


ସତୀଅରୁ ବାଚ୍



The New Testament in the Desiya language of India: ସତୀଅରୁ  
ବାଚ୍ (Bible)

**ସତ୍ତ୍ୱ ବାବ୍**  
**The New Testament in the Desiya language of India:**  
**ସତ୍ତ୍ୱ ବାବ୍ (Bible)**

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

**ସତ୍ତ୍ୱ ବାବ୍**  
**ଦ୍ୱିତୀୟା ନିୟମ, 2020**

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde

## Contents

|              |     |
|--------------|-----|
| ମାତିଉ        | 1   |
| ମାରକ         | 70  |
| ଲୁକ          | 116 |
| ଜଅନ          | 189 |
| ଫେରିତ୍       | 242 |
| ରମିଅ         | 306 |
| ୧ମ କରନତିୟ    | 336 |
| ୨ୟ କରନତିୟ    | 365 |
| ଗାଲାତିୟ      | 386 |
| ଏପିସିୟ       | 398 |
| ପିଲିପିୟ      | 409 |
| କଲସିଅ        | 418 |
| ୧ମ ଡେସଲନିକିୟ | 426 |
| ୨ୟ ଡେସଲନିକିୟ | 433 |
| ୧ମ ତିମତି     | 437 |
| ୨ୟ ତିମତି     | 447 |
| ତିତସ୍        | 454 |
| ପିଲିମନ       | 459 |
| ଏବ୍ରି        | 462 |
| ଜାକୁବ        | 486 |
| ୧ ମ ପିତର     | 494 |
| ୨ ଯ ପିତର     | 503 |
| ୧ ମ ଜଅନ      | 509 |
| ୨ ଯ ଜଅନ      | 518 |
| ୩ ଯ ଜଅନ      | 520 |
| ଜିଉଦା        | 522 |
| ପରକାସିତ      | 525 |

**ଯୀଶୁ ଖ୍ରୀଷ୍ଟଙ୍କ ବିଷୟରେ ମାଥୁତ ଲେଖୁଥିବା  
ସୁସମାଚାର  
ଜିସୁକିରିସ୍ଟ ବିସଇ ନେଇକରି ମାଡ଼ିତ  
ଲେକିରଇବା ନିମାନ୍ କବର୍  
ଏ ବଇ ବିସଇ ଜାନ୍‌ବାଟା**

ମସିଅକେ ରାଇଜ୍ ସାସନ୍ କର୍ବା ରାଜା ଆଇସି ବଲି ବିସ୍‌ବାସ୍ କର୍ତ୍ତେରଇଲାଇ । ମାଡ଼ିତ ସେମନ୍ ବିସ୍‌ବାସ୍ କରିରଇବାଟା ବାଦ୍‌ଲାଇ ଦେଲା । ପର୍ମେସରର୍ ରାଇଜ୍ ଅଇଲାନି ଆଡ଼ମାର୍ ରାଇଜ୍, ଏ ଜଗତର୍ ରାଇଜ୍ ନର୍ସି ବଲି ସେଟା ଗୁରୁତୁସଙ୍ଗ୍ ସିକାଇତେରଇଲା ।

ମାଡ଼ିତ ଲେକଲା ସୁବକବର୍ ନୁଆ ନିଅମର୍ ପର୍ତୁମର୍ ବଇ ଇସାବେ ମିସାଇଲେ ନିକ । କାଇକେ ବଇଲେ ପୁର୍ନା ନିୟମର୍ ବାକିଅମନ୍ ଅଦିକ୍ ମିସି କରି ଆଟେ । ଏ ବଇ ପୁର୍ନା ନିୟମକେ ଆରି ନୁଆ ନିୟମକେ ମିସାଇସି । ପଣ୍ଡିତମନ୍ ମିସା କଇବାଇ ମାଡ଼ିତ ତାର୍ ଲେକାଟାନ୍ ମସାର୍ ନିୟମ୍ ବଇମନର୍ ପାରା କର୍ବାକେ ଚେସ୍‌ଟା କରିଆଟେ । ଜିସୁ ତଙ୍ଗର୍ ଉପ୍ରେ ସିକିଆ ଦେବା ବିସଇ ମାଡ଼ିତ ୫:୭ ପର୍ମେସର୍ ମସାର୍ ନିୟମ୍ ଦେବା ବିସଇ ସଙ୍ଗ୍ ମିସା ତୁଲ୍‌ନା କରିଅଇସି ୨ୟ ବିବରଣି ୧୯:୩;୨୩-୩୩

**ଏ ବଇବିତ୍‌ରେ ରଇଲାଟା**

- ୧. ଜିସୁର୍ ଜନମ୍ ଆରି ତାର୍ ସେବାକାମ୍ । ୧-୪
- ୨. ଜିସୁର୍ ସେବାକାମ୍ ଆରି ସିକିଆ । ୫-୨୫
- ୩. ଜିସୁ କିରିସ୍ଟର୍ ମରନ୍ ଆରି ମରିକରି ଉଟ୍‌ବାଟା । ୨୬-୨୮

ଜିସୁର୍ ଆନିଦାଦିମନର୍ ନାଉଁ ତାଲିକା  
(ଲୁକ୍ ୩:୨୩-୩୮)

୧ ଏଟା ଅଇଲାନି ଜିସୁକିରିସ୍ଟର୍ ଆନିଦାଦିମନର୍ ନାଉଁ ତାଲିକା । ସେ ଦାଉଦ୍ ବସ୍‌ର୍ ରଇଲା ଆରି ଦାଉଦ୍ ଅବ୍ରାଆମ୍ ବସ୍‌ର୍ ରଇଲା ।

୨ ଅବ୍ରାଆମର୍ ପଅ ଇସାକ୍, ଇସାକର୍ ପଅ ଜାକୁବ୍, ଜାକୁବର୍ ପଅ ଜିଉଦା ଆରି ତାର୍ ବାଇମନ୍ । ୩ ଜିଉଦା ପେରସ୍ ଆରି ଜେରଅର୍ ବାବା ରଇଲା, ତାକର୍ ମାଆ ଅଇଲାନି ତାମର୍ । ପେରସ୍‌ର୍ ପଅ ଏସ୍‌ରନ୍ । ୪ ଏସ୍‌ରନ୍‌ର୍ ପଅ ଆରାମ୍, ଆରାମର୍ ପଅ ଅମିନାଦବ୍ ଅମିନାଦବର୍ ପଅ ନଅସନ୍, ନଅସନ୍‌ର୍ ପିଲା ସଲ୍‌ମନ୍ ୫ ସଲ୍‌ମନ୍‌ର୍ ପଅର୍ ନାଉଁ ବୟଜ୍, ବୟଜର୍ ମାଆ ରାଅବ୍ । ବୟଜର୍ ପଅର୍ ନାଉଁ ଅବେଦ୍ ଆରି ଅବେଦର୍ ମାଆର୍ ନାଉଁ ରୁଡ୍ । ଅବେଦର୍ ପଅ ଜସୟ,

୬ ଦାଉଦ୍ ରାଜାର୍ ସାସନ୍ ବେଲେ ଅନି ଜେଡେବଲ୍ ଇସ୍ରାଏଲ୍ ଲକ୍‌ମନ୍‌କେ ବାବିଲନ୍ ଦେସେ ବାସି ନେଇରଇଲା ଜାକ ସେଡ୍‌କି ଆନିଦାଦିମନର୍ ତାଲିକା ଆଟେ । ଜସୟର୍ ପଅ ଦାଉଦ୍ ରାଜା । ଉରିୟର୍ ମାଇଜିର୍ ପେଟେ ଅନି ସଲ୍‌ମନ୍‌କେ ଜନମ୍ ଦେଲା, ୭ ସଲ୍‌ମନ୍‌ର୍ ପଅ ରିଅବିୟାମ୍ ରିଅବିୟାମର୍ ପଅ ଅବିୟ । ୮ ଅବିୟର୍ ପଅ ଆସା, ଆସାର୍ ପଅ ଜିଅସାପର୍, ଜିଅସାପର୍ ପଅ ଜରାମ୍, ଜରାମର୍ ପଅ ଉଜିୟ । ୯ ଉଜିୟର୍ ପଅ ଜତାମ୍, ଜତାମର୍ ପଅ ଆଅସ୍, ଆଅସର୍ ପଅ ଇଜକିୟ । ୧୦ ଇଜକିୟର୍ ପଅ ମନସେଅ, ମନସେଅର୍ ପଅ ଆମନ୍, ଆମନ୍‌ର୍ ପଅ ଜସିୟ

। ୧୧ ଜସିୟ ବାବିଲନ୍ ନଅରେ ବାସା ଅଇରଇଲା ବେଲେ, ଜିକନିୟ ଆରି ତାର ବାଇମନ୍ ଜନମ୍ ଅଇଲା ।

୧୨ ବାବିଲନେ ବନ୍ଦିଅଇ ସାରଲା ପରେଅନି ଜିସୁର୍ ଜନମ୍ ଜାକ ଏଡ଼କି ଆନିଦାଦିମନର୍ ତାଲିକା ଆଚେ । ଜିକନିୟ ବାବିଲନେ ବାସାଅଇରଇଲା ବେଲେ, ସଲୁଟିଏଲ୍ ଜନମ୍ ଅଇଲା, ସଲୁଟିଏଲର୍ ପଅ ଜିରୁବାବେଲ୍, ୧୩ ଜିରୁବାବେଲର୍ ପଅ ଅବିଉଦ୍, ଅବିଉଦର୍ ପଅ ଏଲିୟାକିମ୍, ଏଲିୟାକିମର୍ ପଅ ଅଜୁର୍ । ୧୪ ଅଜୁର୍ ପଅ ସାଦକ୍, ସାଦକର୍ ପଅ ଆକିମ୍, ଜାକିନର୍ ପଅ ଏଲିଉଦ୍, ଏଲିଉଦର୍ ପଅ ଏଲାଜାର୍, ଏଲାଜାର୍ ପଅ ମଡ଼ତାନ । ୧୫ ମଡ଼ତାନର୍ ପଅ ଜାକୁବ୍, ଜାକୁବର୍ ପଅ ଜସେପ୍ । ୧୬ ଏ ଜସେପ୍ ମରିୟମ୍‌କେ ବିବା ଅଇରଇଲା । ମରିୟମ୍‌ର୍ ପେଟେଅନି ଜିସୁ ଜନମ୍ ଅଇରଇଲା । ଜିସୁ କିରିସ୍‌ଟକେ ମସିଅ ବଲି ମିସା ନାଉଁ ଆଚେ ।

୧୭ ଏନ୍ତାରି ଅବରାଆମର୍‌ତେଇ ଅନି ଦାଉଦ୍ ରାଜାର୍ ଜାକ ଚଉଦ ଉତାର୍, ଦାଉଦ୍‌ତେଇ ଅନି ବାବିଲନ୍ ବନ୍ଦିରଇଲା ଜାକ ଚଉଦ ଉତାର୍, ଆରି ବାବିଲନେ ବନ୍ଦିଅଇରଇଲା ବେଲେଅନି ଜିସୁକିରିସ୍‌ଟର୍ ଜନମ୍ ଜାକ ଚଉଦ ଉତାର୍ ।

ଜିସୁର୍ ଜନମ୍ ବିସଇ  
(ଲୁକ୍ ୨:୧-୭)

୧୮ ଏଟା ଅଇଲାନି ଜିସୁ କିରିସ୍‌ଟର୍ ଜନମ୍ ବିସଇ । ଜିସୁର୍ ମା ମରିୟମ୍‌ର୍ ସଙ୍ଗ୍ ଜସେପ୍ ନାଉଁର୍ ଗଟେକ୍ ଦାଙ୍ଗ୍‌ଡାର୍ ପାଇ ବିବା ମାଙ୍ଗ୍‌ନି ଅଇରଇଲା । ମାତର୍ ସେମନର୍ ବିବା ନ ଅଇତେ ସୁକଲ୍ ଆଡ଼ମାଇ ଅନି ଗାଗ୍‌ତେ ଅଇରଇବାଟା ମରିୟମ୍ ଜାନିପାରଲା । ୧୯ ଜସେପ୍ ଗଟେକ୍ ଦରମ୍ ଲକ୍ ରଇଲା ଆରି ସବୁବେଲେ ସଡ଼ କାମ୍ କର୍‌ତେରଇଲା । ଆରି ମରିୟମ୍‌କେ ଲକ୍‌ମନର୍ ଟାନେ ନିନ୍ଦା କାତା ସୁନାଇବାକେ ମନ୍ ନ କର୍‌ତେ ରଇଲା । ସେଟାର୍‌ପାଇ କେ ନାଜାନ୍‌ତେ ତାର୍ ବିବା ମାଙ୍ଗ୍‌ନି ପିଟାଇଦେବାକେ ଉପାଇ ପାଁଟେ ରଇଲା । ୨୦ ସେ ଏନ୍ତି ଉପାଇ ପାଁଟଲା ବେଲେ, ଜସେପ୍‌କେ ଗଟେକ୍ ପର୍‌ମେସରର୍ ଦୁଡ଼ ସପ୍‌ନେ ଦେକାଇ ଅଇ କଇଲା, ଏ ଦାଉଦ୍‌ ନାଡ଼ିର୍ ତିତି ଜସେପ୍, ଡରନାଇ । ମରିୟମ୍‌କେ ମାଇଜି କିରି ସଙ୍ଗ୍‌ଅ । କାଇକେବଇଲେ ସୁକଲ୍ ଆଡ଼ମାଇ ଅନି ସେ ଗାଗ୍‌ତେ ଅଇଲାଆଚେ ।

୨୧ ଡାର୍‌ଟାନେଅନି ଗଟେକ୍ ପିଲା ଜନମ୍ ଅଇସି, ତମେ ତାକେ ଜିସୁ ବଲି ନାଉଁ ଦିଆସ୍, କାଇକେବଇଲେ ସେ ତାର୍ ଲକ୍‌ମନ୍‌କେ ସେମନର୍ ପାପେଅନି ଉଦାର୍ କର୍‌ସି ।

୨୨ ଆଇବା ଦିନ୍‌ମନ୍‌କେ କାଇଟା ଅଇସି ବଲି, ପର୍‌ମେସର୍ ଗଟେକ୍ ବବିସ୍‌ଡ଼ବକ୍‌ତାକେ ପାଟାଇ ଜନ୍ କାତା ସୁନାଇରଇଲା, ସେଟା ପୁରାପୁରୁନ୍ ଅଇବାକେ ଏ ସବୁ ଅଇଲା । ୨୩ ଗଟେକ୍ ଦାଙ୍ଗ୍‌ଡି ଗାଗ୍‌ତେ ଅଇ ପିଲା ଜନମ୍ କର୍‌ସି, ଆରି ସେ ପିଲା ଲକ୍‌ମନର୍ ଟାନେ ଇମାନ୍‌ସୁଏଲ୍ ବଲି ନାମାଇ ଅଇସି, ଏ ନାଉଁର୍ ଅରଡ଼ ଅଇଲାନି, ପର୍‌ମେସର୍ ଆମର୍ ସଙ୍ଗ୍ ଆଚେ ।

୨୪ ଜସେପ୍ ସଇଲା ଟାନେଅନି ଉଟି, ପର୍‌ମେସରର୍ ଦୁଡ଼ ଜେନ୍ତି କଇରଇଲା, ସେନ୍ତି କଲା । ମରିୟମ୍‌କେ ବିବା ଅଇଲା । ୨୫ ମାତର୍ ସେ ପିଲା ଜନମ୍ ନ ଅଇବା ଜାକ ମରିୟମ୍ ସଙ୍ଗ୍ ସୁଆବସା କରେନାଇ । ଜସେପ୍ ସେ ପିଲାକେ ଜିସୁ ବଲି ନାଉଁ ଦେଲା ।

9

ପୁରୁବ୍ ଦେସର୍ ପଣ୍ଡିତ୍‌ମନ୍ ଆଇବାଟା

\* ୧:୧୮ ୧:୧୮ ଲୁକ୍ ୧:୨୭ \* ୧:୨୧ ୧:୨୧ ଲୁକ୍ ୧:୩୧ \* ୧:୨୫ ୧:୨୫ ଲୁକ୍ ୨:୨୧

୧ ଏରଦ୍ ରାଜାର ସାସନ ବେଲେ, ଜିଉଦା ରାଇଜର୍ ବେଡ଼ଲିଇମେ ଜିସୁ ଜନମ୍ ଅଇଲା । ଜନମ୍ ଅଇ ଚନେକ୍ ଜିବାକେ ପୁରୁବ୍ ଦେସର୍ କେତେଟା ତାରାର ବିସଇ ପଡ଼ତେ ରଇବା ପଣ୍ଡିତ୍‌ମନ୍ ଜିରୁସାଲାମେ ଆସି ପାଟାରୁଲାଇ, ୨ “ଜନ୍ ପିଲା ଜିଉଦିମନର୍ ରାଜା ଅଇବାକେ ଜନମ୍ ଅଇଲାଆଚେ, ସେ କନ୍ତି ଆଚେ ? କାଇକେବଇଲେ ଆମେ ପୁରୁବ୍ ଦେସେ ତାର ତାରା ଦେକି ତାକେ ପୁଜା କରବାର୍ ଆସିଆଚୁ ।”

୩ ପଣ୍ଡିତ୍‌ମନର୍ କାତା ସୁନି ଏରଦ୍ ରାଜା ଆରି ତାର୍ ସଙ୍ଗ୍ ରଇବା ଜିରୁସାଲାମର୍ ଲକ୍‌ମନ୍ ସବୁ କିଲ୍‌ବିଲ୍ ଅଇଗାଲାଇ । ୪ ଆରି ଏରଦ୍ ସବୁ ମୁକିଅ ପୁଜାରିମନ୍‌କେ ଆରି ସାସତର୍ ସିକାଉମନ୍‌କେ ତାକାଇ କରି, “ମସିଅ ଜେ କି କିରିସର୍ କନ୍ ଜାଗାଇ ଜନମ୍ ଅଇଆଚେ ?” ସେଟା ସେମନର୍‌ତେଇ ଅନି ବୁଜିବାକେ ଚେସଟା କଲା ।

୫ ପଣ୍ଡିତ୍‌ମନ୍ ଏରଦ୍ ରାଜାକେ କଇଲାଇ, ଜିଉଦା ରାଇଜର୍ ବେଡ଼ଲିଇମ୍ ଗତେ, ଜନ୍‌ଟାକି ଗଟେକ୍ ବବିସଡ଼ବକ୍‌ତା ଏନ୍ତାରି ଲେକିଆଚେ । ୬ ଏ ଜିଉଦା ଦେସର୍ ବେଡ଼ଲିଇମ୍,

ତୁଇ ଜିଉଦା ରାଇଜର୍ ମୁକିଅ ଗଡ଼ମନର୍‌ତେଇ ଅନି ସାନ୍ ନଉଁସ୍,

କାଇକେବଇଲେ ମର୍ ଇସ୍ରାଏଲର୍ ଲକ୍‌ମନ୍‌କେ ବାଟ୍ ଦେକାଇସି,

ଏନ୍ତାରି ଗଟେକ୍ ସାସନକାରିଆ ତର୍‌ତେଇଅନି ଉବଜ୍‌ସି ।

୭ ଏଟା ସୁନି କରି ଏରଦ୍ ରାଜା ସେ ପଣ୍ଡିତ୍‌ମନ୍‌କେ ଲୁଟ୍‌ତେ ତାକାଇ, ତାରା କନ୍ ବେଲାଇ ଉଦିରଇଲା, ସେମନର୍‌ତେଇ ଅନି ଟିକ୍ ସଙ୍ଗ୍ ବୁଜିନେଲା । « ତାର୍‌ପତେ ସେମନ୍‌କେ କଇ ପାଟାଇଲା, “ତମେ ଜାଆ ଆରି ବେଡ଼ଲିଇମେ ସେ ପିଲାକେ ନିମାନ୍ କରି କଜିଦେକା, ଆରି ପିଲା ମିଲ୍‌ଲେସରି ମକେ ଜାନାଆ ମୁଇ ମିସା ଜାଇ ତାକେ ଦରସନ୍ କରବି ।”

୮ ପଣ୍ଡିତ୍‌ମନ୍ ରାଜାର କାତା ସୁନି ସେ ଜାଗାଇଅନି ବାରିଗାଲାଇ । ଗାଲାବେଲେ ଏଦେ ଦେକା ! ସେମନ୍ ପୁରୁବ୍ ଦେସେ ଜନ୍ ତାରା ଦେକି ରଇଲାଇ, ସେ ତାରା ଆରି ତରେକ୍ ଡିସଲା । ୯ ସେମନ୍ ତାରା ଦେକି ବେସି ସାର୍‌ଦା ଅଇଗାଲାଇ । ତାରା ସେମନର୍ ଆଗେ ଜାଇକରି ଜିସୁ ରଇଲା ଜାଗାର୍ ଉପରେ ଅବ୍‌କିଗାଲା । ୧୦ ପଣ୍ଡିତ୍‌ମନ୍ ସେ ଗର୍ ବିଡ଼ରେ ପୁରି ପିଲାକେ ତାର୍ ମା ମରିୟ୍‌ସ୍ ସଙ୍ଗ୍ ରଇଲାଟା ଦେକି, ତାକେ ମାଣ୍ଡିକୁଟା ଦେଇ ଜୁଆର୍ କଲାଇ, ଆରି ଆନିରଇବା ସୁନା, କୁହୁରୁ ଆରି ଗନ୍‌ରସ୍ ବେଟି, ପିଲାକେ ଦେଲାଇ ।

୧୧ ପତେ ସେମନ୍ ଏରଦର୍ ଲଗେ ଆରିତରେକ୍ ନ ଜାଇକରି ବିନ୍ ବାଟେ ନିଜର୍ ଦେସେ ବାଉଡ଼ି ଗାଲାଇ । କାଇକେବଇଲେ ଏରଦର୍ ଟାନେ ଆରିତରେକ୍ ବାଉଡ଼ି ନ ଜିବାକେ ପର୍‌ମେସର୍ ସେମନ୍‌କେ ସପ୍‌ନେ ଆଦେସ୍ ଦେଇରଇଲା ।

ମିସର୍ ଦେସେ ଜିବାଟା

୧୨ ପଣ୍ଡିତ୍‌ମନ୍ ଗାଲାପତେ, ପର୍‌ମେସରର୍ ଗଟେକ୍ ଦୁଡ଼ ଜସେପ୍‌କେ ସପ୍‌ନେ ଦରସନ୍ ଦେଇ କଇଲା, “ଉର୍, ପିଲାକେ ଆରି ତାକର୍ ଆୟାକେ ଦାରି ମିସର୍ ଦେସେ ଦାପ୍‌ରେ ଉଟିଜା । ଏରଦ୍ ପିଲାକେ ମରାଇବାକେ କଜିବୁଲ୍‌ସି । ମୁଇ ସେ ଜାଗା ଚାତା ବଲି ନ କଇବା ଜାକ ତେଇସେ ରୁଆ ।”

୧୩ ଏ କାତା ସୁନି ଜସେପ୍ ସେ ରାତି, ପିଲାକେ ଆରି ତାର୍ ମାକେ ଦାରି ମିସର୍ ଦେସେ ଉଟିଗାଲା । ୧୪ ଏରଦ୍ ରାଜା ମର୍‌ବା ଜାକ ମିସର୍ ଦେସେସେ ରଇଲାଇ, ଜେନ୍ତାର୍ କି ବବିସଡ଼ବକ୍‌ତା କଇରଇଲା ମାପୁରୁର୍ ବାକିଅ ସିଦ୍ ଅଇଲା, ମର୍ ପିଲାକେ ମୁଇ ମିସର୍ ଦେସେଅନି ତାକି ଆନିଲି ।

ପିଲାମନ୍‌କେ ମରାଇବାଟା

୧୭ ପୁରୁଷ ଦେସେଅନି ଆସିରଇଲା ପଣ୍ଡିତମନ୍ ତାକେ ନାଡ଼ାଇ କରି ଉଚିଗାଲାଇ ଆଚତ୍ ବଲି ଜାନି, ଏରଦ୍ ବେସି ରିସା ଅଇଗାଲା । ବେଡ଼ଲିଇମ୍ ଆରି ସେ ଲଗେ ପାକେ ରଇବା ଦୁଇ ବରସ୍ ଅନି ତଲେ ରଇଲା ସବୁ ପିଲାମନ୍‌କେ ମରାଇବାକେ ଆଦେସ୍ ଦେଲା । ପଣ୍ଡିତମନ୍‌ର ଗାନେଅନି ତାରା ଡିସ୍‌ତେ ରଇବା ବେଲା ସେ ଜାନିରଇଲା । ସେ ଇସାବେ ପିଲାମନ୍‌ର ବରସ୍ ଟିକ୍ କରିରଇଲା ।

୧୭ ଏନ୍ତି ଅଇଲାଜେ ଜିରିମିୟା ବବିସଡ଼ବକ୍ତା କଇଲା ଏ ବାକିଅ ପୁରାପୁରୁନ୍ ଅଇଲା । ସେ ଏନ୍ତି କଇରଇଲା,

୧୮ ରାମା ନାଉଁର୍ ସଅରେ

ମାର୍‌ଚପ୍ ଅଇ କାନ୍‌ବାଟା ସୁନି ଅଇଲାନି,

ରାଏଲ୍ ତାର୍ ପିଲାମନ୍‌ର ପାଇ କାନ୍‌ଲାନି ।

ତାକେ ଜେଡେକ୍ ବୁଜାଇଲେ ମିସା ବୁଜେନାଇ ।

କାଇକେବଇଲେ ତାର୍ ପିଲାମନ୍ ସବୁ ମରିଜାଇରଇଲାଇ ।

ମିସର୍ ଦେସେଅନି ବାଅଡ଼ବାଟା

୧୯ ଏରଦ୍ ମଲାପଟେ, ଏଦେ ଦେକା ! ମାପୁରୁର୍ ଗଟେକ୍ ଦୁଡ଼ ମିସର୍ ଦେସେ ଜସେପ୍‌କେ ଦର୍‌ସନ୍ ଦେଇ କଇଲା, ୨୦ “ଉର୍ ଆରି ବାରଇକରି, ଦୁଇ ମାଆ ପିଲାକେ ଇସ୍ରାଏଲ୍ ଦେସେ ଦାରିଜା । କାଇକେବଇଲେ ଜନ୍ ଲକ୍‌ମନ୍ କି ପିଲାର୍ ଜିବନ୍ ନେବାକେ ଚେସଟା କର୍‌ଡେରଇଲାଇ, ସେମନ୍ ମରିଗାଲାଇ ଆଚତ୍ ।” ୨୧ ଜସେପ୍ ଏ କାତା ସୁନି ଜିସୁ ଆରି ତାର୍ ମାଆ ମରିୟ୍‌ମ୍ ସଙ୍ଗ୍ ବାରଇକରି ଇସ୍ରାଏଲ୍ ଦେସେ ବାଉଡ଼ି ଆଇଲାଇ ।

୨୨ ମାତର୍ ଜସେପ୍, ଏରଦର୍ ପଟେ ତାର୍ ପଅ ଆର୍କିଲାୟ୍ ଜିଉଦା ରାଇଜର୍ ରାଜା ଅଇଆଚେ ବଲି ସୁନିକରି ତେଇ ଜିବାକେ ଡରଲା । ୨୩ \*ମାତର୍ ଆରିଗଟେକ୍ ବିନ୍ ସପନ୍ ଇସାବେ ଗାଲିଲି ଦେସେ ଜାଇକରି ନାଜରିତ୍ ନାଉଁର୍ ଗଡେ ବାସା ଅଇ ରଇଲା । ଜେନ୍ତାର୍ କି ବବିସଡ଼ବକ୍ତା କଇଲା ଏ ବାକିଅ ସିଦ୍ ଅଇଲା । ସେ ଏନ୍ତି ବଲି କଇରଇଲା, “ସେ ନାଜରିତ୍‌ୟା ବଲି ଡାକ୍‌ପୁଟା ଅଇସି ।”

## ୩

ତୁବନ୍ ଦେଉ ଜଅନର୍ ବିସଇ

(ମାର୍‌କ ୧:୧-୮; ଲୁକ୍ ୩:୧-୧୮; ଜଅନ୍ ୧:୧୯-୨୮)

୧ ସେବେଲେ ତୁବନ୍ ଦେଉ ଜଅନ୍ ଜିଉଦା ରାଇଜର୍ ମରୁବାଲି ବୁର୍‌ଆସି ଜାନାଇବାର୍ ଦାରଲା । ୨ \*ସେ ଏନ୍ତି ବଲି କଇଡେରଇଲା, “ପାପ୍‌ଗାନେଅନି ବାଉଡ଼ା, କାଇକେବଇଲେ ସରଗ୍ ରାଇଜ୍ ଲଗେ କେଟ୍‌ଲାନି ।” ୩ ଜିସାୟ୍‌ୟା ବବିସଡ଼ବକ୍ତା ଜନ୍ ଲକ୍‌ର ବିସଇନେଇ ଏ ବାକିଅ କଇରଇଲା, ଜଅନ ସେ, ସେ ଲକ୍ ।

ମରୁବାଲି ବୁର୍‌ ଗଟେକ୍ ଲକ୍ ଆକ୍‌ମାରି କଇଲାନି,

“ମାପୁରୁର୍ ବାଟ୍ ଡିଆର୍ କରା,

ସେ ଆଇବାକେ ଗଟେକ୍ ସଲକ୍ ବାଟ୍ କରା ।”

୪ ଜଅନ୍ ପିନ୍‌ବାଟା ଉର୍ ଚାମ୍ ସଙ୍ଗ୍ ଡିଆର୍ ଅଇ ରଇଲା । ଆରି ଚାମର୍ ଆଁଗାବେଡା ବାନ୍‌ଅଇଡେ ରଇଲା । ସେ ଚିଟ୍‌କା ଆରି ବନେ ରଇବା ମୁଡ କାଇଡେରଇଲା ।

୫ ସେ ବେଲେ ଜିରୁସାଲମ୍ ଅନି ଗୁଲାଇ ଜିଉଦା ଦେସ୍ ଆରି ଜର୍‌ଦନର୍ ପାକର୍ ସବୁଗାନର୍ ଲକ୍‌ମନ୍ ବାରଇ ଜଅନର୍ ଲଗେ ଆଇଡେରଇଲାଇ । ୬ ଆରି ନିଜର୍

\* ୨:୨୩ ୨:୨୩ ମାର୍‌କ ୧:୨୪; ଲୁକ୍ ୨:୩୯; ଜଅନ୍ ୧:୪୫      \* ୩:୨ ୩:୨ ମାଡ଼ିଉ ୪:୧୭; ମାର୍‌କ ୧:୧୫

ନିଜର ପାପ କଲାଟା ମାନିଅଇକରି ଜଅନର ଟାନେ ଜାଇ ଜରଦନ୍ ଗାଡେ ହୁବନ୍ ନେଇତେ ରଇଲା ।

<sup>୭</sup> \*ମାତର ପାରୁସି ଆରି ସାବୁକି ମନର ବିତରେ ଅନି ମିସା କେତେକ୍ ଲକ୍ ହୁବନ୍ ନେବାକେ ଆଇବାଟା ଦେକି ଜଅନ୍ ସେମନ୍‌କେ କଇଲା, “ଏ ବେସି ବିସ୍‌ରଇବା ସାଁପର ପାରା ବସ୍‌ର ଲକ୍‌ମନ୍, ପରମେସରର ଟାନେଅନି ଆଇବା ଡଣ୍ଡେତେଇ ଅନି ପାଲାଇବାକେ ତମ୍‌କେ କେ ଚେଡ଼ନା ଦେଲା ? ” ଚେବର ପାଇ, ଜଦି ପାପ କାମ୍ କରବାଟା ଚାଡ଼ିଆଗାସ୍, ସେନ୍ତାରୁଆଲେ ନିକ କାମ୍ କରି ଦେକାଆ । <sup>୯</sup> \*ଅବ୍ରାଆମ୍ ଆମର ପୁରବର ଆନିଦାଦି ବଲି କଇଲେ ତମ୍‌କେ ପରମେସର ଦେବା ଡଣ୍ଡ ନ ମିଲେ ବଲି ବାବା ନାଇ । ମୁଇ ତମ୍‌କେ କଇଲିନି, ପରମେସର ପାକ୍‌ନାଡେଇ ଅବ୍ରାଆମର ବସ୍ ଡିଆର କରସି । <sup>୧୦</sup> \*ଆରି ଏବେ ମିସା ଗର୍‌ମନର ବୁନ୍ଦେ ଟେଜିଆ ଲାଗିଆଡେ । ଜନ୍ ଗର୍ ନିକ ପଲ୍ ନ ପଲେ, ସେଟା କାଟିକରି ଜଇଟାନେ ପିଙ୍ଗା ଅଇସି । <sup>୧୧</sup> ମୁଇ ସିନା ତମ୍‌କେ ପାପେଅନି ମନ୍ ବଦଲାଇଲାଟା ଦେକାଇଅଇବାକେ ବଲି ପାନିଡେଇ ହୁବନ୍ ଦେଲିନି, ମାତର ମର ପରେ ଜେ ଆଇଲାନି, ସେ ମରଡେଇ ଅନି ଅଦିକ୍ ବପୁଟା । ତାର ପାଦର ପାଣ୍ଡୁଇ ମିସା ଦାରି ନେବାର ମର ଅଦିକାର ନାଇ, ସେ ତମ୍‌କେ ସୁକଲ୍‌ଆଡ଼ମାଇ ଆରି ଜଇଟାନେ ହୁବନ୍ ଦେଇସି । <sup>୧୨</sup> ଉଡାଲି କରି ପର୍ ବେଗଲାଇ ନିକଟାକେ ସଙ୍ଗାଇବାକେ ତାର ଆଡେ କୁଲା ଆଡେ । ନିକଟା ତାର କଲ୍‌କିଡେଇ ସଙ୍ଗାଇସି ଆରି ବେଗଲ୍‌ଲା ପର୍ ସବୁଦିନେ ଲାଗଡେରଇବା ଜଇଟାନେ ପିଙ୍ଗିଦେଇସି ।”

ଜିସୁର ହୁବନ୍

(ମାର୍‌କ ୧:୧୨-୧୩; ଲୁକ୍ ୪:୧-୧୩)

<sup>୧୩</sup> ସେଡ଼କିବେଲେ ଜିସୁ ଜଅନର ଲଗେ ହୁବନ୍ ନେବାକେ ଗାଲିଲି ଅନି ଜରଦନ୍ ଗାଡେ ଆଇଲା, <sup>୧୪</sup> ମାତର ଜଅନ୍ ଜିସୁକେ ମନାକରି କଇଲା, “ମୁଇ ସିନା ତମ୍‌କେ ଲଗେ ହୁବନ୍ ନେବାର ଆଡେ, ମାତର ତମେ ମରଲଗେ ଆଇଲାସିନି ?”

<sup>୧୫</sup> ମାତର ଜିସୁ ତାକେ କଇଲା, “ମର କାତାଇ ରାଜି ଅଇ ଜା । କାଇକେବଇଲେ ଏଟାର ଲାଗି ଆମେ ପରମେସର ମନ୍ କରିରଇବା କାମ୍ କରିଅଇସି ।” ସେଟାରପାଇ ଜଅନ୍ ତାକେ ହୁବନ୍ ଦେବାକେ ରାଜି ଅଇଲା ।

<sup>୧୬</sup> ଜିସୁ ହୁବନ୍ ନେବାକେ ପାନି ବିତରେ ବୁଡ଼ି ବାରଇଲା ଦାପରେ ଏଦେ ଦେକା ! ସରଗ୍ ଉଗାଡି ଅଇ ରଇଲାଟା ଦେକ୍‌ଲା । ଆରି ପରମେସରର ଆଡ଼ମା ପରୁଆ ପାରା ଅଇ ଜିସୁର ଉପରେ ଉଡ଼ରଲା । <sup>୧୭</sup> \*ଆରି ଦେକା ଆକାସେ ଅନି ଏଡ଼ି କାତା ଆଇଲା “ଏ ମର ଆଲାଦର ପିଲା, ତରଟାନେ ମୁଇ ବେସି ସାରଦା ।”

## ୪

ସଇତାନ୍ ଜିସୁକେ ପରିକା କରବାଟା

(ମାର୍‌କ ୧:୧୨-୧୩; ଲୁକ୍ ୪:୧-୧୩)

<sup>୧</sup> \*ତାରପରେ ସୁକଲ୍‌ଆଡ଼ମା ଜିସୁକେ ମରୁବାଲି ବୁର୍ସି ଡାକିନେଲା । ତେଇ ସଇତାନ୍ ତାକେ ପରିକା କଲା । <sup>୨</sup> ଜିସୁ ଚାଲିସ୍ ଦିନ୍ ଚାଲିସ୍ ରାତି ଉପାସ୍ ରଇକରି ବିତାଇଲା ପରେ, ତାକେ ବେସି ବୁକ୍ କଲା । <sup>୩</sup> ସେଡ଼କିବେଲେ ସଇତାନ୍ ତାର ଲଗେ ଆସି କଇଲା “ତୁଇ ଜଦି ପରମେସରର ପଅ, ତେବେ ଏ ପାକ୍‌ନାମନ୍ ‘ବୁଡ଼ି ଅଇଜା’ ବଲି ଆଦେସ୍ ଦେସ୍ ।”



୪ ମାଡ଼ିତ ଜିସୁ କଇଲା, “ସାସ୍ତରେ ଲେକାଆତେ ମୁନୁସ୍ ଅବକା ରୁଟି କାଇକରି ନ ବଢ଼େ, ମାଡ଼ିତ ପର୍ମେସରର୍ ଟଣ୍ଡେ ଅନି ବାରଇବା ସବୁ ବାକିଅ ଟାନେ ବଢ଼ସି ।”<sup>୫</sup> ତେଇଅନି ସଇତାନ୍ ଜିସୁକେ ସୁକଲ୍ ଗଡ଼ ଜିରୁସାଲାମ୍ ଡାକିନେଲା । ତେଇ ତାକେ ମନ୍ଦିର ଚିପେ ଚିଆ କରାଇ କଇଲା,<sup>୬</sup> “ତୁଇ ଜଦି ପର୍ମେସରର୍ ପଅ, ତେବେ ଇତିଅନି ତଲେ ତେଗଇ ଦେସ୍, ସାସ୍ତରେ ଲେକା ଆତେ,

“ପର୍ମେସର୍ ତାର୍ ଦୁଡ଼ମନ୍‌କେ ତର୍ ବିସଇନେଇ ଆଦେସ୍ ଦେଇସି,

ଆରି ସେମନ୍ ତକେ ଆତେ ଦାରି ଟେକ୍‌ବାଇ ।  
ତେବେ ତର୍ ଗଡ଼େ ପାକ୍‌ନା ନ ପାଏ ।”

<sup>୭</sup> ଜିସୁ ସଇତାନ୍‌କେ କଇଲା, “ପର୍ମେସରର୍ ସାସ୍ତରେ ଏନ୍ତି ଲେକାଆତେ, ତୁଇ ତର୍ ମାପୁର୍ ପର୍ମେସର୍‌କେ ପରିକା କର୍‌ନାଇ ।”

୮ ତାର୍ ପତେ ସଇତାନ୍ ଜିସୁକେ ବେସି ଉର୍ ରଇବା ଗଟେକ୍ ଡଙ୍ଗର୍ ଚିପେ ଡାକି ଦାରିଗାଲା । ଆରି ଦୁନିଆର୍ ସବୁ ରାଇଜର୍ ଦନ୍ ସପତି ଦେକାଇ କଇଲା,  
୯ “ତୁଇ ଜଦି ମକେ ମାଣ୍ଡିକୁଟା ଦେଇ ଜୁଆର୍ କର୍‌ସୁ ବଇଲେ ମୁଇ ଏ ସବୁ ତକେ ଦେଇପାକାଇସି ।”

<sup>୧୦</sup> ତେଇ ଜିସୁ ତାକେ କଇଲା “ମରଟାନେଅନି ଦୁର୍ ଅ ସଇତାନ୍, ସାସ୍ତରେ ଲେକା ଆତେ, ତୁଇ ପର୍ମେସର୍‌କେ ଜୁଆର୍ କର୍‌ସୁ, ଆରି ତାକେସେ ସେବା କର୍‌ସୁ ।”<sup>୧୧</sup> ତାର୍‌ପତେ ସଇତାନ୍ ଜିସୁକେ ଚାଡ଼ି ବାରିଗାଲା, ଆରି ଏଦେ ଦେକା ! ସରଗର୍ ଦୁଡ଼ମନ୍ ଆସି ଜିସୁକେ ସେବା କର୍‌ବାର୍ ଦାର୍‌ଲାଇ ।

ଜିସୁ ଗାଲିଲି ରାଇଜେ ତାର୍ କାମ୍ ଆରାମ୍ କଲା  
(ମାର୍‌କ ୧:୧୪-୧୫; ଲୁକ୍ ୪:୧୪-୧୫)

<sup>୧୨</sup> \*ତାର୍‌ପତେ ତୁବନ୍ ଦେଉ ଜଅନ୍ ବନ୍ଦି ଅଇଲାଆତେ ବଲି ଜିସୁ ସୁନିକରି ଗାଲିଲି ଉଟି ଗାଲା ।<sup>୧୩</sup> \*ତାର୍ ପତେ, ସେ ନାଜରିତ୍ ଚାଡ଼ି କରି ସବ୍‌ଲୁନର୍ ଆରି ନପ୍‌ତାଲିନ୍ ନାଉର୍ ଜାଗା ଲଗେ ରଇବା ଗାଡ଼ କଣ୍ଡି ରଇଲା, କପରନାଉମେ ଜାଇ ବାସା କଲା ।<sup>୧୪</sup> ଜେନ୍ତାର୍ କି ଜିସାୟ ବବିସଡ଼ବକ୍‌ତାର୍ ଏ କାତା ପୁରୁନ୍ ଅଇଲା । ସେ କଇରଇଲା,

<sup>୧୫</sup> “ଜର୍‌ଦନ୍ ଗାଡ଼ ସେପାଟେ ସମ୍‌ଦୁରେ ଜିବା ବାଟେ  
ରଇଲା ସବ୍‌ଲୁନ୍ ଆରି ନାପ୍‌ତାଲି ନାଉର୍  
ଦୁଇଟା ଦେସ୍, ଅବିସ୍‌ବାସି ମନର୍ ଗାଲିଲି !

<sup>୧୬</sup> ଆନ୍ଦାରେ ରଇବା ଲକ୍‌ମନ୍ ବଡ଼ ଉଜଲର୍ ଦର୍‌ସନ୍ ଦେକ୍‌ବାଇ  
ଆରି ମରନର୍ ଆନ୍ଦାରେ ରଇଲା  
ଲକ୍‌ମନର୍ ଉପରେ ସେ ଉଜଲ୍ ଉଦ୍‌ସି ।”

<sup>୧୭</sup> \*ସେ ବେଲାଇ ଅନି ଜିସୁ କଇବାର୍ ଆରାମ୍ କରି ଜାନାଇବାର୍ ଦାର୍‌ଲା । ପାପ୍ କର୍‌ବାତେଇଅନି ମନ୍ ବଦ୍‌ଲାଆ, ସରଗ୍ ରାଇଜ୍ ଲଗେ କେଟ୍‌ଲା ।

ଜିସୁ ଚାର୍‌ଟା କେଉଟ୍‌ମନ୍‌କେ ଡାକ୍‌ଲା  
(ମାର୍‌କ ୧:୧୬-୨୦; ଲୁକ୍ ୫:୧-୧୧)

<sup>୧୮</sup> ଜିସୁ ଗାଲିଲି ସମ୍‌ଦୁର୍ ପାଲି ରଇବା ଜାଗାମନ୍‌କେ ବୁଲ୍‌ବାବେଲେ ସିମନ୍ ଜାକେ କି ପିତର୍ ବଲି କଇବାଇ, ଆରି ତାର୍ ବାଇ ଆନ୍‌ରିୟ୍, ଏ ଦୁଇ ଲକ୍‌କେ ବେଟ୍ ଅଇଲା । ଏ ଦୁଇ ବାଇ ଗାଡ଼େ ବଇଜାଲ୍ ମାରି ମାଟ୍ ଦାର୍‌ତେରଇଲାଇ ।<sup>୧୯</sup> ଜିସୁ ସେ ଦୁଇ ବାଇକେ ଡାକି କଇଲା, “ମର୍ ସଙ୍ଗ୍ ଆସା, ମୁଇ ତମ୍‌କେ ଲକ୍‌ମନ୍‌କେ

\* ୪:୧୨ ୪:୧୨ ମାଡ଼ିତ ୧୪:୩; ମାର୍‌କ ୬:୧୭; ଲୁକ୍ ୩:୧୯, ୨୦

\* ୪:୧୩ ୪:୧୩ ଜଅନ୍ ୨:୧୨

\* ୪:୧୭

ମାପୁରୁରବାଟେ ଆନୁବାଟା ସିକାଇବି ।”<sup>୨୦</sup> ସେଦାପରେ ସେମନ୍ ଜାଲ୍ ଚାଡ଼ି, ଜିସୁର୍ ପଟେ ପଟେ ଗାଲାଲ ।

<sup>୨୧</sup> ଜିସୁ ଆରି ତେଇଅନି କଣ୍ଠେକ୍ ଦୁର୍ ଆଗେ ଜାଇ ଜେବଦିର୍ ପଥ ଜାକୁର୍ ଆରି ତାର୍ ବାଇ ଜଅନ୍‌କେ ବେଟ୍ ଅଇଲା । ସେଡ଼କିବେଲେ ଏ ଦୁଇବାଇ ତାକର୍ ବାବା ସଙ୍ଗ୍ ତଙ୍ଗାଇ ଜାଲ୍ ସାଜାଡ଼ତେ ରଇଲାଲ ।

<sup>୨୨</sup> ଜିସୁ ସେମନ୍‌କେ ମିସା ତାକଲା ଆରି ସେମନ୍ ଦାପରେ ତଙ୍ଗା ଆରି ତାକର୍ ବାବାକେ ଚାଡ଼ିକରି ଜିସୁର୍ ସଙ୍ଗ୍ ଗାଲାଲ ।

ଜିସୁ ପର୍‌ମେସରର୍ ବିସଇ ଜାନାଇ ନିମାନ୍ କର୍‌ବାଟା

(ଲୁକ୍ ୬:୧୭-୧୯)

<sup>୨୩</sup> ✱ଜିସୁ ଗାଲିଲିର୍ ଗୁଲାଇବାଟେ ବୁଲି ବୁଲି ଜିଉଦିମନର୍ ସବୁ ପାର୍‌ତନା ଗର୍‌ମନ୍‌କେ ସିକିଆ ଦେଇ, ପର୍‌ମେସରର୍ ରାଇଜର୍ ବିସଇ ଜାନାଇଲା । ଆରି ବିନ୍ ବିନ୍ ରଗେ ରଇବା ଲକ୍‌ମନ୍‌କେ ସବୁ ରକାମର୍ ରଗ୍ ଆରି ସବୁ ଦୁକ୍ କସ୍‌ଟ, ନିମାନ୍ କଲା ।<sup>୨୪</sup> ସିରିଆ ଦେସର୍ ଗୁଲାଇବାଟେ ତାର୍ ନାଉଁ ଜାନ୍‌ଲାଲ ଆରି ଲକ୍‌ମନ୍ ଡୁମା ଦାରିରଇବା, ମୁର୍‌ଗା ଅଇରଇବା, ଚେରେଙ୍ଗ୍ ଦାରି ରଇବା ଆରି ବିଆଦି ଦାରିରଇଲା ଲକ୍‌ମନ୍‌କେ ତାରଲଗେ ଆନ୍‌ଲାଲ । ସେ ସବୁକେ ନିକ କଲା ।<sup>୨୫</sup> ଆନି ରଇବା ସବୁ ଲକ୍‌ମନ୍‌କେ ଜିସୁ ନିକ କଲା । ଗାଲିଲି ଅନି ଆରି ଦସ୍‌ଟା ସଅରେଅନି, ଆରି ଜିରୁସାଲାମ୍, ଜିଉଦା ଆରି ଜର୍‌ଦନ୍ ସେବାଟେ ରଇଲା ଜାଗାମନର୍‌ତେଇଅନି ବେସି ଲକ୍‌ମନ୍ ଜିସୁର୍ ସଙ୍ଗ୍ ଗାଲାଲ ।



ଜିସୁ ତଙ୍ଗର୍ ଉପରେଅନି ସିକାଇବାଟା

<sup>୧</sup> ଜିସୁ ଜବର୍ ଲକ୍‌ମନ୍ ତାର୍‌ଟାଗେ ଆଇବାଟା ଦେକି ତଙ୍ଗର୍ ଉପରେ ଜାଇ ବସଲା । ସିସମନ୍ ତାକେ ଚାରିବେଡ଼ି ଗେରି ରଇଲାଲ ।<sup>୨</sup> ସେବେଲେ ଜିସୁ ସେମନ୍‌କେ ସିକିଆ ଦେଇ କଇବାର୍ ଦାରଲା ।

କେନ୍ତାରି ଲକ୍‌ମନ୍‌ର ନିକ କରମ୍

(ଲୁକ୍ ୬:୨୦-୨୩)

<sup>୩</sup> “ଜନ୍ ଲକ୍‌ମନ୍ ଆଡ଼ମାଇ କାକୁର୍‌ତି ଅଇଆଚଡ଼, ସେମନ୍‌ର୍ କେଡେକ୍ ନିକ କରମ୍, କାଇକେବଇଲେ ସରଗ୍ ରାଇଜ୍ ତାକର୍‌ଟା ।”

<sup>୪</sup> ଦୁକେ ରଇବା ଲକ୍‌ମନ୍‌ର୍ କେଡେକ୍ ନିକ କରମ୍,  
କାଇକେବଇଲେ ପର୍‌ମେସର୍ ସେମନ୍‌ର୍ ଦୁକ୍ ସାରାଇସି ।

<sup>୫</sup> ସୁଆଲେ ରଇବା ଲକ୍‌ମନ୍‌ର୍ କେଡେକ୍ ନିକ କରମ୍,  
କାଇକେବଇଲେ ସେମନ୍ ପର୍‌ମେସର୍ ସପଡ଼ କରିରଇବା ବିସଇ ମିଲାଇବାଇ

<sup>୬</sup> ଜନ୍ ଲକ୍‌ମନ୍ ପର୍‌ମେସରର୍ ମନ୍ କଲା ଇସାବେ କାମ୍ କର୍‌ବାକେ ଆସା କର୍‌ବାଇ,  
ତାକର୍ କେଡେକ୍ ନିକ କରମ୍,

କାଇକେବଇଲେ ପର୍‌ମେସର୍ ସେମନ୍‌କେ ସାରଦା କରାଇସି ।

<sup>୭</sup> ବିନ୍ ଲକ୍‌ମନ୍‌କେ ଦୟା ଦେକାଇବା ଲକ୍‌ମନ୍‌ର୍ କେଡେକ୍ ନିକ କରମ୍,  
କାଇକେବଇଲେ ସେମନ୍‌କେ ପର୍‌ମେସର୍ ଦୟା କର୍‌ସି ।

<sup>୮</sup> ମନ୍ ବିଡ଼ରେ ନିର୍‌ମାଲ୍ ରଇଲା ଲକ୍‌ମନ୍‌ର୍ କେଡେକ୍ ନିକ କରମ୍,  
କାଇକେବଇଲେ ସେମନ୍‌କେ ପର୍‌ମେସରର୍ ଦର୍‌ସନ୍ ମିଲ୍‌ସି ।

<sup>୯</sup> ସାନ୍ତିର୍ ପାଇ କାମ୍ କର୍‌ବା ଲକ୍‌ମନ୍‌ର୍ କେଡେକ୍ ନିକ କରମ୍,  
କାଇକେବଇଲେ ସେମନ୍ ପର୍‌ମେସରର୍ ପିଲାଟକି ବଲି ନାମାଇ ଅଇବାଇ ।

୧୦ \*ଜନ୍ ଲକ୍ମନ ପରମେସରର୍ ମନ୍ କଲା ଇସାବେ କାମ୍ କରି ଦୁକ୍ କସ୍ତ  
ପାଇବାଇ, ସେମାନର କେତେକ୍ ନିକ୍ କରମ୍,  
କାଇକେବଇଲେ ସରଗ୍ ରାଇଜ୍ ତାକରଗା ।

୧୧ \*“ମକେ ବିସ୍ବାସ୍ କରବାର୍ ଲାଗି ତମ୍‌କେ ଲକ୍ମନ ନିନ୍ଦା ଆରି କସ୍ତ  
ଦେବାଇ, ଆରି ତୁଟାଇ ତମର୍ ବିରୁଦେ ମିର୍ କାତା କଇବାଇ, ନିଜ୍‌କେ କେତେ  
କରମର୍ ଲକ୍ ବଲି ମନେ କରା । ୧୨ \*ସାର୍‌ଦା ଅଇ ସାର୍‌ଦାଇ ରୁଆ,  
କାଇକେବଇଲେ ସରଗେ ତମର୍ ପାଇ ବଡ୍ ପୁରୁସ୍‌କାର୍ ସଙ୍ଗଇଲା ଆଟେ ।  
ମନେରକା ସେନ୍ତାରି ତମର୍ ଆଗତୁ ରଇଲା ବବିସ୍ତବକ୍‌ତାମନ୍ ମିସା ଦୁକ୍‌ପାଇ  
ରଇଲାଇ ।”

ନୁନ୍ ଆରି ଉଜଲ୍  
(ମାର୍‌କ ୯:୫୦; ଲୁକ୍ ୧୪:୩୪-୩୫)

୧୩ \*“ତମେ ସବୁ ମୁନୁସ୍ ଜାତିର୍‌ପାଇ ନୁନ୍ ପାରା । ମାତର୍ ନୁନ୍ ଜଦି ସୁଆଦ୍  
ଆରାଇସି, ତେବେ ସେଟା କେନ୍ତ୍ର କରିଆ ଅଇସି? ସେଟା ଆରି କାଇ କାମେ ନ ଆସେ,  
ତେବେ ତାକେ ବାଇରେ ପିଙ୍ଗି ଦେବାଇ ଆରି ସେଟା ଲକ୍ମନ ମାଣ୍ଟି ପାକାଇବାଇ ।”

୧୪ \*ତମେ ଗୁଲାଇ ଜଗତର୍ ପାଇ ଉଜଲ୍ ପାରା । ଜନ୍ ଗଡ୍ ତଙ୍ଗର୍ ଉପ୍‌ରେ  
ତିଆର୍ ଅଇଲାଆଟେ, ସେଟା କେବେ ମିସା ଲୁଚି ରଇ ନାପାରେ । ୧୫ \*କେ ମିସା  
ବଡି ତସାଇକରି ଆଣ୍ଟିଡାବି ନ ସଙ୍ଗଅଡ୍ । ସେଟା ବଡିକୁଦରା ଉପ୍‌ରେ ସଙ୍ଗଇବାଇ  
ଆରି ଗରେ ରଇଲା ସବୁ ଲକ୍‌କେ ଉଜଲ୍ ଦେଇସି । ୧୬ \*ସେନ୍ତାରିସେ ତମର୍ ଉଜଲ୍  
ଲକ୍ମନରଟାନେ ଉଜଲ୍ ତିସ । ସେନ୍ତାରିଆଲେ ତମର୍ ସଡ୍‌କାମ୍ ଦେକି ସେମନ୍  
ସରଗେ ରଇବା ବାବା ପରମେସରର୍ ତାକ୍‌ପୁଟା କରବାଇ ।

ରିତି ନିତି

୧୭ “ମୁଇ ମିସା, କରିରଇବା ନିୟମ୍ କି ବାବବାଦିମନର୍ ଦରମ୍ ସାସ୍ତର୍  
ବୁଡାଇବାକେ ଆସିଆରି ବଲି ବାବା ନାଇ । ମୁଇ ସେଟା ବୁଡାଇବାକେ ଆସିନାଇ  
ମାତର୍ ସିଦ୍ କରବାକେ ଆସିଆରି । ୧୮ \*ମନେରକିରୁଆ, ମୁଇ ତମ୍‌କେ ସଡ୍ କଇଲିନି  
ସରଗ୍ ଆରି ଦରତନି ତବିର୍ ଅଇ ରଇବା ଜାକ ମସାର୍ ନିୟମର୍ ଗଟେକ୍ ତିନ୍ ମିସା  
ନ ବୁଡେ । ସବୁ ବିସଇ ପୁରାପୁରୁନ୍ ନ ଅଇତେ ଏ ସବୁ ନ ଗଟେ । ୧୯ ତେବର୍‌ପାଇ  
ଜେ ମିସା ନିୟମ୍ ତେଇ ରଇବା ସବୁଟାନେଅନି ସାନ୍ ଆଦେସ୍ ନ ମାନେ ଆରି ସେନ୍ତ୍ର  
କରବାକେ ବିନ୍ ଲକ୍ମନକେ ସିକାଇସି, ସେ ସରଗ୍ ରାଇଜେ ସବୁଟାନେଅନି ସାନ୍  
ଲକ୍ ବଲି ଏଜାଇଅଇସି । ମାତର୍ ଜେ ନିୟମର୍ ସବୁ ବିସଇର୍ ସାନ୍ ଆଦେସ୍ ମାନ୍‌ସି  
ଆରି ସେଟା ବିନ୍ ଲକ୍ମନକେ ସିକାଇସି, ସେ ସରଗ୍ ରାଇଜେ ବଡ୍ ଲକ୍ ବଲି  
ଏଜାଇଅଇସି । ୨୦ କାଇକେବଇଲେ ମୁଇ ତମ୍‌କେ କଇଲିନି, ସାସ୍ତର୍ ସିକାଉମନ୍  
ଆରି ପାରୁସିମନର୍‌ତେଇଅନି ଅଦିକ୍ ବିସ୍ବାସ୍ ରଇ, ପରମେସରର୍ ମନ୍ କଲା  
ଇସାବେ, କାମ୍ କଲେସେ ସରଗ୍ ରାଇଜେ ଜାଇପାରାସ୍ ।”

ରିସା ଅଇବା ବିସଇ ନେଇ ସିକିଆ

୨୧ “ତମେ ସୁନି ଆଟାସ୍ ଜେ, ପୁରବେଅନି ଲକ୍ମନକେ କୁଆଅଇଲା ଆଟେ,  
ଲକ୍‌କେ ମରାଇବାର୍ ନାଇ । ଆରି ଜେ ମରାଇସି ବଇଲେ ସେ ବିଚାର୍ କରାଇଅଇସି  
। ୨୨ ମାତର୍ ମୁଇ କଇଲିନି, ଜେ ମିସା ବାଇକେ ରିସା ଅଇସି, ତାକେ ସବାଟାନେ  
ବିଚାର୍‌ନା କରାଅଇସି । ଜେ ବାଇକେ ଏ ବେକାର୍‌ଟାସେ ବଲି କଇସି, ତାକେ  
ବଡ୍ ସବାଟାନେ ବିଚାର୍‌ନା କରବାକେ ଆନ୍‌ବାଇ, । ଆରି ଜେ ବାଇକେ ଏ  
ବକୁଆଟାସେ ବଲି କଇସି, ତାର୍‌ପାଇ ନରକର୍ ଜଇଟାନେ ପିଙ୍ଗାଇଅଇବା ବିପଦ୍

\* ୫:୧୦ ୫:୧୦ ୧ ମ ପିତର୍ ୩:୧୪ \* ୫:୧୧ ୫:୧୧ ୧ ମ ପିତର୍ ୪:୧୪ \* ୫:୧୨ ୫:୧୨ ପେରିଡ୍ ୭:୫୨  
\* ୫:୧୩ ୫:୧୩ ମାର୍‌କ ୯:୫୦; ଲୁକ୍ ୧୪:୩୪-୩୫ \* ୫:୧୪ ୫:୧୪ କଅନ୍ ୮:୧୨:୯:୫ \* ୫:୧୫ ୫:୧୫  
ମାର୍‌କ ୪:୨୧; ଲୁକ୍ ୮:୧୬:୧୧:୩୩ \* ୫:୧୬ ୫:୧୬ ୧ ମ ପିତର୍ ୨:୧୨ \* ୫:୧୮ ୫:୧୮ ଲୁକ୍ ୧୬:୧୭

ଆଚେ । ୨୩ ସେଟାପୁରୁଷ ଉପେ ପରମେସ୍ୱରକେ ବେଦି ଗାନେ ନିଜର ଦାନ ଦେଲା ବେଳେ, ତେଜ ତମର ବିରୁଦେ ତମର ବାଇର କାଇମିସା କାତା ଆଚେ ବଲି ମନେ ଏତାଇଲୁସ, ୨୪ ସେନ୍ତି ବଇଲେ ବେଦିଲଗେ ବଲିଦେବାଟା ସଙ୍ଗଇଦେଇ ବାରିଜା, ଆଗେ ନିଜର ବାଇ ସଙ୍ଗ ମିସା, ତାର ପଚେ ଆସି ତମର ବଲି ଦିଆସ ।”

୨୫ ଜଦି କେ ତମର ବିରଦେ ତମକେ ବିଚାର କରବା ଜାଗାଇ ଜିବାକେ ବାଦିଆ କରସି ବଇଲେ, ବିଚାର ଜାଗାଇ ଜିବା ଆଗତୁ, ବେଲ ରଇତେସେ ତାର ସଙ୍ଗ ରାଜି ଆ । ନଇଲେ ବିଚାର କରବା ଜାଗାଇ କେଟିଗାଲେ, ସେ ତମକେ ବିଚାରକରୁକେ ସରପି ଦେଇସି ଆରି ଅଇପାରେ ବିଚାର କରୁ ତମକେ ବନ୍ଦି ଗରେ ନେବାକେ ଜମାନକେ ସରପି ଦେଇସି ।

୨୬ ମୁଇ ତମକେ ସତ୍ କଇଲିନି, ତମର ଉପରେ ଟିକ୍ ଅଇଲା ଜରିମନାର୍ ସାରାସାରି ଅଣା ମିସା ନ ଦେବା ଜାକ, ତେଇଅନି କୁଲାସ ନ ଉଆସ ।

ବେସିଆ କାମ୍ ବିସଇ ନେଇ ସିକିଆ

୨୭ “ବେସିଆ କାମ୍ କରାନାଇ, ତମେ ପୁରୁବେ ଅନି ଏ ଆଦେସ୍ ସୁନି ଆସିଆଚାସ୍ । ୨୮ ମାତର ମୁଇ ତମକେ କଇଲିନି, ଜେ ମିସା ବିନ୍ ମାଇଜିକେ ବେସିଆକାମ୍ ଇସାବେ ଆକି ଦେକସି, ସେ ତାର ସଙ୍ଗ ମନେ ମନେ ବେସିଆ କାମ୍ ଅପରାଦ୍ କଲାଆଚେ । ୨୯ ଧେଟାପୁରୁଷ ତମର ଉଜାବାଟର ଆକିର ଲାଗି ତମେ ପାପକରିଆଚାସ୍, ତେବେ ସେଟା ବେଟି ପିଙ୍ଗି ଦିଆସ୍, କାଇକେ ବଇଲେ ତମର ସବୁ ଗାଗଡ୍ ନରକେ ଜିବା ବାଦୁଲେ ଗଟେକ୍ ଆକି ନସଟ୍ ଅଇବାଟା ତମପୁରୁଷ ନିକ । ୩୦ ଜଦି ତମର ଉଜା ଆଡ୍ ତମକେ ପାପ୍ କାମ୍ କରାଇଲାନି ବଇଲେ, ସେଟା କାଟି ପିଙ୍ଗି ଦିଆସ୍, କାଇକେ ବଇଲେ ତମର ସବୁ ଗାଗଡ୍ ନରକେ ଜିବା ବାଦୁଲେ ଗଟେକ୍ ଆଡ୍ ନସଟ୍ ଅଇବାଟା ନିକ ।”

ଚାଡାମେଲା ବିସଇ ନେଇ ସିକିଆ  
(ମାତ୍ରିକ ୧୯:୯; ମାର୍କ ୧୦:୧୧,୧୨; ଲୁକ୍ ୧୬:୧୮)

୩୧ “ଜଦି କେ ମିସା ନିଜର ମାଇଜିକେ ଚାଡିଦେବାକେ ମନ୍ କଲାନି, ସେ ତାକେ ରାଜିନାମା ପତର ଲେକି ଚାଡିଦେଅ । ଏ ସିକିଆ ତମେ ଆଗତୁ ପାଇଆଚାସ୍ । ୩୨ ମାତର ମୁଇ କଇଲିନି, ଜେକି ନିଜର ମାଇଜିକେ ବେସିଆ କାମ୍ ଚାଡି ଅଲଗା ଦସ୍ ଦାରି ଚାଡସି, ସେ ତାକେ ପାଦ୍ରି କରାଇବା ଅପରାଦେ ଦସିଅଇସି, ଆରି ଜେକି ଚାଡଲା ମାଇଜିକେ ବିବା ଅଇସି, ସେ ପାଦ୍ରି ଅଇସି ।”

ପରମାନ୍ ବିସଇ ନେଇ ସିକିଆ

୩୩ “ତମେ ପୁରୁବ୍ କାଲେଅନି ଏ ସିକିଆ ସୁନି ଆଇଲାସ୍ନି, ପରମାନ୍ ବାଙ୍ଗା ନାଇ । ପରମେସ୍ୱରର୍ ମୁଆଟେ ଜନ୍ ପରମାନ୍ କରିଆଚାସ୍ ସେଟା ପୁରାପୁରୁନ୍ କରା । ୩୪ ମାତର ମୁଇ ତମକେ କଇଲିନି ସପତ୍ କରବା ବେଲେ ପରମାନ୍ ନିୟମ୍ ପାକାଆ ନାଇ । ସରଗ୍ ନାଉଁ ଦାରି ରାନ୍ ପାକାଆ ନାଇ, କାଇକେବଇଲେ ସେଟା ପରମେସ୍ୱରର୍ ବସ୍ବା ଜାଗା । ୩୫ ଦରତନିର୍ ନାଉଁ ଦାରି ରାନ୍ ପାକାଆ ନାଇ, କାଇକେବଇଲେ, ସେଟା ପରମେସ୍ୱରର୍ ପାଦ୍ ସଙ୍ଗଇବା ଜାଗା । ଜିରୁସାଲାମ୍ ଗତର୍ ନାଉଁ ଦାରି ମିସା ରାନ୍ ପାକାଇବାଟା ଟିକ୍ ନାଇ, କାଇକେବଇଲେ ସେଟା ରାଜାମନର୍ ରାଜା ରଇବା ଜାଗା । ୩୬ ଆରି ନିଜର ମୁଣ୍ଡ ଟିକ୍ କରି ପରମାନ୍ କରାନାଇ, କାଇକେବଇଲେ ତମେ, ତେଇର୍ ଗଟେକ୍ ଚେଣ୍ଡି ଦବ୍ଲା କି କାଲିଆ

☆ ୫:୨୯ ୫:୨୯ ମାତ୍ରିକ ୧୮:୯; ମାର୍କ ୯:୪୭ ☆ ୫:୩୦ ୫:୩୦ ମାତ୍ରିକ ୧୮:୮; ମାର୍କ ୯:୪୩ ☆ ୫:୩୧ ୫:୩୧ ମାତ୍ରିକ ୧୯:୭; ମାର୍କ ୧୦:୪ ☆ ୫:୩୨ ୫:୩୨ ମାତ୍ରିକ ୧୯:୯; ମାର୍କ ୧୦:୧୧,୧୨; ଲୁକ୍ ୧୬:୧୮; ୧୮ କରକ୍ରିୟ ୭:୧୦,୧୧ ☆ ୫:୩୪ ୫:୩୪ ଜାକ୍ୱବ ୫:୧୨; ମାତ୍ରିକ ୨୩:୨୨

କରିନାପାରାସ । ୩୭ ମାତର ତମେ ପରମାନ ନିୟମ୍ ନ କରି, ତର ଉଁ କାତା ଉଁ ଅ, ନାଇ କାତା ନାଇ ଅ, ଇତିଅନି ଆରି ଅଦିକ୍ କାତା କଇ ପରମାନ୍ କରବାଟା ସଇତାନରଟାନେଅନି ଆଇଲାଟା ।”

ଇଁସାତଲା ବିସଇ ନେଇ ସିକିଆ  
(ଲୁକ୍ ୬:୩୦)

୩୮ “ଏ କାତା ତମେ ସୁନିଆଟାସ, ଆଁକିର ବାଦୁଲେ ଆଁକି ଆରି ଦାଁତର ବାଦୁଲେ ଦାଁତ, ୩୯ ମାତର ମୁଇ ତମ୍‌କେ କଇଲିନି, ତମର ବିରଦେ କେ ଅନିଆଇ କାମ୍ କଲେ, ତାକେ ସୁଜାଇବାକେ ଚେସଟା କରା ନାଇ, ଜେ ତମର ଉଜା ଗାଲେ ଚାପଡ଼ ମାର୍‌ସି, ତାକେ ଆରି ଗଟେକ୍ ଚାପଡ଼ା ମାର୍‌ବାକେ ଡେବ୍‌ରି ଗାଲ୍ ମିସା ଦେକାଇ ଦିଆସ । ୪୦ କେ ଜଦି ତମରସଙ୍ଗ୍ ବିରଦ୍ କରି ବିଚାର୍ ଲଗେ ଦାବିକରି ତମର କାମିଜ୍ ନେବାକେ ମନ୍ କରସି, ତାକେ ଚାଦର୍ ମିସା ଦେଇ ପାକାଆ । ୪୧ ସନିଅମନର୍ ବିତ୍‌ରେଅନି, କେ ମିସା ତମ୍‌କେ ତାର୍ ବଜ୍ ରୁଆଇ କରି ଗଟେକ୍ କିଲମିଟର୍ ଜୁ ଆକା ବଇଲେ, ତମେ ତାର୍ ସଙ୍ଗ୍ ଦୁଇ କିଲମିଟର୍ ଜା । ୪୨ କେ ଜଦି ତମ୍‌କେ କାଇଆଲେ ଜିନିସ୍ ମାଙ୍ଗ୍‌ସି ବଇଲେ, ମନା ନ କରି ତାକେ ଦିଆସ । କେ ମିସା କାଇଆଲେ ଉଦାର୍ ମାଙ୍ଗ୍‌ଲେ ତାକେ ଦିଆସ ।”

ସତ୍‌ରୁକେ ଆଲାଦ୍ କରା  
(ଲୁକ୍ ୭:୨୭-୨୮, ୩୨-୩୬)

୪୩ “ମଇତରକେ ଆଲାଦ୍ କରା ଆରି ତମର ସତ୍‌ରୁକେ ଗିନ୍ କରା । ଏ ସିକିଆ ତମେ ପୁରବେଅନି ସୁନି ଆଟାସ । ୪୪ ମାତର ମୁଇ ତମ୍‌କେ କଇଲିନି, ସତ୍‌ରୁମନ୍‌କେ ଆଲାଦ୍ କରା, ଜନ୍ ଲକ୍ ତମ୍‌କେ କସ୍‌ଟ ଦେଲାଜିନି, ତାକର୍‌ପାଇ ପାର୍‌ତନା କରା । ୪୫ ଏଟା କଲେ ସରଗର୍ ପର୍‌ମେସରର୍ ପିଲା ବଲି ଚିନାପଡ଼ସା । କାଇକେ ବଇଲେ ପର୍‌ମେସର ବଲ୍ କାରାପ୍ ଦୁଇ ଲକର୍ ପାଇ ମିସା ବେଲର ଉଜଲ୍ ଦେଲାନି, ଆରି ଦରମ୍ ରଇବା, ଦରମ୍ ନ ରଇବା ସବୁର୍ ଉପରେ ବରସା ମାରାଇଲାନି । ୪୬ ତେବେ, ତମ୍‌କେ ଆଲାଦ୍ କରବା ଲକ୍‌କେ ଆଲାଦ୍ କଲେ, ପର୍‌ମେସର ତମ୍‌କେ କାଇକେ ପୁରୁସକାର୍ ଦେଇସି ? ସିସ୍ତୁ ମାଙ୍ଗ୍‌ବା ଲକ୍‌ମନ୍ ମିସା ସେନ୍ତି କରବାଇ । ୪୭ ତମେ ଜଦି ନିଜର୍ ନିଜର୍ ବାଇମନ୍‌କେସେ ଜୁଆର୍ କରସା, ତେବେ ଆରି ଅଦିକ୍ କାଇଟା କଲାସିନି ? ବିସ୍‌ବାସ ନକଲା ଲକ୍‌ମନ୍ ମିସା ସେଟା କରବାଇ । ୪୮ ସେଟାର୍ ପାଇ ତମର ସରଗର୍ ବାବା ଜେନ୍ତାର୍ ସିଦ୍, ତମେ ମିସା ସେନ୍ତାର୍ ସିଦ୍ ଅଇବା ଦରକାର୍ ।”



ଦାନ୍ ବିସଇନେଇ ସିକିଆ

୧ \* ଲକ୍‌ମନ୍‌କେ ଦେକାଇଅଇବାକେ ସବୁର୍ ମୁଆଟେ ନିକ କାମ୍ କରାନାଇ । ସେଟା କଲେ ସରଗେ ରଇବା ତମର ବାବାର୍ ଟାନେଅନି ପୁରୁସକାର୍ ନ ପାଆସ ।

୨ ତେବେ ଗଟେକ୍ ଗରିବ୍ ଲକ୍‌କେ ଦାନ୍ ଦେବା ବେଲେ କୁଟିଆଲ୍‌ମନର୍ ପାରା ଦେକାଇ ନ ଉଆ । ସେମନ୍ ଲକ୍‌ମନର୍‌ତେଇ ଅନି ତାକ୍‌ପୁଟା ପାଇବାକେ ପାର୍‌ତନା ଗରେ ଆରି ସାଇ ମଜାଇ ଦାନ୍‌ଦରମ୍ ଦେକାଇବାଇ । ମୁଇ ସତ୍ କଇଲିନି ଜେ, ସେମନ୍ ଇତିଅନି ସେମନର୍ ବୁଡି ପୁରାପୁରୁନ୍ ପାଇସାରି ଆଟଡ । ୩ ମାତର ତମେ ଅବାବେ ରଇଲା ଲକ୍‌କେ ସାଇଜ କଲାବେଲେ, ଏନ୍ତାରି କରା, ଜେନ୍ତିକି ତମର ଲଗର୍ ମଇତର ମିସା ଏ କାତା ନାଜାନ । ୪ ତମର ଏ ଦାନ୍ ଲୁଟେ ଅଇରଇଲେ ମିସା ସବୁ ଦେକ୍‌ବା ବାବା ପର୍‌ମେସର ସେଟା ଦେକି ତମ୍‌କେ ପୁରୁସକାର୍ ଦେଇସି ।

\* ୭:୧ ୭:୧ ମାଡ଼ିର ୨୩:୫

ପାର୍ତନା ବିସଇ ନେଇ ସିକିଆ  
(ଲୁକ ୧୧:୨-୪)

\* ପାର୍ତନା କରବା ବେଳେ କୁଟିଆଲ୍ ବିସବାସିମନର୍ ପାରା ଉଥାନାଇ । କାଇକେ ବଇଲେ ସେମନ୍ ଲକ୍ମନକେ ଦେକାଇ ଅଇବାକେ ପାର୍ତନା ଗର୍ମନକେ ଆରି ଗାଉଁର୍ ମଜା ତାଣ୍ଡେ ଟିଆ ଅଇକରି ପାର୍ତନା କରବାକେ ମନ୍ କରବାଇ । ମୁଇ ତମକେ ସତ୍ କଇଲିନି, ସେମନ୍ ନିଜର୍ ନିଜର୍ ପୁରୁସ୍କାର୍ ପାଇଲାଇବେ ।<sup>୨</sup> ମାତର୍ ତମେ ପାର୍ତନା କରବାକେ ତମର୍ ବାକ୍‌ରାଇ ଜାଇ, କାକେ ନ ଦେକାଇଅଇତେ ପୁରିକରି କାପାଟ୍ ତାବିଅଇଦିଆସ୍ ଆରି ନ ଡିସାଇ ଅଇବା ତମର୍ ସରଗର୍ ବାବାର୍ ଲଗେ ପାର୍ତନା କରା । ତମେ ଲୁଚ୍‌ତେ ଜାଇଟା କରସା, ସେଟା ଦେକି ତମର୍ ବାବା ତମକେ ପୁରୁସ୍କାର୍ ଦେଇସି ।

<sup>୩</sup> ପାର୍ତନା କରବା ବେଳେ ପର୍ମେସର୍‌କେ ବିସବାସ୍ ନ କରବା ଲକ୍ମନର୍ ପାରା ଅରତ୍ ନଇଲା କାତା ତରକେ ତର କଇ ଆଉଲି ନ ଉଆ, ବେସି ପର୍ ପାର୍ତନା କଲେ ସେ ପର୍ମେସର୍ ସୁନ୍‌ସି ବଲି, ସେମନ୍ ମନେ ବାବ୍‌ବାଇ ।<sup>୪</sup> ସେମନର୍ ପାରା ଉଆ ନାଇ । ତମେ ମାଙ୍ଗ୍‌ବା ଆଗ୍‌ତୁ ଜାଇଟା ଦରକାର୍, ତମର୍ ସରଗର୍ ବାବା ପର୍ମେସର୍ ସେଟା ସବୁ ଜାନ୍‌ସି ।<sup>୫</sup> ସେଟାର୍ ପାଇ ତମେ ଏନ୍ତାରି ପାର୍ତନା କରବାର୍ ଆଟେ ।

ଏ ଆମର୍ ସରଗର୍ ବାବା,

ତମର୍ ସୁକଲ୍ ନାଉଁ ତାକ୍‌ପୁଟା ପାଅ ।

<sup>୬</sup> ତମର୍ ସାସନ୍ ଆସ । ସର୍‌ଗେ ତମର୍ ମନ୍ କଲାଟା ଜେନ୍ତାରି ସିଦ୍ ଅଇଲାନ୍ତି,

ଏ ରାଇଜେ ମିସା ସେନ୍ତାରି ତମେ ମନ୍ କଲାଟା ସିଦ୍ ଅ ।

<sup>୭</sup> ଆଜି ଆମ୍‌କେ ଦରକାର୍ ରଇଲା କାଦି କାଇବାକେ ଦିଆ ।

<sup>୮</sup> ଆମର୍ ବିରଦେ ଦସ୍ କରିରଇବା ଲକ୍ମନକେ

ଆମେ ଜେନ୍ତାର୍ କେମା କଲୁନି, ସେନ୍ତାରି ଆମର୍ ସବୁ ଦସ୍ କେମା କରା ।

<sup>୯</sup> ବେସି କସ୍‌ଟ ରଇବା ପରିକା ଆମକେ ମୁରବ୍‌ବାକେ ଦିଆ ନାଇ,

ମାତର୍ କାରାପ୍ କାମେଅନି ରକିଆ କରା

ଜେନ୍ତାକି ତମର୍ ରାଇଜ୍, ତମର୍ ବପୁ,

ଆରି ତାକ୍‌ପୁଟା ସବୁ ଜୁଗେଜୁଗେ ତମର୍ ଅଇକରି ରଅ\* । ଆମେନ୍ !

<sup>୧୦</sup> \* “ତମର୍ ବିରଦେ ଦସ୍ କରିରଇବା ବିନ୍ ଲକ୍ମନକେ ଜଦି ତମେ କେମା କରସା, ତମର୍ ସରଗର୍ ବାବା ପର୍ମେସର୍ ମିସା ତମକେ କେମା କରସି ।<sup>୧୧</sup> ମାତର୍ ତମେ ଜଦି ବିନ୍ ଲକ୍ମନକେ କେମା ନ କରାସ୍, ସରଗର୍ ବାବା ମିସା ତମେ କରିରଇବା ପାପ୍‌ଦସ୍ କେମା ନ କରେ ।”

ଉପାସ୍ ରଇବା ବିସଇ ନେଇ ସିକିଆ

<sup>୧୨</sup> “ଉପାସ୍ କରବା ବେଳେ ଦରମ୍ ବଲି ଦେକାଇଅଇଲା ଲକ୍ମର୍ ପାରା ବାଇରେ ସପାସୁତର୍ ଅଇବାଟା ଚାଡିଦେବାର୍ ନାଇ । ସେମନ୍ ଉପାସ୍ କଲୁନି ବଲି ଲକ୍ମର୍ ଲଗେ ଦେକାଇ ଅଇବାକେ ସେନ୍ତାରି କରବାଇ । ମୁଇ ତମକେ ସତ୍ କଇଲିନି, ସେମନ୍ ଏନ୍ତା କରବାର୍ ଲାଗି ନିଜର୍ ପୁରୁସ୍କାର୍ ସବୁ ପାଇଲାଇବେ ।<sup>୧୩</sup> ମାତର୍ ତମେ ଉପାସ୍ କରବା ବେଳେ, ମୁଣ୍ଡେ ଚିକନ୍‌ଲାଗାଇ ଅଇ ସପା ସୁତରା ରୁଆ ।<sup>୧୪</sup> ଜେନ୍ତାକି ଉପାସ୍ କଲାସିନି ବଲି ବିନ୍ ଲକ୍ମନ ନାଜାନତ୍ । ମାତର୍ ତମର୍ ନ ଡିସବା ବାବା ସବୁ କାତା ଜାନେ । ତମେ ଲୁଚ୍‌ତେ ଜାଇଟା କରସା, ସେଟା ଦେକି ତମକେ ପୁରୁସ୍କାର୍ ଦେଇସି ।”

\* ୭:୫ ୭:୫ ଲୁକ୍ ୧୮:୧୦-୧୪

\*

୭:୧୩ ୭:୧୩ ଏ ବାକିଅ ପୁରନା ପାଣ୍ଡୁ ଲିପି ଗାନେ ନାଇ

\* ୭:୧୪

କରିରଇବା କାମ୍  
(ଲୁକ୍ ୧୨:୩୩-୩୪)

୧୯ “ଏ ଦୁନିଆଇ ନିଜରପାଇ ଦନ୍ ଅରଜା ନାଇ । ଇତି ସଙ୍ଗଇଲା ଦନ୍ ଅଲ୍‌ମା କାଇ ଚିଲମ୍ ଦାରସି ଆରି ଚରମନ୍ କତି କାଣା କରି ଚରାଇନେବାଇ । ୨୦ ସରଗେ ତମର୍ ପାଇ ଏନ୍ତାରି ଦନ୍ ଅରଜି ସଙ୍ଗୁଆ । ତେଇ ଅଲ୍‌ମା ଆରି ଚିଲମ୍ ନ ଦାରେ । ଆରି ଚରମନ୍ ମିସା କତି କାଣାକରି ଚରାଇ ନେଇ ନାପାରତ୍ । ଜାଗରତ୍ ! ୨୧ କାଇକେବଇଲେ ଜନ୍‌ଟାଣେ ତମର୍ ଦନ୍, ତେଇସେ ତମର୍ ମନ୍ ।”

ଗାଗତର ଉଜଲ୍  
(ଲୁକ୍ ୧୧:୩୪-୩୬)

୨୨ “ତମର୍ ଆଁକି ଅଇଲାନି ଗାଗତର ବତି । ଜେତେବେଲା ଆଁକି ନିରମଲ୍ ରଇସି, ତେବେ ତମର୍ ଗୁଲାଇ ଗାଗତ୍ ମିସା ଉଜଲ୍ ବରତି ଅଇରଇସି । ୨୩ ମାତର ଜେବେ ତମର୍ ଆଁକି ନସିରଇସି, ତେବେ ସବୁ ଗାଗତ୍ ଆନ୍ଦାର୍ ଅଇସି । ତେବରପାଇ ତମର୍ ମନ୍ ବିତରର ଉଜଲ୍ ଜେବେ ଆନ୍ଦାର୍ ଅଇସି, ତେବେ ସେ ଆନ୍ଦାର୍ କେତେକ୍ ବଡ଼ ବିପଦ୍ ।”

ପରମେସର ଆରି ଦନ୍  
(ଲୁକ୍ ୧୬:୧୩; ଲୁକ୍ ୧୨:୨୨-୩୧)

୨୪ “କେ ମିସା ଗଟେକ୍ ଲକ୍ ଦୁଇଟା ସାଉକାରର ସେବାକରି ନାପାରେ । ସେ ଗଟେକ୍ ଲକ୍‌କେ ମାନସି ଆରି ଗଟେକ୍ ଲକ୍‌କେ ଗିନ୍ କରସି । ନଇଲେ ଗଟେକ୍ ଲକ୍‌କେ ବିସ୍‌ବାସ୍ କରସି ଆରି ଗଟେକ୍ ଲକ୍‌କେ ବିସ୍‌ବାସ୍ ନ କରେ । ତମେ ଏକାତର ପରମେସରକେ ଆରି ତାରୁକାସୁକେ ସେବାକରି ନାପାରାସ୍ ।”

୨୫ ଏଟାରପାଇ ମୁଇ ତମ୍‌କେ କଇଲିନି, ବର୍ତ୍ତବାକେ କାଇଟା କାଇବୁବେ ? ଆରି ଗାଗତର ପାଇ କାଇଟା ପିନ୍‌ବୁ ? ବଲି ବାବି ଚିନ୍ତା କରାନାଇ । କାଦିର୍‌ତେଇଅନି ଜିବନ୍, ଆରି ବସ୍‌ତର ତେଇଅନି ଗାଗତ୍ ମୁକିଅ ଆରେ ।

୨୬ ଚତଇମନ୍‌କେ ଦେକା, ସେମନ୍ ନ ବୁନତ୍ କି ନ କାଟତ୍, କି କଲ୍‌କିତେଇ ନ ସଙ୍ଗଅତ୍, ଅଇଲେ ମିସା ସରଗର ବାବା ସେମନ୍‌କେ କାଇବାପାଇ ଜାଗାଇଲାନି । ତମେ କାଇ ସେମନ୍‌ତେଇଅନି ମୁକିଅ ନୁଆସ୍ କି ? ୨୭ ବର୍ତ୍ତବା ପାଇ ବଲି ନିଜେ ଚିନ୍ତାକରି ବିକଲ୍ ଅଇ ଜେ ତାର୍ କଣ୍ଡେକ୍ ମିସା ବର୍ତ୍ତବା ଦିନ୍ ପାରସି କି ? ନାଇ ନାପାରେ ।

୨୮ ବସ୍‌ତର ପାଇ କାଇକେ ବିକଲ୍ ଅଇଲାସିନି ? ଦେକା, ବନର୍ ପୁଲ୍‌ମନ୍ କେନ୍ଦ୍ରି ବଡ଼ଲାଇନି, ସେମନ୍ କାମ୍‌ଦାମ୍ କରତ୍ ନାଇ କି ନିଜର୍ ପାଇ ବସ୍‌ତର ତିଆର୍ କରତ୍ ନାଇ, ୨୯ ମାତର ମୁଇ ତମ୍‌କେ କଇଲିନି, ରାଜା ସଲ୍‌ମନ୍ ତାର୍ ସବୁ ଦନ୍ ସପତି ସଙ୍ଗ୍ ମିସା ଏ ପୁଲ୍ ପାରା ସୁନ୍‌ର ବସ୍‌ତର କେବେ ପିନ୍ ନ ରଇଲା । ୩୦ ଆଜି ପଦାଇ ରଇଲା ଗାଁସ୍ କାଲିକେ ନ ମିସା ରଏ । କାଟିକରି ଜଇଟାଣେ ପଡ଼ାଇଦେବାଇ । ଏଲେମିସା ତାକେ ପରମେସର ଏନ୍ଦ୍ରି ସୁନ୍‌ର ବେସ୍ ଦେଇସି, ତେବେ ଏ ଅଲ୍‌ପ୍ ବିସ୍‌ବାସିମନ୍, ସେ ବାଇଦରେ ତମ୍‌କେ ଅଦିକ୍ ନିମାନ୍ ବସ୍‌ତର ନ ଦେଏ କି ? ଦେଇସିସେ ।

୩୧ ଏଟାର ପାଇ କାଇଟା କାଇବି ? ଆରି କାଇଟା ପିଇବି ? ଆରି କାଇଟା ଅଡ଼ବି ବଲି ଚିନ୍ତା କରାନାଇ । ୩୨ କାଇକେବଇଲେ ପରମେସରକେ ନାଜାନ୍‌ଲା ଲକ୍‌ମନ୍ ଏ ସବୁ କଜିବୁଲ୍‌ବାଇ । ଆରି ଏ ସବୁ ବିସଇ ଜେ ତମ୍‌କେ ଲଡ଼ା, ସେଟା ତମର୍ ସରଗର ବାବା ଜାଣେ । ୩୩ ମାତର ତମେ ତାର୍ ରାଇଜ୍ ଆରି ସେ ତମର୍‌ଟାଣେଅନି କାଇଟା ମନ୍ କଲାନି, ସେ ବିସଇ କଜା । ସେନ୍ତାର୍ କଲେ, ସେ ତମ୍‌କେ ଲଡ଼ାକେ ଆଇବା ସବୁ ବିସଇ ଜାଗାଇ ଦେଇସି । ୩୪ ଆରି, କାଲିକର୍ ପାଇ

ଚିନ୍ତା କରାନାଇ, କାଇକେବଇଲେ କାଲିକର୍ ଚିନ୍ତା କାଲିକେ କରା । ଜନ୍ ଦିନର୍ କସ୍ତ, ସେଦିନର୍ପାଇ ଅଦିକ୍ ଅଇସି ।



ବିନ୍ ଲକ୍‌କେ ଦସ୍ ଦାର୍‌ବାଟା

(ଲୁକ୍ ୬:୩୭-୩୮, ୪୧-୪୨)

୧ ବିନ୍ ଲକ୍‌କର୍ ଦସ୍ କଜି ବୁଲାନାଇ । ତାକର୍ ବିଚାରର୍ ଦସ୍ ନ ଦାର୍‌ଲେ, ପର୍‌ମେସର୍ ତମର୍ ଦସ୍ ନ ଦାରେ । ୨ \*କାଇକେବଇଲେ ତମେ ବିନ୍ ଲକ୍‌କର୍ ଦସ୍ ଜେନ୍ତି ବିଚାର୍ କର୍‌ତେରଇସା, ସେନ୍ତାରିସେ ପର୍‌ମେସର୍ ତମର୍ ବିଚାର୍ କର୍‌ସି । ତମେ ବିନ୍ ଲକ୍‌ମନ୍‌କେ ଜନ୍ ନିୟ୍‌ମ୍ କର୍‌ସା, ପର୍‌ମେସର୍ ତମକେ ସେ ନିୟ୍‌ମ୍ କର୍‌ସି । ୩ ତମର୍ ଆଁକିତେଇ ବଡ଼ କାଟ୍‌ରା ରଇଲେ ମିସା, କାଇକେ ତମର୍ ବାଇର୍ ଆଁକିଟାନ୍‌ରେ ରଇବା କାଟ୍‌ରା, ନିକସଙ୍ଗ୍ ଦେକ୍‌ଲାସ୍‌ନି ? ୪ ନିଜର୍ ଆଁକିତେଇ ବଡ଼ କାଟ୍‌ରା ରଉରଉ ତମେ କାଇ ଯାଆସେ ତମର୍ ବାଇର୍ ଆଁକିତେଇ ରଇବା କାଟ୍‌ରା ବାରକରାଇ ଦେବି ବଲି କଇଲାସ୍‌ନି ? ୫ ଏରେ କୁଟିଆଲ୍‌ମନ୍ ! ଆଗେ ନିଜର୍ ଆଁକିତେଇ ରଇଲା କାଟ୍‌ରା ବାରକରାଇ ପାକା, ତାର୍ ପତେ ନିଜର୍ ବାଇର୍ ଆଁକିତେଇ ରଇବା କାଟ୍‌ରା ବାରକରାଇବାକେ ନିମାନ୍ କରି ଦେକି ପାରାସ୍ ।

୬ ସୁକଲ୍ ଦିନସୁ କୁକୁର୍‌ମନ୍‌କେ ଦିଆସ୍ ନାଇ, ସେମନ୍ ପାସ୍‌ଲିକରି ତମକେ ଚାବିପାକାଇବାଇ । ଗୁସ୍‌ରି ମନର୍ ମୁଆଟେ ମୁକ୍‌ତା ପାକାଆ ନାଇ, ସେମନ୍ ମୁକ୍‌ତାର୍ ମୁଲିଅ ନ ବୁଜିକରି ମାଣ୍ଡିପାକାଇବାଇ ।

ମାଙ୍ଗା, କଜା ଆରି କାପାଟେ ମାରା

(ଲୁକ୍ ୧୧:୯-୧୩)

୭ ମାଙ୍ଗା, ତେବେ ତମକେ ଦିଆଅଇସି । କଜା, ତେବେ ମିଲାଇସା, କାପାଟେ ମାରା କାପାଟ୍ ଉଗାଡ଼ି ଅଇସି । ୮ ଜେ ମାଙ୍ଗ୍‌ସି, ତାକେ ଦିଆଅଇସି, ଜେ କଜ୍‌ସି, ସେ ମିଲାଇସି, ଜେ କାପାଟେ ମାର୍‌ସି ତାର୍‌ପାଇ କାପାଟ୍ ଉଗାଡ଼ି ଦିଆଅଇସି ।

୯ ତମର୍ ବିତ୍‌ରେ ଏନ୍ତାରି ବାବା କେ ଆଟେ କି ? ତମର୍ ପିଲା ଜଦି ରୁଟି ମାଙ୍ଗ୍‌ଲେ, ତାକେ ପାକ୍‌ନା ଦେଇସା ? ୧୦ ନଇଲେ ସେ ମାଟ୍ ମାଙ୍ଗ୍‌ଲେ ତାକେ ସାପ୍ ଦେଇସା ?

୧୧ ତମେ କାରାପ୍ ଲକ୍ ଅଇରଇଲେ ମିସା ନିଜର୍ ପିଲାମନ୍‌କେ ନିକନିକ ଜିନିସ୍ ଦେଇସା । ସେନ୍ତାରିସେ ଜନ୍ ଲକ୍‌ମନ୍ ସରଗର୍ ବାବାକେ ମାଙ୍ଗ୍‌ବାଇ ସେ ସେମନ୍‌କେ ଆରି କେତେ ନିକନିକ ଜିନିସ୍ ଦେଇସି ।

୧୨ \*“ତମର୍ ପାଇ ବିନ୍ ଲକ୍‌ମନ୍ ଜାଇଟା କରଡ଼ ବଲି ମନ୍ କଲାସ୍‌ନି, ସେନ୍ତାରି ତମେ ବିନ୍ ଲକ୍‌କର୍ ପାଇ କରା । ଏଟା ଅଇଲାନ୍ ମିସା ଦେଇରଇବା ନିୟ୍‌ମ୍ ଆରି ବବିସଡ଼ବକ୍‌ତାମନ୍‌ର ସିକିଆର୍ ଅରଡ଼ ।”

ଚିପଙ୍ଗା ଦୁଆର୍

(ଲୁକ୍ ୬:୪୩, ୪୪)

୧୩ “ଚିପଙ୍ଗା ଦୁଆର୍ ବାଟେ ଜାଆ । କାଇକେବଇଲେ ବିନାସ୍ କର୍‌ବାକେ ନେବା ନର୍‌କେ ଜିବା ବାଟ୍ ଅସାର୍ ଆରି ସୁବିଦାର୍‌ଟା । କେତେ କେତେ ଲକ୍ ସେ ବାଟେ ଜିବାଇ । ୧୪ ମାତର୍ ନ ସାର୍‌ବା ଜିବନେ ମିସି ରଇଲା ବାଟ୍, ଚିପଙ୍ଗା ଆରି ଜିବାଟା ବେସି କସ୍ତ । ଉନା ଲକ୍ ସେ ବାଟ୍ କଜି କଜି ମିଲାଇବାଇ ।”

ଗଟ୍ ଆରି ତାର୍ ପଲ୍

(ଲୁକ୍ ୬:୪୩-୪୪)



୧୫ “ଚକାବଣ୍ଡା କରବା ବବିସଦ୍‌ବକ୍ତାମାନର ତେଇଅନି ଜାଗରତା ଅଇରୁଆ, ସେମନ୍ ବାଇରେ ମେଣ୍ଡା ପାରା ତିସ୍‌ବାଇ ମାତର ତାକର ମନ୍ ବିତ୍‌ରେ ବାଲିଆଡୁରକାମାନର ପାରା । ୧୬ ସେମାନର କରବା କାମ୍ ଦେକି ତମେ ସେମନ୍‌କେ ଚିନିପାରାସ୍ । କାଟା ବୁଟାଇ ଅଛୁର୍ ନ ପଲେ କି କାଟାକଲି ବୁଟାଇ ହୁମ୍‌ରି ପଲ୍ ନ ଦାରେ । ୧୭ ନିକ ଗଟେ ନିକ ପଲ୍ ଦାରସି, ବାନିଆ ଗଟର୍ ପଲ୍ ବାନିଆ ସେ । ୧୮ ନିକ ଗଟେ ବାନିଆ ପଲ୍ ନ ପଲେ କି ବାନିଆ ଗଟେ ନିକ ପଲ୍ ଅଇନାପାରେ । ୧୯ ନିକ ପଲ୍ ନ ଦାରଲେ ସେ ଗର୍ କାଟି କରି ଜଇଟାନେ ପାକାଇଅଇସି । ୨୦ ସେନ୍ତାରି ସେ ଚକାବଣ୍ଡା କରବା ବବିସଦ୍‌ବକ୍ତାମାନର କାମ୍ କରବାଟାନେ ଅନି ତମେ ସେମନ୍‌କେ ଚିନିପାରାସ୍ ।”

ମୁଇ ତମ୍‌କେ ନାଜାନି  
(ଲୁକ୍ ୧୩:୨୫-୨୭)

୨୧ ମକେ ମାପରୁ, ମାପରୁ ବଲି ତାକ୍‌ବା ଲକ୍‌ମନରତେଇ ଅନି ସବୁ ଲକ୍ ସରଗ୍ ରାଇଜେ କେଟିନାପାରତ୍ । ମାତର ଜନ୍ ଲକ୍‌ମନ୍ ସରଗର୍ ବାବା ମନ୍ କଲା ଇସାବେ ଚଲାଚଲ୍‌ତି କରବାଇ, ସେମନ୍‌ସେ ସରଗ୍ ରାଇଜେ କେଟ୍‌ବାଇ ।

୨୨ ମାପରୁର୍ ବିଚାର କରବା ଦିନ୍ କେଟ୍‌ଲେ କେତେ କେତେ ଲକ୍ ମକେ କଇବାଇ, ଏ ମାପରୁ, ତମର୍ ନାଉଁ ଦାରି ଆମେ ପର୍‌ମେସରର୍ ସୁବ୍‌କବର୍ ଜାନାଇ ଆରୁ । ତମର୍ ନାଉଁ ଦାରି ହୁମାମନ୍‌କେ କେଦି ଆରୁ ଆରି କେତେକ୍ କାବାଅଇଜିବା କାମମନ୍ କରିଆରୁ । ୨୩ ସେଡ୍‌କି ବେଲେ ମୁଇ ସେମନ୍‌କେ କଇବି, ନାଇ, ମୁଇ ତମ୍‌କେ ନାଜାନି । କରାପ୍‌କାମ୍ କରବା ଲକ୍‌ମନ୍, ମର୍‌ଲଗେ ରୁଆନାଇ ।

ଦୁଇଟା ଗର୍ ବାନ୍ଧୁମନ୍  
(ଲୁକ୍ ୭:୪୭-୪୯)

୨୪ “ଜେ ମର୍ କାତା ସୁନି, ସେ ଇସାବେ ଚାଲ୍‌ସି, ସେ ବଡ୍ ରାଇନି ପାକ୍‌ନା ଉପ୍‌ରେ ଗର୍ କରବା ଗିଆନ୍‌ଲକ୍‌ର୍ ପାରା । ୨୫ ଅପର୍‌ବଲ୍ ବର୍‌ସା ମାର୍‌ଲାକେ ଗାଡ୍ ଉଟ୍‌ଲି ଗାଲା ଆରି ସେ ଗର୍ ଉପ୍‌ରେ ବେସି ପବନ୍ ଦାରଲା । ମାତର ସେ ଗର୍ ବସ୍‌ଲେ ନାଇ । କାଇକେ ବଇଲେ ସେଟା ପାକ୍‌ନା ଉପ୍‌ରେ ତିଆର୍ ଅଇରଇଲା ।”

୨୬ “ମାତର ଜନ୍ ଲକ୍‌ମନ୍ ମର୍ କାତା ସୁନିକରି ମିସା ସେ ଇସାବେ ଚଲାଚଲ୍‌ତି ନ କରତ୍, ସେମନ୍ ବାଲି ଗାଦି ଉପ୍‌ରେ ଗର୍ ତିଆର୍ କରି ରଇବା ବକ୍ତୁଆ ଲକ୍ ପାରା । ୨୭ ଅପର୍‌ବଲ୍ ବର୍‌ସା ଅଇଲାକେ ଗାଡ୍ ପୁରି ଉଟ୍‌ଲିଲା, ଜବର୍ ବାଉଦୁକା ଆଇଲା ଆରି ଗର୍ କୁରୁପ୍‌ନାସ୍ ଅଇଗାଲା । ସେ କୁରୁପ୍‌ନାସ୍ ଅଇଲାଟା କେତେ ଇନସ୍‌ତା ରଇଲା !”

ଜିସୁର୍ ଅଦିକାର୍ ବିସଇ ନେଇ ସିକିଆ

୨୮ ସାରାସାରି ଜାକ ଜିସୁ ସିକିଆ ଦେବାଟାନେ ଏ ସବୁ କାତା ସୁନିକରି ଲକ୍‌ମନ୍ କାବା ଅଇଗାଲାଇ । ୨୯ ସେ ବିନ୍‌ବିନ୍ ସାସ୍‌ତର୍ ସିକାଉମନର୍ ପାରା ନ ସିକାଇକରି ନିଜର୍ ଅଦିକାର୍ ସଙ୍ଘ୍ ସିକାଇତେ ରଇଲା ।



ଜିସୁ ଗଟେକ୍ ବଡ୍ ରଗିକେ ନିକ କଲା  
(ମାର୍‌କ ୧:୪୦-୪୫; ଲୁକ୍ ୫:୧୨-୧୬)

୧ ଜିସୁ ତୁଙ୍ଗ୍‌ରେ ଅନି ଉଡ୍‌ରି ଆଇଲା ଦାପ୍‌ରେ, ବେସି ଲକ୍‌ମନ୍ ତାର୍ ପଟେ ପଟେ ଇଣ୍ଡିଲାଇ । ୨ ସେବେଲେ ଗଟେକ୍ ବଡ୍ ରଗି ଜିସୁର୍ ମୁଆଟେ ଆସି ମାଣ୍ଡିକ୍‌ଟା ଦେଇ

☆ ୭:୧୯ ୭:୧୯ ମାତ୍ରିକ ୩:୧୦; ଲୁକ୍ ୩:୯ ☆ ୭:୨୦ ୭:୨୦ ମାତ୍ରିକ ୧୨:୩୩ ☆ ୭:୨୮ ୭:୨୮ ମାର୍‌କ ୧:୨୨; ଲୁକ୍ ୪:୩୨

କଇଲା, “ଏ ମାପରୁ, ତମେ ଜଦି ମନ୍ କଲାସ୍ନି ବଇଲେ ମକେ ସୁକଲ୍ କରି ପାରାସ୍ ।”

୩ ତେଇ ଜିସୁ ଆଡ଼ ଲାମାଇ ତାକେ ଚିଇ କଇଲା, “ମୁଇ ମନ୍ କଲିନି, ସୁକଲ୍ ଅ ।” ଜିସୁ ଏଡ଼କ କଇଲା ଦାପରେ ସେ ଲକ୍ ବଡ଼ ରଗେଅନି ନିକ ଅଇଲା । ୪ ଜିସୁ ତାକେ କଇଲା, “ସୁନ୍, ତୁଇ କେନ୍ତ୍ରିଅଇ ନିକ ଅଇଲୁସ୍, ଏ କାତା କାକେ ମିସା କ ନାଇ, ମାତର ସିଦା ପୁଜାରିର୍ ଲଗେ ଜାଇକରି ନିଜ୍ଜକେ ଦେକାଇ ଅ, ଆରି ତୁଇ ନିକ ଅଇ ଆରୁସ୍ ବଲି ସବୁ ଲକର୍ ଟାମେ ଜାନାଇଅଇବାକେ ମସାର୍ ନିୟ୍ମ୍ ଇସାବେ ପର୍ମେସର୍କେ ସର୍ପିଦେସ୍ ।”

ଜିସୁ ରମିୟ୍ ସନିଅମନର୍ ମୁକିଅର୍ ଗତିଦାଙ୍ଗତାକେ ନିକ କଲା

(ଲୁକ୍ ୭:୧-୧୦)

୫ ଜିସୁ କପରନାଉମ୍ ସଅରେ କେଟ୍ଲା । ସେଦାପରେ ଗଟେକ୍ ରମିୟ୍ ସନିଅମନର୍ ମୁକିଅ ତାକେ ବେଟ୍ ଅଇକରି ବାରୁଜିଆ କରି କଇଲା । ୬ “ଏ ମାପରୁ, ମର୍ ଗଟେକ୍ ଗତିଦାଙ୍ଗତା ଅଟନାଇ ତୁଲିକରି ବେସି କସ୍ଟ ପାଇଲାନି ଉଟେ ନାଇ, ବସେ ନାଇ ।”

୭ ଜିସୁ ତାକେ କଇଲା, “ମୁଇ ଆସି ତାକେ ନିକ କର୍ବି ।”

୮ ମାତର୍ ମୁକିଅ କଇଲା, “ନାଇ ମାପରୁ ତମେ ଜେ ମର୍ଗରେ ପାଦ୍ ପାକାଇସା, ଏଟାର୍ପାଇ ମର୍ ଅଦିକାର ନଇ । ତମେ ପଦେକ୍ କଇଦିଆ, ମର୍ ଗତିଦାଙ୍ଗତା ନିକ ଅଇଜାଇସି । ୯ କାଇକେବଇଲେ ମୁଇ ମର୍ ଉପ୍ପରର୍ ଅଦିକାରିର୍ ତଲେ କାମ୍ କଲିନି, ଅଇଲେ ମିସା ମର୍ ତଲେ କେତେ କେତେ ସନିଅମନ୍ ଆତଡ଼ । ସେମନର୍ ବିଡ଼ରେଅନି ଜଦି ମୁଇ ଗଟେକ୍ ଲକ୍କେ ଜାଆ ବଲି ଆଦେସ୍ ଦେଲେ, ସେ ଜାଇସି । ବିନ୍ଟାକେ ଆଉ ବଲି କଇଲେ ସେ ଆଇସି । ସେନ୍ତ୍ରସେ ମର୍ ଗତି ଦାଙ୍ଗତାକେ ଏଟା କର୍ ବଲି କଇଲା ଦାପରେ ସେ ସେଟା କର୍ସି ।”

୧୦ ଜିସୁ ଏଟା ସୁନି କାବା ଅଇଗାଲା, ଆରି ତାର୍ ସଙ୍ଗ୍ ଆଇବା ଲକ୍ମନକେ କଇଲା, “ମୁଇ ସଡ଼ କଇଲିନି, ଇସରାଏଲ୍ ବିଡ଼ରେ କନ୍ ଲକ୍ମଟାମେ ମିସା ଏ ଲକ୍ମର୍ ପାରା ବିସ୍ବାସ୍ ମୁଇ ଦେକିନାଇ । ୧୧ ଏକାତା ତମର୍ ମନେ ର, ପୁରୁବ୍ ଆରି ପସ୍ଟର୍ ବାଟର୍ ଦେସେଅନି କେତେ କେତେ ଲକ୍ ସରଗ୍ ରାଇଜେ ଆସି ଅବ୍‌ରାଆମ୍ ଇସାକ୍ ଆରି ଜାକୁବର୍ ସଙ୍ଗ୍ ବଜିତେଇ ଗଟେକ୍ଟାମେ କାଇବାକେ ବସ୍‌ବାଇ । ୧୨ ମାତର୍ ଜନ୍ ଲକ୍ମନ୍ ସରଗ୍ ରାଇଜେ ପୁର୍ବାର୍ ରଇଲାଇ, ସେମନକେ ବାଇରର୍ ଆନ୍ଦାରେ ପିଙ୍ଗା ଅଇସି । ତେଇ ସେମନ୍ ଦାଡ଼ ମୁଣ୍ଟ କାଡ଼ି ମାରିତପିଅଇ କାନ୍‌ବାଇ ।” ୧୩ ଜିସୁ ସନିଅମନର୍ ମୁକିଅକେ କଇଲା, “ତୁଇ ଏବେ ଗରେ ଜା । ତୁଇ ଜେନ୍ତ୍ର ବିସ୍ବାସ୍ କଲୁସ୍ନି ସେନ୍ତ୍ରାରିସେ ଅଇସି ।” ସମାନ୍ ସେ ବେଲାଇସେ ତାର୍ ଗତିଦାଙ୍ଗତା ପୁରାପୁରୁନ୍ ନିକ ଅଇଗାଲା ।

ଜିସୁ କେତେ କେତେ ଲକ୍ମନକେ ନିକ କଲା

(ମାର୍କ୍ ୧:୨୯-୩୪; ଲୁକ୍ ୪:୩୮-୪୧)

୧୪ ଜିସୁ ପିତରର୍ ଗରେ ଜାଇ ତାର୍ ସାଡ଼ି ଜର୍ଅଇକରି ଅଟନାଇ ତୁଲି ରଇବାଟା ଦେକଲା । ୧୫ ସେ ପିତରର୍ ସାଡ଼ିର୍ ଆତେ ଚିଇଲା ଦାପରେ ତାର୍ ଜର୍ ଚାଡ଼ିଗାଲା । ଆରି ସେ ଉଟିକରି ଜିସୁର୍ ସେବା କର୍ବାର୍ ଦାରଲା ।

୧୬ ସଙ୍ଗ୍ ଅଇଲାକେ ଲକ୍ମନ୍, କେତେକ୍ କେତେକ୍ ତୁମା ଦାରିରଇଲା ଲକ୍ମନକେ ଜିସୁର୍ ଲଗେ ଆନଲାଇ । ତାର୍ ପଦେକ୍ କାତା କଇଲା ଦାପରେସେ ତୁମା ଆଡ଼ମାନକେ ବାଡ଼କରାଇଦେଲା ଆରି ରଗି ଲକ୍ମନକେ ନିକ କଲା । ୧୭ ଏଟା କଲାଟା ଲାଗି ଜିସୁ ଜିସାଲୟ୍ ବବିସଡ଼ବକ୍ତା ଜାନାଇ ରଇଲାଟା ପୁରାପୁରୁନ୍

ସିଦ୍ଧକଲ୍ଲା । ବବିସ୍ତବକ୍ତା କଇରଇଲ୍ଲା “ଆମର୍ ଦୁକାସୁକା ସବୁ ନିଜେ ନେଲ୍ଲା ଆରି ଆମର୍ ଜର୍ଦ୍ଦୁକା ବଇଲ୍ଲା ।”

ଜିସୁର ସଙ୍ଗ ଜିବା ବିସଇ

(ଲୁକ ୯:୫୭-୬୨)

୧୮ ଜିସୁ ତାର ଚାରିବେଟି ରଇଲ୍ଲା ବେସି ଲକ୍ମନକେ ଦେକିକରି ତାର ସିସ୍ତାନକେ ଗାଡ଼ ସେପାଟ୍ ଜିବାକେ କଇଲ୍ଲା । ୧୯ ତେଇ ଗଟେକ୍ ଜିଉଦିମନର୍ ସାସ୍ତର ସିକାଉ ତାର ଲଗେ ଆସି କଇଲ୍ଲା, “ଏ ଗୁରୁ ତମେ ଜନ୍ ଜାଗାଇ ଗାଲେ ମିସା ମୁଇ ତମର୍ ସଙ୍ଗ ଆଇବି ।”

୨୦ ମାତର୍ ଜିସୁ ତାକେ କଇଲ୍ଲା, “କଲିଆ ରଇବାକେ ପାଆର୍ ଆଚେ, ଆରି ଉଡ଼ିବୁଲ୍ଲାବା ଚତଇମନ୍ ରଇବାକେ ଗୁଡା ଆଚେ, ମାତର୍ ନର୍ପିଲ୍ଲା ମୁଇ, ମକେ ରଇବାକେ ଜାଗା ନାଇ ।”

୨୧ ଆରି ସିସ୍ତାନର୍ ବିତ୍ତରେଅନି ଗଟେକ୍ ସିସ୍ କଇଲ୍ଲା, “ଏ ମାପୁରୁ, ମକେ ପର୍ତୁମ୍ ମର୍ ବାବାକେ ଜାଇ ତପି ଆଇବାକେ ମେଲାନି ଦିଆ ।”

୨୨ ମାତର୍ ଜିସୁ ତାକେ କଇଲ୍ଲା, “ମରିଗାଲ୍ଲା ଲକ୍ମନ୍ ମଲ୍ଲା ଲକ୍ମନକେ ତପଡ଼, ତୁଇ ମର୍ ପଚେ ପଚେ ଆଉ ।”

ଜିସୁ ବାଉ ପବନକେ ତବିର୍ କଲ୍ଲା

(ମାର୍କ ୪:୩୫-୪୧; ଲୁକ ୮:୨୨-୨୫)

୨୩ ତାର ପଚେ ଜିସୁ ଗଟେକ୍ ଡଙ୍ଗାଇ ଚଗ୍ଲାକେ ତାର ସିସ୍ତାନ ମିସା ତାର ସଙ୍ଗ ଗାଲାଇ । ୨୪ ସେ ବେଲ୍ଲା ଅଟାଡ଼ ସମ୍ପୁରେ ଏକ୍ତି ବାଉପବନ ଆଇଲ୍ଲା ଆରି ଉଲ୍ଲକାର୍ ଲାଗି ଡଙ୍ଗା ପାନିତେଇ ବୁଡ଼ିଜିବା ପାରା ଅଇଲ୍ଲା । ମାତର୍ ଜିସୁ ଡଙ୍ଗାଇ ସଇଦେଇ ରଇଲ୍ଲା । ୨୫ ଆରି ସିସ୍ତାନ ଜିସୁର ଲଗେ ଜାଇକରି ତାକେ ଉଟାଇ କଇଲ୍ଲା, “ଏ ମାପୁରୁ ଆମ୍ଭକେ ରକିଆ କର୍ । ନଇଲେ ଆମେ ବୁଡ଼ି ମରିଜିବୁବେ ।”

୨୬ ଜିସୁ ସେମାନକେ କଇଲ୍ଲା, “ଏ ବିସ୍ବାସେ ତାଟ୍ ନ ରଇଲ୍ଲା ଲକ୍ମନ୍, ତମେ କାଇକେ ଏତେକ୍ ଡରିଗାଲାସ୍ତନି ?” ଜିସୁ ବାଉପବନକେ ଆରି ଲଅଡ଼ିକେ ଦମ୍ଭକାଇଲ୍ଲା । ତେବର୍ପାଇ ବାଉପବନ ଆରି ଲଅଡ଼ି ତବିର୍ ଅଇଗାଲ୍ଲା ।

୨୭ ଏଟା ଦେକି ସିସ୍ତାନ ବେସି କାବାଅଇଜାଇ ତାକର୍ ତାକର୍ ବିତ୍ତରେ କୁଆବଲ୍ଲା ଅଇଲାଇ, “ଏ କେନ୍ତାର୍ ଲକ୍ ଜେ ବାଉପବନ ଆରି ଲଅଡ଼ି ମିସା ଆର୍ କାତା ମାନ୍ଲାଇନି ।”

ଜିସୁ ଦୁଇଟା ଡୁମା ଡସାଇଅଉମନକେ ନିକ କଲ୍ଲା

(ମାର୍କ ୫:୧-୨୦; ଲୁକ ୮:୨୬-୩୯)

୨୮ ଜିସୁ ଆରି ତାର ସିସ୍ତାନ ଗାଡ଼ ସେପାଟ୍ ଗଦ୍ରିୟ ନାଉର୍ ଜାଗାଇ କେଟ୍ଲା ଦାପ୍ରେ, ଦୁଇଟା ଡୁମା ଡସ୍ଲାଇ ଲକ୍ ତାକେ ବେଟ୍ ଅଇଲାଇ । ସେମନ୍ ମସନ୍ ବିତ୍ତରେ ରଇତେରଇଲାଇ । ଆରି ସେମନ୍ ଏକ୍ତି ରଇଲାଇ ଜେ, ସେ ବାଟେ କେ ମିସା ଆସ୍ ଜା ନ ଅଇତେ ରଇଲାଇ । ୨୯ ସେ ଲକ୍ମନ୍ ବେସି କିଟ୍କିରି କରି କଇଲାଇ, “ଏ ପର୍ତ୍ତମେସରର୍ ପିଲ୍ଲା ଆମର୍ ଟାନେ ତର୍ କାଇ କାମ୍ ଆଚେ ? ବେଲ୍ କାଲ୍ ନ କେଟ୍ତେ ତୁଇ କାଇ ଡସ୍ ଦେବାକେ ଇତି ଆଇଲୁସ୍ କି ?”

୩୦ ସେବେଲାଇ ସେ ଜାଗାଇଅନି କଣ୍ଡେକ୍ ଦୁରିକେ ଗଟେକ୍ ବଡ଼ ଗୁସ୍ରି ମାନ୍ଦା ଚାରାଇତେରଇଲାଇ । ୩୧ କାରାପ୍ ଆଡ଼ମାନ୍ ଜିସୁକେ ଗୁଆରି କରି କଇଲାଇ, “ତୁଇ ଜଦି ଆମ୍ଭକେ ଏ ଲକ୍ମନର୍ତେଇ ଅନି ବାଟକରାଇ ଦେଇସୁ ବଇଲେ ସେ ଗୁସ୍ରି ମାନ୍ଦା ବିତ୍ତରେ ଜିବାକେ, ଆଦେସ୍ ଦେ ।”

୩୨ ଜିସୁ ସେମାନଙ୍କେ ଜା ! ବଲି କଇଲାକେ କାରାପ୍ ଆଡ଼ମାନ ସେ ଲକ୍‌ମାନରତେଇଅନି ବାରଇକରି ଗୁସ୍‌ରିମାନର ବିତ୍‌ରେ ପୁରୁଲାଇ । ତେବର୍ ପାଇ, ଗୁସ୍‌ରିମାନ ଟିପେଅନି ଗସ୍‌ରି ସମ୍‌ଦୁରେ ବୁଡ଼ି ମଲାଇ ।

୩୩ ଆରି ତେଇ ଗୁସ୍‌ରି ଚାରାଇତେ ରଇବା ଲକ୍‌ମାନ ପାଲାଇ କରି ତୁମା ଡସି ରଇଲା ଲକ୍‌ମାନଙ୍କେ କାଇକାଇଟା ଅଇଲା ସେଟା ସବୁ କଇଦେଲାଇ । ୩୪ ଆରି ସେ ଗଡ଼ର ସବୁ ଲକ୍‌ମାନ ଜିସୁକେ ଦେକ୍‌ବାକେ ଆଇଲାଇ । ସେମାନ ତାକେ ଦେକିକରି ସେ ଜାଗା ଚାଡ଼ି ଜା ବଲି ଗୁଆରି କଇଲାଇ ।



ଜିସୁ ଚେରେଙ୍ଗ୍ ରଗିକେ ନିକ କରବାଟା

(ମାର୍କ ୨:୧-୧୨; ଲୁକ୍ ୫:୧୭-୨୬)

୧ ଜିସୁ ତଙ୍ଗାଇ ବସି ଗାଡ଼ ସେପାଟେ ରଇଲା ନିଜର ଗଡେ ବାଉଡ଼ି ଗାଲା । ୨ ଆରି ତେଇ ଲକ୍‌ମାନ ଗଟେକ୍ ଚେରେଙ୍ଗ୍ ରଗିକେ ବଇକରି ତାର ଲଗେ ଆନ୍‌ଲାଇ । ଚେରେଙ୍ଗ୍ ରଗି ଅଟନାଇ ସଇରଇଲା । ସେ ଲକ୍‌ମାନର ବିସ୍‌ବାସ୍ ଦେକି ରଗିକେ କଇଲା, “ସାଆସ୍ ଦାର, ତର ସବୁ ପାପ୍ କେମା ଅଇଗାଲା ।”

୩ ଏ କାତା ସୁନି କେତେଟା ସାସ୍‌ତର ସିକାଉମନ୍ ତାକର ତାକର ବିତ୍‌ରେ କାତା ଅଇଲାଇ, “ଏ ଲକ୍ କାଇକେ ପର୍‌ମେସରର ନିନ୍ଦା କଲାନି ?”

୪ ଜିସୁ ତାକର ମନର ଚିନ୍ତା ଜାନି କଇଲା, “ତମେ ନିଜର ନିଜର ମନେ କାଇକେ କାରାପ୍ ଚିନ୍ତା କଲାସ୍‌ନି ? ୫ 'ତମର ପାପ୍‌ସବୁ କେମା ଅଇଗାଲା ବଲି କଇବାଟା ସଅଜ୍ କି 'ଉଟିକରି, ଇଣ୍ଡିଜା ବଲି କଇବାଟା ଅଦିକ୍ ସଅଜ୍ ? ୬ ମାତର ଜଗତର ପାପ୍ କେମା କରବାକେ ନରପିଲା, ମର ଅଦିକାର୍ ଆଚେ, ମୁଇ ଏଟା ତମର ମୁଆଟେ ଦେକାଇବି ।” ତାର ପଚେ ଜିସୁ ଚେରେଙ୍ଗ୍ ରଗିକେ କଇଲା, “ଉଟ୍, ନିଜର ଟାଟି ଦାରି ଗରେ ଉଟିଜା ।”

୭ ଆରି ସେ ଲକ୍ ଉଟିକରି ଗରେ ବାରିଗାଲା । ୮ ଲକ୍‌ମାନ ସେଟା ଦେକି କାବା ଅଇଜାଇ ଡରିଗାଲାଇ । ମାତର ନର୍ ଲକ୍‌କେ ଏନ୍ତାରି ଅଦିକାର୍ ଦେଲାର୍ ପାଇ ପର୍‌ମେସରକେ ଡାକ୍‌ପୁଟା କଲାଇ ।

ଜିସୁ ମାଡ଼ିଉକେ ଡାକ୍‌ଲା

(ମାର୍କ ୨:୧୮-୨୨; ଲୁକ୍ ୫:୩୩-୩୯)

୯ ଜିସୁ ତେଇଅନି ଉଟି ଜିବାବେଲେ ମାଡ଼ିଉ ନାଉଁର ଗଟେକ୍ ସିସ୍‌ତୁ ମାଙ୍ଗୁକେ, ତାର ସିସ୍‌ତୁମାଙ୍ଗୁମନ୍ ମାଙ୍ଗ୍‌ବା ଜାଗାଇ ବସିରଇଲାଟା ଦେକି କଇଲା, “ମର ସଙ୍ଗ୍ ଆଉ ।” ମାଡ଼ିଉ ସିସ୍‌ତୁମାଙ୍ଗୁମନ୍ ମାଙ୍ଗ୍‌ବା ଜାଗାଇଅନି ଉଟି ଜିସୁର ସଙ୍ଗ୍ ଗାଲା ।

୧୦ \*ଜିସୁ ମାଡ଼ିଉର ଗରେ କାଇବାବେଲେ ବେସି ସିସ୍‌ତୁମାଙ୍ଗୁମନ୍, ଆରି ପାପି ଲକ୍‌ମାନ ତେଇ ଜିସୁ ଆରି ତାର ସିସ୍‌ମନ୍‌ର ସଙ୍ଗ୍ ବସି କାଇତେ ରଇଲାଇ । ୧୧ ଏଟା ଦେକି ପାରୁସି ଲକ୍‌ମାନ ଜିସୁର ସିସ୍‌ମନ୍‌କେ ପାଚାରଲାଇ, “କାଇକେ ତମର ଗୁରୁ ସିସ୍‌ତୁମାଙ୍ଗୁମନ୍‌ର ସଙ୍ଗ୍ ଆରି ପାପି ଲକ୍‌ମାନ‌ର ସଙ୍ଗ୍ ବସି କାଇଲାନି ?”

୧୨ ଜିସୁ କଇଲା, “ନିକ ରଇଲା ଲକ୍‌ର ପାଇ ଡାକ୍‌ଦର୍ ଲଡା ନାଇ । ମାତର ଜରଦୁକାର୍ ଲକ୍‌ମାନ‌ର ପାଇ ଡାକ୍‌ଦର୍ ଲଡା ଆଚେ । ୧୩ \*ସାସ୍‌ତରେ ଲେକାଅଇଆଚେ, 'ମୁଇ ପସୁ ପୁଜ୍‌ବା ବିରୁଟାନେଅନି, ଲକ୍‌ମାନ‌କେ ଦୟା ଦେକାଇବାଟା ମନ୍ କଲିନି । ଏ କାତାର୍ ଅରଡ୍ କାଇଟା ? ଜାଇକରି ବୁଜ୍‌ବାକେ ଚେସ୍‌ଟା କରା । ମୁଇ ଦରମ୍ ଲକ୍‌ମାନ‌କେ ଡାକ୍‌ବାକେ ଆସି ନାଇ, ପାପିମନ୍‌କେ ଡାକ୍‌ବାର୍ ଆସିଆଟି ।”

କାଇକେ ଉପାସ୍ କରବାର୍  
(ମାର୍ଚ୍ଚ ୨:୧୮-୨୨; ଲୁକ୍ ୫:୩୩-୩୯)

୧୪ ତାର୍ ପତେ ଦିନେକ୍ ତୁବନ୍ ଦେଉ ଜଅନର୍ ସିସ୍‌ମନ୍ ଜିସୁର୍ ଲଗେ ଆସି ପାଟାର୍‌ଲାକ୍, “ଆମେ ଆରି ପାରୁସିମନ୍ ବେସି ତର୍ ଲାକା ଉପାସ୍ କଲୁନି, ମାତର୍ ତମର୍ ସିସ୍‌ମନ୍ କାଇକେ ଉପାସ୍ କରତ୍ ନାଇ ?”

୧୫ ଜିସୁ ସେମନ୍‌କେ କଇଲା, “ବିବା ଦାଙ୍ଗ୍‌ତା ଜେଡେବେଲେ ଜାକ ଦାଙ୍ଗ୍‌ତାମନ୍‌ର ସଙ୍ଗ୍ ବିବାଗରେ ରଇସି, ସେ ଦିନ୍ ଜାକ ସଙ୍ଗର୍ ଦାଙ୍ଗ୍‌ତାମନ୍ ଦୁକ୍ ନ କରତ୍ । ମାତର୍ ଜେଡେବଲ୍ ବିବା ଅଇବା ଦାଙ୍ଗ୍‌ତାକେ ସଙ୍ଗର୍‌ଦାଙ୍ଗ୍‌ତାମନ୍‌ରଟାନେଅନି ଦାରିଜିବାଇ, ସେମନ୍ ଦୁକ୍ କରି ଉପାସ୍ କରବାଇ ।”

୧୬ କେ ମିସା ପୁରନା ଲୁଗା କାଣା ଅଇଲାଟାନେ, ନୁଆ ଲୁଗାର୍ ଗରଣ୍ଡା ନ ସିଲାଅତ୍, କାଇକେ ବଇଲେ ନୁଆ ଗରଣ୍ଡା ପୁରନା ଲୁଗାକେ ବେସି ଚିରି ଦେଇସି । ୧୭ ଆରି, କେ ମିସା ନୁଆ ଅଙ୍ଗ୍‌ର୍ ରସ୍, ଚାମ୍ ସଙ୍ଗ୍ ତିଆର୍ ଅଇଲା ପୁରନା ମୁନାଇ ବେସି ଦିନ୍ ନ ସଙ୍ଗ୍‌ଅତ୍, ସଙ୍ଗ୍‌ଇଲେ ମୁନା ପାଟିଜାଇସି ଆରି ରସ୍ ଚିଡ଼ତେ ତାଲି ଅଇଜାଇସି । ସେଟାର୍ ପାଇ ନୁଆ ରସ୍ ନୁଆ ମୁନାଇ ସଙ୍ଗ୍‌ଇବାଇ । ଏଡ଼ି ସଙ୍ଗ୍‌ଇଲେ ମୁନା ଆରି ରସ୍ ଦୁଇଟା ଜାକ ନସ୍‌ଟ ନ ଅଏ ।

ଜାଇରସର୍ ଟକି ଆରି ଜିସୁର୍ ପଟିଆ ଜାଲି ଚିଇଲା ମାଇଜି  
(ମାର୍ଚ୍ଚ ୫:୨୧-୪୩; ଲୁକ୍ ୮:୪୦-୫୬)

୧୮ ଜିସୁ ସେମନ୍‌କେ ଏ ସବୁ କାତା କଇଲା ବେଲେ, ଦେକା ଗଟେକ୍ ଜିଉଦିମନ୍‌ର୍ ପାର୍‌ତନା ଗରର୍ ନେତା ଜିସୁର୍ ଲଗେ ଆସି ମାଣ୍ଡିକୁଟା ଦେଇ କଇଲା, “ମର୍ ଟକି ଏବେସେ ମରିଗାଲା ଆତେ, ମାତର୍ ତୁଇ ଆସି ତାର୍ ଉପରେ ଆଡ଼ ସଙ୍ଗ୍‌ଇଲେ ସେ ବର୍‌ସି ।”

୧୯ ଜିସୁ ଦାପରେ ଉଟିକରି ତାର୍ ସିସ୍‌ମନ୍‌ର ସଙ୍ଗ୍ ଗାଲା ।

୨୦ ତେଇ ଗଟେକ୍ ମାଇଜି ଜିସୁର୍ ପଟ୍‌ବାଟେ ଆଇଲା । ତାକେ ବାର ବରସ୍ ଜାକ ବନି ଜାଇତେ ରଇବା ରଗ୍ ଅଇରଇଲା । ସେ ମାଇଜି ପତେ ଜାଇ ଜିସୁର୍ ଲୁଗା ଚିଇଲା । ୨୧ ସେ ମନେ ମନେ ବାବ୍‌ଲା ମୁଇ ତାର୍ ପିୟ୍‌ଲାଟା ଚିଇଲେ ନିମାନ୍ ଅଇଜିବି ।

୨୨ ମାତର୍ ଜିସୁ ପାସ୍‌ଲି କରି ତାକେ ଦେକି କଇଲା, “ଏ ନୁନି, ତର୍‌ନାଇ ସାଆସ୍ ଦାର୍, ତର୍ ବିସ୍‌ବାସ୍ ତକେ ନିମାନ୍ କରିଆତେ ।” ଏଡ଼କି କଇଲା ଦାପରେ ସେ ମାଇଜି ନିମାନ୍ ଅଇଗାଲା । ୨୩ ତାର୍ ପତେ ଜିସୁ ଜିଉଦିମନ୍‌ର୍ ପାର୍‌ତନା ଗରର୍ ମୁକିଆର୍ ଗରେ କେଟ୍‌ଲା । ତେଇ ଦନ୍‌କର୍‌ବାକେ ଆସି ରଇଲା ଲକ୍‌ମନ୍, ଆରି ବାଜ୍‌ନିଆମନ୍ କାନ୍ଦାବୁବା ଅଇବାଟା ଦେକି, ୨୪ ଜିସୁ କଇଲା, “ସବୁ ଲକ୍ ଇତିଅନି ବାରଇଜା । ଏ ଟକିତା ମରେନାଇ, ସଇଆତେ ।” ତାର୍ କାତା ସୁନି ତେଇ ରଇଲା ଲକ୍‌ମନ୍ ତାକେ କିଜାଇବାର୍ ଦାର୍‌ଲାଇ । ୨୫ ମାତର୍ ଲକ୍‌ମନ୍‌କେ ବାର୍‌କଲା ପତେ ଜିସୁ ବାକ୍‌ରାଇ ଜାଇ ଟକିର୍ ଆତେ ଦାରି ତାକେ ଉଟାଇଲା । ଟକି ଦାପରେ ଉଟିକରି ଚିଆଅଇଲା । ୨୬ ଏ ଗଟ୍‌ନାର୍ କବର୍ ସେ ଜାଗାର୍ ଗୁଲାଇ ବାଟର୍ ଲକ୍ ସୁନ୍‌ଲାଇ ।

ଜିସୁ ଦୁଇଟା କାଣାକେ ନିକ କଲା

୨୭ ଜିସୁ ସେ ଜାଗାଇଅନି ବାରଇ ଜିବାବେଲେ ଦୁଇଟା କାଣା, ତାର୍ ପତେ ପତେ ଇଣ୍ଡି ଆଇଲାଇ । ସେମନ୍ ଆଉଲି ଅଇକରି କଇବାର୍ ଦାର୍‌ଲାଇ । “ଏ ଦାଉଦ୍ ରାଜାର୍ ପଅ ! ଆମ୍‌କେ ଦୟା କରା ।”

୨୮ ଜିସୁ ଗଟେକ୍ ଗରେ ଗାଲା ଆରି କାଣାମନ୍ ମିସା ତାର୍ ପଟ୍ ପଟ୍ ପୁରୁଲାଇ । ପୁରୁଲାକେ ଜିସୁ ସେମନ୍‌କେ ପାଟାର୍‌ଲା, “ମୁଇ ତମର୍ ଆଁକି ନିକ କରି ପାର୍‌ବି ବଲି ତମେ ବିସ୍‌ବାସ୍ କଲାସ୍‌ନି କି ?” ସେମନ୍ କଇଲାଇ “ଉଁ ମାପୁରୁ ।”

୨୯ ତାର ପରେ ଜିସୁ ସେମାନରୁ ଆଁକି ଚିତ୍ତକରି କଇଲା, “ମକେ ବିସ୍‌ବାସ୍ କଲାର୍ ଲାଗି ତମରୁ ଆଁକି ତିସ୍ ।” ୩୦ ଜିସୁ କଇଲା ଦାପ୍‌ରେ କାଣାମନ୍ ଆଁକି ଦେକିପାରଲାଇ । ଆରି ଜିସୁ, ସେମନ୍‌କେ ଡାଟ୍‌କରି, “ଏ ବିସଇ କାକେ ମିସା କୁଆ ନାଇ ।” ବଲି କଇଲା ।

୩୧ ମାତର ସେମନ୍ ବାରଇ ଜାଇ ଜିସୁର ଏ କରିରଇବାଟା ଗୁଲାଇ ଦେସେ ଜାନାଇଲାଇ ।

ଗଟେକ୍ ଗୁଲା ଅଇଲା ଲକ୍ କାତା ଅଇ ପାରଲା

୩୨ ଜିସୁ ଆରି ତାର ସିସ୍‌ମନ୍ ସେ ଗରେଅନି ବାରଇ ଗାଲାବେଲେ କେତେଟା ଲକ୍‌ମନ୍ ଗଟେକ୍ ଗୁଲା ଲକ୍‌କେ ତାର ଲଗେ ଆନ୍‌ଲାଇ । ତାକେ ତୁମାଦାରିରଇଲାକେ ସେ ଗୁଲା ଅଇଜାଇରଇଲା । ୩୩ ଜିସୁ ତୁମାକେ ସେ ଲକ୍‌ରତେଇଅନି କେଦଲା ପରେ ସେ କାତାଅଇବାର ଦାରଲା । ଆରି ତେଇ ରଇଲା ଲକ୍‌ମନ୍ କାବାଅଇଜାଇ କଇଲା । “ଇସ୍‌ରାଏଲ୍ ଦେସେ ଏନ୍ତାରି ଗଟ୍‌ନା ଆମେ କେବେ ଦେକି ନ ରଇଲୁ ।” ୩୪ \*ମାତର ପାରୁସିମନ୍ କଇଲା, “ସେ ତୁମାମନ୍‌ ନେତାର ବପୁ ସଙ୍ଗ୍ ବିନ୍ ତୁମାମନ୍‌କେ କେଦଲାନି ।”

ଲକ୍‌ମନ୍‌କେ ଜିସୁର ଦୟା

୩୫ \*ଜିସୁ ଗାଉଁ ଗାଉଁ ବୁଲି ବୁଲି ଜିଉଦିମନ୍‌ ପାରତନା ଗର୍‌ମନ୍‌କେ ଜାଇ ସିକାଇ ଦେଇତେ ରଇଲା । ଆରି ପର୍‌ମେସରର ରାଇଜର୍ ନିମାନ୍ କାତା କଇତେରଇଲା । ବିନ୍ ବିନ୍ ଜର୍ ଆରି ରଗ୍ ଦାରଲା ଲକ୍‌ମନ୍‌କେ ସବୁ ନିକ କରିଦେଲା ଆରି ପାରତନା ଗରେ ସିକିଆ ଦେଲା । ୩୬ \*ଆରି ତେଇ ରଇଲା ଜବର୍ ଲକ୍‌ମନ୍‌କେ ଦେକିକରି ସେ ଦୟା କଲା । କାଇକେ ବଇଲେ ସେମନ୍ ବେସି ତାକିଜାଇରଇଲା ଆରି ସାଇଜ ପାଇବାକେ କନ୍ ବାଟେ ଜିବାର୍ ଆଟେ, ଜାନିନାପାରତେ ରଇଲା । ସେମନ୍ ଗଉଡ଼ ନଇଲା ମେଣ୍ଡାୟି ପାରା ଅଇଜାଇରଇଲା । ୩୭ \*ସେଡ଼କିବେଲେ ସେ ସିସ୍‌ମନ୍‌କେ କଇଲା, “ତାସ୍ ସିନା ବୁଡେକ୍ । ମାତର ସେଟା କାଟ୍‌ବାକେ, ଲକ୍‌ମନ୍ ଉନା ଆଟତ୍ । ୩୮ ତେବର୍‌ପାଇ ‘କେଡ଼ ରଇଲା ପଦାଇ କାଟ୍‌ବାକେ ବେସି ଲକ୍‌କେ ପାଟାଆ’ ବଲି ତାସ୍ କଲା ସାଉକାରକେ ପାରତନା କରା ।”

## ୧୦

ବାରଟା ସିସ୍‌ମନ୍

(ମାର୍‌କ ୩:୧୩-୧୯; ଲୁକ୍ ୬:୧୨-୧୬)

୧ ଜିସୁ ତାର ବାରଟା ପେରିଡ଼ମନ୍‌କେ ଲଗେ ଡାକି ତୁମା କେଦବାକେ, ସବୁ ରକାମର୍ ରଗ୍ ଆରି ଜର୍‌ଦୁକା ନିମାନ୍ କରବାକେ ଅଦିକାର୍ ଦେଲା । ୨ ସେ ବାରଟା ପେରିଡ଼ମନ୍‌ ନାଉଁ ଅଇଲାନି, ସିମନ୍ ଜାକେକି ପିତର ବଲି ଡାକ୍‌ବାଇ, ଆରି ତାର ବାଇ ଆନ୍‌ରିୟ୍, ଜେବଦିର୍ ପଅ ଜାକୁବ୍ ଆରି ତାର ବାଇ ଜଅନ୍, ୩ ପିଲିପ୍ ଆରି ବାରତଲମି, ତମା ଆରି ସିସ୍‌ତୁମାକୁମନ୍ ମାଡ଼ିତ, ଆଲ୍‌ପିର୍ ପଅ ଜାକୁବ୍ ଆରି ତଦିୟ୍, ୪ କିଣାନିୟ୍ ସିମନ୍ ଜେ କି ଇସ୍‌ରାଏଲ୍ ଲକ୍‌ମନ୍‌ର ମୁକ୍‌ତିର୍ ପାଇ ତେସ୍‌ଟା କରତେରଇଲା । ଆରି ଇସ୍‌କାରିୟ୍‌ଡ଼ ଜିଉଦା, ଜେ ଜିସୁକେ ସଡ଼ୁମନ୍‌କେ ସର୍‌ପିଦେଇ ରଇଲା ।

ବାରଟା ସିସ୍‌କେ ଦିଆଅଇରଇଲା କାମ୍

(ମାର୍‌କ ୬:୭-୧୩; ଲୁକ୍ ୯:୧-୬)

୫ ଜିସୁ ବାଟ୍ଟା ସିସମନକେ ପାଟାଈଲାବେଲେ କାଈଟା କରବାର୍ ଆଟେ କାଈଟା ନାଇ ବଲି ଆଦେସ୍ ଦେଇ କଇଲା, “ତମେ ଜିଉଦି ନଇଲା ଲକ୍ମନର୍ କନ୍ ଜାଗାଇ ମିସା ଜାଆନାଇ କି ସମିରଣିୟ୍ ଗଡେ ମିସା ପୁରାନାଇ । ୬ ମାତର୍ ଆଜିଗାଲା ମେଣ୍ଟାମନର୍ ପାରା ରଇବା ଈସରାଏଲ୍ମନର୍ ଲଗେ ଜା । ୭ ସେମନର୍ ଲଗେ ଜାଈ ଜାନାଇକରି କୁଆ, ସରଗ୍ ରାଇଜ୍ ଲଗେ ଆଇଲା ଆଟେ ! 「ଜରର୍ ଲକ୍ମନକେ ନିମାନ୍ କରା, ମଲା ଲକ୍ମନକେ ଉଟାଆ, ବଡ଼ ରଗିମନକେ ନିମାନ୍ କରା, ତୁମାମନକେ କେଦିଆସ୍ । ଏ ସବୁ ସରଗର୍ ମାପୁରୁର୍ ତେଇଅନି ତିନ୍ପଲିଆରେ ମିଲାଈ ଆଟାସ୍ । ସେନ୍ତି ବିନ୍ ଲକ୍ମନକେ କାଈଟା ନ ମାଙ୍ଗ୍ତେ ଦିଆସ୍ । ୯ ତାବୁ ମିସା ନିଆନାଇ । ୧୦ \*ଆରି ବୁଲ୍‌ବା ବେଲେ ମୁନା ଦାରି ବୁଲାନାଇ । ଗଟେକ୍ ଉଡ଼କା ପିନ୍ଦବା ପଟିଆ, ପାଣ୍ଡୁଇ, ତାଙ୍ଗ୍ ନିଆ ନାଇ । ପାଈଟି କରୁ ତାର୍ ବୁଡି ପାଇସିସେ ।”

୧୧ “ଗଟେକ୍ ଗଡେ କି ଗାଏଁ କେଟ୍‌ସା ବଇଲେ, ତେଇ କେ ତମ୍‌କେ ନିଜର୍ ଗରେ ତାକ୍‌ସି, ସେ ଲକ୍‌କେ କଜା, ଆରି ବିନେ ଜିବା ଜାକ ତାକର୍ ଗରେସେ ରୁଆ । ୧୨ ଗରେ କେଟ୍‌ଲା ବେଲେ ତେଇ ରଇଲା ଲକ୍ମନକେ ଜୁଆର୍ କରି କୁଆ, ‘ତମ୍‌କେ ସାନ୍ତି ମିଲ’ । ୧୩ ସେମନ୍ ଜଦି ତମ୍‌କେ ଗତିଆ କରି ତାକ୍‌ବାଇ, ତମେ କଇଲା ସାନ୍ତିର୍ କାତା ପୁରୁନ୍ ଅଇସି । ମାତର୍ ସେମନ୍ ଜଦି ତମ୍‌କେ ଗତିଆ କରି ନ ତାକଡ଼ ବଇଲେ, ତମେ କଇଲାଟା ତମର୍ ଲଗେ ବାଉଡି ଆଇସି । ୧୪ \*ଜଦି କେ ମିସା ତମ୍‌କେ ନ ତାକଡ଼ କି ତମେ କଇଲା କାତା ନ ସୁନଡ଼ ବଇଲେ, ‘ଏ ଜାଗା ଚାଡ଼ଲୁ’ ବଲି ଗଟେକ୍ ଚିନ୍ ପାରା ଦେକାଈବାକେ, ପାଦର୍ ଦୁଲି ପାପ୍‌ତି, ସେ ଜାଗା ଗାଡି ଉଟିଜା । ୧୫ \*\*ମୁଇ ତମ୍‌କେ ସଡ଼ କଇଲିନି, ବିଚାର୍‌ନା ଦିନେ ସଦମ୍ ଗମରାକେ ପର୍ମେସର୍ ଅଦିକ୍ ଦୟା ଦେକାଈସି ।”

ଆଇବା ଦୁକ୍‌କସ୍ଟ  
(ମାର୍‌କ ୧୩:୯-୧୩; ଲୁକ୍ ୨୧:୧୨-୧୫)

୧୬ \*ସୁନା, ବାଲିଆତୁରକାମନର୍ ବିଡ଼ରେ ମେଣ୍ଟାମନକେ ପାଟାଈଲା ପାରା ମୁଇ ତମ୍‌କେ ପାଟାଈଲିନି । ସାଁପର୍ ପାରା ଚାଲାକି ଅଇ ପରୁଆପାରା ସୁଆଲ୍ ଉଆ । ୧୭ \*ମାତର୍ ଜାଗର୍‌ଡ଼ ଅଇରୁଆ, କାଈକେ ବଇଲେ ଲକ୍ମନ ସେମନର୍ ବିଚାର୍ କରବା ଜାଗାମନର୍‌ତେଇ ତମ୍‌କେ ସର୍ପିଦେବାଇ ଆରି ପାର୍‌ତନା ଗର୍ମନକେ ତମ୍‌କେ କରଡା ମାର୍‌ବାଇ । ୧୮ ଆରି ତମେ ମର୍ ସିସ୍ ଅଇଲାର୍ ଲାଗି, ରାଜା ଆରି ସାସନ୍ କରବା ଲକ୍ମନର୍ ଲଗେ ନିଆଅଇ ବିଚାର୍ କରାଇଅଇସା । ଈତିଅନି ସେମନକେ ଆରି ଜିଉଦି ନଇଲା ଲକ୍ମନର୍ ତେଇ ମର୍ ବିସଇନେଇ କଇବାକେ ତମେ ବେଲା ପାଇସା । ୧୯ ତମର୍ ବିଚାର୍‌ନା ଅଇବାବେଲେ ‘କାଈଟା କଇବି, କେନ୍ତି କଇବି’ ବଲି ଚିନ୍ତା କରି ତେରେପେତେ ନ ଉଆ । ଚିକ୍ ସେବେଲାଈ ସେଟା ତମ୍‌କେ ଜାନାଇ ଦିଆଅଇସି । ୨୦ କାଈକେ ବଇଲେ ତମେ ନିଜେ କାଈଟା କଇବାକେ ନ ପଡେ । ବାବା ପର୍ମେସର୍ ସୁକଲ୍ ଆଡ଼ମାଇ ତମର୍ ଟଣ୍ଡେଅନି କାତା କଇସି ।”

୨୧ \*ଲକ୍ମନ ନିଜର୍ ବାଈକେ ମରନର୍ ଡଣ୍ଡ ବର୍ବାକେ ଦାରାଇଦେବାଇ । ବାବା ମିସା ନିଜର୍ ପିଲାମନକେ ସେନ୍ତାରି କରସି । ପିଲା ଟକିମନ୍ ବାବାମାଆର୍ ବିରଦେ ଉଟି ସେମନକେ ମରାଇବାଇ । ୨୨ \*ମକେ ବିସବାସ କଲାର୍ ଲାଗି ତମ୍‌କେ ସବୁ ଲକ୍ ଗିନ୍ କରବାଇ । ମାତର୍ ଜନ୍ ଲକ୍ ସାରାସାରି ଜାକ ସାଆସ୍ ଦାରି ରଇସି, ସେ ମୁକ୍‌ତି ପାଇସି । ୨୩ ଗଟେକ୍ ନଅରେ ଦୁକ୍ କସ୍ଟ ଦେଲେ, ତମେ ଆରି ଗଟେକ୍ ନଅରେ ଉଟି

\* ୧୦:୧୦ ୧୦:୧୦ ୧ମ କରନ୍ତିୟ୍ ୯:୧୪; ୧ମ ତିମତି ୫:୧୮ \* ୧୦:୧୪ ୧୦:୧୪ ପେରିଡ଼ ୧୩:୫୧ \* ୧୦:୧୫ ୧୦:୧୫ ମାଡ଼ିଉ ୧୧:୨୪ \* ୧୦:୧୫ ୧୦:୧୫ ଲୁକ୍ ୧୦:୪-୧୨ \* ୧୦:୧୬ ୧୦:୧୬ ଲୁକ୍ ୧୦:୩ \* ୧୦:୧୭ ୧୦:୧୭ ମାର୍‌କ ୧୩:୯-୧୧; ଲୁକ୍ ୧୨:୧୧, ୧୨:୨୧-୧୨-୧୫ \* ୧୦:୨୧ ୧୦:୨୧ ମାର୍‌କ ୧୩:୧୨; ଲୁକ୍ ୨୧:୧୬ \* ୧୦:୨୨ ୧୦:୨୨ ମାଡ଼ିଉ ୨୪:୯; ମାର୍‌କ ୧୩:୧୩; ଲୁକ୍ ୨୧:୧୭; ମାଡ଼ିଉ ୨୪:୧୩; ମାର୍‌କ ୧୩:୧୩

ପାଲାଆ । ମୁଇ ତମକେ ସତ୍‌କାତା କଇଲିନି, ତମେ ଇସରାଏଲ୍ ଦେସେ ରଇବା ସବୁ ଗତେ ବୁଲି ନ ସାରତେ, ନରପିଲା ମୁଇ ଆରି ତରେକ୍ ବାଉଡ଼ି ଆସିରଇବି ।

୨୪ \*କନ୍ ସିସ୍ ମିସା ଗୁରୁର୍ ତେଇଅନି ବଡ଼ ନର୍ଏ । ଗତିଦାଙ୍ଗଡ଼ା ସାଉକାରରତେଇଅନି ବଡ଼ ନର୍ଏ । ୨୫ \*ସିସ୍ ତାରୁ ଗୁରୁର୍ ପାରା ଆରି ଗତିଦାଙ୍ଗଡ଼ା ନିଜର୍ ସାଉକାର୍ ପାରା ଅଇଲେ ସେମନ୍ ସାରଦା ଅଇବାର୍ ଆତେ । ଗଟେକ୍ ଗରର୍ ମୁକିଆ ମକେ, ବାଲ୍‌ଜିବୁଲ୍ ବଲି ଡାକ୍‌ଲାଇନି ବଇଲେ, ଗରର୍ ଆରି ଅଦେକ୍ ଲକ୍‌ମନ୍‌କେ ବାଇଦରେ ଅଦିକ୍ କାରାପ୍ ନାଉଁ ଦାରି ଡାକ୍‌ବାଇ ।”

କାକେ ଡର୍‌ବାର୍  
(ଲୁକ୍ ୧୨:୨-୭)

୨୬ \*ସେଟାରପାଇ ଲକ୍‌ମନ୍‌କେ ଡରାନାଇ । ଜନ୍ ବିସଇ କି ଲୁଚ୍‌ତେ ଆତେ, ସେଟା କେବେ ନଇଲେ କେବେ ତିସସି ଆରି ସବୁ ଲୁଚ୍‌ଲା କାତାମନ୍ ଜାନା ପଡ଼ସି । ୨୭ ଜନ୍‌ଟା ମୁଇ ତମକେ ଆନ୍ଦାର୍ ବେଲାଇ କଇଲିନି ସେଟା ତମେ ଉଜଲେ କୁଆ, ଆରି ଜନ୍‌ଟା ଲୁଚ୍‌ତେ ସୁନିଆଟାସ୍ ସେଟା ଗରର୍ ଚାଉନି ଉପରେ ଚିଆଅଇ କୁଆ । ୨୮ ଜନ୍‌ଲକ୍‌ମନ୍ ତମର୍ ଗାଗଡ଼ ନସଟ୍ କର୍‌ବାଇ ମାତର୍ ତମର୍ ଆଡ଼ମାକେ କାଈଟା କରିନାପାରଡ଼ ସେମନ୍‌କେ ଡରାନାଇ । ମାତର୍ ଜନ୍ ପର୍‌ମେସର୍ ତମର୍ ଗାଗଡ଼ ଆରି ଆଡ଼ମାକେ ନରକ୍ କୁଣ୍ଡେ ପିଙ୍ଗସି, ତାକେ ଡରା । ୨୯ ଡାରୁଦେଇ ଦୁଇଟା ଚେଟିଆ ଚଡ଼ଇ ଗେନିପାରାସ୍, ମାତର୍ ତମର୍ ବାବା ପର୍‌ମେସର୍ ନାଜାନ୍‌ତେ ସେ ଚଡ଼ଇମନ୍‌ତେଇଅନି ଗଟେକ୍ ମିସା ନ ମରଡ଼ । ୩୦ ଆରି ପର୍‌ମେସର୍ ତମର୍ ମୁଣ୍ଡର୍ ଚେଣ୍ଡି ମିସା ଗଟେକ୍ ଗଟେକ୍ କରି ଏଜିଆତେ । ୩୧ ଡରାନାଇ, ବେସି ଚେଟିଆ ଚଡ଼ଇମନ୍‌ର୍ ତେଇ ଅନି ତମର୍ ଦାମ୍ ଅଦିକ୍ ।”

ଜିସୁକେ ନାମ୍‌ବାଟା  
(ଲୁକ୍ ୧୨:୮-୯)

୩୨ “ଜେ ମକେ ସବୁର୍ ମୁଆଟେ ‘ମର୍ ଲକ୍’ ବଲି ନାମସି, ମୁଇ ମିସା ମର୍ ସରଗର୍ ବାବାର୍ ମୁଆଟେ ସେମନ୍‌କେ ‘ମର୍ ଲକ୍’ ବଲି କଇବି । ୩୩ \*ମାତର୍ ଜନ୍ ଲକ୍ ମକେ ସବୁର୍ ମୁଆଟେ ‘ତାକେ ନାଜାନି’ ବଲି କଇସି, ମୁଇ ମିସା ମର୍ ସରଗର୍ ବାବାର୍ ମୁଆଟେ ‘ତାକେ ନାଜାନି’ ବଲି କଇବି ।”

ସାନ୍ତିର୍ ବାଦୁଲେ କାଣ୍ଡା  
(ଲୁକ୍ ୧୨:୫୧-୫୩; ଲୁକ୍ ୧୪:୨୬-୨୭)

୩୪ “ମୁଇ ଏ ଦୁନିଆଇ ସାନ୍ତି ଦେବାର୍ ଆସିଆତି ବଲି ତମେ ବାବା ନାଇ । ନାଇ, ସାନ୍ତି ଦେବାକେ ଆସି ନାଇ, କାଣ୍ଡା ଦେବାକେ ଆଇଲିଆତି । ୩୫ ମର୍ ଲାଗି ପିଲା ବାବାକେ ବିରଦ୍ କରସି, ଟକି ଆୟାକେ ବିରଦ୍ କରସି ଆରି ବୁଆରି ସାଡ଼ିରୁ ବିରଦେ ଉର୍‌ସି । ୩୬ ନିଜର୍ ଗରର୍ ଲକ୍‌ମନ୍‌ସେ ନିଜର୍ ସତ୍‌ରୁ ଅଇବାଇ ।”

୩୭ “କେମିସା ଜଦି ନିଜର୍ ମାବାବାକେ ମର୍‌ତେଇଅନି ଅଦିକ୍ ଆଲାଦ୍ କରସି, ସେ ମର୍ ସିସ୍ ଅଇନାପାରେ । ଆରି ଜନ୍ ଲକ୍ ମକେ ଆଲାଦ୍ କର୍‌ବାଟାନ୍‌ନେ ଅନି ନିଜର୍ ପିଲାଟକିକେ ଅଦିକ୍ ଆଲାଦ୍ କରସି ବଇଲେ ସେ ମର୍ ସିସ୍ ଅଇବାକେ ଅଦିକାର୍ ନ ପାଏ । ୩୮ \*ଜନ୍ ଲକ୍ ନିଜର୍ କୁରୁସ୍ ବଇ ମର୍ ସଙ୍ଗ୍ ନ ଆସେ ବଇଲେ ସେ ମର୍ ସିସ୍ ଅଇବାକେ ଅଦିକାର୍ ନ ପାଏ । ୩୯ \*ଜନ୍‌ଲକ୍ ନିଜର୍ ଜିବନ୍ ରକିଆ କର୍‌ବାକେ

\* ୧୦:୨୪ ୧୦:୨୪ ଲୁକ୍ ୬:୪୦; ଜଅନ୍ ୧୩:୧୭; ୧୫:୨୦    \* ୧୦:୨୫ ୧୦:୨୫ ମାଡ଼ିଉ ୯:୩୪; ୧୨:୨୪; ମାର୍‌କ୍ ୩:୨୨; ଲୁକ୍ ୧୧:୧୫    \* ୧୦:୨୬ ୧୦:୨୬ ମାର୍‌କ୍ ୪:୨୨; ଲୁକ୍ ୮:୧୭    \* ୧୦:୩୩ ୧୦:୩୩ ୧ୟ ଡିମତି ୨:୧୨  
\* ୧୦:୩୮ ୧୦:୩୮ ମାଡ଼ିଉ ୧୭:୨୪; ମାର୍‌କ୍ ୮:୩୪; ଲୁକ୍ ୯:୨୩    \* ୧୦:୩୯ ୧୦:୩୯ ମାଡ଼ିଉ ୧୭:୨୫; ମାର୍‌କ୍ ୮:୩୫; ଲୁକ୍ ୯:୨୪; ୧୭:୩୩; ଜଅନ୍ ୧୨:୨୫



ଚେସ୍‌ଟା କରୁଥି ବଇଲେ ସେ ସେଟା ଆରାଇସି । ମାଡ଼ର ଜେ ମର୍ ଲାଗି ତାର ଜିବନ୍ ଆରାଇସି ବଇଲେ, ସେ ସତଇସେ ସେଟା ରକିଆ କରୁସି ।”

ପୁରୁସକାର  
(ମାର୍କ ୯:୪୦)

୪୦ ☆ “ଜନ୍ ଲକ୍ ତମକେ ଡାକିନେଇସି, ସେ ମର୍ପାଇ ସେଟା କଲାନି । ଆରି ଜନ୍ ଲକ୍ ମକେ ଡାକିନେଇସି ସେ ମକେ ପାଟାଇଲା ବାବା ପରମେସରର୍ ପାଇ ସେଟା କଲାନି । ୪୧ ଜେ ମିସା ଗଟେକ୍ ବବିସଡ଼ବକ୍ତାକେ ‘ପର୍ମେସରର୍ କାତା ସୁନାଡ଼’ ବଲି ଡାକ୍ସି, ବବିସଡ଼ବକ୍ତାକେ ମିଲ୍‌ବା ପୁରୁସକାର୍‌ତେଇ ସେ ମିସା ମିସ୍ସି । ଆରି ଜେ ଦରମ୍ ଲକ୍‌କେ ଗରେ ଡାକ୍ସି, ଦରମ୍ ଲକ୍‌କେ ମିଲ୍‌ବା ପୁରୁସକାର୍‌ତେଇ ସେ ମିସା ମିସ୍ସି । ୪୨ ଆରି ଜନ୍ ଲକ୍ ମର୍ ପତେ ପତେ ଆଇବା ମୁକିଅ ନଇଲା ଗଟେକ୍ ସାନ୍ ସିସ୍‌କେ, ଗିଲ୍‌ସେକ୍ ପାନି ଦେଇସି, ସେ ମର୍ ସିସ୍ । ସେ ପୁରୁସକାର୍ ପାଇସି ଆକା ।”

### ୧୧

ଜିସୁ ଆରି ତୁବନ୍ ଦେଉ ଜଅନ୍  
(ଲୁକ୍ ୭:୨-୭)

୧ ଜିସୁ ବାର୍‌ଟା ସିସ୍‌ମନ୍‌କେ ସିକାଇ କରି କଇ ପାଟାଇ ସାର୍‌ଲା ପରେ, ସେ ଜାଗା ଚାଡ଼ିକରି ଲଗେ ରଇଲା ଗଡ଼ମନ୍‌ର ଲକ୍‌ମନ୍‌କେ ଜାଇ ସିକାଇଲା ଆରି ମାପ୍‌ରୁର୍ କାତା ସୁନାଇବାର୍ ଦାରଲା ।

୨ ସେ ବେଲା ତୁବନ୍‌ଦେଉ ଜଅନ୍ ବନ୍ଦିଗରେ ରଇଲା । ଜିସୁ ଜନ୍ କାମ୍‌ମନ୍ ସବୁ କର୍ତେ ରଇଲା, ତାର୍ କବର୍ ସୁନି ତାର୍ କେତେଟା ସିସ୍‌ମନ୍‌କେ ଜିସୁର୍ ଲଗେ ପାଟାଇଲା । ୩ ସେମନ୍ ଜାଇ ଜିସୁକେ ପାଟାରଲା, “ଜନ୍ ଲକ୍ ଆଇସି ବଲି ଜଅନ୍ କଇରଇଲା, ସେ ଲକ୍ ତମେ କି ? ନଇଲେ, ଆମେ ଆରି ବିନ୍ ଲକ୍‌କେ ଜାଗ୍‌ବୁ କି ?”

୪ ଜିସୁ ସେମନ୍‌କେ କଇଲା, “ତମେ ବାଉଡ଼ି ଜାଇ ଜନ୍‌ଟା ସବୁ ଦେକ୍‌ଲାସ୍ ଆରି ସୁନ୍‌ଲାସ୍, ଜଅନ୍‌କେ କଇଦିଆସ୍ । ୫ କାଣାମନ୍ ଦେକିପାର୍‌ଲାଇନି, ଚଟାମନ୍ ଇଣ୍ଟୁଲାଇନି, ବଡ଼ ରଗିମନ୍ ନିମାନ୍ ଅଇଲାଇନି, ବଇରାମନ୍ ସୁନ୍‌ଲାଇନି, ମଲା ଲକ୍‌ମନ୍ ଜିବନ୍ ଅଇଲାଇନି ଆରି ଗରିବ୍ ଲକ୍‌ମନ୍‌ର ଲଗେ ନିମାନ୍ କବର୍ କେଟ୍‌ଲାନି । ୬ ଜେ ମର୍ ବିସଇ ନେଇକରି, ‘ସେ କି ନଏଁ ଆଲେ’ ବଲି ନ ବାବେ, ସେ କେତେ ନିକ କରମର୍ ଲକ୍ । ଜେ ମକେ ନାମ୍‌ସି ଆରି ମକେ ସବୁ ବେଲା ବିସ୍‌ବାସ୍ କରୁସି ତାକେ ପର୍ମେସର୍ ଆସିର୍‌ବାଦ୍ କରୁସି ।” ବଲି କଇଲା ।

୭ ଜଅନ୍‌ର ସିସ୍‌ମନ୍ ବାଉଡ଼ି ଗାଲାବେଲେ ଜିସୁ ଲକ୍‌ମନ୍‌କେ ଜଅନ୍‌ର ବିସଇ କଇଲା, ତମେ ଜଅନ୍‌କେ ଦେକ୍‌ବାକେ ଜେତେବଲ୍ ମରୁବାଲିବୁଏଁ ଜାଇରଇଲାସ୍, କାଇଟା ଦେକ୍‌ବାକେ ଆସା କରିରଇଲାସ୍ ? ପବନ୍ ମାର୍‌ଲେ ଜୁଲ୍‌ବା ଗାଁସ୍ ପତର୍ ? 「 କାକେ ଦେକ୍‌ବାକେ ଜାଇ ରଇଲାସ୍ ? କାଇ ସୁନ୍‌ର୍ ବସ୍‌ତର୍ ପିନ୍‌ରଇବା ଲକ୍‌କେ ଦେକ୍‌ବୁ ବଲି ଜାଇ ରଇଲାସ୍ କି ? ସେନ୍ତ୍ରି ବସ୍‌ତର୍ ପିନ୍‌ବା ଲକ୍ ରାଜାର୍ ଗରେ ରଇବାଇ । ୯ ମକେ କୁଆ, କାଇଟା ଦେକ୍‌ବାକେ ଜାଇ ରଇଲାସ୍ ? ଗଟେକ୍ ବବିସଡ଼ବକ୍ତାକେ ଦେକ୍‌ବୁ ବଲିକରି କି ? ସେଟା ତ ସଡ଼, ମାଡ଼ର୍ ଅବ୍‌କା ବବିସଡ଼ବକ୍ତା ଟାନେଅନି ଗଟେକ୍ ଅଦିକ୍ ବଡ଼ ଲକ୍‌କେ ବେଟ୍‌ପାଇଆଟାସ୍ । ୧୦ କାଇକେ ବଇଲେ ଏ ଜଅନ୍‌ର ବିସଇ ସାସ୍‌ତରେ ଲୋକାଅଇଲା ଆତେ । ପର୍ମେସର୍ କଇଲା, “ତମର୍ ପାଇ ବାଟ୍ ଡିଆର୍ କର୍‌ବାକେ ମୁଇ ପର୍‌ତୁମ୍ ମର୍ ଦୁଡ଼କେ ପାଟାଇବି ।” ୧୧ ମୁଇ ତମକେ ସଡ଼ କଇଲିନି, ଏ ଦୁନିଆଇ

☆ ୧୦:୪୦ ୧୦:୪୦ ଲୁକ୍ ୧୦:୧୭; ଜଅନ୍ ୧୩:୨୦; ମାର୍କ ୯:୩୭; ଲୁକ୍ ୯:୪୮

ପୁରୁବେ ଅନି ଆଜିକେ ଜାକ ଜେତେକ୍ ଲକ୍ ସବୁ ଜନମ୍ ଅଇଲାଅଆଚଡ଼, ସବୁ ଲକ୍ମାନର୍ ବିତ୍ରେଅନି ତୁବନ୍ ଦେଉ ଜଅନ୍ ବଡ଼ । ମାତର୍ ସରଗ୍ ରାଇଜେ ଜେ ସବୁରଟାନେଅନି ସାନ୍, ସେ ଜଅନର୍ତେଇ ଅନି ବଡ଼ । ୧୨ \*ତୁବନ୍ ଦେଉ ଜଅନ୍ ପର୍ମେସରର୍ ନିକ କାତା ଜାନାଇବାଟା ଆରାମ୍ କଲାବେଲେ ଅନି ଆଜିକେ ଜାକ ସରଗ୍ ରାଇଜ୍ ନେଇକରି ବେସି ଜୁଇଦ୍ ଚାଲିଲାଆଚେ । ଦୟା ମାୟା ନଇଲା ଲକ୍ମାନ୍ ତାକର୍ ବପୁସକ୍ ସରଗ୍ ରାଇଜ୍ ଅଦିକାର୍ କର୍ବାକେ ଚେସ୍ଟା କଲାଇନି । ୧୩ ଜଅନ୍ ଆଇବା ଜାକ ମସାର୍ ନିୟମ୍ ଆରି ବବିସଡ଼ବକ୍ତାମନ୍ ସରଗ୍ ରାଇଜର୍ ବିସଇ କଇତେ ରଇଲା । ୧୪ \*ଜଦି ସେମନର୍ କାତା ତମେ ବିସବାସ୍ କରସା, ତେବେ ଜଅନ୍ ଅଇଲାନି ସେ ଏଲିୟ, ଜେ କି ପର୍ତୁମ୍ ଆଇବାର୍ ରଇଲା । ୧୫ ଜାକେ କାନୁଆଚେ, ସେ ସୁନ ।

୧୬ ଏ ଜୁଗର୍ ଲକ୍ମାନକେ କାର୍ ସଙ୍ଗ୍ ସମାନ୍ କରବି ? ସେମନ୍ ଆର୍ ମଜାଇ ବସିକରି କେଲୁବା ପିଲାମନର୍ ପାରା । ଗଟେକ୍ ଦଲୁର୍ ପିଲାମନ୍ ଆରି ଗଟେକ୍ ଦଲୁକେ କଇବାଇ, ୧୭ “ଆମେ ବିବା ବାଜା ବାଜାଇଲୁ, ମାତର୍ ତମେ ନାଟ୍ କରାସ୍ ନାଇ । ଦୁକର୍ ଗିଡ଼ ଗାଇଲୁ ତମେ କାନ୍ଦାସ୍ ନାଇ । ୧୮ ଜଅନ୍ ତରକେ ତର୍ ଉପାସ୍ କର୍ତେ ରଇଲା ଆରି କେବେ ମିସା ମଦ୍ ନ କାଇତେ ରଇଲା, ମାତର୍ ତମେ ତାକେ ତୁମା ଦାରଲା ଲକ୍ ବଲି କଇଲାସ୍ନି । ୧୯ ମାତର୍ ନର୍ପିଲା ମୁଇ କାଇଲେ କି ପିଇଲେ ମକେ କାଉରାଟା ଆରି ମଦୁଆଟା ବଲି କଇଲାସ୍ନି । ସିସତୁ ମାଜୁମନର୍ ଆରି ପାପି ଲକ୍ମାନର୍ ମଇତର୍ ବଲି କଇଲାସ୍ନି । ସେଟା ଜନ୍ଟା ଅବେ ଚାଡା, ପର୍ମେସରର୍ ବିଚାର୍ ସଡ଼ ଆକା । ଏଟା ତାର୍ କାମେଅନି ଜାନାପଡ଼ସି ।”

ବିସବାସ୍ ନକଲା ଗତର୍ ଲକ୍  
(ଲୁକ୍ ୧୦:୧୩-୧୫)

୨୦ ଜନ୍ ଗଡ଼ମନକେ ଜିସୁ ତାର୍ ବେସି କାବାଅଇଜିବା କାମମନ୍ କରିରଇଲା, ସେ ଗତର୍ ଲକ୍ମାନ ନିଜେ କରିରଇବା ପାପୁଲାଗି ମନ୍ ନ ବାଦୁଲାଇଲାଟା ଦେକି, ଜିସୁ ସେ ଗତର୍ ଲକ୍ମାନକେ ନିୟା କରି କଇଲା, ୨୧ “ଏ କରାଜିନର୍ ଲକ୍ମାନ, ତମେ କେତେ ଇନସ୍ତା ଅଇ ଡଣ୍ଟ ପାଇସା ! ଏ ବେଡ଼ସାଇଦାର୍ ଲକ୍ମାନ, ତମର୍ ଦସା ମିସା ସେକ୍ରିସେ । ତମର୍ ବିତରେ ଜନ୍ କାବାଅଇଜିବା କାମମନ୍ କରାଅଇଲାଆଚେ, ସେଟା ସବୁ ଜଦି ମୁଇ ସର ଆରି ସିଦନ୍ ଗତେ କରି ରଇଲେ, ସେ ଗତର୍ ଲକ୍ମାନ ପାପେଅନି ବାଅଡ଼ଲୁ ବଲି ଦେକାଇବାକେ ଗାଗ୍ତେ ଚାର୍ ଡାଲିଅଇ, ବାସ୍ତା ପିନ୍ଦିକରି ମନ୍ ବାଦୁଲାଇତାଇ ।”

୨୨ “ମୁଇ ତମକେ ସଡ଼ କଇଲିନି, ପର୍ମେସରର୍ ବିଚାର୍ ଦିନେ ତମର୍ତେଇଅନି ସର୍ ଆରି ସିଦନ୍ ଗତର୍ ଲକ୍ମାନକେ ସେ ଅଦିକ୍ ଦୟା ଦେକାଇସି ।” ୨୩ ଏ କପର୍ନାଉମର୍ ଲକ୍ମାନ ! ତମେ କାଇ ନିଜେ ସର୍ଗେ ଜିବାକେ ଚେସ୍ଟା କଲାସ୍ନି ? ତମେ ନର୍ତେକେ ପିଙ୍ଗା ଅଇସି । ତମର୍ ବିତରେ ମୁଇ ଜନ୍ କାବାଅଇଜିବା କାମମନ୍ କରିରଇଲି, ସେଟା ଜଦି ସଦମ୍ ଗତେ କରି ରଇଲେ, ସେ ଗଡ଼ ଆଜିକେ ଜାକ ରଇତା ।

୨୪ \*“ମୁଇ ତମକେ ସଡ଼ କାତା କଇଲିନି, ପର୍ମେସରର୍ ବିଚାର୍ନା ଦିନେ ତମର୍ତେଇଅନି ସଦମର୍ ଲକ୍ମାନକେ ସେ ଅଦିକ୍ ଦୟା ଦେକାଇସି ।”

ମର୍ ଲଗେ ଆସି ପୁଣ୍ଡା  
(ଲୁକ୍ ୧୦:୨୧-୨୨)

\* ୧୧:୧୨ ୧୧:୧୨ ଲୁକ୍ ୧୬:୧୬ \* ୧୧:୧୪ ୧୧:୧୪ ମାଡ଼ିଉ ୧୭:୧୦-୧୩; ମାର୍କ ୯:୧୧-୧୩ \* ୧୧:୨୪ ୧୧:୨୪ ମାଡ଼ିଉ ୧୦:୧୫; ଲୁକ୍ ୧୦:୧୨

୨୫ ଜିସୁ ସେବେଲାଇ ପାର୍ତନା କରି କଇଲା, “ଏ ବାବା, ତମେ ସରଗ ଆରି ମର୍ପୁରର୍ ମାପୁରୁ । ଏ ସବୁ ବିସଇ ସିକ୍‌ଲା ଲକ୍ ଆରି ଗିଆନି ରଇବା ଲକର୍‌ତେଇଅନି ଲୁଟାଇ ସଙ୍ଗଇ, ନସିକ୍‌ଲା ଲକ୍‌ମନର୍ ତେଇ ଜାନାଇ ଆରୁସ୍ ବଲି ମୁଇ ତମକେ ଦନିଅବାଦ୍ ଦେଲିନି ।” ୨୬ ଓ ବାବା, ତମର୍ ମନ୍ କଲା ଇସାବେ ଏ ସବୁ ଗର୍‌ଲାନି ।”

୨୭ \*“ମର୍ ବାବା ମକେ ସବୁ ବିସଇ ଦାନ କଲାଆଚେ । ବାବାକେ ଚାଡ଼ି କେ ମିସା ତାର୍ ପିଲା, ମକେ ନାଜାନଡ଼ । ଆରି ତାର୍ ପିଲା, ମକେ ଚାଡ଼ି କେ ମିସା ବାବାକେ ନାଜାନଡ଼ । ତାର୍ ପିଲା ମୁଇ, ଜନ୍ ଲକ୍‌ମନର୍ ଲଗେ ବାବାକେ ଦେକାଇବି, ସେମନ୍‌ସେ ବାବାକେ ଚିନି ପାରଡ଼ ।

୨୮ “ବେସି ବଜ୍ ବଇକରି ତାକ୍‌ଲା ଲକ୍‌ମନ୍, ମର୍ ଲଗେ ଆସା । ମୁଇ ତମକେ ପୁଣ୍ଡାଇବି । ୨୯ ମର୍ ଜୁଆଡ଼ି ବଇ ମର୍‌ଟାନେଅନି ସିକା । କାଇକେବଇଲେ ମୁଇ ନିଜେ ସୁଆଲ୍ ଆରି ମର୍ ମନ୍ କୁଞ୍‌ଲ୍ ଅଇଲାର୍ ଲାଗି ତମେ ମର୍‌ଲଗେ ପୁଣ୍ଡସା । ୩୦ ମୁଇ ତମର୍ ଉପରେ ଜନ୍ ଜୁଆଡ଼ି ସଙ୍ଗଇବି ସେଟା ତମକେ ବଇବାକେ ସଅଜ୍ ଅଇସି । ଆରି ତମକେ ଜନ୍ ବଜ୍ ଦେବି, ସେଟା ମିସା ବେସି ଉସାସ୍ ।”

## ୧୨

ବିସ୍‌ରାମ୍‌ବାର୍ ବିସଇନେଇ ପାଚାର୍‌ବାଟା

(ମାର୍‌କ ୨:୨୩-୨୮; ଲୁକ୍ ୬:୧-୫)

୧ ତାର୍ କେତେ ଦିନ୍ ପଚେ ଜିସୁ ଗଟେକ୍ ବିସ୍‌ରାମ୍‌ବାରେ ତାସ୍‌ପଦାର୍ ବାଟେ ଜାଇତେରଇଲା । ଜିବାବେଲେ ତାର୍ ସିସ୍‌ମନ୍‌କେ ବୁକ୍ ଲାଗଲାଜେ କେଡ଼ ଚିତାଇ କାଇବାର୍ ଦାର୍‌ଲାଇ । ୨ ସେଟା ଦେକି ପାରୁସିମନ୍ ଜିସୁକେ ପାଚାର୍‌ଲାଇ, “ଦେକ୍ ବିସ୍‌ରାମ୍‌ବାରେ ତର୍ ସିସ୍‌ମନ୍ କେନ୍ତାରି ସାସ୍‌ତରେ ରଇବା ଚିତିନିତି ବିରଦର୍ କାମ୍ କଲାଜନି ।”

୩ ଜିସୁ ସେମନ୍‌କେ କଇଲା, “ଦିନେକ୍ ଦାଉଦ୍ ଆରି ତାର୍ ସଙ୍ଗ୍ ରଇଲା ଲକ୍‌ମନ୍ ବୁକେ ରଇଲା ବେଲେ, ଦାଉଦ୍ କାଇଟା କରି ରଇଲା, ତମେ ସାସ୍‌ତରେ ପତାସ୍ ନାଇ କି ? ୪ ସେଦିନେ ସେମନ୍ ମନ୍‌ର୍ ବିଡ଼ରେ ପୁରି, ମାପୁରୁର୍‌ପାଇ ସର୍‌ପି ଅଇରଇବା ରୁଟି କାଇଲାଇ । ନିୟମ୍ ଇସାବେ ପୁଜାରିକେ ଚାଡ଼ି, ସେ ରୁଟି କେ ମିସା କାଇବାର୍ ଅଦିକାର୍ ନ ରଇଲା । ୫ ତମେ କାଇ ପତାସ୍ ନାଇ କି ? ମସାର୍ ନିୟମ୍ ଇସାବେ ସବୁ ବିସ୍‌ରାମ୍‌ବାରେ ପୁଜାରିମନ୍ ନିୟମ୍ ନ ମାନ୍‌ଲେ ମିସା, ସେଟାର୍ ପାଇ, ସେମନ୍ ଦସି ବଲି ବିଚାର୍‌ନା ନ ଅଅଡ଼ । ୬ ମୁଇ ତମକେ କଇଲିନି, ଆଜି ଏ ମନ୍‌ର୍‌ଟାନେଅନି ମୁକିଅ ବିସଇ ଇଡ଼ି ଆଚେ ।” ୭ \* “ସାସ୍‌ତର୍ କଇଲାନି, ପସୁ ପୁଜ୍‌ବା ବିରୁ ନ କରି, ଲକ୍‌ମନ୍‌କେ ଦୟା କର୍‌ବାଟା, ମୁଇ ମନ୍ କଲିନି । ଏ କାତାର୍ ଅରଡ଼ ଜଦି ସଡ଼ ଇସାବେ ବୁଜିରଇତାସ୍‌ବଇଲେ, ଏ ଦସ୍ ନ କଲା ଲକ୍‌ମନ୍‌କେ ତମେ ଦସି ନ କର୍‌ତାସ୍ ।” ଜାନିରୁଆ, ନର୍‌ପିଲା ମୁଇ ନିଜେ ବିସ୍‌ରାମ୍‌ବାର୍ ମାପୁରୁ ।”

ସୁକ୍‌ଲା ଆଡ଼ ନିମାନ୍ ଅଇଲା

(ମାର୍‌କ ୩:୧-୬; ଲୁକ୍ ୬:୬-୧୧)

୯ ଜିସୁ ସେ ଜାଗାଇଅନି ବାରଇ ଜାଇ ପାର୍‌ତନା ଗରେ ପୁର୍‌ଲା । ୧୦ ତେଇ ଆଡ଼ ସୁକ୍‌ଜାଇରଇଲା ଗଟେକ୍ ଲକ୍ ରଇଲା । ଜିସୁର୍ ଦସ୍ ଦାର୍‌ବାକେ ପାରୁସିମନ୍ ଗଟେକ୍ ଦଲଅଇ ତେଇ ଜାଗି ରଇଲାଇ । ସେଟାର୍‌ପାଇ ସେମନ୍ ଜିସୁକେ ପାଚାର୍‌ଲାଇ, “ବିସ୍‌ରାମ୍‌ବାରେ ନିମାନ୍ କର୍‌ବାଟା ଆମର୍ ନିୟମ୍‌ର୍ ବିରଦ୍ ନର୍‌ କି ?”

୧୧ \*ଜିସୁ କଇଲା, “ଜଦି ବିସରାମ୍ବାରେ ତମର୍ ବିତ୍ତରେ କାର୍‌ଆଲେ ମେଣ୍ଡା ଗଟେକ୍ ଡେଙ୍ଗ୍ କାଲେ ଅଦରଲେ, ତମେ ତାକେ ଜିକି ନ ଆନାସ୍ କି ?  
 ୧୨ ମେଣ୍ଡାର୍‌ତେଇ ଅନି ଗଟେକ୍ ଲକର୍ ମୁଲିଅ କେତେକ୍ ଅଦିକ୍ । ସେଟାର୍ ପାଇ ଆମେ ବିସରାମ୍ବାରେ ବିନ୍ ଲକ୍‌କେ ସାଇଜ କର୍‌ବାଟା ସାସ୍‌ତରେ ରଇବା ରିତିନିତିର୍ ବିରଦ୍ ଅଇବା କାମ୍ ନର୍ ।” ୧୩ ଏଡ୍‌କି କଇକରି ସେ ଆଡ୍ ସୁକିଜାଇରଇଲା ଲକ୍‌କେ କଇଲା, “ଆଡ୍ ସଲକ୍ କର୍ ।”

ସେ ଲକ୍ ଆଡ୍ ସଲକ୍ କଲା ଦାପ୍‌ରେ, ସେ ଆଡ୍ ନିକ ଲକର୍ ଆଡ୍ ପାରି ଅଇଗାଲା । ୧୪ ତାର୍‌ପଟେ ପାରୁସିମନ୍ ସେ ଜାଗାଇଅନି ବାରଇ ଉଟିଜାଇ ଜିସୁକେ ମରାଇବାକେ ଜଜ୍‌ନା କଲାଇ ।

ମାପ୍‌ରୁ ବାଟିରଇବା ସେବା କାରିଆ

୧୫ ତାର୍ ବିରୁଦେ ପାଁଟ୍‌ବାଟା ସୁନିକରି, ଜିସୁ ସେ ଜାଗା ଚାଡ଼ି ବିନେ ଉଟିଗାଲା । କେତେକ୍ କେତେକ୍ ଲକ୍ ତାର୍ ପଟେ ପଟେ ଗାଲାଇ । ଆରି ସେ ସବୁ ରଗି ଲକ୍‌ମନ୍‌କେ ନିକ କଲା । ୧୬ ତାର୍ ନିଜର୍ ବିସଇ ବିନ୍ ଲକ୍‌ମନ୍‌କେ କାଇ ବଲି ନ କୁଆ ବଲି ସେମନ୍‌କେ ଆଦେସ୍ ଦେଇତେରଇଲା । ୧୭ ଜିସାୟ୍ ବବିସ୍‌ଡ୍‌ବକ୍‌ତାର୍ ଟାନେଅନି ପର୍‌ମେସର୍ ଜନ୍ କାତା ସୁନାଇରଇଲା, ସେଟା ପୁରାପୁରୁନ୍ କର୍‌ବାକେ ଏଟା କଲା,

୧୮ “ଏ ମର୍ ବାଟିରଇବା ସେବାକାରିଆ ।

ଆକେ ମୁଇ ଆଲାଦ୍ କଲିନି,

ତାର୍ ଲଗେ ମର୍ ସାର୍‌ଦା । ମର୍ ଆଡ୍‌ମା ତାର୍ ଉପରେ ଆସି ଡାବି ଅଇସି,  
 ସେ ସବୁ ଜାଡିର୍ ଲଗେ ଜାଇ ମର୍ ଟିକ୍ ବିଚାର୍‌ନା ଜାନାଇସି ।

୧୯ ସେ କାକେ କିରଜାଟି ନ କରେ । ସେ ବେସି ଆଇଲି ନ ଅଏ ।  
 ସାଇର୍ ମଜାଇ ଚିଆ ନ ଅଏ ଆରି ଜବର୍ ଅଇତେ କାତା ନ କଏ ।

୨୦ ଦୁର୍‌ବଲ୍ ଲକ୍‌ମନ୍‌କେ ସେ ଆଲାଦ୍‌ର୍  
 ଚଲାଚଲ୍‌ତି କର୍‌ସି,

ଆରି ଆକା ସାକା ନଇଲା ଲକ୍‌ମନ୍‌କେ ଦୟା କର୍‌ସି ।

ସେମନ୍ ନିଆଇ ନ ପାଇବାଜାକ ସେ

ତାର୍ କାମ୍ ବନ୍ ନ କରେ ।

୨୧ ତାକେ ସବୁ ଦେସର୍ ଲକ୍ ଆସା କର୍‌ବାଇ ।”

ଜିସୁ ଆରି ବାଲ୍‌ଜିବୁଲ୍

(ମାର୍‌କ ୩:୨୦-୩୦; ଲୁକ୍ ୧୧:୧୪-୨୩)

୨୨ ତାର୍ ପଟେ ଦିନେକ୍ ଲକ୍‌ମନ୍ ଗଟେକ୍ କାଣା ଅଇ ଗୁଲା ଅଇଜାଇରଇଲା ଲକ୍‌କେ ଜିସୁର୍ ଲଗେ ଆନିଲାଇ । ତାକେ ତୁମା ଦାରିରଇଲାଜେ କାତାଅଇ ନାପାର୍‌ତେ ରଇଲା । ଜିସୁ ତାକେ ନିମାନ୍ କଲା । ଏଦେ ଦେକା ! ସେ ଦେକ୍‌ଲା ଆରି କାତା କଇପାର୍‌ଲା । ୨୩ ଜିସୁର୍ ଏ କାମ୍ ଦେକି ସବୁ ଲକ୍ କାବା ଅଇଜାଇ ପାଗର୍ ଉଚାର୍ ଅଇଲାଇ, “ଏ କାଇ ସେ ଦାଉଦର୍ ପଅ କି ?” ୨୪ \*ଏଟା ସୁନି ପାରୁସିମନ୍ କଇଲାଇ, “ସେ ତୁମାମନ୍‌ର୍ ମୁକିଅ ବାଲ୍‌ଜିବୁଲ୍‌ର୍ ଟାନେଅନି ବପୁ ପାଇ ତୁମା ଚାଡାଇଲାନି ।”

୨୫ ଜିସୁ ତାକର୍ ମନ୍‌ର୍ କାତା ଜାନି ସେମନ୍‌କେ କଇଲା, ଗଟେକ୍ ରାଇଜର୍ ଲକ୍ ବିନ୍‌ବିନ୍ ଦଲେ ବାଗ୍ ଅଇ ନିଜର୍ ନିଜର୍ ବିତରେ ଲାଗାଲାଗି ଅଇଲେ, ସେ ଦେସ୍ ବେସି ଦିନ୍ ନ ରଏ । କନ୍‌ଆଲେ ସଅର୍ ନଇଲେ ଗର୍ ବିତ୍ତରେ ବିନ୍ ବିନ୍ ଦଲ୍ ଗଡ଼ିକରି ଲାଗାଜଡା ଅଇଲେ ସେମନ୍ ଦାପ୍‌ରେସେ କୁରୁପ୍‌ନାସ୍ ଅଇଜିବାଇ

। ୨୬ ସେନ୍ତାରିସେ, ସଇତାନର୍ ରାଇଜେ ଜଦି ଗଟେକ୍ ଦଲ୍ ବିନ୍ ଦଲ୍ ବିରୁଦେ ଲାଗ୍ଲାନ୍ତି ବଇଲେ, ସେଟା କୁଟ୍‌କୁଟା ଅଇ ବିଲିଜାଇସି । ଏଟା ଜାନ୍‌ବାର୍ ଆଟେ । ୨୭ ମୁଇ ବାଲ୍‌ଜିବୁଲର୍ ବପୁ ପାଇ ତୁମାମନ୍‌କେ ଚାତାଇଲିନି ବଲି ତମେ କଇଲାସ୍‌ନି ତେବେ, ସେମନ୍‌କେ କେଦବାକେ ତମର୍ ସିସ୍‌ମନ୍‌କେ କେ ବପୁ ଦେଲାନି ? ତମର୍ ସିସ୍‌ମନ୍‌ ଏ କାମର୍ ଲାଗି, ତମେ ଦାବି କଲାଟା ମିର୍ ବଲି ଜାନାପଡ୍‌ଲାନି । ୨୮ ତୁମା ଚାତାଇବା ବପୁ ମୁଇ ବାଲ୍‌ଜିବୁଲର୍ ଟାନେଅନି ପାଇନାଇ । ସେଟା ମୁଇ ପର୍‌ମେସରର୍ ଆଡ୍‌ମାର୍‌ଟାନେଅନି ପାଇଆଟି । ଏଟାର୍ ପାଇ ଆରି ଗଟେକ୍ ବିସଇ ଜାନାପଡି ଗାଲାନିଜେ ସରଗ୍ ରାଇଜ୍ ତମର୍ ଲଗେ ଆସି କେଟିଗାଲାବେ ।

୨୯ ଆଗେ ଗଟେକ୍ ବପୁର୍ ଲକ୍‌କେ ନ ବାନ୍‌ଡେ କେ ମିସା ତାର୍ ଗରେ ପୁରିକରି ଗରେ ରଇଲାଟା ଚରାଇ ନେଇ ନାପାରଡ୍ ।

୩୦ ☆ଜେ ମର୍ ବାଟେ ନ ରଏ, ବାଇଦରେ ସେ ମର୍ ବିରୁଦେ ଆଟେ । ଆରି ଜେ ମର୍ ସଜ୍ ମିସିକରି ନ ଟୁଲିଆଏ, ସେ ବିଚିଦେଲାନି । ୩୧ ସେଟାର୍‌ପାଇ ମୁଇ ତମ୍‌କେ କଇଲିନି, ଜଦି କେ ଆଲେ ପାପ୍ କଲେ କି ନିନ୍‌ କାତା କଇଲେ ମିସା, ତାର୍ ଲାଗି ତାକେ କେମା ଦିଆଅଇସି । ମାତର୍ କେ ଜଦି ସୁକଲ୍ ଆଡ୍‌ମାର୍ ବିରୁଦେ କାଇ ବଲି କଇସି ବଇଲେ, ତାକେ କେମା ନାଇ । ୩୨ ☆ଜଦି କେ ନର୍‌ପିଲା, ମର୍ ବିରଦେ ନିନ୍‌ କାତା କଇଲେ, ତାକେ କେମା ମିଲ୍‌ସି, ମାତର୍ ଜେ ଜଦି ସୁକଲ୍ ଆଡ୍‌ମାର୍ ବିରୁଦେ ନିନ୍‌ କାତା କଇଲେ ତାକେ ଏବେ କି ପଡ୍‌କେ ମିସା କେମା ନ ମିଲେ ।

ଗର୍ ଆରି ତାର୍ ପଲ୍  
(ଲୁକ୍ ୬:୪୩-୪୫)

୩୩ ☆“ନିକ ପଲ୍ ଦାର୍‌ବାର୍‌ଆଲେ ଗଟେକ୍ ଗର୍ ନିକ ଅଇବାର୍ ଆଟେ । ବାନିଆ ଗଟେ ବାନିଆ ପଲ୍ ଅଇସି । ଗର୍ କେନ୍ତ୍ରଟା, ତାର୍ ପଲେ ଅନି ଜାନାପଡ୍‌ସି । ୩୪ ☆ଏ ସାଁପ୍ ପାରା କାରାପ୍ ଲକ୍‌ମନ୍ ! ତମେ କାରାପ୍ ଅଇ ନିମାନ୍ କାତା କଇପାରାସ୍ କି ? ମନେ ଚିନ୍ତାକଲାଟା ଚଣ୍ଡୁବାଟେ ବାରଇସି । ୩୫ ଗଟେକ୍ ନିମାନ୍ ଲକ୍ ତାର୍ ମନ୍‌ବିଡ୍‌ରେ ଅନି ନିମାନ୍ କାତା ଆନ୍‌ସି । ଗଟେକ୍ କାରାପ୍ ଲକ୍ ତାର୍ ମନ୍‌ ବିଡ୍‌ରେ ବର୍‌ଡିଅଇ ରଇବା ବାଦ୍‌ଲାପାରା କାତା ବାର୍‌କରାଇ ଆନ୍‌ସି ।”

୩୬ “ତମେ କଇରଇଲା କାଇ ଲତାକେ ନଇବା ସବୁ କାତା, ବିଚାର୍‌ନା ଦିନେ ତମ୍‌କେ ଇସାବ୍ ଦେବାକେ ଅଇସି । ୩୭ ତମର୍ କାତାଇଅନି ତମେ ବିଚାର୍ କରାଇଅଇ, ଦସି ନଇଲେ ଦସ୍ ନ କଲା ଲକ୍ ବଲାଇଅଇସା ।”

କାବାଅଇଜିବା କାମ୍ କର୍‌ବାକେ ଦାବି  
(ମାର୍‌କ୍ ୮:୧୧-୧୨; ଲୁକ୍ ୧୧:୨୯-୩୨)

୩୮ ☆ଗଟେକ୍ ଦିନେ ଜିଉଦି ମନର୍ ନିୟ୍‌ମ୍ ସିକାଇଦେବା ଲକ୍‌ମନ୍ ଆରି ପାରୁସି ଲକ୍‌ମନର୍ ବିଡ୍‌ରେଅନି କେଡେଲକ୍ ଜିସୁକେ କଇଲାଇ, “ଏ ଗୁରୁ, ତମର୍ ଗଟେକ୍ କାବାଅଇଜିବା ଚିନ୍ ଦେକ୍‌ବାକେ ଆମେ ମନ୍‌କଲୁନି ।”

୩୯ ☆ଜିସୁ ସେମନ୍‌କେ କଇଲା, “ଏ ଜୁଗର୍ ବିସ୍‌ବାସ୍ ନ କରୁମନ୍ କେଡେ କାରାପ୍, ଆରି ପର୍‌ମେସର୍‌କେ ବିସ୍‌ବାସ୍ କରଡ୍‌ନାଇ । ତମେ ମକେ ଗଟେକ୍ କାବାଅଇଜିବା କାମ୍ ଦେକାଇବାକେ କଇଲାସ୍‌ନି ? ନାଇ, ଅବ୍‌କା ବାବଦାଦି ଜୁନସର୍ ଜିବନେ ଗଟିରଇଲା କାବାଅଇଜିବାଟା ତମ୍‌କେ ଦେକାଇଦେଇ ଅଇସି ।”

୪୦ “ଜୁନସ୍ ଜେନ୍ତ୍ରି ମାର୍ ପେଟେ ତିନ୍ ଦିନ୍ ତିନ୍ ରାତି ରଇଲା, ସେନ୍ତ୍ରି ନର୍‌ପିଲା ମୁଇ ମିସା ମାଟି ତଲେ ତିନ୍ ଦିନ୍ ତିନ୍ ରାତି କାଟାଇବି । ୪୧ ଜନ୍ ଦିନେ ପର୍‌ମେସର୍

☆ ୧୨:୩୦ ୧୨:୩୦ ମାର୍‌କ୍ ୯:୪୦ ☆ ୧୨:୩୨ ୧୨:୩୨ ଲୁକ୍ ୧୨:୧୦ ☆ ୧୨:୩୩ ୧୨:୩୩ ମାଡ଼ିଉ ୭:୨୦; ଲୁକ୍ ୬:୪୪ ☆ ୧୨:୩୪ ୧୨:୩୪ ମାଡ଼ିଉ ୩:୭:୨୩:୩୩; ଲୁକ୍ ୩:୭; ମାଡ଼ିଉ ୧୫:୧୮; ଲୁକ୍ ୬:୪୫ ☆ ୧୨:୩୮ ୧୨:୩୮ ମାଡ଼ିଉ ୧୭:୧; ମାର୍‌କ୍ ୮:୧୧; ଲୁକ୍ ୧୧:୧୭ ☆ ୧୨:୩୯ ୧୨:୩୯ ମାଡ଼ିଉ ୧୭:୪; ମାର୍‌କ୍ ୮:୧୨

ଲକ୍ଷ୍ମୀନର ବିଚାର କରୁଥି, ସେ ଦିନେ ନିନିବିର ଲକ୍ଷ୍ମୀନ ତମର ବିରୁଦ୍ଧେ ଦାବି କରବାକେ ଚିଆ ଅଇବାଇ । କାଇକେ ବଇଲେ ସେମନ୍ ଜୁନସର କାତା ସୁନି ପାପ୍ ବାଟେଅନି ବାଅଡ଼ଲାଇ । ମୁଇ ତମକେ କଇଲିନି, ଜୁନସର ଟାନେଅନି ବଡ଼ ଲକ୍ଷ୍ମୀ ଇତି ଆଟେ । <sup>୪୭</sup> ବିଚାର କରବାବେଲେ ଦକିନ୍ ଦେସେ ରଇବା ସେବା ନାଉର୍ ଗଟେକ୍ ଜାଗାର ରାନି, ତମର ଦସ୍ ଦେକାଇବାକେ ଚିଆ ଅଇଥି, କାଇକେ ବଇଲେ ସଲମନର ଗିଆନର କାତା ସୁନବାକେ ବେସି ଦୁର ଦେସେଅନି ସେ ଆସି ରଇଲା । ମାତର ମୁଇ ତମକେ ସଡ଼ କଇଲିନି, ସଲମନର ଟାନେ ଅନି ଗଟେକ୍ ବେସି ବଡ଼ ଲକ୍ଷ୍ମୀ ଇତି ଆଟେ ।”

ତୁମା ବାଅଡ଼ଲା

(ଲୁକ୍ ୧୧:୨୪-୨୬)

<sup>୪୩</sup> ଜିସୁ ଆରି କଇଲା, ଜେଡେବଲ୍ କାରାପ୍ ଆଡ଼ମା ଗଟେକ୍ ଲକ୍ଷ୍ମୀ ଗାଗ୍ଡେଅନି ବାରଇ ଜାଇଥି, ସେବେଲା, ସେ ରଇବାକେ ମରୁବାଲିରୁଏଁ ଜାଗା କଜି ରୁଲୁଥି । ମାତର ସେଡ଼ି ଜାଗା ତାକେ ନ ମିଲିଲେ । <sup>୪୪</sup> ସେ ବେଲା ସେ କଇଥି, “ମୁଇ ଜନ୍ ଲକ୍ଷ୍ମୀତେଇଅନି ବାରଇ ଆଇଲି ଆଟି, ତେଇସେ ଆରିତରେକ୍ ଜିବି” ବଲି ବାଉଡ଼ି ଉଚିଜାଇଥି । ସେଡ଼ିକି ବେଲେ ସେ ଆସିକରି ବିଡ଼ରେ ସପାସୁତର ଅଇ ପରିଚଲ୍ ରଇବାଟା ଦେକଲେ, ସେ ଜାଇ ତାର୍ଡେଇଅନି ଅଦିକ୍ କାରାପ୍ ରଇବା ସାଡ଼ଟା ଆଡ଼ମାମନକେ ଭାଜିଆନ୍ଥି । <sup>୪୫</sup> ତାର୍ ପଟେ ସବୁ କାରାପ୍ ଆଡ଼ମାମନ ଜାଇକରି ସେ ଲକ୍ଷ୍ମୀ ବିଡ଼ରେ ବାସାକରି ରଇବାଇ । ସେ ବେଲା ସେ ଲକ୍ଷ୍ମୀ ଆଗ୍ଡୁରତେଇଅନି ଅଦିକ୍ କରାପ୍ ଅଇଜାଇଥି । ଏଡ଼ିସେ ଆଜିକାଲି ଜିଇବା କାରାପ୍ ଲକ୍ଷ୍ମୀମନକେ ଅଇଥି । ବଲି କଇଲା ।

ଜିସୁର ଗରର ଲକ୍ଷ୍ମୀମନ

(ମାର୍କ ୩:୩୧-୩୫; ଲୁକ୍ ୮:୧୯-୨୧)

<sup>୪୬</sup> ଜିସୁ ଜେଡେବେଲା ତେଇ ରୁଣ୍ଡିରଇଲା ଲକ୍ଷ୍ମୀମନକେ କାତା ସୁନାଇତେ ରଇଲା, ତାର୍ ଆୟା ଆରି ବାଇମନ ଆସି ତାଣ୍ଡେ ଚିଆଅଇରଇଲାଇ । ସେମନ୍ ଜିସୁର ସଙ୍ଗ୍ କାତାଅଇବାକେ ମନ୍ କରତେ ରଇଲାଇ । <sup>୪୭</sup> ସେଡ଼ିକି ବେଲେ ଗଟେକ୍ ଲକ୍ଷ୍ମୀ ଜିସୁକେ କଇଲା, “ତର ଆୟା ଆରି ବାଇମନ ତାଣ୍ଡେ ଜାଗ୍ଲାଇ ଆଟଡ଼, ସେମନ୍ ତର ସଙ୍ଗ୍ କାତା ଅଇବାକେ ମନ୍ କଲାଇନି ।”

<sup>୪୮</sup> ଜିସୁ ସେମନ୍କେ କଇଲା, “କାକେ ମର ଆୟା ଆରି ବାଇମନ ବଲି ବାବ୍ଲାସ୍ନି ?” <sup>୪୯</sup> ତାର୍ ସିସ୍ମନର ବାଟେ ଆଡ଼ ଦେକାଇ କଇଲା, “ଏ ଲକ୍ଷ୍ମୀମନସେ ମର ଆୟା ଆରି ବାଇମନ ଅଇବାଇ । <sup>୫୦</sup> ଜେ ସରଗେ ରଇବା ମର ବାବାର ମନ୍ କଲା ଇସାବେ କାମ୍ କରୁଥି, ସେମନ୍ ଆକା ମର ବାଇ, ବଇନି ଆରି ଆୟା ଅଇବାଇ ।”

## ୧୩

ବିଅନ୍ ବୁନ୍ବା ଲକ୍ଷ୍ମୀ କାତା

(ମାର୍କ ୪:୧-୯; ଲୁକ୍ ୮:୪-୮)

<sup>୧</sup> ଦିନେକ୍ ଜିସୁ ତାର୍ ସିସ୍ମନର ସଙ୍ଗ୍ ଗରେ ଅନି ବାରଇ ସମଦୁର କଣ୍ଡି ଗାଲା । ତେଇ ସେ ବସିକରି ସିକାଇବାର୍ ଦାରଲା । <sup>୨</sup> ଲକ୍ଷ୍ମୀମନ୍ ତାର୍ ଚାରିବେଡ଼ି ଜବର ଅଇ ରୁଣ୍ଡିରଇଲାଇଜେ ସେ ଗଟେକ୍ ଡଙ୍ଗାଜ ଜାଇ ବସିଲା । ଲକ୍ଷ୍ମୀମନ୍ ଚିଆ ଅଇ ତାର୍ କାତା ସୁନବାର୍ ଦାରଲାଇ । <sup>୩</sup> ଆରି ସେ କେଡେକ୍ କେଡେକ୍ ବିସଇ, ଉଦାଅରଣ୍ ଦେଇ, ସିକାଇତେ ରଇଲା । ସେ କଇଲା,

“ଗଟେକ୍ ଚାସି ତରେକ୍ ବିଅନ୍ ବୁନ୍‌ବାର୍ ବାରଇଲା । ୪ ଚାସି ସେ ଜମିଟାନ୍‌ନେ ବିଅନ୍ ବୁନ୍‌ବା ବେଲେ କେତେଟା ମୁଞ୍ଜି ମଜା ବାଟେ ଅଦର୍‌ଲାଜେ ସେଟା ଚତଇମନ୍ ଆସି କାଇଦେଲାଇ । ୫ ଆରି ଅଦେକ୍ ମାଟି ଉନାରଇ ଜବର୍ ପାକ୍‌ନା ରଇବା ପଦାଇ ଅଦର୍‌ଲା । ତେଇ ମାଟି ବଉଲ୍ ନ ରଇଲାଜେ ଦାପ୍‌ରେ ଆଁକ୍‌ରି ଗାଜା ଅଇଲା । ୬ ମାତର୍ ଗାଜାର୍ ଚେର୍ ବିଡ଼ରେ ଜାଏ ନାଇଜେ, କାରା କଲାକେ ସେଟା ସୁକିଗାଲା । ୭ ଆରି କେତେଟା ବିଅନ୍ କାଟାବୁଟା ବିଡ଼ରେ ଅଦର୍‌ଲା, ଆରି କାଟାବୁଟା ଆଁକ୍‌ରି ଗାଜା ଅଇଲା । ବିଅନ୍‌ର୍ ଚାରିବେଡ଼ି ବର୍ଡ଼ି ଜାଇ ସେଟା ସବୁ ଗିଲିଦେଲା । ୮ ମାତର୍ ଆରି ବାକି ସବୁ ବିଅନ୍ ନିକ ବୁଏଁ ଅଦ୍‌ରି ବୁଟା ଅଇ ବଡ଼ିକରି ପଲ୍ ଦାର୍‌ଲା । କେତେଟା ବୁଟାଇ ଡିରିସ୍ ବାଗ୍, ସାଟେ ବାଗ୍, ଆରି ସଏ ବାଗ୍ ଅନି ଅଦିକ୍ ପଲ୍‌ଦାର୍‌ଲା ।”

୯ ଜିସୁ ଉଦାଅରଣ୍ ସାରାଇକରି କଇଲା, “ଜାକେ ସୁନ୍‌ଲା ପାରା କାନ୍ ଆଟେ, ସେ ସୁନ୍ ।”

ଉଦାଅରଣ୍ କାତାର୍ ଆଦେସ୍  
(ମାର୍‌କ୍ ୪:୧୦-୧୨; ଲୁକ୍ ୮:୯-୧୦)

୧୦ ପଟେ ସିସ୍‌ମନ୍ ଜିସୁର୍ ଲଗେ ଆସି ପାଚାର୍‌ଲାଇ, “ତମେ ଲକ୍‌ମନ୍‌କେ ସିକାଇଲା ବେଲେ କାଇକେ ଉଦାଅରଣ୍ ଇସାବେ କଇଲାସ୍‌ନି ?” ୧୧ ଜିସୁ କଇଲା, “ସରଗ୍ ରାଇଜର୍ ଟିକି ନିକି କାତା ବୁଜ୍‌ବାକେ ତମେ ଗିଆନ୍ ପାଇଆଚାସ୍ । ମାତର୍ ସେମନ୍ ପାଅଡ଼ ନାଇ । ୧୨ \*ଜାକେ ଆଟେ, ତାକେ ଦିଆଅଇସି । ତେଇଅନି ସେ ଅଦିକ୍ ଅଦିକ୍ ଲାବ୍ କର୍‌ସି । ମାତର୍ ଜାକେ ନାଇ, ତାର୍‌ଟାନ୍‌ନେ ଜେଡ଼କି ଆଟେ, ସେଟା ମିସା ନିଆଅଇସି ।” ୧୩ ସେମନ୍‌କେ ମୁଇ କାତାନି ଇସାବେ ସିକାଇଲିନି । କାଇକେବଇଲେ ସେମନ୍ ଦେକି ଦେକି ରଇବାଇ, ମାତର୍ ନ ଦେକ୍‌ଲା ପାରା । ସୁନ୍‌ତେ ରଇବାଇ, ମାତର୍ ନ ସୁନ୍‌ଲା ପାରା ଆରି ନ ବୁଜ୍‌ଡ଼ । ୧୪ ଜିସାୟ୍ ବବିସଡ଼ବକ୍‌ତା କଇରଇବା ବାକିଅ ପୁରାପୁରୁନ୍ ଅଇଲା ।

ଏ ଲକ୍‌ମନ୍ ସୁନି ସୁନି ମିସା କାଇଟା ନ ବୁଜ୍‌ଡ଼  
ଦେକ୍‌ତେରଇବାଇ, ମାତର୍ ନ ଦେକ୍‌ଲା ପାରା ।

୧୫ କାଇକେ ବଇଲେ ସେମନ୍‌ର୍ ବୁଦି ଉନା ।  
ସେମନ୍ କାନ୍‌ନେ ବୁଟିଅଇ ଦେଇଆଚଡ଼  
ଆରି ଆଁକି ଲିମିଦେଇ ଆଚଡ଼ ।  
ସେନ୍ତାର୍ ନ ଅଇରଇଲେ ସେମନ୍ ଦେକିପାର୍‌ତାଇ,  
ସୁନିପାର୍‌ତାଇ ଆରି ମର୍ ଲଗେ ବାଉଡ଼ି ଆଇତାଇ ।  
ସେମନ୍‌କେ ମୁଇ ନିକ କରାଦେଇତି ।

୧୬ \* “ତମେ କେତେକ୍ ନିକ କରମର୍ ଲକ୍ ! ତମେ ଦେକି ପାର୍‌ଲାସ୍‌ନି ଆରି ସୁନି ପାର୍‌ଲାସ୍‌ନି ! ୧୭ ମୁଇ ତମ୍‌କେ ସଡ଼ କଇଲିନି, କେତେକ୍ କେତେକ୍ ବବିସଡ଼ବକ୍‌ତା ଆରି ପର୍‌ମେସରର୍ ଲକ୍‌ମନ୍ ତମେ ଜନ୍‌ଟା ଦେକ୍‌ଲାସ୍‌ନି, ସେଟା ଦେକ୍‌ବାକେ, ଆରି ଜାଇଟା ସୁନ୍‌ଲାସ୍‌ନି, ସେଟାମନ୍ ସୁନ୍‌ବାକେ ମନ୍ କର୍‌ତେରଇଲାଇ, ମାତର୍ ନାପାର୍‌ଲାଇ ।”

ବିଅନ୍ ବୁନ୍‌ବା କାତାର୍ ଅରଡ଼  
(ମାର୍‌କ୍ ୪:୧୩-୨୦; ଲୁକ୍ ୮:୧୧-୧୫)

୧୮ “ତେବେ ସୁନା, ବିଅନ୍ ବୁନ୍‌ବା କାତାର୍ ଅରଡ଼ କଇଲିନି । ତମେ ବୁଜ୍‌ବାକେ ଚେସ୍‌ଟା କରା । ୧୯ ଜନ୍ ଲକ୍‌ମନ୍ ସରଗ୍ ରାଇଜର୍ ବାକିଅ ସୁନି ନ ବୁଜ୍‌ଡ଼, ସଇତାନ୍

\* ୧୩:୧୨ ୧୩:୧୨ ମାଡ଼ିଉ ୨୫:୨୯; ମାର୍‌କ୍ ୪:୨୫; ଲୁକ୍ ୮:୧୮; ୧୯:୨୭ \* ୧୩:୧୨ ୧୩:୧୨ ଲୁକ୍ ୧୦:୨୩, ୨୪

ଆସି ସେମାନର ମନ ବିତ୍ତରେ ଅନି ଜନ୍ମଟା ବୁନାଅଇ ରଇସି, ସେଟା ଜିକି ଦାରିଜାଇସି । ଏଟା ଅଇଲାନି ବାଟେ ଅଦ୍‌ରି ରଇବା ବିଅନର୍ ଅରଡ୍ ।”

୨୦ “ଜନ୍ ଲକ୍‌ମନ୍ ବାକିଅ ସୁନ୍‌ଲା ଦାପ୍‌ରେ ସାର୍‌ଦା ସଙ୍ଗ୍ ମାନ୍‌ବାଇ, ସେଟା ପାକ୍‌ନାବାଡ଼ି ଜାଗାଇ ଅଦ୍‌ରିରଇବା ବିଅନ୍ ପାରା । ୨୧ ବାକିଅ ପୁରାପୁରୁନ୍ ଡାକ୍‌ର୍ ମନ୍ ବିତ୍ତରେ ଜାଇ ନ ରଏ ଜେ, ସେମନ୍ ସେଟା ବେସି ଦିନ୍ ମାନିକରି ରଇ ନାପାରଡ୍ । ବାକିଅର୍ ଲାଗି କସ୍‌ଟ କି ବେମ୍‌ଜା ଆଇଲେ, ସେମନ୍ ଦାପ୍‌ରେସେ ସେଟା ଚାଡ଼ିଦେବାଇ । ୨୨ କାଟାବୁଟା କେନ୍ତାରିକି ସାନ୍ ବୁଟାମନ୍‌କେ ଚାପି ଗିଲିଦେଇସି, ସେନ୍ତାରି ଏ ଜଗତର୍ ପାଇଟି କାବାଡ଼ ଆରି ଦନ୍‌କେ ଲବ୍ ଅଇକରି, କେତେକ୍ ଲକ୍‌ମନ୍‌ର ଟାନେ କେଟିରଇବା ବାକିଅ ନସାଇଦେଇସି । ସେମନ୍ କାଟାବୁଟାଇ ଅଦ୍‌ରଲା ବିଅନ୍ ପାରା । ସେମାନର୍ କାଇ ପସଲ୍ ନ ପାଟାଅଡ୍ । ୨୩ ଜନ୍‌ଲକ୍‌ମନ୍ ବାକିଅ ସୁନି ନିକକରି ବୁଜ୍‌ବାଇ, ନିକ ପଦାଇ ଅଦ୍‌ରିରଇବା ବିଅନର୍ ପାରା । ସେମନ୍ ନିକ ପସଲ୍ ଲାବ୍ କରବାଇ କେ ସଏ ପୁଟିଅନି ଅଦିକ୍, କେ ସାଟେ ପୁଟିଅନି ଅଦିକ୍, କେ ତିରିସ୍ ପୁଟିଅନି ଅଦିକ୍ ପସଲ୍ ପାଟାଇବାଇ ।”

**ଜୁଡ଼ ଗାଁସ୍‌ର କାତା**

୨୪ ଜିସୁ ତାର୍ ସିସମନ୍‌କେ ଆରି ଗଟେକ୍ ବିସଇ କାତାନି ଇସାବେ କଇଲା, ସରଗ୍ ରାଇଜ୍ ଏନ୍ତାରି ଗଟେକ୍ ଲକ୍‌ର୍ ପାରା । ସେ ଲକ୍ ତାର୍ ଜମିଟାନେ ନିକ ବିଅନ୍ ବୁନ୍‌ଲା । ୨୫ ସେ ଦିନେକ୍, ରାତିଆ ସଇଲା ବେଲେ, ତାର୍ ଗଟେକ୍ ବିରଦ୍ ଲକ୍ ଆସି ସେ ଜମିଟାନେ ଗାଁସ୍ ମୁଞ୍ଜି ବୁନି ଦେଇ, ଉଟିଗାଲା । ୨୬ ଜେଡେବେଲେ ଗର୍ ବଡ଼ି କେଡ଼ ଦାରଲା, ମଜାଇମଜାଇ ଜୁଡ଼ ଗାଁସ୍ ଡିସଲା । ୨୭ ସେ ଲକ୍‌ର୍ ଦାଙ୍ଗ୍‌ଟାମନ୍ ଆସି କଇଲାଇ, “ଏ ସାଉକାର୍ ତମେ ଜମିଟାନେ ନିକ ବିଅନ୍ ବୁନିରଇଲାସ୍, ଏତେକ୍‌ମାଣ୍ଡୁ ଜୁଡ଼ ଗାଁସ୍ କନ୍ତିଅନି ଆଇଲା ?” ୨୮ ଜମି ସାଉକାର୍ କଇଲା, ମର୍ ବିରଦି ଲକ୍ ଗଟେକ୍ ଏନ୍ତି କଲାଆଚେ । ସେମନ୍ ପାଟାରଲାଇ, “ତେବେ ଆମେ ଜାଇ ସେ ଜୁଡ଼ ଗାଁସ୍‌ମନ୍‌କେ ଜିକି ପିଙ୍ଗିଦେବୁ କି ?” ୨୯ ସାଉକାର୍ କଇଲା, “ନାଇ, ଜୁଡ଼ ଗାଁସ୍ ଜିକ୍‌ବାବେଲେ କେଡେବଲ୍ ଦାନ୍‌ବୁଟା ମିସା ଜିକିଅଇଜାଇସି । ୩୦ କାଟ୍‌ବା ଜାକ ଦାନ୍ ଆରି ଜୁଡ଼ ଗାଁସ୍ ମିସ୍‌ତେ ବଡ଼ । କାଟ୍‌ବା ଲକ୍‌ମନ୍‌କେ କଉଁ ସେମନ୍ ପର୍‌ତୁମ୍ ଜୁଡ଼ ଗାଁସ୍ କାଟି ବାରା ବାନ୍ଦି ପଡାଇ ଦେଅଡ୍ । ତାର୍ ପଟେ ଦାନ୍ କାଟି ମାଣ୍ଡାଇ କଲ୍‌କିଟାନେ ସଙ୍ଗାଉ ।”

**ସରସୁ ମୁଞ୍ଜିର ଉଦାଅରଣ୍  
(ମାର୍‌କ ୪:୩୦-୩୨; ଲୁକ୍ ୧୩:୧୮-୧୯)**

୩୧ ଜିସୁ ଆରି ଗଟେକ୍ ବିସଇ କଇଲା, “ସରଗ୍ ରାଇଜ୍ ଏନ୍ତାରି ଗଟେକ୍ ଲକ୍ ତାର୍ ଜମିଟାନେ ସରସୁ ମୁଞ୍ଜି ତପିଦେଲା । ୩୨ ସେ ମୁଞ୍ଜି ସବୁରଟାନେଅନି ସାନ୍ ଅଇଲେ ମିସା ତେଇଅନି ଜନ୍ ଗର୍ ଅଇଲା, ଜମିଟାନେ ରଇଲା ବିନ୍ ଗର୍‌ମନ୍‌ତେଇଅନି ଅଦିକ୍ ଡେଙ୍ଗ୍ ଅଇ ଜୁଜୁରା ଅଇଲା । ଆରି ସେ ଗଟେ ଚଡ଼ଇମନ୍ ବାସା ଅଇଲାଇ ।”

**କମିରର୍ ଉଦାଅରଣ୍  
(ଲୁକ୍ ୧୩:୨୦-୨୧)**

୩୩ ଜିସୁ ଆରି ତରେକ୍ ଏନ୍ତାରି କାତା କଇଲା, “ଗଟେକ୍ ମାଇଜି କଣ୍ଡେକ୍ କମିର୍ ନେଇ ଅଦ୍‌ବାସ୍‌ତା ଗୁଣ୍ଡାଗାନେ ମିସାଇଦେଲା । ସମାନ୍ ବେଲାଇ ସବୁଜାକ ଗୁଣ୍ଡ କମିର୍‌ତେଇ ମିସି ପୁଲ୍‌ଲା । ସରଗ୍ ରାଇଜ୍ ବଡ଼ବାଟା ମିସା ଏନ୍ତାରିସେ ।”

**ଉଦାଅରଣ୍ ବିସଇର୍ ସିକିଆ  
(ମାର୍‌କ ୪:୩୩-୩୪)**



୩୪ ଜିସୁ ଏନ୍ତାରି ଉଦାଅରଣ ଦେଇ ସିକାଇତେ ରଇଲା । ଉଦାଅରଣ ନ ଦେଇ ସେ କାଇଟା ମିସା ନ ସିକାଇତେ ରଇଲା ।

୩୫ ଏଟାର୍‌ପାଇ ବବିସଡ଼ବକ୍ତାର ଏ ବାକିଅ ପୁରାପୁରୁନ୍ ଅଇଲା । ମୁଇ ଉଦାଅରଣ ଦେଇ

ସେମନ୍‌କେ କାତା କଇବି,  
ଏନ୍ତାରିସେ କାଇଟା ତିଆର୍ ନ ଅଇବା ଆଗ୍‌ତୁଅନି ନାଜାନି ରଇବା  
ସବୁ ବିସଇ ମୁଇ ସେମନ୍‌କେ ବୁଜାଇଦେବି ।

ଜିସୁ ଜୁଡ଼ ଗାଁସର୍ ଅରଡ଼ ବୁଜାଇଲା

୩୬ ଜିସୁ ଲକ୍ ଗଅଲି ବିଡ଼ରେଅନି ବାରଇ ଆସି ଜେଡେବେଲେ ଗର୍ ବିଡ଼ରେ ପୁରଲା, ସେଡ଼କି ବେଲେ ତାର ସିସମନ୍ ଆସି ପାଟାରଲାଇ, “ଆମ୍‌କେ ଜୁଡ଼ ଗାଁସର୍ ଅରଡ଼ ବୁଜାଇ ଦିଆ ।”

୩୭ ଜିସୁ କଇଲା, “ଜନ୍ ଲକ୍ ନିକ ବିଅନ୍ ବୁନ୍‌ଲା, ସେ ନର୍‌ପିଲା ମୁଇ । ୩୮ ଏ ଦୁନିଆ ଅଇଲାନି ଜମି । ଜେମନ୍ ସରଗ୍ ରାଇଜର୍ ଲକ୍, ସେମନ୍ ନିକ ବିଅନ୍ । ଜୁଡ଼ ଗାଁସ୍ ଅଇଲାନି ସଇତାନର୍ ବାଟେ ଜିବା ଲକ୍ । ୩୯ ଜନ୍ ବିରଦି ଲକ୍ ଜୁଡ଼ ଗାଁସ୍ ମୁଞ୍ଜି ବୁନ୍‌ଲା, ସେ ସଇତାନ୍ । କାଟାବେଟାର ବେଲା ଅଇଲାନି ଜୁଗ୍ ସାରବା ଦିନ୍ । ତାସ୍ କାଟ୍‌ବା ଲକ୍‌ମନ୍ ଅଇଲାଇନି ସରଗର୍ ଦୁଡ଼ମନ୍ । ୪୦ ଜୁଡ଼ ଗାଁସ୍‌ମନ୍ ଜେନ୍ତି ଚୁଲିଆଇକରି ପତାଇଲାଇ, ଜୁଗର୍ ସାରାସାରି ବେଲେ ସେନ୍ତାରି ଅଇସି । ୪୧ ନର୍‌ପିଲା ମୁଇ ମର୍ ରାଇଜେଅନି ସବୁ ପାପ୍ କାମ୍ କଲା ଲକ୍‌ମନ୍‌କେ ଆରି ଜେଜେମନ୍ ବିନ୍ ଲକ୍‌ମନ୍‌କେ ପାପ୍ କରବାକେ ଉସକାଇଲାଇନି, ସେମନ୍‌କେ ଚୁଲିଆଇବାକେ ସରଗର୍ ଦୁଡ଼ମନ୍‌କେ ପାଟାଇବି । ୪୨ ସେମନ୍ ଏ ସବୁ ଲକ୍‌ମନ୍‌କେ ଲାଗି ରଇବା ଜଇଟାନେ ପିଙ୍‌ବାଇ । ତେଇ ସେମନ୍ କିଲ୍‌ବିଲ୍ ଅଇ କାନ୍‌ବାଇ ଆରି ଦାଡ଼ କାଡ଼ରିଅଇବାଇ । ୪୩ ସେବେଲେ ପର୍‌ମେସର୍‌କେ ମାନ୍‌ବା ଲକ୍‌ମନ୍ ତାକର୍ ସରଗର୍ ବାବାର୍ ରାଇଜେ ବେଲ୍‌ପାରା ଜକ୍‌ମକିଜିବାଇ । ସୁନ୍‌ଲା ପାରା କାନ୍ ରଇଲେ ସୁନା ।”

ତପିଅଇଲା ଦନର୍ ଉଦାଅରଣ୍

୪୪ “ଦିନେକ୍ ଗଟେକ୍ ଲକ୍ ଜମିଟାନେ କୁନି ନେଉନେଉ ତପିଅଇରଇଲା ଦନ୍ ମିଲାଇଲା । ସେଟା ସେ ଗୁଡାଇପାକାଇଲା ଆରି ସାର୍‌ଦା ସଙ୍ଗ୍ ନିଜର୍ ସବୁ ଦନ୍ ବିକି ଦେଇ, ସେ ଜମି ଗେନ୍‌ଲା । ସରଗ୍ ରାଇଜ୍ ମିସା ଏନ୍ତାରି ତପିଅଇରଇବା ଦନ୍ ପାରା ।”

ମୁକ୍‌ତାର ଉଦାଅରଣ୍

୪୫ ଆରି ସରଗ୍ ରାଇଜ୍ ଏନ୍ତାରି, ଗଟେକ୍ ସୁନାରି ବେସି ମୁଲିଅର୍ ମୁକ୍‌ତା କଜି କଜି ରଇଲା । ୪୬ ଗଟେକ୍ ବେସି ମୁଲିଅର୍ ମୁକ୍‌ତା ରଇଲାଟା ସୁନି, ସେ ତାର୍ ସବୁ ଦନ୍ ସଁପତି ବିକି ସେଟା ଗେନ୍‌ଲା । ସରଗ୍ ରାଇଜ୍ ମିସା ସେ ମୁକ୍‌ତା ପାରା ।

ମାଟ୍ ଜାଲର୍ କାତା

୪୭ ସରଗ୍ ରାଇଜ୍ ଗଟେକ୍ ମାଟ୍ ଦାର୍‌ବା ଜାଲ୍ ପାରା । କେଉଟ୍‌ମନ୍ ଗାଡେ ଜାଲ୍ ପାକାଇ ବିନ୍‌ବିନ୍ ରକାମର୍ ମାଟ୍ ଦାର୍‌ବାଇ ।

୪୮ “ଜାଲ୍ ବରଡ଼ି ଅଇଗାଲେ କଣ୍ଡିତେଇ ଜିକିଆନି ନିକନିକ ମାଟ୍ ବାଟି କରି ମୁରଡ଼ିତେଇ ସଙ୍ଗାଇବାଇ ଆରି ବେଙ୍ଗ୍‌ଟିମାଟ୍ ପାରାଟାମନ୍ ପିଙ୍ଗି ଦେବାଇ । ୪୯ ଜୁଗ୍ ସାରବା ବେଲେ ଏନ୍ତାରି ଅଇସି । ସରଗର୍ ଦୁଡ଼ମନ୍ ଦରମ୍ ଲକ୍‌ର୍ ଟାନେଅନି ପାପିମନ୍‌କେ ବେଗ୍‌ଲାଇବାଇ । ୫୦ ସେମନ୍‌କେ ଲାଗ୍‌ବା ଜଇଟାନେ ପିଙ୍ଗିଦେବାଇ । ତେଇ ସେମନ୍ ମାରିତପିଅଇ କାନ୍ କସ୍‌ଟେ ମସ୍‌ଟେ ଦାଡ଼ କାଡ଼ରିଅଇବାଇ ।”

ପୁରୁନା ସିକିଆ ଆରି ନୁଆ ସିକିଆ

୫୧ ଜିସୁ ସିସନାନ୍‌କେ ପାଚାରଲା, “ଏ ସବୁ ବିସଇ ବୁଜି ପାରଲାସନି କି ?” ସେମନ୍ “ଉଁ ମାପୁରୁ ।” ବଲି କଇଲା ।

୫୨ ଜିସୁ ସେମନ୍‌କେ କଇଲା, “ଜେନ୍ତାରକି ଗଟେକ୍ ଗରର୍ ଲକ୍, ତାର୍ ବାଣ୍ଟାର୍ ଗରେଅନି ତାକେ ଦରକାର୍ ଅଇବା ଇସାବେ ନୁଆ ଦିନ୍‌ସୁ ଆରି ପୁରନା ଦିନ୍‌ସୁ ବାରକରାଇସି । ସରଗ୍ ରାଇଜେ ସିସ୍ ଅଇରଇବା ଗଟେକ୍ ଦରମ୍ ଗୁରୁ ସମାନ୍ ସେନ୍ତାରିସେ କରସି ।”

ଜିସୁ ନାଜରିତେ କେଟଲା

(ମାର୍‌କ ୭:୧-୬; ଲୁକ୍ ୪:୧୬-୩୦)

୫୩ ଜିସୁ ଏ ଉଦାଅରଣ୍ କଇସାରାଇ, ସେ ଜାଗା ଚାଡ଼ି ଉଟିଗଲା । ୫୪ ଆରି ନିଜର୍ ଜାଗାଇ ବାଅଡ଼ଲା । ସେ ଜାଗାର୍ ପାର୍‌ତନା ଗରେ ତାର୍ ସିକାଇବାଟା ସୁନି ଲକ୍‌ମନ୍ କାବା ଅଇଜାଇ କଇଲା, “ଏତେକ୍ ଗିଆନ୍ ଏ କନ୍ତ୍ରିଅନି ମିଲାଇଲା ? ଏ କାବା ଅଇଜିବା କାମ୍‌ମନ୍ କରବାକେ ଆକେ କେ ବପୁ ଦେଲା ? ୫୫ ଏ କାଇ ସେ ବାଡ଼ଇର୍ ପିଲା ! ମରିୟମ୍ ତାର୍ ମାଆ ! ଜାକୁବ୍, ଜସେପ୍, ସିମନ୍ ଆରି ଜିଉଦା ତାର୍ ବାଇମନ୍ ! ୫୬ ତାର୍ ବଇନିମନ୍ ଇତି ଆଚଡ଼ ! ତେବେ ଏ ସବୁ ବପୁ ସେ କନ୍ତ୍ରିଅନି ମିଲାଇଲା ?” ୫୭ ☆ଏନ୍ତାରି କଇ, ସେମନ୍ ଜିସୁକେ ନାମାଡ଼ ନାଇ ।

ଜିସୁ ସେମନ୍‌କେ କଇଲା “ଗଟେକ୍ ବବିସଡ଼ବକ୍ତା ନିଜର୍ ଗରେ ଆରି ଗାଏଁ ଚାଡ଼ିଦେଲେ, ସବୁଟାନ୍‌ବେ ବଲ୍ ବଲାଇଅଇସି ।” ୫୮ କାଇକେବଇଲେ ସେମନ୍ ଜିସୁକେ ବିସବାସ୍ କରଡ଼ ନାଇଜେ ସେ ତେଇ ଆରି ଅଦିକ୍ କାବା ଅଇଜିବା କାମ୍‌ମନ୍ କରେ ନାଇ ।

## ୧୪

ତୁବନ୍ ଦେଉ ଜଅନର୍ ମରନ୍

(ମାର୍‌କ ୭:୧୪-୨୯; ଲୁକ୍ ୯:୭-୯)

୯ ସେବେଲେ ଗାଲିଲି ଦେସର୍ ସାସନ୍ କାରିଆ ଏରଡ଼, ଜିସୁର୍ ବିସଇ ସୁନ୍‌ଲା । ୧୦ ସେ ତାର୍‌ଟାନ୍‌ବେ କାମ୍ କରବା ଲକ୍‌ମନ୍‌କେ କଇଲା, “ସତଇସେ ଏ ତୁବନ୍ ଦେଉ ଜଅନ୍‌ସେ । ସେ ଆରିତରେକ୍ ଜିବନ୍ ଅଇ ଉଟି ବାଉଡ଼ି ଆଇଲାଆଚେ । ସେଟାର୍‌ପାଇ ତାର୍‌ଟାନ୍‌ବେ କାବା ଅଇଜିବା କାମ୍ କରବା ବପୁ ଆଚେ ।”

୧୧ ☆ଆର୍ ଆଗତୁ ଏରଡ଼ ଜଅନ୍‌କେ ବାନ୍‌ବାକେ ଆଦେସ୍ ଦେଇରଇଲା ଆରି ତାକେ ସିକିଲି ସଙ୍ଗ୍ ବାନ୍, ବାନ୍ ଗରେ ସଙ୍ଗିରଇଲା । ତାର୍ ବାଇ, ପିଲିପର୍ ମାଇଜି ଏରଡ଼ିଆର୍ ଲାଗି, ସେ ଏନ୍ତ୍ର କିରିରଇଲା । ୧୨ ଜଅନ୍ ତାକେ କଇରଇଲା “ତମ୍‌ର୍ ବଉ ଏରଡ଼ିଆକେ ବିବା ଅଇବାଟା ତମ୍‌ର୍ ଚିକ୍ ଅଏନାଇ ।” ୧୩ ସେଟାର୍‌ପାଇ ଏରଡ଼ ଜଅନ୍‌କେ ମରାଇବାକେ ଜଜ୍‌ନା କରଡ଼େରଇଲା, ମାତର୍ ସେ ଜିଉଦି ଲକ୍‌ମନ୍‌କେ ଡରଡ଼େରଇଲା । କାଇକେବଇଲେ ଜିଉଦି ଲକ୍‌ମନ୍ ଜଅନ୍ ଗଟେକ୍ ବବିସଡ଼ବକ୍ତା ବଲି ମାନ୍‌ଡେରଇଲା ।

୧୪ ମାତର୍ ଏରଡ଼ର୍ ଜନମ୍ ପୁରଡ଼ି ଦିନେ ଏରଡ଼ିଆର୍ ଟକି, ତାକାଇରଇବା ଲକ୍‌ମନ୍‌ର୍ ମୁଆଚେ ନାଟ୍ କିରିରଇଲା । ୧୫ ଏରଡ଼ ତାର୍ ଉପ୍‌ରେ ଏତେକ୍ ସାର୍‌ଦା ଅଇଲାଜେ, ସାର୍‌ଦା ଅଇ ପର୍‌ମାନ୍ ନିୟମ୍ କରି କଇଲା “ତୁଇ ଜାଇଟା ମାଙ୍ଗ୍‌ଲେ, ସେଟା ଦେବି !”

୧୬ ତାର୍ ଆୟାର୍ କାତା ଦାରି ଟକି କଇଲା “ମକେ ଏବେଆକା ତୁବନ୍ ଦେଉ ଜଅନ୍‌ର୍ ମୁଣ୍ଟ୍ ଗଟେକ୍ ତାଲାଇ ସଙ୍ଗି କିରି ଦିଆ ।”

୯ ଏଟା ସୁନିକରି ରାଜା ଦୁକ୍ ଅଇଗାଲା । ଏଲେମିସା ସବୁର୍ ମୁଆଟେ ନିଜେ ପରମାନ ନିୟମ୍ କରିରଇଲାଜେ ଟକିର୍ ମନ୍ କରିରଇବାଟା ପୁରୁନ୍ କରବାକେ ଆଦେସ୍ ଦେଲା । ୧୦ ସେଟାରପାଇ ବନ୍ଦି ଗରେ ଜଅନର୍ ମୁଣ୍ କାଟା ଅଇଲା । ୧୧ ଗଟେକ୍ ତାଲାଟାନେ ମୁଣ୍ ସଙ୍ଗାଇ ଟକିକେ ଦେଲାଇ । ସେ ସେଟା ନେଇକରି ତାର୍ ମାକେ ଦେଲା ।

୧୨ ତାରପଟେ ଜଅନର୍ ସିସ୍ମନ୍ ଆସି ମଲା ଗାଗଡ୍ ନେଇ ତପ୍ବାକେ ଦାରିଗାଲାଇ । ସେମନ୍ ଜାଇକରି ଜିସୁକେ ଏ ବିସଇ ଜାନାଇଲାଇ ।

ଜିସୁ ପାଁର୍ଅଜାର୍ ଲକ୍‌କେ କୁଆଇବାଟା

(ମାର୍‌କ ୬:୩୦-୪୪; ଲୁକ୍ ୯:୧୦-୧୭; ଜଅନ୍ ୬:୧-୧୪)

୧୩ ଜିସୁ ଜଅନର୍ କବର୍ ସୁନ୍‌ଲା ଦାପରେ ତଙ୍ଗାଇ ଚଗ୍ଲା ଆରି ଗଟେକ୍ କିନରା ଜାଗାଇ ଗାଲା । ତେଇ ସେ ଜିବାଟା ଜାନିକରି ଲଗର୍ ପାକର୍ ସଅରେ ଅନି କେତେକ୍ କେତେକ୍ ଲକ୍‌ମନ୍ ଗାଡ୍ କଣ୍ଡିକଣ୍ଡି ଇଣ୍ଡି ଜିସୁର୍ ପଟେ ପଟେ ଗାଲାଇ । ୧୪ ଜେତେବେଲେ ଜିସୁ ତଙ୍ଗାଇଅନି ଉଡ୍‌ରି ଏତେକ୍‌ମାଣ୍ଡି ଲକ୍‌ମନ୍‌କେ ଦେକ୍‌ଲା, ସେ ଦୟା କଲା । ତେଇ ଜେଡ୍‌କି ରଗିମନ୍ ରଇଲାଇ, ସବୁକେ ନିକ କଲା ।

୧୫ ସେଦିନେ ସଞ୍ଜବେଲାଇ, ସିସ୍ମନ୍ ଆସି ତାକେ କଇଲାଇ, “ବେସି ଅଲ୍‌ସମ୍ ଅଇଗାଲାନି । ଆରି ଏଟା ଗଟେକ୍ କିନରା ଜାଗା, ଲକ୍‌ମନ୍‌କେ କଇଦିଆସ୍, ସେମନ୍ ଗାଉଁମନ୍‌କେ ଜାଇ କାଦି ମିଲାଇବାଇ ।”

୧୬ ମାତର୍ ଜିସୁ ସେମନ୍‌କେ କଇଲା, “ସେମନ୍ ଇତିଅନି ନ ଜାଅଡ୍ । ତମେ ସେମନ୍‌କେ କାଇଟାଆଲେ କାଇବାକେ ଦିଆସ୍ ।”

୧୭ ସିସ୍ମନ୍ କଇଲାଇ, “ଆମର୍ ଟାନେ ଏକାଇ ପାଁର୍ଟା ରୁଟି ଆରି ଦୁଇଟା ମାଟ୍ ସେ ଆଟେ ।”

୧୮ ଜିସୁ କଇଲା, “ସେଟା ମର୍ଟାନେ ଦାରିଆସା ।” ୧୯ ଜିସୁ ସବୁଲକ୍‌କେ ଗାଁସ୍ ଉପ୍ରେ ବସାଇବାକେ କଇଲା । ସେ ପାଁର୍ଟା ରୁଟି ଆରି ଦୁଇଟା ମାଟ୍ ଦାରି ସରଗବାଟେ ଦେକି ପର୍ମେସର୍‌କେ ଦନିଅବାଦ୍ ଦେଲା, ଆରି ରୁଟି ବାଙ୍ଗାଇ କରି ସିସ୍ମନ୍‌କେ ଦେଲା । ସିସ୍ମନ୍ ସବୁଲକ୍‌କେ ବାଟାକରି ଦେଲାଇ । ୨୦ ସେଟା ସବୁଲକ୍ କାଇକରି ସାନ୍ତି ଅଇଲାଇ । ତାରପଟେ ସିସ୍ମନ୍ ଅଗ୍ଲି ରଇବା ରୁଟି ଆରି ମାଟ୍ ଟୁଲିଆଇ ବାଟା ତାଲାଇ ବର୍ଡି କଲାଇ । ୨୧ ତେଇ ମାଇଜିମନ୍ ଆରି ପିଲାମନ୍‌କେ ଚାଡି, ସେ କାଦି ପାଁର୍ ଅଜାର୍ ଲକ୍ କାଇରଇଲାଇ ।

ଜିସୁ ପାନି ଉପରେ ଇଣ୍ଡିଲା

(ମାର୍‌କ ୬:୪୫-୫୨; ଜଅନ୍ ୬:୧୫-୨୧)

୨୨ ତାରପଟେ ଜିସୁ ସିସ୍ମନ୍‌କେ ତଙ୍ଗାଇ ବସାଇ ଗାଡ୍ ସେପାଟେ ଜିବାକେ କଇଲା । ସେ ନିଜେ ପଟେ ରଇଜାଇକରି ଲକ୍‌ମନ୍‌କେ ପାଟାଇତେ ରଇଲା । ୨୩ ସେ ଏକ୍‌ଲାସେ ପାର୍‌ତନା କରବାକେ ଗଟେକ୍ ତଙ୍ଗର୍ ଉପରେ ଗାଲା ଆରି ସଞ୍ଜ ଅଇବା ଜାକ ଜିସୁ ଗଟେକ୍ ଲକ୍‌ସେ ତେଇ ରଇଲା । ୨୪ ସେଡ୍‌କି ବେଲେ ତଙ୍ଗା କଣ୍ଡିଅନି ବେସି ଦୁର୍ ଗାଡ୍ ବିଡ୍‌ରେ ଉଟିଜାଇରଇଲା । ଆରି ଜବର୍ ପବନ୍ କଲାଜେ, ଲଅଡି ଟଲ୍‌ମିଲି ଜାଇତେରଇଲା ।

୨୫ କୁକ୍‌ଡା ତାକେ, ଏଦେ ଦେକା ! ଜିସୁ ପାନି ଉପରେ ଇଣ୍ଡି ଇଣ୍ଡି ସିସ୍ମନ୍‌ର୍ ଲଗେ ଆଇଲା । ୨୬ ସିସ୍ମନ୍ ତାକେ ଦେକି କିଲ୍‌ବିଲ୍ ଅଇଗାଲାଇ । ଡରର୍‌ମାଡେ ଡୁମା ବଲି କିର୍କିରଲାଇ ।

୨୭ ସେ ଦାପ୍‌ରେସେ ଜିସୁ ସେମନ୍‌କେ ସାଆସ୍ ଦେଇ କଇଲା, “ମୁଇ କାଇକି, ତରାନାଇ ।”

୨୮ ଜିସୁର୍ ଏ କାତା ସୁନି ପିତର୍ କଇଲା, “ମାପରୁ ଜଦି ସତଇସେ ତମେ ଅଇରଇସା ବଇଲେ, ମକେ ପାନି ଉପ୍ରେ ଇଣ୍ଡି ଇଣ୍ଡି ତମର୍ ଲଗେ ଆଇବାକେ ଆଦେସ୍ ଦିଆ ।”

୨୯ ଜିସୁ କଇଲା, “ଇଣ୍ଡି ଇଣ୍ଡି ଆଉ ।” ପିତର୍ ତଙ୍ଗାଅନି ବାରଇ, ପାନି ଉପ୍ରେ ଇଣ୍ଡି ଇଣ୍ଡି ଜିସୁର୍ ବାଟେ ଆଇବାର୍ ଦାରଲା । ୩୦ ମାତର୍ ପବନ୍ ଜବର୍ ଆଇବାଟା ଦେକିକରି ଡରିଗାଲା ଆରି ପାନିଟାନେ ବୁଡ଼ିଜିବାର୍ ଦାରଲା । ତେବେ ଆକ୍ମାରି କରି ଡାକ୍ଲା ଏ ମାପରୁ ମକେ ରକିଆ କର୍ !

୩୧ ଜିସୁ ସେ ଦାପ୍ରେ, ଆଡ୍ ଲାମାଇକରି ତାକେ ଦାରିକରି କଇଲା, “ଏ ଅଲପ୍ ବିସ୍ବାସ୍ କରୁ, କାଇକେ ଦୁଇମନିଆ ଅଇଲୁସ୍ନି ?”

୩୨ ମାତର୍ ସେମନ୍ ତଙ୍ଗାଇ ଚଗ୍ଲାକେ ପବନ୍ ବନ୍ଦୁଅଇ ଗାଲା । ୩୩ ତଙ୍ଗାଇ ରଇଲା ଲକ୍ମନ୍ ଜିସୁକେ ଜୁଆର୍ କରି କଇଲା, “ତମେ ସତ୍ସେ ମାପରୁର୍ ପିଲା ।”

ଜିସୁ ଗିନେସରତେ ରଗିମନ୍କେ ନିକ କର୍ବାଟା  
(ମାର୍କ ୭:୫୩-୫୭)

୩୪ ଜିସୁ ଆରି ତାର୍ ସିସ୍ମନ୍ ଗାଡ଼ଲଜିକରି ଗିନେସରତ୍ ଜାଗାଇ କେଟ୍ଲାଇ । ୩୫ ଆରି ତେଇର୍ ଲକ୍ମନ୍ ଜିସୁକେ ଚିନିକରି ଲଗେ ପାକେ ରଇବା ଚାରିବେଡ଼ିତ୍ ସବୁ ଜାଗାଇ କବର୍ ପାଟାଇଲାଇ ଆରି ରଗି ଲକ୍ମନ୍କେ ତାର୍ ଲଗେ ଆନ୍ଲାଇ । ୩୬ ରଗିମନ୍ ଜିସୁର୍ ପିନ୍ଦ୍ଲା ଲୁଗାର୍ ଜାଲି ଚିଇବାକେ, ଆଦେସ୍ ଦେବାକେ, ଲକ୍ମନ୍ ତାକେ ବାବୁଜିଆକରି କଇଲାଇ । ମାତର୍ ଜେତେକ୍ଲକ୍ ସେଟା ଚିଇଲାଇ, ସବୁଲକ୍ ନିକଅଇଲାଇ ।

### ୧୫

ଆନିଦାଦି ମନର୍ ରିତିନିତି  
(ମାର୍କ ୭:୧-୧୩)

୧ ଦିନେକ୍ କେତେଟା ପାରୁସିମନ୍ ଆରି ଦରମ୍ ଗୁରୁମନ୍ ଜିରୁସାଲାମ୍ ଅନି ଆସି ଜିସୁକେ ପାଚାରଲାଇ, ୨ “ଆମର୍ ଆନିଦାଦିମନ୍ ଜନ୍ ରିତିନିତି ଦେଇଆଚଡ୍, ସେଟା ସବୁ କାଇକେ ତମର୍ ସିସ୍ମନ୍ ମାନନ୍ନାଇ ? ବିଦି ଇସାବେ କାଇବା ଆଗ୍ଡୁ ନିକ କରି ଆଡ୍ ନ ଦଅଡ୍ ।”

୩ ଜିସୁ କଇଲା, “ତମେ କାଇକେ ପର୍ମେସରର୍ ଆଦେସ୍ ନ ମାନି ନିଜର୍ ରିତିନିତି ଇସାବେ କାମ୍ କଲାସ୍ନି ?” ୪ ପର୍ମେସର ଆଦେସ୍ ଦେଲାଆଚେ, ମା ବାବାକେ ଆଲାଦ୍କରା । ଆରି କେ ମିସା ନିଜର୍ ବାବା ମାକେ ସାଇପ୍ ଦେଇକରି କାଇବଲି କଇସି ବଇଲେ, ସେ ମରନର୍ ଡଣ୍ଡ ପାଇସି । ୫ ମାତର୍ ତମେ ସିକିଆ ଦେଲାସ୍ନି ଜେ, ଗଟେକ୍ ଲକ୍ ଜନ୍ ଦନ୍ ସଙ୍ଗ୍ ବାବା ମାକେ ସାଇଜ କରିପାର୍ତା, ସେଟା ପର୍ମେସରକେ ଦାନ୍ କଲିଆତି ବଲି କଇଲେ, ୬ “ସେ ଆରି ତାର୍ ବାବା ମାଆର୍ ଦାଇଡ୍ ନେବାର୍ ଲଡାନାଇ । ଏଣ୍ଡାରି ତମେ ପର୍ମେସରର୍ ଆଦେସ୍ ନ ମାନିକରି ନିଜର୍ ରିତିନିତି ଇସାବେ ଚାଲୁଲାସ୍ନି । ୭ ଏରେ ଦରମ୍ ଲକ୍ ବଲାଅଇବା କୁଟିଆଲ୍ମନ୍, ତମର୍ ବିସଇ ନେଇ ଜିସାଇୟ୍ ବବିସଡ୍ବକ୍ତା କଇରଇବାଟା ଟିକ୍ ଆକା ।”

୮ ପର୍ମେସର କଇଲାନି,

ଏ ଲକ୍ମନ୍ କାତାଇସେ ମକେ ସନ୍ମାନ୍ ଦେଲାଇନି,

ମାତର୍ ସେମନ୍ ମନ୍ ମର୍ତ୍ତେଇଅନି ବେସି ଦୁରିକେ ।

୯ ସେମନ୍ ମକେ ଡାକ୍ବାଟାନେ କାଇ ଅରଡ୍ ନାଇ,

କାଈକେ ବଇଲେ ସେମନ୍ ଲକ୍ମନ୍ ତିଆରକରି ରଇବା ରିତିନିତି ମର୍ ଆଦେସ୍ ବଲି ସିକାଇଲାଇନି ।

ଗଟେକ୍ ଲକ୍ମକେ କାଈଟା ଅସୁକଲ୍ କରସି

୧୦ ତାର୍ପତେ ଲକ୍ମନ୍କେ କଇଲା, “ମନ୍ ଦେଇ ସୁନା ଆରି ବୁଢ଼ବାକେ ଚେସଟା କରା । ୧୧ ଲକ୍ମର୍ ଟଣ୍ଡେଅନି ଜାଈଟା ବିତ୍ତରେ ଗାଲାନି, ସେଟା ତାକେ ଅସୁକଲ୍ ନ କରେ, ମାତର୍ ଜାଈଟା, ତାର୍ ବିତ୍ତରେଅନି ବାରଇଆଇସି, ସେଟା ତାକେ ଅସୁକଲ୍ କରସି ।”

୧୨ ସିସମନ୍ ଜିସୁର୍ ଲଗେ ଆସି ପାଟାରଲାଈ, “ତମେ କଇଲା କାତା ପାରୁସିମନ୍କେ ବେସି ବାଦଲା, ଏଟା କାଈ ତମେ ନାଜାନାସ୍ କି ?”

୧୩ ଜିସୁ କଇଲା, “ଜନ୍ ଗର୍ମନ୍ ମର୍ ସରଗର୍ ବାବା ରପେ ନାଈ, ସେ ସବୁ ଜିକା ଅଇସି । ୧୪ \*ସେମନ୍ ବିସଇନେଇ ତେରେପେତେ ଉଆନାଈ । ସେମନ୍ କାଣାମନ୍କେ ବାଟ୍ ଦେକାଉ କାଣାମନ୍ । ଗଟେକ୍ କାଣା ଆରି ଗଟେକ୍ କାଣାକେ ବାଟ୍ଦେକାଇଲେ ଦୁଇ ଲକ୍ ଜାକ କାଲେ ଅଦରବାଈ ।”

୧୫ ପିତର୍ କଇଲା, “ଏ କାତା ଆମକେ ନିକ କରି ବୁଜାଇଦେ ।”

୧୬ ଜିସୁ କଇଲା, “ଆଜିକେ ଜାକ ବିନ୍ଲକ୍ମନ୍ତରେତେଇ ଅନି ତମର୍ ବୁଢ଼ବା ବପୁ କଣ୍ଡେକ୍ ମିସା ଅଦିକ୍ ଅଏନାଈ । ୧୭ ତମେ ଏଡ଼କି ବୁଜାସ୍ ନାଈ କି ? ଜନ୍ ଦିନ୍ସୁ ମୁନ୍ସର୍ ଟଣ୍ଡେବାଟେ ପୁରସି, ସେଟା ପେଟ୍ ବିତ୍ତରେ ଜାଈସି ଆରି ଗାଗ୍ତେଅନି ବାରଇ ଜାଈସି । ୧୮ \*ମାତର୍ ଜନ୍ଟା ସବୁ ମୁନ୍ସର୍ ଟଣ୍ଡେଅନି ବାରଇସି, ସେଟା ତାର୍ ମନ୍ବିତ୍ତରେଅନି ଜନମ୍ ଅଇସି ଆରି ସେଟାସେ ତାକେ ଅସୁଚି କରସି । ୧୯ କାଈକେବଇଲେ ତାର୍ ମନେ ଜନମ୍ ଅଇଲା କାରାପ୍ ଚିନ୍ତାଇଅନି ସେ ନର୍ମାରବାଟା, କାରାପ୍ କାମ୍ କରବାଟା, ବେସିଆ କାମ୍ କରବାଟା, ଚର୍ବାଟା, ମିଚକାତା କଇବାଟା ଆରି ବିନ୍ଲକ୍ମର୍ କୁଚକାତା କଇବା ପାରା, ବିନ୍ ବିନ୍ ରକାମର୍ ନିୟମ୍ ନଇଲା କାମ୍ମନ୍ କରସି ।” ୨୦ “ଏସବୁ କାମ୍ ଲକ୍ମକେ ଅସୁକଲ୍ କରସି । ମାତର୍ ସେମନ୍ କଇଲା ଇସାବେ ଆଡ଼ ନ ଦଇକରି କାଈଲେ, କେ ଅସୁକଲ୍ ନଅଅଡ଼ ।”

ଗଟେକ୍ ମାଈଜିର୍ ବିସବାସ୍

(ମାର୍କ ୭:୨୪-୩୦)

୨୧ ଜିସୁ ସେ ଜାଗା ଚାଡ଼ିକରି ସର ଆରି ସିଦନର୍ ସଅରେ ଗାଲା । ୨୨ ଆରି ଦେକା, ତେଇ ବାସାକରି ରଇଲା ଗଟେକ୍ କିଣାନିୟ୍ ମାଈଜି ଜିସୁର୍ ଲଗେ ଆସି କଇଲା, “ଏ ଦାଉଦ୍ କୁଟୁମର୍ ମାପୁରୁ, ମକେ ଦୟାକରା । ମର୍ ଟକିକେ ତୁମା ଦାରଲା ଆତେ ଆରି ସେ ବଡେ କସଟ ପାଇଲାନି ।”

୨୩ ମାତର୍ ଜିସୁ ତାକେ ପଦେକ୍ କାତା ମିସା କଏ ନାଈ । ସିସମନ୍ ତାର୍ ଲଗେ ଆସି ବାବୁଜିଆ କଲାଈ, “ତାକେ ବିଗି ପାଟାଇ ଦିଆସ୍ । ଦେକା ସେ କେନ୍ତୁ ଆଉଲିଅଇ ଆମ୍ମକେ କେଦିଆନ୍ଲାନି ?”

୨୪ ଜିସୁ କଇଲା, “ଆଜିରଇବା ମେଣ୍ଟାପାରା ବାଟ୍ ବାନା ଅଇଲା ଇସରାଏଲ୍ ଲକ୍ମନ୍ତର୍ ଲଗେସେ ମୁଇ ଆଇଲି ଆତି ।”

୨୫ ସେ ମାଈଜି ଆସି ଜିସୁର୍ ଗଡ଼ତଲେ ମାଣ୍ଡିକୁଟା ଦେଇ ଜୁଆର୍ କରି କଇଲା, “ମାପୁରୁ ମକେ ଦୟା କରା ।”

୨୬ ଜିସୁ କଇଲା, “ପିଲାମନ୍ତର୍ କାଦି ନେଇ କୁକୁରର୍ ମୁଆଟେ ପିଙ୍ଗବାଟା ଟିକ୍ ନାଈ ।”

୨୭ ସେ ମାଇଜି କଇଲା, ଏଟା ସତ୍ କାତା ମାପୁରୁ, ମାତର୍ କୁକୁର୍ମନ୍ ମିସା ସାଉକାରର୍ ଅଦର୍ଲା ସକ୍ତି କାଇବାକେ ପାଇବାଇ ।

୨୮ ଜିସୁ ତାକେ କଇଲା, “ତମେ ଗଟେକ୍ ତାଟ୍‌ସକ୍ ବିସ୍‌ବାସ୍ କର୍‌ବା ମାଇଜି । ତୁଇ ମନ୍‌କଲାଟା ପୁରୁନ୍ ଅଇସି ।” ସେଦାପ୍‌ରେ ତାର୍ ଟକି ନିମାନ୍ ଅଇଲା ।

ଜିସୁ ବେସି ଲକ୍‌ମନ୍‌କେ ନିକ କଲା

୨୯ ଜିସୁ ତେଇଅନି ବାରଇ ଗାଡ୍ କଣ୍ଟି କଣ୍ଟି ଜାଇ ଗଟେକ୍ ଡଙ୍ଗର୍ ଉପ୍‌ରେ ବସ୍‌ଲା । ୩୦ ବେସି ଲକ୍‌ମନ୍ ତାର୍ ଲଗେ ରୁଣ୍ଟିଲାଇ । ସେମନ୍‌ର୍ ବିତ୍‌ରେ ଚଟା, କାଣା, ଆଡ୍‌ଗଡ୍ ସୁକିଗାଲାଟା ଆରି ବେସି ଜରର୍ ଲକ୍‌ମନ୍‌କେ ଆନି, ଜିସୁର୍ ପାଦ୍ ତଲେ ତୁଲାଇଲାଇ । ଆରି ସେ ସେମନ୍‌କେ ନିକ କଲା । ୩୧ ଗୁଲା କାତା ଅଇବାଟା, ସୁକ୍‌ଲା ଆଡ୍ ନିକ ଅଇବାଟା, ଚଟା ଇଣ୍ଟିବାଟା, କାଣା ଦେକିପାର୍‌ବାଟା ଦେକି ଲକ୍‌ମନ୍ କାବା ଅଇଗାଲାଇ ଆରି ଇସ୍‌ରାଏଲର୍ ମାପୁରୁକେ ଜୁଆର୍ କଲାଇ ।

ଜିସୁ ଚାରିଅଜାର୍ ଲକ୍‌କେ କୁଆଇଲା  
(ମାର୍‌କ ୮:୧-୧୦)

୩୨ ଜିସୁ ସିସ୍‌ମନ୍‌କେ ତାକି କଇଲା, “ଏ ଲକ୍‌ମନ୍‌କେ ଦେକି ମକେ ଦୁକ୍ ଲାଗ୍‌ଲାନି, କାଇକେ ବଇଲେ ସେମନ୍ ମର୍ ସକ୍ ତିନ୍ ଦିନ୍ ଅଇଲାନି ଆଚଡ୍ ଆରି ସେମନ୍‌ର୍ ଲଗେ କାଇଟା ମିସା ନାଇ । ସେମନ୍ ନ କାଇ ଇତିଅନି ଉଟିଜାଅଡ୍, ଏଟା ମୁଇ ମନ୍ କରି ନାଇ; କାଇକେ ବଇଲେ ବାଉଡିଗାଲାବେଲେ ବାଟେ ସେମନ୍ ତାକି ଜାଇ ଅଦର୍ ପଡ୍ ଅଇଜିବାଇ ।”

୩୩ ସିସ୍‌ମନ୍ ତାକେ କଇଲା, “ଏ ମରୁବାଲିବୁଏଁ ଏଡେକ୍ ଲକ୍‌କେ କୁଆଇବାକେ ଆମେ କନ୍ତିଅନି ଏଡେକ୍‌ମାଣ୍ଟ କାଦି ଆନ୍‌ରୁ ?”

୩୪ ଜିସୁ ପାଚାରୁଲା, “ତମର୍ ଲଗେ କେଡେଟା ରୁଟି ଆଟେ ?” ସେମନ୍ କଇଲା, “ସାଡ୍‌ଟା ରୁଟି ଆରି କେଡେଟା ସାନ୍ ମାଟ୍ ଆଟେ ।”

୩୫ ଜିସୁ ଲକ୍‌ମନ୍‌କେ ବୁଏଁ ବସ୍‌ବାକେ କଇଲା । ୩୬ ତାର୍‌ପଟେ ସେ ସାଡ୍‌ଟା ରୁଟି ଆରି ମାଟ୍ ନେଇ ପର୍‌ମେସର୍‌କେ ଦନିଅବାଦ୍ ଦେଲା ଆରି ବାଙ୍ଗାଇ କରି ସିସ୍‌ମନ୍‌କେ ଦେଲା । ସିସ୍‌ମନ୍ ସେଟା ଲକ୍‌ମନ୍‌କେ ବାଟାକରି ଦେଲାଇ । ୩୭ ସବୁ ଲକ୍ ପେଟ୍‌ପୁରଡେ କାଇଲାଇ । ଆରି ସିସ୍‌ମନ୍ ଅଗଲ୍‌ଲାଟା ସାଡ୍‌ଟାତାଲାଇ ବର୍‌ଡି କଲାଇ । ୩୮ ମାଇଜିଟକି ଆରି ପିଲାମନ୍‌କେ ଚାଡି ଚାରି ଅଜାର୍ ଲକ୍ ଏ କାଦି କାଇରଇଲାଇ ।

୩୯ ଏଟାର୍ ପଟେ ଜିସୁ ଲକ୍‌ମନ୍‌କେ ପାଟାଇ ଦେଇ ଡଙ୍ଗାଇ ଚଗି ମଗ୍‌ଦାନ୍ ଜାଗାର୍ ସନ୍ଦିଲଗେ ଗାଲା ।

### ୧୭

କାବାଅଇଜିବା କାମର୍ ପାଇ ଦାବି  
(ମାର୍‌କ ୮:୧୧-୧୩; ଲୁକ୍ ୧୨:୫୪-୫୬)

୧ \*ଦିନେକ୍ କେଡେଟା ପାରୁସିମନ୍ ଆରି ସାଦୁକିମନ୍ ଜିସୁର୍ ଦସ୍ ଦାର୍‌ବାକେ ତାର୍ ଲଗେ ଆଇଲାଇ । ସେମନ୍ ତାକେ କଇଲା, “ପର୍‌ମେସର୍ ତକେ ବାଟ୍‌ଲା ଆଟେ ବଲି ଆମେ ଜାନ୍‌ବାକେ, ତୁଇ ଗଟେକ୍ ସରଗର୍ କାବାଅଇଜିବା ଚିନ୍ ଦେକା ।” ୨ ଜିସୁ କଇଲା, “ତମେ ସଞ୍ଜ୍ ବେଲାଇ ବାଦଲ୍ ରକ୍ ଡିସ୍‌ଲେ ପାଗ୍ ବଲ୍ ଅଇସି ବଲି କଇସା, ୩ ଆରି ସାକାଲ୍ ବେଲାଇ ରକ୍ ଆରି ଆନ୍ଦାର୍ ଡିସ୍‌ଲେ ପାନି ମାର୍‌ସି ବଲି ଜାନାସ୍ । ବାଦଲ୍ ଦେକି ପାଗର୍ କାତା ଆଗ୍‌ତୁ ଜାନ୍‌ସା । ମାତର୍ ଆଜିକାଲିର୍ ଡିସ୍‌ବା ଚିନ୍ ତମେ ବୁଜିନାପାରାସ୍ । ୪ \*ଏ ଜୁଗର୍ ଲକ୍‌ମନ୍ କେଡେ କାରାପ୍ ଆରି ପର୍‌ମେସର୍‌କେ

\* ୧୭:୧ ୧୬:୧ ମାଡ଼ିଉ ୧୨:୩୮; ଲୁକ୍ ୧୧:୧୭      \* ୧୭:୪ ୧୬:୪ ମାଡ଼ିଉ ୧୨:୩୯; ଲୁକ୍ ୧୧:୨୯

ବିସ୍‌ବାସ୍ ନ କରୁମନ୍ ! ତମେ ଗଟେକ୍ କାବାଅଇଜିବା କାମ୍ ଦେକ୍‌ବାକେ କଇଲାସ୍‌ନି ? ମାତର୍ ନାଇ, ଜୁନସର୍ ଜିବନେ ଗଟ୍‌ଲାଟା ଚାଡ଼ି ଆରି ଗଟେକ୍ ମିସା କାବାଅଇଜିବା କାମ୍, ତମେ ମର୍ତ୍ତେଇ ଦେକିନାପାରାସ୍ ।” ଏଟା କଇ ଜିସୁ ସେମନ୍‌କେ ଚାଡ଼ି ଉଚିଗାଲା ।

ପାରୁସି ଆରି ସାଦୁକିମନର୍ ସିକିଆ

୫ ସିସ୍‌ମନ୍ ଗାଡ଼ ସେପାଟେ ଜିବାବେଲେ ରୁଚି ନେବାକେ ପାସରି ଜାଇରଇଲାଇ । ୬ \*ଜିସୁ ସେମନ୍‌କେ କଇଲା, “ଜାଗ୍‌ରଡ଼, ପାରୁସି ଆରି ସାଦୁକିମନର୍ କମିର୍ତେଇଅନି ତରିକ୍‌ନା ଅଇ ରୁଆ ।” ୭ ସେମନ୍ ନିଜର୍ ନିଜର୍ ବିତ୍‌ରେ କୁଆ ବଲା ଅଇଲାଇ, “ଆମେ ରୁଚି ଆନି ନ ରଇଲାର୍ ପାଇ ସେ ଏଡ଼ାରି କଇଲାନି ।”

୮ ସେମନ୍ କାଇଟା କଇତେ ରଇଲାଇ ସେଟା ଜାନି ଜିସୁ ସେମନ୍‌କେ କଇଲା, “ତମର୍ ଲଗେ ରୁଚି ନାଇ ବଲି କାଇକେ କୁଆବଲା ଅଇଲାସ୍‌ନି ? ତମର୍ ବିସ୍‌ବାସ୍ କେତେ ଦୁର୍‌ବଲ୍ । ୯ \*ଏବେ ଜାକ ତମେ ବୁଜାସ୍ ନାଇ କି ? ପାର୍ ଅଜାର୍ ଲକ୍‌ମନର୍ ବିତ୍‌ରେ ମୁଇ ପାର୍ଟା ରୁଚି ବାଟାକରି ରଇବା କାତା ତମେ କାଇ ପାସରି ଗାଲାସ୍ କି ? ସେଡ଼କିବେଲେ ତମେ କେତେଟା ଡାଲାଇ ବର୍ତ୍ତି କରି ରଇଲାସ୍ ? ୧୦ \*ଆରି ଚାରି ଅଜାର୍ ଲକ୍‌କେ ସାଡ଼ଟା ରୁଚି କାତା ମନେ ନାଇ କି ? ସେଡ଼କିବେଲେ କେତେ ଡାଲା ବର୍ତ୍ତି କରି ରଇଲାସ୍ ?

୧୧ “ମୁଇ ରୁଚିର୍ ବିସଇ ନ କଇତେ ରଇଲି, ତମେ କେନ୍ତ୍ର ବୁଜାସ୍ ନାଇ ? ମୁଇ କଇଲିନି, ପାରୁସି ଆରି ସାଦୁକିମନର୍ କମିର୍ ପାରା ସିକିଆ ତେଇଅନି ତରିକ୍‌ନା ଅଇ ରୁଆ ବଲି ।” ୧୨ ସେଡ଼କିବେଲେ ସିସ୍‌ମନ୍ ବୁଜି ପାରୁଲାଇ ଜେ, ଜିସୁ ରୁଚିର୍ କମିର୍ କାତା ନ କଇତେ ରଇଲା, ମାତର୍ ପାରୁସି ଆରି ସାଦୁକିମନର୍ ସିକିଆ ତେଇ ତରିକ୍‌ନା ଅଇ ରୁଆ ବଲି କଇରଇଲା ।

ପିତର୍ ଜିସୁକେ ମସିଅ ବଲି ଜାନାଇବାଟା

(ମାର୍‌କ ୮:୨୭-୩୦; ଲୁକ୍ ୯:୧୮-୨୧)

୧୩ ଜିସୁ କାଇସେରିଆ ପିଲିପି ଗଡ଼ ପାକାପାକି ଜାଗାଇ ଗାଲା ପତେ ସିସ୍‌ମନ୍‌କେ ପାଚାରୁଲା, “ନର୍‌ପିଲା କେ ବଲି ଲକ୍‌ମନ୍ କାଇଟା କଇଲାଇନି ?”

୧୪ \*ସେମନ୍ କଇଲାଇ, “କେତେ ଲକ୍ କଇଲାଇନି, ସେ ତୁବନ୍ ଦେଉ ଜଅନ୍ । ଆରି କେତେ ଲକ୍ ‘ସେ ଏଲିୟ’, ବିନ୍ ଲକ୍‌ମନ୍ କଇଲାଇନି, ‘ସେ ଜିରିମିୟ ନଇଲେ ବବିସଡ଼ବକ୍‌ତାମନର୍‌ତେଇଅନି ଗଟେକ୍ ଲକ୍’ ।”

୧୫ ଜିସୁ ପାଚାରୁଲା, “ମୁଇ କେ ବଲି ତମେ କାଇଟା ବଇଲାସ୍‌ନି ?”

୧୬ \*ସିମନ୍ ପିତର୍ କଇଲା, “ତମେ କିରିସ୍‌ଟ, ମସିଅ, ଜିବନ୍ ରଇବା ପରମେସରର୍ ପିଲା ।”

୧୭ ଜିସୁ କଇଲା, “ନିମାନ୍, ଜୁନସର୍ ପିଲା, ପିତର୍ ! ଏଟା ସଡ଼, ତୁଇ ମୁନୁସର୍‌ଟାନେ ଅନି କଉସ୍ ନାଇ । ମର୍ ସରଗର୍ ବାବା ତକେ ଜାନାଇଲାକେ ତୁଇ କଇଲୁସ୍ । ୧୮ ସେଟାର୍‌ପାଇ ମୁଇ ତକେ କଇଲିନି, ତୁଇ ପିତର୍, ଜାର୍ ଅରଡ଼ କି ପାକ୍‌ନା । ଏ ପାକ୍‌ନା ଉପରେ ମୁଇ ମର୍ ମଣ୍ଡଲି ତିଆର୍ କର୍‌ବି । ଜେନ୍ତକି ମରନ୍ ପାରା ବପୁ ମିସା ତାକେ କାଇ କରିନାପାରେ ।

୧୯ \* “ମୁଇ ତକେ ସରଗ୍ ରାଇଜର୍ କୁଟିକାଡ଼ି ଦେବି । ତୁଇ ଜାଇଟା ଜଗତେ ନାଇ ବଲ୍‌ସୁ, ସେଟା ସରଗେ ମିସା ନାଇ ଅଇସି । ତୁଇ ଜଗତେ ଜାଇଟା କରା ବଲି କଇସୁ

\* ୧୭:୨ ୧୭:୨ ଲୁକ୍ ୧୭:୧ \* ୧୭:୯ ୧୭:୯ ମାଡ଼ିଉ ୧୪:୧୭-୨୧ \* ୧୭:୧୦ ୧୭:୧୦ ମାଡ଼ିଉ ୧୫:୩୪-୩୮

\* ୧୭:୧୪ ୧୭:୧୪ ମାଡ଼ିଉ ୧୪:୧,୨; ମାର୍‌କ ୭:୧୪,୧୫; ଲୁକ୍ ୯:୭,୮ \* ୧୭:୧୭ ୧୭:୧୭ ଜଅନ୍ ୬:୬୮,୭୯

\* ୧୭:୧୯ ୧୭:୧୯ ମାଡ଼ିଉ ୧୮:୧୮; ଜଅନ୍ ୨୦:୨୩

ସେଟା ସରଗେ ମିସା କରାଅଇସି ।” ୨୦ ସେ ମସିଅ ବଲି କାକେ ନ କଇବାକେ, ସିସ୍‌ମନକେ ଡାଟକଲା ।

ଜିସୁ ନିଜର୍ ଦୁକ୍ ଡଣ୍ଟ ବିସଇ ଜାନାଇଲା  
(ମାର୍କ ୮:୩୧; ମାଠିର ୯:୧; ଲୁକ୍ ୯:୨୨-୨୭)

୨୧ ସେବେଲେଅନି ଜିସୁ ସିସ୍‌ମନକେ ବୁଢ଼ଲାପାରା କଇବାର ଦାରଲା, “ମୁଇ ଜିରୁସାଲାମ୍ ଜାଇ ଦରମ୍‌ଗୁରୁମନ୍, ମୁକିଅ ପୁଜାରିମନ୍ ଆରି ପାରଟିନମନ୍‌ରଟାନେ ବେସି କସ୍‌ଟ ପାଇବି । ସାରାସାରି ମକେ ମରାଇବାଇ, ମାତର୍ ତିନ୍ ଦିନ୍ ଗାଲାପଟେ ମୁଇ ଆରି ତରେକ୍ ଜିବନ୍ ଅଇ ଉଟ୍‌ବି ।” ୨୨ ପିତର୍ ଜିସୁକେ ଅଁଡରେ ଡାକିନେଇ ସେନ୍ତି ନ ଅ ବଲି ଦମ୍‌କାଇଲା । “ପର୍‌ମେସର୍ ତମକେ କାଇଟା ନ କର, ମାପୁରୁ, ତମକେ ଏ ସବୁ କେବେ ମିସା ନଅ ।” ୨୩ ଜିସୁ ପାସ୍‌ଲି କରି କଇଲା, “ମର୍ ମୁଆଟେଅନି ଦୁରିକେ ଜା ସଇତାନ୍ । ତୁଇ ମର୍ ବାଟ୍ ରୁଟିଦେଲୁସିନି । ମକେ ନିରୁ ବଲି କଅ ନାଇ । କାଇକେ ବଇଲେ ତମର୍ ଚିନ୍ତା ମୁନୁସ୍‌ମନର୍‌ତେଇଅନି, ପର୍‌ମେସର୍‌ତେଇଅନି ନାଇ ।”

୨୪ \*ତାରପଟେ ଜିସୁ ସିସ୍‌ମନକେ କଇଲା, “କେ ମିସା ମର୍ ସଙ୍ଗ୍ ଆଇବାକେ ମନ୍ କଲେ, ନିଜର୍ ମନ୍ କଲାଟା ସବୁ ଚାଡିଦେଇ, ନିଜର୍ କୁରସ ବଇବାକେ ଅଇସି, ଆରି ମର୍ ପଟେ ପଟେ ଇଣ୍ଟ୍ରାବାକେ ଅଇସି । ୨୫ \*କାଇକେ ବଇଲେ କେ ମିସା ନିଜର୍ ଜିବନ୍ ରକିଆ କର୍‌ବାକେ ମନ୍ କର୍‌ସି ବଇଲେ, ସେଟା ସେ ଆରାଇସି, ମାତର୍ ଜେ ମର୍ ଲାଗି ଜିବନ୍ ଦେଇସି, ସେ ସତଇସେ ସେଟା ରକିଆ କର୍‌ସି । ୨୬ ଜଦି ଗଟେକ୍ ଲକ୍, ଗୁଲାଇ ଜଗଡ୍ ଜିତିକରି ନିଜର୍ ଜିବନ୍ ଆରାଇଦେଇସି ବଇଲେ ସେଟା କାଇ ଲାବ୍ ? ଜିବନ୍ ବାଉଡାଇ ପାଇବାକେ ଆଲେ ସେ କାଇଟା ମିସା ଦେଇ ନାପାରେ । ୨୭ \*ନର୍‌ପିଲା ମୁଇ ବାବା ପର୍‌ମେସର୍‌ର ଡାକ୍‌ପୁଟା ପାଇ ସରଗ୍ ଦୁଡ୍‌ମନ୍‌ର୍ ସଙ୍ଗ୍ ଆରି ତରେକ୍ ଆଇବି । ସେଡ୍‌କି ବେଲେ ମୁଇ ସବୁ ଲକର୍ କରିରଇବା କାମ୍ ଦେକି ପୁରୁସ୍‌କାର୍ ଦେବି । ୨୮ ମୁଇ ତମକେ ସଡ୍ କଇଲିନି, ନର୍‌ପିଲା ମୁଇ ମର୍ ରାଇଜେ ରାଜା ଅଇ ଆଇବା ଜାକ, ଇତି ରଇଲା କେତେ ଲକ୍ ନ ମରଡ୍ ।”

୧୭

ଜିସୁ ରୁପ୍ ବାଦ୍‌ଲାଇବାଟା  
(ମାର୍କ ୯:୨-୧୩; ଲୁକ୍ ୯:୨୮-୩୬)

୧ ତଅ ଦିନପଟେ ଜିସୁ ପିତର୍, ଜାକୁବ୍ ଆରି ଜଅନ୍ ଦୁଇ ବାଇକେ ନେଇ ଗଟେକ୍ ଡେଙ୍ଗ୍ ଡେଙ୍ଗ୍‌ରେ ଗାଲା । ତେଇ କେ ମିସା ନ ରଇଲାଇ । ୨ ସିସ୍‌ମନ୍ ଦେକ୍‌ଲା ଦାପ୍‌ରେ ଜିସୁ, ଗଟେକ୍ ଦେକ୍‌ଲେ କାବା ଅଇଜିବା ରୁପ୍ ଅଇ ବାଦ୍‌ଲି ଗାଲା । ତାର ମୁ ବେଲ୍ ପାରା ଉଜଲ୍ ଅଇଲା ଆରି ପଟିଆର୍ ଉଜଲ୍ ପୁଲ୍‌ପାରା ଦବ୍ ଡିସ୍‌ଲା । ୩ ସିସ୍‌ମନ୍ ମସା ଆରି ଏଲିୟ ଜିସୁର୍ ସଙ୍ଗ୍ କାତାବାର୍‌ତା ଅଇବାଟା ଦେକ୍‌ଲାଇ । ୪ ପିତର୍ ଜିସୁକେ କଇଲା, “କେଡେ ସୁକର୍ କାତା, ଆଜି ଆମେ ଇତି ଆରୁ । ତମେ ଜଦି ମନ୍ କର୍‌ସା, ଇତି ମୁଇ ତିନ୍‌ଟା କୁଡିଆ ତିଆର୍ କର୍‌ବି । ତମର୍ ପାଇ ଗଟେକ୍, ମସା ଆରି ଏଲିୟର୍ ପାଇ ଦୁଇଟା ।”

୫ \*ପିତର୍ ଏଟା କଇବାବେଲେ ଏଦେ ଦେକା ! କଣ୍ଟେକ୍ ବାଦ୍‌ଲ୍ ଉଜଲ୍ ଅଇ ସେମନ୍‌ର୍ ଉପ୍‌ରେ ଉଡି ଆଇଲା ଆରି ତେଇଅନି ଗଟେକ୍ ସର୍ ଆଇଲା “ଏ ମର୍ ଆଲାଦର୍ ପଅ, ଆର୍ ଲଗେ ମୁଇ ବେସି ସାର୍‌ଦା । ତାର କାତା ମନ୍ ଦେଇ ସୁନା ।”

\* ୧୭:୨୪ ୧୭:୨୪ ମାଠିର ୧୦:୩୮; ଲୁକ୍ ୧୪:୨୭    \* ୧୭:୨୫ ୧୭:୨୫ ମାଠିର ୧୦:୩୯; ଲୁକ୍ ୧୭:୩୩; ଜଅନ୍ ୧୨:୨୫    \* ୧୭:୨୬ ୧୭:୨୬ ମାଠିର ୨୫:୩୧; ରମିୟ ୨:୬    \* ୧୭:୫ ୧୭:୫ ମାଠିର ୩:୧୭; ୧୭:୧୮; ମାର୍କ ୧:୧୧; ଲୁକ୍ ୩:୨୨    \* ୧୭:୫ ୧୭:୫ ୨ ଯ ପିତର୍ ୧:୧୭,୧୮



୭ ସିସ୍‌ମନ୍ ସେ ସର୍ ସୁନି ଏତେକ୍ ଡରି ଗାଲାଜ ଜେ ସେମନ୍ ଉମତାଡ଼ିଅଇ ଅଦ୍‌ରିଗାଲାଜ । ୭ ଜିସୁ ସେମନ୍‌ର ଲଗେ ଆସି ସେମନ୍‌କେ ଚିଇ କରି କଇଲା, “ତରା, ତରା ନାଜ ।” ୮ ସେଟାର୍ ପାଇ ସେମନ୍ ଉପରେ ଦେକ୍‌ଲାଜଜେ ଜିସୁକେ ଚାଡ଼ି ଆରି କେ ତସଡ଼ ନାଜ ।

୯ ସେମନ୍ ତଙ୍ଗରେଅନି ଉଡ଼ରି ଆଇଲା ବେଲେ ଜିସୁ ସେମନ୍‌କେ ଆଦେସ୍ ଦେଇ କଇଲା, “ନର୍‌ପିଲା ମୁଇ ମଲାଟାନେଅନି ଆରିତରେକ୍ ନ ଉର୍‌ବା ଜାକ ଏ ଦେକ୍‌ଲା କାତା ତମେ କାକେ କୁଆ ନାଜ ।”

୧୦ ସିସ୍‌ମନ୍ ତାକେ ପାଚାର୍‌ଲାଜ “ଆମର୍ ଦରମ୍ ଗୁରୁମନ୍ ଏଲିୟ ପର୍‌ତୁମ୍ ଆଇସି ବଲି କାଇକେ କଇଲାଜ ଆଚଡ଼ ?”

୧୧ ଜିସୁ କଇଲା, “ଉଁ ଏଲିୟ ପର୍‌ତୁମ୍ ଆସିକରି ସବୁ ବିସଇ ତିଆର୍ କରି ରଇବା କାତା । ୧୨ \*ମାତର୍ ମୁଇ ତମ୍‌କେ କଇଲିନି, ଏଲିୟ ତା ଆସି ସାର୍‌ଲା ଆଚେ ଆରି ଲକ୍‌ମନ୍ ତାକେ ନ ଚିନି ଜନ୍‌ଟା ମନ୍ କଲା ସେଟା ତାକେ କଲାଜ ଆଚଡ଼ । ସେନ୍ତାରିସେ ନର୍‌ପିଲା ମକେ ମିସା ସେମନ୍ ସେକ୍ତି କାରାପ୍ ଚଲାଟଲ୍‌ଡ଼ି କର୍‌ବାଇ ।”

୧୩ ସେତକ୍ ବେଲେ ସେମନ୍ ବୁଜି ପାର୍‌ଲାଜ ଜେ, ଜିସୁ ତୁବନ୍ ଦେଉ ଜଅନର୍ ବିସଇ କଇଲାନି ବଲି ।

ଜିସୁ ତୁମା ଦାର୍‌ଲା ପିଲାକେ ନିକ କଲା ।

(ମାର୍‌କ ୯:୧୪-୨୯; ଲୁକ୍ ୯:୩୭-୪୩)

୧୪ ଜିସୁ ଆରି ତାର୍ ସିସ୍‌ମନ୍ ଲକ୍ ଗଉଲି ବିଡ଼ରେ ବାଉଡ଼ି ଆଇଲା ପଚେ, ଗଟେକ୍ ଲକ୍ ଜିସୁର୍ ଲଗେ ଆସି ମାଣ୍ଡିକୁଟା ଦେଇ କଇଲା, ୧୫ “ମାପୁରୁ, ମର୍ ପିଲାକେ ଦୟା କରା । ମୁର୍ତା ବେମାର୍ ଲାଗି କସ୍‌ଟ ପାଇଲାନି । ସେ ବେସି ତର୍ ଜଇତେଇ ଆରି ପାନିତେଇ ଅଦ୍‌ରି ଦେଲାନି । ୧୬ ତାକେ ମୁଇ ତମର୍ ସିସ୍‌ମନ୍‌ର ଲଗେ ଆନି ରଇଲି, ମାତର୍ ସେମନ୍ ନିକ କରି ନାପାର୍‌ଲାଜ ।”

୧୭ ଜିସୁ କଇଲା, “ତମର୍ କେତେ ତାର୍ ନ ରଇବା ବିସ୍‌ବାସ୍ ଆରି ବୁଲ୍ ! ତମର୍ ସଙ୍ଗ୍ ଆରି ମୁଇ କେତେ ଦିନ୍ ରଇବି ? ଆରି କେତେ ଦିନ୍ ତମର୍ ଚଲାଟଲ୍‌ଡ଼ିଟା ସୁନି ସୁନି ତୁମ୍‌ପୁଡ଼ି ରଇବି ? ସେ ପିଲାକେ ମର୍ ଲଗେ ଆନା ।” ୧୮ ପିଲା ବିଡ଼ରେ ରଇଲା କାରାପ୍ ଆଡ଼ମାକେ ଜିସୁ ଦମ୍‌କାଇଲା । କାରାପ୍ ଆଡ଼ମା ଚାଡ଼ି ଉଟିଗାଲା ଆରି ସେ ଦାପ୍‌ରେସେ ପିଲା ନିକ ଅଇଗାଲା ।

୧୯ ତାର୍ ପଚେ ସିସ୍‌ମନ୍ ଜିସୁ ଏକ୍‌ଲା ରଇଲା ବେଲେ ଆସି ତାକେ ପାଚାର୍‌ଲାଜ, “ଆମେ କାଇକେ ସେ କାରାପ୍ ଆଡ଼ମାକେ କେଦି ନାପାର୍‌ଲୁ ?”

୨୦ \*ଜିସୁ ସେମନ୍‌କେ କଇଲା, “ତମର୍ ବିସ୍‌ବାସ୍ ବେସି ଦୁର୍‌ବଲ୍ । ମୁଇ ତମ୍‌କେ ସଡ଼ କଇଲିନି, ଜଦି ଗଟେକ୍ ସର୍‌ସୁ ମୁଞ୍ଜି ଏଡ଼କ୍ ତମର୍ ବିସ୍‌ବାସ୍ ରଇଲେ, ଏ ତଙ୍ଗର୍, ଇଡ଼ିଅନି ତେଇ ଗୁଟି ଜିବାକେ କଇଲେ, ସେଟା ଗୁଟି ଜାଇସି । ବିସ୍‌ବାସ୍‌ର ଲାଗି ତମେ ସବୁ ବିସଇ କରିପାରାସ୍ ।”

ଜିସୁ ନିଜର୍ ମରନ୍ ବିସଇ ଆରି ତରେକ୍ କଇଲା

୨୧ ମାତର୍ ଉପାସ୍ ରଇକରି ପାର୍‌ତନା ନ କଲେ, କାଇ ବିନ୍ ଉପାଇ ନେଇ ମିସା ଏନ୍ତାରି ତୁମା ବାରଇ ନ ଜାଏ \* ।

୨୨ ସିସ୍‌ମନ୍ ଗାଲିଲିତେଇ ରୁଣ୍ଡିଲା ପଚେ ଜିସୁ ସେମନ୍‌କେ କଇଲା, “ନର୍‌ପିଲା ମୁଇ ଲକ୍‌ମନ୍‌କେ ସର୍‌ପି ଅଇବାର୍ ଗାଲିନି । ୨୩ ତେଇ ସେମନ୍ ମକେ ମରାଇବାଇ, ମାତର୍ ତିନ୍ ଦିନ୍ ପଚେ ମୁଇ ଆରି ତରେକ୍ ଜିବନ୍ ଅଇ ଉର୍‌ବି ।” ଜିସୁର୍ କାତା ସୁନି ସିସ୍‌ମନ୍ ବେସି ଦୁକ୍ ଅଇଗାଲାଜ ।

\* ୧୭:୧୨ ୧୭:୧୨ ମାଡ଼ିର ୧୧:୧୪    \* ୧୭:୨୦ ୧୭:୨୦ ମାଡ଼ିର ୨୧:୨୧; ମାର୍‌କ ୧୧:୨୩; ୧ମ କରନ୍ତିୟ

୧୩:୨    \* ୧୭:୨୧ ୧୭:୨୧ ଏ ପଦ୍ ସବୁ

ଜିସୁ ମନ୍ଦିରର ସିସ୍ତ୍ରୁମାଙ୍କୁମନକେ ଦେଲା

୨୪ ଜିସୁ ଆରି ତାର ସିସ୍ତ୍ରୁମା କପରନାଭମେ କେଟଲା ପତେ ମନ୍ଦିର ପାଇ ସିସ୍ତ୍ରୁମାଙ୍କୁମନ ପିତରକେ ପାଚାରଲାଇ, “ତମର ଗୁରୁ ମନ୍ଦିରର ପାଇ ସିସ୍ତ୍ରୁ ଦେଇସି କି ନାଇ ?”

୨୫ ପିତର କଇଲା, “ଦେଇସି ।” ପିତର ଗର ବିତ୍ତରେ ପୁରୁପୁରୁ ଜିସୁ ତାକେ ପାଚାରଲା, “ସିସ୍ତ୍ରୁ, ତମେ କାଇଟା ବାଦ୍‌ଲାସ୍‌ନି ? ଏ ଜଗତର ରାଜାମନ କାରଟାନେଅନି ସିସ୍ତ୍ରୁ ନେବାଇ ? ତାକର ନିଜର ଦେସର ଲକ୍‌ମନରଟାନେଅନି କି ବିନ୍ ଦେସର ଲକ୍‌ମନରଟାନେଅନି ?”

୨୬ ପିତର କଇଲା, “ବିନ୍ ଦେସର ଲକ୍‌ମନରଟେଇଅନି ।” ଜିସୁ କଇଲା, “ସେତି ବଇଲେ ରାଇଜର ଲକ୍‌ମନ ସିସ୍ତ୍ରୁ ନ ଦେଅଡ଼ ?” ୨୭ ମାତର ଆମେ ଏବେ ସେମନକେ ଇନ୍ କରବାକେ ମନ୍ କରୁ ନାଇ । ତୁଇ ଗାତେ ଜାଇ ବଡ଼ସି ପାକାଆ ଆରି ଜନ୍ ମାଡ଼ ପରତୁମ୍‌ଲାଗସି, ତାର ଟଣ୍ଡେଅନି ଗଟେକ୍ ଅଦଲି ମିଲାଇସୁ । ସେଟା ନେଇ ମର ପାଇ ଆରି ତମର ପାଇ ମନ୍ଦିରର ସିସ୍ତ୍ରୁମାଙ୍କୁମନକେ ଦେଇଦେସ ।”

## ୧୮

ସରଗ୍ ରାଇଜେ ସବୁରଟାନେଅନି କେ ବଡ଼

(ମାର୍କ ୯:୩୩-୩୭; ଲୁକ୍ ୯:୪୬-୪୮)

୧ \*ସେ ବେଲେ ସିସ୍ତ୍ରୁମାଙ୍କୁମନକେ ପାଚାରଲାଇ, “ସରଗ୍ ରାଇଜେ ସବୁରଟାନେଅନି କେ ବଡ଼ ?” ୨ ଜିସୁ ଗଟେକ୍ ସାନ୍ ପିଲାକେ ଡାକି ସେମନର ଲଗେ ଟିଆକରାଇ କଇଲା, ୩ \*“ମୁଇ ତମକେ ସଡ଼ କଇଲିନି, ତମର ମନ୍ ବାଦ୍‌ଲାଇ ସାନ୍ ପିଲାମନର ପାରା ନ ଅଇଲେ ସରଗ୍ ରାଇଜେ କେବେ ପୁରି ନାପାରାସ । ୪ ଜେ ନିଜକେ ସୁଆଲ୍ କରି ସାନ୍ ପିଲାପାରା ଅଇସି, ସେ ସରଗ୍ ରାଇଜେ ସବୁରଟାନେଅନି ବଡ଼, ୫ ଆରି, ଜେକି ମର ନାଉଁ ଦାରି ଏ ସାନ୍ ପିଲାକେ ନାମସି, ସେ ମକେ ମିସା ନାମସି ।”

ବିସ୍‌ବାସେ ବିସ୍

(ମାର୍କ ୯:୪୨-୪୮; ଲୁକ୍ ୧୭:୧-୨)

୬ “ମରତେଇ ବିସ୍‌ବାସ୍ କରତେ ରଇବା ଏ ସାନ୍ ପିଲାମନର ବିତ୍ତରେଅନି ଗଟେକ୍ ଲକ୍ କେ ଆଲେ ବିସ୍‌ବାସେ ବାଦା ଗଟାଇସି ବଇଲେ, ତାର ଗାଲାଇ ଜତା ପାକ୍‌ନା ବାନ୍ଦିକରି ତାକେ ସମ୍‌ଦୁରେ ବୁଡ଼ାଇଦେବାଟା ନିକ ଅଇସି । ୭ ଲକ୍‌ମନର ବିସ୍‌ବାସେ ବାଦା ଗଟାଇବାକେ ବେସି ବିସ୍‌ଇ ଆତେ । ସେଟାର ପାଇ ଏ ଜଗତର ଦସା ବଡେ ଇନସତା । ସବୁ ବେଲେ ଏତି ବାଦା ଆଇସି, ମାତର ଜେ ବାଦା ଗଟାଇସି, ତାର ଦସା କେତେ ଇନସତା ଅଇସି !”

୮ \* “ଜଦି ତମେ ତମର ଆଡ଼ ନଇଲେ ପାଦର ଲାଗି ବିସ୍‌ବାସ୍ ଆରାଇଲାସ୍‌ନି, ତେବେ ସେଟା କାଟି ପିଙ୍ଗି ଦିଆସ । ଜତେକ୍ ପାଦ୍ ଆରି ଜତେକ୍ ଆଡ଼ ରଇ ସବୁବେଲେ ଲାଗି ରଇବା ଜଏ ପିଙ୍ଗାଇ ଅଇବା ବାଦୁଲେ ଗଟେକ୍ ପାଦ୍ ନଇଲେ ଗଟେକ୍ ଆଡ଼ ନ ରଇ, ନ ସାର୍‌ବା ଜିବନେ ପୁରବାଟା କେତେ କରମର କାତା । ୯ \* ଜଦି ତମର ଆକିର ଲାଗି ତମେ ବିସ୍‌ବାସ୍ ଆରାଇଲାସ୍‌ନି ବଇଲେ ତାକେ ବେଟି ପିଙ୍ଗି ଦିଆସ । ଜତେକ୍ ଆକି ରଇ ନରକେ ପିଙ୍ଗାଇଅଇବା ବାଦୁଲେ ଗଟେକ୍ ଆକି ରଇ ନ ସାର୍‌ବା ଜିବନେ ପୁରବାଟା କେତେ କରମର କାତା ଅଇସି ।”

\* ୧୮:୧ ୧୮:୧ ଲୁକ୍ ୨୨:୨୪

\* ୧୮:୩ ୧୮:୩ ମାର୍କ ୧୦:୧୫; ଲୁକ୍ ୧୮:୧୭

\* ୧୮:୮ ୧୮:୮ ମାଡ଼ିଉ

୫:୩୦ \* ୧୮:୯ ୧୮:୯ ମାଡ଼ିଉ ୫:୨୯

ଆଜିରଇବା ମେଣ୍ଟା  
(ଲୁକ୍ ୧୫:୩-୭)

୧୦ \*ଏ ସାନ୍ ପିଲାମାନର ବିତ୍ତରେ ଅନି ଗଟେକ୍‌କେ ମିସା ଇନ୍‌କରା ନାଇ । ମୁଇ ତମ୍‌କେ କଇଲିନି, ଏ ମନର ଜତନ୍ ନେଇତେ ରଇବା ସରଗର ଦୁଡ଼ମନ୍ ସବୁ ବେଲା ମର ବାବାର ଲଗେ ଆତଡ଼ ।

୧୧ କାଇକେ ବଇଲେ ବାଟ୍ ବାନା ଅଇଲା ଲକ୍‌ମନ୍‌କେ କଜି ରକିଆ କରବାକେ ନରପିଲା ମୁଇ ଆଇଲିଆତି \* ।

୧୨ ତମେ କାଇଟା ବାଦଲ୍‌ସନି, ଜଦି ଗଟେକ୍ ଲକର ସବଟା ମେଣ୍ଟା ରଇସି ଆରି ସିତିଅନି ଗଟେକ୍ ଆଜି ଜାଇସି, ତେବେ ସେ କାଇଟା କରସି ? ନବେ ନଅଟା ମେଣ୍ଟାକେ ତଙ୍ଗରେ ଚାରବାକେ ଚାଡ଼ିଦେଇ ସେ ଆଜିଲା ମେଣ୍ଟାକେ କଜ୍‌ବାର ବାରଇସି । † ୧୩ ମୁଇ ତମ୍‌କେ ସଡ଼ କଇଲିନି, ଜେତେବଲ୍ ସେ ମେଣ୍ଟା ମିଲାଇସି, ଆଜି ନ ରଇଲା ନବେ ନଅଟା ମେଣ୍ଟାର ପାଇ ତାର ଜେଡ଼କି ସାରଦା, ଏ ଗଟେକ୍ ମେଣ୍ଟାର ପାଇ ସେ ଅଦିକ୍ ସାରଦା ଅଇସି । ୧୪ ସମାନ୍ ସେନ୍ତି ସେ, ଏ ସାନ୍ ପିଲାମାନର ତେଇ ଅନି ଗଟେକ୍ ଲକ୍ ମିସା ବାଟ୍ ବାନା ଅଅଡ଼, ଏଟା ତମର ସରଗର ବାବା ମନ୍ କରେ ନାଇ ।

ଗଟେକ୍ ବାଇ ତମର ବିରୁଦେ ପାପ୍ କଲେ

୧୫ \* “ଜଦି ତମର ବାଇ ତମର ବିରୁଦେ ପାପ୍ କରସି, ତାର ଲଗେ ଜାଇ ତାର ପାପ୍ ତାକେ ଦେକାଇ ଦିଆସ୍ । ମାତର ତମେ ଦୁଇ ଲକ୍ ରଇଲା ବେଲେ ଏଟା ଲୁଡ଼ତେ କରା । ଜଦି ସେ ତମର କାତା ସୁନ୍‌ସି, ତମର ବାଇକେ ତମେ ଆରି ତରେକ୍ ପାଇସା । ୧୬ ଆରି ଜଦି ସେ ନ ସୁନ୍‌ଲେ, ଗଟେକ୍ ଲକ୍‌କେ ନଇଲେ ଦୁଇ ଲକ୍‌କେ ତାକି ନେଇ ତାର ଲଗେ ଜାଆ । ଆମର ସାସ୍‌ତର ନିୟମ୍ ଇସାବେ, ଦୁଇଟା ନଇଲେ ତିନ୍‌ଟା ସାକିର ମୁଆଟେ ତମର ଦାବି ସଡ଼ ବଲି ଜାନା ପଡ଼ସି । ୧୭ ଏଲେ ମିସା ଜଦି ସେ ତମର କାତା ନ ସୁନେ, ମଣ୍ଡୁଲିତେଇ ଜାନାଇ ଦିଆସ୍ । ସାରାସାରି ଜଦି ମଣ୍ଡୁଲିର କାତା ମିସା ନ ସୁନେ ବଇଲେ, ତାକେ ଗଟେକ୍ ସିସ୍‌ତୁମାଙ୍ଗୁ, ବିସ୍‌ବାସ୍ ନ କରବା ଲକ୍ ବଲି ବାବିକରି, ତାର ସଙ୍ଗ୍ ମିଲାମିସା କରବାଟା ତାଡ଼ି ଦିଆସ୍ ।

ଜଗତର ଆରି ସରଗର ବିସଇ

୧୮ \* “ମୁଇ ତମ୍‌କେ ସଡ଼ କଇଲିନି, ତମେ ଏ ଜଗତେ ଜାଇଟା ନାଇ ବଲ୍‌ସା, ସେଟା ସରଗେ ମିସା ନାଇ ଅଇସି । ଆରି ଜନ୍‌ଟା ପାଇ ତମେ ଜଗତେ ଡ଼ କଇସା, ସେଟା ସରଗେ ମିସା ଡ଼ ଅଇସି । ୧୯ କାଲି ସେଡ଼କି ନଏଁ, ମୁଇ ତମ୍‌କେ ସଡ଼ କଇଲିନି, ଜେତେବେଲେ ମିସା ଏ ଜଗତେ ତମେ ଦୁଇ ଲକ୍ ଜନ୍ ବିସଇ ନେଇକରି ଗଟେକ୍ ମନ୍ ଅଇକରି ପାର୍‌ତନା କଲେ, ମର ସରଗର ବାବା ତମେ ମାଙ୍ଗ୍‌ଲାଟା ପୁରୁନ୍ କରସି । ୨୦ କାଇକେ ବଇଲେ ଜନ୍ତି ଦୁଇ କି ତିନ୍ ଲକ୍ ରୁଣ୍ଡିକରି ମର ନାଉଁ ଦାର୍‌ବାଇ, ତେଇ ମୁଇ ଆତି ।”

କେମା ନ ଦେଇରଇଲା ଦାଙ୍ଗ୍‌ତା

୨୧ \* ଦିନେକ୍ ପିତର ଜିସୁର ଲଗେ ଆସି ପାଟାରଲା, “ମାପୁରୁ, ଗଟେକ୍ ବାଇ ମର ବିରଦେ ତରକେ ତର ଦସ୍ କରତେ ରଇଲେ, ତାକେ ମୁଇ କେତେ ତର କେମା କରବି ? କାଇ ସାଡ଼ ତର କି ?”

୨୨ ଜିସୁ କଇଲା, “ନାଇ ସାଡ଼ ତର ନାଇ । ସାଡ଼ ତରର ସତୁରି ଗୁନ୍ । ୨୩ ସରଗ୍ ରାଇଜର ଆରି ଗଟେକ୍ କାତା ସୁନ୍ । ଗଟେକ୍ ରାଜା ଦିନେକ୍ ତାରଟାନେ

\* ୧୮:୧୦ ୧୮:୧୦ ଲୁକ୍ ୧୯:୧୦ \* ୧୮:୧୧ ୧୮:୧୧ଏ ପଦ୍ ସବୁ ପୁରନା ପାଣ୍ଡୁଲିପି ଟାଲେ ନାଇ † ୧୮:୧୨ ୧୮:୧୨ ଏ ପଦ୍ ସବୁ ପୁରନା ପାଣ୍ଡୁଲିପିଟାଲେ ନାଇ \* ୧୮:୧୫ ୧୮:୧୫ ଲୁକ୍ ୧୭:୩ \* ୧୮:୧୮ ୧୮:୧୮ ମାଡ଼ିଉ ୧୭:୧୯; ଜଅନ୍ ୨୦:୨୩ \* ୧୮:୨୧ ୧୮:୨୧ ଲୁକ୍ ୧୭:୩,୪

କାମକରୁମନ୍ ରୁନ୍ ନେଇରଇବାଟା ଇସାବ୍ କିତାବ୍ କରବାକେ ମନ୍ କଲା । ୨୪ ସେ ଇସାବ୍ କରବାବେଲେ ତାରଟାନେ ଗଟେକ୍ କାମ୍ କରୁ ଲାକ୍ ଲାକ୍ ଟାଙ୍ଗା ରୁନ୍ ନେଇରଇଲା ଲକ୍‌କେ ରାଜାର୍ ଲଗେ ଆନଲାଇ । ୨୫ ରୁନ୍ ସୁଜବାକେ ସେ ଲକ୍‌ଟାନେ ସେଡ଼କି ବପୁ ନ ରଇଲା । ତେବର୍‌ପାଇ ରୁନ୍ ବାଦ୍‌ବାକେ ବଲି ତାରଟାନେ ଜେଡ଼କି ରଇଲାଟା ବିକିକରି ତାକେ, ତାର୍ ମାଇଜିକେ ଆରି ତାର୍ ପିଲାଟକିମନ୍‌କେ ଗତି ଇସାବେ ବିକିଦେବାକେ ରାଜା ଆଦେସ୍ ଦେଲା ।” ୨୬ କାମ୍ କରୁ ରାଜାର୍ ପାଦ୍‌ତଲେ ଅଦ୍‌ରି ଗୁଆରି କରି କଇଲା “ ଆଗିଆଁ ଆରି କେଡେଦିନ୍ ଜାଗା, ମୁଇ ତମର୍ ସବୁଜାକ ରୁନ୍ ସୁଜିଦେବି ।” ୨୭ ରାଜା ତାକେ ଦୟା କଲା । ତେବର୍‌ପାଇ ତାକେ କେମା କରି ରୁନ୍ ନ ବାନ୍ଦାଇ ଚାଡ଼ିଦେଲା ।

୨୮ ମାତର୍ ସେ ଗତି ବାରଇ ଜାଇ ତାର୍‌ତେଇ ଅନି ପଚାସ୍ ଟାଙ୍ଗା ରୁନ୍ କରି ରଇବା ଗଟେକ୍ ମିସ୍‌ତେ ରଇବା ଗତିଦାଙ୍ଗ୍‌ତାକେ ଦାରି ତାର୍ ଟର୍‌ରି ପିଟକ୍‌ବାର୍ ଦାରୁଲା, “ମର୍‌ତେଇଅନି ନେଇ ରଇଲା ସବୁ ଡାବୁ ବାଉଡାଲ ଦେ ।”

୨୯ ସେ ଗତି ଦାଙ୍ଗ୍‌ତା ତାର୍ ଗଡେଦାରି ବାବୁଜିଆ କରି କଇଲା, “ସାଆସ୍ ଦାରା, ତମର୍ ସବୁ ଡାବୁ ସୁଜି ଦେବି ।”

୩୦ ମାତର୍ ପର୍‌ଡୁମ୍ ଲକ୍, ସେ ଗୁଆରି କଲାଟା ସୁନେ ନାଇ, ରୁନ୍ ସୁଜବା ଜାକ ତାକେ ବନ୍ଦି ଗରେ ପୁରାଇ ସଙ୍ଗାଇବାକେ ତିଆରୁଲା । ୩୧ ଏଟା ଅଇଲାଟା ଦେକି ବିନ୍ କାମ୍ କରୁମନ୍ ଦୁକ୍ କଲାଇ । ସେମନ୍ ରାଜାର୍ ଲଗେ ଜାଇ ଜନ୍ ଜନ୍‌ଟା ଅଇରଇଲା, ସବୁ ଜାନାଇଲାଇ । ୩୨ ରାଜା ପର୍‌ଡୁମ୍ କାମ୍ କରୁକେ ଡାକାଇ କଇଲା, “ ଅଇରେ ମୁରକ ଦାଙ୍ଗ୍‌ତା, ତୁଇ ଗୁଆରି କଲୁସ୍ ଜେ ମୁଇ ତର୍ ସବୁ ରୁନ୍ ଚାଡ଼ି ଦେଲି । ୩୩ ମୁଇ ଜେଡ଼ି ତକେ ଦୟା କଲି, ତୁଇ ମିସା ତର୍ ସଙ୍ଗର୍ କାମ୍ କରୁକେ ଦୟା କରବାର୍ ରଇଲା ।” ୩୪ ରାଜା ବେସି ରିସା ଅଇଗାଲା ଆରି ସବୁ ଜାକ ରୁନ୍ ନ ସୁଜବା ଜାକ ଡଣ୍ଡ ପାଅ ବଲି ତାକେ ବନ୍ଦି ଗରେ ପାଟାଇ ଦେଲା ।

୩୫ ଜିସୁ ଏ କାତା କଇସାରାଇ କଇଲା, “ତମର୍ ବିରୁଦେ ଦସ୍ କରି ରଇବା ବାଇମନ୍‌କେ ମନ୍ ବିଡ଼ରେଅନି ଜଦି କେମା ନ ଦିଆସ୍, ତେବେ ମର୍ ସରଗର୍ ବାବା ମିସା ତମ୍‌କେ ଏଣ୍ଡାରିସେ କରସି ।”

## ୧୯

ଚାଡାମେଲା ବିସଇ ନେଇ ସିକିଆ  
(ମାର୍‌କ ୧୦:୧-୧୨)

୧ ଜିସୁ ଏ ସବୁ କଇସାରୁଲା ପଚେ ଗାଲିଲି ଚାଡିକରି ଜର୍‌ଦନ୍ ଗାଡ୍ ସେପାଟେ ରଇଲା ଜିଉଦା ଜାଗାଇ କେଟ୍‌ଲା । ୨ ବେସି ଲକ୍‌ମନ୍ ତାର୍ ସଙ୍ଗ୍ ଗାଲାଇ ଆରି ସେ କେଡେକ୍ କେଡେକ୍ ରଗିମନ୍‌କେ ନିକ କଲା ।

୩ କେଡେଟା ପାରୁସିମନ୍ ଜିସୁକେ ବୁଲ୍ ଦାର୍‌ବାକେ ଚେସ୍‌ଟା କଲାଇ । ସେମନ୍ ତାର୍ ଲଗେ ଆସି ପାଚାରୁଲାଇ, “ମସାର୍ ରିଡିନିଡି ଇସାବେ ଗଟେକ୍ ଲକ୍ କାଇଆଲେ ବୁଲର୍ ପାଇ ବଲି ତାର୍ ମାଇଜିକେ ଚାଡ଼ି ଦେଇ ପାରେ କି ?”

୪ ଜିସୁ କଇଲା, “ସାସ୍‌ତରେ ପଡାସ୍ ନାଇ କି ? ଆଦିପୁର୍‌ବେ ପର୍‌ମେସର୍ ନର୍ ଲକ୍‌କେ ମୁନ୍‌ସ୍ ଆରି ମାଇଜି କରି ତିଆର୍ କଲା । ୫ ସେଡେବେଲେ ମାପୁରୁ କଇରଇଲା, ଏଟାର୍ ପାଇ ବଲି ମୁନ୍‌ସ୍, ତାର୍ ଆୟା ବାବାର୍‌ତେଇ ଅନି ବିନେ ଅଇସି ଆରି ସେମନ୍ ଦୁଇ ଲକ୍ ଗଟେକ୍ ଅଇବାଇ । ୬ ଆରି ସେମନ୍ ଅଲ୍‌ଗା ନ ଅଅଡ୍, ମିସି ରଇବାଇ । ସେମନ୍ ଦୁଇଲକ୍ ଇସାବେ ନ ରଅଡ୍ । ଜନ୍ ଲକ୍‌ମନ୍‌କେ ପର୍‌ମେସର୍ ଜଡିଆଟେ, ଲକ୍‌ମନ୍ ସେମନ୍‌କେ ବେଗ୍‌ଲାଇବାଟା ଟିକ୍‌ନାଇ ।”

୭ \*ପାରୁସିମନ୍ ଆରି ପାଚାରୁଲାଇ, “ସେନ୍ତାର ଆଲେ ମାଇଜିକେ ରାଜିନାମା ପତର ଲେକି ଚାଡ଼ି ଦେବାକେ ମସା କାଇକେ ନିୟମ୍ କଲାଆତେ ?”

୮ ଜିସୁ କଇଲା, “ତମର୍ ମନ୍‌ବିଡ଼ରର ବୁଜ୍‌ବା ବପୁ ଦୁର୍‌ବଲ୍ ରଇଲାଟା ଦେକି ମସା ତମର୍ ମାଇଜିମନ୍‌କେ ଚାଡ଼ବାକେ ରାଜି ଅଇଲା । ମାତର୍ ଆଦିପୁରବେ ତିଆର୍ ଅଇଲା ବେଲେ ଏନ୍ତାରି ନିୟମ୍ ନ ରଇଲା । ୯ \*ମାତର୍ ମୁଇ ତମ୍‌କେ କଇଲିନି, କେ ମିସା ତାର୍ ମାଇଜିକେ ବେସିଆ କାମ୍ ଅପରାଦ୍‌କେ ଚାଡ଼ି, ବିନ୍ କାଇଆଲେ କାମର୍ ପାଇ ଚାଡ଼ାମେଲା କରି, ବିନ୍ ମାଇଜିକେ ସଙ୍ଗଲେ, ସେ ସେ ନିଜେ ଦାରିଆ ଅଇସି ।”

୧୦ ଜିସୁର୍ ସିସମନ୍ କଇଲାଇ, “ଜଦି ମାଇଜି ମୁନୁସର୍ ବିଡ଼ରେ ଏନ୍ତାରି ଆତେ ବଇଲେ, ବିବା ନ ଅଇବାଟା ନିକ ।”

୧୧ ଜିସୁ କଇଲା, “ଏ ସିକିଆ ସବୁ ଲକ୍ ନ ମାନଡ଼ । ପର୍‌ମେସର୍ ଟାନେଅନି ଜନ୍‌ଲକ୍‌ମନ୍‌କେ ଏଟା ଦିଆଅଇଆତେ ସେମନ୍‌ସେ ଏଟା ମାନ୍‌ବାଇ । ୧୨ ବିନ୍ ବିନ୍ କାମର୍‌ପାଇ ଲକ୍‌ମନ୍ ବିବା ନ ଅଇ ରଇଜିବାଇ । କେତେ ଲକ୍ ଜନମେ ଅନି ବେଜୁ ଅଇ ବିବାଅଇ ନାପାରଡ଼ । କେତେ ଲକ୍‌କେ ମୁନୁସମନ୍ ସେନ୍ତାରି କରି ଆଚଡ଼, ଆରି କେତେ ଲକ୍ ସରଗ୍ ରାଇଜର୍ ପାଇ କାମ୍ କର୍‌ବାକେ ବିବା ନ ଅଇକରି ଆଚଡ଼ । ଜନ୍ ଲକ୍‌ମନ୍ ଏ ସିକିଆର୍ ଅରଡ଼ ବୁଜିପାରୁଲାଇନି, ସେମନ୍ ସେଟା ମାନଡ଼ ।”

ଜିସୁ ସାନ୍ ପିଲାମନ୍‌କେ ଆସିର୍‌ବାଦ୍ କଲା  
(ମାର୍‌କ ୧୦:୧୩-୧୬; ଲୁକ୍ ୧୮:୧୫-୧୭)

୧୩ କେତେ ଲକ୍ ପିଲାମନ୍‌ର ଉପରେ ଆଡ଼ ସଙ୍ଗଲ ପାର୍‌ତନା କର୍‌ବାକେ, ସେମନ୍‌କେ ଜିସୁର୍ ଲଗେ ଆନ୍‌ଲାଇ । ମାତର୍ ସିସମନ୍ ସେମନ୍‌କେ ଦମ୍‌କାଇଲାଇ । ୧୪ ମାତର୍ ଜିସୁ କଇଲା, “ସାନ୍ ପିଲାମନ୍‌କେ ମର୍ ଲଗେ ଆଇବାକେ ବାଟ୍ ଦିଆସ୍ । ସେମନ୍‌କେ ମିନା କରା ନାଇ । କାଇକେ ବଇଲେ ଏମନ୍ ଆକା ସରଗ୍ ରାଇଜେ ରଇବା ଲକ୍ ।”

୧୫ ଜିସୁ ପିଲାମନ୍‌ର ଉପରେ ଆଡ଼ ସଙ୍ଗଲ ଆସିର୍‌ବାଦ୍ କଲା । ପତେ ସେ ତେଇଅନି ଉଟିଗାଲା ।

ଗଟେକ୍ ସାଉକାର୍ ପିଲା  
(ମାର୍‌କ ୧୦:୧୭-୩୧; ଲୁକ୍ ୧୮:୧୮-୩୦)

୧୬ ଦିନେକ୍ ଗଟେକ୍ ସାଉକାର୍ ପିଲା ଜିସୁର୍ ଲଗେ ଆସି ପାଚାରୁଲା, “କାଇ ନିକ କାମ୍‌କଲେ, ନ ସାର୍‌ବା ଜିବନ୍ ମିଲ୍‌ସି ?”

୧୭ ଜିସୁ ତାକେ କଇଲା, “ନିକ କାମ୍ ବିସଇ ନେଇକରି ମକେ କାଇକେ ପାଚାରୁଲୁସି ? ପର୍‌ମେସର୍‌ସେ ସଡ଼ । ତାର୍ ଆଦେସ୍ ମାନ୍‌ଲେ, ନ ସାର୍‌ବା ଜିବନ୍ ମିଲାଇସୁ ।”

୧୮ ସେ ପାଚାରୁଲା, “କାଇ କାଇ ଆଦେସ୍ ?”

ଜିସୁ କଇଲା, “ନର୍ ଲକ୍‌ମନ୍‌କେ ମରାଇବାର୍ ନାଇ, ବେସିଆ କାମ୍ କର୍‌ବାର୍ ନାଇ, ଚରାଇବାର୍ ନାଇ, କାର୍ ବିରୁଦେ ମିଡ଼ ସାକି ଦେବାର୍ ନାଇ । ୧୯ ଆୟା ବାବାର୍ ସେବା କରା ଆରି ତମର୍ ପଡ଼ିସାର୍ ଲକ୍‌ମନ୍‌କେ ନିଜର୍ ପାରା ଆଲାଦ୍ କରା ।”

୨୦ ସେ ବେଣ୍ଡିଆ କଇଲା, “ମୁଇ ଏ ସବୁ ଆଦେସ୍ ମାନି ଆଇଲିନି । ଆରି କାଇଟା କର୍‌ବାର୍ ଆତେ ?”

୨୧ ଜିସୁ ତାକେ କଇଲା, “ତୁଇ ଜଦି ସିଦ୍ ଅଇବାକେ ମନ୍ କଲୁସିନି ବଇଲେ, ଜାଆ ଡର୍‌ଟାନେ ରଇବା ସବୁଜାକ ବିକି ଦେଇ, ସେ ତାବୁ ଗରିବ୍ ଲକ୍‌ମନ୍‌କେ ଦାନ୍

କରିଦେସ୍ । ଏଟା ସବୁ କରି ସାରାଇ ମର୍ ସଙ୍ଗ୍ ଆଉ । ସେନ୍ତାର୍ କଲେ ତକେ ସର୍ଗେ ଦନ୍ ମିଲ୍ସି ।”

୨୨ ଏଟା ସୁନି କରି ସେ ବେଣ୍ଡିଆ ମୁ ଉଡ଼ରାଇଦେଇ ତେଇଅନି ଉଟିଗାଲା । କାଇକେ ବଇଲେ ସେ ଲକ୍ ବେସି ସାଉକାର୍ ରଇଲା ।

୨୩ ଜିସୁ ସିସ୍ତମନକେ କଇଲା, “ମୁଇ ତମକେ ସଡ଼ କଇଲିନି, ସାଉକାର୍ ଲକ୍ମନ ସରଗ୍ ରାଇଜେ ସଲ୍କେ କେଟ୍‌ବାଟା ବଡେ ଆବଡ଼ । ୨୪ ଆରି ତରେକ୍ କଇଲିନି, ଗଟେକ୍ ବଡ଼ଟା ପସୁ ଜେନ୍ତି ସୁଜି କାଣାବାଟେ ଚିଙ୍ଗଲି ଜିବାକେ ଆବଡ଼, ସାଉକାର୍ ଲକ୍ ସରଗ୍ ରାଇଜେ କେଟ୍‌ବାଟା ଅଦିକ୍ ଆବଡ଼ ।” ୨୫ ସିସ୍ତମନ୍ ଏ କାତା ସୁନି କାବାଅଇଜାଇ ପାଟାରଲାଇ, “ଏନ୍ତି ବଇଲେ କେ ତେବେ ମୁକ୍ତି ପାଇପାରସି ?”

୨୬ ଜିସୁ ସେମନର୍ ବାଟେ ଦିରେକରି ଦେକି କଇଲା, “ମୁନୁସ୍‌ମନର୍‌ଟାନେ ଏଟା ଅଇନାପାରେ, ମାତର୍ ପର୍ମେସରର୍ ଟାନେ ସବୁଟା ଅଇପାରସି ।”

୨୭ ଏ କାତା ସୁନି ପିତର୍ କଇଲା, “ଦେକା, ଆମେ ସବୁଜାକ ଚାଡ଼ିକରି ତମର୍ ସଙ୍ଗ୍ ଆସିଆରୁ । ତେବେ ଆମ୍‌କେ କାଇଟା ମିଲ୍ସି ?”

୨୮ ଜିସୁ ସେମନକେ କଇଲା, “ଏ କାତା ସଡ଼ ବଲି ଜାନ୍‌ସା, ଜେତେବେଲେ ନୁଆ ଜୁଗେ ନର୍‌ପିଲା ମୁଇ ମର୍ ତାକ୍‌ପୁଟା ଅଇବା ବସ୍‌ବାଟାନେ ବସିବି । ମର୍ ବାର୍‌ଟା ସିସ୍, ତମେ ମିସା, ବାର୍‌ଟା ବସ୍‌ବାଟାନେ ବସି ଇସ୍‌ରାଏଲର୍ ବାର୍‌ଟା କୁଟୁମ୍‌କେ ସାସନ୍ କରସା । ୨୯ ଜନ୍ ଲକ୍‌ମନ୍ ମର୍‌ଲାଗି ନିଜର୍ ଗର୍, ବାଇ ବଇନି, ଆୟା ବାବା, ପିଲାଟକି ଆରି ଜମିବାଡ଼ି ଚାଡ଼ି ଆଚଡ଼, ସେମନ୍ ତାର୍ ସଏ ଗୁନ୍ ଆସିରବାଡ଼ ପାଇବାଇ, ଆରି ନ ସାର୍‌ବା ଜିବନ୍ ମିସା ପାଇବାଇ । ୩୦ ଏବେ ଜନ୍ ଲକ୍‌ମନ୍ ଆଗ୍‌ତୁ ଆଚଡ଼, ସେମନର୍ ବିଡ଼ରେଅନି ବେସି ଲକ୍ ପଟେ ଅଇଜିବାଇ । ଆରି ଜନ୍ ଲକ୍‌ମନ୍ ପଟେ ଆଚଡ଼, ସେମନର୍ ବିଡ଼ରେ ଅନି ବେସି ଲକ୍ ଆଗ୍‌ତୁ ଅଇଜିବାଇ ।”

## ୨୦

ଅଙ୍ଗୁର୍ ବାତର୍ ବୁଡ଼ିଆର୍‌ମନ୍

୧ ସରଗ୍ ରାଇଜ୍ କେନ୍ତିଟା, ଏଟାର୍ ପାଇ ଆରି ଗଟେକ୍ କାତା ସୁନା । ଦିନେକ୍ ଗଟେକ୍ ଲକ୍ ସାକାଲ୍ ସାକାଲ୍ ତାର୍ ଅଙ୍ଗୁର୍ ବାତେ କାମ୍ କରାଇବାକେ କୁଲିଆର୍‌ମନକେ କଜ୍‌ବାର୍ ବାରଇଲା । ୨ ସେ ଜନ୍ ଲକ୍‌ମନକେ ମିସ୍‌ଲା, ସେମନକେ ଗଟେକ୍ ଦିନକେ, ଗଟେକ୍ ଲାକା ରୁପାଟାଙ୍ଗା କୁଲି ଦେବାକେ ରାଜି କରି ତାର୍ ବାତେ ପାଟାଇଲା । ୩ ତାର୍ ପଟେ ସାକ୍‌ଲିଆ ନଅଟା ବେଲେ ଆଟେ ଜାଇ, ଗଟେକ୍ ଦଲର୍ ଲକ୍ କାଇ କାମ୍ ନ କରି ଚିଆଅଇ ରଇଲାଟା ଦେକ୍‌ଲା । ୪ ସେ ଲକ୍ ସେମନକେ କଇଲା, “ତମେ ମିସା ମର୍ ଅଙ୍ଗୁର୍ ବାତେ ଜାଇ କାମ୍ କରା, ତମ୍‌କେ ମିସା ସମାନ୍ ଇସାବେ ବୁଡ଼ି ଦେବି ।” ୫ ସେମନ୍ ଜାଇ କାମ୍ କର୍‌ବାର୍ ଦାରଲାଇ । ସେନ୍ତାରିସେ ମୁଣ୍ଡବେଲାଇ, ଆଡ଼ବେଲାଇ ମିସା ଆରି କେତେଟା କୁଲିଆର୍‌ମନକେ ଆନି କାମେ ମିସାଇଲା । ୬ ସଞ୍ଜୁଆ ପାଁର୍‌ଟା ବେଲା ଆରି ତରେକ୍ ଆଟେ ଜାଇ ଆରି କେତେ ଲକ୍ ରୁଟାଇ ଚିଆଅଇରଇବାଟା ଦେକ୍‌ଲା । ସେମନକେ ପାଟାରଲା “ଗୁଲାଇ ମୁଇଦାନ୍ କାମ୍ ନ କରି କାଇକେ ଇତି ଉଜେ ଉଜେ ଆଚାସ୍ ?” ୭ ସେମନ୍ ତାକେ କଇଲାଇ, “ଆମ୍‌କେ ତା କେ ମିସା କାମେ ମିସାଅଡ଼ ନାଇ ।” ସାଉକାର୍ ସେମନକେ କଇଲା “ସେନ୍ତାରିଆଲେ ତମେ ସବୁ ଲକ୍ ମର୍ ଅଙ୍ଗୁର୍ ବାତେ ଜାଇ କାମ୍ କରା ।”

୮ ସେ ଦିନେ ସଞ୍ଜ୍ ଅଇଲାକେ ଅଙ୍ଗୁର୍ ବାତର୍ ସାଉକାର୍ ଗୁମ୍‌ସ୍‌ତାକେ କଇଲା, “କୁଲିଆର୍‌ମନକେ ତାକ୍ । ଜନ୍ ଲକ୍‌ମନ୍ ସବୁର୍ ପଟେ କାମ୍ ଦାରଲାଇ, ସେମନକେ ଆଗେ ବୁଡ଼ି ଦେଇଦେସ୍ । ଜନ୍ ଲକ୍‌ମନ୍ ସବୁର୍‌ତେଇଅନି ପର୍‌ତୁମ୍ କାମେ ମିସି

ଆତ୍ମତ୍ଵେ, ସେମାନଙ୍କେ ତାକର୍ ବୁଡ଼ି ସାରାସାରି ପଟେ ଦେସ୍ ।” ୯ ଜନ୍ ଲକ୍ମନନ୍ ସଞ୍ଜୁଆ ପାଁଟଟା ବେଲେ କାମେ ମିସି ରଇଲାଇ ସେମାନଙ୍କେ ସବୁ ଲକ୍ମନଙ୍କେ ଗଟେକ୍ ଗଟେକ୍ ରୁପା ଟାଙ୍ଗା ଦେଲାଇ । ୧୦ ଜନ୍ ଲକ୍ମନନ୍ ପରତୁମ୍ କାମ୍ ଆରାମ୍ କରି ରଇଲାଇ, ସେମାନଙ୍କେ ଅଦିକ୍ ବୁଡ଼ି ମିଲ୍ସି ବଲି ଆସା କଲାଇ । ମାତର୍ ସେମନ୍ ମିସା ଗଟେକ୍ସେ ରୁପା ଟାଙ୍ଗା ମିଲାଇଲାଇ । ୧୧ ସେମନ୍ ସେତ୍ତକି ନେଇ ମୁରମୁରା ଅଇକରି ସାଉକାରର୍ ବିରୁଦେ କଇଲାଇ, ୧୨ “ସଞ୍ଜୁଆ ପାଁଟଟା ବେଲେ କାମ୍ ଆରାମ୍ କଲା କୁଲିଆର୍ମନ୍ ଏକାଇ ଗଟେକ୍ ଗାଁଟାସେ କାମ୍ କଲାଇ ଆତ୍ମତ୍ଵେ । ଆମେ ଟାଇ ଟାଇ କାରାଇ, ଦିନ୍ଦାକ କଟ୍ଟୁ, ଏଲେ ମିସା ବୁଡ଼ି ଦେବା ବେଲେ ଆମ୍‌କେ ମିସା ସେମନର୍ ସଙ୍ଗ୍ ସମାନ୍ କରିଦେଲାସ୍ ।”

୧୩ ସାଉକାର୍ ସେମନର୍ ବିତ୍ତରେଅନି ଗଟେକ୍ ଲକ୍ମନଙ୍କେ କଇଲା, “ମଇତର୍ ମୁଇ ତମ୍‌କେ ନାଡାଇ ନାଇ । ଗଟେକ୍ ଦିନର୍ ବୁଡ଼ି ପାଇ ଗଟେକ୍ ରୁପା ଟାଙ୍ଗା ନେଇ କାମକରବାକେ ତମେତା ସବୁ ଲକ୍ମ ରାଜି ଅଇରଇଲାସ୍ । ୧୪ ତମର୍ ସେତ୍ତକି ବୁଡ଼ି ଦାରି ଗରେ ଜାଆ । ତମ୍‌କେ ଜେତ୍ତକି ଦେଲି ଆତି, ଗଟେକ୍ ଗାଁଟା କାମ୍ କରିରଇବା ଲକ୍ମନଙ୍କେ ମିସା ସେତ୍ତକିସେ ଦେବାକେ ମର୍ ମନ୍ । ୧୫ ମର୍ ନିଜର୍ ଦନ୍, ମୁଇ ଜେନ୍ତି ମନ୍ କଲିନି, ସେନ୍ତି କରତ କରବାକେ ମରକାଇ ଅଦିକାର୍ ନାଇ କି ? କି ମୁଇ ଦାନ୍ ଇସାବେ ଦେଲିନି ବଲି ଆଁକାର୍ ଅଇଲାସ୍ନି ?”

୧୬ ଜିସୁ ଏ କାତା କଇସାରାଇ କଇଲା, “ଜନ୍ ଲକ୍ମନନ୍ ଏବେ ପଟେ ଆତ୍ମତ୍ଵେ ସେମନ୍, ଆଗ୍ତୁ ଅଇବାଇ । ଆରି ଜନ୍ ଲକ୍ମନନ୍ ଆଗ୍ତୁ ଆତ୍ମତ୍ଵେ ସେମନ୍ ପଟେ ସେ ରଇଜିବାଇ ।”

ଜିସୁ ତାର୍ ମରନ୍ ବିସଇ ଏଟାସଙ୍ଗ୍ ତିନତର୍ ଜାନାଇଲା  
(ମାର୍କ ୧୦:୩୨-୩୪; ଲୁକ୍ ୧୮:୩୧-୩୪)

୧୭ ଜିସୁ ଜିରୁସାଲାମ୍ ଜିବା ବାଟେ ତାର୍ ବାଟଟା ସିସମନଙ୍କେ ଗଟେକ୍ ଲଗେ ଡାକି ନେଇ, କେ ନଇଲା ବେଲେ କଇଲା, ୧୮ “ସୁନା, ଆମେ ଜିରୁସାଲମେ ଗାଲୁନି । ତେଇ ନର୍ପିଲା ମୁଇ, ମୁକିଅ ପୁଜାରି ଆରି ଦରମ୍ ଗୁରୁମନଙ୍କେ ସର୍ପି ଅଇବି । ସେମନ୍ ମକେ ମରନ୍ ତଣ୍ଟି ଦେବାଇ । ୧୯ ତାର୍ପଟେ ସେମନ୍ ମକେ, ଜିଉଦି ନ ଅଇଲା ଲକ୍ମନଙ୍କେ ସର୍ପି ଦେବାଇ । ଜିଉଦି ନ ଅଇଲା ଲକ୍ମନନ୍, ମକେ କିଜାଇବାଇ, କରତା ସଙ୍ଗ୍ ମାର୍‌ବାଇ ଆରି କୁର୍ସେ ଚଗାଇବାଇ । ମାତର୍ ତିନଦିନ୍ ପଟେ ମୁଇ ଆରି ତରେକ୍ ଜିବନ୍ ଅଇ ଉର୍ବି ।”

ଗଟେକ୍ ମାଆର୍ ଗୁଆରି  
(ମାର୍କ ୧୦:୩୫-୪୫)

୨୦ ସେତ୍ତକିବେଲେ ଜେବଦିର୍ ମାଇଜି ତାର୍ ଦୁଇଟା ପିଲାମନର୍ ସଙ୍ଗ୍ ଜିସୁରଲଗେ ଆସି ତାକେ କୁଆର୍‌କରି, ଗଟେକ୍ ବିସଇ ମାଙ୍ଗିଲା ।

୨୧ ଜିସୁ ତାକେ ପାଟାରୁଲା, “ତୁଇ କାଇଟା ମନ୍ କଲୁସ୍ନି ?” ସେ କଇଲା, “ଜେତେବଲ୍ ତମେ ତମର୍ ରାଇଜେ ରାଜା ଅଇସା, ମର୍ ଏ ଦୁଇଟା ପିଲାମନଙ୍କେ ତମର୍ ଡେବ୍‌ରି ବାଟେ ଆରି ଉଜା ବାଟେ ବସାଇବି ବଲି ମକେ କାତା ଦିଆ ।”

୨୨ ଜିସୁ ଜେବଦିର୍ ପିଲାମନଙ୍କେ କଇଲା, “ତମେ କାଇଟା ମାଗୁଲାସ୍ନି ସେଟା ବୁଜି ନାପାରୁଲାସ୍ନି । ମୁଇ ଜନ୍ ଦୁକ୍‌ପୁରୁନ୍ ମୁତାର୍ ପାନି କାଇବାର୍ ଗାଲିନି, ତମେ କାଇ ପାରାସ୍ କି ?” ସେମନ୍ “ଉଁ” ବଲି କଇଲାଇ ।

୨୩ ଜିସୁ ସେମନଙ୍କେ କଇଲା, “ତମେ, ମର୍ ମୁତାର୍ ପାନି କାଇଲେ କାଇପାରାସ୍ । ମାତର୍ ମର୍ ଉଜା ବାଟେ ଆରି ଡେବ୍‌ରି ବାଟେ କେ ବସିପାରେ ସେଟା ବାଟବାକେ

\* ୨୦:୧୭ ୨୦:୧୭ ମାଡ଼ିଉ ୧୯:୩୦; ମାର୍କ ୧୦:୩୧; ଲୁକ୍ ୧୩:୩୦

ମରୁ ଅଦିକାର ନାହିଁ । ଜନ୍ମ ଲକ୍ଷ୍ମୀମନରୁ ପାଇ ମରୁ ବାବା ସେ ଜାଗା ତିଆର କଲା ଆଚେ, ସେଟା ସେମନରୁ ପାଇ ଆକା ।”

୨୪ ବିନ୍ ସିସ୍‌ମନ୍ ଜେଡେବେଲ୍ ଏ କାତା ସୁନ୍‌ଲାଲ, ସେ ଦୁଇ ବାଇର ଲାଗି ବେସି ରିସା ଅଇଗାଲାଲ । ୨୫ \*ଜିସୁ ସିସ୍‌ମନ୍‌କେ ଗଟେକ୍‌ଟାନେ ଟୁଲ୍‌କରି କଇଲା, “ତମେତା ଜାନାସ୍ ଏ ଦୁନିଆର୍ ରାଜାମନ୍ ବିନ୍ ଲକ୍ଷ୍ମୀମନ୍‌କେ ନିଜର୍ ଅଦିକାର କରିରଇବାଇ । ବଡ଼ ବଡ଼ ନେତାମନ୍ ମିସା ବିନ୍ ଲକ୍ଷ୍ମୀମନ୍‌କେ ସାସନ୍ କରୁବାଇ । ୨୬ \*ମାତର୍ ତମେ ସେନ୍ତାର ଉଆନାଇ । ତମର୍ ବିତ୍‌ରେ ଗଟେକ୍ ଲକ୍ଷ୍ମୀମନ୍ ବଡ଼ ଅଇବାକେ ମନ୍ କଲାନ୍ତି ବଇଲେ, ସେ ସବୁଲକ୍ଷ୍ମୀମନ୍ ସେବା କରୁବାରୁ ଆଚେ । ୨୭ ତମର୍ ବିତ୍‌ରେ ଜେ ମୁକ୍ତି ଅଇବାକେ ମନ୍ କଲାସନ୍ତି, ସେ ବିନ୍ ଲକ୍ଷ୍ମୀମନ୍ ଗତିଦାକ୍ଷତା ପାରା ଅଇ ସେମନରୁ ସେବା କର । ୨୮ ଜେନ୍ତାରି କି ପରମେସର୍ ପାଟାଇଲା ନର୍ପିଲା ମୁଇ ମିସା ସେବା ମିଲ ବଲି ଆସି ନାଇ, ମାତର୍ ବିନ୍ ଲକ୍ଷ୍ମୀମନ୍‌ରୁ ସେବା କରି ସେମନ୍‌କେ ମୁକ୍ତି ମିଲ ବଲି ନିଜର୍ ଜିବନ୍ ଦେବାକେ ଆଇଲି ଆତି ।”

ଜିସୁ ଦୁଇଟା କାଣାମନ୍‌କେ ଦେକ୍‌ବା ବପୁ ଦେଲା

(ମାର୍‌କ ୧୦:୪୭-୫୨; ଲୁକ୍ ୧୮:୩୫-୪୩)

୨୯ ଦିନେକ୍ ଜିସୁ ସିସ୍‌ମନ୍‌ରୁ ସକ୍ଷ୍ମ ଜିରିଅ ସଅର୍ ଚାଡ଼ିକରି ଜିବାବେଲେ କେତେ କେତେ ଲକ୍ଷ୍ମୀମନ୍ ତାର ପଟେ ପଟେ ଇଣ୍ଡୁବାରୁ ଦାରୁଲାଲ । ୩୦ ଆରି ଏଦେ ଦେକା ! ବାଟ୍‌ପାଲି ବସି ରଇବା ଦୁଇଟା କାଣା, ଜିସୁ ସେ ବାଟେ ଆଇଲାନ୍ତି ବଲି ସୁନ୍ତି, ଆକ୍‌ମାରି ଡାକ୍‌ଲାଲ, “ଏ ମାପ୍‌ରୁ ଦାଉଦର୍ ପଅ ! ଆମ୍‌କେ ଦୟା କର ।”

୩୧ ଲକ୍ଷ୍ମୀମନ୍ ସେମନ୍‌କେ ଦମ୍‌କାଇ କରି ରୁପ୍‌ଅଇ ରଇବାକେ କଇଲାଲ । ମାତର୍ ସେମନ୍ ଅଦିକ୍ ଅଦିକ୍ ଆକ୍‌ମାରି କଇଲାଲ, “ଏ ମାପ୍‌ରୁ, ଦାଉଦର୍ ପଅ ! ଆମ୍‌କେ ଦୟା କର ।”

୩୨ ଜିସୁ ତେଇ ଚିଆଅଇ ସେମନ୍‌କେ ଡାକି ପାଟାରୁଲା, “ମୁଇ ତମର୍ ପାଇ କାଇଟା କରୁବି ବଲି ମନ୍ କଲାସନ୍ତି ?”

୩୩ ସେମନ୍ କଇଲାଲ, “ମାପ୍‌ରୁ ଆମ୍‌କେ ଦେକ୍‌ବା ବପୁ ଦିଆ ।”

୩୪ ଜିସୁ ସେମନ୍‌ରୁ ପାଇ ଦୟା ଅଇ, ତାକ୍‌ର ଆଁକି ଚିଇଲା । ସେ ଦାପ୍‌ରେସେ ସେମନ୍ ଦେକିପାରୁଲାଲ ଆରି ଜିସୁର୍ ପଟେ ପଟେ ଗାଲାଲ ।

## ୨୧

ଜିରୁସାଲାମ୍ ଜିସୁ ଡାକ୍‌ପୁଟାରେ ଜିବାଟା

(ମାର୍‌କ ୧୧:୧-୧୧; ଲୁକ୍ ୧୯:୨୮-୪୦; ଜଅନ୍ ୧୨:୧୨-୧୯)

୧ ଜିସୁ ଆରି ତାର ସିସ୍‌ମନ୍ ଜିରୁସାଲାମ୍ ଲଗାଲଗି ଅଇ କଣ୍ଟେକ୍ ଦୁଇ ଜାଇ ଡଙ୍ଗାଲଗେ ରଇଲା ବେଡ଼ପାଗି ଆରି ବେଡ଼ିନିଆ ନାଉର୍ ଗାର୍ କେଟ୍‌ଲାଲ । ତାରୁ ଦୁଇଟା ସିସ୍‌ମନ୍‌କେ ଆଦେସ୍ ଦେଇ କଇଲା, ୨ “ତମେ ମୁଆଟେ ରଇଲା ସେ ଗାର୍ ଜାଆ । ତେଇ କେଟ୍‌ଲା ଦାପ୍‌ରେ, ଗଟେକ୍ ଗଦ ବାନ୍ଧିଅଇ ରଇବାଟା ଦେକ୍‌ସା ଆରି ତାର ଲଗେ ତାର ପିଲା ଆଚେ । ସେମନ୍‌କେ ମେଲି ମରୁଲଗେ ଦାରି ଆସା । ୩ କେ ଜଦି କାଇ ବଲି ପାଟାରୁଲେ କଇସା, ଏଟା ସାଉକାର୍‌କେ ଦର୍‌କାର୍ ଆଚେ ।” ସେଡ଼କି ଦାପ୍‌ରେ ସେ ଗଦମନ୍‌କେ ଚାଡ଼ିଦେଇସି ।”

୪ ଏ ଗର୍‌ନାଅନ୍ତି ବାବଦାଦିମନ୍ ଲେକି ରଇଲା କାତା ସିଦ୍ ଅଇଲା ।

୫ “ସିଅନ୍ ଗତେ କୁଆ !

ଦେକା, ତମର୍ ରାଜା ତମର୍ ଲଗେ ଆଇଲାନ୍ତି,

ସେ କେତେ ସୁଆଲ୍ ଗଦପିଲାଟ୍ ପିଟିତେଇ ବସ୍‌ଲାଆଚେ



ଦେକା, ସେ ଗଦପିଲା ଉପରେ ବସିଆଇଲାନି ।”

୨ ସିସ୍ତାନ୍ ଜାଇ ଜିସୁ କଇବା ଇସାବେ କଲା । ୩ ଗଦ ଆରି ତାର ପିଲାକେ ଦାରି ଆସି ତାକର୍ ଉପରେ ଲୁଗାମନ୍ ଅଟାଇ ଦେଲା ଆରି ଜିସୁ ଗଦ ଉପରେ ବସଲା । ୪ ତେଇ ରଇଲା ଲକ୍ମନ୍ ଜିସୁ ଜିବା ବାଟେ ନିଜର୍ ନିଜର୍ ପଟିଆମନ୍ ଅଟାଇ ଦେଲା ଆରି କେତେକ ଲକ୍ମନ୍ କଜ୍ରି ତାଲ୍ ଆନି କରି ସେ ବାଟେ ଅଟାଇଦେଲା । ୫ ଜିସୁର୍ ଆଗତୁବାଟେ ଆରି ପର୍ବାଟେ ଜାଇତେ ରଇଲା ଲକ୍ମନ୍ ଆକ୍ମାରି କରି କଇଲା, “ଦାଉଦର୍ ପଅକେ ତାକ୍ପୁଟା କରା, ଜେ ମାପୁରୁର୍ ନାଉଁ ଦାରି ଆଇଲାନି ତାକେ ପର୍ମେସର୍ ଆସିର୍ବାଦ୍ କର । ପର୍ମେସର୍ ତାକ୍ପୁଟା କରା ।”

୧୦ ଜିସୁ ଜିରୁସାଲମ୍ କେଟ୍ଲାଦାପ୍ରେ ସେ ଗଡର୍ ଲକ୍ମନ୍ ଜିସୁ କେ ? ବଲି କରି ଗୁଲାଇ ବାଟେ ଉଡ଼ରା ଅଇଗଲା । ୧୧ ଲକ୍ମନ୍ ପାଟାରୁଲା, “ସେ କେ ?” ବିନ୍ ଲକ୍ମନ୍ କଇଲା, “ସେ ଅଇଲାନି ଗାଲିଲି ରାଇଜେ ରଇବା ନାଜରିଡ଼ ଗଡର୍ ବବିସତ୍‌ବକ୍ତା ଜିସୁ ।”

ଜିସୁ ମନ୍ଦିରେ ଗାଲା

(ମାର୍କ ୧୧:୧୫-୧୯; ଲୁକ୍ ୧୯:୪୫-୪୮)

୧୨ ଜିସୁ ମନ୍ଦିର୍ ବିତ୍ରେ ପୁରିକରି ତେଇ ଗେନା ବିକା କର୍ତେ ରଇବା ସବୁ ଲକ୍ମନ୍‌କେ ବାରକରାଇ ଦେଲା । ତାରୁ ବାଦ୍‌ଲାଉମନ୍‌ର୍ ଟେବୁଲ୍ ଆରି ପରୁଆ ବିକ୍ମନ୍‌ର୍ ବସ୍‌ବାଟା ପାସ୍‌ଲା ଦେଲା । ୧୩ ଜିସୁ ସେମନ୍‌କେ କଇଲା, “ଦରମ୍ ସାସ୍‌ତରେ ଲେକା ଆଟେ, ମର୍ ମନ୍ଦିର୍ ପାର୍ତନା ଗର୍ ବଲି ନାଉଁ ଅଇସି । ମାତର୍ ତମେ ତାକେ ଚର୍ମନ୍‌ର୍ ଆକାଡା ସାଲ୍ ପାରା କରିଆରାସ୍ ।”

୧୪ ଜିସୁ ମନ୍ଦିରେ ରଇଲାବେଲେ କାଣାମନ୍ ଆରି ମେଟାମନ୍ ତାର ଲଗେ ଆଇଲା ଆରି ସେ ସେମନ୍‌କେ ନିକ କଲା । ୧୫ ମୁକିଅ ପୁଜାରିମନ୍ ଆରି ଦରମ୍ ଗୁରୁମନ୍ ତାର କାବା ଅଇଜିବା କାମ୍ ସବୁ ଦେକି ଆରି ପିଲାମନ୍ ଦାଉଦର୍ ପଅର୍ ଜୟ ଜୟ ଅ, ବଲି କଇବାଟା ସୁନି ରିସା ଅଇଗଲା । ୧୬ ସେମନ୍ ଜିସୁକେ ପାଟାରୁଲା, “ଏମନ୍ କାଇବଲି କଇଲାଇନି ତୁଇ ସୁନି ପାର୍‌ଲୁସିନି ?” ଜିସୁ କଇଲା, “ଉଁ ସୁନିନି । ଦରମ୍ ସାସ୍‌ତରେ କାଇ ଏ କାଡା ପଡାସ୍ ନାଇ କି ? ‘ତମେ ପିଲାମନ୍‌କେ ଆରି କଅଁଲା ପିଲାମନ୍‌କେ ଟିକ୍ ଇସାବେ ଆରାଦନା କର୍ବାକେ’ ସିକାଇଆରାସ୍ ?”

୧୭ ଏ କାଡା କଇକରି ଜିସୁ ସେମନ୍‌କେ ଚାଡ଼ି ଜିରୁସାଲମେଅନି ବେଡ଼ନିଆଇ ଗାଲା । ସେ ତେଇ ଗଟେକ ରାଡ଼ି ବିତାଇଲା ।

ଜିସୁ ତୁମ୍ବରି ଗର୍‌କେ ସାଇପ୍ ଦେଲା

(ମାର୍କ ୧୧:୧୭-୧୪, ୨୦-୨୪)

୧୮ ତାର ଆରକର୍ ଦିନେ ଜିସୁ ସାକାଲ୍ ସାକାଲ୍ ଜିରୁସାଲମ୍ ବାଉଡ଼ଲା ବେଲେ ତାକେ ବୁକ୍ କଲା । ୧୯ ବାଟ୍‌ପାଲି ଗଟେକ୍ ତୁମ୍ବରି ଗର୍ ରଇଲା । ଜିସୁ ସେ ଗର୍ ଲଗେ ଜାଇ ତେଇ ପତର୍ ରଇବାଟା ଚାଡ଼ି, ଆରି କାଇଟା ଦେକେ ନାଇ । ତେବେ ସେ ଗର୍‌କେ କଇଲା, “ତୁଇ ଆରି କେବେ ମିସା ପଲ୍ ନ ଦାରୁସ୍ !” ସେ ଦାପ୍ରେ ସେ ତୁମ୍ବରି ଗର୍ ସୁକିଗଲା ।

୨୦ ଏଟା ଦେକିକରି ସିସ୍ତାନ୍ କାବା ଅଇଜାଇ ପାଟାରୁଲା, “ଏ ଗର୍ ଏତେକ୍ ଦାପ୍ରେ କେନ୍ତି ସୁକିଗଲା ?”

୨୧ ଜିସୁ କଇଲା, “ମୁଇ ତମ୍‌କେ ସତ୍ କଇଲିନି, ତମ୍‌ ମନେ ଅଇସି କି ନ ଅଏ ବଲି ଅଲପ୍ ମିସା ନ ବାବିକରି ଜଦି ପୁରାପୁରୁନ୍ ବିସ୍‌ବାସ୍ କର୍‌ସା ବଇଲେ ମୁଇ ଏ

ତୁମ୍ଭର ଗର୍ବକେ ଜେନ୍ତୁ କରିଆଡ଼ି, ତମେ ମିସା ସେନ୍ତୁ କରିପାରାସ । ସେତୁକି ଆକା ନଏଁ,  
ଏ ଡଙ୍ଗା ଉଲଟିକରି ସମୁଦ୍ରେ ଜାଇ ଅଦର ବଳି କଇଲେ ମିସା ସେଟା ଅଇସି ।  
୨୨ ତମେ ବିସ୍‌ବାସ କରି ପାରତନାଇ ଜନ୍‌ଟା ମାଙ୍ଗସା, ସେଟା ମିଲୁସି ।”

ଜିସୁର ଅଦିକାର ବିସଇ ପାଟାରବାଟା

(ମାରକ ୧୧:୨୭-୩୩; ଲୁକ ୨୦:୧-୮)

୨୩ ଜିସୁ ମନ୍ଦିରେ ବାଉଡ଼ି ଆସି ତେଇ ସିକିଆ ଦେଇତେ ରଇଲା ବେଲେ ମୁକିଅ  
ପୁଜାରିମନ୍ ଆରି ପାରତିମନ୍ ତାକେ ପାଟାରଲାଇ, “କାଇ ଅଦିକାରେ ତୁଇ ଏ ସବୁ  
କାମ୍ କଲୁସିନି ? ତକେ ଏ ଅଦିକାର କେ ଦେଲା ?”

୨୪ ଜିସୁ କଇଲା, “ମୁଇ ମିସା ତମ୍‌କେ ଏକାଇ ଗଟେକ୍ ସେ ପର୍‌ସନ୍ ପାଟାରୁବି ।  
ତାର ଉତ୍ତର ଦେଇ ପାରଲେ ମୁଇ କାଇ ଅଦିକାରେ ଏ ସବୁ କାମ୍ କଲିନି, ତମ୍‌କେ  
କଇଦେବି । ୨୫ ଜଅନ୍ ତୁବନ୍ ଦେବା ଅଦିକାର କାର୍‌ଟାନେଅନି ମିଲାଇ ରଇଲା ?  
ସର୍‌ଗେଅନି କି ମୁନୁସ୍ ମନରଟାନେଅନି ?”

ସେମନ୍ ତାକର୍ ତାକର୍ ବିତ୍‌ରେ କୁଆବଲା ଅଇଲାଇ “ଏ ବିସଇ ନେଇ କାଇବଲି  
କଉଁ ? ଜଦି ପର୍‌ମେସରର୍ ଟାନେଅନି ବଲି କଇଲେ, ତେବେ ସେ ଆମ୍‌କେ  
‘ଜଅନ୍‌କେ କାଇକେ ବିସ୍‌ବାସ୍ କରାସ୍ ନାଇ ?’ ବଲି କଇସି । ୨୬ ଜଦି ଲକ୍‌ମନ୍‌ର୍  
ଟାନେଅନି ବଲି କଇଲେ, ତେବେ ଲକ୍‌ମନ୍‌କେ ଡର୍ ଲାଗୁଲାନି । କାଇକେ ବଇଲେ  
ଜଅନ୍ ଗଟେକ୍ ବବିସ୍‌ତ୍ରବକ୍‌ତା ବଲି ସେମନ୍ ସବୁଲକ୍ ବିସ୍‌ବାସ୍ କଲାଇନି ।”  
୨୭ ସେଟାରପାଇ ସେମନ୍ ଜିସୁକେ କଇଲାଇ, “ଆମେ ନାଜାନୁ ।”

ଜିସୁ ସେମନ୍‌କେ କଇଲା, “କନ୍ ଅଦିକାରେ ଏ ସବୁ କଲିନି ସେଟା ମୁଇ ମିସା  
ତମ୍‌କେ ନ କଇ ।”

ଦୁଇଟା ପିଲାଟା କାତାନି

୨୮ ଆଲେ ଏ ବିସଇ ତମେ କାଇ ବଲି ବାଦ୍‌ଲାସିନି କଇଦେକା ପନି ? ଗଟେକ୍  
ଲକର୍ ଦୁଇଟା ପଅମନ୍ ରଇଲାଇ । ଦିନେକ୍ ସେ ଲକ୍ ତାର ବଡ଼ ପଅକେ କଇଲା,  
“ଦୁନାରେ, ଆଜି ଆମର୍ ଅଙ୍ଗୁର୍ ବାଡେ ଜାଇ ପାଇଟି କର୍ । ୨୯ ‘ନାଇ ମୁଇ ନ  
କରି’ ବଲି ବଡ଼ ପଅ କଇଲା । ମାତର୍ ପଟେ ମନ୍ ବାଦ୍‌ଲାଇ ପାଇଟି କରୁବାର୍  
ଗାଲା । ୩୦ ସେ ଲକ୍ ସାନ୍ ପଅକେ ମିସା ସେ କାମ୍ କରବାକେ କଇଲା । ‘ଉଁ ବାବା  
ଗାଲିନି’ ବଲି ସାନ୍ ପଅ କଇଲା । ମାତର୍ ସେ କାମ୍‌ଟାନେ ମୁଲ୍‌କେ ଜାଏ ନାଇ  
। ୩୧ କଇଦେକା ପନି, ଏ ଦୁଇଟା ପଅର୍ ବିତ୍‌ରେ କେ ତାର ବାବା ତିଆରଲାଟା  
ମାନିରଇଲା ?” ସେମନ୍ କଇଲାଇ, “ବଡ଼ ପଅ ।”

ଜିସୁ ସେମନ୍‌କେ କଇଲା, “ମୁଇ ସଡ଼ କଇଲିନି ସିସ୍‌ତୁ ମାଙ୍ଗୁମନ୍ ଆରି  
ବେସିଆମନ୍ ତମ୍‌ଟାନେଅନି ପରମେସରର୍ ରାଇଜେ ଆଗତୁ କେଟ୍‌ବାଇ ।  
୩୨ ଧୁବନ୍ ଦେଉ ଜଅନ୍ ତମ୍‌ଟାନେ ଆସି ଦରମର୍ ବାଟ୍ ଦେକାଇ ଦେଇରଇଲା,  
ମାତର୍ ତମେ ତାକେ ବିସ୍‌ବାସ୍ କରାସ୍ ନାଇ, ମାତର୍ ସିସ୍‌ତୁ ମାଙ୍ଗୁମନ୍ ଆରି  
ବେସିଆମନ୍ ତାର କଇଲା କାତା ବିସ୍‌ବାସ୍ କଲାଇ । ଏଟା ଦେକିକରି ମିସା ପଟେ  
ତମେ ପାପ୍ କାମ୍‌କରବାଟା ଚାଡ଼ି ମନ୍ ବାଉଡ଼ାଇ ତାକେ ବିସ୍‌ବାସ୍ କରାସ୍ ନାଇ ।”

ଆଦିବାଗ୍ ଚାସ୍ କରୁମନ୍‌ର୍ ବିସଇ

(ମାରକ ୧୨:୧-୧୨; ଲୁକ ୨୦:୯-୧୯)

୩୩ ଜିସୁ କଇଲା, “ଆରି ଗଟେକ୍ କାତା ସୁନା, ଗଟେକ୍ ସାଉକାର୍ ତାର ଜମିଟାନେ  
ଅଙ୍ଗୁର୍ ଚାସ୍ କରୁରଇଲା । ତେଇ ଚାରିବେଟ୍‌ତି ବାଡ଼ ବୁନ୍‌ଲା ଆରି ଅଙ୍ଗୁର୍  
ପିଲ୍‌ବାକେ ଗଟେକ୍ କୁଣ୍ଡୁ ତିଆରକଲା । ଆରି ଜାଗୁଆଲିର୍ ପାଇ ଗଟେକ୍ ମାଟା

ମିସା ତିଆର କରିଦେଲା । ତାର ପରେ ସେ ଜମି, ଚାସିମନ୍‌କେ ଆଦିବାଗ୍ ଇସାବେ ଦେଇକରି, ସାଉକାର ବିଦେସେ ଉଟିଗାଲା ।”

୩୪ ଅଛୁର୍ ତଲ୍‌ବାବେଲେ ସେ ସାଉକାର ତାର ଦାଙ୍ଗ୍‌ତାମନ୍‌କେ ନିଜର୍ ଆଦିବାଗ୍ ମାଙ୍ଗ୍‌ବାକେ ଚାସିମନ୍‌ର ଲଗେ ପାଟାଇଲା । ୩୫ ଚାସିମନ୍ ସେ ଦାଙ୍ଗ୍‌ତାମନ୍‌କେ ଦାରି, ଗଟେକ୍ ଲକ୍‌କେ ମାର୍‌ଲାଇ, ଆରି ଗଟେକ୍ ଲକ୍‌କେ ମରାଇଲାଇ, ଆରି ଗଟେକ୍ ଲକ୍‌କେ ପାକ୍‌ନାସଙ୍ଗ୍ ମାରିପାକାଇଲାଇ । ୩୬ ଏଟାର ପାଇ ଜମି ସାଉକାର ଆଗର୍‌ତେଇଅନି ଅଦିକ୍ ଗତିଦାଙ୍ଗ୍‌ତାମନ୍‌କେ ପାଟାଇଲା । ବାଗ୍ ଚାସିମନ୍ ସେମନ୍‌କେ ମିସା ସେନ୍ତାରିସେ କଲାଇ । ୩୭ ସାରାସାରି ପରେ ପଦା ସାଉକାର ଚାସିମନ୍‌ରଟାନେ ତାର୍‌ପିଲାକେ ପାଟାଇଲା । ସେ ବାବ୍‌ଲା, ସେମନ୍ ମର୍ ପିଲାକେ ବାଦିଅରେ ନାମ୍‌ବାଇ ।

୩୮ ମାତର୍ ଚାସିମନ୍ ସାଉକାରର୍ ପଅକେ ଦେକିକରି ତାକର୍ ତାକର୍ ବିତ୍ତରେ କୁଆବଲା ଅଇଲାଇ, “ଏଦେ ଦେକା, ସାଉକାରର୍ ପିଲା ! ଆସା ଆକେ ମିସା ମାରିପାକାଉ । ଏନ୍ତାର କଲେ ଆକା ସାଉକାରର୍ ଦନ୍ ଆମର୍‌ଟା ଅଇସି ।” ୩୯ ଏନ୍ତାରି କଇକରି ସେମନ୍ ତାକେ ଜମିତେଇଅନି ଦାରି ବାଟ୍‌କରାଇ, ବାଇରେ ନେଇ ମାରି ମରାଇଦେଲାଇ ।

୪୦ ଜିସୁ ପାଟାରଲା, “ଜେତେବେଲ୍ ଜମି ସାଉକାର୍ ଆଇସି ସେ ଚାସିମନ୍‌କେ କାଇଟା କରସି ?”

୪୧ ସେମନ୍ କଇଲାଇ “ବଦ୍‌ମାସ୍‌ମନ୍‌କେ ମାରି ମରାଇସି । ଆରି ଜନ୍ ଚାସିମନ୍ ସମାନ୍ ବେଲାଇ ତାର୍ ଆଦିବାଗ୍ ଦେବାଇ, ସେ ଜମି ସେମନ୍‌ର୍ ଆତେ ଜିମା ଦେଇସି ।”

୪୨ ଜିସୁ ସେମନ୍‌କେ କଇଲା, “ଏ ସାସ୍‌ତରର୍ କାତା କାଇ କେବେ ତମେ ପତାସ୍ ନାଇ କି ?

“ଗର୍‌ବାହୁମନ୍ ଜନ୍ ପାକ୍‌ନା ଲତାକେ ନ ଅଏ ବଲି ଚାଡ଼ିଦେଇ ରଇଲାଇ,

ସେଟାସେ ଗର୍ କନର୍ ମୁକିଅ ପାକ୍‌ନା ଅଇଲା ।

ନିଜେ ମାପରୁଆକା ଏଟା କଲା ଆତେ ।

ତାର୍ କାମ୍ କେତେକ୍ କାବାଅଇଜିବା କାମ୍ !”

୪୩ ଜିସୁ ଆରି କଇଲା, “ସେଟାର ପାଇ ତମ୍‌କେ କଇଲିନି, ପର୍‌ମେସରର୍ ରାଇଜେ ପୁର୍‌ବା ଅଦିକାର୍ ତମର୍‌ତେଇଅନି ଦାରିଜିବାଇ ଆରି ଜନ୍ ଦଲ୍ ଏ ରାଇଜର୍ ନିମାନ୍ ପଲ୍ ଦେକାଇ ପାର୍‌ବାଇ, ସେମନ୍‌କେ ସେଟା ଦିଆଅଇସି ।”

୪୪ ଆରି ଜେ ଏ ପାକ୍‌ନା ଉପ୍‌ରେ ଅଦରସି, ସେ କଣ୍ଟ୍ କଣ୍ଟ୍ ଅଇଜାଇସି । ଆରି ଏ ପାକ୍‌ନା ଜାର୍ ଉପ୍‌ରେ ଅଦରସି, ସେଟା ତାକେ ଚାପି କରି ଗୁଣ୍ଟ୍ କରି ଦେଇସି\* ।

୪୫ ମୁକିଅ ପୁଜାରିମନ୍ ଆରି ପାରୁସିମନ୍ ଏ କାତା ସୁନି, ଜିସୁ ସେମନ୍‌କେ ଦେକାଇ କରି କଇଲାନି ବଲି ବୁଜିପାର୍‌ଲାଇ । ୪୬ ସେଟାର୍ ପାଇ ସେମନ୍ ତାକେ ବାନ୍ଦାଇ ନେବାକେ ଚେସ୍‌ଟା କଲାଇ, ମାତର୍ ଲକ୍‌ମନ୍‌କେ ଡରି ସେମନ୍ ସେଟା କରି ନାପାର୍‌ଲାଇ, କାଇକେବଇଲେ ଲକ୍‌ମନ୍ ଜିସୁକେ ଗଟେକ୍ ବବିସ୍‌ତ୍‌ବକ୍‌ତା ବଲି ମନେ ବାବ୍‌ତେରଇଲାଇ ।

## ୨୨

ବିବା ବଜିର କାତା

(ଲୁକ୍ ୧୪:୧୫-୨୪)

୧ ଜିସୁ ଆରିତରେକ୍ ଉଦାଅରଣ୍ ଦେଇ ଲକ୍‌ମନ୍‌କେ ସିକିଆ ଦେଲା । ୨ ପର୍‌ମେସରର୍ ସରଗ୍ ରାଇଜ୍ ଏନ୍ତାରି । ତରେକ୍ ଗଟେକ୍ ରାଜା ତାର୍ ପିଲାପାଈ ବଜି କରାଇଲା । ୩ ଜନ୍ ଲକ୍‌ମନ୍‌କେ ବିବା ବଜିଟାନେ କବର୍ ଦେଇରଇଲା,

\* ୨୧:୪୪ ୨୧:୪୪ ଏ ବାକିଅ ପୁର୍‌ନା ପାଣ୍ଟ୍ ଲିପିଟାନେ ଲେକାଅଏନାଇ

ସେମାନଙ୍କେ ଡାକିଆନ୍‌ବାକେ ଦାଙ୍ଗଡ଼ାମାନଙ୍କେ ପାଟାଇଲା । ମାତର ସେମାନ ନିର୍ଦ୍ଦିଲାଇ । ୪ ବିବାଟାନେ ଗାଗଡ଼ ଚେଲିମାନଙ୍କେ ମାରି ବଜି ଅଇଲା ଆଟେ । ଦାପ୍‌ରେ ଆସା ବଲି ରାଜା ଆରି ତରେକ୍ ବିନ୍ ଦାଙ୍ଗଡ଼ାମାନଙ୍କେ କଇପାଟାଇଲା । ୫ ମାତର କବର ପାଇରଇଲା ଲକ୍‌ମନ୍ ଏ କାତା ନ ମାନିକରି ନିଜର ନିଜର ପାଇଟି କରବାର ଦାରୁଲା । କେତେ ଲକ୍ ବାରଇକରି ପଦାଇ ଉଟିଗାଲା । ଆରି କେତେକ୍ ଲକ୍ ଡାକର ଦୁକାନେ ଉଟିଗାଲା । ୬ ଆରି କେତେ ଲକ୍ ରାଜାର ଦାଙ୍ଗଡ଼ାମାନଙ୍କେ ଦାରି ମାରି ମରାଇଲା । ୭ ରାଜା ରିସାଅଇଜାଇ କରି ସଇନମାନଙ୍କେ ପାଟାଇଲା । ସଇନମନ୍ ଜାଇକରି ସେ ମାରୁମାନଙ୍କେ ମରାଇ ପାକାଇଲା ଆରି ସେମନ୍ ରଇଲା ସଅର୍ ପତାଇ ପାକାଇଲା । ୮ ତାର ପଟେ ରାଜା ଗତିଦାଙ୍ଗଡ଼ାମାନଙ୍କେ ଡାକି କଇଲା, ବିବା ବଜିର ରାନ୍ଦାବାତା ସାରୁଲାବେ ମାତର ମୁଇ କବର ଦେଇରଇଲା ଲକ୍‌ମନ୍ ଏ ବଜି କାଇବାକେ ବାଗ୍ ନାଇ ।

୯ ଏବେ ତମେ ଜାଇକରି ଗାଉଁପାଲିର ଗୁଡ଼ା ଆରି ପୁଟ୍‌ମାନଙ୍କେ, ଜେଡ଼କି ଲକ୍‌କେ ବେଟ୍ ଅଇସା ସେ ସବୁ ଲକ୍‌ମାନଙ୍କେ ଆମର ବଜିଟାନେ ଡାକିଆନା । ୧୦ ତେବେ ଦାଙ୍ଗଡ଼ାମନ୍ ଲଗର ପାକର ଗାଉଁମାନଙ୍କେ ବୁଲି ନିକ ଲକ୍ ଅଅଡ଼ କି ବାନିଆ ଲକ୍ ଅଅଡ଼ ଜେଡ଼କି ଲକ୍‌କେ ବେଟ୍ ଅଇଲା, ସବୁକେ ଡାକି ଆନ୍‌ଲା । ଆରି ବିବା ଗରେ ଲକ୍‌ମନ୍ ମାଣ୍ଡାବୁଣ୍ଡା ଅଇଗାଲା ।

୧୧ ପଟେ ରାଜା ଡାକାଇଲା ଲକ୍‌ମାନଙ୍କେ ଦେକ୍‌ବାର ଆଇଲା । ସେ ଲକ୍‌ମାନର ବିଡ଼ରେ ଅନି ଗଟେକ୍ ଲକ୍ ତିଆର୍‌ପିଆର୍ ନ ଅଇକରି ନିକଟା ପିନ୍ଦି ନ ଆସିରଇଲାଟା ରାଜା ଦେକ୍‌ଲା । ୧୨ ରାଜା ତାର ଲଗେ ଜାଇ ପାଟାରୁଲା, “ମଇତର, ତୁଇ ତିଆର୍ ପିଆର୍ ନ ଅଇତେ କେନ୍ତ୍ରି ଏ ବଜିଟାନେ ଆଇଲୁସ୍” ସେ ଲକ୍ ଚିମ୍‌ରା ଅଇଦେଲା । ୧୩ ରାଜା ଦାଙ୍ଗଡ଼ାମାନଙ୍କେ କଇଲା, “ତାର୍ ଆଡ଼ ଗଡ଼ ବାନ୍ଦି ବାଇରେ ନେଇ ଆନ୍‌ରେ ପିଙ୍ଗିଦିଆସ୍ । ତେଇ ସେ ଦାଁଡ଼ମୁଣ୍ଡ କାଡ଼ରିଅଇ କାନ୍ଦି କାନ୍ଦି ରଅ ।”

୧୪ ଜିସୁ କାତାନି କଇସାରାଇ କଇଲା, ବେସି ଲକ୍‌କେ ଡାକ୍‌ବାଇ, ମାତର ଉନାଲକ୍‌କେ ବାଟ୍‌ବାଇ ।

ସିସଡ଼ୁ ବାନ୍ଦିବାକେ ପାଟାର୍‌ବାଟା  
(ମାର୍‌କ ୧୨:୧୮-୨୭; ଲୁକ୍ ୨୦:୨୭-୪୦)

୧୫ କେତେଟା ପାରୁସିମନ୍ ଜାଇକରି ଜିସୁକେ ପରସନ୍ ପାଟାରି ପାନ୍ଦେ ପାକାଉଁ ବଲି ବାବ୍‌ଲା । ୧୬ ସେମନ୍ ଡାକର କେତେଟା ସିସଡ଼ୁମାନଙ୍କେ ଆରି ଏରଦର୍ ଦଲେଅନି କେତେଟା ଲକ୍‌ମାନଙ୍କେ ଜିସୁର ଲଗେ ପାଟାଇଲା । ଏମନ୍ ଆସି ଜିସୁକେ ପାଟାରୁଲା, “ଗୁରୁ, ତମେ ସଡ଼ କଇସା ଆରି ପର୍‌ମେସରର୍ ସଡ଼ ବିସଇ ସିକିଆ ଦେବାଟା ଆମେ ଜାନ୍ । ତମେ ମୁନ୍‌ସମାନର୍ ମର୍‌ଜିତାକେ କାତୁର କରାସ୍ ନାଇ । ଲକ୍‌ମନ୍ କାଇ ବଲି ବାବ୍‌ବାଇ ବଲି ଚିନ୍ତା କରାସ୍ ନାଇ । ୧୭ ତେବେ କଇଦେକା ପନି, ଏ ବିସଇ ତମେ କାଇବଲି କଇଲାସିନି ? ରମିୟ ସର୍‌କାରକେ ସିସଡ଼ୁ ଦେବାଟା ଆମର ଦରମ୍ ସାସ୍‌ତରର୍ ଇସାବେ ଚିକ୍ କି ନାଇ ?”

୧୮ ମାତର ଜିସୁ ସେମାନର କୁଟ୍‌କାତା ଜାନି କରି କଇଲା, “ଏ କୁଟିଆଲ୍‌ମନ୍, କାଇକେ ମକେ ପାନ୍ଦେ ପାକାଇବାକେ ଚେସ୍‌ଟା କଲାସିନି ? ୧୯ ଜନ୍ ଅଦ୍‌ଲି ତାବୁ ସିସଡ଼ୁ ଦେଲାସିନି, ତେଇଅନି ଗଟେକ୍ ଆନିକରି ମକେ ଦେକାଆ ।” ସେମନ୍ ଗଟେକ୍ ଅଦ୍‌ଲି ଆନି ତାକେ ଦେଲା ।

୨୦ ଜିସୁ ସେମାନଙ୍କେ ପାଟାରୁଲା “ଏ ଅଦ୍‌ଲି ତାବୁଟାନେ କାର୍ ମୁଉ ଆରି ନାଉଁ ଆଟେ ?”

☆ ୨୨:୧୩ ୨୨:୧୩ ମାଡ଼ିଉ ୮:୧୨;୨୫:୩୦; ଲୁକ୍ ୧୩:୨୮

୨୧ ସେମନ୍ କଇଲା, “ରମିୟ ରାଜାର ମୁଖ ଆରି ନାଉଁ ଆଚେ ।” ଜିସୁ ସେମନ୍‌କେ କଇଲା, “ତେବେ ଜନ୍‌ଟା ରମିୟ ରାଜାରଟା, ସେଟା ତାକେ ଦିଆସ୍ ଆରି ଜନ୍‌ଟା ପରମେସରଟା, ସେଟା ପରମେସରକେ ଦିଆସ୍ ।”

୨୨ ଏ କାତା ସୁନି ସେମନ୍ କାବାଅଇଗାଲା ଆରି ତେଇଅନି ଉଟିଗାଲା ।

ମରିକରି ଉଟ୍‌ବା ବିସଇନେଇ ପର୍‌ସନ୍  
(ମାର୍କ ୧୨:୧୮-୨୭; ଲୁକ୍ ୨୦:୨୭-୪୦)

୨୩ \*ସେ ଦିନେ ସାଦୁକି ଦଲର କେତେ ଲକ୍ ଜିସୁର ଲଗେ ଆଇଲା । ସାଦୁକିମନ୍ ମରିଗାଲେ ଆରି ତରେକ୍ ଉଟି ନଏଁ ବଲି ବିସବାସ୍ କରତେ ରଇଲା । ୨୪ ସେମନ୍ ଜିସୁକେ ପାଚାରଲା, “ଏ ଗୁରୁ, ଜଦି ଗଟେକ୍ ଲକ୍ ପିଲାଟକି ନ ଅଇତେ ମରିଜାଉସି, ତେବେ ମରିଜାଉର୍ ବାଇ ସେ ରାଣ୍ଡି ମାଇଜିକେ ସଙ୍ଗଇସି । ଆରି ତାକର୍ ଟାନେଅନି ଅଇଲା ପିଲାଜିଲା ସେ ମଲା ଲକ୍‌ପାଇ ଅଇସି ବଲି ମସା ନିୟମ୍ କଲା ଆଚେ । ୨୫ ଗଟେକ୍ କାତା ସୁନା । ଇତି ଆମର୍ ବିତରେ ସାତ୍‌ବାଇ ରଇଲା । ବଡ଼ ବାଇ ପିଲାଜିଲା ନ ଅଇତେ ମରିଗାଲାଜେ ତାର୍ ପିଟିର୍ ବାଇ ତାର୍ ବଡ଼କେ ସଙ୍ଗଇଲା । ୨୬ ମାତର୍ ବଡ଼ମଜିଆ, ମଜିଆ, ସାନ୍‌ମଜିଆ ଏକ୍ତି ଅଇକରି ସାରାସାରି ସାନ୍‌ର୍ ଦସା ମିସା ଏକ୍ତି ଅଇଲା । ୨୭ ସାରାସାରି ପଚେ ସେ ମାଇଜି ମିସା ମରିଗାଲା । ୨୮ ଜେବେ ମଲା ଲକ୍‌ମନ୍‌ର୍ ଉଟ୍‌ବା ଦିନ୍ ଆଇସି, ତେବେ ଏ ମାଇଜି କାର୍ ମାଇଜି ଅଇସି ? ସବୁ ଲକ୍‌ସେ ତାକେ ସଙ୍ଗଇ ରଇଲା ।”

୨୯ ଜିସୁ ସେମନ୍‌କେ କଇଲା, “ତମେ କେତେକ୍ ବୁଲ୍ ବିସଇ ବାବ୍‌ବା ଲକ୍‌ମନ୍ ! ଦରମ୍ ସାସ୍‌ତରେ ପର୍‌ମେସରର୍ ବପୁ ବିସଇ ସମାନ୍ ଇସାବେ ଚିନ୍‌ତା କରାସ୍ ନାଇଜେ, ତମେ ଏ କାତା ପାଚାରଲାସୁନି ।” ୩୦ ମରିକରି ଉଟ୍‌ଲା ପଚେ, ମଲା ଲକ୍‌ମନ୍ ସରଗର୍ ଦୁଡ଼ମନ୍‌ର୍ ପାରା ଅଇଜିବାଇ । ସେମନ୍ ଆରି ବିବା ନ ଅଅଡ଼ କି ନ କରଡ଼ । ୩୧ ମଲା ଲକ୍‌ମନ୍ ଆରି ତରେକ୍ ଉଟ୍‌ବା ବିସଇ, ପରମେସର ଜନ୍‌ଟା କଇଲା ଆଚେ, ତମେ କାଇ ସାସ୍‌ତରେ କେବେ ପତାସ୍ ନାଇ କି ? ୩୨ ପର୍‌ମେସର୍ କଇଲା ଆଚେ “ଆମେ ଅବରାଆମର୍, ଇସାକର୍ ଆରି ଜାକୁବର୍ ମାପୁରୁ ।”

“ପର୍‌ମେସର୍ ତା ଜିବନ୍ ରଇଲା ଲକ୍‌ମନ୍‌ର୍ ମାପୁରୁ, ମଲା ଲକ୍‌ମନ୍‌ର୍ ଅଇନାପାରେ ।”

୩୩ ଲକ୍‌ମନ୍ ଜିସୁର ସିକାଇବାଟା ସୁନିକରି କାବାଅଇଗାଲା ।

ମୁକିଅ ଆଦେସ୍  
(ମାର୍କ ୧୨:୨୮-୩୪; ଲୁକ୍ ୧୦:୨୫-୨୮)

୩୪ ଜିସୁ ସାଦୁକିମନ୍‌କେ ଚୁପ୍‌କରାଇ ରଇବାଟା ଜାନିକରି ପାରୁସିମନ୍ ସବୁଲକ୍ ଗଟେକ୍ ଅଇ ତାର୍ ଲଗେ ଆଇଲା । ୩୫ ଆରି ସେମନ୍‌ର୍ ବିତରେଅନି ଗଟେକ୍ ନିୟମ୍ ସିକାଇବା ଦରମ୍ ଗୁରୁ ଜିସୁକେ ପାନ୍ଦେ ପାକାଇବାକେ ଗଟେକ୍ ପର୍‌ସନ୍ ପାଚାରଲା । ୩୬ “ଏ ଗୁରୁ ମସାର୍ ଦରମ୍ ସାସ୍‌ତରର୍ ନିୟମ୍ ଇସାବେ ସବୁଟାନେଅନି କନ୍ ଆଦେସ୍ ମୁକିଅ ?”

୩୭ ଜିସୁ ତାକେ କଇଲା, “ତମର୍ ମାପୁରୁ, ପରମେସରକେ ପୁରାପୁରୁନ୍ ମନ୍‌ଦେଇ, ପୁରାପୁରୁନ୍ ଜିବନ୍ ଦେଇ, ପୁରାପୁରୁନ୍ ଚିନ୍ତା ସଙ୍ଗ ତାକେ ମାନା ଆରି ଆଲାଦ୍ କରା । ୩୮ ଏଟା ଅଇଲାନି ସବୁଟାନେଅନି ଆଗତୁ ଆରି ମୁକିଅ ଆଦେସ୍ ।” ୩୯ ତାର୍ ପଚର୍ ମୁକିଅ ଆଦେସ୍ ଅଇଲାନି, ତମର୍ ଲଗର୍ ପାକର୍ ଗରର୍ ଲକ୍‌ମନ୍‌କେ ନିଜ୍‌କେ ଆଲାଦ୍ କଲା ପାରା ଆଲାଦ୍ କରା । ୪୦ \*ଏ ଦୁଇଟା ଆଦେସ୍ ଆକା ମସା କରିରଇବା ସବୁ ରିତିନିତି ଆରି ବବିସଡ଼ବକ୍‌ତାମନ୍‌ର୍ ସିକିଆ ଜାନାଇଲାନି ।

କିରିସ୍ତ ଆକା ମସିଅ

(ମାର୍କ ୧୨:୩୫-୩୬; ଲୁକ୍ ୨୦:୪୧-୪୪)

୪୧ କେତେଟା ପାରୁସିମନ୍ ଜିସୁର ଲଗେ ରଇଲା ବେଲେ, ଜିସୁ ସେମନ୍‌କେ ପାଚାରୁଲା । ୪୨ “କିରିସ୍ତ ମସିଅର୍ ବିସଇ, ତମେ କାଇଟା ବାଦ୍‌ଲାସ୍‌ନି ? ସେ କାର୍ ପଅ ?”

ସେମନ୍ କଇଲାଇ, “ସେ ଦାଉଦର୍ ପଅ ।”

୪୩ ଜିସୁ ପାଚାରୁଲା, “ସେନ୍ତାନ୍ ଆଲେ ଦାଉଦ୍ ମସିଅକେ ‘ମର୍ ମାପୁରୁ !’ ବଲି କାଇକେ ଜାନାଇ ଆଟେ ?” କାଇକେବଇଲେ ଆଡ଼ମା ଚାଲ୍‌ନା ଦେଲାକେ, ସେ ଲେକିଆଟେ,

୪୪ ପର୍ମେସର୍ ମର୍ ମାପୁରୁକେ କଇଲା,

“ଆମେ ତର୍ ସତ୍‌ରୁମନ୍‌କେ ତମର୍ ପାଦ୍ ତଲେ ନ ଆନ୍‌ବା ଜାକ

‘ତୁଇ ମର୍ ଉଜା ବାଟେ ବସି ରଅ ।’

୪୫ “ଜଦି ଦାଉଦ୍ ମସିଅକେ ‘ମର୍ ମାପୁରୁ’ ବଲି ନାମି ଆଟେ, ତେବେ ମସିଅ କେନ୍ତି ତାର୍ ପଅ ଅଇପାରସି ?”

୪୬ ଜିସୁକେ ଇଡିର୍ ଉତର କେ ମିସା ଦେଇ ନାପାରୁଲାଇ । ସେ ଦିନେଅନି, ଆରି ତାକେ କେ ମିସା କାଇ ପର୍‌ସନ୍ ପାଚାର୍‌ବାକେ ସାଆସ୍ କରଡ୍ ନାଇ ।

## ୨୩

ପାରୁସି ଆରି ଦରମ୍ ଗୁରୁମନର୍ ବିରୁଦେ ଜାଗରଡ୍ କରାଇବାଟା

(ମାର୍କ ୧୨:୩୮-୩୯; ଲୁକ୍ ୧୧:୪୩-୪୬; ୨୦:୪୫-୪୬)

୧ ଜିସୁ ସିସମନ୍‌କେ ଆରି ତେଇ ରୁଣ୍ଡି ରଇବା ଲକ୍‌ମନ୍‌କେ କଇଲା, ୨ “ପାରୁସି ଆରି ଦରମ୍ ଗୁରୁମନ୍‌କେ ମସାର୍ ନିୟମର୍ ଅରଡ୍ ବୁଜାଇ ଦେବାର୍ ଅଦିକାର୍ ଆଟେ । ୩ ସେମନ୍ ଜାଇଟା କର୍‌ବାକେ କଇଲାଇନି, ସେଟା କରା, ମାତର୍ ସେମନ୍ ଜାଇ ଜାଇଟା କଲାଇନି, ସେଟା ଦେକି ସେନ୍ତାରି କରାନାଇ । କାଇକେ ବଇଲେ ସେମନ୍ ନିଜେ ଜନ୍ ସିକିଆ ଦେବାଇ, ତାର୍ ଉଲ୍‌ଟା କର୍‌ବାଇ । ୪ ସେମନ୍ ତାକର୍ ସିକିଆ ସବୁ ଲକ୍‌ମନର୍ ପିଟି ଉପରେ ବେସି ବଜ୍ ପାରା ଲାଦିଦେବାଇ । ମାତର୍ ସେ ସବୁ ବଜର୍ ନିୟମ୍, ଚିନି ଆଙ୍ଗଟିତେଇ ଉଟାଇବା ଏଡକି ମିସା ସାଇଜ ନ କରଡ୍ । ୫ \*ସେମନ୍ ଲକ୍‌କେ ଦେକାଇଅଇବାକେ ସବୁ କାମ୍ କର୍‌ବାଇ । ସାସତର୍ ପଦ୍ ଲେକାଅଇଲା କେତେ କେତେ ବଡ୍ ବଡ୍ ତଅଁରାମନ୍ କାପାଲେ ଆରି ପଡିଆଇ ବାନ୍ଦିଅଇ ଆଟଡ୍ । ଆରି ଦେକା, ସେମନର୍ ବସତରର୍ ଜାଲି କେତେକ୍ ତେଜ୍ । ୬ ସେମନ୍ ବଜିମନ୍‌କେ ମୁକିଅ ଜାଗାଇ ଆରି ପାର୍‌ତନା ଗରେ ବାଟିଅଇରଇଲା ଜାଗା ଅଦିକାର୍ କର୍‌ବାକେ ମନ୍ କର୍‌ବାଇ । ୭ ଆଟେ ବାଟେ ଆରି ଦୁକାନେ ଲକ୍‌ମନ୍ ସେମନ୍‌କେ ମାନିକରି ଜୁଆର୍ କରଡ୍ ଆରି ‘ଗୁରୁ’ ବଲି ତାକଡ୍, ଏନ୍ତାରି ସେମନ୍ ମନ୍ କର୍‌ବାଇ । ୮ ମାତର୍ ତମ୍‌କେ କେ ଗୁରୁ ବଲି ତାକ୍‌ବାର୍ ଦରକାର୍ ନାଇ । କାଇକେ ବଇଲେ ସବୁ ଲକ୍ ନିଜର୍ ନିଜର୍ ବିଡରେ ବାଇ, ଆରି ତମର୍ ଗୁରୁ ଗଟେକ୍ ସେ । ୯ ଆରି ଜଗତେ ତମେ କାକେ ବାବା ବଲି ତାକ୍‌ବାକେ ଦରକାର୍ ନାଇ । କାଇକେ ବଇଲେ ତମର୍ ଗଟେକ୍‌ସେ ବାବା, ସେ ସର୍‌ଗେ ଆଟେ । ୧୦ ତମ୍‌କେ ନେତା ବଲି ମିସା କେ ନ ତାକଡ୍, କାଇକେ ବଇଲେ ଗଟେକ୍ ସେ ନେତା, ସେ ଅଇଲାନି ମାପୁରୁ ମସିଅ । ୧୧ \*ତମର୍ ବିଡରେ ଜେ ସବୁର୍ ଚାନେଅନି ମୁକିଅ, ସେ ତମର୍ ସେବା କର । ୧୨ \*ଜେ ନିଜ୍‌କେ ବଡ୍ ବଲି କଇସି, ତାକେ ସାନ୍ କରାଅଇସି ଆରି ଜେ ନିଜ୍‌କେ ସାନ୍ ବଲି ବାଦ୍‌ସି, ତାକେ ବଡ୍ କରାଅଇସି ।”

\* ୨୩:୫ ୨୩:୫ ମାଡ଼ିଉ ୬:୧

\* ୨୩:୧୧ ୨୩:୧୧ ମାଡ଼ିଉ ୨୦:୨୬,୨୭; ମାର୍କ ୯:୩୫; ୧୦:୪୩,୪୪; ଲୁକ୍

୨୨:୨୬ \* ୨୩:୧୨ ୨୩:୧୨ ଲୁକ୍ ୧୪:୧୧; ୧୮:୧୪

ଜିସୁ ଟକାବଣ୍ଡା ଗୁରୁମନକେ ନିନ୍ଦା କଲା  
(ମାର୍କ ୧୨:୪୦; ଲୁକ୍ ୧୧:୩୯-୪୨, ୪୪-୫୨, ୨୦:୪୭)

୧୩ “ଅଇରେ ଦରମ୍ ଗୁରୁମନ ଆରି ପାରୁସିମନ ! ସେସବେଲେ ତମର ଦସା କେତେ ଅଦିକ୍ ଅଇସି ! ଏଇ ଟକାବଣ୍ଡା ଦଲ୍, ସରଗ୍ ରାଇଜେ କେଟ୍‌ବା ଦୁଆର୍ ତମେ ଡାବିଦେଇଆଟାସ୍ ! ନିଜେ ତେଇ କେଟାସ୍ ନାଇ ଆରି ଜନ୍‌ଲକ୍‌ମନ ତେଇ କେଟ୍‌ବାକେ ମନ୍ କଲାଇନି, ସେମନ୍‌କେ ବାଟ୍ ଚାଡାସ୍ ନାଇ ।”

୧୪ “ଏ କୁଟିଆଲ୍ ଦରମ୍‌ଗୁରୁମନ ଆରି ପାରୁସିମନ ! ତମର ଇନସ୍‌ତା କେତେକ୍ କାକୁରତି ଅଇସି । ତମେ ଚାଲାକି ଅଇକରି ଜବର୍ ପର୍ ପାରତନା କରସା । ମାତର୍ ରାଣ୍ଡି ମାଇଜିମନର୍ ଗର୍ମନ ସବୁ ଦାପ୍‌ରେ ଗିଲିଦେଇସା । ତେବେ ତମ୍‌କେ ଅଦିକ୍ ଡଣ୍ଡ ଦିଆଅଇସି ।”

୧୫ ଏ ଟକାବଣ୍ଡା ଦରମ୍‌ଗୁରୁମନ ଆରି ପାରୁସିମନ ! ତମେ କେତେ ଇନସ୍‌ତା ଅଇ କାକୁରତି ଅଇସା । ସମ୍‌ଦୁର୍ ଲଜି ବିନ୍ ବିନ୍ ଦେସ୍‌ମନ୍‌କେ ଜାଇ ଗଟେକ୍ ଲକ୍‌କେ ତମର୍ ଦରମ୍‌ଟାନେ ମିସାଇବାକେ କଜି ବୁଲ୍‌ଲାସିନି । ମାତର୍ ସେନ୍ତାର୍ ଗଟେକ୍ ଲକ୍‌କେ ମିଲାଇଲେ, ତାକେ ତମର୍ ଟାନେଅନି ଅଦିକ୍, ନରକର୍ ଡଣ୍ଡ ପାଇବାକେ ବାଟ୍‌ଲାସିନି ।

୧୬ ଏଇ ବାଟ୍ ଦେକାଉ କାଣାମନ୍ ! ତମର୍ ଦସା କେତେକ୍ ଇନସ୍‌ତା ଅଇସି । କେ ମନ୍‌ରର୍ ନାଉଁ ଦାରି ପର୍‌ମାନ୍ କଲେ, ସେଟା ସେମନ୍ ମାନ୍‌ବାର୍ ବାଦିଅ ନାଇ, ମାତର୍ ମନ୍‌ରେ ରଇଲା ସୁନାର୍ ନାଉଁ ଦାରି ଜେ ପର୍‌ମାନ୍ କରସି, ତାକେ ସେଟା ମାନ୍‌ବାକେ ପଡ଼ସି ବଲି ତମେ ସିକାଇତେ ରଇସା । ୧୭ ଏଇ ବୁଦି ନ ରଇବା କାଣାମନ୍ ! ସୁନା ବଡ଼, କି ସୁନାକେ ସୁକଲ୍ କରତେ ରଇବା ମନ୍‌ର ବଡ଼ ? ୧୮ ଗଟେକ୍ ଲକ୍ ବେଦିର୍ ନାଉଁ ଦାରି ପର୍‌ମାନ୍ କଲେ ସେ ସେଟା ମାନ୍‌ବାର୍ ଆକା ଆତେ ବଲି ନଏଁ, ମାତର୍ ବେଦି ଉପ୍‌ରେ ସଙ୍ଗଇ ରଇବା ମାପୁରୁକେ ଦେଲାଟା ନାଉଁଦାରି ପର୍‌ମାନ୍ କଲେ, ସେଟା ମାନ୍‌ବାଟା ବଲି ତମେ ସିକାଇତେ ରଇସା । ୧୯ ତମେ କେତେବଡ଼ କାଣାମନ୍ ! କନ୍‌ଟା ମୁକିଅ ? ମାପୁରୁକେ ଦେଲାଟା କି, ମାପୁରୁକେ ଦେଲାଟା ସୁକଲ୍ କରତେ ରଇବା ବେଦି ? ୨୦ ତେବର୍ ପାଇ କେ ମିସା ବେଦିର୍ ନାଉଁ ଦାରି ପର୍‌ମାନ୍ କଲେ, ସେ ବେଦି ଆରି ତାର୍ ଉପ୍‌ରେ ରଇବା ମାପୁରୁକେ ଦେଇ ରଇବା ସବୁ ଜିନିସ୍ ନାଉଁ ଦାରି ପର୍‌ମାନ୍ କରସି । ୨୧ କେ ମିସା ମନ୍‌ରର୍ ନାଉଁ ଦାରି ପର୍‌ମାନ୍ କଲେ, ସେ ମନ୍‌ର ଆରି ତେଇ ବାସା ଅଇରଇବା ପର୍‌ମେସରର୍ ନାଉଁ ଦାରି ପର୍‌ମାନ୍ କରସି ।

୨୨ ☆କେ ମିସା ସରଗର୍ ନାଉଁ ଦାରି ପର୍‌ମାନ୍ କଲେ, ସେ ପର୍‌ମେସରର୍ ବସ୍‌ବା ଜାଗା ଆରି ସେ ବସ୍‌ବା ଜାଗାଇ ବସି ରଇବା ପର୍‌ମେସରର୍ ନାଉଁ ଦାରି ପର୍‌ମାନ୍ କରସି ।

୨୩ ଏଇ କୁଟିଆଲ୍ ଦରମ୍‌ଗୁରୁମନ ଆରି ପାରୁସିମନ, ତମର୍ ଦସା କେତେ ଇନସ୍‌ତା ଆରି କାକୁରତି ଅଇସି ! ତମେ ପର୍‌ମେସରର୍ ପାଇ ବଲି ସାନ୍ ସାନ୍ ଜିନିସ୍ ଅଇଲେ ମିସା ଦସ୍‌ବାଗ୍ ଅନି ବାଗେକ୍ ଦାନ୍ କରସା, ମାତର୍ ନିଆଇ, ଦୟା, ବିସ୍‌ବାସ୍ ଏକ୍ତି ମୁକିଅ ମୁକିଅ ବିସଇର୍ ନିୟମର୍ ସିକିଆ ଏଲା କଲାସିନି । ପୁର୍‌ବର୍ ମୁକିଅ ବିସଇ ଏଲା ନ କରି, ଏ ସବୁଜାକ ଆଗ୍‌ତୁଅନିସେ ଅବିଆସ୍ କରବାର୍ ରଇଲା ।

୨୪ ଏଇ ବାଟ୍‌ଦେକାଇବା କାଣା ଲକ୍‌ମନ୍ ! ତମେ କାଇବାବେଲେ କେତେବଲ୍ ତେଇ କାଇଆଲେ କିଡା ଅଦି ରଇସି ବଲି ସେଟା ଚାନି ପାକାଇତେ ରଇସା । ମାତର୍ ତମେ ଗଟେକ୍ ଗଟେକ୍ ବଡ଼ ପସୁକେ ମିସା ଗିଲି କାଇପାକାଇସା ।

୨୫ ସାରାସାରି ଦିନେ ତମେ କେତେ କାକୁରୁତି ଅଇସା, ଏଇ କୁଟିଆଲ୍ ଦରମ୍ ଗୁରୁ ଆରି ପାରୁସିମନ୍ ! ତମେ ଉପରେ ଉପରେ ତାଲାଗିନା ମାଜି ପରିଚଲ୍ କରଇଇସା, ମାତର୍ ସେ ବିତ୍ତରେ ଛାଁସା ଆରି ନିଜର୍ ବିସଇ ଚିନ୍ତା କରବାଟା ବରୁତି ଅଇଇଇସି ।

୨୬ ଏଇ କାଣା ପାରୁସିମନ୍ ! ମୁତାର୍ ବିତ୍ତରେ ରଇବାଟା ଆଗତୁ ପରିଚଲ୍ କରା, ସେନ୍ତାର୍ କଲେ ଉପରୁଟା ମିସା ପରିଚଲ୍ ଅଇଇଇସି ।

୨୭ ଏଇ ଦରମ୍ ଗୁରୁମନ୍ ଆରି ପାରୁସିମନ୍ ! ତମକେ କେତେ ବଡ଼ ତଣ୍ଡ ମିଲ୍ଲସି । ଏଇ କୁଟିଆଲ୍ମନ୍ ! ତମେ ଉପରେ ଉପରେ ବୁନ୍ଦସଙ୍ଗ୍ ସାରଇ ରଇବା ଗୁଡାମ୍ ପାରା । ଏଟାମନ୍ ଉପରେ ସୁନ୍ଦର୍ ଡିସିସି, ମାତର୍ ବିତ୍ତରେ କୁଇଲ୍ଲା ମଡ଼ ଆରି ଆଡ଼ଗଡ଼ ବରୁତି ଅଇଇଇସି ।

୨୮ ସେନ୍ତାରିସେ ତମେ ମିସା ବାଇରେ ଲକ୍ମନର୍ ଦେକ୍ତେ ଦରମ୍ ପାରା ଡିସ୍ତେରଇସା, ମାତର୍ ତମର୍ ବିତ୍ତରେ କୁଟ୍ କାତା, ଆଁକାର୍, ଆରି ପାପ୍ ବରୁତି ଅଇଆଟେ ।

ଜିସୁ ସେମନର୍ ତଣ୍ଡ ପାଇବାଟା ଜାନାଇଲ୍ଲା  
(ଲୁକ୍ ୧୧:୪୭-୫୧)

୨୯ ଏଇ ଦରମ୍ଗୁରୁମନ୍ ଆରି ପାରୁସିମନ୍ ! ଏ ଟକାବଣ୍ଡା କରୁମନ୍ ! ତମର୍ ପାଇ ଏଟା କେତେକ୍ ଇନସ୍ତାର୍ ବିସଇ । ତମେ ବବିସତ୍ତବକ୍ତାମନର୍ ପାଇ ସୁନ୍ଦର୍ ସୁନ୍ଦର୍ ସମାଦି ତିଆର୍ କଲାସ୍ନି ଆରି ଦରମ୍ ଲକ୍ମନକେ ସବୁ ଦିନ୍ ଏତାଇବାକେ ନାଉଁ ଲେକି ତସାଇଲାସ୍ନି । ୩୦ ଆରି ତମେସେ କଇଲାସ୍ନି ଜଦି ତମର୍ ଆନିଦାଦିମନର୍ ବେଲେ, ତମେ ରଇତାସ୍ ବଇଲେ, ସେମନର୍ ପାରା ଚଲାଚଲ୍ତି ନ କରତାସ୍, କି ବବିସତ୍ତବକ୍ତାମନକେ ନ ମରାଇତାସ୍ । ୩୧ ଏ କାତା କଇଲାର୍ ପାଇ ତମେ ବବିସତ୍ତବକ୍ତାମନକେ ମରାଉମନର୍ ନାତି ତିଡିର୍ ଲକ୍ ବଲି ଏବେ ମାନଲାସ୍ନି ।

୩୨ ତେବେ ତମେ ଆଗତୁ ଉଆ । ତମର୍ ଆନିଦାଦିମନ୍ କରଇଇବା କରତା କାମ୍ ପୁରାପୁରୁନ୍ ସାରାଇ ଦିଆସ୍ ।

୩୩ ଏଇ ସାଁପମନ୍ ! ବିସ୍ତରଇବା ସାଁପର୍ କୁଟୁମର୍ ପାରା ଲକ୍ମନ, ତମେ କେନ୍ତ୍ର ନରକର୍ ତଣ୍ଡେଅନି ରକିଆ ମିଲ୍ଲସି ବଲି ଆସା କଲାସ୍ନି ? ୩୪ ସେଟାର୍ ପାଇ ମୁଇ ତମକେ କଇଲିନି, ତମର୍ ଲଗେ ବବିସତ୍ତବକ୍ତାମନକେ, ସିକାଇବା ଗୁରୁମନକେ ଆରି ଗିଆନ୍ ରଇବା ବଡ଼ ଲକ୍ମନକେ ମୁଇ ପାଟାଇବି । ତାକର୍ ବିତ୍ତରେଅନି ତମେ କେତେ ଲକ୍ମକେ ମରାଇସା, କେତେ ଲକ୍ମକେ କୁରସେ ଚଗାଇସା, ଆରି ବାକି ଲକ୍ମନକେ ପାରତନା ଗରେଅନି କରତା ସଙ୍ଗ୍ ମାରି ମାରି ଗଟେକ୍ ନଅରେ ଅନି ଆରିଗଟେକ୍ ନଅରେ କେଦି ଦେଇସା । ୩୫ ଜେନ୍ତ୍ରକି ଏବଲର୍ ବେଲେଅନି ଆରାମ୍ କରି ବରୁକିଆର୍ ପ ଜିକରିୟର୍ ଜାକ, ଜାକେ କି ତମେ ମନ୍ଦିର୍ ଆରି ବେଦିର୍ ମଜାଇ ମରାଇରଇଲାସ୍, ଦସ୍ ନ କରିରଇବା ସବୁ ଲକ୍ମନକେ ମରାଇଲା ପାଇ ତମେ ଦସିଅଇ ତଣ୍ଡ ପାଇସା । ୩୬ ମୁଇ ସତ୍ତ କଇଲିନି, ଏ ସବୁ ଲକ୍ମନକେ ମରାଇଲା ପାଇ ଏ ଜୁଗର୍ ଲକ୍ମନ ତଣ୍ଡ ପାଇବାଇ ।

ଜିରୁସାଲାମର୍ ପାଇ ଜିସୁର୍ ଆଲାଦ୍  
(ଲୁକ୍ ୧୩:୩୪-୩୫)

୩୭ ଏ ଜିରୁସାଲାମ୍, ଏ ଜିରୁସାଲାମ୍, ତୁଇ ବବିସତ୍ତବକ୍ତାମନକେ ମରାଇଲୁସ୍ନି ଆରି ପର୍ତମେସର୍ ପାଟାଇରଇଲା କବର୍ ଆନୁମନକେ ପାକ୍ନା ମାରି ମରାଇଲୁସ୍ନି । ମାଇ କୁକ୍ତା ତାର୍ ଚିଆଁମନକେ ତେନା ବିତ୍ତରେ ଦାରି ଅଲଣ୍ଡିଲାପାରା, ତର୍



ଲକ୍ଷ୍ମୀଙ୍କୁ ମୁଁ ପାଟାଲି ରକିଆ କରୁବାକେ କେତେ କେତେ ତରୁ ଚେଷ୍ଟା କଲି । ମାତରୁ ମକେ ସେନ୍ତାରି କରୁବାକେ ଦେଉୟ ନାଇ । ୩୮ ସେଟାରୁ ପାଇ ତରୁ ମନ୍ଦିର ବାଜିରୁଜି ତିନ୍ଦିନ୍ ଅଇଜାଇସି । ୩୯ ମାତରୁ ମୁଁ କଇଲା କାତା ରଇସି, ମାପରୁରୁ ନାଉଁ ଦାରି ଜେ ଆଇଲାନି, ସେ କେତେ କରମରୁ ଲକ୍ଷ୍ମୀ ବଲି ଏଟା ଜେବେ ଜାକ ନ କୁଆସ, ଆଜିଅନି ଆରି କେବେ ମକେ ଦେକି ନାପାରାସ ।

### ୨୪

ମନ୍ଦିର କୁରୁପନାସ ଅଇବା ବିସଇ ଜାନାଇବାଟା  
(ମାରକ ୧୩:୧-୨; ଲୁକ୍ ୨୧:୫-୬)

୧ ଜିସୁ ମନ୍ଦିରେଅନି ବାରଇ ଇଣ୍ଡିଜାଇତେ ରଇବାବେଲେ ସିସ୍ତମନ୍ ମନ୍ଦିର ପିଣ୍ଡା ଦୁଆରେ ରଇବା ବଡ଼ ବଡ଼ ପାକନା ବାଟେ ଦେକାଇଲା । ୨ ଜିସୁ କଇଲା, “ଏବେ ସିନା ଏ ସବୁ ଦେକଲ୍ୟାସିନି । ମୁଁ ତମକେ ସତ୍ କଇଲିନି ଏ ମନ୍ଦିରରୁ ଗଟେକ୍ ମିସା ପାକନା ତାରୁ ଜାଗାଇ ନ ରଏ । ସବୁଜାକ ଅଦ୍ରି ବିଲିଜାଇସି ।”

ଦୁକ୍ ଆରି କସ୍ତ  
(ମାରକ ୧୩:୩-୧୩; ଲୁକ୍ ୨୧:୭-୧୯)

୩ ଜିସୁ ଜିତ୍ ନାଉଁରୁ ତଙ୍ଗରୁ ଉପରେ ବସିରଇଲା ବେଲେ, ତେଇ କେ ନ ରଇଲା ବେଲେ, ସିସ୍ତମନ୍ ଆସି ତାକେ ପାଚାରୁଲା, “ଏ ସବୁଜାକ କେବକେ ଅଇସି ଆମକେ କୁଆ କାଇ ଗଟ୍ଟନା ଗଟ୍ଟଲେ ଆମେ ଜାନିପାରୁବୁ ଜେ ତମରୁ ଆଇବା ବେଲା ଅଇଲାନି ଆରି ଏ ଜୁଗ୍ ସେସ୍ ଅଇସି ବଲି ?”

। ୪ ଜିସୁ କଇଲା, “ଜାଗରତ୍ ଅଇକରି ରୁଆ, ଜେନ୍ତୁକି କେ ମିସା ତମକେ ନ ନାତାଅତ୍ । ୫ କେତେ କେତେ ଲକ୍ଷ୍ମୀନ୍ ମରୁ ନାଉଁ ଦାରି ଆସି କଇବାଇ, ‘ମୁଁ ଆକା କିରିସ୍ତର୍ ମସିଅ ।’ ସେମନ୍ ଏନ୍ତାରୁ କଇ କେତେ କେତେ ଲକ୍ଷ୍ମୀଙ୍କୁ ନାତାଇବାଇ । ୬ ତମରୁ ଲଗେ ଅଇତେ ରଇବା ଜୁଇଦରୁ କିଲ୍ବିଲ୍ ଅଇବାଟା ସୁନ୍ସା ଆରି ଦୁରିକେ ଅନି ଅଇତେ ରଇବା ଜୁଇଦରୁ କବରୁ ଜାନସା । ମାତରୁ ତରାନାଇ, ବାଇଦରେ ଏନ୍ତି ଗଟ୍ଟନା ଅଇସି । ମାତରୁ ଏଟାରୁ ଅରତ୍ ନଏଁ ଜେ, ଜୁଗ୍କାଲ୍ କେଟିଗାଲା । ୭ ଦେସ୍ ଦେସ୍ ବିଡ଼ରେ ଜୁଇଦ୍ ଅଇସି, ଗଟେକ୍ ରାଇଜ୍ ଆରି ଗଟେକ୍ ରାଇଜ୍ ଉପରେ ଜୁଇଦ୍ କରସି । ସବୁ ବାଟେ ମରୁତି ଆରି ଦରୁତନି ରୁଲ୍ବୁଲ୍ସି । ୮ ମାତରୁ ଏଟାମନ୍ ସବୁ ମାଇଜିମନ୍ ଆଡ଼ଗତ୍ ସୁକ୍ ଅଇବା ବେଲେ ପରୁତମ୍ ପରୁତମ୍ ଅଇବା ଦୁକାସୁକା ପାରା । ୯ \*ତମେ ଦାରାଇ ଅଇ ମାଡ଼ କାଇବାକେ ଆରି ମରନରୁ ତଣ୍ଡ ପାଇବାକେ ସର୍ପି ଅଇସା । ତମେ ମକେ ବିସ୍ତାସ୍ କଲାରୁ ପାଇ ବଲି ସବୁ ଲକ୍ଷ୍ମୀ ଗିନ୍ କରୁବାଇ । ୧୦ ସେଡ଼କିବେଲେ କେତେ କେତେ ଲକ୍ଷ୍ମୀ ତାକରୁ ବିସ୍ତାସ୍ ଆରାଇବାଇ, ତାକରୁ ତାକରୁ ବିଡ଼ରେ ଗିନ୍ ଅଇକରି ତାକରୁ ତାକରୁ ବିଡ଼ରେ ବିସ୍ତାସେ ବିସ୍ ଦିଆ ଦିଇ ଅଇବାଇ । ୧୧ ସେବେଲେ କେତେ କେତେକ୍ ଟକାବଣ୍ଡା ବବିସତ୍ ବକ୍ତା ଆସିକରି ଲକ୍ଷ୍ମୀଙ୍କୁ ନାତାଇବାଇ । ୧୨ ଏନ୍ତାରି ଅଇ ପାପ୍ ଅଦିକ୍ ଅଦିକ୍ ଅଇସି ଆରି ପରୁମେସ୍ତର୍ ପାଇରଇବା ଲକ୍ଷ୍ମୀମନ୍ ଆଲାଦ୍ ସିତଲ୍ ଅଇଜାଇସି । ୧୩ \*ମାତରୁ ଜେ ସାରାସାରି ଜାକ ମୁରଟିକରି ରଇସି, ସେ ମୁକ୍ତି ପାଇସି । ୧୪ ରାଇଜ୍ ସବୁ ବାସାରୁ ଲକ୍ଷ୍ମୀମନ୍ ଲଗେ, ମାପରୁରୁ ସାକିଦେବାକେ ଦୁନିଆରୁ ଗୁଲାଇବାଟେ ତାରୁ କାତା ସୁନାଇବାଇ । ତାରପଟେ ସେ ଜୁଗ୍ ସାରସି ।”

ସାରାସାରି ଦିନରୁ କସ୍ତ  
(ମାରକ ୧୩:୧୪-୨୩; ଲୁକ୍ ୨୧:୨୦-୨୪)

\* ୨୪:୯ ୨୪:୯ ମାଡ଼ିଭ ୧୦:୨୨ \* ୨୪:୧୩ ୨୪:୧୩ ମାଡ଼ିଭ ୧୦:୨୨

୧୫ ଦାନିଏଲ୍ ବବିସତ୍ତ୍ୱବକ୍ତା ଟିକି ନିକି ଇସାବେ ଲେକିରଇବା ସେ ବାୟାବିକଲର୍ ଦିନ୍ ତମେ ଆରି ତରେକ୍ ଦେକ୍ସା । ସେଟା ସୁକଲ୍ ଜାଗାକେ ଅସୁକଲ୍ କରିଦେଇସି । ଇଡିର୍ ଅରଡ୍ କାଜାଟା, ପଡ୍ଲା ଲକ୍ ବୁଜା । ୧୬ ସେବେଲେ ଜନ୍ ଲକ୍ମନ୍ ଜିଉଦା ରାଇଜେ ରଇବାଇ, ସେମନ୍ ତଙ୍ଗରେ ପାଲାଅଡ୍ । ୧୭ \*ଜନ୍ ଲକ୍ମନ୍ ଚାଉନି ଉପ୍ରେ ରଇବାଇ, ସେମନ୍ ଗର୍ବିଡ୍ରେ ଜିନିସ୍ ପତର୍ ନେବାକେ ତଲେ ଆସି ତୁଚାଇ ତୁଚାଇ ବେଲା ନ ଗତାଅଡ୍ । ୧୮ ଜନ୍ ଲକ୍ମନ୍ ପଦାଇ ଜାଇତେ ରଇବାଇ, ସେମନ୍ ତାକର୍ ଲୁଗା ପଟିଆ ନେବାକେ ଗରେ ନ ବାଉଡଡ୍ । ୧୯ ସେଡ୍କିବେଲେ ଗାଗ୍ତେ ରଇବା ଫାଇଜିମନ୍ ଆରି ପିଲାକେ ଦୁଦ୍ କୁଆଇତେ ରଇବା ମାମନର୍ ଦସା କେତେ ଇନସ୍ତା ଅଇସି । ୨୦ ଏ ସବୁ ଗର୍ନା ସିଡ୍ ଦିନେ ନ ଅ । ସେଟାପାଇ ପର୍ମେସର୍କେ ପାର୍ତନା କରତେ ରୁଆ, ଜେନ୍ତାରି କି ସିଡ୍ମାସେ ନଇଲେ ବିସ୍ତ୍ରାମ୍ବାରେ ତମ୍ବେ ପାଲାଇବାକେ ନ ପଡେ । ୨୧ \*ସେବେଲେ ଜନ୍ ଦୁକ୍ ପାଇବାକେ ପଡ୍ସି, ଦୁନିଆ ତିଆର୍ ଅଇଲାଟାନେଅନି ଆଜିକେ ଜାକ ଅଇ ରଇବା ସବୁ କସ୍ତେଇଅନି ଅଦିକ୍ ଅଇଜାଇସି । ସେନ୍ତାରି ଦୁକ୍ ଆଗ୍ତେ ଆରି କେବେ ନ ଆସେ । ୨୨ ମାତର୍ ପର୍ମେସର୍ ଦୁକର୍ ବେଲା ଉନାକରି ଦେଇଆତେ । ସେନ୍ତାରି ନ କରିରଇଲେ କେ ମିସା ନ ରଇତାଇ । ମାତର୍ ସେ ବାଟିରଇବା ଲକ୍ମନ୍କେ ଜିଆଇବାପାଇ ପର୍ମେସର୍ ସେ ବେଲା ଉନାକରି ଦେଇଆତେ ।

୨୩ ସେବେଲେ କେ ଜଦି ତମ୍ବେ ଇଡି କିରିସ୍ତ ଆତେ ନଇଲେ ତେଇ ସେ ଆତେ ବଲି କଇସି, ତାକେ ବିସ୍ବାସ୍ କରା ନାଇ । ୨୪ କାଇକେ ବଇଲେ ମୁଇ ନିଜେ ମସିଅ କି ମୁଇ ନିଜେ ବବିସତ୍ତ୍ୱବକ୍ତା ବଲାଇଅଇତେ ରଇବା ଟକାବଣ୍ଡାକରୁମନ୍ ସେବେଲେ ଦେକାଇଅଇବାଇ । ସେମନ୍ କାବା ଅଇଜିବା କାମ୍ମନ୍ ଦେକାଇ ପର୍ମେସର୍ ବାଟି ରଇବା ଲକ୍ମନ୍କେ ମିସା ନାତାଇବାଇ । ୨୫ ଦେକା, ସେ ବେଲା ନ ଆଇବା, ଆଗ୍ତୁ ମୁଇ ତମ୍ବେ ଜାନାଇଦେଲିନି ।

୨୬ \*ଦେକା, ଜଦି ଲକ୍ମନ୍ ସେ ମରୁବାଲି ରଇବା ଜାଗାଇ ଆତେ ବଲି କଇବାଇ, ତମେ ତେଇ ଜାଆ ନାଇ । କି ସେମନ୍ ଇଡି ଦେକିଦେକା ସେ ଲୁଟିଆତେ ବଲି କଇବାଇ, ସେମନ୍କେ ବିସ୍ବାସ୍ କରା ନାଇ । ୨୭ ଉଦିଆନ୍ ଦିଗେଅନି ବୁଡ୍ଡି ଦିନ୍ ଜାକ ଜେନ୍ତାରି ବିଜ୍ଜି ମାରିକରି ଗୁଲାଇ ଆକାସ୍ ଉଜଲ୍ ଅଇସି, ସେନ୍ତାରି ଅଇକରିସେ ନର୍ପିଲା ମୁଇ ଆଇବି ।”

୨୮ \*ଜନ୍ତ୍ର ମତା ପିଙ୍ଗି ରଇବାଇ, ତେଇ ମଡ୍କାଉ ଗିଦ୍ମନ୍ ରୁଣ୍ଡିରଇବାଇ ।”

ନର୍ପିଲା ଆଇବାଟା  
(ମାର୍ଚ୍ଚ ୧୩:୨୪-୨୭; ଲୁକ୍ ୨୧:୨୫-୨୮)

୨୯ \*ସେ ଦୁକର୍ବେଲା ସାର୍ବା ବେଲେ, ବେଲ୍ ଜାଉଁଲି ଜାଇସି, ଜନ୍ ଆରି ଉଜଲ୍ ନ ତିସାଏ, ବାଦ୍ଲେଅନି ତାରାମନ୍ ଅଦର୍ବାଇ ଆରି ବାଦ୍ଲେ ଉଜଲ୍ ଦେବାଟାମନ୍ ସବୁ ବାଟ୍ ବାନା ଅଇଜିବାଇ । ୩୦ \*ତାର୍ ପତେ ନର୍ପିଲା ମୁଇ ବାଦ୍ଲେ ଆଇବାଟା ଦେକ୍ସା । ଆରି ଡାକ୍ପୁଟାଅଇ ପାନି ବାଦ୍ଲେ ବପୁ ସଙ୍ଗ୍ ଆଇବାଟା ଦେକି ଦର୍ତ୍ତନିର୍ ଲକ୍ମନ୍ କାନ୍ଦାବୁବା ଅଇଜିବାଇ । ୩୧ ବଡ୍ ମଇରି ବାଜ୍ସି । ଆରି ଗୁଲାଇ ସରଗର୍ ଗଟେକ୍ କନେ ଅନି ବିନ୍ ବିନ୍ କନେ ରଇବା ମର୍ ବାବା ବାଟି ରଇବା ଲକ୍ମନ୍କେ ଚୁଲିଆଇବାକେ ମୁନ୍ସୁସ୍ ପିଲା ମୁଇ ମର୍ ଦୁଡ୍ମନ୍କେ ପାଟାଇବି ।

\* ୨୪:୧୭ ୨୪:୧୭ ଲୁକ୍ ୧୭:୩୧    \* ୨୪:୨୧ ୨୪:୨୧ ପର୍କାସିତ ୭:୧୪    \* ୨୪:୨୭ ୨୪:୨୭ ଲୁକ୍ ୧୭:୨୩, ୨୪    \* ୨୪:୨୮ ୨୪:୨୮ ଲୁକ୍ ୧୭:୩୭    \* ୨୪:୨୯ ୨୪:୨୯ ପର୍କାସିତ ୭:୧୨; ପର୍କାସିତ ୭:୧୩  
\* ୨୪:୩୦ ୨୪:୩୦ ପର୍କାସିତ ୧:୭

ତୁମ୍ଭର ଗତେଅନି ସିକିଆ  
(ମାର୍ଚ୍ଚକ ୧୩:୨୮-୩୧; ଲୁକ୍ ୨୧:୨୯-୩୩)

୩୨ ତୁମ୍ଭର ଗତେଅନି ସିକା । ଜେଡେବେଲେ ତାର୍ କେନ୍ଦିଅନି ପତର୍ ପାଲୁଆନି କରସି, ଆରି କାଁଚାପଡ଼ିଆ ଡିସଲେ କାରାଦିନ୍ କେଟ୍ଲା ବଲି ତମେ ଜାନସା । ୩୩ ସମାନ ସେନ୍ତାରିସେ ଏ ସବୁ ଜାକ ଅଇବାଟା ଦେକ୍ଲେ, ସାରାସାରି ଦିନ୍କାଲ୍ ଆରାମ୍ ଅଇଲା ବଲି ତମେ ଜାନା ।

୩୪ “ ଏତାଇରୁଆ, ମୁଇ ସଡ଼ କଇଲିନି, ଏବେ ଜିବନ୍ ରଇଲା ଲକ୍ମନର୍ ବିଡ଼ରେଅନି ସବୁ ଲକ୍ ମରବା ଆଗ୍ତୁ, ଏସବୁ ବିସଇ ଗଟ୍ସି । ୩୫ ସରଗ୍ ଆରି ମର୍ପୁର୍ କୁରୁପ୍ନାସ୍ ଅଇଜାଇସି, ମାତର୍ ମର୍ ସବୁ ବାକିଅ କେବେ ମିର୍ ନ ଅଏ ।

ସେ ଆଇବା ବେଲା କେ ମିସା ନାଜାନଡ଼  
(ମାର୍ଚ୍ଚକ ୧୩:୩୨-୩୭; ଲୁକ୍ ୧୭:୨୭-୩୦, ୩୪-୩୬)

୩୬ “ସେ ଦିନ୍, ସେ ବେଲା କେବେ ଆଇସି, କେ କଇନାପାରଡ଼ । ପର୍ମେସରର୍ ପିଲା ମୁଇ ମିସା କି ସରଗର୍ ଦୁଡ଼ମନ୍ ମିସା ସେ କାତା ନାଜାନଡ଼, ବାବା ପର୍ମେସର୍ ଆକା ଜାନିଆଚେ । ୩୭ ନଅର୍ ବେଲେ ଜେନ୍ତାରି ଗଟିରଇଲା, ସମାନ ସେନ୍ତାରିସେ ନର୍ପିଲା ମୁଇ ଆଇବା ବେଲା ମିସା । ୩୮ ପୁର୍ତିବି ଉପ୍ରେ ପାନି ବରୁତି ଅଇବାବେଲେ ଅନି ନଅ ପାନିଜାଜେ ପୁର୍ବା ଜାକ, ଲକ୍ମନ୍ କାଆ ପିଇ ଅଇ ବିବା କାମେ ତେରେପେତେ ଅଇରଇଲାଇ । ୩୯ ପାନିଡେଇ ସେମନ୍ ବଅଁଲି ଜିବା ଜାକ, କାଇଟା ଅଇଲାନି, ଜାନି ନ ରଇଲାଇ । ନର୍ପିଲା ମୁଇ ଆଇବା ବେଲେ ସମାନ ସେନ୍ତାରି ଅଇସି । ୪୦ ସେ ବେଲାଇ ପଦାଇ ପାଇଟି କରତେ ରଇବା ଦୁଇ ଲକ୍ ବିଡ଼ରେ ଅନି ଗଟେକ୍ ଲକ୍ କେ ବାଟ୍ବାଇ ଆରି ଗଟେକ୍ ଲକ୍ କେ ଚାଡ଼ିଦେବାଇ । ୪୧ ଗର୍ଡେରଇବା ଦୁଇଟା ମାଇଜି ମନର୍ ବିଡ଼ରେ ଅନି ଗଟେକ୍ ଲକ୍ ବାଟି ଅଇସି ଆରି ଗଟେକ୍ ଲକ୍ ରଇଜାଇସି । ୪୨ ସେନ୍ତି ବଇଲେ ତମେ ଜାଗ୍ରେଡ଼ ଅଇ ରୁଆ, କାଇକେ ବଇଲେ ତମର୍ ମାପୁରୁ କେଡେବେଲା ଆଇସି, ତମେ ନାଜାନାସ୍ । ୪୩ \*କେଡେବଲ୍ ଚର୍ ପୁରସି ବଲି ଜାନିରଇଲେ, ଗର୍ ସାଉକାର୍ ଜାଗ୍ରେଡ଼ ରଇ ଚର୍କେ ଗରେ ପୁର୍ବାକେ ନ ଦେଏ । ୪୪ ତମେ ମିସା ସବୁବେଲେ ଜାଗ୍ରେଡ଼ ରଇକରି ତିଆର୍ ଅଇ ରୁଆ । କାଇକେ ବଇଲେ ତମେ ଜାଗି ନ ରଇଲା ବେଲେସେ ନର୍ପିଲା ମୁଇ ଉଟିଆଇବି ।

ବିସ୍ବାସ୍ ରଇବା ଆରି ବିସ୍ବାସ୍ ନ ରଇବା ଦାଙ୍ଗ୍ଡା  
(ଲୁକ୍ ୧୨:୪୧-୪୮)

୪୫ “ସେନ୍ତି ବଇଲେ କେ ତେବେ ନିମାନ୍ ଆରି ବୁଦି ରଇବା ଦାଙ୍ଗ୍ଡା ? ଜାର୍ ଉପ୍ରେ ସାଉକାର୍ ବିନ୍ ଦାଙ୍ଗ୍ଡାମନର୍ ଟିକ୍ ବେଲାଇ, କାଇବା କାଦି ଦେବା ଦାଇଡ଼ ଦେଇରଇସି । ୪୬ ସାଉକାର୍ ବାଉଡ଼ି ଆଇଲା ବେଲେ ସେ ଦାଙ୍ଗ୍ଡା ଜଦି ଟିକ୍ ସଙ୍ଗ୍ କାମ୍ କରିରଇସି ବଇଲେ, ତାର୍ କେଡେକ୍ ନିକ କରମ୍ ! ୪୭ ମୁଇ ସଡ଼ କଇଲିନି, ସେନ୍ତାରି ଦାଙ୍ଗ୍ଡାକେ ସାଉକାର୍ ଗଟେକ୍ ଦିନେ ତାର୍ ସବୁ ଦନ୍ ସିପତିର୍ ଦାଇଡ଼ ଦେଇ ଦେଇସି । ୪୮ ମାତର୍ ସେ ଦାଙ୍ଗ୍ଡା ଜଦି ‘ସାଉକାର୍ ନ ଆସେତା’ ବଲି ବାବ୍ସି ଆରି ୪୯ ବିନ୍ ଦାଙ୍ଗ୍ଡାମନ୍କେ ମାର୍ପିର୍ କରି ମଦୁଆମନର୍ ସଙ୍ଗ୍ କିଆପିଆ କରତେ ରଇସି, ୫୦ ସେ ଜାଗ୍ରେଡ଼ ନ ରଇଲା ବେଲେ ଆରି ଜନ୍ ବେଲାଇ ସେ ନାଜାନି ରଏ, ସେ ଦିନେ ଆରି ସେ ବେଲାଇସେ ସାଉକାର୍ ବାଉଡ଼ିଆଇସି । ୫୧ ତାକେ ସେଡ଼କି ବେଲେ କଣ୍ଟ୍ କଣ୍ଟ୍ କରି କାଟି ଦେଇସି । ସେ ନାଡାଉମନର୍ ଦସାର୍ ଡଣ୍ଟ୍ ପାଇସି । ଆରି ସାରାସାରି ଦାଁଡ଼ କାଡ଼ି ମାର୍ଚପ୍ ଅଇ କାନ୍ସି ।”

\* ୨୪:୪୩ ୨୪:୪୩ ଲୁକ୍ ୧୨:୩୯, ୪୦

# ୨୫

## ଦସ୍ୟା ଦାଙ୍ଗୁଡ଼ିମନର କାତା

୧ \* “ସେତିକିବେଳେ ସରଗ୍ ରାଇଜେ କେଟ୍‌ବା ବାଟ୍ ଏନ୍ତି ଅଇସି । ଦସ୍ୟା ଦାଙ୍ଗୁଡ଼ିମନ୍ ସବୁ ଲକ୍ ଗଟେକ୍ ଗଟେକ୍ ବଡ଼ି ଦାରି ବାଟେ, ବର୍ ଦାଙ୍ଗୁଡ଼ାକେ ଜାଗ୍‌ବାର୍ ଜାଇରଇଲା । ୨ ସେମନର୍ ବିଡ଼ରେଅନି ପାଁଟ୍‌ଟା ଦାଙ୍ଗୁଡ଼ି ଚତୁର୍ ରଇଲା, ଆରି ପାଁଟ୍‌ଟା ଦାଙ୍ଗୁଡ଼ି ବକୁଆ ରଇଲା । ୩ ବକୁଆ ରଇଲା ଦାଙ୍ଗୁଡ଼ିମନ୍ ଅଦିକ୍ ଚିକନ୍ ନେଇ ନ ରଇଲା । ୪ ମାତର୍ ଚତୁର୍ ରଇବା ଦାଙ୍ଗୁଡ଼ିମନ୍ ନିଜର୍ ନିଜର୍ ବଡ଼ି ଟାନେ ରଇବାଟା ଚାଡ଼ି ଆରି କାଁଟେ ମିସା ଚିକନ୍ ବର୍ଡ଼ି କରି ନେଇରଲା । ୫ ବର୍ ଦାଙ୍ଗୁଡ଼ା ଆଇବାଟା ଅଲ୍‌ସମ୍ ଅଇଲାକେ ଦାଙ୍ଗୁଡ଼ିମନ୍ ଜୁମ୍‌ରି ଜୁମ୍‌ରି କରି ସଇଦେଲା । ”

୬ ମଜା ରାତିବେଲା ଆଉଲି ସୁନି ଅଇଲା, “ଏଦେ ଦେକା ! ବର୍ ଦାଙ୍ଗୁଡ଼ା ଆଇଲାବେ ! ଆସା ସେମନ୍‌କେ ଡାକିଆନୁ !” ୭ ଦାଙ୍ଗୁଡ଼ିମନ୍ ଉଚିକରି ନିଜର୍ ନିଜର୍ ବଡ଼ିମନ୍ ସାଜାଡ଼ଲା । ୮ ସେଡ଼କି ବେଳେ ବକୁଆ ଦାଙ୍ଗୁଡ଼ିମନ୍ ଚତୁର୍ ରଇଲା ଦାଙ୍ଗୁଡ଼ିମନ୍‌କେ କଇଲା “ଆମକେ କଣ୍ଡେକ୍ ଚିକନ୍ ଦିଆ । ଆମର୍ ବଡ଼ି ଲିବିଗାଲାନି ।” ୯ ଚତୁର୍ ଦାଙ୍ଗୁଡ଼ିମନ୍ କଇଲା, “ତମକେ ଦେଲେସରି ଆମର୍ ପାଇ ଚିକନ୍ ନ ଅଏ । ତମେ ଦୁକାନେ ଜାଇ ନିଜର୍ ନିଜର୍ ପାଇ ଚିକନ୍ ଗେନିଆନା ।” ୧୦ ସେଟାର୍‌ପାଇ ବୁଦି ନଇଲା ଦାଙ୍ଗୁଡ଼ିମନ୍ ଚିକନ୍ ଗେନିବାକେ ବାରଇଲା । ସେମନ୍ ଗାଲା, ପଟେ ବର୍ ଦାଙ୍ଗୁଡ଼ା ଆସି କେଟ୍‌ଲା । ଜାଗ୍‌ରଡ଼ ଅଇରଇଲା ପାଁଟ୍‌ଟା ଚତୁର୍ ଦାଙ୍ଗୁଡ଼ିମନ୍ ତାକର୍ ସଙ୍ଗ୍ ବିବା ବଜିତେଇ ଗାଲା ପଟେ କାପାଟ୍ ଡାବିଅଇଗାଲା । ୧୧ \*ସେ ବୁଦି ନ ରଇଲା ଦାଙ୍ଗୁଡ଼ିମନ୍ ପଟେ ସେ ଜାଗାଇ ଆଇଲା, ଏ ମାପରୁ, ଏ ମାପରୁ କାପାଟ୍ ଉଗାଡ଼ା, ଆମେ ବିଡ଼ରେ ଜିବୁ ବଲି ସେମନ୍ ଆଉଲି ଅଇଲା । ୧୨ ବର୍‌ଦାଙ୍ଗୁଡ଼ା କଇଲା, “ମୁଇ ସଡ଼ କଇଲିନି, ତମେ କେ, ମୁଇ ନାଜାନି ।” ୧୩ କାତା କଇବାଟା ସାରାଇ, କରି ଜିସୁ କଇଲା, “ଜାଗ୍‌ରଡ଼ ଅଇ ରୁଆ । ସେ ଦିନ୍ କି ବେଲା କେ ମିସା ନାଜାନାସ୍ ।”

## ତିନଟା ଚାକରର କାତା

(ଲୁକ୍ ୧୯:୧୧-୨୭)

୧୪ \* “ସରଗ୍ ରାଇଜ୍ ଏନ୍ତାରି, ସେ ବିସଇର୍ ଆରି ଗଟେକ୍ କାତା ସୁନା । ତରେକ୍ ଗଟେକ୍ ଲକ୍ ତାର୍ ଚାକର୍‌ମନ୍‌କେ, ତାର୍ ସଁପତି ଚାଡ଼ିଦେଇ ବିଦେସେ ଉଚିଗାଲା । ୧୫ ସେମନର୍ ପାର୍‌ବା ଇସାବେ ସେମନ୍‌କେ କେତେକ୍ କେତେକ୍ ତାରୁ ଜିମା ଦେଲା । ଗଟେକ୍ ଲକ୍‌କେ ପାଁଟ୍ ଅଜାର୍ ରୁପା ଟାଙ୍ଗା ଦେଲା, ଗଟେକ୍ ଲକ୍‌କେ ଦୁଇ ଅଜାର୍, ଆରି ଗଟେକ୍‌ଲକ୍‌କେ ଅଜାର୍ ରୁପା ଟାଙ୍ଗା ଦେଲା । ଆରି ବିଦେସେ ଉଚିଗାଲା । ୧୬ ପାଁଟ୍ ଅଜାର୍ ରୁପାଟାଙ୍ଗା ନେଇରଇଲା ଚାକର୍ ସେ ତାରୁ ବେବାର୍ କରି ଆରି ପାଁଟ୍ ଅଜାର୍ ଲାବ୍‌କଲା । ୧୭ ସେନ୍ତାରି ଦୁଇ ଅଜାର୍‌ଟା ନେଇରଇଲା ଚାକର୍ ମିସା ଆରି ଦୁଇ ଅଜାର୍ ଲାବ୍‌କଲା । ୧୮ ମାତର୍ ଜନ୍ ଚାକର୍ ଅଜାର୍‌ଟା ପାଇରଇଲା, ସେ ଗଟେକ୍ କାଲ୍‌କୁନି ସାଉକାର୍ ଦେଇରଇବା ସେ ରୁପା ଟାଙ୍ଗା ଲୁଟାଇ ସଙ୍ଗଇଲା ।

୧୯ “ବେସିଦିନ୍ ଗାଲା ପଟେ ସାଉକାର୍ ବାଅଡ଼ଲା ଆରି ଚାକର୍‌ମନର୍ ସଙ୍ଗ୍ ଇସାବ୍‌କିତାବ୍ କଲା ।” ୨୦ ପାଁଟ୍ ଅଜାର୍ ରୁପାଟାଙ୍ଗା ନେଇରଇଲା ଚାକର୍ ଆସି ଆରି ପାଁଟ୍ ଅଜାର୍ ଦେଇ କଇଲା, “ସାଉକାର୍ ତମେ ମକେ ପାଁଟ୍ ଅଜାର୍ ଦେଇରଇଲାସ୍, ଏଦେ ଦେକା, ମୁଇ ଆରି ପାଁଟ୍ ଅଜାର୍ ଲାବ୍ କଲିଆଚି ।” ୨୧ ସାଉକାର୍ ସାର୍‌ଦା ଅଇ ତାକେ କଇଲା, “ ଟିକ୍ କରିଆରୁସ୍, ତୁଇ ମର୍ କେତେକ୍ ନିକ ଆରି ବିସ୍‌ବାସ୍ ରଇବା

ଚାକର ! ତମେ ବିସ୍ୱାସ୍ ସଙ୍ଗେ ଉନା ଦନ୍ କାର୍‌ବାର କରି ରଇଲାର ପାଇ ତମ୍ଭେକେ ଦେସି ଦନ୍ ଚାଡ଼ିଦେବି । ଆଉ ମର୍ ସଙ୍ଗେ ସାରଦା କର୍ ।”

୨୨ “ଦୁଇ ଅଜାର ରୁପାଟାଙ୍ଗା ନେଇ ରଇଲା ଚାକର ଆସି କଇଲା, ସାଉକାର ତମେ ମକେ ଦୁଇ ଅଜାର ଦେଇ ରଇଲାସ୍, ମୁଇ ଆରି ଦୁଇ ଅଜାର ଲାବ୍ କଲିଆଟି ।” ୨୩ ସାଉକାର କଇଲା, କେତେକ୍ ନିକ ! ଦୁଇ ମିସା ମର୍ ବଡ଼ିଆ ଚାକର । ଉନା ତାବୁ ମିସା ନିକକରି କାମେ ଲାଗାଇଲୁସ୍ । ଏବେ ତର୍ ଜିମାରେ ମୁଇ ବୁଡେକ୍ ଦନ୍ ଦେବି । ଆଉ ମର୍ ସଙ୍ଗେ ସାରଦା କର୍ । ୨୪ ସାରାସାରି ଅଜାର ରୁପାଟାଙ୍ଗା ପାଇରଇଲା ଚାକର ଆସି କଇଲା, “ଏ ସାଉକାର ମୁଇ ଜାନି, ତମେ ଗଟେକ୍ ଦେସି ରିସା ଅଇବା ଲକ୍ । ବୁନି ନ ରଇବା ପଦାଇ କାର୍‌ସା ଆରି ବିଅନ୍ ନ ବୁନିକରି ତାସ୍ ବାରା ବାନ୍‌ସା । ୨୫ ସେଟାର ପାଇ ମୁଇ ଡରିକରି ତମର୍ ଦନ୍ ମାଟିତେଇ କାଲ୍‌କୁନି ତପି ରଇଲି । ଏଦେ ଦେକା ! ତମର୍ ସେ ଟାଙ୍ଗା !”

୨୬ ସାଉକାର କଇଲା, “ଅଇରେ କାମ୍‌କେ ନଇଲା ବାହୁ ! ଦୁଇତା ଜାନିରଇଲୁସ୍, ମୁଇ ଜନ୍ତ୍ର ବୁନି ନ ରଇ, ତେଇ ତାସ୍ ଚୁଲିଆଇବି । ୨୭ ତେବେ ମର୍ ଟାଙ୍ଗାମେଇ ବିନ୍ ଲକ୍‌ମନ୍‌କେ କଲ୍‌ତ୍ରୁର୍ ଇସାବେ ଦେଇରଇଲେ ମିସା ତେଇଅନି ମକେ କଲ୍‌ତ୍ରୁର୍ ମିଲ୍‌ତା ।” ୨୮ ଏନ୍ତାରି କଇ ସାଉକାର ଆଦେସ୍ ଦେଲା, ଏ ଚାକରଟାମେ ଅନି ସବୁ ଟାଙ୍ଗା ନେଇ, ଜାର୍ ଆଡେ ଦସ୍‌ଅଜାର୍ ଆଟେ, ତାକେ ଦେଇଦିଆସ୍ । ୨୯ କାଲକେ ବଇଲେ ଜାକେ ଆଟେ, ତାକେ ଅଦିକ୍ ଦିଆଅଇସି । ଆରି ସେ ଅଦିକ୍ ଅଦିକ୍ ଲାବ୍ କରସି । ମାତର୍ ଜାକେ ନାଇ ତାରଲଗେ ଜାଇଟା ଆଟେ, ସେଟା ମିସା ତାରତେଇଅନି ଚାଡ଼ାଇ ନିଆଅଇସି । ୩୦ ଏବ୍ କାମ୍‌କେ ନଇଲା ଚାକରକେ ବାଇରେ ଦାରିଜା ଆରି ଆନ୍ଦାରେ ପଙ୍ଗିଦିଆସ୍ । ତେଇ ସେ କିଲିବିଲିଅଇ ଦାଡ୍ କାଡ଼ି ମାରି ତପି ଅଇ କାନ୍‌ସି ।

ସାରାସାରିର ବିଚାର

୩୧ ଏଜେତେବେଲା ନର୍‌ପିଲା ମୁଇ ରାଜାଅଇ ମର୍ ସରଗର୍ ଦୁଡ଼ମନର୍ ସଙ୍ଗେ ଆଇବି, ଆରି ମର୍ ଡାକ୍‌ପୁଟା ବସ୍‌ବା ଜାଗାଇ ବସ୍‌ବି, ୩୨ ସବୁ ଜାଡ଼ିର୍ ଲକ୍ ମର୍ ମୁଆଟେ ଚୁଲ୍ ଅଇବାଇ । ସେଡ଼କି ବେଲା ଗଉଡ଼ ଜେନ୍ତ୍ର ମେଣ୍ଡା ଆରି ଚେଲିମନ୍‌କେ ବେଗ୍‌ଲାଇସି, ସେନ୍ତ୍ର ନର୍‌ପିଲା ମୁଇ ଲକ୍‌ମନ୍‌କେ ଦୁଇ ଦଲ୍ କରି ବାଗ୍ କର୍‌ବି । ୩୩ ଦରମ୍ ଲକ୍‌ମନ୍‌କେ ଉଜା ବାଟେ ଆରି ବିନ୍ ଲକ୍‌ମନ୍‌କେ ମର୍ ଡେବ୍‌ବି ବାଟେ ସଙ୍ଗାଇବି । ୩୪ ତାର୍ ପଟେ ମର୍ ଉଜାବାଟେ ରଇଲା ଲକ୍‌ମନ୍‌କେ ମୁଇ କଇବି, “ଆସା, ତମ୍ଭେକେ ମର୍ ବାବା ଆସିର୍‌ବାଦ୍ କଲାଆଟେ । ଦୁନିଆ ତିଆର୍‌ଅଇଲା ବେଲେଅନି ଜନ୍ ରାଇଜ୍ ତମର୍ ପାଇ ତିଆର୍ ଅଇଲା ଆଟେ, ଆସା, ତେଇ ଜାଇ ପୁରା । ୩୫ ମୁଇ ବୁକେ ରଇଲି, ତମେ ମକେ କୁଆଇଲାସ୍ । ମକେ ସସ୍ କଲା, ତମେ ମକେ କାଇବାକେ ଦେଲାସ୍ । ମୁଇ ଚିନାର୍ ଜାନାର୍ ନ ରଇଲି, ମକେ ତମର୍ ଗରେ ଗତିଆ କରି ଡାକ୍‌ଲାସ୍ । ୩୬ ମୁଇ ହୁମ୍‌ଣ୍ଡା ରଇଲି, ମକେ ବସ୍‌ତର୍ ପିନ୍‌ଆଇଲାସ୍ । ମୁଇ ଜର୍‌ଦାରାଇ ଅଇରଇଲି, ମକେ ଜତନ୍ କଲାସ୍ । ମୁଇ ବନ୍‌ପି ଗରେ ରଇଲି ମକେ ଦେକ୍‌ବାର୍ ଆସିରଇଲାସ୍ ।”

୩୭ ଦରମ୍ ଲକ୍‌ମନ୍ କଇବାଇ, “ମାପୁର ! କେବେ ତମେ ବୁକେ ରଇଲାଟା ଦେକି ତମ୍ଭେକେ କାଇବାକେ ଦେଇରଇଲୁ ? କେବେ ତମ୍ଭେକେ ସସ୍ କଲାଜେ ପାନି କାଇବାକେ ଦେଇ ରଇଲୁ ? ୩୮ କେବେ ତମେ ଚିନାର୍ ଜାନାର୍ ନ ଅଇରଇଲାସ୍ ଜେ ଆମେ ତମ୍ଭେକେ ଗତିଆ କରି ଗରେ ଡାକି ରଇଲୁ ? ଆରି କେବେ ହୁମ୍‌ଣ୍ଡା ରଇଲାସ୍ ଜେ ପିନ୍‌ବାକେ ବସ୍‌ତର୍ ଦେଇ ରଇଲୁ ? ୩୯ କେବେ ତମେ ଜର୍ ଦାରାଇ

☆ ୨୫:୨୯ ୨୫:୨୯ ମାଡ଼ିଉ ୧୩:୧୨; ମାର୍‌କ୍ ୪:୨୫; ଲୁକ୍ ୮:୧୮ ☆ ୨୫:୩୦ ୨୫:୩୦ ମାଡ଼ିଉ ୮:୧୨;୨୨:୧୩; ଲୁକ୍ ୧୩:୨୮ ☆ ୨୫:୩୧ ୨୫:୩୧ ମାଡ଼ିଉ ୧୭:୨୭; ମାଡ଼ିଉ ୧୯:୨୮

ଅଇରଇଲାସ୍‌ଜେ ଆମେ ତମ୍‌କେ ଜତନ୍ କଲୁ ? ଆରି କେବେ ତମେ ବନ୍ଦି ଗରେ ରଇଲାସ୍‌ଜେ ଆମେ ଦେକ୍‌ବାର୍ ଆସିରଇଲୁ ?”<sup>୪୦</sup> ପତେ, ମୁଇ ସେମନ୍‌କେ କଇବି, ମୁଇ ତମ୍‌କେ ସତ୍‌କଇଲିନି, ଏ ମର୍ ବାଇମନର୍ ବିତ୍‌ରେ ସବୁଟାମେଅନି ଗଟେକ୍ ସାନ୍ ଲକର୍ ପାଇ, ଜାଜାଟା ସବୁ କରିଆଟାସ୍, ସେଟା ମର୍ ପାଇ କରିଆଟାସ୍ ।

<sup>୪୧</sup> ତାର୍‌ପତେ ଡେବ୍‌ରିବାଟେ ବସି ରଇବା ଲକ୍‌ମନ୍‌କେ ମୁଇ କଇବି “ଏଇ ସାଇପ୍ ପାଇରଇବା ଦଲର୍ ଲକ୍‌ମନ୍ ! ମର୍ ମୁଆଟେ ରୁଆନାଇ । ସଇତାନ୍ ଆରି ତାର୍ ସଙ୍ଗ୍ ରଇଲା ଦୁଡ୍‌ମନର୍ ପାଇ, ସବୁବେଲେ ଲାଗି ରଇବା ଜଇକୁଣ୍ ତିଆର୍ ଅଇଲାଆତେ । ତେଇ ଜାଆ !<sup>୪୨</sup> ମୁଇ ବୁକେ ରଇଲି, ତମେ ମକେ କାଇବାକେ ଦିଆସ୍ ନାଇ, ମକେ ସସ୍ କଲାଜେ ପାନି ଗୁଡ଼ିକ୍ ଦିଆସ୍ ନାଇ ।<sup>୪୩</sup> ମୁଇ ଅଟିନାର୍ ଅଇ ରଇଲା ବେଲେ ମକେ ଡାକାସ୍ ନାଇ । ମୁଇ ହୁମ୍‌ଣ୍ଟା ରଇଲା ବେଲେ ମକେ ବସ୍‌ତର୍ ପିନ୍‌ଆସ୍ ନାଇ । ଜର୍ ଦାରାଅଇ ଆରି ବନ୍ଦି ଅଇ ରଇଲା ବେଲେ, ମକେ ଜତନ୍ କରାସ୍‌ନାଇ ।”

<sup>୪୪</sup> ସେମନ୍ ସେଡ଼କିବେଲେ ମକେ କଇବାଇ, “ମାପୁରୁ, ତମ୍‌କେ ଆମେ କେବେ ବୁକେ ରଇଲା ବେଲେ, ସସେ ରଇଲା ବେଲେ, ଅଟିନାର୍ ରଇଲା ବେଲେ, ହୁମ୍‌ଣ୍ଟା ରଇଲା ବେଲେ ଆରି ଜର୍ ଦାରାଅଇ ବନ୍ଦି ରଇବାଟା ଦେକି ତମ୍‌କେ ସାଇଜ କରୁ ନାଇ ?”

<sup>୪୫</sup> ସତଇସେ ମୁଇ କଇବି, “ଏ ସାନ୍ ଲକ୍‌ମନର୍ ବିତ୍‌ରେଅନି ଗଟେକ୍ ଲକ୍‌କେ ସାଇଜ କର୍‌ବାକେ ମନାକର୍‌ବା ବେଲେ, ତମେ ମକେ ସାଇଜ କରାସ୍ ନାଇ ।<sup>୪୬</sup> ଏନ୍ତାରି ଲକ୍‌ମନ୍‌କେ ସବୁ ଦିନର୍ ପାଇ ଡଣ୍ଟି ମିଲ୍‌ସି ଆରି ଦରମ୍ ଲକ୍‌ମନ୍ ନ ସାର୍‌ବା ଜିବନ୍ ପାଇବାଇ ।”

## ୨୨

ଜିସୁର୍ ବିରୁଦେ ପାଁର୍‌ବାଟା

(ମାର୍‌କ ୧୪:୧-୨; ଲୁକ୍ ୨୨:୧-୨; ଜଅନ୍ ୧୧:୪୫-୫୩)

<sup>୧</sup> ଜିସୁ ଏ ସବୁ ସିକିଆ ଦେଇ ସାରାଇଲା ପତେ ସିସ୍‌ମନ୍‌କେ, <sup>୨</sup> “ନିସ୍‌ତାର୍ ପରବ୍ ଅଇବାକେ ଆରି ଦୁଇ ଦିନ୍ ଆତେ । ସେଟା ତମେ ଜାନାସ୍ । ସେଡ଼କିବେଲେ ନର୍‌ପିଲା ମୁଇ କୁରସେ ମର୍‌ବାକେ ଲକ୍‌ମନ୍‌କେ ସର୍‌ପି ଅଇବି ।”

<sup>୩</sup> ସେବେଲେ ମୁକିଅ ପୁଜାରିମନ୍ ଆରି ପାର୍‌ତିନମନ୍ ବଡ଼ ପୁଜାରି କୟାପାର୍ ଗରେ ରୁଣ୍ଟି ଅଇଲାଇ ।<sup>୪</sup> ସେମନ୍ କେ ନାଜାନ୍‌ଲାପାରା ଜିସୁକେ ଦାରି ମରାଇବାକେ ପାଁର୍‌ନା କଲାଇ ।<sup>୫</sup> ମାତର୍ ସେମନ୍ କଇଲାଇ, “ଆମେ ପରବ୍ ବେଲେ ଏ କାମ୍ କର୍‌ବାଟା ଚିକ୍ ନର୍ । ସେ ବେଲେ ଲକ୍‌ମନ୍ ଗଣ୍ଟିଗଲ୍ ମିସା କରିପାର୍ତ୍ ।”

ଜିସୁକେ ବେଡ଼ିଆଇ ଚିକନ୍ ଲାଗାଇଲାଇ

(ମାର୍‌କ ୧୪:୩-୯; ଜଅନ୍ ୧୨:୧-୮)

<sup>୬</sup> ଜିସୁ ଦିନେକ୍ ବେଡ଼ିଆଇ, ଆଗେଅନି ବଡ଼ରଗ୍ ଅଇ ରଇବା ସିମନର୍ ଗରେ ରଇଲା ।<sup>୭</sup> ସିମନର୍ ଗରେ ସେ କାଇବାକେ ବସି ରଇଲା ବେଲେ, ଏଦେ ଦେକା ! ଗଟେକ୍ ମାଇଜି ଆଲାବାସ୍‌ଟା ନାଉର୍ ପାକ୍‌ନାସଙ୍ଗ୍ ତିଆର୍‌କଲା କଣ୍ଡିତେଇ ବେସି ଦାମର୍ ବାସ୍‌ନା ଚିକନ୍ ବର୍ଡି କରି ଆନି ତାର୍ ମୁଣ୍ଡେ ଡାଲି ଦେଲା ।<sup>୮</sup> ଏଟା ଦେକିକରି ତାର୍ ସିସ୍‌ମନ୍ ରିସା ଅଇଗାଲାଇ । ସେମନ୍ ତାକେ ପାଟାର୍‌ଲାଇ, “ଏଡେକ୍‌ପାରା ଚିକନ୍ କାଇକେ ରୁଟାଇ ରୁଟାଇ ଡାଲିପାକାଇଲୁସ୍ ?<sup>୯</sup> ଏ ବାସ୍‌ନା ଚିକନ୍ ବିକ୍‌ଲେ ସରି, ବେସି ଡାବୁ ମିଲ୍‌ତା ଆରି ସେଟା ଗରିବ୍ ଲକ୍‌ମନ୍‌କେ ଦାନ୍ ଦେବାର୍ ଅଇତା ।”

୧୦ ସେମନ୍ କାଇଟା ବଲି କଇଲାଇନି, ଏଟା ଜାନିକରି ଜିସୁ କଇଲା, “ତାକେ କାଇକେ ତମେ ଅଇରାନ୍ କଲାସ୍ନି ? ସେ ମର୍ ପାଇ ଗଟେକ୍ ନିକ ଆରି ସୁନ୍ଦର୍ କାମ କଲାଆଟେ ।”

୧୧ “ତମେ ସବୁବେଳେ ଗରିବ୍ ଲକ୍ମନର୍ ସଙ୍ଗ୍ ମିସ୍ସା । ମାତର୍ ମର୍ସଙ୍ଗ୍ ସବୁବେଳେ ରଇ ନାପାରାସ୍ । ୧୨ ସେ ମର୍ ଉପରେ ବାସ୍ନା ଚିକନ୍ ରକଇକରି, ମକେ ସମାଦି ଦେବା ଆଗ୍ତୁ, ତିଆର୍ କରି ଦେଲାଆଟେ । ୧୩ ମୁଇ ତମ୍‌କେ ସତ୍‌କାତା କଇଲିନି, ଗୁଲାଇ ଜଗତେ ଜନ୍ ଜାଗାଇ ମିସା ମାପ୍‌ରୁର୍ ନିକ କବର୍ ଜାନାଇଅଇସି, ଏ ମାଇଜି ଜାଇଟା କଲାଆଟେ, ତାକେ ଏତାଇକରି ସେଟା ମିସା କଇବାଇ ।”

ଜିସୁକେ ଦାରାଇଦେବାକେ ଜିଉଦାର ରାଜି  
(ମାର୍‌କ ୧୪:୧୦-୧୧; ଲୁକ୍ ୨୨:୩-୬)

୧୪ ଜିସୁର୍ ବାରଟା ସିସମନର୍ ବିତ୍‌ରେଅନି ଇସକାରିୟ୍‌ଡ୍ ଜିଉଦା ନାଉର୍ ଗଟେକ୍ ସିସ୍ ମୁକିଅ ପୁଜାରିମନର୍ ଲଗେ ଜାଇ ପାଟାରଲା । ୧୫ “ଜିସୁକେ ଦାରାଇଦେଲେ ମକେ କାଇଟା ଦେଇସା ?” ସେମନ୍ ତାକେ ତିରିସ୍‌ଟା ରୁପାଟାଙ୍ଗା ଏଜିକରି ଦେଲାଇ । ୧୬ ସେ ଦିନେଅନି ଜିଉଦା ଜିସୁକେ ଦାରାଇ ଦେବାକେ ବେଲା କଜ୍‌ତେରଇଲା ।

ନିସ୍‌ତାର ପରବର୍ ବଜି  
(ମାର୍‌କ ୧୪:୧୨-୨୧; ଲୁକ୍ ୨୨:୭-୧୪, ୨୧-୨୩; ଜଅନ୍ ୧୩:୨୧-୩୦)

୧୭ ନିସ୍‌ତାର ପରବର୍ ପର୍‌ଡୁମ୍ ଦିନେ ସିସମନ୍ ଆସି ଜିସୁକେ ପାଟାରଲାଇ, “ତମର୍ ପାଇ ଆମେ କନ୍ତି ନିସ୍‌ତାର ପରବର୍ ବଜି ତିଆର୍ କର୍‌ବୁ ?”

୧୮ ଜିସୁ କଇଲା, “ନଅରେ ଜାଇ ସେ ଲକ୍‌କେ କଇସା, ତାର୍ ଦିନ୍କାଲ୍ କେଟି ଆଇଲାନି ବଲି ଗୁରୁ କଇଲା ଆଟେ । ତାର୍ ସିସମନର୍ ସଙ୍ଗ୍ ତମର୍ ଗରେ ସେ ନିସ୍‌ତାର ପରବ୍ ମାନସି ।”

୧୯ ସିସମନ୍, ଜିସୁ କଇଲା ଇସାବେ ନିସ୍‌ତାର ପରବର୍ ବଜି ତିଆର୍‌କଲାଇ ।

୨୦ ସଙ୍ଗ୍ ଅଇଲାକେ ଜିସୁ ଆରି ତାର୍ ବାରଟା ସିସମନ୍ କାଇବାର୍ ବସଲାଇ । ୨୧ କାଇବା ବେଲେ ଜିସୁ କଇଲା, “ମୁଇ ତମ୍‌କେ ସତ୍ କଇଲିନି, ତମର୍ ବିତ୍‌ରେଅନି ଗଟେକ୍ ଲକ୍ ମକେ ବିସ୍‌ବାସେ ବିସ୍‌ଦେଲା ପାରା କର୍‌ସି ।”

୨୨ ଏ କାତା ସୁନି ସିସମନ୍ କାବା ଅଇଗାଲାଇ । ଆରି ଗଟେକ୍ ଗଟେକ୍ ଲକ୍ ଜିସୁକେ ପାଟାରଲାଇ “ମାପ୍‌ରୁ ସେ ଲକ୍ ମୁଇ କି ?”

୨୩ ଜିସୁ କଇଲା, “ଜନ୍ ଲକ୍‌କି ମର୍ସଙ୍ଗ୍ ଗିନାତେଇ ରୁଟି ଚବାଲୁଲା, ସେ ଆକା ।” ସେ ମକେ ବିସ୍‌ବାସେ ବିସ୍ ଦେଲାପାରା କର୍‌ସି । ୨୪ ସାସ୍‌ତରର୍ ଲେକା ଇସାବେ ମୁନ୍‌ସପିଲା ମୁଇ ମରିଜିବି, ମାତର୍ ଜେ ମକେ ଦାରାଇ ଦେଇସି, ତାର୍ ଦସା କେତେ ଇନସ୍‌ତା ଅଇସି ! ସେ ଜନମ୍ ନ ଅଇରଇଲେ ନିକ ଅଇତା ।

୨୫ ବିସ୍‌ବାସେ ବିସ୍ ଦେଉ ଜିଉଦା ଉଟି ପାଟାରଲା, “ଗୁରୁ ତମେ ମକେ ଦେକାଇକରି କୁଆସ୍‌ନାଇ ତ ?” ଜିସୁ ତାକେ କଇଲା, “ସେଟା ତୁଇସେ କଇଲୁସ୍‌ନି ।”

ମାପ୍‌ରୁ ବଜି  
(ମାର୍‌କ ୧୪:୨୨-୨୬; ଲୁକ୍ ୨୨:୧୪-୨୦; ୧ମ କରନ୍ତିୟ୍ ୧୧:୨୩-୨୫)

୨୬ ସେମନ୍ କାଇବା ବେଲେ ଜିସୁ ଗଟେକ୍ ରୁଟି ଦାରି ପର୍‌ମେସର୍‌କେ ଦନିଅବାଦ୍ ଦେଲା, ଆରି ସେଟା ବାଙ୍ଗାଇ ସିସମନ୍‌କେ ଦେଇ କଇଲା, “ଏଟା ମର୍ ଗାଗଡ୍ । ନିଆ ଆରି କାଆ ।”

୨୭ ତାର୍‌ପଟେ ଅଙ୍ଗୁରରସ୍ ରଇଲା ମୁତା ଦାରି ପର୍‌ମେସର୍‌କେ ଦନିଅବାଦ୍ ଦେଲା ଆରି ତାର୍ ସିସମନ୍‌କେ କଇଲା, “ତମେ ସବୁ ଲକ୍ ଏ ମୁତାରଟା କାଆ । ୨୮ ଏଟା ମର୍ ବନି । ମୁନ୍‌ସମନର୍ ପାପ୍‌କେମାର୍ ଲାଗି ମୁଇ ମର୍ ଜନ୍ ବନି ତାଲି ଦେବି ବଲି

ଗାଲିନି, ସେଟା ପର୍ଯ୍ୟନ୍ତ ନୁଆ ନିୟମ୍ ଟିକ୍ କରୁସି । ୨୯ ମୁଇ ତମ୍‌କେ କଇଲିନି, ମର ବାବାର ରାଇଜେ ତମ୍‌ର ସଙ୍ଗ୍ ନୁଆ ଅଙ୍ଗୁର ରସ୍ କାଇବା ଜାକ ମୁଇ ଆରି କେବେ ଏ ରସ୍ ନ କାଇ ।”

୩୦ ତାର୍‌ପତେ ସେମନ୍ ଦନିଅବାଦର୍ ଗିଡ଼ ଗାଇ ଗାଇ କରି ଜିଡ଼ନାଉଁର୍ ପର୍ବତେ ଗଲାଲ ।

ପିତର ନାଜାନି ବଲ୍‌ବା ବିସଇ ଜିସୁ କଇବାଟା  
(ମାର୍‌କ ୧୪:୨୭-୩୧; ଲୁକ୍ ୨୨:୩୧-୩୪; ଜଅନ୍ ୧୩:୩୬-୩୮)

୩୧ ସେବେଲେ ଜିସୁ ସେମନ୍‌କେ କଇଲା, “ଆଜି ରାତି ତମେ ସବୁ ଲକ୍ ମକେ ଚାଡ଼ିକରି ଉଟିଜାଇସା । ସାସ୍‌ତର୍ କଇଲାନି, ମୁଇ ମେଣ୍ଟା ଚାରାଉକେ ମରାଇବି ଆରି ମେଣ୍ଟାମନ୍ ଚିନ୍‌ବିନ୍ ଅଇଜିବାଇ । ୩୨ \*ମାତର୍ ମୁଇ ମରିକରି ଆରି ତର୍ ଉଟ୍‌ଲା ପତେ, ତମ୍‌ର ଆଗତୁ ଆଗତୁ ଗାଲିଲି ରାଇଜେ ଜିବି ।”

୩୩ ପିତର ଜିସୁକେ କଇଲା, “ତମ୍‌କେ ବିନ୍ ଲକ୍‌ମନ୍ ସବୁ ଚାଡ଼ିକରି ଉଟିଗାଲେ ମିସା ମୁଇ ଚାଡ଼ି ନ ଜାଇ ।”

୩୪ ଜିସୁ ପିତରକେ କଇଲା, “ମୁଇ ସଡ଼ କଇଲିନି ଆଜି ରାତି କୁକ୍‌ତା ନ ତାକ୍‌ତେ, ତୁଇ ମକେ ତିନ୍ ତର ନାଜାନି ବଲ୍‌ କଇସୁ ।”

୩୫ ପିତର କଇଲା, “ଜଦି ମୁଇ ତମ୍‌ର ସଙ୍ଗ୍ ମରବାର ରଇଲେ ମିସା, ମୁଇ ତମ୍‌କେ କେବେ ନାଜାନି ବଲ୍‌ ନ କଇ ।” ବିନ୍ ସିସ୍‌ମନ୍ ମିସା ସେନ୍ତାର୍ କଇଲାଲ ।

ଗେଡ଼ସିମନି ବାଡେ ଜିସୁର ପାର୍‌ତନା  
(ମାର୍‌କ ୧୪:୩୨-୪୨; ଲୁକ୍ ୨୨:୩୯-୪୬)

୩୬ ତାର୍ ପତେ ଜିସୁ ତାର୍ ସିସ୍‌ମନ୍‌ର ସଙ୍ଗ୍ ଗେଡ଼ସିମନି ନାଉଁର୍ ଗଟେକ୍ ଜାଗାଇ ଜାଇ ସେମନ୍‌କେ କଇଲା, “ତମେ ଇତି ଚନେକ୍ ବସି ରୁଆ । ମୁଇ ସେ ଲଗେ ଜାଇ ପାର୍‌ତନା କରୁବି ।” ୩୭ ସେ ପିତରକେ ଆରି ଜେବଦିର୍ ତୁଇଟା ପିଲାମନ୍‌କେ ତାର୍ ସଙ୍ଗ୍ ଡାକିନେଲା । ସେଡ଼କି ବେଲେ ସେ ବେସି ଦୁକ୍ କସ୍‌ଟ ଆରି କିଲ୍‌ବିଲ୍‌ଅଇ, ୩୮ ସେମନ୍‌କେ କଇଲା, “ଦୁକ୍ ଅଇ ମର୍ ଜିବନ୍ ଚିଡ଼ିଗାଲା ପାରା ଲାଗ୍‌ଲାନି । ଇତି ତମେ ମକେ ଜାଗିରୁଆ ।”

୩୯ ଜିସୁ ତାକର୍ ଚାନେଅନି କଣ୍ଠେକ୍ ଦୁରିକେ ଜାଇ ବୁର୍‌ ଉମ୍‌ତାଡ଼ିଅଇ ପାର୍‌ତନା କଲା, “ବାବା ଜଦି ଅଇସି ବଇଲେ ଏ ଦୁକ୍ ପୁରୁନର୍ ମୁତା ମର୍‌ଟାନେଅନି ଦାରି ଜା, ମାତର୍ ମୁଇ ମନ୍ କଲାଟା ନର୍, ତମେ ମନ୍ କଲାଟା ପୁରାପୁରୁନ୍ ଅ ।”

୪୦ ତାର୍‌ପତେ ସେ ତିନ୍‌ଟା ସିସ୍‌ମନ୍‌ର ଲଗେ ବାଉଡ଼ି ଆସି ଦେକ୍‌ଲା, ସେମନ୍ ସଇଦେଇଆଚଡ଼ । ଜିସୁ ପିତରକେ କଇଲା, “ତମେ ଗଟେକ୍ ଗଟା ମିସା ଜାଗି ନାପାର୍‌ଲାସ୍ ? ୪୧ ଜେକ୍‌କି ପରିକାର୍ ବେଲାଲ ନ ଆରିଜିବାକେ, ଜାଗିରଇ ପାର୍‌ତନା କରା । କାଇକେ ବଇଲେ ଆଡ଼ମା କରୁବି ବଲ୍‌ ମନ୍ କଲାନି, ମାତର୍ ଗାଗଡ଼ ନିଚି ବଇଲାନି ।”

୪୨ ଜିସୁ ଆରି ତରେକ୍ ଜାଇ ପାର୍‌ତନା କଲା, “ଏ ମର୍ ବାବା ଜଦି ଏ ଦୁକର୍ ମୁତା ମର୍‌ଟାନେଅନି ନ ନେଲେ, ମୁଇ ସେଟା କାଇବାକେ ସେ ପଡ଼ୁସି । ମାତର୍ ମୁଇ ମନ୍ କଲାଟା ନାଇ, ତମେ ମନ୍ କଲାଟା ପୁରାପୁରୁନ୍ ଅ ।” ୪୩ ସେ ଆରି ତରେକ୍ ବାଉଡ଼ି ଆସି ସିସ୍‌ମନ୍ ସଇରଇଲାଟା ଦେକ୍‌ଲା । ସେମନ୍‌କେ ଗୁନ୍ ଡାବି ଆନ୍‌ତେ ରଇଲାଜେ ଆକି ଦେକି ନାପାର୍‌ତେ ରଇଲାଲ ।

୪୪ ଏଟାସଙ୍ଗ୍ ତିନ୍‌ତର୍ ଅଇଲା ଜିସୁ ସେମନ୍‌କେ ଚାଡ଼ିକରି କଣ୍ଠେକ୍ ଦୁରିକେ ଜାଇ ସେନ୍ତାରି ପାର୍‌ତନା କଲା । ୪୫ ତାର୍ ପତେ ସିସ୍‌ମନ୍‌ର ଲଗେ ଆସି କଇଲା, “ଏବେ ଜାକ ତମେ ସଇଆଟାସ୍ ? ଦେକା ପର୍ଯ୍ୟନ୍ତ ନର୍‌ପିଲା ମୁଇ ପାପିମନ୍‌କେ ସର୍‌ପି

\* ୨୭:୩୨ ୨୭:୩୨ ମାଡ଼ିଉ ୨୮:୧୭



ଅଇବା ବେଲା କେଟିଆଚେ । ୪୭ ଉଟା, ଜୁ । ଏଦେ ଦେକା ! ମକେ ଦାରାଇ ଦେବା ଲକ୍ ଆସି କେଟିଲାବେ ।”

ଜିସୁକେ ଦାରି ବାନ୍ଦିଲାଇ

(ମାର୍କ ୧୪:୪୩-୫୦; ଲୁକ୍ ୨୨:୪୭-୫୩; ଜଅନ୍ ୧୮:୩-୧୨)

୪୭ ଜିସୁ ତାର ସିସ୍ତାମନକେ ଏ କାତା କଇବା ବେଲେ ତାର ବାରଟା ସିସ୍ତାମନର୍ ବିତ୍ତରେ ଅନି ଜିଉଦା ନାଉଁର୍ ସିସ୍ ଆସି କେଟିଲା । ତାର ସଙ୍ଗ୍ କାତି କାଣ୍ଡା ଆରି ଚେଙ୍ଗ୍ ତାଙ୍ଗ୍ ଦାରି ବେସି ଲକ୍ ତେଇ ଚୁଲ୍ ଅଇଲାଇ । ସେମନକେ ମୁକିଅ ପୁଜାରିମନ୍ ଆରି ପାର୍ଟିନମନ୍ ପାଟାଇରଇଲାଇ । ୪୮ ବିସ୍ତାସେ ବିସ୍ ଦେଉ ଜିଉଦା ସେମନକେ ଜାନାଇ ରଇଲା । ସେ ସେମନକେ କଇରଇଲା ମୁଇ ଜନ୍ ଲକ୍‌କେ ଚୁମ୍ବି ତାକେ ତମେ କଜ୍‌ଲାସ୍‌ନି, ତାକେ ଦାରା ।

୪୯ ଜିଉଦା ସଲ୍‌କେ ଜିସୁରଲଗେ ଜାଇ ତାକେ “ଏ ଗୁରୁ ଜୁଆର୍ !” ବଲିକରି ଚୁମ୍‌ଲା ।

୫୦ ଜିସୁ ଜିଉଦାକେ କଇଲା, “ମଇତର୍ ତର୍ କାମ୍ ଦାପ୍‌ରେ ସାରାଇଦେସ୍ ।” ତାର ପଚେ ସେମନ୍ ଜିସୁକେ ଦାରି ବାନ୍ଦି ପାକାଇଲାଇ ।

୫୧ ଜିସୁର୍ ବାଟର୍ ଗଟେକ୍ ଲକ୍ ତାର ନିଜର୍ କାଣ୍ଡା ବାରକରାଇ ମୁକିଅ ପୁଜାରିର୍ ଗତିଦାଙ୍ଗ୍‌ତାକେ ମାରଲା । ସେ ଲକର୍ କାନ୍ ଚିଡି ଗାଲା । ୫୨ ଜିସୁ ତାକେ କଇଲା, “ତର୍ କାଣ୍ଡା ପୁରାଇକରି ସଙ୍ଗ୍ । ଜନ୍ ଲକ୍‌ମନ୍ କାଣ୍ଡା ଉଟାଇବାଇ, ସେମନ୍ କାଣ୍ଡାଇସେ ମର୍ବାଇ । ୫୩ ତୁଇ କାଇ ନାଜାନୁସ୍ କି ? ମୁଇ ମର୍ ବାବାକେ ସାଇଜ ମାଙ୍ଗ୍‌ଲେ, ସେ ମର୍ପାଇ ଦାପ୍‌ରେସେ, ବାରଟା ଦଲେଅନି ଅଦିକ୍ ସରଗର୍ ଦୁଡ୍‌ମନକେ ପାଟାଇପାରେ । ୫୪ ମାତର୍ ସେନ୍ତାରି ଆଲେ ଏଟାମନ୍ ସବୁ ଗର୍ସି ବଲି ସାସ୍‌ତରେ ଜାଇ ଜାଇଟା ଲେକା ଅଇଲା ଆଚେ, ସେଟା କେନ୍ତେ ପୁରାପୁରୁନ୍ ଅଇସି ?”

୫୫ \*ତାର ପଚେ ଜିସୁ ତେଇ ଚୁଲ୍‌ଅଇରଇବା ଲକ୍‌ମନକେ କଇଲା, “ମୁଇ କାଇ ଗଟେକ୍ ପାଲାଇବା କାଙ୍ଗାମ୍‌ରେ ଚେଙ୍ଗ୍ ତାଙ୍ଗ୍ ଆରି କାଣ୍ଡା ଦାରି ମକେ ଦାର୍‌ବାର୍ ଆସିଆଗାସ୍ ? ମୁଇ ସବୁ ଦିନ୍ ମନ୍ଦିରେ ବସି ସିକିଆ ଦେଇତେ ରଇଲି, ସେବେଲେତା ମକେ ଦାରାସ୍ ନାଇ ! ୫୬ ଜାଇଟା ଅବେ, ବବିସ୍‌ତ୍‌ବକ୍‌ତାମନ୍ ସାସ୍‌ତରେ ଜାଇଟା ଲେକ୍‌ଲାଇ ଆଚତ୍, ସେ ସବୁ ସିଦ୍ ଅଇବାକେ ଏଟା ଗର୍ଲା ।”

ସେଡ୍‌କିବେଲେ ସିସ୍ତାମନ୍ ସବୁଲକ୍ ଜିସୁକେ ଚାଡି ପାଲାଇଲାଇ ।

ବଡ୍ ସବାଇ ଜିସୁର୍ ବିଚାରନା

(ମାର୍କ ୧୪:୩୫-୬୫; ଲୁକ୍ ୨୨:୪୫-୫୫, ୬୩-୭୧; ଜଅନ୍ ୧୮:୧୩-୧୪, ୧୯-୨୪)

୬୬ ଜିସୁକେ ବନ୍ଦି କରୁମନ୍ ତାକେ ବଡ୍ ପୁଜାରି କାୟାପାର୍ ଗରେ ନେଲାଇ । ସିତି ଦରମ୍ ଗୁରୁ ଆରି ପାର୍ଟିନମନ୍ ଚୁଲ୍ ଅଇରଇଲାଇ । ୬୮ ପିତର୍ କଣ୍ଡେକ୍ ଦୁରିକେ ରଇକରି ଜିସୁକେ ଦେକ୍‌ତେ ରଇଲା । ଆରି ସେ କାୟାପା ଗରର୍ ଡାଣ୍ଡୁଜାକ ଗାଲା । ଏ ସବୁ ଗର୍ନା କାଇଟା ଅଇସି ବଲି ସେଟା ଦେକ୍‌ବାକେ ପିତର୍ ମନ୍ଦିର୍ ଜାଗୁଆଲ୍‌ମନର୍ ସଙ୍ଗ୍ ତେଇ ବସଲା । ୬୯ ମୁକିଅ ପୁଜାରିମନ୍ ଆରି ବଡ୍ ସବାଇ ରଇଲା ସବୁ ଲକ୍‌ମନ୍ ଜିସୁକେ ମରନ୍ ଡଣ୍ଡ ଦେବାକେ ତାର ବିରୁଦେ ମିର୍ କାତା କଜ୍‌ବାକେ ଚେସ୍‌ଟା କଲାଇ । ୭୦ କେତେ କେତେ ଲକ୍‌ମନ୍ ଜିସୁର୍ ବିରୁଦେ ମିର୍ କାତା କଇଲାଇ । ମାତର୍ ସେନ୍ତାରି କାଇ ଚୁଲ୍ କାତା ମିସା ମିଲେ ନାଇ । ପଚେ ଦୁଇଲକ୍ ଉଟିକରି, ୭୧ \* “ଏ ଲକ୍ ମୁଇ ପର୍‌ମେସରର୍ ମନ୍ଦିର୍ ବାଙ୍ଗାଇ ଦେଇ, ସେଟା ତିନ୍ ଦିନ୍ ବିତ୍ତରେ ଆରି ତରେକ୍ ଉଟାଇ ଦେଇପାରି ।” ବଲି କଇରଇଲା । ୭୨ ବଡ୍ ପୁଜାରି ଚିଆଅଇକରି ଜିସୁକେ କଇଲା, “ତୁଇ କାଇକେ କାଇଟାବଲି କଉସ୍ ନାଇ

? ଏମନ୍ କଇବା କାତା ଚାପବାକେ ତୁଇ ଆରି କାଇଟା କଇବାର୍ ଆଚେ କି ?”  
୭୩ ମାତର୍ ଜିସୁ ଚିମ୍ଭରାଅଇ ରଇଲା । ବଡ଼ ପୁଜାରି କଇଲା, “ମୁଇ ତମ୍ଭକେ ଜିବନ୍  
ରଇବା ପର୍ମେସରର୍ ନାଉଁ ଦାରି ପର୍ମାନ୍ କରାଇ ପାଚାରୁଲିନି, ସତ୍ କଅ, ତୁଇ  
କାଇ ପର୍ମେସରର୍ ପିଲା ମସିଅ କି ?”

୭୪ ଜିସୁ କଇଲା, “ତୁଇ ସମାନ୍ କାତା କଇଆରୁସ୍ । ମାତର୍ ମୁଇ ତମ୍ଭକେ ସବୁ  
ଲକ୍ଷକେ କଇଲିନି, ପର୍ମେସର୍ ପାଟାଇଲା ନରୁପିଲା ମୁଇ, ଦାପ୍ତରେ ସେ ସବୁର୍  
ଉପରର୍ ମାପରୁର୍ ଉଜା ବାଟେ ବସବାକେ ଗାଲିନି, ଆରି ମକେ ତମେ ସର୍ଗେଅନି  
ବାଦଲ୍ ସଙ୍ଗ୍ ଉଡ଼ରି ଆଇବାଟା ଦେକ୍‌ସା ।”

୭୫ ଏ କାତା ସୁନି ବଡ଼ ପୁଜାରି ତାର୍ ପିନ୍ଦି ରଇବାଟା ଚିରିପାକାଇ କଇଲା, “ଏଟା  
ସେ ପର୍ମେସର୍‌କେ ନିନ୍ଦା କରବାଟା ! ଆରି ବିନ୍ଦି ସାକି ଦରକାର୍ ନାଇ । ତମେ  
ଏବେସେ ଏ ଲକ୍ ପର୍ମେସର୍‌କେ ନିନ୍ଦା କରବାଟା ସୁନ୍‌ଲାସ୍ । ୭୬ ଏ ବିସଇନେଇ  
କରି ତମେ କାଇଟା ବାବ୍‌ଲାସ୍‌ନି ?”

ସେମନ୍ ସବୁ ଲକ୍ କଇଲାଇ, “ସେ ଦସ୍ କରିଆଚେ, ମରନ୍ ଡଣ୍ ପାଇବାର୍  
ଦରକାର୍ ଆକା ।”

୭୭ ତାର୍ ପଚେ ସେମନ୍ ଜିସୁର୍ ମୁର୍ଁ ତୁକ୍‌ଲାଇ ଆରି ମାରୁଲାଇ । କେତେ ଲକ୍  
ତାକେ ଚାପଡ଼ ସଙ୍ଗ୍ ମାରି କଇଲାଇ, ୭୮ “ଏ କିରିସ୍ଟ ! ବବିସତ୍ କାତା ଅଲପ୍ କଅ  
। ତକେ କେ ମାରୁଲା କଇଦେକ୍ ପନି !”

ପିତର୍ ଜିସୁକେ ନାଜାନି ବଲି କଇଲା

(ମାର୍କ ୧୪:୬୭-୭୨; ଲୁକ୍ ୨୨:୫୭-୬୨; ଜଅନ୍ ୧୮:୧୫-୧୮, ୨୫-୨୭)

୭୯ ପିତର୍ ବଡ଼ ପୁଜାରିର୍ ଦୁଆର୍ ମୁଆଟେ ବସି ରଇଲା ବେଲେ ଗଟେକ୍ ବଡ଼  
ପୁଜାରିର୍ ପାଇଟିକାରିଆନି ଲଗେ ଆସି କଇଲା, “ତୁଇ ମିସା ଗାଲିଲିର୍ ଜିସୁର୍ ସଙ୍ଗ୍  
ରଇଲୁସ୍ କାଇକି ?”

୮୦ ମାତର୍ ପିତର୍ ସବୁର୍ ମୁଆଟେ ନାଡାଇ କରି ଏ କାତା କଇଲା, “ତୁଇ କାଇ  
ବଲି କଇଲୁସ୍‌ନି ମୁଇ ନାଜାନି ।”

୮୧ ଏନ୍ତି କଇକରି ପିତର୍ ଦୁଆର୍ ମୁଆର୍ ଲଗେ ଉଟିଗାଲା । ଆରି ଗଟେକ୍ ବିନ୍ଦି  
ପାଇଟିକାରିଆନି ତାକେ ଦେକି ତେଇ ରଇବା ଲକ୍‌ମନ୍‌କେ କଇଲା, “ଏ ନାଜରିତର୍  
ଜିସୁର୍ ସଙ୍ଗ୍ ରଇଲା ।”

୮୨ ପିତର୍ ଆରି ତରେକ୍ କଇଲା, “ମୁଇ ପର୍ମାନ୍ କରି କଇଲିନି, ସେ ଲକ୍‌କେ  
ନାଜାନି ।”

୮୩ କେତେପର୍ ଗାଲାପଚେ ତେଇ ରଇଲା ଲକ୍‌ମନ୍ ପିତରର୍ ଲଗେ ଆସି  
କଇଲାଇ, “ବାଇଦରେ ତୁଇ ମିସା ସେମନ୍‌ର୍ ବିଡ଼ରେଅନି ଗଟେକ୍ ଲକ୍ । ତର୍  
କାତାବାର୍‌ତାଇଅନି ଏଟା ଜାନା ପଡ଼ିଗାଲାନି ।”

୮୪ ପିତର୍ କଇଲା, “ମୁଇ ପର୍ମାନ୍ କରି କଇଲିନି, ମର୍ କାତା ସତ୍ ଆକା ।  
ନଇଲେ ପର୍ମେସର୍ ମକେ ଡଣ୍ ଦେଅ । ସେ ଲକ୍‌କେ ମୁଇ ନାଜାନି ।” ସେଦାପ୍ତରେ  
କୁକ୍‌ଡା ଡାକ୍‌ଲା ।

୮୫ ଆରି ଜିସୁ ଜନ୍ ଜନ୍ କାତା କଇରଇଲା, କୁକ୍‌ଡା ନ ଡାକ୍‌ତେ ତୁଇ ମକେ ତିନ୍  
ତର୍ ନାଜାନି ବଲି କଇସୁ । ସେ ସବୁ ପିତର୍ ଏଟାଇଲା ଆରି ସେ ବାଇରେ ଜାଇ  
ବେସି ଦୁକ୍ ଅଇ କାନ୍‌ଲା ।



ପିଲାତର୍ ମୁଆଟେ ଜିସୁ

(ମାର୍କ ୧୫:୧; ଲୁକ୍ ୨୩:୧-୨; ଜଅନ୍ ୧୮:୨୮-୩୨)

୧ ତାର ଆରକର ଦିନର ସାକାଲ ସାକାଲ ଜିସୁକେ ମରାଇଦେବାକେ ମୁକିଅ ପୁଜାରିମନ୍ ଆରି ପାର୍ଟିନମନ୍ ରାଜି ଅଇଲାଇ ।

୨ ସେମନ୍ ଜିସୁକେ ସିକିଲି ସକ୍ଟ ବାନ୍ଦି ରମ୍ପରାଇଜର୍ ରାଜା ପିଲାତର୍ ଲଗେ ଦାରିଗାଲାଇ ।

ଜିଉଦାର ମରନ୍  
(ପେରିଡ଼ ୧:୧୮-୧୯)

୩ \*ଜେତେବେଲେ ବିସ୍‌ବାସେ ବିସ୍ ଦେଉ ଜିଉଦା ଜିସୁକେ ମରନ୍‌ର ଡଣ୍ଡ ଆଦେସ୍ ଅଇଲା ଆଚେ ବଲି ସୁନ୍‌ଲା, ସେ ଦୁକ୍ ଅଇ ଏତାଇଲା ଆରି ମୁକିଅ ପୁଜାରିମନ୍‌କେ ଆରି ପାର୍ଟିନମନ୍‌କେ ତିରିସ୍‌ଟା ରୁପାଟାଙ୍ଗା ବାଉତାଇଦେଇ କଇଲା, “ଗଟେକ୍ କାଇ ଦସ୍ ନ ରଇଲା ଲକ୍‌କେ ମୁଇ ବିସ୍‌ବାସେ ବିସ୍ ଦେଲାପାରା କରି ବଡ଼ ପାପ୍ କରିଆଚି ।” ସେମନ୍ କଇଲାଇ, “ତେଇ ଆମର୍ କାଇଟା ଆଚେ ? ସେଟା ତର୍ ନିଜର୍ କାତା ।” ୫ ଜିଉଦା ସେମନ୍ ଦେଇରଇବା ରୁପାଟାଙ୍ଗା ମନ୍ଦିର୍ ବିତ୍‌ରେ ପିଙ୍ଗିଦେଇ ଉଟିଗାଲା । ତାପ୍‌ପଚେ ସେ ଜାଇକରି ଗାଲାଇ ତର୍ ବାନ୍ଦି ଉଡ଼କିଅଇ ମରିଗାଲା ।

୬ ମୁକିଅ ପୁଜାରିମନ୍ ଜିଉଦା ପିଙ୍ଗି ରଇଲା ରୁପାଟାଙ୍ଗାମନ୍ ଟୁଲିଆଇ କଇଲା, “ଏଟା ବନିର୍ ମୁଲିଅ, ଏଟା ମନ୍ଦିର୍‌ର ଦାନଦେବା ଜାଗାଇ ସକ୍ଟାକବାଟା ନିୟ୍‌ମ୍ ବିରୁଦର୍ କାମ୍ ।” ୭ ସେ ତାବୁ କେନ୍ତାରି କର୍‌ଟ କରିଅଇସି, ଏ ବିସଇର୍ କାତାବାଟା ଅଇ କୁମାରକେଡ଼ ନାଉର୍ କଣ୍ଟେକ୍ ଜମି ଗେନ୍‌ଲାଇ । ଏଟା ବିନ୍ ଦେସର୍ ମଲା ଲକ୍‌ମନ୍‌ ପାଇ କବର୍ ଦେବା ଜାଗା ଅଇଲା । ୮ ତେବର୍ ପାଇ ଆଜିକେ ଜାକ ସେ ଜାଗାକେ ବନିର୍ ଜାଗାବଲିକରି କଇଲାଇନି । ୯ ଏ ବିସଇ ନେଇକରି ଜିରିମିୟ୍ ବବିସ୍‌ଡ଼ବକ୍‌ତା ଜେନ୍ତି କଇରଇଲା, ସେଟା ପୁରାପୁରୁନ୍ ଅଇଲା । ଜନ୍‌ଟା ତିରିସ୍ ଟାଙ୍ଗାକେ ବିକ୍‌ବାକେ ଇସ୍‌ରାଇଲର୍ ପିଲାମନ୍ ରାଜି କରିରଇଲାଇ ସେଟା ନେଲାଇ । ୧୦ ଆରି ତିରିସ୍‌ଟା ଅଦ୍‌ଲି ତାବୁ ନେଇ ସେମନ୍ କୁମାର କେଡ଼ ଗେନ୍‌ଲାଇ । ଏଟା କର୍‌ବାକେ ମକେ ମାପୁରୁ ଆଦେସ୍ ଦେଇରଇଲା ।

ପିଲାଡ଼ ଜିସୁକେ ଆଡୁଆ ତାଡୁଆ ପାଚାରଲା  
(ମାର୍‌କ ୧୫:୨-୫; ଲୁକ୍ ୨୩:୩-୫; ଜଅନ୍ ୧୮:୩୩-୩୮)

୧୧ ଜିସୁର୍ ମୁଆଟେ ଦେକି ରମ୍ପ ରାଇଜର୍ ସାସନ୍‌କାରିଆ ପିଲାତ ପାଚାରଲା, “ତୁଇ କାଇ ଜିଉଦି ମନର୍ ରାଜା କି ?” ଜିସୁ ତାକେ କଇଲା, ତୁଇ ସେଟା କଇଲୁସିନି । ୧୨ ମାତର୍ ମୁକିଅ ପୁଜାରିମନ୍ ଆରି ପାର୍ଟିନମନ୍ ଜିସୁର୍ ବିରୁଦେ ଆନିରଇବା ନିନ୍ଦା କାତାର କାଇମିସା ଉତର୍ ଦେଏ ନାଇ ।

୧୩ ତେବର୍ ପାଇ ପିଲାଡ଼ ତାକେ କଇଲା, ତର୍ ବିରୁଦେ ସେମନ୍ ଜାଇ ଜାଇଟା କଇଲାଇନି ସେଟା କାଇ ତୁଇ ସୁନି ନାପାର୍‌ଲୁସିନି କି ? ୧୪ ମାତର୍ ଜିସୁ ପଦେକ୍ ମିସା କଏନାଇ ଜେ ପିଲାଡ଼ କାବାଅଇଗାଲା ।

ଜିସୁକେ ମରନ୍‌ର ଡଣ୍ଡ ଦେଲା  
(ମାର୍‌କ ୧୫:୬-୧୫; ଲୁକ୍ ୨୩:୧୩-୨୫; ଜଅନ୍ ୧୮:୩୯; ୧୯:୧୬)

୧୫ ନିସ୍‌ତାର୍ ପରର୍ ବେଲେ ରମିୟ୍ ସାସନ୍‌କାରିଆ ଲକ୍‌ମନ୍‌ ମନ୍ କଲା ଇସାବେ କାକେ ମିସା ଗଟେକ୍ ବନ୍ଦି ଲକ୍‌କେ ବନ୍ଦିଗରେଅନି ମୁକ୍‌ଲାଇଦେବା ରିତିନିତି ରଇଲା । ୧୬ ସେବେଲେ ବାର୍‌ବା ନାଉର୍ ଗଟେକ୍ ବଡ଼ ଟାଉଟରିଆ ନର୍‌ମାରୁ ବନ୍ଦି ଅଇରଇଲା । ୧୭ ତେଇ ଆସି ରଇଲା ଲକ୍‌ମନ୍‌କେ ପିଲାଡ଼ ପାଚାରଲା, “ମୁଇ କାକେ ମୁକ୍‌ଲାଇ ଦେବି ବଲି ତମେ ମନ୍ କଲାସିନି ? ବାର୍‌ବାକେ କି ଜିସୁକେ, ଜାକେ

\* ୨୭:୩ ୨୭:୩ ପେରିଡ଼ ୧:୧୮, ୧୯

କିରିସ୍ତ ବଲି କଇବାଇ ?” ୧୮ ପିଲାଡ଼, ଜିଉଦି ନେତାମନ୍ ଆକାର୍ ଅଇ ଜିସୁକେ ତାର୍‌ଟାନେ ସର୍ପିଦେଇ ଆତଡ଼ ବଲି ନିକ ସଙ୍ଗ୍ ଜାନିରଇଲା ।

୧୯ ପିଲାଡ଼ ବିଚାରନା ଜାଗାଇ ବସି ରଇଲାବେଲେ ତାର୍ ମାଇଜି ଗଟେକ୍ କବର୍ କଇଲା, “କାଇ ଦସ୍‌ପାପ୍ ନ କଲା ସେ ଲକ୍‌କେ କାଇଟା କରା ନାଇ । କାଲି ରାତି ସପ୍‌ନେ ତାର୍ ଲାଗି ମୁଇ ବେସି କସ୍‌ଟ ପାଇଲି ।”

୨୦ ମୁକିଅ ପୁଜାରିମନ୍ ଆରି ପାର୍‌ତିନମନ୍ ବାର୍‌ବାକେ ମୁକ୍‌ଲାଇ ଦେଇକରି, ଜିସୁକେ ମରନ୍ ଡଣ୍ ଡେବାକେ ଲକ୍‌ମନ୍‌କେ ପିଲାଡ଼ର୍ ଲଗେ ଜାଇ ଦାବି କର୍‌ବାକେ ଉସ୍‌କାଇଲା । ୨୧ ପିଲାଡ଼ ଆରି ତରେକ୍ ଲକ୍‌ମନ୍‌କେ ପାଚାର୍‌ଲା, “ମୁଇ ଏ ଦୁଇ ଲକ୍‌ର୍ ବିଡ଼ରେଅନି କାକେ ମୁକ୍‌ଲାଇ ଦେବି ବଲି ତମେ ମନ୍ କଲାସ୍‌ନି ?”

ସେମନ୍ କଇଲାଇ, “ବାର୍‌ବାକେ ”

୨୨ ପିଲାଡ଼ ପାଚାର୍‌ଲା, “ତେବେ ସବୁ ଲକ୍ ମସିଅ ବଲି ଜାନିରଇଲା ଜିସୁକେ ମୁଇ କାଇଟା କର୍‌ବି ?” “ତାକେ କୁର୍‌ସେ ଚଗାଆ” ବଲି ସବୁଲକ୍ ଆଉଲି ଅଇଲାଇ ।

୨୩ ପିଲାଡ଼ ପାଚାର୍‌ଲା, “ମାତର୍ ସେ କାଇ ଦସ୍ କଲା ଆଚେ ?”

ସେମନ୍ ଆରି ଅଦିକ୍ ଆଉଲିଅଇ କଇବାର୍ ଦାର୍‌ଲାଇ “ତାକେ କୁର୍‌ସେ ଚଗାଆ ।”

୨୪ ଜେତେବେଲେ ପିଲାଡ଼ ଦେକ୍‌ଲା ଜେ ସେମନ୍‌କେ ଆରି କାଇଟା କଇକରି ମିସା ଲାବ୍ ନାଇ, ନଇଲେ ଗଣ୍‌ଗଲ୍ ଅଇବାର୍ ଉପ୍‌ରେ ଆଚେ, ସେ ପାନି ଗୁଡ଼ିକ୍ ନେଇ, ସବୁ ଲକ୍‌ମନ୍‌ର୍ ମୁଆଟେ ଆଡ଼ ଦଇପାକାଇ କଇଲା, “ଏ ଲକ୍‌ର୍ ମରନ୍‌ର୍ ପାଇ ମୁଇ ଦାଇ ନାଇ । ଏଟା ତମର୍ କାମ୍ ।”

୨୫ ଲକ୍‌ମନ୍ କଇଲାଇ, “ତାର୍ ମରନ୍‌ର୍ ଡଣ୍‌ର୍ ଦସ୍ ପାଇବାର୍ ରଇଲେ, ସେ ଦସ୍ ଆମ୍‌କେ ଆରି ଆମ୍‌ର୍ ପିଲାଜିଲାକେ ପଡ଼ ।”

୨୬ ସାରାସାରି ପିଲାଡ଼ ବାର୍‌ବାକେ ମୁକ୍‌ଲାଇଦେଇ ଜିସୁକେ କର୍‌ଡ଼ା ସଙ୍ଗ୍ ମାର୍‌ବାକେ ଆଦେସ୍ ଦେଲା, ତାର୍ ପଚେ କୁର୍‌ସେ ମରାଇବା ପାଇ ସନିଅମନ୍‌କେ ସର୍ପି ଦେଲାଇ ।

ସନିଅମନ୍ ଜିସୁକେ କିଜାଇଲାଇ

(ମାର୍‌କ୍ ୧୫:୧୬-୨୦; ଜଅନ୍ ୧୯:୨-୩)

୨୭ ପିଲାଡ଼ର୍ ସନିଅମନ୍ ଜିସୁକେ ରମିୟ୍ ସାସନ୍‌କାରିଆର୍ ଗରେ ଦାରି ଗାଲାଇ ଆରି ତାର୍ ଚାରିବେଟ୍‌ଟି ଚିଆଅଇଲାଇ । ୨୮ ସେ ପିନ୍ ରଇବାଟା ବେଟି ନେଇକରି ତାକେ ଗଟେକ୍ ଜାମ୍‌କଲି ରଙ୍‌ର୍ ବସ୍‌ତର୍ ପିନ୍‌ଆଇ ଦେଲାଇ । ୨୯ କାଟାର୍ ମୁକୁର୍ ତିଆର୍ କରି ତାର୍ ମୁଣ୍ଡେ ପିନ୍‌ଆଇ ଦେଲାଇ ଆରି ତାର୍ ଉଜା ଆଡେ ଗଟେକ୍ ଡାଙ୍ଗ୍ ଦାରାଇ ଦେଲାଇ । ତାର୍ ପଚେ, ତାର୍ ମୁଆଟେ ମାଣ୍ଡିକୁଟା ଦେଇ କିଜାଇକରି କଇଲାଇ, “ଏ ଜିଉଦିମନ୍‌ର୍ ରାଜା ! ବେସି ଦିନ୍ ବଟି ରଅ ।” ୩୦ ସେମନ୍ ଜିସୁର୍ ଉପ୍‌ରେ ତୁକି ପାକାଇଲାଇ ଆରି ସେ ଦାରି ରଇବା ଡାଙ୍ଗ୍‌ସଙ୍ଗ୍ ତାର୍ ମୁଣ୍ଡେ ମାର୍‌ଲାଇ । ୩୧ ତାକେ ଏନ୍ତାରି କିଜାଇ ସାର୍‌ଲା ପଚେ ରାଜା ପିନ୍‌ବା ବସ୍‌ତର୍ ବେଟିଦେଇ ତାର୍ ନିଜର୍ ବସ୍‌ତର୍ ପିନ୍‌ଆଇଦେଲାଇ ଆରି ତେଇଅନି ତାକେ କୁର୍‌ସେ ଚଗାଇବାକେ ଦାରିଗାଲାଇ ।

ଜିସୁକେ କୁର୍‌ସେ ଚଗାଇଲାଇ

(ମାର୍‌କ୍ ୧୫:୨୧-୩୨; ଲୁକ୍ ୨୩:୨୬-୪୩; ଜଅନ୍ ୧୯:୧୭-୨୭)

୩୨ ସେମନ୍ ଜିବାବାଟେ କୁରିଣି ସଅରର୍ ସିମନ୍ ନାଉର୍ ଗଟେକ୍ ଲକ୍‌କେ ବେଟ୍‌ଅଇଲାଇ ଆରି ସନିଅମନ୍ ତାକେ ଜିସୁର୍ କୁର୍‌ସ ବଇ ନେବାକେ ବାଦିଅ କଲାଇ ।

୩୩ ସେମାନ ଗଲଗତା ନାଉଁର ଗଟେକ୍ ଜାଗାଇ କେଟ୍‌ଲାଲ । ଗଲଗତାର୍ ଅରଡ୍ ଅଇଲାନି, ମୁଣ୍ଡଗିଗ୍ତି ପାରା ରଇବା ଜାଗା । ୩୪ ତେଇ ସେମାନ ଜିସୁକେ ପିତା ରଇବା ଅଙ୍ଗୁର୍ ରସ୍ କାଇବାକେ ଦେଲାଲ । ସେଟା ଜିସୁ ଅଲପ୍ ଚାକିକରି ଆରି କାଏନାଇ ।

୩୫ ସେମାନ ଜିସୁକେ କୁର୍ସେ ମାରି କରି ସେ ପିନ୍ଦିରଇବା ବସ୍ତର୍ ତାକର୍ ତାକର୍ ବିଡ୍‌ରେ କେଡ୍‌ପୁଟାଇ ବାଟାକରି ନେଲାଲ । ୩୬ ତାର୍‌ପଟେ ସେମାନ କୁର୍ସେ ଚଗାଇଲା ଜିସୁକେ, ତେଇ ଜାଗି ରଇଲାଲ । ୩୭ ତାର୍ ବିରୁଦେ ଲେକାଅଇରଇବା ଗଟେକ୍ ବରଡ୍ ଲେକି ତାର୍ ମୁଣ୍ଡ ଉପ୍‌ରେ, ଜୁଲାଇ ରଇଲାଲ । ସେ ବରଡ୍ ଲଗେ ଏନ୍ତି ଲେକାଅଇରଇଲା, ଏ ଅଇଲାନି ଜିଉଦିମନର୍ ରାଜା, ଜିସୁ ।

୩୮ ତାର୍‌ପଟେ ସେମାନ ତେଇ ଦୁଇଟା ଚର୍ମନକେ ଆନ୍‌ଲାଲ । ଗଟେକ୍‌କେ ଜିସୁର୍ ଉଜା ବାଟେ ଆରି ଗଟେକ୍‌କେ ତାର୍ ଡେବ୍‌ରି ବାଟେ କୁର୍ସେ ଚଗାଇଲାଲ ।

୩୯ ସେବାଟେ ଜାଇତେ ରଇବା ଲକ୍‌ମନ୍ ମୁଣ୍ଡ ଜୁଲାଇ ଜୁଲାଇ ଜିସୁକେ କିଜାଇ କିଜାଇ କଇଲାଲ, ୪୦ “ତୁଇସେ କାଇକି ମାନ୍‌ର୍ ବସ୍‌ଲାଲଦେଇ ତିନ୍ ଦିନ୍‌କେ ଆରି ତରେକ୍ ତିଆର୍ କରିଦେଇତେ ରଇଲୁସ୍ ? ତୁଇ ଜଦି ପର୍ମେସରର୍ ପଅ, ନିଜ୍‌କେ ରକିଆ କର୍ ଆରି କୁର୍ସେଅନି ଉଡ୍‌ରି ଆଉ ।”

୪୧ ମୁକିଅ ପୁଜାରି, ଦରମ୍ ଗୁରୁ ଆରି ଜିଉଦି ଜାତିର୍ ପାର୍‌ଚିନ୍ ନେତାମନ୍ ମିସା ଜିସୁକେ କିଜାଇକରି କଇଲାଲ, ୪୨ “ସେ ବିନ୍ ଲକ୍‌ମନ୍‌କେ ରକିଆ କର୍ତେ ରଇଲା, ମାତର୍ ନିଜ୍‌କେ ରକିଆ କରିନାପାର୍‌ଲାନି । ସେ ଇସ୍‌ରାଏଲର୍ ରାଜା କାଇକି ? ଏବେ ଜଦି ସେ କୁର୍ସେଅନି ଉଡ୍‌ରି ଆସି ପାର୍‌ସି ବଇଲେ ଆମେ ତାକେ ବିସ୍‌ବାସ୍ କରବୁ । ୪୩ ସେ ନିଜେ ମୁଇ ପର୍ମେସରର୍ ପଅ ବଲି କଇ, ପର୍ମେସର୍‌ଟାନେ ଆସା କଲାଆଟେ । ଆଲେ ଦେକୁ ତେବେ, ପର୍ମେସର୍ ତାକେ ଏବେ ରକିଆ କର୍ବାକେ ମନ୍ କଲାନି କି ନାଇ ।”

୪୪ ଜିସୁର୍ ସକ୍ କୁର୍ସେ ଚଗିରଇବା ଦୁଇଟା ଚର୍ମନ ମିସା ତାକେ ସେନ୍ତାରି କିଜାଇଲାଲ ।

ଜିସୁର୍ ମରନ୍

(ମାର୍‌କ ୧୫:୩୩-୪୧; ଲୁକ୍ ୨୩:୪୪-୪୯; ଜଅନ୍ ୧୯:୨୮-୩୦)

୪୫ ସେ ଦିନେ ମୁଣ୍ଡବେଲାଲ ଅନି ଆଡ୍‌ବେଲାଲ ଜାକ ଗୁଲାଇ ଜଗଡ୍ ଆନ୍ଦାର୍ ଅଇଗାଲା ଆରି ସେଟା ତିନ୍ ଗନ୍‌ଟାଜାକ ରଇଲା ।

୪୬ ଆଡ୍‌ବେଲାର୍ ତିନ୍‌ଟା ବେଲେ ଜିସୁ ଆକ୍‌ମାରି କଇଲା, “ଏଲି, ଏଲି, ଲାମାସ୍‌ବକ୍‌ତାନି, ବଇଲେ ଏ ମର୍ ପର୍ମେସର୍, ଏ ମର୍ ପର୍ମେସର୍, ମକେ ତମେ କାଇକେ ଚାଡିଦେଲାସ୍ ?”

୪୭ ଲଗେ ଟିଆ ଅଇରଇବା କେତେ ଲକ୍ ଏଟା ସୁନିକରି କଇଲାଲ, “ସେ ଏଲିୟକେ ଡାକ୍‌ଲାନି ।”

୪୮ ଗଟେକ୍ ଲକ୍ ପାଲାଲ ଜାଇ ପିତା ରଇଲା ଅଙ୍ଗୁର୍‌ରସ୍‌ଟାନେ ଗଟେକ୍ ସୁତାର୍ ଗରଣ୍ଡା ବୁଡାଇଲା । ଆରି ସେଟା ଲାଟି ଟିପେ ବାନ୍ଦି କାଅ ବଲି ଜିସୁର୍ ମୁଆଟେ ଲାମାଲୁଦେଲା ।

୪୯ ବିନ୍ ଲକ୍‌ମନ୍ କଇଲାଲ “ଚନେକ୍ ଜାଗା, ତାକେ ଏଲିୟ ରକିଆ କର୍ବାକେ ଆଇଲାନି କି ନାଇ ଦେକିଦେକୁ ।” ୫୦ ଜିସୁ ଆରି ତରେକ୍ ଆକ୍‌ମାରିକରି, ସାରାସାରି ଜିବନ୍ ଚାଡିଗାଲା ।

୫୧ ସେଡ୍‌କି ବେଲେ ମନ୍ଦିରେ ଜୁଲୁଡେ ରଇବା ପାର୍‌ଦା ଉପ୍‌ରେଅନି ତଲେ ଜାକ ଦୁଇ ଗନ୍ଦାଅଇ ଚିରିଅଇଗାଲା । ଦର୍ତ୍ତନି ବୁଲ୍‌ବୁଲି ପାକ୍‌ନାମନ୍ ସବୁ ପୁଟିଗାଲା ୫୨ ଆରି କବର୍ ଦେଇରଇବା କାଲ୍‌ମନ୍ ଉଗାଡିଅଇ କେଡେକ୍ କେଡେକ୍

☆ ୨୭:୪୦ ୨୭:୪୦ ମାଡ଼ିର ୨୭:୭୧; ଜଅନ୍ ୨:୧୯

ପରମେସରର ଦରମ୍ ଲକ୍ଷ୍ମୀନ୍ ଆରିତରେକ୍ ଜିବନ୍ ଅଇ ଉଟ୍ଟଲାଇ । ୫୩ ସେମନ୍ କବର୍ ଦେଇରଇବା କାଲେଅନି ଉଟି ଆଇଲାଇ । ଜିସୁ ଆରିତରେକ୍ ଉଟ୍ଟଲା ପତେ ଲକ୍ଷ୍ମୀନ୍, ଏମନ୍କେ ସୁକଲ୍ ଜାଗା ଜିରୁସାଲମେ ଜିବାଟା ଦେକ୍ଲାଇ ।

୫୪ ଦରତନି ତୁଲ୍‌ତୁଲି ବିନ୍ ବିନ୍ ଗଟ୍ଟନା ଅଇବାଟା ଦେକି, ଜିସୁକେ ଜାଗିରଇବା ସନିଅମନ୍‌ର ମୁକିଅ ଆରି ବିନ୍ ସନିଅମନ୍ ଡରିଗାଲାଇ । ସେମନ୍ କଇଲାଇ, “ସତଇସେ ଏ ନିଜେ ପରମେସରର ପଅ ଆକା !”

୫୫ ଶାଲିଲିଅନି ଜିସୁର ସଙ୍ଗ୍ ରଇକରି ତାକେ ସାଇଜ କରିରଇବା କେତେଟା ମାଇଜି ଦୁରିକେ ରଇକରି ଏଟା ସବୁ ଦେକ୍‌ତେ ରଇଲାଇ । ୫୬ ସେମନ୍‌ର ବିତ୍‌ରେ ମଗ୍‌ଦଲିନି ମରିୟମ୍, ଜାକୁବ୍ ଆରି ଜସେପର୍ ମାଆ ମରିୟମ୍ ଆରି ଜେବଦିର୍ ମାଇଜି ରଇଲାଇ ।

ଜିସୁକେ କବର୍ ଦେଲାଇ

(ମାର୍‌କ ୧୫:୪୨-୪୭; ଲୁକ୍ ୨୩:୫୦-୫୬; ଜଅନ୍ ୧୯:୩୮-୪୨)

୫୭ ସଞ୍ଜବେଲାଇ ଆରାମାତିଆ ସଅରର୍ ଜସେପ୍ ନାଉର୍ ଗଟେକ୍ ସାଉକାର୍ ଆସି କେଟ୍‌ଲା । ସେ ମିସା ଗଟେକ୍ ସିସ୍ ରଇଲା । ୫୮ ସେ ପିଲାତ୍‌କେ ବେଟ୍‌ଅଇକରି ଜିସୁର ମଲାମଡ୍ ଦାରିଜିବାକେ ଗୁଆରି କଲା । ଜସେପ୍ ଗୁଆରଲାକେ ପିଲାତ୍ ମଡ୍ ନେବାକେ ଆଦେସ୍ ଦେଲା । ୫୯ ସେ ଜିସୁର ଗାଗଡ୍ ଦାରିଗାଲା ଆରି ଗଟେକ୍ ନୁଆ ଚାଦର୍ ଗରଣ୍ଡାଇ ଗୁଡିଆଇ ଦେଲା । ୬୦ ପାକ୍‌ନାଇ ତାକର୍ ନିଜର୍ ପାଇ କୁନି ରଇବା ଗଟେକ୍ ନୁଆ କବର୍ ଦେବା ପାଆରେ ସେଟା ନେଇ ସଙ୍ଗିଲଲା ଆରି ସେ ପାଆର୍ ମୁଆଟେ ଗଟେକ୍ ବଡ଼ଟା ଚାତଡା ପାକ୍‌ନା ଡାବିଦେଇ ଉଟିଗାଲା । ୬୧ ମଗ୍‌ଦଲିନି ମରିୟମ୍ ଆରି ବିନ୍ ମରିୟମ୍ ଜିସୁକେ କବର୍ ଦେଲା ପାଆର୍ ମୁଆଟେ ବସି ରଇଲାଇ ।

ମସନ୍ ଜାଗୁଆଲ୍‌ମନ୍

୬୨ ତାର୍ ଆରକର୍ ଦିନର୍ ବିସରାମ୍‌ବାରେ ମୁକିଅ ପୁଜାରିମନ୍ ଆରି ପାରୁସିମନ୍ ପିଲାତ୍‌କେ ବେଟ୍‌ଅଇ କଇଲାଇ, ୬୩ ☆“ଆଗିଆଁ, ସେ ବେସି ମିରୁଆଟା । ବଠିରଇଲାବେଲେ ‘ମୁଇ ତିନ୍‌ଦିନ୍ ପତେ ଆରିତରେକ୍ ଉଟ୍‌ବି’ ବଲି କଇତେ ରଇଲା । ଏଟା ଆମର୍ ମନେ ଆଟେ । ୬୪ ତେବର୍ ପାଇ ତିନ୍ ଦିନ୍ ଜାକ ତାକେ କବର୍ ଦେଲାଟାନ୍‌ନେ ଜାଗୁଆଲ୍ ଦାର୍‌ବାକେ ଆଦେସ୍ ଦିଆସ୍ । ସେକ୍ତି କଲେ ତାର୍ ସିସ୍‌ମନ୍ ତାର୍ ଗାଗଡ୍ ଚରାଇନେଇ ସେ ଜିବନ୍ ଅଇକରି ମଲାତେଇଅନି ଉଟ୍ଟଲା ବଲି କଇନାପାରଡ୍ ।” ସେମନ୍‌ର ଏକ୍ତାରି ମିର୍ କାତା ଜାନାଇବାଟା ସବୁଟାନ୍‌ନେଅନି ଅଦିକ୍ କେଡି ଅଇସି ।

୬୫ ପିଲାତ୍ କଇଲା, “ଗଟେକ୍ ଦଲ୍ ଜାଗୁଆଲ୍‌ମନ୍‌କେ ନିଆ ଆରି ତାକେ କବର୍ ଦେଲାଟାନ୍‌ନେ କାଇଟା ନ ପୁର୍‌ଲା ପାରା ଜାଗାଆ ।”

୬୬ ସେମନ୍ ଜାଇକରି ଜିସୁକେ କବର୍ ଦେଲାଟାନ୍‌ନେ ଜାଗ୍‌ବାକେ ସନିଅମନ୍ ଟିକ୍ କଲାଇ । କବର୍ ମୁଆଟେ ଡାବି ରଇବା ପାକ୍‌ନା ଉପ୍‌ରେ ସିଲ୍‌ମାରି ଜାଗୁଆଲ୍‌ମନ୍‌କେ ଜାଗାଇଲାଇ ।

# ୨୮

ଜିସୁ ମରିକରି ଆରିତରେକ୍ ଉଟ୍‌ବାଟା

(ମାର୍‌କ ୧୬:୧-୧୦; ଲୁକ୍ ୨୪:୧-୧୨; ଜଅନ୍ ୨୦:୧-୧୦)

୧ ବିସରାମ୍‌ବାରେ ଆରକର୍ ଦିନେ, ରଇବାର୍ ସାକାଲେ ମଗ୍‌ଦଲିନି ମରିୟମ୍ ଆରି ବିନ୍ ମରିୟମ୍ ଜିସୁକେ ସଙ୍ଗିରଇବା କବର୍ ଦେକ୍‌ବାର୍ ଗାଲାଇ ।

☆ ୨୭:୫୫ ୨୭:୫୫ ଲୁକ୍ ୮:୨,୩ ☆ ୨୭:୬୩ ୨୭:୬୩ ମାତ୍ରିକ ୧୭:୨୧;୧୭:୨୩;୨୦:୧୯; ମାର୍‌କ ୮:୩୧;୯:୩୧;୧୦:୩୩,୩୪; ଲୁକ୍ ୯:୨୨;୧୮:୩୧-୩୩

୨ ସେତକିବେଲେ ଅଗାଡ଼ ଦରତନି ତୁଲ୍‌ବୁଲିଗାଲା । ଏଦେ ଦେକା ! ମାପରୁର୍ ଗଟେକ୍ ସରଗ୍ ଦୁଡ଼ ଉଡ଼ରି ଆସି, କବର୍ ମୁଆଟେ ତାବିରଇଲା ପାକ୍‌ନା ତୁଲ୍‌ଗୁଡାକଦେଇ ତାର୍ ଉପ୍‌ରେ ବସି ରଇଲା । ୩ ତାର୍ ଗୁଲାଇ ଗାଗଡ଼ ବିଜ୍‌ଲି ପାରା ଜଟକ୍‌ତେରଇଲା ଆରି ସେ ପିନ୍‌ରଇବାଟା ବରପ୍ ପାରା ଚିଟ୍ ଦବ୍ ରଇଲା । ୪ ଜାଗୁଆଲ୍‌ମନ୍ ଦୁଡ଼କେ ଦେକି ଡରି ତରତରି ଗାଲାଇ ଆରି ମଲା ଲକରପାରା ଅଇଗାଲାଇ । ୫ ସରଗର୍ ଦୁଡ଼ ମାଇଜିମନ୍‌କେ କଇଲା, “ତରା ନାଇ । ମୁଇ ଜାନି, ତମେ କୁରସେ ମରିରଇବା ଜିସୁକେ ଦେକ୍‌ବାର୍ ଆସିଆଟାସ୍ ।” ୬ ସେ ଇତି ନାଇ । ସେ କଇଲା ଇସାବେ ଆରି ତରେକ୍ ଉଚି ଆଟେ । ଆସି ଦେକା, ଇତି ତାର୍ ମଲା ଗାଗଡ଼ ସଙ୍ଗିରଇଲାଇ ।”

୭ “ତମେ ଦାପ୍‌ରେ ଜାଇ ତାର୍ ସିସ୍‌ମନ୍‌କେ କୁଆ, ସେ ଆରି ତରେକ୍ ଜିବନ୍ ଅଇଆଟେ ଆରି ତମର୍ ଆଗେ ଆଗେ ଗାଲିଲି ଗାଲା ଆଟେ । ତମେ ତେଇ ତାକେ ଦେକ୍‌ସା । ମୁଇ ଜାଇଟା କଇଲି ମନେ ରକିରୁଆ ।”

୮ ଏ କାତାସୁନି ସେମନ୍ ଦାପ୍‌ରେ କବର୍‌ଦେଲା ଟାନେଅନି ସିସ୍‌ମନ୍‌ର ଲଗେ ପାଲାଇଲାଇ । ତରିକରି ରଇଲେ ମିସା, ତାକର୍ ମନେ ବେସି ସାର୍‌ଦା ଜାନିପାର୍‌ତେ ରଇଲାଇ ।

୯ ସେଦାପ୍‌ରେ ଜିସୁ ସେମନ୍‌କେ ବେଟ୍‌ଅଇ କଇଲା, “ତମ୍‌କେ ସାନ୍ତି ମିଲ !” ସେମନ୍ ଜିସୁର୍ ଲଗେ ଜାଇ ତାର୍ ପାଦ୍ ଦାରି ଜୁଆର୍ କଲାଇ । ୧୦ ଜିସୁ ସେମନ୍‌କେ କଇଲା, “ତରା ନାଇ । ମର୍ ବାଇମନ୍‌କେ କୁଆ, ସେମନ୍ ଗାଲିଲି ଆସଡ଼ । ତେଇ ସେମନ୍ ମକେ ଦେକ୍‌ବାଇ ।”

**ଜାଗୁଆଲ୍‌ମନ୍ ଜାନାଇବାଟା**

୧୧ ମାଇଜିମନ୍ ତେଇଅନି ଇଣ୍ଡିଜାଇତେ ରଇଲାଇ । ଜିବାବେଲେ ଜିସୁକେ କବର୍ ଦେଇ ରଇବାଟାନେ ଜାଗି ରଇଲା କେତେଟା ସନିଅମନ୍ ନଅରେ ବାଉଡ଼ି ଗାଲାଇ । ଜାଇକରି ମୁକିଅ ପୁଜାରିମନ୍‌କେ ଏ ସବୁ ଅଇଲାଟା ଜାନାଇଲାଇ । ୧୨ ମୁକିଅ ପୁଜାରିମନ୍ ପାର୍‌ଚିମ୍‌ମନ୍‌ର ସଙ୍ଗି ମିସି କୁଟ୍ ପାଁର୍‌ଲାଇ । ସେମନ୍ ସନିଅମନ୍‌କେ ବେସି ତାରୁ ଲାଁର୍‌ଦେଇ କଇଲାଇ, ୧୩ ତମେ କୁଆ “ଆମେ ରାତିଆ ସଇଦେଇ ରଇଲା ବେଲେ ତାର୍ ସିସ୍‌ମନ୍ ଆସି ତାର୍ ମଲା ଗାଗଡ଼ ତରାଇ ଦାରିଗାଲାଇ । ୧୪ ଜଦି ସାସନ୍‌କାରିଆ ଏ କାତା ନ ସୁନ୍‌ସି, ବଇଲେ ତମର୍ ଦସ୍ ନାଇ ବଲି ଆମେ ବୁଜାଇ ଦେବୁ । ଏ ବିସଇନେଇ ତମେ ଦାନ୍ଦା ଉଆନାଇ ।”

୧୫ ସନିଅମନ୍ ତାରୁ ନେଇକରି, ସେମନ୍‌କେ କଇରଇଲା ଇସାବେ କାମ୍ କଲାଇ । ସେମନ୍ ସେବେଲେ ଜେନ୍ତି କଇରଇଲାଇ, ଜିଉଦିମନ୍ ଆଜିକେ ଜାକ ସେ କାତା ଜାନାଇଲାଇନି ।

**ଜିସୁ ସିସ୍‌ମନ୍‌କେ ଦେକାଇ ଅଇଲା /**

(ମାର୍‌କ ୧୬:୧୪-୧୮; ଲୁକ୍ ୨୪:୩୬-୩୯; ଜଅନ୍ ୨୦:୧୯-୨୩; ପେରିଡ଼ ୧:୬-୮)

୧୬ \*ଜିସୁ କଇବା ଇସାବେ ତାର୍ ଏଗାର୍‌ଟା ସିସ୍‌ମନ୍ ଗାଲିଲିର୍ ଗଟେକ୍ ତଙ୍ଗର୍ ଉପ୍‌ରେ ଗାଲାଇ । ୧୭ ଜିସୁକେ ତଙ୍ଗର୍ ଉପ୍‌ରେ ଦେକି ସେମନ୍ ତାକେ ଜୁଆର୍ କଲାଇ । କେତେ ଲକ୍ ବିସ୍‌ବାସ୍ କରଡ଼ ନାଇ । ୧୮ ଜିସୁ ସେମନ୍‌ର ଲଗେ ଜାଇ କଇଲା, “ସରଗ୍ ଆରି ମର୍‌ପୁରର୍ ସବୁ ଅଦିକାର୍ ମକେ ଦିଆଅଇଲା ଆଟେ । ୧୯ \*ତେବେ ତମେ ଦେସ୍‌ମନ୍‌କେ ରଇବା ସବୁ ବାସାର୍ ଲକ୍‌ମନ୍‌ର ଲଗେ ଜାଇ, ସେମନ୍‌କେ ମର୍ ସିସ୍ କରାଆ । ବାବା, ପଅ ଆରି ସୁକଲ୍ ଆଡ଼ମାର୍ ନାଉଁଦାରି ସେମନ୍‌କେ ତୁବନ୍ ଦିଆସ୍ । ୨୦ ଆରି ମୁଇ ଜନ୍ ସବୁ ସିକିଆ ଦେଇଆତି, ସେଟା ମାନା

\* ୨୮:୧୨ ୨୮:୧୬ ମାତ୍ରିକ ୨୭:୩୨; ମାର୍‌କ ୧୪:୨୮ \* ୨୮:୧୯ ୨୮:୧୯ ପେରିଡ଼ ୧:୮

ବଲି ସିକାଆ । ଆରି ମନେ ରଅ, କାଲ୍ କାଲ୍ ଜୁର୍ ଜୁର୍ ମୁଇ ସବୁବେଳେ ତମର୍ ସଙ୍ଗ୍  
ରଇବି ।”



# ଯୀଶୁଖ୍ରୀଷ୍ଟଙ୍କ ବିଷୟରେ ମାର୍କ ଲେଖିଥିବା ସୁସମାଚାର ଜିସୁକିରିସ୍ଟର ବିସଇରେ ମାର୍କଙ୍କ ଲେଖିଲା ନିମାନ୍ କବର୍ ଏ ବଇ ବିସଇରେ ଜାନ୍‌ବାଟା

ଜିସୁ ମାପୁରୁର ଜିବନ୍ ବିସଇର ଚିକି ନିକି କାତା କରିରଇବା ନୁଆ ନିୟମର ଚାରିଟା ବଇ ବିଡ଼ରେଅନି ମାର୍କଙ୍କ ଲେଖିରଇବା ସୁବକବର୍ ଅଇଲାନି ଗଟେକ୍ । ସେ ଚାରଟା ବଇକେ ସୁସମାଚାର ବଲି କଇବାଇ । ଜନ୍‌ଟାର ଅରଡ଼ କି “ସୁବକବର୍ ।” ସେଟା ସବୁ ଜିସୁର ମରନ୍ ପଟେ ମାଡ଼ିଉ, ମାର୍କ, ଲୁକ୍ ଆରି ଜଅନର୍ ଲାଗି ଲେକା ଅଇଲା ଆଟେ । ଚାରିଟା ସୁବକବର୍ ବିଡ଼ରେଅନି ମାର୍କଙ୍କ ଲେଖିରଇବା ସୁବକବର୍ ଅଇଲାନି ସବୁରଟାନେଅନି ସାନ୍‌ଟା । ଏଟାକେ ଏନ୍ତି ମିସା ବିସବାସ୍ କରବାଇ ଜେ ଏଟା ସୁବକବର୍ମନର୍ ବିଡ଼ରେ ଅନି ସବୁର ଆଗୁଡୁ କିରିସ୍‌ଟାଦ ୬୫-୭୦ ବିଡ଼ରେ ଲେକାଅଇଲା । କେତେକ୍ ବାଇବଲ୍ ପଣ୍ଡିତମନ୍ ବିସବାସ୍ କରବାଇ ଜେ ରମ୍ ଦେସେ ରଇବା କିରିସ୍‌ଟାନି ମନ୍‌କେ ସାର୍‌ଦା କରାଇବାପାଇ ବଲି ରମ୍‌ଦେସେ ଏଟା ଲେକାଅଇଲାଆଟେ । ମାର୍କ, ଜେ କି ଜଅନ୍ ମାର୍କ ବଲି ଜାନିରଇଲାଇ । ସେ ପାଉଲ୍ ଆରି ବର୍ନବାସର୍ ସଙ୍ଗାରି ରଇଲା, ମାଡ଼ିଉ ଜେତେବେଲେ ସେ ସେମନ୍‌କେ ମାପୁରୁର ସେବା କାମର୍ ଲାଗି ଜିବାକେ ଚାଡ଼ି ଆଇଲା, ସେତେବେଲେ ସେମନ୍‌ର୍ ନାଉଁ ବଡ଼ି ବଡ଼ି ଆଇଲାବେଲେ, ଦୁକର୍ ବେଲା କେଟ୍‌ଲା ପେରିଡ଼ ୧୩:୧୩ କେତେ ବରସ୍ ଗାଲାପଟେ ମାର୍କ ଆରିତରେକ୍ ବର୍ନବାସର୍ ସଙ୍ଗ୍ ଜିବାକେ ଆରାମ୍ କଲାଇ ପେରିଡ଼ ୧୫:୩୭-୩୯ । ମାର୍କ ମିସା ପିତରର୍ ଗଟେକ୍ ନିଜର୍ ମଇଡ଼ର୍ ପାରା ବଲି ଜାନିରଇଲାଇ ୧ ମ ପିତର୍ ୫:୧୩ । ମାର୍କ ଜିସୁର୍ ଜିବନେ ଅଇରଇବା ସବୁ ବିସଇର୍ ସାକି ନ ରଇଲେ ମିସା, ପଣ୍ଡିତମନ୍ ତାକେ ବିସବାସ୍ କରବାଇ । ସେ ପିତର୍ ସାକିଦେଇରଇବା ବିସଇ ନିଜର୍ ସୁବକବର୍ ତେଇ ଲେଖିଆଟେ । ମାର୍କ ସିସଅଇଲାଟା ଆରି ସାରାସାରି ବେଲେ ଅଇରଇଲା କାତା ଜିସୁର୍ ସିକିଆ ତେଇ ଜାନାଇଲାଆଟେ । ଏ ମାର୍କ ବଇଟାନେ ଜିସୁ କିରିସ୍‌ଟକେ ଗଟେକ୍ ଦରମ୍ ଚାକର୍ ଆରି ପର୍ମେସର୍ ଜଜନା କଲାଟା ପୁରାପୁରୁନ୍ କରବାକେ, ସବୁବେଲେ ତିଆର୍ ଅଇରଇବା ଆଲାଦର୍ ପିଲାପାରା ଜାନାଇଆଟେ । ସେଟାପାଇ ମାର୍କ ଜିସୁ କରିରଇବା କାବାଅଇଜିବା କାମର୍ ବିସଇ ଅଦିକ୍ ଲେଖିଲା । ସାରାସାରି ସେ ଗୁଲାଇ ଜଗତେ ମାପୁରୁର କାତା ସୁନାଇବା ଗଟେକ୍ ମଆନ୍ ଆଦେସ୍ ସଙ୍ଗ୍ ଏ ସୁବକବର୍‌ର୍ ଲେକା ତେବାଇଆଟେ ।

### ବିଡ଼ରେ ରଇବାଟା

- ୧. ତୁବନ୍ ଦେଉ ଜଅନ୍ ଆରି ଜିସୁର୍ ତୁବନ୍ । ୧:୧-୧୩
- ୨. ଗାଲିଲିତେଇ ଜିସୁର୍ ସେବାକାମ୍ । ୧:୧୪,୯:୫୦
- ୩. ଜିସୁ ଜିରୁସାଲାମ୍ ଜିବାଟା ଆରି ପାରତନା ଗରେ ପୁର୍ବାଟା । ୧୦:୧;୧୨:୪୪
- ୪. ପର୍‌କେ ଗର୍‌ବା ବିସଇ ଜାନାଇବାଟା । ୧୩:୩୧-୩୭
- ୫. ଜିସୁର୍ ମରନ୍ ଆରିତରେକ୍ ଉର୍‌ବାଟା ଆରି ମୁକିଅ ଆଦେସ୍ । ୧୪:୧-୧୭:୨୦

ତୁବନ୍ ଦେଉ ଜଅନର୍ ପର୍‌ଚାର୍  
(ମାଡ଼ିଉ ୩:୧-୧୨; ଲୁକ୍ ୩:୧-୧୮; ଜଅନ୍ ୧:୧୯-୨୮)

୧ ଏଟା ଅଇଲାନି ପର୍ଯ୍ୟନ୍ତର ପଥ ଜିସୁ କିରିସ୍ତର ନିମନ୍ତ କବରର ଆରାମ ।  
 ୨ ଏଟା ଏଡ଼୍ାରି ଆରାମ ଅଇଲା । ଜିସାୟ ବବିସ୍ତବକ୍ତାର ସାସ୍ତରେ ଜେନ୍ତାରି  
 ଲେକାଅଇଲା ଆଟେ,  
 ପର୍ଯ୍ୟନ୍ତର କଇଲା, ଦେକା ମୁଇ ମର୍ କବର୍ ଜାନାଉକେ ତମର୍ ଆଗେ  
 ପାଟାଇଲିନି,

ସେ ତମର୍ ବାଟ୍ ତିଆର୍ କରସି ।

୩ ତାର ସର୍ ମରୁବାଲି ବୁର୍ଷ୍ ଆଉଲିଅଇକରି ସୁନାଇଲାନି

ମାପରୁର୍ ବାଟ୍ ତିଆର୍ କରା,  
 ତାରପାଇ ବାଟ୍ ସଲ୍ଲକାଆ ।

୪ ତାରପଟେ ଏ ସବୁ କାତା ପୁରାପୁରୁନ୍ ଅଇଲା, ଜେତେବେଲେ, ତୁବନ୍  
 ଦେଉ ଜଅନ୍ ମରୁବାଲିବୁର୍ଷ୍ ଆସି ପାପ୍ କେମାର୍ ଲାଗି ବଲି ପାପ୍ଟାନେଅନି  
 ବାଉତାଇବା ବିସଇ କଇବାର୍ ଦାରଲା । “ତମର୍ ପାପ୍ କେମା ଅଇବାକେ  
 ପାପ୍ଟାନେ ମନ୍ ବାଦଲାଇ ତୁବନ୍ ନିଆ । ପର୍ଯ୍ୟନ୍ତର ତମର୍ ପାପ୍ କେମା କରସି ।”

୫ ସେତକିବେଲେ ଜିଉଦାଦେସର୍ କେତେକ୍ ଲକ୍ ଆରି ଜିରୁସାଲାମ୍ ରାଇଜର୍ ସବୁ  
 ଲକ୍ମନ୍ ବାରଇକରି ଜଅନ୍ କାତା ସୁନ୍ ବଲି ଆଇବାର୍ ଦାରଲାଇ । ଆରି ନିଜର୍  
 ନିଜର୍ ପାପ୍କଲମାଟା ମାନକରି ଜର୍ଦନ୍ ଗାଡେ ତାରତେଇଅନି ତୁବନ୍ ନେଲାଇ ।

୬ ଜଅନ୍ ଉଟର୍ ଚେଣ୍ଡିସକ୍ ତିଆର୍ ଅଇଲା ଲୁଗା ପିନ୍ଦି, ପସୁ ଚାମର୍ ଆଁଟାବେତା  
 ଆଁଟାଇ ବାନ୍ଦି ଅଇତେରଇଲା । ତାର କାଦି ଅଇଲା ଚିଟ୍ଟକା ଆରି ବନର୍ ମୁ ।

୭ ସେ ଜାନାଇକରି କଇବାର୍ ମୁଲିଆଇଲା, “ମର୍ ପଟେ ଗଟେକ୍ ବେସି ବପୁର୍ ଲକ୍  
 ଆଇସି, ତାର ଗତିଦାଙ୍ଗ୍ଟା ଅଇକରି ତାର ଗତର୍ ପାଣ୍ଡଇ ବେଟ୍ବାର୍ ମିସା ମର୍  
 ଅଦିକାର୍ ନାଇ । ମୁଇ ତମ୍‌କେ ପାନିତେଇ ତୁବନ୍ ଦେଲିନି, ମାତର୍ ସେ ତମ୍‌କେ  
 ସୁକଲ୍‌ଆଡ଼ମାଇ ତୁବନ୍ ଦେଇସି ।”

ଜିସୁର୍ ତୁବନ୍ ଆରି ପରିକା

(ମାତିଉ ୩:୧୩;୪:୧୧; ଲୁକ୍ ୩:୨୧;୨୨;୪:୧-୧୩)

୯ ସେତକିବେଲେ ଜିସୁ ଗାଲିଲି ଜାଗାର୍ ନାଜରିତ୍ ଗଡେ ଅନି ଆସି ଜର୍ଦନ୍ ଗାଡେ  
 ତୁବନ୍ ଦେଉ ଜଅନ୍ ଚାନେ ତୁବନ୍ ନେଲା । ୧୦ ସେ ପାନିତେଇ ଅନି ବାରଇ  
 ଆଇବାବେଲେ, ସରଗ୍ ଉଗାଡି ଅଇ ପର୍ଯ୍ୟନ୍ତର ଆଡ଼ମା ପରୁଆ ପାରା ଅଇ  
 ଜିସୁର୍ ଉପରେ ଉଡ଼ି ଆଇବାଟା ସେ ଦେକଲା । ୧୧ ଆରି ସର୍ଗେଅନି ଗଟେକ୍  
 ସର୍ ସୁନିଅଇଲା, “ତୁଇ ମର୍ ଆଲାଦର୍ ପିଲା, ତର୍ଟାନେ ମୁଇ ବେସି ସାର୍ଦା ।”

୧୨ ସେଦାପରେ ସୁକଲ୍ ଆଡ଼ମା ଜିସୁକେ ମରୁବାଲି ବୁର୍ଷ୍ ପାଟାଇଲା । ୧୩ ମରୁବାଲି  
 ବୁର୍ଷ୍ ଚାଲିସ୍ ଦିନ୍ ରଇଲାବେଲେ, ସଇତାନ୍ ତାକେ ପାପ୍‌କରାଇବାକେ ଚେସ୍ଟା  
 କର୍ତେରଇଲା । ସେ ଜାଗାଇ ବନର୍ ଜିତ୍‌ମନ୍ ରଇଲାଇ, ଆରି ସରଗର୍ ଦୁତ୍‌ମନ୍  
 ଆସି ତାର ସେବା କର୍ତେରଇଲାଇ ।

ଜିସୁ ଚାରିଟା କେଉଟ୍‌ମନ୍‌କେ ତାକ୍‌ଲା

(ମାତିଉ ୪:୧୨-୨୨; ଲୁକ୍ ୪:୧୪, ୧୫;୫:୧-୧୧)

୧୪ କେତେଦିନ୍ ଗାଲାପଟେ ଏରଦ୍‌ରାଜା ତୁବନ୍ ଦେଉ ଜଅନ୍‌କେ ବନ୍ଦି ଗରେ  
 ସଙ୍ଗାଇଲା ପଟେ ଜିସୁ ଗାଲିଲି ଗାଏଁ ବାଉଡିଆସି, ପର୍ଯ୍ୟନ୍ତର ନିମନ୍ତ କବର୍  
 ସୁନାଇବାର୍ ଦାରଲା । ୧୫ “ସମାନ୍ ବେଲା ଆଇଲା, ପର୍ଯ୍ୟନ୍ତର ରାଇଜ୍ ଲଗେ  
 କେଟ୍‌ଲା ଆଟେ । ତମେ ପାପେ ଅନି ମନ୍ ବାଉତାଇକରି ନିମାନ୍ କାତାଇ ବିସ୍‌ବାସ୍  
 କରା ।” ୧୬ ଜିସୁ ଗାଲିଲି ସମ୍‌ତୁର୍ କଣ୍ଡିବାଟେ ଜିବା ବେଲେ ସିମନ୍ ଆରି ତାର

\* ୧:୧୧ ୧:୧୧ ମାତିଉ ୩:୧୭;୧୨:୧୮; ମାର୍ଚ୍ଚକ ୯:୭; ଲୁକ୍ ୩:୨୨ \* ୧:୧୫ ୧:୧୫ ମାତିଉ ୩:୨

ବାଇ ଆନ୍ଦରିଅକେ ସମଦୁରେ ବଇଜାଲ୍ ପାକାଇବାଟା ଦେକ୍ଲା, ସେମନ୍ ମାତ୍ ଦାରୁ କେଉଟ୍‌ମନ୍ ରଇଲା । ୧୭ ଜିସୁ ସେମନ୍‌କେ କଇଲା, “ମାତ୍ ସଙ୍ଗ୍ ଆସା, ମୁଇ ତମ୍‌କେ ଲକ୍‌ମନ୍‌କେ ପରମେସରର୍ ବାଟେ ଆନ୍ଦା ବିସଇ ସିକାଇବି ।” ୧୮ ସେଦାପ୍‌ରେ ସେମନ୍ ଜାଲ୍ ଚାଡ଼ି ଜିସୁର୍ ପଟେ ପଟେ ଗାଲା ।

୧୯ ପଟେ କଣ୍ଠେକ୍ ଦୁର୍ ଜାଇ ଜେବଦିର୍ ପଅମନ୍ ଜାକୁବ୍ ଆରି ତାର୍ ବାଇ ଜଅନ୍‌କେ ଡଙ୍ଗାଇ ଜାଲ୍ ସାଜାଡ଼ବାଟା ଦେକ୍ଲା । ୨୦ ଜିସୁ ସେମନ୍‌କେ ଦେକ୍ଲା ଦାପ୍‌ରେ ତାକ୍‌ଲା, ଆରି ସେମନ୍ ତାକର୍ ବାବା ଜେବଦିକେ ଆରି କୁଲିଆର୍‌ମନ୍‌କେ ଡଙ୍ଗାଇ ଚାଡ଼ି ତାର୍ ସଙ୍ଗ୍ ଗାଲା ।

ଜିସୁ ତୁମା ଦାରୁଲା ଲକ୍‌କେ ନିକ କଲା  
(ଲୁକ୍ ୪:୩୧-୩୭)

୨୧ ପଟେ ଜିସୁ ଆରି ତାର୍ ସିସମନ୍ କପରନାଉମେ ଗାଲା, ଆରି ବିସ୍‌ରାମ୍‌ବାର୍ କେଟ୍‌ଲାକେ ସେ ଜିଉଦିମନ୍‌ର୍ ପାର୍‌ତନା ଗରେ ପୁରି, ଲକ୍‌ମନ୍‌କେ ସିକାଇବାର୍ ଦାରୁଲା । ୨୨ ଲକ୍‌ମନ୍ ତାର୍ ସିକିଆ ସୁନି କାବା ଅଇଗାଲା, ସେ ସାସ୍‌ତର୍ ସିକାଉପାରା ନ ସିକାଇ, ନିଜର୍ ଅଦିକାର୍ ସଙ୍ଗ୍ ସିକିଆ ଦେଇତେ ରଇଲା ।

୨୩ ସେ ଦାପ୍‌ରେ ସେମନ୍‌ର୍ ପାର୍‌ତନା ଗରେ ଗଟେକ୍ ତୁମା ଦାରୁଲା ଲକ୍ କିର୍କିରି କରି ଜିସୁକେ କଇଲା, ୨୪ “ଏ ନାଜରିତ୍ ଗତର୍ ଜିସୁ, ତୁଇ କାଇକେ ଆମ୍‌କେ ଅରିଆନ୍ କଲୁସିନି ? ତୁଇ କାଇ ଆମ୍‌କେ ବିନାସ୍ କରବାକେ ଆଇଲୁସି କି ? ତୁଇ କେ, ସେଟା ମୁଇ ଜାନି, ତୁଇ ଅଇଲୁସିନି ପରମେସରର୍ ସୁକଲ୍ ଲକ୍ ।”

୨୫ ଜିସୁ ତୁମାକେ ଦମ୍‌କାଇ କରି କଇଲା, “ତୁପ୍ ଅ, ଆରି ଏ ଲକ୍‌ଟେଇ ଅନି ବାର୍‌ଇ ଜା ।”

୨୬ ସେଡ଼କି ବେଲେ ତୁମା ତାକେ ମଡ଼ିପିଙ୍ଗି ବେସି କିର୍କିରି କରି ତାର୍‌ଲଗେ ଅନି ବାରଇଗାଲା । ୨୭ ତେବର୍‌ପାଇ ପାର୍‌ତନା ଗରେ ରଇବା ସବୁ ଲକ୍ କାବା ଅଇଗାଲା ଆରି ତାକର୍ ତାକର୍ ବିତ୍‌ରେ କୁଆବଲା ଅଇଲା । “ଏଟା କେନ୍ତାର୍ ? ଏଟା ଅଦିକାର୍ ସଙ୍ଗର୍ ନୁଆ ସିକିଆ । ତୁମା ଆତ୍‌ମାମନ୍ ମିସା, ସେ ତିଆର୍‌ଲାଟା ମାନ୍‌ଲାଇନି ।”

୨୮ ସେଡ଼କିବେଲେ ଜିସୁର୍ କାତା ଗାଲିଲିର୍ ଚାରିବେଡ଼ତିର୍ ଗାଉଁମନ୍‌କେ କେଟିଗାଲା ।

ଜିସୁ ବେସି ଲକ୍‌ମନ୍‌କେ ନିକ କଲା  
(ମାତିଉ ୮:୧୪:୧୭; ଲୁକ୍ ୪:୩୮-୪୧)

୨୯ ତାର୍ ପଟେ ଜିସୁ ଆରି ତାର୍ ସିସମନ୍ ପାର୍‌ତନା ଗରେ ଅନି ବାରଇ ଜାକୁବ୍ ଆରି ଜଅନ୍‌ର୍ ସଙ୍ଗ୍ ସିମନ୍ ଆରି ଆନ୍ଦରିୟର୍ ଗରେ ଗାଲା । ୩୦ ତେଇ ରଇଲା ଲକ୍‌ମନ୍ ସିମନ୍‌ର୍ ସାଡ଼ରି ଜର୍‌କେ ସଇରଇଲା ବିସଇ ଜିସୁକେ କଇଲା । ୩୧ ସେଟାର୍‌ପାଇ ଜିସୁ ଜାଇ ସିମନ୍‌ର୍ ସାଡ଼ରିର୍ ଆତେ ଦାରି ଉଟାଇଲା, ସେଦାପ୍‌ରେ ତାର୍ ଜର୍ ଚାଡ଼ିଗାଲା, ଆରି ସେ ଜାଇ ସେମନ୍‌କେ ସେବା କରବାର୍ ଦାରୁଲା ।

୩୨ ସଞ୍ଜ ବେଲାଇ ବେଲ୍ ରୁଡ଼ିଗାଲା ପଟେ, ଲକ୍‌ମନ୍ ଜରର୍ ଲକ୍‌ମନ୍‌କେ ଆରି ତୁମାଦାରି ରଇବା ସବୁଲକ୍‌ମନ୍‌କେ ଜିସୁର୍ ଲଗେ ଆନ୍‌ବାର୍ ଦାରୁଲା, ୩୩ ଆରି ଗାଉଁର୍ ଲକ୍‌ମନ୍ ସେ ଗରର୍ ଦୁଆରେ ରୁଣ୍ଡିଲା । ୩୪ ସେଡ଼କିବେଲେ ସେ ବିନ୍ ବିନ୍ ରକାମର୍ ରଗି ଅଇରଇବା ଜବର୍ ରଗି ଲକ୍‌ମନ୍‌କେ ନିମାନ୍ କଲା ଆରି ଜବର୍ ତୁମାମନ୍‌କେ ଚାଡ଼ାଇଲା, ମାତର୍ ସେ ତୁମାମନ୍‌କେ କାତା କଇବାକେ ଦେଏନାଇ । କାଇକେବଇଲେ ତୁମାମନ୍ ଜିସୁ ପରମେସରର୍ ଟାନେଅନି ଆଇଲାଆଟେ ବଲିକରି ଜାନି ରଇଲା ।

ଜିସୁ ଗାଲିଲି ରାଇଜେ ମାପୁରୁର୍ କାତା ସୁନାଇଲା  
(ଲୁକ ୪:୪୨-୪୪)

୩୫ ଆରକର୍ ସାକାଲେ କୁକ୍ତା ତାକ୍ ବେଲାଇ ଜିସୁ ଉଚି ଗରେଅନି ବାରଇ  
ଜାଇ ଗଟେକ୍ କିନରା ରଇବା ତିମ୍ବା ଜାଗାଇ, ଜାଇ ପାର୍ତନା କର୍ବାର୍ ଦାରଲା  
। ୩୬ ସେଡକିବେଲେ ସିମନ୍ ଆରି ତାର୍ ସଙ୍ଗର୍ଲକ୍ ତାକେ କଜ୍ବାର୍ ଗାଲାଇ,  
୩୭ ଜେଡେବଲ୍ ସେମନ୍ ଜିସୁକେ ବେଟ୍ ଅଇଲାଇ, ଆରି କାବାଅଇ ତାକେ କଇଲାଇ,  
“ସବୁ ଲକ୍ ତମ୍ବେକେ କଜ୍ଲାଇନି ।”

୩୮ ସେଡକିବେଲେ ଜିସୁ ସେମନ୍ବେକେ କଇଲା, “ଆସା, ଆମେ ରଇବା ବିନ୍ ବିନ୍  
ଗାଉଁମନ୍ବେକେ ଜୁ, କାଇକେବଇଲେ ସେ ଜାଗାମନ୍ବେକେ ମିସା ମୁଇ ପର୍ମେସରର୍  
କାତା କଇବି । କାଇକେବଇଲେ ସେଟାର୍ପାଇସେ ମୁଇ ଆଇଲିଆଟି ।”

୩୯ ଆରି ଗାଲିଲିର୍ ସବୁଟାମେ ବୁଲି ବୁଲି ସେମନ୍ର୍ ସବୁ ପାର୍ତନା ଗରେ,  
ମାପୁରୁର୍ କାତା ସୁନାଇଲା, ଆରି ହୁମା ଦାରଲା ଲକ୍ମନ୍ବେକେ ଚାଡାଇଲା ।

ଜିସୁ ବଡ଼ ରଗିକେ ନିକ କଲା  
(ମାତୃକ ୮:୧,୪; ଲୁକ ୫:୧୨,୧୬)

୪୦ ସେଡକି ବେଲେ ଗଟେକ୍ ବଡ଼ ରଗି\* ତାର୍ ଲଗେ ଆସି ମାଣ୍ଡିକଟା ଦେଇ ତାକେ  
ବାବୁଜିଆ କରି କଇଲା, “ତମେ ଜଦି ମନ୍ବଲେ ମକେ ସୁକଲ୍ କରି ପାର୍ସା ।”

୪୧ ତେଇ ସେ ତାକେ ଜିବନ୍ ଦୁକାଇଲା ଆରି ଆଡ଼ ଲାମାଇ କରି ତାକେ ଚିଇକରି  
କଇଲା, “ମୁଇ ମନ୍ କଲିନି, ତୁଇ ସୁକଲ୍ ଅ ।” ୪୨ ସେଦାପୁରେ ବଡ଼ ରଗ୍ ତାର୍ ଲଗେ  
ଅନି ଦୁର୍ଅଇଲା ଆରି ସେ ସୁକଲ୍ ଅଇଗାଲା । ୪୩ ଆରି, ଜିସୁ ସେ ଲକ୍ବେକେ ତାଟ୍ସଙ୍ଗ୍  
ଆଦେସ୍ ଦେଇ ସେଦାପୁରେ କଇ ପାଟାଇଲା । ୪୪ “ଜାଗ୍ରଡ଼, ମୁଇ ତକେ ସୁକଲ୍  
କଲି ବଲି କାକେ ମିସା କ ନାଇ, ମାତର୍ ଜା ଆରି ନିଜେ ପୁଜାରିକେ ଦେକାଇ ଅ ଆରି  
ମସା ଜନ୍ ଜନ୍ ବିରୁ ପର୍ମେସର୍ବେକେ ଦେବାକେ ଆଦେସ୍ ଦେଲାଆଟେ, ସେ ଇସାବେ  
ଦେସ୍ । ଏଟାର୍ ଲାଗି ତୁଇ ସୁକଲ୍ ଅଇଜାଇଆରୁସ୍ ବଲିକରି ପୁଜାରି ସବୁଲକର୍  
ମୁଆଟେ ସାକି ଦେଅ ।”

୪୫ ମାତର୍ ସେଲକ୍ ବାରଇ ଜାଇ ଜିସୁ ସୁକଲ୍ କରିରଇବା କବର୍ ଏଡେକ୍  
ରାଟୁକରି କଇବୁଲ୍ଲାଇ ଜେ, ଜିସୁ ଲକ୍ମନ୍ର୍ ଦେକ୍ତେ ଦେକ୍ତେ କନ୍  
ଗାଉଁମନ୍ବେକେ ମିସା ଜାଇ ପୁରି ନାପାର୍ଲା । ମାତର୍ ବାଇରେ ଜାଇ ତିମ୍ବା  
ଜାଗାମନ୍ବେକେ ରଇଲା । ଅଇଲେ ମିସା ଲକ୍ମନ୍ ରାରିଦିଗେ ଅନି ତାର୍ ଲଗେ  
ଆଇବାର୍ଦ୍ଦାଇଲାଇ ।

### ୨

ଚେରେଙ୍ଗ୍ବାଡ଼ ରଗି ନିମାନ୍ ଅଇଲା  
(ମାତୃକ ୯:୧-୮; ଲୁକ ୫:୧୭-୨୬)

୧ କେଡେଦିନ୍ ଗାଲା ପଟେ ଜିସୁ ଆରି ତରେକ୍ କପର୍ନାଉମେ ବାଅଡ଼ଲାକେ,  
ସେ ଗରେ ଆଟେ ବଲି ଆଲା ଅଇଗାଲା । ୨ ସେ ଗରେ ଏଡେମାଣ୍ଡ୍ ଲକ୍  
ଜମ୍ଲାଇ ଜେ, ଦୁଆରେ ମିସା ଟାନ୍ ଦାରିନାପାର୍ଲା, ଆରି ଜିସୁ ସେମନ୍ର୍ ଲଗେ  
ପର୍ମେସରର୍ ବାକିଅ ସୁନାଇବାର୍ ଦାରଲା । ୩ ସେଡକି ବେଲେ କେଡେକ୍ ଲକ୍ମନ୍  
ଗଟେକ୍ ଚେରେଙ୍ଗ୍ ରଗିକେ ବଇକରି ତାର୍ ଲଗେ ଦାରିଆଇଲାଇ । ତାକର୍  
ବିଡ଼ରେ ଅନି ଚାର୍ଲକ୍ ରଗିକେ ବଇରଇଲାଇ । ୪ ମାତର୍ ଲକ୍ମନ୍ ତିପାଟେଲା  
ଅଇରଇଲାଇକେ, ତାକେ ଜିସୁର୍ ଲଗେ ନେଇ ନାପାର୍ଲାଇ । ନାପାରିକରି, ଜିସୁ

\* ୧:୩୯ ୧:୩୯ ମାତୃକ ୪:୨୩:୯:୩୫ \* ୧:୪୦ ୧:୪୦ ବଡ଼ ରଗ୍ ଅଇରଇଲାର୍ ପାଇ ଗଟେକ୍ ଲକ୍  
ପର୍ମେସର୍ବେକେ ପାର୍ତନା କର୍ତେରଇଲା, କାଇକେବଇଲେ ବଡ଼ ରଗିକେ ଜିଉଦିମନ୍ ଅସ୍ତି ବଲି ବାବ୍ବେ  
ରଇଲାଇ ।

ଜନ୍ମଗାନେ ରଇଲା, ତେଇର୍ ଚାନ୍ତି ବଡ଼ଟା କାଣାକରି, ରଗିକେ କଟ୍ ମିସ୍ତେ ତାର୍ ମୁଆଟେ ସିଦା ଉଡ଼ରାଇଦେଲା । ୫ ଜିସୁ ସେମନର୍ ବିସ୍ତବାସ୍ ଦେକି ତେରେଙ୍ଗ୍ ରଗିକେ କଇଲା, “ବାବୁରେ ମୁଇ ତର୍ ପାପ୍ କେମା କରିଦେଲି ।”

୬ ମାତର୍ ସେ ଗର୍ ବିଡ଼ରେ କେତେଟା ସାସ୍ତର୍ ସିକାଇବା ଲକ୍ମନ୍ ବସି ନିଜର୍ ନିଜର୍ ମନ୍ ବିଡ଼ରେ ବାବିଅଇତେରଇଲା, ୭ “ଏ ଲକ୍ ତେରେଙ୍ଗ୍ ରଗିକେ ‘ତର୍ ପାପ୍ କେମା କରିଦେଲି ।’ ବଲି କେନ୍ତ୍ର କଇପାରଲା ? ଏ ପର୍ମେସର୍କେ ନିଦା କରସିଆଟେ, ସେ ଗଟେକ୍ ମାପୁରୁକେ ଚାଡ଼ିଦେଲେ, ଆରି କେ ମିସା ପାପ୍ କେମା କରି ପାରଡ଼ କି ?”

୮ ସେଦାପୁରେ ଜିସୁ ସେମନ୍ ମନେ ମନେ ଏନ୍ତାରି ବାବିଅଇଲାଟା, ନିଜର୍ ଆଡ଼ମାଇ ଜାନି ସେମନ୍କେ କଇଲା, “ତମେ କାଇକେ ନିଜର୍ ନିଜର୍ ମନେ ଏ ସବୁଜାକ ବାବିଅଇଲାସିନି ? ୯ କନଟା କରବାଟା ସଅଜ୍ ଅଇଲାନି ? ବାବୁରେ ‘ମୁଇ ତର୍ ପାପ୍ କେମା କରିଦେଲି ।’ ବଲି କଇବାଟା, କି ‘ଉର୍ ତର୍ କଟ୍ ବଇ ଇଣ୍ଡିଆ ।’ ବଲିବାଟା ? ୧୦ ମାତର୍ ଗୁଲାଇ ଜଗତର୍ ପାପ୍ କେମା କରବାକେ ପର୍ମେସର୍ ପାଟାଇଲା ନରପିଲା ମର୍ ଅଦିକାର୍ ଆଟେ ବଲି ଏବେ ମୁଇ, ଏ ଲକ୍କେ ନିକ କରି ଦେକାଇବି ।” ସେ ତେରେଙ୍ଗ୍ ରଗିକେ କଇଲା, ୧୧ “ମୁଇ ତକେ କଇଲିନି ଉର୍, ତର୍ କଟ୍ ବଇ, ନିଜର୍ ଗରେ ବାରିଜା ।”

୧୨ ସେଦାପୁରେ ସେ ରଗି ଉଟି କଟ୍ ବଇକରି ସବୁ ଲକ୍କର୍ ଦେକ୍ତେ ବାରଇ ଗାଲା । ସେବେଲାଇ ସବୁଲକ୍ କାବା ଅଇ ପର୍ମେସର୍ ମଇମା କରି କରି କଇଲା, “ଆମେ ଏନ୍ତାରିଟା କେବେ ମିସା ଦେକି ନ ରଇଲୁ ।”

ଜିସୁ ଲେବିକେ ଡାକ୍ଲା  
(ମାତିଉ ୯:୯-୧୩; ଲୁକ୍ ୫:୨୭-୩୨)

୧୩ ସେ ଆରିତରେକ୍ ସମ୍ପଦୁରର୍ କଣ୍ଡିବାଟେ ବାରଇଗାଲା । ବେସି ଲକ୍ମନ୍ ତାର୍ ଲଗେ ଆଇଲାକେ, ଜିସୁ ସେମନ୍କେ ସିକିଆ ଦେବାର୍ ଦାରଲା । ୧୪ ଆରି ସେ ଜାଉ ଜାଉ ଆଲ୍ପିଅର୍ ପଅ ଲେବିକେ ରମିୟ୍ ସର୍କାରର୍ ପାଇ ସିସ୍ତୁମାଙ୍ଗୁମନ୍ ମାଙ୍ଗବା ଜାଗାଇ ବସି ରଇବାଟା ଦେକି ତାକେ କଇଲା, “ମର୍ ସଙ୍ଗ୍ ଆଉ ।” ତେଇଅନି ସେ ତାର୍ ସିସ୍ତୁମାଙ୍ଗୁମନ୍ ମାଙ୍ଗବାଟା ଚାଡ଼ି ଉଟିକରି ଜିସୁର୍ ସଙ୍ଗ୍ ଗାଲା ।

୧୫ ପଟେ ଜିସୁ ଲେବିର୍ ଗରେ ଜାଇ କାଇବା ବେଲେ ବେସି ସିସ୍ତୁମାଙ୍ଗୁମା ଲକ୍ ଆରି ଜନ୍ ଲକ୍ମନ୍କେ ପାପି ବଲି କଇତେରଇଲା, ତାର୍ ସିସ୍ତୁମନ୍ ସଙ୍ଗ୍ ମିସି କାଇତେରଇଲା । କାଇକେବଇଲେ ଏନ୍ତାରି ବେସି ଲକ୍ ତାର୍ ସଙ୍ଗ୍ ଜାଇତେ ରଇଲା । ୧୬ ଜିସୁ ପାପି ଆରି ସିସ୍ତୁମାଙ୍ଗୁମନର୍ ସଙ୍ଗ୍ କାଇଲାନି, ଏଟା ଦେକିକରି ପାରୁସି ଦଲର୍ ସାସ୍ତର୍ ସିକାଉମନ୍ ତାର୍ ସିସ୍ତୁମନ୍କେ କଇବାର୍ ଦାରଲା, “ସେ କାଇକେ ସିସ୍ତୁମାଙ୍ଗୁମନର୍ ଆରି ପାପିମନର୍ ସଙ୍ଗ୍ କାଇଲାନି ?”

୧୭ ସେଟା ସୁନି ଜିସୁ ସାସ୍ତର୍ ସିକାଉମନ୍କେ କଇଲା, “ ନିମାନ୍ ଲକ୍ମନର୍ପାଇ ଡାକ୍ଦରର୍ ଲଡା ନାଇ, ମାତର୍ ନିମାନ୍ ନ ରଇଲା ଲକ୍ମନ୍କେ ଲଡା ଆଟେ । ଜେ ନିଜେ ‘ମୁଇ ଦରମ୍ ଲକ୍ ।’ ବଲି ବାବିଅଇବା ଲକ୍ପାଇ ମୁଇ ଆସିନାଇ, ମାତର୍ ପାପିମନ୍କେ ପାପ୍ଟାନେଅନି ବାଉଡାଇବାକେ ଆସିଆଟି ।”

ଉପାସ୍ ବିସଇ  
(ମାତିଉ ୯:୧୪-୧୭; ଲୁକ୍ ୫:୩୩-୩୯)

୧୮ ତୁବନ୍ ଦେଉ ଜଅନର୍ ସିସ୍ତୁମନ୍ ଆରି ପାରୁସିମନ୍ ଉପାସ୍ କର୍ତେ ରଇଲା । ସେବେଲାଇ କେତେଲକ୍ ଆସି ଜିସୁକେ କଇଲା, “ତୁବନ୍ ଦେଉ ଜଅନର୍ ସିସ୍ତୁମନ୍

ଆରି ପାରୁସିମନରୁ ସିସ୍‌ମନ୍ ଉପାସ୍ କରବାଇ, ମାତରୁ ତରୁ ସିସ୍‌ମନ୍ କାଇକେ ଉପାସ୍ ନ କରଡ଼ ?”

୧୯ ଜିସୁ ସେମନ୍‌କେ କଇଲା, “ବଜିଟାନେ ବିବା ଦାଙ୍ଗ୍‌ତା ରଇବା ଜାକ ବିବା ଦାଙ୍ଗ୍‌ତାରୁ ସଙ୍ଗ୍ ରଇବା ଦାଙ୍ଗ୍‌ତାମନ୍ ଉପାସେ ରଇବାଇ କି ? ନାଇ ନ ରଅଡ଼ । ବିବା ଦାଙ୍ଗ୍‌ତା ଜେତେବେଲାଜାକ ରଇସି, ସେ ବେଲାଜାକ ସେମନ୍ ଉପାସେ ନ ରଅଡ଼ । ୨୦ ମାତରୁ ବେଲା ଆଇସି, ଜେତେବେଲେ ଲକ୍‌ମନ୍ ଆସି ତାକରୁ ଲଗେ ଅନି ବିବା ଦାଙ୍ଗ୍‌ତାକେ ଦାରିଜିବାଇ, ସେଦିନେ ସେମନ୍ ଉପାସ୍ କରବାଇ ।

୨୧ “କେ ନୁଆ ଲୁଗାରୁ ଗରୁଣ୍ଡା ପୁରନା ଲୁଗାଇ ନ ସିଲାଏ, ସିଲାଇଲେ ନୁଆ ଗରୁଣ୍ଡା ପୁରନା ଲୁଗାକେ ଅଦିକ୍ ଚିରି ପାକାଇସି, ଆରି ଅଦିକ୍ ବଡ଼ଟା କାଣା କରିଦେଇସି । ୨୨ ଆରି କେ ନୁଆ ଅଙ୍ଗୁରୁ ରସ୍ ପୁରନା ଚାମ୍ ସଙ୍ଗ୍ ତିଆରୁ କଲା ମୁନାଇ ନ ସଙ୍ଗ୍‌ଅଡ଼, ସଙ୍ଗ୍‌ଇଲେ ସେ ଅଙ୍ଗୁରୁ ରସ୍ ଆରି ଚାମ୍ ମୁନା ନସିଜାଇସି । ନାଇ ନୁଆ ଅଙ୍ଗୁରୁ ରସ୍ ନୁଆ ଚାମ୍ ମୁନାଇ ସଙ୍ଗ୍‌ଇବାରୁ ଆଟେ ।”

ଜିସୁ ବିସ୍‌ରାମ୍ ବାରରୁ ମାପୁରୁ  
(ମାତିଉ ୧୨:୧-୮; ଲୁକ୍ ୬:୧-୫)

୨୩ ଜିସୁ ତରେକ୍ ବିସ୍‌ରାମ୍‌ବାରେ ତାସ୍ ରଇବା କେଡ଼ ବାଟେ ଜାଇତେ ରଇଲା, ଆରି ଜିବାବେଲେ ତାରୁ ସିସ୍‌ମନ୍ ଦାନ୍ କେଡ଼ ଚିତାଇତେ ଗାଲାଇ । ୨୪ ସେ ଜାଗାଇ ରଇବା ପାରୁସିମନ୍ ଜିସୁକେ କଇଲା, “ଦେକ୍ ବିସ୍‌ରାମ୍‌ବାରେ ଜନ୍‌ଟା କରବାରୁ ଆମରୁ ବିଦି ନଏ । ତରୁ ସିସ୍‌ମନ୍ କାଇକେ ସେଟା କଲାଇନି ?”

୨୫ ଜିସୁ ସେମନ୍‌କେ କଇଲା, “ଆମରୁ ତାକ୍‌ପୁଟା ଆନିଦାଦି ଦାଉଦରୁ ଅବାବ୍ ବେଲେ, ସେ ଆରି ତାରୁ ସଙ୍ଗ୍‌ରୁ ଲକ୍‌ମନ୍ ବୁକେ ରଇଲାଇ, ସେଡ଼କିବେଲେ ସେ କାଇଟା କରି ରଇଲା, ସେଟା କାଇ ତମେ କେବେ ପତାସ୍ ନାଇ କି ? ୨୬ ବଡ଼ ପୁଜାରି ଅବିୟାତରୁ ବେଲେ ସେ କେନ୍ଦ୍ରି ପର୍‌ମେସରୁ ମଦିରେ ପୁରିକରି ମାପୁରୁକେ ସର୍‌ପିଦେଲା ଜନ୍ ଦରୁସିନି ରୁଟି, ପୁଜାରିମନ୍‌କେ ଚାଡ଼ିଦେଲେ ଆରି କେ ମିସା କାଇବାରୁ ବିଦି ନଏ, ସେଟା ସେ କାଇଲା, ଆରି ସେ ରୁଟି ନିଜରୁ ସଙ୍ଗ୍‌ରୁ ଲକ୍‌ମନ୍‌କେ ମିସା ବାଟାକରି ଦେଇରଇଲା ।” ୨୭ ଜିସୁ ସେମନ୍‌କେ କଇଲା, “ ବିସ୍‌ରାମ୍‌ବାରେ ଲକ୍‌ମନ୍‌ରୁ ସାଇଜରୁପାଇ ଅଇଲା ଆଟେ, ସେଟା ଲକ୍‌ମନ୍‌କେ ବିଜାରୁ କରବାକେ ଅଏନାଇ । ୨୮ ତେବରୁପାଇ ପର୍‌ମେସରୁ ପାଟାଲଲା ନରୁପିଲା ମୁଇ ବିସ୍‌ରାମ୍‌ବାରେ ଲକ୍‌ମନ୍ କାଇଟା କରବାରୁ ଆଟେ, କାଇଟା କରବାରୁ ନାଇ, ସେଟା କାଇବାରୁ ମରୁ ଅଦିକାରୁ ଆଟେ ।”

### ୩

ଜିସୁ ଗଟେକ୍ ଆଡ଼ ସୁକ୍‌ଲା କଲା ଲକ୍‌କେ ନିକ କଲା  
(ମାତିଉ ୧୨:୯-୧୪; ଲୁକ୍ ୬:୬-୧୧)

୯ ପଟେ ଜିସୁ ଆରି ଗଟେକ୍ ତରୁ ଜିଉଦିମନରୁ ପାରୁତନା ଗରେ ଗାଲା । ତେଇ ଗଟେକ୍ ଲକ୍ ରଇଲା । ତାରୁ ଗଟେକ୍ ଆଡ଼ ସୁକ୍‌ଜାଇରଇଲା । ୨ ଜିସୁ କେଜାନେ ବିସ୍‌ରାମ୍ ବାରେ ନିମାନ୍ କରସି ବଲି, ସେମନ୍ ଆଁକି ନ ମରାଇତେ ଦେକ୍‌ତେରଇଲା, କାଇକେବଇଲେ ଜେନ୍ଦ୍ରିକି ତାରୁ ବିରୁଦେ ଦସ୍ ଦାରିପାରୁବାଇ । ୩ ଜନ୍ ଲକ୍‌ରୁ ଆଡ଼ ସୁକ୍‌ ଜାଇରଇଲା, ତାକେ ଜିସୁ କଇଲା, “ଆଉ ମଜାଇ ଚିଆ ଅ ।” ୪ ଆରି ଜିସୁ ଲକ୍‌ମନ୍‌କେ ପାଟାରୁଲା, “ ବିସ୍‌ରାମ୍‌ବାରେ କାଇଟା କରବା ନିଅମ୍ ? ନିକ କରବାରୁ କି ଆସାରୁ କରବାରୁ ? ଜିବନ୍ ବଢ଼ାଇବାରୁ କି ମରାଇଦେବାରୁ ?” ମାତରୁ ସେମନ୍ କାଇଟା ନ କଇ ଚିମ୍‌ରାଅଇ ରଇଲା । ୫ ସେବେଲେ ତାକରୁ ମନ୍ ତାଡ଼ ରଇବାଟା ଦେକିକରି ଜିସୁ ଦୁକ୍‌ଅଇ ରିସାସଙ୍ଗ୍,

ଚାରିବେଡ଼ି ଦେକଲା । ଆରି ସେ ଲକ୍ଷ୍ମୀ କେ କଲଲା, “ଆଡ଼ ଲାମା ।” ସେ ଲକ୍ଷ୍ମୀ ଆଡ଼ ଲାମାକଲା, ଆରି ତାର ଆଡ଼ ନିମାନ୍ ଅଇଗଲା । <sup>୭</sup> ତେଇଅନି ପାରୁସିମନ୍ ସେ ଜାଗାଇଅନି ଦାପ୍ତରେ ବାରଇ ଜାଇ ଜିସୁକେ ମରାଉ ବଲି ତାର ବିରୁଦ୍ଧେ ଏରଦ୍ ରାଜାର ଲକ୍ଷ୍ମୀମନ୍‌ସଙ୍ଗେ ଉପାଇ ପାଁବାର ଦାରଲାଇ । <sup>୮</sup> ସେଡ଼କିବେଲେ ଜିସୁ ସିସ୍ତମନ୍‌ର ସଙ୍ଗେ ଲକ୍ଷ୍ମୀମନ୍‌ରଟାନେଅନି ବେଗଲି କରି, ସମଦୁର୍ କଣ୍ଡିବାଟେ ବାରଇ ଗଲା । ଆରି ଗାଲିଲି ଅନି ବେସି ଲକ୍ଷ୍ମୀ ତାର ପଟେ ପଟେ ଆଇଲାଇ, ଆରି ଜିଉଦା, <sup>୯</sup> ଜିରୁସାଲାମ୍, ଇଦମ୍, ଜର୍ଦ୍ଦନ୍‌ର ଉପର୍ ବାଟେ ରଇବା ସର ଆରି ସିଦନ୍‌ର ଚାରିବେଡ଼ିତର ଲକ୍ଷ୍ମୀ ସେ କରିରଇବା ସବୁ କାମାର କାତା ସୁନି ତାର ଲଗେ ଆଇଲାଇ । <sup>୧୦</sup> ସେଡ଼କିବେଲେ ଚିପାଟେଲା ରଇଲାକେ, ଲକ୍ଷ୍ମୀମନ୍ ଜେଡ଼ିକି ଉପରେ ଡାବି ନ ଅଅଡ଼, ତେବର୍ ପାଇ ଜିସୁ ସିସ୍ତମନ୍‌କେ ତାରପାଇ ଗଟେକ୍ ସାନ୍‌ଟା ଡଙ୍ଗା ଆନି ଜାଗାଇବାକେ ଡିଆରଲା । <sup>୧୧</sup> କାଇକେବଇଲେ ସେ ବେସି ଲକ୍ଷ୍ମୀମନ୍‌କେ ନିମାନ୍ କଲାଜେ ଜର୍ଦ୍ଦୁକା ଅଇରଇବା ଲକ୍ଷ୍ମୀମନ୍ ତାକେ ଚିଉଁ ବଲି ଉପରେ ଡାବିଅଇ ଜାଇତେରଇଲାଇ । <sup>୧୨</sup> ଆରି ଜେଡେବେଲେ ଜିସୁକେ କରାପ୍ ଆଡ଼ମାମନ୍ ଦେକ୍‌ତେ ରଇଲାଇ, ସେ ଆଡ଼ମାମନ୍ ତାର ମୁଆଟେ ଅଦ୍‌ରି ଆଉଲିଅଇ କଇତେରଇଲାଇ, “ତୁଇ ଆକା ପରମେସରର୍ ପଅ ।” <sup>୧୩</sup> ମାତର୍ ଜିସୁ ତୁମାମନ୍‌କେ ତାର ବିସଇନେଇ ବିନ୍ ଲକ୍ଷ୍ମୀମନ୍‌କେ କାଇ ବଲି ନ କୁଆ ବଲି ଡାବ୍‌ସଙ୍ଗେ ଆଦେସ୍ ଦେଇତେରଇଲା ।

ଜିସୁ ବାରଟା ସିସ୍ତମନ୍‌କେ ବାଟଲା  
(ମାତିଉ ୧୦:୧-୪; ଲୁକ୍ ୬:୧୨-୧୬)

<sup>୧୩</sup> ଜିସୁ ପର୍ବତ ଉପରେ ଜାଇ, ଜନ୍ ଲକ୍ଷ୍ମୀମନ୍‌କେ ସେ ମନ୍ କଲା, ସେମନ୍‌କେ ଲଗେ ଡାକ୍‌ଲା, ଆରି ସେମନ୍ ତାର ଲଗେ ଆଇଲାଇ । <sup>୧୪</sup> ସେ ବାର ଲକ୍ଷ୍ମୀକେ ବାଟଲା ଆରି ସେମନ୍‌କେ ତାର କବର୍ ନେଉ ବଲି ଡାକ୍‌ଲା । ଜେଡ଼ି ସେମନ୍ ତାର ସଙ୍ଗେ ରଇପାରତ୍ ଆରି ସେମନ୍ ତାର କବର୍ ଜାନାଇବାଇ, <sup>୧୫</sup> ଆରି ତୁମାଟାଡାଇବାକେ ଅଦିକାର ଦେଲା ।

<sup>୧୬</sup> ଜିସୁ ବାର ଲକ୍ଷ୍ମୀକେ ବାଟଲା, ଜନ୍‌ଲକ୍ଷ୍ମୀମନ୍ କି ସିମନ୍, ଜାକେ ସେ ପିତର୍ ବଲି ନାଉଁ ଦେଲା, <sup>୧୭</sup> ଜେବଦିର୍ ପ ଜାକୁବ୍ ଆରି ତାର ବାଇ ଜଅନ୍‌କେ ସେ ବିନେରିଗସ୍ ବଲି ନାଉଁ ଦେଲା, ଆର୍ ଅରତ୍ ଅଇଲାନି ମେଗ୍‌ନାଦର୍ ପଅମନ୍, <sup>୧୮</sup> ଆନ୍ଦ୍ରିୟ୍, ପିଲିପ୍, ବାରତଲମି, ମାତିଉ, ତମା, ଆଲ୍‌ପିର୍ ପଅ ଜାକୁବ୍, ତଦିୟ୍, କିଶାନିୟ୍ ସିମନ୍, ଜେ କି ରମିୟ୍ ସର୍କାରର୍ ବିରୁଦ୍ଧେ ଉଚିରଇଲା । <sup>୧୯</sup> ଆରି ଇସ୍କାରିୟ୍‌ତିୟ୍ ଜିଉଦା, ଜେ କି ଜିସୁକେ ସଡ଼ରୁକେ ସର୍ପି ଦେଇରଇଲା ।

(ମାତିଉ ୧୨:୨୨-୩୨; ଲୁକ୍ ୧୧:୧୪-୨୩; ୧୨:୧୦)

<sup>୨୦</sup> ପଟେ ଜିସୁ ଗଟେକ୍ ଗରେ ପୁରଲା । ସେଡ଼କି ବେଲେ ଲକ୍ଷ୍ମୀମନ୍ ଆରି ତରେକ୍ ଏତେକ୍ ରୁଣ୍ଡିଲାଇ ଜେ, ସେ ଆରି ତାର ସିସ୍ତମନ୍ କାଇବାଟ ମିସା ନାପାରଲାଇ । <sup>୨୧</sup> “ଜିସୁକେ କାଇବାକେ ମିସା ବେଲା ନାଇ ।” ବଲି କଇ ଡାକର୍ ଗରର୍ ଲକ୍ଷ୍ମୀ ସୁନି, ତାକେ ଗରେ ଡାକିନେବାକେ ଆଇଲାଇ । କାଇକେବଇଲେ ସେମନ୍ କଇଲାଇ, “ତାର ବୁଦି ବାନାଅଇଗଲାନି ।”

ଜିସୁ ଆରି ବାଲ୍‌ଜିରୁଲ୍

<sup>୨୨</sup> ଆରି, ଜିରୁସାଲାମ୍ ଅନି ଆସିରଇବା ସାସ୍‌ତର୍ ସିକାଉମନ୍ କଇଲାଇ, “ଆକେ ତୁମାମନ୍‌ର ନେତା ବାଲ୍‌ଜିରୁଲ୍ ଦାରିଆଟେ, ଆରି ତୁମାମନ୍‌ର ନେତାର୍ ବପୁସଙ୍ଗେ ତୁମା ଗତାଇଲାନି ।” <sup>୨୩</sup> ସେଡ଼କିବେଲେ ଜିସୁ ସାସ୍‌ତର୍ ସିକାଉମନ୍‌କେ ଲଗେଡାକି ଉଦାଅରନ୍ ଦେଇ କଇଲା, “ସଇତାନ୍ କେଡ଼ି ସଇତାନ୍‌କେ ଚାଡାଇ ପାରସି ?” <sup>୨୪</sup> ଜିଦି

✽ ୩:୯ ୩:୯ ମାର୍ଚ୍ଚକ ୪:୧; ଲୁକ୍ ୫:୧-୩ ✽ ୩:୨୨ ୩:୨୨ ମାତିଉ ୯:୩୪; ୧୦:୨୫

ଗଟେକ୍ ରାଇଜ୍ ଦୁଇ ବାଗ୍ ଅଇ ନିଜର୍ ବିରୁଦେ ଉଚ୍ଚସି, ତେବେ ସେ ରାଜିଅ ବେସିଦିନ୍ ନ ରଏ ।<sup>୨୫</sup> ଗଟେକ୍ ଗର୍ ବାଗ୍ ଅଇ ନିଜର୍ ବିରୁଦେ ଉଚ୍ଚସି, ତେବେ ସେ ଗର୍ ବେସି ଦିନ୍ ନ ରଏ ।<sup>୨୬</sup> ସେନ୍ତାନ୍ତସେ ସଇତାନ୍ ଜଦି ବାଗ୍ ଅଇ ନିଜର୍ ବିରୁଦେ ଉଚ୍ଚସି, ତେବେ ସେ ତବିର୍ ଅଇ ରଇ ନାପାରେ, ମାତର୍ ତାର ବିନାସ୍ ଗଟ୍ସି ।

<sup>୨୭</sup> “ମାତର୍ କେ ମିସା ବପୁ ରଇବା ଲକ୍‌କେ ପର୍ତୁତ୍ତ୍ ମ ବାନ୍‌ଡେ, ତାର ଗରେ ପୁରିକରି ସେଲକର୍ ନିଜର୍ ସବୁ ଚରାଇ ନେଇ ନାପାରେ, ମାତର୍ ସେ ବପୁ ରଇବା ଲକ୍‌କେ ଆଗେ ବାନ୍‌ଲେ ସିନା ସେ ତାର ଗରେ ପୁରି ଚରିପାର୍ସି ।

<sup>୨୮</sup> “ମୁଇ ତମ୍‌କେ ସତ୍ କଇଲିନି, ଲକ୍‌ମନର୍ ସବୁ ପାପ୍, ଆରି ସେମନ୍ ଜେତେକ୍ ନିନ୍‌ୟା କାତା କଇ ପର୍‌ମେସର୍ ନିନ୍‌ୟା କଲେ ମିସା, ସେ ସବୁଜାକ କେମା କରାଅଇସି ।<sup>୨୯</sup> \*ଜେକି ସୁକଲ୍‌ଆଡ଼ମାର୍ ବିରୁଦେ ନିନ୍‌ୟା କାତା କଇସି, ତାକେ କନ୍ କାଲେ ମିସା ପର୍‌ମେସର୍ କେମା ନ ଦେଏ, ଆରି ସେ ନ ସାର୍‌ବା ପାପର୍ ଦସି ଅଇସି ।”<sup>୩୦</sup> ତାକେ କାରାପ୍ ଆଡ଼ମା ଲାଗିଆଚେ ବଲି ସାସ୍‌ତର୍ ସିକାଉମନ୍ କଇଲାକେ, ଜିସୁ ଏନ୍ତାରି କଇଲା ।

ଜିସୁର ମାଆ ଆରି ବାଇବଇନିମନ୍  
(ମାତିଉ ୧୨:୪୭-୫୦; ଲୁକ୍ ୮:୧୯-୨୧)

<sup>୩୧</sup> ସେଡକିବେଲେ ଜିସୁର ମା ଆରି ବାଇମନ୍ ଆସି ବାଇରେ ଚିଆ ଅଇ ଜିସୁକେ ଡାକାଇପାଟାଇଲା ।<sup>୩୨</sup> ତେଇ ତାର ଚାରିବେଡ଼ତି ବସି ରଇବା ଲକ୍‌ମନ୍ ତାକେ କଇଲାକ, “ଦେକା, ତମ୍‌ର ମାଆ ଆରି ବାଇ ବଇନି ବାଇରେ ରଇ ତମ୍‌କେ କଇଲାକନି ।”<sup>୩୩</sup> ଜିସୁ ସେମନ୍‌କେ କଇଲା, “କେ ମର୍ ମା ଆରି ବାଇବଇନିମନ୍ ?”<sup>୩୪</sup> ସେ ତାର ଚାରିବେଡ଼ତି ବସିରଇବା ଲକ୍‌ମନ୍‌କେ ଦେକିକରି କଇଲା, “ଏମନ୍ ମର୍ ମାଆ ଆରି ମର୍ ବାଇ ବଇନି ।<sup>୩୫</sup> ଜନ୍ ଲକ୍‌ମନ୍ ପର୍‌ମେସର୍ ମନ୍‌କଲାଟା ପୁରାପୁରନ୍ କର୍‌ବାଇ, ସେ ମର୍ ବାଇ, ବଇନି ଆରି ମା ।”

## ୪

ବିଅନ୍ ବୁନ୍‌ବା ବିସଇର୍ କାତା  
(ମାତିଉ ୧୩:୧-୯; ଲୁକ୍ ୮:୪-୮)

<sup>୧</sup> \*ଜିସୁ ଆରିତରେକ୍ ଗାଲିଲି ସମ୍‌ଦୁର୍ କଣ୍ଟିଗାନେ ସିକିଆ ଦେବାର୍ ଦାର୍‌ଲା, ଆରି ଏତେକ୍ ମାଣ୍ଟ ଲକ୍‌ମନ୍ ତାର ଲଗେ ଚୁଲ୍‌ଅଇଲାକେ, ସେ ସମ୍‌ଦୁରେ ରଇବା ଗଟେକ୍ ଡଙ୍ଗାଇ ଜାଇ ବସିଲା, ଆରି ଗୁଲାଇ ଲକ୍‌ମନ୍ ସମ୍‌ଦୁର୍ ପାଲିକେ ରଇଲାକ ।<sup>୨</sup> ଜିସୁ ସେମନ୍‌କେ ବେସି ବିସଇ ଉଦାଅରନ୍ ଦେଇ ସିକାଇଲା । ଆରି ସିକାଇବାବେଲେ ସେମନ୍‌କେ କଇଲା,

<sup>୩</sup> “ସୁନା ଗଟେକ୍ ଚାସି ତାର ବିଅନ୍ ବୁନ୍‌ବାର୍ ବାରଇଲା ।<sup>୪</sup> ସେ ବୁନ୍ ବୁନ୍ କେତେକ୍ ବିଅନ୍ ବାଟେ ଅଦର୍‌ଲା, ଆରି ଚଡ଼ଇମନ୍ ଆସି ସବୁଜାକ ବିଅନ୍ କାଇଦେଲାକ ।<sup>୫</sup> ଆରି କେତେକ୍ ବିଅନ୍ ଉନା ମାଟିରଇ ତଲେ ପାକ୍‌ନା ରଇଲା ବୁଏଁ ଅଦର୍‌ଲା, ଆରି ମାଟି ଉନା ରଇଲାକେ ଦାପ୍‌ରେ ଗାଜା ଅଇଲା ।<sup>୬</sup> ମାତର୍ ବେଲ୍ ଉଦ୍‌ଲାକେ ଗାଜା ଅଇଲାଟା ପଡ଼ି ମସ୍‌ରିଗାଲା, ଆରି ଚେର୍ ବେଦି ନ ରଇଲାକେ ସୁକିଗାଲା ।<sup>୭</sup> ଆରି କେତେକ୍ ବିଅନ୍ କାଟା ବୁଟା ମଜାଇ ଅଦର୍‌ଲା, ଆରି କାଟା ବୁଟାମନ୍ ଉଟି ବଡ଼ିକରି ଗାଜା ଅଇ ସବୁକେ ଚାପି ପାକାଇଲାକ । ଚାପିଦେଲାକେ କାଇ ଦାନ୍ ମିସା ଅଏ ନାଇ ।<sup>୮</sup> ମାତର୍, ଆରି କେତେକ୍ ବିଅନ୍ ନିକ ବୁଏଁ ଅଦର୍‌ଲା ଆରି ଗାଜା ଅଇ ଉଟି ବଡ଼ିକରି ତିରିସ୍ ଗୁଣ୍ଟ ସାଟେ ଗୁଣ୍ଟ ଆରି ସଏ ଗୁଣ୍ଟ ଜାକ ପସଲ୍ ଦେଲା ।”

\* ୩:୨୯ ୩:୨୯ ଲୁକ୍ ୧୨:୧୦    ✧ ୪:୧ ୪:୧ ଲୁକ୍ ୫:୧-୩



୯ ଆରି ଜିସୁ କଇଲା, “ଜାକେ ସୁନ୍ଦବାକେ କାନ ଆଚେବଇଲେ, ସେ ମନ୍ଦେଇ ସୁନ ।”

ଜିସୁ ସେ ଉଦାଅରନ୍ କାଇକେ କଇଲା  
(ମାତିଉ ୧୩:୧୦-୧୭; ଲୁକ୍ ୮:୯-୧୦)

୧୦ ଜିସୁ ଗଟେକଲକ୍ ରଇଲା ବେଲେ ତାର୍‌ସଙ୍ଗ୍ ରଇଲା ଲକ୍‌ମନ୍ ଆରି ବାର୍ତ୍ତା ସିସ୍‌ମନ୍ ତାକେ ପାଚାରୁଲା, “ତମେ କାଇକେ ଉଦାଅରନ୍ ଦେଇ ସିକାଇଲାସିନି ?” ୧୧ ଜିସୁ ସେମନ୍‌କେ କଇଲା, “ପର୍‌ମେସରର୍ ରାଇଜେ ଲୁଚିକରି ରଇଲା ବିସଇ ତମେ ବୁଜିପାରୁଲାସିନି, ମାତର୍ ବାଇରେ ରଇବା ବିନ୍ ଲକ୍‌ମନ୍‌କେ ଉଦାଅରନ୍ ଦେଇ କୁଆ ଅଇଲାନି ।” ୧୨ ଜେନ୍ତାର୍‌କି

“ମୁଇ କରବା କାମ୍‌ମନ୍ ଦେକ୍‌ତେ ରଇଲେ ମିସା ବୁଜି ନାପାରତ୍, ଆରି କଇଲାଟାମନ୍ ସୁନି ସୁନି ମିସା ନ ବୁଜତ୍, ବୁଜ୍‌ତାଇଆଲେ ସେମନ୍ ପର୍‌ମେସରର୍ ଲଗେ ବାଅଡ୍‌ତାଇ ଆରି ପାପ୍ କେମା ପାଇତାଇ ।”

ଜିସୁ କାତାନିର୍ ଅରତ୍ ବୁଜାଇଲା  
(ମାତିଉ ୧୩:୧୮-୨୩; ଲୁକ୍ ୮:୧୧-୧୫)

୧୩ ଜିସୁ ସେମନ୍‌କେ କଇଲା, “ଏ ଉଦାଅରନ୍‌ର୍ ଅରତ୍ ତମେ ବୁଜାସ୍ ନାଇ କି ? ତେବେ ବିନ୍ ଉଦାଅରନ୍‌ର୍ ଅରତ୍ କେନ୍ତ୍ର ବୁଜ୍‌ସା ? ୧୪ ଚାସି ପର୍‌ମେସରର୍ ବାକିଅ ବୁନ୍‌ସି, ୧୫ ଜନ୍‌ଲକ୍‌ମନ୍ ସୁନ୍‌ବାଇ ଆରି ସୁନ୍‌ଲା ଦାପ୍‌ରେ, ସଇତାନ୍ ଆସି ସେମନ୍‌ର୍ ଟାନେଅନି ବୁନିରଇବା ବାକିଅ ଜିକି ନେଇସି, ସେମନ୍ ବୁନିରଇବା ବାଟ୍‌ଲଗର୍ ବିଅନ୍ ପାରା । ୧୬ ସେନ୍ତାର୍ ସେ, ଜନ୍‌ଲକ୍‌ମନ୍ ବାକିଅ ସୁନ୍‌ଲା ଦାପ୍‌ରେ ସାର୍‌ଦା ଅଇ ସେଟା ମାନ୍‌ବାଇ, ସେଲକ୍ ପାକ୍‌ନା ରଇବା ଜାଗାଇ ଅଦର୍‌ଲା ବିଅନ୍ ପାରା । ୧୭ ମାତର୍ ସେମନ୍‌ର୍ ଟାନେ ଚେର୍ ନ ବେଦିରଏଜେ ଚନେକର୍‌ପାଇ ବିସ୍‌ବାସ୍ କରି ରଇବାଇ, ପତେ ବାକିଅର୍‌ଲାଗି କସ୍‌ଟ କି ତାଡ୍‌ନା ଆଇଲେ, ସେ ଦାପ୍‌ରେ ବିସ୍‌ବାସ୍ ଚାଡି ଦେବାଇ । ୧୮ ଆରି ଜନ୍‌ଲକ୍‌ମନ୍ ବାକିଅ ସୁନ୍‌ବାଇ, ମାତର୍ ତାର୍ ଦିନ୍‌କର୍ ବିସଇର୍ ଚିନ୍ତା, ଦନର୍ ମାୟା ଆରି ବିନ୍ ବିନ୍ ବିସଇର୍ ଲାଲ୍‌ସାଟାନେ ପୁରିକରି ମାପ୍‌ରୁର୍ ବାକିଅକେ ଚାପିପାଇସି, ତେଇ ମାପ୍‌ରୁର୍ ବାକିଅ ନିକ କାମ୍ ନ କରେ । ୧୯ ସେନ୍ତାରି ଅଦେକ୍ ଲକ୍‌ମନ୍ ବିଅନ୍ ବୁନିରଇବା କାଟାଲାଟା ବୁଜ୍ ପାରା । ୨୦ ବାକିଲକ୍‌ମନ୍ ବାକିଅ ସୁନି ସେଟା ମାନ୍‌ବାଇ ଆରି ତିରିସ୍ ଗୁଣ୍, ସାଟେ ଗୁଣ୍ ଆରି ସଏ ଗୁଣ୍ ପଲ୍ ଦେବାଇ, ସେମନ୍ ବିଅନ୍ ଅଦ୍‌ରି ରଇବା ନିକ ବୁଜ୍ ପାରା ।”

ବଡି କୁଦ୍‌ରା  
(ଲୁକ୍ ୮:୧୬-୧୮)

୨୧ \*ଜିସୁ ଆରିତରେକ୍ ସେମନ୍‌କେ କଇଲା, “ବଡି ତସାଇ ମାନ୍ ତଲେ କି କର୍ ତଲେ ସଙ୍ଗାଇବାକେ ନ ଆନତ୍ । ବଡି, କୁଦ୍‌ରାଇ ସଙ୍ଗାଇବାକେ ତସାଇବାଇ । ୨୨ \*କାଇକେବଇଲେ ଲକ୍‌ମନ୍‌କେ ଏବେଜାକ ନାଜାନି ରଇବା ବିସଇ ଜାନାଇ ଦିଆଅଇସି, ଆରି ଜନ୍ ବିସଇ ସବୁ ଲୁଚି ରଇସି, ସେଟା ମେଲାକରି ଦିଆଅଇସି । ୨୩ ଜଦି ଜାକେ ନିକ ସଙ୍ଗ୍ ସୁନ୍‌ବାର୍ ଆଚେ, ସେ ନିକ ସଙ୍ଗ୍ ସୁନ ।”

୨୪ \*ଆରି ଜିସୁ ସେମନ୍‌କେ କଇଲା, “କାଇଟା ସୁନ୍‌ଲାସିନି, ସେ ବିସଇ ଏତାଇକରି ଜାଗରତ୍ ରୁଆ । ଜନ୍ ନାପେ ତମେ ନାପ୍‌ସା, ସେ ନାପେ ପର୍‌ମେସର୍ ତମ୍‌କେ ନାପ୍‌ସି, ଆରି ତାର୍‌ତେଇଅନି ଅଦିକ୍ । ୨୫ \*କାଇକେବଇଲେ ଜାକେ ରଇ, କାମେ

☆ ୪:୨୧ ୪:୨୧ ମାତିଉ ୫:୧୫; ଲୁକ୍ ୧୧:୩୩    ☆ ୪:୨୨ ୪:୨୨ ମାତିଉ ୧୦:୨୬; ଲୁକ୍ ୧୨:୨    ☆ ୪:୨୫ ୪:୨୫ ମାତିଉ ୭:୨; ଲୁକ୍ ୬:୩୮    ☆ ୪:୨୫ ୪:୨୫ ମାତିଉ ୧୩:୧୨;୨୫:୨୯; ଲୁକ୍ ୧୯:୨୭

ଲୀଗାଉରଇସି ତାକେ ଅଦିକ ଦିଆଅଇସି, ଆରି ଜାକେ ରଇ, କାମେ ନ ଲୀଗାଏ, ତାରଟାନେ ଅନି ସେ ଅଲପ୍ ରଇଲାଟା ମିସା ନିଆଅଇସି ।”

୨୬ ଆରି ସେ କଇଲା, “ପର୍ଯ୍ୟେସରର୍ ରାଇଜ୍ ଏନ୍ତାରି । ଗଟେକ୍ ଲକ୍ ନିଜର୍ ପଦାଇ ବିଅନ୍ ବୁନ୍ସି । ୨୭ ଆରି, ସେ ଦିନବେଲେ କି ରାତିବେଲେ, ସଇଲେ କି କାମ୍ କଲେ ମିସା ବିଅନ୍ କେନ୍ତ୍ରୀ ଆଁକରି ବଡ଼ସି, ସେଟା ନାଜାନେ, ୨୮ ଜମି ତାର୍ମାନକେ ପଲ୍ ଉବ୍‌ଜାଇସି, ପର୍‌ଡୁମ୍ ପତର୍, ପଚେ କେଡ଼, ତାର୍‌ପଚେ ମୁଞ୍ଜି ପୁରୁନ୍ ରଇବା କେଡ଼ । ୨୯ ମାତର୍ ଚାସ୍ ପାଟ୍‌ଲା ଦାପ୍‌ରେ କାଟ୍‌ବା ବେଲା କେଟିଆଇଲେ, ଚାସି କାଟ୍‌ବାକେ ଇଲା ଲୀଗାଉସି ।”

ସର୍ସୁ ମୁଞ୍ଜିର୍ କାତାନି

(ମାତିଉ ୧୩:୩୧,୩୨,୩୪; ଲୁକ୍ ୧୩:୧୮-୧୯)

୩୦ ସେ ଆରି ତରେକ୍ କଇଲା, “ଆମେ ପର୍‌ଯ୍ୟେସରର୍ ରାଇଜ୍ କାଇଟା ସଙ୍ଗ୍ ସମାନ କରୁ ? ନଇଲେ କାଇ ଉଦାଅରନ୍ ସଙ୍ଗ୍ ବୁଜାଇଦେଉଁ ? ୩୧ ସେଟା ଗଟେକ୍ ସର୍ସୁ ମୁଞ୍ଜି ପାରା, ବୁର୍ବୁ ବୁନ୍‌ବା ବେଲେ ସେଟା ପୁର୍‌ତିବିର୍ ସବୁ ମୁଞ୍ଜିତେଇ ଅନି ସାନ୍‌ଟା, ୩୨ ମାତର୍ ବୁନ୍‌ଲେ, ସେଟା ବଡ଼ିକରି ସବୁ ସାଗର୍ ଟାନେଅନି ବଡ଼ ଅଇସି, ଆରି ତାର୍ କେନ୍ଦି ଏନ୍ତ ବଡ଼ ବଡ଼ ଅଇଜାଇସି ଜେ, ସରଗର୍ ଚତଇମାନ୍ ତାର୍ କେନ୍ଦାଇ ବାସା ଅଇବାଇ ।”

୩୩ ଜିସୁ ଏନ୍ତ କେତେକ୍ କେତେକ୍ ଉଦାଅରଣ୍ ସଙ୍ଗ୍ ସେମନର୍ ବୁଜ୍‌ବା ବପୁ ଇସାବେ ବାକିଅ ସୁନାଇତେ ରଇଲା, ୩୪ ଆରି ଉଦାଅରନ୍ ନଇତେ ସେ ତାକର୍ ଲଗେ କାଇ କାତା ନ କଇତେରଇଲା । ମାତର୍ ଜିସୁ ବିନ୍ ଲକ୍‌ମନ୍ କେ ନ ରଇଲାବେଲେ ନିଜର୍ ସିସମାନକେ ସବୁ ବିସଇ ବୁଜାଇ ଦେଇତେ ରଇଲା ।

ଜିସୁ ପବନ୍‌କେ ତବିର୍ କଲା

(ମାତିଉ ୮:୨୩-୨୭; ଲୁକ୍ ୮:୨୨-୨୫)

୩୫ ସେଦିନେ ସଞ୍ଜ୍ ଅଇଲାକେ ଜିସୁ ସେମନକେ କଇଲା, “ଆସା, ଗାଡ଼ ସେପାଟେ କୁ ।” ୩୬ ସେଡ଼କିବେଲେ ସେମନ୍ ଲକ୍ ଗଅଲି ଚାଡ଼ିକରି, ଜିସୁ ବସି ରଇଲା, ଗଟେକ୍ ଡଙ୍ଗା ଲାଇ ବସ୍‌ଲାଇ । ଆରି ବିନ୍ ବିନ୍ ଡଙ୍ଗା ମିସା ତାକର୍ ସଙ୍ଗ୍ ରଇଲା । ୩୭ ପଚେ ଅଟାଡ଼ ବେସି ବାଉପବନ୍ ଆଇଲା, ଆରି ଲଅଡିର୍ ମାଡ଼କେ ଡଙ୍ଗା ପାନି ପୁରୁନ୍ ଅଇବାର୍ ଦାର୍‌ଲା । ୩୮ ସେଡ଼କିବେଲେ ଜିସୁ ଡଙ୍ଗାର୍ ପର୍ ଚଟୁ ମାର୍‌ବା ଲଗେ ମଟ୍‌ଲା ମୁଣ୍ଡିସାକରି ସଇଦେଇ ରଇଲା । ସିସମନ୍ ତାକେ ଉଟାଇ କଇଲା, “ଏ ଗୁରୁ, ଆମେ ବୁଡ଼ିଜିବୁବେ, ତମ୍‌କେ କାଇ ଚେଡ଼ନା ନାଇ ?”

୩୯ ସେଡ଼କିବେଲେ ଜିସୁ ଉଟି ପବନ୍‌କେ ଦମ୍‌କାଇ ଦେଇ ଲଅଡିକେ କଇଲା, “ତବିର୍ ଅଇ ବୁପ୍ ର ।” ସେଡ଼କି ବେଲେ ପବନ୍ ବନ୍ଦ୍ ଅଇଲା, ଆରି ସବୁ ତବିର୍ ଅଇଲା । ୪୦ ଆରି ସେ ସିସମନକେ କଇଲା, “କାଇକେ ଏତେକ୍ ଡର୍‌ଲାସ୍‌ନି ? ତମ୍‌କେ ଏବେଜାକ ମର୍‌ଲଗେ ବିସବାସ୍ ନାଇ କି ?”

୪୧ ସେମନ୍ ବେସି ଡରି ଜାଇକରି ତାକର୍ ତାକର୍ ବିଡ଼ରେ କୁଆବଲା ଅଇଲା, “ତେବେ ଏ କେ ଜେ, ପବନ୍ ଆରି ଲଅଡି ମିସା ତାର୍ ଆଦେସ୍ ମାନ୍‌ଲାଇନି ?”



ଡୁମାଦାରଲା ଲକ୍‌କେ ଜିସୁ ନିମାନ୍ କଲା

(ମାତିଉ ୮:୨୮-୩୪; ଲୁକ୍ ୮:୨୬-୩୯)

୧ ଜିସୁ ଆରି ତାର୍ ସିସମନ୍ ସମ୍‌ଦୁର୍ ସେପାଟେ ରଇବା ଗରାସିୟମନର୍ ଜାଗା କେଟ୍‌ଲାଇ । ୨ ଜିସୁ ଡଙ୍ଗାଅନି ଉତର୍‌ଲା ଦାପ୍‌ରେ ଗଟେକ୍ ଡୁମା ଦାରିରଇବା ଲକ୍ ମସନେ ଅନି ବାରଇ ତାକେ ବେଟ୍‌ଅଇବାକେ ଆଇଲା । ୩ ସେ ଲକ୍ ମସନେ

ବାସାଅଇରଇଲା, ଆରି କେ ମିସା ତାକେ ସିକିଲି ସଙ୍ଗ ବାନ୍ଦି ନାପାର୍ତେ ରଇଲା । ୪ ତାକେ କେତେକ୍ ତର ଗତେ କତୁ ଆରି ଆତେ ସିକିଲି ସଙ୍ଗ ବାନ୍ଦିଲେ ମିସା, ସେ ସିକିଲି ସବୁ ଚିତାଇ ଦେଇ, କତୁ ସବୁ ବାଙ୍ଗାଇ ପାକାଇତେ ରଇଲା । ତାକେ ବାନ୍ଦି ସଙ୍ଗଇବାକେ କାର୍ ମିସା ବପୁ ନ ରଇଲା । ୫ ସେ ଦିନ ରାତି ସବୁବେଳେ ମସନେ ଆରି କୁପ୍ଲିତେଇ ରଇ କିରକିରତେ ରଇଲା, ଆରି ପାକ୍ନା ସଙ୍ଗ ଗାଗ୍ତେ ମୁଣ୍ଡେ ମାରିଅଇ କଣ୍ଡିଆ ବଣ୍ଡିଆ ଅଇଜାଇତେରଇଲା ।

୬ ସେ ଜିସୁକେ ଦୁରିକେ ଅନି ଦେକି ପାଲାଅ ଆସି ତାର ମୁଆଟେ ଅଦରଲା । ୭ ଆରି ଆଉଲି ଅଇ କିରକିରି କରି କଇଲା, “ଏ ସବୁର୍ ଟାନେଅନି ବଡ଼ ପର୍ମେସରର୍ ପ ଜିସୁ, ମର୍ ଟାନେ ତମର୍ କାଇ କାମ୍ ଆତେ ? ମୁଇ ତମ୍‌କେ ପର୍ମେସରର୍ ନାଉଁ ଦାରି ଗୁଆରି କରି କଇଲିନି, ମକେ କସ୍ତ ଦିଆନାଇ ।” ୮ କାଇକେବଇଲେ ଜିସୁ ତାକେ ଆଗ୍ତୁ କଇତେରଇଲା, “ଏରେ ତୁମା, ଏ ଲକର୍ଟାନେଅନି ବାରଇ ଜା ।”

୯ ଆରି, ଜିସୁ ତାକେ ପାଚାରଲା, “ତର୍ ନାଉଁ କାଇ ନାଉଁ ?” ସେ ତାକେ କଇଲା, “ମର୍ ନାଉଁ ବାଇନି ତୁମା, ଏନ୍ତି ଆମେ ଜବର୍ ଆରୁ ।”

୧୦ ଆରି, ସେ ଲକ୍ ଜେନ୍ତ୍ରିକି ସେମନ୍‌କେ ସେ ଜାଗାଇ ଅନି ବାଇରେ ନ ପାଟାଅ ବଲି, ଜିସୁକେ ତରକେ ତର ଜୁଆର୍ ବିଆର୍ କଲା ।

୧୧ ସେ ଲଗର୍ କୁପ୍ଲି ପାଲିକେ ବେସି ଗୁସ୍‌ରି ମାନ୍ଦା ଚାଟେରଇଲା । ୧୨ ଆରି ତୁମାମନ୍ ଜିସୁକେ ଜୁଆର୍ ବିଆର୍ କରି କଇଲା, “ସେ ଗୁସ୍‌ରିମନ୍‌ର୍ ବିଡ଼ରେ ପୁରବାକେ ଆମ୍‌କେ ପାଟାଆ ।” ୧୩ ଜିସୁ ସେମନ୍‌କେ ଆଦେସ୍ ଦେଲାଦାପ୍‌ରେ, ସେ ଲକର୍ ଲଗେଅନି ତୁମାମନ୍ ବାରଇକରି ଗୁସ୍‌ରିମନ୍‌ର୍ ବିଡ଼ରେ ପୁରଲା । ସେଡ଼କିବେଲେ, ସେ ଆଡାର ବିଡ଼କିକରି ପାଲାଅଲା ଆରି କୁପ୍ଲି ଅନି ଗସ୍‌ରିକରି ସମ୍‌ଦୁରେ ଜାଇ ବୁଡି ମରିଗାଲା । ଆଡାରେ ଗୁସ୍‌ରି ମାନ୍ଦା ପାକାପାକି ଦୁଇଅଜାଟା ରଇଲା ।

୧୪ ଗୁସ୍‌ରିମନ୍‌କେ ଚାରାଇତେରଇବା ଲକ୍‌ମନ୍ ପାଲାଅ ଜାଇ ଗାଉଁ ଆରି ଗୁଡାମନ୍‌କେ ସେଟା ଜାନାଇଲା । ଜାନାଇଲାଟା ସୁନି ଲକ୍‌ମନ୍ “ତେଇ କାଇଟା ଅଇଲାଆତେ ?” ବଲି ଦେକ୍‌ବାର୍ ଆଇଲା । ୧୫ ଆରି ଲକ୍‌ମନ୍ ଜିସୁର୍ ଲଗେ ଆସିକରି ସେ ତୁମା ଦାରି ରଇଲା ଜନ୍‌ଲକ୍‌କେ କି ଆଗ୍ତୁ ବାଇନି ତୁମା ଦାରିରଇଲା, ସେ ଲକ୍ ନିମାନ୍ ଲୁଗା ପିନ୍ଧିକରି ନିକ ଲକ୍‌ପାରି ବସିରଇବାଟା ଦେକି ଡରିଗାଲା । ୧୬ ଆରି ଜନ୍ ଲକ୍‌ମନ୍ ଦେକିରଇଲା, ସେମନ୍ ସେ ତୁମା ଦାରିରଇବା ଲକ୍‌କେ କାଇଟା ଅଇରଇଲା, ସେଟା ଆରି ଗୁସ୍‌ରିମନ୍‌କେ ଅଇଲା ବିସଇ ସେମନ୍‌କେ କଇଦେଲା ।

୧୭ ତେଇ ଲକ୍‌ମନ୍ ଜିସୁକେ ସେମନ୍‌ର୍ ସନ୍ଦିଅନି ଚାଡି ଜିବାକେ ବାବୁଜିଆ କଲା ।

୧୮ ପଟେ ଜିସୁ ତଙ୍ଗାଇ ଚଗ୍‌ବା ବେଲେ ଜନ୍‌ଲକ୍‌କେ ଆଗ୍ତୁ ତୁମା ଦାରିରଇଲା, ସେ ଲକ୍ ତାର୍ ସଙ୍ଗ ରଇବାକେ ବାବୁଜିଆ କଲା ।

୧୯ ମାତର୍ ଜିସୁ ତାକେ ତେବାଇକରି କଇଲା, “ତମର୍ ଗରେ, ତମର୍ ନିଜର୍ ଲକ୍‌ମନ୍‌ର୍ ଟାନେ ଜା, ଆରି ପର୍ମେସର୍ ତର୍‌ପାଇ ଜନ୍ ବଡ଼ କାମ୍ କଲା ଆତେ ଆରି ତକେ ଜନ୍ ଦୟା ଦେକାଇ ଆତେ, ସେଟା ସବୁ ସେମନ୍‌କେ ଜାନାଇଦେସ୍ ।”

୨୦ ତେଇଅନି ସେ ଲକ୍ ଜାଇକରି, ଜିସୁ ତାର୍‌ପାଇ ଜନ୍ ବଡ଼ କାମ୍ କରିରଇଲା, ସେ ସବୁ ଦେକାପଲି ନଅରେ, ଗାଉଁମନ୍‌କେ କଇବୁଲା । ତେଇ ସବୁଲକ୍ କାବା ଅଇଗାଲା ।

ଜିସୁ ଗଟେକ୍ ମଲା ଟକିକେ ଜିବନ୍ ଦେଲା ଆରି ଗଟେକ୍ ରଗି ମାଇଜିକେ ନିମାନ୍ କଲା

(ମାଡିଉ ୮:୨୩-୨୭; ଲୁକ୍ ୮:୨୨-୨୫)

୨୧ ଜିସୁ ତାଙ୍କ ମାତାଙ୍କୁ ଜାଇ ଆରିତରେକ୍ ବାଉଡି ଆଇଲାଦାପ୍ରେ, ଜବରଲକ୍ ତାର ଲଗେ ରୁଣ୍ଡିଲା, ଆରି ସେ ସମ୍ପୂର୍ଣ୍ଣ କଣ୍ଠି ରଇଲା । ୨୨ ସେତୁକିବେଲେ ଜିଉଦିମନର୍ ପାର୍ତନା ଗରର୍ ମୁକିଅ, ଜାଇରସ୍ ନାଉର୍ ଗଟେକ୍ ଲକ୍ ଆସି ଜିସୁକେ ଦେକି ତାର ଗଡ଼ତଲେ ଅଦରଲା । ୨୩ ଆରି ବେସି ବାରୁଜିଆ କରି କଇଲା, “ମର୍ ଟକି ମରବା ଉପ୍ରେ ଆଟେ, ସେ ଜେନ୍ତି ନିକ ଅଇ ବର୍ସି, ତେବର୍ ପାଇ ତମେ ଆସି ତାର ଉପ୍ରେ ଆଡ଼ ସଙ୍ଗଇଦିଆସ୍ ।”

୨୪ ଜିସୁ ତାକର୍ ସଙ୍ଗ ଗାଲା, ଆରି ଗାଦିଲକ୍ ତାର ପଟେ ପଟେ ଜିବାର୍ ଦାରଲା, ଆରି ଲକ୍ମନ୍ ତାକେ ଡାବାଡାବି ଅଇତେ ରଇଲା ।

୨୫ ତେଇ ଗଟେକ୍ ବାର ବରସ୍ ଜାକ ଗାଗ୍ତେଅନି ବନି ଜିବା ମାଲଜିଟକି ରଇଲା । ୨୬ ଜେ କି କେତେ କେତେ ଡାକ୍ଟରଟାନେ ଜାଇକରି ମିସା ସାସ୍ତି ବଗି ସବୁ ବିକିଦେଇ ରଇଲା । ମାତର୍ ଅଲପ୍ମିସା ନିକ ନ ଅଇ ଅଦିକ୍ ଅଦିକ୍ ଅଇଜାଇତେରଇଲା । ୨୭ ଜେତେବେଲେ ସେ ଜିସୁର୍ ବିସଇ ସୁନି, ଲକ୍ ଗଅଲି ବିତ୍ରେ ପର୍ବାଟେ ଆସି ଜିସୁର୍ ଲୁଗା ଚିଇଲା, କାଇକେବଇଲେ ସେ କଇତେ ରଇଲା, ୨୮ “କେନ୍ତି ମିସା ମୁଇ ତାର ଲୁଗାଜାଲି ଅଲପ୍ ଚିଇଲେ ନିମାନ୍ ଅଇବି ।”

୨୯ ସେ ଦାପ୍ରେ ତାର ବନି ଜିବାଟା ବନ୍ଦୁଅଇଗାଲା, ସେଟା ସେ ନିଜେ ଜାନି ପାରଲା । ୩୦ ସେ ଦାପ୍ରେ ଜିସୁ ନିଜର୍ ଟାନେଅନି ସକ୍ତି ବାରଇବାଟା ଜାନିକରି ଲକ୍ମନ୍ ବାଟେ ବୁଲି ଦେକି କଇଲା, “କେ ମର୍ ଲୁଗା ଚିଇଲା ?”

୩୧ ତାର ସିସ୍ମନ୍ ତାକେ କଇଲା, “ତମେତା ଦେକ୍ଲାସ୍ନି, ଲକ୍ମନ୍ ତମର୍ ଉପ୍ରେ ଡାବା ଡାବି ଅଇଗାଲାଇନି ଆରି ତମେ କେନ୍ତି କଇଲାସ୍ନି, କେ ମକେ ଚିଇଲା ବଲି ?”

୩୨ ମାତର୍ ଜେ ଏଟା କରିରଇଲା, ତାକେ ଦେକ୍ବାକେ ସେ ଚାରିବେଡ଼ି ଆଁକି ବୁଲାଇବାର୍ ଦାରଲା । ୩୩ ସେତୁକି ବେଲେ ସେ ମାଲଜିଟକି ତାକେ ଜନ୍ ଜନ୍ଟା ଗଟିଆଟେ, ସେଟା ଜାନି, ତରିକରି ତର୍ତରି ତର୍ତରି ଆସି ଜିସୁର୍ ଗଡ଼ତଲେ ଅଦରି ସବୁ ସଡ଼କାତା କଇଲା । ୩୪ ଜିସୁ ତାକେ କଇଲା, “ନୁନି, ମର୍ଟାନେ ବିସ୍ବାସ୍ କଲାକେ ତୁଇ ନିମାନ୍ ଅଇ ଆତୁସ୍, ସାନ୍ତିଅଇ ଜା ଆରି ତର୍ ରଗେଅନି ନିମାନ୍ ଅଇ ର ।”

୩୫ ସେ ଏ କାତା କଇଲା ବେଲେ ଜିଉଦି ମନର୍ ପାର୍ତନା ଚାଲାଉ ଜାଇରସ୍ ଗରେଅନି ଗଟେକ୍ ଲକ୍ ଆସି କଇଲା, “ତମର୍ ନୁନି ମରିଗାଲାବେ, କାଇକେ ଗୁରୁକେ ଆରି କସ୍ଟ ଦେଲାସ୍ନି ?”

୩୬ ମାତର୍ ଜିସୁ ସେମନ୍ କାତା ଅଇଲାଟା ନ ସୁନ୍ଲାପାରାଅଇ ପାର୍ତନା ଚାଲାଉକେ କଇଲା, “ତରାନାଇ, ଆବ୍‌କା ବିସ୍ବାସ୍ କରା ।” ୩୭ ଆରି ପିତର୍, ଜାକୁବ ଆରି ତାର ବାଇ ଜଅନକେ ଚାଡ଼ି ଆରି କାକେ ନିଜର୍ ସଙ୍ଗ ଜିବାକେ ଦେଏ ନାଇ । ୩୮ ସେମନ୍ ପାର୍ତନା ଚାଲାଉର୍ ଗରେ ଆଇଲା ଦାପ୍ରେ, ଜିସୁ, ଆଉଲି ଅଇବାଟା ଆରି ବେସି ମାର୍ତପ୍ ଅଇ କାନ୍ଦବାଟା ଦେକ୍ଲା । ୩୯ ମାତର୍ ବିତ୍ରେ ଜାଇ ଲକ୍ମନ୍‌କେ କଇଲା, “କାଇକେ ଆଉଲି ଅଇ କାନ୍ଦଲାସ୍ନି ? ଏ ନୁନି ମରେ ନାଇ, ଅବ୍‌କା ସଇଦେଇଆଟେ ।” ସେତୁକି ବେଲେ ସେମନ୍ ଜିସୁକେ ଲାଜ୍ କରାଇ କଇବାର୍ ଦାରଲା ।

୪୦ ମାତର୍ ସେ ସବୁକେ ବାରକରି ଟକିର୍ ଆୟାବାବାକେ ଆରି ନିଜର୍ ସିସ୍ମନ୍ ସଙ୍ଗ, ତାକେ ଜନ୍ ଲଗେ ତୁଲାଇ ରଇଲା, ସେ ଜାଗାଇ ଗାଲା । ୪୧ ଆରି ଟକିର୍ ଆଡେଦାରି ତାକେ କଇଲା, “ଟଲିଡାକୁମ୍ !” ବଇଲେ “ଏ ନୁନି ମୁଇଁ ତକେ କଇଲିନି ଉର୍ !”

୪୨ ଏତୁକି କଇଲା ଦାପ୍ରେ ଟକି ଉଟି ବୁଲ୍‌ବାର୍ ଦାରଲା, ତାକେ ବାର ବରସ୍ ଅଇରଇଲା । ସେତୁକିବେଲେ ସବୁଲକ୍ମନ୍ ଦେକି ଅଦିକ୍ କାବାଅଇଗାଲା ।

୪୩ ଜେନ୍ତୁ ଆରି, କେ ମିସା ଟକିକେ ଗଟୁଲା ବିସଇ ନାଜାନତ୍, ତେବର୍ ପାଇ ସେ ଟକିର୍ ଆୟାବାବାକେ ଅଦିକ୍ ତାଟ୍ ସଙ୍ଗ୍ ଆଦେସ୍ ଦେଲା, ଆରି “ଟକିକେ କାଜଟା ଆଲେ କାଜବାକେ ଦିଆସ୍ ।” ବଲି କଇଲା ।



ନିଜର୍ ଗାଏଁ ଜିସୁକେ ନାମତ୍ ନାଇ

(ମାଡିଉ ୧୩:୫୩-୫୮; ଲୁକ୍ ୪:୧୭-୩୦)

୧ ଜିସୁ ସେ ଜାଗା ଚାଡି, ସାନ୍‌ବେଲେ ଅନି ବଡିଆଇଲା ନଅରେ ଆଇଲା, ଆରି ତାର୍ ସିସ୍‌ମନ୍ ମିସା ତାର୍ ସଙ୍ଗ୍ ଗାଲାଇ । ୨ ବିସ୍‌ରାମ୍‌ବାର୍ ଆଇଲାକେ, ସେ ଜିଉଦିମନର୍ ପାରତନା ଗରେ ସିକିଆ ଦେବାର୍ ଦାରୁଲା, ଆରି କେତେ କେତେ ଲକ୍ ତାର୍ କାତା ସୁନି କାବା ଅଇ କଇଲାଇ, “ଏ ଲକ୍ ଏ ସବୁଜାକ କନ୍ତି ଅନି ସିକ୍‌ଲା ? ଆରି, ଆକେ ଏନ୍ତାରି ଗିଆନ୍ କେ ଦେଲା ? ଆରି କେବେ ନ ଅଇବା କାମର୍ ବପୁ କନ୍ତିଅନି ପାଇଲା ? ୩ ଏ ଲକ୍‌ତା ସେ ବାଡଇ । ସେ ମରିୟମର୍ ପଅ, ଜାକୁବ୍, ଜସି, ଜିଉଦା ଆରି ସିମନ୍ ତାର୍ ବାଇ ଅଇବାଇ । ଆର୍ ବଇନିମନ୍ ତା ଇଡି ଆମର୍ ସଙ୍ଗ୍ ଆଚଡ୍ ।” ଏନ୍ତାରି କଇକରି ସେମନ୍ ତାକେ ମାନତ୍ ନାଇ ।

୪ ଖେଇ ଜିସୁ ସେମନ୍‌କେ କଇଲା, “ନିଜର୍ ନଅରର୍ କୁଟୁମର୍ ଲକ୍‌ମନ୍‌କେ ଆରି ନିଜର୍ ଗରର୍ ଲକ୍‌କେ ଚାଡି ବାକି ସବୁ ଜାଗାଇ ବାବଦାଦିମନ୍‌କେ ସନ୍‌ମାନ୍ ମିଲ୍‌ସି ।” ୫ ସେଜାଗାଇ ଆରି କେତେଟା ରଗିମନ୍‌କେ ସେ ଆଡ୍ ସଙ୍ଗଇକରି ନିକ କର୍‌ବାଟା ଚାଡି ଆରି କାଇ ନ ଅଇବା କାମ୍ କରିନାପାରୁଲା । କାଜକେବଇଲେ ତେଇର୍ ଲକ୍‌ମନ୍ ତାକେ ବିସ୍‌ବାସ୍ କରଡ୍ ନାଇ । ୬ ଆରି ତେଇର୍ ଲକ୍‌ମନ୍ ତାକେ ବିସ୍‌ବାସ୍ ନ କର୍‌ବାଟା ଦେକି ଜିସୁ କାବାଅଇଗାଲା ।

ଜିସୁ ବାର୍‌ଟା ସିସ୍‌ମନ୍‌କେ ପାଟାଇଲା

(ମାଡିଉ ୧୦:୫-୧୫; ଲୁକ୍ ୯:୧-୬)

୭ ପଟେ ସେ ଚାରିବେଡଡିର୍ ଗାଉଁ ମନ୍ ବୁଲି ବୁଲି ସିକିଆ ଦେବାର୍ ଦାରୁଲା । ଏଡକି ବିଡରେ ସେ ବାରଟା ସିସ୍‌ମନ୍‌କେ ଲଗେ ତାକି, ଦୁଇ ଦୁଇ ଲକ୍‌କେ ପାଟାଇବାର୍ ଆରାମ୍ କଲା, ସେମନ୍‌କେ ତୁମାମନ୍‌କେ ଚାଡାଇବାକେ ଅଦିକାର୍ ଦେଲା । ୮ ଜିବାବେଲେ ଗଟେକ୍ ତାଙ୍ଗ୍ ଚାଡି ବାଟ୍ କର୍‌ଚର୍ ପାଇ ରୁଟି କି ବେସ୍‌ନିଟାନେ ତାରୁ ନ ନିଆ ବଲି ଆଦେସ୍ ଦେଲା । ୯ ମାତର୍ ସେମନ୍‌କେ ପାଣ୍ଡୁଇ ପିନ୍‌ବାକେ କଇଲା, ପିନ୍‌ରଇବା ଚକା ଚାଡି ଆରି ଗଟେକ୍ ଚକା ନିଆନାଇ ବଲି କଇଲା । ୧୦ “ଜେଡେବେଲେ ତମ୍‌କେ ଜାର୍ ଗରେ ଡାକ୍‌ବାଇ ସେ ନଅର୍ ଚାଡିଜିବା ଜାକ ତେଇସେ ରୁଆ । ୧୧ \*\*\*ଜଦି କନ୍ ନଅରର୍ ଲକ୍‌ମନ୍ ତମ୍‌କେ ନ ନାମତ୍, ଆରି ତମର୍ କାତା ନ ସୁନତ୍, ସେ ଜାଗାଇ ଅନି ଆଇବା ବେଲେ ସେମନ୍‌ର୍ ବିରଦେ ସାକି ଇସାବେ, ତମର୍ ପାଦର୍ ଦୁଲି ପାପଡିଦିଆସ୍ । ଏଟାରୁଲାଗି ସେ ନଅରର୍ ଲକ୍‌ମନ୍ ଜାନ୍‌ବାଇ ଜେ, ପର୍‌ମେସର୍ ସେମନ୍‌କେ ଡଣ୍ଡ ଦେଇସି ।”

୧୨ ସିସ୍‌ମନ୍ ବାରଇ ଜାଇ ଲକ୍‌ମନ୍‌କେ “ତମର୍ ପାପ୍ ଟାନେଅନି ବାଡଡା ।” ବଲି ଜାନାଇଲାଇ । ୧୩ ଖେତେକ୍ କେତେକ୍ ଲକ୍‌ମନ୍‌ର୍ ଟାନେଅନି ତୁମା ଚାଡାଇଲାଇ, ଆରି କେତେକ୍ ରଗି ଲକ୍‌ମନ୍‌କେ ଚିକନ୍ ଲାଗାଇ ନିମାନ୍ କଲାଇ ।

ତୁବନ୍ ଦେଉ ଜଅନର୍ ମରନ୍

(ମାଡିଉ ୧୪:୧-୧୨; ଲୁକ୍ ୯:୬-୯)

✧ ୬:୪ ୬:୪ ଜଅନ୍ ୪:୪୪

✧ ୬:୧୧ ୬:୧୧ ପେରିଡ୍ ୧୩:୫୧

✧ ୬:୧୧ ୬:୧୧ ଲୁକ୍ ୧୦:୪-୧୧

✧ ୬:୧୩

୧୪ \*ଜିସୁସ୍ ନାଉଁ ସବୁବାଟେ ଉଡ଼ରା ଅଇଗାଲାକେ, ଏରଦ୍ ରାଜା ଜିସୁସ୍ ବିସଇ ସୁନ୍‌ଲା, ଆରି ଲକ୍‌ମନ୍ କଇତେରଇଲାଇ, ତୁବନ୍ ଦେଉ ଜଅନ୍ ମରିକରି ଉଟି ଆଟେ, ତେବର୍‌ପାଇ ଏ ସବୁ ନ ଅଇବା କାମର୍ ସକ୍ତି ତାର୍‌ଟାନେ କାମ୍ କଲାନି । ୧୫ ମାତର୍ ବିନ୍ ବିନ୍ ଲକ୍‌ମନ୍ କଇତେ ରଇଲାଇ, ଏ ଏଲିୟ, ଆରି କେ କେ କଇତେ ରଇଲାଇ, ଆଗର୍ ବାବବାଦି ମନର୍‌ପାରା ଗଟେକ୍ ଲକ୍ ।

୧୬ ମାତର୍ ଏରଦ୍ ଏଟା ସୁନି କଇଲା, “ମୁଇ ଜନ୍ ଜଅନ୍‌ର୍ ମୁଣ୍ଟ୍ କାଟାଇଲି, ସେ ମଲାତେଇଅନି ଉଟିଆଟେ !” ୧୭ \*ତେବେ ଏରଦ୍ ନିଜର୍ ବାଇ ପିଲିପର୍ ମାଇଜି ଏରଦିଆକେ ବିବା ଅଇ ରଇଲା । ତାକେ ସାର୍‌ଦା କର୍‌ବାକେ ନିଜେ ଏରଦ୍ ଲକ୍‌ମନ୍‌କେ ପାଟାଇ ତୁବନ୍ ଦେଉ ଜଅନ୍‌କେ ଦାରି, ବାନ୍ଦିକରି ବନ୍ଦି କର୍‌ବାକେ ଆଦେସ୍ ଦେଲା । ୧୮ କାଇକେବଇଲେ ଜଅନ୍ ଏରଦ୍‌କେ ତରକେତର୍ କଇତେରଇଲା “ମସାର୍ ନିୟ୍‌ମ୍ ଇସାବେ ନିଜର୍ ବାଇର୍ ମାଇଜିକେ ସଙ୍ଗଇବାର୍ ତର୍ ବିଦି ନାଇ ।”

୧୯ ଏନ୍ତାରି କଇଲାକେ ଏରଦିଆ ଜଅନ୍‌କେ ରିସା ଅଇ ତାକେ ମରାଇବାକେ ମନ୍ କର୍‌ତେରଇଲା, ମାତର୍ ନାପାର୍‌ତେ ରଇଲା । ୨୦ କାଇକେବଇଲେ ଏରଦ୍ ଜଅନ୍‌କେ ଗଟେକ୍ ଦରମ୍ ଆରି ସୁକଲ୍ ଲକ୍ ବଲି ଜାନି ତର୍‌ତେ ରଇଲା, ଆରି ତାକେ ରକିଆ କର୍‌ବାକେ ଚେସ୍‌ଟା କର୍‌ତେରଇଲା । ଜେତେବେଲେ ମିସା ତାର୍ କାତା ସୁନ୍‌ତେରଇଲା, ବେସି କିଲ୍‌ବିଲ୍ ଅଇତେରଇଲା । ଏଲେମିସା ସେଟା ସାର୍‌ଦା ସଙ୍ଗ୍ ସୁନ୍‌ତେରଇଲା ।

୨୧ ପଟେ ଏରଦିଆର୍ ଜାଗ୍‌ତେ ରଇବା ଦିନ୍ କେଟିଆଇଲା । ଏରଦ୍ ଜନମ୍ ଦିନେ, ନିଜର୍ ମନ୍ତ୍ରି ମନ୍‌କେ ଆରି ମୁକିଅ ମୁକିଅ ସେନାପତି ଆରି ଗାଲିଲିର୍ ବଡ଼ବଡ଼ ଲକ୍‌ମନ୍‌କେ ତାକି, ରାତିଆ ଗଟେକ୍ ବଜିକଲା । ୨୨ ତେଇ ଏରଦିଆର୍ ଟକି ବିଡ଼ରେ ପୁରି ଏରଦ୍ ଆରି ତାର୍ ସଙ୍ଗ୍ ବସି କାଇବା ଲକ୍‌ମନ୍‌କେ ନାଟ୍‌କରି ମନ୍‌ତାଇ ଦେଲା । ରାଜା ଟକିକେ କଇଲା, “ତୁଇ ଜାଇଟା ମନ୍ କଲୁସ୍‌ନି ସେଟା ମାଙ୍ଗ୍, ମୁଇ ତକେ ଦେବି ।” ୨୩ ଆରି ଏରଦ୍ ତାର୍ ଲଗେ ପର୍‌ମାନ୍ କଲା, “ତୁଇ ଆମକେ ଜାଇଟା ମାଙ୍ଗ୍‌ଲେ ମିସା, ମୁଇ ରାଇଜର୍ ଅଦ୍ ବାଗ ଜାକ ତକେ ଦେଇ ଦେବି ।”

୨୪ ତେଇଅନି ସେ ବାରଇଜାଇ ତାର୍ ମାଆକେ ପାଟାରଲା, “ମୁଇ କାଇଟା ମାଙ୍ଗ୍‌ବି ?” ତାର୍ ମାଆ କଇଲା, “ତୁବନ୍ ଦେଉ ଜଅନ୍‌ର୍ ମୁଣ୍ଟ୍ ମାଙ୍ଗ୍ ।”

୨୫ ସେଦାପ୍‌ରେ ଟକି ରାଜାର୍ ଲଗେ ଆସି ଏଟା କଇ ମାଙ୍ଗ୍‌ଲା, “ତୁଇ ମକେ ଏବେ ତୁବନ୍ ଦେଉ ଜଅନ୍‌ର୍ ମୁଣ୍ଟ୍ ଗଟେକ୍ ତାଲାଇ କାଟି ଦେ ।” ୨୬ ସେକାତା ସୁନି ରାଜା ବେସି ଦୁକ୍ କଲା ମାତର୍ ନିଜେ କାତା ଦେଇରଇଲାଟା ଆରି କାଇବାକେ ବସି ରଇବା ଲକ୍‌ମନ୍‌ର୍‌ମୁଆଟେ ମାଙ୍ଗ୍‌ଲାଟା ନାଇ ବଲି କଇବାକେ ମନ୍ କରେନାଇ । ୨୭ ତେବେ ରାଜା ସେଦାପ୍‌ରେ ଗଟେକ୍ ସଇନକେ ପାଟାଇ ତାର୍ ମୁଣ୍ଟ୍ ଆନ୍‌ବାକେ ଆଦେସ୍ ଦେଲା, ତେଇ ସଇନ ବନ୍ଦି ଗରେ ଜାଇ, ତୁବନ୍ ଦେଉ ଜଅନ୍‌ର୍ ମୁଣ୍ଟ୍ କାଟ୍‌ଲା । ୨୮ ଆରି ସେ ମୁଣ୍ଟ୍ ଗଟେକ୍ ତାଲାଇ ଆନି ଟକିକେ ଦେଲା, ଆରି ଟକି ତୁବନ୍ ଦେଉ ଜଅନ୍‌ର୍ ମୁଣ୍ଟ୍ ନେଇ ତାର୍ ମାକେ ଦେଲା । ୨୯ ଜଅନ୍‌ର୍ ସିସ୍‌ମନ୍ ତେଇର୍ କବର୍ ସୁନି ଆଇଲାଇ, ଆରି ମଲା ମଦ୍‌କେ ନେଇ ମସ୍‌ନେ ତପ୍‌ଲାଇ ।

ଜିସୁ ବେସି ଲକ୍‌ମନ୍‌କେ କୁଆଇଲା  
(ମାତିଉ ୧୪:୧୩-୨୧; ଲୁକ୍ ୯:୧୦-୧୭; ଜଅନ୍ ୬:୧-୧୪)

୩୦ ପଟେ \*ପେରିଡ଼ମନ୍ ଜିସୁର୍ ଲଗେ ରୁଣ୍ଟିଲାଇ, ଆରି ସେମନ୍ ଜନ୍ ଜନ୍‌ଟା କରି ରଇଲାଇ, ଆରି ଜାଇ ଜାଇଟା ସିକାଇ ଦେଇରଇଲାଇ, ସେସବୁ ତାକେ

\* ୬:୧୪ ୬:୧୪ ମାତିଉ ୧୭:୧୪; ମାର୍ଚ୍ଚ ୮:୨୮; ଲୁକ୍ ୯:୧୯      \* ୬:୧୭ ୬:୧୭ ଲୁକ୍ ୩:୧୯, ୨୦      \* ୬:୩୦ ୬:୩୦ ମାପ୍‌ଚୁର୍ କାତା କଇବାକେ ପାଟାଇଲା ଲକ୍‌ମନ୍

ଜାନାଇଲା । ୩୧ ସେଡ଼କି ବେଳେ ଜିସୁ ସେମନ୍‌କେ କଇଲା, “ତମେମନ୍ ମରସଙ୍ଗ ଆସା ଆମେ ଗଟେକ୍ କିନରା ଜାଗାଇ ଜାଇ ଚନେକ୍ ବିସ୍‌ରାମ୍ କରୁ ।” କାଇକେବଇଲେ କେଡେକ୍ କେଡେକ୍ ଲକ୍ ଆସ୍ ଜା ଅଇଡେରଇଲାକିଜେ ସେମନ୍‌କେ କାଇବାକେ ମିସା ସୁଜଗ୍ ନ ମିଲ୍‌ଡେ ରଇଲା । ୩୨ ତେବେ ଜିସୁ ଆରି ତାର୍ ସିସ୍‌ମନ୍ ବାରଇ ବେଗ୍‌ଲି ଜାଇ ଡଙ୍ଗାଇ ବସି ଗଟେକ୍ କିନରା ଜାଗାଇ ଗାଲାକ ।

୩୩ ମାତର୍ ସେମନ୍ ବାରଇ ଜିବାଟା ବେସିଲକ୍ ଦେକି ଚିନ୍‌ଲାକ, ଆରି ସବୁ ନଅରେ ଅନି ଲକ୍‌ମନ୍ ପାଲାକ ପାଲାକ ଜାଇ ସେମନ୍‌ର୍ ଆଗତୁ କେଟ୍‌ଲାକ । ୩୪ ଜିସୁ ଡଙ୍ଗାଇଅନି ବାରଇ, ବେସି ଲକ୍‌ମନ୍‌କେ ଦେକି ତାର୍ ଜିବନ୍ ଦୁକାଇ ଦୟାକଲା । କାଇକେବଇଲେ ସେମନ୍ ଗଡ଼ତ୍ ନ ରଇଲା ମେଣ୍ଡାରାସି ପାରା ରଇଲାକ ଆରି ସେ ସେମନ୍‌କେ କେଡେକ୍ ବିସଇ ସିକିଆ ଦେବାର୍‌ଦାରଲା । ୩୫ ଏଡ଼କି ବିଡ଼ରେ ବେଲ୍ ବସି ଆଇବାକେ ସିସ୍‌ମନ୍ ଆସି ଜିସୁକେ କଇଲାକ, “ଏ ଜାଗା ତା ଚିମ୍‌ରା ଜାଗା ଆରି ବେଲ୍ ମିସା ବସିଆଇଲାନି, ୩୬ ତେବର୍‌ପାଇ ଲକ୍‌ମନ୍‌କେ ପାଟାଇ ଦିଆସ୍ । ଜେଡ଼ି କି ସେମନ୍ ଚାରିବେଡ଼ିଡ଼ି ଗାଉଁ ମନ୍‌କେ ଜାଇ ନିଜର୍ ନିଜର୍ ପାଇ କାଇବାକେ କାଇଟା ମିସା ଗେନଡ଼ ।”

୩୭ ମାତର୍ ଜିସୁ ସେମନ୍‌କେ କଇଲା, “ତମେ ସେମନ୍‌କେ କାଇଟା ମିସା କାଇବାକେ ଦିଆସ୍ ।” ସେମନ୍ ତାକେ କଇଲାକ, “ଆମେ ଜାଇ ଆର୍ ମାସର୍ କୁଲି ତାବୁ ନେଇ ଏମନ୍‌କେ ରୁଟି ଗେନିଆନି କୁଆଇବୁ କି ?”

୩୮ ଜିସୁ ସେମନ୍‌କେ କଇଲା, “ତମର୍ ଲଗେ କେଡେଟା ରୁଟି ଆଟେ ? ଜାଇ ଦେକା ।” ସେମନ୍ ଦେକିଆସି ତାକେ କଇଲାକ, “ପାର୍‌ଟା ରୁଟି ଆରି ଦୁଇଟା ମାର୍ ।”

୩୯ ତେଇ ସବୁଲକ୍ ଜେଡ଼ି ଦଲ୍‌ଦଲ୍ ଅଇ କଅଁଲି ଗାଁସ୍ ଉପ୍‌ରେ ବସ୍‌ବାଇ, ଏଟାର୍‌ପାଇ ଜିସୁ ତାର୍ ସିସ୍‌ମନ୍‌କେ ତିଆର୍‌ଲା । ୪୦ ସେମନ୍ ସଏ ସଏ ଆରି ପଟାସ୍ ପଟାସ୍ ଲକ୍ ଦାଡ଼ି ଦାଡ଼ି ଅଇ ବସ୍‌ଲାକ । ୪୧ ପଟେ ଜିସୁ ପାର୍‌ଟା ରୁଟି ଆରି ଦୁଇଟା ମାର୍ ଦାରି ସରଗ୍ ବାଟେ ଦେକି ପର୍‌ମେସର୍‌କେ ଦନିଅବାଦ୍ ଦେଲା, ଆରି “ରୁଟି ବାଙ୍ଗାଇ ଲକ୍‌ମନ୍‌କେ ଦିଆସ୍ ।” ବଲି ସିସ୍‌ମନ୍‌କେ ଦେଲା । ଆରି, ସେ ଦୁଇଟା ମାର୍ ସବୁକେ ବାଟାକରି ଦେଲା । ୪୨ ତେଇ ସବୁଲକ୍ କାଇକରି ପେଟ୍ ପୁରାଇଲାକ, ୪୩ ଆରି ସେମନ୍ ବାଙ୍ଗଲା ରୁଟି ଆରି ମାର୍ ରୁଣ୍ଡାଇ ବାରଟା ଡାଲାକ ପୁରୁନ୍ କଲାକ । ୪୪ ତେଇ କାଇଲା ଲକ୍‌ମନ୍‌ର୍ ବିଡ଼ରେ ଅବ୍‌କା ମନସ୍ ପିଲାମନ୍ ପାର୍ ଅଜାର୍ ରଇଲାକ ।

ଜିସୁ ପାନିଡେଇ ଇଣ୍ଡିଲା  
(ମାଡ଼ିଉ ୧୪:୨୨-୩୩; ଜଅନ୍ ୬:୧୫-୨୧)

୪୫ ସେଦାପ୍‌ରେ ଜିସୁ ନିଜର୍ ସିସ୍‌ମନ୍‌କେ ଡଙ୍ଗାଇ ବସି ଗାଡ଼ ସେପାଟର୍ ବେଡ଼ିଆଇଦାଇ ତାର୍ ଆଗତୁ ଜିବାକେ କଇଲା, ଆରି ତେଇ ରଇଲା ଲକ୍‌ମନ୍‌କେ ନିଜର୍ ନିଜର୍ ଗର୍‌ମନ୍‌କେ ପାଟାଇ ଦେଲା । ୪୬ ଜିସୁ ଲକ୍‌ମନ୍‌କେ ପାଟାଇଲା ପଟେ, ପାର୍‌ଡନା କର୍‌ବାକେ କୁପ୍‌ଲିଉପ୍‌ରେ ଗାଲା । ୪୭ ରାତି ଅଇଲାକେ ଡଙ୍ଗା ସମ୍‌ଦୁର୍ ମଜାଇ ରଇଲା, ଆରି ସମ୍‌ଦୁର୍ ପାଲି ଜିସୁ ଗଟେକ୍ ଲକ୍‌ସେ ରଇଲା । ୪୮ ମୁଆର୍ ବାଟେ ଅନି ପବନ୍ ଆଇଡେ ରଇଲାକେ ତାର୍ ସିସ୍‌ମନ୍ ଡଙ୍ଗା ଗାଟ୍‌ବାକେ କସ୍‌ଟ ଅଇବାଟା ଜିସୁ ଦେକ୍‌ଲା । କୁକ୍‌ଡା ତାକେ ଜିସୁ ସମ୍‌ଦୁର୍ ଉପ୍‌ରେ ଇଣ୍ଡି ଇଣ୍ଡି ସେମନ୍‌ର୍ ଲଗେ ଗାଲା, ଆରି ସେମନ୍‌କେ ବାଟ୍ ଦେଇ ଜିବାଟା ସିସ୍‌ମନ୍ ଦେକ୍‌ଲାକ । ୪୯ ମାତର୍ ସେମନ୍ ଜିସୁ ପାନିଡେଇ ଇଣ୍ଡିବାଟା ଦେକି ଡୁମା ବଲି ବାବି କିର୍‌କିର୍‌ଲାକ । ୫୦ କାଇକେବଇଲେ ସବୁଲକ୍ ତାକେ ଦେକି କିଲ୍‌ବିଲ୍ ଅଇଜାଇଡେ ରଇଲାକ

☆ ୬:୩୪ ୬:୩୪ ମାଡ଼ିଉ ୯:୩୬

। ସେଦାପରେ ଜିସୁ ସେମାନର ସଙ୍ଗେ କାତା ବାର୍ତ୍ତା ଅଇ ସେମାନଙ୍କେ କଇଲା, “ତରାନାଇ ସାଆସ୍ ଦାରା, ଏଗାତା ମୁଇ ।”

୫୧ ଆରି, ସେ ସେମାନର ଲଗେ ଜାଇ ତଙ୍ଗାଇ ଚଗ୍ଲା, ଆରି ପବନ୍ ବନ୍ଦ ଅଇଲା । ତେଇ ସେମାନ ମନେ ମନେ କାବା ଅଇଗାଲାଇ, ୫୨ କାଇକେବଇଲେ ପାଁଟା ରୁଟିର ଗଟ୍‌ନାଇଅନି ଜିସୁ କେ ବଲି ବୁଜି ନ ରଇଲାଇଜେ ସେମାନର ବୁଦି ଗୁପିଜାଇରଇଲା ।

ଜିସୁ ଗିନେସରତେଇ ବେସି ଲକ୍‌ମାନଙ୍କେ ନିକ କଲା

(ମାତିଉ ୧୪:୩୪-୩୬)

୩୩ ଜିସୁ ଆରି ତାର ସିସ୍‌ମାନ ଗାଡ଼ ଲଙ୍ଗି ଗିନେସରତ୍ ବାଟେ ଜାଇକରି କେଟ୍‌ଲାଇ ଆରି ଗାଡ଼ପାଲି ତଙ୍ଗା ବାନ୍ଦ୍‌ଲାଇ । ୩୪ ଆରି, ତଙ୍ଗାଇ ଅନି ଉତ୍‌ରଲା ଦାପ୍‌ରେ, ଲକ୍‌ମାନ ଜିସୁକେ ଚିନ୍‌ଲାଇ । ୩୫ ଆରି ସେମାନ ଜିସୁ ଆଇଲା କବର୍ ସୁନାଇବାକେ ସବୁ ଗାଏଁ ପାଲାଇଲାଇ । ସେ ଜନ୍ ଜନ୍ ଜାଗାଇ ଆଚେ ବଲି ସୁନ୍‌ଲାଇ, ସେ ଜାଗାଇ ଜରର୍ ଲକ୍‌ମାନଙ୍କେ କଟ୍ ମିସ୍‌ତେ ବଇ ଆନ୍‌ବାର୍ ଦାର୍‌ଲାଇ । ୩୬ ଆରି ସେ ଜେତେକ୍ ଜେତେକ୍ ଗାଉ, ସଅର୍ ଆରି ପୁଟ୍ ମନ୍କେ କେଟ୍‌ଲା, ଲକ୍‌ମାନ ସେ ସବୁ ଜାଗାଇ ଆଟ୍ ବଜାର୍‌ମନ୍କେ ରଗିମନ୍କେ ସଙ୍ଗଇଦେଇ, ସେମାନ ତାର ଲୁଗା ଅଁଟାଗନେ ଚିଇବୁ ବଲି ଜୁଆର୍‌ବିଆର୍ କଲାଇ । ଜେତେକ୍ ଲକ୍ ତାକେ ଚିଇଲାଇ, ସବୁଲକ୍ ନିକ ଅଇଲାଇ ।



ସୁଚି ଆରି ଅସୁଚି ବିସଇରେ ସିକିଆ

(ମାତିଉ ୧୫:୧-୯)

୧ ପଚେ ପାରୁସିମନ୍ ଆରି ଜିରୁସାଲାମ୍ ଅନି ଆସିରଇବା କେତେଟା ସାସ୍‌ତର୍ ସିକାଉ ପଣ୍ଡିତ୍‌ମନ୍ ଜିସୁର ଲଗେ ରୁଣ୍ଡ୍‌ଲାଇ । ୨ ତାର ସିସ୍‌ମାନର ବିତ୍‌ରେ ଅନି କେତେକ୍ ସିସ୍‌ମନ୍ ଜିଉଦିମାନର ରିତିନିତି ଇସାବେ ଆଡ଼ ନ ଦଇତେ କାଇବାଟା ଦେକ୍‌ଲାଇ ।

୩ ପାରୁସିମନ୍ ଆରି ସବୁ ଜିଉଦିଲକର୍ ପାର୍‌ଚିନ୍‌ମାନର ନିୟମ୍ ମାନି ରିତିନିତି ଇସାବେ ଆଡ଼ ନ ଦଇତେ ନ କାଇତେରଇଲାଇ । ୪ ଆରି ଆଟ୍‌ବାଟ୍ କରିଆସି ରିତିନିତି ଇସାବେ ପାନି ନ ଚିଚି ଅଇତେ ନ କାଇତେ ରଇଲାଇ । ଗିନା, ମୁତା, ପିତଲ୍ ତାଲା ଆରି ସଇବା କଟ୍ କେନ୍ଦ୍ରି ଦଇବାର୍, ସେଟା ସଙ୍ଗ୍ ଅଲ୍‌ଗା ରିତିନିତି ମିସା ମାନ୍‌ତେରଇଲାଇ ।

୫ ତେବେ ପାରୁସି ଆରି ସାସ୍‌ତର୍ ସିକାଉମନ୍ ଜିସୁକେ ପାଚାର୍‌ଲାଇ, “କାଇକେ ତର୍ ସିସ୍‌ମନ୍ ପାର୍‌ଚିନ୍‌ମାନର ରିତିନିତି ନ ମାନି ଆଡ଼ ନ ଦଇ କାଇଲାଇନି ?”

୬ ଜିସୁ ସେମାନଙ୍କେ କଇଲା, “ଏରେ କ୍ଳିଆଲ୍‌ମନ୍, ତମର୍ ବିସଇନେଇ ଜିସାୟ୍ ବବିସ୍‌ତ୍‌ବକ୍‌ତା ନିକସଙ୍ଗ୍ ଜାନାଇଆଚେ, ସେ ଏନ୍ଦ୍ରି କଇଲା ଆଚେ ।”

ପର୍‌ମେସର୍ କଇଲାନି “ଏ ଜାତି, ମକେ ମୁଏ ସନ୍‌ମାନ୍ ଦେବାଇ, ମାତର୍ ତାକର୍ ମନ୍ ମର୍‌ଟାଗେନଅନି ଦୁରିକେ ରଇସି ।

୭ ସେମନ୍ ଲକ୍‌ମନ୍ କଲା ନିୟମ୍

ମାପ୍‌ରୁର୍ ନିୟମ୍ ବଲି ସିକାଇବାଇ

ମାତର୍ ସେ ଉପାସନାର୍ କିଚି ମୁଲିଅ ନାଇ ।

୮ “ତମେ ପର୍‌ମେସରର୍ ଆଦେସ୍ ଇନ୍‌କରି ନର୍‌ଲକ୍‌କର୍ ରିତିନିତି ଦାରି ବସିଆଚାସ୍ ।” ୯ ଆରି ଜିସୁ ସେମାନଙ୍କେ କଇଲା, ତମେ ଚତୁର୍ ଅଇ ନିଜର୍ ରିତିନିତି ମାନ୍‌ବାକେ ବଲି ପର୍‌ମେସରର୍ ଆଦେସ୍ ନିଚୁ ବଇଲାସ୍‌ନି । ୧୦ କାଇକେବଇଲେ ମସା ସିକିଆ ଦେଇଆଚେ, ମା ବାବାକେ ମାନା, ଆରି ଜେ କି ତାର୍ ବାବାକେ କି ମାକେ ସାଇପ୍



ଦେଇସି, ସେ ମରନ୍ ଡଣ୍ଡ ପାଇସି ଆକା । ୧୧ ମାତର୍ ତମେ ସିକାଇଲାସ୍ତି କି ଜେବେ ବାବାକେ କି ମାକେ କଇସା, “ଜନ୍ଟା ମୁଇ ତମ୍‌କେ ଦେବାର ରଇଲା ସେଟା କର୍ବାନ୍ ।” କର୍ବାନ୍ ବଇଲେ ମାପୁରୁକେ ଆକା ମାନଡ୍ କର୍ବାଟା । ୧୨ ତେବେ ତମେ ତାର ବାବାର କି ମାଆର କାଇ ଉପକାର କର୍ବାଟାକେ ତେବାଇଲାସ୍ତି । ୧୩ ଏନ୍ତାରି ତମେ ନିଜର୍ ଆନିଦାଦିମନର୍ ବେଲେ ଅନି ଆଇବା ରିଡିନିଡି ମାନିକରି ପର୍ମେସରର୍ ବାକିଅ ଏଡାଇ ଦେଲାସ୍ତି, ଆରି ଏନ୍ତାରି କେତେକ୍ କେତେକ୍ କାମ୍‌ମନ୍ କଲାସ୍ତି ।

ଗଟେକ୍ ଲକ୍‌କେ କାଇଟା ଅସୁକଲ୍ କର୍ସି  
(ମାଡିଉ ୧୫:୧୦-୨୦)

୧୪ ଜିସୁ ଆରି ତରେକ୍ ଲକ୍‌ମନ୍‌କେ ଲଗେଡାକି କଇଲା, “ତମେ ସବୁଲକ୍ ମର୍ କାତା ସୁନା ଆରି ବୁଜା । ୧୫ ଲକ୍‌ର୍ ଟଣ୍ଡେଅନି ଏନ୍ତାରି କାଇ ବିସଇ ନାଇ, ଜନ୍ଟା ତାର ବିଡରେ ପୁରି ତାକେ ଅସୁକଲ୍ କରି ପାରେ, ମାତର୍ ଜନ୍ ଜନ୍ଟା ମୁନ୍‌ସମନର୍‌ଟାନେଅନି ବାରଇସି ସେ ସବୁ ତାକେ ଅସୁକଲ୍ କର୍ସି । ୧୬\* ଜଦି ଜାକେ ସୁନ୍‌ବାର୍ କାନ୍ ଆଟେ, ସେ ସୁନ ।”

୧୭ ଆରି ଜିସୁ ଲକ୍‌ର୍ ମାନ୍ଦା ଚାଡି ଗରେ ପୁରଲାପତେ ତାର ସିସମନ୍ ସେ ଉଦାଅରନର୍ ଅରଡ୍ କାଇଟା ବଲି ପାଟାର୍‌ବାର୍ ଦାରଲାଇ । ୧୮ ଜିସୁ ସେମନ୍‌କେ କଇଲା, “ତମେ ମିସା କାଇ ବୁଜାସ୍ ନାଇ ? ଜନ୍ ଜିନିସ୍ ମିସା ବାଇରେ ଅନି ମୁନ୍‌ସମନର୍ ବିଡରେ ପୁରସି, ସେଟା ତାକେ ଆସାର ନ କରେ । ୧୯ କାଇକେବଇଲେ ସେଟା ତାର ମନ୍ ବିଡରେ ପୁରେନାଇ, ମାତର୍ ପେଟ୍ ବିଡରେ ପୁରି କରି ବାଇରେ ବାରଇ ଆଇସି ।” ଏନ୍ତାରି କଇଲାକେ ସବୁ କାଦି ସୁକଲ୍ ଆକା ବଲି ଜିସୁ ଜାନାଇଲା ।

୨୦ ଆରି ସେ କଇଲା, “ମୁନ୍‌ସର୍ ମନ୍‌ବିଡରେ ଅନି ଜନ୍ଟା ବାରଇସି, ସେଟାସେ ତାକେ ଆସାର କର୍ସି । ୨୧ କାଇକେବଇଲେ ମୁନ୍‌ସର୍ ମନ୍ ବିଡରେ ଅନି କରାପ୍ ଚିନ୍ତା ବାରଇସି । ସେଟାମନ୍ ଅଇଲାନି, ପାଦ୍‌ରା ପାଦ୍‌ରି କାମ୍, ଚର୍‌କାମ୍, ଲକ୍‌ମନ୍‌କେ ମରାଇବା କାମ୍ । ୨୨ ବିବା ଅଇ କର୍ବା ବେସିଆ କାମ୍, ବିବା ନଇତେ କର୍ବା ବେସିଆ କାମ୍, ଲବାଇବାଟା, ମିଡ୍ କଇବାଟା, ଅଲ୍‌ସୁଆ ଅଇବାଟା, ଆଁକାର୍ ଅଇବାଟା, ନିନ୍ଦା କାତା କଇବାଟା, ବଡ୍‌ପନ୍ ଅଇବାଟା, ବକୁଆ ଅଇବାଟା । ୨୩ ଏ ସବୁ କରାପ୍ ବିସଇମନ୍ ବିଡରେଅନି ବାରଇ ଲକ୍‌କେ ନସାଇଦେଇସି ।”

ଗଟେକ୍ ମାଇଜିର୍ ତାଟ୍ ବିସବାସ୍  
(ମାଡିଉ ୧୫:୨୧-୨୮)

୨୪ ତାରପତେ ଜିସୁ ସେ ଜାଗା ଚାଡିକରି ସର ଆରି ସିଦନର୍ ସଅରେ ଗଲା । ତେଇ ଗଟେକ୍ ଗରେ ପୁରଲା । ଜେଡ୍ରି କେ ମିସା ସେଟା ନାଜାନଡ୍, ଏଟା ସେ ମନ୍ କର୍ତ୍ତେ ରଇଲା, ମାତର୍ ସେ ନ ଜାନାଇ ଅଇତେ ରଇନାପାର୍‌ଲା । ୨୫ ଜିସୁ ଆଇଲାଆତେ ବଲି ସୁନ୍‌ଲା ଦାପ୍‌ରେ, ଗଟେକ୍ ମାଇଜି ଜାର୍ ସାନ୍ ଟକିକେ ତୁମା ଦାରିରଇଲା, ତାର ଗଡ୍‌ତଲେ ଆସି ଅଦର୍‌ଲା । ୨୬ ସେ ସୁର ଦେସର୍ ପଇନିକିଆ ଜାଗାଇ ଜନମ୍ ଅଇ ଜିଉଦି ଜାଡିର୍ ନ ରଇଲା, ତାର ଟକିକେ ତୁମା ଚାଡାଇବାକେ ସେ ଜିସୁକେ ବାବୁଜିଆ କଲା ।

୨୭ ତେବେ ଜିସୁ ତାକେ କଇଲା, “ଆଗ୍‌ତୁ ପିଲାମନ୍‌କେ ପେଟ୍ ପୁରୁନ୍ କାଇବାକେ ଦେସ୍, କାଇକେବଇଲେ ପିଲାମନ୍‌ର୍ କାଦି ନେଇ କୁକୁର୍‌ମନ୍‌ର୍ ଟାନେ ପାକାଇବାଟା ଟିକ୍‌ନାଇ ।”

\* ୭:୧୨ ୭:୧୭ କେତକ୍ ପୁରନା ଲେକାଇ ଏ ପଦ୍ ଲେକାଅଏ ନାଇ

୨୮ ମାତର୍ ମାଇଜି ତାକେ କଇଲା, “ଉଁ ମାପୁରୁ, କୁକୁର୍ମାନ୍ ମିସା ପିଲାମାନର୍ ଅଦ୍ରି ରଇଲା ସକ୍ତି କାଇବାଇ ।”

୨୯ ସେଡ଼କି ବେଲେ ଜିସୁ ତାକେ କଇଲା, “ଏନ୍ତାରି କଇଲାଟପାଇ ଜା, ତର୍ ଟକିତେଇଅନି ତୁମା ବାରଇଗାଲାବେ ।”

୩୦ ଆରି ସେ ମାଇଜି ଗରେ ଜାଇ, ଟକି କଟେ ସଇରଇବାଟା ଆରି ତାର୍ଟାନେଅନି ତୁମା ବାରଇଜାଇ ରଇବାଟା ଦେକ୍ଲା ।

ଜିସୁ ଗଟେକ୍ ଗୁଲା ବଇରାକେ ନିକ କଲା

୩୧ ଜିସୁ ଆରିତରେକ୍ ସର ସନ୍ଦିଅନି ଜାଇ ସିଦନ୍ ଦେଇ ଦେକାପଲି ଦସ୍ତା ସଅରେ ଉଡ଼ରି ଗାଲିଲି ସମ୍ପୁରେ ଗାଲା । ୩୨ ଆରି ତେଇ କେତେକ୍ ଲକ୍ମାନ୍ ଗଟେକ୍ କସ୍ତସଙ୍ଗ୍ କାତା ଅଇବା ବଇରାକେ ଜିସୁର୍ ଲଗେ ଆନି ତାର୍ ଉପ୍ରେ ଆଡ଼ ସଙ୍ଗାଇବାକେ ବାଟୁଜିଆ କଲାଇ । ୩୩ ଜିସୁ ସେ ବଇରାକେ ଲକ୍ମାନ୍ ଟାନେଅନି ବେଗ୍ଲାଇ କରି, ତାକିନେଇ ତାର୍ ଦୁଇଟା କାନେ ଆଙ୍ଗଟି ପୁରାଇଲା ଆରି ତୁକିକରି ଆଡ଼ସଙ୍ଗ୍ ସେ ଲକ୍ମାନ୍ ଜିବେ ଲାଗାଇଲା, ୩୪ ଆରି ସରଗ୍ ବାଟେ ଦେକିକରି ତେଙ୍ଗ୍ ପୁଣ୍ଡା ଦାରି ବଇରାକେ କଇଲା, “ଇପ୍ପତା !” ବଇଲେ ପୁଟିଅ ।

୩୫ ସେ ଦାପ୍ରେ ତାର୍ କାନ୍ ଉଗାଡ଼ି ଅଇଲା, ଆରି ଜିବର୍ ବନ୍ଦନ୍ ପିଟିଗାଲା, ଆରି ସେ ନିମାନ୍ ସଙ୍ଗ୍ କାତା ଅଇବାର୍ ଦାର୍ଲା ।

୩୬ ଜିସୁ ଲକ୍ମାନ୍କେ ଏ ବିସଇ କାକେ ନ କଇବାକେ ଆଦେସ୍ ଦେଲା, ମାତର୍ ସେ ଲକ୍ମାନ୍କେ ଜେତେକ୍ ନିରୁବଇଲେ ମିସା ସେମନ୍ ଆରି ଅଦିକ୍ ଅଦିକ୍ ସେଟା ଜାନାଇଲାଇ । ୩୭ ଆରି ଲକ୍ମାନ୍ ଅଦିକ୍ କାବା ଅଇ କଇଲାଇ, “ସେ ସବୁ କାମ୍ ନିମାନ୍ ସଙ୍ଗ୍ କରିଆଟେ, ସେ ବଇରାମାନ୍କେ ସୁନ୍ଦା ବପୁ ଆରି ଗୁଲାମାନ୍କେ କଇବା ବପୁ ମିସା ଦେଇଆଟେ ।”

## ୮

ଜିସୁ ଚାରିଅଜାର୍ ଲକ୍ମାନ୍ କୁଆଇଲା

(ମାତିଉ ୧୫:୩୨-୩୯)

୧ ସେବେଲେ ଆରି ତରେକ୍ ବେସି ଲକ୍ମାନ୍ ମିସ୍ଲାଇ, ଆରି ସେମାନର୍ ଲଗେ କାଇବା ପିଇବାକେ କାଇଟା ନ ରଇଲାଜେ ଜିସୁ ସିସ୍ମାନ୍କେ ଲଗେଡାକି କଇଲା, ୨ “ଏ ଲକ୍ମାନ୍କେ ଦେକି ମକେ ଦୁକ୍ ଲାଗ୍ଲାନି, କାଇକେବଇଲେ ଏମନ୍ ତିନ୍ଦିନ୍ ଅଇଲାନି ମର୍ ସଙ୍ଗ୍ ଆଟଡ଼ ଆରି ଏମାନର୍ ଲଗେ କାଇବାକେ କାଇଟା ମିସା ନାଇ । ୩ ତେବେ ମୁଇ ସେମାନ୍କେ ନ କୁଆଇତେ ଗରେ ପାଟାଇଲେ, ବାଟେ ସେମାନର୍ ଚେଟା ଆଜିଜାଇସି, ସେମାନର୍ ବିଡ଼ରେ କେତେକ୍ ଲକ୍ମାନ୍ ଦୁରେଅନି ଆସି ଆଟଡ଼ ।”

୪ ସିସ୍ମାନ୍ ତାକେ କଇଲାଇ, “ଇତି ଏ ଚିମ୍ବରା ଜାଗାଇ ଲକ୍ମାନ୍ ନ ରଇବାଟାନେ କନ୍ତିଅନି ରୁଟି ଆନି ଏମାନ୍କେ ପେଟ୍ ପୁରାଇବାର୍ ?” ୫ ଜିସୁ ସେମାନ୍କେ ପାଟାର୍ଲା, “ତମ୍ଭାର୍ଲଗେ କେତେଟା ରୁଟିଆଟେ ?” ସେମାନ୍ କଇଲାଇ, “ସାଡ଼ଟା ।”

୬ ତେଇ ଜିସୁ ସେ ସବୁ ଲକ୍ମାନ୍କେ ବୁର୍ସି ବସ୍ତାକେ କଇଲା, ଆରି ସେ ସାଡ଼ଟା ରୁଟି ଦାରିକରି ପରମେସର୍କେ ଦନିଅବାଦ୍ ଦେଇ ସେଟା ସବୁ ବାଙ୍ଗାକରି ବାଟାକରିଦେବାକେ ତାର୍ ସିସ୍ମାନ୍କେ ଦେଲା । ଆରି ସେମାନ୍ ଲକ୍ମାନ୍କେ ସେଟା ବାଟାକଲାଇ । ୭ ସେମାନର୍ ଲଗେ ଜଡେକ୍ ପାରା କେତେଟା ସାନ୍ ମାଡ଼ ରଇଲା, ସେଟା ମିସା ସେ ପରମେସର୍କେ ଦନିଅବାଦ୍ ଦେଇ ବାଟାକରାକେ କଇଲା । ୮ ତେଇ ସେମାନ୍ ସବୁ ଲକ୍ମାନ୍ ପେଟ୍ପୁରୁତେ କାଇଲା ଆରି ଅଗଲ୍ଲାଟା ସାଡ଼ଡାଲା ବେଟ୍ଲାଇ । ୯ ତେଇ ଚାରିଅଜାର୍ ଲକ୍ମାନ୍ ରଇଲାଇ । ୧୦ ତାର୍ପଟେ ଜିସୁ

ଲକ୍ଷ୍ମୀଙ୍କୁ ପାଟାଲ ଦେଲା ଆରି ନିଜର ସିସ୍ତମନ୍ତର ସଙ୍ଗେ ଡଙ୍ଗାଲ ଚାରି ଦଳ୍ଲମନ୍ତୁତା ନାଉଁର ଗଟେକ୍ ଜାଗାଲ ଆଇଲା ।

ପାରୁସିମନ୍ତ ଜିସୁଙ୍କେ ପରିକା କଲାଲ  
(ମାତିଉ ୧୨:୧-୪)

୧୧ \*ପରେ ପାରୁସିମନ୍ତ ବାରଇ ଆସି ଜିସୁର ସଙ୍ଗେ ଦଦାପେଲା ଅଇବାର୍ ଦାରଲାଲ । ତାଙ୍କେ ପରିକା କରବାକେ ପାନ୍ଦେ ପାକାଉଁ ବଲି ମନ୍ତକରି, ସେ ଜେ ପରମେସ୍ତରଟାନେଅନି ଆସିଆରେ, ଏଟା ଦେକାଇବାକେ ଆକାସେଅନି ଗଟେକ୍ କାବାଅଇଜିବା ଚିନ୍ ଦେକାଆ ବଲି କଇଲାଲ । ୧୨ \*ଜିସୁ ଗଟେକ୍ ଡେଙ୍ଗ୍ ପୁଣ୍ଡା ପୁଣ୍ଡିକରି କଇଲା, “ଏବର୍ ଲକ୍ଷ୍ମୀ କାଇକେ କାବା ଅଇବା ଚିନ୍ ମାଙ୍ଗ୍ଲାଲନି ? ମୁଇ ତମକେ ସତ୍ କଇଲିନି, ଆଜିକାଲିର୍ ଏ ଲକ୍ଷ୍ମୀଙ୍କେ କାବା ଅଇବା କାଇ ଚିନ୍ ମିସା ଦେକାଇ ନଏଁ ।”

୧୩ ତାରପରେ ଜିସୁ ଆରି ତାର ସିସ୍ତମନ୍ତ ସେମନ୍ତକେ ଡେଇ ଚାଡି ଡଙ୍ଗାଲ ଚାରି ଆରି ଡରେକ୍ ଗାଡ୍ ସେପାଟେ ଗାଲା ।

ପାରୁସିମନ୍ତର ସିକିଆ ବିରୁଦେ ଜିସୁର ଚେଡନା  
(ମାତିଉ ୧୨:୫-୧୨)

୧୫ ଜିସୁର ସିସ୍ତମନ୍ତ ଡଙ୍ଗାଲ ଗାଲାବେଲେ କାଇବାକେ ରୁଟି ନେବାକେ ପାସ୍ତରିଜାଇରଇଲାଲ । ସେମନ୍ତଟାନେ ଏକାଇ ଗଟେକ୍ ସେ ରୁଟି ରଇଲା । ୧୫ \*ଜିସୁ ସେମନ୍ତକେ ଜାଗରତ୍ କରାଇ କଇଲା, “ପାରୁସିମନ୍ତ ଆରି ଏରଦର୍ କମିର୍ ଅନି ତରିକନା ଅଇ ରୁଆ ।”

୧୬ ଏଟା ସୁନି ସିସ୍ତମନ୍ତ ନିଜର ନିଜର ବିଡରେ କାତାବାର୍ତା ଅଇକରି କଇଲାଲ, “ଆମରଲଗେ କାଇବାକେ ରୁଟିନାଇ ବଲି ସେ ଏଣ୍ଡାରି କଇଲାଲନି ।” ୧୭ ସେମନ୍ତ କାଇ ବିସଇନେଇ କାତାବାର୍ତା ଅଇଲାଲନି ବଲି ଜିସୁ ଜାନିକରି ସେମନ୍ତକେ କଇଲା, “ତମର ଲଗେ ଜେଡକି ଦରକାର୍ ଆରେ, ସେଡକି ରୁଟିନାଇ ବଲିକରି ତମେ କାଇକେ କାତାବାର୍ତା ଅଇଲାସ୍ତନି ? ଏବେଜାକ ତମେ କାଇ ଦେକାସ୍ ନାଇ କି ବୁଜାସ୍ନାଇ ? ତମର ମନ୍ତ କାଇ ଆର୍ ଅଇଗାଲା ଆରେ କି ? ୧୮ \*ଆଁକି ରଉ ରଉ ଦେକାସ୍ ନାଇ ? ଆରି, କାନ୍ ରଉ ରଉ ସୁନାସ୍ ନାଇ ? ଆମରଟାନେ ଜେଡେବେଲେ କାଇବାକେ ଉନା ରଇଲା, ସେ ବେଲେ ମୁଇ କାଇଟା କରରଇଲି ? ସେ ବିସଇ ତମେ ଏତାଆସ୍ ନାଇକି ? ୧୯ ମୁଇ ଜେଡେବେଲେ ପାଁର୍ ଅଜାର୍ ଲକ୍ଷ୍ମୀ ବିଡରେ ପାଁଟା ରୁଟିବାଙ୍ଗାଲ ରଇଲି, ସେଡକି ବେଲେ ତମେମନ୍ତ ସବୁ କେଡେକ୍ ଡାଲା ବାଙ୍ଗ୍ଲା କଣ୍ଡ ବେଟି ନେଇ ରଇଲାସ୍, ସେଟାକାଇ ତମର ମନେ ନାଇ ?” ସେମନ୍ତ ତାଙ୍କେ କଇଲାଲ, “ବାର ଡାଲା ।”

୨୦ “ଆରି, ସେ ଚାରି ଅଜାର୍ ଲକ୍ଷ୍ମୀ ବିଡରେ ମୁଇଁ ଜେଡେବେଲ୍ ସାତଟା ରୁଟି ବାଙ୍ଗାଲ ରଇଲି, ସେଡକିବେଲେ ତମେମନ୍ତ ସବୁ କେଡେକ୍ ଡାଲା ବାଙ୍ଗ୍ଲା କଣ୍ଡ ଚୁଲିଆଇ ରଇଲାସ୍ ?” ସେମନ୍ତ କଇଲାଲ “ସାଡ୍ ଡାଲା ।”

୨୧ ଆରି ଜିସୁ ସେମନ୍ତକେ ପାଚାରଲା, “ମୁଇ କାଇଟା କଇଲିନି, ତମେ କେନ୍ତ୍ର ବୁଜାସ୍ ନାଇ ?”

ଜିସୁ ଗଟେକ୍ କାଣାକେ ଆଁକି ଦେକାଇଲା

\* ୮:୧୧ ୮:୧୧ ମାତିଉ ୧୨:୩୮; ଲୁକ୍ ୧୧:୧୬    \* ୮:୧୨ ୮:୧୨ ମାତିଉ ୧୨:୩୯; ଲୁକ୍ ୧୧:୨୯    \* ୮:୧୫ ୮:୧୫ ଲୁକ୍ ୧୨:୧    \* ୮:୧୫ ୮:୧୫ କମିର୍କେ ଗାଉଁ ଗୁଣ୍ଡେ ପାକାଇଲେ ଏଟା ରୁଟିକେ ପୁଲାଇସି, ସେମନ୍ତ ଅଲପର୍ ସିକିଆ ଜବର୍ ଲକ୍ଷ୍ମୀଙ୍କେ ବୁଲ୍ ବାଟେ ଦାରିଜାଇସି    \* ୮:୧୮ ୮:୧୮ ମାର୍ଚ୍ଚ ୪:୧୨

୨୨ ପରେ ସେମନ୍ ବେତସାଇଦାଇ ଉଚି ଆଇଲାଇ, ଆରି ତେଇ କେତେକ୍ ଲକ୍ମନ୍ ଗଟେକ୍ କାଣାଲକ୍ମେ ଜିସୁର୍ ଲଗେ ଆନିକରି ତାକେ ଚିକ୍ମକରି ନିକ କର୍ବାକେ କଇଲାଇ । ୨୩ ଜିସୁ ତାକେ ଆତେଦାରି ଗାଉଁ ବାଇରେ ତାକିନେଲା, ଆରି ତୁକିକରି ତାର୍ ଲାଲ୍ ସେ କାଣାର୍ ଆକିତେଇ ଲାଗାଇଲା । ତାର୍ମୁଣ୍ଡେ ଆତ୍ ସଙ୍ଗାଇକରି “ତୁଇ ଅଲପ୍ ମିସା ଦେକି ପାର୍ଲୁସ୍ନି କି ?” ବଲି ପାଚାର୍ଲା ।

୨୪ ସେ ଚାରିବେଡ଼ତି ଦେକିକରି କଇଲା, “ମୁଇ ଲକ୍ମନ୍ ଇଣ୍ଡୁବାଟା ଦେକିପାର୍ଲିନି, ମାତର୍ ସେମନ୍ ଗର୍ପାରା ଡିସ୍ଲାଇନି” ବଲିକରି କଇଲା ।

୨୫ ଜିସୁ ଆରିତରେକ୍ ସେ କାଣାଲକର୍ ଆକିତେଇ ଆତ୍ସଙ୍ଗ୍ ଚିକ୍ମା । ସେଦାପରେ ଅନି ତାର୍ ଆକି ନିମାନ୍ ଅଇଗାଲା ଆରି ପୁରାପୁରୁନ୍ ନିମାନ୍ ଦେକିପାର୍ଲା । ୨୬ ଆରି ଜିସୁ ତାକେ କଇଲା, “ଏବେ ତୁଇ ଗାର୍ବ ନ ଜାଆ, ମାତର୍ ତର୍ ନିଜର୍ ଗରେ ଉଚିଜା” ବଲିକରି ପାଟାଇଦେଲା ।

ପିତର୍ କଇଲା ଜିସୁ ଅଇଲାନି କିରିସ୍ତ  
(ମାତିଉ ୧୬:୧୩-୨୦; ଲୁକ୍ ୯:୧୮-୨୧)

୨୭ ତାର୍ପରେ ଜିସୁ ଆରି ତାର୍ ସିସ୍ମନ୍ କାଇସେରିଆ ପିଲିପ୍ ନାଉର୍ ଗଡ଼ଲଗେ ରଇବା ଚାରିବେଡ଼ତିର୍ ଗାଉଁ ମନ୍କେ ଗାଲାଇ । ବାଟେ ଜିସୁ ତାର୍ ସିସ୍ମନ୍କେ ପାଚାର୍ଲା, “ଲକ୍ମନ୍ ମକେ କେ ବଲିକରି ବାବ୍ଲାଇନି ?”

୨୮ \*ସେମନ୍ ତାକେ କଇଲାଇ, “କେତେ ଲକ୍ମନ୍ ତମ୍କେ ଭୁବନ୍ ଦେଉ ଜଅନ୍ ବଲିକରି କଇଲାଇନି, ଆରି ଅଦେକ୍ ଲକ୍ମନ୍ ତମ୍କେ ଆଗର୍ ଏଲିୟ୍ ବଲି କଇଲାଇନି ଆରି କେତେଲକ୍ ତମ୍କେ ପର୍ମେସରର୍ଟାନେଅନି ଆଦେସ୍ ପାଇ ଆସି, କାତାଅଇବା ବବିସଡ଼ବକ୍ତା ମନର୍ଟାନେଅନି ଗଟେକ୍ଲକ୍ ବଲି କଇଲାଇନି ।” ୨୯ \*ଆରି ତମେ ମକେ କେ ବଲିକରି ବାବ୍ଲାସ୍ନି ? ବଲି ଜିସୁ ସେମନ୍କେ ପାଚାର୍ଲା । ପିତର୍ କଇଲା, “ତୁଇ ପର୍ମେସର୍ ପାଟାଇରଇବା ଉଦାର୍କାରିଆ କିରିସ୍ତ” ବଲି କଇଲା ।

୩୦ ତେଇ ଜିସୁ ସେମନ୍କେ ତାର୍ସଙ୍ଗ୍ ଜାଗ୍‌ରତା କରାଇ କଇଲା, “ମୁଇ କେ ବଲି କାକେ ନ କୁଆ ।”

ନିଜର୍ ମରନ୍ ବିସଇନେଇ ଜିସୁର୍ କାତା  
(ମାତିଉ ୧୬:୨୧-୨୮; ଲୁକ୍ ୯:୨୨-୨୭)

୩୧ ତାର୍ପରେ ଜିସୁ, ପର୍ମେସର୍ ଅନି ଆଇଲା ନର୍ପିଲାକେ କାଇ କାଇଟା ଅଇସି ବଲି ତାର୍ ସିସ୍ମନ୍କେ ସିକାଇଦେବାର୍ ଦାର୍ଲା । ସେ କଇଲା, “ପର୍ମେସରର୍ଟାନେଅନି ଆଇଲା ନର୍ପିଲା ମୁଇ ବେସି ଦୁକ୍ କସ୍ଟ ପାଇବାର୍ ଆଟେ । ମୁକିଅ ନେତାମନ୍, ମୁକିଅ ପୁଜାରିମନ୍, ଆରି ନିୟ୍ମ୍ ସିକାଇଦେବା ଲକ୍ମନ୍ ମକେ ନ ନାମଡ଼ । ସେମନ୍ ମକେ ମରାଇବାଇ ଆରି ତିନ୍ଦିନ୍ ଗାଲାପରେ ମୁଇ ଆରି ତରେକ୍ ମଲାତେଇଅନି ଜିବନ୍ ଅଇ ଉର୍ବି ।” ୩୨ ଏ ସବୁ ବିସଇର୍ କାତା ଜିସୁ ତାର୍ ସିସ୍ମନ୍କେ କାଇଟାମିସା ନ ଲୁଟାଇକରି କୁଲାକୁଲି ବାବେ କଇଦେଲା । ସେ ବେଲା ପିତର୍ ଜିସୁକେ ଅଡ଼ରେ ତାକିନେଇକରି କଇଲା, “ତମେ କଇବା କାତା ସବୁ ସେଡ଼ି ନ ଅ ।” ୩୩ ଜିସୁ ପିଟିବାଟେ ପାସ୍ଲି ତାର୍ ସିସ୍ମନ୍କେ ଦେକ୍ଲା ଆରି ପିତର୍କେ କଇଲାଇ, “ତୁଇ ଏ କାତା ସଇତାନେଅନି କଇଲୁସ୍ନି, ତୁଇ ମର୍ଟାନେଅନି ଉଚି ଜା । ତୁଇ ପର୍ମେସର୍ ପାରା ଚିନ୍ତା ନ କରି ଲକ୍ମନର୍ ପାରା ଚିନ୍ତା କଲୁସ୍ନି ।” ବଲି କଇଲାଇ ।

\* ୮:୨୮ ୮:୨୮ ମାର୍ଚ୍ଚକ ୬:୧୪,୧୫; ଲୁକ୍ ୯:୭,୮      \* ୮:୨୯ ୮:୨୯ ଜଅନ୍ ୬:୨୮,୨୯

୩୪ ✠ତାର୍ପଣେ ଜିସୁ ସିସ୍ତାମନ୍ତେ ଆରି ଲକ୍ଷ୍ମୀମନ୍ତେ ତାର୍ଲଗେ ତାକିକରି କଇଲାଇ “କେ ମର୍ ସିସ୍ ଅଇବାକେ ମନ୍ କଲାନି ବଇଲେ, ସେ ତାର୍ ନିଜର୍ ମନ୍ କଲାର୍ । ଚାଡିଦେଇକରି କୁର୍ସତେଇ ମର୍ବା ଲକ୍ଷ୍ମୀମନ୍ ପାଇବା ଦୁକ୍ କସ୍ତ ପାରା ଦୁକ୍ କସ୍ତ ପାଇବାକେ, ତିଆର୍ ଅଇକରି ମର୍ସଙ୍ଗ ଆଇବାର୍ ଆଟେ । ୩୫ ✠ମାତର୍ କେ ନିଜର୍ ଜିବନ୍ ରକିଆ କର୍ବାକେ ମନ୍ କର୍ସି, ସେ ସେଟା ଆରାଇସି, ମାତର୍ ଜେ ମର୍ ଲାଗି ଆରି ସୁବକବର୍ ଜାନାଇବାକେ ତାର୍ ଜିବନ୍ ଆରାଇସି ବଇଲେ, ସେ ତାର୍ ଜିବନ୍ ରକିଆ କର୍ସି । ୩୬ ଜଦି ଗଟେକ୍ ଲକ୍ ଦୁନିଆର୍ ସବୁ ଜିନିସ୍ ପାଇକରି, ନିଜର୍ ଜିବନ୍ ଆରାଇସି, ସେଟା ତାର୍ପାଇ କାଇ ଲାବ୍ ନାଇ । ୩୭ ଆରି ତାର୍ ଆଡ଼ମାର୍ ବାଦୁଲେ କାଇଟା ଦେଲେ ମିସା ସମାନ୍ ନ ଅଏ । ୩୮ ପର୍ମେସରକେ ଚାଡିକରି ରଇବା ଏ କାରାପ୍ ଦୁନିଆଇ, ଲକ୍ଷ୍ମୀମନ୍ ଜଦି ମର୍ ଲାଗି ଆରି ମର୍ କାତାର୍ ଲାଗି ଲାଜ୍ ଅଇବାଇ, ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ ମିସା ମର୍ ବାବାର୍ ବେସି ଉଜଲ୍ ଆରି ତାକ୍ପୁଟା ସଙ୍ଗ୍ ଆରି ସରଗର୍ ସୁକଲ୍ ଦୁଡ଼ମନ୍ ସଙ୍ଗ୍ ଆଇଲାବେଲେ, ସେମନ୍ତେ ମର୍ଲକ୍ଷ୍ମୀମନ୍ ବଲି କଇବାକେ ମୁଇ ମିସା ଲାଜ୍ ଅଇବି ।”

**୯**

୧ ଆରିତରେକ୍ ଜିସୁ ସେମନ୍ତେ କଇଲା, ମୁଇ ତମକେ ସଡ଼ କାତା କଇଲିନି । ସେଟାର୍ପାଇ ସୁନା, ଏବେ ଇତି ରଇବା କେତେ ଲକ୍ଷ୍ମୀମନ୍, ପର୍ମେସର୍ ରାଜା ଅଇକରି ତାର୍ ରାଇଜ୍ ସାସନ୍ କର୍ବାଟା ନ ଦେକ୍ବା ଜାକ ନ ମରାସ୍ ।

ଜିସୁର୍ ସଙ୍ଗ୍ ମସା ଆରି ଏଲିୟ  
(ମାଡିଉ ୧୭:୧-୧୩; ଲୁକ୍ ୯:୨୮)

୨ ✠ଅ ଦିନ୍ ପଟେ ଜିସୁ ପିତର୍ ଜାକୁବ୍ ଆରି ଜଅନକେ ତାର୍ ସଙ୍ଗ୍ ମିସ୍ତେ ତାକିକରି କେ ନଇବା ଗଟେକ୍ ଡେଙ୍ଗ୍ ପର୍ବତ୍ ଉପ୍ରେ ଗାଲା । ସିତି ସେମନ୍ତେ ମୁଆଟେ ତାର୍ ରୁପ୍ ବଦଲିଗାଲା । ୩ ଆରି ତାର୍ ପଟିଆ ବେସି ଜଗଜିଗି ଜାଇ, ଦବ୍ ଅଇଗାଲା । ଆରି ଏ ଦୁନିଆ ଇସାବେ କେ ମିସା ସେକ୍ତି ଦବ୍ କରି ଦଇନାପାରଡ଼ । ୪ ଆରି ମସାର୍ ସଙ୍ଗ୍ ଏଲିୟ୍ ଆରି ଜିସୁ ମିସ୍ତେ କାତାବାର୍ତା ଅଇବାଟା ସେମନ୍ତେ ଡିସ୍ଲା । ୫ ତେଇ ପିତର୍ ଜିସୁକେ କଇଲା, “ଏ ଗୁରୁ ଆମେ ଇତି ରଇବାଟା ନିକ । ଇତି ତିନ୍ଟା କୁଡିଆ ତିଆର୍ କରୁ । ତମର୍ପାଇ ଗଟେକ୍, ମସାର୍ପାଇ ଗଟେକ୍ ଆରି ଏଲିୟର୍ ପାଇ ଗଟେକ୍ ।” ୬ ପିତର୍ କଇବା ବିସଇ କାଇଟା ବଲି ନିଜେ ନାଜାନି ରଇଲା । କାଇକେବଇଲେ ସେମନ୍ ବେସି ଡରିଜାଇରଇଲାଇ ।

୭ ✠ଆରି ସେମନ୍ତେ ମେଗର୍ ଚାଇ ତାବିଅଇଦେଲା । ସେ ମେଗେଅନି ଏନ୍ତାରି କାତା ଅଇଲା, “ଏ ମର୍ ଆଲାଦର୍ ପ, ଆର୍ କାତା ସୁନା ।” ୮ ଆରି ଅଟାଡ଼ ସେମନ୍ ଚାରିବେଡ଼ି ଦେକ୍ଲାଇ, ତାକର୍ ସଙ୍ଗ୍ ଜିସୁକେ ଚାଡି ଆରି କାକେ ମିସା ଦେକଡ଼ ନାଇ ।

୯ ସେମନ୍ ପର୍ବତେ ଅନି ଉଡ଼ରୁଲାବେଲେ ଜିସୁ ସେମନ୍ତେ ତାଟ୍ ସଙ୍ଗ୍ ଆଦେସ୍ ଦେଇ ଏକ୍ତି ବଲି କଇଲା, “ପର୍ମେସରର୍ ଟାନେଅନି ଆସିରଇବା ନର୍ପିଲା ମୁଇ, ମଲାଟାନେଅନି ଆରିତରେକ୍ ନ ଉଡ଼ବା ଜାକ ଇତି କାଇକାଇଟା ତମେ ଦେକ୍ଲାସ୍, ସେ ବିସଇ କାକେମିସା ନ କୁଆ ।” ୧୦ ସେଟାର୍ପାଇ ପର୍ବତ୍ ଉପ୍ରେ ଜାଇଟା ସେମନ୍ ଦେକ୍ଲାଇ, ସେ ବିସଇ କାକେମିସା କଅଡ଼ ନାଇ । ମାତର୍ ମଲାଟାନେଅନି ଆରିତରେକ୍ ଉଡ଼ବା ଅର୍ଡ଼ କାଇଟା ବଲିକରି ସେମନ୍

✠ ୮:୩୪ ୮:୩୪ ମାଡିଉ ୧୦:୩୮; ଲୁକ୍ ୧୪:୨୭ ✠ ୮:୩୫ ୮:୩୫ ମାଡିଉ ୧୦:୩୯; ଲୁକ୍ ୧୭:୩୩; ଜଅନ୍ ୧୨:୨୫  
✠ ୯:୨ ୯:୨ ୨ ଯ ପିତର୍ ୧:୧୭,୧୮ ✠ ୯:୭ ୯:୭ ମାଡିଉ ୩:୧୭; ମାର୍ଚ୍ଚକ ୧:୧୧; ଲୁକ୍ ୩:୨୨

କାତାବାର୍ତ୍ତା ଅଇତେରଇଲା । ୧୧ \*ସିସ୍ତମନ୍ ଜିସୁକେ ପାତାରଲା, “ଏଲିୟ ପରତୁମ୍ ଆଇବାର୍ ଆତେ ବଲି ନିୟମ୍ ସିକାଇଦେବା ଲକ୍ମନ୍ କାଇକେ କଇଲାକିନି ?”

୧୨ ଜିସୁ ତାର୍ ସିସ୍ତମନ୍କେ କଇଲା, “ଉଁ ପର୍ମେସରର୍ ବଇତେଇ ଏଲିୟ ଆଗ୍ତୁ ଆଇସି ବଲି ଲେକା ଅଇଲାକାତା ସତ୍ତସେ । ଏଲିୟ ପରତୁମ୍ ଆସିକରି ସବୁ ବିସଇ ଟିକ୍ କର୍ସି, ମାତର୍ ପର୍ମେସର୍ ଅନି ଆସିରଇବା ନର୍ପିଲା ମୁଇ ବେସି ବେସି କସ୍ତ ପାଇବି ଆରି ଲକ୍ମନ୍ ମକେ ନ ନାମତ୍ ବଲି ମିସା କାଇ ପର୍ମେସରର୍ ବଇଟାନେ ଲେକା ଅଏନାଇ କି ? ୧୩ ମୁଇ ତମ୍କେ ସତ୍ କଇଲିନି, ଏବେ ଏଲିୟ ଆସି ସାରଲା ଆତେ । ଆରି ତାର୍ ବିସଇ ପର୍ମେସର୍ ଟାନେ କାଇଟା ଲେକା ଅଇଲା ଆତେ, ସେ ସେକ୍ତିସେ ଲକ୍ମନ୍ ମିସା ତାକର୍ ନିଜର୍ ମନ୍ କଲା ଇସାବେ କରାପ୍ ଚଲାଚଲ୍ତି କଲା ।”

ଜିସୁ ଗଟେକ୍ ପିଲାକେ ତୁମା ଚାତାଇଲା

(ମାତିଉ ୧୭:୧୪-୨୦; ଲୁକ୍ ୯:୩୭-୪୩)

୧୪ ତାର୍ପତେ ଜିସୁ, ପିତର୍, ଜାକୁବ୍ ଆରି ଜଅନ୍ ବିନ୍ ସିସ୍ତମନ୍ ଲଗେ କେଟ୍ଲାବେଲେ ତେଇ ବେସି ଲକ୍ମନ୍ ରୁଣ୍ଡିରଇବାଟା ଦେକ୍ଲା । ଆରି ନିୟମ୍ ସିକାଇଦେବା ଲକ୍ମନ୍ ସିସ୍ତମନ୍ ସଙ୍ଗ୍ ଦଦାପେଲା ଅଇତେରଇଲା । ୧୫ ଲକ୍ମନ୍ ଜେଡେବେଲ୍ ଜିସୁ ତେଇ ଆଇବାଟା ଦେକ୍ଲା, ସାର୍ଦାରେ କାବା ଅଇଗାଲା ଆରି ଜିସୁକେ ତୁକ୍ ସୁକ୍ ପାତାରବାକେ ତାର୍ଲଗେ ପାଲା ଆସି କୁଆର୍ କର୍ବାର୍ ଦାରଲା । ୧୬ ଜିସୁ ତାର୍ ସିସ୍ତମନ୍କେ ପାତାରଲା, “ତମେ ନିୟମ୍ ସିକାଇବା ଲକ୍, ମର୍ ସିସ୍ତମନ୍ ସଙ୍ଗ୍ କାଇ ବିସଇନେଇ ଦଦାପେଲା ଅଇତେରଇଲାସ୍ ?”

୧୭ ସେ ମାନ୍ଦା ଲକ୍ମନ୍ ବିତ୍ରେଅନି ଗଟେକ୍ ଲକ୍ ଜିସୁକେ ଡାକି କଇଲା, “ଏ ଗୁରୁ, ମୁଇ ମର୍ ପିଲାକେ ନିକ କର୍ବାକେ ତମର୍ ଟାନେ ଆନିରଇଲି । ତାର୍ ବିତ୍ରେ ଗଟେକ୍ କାରାପ୍ ଆତୁମା ପୁରିକରି ତାକେ କାତା ଅଇବାକେ ଦେଏ ନାଇ । ୧୮ ସେ କରାପ୍ ଆତୁମା ପିଲାକେ ଦାରଲାବେଲେ, ତାକେ ମଡିକରି ଅଦରାଇଦେଲାନି ଆରି ତାର୍ ଟଣ୍ଡେଅନି ପେପୁଲ୍ ବାରଇଲାନି ଆରି ସେ ଦାତ୍ କାତର୍ସି । ଆରି ତାର୍ ଗାଗଡ୍ ସିଦା ଅଇଜାଇସି । ମୁଇ ତାର୍ତେଇ ଅନି କାରାପ୍ ଆତୁମାକେ ବାକରାଇ କେଦିଦେବାଇ ବଲି ତମର୍ ସିସ୍ତମନ୍ ଲଗେ ଆନିରଇଲି । ମାତର୍ ତମର୍ ସିସ୍ତମନ୍ ନାପାରଲା ।”

୧୯ ଜିସୁ ସେମନ୍କେ କଇଲା, “ଏ ପର୍ମେସରକେ ବିସ୍ବାସ୍ ନ ରଇବା ଆଜିକାଲିର୍ ଲକ୍ମନ୍, ତମେ ବିସ୍ବାସ୍ କର୍ବାକେ ଆରି କେତେ ଦିନ୍ ମୁଇ ତମର୍ ସଙ୍ଗ୍ ରଇବାର୍ ଆତେ ? ଆରି କେତେଦିନ୍ ମୁଇ ସାଆସ୍ ଦାରି ତମର୍ ସଙ୍ଗ୍ ରଇବାର୍ ଆତେ ? ସେ ପିଲାକେ ମର୍ଲଗେ ଆନା ।” ୨୦ ଆରି ଲକ୍ମନ୍ ସେ ପିଲାକେ ଜିସୁରଲଗେ ଆନଲା । ସେ କରାପ୍ ଆତୁମା ଜିସୁକେ ଦେକ୍ଲା ଦାପରେ ପିଲାକେ ତଲେ ମଡିକରି ଅଦରାଇଲା । ଆରି ଗୁଣ୍ଡି ଗୁଣ୍ଡି କରି ତାର୍ ଟଣ୍ଡେଅନି ପେପୁଲ୍ ବାରଇ ଜାଇତେରଇଲା ।

୨୧ ଜିସୁ ସେ ପିଲାର୍ ବାବାକେ ପାତାରଲା, “ଏ ପିଲା ଏକ୍ତି ଅଇ କେତେଦିନ୍ ଅଇଲା ?” ପିଲାର୍ ବାବା କଇଲା, “ସାନ୍ବେଲେଅନି ” ବଲି । ୨୨ ଆରି ସେ କଇଲା, “ସେ କରାପ୍ ଆତୁମା ପିଲାକେ ମରାଇବାକେ ବେସିତର୍ ପାନିଟାନେ ଆରି ଜଇଟାନେ ମଡିକରି ଅଦରାଇ ଆତେ । ମାତର୍ ତୁଇ ଜଦି କାଇଟା କର୍ବାକେ ପାରୁସ୍ ବଇଲେ ଆମର୍ ପାଇ ଦୟାକରି ସାଇଜ କର୍ ।”

୨୩ ଜିସୁ ତାଙ୍କେ କଇଲା, “କାଇକେ ଜଦି ପାରୁସ୍ ବଇଲେ ନିମାନ୍ କର୍ ବଲିକରି କଇଲୁସ୍ନି ? କାଇକେବଇଲେ ପର୍ମେସରକେ ବିସ୍ବାସ୍ କର୍ବା ଲକ୍ମାନର୍ ତେଇ ସବୁ ଅଇସି ।”

୨୪ ସେ ଦାପ୍ତରେ ପିଲାଟ ବାବା ଆଉଲିଅଇକରି, “ମୁଇ ବିସ୍ବାସ୍ କଲିନି, ଆରି ଅଦିକ୍ ବିସ୍ବାସ୍ କର୍ବାକେ ମକେ ସାଇଜ କର୍ ।” ବଲିକରି କଇଲା ।

୨୫ ଏ ଗଟ୍‌ନାର୍ କାମ୍ ଦେକ୍‌ବାକେ ଲକ୍ମାନ୍ ଏକାତରେ ପାଲାଅଇବାଟା ଜିସୁ ଦେକିକରି ସେ କାରାପ୍ ଆଡ଼ମାକେ ଦମ୍‌କାଇକରି କଇଲା, “ଏ କରାପ୍ ଆଡ଼ମା, ତୁଇ ଏ ପିଲାକେ ଗୁଲା ଆରି ବଇରା କରାଇଆତୁସ୍ । ଏ ପିଲାଟ୍ ଗାଗ୍‌ତେଅନି ବାରଇ ଉଟିଜା ଆରି କେବେ ମିସା ତାର୍ ଗାଗ୍‌ତେ ନ ପୁର, ବଲି ମୁଇ ତକେ ଆଦେସ୍ ଦେଲିନି ।”

୨୬ ଆରି କାରାପ୍ ଆଡ଼ମା ବେସି ଆଉଲିଅଇକରି ପିଲାକେ ମଡିକରି ଅଦରାଇ, ତାର୍‌ଟାନେଅନି ବାରଇଗାଲା । ଆରି ପିଲା ମରିଗାଲା ଲକ୍ମନ୍ ପାରା ଡିସ୍‌ଲା, ଏକ୍ତିକି କେତେକ୍ ଲକ୍ମନ୍ “ସେ ମରିଗାଲା ।” ବଲିକରି କଇଲା । ୨୭ ମାତର୍ ଜିସୁ ସେ ପିଲାକେ ଆଡ଼େଦାରି ଉଟାଇକରି ତାକେ ଟିଆ କରାଇଲାକେ ସେ ଟିଆଅଇଲା ।

୨୮ ଜିସୁ ଆରି ତାର୍ ସିସ୍‌ମନ୍ ଗଟେକ୍ ଗର୍ ବିଡ଼ରେ ଗାଲାପତେ, ଲକ୍ମନ୍ କେ ନଇଲାବେଲେ ତାକେ ପାଟାର୍‌ଲାଇ, “ଆମେ କାଇକେ ସେ କାରାପ୍ ଆଡ଼ମାକେ କେଦି ନାପାରଲୁ ?”

୨୯ ଏ କାତା ସୁନି ଜିସୁ ସେମନ୍‌କେ କଇଲା, “ଏନ୍ତାରି କାରାପ୍ ଆଡ଼ମା ପର୍ମେସରକେ ପାର୍‌ତନା କରିସେ କେଦ୍‌ବାର୍ ଅଇସି, ଆରି କାଇ ବାଟ୍ ନାଇ ।”

ନିଜର୍ ମରନ୍ ବିସଇ ଜିସୁ ଆରିତରେକ୍ କଇଲାନି

(ମାଡିଉ ୧୭:୨୨-୨୩; ଲୁକ୍ ୯:୪୩-୪୫)

୩୦ ତାର୍‌ପତେ ଜିସୁ ଆରି ତାର୍ ସିସ୍‌ମନ୍ ସେ ଜାଗା ଚାଡିକରି ଉଟିଗାଲାଇ । ସେମନ୍ ଗାଲିଲି ଦେସର୍ ବାଟ୍‌ଦେଇକରି ଜାଇତେରଇଲାଇ । ସେମନ୍ କନ୍ ଜାଗାଇ ଆତଡ଼ ବଲିକରି ଲକ୍ମନ୍ ନ ଜାନଡ଼ ବଲି ଜିସୁ ମନ୍ କର୍‌ତେରଇଲା ୩୧ କାଇକେବଇଲେ ସେ ତାର୍ ସିସ୍‌ମନ୍‌କେ ସିକାଇ ଦେବାକେ ମନ୍ କର୍‌ତେରଇଲା । ଜିସୁ ତାର୍ ସିସ୍‌ମନ୍‌କେ କଇଲା, “ସଡ଼ ପର୍ମେସରର୍ ଟାନେଅନି ଆସିରଇବା ନର୍‌ପିଲା ମକେ, ଲକ୍ମାନର୍ ଆତେ ସର୍‌ପି ଦେବାଇ ଆରି ସେମନ୍ ମକେ ମରାଇଦେବାଇ । ମାତର୍ ମୁଇ ମରିକରି ତିନ୍‌ଦିନ୍ ଗାଲାପତେ ଆରି ତରେକ୍ ମଲାଟାନେଅନି ଜିବନ୍ ଅଇ ଉଟ୍‌ବି ।”

୩୨ ମାତର୍ ଜିସୁ କଇବା ଏ କାତାର୍ ଅରଡ଼ ସିସ୍‌ମନ୍ ବୁଜଡ଼ ନାଇ ଆରି ସେମନ୍ ସେ କାତାର୍ ଅରଡ଼ ପାଟାର୍‌ବାକେ ଡର୍‌ଲାଇ ।

ସବୁଟାନେଅନି କେ ବଡ଼

(ମାଡିଉ ୧୮:୧-୫; ଲୁକ୍ ୯:୪୬-୪୮)

୩୩ ଜିସୁ ଆରି ତାର୍ ସିସ୍‌ମନ୍ କପର୍‌ନାଉମେ ଆଇଲାଇ ଆରି ସେମନ୍ ଗର୍ ବିଡ଼ରେ ଗାଲାଇ । ତାର୍‌ପତେ ଜିସୁ ସେମନ୍‌କେ ପାଟାର୍‌ଲା, “ତମେ ବାଟେ କନ୍ ବିସଇନେଇ ଦଦାପେଲା ଅଇତେରଇଲାସ୍ ?”

୩୪ ☆ମାତର୍ ତାର୍ ସିସ୍‌ମନ୍ ଚିମ୍‌ରା ଅଇଦେଲାଇ । କାଇକେବଇଲେ ସେମନ୍ ବାଟେ, ଆମର୍ ବିଡ଼ରେ ସବୁଟାନେଅନି କେ ବଡ଼ ବଲି ଦଦାପେଲା ଅଇତେରଇଲାଇ । ୩୫ ☆ଜିସୁ ବସ୍‌ଲା ଆରି ତାର୍ ବାର୍‌ଟା ସିସ୍‌ମନ୍‌କେ ତାର୍‌ଲଗେ ଡାକାଇ ସେମନ୍‌କେ କଇଲା, “ଜଦି କେ ମୁଜିଆ ଅଇବାକେ ମନ୍ କଲେ, ସେ ସବୁଟାନେଅନି ସାନ୍ ଅଇବାର୍ ଆତେ, ଆରି ସବୁଲକର୍ ସେବା କର୍‌ବାର୍ ଆତେ

୧୩୭ ତାର୍ପତରେ ଜିସୁ ଗଟେକ୍ ସାନ୍ତା ପିଲାକେ ନେଇକରି ସେମାନର୍ ମୁଆଟେ ଚିଆ କରାଇ ସେମାନକେ କଇଲା, ୩୭ \* “କେ କେ ମର୍ ଲାଗି ଏନ୍ତାରି ଗଟେକ୍ ସାନ୍ତା ପିଲାକେ ନାମ୍ବାଇ, ସେମନ୍ ମକେ ନାମ୍ଲାଜନ୍, ଆରି କେ କେ ମକେ ନାମ୍ଲାଜନ୍, ସେମନ୍ ମକେ ନାଇ, ମାତର୍ ମକେ ପାଟାଇରଇବା ମର୍ ବାବାକେ ନାମ୍ଲାଜନ୍ ।”

ଜେ ଆମ୍ବକେ ବିରଦ୍ ନ କରେ ସେ ଆମର୍ ନିଜର୍ ଲକ୍  
(ଲୁକ୍ ୯:୪୯-୫୦)

୩୮ ଜଅନ୍ ଜିସୁକେ କଇଲା, “ଏ ଗୁରୁ, ଗଟେକ୍ ଲକ୍ ତର୍ନାଉଁ ଦାରି ଲକ୍ମାନର୍ଟାନେଅନି କାରାପ୍ ଆଡ଼ମାକେ ବାରକରାଇ କେଦିଦେବାଟା ଆମେ ଦେକକରି, ତାକେ ସେନ୍ତି ନ କର୍ ବଲି କଇଲୁ, କାଇକେବଇଲେ ସେ ଆମର୍ ନିଜର୍ ଲକ୍ ନଏଁ ।”

୩୯ ମାତର୍ ଜିସୁ କଇଲା, “ତାକେ ଏନ୍ତି ନ କର୍ ବଲି ତେବାଆ ନାଇ କାଇକେବଇଲେ, ମର୍ ନାଉଁର୍ ବପୁ ପାଇକରି କାବା ଅଇଜିବା କାମ୍ମନ୍ କରପାର୍ବା ଲକ୍, ମର୍ ବିରୁଦେ କାରାପ୍ କାତା ନ କଏ । ୪୦ \*କାଇକେବଇଲେ ଜେ ଆମ୍ବକେ ବିରଦ୍ ନ କରେ, ସେ ଆମର୍ ନିଜର୍ ଲକ୍ । ୪୧ \*ଆରି ମୁଇ ତମ୍ବକେ ସଡ଼ କଇଲିନି, କେ ତମ୍ବକେ ମର୍ନାଉଁ ଦାରି ଗଟେକ୍ ଗିଲାସ୍ ପାନି କାଇବାକେ ଦେଇସିବଇଲେ, ସେଟାପାଇ ସଡ଼ସେ ତାକେ ପୁରୁସ୍କାର୍ ମିଲ୍ସି ।”

ବିନ୍ ଲକ୍ବକେ ପାପ୍ ନ କରାଇବାକେ ସିକିଆ  
(ମାତିଉ ୧୮:୬-୯; ଲୁକ୍ ୧୭:୧-୨)

୪୨ ଜିସୁ କଇବାର୍ ଦାରଲା “ଜଦି କେ ମର୍ତେଇ ବିସ୍ବାସ୍ କରିରଇବା ଗଟେକ୍ ଲକ୍ବକେ, ସେ କରିରଇବା ବିସ୍ବାସ୍ ଚାଡ଼ିଦେବାକେ ପାପ୍କାମ୍ କରାଇଲାଜନ୍ ବଇଲେ, ସେ ଲକ୍ ଗାଲାଜ ଜତା ପାକ୍ନା ବାନ୍ଧିକରି ତାକେ ସମ୍ବୁରେ ପିଙ୍ଗିଦେବାଟା ତାପାଇ ନିକ ଅଇତା । ୪୩ \*ଜଦି ତମ୍ବ ଆଡ଼ ତମ୍ବକେ ପାପ୍ କରାଇଲାନି ବଇଲେ, ସେ ଆଡ଼ କାଟିପାକାଆ । କାଇକେବଇଲେ ଜତେକ୍ ଆଡ଼ ରଇକରି ସବୁଦିନର୍ପାଇ ଜଇଲାଗ୍ବା ନର୍ବକେ ପେଲାଅଇବା ବାଦୁଲେ ଗଟେକ୍ ଆଡ଼ ନ ରଇକରି ସର୍ଗେ କେଟ୍ବାଟା ନିକ ଅଇସି । ୪୪ କାଇକେବଇଲେ ନର୍ବକେ ସେମାନର୍ କିତା ନସ୍ଟ ନ ଅଅଡ଼ ଆରି ଜଇ ନ ଲିବେ । \* ୪୫ ଜଦି ତମ୍ବ ପାପ୍ ତମ୍ବକେ ପାପ୍କାମ୍ କରାଇଲାନି ବଇଲେ, ସେ ପାପ୍ କାଟି ପିଙ୍ଗିଦିଆସ୍ । ଜତେକ୍ ପାପ୍ ରଇକରି ନର୍ବକେ ପେଲାଅଇବା ବାଦୁଲେ ଚଟା ଅଇକରି ସର୍ଗେ କେଟ୍ବାଟା ତମ୍ବପାଇ ନିକଅଇସି । ୪୬ କାଇକେବଇଲେ ନର୍ବକେ ସେମାନର୍ କିତା ନସ୍ଟ ନ ଅଅଡ଼ ଆରି ଜଇ ନ ଲିବେ । † ୪୭ \*ଜଦି ତମ୍ବ ଆଁକିର୍ ଲାଗି ତମେ ବିସ୍ବାସ୍ ଆରାଇଲାସ୍ନି ବଇଲେ, ସେ ଆଁକି ବେଟି ପିଙ୍ଗିଦିଆସ୍ । କାଇକେବଇଲେ ଜତେକ୍ ଆଁକି ରଇ ନର୍ବକେ ପେଲାଅଇବା ବାଦୁଲେ, ଗଟେକ୍ ଆଁକି ରଇକରି ସରଗ ରାଇଜେ କେଟ୍ବାଟା ତମ୍ବପାଇ ନିକରଇସି । ୪୮ କାଇକେବଇଲେ ନର୍ବକେ ସେମାନର୍ କିତା ନସ୍ଟ ନ ଅଅଡ଼ ଆରି ଜଇ ନ ଲିବେ ।”

୪୯ “ଜେନ୍ତିକି ସୁନା ଜଇଟାନେ ପତାଇକରି ନିର୍ମଲ୍ କଲାପାରା ସବୁ ଲକ୍ମାନକେ ଜଇସଙ୍ଗ୍ ନିର୍ମଲ୍ କର୍ବାଇ ।”

୫୦ \* “ନୁନ୍ ଗଟେକ୍ ନିମାନ୍ ଜିନିସ୍ । ମାତର୍ ନୁନ୍ ଜଦି ତାର୍ କରିଆ ଅଇବାଟା ଆରାଇସି ବଇଲେ ସେ ଆରି ତରେକ୍ କେନ୍ତାର୍ କରିଆ ଅଇପାର୍ସି ? ତମେ ନୁନ୍

\* ୯:୩୭ ୯:୩୭ ମାତିଉ ୧୦:୪୦; ଲୁକ୍ ୧୦:୧୨; ଜଅନ୍ ୧୩:୨୦ \* ୯:୪୦ ୯:୪୦ ମାତିଉ ୧୨:୩୦; ଲୁକ୍ ୧୧:୨୩  
\* ୯:୪୧ ୯:୪୧ ମାତିଉ ୧୦:୪୨ \* ୯:୪୩ ୯:୪୩ ମାତିଉ ୫:୩୦ \* ୯:୪୪ ୯:୪୪ କେତକ୍ପୁରନା ଲେକାଇ ଏ ପଦ୍ ନାଇ † ୯:୪୬ ୯:୪୬ କେତକ୍ପୁରନା ଲେକାଇ ଏ ପଦ୍ ନାଇ \* ୯:୪୭ ୯:୪୭ ମାତିଉ ୫:୨୯  
\* ୯:୫୦ ୯:୫୦ ମାତିଉ ୫:୧୩; ଲୁକ୍ ୧୪:୩୪, ୩୫



ପାରା ନିମାନ୍ ଗୁନେ ପୁରାପୁରୁନ୍ ଅଇ ସବୁଲକ୍ମନର୍ ସଙ୍ଗ୍ ମିସି ବିତି କରି ସୁଆଲେ ରୁଆ” ବଲି କଇଲା ।

## ୧୦

ବିବାଅଇ ଚାତାଚାଡ଼ି ଅଇବା ବିସଇ ଲାଗ ଜିସୁର୍ ସିକିଆ

(ମାଡ଼ିଉ ୧୯:୧-୧୨; ଲୁକ୍ ୧୭:୧୮)

୧ ତାର୍‌ପତେ ଜିସୁ ସେ ଜାଗା ଚାଡ଼ିକରି ଜିଉଦା ରାଇଜର୍ ସନ୍ଦି ଆରି ଜର୍ଦନର୍ ଆରି ଗଟେକ୍ ବାଟେ ଆଇଲା । ଆରି ସବୁ ବେଲାର୍ ପାରା ଲକ୍ମନର୍ ତାର୍ ଲଗେ ରୁଣ୍ଡୁଲାଇ । ଆରି ଜିସୁ ସେମନ୍‌କେ ପର୍ମେସରର୍ କାତା ସିକାଇଦେଲା ।

୨ କେତେଟା ପାରୁସିମନ୍ ଜିସୁରୁ ଲଗେ ଆସିକରି ତାକେ ବୁଲ୍ ଦାରବାକେ ଏନ୍ତାରି ପର୍ସନ୍ ପାଚାରୁଲାଇ । “ଗଟେକ୍ ମୁନୁସ୍ ତାର୍ ମାଇଜିକେ ଚାଡ଼ିଦେବାଟା ଆମର୍ ନିୟମେ ଆଟେ କି ?”

୩ ଜିସୁ ସେମନ୍‌କେ କଇଲା, “ମସା ତମ୍‌କେ କାଇ ଆଦେସ୍ ଦେଲା ଆଟେ ?”

୪ \*ସେମନ୍ କଇଲା, “ଗଟେକ୍ ମୁନୁସ୍ ତାର୍ ମାଇଜିକେ ଚାଡ଼ିଦେବାର୍ ରାଜିନାମା ପତର୍ ଲେକି ତାକେ ଦେଲାପତେ ତାକେ ପାଟାଇଦେଇ ଅଇସି ବଲି ମସା କଇଲା ଆଟେ ।”

୫ ଜିସୁ ସେମନ୍‌କେ କଇଲା, “ମସା କାଇକେ ଏନ୍ତି ଲେକିରଇଲା ବଇଲେ, ତମର୍ ମନ୍‌ବିଡରର୍ ବୁଦ୍‌ବା ବପୁ ତାର୍ ରଇଲାଟା ଦେକିକରି ସେ, ଏ ଆଦେସ୍ ଲେକିଦେଲା ଆଟେ । ୬ ଜେନ୍ତି ସାସ୍‌ତର୍ କଇଲାନ୍ତି, ପର୍ମେସର୍ ଜେଡେବେଲେ ଏ ଦୁନିଆ ଡିଆର୍‌କଲା, ସେବେଲେ ସେ ମାଇଜିମୁନୁସ୍ କରି ଡିଆର୍‌କଲା ଆଟେ । ୭ ସେଟାର୍‌ପାଇ ଗଟେକ୍ ମୁନୁସ୍ ତାର୍ ବାବା ମାକେ ଚାଡ଼ିକରି ତାର୍ ମାଇଜି ସଙ୍ଗ୍ ମିସି । ୮ ସେ ଦୁଇଲକ୍ ଗଟେକ୍ ଅଇବାଇ, ଆରି ସେମନ୍ ଦୁଇଲକ୍ ଇସାବେ ନ ରଅଡ୍, ମାତର୍ ଗଟେକ୍ ଲକ୍ ଇସାବେ ରଇବାଇ । ୯ ସେଟାର୍‌ପାଇ ପର୍ମେସର୍ ଜନ୍ ଦୁଇଲକ୍‌କେ ମିସାଇଆଟେ, କେ ମିସା ସେମନ୍‌କେ ବିନେ ନ ବେଗ୍‌ଲାଅଡ୍ ।”

୧୦ ଜିସୁ ଆରି ତାର୍ ସିସମନ୍ ଗରେ ବାଉଡିଗାଲା ପତେ, ସିସମନ୍ ଆରିତରେକ୍ ଏ ବିସଇ ତାକେ ପାଚାରୁଲାଇ । ୧୧ \*ଜିସୁ ସେମନ୍‌କେ କଇଲା, “ଗଟେକ୍ ମନସ୍ ତାର୍ ମାଇଜିକେ ଚାଡ଼ିପତର୍ ଦେଇ ବିନ୍ ମାଇଜିକେ ବିବା ଅଇସି ବଇଲେ, ସେ ମନସ୍ ପର୍ତୁମ୍ ମାଇଜିର୍ ବିରୁଦେ ପାଦ୍‌ରା କାମ୍ କଲାନ୍ତି । ୧୨ ଆରି ସେନ୍ତି ସେ ଜନ୍ ମାଇଜିଟକି ତାର୍ ମୁନୁସ୍‌କେ ଚାଡ଼ି ପତର୍ ଦେଇ, ବିନ୍ ମୁନୁସ୍‌କେ ବିବା ଅଇସି ବଇଲେ ସେ ମିସା ପର୍ତୁମ୍ ମନସ୍ ବିରୁଦେ ପାଦ୍‌ରି କାମ୍ କଲାନ୍ତି ।” ବଲିକରି କଇଲା ।

ଜିସୁ ସାନ୍ ପିଲାମନ୍‌କେ ଆସିରବାଦ୍ କଲା

(ମାଡ଼ିଉ ୧୯:୧୩-୧୫; ଲୁକ୍ ୧୮:୧୫-୧୭)

୧୩ ଗଟେକ୍ ଦିନ୍ କେତେକ୍ ଲକ୍ମନର୍ ତାକର୍ ପିଲାଟକିମନ୍‌କେ ଜିସୁ ଆଡ୍ ସଙ୍ଗ୍‌ଇ ଆସିରବାଦ୍ କର ବଲି ତାରୁଲଗେ ଆନ୍‌ଲାଇ । ମାତର୍ ତାର୍ ସିସମନ୍ ଲକ୍ମନ୍‌କେ, ଦମ୍‌କାଲାଇ । ୧୪ ଜିସୁ ଏଟା ଦେକି ବେସି ରିସାଅଇ ସିସମନ୍‌କେ କଇଲା, “ସାନ୍ ପିଲାମନ୍‌କେ ମର୍ ଲଗେ ଆଇବାକେ ବାଟ୍ ଦିଆସ୍, ସେମନ୍‌କେ ମନା କରାନାଇ । କାଇକେବଇଲେ ପର୍ମେସରର୍ ରାଇଜ୍ ଏନ୍ତି ପିଲାଟକିମନ୍‌ର୍ ପାରା ରଇବା ଲକ୍ମନର୍ ପାଇସେ । ୧୫ \*ମୁଜ୍ ତମ୍‌କେ ସଡ୍ କାତା କଇଲିନ୍ତି, କେ ମିସା ଗଟେକ୍ ସାନ୍ ପିଲାର୍ ପାରା ନ ଅଇ, ପର୍ମେସରର୍ ରାଇଜ୍ ନ ନାମାଡ୍, ସେମନ୍ କେବେ ମିସା

\* ୧୦:୪ ୧୦:୪ ମାଡ଼ିଉ ୫:୩୧

\* ୧୦:୧୧ ୧୦:୧୧ ମାଡ଼ିଉ ୫:୩୨; ୧ମ କରନ୍ତିୟ ୭:୧୦, ୧୧

\* ୧୦:୧୫

୧୦:୧୫ ମାଡ଼ିଉ ୧୮:୩

ତାର ରାଜ୍ୟେ କେଟି ନାପାରତ୍ତ ।”<sup>୧୬</sup> ତାରପତେ ଜିସୁ ସାନ୍ ସାନ୍ ପିଲାଟକିମନ୍ଦକେ ଉତ୍ତାରି ତାକର୍ ମୁଣ୍ଡେ ଚିକ୍କକରି ଆସିର୍ବାଦ୍ କଲା ।

ସାଉକାର ଗର୍ ପିଲାର କାତ

(ମାତିଉ ୧୯:୧୬-୩୦; ଲୁକ୍ ୧୮:୧୮-୩୦)

<sup>୧୭</sup> ଜିସୁ ଆରି ତାର ସିସ୍ତାନ୍ ତେଇଅନି ବାରଇ ଜିବାବେଲେ ବାଟେ ଗଟେକ୍ ଲକ୍ ପାଲାଇ ଆସି ତାର ଲଗେ କେଟ୍‌ଲା ଆରି ତାର ମୁଆଟେ ମାଣ୍ଡିକୁଟା ଦେଇ ପାଟାରୁଲା, “ଏ ନିମାନ୍ ଗୁରୁ, ନ ସାର୍‌ବା ଜିବନ୍ ମିଲାଇବାକେ ଆଲେ ମୁଇ କାଇଟା କର୍‌ବାର୍ ଆଟେ ?”

<sup>୧୮</sup> ଜିସୁ ତାକେ କଇଲା, “ତୁଇ ମକେ କାଇକେ ନିମାନ୍ ଲକ୍ ବଲି କଇଲୁସ୍‌ନି ? କାଇକେବଇଲେ ପର୍‌ମେସର୍‌କେ ଚାଡ଼ିକରି ଆରି ବିନ୍‌ଟା କେ ମିସା ନିମାନ୍ ଲକ୍ ନାଇ ।<sup>୧୯</sup> ଆରି ତୁଇ ନିଅମ୍‌ତା ଜାନିଆରୁସ୍, ମାର୍‌ବାର୍ ନାଇ, ପାଦ୍‌ରାପାଦ୍‌ରି କାମ୍ କର୍‌ବାର୍ ନାଇ, ଚର୍ କାମ୍ କର୍‌ବାର୍ ନାଇ, ମିର୍ ସାକି ଦେବାର୍ ନାଇ, ଆୟା ବାବାକେ ସନ୍‌ମାନ୍ ଦିଆସ୍ ।” ବଲି କଇଲା ।

<sup>୨୦</sup> ସେ ଲକ୍ ଜିସୁକେ କଇଲା, “ଏ ଗୁରୁ, ମୁଇତା ଏସବୁ ଆଦେସ୍ ସାନ୍ ବେଲେ ଅନି ମାନ୍‌ଲିନି ।”

<sup>୨୧</sup> ଜିସୁ ତାକେ ନିକକରି ଦେକ୍‌ଲା ଆରି ତାକେ ଆଲାଦ୍ କରି କଇଲା, “ତୁଇ ଏବେ ମିସା ଗଟେକ୍ ବିସଇତେଇ ଉନା ଆରୁସ୍ । ତୁଇ ଜାଇ ତର୍ ଦନ୍‌ସ୍‌ପତି ବିକି, ସେ ତାରୁ ଗରିବ୍ ଲକ୍‌ମନ୍‌କେ ବାଟାକରି ଦେସ୍, ତୁଇ ସର୍‌ଗେ ଦନ୍ ପାଇସୁ । ଏଡ଼ିକରି ମର୍ ପତେ ପତେ ଆଉ ।” ବଲିକରି କଇଲା ।<sup>୨୨</sup> ଜିସୁ କଇଲା ଏ କାତା ସୁନିକରି ସେ ଲକ୍ ମୁ ସୁକାଇ କରି, ଗରେ ଉଟିଗାଲା । କାଇକେବଇଲେ ସେଲକ୍ ବେସି ସାଉକାର ରଇଲା ।

<sup>୨୩</sup> ଜିସୁ ଚାରିବେଡ଼ତି ଦେକିକରି ସିସ୍ତାନ୍‌କେ କଇଲା, “ସାଉକାର ଲକ୍‌ମନ୍ ପର୍‌ମେସର୍‌ର ରାଜ୍ୟେ ଜିବାଟା ବେସି କସ୍‌ଟ ଆଟେ ।”

<sup>୨୪</sup> ଜିସୁର୍ କାତା ସୁନିକରି ସିସ୍ତାନ୍ କାବା ଅଇଗାଲାଇ । ମାତର୍ ଜିସୁ ସେମନ୍‌କେ ଆରିତରେକ୍ କଇଲା, “ଏ ମର୍ ପିଲାମନ୍ ପର୍‌ମେସର୍‌ର ରାଜ୍ୟେ ଜିବାଟା ଲକ୍‌ମନ୍‌କେ କେତେକ୍ କସ୍‌ଟ !<sup>୨୫</sup> ଜେନ୍ତି ଗଟେକ୍ ବଡ଼ ଜୁଡ଼ି ସୁଜି ବାଟେ ଚିଙ୍ଗିଲି ଜିବାକେ କସ୍‌ଟ, ସାଉକାର ଲକ୍ ପର୍‌ମେସର୍‌ର ରାଜ୍ୟେ କେଟ୍‌ବାଟା ତାର୍‌ତେଇଅନି ଅଦିକ୍ କସ୍‌ଟ ।”

<sup>୨୬</sup> ସିସ୍ତାନ୍ ଆରିତରେକ୍ ବେସି କାବା ଅଇଗାଲାଇ ଆରି ନିଜର୍ ନିଜର୍ ବିତ୍‌ରେ କାତା ଅଇଲାଇ, “ଏଡ଼ି ବଇଲେ କେ ତେବେ ରକିଆ ପାଇସି ?”

<sup>୨୭</sup> ଜିସୁ ସେମନ୍‌କେ ଦେକିକରି କଇଲା, “ଏ ବିସଇ ଲକ୍‌ମନ୍‌ର୍ ଟାନେ ଅଇନାପାରେ, ମାତର୍ ପର୍‌ମେସର୍‌ର୍ ଟାନେ ସବୁଟା ଅଇପାର୍‌ସି ।”

<sup>୨୮</sup> ପିତର୍ ଜିସୁକେ କଇଲା, “ଦେକା ଆମେ ଆମର୍ ସବୁ ଚାଡ଼ିଦେଇ ତମର୍ ସଙ୍ଗ୍ ଆଇଲୁଆରୁ ।”

<sup>୨୯</sup> ଜିସୁ ସେମନ୍‌କେ କଇଲା, “ମୁଇ ତମ୍‌କେ ସଡ଼ କାତା କଇଲିନି, ଜେ ମର୍ ସଙ୍ଗ୍ ଆଇବାକେ ଆରି ପର୍‌ମେସର୍‌ର୍ ନିମାନ୍ କାତା ଜାନାଇବାକେ ଗର୍ ଦୁଆର୍, ବାଇ ବଇନି, ମା ବାବା, ପିଲାଟକି ଆରି ଜମିବାଡ଼ି ଚାଡ଼ିକରି ଆଟେ, <sup>୩୦</sup> ସେ ସଡ଼ସେ, ନିଜର୍ ଚାଡ଼ିରଇଲା ସବୁ ବିସଇତେଇଅନି ସଏ ବାଗ୍ ଅଦିକ୍ ଏ ଜୁଗେ ପାଇସି । ଗର୍ ଦୁଆର୍, ବାଇ ବଇନି, ମାଆ ବାବା, ପିଲାଟକି ଆରି ଜମିବାଡ଼ି ଏ ସବୁ ଦିନ୍‌ସୁ ଅଦିକ୍ ପାଇସି ଆରି ତାର୍ ସଙ୍ଗ୍ ଗେଞ୍ଜନା ମିସା ପାଇସି । ମାତର୍ ଆଇବା ଜୁଗେ ପର୍‌ମେସର୍‌ର ରାଜ୍ୟେ, ସେ ନ ସାର୍‌ବା ଜିବନ୍ ପାଇସି ।<sup>୩୧</sup> ☆ମାତର୍ ଜନ୍ ଲକ୍‌ମନ୍

ଆଗତୁ ଅଇତେରଇବାଇ, ସେମନ୍ ପତେ ରଇବାଇ । ଆରି କେ କେ ପତେ ରଇବାଇ, ସେମନ୍ ଆଗତୁ ରଇବାଇ ।”

ଜିସୁ ତାର୍ ମରନର୍ ବିସଇ ଏଟା ସଙ୍ଘ ତିନ୍ ପାଲି କଇଲା  
(ମାତିଉ ୨୦:୧୭-୧୯; ଲୁକ୍ ୧୮:୩୧-୩୪)

୩୨ ସେମନ୍ ଜିରୁସାଲମେ ଗାଲାବେଲେ, ଜିସୁ ସେମନର୍ ଆଗତୁ ଆଗତୁ ଜାଇତେ ରଇଲା । ସେବେଲା ସିସମନ୍ କାବାଅଇଜାଇତେ ରଇଲାଇ । ଆରି ଜିସୁର୍ ପତେ ପତେ ଜିବା ଲକ୍ମନ୍ ସବୁ ସେ ଜିରୁସାଲମେ ଗାଲାନ୍ତି ବଲି ଡରିଜାଇତେ ରଇଲାଇ । ଜିସୁ ତାର୍ ବାରଟା ସିସମନ୍‌କେ ବିନେ ଡାକିନେଇକରି ନିଜ୍‌କେ କାଇକାଇଟା ଅଇସି, ସେ ବିସଇ କଇବାର୍ ଦାରଲା । ୩୩ ଜିସୁ ତାର୍ ସିସମନ୍‌କେ କଇଲା, “ସୁନା ଆମେ ଜିରୁସାଲମେ ଗାଲୁନି । ତେଇ ପର୍ଯ୍ୟେସରର୍‌ଟାନେଅନି ଆସିରଇବା ନରପିଲା, ମକେ ବିସ୍‌ବାସେ ବିସ୍ ଦେଲାପାରା କରି ମୁକ୍ତି ଅପୁଜାରିମନ୍ ଆରି ନିୟମ୍ ସିକାଇ ଦେବା ଲକ୍ମନ୍‌କେ ସର୍ପି ଦେବାଇ । ସେମନ୍ ମକେ କିଜାଇକରି ବିଚାର୍ କରି ‘ଆକେ ମରାଇବାର୍ ଆଟେ ।’ ବଲି ରମିୟ ଲକ୍ମନ୍‌କେ ସର୍ପି ଦେବାଇ । ୩୪ ସେମନ୍ ମକେ ଟାପୁରା କର୍‌ବାଇ, ମର୍ ଉପରେ ତୁକ୍‌ବାଇ । ମକେ କର୍‌ତା ସଙ୍ଘ୍ ମାର୍‌ବାଇ, ଆରି ସାରାସାରି ମରାଇବାଇ । ମାତର୍ ମରିକରି ତିନ୍‌ଦିନ୍ ଗାଲାପତେ, ମୁଇ ଆରି ତରେକ୍ ମଲାଟାନେଅନି ଉର୍‌ବି ।”

ଜାକୁବ୍ ଆରି ଜଅନ୍ ମାଙ୍‌ବାଟା  
(ମାତିଉ ୨୦:୨୦-୨୮)

୩୫ ଜେବଦି ନାଉର୍ ଗଟେକ୍ ଲକ୍ମନ୍ ପିଲାମନ୍ ଜାକୁବ୍ ଆରି ଜଅନ୍ ଜିସୁର୍‌ତେଇ ଆସି ତାକେ କଇଲାଇ, “ଏ ଗୁରୁ, ଆମେ ତର୍‌ତେଇ ଜାଇଟା ମାଙ୍‌ବୁ, ତୁଇ ସେଟା କର୍ ବଲି ଆମେ ମନ୍ କଲୁନି ।”

୩୬ ଜିସୁ ପାଟାରଲା, “ମୁଇ ତମର୍ ପାଇ କାଇଟା କର୍‌ବି ବଲି ମନ୍ କଲାସନ୍ତି ?”

୩୭ ସେମନ୍ ଜିସୁକେ କଇଲାଇ, “ତୁଇ ତର୍ ଡାକ୍‌ପୁଟା ପାଇବା ବସ୍‌ବା ଜାଗାଇ ବସ୍‌ଲା ବେଲେ ଆମର୍ ଦୁଇଲକ୍‌କର୍ ବିଡରେ ଅନି ଗଟେକ୍ ଲକ୍‌କେ ତର୍ ଉଜା ବାଟେ ଆରି ଗଟେକ୍ ଲକ୍‌କେ ତେବ୍‌ରି ବାଟେ ବସାଅ ବଲି ମନ୍ କଲୁନି ।”

୩୮ \*ଜିସୁ ସେମନ୍‌କେ କଇଲା, “ତମେ କାଇ ବିସଇ ମାଙ୍‌ଲାସନ୍ତି ସେ ବିସଇ ନାଜାନାସ୍ । ମକେ ଜନ୍ ମୁତାଇ ଦୁକ୍‌କସ୍‌ଟ ପାଇବାକେ ଆଟେ, ସେ ମୁତାର୍ ଦୁକ୍‌କସ୍‌ଟ ପାଇପାରାସ୍ କି ? ଆରି ମୁଇ ଜନ୍ ତୁବନ୍ ନେବାର୍ ଆଟେ, ସେ ତୁବନ୍ ନେଇ ପାରାସ୍ କି ?”

୩୯ ସେମନ୍ ଜିସୁକେ କଇଲାଇ, “ଉଁ ଆମେ ପାର୍‌ବୁ ।” ଜିସୁ ସେମନ୍‌କେ କଇଲା, “ଏଟା ସତ୍‌ସେ । ମୁଇ ଜନ୍ ମୁତାର୍ ଦୁକ୍‌କସ୍‌ଟ ପାଇବି ଆରି ଜନ୍ ତୁବନ୍ ନେବି ତମେମିସା ସେ ମୁତାର୍ ଦୁକ୍‌ କସ୍‌ଟ ଆରି ତୁବନ୍ ପାଇସା । ୪୦ ମାତର୍ ମର୍ ଉଜାବାଟେ କି ତେବ୍‌ରିବାଟେ ବସ୍‌ବାକେ ଦେବାର୍, ମର୍ ଅଦିକାର୍ ନାଇ, ମାତର୍ ମର୍ ବାବା ବାଟ୍‌ସି ।”

୪୧ ଜାକୁବ୍ ଆରି ଜଅନ୍ କଇଲା କାତା ବିନ୍ ସିସମନ୍ ଜେତେବେଲ୍ ସୁନ୍‌ଲାଇ, ଜାକୁବ୍ ଆରି ଜଅନ୍‌କେ ବେସି ରିସା ଅଇଗାଲାଇ । ୪୨ \*ମାତର୍ ଜିସୁ ତାର୍ ସିସମନ୍‌କେ ଗଟେକ୍‌ଟାନେ ଡାକି କରି ସେମନ୍‌କେ କଇଲା, “ଏ ଦୁନିଆର୍ ରାଜାମନ୍ ଆରି ନେତାମନ୍ ଲକ୍ମନ୍‌କେ ନିଜର୍ ଅଦିକାରେ ରକ୍‌ବାକେ ମନ୍ କର୍‌ବାଇ । ଆରି ସର୍‌କାର୍ ମିସା ତାକର୍ ତଲେ ରଇଲା ଲକ୍ମନ୍‌କେ ନିଜର୍ ଅଦିକାରେ ରକି ରଇବାକେ ମନ୍ କର୍‌ବାଇ । ଏ ବିସଇ ତମେ ଜାନିଆଟାସ୍ । ୪୩ \*ମାତର୍ ତମର୍

☆ ୧୦:୩୮ ୧୦:୩୮ ଲୁକ୍ ୧୨:୫୦ ☆ ୧୦:୪୨ ୧୦:୪୨ ଲୁକ୍ ୨୨:୨୫, ୨୬ ☆ ୧୦:୪୩ ୧୦:୪୩ ମାତିଉ ୨୩:୧୧; ମାର୍ଚ୍ଚ ୯:୩୫; ଲୁକ୍ ୨୨:୨୬

ବିତ୍ତରେ ଏହି ନ ରଇକରି ବିନ୍ଦବାବେ ରଇବାର୍ ଆଚେ । ତମର୍ ବିତ୍ତରେଅନି କେ ବଡ଼ ଲକ୍ ପାରା ଦେକାଇଅଇବାକେ ମନ୍ କଲାନି ବଇଲେ, ସେ ତମର୍ ସବୁ ଲକର୍ ଗଟେକ୍ ଗତିଦାଙ୍ଗଡ଼ା ପାରା ରଅ । <sup>୪୪</sup> ଜଦି କେ ତମର୍ ବିତ୍ତରେ ଅନି ପର୍ମେସରର୍ ମୁଆଟେ ମୁକିଅ ଲକ୍ ଅଇବାକେ ମନ୍ କଲାନି ବଇଲେ, ସେ ଗଟେକ୍ ଗେନ୍ଲୀ ଗତିଦାଙ୍ଗଡ଼ା ପାରା ସେବା କର । <sup>୪୫</sup> କାଇକେ ବଇଲେ ପର୍ମେସରଟାନେଅନି ଆସିରଇବା ନର୍ପିଲା ମୁଇ, ବିନ୍ ଲକ୍ମନର୍ଟାନେଅନି ମକେ ସେବା ମିଲ ବଲି ଆସି ନାଇ, ମାତର୍ ସେବା କର୍ବାକେ ଆସି ଆଚି । ଆରି ମୁଇ ଜିବନ୍ ଦେବାର୍ ଲାଗି, ବେସି ଲକ୍ ଦସି ବଲି ଏଜାଇ ନ ଅଇ, ପାପେଅନି ରକିଆ ପାଇବାଇ ।”

ଜିସୁ ବାର୍ତିମୟ କାଣାକେ ନିକ କଲା  
(ମାତିଉ ୨୦:୨୯-୩୪; ଲୁକ୍ ୧୮:୩୫-୪୩)

<sup>୪୬</sup> ତାର୍ପଟେ ଜିସୁ ଆରି ତାର୍ ସିସମନ୍ ଜିରିଅ ନାଉର୍ ଗଡେ କେଟ୍ଲାଇ । ସେ ଗଡ଼ ଚାଡ଼ିକରି ଗାଲାବେଲେ, ତିମାୟ ନାଉର୍ ଲକର୍ ପିଲା ବାର୍ତିମୟ ବଲି ଗଟେକ୍ କାଣା ଲକ୍ ବାଟ୍ପାଲି ବସି ବିକ୍ ମାଙ୍ଗଡେରଇଲା । <sup>୪୭</sup> ନାଜିରିତର୍ ଜିସୁ ଏବାଟେ ଆଇଲାନି ବଲି ସୁନି, ସେ ବେସି ଆଉଲି ଅଇକରି କଇଲା, “ଏ ଦାଉଦର୍ ପଅ ଜିସୁ, ମକେ ଦୟାକରା !”

<sup>୪୮</sup> ବେସି ଲକ୍ମନ୍ ତାକେ ଚିମରାଇଅଇ ରଇବାକେ କଇଲାଇ, ମାତର୍ ସେ କାଣାଲକ୍ ଅଦିକ୍ ଅଦିକ୍ ଆଉଲିଅଇକରି କଇଲା, “ଏ ଦାଉଦର୍ ପଅ ! ମକେ ଦୟା କରା ।”

<sup>୪୯</sup> ଜିସୁ ତେବିକରି କଇଲା, “ତାକେ ମର୍ ଲଗେ ଆଇବାକେ କୁଆ ।” ଲକ୍ମନ୍ କାଣାକେ ଡାକିକରି କଇଲାଇ, “ସାଆସ୍ ଦାରିକରି ଉଟ୍, ଜିସୁ ତକେ ଡାକ୍ଲାନି ।”

<sup>୫୦</sup> କାଣା ଲକ୍ ତାର୍ ଚାଦର୍ ତେଇ ପିଙ୍ଗିଦେଇକରି ଚିକାଲ୍ନା ତେଗଇ ଉଟ୍ଲାଇ ଆରି ଜିସୁର ଲଗେ ଗାଲା ।

<sup>୫୧</sup> ଜିସୁ ତାକେ ପାଚାର୍ଲାଇ “ମୁଇ ତର୍ପାଇ କାଇଟା କର୍ବି ବଲି ତୁଇ ମନ୍ କଲୁସିନି ?” ସେ କଇଲା, “ଏ ଗୁରୁ, ମୁଇ ଜେନ୍ତ୍ରିକି ଦେକି ପାର୍ବି ସେଟା ମନ୍ କଲିନି ।”

<sup>୫୨</sup> ଜିସୁ ତାକେ କଇଲା, “ଜା, ତୁଇ ନିମାନ୍ ଅଇଜାଇ ଆରୁସ୍ । କାଇକେବଇଲେ ତୁଇ ମକେ ବିସ୍ବାସ୍ କରି ଆଁକି ଦେକି ପାର୍ଲୁସିନି ।” ସେଦାପ୍ରେସେ କାଣା ଆଁକି ଦେକି ବାଟେ ବାଟେ ଜିସୁର ପଟେ ଜିବାର୍ ଦାର୍ଲାଇ ।

## ୧୧

ଜିସୁ ଡାକ୍ପୁଗାଅଇ ଜିରୁସାଲାମ୍ କେଟ୍ଲାଇ  
(ମାତିଉ ୨୧:୧-୧୧; ଲୁକ୍ ୧୯:୨୮-୪୦; ଜଅନ୍ ୧୨:୧୨-୧୯)

<sup>୧</sup> ଜିସୁ ଆରି ତାର୍ ସିସମନ୍ ଜିରୁସାଲାମ୍ ଲଗାଲଗି ଅଇକରି ଜିଡ଼ ନାଉର୍ ଡଙ୍ଗର୍ଲଗେ ରଇଲା ବେଡ଼ପାଗି ଆରି ବେଡ଼ନିଆ ନାଉର୍ ଗାଏଁ କେଟ୍ଲାଇ । ଜିସୁ ସିସମନ୍ ବିତ୍ତରେଅନି ଦୁଇଲକ୍କେ ଡାକିକରି ସେମନ୍କେ କଇଲା, <sup>୨</sup> ତମେ ଆମର୍ ମୁଆଟେ ରଇଲା ଗାଏଁ ଜା । ତମେ ଗାଉଁ ବିତ୍ତରେ ଜିବାବେଲେ, ଗଟେକ୍ ଗଦ ପିଲା ବାନ୍ଦିରଇଲାଟା ଦେକ୍ସା । ସେ ଗଦ ପିଲାର୍ ଉପ୍ରେ ଏବେଜାକ କେ ମିସା ଚଗଡ଼ ନାଇ । ତାକେ ମେଲିକରି ମର୍ଲଗେ ଦାରିଆସା । <sup>୩</sup> ଜଦି କେ ତମକେ କାଇକେ ମେଲିକରି ନେଲାସିନି ? ବଲି ପାଚାର୍ଲେ, ମାପ୍ପୁକେ ଦରକାର୍ ଆଚେ ଆରି ସେ ତମକେ ଦାପ୍ରେସେ ବାଉଡାଇଦେଇସି । ବଲି ସେମନ୍ ଜିବା ଆଗ୍ତୁ ସେମନ୍କେ ପାଟାଇଦେଲା ।

<sup>୪</sup> ସେ ଗାଏଁ ଗାଲାଇ ଜେ ଗଟେକ୍ ଗରର୍ ଡାଣ୍ଡୁର୍ ତିଆଗଡ଼ିଲଗେ ଗଦ ପିଲା ବାନ୍ଦିଅଇ ରଇଲାଟା ଦେକିକରି ତାକେ ଜାଇ ମେଲ୍ଲାଇ । <sup>୫</sup> ତେଇ ଚିଆଅଇରଇଲା

କେତେଲକ୍ଷ୍ମୀ କହିଲେ, “ତମେ କାହିଁ କଲୁଣୀ ? ଆରି କାହିଁକି ଏ ଗଦ ପିଲାକେ ମେଲୁଣୀସି ?”

୧୧ ସେମାନଙ୍କେ ଜିସୁ ଜେନ୍ତୁ କହିବାକେ କହିଲେଲା, ସେନ୍ତାରିସେ ସିସ୍ତାମାନ ଲକ୍ଷ୍ମୀକେ କହିଲେଲା । ତାହାପରେ ସେ ଲକ୍ଷ୍ମୀ “ଗଦ ପିଲାକେ ନିଆ ।” ବଲି କହିଲେଲା ।

୧୨ ସେମାନ ଗଦ ପିଲାକେ ଜିସୁର ଲଗେ ଆନୁଲାଇ ଆରି ନିଜର ନିଜର ପରିଆମନ୍ ଗଦ ପିଲାକୁ ପିଟି ଉପରେ ପାକାଇଲେ । ଆରି ଜିସୁ ଗଦ ଉପରେ ବସିଲା । ୮ ବେସି ଲକ୍ଷ୍ମୀ ଜିସୁକେ ସନ୍ତାନ ଦେବାକେ ନିଜର ନିଜର ପରିଆମନ୍ ବାଟେ ଅଟାଇଦେଲେ ଆରି ବିନୁଲକ୍ଷ୍ମୀ ଗତର ଭାଲପତର ଆରି କେନ୍ଦାମନ୍ କାଟିଆନିକରି ବାଟେ ଅଟାଇଦେଲେ । ୯ ଜିସୁର ଆଗଭୁବାଟେ ଆରି ପର୍ବବାଟେ ଜିବା ଲକ୍ଷ୍ମୀ ବେସି ଆଉଲିଅଇ ଏନ୍ତି କହିତେରଇଲେ, “ଅସାନା, ପର୍ବେସରକେ ଡାକ୍ତୁଣୀ କର । ପର୍ବେସର ତାକେ ଆସିରବାଦ୍ କଲାଆଟେ । ୧୦ ଆମର ଆନିଦାଦି ଦାଉଦ ରାଜାର ରାଇଜ୍ ଆଇଲାନି, ତାର ରାଇଜ୍ ପର୍ବେସର ଆସିରବାଦ୍ କର । ସରଗେ ରଇବା ବାବା ପର୍ବେସର ସନ୍ତାନ ପାଇଲାପାରା କାତା କୁଆ” ବଲି କହିଲେଲା ।

୧୧ ତାହାପରେ ଜିସୁ ଜିରୁସାଲମ୍ ଆସିକରି ପର୍ବେସରର ଗର ବିତ୍ତରେ ପୁରୁଲା । ଆରି ଚାରିବେଡ଼ି ରଇଲା ସବୁ ଜିନିଷମନ୍ ନିମାନ୍ କରି ଦେଲେ । ସେ ବେଲା ବେସି ଅଲ୍‌ସମ୍ ଅଇଗାଲାଜେ, ସେ ବାଟେ ସିସ୍ତାମାନର ସଙ୍ଗେ ବେଡ଼ିଆ ନାଉର୍ ଗାଏଁ ଉଚିତାଇକରି ତେଇ ରଇଲା ।

ଜିସୁ ତୁମ୍ଭେ ଗତକେ ସାଉପଦେଲା

(ମାତିଉ ୨୧:୧୮-୧୯)

୧୨ ତାର ଆରକର ଦିନେ ଜିସୁ ଆରି ତାର ସିସ୍ତାମାନ ବେଡ଼ିଆଇଅନି ଜିରୁସାଲମ୍ ଆଇବାବେଲେ ଜିସୁକେ ବେସି ବୁକ୍ କଲା । ୧୩ ଜିସୁ ଦୁରିକେ ଅନି ବେସି ପତର ରଇବା ଗଟେକ୍ ତୁମ୍ଭେଗତ ଦେଲେ । ଆରି ସେ ଗତେ କେତେଟା ପଲ୍ ଦାରିରଇସି ବଲି ବାବିକରି ଗତବୁଦେ ଗାଲା । ମାତର ଗତଲଗେ ଜାଇକରି ଦେଲେଲେ, ଗଟେକ୍ ମିସା ପଲ୍ ମିଲେ ନାଇ । କାହିଁକିବଇଲେ, ସେଟା ତୁମ୍ଭେପଲ୍ ଦାରବା ଦିନ୍ ନ ରଇଲା । ୧୪ ଜିସୁ ଗତକେ କହିଲା, “ତୁଇ ଆରି କେବେ ମିସା ପଲ୍ ନ ଦାରୁସ୍ ।” ସେ କାତା ତାର ସିସ୍ତାମାନ ସୁନ୍‌ଲାଇ ।

ଜିସୁ ଜିରୁସାଲମ୍ ପାରତନା ଗତ ପରିଚଳ୍ କଲା

(ମାତିଉ ୨୧:୧୨-୧୭; ଲୁକ୍ ୧୯:୩୯-୪୮; ଜଅନ୍ ୨:୧୩-୨୨)

୧୫ ତାହାପରେ ଜିସୁ ଜିରୁସାଲମ୍ ଗତେ ଜାଇ, ମନ୍ଦିରେ ପୁରିକରି ତେଇ ଗେନାବିକା କରବା ଲକ୍ଷ୍ମୀକେ ତାଣ୍ଡେ ବାରକରାଇଦେଲା । ବିନ୍ ଦେସର ତାବୁ ବାଦ୍‌ଲାଇବା ଲକ୍ଷ୍ମୀମାନ ଗେରୁଲ୍ ଆରି ବିରୁ କରବା ପରୁଆ ବିକ୍‌ବା ଲକ୍ଷ୍ମୀମାନ ବସ୍‌ବା ପିତା ପାସ୍‌ଲାଇ ପାକାଇଲା । ୧୬ ମନ୍ଦିରର ତାଣ୍ଡେ ଗେନା ବିକା କରବାକେ ସେ କାକେମିସା ଦେଏ ନାଇ । ୧୭ ତାର ପରେ ସେ ଲକ୍ଷ୍ମୀକେ ସିକାଇଦେବାବେଲେ ଏନ୍ତି କହିଲା,

“ମର ମନ୍ଦିର ସବୁ ଜାତିର ଲକ୍ଷ୍ମୀମାନ ପାରତନା ଗତ ବଲି ନାମ୍‌ବାଇ ବଲି ପର୍ବେସରର ବଇଟାନେ ଲେକା ଅଇଆଟେ,

ମାତର ତମେ ସେ ଗତ ଚରମନର ପାଆର କରିଆଗାସ୍ ।”

୧୮ ତେଇ ମୁକ୍ତି ପୁଜାରିମନ୍ ଆରି ନିୟମ୍ ସିକାଉମନ୍ ଏ କାତା ସୁନି, ଜିସୁକେ କେନ୍ତି ମରାଇବାର ଅଇସି ବଲି ଚେସ୍‌ଟା କରତେରଇଲେ । ମାତର ଲକ୍ଷ୍ମୀକେ ଡରତେରଇଲେ । କାହିଁକିବଇଲେ ଲକ୍ଷ୍ମୀ ସେ ସିକାଇଦେବା ବିସଇ କାବା ଅଇକରି ବେସି ମନ୍ କର ସୁନ୍‌ତେରଇଲେ ।

୧୯ ଆରି ସେଦିନର ସଞ୍ଜ ଅଇଲାକେ ଜିସୁ ଆରି ତାର ସିସ୍ତାନ୍ ଜିରୁସାଲମ୍ ନଅରେଅନି ବାରଇକରି ଉଠିଗାଲା ।

ତୁମ୍ଭି ଗତରତେଇ ଅନି ସିକିଆ  
(ମାତିଉ ୨୧:୨୧-୨୨)

୨୦ ତାର ଆରକର ଦିନର ସାକାଲେ ବାଉଡ଼ି ଆଇବାବେଲେ, ଏଦେ ଦେକା ! ସେ ତୁମ୍ଭିଗର୍ ବୁଦ୍ଧେଅନି ଚିପେଜାକ ସୁକି ଜାଇରଇଲାଟା ଦେକ୍ଲା । ୨୧ ସେବେଲା ଜିସୁ ଆଗତୁ କଇରଇଲା କାତା ପିତର୍ ଏତାଇକରି ତାକେ କଇଲା, “ଏ ଗୁରୁ ଜନ୍ ତୁମ୍ଭି ଗର୍କେ ତମେ ସାଇପ୍ ଦେଇରଇଲାସ୍, ସେ ଗର୍ ସୁକିଗାଲା ଆଟେ ।”

୨୨ ଜିସୁ ସେମନ୍ତକେ କଇଲା, “ତମେ ପର୍ମେସରର୍ ତେଇ ବିସବାସ୍ କରିରୁଆ । ୨୩ \*ମୁଇ ତମ୍ଭକେ ସତ୍ କାତା କଇଲିନି, ଜେ ନିଜର୍ ମନେ ଅଇସି କି ନଏ ବଲିକରି ଏନେ ତେନେ ନ ଅଇ, ସେ କଇବା କାତାଇ ବିସବାସ୍ କରି, ‘ଏ ଡଙ୍ଗର୍ ଉଲଟିକରି ସମ୍ଭୁରେ ଜାଇ ଅଦର୍ ।’ ବଲି କଇଲେ ସେଟା ସେନ୍ତାରି ଅଇସି । ୨୪ ସେଟାରପାଇ ମୁଇ ତମ୍ଭକେ କଇଲିନି, ତମେ ପାର୍ତନାଇ ଜନ୍ଟା ମିଲ୍ସି ବଲି ବିସବାସ୍ କରି ମାଙ୍ଗ୍ଲେ, ସେଟା ତମ୍ଭକେ ମିଲ୍ସି । ୨୫ \*ମାତର୍ ତମେ ପାର୍ତନା କରବା ବେଲେ ତମର୍ ମନେ କାର୍ ବିରଦେ ମିସା କାଇ କାତା ରଇଲେ, ତାକେ କେମା ଦିଆସ୍ । ଏନ୍ତି କଲେ ତମର୍ ସରଗର୍ ବାବା ମିସା ତମ୍ଭକେ ତମର୍ ପାପେଅନି କେମା ଦେଇସି । ୨୬ ମାତର୍ ତମେ କେମା ନ କଲେ, ତମର୍ ସରଗର୍ ବାବା ମିସା ତମ୍ଭକେ କେମା ନ ଦେଏ ।” \*

ଜିସୁର୍ ଅଦିକାର୍ ବିସଇନେଇ ପର୍ସନ୍  
(ମାତିଉ ୨୧:୨୩-୨୬; ଲୁକ୍ ୨୦:୧-୮)

୨୭ ସେମନ୍ ଆରିତରେକ୍ ଜିରୁସାଲମ୍ ଆଇଲା । ଜିସୁ ମନ୍ଦିରର୍ ଦୁଆରେ ବୁଲ୍ବାବେଲେ ମୁକିଅ ପୁଜାରିମନ୍, ନିୟ୍ମ୍ ସିକାଉମନ୍ ଆରି ପାର୍ତନମନ୍ ତାର ଲଗେ ଆସି ପାଚାରଲା । ୨୮ “ତୁଇ କାଇ ଅଦିକାରେ ଏ ସବୁ କାମ୍ମନ୍ କଲୁସ୍ନି ? ଆରି ଏ ସବୁ କାମ୍ମନ୍ କରବାକେ ତକେ କେ ଅଦିକାର୍ ଦେଲାଆଟେ ?”

୨୯ ମାତର୍ ଜିସୁ ସେମନ୍ତକେ କଇଲା, “ମୁଇ ମିସା ତମ୍ଭକେ ଏକାଇ ଗଟେକ୍ ସେ ପର୍ସନ୍ ପାଚାରବି, ସେ ପର୍ସନ୍ ଉତର୍ ତମେ କଇଲେ, ମୁଇ ଏ ସବୁ କାମ୍ କନ୍ ଅଦିକାରେ କଲିନି, ସେଟା ତମ୍ଭକେ କଇବି । ୩୦ ଜଅନ୍ ତୁବନ୍ ଦେବା ଅଦିକାର୍ ସରଗର୍ ପର୍ମେସରର୍ଟାନେଅନି ଆସିରଇଲା କି ଲକ୍ମନର୍ ଟାନେଅନି ଆସିରଇଲା ? ଏଟା ମକେ କୁଆ ।” ବଲି କଇଲା ।

୩୧ ତେଇ ସେମନ୍ ନିଜର୍ ନିଜର୍ ବିତ୍ରେ କୁଆବଲା ଅଇଲା, “ଆମେ ଜଦି ସରଗର୍ ପର୍ମେସରର୍ ଟାନେଅନି ବଲି କଇବୁ ବଇଲେ, ସେନ୍ତାର୍ ଆଲେ ତମେ ଜଅନ୍ ଜନ୍ଟା କଇଲା ସେଟା କାଇକେ ବିସବାସ୍ କରାସ୍ ନାଇ ? ବଲିକରି ଜିସୁ ଆମ୍ଭକେ କଇସି । ୩୨ ମାତର୍ ଲକ୍ମନର୍ଟାନେଅନି ବଲି କଇବାକେ ଆମ୍ଭକେ ଡର୍ ଲାଗ୍ଲାନି । କାଇକେ ବଇଲେ ଜଅନ୍ ଗଟେକ୍ ବବିସତ୍ବକ୍ତା ବଲି ସେମନ୍ ସବୁଲକ୍ ବିସବାସ୍ କଲାଇନି ।” ୩୩ ସେଟାରପାଇ ସେମନ୍ ଆମେ ନାଜାନୁ । ବଲି ଜିସୁକେ କଇଲା । ତାରପଟେ ଜିସୁ ସେମନ୍ତକେ କଇଲା, “ଏନ୍ତି ବଇଲେ ମୁଇ ମିସା କନ୍ ଅଦିକାରେ ଏସବୁ କାମ୍ କଲିନି, ସେଟା ତମ୍ଭକେ ନ କଇ ।”

\* ୧୧:୨୩ ୧୧:୨୩ ମାତିଉ ୧୭:୨୦; ୧ମ କରନ୍ଥୟ ୧୩:୨    \* ୧୧:୨୫ ୧୧:୨୫ ମାତିଉ ୭:୧୪, ୧୫    \* ୧୧:୨୭ ୧୧:୨୭ କେତକ୍ ପୁରନା ଲେକାଇ ଏ ପଦ୍ ନାଇ

# ୧୨

ଅଙ୍ଗୁର ଚାସ୍ ଆରି ଆଦିବାଗ୍ କରବା ଚାସିମନ୍  
(ମାତିଉ ୨୧:୩୩-୪୭; ଲୁକ୍ ୨୦:୯-୧୯)

୧ ତାରପତେ ଜିସୁ ଲକ୍ମନକେ ବୁଜାଇବାକେ କେତେଟା କାତାନି କଇବାର୍ ଦାରଲା । ପରତୁମ୍ କାତାନି ଅଇଲାନି, ଗଟେକ୍ ଲକ୍ ଗଟେକ୍ ଅଙ୍ଗୁରବାଡ଼ ତିଆରକରି, ତାର୍ ଚାରିବେଡ଼ତି ବାଡ଼ ବୁନଲା, ଆରି ଅଙ୍ଗୁର ପିଲବାକେ ଗଟେକ୍ କୁଣ୍ଡ ତିଆରକଲା । ବାଡ଼ ଜାଗ୍‌ବାକେ ଗଟେକ୍ ଚାଙ୍ଗ୍ ତିଆରକଲା । ଚାସ୍ କରବା ଲକ୍ମନକେ ବାଡ଼ ଆଦିବାଗ୍ କରବାକେ ଦେଇକରି, ସେ ଗଟେକ୍ ବିନ୍ ଦେସେ ଉଟିଗଲା । ୨ ତାରପତେ ଅଙ୍ଗୁର ତଲବା ବେଲା ଆଇଲାକେ, ସାଉକାର୍ ତାର୍ ଗଟେକ୍ ଗତିଦାଙ୍ଗ୍‌ତାକେ ଅଙ୍ଗୁରପଲର୍ ବାଗ୍ ବାଟା ପାଇବାକେ ଚାସିମନ୍‌ରଲଗେ ପାଟାଇଲା । ୩ ମାତର୍ ଚାସି ଲକ୍ମନ୍, ସାଉକାର୍ ପାଟାଇଲା ଗତିଦାଙ୍ଗ୍‌ତାକେ ଦାରିକରି ମାରିପାକାଇଲା ଆରି କାଇଟା ନ ଦେଇ ଚୁଟା ଆତେ ପାଟାଇଦେଲା । ୪ ସାଉକାର୍ ତାର୍ ଆରିଗଟେକ୍ ଗତି ଦାଙ୍ଗ୍‌ତାକେ ଚାସିମନ୍‌ର୍ ଲଗେ ପାଟାଇଲା । ଚାସି ଲକ୍ମନ୍ ସେ ଗତିଦାଙ୍ଗ୍‌ତାକେ ମିସା ମୁଣ୍ଡ ପୂର୍ତେ ମାର୍‌ଲା ଆରି ଇଜଡ଼ ଜିକ୍‌ଲା । ୫ ସାଉକାର୍ ଆରି ଗଟେକ୍ ଗତିଦାଙ୍ଗ୍‌ତାକେ ପାଟାଇଲା ଜେ, ଚାସିଲକ୍ମନ୍ ତାକେ ମର୍ତେ ମାରିଦେଲା । ତାରପତେ ସାଉକାର୍ ଆରି ଗାଦି ଗତିଦାଙ୍ଗ୍‌ତାମନ୍‌କେ ପାଟାଇଲା ଜେ କେତେଟା ଗତିଦାଙ୍ଗ୍‌ତାମନ୍‌କେ ମାର୍‌ଲା ଆରି କେତେଟାକେ ମର୍ତେ ମାରିପାକାଇଲା । ୬ ଏବେ ସାଉକାର୍ ଲଗେ ଗଟେକ୍ ଲକ୍‌ସେ ରଇଲା, ତାର୍ ନିଜର୍ ଆଲାଦର୍ ପିଲା । ମର୍ ପିଲାକେ ଚାସିଲକ୍ମନ୍ ନାମ୍‌ବାଇ ଆକା ଆରି ମର୍ ବାଗ୍ ପାଟାଇଦେବାଇ । ବଲି ବାବିକରି ସେ ସାରାସାରି ତାର୍ ପିଲାକେ ଚାସିମନ୍‌ର୍ ଲଗେ ପାଟାଇଲା । ୭ ମାତର୍ ଚାସିମନ୍ ନିଜର୍ ନିଜର୍ ବିଡ଼ରେ କାତା ଅଇଲା, “ଏ ଲକ୍ ତା ଆମର୍ ସାଉକାର୍ ଗଟେକ୍ ବଲି ପିଲା, ଆସା ଆମେ ଆକେ ମର୍ତେ ମାର୍‌ଲେ ଏ ବାଡ଼ ଆମର୍ ଅଇଜାଇସି ।” ୮ ଆରି ଚାସିମନ୍ ସାଉକାର୍ ପିଲାକେ ଦାରିକରି ମର୍ତେ ମାରି ଅଙ୍ଗୁର ବାଡ଼ର୍ ସେପାଟେ ପିଙ୍ଗିଦେଲା ।

୯ ଏ କାତାନି କଇସାରାଇଲା ପତେ, ଜିସୁ ସେମନ୍‌କେ ପାଟାର୍‌ଲା, “ଏନ୍ତି ବଇଲେ ଅଙ୍ଗୁର ବାଡ଼ର୍ ସାଉକାର୍ କାଇଟା କରସି ? ସେ ଆସିକରି ଚାସିମନ୍‌କେ ମର୍ତେ ମାର୍‌ସି । ଆରି ଅଙ୍ଗୁର ବାଡ଼ ବିନ୍ ଲକ୍ମନକେ ଆଦିବାଗ୍ କରବାକେ ଦେଇସି ।

୧୦ “ଗର୍ ବାନ୍‌ବା ଲକ୍ମନ୍ ଜନ୍ ପାକ୍‌ନା ନଏଁ ବଲି ଚାଡ଼ଲାଇ,  
ସେ ପାକ୍‌ନା ମୁକିଆ ପାକ୍‌ନା ଅଇଲା ବଲିକରି  
ତମେ ପର୍ମେସରର୍ ବଇତେଇ ପଡ଼ାସ୍ ନାଇ କି ?”

୧୧ ଏ ବିସଇ ମାପରୁ କରିଆଟେ,  
ଏଟା ଆମର୍ ପାଇ କାବାଅଇଜିବା ବିସଇ ।

୧୨ ତେଇ ଜିଉଦି ଲକ୍ମର୍ ମୁକିଆ ପୁଜାରିମନ୍ ଜିସୁକେ ବାନ୍‌ନେବାକେ ବାଟ୍ କଜ୍‌ଲା । କାଇକେବଇଲେ ଜିସୁ ଆମର୍ ବିରଦେ ଏ କାତାନି କଇଲାଇନି ବଲିକରି ସେମନ୍ ଜାନିରଇଲା । ମାତର୍ ଲକ୍ମନ୍ ଆମ୍‌କେ କାଇ କାଇଟା କରବାଇ । ବଲିକରି ଡରି, ତାକେ ଚାଡ଼ିକରି ଉଟିଗଲା ।

ସିସ୍ତୁମାଙ୍ଗୁମନ୍ ବାନ୍‌ବା ବିସଇ ନେଇ ସିକିଆ  
(ମାତିଉ ୨୨:୧୫-୨୨; ଲୁକ୍ ୨୦:୨୦-୨୭)

୧୩ ତାରପତେ ଜିସୁକେ ତାର୍ କାତାଇ ବୁଲ୍ ଦାରବାକେ ଜିଉଦି ନେତାମନ୍ କେତେଟା ପାରୁସି ଦଲର୍ ଲକ୍ମନକେ ଆରି ଏରଦ୍ ରାଜାର୍ କେତେଟା ଲକ୍ମନକେ ତାର୍ ଲଗେ ପାଟାଇଲା । ୧୪ ସେମନ୍ ଜିସୁର୍ ଲଗେ ଆସିକରି, “ଏ ଗୁରୁ ତମେ ସଡ଼

କାତା କଇଲାସନି ଆରି କାକେ ମିସା ନ ଡରାସ, ସବୁ ଲକ୍ଷ୍ୟମାନଙ୍କେ ସମାନ୍ ଇସାବେ ଦେକ୍‌ଲାସନି ବଲି ଆମେ ଜାନିଆରୁ । କାଇକେବଇଲେ ତମେ ଲକ୍ଷ୍ୟମାନର୍ ଇସାବେ ନାଇ, ମାତର୍ ସତ୍ ବାବେ ସିକାଇଲାସନି । ଏବେ ଆମ୍ଭକେ କୁଆ, ରମିଅ ରାଜାକେ ସିସୁତୁ ଦେବାଟା ନିୟମ୍ କି ନାଇ ?”

୧୫ “ଆମେ ସିସୁତୁ ବାନ୍ଧୁ କି ନାଇ ?” ଜିସୁ ସେମାନର୍ ମନ୍‌ବିତ୍‌ରର୍ କୁଟ୍ କାତା ବୁଜିକରି ସେମାନଙ୍କେ କଇଲା, “କାଇକେ ତମେ ମକେ ପାନ୍ଦେ ପାଇବାକେ ଚେଷ୍ଟା କଲାସନି ? ରମିୟ ସରକାରର୍ ଗଟେକ୍ ଅଦ୍‌ଲି ତାବୁ ମର୍ ଲଗେ ଆନା, ମୁଇ ସେଟା ଦେକ୍‌ବି ।” ୧୬ ସେମନ୍ ଗଟେକ୍ ଅଦ୍‌ଲି ତାବୁ ଆନ୍‌ଲାକେ ଜିସୁ ପାଚାରଲା, “ଏ ତାବୁ ଉପରେ କାର୍ ମୁରତି ଆରି ନାଉଁ ଲେକା ଅଇଆଚେ ?” ସେମନ୍ କଇଲା, “ରମିୟ ରାଜାର୍ ମୁରତି ଆରି ତାର୍ ନାଉଁ ଲେକା ଅଇଲାଆଚେ ।”

୧୭ ଜିସୁ କଇଲା, “ଏକ୍ତି ବଇଲେ ଜନ୍‌ଟା ରମିୟ ରାଜାର୍, ସେଟା ରମିୟ ରାଜାକେ ଆରି ଜନ୍‌ଟା ପରମେସରର୍, ସେଟା ପରମେସର୍କେ ଦିଆସ୍ ।” ଏ କାତା ସୁନିକରି ସେମନ୍ କାବା ଅଇଗାଲା ।

ମଲାଟାନେଅନି ଉଟ୍‌ବା ବିସଇ  
(ମାତିଉ ୨୨:୨୩-୩୩; ଲୁକ୍ ୨୦:୨୭-୪୦)

୧୮ \*ତାର୍‌ପତେ ମଲାଟାନେଅନି ଉଟ୍‌ବା ବିସଇ, ବିସ୍‌ବାସ୍ ନ କର୍‌ବା ସାଦୁକ୍‌ ଦଲର୍ ଲକ୍ଷ୍ୟମନ୍ ଜିସୁର୍ ଲଗେ ଆସିକରି ଏ ପରସନ୍ ପାଚାରଲା । ୧୯ “ଏ ଗୁରୁ, ଜଦି ଗଟେକ୍ ଲକ୍ ବିବାଅଇକରି ପିଲାଜିଲା ନ ଅଇତେ ମରିଜାଇସି ବଇଲେ, ତାର୍ ବାଇ ସେ ମାଇଜିକେ ବିବାଅଇ ପିଲାଜିଲା ପାଇବାର୍ ଆଚେ । ଏକ୍ତି କଲେ ମରିଗାଲା ବାଇର୍ ପାଇ ସେ ପିଲାଟକିମନ୍ ତାର୍ ନାଉଁ ଦାର୍‌ବାଇ ବଲି ମସା ଆମର୍‌ପାଇ ନିଅମ୍ ଲେକିଦେଲା ଆଚେ । ୨୦ ଏକ୍ତି ସାତ୍ ବାଇ ରଇଲା, ସବୁଟାନେଅନି ବଡ୍ ବାଇ ବିବା ଅଇଲା । ମାତର୍ ପିଲାଟକି ନ ଅଇତେ ମରିଗାଲା । ୨୧ ସେଟାର୍‌ପାଇ ତାର୍ ପଚର୍ ବାଇ ସେ ମାଇଜିକେ ସଙ୍ଗଇଲା । ସେ ମିସା ପିଲାଟକି ନଇତେ ମରିଗାଲା । ତାର୍‌ପଚର୍ ବାଇ ମିସା ବିବା ଅଇ ପିଲାଟକି ନଇତେ ମରିଗାଲା । ୨୨ ସାତ୍‌ବାଇ ଜାକ ସେ ମାଇଜିକେ ଗଟେକ୍ ଲକ୍‌ର ପତେ ଗଟେକ୍ ଲକ୍ ବିବା ଅଇରଇଲା । ସାରାସାରି ସାତ୍ ବାଇ ଜାକ ପିଲାଟକି ନ ଅଇତେ ମରିଗାଲା । ତାର୍‌ପତେ ସେ ମାଇଜି ମିସା ମରିଗାଲା । ୨୩ ସାତ୍‌ବାଇ ଜାକ ତାକେ ବିବା ଅଇରଇଲା, ତେବେ ମରିକରି ଉଟ୍‌ଲା ବେଲେ, ସେ କାର୍ ମାଇଜି ଅଇସି ? ସାତ୍‌ବାଇ ଜାକ ତାକେ ବିବା ଅଇରଇଲା ।”

୨୪ ଜିସୁ ସେମାନଙ୍କେ କଇଲା, “ଦରମ୍ ସାସ୍‌ତରେ ପରମେସରର୍ କାଇଟା ଲେକା ଅଇଲା ଆଚେ ସେ ବିସଇ, ଆରି ତାର୍ ବପୁର୍ ବିସଇ ତମେ ନାଜାନି କରି ବୁଲ୍ ବାବ୍‌ଲାସନି । ୨୫ ଜେତେବେଲେ ଲକ୍‌ମନ୍ ମରିକରି ଆରି ତରେକ୍ ଉଟ୍‌ବାଇ, ସେବେଲେ ମୁନ୍‌ସ୍‌ପିଲାମନ୍ ବିବା ନ ଅଅଡ୍, କି ମାଇଜି ଟକିମନ୍‌କେ ବିବା ଅଇବାକେ ନ ଦେଅଡ୍ । ସେମନ୍ ସବୁଲକ୍ ସରଗର୍ ଦୁଡ୍‌ପାରା ଅଇବାଇ । ୨୬ ମଲାଟାନେଅନି ଉଟ୍‌ବା ବିସଇ ମସା ଲେକ୍‌ଲା ବଇଟାନେ ପଡାସ୍ ନାଇ କି ? ପରମେସର୍ ଜଇଲାଗବା ବୁଟାଇ ମସାକେ ଦେକାଇରଇଲାକେ, ‘ମୁଇ ଅବ୍‌ରାଆମର୍, ଇସାକର୍ ଆରି ଜାକୁବର୍ ପରମେସର୍ ।’ ବଲି କଇଲାଟା, ଲେକା ଅଇଲାଆଚେ । ମାତର୍ ଏ ଲକ୍‌ମନ୍ ସବୁ ମରିଗାଲା ଆଚଡ୍ । ୨୭ ପରମେସର୍ ମଲାଲକ୍‌ମାନର୍ ମାପୁରୁ ନର୍ । ସେ ଜିବନ୍ ରଇଲା ଲକ୍‌ମାନର୍ ମାପୁରୁ । ଏ ବିସଇ ତମେ ବେସି ବୁଲ୍ ବୁଜିଲାସନି ।” ବଲି କଇଲା ।

\* ୧୨:୧୮ ୧୨:୧୮ ପେରିଡ୍ ୨୩:୮



କନ୍ ଆଦେସ୍ ବେସି ମୁକିଅ  
(ମାତିଉ ୨୨:୩୪-୪୦; ଲୁକ୍ ୧୦:୨୫-୨୮)

୨୮ ଜିସୁ ଆରି ସାଦୁକି ଦଲର ଲକ୍ମନ୍ ଦଦା ପେଲା ଅଇବାବେଲେ ଗଟେକ୍ ନିୟମ୍ ସିକାଉ ତାର୍ ଲଗେ ଆଇଲା । ଜିସୁ ଲକ୍ମନ୍ ପର୍ସନ୍ ଉତର୍ ନିମାନ୍ସଙ୍ଗ୍ କଇବାଟା ସୁନିକରି, ତାକେ ପାଚାରଲା, “କନ୍ ଆଦେସ୍ ସବୁର୍ଟାନେଅନି ଅଦିକ୍ ମୁକିଅ ?”

୨୯ ଜିସୁ କଇଲା, “ସବୁର୍ଟାନେଅନି ପର୍ତୁମର୍ ମୁକିଅ ଆଦେସ୍ ଅଇଲାନ୍, ସୁନା ଏ ଇସ୍ରାଏଲର୍ ଲକ୍ମନ୍ ମାପୁରୁ ଆମର୍ ପର୍ମେସର୍ ଗଟେକ୍ସେ ମାପୁରୁ । ୩୦ ତମେ ତମର୍ ପୁରାପୁରୁନ୍ ମନ୍ ସଙ୍ଗ୍, ପୁରାପୁରୁନ୍ ଆତ୍ମା ସଙ୍ଗ୍, ପୁରାପୁରୁନ୍ ଚିନ୍ତା ସଙ୍ଗ୍ ଆରି ପୁରାପୁରୁନ୍ ବପୁସଙ୍ଗ୍ ତାକେ ଆଲାଦ୍ କର୍ବାର୍ ଆଚେ । ୩୧ ଆରି ପଚର୍ ମୁକିଅ ଆଦେସ୍ ଅଇଲାନ୍, ତମେ ନିଜ୍ଜକେ ଆଲାଦ୍ କଲାପାରା ପତିସାର୍ ଲକ୍ମକେ ମିସା ଆଲାଦ୍ କରା । ଏ ଦୁଇଟା ଆଦେସ୍ ଗଠିକରି ଆରି କାଇ ମିସା ମୁକିଅ ଆଦେସ୍ ନାଇ” ବଲି କଇଲା ।

୩୨ ଏ କାତା ସୁନି ସେ ଲକ୍ ଜିସୁକେ କଇଲା, “ଏ ଗୁରୁ, ପର୍ମେସର୍ ଗଟେକ୍ ସେ, ତାକେ ଚାଡିଦେଲେ ଆରି କେ ମିସା ନାଇ । ଏ କାତା ତମେ ଚିକ୍ ବାବେ କଇଆଚାସ୍ । ୩୩ ପର୍ମେସର୍କେ ସବୁ ମନ୍ଦେଇକରି ସବୁ ଚିନ୍ତା ଦେଇକରି ଆରି ସବୁ ବପୁ ଦେଇ ଆଲାଦ୍ କର୍ବାର୍ ଆଚେ ଆରି ନିଜ୍ଜକେ ଆଲାଦ୍ କଲା ପାରା ବିନ୍ ଲକ୍ମକେ ମିସା ଆଲାଦ୍ କର୍ବାର୍ ଆଚେ ବଲିକରି ତମେ କଇଲା କାତା ଚିକ୍ ସେ । ଆମେ ପର୍ମେସର୍କେ ଜେତେକ୍ ଅମ୍ କଲେ ମିସା ଆରି ଜେତେକ୍ କାଇଟା ପୁଜଲେ ମିସା, ଏ ଦୁଇଟା ଆଦେସ୍ ବେସି ମୁକିଅ ।” ବଲି କଇଲା । ୩୪ \*ସେଲକ୍ ବେସି ବୁଦି ସଙ୍ଗ୍ ଉତର୍ ଦେଲା ଆଚେ ବଲି ଜିସୁ ଦେକି, ତାକେ କଇଲା, “ତୁଇ ପର୍ମେସର୍ ରାଇଜେ ପୁର୍ବା ଲଗେସେ ଆଚୁସ୍ ।” ତାପଚେ ଆରି କେ ମିସା ଜିସୁକେ ପର୍ସନ୍ ପାଚାର୍ବାକେ ସାଆସ୍ କରି ନାପାରଲା ।

ଜିସୁ ଦାଉଦର୍ ପିଲା  
(ମାତିଉ ୨୨:୪୧-୪୬; ଲୁକ୍ ୨୦:୪୧-୪୪)

୩୫ ଜିସୁ ଜିଉଦିମନ୍ ରୁଣ୍ଡିବା ଗରର୍ ତାଣ୍ଡେ ସିକିଆ ଦେବାବେଲେ ଲକ୍ମନ୍କେ ପାଚାରଲା, “ପର୍ମେସର୍ ବାଟିକରି ପାଟାଇଲା ରାଜା ଦାଉଦର୍ ନାତିତିତି ବଲିକରି ନିୟମ୍ ସିକାଇଦେବା ଲକ୍ମନ୍ କେନ୍ତ୍ର କଇଲାଇନି ?” ୩୬ ଦାଉଦ୍ ସୁକଲ୍ ଆତ୍ମା ଅନି ଏନ୍ତି କଇଲା, ପର୍ମେସର୍ ମର୍ ମାପୁରୁକେ କଇଲା, “ମୁଇ ତର୍ ସର୍ତ୍ତୁମନ୍କେ ତର୍ ପାଦ୍ ତଲେ ନ ଆନ୍ଦା ଜାକ ତୁଇ ମର୍ ଉଜାଆତ୍ବାଟେ ବସି ର ।”

୩୭ “ଜଦି ଦାଉଦ୍ ରାଜା ନିଜେ ମାପୁରୁବଲି କଇରଇଲା ବଇଲେ ପର୍ମେସର୍ ବାଟିକରି ପାଟାଇରଇବା ମସିଅ କେନ୍ତ୍ର ଦାଉଦର୍ ପିଲା ଅଇସି ?” ତେଇ ରଇଲା ବେସି ଲକ୍ମନ୍ ସାର୍ଦା ସଙ୍ଗ୍ ଏ କାତା ସୁନ୍ଲା ।

ଜିସୁ ନିୟମ୍ ସିକାଉମନ୍କେ ଜାଗ୍ବର୍ତ୍ କରାଇଲା  
(ମାତିଉ ୨୩:୩୬; ଲୁକ୍ ୨୦:୪୫-୪୬)

୩୮ ଜିସୁ ଆରି କେତେଟା ବିସଇ ସିକାଇଦେବା ବେଲେ କଇଲା, “ତମେ ନିୟମ୍ ସିକାଇଦେବା ଲକ୍ମନ୍ ପାରା ଚଲାଟଲ୍ତି ନ ଅଇକରି ଜାଗ୍ବର୍ତ୍ ସଙ୍ଗ୍ ରୁଆ । ସେମନ୍ ସନ୍ମାନ୍ ପାଇବାକେ ବେସି ତେଙ୍ଗ୍ ପଟିଆ ପିନ୍ଧିକରି ଏନେ ତେନେ ବୁଲ୍ବାଇ । ଆଟେ ବାଟେ ଲକ୍ମନ୍ ଗଟାନେଅନି ଜୁଆର୍ ପାଇକରି ସନ୍ମାନ୍ ପାଇବାକେ

\* ୧୨:୩୪ ୧୨:୩୪ ଲୁକ୍ ୧୦:୨୫-୨୮

ମନ୍ କରୁବାଇ । ୩୯ ଜିଉଦିମନର ପାରତନା ଗରେ ମୁକିଅ ଜାଗାଇ, ବଜିଟାନର୍ ମୁକିଅ ଜାଗାଇ ବସ୍‌ବାକେ ମନ୍ କରୁବାଇ । ୪୦ ଆରି ସେମନ୍ ରାଣ୍ଡି ମାଇଜିମନ୍‌କେ ନାଡାଇକରି ସେମନର୍ ଦନ୍‌ସପତି ଜୁରି ନେବାଇ । ସେମନ୍ ନିମାନ୍ ଲକ୍ ବଲିକରି ଦେକାଇଅଇବାକେ ବେସି ପର୍ ପାରତନା କରୁବାଇ । ଏଣ୍ଡି ଲକ୍‌ମନ୍‌କେ ପର୍‌ମେସର୍ ବିନ୍ ଲକ୍‌ମନର୍‌ଟାନେଅନି ବେସି ବଡ଼ ଡଣ୍ଡ ଦେଇସି ।”

ଗଟେକ୍ ରାଣ୍ଡିମାଇଜିର୍ ଦାନ୍ ଦେବାଟା

(ଲୁକ୍ ୨୧:୧-୪)

୪୧ ଜିସୁ ମନ୍‌ର ବିତ୍‌ରେ ଜାଇକରି ଚାନ୍‌ଦେବା ପେଡିଲଗେ ବସିକରି ଲକ୍‌ମନ୍ ପର୍‌ମେସର୍‌କେ କେଣ୍ଡି ଚାନ୍‌ ଦେଲାଜନି ବଲି ଦେକ୍‌ତେରଇଲା । ସାଉକାର୍ ଲକ୍‌ମନ୍ ଲଟେକ୍ ଲଟେକ୍ ତାରୁ ଦେବାଟା ଦେକ୍‌ଲା । ୪୨ ସାରାସାରି ଗଟେକ୍ ଗରିବ୍ ରାଣ୍ଡି ମାଇଜି ଦାନ୍ ଦେବା ପେଡିଲଗେ ଆସିକରି ଦୁଇଟା ସାନ୍ ତାମା କାସୁ ପୁରାଇଦେଲା । ସେ ଦୁଇଟା ତାରୁ ଦାମ୍ ଗଟେକ୍ ଟାଙ୍ଗାଇ ଅନି ମିସା ଉନା । ୪୩ ତାର୍‌ପଟେ ଜିସୁ ତାର୍ ସିସମନ୍‌କେ ଲଗେ ଡାକି କଇଲା, “ମୁଇ ତମ୍‌କେ ସଡ଼ କାତା କଇଲିନି, ଏ ସବୁ ସାଉକାର୍ ଲକ୍‌ମନ୍ ଦେଲା ତାରୁତେଇଅନି, ଏ ଅର୍କିଡ଼ ରାଣ୍ଡି ମାଇଜି ଅଦିକ୍ ଦେଲାଆଟେ । ୪୪ କାଇକେବଇଲେ ସବୁ ଲକ୍‌ମନ୍ ସେମନ୍‌କେ ଦରକାର୍ ଅଇକରି ଅଗଲ୍‌ଲା ତାରୁ ଦେଲାଆଟଡ଼ । ମାତର୍ ଏ ଗରିବ୍ ରାଣ୍ଡି ମାଇଜି, ସେ ବର୍‌ବାପାଇ ଜେଡ଼କି ତାରୁ ରଇଲା, ସେ ସବୁ ଦେଲାଆଟେ” ବଲିକରି କଇଲା ।

## ୧୩

ପାରତନା ଗର୍ ବାଙ୍ଗାଇବା ବିସଇନେଇ ଜିସୁ କଇଲା କାତା

(ମାତିଉ ୨୪:୧-୨; ଲୁକ୍ ୨୧:୫-୬)

୧ ଜିସୁ ଜିଉଦିମନର୍ ପାରତନା ଗରେଅନି ବାରଇକରି ଜିବାବେଲେ ତାର୍ ଗଟେକ୍ ସିସ୍ ତାକେ କଇଲା, “ଏ ଗୁରୁ ଏଦେ ଦେକା ! ବଡ଼ ବଡ଼ ପାକ୍‌ନାଇ ମନ୍‌ର କେତେକ୍ ସୁନ୍‌ର୍ ଅଇ ତିଆର୍ ଅଇଲାଆଟେ !”

୨ ଜିସୁ ତାକେ କଇଲା, “ତୁଇ ଏ ବଡ଼ ବଡ଼ ପାକ୍‌ନାଇ ତିଆର୍ ଅଇଲା ପର୍‌ମେସରର୍ ଗର୍ ଦେକ୍‌ଲୁସନି ? ଏ ସବୁ ଗର୍ ନସ୍‌ଟ ଅଇଜାଇସି । ସବୁ ପାକ୍‌ନାମନ୍ ତୁଲିକରି ମାଟିତେଇ ଏନେତେନେ ଅଇଜାଇସି, ଗଟେକ୍ ପାକ୍‌ନା ଆରି ଗଟେକ୍ ପାକ୍‌ନାର୍ ଉପ୍‌ରେ ନ ରଏ ।”

ଜିସୁ ସାରାସାରି ଦିନେ ଗର୍‌ବା ବିସଇ କଇଲା

(ମାତିଉ ୨୪:୩-୧୪; ଲୁକ୍ ୨୧:୭-୧୯)

୩ ତାର୍‌ପଟେ ଜିସୁ ପର୍‌ମେସରର୍ ଗରର୍ ମୁଆଟେ ରଇଲା ଜିଡ଼ ନାଉର୍ ଗର୍‌ମନ୍ ରଇବା ଡଙ୍ଗରେ ବସିରଇଲା । ସେବେଲା ପିତର୍, ଜାକୁବ୍, ଜଅନ୍ ଆରି ଆନ୍‌ରିୟ୍, କେ ନ ରଇଲାବେଲେ ତେଇ ଆସିକରି ତାକେ ପାଚାର୍‌ଲାଇ । ୪ “ଏ ସବୁ ଗର୍‌ନା କେବେ ଅଇସି ଆରି ସବୁ ଅଇବା ଚିନ୍‌ମନ୍ କାଇଟା, ଆମ୍‌କେ କଇଦେ ।” ବଲି କଇଲାଇ ।

୫ ଜିସୁ ସେମନ୍‌କେ କଇଲା, “ତମେ ଜାଗରଡ଼ ଅଇକରି ରୁଆ, ତମ୍‌କେ କେ ମିସା ନ ନାଡାଅଡ଼ । ୬ କାଇକେବଇଲେ ବେସି ଲକ୍‌ମନ୍ ମର୍ ନାଉଁ ଦାରି, ସେମନ୍ କିରିସଟ ବଲି ବେସି ଲକ୍‌ମନ୍‌କେ ବୁଲ୍‌କାଇବାଇ । ୭ ମାତର୍ ଜେଡେବେଲେ ତମେ ଜୁଇଦର୍ ବିସଇ ନଇଲେ ଜୁଇଦ୍ ଇତି ଅଇସି ନଇଲେ ସିତି ଅଇସି ବଲିକରି ଲକ୍‌ମନ୍ କଇବାଟା ସୁନ୍‌ଲେ, କିଲ୍‌ବିଲ୍ ନ ଉଆ । ଏ ସବୁ ଗର୍‌ନା ଅଇସି, ମାତର୍ ସେଦାପ୍‌ରେ ଆକା ଜୁଗ୍ ସେସ୍ ନଏ । ୮ କାଇକେବଇଲେ, ଗଟେକ୍ ଦେସର୍ ଲକ୍‌ମନ୍ ଆରି ଗଟେକ୍

ଦେସର ଲକ୍ଷ୍ମୀମନ୍ଦିର ବିରଦେ ଜୁଇଦ୍ କରୁବାର । ଗଟେକ୍ ରାଇଜ୍ ଆରିଗଟେକ୍ ରାଇଜ୍ ବିରଦେ ଉଟ୍ଟବା । ବେସି ଜାଗାଇ ଦରତନି ଚୁଲ୍‌ଚୁଲ୍‌ସି, ଆରି ବେସି ଜାଗାଇ ମରୁତି ଅଇସି । ଏସବୁ ଗଟ୍‌ନା ଗଟେକ୍ ପିଲା ଜନମ୍ ଅଇବା ଆଗୁଟୁ ଆଇବା ଦୁକାସୁକା ପାରା ଅଇସି ।”

୯ “ଏନ୍ତି ସବୁ ଅଇବା ବେଲା ତମେ ଜାଗରତ୍ ରୁଆ । ଲକ୍ଷ୍ମୀମନ୍ଦିର ତମ୍‌କେ ବାନ୍ଧିକରି ବିଚାର କରୁବା ଲକ୍ଷ୍ମୀମନ୍ଦିର ସର୍ପିଦେବାଇ । ସେମନ୍ ନିଆଇ କରୁବା ଜାଗାଇ ତମ୍‌କେ ମାରିପାକାଇବାଇ । ତମେ ମର୍ ସିସ୍ ଅଇରଇବା ଲାଗି, ସାସନ୍ କରୁବା ଲକ୍ଷ୍ମୀମନ୍ଦିରାନେ ଆରି ରାଜାମନ୍ଦିର ମୁଆଟେ ଟିଆ କରାଇବାଇ । ତମେ ମର୍‌ଟାନେ ବିସ୍‌ବାସ୍ କଲା ବିସଇ ତେଇ ସାକି ଦେଇସା । ୧୦ ଏ ସବୁ ଗଟ୍‌ନା ଅଇଜିବା ଆଗୁଟୁ, ସବୁ ଦେସର ଲକ୍ଷ୍ମୀମନ୍ଦିର ଲଗେ, ଏ ନିମାନ୍ କବର କେଟ୍‌ବାର୍ ଆଟେ । ୧୧ ସେମନ୍ ତମ୍‌କେ ବାନ୍ଧିକରି ବିଚାର କରୁବା ବେଲେ ତେଇ କାଇଟା କଇବୁ ବଲିକରି ଆଗୁଟୁ ଚିନ୍ତା କରାନାଇ । ତମେ କାଇଟା କଇବାର୍ ଆଟେ, ସେ କାତା ପର୍‌ମେସର୍ ତମ୍‌କେ ସମାନ୍ ବେଲାଇ ଦେଇସି । କାଇକେବଇଲେ ସେ ବେଲାଇ ତମେ ନିଜେ ନ କୁଆସ୍ ମାତର୍ ସୁକଲ୍‌ଆଡ଼ମା ତମ୍‌ଟାନେଅନି କାତା କଇସି । ୧୨ ବାଇ ବାଇକେ ମରାଇବାତେଇ ସର୍ପିଦେବାଇ ଆରି ବାବା ପିଲାକେ ମରାଇବାତେଇ ସର୍ପି ଦେବାଇ ଆରି ପିଲାଟକିମନ୍ ତାକର୍ ମାଆ ବାବା ବିରୁଦେ ଉଟିକରି ସେମନ୍‌କେ ମରାଇବାକେ ସର୍ପିଦେବାଇ । ୧୩ \*ତମେ ମର୍ ସିସ୍ ଅଇରଇଲାଟ୍ ଲାଗି ସବୁ ଲକ୍ଷ୍ମୀମନ୍ଦିର ତମ୍‌କେ ଗିନ୍ କରୁବାର । ମାତର୍ ଜେ ସାରାସାରି ଜାକ ମୁରୁତି କରି ରଇସି, ସେ ରକିଆପାଇସି ।”

ଜିସୁ ନାସ୍ କରୁବା ଅସୁକଲ୍ ବିସଇ କଇଲା

(ମାତିଉ ୨୪:୧୫-୨୮; ଲୁକ୍ ୨୧:୨୦-୨୪)

୧୪ “ମାତର୍ ତମେ ଜେଡେବେଲା କେ ମନ୍ ନ କରୁବାଟା ଆରି ନାସ୍ ଅଇବା ଦିନ୍‌ସୁ ଜନ୍‌ଟାକି ସୁକଲ୍ ଜାଗାଇ ସଙ୍ଗଇବାର୍ ନର୍, ସେ ଜାଗାଇ ସଙ୍ଗଇବାଟା ଦେକ୍‌ଲେ, ତମେ ସେ ଜାଗାଇଅନି ପାଲାଇବାର୍ ଆଟେ । ଏ ବିସଇ ପଡ଼ୁବା ଲକ୍ଷ୍ମୀମନ୍, ତମେ ଏ କାତା ବୁଜା । ସେବେଲେ ଜନ୍ ଲକ୍ଷ୍ମୀମନ୍ ଜିଉଦା ରାଇଜେ ରଇବାଇ, ସେମନ୍ ତଙ୍ଗ୍‌ରେ ପାଲାଅଡ଼ । ୧୫ \* ଜଦି କେ ଗରର୍ ଚାଉନି ଉପ୍‌ରେ ରଇସିବଇଲେ, ସେ ଗର୍ ବିଡ଼ରେ ତାର୍ କାଇମିସା ଦିନ୍‌ସୁ ଆନ୍‌ବି ବଲିକରି ନ ଜାଅ । ୧୬ ଜଦି କେ ଚାସ୍ ରଇବା ପଦାଇ ରଇସି, ସେ ତାର୍ ଚାଦର୍ ଆନ୍‌ବାକେ ଗରେ ବାଉଡି ନ ଜାଅ । ୧୭ ଗାଗଡେ ରଇଲା ମାଇଜିମନ୍‌ପାଇ ଆରି ଦୁଦ୍ କୁଆଇବା ମାଇଜିମନ୍‌ ପାଇ ସେବେଲେ ପାଲାଇବାକେ ବେସି କସ୍‌ଟ ଅଇସି । ୧୮ ଏ ସବୁ ଗଟ୍‌ନା ସିଡ଼ ଦିନେ ନ ଅଇବାକେ ପାର୍‌ତନା କରା । ୧୯ \*କାଇକେବଇଲେ ପର୍‌ମେସର୍ ଏ ଦୁନିଆ ଡିଆରକଲା ଦିନେଅନି ଆଜିକେ ଜାକ ସେନ୍ତାରି ଦୁକ୍ କସ୍‌ଟ ଅଏନାଇ ଆରି ପତେ କେବେମିସା ନ ଅଏ । ସେନ୍ତି ବେସି ଦୁକ୍ କସ୍‌ଟର୍ ଗଟ୍‌ନା ସେ ଦିନ୍‌ମନ୍‌କେ ଅଇସି । ୨୦ ଜଦି ପର୍‌ମେସର୍ ଅପର୍‌ବଲ୍ ଦୁକ୍‌ର୍ ଦିନ୍‌ମନ୍ ଉନା ନ କରି ରଇଲେ, ତେବେ ଦୁନିଆର୍ କେ ମିସା ରକିଆ ନ ପାଇକରି ମରି ଜିବାର୍ ଅଇତା । ମାତର୍ ସେ ଜନ୍ ଲକ୍ଷ୍ମୀମନ୍‌କେ ବାଟିଆଟେ ସେ ଲକ୍ଷ୍ମୀମନ୍‌ପାଇ ସେ ଦୁକ୍‌ର୍ ଦିନ୍‌ମନ୍ ଉନା କଲାଆଟେ ।”

୨୧ ସେବେଲେ କେ ଜଦି ତମ୍‌କେ ଇତି କିରିସ୍‌ଟ ଆଟେ । ନଇଲେ ତେଇ ସେ ଆଟେ । ବଲି କଇସି, ତାକେ ବିସ୍‌ବାସ୍ କରା ନାଇ । ୨୨ ସେଦିନ୍‌ମନ୍‌କେ ମୁଇଆକା କିରିସ୍‌ଟ । ବଲିକରି ମିଡ଼ କଇବା ବବିସଡ଼ କଇବାଲକ୍, ବିନ୍ ବିନ୍ ରକାମର୍ ତିନ୍ ଆରି

କାବା ଅଇଜିବା କାମ୍ପାନ ଦେକାଇବାଇ । ପର୍ଯ୍ୟେସର୍ ବାଟ୍ଲା ଲକ୍ମାନ ତମ୍ବକେ ମିସା ନାଡାଇବାକେ ଚେସ୍ଟା କର୍ବାଇ । ୨୩ ସେଦିନମନ୍ଦକେ କାଇ କାଇଟା ଅଇସି ସେ ବିସଇନେଇ ତମେ ଜାଗ୍‌ରଡ୍ ଅଇ ରୁଆ । ସେଟାର୍‌ପାଇ, ଦେକା ସେ ବେଲା ନ ଆଇବା ଆଗ୍‌ତୁ ମୁଇ ତମ୍ବକେ ଜାନାଇଦେଲିନି ।

ଜିସୁ ଆରି ତରେକ୍ ଆଇବା ବିସଇ  
(ମାଡିଉ ୨୪:୨୯-୩୧; ଲୁକ୍ ୨୧:୨୫-୨୮)

୨୪ \*ସେଦିନମନ୍ଦକେ, ସେ ଦୁକର୍ ଗଟ୍‌ନା ଅଇଲାପଚେ  
ବେଲ୍ ଉଜଲ୍ ନ ଦେଇକରି ଆନ୍ଦାର୍ ଅଇଜାଇସି ଆରି ଜନ୍ ମିସା ଉଜଲ୍ ନ ଦେଏ ।  
୨୫ \*ତାରାମନ୍ ବାଦ୍‌ଲେଅନି ଅଦର୍‌ବାଇ ଆରି ବାଦ୍‌ଲେ ଉଜଲ୍ ରଇବାଟାମନ୍ଦକେ  
ପର୍ଯ୍ୟେସର୍ ଆଲାଇଦେଇସି ।

୨୬ \*“ସେବେଲା ନରପିଲା ମୁଇ, ବେସି ବପୁତେଇ ଆରି ଡାକ୍‌ପୁଟା ସଙ୍ଗ୍  
ବାଦଲ୍‌ଟାନେ ଆଇବାଟା ଲକ୍ମାନ ଦେକ୍‌ବାଇ । ୨୭ ସେବେଲା ମର୍ ଦୁର୍‌ମନ୍ଦକେ  
ପାଟାଇକରି ଦୁନିଆ ସାରଲାଅନି ଆରି ସରଗ୍ ଚିଡ୍‌ଲା ତେଇଅନି ପର୍ଯ୍ୟେସର୍  
ବାଟ୍‌ଲା ଲକ୍ମାନକେ ଚୁଲିଆଇବି ।”

ଡୁମ୍‌ରି ଗଟ୍‌ର ସିକିଆ  
(ମାଡିଉ ୨୪:୩୨-୩୫; ଲୁକ୍ ୨୧:୨୯-୩୩)

୨୮ “ଏବେ ଡୁମ୍‌ରି ଗଟ୍‌ର ଉଦାଅରନ୍ ଅନି ଏ ବିସଇ ସିକା । ଜେଡେବେଲେ ତାର୍  
କେନ୍ଦିଅନି ପତର୍ ପାଲୁଆନି କରି, କାଟାପଡ୍‌ତିଆ ଡିସ୍‌ଲେ, କାରାଦିନ୍ କେଟ୍‌ଲା  
ବଲିକରି ତମ୍ବକେ କେ ନ କଇଲେମିସା ଜାନାସ୍ । ୨୯ ସେକ୍ରିସେ ତମେ ଏ ସବୁ ଗଟ୍‌ନା  
ଦେକ୍‌ବାବେଲେ, ମୁଇ ଆଇବା ଦିନ୍ କେଟ୍‌ଲା, ବଲିକରି ଜାନାସ୍ । ୩୦ ମୁଇ ତମ୍ବକେ  
ସଡ୍‌କାତା କଇଲିନି, ଏ ଗଟ୍‌ନା ନ ଅଇବାଜାକ, ଏବେ ରଇଲା ଲକ୍ମାନ ନ ମରଡ୍  
। ୩୧ ବାଦଲ୍ ଆରି ତେଇ ଉଜଲ୍ ଅଇ ରଇବାଟାମନ୍, ଦୁନିଆଇ ଆରି ତେଇରଇବା  
ସବୁ ଦିନ୍‌ସୁ ନାସ୍ ଅଇବା ସାରାସାରି ଦିନ୍ ଆଇସି, ମାତର୍ ମର୍ ବାକିଅ କେବେ ମିସା  
ନ ସାରେ ।”

ଜିସୁ ଆଇବା କବର୍ କେ ନାଜାନଡ୍  
(ମାଡିଉ ୨୪:୩୬-୪୪)

୩୨ \*“ମାତର୍ ସବୁ ଗଟ୍‌ନା କେବେ ଆରି ଜେଡେବେଲା ଅଇସି ବଲିକରି କେ  
ମିସା ନାଜାନଡ୍ । ସରଗର୍ ଦୁଡ୍ କି ସଡ୍ ମାପ୍‌ରୁର୍ ପିଲା ମୁଇ ମିସା ନାଜାନି ।  
ମର୍ ବାବା ପର୍ଯ୍ୟେସର୍ ଗଟ୍‌କ୍ ଲକ୍‌ସେ ଜାନିଆଚେ । ୩୩ ସେ ଦିନ୍ କି ବେଲା  
କେବେ ଆଇସି, ସେଟା ତମେ କେ ନାଜାନାସ୍ । ସେଟାର୍‌ପାଇ ତମେ ଜାଗ୍‌ରଡ୍ ଅଇ  
ଡିଆର୍‌ଅଇ ରୁଆ । ୩୪ \*ମୁଇ ଆଇବା ଦିନ୍, ଏକ୍ରି ଗଟ୍‌କ୍ ଲକ୍ ତାର୍ ଗର୍ ଚାଡି  
ବିନ୍ ଦେସେ ଜିବା ବିସଇ ସମାନ୍ କରିଅଇସି । ସେ ନିଜର୍ ଗତିଦାଙ୍ଗ୍‌ତାମନ୍ଦକେ  
ଡାକିକରି ସେମନ୍ କାଇ କାଇ କାମ୍ କର୍‌ବାର୍‌ଆଚେ, ସେ ସବୁ ବିସଇ ସେମନ୍ଦକେ  
କଇଲା । ବାଟ୍ ଡିଆଗଡି ଜାଗ୍‌ବା ଗତିଦାଙ୍ଗ୍‌ତାକେ ଡାକିକରି ସେ ବାଉଡି ଆଇବା  
ଜାକ ଜାଗିକରି ରଇବାକେ କଇକରି ଗାଲା । ୩୫ ତମେମିସା ଜାଗୁଆଲର୍ ପାରା  
ଜାଗ୍‌ରଡ୍ ଅଇ ରୁଆ । କାଇକେବଇଲେ ସାଉକାର୍ ସଞ୍ଜବେଲା, କି ମଜାରାଡି, କି  
କୁକ୍‌ତାଡାକେ କି ସାକ୍‌ଲିଆ ଆଇସି ସେଟା ତମେ ନାଜାନାସ୍ । ୩୬ ଜଦି ସେ ଅଟାଡ୍  
ଆସିକରି ଦେକ୍‌ଲାବେଲେ, ତମେ ଇସ୍‌ରାଇଲର୍ ଲକ୍ମାନର୍ ପାରା ରଇବାଟା ସେ  
ଦେକ୍‌ବାର୍‌ନାଇ । ୩୭ ମୁଇ ତମ୍ବକେ କାଇଟା କଇଲିନି, ସେ ବିସଇସେ ସବୁ ଲକ୍‌କେ

\* ୧୩:୨୪ ୧୩:୨୪ ପର୍ଯ୍ୟାୟତ ୬:୧୨ \* ୧୩:୨୫ ୧୩:୨୫ ପର୍ଯ୍ୟାୟତ ୬:୧୩ \* ୧୩:୨୬ ୧୩:୨୬  
ପର୍ଯ୍ୟାୟତ ୧:୭ \* ୧୩:୩୨ ୧୩:୩୨ ମାଡିଉ ୨୪:୩୬ \* ୧୩:୩୫ ୧୩:୩୫ ଲୁକ୍ ୧୨:୩୬-୩୮

କଲଲିନି । ମୁଇ ଆଇବା ଦିନ୍‌ପାଇ ତିଆର୍ ଅଇକରି ସବୁବେଲା ଜାଗରତ୍ ଅଇକରି ରୁଆ ।”

### ୧୪

ଜିସୁକେ ମରାଇବାକେ ଜିଉଦି ନେତାମନର୍ ଜଜନା  
(ମାତିଉ ୨୬:୧-୫; ଲୁକ୍ ୨୨:୧-୨; ଜଅନ୍ ୧୧:୪୫-୫୩)

୧ ନିସ୍ତାର୍ ପରବ୍ ଆରି କମିର୍ ନ ମିସାଇ ରୁଟି କାଇବା ପରବ୍ ଅଇବାକେ ଆରି ଦୁଇଦିନ୍ ବାକିରଇଲା । ସେବେଲେ ମୁକିଅ ପୁଜାରିମନ୍ ଆରି ନିୟମ୍ ସିକାଉମନ୍ କେ ନାଜାନ୍‌ତେ ଜିସୁକେ କେନ୍ତ୍ର ବନ୍ଦିକରି ମରାଇଅଇସି ବଲିକରି ବୁଦି ପାଁତ୍‌ତେରଇଲା । ୨ ମାତର୍ ସେମନ୍ କଇଲା, “ପରବ୍ ଦିନ୍‌ମନ୍‌କେ ତାକେ ବନ୍ଦିକରି ନଏ । କାଇକେବଇଲେ ଲକ୍‌ମନ୍ ଗଣ୍ଟିଗଲ୍ କର୍‌ବାଇ ।”

ଗଟେକ୍ ମାଇଜି ଜିସୁକେ ନାମ୍‌ଲା  
(ମାତିଉ ୨୬:୬-୧୩; ଜଅନ୍ ୧୨:୧-୮)

୩ \*ଜିସୁ ବେଡ୍‌ନିଆ ଗତେ ଆଗତୁ ବଡ୍ ରଗ୍ ଅଇଲା ସିମନର୍ ଗରେ କାଇବାକେ ବସ୍‌ଲାବେଲେ, ଗଟେକ୍ ମାଇଜି କାଁରେ ବେସି ଦାମ୍ ଦେବା ବାସ୍‌ନା ଟିକନ୍ ଆନିକରି କାଁଟର୍ ଗାଲା ବାଙ୍ଗାଇ, ଜିସୁର୍ ମୁଣ୍ଡେ ରକଇଦେଲା । ୪ ମାତର୍ ତେଇ ରଇବା କେତେକ୍ ଲକ୍‌ମନ୍ ରିସାଅଇ ନିଜର୍ ନିଜର୍ ବିତ୍‌ରେ କାତା ଅଇଲା, “ଏ ଟିକନ୍ କାଇକେ ବେକାର୍ ବେକାର୍ ନସ୍‌ଟ କରି ପାକାଇଲାନି ? ୫ ଏଟା ବରସେକର୍ କାମାଇଲାତେଇଅନି ଅଦିକ୍ ତାବୁକେ ବିକି ଗରିବ୍ ଲକ୍‌ମନ୍‌କେ ଦେବାର୍ ଅଇତା ।” ବଲିକରି ସେମନ୍ ସେ ମାଇଜିକେ ବେସି କଇପାକାଇଲା ।

୬ ମାତର୍ ଜିସୁ ସେମନ୍‌କେ କଇଲା, “ସେ ମାଇଜିକେ ଚାଡିଦିଆସ୍, କାଇକେ ତାକେ ଲାଗିକରି କସ୍‌ଟ ଦେଲାସିନି ? ସେ ମର୍‌ପାଇ ନିକ କାମ୍ କଲାଆତେ । ୭ କାଇକେବଇଲେ, ଗରିବ୍ ଲକ୍‌ମନ୍ ସବୁବେଲା ତମ୍‌ସଙ୍ଗ୍ ଆଚଡ୍ । ତମେ ଜେତେବେଲା ମନ୍‌କଲେ, ସେତେବେଲା ସେମନ୍‌କେ ସାଇଜି କରିପାରାସ୍ । ମାତର୍ ମୁଇ ଆରି ବେସିଦିନ୍ ତମର୍ ସଙ୍ଗ୍ ନ ରଇ । ୮ ଏ ମାଇଜି ଜେଡ୍‌କି ପାର୍‌ଲା, ସେଡ୍‌କି କଲାଆତେ । ସେ ମର୍ ମଲା ଗାଗଡ୍ ମସ୍‌ନେ ତପ୍‌ବା ଆଗତୁ ଟିକନ୍ ଲାଗାଇଦେଲା ଆତେ । ୯ ମୁଇ ତମ୍‌କେ ସଡ୍‌କାତା କଇଲିନି, ଗୁଲାଇ ଜଗତେ ଜନ୍ ଜାଗାଇ ମିସା ମାପ୍‌ରୁର୍ ନିକ କବର୍ ଜାନାଇଅଇସି । ଏ ମାଇଜି ଜାଇଟା କଲାଆତେ, ତାକେ ଏତାଇକରି ସେଟା ମିସା କଇବାଇ ।”

ଜିସୁକେ ସଡ୍‌ରୁମନ୍‌କେ ସର୍‌ପି ଦେବାକେ ଜିଉଦାର୍ ରାଜି  
(ମାତିଉ ୨୬:୧୭-୨୫; ଲୁକ୍ ୨୨:୩-୬)

୧୦ ତାର୍‌ପତେ ଜିସୁର୍ ବାର୍‌ଟା ସିମନର୍ ବିତ୍‌ରେଅନି ଇସ୍କାରିୟଡ୍ ଜିଉଦା ନାଉର୍ ଗଟେକ୍ ସିସ୍ ଜିସୁକେ ମୁକିଅ ପୁଜାରିମନ୍ ଆତେ ଦାରାଇଦେବାକେ ରାଜିଅଇକରି ସେମନର୍ ଲଗେ ଗାଲା । ୧୧ ସେ ମୁକିଅ ପୁଜାରିମନ୍ ଜିଉଦାର୍ କାତା ସୁନିକରି ବେସି ସାର୍‌ଦା ଅଇଗାଲା । ଏ କାମ୍ କଲେ ସେମନ୍ ଇସ୍କାରିୟଡ୍ ଜିଉଦାକେ ତାବୁ ଦେବୁ ବଲିକରି ପର୍‌ମାନ୍ କରି କଇଲା । ସେଟାର୍‌ପାଇ ଇସ୍କାରିୟଡ୍ ଜିଉଦା ଜିସୁକେ ମୁକିଅ ପୁଜାରିମନ୍‌କେ ଦାରାଇ ଦେବାକେ ବେଲା କଜିଲା ।

ରକିଆ ପାଇବା ପରବର୍ ବଜି  
(ମାତିଉ ୨୬:୧୭-୨୫; ଲୁକ୍ ୨୨:୬-୧୪; ୨୧-୨୩; ଜଅନ୍ ୧୩:୨୧-୩୦)

\* ୧୪:୩ ୧୪:୩ ଲୁକ୍ ୭:୩୭,୩୮

୧୨ କମିଟି ନ ମିସାଇକରି ରୁଟି ତିଆରିକରି କାଇବା ବଜିର୍ ପରବର୍ ପର୍ତୁତୁମ୍ ଦିନେ, ରକିଆ ପାଇବା ପରବେ ମେଣ୍ଡାପିଲା ପୁଜୁବାଇ । ସେଦିନେ ଜିସୁର୍ ସିସ୍ମାନ୍ ତାକେ “ତର୍ପାଇ ରକିଆ ପାଇବା ପରବର୍ ବଜି ସବୁ ଟିକ୍ କରବାକେ ଆମେ କନ୍ ଜାଗାଇ ଜିବୁ ବଲିକରି ତୁଇ ମନ୍ କଲୁସନ୍ ?”

୧୩ ସେଟାର୍ପାଇ ଜିସୁ ତାର୍ ଦୁଇଟା ସିସ୍ମାନ୍‌କେ ଡାକିକରି କଇଲା ତମେ ଗତେ ଜା । ତେଇ ଗଟେକ୍ ବଡ଼ଟା ଆଣ୍ଡିତେଇ ପାନି ନେବା ଲକ୍‌କେ ଦେକ୍‌ସା । ତମେ ତାର୍ ପଟେ ପଟେ ଜା । ୧୪ ସେ ପାନିନେବା ଲକ୍ ଗଟେକ୍ ଗରେ ପୁରୁସି । ତମେ ମିସା ସେ ଗର୍ ବିଡ଼ରେ ପୁରିକରି ସେ ଗରର୍ ସାଉକାରକେ କୁଆ, “ଆମର୍ ଗୁରୁ ପାଟାର୍‌ଲାନି, ମୁଇ ମର୍ ସିସ୍ମାନର୍ ସଙ୍ଗ୍ ରକିଆ ପାଇବା ପରବର୍ ବଜି କର୍ବା ବାକ୍‌ରା କନ୍ତି ଆଟେ ? ୧୫ ସେ ଗରର୍ ସାଉକାର୍ ତମ୍‌କେ ଗର୍ ଉପ୍‌ରେ ରଇବା ନିମାନ୍ ସଜାଇଅଇରଇଲା ଗଟେକ୍ ବଡ଼ଟା ବାକ୍‌ରା ଦେକାଇଦେଇସି । ତେଇ ଆମର୍ପାଇ କାଇବା କାଦି ତିଆରିକରା ।” ବଲି ପାଟାଇଲା ।

୧୬ ତାର୍ ପଟେ ଦୁଇଟା ସିସ୍ମାନ୍ ସେ ଗରେ ଗାଲାଇ । ତେଇ ଜିସୁ ସେମନ୍‌କେ ଜେନ୍ତି କଇରଇଲା, ସବୁ ସେନ୍ତି ଦେକ୍‌ଲାଇ । ସେଟାର୍ପାଇ ସେମନ୍ ତେଇ ନିସ୍‌ତାର୍ ପରବର୍ ବଜି ତିଆରିକଲାଇ ।

୧୭ ସଙ୍ଗ୍ ଅଇଲାକେ ଜିସୁ ତାର୍ ସିସ୍ମାନ୍‌କେ ଡାକିନେଇ ତେଇ କେଟ୍‌ଲା । ୧୮ ସେମନ୍ ବସି କାଇବାବେଲେ ଜିସୁ କଇଲା, “ମୁଇ ତମ୍‌କେ ସଡ଼କାତା କଇଲିନି, ଏବେ ତମର୍ ବିଡ଼ରେଅନି ଗଟେକ୍ ଲକ୍ ଜେକି ଆମର୍ ସଙ୍ଗ୍ କାଇଲାନି, ସେ ମକେ ସଡ଼ୁମନ୍‌କେ ଦାରାଇଦେଇସି ।” ୧୯ ଏ କାତା ସୁନିକରି ସିସ୍ମାନ୍ ବେସି ମନ୍‌ଦୁକ୍ ଅଇଲାଇ । ସବୁଲକ୍ ଗଟେକ୍ ଗଟେକ୍ ଅଇକରି ଜିସୁକେ ସେଲକ୍ ମୁଇ କି ? ବଲିକରି ପାଟାର୍‌ଲାଇ । ୨୦ ଜିସୁ ସେମନ୍‌କେ କଇଲା, “ତମର୍ ବାର ଲକ୍ ବିଡ଼ରେଅନି ଜନ୍ ଲକ୍ ମର୍‌ସଙ୍ଗ୍ ଗିନାତେଇ ରୁଟି ଚବାଲିଆଟେ, ସେ ଆକା ।” ୨୧ “ମର୍ ବିସଇ ପର୍‌ମେସର୍‌ର ସାସ୍‌ତରେ କେନ୍ତି ଲେକା ଅଇଲାଆଟେ, ସେନ୍ତିସେ ସବୁ ଅଇଲାନି, ସେଟା ସଡ଼ସେ, ମାତର୍ ଜାର୍‌ଟାନେଅନି ନର୍‌ପିଲା ମୁଇ ସଡ଼ୁମନ୍‌ର ଆତେ ଦାରାଇଅଇବି, ସେ ବେସି ବଡ଼ ଡଣ୍ ପାଇବାଲକ୍ ଆରି ସେ ଜନମ୍ ନ ଅଇରଇଲେ ନିକ ଅଇତା ।”

ଜିସୁ ତାର୍ ସିସ୍ମାନର୍ ସଙ୍ଗ୍ ବଜି କାଇବା ବିସଇ

(ମାତିଉ ୨୬:୨୬-୩୦; ଲୁକ୍ ୨୨:୧୪-୨୦; ୧ମ କରନ୍ତିୟ ୧୧:୨୩-୨୫)

୨୨ ସିସ୍ମାନ୍ କାଇବାକେ ବସ୍‌ଲାବେଲେ, ଜିସୁ ରୁଟିଦାରିକରି ପର୍‌ମେସର୍‌କେ ଜୁଆରିକଲା ଆରି ସେଟା ବାଙ୍ଗାଇ ସେମନ୍‌କେ ଦେଇକରି କଇଲା, “ନିଆ ଏଟା ମର୍ ଗାଗଡ଼ ।”

୨୩ ତାର୍‌ପଟେ ଅଙ୍ଗୁର୍ ରସ୍ ଦାରି ପର୍‌ମେସର୍‌କେ ଜୁଆର୍ କରି ସବୁ ଲକ୍‌କେ କାଇବାକେ ଦେଲାଜେ ସେମନ୍ କାଇଲାଇ । ୨୪ ଆରି ସେ ତାର୍ ସିସ୍ମାନ୍‌କେ କଇଲା, ଏଟା ଅଇଲାନି ବେସି ଲକ୍‌ପାଇ ଜରାଇଲା ମର୍ ବନି । ଏ ବନି ସଙ୍ଗ୍ ପର୍‌ମେସର୍ ଲକ୍‌ମନ୍‌ର ସଙ୍ଗ୍ ରାଜିନାମା କଲାନି । ୨୫ ମୁଇ ତମ୍‌କେ ସଡ଼ କାତା କଇଲିନି, “ମୁଇ ପର୍‌ମେସର୍‌ର ରାଇଜେ ନୁଆ ଅଙ୍ଗୁର୍ ରସ୍ କାଇବା ଦିନ୍ ନ ଆଇବାଜାକ, ଏଟା ଆରି କେବେ ମିସା ନ କାଇ ।”

୨୬ ସବୁ ସିସ୍ମାନ୍ ମିସିକରି ପର୍‌ମେସର୍‌କେ ଦନିଅବାଦର୍ ଗିଡ଼ ଗାଇ ଗାଇ କରି ଜିଡ଼ ନାଉର୍ ପର୍‌ବତେ ଗାଲାଇ ।

ଜିସୁର୍ ବବିସଡ଼ କାତା

(ମାତିଉ ୨୬:୩୧-୩୫; ଲୁକ୍ ୨୨:୩୧-୩୪; ଜଅନ୍ ୧୩:୩୬-୩୮)

୨୭ ସେବେଲେ ଜିସୁ ସିସ୍ତମନକେ କଇଲା, “ତମେ ସବୁଲକ୍ ମକେ ଚାଡ଼ିକରି ଉଡ଼ିଜାଇସା । ସେଟା ପର୍ଯ୍ୟନ୍ତ ସାସ୍ତରେ ଏନ୍ତି ଲେକାଅଇଲାଆତେ,  
“ମୁଇ ମେଣ୍ଟା ଗଉଡ଼କେ ମରାଇବି ।

ତେଇର୍ ମେଣ୍ଟାମନ୍ ଚିନ୍ତତର୍ ଅଇଜିବାଇ ।”

୨୮ \*<sup>୨୮</sup> “ମାତର୍ ମୁଇ ମଲାଟାନେଅନି ଆରିତରେକ୍ ଉର୍ଲାପତେ, ତମେ ଗାଲିଲି ଦେସେ ଜିବା ଆଗୁଡୁ, ମୁଇ ତମର୍ ଆଗୁଡୁ ଆଗୁଡୁ ଗାଲିଲି ରାଇଜେ ଜିବି ।”

୨୯ ମାତର୍ ପିତର୍ ଜିସୁକେ କଇଲା, “ସବୁ ସିସ୍ତମନ୍ ତମକେ ଚାଡ଼ିକରି ଗାଲେ ମିସା ମୁଇ ତମକେ କେବେ ନ ଚାଡ଼ି ।”

୩୦ ଜିସୁ ତାକେ କଇଲା, “ମୁଇ ତକେ ସତ୍‌କାତା କଇଲିନି, ଆଜି ରାତି ଦୁଇତର୍ କୁକ୍‌ତା ଡାକ୍‌ବା ଆଗୁଡୁ, ତୁଇ ମକେ ତିନତର୍ ଚିନିନାଇ ବଲିକରି କଇସୁ ।”

୩୧ ଏ କାତା ସୁନି ପିତର୍ ଜିସୁକେ ଆରିତରେକ୍ ଡାକ୍‌ସଙ୍ଗ୍ କଇଲା, “ମୁଇ ତମର୍ ସଙ୍ଗ୍ ମର୍ବାର୍ ଆଲେ ମିସା କେବେ ତମକେ ନାଜାନି ବଲି ନ କଇ ।” ଆରି ବାକି ସିସ୍ତମନ୍ ମିସା ସେନ୍ତିସେ କଇଲାଇ ।

ଗେଡ଼ସିମନି ବାଡେ ଜିସୁର୍ ପାର୍ତନା

(ମାତିଉ ୨୭:୩୬-୪୬; ଲୁକ୍ ୨୨:୩୯-୪୬)

୩୨ ତାର୍‌ପତେ ଜିସୁ ତାର୍ ସିସ୍ତମନର୍ ସଙ୍ଗ୍ ଗେଡ଼ସିମନି ନାଉର୍ ଗଟେକ୍ ଜାଗାଇ ଆଇଲାଇ । ତେଇ ଜିସୁ ସିସ୍ତମନକେ କଇଲା, “ମୁଇ ପାର୍ତନା କର୍ବାବେଲେ ତମେ ଇତି ବସିରୁଆ ।”<sup>୩୩</sup> ପିତର୍, ଜଅନ୍ ଆରି ଜାକୁବ୍‌କେ ତାର୍ ସଙ୍ଗ୍ ମିସ୍ତେ ଡାକିନେଲା । ସେ ଦୁକ୍‌ଅଇ କିଲିବିଲ୍ ଅଇବାର୍ ବସଲା ।<sup>୩୪</sup> ଆରି ଜିସୁ, ପିତର୍, ଜାକୁବ୍ ଆରି ଜଅନ୍‌କେ କଇଲା, “ମର୍ ମନେ ବେସି ଦୁକ୍ ଅଇଗାଲା ଆତେ । ଜିବନ୍ ଚିଡ଼ିଗାଲା ପାରା ଲାଗଲାନି । ତମେ ଇତି ବସିରଇ ଜାଗିରୁଆ ।”

୩୫ ଜିସୁ ତାକ୍‌ଟାନେଅନି କଣ୍ଟେକ୍ ଦୁରିକେ ଇଣ୍ଡିଜାଇ ଉମତାଡ଼ିଅଇ ବୁର୍‌ଅଦ୍‌ରିକରି ପର୍ଯ୍ୟନ୍ତକେ ଏନ୍ତି ପାର୍ତନା କଲା, “ଏନ୍ତି କରିଅଇସି ବଇଲେ, ଏ କସ୍‌ଟର୍ ବେଲା ମକେ ନ ଆସ ।<sup>୩୬</sup> ଏ ମର୍ ବାବା ତୁଇ ମନକଲୁସ୍ ବଇଲେ କାଇ କାମ୍ ମିସା କରିପାରୁସ୍ । ସେଟାର୍‌ପାଇ ଏ ଦୁକ୍ କସ୍‌ଟର୍ ମୁତା ମର୍‌ଟାନେଅନି ଦାରି ଜା । ମାତର୍ ମର୍ ମନ୍ କଲା ଇସାବେ ନ କରି ତମର୍ ମନ୍ କଲା ଇସାବେ କରା” ବଲି ପାର୍ତନା କଲା ।

୩୭ ତାର୍‌ପତେ ଜିସୁ ତାର୍ ସିସ୍ତମନର୍ ଲଗେ ବାଉଡ଼ି ଆଇଲାଜେ, ସେମନ୍ ସଇରଇବାଟା ଦେକ୍‌ଲା । ସେ ପିତର୍‌କେ କଇଲା, “ ସିମନ୍ ପିତର୍, ତମେ ସଇଦେଲାସ୍‌ନି କି ? ଗଟେକ୍ ଗଟା ମିସା ତେଡା ରଇ ଜାଗି ନାପାରୁଲାସ୍‌ନି ?<sup>୩୮</sup> ତମେ ଜେନ୍ତିକି ପରିକାର୍ ପାନ୍ଦେ ନ ଅଦର୍‌ବାପାଇ ଜାଗି ରଇକରି ପାର୍ତନା କରା । ମନ୍ କର୍‌ବି ବଲି ମନ୍ କଲାନି ମାତର୍ ଗାଗଡ଼ ନିର୍‌ଲାନି ।”

୩୯ ଜିସୁ ଆରିତରେକ୍ ଜାଇକରି ଆଗୁଡୁର୍ ପାରା କଇକରି ପାର୍ତନା କଲା ।<sup>୪୦</sup> ତାର୍‌ପତେ ସେ ସିସ୍ତମନର୍ ଲଗେ ଆରି ତରେକ୍ ବାଉଡ଼ି ଆସି ଦେକ୍‌ଲା । ସେମନ୍ ଆରିତରେକ୍ ସଇଦେଇରଇଲାଇ । ସେମନ୍ ଆକିତେଇ ଗୁନ୍ ଡାବି ଆଇତେରଇଲାଜେ ସେମନ୍ ଜିସୁକେ କାଇବଲି ମିସା କଇବାକେ ଜାନି ନାପାରୁଲାଇ ।

୪୧ ଏନ୍ତି ତିନତର୍ ପାର୍ତନା କରି ସାରାଇଲାପତେ ଜିସୁ ସିସ୍ତମନର୍‌ଲଗେ ଆରିତରେକ୍ ବାଉଡ଼ି ଆଇଲା ଆରି ସେମନ୍‌କେ କଇଲା, “ଏବେଜାକ ତମେ ପୁଣ୍ଡିକରି ସଇଦେଇ ଆଚାସ୍ ? ଏଡ଼କି ଅଇସିବେ, ଏବେ ନର୍‌ପିଲା ମକେ, ପାପି ଲକ୍‌ମନର୍

ଆତେ ଦାରାଇଦେବା ବେଲା ଆସି କେଟ୍‌ଲା । ୪୨ ଉଟା ଆମେ ଜୁବେ । ଏଦେ ଦେକା ! ମକେ ସତ୍‌ରୁମନ୍‌କେ ଦାରାଇ ଦେବା ଲକ୍ ଆଇଲାଆତେ ।” ବଲି କଇଲା ।

ଜିସୁ ବନ୍ଦି ଅଇଲା

(ମାତୃକ ୨୭:୪୭-୫୨; ଲୁକ୍ ୨୨:୪୭-୫୩; ଜଅନ୍ ୧୮:୩-୧୨)

୪୩ ସେ ଦାପ୍‌ରେ ଜିସୁ ଏ କାତା କଇବାବେଲା, ବାର୍‌ଟା ସିସ୍‌ମାନର୍ ବିତ୍‌ରେଅନି ଗଟେକ୍ ଲକ୍ ଜେକି ଇସ୍କାରିୟତ୍ ଜିଉଦା ଆସି କେଟ୍‌ଲା । ଆରି ତାର୍ ସଙ୍ଗ୍ ବେସି ଲକ୍‌ମନ୍ ରଇଲା । ସେ ଲକ୍‌ମନ୍ ଆତେ କାଣ୍ଟା ଆରି ଟେଙ୍ଗ୍ ଦାରିରଇଲା । ସେ ଲକ୍‌ମନ୍‌କେ ମୁକିଅ ପୁଜାରିମନ୍, ନିୟମ୍ ସିକାଇବା ଲକ୍‌ମନ୍ ଆରି ମୁକିଅ ଜିଉଦି ନେତାମନ୍, ପାଟାଇ ରଇଲା । ୪୪ ସତ୍‌ରୁମନ୍ ଆତେ ଦାରାଇଦେବା ଇସ୍କାରିୟତ୍ ଜିଉଦା ଜିସୁକେ ଦେକାଇଦେବାକେ ଏନ୍ତି ଗଟେକ୍ ଚିନ୍ କଇରଇଲା, “ମୁଇ ଜନ୍ ଲକ୍‌କେ ରୁମ୍‌ବି, ସେ ଆକା ଜିସୁ । ତମେ ତାକେ ବନ୍ଦିକରି ଜାଗରତ୍ ସଙ୍ଗ୍ ଦୁରିକେ ଦାରିଜାଇସା ।”

୪୫ ସେମନ୍ ତେଇ ଆସିକରି କେଟ୍‌ଲା ଦାପ୍‌ରେ, ଇସ୍କାରିୟତ୍ ଜିଉଦା ଜିସୁର୍ ଲଗେ ଜାଇକରି “ଏ ଗୁରୁ, ଜୁଆର୍ !” ବଲିକରି ରୁମ୍‌ଲା । ୪୬ ସେବେଲା ସେଲକ୍‌ମନ୍ ଜିସୁକେ ଦାରି ବନ୍ଦିକରି ନେବାବେଲେ, ୪୭ ସେ ଲଗେ ଚିଆଅଇରଇଲା ଜିସୁର୍ ଗଟେକ୍ ସିସ୍ ତାର୍ କାଣ୍ଟା ବେଟି ମୁକିଅ ପୁଜାରିର୍ ଗତି ଦାଙ୍ଗ୍‌ତାର୍ ଉଜା କାନ୍ କାଟିଦେଲା । ୪୮ ଜିସୁ ସେ ଲକ୍‌ମନ୍‌କେ ପାଟାରିଲା, “ମୁଇ କାଇ ଗଟେକ୍ ଅପ୍‌ରାଦି ଲକ୍ କି, ତମେ କାଣ୍ଟା ଆରି ଟେଙ୍ଗ୍‌ମନ୍ ଦାରି ମକେ ନେବାର୍ ଆସିଆଗାସ୍ ? ୪୯ ସବୁ ଦିନ୍ ମୁଇ ପାର୍‌ତନା ଗର୍‌ମନ୍‌କେ ସିକାଇଦେବା ବେଲେ ମୁଇ ତମର୍ ସଙ୍ଗ୍ ରଇଲି । ମାତର୍ ସେବେଲେ ମକେ ଦାରାସ୍‌ନାଇ । ମାତର୍ ପର୍‌ମେସରର୍ ସାସ୍‌ତରେ ଜେନ୍ତି ଲେକାଅଇରଇଲା ସେଟା ସବୁ ସତ୍ ଅଇବାକେସେ ଏନ୍ତି ଅଇଲାଆତେ ।”

୫୦ ସେବେଲା ଜିସୁର୍ ସିସ୍‌ମନ୍ ତାକେ ଚାଡି ଉଟିପାଲାଇଲା ।

୫୧ ମାତର୍ ସେବେଲା ଗଟେକ୍ ଦାଙ୍ଗ୍‌ତା ଅବ୍‌କା ପାତଲ୍ ଚାଦର୍ ଡାବିଅଇ ଜିସୁର୍ ପଟେ ପଟେ ଜାଇତେରଇଲା । ଲକ୍‌ମନ୍ ତାକେ ବନ୍ଦିକରବାକେ ଟେସ୍‌ଟା କଲାକେ ୫୨ ସେ ଦାଙ୍ଗ୍‌ତା ପାତଲ୍ ଚାଦର୍ ଚାଡିକରି ହୁମ୍‌ଣ୍ଟା ଉଟିପାଲାଇଲା ।

ଜିଉଦିମନ୍‌ର ବଡ଼ସବା ତେଇ ଜିସୁର୍ ବିଚାର୍

(ମାତୃକ ୨୭:୫୭-୬୮; ଲୁକ୍ ୨୨:୫୪-୫୫, ୬୩-୬୧; ଜଅନ୍ ୧୮:୧୩-୧୪)

୫୩ ପଟେ ସେ ଲକ୍‌ମନ୍ ଜିସୁକେ ସବୁର୍‌ଟାନେଅନି ବଡ଼ପୁଜାରିତେଇ ଦାରିଗାଲା । ମୁକିଅ ପୁଜାରିମନ୍, ପାର୍‌ଚିନମନ୍ ଆରି ନିୟମ୍ ଗୁରୁମନ୍ ସବୁଲକ୍ ଗଟେକ୍ ତେଇ ରୁଣ୍ଡିଲା । ୫୪ ପିତର୍ ଜିସୁର୍ ଟାନେଅନି ଦୁରିକେ ରଇ ତାର୍ ପଟେ ପଟେ ଗାଲା ଆରି ମୁକିଅ ପୁଜାରିର୍ ଡାଣ୍ଡିବିତ୍‌ରେ ଗାଲା । ଜାଗୁଆଲ୍‌ମନ୍‌ର ସଙ୍ଗ୍ ବସିକରି ଜଇ ଟେକ୍‌ତେରଇଲା । ୫୫ ତେଇ ମୁକିଅ ପୁଜାରିମନ୍ ଆରି ବିଚାର୍ କର୍‌ବା ଜିଉଦି ନେତାମନ୍ ଜିସୁକେ ମର୍‌ବା ଡଣ୍ଡି ଦେବାକେ ତାର୍ ବିରଦେ ସାକି କଜ୍‌ତେରଇଲା । ମାତର୍ ସାକି ଦେବାକେ କେ ମିସା ମିଲ୍‌ତନାଇ । ୫୬ ବେସି ଲକ୍‌ମନ୍ ଆସିକରି ଜିସୁର୍ ବିରଦେ ମିର୍ ସାକି କଇଲା, ମାତର୍ ସେମନ୍ ସବୁଲକ୍ ବିନ୍ ବିନ୍ ରକାମର୍ କାତା କଇଲା ।

୫୭ ସାରାସାରି କେତେ ଲକ୍ ଉଟିକରି ତାର୍ ବିରଦେ ମିର୍ ସାକି ଦେଇ ଏନ୍ତି କଇଲା, ୫୮ “ଲକ୍‌ମନ୍ ତିଆରକଲା ଏ ପର୍‌ମେସରର୍ ମନ୍ଦିର୍ ମୁଇ ବାଙ୍ଗାଇ ଦେଇ, ସେଟା ତିନ୍ ଦିନ୍ ବିତ୍‌ରେ ଆରି ତିଆରକରିଦେବି, ଜନ୍‌ଟାକି ଲକ୍‌ମନ୍ ତିଆର୍ ନ କରିରଅଡ଼ ବଲି ସେ କଇବା ଏ କାତା ଆମେ ସୁନିଆରୁ ।” ୫୯ ମାତର୍, ଏନ୍ତି

☆ ୧୪:୪୯ ୧୪:୪୯ ଲୁକ୍ ୧୯:୪୭; ୨୧:୩୭ ☆ ୧୪:୫୮ ୧୪:୫୮ ଜଅନ୍ ୨:୧୯



ବଇଲେମିସା ଏ ଲକ୍ଷ୍ମୀନ କାଜ କାଜ ବିସଇ ସବୁ କଇତେରଇଲା, ସେଟା, ଗଟେକ୍ ଲକ୍ଷ୍ମୀନ କାତା ଆରି ଗଟେକ୍ ଲକ୍ଷ୍ମୀନ କାତା ସଙ୍ଗେ ନ ମିସ୍ତେରଇଲା ।

୨୦ ତାରପଟେ ସବୁଲକ୍ଷ୍ମୀନ ଆଗ୍ତୁ ବଡ଼ ପୁଜାରି ଚିଆଅଇକରି ପାଚାରଲା, “ଏ ଲକ୍ଷ୍ମୀନ ତର ବିରଦେ କେତେ କାତା କଇଲାକିନି, ସେ ବିସଇନେଇ ତକେ କାଇଟା ମିସା କଇବାର ଆଚେ କି ?”

୨୧ ମାତର ଜିସୁ ଚିମ୍ବିରା ଅଇକରି ରଇଲା, କାଇଟା ମିସା କଏନାଇ । ବଡ଼ପୁଜାରି ଜିସୁକେ ଆରି ତର ପାଚାରଲା, “ତୁଇ କାଜ ପୁଜା ପାଇବା ପର୍ମେସରର୍ ପଅ କିରିସ୍ତ କି ?”

୨୨ ଜିସୁ କଇଲା, “ଉଁ, ମୁଇ ସେ । ଆରି ନରପିଲା ମୁଇ, ପର୍ମେସରର୍ ବେସି ବପୁର୍ ଉଜା ଆଡ଼ ବାଟେ ବସିରଇଲାଟା ଆରି ସରଗର୍ ମେଗେ ଆଇବାଟା ଦେକ୍ସା ।”

୨୩ ବଡ଼ ପୁଜାରି ଏ କାତା ସୁନିକରି ବେସି ରିସାଅଇଜାଇ ତାର ନିଜର୍ ପଚିଆ ଚିରିପାକାଇଲା ଆରି ସବୁଲକ୍ଷ୍ମୀନକେ କଇଲା, “ଆମ୍ଭକେ ଆରି କାଜ ସାକି ଦରକାର ?”

୨୪ “ସେ ପର୍ମେସରର୍ ପିଲା ବଲିକରି କଇଲାଟା ତମେ ସୁନିଆଟାସ୍ । ଏବେ ତମେ କାଇଟା ବଲି ବାଦ୍ଲାସ୍ନି ?” ତେଇ ସବୁ ଲକ୍ଷ୍ମୀନ ଜିସୁକେ ଦସି କରାଇ, ତାକେ ମର୍ବା ଡଣ୍ଡ ମିଲ ବଲି କଇଲା ।

୨୫ ତେଇ ରଇଲା କେତେ ଲକ୍ଷ୍ମୀନ ତାର ଉପରେ ତୁକ୍‌ବାର୍ ଦାରଲା । କେତେଲକ୍ଷ୍ମୀନ ତାର ମୁଁ ଡାବିକରି ତାକେ ବିଦାସଙ୍ଗେ ମାରଲା । ତାକେ କିଜାଇକରି କଇଲା, “ତୁଇ ଜଦି ପର୍ମେସରର୍ କାତା କଇବା ବସିସ୍ତବକ୍ତା ବଇଲେ, ତକେ କେ ମାରଲା କ ?” ପଟେ ସନିଅମନ୍ ତାକେ ଦାରିଜାଇକରି ମାରଲା ।

ପିତର ଜିସୁକେ ନାଜାନି ବଲି କଇଲା  
(ମାତିଉ ୨୬:୨୯-୩୫; ଲୁକ୍ ୨୨:୫୭-୬୨; ଜଅନ୍ ୧୮:୧୫-୧୮, ୨୧-୨୫)

୨୬ ପିତର ମଜାତାଣ୍ଡେ ଚିଆଅଇଲାବେଲେ ବଡ଼ ପୁଜାରିର୍ ଗତି ଦାଙ୍ଗଡ଼ି ତେଇ ଆଇଲା । ୨୭ ପିତର ଜଇ ଚେକ୍‌ବାବେଲେ ତାକେ ନିମାନ୍ ଦେକିକରି କଇଲା, “ତୁଇମିସା ନାଜରିତର ଜିସୁର୍ ସଙ୍ଗେ ରଇଲୁସ୍ ।”

୨୮ ମାତର ପିତର ତାକେ କଇଲା, “ସେଟା ମୁଇ ନଇ, ମୁଇ କେବେ ମିସା ଜିସୁର୍ ସଙ୍ଗେ ରଇନାଇ, ତମେ କାଇଟା କଇଲାସ୍ନି ମୁଇ ନାଜାନି ।” ତାରପଟେ ପିତର ତାଣ୍ଡେ ପୁର୍ବା ବାଟେ ଉଟିଗାଲା ।

୨୯ ଆରି ତରେକ୍ ଗତିଦାଙ୍ଗଡ଼ି ପିତରକେ ଦେକି ତେଇ ଚିଆଅଇଲା ଲକ୍ଷ୍ମୀନକେ କଇଲା, “ଏ ଲକ୍ଷ୍ମୀନ ମିସା ଜିସୁର୍ ଦଲେଅନି ଗଟେକ୍ ଲକ୍ଷ୍ମୀନ ।” ୩୦ ମାତର ପିତର ଆରିତରେକ୍ କଇଲା, “ଏ କାତା ମୁଲ୍‌କେ ସତ୍ ନାଇ ।” ଆରି କେତେପର୍ ଗାଲା ପଟେ, ତେଇ ରଇଲା ଲକ୍ଷ୍ମୀନ “ତୁଇ ସେମନର୍ ମାନ୍ଦାଇ ରଇଲୁସ୍ ଆକା, ତୁଇ ଗଟେକ୍ ଗାଲିଲି ଅନି ଆଇଲା ଲକ୍ଷ୍ମୀନ ପାରା ତିସ୍‌ଲୁସ୍ନି ।” ବଲି କଇଲା ।

୩୧ ମାତର ପିତର ସାଇପ୍ ଦେଇ ରାନ୍ ପାକାଇ କଇଲା, “ମୁଇ ପର୍ମେସରର୍ ନାଉଁ ଦାରି ପର୍ମାନ୍ କରି କଇଲିନି, ତମେ କାର୍ କାତା କଇଲାସ୍ନି, ମୁଇ ତାକେ ମୁଲ୍‌କେ ନାଜାନି ।”

୩୨ ପିତର ଏ କାତା କଇଲା ଦାପ୍‌ରେ କୁକ୍‌ତା ଦୁଇତର୍ ଡାକ୍‌ଲା । ଜିସୁ କଇରଇବା ସବୁ କାତା ପିତର ଏତାଇଲା । ଜିସୁ କଇରଇଲା, କୁକ୍‌ତା ଦୁଇତର୍ ଡାକ୍‌ବା ଆଗ୍ତୁ ତୁଇ ମକେ ତିନ୍ ତର ନାଜାନି ବଲିକରି କଇସାରାଇରଇସୁ ବଲି । ତାରପଟେ ପିତର ବେସି ଦୁକ୍‌କରି କାନ୍ଦିବାର ଦାରଲା ।

## ୧୫

ପିଲାତର ମୁଆଟେ ଜିସୁର ବିଚାର

(ମାତୃକ ୨୭:୧-୨, ୧୧-୧୪; ଲୁକ୍ ୨୩:୧-୫; ଜଅନ୍ ୧୮:୨୮-୩୮)

୯ ସାକାଲ୍ ସାକାଲ୍ ପାରତନା ଗରର୍ ମୁକିଅ ପୁଜାରିମନ୍, ମୁକିଅ ନେତାମନ୍, ଜିଉଦି ନେତାମନ୍, ନିୟମ୍ ସିକାଇବା ଲକ୍ମନ୍ ଆରି ଜିଉଦି ଲକ୍ମନ୍‌କେ ସାସନ୍ କରବା ସବୁ ରକାମର୍ ନେତାମନ୍ ଜିସୁକେ କାଇଟା କରବାର୍ ଆଟେ ? ବଲି ଗଟେକ୍ ବଡ଼ ପଠାଦି କଲାଇ । ସେମନ୍ ତାକେ ବାନ୍ଦିକରି ସାସନ୍ କରବା ପିଲାତକେ ସରପିଦେଲାଇ । ୧୦ ପିଲାତ୍ ଜିସୁକେ ପାଟାରଲା, “ତୁଇ କାଇ ଜିଉଦି ମନର୍ ରାଜା ?” ଜିସୁ ତାକେ କଇଲା, “ତୁଇ ଜନ୍‌ଟା ପାଟାରଲୁସ୍‌ନି, ସେଟା ସତ୍‌ସେ ।” ୧୧ ମୁକିଅ ପୁଜାରିମନ୍ ଜିସୁକେ ଦସ୍ ଦେଇ କଇବାର୍ ଦାରଲାଇ । ୧୨ ସେବେଲା ପିଲାତ୍ ତାକେ ଆରିତରେକ୍ ପାଟାରଲା, “ତୁଇ କାଇକେ ଚିମ୍‌ରା ଅଇଦେଲୁସ୍ ? କାଇଟା ମିସା କଉସ୍ ନାଇ । ଦେକା ସେମନ୍ ତର ବିରଦେ କେତେକ୍ ନିୟା କାତା କଇଲାଇନି ।” ୧୩ ମାତର୍ ଜିସୁ କାତା ଅଏ ନାଇ । ସେଟା ଦେକିକରି ପିଲାତ୍ ବେସି କାବା ଅଇଗାଲା ।

ପିଲାତ୍ ଜିସୁକେ ମୁକ୍‌ଲାଇ ନାପାରଲା

(ମାତୃକ ୨୭:୧୫-୨୬; ଲୁକ୍ ୨୩:୧୩-୨୫; ଜଅନ୍ ୧୮:୩୯; ୧୯:୧୭)

୧୪ ରକିଆ ପାଇବାର୍ ପରବ୍ କଲାବେଲେ ସବୁ ବରସର୍ ରିତିନିତି ଇସାବେ ପିଲାତ୍, ଜନ୍ ଆଲେ ବନ୍ଦି ଲକ୍‌କେ, ଲକ୍‌ମନ୍ ବାରକରାଇ ଦେବାକେ ମନ୍ କରତେରଇଲାଇ, ତାକେ ବାରକରାଇ ଦେଇତେରଇଲା । ୧୫ ସେବେଲେ ସରକାରର୍ ବିରୁଦେ ଦାବିକରି ବାରବା ନାଉର୍ ଗଟେକ୍ ଲକ୍ ବନ୍ଦି ଅଇରଇଲା । ଏ ଲକ୍ ଆରି କେତେଟା ଲକ୍‌ମନ୍‌ର ସଙ୍ଗ୍, ଲକ୍‌ମନ୍‌କେ ମରାଇ ବନ୍ଦି ଅଇରଇଲା । ୧୬ ଲକ୍‌ମନ୍ ପିଲାତର୍‌ଟାଣେ ଆସି, କଇଲାଇ, “ସବୁ ବରସର୍ ରିତିନିତି ଇସାବେ ଏ ତରେକ୍ ମିସା ଗଟେକ୍ ବନ୍ଦି ଲକ୍‌କେ ମୁକ୍‌ଲାଇ କରି ବାରକରାଇଦେସ୍ ।” ୧୭ ପିଲାତ୍ ଲକ୍‌ମନ୍‌କେ ପାଟାରଲା, “ତମେ କାକେ ମନ୍ କଲାସ୍‌ନି ? ମୁଇ ତମର୍ ଲାଗି ଜିଉଦିମନ୍‌ର ରାଜାକେ ଚାଡ଼ିଦେବି କି ?” ୧୮ ପିଲାତ୍ ରାଜା କାଇକେ ଏନ୍ତି କଇଲା ବଇଲେ, ମୁକିଅ ପୁଜାରିମନ୍ କୁଟ୍ ପାଠି ଜିସୁକେ ତାର୍ ଆଟେ ସରପିଦେଇ ଆତଡ଼ ବଲିକରି ସେ ଜାନିରଇଲା ।

୧୯ ମାତର୍ ମୁକିଅ ପୁଜାରିମନ୍ ଲକ୍‌ମନ୍‌କେ ଉସକାଇ କରି, “ଜିସୁର୍ ବାଦୁଲେ ବାରବାକେ ଆମର୍‌ପାଇ ବନ୍ଦି ଗରେଅନି ମୁକ୍‌ଲାଇବାକେ କୁଆ ।” ବଲି କଇଲାଇ । ୨୦ ମାତର୍ ପିଲାତ୍ ଆରିତରେକ୍ ପାଟାରଲା, “ସେନ୍ତିଆଲେ ତମେ ଜନ୍ ଲକ୍‌କେ ଜିଉଦିମନ୍‌ର ରାଜା ବଲି କଇଲାସ୍‌ନି, ତାକେ ମୁଇ କାଇଟା କରବି ବଲି ତମେ ମନ୍ କଲାସ୍‌ନି ?”

୨୧ ଲକ୍‌ମନ୍ ବେସି ରାଟୁକରି କଇଲାଇ, “ତାକେ କୁରସେ ମରାଆ ।”

୨୨ ତେଇଅନି ପିଲାତ୍ ଆରିତରେକ୍ ଲକ୍‌ମନ୍‌କେ ପାଟାରଲା, “କାଇକେ, ସେ କାଇ ଦସ୍ କଲାଆଟେ ଜେ ?” ମାତର୍ ଲକ୍‌ମନ୍ ଅଦିକ୍ ଅଦିକ୍ ରାଟୁଅଇକରି କଇଲାଇ, “ତାକେ କୁରୁସ୍ କାଟେ ମରାଆ ।”

୨୩ ସେଟାର୍‌ପାଇ ପିଲାତ୍ ଲକ୍‌ମନ୍‌କେ ସାର୍‌ଦା କରାଇବାକେ ମନ୍‌କରି ବାରବାକେ ବନ୍ଦି ଗରେଅନି ମୁକ୍‌ଲାଇଦେଇ ଜିସୁକେ କରଡ଼ା ସଙ୍ଗ୍ ମାରି, କୁରୁସ୍‌କାଟେ କୁଟିମାରି ମରାଇଦେବାକେ ସନିଅମନ୍‌କେ ସରପିଦେଲା ।

ସନିଅମନ୍ ଜିସୁକେ କିଜାଇଲାଇ

(ମାତୃକ ୨୭:୨୭-୩୧; ଜଅନ୍ ୧୯:୨-୩)

୨୪ ସନିଅମନ୍ ଜିସୁକେ ରମିୟ୍ ସରକାରର୍ ସାସନ୍‌କାରିଆ ପିଲାତର୍, ମୁକିଅ ଗରର୍ ତାଣ୍ଡେ ଦାରିଗାଲାଇ ଆରି ସେମନ୍ ବିନ୍ ସନିଅମନ୍‌କେ ଗଟେକ୍ ଟାଣେ

ତାକି ରୁଣ୍ଡାଇଲା । ୧୭ ସେମନ୍ ଜିସୁକେ କିଜାଇବାକେ ଜାମ୍‌କଲି ରଙ୍ଗର୍ ବସ୍ତର୍ ପିନ୍ଧାଇଲା ଆରି ଗଟେକ୍ କାଟାର୍ ମୁକୁର୍ ତିଆରକରି ତାର୍ ମୁଣ୍ଡେ ପିନ୍ଧାଇଦେଲା । ୧୮ ସେମନ୍ ଜିସୁକେ କିଜାଇ କରି କଇଲା, “ଏ ଜିଉଦିମନ୍‌ର ରାଜା ତକେ ଜୁଆର୍, ତୁଇ ବେସି ଦିନ୍ ବର୍ଦ୍ ।” ୧୯ ସେମନ୍ ତରକେତର୍ ବେଡ୍ ଡାଙ୍ଗ୍ ସଙ୍ଗ୍ ତାର୍ ମୁଣ୍ଡେ ମାର୍‌ତେରଇଲା ଆରି ତାର୍ ଉପରେ ତୁକି କିଜାଇକରି ମାଣ୍ଡିକୁଟା ଦେଇ ଜୁଆର୍ କଲା । ୨୦ ସେମନ୍ ଜିସୁକେ କିଜାଇ ସାରାଇଲାପତେ, ଜାମ୍‌କଲି ରଙ୍ଗର୍ ବସ୍ତର୍ ତାର୍ ଗାଗଡେଅନି ବେଟିକରି, ନିଜର୍ ବସ୍ତର୍ ପିନ୍ଧାଇଦେଲା । ତାର୍‌ପତେ ସେମନ୍ ତାକେ କୁର୍ସକାଟେ ମରାଇବାକେ ଗଡ୍ ବାଇରେ ଦାରିଗାଲା ।

**କୁର୍ସେ ଜିସୁର୍ ମରନ୍**

(ମାତିଉ ୨୭:୩୨-୪୪; ଲୁକ୍ ୨୩:୨୬-୪୩; ଜଅନ୍ ୧୯:୧୭-୨୭)

୨୧ \*ସେବେଲା ଆଲେକ୍‌ଜାଣ୍ଡାର୍ ଆରି କୁର୍ନିୟ୍ ଜାଗାର୍ ରୁପଅର୍ ବାବା ସିମନ୍ ନାଉର୍ ଗଟେକ୍ ଲକ୍, ପଲିଗାରାମ୍ ଅନି ଆସିକରି ସେ ବାଟେ ଜାଇତେରଇଲା । ସେ ସନିଅମନ୍ ତାକେ ଜିସୁର୍ କୁର୍ସ ବଇବାକେ ବାଦିଅ କଲା । ୨୨ ତାର୍‌ପତେ ସେମନ୍ ଜିସୁକେ ଗଲଗତା ନାଉର୍ ଗଟେକ୍ ଜାଗାଇ ଦାରିଗାଲା । ଗଲଗତାର୍ ଅରଡ୍ ଅଇଲାନି, କାପାଲ୍ ଜାଗା । ୨୩ ସେମନ୍ ଜିସୁକେ ଅସ ମିସାଇଲା ଅଙ୍ଗୁର୍ ରସ୍ କାଅ ବଲିକରି ଦେଲା, ମାତର୍ ସେ ନିର୍ଲା । ୨୪ ତାର୍‌ପତେ ଜିସୁକେ କୁର୍ସେ ଚଗାଇଲା ଆରି ତାର୍ ବସ୍ତର୍ କାର୍‌ବାଗେ କାଇଟା ମିଲ୍‌ସି ବଲି ବାଟାକରି ନେବାକେ, କେଡ୍ ପୁଟାଇକରି ନିଜର୍ ନିଜର୍ ବିଡ୍‌ରେ ବାଟାକରି ନେଲା । ୨୫ ସେମନ୍ ସାକ୍‌ଲିଆ ନ ଗଟା ବେଲାଇ ଜିସୁକେ କୁର୍ସେ ଚଗାଇଲା । ୨୬ ଆରି “ଏଗା ଜିଉଦିମନ୍‌ର ରାଜା । ” ବଲି ନିନ୍ଦା କାତା ଲେକି କୁର୍ସ ଉପରେ ଡସାଇଲା । ୨୭ କୁର୍ସେ ଜିସୁର୍ ସଙ୍ଗ୍ ଆରି ଦୁଇଟା ଚର୍ମନ୍‌କେ, ତାର୍ ଉଜାବାଟେ ଗଟେକ୍‌କେ, ଡେବ୍‌ରି ବାଟେ ଆରିଗଟେକ୍‌କେ ଚଗାଇରଇଲା । ୨୮ ସେ ବୁଲ୍ କଲା ଲକ୍‌ମନ୍‌ର ବିଡ୍‌ରେଅନି ଗଟେକ୍ ଲକ୍ ବଲି, ଇସାବ୍ ଅଇଲା ବଲିକରି \*ପର୍‌ମେସରର୍ ସାସ୍‌ତରେ ଲେକାଅଇରଇବା ବିସଇ ସିଦ୍ ଅଇଲା । ୨୯ \*ସେ ବାଟ୍ ଦେଇ ଜିବା ଲକ୍‌ମନ୍ ନିଜେ ନିଜେ ମୁଣ୍ଡ୍ ଜୁଲାଇ ଜିସୁକେ ନିନ୍ଦାକରି କଇଲା, “ପାରତନା ଗର୍ ବାଙ୍ଗାଇ କରି ତିନ୍‌ଦିନ୍ ବିଡ୍‌ରେ ତିଆର୍ କର୍‌ବାଲକ୍ ଏ ସେ କି ?” ବଲି କିଜାଇଲା । ୩୦ “ତୁଇ ଏବେ କୁର୍ସେ ଅନି ଉଡ୍‌ରି ନିଜ୍‌କେ ରକିଆ କର୍ ।”

୩୧ ମୁକିଅ ପୁଜାରିମନ୍ ଆରି ନିୟ୍‌ମ୍ ସିକାଇବା ଲକ୍‌ମନ୍ ମିସା ନିଜର୍ ନିଜର୍ ବିଡ୍‌ରେ କାତାଅଇକରି କିଜାଇଲା । ସେମନ୍ କଇତେରଇଲା, “ବିନ୍ ଲକ୍‌ମନ୍‌କେ ରକିଆ କର୍‌ତେରଇଲା, ମାତର୍ ସେ ନିଜେ ରକିଆ ଅଇ ନାପାର୍‌ଲା ।” ୩୨ “ତମେ ସତଇସେ ଇସରାଏଲର୍ ରାଜା କିରିସ୍‌ଅଇରଇଲେ, କୁର୍ସେ ଅନି ଉଡ୍‌ରି ଆଉ । ସେନ୍ତି ଅଇଲେ ଆମେ ଦେକିକରି ବିସ୍‌ବାସ୍ କର୍ବୁ ।” ବଲି କଇଲା । ଜନ୍ ଲକ୍‌ମନ୍‌କେ ଜିସୁର୍ ସଙ୍ଗ୍ କୁର୍ସେ ଚଗାଇରଇଲା, ସେମନ୍ ମିସା ଜିସୁକେ ନିନ୍ଦା କଲା ।

**ଜିସୁର୍ ମରନ୍**

(ମାତିଉ ୨୭:୪୫-୫୬; ଲୁକ୍ ୨୩:୪୪-୪୯; ଜଅନ୍ ୧୯:୨୮-୩୦)

୩୩ ମୁଇଦାନିଆ ବାର୍‌ଟା ବେଲାଅନି ତିନ୍‌ଟା ଜାକ ଗୁଲାଇ ଦେସ୍ ଆନ୍ଦାର୍ ଅଇଗାଲା । ୩୪ ଦିନ୍ ତିନ୍‌ଟା ବେଲେ ଜିସୁ ଆଉଲିଅଇ କଇଲା, “ଏଲଇ ଏଲଇ ଲାମା

\* ୧୫:୨୧ ୧୫:୨୧ ରମିୟ୍ ୧୭:୧୩      \* ୧୫:୨୮ ୧୫:୨୮ କେତେକ୍ ପୁର୍‌ନା ଲେକାଇ ଏଗା ଲେକାଅଏନାଇ  
 \* ୧୫:୨୯ ୧୫:୨୯ ମାର୍ଚ୍ଚ ୧୪:୫୮; ଜଅନ୍ ୨:୧୯

ସବକ୍ତାନି ।” ଆର୍ ଅରଡ଼ ଅଇଲାନି, “ଏ ମର୍ ପର୍ମେସର୍ ଏ ମର୍ ପର୍ମେସର୍, ତମେ ମକେ କାଇକେ ଚାଡ଼ିଦେଲାସ୍ ?”

୩୫ ଏ କାତା ସୁନି ସେଲଗେ ଚିଆ ଅଇରଇବା କେତେ ଲକ୍ କଇଲାଇ, “ସେ ଏଲିୟକେ ଡାକଲାନି ।” ୩୬ ତେଇଅନି ଗଟେକ୍ ଲକ୍ ପାଲାଇ ଜାଇ ଅଜ୍ଞୁର୍ ରସେ, ତୁଲା ବୁଡ଼ାଇ ଡାଙ୍ଗେ ବାନ୍ଦି ଉପରେ ଲାମାଇଦେଲା । ସେ ଲକ୍ କଇଲା, “ଏବେ ଏଲିୟ ଆସିକରି ଆକେ କୁରସେ ଅନି ଉଡ଼ରାଇଦେଇସି କି ନାଇ ଦେକୁ ।”

୩୭ ମାତର୍ ଜିସୁ ଆଉଲିଅଇଲା ଦାପ୍ରେ ତାର୍ ଜିବନ୍ ଚାଡ଼ିଗାଲା ।

୩୮ ସେବେଲା ମନ୍ଦିରର୍ ସୁକଲ୍ ଜାଗା ବିନେ କର୍ବା ପାର୍ଦା ଉପରେଅନି ତଲେ ଜାକ ଦୁଇ ତାଡ଼ ଅଇ ଚିରିଅଇଗାଲା । ୩୯ ତେଇ ଜିସୁର୍ କୁରସ ମୁଆଟେ ଚିଆଅଇରଇଲା ସଏଟା ସନିଅମନର୍ ମୁକିଅ, ଜିସୁ ସାରାସାରି ଆଉଲି ଅଇଲାଟା ଆରି ସେ କେନ୍ତ୍ର ଅଇକରି ମଲା, ଦେକିକରି କଇଲା, “ସତଇସେ ଏ ପର୍ମେସରର୍ ପିଲା ରଇଲା ।”

୪୦ \*ତେଇ କେତେଟା ମାଇଜିମନ୍ ମିସା କୁରସେ ଅନି ଦୁରିକେ ଚିଆଅଇ ଦେକ୍ତେରଇଲାଇ । ସେମନ୍ ଅଇଲାଇନି, ମଗ୍ଦଲିନି ମରିୟମ୍, ସାନ୍ଟା ଜାକୁବ୍ ଆରି ଜସିର୍ ମା ମରିୟମ୍ ଆରି ସଲମି । ୪୧ ଜିସୁ ଗାଲିଲିତେଇ ରଇଲାବେଲେ ଏ ମାଇଜିମନ୍ ଜିସୁର୍ ସଙ୍ଗ୍ ଜାଇତେରଇଲାଇ । ଆରି ତାକେ ଦର୍କାର୍ ରଇଲା ବିସଇ ସାଇଜ କର୍ତ୍ତେରଇଲାଇ । ଜିସୁର୍ ସଙ୍ଗ୍ ଜିରୁସାଲାମେ ଆସିରଇଲା ବିନ୍ ମାଇଜିମନ୍ ମିସା ତେଇ ରଇଲାଇ ।

ଜିସୁର୍ ମଲା ମଡ଼ ରାଙ୍ଗ୍ନି କାଟି ତିଆର୍ କଲା ପାଆର୍ ବିଡ଼ରେ ସଙ୍ଗାଇଲାଇ (ମାଡ଼ିଉ ୨୭:୫୭-୬୧; ଲୁକ୍ ୨୩:୫୦-୫୬; ଜଅନ୍ ୧୯:୩୮-୪୨)

୪୨ ସେ ଦିନ୍ ବିସ୍ମାମ୍ ଦିନ୍ ପାଇ ତିଆର୍ ଅଇବା ଦିନ୍ ଅଇରଇଲା । ସେଦିନେ ସଞ୍ଜବେଲା, ୪୩ ଆରାମାଡ଼ିଆ ଗାଉଁର୍ ବିଚାରକର୍ବା ମୁକିଅ ଲକ୍ ବିଡ଼ରେ ରଇଲା ଜସେପ୍ ନାଉଁର୍ ଗଟେକ୍ ଲକ୍, ପର୍ମେସର୍ ସାସନ୍ କର୍ବା ରାଇଜର୍ ବେଲା ଆସ ବଲି ଜାଗିରଇବା ଗଟେକ୍ ଲକ୍ । ବେସି ସାଆସଅଇ ପିଲାତର୍ ଲଗେ ଜାଇକରି ଜିସୁର୍ ମଲାମଡ଼ ମାଙ୍ଗ୍ଲା । ୪୪ ଜିସୁ ଏତେକ୍ ଦାପ୍ରେ ମରିଗାଲା ବଲି ସୁନି ପିଲାଡ଼ କାବା ଅଇଗାଲା । ତାର୍ ସନିଅମନର୍ ନେତାକେ ଡାକି “ଜିସୁ ମଲାବେ କି ?” ବଲି ପାଚାରଲା । ୪୫ ସେ ସନିଅମନର୍ ନେତା, ଜିସୁ ମରିଗାଲା ବିସଇ ପିଲାଡ଼କେ କଇଲା । ତାର୍ପତେ ଜସେପ୍କେ ପିଲାଡ଼ କଇଲା, “ତୁଇ ମଡ଼ ନେଇ ପାରୁସ୍ ।” ୪୬ ସେଟାର୍ପାଇ ଜସେପ୍ ଜିସୁର୍ ଗାଗଡ଼ କୁରସ ଉପରେଅନି ଉଡ଼ରାଇ ଆନ୍ଲା ଆରି ଗଟେକ୍ ନୁଆ ଲୁଗା ସଙ୍ଗ୍ ଗୁଡ଼ିଆଇକରି ରାଙ୍ଗ୍ନି କାଟି ତିଆର୍ କରି ରଇଲା ଗଟେକ୍ ପାଆରେ ନେଇକରି ସଙ୍ଗାଇଲା । ଗଟେକ୍ ବଡ଼ ଚାତତା ପାକନା ନେଇ ପାଆର୍ ମୁଆଟେ ଡାବିଦେଲା । ୪୭ ଜିସୁକେ ଜନ୍ ଜାଗାଇ ନେଇ ସଙ୍ଗାଇ ରଇଲାଇ, ସେ ଜାଗା ମଗ୍ଦଲିନି ମରିୟମ୍ ଆରି ଜସିର୍ ମା ମରିୟମ୍ ଦେକିରଇଲା ।

### ୧୭

ଜିସୁ ମରିକରି ଉଟ୍ଲା (ମାଡ଼ିଉ ୨୮:୧-୮; ଲୁକ୍ ୨୪:୧-୧୨; ଜଅନ୍ ୨୦:୧-୧୦)

୧ ବିସ୍ମାମ୍ବାର୍ ସାରଲା ତାର୍ ଆରକର୍ ଦିନେ ମଗ୍ଦଲିନି ମରିୟମ୍, ଜାକୁବ୍ ମାଆ ମରିୟମ୍ ଆରି ସଲମି, ଜିସୁର୍ ମଲା ଗାଗଡ଼େ ଲାଗାଇବାକେ ବାସନା ଚିକନ୍ ଗେନିଆନ୍ଲାଇ । ୨ ରଇବାର୍ ଦିନର୍ ସାକାଲ୍ ସାକାଲ୍ ସେମନ୍ ତାର୍ ଗାଗଡ଼ ସଙ୍ଗାଇଲା ଜାଗାକେ ଜାଇତେରଇଲାଇ । ସେବେଲେ ବେଲ୍ ଉଦି ଆଇତେରଇଲା

\* ୧୫:୪୦ ୧୫:୪୦ ଲୁକ୍ ୮:୨,୩

। ୩ ସେମନ୍ ନିଜର ନିଜର ବିତ୍ତରେ “ଜିସୁର ଗାଗଡ଼ ସଙ୍ଗାଇରଇଲା ମୁଆଟର୍ ବଡ଼ ଚାଟା ପାକ୍ନା ଆମର୍ ପାଇ କେ ଗୁଟାଇଦେଇସି ତେବେ ?” ବଲି କାତା ଅଇତେରଇଲା । ୪ ସେମନ୍ ସେ ଜାଗାଇ କେଟିକରି ଦେକ୍ଲାବେଲେ, ଏଦେ ଦେକା ! ସେ ବଡ଼ ଚାଟା ପାକ୍ନା ଗୁଟିଜାଇରଇଲା । ୫ ସେବେଲା ସେମନ୍ ସେ ଜାଗା ବିତ୍ତରେ ପୁରିକରି ଦେକ୍ଲାବେଲେ ଗଟେକ୍ ବିଜ୍ଜି ପାରା ଜଗ୍ଜଗି ଜାଇତେରଇବା ଦବ୍ ପଟିଆ ପିନ୍ଦିରଇବା ଦାଙ୍ଗଡ଼ା, ଜିସୁର ମଡ଼ ସଙ୍ଗାଇରଇଲା ଜାଗାର ଉଜାବାଟେ ବସିରଇଲା । ସେଟା ଦେକି ସେମନ୍ ବେସି ଡରିଜାଇ କାବା ଅଇଗାଲା ।

୬ ମାତର ସେ ଲକ୍ ସେମନ୍‌କେ କଇଲା, “ଡରାନାଇ, ତମେ କୁରସେ ମଲା ନାଜରିଡ଼ ଗତର୍ ଜିସୁ କିରିସଟକେ କଇଲାସିନି କି ? ସେ ଭଡ଼ି ନାଇନି, ଏବେ ମଲାଟାନେଅନି ଉଟ୍ଲା ଆଟେ । ତାର ମଡ଼ ସଙ୍ଗାଇଲା ଜାଗା ଦେକା ।” ବଲି କଇଲା । ୭ \* “ତମେ ଜାଇକରି ତାର ସିସମନ୍‌କେ ଆରି ପିତର୍‌କେ ବାଇଦରେ କୁଆ, ତମେ ଜିବା ଆଗ୍ଡୁ ଜିସୁ ଗାଲିଲି ଗତେ ଗାଲା ଆଟେ । ସେ ତମକେ ଜେନ୍ତି କଇରଇଲା, ସେନ୍ତିସେ ଗାଲିଲି ଗତେ ତାକେ ଦେକ୍‌ସା ।” ବଲି କଇଲା । ୮ ସେ ମାଇଜିମନ୍ ବେସି କାବା ଅଇଜାଇ, ଡରଡ଼ରି ଜାଇକରି ସେ ଜାଗାଇଅନି ବାରଇକରି ପାଲାଇଲା ଅରି ସେମନ୍ ବେସି ଡରିଜାଇକରି କାକେ ମିସା କାଇବଲି କଅଡ଼ନାଇ ।

ଜିସୁ ବେସି ଲକ୍‌ମନ୍‌କେ ଦେକାଇଅଇଲା

(ମାତିଉ ୨୮:୯-୧୦; ଜଅନ୍ ୨୦:୧୧-୧୮)

୯ ଜିସୁ ମଲାଟାନେଅନି ଉଟ୍ଲା ଆଟର୍ ପର୍‌ଡୁମ୍ ଦିନର୍ ସାକାଲେ ଜନ୍ ମାଇଜିଟାନେଅନି ଜିସୁ ସାଡ଼ଟା ଡୁମାମନ୍‌କେ କେଦିରଇଲା, ମଗଦଲିନି ନାଉର୍ ମରିୟମକେ ପର୍‌ଡୁମ୍ ଦେକାଇଅଇଲା । ୧୦ ସେ ମାଇଜି ତେଇଅନି ଜାଇକରି, ଦୁକ୍‌ଅଇ କରି କାନ୍‌ଡେ ରଇଲା ଜିସୁର ସିସମନ୍‌କେ କଇଲା, ୧୧ “ଜିସୁ ମଲାତେଇଅନି ଉଟ୍ଲା ଆଟେ ଆରି ମୁଇ ତାକେ ନିଜେ ଦେକିଆଟି ।” ବଲି କଇଲା । ସିସମନ୍ ତାକେ ମୁଲ୍‌କେ ବିସ୍‌ବାସ୍ କରଡ଼ ନାଇ ।

ଜିସୁ ଦୁଇଟା ସିସମନ୍‌କେ ଦେକାଇ ଅଇଲା

(ଲୁକ୍ ୨୪:୧୩-୩୫)

୧୨ ତାରପଟେ ଦୁଇଟା ସିସମନ୍ ଗଟେକ୍ ଗାଏଁ ଜିବାବେଲେ ଜିସୁ ସେମନ୍‌କେ ବିନ୍ ରୁପେ ଦେକାଇଅଇଲା । ସିସମନ୍ ତାକେ ଚିନି ନାପାରଲା । ୧୩ ସେ ଦୁଇଟା ସିସମନ୍ ବାଉଡ଼ିଆସିକରି ବିନ୍ ସିସମନ୍‌କେ ଏ କାତା କଇଲା । ଏନ୍ତି କଇଲେ ମିସା ସିସମନ୍ ତାକର୍ କାତା ବିସ୍‌ବାସ୍ କରଡ଼ ନାଇ ।

ଜିସୁ ବେସି ଲକ୍‌ମନ୍‌କେ ଦେକାଇଅଇଲା

(ମାତିଉ ୨୮:୧୭-୨୦; ଲୁକ୍ ୨୪:୩୬-୪୯; ଜଅନ୍ ୨୦:୧୯-୨୩; ପେରିଡ଼ ୧:୬-୮)

୧୪ ତାରପଟେ ଏଗାରଟା ସିସମନ୍ କାଇବାବେଲେ ଜିସୁ ସେମନ୍‌କେ ଦେକାଇଅଇଲା । ଜିସୁ ମଲାଟାନେଅନି ଉଟ୍ଲାଟା ଦେକିରଇଲା ଲକ୍‌ମନ୍ କଇଲା କାତା ବିସ୍‌ବାସ୍ ନ କରି, ସେମନ୍‌ର ମନ୍ ଆର୍ କଲାର୍ ଲାଗି ସେମନ୍‌କେ ଲାଗଲା । ୧୫ \* ଜିସୁ ସେମନ୍‌କେ କଇଲା, “ତମେ ଏ ଦୁନିଆର୍ ଗୁଲାଇବାଟେ ଜାଇକରି ସବୁ ଲକ୍‌ମନ୍‌କେ ମର୍ ନିମାନ୍ କାତା କୁଆ । ୧୬ ଜେ ଜେ ଏ ନିମାନ୍ କାତା ବିସ୍‌ବାସ୍ କରି ଡୁବନ୍ ନେବାଇ, ସେମନ୍ ପାପେଅନି ରକିଆ ପାଇବାଇ, ମାତର୍ ଜେ ଜେ ଏ ନିମାନ୍ କାତା ବିସ୍‌ବାସ୍ ନ କରଡ଼, ପର୍‌ମେସର୍ ସେମନ୍‌କେ ଡଣ୍ଡ ଦେଇସି । ୧୭ ଆରି ବିସ୍‌ବାସି ଲକ୍‌ମନ୍ ମର୍ ନାଉଁ ଦାରି ଡୁମାମନ୍‌କେ ବାରକରାଇ କେଦିଦେବାଇ ଆରି

ନାଜାନିରଇବା ବାସାଇ କାତା ଅଇବାଇ । ଏନ୍ତି ବିସ୍‌ବାସ୍ କରବା ଲକ୍‌ମନ୍‌ରଟାନ୍‌ନେ ଗଟେକ୍ ଚିନ୍ ପାରା ଅଇସି ।<sup>୧୮</sup> ସେମନ୍ ନାଜାନିକରି ସାଁପ୍ ଆଡେ ଦାରଲେ କି ବିସ୍ କାଇଲେ ନ ମରଡ଼ । ଜର୍‌ଦୁକାର୍ ଲକ୍‌ମନ୍‌କେ ଆଡ଼ ଚିଇ କରି ପାର୍‌ତନା କଲେ, ସେଲକ୍‌ମନ୍ ନିମାନ୍ ଅଇଜିବାଇ” ବଲି କଇଲା ।

ଜିସୁ ସରଗେ ଗାଲା

(ଲୁକ୍ ୨୪:୫୦-୫୩; ପେରିଡ଼ ୧:୯-୧୧)

<sup>୧୯</sup> \*ମାପୁରୁ ଜିସୁ ଏ ସବୁ କାତା ସେମନ୍‌କେ କଇ ସାରାଇଲା ପଡେ, ପର୍‌ମେସର୍ ତାକେ ସରଗେ ଦାରିଗାଲା ଆରି ପର୍‌ମେସର୍ ସନ୍‌ମାନ୍ ଜାଗାଇ ବସୁଲା ।  
<sup>୨୦</sup> ତାର୍‌ପଡେ ତାର୍ ସିସମନ୍ ଜାଇକରି ଏ ଦୁନିଆର୍ ଗୁଲାଇବାଟେ ମାପୁରୁ ଜିସୁର୍ ନିମାନ୍ କାତା କଇଲାଇ ଆରି ମାପୁରୁ ତାକର୍ ସଙ୍ଗ୍ ରଇକରି କାବାଅଇଜିବା ବିନ୍ ବିନ୍ କାମ୍ କଲା । ଏନ୍ତାରି ସେମନ୍ କଇବା କାତା ସଡ଼ ବଲି ଦେକାଇଦେଲା । \*

☆ ୧୭:୧୯ ୧୭:୧୯ ପେରିଡ଼ ୧:୯-୧୧  
 ନ ମିଲେ

\* ୧୭:୨୦ ୧୭:୨୦ କେଡେଟା ପୁରନା ଲେକାଇ ମାର୍ଚ୍ଚ ୧୭, ୯-୨୦

# ଯୀଶୁଖ୍ରୀଷ୍ଟଙ୍କ ବିଷୟରେ ଲୁକ ଲେଖୁଥିବା ସୁସମାଚାର ଜିସୁକ୍ରିସ୍ଟର ବିସଇ ନେଇକରି ଲୁକ୍ ଲେକିରଇବା ନିମାନ୍ କବର୍ ଏ ବଇ ବିସଇ ଜାନ୍‌ବାଟା

ଲୁକ୍ ଲେକିରଇବା ନିମାନ୍ କବର୍ ଅଇଲାନ୍ତି, ଜିସୁକ୍ରିସ୍ଟର ଜିବନେ ଅଇରଇବା ଚିକିନିକି ବିସଇର କାତା । ନୁଆ ନିଅମର୍ ଚାରଟା ବଇ ବିଡ୍‌ରେ ଅନି ଏଟା ଗଟେକ୍ । ସେ ବିଡ୍‌ରେ ଅନି ସବୁକେ ନିମାନ୍ କବର୍ କଇବାଇ । ଜାର୍ ଅରଡ୍ ଅଇଲାନ୍ତି ସୁବ୍ କବର୍ । ସେଟା ସବୁ ଜିସୁର୍ ମରନର୍ ପଟେ ମାଡିଉ, ମାର୍ଚ୍ଚ, ଲୁକ୍ ଆରି ଜଅନର୍ ଲଗେ ଅନି ଲେକା ଅଇଆଟେ । ଲୁକ୍ ଲେକଲା ବଇଟା'ନେ ଜିସୁର୍ ଜିବନେ ଗଟ୍‌ଲା ଲେକ୍‌ବା ସଙ୍ଗ୍ ତାର୍ ମରନ୍ ଆରି ମଲାଟା'ନେ ଅନି ଉଟ୍‌ଲା ବିସଇ ମିସା ଆଟେ । ତାର୍ ସିସ୍‌ମନ୍ ଜନ୍ ଜନ୍ ବିସଇ ସବୁ କିରିରଇଲାଇ, ସେଟାମନ୍‌ମିସା ଏ ବଇଟା'ନେ ଆଟେ । ବଇକେ ପେରିଡ୍‌ମନର୍ କାମର୍ ବିସଇ ବଲି କଇବାଇ । ଲୁକ୍ ସୁବ୍‌କବର୍‌ର ବଇ କେତେବେଲେ ଆରି କନ୍‌ଟା'ନେ ଲେକାଅଇ ରଇଲା, ସେ ବିସଇ କେମିସା ନିକସଙ୍ଗ୍ ନାଜାନଡ୍ । ମାଡର୍ ପଣ୍ଡିଡ୍‌ମନ୍ ଜେକ୍ରିକି ଏଟା ଜିସୁକ୍ରିସ୍ଟ ଜନମ୍ ଅଇ ୭୦ ବରସ୍ ପଟେ ଲେକା ଅଇଲାଆଟେ ବଲି ବିସ୍‌ବାସ୍ କର୍‌ବାଇ ।

ଲେକଲା ଲକ୍ ଅଇଲାନ୍ତି ଲୁକ୍ । ସେ ଗଟେକ୍ ଡାକ୍‌ଦର୍ । ତାର୍ ଲେକା ସଇଲି ଆରି କାତା ଆରି ଚାଲିଚଲନ୍ ଜାନାଇ ଦେଲାନ୍ତିଜେ, ସେ ଗଟେକ୍ ସିକିଡ୍‌ଲକ୍ ରଇଲା । ଜିସୁର୍ ଜିବନେ ଗଟିରଇବା ସବୁ ଗଟନା'ର ଲେକା, ନିୟମ୍ ଇସାବେ ଟିକ୍ ବାବ୍‌ନା କର୍‌ବାକେ ଇଟା କଲାନ୍ତି । ଜେକ୍ରିକି ସେଟା ବିନ୍‌ଲକ୍‌ମନ୍ ପଡିକରି ଉପ୍‌କାର୍ ପାଇବାଇ ୧:୧-୩ । ସେ ଗଟେକ୍ ଜିଉଦି ଲକ୍ ନ ରଇଲା ମିସା କଲସିଅ ୪:୧୦-୧୪ ସେ ଏ ରକାମ୍ ବାବ୍‌ନାକରି ଲେକଲା । ଜିଉଦି ନଇଲା ଲକ୍‌ମନ୍ ଜେନ୍‌ଡିକି ବୁଜିପାର୍‌ବାଇ । ସେ ଜିଉଦି'ର୍ ନିଡିନିୟମ୍ କଇବାଟା ଇତି ଆମେ ସଅଜେ ଦେକ୍‌ବା'ର୍ ଅଇସି ୧:୮ ।

ଲୁକ୍ ଲେକଲା ସୁସମାଚାର୍, ମାଡିଉ ଆରି ମାର୍ଚ୍ଚ ବଇସଙ୍ଗେ ସମାନ୍ । କାଇକେ ବଇଲେ ସେମନ୍ ସମାନ୍ ବିସଇ ଆରି ସମାନ୍ ବାବ୍‌ନାଇ କଇବାଟା ଲେକିଆଟଡ୍ । ତିନ୍‌ଟା ବଇବିଡ୍‌ରେଅନି ଲୁକ୍ ଡୁବନ୍ ଦେଉ ଜଅନର୍ ଜନମ୍ ବିସଇ ତିଆର୍ କଲାଆଟେ । ଆରି ଲୁକ୍ ପାର୍‌ଡନା ଉପ୍‌ରେ ଦିଆନ୍ ଦେଇଆଟେ ୩:୨୧;୫:୧୭;୬:୧୨;୧୧:୧-୧୨;୨୨:୩୨; ଆରି ସେ କେମା ଉପ୍‌ରେ ମିସା ଦିଆନ୍ କରିଆଟେ । ୩:୩, ୧୧:୪, ୧୭:୩-୪, ୨୩:୩୪, ୨୪:୪୭

### ଏ ବଇବିଡ୍‌ରେ ରଇବା ବିସଇ

୧. ଲୁକ୍ ସୁବ୍‌କବର୍ ଉପକର୍ମ ଆର୍ ଲେକା ଉଦେସେ ବରନା କର୍‌ସି । ୧:୧-୪
୨. ଜିସୁର୍ ଜନମ୍ ଆରି ସେ କେକ୍ରି ସେବାକାମର୍ ପାଇ ତିଆର୍ ଅଇଲା । ୧:୫-୪:୧୩
୩. ଜିସୁର୍ କାମ୍ ପୁରାପୁରନ୍ ବିସଇର୍ ବେଲେ ସେ ସବୁକରି ରଇଲା ଚକିଡ୍ କାମ୍ ଆରି ତାର୍ ସିକିଆ ବିସଇ କଇଲା ଆଟେ । ଏଟା ଅଇଲାନ୍ତି ସୁବ୍‌କବର୍‌ର ବଡ୍ ବାଗ୍ । ୪:୧୪-୨୧:୩୮
୪. ତାର୍‌ପଟେ, ପଟର୍ ବାଗ୍ ଟା'ନେ, ଜିସୁ କେକ୍ରି ମିରିରଇଲା ମସ୍‌ନେ ତପି ଅଇରଇଲା ଆରି ମଲାଟା'ନେ ଅନି ଉଟ୍‌ଲା ସେଟାମନ୍ ଆଟେ । ୨୨:୨୪

୧ ଏ ଡିଅପିଲ୍ ମଥାସୟ, ଆମର ବିତ୍ତରେ ଜନ୍ ସବୁ ଗର୍ବନା ଗର୍ବଲା, ସେସବୁ ଲେକ୍‌ବାକେ ବେସି ଲକ୍ ଚେସ୍‌ଟା କଲା। ୨ ଆରାମ୍ ଅଇଲା ମୁଲେ, ଜେଜେ ଏ ସବୁ ଦେକିରଇଲା। ଆରି ସୁବ୍ କବର୍ ବିନ୍ ଲକ୍‌ମନ୍‌କେ ଜାନାଇଲା, ସେମନ୍ ଆମ୍‌କେ କଇଲା ଇସାବେ ଲେକ୍‌ଲା। ୩ ତେବର୍‌ପାଇ ଏ ମାନନିୟ୍ ତିୟ୍‌ପିଲ୍। ପୁର୍‌ବେଅନି ଚିକିନିକି କଜ୍‌ଲଡ୍‌କରି ତେଇ ସବୁଜାକ ରିତିନିତି ସକ୍ ଅଇଲାଟା ତମର୍‌ପାଇ ମୁଇ ଲେକ୍‌ବିଆକା ବଲି ମନ୍‌କଲି । ୪ ଜେନ୍ତ୍ରୁ ତୁଇ ସବୁ ବିସଇର୍ ସିକିଆ ପାଇଆରୁସ୍, ସେ ସିକିଆର୍ ପୁରାପୁରୁନ୍ ସଡ୍ ପାଇପାରୁସ୍ ।

ତୁବନ୍ ଦେଉ ଜଅନର୍ ଜନମ୍

୫ ଜିଉଦା ଦେସର୍ ରାଜା ଏରଦର୍ ବେଲେ, ଅବିୟ୍ ପୁଜାରି ଦଲେ ଜିକରିୟ୍ ନାଉର୍ ଗଟେକ୍ ପୁଜାରି ରଇଲା । ତାର୍ ମାଇଜି ଏଲିସାବେଡ୍ । ସେ ଆରଣ୍ ବ୍‌ସର୍ ରଇଲା । ୬ ପର୍‌ମେସରର୍ ଦେକ୍‌ବା ଇସାବେ ସେମନ୍ ଦୁଇଲକ୍ ଜାକ ମାପୁରୁର୍ ସବୁ ଆଦେସ୍, ବିଦି ଇସାବେ କରତେରଇଲା। ୭ ମାତର୍ ସେମନ୍‌କେ ପିଲାଜିଲା ନ ରଇଲା । କାଇକେ ବଇଲେ ଏଲିସାବେଡ୍ ବାଞ୍ଜି ରଇଲା । ଆରି ସେମନ୍ ଡକ୍‌ରା ଡକ୍‌ରି ଅଇଜାଇରଇଲା।

୮ ଦିନେକ୍ ଜିକରିୟ୍ ନିଜର୍ ଦଲର୍ ପାଲି ଇସାବେ, ଜିଉଦିମନ୍‌ର୍ ମନ୍‌ରେ ପୁଜାରି କାମ୍ କର୍‌ବାବେଲେ, ୯ ରିତିନିତି ଇସାବେ ଜିକରିୟ୍‌ର୍ ନାଉଁ କେଡ୍ ପୁର୍‌ଲାଜେ ତାକେ ମାପୁରୁର୍ ମନ୍‌ରେ ଜାଇକରି ବେଦିଟାନେ ଦୁପ୍ ଦେବାକେ ପଡ୍‌ଲା । ୧୦ ଆରି ଦୁପ୍ ଦେବାବେଲେ ଲକ୍‌ମନ୍ ବାଇରେ ପାର୍‌ତନା କରତେ ରଇଲା।

୧୧ ସେଡ୍‌କିବେଲେ ଏଦେ ଦେକା ! ମାପୁରୁର୍ ଗଟେକ୍ ଦୁଡ୍ ଦୁପ୍ ଦେବା ବେଦିର୍ ଉଜାବାଟେ ଟିଆଅଇ ତାକେ ଦର୍‌ସନ୍ ଦେଲା । ୧୨ ଜିକରିୟ୍ ତାକେ ଦେକି କିଲ୍‌ବିଲ୍ ଅଇ ଡରିଗାଲା । ୧୩ ମାତର୍ ଦୁଡ୍ ତାକେ କଇଲା, “ଜିକରିୟ୍ ଡର୍‌ନାଇ, କାଇକେବଇଲେ ତମେ ଗୁଆରି କଲାଟା ପର୍‌ମେସର୍ ସୁନିଆଟେ । ତର୍ ମାଇଜି ଏଲିସାବେଡ୍ ଗଟେକ୍ ପିଲା ଜନମ୍ ଦେଇସି । ତମେ ତାକେ ଜଅନ୍ ବଲି ନାଉଁ ଦିଆସ୍ । ୧୪ ସେ ତମର୍ ପାଇ ବେସି ସାର୍‌ଦା ଆନ୍‌ସି ଆରି କେତେ କେତେ ଲକ୍‌ମନ୍ ତାର୍ ଜନମେ ସାର୍‌ଦା କର୍‌ବାଇ । ୧୫ ମାପୁରୁର୍ ଦେକ୍‌ବା ଇସାବେ ସେ ଗଟେକ୍ ଡାକ୍‌ପୁଟା ଲକ୍ ଅଇସି । ସେ ଆମର୍ ଅଇଜାଇରଇବା ଅଙ୍ଗୁର୍ ରସ୍ କି ନିସା ଜିନିସ୍ ମୁଲ୍‌କେ ନ କାଏ ଆରି ମାଆର୍ ଗର୍‌ବେ ଅନି ସୁକଲ୍ ଆଡ୍‌ମାଇ ପୁରାପୁରୁନ୍ ଅଇ ଆଇସି । ୧୬ ଆରି ଇସ୍ରାଏଲ୍ ଲକ୍‌ମନ୍‌ର୍ ବିତ୍ତରେ ଅନି କେତେ କେତେ ଲକ୍‌ମନ୍‌କେ ମାପୁରୁ ତାର୍ ପର୍‌ମେସରର୍ ଟାନେ ବାଉଡାଇସି । ୧୭ ସେ ବବିସଡ୍‌ବକ୍‌ତା ଏଲିୟ୍‌ର୍ ଆଡ୍‌ମାଇ ବପୁଅଇ ପର୍‌ମେସରର୍ ଆଗ୍‌ତୁ ଜାଇସି । ବାବାମନ୍‌ର୍ ମନ୍ ପିଲାମନ୍‌ର୍‌ଟାନେ ବାଉଡାଇସି । ପର୍‌ମେସରର୍ କାତା ନ ମାନ୍‌ବା ଲକ୍‌ମନ୍‌କେ ଦରମ୍ ଲକ୍‌ମନ୍ ଚିନ୍ତା କର୍‌ବା ଟାନେ ବାଉଡାଇସି । ଆରି ପର୍‌ମେସରର୍ ଲକ୍‌ମନ୍‌କେ ତାର୍ ପାଇ ଜାଗରଡ୍ କରାଇସି ।”

୧୮ ତେଇ ଜିକରିୟ୍ ଦୁଡ୍‌କେ କଇଲା, “ତମେ କଇବାଟା ସଡ୍ ଅଇସି ବଲି ମୁଇ କେନ୍ତ୍ରୁ ଜାନ୍‌ବି ? କାଇକେବଇଲେ ମୁଇତା ଡକ୍‌ରା ଅଇଗାଲିବେ, ଆରି ମର୍ ମାଇଜି ମିସା ଡକ୍‌କରି ଅଇଗାଲାନି ।”

୧୯ ଦୁଡ୍ ତାକେ କଇଲା “ମୁଇ ଗାବ୍‌ରିଏଲ୍, ମୁଇ ପର୍‌ମେସରର୍ ମୁଆଟେ ଟିଆ ଅଇରଇବା ଦୁଡ୍, ତମ୍‌କେ ଏ କବର୍ ଜାନାଇବାକେ ମକେ ପାଟାଇଆଟେ । ୨୦ ଦେକ୍, ଏ ସବୁ ନ ଅଇବା ଦିନ୍ ଜାକ ତୁଇ ଗୁଲାଅଇ ରଇସୁ । କାଇକେବଇଲେ ମର୍ ସବୁ ବାକିଅ ସମାନ୍ ବେଲାଇସେ ପୁରାପୁରୁନ୍ ଅଇସି । ସେଟା ସବୁ ତୁଇ ବିସବାସ୍ କୁରୁସ୍ ନାଇ ।” ୨୧ ଏଡ୍‌କି ଅଇବା ବିତ୍ତରେ ଲକ୍‌ମନ୍ ଜିକରିୟ୍‌କେ ବାଇରେ ଜାଗିରଇଲା। ଆରି ଦେଉଲେ ତାର୍ ଅଲ୍‌ସମ୍ ଅଇଲାଜେ ସେମନ୍ କାବାଅଇ ଜାଇତେରଇଲା। ୨୨ ମାତର୍ ଜିକରିୟ୍ ବାରଇ ଆସି ଲକ୍‌ମନ୍‌ର୍ ସକ୍ କାତାଅଇ ନାପାର୍‌ଲା, ତେଇ



ସେ ଦେଉଲେ ଦର୍ସନ୍ ପାଇଆଚେ ବଲି ଲକ୍ମନ୍ ଦୁଇଲାଇ ଆରି ସେ ଲକ୍ମନ୍ କେ ଆଡ଼ ସଗିଆ କରି ଜାନାଇବାର୍ ଦାର୍ଲାଇ ଆରି ଗୁଲାଇକରି ରଇଲା ।

୨୩ ଜିକରିୟ୍ ତାର୍ ସେବା କର୍ବା ପାଲି ଦିନ୍ ସବୁ ସାର୍ଲାଇ ପଚେ ତାର୍ ଗରେ ଉଟିଗାଲା । ୨୪ ଏଡ଼କି ଅଇ କେତେକ୍ ଦିନ୍ ଗାଲା ପଚେ ତାର୍ ମାଇଜି ଏଲିସାବେଡ଼ ଗାଗଡେ ଅଇଲା ଆରି ସେ ପାଁର୍ ମାସ୍ ଜାକ କାକେ ନ ଜାନାଇ ଗରେସେ ରଇଲା । ୨୫ ତାର୍ପଚେ ଏଲିସାବେଡ଼ କଇଲା, “ଲକ୍ମନ୍ ତେଜେଟ୍ କର୍ବାଟା ଦୁର୍ କର୍ବାକେ ସାରାସାରି ମକେ ଦୟା କରି ମାପୁରୁ ଏଡ଼ାରି କଲାଆଚେ ।”

**ଜିସୁର୍ ଜନମ୍ ବିସଇ**

୨୬ ଏଲିସାବେଡ଼ ଗାଗଡେଅଇ ତ ମାସ୍ ଅଇଲାକେ, ପର୍ମେସର୍ ଗାବ୍ରିଏଲ୍ ଦୁଡ଼କେ ଗାଲିଲି ରାଇଜର୍ ନାଜରିଡ଼ ନାଉଁର୍ ନଅରେ ଗଚେକ୍ ଦାଙ୍ଗଡିର୍ ଟାନେ ପାଟାଇଲା । ୨୭ ସେ ଦାଙ୍ଗଡିର୍ ନାଉଁ ମରିୟ୍ମ, ଦାଉଦ୍ ବସ୍ବର୍ ଜସେପ୍ ନାଉଁର୍ ଗଚେକ୍ ଦାଙ୍ଗଡା ସଙ୍ଗ୍ ତାର୍ ମାଙ୍ଗିନି ଅଇରଇଲା । ୨୮ ଦୁଡ଼ ମରିୟ୍ମର୍ ଲଗେ ଆସି କଇଲା, “ଏ ନୁନି, ମାପୁରୁ ତକେ ଦୟାକଲା ଆଚେ, ଆରି ତର୍ସଙ୍ଗ୍ ଆଚେ ।”

୨୯ ମରିୟ୍ମ୍ ସରଗର୍ ଦୁଡ଼ କଇଲା ବାକିଅ ସୁନ୍ଲାଇ ଆରି କାଜଟା ବୁଜିନାପାରି ଉଡୁକ୍ ଦୁଡୁକ୍ ଅଇଜାଇକରି, ବାବିବାବି ରଇଲା । ୩୦ ଦୁଡ଼ ତାକେ କଇଲା, “ମରିୟ୍ମ୍ ତର୍ ନାଇ, ତୁଇ ମାପୁରୁର୍ ଦୟା ପାଇଆରୁସ୍ । ୩୧ ଦେକ୍ ତୁଇ ଗାଗଡେ ଅଇ ପିଲା ଗଚେକ୍ ଜନମ୍ କର୍ସୁ ଆରି ତାର୍ ନାଉଁ ଜିସୁ ଦେଇସା । ୩୨ ସେ ଗଚେକ୍ ତାକ୍ପୁଟା ଲକ୍ ଅଇସି ଆରି ସବୁର୍ ଉପ୍ରେ ରଇବା ପର୍ମେସରର୍ ପଅ ବଲି କଇବାଇ, ସରଗର୍ ମାପୁରୁ ତାକେ, ତାର୍ ଆନିଦାଦି ଦାଉଦର୍ ପାରା ରାଜା କରାଇସି । ୩୩ ସେ କାଲକାଲ୍ ଜୁଗ୍ଜୁଗ୍ ଇସରାଏଲ୍ ଲକ୍ମନ୍ କେ ସାସନ୍ କର୍ସି । ତାର୍ ରାଇଜ୍ କେବେ ନ ସାରେ ।”

୩୪ ମରିୟ୍ମ୍ ଦୁଡ଼କେ କଇଲା, “ଏଟା କେନ୍ତି ଅଇସି ? ମୁଜ୍ତା ମୁନ୍ସକେ ନାଜାନି !” ୩୫ ଦୁଡ଼ ତାକେ କଇଲା, “ସୁକଲ୍ ଆଡ଼ମା ଆସି ତକେ ଡାବି ଅଇସି, ଆରି ସବୁର୍ ଉପ୍ରେ ରଇବା ପର୍ମେସରର୍ ବପୁ ତକେ ଗୁଡ଼ିଆଇ ଅଇସି, ତେବର୍ପାଇ ଜେ ଜାଡ଼ ଅଇସି, ସେ ସୁକଲ୍ ପର୍ମେସରର୍ ପଅ ବଲି ତାକ୍ପୁଟା ଅଇସି ।”

୩୬ ଆରି ଦେକ୍, ତର୍ ଲାଗାର୍ ଲିଡାର୍ ଏଲିସାବେଡ଼ ମିସା ତକ୍ରି ବେଲେ ଗାଗଡେ ଆଚେ, ଜାକେ ଲକ୍ମନ୍ ବାଞ୍ଜି ବଲି କଇତେରଇଲାଇ । ତାକେ ଏବେ ତ ମାସ୍ ଅଇଲାନି । ୩୭ କାଇକେବଇଲେ ପର୍ମେସରର୍ଟାନେ କାଜଟା ମିସା ନ ଅଇବା କାମ୍ ନାଇ, ବଲି କଇଲା ।

୩୮ ତେଇ ମରିୟ୍ମ୍ କଇଲା, “ଦେକା, ମୁଇ ଗଚେକ୍ ମାପୁରୁର୍ ଦାସି, ତମେ କଇବା ଇସାବେ ମକେ ଅ ।” ତାର୍ପଚେ ଦୁଡ଼ ତାର୍ଟାନେଅନି ଉଟିଗାଲା ।

**ଏଲିସାବେଡ଼ ଆରି ମରିୟ୍ମର୍ ବେଟ୍ଗାଟ୍**

୩୯ ସେଡ଼କିବେଲେ ମରିୟ୍ମ୍ ବାରଇକରି ଜିଉଦା ରାଇଜର୍ ତଙ୍ଗର୍ ଜାଗାର୍ ଗଚେକ୍ ନଅରେ ଉଟିଗାଲା । ୪୦ ତେଇ ଜିକରିୟ୍ ଗରେ ପୁରିକରି ସେ ଏଲିସାବେଡ଼କେ ଜୁଆର୍ କଲା । ୪୧ ମରିୟ୍ମ୍ ଜୁଆର୍କଲାଟା ସୁନ୍ଲାଇ ଦାପ୍ରେ ଏଲିସାବେଡ଼ର୍ ଗର୍ବେ, ପିଲା ସାର୍ଦା ଅଇ ତେଗଇଲା ଆରି ଏଲିସାବେଡ଼ ସୁକଲ୍ ଆଡ଼ମାଇ ପୁରାପୁରୁନ୍ ଅଇଲା । ୪୨ ଏଲିସାବେଡ଼ ଆଉଲି ଅଇକରି କଇଲା, “ତୁଇ ସବୁ ମାଇଜିମନ୍ ବିଡ଼ରେ ଅନି କେତେକ୍ ନିକ କରମର୍ ଲକ୍ ! ତର୍ ଗରବର୍ ପିଲାଟା ମିସା କେତେକ୍ କରମ୍ ! ୪୩ ମୁଇ କେ ଜେ ମର୍ ମାପୁରୁର୍ ମାଆ, ମକେ ଦେକ୍ବାର୍ ଆଇଲା ଆଚେ ? ୪୪ କାଇକେବଇଲେ, ଦେକ୍, ତୁଇ ଜୁଆର୍କଲାଟା

ସୁନ୍ଦରୀ ଦାପରେ ମର୍ ଗରବର୍ ପିଲା ସାର୍ଦା ଅଇ ତେଗଇଲା । ୪୫ ଜେ ବିସ୍ବାସ୍ କର୍ସି ତାର୍ କେତେକ୍ ନିମାନ୍ କରମ୍, କାଇକେବଇଲେ ମାପ୍ତୁ ତାକେ ଜାଇଜାଇଟା କୁଆଅଇଲାଆଟେ, ସେ ସବୁଜାକ ଅଇସି ଆକା ।”

ମାପ୍ତୁକେ ମରିୟମର୍ ମଇମା ଗିଡ୍

୪୬ ତେଇ ମରିୟମ୍ କଇଲା,

“ମର୍ ଜିବନ୍ ମର୍ ମାପ୍ତୁର ମଇମା କଲାନ୍ତି ।

୪୭ ଆରି ମର୍ ଆଡମା ମର୍ ରକିଆକାରି ପର୍ମେସରଟାନେ ସାର୍ଦା କଲାନ୍ତି ।

୪୮ କାଇକେବଇଲେ ସେ ମର୍ପାରା କାକୁଡିଆନିକେ ନିଜର୍ ଗତିଦାଙ୍ଗ୍ତି ବଲି ଏତାଇଲା ଆଟେ ।

ଆରି ଦେକା ଆଜିଅନି କାଲକାଲ୍ ଜୁଗଜୁଗ, ସବୁ ଲକ୍ ମକେ ପର୍ମେସରଟ୍ ତେଇଅନି ଆସିର୍ବାଦ୍ ମିଲ୍ଲା ଲକ୍ ବଲି କଇବାଇ ।

୪୯ କାଇକେବଇଲେ ସବୁଟାନେଅନି ବପୁର୍ ମାପ୍ତୁ, ମର୍ପାଇ କାବାଅଇଜିବା କାମ୍ କଲାଆଟେ,

ତାର୍ ନାଉଁ ସୁକଲ୍ ।

୫୦ ଆରି ଜନ୍ ଲକ୍ମନ୍ ତାକେ ଡରିକରି ରଇବାଇ, ଜୁଗେ ଜୁଗେ ସେ ସେମନ୍କେ ଦୟା କର୍ସି ।

୫୧ ସେ ତାର୍ ନିଜର୍ ବପୁର୍ ଆଡ୍ ଦେକାଇଆଟେ,

ସେ ଆଁକାର୍ ଲକ୍ମନ୍କେ ସେମନ୍ର୍ ମନେ ବାନ୍ନା କଲାଟା ତିନ୍ତତର୍ କଲା ଆଟେ ।

୫୨ ସେ ବଡ୍ ବଡ୍ ରାଜାମନ୍କେ ସେମନ୍ ରଇବାଟାନେଅନି ଉଡ୍‌ରାଇ ଦେଲା ଆଟେ, ଆରି କାକୁଡିଆମନ୍କେ ଉପ୍ରେ ଉଟାଇ ଆଟେ ।

୫୩ ସେ ବୁକର୍ ଲକ୍ମନ୍କେ ନିକ ନିକ ବିସଇ ଦେଇ ସାର୍ଦା କରାଇ ଆଟେ, ସାଉକାର୍ଲକ୍ମନ୍କେ ଚୁଟା ଆଡେ ବାଉତାଇଦେଇ ଆଟେ ।

୫୪ ଆମର୍ ଆନିଦାଦମନ୍କେ ଜନ୍ କାତା ଦେଇରଇଲା,

ସେଟା ପୁରାପୁରୁନ୍ କଲା ଆରି ତାର୍ ନିଜର୍ ଚାକର୍ ଇସରାଏଲର୍ ଉପ୍କାର୍ କରି ଆଟେ ।

୫୫ ସେ ଅବରାଆମ୍ ଆରି ତାର୍ ନାତିମନ୍କେ ତାର୍ ଦୟା କାଲକାଲ୍ ଜୁଗଜୁଗ୍ ଏତାଅଡ୍‌ବଲି ଦେକାଇଲା ଆଟେ ।”

୫୬ ଆରି ମରିୟମ୍ ତିନ୍ ମାସ୍ ପାରା ଏଲିସାବେତର୍ ସଙ୍ଗ୍ ରଇ ନିଜର୍ ଗରେ ବାଉଡି ଗାଲା ।

ତୁବନ୍ ଦେଉ ଜଅନର୍ ଜନମ୍

୫୭ ପଟେ ଏଲିସାବେତର୍ ଆଡ୍‌ଗଡ୍ ସୁକ୍ ଅଇବା ଦିନ୍ କେଟି ଆଇଲାଜେ, ସେ ଗଟେକ୍ ପିଲା ଜନମ୍ ଦେଲା । ୫୮ ଆରି ମାପ୍ତୁଜେ ତାକେ ଦୟା କଲାଆଟେ, ଏଟା ସୁନି ଜିକରିୟର୍ ଲାଗାର୍ଲିତାର୍ ଲକ୍ ଆରି ଗତିଆ କୁଟୁମ୍ ତାକର୍ ସଙ୍ଗ୍ ସାର୍ଦା କର୍ବାର୍ ଦାର୍ଲାଇ ।

୫୯ ଆର୍ ଦିନ୍ ଗାଲାପଟେ ଲକ୍ମନ୍ ପିଲାର୍ ସୁନଡ୍‌ଟାନେ ଆଇଲାଇ\* ଆରି ତାର୍ ବାବାର୍ ନାଉଁ ଇସାବେ ପିଲାର୍ ନାଉଁ ମିସା ଜିକରିୟ୍ ଦେବାକେ ମନ୍‌କଲାଇ ।

୬୦ ମାତର୍ ଏଲିସାବେଡ୍ କଇଲା, “ନାଇ ତାର୍ ନାଉଁ ଜଅନ ଦିଆ ଅ ।” ୬୧ ଲକ୍ମନ୍ ତାକେ କଇଲା “ତମର୍ ବସ୍ ବିଡ୍‌ରେ ତା ଏନ୍ତାରି ନାଉଁର୍ ଲକ୍ କେ ମିସା ନାଇ ।” ୬୨ ତେଇ ସେମନ୍ ପିଲାକେ କାଇ ନାଉଁ ଦେଉଁ ବଲି ମନ୍ କଲୁସିନ୍ ? ସେଟା ଜିକରିୟ୍‌କେ ଆଡ୍ ଦେକାଇକରି ପାଟାର୍‌ବାର୍ ଦାର୍ଲାଇ ।

\* ୧:୫୯ ୧:୫୯ ମନସ୍ ପିଲାର୍ ଜୁଡ୍‌ଗାନର୍ ଟିପର ଚାମ୍ କାଟ୍‌ବାଟା ଅଇଲାନ୍ ସୁନ୍‌ଡ୍

୨୩ ସେଡ଼କିବେଲେ ଜିକରିୟ ଲକ୍ଷ୍ମୀଙ୍କୁ ଗଟେକ୍ ଲେକ୍‌ବା ପାଟା ମାଙ୍ଗିଲା ଆରି “ଏଦେ ଦେକା ! ତାର ନାଉଁ ଜଅନ୍ !” ବଲି ଲେକ୍‌ଲା । ତେଇ ସବୁଲକ୍ କାବା ଅଇଗାଲା । ୨୪ ସେଡ଼କି ଦାପ୍‌ରେ ଜିକରିୟର୍ ଟଣ୍ଟୁ ପୁଟ୍‌ଲା, ସେ ଆରି ତରେକ୍ କାତା ଅଇ ପର୍‌ମେସର୍‌କେ ମଇମା କର୍‌ବାର୍ ଦାର୍‌ଲା । ୨୫ ତାର୍ ଲଗର୍ ପାକର୍ ଲକ୍‌ମନ୍ ତରିଗାଲା, ଆରି ଏସବୁ କାତା ଜିଉଦା ରାଇଜର୍ ଡଙ୍ଗର୍ ଜାଗାର୍ ସବୁ ବାଟର୍ ଲକ୍‌ମନ୍ କୁଆବଲା ଅଇଲା । ୨୬ ଆରି ସୁନିରଇବା ସବୁ ଲକ୍‌ମନ୍ କାବା ଅଇକରି, ମନେ ମନେ ବାବ୍‌ଲା, ତେବେ ଏ ପିଲା କାଇଟା ଅଇସି ? କାଇକେବଇଲେ ମାପ୍‌ରୁର୍ ବପୁ ପିଲାସଙ୍ଗ୍ ଆଟେ ବଲି ସବୁକେ ଜାନାପଡ଼ଲା ।

ଜିକରିୟ ବବିସଡ଼ବକ୍‌ତାର୍ କାତା

୨୭ ଆରି ଜଅନ୍‌ର ବାବା ଜିକରିୟ ସୁକଲ୍ ଆଡ଼ମାଇ ପୁରାପୁରୁନ୍ ଅଇ ପର୍‌ମେସର୍‌ର କବର୍ କଇବାର୍ ଦାର୍‌ଲା ।

୨୮ “ଆସା ଆମେ ଇସ୍ରାଏଲର୍ ମାପ୍‌ରୁକେ ଦନିଅବାଦ୍ ଦେଉ

କାଇକେବଇଲେ ସେ ତାର୍ ନିଜର୍ ଲକ୍‌ମନ୍‌କେ ଦୟାକରି ମୁକ୍‌ଲାଇସି ।

୨୯ ତାର୍ ନିଜର୍ ଗତିଦାଙ୍ଗ୍‌ତା ଦାଉଦର୍ କୁଟୁମେ ଅନି

ଆମର୍ ପାଇ ଗଟେକ୍ ବପୁ ସଙ୍ଗର୍ ଉଦାର୍‌କାରିଆକେ ଦେଲା ଆଟେ ।

୩୦ ପୁରବ୍ କାଲେଅନି ସୁକଲ୍ ରଇବା ନିଜର୍ ବବିସଡ଼ବକ୍‌ତାମନ୍‌ର୍ ଟଣ୍ଟେଅନି କାତା ଦେଇ ଜେନ୍ତି କଇରଇଲା,

୩୧ ସେନ୍ତାରି ଆମ୍‌କେ ଇନ୍ କର୍‌ବା ସବୁ ସଡ଼ରୁମନ୍‌ର୍ ଟାନେଅନି ମୁକ୍‌ଲାଇ ଆଟେ ।

୩୨ ଜେନ୍ତି ସେ ଆମର୍ ଆନିଦାଦିମନ୍‌ପାଇ ଦୟା ଦେକାଇଆଟେ, ଆରି ସେମନ୍‌ର୍ ସଙ୍ଗ୍ କରିରଇବା ନିଜର୍ ସୁକଲ୍ ନିୟମ୍ ଏତାଇ ଆଟେ,

୩୩ ଆମର୍ ପୁରବର୍ ବାବା ଅବ୍ରାଆମ୍‌କେ ଜନ୍ କାତା ଦେଇରଇଲା ।

୩୪ ଆରି ଜେନ୍ତାରିକି ସଡ଼ରୁର୍ ଆଡେଅନି ଉଦାର୍ ପାଇ ଆଟୁ ।

୩୫ ଜେନ୍ତାରିକି ଆମେ ଜିବନ୍‌ସାରା ଦରମ୍ ସଙ୍ଗ୍, ସୁକଲ୍ ସଙ୍ଗ୍ ତାର୍ ସେବା କର୍‌ବାକେ, ଆମ୍‌କେ ଦୟା କର୍‌ସି ।

୩୬ ଏ ମର୍ ନୁନା, ତୁଇ ସବୁର୍ ଉପ୍‌ରେ ରଇବା ପର୍‌ମେସର୍‌ର୍ ଗଟେକ୍ ବବିସଡ଼ବକ୍‌ତା ବଲି ଡାକ୍‌ପୁଟା ଅଇସୁ । ତୁଇ ସେ ପାଟାଈରଇବା ଗଟେକ୍ ଦୁଡ଼ପାରା, ତାର୍‌ପାଇ ବାଟ୍ ତିଆର୍ କର୍‌ସୁ ।

୩୭ ପାପ୍‌ଟାନେଅନି କେମା ପାଇକରି ଜେନ୍ତି କି ଉଦାର୍ ଅଇବାଇ, ସେ କାତା ଜାନାଈବାକେ ଜାଇସୁ ।

୩୮ ଆମର୍ ପାଦ୍ ସାନ୍ତିର୍ ବାଟେ ଆନ୍‌ବାକେ, ଆମର୍ ପର୍‌ମେସର୍‌ର୍ ଆଲାଦର୍ ଦୟାର୍‌ଲାଗି, ଆମର୍‌ପାଇ ସର୍‌ଗେଅନି ବେଲ୍ ତାରାସି ।

୩୯ ସେ ପୁରାପୁରୁନ୍ ଆଲାଦର୍ ଦୟାର୍‌ଲାଗି ମାପ୍‌ରୁର୍ ଲକ୍‌ମନ୍‌କେ, ସେମନ୍‌ର୍ ପାପ୍‌ଟାନେଅନି ମୁକ୍‌ଲାଇବା ଗିଆନ୍ ଦେଇସୁ । ତାର୍ ବାଟ୍ ତିଆର୍ କର୍‌ବାକେ ମୁଲିଆଇସୁ ।”

୮୦ ଆରି ଜଅନ୍ ବଡ଼କରି ଆଡ଼ମାଇ ବପୁ ଅଇଲା ଆରି ଲକ୍‌ମନ୍‌ର୍ ଟାନେ ଜାନାଇ ନ ଅଇକରି କିନରା ଜାଗାମନ୍‌କେ ରଇତେ ରଇଲା । ପଟେ ସେ ଇସ୍ରାଏଲର୍ ଲକ୍‌ମନ୍‌ର୍‌ଟାନେ ବାକିଅ ସୁନାଇବାର୍ ଦାର୍‌ଲା ।

୨

ଜିସୁର୍ ଜନମ୍  
(ମାଡିଉ ୧:୧୮-୨୫)

୧ ସେବେଲେ ରମିୟ ରାଇଜର୍ ବଡ଼ ସାସନ୍ କାରିଆ ଅଗସଟ କାଇସରର୍ ଆଦେସ୍ ଇସାବେ ସବୁଲକ୍‌କେ ନାଉଁ ଲେକାଇବାର୍ ଅଇଲା । ୨ କିରିଣିୟ ନାଉଁର୍ ସାସନ୍ କାରିଆ ସିରିଆ ରାଇଜ୍ ସାସନ୍ କର୍ବା ବେଲେ ପର୍‌ତୁମ୍ ତର୍ ଏନ୍ତାରି ନାଉଁ ଲେକା ଅଇରଇଲା । ୩ ସେଟାର୍‌ପାଇ ବଲି ସବୁଲକ୍ ନାଉଁ ଲେକାଇବାକେ ନିଜର୍ ନିଜର୍ ନଅରେ ଗାଲାଇ ।

୪ ଆରି ଜସେପ୍ ମିସା ନାଉଁ ଲେକାଇବାକେ ମରିୟମର୍ ସଙ୍ଗ୍ ଗାଲିଲି ରାଇଜର୍ ନାଜରିତ୍ ନାଉଁର୍ ଗଟେକ୍ ନଅରେ ଅନି ଜିଉଦା ରାଇଜର୍ ବେଡଲିଇମ୍ ବଲି ଦାଉଦ୍ ରାଜାର୍ ଜନମ୍ ନଅରେ ଗାଲାଇ । କାଇକେବଇଲେ, ଜସେପ୍ ଦାଉଦ୍ ବସ୍‌ର୍ ଆରି ସେ କୁଟୁମର୍ ଲକ୍ ରଇଲା । ୫ ତାର୍‌ସଙ୍ଗ୍ ମରିୟମର୍ ବିବା ମାଙ୍ଗନ୍ ଅଇରଇଲା, ଆରି ମରିୟମ୍ ଗାଗ୍‌ଡେ ଅଇରଇଲା । ୬ ଜସେପ୍ ଆରି ମରିୟମ୍ ବେଡଲିଇମେ ରଇଲାବେଲେ, ମରିୟମର୍ ଆଡ଼ଗଡ଼ ସୁକ୍ ଅଇବା ଦିନ୍ କେଟି ଆଇଲା । ୭ ଆରି ମରିୟମ୍ ତାର୍ ପଣ୍ଡୁଆ ପିଲାକେ ତେଇ ଜନମ୍‌ଦେଲା, ଆରି ତାକେ ଲୁଗାସଙ୍ଗ୍ ଗୁଡ଼ିଆଇକରି ଗରୁସାଲର୍ ଡଙ୍ଗାକୁଣ୍ଡେ ଡୁଲାଇରଇଲା, କାଇକେବଇଲେ ସେମନ୍‌କେ ରଇବାପାଇ ବାସାଗରେ ଟାନ୍ ନି ରଇଲା ।

ମେଣ୍ଡା ଗଉଡ଼ମନ୍ ଜିସୁର୍ ଜନମ୍ କବର୍ ସୁନ୍‌ଲାଇ

୮ ବେଡଲିଇମ୍ ଲଗେ କେତେଟା ମେଣ୍ଡା ଚାରାଉ ଗଉଡ଼ମନ୍ ସେ ରାତିଆ ପଦାଇ ରଇ ତାକର୍ ମେଣ୍ଡା ଗଟାନ୍ ଜାଗତେରଇଲାଇ । ୯ ଆରି ଏଦେ ଦେକା ! ମାପ୍‌ରୁର୍ ଦୁଡ଼ ଗଟେକ୍ ଆସି ସେମନ୍‌ର୍ ଲଗେ ଚିଆଅଇଲା, ଆରି ମାପ୍‌ରୁର୍ ମଇମାର୍ ଉଜଲ୍ ତାକର୍ ଚାରିବେଡ଼ି ଜଲ୍‌ସିଗାଲାଜେ ଗଉଡ଼ମନ୍ ବେସି ଡରିଗାଲାଇ । ୧୦ ତେଇ ଦୁଡ଼ ସେମନ୍‌କେ କଇଲା, “ତରାମା ! ଦେକା ମୁଇ ସବୁଲକ୍‌ର୍‌ପାଇ ଗଟେକ୍ ବେସି ସାର୍‌ଦାର୍ କବର୍ ତମ୍‌କେ ଜାନାଇଲିନି, ଜନ୍‌ଟାକି ସବୁଲକ୍‌ର୍‌ପାଇ ସାର୍‌ଦାର୍ ବିସଇ ଅଇସି । ୧୧ କାଇକେବଇଲେ, ଆଜିସେ ଦାଉଦ୍ ରାଜାର୍ ଜନମ୍ ନଅରେ ତମ୍‌ର୍‌ପାଇ ଗଟେକ୍ ଉଦାର୍‌କାରିଆ ଜନମ୍‌କଲା ଆତେ, ସେ କିରିସ୍ଟ ମାପ୍‌ରୁ । ୧୨ ଆରି ତମ୍‌ର୍‌ପାଇ ବଲି ଏଟା ଗଟେକ୍ ଚିନ୍‌ପାରା ଅଇସି, ତମେ ଲୁଗା ଗୁଡ଼ିଆଇକରି ଗଟେକ୍ ପିଲା ଗରୁସାଲର୍ ଡଙ୍ଗାଇ ଡୁଲାଇ ରଇବାଟା କଜି ମିଲାଇସା ।”

୧୩ ସେଡ଼କିବେଲେ ଅଟାଡ଼ ସର୍‌ଗେଅନି ଦୁଡ଼ମନ୍ ମାନ୍‌ଆଇ, ସେ ସରଗର୍ ଦୁଡ଼ଟାନ୍ କେଟି ପର୍‌ମେସର୍‌କେ ସୁମର୍‌ନା କର୍‌ବାର୍ ଦାର୍‌ଲାଇ ।

୧୪ “ସର୍‌ଗେ ରଇବା ପର୍‌ମେସର୍‌ର୍ ଜୟ ଜୟ କରୁ, ଆରି ଦର୍‌ତନିଟାନ୍ ରଇବା ଜନ୍ ଲକ୍‌ମନ୍‌କେ ପର୍‌ମେସର୍ ବାଡ଼ଲାଆତେ ସେମନ୍‌କେ ସାନ୍ତି ମିଲ ।”

୧୫ ଦୁଡ଼ମନ୍ ମେଣ୍ଡା ଚାରାଉ ଗଉଡ଼ମନ୍‌କେ ଚାଡ଼ି ସର୍‌ଗେ ଉଟିଗାଲା ପତେ, ଗଉଡ଼ମନ୍ ତାକର୍ ତାକର୍ ବିଡ଼ରେ କୁଆବଲା ଅଇବାର୍ ଦାର୍‌ଲାଇ, “ଆସା ଆମେ ସବୁ ବେଡଲିଇମ୍ ଜାକ ଜାଇକରି, ପର୍‌ମେସର୍ ଜାନାଇରଇଲା ବିସଇ ଦେକୁ ।”

୧୬ ତେଇଅନି ସେମନ୍ ଦାପ୍‌ରେ ଜାଇ କଜିକରି ମରିୟମ୍, ଜସେପ୍ ଆରି ଗରୁସାଲର୍ ଡଙ୍ଗାଇ ପିଲା ଡୁଲିରଇଲାଟା ଦେକ୍‌ଲାଇ । ୧୭ ସେମନ୍ ପିଲାକେ ଦେକିକରି, ଦୁଡ଼ ଜାଇ ଜାଇଟା କଇରଇଲା, ତେଇ ରଇଲା ସବୁଲକ୍‌କେ କଇଲାଇ । ୧୮ ଆରି ଜେଡ଼କି ଲକ୍ ତେଇ ରଇଲାଇ ଗଉଡ଼ମନ୍‌ର୍ ଟାନ୍‌ଅନି ସେ ସବୁ କାତା ସୁନି କାବା ଅଇଗାଲାଇ । ୧୯ ମାତର୍ ମରିୟମ୍ ଏ ସବୁ କାତା ନିଜର୍ ମନେ ସଙ୍ଗାଇ, ସେ ବିସଇସେ ଚିନ୍ତା କର୍‌ବାର୍ ଦାର୍‌ଲା । ୨୦ ଆରି ମେଣ୍ଡା ଚାରାଉମନ୍‌କେ ଦୁଡ଼ ଜେଡ଼ି କଇରଇଲା, ସେନ୍ତା ସୁନ୍‌ଲାଇ ଆରି ଦେକ୍‌ଲାଇ । ସେ ସବୁର୍‌ଲାଗି ପର୍‌ମେସର୍‌ର୍ ମଇମା କରି କରି ବାଅଡ଼ଲାଇ ।

ଜିସୁକେ ପର୍‌ମେସର୍‌ର୍ ଗରେ ନେଲାଇ

୨୧ ✠ଆର୍ ଦିନ୍ ଅଇଲାପତେ ଜିଉଦିମନର୍ ନିୟମ୍ ଇସାବେ ପିଲାକେ ସୁନତ୍ କରବାକେ ମନ୍ଦିରେ ନେଲା । ଆରି ପିଲାର୍ ନାଉଁ ଜିସୁ ବଲି ଦିଆଅଇଲା । ଏ ନାଉଁ ମରିୟମ୍ ଗାଗଡେ ନ ଅଇତେ, ସର୍ଗର୍ ଦୁଡ୍ କଇରଇଲା ।

୨୨ ପତେ ଜେଡେବଲ୍ ମସାର୍ ବିଦି ଇସାବେ, ଜସେପ୍ ଆରି ମରିୟମର୍ ସୁତକ୍ ଅଇରଇବା ବେଲା ପୁରୁନ୍ ଅଇଆଇଲା, ପିଲାକେ ପର୍ମେସରକେ ସର୍ପି ଦେବାକେ ଜିରୁସାଲାମ୍ ମନ୍ଦିରେ ନେଲା । ୨୩ ମାପୁରୁର୍ ଲେକା ଅଇରଇବା ସାସ୍ତର୍ ଇସାବେ, ସେ ବେଲେ ଜନ୍ ଗରେ ମିସା, ପର୍ତୁମ୍ ଜନମ୍ ଅଇଲା ପଣ୍ଡୁଆ ପିଲାମନ୍ ପର୍ମେସରର୍ ସେବାର୍ ପାଇ ସର୍ପି ଅଇବାଇ ବଲି ମାନ୍ତେ ରଇଲା । ୨୪ ଜସେପ୍ ଆରି ମରିୟମ୍ ଜିସୁକେ ଲେକା ଅଇରଇବା ସାସ୍ତର୍ ଇସାବେ ପର୍ମେସରକେ ସର୍ପି ଦେବାକେ ଆରି ସୁକଲ୍ ଅଇବା ବିରୁପାଇ ଦୁଇଟା ପରୁଆ ପିଲା ଦାରି ଜିରୁସାଲାମ୍ ଗାଲା ।

ସିମିୟନ୍ ଆରି ଆନା ଜିସୁକେ ଦେକ୍ଲାଇ

୨୫ ସେବେଲେସେ ଜିରୁସାଲାମେ ସିମିୟନ୍ ନାଉଁର୍ ଗଟେକ୍ ଦରମ୍ ଲକ୍ ରଇଲା । ସେ ମାପୁରୁ ଦେକ୍ବା ଇସାବେ ନିମାନ୍ ଲକ୍ । ଇସ୍ରାଏଲ୍ ଦେସେ ଉଦାରକାରିଆ ଆସି ସାନ୍ତି ଦେଅ ବଲି ଜାଗିରଇଲା । ଆରି ତାର୍ଟାନେ ସୁକଲ୍ ଆଡ଼ମା ବାସାଅଇରଇଲା । ୨୬ ସୁକଲ୍ ଆଡ଼ମା ତାକେ ଜାନାଇଦେଇରଇଲା ଜେ, ପର୍ମେସର୍ ପାଟାଇରଇବା ଉଦାରକାରିଆର୍ ଦର୍ସନ୍ ନ ମିଲ୍ବାଜାକ ତାର୍ ମରନ୍ ନ ଅଏ । ୨୭ ତାକେ ଆଡ଼ମା ଚାଲାଇ ଆନ୍ଲାଜେ ସେ ଦେଉଲର୍ ଡାଣ୍ଡେ ଆଇଲା, ଆରି ଜେଡେବଲ୍ ସାନ୍ପିଲା ଜିସୁର୍ ଆୟା ବାବା ତାକେ ବିଡ଼ରେ ଆନ୍ଲାଇ,

୨୮ ସେଡ଼କିବେଲେ ସିମିୟନ୍ ସାନ୍ପିଲାକେ କଲେ ଦାରି ପର୍ମେସରର୍ ମଇମା କରି କଇଲା,

୨୯ “ଏ ମାପୁରୁ ! ଏବେ ତୁଇ ନିଜର୍ ବାକିଅ ଇସାବେ

ତର୍ ନିଜର୍ ଦାସ୍ ମକେ ସାନ୍ତିସଙ୍ଗ୍ ଜିବାକେ ଦେଲୁସ୍ତି !

୩୦ କାଇକେବଇଲେ ମର୍ ଆଁକି ତର୍ ଉଦାର୍ ଦେକି ଆତେ,

୩୧ ଜନ୍ ଉଦାରକାରିଆକେ ତମେ ସବୁଲକ୍ ମୁଆଟେ ପାଟାଇ ଆଗାସ୍ ।

୩୨ ଆରି ବିଜାତି ଲକ୍ମନର୍ପାଇ ବଲି ଜାନାଇଅଇଲା ସତର୍ ଉଜଲ୍

ଆରି ତମର୍ ଲକ୍ମନ୍ ଇସ୍ରାଏଲର୍ ମଇମା କରି ଆଗାସ୍ ।”

୩୩ ସିମିୟନର୍ଟାନେଅନି ଜିସୁର୍ ବିସଇର୍ କାତା ସୁନି ଜସେପ୍ ଆରି ମରିୟମ୍ କାବାଅଇ ଜାଇତେ ରଇଲା । ୩୪ ଆରି ସିମିୟନ୍ ସେଲକ୍କେ ଆସିର୍ବାଦ୍ ଦେଇ ଜିସୁର୍ ମାକେ କଇଲା, “ଏ ପିଲା ଇସ୍ରାଏଲ୍ ଦେସର୍ କେତେ କେତେ ଲକ୍ ଉବଜ୍ବାଟା ଆରି କେତେ କେତେ ଲକ୍ ବୁଡିଜିବାର୍ପାଇ ବଲି ପର୍ମେସର୍ ବାତି ପାଟାଇଲା ଲକ୍ ଅଇସି । କେତେ କେତେ ଲକ୍ମନ୍ ତାର୍ ବିରୁଦେ କଇବା, ଗଟେକ୍ ତିନ୍ ପାରା ଅଇସି । ୩୫ କେତେ କେତେ ଲକ୍ ତାକେ ବିରଦ୍ କରି ନିଜର୍ ମନ୍ ବିଡ଼ରର୍ କାତା ସବୁ ଜାନାଇବାଇ । ଆରି ତମର୍ ଜିବନେ ଗଟେକ୍ କାଣ୍ଡା ବୁସିଅଇରଇଲାପାରା ତମ୍କେ ବେସି ଦୁକ୍ ଆଇସି ।”

୩୬ ସେ ଦାପୁରେ, ଏଦେ ଦେକା ! ଆନା ନାଉଁର୍ ଗଟେକ୍ ମାଇଜି ବବିସଡ଼ବକ୍ତା ତାକର୍ ଲଗେ ଆଇଲା । ସେ ଆସେର୍ ବସର୍ ପିନ୍ଧୁଲ୍ ଟକି, ସେ ବେସି ଡକ୍ରି ଅଇଜାଇରଇଲା । ବିବା ଅଇ ମୁନ୍ସ ସଙ୍ଗ୍ ସାଡ଼ ବରସ୍ ରଇକରି, ରାଣ୍ଡି ଅଇଗାଲା । ଆରି ତାକେ ଚାରିକଡ଼ିଚାରି ବରସ୍ ଅଇରଇଲା । ୩୭ ସେ ଦେଉଲେଅନି କେନେ ନ ଜାଇ, ଉପାସ୍ ରଇକରି ଦିନ୍ ରାତି ମାପୁରୁର୍ ଉପାସନା କର୍ତେରଇଲା । ୩୮ ପିଲାକେ ମାପୁରୁଟାନେ ସର୍ପି ଦେବାବେଲେ ସେ ଦେଉଲର୍ ଡାଣ୍ଡେ କେଟି,

ପରଫେସରର୍ ମଇମା କରକରି ଜନ୍ ଲକ୍ମନ ଜିରୁସାଲମର୍ ମୁକ୍ତି ମିଲ ବଲି ଜାଗ୍‌ତେରଇଲାଇ, ସେ ଲକ୍ମନକେ ପିଲାର୍ ବିସଇ କଇବାର୍ ଦାରଲା ।

ଜସେପ୍ ଆରି ମରିୟମ୍ ନାଜରିତେ ବାଅଡ଼ଲାଇ

୩୯ \*ପତେ ଜସେପ୍ ଆରି ମରିୟମ୍ ମାପୁରୁର୍ ରିତିନିତି ଇସାବେ କରବା ସବୁ କାମ୍ ସାରାଇ, ଗାଲିଲି ନିଜର୍ ନଅର୍ ନାଜରିତେ ବାଅଡ଼ଲାଇ । ୪୦ ଆରି ପିଲା ଦିନକେ ଦିନ ବଡ଼କରି ବପୁଅଇଲା, ଆରି ଗିଆନେ ପୁରାପୁରୁନ୍ ଅଇଲା । ତାକେ ପରଫେସରର୍ ଦୟା ରଇଲା ।

ସାନ୍ ପିଲା ଜିସୁ ଦେଉଲେ ରଇବାଟା

୪୧ ଜିସୁର୍ ବାବା, ମା ସବୁବରସେ ଜିଉଦିମନର୍ ନିସ୍ତାର୍ ପରବ୍ ପାଇ ଜିରୁସାଲମେ ଜାଇତେରଇଲାଇ । ୪୨ ତରେକ୍ ଜିସୁକେ ବାର ବରସ୍ ଅଇଲାବେଲେ ସେମନର୍ ରିତିନିତି ଇସାବେ ଜିରୁସାଲମେ ପରବ୍ ମାନବାର୍ ଗାଲାଇ ।

୪୩ ସେମନ୍ ପରବ୍ ସାରାଇ ବାଉଡ଼ି ଆଇଲାବେଲେ, ପିଲା ଜିସୁ ଜିରୁସାଲମେ ରଇଗାଲା । ମାତର୍ ତାର୍ ବାବା ମାଆ ମିସା ସେ ତେଇ ରଇଲାଟା ଜାନି ନ ରଇଲାଇ । ୪୪ ତାର୍ ସଙ୍ଗର୍ ଲକ୍ମନର୍ ସଙ୍ଗ୍ ଆଟେ କାଇକି ବଲି ବାବକରି ସେମନ୍ ଗଟେକ୍ ଦିନର୍ ବାଟେ ଇଣ୍ଟି ଉଟି ଜାଇରଇଲାଇ । ସେମନ୍ ସାଇପଡ଼ିସା, ତିନାର୍ ଜାନାର୍ ଲକ୍ମନକେ ପାଚାରି କଇଲାଇ । ୪୫ ତିସେନାଇକେ ଆରି କଜି କଜି ଜିରୁସାଲମେ ବାଉଡ଼ିଗାଲାଇ । ୪୬ ତିନ୍ଦିନ୍ ପତେ ସେମନ୍ ତାକେ ମନ୍ଦିରେ ଦେକ୍ଲାଇ, ସେ ସାସ୍ତର୍ ସିକାତମନର୍ ମଜାଇ ବସି, ତାକର୍ କାତା ସୁନ୍‌ତେରଇଲା, ଆରି ପର୍ସନ୍ ପାଚାର୍‌ତେରଇଲା । ୪୭ ଆରି ତେଇ ଜେଡ଼କି ଲକ୍ ତାର୍ କାତା ସୁନ୍‌ତେରଇଲାଇ, ସବୁଲକ୍ ସେ କାତା ଅଇବାଟା ଆରି ତାର୍ ବୁଦି ଦେକି କାବାଅଇ ଜାଇତେରଇଲାଇ । ୪୮ ଜସେପ୍ ଆରି ମରିୟମ୍ ମିସା ଜିସୁକେ ଦେକି କାବା ଅଇଗାଲାଇ, ଆରି ତାର୍ ମାଆ ତାକେ କଇଲା, “ତୁଇ କାଇକେ ନୁନା ଆମ୍‌କେ ଏନ୍ତାରି କଲୁସ୍ ? ଦେକ୍‌ନି ତର୍ ବାବା ଆରି ମୁଇ କେତେକ୍ କିଲ୍‌ବିଲ୍ ଅଇ କଇଲୁନି ।”

୪୯ ତେଇ ଜିସୁ ସେମନ୍‌କେ କଇଲା, “କାଇକେ ମକେ କଇତେରଇଲାସ୍ ? ମର୍ ବାବାର୍ ଗରେ ମୁଇ ରଇବାର୍ ଆଟେଆକା, ଏଟା ନାଜାନି ରଇଲାସ୍ କି ?” ୫୦ ମାତର୍ ଜିସୁ ସେମନ୍‌କେ ଜନ୍ କାତା କଇଲା, ସେଟା ସେମନ୍ ବୁଜିନାପାରଲାଇ ।

୫୧ ପତେ ଜିସୁ ତାର୍ ବାବା ମାଆ ସଙ୍ଗ୍ ନାଜରିତେ ବାଉଡ଼ି ଆଇଲା ଆରି ତାକର୍ କାତା ମାନ୍‌ତେରଇଲା, ମରିୟମ୍ ମିସା ଏ ସବୁ କାତା ନିଜର୍ ମନ୍ ବିତ୍‌ରେ ସଙ୍ଗ୍‌ଇ ତିନ୍ତା କଲା । ୫୨ ଜିସୁ, ଗିଆନେ, ଗାଗ୍‌ତେ, ପରଫେସର୍ ଆରି ଲକ୍ମନର୍ ଦୟାଇ ବଡ଼ିଆଇଲା ।

## ୩

ତୁବନ୍ ଦେଉ ଜଅନ୍ କଇବା ନିକ କାତା

(ମାତିଉ ୩:୧-୧୨; ମାର୍କ ୧:୧-୮; ଜଅନ୍ ୧:୧୯-୨୮)

୧ ବଡ଼ ସାସନ୍‌କାରିଆ ତିବିରିଆ କାଇସର୍ ସାସନ୍ କରବା ପନ୍‌ର ବରସ୍ ଅଇଲାବେଲେ, ପାନ୍ତ୍ରୟ ପିଲାଡ଼ ଜିଉଦା ରାଇଜ୍ ସାସନ୍ କର୍‌ତେରଇଲା । ଆରି ଏରଦ୍ ଗାଲିଲିର୍ ସାସନ୍‌କାରିଆ ରଇଲା । ଏରଦର୍ ବାଇ ପିଲିପ୍ ଇଡୁରିଆ ଆରି ତାକ୍‌ନିଡ଼ ରାଇଜର୍ ସାମନ୍ତ ରାଜା ରଇଲା । ଲୁସାନିଆ ନାଉର୍ ଗଟେକ୍ ଲକ୍ ଅବିଲିନି ରାଇଜର୍ ସାମନ୍ତ ରାଜା ରଇଲା । ୨ ଆନାନ୍ ଆରି କୟାପ୍ ନାଉର୍ ତୁଇ ଲକ୍ ବଡ଼ ପୁଜାରି ରଇଲାଇ । ସେବେଲେ ଜିକରିୟର୍ ପଅ ଜଅନ୍, ମରୁବାଲି ବୁର୍‌ ରଇଲାବେଲେ ପରଫେସରର୍ କାତା ସେ ସୁନ୍‌ଲା । ୩ ଜର୍‌ଦନ୍ ଗାଡ଼ ଲଗେ ରଇବା

ଲଗତ୍ ପାକର୍ ଗାଉଁଶଶୁଣ୍ଠା ଲାଜ ଜଅନ୍ ପାପ କେମାନ୍ ଲାଗି, ପାପକାମ୍ ଚାଡ଼ିକରି ମାପ୍‌ରୁର୍ ବାଟେ ଆସି ତୁବନ୍ ନେବାକେ ଜାନାଇବାର୍ ଦାରିଲା ।

୪ ଜେନ୍ତାରି ଜିୟାୟ ବବିସତ୍‌ବକ୍ତା ସୁନାଇରଇବା ସାସ୍ତରେ ଲେକା ଅଇଲାଆଟେ, “ମରୁବାଲିବୁଏଁ ଆଉଲିଅଇ କଇବା ଗଟେକ୍ ଲକ୍ ସବଦ୍ କରି କଇଲାନ୍ତି, ମାପ୍‌ରୁ ଆଇବାଟା ତିଆରକରା, ତାର୍ ଆଇବା ବାଟ୍ ସଲ୍‌କାଆ ।

୫ ବଡ଼ ବଡ଼ ତଙ୍ଗର୍ ପର୍ବତ୍ ସବୁ ସଦରମ୍ ଅଇକରି ଗାଡ଼ କଣ୍ଡି କଣ୍ଡି ରଇବା ଆଁଟାଲ୍ ବୁଟାଲ୍ ସାର୍‌ଦି ଅଇସି, ବାଁକ୍ ଟେକ୍ ବାଟ୍ ସଲ୍‌କ୍ ଅଇସି, ଆରି କାଲ୍ ତେପ୍ ଜମି ସଦରମ୍ ଅଇଜାଇସି ।

୬ ମତ୍‌ପୁରର୍ ସବୁଲକ୍ ପର୍‌ମେସରର୍ ଉଦାରିକାରିଆକେ ଦେକ୍‌ବାଇ ।”

୭ \*ଜଅନ୍‌ଟାନ୍‌ନେ ତୁବନ୍ ନେବାରିଲାଗି ବାରଇ ଆଇବା ଲକ୍‌ମନ୍‌କେ ସେ କଇଲା, “ଏ ବିସ୍ ରଇଲା ସାଁପର୍ ବସ୍‌ର୍ ଲକ୍‌ମନ୍, ଆଇବା ପର୍‌ମେସରର୍ କପେଅନ୍ତି ପାଲାଇବାକେ ତମ୍‌କେ କେ ଚେଡ଼ନା ଦେଲା ? ” \*ତେବର୍‌ପାଇ ପାପକାମ୍ ଚାଡ଼ି ନିକ କାମ୍ କରା, ଅବରାଆମ୍‌ତା ଆମର୍ ଆନିଦାଦି ବଲି ମନେ ମନେ ବାବାନାଇ, କାଇକେବଇଲେ ମୁଇ ତମ୍‌କେ କଇଲିନ୍ତି, ପର୍‌ମେସର୍ ଏ ପାକ୍‌ନାମନ୍‌ଟାନ୍‌ନେଅନ୍ତି ମିସା ଅବରାମର୍ ପିଲାଜିଲା ଉଦ୍‌ଜାଇ ପାର୍‌ସି । ୮ \*ଏବେମିସା ଗର୍‌ମନ୍‌ର୍ ବୁନ୍‌ଦେ କୁରାଡ଼ି ଲାଗିଆଟେ, ତେବର୍‌ପାଇ ଜନ୍ ଗଟ୍ ନିମାନ୍ ପଲ୍ ନ ପଲେ, ସେଟା କାଟିକରି ଜଇଟାନ୍‌ନେ ପିଙ୍ଗାଅଇସି ।”

୧୦ ତେଇ ଲକ୍‌ମନ୍ ଜଅନ୍‌କେ ପାଚାରିଲାଇ, “ସେନ୍ତାରି ଆଲେ ଆମେ କାଇଟା କର୍‌ବୁ ?”

୧୧ ଜଅନ୍ ସେମନ୍‌କେ କଇଲା “ଜାର୍‌ଟାନ୍‌ନେ ଦୁଇଟା ପିନ୍‌ବା ଲୁଗା ଆଟେ, ଜାକେ ନାଇ, ତାକେ ସେ ଗଟେକ୍ ଦେଅ, ଆରି ଜାର୍‌ଟାନ୍‌ନେ କାଦି ଆଟେ, ସେ ମିସା ସେନ୍ତାରି ବାଟା କରି ଦେଅ ।”

୧୨ \*ସିସ୍‌ତୁମାଙ୍ଗୁମନ୍ ମିସା ତୁବନ୍ ନେବାକେ ଆସି ତାକେ ପାଚାରିଲାଇ “ଏ ଗୁରୁ ଆମେ କାଇଟା କର୍‌ବୁ ?”

୧୩ ଜଅନ୍ ସେମନ୍‌କେ କଇଲା, “ତମର୍ ଜେଡ଼କି ନେବାର୍ ଅଦିକାର୍ ଆଟେ, ତାର୍‌ତେଇଅନ୍ତି ଅଦିକ୍ ମାଙ୍ଗା ନାଇ ।”

୧୪ ସନିଅମନ୍ ମିସା ତାକେ ପାଚାରିବାର୍ ଦାରିଲାଇ, “ଆରି ଆମେ କାଇଟା କର୍‌ବୁ ?”

ଜଅନ୍ ସେମନ୍‌କେ କଇଲା, “ବପୁ ଦେକାଇ କାଇଟା ମିସା ଜିକି ଆନା ନାଇ କି ନାଡାଇକରି କାର୍ ଦନ୍‌ସିପତି ଆନା ନାଇ, ତମ୍‌କେ ଜେଡ଼କି କୁଲି ମିଲ୍‌ଲାନ୍ତି ସେଡ଼କି ନେଇକରି ସାର୍‌ଦା ସଙ୍ଗ୍ ରୁଆ ।”

୧୫ ଲକ୍‌ମନ୍ ଆସାଅଇ କିରିସ୍‌ଟେକେ ଜାଗ୍‌ତେ ରଇଲାଇ ଜେ, କେତେବେଲେ ଏ ମିସା କିରିସ୍‌ଟେ ଅଇରଇସି ବଲି ବାବି, ଜଅନ୍‌ର୍ ବିସଇ ଚିନ୍ତା କର୍‌ତେରଇଲାଇ । ୧୬ ତେବେ ଜଅନ୍ ସବୁଲକ୍‌ମନ୍‌କେ କଇଲା, “ମୁଇସିନା ତମ୍‌କେ ପାନିଟାନ୍‌ନେ ତୁବନ୍ ଦେଲିନ୍ତି, ମାତର୍ ମର୍‌ଟାନ୍‌ନେଅନ୍ତି ଅଦିକ୍ ବପୁର୍‌ଲକ୍ ଆଇଲାନ୍ତି, ମୁଇ ତାର୍ ଗତିଦାଙ୍ଗ୍‌ତା ଅଇ ପାଦର୍ ପାଣ୍ଡୁଇ ମିସା କୁସ୍‌ଲାଇବାକେ ମର୍ ଅଦିକାର୍ ନାଇ । ସେ ତମ୍‌କେ ଜଇସଙ୍ଗ୍ ଆରି ସୁକଲ୍ ଆଡ଼ମାଇ ତୁବନ୍ ଦେଇସି । ୧୭ ତାର୍ ଆଟେ କୁଲାଆଟେ, ତେବେ ସେ କଟାରେ ରଇଲା ଦାନ୍ ପରିଟଲ୍ କରି ଚୁଲିଆଇ

\* ୩:୭ ୩:୭ ମାଡ଼ିଇ ୧୨:୩୪:୨୩:୩୩ \* ୩:୮ ୩:୮ ଜଅନ୍ ୮:୩୩ \* ୩:୯ ୩:୯ ମାଡ଼ିଇ ୭:୧୯ \* ୩:୧୨ ୩:୧୨ ଲୁକ୍ ୭:୨୯

କଲ୍ଲକିଟାନେ ସଙ୍ଗଈସି । କାଇ କାମେ ନ ଆଇବାଟା ଜାକ ସବୁବେଲେ ଲାଗିରଇବା ଜଇଟାନେ ପଡାଇଦେଇସି ।”

<sup>୧୮</sup> ଜଅନ୍ ଏନ୍ତାରି କେତେକ୍ କେତେକ୍ ଉପଦେସ୍ ଦେଇକରି ଲକ୍ମନକେ ମାପ୍‌ରୁରବାଟେ ଆଇବାକେ ମନ୍ କରାଇତେରଇଲା ଆରି ମାପ୍‌ରୁର ନିକ କାତା ସୁନାଇତେରଇଲା ଆରି ପାପ୍ କରବାଟାନେଅନି ବାଅଡବାକେ ବୁଜାଇତେରଇଲା । <sup>୧୯</sup> \*ମାତର୍ ସାମନ୍ତ ରାଜା ଏରଦ୍ ନିଜର୍ ବାଇର୍ ମାଇଜି ଏରଦିଆକେ ସଙ୍ଗଇଲାକେ ତାର୍ କରରଇବା ବିନ୍ ବିନ୍ ପାପ୍‌କାମର୍ ବିସଇ ଜାନି ଜଅନ୍ ତାକେ ଦମ୍‌କାଇତେରଇଲା । <sup>୨୦</sup> ଏରଦ୍ ଜଅନ୍‌କେ ବନ୍ଦିକରି ସେ କରରଇବା ସବୁ ପାପ୍‌କାମର୍ ସଙ୍ଗ୍ ଏ ବଡ୍ ପାପ୍ ମିସା ଜଡ୍‌ଲା ।

ଜିସୁର ଡ୍ରବନ୍

(ମାତିଉ ୧୩:୧୭; ମାର୍କ ୧:୯-୧୧)

<sup>୨୧</sup> ସବୁଲକ୍ ଡ୍ରବନ୍ ନେଲା ପତେ ଜିସୁ ମିସା ଡ୍ରବନ୍ ନେଲା । ଆରି ପାର୍‌ତନା କରବାବେଲେ, ଏଦେ ଦେକା ! ବାଦଲ୍ ଉଗାଡିଅଇଗାଲା, <sup>୨୨</sup> \*ଆରି ସୁକଲ୍ ଆଡ୍‌ମା ପରୁଆର୍ ଗାଗଡ୍ ଦାରି ଉଡ୍‌ରି ଆସି, ଜିସୁର ଉପରେ ବସ୍‌ଲା । ସର୍‌ଗେଅନି ଗଟେକ୍ ଏନ୍ତାରି ସବଦ୍ ଆଇଲା, “ଡୁଇସେ ମର୍ ଆଲାଦର୍ ପିଲା, ତର୍‌ଟାନେ ମୁଇ ବେସି ସାର୍‌ଦା ଅଇଲିନି ।”

ଜିସୁର ଆନିଦାଦିମନର୍ ଇସାବ୍

(ମାତିଉ ୧:୧-୧୭)

<sup>୨୩</sup> ଜିସୁ ପର୍‌ମେସରର୍ କାମ୍ ଆରମ୍ କଲାବେଲେ ତାକେ ଡିରିସ୍ ବରସ୍ ଅଇରଇଲା । ଲକ୍ମନର୍ ବାବ୍‌ନା ଇସାବେ, ଜିସୁ ଜସେପର୍ ପଅ, ଜସେପ୍ ଏଲିର୍ ପଅ । <sup>୨୪</sup> ଏଲି ମଡ୍‌ତାତର୍ ପଅ, ମଡ୍‌ତାଡ୍ ଲେବିର୍ ପଅ, ଲେବି ମଲ୍‌କିର୍ ପଅ, ମଲ୍‌କି ଜନୟର୍ ପଅ, ଜନୟ୍ ଜସେପର୍ ପଅ, <sup>୨୫</sup> ଜସେପ୍ ମତିତିଆର୍ ପଅ, ମତିତିଆ ଅମସର୍ ପଅ, ଅମସ୍ ନାଉମର୍ ପଅ, ନାଉମ୍ ଏସ୍‌ମିର୍ ପଅ, ଏସ୍‌ମି ନଗୟର୍ ପଅ, <sup>୨୬</sup> ନଗୟ୍ ମଅତର୍ ପଅ, ମଅଡ୍ ମତିତିଆର୍ ପଅ, ମତିତିଆ ସମଇର୍ ପଅ, ସମୟ୍ ଜସେକର୍ ପଅ, ଜସେକ୍ ଜଦାର୍ ପଅ, <sup>୨୭</sup> ଜଦା ଜଅନର୍ ପଅ, ଜଅନ୍ ରେସାର୍ ପଅ, ରେସା ଜିରୁବାବେଲର୍ ପଅ, ଜିରୁବାବେଲ୍ ସିଅଲ୍‌ଡିଏଲର୍ ପଅ, ସଅଲ୍‌ଡିଏଲ୍ ନେରିର୍ ପଅ, <sup>୨୮</sup> ନେରି ମଲ୍‌କିର୍ ପଅ, ମଲ୍‌କି ଅଦିର୍ ପଅ, ଅଦି କସାମର୍ ପଅ, କସାମ୍ ଏଲୁଦାନର୍ ପଅ, ଏଲୁଦାନ୍ ଏରର୍ ପଅ, <sup>୨୯</sup> ଏର ଜିୟସୁଅର୍ ପଅ, ଜିୟସୁଅ ଏଲିଏଜର୍ ପଅ, ଏଲିଏଜ୍ ଜରିମର୍ ପଅ, ଜରିମ୍ ମଡ୍‌ତାତର୍ ପଅ, ମଡ୍‌ତାଡ୍ ଲେବିର୍ ପଅ, <sup>୩୦</sup> ଲେବି ସିମିୟନର୍ ପଅ, ସିମିୟନ୍ ଜିଉଦାର୍ ପଅ, ଜିଉଦା ଜସେପର୍ ପଅ, ଜସେପ୍ ଜନାମର୍ ପଅ, ଜନାମ୍ ଏଲିଆକିମର୍ ପଅ, <sup>୩୧</sup> ଏଲିଆକିମ୍ ମଲାଅର୍ ପଅ, ମଲାଅ୍ ମନାର୍ ପଅ, ମନା ମତତାର୍ ପଅ, ମତତା ନାତନର୍ ପଅ, ନାତନ୍ ଦାଉଦର୍ ପଅ, <sup>୩୨</sup> ଦାଉଦ୍ ଜିୟସୁଅର୍ ପଅ, ଜିୟସୁଅ ଆବେଦର୍ ପଅ, ଆବେଦ୍ ବୟଜର୍ ପଅ, ବୟଜ୍ ସେଲଅର୍ ପଅ, ସେଲଅ୍ ନଅସନର୍ ପଅ, <sup>୩୩</sup> ନଅସ୍ ଅମିନାଦାବର୍ ପଅ, ଅମିନାଦାବ୍ ଅଦ୍‌ମିନର୍ ପଅ, ଅଦ୍‌ମିନ୍ ଅର୍ନିର୍ ପଅ, ଅର୍ନିର୍ ଏସ୍‌ରନର୍ ପଅ, ଏସ୍‌ରନ୍ ପେରସର୍ ପଅ, ପେରସ୍ ଜିଉଦାର୍ ପଅ, <sup>୩୪</sup> ଜିଉଦା ଜାକୁବର୍ ପଅ, ଜାକୁବ୍ ଇସାକର୍ ପଅ, ଇସାକ୍ ଅବ୍ରାମର୍ ପଅ, ଅବ୍ରାଆମ୍ ତେରଥ୍‌ର୍ ପଅ, ତେରଥ୍‌ ନାଅର୍ ପଅ, <sup>୩୫</sup> ନାଅର୍ ସରୁଗର୍ ପଅ, ସରୁଗ୍ ରଗୁର୍ ପଅ, ରଗୁ ପେଲଗର୍ ପଅ, ପେଲଗ୍ ଏବର୍ ପଅ, ଏବ ସେଲଅର୍ ପଅ, <sup>୩୬</sup> ସେଲା କଇନାନର୍ ପଅ, କଇନାନ୍ ଆର୍‌ପାକ୍‌ସଡ୍‌ର୍ ପଅ, ଆର୍‌ପାକ୍‌ସେଡ୍‌ର୍ ସେ ମର୍ ପଅ, ସେମ୍ ନଅର୍ ପଅ, ନଅ ଲାମେକର୍ ପଅ, <sup>୩୭</sup> ଲାମେକ୍ ମିଡୁସେଲଅର୍ ପଅ, ମିଡୁସେଲଅ୍ ଅନକର୍ ପଅ,

\* ୩:୧୯ ୩:୧୯ ମାତିଉ ୧୪:୩,୪; ମାର୍କ ୭:୧୭,୧୮ \* ୩:୨୨ ୩:୨୨ ମାତିଉ ୩:୧୭; ମାର୍କ ୧:୧୧; ଲୁକ୍ ୯:୩୫



ଅନକ୍ ଜାରେଦର୍ ପଅ, ଜାରେଦ୍ ମଅଲେଲର୍ ପଅ, ମଅଲେଲ୍ କେନାନର୍ ପଅ  
 ୩୮ କେନାନ୍ ଏନସର୍ ପଅ, ଏନସ୍ ସେତର୍ ପଅ, ସେତ ଆଦମର୍ ପଅ, ଆଦମ୍  
 ପର୍ମେସରର୍ ପଅ ।

୪

ଜିସୁକେ ସଇତାନର୍ ପରିକା

(ମାତିଉ ୪:୧-୧୧; ମାର୍କ ୧:୧୨-୧୩)

୯ ଜିସୁ ସୁକଲ୍ ଆଡ଼ମାଲ ପୁରାପୁରୁନ୍ ଅଇକରି ଜର୍ଦ୍ଦନ୍ ଗାଡେଅନି ବାଉଡି  
 ଆଇଲା । ଆରି ସଇତାନର୍ ଟାନେ ପରିକା କରାଇବାକେ ତାକେ ଆଡ଼ମା ଚାଲାଇ  
 ନେଲା । ତେଇ ଚାଲିସ୍ ଦିନ୍ ଜାକ ସଇତାନ୍ ତାକେ ପରିକା କର୍ତେରଇଲା ।

୧୦ ସର୍ତେ ଦିନ୍ ସାରଲା ପଚେ ସେ ବୁକ୍‌କେ ବାୟାଚୁରା ଅଇଗାଲା ।

୩୧ ତେଇ ସଇତାନ୍ ଜିସୁକେ କଇଲା, “ତୁଇ ଜଦି ପର୍ମେସରର୍ ପ, ତେବେ ଏ  
 ପାକ୍‌ନା କାଦି ଅ ବଲି ଆଦେସ୍ ଦେସ୍ ।”

୪ ଜିସୁ ତାକେ କଇଲା, “ପର୍ମେସରର୍ ସାସ୍‌ତରେ ଲେକାଅଇ ଆଚେ, ମୁନୁସ୍  
 ଅବ୍‌କା କାଦି କାଇ ନ ବଠେ ।”

୫ ତାର୍‌ପଚେ ସଇତାନ୍ ଜିସୁକେ ଗଟେକ୍ ଉର୍ ଜାଗାଇ ତାକି ଦାରିଜାଇ କରି  
 ଆଁକିମିଟ୍‌କା ମାର୍‌ବା ଏଡକି ପର୍‌କେ ଜଗତର୍ ସବୁ ରାଇଜ୍ ଦେକାଇଲା । ୬ ଆରି  
 ଜିସୁକେ କଇଲା, “ମୁଇ ତକେ ଏ ସବୁ ଦନ୍ ସଁପତିର୍ ଅଦିକାର୍ ଆରି ମଇମା ଦେବି  
 । କାଇକେବଇଲେ ସେଟା ସବୁ ମକେ ସର୍‌ପିଦେଲାଆଚେ, ଆରି ମୁଇ ତାକେ ମନ୍  
 କରବି, ତାକେ ଦେବି । ୭ ତେବର୍‌ପାଇ, ଜେବେ ତୁଇ ମକେ ଜୁଆର୍ କର୍‌ସୁ, ତେବେ  
 ସେ ସବୁଜାକ ତର୍ ଅଇସି ।”

୮ ଜିସୁ ତାକେ କଇଲା, “ପର୍ମେସରର୍ ସାସ୍‌ତରେ ଲେକାଅଇଆଚେ, ତୁଇ ତର୍  
 ପର୍ମେସର୍କେସେ ଜୁଆର୍ କର୍‌ସୁ, ଆରି ତାକେସେ ସେବା କର୍‌ସୁ ।”

୯ ପଚେ ସଇତାନ୍ ଜିସୁକେ ଜିରୁସାଲାମେ ତାକିଦାରିଜାଇ, ମନ୍ଦିରର୍ ଚାଉନି  
 ଚିପେ ଚିଆକରାଇ କଇଲା, “ତୁଇ ଜଦି ପର୍ମେସରର୍ ପ, ତେବେ ଇଡିଅନି  
 ତଲେ ଡେଗଇଦେସ୍, ୧୦ କାଇକେବଇଲେ ସାସ୍‌ତରେ ଲେକାଆଚେ ତକେ ରକିଆ  
 କର୍‌ବାକେ ପର୍ମେସର୍ ତାର୍ ନିଜର୍ ଦୁଡ଼ମନ୍‌କେ ଆଦେସ୍ ଦେଇସି । ୧୧ ଆରି ମିସା  
 ଲେକା ଆଚେ, ‘ଜେଡ୍‌କି ତର୍ ପାଦ୍ ପାକ୍‌ନାଇ ନ ପାଏ, ସେଟାପାଇ ଦୁଡ଼ମନ୍ ତକେ  
 ଆଡେଦାରି ଟେକି ନେବାଇ ।”

୧୨ ଜିସୁ ସଇତାନ୍‌କେ କଇଲା, “ଏଟା ମିସା ଲେକାଆଚେ, ତୁଇ ତର୍ ମାପୁରୁ ନିଜର୍  
 ପର୍ମେସର୍କେ ପରିକା କର୍ ନାଇ ।”

୧୩ ସଇତାନ୍ ସବୁ ରକାମର୍ ପରିକା ସାରାଇଲା ପଚେ, ଆରି ତରେକ୍ ବେଲା  
 ମିଲ୍‌ବାଜାକ କେତେ ଦିନର୍ ପାଇ ଜିସୁକେ ଚାଡି ଉଟିଗାଲା ।

ଜିସୁର୍ ସେବା କାମ୍ ଆରାମ୍

(ମାତିଉ ୪:୧୨-୧୭; ମାର୍କ ୧:୧୪-୧୫)

୧୪ ତାର୍‌ପଚେ ଜିସୁ ଆଡ଼ମାଲ ବପୁଅଇକରି ଗାଲିଲି ରାଇଜେ ବାଉଡିଗାଲା ।  
 ଆରି ତାର୍ କବର୍ ଗାଲିଲି ରାଇଜର୍ ଗୁଲାଇ ଗାଉଁମନ୍ ଜାନ୍‌ଲାଇ । ୧୫ ପଚେ ଜିସୁ  
 ଜିଉଦିମନର୍ ପାର୍‌ତନା ଗର୍‌ମନ୍‌କେ ବୁଲି ବୁଲି ସିକିଆ ଦେଇକରି ସବୁ ଲକ୍‌ଟ୍‌ଗାନେ  
 ଅନି ତାକ୍‌ପୁଟା ପାଇବାର୍ ଦାରଲା ।

ଜିସୁକେ ନାଜରିତର୍ ଲକ୍ ନାମଡ଼ନାଇ

(ମାତିଉ ୧୩:୫୩-୫୮; ମାର୍କ ୬:୧-୬)

୧୬ ଏତ୍ତକିବିତ୍ତରେ ନାଜରିତେ, ଜନ୍ ଜାଗାଇ କି ଜିସୁ ସାନ୍‌ବେଲେ ଅନି ବଡ଼ ଅଇରଇଲା, ସେ ଜାଗାଇ ଗାଲା । ଆରି ନିଜର୍ ରିତିନିତି ଇସାବେ, ବିସ୍‌ରାମ୍ ବାରେ ଜିଉଦିମନର୍ ପାର୍ତନା ଗରେ କେଟି ଦରମ୍ ସାସ୍‌ତର୍ ପଡ଼ବାକେ ଚିଆ ଅଇଲା । ୧୭ ସେତ୍ତକିବେଲେ ତାକେ ଜିସାୟ ବବିସ୍‌ତ୍‌ବକ୍ତା ଲେକିରଇଲା ଦରମ୍ ସାସ୍‌ତର୍ ଦିଆଅଇଲା, ଆରି ଜିସୁ ସେ ଜିସାୟ ବଇଟାନେ ଲେକାଅଇରଇଲା ଏଣ୍ଡାରି ବାକିଅ ମେଲାକରି ପାଇଲା ।

୧୮ “ମାପୁରୁ ଆଡ଼ମା ମର୍ ସଙ୍ଗ୍ ଆଚେ,  
ତେବର୍‌ପାଇ ନଇଲା ମଇଲା ଲକ୍‌ମନର୍‌ଟାନେ ସୁବ୍ କବର୍ ଜାନାଇବାକେ,  
ପର୍‌ମେସର୍ ମକେ ବାଟିକରି ପାଟାଇଲା,

ବନ୍ଦି ଗରେ ରଇବା ଲକ୍‌ମନକେ ମୁକ୍‌ଲାଇବାକେ,  
କାଣା ଲକ୍‌ମନକେ ଦେକାଇବା ବିସଇ ଜାନାଇବାକେ ଆରି  
ଦୁକର୍ ଲକ୍‌ମନକେ ମୁକ୍‌ଲାଇବାକେ,

୧୯ ଆରି ମାପୁରୁ ତାର୍ ଲକ୍‌ମନକେ ରକିଆ କର୍‌ବା ବେଲା ଆସିଆଚେ, ବଲି  
ଜାନାଇବାକେ  
ସେ ମକେ ପାଟାଇଆଚେ ।”

୨୦ ପଚେ ସେ ସାସ୍‌ତର୍ ଡାବି, ପାର୍ତନା ଚାଲାଇବା ଗଟେକ୍ ଲକ୍‌କେ ବାଉଡାଇଦେଇ ବସିଦେଲା । ପାର୍ତନା ଗରେ ରଇଲା ଲକ୍‌ମନ୍ ତାକେସେ ଦେକ୍‌ତେରଇଲା । ୨୧ ଜିସୁ ଲକ୍‌ମନକେ କଇବାର୍ ଦାର୍‌ଲା, “ଆଜି ତମେ ସୁନ୍‌ଲା ଏ ଦରମ୍ ସାସ୍‌ତରର୍ ବାକିଅ ପୁରାପୁରୁନ୍ ଅଇଲା ।”

୨୨ ଜିସୁର୍ ବିସଇ ନେଇକରି ସବୁଲକ୍ ନିକ ସାକି ଦେବାର୍ ଦାର୍‌ଲା ଆରି ସେ କଇବା, ମନକେ ପାଇଲା ବାକିଅ ସୁନି କାବାଅଇଲା, ଆରି ସେମନ୍ “ଏଟାକାଇ ଜସେପର୍ ପ ନର୍‌ ଜେ ?” ବଲି କଇବାର୍‌ଦାର୍‌ଲା ।

୨୩ ଜିସୁ ଲକ୍‌ମନକେ କଇଲା, “ତମେ ସେ ଗାଲା କାତା ଆରିତରେକ୍ କଇସା ବଲି ମୁଇ ଜାନିରଇଲି, ଏ ଅସ ଦେଉ, ନିଜେ ତୁଇ ନିକ ଅ, ଆରି କପର୍‌ନାଉମେ ଜାଇ ଜାଇଟା ଗଟିଆଚେ ବଲି ଆମେ ସୁନିଆରୁ, ସେଟା ସବୁ ଏ ଜାଗାଇ, ତର୍ ନିଜର୍ ଜନମ୍ ନଅରେ ମିସା କର୍ ।” ୨୪ “ମାତର୍ ମୁଇ ତମକେ ସତ୍ କଇଲିନି, ବବିସ୍‌ତ୍‌ବକ୍ତା ଅଇରଇବା କାକେମିସା ନିଜର୍ ଗାଏଁ ନ ନାମତ୍ ।”

୨୫ “ମାତର୍ ମୁଇ ତମକେ ସତ୍‌କାତା କଇଲିନି, ଜେତେବେଲେ ବବିସ୍‌ତ୍‌ବକ୍ତା ଏଲିୟର୍ ବେଲେ ତିନ୍‌ବରସ୍ ଚ ମାସ୍ ଜାକ ବାଦଲେଅନି ପାନିମାରେ ନାଇକେ ଗୁଲାଇ ଦେସେ ମର୍‌ଡି ଅଇରଇଲା, ସେବେଲେ ଇସ୍ରାଏଲ୍ ଦେସେ କେତେ କେତେ ରାଣ୍ଡିମାଇଜିମନ୍ ରଇଲା । ୨୬ ରଇଲେ ମିସା ପର୍‌ମେସର୍ ଏଲିୟକେ କାର୍‌ଲଗେ ମିସା ନ ପାଟାଇ ସିଦନ୍ ଦେସର୍ ସାରିପତ୍ ବଲି ଗଟେକ୍ ଜାଗାଇ, ଗଟେକ୍ ରାଣ୍ଡିମାଇଜିର୍ ଲଗେ ପାଟାଇଲା । ୨୭ ଆରି ମାପୁରୁ ବବିସ୍‌ତ୍‌ବକ୍ତା ଏଲିସାୟର୍ ବେଲେ ଇସ୍ରାଏଲ୍ ଦେସେ କେତେ କୁସ୍‌ଟି ରଗି ରଇଲା, ଏଲେ ମିସା ତାକର୍ ବିତ୍ତରେ କାକେମିସା ନିକକରି ନ ରଇଲା, ସୁରିଆ ଦେସର୍ ନାମାନ୍ ନାଉର୍ ଲକ୍‌କେ ସେ ନିକକରି ରଇଲା ।”

୨୮ ଜିଉଦିମନର୍ ପାର୍ତନା ଗରେ ଏ କାତା ସୁନି ଲକ୍‌ମନ୍ ବେସି ରିସାଅଇଗାଲା । ୨୯ ଆରି ସେମନ୍ ଉଟିକରି ଜିସୁକେ ନଅରେଅନି ବାର୍‌କରାଇଦେଲା । ତାକର୍ ନଅରର୍ ଜନ୍ ପର୍‌ବତ୍ ଉପ୍‌ରେ ତିଆର୍ ଅଇରଇଲା, ସେ ପର୍‌ବତର୍ ଦାରେଅନି ତଲେ ପିଙ୍ଗିଦେଉଁ ବଲି, ତାକେ ତେଇ ଦାରିଗାଲା । ୩୦ ମାତର୍ ଜିସୁ ସେମନର୍ ବିତ୍ତରେ ପୁରି ଉଟିଗାଲା ।

ଜିସୁ ଗଟେକ୍ ତୁମା ଡସିରଇବା ଲକ୍‌କେ ନିମାନ୍ କଲା  
(ମାର୍‌କ ୧:୨୧-୨୮)

୩୧ ଜିସୁ ଗାଲିଲି ରାଇଜର୍ କପର୍‌ନାଉମ୍ ନାଉର୍ ଗଟେକ୍ ନଅରେ ଆଇଲା, ଆରି ବିସରାମ୍‌ବାରେ ଲକ୍‌ମନକେ ସିକିଆ ଦେବାର୍ ଦାରଲା । ୩୨ ଲକ୍‌ମନ ତାର୍ ସିକାଇବାଟା ଦେକି କାବାଅଇଗାଲାଇ, କାଇକେବଇଲେ ତାର୍ ବାକିଅ ଅଦିକାର୍ ସଙ୍ଗ୍ ରଇଲା । ୩୩ ଦିନେକ୍ ଜିଉଦିମନର୍ ପାର୍‌ତନା ଗରେ ଗଟେକ୍ ତୁମା ଡସିରଇବା ଲକ୍ ରଇଲା । ସେ ଆଉଲିଅଇ କିରକିରି କଇଲା, ୩୪ “ଏ ନାଜରିତର୍ ଜିସୁ, ଆମର୍‌ଟାନେ ତର୍ କାଇ କାମ୍ ଆଟେ ? ତୁଇ କାଇ ଆମ୍‌କେ ମରାଇବାକେ ଆସିଆରୁସ୍ ? ତୁଇ କେ ସେଟା ମୁଇ ଜାନି, ତୁଇ ପର୍‌ମେସରର୍ ସୁକଲ୍ ଲକ୍ ।”

୩୫ ଜିସୁ ତାକେ ଦମ୍‌କାଇ କରି କଇଲା, “ତୁପ୍ ର, ଆର୍‌ଟାନେଅନି ବାରଇ ଜା ।” ତେଇଅନି ସେ ତୁମା ସେ ଲକ୍‌କେ ସବୁର୍ ମୁଆଟେ ଅଦରାଇଲା ଆରି, ତାକେ କାଇଟା ନ କରି ତାର୍ ଗାଗ୍‌ଡେଅନି ବାରଇ ଉଟିଗାଲା ।

୩୬ ତେଇ ସବୁଲକ୍ କାବାଅଇକରି ତାକର୍ ତାକର୍ ବିତ୍‌ରେ କୁଆବଲା ଅଇଲାଇ, “ଏଟା କାଇ କାତା, ସେ ବପୁ ଆରି ଅଦିକାର୍ ସଙ୍ଗ୍ ତୁମାମନକେ ମିସା ଆଦେସ୍ ଦେଲାନି । ସେମନ୍ ମିସା ବାରଇ ଗାଲାଇନି ।” ୩୭ ଜିସୁର୍ ଏ କବର୍ ସେ ଜାଗାର୍ ଗୁଲାଇବାଟର୍ ଲକ୍ ଜାନ୍‌ଲାଇ ।

ଜିସୁ କେତେ କେତେ ଲକ୍‌ମନକେ ନିମାନ୍ କଲା  
(ମାତିଉ ୮:୧୪-୧୭; ମାର୍‌କ ୧:୨୯-୩୪)

୩୮ ପଟେ ଜିସୁ ଜିଉଦିମନର୍ ପାର୍‌ତନା ଗରେଅନି ଉଟି ସିମନର୍ ଗରେ ଗାଲା । ସିମନର୍ ସାଡ୍‌ରିକେ ବେସି ଜର୍ ଅଇରଇଲାଜେ ସେମନ୍ ତାର୍ ବିସଇ ନେଇ ଜିସୁକେ କଇଲାଇ । ୩୯ ତେଇ ସେ ସିମନର୍ ସାଡ୍‌ରିର୍ ଲଗେ ଟିଆଅଇ ଜର୍‌କେ ଦମ୍‌କାଇଲା ଆରି ତାକେ ଜର୍ ଚାଡିଗାଲା । ସେଦାପ୍‌ରେ ସେ ଉଟିକରି ସେମନ୍‌କେ ସେବା କର୍‌ବାର୍ ଦାରଲା ।

୪୦ ବେଲ୍‌ବସି ସଞ୍ଜ ଅଇଲାଜେ ଜର୍‌ଦୁକା ଅଇରଇଲା ଲକ୍‌ମନକେ ଜିସୁର୍ ଲଗେ ଆନ୍‌ଲାଇ, ଆରି ସେ ଜର୍‌ଦୁକାର୍ ଲକ୍‌ମନକେ ଗଟେକ୍ ଗଟେକ୍ ଲକ୍‌ର୍ ଉପ୍‌ରେ ଆଡ୍ ସଙ୍ଗ୍‌ଇ ନିକ କଲା । ୪୧ ତୁମା ଦାରିରଇବା ବେସି ଲକ୍‌ମନ୍ ମିସା କିରକିରି କରି “ତୁଇ ପର୍‌ମେସରର୍ ପଅ !” ବଲି ଲକ୍‌ର୍ ଟାନେଅନି ଚାଡି ପାଲାଇଲାଇ । ଜିସୁ ସେମନ୍‌କେ ଦମ୍‌କାଇ କରି କାତାଅଇବାକେ ମିସା ଦେଏନାଇ, କାଇକେବଇଲେ ସେମନ୍ ତାକେ କିରିସଟ୍ ବଲି ଜାନିରଇଲାଇ ।

ପାର୍‌ତନା ଗରେ ଜିସୁର୍ ସିକିଆ  
(ମାର୍‌କ ୧:୩୫-୩୯)

୪୨ ସାକାଲ୍ ପାଇଲାଜେ ଜିସୁ ନଅରେ ଅନି ବାରଇ ଗଟେକ୍ କିନରା ଜାଗାଇ ଗାଲା । ଲକ୍‌ମନ୍ କଜି କଜି ତାର୍ ଲଗେ ଆଇଲାଇ, ଆରି ସେ ଜେଡ୍‌କି ତାକର୍ ଲଗେଅନି ଉଟିନଜାଅ ବଲି ଅଟ୍‌କାଇବାକେ ଚେସ୍‌ଟା କଲାଇ । ୪୩ ମାତର୍ ଜିସୁ ସେମନ୍‌କେ କଇଲା, “ବିନ୍ ବିନ୍ ନଅରେ ମିସା ମୁଇ ପର୍‌ମେସରର୍ ରାଇଜର୍ ନିକ କବର୍ ଜାନାଇବାର୍ ଆଟେ, କାଇକେ ବଇଲେ ସେଟାର୍‌ପାଇ ପର୍‌ମେସର୍ ମକେ ପାଟାଇଆଟେ ।”

୪୪ ଆରି ସେ ଜିଉଦା ଦେସର୍ ଜିଉଦି ଲକ୍‌ମନର୍ ପାର୍‌ତନା ଗର୍‌ମନକେ ବାକିଅ ସୁନାଇବାର୍ ଦାରଲା ।



ଜିସୁ ପରତୁମ୍ ସିସ୍ତମନ୍‌କେ ଡାକ୍‌ଲା

(ମାତ୍ତିଉ ୪:୧୮-୨୨; ମାର୍କ ୧:୧୩-୨୦)

୧ \*ଦିନେକ୍ ଜିସୁ ଗିନେସରତ୍ ଗାଡ଼କଣ୍ଡି ଚିଆଅଇରଇଲା ବେଲେ ଲକ୍‌ମନ୍‌ ମାଣ୍ଡାଚୁଣ୍ଡା ଅଇ ପରଫେସରର୍ ବାକିଅ ସୁନ୍‌ତେରଇଲା । ୨ ସେଡ଼କିବେଲେ ସେ ଗାଡ଼କଣ୍ଡି ଦୁଇଟା ଡଙ୍ଗା ରଇଲାଟା ଦେକ୍‌ଲା, କେଉଟ୍‌ମନ୍‌ ଡଙ୍ଗାଅଧି ଉଡ଼ି ଜାଲ୍ ଦଇତେରଇଲା । ୩ ସେ ଡଙ୍ଗାମନ୍‌ ବିତ୍‌ରେଅଧି ଜନଟା କେଉଟ୍‌ ସିମନ୍‌ଟା ରଇଲା, ଜିସୁ ତେଇ ଚଗିକରି “କଣ୍ଡିତେଅଧି କଣ୍ଡେକ ଦୁର୍ ପାନିତେଇ ଚାଲାଇନେ ।” ବଲି ସିମନ୍‌କେ କଇଲା, ଆରି ଡଙ୍ଗାଇ ବସିକରି ସିକିଆ ଦେବାର୍ ଦାରୁଲା ।

୪ ଜିସୁ କାତା ସାରାଇକରି ସିମନ୍‌କେ କଇଲା, “ତେଙ୍ଗ୍ ପାନିଟାନେ ଜାଇକରି ମାଟ୍ ଦାର୍‌ବାକେ ତମର୍ ଜାଲ୍ ପାକାଆ ।”

୫ \*ତେଇ ସିମନ୍ କଇଲା, “ଏ ଗୁରୁ ଆମେ ସବୁଲକ୍ ଗୁଲାଇରାତି କସଟ୍ କରି ଗଟେକ୍ ମିସା ଦାରୁନାଇ, ମାତର୍ ତମର୍ କାତା ଦାରି ମୁଇ ଜାଲ୍ ପାକାଇବି ।” ୬ ଆରି ଜାଲ୍ ପାକାଇଲାକେ, ଏଦେ ଦେକା ! ଏନ୍ତି ମାଟ୍ ଲାଗ୍‌ଲାଇଜେ ତାକର୍ ଜାଲ୍ ଚିରିଅଇବାର୍ ଦାରୁଲା । ୭ ଡଙ୍ଗାଇ ମାଟ୍ ବର୍ତ୍ତି କଲାଇଜେ ସେ ଦୁଇଟା ଡଙ୍ଗା ବୁଡ଼ଲା ପାରା ଅଇଗାଲା । ୮ ଏଟା ଦେକି ସିମନ୍ ପିତର୍ ଜିସୁର୍ ପାଦେ ମାଣ୍ଡିକ୍‌ଟା ଦେଇ ଜୁଆର୍ କରି କଇଲା, “ମର୍ଟାନେଅଧି ଜାଆ ମାପୁରୁ, କାଇକେବଇଲେ ମୁଇ ଗଟେକ୍ ପାପି ମୁନ୍‌ସ୍ ।”

୯ କାଇକେବଇଲେ ତେଇ ସେମନ୍ ଏତେକ୍ ମାଟ୍ ଦାରିରଇଲାଇଜେ, ସେଟା ଦେକି ସିମନ୍‌ର୍ ସଙ୍ଗାରିମନ୍ କାବାଅଇଗାଲା । ୧୦ ଆରି ଜେବଦିର୍ ଦୁଇଟା ପ ଜାକୁର୍ ଆରି ଜଅନ୍ ଜନ୍‌ଲକ୍‌ମନ୍ ସିମନ୍‌ର୍ ସଙ୍ଗାରି ରଇଲା, ସେମନ୍ ମିସା ସେନ୍ତାରିସେ କାବା ଅଇଗାଲା । ଆରି ଜିସୁ ସିମନ୍‌କେ କଇଲା, “ତରାନାଇ, ଆଜିଅଧି ତମେ ମାଟ୍ ନ ଦାରି, ଲକ୍‌ମନ୍‌କେ ମର୍ଟାନେ ଆନ୍‌ସା ।”

୧୧ ତେଇ ସେମନ୍ ସବୁ ତାକର୍ ଡଙ୍ଗା କଣ୍ଡି ଆନି ଚାଡ଼ିଦେଇକରି ଜିସୁର୍ ପତେ ପତେ ଗାଲା ।

ଜିସୁ ଗଟେକ୍ ବଡ଼ ରଗିକେ ନିମାନ୍ କଲା

(ମାତ୍ତିଉ ୮:୧-୪; ମାର୍କ ୧:୪୦-୪୫)

୧୨ ତରେକ୍ ଜିସୁ ଗଟେକ୍ ନଅରେ ରଇଲାବେଲେ ଗଟେକ୍ ଗୁଲାଇ ଗାଗତେ ବଡ଼ରଗ୍ ଅଇରଇବା ଲକ୍ ତେଇ ରଇଲା । ସେ ତାଣ୍ଡାସନ୍ ପଡ଼ି ମୁ ବୁର୍ ଚିଆଇ ଜିସୁକେ ବାବୁଜିଆ କରି କଇଲା, “ଏ ମାପୁରୁ, ତମେ ଜଦି ମନ୍‌କଲୁସ୍‌ନି ବଇଲେ, ମକେ ନିକ କରିପାରୁସ୍ ।”

୧୩ ତେଇ ଜିସୁ ଆଡ଼ ଲାମାଇ ତାକେ ଚିଇ କରି କଇଲା, “ମୁଇ ମନ୍ କଲିନି, ତୁଇ ସୁକଲ୍ ଅ ।” ଦାପୁରେସେ ତାର୍ ବଡ଼ ରଗ୍ ଚାଡ଼ିଗାଲା । ୧୪ ଆରି ଜିସୁ ତାକେ ଆଦେସ୍ ଦେଇ କଇଲା, “ଏ କାତା କାକେ କ ନାଇ । ମାତର୍ ପୁଜାରିର୍ ଲଗେ ଜା ଆରି ସେ ତକେ ପରିକା କରି ଦେକ । ତୁଇ, ‘ନିକ ଅଇଲିଆଟି’ ବଲି ବିନ୍ ଲକର୍ ଟାନେ ସାକିଦେବାକେ ମସାର୍ ଆଦେସ୍ ଇସାବେ ବିରୁ ଦେସ୍ ।”

୧୫ ମାତର୍ ଜିସୁର୍ କବର୍ ଗୁଲାଇ ଚାରିବେଡ଼ିର୍‌ଲକ୍ ଜାନ୍‌ଲା । ତାର୍ କାତା ସୁନ୍‌ବାପାଇ ଆରି ନିଜର୍ ନିଜର୍ ରଗେଅଧି ନିକ ଅଉଁବଲି ଗାଦି ଲକ୍‌ମନ୍ ଚୁଲ୍‌ଅଇବାର୍ ଦାରୁଲା । ୧୬ ମାତର୍ ଜିସୁ କିନରା ଜାଗାମନ୍‌କେ ଜାଇ ପାର୍‌ତନା କିର୍‌ତେରଇଲା ।

\* ୫:୧ ୫:୧ ମାତ୍ତିଉ ୧୩:୧,୨; ମାର୍କ ୩:୧,୧୦,୪:୧    \* ୫:୫ ୫:୫ ଜଅନ୍ ୨୧:୩    \* ୫:୭ ୫:୭ ଜଅନ୍ ୨୧:୭

ଜିସୁ ଗଟେକ୍ ଚେରେଙ୍ଗ୍ ରଗିକେ ନିମାନ୍ କଲା  
(ମାତିଉ ୯:୧-୮; ମାର୍କ ୨:୧-୧୨)

୧୭ ଦିନେକ୍ ଜିସୁ ସିକିଆ ଦେଇତେରଇଲା । ତେଇ ଗାଲିଲିର୍ ସବୁ ଗାଏଁଅନି, ଜିଉଦା ଆରି ଜିରୁସାଲମେଅନି ଆସିରଇବା ପାରୁସିମନ୍ ଆରି ନିଅମ୍ ସିକାଉମନ୍ ତେଇ ବସିରଇଲା । ଆରି ରଗିମନ୍କେ ନିକ କର୍ବାକେ ମାପ୍ତୁର ବପୁ, ଜିସୁକେ ରଇଲା । ୧୮ ଆରି ଏଦେ ଦେକା ! ଗଟେକ୍ ଚେରେଙ୍ଗ୍ବାଡ଼ ଦାରଲା ମୁନ୍ସକେ, କେତେଲକ୍ କର୍ ମିସ୍ତେ ବଇଆନିକରି, ଗର୍ ବିଡ଼ରେ ନେଇ ଜିସୁର୍ ମୁଆଟେ ସଙ୍ଗୁଉବଲି, ଚେସ୍ଟା କରତେରଇଲା । ୧୯ ମାତର୍ ଚିପାଟେଲାଋଲାଗି, ତାକେ ବିଡ଼ରେ ନେବାକେ ବାଟ୍ ମିଲେନାଇ । ଏଦେ ଦେକା ! ସେମନ୍ ରଗିକେ ଗର୍ ଉପ୍ରେ ଚଗାଇ ଚାଉନି ଉଜାତି, କର୍ ମିସ୍ତେ ଲକ୍ମନର୍ ମଜାଇ ଜିସୁର୍ ମୁଆଟେ ଉଡ଼ରାଇଦେଲା । ୨୦ ଜିସୁ ସେମନ୍ର୍ ବିସ୍ବାସ୍ ଦେକି କଇଲା, “ଏ ବାବୁ, ତମର୍ ସବୁ ପାପ୍ କେମା ଅଇଗାଲାବେ ।”

୨୧ ସାସ୍ତର୍ ସିକାଇବା ଲକ୍ମନ୍ ଆରି ପାରୁସି ଲକ୍ମନ୍ ମନେ ମନେ କୁଆବଲା ଅଇ, ଏନ୍ତି କଇବାର୍ ଦାରଲା, “ଏ କେ ଜେ ପର୍ମେସରର୍ ନିନ୍ଦାକଲାନି ? ପର୍ମେସରକେ ଚାଡ଼ି ଆରି କେ ପାପ୍ କେମା କରିପାରସି ?”

୨୨ ତେଇ ସେମନ୍ ମନେ ମନେ କୁଆବଲା ଅଇବାଟା ଜାନିକରି ସେମନ୍କେ ଜିସୁ କଇଲା, “ତମେ କାଇକେ ସବୁଲକ୍ ନିଜର୍ ମନେ ମନେ ଏନ୍ତାରି କୁଆବଲା ଅଇଲାସିନି ? ୨୩ କାଇଟା ଉପାସ୍ କାତା ? ତର୍ ସବୁ ପାପ୍ କେମା ଅଇଗାଲା ବଲି କଇବାଟା, କି ଉଟିକରି ଇଣ୍ଡି ଜା ବଲି କଇବାଟା ? ୨୪ ମାତର୍ ପୁର୍ତିବିର୍ ସବୁ ପାପ୍ କେମା କର୍ବାକେ ପର୍ମେସରର୍ ଟାନେଅନି ଆଇଲା ନର୍ପିଲା ମର୍ ଅଦିକାର୍ଆତେ ।” ଏଟା ତମେ ଜେନ୍ତି ଜାନିପାରାସ୍ । ଏଟାର୍ପାଇ ଜିସୁ ଚେରେଙ୍ଗ୍ବାଡ଼ ଦାରଲା ରଗିକେ କଇଲା, “ମୁଇ ତକେ କଇଲିନି, ଉର୍ ନିଜର୍ ବିର୍ନା ଦାରି ଗରେ ଜା ।”

୨୫ ସେଦାପ୍ରେ ଚେରେଙ୍ଗ୍ ଦାରଲା ଲକ୍ ସବୁଲକ୍ ଦେକ୍ତେ ଉଟିକରି ଜନ୍ କଟେ ସଇରଇଲା, ସେଟା ବଇ ପର୍ମେସରର୍ ମଇମା କରି କରି ତାର୍ ଗରେ ଉଟିଗାଲା । ୨୬ ତେଇ ରଇଲା ସବୁଲକ୍ କାବା ଅଇଜାଇକରି ପର୍ମେସରର୍ ମଇମା କର୍ବାର୍ ଦାରଲା ଆରି ମାପ୍ତୁର ରକିଡ଼ କାମ୍ ଦେକି, “ଆଜି ଆମେ କେବେ ନ ଅଇଲାଟା ଦେକ୍ଲୁ !” ବଲି କଇଲା ।

ଜିସୁ ଲେବିକେ ଡାକ୍ଲାଇ  
(ମାତିଉ ୯:୯-୧୩; ମାର୍କ ୨:୧୩-୧୭)

୨୭ ତାର୍ପଟେ ଜିସୁ ବାରଇଜାଇ ଲେବି ନାଉଁର୍ ଗଟେକ୍ ସିସ୍ତୁମାଙ୍ଗୁ, ସିସ୍ତୁମାଙ୍ଗୁମନ୍ ମାଙ୍ଗ୍ବାଟାନେ ବସିରଇବାଟା ଦେକି, ତାକେ କଇଲା, “ମର୍ସଙ୍ଗ୍ ଆଉ ।” ୨୮ ତେଇ ଲେବି ସବୁଜାକ ଚାଡ଼ିଦେଇ ଉଟିକରି ଜିସୁର୍ ସଙ୍ଗ୍ ଜିବାର୍ଦାରଲା ।

୨୯ ଆରି ଲେବି ଜିସୁର୍ପାଇ ନିଜର୍ ଗରେ, ଗଟେକ୍ ବଡ଼ ବଜିକଲା । ତେଇ ସିସ୍ତୁମାଙ୍ଗୁମନ୍, ଅଦିକ୍ ଲକ୍ ଆରି ବିନ୍ ବିନ୍ ଲକ୍ମନର୍ ସଙ୍ଗ୍ ସେ କାଇବାକେ ବସଲା । ୩୦ ତେଇ ପାରୁସିମନ୍ ଆରି ତାକର୍ ଦଲର୍ ସାସ୍ତର୍ ସିକାଉମନ୍ ଜିସୁର୍ ମୁଆଟେ ତାର୍ ସିସ୍ତୁମନ୍କେ ଦସ୍ ଦେକାଇ କଇଲା, “ତମେ କାଇକେ ସିସ୍ତୁମାଙ୍ଗୁମନ୍ର୍ ସଙ୍ଗ୍ ଆରି ପାପିମନ୍ର୍ ସଙ୍ଗ୍ ମିସି କିଆ ପିଆ କଲାସିନି ?”

୩୧ ଜିସୁ ସେମନ୍କେ କଇଲା, “ଜାକେ ଦୁକାଦାରି ରଇସି, ସେସେ ଅସ କାଇସି, ଜାକେ ଦୁକା ଦାରେ ନାଇ ତାକେ ଅସ ଲଡାନାଇ । ୩୨ ମୁଇ ଦରମ୍ ଲକ୍ବଲି ନିଜକେ

☆ ୫:୩୦ ୫:୩୦ ଲୁକ୍ ୧୫:୧,୨

ବାବୁବା ଲକ୍ଷ୍ମୀନର ପାଇ ଆସିନାଇ, ମାତର ପାପି ଲକ୍ଷ୍ମୀନକେ ପାପେଅନି ମନ୍ ବାଦ୍‌ଲାଇବାକେ ଆଇଲିଆତି ।”

ଉପାସ୍ ବିସଇନେଇ ସିକିଆ

(ମାତିଉ ୯:୧୪-୧୭; ମାର୍କ ୨:୧୮-୨୨)

୩୩ କେତେକ୍ ଲକ୍ଷ୍ମୀ ଜିସୁକେ ପାଚାରଲାଇ, “ତୁବନ୍ ଦେଉ ଜଅନର ସିସ୍‌ମନ୍ ତରକେତର ଉପାସ୍ କରି ପାରତନା କରବାଇ । ପାରୁସିମନ୍ ସିସ୍‌ମନ୍ ମିସା ସେନ୍ତାରି ସେ କରବାଇ । ମାତର ତମର ସିସ୍‌ମନ୍ କିଆ ପିଆ କରବାଇ ।”

୩୪ ଜିସୁ ସେମନ୍‌କେ କଇଲା, “ବରବାଟର ଲକ୍ଷ୍ମୀନରସଙ୍ଗ୍ ବର ରଇଲାବେଲେ, ତମେ କାଇ ସେମନ୍‌କେ ଉପାସ୍ କରାଇପାରାସ୍ ? ନାଇ, ନାପାରାସ୍ । ୩୫ ମାତର ବେଲା ଆଇସି, ଜେତେବେଲେ ତାକରଗାନେଅନି ବରକେ ଡାକିଦାରିଜିବାଇ, ସେଡ଼କିବେଲେ ସେମନ୍ ଉପାସ୍ କଇବାଇ ।”

୩୬ ଜିସୁ ସେମନ୍‌କେ ଆରି ଗଟେକ୍ ଉଦାଅରନ୍ ଦେଇ କଇଲା, “କେ ମିସା ପୁରନା ଲୁଗା ପାଟିରଇଲାଗାନେ ନୁଆଲୁଗା ଚିରି ଚାପ୍ ନ ଦେଅଡ଼, ଚାପ୍ ଦେଲେ ନୁଆଟା ମିସା ନସିଜାଇସି, ନୁଆ ଲୁଗାର ଚାପ୍ ପୁରନାଗାନେ ନ ମିସେ । ୩୭ ବେସି ଦିନର ପୁରନା ଗାଗ୍‌ରିଗାନେ କେ ମିସା ଏବେ ଉଡ଼ରାଇଲା ମଦ୍ ନ ରକଅଡ଼, ତେଇ ଜିଦି ସେ ମଦ୍ ରକଇ ଡାବିଦେଲେ, ଗାଗ୍‌ରି ପୁଟିକରି ପଡ଼ାଅଇଜାଇସି । ୩୮ ତେବେ ମଦ୍ ଉଡ଼ରାଇଲା ଦାପ୍‌ରେ ନୁଆ ଗାଗ୍‌ରିଗାନେ ରକଇ ସଙ୍ଗ୍‌ଇବାଡ଼ୁଆଟେ । ୩୯ ଆରି କେ ମିସା ପୁରନା ମଦ୍ କାଇକରି ଏବେ ଉଡ଼ରାଇଲା ମଦ୍ କାଇବାକେ ମନ୍ ନ କରଡ଼, କାଇକେବଇଲେ, ସେ ବାସିଟା ଆକା ନିକ ବଲି କଇସି ।”



ବିସ୍‌ରାମ୍ ଦିନ୍ ବିସଇ ନେଇ ପର୍‌ସନ୍

(ମାତିଉ ୧୨:୧-୮; ମାର୍କ ୨:୨୩-୨୮)

୧ ତରେକ୍ ବିସ୍‌ରାମ୍ ବାରେ ଜିସୁ ତାସ୍ ରଇଲା ପଦାବାଟେ ଜିବାବେଲେ ତାର୍ ସିସ୍‌ମନ୍ କେଡ଼ ତିତାଇ ଆତେ ରମ୍‌ଦି କାଇତେରଇଲାଇ । ୨ ସେମନ୍‌କେ ଦେକ୍‌ତେରଇବା ପାରୁସି ଲକ୍ଷ୍ମୀନର ବିଡ଼ରେଅନି କେତେଲକ୍ କଇଲାଇ, “ବିସ୍‌ରାମ୍ ବାରେ ଜନ୍‌ଟା କରବାର୍ ବିଦି ନଏଁ, ସେଟା ତମେ କାଇକେ କଲାସ୍‌ନି ?”

୩ ଜିସୁ ସେମନ୍‌କେ କଇଲା, “ଦାଉଦ୍ ଆରି ତାର୍ ସଙ୍ଗ୍‌ର ଲକ୍ଷ୍ମୀନ୍ ରୁକେ ରଇଲାବେଲେ, ଦାଉଦ୍ କାଇଟା କରିରଇଲା, ସେଟା କାଇ ତମେ ପଡ଼ାସ୍ ନାଇ କି ? ୪ ସୁନା, ଦାଉଦ୍ ପର୍‌ମେସରର ଗରେ ପୁରି, ପର୍‌ମେସରକେ ସର୍‌ପି ଅଇରଇଲା ଜନ୍ ରୁଟି, ପୁଜାରିମନ୍‌କେ ଚାଡ଼ି ଆରି କେ ମିସା କାଇବାର୍ ବିଦି ନ ରଇଲା, ସେଟା ନେଇକରି କାଇଲା ଆରି ତାର୍ ସଙ୍ଗ୍‌ର ଲକ୍ଷ୍ମୀନକେ ମିସା ଦେଇରଇଲା ।”

୫ ଆରି ଜିସୁ କଇଲା, “ପର୍‌ମେସର ପାଟାଗରଇବା ନର୍‌ପିଲା ମୁଇ ବିସ୍‌ରାମ୍ ବାରେ ଲକ୍ଷ୍ମୀନ କାଇଟା କରବାର୍ ଆଟେ କାଇଟା କରବାର୍ ନାଇ, ସେଟା କଇବାର୍ ମର୍ ଅଦିକାର୍ ଆଟେ ।”

ଆଡ଼ ସୁକିଜାଇରଇଲା ଲକ୍ଷ୍ମୀ ନିକ ଅଇଲା

(ମାତିଉ ୧୨:୯-୧୪; ମାର୍କ ୩:୧-୬)

୬ ଆରି ଜିସୁ ଦିନ୍ ଗଟେକ୍ ବିସ୍‌ରାମ୍‌ବାରେ, ଜିଉଦି ଲକ୍ଷ୍ମୀନର ପାରତନା ଗରେ ଜାଇକରି ସିକାକେତେରଇଲା । ତେଇ ଗଟେକ୍ ଲକ୍ଷ୍ମୀ ରଇଲା । ତାର୍ ଉଜା ଆଡ଼ ସୁକିଜାଇରଇଲା । ୭ ଆରି ଜିସୁ ବିସ୍‌ରାମ୍‌ବାରେ ମିସା କେ ଜାନେ ନିକ କରସି, ଏଟା ଦେକୁ ବଲି ପାରୁସି ଲକ୍ଷ୍ମୀନ୍ ଆରି ସାସ୍‌ତର ସିକାଉମନ୍ ତାକେସେ ଦେକି ଦେକି ରଇଲାଇ, କାଇକେବଇଲେ ତାର୍ ବିରୁଦେ ଦସ୍ ଦାର୍‌ବାକେ । ୮ ମାତର ଜିସୁ ତାକର

ମନେ ବାବଲାଟା ଜାନିକରି, ଜନ୍ ଲକର ଆଡ଼ ସୁଜିଜାଇରଇଲା, ତାକେ କଇଲା, “ଉର୍ ଆରି ସବୁଲକର ମୁଆଟେ ଚିଆ ଅ ।” ଆରି ସେଲକ ଉଚି ଚିଆଅଇଲା ।<sup>୯</sup> ତେଇ ଜିସୁ ସେମନ୍‌କେ କଇଲା, “ମୁଇ ତମ୍‌କେ ପାଟାରଲିନି, ବିସରାମ୍‌ବାରେ ବିଦି ଇସାବେ କାଇଟା କରବାର ? ନିକ କରବାର କି କାରାପ୍ କରବାର ? ଜିବନ୍ ବଠାଇବାର କି ମରାଇବାର ?”<sup>୧୦</sup> ଆରି ସେ ଚାରିବେଡ଼ି ସବୁକେ ଦେକି ସେ ଲକ୍‌କେ କଇଲା, “ତମର୍ ଆଡ଼ ଲାମାଆ ।” ତେଇ ସେ ସେନ୍ତାର କଲା, ଆରି ତାର ଆଡ଼ ପୁରାପୁରୁନ୍ ନିକ ଅଇଗାଲା ।

<sup>୧୧</sup> ମାତର୍ ପାରୁସିମନ୍ ଆରି ସାସ୍‌ତର୍ ସିକାଉମନ୍ ବେସି ରିସା ଅଇଗାଲାଅ ଆରି ଜିସୁର୍ ବିରୁଦେ “କାଇଟା କରୁ ?” ବଲି ତାକର୍ ତାକର୍ ବିଡ଼ରେ ନିଆଇ କଲାଇ ।

ଜିସୁ ବାରଟା ସିସମନ୍‌କେ ବାଟଲା  
(ମାତିଉ ୧୦:୧-୪; ମାର୍କ ୩:୧୩-୧୯)

<sup>୧୨</sup> ସେବେଲେ ଦିନେକ୍ ଜିସୁ ପାର୍ତନା କରବାକେ ବାରଇ, ପରବତେ ଗାଲା ଆରି ଗୁଲାଇରାତି ପର୍ମେସର୍‌କେ ପାର୍ତନା କରି କରି ରଇଲା ।<sup>୧୩</sup> ସାକାଲ୍ ପାଇଲାକେ, ଜିସୁ ସିସମନ୍‌କେ ଲଗେ ତାକି ସେମନ୍‌ର୍ ବିଡ଼ରେଅନି ବାର ଲକ୍‌କେ ବାଟଲା, ଆରି ସେମନ୍‌କେ ପେରିଡ଼ ବଲି ନାଉଁ ଦେଲା ।<sup>୧୪</sup> ସେମନ୍ ରଇଲା, ସିମନ୍ ଜାକେ କି ସେ ପିତର୍ ବଲି ମିସା ନାଉଁ ଦେଲା, ଆରି ସିମନ୍‌ର୍ ବାଇ ଆନ୍‌ରିୟ୍, ଜାକୁବ୍ ଆରି ଜଅନ୍, ପିଲିପ୍ ଆରି ବାର୍ତଲମି ।<sup>୧୫</sup> ମାତିଉ ଆରି ତମା, ଆଲ୍‌ପିର୍ ପ ଜାକୁବ୍ ଆରି ସିମନ୍, ଜାକେ କି କାଇ କାମ୍ କରବାକେ ମିସା ଆଗତୁ ଅଇସି ବଲି କଇବାଇ ।<sup>୧୬</sup> ଜାକୁବ୍ ପ ଜିଉଦା ଆରି ଇସ୍କାରିତ ଜିଉଦା, ଜେ କି ଜିସୁକେ ସତ୍‌ରୁମନ୍‌କେ ସର୍‌ପିଦେଇ ରଇଲା ।

ଜିସୁ ସିକିଆ ଦେଲା ଆରି ନିକ କଲା  
(ମାତିଉ ୪:୨୩-୨୫)

<sup>୧୭</sup> ଆରି ଜିସୁ ପେରିଡ଼ମନ୍‌ର୍ ସଙ୍ଗ୍ ଉଡ଼ରିକରି, ଗଟେକ୍ ସଦର୍ମ୍ ରଇଲା ଜାଗାଇ ଚିଆଅଇଲା । ଆରି ତେଇ ତାର ବେସି ସିସମନ୍, ଜିଉଦା ରାଇଜର୍ ବେସି ଲକ୍, ଜିରୁସାଲାମ୍ ଆରି ସମ୍‌ଦୁର୍ ପାଲି ରଇବା ସର ଆରି ସିଦନ୍ ସଅରେଅନି ବେସି ଲକ୍‌ମନ୍ ରୁଣ୍ଡିରଇଲାଇ ।<sup>୧୮</sup> ଲକ୍‌ମନ୍ ତାର ବାକିଅ ସୁନ୍‌ବାକେ ଆରି ନିଜର୍ ନିଜର୍ ରଗେଅନି ନିକ ଅଇବାକେ ଆସିରଇଲାଇ । ଜନ୍ ଲକ୍‌ମନ୍ ତୁମା ଦାରାଇଅଇ ଦୁକ୍ କସ୍ ପାଇତେରଇଲାଇ, ସେମନ୍‌କେ ଜିସୁ ନିକ କଲା ।<sup>୧୯</sup> ସବୁଲକ୍‌ମନ୍ ଜିସୁକେ ଚିଇବାକେ ଚେସ୍‌ଟା କର୍‌ତେରଇଲାଇ । କାଇକେବଇଲେ ତାର ଗାଗତେଅନି ମାପ୍‌ରୁର୍ ବପୁ ବାରଇତେରଇଲା ଆରି ସବୁଲକ୍‌ମନ୍‌କେ ନିକ କରତେରଇଲା ।

ସୁକ୍ ଆରି ଦୁକ୍  
(ମାତିଉ ୫:୧-୧୨)

<sup>୨୦</sup> ସେବେଲେ ଜିସୁ ନିଜର୍ ସିସମନ୍‌ର୍ ବାଟେ ଦେକି କଇଲା, “ତମେ ଏବେ କାକୁରତି ଅଇଆଟାସ୍ ତମର୍ କେତେକ୍ ନିକ କରମ୍, କାଇକେବଇଲେ ପର୍ମେସର୍‌ର୍ ରାଇଜ୍ ତମର୍‌ଟା ।

<sup>୨୧</sup> ତମେମନ୍ ଏବେ ବୁକେ ଆଟାସ୍, ତମର୍ କେତେକ୍ ନିକ କରମ୍, କାଇକେବଇଲେ, ତମ୍‌କେ ପର୍ମେସର୍ ପୁରାପୁରୁନ୍ ଦେଇସି ।

ତମେମନ୍ ଏବେ କାନ୍‌ଲାସ୍‌ନି, ତମର୍ କେତେକ୍ ନିକ କରମ୍, କାଇକେବଇଲେ ତମେମନ୍ ସାର୍‌ଦା ଅଇକରି ଆସିସା ।”

<sup>୨୨</sup> \*ଲକ୍‌ମନ୍ ଜେବେ ପର୍ମେସର୍ ପାଟାଇରଇବା ନର୍‌ପିଲା ମର୍ ଲାଗି ତମ୍‌କେ ଇନ୍ କରବାଇ, ଆରି ବେଗ୍‌ଲାଇ ଦେବାଇ, ନିନ୍‌କାକରି ତମର୍ ନାଉଁ ମନ୍ ବଲି

ଦାର୍‌ବାଇ, ତମର କେତେକ୍ ନିକ କରମ୍ । ୨୩<sup>☆</sup> ସେ ଦିନେ ସାର୍‌ଦା ଅଇ ନାଟ୍ କରସା । କାଇକେବଇଲେ ଦେକା, ସରଗେ ତମର ପୁରୁସକାର୍ ଅଦିକ୍ ଆରି ସେନ୍ତାରି ତା ସେମନର୍ ଆନିଦାଦିମନ୍, ବବିସତ୍‌ବକ୍‌ତାମନ୍କେ କରତେରଇଲାଇ ।

୨୪ ମାତର୍ ଏ ଡଣ୍ଡ ପାଉମନ୍, ତମେମନ୍ ଏବେ ସାଉକାର୍ ଆଗସ୍,  
କାଇକେବଇଲେ ତମେ ନିଜେ ନିଜେ ସୁକ୍ ପାଇଲାସବେ ।

୨୫ ଏ ଡଣ୍ଡ ପାଉମନ୍, ଏବେ ତମେ ନିକସଙ୍ଗ୍ କାଇଲାସନ୍,  
କାଇକେବଇଲେ, ତମେ ବୁକେସେ ରଇସା ।

ଏ ଡଣ୍ଡ ପାଉମନ୍, ତମେମନ୍ ଏବେ ଆସ୍‌ଲାସନ୍,  
କାଇକେବଇଲେ ପତେ ବୁକେ ରଇକରି କାନ୍‌ସା ।

୨୬ “ଜେତେବେଲେ ତମ୍‌କେ ଲକ୍‌ମନ୍ ବଲ୍ ବଲିକରି ବାବ୍‌ଲାଇନ୍, ଏ ଡଣ୍ଡ ପାଉମନ୍, ତାକର୍ ଆନିଦାଦି ତା ମାପ୍‌ରୁର୍ କାତା ବୁଲ୍‌କାଉମନର୍‌ପାଇ ସେନ୍ତାରି କରତେରଇଲାଇ ।”

ସତ୍‌ରୁମନ୍କେ ମିସା ଆଲାଦ୍ କରା

(ମାତିଉ ୫:୩୮-୪୮:୭:୧୨)

୨୭ “ମାତର୍ ତମେମନ୍ ସୁନି ଆଗସ୍‌ଜେ ମୁଇ ତମ୍‌କେ କଇଲିନି, ତମର୍ ସତ୍‌ରୁମନ୍କେ ଆଲାଦ୍ କରା, ଜନ୍ ଲକ୍‌ମନ୍ ତମ୍‌କେ ଇନ୍ କରବାଇ, ସେମନର୍ ମଙ୍ଗଲ୍ କରା । ୨୮ ଜନ୍ ଲକ୍‌ମନ୍ ତମ୍‌କେ ସାଇପ୍ ଦେବାଇ, ସେମନ୍କେ ଆସିର୍‌ବାଦ୍ କରା । ଜନ୍ ଲକ୍‌ମନ୍ ତମ୍‌କେ ଇଜଡ୍ ଜିକ୍‌ବାଇ, ସେମନର୍‌ପାଇ ପାର୍‌ତନା କରା । ୨୯ ଜେ ତମ୍‌କେ ଗଟେକ୍ ଗାଲେ ଚାପଡ୍ ମାର୍‌ସି, ତାକେ ଆରିଗଟେକ୍ ଗାଲ୍ ମିସା ଦେକାଇଦିଆସ୍ । ଜେ ତମର୍ ଚାଦର୍ ଦାରିଜାଇସି, ତାକେ ତମର୍ ପିନ୍‌ଲାଟା ନେବାକେ ମିସା ମନା କରାନାଇ । ୩୦ ଜେ ତମ୍‌କେ ମାଙ୍ଗ୍‌ସି, ତାକେ ଦିଆସ୍ । ଆରି ଜେ ତମର୍ ଦନ୍ ସମ୍‌ପତି ଉଦାର୍ ନେଇସି, ତାର୍‌ଟାନେଅନି ସେଟା ଆରିତରେକ୍ ମାଙ୍ଗ୍‌ନାଇ । ୩୧<sup>☆</sup> ଲକ୍‌ମନ୍ ତମ୍‌କେ ଜେନ୍ତ୍ର କରଡ୍ ବଲି ମନ୍ କଲାସନ୍, ତମେମିସା ସେମନର୍‌ଟାନେ ସେନ୍ତାରି କରା ।”

୩୨ “ଆରି ଜନ୍ ଲକ୍‌ମନ୍ ତମ୍‌କେ ଆଲାଦ୍ କଲାଇନ୍, ଜଦି ସେମନ୍କେସେ ତମେ ଆଲାଦ୍ କରସା ବଇଲେ କାଇ ଆସିର୍‌ବାଦ୍ ପାଇସା ? କାଇକେବଇଲେ ପାପିମନ୍ ମିସା ସେନ୍ତାରି କରବାଇ । ୩୩ ଜଦି ଜନ୍ ଲକ୍‌ମନ୍ ତମର୍ ମଙ୍ଗଲ୍ କଲାଇନ୍, ସେମନ୍କେସେ ମଙ୍ଗଲ୍ କରସା ବଇଲେ, କାଇ ଆସିର୍‌ବାଦ୍ ପାଇସା ? କାଇକେବଇଲେ ପାପିମନ୍ ମିସା ସେନ୍ତାରି କରବାଇ । ୩୪ ଆରି ଜନ୍ ଲକ୍‌ମନର୍‌ଟାନେଅନି ତମର୍ ମିଲାଇବାର୍ ଆସା ରଇସି, ଜଦି ସେମନ୍କେସେ ଉଦାର୍ ଦେଇସା ବଇଲେ, ତମେ କାଇ ଆସିର୍‌ବାଦ୍ ପାଇସା ? ପାପିମନ୍ ମିସା ସମାନ୍ ଇସାବେ ବାନ୍‌ଲାଟା ମିଲବଲି, ରୁନ୍ ଦେବାଇ । ୩୫ ମାତର୍ ତମର୍ ସତ୍‌ରୁମନ୍କେ ଆଲାଦ୍ କରା । ଆରି ସେମନର୍ ମଙ୍ଗଲ୍ କରା । ରୁନ୍ ବାନ୍ ବଲି ଆସା ନ କରି, ରୁନ୍ ଦିଆସ୍ । ସେନ୍ତାରିକଲେ ତମର୍ ପୁରୁସକାର୍ ଅଦିକ୍ ଅଇସି । ଆରି ତମେ ପର୍‌ମେସର୍‌ପ ଅଇସା । କାଇକେବଇଲେ ସେ ନ ମାନ୍‌ବା ଲକ୍‌ର୍ ଆରି କରାପ୍ ଲକ୍‌ର୍ ମିସା ଦୟାକାରିଆ । ୩୬ ତମର୍ ସରଗର୍ ବାବା ଜେନ୍ତାରି ଦୟା କଲାନି, ସେନ୍ତାରି ତମେ ମିସା ଦୟା କରା ।”

ବିନ୍ ଲକ୍‌ମନ୍କେ ବିଚାର୍ କରାନାଇ

(ମାତିଉ ୭:୫-୭)

୩୭ “ବିନ୍‌ଲକ୍‌ର୍ ବିଚାର୍ କରାନାଇ, ସେନ୍ତାରିକଲେ ପର୍‌ମେସର୍ ତମ୍‌କେ ବିଚାର୍ କରସି । ଦସ୍ ନ ଦିଆସ୍, ସେନ୍ତାରିକଲେ ପର୍‌ମେସର୍ ତମ୍‌କେ ଦସ୍ ନ ଦାରେ



। କେମା କରା, ସେନ୍ତାଉକଲେ ତମକେ କେମା ମିଲୁସି । ୩୮ ବିନ୍ ଲକ୍‌କେ ଦାନ୍ କରା, ସେନ୍ତାଉକଲେ ପର୍‌ଫେସର୍ ତମକେ ଦାନ୍ ଦେଇସି, ଲକ୍‌ମନ୍ ମାନ୍‌ଟାନେ କାଦି ପୁରୁନ୍‌କରି ତାକେ ଚାପି ଜୁଲାଇ, ଉଚ୍‌ଲାଇକରି, ତମର୍ ଅଁଟେଇ ଦେବାଇ, କାଇକେବଇଲେ ଜନ୍ ଇସାବେ ତମେ ନାପସା, ସେ ଇସାବେ ସେ ତମକେ ନାପି ଦିଆଅଇସି ।” ୩୯ \*ଜିସୁ ସେମନ୍‌କେ ଉଦାଅରନ୍ ଦେଇ କଇଲା, “କାଣା କାଇ କାଣାକେ ବାଟ୍ ଦେକାଇପାରେକି ? ନାଇ, ନାପାରେ । ଜଦି ସେମନ୍ ସେନ୍ତାରି କର୍‌ବାଇ ବଇଲେ ଦୁଇଲକ୍‌ଜାକ କାଲେ ନ ଅଦରଡ୍ କି ? ୪୦ \*ଗୁରୁଟାନେଅନି ସିସ୍ ବଡ୍ ନାଇ । ମାତର୍ ସିସ୍‌ମନ୍ ସିକିଆ ପାଇ ସାରାଇଲେ ସିଦ୍‌ଅଇ ଗୁରୁ ସମାନ୍ ଅଇବାଇ ।”

୪୧ “ଆରି କାଇକେ ତମର୍ ବାଇର୍ ଆଁକିଟାନେ ରଇବା ସାନ୍ କାଟ୍‌ରା ଦେକ୍‌ଲାସ୍‌ନି ? ମାତର୍ ତମର୍ ନିଜର୍ ଆଁକିଟାନେ ଜନ୍ ବଡ୍ କାଟ୍‌ରା ଆଟେ, ସେଟା ବାବିଦେକାସ୍‌ନାଇ । ୪୨ ତମେ ନିଜର୍ ଆଁକିଟାନେ ରଇବା ବଡ୍‌ଟା କାଟ୍‌ରା ନ ଦେକିକରି, ନିଜର୍ ବାଇର୍ ଆଁକି ଟାନେ ରଇବା ସାନ୍ କାଟ୍‌ରା ଦେକି କେନ୍ତ୍ର କଇପାରାସ୍, ଆଉ ବାଇ ତମର୍ ଆଁକିଅନି କାଟ୍‌ରା ବାଟ୍‌କରାଇଦେବି ? ଏ କୁଟିଆଲ୍‌ମନ୍, ପର୍‌ଡୁମ୍ ନିଜର୍ ଆଁକିଅନି କାଟ୍‌ରା ବାଟ୍‌କରାଇପାକା, ତାପ୍‌ପଟେ ନିଜର୍ ବାଇର୍ ଆଁକିଟାନେ ରଇବା କାଟ୍‌ରା ସବୁ ବାଟ୍‌କରାଇବାକେ, ନିକକରି ଦେକିପାରାସ୍ ।”

ଗର୍ ଆରି ତାର୍ ପଲ୍  
(ମାତିଉ ୬:୧୭-୨୦; ୧୨:୩୩-୩୫)

୪୩ “ନିକ ଗଟେ କାରାପ୍ ପଲ୍ ନ ପଲେ, କାରାପ୍ ଗଟେ ନିକ ପଲ୍ ନ ପଲେ । ୪୪ \*କାଇକେବଇଲେ ଗର୍‌ମନ୍‌କେ ତାର୍ ପଲ୍‌ରଲାଗି ଜାନିଅଇସି । କାଟା ଗଟେଅନି ଲକ୍‌ମନ୍ ତୁମ୍‌ରି ପଲ୍ ନ ତଲଡ୍, କି କାଟା ବୁଟାଇଅନି ଅଜୁର୍ ପଲ୍ ନ ତଲଡ୍ । ୪୫ \*ନିକ ଲକ୍ ନିଜର୍ ମନ୍ ବିଡ୍‌ରର୍ ଗରବ୍‌ବିଡ୍‌ରେ ଅନି ନିକଟା ବାଟ୍‌କରାଇସି । ଆରି କାରାପ୍ ଲକ୍‌ମନ୍ ନିଜର୍ ମନ୍ ବିଡ୍‌ରର୍ ଗରବ୍‌ଟାନେ ଅନି କାରାପ୍‌ଟା ବାଟ୍‌କରାଇବାଇ । କାଇକେବଇଲେ, ମନ୍‌ବିଡ୍‌ରେ ଚିନ୍ତା କର୍‌ବାଟା, ଚଣ୍ଟି କାତା କଇସି ।”

ଦୁଇଟା ରକାମର୍ ଗର୍‌ବାନ୍‌ଦା ଲକ୍  
(ମାତିଉ ୬:୨୪-୨୭)

୪୬ “ଆରି ତମେ କାଇକେ ମକେ ଏ ମାପୁରୁ ଏ ମାପୁରୁ, ବଲି ଡାକିକରି ମର୍ ଆଦେସ୍ ମାନାସ୍ ନାଇ ? ୪୭ ଜେ ମିସା ମର୍‌ଲଗେ ଆସି, ମର୍ କାତା ସୁନି, ସେଟା ସବୁ ମାନ୍‌ସି, ସେ କାର୍ ସମାନ୍ ରଇସି, ସେଟା ମୁଇ ତମକେ ଦେକାଇବି । ୪୮ ସେ ଏନ୍ତାରି ଗଟେକ୍ ଗର୍ ଉଟାଇବା ଲକ୍‌ପାରା । ଜେ ଗଇର୍ କରି କୁନି, କୁନାଦି ପାକ୍‌ନା ଉପ୍‌ରେ ବସାଇଲା । ବନିଆ ପାନି ଆସି ସେଟା ଉଲ୍‌କା ମାଟ୍‌ଲା ମିସା ସେଟା ବସ୍‌ଲାଇ ନାପାର୍‌ଲା । କାଇକେବଇଲେ ସେଟା ନିମାନ୍‌କରି ଉଟାଇରଇଲା । ୪୯ ମାତର୍ ଜନ୍ ଲକ୍‌ମନ୍ ମର୍‌କାତା ସୁନିକରି ମିସା ସେ ଇସାବେ ଚଲାଟଲ୍‌ତି ନ କରଡ୍, ସେ କୁନାଦି ନ କରି, ବାଲି ଉପ୍‌ରେ ଗର୍‌କଲା ଲକ୍‌ପାରା । ଜବର୍ ଅଇତେ ଉଦ୍‌କାମାଟ୍‌ଲା ଦାପ୍‌ରେ ସେ ଗର୍ ବସ୍‌ଲିଗାଲା ଆରି ସେଟା ଅପର୍‌ବଲ୍ ବିନାସ୍ ଅଇଲା ।”

\* ୬:୩୯ ୬:୩୯ ମାତିଉ ୧୫:୧୪    \* ୬:୪୦ ୬:୪୦ ମାତିଉ ୧୦:୨୪, ୨୫; ଜଅନ୍ ୧୩:୧୭; ୧୫:୨୦    \* ୬:୪୪ ୬:୪୪ ମାତିଉ ୧୨:୩୩    \* ୬:୪୫ ୬:୪୫ ମାତିଉ ୧୨:୩୪



ଜିସୁ ଗଟେକ୍ ରମିୟ ଲକର୍ ଗତି ଦାଙ୍ଗ୍‌ତାକେ ନିକ କଲା  
(ମାତିଉ ୮:୫-୧୩)

୧୧ ଜିସୁ ଲକ୍‌ମନକେ ସବୁ କାତା କଇ ସାରାଇକରି କପରନାଉମ୍ ସଅରେ କେଟ୍‌ଲା । ୧୨ ସେବେଲେ ସଏଟା ସନିଅମନର୍ ମୁକିଆର୍ ଗଟେକ୍ ଗତିଦାଙ୍ଗ୍‌ତା, ଜର୍ ଅଇକରି ମଲାପାରା ଅଇଜାଇରଇଲା । ସେ ତାକେ ନିଜର୍‌ଲକ୍ ପାରା ଆଲାଦ୍ କର୍‌ତେରଇଲା । ୧୩ ସେ ଜିସୁର୍ ବିସଇର୍ କବର୍ ସୁନି, ଜିସୁ ଜେକ୍ରିକି ଆସି ତାର୍ ଗତିଦାଙ୍ଗ୍‌ତାର୍ ଜିବନ୍ ରକିଆ କର୍‌ସି ବଲି ବାବ୍‌ଲା । ସେଟାର୍‌ପାଇ ଜିସୁର୍ ଲଗେ କେତେଟା ଜିଉଦି ପାର୍‌ଟିନ୍‌ମନକେ ପାଟାଇ ତାକେ ବାବୁଜିଆ କଲାଇ । ୧୪ ପାର୍‌ଟିନ୍‌ମନ ଜିସୁର୍‌ଲଗେ କେଟିକରି ତାକେ ଜୁଆର୍ ବିଆର୍ କରି କଇବାର୍ ଦାର୍‌ଲାଇ, “ତାର୍‌ପାଇ ତମେ ଏନ୍ତାରି କରିରଇଲେ, ନିକରଇସି । ୧୫ କାଇକେବଇଲେ ସେ ଆମର୍ ଲକ୍‌ମନକେ ଆଲାଦ୍ କର୍‌ସି ଆରି ନିଜେ ସେ ଆମର୍ ସବୁଲକର୍ ପାଇ ପାର୍‌ତନାଗର୍ ତିଆର୍‌କରି ଦେଇଆଟେ ।”

୧୬ ତେଇ ଜିସୁ ତାକର୍ ସଙ୍ଗ୍ ଗାଲା । ସେ ଗରେ କେଟ୍‌ବାକେ କଣ୍ଟେକ୍ ଦୁର୍ ରଇଲାକେ, ସଏଟା ସନିଅମନର୍ ମୁକିଆ ଲକ୍‌ମନକେ ପାଟାଇ ତାକେ କଇଲା, “ମାପ୍‌ରୁ, କସ୍‌ଟ ଉଆନାଇ, କାଇକେବଇଲେ ତମେ ଜେ ମର୍ ଗରେ ପାଦ୍ ପାକାଇସା, ମର୍ ଏନ୍ତାରି ବାଗିଅ ନାଇ । ୧୭ ଏଟାର୍‌ପାଇ ମୁଇ ତମର୍‌ଟାନେ ଆଇବାକେ ମନ୍ କରିନାଇ । ମାତର୍ ଗଟେକ୍ ପଦ୍ ଆଦେସ୍ କରା, ମର୍ ଗତିଦାଙ୍ଗ୍‌ତା ନିକ ଅଇଜାଇସି । ୧୮ ମୁଇ ଗଟେକ୍ ଲକର୍ ତଲେ କାମ୍ କର୍‌ତେରଇଲେ ମିସା ମର୍ ତଲେ ସନିଅମନ୍ ଆଟଡ୍ । ଆରି ମୁଇ ଗଟେକ୍ ଲକ୍‌କେ ଜା ବଲି କଇଲେ, ସେ ଜାଇସି । ବିନ୍ ଲକ୍‌କେ ଆଉ ବଇଲେ ସେ ଆଇସି । ମର୍ ଗତିଦାଙ୍ଗ୍‌ତାକେ ଏଟା କର୍ ବଇଲେ, ସେ ସେଟା କର୍‌ସି ।”

୧୯ ଜିସୁ ତାର୍ ଏ ସବୁ ବିସଇ ସୁନି କାବା ଅଇଗାଲା, ଆରି ବୁଲିକରି ତାର୍ ପଟେ ଆଇତେରଇବା ଲକ୍‌ମନକେ କଇଲା, “ମୁଇ ତମ୍‌କେ କଇଲିନି, ଇସ୍ରାଏଲ୍ ବିତ୍‌ରେ ମିସା ଏତେକ୍ ବଡ୍ ବିସ୍‌ବାସି ନ ମିଲଡ୍ ।”

୨୦ ଆରି ଜିସୁକେ ତାକ୍‌ବାକେ ଜାଇରଇଲା ଲକ୍‌ମନ୍ ଗରେ ବାଉଡି ଆସି ଗତିଦାଙ୍ଗ୍‌ତା ନିକ ଅଇରଇବାଟା ଦେକ୍‌ଲାଇ ।

ଜିସୁ ଗଟେକ୍ ରାଣ୍ଡିମାଇଜିର୍ ମରିଜାଇରଇଲା ଦାଙ୍ଗ୍‌ତା ପିଲାକେ ଉଟାଇଲା

୨୧ ତେଇଅନି ଜିସୁ ନାଇନ୍ ନାଉର୍ ନଅରେ ଗାଲା । ତାର୍‌ସଙ୍ଗ୍ ସିସ୍‌ମନ୍ ଆରି ଲକ୍‌ମନ୍ ବେସି ଜାଇତେରଇଲାଇ ।

୨୨ ସେ ନଅରର୍ ଦୁଆର୍‌ଲଗେ କେଟୁ କେଟୁ, ଏଦେ ଦେକା ! ଲକ୍‌ମନ୍ ଗଟେକ୍ ମଲା ଲକ୍‌କେ ବଇଆନଡେ ରଇଲାଇ । ସେ ନିଜର୍ ମାଆର୍ ଗଟେକ୍ ସେ ପିଲା, ଆରି ସେ ମାଇଜି ରାଣ୍ଡିଟା । ନଅରର୍ ବେସିଲକ୍‌ମନ୍ ତାର୍ ସଙ୍ଗ୍ ରଇଲାଇ । ୨୩ ସେ ରାଣ୍ଡି ମାଇଜିକେ ଦେକି ଜିସୁ ଦୁକ୍‌କଲା ଆରି ତାକେ କଇଲା, “ଏ ମାଆ କାନ୍‌ନାଇ ।” ୨୪ ଆରି, ଜିସୁ ଜାଇକରି ତାଣ୍ଡିଆ ଚିଇଲାକେ ବଇ ଆନଡେରଇବା ଲକ୍‌ମନ୍ ଚିଆଅଇଲାଇ । ଆରି ସେ କଇଲା, “ମୁଇ ତକେ କଇଲିନି, ନୁନା ଉର୍ !” ୨୫ ତେଇ ସେ ଦାଙ୍ଗ୍‌ତା ଉଟିବସ୍‌ଲା ଆରି କାତା କଇବାର୍ ଦାର୍‌ଲା । ଆରି ଜିସୁ ସେ ଦାଙ୍ଗ୍‌ତାକେ ତାର୍ ମାକେ ସର୍‌ପିଦେଲା ।

୨୬ ତେଇ ସବୁଲକ୍ ଡରିଗାଲାଇ, ଆରି ପର୍‌ମେସରର୍ ମଇମା କରି କରି କଇଲାଇ “ଆମର୍ ବିତ୍‌ରେ ଗଟେକ୍ ମଆନ୍ ବବିସଡ୍‌ବକ୍‌ତା ଆଇଲାଆଟେ, ଆରି ପର୍‌ମେସର୍ ନିଜର୍ ଲକ୍‌ମନକେ ଉଦାର୍ କର୍‌ବାକେ ଆସିଆଟେ ।”

୧୭ ଜିସୁର୍ ଏ ବିସଇର୍ କାତା ଗୁଲାଇ ଜିଉଦା ଦେସେ ଆରି ଚାରିବାଟର୍ ଗାଉଁଗଣ୍ଡାର୍ ଲକ୍ମନ୍ ଜାନଲାଇ ।

ତୁବନ୍ ଦେଉ ଜଅନର୍ ଦୁଇଟା ସିସ୍  
(ମାତିଉ ୧୧:୨-୧୯)

୧୮ ପରେ ତୁବନ୍ ଦେଉ ଜଅନର୍ ସିସ୍ମନ୍ ଏ ସବୁ କାତା ଜଅନକେ ଜାନାଇଲାଇ ।  
୧୯ ତେଇ ଜଅନ୍ ନିଜର୍ ସିସ୍ମନ୍ ବିତ୍ରେଅନି ଦୁଇଲକ୍ମକେ ତାକି ମାପ୍ପୁରୁର୍ ଲଗେ ଏନ୍ତାରି କଇ ପାଟାଇଲା, “ଜେ ଆଇବାର୍ ରଇଲା, ସେ ଲକ୍ ତମେସେ କି ? କି କାଇ ବିନ୍ ଲକ୍କେ ଆମେ ଜାଗ୍ବୁ ?”

୨୦ ସେ ଲକ୍ମନ୍ ଜିସୁର୍ଲଗେ କେଟିକରି କଇଲାଇ, “ତୁବନ୍ ଦେଉ ଜଅନ୍ ଆମ୍ବକେ ଏନ୍ତାରି କଇ ତମର୍ଲଗେ ପାଟାଇଆଚେ, ଜେ ଆଇବାର୍ ରଇଲା, ସେ ଲକ୍ ତମେ କି ? କି କାଇ ଆମେ ଆରି ବିନ୍ ଲକ୍କେ ଜାଗ୍ବୁ ?”

୨୧ ସେବେଲେ ଜିସୁ ଜର୍ ଦୁକା, ଆରି ତୁମା ଦାରଲା ଲକ୍ମନ୍କେ ନିକ କଲା । ଆରି କେତେଟା କାଣାମନ୍କେ ମିସା ଆଁକି ଡିସାଇଲା ।

୨୨ ଜିସୁ ଜଅନର୍ ସିସ୍ମନ୍କେ କଇଲା, “ତମେମନ୍ ଜନ୍ ଜନ୍ଟା ଦେକ୍ଲାସ୍ ଆରି ସୁନ୍ଲାସ୍, ସେଟା ସବୁ ଜାଇ ଜଅନ୍କେ ଜାନାଆ, କାଣା ଲକ୍ମନ୍ ଦେକିପାରୁଲାଇନି, ଚଟାମନ୍ ଇଣ୍ଡ୍ରୁଲୁଲାଇନି, ବଡ଼ ରଟିମନ୍ ନିକ ଅଇଲାଇନି, ବଇରା ଲକ୍ମନ୍ ସୁନ୍ଲାଇନି, ମଲାଲକ୍ମନ୍ ଜିବନ୍ଅଇ ଉର୍ଲାଇନି, ଆରି ଦୁକର୍ ଲକ୍ମନ୍କେ ମାପ୍ପୁରୁର୍ ବାକିଅ ସୁନାଇଅଇଲାନି । ୨୩ ଜନ୍ଲକ୍ ମକେ ‘କିରିସ୍ଟ’ ସେ କି ନର୍ବ ? ବଲି ନ ବାବିକରି ବିସବାସ୍ କର୍ସି, ତାର୍ କେତେକ୍ ନିକ କରମ୍ ।”

୨୪ ଜଅନର୍ ସିସ୍ମନ୍ ବାଉଡିଗାଲାପଚେ ଜିସୁ ଲକ୍ମନ୍କେ ଜଅନର୍ ବିସଇ କଇବାର୍ଦାରଲା, “କାଇଟା ଦେକ୍ବାକେ ତମେ ମାରୁବାଲି ବୁର୍ବ ବାରଇ ଜାଇରଇଲାସ୍ ? କାଇ ପବନେ ଜୁଲ୍ଡେରଇବା ବାଉଁସ୍ ନାଲା ? ୨୫ ସେଟା ନଇଲେ ତମେ କାଇଟା ଦେକ୍ବାକେ ବାରଇଜାଇ ରଇଲାସ୍ ? କାଇ ଜବର୍ ଡାରୁଦେଇ ବସ୍ତର୍ ଗେନି ପିନ୍ଦିରଇବା ଗଟେକ୍ ଲକ୍କେ ଦେକ୍ବାକେ ? ଦେକା, ଜନ୍ ଲକ୍ମନ୍ ଜେ କି ସୁନ୍ଦର୍ ବସ୍ତର୍ ପିନ୍ଦିକରି, ସୁକର୍ ସଙ୍ଗ୍ ଦିନ୍ ବିତାଇବାଇ, ସେମନ୍ ତା ରାଜାର୍ ନଅରେ ରଇବାଇ । ୨୬ ସେନ୍ତାର୍ ନଇଲେ କାଇକେ ବାରଇ ଜାଇରଇଲାସ୍ ? କାଇ ଗଟେକ୍ ବବିସ୍ତବକ୍ତାକେ ଦେକ୍ବାକେ ? ମୁଇ ତମ୍ବକେ ସତ୍ କଇଲିନି, ଜଅନ୍ ବବିସ୍ତବକ୍ତାମନ୍ ତେଇଅନି ମିସା ଅଦିକାର୍ ରଇବା ଲକ୍ ।” ୨୭ ଜାର୍ ବିସଇ ନେଇକରି ଦରମ୍ ସାସ୍ତରେ ଲେକାଆଚେ । ପର୍ମେସର୍ କଇଲା, “ଆମେ ନିଜର୍ ଦୁଡ୍ବକେ ତମର୍ ଆଗେ ପାଟାଇଲୁନି, ସେ ତମର୍ ମୁଆଟେ ତମର୍ପାଇ ବାଟ୍ ତିଆର୍ କର୍ସି, ଏ ସେ ଲକ୍ । ୨୮ ମୁଇ ତମ୍ବକେ ସତ୍ କଇଲିନି, ମାଇଜିମନ୍ ଟାନେଅନି ଜାଡ୍ କିରିରଇବା ସବୁର୍ ବିଡ୍ରେ, ଜଅନର୍ ଟାନେଅନି ଆରି ମୁକିଅ କେ ମିସା ନାଇ, ଏଲେମିସା ପର୍ମେସରର୍ ରାଇଜେ ଜେ ସାନ୍, ସେ ଜଅନର୍ ଟାନେଅନି ବଡ଼ ।”

୨୯ \*ଜନ୍ଲକ୍ମନ୍ ଏ ସବୁ କାତା ସୁନ୍ଡେରଇଲାଇ, ସେମନ୍, ଜେନ୍ତାରିକି ସିସ୍ତୁମାଲ୍ମନ୍ ମିସା ପର୍ମେସରର୍ ଦାବିକଲାଟା ମାନି ଜଅନର୍ ଟାନେ ତୁବନ୍ ନେଇରଇଲାଇ । ୩୦ ମାତର୍ ପାରୁସିମନ୍ ଆରି ନିଅମ୍ ସିକାଉମନ୍ ତାକର୍ ଜିବନ୍ପାଇ ପର୍ମେସର୍ କିରିରଇବା ଜଜ୍ନା ମାନନ୍ନାଇ, ଆରି ଜଅନର୍ଟାନେ ତୁବନ୍ ନେଅନ୍ନାଇ । ୩୧ ଜିସୁ ଆରିତରେକ୍ କଇଲା, ଏବର୍ ଲକ୍ମନ୍କେ ମୁଇ କାର୍ ସଙ୍ଗ୍ ସମାନ୍ କର୍ବି ? ଆରି ସେମନ୍ କାର୍ ପାରା ? ୩୨ ଜନ୍ ପିଲାମନ୍ ଡାଣ୍ଡେବାଟେ ବସି ସେମନ୍ ସେମନ୍ ତାକାତାକିଅଇ କୁଆକୁଇ ଅଇବାଇ, “ ଅଇରେ,

ଆମେ ତମରଲଗେ ବାଉଁସି ପୁକଲୁ, ତମେ ନାଟ୍ କରାସନାଇ, ଦୁକର୍ ଗିଡ଼ ଗାଇଲୁ, ତମେ କାନ୍ଦାସନାଇ, ସେମନ୍ ତାକରପାରା । ୩୩ କାଇକେବଇଲେ, ତୁବନ୍ ଦେଉ ଜଅନ୍ ଆସି ଉପାସେ ରଇ, ଆମଟ୍ ଅଇଲା ପଲ୍‌ରସ୍ ମିସା କାଏନାଇ, ଆରି ତମେ ତାକେ କଇଲାସନି ତୁମା ଦାରିଆଚେ ବଲି । ୩୪ ପର୍ମେସର୍ ପାଟାଇରଇବା ନର୍ପିଲା ମୁଇ ଆସି କିଆପିଆ କଲିନି, ଆରି ତମେମନ୍ କଇଲାସନି, ଦେକା ଅ ! ଏ ଗଟେକ୍ କାଉରାଟା ଆରି ମଦୁଆଟା, ସିସ୍‌ତୁମାଙ୍ଗୁମନର୍ ଆରି ପାପିମନର୍ ମଇତର୍ । ୩୫ ମାତର୍ ଜନ୍‌ଲକ୍‌ମନ୍ ପର୍ମେସରର୍ ଗିଆନ୍ ମାନ୍‌ବାଇ, ସେମନର୍‌ଟାନେ ମାପୁର ସତ୍ ଇସାବେ ତସ୍‌ସି ।”

**ପାରୁସି ସିମନର୍ ଗରେ ଜିସୁ**

୩୬ ଆରି ପାରୁସିମନର୍ ବିଡ଼ରେଅନି ଗଟେକ୍ ଲକ୍ ଜିସୁକେ କାଇବାକେ ଡାକଲା । ତେଇ ଜିସୁ ପାରୁସିର୍ ଗରେ ଜାଇକରି କାଇବାକେ ବସଲା । ୩୭ ଆରି ଦେକା, ସେ ନଅରେ ଗଟେକ୍ ପାପି ମାଇଜି ରଇଲା । ଜିସୁ ପାରୁସିର୍ ଗରେ କାଇବାକେ ବସିଆଚେ ବଲି ଜାନିକରି, ସେ ଗଟେକ୍ କଣ୍ଡିତେଇ ବାସନା ଚିକନ୍ ଆନ୍‌ଲା । ୩୮ ପର୍ବାଚେ ଜିସୁର୍ ପାଦ୍‌ଲଗେ ଚିଆଅଇ ଆଁସୁ ଜରାଇ ଜରାଇ ତାର୍ ଆଁସୁ ପାନି ସଙ୍ଗ୍ ଜିସୁର୍ ପାଦ୍ ବିଜାଇକରି ତାର୍ ଚେଣ୍ଡିସଙ୍ଗ୍ ସେଟା ପୁଟ୍‌ବାର୍ ଦାରଲା । ଆରି ତାର୍ ପାଦେ ଚୁମି ଚୁମି କରି ସେ ଚିକନ୍ ଲାଗାଇବାର୍ ଦାରଲା । ୩୯ ସେଟା ଦେକିକରି ଜନ୍ ପାରୁସି ତାକେ ଡାକିରଇଲା, ସେ ମନେ ମନେ ବାବ୍‌ଲା, “ଜଦି ଏ ଲକ୍ ବବିସତ୍‌ବକତା ଅଇରଇତା ବଇଲେ, ଆକେ ଜେ ଚିଇଲାନି, ସେ କେ ଆରି ସେଟା କେନ୍ତାର୍ ମାଇଜି, ବଲି ଜାନ୍‌ତା । କାଇକେବଇଲେ ସେ ଗଟେକ୍ ପାପି ମାଇଜି ।”

୪୦ ଜିସୁ ତାକେ କଇଲା, “ସିମନ୍ ତକେ ମୁଇ ଅଲପ୍ କଇବାର୍ ଆଚେ ।” ସେ କଇଲା, “ଗୁରୁ କୁଆ ଡେବେ ।”

୪୧ “ଗଟେକ୍ ସାଉକାରର୍ ରୁନ୍ ନେଇରଇବା ଦୁଇଲକ୍ ରଇଲାଇ, ଗଟେକ୍‌ଲକ୍ ପାଁର୍‌ସ ରୁପାଟାଙ୍ଗା ଆରି ଗଟେକ୍‌ଲକ୍ ପଟାସ୍ ରୁପାଟାଙ୍ଗା ରୁନ୍ କରିରଇଲାଇ । ୪୨ ରୁନ୍ ବାନ୍‌ବାକେ ସେମନ୍‌କେ କାଇଟା ନ ରଇଲାଜେ, ସାଉକାର୍ ଦୁଇଲକ୍‌ର୍ ଜାକ ରୁନ୍ ଚାଡ଼ିଦେଲା । ତେବେ ସେମନର୍ ବିଡ଼ରେ କେ ତାକେ ବେସି ଆଲାଦ୍ କରସି ?”

୪୩ ସିମନ୍ କଇଲା, “ମୁଇ ବାବ୍‌ଲିନି, ସାଉକାର୍ ଜାକେ ଅଦିକ୍ ରୁନ୍ ଚାଡ଼ିଦେଲା, ସେ ।” ଜିସୁ ତାକେ କଇଲା, “ତମେ ଟିକ୍ ବିଚାର୍ କଲାସ୍ ।” ୪୪ ଆରି ଜିସୁ ସେ ମାଇଜିର୍‌ବାଚେ ମୁ ବୁଲାଇକରି ସିମନ୍‌କେ କଇଲା, “ଏ ମାଇଜିକେ ଦେକ୍‌ଲୁସିନି ? ମୁଇ ତମର୍ ଗରେ ଆଇଲି, ମକେ ଗଡ଼ ଦଇବାକେ ପାନି ଦିଆସନାଇ, ମାତର୍ ଏ ତାର୍ ଆଁସୁପାନି ସଙ୍ଗ୍ ମର୍ ପାଦ୍ ବିଜାଇ ତାର୍ ଚେଣ୍ଡିସଙ୍ଗ୍ ସେଟା ପୁଟିଦେଲା । ୪୫ ତମେ ମକେ ଚୁମାସନାଇ, ମାତର୍ ମୁଇ ବିଡ଼ରେ ଆଇଲା ବେଲେଅନି ଏ ମର୍ ପାଦେ ଚୁମି ଚୁମି, ତାକେନାଇ । ୪୬ ତମେ ମକେ ସନ୍‌ମାନର୍ ସଙ୍ଗ୍ ମୁଣ୍ଡେ ଟିକନ୍ ଲାଗାଆସନାଇ, ମାତର୍ ଏ ମର୍ ପାଦେ ବାସନା ଚିକନ୍ ଲାଗାଇଲା । ୪୭ ଡେବର୍‌ପାଇ ମୁଇ ତକେ କଇଲିନି, ଏ ମାଇଜିର୍ କେତେ କେତେ ପାପ୍ କେମାଅଇଲାଆଚେ, କାଇକେବଇଲେ ସେ ବେସି ଆଲାଦ୍ କଲା, ମାତର୍ ଜାକେ ଅଲପ୍ କେମା ଦିଆଅଇସି, ସେ ଅଲପ୍ ଆଲାଦ୍ କରସି ।”

୪୮ ଆରି ଜିସୁ ସେ ମାଇଜିକେ କଇଲା, “ତର୍ ସବୁ ପାପ୍ କେମା ଅଇଲା ଆଚେ ।”

୪୯ ତେଇ ଜିସୁର୍‌ସଙ୍ଗ୍ କାଇବାକେ ବସିରଇବା ଲକ୍‌ମନ୍ ମନେ ମନେ କଇବାର୍ ଦାରଲାଇ, “ପାପ୍ ମିସା କେମାକଲାନିଜେ, ଏ କେ ?”

୫୦ ମାତର୍ ଜିସୁ ସେ ମାଇଜିକେ କଇଲା, “ତୁଇ ମକେ ବିସ୍‌ବାସ୍ କଲାପାଇ ବଲି ରକିଆ ପାଇଆରୁସ୍, ସାନ୍ତିସଙ୍ଗ୍ ଉଟିଜା ।”

\* ୭:୩୭ ୭:୩୭ ମାଡ଼ିଉ ୨୭:୭; ମାର୍‌କ ୧୪:୩; ଜଅନ୍ ୧୨:୩



ସିସ୍ତମାନର ସଙ୍ଘ ଜିସୁ

୧ ତେଜଅନି ଚନେକ୍ ଗାଲାପରେ, ଜିସୁ ନଅରେ ନଅରେ ଆରି ଗାଏଁ ଗାଏଁ ପରମେସରର ରାଇଜର ସୁବକବର କଇ ବୁଲବାର ଦାରଲା, ଆରି ବାରଟା ସିସ୍ତମାନ ତାର ସଙ୍ଘ ରଇଲା । ୨ \* ଜନ୍ ମାଇଜିମନ୍ ତୁମାଦାରଲା ଟାନେଅନି ଆରି ଜରଦୁକା ଟାନେଅନି ନିକ ଅଇରଇଲା, ସେମନ୍ ମିସା ତାର ସଙ୍ଘ ରଇଲା । ମାଇଜିମାନର ବିତ୍ତରେ ଅନି ମରିୟମ୍ ଜାକେ କି ମଗଦଲିନି ମରିୟମ୍ ବଲି କଇବାଇ । ଜାରଟାନେଅନି ସାତଟା ତୁମା ବାରଇ ଜାଇରଇଲା । ୩ ଏରଦ୍ ରାଜାର ଗୁମସତା କୁଜାର ମାଇଜି ଜଆନା, ସସନା, ଆରି କେତେକ୍ କେତେକ୍ ମାଇଜିମନ୍, ଜିସୁର ସଙ୍ଘ ରଇ ନିଜର ନିଜର ଦନ୍ ସାରାଇ ତାକେ ସେବା କର୍ତ୍ତେରଇଲା ।

ବିଅନ୍ ବୁନ୍ବା ଚାସିର କାତା

(ମାତିଉ ୧୩:୧-୯; ମାର୍କ ୪:୧-୯)

୪ ଜେତେବେଲେ ଲକ୍ମନ୍ ଗଟେକ୍ ଜାଗାଇ ବୁଲୁଅଇଲା, ଆରି ନଅରେ ନଅରେ ଅନି ତାରଲଗେ ଆଇଲାଇଜେ ଜିସୁ ଏନ୍ତି ଉଦାଅରନ୍ ଦେଇ କଇଲା, ୫ “ଗଟେକ୍ ଚାସି ତାର ବିଅନ୍ ବୁନ୍ବାକେ ବାରଇଲା । ସେ ବୁନ୍ ବୁନ୍ କେତେଟା ବିଅନ୍ ବାଟେ ଅଦରଲା । ଲକ୍ମନ୍ ସେଟା ମାଣ୍ଡୁରୁଣ୍ଡୁ କରିଦେଲା ଆରି ଚତଇମନ୍ ଆସି କାଇଦେଲା । ୬ କେତେଟା ପାକ୍ନା ବାଡି ରଇଲା ବୁଏଁ ଅଦରଲା, ସେଟା ଆଁକରି ଗାଜା ଅଇଲା, ମାତର୍ ମାଟି ନ ବିଜିରଇଲାଜେ ସୁକିଗାଲା । ୭ କେତେଟା କାଟାବୁଟାମନ୍ ମଜାଇ ଅଦରଲା । କାଟାବୁଟାମନ୍ ଦାପ୍ରେ ବଡିକରି ଆଁକରଲାଟାମନ୍ କେ ଚାପିଦେଲା । ୮ ଆରି ବାକି କେତେଟା ନିକ ଜମିଟାନେ ଅଦରଲା ଆରି ସଏ ଗୁନ୍ ପଲ୍ ପଲ୍ଲା ।” ଏଟା କଇସାରାଇ ଜିସୁ ଆଉଲିଅଇକରି କଇଲା, “ଜାକେ ସୁନ୍ଲିପାରା କାନ୍ ଆଟେ, ସେ ସୁନ୍ ।”

ଉଦାଅରନର ଅରଡ୍

(ମାତିଉ ୧୩:୧୦-୧୭; ମାର୍କ ୪:୧୦-୧୭)

୯ ତାର ସିସ୍ତମନ୍ ଏ ଉଦାଅରନ୍ ଦେଇରଇବାଟା କାଇଟା ଅଇରଇସି ବଲି ତାକେ ପାଚାରବାର ଦାରଲା । ୧୦ ତେଇ ଜିସୁ ସେମନ୍ କେ କଇଲା, “ପରମେସରର ରାଇଜର ଟିକିନିକି ବିସଇ ଜାନଡ୍ ବଲି ତମ୍ କେ ଗିଆନ୍ ଦିଆଅଇଲାଆଟେ, ମାତର୍ ବିନ୍ଲକ୍ମନ୍ କେ ଉଦାଅରନ୍ ଦେଇ କଇଅଇସି, ଜେନ୍ତାରିକି ସେମନ୍ ଦେକି ଦେକି ନ ଦେକଡ୍ କି ସୁନି ସୁନି ମିସା ନ ବୁଜଡ୍ ।”

ବିଅନ୍ ବୁନ୍ବାଟାର ଅରଡ୍

(ମାତିଉ ୧୩:୧୮-୨୩; ମାର୍କ ୪:୧୩-୨୦)

୧୧ “ଉଦାଅରନର କାତା ଏନ୍ତାରି, ବିଅନ୍ ଅଇଲାନି ପରମେସରର ବାକିଅ । ୧୨ ବାଟ୍ ଲଗେ ଅଦରଲା ବିଅନ୍, ଏନ୍ତାରି ଲକ୍ମନ୍ ପାରା, ଜେମନ୍ ବାକିଅ ସୁନ୍ବାଇ । ତାରପଟେ ସଇତାନ୍ ଆସି, ଜେନ୍ତାରି ସେମନ୍ ବିସ୍ତବାସ୍ କରି ରକିଆ ନ ପାଅଡ୍, ସେ ଲକ୍ମନ୍ ମନ୍ ବିତ୍ତରେଅନି ବାକିଅ ଜିକିନେଇସି । ୧୩ ପାକ୍ନାବାଡି ବୁଏଁ ଅଦରଲା ବିଅନ୍ ଏନ୍ତାରି ଲକ୍ମନ୍ କେ ବୁଜାଇସି । ସେମନ୍ ବାକିଅ ସୁନି ସାରଦାସଙ୍ଘ୍ ମାନ୍ବାଇ, ମାତର୍ ସେମନ୍ କେ ଚେର୍ ନ ରଇଲାରପାଇ ବଲି ଚନେକ୍ ବିସ୍ତବାସ୍ କର୍ବାଇ ଆରି କାଇଆଲେ ପରିକା ବେଲାଇ ବିସ୍ତବାସ୍ ଚାଡିଦେବାଇ । ୧୪ ଆରି କାଟାବୁଟାମନ୍ ମଜାଇ ଅଦରଲା ବିଅନ୍ ଏନ୍ତାରି ଲକ୍ମନ୍ କେ ବୁଜାଇସି । ଜନ୍ଲକ୍ମନ୍ ବାକିଅ ସୁନ୍ବାଇ, ମାତର୍ ଜଗତର୍ ଚିନ୍ତା, ଦନ୍ ସଁପତିର୍ ଚିନ୍ତା କରି କରି ଚାପିଅଇଜିବାଇ ।

\* ୮:୨ ୮:୨ ମାତିଉ ୨୭:୫୫,୫୬; ମାର୍କ ୧୫:୪୦,୪୧; ଲୁକ୍ ୨୩:୪୯

ତେଜ ନିକ ଦାନ ନ ଅଏ । ୧୫ ଆରି ନିମାନ ବୁର୍ବୁ ଅଦରଲା, ବିଅନ୍ ଏନ୍ତାରି ଲକ୍ମନକେ ବୁଜାଇସି । ଜନ୍ ଲକ୍ମନ କି ନିମାନ ଆରି ଦରମ୍ ମନେ ବାକିଅ ସୁନିକରି ସେଟା ତାଟ୍ ସଙ୍ଗ୍ ଦାରି ସଙ୍ଗଇବାଇ ଆରି ଜାଗିରଇକରି ପଲ୍ପଲ୍ପବାଇ ।”

ମାନ ତଲେ ବତି  
(ମାର୍ଚ୍ଚକ ୪:୨୧-୨୫)

୧୬ ☆“ବତି ତସାଇ କରି କେ ମିସା ତାଲାତାବି ନ ସଙ୍ଗଅଡ୍ । କି କଟ୍ ତଲେ ନ ସଙ୍ଗଅଡ୍ । ମାତର୍ ବତି କୁଦରା ଉପ୍ରେ ସଙ୍ଗଇବାଇ । ଜେନ୍ତାରିକି ଆଇଲା ଲକ୍ମନ ଉଜଲ୍ ଦେକିପାରଡ୍ ।”

୧୭ ☆“କାଇକେବଇଲେ, ଏନ୍ତାରି ଲୁଟିରଇବା ବିସଇ କାଇଟା ନାଇ, ଜନ୍ଟା ଜାନା ନ ପଡେ । ତାବିଅଇରଇବା ବିସଇ କାଇଟା ନାଇ ଜନ୍ଟା ଉଗାଡି ନର୍ବ ।”

୧୮ ☆“ସେଟାର ପାଇ, ଜେନ୍ତାରି ସୁନ୍ସା, ସେ ବିସଇ ନେଇକରି ଜାଗରଡ୍ ରୁଆ । କାଇକେବଇଲେ ଜାକେ ଆଟେ ତାକେ ଅଦିକ୍ ଦିଆଅଇସି । ଆରି ଜାକେ ନାଇ, ସେ ଜେଡ୍‌କି ନିଜର୍ଟା ଆଟେ ବଲି ବାବ୍‌ସି, ସେ ଅଲପ୍ଟା ମିସା ତାର୍ଟାନେଅନି ନିଆଅଇସି ।”

ଜିସୁର ମାଆ ଆରି ବାଇମନ୍  
(ମାଡିଉ ୧୨:୪୬-୫୦; ମାର୍ଚ୍ଚକ ୩:୩୧-୩୫)

୧୯ ଜିସୁର ମାଆ ଆରି ବାଇମନ୍ ତାର୍ ଲଗେ ଆଇଲାଇ । ମାତର୍ ଲକ୍ମନ ଜବର୍ ରଇଲାଇକେ ତାର୍ ସଙ୍ଗ୍ ମିସିନାପାର୍ଡେତେ ରଇଲାଇ । ୨୦ ତେଇ ଜିସୁକେ ଏ କବର୍ ଦେଲାଇ, “ତମର୍ ମାଆ ଆରି ବାଇମନ୍ ତକେ ଦେକ୍‌ବାକେ ମନ୍‌କରି ବାଇରେ ଚିଆଅଇଲାଇ ଆଟଡ୍ ।”

୨୧ ମାତର୍ ଜିସୁ ଲକ୍ମନକେ କଇଲା, “ଜନ୍ ଲକ୍ମନ ପର୍ମେସରର୍ ବାକିଅ ସୁନ୍‌ବାଇ ଆରି ମାନ୍‌ବାଇ ସେମନ୍ ମର୍ ମାଆ ଆରି ବାଇମନ୍ ।”

ଜିସୁ ବାଉପବନ୍‌କେ ତେବାଇଲା  
(ମାଡିଉ ୮:୨୩-୨୭; ମାର୍ଚ୍ଚକ ୪:୩୫-୪୧)

୨୨ ଦିନେକ୍ ଜିସୁ ଆରି ତାର୍ ସିସମନ୍ ଗଟେକ୍ ତଙ୍ଗାଇ ଚଗ୍‌ଲାଇ, ଆରି ସେ ସିସମନ୍‌କେ କଇଲା, “ଆସା, ଗାଡ୍ ସେପାଟେ ଜୁ ।” ତେଇ ସେମନ୍ ତଙ୍ଗା ମେଲ୍‌ଲାଇ । ୨୩ ମାତର୍ ତଙ୍ଗାଗାଟି ଗାଲାବେଲେ ଜିସୁ ସଇଦେଲା । ସେଡ୍‌କିବେଲେ ଗାଡେ ଅଟାଡ୍ ବାଉପବନ୍ ଆଇଲା ଆରି ତଙ୍ଗାଇ ପାନିପୁରି ବର୍ଡି ଅଇବାର୍ ଦାର୍‌ଲା । ସେମନ୍ ବଡ୍ ବିପଦେ ପଡିଗାଲାଇ । ୨୪ ତେଇ ସିସମନ୍ ଜିସୁରଲଗେ ଆସି ତାକେ ଉଟାଇ କଇଲା “ଏ ଗୁରୁ, ଏ ଗୁରୁ, ଆମେ ମରିଜିବୁବେ !” ତେଇ ଜିସୁ ଉଟିକରି ପବନ୍ ଆରି ବଡ୍ ଲଅଡିକେ ଦମ୍‌କାଇଲା, ଆରି ସେଟା ସବୁ ଚିମ୍‌ରାଇଅଇ ତବିର୍ ଅଇଲା । ୨୫ ସେ ସିସମନ୍‌କେ କଇଲା, “ତମର୍ ବିସ୍‌ବାସ୍ କେନେ ଅଇଲା ?” ମାତର୍ ସେମନ୍ ଡରିକରି କାବାଅଇ ନିଜେ ନିଜେ କଇବାର୍ ଦାର୍‌ଲାଇ । “ତେବେ ଏ କେ ଜେ ପବନ୍ ଆରି ପାନିକେ ମିସା ଆଦେସ୍ ଦେଲା ଦାପ୍ରେ, ସେଟା ସବୁ ତାର୍ ଆଦେସ୍ ମାନ୍‌ବାଇ ।”

ଜିସୁ ଗଟେକ୍ ତୁମା ଦାରିରଇବା ଲକ୍‌କେ ନିକକଲା  
(ମାଡିଉ ୮:୨୮-୩୪; ମାର୍ଚ୍ଚକ ୫:୧-୨୦)

୨୬ ପଟେ ଜିସୁ ଆରି ତାର୍ ସିସମନ୍ ଗାଲିଲି ମୁଆଟର୍ ସେପାଟେ ଗରାସିୟମନ୍‌ର୍ ଜାଗାଇ କେଟ୍‌ଲାଇ । ୨୭ ଜିସୁ ତଙ୍ଗାଇଅନି ଉତର୍‌ଲା ଦାପ୍ରେ, ସେ ନଅରର୍ ଗଟେକ୍

☆ ୮:୧୭ ୮:୧୭ ମାଡିଉ ୫:୧୫; ଲୁକ୍ ୧୧:୩୩ ☆ ୮:୧୭ ୮:୧୭ ମାଡିଉ ୧୦:୨୬; ଲୁକ୍ ୧୨:୨ ☆ ୮:୧୮ ୮:୧୮ ମାଡିଉ ୨୫:୨୯; ଲୁକ୍ ୧୯:୨୭

ତୁମ୍ଭାଦାରୁଲା ଲକ୍ ତାକେ ବେଟୁଅଇଲା । ସେ ବେସି ଦିନେଅନି କାଇଟା ନ ପିନ୍ଦିକରି ଗରେ ନ ରଇ, ମସ୍ନେ ରଇତେ ରଇଲା । ୨୮ ସେ ଜିସୁକେ ଦେକି କିରକିରି ତାର ପାଦେ ଅଦ୍ରି, ଆଉଲିଅଇ କଇଲା, “ଏ ବେସି ବପୁରସଙ୍ଗ୍ ରଇବା ପର୍ତ୍ତେସରର୍ ପଅ ଜିସୁ, ମର୍ ଲଗେ ତମର୍ କାଇ କାମ୍ ଆଚେ ? ମୁଇ ତମ୍‌କେ ବାବୁଜିଆ କରି କଇଲିନି, ମକେ କସ୍‌ଟ ନ ଦିଆ ।” ୨୯ କାଇକେ ବଇଲେ ଜିସୁ ତୁମାକେ ସେ ମୁନ୍‌ସର୍ ଟାନେଅନି ବାରଇଜାଅ ବଲି ଆଦେସ୍ ଦେଇରଇଲା । ସେ ତୁମା ସେଲକ୍‌କେ ଦାରିଲାଗିରଇଲା, ଆରି ଲକ୍‌ମନ୍ ତାକେ ସିକିଲି ସଙ୍ଗ୍ ବାନ୍ଦି ଜାଗ୍‌ତେ ରଇଲାଇ । ମାତର୍ ସେ ବାନ୍ଦିଲାଟା ସବୁ ଚିତାଇ ପାକାଇତେରଇଲା ଆରି ତୁମା ତାକେ କିନରା ଜାଗାମନ୍‌କେ ଦାରିଜାଇତେରଇଲା ।

୩୦ ଜିସୁ ତାକେ ପାଚାରଲା, “ତର୍ ନାଉଁ କାଇ ନାଉଁ ?” ସେ କଇଲା, ବାଇନି, କାଇକେ ବଇଲେ ତାକେ ଗାଦା ତୁମାମନ୍ ଦାରି ରଇଲାଇ । ୩୧ ଆରି ଜିସୁ ଜେନ୍ତ୍ରକି ସେମନ୍‌କେ ପାତାଲେ ଜିବାକେ ଆଦେସ୍ ନ ଦେଏ, ଏଟାର ପାଇ ସେମନ୍ ତାକେ ବାବୁଜିଆ କର୍‌ବାର୍ ଦାରଲାଇ ।

୩୨ ତେଇ କୁପ୍‌ଲି ଲଗେ ଗଟେକ୍ ମାନ୍ଦା ଗୁସ୍‌ରି ରାସି ଚାର୍‌ତେ ରଇଲାଇ । ଆରି ସେ ଜେନ୍ତ୍ରାରି ସେମନ୍‌କେ ସେ ଗୁସ୍‌ରି ମାନ୍ଦାର୍ ମଜାଇ ପୁରବାକେ ଆଦେସ୍ ଦେଇସି, ଏଟାର ପାଇ ସେମନ୍ ଜିସୁକେ ବାବୁଜିଆ କଲାଇ । ୩୩ ଜିସୁ ସେମନ୍‌କେ ଆଦେସ୍ ଦେଲା ଦାପରେ ତୁମାମନ୍ ସେ ମୁନ୍‌ସର୍‌ଟାନେଅନି ବାରଇ ଗୁସ୍‌ରି ରାସିର୍ ମଜାଇ ପୁରଲାଇ । ପୁର୍‌ଲାକେ ଗୁସ୍‌ରି ମାନ୍ଦା ଜବର୍ ପାଲାଇକରି ଗଡ୍‌ଗଡାବାଟେ ଜାଇ ଗାଡେ ଅଦ୍ରି ମରିଗାଲାଇ ।

୩୪ ଗୁସ୍‌ରି ଚାରାଇତେ ରଇଲା ଲକ୍‌ମନ୍ ସେ ଗର୍‌ନା ଦେକି ପାଲାଇକରି ନଅରେ ଆରି ଗାଉଁମନ୍‌କେ ଜାଇ ସେ କାତା ଜାନାଇଲାଇ । ୩୫ ତେଇ ଲକ୍‌ମନ୍ ସେ ଗର୍‌ନା ଦେକ୍‌ବାକେ ବାରଇ ଆଇଲାଇ ଆରି, ସେମନ୍ ଜିସୁର୍ ଲଗେ ଆସି ଜନ୍ ମୁନ୍‌ସର୍ ଟାନେଅନି ତୁମାମନ୍ ବାରଇଲାଇ, ସେ ଲକ୍ ଲୁଗା ପିନ୍ଦି ନିକ ମନର୍ ସଙ୍ଗ୍ ଜିସୁର୍ ପାଦ୍ ତଲେ ବସି ରଇବାଟା ଦେକି ଡରିଗାଲାଇ । ୩୬ ଆରି ଜନ୍‌ଲକ୍‌ମନ୍ ଏଟା ସବୁ ଦେକି ରଇଲାଇ, ସେମନ୍ ସେ ତୁମା ଦାରୁଲା ଲକ୍ କେନ୍ତ୍ରାରି ନିକ ଅଇଲା, ସେଟା ବିନ୍ ଲକ୍‌ମନ୍‌କେ ଜାନାଇଲାଇ । ୩୭ ତେଇ ଗରାସିୟମନର୍ ଚାରିବେଡ୍‌ଡିର୍ ଜାଗାର୍ ଲକ୍‌ମନ୍ ଜିସୁକେ ତାକର୍‌ଟାନେଅନି ଜିବାକେ ଗୁଆରି କଲାଇ । କାଇକେବଇଲେ ସେମନ୍ ବେସି ଡରିଜାଇ ରଇଲାଇ ଆରି, ଜିସୁ ଗଟେକ୍ ତଙ୍ଗାଇ ବସି ବାଉଡି ଆଇଲା । ୩୮ ମାତର୍ ଜନ୍ ଲକ୍‌ଟାନେଅନି ତୁମାମନ୍ ବାରଇଜାଇ ରଇଲାଇ, ସେ ଜିସୁର୍ ସଙ୍ଗ୍ ରଇବି ବଲି ଗୁଆରି କର୍‌ବାର୍‌ଦାରୁଲା । ୩୯ ମାତର୍ ସେ ତାକେ କଇକରି ପାଚାଇଲା । “ତର୍ ଗରେ ବାଉଡି ଜା ଆରି ପର୍ତ୍ତେସର୍ ତର୍‌ଲାଗି ଜନ୍ ଜନ୍ କାମ୍ କଲାଆଚେ ସେ ସବୁ କଇଦେସ୍ ।” ତେଇ ସେ ଲକ୍ ଇଣ୍ଡିଜାଇ ଜିସୁ ତାର୍ ପାଇ ଜନ୍ ଜନ୍ କାମ୍ କରିରଇଲା, ଗୁଲାଇ ନଅରେ ଜାନାଇବାର୍ ଦାରୁଲା ।

ଜାଇରସର୍ ଟକି ଆରି ବନି ଜିବା ମାଇଜି ନିକ ଅଇଲାଇ  
(ମାତିଉ ୯:୧୮-୨୬; ମାର୍କ ୫:୨୧-୪୩)

୪୦ ଜିସୁ ଗାଡ୍ ସେପାଟେ ଅନି ଏ ପାଟେ ଆରିତରେକ୍ ବାଉଡି ଆଇଲା ପଟେ, ଲକ୍‌ମନ୍ ତାକେ ସାର୍‌ଦା ସଙ୍ଗ୍ ମାନ୍‌ଲାଇ । କାଇକେ ବଇଲେ ସେମନ୍ ତାକେ ଜାଗି ରଇଲାଇ । ୪୧ ଆରି ଏଦେ ଦେକା ! ଜାଇରସ୍ ନାଉଁର୍ ଗଟେକ୍ ଲକ୍ ଆଇଲା । ସେ ଜିଉଦି ଲକ୍‌ମନର୍ ପାର୍‌ତନା ଗରର୍ ମୁକିଆ ରଇଲା । ସେ ଜିସୁର୍ ପାଦ୍ ତଲେ ଅଦ୍ରି ତାର୍ ଗରେ ଆଇବାକେ ଗୁଆରି କଲା । ୪୨ କାଇକେ ବଇଲେ ତାଉଁକେ ଗଟେକ୍‌ସେ ବାର ବରସର୍ ଟକି ରଇଲା ଆରି ସେ ମଲାପାରା ଅଇଜାଇରଇଲା । ମାତର୍ ଜିସୁ

ଜାଇତେ ରଇବାବେଲେ ଲକ୍ମନ୍ ତାର୍ ଉପରେ ମାଣ୍ଡାଚୁଣ୍ଡାଅଇଜାଇତେ ରଇଲା ।

୪୩ ସେଡ଼କିବେଲେ ବାର ବରଷ୍ ଦାରି ବନି ଜାଇତେ ରଇବା ଗଟେକ୍ ରଗିନି ମାଇଜି ରଇଲା । ନିଜର୍ ସବୁତାରୁ ସାରାଇକରି ମିସା\* କାର୍ ଲଗେ ଜାଇ ନିକ ଅଇ ନାପାରଲା । ୪୪ ସେ ପର୍ବାଟେଅନି ଆସି ଜିସୁର୍ ଲୁଗା ଜାଲି ଚିଇଲା । ଚିଇଲା ଦାପରେ ତାର୍ ବନି ଜିବାଟା ତେବଲା । ୪୫ ତେଇ ଜିସୁ କଇଲା, “କେ ମକେ ଚିଇଲା ?” ମାତର୍ ସବୁ ଲକ୍ ନାଇ ବଲି କଇଲାଜେ, ପିତର୍ କଇଲା, “ଏ ଗୁରୁ ଲକ୍ମନ୍ ମାଣ୍ଡାଚୁଣ୍ଡାଅଇ ତମର୍ ଉପରେ ଡାବିଅଇଆଇଲାଜନି ।”

୪୬ ମାତର୍ ଜିସୁ କଇଲା, “କେ କି ଗଟେକ୍ ଲକ୍ ମକେ ଚିଇଲା, କାଇକେ ବଇଲେ ମର୍ ବିଡ଼ରେଅନି ବପୁ ବାରଇଲା ବଲି ମୁଇ ଜାନଲି ।” ୪୭ ଜେତେବଲ୍ ମାଇଜି ଦେକଲାଜେ ମୁଇ ଲୁଚିନାପାରି, ସେ ତରତରି ତରତରି ଆସି ଜିସୁର୍ ପାଦେ ଅଦରି, କାଇଟାର୍ ପାଇ ତାକେ ଚିଇଲା, ଆରି କେନ୍ତାରି ଦାପରେ ନିକ ଅଇଲା, ସେଟା ସବୁ ଲକର୍ ମୁଆଟେ ଜାନାଇଲା । ୪୮ ତେଇ ଜିସୁ ତାକେ କଇଲା, “ନୁନି ତର୍ ବିସ୍ବାସ୍ ତକେ ନିମାନ୍ କଲାଆଟେ ସାନ୍ତିଅଇ ଉଚିଜା ।”

୪୯ ସେ ଏ କାତା କଇବା ବେଲେ ଜିଉଦିମନର୍ ପାରତନା ଗରର୍ ମୁକିଆ ଜାଇରସର୍ ଗରେଅନି ଗଟେକ୍ ଲକ୍ ଆସି କଇଲା, “ତମର୍ ଟକି ମରିଗାଲାବେ, ଗୁରୁକେ ଆରି କସ୍ ଦିଆସ୍ ନାଇ ।”

୫୦ ମାତର୍ ଜିସୁ ଏଟା ସୁନି ଜାଇରସ୍କେ କଇଲା, “ତରାନାଇ ଅବକା ବିସ୍ବାସ୍ କରା, ସେ ବର୍ସି ।”

୫୧ ଜିସୁ ଜାଇରସର୍ ଗରେ ଆସି ପିତର୍, ଜଅନ୍ ଆରି ଜାକୁବ୍ ଆରି ଟକିର୍ ବାବା ମାଆ କେ ଚାଡ଼ିକରି କାକେ ମିସା ବିଡ଼ରେ ଡାକିନେଏ ନାଇ । ୫୨ ମାତର୍ ସବୁ ଲକ୍ ଟକିର୍ ଲାଗି କାନ୍ଦି କାନ୍ଦି କରି ବୁକେ ମାରିଅଇତେ ରଇଲା । ତେଇ ଜିସୁ କଇଲା “କାନ୍ଦା ନାଇ, ସେ ମରେ ନାଇ, ମାତର୍ ସଇ ଦେଲାଆଟେ ।”

୫୩ ମାତର୍ ଟକି ମରିଗାଲାଆଟେ ବଲି ଜାନି ରଇଲାଜେ ଲକ୍ମନ୍ ଜିସୁକେ କିଜାଇବାର୍ ଦାରଲା । ୫୪ ମାତର୍ ଜିସୁ ଟକିର୍ ଆତେ ଦାରି କଇଲା, “ଏ ନୁନି ଉର୍ ।” ୫୫ ତେଇ ଟକିର୍ ଜିବନ୍ ବାଉଡ଼ି ଆଇଲା, ଆରି ସେ ସେଡ଼କି ବେଲେସେ ଉର୍ଲା । ଜିସୁ ତାକେ କାଇଟା ଆଲେ କାଇବାକେ ଦିଆସ୍ ବଲି ଆଦେସ୍ ଦେଲା । ୫୬ ତେଇ ଟକିର୍ ବାବା ମା କାବା ଅଇଗାଲା, ମାତର୍ ଜିସୁ ସେ ଗର୍ନାର୍ କାତା କାକେ ଜାନାଆ ନାଇ ବଲି ଆଦେସ୍ ଦେଲା ।

୯

ଜିସୁ ବାରଟା ସିସ୍ମାନ୍କେ ପାଟାଇଲା  
(ମାତିଉ ୧୦:୫-୧୫; ମାର୍କ ୬:୬-୧୩)

୯ ପଟେ ଜିସୁ ବାରଟା ସିସ୍ମାନ୍କେ ରୁଣ୍ଡାଇକରି, ସେମନ୍କେ ସବୁ ତୁମା ଚାଡ଼ାଇବାକେ, ରଗ୍ ନିକ କର୍ବାକେ ବପୁ ଆରି ଅଦିକାର୍ ଦେଲା । ୨ ଆରି ସେମନ୍କେ ପର୍ମେସରର୍ ରାଇଜ୍ ଜାନାଇବାକେ ଆରି ରଗ୍ତୁକା ଅଇରଇବା ଲକ୍ମନ୍କେ ନିକ କର୍ବାକେ ପାଟାଇଲା । ୩ ସେମନ୍କେ କଇଲା, “ତମେ ଜିବାବେଲେ ଡାଙ୍ଗ୍ କି ମୁନା କି ରୁଚି, କି ତାରୁ କାଇଟା ମିସା ନିଆନାଇ । ପିନ୍ଦଲାଟା ଚାଡ଼ିକରି ଆରି ଉର୍କା ନିଆନାଇ । ୪ ଜେତେବେଲେ ତମକେ ଜାର୍ ଗରେ ଡାକିନେବାଇ, ସେ ନଅର୍ ଚାଡ଼ି ଜିବାଜାକ ତେଇସେ ରୁଆ । ୫ ☆☆ଆରି ଜେତେଲକ୍

\* ୮:୪୩ ୮:୪୩ କେତେଟା ପାଣ୍ଡୁ ଲିପିଗନେଏ ପଦ ଲେକାଅଏନାଇ ☆ ୯:୫ ୯:୫ ପେରିର୍ ୧୩:୫୧ ☆ ୯:୫ ୯:୫ ଲୁକ୍ ୧୦:୪-୧୧



ତମ୍ଭେକେ ନ ମାନନ୍ତୁ, ସେ ନଅରେଅନି ବାରଇ ଆଇବା ବେଲାଇ, ତାକର୍ ବିରୁଦ୍ଧେ ସାକି ଇସାବେ ତମର୍ ପାଦେଅନି ଦୁଲି ପାପୁଡ଼ି ଦିଆସ୍ ।”

୭ ତେଇଅନି ସିସ୍ତମନ୍ ଜାଇକରି ଗାଉଁ ଗାଉଁ ବୁଲି ଗୁଲାଇ ଜାଗାଇ ସୁବ୍ କବର୍ କଇ କଇ ଆରି ଜର୍ଦ୍ଦୁକାର୍ ଲକ୍ମନ୍ଦକେ ନିମାନ୍ କର୍ବାର୍ ଦାର୍ଲାଇ ।

ଏରଦ୍ ଚିନ୍ତାରେ ପଡ଼ିଗାଲା

(ମାତିଉ ୧୪:୧-୧୨; ମାର୍କ ୬:୧୪-୨୯)

୭ \*ଏଡ଼କିବିଡ଼ରେ ଗାଲିଲିର୍ ମୁକିଅ ରାଜା ଏରଦ୍ ଏ ସବୁ ଅଇରଇବା ବିସଇ ଜାନି କାନାବାନା ଅଇଗାଲା । କାଇକେବଇଲେ ତୁବନ୍ ଦେଉ ଜଅନ୍ ମଲାତେଇଅନି ଉର୍ଲାଆତେ ବଲି କେ କେ କଇତେରଇଲାଇ । ଠ ଆରି, କେ କେ ଏଲିୟ ଦର୍ସନ୍ ଦେଲାଆତେ ବଲି କଇଲାଇ । ବିନ୍ ଲକ୍ମନ୍ ପୁର୍ବକାଲର୍ ବବିସଡ଼ବକ୍ତାମନ୍ ବିଡ଼ରେଅନି ଗଟେକ୍ ଉଚି ଆସିଆତେ ବଲି କଇତେ ରଇଲାଇ । ଯ ମାତର୍ ଏରଦ୍ କଇଲା, “ମୁଇ ତା ତୁବନ୍ ଦେଉ ଜଅନ୍ ମୁଣ୍ଟି କାଟାଇଆଚି, ମାତର୍ ଜାର୍ ବିସଇ ଆମେ ଏନ୍ତାର୍ କାତା ସୁନ୍ଲୁନି, ଏ କେ ?” ଆରି ସେ ତାକେ ଦେକ୍ବିବଲି ତେସ୍ଟା କର୍ତେରଇଲା ।

ଜିସୁ ପାଁର୍ ଅଜାର୍ ଲକ୍ମନ୍ଦକେ କୁଆଇଲା ବିସଇ

(ମାତିଉ ୧୪:୧୩-୨୧; ମାର୍କ ୬:୩୦-୪୪; ଜଅନ୍ ୬:୧-୧୪)

୧୦ ପତେ ବାର୍ଟା ସିସ୍ତମନ୍ ବାଉଡ଼ି ଆସି ଜାଇ ଜାଇଟା କିରିରଇଲାଇ, ସେ ସବୁ ଜିସୁର୍ ଲଗେ ବାତାଇଦେଲାଇ । ତେଇଅନି ଜିସୁ ଜେନ୍ତିକି ଲକ୍ମନ୍ଦଟାନ୍ନେଅନି ବିନେ ରଇବାକେ ସେମନ୍ଦକେ ବେଡ଼ସାଇଦା ନାଉଁର୍ ନଅରେ ଡାକିନେଲା । ୧୧ ମାତର୍ ଲକ୍ମନ୍ ସେଟା ଜାନିକରି ତାକର୍ ପତେ ପତେ ଗାଲାଇ । ଜିସୁ ସେମନ୍ଦକେ ମିସା ଆଲାଦକରି ତାକି ପର୍ମେସରର୍ ରାଇଜର୍ ବିସଇ କଇବାର୍ ଦାର୍ଲା । ଆରି ଜନ୍ ଲକ୍ମନ୍ ନିକ ଅଇବାର୍ ରଇଲା, ସେମନ୍ଦକେ ନିକକଲା ।

୧୨ ଏଡ଼କିବିଡ଼ରେ ଦିନ୍ ସାରି ରାତିଅଇବାର୍ ଆରାମ୍ ଅଇଲା, ତେଇ ପାଟାଇରଇବା ବାର୍ଟା ସିସ୍ ଜିସୁର୍ଲଗେ ଆସି କଇଲାଇ, “ଲକ୍ମନ୍ ଜାଇକରି ତାକର୍ପାଇ ବାସା ଆରି କାଦିର୍ପାଇ ଚାରିବେଡ଼ଡିର୍ ଗାଉଁ ଆରି ଗୁଡାମନ୍ଦକେ କଜଡ଼ । ସେଟାପାଇ ତମେ ସେମନ୍ଦକେ ମେଲାନ୍ ଦିଆସ୍ । କାଇକେବଇଲେ ଆମେ ଇତି ମେଲାନ୍ ଜାଗାଇ ଆଚୁ ।”

୧୩ ମାତର୍ ଜିସୁ ସେମନ୍ଦକେ କଇଲା, “ତମେ ସେମନ୍ଦକେ କାଇବାକେ ଦିଆସ୍ ।” ସେମନ୍ କଇଲାଇ, “ଆମର୍ଲଗେ ଏକାଇ ପାଁଟା ରୁଚି ଆରି ଦୁଇଟା ମାଟ୍ ଚାଡ଼ି ଅଦିକ୍ ନାଇ । ସେନ୍ତାଆଲେ ଆମେ ଜାଇକରି ଏ ସବୁଲକର୍ପାଇ କନ୍ତିଅନି କାଦି ଗେନ୍ତୁ ?” ୧୪ କାଇକେବଇଲେ ସେମନ୍ ଅବ୍ କା ମୁନ୍ସପିଲାମନ୍ଦସେ ପାଁର୍ ଅଜାର୍ ରଇଲାଇ । ଜିସୁ ସିସ୍ତମନ୍ଦକେ କଇଲା, “ଗଟେକ୍ ଗଟେକ୍ ଦାଡ଼ି, ପଚାସ୍ ଲକ୍ମକେ ଲାକା ବସାଆ ।”

୧୫ ତେଇ ସେମନ୍ ସେନ୍ତାରିକରି ଲକ୍ମନ୍ଦକେ ବସାଇଲାଇ । ୧୬ ଆରି, ଜିସୁ ପାଁଟା ରୁଚି ଆରି ଦୁଇଟା ମାଟ୍ ଦାରି, ସରଗ୍ବାଟେ ମୁ କିରି ଦନିଅବାଦ୍ ଦେଲା ଆରି ବାଙ୍ଗାକିରି ସିସ୍ତମନ୍ଦକେ ବାଟାକଲା । ୧୭ ତେଇ ସବୁଲକ୍ ପେଟ୍ ପୁର୍ତେ କାଇଲାଇ ଆରି ସାନ୍ତି ଅଇଲାଇ । ପତେ ସିସ୍ତମନ୍ ତେଇ ଅଗ୍ଲି ରଇବା ବାଙ୍ଗାକିଲାମନ୍ ବାର ଡାଲା ଉର୍ରାଇଲାଇ ।

ଜିସୁକେ ପିତର୍ ମାନ୍ଲା

(ମାତିଉ ୧୬:୧୩-୧୯; ମାର୍କ ୮:୨୭-୨୯)

\* ୯:୭ ମାତିଉ ୧୬:୧୪; ମାର୍କ ୮:୨୮; ଲୁକ ୯:୧୯

୧୮ ତରେକ୍ ଜିସୁ ଗଟେକ୍ ଲକ୍ଷେ କିନରା ଜାଗାଇ ବସି ପାର୍ତନା କରବାବେଲେ ସିସ୍ତାନ୍ ତାରଲଗେ ଆଇଲାଇ, ଆରି ସେ ସିସ୍ତାନ୍‌କେ ପାଚାରଲା, “ମୁଇ କେ ବଲି ଲକ୍ଷମନ୍ କଇଲାଇନି ?”

୧୯ \*ସେମନ୍ କଇଲାଇ, “କେ କେ ହୁବନ୍ ଦେଉ ଜଅନ୍, ଆରି କେ କେ ଏଲିୟ, ଆରି କେ କେ ପୁରବର ବବିସତ୍‌ବକ୍ତାମନର୍ ବିତ୍‌ରେଅନି ଗଟେକ୍‌ଲକ୍ ମଲାତେଇଅନି ଜିବନ୍ ଅଇଲାଆତେ ବଲି କଇଲାଇନି ।”

୨୦ \*ସେ ସିସ୍ତାନ୍‌କେ ପାଚାରଲା, “ମାତର୍ ତମେ ମୁଇ କେ ବଲି ବାବ୍‌ଲାସ୍ତନି ?” ପିତର୍ କଇଲା “ତମେ ପର୍ମେସର୍ ପାଟାଇଲା କିରିସଟ୍ ।”

ଜିସୁ ତାର୍ ମରନର୍ ବିସଇ ଜାନାଇଲା  
(ମାତିଉ ୧୭:୨୦-୨୮; ମାର୍କ ୮:୩୦;୯:୧)

୨୧ ତେଇ ଜିସୁ ଏଟା କାକେ ନ କଇବାପାଇ ସେମନ୍‌କେ ଜାଗରତ୍‌କରି ତିଆରଲା । ୨୨ ସେ ସେମନ୍‌କେ କଇଲା, “ପର୍ମେସର୍ ପାଟାଇଲା ନର୍ପିଲା ମୁଇ ବେସି ଦୁକ୍ କସଟ୍ ଅଇବାର୍‌ଆତେ । ପାର୍‌ଚିନ୍‌ମନ୍, ସାସତର୍ ସିକାଉମନ୍ ଆରି ମୁକିଅ ପୁଜାରିମନ୍ ମକେ ନ ନାମତ୍ । ସେମନ୍ ମକେ ମରାଇବାଇ । ଆରି ତିନ୍‌ଦିନ୍ ପତେ ମୁଇ ଆରିତରେକ୍ ମଲାତେଇଅନି ଜିବନ୍ ଅଇ ଉର୍ବି ।”

୨୩ \*ସେତ୍‌କିବେଲେ ଜିସୁ ସବୁଲକ୍‌କେ କଇଲା, “ତେବେ କେ ମିସା ମର୍ସଙ୍ଗ୍ ଆଇବାକେ ମନ୍ କର୍ସି, ସେ ନିଜର୍ ମନକଲାଟା ସବୁ ଚାଡିଦେବାର୍ ଆତେ, ଆରି ସବୁଦିନ୍ ତାର୍ ନିଜର୍ କୁରସ ବଇ ମର୍ ସଙ୍ଗ୍ ଆସ । ୨୪ \*କାଇକେବଇଲେ, ଜେ ନିଜର୍ ଜିବନ୍ ବଠାଇବାକେ ମନ୍ କର୍ସି, ସେ ସେଟା ଆରାଇସି । ମାତର୍ ଜେ ମର୍ପାଇବଲି ଜିବନ୍ ଆରାଇସି, ସେ ସେଟା ରକିଆ କର୍ସି । ୨୫ ଆରି ଜଦି ଗଟେକ୍ ମୁନ୍ସ୍ ଗୁଲାଇ ଦୁନିଆ ଜିତିକରି ନିଜେ ବିନାସ୍ ଅଇସି, କି ଆରାଇସି, ତେବେ ତାର୍ କାଇ ଲାବ୍ ? ୨୬ ତେବେ କେ ମିସା ମର୍ପାଇ ଆରି ମର୍ ବାକିଅର୍ ଲାଜ୍ ଅଇସି, ଜେତ୍‌କିବେଲେ ପର୍ମେସର୍ ପାଟାଇରଇବା ନର୍ପିଲା ମୁଇ ନିଜର୍ ଆରି ବାବାର୍, ଆରି ସୁକଲ୍ ଦୁତ୍‌ମନର୍ ମଇମାସଙ୍ଗ୍ ବାଉତି ଆଇବି, ସେତ୍‌କିବେଲେ ତାର୍ ବିସଇ ନେଇ ଲାଜ୍‌ଅଇବି । ୨୭ ମାତର୍ ମୁଇ ତମ୍‌କେ ସତ୍ କଇଲିନି, ପର୍ମେସରର୍ ରାଇଜ୍ ନ ଦେକ୍‌ବାଜାକ୍ ଇତି ଟିଆଅଇରଇବା ଲକ୍ଷମନର୍ ବିତ୍‌ରେଅନି କେତେଲକ୍, ପର୍ମେସରର୍ ରାଇଜ୍ ଦେକ୍‌ବାଇ ।”

ଜିସୁ ବିନ୍ ରକାମ୍ ଡିସଲା  
(ମାତିଉ ୧୭:୧-୮; ମାର୍କ ୯:୨-୮)

୨୮ ଜିସୁ ଏ ସବୁ କଇ ପାକାପାକି ଆଟ୍‌ଦିନ୍ ଗାଲାପତେ, ଜଅନ୍, ପିତର୍ ଆରି ଜାକୁବର୍ ସଙ୍ଗ୍ ପାର୍ତନା କରବାକେ ପର୍ବତ୍ ଉପରେ ଗାଲା । ୨୯ ଆରି, ସେ ପାର୍ତନା କରବାବେଲେ ତାର୍ ମୁ ବିନ୍ ଅଇଗାଲା ଆରି ସେ ପିନ୍‌ଲା ଲୁଗା ଦବ୍ ଅଇ ବିଜ୍‌ଲିପାରା ଜିକ୍‌ମିକିଗାଲା । ୩୦ ଆରି ଏଦେ ଦେକା ! ସେଦାପ୍‌ରେ ମସା ଆରି ଏଲିୟ୍ ତାର୍‌ସଙ୍ଗ୍ କାତାବାର୍‌ତା ଅଇବାର୍ ଦାର୍‌ଲାଇ । ୩୧ ସେମନ୍ ସରଗର୍ ମଇମାସଙ୍ଗ୍ ଡିସ୍‌ତେ ରଇଲାଇ । ସେ କେନ୍ତ୍ର ଜିରୁସାଲାମେ ଦୁକ୍ କସଟ୍ ପାଇ ମରିକରି ପର୍ମେସରର୍ ଜଜନା ସିଦ୍ କରବାର୍ ଆତେ ବଲି ସେମନ୍ ଜିସୁର୍‌ସଙ୍ଗ୍ କାତା ଅଇଲାଇ । ୩୨ ସେତ୍‌କିବେଲେ ପିତର୍ ଆରି ତାର୍ ସଙ୍ଗର୍ ଲକ୍ଷମନ୍ ଚାଟିଅଇତେ ସଇଦେଇରଇଲାଇ, ମାତର୍ ସେମନ୍ ଚେତାଅଇ ଜାଗରତ୍ ଅଇବାକେ, ଜିସୁର୍ ମଇମା ଆରି ତାର୍‌ସଙ୍ଗ୍ ଦୁଇଲକ୍ ଟିଆଅଇରଇବାଟା ଦେକ୍‌ଲାଇ । ୩୩ ମସା ଆରି

\* ୯:୧୯ ୯:୧୯ ମାତିଉ ୧୪:୧,୨; ମାର୍କ ୬:୧୪,୧୫; ଲୁକ୍ ୯:୭,୮      \* ୯:୨୦ ୯:୨୦ ଜଅନ୍ ୬:୬,୭,୯  
\* ୯:୨୩ ୯:୨୩ ମାତିଉ ୧୦:୩୮; ଲୁକ୍ ୧୪:୨୭      \* ୯:୨୪ ୯:୨୪ ମାତିଉ ୧୦:୩୯; ଲୁକ୍ ୧୭:୩୩; ଜଅନ୍ ୧୨:୨୫

ଏଲିୟ ବାରଇ ଜିବା ବେଲେ ପିତରୁ ଜିସୁକେ କଇବାରୁ ଦାରଲା, “ଏ ଗୁରୁ, ଆମେ ତା ଏ ଜାଗାଇ ଆରୁ, ଏଟା ନିକ ଜାଗା, ଇତି ତିନଟା କୁଡିଆ ତିଆର କରୁ । ତମରପାଇ ଗଟେକ୍, ମସାରପାଇ ଗଟେକ୍ ଆରି ଏଲିୟରପାଇ ଗଟେକ୍ ।” ମାତରୁ ସେ କାଇଟା କଇଲାନି, ସେଟା ସେ ଜାନିନାପାରଲା ।

୩୪ ସେ ଏନ୍ତି କଇବାବେଲେ ବାଦଲ୍ ଆସି ସେମନ୍‌କେ ଡାବିଅଇଦେଲା । ବାଦଲ୍ ଡାବିଦେଲାକେ ସେମନ୍ ଡରିଗାଲା । ୩୫ ✠✠ଆରି, ବାଦଲେଅନି ଏନ୍ତି ବାକିଆ ଆଇଲା, “ଏଟାସେ ମର ପିଲା, ଆକେ ମୁଇ ବାଟିଆଟି, ସେ କଇବାଟା ସୁନା ।”

୩୬ ସେ ସବଦ୍ ଅଇଲାପରେ ଜିସୁ ଗଟେକ୍‌ଲକ୍‌ସେ ଡିସ୍‌ଲା । ଆରି, ସେମନ୍ ତିମରା ଅଇରଇଲା, ତେଇ ଜାଇଜାଇଟା ଦେକିରଇଲା, ସେବେଲେ ସେ କାତା କାକେ ନ କଇ, ମନେ ଦାରିରଇଲା ।

ଜିସୁ ତୁମା ତସଲା ପିଲାକେ ନିକ କଲା

(ମାତିଉ ୧୭:୧୪-୨୭; ମାର୍କ ୯:୧୪-୧୭)

୩୭ ଆରକରୁ ଦିନେ ଜିସୁ ଆରି ତିନଟା ସିସମନ୍ ତଙ୍ଗରେଅନି ଉଡ଼ରି ଆଇଲା । ଆରି ସେ ଜାଗାଇ ବେସି ଲକ୍‌ମନ୍ ତାକରସଙ୍ଗ୍ ବେଟ୍ ଅଇଲା । ୩୮ ଆରି ଦେକା ଲକ୍‌ମନ୍‌ର ବିଡ଼ରେଅନି ଗଟେକ୍ ଲକ୍ ଆଉଲିଅଇ କଇଲା, “ଏ ଗୁରୁ ମୁଇ ତମ୍‌କେ ବାରୁଜିଆ କଲିନି, ମର ପିଲାକେ ଅଲପ୍ ଦେକି ଦୟାକରା, କାଇକେବଇଲେ ସେ ମର ଗଟେକ୍ ବଲି ପଅ । ୩୯ ଦେକା, ତାକେ ଗଟେକ୍ ତୁମା ଦାରସି, ଆରି ସେ ଅଟାଡ଼ କିରକିରି ଉଡ଼ସି, ତାକେ ସେ ଏନ୍ତି ମଡ଼ିପାକାଇସିଜେ, ତାର ମୁଏଅନି ପେପୁଲ୍ ବାରଇଜାଇସି, ଆରି ସେ ତାକେ କଣ୍ଡିଆବଣ୍ଡିଆ କରି ତାରଟାନେଅନି କସ୍‌ଟେ ବାରଇଜାଇସି । ୪୦ ତାକେ ତୁମା ଚାଡ଼ାଇବାକେ ବଲି ମୁଇ ତମର ସିସମନ୍‌ର ଲଗେ ଆନି ଗୁଆରି କରିରଇଲି, ମାତରୁ ସେମନ୍ ନାପାରଲା ।”

୪୧ ଜିସୁ କଇଲା, “ଏରେ କରାପ୍‌ବାଟେ ଜାଇ ବିସ୍‌ବାସ୍ ନ କଲା ଲକ୍‌ମନ୍, କେତେ କାଲ୍ ଆରି ମୁଇ ତମରସଙ୍ଗ୍ ମୁରତି ରଇବି, ପିଲାକେ ଇତି ଦାରିଆସା ।”

୪୨ ପିଲା ଆଇବାବେଲେ କାରୁ ଆଡ଼ମା ତାକେ ବୁର୍‌ଆପ୍‌ଟିଦେଇ ମଡ଼ିପାକାଇଲା, ସେ ଆଡ଼ମାକେ ଜିସୁ ଦମ୍‌କାଇଲା ଆରି ପିଲାକେ ନିକକରି ତାର ବାବାକେ ସରପିଦେଲା । ୪୩ ତେଇ କେବେ ଦେକି ନ ରଇବା ପର୍‌ମେସରରୁ ବପୁ ଦେକି ସବୁଲକ୍ କାବା ଅଇଗାଲା ।

ଜିସୁ ତାର ମରନରୁ ବିସଏ ଜାନାଇଲା

(ମାତିଉ ୧୭:୨୨-୨୩; ମାର୍କ ୯:୩୦-୩୨)

୪୪ ତାର କରିରଇବା ସବୁ କାମରଲାଗି ସବୁଲକ୍ ଚକିଡ଼ ଅଇବାବେଲେ ସେ ସିସମନ୍‌କେ କଇଲା, “ଏବେ ମୁଇ କାତା ନିମାନ୍‌କରି କଇଦେଲିନି, ସୁନା । କାଇକେବଇଲେ ପର୍‌ମେସର ପାଟାଇରଇବା ନର୍‌ପିଲା ମୁଇ ବିସ୍‌ବାସେ ବିସ୍‌ଦେଲାପାରା ଲକ୍‌ମନ୍‌କେ ସରପି ଅଇବାରୁ ଗାଲିନି ।” ୪୫ ମାତରୁ ସିସମନ୍ ସେ କାତା ବୁଜିନାପାରଲା, ଆରି ସେଟା ତାକରଟାନେଅନି ଲୁଚିରଇଲା । ତେବରପାଇ ସେମନ୍ ଏଟା ବୁଜିନାପାରଲେ ମିସା ଜିସୁକେ ପାଟାରବାକେ ଡର୍‌ତେରଇଲା ।

ସରଗ୍ ରାଇଜେ କେ ବଡ଼

(ମାତିଉ ୧୮:୧-୫; ମାର୍କ ୯:୩୩-୩୭)

୪୬ ✠ତରେକ୍ ସିସମନ୍‌ରୁ ବିଡ଼ରେ କେ ମୁକିଆ, ସେ ବିସଇ ନେଇ ଦଦାପେଲା ଅଇଲା । ୪୭ ମାତରୁ ଜିସୁ ତାକରୁ ମନ୍‌ବିଡ଼ରୁ କାତା ଜାନିକରି, ଗଟେକ୍ ସାନ୍

✠ ୯:୩୫ ୯:୩୫ ମାତିଉ ୩:୧୭:୧୨:୧୮; ମାର୍କ ୧:୧୧; ଲୁକ ୩:୨୨

✠ ୯:୩୫ ୯:୩୫ ୨ ଯ ପିତରୁ ୧:୧୭:୧୮

✠ ୯:୪୬ ୯:୪୬ ଲୁକ ୨୨:୨୪

ପିଲାକେ ଦାରୁଲା ଆରି ତାକର୍ ମୁଆଟେ ଚିଆକରି ସେମନ୍‌କେ କଇଲା, ୪୮ \*“କେ ମିସା ମର୍ ନାଉଁଦାରି ଏ ପିଲାକେ ନାମସି, ସେ ମକେ ନାମସି । ଜେ ମକେ ନାମସି, ସେ ମର୍ ପାଟାଇରଇବା ବାବାକେ ନାମସି । ସେଟାରପାଇ ତମର୍ ବିତ୍‌ରେ ଜେ ସବୁର୍ ଗାନେଅନି ସାନ୍, ସେ ପର୍‌ମେସର୍ ତେଇ ମୁକିଅ ।”

ଜନ୍ ଲକ୍ ତମର୍ ବିରଦ୍ ନଏଁ, ସେ ତମର୍ ବାଟେ  
(ମାର୍କ ୯:୩୮-୪୦)

୪୯ ତେଇ ଜଅନ୍ କଇଲା, “ଏ ଗୁରୁ, ଆମେ ଗଟେକ୍ ଲକ୍, ତମର୍ ନାଉଁ ଦାରି ତୁମା ଚାଡାଇବାଟା ଦେକ୍‌ଲୁ ଆରି ତାକେ ନ କର୍ ବଲି ତେବାଇଲୁ କାଇକେବଇଲେ ସେ ଆମର୍ ଦଲର୍ ଲକ୍ ନଏଁ ।” ୫୦ ମାତର୍ ଜିସୁ ସେମନ୍‌କେ କଇଲା, “ତେବାଆ ନାଇ, ଜନ୍‌ଲକ୍ ତମର୍ ବିରଦେ ନାଇ, ସେମନ୍ ତମର୍ ବାଟେ ।”

ଗଟେକ୍ ସମିରଣିୟ ଗାଉଁ ଜିସୁକେ ନାମତ୍ ନାଇ

୫୧ ପଟେ ଜେତେବେଲେ ଜିସୁର୍ ସର୍‌ଗେ ଜିବାର୍ ବେଲା କେଟିଆଇତେରଇଲା, ସେତେବେଲେ ସେ ଜିରୁସାଲାମ୍ ଜିବାକେ ମନ୍‌କଲା । ୫୨ ସେ ଜିବା ଆଗ୍‌ତୁ କେତେଟା ଲକ୍‌ମନ୍‌କେ ପାଟାଇଲା । ସେମନ୍ ଜାଇକରି ଜିସୁର୍‌ପାଇ ସବୁ କର୍‌ବାକେ ସମିରଣିୟମନ୍‌ର୍ ଗଟେକ୍ ଗାଏଁ କେଟ୍‌ଲାଇ । ୫୩ ମାତର୍ ଜିସୁ ଜିରୁସାଲାମ୍ ଜିବାକେ ମନ୍‌କଲାଆଟେ ବଲି ଜାନିକରି, ତାକେ ଡାକି ବସାଅଡ୍‌ନାଇ । ୫୪ ଏଟାଦେକି ଜାକୁଦ୍ ଆରି ଜଅନ୍ କଇଲା, “ମାପୁରୁ ଏଲିୟ ମିସା ଜେନ୍ତି କରିରଇଲା, \* ସେନ୍ତାର୍‌ସେ ଆମେ ବାଦ୍‌ଲେଅନି ଜଇ ଅଦରାଇ ସେମନ୍‌କେ ନାସକର୍‌ବାକେ ତମେ ମନ୍ କଲାସ୍‌ନି କି ?”

୫୫ ମାତର୍ ଜିସୁ ବୁଲିକରି ସେମନ୍‌କେ ଦମ୍‌କାଇକରି କଇଲା, “ତମେମନ୍ କେନ୍ତାରି ଆଡ୍‌ମାର୍ ଲକ୍, ଏଟା ନାଜାନାସ୍ । ମାପୁରୁ ପାଟାଇରଇବା ନର୍‌ପିଲା ମୁଇ ମୁନ୍‌ସମନ୍‌ର୍ ଜିବନ୍ ନାସ୍ କର୍‌ବାକେ ନ ଆସି, ରକିଆ କର୍‌ବାକେ ଆସିଆଟେ ।” ୫୬ ତାର୍‌ପଟେ ସେମନ୍ ଆରିଗଟେକ୍ ଗାଏଁ ଉଟିଗାଲାଇ ।

ଜିସୁର୍ ସିସ୍ ଅଇବାକେ ମନ୍ କର୍‌ବା ଲକ୍‌ମନ୍  
(ମାତିଉ ୮:୧୯-୨୨)

୫୭ ସେମନ୍ ଜିବାବେଲେ ବାଟେ ଗଟେକ୍ ଲକ୍ ଜିସୁକେ କଇଲା, “ତମେ ଜନ୍ ଜାଗାଇ ଜାଇସା, ମୁଇ ତମର୍‌ସଙ୍ଗ୍ ଆଇବି ।”

୫୮ ଜିସୁ ତାକେ କଇଲା, “କକପାନ୍‌ଦିର୍ ପାଆର୍ ଆଟେ, ଚଡ଼ଇମନ୍‌କେ ଗୁଡା ଆଟେ, ମାତର୍ ମାପୁରୁ ପାଟାଇରଇବା ନର୍‌ପିଲା ମକେ ବସ୍‌ବାକେ ନିଜର୍ ଗର୍ ନାଇ ।”

୫୯ ତାର୍‌ପଟେ ଜିସୁ ଆରିଗଟେକ୍ ଲକ୍‌କେ କଇଲା, “ମର୍‌ସଙ୍ଗ୍ ଆଉ ।” ମାତର୍ ସେ କଇଲା, “ପର୍‌ତୁମ୍ ଜାଇ ମର୍ ବାବାକେ ଦନ୍ କରିଆଇବାଜାକ ମକେ ଆଦେସ୍ ଦିଆ ।” ୬୦ ମାତର୍ ଜିସୁ ତାକେ କଇଲା, “ମଲାଲକ୍‌ମନ୍ ମଲାଲକ୍‌ମନ୍‌କେ ଦନ୍ କର୍‌ବାକେ ଚାଡିଦିଆସ୍, ମାତର୍ ତମେ ଜାଇ ପର୍‌ମେସର୍‌ର୍ ରାଇଜ୍ ଜାନାଆ ।”

୬୧ ଆରିଗଟେକ୍ ଲକ୍ କଇଲା, “ମାପୁରୁ ମୁଇ ତମର୍‌ସଙ୍ଗ୍ ଆଇବି, ମାତର୍ ଗରର୍ ଲକ୍‌ମନ୍‌କେ ଗାଲିନି ବଲି କଇକରି ଆଇବାକେ ଆଦେସ୍ ଦିଆ ।”

୬୨ ମାତର୍ ଜିସୁ ତାକେ କଇଲା, “ଜେ କସ୍‌ବାବେଲେ ନଙ୍ଗ୍‌ଲଦାରି ପଟେ ଦେକିଲାଗିରଇସି, ସେ ପର୍‌ମେସର୍‌ର୍ ରାଇଜର୍ ସେବା କର୍‌ବାକେ ଅଦିକାର୍ ନ ପାଏ ।”

\* ୯:୪୮ ୯:୪୮ ମାତିଉ ୧୦:୪୦; ଲୁକ୍ ୧୦:୧୨; ଜଅନ୍ ୧୩:୨୦ \* ୯:୫୪ ୯:୫୪ କେତେଟା ପାଣ୍ଡୁ ଲିପିଗାନେ ଏନ୍‌ଦାରି ଲେକା ଅଏ ନାଇ

# ୧୦

ଜିସୁ ସତୁରି ଦୁଇଟା ସିସ୍ତମନ୍ଦକେ ପାଟାଇଲା

୧ ତାର୍ପଚେ ମାପୁରୁ ଆରି ସତୁରିଦୁଇ ଲକ୍‌କେ ମିସାଇଲା ଆରି ସେ ଜନ୍ ଜନ୍ ଜାଗାଇ ଆରି ଜନ୍ ଜନ୍ ନଅରେ ଜିବାକେ ମନ୍ କରିରଇଲା, ସେ ଜାଗାମନ୍ଦକେ ଦୁଇ ଦୁଇ ଲକ୍‌କରି, ସେ ଜିବା ଆଗ୍‌ତୁ ପାଟାଇଲା । ୨ \*ଆରି ଜିସୁ ସେମନ୍ଦକେ କଇଲା, ଜମିତେଇ ପସଲ୍ ସିନା ଅଦିକ୍, ମାତର କାମ୍‌କରୁମନ୍ ଉନା । ତେବର୍‌ପାଇ ତାର୍ ଚାସ୍‌କେତେ, ଅଦିକ୍ ଲକ୍‌ମନ୍ଦକେ ପାଟାଇ ଦେବାକେ ଜମି ସାଉକାର୍‌ଗାନେ ଜାନାଆ । ୩ \*ତମେ ଜାଆ । ଦେକା, ବାଲିଆଡୁରକାମାନର୍ ବିତରେ ମେଣ୍ଟାମନ୍ଦକେ ପାଟାଇଲା ପାରା ମୁଇ ତମ୍‌କେ ପାଟାଇଲିନି । ୪ ତାଲା, ମୁନା କି ପାଣ୍ଡୁଇ ମିସା ନିଆନାଇ, ଆରି ବାଟେ କାକେ ଜୁଆର୍ କରାନାଇ । ୫ ଜାର୍ ଗରେ ତମେ କେଟ୍‌ଲେ, ପର୍‌ତୁମ୍ କରା, ଏ ଗରେ ସାକ୍ତି ମିଲ । ୬ ଜଦି ସେ ଜାଗାଇ ଗଟେକ୍ ସାକ୍ତିର୍ ଲକ୍ ରଇସି, ସେନ୍ତାଆଲେ ତମର୍ ଆସିର୍‌ବାଦ୍ ତାକେ ମିଲ୍‌ସି । ୭\* ତାକରଲଗେ ଜନଟା ରଇସି, ସେଟା କାଇକରି, ସେ ଗରେ ରୁଆ । କାଇକେବଇଲେ, ପାଇଟିକରୁ ନିଜର୍ ରୁଡି ପାଇବାଇଆକା । ଗର୍ ଗର୍‌କେ ଜାଆନାଇ । ୮ ଜନ୍ ନଅରେ ତମେ କେଟ୍‌ଲେ, ଆରି ଲକ୍‌ମନ୍ ତମ୍‌କେ ତାକିନେଲେ, ତେଇ ତମ୍‌କେ ଜନଟା କାଇବାକେ ଦେଲେ ସେଟା କାଆ । ୯ ସେ ଜାଗାଇ ଜର୍ ଦୁକା ଅଇରଇଲା ଲକ୍‌ମନ୍ଦକେ ନିକ କରା, ଆରି ସେମନ୍ଦକେ କୁଆ ପର୍‌ମେସରର୍ ରାଇଜ୍ ତମର୍‌ଲଗେ ସେ । ୧୦ \*ମାତର୍ ଜନ୍ ନଅରେ ତମେ କେଟ୍‌ସା, ତେଇର୍ ଲକ୍ ତମ୍‌କେ ନ ତାକିନେଲେ, ସେ ତାଣ୍ଟେଅନି, ସେ ସାଇ ଅନି ବାରଇ କୁଆ, ୧୧ \*ତମର୍ ନଅରର୍ ଜନ୍ ଦୁଲି ଆମର୍ ପାଦେ ଲାଗିଆଚେ, ସେଟାମିସା ତମର୍‌ପାଇ ପାପ୍‌ଡିଦେଲୁନି, ଅଇଲେମିସା ପର୍‌ମେସରର୍ ରାଇଜ୍ ଲଗେସେ, ଏଟା ତମେ ଜାନିରୁଆ । ୧୨ \*ମୁଇ ତମ୍‌କେ ସତ୍ କଇଲିନି, ବିଚାର୍ ଅଇବାଦିନେ ସେ ନଅରର୍ ଦସା, ତଣ୍ଟରଲାଗି ସଦମର୍ ଦସାତେଇଅନି ଅଦିକ୍ ରଇସି ।

ବିସବାସ ନ କରବା ନଅର୍ ମନ୍ଦକେ ଜିସୁର୍ ଚେତନା

(ମାତିଉ ୧୧:୨୦-୨୪)

୧୩ ଅଇରେ ତଣ୍ଟପାଇବାକେ ଜାଗିରଇବା କରାଜିନି ! ଅଇରେ ତଣ୍ଟପାଇବାକେ ଜାଗିରଇବା ବେଡ୍‌ସାଇଦା ! ତମର୍‌ଗାନେ ବପୁର୍‌ସଙ୍ଗ୍ ଜନ୍ ଜନ୍ ନ ଅଇବା କାମମନ୍ ଅଇଲାଆଚେ, ସେ ସବୁ ସର ଆରି ସିଦନେ ଅଇରଇତା ବଇଲେ, ସେମନ୍ କେତେକାଲ୍ ପୁରବେ ବାସ୍‌ତା ପିନ୍ଦି, ଚାରେ ବସି, ମାପୁରୁଟାନେ ମନ୍ ବାଉତାଇତାଇ । ୧୪ ଅଇଲେମିସା ବିଚାର୍‌ଦିନେ ତମର୍ ଦସା ସର ଆରି ସିଦନର୍ ଦସାଟାନେଅନି ଅଦିକ୍ ଅଇସି । ୧୫ ଆରି ଏ କପର୍‌ନାଉମ୍, ସରଗ୍ ଜେଡ୍‌କି ଉର୍, ତୁଇ କାଇ ସେଡ୍‌କିଜାକ ଉର୍ ଅଇସୁ କି ? ପାତାଲ୍ ଜେଡ୍‌କି ତଲେ ଆଚେ, ସେଡ୍‌କି ତଲେ ତକେ ଆନାଅଇସି ।

୧୬ \*ଜେଡେବେଲେ ଜନ୍ ଲକ୍‌ମନ୍ ତମର୍ କାତା ସୁନ୍‌ବାଇ, ସେମନ୍ ମର୍ କାତା ସୁନ୍‌ବାଇ । ଜନ୍ ଲକ୍‌ମନ୍ ତମ୍‌କେ ନ ମାନଡ୍, ସେମନ୍ ମକେ ନ ମାନଡ୍, ଆରି ଜନ୍ ଲକ୍‌ମନ୍ ମକେ ନ ମାନଡ୍, ସେମନ୍ ମକେ ପାଟାଇରଇବା ପର୍‌ମେସର୍‌କେ ମିସା ନ ମାନଡ୍ ।

୧୭ ତାର୍‌ପଚେ ସେ ସତୁରି ଲକ୍ ବାଉଡି ଆଇଲାଇ ଆରି ସାର୍‌ଦାଅଇକରି କଇଲାଇ, “ମାପୁରୁ, ତମର୍ ନାଉଁ ଦାରି ଆଦେସ୍ ଦେଲେ ତୁମାମନ୍‌ମିସା ଆମର୍

\* ୧୦:୨ ୧୦:୨ ମାତିଉ ୯:୩୭,୩୮    \* ୧୦:୩ ୧୦:୩ ମାତିଉ ୧୦:୧୬    \* ୧୦:୬ ୧୦:୬ ମେ କରକ୍ତିୟ ୯:୧୪; ୧୮ ଡିମତି ୫:୧୮    \* ୧୦:୧୦ ୧୦:୧୦ ପେରିଡ୍ ୧୩:୫୧    \* ୧୦:୧୧ ୧୦:୧୧ ମାତିଉ ୧୦:୬-୧୪; ମାର୍‌କ ୬:୮-୧୧; ଲୁକ୍ ୯:୩-୫    \* ୧୦:୧୨ ୧୦:୧୨ ମାତିଉ ୧୧:୨୪; ମାତିଉ ୧୦:୧୫    \* ୧୦:୧୬ ୧୦:୧୬ ମାତିଉ ୧୦:୪୦; ମାର୍‌କ ୯:୩୭; ଲୁକ୍ ୯:୪୮; ଜଅନ୍ ୧୩:୨୦

କାତା ମାନୁଲାଇନି ।” ୧୮ ମାତର୍ ଜିସୁ ସେମାନଙ୍କେ କଇଲା, “ସଇତାନ୍ ବାଦ୍‌ଲେଅନି ବିଜ୍ଞଳି ପାରା ଅଇ ଅଦର୍‌ବାଟା ମୁଇ ଦେକ୍‌ଲି । ୧୯ ଦେକା, ମୁଇ ତମ୍‌କେ ସାଁପ୍ ଆରି ବିସ୍‌କାକଡା ଉପରେ ଇଣ୍ଟ୍ରାବାକେ ବପୁ ଦେଲିଆଟି, ଆରି ସତ୍‌ରୁର ଉପରେ ରଇବା ବପୁ ମିସା ଦେଲିଆଟି । ତମ୍‌କେ କେ ମିସା କାଇଟା କରିନାପାରତ୍ । ୨୦ ଏଲେମିସା ଆଡ୍‌ମାମନ୍ ଆମର୍ କାତା ମାନୁଲାଇନି ବଲି ସାର୍‌ଦା ଉଆନାଇ । ତମର୍ ନାଉଁମନ୍ ସର୍‌ଗେ ଲେକାଅଇଆଟେ ବଲି ସାର୍‌ଦାଉଆ ।”

ଜିସୁ ପର୍‌ମେସର୍‌କେ ପାର୍‌ତନା କଲା

୨୧ ଜିସୁ ସେ ତାଣ୍ଟେ ସୁକଲ୍‌ଆଡ୍‌ମାଇ ପୁରୁନ୍‌ଅଇ କଇଲା, “ଏ ବାବା ! ସରଗ୍ ଆରି ମତ୍‌ପୁରର୍ ମାପୁର ! ତୁଇ ଗିଆନି ଆରି ବୁଦିରଇବା ଲକ୍‌ମନର୍‌ଟାନ୍‌ନେଅନି ଏ କାତା ଲୁଚାଇରଇଲେ ମିସା, ସାନ୍ ପିଲାମନର୍ ପାରା ଲକ୍‌ରଟାନ୍‌ନେ ଜାନାଇଲାସ୍ । ଏଟାର୍‌ପାଇ ତମ୍‌କେ ସୁମର୍‌ନା କଲିନି । ଉଁ ବାବା, କାଇକେବଇଲେ ତମେ ଏନ୍ତାଟା ଦେକ୍‌ବାକେ ମନ୍‌କର୍‌ତେ ରଇଲାସ୍ । ୨୨ ମର୍ ବାବାର୍ ସବୁ ବିସଇ ମକେ ସର୍‌ପି ଅଇଲାଆଟେ, ଆରି ପଅ କେ, ଏଟା ବାବାକେ ଚାଡି ଆରି କେ ନାଜାନତ୍, ଆରି ବାବା କେ, ଏଟା ପଅକେ ଚାଡି କେ ନାଜାନତ୍ । ପଅ ଜାର୍‌ଲଗେ ମର୍ ବାବାକେ ଜାନାଇବି ବଲି ମନ୍‌କରିରଇସି, ସେସେ ଜାନିରଇସି ।” ୨୩ ଜିସୁ ସିସ୍‌ମନର୍‌ବାଟେ ମୁ ବୁଲାଇ ସେମାନଙ୍କେ କଇଲା, “ତମେ ଜନ୍ ଜନ୍‌ଟା ଦେକ୍‌ଲାସ୍‌ନି, ସେ ସବୁ ଜେ ଦେକ୍‌ସି, ସେଟା ନିକ । ୨୪ କାଇକେବଇଲେ ମୁଇ ତମ୍‌କେ କଇଲିନି, ତମେ ଜନ୍ ଜନ୍‌ଟା ଦେକ୍‌ଲାସ୍‌ନି, ସେ ସବୁଜାକ ଦେକ୍‌ବାକେ କେତେ କେତେ ରାଜାମନ୍ ଆରି ମାପ୍‌ରୁ କବର୍ ଜାନାଉମନ୍ ମନ୍‌କଲାଇ, ମାତର୍ ଦେକିନାପାରୁଲାଇ । ଆରି ତମେ ଜନ୍ ଜନ୍‌ଟା ସୁନ୍‌ଲାସ୍‌ନି, ସେ ସବୁ ସୁନ୍‌ବାକେ ସେମନ୍ ମନ୍‌କଲାଇ, ମାତର୍ ସୁନିନାପାରୁଲାଇ ।”

ସମିରଣିୟ ଗତର୍ ନିକ ଲକ୍

୨୫ ତାର୍‌ପଟେ ଗଟେକ୍ ଦରମ୍ ସାସ୍‌ତର୍ ସିକାଉ ତାକେ ପରିକାକରି ପାଗାରୁଲା, “ଏ ଗୁରୁ କେବେ ନ ସାର୍‌ବା ଜିବନ୍ ମିଲାଇବାକେ ଆଲେ ମୁଇ କାଇଟା କର୍‌ବାର୍ ଆଟେ ?”

୨୬ ଜିସୁ ତାକେ କଇଲା, “ନିୟମ୍ ସାସ୍‌ତରେ କାଇଟା ଲେକାଆଟେ ? ତୁଇ କେନ୍ତାରି ପଡ୍‌ଲୁସ୍‌ନି ?”

୨୭ ସେ କଇଲା, “ତମେ ନିଜର୍ ସବୁ ଗାଗଡ୍, ମନ୍, ଆଡ୍‌ମା ଆରି ବପୁ ଦେଇ ପର୍‌ମେସର୍‌କେ ଆଲାଦ୍ କରା । ଆରି ପଡିସାର୍ ଲକ୍‌ମନ୍‌କେ ନିଜର୍ ସମାନ୍ ଆଲାଦ୍ କରା ।”

୨୮ ତାର୍‌ପଟେ ଜିସୁ ତାକେ କଇଲା, “ତମେ ଟିକ୍ କଇଲାସ୍ । ଏନ୍ତାର୍ କର୍, ତେବେ ଜିବନ୍ ମିଲାଇସୁ ।”

୨୯ ମାତର୍ ସେ ନିଜେ ଦରମ୍‌ଲକ୍ ବଲି ଦେକାଇବାକେ ମନ୍‌କରି ଜିସୁକେ ପାଗାରୁଲା, “ତେବେ କେ ମର୍ ପଡିସାର୍ ଲକ୍ ?”

୩୦ ଜିସୁ ତାକେ କଇଲା, ଗଟେକ୍ ଲକ୍ ଜିରୁସାଲମେଅନି ଜିରିଅ ଜିବାବେଲେ ଚର୍‌ମନର୍ ମୁଆଟେ ପଡ୍‌ଲା । ଚର୍‌ମନ୍ ତାର୍ ଲୁଗାପଟିଆ ଚାଡାଇ, ତାକେ ମାରୁଲାଇ ଆରି ମରିଗାଲାପାରା ଅଇଲାକେ ଚାଡି ଉଟିଗାଲାଇ । ୩୧ ସେଟା ଅଇସାରି କେତେପର୍ ଜିବାକେ ଗଟେକ୍ ପୁଜାରି ସେ ବାଟେ ଜାଇତେରଇଲା ଆରି ତାକେ ଦେକି, ବାଟ୍ ପିଟାଇଅଇ ଉଟିଗାଲା । ୩୨ ସେନ୍ତାରିସେ ଗଟେକ୍ ଲେବିୟ ଲକ୍ ମିସା ସେ ଜାଗାଇ ଆସି ତାକେ ଦେକି ବାଟ୍ ପିଟାଇଅଇ ଉଟିଗାଲା । ୩୩ ମାତର୍

☆ ୧୦:୨୨ ୧୦:୨୨ ଜଅନ୍ ୩:୩୫; ଜଅନ୍ ୧୦:୧୫ ☆ ୧୦:୨୫ ୧୦:୨୫ ମାଡିଉ ୨୨:୩୫-୪୦; ମାର୍କ ୧୨:୨୮-୩୪

ସମିରଣିୟର୍ ଗଟେକ୍ ଲକ୍ ତାରଲଗେ ଆସି, ଦେକ୍ଲା ଆରି ବେସି ମନୁକ୍ କଲା । ୩୪ ଆରି ତାରଲଗେ ଜାଇ ମାଡ଼ଅଇ କଣ୍ଡିଆ ବଣ୍ଡିଆ ଅଇଲାଟାନେ, ଚିକନ୍ ଆରି ଆମର୍ ଅଙ୍ଗୁରସ୍ ଲାଗାଇଦେଲା । ତାକେ ଗର୍ଣ୍ଣା ବାନ୍ଦି, ଗଦଉପ୍ରେ ବସାଇ, ଲକ୍ମନ୍ ବସି ମିଟିଙ୍ଗ୍ କର୍ବା ଗରେ ନେଇ ସେବାଜତନ୍ କଲା । ୩୫ ତାର୍ ଆରକର୍ ଦିନେ ସିମରଣିୟ ଲକ୍ ଦୁଇଟା ରୁପାଟାଙ୍ଗା ବାରକରାଇ, ମିଟିଙ୍ଗ୍ ଗରର୍ ମୁକିଆକେ ଦେଇ କଇଲା, “ଆର୍ ସେବା ଜତନ୍ କରା, ଆରି ଅଦିକ୍ କର୍ତ ଅଇଲେ, ସେଟା ମୁଇ ବାଉଡିଆଇବା ବେଲେ ତମ୍‌କେ ସୁଜିଦେବି ।”

୩୬ ଏ ତିନଲକର୍ ବିଡ଼ରେଅନି କେ ଚର୍ମାନର୍ ଟାନେ ମାଡ଼କାଉ ଲକର୍ ପଡ଼ିସାର୍ ଲକ୍ ବଲି ବାବ୍‌ଲୁସି ?

୩୭ ସାସ୍‌ତର୍ ସିକାଉ କଇଲା, “ଜନ୍ ଲକ୍ ତାକେ ଦୟାକଲା, ସେ ଆକା ।” ଜିସୁ ତାକେ କଇଲା, “ଜା ତୁଇ ମିସା ସେନ୍ତାରି କର୍ ।”

ଜିସୁ ମାର୍ତ୍ତା ଆରି ମରିୟମର୍ ଗରେ ଗାଲା

୩୮ ଜିସୁ ଆରି ତାର୍ ସିସମନ୍ ଜିବାବେଲେ ଗଟେକ୍ ଗାଏଁ କେଟ୍‌ଲାଇ । ତେଇ ମାର୍ତ୍ତା ନାଉର୍ ଗଟେକ୍ ମାଇଜି ଜିସୁକେ ତାର୍ ଗରେ ଡାକି ବସାଇଲା । ୩୯ ମାର୍ତ୍ତାକେ ମରିୟମ୍ ନାଉର୍ ଗଟେକ୍ ବଇନି ରଇଲା । ସେ ମାପ୍‌ରୁର୍ ପାଦେ ବସି ତାର୍ ବାକିଅ ସୁନ୍‌ତେରଇଲା । ୪୦ ମାତର୍ ମାର୍ତ୍ତାକେ ବେସି ପାଇଟି ରଇଲାଜେ ଦାନ୍ଦା ଅଇଜାଇତେ ରଇଲା । ତେବର୍‌ପାଇ ସେ ଜିସୁରଲଗେ ଆସି କଇଲା, “ଏ ମାପ୍‌ରୁ, ମର୍ ବଇନି ଗରର୍ ସବୁ ପାଇଟି ମକେ ସେ କରାଇଲାନି, ସେବାଟେ କାଇ ତମର୍ ମନ୍ ନାଇ କି ? ସେଟାର୍‌ପାଇ ତାକେ କୁଆ, ସେ ମକେ ଆସି ସାଇଜ କର ।”

୪୧ ମାତର୍ ମାପ୍‌ରୁ ତାକେ କଇଲା, “ଏ ମାର୍ତ୍ତା, ତୁଇ ବେସି ବିସଇ ଚିନ୍ତା କରି, ଦାନ୍ଦାଅଇଗାଲୁସି, ୪୨ ମାତର୍, ଗଟେକ୍ ବିସଇ ଆକା ସବୁଟାନେଅନି ମୁକିଅ । ସେଟା ମରିୟମ୍ ବାଟିକରି ନେଇଆଟେ । ସେଟା ତାର୍‌ଟାନେଅନି କେ ନେଇ ନାପାରତ୍ ।”

## ୧୧

ପାର୍ତନା ବିସଇ ନେଇ ସିକିଆ

(ମାତିଉ ୬:୯-୧୩,୭:୭-୧୧)

୧ ତରେକ୍ ଜିସୁ ଗଟେକ୍ ଜାଗାଇ ପାର୍ତନା କର୍ତେରଇଲା । ସେ ପାର୍ତନା କରି ସାରାଇଲା ପଟେ, ତାକର୍ ସିସମନ୍ ବିଡ଼ରେଅନି ଗଟେକ୍ ଲକ୍ ତାକେ କଇଲା, “ଏ ମାପ୍‌ରୁ ତୁବନ୍ ଦେଉ ଜଅନ ଜେନ୍ତାରି ନିଜର୍ ସିସମନ୍‌କେ ପାର୍ତନା କର୍ବାକେ ସିକାଇଲା, ତମେମିସା ଆମ୍‌କେ ପାର୍ତନା କର୍ବାକେ ସିକାଆ ।”

୨ ଜିସୁ ସେମନ୍‌କେ କଇଲା, ଜେଡେବେଲେ ତମେ ପାର୍ତନା କର୍ସା, ସେଡ଼କିବେଲେ କୁଆ,

“ବାବା ତମର୍ ନାଉଁ ସୁକଲ୍‌ବଲି ସବୁଲକ୍ ମାନତ୍ ।

ତମର୍ ରାଇଜ୍ ଆସ ।

୩ ସବୁଦିନ୍ ଆମ୍‌କେ ଆମର୍ ଦର୍କାର୍ ରଇଲା କାଦି କାଇବାକେ ଦିଆ ।

୪ ଆମର୍ ସବୁ ପାପ୍ କେମା କରିଦିଆସ୍,

କାଇକେବଇଲେ ଆମେ ମିସା ଆମର୍ ବିରୁଦେ ବୁଲ୍ କଲା ଲକ୍ମନ୍‌କେ କେମା କଲୁନି ।

ଆମ୍‌କେ ପାପ୍ ଦସ୍ କରାଇବା ସବୁଟେଇଅନି ରକିଆ କରା ।”

୫ ପରେ ଜିସୁ ତାର ସିସୟାମାନଙ୍କୁ କହିଲେ, “ତମର ଏନ୍ତାରି କାର୍ ମଇତରୁ ଆତେ କି, ଜାରଲଗେ କି ତମେ ମଜାରାତି ଜାଇ କଇପାରାସ, ଏ ମଇତରୁ, ମକେ ତିନ୍ତା ରୁଟି ଉଦାର ଦେଇରୁଆ, ୬ କାଇକେବଇଲେ, ମର ଗଟେକ୍ ବେସି ଦୁରରୁ ସାଙ୍ଗ ଆସିଆତେ, ତାକେ କାଇବାକେ ଦେବାକେ ମରଲଗେ କାଇଟାମିସା ନାଇ । ୭ ଆରି ବିତ୍ତରେଅନି ସେ କଇସି, ମକେ କସ୍ତ ଦିଆନାଇ, କାପାଟ୍ ଡାବ୍ଲୁବେ, ଆରି ମରସଙ୍ଗ୍ ମର ପିଲାମନ୍ ସଇଆତଡ୍ । ତମକେ ଉଟିକରି ଦେଇନାପାରି । ୮ ମୁଇ ତମକେ କଇଲିନି, ତମର ମଇତରୁ ଅଇରଇଲେ ମିସା ସେ ଉଟିକରି ରୁଟି ନ ଦେଏ, ମାତରୁ ତମେ ଲାଜ୍ ନ ଅଇ ମାଙ୍ଗିଲାଗିରଇଲେ, ସେ ଉଟିକରି ତକେ ଜେଡ୍ କି ଲତା, ସେଡ୍ କି ଦେଇସି ।”

୯ ମୁଇ ତମକେ କଇଲିନି, ମାଙ୍ଗା ତେବେ ତମକେ ଦିଆଅଇସି । କଜା, ତେଇ ତମେ ମିଲାଇସା । କାପାଟେ ବାଜାଆ, ତେଇ ତମରପାଇବଲି ଉଗାତି ଦିଆଅଇସି । ୧୦ କାଇକେବଇଲେ, ଜେ ମାଙ୍ଗସି, ସେ ପାଇସି । ଜେ କଜସି, ସେ ମିଲାଇସି । ଜେ କାପାଟେ ବାଜାଇସି, ତାରପାଇ କାପାଟ୍ ଉଗାତି ଦିଆଅଇସି । ୧୧ “ଆରି ତମରୁ ବିତ୍ତରେ ଏନ୍ତାରି ବାବା କେ ଆତେ, ଜେ କି ଜନ୍ ବାବାକେ ତାର ପଅ ମାଟ୍ ମାଙ୍ଗ୍ଲେ, ତାକେ ମାଟ୍ ନ ଦେଇ ସାପ୍ ଦେଇସି ? ୧୨ କି ଗାର୍ ମାଙ୍ଗ୍ଲେ, ସେ ତାକେ ବିସକାକ୍ତା ଦେଇସି ? ୧୩ ତେବେ ତମେ କରାପ୍ ଲକ୍ ଅଇଲେ ମିସା, ନିଜରୁ ନିଜରୁ ପିଲାମନ୍ କେ ନିକ ନିକ ବିସଇ ଦେବାରୁ ଜାନାସ । ତେବେ ଜନ୍ ବାବା ସର୍ଗେଅନି ଦାନ୍ କଲାନି, ସେ ଜାନେ, ସେ ତାକେ ମାଙ୍ଗ୍ବା ଲକ୍ କେ କେତେକ୍ ଅଦିକ୍ ସୁକଲ୍ ଆଡ଼ମା ଦେଇସି !”

ଜିସୁ ଆରି ବାଆଲ୍ ଜିବୁଲ୍  
(ମାତିଉ ୧୨:୨୨-୩୦; ମାର୍କ ୩:୨୦-୨୭)

୧୪ ତରେକ୍ ଜିସୁ ଗଟେକ୍ ଲକ୍ ଗଟେଇଅନି ତୁମା ଚାଡାଇତେରଇଲା । ସେ ତୁମା ଗୁଲାଟା । ତୁମା ବାରଇଗାଲା ପତେ ଗୁଲା ଲକ୍ କାତା କଇଲା । କାତାକଇଲାକେ ତେଇ ରଇବା ଲକ୍ ମନ୍ କାବାଅଇଗାଲା । ୧୫ \*ମାତରୁ ସେମନ୍ରୁ ବିତ୍ତରେ କେ କେ କଇଲା, “ସେ ତୁମାମନ୍ରୁ ନେତା ବାଲ୍ ଜିବୁଲ୍ ସାଇଜ ନେଇ ତୁମା ଚାଡାଇସି ।”

୧୬ \*ବିନ୍ ଲକ୍ ମନ୍ ଜିସୁକେ ପରିକାକରି ପାନ୍ଦେ ପାକାଇବାକେ ବାବ୍ ତେ ରଇଲା । ତେବରପାଇ ପରମେସରୁ ତାର ରକିଆକାରି ବଲି ସବୁକେ ଜାନାଇବାକେ ଗଟେକ୍ କାବାଅଇଜିବା ଚିନ୍ ଦେକାଇବାକେ କଇଲା । ୧୭ ମାତରୁ ଜିସୁ ତାକ୍ ମନ୍ କାତା ଜାନି, ସେମନ୍ କେ କଇଲା, “ଗଟେକ୍ ରାଇଜ୍ ଦୁଇ ବାଗ୍ ଅଇକରି, ନିଜରୁ ନିଜରୁ ବିରୁଦେ ଜୁଇଦ୍ କଲେ, ସେଟା କୁରୁପ୍ ନାସ୍ ଅଇଜାଇସି । ଗଟେକ୍ ଗରୁ ଲକ୍ ନିଜରୁ ନିଜରୁ ବିରୁଦେ ଲାଗ୍ଲେ, ସେ ଗରୁ ମିସା ବାଙ୍ଗିଜାଇସି । ୧୮ ଆରି ସଇତାନ୍ ମିସା ବାଗ୍ ବାଗ୍ ଅଇ, ନିଜରୁ ବିରୁଦେ ଉଟ୍ଲାନି ବଇଲେ, ତାର ରାଇଜ୍ କେଡ୍ ତବିରୁ ଅଇକରି ରଇସି ? ନାଇ ନ ରଏ । ମୁଇ କାଇକେ ଏଟା କଇଲିନି ବଇଲେ, ବାଲ୍ ଜିବୁଲ୍ ସାଇଜ ନେଇ ତୁମା ଚାଡାଇଲିନି ବଲି ତମେ ତା କଇଲାସିନି । ୧୯ ତମରୁ ପଅମନ୍ ବାଲ୍ ଜିବୁଲ୍ ବପୁ ପାଇ ସେମନ୍ କେ ଚାଡାଇବାଇ, ତେବରପାଇ ସେମନ୍ ସେ ତମକେ ବିଚାରୁ କରବାଇ । ୨୦ ନାଇ, ମୁଇ ପରମେସରୁ ବପୁସଙ୍ଗ୍ ତୁମା ଚାଡାଇସି । ତେବେ ତା ଏଟା ଜାନାଇ ଦେଲାନି, କି ପରମେସରୁ ରାଇଜ୍ ତମରୁ ଲଗେ କେଟ୍ ଲାବେ ବଲି ।”

୨୧ “ଜେତେବେଲେ ଗଟେକ୍ ବପୁର ଲକ୍ ଆଡ଼ଅଡିଆରୁ ଦାରି ନିଜରୁ ଗରୁ ଜାଗସି, ସେତେବେଲାଜାକ ତାର ଦନ୍ କାଇଟା ନ ଅଏ । ୨୨ ମାତରୁ ଜେତେବେଲେ ତାର ଚାନେଅନି ଅଦିକ୍ ବପୁରଲକ୍ ଆସି, ତାକେ ଲାଗିକରି ଜିଡ୍ସି । ଗରୁ ସାଉକାରୁ

\* ୧୧:୧୫ ୧୧:୧୫ ମାତିଉ ୯:୩୪; ୧୦:୨୫      \* ୧୧:୧୬ ୧୧:୧୭ ମାତିଉ ୧୨:୩୮; ୧୭:୧; ମାର୍କ ୮:୧୧



ଜନ୍ ଆଡ଼ଆଡ଼ିଆର୍ ଦାରି ନିଜେ ରକିଆ ପାଇତେରଇଲା , ସେ ସବୁଜାକ ବପୁର୍ ଲକ୍ ଚାଡ଼ାଇନେଇସି । ଆରି ଚାଡ଼ାଇ ନେଲାଟା ସେ ମନକଲା ପାରା କାକେ ମିସା ବାଟା କରାଦେଇସି ।

୨୩ \* “ଜେ ଆମକେ ବିରଦ୍ ନ କରେ, ସେ ଆମର୍ ନିଜର୍ ଲକ୍ । ଜେ ମର୍ ସଙ୍ଗ୍ କୁଡ଼ାଏନାଇ, ସେ ବିଟିପାକାଇସି ।”

ଗଟେକ୍ ତୁମା ବାରଇଗାଲା  
(ମାଡ଼ିଉ ୧୨:୪୩-୪୫)

୨୪ “ଗଟେକ୍ କରାପ୍ ଆଡ଼ମା ମୁନୁସର୍ଟାନେଅନି ବାରଇଗାଲାପତେ, ସେ ଆଡ଼ମା ବିସରାମ୍ କର୍ବାକେ ସୁକ୍ଲା ଜାଗାଇ କନ୍ଥାଲେ ଲକ୍ଟଟାନେ ରଇବାକେ କଜି ବୁଲ୍ସି । ଆରି ଜାଗା ନ ମିଲ୍ଲେ କଇସି, ମୁଇ ଜନ୍ ଲକ୍ଟଟାନେ ବାରଇଆସି ରଇଲି, ସେ ଲକ୍ଟଟାନେସେ ବାଉଡ଼ି ଜିବି । ୨୫ ଜେତେବେଲେ ସେ ତୁମା ଚାଡ଼ଲା ମୁନୁସର୍ଲଗେ ଆସି ପରିଚଲ୍ଲରଇ ନିମାନ୍ ସଜାଇଅଇରଇଲାଟା ଦେକ୍ସି । ୨୬ ତାର୍ପତେ ସେ ତୁମା ଜାଇକରି ତାର୍ଟାନେଅନି ବାନିଆରଇବା ବିନ୍ ବିନ୍ ସାଡ଼ଟା ତୁମାମନ୍କେ ଡାକିଆନ୍ସି । ସେମନ୍ କେଟିକରି ତେଇ ବାସା ଅଇବାଇ, ଆରି ସେ ଲକ୍ ଆଗ୍ଟୁ ଜେନ୍ତାର୍ ଅଇରଇଲା, ତାର୍ତେଅନି ସାରାସାରି ଅଦିକ୍ କରାପ୍ ଅଇଜାଇସି ।”

ସଡ଼ ସାର୍ଦଦା

୨୭ ଜିସୁ ଏନ୍ତାରି ସବୁ କାତା କଇବାବେଲେ ଲକ୍ମନର୍ ବିଡ଼ରେଅନି ଗଟେକ୍ ମାଇଜିଟକି ଆଉଲିଅଇ କଇଲା, “କେତେକ୍ କରମର୍ ମାଆ ଜେ କି ତମକେ ଜନମ୍ ଦେଲା ଆରି ନିଜର୍ ଦୁଦ୍ କୁଆଇଲା ।”

୨୮ ମାତର୍ ଜିସୁ କଇଲା, “ନାଇ, ଜନ୍ ଲକ୍ମନ୍ ପର୍ମେସରର୍ ବାକିଅ ସୁନ୍ବାଇ ଆରି ସେଟା ମାନ୍ବାଇ, ସେମନ୍ ନିକ କରମର୍ ଲକ୍ ।”

କାବାଅଇ ଜିବାପାରା କାମର୍ ଲାଗି ଦାବି  
(ମାଡ଼ିଉ ୧୨:୩୮-୪୨)

୨୯ \* ଲକ୍ମନ୍ ଦଲ୍ ଦଲ୍ ଅଇ ଜିସୁରଲଗେ ଚୁଲ୍ ଅଇବାବେଲାଇ ସେ କଇବାର୍ ଦାରଲା । “ଏବର୍ ଜୁଗର୍ ମୁନୁସମନ୍ କରାପ୍, ଏମନ୍ କାବା ଅଇଜିବା କାମର୍ ଚିନ୍ କଜ୍ଲାଇନି । ମାତର୍ ଜୁନସକେ ଗଟ୍ଲା ଚିନ୍ ଚାଡ଼ିକରି ଆରି କାଇ ବିନ୍ ଚିନ୍ ମିସା ଦିଆ ନ ଅଏ । ୩୦ କାଇକେବଇଲେ ଜୁନସ୍ ଜେକ୍ଟି ନିନିବିୟ୍ ଲକ୍ମନର୍ପାଇ ଚିନ୍ପାରା ଅଇଲା, ପର୍ମେସର୍ ପାଟାଇରଇବା ନର୍ପିଲା ମୁଇ ମିସା ଏବର୍ ଲକ୍ମନର୍ପାଇ ଚିନ୍ ପାରା ଅଇବି । ୩୧ ବିଚାର୍ନା ଦିନେ ଦକିନ୍ ଦେସେ ରଇବା ସେବା ନାଉର୍ ରାନି, ଏବର୍ ଲକ୍ମନର୍ ବିରଦେ ଉଟି, ଏମନ୍କେ ଦସି କରାଇସି, କାଇକେବଇଲେ ସେ ରାନି, ସଲ୍ମନ୍ ରାଜା ସିକାଇରଇବା ଗିଆନର୍ କାତା ସୁନ୍ବାକେ ବେସି ଦୁରଅନି ଆସିରଇଲା । ଆରି ଦେକା ! ସଲ୍ମନର୍ଟାନେଅନି ଅଦିକ୍ ବଡ଼ ଲକ୍ ଇଡି ଆଟେ । ୩୨ ବିଚାର୍ନାଦିନେ ନିନିବିର୍ ଲକ୍ମନ୍ ଏବର୍ ମୁନୁସମନ୍ ବିରୁଦେ ଚିଆଅଇ ଏମନ୍କେ ଦସି କର୍ବାଇ । କାଇକେବଇଲେ ସେମନ୍, ଜୁନସ୍ ମାପ୍ଚୁର୍ କାତା ଜାନାଇଲାକେ, ପାପ୍କାମେଅନି ବାଉଡ଼ିରଇଲାଇ, ଆରି ଦେକା ! ଜୁନସର୍ ଟାନେଅନି ବଡ଼ ଲକ୍ ଇଡି ଆଟେ ।

୩୩ \* “କେ ମିସା ବଡ଼ି ତସାଇ ମାନ୍ତଲେ ତାବିକରି ନ ସଙ୍ଗାଅଡ଼ । ମାତର୍ ବଡ଼ି ସଙ୍ଗାଇବା କୁଦରାଇ ସଙ୍ଗାଇବାଇ, ଜେନ୍ତାରିକି ଗର୍ବିଡ଼ରେ ଜିବାଲକ୍ମନ୍ ଉଜଲ୍ ଦେକିପାର୍ବାଇ । ୩୪ ତମର୍ ଆଁକି, ଗାଗଡର୍ ବଡ଼ି । ଜେତେବଲ୍ ତମର୍ ଆଁକି

\* ୧୧:୨୩ ୧୧:୨୩ ମାର୍କ ୯:୪୦ \* ୧୧:୨୯ ୧୧:୨୯ ମାଡ଼ିଉ ୧୭:୪; ମାର୍କ ୮:୧୨ \* ୧୧:୩୩ ୧୧:୩୩ ମାଡ଼ିଉ ୫:୧୫; ମାର୍କ ୪:୨୧; ଲୁକ୍ ୮:୧୭

ନିକ ରଇସି, ସେତେବେଳେ, ତମର ଗୁଲାଇ ଗାଗଡ଼ ମିସା ଉଜଲ୍ ଅଇସି । ମାତର୍ ଜେତେବେଳେ ସେଟା ମୁରକି ରଇସି, ସେଡ଼କିବେଲା ତମର ଗାଗଡ଼ ମିସା ଆନ୍ଦର୍ ଅଇଜାଇସି । ୩୫ ତେବେ ମନେ ରଅ, ଜାଗରଡ଼ଅଇ ରୁଆ, ଜେନ୍ତିକି ତମର ବିଡ଼ରର୍ ଉଜଲ୍ କେବେ ଆନ୍ଦର୍ ନ ଅଏ । ୩୬ ଏଟାରପାଇ ତମର ଗୁଲାଇ ଗାଗଡ଼ ଜଦି ଉଜଲ୍ ଅଇସି ଆରି ତେଇର କଣ୍ଢେକ ମିସା ଆନ୍ଦର୍ ନ ରଏ, ସେନ୍ତାରଅଇଲେ, ବଡ଼ି ଜେନ୍ତି ଜଗଜଗି ଜାଇ ଉଜଲ୍ ଦେଇସି, ସେନ୍ତାରି ତମର ଗୁଲାଇ ଗାଗଡ଼ ଉଜଲ୍ ଅଇସି ।”

ଜିସୁ ପାରୁସିମନ୍‌କେ ଆରି ସାସତର୍ ସିକାଉମନ୍‌କେ ଦସ୍ ଦେଲା  
(ମାତିଉ ୨୩:୧-୩୬; ମାର୍କ ୧୨:୩୮-୪୦)

୩୭ ଜିସୁ କାତା କଇସାରାଇଲା ପଟେ ଗଟେକ୍ ପାରୁସିଲକ୍ ତାକେ ନିଜର୍ ଗରେ କାଇବାକେ ତାକଲା, ଆରି ଗରେ ବସାଇଲା । ୩୮ ମାତର୍ ଜିସୁ ଜିଉଦି ରିତିନିତି ଇସାବେ ଦୁଆପୁଟା ନ ଅଇରଇଲାକେ ଏଟା ଦେକି ସେ ପାରୁସି ଲକ୍ କାବା ଅଇଗାଲା । ୩୯ ଜିସୁ ତାକେ କଇଲା, “ତମେ ପାରୁସିମନ୍ ଗିନା ଆରି ତାଲାର୍ ବାଇରେ ମାଞ୍ଜିରଇସା, ମାତର୍ ତମର ବିଡ଼ରର୍ ସକ୍ତି ବେନ୍‌ବେନା ରଇସି । କରାପୁଟା ଆରି ଲବ୍ କରବାଟା ସବୁ ପୁରୁନ୍ ଅଇଆଟେ । ୪୦ ଏ ବକୁଆମନ୍ ! ଜେ ଗାଗଡ଼ ବାଇରଟା ତିଆର୍ କଲା ଆଟେ, ସେ କାଇ ବିଡ଼ରଟା ମିସା ତିଆର୍ କରେନାଇ କି ? ୪୧ ତେବରପାଇ ତମେ ଜନ୍‌ଟା କଟିକରି ସଙ୍ଗଇ ଆଟାସ୍, ସେଟା ଦୁକିରୁକି ଲକ୍‌ମନ୍‌କେ ଦାନକରା, ଆରି ଦେକା, ତମେ ପୁରାପୁରୁନ୍ ପରିଚଲ୍ ଅଇଜାଇସା ।”

୪୨ “ଅଇରେ ପାରୁସିମନ୍ ! ତମର ଉପରେ ଗଟେକ୍ ବଡ଼ ଡଣ୍ଡ ଲାଦିଅଇସିବେ ! କାଇକେବଇଲେ ତମର ବାତେଅନି କାମାଇଲାଟା ଦସ୍‌ବାଟ୍ ଅନି ବାଗେକ୍ ଦେଲାସିନି । ମାତର୍ ତମେ ନିଆଇ ଆରି ଦୟା ଏଲା କଲାସିନି । ଏଟାସଙ୍ଗ୍ ବାଗେକ୍ ଦେବାଟା ମିସା ଚାଡ଼ବାର ନାଇ ।”

୪୩ “ଅଇରେ ପାରୁସିମନ୍, ତମର ଉପରେ ଗଟେକ୍ ବଡ଼ ଡଣ୍ଡ ଲାଦିଅଇସିବେ ! କାଇକେବଇଲେ ତମେ ପାର୍‌ତନାଗରେ ମୁକିଅ ଜାଗାଇ ବସବାକେ ମନ୍ କରସା ଆରି ଆଟେବାଟେ ଲକ୍‌ମନ୍‌ଟାନେଅନି ଜୁଆର୍ କରାଇଅଇବାକେ ବଲ୍ ବଲାଅଇସା । ୪୪ ଅଇରେ ପାରୁସିମନ୍ ! ତମର ଉପରେ ଗଟେକ୍ ବଡ଼ ଡଣ୍ଡ ଲାଦିଅଇସିବେ । କାଇକେବଇଲେ, ତମେ ନ ତିସ୍‌ବା ସମାଦି ପାରା । ତାର୍ ଉପରେ ଆସା ଜା କରବା ଲକ୍‌ମନ୍ ସେଟା ସମାଦି ବଲି ନାଜାନଡ଼ ।”

୪୫ ତେଇ ସାସତର୍ ସିକାଉବା ଦରମ୍ ଗୁରୁମନ୍‌ର ବିଡ଼ରେଅନି ଗଟେକ୍ ପଣ୍ଡିତ୍ ଜିସୁକେ କଇଲା, “ଏ ଗୁରୁ ତମେ ପାରୁସିମନ୍‌ର ବିସଇ କଇକରି ଆମ୍‌କେ ଲାଜ୍ କରାଇଲାସିନି ।”

୪୬ ଜିସୁ କଇଲା, “ଅଇରେ ସାସତର୍ ସିକାଉ ପଣ୍ଡିତ୍‌ମନ୍ ! ତମର ଉପରେ ଗଟେକ୍ ବଡ଼ ଡଣ୍ଡ ଲାଦିଅଇସିବେ ! କାଇକେବଇଲେ ତମେ ଲକ୍‌ମନ୍‌କେ ବେସି ଆବଡ଼ ନିୟମ୍ ମାନ୍‌ବାକେ କଇଲାସିନି, ଆରି ସେ ନିୟମ୍ ମାନ୍‌ବାକେ ମୁଲ୍‌କେ ଆଙ୍ଗଟିତେଇ ଉଟାଇବା ଏଡ଼କି ମିସା ସାଇଜ କରାସ୍ ନାଇ । ୪୭ ଅଇରେ, ଡଣ୍ଡ ପାଉମନ୍ ! ତମର ଉପରେ ଗଟେକ୍ ବଡ଼ ଡଣ୍ଡ ଲାଦିଅଇସିବେ । କାଇକେବଇଲେ, ତମେ ବବିସତ୍‌ବକ୍‌ତାମନ୍‌ର ମସ୍‌ନେ ସମାଦି ତିଆର୍ କରତେରଇସା, ମାତର୍ ତମର ଆନିଦାଦିମନ୍ ସେମନ୍‌କେ ମରାଇରଇଲାଇ । ୪୮ ତେବେ ତମର ଆନିଦାଦିମନ୍‌ର ଦରମ୍ କରମ୍ ବିସଇର୍ ତମେ ସାକି ଆଟାସ୍ । ଆରି ସେଟା ମାନ୍‌ଲାସିନି କାଇକେବଇଲେ ସେମନ୍ ସିନା ବବିସତ୍‌ବକ୍‌ତାମନ୍‌କେ ମରାଇରଇଲାଇ, ମାତର୍ ତମେ ସେମନ୍‌ର ସମାଦିର୍ କାମ୍ ତିଆର୍ କଲାସିନି । ୪୯ ତେବେ ପର୍‌ମେସର୍ ମିସା ନିଜର୍ ବୁଦିରେ କଇଲାଆଟେ, ମୁଇ ବବିସତ୍‌ବକ୍‌ତାମନ୍‌କେ ଆରି କବର୍ ନେଉମନ୍‌କେ ସେମନ୍‌ର ଲଗେ ପାଟାଇବି

। ସେମାନର ବିତ୍ତରେ କେତେଲକ୍ଷକେ ସେମାନ ମରାଇବାଇ ଆରି କେତେଲକ୍ଷକେ ନିନ୍ଦାକରି କସ୍ତ ଦେବାଇ । <sup>୫୦</sup> ସେଗାରପାଇ ଜଗତ୍ ତିଆରଅଇଲାଟାନେଅନି, ଏବଲର ବେଲେଅନି ଆରାମ୍ କରି ବରକିଆର୍ ପ ଜିକରିୟର୍ ଜାକ, ଜାକେ କି ତମେ ମନ୍ଦିର୍ ଆରି ବେଦିର୍ ମଜାଇ ମରାଇରଇଲା ଜେଡକି ବବିସତ୍‌ବକ୍ତାମନକେ ମରାଇଆରାସ୍ ସେ ସବୁ ତଣ୍ଟୁ ଏ ଆଜିକାଲିର୍ ଲକ୍ଷମନ୍ ପାଇବାର୍ ଆଟେ । <sup>୫୧</sup> ସେ ସବୁର୍ ମୁଲିଅ, ଏବର୍ ଲକ୍ଷମନର୍ ଟାନେଅନି ନିଆ ଅଇସି ।”

<sup>୫୨</sup> “ଅଇରେ, ଦରମ୍‌ଗୁରୁମନ୍ ! ତମର୍ ଉପରେ ଗଟେକ୍ ବଡ୍ ତଣ୍ଟୁ ଲାଦିଅଇସିବେ ! କାଇକେବଇଲେ, ତମେ ପର୍ମେସରର୍ ଗିଆନର୍ କାପାଟ୍ ଡାବିଦେଇ ଆଟାସ୍ । ନିଜେ ପର୍ମେସରର୍ ଗିଆନଟାନେ ନ ଜାଇକରି ତେଇ ଜିବାକେ ମନ୍‌କଲା ଲକ୍ଷମନକେ ମିସା ବାଦାଦେଲାସ୍ ।”

<sup>୫୩</sup> ଆରି ଜିସୁ ତେଇଅନି ବାରଇଗାଲାପଟେ, ପାରୁସିମନ୍ ଆରି ସାସ୍‌ତର୍ ସିକାଉମନ୍ ବେସି ଡାଟ୍‌ସକ୍ ଜିସୁକେ ବିରଦ୍ କର୍ବାକେ ଆରାମ୍ କଲାଇ । <sup>୫୪</sup> ଡାର୍‌ଟାନେଅନି ବୁଲ୍ ଦାର୍‌ବାକେ କାଇ କାଇ ପର୍‌ସନ୍ ପାଟାର୍‌ବାର୍ ଦାର୍‌ଲାଇ ।

## ୧୨

ପାରୁସିମନର୍ ପାରା ଉଆନାଇ  
(ମାତିଉ ୧୦:୨୭-୨୭)

<sup>୧</sup> \*ଏଡକି ବିତ୍ତରେ ଅଜାର୍ ଅଜାର୍ ଲକ୍ଷ ବୁଲ୍‌ଅଇକରି, ତାକର୍ ତାକର୍ ବିତ୍ତରେ ମାଣ୍ଡାରୁଣ୍ଡା ଅଇଜାଇତେ ରଇଲାଇ, ସେଡକିବେଲେ ଜିସୁ ପର୍‌ତୁମ୍ ନିଜର୍ ସିସ୍‌ମନକେ କଇବାର୍ ଦାର୍‌ଲା, “ପାରୁସିମନର୍ କମିର୍ ପାରା କପଟ୍ ତେଇଅନି ଜାଗରଡ୍ ଅଇରୁଆ । <sup>୨</sup> \*ଡାବିଅଇରଇବା ସବୁ ବିସଇ ଜାନାପଡ୍‌ସି, ଆରି ଲୁଚିରଇବା ବିସଇ ସବୁ ଦେକାଅଇସି । <sup>୩</sup> ତେବର୍‌ପାଇ, ତମେମନ୍ ଜନ୍ ଜନ୍‌ଟା ଆନ୍ଦାରେ କଇଆଟାସ୍, ସେ ସବୁଜାକ ଉଜ୍‌ଲେ ସୁନ୍‌ବାଇ, ଆରି ଜନ୍ ଜନ୍‌ଟା ବିତ୍‌ରଗରେ, କେ ନ ସୁନ୍‌ତେ କଇଆଟାସ୍, ସେଟା ଗରର୍ ଚାନିଉପରେ ଅନି ସୁନାଇଅଇସି ।”

ପର୍ମେସରକେସେ ଡରା  
(ମାତିଉ ୧୦:୨୮-୩୧)

<sup>୪</sup> “ମାତର୍ ତମେ ମର୍ ମଇତର୍, ତମକେ ମୁଇ କଇଲିନି, ଜନ୍ ଲକ୍ଷମନ୍ ଗାଗଡକେ ମରାଇବାଇ, ମାତର୍ ତାର୍‌ପଟେ ତମର୍ ଆଡ୍‌ମାକେ କାଇଟା କରିନାପାରଡ୍, ସେମନ୍‌କେ ଡରାନାଇ । <sup>୫</sup> ମାତର୍ କାକେ ଡର୍‌ସା, ସେଟା ମୁଇ ତମ୍‌କେ ଜାନାଇବି, ମରାଇଲାପଟେ ନର୍‌କେ ପିଙ୍‌ବାକେ ଜାର୍ ଅଦିକାର୍ ଆଟେ, ତାକେ ଡରା, ଉଁ ମୁଇ ତମ୍‌କେ ସଡ୍ କଇଲିନି, ପର୍ମେସରକେ ଡରା ।

<sup>୬</sup> “ପାଁଟା ଚେଟିଆ ଚଡଇ କାଇ ଅଲପ୍ ଡାବୁକେ ବିକା ନଅଏ କି ? ଏଲେ ମିସା ସେମନର୍ ବିତ୍ତରେଅନି ଗଟେକ୍‌କେ ମିସା ପର୍ମେସର୍ ନ ପାସ୍‌ରେ । <sup>୭</sup> ମାତର୍ ତମର୍ ମୁଣ୍ଡର୍ ସବୁ ଚେଣ୍ଡି ମିସା ଏଜା ଅଇଲାଆଟେ । ଡରାନାଇ, ତମେମନ୍ କେତେକ୍ କେତେକ୍ ଚେଟିଆ ଚଡଇର୍ ଟାନେଅନି ମୁକିଅ ।”

ଜିସୁକେ ନାମି କରି ଚାଡ୍‌ବାଟା  
(ମାତିଉ ୧୦:୩୨-୩୩; ୧୨:୩୨; ରମିୟ ୧୦:୯-୧୦)

୮ “ଆରି ମୁଇ ତମ୍‌କେ କଇଲିନି, ଜେ ଜଦି ମକେ ଲକ୍ଷମନର୍ ମୁଆଟେ ନାମସି ଆରି ବିସ୍‌ବାସ୍ କର୍‌ସି, ପର୍ମେସର୍ ପାଟାଇରଇବା ନର୍‌ପିଲା ମୁଇ ମିସା ପର୍ମେସରର୍ ଦୁଡ୍‌ମନର୍ ମୁଆଟେ ତାକେ ନାମ୍‌ବି । <sup>୯</sup> ମାତର୍ ଜେ ଲକ୍ଷମନର୍ ମୁଆଟେ ମକେ ନ

\* ୧୨:୧ ୧୨:୧ ମାତିଉ ୧୭:୬; ମାର୍କ ୮:୧୫      \* ୧୨:୨ ୧୨:୨ ମାର୍କ ୪:୨୨; ଲୁକ୍ ୮:୧୭

ନାମି, ବିସ୍‌ବାସ୍ ନ କରେ, ତାକେ ପର୍‌ଫେସରର୍ ଦୁତ୍‌ମନର୍ ମୁଆଟେ ମୁଇ ଇନ୍ କର୍‌ବି ।”

୧୦\*“ଆରି ଜେ ପର୍‌ଫେସର୍ ପାଟାଇରଇବା ନର୍‌ପିଲାର୍ ବିରୁଦେ କଇଲେ, ତାକେ କେମା ଦିଆଅଇସି, ମାତର୍ ଜେ ସୁକଲ୍ ଆତ୍‌ମାର୍ ବିରୁଦେ କଇସି, ତାକେ କେମା ନ ଦିଆଅଏ ।

୧୧\*“ଆରି ଜେତେବେଲେ ସେମନ୍ ତମ୍‌କେ ଜିଉଦି ଲକ୍‌ମନର୍ ପାର୍‌ତନା ଗରେ, ସାସନ୍ କର୍‌ବା ଲକ୍‌ମନର୍‌ଟାନେ କି ବିନ୍ ବିନ୍ ଅଦିକାରି ମନର୍‌ଟାନେ ବାନ୍ଦିନେଲେ, ସେତ୍‌କିବେଲେ କାଇଟାବଲି କଇସା, ସେ ବିସଇ ନେଇକରି ଚିନ୍ତା କରାନାଇ । ୧୨ କାଇକେବଇଲେ କାଇଟା କଇବାକେ ଅଇସି, ସେବେଲାଇ ସୁକଲ୍‌ଆତ୍‌ମା ତମ୍‌କେ ସିକାଇସି ।”

ବକୁଆ ସାଉକାରର୍ କାତା

୧୩ ଲକ୍‌ମନର୍ ଗଅଲି ବିତ୍‌ରେଅନି ଗଟେକ୍ ଲକ୍ ଜିସୁକେ କଇଲା, “ଏ ଗୁରୁ, ମର୍ ବାବାର୍ ସଁପତି ବାଗ୍‌ବାଟା କର୍‌ବାକେ ମର୍ ବାଇକେ କୁଆ ।” ୧୪ ଏଟା ସୁନି ଜିସୁ ତାକେ କଇଲା, “ଏ ମଇତର୍, ତମର୍ ବିତ୍‌ରେ ନିଆଇ କର୍‌ବାକେ ଆରି ଦନ୍‌ସଁପତି ବାଗ୍‌ବାଟା କରିଦେବାକେ ମକେ କେ ଅଦିକାର୍ ଦେଲାଆଟେ ?” ୧୫ ଆରି ଜିସୁ ସେମନ୍‌କେ କଇଲା, “ଜାଗର୍‌ତା, ସବୁରକାମର୍ ଲବ୍ କର୍‌ବାଟାନେଅନି ନିଜେ ନିଜେ ଦୁରେ ରୁଆ । କାଇକେବଇଲେ ଗଟେକ୍ ଲକ୍‌ର୍ ଜିବନ୍‌ଟାନେଅନି ଦନ୍‌ସଁପତି ବଡ୍ ବିସଇ ନଏ ।”

୧୬ ଆରି ସେ ଲକ୍‌ମନ୍‌କେ ଗଟେକ୍ ଉଦାଅରନ୍ ଦେଇ କଇଲା, ଗଟେକ୍ ସାଉକାର୍‌କେ ତାର୍ ଜମିଟାନେଅନି ବେସି ତାସ୍ ପାଟ୍‌ଲା । ୧୭ ସେ ଲକ୍ ମନେ ମନେ ବାବ୍‌ନାକରି କଇଲା, “କାଇଟା କର୍‌ବି ? ମର୍ କାଦି ଆନି ସଙ୍ଗଇବାକେ ଜାଗାନାଇ ।” ୧୮ ଆରି ସେ କଇଲା, “ଏନ୍ତାରି କର୍‌ବି, ମର୍ କାଦି ସଙ୍ଗଇବା ଗରର୍ କତି ବାଙ୍ଗାକକରି ବଡ୍ ବଡ୍ କରି ତିଆର୍‌କର୍‌ବି ଆରି ତେଇ ମର୍ ସବୁ କାଦିକଣ୍ଡା ଜାଗର୍‌ତ୍ କରି ସଙ୍ଗଇବି । ୧୯ ଆରି ମର୍ ଜିବନ୍‌କେ କଇବି, ର ଜିବନ୍, ତର୍‌ପାଇବଲି ବେସି ବରସର୍ କାଦିକଣ୍ଡା ସଙ୍ଗଇ ଅଇଲାଆଟେ, ପୁଣ୍ଡ, କାଆ ଆରି ଆରାମ୍‌ସଙ୍ଗ ର ।” ୨୦ ମାତର୍ ପର୍‌ଫେସର୍ ତାକେ କଇଲା, “ଏରେ ବକୁଆ ଜଦି ଆଜି ରାତି ପର୍‌ଫେସର୍ ତର୍ ଜିବନ୍ ମାଙ୍ଗସି ବଇଲେ, ତୁଇ ତର୍‌ପାଇ ଜେତ୍‌କି ସଙ୍ଗଇଆରୁସ୍, ସେ ସବୁ କାର୍‌ଟା ଅଇସି ? ୨୧ ଜେ ନିଜର୍‌ପାଇ ଦନ୍ ଜତନ୍ କରି ସଙ୍ଗଇସି, ସେ ପର୍‌ଫେସରର୍ ମୁଆଟେ ସାଉକାର୍ ନଏ, ତାର୍‌ପାଇ ଏନ୍ତାରି ଗଟ୍‌ସି ।”

ମାପ୍‌ରୁ ଟାନେ ବିସ୍‌ବାସ୍ କର୍‌ବାର୍  
(ମାତିଉ ୭:୨୫-୩୪)

୨୨ ଜିସୁ ନିଜର୍ ସିସ୍‌ମନ୍‌କେ କଇଲା, “ଏଟାପାଇ ମୁଇ ତମ୍‌କେ କଇଲିନି, କାଇଟା କାଇକରି ଜିବନ୍ ବଁଟାଉ ଆରି ଗାଗତର୍‌ପାଇ କାଇଟା ପିନ୍‌ବୁ ବଲି ଚିନ୍ତା କରାନାଇ । ୨୩ କାଇକେବଇଲେ କାଦିଟାନେଅନି ଜିବନ୍ ଆରି ବସ୍‌ତର୍‌ଟାନେଅନି ଗାଗତ୍ ଆକା ମୁକିଅ । ୨୪ ଚତ୍‌ଇମନର୍ ବିସଇନେଇକରି ବାବିଦେକା, ସେମନ୍ ନ ବୁନଡ୍ କି ନ କାଟ୍, ଆରି ସେମନର୍ ବାଣ୍ଡାଗର୍ କି କାଦି ସଙ୍ଗଇବା ଆମାର୍ ଗର୍ ନାଇ । ଅଇଲେ ମିସା ମାପ୍‌ରୁ ସେମନ୍‌କେ କାଦି ଜାଗାଇଦେଇସି । ତମେ ଚତ୍‌ଇମନର୍ ଟାନେଅନି କେତେକ୍ ଅଦିକାର୍‌ର ଲକ୍ । ୨୫ ତମର୍ ବିତ୍‌ରେ ଏନ୍ତାରିଲକ୍ ନ ରଅଡ୍, ଜେ କି ଚିନ୍ତାକରି ତାର୍ କଣ୍ଡେକ୍ ମିସା ଆଇସ୍ ବଡାଇ ପାର୍‌ସି । ୨୬ ତେବର୍‌ପାଇ ତମେମନ୍ ଗଟେକ୍ ସାନ୍ ବିସଇ ମିସା କରିନାପାର୍‌ଲାସ୍‌ନି ବଇଲେ

\* ୧୨:୧୦ ୧୨:୧୦ ମାତିଉ ୧୨:୩୨; ମାର୍‌କ ୩:୨୯ \* ୧୨:୧୧ ୧୨:୧୧ ମାତିଉ ୧୦:୧୯,୨୦; ମାର୍‌କ ୧୩:୧୧; ଲୁକ୍ ୨୧:୧୪,୧୫

ବଡ଼ ବଡ଼ ବିସଇ କାଇକେ ଚିନ୍ତା କଲାସ୍ତନି ? ୨୭ ପୁଲ୍ଲମନର୍ ବିସଇ ବାବିଦେକା, ସେମନ୍ କେନ୍ତି ପୁଟ୍ଲାଇନି, ସୁତା ନ କାଟଡ଼ କି ଲୁଗା ନ ବୁନଡ଼ । ଏଲେମିସା ମୁଇ ତମ୍ବେ କଇଲିନି, ସବୁରଟାନେଅନି ମଆନ୍ ଆରି ଦନି ରାଜା ସଲ୍ଲମନ୍ ମିସା ସେ ପୁଲ୍ଲମନର୍ ବିଡ଼ରେଅନି ଗଟେକ୍ ପୁଲ୍ଲର୍ ଏଡ଼କ୍ ସଜାଇ ନ ଅଇରଇଲା । ୨୮ ଆଜି ଜନ୍ ଗାଁସ୍ ପଦାଇ ଆଚେ, କାଲିକେ ସେଟା ରୁଣ୍ଡାଇ ଜଇ ଲାଗାଇବାଇ । ସେଟାକେ ପର୍ମେସର୍ ଏନ୍ତାରି ବେସ୍ ଦେଲାନି ବଇଲେ, ଏ ଅଲପ୍ ବିସ୍ବାସ୍ କର୍ବା ଲକ୍ମନ୍, ସେ ତମ୍ବେକେ ପିନ୍ଦ୍ବାକେ କେତେକ୍ ଅଦିକ୍ ଦେଇସି !”

୨୯ “ଆରି କାଇଟା କାଇବୁ ? ବଲି ଚିନ୍ତାକରି ଲାଗିରୁଆନାଇ, ୩୦ କାଇକେବଇଲେ ପର୍ମେସର୍କେ ନାଜାନ୍ଲା ଲକ୍ମନ୍ ଏ ସବୁ ବିସଇ କଜିବୁଲ୍ବାଇ । ମାତର୍ ଏ ସବୁ ବିସଇ ତମ୍ବେକେ ଦରକାର୍, ସେଟା ତମର୍ ବାବା ଜାନିରଇସି । ୩୧ ମୁଇ କଇଲିନି ତମେ ପର୍ମେସର୍ବର୍ ସରଗ୍ ରାଇଜ୍ କଜା, ଆରି ଏ ସବୁ ବିସଇ ସେ ତମ୍ବେକେ ଦେଇସି ।”

ସରଗ୍ ରାଇଜେ ଦନ୍  
(ମାତିଉ ୭:୯-୨୧)

୩୨ ଏ ଉନା ମେଣ୍ଡାରାସି, ତରାନାଇ, କାଇକେବଇଲେ ତମର୍ ବାବା ତମ୍ବେକେ ତାର୍ ରାଇଜ୍ ଦେବାକେ ମନ୍କଲାଆଚେ । ୩୩ ତମ୍ବେକେ ଜନ୍ ଜନ୍ଟା ଆଚେ, ସେଟା ବିକିଦେଇ ଗରିବମନ୍ଦକେ ଦାନ୍ କରା । ଜନ୍ଟା କି କେବେ ନ ସାରେ, ନିଜର୍ ନିଜର୍ପାଇ ଏନ୍ତାରି କାଣା ନ ଅଇବା ବେସ୍ନି ତିଆରକରା । ଜନ୍ଟାନେ ଚର୍ ନ ଆସେ କି କିତାମନ୍ ମିସା ନ ନସାଅଡ଼ । ସର୍ଗେ ଏନ୍ତାରି ନ ସାର୍ବା ଦନ୍ ସଙ୍ଗଇରୁଆ । ୩୪ କାଇକେବଇଲେ ଜନ୍ଟାନେ ତମର୍ ଦନ୍, ତେଇସେ ତମର୍ ମନ୍ ।

ତରିକ୍ନା ରଇବା ଗତି ଦାଙ୍ଗତା

୩୫ ☆“ତମର୍ ଆଚର୍ ତୁଆଲ୍ ବାନ୍ଦିଅଇ ସେବା କର୍ବାକେ ଜାଗିରୁଆ, ଆରି ବଡ଼ି ଲାଗ୍ତେରଅ । ୩୬ ☆ ମାପରୁ ବିବା ବଜିଟାନେଅନି ବାଉଡ଼ିଆସି କାପାଟେ ବାଜାଉ ବାଜାଉ ଜନ୍ଲକ୍ମନ୍ ଦାପ୍ରେ କାପାଟ୍ ଉଗାଡ଼ବାକେ ଜାଗିରଇବାଇ, ତମେ ସେମନର୍ପାରା ଅଇରୁଆ । ୩୭ ମାପରୁ ଆସି ଜନ୍ ଦାଙ୍ଗତାମନ୍ଦକେ ଜାଗରଡ଼ ରଇବାଟା ଦେକ୍ସି, ସେମନ୍ କେତେ ନିକ କରମର୍ ଲକ୍ । ମୁଇ ତମ୍ବେକେ ସଡ଼ କଇଲିନି, ସେ ନିଜର୍ ଆଁଟାଇ ତୁଆଲ୍ ବାନ୍ଦିକରି, ସେମନ୍ଦକେ କାଇବାକେ ବସାଇ, ତାକରଲଗେ ଜାଇ ସେବାକର୍ସି । ୩୮ ଆରି ସେ ଜଦି ମଜାରାତି କି କୁକ୍ତାଡାକେ ମିସା ଆସି ସେମନ୍ଦକେ, ସେନ୍ତାରି ରଇବାଟା ଦେକ୍ସି, ସେନ୍ତାରୁଆଲେ ସେ ଦାଙ୍ଗତାମନ୍ କେତେ ନିକ କରମର୍ ଲକ୍ । ୩୯ ☆ମାତର୍ ଏଟା ଜାନିରୁଆ, କେତେବେଲେ ଚର୍ ଆଇସି, ଏଟା ଗରର୍ ସାଉକାର୍ ଜେବେ ଜାନ୍ସି, ସେନ୍ତାରୁଆଲେ ସେ ନିଜର୍ ଗରର୍ ପେଡ଼ି ବାଙ୍ଗାଇବାକେ ନ ଦେଏ । ୪୦ ତମେ ମିସା ଜାଗ୍ବଡ଼ଅଇ ରୁଆ, କାଇକେବଇଲେ, କେବେ ତମେ ବାବି ନ ରୁଆସ୍, ସେ ବେଲେ ପର୍ମେସର୍ ପାଟାଇରଇବା ନର୍ପିଲା ମୁଇ ଆଇବି ।”

ବିସ୍ବାସ୍ କର୍ବା ଗତି ଦାଙ୍ଗତା କି ବିସ୍ବାସ୍ ନକର୍ବାଟା  
(ମାତିଉ ୨୪:୪୫-୫୧)

୪୧ ସେଟାସ୍ତନି ପିତର୍ କଇଲା, “ଏ ମାପରୁ ତମେ ଆମ୍ବେକେସେ କି ସବୁଲକ୍କେ ଏନ୍ତାରି କାତା ଦେକାଇ କଇଲାସ୍ତନି ?”

୪୨ ଜିସୁ କଇଲା, “ବିସ୍ବାସେ ରଇବା ଲକ୍ ଆରି ବୁଦିମାନ୍ ଲକ୍ କେ ଆଚଡ଼ ? ତାକେ ସେ ସାଉକାର୍ ଗର୍ ତାଲାଇବା ଦାଉଡ଼ ଦେଇସି । ସେ ସମାନ୍ ବେଲାଇ ବିନ୍ ଦାଙ୍ଗତାମନ୍ଦକେ କାଦି ଜାଗାଇ ଦେଇସି । ୪୩ ସାଉକାର୍ ଆସି, ତାର୍ ନିଜର୍

☆ ୧୨:୩୫ ୧୨:୩୫ ମାତିଉ ୨୫:୧-୧୩ ☆ ୧୨:୩୬ ୧୨:୩୬ ମାର୍କ ୧୩:୩୪-୩୬ ☆ ୧୨:୩୯ ୧୨:୩୯ ମାତିଉ ୨୪:୪୩,୪୪

ଦାଙ୍ଗଡ଼ା ଏନ୍ତାର କରବାଟା ଦେକସି ବଇଲେ ସେ କେତେ ନିକ କରମର୍ ଲକ୍ ।  
 ୪୪ ମୁଇ ତମ୍‌କେ ସଡ଼ କଇଲିନି, ସେ ତାକେ ନିଜର୍ ସବୁର୍ ଉପରେ ଅଦିକାର  
 ଦେଇସି । ୪୫ ଜଦି ସେ ଦାଙ୍ଗଡ଼ା, ମର୍ ସାଉକାର ଆଇବାଟା ଅଲ୍‌ସମ୍ ଅଇସି ବଲି  
 ମନେକରି, ମାତୁଆଲ୍ ଅଇ ବିନ୍ ଦାଙ୍ଗଡ଼ାମନ୍‌କେ ଲାଗମାର କରବାର ଆରାମ୍  
 କରସି, ୪୬ ସେନ୍ତାରୁଆଲେ ଜନ୍ ଦିନେ ସେ ଜାଗି ନ ରଏ, ଆରି ସେ କେତେବେଲେ  
 ଆଇବାଟା ଜାନି ନ ରଏ, ସେ ସାଉକାର ଆସି ତାକେ ବେସି ବଡ଼ ଡଣ୍ଟ ଦେଇସି । ଆରି  
 ବିସ୍‌ବାସ୍ ନ କରବା ଲକର୍ ସଙ୍ଗ୍ ମିସାଇ ଦେଇସି ।”

୪୭ “ଆରି ଜନ୍ ଦାଙ୍ଗଡ଼ା ନିଜର୍ ସାଉକାରର୍ ମନ୍ ଜାନିକରି ଜାଗରଡ଼ ନ ଅଇରଏ,  
 କି ସାଉକାରର୍ ମନ୍‌କଲ୍ ଇସାବେ ପାଇଟି ନ କରେ, ତାକେ କରତା ସଙ୍ଗ୍ ଅପର୍‌ବଲ୍  
 ମାଡ଼ ଅଇସି । ୪୮ ମାତର୍ ଜେ ତାର ମନ୍‌କଲ୍‌ଗା ନାଜାନିକରି, ଡଣ୍ଟମିଲ୍‌ବା କାମ୍  
 କରବାର ଦାରସି, ତାକେ ଅଲପ୍ ମାଡ଼ ଅଇସି । ଜନ୍ ଲକ୍‌କେ ଅଦିକ୍ ଦିଆଅଇରଇସି,  
 ତାକେ ଅଦିକ୍ ଦାବି କରାଅଇସି । ଆରି ଲକ୍‌ମନ୍ ତାକେ ଜାରଲଗେ ଅଦିକ୍ ସର୍ପି  
 ଦେଲାଅଇଆଟଡ଼, ଅଦିକ୍ ଅଦିକ୍ ଦାବି କରବାଇ ।”

**ଜିସୁର ଲାଗି ବାଗ୍ ବାଗ୍ ଅଇବାଟା**

୪୯ ଜିସୁ କଇଲା, “ମୁଇ ଏ ଦୁନିଆଇ ଜଇ ଲାଗାଇବାର୍ ଆଇଲିଆଟି । ସେଟା  
 ଜଦି ଲାଗିବାକେ ଆରାମ୍ ଅଇଲାନି, ସେନ୍ତାରୁଆଲେ ମୁଇ ମନ୍‌କଲ୍‌ଗା ପୁରାପୁରୁନ୍  
 ଅଇଗାଲାବେ । ୫୦ ମାତର୍ ମକେ ଆରି ଗଟେକ୍ ଡୁବନେ ଡୁବନ୍ ନେବାକେ ପଡ଼ସି,  
 ଆରି ସେଟା ନ ସାର୍‌ବାଜାକ, ମର୍ ମନ୍‌ବିଡ଼ରେ କେନ୍ତ୍ର କସ୍‌ଟ ଲାଗଲାନି । ୫୧ ଜଗତେ  
 ସାନ୍ତି ଦେବାକେ ଆସିଆଟେ ବଲି ତମେ କାଇ ମକେ ବାବ୍‌ଲାସ୍‌ନି କି ? ନାଇ ମୁଇ ସାନ୍ତି  
 ଆନ୍‌ବାକେ ନାଇ, ମାତର୍ ବିଚାର୍‌ନା କରବାକେ ଆସିଆଟି । ୫୨ ଏବେଅନି ଗଟେକ୍  
 ଗରେ ପାଁର୍ ଲକ୍ ରଇଲେ, ଦୁଇଲକର୍ ବିରୁଦେ ତିନିଲକ୍ ଆରି ତିନିଲକର୍ ବିଡ଼ରେ  
 ଦୁଇ ଲକ୍ ବାଗ୍ ଅଇବାଇ । ୫୩ ପଅର୍ ବିରୁଦେ ବାବା, ବାବାର ବିରୁଦେ ପଅ, ଜିଇର୍  
 ବିରୁଦେ ମା, ମାଆର୍ ବିରୁଦେ ଜିଇ, ରୁଆରିର୍ ବିରୁଦେ ସାଡ଼ରି, ସାଡ଼ରିର୍ ବିରୁଦେ  
 ବୁଆରି ବିନେ ଅଇବାଇ ।”

**ବେଲା ଦେକି ଜାନ୍‌ବାଟା  
 (ମାତିଉ ୧୨:୨-୩)**

୫୪ ଆରି ଜିସୁ ଲକ୍‌ମନ୍‌କେ କଇଲା, “ବୁଡ଼ି ଦିଗେ ବାଦଲ୍ ଗରୁବାଟା ଦେକଲେ,  
 ପାନି ଆଇସିବେ ବଲି କଇସା । ଆରି ସେନ୍ତାରି ସେ ଅଇସି । ୫୫ ଆରି ଦକ୍‌ଶିଦିଗ୍  
 ବାଟେଅନି ପବନ୍ ମାର୍‌ବାଟା ଜାନ୍‌ଲେ କାରା ଅଇସି ବଲି କଇସା । ଆରି ସେଟା  
 ସେନ୍ତାରି ଅଇସି । ୫୬ ଏ କୁଟିଆଲ୍‌ମନ୍, ତମେ ଜଗତର୍ ଆରି ସରଗର୍ କାତା ଜାନି  
 ପାଗ୍ କେନ୍ତ୍ର ଅଇସି ବଲି ଆଗତୁ କଇଲାସ୍‌ନି, ମାତର୍ ଏବେ କାଇଟା ଗଟସି, ସେଟା  
 କାଇକେ ନାଜାନ୍‌ଲାସ୍‌ନି ?”

**ସଡ଼ରୁ ସଙ୍ଗ୍ ମିସ୍‌ବାଟା  
 (ମାତିଉ ୫:୨୫-୨୬)**

୫୭ “ଆରି ନିଜେ ନିଜେ କାଇକେ ଟିକ୍ ବିଚାର୍ କରାସ୍ ନାଇ ? ୫୮ ଜଦି ତମ୍‌ର୍  
 ବିରଦିସଙ୍ଗ୍ ବିଚାରକାରିଆର୍‌ଲଗେ ଗାଲାସ୍‌ନି, ମଜାବାଟେ ତାର୍‌ସଙ୍ଗ୍ ବୁଜାମାନା  
 ଅଇବାକେ ଚେସ୍‌ଟା କରା । ନଇଲେ କେତେବେଲେ ସେ ତମ୍‌କେ ବିଚାରକାରିଆର୍  
 ଗାନେ ଜିକିନେଇସି, ବିଚାରକାରିଆ ସନିଅମନର୍ ଆତେ ସର୍ପିଦେଇସି, ସନିଅମନ୍  
 ତମ୍‌କେ ବନ୍ଦି ଗରେ ନେଇ ପୁରାଇଦେବାଇ ।” ୫୯ ମୁଇ ତମ୍‌କେ କଇଲିନି,

☆ ୧୨:୫୦ ୧୨:୫୦ ମାର୍‌କ ୧୦:୩୮

“କେନ୍ଦ୍ରିକଲେ ମିସା ସବୁ ତାକୁ ନ ସୁଜ୍‌ବାଜାକ ସେ ଜାଗାଇଅନି ବାରଇ ଆସିନାପାରାସ୍ ।”

### ୧୩

ନିଜର ପାପକାମେଅନି ବାଉଡ଼ା, ନଇଲେ ମର୍ସା

୯ ଗାଲିଲିଅନି କେତେ ଲକ୍ ଆସି ପାର୍ତନା ଗରେ ବଲି ଦେଇତେରଇଲାବେଳେ ପିଲାଡ଼ ତାର ସଇନମନ୍‌କେ ପାଟାଇ ଗାଲିଲିଅ ମନ୍‌କେ ମରାଇଲା । ତେଇ ମଲାଲକର ବନି ପୁଜ୍‌ଲା ପସୁର୍ ବନି ସଙ୍ଗ୍ ମିସ୍‌ଲା । ଏ ବିସଇ କେତେଲକ୍ ଆସି ଜିସୁକେ ଜାନାଇଲା । ୧୦ ତେଇ ଜିସୁ ସେମନ୍‌କେ କଇଲା, “ଏ ସବୁ କସ୍‌ଟ ପାଇବାକେ, ଏ ଗାଲିଲିୟମନ୍ ବିନ୍ ସବୁ ଗାଲିଲିୟମନ୍‌ର ଟାନେଅନି ଅଦିକ୍ ପାପ କଲାଇ ଆଟଡ଼ ବଲି ବାଦ୍‌ଲାସ୍‌ନି କି ? ୧୧ ମୁଇ ତମକେ କଇଲିନି, ଜେତେବେଳେ ଜାକ ପାପେଅନି ମନ୍ ନ ବାଦ୍‌ଲାଆସ୍, ତମେ ସବୁ ଲକ୍ ସେନ୍ତାରି କୁରୁପ୍‌ନାସ୍ ଅଇଜାଇସା । ୧୨ ନଇଲେ ସିଲଅତେଇ ରଇଲା ଜନ୍ ଅଟ୍‌ର ଲକର ଉପରେ ବଡ଼ ଗର୍ ଅଦ୍‌ରି ମରିଜାଇ ରଇଲା, ସେମନ୍ ତେବେ ? ତମେ ସେମନ୍‌କେ ଜିରୁସାଲୀମର୍ ବିନ୍ ଲକ୍‌ମନ୍‌ର ଟାନେଅନି ଅଦିକ୍ ପାପ କଲାଇ ଆଟଡ଼ ବଲି ବାଦ୍‌ଲାସ୍‌ନି କି ? ୧୩ ନାଇ, ମୁଇ ତମକେ କଇଲିନି, ପାପେଅନି ମନ୍ ନ ବାଦ୍‌ଲାଇଲେ ତମେସବୁ ଲକ୍ ସେନ୍ତା କୁରୁପ୍‌ନାସ୍ ଅଇଜାଇସା ।”

ପଲ୍ ନ ପଲ୍‌ବା ତୁମ୍‌ରି ଗଟର୍ କାତା

୧୪ ଆରି ଜିସୁ ଏ କାତାନି କଇଲା, ଗଟେକ୍ ଲକର ଅଙ୍ଗୁର୍ ବାତେ ଗଟେକ୍ ତୁମ୍‌ରି ଗର୍ ରପିରଇଲା । ସେ ସାଉକାର୍ ଆସି ତେଇ ପଲ୍ କଜ୍‌ଲା, ମାତର୍ ମିଲେନାଇ । ୧୫ ସେଟାର୍‌ପାଇ ସାଉକାର୍ ଅଙ୍ଗୁର୍ ବାତର୍ ଜାଗୁଆଲ୍‌କେ କଇଲା, “ଦେକା, ଏଟା ତିନ୍ ବରସ୍ ଅଇଲା ମୁଇ ଆସି ଏ ତୁମ୍‌ରି ଗଟେ ପଲ୍ କଜ୍‌ଲିନି ମାତର୍ ମିଲାଇ ନାଇ, ଏଟା କାଟି ପାକା । ଏଟା କାଇକେ ବେକାର୍ ମାଟିକେ ମିସା କାରାପ୍ କର୍‌ସି ?” ୧୬ ମାତର୍ ଜାଗୁଆଲ୍ ସାଉକାର୍‌କେ କଇଲା, “ସାଉକାର୍ ଏଟାକେ ବର୍‌ସେକ୍ ମିସା ଚାଡ଼ିଦେଉ, ମୁଇ ଏ ବିଡ଼ରେ ଗଟର୍ ଚାରିବେଡ଼ି କୁନିକରି କଡ଼ ଦେବି, ୧୭ ତାର୍ ପଟେ ଜଦି ପଲ୍ ଦାର୍‌ଲେତା ନିକ, ନଇଲେ ତାକେ କାଟି ପାକାଉଁ ।”

ଜିସୁ ବିସ୍‌ରାମ୍‌ବାରେ ଗଟେକ୍ କୁବ୍‌ତି ମାଇଜିକେ ନିକ କଲା

୧୮ ତରେକ୍ ଜିସୁ ବିସ୍‌ରାମ୍‌ବାରେ ଗଟେକ୍ ପାର୍ତନା ଗରେ ସିକିଆ ଦେଇତେରଇଲା । ୧୯ ତେଇ ଗଟେକ୍ ମାଇଜି ରଇଲା । ତାକେ ତୁମ୍‌ ଦାରି ଅଟ୍‌ର ବରସ୍ ଜାକ କୁବ୍‌ତି ଅଇରଇଲା । ସେ ବିଲ୍‌କୁଲ୍ ସିଦା ଅଇ ଇଣ୍ଡି ନାପାର୍‌ତେ ରଇଲା । ୨୦ ଜିସୁ ତାକେ ଦେକି ଲଗେ ଡାକି କଇଲା, “ଏ ନିନି ତକେ ମୁଇ, ଏ କୁବ୍‌ତି ରଗେଅନି ନିକ କଲିନି ।” ୨୧ ଜିସୁ ସେ ମାଇଜିର୍ ଉପରେ ଆଡ଼ ସଙ୍ଗ୍‌ଇଲା । ସେ ମାଇଜି ସେ ଦାପ୍‌ରେସେ ସଲକ୍ ଅଇ ପର୍‌ମେସର୍‌କେ ମଇମା କର୍‌ବାର୍ ଲାଗଲା । ୨୨ ଜିସୁ ବିସ୍‌ରାମ୍‌ଦିନେ ସେ ମାଇଜିକେ ନିକ କଲାଟା ଦେକି ଜିଉଦିମନ୍‌ର ପାର୍ତନା ଗରର୍ ମୁକିଆ ବେସି ରିସା ଅଇଗାଲା । କାଇକେ ବଇଲେ ଲକ୍‌ମନ୍‌କେ ନିକ କର୍‌ବାଟା ଗଟେକ୍ କାମ୍ ବଲି ଜିଉଦି ଲକ୍‌ମନ୍ ବାବ୍‌ତେ ରଇଲା । ସେଟାର୍ ପାଇ ପାର୍ତନା ଗରର୍ ମୁକିଅ କଇଲା, “ଗଟେକ୍ ଆଟେ କାମ୍ କର୍‌ବାକେ ଚଅ ଦିନ୍ ଆଟେ, ସେ ଦିନ୍ ମନ୍‌କେ ତମେ ନିକ ଅଇବାକେ ଆସା । ମାତର୍ ବିସ୍‌ରାମ୍‌ବାରେ ନିକ ଅଇବାକେ କେବେ ମିସା ଆସାନାଇ ।”

୨୩ ମାତର୍ ଜିସୁ ତାକେ ଆରି ତେଇ ରଇଲା ଲକ୍‌ମନ୍‌କେ କଇଲା, “ଏ କୁଟିଆଲ୍‌ମନ୍ ! ତମେ ତମର୍ ଗରୁମନ୍‌କେ ମେଲି ପାନି କୁଆଇବାକେ ନିଆସ୍ ନାଇ କି ? ସେଟା ମିସା ଗଟେକ୍ କାମ୍‌ସେ ।”

୧୭ “ମୁଁ ତାକେ ନିକ କଲି ଆଚି । ଏ ମାଉଜି ଅବରାଆମର୍ କୁହୁମର୍ ଲକ୍ । ସଇତାନ୍ ତାକେ ଅର୍ବର ବରସ୍ ଜାକ ଦାରି ରଇଲା । ସେ ମାଉଜି ବିସ୍‌ରାମ୍ ବାରେ ନିକ ଅଇବାଟା ଟିକ୍ ନଏଁ କି ?” ୧୭ ଜିସୁ କଇଲା କାତା ସୁନି ତାର୍ ବିରଦି ଲକ୍‌ମନ୍ ଲାଜ୍ ଅଇଲା । ମାତର୍ ବିନ୍ ଲକ୍‌ମନ୍ ସେ କର୍‌ବା ସବୁ କାବାଅଇଜିବା କାମ୍ ଦେକି ସାର୍‌ଦା ଅଇଗାଲା ।

ସର୍‌ସୁ ମୁଞ୍ଜିର ଉଦାଅରନ୍

(ମାତିଉ ୧୩:୩୧-୩୨; ମାର୍‌କ ୪:୩୦-୩୨)

୧୮ ତାର୍ ପଟେ ଜିସୁ କଇଲା, “ପର୍‌ମେସରର୍ ରାଇଜ୍ କେନ୍ତାଟା, ଆରି ମୁଇ କାଇଟା ସଙ୍ଗ୍ ସେଟା ସମାନ୍ କର୍‌ବି ?” ୧୯ ପର୍‌ମେସରର୍ ରାଇଜ୍ ଗଟେକ୍ ବଡ଼ ବର୍ ଗଟର୍ ସାନ୍‌ଟା ମୁଞ୍ଜି ପାରା । ଗଟେକ୍ ଲକ୍ ଗଟେକ୍ ସାନ୍‌ଟା ମୁଞ୍ଜି ରପିଦେଲା । ସେ ମୁଞ୍ଜି ତେଇ ଗାଜା ଅଇ ବଡ଼ ଗର୍‌ପାରା ଅଇଲା ଆରି ଚତଇମନ୍ ଆସି ତାର୍ କେନ୍ଦାଇ ଗୁଡା ବାନ୍‌ଲା ।”

କମିରର୍ ଉଦାଅରନ୍

(ମାତିଉ ୧୩:୩୩)

୨୦ ଜିସୁ ଆରି କଇଲା, “ପର୍‌ମେସରର୍ ରାଇଜ୍ କେନ୍ତାଟା ଆରି କାଇଟା ସଙ୍ଗ୍ ସମାନ୍ କରିଅଇସି ?” ୨୧ ସେଟା କମିର୍ ପାରା । ଜନ୍‌ଟା କି ଗଟେକ୍ ମାଉଜି ମାନେକ୍ ଗୁଣ୍ଟାଟାନେ କଣ୍ଡେକ୍ କମିର୍ ପାକାଇ ଚକଟ୍‌ଲା ଆରି ସାରାସାରି ସେ କମିର୍, ଗୁଲାଇ ଗୁଣ୍ଟା ଆମର୍ କରିଦେଲା ।

ଟିପୁଞ୍ଜି ବାଟେ ଜିବା ବିସଇ

(ମାତିଉ ୭:୧୩-୧୪; ୨୧:୨୩)

୨୨ ତାର୍ ପଟେ ଜିସୁ ତାର୍ ସିସ୍‌ମନ୍‌ର୍ ସଙ୍ଗ୍ ଜିରୁସାଲମେ ଗାଲାବେଲେ ଗାଉଁମନ୍‌କେ ଆରି ଗଡ଼ମନ୍‌କେ ପର୍‌ମେସରର୍ ରାଇଜର୍ ବିସଇ ସିକାଇ ଦେଲା । ୨୩ ସେବେଲେ ଲକ୍‌ମନ୍‌ର୍ ବିଡ଼ରେଅନି ଗଟେକ୍ ଲକ୍ ଜିସୁକେ କଇଲା, “ଏ ମାପୁରୁ, ଉନା ଲକ୍‌ମନ୍‌ସେ ପାପେ ଅନି ରକିଆ ପାଇବାଇ କି ?”

ଜିସୁ ସେମନ୍‌କେ କଇଲା, ୨୪ “ଟିପୁଞ୍ଜି ଦୁଆର୍ ବାଟେ ପୁର୍‌ବାକେ ଚେସ୍‌ଟା କରା । କାଇକେ ବଇଲେ ବେସି ଲକ୍‌ମନ୍ ସେ ଟିପୁଞ୍ଜିବାଟ୍‌ଦେଇ ଜିବାକେ ଚେସ୍‌ଟା କର୍‌ବାଇ ମାତର୍ ଜାଇ ନାପାର୍‌ଡ଼ । ୨୫ ମୁଇ ଗଟେକ୍ ଗରର୍ ସାଉକାର୍ ପାରା । ଜେଡେବଲ୍ ସେ ସାଉକାର୍ କାପାଟ୍ ଡାବି ଦେଇସି । ସେଡ଼କି ବେଲେ ତମେ ଦୁଆରେ ଟିଆ ଅଇ ରଇସା ଆରି କାପାଟ୍ ଡକ୍ ଡକ୍ କରି ଏ ମାପୁରୁ ଆମର୍ ପାଇ କାପାଟ୍ ଉଗାଡା ! ବଲି ଜୁଆର୍ ବିଆର୍ କର୍‌ସା । ମାତର୍ ସେ କାପାଟ୍ ନ ଉଗାଡି ସେମନ୍‌କେ କଇସି, ‘ତମେ କନ୍‌ଡିଅନି ?’ ମୁଇ ତମ୍‌କେ ମୁଲ୍‌କେ ନାଜାନି । ୨୬ ମାତର୍ ତମେ କଇସା ‘ଏ ମାପୁରୁ ଆମେ ତମର୍ ସଙ୍ଗ୍ କାଇପିଇ ଅଇରଇଲୁ, ତୁଇ ଆମର୍ ଦୁଆର୍ ମନ୍‌କେ ସିକିଆ ଦେଇଡେରଇଲୁସ୍ ବଲି କଇସା’ ୨୭ ଆରି ସେ ତମ୍‌କେ କଇସି, ତମେ କନ୍‌ ଜାଗାର୍ ଲକ୍‌ମନ୍ ମୁଇ ତମ୍‌କେ ମୁଲ୍‌କେ ନାଜାନି, ଏ କରାପ୍ କାମ୍ କର୍‌ବା ଲକ୍‌ମନ୍, ‘ତମେ ସବୁ ମର୍ ମୁଆଟେ ଅନି ଉଟି ଜା ।’ ୨୮ ☆☆ଆରି ସେ ତମ୍‌କେ ପାଟାଇଦେବା ଜାଗାଇଅନି ଅବରାଆମ୍ ଇସାକ୍, ଜାକୁବ୍, ଆରି ପର୍‌ମେସରର୍ ଟାନେଅନି ଆସି ରଇଲା ବବିସଡ଼ ବକ୍‌ତାମନ୍ ରଇବାଟା ଦେକ୍‌ସା । ମାତର୍ ପର୍‌ମେସର୍ ତାର୍ ରାଇଜେ ତମ୍‌କେ ଜାଗା ନ ଦେଏ । ଜେଡେବଲ୍ ଏଟା ଅଇସି, ସେ ବେଲା ସେଟା ଦେକି, ତମେ କାଇକାଇ କାରାପ୍ କାମ୍‌ମନ୍ କରି ରଇଲାସ୍ ସେଟା ସବୁ ଏତାଇ କରି ମାରିଚପିଅଇ କାନ୍‌ସା ଆରି



ଦାତ୍ ମୁଣ୍ଡ କାତୁରି ଅଇସା । ୨୯ ଆରି ଜିଉଦି ନଇଲା ଲକ୍ମନ୍ ଏ ଦୁନିଆର ସବୁ କନ୍ଦିବିକନ୍ଦି ଅନି ଆସି ପରମେସରର୍ ରାଇଜେ କାଇବାକେ ବସ୍‌ବାଇ । ୩୦ \*ଆରି ଦେକା, ସାରାସାରି ରଇଲା ଲକ୍ ଆଗତ୍ ଅଇବାଇ ଆରି ଆଗତ୍ ରଇବା ଲକ୍ମନ୍ ପଟେ ଅଇଜିବାଇ ।”

ଜିସୁ ଜିରୁସାଲମ୍‌କେ ଦେକିକରି କାନ୍ଦଲାଇ  
(ମାତିଉ ୨୩:୩୭-୩୯)

୩୧ ସେତ୍‌କିବେଲେ କେତେଟା ପାରୁସି ଲକ୍ମନ୍ ଜିସୁର୍ ଲଗେ ଆସି କଇଲାଇ, “ତମେ ଏ ଜାଗା ଚାଡ଼ି ଉଟି ଜା, କାଇକେ ବଇଲେ ଏରଦ୍ ତମ୍‌କେ ମରାଇବାକେ ମନ୍ କଲାନି ।”

୩୨ ଜିସୁ ସେମନ୍‌କେ କଇଲା, “ତମେ ଜାଇ ସେ କଲିଆପାରା ଲକ୍‌କେ କୁଆ, ଦେକ୍ ଆଜି ଆରି କାଲି ମୁଇ ତୁମା ଚାଡ଼ାଇଲିନି ଆରି ନିକ କଲିନି । ଆରି ପର୍ଦିନ୍‌କେ ମୁଇ ମର୍ କାବା ଅଇଜିବା କାମ୍‌କଲିନି । ପର୍ମେସରର୍ ଜଜ୍‌ନାଇ ରଇଲା ବେଲା କେଟ୍‌ବା ଆଗତ୍, ମୁଇ ଏକ୍ତି କାମ୍ କରି ସାରାଇବି । ୩୩ କାଇଟା ମିସା ଅ, ମୁଇ ଆଜି, କାଲିକେ ଆରି ପର୍ଦିନ୍‌କେ ଜାଇତେ ରଇବାର୍ ଆଟେ, କାଇକେ ବଇଲେ ପର୍ମେସରର୍ ଟାନେଅନି ଆଇଲା ସବୁ ବବିସତ୍‌ବକ୍‌ତାମନ୍‌କେ ଜିରୁସାଲମ୍‌କେସେ ମରାଇଆତ୍ ।”

୩୪ ଜିସୁ କଇଲା, “ଏ ଜିରୁସାଲମ୍‌ମର୍ ଲକ୍ମନ୍ ! ପର୍ମେସର୍ ତମ୍‌ଟାନେ ଜେତ୍‌କି ପାଟାଇରଇଲା ବବିସତ୍‌ବକ୍‌ତାମନ୍‌କେ ମାରି ମରାଇଲାସ୍ ! ଆରି ପେରିତ୍‌ମନ୍‌କେ ତରକେ ତର୍ ପାକ୍‌ନା ମାରି ମରାଇଲାସ୍ । ତେବେ ତମ୍‌ପାଇ ମର୍ ଲଗେ ଗଟେକ୍ କାତା ଆଟେ । ମାଇ କୁକୁଡ଼ା ଜେକ୍ତି ତାର୍ ଚିଅଁମନ୍‌କେ ଡେନା ତଲେ ରୁଣ୍ଡାଇସି, ମୁଇ ସେକ୍ତି କେତେ ତର୍ ତମ୍‌କେ ରକିଆ କର୍‌ବାକେ ମନ୍ କଲି । ମାତର୍ ସେକ୍ତି କର୍‌ବାକେ ତମେ ନ ଦିଆସ୍ । ୩୫ ଦେକା, ତମ୍ ମଫିର୍ ଚାଡ଼ିଦେଇ ଆତ୍ । ସେଟାର୍ ପାଇ ପର୍ମେସର୍ ଏବେ ତମ୍‌କେ ‘ପାର୍‌ତନା ଗର୍ ଆରି ତମ୍ ଗଡ଼ ନିଜେ ରକିଆ କରା’ ବଲି ଚାଡ଼ି ଦେଲାଆଟେ । ମୁଇ ତମ୍‌କେ କଇଲିନି, ପର୍ମେସର୍ ଜନ୍ ଲକ୍‌କେ ଆସିର୍‌ବାଦ୍ କରି ଆମର୍ ଲଗେ ପାଟାଇଲାଆଟେ ବଲି ମର୍ ବିସଇ ନେଇ, ତମେ ନ କଇବାଜାକ ମକେ ଦେକିନାପାରାସ୍ ।”

## ୧୪

ଜିସୁ ଗଟେକ୍ ରଗିକେ ନିକକଲା

୧ ତରେକ୍ ଜିସୁ ବିସରାମ୍‌ବାରେ ବଜି କାଇବାକେ ଗଟେକ୍ ପାରୁସି ନେତାର୍ ଗରେ ଗାଲା । ଆରି ସେମନ୍ ଜିସୁକେ କାଇଆଲେ ବୁଲ୍ ଦାର୍‌ବାକେ ଆଁକିମରାଇ ଦେକ୍‌ତେ ରଇଲାଇ । ୨ ତେଇ ଜିସୁ ତାର୍ ମୁଆଟେ ଗଟେକ୍ ପୁଲାର୍ ଅଇରଇଲା ଲକ୍‌କେ ଦେକ୍‌ଲା । ୩ ତାର୍ ପଟେ ଜିସୁ ସେ ପାରୁସି ଆରି ମସାର୍ ନିୟମ୍ ସିକାଇଦେବା ଲକ୍‌ମନ୍‌କେ ପାଟାରୁଲା । “ମସାର୍ ନିୟମ୍ ଇସାବେ ବିସରାମ୍‌ବାରେ ଗଟେକ୍ ରଗ୍ ଅଇଲା ଲକ୍‌କେ ନିକ କର୍‌ବା ବିଦି ଆଟେ କି ନାଇ ?”

୪ ମାତର୍ ସେମନ୍ କାଇଟାବଲି ମିସା ନ କଇ ତୁପ୍‌ପା ଅଇ ରଇଲାଇ । ସେଟାର୍ ପାଇ ଜିସୁ ସେ ରଗିକେ ଚିଇଲା ଆରି ନିକ କରି ପାଟାଇ ଦେଲା । ୫ \*ତାର୍ ପଟେ ଜିସୁ ସେମନ୍‌କେ ପାଟାରୁଲା, “ ବିସରାମ୍‌ବାରେ ତମ୍ ବିଡ଼ରେଅନି ଗଟେକ୍ କାର୍‌ଆଲେ ନିଜର୍ ପିଲା ନଇଲେ ଗଟେକ୍ ଗରୁ କୁଇସାଲେ ଅଦ୍‌ରି ରଇଲେ ତାକେ ଦାପ୍‌ରେ ଜିକି ନ ଆନାସ୍ କି ?” ୬ ଏତର୍ ମିସା ସେମନ୍ ଏ କାତାର୍ ଉତର୍ ଦେଇ ନାପାରୁଲାଇ ।

ସତ୍‌ଦରମ୍ ରଇ ସେବାକର୍‌ବାର୍

୭ ଆରି ତେଇ କାଇବାର୍ ଆସି ରଇଲା ଲକ୍ମନ୍ ନିଜର୍ ନିଜର୍ ପାଇ ମୁକିଅ ଜାଗା ବାଟି ରଇଲା । ସେଟା ଜିସୁ ଦେକି କରି ସେମନ୍‌କେ ଏ ଉଦାଅରନ୍ ଦେଇ କଇଲା, “ଜେତେବେଲା ତମ୍‌କେ କାର୍‌ଆଲେ ବିବାଗରେ ଜିବାକେ ଡାକ୍‌ବାଇ, ସେବେଲା ମୁକିଅ ଲକ୍ମନ୍ ବସବା ଜାଗାଇ ଜାଇ ବସାନାଇ । କାଇକେ ବଇଲେ ସେମନ୍ ତମ୍‌ରେତେଇଅନି ବଡ଼ ଲକ୍‌କେ ମିସା ବିବାଗାନେ ଜିବାକେ ଡାକି ରଇବାଇ । ୯ କେ ତମ୍‌କେ ଆରି ବଡ଼ ଲକ୍‌କେ ଡାକ୍‌ଲା ଆରେ ସେ ଆସିକରି ତମ୍‌କେ କଇସି, ‘ଆକେ ଏ ନିକ ଜାଗା ଦେସ୍’ ବଲି । ତେଇ ତମେ ଉଟି ମୁକିଅ ନଇଲା ଜାଗାଇ ଜାଇ ବସ୍‌ବାର୍ ଆରେ । ସେବେଲା ତମ୍‌କେ ବେସି ଲାଜ୍ ଲାଗ୍‌ସି । ୧୦ ମାତର୍ ଜେତେବଲ୍ ତମ୍‌କେ ଡାକ୍‌ବାଇ, ସେଡ଼କିବେଲେ ତମେ ଜାଇ ମୁକିଅ ନଇଲା ଜାଗାଇ ବସା । ସେବେଲା ତକେ ଡାକ୍‌ଲା ଲକ୍ ଆସି କଇସି, ‘ଏ ମଇତର୍ ତୁଇ କାଇକେ ଇତି ବସିଆତୁସ୍ ? ଆଉ ଏ ନିମାନ୍ ଜାଗାଇ ବସ୍’ । ସେବେଲା ତମର୍ ସଙ୍ଗ୍ ବସ୍‌ଲା ସବୁ ଲକ୍‌ମନ୍‌ର ମୁଆଟେଅନି ଡାକିନେଇ ନିକ ଜାଗାଇ ବସାଇ ଦେଇସି । ଆରି ସବୁ ଲକ୍‌ର୍ ମୁଆଟେ ତମେ ସନ୍‌ମାନ୍ ପାଇସା । ୧୧ \*କେ ନିଜ୍‌କେ ବଡ଼ ଲକ୍ ବଲି ବାବ୍‌ଲାନି ତାକେ ପର୍‌ମେସର୍ ସାନ୍ କରାଇସି । ଆରି କେ ନିଜ୍‌କେ ସାନ୍ ଲକ୍ ବଲି ବାବ୍‌ସି ତାକେ ପର୍‌ମେସର୍ ବଡ଼ କରାଇସି ।” ବଲି କଇଲା ।

୧୨ ତାର୍‌ପଟେ ଜିସୁ ବଜିତେଇ ଡାକ୍‌ଲା ଲକ୍‌କେ କଇଲା, “ତୁଇ ଲକ୍‌ମନ୍‌କେ ବଜିତେଇ ଡାକ୍‌ବା ବେଲାଇ ତର୍ ମଇତର୍‌ମନ୍‌କେ, ବାଇମନ୍‌କେ, ନିଜର୍ ଲକ୍‌ମନ୍‌କେ ଆରି ସାଉକାର୍ ଲକ୍‌ମନ୍‌କେ ଡାକ୍ ନାଇ । କାଇକେବଇଲେ ସେମନ୍ କେତେବଲ୍ ମିସା ତକେ ଡାକିକରି ତୁଇ ଦେଲାପାରା ବଜି ବାଉଡାଇ ଦେଇପାରତ୍ । ୧୩ ତେବେ ତୁଇ ବଜି କଲେ ଗରିବ୍, କାଣା, ଚଟା ଆରି ଚେରେଙ୍ଗ୍‌ରଗି ଏନ୍ତାରି ଲକ୍‌ମନ୍‌କେ ଡାକି ଦେସ୍ । ୧୪ ସେନ୍ତି କଲେ ପର୍‌ମେସର୍ ତକେ ଆସିର୍‌ବାଦ୍ କରସି । କାଇକେ ବଇଲେ ଏନ୍ତାରି ଲକ୍‌ମନ୍ ତୁଇ ଦେଲା ବଜି ବାଉଡାଇ ଦେଇ ନାପାରତ୍ । ପର୍‌ମେସର୍ ଦରମ୍ ଲକ୍‌ମନ୍‌କେ ମଲାଟାନେଅନି ଉଟାଇଲା ବେଲେ ତକେ ପୁରୁସ୍‌କାର୍ ମିଲସି ।”

ବଡ଼ ବଜିର୍ ଉଦାଅରନ୍  
(ମାତିଉ ୨୨:୧-୧୦)

୧୫ ଜିସୁ କଇଲା ବିସଇ ସୁନିକରି ତାର୍ ସଙ୍ଗ୍ ବଜିତେଇ କାଇବାକେ ବସି ରଇଲା ଲକ୍‌ମନ୍‌ର ବିଡ଼ରେଅନି ଗଟେକ୍ ଲକ୍ କଇଲା, “କେ କେ ପର୍‌ମେସର୍‌ର ରାଇଜେ ତାର୍ ସଙ୍ଗ୍ ବଜି କାଇବାକେ ବସ୍‌ବାଇ, ସେଟା ତାକର୍ ପାଇ ଗଟେକ୍ ବଡ଼ ଆସିର୍‌ବାଦ୍ ।”

୧୬ ଜିସୁ ସେ ଲକ୍‌କେ କଇଲା, “ତରେକ୍ ଗଟେକ୍ ଲକ୍ ବେସି ବଡ଼ ବଜି କଲା ।” ସେ ବଜିତେଇ ବେସି ଗତିଆମନ୍‌କେ ଡାକି ରଇଲା । ୧୭ ଆରି ରାନ୍‌ବାଟା ଟିକ୍ ଅଇଲା ପଟେ ସାଉକାର୍ ତାର୍ ଗତିଦାଙ୍ଗ୍‌ତାକେ ଡାକି କଇଲା, “ମୁଇ ବଜିର୍ ପାଇ ଡାକ୍‌ଲା ଲକ୍‌କେ ଜାଇ କଅ, କାଇବାଟା ଅଇଗାଲାବେ କାଇବାକେ ଆସତ୍ ।” ୧୮ ମାତର୍ ଲକ୍‌ମନ୍ ଗଟେକ୍ ରକାମ୍ କଇଲା, “ମକେ କାମ୍ ଆରେ, ନ ଆସୁ” ବଲି । ଗଟେକ୍ ଲକ୍ କଇଲା “ମୁଇ ନୁଆ ବେଡା ଗେନ୍‌ଲି ଆଟି ସେ ବେଡା ଦେକ୍‌ବାକେ ଜିବି । ଆସି ନାପାରି, ଦୟାକରି ତର୍ ସାଉକାର୍‌କେ ଅଲପ୍ କଇଦେସ୍ ।” ୧୯ ଆରି ଗଟେକ୍ ଲକ୍ କଇଲା, “ମୁଇ ପାଁର୍‌ମୁଣ୍ଟ୍ ଗରୁ ଗେନ୍‌ଲି ଆଟି, ଗରୁମନ୍‌କେ କସିକରି ଦେକ୍‌ବାକେ ଗାଲିନି । ଆସିନାପାରି ଦୟାକରି ତର୍ ସାଉକାର୍‌କେ ଅଲପ୍ କଇଦେସ୍ ।” ୨୦ ଆରି ଗଟେକ୍ ଲକ୍ କଇଲା, “ମୁଇ ନୁଆରେ ବିବା ଅଇଆଟି, ତେବେ ମୁଇ ଆସି ନାପାରି ।”

\* ୧୪:୧୧ ୧୪:୧୧ ମାତିଉ ୨୩:୧୨; ଲୁକ୍ ୧୮:୧୪

୨୧ ତାର୍ ପରେ ସେ ଗତିଦାଙ୍ଗତା ଆସି ସାଉକାର୍‌କେ ଏ ସବୁ କାତା ଜାନାଇଲା । ସେଟା ସୁନି ସାଉକାର୍ ବେସି ରିସାଅଇଜାଇ ତାକେ କଇଲା, “ଦାପ୍‌ରେ ଜାଇକରି ନଅରେ ଆରି ଗାଉଁ ମନ୍‌କେ ରଇଲା ଗରିବ୍, କାଣା, ଚଟା, ବଇରା ଆରି ଚେରେଙ୍ଗାରିମନ୍‌କେ ଇତି ତାକି ଆନ୍ ।” ୨୨ ସେ ଗତିଦାଙ୍ଗତା ଜାଇକରି ସାଉକାର୍ କଇଲାପାରା ଲକ୍‌ମନ୍‌କେ ଆନ୍‌ଲା । ତାର୍ ପରେ ଗତିଦାଙ୍ଗତା ତାର୍ ସାଉକାର୍‌କେ କଇଲା, “ଏ ସାଉକାର୍ ତୁଇ କଇଲା ଇସାବେ ମୁଇ ତାକିଆନ୍‌ଲି । ଏଲେ ମିସା ଆରି କେତେ ଲକ୍‌ର୍ ପାଇ ଜାଗା ଆଚେ ।” ୨୩ ଆରି ସାଉକାର୍ ସେ ଗତିଦାଙ୍ଗତାକେ କଇଲା, “ଗଡ୍‌ର୍ ସଡ୍‌କ୍ ପାଲି ରଇଲା ଲକ୍‌ମନ୍‌କେ ଆରି ଗାର୍‌ ରଇଲା ଗରିବ୍ ଲକ୍‌ମନ୍‌କେ ଜାଇକରି ତାକିଆନ୍ । ମର୍ ଗରେ ଲକ୍ ପୁରୁନ୍ ଅଅଡ୍ ବଲି ମୁଇ ମନ୍ କଲିନି ।” ୨୪ ତାର୍‌ପରେ ଜିସୁ କଇଲା, “ମୁଇ ଜନ୍ ଲକ୍‌ମନ୍‌କେ ପର୍‌ତୁମ୍ ତାକିରଇଲି, ସେମନ୍ କଣ୍ଟେକ୍ ମିସା ଚାକି ନାପାରଡ୍ ।”

ସିସ୍ ଅଇବାର୍ ମୁଲିଅ  
(ମାତିଉ ୧୦:୩୭-୩୮)

୨୫ ତରେକ୍ ବେସି ଲକ୍‌ମନ୍ ଜିସୁର୍ ସଙ୍ଗ୍ ଜାଇତେ ରଇଲାଇ । ଆରି ସେ ପର୍‌ବାଟେ ବୁଲିକରି ସେମନ୍‌କେ କଇଲା । ୨୬ \*ଜେ ମର୍ ଲଗେ ଆସିକରି ନିଜର୍ ବାବା, ମାଆ, ମାଇଜି ପିଲା, ବାଇ ବଇନି ଆରି ନିଜ୍‌କେ ମର୍‌ତେଇଅନି ଅଦିକ୍ ଆଲାଦ୍ କର୍‌ସି, ସେ ମର୍ ସିସ୍ ଅଇନାପାରେ । ୨୭ \*ଗଟେକ୍ ଲକ୍ ମର୍ ପରେ ପରେ ଇଣ୍ଟିବାର୍‌ଆଲେ, ତାକେ ଦିଆଅଇଲା କୁରୁସ୍ ବଇକରି ନ ଇଣ୍ଟେ ବଇଲେ, ସେ କେବେ ମର୍ ସିସ୍ ଅଇନାପାରେ । ୨୮ ତମେ ଜଦି ଗଟେକ୍ ବଡ୍ ଗର୍ ବାନ୍‌ବାକେ ମନ୍ କଲାସ୍‌ନି ବଇଲେ, ବାନ୍‌ବା ଆଗ୍‌ତୁ କେତେକ୍ କର୍‌ତ ଅଇସି ସେଟା ବସି କରି ଇସାବ୍ କର୍‌ସା । ଆରି ସେ ଗରର୍ ସବୁ କାମ୍ କରିସାରାଇବାକେ ତମର୍ ଲଗେ ସେଡ୍‌କି ତାରୁ ଆଚେକି ନାଇ ବଲି ଇସାବ୍ କରିଦେକ୍‌ସା । ୨୯ ତମେ ଜଦି ଇସାବ୍ କରି ନ ଦେକ୍‌ଲେ ଗର୍ କାମ୍ ଆରାମ୍ କରି ସାରାଇ ନାପାରାସ୍ । ସେ କାମ୍ କରି ନ ସାରାଇଲେ ତମ୍‌କେ ଦେକ୍‌ବା ଲକ୍‌ମନ୍ ଆସିକରି ଲାଜକରି ଦେବାଇ । ୩୦ ସେମନ୍ କଇବାଇ, ଏ ଲକ୍ ବଡ୍‌ଟା ଗର୍ ବାନ୍‌ବାର୍ ଆରାମ୍ କଲା, ମାତର୍ ସାରାଇବାର୍ ନାପାରଲା ।”

୩୧ ଆରି ଜିସୁ କଇଲା, “ଗଟେକ୍ ରାଜା ଦସ୍‌ଅଜାର୍ ସନିଅ ଦାରି, କତେଅଜାର୍ ସନିଅ ରଇଲା ରାଜାସଙ୍ଗ୍ ଜୁଇଦ୍ କର୍‌ବାର୍ ଆଇଲେ, ପର୍‌ତୁମ୍ ତାର୍ ସନିଅମନ୍ ସଙ୍ଗ୍ ବସିକରି ତାର୍ ଦସ୍‌ଅଜାର୍ ସନିଅମନ୍ ସଙ୍ଗ୍ ଜୁଇଦ୍ କଲେ ଜିତି ଅଇସି କି ନାଇ ବଲି ଜଜ୍‌ନା ନ କରେକି ? ୩୨ ଜଦି ସେ ରାଜା ଜିତି ନଏଁ ବଲି ବାବ୍‌ଲେ ସେମନ୍ ଦୁରିକେ ରଇଲା ବେଲେସେ, ଏ ରାଜା ତାର୍ କେତେଟା ଲକ୍‌କେ ପାଟାଇ କରି, ଜୁଇଦ୍ ନ କରି ସାନ୍ତ୍ରିର ରାଜିନାମା କର୍‌ବାକେ କଇସି । ୩୩ ତମେମିସା ସେନ୍ତାରିସେ ମର୍ ସିସ୍ ଅଇବାକେ ମନ୍ କଲେ ତମର୍‌ତେଇ ରଇଲା ସବୁଟା ଚାଡିଦେବାକେ ମନ୍ କର୍‌ବାର୍ ଆଚେ । ନଇଲେ ତମେ ମର୍ ସିସ୍ ଅଇ ନାପାରାସ୍ ।”

ତପ୍‌ରା ରଇବା ନୁନ୍  
(ମାତିଉ ୫:୩; ମାର୍କ ୯:୫୦)

୩୪ “ନୁନ୍ ଗଟେକ୍ ବଡିଆ ଦିନ୍‌ସୁ । ନୁନ୍ ଜଦି ନୁନ୍ ପାରା କରିଆ ନ ଅଇଲେ ସେଟା ଆରିତରେକ୍ କେନ୍ତ୍ର ନୁନ୍‌ପାରା କରିଅଇସି । ୩୫ ସେଟା ମାଟି କି କଡ୍ କର୍‌ବାକେ ମିସା କାମେ ନ ଆସେ । ସେଟା ପିଙ୍ଗି ଦେବାର୍‌ସେ ଅଇସି । ଜାକେ ସୁନ୍‌ଲାପାରା କାନ୍ ଆଚେ ସେ ସୁନ୍ ।”

\* ୧୪:୨୨ ୧୪:୨୭ ମାତିଉ ୧୦:୩୭    \* ୧୪:୨୭ ୧୪:୨୭ ମାତିଉ ୧୦:୩୮; ୧୭:୨୪; ମାର୍କ ୮:୩୪; ଲୁକ୍ ୯:୨୩

# ୧୫

## ଆଜ୍ଞା ମେଣ୍ଟା

(ମାତ୍ରି ୧୮:୧୨-୧୪)

୧ \*ଦିନେକ୍ ଜିସୁ କଇବା କାତା ସୁନ୍ଦାକେ ସିସୁତୁ ମାଙ୍ଗୁବା ଲକ୍ମନ ଆରି ଏନ୍ତି ବେସି ପାପିଲକ୍ମନ ତାର୍ ଲଗେ ଆଇତେ ରଇଲାଇ । ୨ ତେଇ ପାରୁସି ଲକ୍ମନ ଆରି ନିୟମ୍ ସିକାଇ ଦେବା ଲକ୍ମନ, ଏଟା ଦେକି ତାର୍ ବିରଦେ ଏନ୍ତି କଇବାର୍ ବସଲାଇ । “ଏ ଲକ୍ମକେ ଦେକା, ସେ ପାପି ଲକ୍ମନର୍ ସଙ୍ଗ୍ ମଇତର୍ ପାରା ଅଇ ତାକର୍ ସଙ୍ଗ୍ ମିସ୍ତେ କାଇଲାନି ।” ୩ ସେଟାର୍ ପାଇ ଜିସୁ ସେମନ୍ତେ ଏ ଉଦାଅରନ୍ କଇଲା ।

୪ “ଜଦି ତମର୍ ବିତ୍ତରେ ଗଟେକ୍ ଲକର୍ ସଏଟା ମେଣ୍ଟା ରଇସି ଆରି ସେ ବିତ୍ତରେଅନି ଗଟେକ୍ ଆଜିଜାଇସି ବଇଲେ ତମେ କାଇଟା କରସା ? ସେ ନବେ ନଅଟା ମେଣ୍ଟାମନ୍ତେ ଚାରତ୍ତବଲି ଚାଡିଦେଇ, ଆଜିଗାଲା ଗଟେକ୍ ମେଣ୍ଟା ମିଲ୍ବାଜାକ ନ କଜାସ୍ କି ? ୫ ଆରି ଜେତେବଲ୍ ସେ ମେଣ୍ଟା ମିଲାଇସି, ବେସି ସାର୍ଦା ଅଇ ମେଣ୍ଟାକେ କନ୍ଦେ ବଇକରି ଗରେ ଦାରିଆଇସା । ୬ ତମେ ଗରେ କେଟ୍ଲା ପତେ, ତମର୍ ମଇତର୍ମନ୍ତେ ଆରି ଗର୍ ଲଗର୍ ଲକ୍ମକେ ତାକିକରି ‘ମର ସଙ୍ଗ୍ ସାର୍ଦା କରା, କାଇକେବଇଲେ ମର୍ ଆଜିଗାଲା ମେଣ୍ଟା ମିଲ୍ଲା’ ବଲି କଇସା । ୭ ସେନ୍ତାରି ମୁଇ ତମକେ କଇଲିନି, ‘ଆମେ ପାପି ଲକ୍ମନ ନଉଁ’ ବଲି ବାବ୍ତେରଇବା ନବେ ନଅଟା ଦରମ୍ ଲକ୍ମନ ରଇଲେମିସା ଗଟେକ୍ ପାପି ଲକ୍ ନିଜେ ‘ମୁଇ ଗଟେକ୍ ପାପି’ ବଲି ଏତାଇସି । ପତେ ମନ୍ଦାଦଲାଇ କରି ପର୍ମେସରର୍ ଲଗେ ଆଇସି । ସେ ନବେ ନଅଟା ଦରମ୍ ଲକ୍ମନର୍ତେଇ ଅନି ଏ ଗଟେକ୍ ଲକର୍ ପାଇ ସର୍ଗେ ଅଦିକ୍ ସାର୍ଦା କର୍ବାଇ ।”

## ଆଜିରଲା ରୁପା ଟାଙ୍ଗା

୮ ଏ କାତା ସୁନାଇ ଦେବାକେ ଜିସୁ ଆରି ଗଟେକ୍ କାତାନି ସେମନ୍ତେ କଇଲା, “ଜଦି ଗଟେକ୍ ମାଇଜିର୍ ଦସ୍ଟା ରୁପାଟାଙ୍ଗା\* ରଇଲା । ତେଇଅନି ଗଟେକ୍ ଅଦ୍ଲି ଆଜିଗାଲେ ସେ କାଇଟା କରସି ? ସେ ବଡି ଲାଗାଇ ଗୁଲାଇ ଗର୍ ସେଟା ନ ମିଲ୍ବାଜାକ ବାତାନ୍ ତୁତାନ୍ କରି କଜସି । ୯ ଆରି ସେଟା ମିଲ୍ଲା ଦାପ୍ତରେ ତାର୍ ମଇତର୍ମନ୍ତେ ଆରି ଗର୍ ଲଗେ ରଇଲା ଲକ୍ମନକେ କଇସି ‘ତମେ ମର୍ସଙ୍ଗ୍ ସାର୍ଦା କରା, କାଇକେ ବଇଲେ ଆଜିଗାଲା ରୁପାଅଦ୍ଲି ତାରୁ ମକେ ମିଲ୍ଲା ଆଟେ’ । ୧୦ ମୁଇ ତମକେ କଇଲିନି, ସେନ୍ତିସେ ଗଟେକ୍ ପାପି ଲକ୍ ମାପ୍ତୁରତେଇ ମନ୍ଦାଦଲାଇସି ବଇଲେ, ପର୍ମେସରର୍ ଦୁତ୍ତମନ୍ ବେସି ସାର୍ଦା କର୍ବାଇ ।”

## ଆଜ୍ଞା ପିଲା

୧୧ ଏ କାତା ବୁଜାଇ ଦେବାକେ ଜିସୁ ସେମନ୍ତେ ଆରି ଗଟେକ୍ କାତାନି କଇଲା । ଗଟେକ୍ ଲକ୍ମକେ ଦୁଇଟା ପିଲାମନ୍ ରଇଲାଇ । ୧୨ ଦିନେକ୍ ସାନ୍ ପଅ ତାର୍ ବାବାକେ କଇଲା, “ଏ ବାବା ତର୍ ଦନ୍ ମର୍ବାଗେ ଜେଡ୍ କି ଅଇସି, ସେଟା ଏବେ ମକେ ଦେଇପାକା ।” ସେଟାର୍ ପାଇ ତାର୍ ବାବା ତାର୍ ଦନ୍ ଦୁଇବାଗ୍ କରି ତାର୍ ପିଲାମନ୍ତେ ଦେଲା । ୧୩ ଅଲପ୍ ଦିନ୍ ଗାଲା ପତେ ସାନ୍ ପିଲା ତାର୍ ବାଗର୍ ସବୁ ଦନ୍ ବିକିଦେଇ ମିଲ୍ଲା ତାରୁ ଚୁଲିଆଇ ଗଟେକ୍ ଦୁର୍ ଦେସେ ଉଟିଗାଲା । ଆରି ତାର୍ ସବୁ ତାରୁ ନିଜେ ମନ୍ଦକଲା ଇସାବେ କର୍ତ୍ତ କଲା । ୧୪ ତାର୍ଲଗେ ରଇଲା ସବୁ ତାରୁ ସାରାଇଦେଲା । ପତେ ସେ ଦେସର୍ ଗୁଲାଇ ବାଟେ ମର୍ଡି ଅଇଲା । ଆରି କାଇଟା ମିସା ଗେନି କାଇବାକେ ତାର୍ଲଗେ ତାରୁ ନ ରଇଲା । ୧୫ ତେବେ ସେ ଗତେ ଗଟେକ୍

\* ୧୫:୧ ୧୫:୧ ଲୁକ୍ ୫:୨୯, ୩୦ \* ୧୫:୮ ୧୫:୮ ଗଟେକ୍ ରୁପା ଟାଙ୍ଗା ବାମ୍, ଗଟେକ୍ ଦିନରୁଲି ତାରୁ ଏଡ୍ କି

ଲକର ଗରେ କୁଲି ମିଲ୍‌ସି କାଇକି ବଲି କାମ୍ କଇବାର୍ ଗାଲା । ସେ ଲକ୍ ତାକେ ଗୁସ୍‌ରି ଚାରାଇବା କାମ୍ ଦେଲା । ୧୭ ଆରି ତାକେ ବେସି ବୁକ୍ ଲାଗତେ ରଇଲା । ତାକେ ଗୁସ୍‌ରିମନର୍ କାଦି କାଇବାକେ ମନ୍‌ଲାଗଲା ମାତର୍ ସେ କାଦି ମିସା ଦେଅଡ୍ ନାଇ । ୧୮ ସେବେଲେ ତାକେ ଚେଡ୍‌ନା ଆଇଲାଜେ ସେ ମନେ ମନେ ଏନ୍ତି ବାବ୍‌ଲା । ମର୍ ବାବାର୍ ଗରେତା କାମ୍ କରବା ଗତିଦାଙ୍ଗ୍‌ତାମନର୍ କେତେ କାଦି ଉବ୍‌ରି ଗାଲାନ୍ତି । ମାତର୍ ମୁଇ ଇତି ବୁକେ ମରିଜିବିବେ । ୧୯ ସେଟାର୍‌ପାଇ ମୁଇ ଏ ଜାଗା ଚାଡ଼ିକରି ମର୍ ବାବାର୍ ଲଗେ ବାଉଡ଼ି ଜିବି । ଆରି ତାକେ କଇବି, “ଏ ବାବା ମୁଇ ପର୍‌ମେସର୍ ଆରି ତର୍ ବିରଦେ ପାପ୍ କରିଆଟି । ୧୯ ମୁଇ ଆରି ତର୍ ପିଲା ଅଇବାର୍ ଅଦିକାର୍ ନାଇ ଆରି ତର୍ ଗତିଦାଙ୍ଗ୍‌ତାମନର୍ ବିତ୍‌ରେ ଗଟେକ୍ ଗତିଦାଙ୍ଗ୍‌ତା ଅଇ ରଇବି” ବଲି କଇବି । ୨୦ ଆରି ସେ ଜାଗା ଚାଡ଼ି ବାବାର୍ ଲଗେ ଜିବାକେ ବାରଇଲା ।

ମାତର୍ ସେ ପିଲା ଦୁରିକେ ରଇଲାବେଲେ ବାବା ତାକେ ଦେକ୍‌ଲା । ତାକେ ଦେକି ବେସି କଲିକରମ୍ ଅଇ, ତାର୍ ଲଗେ ପାଲାଇ ଆସି ପାଟାଲିକରି ହୁମ୍‌ଲା । ୨୧ ସେ ପିଲା ତାର୍ ବାବାକେ କଇଲା, “ଏ ବାବା ମୁଇ ପର୍‌ମେସରର୍ ବିରଦେ ଆରି ତର୍ ବିରଦେ ପାପ୍ କଲିଆଟି ସେଟାର୍‌ପାଇ ତର୍ ପିଲା ଅଇବାର୍ ମର୍ ଅଦିକାର୍ ନାଇ ।” ୨୨ ମାତର୍ ତାର୍ ବାବା ନିଜର୍ ଗତିଦାଙ୍ଗ୍‌ତାମନ୍କେ କଇଲା, “ତମେ ବେଗି ଜାଇକରି ସବୁର୍‌ଟାମନେଅନି ନିମାନ୍ ଚକାପଟିଆ ତାକେ ପିନ୍ଦାଇଦିଆସ୍ । ଆରି ତାର୍ ଆଙ୍ଗଟି ମୁନ୍ଦି ପିନ୍ଦାଆ । ତାର୍ ଗତେ ପାଣ୍ଡୁଇ ପିନ୍ଦାଇଦିଆସ୍ ।” ୨୩ ଆରି ତାର୍ ଗତିଦାଙ୍ଗ୍‌ତାମନ୍କେ କଇଲା, “ଆମର୍‌ତେଇ ରଇଲା ସବୁର୍‌ଟାମନେଅନି ଗଟେକ୍ ଗାଗଡ୍ ରଇବା ପସୁ ଆନି ମାରା, ଆରି ଆମେ ସାର୍‌ଦା ଅଇକରି ବଜି କରୁ । ୨୪ କାଇକେ ବଇଲେ ମର୍ ପିଲା ମରିଜାଇରଇଲା, ଆରି ଏବେ ଜିବନ୍ ଅଇଲା ଆତେ । ସେ ଆଜିଜାଇ ରଇଲା ଏବେ ମିଲ୍‌ଲା ଆତେ ।” ସେଟାର୍‌ପାଇ ସେମନ୍ ବଜି କରବାର୍ ବସିଲାଇ ।

୨୫ ସେ ବେଲା ତାର୍ ବଡ୍ ପଅ ତାସ୍‌ପଦାଇ ରଇଲା । ସେ ବାଉଡ଼ି କରି ଗର୍ ଲଗେ ଆଇବା ବେଲାଇ ବାଜାବାଇଦ୍ କରି ନାଟ୍‌ଗିଡ୍ କରବାଟା ସୁନ୍‌ଲା । ୨୬ ସେ ଗଟେକ୍ ଗତିଦାଙ୍ଗ୍‌ତାକେ ଡାକିକରି ପାଟାର୍‌ଲା, “ଇତି କାଇଟା ଅଇଲାନ୍ତି ?” ୨୭ ଗତିଦାଙ୍ଗ୍‌ତା ତାକେ କଇଲା, “ତର୍ ବାଇ ଗରେ ବାଉଡ଼ି ଆଇଲା ଆତେ । ଆରି ତର୍ ବାବା, ତର୍ ବାଇ ଜର୍‌ଦୁକା ନ ଅଇ ଜିବନ୍‌ଅଇ ଆଇଲାକେ ଗଟେକ୍ ଗାଗଡ୍ ପସୁକେ ମାର୍‌ଲା ଆତେ ।”

୨୮ ଏ କାତା ସୁନି ବଡ୍ ପଅ ବେସି ରିସା ଅଇଗାଲା । ସେ ଗର୍ ବିତ୍‌ରେ ପୁରେ ମିସା ନାଇ । ମାତର୍ ତାର୍ ବାବା ବଡ୍ ପଅର୍ ଲଗେ ଜାଇ ଗରେ ଜିବାକେ ବୁଜାଇବାର୍ ଦାର୍‌ଲା । ୨୯ ମାତର୍ ବଡ୍ ପଅ ତାର୍ ବାବାକେ କଇଲା, “ଦେକ୍, ମୁଇ ଏତେକ୍ ବରସ୍ ଜାକ ଗଟେକ୍ ଗତିଦାଙ୍ଗ୍‌ତା ପାରା ତର୍ ସେବା କଲିନି ଆରି ତର୍ କାତା ମାନି କରି ରଇଲି । ତୁଇ ମକେ କାଇଟା ଦେଇଆରୁସ୍ ? ମର୍ ମଇତର୍‌ମନର୍ ସଙ୍ଗ୍ ବଜି କରା ବଲି ଗଟେକ୍ ସାନ୍‌ଟା ପସୁ ମିସା ଦେଉସ୍ ନାଇ । ୩୦ ମାତର୍ ତର୍ ଏ ସାନ୍ ପଅ ସବୁ ଦନ୍ ଦାରିଜାଇ ବେସିଆମନ୍କେ ଦେଇ ସାରାଇଦେଲା ଆରି ସେ ଗରେ ବାଉଡ଼ି ଆଇଲାକେ ତୁଇ ତାର୍ ପାଇ ଗଟେକ୍ ଗାଗଡ୍‌ଟା ପସୁକେ ମାର୍‌ଲୁସ୍ !” ୩୧ ସେବେଲେ ତାର୍ ବାବା ବଡ୍ ପଅକେ କଇଲା, “ଏ ନୁନା ତୁଇତା ସବୁ ବେଲା ମର୍ ସଙ୍ଗ୍ ରଇଲୁସ୍‌ନି ଆରି ମର୍ ଜେଡ୍‌କି ଦନ୍ ଆତେ ସେଟା ସବୁ ତର୍‌ଟାସେ । ୩୨ ମାତର୍ ତର୍ ବାଇ ମରିଜାଇରଇଲା । ଏବେ ସେ ଜିବନ୍ ଅଇଆତେ ସେ ଆଜିଜାଇରଇଲା ମାତର୍ ଏବେ ମିଲ୍‌ଲା ଆତେ । ସେଟାର୍‌ପାଇ ଆମେ ସାର୍‌ଦା କରବାର୍ ରଇଲା ।”



୧ ଜିସୁ ତାର ସିସ୍ତାମାନଙ୍କେ ଗଟେକ୍ କାତାନି ବୁଜାଇ କଇଲା । “ଗଟେକ୍ ସାଉକାର୍ ଲକ୍ ରଇଲା । ତାର ଦନ୍ ଇସାବ୍ କିତାବ୍ କରବାକେ ଗଟେକ୍ ମୁକିଅ ଗତିଦାଙ୍ଗ୍ତା ରଇଲା । ଆରି ସେ ସବୁ ଦନ୍ ଏନେତେନେ କରିଦେଲାନି ବଲି ଗଟେକ୍ ଲକ୍ ରତେଇ ଅନି ସାଉକାର୍ ସୁନ୍ଲା ।” ୯ ସେଟାର ପାଇ ସାଉକାର୍ ମୁକିଅ ଗତିଦାଙ୍ଗ୍ତାକେ ଡାକି କଇଲା, “ତୁଇ ଟିକ୍ ସଙ୍ଗ୍ ଇସାବ୍ ପତର୍ କରୁସ୍ ନାଇ ବଲି ମୁଇ ବେସି କାତା ସୁନ୍ଲିନି । ମର୍ ସବୁ ତାରୁର୍ ଇସାବ୍ ମକେ ଦେ । କାଇକେ ବଇଲେ ତୁଇ ଆରି ମର୍ ମୁକିଅ ଗତିଦାଙ୍ଗ୍ତାର୍ କାମେ ନ ରଉସ୍ ।” ୧୦ ସେବେଲା ସେ ମୁକିଅ ଗତିଦାଙ୍ଗ୍ତା ମନେ ମନେ ଏତାଇଲା । ଏବେ ମୁଇ କାଇଟା କରବି ? ମର୍ ସାଉକାର୍ କାମେ ଅନି ବାରକରିଦେବି ବଲି କଇଲା ଆତେ । ମାଟି ମାରବାକେ ମକେ ବପୁ ନାଇ ଆରି ବିକ୍ ମାଗ୍ବି ବଇଲେ ମିସା ଲାଜ୍ ଲାଗ୍ଲାନି । ୧୧ ମୁଇ କାଇଟା କରବାର୍ ଆତେ ବଲି ଜାନି ଆଟି । ମକେ ଏ କାମେ ଅନି ବାର୍ କରଦେଲା ପତେ କାଇଟା କଲେ ଲକ୍ ମନର୍ ଗଟେକ୍ ମକେ ଡାକି ନିକକରି ଦେକ୍ ବାଇ ବଲି ବାବ୍ଲା ।

୧୨ ତେବେ ସେ ମୁକିଅ ଗତିଦାଙ୍ଗ୍ତା ତାର୍ ସାଉକାର୍ ତେଇଅନି ଉଦାର୍ ନେଲା ସବୁ ଲକ୍ କେ ଡାକ୍ଲା । ପର୍ତୁମ୍ ଗଟେକ୍ ଲକ୍ କେ ଡାକି ପାଟାର୍ଲା, “ତୁଇ ମର୍ ସାଉକାର୍ କେ କେତେକ୍ ଦେବାର୍ ଆତେ ?” ୧୩ ସେ ଲକ୍ ତାକେ “ସଏ ଡାବା ଟିକନ୍ ।” ବଲି କଇଲା । ମୁକିଅ ଗତିଦାଙ୍ଗ୍ତା ତାକେ କଇଲା, “ତମେ ଉଦାର୍ ନେଲା ପତିଲଗେ ଉନା କରି ପତାସ୍ ଡାବା ବଲି ଲେକିଦେସ୍ ।” ୧୪ ତାର୍ ପତେ ସେ ଆରି ଗଟେକ୍ ଲକ୍ କେ ପାଟାର୍ଲା, “ତମେ କେତେକ୍ ଦେବାର୍ ଆତେ ?” ଉଦାର୍ ନେଲା ଲକ୍ କଇଲା, “ଆଜାର୍ ବାସ୍ତା ଦାନ୍ ।” ମୁକିଅ ଗତିଦାଙ୍ଗ୍ତା ତାକେ କଇଲା “ତୁଇ ଉଦାର୍ ନେଲା ପତିତେଇ ଉନାକରି ଆଟ୍ ସଅ ବାସ୍ତା ବଲି ଲେକିଦେସ୍ ।”

୧୫ ଏଟାର୍ ପାଇ ସେ ମିରୁଆ ମୁକିଅ ଗତିଦାଙ୍ଗ୍ତାକେ ତାର୍ ସାଉକାର୍ କଇଲା, “ତୁଇ ବେସି ଚାଲାକି ଅଇକରି ଏକ୍ତି କାମ୍ କରୁଆରୁସ୍ । କାଇକେ ବଇଲେ ଏ ଦୁନିଆର୍ ଲକ୍ ମନର୍ ନିଜର୍ କାମ୍ କରବାକେ ପର୍ମେସର୍ ଲକ୍ ମନର୍ ଟାନେଅନି ଅଦିକ୍ ଚାଲାକି ।”

୧୬ ଆରି ଜିସୁ କଇଲା, “ସେଟାର୍ ପାଇ ମୁଇ ତମ୍ କେ କଇଲିନି, ଲକ୍ ମନ୍କେ ଏ ଦୁନିଆର୍ ଦନ୍ ଦେଇ କରି ନିଜର୍ ନିଜର୍ ପାଇ ମଇତର୍ କରା । ସେନ୍ତାରି କଲେ ଜେତେବଲ୍ ତମର୍ ଦୁନିଆର୍ ଦନ୍ ସାରିଜାଇସି, ପର୍ମେସର୍ ତମକେ କାଲ୍ କାଲ୍ ଜୁଗ୍ ଜୁଗ୍ ରଇବା ଗରେ ଡାକି ନେଇସି । ୧୭ କେ ସାନ୍ ବିସଇ ସତ୍ ସଙ୍ଗ୍ କରୁସି, ସେ ବଡ୍ ବିସଇ ସତ୍ ସଙ୍ଗ୍ କରୁସି । ସେନ୍ତାର୍ ସେ କେ ସାନ୍ ବିସଇ ନେଇକରି ସତ୍ କାମ୍ ନ କରେ ସେ ବଡ୍ ବିସଇତେଇ ମିସା ସତ୍ କାମ୍ ନ କରେ । ୧୮ ପର୍ମେସର୍ ତମକେ ଏ ଦୁନିଆଇ ଦେଲା ତାରୁ ଆରି ଦନର୍ ବିସଇ ସତଇସେ ନ କରାସ୍ ବଇଲେ ସରଗର୍ ଦନ୍ ତମକେ ମିଲ୍ ବାକେ ନ ଦେଏ । ୧୯ ତମେ ବିନ୍ ଲକ୍ ମନର୍ ଦନ୍ ସତ୍ ବାବେ ନ ସଙ୍ଗାଇଲେ ନିଜର୍ ଦନ୍ କେ ତମକେ ଦେଇସି ? ୨୦ ଗଟେକ୍ ଗତିଦାଙ୍ଗ୍ତା ଦୁଇଟା ସାଉକାର୍ ଦାଇଡ୍ ସମାନ୍ ବାବେ କରିନାପାରେ । କାଇକେ ବଇଲେ ସେ ଗଟେକ୍ ସାଉକାର୍ କେ ଆଲାଦ୍ କରୁସି ଆରି ଗଟେକ୍ ସାଉକାର୍ କେ ଗିନ୍ କରୁସି । ଗଟେକ୍ ସାଉକାର୍ କେ ନାମ୍ ସି ଆରି ଗଟେକ୍ କେ ନ ନାମେ । ସେନ୍ତାର୍ ସେ ଗଟେକ୍ ଲକ୍ ଏକାତରେକ୍ ଏ ଦୁନିଆର୍ ଦନ୍ ଆରି ପର୍ମେସର୍ କେ ସମାନ୍ ବାବେ ସେବା କରିନାପାରେ ।”

ଜିସୁର କେତେଟା କାତା

(ମାତିଉ ୧୧:୧୨-୧୩, ୫:୩୧-୩୨; ମାର୍କ ୧୦:୧୧-୧୨)

☆ ୧୭:୧୩ ୧୭:୧୩ ମାତିଉ ୭:୨୪

୧୪ ପାରୁସି ଦଲରୁ ଲକ୍ଷମନ୍ ଏ ସବୁ କାତା ସୁନି ଜିସୁକେ ଟାପରା କଲାଇ, କାଇକେ ବଇଲେ ତାରୁ ଆକା ସେମନରୁ ଜିବର ଦନ୍ ବଲି ବାବ୍ତେ ରଇଲାଇ । ୧୫ ଜିସୁ ସେମନକେ କଇଲା, “ତମେ ଲକ୍ଷମନ୍ ମୁଆଟେ ନିକ ବଲି ଦେକାଇ ଅଇଲାସ୍ନି । ମାତରୁ ତମରୁ ମନ୍ବିତ୍ତରେ କାଇଟା ଆଟେ ସେଟା ପର୍ମେସର୍ ଜାନିଆଟେ । ଜନ୍ ଦିନସୁ ଲକ୍ଷମନ୍ ବେସି ମୁଲିଅ ବଲି ବାବ୍ଲାଇନି ସେଟା ପର୍ମେସର୍ ଦେକ୍ବା ଇସାବେ ବେସି ଗିନରୁ ବିସଇ ।”

୧୬ \* “ତୁବନ୍ ଦେଉ ଜଅନ୍ ଆସି ନିକ କାତା କଇବାଟା ଆରାମ୍ କରବା ଜାକ, ମସାରୁ ନିୟମ ଆରି ବବିସତ୍ବକତାମନରୁ କାତା ତମକେ କାତାଇ ନେଇତେ ରଇଲା । ଜଅନ୍ ଆଇଲା ପଟେ, ପର୍ମେସରରୁ ରାଇଜରୁ ସୁବ୍ କବରୁ ଜାନାଇଲାଇନି । ଆରି ନିଜରୁ ବପୁସଙ୍ ପର୍ମେସରରୁ ରାଇଜେ ଜିବାକେ ବେସି ଲକ୍ଷମନ୍ ଚେସ୍ଟା କଲାଇନି । ୧୭ \* ସରଗ୍ ଆରି ଦୁନିଆ ନସିଗାଲେ ମିସା ନିୟମେ ଲେକା ଅଇରଇଲାଟା ଗଟେକ୍ ମିସା ଅଇକରୁ ନ ନସେ ।”

୧୮ \* “କେମିସା ନିଜରୁ ମାଇଜିକେ ଚାଡ଼ି ବିନ୍ଟା ଆନଲେ, ସେ ଦାଙ୍ଗ୍ଡିସଙ୍ ବେସିଆ କାମ୍ କଲା ଲକ୍ ଅଇଜାଇସି । ଆରି କେ, ସେ ଚାଡ଼ଲା ଦାଙ୍ଗ୍ଡିକେ ବିବା ଅଇସି ବଇଲେ ସେ ମିସା ଦାଙ୍ଗ୍ଡିସଙ୍ ବେସିଆ କାମ୍ କଲା ଆଟେ ।” ବଲି କଇଲା ।

ଗଟେକ୍ ସାଉକାରୁ ଆରି ଲାଜାରୁ

୧୯ ଜିସୁ ସେମନକେ ଗଟେକ୍ କାତାନି ବୁଜାଇକରି କଇଲା, “ଗଟେକ୍ ସାଉକାରୁ ଲକ୍ ରଇଲା । ସେ ଲଟେକ୍ ମଲ୍ ଦେଇ ଗେନ୍ଲା ନିକ ନିକ ଚକା ପଟିଆ ପିନ୍ଦ୍ତେ ରଇଲା । ସେ ସବୁଦିନ୍ ବଜି କରି ନିଜେ ସାର୍ଦା ଅଇତେରଇଲା । ୨୦ ତେଇ ଲାଜାରୁ ନାଉର୍ ଅରକ୍ତ ଲକ୍ ଗଟେକ୍ ରଇଲା । ତାରୁ ଗୁଲାଇ ଗାଗଡ଼ ଗାଉ ଅଇରଇଲା । ତାକେ ଆନିକରି ସାଉକାରୁ କାପାଟ୍ ଲଗେ ହୁଲାଇତେ ରଇଲାଇ । ୨୧ ତେଇ ରଇ, ସେ ସାଉକାରୁ ତାଲିଅନି ଅଦରଲା ସକ୍ତି ବାଡ଼ସିତା ବେଟି କାଇବାକେ ମନ୍ କରତେ ରଇଲା । କୁକୁରମନ୍ ତାରୁ ଗାଗଡ଼ ଗାଉ ଚାଟ୍ତେ ରଇଲାଇ ।”

୨୨ କେତେ ଦିନ୍ ଗାଲାପଟେ ସେ ଅରକ୍ତ ଲକ୍ ମରିଗାଲା । ଆରି ପର୍ମେସରୁ ଦୁଡ଼ମନ୍ ଆସି ତାକେ ସରଗ୍ପୁରୁ ବଜିତେଇ ଅବ୍ରାଆମ୍ ଲଗେ ବସବାକେ ଦାରି ଗାଲାଇ । ଆରି କେତେ ଦିନ୍ ଗାଲାପଟେ ସେ ସାଉକାରୁ ମିସା ମରିଗାଲା । ତାକେ ନେଇ ତପିଦେଲାଇ । ୨୩ ଆରି ସେ ନରକ୍ କୁଣ୍ଡେ ଗାଲା । ତେଇ ସେ ବେସି କସ୍ଟ ପାଇବାବେଲା ଉପରେ ସରଗ୍ପୁରେ ଦେକ୍ଲେ ଲାଜାରୁ ଅବ୍ରାଆମ୍ ଲଗେ ବସି ଆଟେ । ୨୪ ସେ ଆଉଲି ଅଇ କଇଲା, “ଏ ବାବା ଅବ୍ରାଆମ୍, ମକେ ଦୟା କର । ଲାଜାରୁକେ ମର ଲଗେ ପାଟାଇଦେସ୍ । ସେ ଆସିକରି ନିଜରୁ ଆଙ୍ଗ୍ଟି ସଙ୍ ପାନି ଦେଇ, ମରୁ ଜିବ୍ କାକରୁ କର । କାଇକେ ବଇଲେ ମୁଇ ଏ ନରକ୍ପୁରୁ ଜଇଲଗେ ବେସି କସ୍ଟ ପାଇଲିନି ।”

୨୫ ମାତରୁ ଅବ୍ରାଆମ୍ କଇଲା, “ବାବୁରେ, ତୁଇ ଜିବନ୍ ରଇଲାବେଲାରୁ କାତା ମନେ ଏତାଇ ଦେକ୍ । ତରୁ ଜିବନେ ସବୁ ନିମାନ୍ ବିସଇ ପାଇରଇଲୁସ୍ । ଆରି ଲାଜାରୁ ସବୁ କାରାପ୍ ବିସଇ ପାଇଲା । ମାତରୁ ସେ ଏବେ ଏ ଜାଗାଇ ସାର୍ଦାଅଇ ଆଟେ । ଆରି ତୁଇ ବେସି କସ୍ଟ ପାଇଲୁସ୍ନି । ୨୬ ଆରି ଗଟେକ୍ ବିସଇ ଅଇଲାନି, ତରୁ ଆମ୍ ମଜାଇ ଗଟେକ୍ ବଡେଟା ପାଗଡ଼ ଆଟେ । ଇତିରୁ ଲକ୍ ସିତି ଜାଇ ନର୍ଏ ଆରି ସିତିରୁ ଲକ୍ ଇତି ଆସି ନର୍ଏ ” ବଲି କଇଲା । ୨୭ ସେ ବେଲା ସେ ସାଉକାରୁ କଇଲା, “ଏ ବାବା ଏନ୍ତି ବଇଲେ ମୁଇ ତକେ ବାବୁଜିଆ କଲିନି ଲାଜାରୁକେ ଦୟାକରି ମରୁ ବାବାରୁ ଗରେ ପାଟାଇଦେସ୍ । ୨୮ କାଇକେ ବଇଲେ ତେଇ ମରୁ ପାଟ୍ଟା

\* ୧୭:୧୭ ୧୭:୧୭ ମାଡ଼ିଉ ୧୧:୧୨,୧୩ \* ୧୭:୧୭ ୧୭:୧୭ ମାଡ଼ିଉ ୫:୧୮ \* ୧୭:୧୮ ୧୭:୧୮ ମାଡ଼ିଉ ୫:୩୨; ୧୮ କରନ୍ତିୟ ୭:୧୦,୧୧

ବାଇମନ୍ ଆଚଡ଼ । ଲାଜାରୁ ଜାଇ ସେମନ୍‌କେ ଜାଗରଡ଼ କରାଅ । ସେମନ୍ ସେ କାତା ସୁନି ପାପେଅନି ମନ୍ ବାଦ୍‌ଲାଅଡ଼ । ସେମନ୍ ମଲେ ମୁଇ ଏବେ ବେସି କସ୍‌ଟ ପାଇବା ଏ ଜାଗାଇ ନ ଆସଡ଼” ବଲି କଇଲା ।

୨୯ ମାତର୍ ଅବ୍ରାଆମ୍ ତାକେ କଇଲା, “ସେମନ୍ ଜାଗରଡ଼ ଅଇ ରଇବାକେ ମସାର ନିୟମ୍ ଆରି ବବିସଡ଼ବକ୍‌ତାମନ୍ କଇଲା କାତା ସବୁ ତାକର୍ ଲଗେ ଆଚେ । ସେଟା ସେମନ୍ ପଡ଼ିକରି ସିକଡ଼ ।” ବଲି କଇଲା । ୩୦ ଆରି ସେ ସାଉକାର୍ ଅବ୍ରାଆମ୍‌କେ କଇଲା, “ସେଡ଼କି ନଏଁ ବାବା, ମଲାଟାନେଅନି ଉଚିକରି ଗଟେକ୍ ଲକ୍ ଜାଇ କଇଲେ ସେମନ୍ ବିସ୍‌ବାସ୍ କରି ପାପେଅନି ମନ୍ ବାଉତାଇବାଇ ।” ବଲି କଇଲା । ୩୧ ଅବ୍ରାମ୍ ତାକେ କଇଲା, “ତର୍ ବାଇମନ୍ ମସାର ଆରି ବବିସଡ଼ବକ୍‌ତାମନ୍ କାତା ନ ସୁନଡ଼ ବଇଲେ ମଲାଟାନେଅନି ଉଚିକରି ଗଟେକ୍ ଲକ୍ ଜାଇ କଇଲେ ମିସା ସେମନ୍ ନ ମାନଡ଼ ।”

### ୧୭

ପାପ୍  
(ମାତିଉ ୧୮:୭-୭; ୨୧:୨୨; ମାର୍କ ୯:୪୨)

୧ ଦିନେକ୍ ଜିସୁ ତାର୍ ସିସ୍‌ମନ୍‌କେ କଇଲା, “ଏ ଦୁନିଆଇ ସବୁ ବେଲା ଲକ୍‌ମନ୍‌କେ ପାପ୍ କରାଇବାକେ କାଇଆଲେ ପରିକା ଆଇସି । ମାତର୍ ଜନ୍ ଲକ୍ ଏଡ଼ି ବିନ୍ ଲକ୍‌କେ ପାପ୍ କରାଇସି, ସେମନ୍‌କେ କେତେକ୍ କସ୍‌ଟର୍ ଦସା ଅଇସି । କାଇକେବଇଲେ ପର୍‌ମେସର୍ ସେମନ୍‌କେ ବେସି ବଡ଼ ଡଣ୍ଟ ଦେଇସି । ୨ ସେନ୍ତାରି ଲକ୍, ଦରମ୍ ଲକ୍‌ମନ୍‌କେ ପାପ୍‌କରାଇବା ବାଦୁଲେ ଗାଲାଇ ଗଟେକ୍ ବଡ଼ଟା ଜତା ପାକ୍‌ନା ବାନ୍ଦିକରି ତେଜ୍ ପାନିତେଇ ପିଙ୍ଗି ଦେବାପାରା ତଣ୍ଟ ତାଟ୍‌ପାଇ ନିକ ଅଇତା । ୩ \*ତେବର୍‌ପାଇ ତମର୍ ଚଲାଟଲୁଡିତେଇ ବେସି ଜାଗରଡ଼ଅଇ ରୁଆ । ଜଦି ତମର୍ ବାଇ କି ବଇନି ପାପ୍ କଲେ, ସେଟା ନିକ କାମ୍ ନଏଁ ବଲି ଟିକ୍ କରା । ଆରି ସେ କରିରଇବା ବୁଲ୍ ଏତାଇ କରି ମନ୍ ବାଦ୍‌ଲାଇସି ବଇଲେ, ତାକେ କେମା ଦିଆସ୍ । ୪ ଜଦି ସେ ଗଟେକ୍ ଦିନେ ସାଡ଼ପାଲି ଜାକ ତମର୍ ବିରଦେ ପାପ୍ କରି, ପଚେ ନିଜର୍ ବୁଲ୍ କଲାଟା ଏତାଇ ମନ୍ ବାଦ୍‌ଲାଇକରି ତମର୍ ତେଇ ଆସି ଜେତେପାଲି କେମା ମାଗ୍‌ଲେ, ସେଡ଼କିପାଲି ତାକେ କେମା ଦିଆସ୍ ।”

#### ବିସ୍‌ବାସ୍

୫ ଆରି ପେରିଡ଼ମନ୍ ଜିସୁକେ କଇଲା, “ଆମର୍ ବିସ୍‌ବାସ୍ ଅଦିକ୍ କରିଦିଆସ୍ ।” ୬ ଜିସୁ ସେମନ୍‌କେ କଇଲା, “ଗଟେକ୍ ସର୍‌ସୁ ମୁଞ୍ଜି ପାରା ତମର୍ ବିସ୍‌ବାସ୍ ରଇସି ବଇଲେ ତମେ ବଡ଼ ଗଟ୍‌କେ ଜିକିଅଇ ସମ୍‌ଦୁରେ ଜାଇ ରପିଅ ବଲି କଇଲେ ସେ ଗଟ୍ ତମର୍ କାତା ମାନ୍‌ସି ।”

#### ଗଟେକ୍ ଗତିଦାଙ୍ଗ୍‌ତାର୍ କାମ୍

୭ “ଜଦି ତୁଇ ଗଟେକ୍ ସାଉକାର୍ ଅଇରଇସୁ ବଇଲେ ତର୍ ଗତିଦାଙ୍ଗ୍‌ତା କସ୍‌ବାଟାନେଅନି ନଇଲେ ଗରୁଟାରାଇବାଟାନେଅନି ଆସି ତାର୍ ନିଜର୍ କାମ୍ ନ ସାରାଇବା ଆଗୁତୁ ତୁଇ ତାକେ ‘କାଇବାକେ ବସ୍‌ବେ’, ବଲି କଇସୁ କି ? ନାଇ, ସେନ୍ତି ନ କଉସ୍ । ୮ ମାତର୍ ସେ ନିଜର୍ କାଦି କାଇବା ଆଗୁତୁ ତର୍‌ପାଇ ରାନ୍ଦି ନ ଦେବା ଜାକ, ତୁଇ ତାକେ କାଇବାକେ ନ ଦେଉସ୍ । ୯ ଆରି ତୁଇ ସେ ଗତିଦାଙ୍ଗ୍‌ତାକେ ‘ସବୁ କାମ୍ କରି ସାରାଇଲୁସ୍ !’ ବଲି ଦନିଅବାଦ୍ ଦେଇସୁ କି ? ନାଇ ନ ଦେଉସ୍ । ୧୦ ସେନ୍ତାରି ତମ୍‌କେ କଇରଇଲା ସବୁ ବିସଇ କରିସାରାଇଲା ପଚେ ତମେ କଇବାର୍

\* ୧୭:୩ ୧୭:୩ ମାତିଉ ୧୮:୧୫



ଆଚେ । ଆମେ ଅବକା ଗତିଦାଙ୍ଗତାମନ୍, ଆମର୍ ଜେଡକି କର୍ବାର୍ ରଇଲା, ସେଡକିସେ ଆମେ କରିଆଚୁ ।”

ଦସ୍ତା ବଡ଼ରଗ୍ ଅଇଲା ଲକ୍ମନ୍ ନିକ ଅଇଲାଇ

୧୧ ଜିସୁ ତାର୍ ସିସ୍ମାନର୍ ସଙ୍ଗ୍ ଜିରୁସାଲମେ ଜିବା ବେଲେ ସେ ଗାଲିଲି ଆରି ସମିରଣ ଜିଲାର୍ ମଜାଇ କେଟ୍ଲା । ୧୨ ଆରି ସେ ଗାଉଁ ବିଡ଼ରେ ପୁର୍ବା ବେଲେ ବଡ଼ରଗ୍ ଅଇରଇଲା ଦସ୍ତା ଲକ୍ମନ୍ ତାକେ ଦୁରିକେଅନି ଦେକ୍ଲାଇ । ସେମାନର୍ ନିୟମେ ବଡ଼ରଗ୍ ରଇଲା ଲକ୍ମନ୍, ବିନ୍ ଲକ୍ମାନର୍ ଲଗେ ଆସି ନାପାରଡ୍ । ସେଟାର୍ ପାଇ ସେମନ୍ ଜିସୁର୍ ଲଗେ ନ ଆସି ଦୁରିକେ ରଇକରି, ୧୩ ବେସି ଆଉଲିଅଇ କଇଲାଇ, “ଜିସୁ ! ଏ ଗୁରୁ ! ଆମ୍ବକେ ଦୟାକରା ।”

୧୪ ଜିସୁ ସେମନ୍କେ ଦେକି କରି କଇଲା, “ତମେ ଜାଇକରି ପର୍ମେସରର୍ ପୁଜାରିମନ୍କେ ତମର୍ ଗାଗଡ୍ ଦେକାଆ । ତମେ ନିମାନ୍ ଅଇଲାସ୍ କି ନାଇ ବଲି ସେମନ୍ ଦେକଡ୍ ।” ପଚେ ସେ ଦସ୍ ଲକ୍ ପର୍ମେସରର୍ ପୁଜାରିମନ୍ର୍ ଲଗେ ଜିବା ବେଲେ, ବାଟେ ନିମାନ୍ ଅଇଗାଲାଇ । ୧୫ ଏଦେ ଦେକା ! ସେମାନର୍ ବିଡ଼ରେଅନି ଗଟେକ୍ ଲକ୍ ନିଜର୍ ଗାଗଡ୍ ନିମାନ୍ ଅଇଲାଟା ଦେକି, ଜିସୁର୍ ଲଗେ ବାଉଡି ଆଇଲା । ଆରି ସେ ବେସି ଆଉଲି ଅଇ ପର୍ମେସରର୍ ତାକ୍ପୁଟା କଲା । ୧୬ ସେ ପାଲାଇ ଆସି ଜିସୁର୍ ପାଦେ ଅଦର୍ଲା “ତମେ ମକେ ନିମାନ୍ କରିଆଚାସ୍” ବଲି ଦନିଅବାଦ୍ କଲା । ସେ ଜିଉଦି ଲକ୍ ନଏଁ । ସେ ସମିରଣିୟ ବଲି ଗଟେକ୍ ଜାଗାର୍ ଲକ୍ । ୧୭ ଜିସୁ ତାକେ କଇଲା, “ମୁଇତା ଦସ୍ଲକ୍କେ ନିମାନ୍ କରି ରଇଲି । ତକେ ଗଟେକ୍ ଲକ୍କେ ଚାଡି ଆରି ନଅ ଲକ୍ କେନେ ଗାଲାଇ ? ୧୮ ନିମାନ୍ ଅଇଲା ପଚେ ବାଉଡି ଆସି ପର୍ମେସରକେ ଦନିଅବାଦ୍ କର୍ବାକେ ଏ ଗଟେକ୍ ସମିରଣିୟ ଲକ୍ସେ ରଇଲା କି ?” ୧୯ ତାର୍ ପଚେ ଜିସୁ ତାକେ କଇଲା, “ତୁଇ ଏବେ ଉଟ୍ ଆରି ଜାଆ, କାଇକେ ବଇଲେ ମୁଇ ତକେ ନିମାନ୍ କରିପାରବି ବଲି ବିସ୍ବାସ୍ କରିରଇଲୁସ୍ ।”

ପର୍ମେସରର୍ ରାଇଜ୍ ଆଇଲାନି  
(ମାଡିଉ ୨୪:୨୩-୨୮, ୩୭-୪୧)

୨୦ କେତେଟା ପାରୁସି ଲକ୍ମନ୍ ଜିସୁକେ “କେବେଅନି ପର୍ମେସର ଲକ୍ମନ୍କେ ସାସନ୍ କର୍ସି ?” ବଲି ପାଚାର୍ଲାଇ । ଜିସୁ ସେମନ୍କେ କଇଲା, “ପର୍ମେସର କେଡି ସାସନ୍ କର୍ସି, ସେ ରାଇଜ୍ ତମର୍ ଆଁକିଡେଇ ନ ଡିସେ । ୨୧ ଆରି ପର୍ମେସର ଇଡି ସାସନ୍ କଲାନି ନଇଲେ ସିଡି ସାସନ୍ କଲାନି ବଲି କଇବାର୍ ନାପାରାସ୍ । କାଇକେ ବଇଲେ, ଲକ୍ମାନର୍ ମନ୍ ବିଡ଼ରେ ପର୍ମେସର ସାସନ୍ କର୍ସି ।”

୨୨ ପଚେ ତାର୍ ସିସ୍ମାନକେ କଇଲା, ଏନ୍ତି ବେଲା ଆଇସି ତମେ ପର୍ମେସରଟାନେଅନି ଆଇଲା ନର୍ପିଲା ମର୍ସଙ୍ଗ୍ ଗଟେକ୍ ଦିନ୍ ରଇବାକେ ବେସି ମନ୍ କର୍ସା । ମାତର୍ ସେବେଲା ମକେ ଦେକି ନାପାରାସ୍ ୨୩ ଲକ୍ମନ୍ ତମ୍ବକେ କଇବାଇ, ପର୍ମେସରର୍ ଟାନେଅନି ଆଇଲା ନର୍ପିଲା ଇଡି ଆଚେ ସିଡି ଆଚେ ବଲି । ତମେ ସେଟା ଦେକ୍ବାକେ ନ ଜାଆ । ତମେ କନ୍ତି ଆଚାସ୍ ତେଇସେ ରୁଆ । ୨୪ କାଇକେବଇଲେ ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ, ବାଉଡ଼ବାଟା ତମେ ଦେକ୍ସା । ସେଟା କେନ୍ତାର୍ ବଇଲେ, ଆକାସେ ଜେଡି ଗଟେକ୍ ବାଟେଅନି ଆରି ଗଟେକ୍ ବାଟେ ବିଜୁଲି ମାରିକରି ଗୁଲାଇ ଆକାସ୍ ଉଜଲ୍ ଅଇସି, ସେନ୍ତାରିସେ ସବୁ ଲକ୍ମନ୍ ଦେକିଅଇସି । ୨୫ ମାତର୍ ସେଟା ଅଇବା ଆଗ୍ତୁ ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ ବେସି ଦୁକ୍ କସ୍ଟ ପାଇବାର୍ ଆଚେ । ଆରି ମର୍ ସବୁ କାମ୍ ଦେକ୍ଲା ଲକ୍ମନ୍ ମକେ ନ ନାମଡ୍ ।

୨୬ ନଅ ରଇଲା ବେଲା ଲକ୍ମନ୍ ଜେନ୍ତାରି ରଇଲାଇ ସେନ୍ତାରିସେ ପରମେସରର୍ ଟାନେଅନି ଆଇଲା ନରପିଲା ମୁଇ ବାଉଡି ଆଇବାବେଲେ ଲକ୍ମନ୍ ରଇବାଇ । ୨୭ ସେବେଲାଇ ନଅ ବଡେଟା ପାନିଜାଜେ ପୁରବା ଦିନ୍ ଜାକ ଲକ୍ମନ୍ ଅବକାସେ ରଇଲାଇ । ସେମନ୍ ବଜି କରବାର୍, ଦାଙ୍ଗୁଡି ଆନବାର୍, ଆରି ଦାଙ୍ଗୁଡି ଦେବାର୍ କରତେ ରଇଲାଇ । ପଟେ ବେସି ପାନିଅଇ ସବୁ ଡାବିଅଇଲା । ନଅ ଆରି ତାର୍ କୁଟୁମର୍ ଲକ୍ମକେ ଚାଡି ସବୁ ଲକ୍ମକେ ପାନି ବୁଡାଇ ପାକାଇଲାଇ । ୨୮ ଲଡ୍ ନାଉର୍ ଗଟେକ୍ ଲକର୍ ବେଲେ ମିସା ସେନ୍ତାର୍ ପାରା ଅଇରଇଲା । ଲକ୍ମନ୍ ସବୁ ଦିନର୍ ପାରାସେ କାଆ ପିଇ, ବିକାବିକ୍ରି, ଗର୍ବପା ଆରି ଗର୍ବବାନ୍ଧାତେଇ ଲାଗିରଇଲାଇ । ୨୯ ମାତର୍ ଲଡ୍ ସଦମ୍ ନାଉର୍ ଗଡେଅନି ବାରଇକରି ଜିବା ଦିନେ ସେ ବାଦଲେଅନି ଜଇ ଆରି ଗନ୍‌ଗୁଲା ଆସି ଲଡ୍ ଆରି ତାର୍ କୁଟୁମର୍ ଲକ୍ମକେ ଚାଡି ସେ ଗଡର୍ ସବୁ ଲକ୍ମକେ ମରାଇ ଦେଲା । ୩୦ ପରମେସରର୍ ଟାନେଅନି ଆଇଲା ନରପିଲା ମୁଇ ବାଉଡି ଆଇବା ଦିନେ ମିସା ସେନ୍ତାରିସେ ଅଇସି ।

୩୧ \*ସେ ଦିନେ ନିଜର୍ ଗର୍ ଉପରେ ରଇଲେ ତୁଇ ଉଡରି ତର୍ ଦିନ୍‌ସୁ ଆନବାକେ ଗର୍ ବିତରେ ନ ଜାଆ । ସେନ୍ତାରି ତାସ୍ ପଦାଇ ରଇଲେ, ଦିନ୍‌ସୁ ବେଟି ନେବାକେ ଗରେ ନ ଆଉ । ୩୨ ଲଡର୍ ମାଇଜିକେ କାଇଟା ଅଇରଇଲା ସେଟା ଏତାଇ ଦେକା । ତାର୍ ଦନ୍ ସିପତି କେନ୍ତାର୍ ଅଇଲା ବଲି ପାସଲି ଦେକଲାଜେ ସେ ନୁନ୍ କୁମ୍ ପାସଲି ଗାଲା । ୩୩ \*କେ କେ ଏ ଦୁନିଆଇ ଜିଇବା ଜିବନ୍ ମନ୍ କଲେ ତାକେ ନ ସାର୍‌ବା ଜିବନ୍ ନ ମିଲେ । ଆରି କେ କେ ଏ ଦୁନିଆଇ ଜିଇବା ଜିବନ୍ ଆରାଇସି, ତାକେ ନ ସାର୍‌ବା ଜିବନ୍ ମିଲୁସି । ୩୪ ମୁଇ ବାଉଡି ଆଇବା ସେ ରାତି, ତମେ ଦୁଇ ଲକ୍ ଗଟେକ୍ ବାକ୍ରାଇ ସଇରଇସା । ଗଟେକ୍ ଲକ୍ମକେ ଡାକି ନେବି, ଆରି ଗଟେକ୍ ଲକ୍ମକେ ଚାଡି ଦେବି । ୩୫ ଦୁଇଟା ମାଇଜିମନ୍ ଗର୍ତେ ରଇବାଇ, ତେଇଅନି ଗଟେକ୍ ମାଇଜିକେ ନେବି ଆରି ଗଟେକ୍‌କେ ଚାଡି ଦେବି । ୩୬ ଦୁଇ ଲକ୍ ପଦାଇ ରଇବାଇ, ଗଟେକ୍ ଲକ୍ମକେ ନେବି, ଆରି ଗଟେକ୍ ଲକ୍ମକେ ଚାଡିଦେବି ।”

୩୭ ତାର୍‌ପଟେ ସିସମନ୍ ଜିସୁକେ ପାଚାରୁଲାଇ, “ଏ ମାପରୁ ଏଟା କନ୍ତି ଗର୍ସି ?” ଜିସୁ ସେମନ୍‌କେ କଇଲା, “ଜନ୍ତି ମଡା ରଇସି, ତେଇ ମଡକାଉ ଗିଦମନ୍ ରୁଣ୍ଡିରଇବାଇ ।”

## ୧୮

ରାଣ୍ଡି ମାଇଜି ଆରି ବିଚାର୍ କାରିଆ

୧ ଜିସୁ ଦିନେକ୍ ତାର୍ ସିସମନ୍‌କେ ପରମେସର୍କେ ମାଙ୍ଗୁବାବେଲେ ନ ଡାକି ପାର୍‌ତନା କରକରି ରଇବାକେ, ଗଟେକ୍ କାତାନି ବୁଜାଇ କଇଲା, ୨ ଗଟେକ୍ ଗଡେ ଗଟେକ୍ ବିଚାର୍ କାରିଆ ଲକ୍ ରଇଲା । ସେ ପରମେସର୍କେ ନ ଡର୍ତେ ରଇଲା, କି ଲକ୍ମନ୍‌କେ ନ ନାମତେ ରଇଲା । ୩ ସେ ଗଡେ ଗଟେକ୍ ରାଣ୍ଡି ମାଇଜି ମିସା ରଇଲା । ସେ ସବୁ ବେଲେ ବିଚାର୍ କାରିଆର୍ ଲଗେ ଜାଇ ଏନ୍ତି କଇତେ ରଇଲା, ଗଟେକ୍ ଲକ୍ ମର୍ ବିରଦି ଅଇଲା ଆଟେ । ଏ ବିସଇନେଇକରି ତମେ ମର୍ ବିରଦିକେ ବିଚାର କରା । ଜେନ୍ତିକି, ସେ ମକେ ନିଆଇ ଇସାବେ ତଲାଟଲୁଡି କର୍ସି । ୪ ଏନ୍ତି ବେସି ଦିନ୍ ସେ ବିଚାର୍‌କାରିଆ ନିଆଇ କର୍‌ବାକେ ମନ୍ ନ କଲେ ମିସା, ସେ ଦିନ୍‌କେ ଆସି ବେମଜା କର୍ତେରଇଲା । ମାତର୍ ସେ ବିଚାର୍‌କାରିଆ ଲକ୍ ମନେ ମନେ ବାଦଲା, “ମୁଇ ପରମେସର୍କେ ଡରି ନାଇକି ଲକ୍ମନ୍‌କେ ନାମି ନାଇ । ୫ ମାତର୍ ଏ ରାଣ୍ଡିମାଇଜି ସବୁ ବେଲା ଆସି ବେମଜା କଲାନି । ସେଟାର୍‌ପାଇ ତାକେ ନିଆଇ ମିଲୁଲା ପାରା

\* ୧୭:୩୧ ୧୭:୩୧ ମାଡିଉ ୨୪:୧୭,୧୮; ମାର୍କ ୧୩:୧୫,୧୬ \* ୧୭:୩୩ ୧୭:୩୩ ମାଡିଉ ୧୦:୩୯:୧୭:୨୫; ମାର୍କ ୮:୩୫; ଲୁକ ୯:୨୪; ଜଅନ୍ ୧୨:୨୫

ବିଚାର କରୁବି । କାଇକେ ବଇଲେ ଏନ୍ତ୍ର ବିଚାର ନ କଲେ ସେ ସବୁଦିନ ଆସି ମକେ ବେମଜା କରତେ ରଇସି ।”

୭ ତେଇ ମାପରୁ କଇଲା, “ଏ ଅନିଆଇ ବିଚାରକାରିଆ କାଇଟା କରବାକେ ବାଟଲା, ସେଟା ତମେ ସିକା । ୭ ସେନ୍ତ୍ର ଲାରୁଆଁ ବିଚାରକାରିଆ ସେ ରାଣ୍ଡିମାଇଜିର୍ ବିଚାର କଲା । ସେନ୍ତ୍ରାର ଆଲେ, ତାରତେଇଅନି କେତେ ନିମାନ୍ ଇସାବେ ପରମେସର୍ ସେ ବାଟଲା ଲକ୍ମାନର୍ ଦିନ୍‌ରାତିର୍ ପାରତନା ସୁନି ନିମାନ୍ ନିଆଇ ବିଚାର କରସି । ସେମନ୍‌କେ ସାଇଜ କରବାକେ ସେ ଅଲ୍‌ସମ୍ ନ କରେ । ୮ ମୁଇ ତମ୍‌କେ କଇଲିନି, ସେ ଦାପରେସେ ତାର ଲକ୍ମାନର୍‌ପାଇ ନିମାନ୍ ନିଆଇବିଚାର କରସି । ମାତର୍ ପରମେସର୍ ଟାନେଅନି ଆଇଲା ନରପିଲା ମୁଇ ଆରିତରେକ୍ ଆଇବାବେଲେ ଏ ଦୁନିଆଇ, ମକେ ବିସ୍‌ବାସ୍ କରବା ଲକ୍ମାନ୍‌କେ ଦେକ୍‌ବି କି ନାଇ ?”

ପାରୁସି ଆରି ସିସ୍‌ତୁମାଙ୍ଗୁମାନର୍ କାତା

୯ ତେଇ ରଇଲା କେତେକ୍ ଲକ୍ମାନ୍ ନିଜ୍‌କେ ମୁଇ ନିକ ଆଟି ବଲି ବାବିଅଇ ବିନ୍‌ଲକ୍‌କେ ଗିନ୍ କରତେ ରଇଲାଇ । ସେନ୍ତ୍ର ଲକ୍ମାନର୍ ବିସଇ ବୁଜାଇବାକେ ଜିସୁ ସେମନ୍‌କେ ଏ କାତାନି କଇଲା । ୧୦ ଦିନେକ୍ ଦୁଇଲକ୍ ପାରତନା କରବାକେ ଗଟେକ୍ ମନ୍ଦିରେ ଗାଲାଇ । ଗଟେକ୍ ଲକ୍ ପାରୁସି ଦଲର ଲକ୍ ଆରି ଗଟେକ୍ ସିସ୍‌ତୁମାଙ୍ଗୁ । ୧୧ ପାରୁସି ଲକ୍ ନିଜେ ଅଲପ୍ ଦୁରିକେ ଚିଆଅଇ ଏନ୍ତ୍ର ପାରତନା କରବାର୍ ବସ୍‌ଲା, “ଏ ପରମେସର୍ ମୁଇ ତମ୍‌କେ ଦନିଅବାଦ୍ ଦେଲିନି । ମୁଇ ବିନ୍‌ଲକ୍‌ପାରା ଲବ୍‌ରା ନାଇ କି ମିର୍‌ମାୟା ନାଇ କି ବେସିଆ କାମ୍ କରି ନାଇ । ଆରି ତକେ କ୍ଲୁଆର୍ କଲିନି ମୁଇ ଏ ସିସ୍‌ତୁମାଙ୍ଗୁ ପାରା ନଇ ।” ୧୨ ଆରି ସେ କଇଲା, “ମୁଇ ଜିଉଦିମାନର୍ ନିୟମ୍ ଇସାବେ ଆଟ୍‌କେ ଦୁଇ ଦିନ୍ ଉପାସ୍ ରଇ ପାରତନା କଲିନି । କାମାଇଲାଟାନର୍ ଦସ୍‌ବାଗର ବାଗେକ୍ ତମ୍‌କେ ଦେଲିନି ।” ବଲି ପାରତନା କଲା ।

୧୩ ମାତର୍ ସେ ସିସ୍‌ତୁମାଙ୍ଗୁ ଦୁରିକେ ଚିଆଅଇ ପାରତନା କରବା ବେଲେ ସରଗ୍‌ବାଟେ ଦେକ୍‌ବାକେ ମିସା ମନ୍ ନକରି ନିଜର୍ ବୁକେ ମାରିଅଇ ଏନ୍ତ୍ର ପାରତନା କଲା । “ଏ ପରମେସର୍ ମୁଇ ଗଟେକ୍ ପାପି ଲକ୍ ମକେ ଦୟା କରା !” ୧୪ ଜିସୁ ତାର୍ ସିସ୍‌ମନ୍‌କେ କଇଲା, “ସେ ଦୁଇଲକ୍ ପାରତନା ସାରାଇ ବାଅଡ୍‌ଲାକେ, ସିସ୍‌ତୁମାଙ୍ଗୁସେ ପରମେସର୍ ଦେକ୍‌ବା ଇସାବେ ଦରମ୍ ରଇଲା । ପାରୁସି ନାଇ । ଜେ ବଡ୍‌ପନ୍ ଦେକାଇ ଅଇସି ଆରି ବଡ୍ ବଲି ବାବ୍‌ସି, ତାକେ ପରମେସର୍ ସାନ୍ ଲକ୍ କରସି । ମାତର୍ ଜେ ନିଜ୍‌କେ ସାନ୍ ଲକ୍‌ପାରା ବାବ୍‌ସି ତାକେ ପରମେସର୍ ବଡ୍ ଲକ୍ କରସି, ଏ କାତା ଏତାଇ ରୁଆ ।”

ଜିସୁ ସାନ୍‌ପିଲାମନ୍‌କେ ଆସିର୍‌ବାଦ୍ କଲା

୧୫ ଆରି ଗଟେକ୍ ଦିନେ ଲକ୍ମାନ୍ ତାକର୍ ସାନ୍‌ସାନ୍ ପିଲାମନ୍‌କେ “ଜିସୁ ଚି କରି ଆସିର୍‌ବାଦ୍ କର ।” ବଲି ଆନ୍‌ତେ ରଇଲାଇ । ସିସ୍‌ମନ୍ ସେଟା ଦେକି ଲକ୍ମାନ୍‌କେ ଲାଗିଲାଇ । ୧୬ ମାତର୍ ଜିସୁ ପିଲାମନ୍‌କେ ଲଗେ ଡାକି, ସିସ୍‌ମନ୍‌କେ କଇଲା, “ପିଲାମନ୍‌କେ ମର୍ ଲଗେ ଆନ୍‌ବାକେ ମନାକରା ନାଇ । କାଇକେ ବଇଲେ ସରଗ୍ ରାଇଜ୍ ଏନ୍ତ୍ର ସାନ୍ ସାନ୍ ପିଲାମନ୍‌ର୍ ପାରା ବିସ୍‌ବାସ୍ କରବା ଲକ୍ମାନର୍‌ପାଇସେ । ୧୭ ଏତାଇ ରୁଆ ! ମୁଇ ତମ୍‌କେ ସଡ୍‌କାତା କଇଲିନି । କେ ମିସା ଏ ସାନ୍‌ଲକ୍ ବିସ୍‌ବାସ୍ କଲାପାରା ମକେ ବିସ୍‌ବାସ୍ ନ କଲେ, ସେ ପରମେସର୍ ରାଇଜେ ଜାଇ ନାପାରେ ।”

ଗଟେକ୍ ସାଉକାର୍ ଲକ୍

(ମାତିଉ ୧୯:୧୬-୩୦; ମାର୍‌କ ୧୦:୧୭-୩୧)

୧୮ ଦିନେକ୍ ଗଟେକ୍ ଜିଉଦି ନେତା ଜିସୁକେ ପାଚାରୁଲା, “ଏ ନିମାନ୍ ଗୁରୁ ! ନ ସାରବା ଜିବନ୍ ମିଲାଇବାକେ ମୁଇ କାଇଟା କର୍ବାର୍ ଆତେ ?”

୧୯ ଜିସୁ ତାକେ କଇଲା, ମକେ କାଇକେ ନିମାନ୍ ବଲି କଇଲୁସନି ? କାଇକେ ବଇଲେ ପର୍ମେସର୍ ଗଟେକ୍ ଲକ୍ଷେ ନିମାନ୍ । ୧୦ ମାତର୍ ମୁଇ ତମ୍ବେ କଇଲିନି “ବେସିଆ କାମ୍ କରା ନାଇ, କାକେ ମରାଆ ନାଇ, ବିନ୍ ଲକ୍ଷର୍ ଦିନ୍ସୁ ତରାଆ ନାଇ, ମିର୍ ସାକି କୁଆ ନାଇ, ଆରି ତମର ମାଆବାବାର୍ କାତା ମାନା । ପର୍ମେସର୍ ମସାକେ ଏକ୍ତି ନିୟମ୍ ଦେଲାଆତେ ଜାନି ଆତୁସ୍ ।”

୨୧ ସେ ଲକ୍ ଜିସୁକେ କଇଲା, “ଏ ସବୁ ନିୟମ୍ ତା ମୁଇ ପିଲାବେଲେ ଅନି ମାନ୍ଲିନି । ମୁଇ ଆରି କାଇଟା କର୍ବାର୍ ଆତେ ?”

୨୨ ଜିସୁ ଏଟା ସୁନି ତାକେ କଇଲା, ତର୍ଟାନେ ଆରି ଗଟେକ୍ ବିସଇ ଉନା ଆତେ । ତର୍ ସବୁ ଦନ୍ ସପତି ବିକି ଗରିବ୍ ଲକ୍ମାନକେ ବାଟାକରିଦେସ୍ । ଏକ୍ତି କଲେ ତକେ ସର୍ଗେ ଦନ୍ ରଇସି । ଏଟା ସବୁ କଲା ପଟେ ତୁଇ ମର୍ ସଙ୍ଗ୍ ଆଉ । ୨୩ ମାତର୍ ସେ ଲକ୍ ଏ କାତା ସୁନି ମନ୍ ଦୁକ୍ ଅଇ ଉଟିଗାଲା । କାଇକେ ବଇଲେ ସେ ବେସି ସାଉକାର୍ ରଇଲା ।

୨୪ ସେ ଲକ୍ ମନ୍ଦୁକ୍ ଅଇଲାଟା ଦେକି ଜିସୁ ତାର୍ ସିସ୍ମାନକେ କଇଲା, “ସାଉକାର୍ ଲକ୍ମନ୍ ସରଗ୍ ରାଇଜେ ଜିବାଟା କେଡେ କସ୍ତର୍ ବିସଇ ! ୨୫ ସେ ଲକ୍ମନ୍ ସରଗ୍ ରାଇଜେ ଜିବାଟାନେଅନି ଗଟେକ୍ ବଡ଼ ଜୁଡ଼୍ ସୁଜିକାଣାବାଟେ ଚିଙ୍ଗିଲି ଜିବାକେ ସଅଜ୍ ଅଇସି ।” ୨୬ ଏକାତା ସୁନ୍ତେ ରଇଲା ଲକ୍ମନ୍ କଇଲାଇ, “ଏକ୍ତି ବଇଲେ କେ ତେବେ ଉଦାର୍ ପାଇସି ?” ୨୭ ଜିସୁ କଇଲା, “ପର୍ମେସର୍ ଟାନେ ନାପାରୁଲା ବିସଇ କାଇଟା ନାଇ ।” ୨୮ ପିତର୍ ଜିସୁକେ କଇଲା, “ଦେକା ଆମର୍ ଗରର୍ ସବୁ ଚାଡ଼ିକରି ତମର୍ ସଙ୍ଗ୍ ଆଇଲୁଆତୁ ।”

୨୯ ଜିସୁ ସେମାନକେ କଇଲା, “ଉଁ ମୁଇ ତମ୍ବେ ସତ୍‌କାତା କଇଲିନି । ଜନ୍ ଲକ୍ ପର୍ମେସର୍ ରାଇଜ୍ ପାଇ ନିଜର୍ ଗର୍ଦୁଆର୍, ମାଇଜିପିଲା, ବାଇବଇନି, ମାଆବାବା ଆରି ପିଲାଟକିକେ ଚାଡ଼ି ଆତେ ବଇଲେ, ୩୦ ତାକେ ଏ ଦୁନିଆର୍ ଜିବନେ, ସେ ଜେଡକି ଚାଡ଼ି ରଇଲା ତାର୍ ତେଇ ଅନି ଅଦିକ୍ ମିଲ୍ସି । ଆରି ପଟେ ତାକେ ନ ସାରବା ଜିବନ୍ ମିଲ୍ସି ।”

ଜିସୁ ଏଟାସଙ୍ଗ୍ ତିନ୍ତର୍ ଅଇଲା ତାର୍ ମରନର୍ କାତା କଇଲା

(ମାଡିଉ ୨୦:୧୭-୧୯; ମାର୍କ ୧୦:୩୨-୩୪)

୩୧ ତାର୍ ପଟେ ଜିସୁ ତାର୍ ବାର୍ଟା ସିସ୍ମାନକେ ବିନେ ଡାକିନେଇ କଇଲା, “ସୁନା ! ଆମେ ଜିରୁସାଲମେ ଗାଲୁନି, ଜନ୍‌ବେଲା ଆମେ କେଟ୍‌ରୁ ସେବେଲା ପର୍ମେସର୍ ଟାନେଅନି ଆଇଲା ନର୍ପିଲା, ମର୍ ବିସଇ ନେଇ ବବିସତ୍‌ବକ୍ତାମନ୍ ଲେକି ରଇଲା ସବୁ ବିସଇ ପୁରାପୁରନ୍ ଅଇସି । ୩୨ ସେଟା କାଇଟା ବଇଲେ, ଜିରୁସାଲମେ ମକେ ରମିୟ୍ ଲକ୍ମାନକେ ସର୍ପିଦେବାଇ ଆରି ସେମନ୍ ମକେ କିଜାଇବାଇ ଆରି ଲାଜ୍ କରାଇ, ମର୍ ଉପରେ ତୁକ୍‌ବାଇ । ୩୩ ତାର୍‌ପଟେ କର୍ତ୍ତା ସଙ୍ଗ୍ ମାର୍‌ବାଇ, ପଟେ ମକେ ମରାଇବାଇ । ମାତର୍ ତିନ୍ଦିନ୍ ପଟେ ମୁଇ ଆରି ତରେକ୍ ଜିବନ୍ ଅଇ ଉଟ୍‌ବି ।”

୩୪ ମାତର୍ ସିସ୍ମନ୍ ଏ ସବୁ କାତା ଅଲପ୍ ମିସା ବୁଜିନାପାରୁଲାଇ, ସେ ବିସଇ ସେମନ୍‌ଟାନେଅନି ଲୁଚିରଇଲା ।

ଆଁକି ନ ତିସ୍‌ବା ବିକାରିକେ ଜିସୁ ନିକକଲା

(ମାଡିଉ ୨୦:୨୯-୩୪; ମାର୍କ ୧୦:୪୬-୫୨)

୩୫ ଜିସୁ ଜିରିଅ ଗତେ କେଟାକେଟି ଅଇଲାବେଲେ ଗଟେକ୍ କାଣା ବାଟ୍‌ପାଲି ବସି ବିକ୍ ମାଙ୍ଗ୍‌ତେ ରଇଲା । ୩୬ ଜିସୁର୍ ସଙ୍ଗ୍ ଜିବା ଲକର୍ କାତା ସୁନି, “ଏଟା କାଇଟା ଅଇଲାନି ?” ବଲି ତେଇ ରଇଲା ଲକ୍‌ମନ୍‌କେ ପାଟାରିଲା ।

୩୭ ସେ ଲକ୍‌ମନ୍ କାଣାକେ କଇଲାଇ, “ନାଜରିତ୍ ଗାଉଁର୍ ଜିସୁ ଏ ବାଟେ ଗାଲାନି ।”

୩୮ ତେଇ ସେ ଆଉଲିଅଇ କଇଲା, “ଏ ଦାଉଦ୍ ରାଜାର୍ କୁଟୁମର୍ ପିଲା ଜିସୁ ! ତମେ ମକେ ଦୟା କରା ।”

୩୯ ଆଗେ ଜିବା ଲକ୍‌ମନ୍ କାଣାକେ ଦମ୍‌କାଇ କରି ତୁପ୍‌ଅଇ ରଇବାକେ କଇଲାଇ । ମାତର୍ ସେ ଅଦିକ୍ ଅଦିକ୍ ଆଉଲି ଅଇ “ଏ ଦାଉଦ୍ ରାଜାର୍ କୁଟୁମର୍ ପିଲା ଜିସୁ ! ମକେ ଦୟା କରା !” ବଲି କଇଲା । ୪୦ ଜିସୁ ତାର୍ କାତା ସୁନି ଟିଆ ଅଇଲା ଆରି, “ତାକେ ମର୍ ଲଗେ ଆନା” ବଲି ଆଦେସ୍ ଦେଲା । ୪୧ କାଣା ବିକାରି ଜିସୁର୍ ଲଗେ ଆଇଲାଜେ, ଜିସୁ ତାକେ ପାଟାରିଲା, “ମୁଇ ତର୍‌ପାଇ କାଇଟା କର୍‌ବି ବଲି ମନ୍ କଲୁସ୍‌ନି ?” ସେ ଜିସୁକେ “ଏ ମାପୁରୁ, ମକେ ଦେକ୍‌ବା ବପୁ ଦିଆ । ସେନ୍ତି ମକେ ନିମାନ୍ କରିଦେ ।” ବଲି କଇଲା ।

୪୨ ତେବେ ଜିସୁ ତାକେ କଇଲା, “ତୁଇ ଦେକ୍‌ବାକେ ପାଆ ! ମୁଇ ତର୍ ଆଁକି ନିକ କର୍‌ବି କାଇକେ ବଇଲେ, ତୁଇ ମର୍‌ତେଇ ବିସ୍‌ବାସ୍ କରି ଆତୁସ୍ ।” ୪୩ ସେ ଦାପୁରେ, ସେ କାଣା ଦେକି ପାରିଲା । ଆରି ପର୍‌ମେସର୍‌କେ ଦନିଅବାଦ୍ କରିକରି ଜିସୁର୍ ସଙ୍ଗ୍ ଗାଲା । ଏ ଗଟ୍‌ନା ଦେକ୍‌ଲା ସବୁ ଲକ୍‌ମନ୍ ପର୍‌ମେସର୍‌ର୍ ଡାକ୍‌ପୁଟା କଲାଇ ।

## ୧୯

### ଜିସୁ ଆରି ଜକିୟ

୧ ଜିସୁ ଆରି ତାର୍ ସିସ୍‌ମନ୍ ଜିରିଅ ବାଟେ ଜାଇତେ ରଇଲାଇ । ୨ ତେଇ ଜକିୟ ନାଉଁର୍ ଗଟେକ୍ ମୁକିଅ ସିସ୍‌ତୁମାଙ୍ଗୁ ରଇଲା । ସେ ବେସି ସାଉକାର୍ ରଇଲା । ୩ ଜିସୁ କେନ୍ତାର୍ ଲକ୍ ବଲି ଦେକ୍‌ବାକେ ଜକିୟ ମନ୍ କର୍‌ତେ ରଇଲା । ମାତର୍ ଜିସୁର୍ ସଙ୍ଗ୍ ବେସି ଲକ୍‌ମନ୍ ଜାଇତେ ରଇଲାଇକେ ତାକେ ଦେକିନାପାର୍‌ତେ ରଇଲା । କାଇକେବଇଲେ ସେ ବୁଟି ରଇଲା । ୪ ସେଟାର୍ ପାଇ ସେ, ଲକ୍‌ମନ୍ ଆଗ୍‌ତୁ ପାଲାଇ ଜାଇ ଜିସୁକେ ଦେକ୍‌ବାକେ ଗଟେକ୍ ତୁମ୍‌ରି ଗଟେ ଚଗ୍‌ଲା । କାଇକେ ବଇଲେ ଜିସୁ ସେ ବାଟ୍‌ଦେଇ ଜିବାର୍ ରଇଲା । ୫ ଜିସୁ ସେ ଜାଗାଇ କେଟି ଉପ୍‌ରେ ଦେକିକରି ଜକିୟକେ କଇଲା, “ଜକିୟ ବିଗି ଉତ୍‌ରି ଆଉ, ଆଜି ମୁଇ ତମର୍ ଗରେ ରଇବି ।”

୬ ତାର୍ ପଟେ ଜକିୟ ଦାପୁରେ ଉତ୍‌ରି ଆସି ବେସି ସାର୍‌ଦାଅଇ ଜିସୁକେ ତାର୍ ଗରେ ଡାକିନେଲା । ୭ ସେଟା ଦେକି ତେଇ ରଇଲା ଲକ୍‌ମନ୍ ଜିସୁ ଗଟେକ୍ ପାପି ଲକର୍ ଗରେ କାଇବାକେ ଗାଲାନି ବଲି ଗୁର୍‌ମୁରି ଜାଇତେରଇଲାଇ ।

୮ ଜକିୟ ଟିଆଅଇ ଜିସୁକେ କଇଲା, “ଏ ମାପୁରୁ, ସୁନା ! ମର୍ ସଁପତିଅନି ଅଦାବାଗ୍ ଗରିବ୍ ଲକ୍‌ମନ୍‌କେ ଦାନ୍ କରିଦେବି । ଆରି ସିସ୍‌ତୁ ମାଙ୍ଗ୍‌ବା ବେଲାଇ କାର୍‌ଟା ଅନିଆଇକରି ଆନି ରଇଲାଟା ମୁଇ ଚାର୍‌ଗୁନ୍ ଅଦିକ୍ ବାଉଡାଇ ଦେବି ।”

୯ ଜିସୁ ଜକିୟକେ କଇଲା, “ଆଜି ଏ ଗରେ ମୁକ୍ତି ମିଲ୍‌ଲା । କାଇକେବଇଲେ ଏ ମିସା ଗଟେକ୍ ଅର୍‌ରାଆମର୍ ନାତିତିତି । ୧୦ \*ପର୍‌ମେସର୍ ଟାନେଅନି ଆସିରଇବା ନର୍‌ପିଲା ମୁଇ ପାପେ ରଇଲା ଲକ୍‌ମନ୍‌କେ ସେମନ୍‌ର୍ ପାପେଅନି ରକିଆ କର୍‌ବାକେ ଆସିଆଟି ।”

ସୁନା ଟାଙ୍ଗାର୍ କାତାନି  
(ମାଡିଉ ୨୫:୧୪-୩୦)

୧୧ ସେମାନେ ଜିରୁସାଲମ୍ ଲଗେ ଆଇଲା ବେଲାଇ ଜିସୁସ୍ ସଙ୍ଗେ ଜିବା ଲକ୍ଷ୍ୟମନ୍ ତାର କଇବା ସବୁ କାତା ସୁନ୍ତେ ରଇଲାଇ । କାଇକେବଇଲେ ତାର କାତା ସୁନ୍ତଲା ଲକ୍ଷ୍ୟମନ୍ ପରମେସରର୍ ରାଇଜର୍ ସାସନ୍ ଦାପ୍ତରେ ଅଇସି ବଲି ବାଦ୍ତେ ରଇଲାଇ । ୧୨ ସେଟାରପାଇ ସେ ଏ କାତାନି କଇଲା, ଗଟେକ୍ ବଡ଼ ଗରେ ଜନମ୍ ଅଇଲା ଲକ୍ଷ୍ୟମନ୍ ଦେସେ ଜିବାକେ ତିଆର୍ ଅଇଲା । କାଇକେ ବଇଲେ ତେଇ ତାକେ ରାଜା କରାଇବାଇ । ସମାନ୍ ବେଲାଇ ତାର ଦେସେ ସେ ବାଉଡ଼ି ଆଇସି । ୧୩ ତାର ଆଗ୍ତୁ ସେ ତାର ଦସ୍ତା ଦାଙ୍ଗଡ଼ାମନ୍କେ ଡାକି, ଗଟେକ୍ ଗଟେକ୍ ଲକ୍ଷ୍ୟକେ ଗଟେକ୍ ଗଟେକ୍ ସୁନାର୍ ତାବୁ ଦେଇ କରି କଇଲା, “ମୁଇ ବାଉଡ଼ି ଆଇବାଜାକ ଏ ତାବୁ ବେବାର୍ କରି ରୁଡେକ୍ କରି ରୁଆ ।”

୧୪ ମାତର୍ ତାର ଦେସର୍ ଲକ୍ଷ୍ୟମନ୍ ତାକେ ଇନ୍ କରୁଡେରଇଲାଇ । ଆରି ସାସନ୍ କରୁବା ଲକ୍ଷ୍ୟମନ୍ ଲଗେ କବର୍ କଇ ପାଟାଇଲାଇ, “ଏ ଲକ୍ଷ୍ୟ ଆମ୍ବକେ ସାସନ୍ କରି ବଲି ଆମେ ମନ୍ କରୁନାଇ ।”

୧୫ ଏନ୍ତି ବଲି କଇଲେ ମିସା, ସେ ରାଜାଅଇ ଗରେ ବାଉଡ଼ି ଆଇଲା । ଆରି ସେ କାକେ କାକେ ସୁନାର୍ ତାବୁ ଦେଇ ରଇଲା, ସେମନ୍ କେତେକ୍ ଲାକା ଲାବ୍ କଲାଇ ଆଟଡ଼ ବଲି ଜାନ୍ବାକେ ତାକାଇ ପାଟାଇଲା । ୧୬ ତେଇ ପର୍ତୁତମର୍ ଲକ୍ଷ୍ୟ ଆସି କଇଲା, “ଏ ଆଗିଆଁ, ତମେ ଦେଲା ଗଟେକ୍ ସୁନାର୍ ତାବୁ ନେଇ ଆରି ଦସ୍ତା କଲିଆତି ।” ୧୭ ସେ ରାଜା ସାର୍ଦା ଅଇ ତାକେ କଇଲା “ତୁଇ ନିକ ଦାଙ୍ଗଡ଼ା, ଅଲପ୍ ବିସଇ ଦାଇଡ଼ ନେଇ କାମ୍ କଲୁସ୍ । ସେଟାରପାଇ ମୁଇ ତକେ ଦସ୍ତା ଗଡ଼ ଉପ୍ରେ ସାସନ୍ କରୁବାକେ ସର୍ପି ଦେଲିନି ।” ୧୮ ଆରି ଗଟେକ୍ ଲକ୍ଷ୍ୟ ଆସି କଇଲା, “ଆଗିଆଁ, ତୁଇ ଦେଇରଇଲା ସୁନାର୍ ତାବୁ ନେଇ ଆରି ପାଁଟଟା ଲାବ୍ କଲିଆତି ।” ୧୯ ସେ ରାଜା ତାକେ ମିସା କଇଲା “ତକେ ସାସନ୍ କରୁବାକେ ପାଁଟଟା ଗଡ଼ ସର୍ପିଦେଲିନି ।”

୨୦ ମାତର୍ ଆରି ଗଟେକ୍ ଦାଙ୍ଗଡ଼ା ରାଜାର୍ ଲଗେ ଆସି କଇଲା, “ଏ ଆଗିଆଁ, ତମେ ଦେଇରଇଲା ସୁନାର୍ ତାବୁ ଏଦେ ଦେକା, ଗଟେକ୍ ଗର୍ଣ୍ଣାଈ ଗୁଡ଼ିଆ ବାନ୍ଧି ସଙ୍ଗଇ ଦେଇରଇଲି । ୨୧ ତୁଇ ସାସନ୍ କରୁବା ଲକ୍ଷ୍ୟ ବଲି ଡରିକରି ମୁଇ ସେଟା ନେଇ ବେବାର୍ କରିନାଇ । କାଇକେବଇଲେ ଜାକେ ଦେଇ ନ ରଉସ୍ ତାର୍ଡେଇଅନି ମାଙ୍ଗିନେଇସୁ । ଆରି ଜନ୍ତି ବୁନି ନ ରଉସ୍ ତେଇଅନି କାଟି ନେଇସୁ ।” ୨୨ ସେ ରାଜା ରିସାଅଇ କଇଲା, “ଅଇରେ ଦାଙ୍ଗଡ଼ା, ତର୍ କାତା ଇସାବେ ଆକା ତକେ ବିଚାର୍ କରୁବି । ମୁଇ ଲକ୍ଷ୍ୟମନ୍ ଜନ୍ଟା ଦେଇ ନ ରଇ ସେଟା ମାଗିନେବି, ଆରି ଜନ୍ତେଇ ବୁନି ନ ରଇ ତେଇଅନି କାଟୁବି, ସେଟା ଜାନିରଇଲୁସ୍ । ୨୩ ସେନ୍ତାର୍ଆଲେ ମର୍ ସୁନାର୍ ତାବୁ କାଇକେ ବେକେ ସଙ୍ଗଊସ୍ ନାଇ ? ସଙ୍ଗଇ ରଇଲେ ତେଇଅନି ମକେ କଲକ୍ତର୍ ମିଲ୍ତା ।”

୨୪ ଆରି ସେ ଲଗେ ଚିଆଅଇଲା ଲକ୍ଷ୍ୟମନ୍କେ ରାଜା କଇଲା, “ତାର୍ ତେଇଅନି ଏ ଅଦଲି ମାଗିନେଇ ଜେ ଦସ୍ତା ଅଦଲି ଲାବ୍ କଲା ଆଟେ, ତାକେ ଦିଆସ୍ ।” ୨୫ ମାତର୍ ସେ ଲକ୍ଷ୍ୟମନ୍ ରାଜାକେ ପାଟାରୁଲାଇ, “ଏ ଆଗିଆଁ ତାର୍ଟାନେ ଦସ୍ତା ଆଟେ ଆରି ତାକେ କାଇକେ ଦେଉଁ ?” ୨୬ ସେ କଇଲା, “ମୁଇ ତମ୍ବକେ କଇଲିନି, ଜାକେ ଆଟେ ତାକେ ଅଦିକ୍ ଦିଆଅଇସି, ମାତର୍ ଜାର୍ ନାଇ, ତାର୍ଡେଇ ରଇଲା ଅଲପ୍ ମିସା ଚାଡ଼ାଇ ନିଆଅଇସି । ୨୭ ମାତର୍ ଜେମନ୍ ମୁଇ ତାକର୍ ରାଜା ଅଇବାକେ ମନ୍ ନ କରୁଡେ ରଇଲାଇ, ସେମନ୍କେ ଡାକି ଆନି ମର୍ ମୁଆଟେ ମରାଇଦିଆସ୍ ।”

ଜିସୁ ଜିରୁସାଲମ୍ ଜିତିକରି ଜିବାଟା  
(ମାତିଉ ୨୧:୧-୧୧; ମାର୍କ ୧୧:୧-୧୧; ଜଅନ୍ ୧୨:୧୨-୧୯)

୨୮ ଜିସୁ ଏ ସବୁ କାତା କଇସାରାଇ ସିସ୍ତାନର୍ ଆଗତୁ ଆଗତୁ ଜିରୁସାଲୀମ୍ ବାଟେ ଗାଲା । ୨୯ ଜେଡେବଲ୍ ଜିସୁ ଆରି ତାର୍ ସିସ୍ତାନ୍ ଜିଡ଼ଗର୍ତ୍ତମନ୍ ରଇଲା ତଙ୍ଗର୍ ପାଲି ଆରି ବେଡ଼ପାଗି ଆରି ବେଡ଼ନିଆ ଗଡେ କେଟ୍ଲାଇ, ସେ ସିସ୍ତାନର୍ ବିଡ଼ରେ ଅନି ଦୁଇ ଲକ୍‌କେ, ସେମନ୍ ଜିବା ଆଗତୁ ଏନ୍ତାରି କଇପାଟାଈଲା । ୩୦ ତମର୍ ମୁଆଟେ ରଇବା ଗାଏଁ ଜାଆ । ସେ ଗାଏଁ ଗାଲେ, କେ କେବେ ମିସା ଚଗିନରଇବା ଗଦପିଲା ବାନ୍ଦିଅଇରଇଲାଟା ଦେକସା । ତାକେ ମେଲି ଦାରିଆସା । ୩୧ ଜେ ଜଦି ତମ୍‌କେ “କାଇକେ ମେଲି ନେଲାସ୍‌ନି ?” ବଲି କଇଲେ “ଏଟା ଗୁରୁକେ ଦର୍‌କାର୍ ଆଟେ ବଲି କୁଆ ।”

୩୨ ପଟେ ସିସ୍ତାନ୍ ସେ ଗାଏଁ ଜାଇ, ଜିସୁ ଜେନ୍ତି କଇରଇଲା ସେନ୍ତି ଦେକ୍‌ଲାଇ । ୩୩ ଆରି ସେମନ୍ ସେ ଗଦପିଲାକେ ମେଲ୍‌ବାବେଲେ ଗଦ ପିଲାର୍ ସାଉକାର୍ ସେମନ୍‌କେ ପାଟାରୁଲା, “କାଇକେ ଗଦପିଲାକେ ମେଲ୍‌ଲାସ୍‌ନି ?”

୩୪ ସିସ୍ତାନ୍ କଇଲାଇ, “ଏ ଗଦପିଲା ଗୁରୁକେ ଦର୍‌କାର୍ ଆଟେ ।” ୩୫ ସିସ୍ତାନ୍ ଗଦ ପିଲାକେ ଜିସୁର୍ ଲଗେ ଆନି ନିଜର୍ ନିଜର୍ ଲୁଗା ଗଦର୍ ଉପରେ ତାବି ଜିସୁକେ ତାର୍ ଉପରେ ବସାଇଲାଇ । ୩୬ ଆରି ଜିସୁ ଗାଲା ବାଟେ ଲକ୍‌ମନ୍ ନିଜର୍ ନିଜର୍ ପଟିଆମନ୍ ଅଟାଇ ଦେଲାଇ ।

୩୭ ଜିସୁ ଜେଡେବଲ୍ ଜିଡ଼ଗର୍ତ୍ତମନ୍ ରଇଲା ଗଡ଼ଗଡ଼ା ଜାଗା ଲଗେ କେଟ୍ଲା, ସେବେଲା ତେଇ ରଇଲା ତାର୍ ଜେଡ଼କି ସିସ୍ ମାନ୍ଦା ସେ କରରଇଲା କାବାଅଇଜିବା କାମ୍ ଏତାଇ, ସାର୍‌ଦାଅଇ ଆଉଲିଅଇକରି ପର୍‌ମେସର୍‌କେ କୁଆର୍ କରି କଇଲାଇ, ୩୮ “ପର୍‌ମେସରର୍ ନାଉଁ ନେଇକରି ଜନ୍ ରାଜା ଆଇଲାନି ତାକେ ସେ ଆସିର୍‌ବାଦ୍ କର । ସର୍‌ଗେ ସାନ୍ତି ଅ, ଆରି ସବୁର୍‌ଗାନେ ଅନି ବଡ଼ ପର୍‌ମେସରର୍ ମଇମା ଅ ।”

୩୯ ସେ ସିସ୍ ମାନ୍ଦାର୍ ବିଡ଼ରେ କେଡେଟା ପାରୁସିମନ୍ ଜିସୁକେ କଇଲାଇ, “ଏ ଗୁରୁ ତର୍‌ସକ୍ ଆଇବା ସିସ୍ତାନ୍‌କେ ଚିମ୍‌ରାଅଇ ରଇବାକେ କଅ ।”

୪୦ ମାତର୍ ଜିସୁ ସେମନ୍‌କେ କଇଲା, “ମୁଇ ତମ୍‌କେ କଇଲିନି, ଏ ଲକ୍‌ମନ୍ ଚିମ୍‌ରାଅଇ ରଇଲେ ପାକ୍‌ନାମନ୍ ତାକର୍ ନିଜେ ନିଜେ ଆତଲି ଅଇବାଇ ।”

**ଜିସୁ ଜିରୁସାଲୀମ୍ ପାଇ କାନ୍ଦଲା**

୪୧ ଜିସୁ ଜିରୁସାଲୀମ୍ ଲଗେ କେଟ୍ଲା ବେଲେ ସେ ଗଡ଼ ଦେକି କାନ୍ଦିକରି କଇଲା, ୪୨ “ସାନ୍ତି ପାଇବାକେ କାଇଟା ଦର୍‌କାର୍, ସେଟା ଜଦି ତମେ ଆଜି ଜାନିରଇତାସ୍ ଆଲେ, କେତେ ନିକ ଅଇତା ! ମାତର୍ ସେସବୁ ଏବେ ତମେ ଦେକି ନାପାରୁଲାସ୍‌ନି । ୪୩ ସେଟାର୍‌ପାଇ ବଲି ଏନ୍ତି ବେସି ବାଦା ଅଇଜିବା ଦିନ୍ ଆଇସି । ତମର୍ ସଡ଼ରୁମନ୍ ତମର୍ ଚାରିବେଡ଼ି ପାରୁରି ବାନ୍ଦି ଅବ୍‌କାଇବାଇ ଆରି ଚାରିବେଡ଼ି ଅନି ତମର୍ ଉପରେ ମାଣ୍ଡି ଆଇବାଇ । ୪୪ ସେମନ୍ ତମ୍‌କେ ଆରି ତମର୍ ପାରୁରି ତେଇ ରଇବା ଲକ୍‌ମନ୍‌କେ ପୁରାପୁରୁନ୍ ନସାଇ କୁଟ୍‌କୁଟା କରିଦେବାଇ । ଗଟେକ୍ ପାକ୍‌ନା ମିସା ନିଜର୍ ଜାଗାଇ ନ ଚାଡ଼ । କାଇକେବଇଲେ ପର୍‌ମେସର୍ ତମ୍‌କେ ରକିଆ କର୍‌ବାକେ ଆସିରଇଲା, ସେବେଲା ତମେ ଜାନି ନାପାରୁଲାସ୍ ।”

**ଜିସୁ ମନ୍ଦିରେ ଗାଲା**

(ମାତିଉ ୨୧:୧୨-୧୭; ମାର୍କ ୧୧:୧୫-୧୯; ଜଅନ୍ ୨:୧୩-୨୨)

୪୫ ଆରି ଜିସୁ ଜିରୁସାଲୀମ୍ ମନ୍ଦିର୍ ବିଡ଼ରେ ପୁରିକରି ତେଇ ଗୋନାବିକା କର୍‌ବା ଲକ୍‌ମନ୍‌କେ ବାର୍‌କରାଇଦେବାର୍ ଦାରୁଲା । ୪୬ ସେମନ୍‌କେ କଇଲା, “ଦରମ୍ ସାସ୍‌ତରେ ଏନ୍ତାରି ଲେକାଅଇଲା ଆଟେ, ମର୍ ଗର୍ ପାର୍‌ତନା ଗର୍ ଅଇସି । ମାତର୍ ତମେ ସେଟା ଚର୍‌ମନର୍ ଲୁଟ୍‌ବା ଜାଗା କରିଆଟାସ୍ ।”

୪୭ \*ତାର୍ ପଟେ ଜିସୁ ସବୁଦିନେ ଜିରୁସାଲୀମ୍ ମନ୍ଦିରେ ସିକିଆ ଦେଇତେ ରଇଲା

\* ୧୯:୪୭ ୧୯:୪୭ ଲୁକ୍ ୨୧:୩୭

। ମାତର ମୁକିଅ ପୁଜାରିମନ୍, ସାସ୍ତର ସିକାଉମନ୍ ଆରି ନେତାମନ୍ ମିସି ଜିସୁକେ ମରାଇବାକେ ଚେସ୍ତା କରତେ ରଇଲା । ୪୮ କାଇକେ ବଇଲେ ଗୁଲାଲ ଲକ୍, ଜିସୁ ସିକାଇଦେବା କାତା ଆରି ସେ କଇତେରଇବା ପଦ୍ମନ୍ ମନ୍ଦିଆନ୍ ଦେଇ ସୁନ୍ତେ ରଇଲା । ତେବର୍ ପାଇ ସେମନ୍ କେନ୍ଦ୍ରା କର୍ବାର୍ ବଲି ବାଟ୍ ମିଲାଲ ନାପାର୍ତେତେ ରଇଲା ।

## ୨୦

ଜିସୁର୍ ଅଦିକାର୍ ବିସଏ ପରସନ୍

(ମାତିଉ ୨୧:୨୩-୨୭; ମାର୍କ ୧୧:୨୭-୩୩)

୧ ଦିନେକ୍ ଜିସୁ ମନ୍ଦିରେ ଲକ୍ମନ୍ଦକେ ମାପରୁର୍ ନିମାନ୍ କାତାର୍ ସିକିଆ ଦେଇତେରଇଲା । ସେବେଲାଲ ମୁକିଅ ପୁଜାରିମନ୍, ନିୟମ୍ ସିକାଇଦେବା ଲକ୍ମନ୍ ଆରି ପାର୍ତିନମନ୍ ଜିସୁର୍ ଲଗେ ଆସି ପାଟାରୁଲା । ୨ “ତୁଇ କାର୍ ଅଦିକାର୍ ମିଲାଲକରି ଏସବୁ ବିସଇ କଲୁସ୍ତି ? କେ ତକେ ଏ ଅଦିକାର୍ ଦେଲା ? ଆମ୍ବକେ କ ।”

୩ ମାତର ଜିସୁ କଇଲା, “ମୁଇ ମିସା ତମକେ ଗଟେକ୍ କାତା ପାଟାର୍ବି, ତମେ ମକେ କୁଆ । ୪ ଜଅନ୍ କାର୍ ଅଦିକାର୍ ମିଲାଲ ଲକ୍ମନ୍ଦକେ ତୁବନ୍ ଦେଇତେ ରଇଲା ? ସରଗର୍ ପର୍ମେସର୍ ଦେଲାଟାନେ ଅନି କି, ଲକ୍ମନ୍ଦଟାନେ ଅନି ?”

୫ ସେବେଲାଲ ସେମନ୍ ନିଜର୍ ନିଜର୍ ବିତ୍ତରେ ଦଦାପେଲା ଅଇଲା । ଜଦି ଜଅନ୍ ତୁବନ୍ ସରଗେଅନି ବଲି କଇଲେ, କାଇକେ ତାକେ ବିସ୍ବାସ୍ କରାସ୍ ନାଇ ? ବଲି କଇବାଇ । ୬ ମାତର ଆମେ ଲକ୍ମନ୍ଦଟେଇଅନି ବଲି କଇଲେ ସବୁ ଲକ୍ ଆମ୍ବକେ ପାକ୍ନା ମାର୍ବାଇ । କାଇକେ ବଇଲେ, ଜଅନ୍ ସତଇସେ ପର୍ମେସର୍ତେଇ ଅନି ଆଇଲା ବବିସତ୍ବକ୍ତା ବଲି ଆମ୍ବ ଜିଉଦି ଲକ୍ମନ୍ ବିସ୍ବାସ୍ କଲାଲନି । ୭ ଏଟା ବାବିକରି ସେମନ୍ “ଆମେ ନାଜାନୁ ।” ବଲି କଇଲାଲ ।

୮ ଆରି ଜିସୁ ସେମନ୍ଦକେ କଇଲା, “ଏନ୍ତି ବଇଲେ ମୁଇ ମିସା କାର୍ ଅଦିକାର୍ ମିଲାଲକରି ଏସବୁ ବିସଇ କଲିନି, ସେଟା ତମ୍ବକେ ନ କଇ ।”

ଅଙ୍ଗୁର୍ ବାତର ଆଦିବାଗ୍ ନେବା ତାସିମନ୍

(ମାତିଉ ୨୧:୩୩-୪୪; ମାର୍କ ୧୨:୧-୧୨)

୯ ତାର୍ ପଟେ ଜିସୁ ଲକ୍ମନ୍ଦକେ ବୁଜାଇବାକେ ଗଟେକ୍ କାତାନି କଇଲା । “ଗଟେକ୍ ଲକ୍ ତାର୍ ପଦାଇ ଅଙ୍ଗୁର୍ ତାସ୍ କରି, କେତେଟା ତାସିକେ ଆଦିବାଗ୍ କର୍ବାକେ ଦେଲା । ଦେଇକରି ସେ ବେସି ଦିନର୍ ପାଇ ଗଟେକ୍ ଦୁର୍ ଦେସେ ରଇବାକେ ଉଟିଗାଲା । ୧୦ ଆରି ଅଙ୍ଗୁର୍ ତଲ୍ଲବାବେଲା କେଟ୍ଲାକେ ସାଉକାର୍ ତାର୍ ଗଟେକ୍ ଦାଙ୍ଗ୍ତାକେ ତାର୍ ବାଗ୍ ମାଜି ଆନ୍ଦବାକେ ପାଟାଇଲା । ମାତର ସେ ଲକ୍ମନ୍ ତାର୍ ବାଗ୍ ନ ଦେଇ ତାର୍ ଦାଙ୍ଗ୍ତାକେ କୁଟ୍ କୁଟା ମାରି ରୁଟା ଆତେ ପାଟାଇଦେଲା । ୧୧ ତାର୍ ପଟେ ସେ ଆରି ଗଟେକ୍ ଦାଙ୍ଗ୍ତାକେ ପାଟାଇଲା । ସେମନ୍ ତାକେ ମିସା ମାରିକରି ନିନ୍ଦା କାତା କଇ, ଲାଜ୍ କରାଇକରି ରୁଟା ଆତେ ପାଟାଇ ଦେଲା । ୧୨ ତାର୍ ପଟେ ସାଉକାର୍ ଆରି ଗଟେକ୍ ଦାଙ୍ଗ୍ତାକେ ସେମନ୍ ଲଗେ ପାଟାଇଲା । ମାତର ସେ ଦାଙ୍ଗ୍ତାକେ ମିସା ରଗ୍‌ରଗା ଅଇତେ ମାରି କେଦିଦେଲା ।” ୧୩ ତାର୍ ପଟେ ସାଉକାର୍ ମନେ ମନେ ବାଟ୍ଲା, “ଏବେ ମୁଇ କାଇଟା କର୍ବି ? ମୁଇ ବେସି ଆଲାଦ୍ କର୍ବା ମର୍ ପିଲାକେ ପାଟାଇବି । ବାଇଦରେ ସେମନ୍ ତାକେ ମାନ୍ଦାଇ ।” ୧୪ ମାତର ସେମନ୍ ସେ ପିଲା ଆଇବାଟା ଦେକିକରି ତାକର୍ ବିତ୍ତରେ କାତାଅଇଲା, “ଏଟାସେ ସେ ସାଉକାର୍ ପିଲା, ଆମେ ଆକେ ମରାଇଦେଲେ ଏ ସବୁ ଦନ୍ ଆମ୍ବ ଅଇଜାଇସି । ୧୫ ଆରି ସେମନ୍ ସାଉକାର୍ ପିଲାକେ ବାଇରେ



ନେଇ ମାରି ମରାଇଦେଲା । ଏହି ବଇଲେ ସାଉକାର୍ ସେ ଲକ୍ଷ୍ମୀନକେ କାଇଟା କରଇରଇସି ? ୧୭ ମୁଇ ତମ୍ଭେ କଇଲିନି, ସେ ଆସିକରି ସେ ଲକ୍ଷ୍ମୀନକେ ମରାଇ ଦେଇସି । ଆରି ବଡ଼ ବିନଲକ୍ଷ୍ମୀନକେ ଆଦିବାଗ୍ କରବାକେ ଦେଇସି ।” ମାତର୍ କାତାନି ସୁନ୍ତେ ରଇଲା ଲକ୍ଷ୍ମୀନ କଇଲା, “ଏନ୍ତାର କେବେ ମିସା ନଅ ।”

୧୭ ମାତର୍ ଜିସୁ ଲକ୍ଷ୍ମୀନକେ ନିକ ଦେକିକରି କଇଲା,

“ଏହି ବଇଲେ ପର୍ତ୍ତେସରର୍ ସାସ୍ତରେ ଲେକାଅଇଲା ଅରଡ଼ କାଇଟା ?

ଗର୍ବାହବା ଲକ୍ଷ୍ମୀନ ଜନ୍ ପାକନା ‘ନଏ’ ବଲି ଚାଡ଼ି ଦେଇରଇଲାଇ ସେ ପାକନାସେ ଗର୍ କନର୍ ମୁଲ୍ ପାକନା ଅଇଲା ।

୧୮ ଜନ୍ ଲକ୍ଷ୍ମୀନ ସେ ପାକନା ଉପରେ ଅଦର୍ବାଇ, ସେମନ୍ କଣ୍ଟ କଣ୍ଟ ଅଇଜିବାଇ, ଆରି ସେ ପାକନା ଜାର୍ ଉପରେ ଅଦର୍ସି, ସେ ବଲି ଆଜିଜାଇସି ।”

ସିସ୍ତୁମାକ୍ଷ୍ମୀନ ଦେବା ବିସଇ ପାଚାରବାଟା

(ମାତିଉ ୨୨:୧୫-୨୨; ମାରକ ୧୨:୧୩-୧୭)

୧୯ ସେବେଲା ସାସ୍ତର୍ ସିକାଉମନ୍ ଆରି ମୁକିଅ ପୁଜାରିମନ୍ ଜିସୁର୍ କାତାନି ସୁନି, ତାକେ ଦାପ୍ତରେ ବନ୍ଦି କରବାକେ ବାଟ୍ କଜ୍ଜେତେ ରଇଲାଇ । କାଇକେ ବଇଲେ ଜିସୁ କଇବା ଅକ୍ଷୁର୍ ବାତର୍ କାତା, ସେମନ୍ର୍ ବିସଇନେଇ କଇଲାନି ବଲି ବୁଜ୍ଜଲାଇ । ମାତର୍ ସେମନ୍ ଲକ୍ଷ୍ମୀନକେ ଡର୍ତେତେ ରଇଲାଇ ।

୨୦ ସେଟାର୍ପାଇ ସେମନ୍ ତାର୍ ବୁଲ୍ ଦାରବାକେ ଗଟେକ୍ ସୁଜଗ୍ କଜ୍ଜେତେ ରଇଲାଇ । ସେମନ୍ କେତେଟା ଚର୍ମମନ୍କେ ଲାର୍ଦେଇ ଦରମ୍ ଲକ୍ଷ୍ମୀପାରି ଦେକାଇ ଅଇବାକେ ପାଟାଇଲାଇ । କାଇକେ ବଇଲେ ଜିସୁର୍ ଟଣ୍ଡେଅନି ବୁଲ୍କାତା ବାରକରାଇ, ଦସ୍ ଦାରି, ରମିୟ୍ ସାସନ୍କାରିଆକେ ସର୍ପି ଦେବାକେ ମନ୍କର୍ତେତେ ରଇଲାଇ । ୨୧ ସେଟାର୍ପାଇ ସେ ଚର୍ମମନ୍ ଜିସୁକେ ପାଚାରଲାଇ, “ଏ ଗୁରୁ, ତମେ ଟିକ୍ କଇଲାସ୍ନି ଆରି ଟିକ୍ ସିକାଇଲାସ୍ନି ବଲି ଆମେ ଜାନିଆଚୁ । କାରବାଟେ ନ ଅଇ ଲକ୍ଷ୍ମୀନର୍ ଜିବନର୍ପାଇ ପର୍ତ୍ତେସରର୍ ସଡ଼ ବିସଇସେ ସିକାଇଲୁସ୍ନି । ୨୨ ଏବେ ତୁଇ ଆମକେ କଅ, ରମିୟ୍ ସର୍କାରର୍ ରାଜା କାଇସର୍କେ ସିସ୍ତୁ ଦେବାଟା ଆମର୍ ନିୟମ୍ ଇସାବେ ଟିକ୍ କି ନାଇ ?”

୨୩ ମାତର୍ ଜିସୁ ସେମନ୍ର୍ ମନ୍ବିଡର୍ରର୍ କାତା ଜାନିକରି କଇଲା, ୨୪ “ମକେ ଗଟେକ୍ ରମିୟ୍ ସର୍କାରର୍ ଅଦଲି ତାରୁ ଦେକାଆ । ତେଇ କାର୍ ମୁର୍ତ୍ତି ଆରି କାର୍ ନାର୍ଡ଼ ଆଟେ ?” “କାଇସରର୍ ମୁର୍ତ୍ତି ଆରି ନାର୍ଡ଼ ଆଟେ ।” ବଲି ସେମନ୍ କଇଲାଇ ।

୨୫ “ସେନ୍ତାର୍ ରଇଲେ ଜନ୍ଟା କାଇସରର୍ଟା ସେଟା କାଇସର୍କେ ଦିଆସ୍, ଜନ୍ଟା ପର୍ତ୍ତେସରର୍ଟା ସେଟା ପର୍ତ୍ତେସର୍କେ ଦିଆସ୍ ।” ବଲି କଇଲା ।

୨୬ ଏ କାତା ସୁନି ସବୁଲକର୍ ମୁଆଟେ ସେମନ୍ ଜିସୁର୍ ବୁଲ୍ ଦାରବାର୍ ନାପାରଲାଇ । ଆରି ଜିସୁର୍ କାତା ସୁନି ସେମନ୍ କାବାଅଇଜାଇ, ତୁପ୍ଅଇ ରଇଲାଇ ।

ଆରିତରେକ୍ ଜିବନ୍ ଅଇ ଉର୍ବା ବିସଇ ନେଇ ପର୍ସନ୍

(ମାତିଉ ୨୨:୨୩-୩୩; ମାରକ ୧୨:୧୮-୨୭)

୨୭ ଡାର୍ ପଟେ କେତେଟା ସାଦୁକି ଲକ୍ଷ୍ମୀନ ଜିସୁର୍ ଲଗେ ଗାଲାଇ । ସେମନ୍, ମଲା ଲକ୍ଷ୍ମୀନ ଆରି ତରେକ୍ ଜିବନ୍ଅଇ ଉର୍ବା ବିସଇ ବିସବାସ୍ ନ କର୍ତେତେ ରଇଲାଇ । ୨୮ ସେମନ୍ ଜିସୁକେ ପାଚାରଲାଇ, “ଏ ଗୁରୁ, ମସା ଆମର୍ ପାଇ ଏହି ନିୟମ୍ ଲେକିଆଟେ ଜେ, ଗଟେକ୍ ଲକ୍ ବିବାଅଇ ପିଲାଟକି ନ ଅଇତେ ମରିଗାଲେ ତାର୍ ବାଇ ସେ ରାଣ୍ଡିମାଇଜିକେ ସଙ୍ଗଇସି । ଆରି ପିଲାଟକି ଅଇଲେ ତାର୍ ବଡ଼ବାଇର୍ କୁଟୁମ୍ ରକିଆ ଅଇସି । ୨୯ ଏହି ସାଡ଼ବାଇ ରଇଲାଇ । ପର୍ତ୍ତୁମ୍ ବାଇ ବିବା ଅଇ ପିଲାଟକି ନଇତେ ମରିଗାଲା । ୩୦ ତାର୍ ପଟେ ବଡ଼ମଜିଆ

☆ ୨୦:୨୨ ୨୦:୨୭ ପେରିଡ଼ ୨୩:୮

ରାଣ୍ଡିମାଉଜିକେ ସଙ୍ଗଇଲା । ମାତର ସେ ମିସା ପିଲାଟକି ନଇତେ ମରିଗାଲା ।  
 ୩୧ ତାର ପତେ ମଜିଆବାଇ ରାଣ୍ଡିମାଉଜିକେ ସଙ୍ଗଇଲାକେ ପିଲାଟକି ନଇତେ  
 ମରିଗାଲା । ସେନ୍ତି ସେ ରାଣ୍ଡିମାଉଜିକେ ସାଡ଼ ବାଇ ଜାକ ସଙ୍ଗଇ ପିଲାଟକି ନଇତେ  
 ମରିଗାଲା । ୩୨ ସାରାସାରି ପତେ ସେ ମିସା ମରିଗାଲା । ୩୩ ଏନ୍ତି ବଇଲେ  
 ମଲାତେଇଅନି ଉଟୁଲା ପତେ ସେ କାର୍ ମାଉଜି ଅଇସି ? କାଇକେ ବଇଲେ ସେମନ୍  
 ସାଡ଼ ଲକ୍‌ଜାକ ତାକେ ସଙ୍ଗଇ ରଇଲା ।”

୩୪ ଜିସୁ ସେମନ୍‌କେ କଇଲା, “ଏ ଜୁଗର ମାଉଜି ମନସ୍ ବିବା ଅଇବାଇ,  
 ୩୫ ମାତର ଜନ୍ ମାଉଜିମନସ୍ ମଲାଟାନେଅନି ଉଟି, ଆଇବା ଜଗତେ ଜିଇବା  
 କାଇବାକେ ବାଟିଅଇଆରଡ଼, ସେମନ୍ ବିବା ନ ଅଥଡ଼ । ୩୬ ସେମନ୍ ପରମେସରର  
 ଦୁଡ଼ମନରପାରା ଅଇ ଆରି କେବେମିସା ନ ମରଡ଼ । ପତେ ମଲାଟାନେଅନି ଉଟି  
 ପରମେସରର ପିଲାଟକି ଅଇ ରଇବାଇ । ୩୭ ମସା ବଲ୍ଲ କରି ବୁଜାଇ ଦେକାଇଦେଇ  
 ଆତେ । ମଲା ଲକ୍‌ମନ୍ ଜିବନ୍ ଅଇ ଉଟୁବାଇ । ଲାଗତେ ରଇବା ବୁଟାର କାତାଇ,  
 ମସା ଅବରାଆମର ପରମେସର, ଇସାକର ପରମେସର ଆରି ଜାକୁବର ପରମେସର  
 ବଲ୍ଲି ପରମେସରକେ ଜାନାଇ ଆତେ । ୩୮ ପରମେସର ମଲା ଲକ୍‌ମନର ମାପୁରୁ  
 ନର୍ସ, ଜିବନ୍ ରଇଲା ଲକ୍‌ମନର ମାପୁରୁ । ପରମେସରର ଦେକ୍‌ବା ଇସାବେ ତେଇ  
 ସେମନ୍ ସବୁ ଲକ୍ ଜିବନ୍ ଅଇଆରଡ଼ ।”

୩୯ ତାର ପତେ କେତେଟା ସାସ୍‌ତର ସିକାଉମନ୍ “ଏ ଗୁରୁ ତୁଇ ବଡେ ନିକସଙ୍ଗ  
 ଉତର ଦେଇଆରୁସ୍ !” ବଲ୍ଲି ଜିସୁକେ କଇଲା । ୪୦ କାଇକେବଇଲେ ଜିସୁକେ  
 ଆରି କେ ମିସା ପରସନ୍ ପାଟାରବାକେ ସାଆସ୍ କରଡ଼ ନାଇ ।

ମସିଅ କାର୍ ପିଲା ?

(ମାତିଉ ୨୨:୪୧-୪୬; ମାର୍କ ୧୨:୩୫-୩୭)

୪୧ ତାର ପତେ ଜିସୁ ତାର କାତା ସୁନ୍‌ବା ଲକ୍‌ମନ୍‌କେ ପାଟାରଲା, “ପରମେସର  
 ବାଟିପାଟାଇଲା କିରିସ୍‌ଟ ଦାଉଦ୍ ରାଜାର ନାତିତିତି ବଲ୍ଲି ଲକ୍‌ମନ୍ କାଇକେ  
 କଇଲାଇନି ?”

୪୨ କାଇକେ ବଇଲେ ଦାଉଦ୍ ରାଜା ଗିଡ଼ସଙ୍ଗିତା ବଇତେଇ ନିଜେ ଏନ୍ତି ଲେକି ଆତେ,  
 ପରମେସର ମର୍ ମାପୁରୁକେ କଇଲା,

୪୩ ମୁଇ ତର ବିରଦିମନ୍‌କେ ଆରାଇକରି ତର ପାଦ୍‌ତଲେ ସଙ୍ଗଇବା  
 ପିତାପାରା ନ କରୁବା ଜାକ,  
 ତୁଇ ମର୍ ଉଜାବାଟେସେ ବସି ର ।

୪୪ ଜଦି ଦାଉଦ୍ ରାଜା କିରିସ୍‌ଟକେ ମାପୁରୁ ବଲ୍ଲି ତାକି ରଇଲେ ଆରି କିରିସ୍‌ଟ  
 କେନ୍ତି ଦାଉଦ୍ ରାଜାର ନାତିତିତି ଅଇସି ? ବଲ୍ଲି ପାଟାରଲା ।

ଜିସୁ ସାସ୍‌ତର ସିକାଇବା ଲକ୍‌ମନ୍‌କେ ଜାଗରଡ଼ କରାଇଲା

(ମାତିଉ ୨୩:୧-୩୬; ମାର୍କ ୧୨:୩୮-୪୦)

୪୫ ସେବେଲା ସବୁ ଲକ୍‌ମନ୍ ଜିସୁ ସିକାଇବା ବିସଇ ସୁନ୍‌ତେ ରଇଲାବେଲେ, ସେ  
 ତାର ସିସ୍‌ମନ୍‌କେ କଇଲା, ୪୬ “ନିୟମ୍ ସିକାଇବା ଲକ୍‌ମନରତେଇଅନି ଜାଗରଡ଼  
 ରୁଆ । ସେମନ୍ ନିମାନ୍ ପଟିଆ ପିନ୍ଦି ବୁଲ୍‌ବାକେ ମନ୍ କରୁବାଇ । ଆଟେବାଟେ  
 ଜୁଆର୍ ପାଇବାକେ, ପାର୍‌ତନା ଗରର ମୁକିଆ ଜାଗାଇ ବସ୍‌ବାକେ, ଆରି ବଜିତେଇ  
 ସବୁ ଲକ୍‌ରଟାନେଅନି ଆଗୁଡ଼ ବସ୍‌ବାକେ ମନ୍ କରୁବାଇ । ୪୭ ସେମନ୍ ଲାଜ୍ ନଅଇ  
 ରାଣ୍ଡି ମାଉଜିମନ୍‌କେ ନାଡ଼ାଇକରି ସେମନ୍‌ର ଦନ୍‌ସିପତି କୁରି ନେବାଇ । ମାତର  
 ସେମନ୍ ନିମାନ୍ ଲକ୍‌ରପାରା ଦେକାଇଅଇବାଇ । ଆରି ଲକ୍‌ମନର ମୁଆଟେ ବେସି  
 ଲମାଇକରି ପାର୍‌ତନା କରୁବାଇ । ଏନ୍ତାରି ଲକ୍‌ମନ୍‌କେ ପରମେସର ବେସି ବଡ଼ ଡଣ୍ଡ  
 ଦେଇସି ।”

# ୨୧

ଗଟେକ୍ ରାଣ୍ଡିମାଲଜିର ଚାନ୍ଦା

୧ ତାର୍ ପଚେ ଜିସୁ ଚାରିବେଡ଼ି ଦେକ୍ଲା ଆରି ସାଉକାର୍ ଲକ୍ମନ୍ ମନ୍ଦିରର୍ ପେଟିଆଟାନେ ଦାନ୍ ଦେବାଟା ଦେକ୍ଲା । ୨ ସେବେଲା ଗଟେକ୍ ଅରକିଡ଼ ରାଣ୍ଡି ମାଲଜି ମିସା ଜଡେକ୍ ତାମାକାସୁ ଦେବାଟା ଜିସୁ ଦେକ୍ଲା । ୩ “ମୁଇ ତମ୍ବେକେ ସତ୍ କାତା କଇଲିନି, ସବୁ ଲକର୍ଟାନେଅନି ଏ ରାଣ୍ଡିମାଲଜି ଅଦିକ୍ ଦେଲା ଆଚେ । ୪ କାଇକେ ବଇଲେ ସାଉକାର୍ ଲକ୍ମନ୍ ନିଜର୍ ନିଜର୍ ଅଗଲ୍ଲା ଦନଡେଇଅନି ଅଲପ୍ ଅଲପ୍ ଦେଲାଲ ଆଚଡ଼ । ମାତର୍ ଏ, ନିଜେ ବର୍ତ୍ତା ପାଇ ତାର୍ ଜେଡ଼କି ରଇଲା ସବୁ ଦେଲା ଆଚେ ।”

ମନ୍ଦିର ବସଲ୍ଲାଟା  
(ମାତିଉ ୨୪.୩-୧୪; ମାର୍କ ୧୩.୩-୧୩)

୫ କେଡେଟା ସିସ୍ତମନ୍ ମନ୍ଦିରର୍ ବିସଇ ନେଇକରି ନିଆଇ କର୍ତେ ରଇଲାଲ । “ଡେଇ ଲାଦିରଇବା ସୁନ୍ଦର୍ ସୁନ୍ଦର୍ ପାକ୍ନା ଆରି ପର୍ତମେସର୍ତ୍ତେକେ ସର୍ପି ଦେଲା ଦାନ୍ ସଙ୍ଗ୍ କେଡେକ୍ ସୁନ୍ଦର୍ ଗର୍ ବାନ୍ଦିଲାଲ ଆଚଡ଼” ବଲି କାତାଅଇଡେ ରଇଲାଲ । ୬ “ଏନ୍ତି ଦିନ୍ ଆଇସି, ଏବେ ତମେ କାଇ କାଇଟା ଦେକ୍ଲାସ୍ତନି ସେଟା ସବୁ କୁରୁପ୍ନାସ୍ ଜାଇସି । ଗଟେକ୍ ପାକ୍ନା ମିସା ତାର୍ ଜାଗାଇ ନ ରଏ । ସବୁ ମାଟିଡେଇ ମିସି ଜାଇସି ।”

ଦୁକ୍ ଆରି ତାଡ଼ନା  
(ମାତିଉ ୨୪.୩-୨୪; ମାର୍କ ୧୩.୩-୧୩)

୭ ତାର୍ ପଚେ ସେମନ୍ ଜିସୁକେ ପାଚାର୍ଲାଲ, “ଏ ଗୁରୁ, ଏଟା ସବୁ କେବେ ଅଇସି ? ଆରି ଏ ସବୁ ଗଟ୍ଟନା କେଟ୍ଟବା ଆଗତୁ ସେଟା କେଡେବଲ୍ ଅଇସି ବଲି କେନ୍ତି ଚିନି ଅଇସି ?”

୮ ଜିସୁ ସେମନ୍କେ କଇଲା, “ଜାଗର୍ତ୍ତଅଇକରି ରୁଆ, ନାତାଇ ଉଆ ନାଇ । ବେସି ଲକ୍ ମର୍ ନାଉଁଦାରି ଆସି କଇବାଇ, ‘ମୁଇ ସେ ଆକା ।’ ବେଲା କେଟ୍ଟଲା ଆଚେ, ମାତର୍ ତମେ ସେମନ୍ ପଚେ ଜାଆ ନାଇ । ୯ ଆରି କେବେ ତମେ ଜୁଇଦ୍ ଆରି କିରମାର ଅଇବାଟା ସୁନ୍ସା, ସେବେଲା ତରା ନାଇ । କାଇକେ ବଇଲେ ଏ ସବୁ ଗଟ୍ଟନା ଆଗତୁ ଅଇସିସେ । ମାତର୍ ଏ ଦୁନିଆର୍ ସେସ୍ ଦିନ୍ ସେଦାପ୍ରେ ନ ଆସେ ।”

୧୦ ଆରି ଜିସୁ କଇଲା, “ଦେସ୍ ବିରୁଦେ ଦେସ୍ ଆରି ଜାତି ବିରୁଦେ ଜାତି ଉଟ୍ଟି । ୧୧ ଦର୍ତନି ଚୁଲ୍ଚୁଲ୍ସି । ବଡ଼ ରଗ୍ମନ୍ ଅଇସି ଆରି ଆକାସେ କେବେ ନ ଅଇବା କାବା ଅଇଜିବା ଚିନ୍ମନ୍ ତିସ୍ସି । ୧୨ ମାତର୍ ଏ ସବୁ ବିସଇ ନ ଅଇବା ଆଗତୁ, ତମ୍ବେକେ ବାନ୍ଦିକରି ନେଇ ସାସ୍ତି ଦେବାଇ, ପାର୍ତନା ଗର୍ମନ୍କେ ବିଗର୍ କରି ବନ୍ଦିଗରେ ପାକାଇବାକେ ସର୍ପିଦେବାଇ । ମର୍ପାଇ ତମେ ରାଜା ଆରି ସାସନ୍ କାରିଆମନ୍ ମୁଆଚେ ଚିଆ ଅଇସା । ୧୩ ମର୍ ବିସଇ ତମେ ବିନ୍ ଲକ୍ମନ୍କେ କଇବାକେ ଗଟେକ୍ ସମାନ୍ ବେଲା ଅଇସି । ୧୪ ଡେବର୍ ପାଇ ‘ମୁଇ ନିଜକେ କେନ୍ତି ରକିଆ କର୍ବି ?’ ସେ ବିସଇ ବାନ୍ଦିକରି ଆଗେଅନି ଚିନ୍ତା କରା ନାଇ । ୧୫ କାଇକେ ବଇଲେ ମୁଇ ତମ୍ବେକେ ଚିକ୍ପଦ୍ କଇବାକେ ଗିଆନ୍ ଦେବି । ତମ୍ବେକେ ବିରଦ୍ କର୍ବା ଲକ୍ମନ୍ ସେ ଗିଆନ୍ ବାଦୁଲେ କାଇଟା କଇନାପାରଡ଼ । ୧୬ ଆରି ତମ୍ବେକେ ମାଆ ବାବା, ବାଇ, ନିଜର୍ ଲାଗାର୍ ଲିଡାର୍ ଲକ୍, ମଇଡର୍ମନ୍ ଆରି କୁଚୁମର୍ ଲକ୍ମନ୍, ତମ୍ବେକେ ବିରଦିମନ୍କେ ସର୍ପି ଦେବାଇ ଆରି ତମ୍ବେକେ ବିଡ଼ରେ ଅନି କେଡେ ଲକ୍କେ ମରାଇଦେବାଇ । ୧୭ ତମେ ମର୍ତଡେଇ ବିସ୍ବାସ୍ କଲାସ୍ତନି ବଲି ଗୁଲାଇ ଲକ୍ମନ୍

☆ ୨୧:୧୪ ୨୧:୧୪ ଲୁକ ୧୨:୧୧,୧୨

ତମ୍ଭେକେ ଇନ୍ କରୁବାଇ । ୧୮ ମାତରୁ ତମର ମୁଣ୍ଡରୁ ଚେଣ୍ଡି ମିସା ଗଟେକ୍ ନ ନସେ । ୧୯ ତମେ ଡାଟ୍‌ଅଇ ରଇଲେ ଏ ସବୁ ବିସଇ ମୁରୁଟିକରି, ତମର ଆତ୍‌ମାକେ ରକ୍ଷିଆ କରୁସା ।”

**ଜିରୁସାଲମ୍ ନସ୍ତ ଅଇଜାଇସି**  
(ମାତିଉ ୨୪:୧୫-୨୧; ମାର୍କ ୧୩:୧୪-୧୯)

୨୦ “ମାତରୁ ଜେଡେବଲ୍ ତମେ ଜିରୁସାଲମ୍ ଗଡେ ବିରଦି ସନିଅମନ୍ ଚାରିବେଡୁଡି କିନ୍ଦ୍ରି ରଇବାଟା ଦେକ୍‌ସା ବଇଲେ, ସେବେଲା ଜିରୁସାଲମ୍ ନସ୍ତ ଅଇବା ବେଲା ଲଗେ କେଟ୍‌ଲା ବଲି ଜାନା । ୨୧ ସେବେଲାକେ କେ କେ ଜିଉଦା ଦେସେ ରଇବାଇ, ସେମନ୍ ତଙ୍ଗରୁ ବିଡରେ ପାଲାଅଡ । କେ କେ ଗଡୁ ବିଡରେ ରଇବାଇ ସେମନ୍ କେନେ ମିସା ବର୍ତ୍‌ବାକେ ପାଲାଅଡ । କେ କେ ଗଡୁ ବାଇରେ ରଇବାଇ ସେମନ୍ ଗଡୁ ବିଡରେ ନ ପୁରଡ । ୨୨ କାଇକେ ବଇଲେ ସେଟା ସାସ୍‌ତରରୁ ସବୁ ବିସଇ ଜେଣ୍ଡିକି ସିଦ୍ ଅଇସି, ସେଟାର ପାଇ ସେ ଦିନ୍‌ମନ୍ ବେସି ତଣ୍ଡ ପାଇବା ଦିନ୍‌ମନ୍ ଅଇସି । ୨୩ ସେ ଦିନ୍‌ମନ୍‌କେ ଗାଗଡେ ରଇବା ମାଇଜିମନ୍ ଆରି ଦୁଦ୍ କୁଆଇଡେରଇବା ମାଆମନରୁ କେଡେକ୍ ଦୁକ୍‌ର ଦିନ୍ ଅଇସି । ଏ ଦେସରୁ ଲକ୍‌ମନ୍‌କେ ଅପରୁବଲ୍ ଦୁକ୍ ଆଇସି ଆରି ସେମନ୍ ତଣ୍ଡ ପାଇବାଇ । ୨୪ କେଡେ ଲକ୍‌କେ କାଣ୍ଡାଉଦାରୁ ସଙ୍ଗ୍ ମରାଇବାଇ ଆରି କେଡେ ଲକ୍‌ମନ୍‌କେ ବନ୍ଦିକରି ବିନ୍‌ବିନ୍ ଦେସେ ଦାରିଜିବାଇ । ଜିଉଦି ନଇଲା ଲକ୍‌ମନରୁ ବେଲା ନ ସାରୁବାଜାକ ଜିରୁସାଲମ୍ ବିନାସ୍ କରୁବାକେ ଚାଡିଦେବାଇ ।”

**ନରପିଲା ଆଇବାଟା**  
(ମାତିଉ ୨୪:୨୯-୩୧; ମାର୍କ ୧୩:୨୪-୨୭)

୨୫ \* “ବାଦ୍‌ଲେ, ବେଲ୍‌ଟାନେ, ଜନ୍‌ଟାନେ ତାରାମନରୁଟାନେ କେବେ ନ ଡିସବା ତିନ୍‌ମନ୍ ଡିସସି । ଦୁନିଆରୁ ସବୁ ଦେସରୁ ଲକ୍, ବେସି ଦୁକ୍ କସଟ୍ ପାଇବାଇ । ଜେଡେବେଲା ସମ୍‌ଦୁରରୁ ବଡୁ ଲଅଡି ଗରଜ୍‌ଲେ ଲକ୍‌ମନ୍ କାଇଟା କରୁବାରୁ ଆଟେ କାଇଟା ନାଇ ବଲି ବାୟାବିକଲ୍ ଅଇଜିବାଇ । ୨୬ ଆରି ଲକ୍‌ମନ୍ ଦୁନିଆଇ ଆଇବା ସବୁ ଗଟ୍‌ନା ଦେକିକରି ‘କାଇକେ ଏନ୍ତି ଅଇଲାନି ?’ ବଲି ଡରିକରି କେଡେ ଲକ୍ ମୁରୁଟା ଅଇଜିବାଇ । କାଇକେ ବଇଲେ ଆକାସେ ରଇଲା ସବୁ ବିସଇ ପରୁମେସର ଚୁଲ୍‌ଚୁଲାଇ ଦେଇସି । ୨୭ \* ସେବେଲାକେ ଲକ୍‌ମନ୍ ପରୁମେସର ଡେଇଅନି ଆସିରଇବା ନରପିଲା ମୁଇ, ବେସି ବପୁସଙ୍ଗ୍ ଆରି ତାକ୍‌ପୁଟାଅଇକରି ବାଦ୍‌ଲେ ଆଇବାଟା ଦେକ୍‌ବାଇ । ୨୮ ମାତରୁ ଏ ସବୁ ଗଟ୍‌ନା ଆରାମ୍ ଅଇଲେ ତମେ ଡାଟ୍‌ସଙ୍ଗ୍ ଟିଆଅଇ ଉପରେ ଦେକା । କାଇକେ ବଇଲେ ତମରୁ ରକ୍ଷିଆ ପାଇବା ଦିନ୍ ଲଗେ ଆଟେ ।”

**ଡୁମ୍‌ରି ଗଟରୁ ସିକିଆ**  
(ମାତିଉ ୨୪:୩୨-୩୫; ମାର୍କ ୧୩:୨୮-୩୧)

୨୯ ଆରି ଜିସୁ ସେମନ୍‌କେ ଗଟେକ୍ ଉଦାଅରନ୍ କଇଲା, “ଡୁମ୍‌ରି ଗଟ୍ ଆରି ବିନ୍ ସବୁ ଗଟରୁ କାତା ଚିନ୍ତା କରା । ୩୦ ଜେଡେବେଲେ ତାରୁ କେନ୍ଦିଅନି ପତରୁ ପାଲୁଆନି କରୁସି, ଆରି କାଁଟାପଡୁରିଆ ଡିସ୍‌ଲେ କାରାଦିନ୍ କେଟ୍‌ଲା ବଲି ତମେ ଜାନୁସା । ୩୧ ସେନ୍ତାରିସେ ଏ ସବୁ ବିସଇ ଅଇବାଟା ଦେକ୍‌ଲେ ପରୁମେସରରୁ ରାଇଜ୍ କେଟି ଆଇଲା ବଲି ଜାନୁସା ।”

☆ ୨୧:୨୫ ୨୧:୨୫ ପରୁକାସିତ ୬:୧୨, ୧୩ ☆ ୨୧:୨୭ ୨୧:୨୭ ପରୁକାସିତ ୧୭

୩୨ “ମୁଇ ତମ୍ଭକେ ସତ୍‌କାତା କଇଲିନି । ମନେ ରକା, ଏବେ ଜିବନ୍ ରଇବା ସବୁ ଲକ୍‌ମାନର୍ ମରନ୍ ଅଇବା ଆଗ୍ତୁ ଏ ସବୁ ଗଟ୍‌ସି । ୩୩ ସରଗ୍ ଆରି ମତ୍‌ପୁର୍ ନସି ଜାଇସି, ମାତର୍ ମର୍ ବାକିଅ କେବେ ନ ନସେ ।”

ସବୁବେଲା ଜାଗରତ୍ ରୁଆ

୩୪ “ମାତର୍ ତମେ ନିଜର୍ ନିଜର୍ ବିସଇ ନେଇକରି ଜାଗରତ୍ ରୁଆ । ତମର୍ ମନ୍ ସବୁବେଲାଇ ବଜିବାଡ୍ କରି ମଦ୍ ପେଣ୍ଡୁମ୍ କାଇବା ବିସଇ ଆରି କେନ୍ତାର୍ ଜିଇବାଡ୍ ଅଇସି କେନ୍ତାର୍ ନାଇ ବଲି ଚିନ୍ତାକରି ରଇଲାବେଲେ, ସେ ଦିନ୍ ଅଟାଡ୍ ପାନ୍ ପାରି ଆସି ଲାଗିଜାଇସି । ୩୫ ସେନ୍ତାରିସେ ଏ ଦୁନିଆର୍ ସବୁ ଲକ୍‌କେ ସେଟା ଗଟ୍‌ସି । ୩୬ ସେ ଦିନ୍‌ମନ୍‌କେ ଗଟ୍‌ବା ସବୁ ବିସଇ ଦେଇ, କାଇ ବିପଦ୍ ନ ଅଇ ଜିବାକେ ଆରି ପର୍‌ମେସର୍ ପାଟାଇରଇବା ନର୍‌ପିଲା ମର୍ ମୁଆଟେ ଚିଆ ଅଇବାକେ, ପାର୍‌ତନା କରି ଜାଗରତ୍ ଅଇରୁଆ ।”

୩୭ ☆ଜିସୁ ସେ ଦିନ୍‌ମନ୍‌କେ ମନ୍‌ରେ ଜାଇ ନିମାନ୍ କାତା ସିକାଇ ଦେଇତେ ରଇଲା । ଆରି ତାର୍ ସିସ୍‌ମନ୍‌ ସଙ୍ଗ୍ ସବୁ ରାତି ବାରିଜାଇ ଜିତ୍ ନାଉର୍ ତଙ୍ଗ୍‌ରେ ବିତାଇତେ ରଇଲା । ୩୮ ବେସି ଲକ୍ ଜିସୁର୍ କାତା ସୁନ୍‌ବାକେ ସବୁ ଦିନ୍ ସାକାଲେ ମନ୍‌ରେ ଜାଇତେରଇଲାଇ ।

## ୨୨

ଜିସୁର୍ ବିରଦେ ସତ୍‌ଜ୍‌ତର୍

(ମାତିଉ ୨୬:୧-୫; ମାର୍କ ୧୪:୧-୨; ଜଅନ୍ ୧୧:୪୫-୫୩)

୧ କମିର୍ ନ ପାକାଇ ରୁଚି ତିଆର୍ କରବା ପରବ୍ ଜାକେକି ନିସ୍‌ତାର୍ ପରବ୍ ବଲି ମିସା କଇବାଇ, ସେ ପରବ୍ ଲଗାଲଗି କେଟି ଆଇତେ ରଇଲା । ୨ ଆରି ମୁକିଅ ପୁଜାରିମନ୍, ସାସ୍‌ତର୍ ସିକାଉମନ୍ ଲକ୍‌ମନ୍‌କେ ତର୍‌ତେ ରଇଲାଇ । ଜିସୁକେ କେନ୍ତ ଲୁଟ୍‌ତେ ମରାଉ ? ବଲି ବାଟ୍ କଜ୍‌ତେ ରଇଲାଇ ।

ଜିସୁକେ ଦାରାଇ ଦେବାକେ ଜିଉଦା ରାଜି ଅଇଲା

(ମାତିଉ ୨୬:୧୪-୧୬; ମାର୍କ ୧୪:୧୦-୧୧)

୩ ଆରି ଜିସୁର୍ ବାର୍‌ଟା ସିସ୍‌ମନ୍‌ ବିତ୍‌ରେଅନି ଇସ୍କାରିୟ୍‌ଡ୍ ଜିଉଦା ନାଉର୍ ଗଟେକ୍ ସିସ୍ ରଇଲା । ସେବେଲାଇ ତାର୍ ମନ୍ ବିତ୍‌ରେ ସଇତାନ୍ ପୁରିଦେଲା । ୪ ଆରି ସେ ମୁକିଅ ପୁଜାରିମନ୍ ଆରି ମନ୍‌ର୍ ଜାଗି ରଇବା ସେନାପତିମନ୍‌ ଲଗେ, କେନ୍ତକରି ଜିସୁକେ ବିସ୍‌ବାସେ ବିସ୍ ଦେଲା ପାରି କରି, ତାକେ ଦାରାଇଦେବି ବଲି ସେମନ୍‌ ସଙ୍ଗ୍ କାତାବାର୍‌ତା ଅଇବାର୍ ଗାଲା । ୫ ସେଟାର୍‌ପାଇ ସେ ଲକ୍‌ମନ୍‌ ବେସି ସାର୍‌ଦା ଅଇକରି ତାକେ ତାବୁ ଦେବାକେ ରାଜି ଅଇଲାଇ । ୬ ଜିଉଦା ମିସା ରାଜି ଅଇଲା ଆରି ଲକ୍‌ମନ୍‌ ନ ଜାନ୍‌ତେ ଜିସୁକେ ଦାରାଇଦେବାକେ ସୁଜଗ୍ କଜ୍‌ତେରଇଲା ।

ନିସ୍‌ତାର୍ ପରବର୍ ବଜିର୍‌ପାଇ ଜିସୁ ଜାଗରତ୍ ଅଇଲା

(ମାତିଉ ୨୬:୧୭-୨୫; ମାର୍କ ୧୪:୧୨-୨୧; ଜଅନ୍ ୧୩:୨୧-୩୦)

୭ ତାର୍‌ପଚେ ନିସ୍‌ତାର୍ ପରବର୍ ବଜି କରି ମେଣ୍ଡାପିଲା ମାର୍‌ବା ଦିନ୍ ଆଇଲା । ୮ ଜିସୁ, ପିତର୍ ଆରି ଜଅନ୍‌କେ ଏ କାତା କଇ ପାଟାଇଲା । “ଜା ଆରି ଆମର୍‌ପାଇ ନିସ୍‌ତାର୍ ପରବର୍ ବଜି କାଇବାକେ ଟିକ୍ କରା ।”

୯ ସେମନ୍ ଜିସୁକେ ପାଟାଇଲାଇ, “ଆମେ କନ୍ ଜାଗାଇ ବଜି ତିଆର୍‌କର୍‌ବୁ ବଲି ତମେ ମନ୍ କଲାସିନି ?”

୧୦ ଜିସୁ ସେମାନଙ୍କେ କଇଲା, ଦେକା, ତମେ ଗଡ଼ ବିତ୍ତରେ ପୁରବା ବେଲେ ଗଟେକ୍ ଆଣ୍ଟିଡେଇ ପାନିନେଇ ଜିବା ଲକ୍‌କେ ବେଟ୍‌ପାଇସା । ସେ ଜନ୍ ଗରେ ପୁରସି, ତାର ପଟ୍‌ପଟ୍ ଜାଇ ସେ ଗରର୍ ସାଉକାରକେ କୁଆ, ୧୧ “ଆମର୍ ଗୁରୁ ତମ୍‌କେ ଏ କବର୍ କଇ ପାଟାଇଆଟେ, ମୁଇ ଆରି ମର୍ ସିସ୍‌ମନ୍ କନ୍ ବାକ୍‌ରାଇ ରକିଆ ପାଇବା ପରବର୍ ବଜି ମାନୁ ? ୧୨ ତାର୍‌ପଟେ ସେ ଲକ୍ ତମ୍‌କେ ଗର୍ ଉପରେ ରଇବା ମଅଲା ତିଆର୍ ଅଇରଇଲା ଗଟେକ୍ ବଡ଼ ବାକ୍‌ରା ଦେକାଇ ଦେଇସି । ତେଇ ତମେ କାଦି ତିଆର୍ କରା ।”

୧୩ ସେମନ୍ ଜାଇକରି ଜିସୁ ସେମାନଙ୍କେ ଜେନ୍ତି କଇରଇଲା ସେନ୍ତିସେ ଦେକ୍‌ଲାଇ । ଆରି ନିସ୍‌ତାର୍ ପରବର୍ ବଜି ତିଆର୍ କଲାଇ ।

**ପରୁ ବଜି**

(ମାତିଉ ୨୬:୨୬-୩୦; ମାର୍କ ୧୪:୨୨-୨୬; ୧ମ କରନ୍ତିୟ ୧୧:୨୩-୨୫)

୧୪ ସମାନ୍ ବେଲା କେଟ୍‌ଲାକେ ଜିସୁ ପେରିଡ଼ମନ୍‌ର୍ ସଙ୍ଗ୍ କାଇବାକେ ମିସ୍‌ତେ ବସ୍‌ଲାଇ । ୧୫ ସେବେଲା ଜିସୁ ସେମାନଙ୍କେ କଇଲା, “ମୁଇ ଦୁକ୍ କସ୍‌ଟ ପାଇବା ଆଗ୍‌ତୁ ନିସ୍‌ତାର୍ ପରବ୍ ତମ୍‌ର୍‌ସଙ୍ଗ୍ ମିସ୍‌ତେ କର୍‌ବାକେ ବେସି ମନ୍ କରିରଇଲି । ୧୬ ମୁଇ ତମ୍‌କେ କଇଲିନି, ପର୍‌ମେସରର୍ ରାଇଜେ ଏଟା ପୁରାପୁରୁନ୍ ନ ଅଇବାଜାକ, କେବେ ମିସା ଏଟା ନ କାଇ ।”

୧୭ ଆରି ସେ ଅଙ୍ଗୁର୍ ରସ୍ ଦାରି ପର୍‌ମେସର୍‌କେ ଜୁଆର୍ କରି କଇଲା, “ଏଟା ନେଇ ତମ୍‌ର୍ ନିଜର୍ ନିଜର୍ ବିତ୍ତରେ ବାଟା କରା । ୧୮ ମୁଇ ତମ୍‌କେ କଇଲିନି ପର୍‌ମେସରର୍ ରାଇଜ୍ ନ ଆଇବା ଜାକ, ଏ ରସ୍ କେବେ ମିସା ନ କାଇ ।”

୧୯ ଆରି ରୁଟି ଦାରିକରି ପର୍‌ମେସର୍‌କେ ଦନିଅବାଦ୍‌ଦେଇ ବାଙ୍ଗାଇ ସେମାନଙ୍କେ ଦେଇକରି କଇଲା, “ଏଟା ମର୍ ଗାଗଡ଼, ଜନ୍‌ଟା ତମ୍‌ର୍ ପାଇ ଦିଆଅଇଲା ଆଟେ । ମକେ ଏତାଇବା ପାଇ ଏଟା କରା ।” ୨୦ ସେନ୍ତାରିସେ କାଇଲା ପଟେ ସେ ମୁତାଇ ଅଙ୍ଗୁର୍ ରସ୍ ଦାରି କଇଲା, “ଏ ମୁତା ମର୍ ବନିତେଇ, ପର୍‌ମେସର୍ ଲକ୍‌ମନ୍‌ର୍ ସଙ୍ଗ୍ କଲା ନୁଆ ରାଜିନାମା । ଏଟା ତମ୍‌ର୍‌ପାଇ ଜରୁଲା ମର୍ ବନି ।”

୨୧ “ମାତର୍ ଦେକା ଇତି ମର୍‌ସଙ୍ଗ୍ ବସି କାଇବା ଗଟେକ୍ ଲକ୍‌ସେ ବିରଦି ଲକ୍‌ମନ୍‌ର୍ ଆଟେ ମକେ ଦାରାଇ ଦେଇସି । ୨୨ ପର୍‌ମେସରର୍‌ଟା‌ନେଅନି ଆଇଲା ନର୍‌ପିଲା ମୁଇ, ସେ ଜେନ୍ତି ଜନ୍‌ନା କଲାଆଟେ, ସେନ୍ତାରିସେ ମର୍‌ବାକେ ଅଇସି । ମାତର୍ ଜନ୍ ଲକ୍ ମକେ ବିସ୍‌ବାସେ ବିସ୍ ଦେଲାପାରା ବିରଦିମନ୍‌ର୍ ଆଟେ ଦାରାଇ ଦେଇସି, ତାକେ ବେସି ଡଣ୍ଟ ମିଲ୍‌ସି ।”

୨୩ ସେବେଲାଇ ସିସ୍‌ମନ୍ ସେମନ୍‌ର୍ ବିତ୍ତରେ କାତା ଅଇଲାଇ, “ଏନ୍ତି ବଇଲେ ଆମର୍ ବିତ୍ତରେ କେ ଜିସୁକେ ସେନ୍ତି କର୍‌ସି ?”

**କେ ବଡ଼ବଲି କାତାବାର୍‌ତା ଅଇଲାଇ**

୨୪ \*ତାର୍ ପଟେ ସେମନ୍‌ର୍ ବିତ୍ତରେଅନି କେ ବଡ଼ ବଲି ଦଦାପେଲା ଅଇଲାଇ । ୨୫ ଜିସୁ ସେମାନଙ୍କେ କଇଲା, “ଏ ଦୁନିଆର୍ ରାଜାମନ୍ ସେମନ୍‌ର୍ ଲକ୍‌ମନ୍‌କେ ନିଜର୍ ଅଦିକାର୍ ଦେକାଇ ସାସନ୍ କର୍‌ବାଇ । ଆରି ସେମନ୍, ଆମେ ଲକ୍‌ମନ୍‌କେ ଦରମ୍ କର୍‌ବା ଲକ୍ ବଲି ଡାକ୍‌ପୁଟା ଅଇବାଇ । ୨୬ \*\*ମାତର୍ ତମ୍‌ର୍ ବିତ୍ତରେ ଏନ୍ତି ନ ଉଆ । କେ ବଡ଼ ସେ ସାନ୍ ଅ । ଆରି କେ ନେତା ରଇସି ସେ ସବୁଲକ୍‌ର୍ ସେବା କର୍‌ବାର୍ ଆଟେ । ୨୭ \*ଏ ଦୁନିଆର୍ ଇସାବେ, ବସିକରି କାଇବା ଲକ୍ ବଡ଼ କି, ବାଟାକରି ଦେବା ଲକ୍ ବଡ଼ ? ବସିକରି କାଇବା ଲକ୍ ସେ ବଡ଼ ଅଇସି । ମାତର୍ ମୁଇ ସେନ୍ତି ନଇ । ମୁଇ

\* ୨୨:୨୪ ୨୨:୨୪ ମାତିଉ ୧୮:୧; ମାର୍କ ୯:୩୪; ଲୁକ୍ ୯:୪୬    \* ୨୨:୨୬ ୨୨:୨୬ ମାତିଉ ୨୩:୧୧; ମାର୍କ ୯:୩୫    \* ୨୨:୨୭ ୨୨:୨୭ ମାତିଉ ୨୦:୨୫-୨୭; ମାର୍କ ୧୦:୪୨-୪୪    \* ୨୨:୨୭ ୨୨:୨୭ ଜଅନ୍ତି ୧୩:୧୨-୧୫

ତମର ବିତ୍ତରେ ବାଟାକରି ଦେବା ଲକ୍ଷ୍ମୀ ପାଠା । ୨୮ ତମେ ମରୁ ସବୁ ପରିକାଟାନ୍ତେ ମରୁସଙ୍ଗ ରଇ ଆଇଲାସିନି । ୨୯ ମରୁ ବାବା ପରମେସର ଜେନ୍ତି ସାସନ୍ କରବାକେ ମକେ ତାର ରାଇଜର ଅଦିକାର ଦେଲା ଆତେ, ସେନ୍ତି ମୁଇ ମିସା ତମକେ ଅଦିକାର ଦେବି । ୩୦ \*ଆରି ତମେ ମରୁ ରାଇଜେ ମରୁସଙ୍ଗ ବସି କାଆପିଆ କରସା । ରାଜ୍‌ଗାଦି ବସି ଇସ୍ରାଏଲର ବାରଟା ଜାତିର ଲକ୍ଷ୍ମୀମକେ ସାସନ୍ କରସା ।”

ଜିସୁ ପିତରକେ ମକେ ନାଜାନି ବଲି କଇସୁ ବଲି କଇଲା  
(ମାତିଉ ୨୬:୩୧-୩୫; ମାର୍କ ୧୪:୨୭-୩୧; ଜଅନ୍ ୧୩:୩୬-୩୮)

୩୧ “ଏ ସିମନ୍, ସିମନ୍ ! ସୁନ୍ ! ଚାସି ଜେନ୍ତି ଦାନ୍ ଉତାଲିକରି ପଟ୍ ବିନେ କରସି, ସେନ୍ତାରି ସଇତାନ୍ ତମକେ ତେରେପେତେ କରବାକେ ଆଦେସ୍ ପାଇଲା ଆତେ । ୩୨ ମାତର ତର ବିସ୍‌ବାସ୍ ଉନା ନ ଅ ବଲି ମୁଇ ପାର୍‌ତନା କଲିଆତି । ସେ ପରିକାଇ, ବିସ୍‌ବାସେ ତାଟ୍‌ଅଇ, ଜିତି ଆଇଲେ ତର ବାଇମନକେ ମିସା ସେନ୍ତି ତାଟ୍ କରାଇସୁ ।”

୩୩ ସେବେଲାଇ ସିମନ୍ ଜିସୁକେ କଇଲା, “ଏ ମାପରୁ ମୁଇ ତରସଙ୍ଗ ବନ୍ଦି ଗରେ ଜିବାକେ ଆରି ମରୁବାକେ ମିସା ରାଜି ଆତି ।”

୩୪ ତାର ପଚେ ଜିସୁ କଇଲା, “ଏ ପିତର ମୁଇ ତକେ କଇଲିନି, ତୁଇ ଏବେ ଏନ୍ତି କଇଲୁସିନି, ମାତର ଆଜି ରାତି କୁକ୍‌ତା ନ ତାକ୍‌ବା ଆଗତୁ ମକେ ତିନିତର ନାଜାନି ବଲି କଇସୁ ।”

ବେସନି, ମୁନା ଆରି କାଣ୍ଡା

୩୫ \*ଜିସୁ ତାର ସିସ୍‌ମନକେ ପାଚାରଲା । “ମୁଇ ତମକେ ପାଚାଇଲାବେଲେ ବେସନି, ମୁନା ଆରି ପାଣ୍ଡାଜ ନ ନେବାକେ କଇରଇଲି । ସେବେଲାଇ ତମକେ କାଇ ଅବାସ୍ ଅଇଲା କି ?” “ନାଇ, କାଇଟା ମିସା ଅବାସ୍ ଅଏ ନାଇ ।” ବଲି କଇଲାଇ । ୩୬ ଆରି ସେ କଇଲା, “ମାତର ଏବେ ତମକେ କଇଲିନି, ବେସନି କି ମୁନା ରଇଲେ ନିଆ । ଆରି ଜାକେ କାଣ୍ଡା ନାଇ, ସେ ପିସ୍‌ବାଟା ବିକି କାଣ୍ଡା ଗେନ । ୩୭ ମୁଇ ତମକେ କାଇକେ କଇଲିନି ‘ସେ ଅପରାଦିମନର ସଙ୍ଗ୍ ସିମନ୍ ଦସା ପାଇଲା’ ବଲି ସାସ୍‌ତରେ ଲେକା ଅଇଲା କାତା ସିଦ୍ ଅଇବାକେ ଗାଲାନି ।”

୩୮ ସିମନ୍ ଜିସୁକେ କଇଲା, “ଏ ମାପରୁ, ଦେକା ଆମର ବିତ୍ତରେ ଜତେକ୍ କାଣ୍ଡା ଆତେ ।” ଜିସୁ କଇଲା, “ସେଡ୍‌କି ଅଇସି ।”

ଜିସୁ ଜିତ୍ ତଙ୍ଗରେ ପାର୍‌ତନା କରବାକେ ଗାଲା

(ମାତିଉ ୨୬:୩୬-୪୨; ମାର୍କ ୧୪:୩୬-୪୨)

୩୯ ତେଇଅନି ଜିସୁ ଗଡ୍ ଚାଡି ଆଗତୁର ଅବିଆସ୍ ଇସାବେ ଜିତ୍‌ନାଉଁର ତଙ୍ଗରେ ପାର୍‌ତନା କରବାକେ ଗାଲା । ସିସ୍‌ମନ୍ ମିସା ତାର ସଙ୍ଗ୍ ରଇଲାଇ । ୪୦ ଆରି ସେ ଜାଗାଇ କେଟିକରି ସିସ୍‌ମନକେ କଇଲା, “ତମେ ପରିକାର୍ ପାନ୍ଦେ ନ ଲାଗାଇ ଅଇବାକେ ପାର୍‌ତନା କରା ।”

୪୧ ତାର ପଚେ ଜିସୁ ତାକ୍‌ତେଇଅନି କଣ୍ଡେକ୍ ଦୁର ଜାଇ ମାଣ୍ଡିକୁଟା ଦେଇକରି ପାର୍‌ତନା କରବାର୍ ଦାରଲା । ୪୨ “ଏ ବାବା, ତୁଇ ମନକଲେ ଏ କସ୍‌ଟର ମୁତା ମରତେଇଅନି ଦୁରିକେ ନେ । ମାତର ମୁଇ ମନ୍ କଲା ଇସାବେ ନାଇ, ତର ମନକଲା ଇସାବେ ସିଦ୍ ଅ ।” ୪୩ ସେଡ୍‌କିବେଲେ ଏଦେ ଦେକା ! ପରମେସରର ଗଟେକ୍ ଦୁଡ୍ ଆସି ଜିସୁକେ ଦେକାଇଅଇଲା ଆରି ତାଟ୍‌ସଙ୍ଗ୍ ରଇବାକେ ବପୁଦେଲା । ୪୪ ମାତର ଜିସୁ ଅଦିକ୍ ବିକଲ୍ ଅଇ, ମନ୍‌ଦିଆନ୍ ଦେଇ ପାର୍‌ତନା କରବାର୍ ଦାରଲା । ତାର ଗାଗତର ଜାଲ୍ ପାନି, ବନିପାରା ଜରଜର ଅଇ ବୁଏଁ ତିପିଗାଲା ।

୪୫ ଆରି ଜିସୁ ପାର୍ତନା କରିସାରାଇ ସିସ୍ତାନର୍ ଲଗେ ଗାଲା । ସେମନ୍ ସବୁ ଲକ୍ ଦୁକ୍ ଅଇକରି ତାକିଜାଇ ସଇରଇଲାଟା ସେ ଦେକ୍ଲା । ୪୬ ତେଇ ସେମନ୍ କେ କଇଲା, “ତମେ କାଇକେ ସଇଦେଇ ଆଗସ୍ ? ଉଟା ପରିକାର୍ ପାନ୍ଦେ ନ ଲାଗାଇ ଅଇବାକେ ପାର୍ତନା କରା ।”

ଜିସୁକେ ସତ୍ତରୁମନ୍ ବନ୍ଦି କଲାଇ

(ମାତିଉ ୨୬:୪୭-୫୨; ମାର୍କ ୧୪:୪୩-୫୦; ଜଅନ୍ ୧୮:୩-୧୧)

୪୭ ଜେତେବଲ୍ ଜିସୁ ଏ କାତା କଇତେରଇଲା ଗାଦି ଲକ୍ମନ୍ ତେଇ ଆଇଲାଇ । ଜିସୁର୍ ବାଟା ସିସ୍ତାନର୍ ବିତ୍ତରେଅନି ଜିଉଦା ନାଉର୍ ସିସ୍, ସେମନ୍ ଆଗତୁ ଅଇ ସେମନ୍ କେ ତାକିଆନ୍ଲା, । ଆରି ଜିସୁକେ ତୁମିକରି ସେମନ୍ କେ ଚିନାଇଦେଲା । ୪୮ ଜିସୁ ଜିଉଦାକେ ପାଚାରୁଲା, “ଏ ଜିଉଦା ପର୍ମେସର୍ତେଇ ଅନି ଆଇଲା ନରପିଲା ମକେ, ତୁଇ ବିରଦି ଲକ୍ମନ୍ କେ ତୁମିକରି ଦାରାଇଦେଲୁସ୍ନି କି ?”

୪୯ ସେ ବିରଦି ଲକ୍ମନ୍ ଜିସୁକେ ବନ୍ଦିକରି ଦାରିଜିବାଇ ବଲି ସିସ୍ତାନ୍ ଜାନ୍ଲାଇ । ସେବେଲାଇ ସିସ୍ତାନ୍ ଜିସୁକେ ପାଚାରୁଲାଇ, “ଏ ମାପ୍ତୁ, ଆମର୍ କାଣ୍ଡା ବେଟ୍ଟୁ କି ?” ୫୦ ସିସ୍ତାନର୍ ବିତ୍ତରେଅନି ଗଟେକ୍ ଲକ୍, ବଡ୍ ପୁଜାରିର୍ ଗତିଦାଙ୍ଗ୍ଡାଉ ଉଜା କାନ୍ ଚିତ୍ତେ କାଟିପାଇଲା ।

୫୧ ଏଟା ଦେକି ଜିସୁ କଇଲା, “ନିତୁ” । ସେ ଚିତ୍ତୁଲା କାନ୍ ଚିଇକରି ନିକ କଲା ।

୫୨ ଜିସୁ ତାକେ ବନ୍ଦି କରବାକେ ଆଇଲା ମୁକିଅ ପୁଜାରିମନ୍ କେ, ମନ୍ଦିର୍ ଜାଗି ରଇବା ସେନାପତିମନ୍ କେ ଆରି ପାର୍ତନମନ୍ କେ କଇଲା, “ମୁଇ କାଇ ତାକୁ କି ? ମକେ ଦାରବାକେ ବଡ୍ ବଡ୍ ଟେଙ୍ଗ୍ ଆରି କାତିକାଣ୍ଡା ଦାରି ଆସି ଆଗସ୍ । ୫୩ ସବୁ ଦିନେତା ମୁଇ ମନ୍ଦିରେ ତମର୍ ସଙ୍ଗ୍ ରଇଲି, ମାତର୍ ତମେ ମକେ ବାନ୍ଦାସ୍ ନାଇ । ଏବେ ବେଲା କେଟ୍ଟୁଲା ଆଟେ । ମକେ କାଇଟାମିସା କରବାକେ ପର୍ମେସର୍ ସଇତାନ୍ କେ ଅନୁମତି ଦେଲାଆଟେ ।”

ଜିସୁକେ ପିତର୍ ନାଜାନି ବଲି କଇଲା

(ମାତିଉ ୨୬:୫୭-୫୮, ୬୯-୭୫; ମାର୍କ ୧୪:୫୩-୫୪, ୬୭-୭୨; ଜଅନ୍ ୧୮:୧୨-୧୮, ୨୫-୨୭)

୫୪ ତାର୍ ପଟେ ସେମନ୍ ଜିସୁକେ ବାନ୍ଦିକରି ବଡ୍ ପୁଜାରିର୍ ଗରେ ଦାରିଗାଲାଇ । ପିତର୍ ଦୁରିକେ ରଇ ସେମନ୍ ପଟେପଟେ ଗାଲା । ୫୫ ସନିଅମନ୍ ଜଇଲାଗାଇ ଚାରିବେଡ୍ଡି ବସ୍ଲାଇ । ପିତର୍ ମିସା ସେମନ୍ ସଙ୍ଗ୍ ବସ୍ଲା । ୫୬ ଗଟେକ୍ ଗତିଦାଙ୍ଗ୍ଡି ପିତର୍ କେ ଜଇପାଲି ବସ୍ଲାଟା ନିକକରି ଦେକି କଇଲା, “ଏ ଲକ୍ ମିସା ଜିସୁର୍ ସଙ୍ଗ୍ ରଇଲା !”

୫୭ ମାତର୍ ପିତର୍ ରାଜି ନ ଅଇ କଇଲା, “ଏ ଗତିଦାଙ୍ଗ୍ଡି, ତାକେ ମୁଇ ମୁଲ୍ କେ ନାଜାନି ।”

୫୮ ତନେକ୍ ରଇଲା ପଟେ ଆରି ଗଟେକ୍ ଲକ୍ ପିତର୍ କେ ଦେକି କଇଲା, “ତୁଇ ମିସା ତାର୍ ସଙ୍ଗ୍ ରଇଲୁସ୍ ।” ମାତର୍ ପିତର୍ ତାକେ କଇଲା, “ମୁଇ ନଇ ।”

୫୯ ଗଟେକ୍ ଗାଁଟା ଗାଲାପଟେ ଆରି ଗଟେକ୍ ଲକ୍ ପିତର୍ କେ ଦେକି କଇଲା, “ଏ ଲକ୍ ମିସା ନିଜେ ତାର୍ ସିସ୍ତାନର୍ ସଙ୍ଗ୍ ରଇଲା । ଆକେ ମୁଇ ନିକକରି ଜାନି । କାଇକେ ବଇଲେ ସେ ଗଟେକ୍ ଗାଲିଲିର୍ ଲକ୍ ।” ୬୦ ଏଟା ସୁନି ପିତର୍ ସେ ଲକ୍ କେ କଇଲା, “ଏ ବାଇ ତୁଇ କାଇଟା କଇଲୁସ୍ନି ? ମୁଇ ବିଲ୍ କୁଲ୍ ନାଜାନି ।” ସେ କାତା ପିତର୍ କଇଲା ଦାପ୍ରେ, କୁକ୍ତା ତାକ୍ଲା । ୬୧ ସେବେଲେ ଜିସୁମାପ୍ତୁ ପିତର୍ କେ ପାସ୍ଲି ନିମାନ୍ କରି ଦେକ୍ଲା । ଜିସୁ ଆଗତୁ କଇଲା କାତା ସେ ଏତାଇଲା । ସେ ତାକେ କଇରଇଲା ତୁଇ ମକେ ଆଜି କୁକ୍ତା ତାକ୍ବା ଆଗତୁ ତିନ୍ତର୍ ନାଜାନି, ବଲି



କଇସୁ । ୬୨ ସେଟାରପାଇ ପିତର ସେଟା ଏତାଇ, ଦୁକ୍ ଅଇ ତାଣ୍ଡେଅନି ବିନେ ଜାଇ ବେସି କାନ୍ଦଲା ।

ଜିସୁକେ ମାରଲାଇ

(ମାତିଉ ୨୭:୨୭-୨୮; ମାର୍କ ୧୪:୨୫)

୬୩ ଜିସୁକେ ଦାରିକରି ସଙ୍ଗଇରଇଲା ଲକ୍ମନ୍ ତାକେ ମାରିମାରି କିଜାଇଲାଇ ।  
 ୬୪ ଆରି ତାର୍ ଆଁକି ବାନ୍ଧିକରି ତାକେ ପାଟାରଲାଇ, “ତକେ କେ ମାରଲା, କଅ ?”  
 ୬୫ ଆରି କେତେଟା କାତା କଇ ତାକେ ନିନ୍ଦା କଲାଇ ।

ଜିସୁକେ ବଡ଼ ସବାତେଇ ଆନ୍ଲାଇ

(ମାତିଉ ୨୭:୫୯-୬୬; ମାର୍କ ୧୪:୫୫-୬୪; ଜଅନ୍ ୧୮:୧୯-୨୪)

୬୬ ତାର୍ ଆରକର୍ ଦିନେ ଜୁଲ୍‌ପୁଲ୍ ଉଜଲ୍ ବେଲାଇ, ପାର୍‌ଚିନ୍‌ମନ୍, ମୁକିଅ ପୁଜାରିମନ୍ ଆରି ସାସ୍‌ତର୍ ସିକାଇଦେବା ଲକ୍ମନ୍ ଗଟେକ୍‌ଟାନେ ରୁଣ୍ଡଲାଇ । ଆରି ଜିସୁକେ ବିଚାର୍ କର୍ବା ବଡ଼ଟା ଜାଗାଇ ନେଲାଇ । ୬୭ “ତୁଇ ସତଇସେ ପର୍‌ମେସର୍ ବାଟିପାଟାଇଲା କିରିସ୍‌ଟ କି ? ଆମ୍‌କେ କଅ ।” ମାତର୍ ଜିସୁ ସେମନ୍‌କେ କଇଲା, “ମୁଇ କଇଲେ ମିସା ତମେ ବିସ୍‌ବାସ୍ ନ କରାସ୍ ।” ୬୮ ମୁଇ ତମ୍‌କେ ପାଟାରଲେ ମିସା ନ କୁଆସ୍ । ୬୯ ମାତର୍ ଏବେ ଅନି, ପର୍‌ମେସର୍‌ଟାନେଅନି ଆଇଲା ନର୍‌ପିଲା ମୁଇ ତାର୍ ଉଜାବାଟେ ବସିରଇବି ।”

୭୦ ସେ କାତା ସୁନି ଗୁଲାଇ ଲକ୍ମନ୍ ଆଉଲିଅଇ ଜିସୁକେ ପାଟାରଲାଇ, “ଏକ୍ତି ବଇଲେ ତୁଇକାଇ ପର୍‌ମେସର୍‌ର ପିଲା କି ?” ଜିସୁ ସେମନ୍‌କେ କଇଲା “ମୁଇସେ ବଲି ତମେ କଇଲାସ୍‌ନି ।”

୭୧ ଆରି ସେମନ୍ କଇଲାଇ, “ଆମ୍‌କେ ଆରି କାଇ ସାକି ଦର୍‌କାର୍ ତା ? ଆମେ ନିଜେ ତାର୍ ଟଣ୍ଡେଅନି ସୁନ୍‌ଲୁ ଆରୁ ।”

## ୨୩

ଜିସୁକେ ପିଲାତର୍ ଲଗେ ନେଲାଇ

(ମାତିଉ ୨୭:୧-୨, ୧୧-୧୪; ମାର୍କ ୧୫:୧-୫; ଜଅନ୍ ୧୮:୨୮-୩୮)

୧ ତାର୍ ପଟେ ବିଚାର୍ କର୍ବା ବଡ଼ ସବାର୍ ଜାଗାଇ ବସିରଇଲା ସବୁ ଲକ୍ମନ୍ ଉଟିକରି ଜିସୁକେ ପିଲାତର୍ ଲଗେ ଦାରିଗାଲାଇ । ୨ ସେ ଲକ୍ମନ୍ ଜିସୁକେ ନିନ୍ଦା କରି ଏକ୍ତି କଇବାର୍ ବସ୍‌ଲାଇ, “ଏ ଲକ୍ ଆମ୍‌ର୍ ଲକ୍ମନ୍‌କେ ବୁଲ୍ ସିକିଆ ଦେଇତେ ରଇଲା ଆରି କାଇସର୍ ସମ୍‌ରାଟ୍‌କେ ସିସ୍‌ତୁ ଦିଆସ୍ ନାଇ ବଲି ସିକାଇଲା ବେଲେ ତାକେ ଦାର୍‌ଲୁ । ଆରି ସେ ନିଜ୍‌କେ ମୁଇ ପର୍‌ମେସର୍ ବାଟି ପାଟାଇଲା ରାଜା କିରିସ୍‌ଟ ବଲି କଇଲାନି ।”

୩ ସେଟାର୍ ପାଇ ପିଲାଡ଼ ଜିସୁକେ ପାଟାରଲା, “ତୁଇ କାଇ ଜିଉଦି ଲକ୍ମନ୍‌ର୍ ରାଜା କି ?” ଜିସୁ ତାକେ କଇଲା, “ତମେତା କଇଲାସ୍‌ନି ।”

୪ ତାର୍ ପଟେ ପିଲାଡ଼ ମୁକିଅ ପୁଜାରିମନ୍‌କେ ଆରି ତେଇ ରଇଲା ସବୁ ଲକ୍ମନ୍‌କେ କଇଲା, “ମୁଇ ଏ ଲକ୍ ଦସି ବଲି କାଇ ବୁଲ୍ ଦେକି ନାଇ ।”

୫ ମାତର୍ ସେମନ୍ ତର୍‌କେତର୍ ଆଉଲିଅଇ କଇଲାଇ, “ତାର୍ ସିକିଆର୍ ଲାଗି ସେ ଜିଉଦାର୍ ସବୁବାଟର୍ ଲକ୍ମନ୍‌ର୍ ବିତ୍‌ରେ କଲି ଲାଗାଇଲାନି । ସେଟା, ସେ ଗାଲିଲିତେଇ ଆରାମ୍ କାରି, ଏବେ ଇତି ଜାକ ଆଇଲା ଆଟେ ।”

ଜିସୁକେ ଏରଦର୍ ଲଗେ ପାଟାଇଲାଇ

୬ ଏ କାତା ସୁନି ପିଲାଡ଼ ଲକ୍ମନ୍‌କେ ପାଟାରଲା, “ଏଟା ଗଟେକ୍ ଗାଲିଲି ଦେସର୍ ଲକ୍ କି ?” ୭ ପିଲାଡ଼ ଜିସୁକେ ଗାଲିଲି ଦେସର୍ ଲକ୍ ବଲି ଜାନି, ତାକେ ଗାଲିଲି ଦେସ୍

ସାସନ କରବା ଏରଦରଲଗେ ପାଟାଇ ଦେଲା । କାଇକେ ବଇଲେ, ସେ ବେଲେ ଏରଦ୍ ମିସା ଜିରୁସାଲମେ ରଇଲା । ୮ ଏରଦ୍ ଜିସୁକେ ଦେକି କରି ବେସି ସାର୍ଦା ଅଇଲା । କାଇକେ ବଇଲେ ଜିସୁର ବିସଇ ଆଗତୁ ସୁନି ରଇଲା ଆରି ତାର୍ ମୁଆଟେ କାବା ଅଇଜିବା କାମ୍ ଦେକବାକେ ମନ୍ କରତେରଇଲା । ୯ ସେଟାର୍ ପାଇ ଏରଦ୍ ତାକେ କାଇ କାଇ ବିସଇ ପାଟାର୍ବାର୍ ଦାରୁଲା । ମାତର୍ ଜିସୁ ତାକେ କାଇବଲି ମିସା କଏ ନାଇ । ୧୦ ସେଡିକି ବେଲେ ତେଇ ଟିଆଅଇରଇଲା ମୁକିଅ ପୁଜାରିମନ୍ ଆରି ନିୟମ୍ ସିକାଉମନ୍ ସବୁ ମିସି କରି ଜିସୁର ବିରୁଦେ ଆଉଲିଅଇ କଇବାର୍ ଦାରୁଲା । ୧୧ ଏରଦ୍ ଆରି ତାର୍ ସନିଅମନ୍ ଜିସୁକେ କିଜାଇଲାଇ ଆରି ନିନ୍ଦା କଲାଇ । ଜିସୁକେ ରାଜାମନ୍ ପିନ୍ଦବା ନିମାନ୍ ପଟିଆ ପିନ୍ଦାଇ ପିଲାଡ଼ଟାମେ ପାଟାଇ ଦେଲା । ୧୨ ସେ ଦିନେଅନି ପିଲାଡ଼ ଆରି ଏରଦ୍ ମଇଡ଼ର୍ ଅଇଲା । ତାର୍ ଆଗତୁ ସେମନ୍ ଦୁଇ ଲକ୍ ସଡ଼ୁରୁ ଅଇରଇଲା ।

ଜିସୁକେ ମର୍ବା ଦଣ୍ଡଦେଲା

(ମାଡିଉ ୨୭-୧୫-୨୬; ମାର୍ଚ୍ଚ ୧୫:୬-୧୫; ଜଅନ୍ ୧୮:୩୯-୧୯:୧୬)

୧୩ ତାର୍ପଟେ ପିଲାଡ଼ ମୁକିଅ ପୁଜାରିମନ୍କେ, ନେତାମନ୍କେ ଆରି ସବୁ ଲକ୍ମନ୍କେ ଗଟେକ୍ଟାମେ ରୁଣ୍ଡାଇକରି ସେମନ୍କେ କଇଲା, ୧୪ ଏ ଲକ୍ ଲକ୍ମନ୍କେ ସର୍କାରର୍ ବିରୁଦେ ବୁଲ୍ ସିକିଆ ଦେଲାନ୍ତି ବଲି ମର୍ ଲଗେ ଆନିଆଟାସ୍ । ଆରି ଦେକା ମୁଇ ତମର୍ ମୁଆଟେ ତାକେ ପରିକା କଲି, ତାର୍ ବିରଦେ ତମେ ସବୁଲକ୍ ନିନ୍ଦାକଲାଟା ମିଲେନାଇ । ୧୫ ଏରଦ୍ ମିସା ତାର୍ଟାମେ କାଇ ବୁଲ୍କଲାଟା ନ ଦେକି ଆମ୍କେ ବାଉଡାଇଦେଲା ଆଟେ । ଏ ଲକ୍ ମରନ୍ ଡଣ୍ଡ ପାଇବାପାରା ବୁଲ୍ କାମ୍ କରେ ନାଇ । ୧୬ ସେଟାର୍ପାଇ ମୁଇ ଆକେ କରତା ମାଡ଼ ମାରିକରି ଚାଡ଼ିଦେବି । ୧୭ ଆରି ଦେକା ସବୁ ବରସେ ରକିଆ ପାଇବା ପରବ୍ ବେଲାଇ ଜିଉଦି ଜାତିକେ ସନ୍ମାନ୍ ଦେବାକେ ଗଟେକ୍ ବନ୍ଦିକେ ମୁକ୍ଲାଇ ଦେବା ନିୟମ୍ ରଇଲା ।

୧୮ ମାତର୍ ସବୁଲକ୍ମନ୍ ଆଉଲିଅଇ କଇଲା, “ଆକେ ମରାଆ ଆରି ଆମର୍ ପାଇ ବାର୍ବାକେ ଚାଡ଼ିଦିଆସ୍ ।” ୧୯ ଏ ବାର୍ବା ବଲ୍ବା ଲକ୍, ସର୍କାରର୍ ବିରଦେ ବୁଲ୍ କରିରଇଲା ଆରି ଗଟେକ୍ ଲକ୍କେ ମାରି ରଇଲା । ସେଟାର୍ପାଇ ତାକେ ବନ୍ଦି କରିରଇଲା ।

୨୦ ମାତର୍ ପିଲାଡ଼ ଜିସୁକେ ଚାଡ଼ିଦେବାକେ ମନ୍କରି ତାର୍ ଲଗେ କାଇ ବୁଲ୍କଲାଟା ଡିସେନାଇ ବଲି ସେମନ୍କେ ତର୍କେ ତର୍ ବୁଜାଇଲା । ୨୧ ମାତର୍ ଲକ୍ମନ୍ ବେସି ଆଉଲି ଅଇ, “ତାକେ କୁର୍ସେ ଚଗାଇ ମରାଆ ! ତାକେ କୁର୍ସେ ଚଗାଇ ମରାଆ !” ୨୨ ତାର୍ପଟେ ପିଲାଡ଼ ସେମନ୍କେ ଆଗେ ଦୁଇଡ଼ର୍ ପାଟାରୁଲାଟା ଚାଡ଼ି ଆରିତରେକ୍ ସମାନ୍ଟାସେ କଇଲା, “କାଇକେ ? ସେ କାଇ ବୁଲ୍ କଲାଆଟେ ଜେ ? ତାର୍ଟାମେ କାଇମିସା ମରନ୍ ପାଇବା ଡଣ୍ଡ ଏଡ଼କି ଦସ୍ ମିଲେ ନାଇ । ଏନ୍ତି ବଇଲେ ମିସା ତାକେ କରତା ମାଡ଼ ମାରି ଚାଡ଼ି ଦେବି ।”

୨୩ ମାତର୍ ଲକ୍ମନ୍ ଆରି ବେସି ଆଉଲିଅଇ ତର୍କେ ତର୍ “ତାକେ କୁର୍ସେ ଚଗାଇ ମରାଆ !” ବଲି ବାଦିଅ କଲା । ସାରାସାରି ପଟେ ସେମନ୍ ଆଉଲିଅଇଲାଟା ଜିଡ଼ଲା । ୨୪ ତାର୍ ପଟେ ପିଲାଡ଼ ଲକ୍ମନ୍ର୍ ଜାଇଟା କରବାକେ ମନ୍ କଲା, ସେ ଇସାବେ ଜିସୁକେ ମରନ୍ର୍ ଡଣ୍ଡ ଦେବାକେ ରାଜି ଅଇଲା । ୨୫ ପଟେ ପିଲାଡ଼ ଲକ୍ମନ୍ର୍ କଇବା ଇସାବେ, ବାର୍ବା ନାଉର୍ ଲକ୍ ଜେ କି, ଆଗତୁ ଗଟେକ୍ ଲକ୍କେ ମରାଇରଇଲା ଆରି ସର୍କାରର୍ ବିରୁଦେ ବୁଲ୍କାମ୍ କରି ବନ୍ଦି ଅଇରଇଲା, ତାକେ ମୁକ୍ଲାଇଲା । ଜିସୁକେ ତାକର୍ ମନ୍କଲା ଇସାବେ ଡଣ୍ଡ ଦେବାକେ ସର୍ପିଦେଲା ।

ଜିସୁକେ କୁରସେ କୁଟିମାରଲାଇ

(ମାତିଉ ୨୭:୩୨-୪୪; ମାର୍କ ୧୫:୨୧-୩୨; ଜଅନ୍ ୧୯:୧୭-୨୭)

୨୭ ସନିଅମନ୍ ଜିସୁକେ ଦାରିଜିବା ବେଲେ କୁରିଣିୟ ସିମନ୍ ନାଉଁର୍ ଲକ୍‌କେ ବେଟପାଇଲାଇ । ଜେ କି ଗାଏଁଅନି ଜିରୁସାଲାମେ ଆଇଡେରଇଲା । ତାକେ ଅଟକାଇକରି ଜିସୁ ବଇଲା କୁରସ ଲାଦିଦେଲାଇ ଆରି ତାର୍ ପଟେ ଜିବାକେ ବାଦିଆ କଲାଇ ।

୨୮ ଆରି ବେସି ଲକ୍‌ମନ୍ ଜିସୁର୍ ପଟେ ପଟେ ଜାଇଡେ ରଇଲାଇ । ତେଇ କେଡେଟା ବୁକେ ପିଟିଅଇ କାନ୍ଦିବା ମାଇଜିମନ୍ ମିସା ରଇଲାଇ । ୨୯ ମାତର୍ ଜିସୁ ସେମନର୍ ବାଟେ ପାସଲିକରି କଇଲା, ଏ ଜିରୁସାଲମ୍ ଗଡର୍ ମାଇଜିମନ୍, ମର୍ପାଇ କାନ୍ଦା ନାଇ । ମାତର୍ ନିଜର୍ ପାଇ ଆରି ନିଜର୍ ପିଲାମନର୍ ପାଇ କାନ୍ଦା । ୩୦ କାଇକେବଇଲେ ଦେକା “ଜନ୍ ମାଇଜି ବାଞ୍ଜି ଆରି କେବେ ମିସା ଗାଗଡେ ନ ଅଇକରି ଆତଡ୍, ଆରି ଜେ କି କେବେ ମିସା ଦୁଦ୍ କୁଆଏ ନାଇ, ସେମନ୍ କେଡେକ୍ ନିକ କରମର୍ ଲକ୍ !” ବଲି କଇବା ଦିନ୍ ଆଇଲାନି । ୩୧ \*ସେବେଲାଇ ଲକ୍‌ମନ୍ ଡଙ୍ଗର୍‌ମନ୍କେ କଇବାର୍ ଦାର୍‌ବାଇ, ଆମର୍ ଉପ୍‌ରେ ଅଦରି ଦିଆସ୍ । କୁପ୍‌ଲିମନ୍କେ କଇବାର୍ ଦାର୍‌ବାଇ, ଆମ୍‌କେ ତପିଦିଆସ୍ । ୩୨ କାଇକେ ବଇଲେ ଗର୍ କାଁଟାପଡ୍‌ରିଆ ରଇଲା ବେଲେ, ଜଦି ଏ ସବୁ ଗର୍‌ନା ଗର୍‌ଲାନି ବଇଲେ ସେଟା ସୁକିଗାଲେ ଆରି କାଇଟା ଅଇସି ।

୩୩ ଜିସୁର୍ ସଙ୍ଗ୍ ଆରି ଦୁଇଟା ବଡ୍ ବୁଲ୍ କରିରଇବା ଲକ୍‌ମନ୍କେ ମିସା ମରାଇବାକେ ନେଲାଇ । ୩୪ ଆରି ସେମନ୍ କପ୍‌ରି ନାଉଁର୍ ଗଟେକ୍ ଜାଗାଇ କେଟିକରି ଜିସୁକେ ଆରି ଚର୍‌ମନ୍କେ, ତାର୍ ତେବ୍‌ରି ବାଟେ ଗଟେକ୍ ଲକ୍‌କେ ଆରି ଉଜାବାଟେ ଗଟେକ୍ ଲକ୍‌କେ ଆଡେ, ପାଦେ କୁଟିମାରି ଟେକିଦେଲାଇ । ୩୫ ସେବେଲା ଜିସୁ କଇଲା, “ଏ ବାବା ଏମନ୍କେ କେମା କରିଦିଆସ୍, କାଇକେ ବଇଲେ ଏମନ୍ କାଇଟା କଲାଜନି ସେଟା ନାଜାନଡ୍ ।” ସେମନ୍ ଜିସୁର୍ ପଟିଆ ନେଇ କାକେ ମିଲ୍‌ସି ବଲି କେଡ୍ ପୁଟାଇଲାଇ । ୩୬ ସବୁ ଲକ୍‌ମନ୍ ଚିଆଅଇ ଦେକ୍‌ବାବେଲେ ଜିଉଦି ନେତାମନ୍ ଜିସୁକେ କିଜାଇକରି ଆସିଲାଇ ଆରି କଇଲା “ସେ ବିନ୍‌ଲକ୍‌ମନ୍କେ ରକିଆ କଲା, ଜଦି ତୁଇ ପର୍‌ମେସର୍ ବାଟିପାଟାଇଲା କିରିସ୍‌ଟ ବଇଲେ ନିଜ୍‌କେ ରକିଆ କର ।”

୩୭ ଆରି ସନିଅମନ୍ ଜିସୁର୍ ଲଗେ ଆସିକରି ତାକେ ଗନ୍ଦିବା ରସ୍ ଦେଇ କିଜାଇକରି କଇଲାଇ, । ୩୮ “ତୁଇ ଜଦି ଜିଉଦି ଲକ୍‌ମନର୍ ରାଜା, ନିଜ୍‌କେ ରକିଆ କର ।”

୩୯ ଆରି ତାର୍ କୁରସର୍ ଚିପେ ଏଟା ଜିଉଦିମନର୍ ରାଜା, ବଲି ଲେକି ଅଲାଇଦେଲାଇ ।

୪୦ ତେଇ ବଡ୍ ବୁଲ୍ କରି କୁରସେ ଚଗାଇଅଇରଇବା ଗଟେକ୍ ଲକ୍ ଜିସୁକେ ନିନ୍ଦା କରି କଇଲା, “ତୁଇ ଜଦି ପର୍‌ମେସର ବାଟି ପାଟାଇଲା କିରିସ୍‌ଟ ରାଜା ଜିସୁ ବଇଲେ, ନିଜ୍‌କେ ରକିଆ କରି ଆମ୍‌କେ ମିସା ରକିଆ କର ।” ୪୧ ମାତର୍ ଆରି ଗଟେକ୍ ଲକ୍ ତାକେ ଦମ୍‌କାଇ କରି କଇଲା, “ତୁଇ କାଇ ପର୍‌ମେସର୍‌କେ ତରୁସ୍ ନାଇ କି ? ତୁଇ ମିସା ତାର୍‌ପାରା ସମନ୍ ଡଣ୍ଡ୍ ପାଇଲୁସ୍‌ନି କି ନାଇ ? ୪୨ ଆରି ଆମେ ବୁଲ୍‌କରି ନିନ୍ଦା କିସାବେ ଡଣ୍ଡ୍ ପାଇଲୁନି । ମାତର୍ ସେତା କାଇ ବୁଲ୍ କରେ ନାଇ ।” ୪୩ ଆରି ସେ ଜିସୁକେ, “ଏ ଜିସୁ, ତୁଇ ନିଜର୍ ରାଇଜେ ରାଜା ଅଇ ଆଇଲେ ମକେ ଏତାଆ ।”

୪୪ ଜିସୁ ତାକେ କଇଲା, “ମୁଇ ତକେ ସଡ୍ କଇଲିନି, ଆଜିସେ ତୁଇ ମର୍‌ସଙ୍ଗ୍ \*ପାରଦେସେ ରଇସୁ ।”

\* ୨୩:୩୦ ୨୩:୩୦ ପର୍କାସିତ ୬:୧୭ \* ୨୩:୪୩ ୨୩:୪୩ ଜିସୁକେ ବିସ୍‌ବାସ୍ କରି ମଲା ଲକ୍‌ମନ୍ ରଇବା ସାର୍‌ଦାର୍ ଜାଗା

ଜିସୁ ମରବାଟା

(ମାତ୍ରିତ ୨୭:୪୫-୫୬; ମାର୍କ ୧୫:୩୩-୪୧; ଜଥନ୍ ୧୯:୨୮-୩୦)

୪୪ ସେବେଲେ ଆଡ଼ବେଲା ଅଇରଇଲା । ଆରି ବେଲର୍ ଉଜଲ୍ ଜାଉଁଲିଜାଇକରି, ତିନ୍ ଗାଁଟା ଜାକ ଗୁଲାଇ ଦେସ୍ ଆନ୍ଦାର୍ ଅଇଗାଲା । ୪୫ ଆରି ଏଦେ ଦେକା ! ମନ୍ଦିରର୍ ସୁକଲ୍ ଜାଗା, ବିନେ କରବା ପାରଦା ମଜାଇ ଦୁଇପତା ଅଇ ଚିରିଅଇଲା । ୪୬ ଆରି ଜିସୁ ଆଉଲିଅଇ କଇଲା, “ଏ ବାବା, ମର୍ ଆଡ଼ମା ତକେ ସର୍ପିଦେଲିନି ।” ଏଡ଼କି କଉ କଉ ତାର୍ ଜିବନ୍ ଚାଡ଼ିଗାଲା ।

୪୭ ରମିୟ ସନିଅମନର୍ ସେନାପତି ଏ ଗଟ୍ଟନା ଦେକି, ପର୍ମେସରର୍ ମଇମା କରି କଇଲା, “ସତଇସେ ଏ ଗଟ୍ଟେକ୍ ଦରମ୍ ଲକ୍ ରଇଲା ।”

୪୮ ଆରି ଜନ୍ ଲକ୍ମନ୍ ଏ ଗଟ୍ଟନା ଦେକବାକେ ରୁଣ୍ଡିରଇଲାଇ ସେମନ୍ ସେଟା ସବୁ ଦେକି ଦୁକ୍‌କରି ବୁକେ ମାରିଅଇ ଗରେ ବାଅଡ଼ଲାଇ । ୪୯ ମାତର୍ ଜିସୁର୍ ତିନାର୍‌ଜାନାର୍ ଲକ୍ମନ୍ ଆରି ଗାଲିଲିଅନି ଆସି ତାର୍ ପଟ୍‌ପଟ୍ ଆଇତେରଇବା ମାଇଜିମନ୍ ଦୁରିକେ ଚିଆଅଇ ଏ ସବୁ ଦେକ୍‌ତେ ରଇଲାଇ ।

ଜିସୁର୍ ମତା ସଙ୍ଗଇବା ଜାଗା

(ମାତ୍ରିତ ୨୭:୫୭-୬୧; ମାର୍କ ୧୫:୪୨-୪୬; ଜଥନ୍ ୧୯:୩୮-୪୨)

୫୦ ଆରି ଦେକା, ଆରାମାତିଆ ଗଡ଼ର୍ ଜିଉଦିମନର୍ ନେତା ଜସେପ୍ ନାଉର୍ ଗଟ୍ଟେକ୍ ଦରମ୍ ଆରି ମର୍ଜିତାର୍ ଲକ୍ ରଇଲା । ସେ ପର୍ମେସରର୍ ରାଇଜ୍ ଆସ ବଲି ଜାଗିରଇଲା । ୫୧ ମାତର୍ ଆରାମାତିଆ ଗାଉର୍ ସେ ଲକ୍ ବଡ଼ସବାର୍ ଗଟ୍ଟେକ୍ ମେମର୍ ରଇଲେ ମିସା, ସେମନର୍ ନିଆଇ ଆରି କାମ୍ ସଙ୍ଗ୍ ରାଜିଅଇ ନ ରଇଲା । ଆରି ପର୍ମେସରର୍ ରାଇଜ୍ ଜାଗ୍‌ତେରଇଲା । ୫୨ ସେ ପିଲାତର୍ ଲଗେ ଜାଇ ଜିସୁର୍ ମଲା ମଡ଼ ମାଙ୍ଗ୍ଲା । ୫୩ ଜିସୁର୍ ମଡ଼ କୁର୍‌ସେଅନି ଉଡ଼ରାଇ ଉଲ୍‌ଉଲା ପଟିଆଇ ରୁଡ଼ିଆଇକରି ଜେଡ଼ିକି କେବେ କାକେ ନ ସଙ୍ଗ୍‌ଇରଇଲା, ଗଟ୍ଟେକ୍ ରାଙ୍ଗ୍‌ନି କାଟି ତିଆର୍‌କରି ରଇଲା ପାଆରେ ନେଇ ସଙ୍ଗ୍‌ଇଲାଇ । ୫୪ ସେ ଦିନ୍ ବିସ୍‌ରାମ୍‌ବାର୍ ଦିନ୍ ନ ଅଇରଇଲା, ସେ ଦିନ୍ କେଟି ଆଇତେରଇଲା ।

୫୫ ଆରି ଗାଲିଲିଅନି ଜିସୁର୍ ସଙ୍ଗ୍ ରଇଲା ମାଇଜିମନ୍ ଜସେପର୍ ସଙ୍ଗ୍ ଜାଇକରି ପାଆର୍ ବିଡ଼ରେ ଜିସୁର୍ ଗାଗଡ଼ କେଡ଼ି ସଙ୍ଗ୍‌ଇଲା ଆଟେ ବଲି ଦେକ୍‌ଲାଇ । ୫୬ ସେମନ୍ ବାଉଡ଼ିଜାଇ ବାସନା ଚିକନ୍ ଆରି ବାସନା ଦିନ୍‌ସୁ ତିଆର୍ କର୍‌ତେ ରଇଲାଇ । ସେ କାମ୍ ସାର୍‌ବାକେ ବିସ୍‌ରାମ୍‌ଦିନ୍ କେଟ୍‌ଲା । ଆରି ସେ ଦିନେ ମସାର୍ ନିୟମ୍ ଇସାବେ, ସେମନ୍ ବିସ୍‌ରାମ୍ କଲାଇ ।

୨୪

ଜିସୁ ଆରି ତରେକ୍ ଜିବନ୍ ଅଇ ଉଟ୍‌ଲା

(ମାତ୍ରିତ ୨୮:୧-୧୦; ମାର୍କ ୧୬:୧-୮; ଜଥନ୍ ୨୦:୧-୧୦)

୧ ଆଟର୍ ପର୍‌ଡୁମ୍ ଦିନର୍ ସାକାଲେ, ମାଇଜିମନ୍ ସେମନ୍ ତିଆର୍ କରିରଇବା ବାସନା ଦିନ୍‌ସୁ ଆରି ବାସନା ଚିକନ୍ ଦାରି ଜିସୁର୍ ମଡ଼ ରଇଲା ପାଆରେ ଗାଲାଇ । ୨ ଆରି ପାଆରର୍ ମୁଆଟେ ରଇଲା ପାକ୍‌ନା ଗୁଣ୍ଡିରଇଲାଟା ଦେକ୍‌ଲାଇ । ୩ ସେଟା ଦେକି ପାଆର୍ ବିଡ଼ରେ ଜାଇ ଦେକ୍‌ଲାଇ, ତେଇ ଜିସୁର୍ ଗାଗଡ଼ ନ ରଇଲା । ୪ କାଇଟା ଅଇଲାବେ, ବଲି, ବାବିକରି ରଇଲାବେଲେ, ଏଦେ ଦେକା ! ବିଜ୍‌ଲି ପାରା ଜଗ୍‌ଜଗି ଜାଇତେରଇବା ଲୁଗା ପିନ୍ଦି ଦୁଇ ଲକ୍ ସେମନର୍ ମୁଆଟେ ଚିଆ ଅଇଲାଇ । ୫ ମାଇଜିମନ୍ ସେ ଦୁଇ ଲକ୍‌କେ ଦେକି ଡରିକରି ଉଡ଼ାଡ଼ିଅଇ ହୁଲିଦେଲାଇ । ସେ ଦୁଇଲକ୍ ସେମନ୍‌କେ କଇଲାଇ, “ଜିବନ୍ ରଇଲା ଲକ୍‌କେ କାଇକେ ମଲା

☆ ୨୩:୪୯ ୨୩:୪୯ ଲୁକ୍ ୮:୨,୩

ଲକ୍ଷ୍ୟେ ସଙ୍ଗଠିତାଗଣେ କଲ୍ୟାଣି ? <sup>୬</sup> \*ଜିସୁ ଇତି ନାହି, ପର୍ଯ୍ୟେସର୍ ତାକେ ଉଚ୍ଚାକ୍ଷୟାଆତେ । ସେ ତମର୍ ସଙ୍ଗ ଗାଲିଲିତେଇ ମିସ୍ତେ ରଇଲା ବେଲେ ତମ୍ବକେ କାଜବଲି କଇରଇଲା, ସେଟା ତମର୍ ମନେ ନାହି କି ? <sup>୭</sup> ନର୍ପିଲା ପାପି ଲକ୍ଷ୍ୟମର୍ ଆତେ ସର୍ପାଇ ଅଇସି ଆରି ସେମନ୍ ତାକେ କୁର୍ସେ କୁଟିମାରି ମରାଇ ଦେବାଇ । ମାତର୍ ତିନ୍ଦିନ୍ ଗାଲାପତେ ସେ ଆରି ତରେକ୍ ଜିବନ୍ ଅଇ ଉର୍ସି ।”

୮ ସେତକି ବେଲେ ମାଇଜିମନ୍ ଜିସୁ ଏକ୍ତି କାତା କଇରଇଲା ବଲି ଏତାଇଲାଇ । <sup>୯</sup> ସେଟାର୍ ପାଇ ସେମନ୍ ତେଇଅନି ଦାପ୍ତରେ ବାଉଡି ଆସିକରି ଏଗାର୍ଟା ସିସ୍ତମନ୍ଦକେ ଆରି ତେଇ ରଇଲା ଲକ୍ଷ୍ୟମନ୍ଦକେ ସେ ଜାଗାଇ ଅଇଲା ଗଟ୍ଟନା ସବୁ କଇଲାଇ । <sup>୧୦</sup> ମଗ୍ଦଲିନି ମରିୟମ୍, ଜଥାନା, ଜାକୁବର୍ ମାଆ ମରିୟମ୍ ଆରି ତାକର୍ସଙ୍ଗ ରଇଲା ବିନ୍ ମାଇଜିମନ୍ ମିସା କାଜ କାଜଟା ଗଟ୍ଟଲା, ସେ ସବୁ ବିସଇ ପେରିଡ଼ମନ୍ଦକେ କଇଲାଇ । <sup>୧୧</sup> ମାତର୍ ପେରିଡ଼ମନ୍ ମାଇଜିମନ୍ କାତା ଟଣ୍ଡେ ପାନ୍ଦି କଇଲାଜିନି ବଲି ବିସବାସ୍ କରଡ଼ ନାହି । <sup>୧୨</sup> ମାତର୍ ପିତର୍ ଅଦର୍ପଡ଼ ଅଇ ପାଲାଇ ପାଆରେ ଜାଇ ଏରି ଦେକ୍ଲା । ପାଆର୍ ବିତ୍ତରେ ଏରି ଦେକ୍ଲାକେ ତେଇ ଜିସୁକେ ଗୁଡ଼ିଆଇଲା ଉଲ୍‌ଉଲା ପଟିଆ ଚାଡ଼ି ଆରି କାଜଟା ନ ରଇଲା । ପିତର୍ ସେ ଗଟ୍ଟନା ଦେକି କାବାଅଇ ଜାଇକରି, ଗରେ ବାଉଡି ଆଇଲା ।

ଦୁଇଟା ସିସ୍ତମନ୍ ଇମାୟୁ ଗାଏଁ ଗାଲାଇ  
(ମାର୍କ ୧୬:୧୨-୧୩)

<sup>୧୩</sup> ସେ ଦିନେସେ ଜିସୁର୍ ଦୁଇଟା ସିସ୍ତମନ୍ ଜିରୁସାଲମେଅନି ଏଗାର କିଲମିଟର୍ ଦୁର୍ବକେ ରଇଲା ଇମାୟୁ ନାଉର୍ ଗାଏଁ ଇଣ୍ଡିକରି ଜାଇତେ ରଇଲାଇ । <sup>୧୪</sup> ଜିସୁକେ କାଜକାଜଟା ଅଇରଇଲା ଆରି ସେ ସବୁ ବିସଇନେଇ ସେମନ୍ କାତାଅଇ କାତାଅଇ ଇଣ୍ଡିତେ ରଇଲାଇ । <sup>୧୫</sup> ସେମନ୍ ଏକ୍ତି କାତାବାର୍ତ୍ତା ଅଇ ଆଇବାବେଲେ ଏଦେ ଦେକା ! ଜିସୁ ନିଜେ ଆସି ସେମନ୍‌ର ସଙ୍ଗ ଇଣ୍ଡିବାର୍ ଦାରଲା । <sup>୧୬</sup> ସେମନ୍ ତାକେ ଦେକ୍ଲାଇ, ମାତର୍ ତିନି ନାପାରୁଲାଇ । <sup>୧୭</sup> ସେତିକିବେଲେ ଜିସୁ ସେମନ୍‌କେ କଇଲା, “ତମେ ଇଣ୍ଡି ଇଣ୍ଡି କାର୍ ବିସଇନେଇକରି ଏତେକ୍ କାତା ଅଇଲାସିନି ?” ସେବେଲାଇ ସେମନ୍ ମନ୍‌ଦୁକ୍‌କରି ମୁଁ ସୁକାଇ ଚିଆଅଇଲାଇ । <sup>୧୮</sup> “ଗାଲା କେତେଦିନ୍ ବିତ୍ତରେ ଜିରୁସାଲାମ୍ ଜନ୍ ଗଟ୍ଟନା ଗଟିଗାଲା ଆତେ ? ସେଟା ନାଜାନୁଲାଟା ତୁଇ ଗଟେକ୍ ଲକ୍ଷ୍ୟେ କି ?”

<sup>୧୯</sup> ଜିସୁ ସେମନ୍‌କେ ପାଚାରୁଲା, “କାଜଟା ଅଇରଇବା ବିସଇ ତମେ କଇଲାସିନି ?” ସେମନ୍, “ନାଜରିତର୍ ଜିସୁକେ ଜାଜଟା ସବୁ ଗଟ୍ଟଲା । ସେ ଗଟେକ୍ ବବିସତ୍‌ବକ୍ତା ରଇଲା । ପର୍ଯ୍ୟେସର୍ ମୁଆଟେ ଆରି ଲକ୍ଷ୍ୟମନ୍‌ଟାଣେ ଗଟେକ୍ ବପୁସଙ୍ଗର୍ ଲକ୍ ରଇଲା । ତାର୍ ସବୁକାମ୍ ଆରି କାତାଇଅନି ଏ ସବୁ ଜାନାପଡ଼ତେ ରଇଲା । <sup>୨୦</sup> ଆମର୍ ମୁକିଅ ପୁଜାରିମନ୍ ଆରି ସାସନ୍ କାରିଆମନ୍ ତାକେ ମରନ୍ ଡଣ୍ଡ ପାଇବାକେ ସଡ଼ୁମନ୍ଦକେ ସର୍ପିଦେଲାଇ ଆରି ତାକେ କୁର୍ସେ ଚଗାଇ ମରାଇଲାଇ । <sup>୨୧</sup> ସେ ଆକା ଇସ୍ରାଏଲର୍ ଲକ୍ଷ୍ୟମନ୍‌କେ ରକିଆ କର୍ସି ବଲି ଆସା କରି ରଇଲୁ । ମାତର୍ ତାକେ ମରାଇ ତିନ୍ଦିନ୍ ଅଇଲାନି । <sup>୨୨</sup> ଆମର୍ ଦଲର୍ କେତେଟା ମାଇଜିମନ୍ ଆମ୍‌କେ କାବାଅଇଜିବା କାତା କଇଲାଇ । ସେମନ୍ ଆଜି ସାକାଲ୍ ସାକାଲ୍ ତାର୍ ମଡ଼ ରଇବା ପାଆରେ ଗାଲାଇ । <sup>୨୩</sup> ମାତର୍ ତେଇ ତାର୍ ଗାଗଡ଼ ନ ରଇଲା । ସେମନ୍ କଇଲାଇ, ପାଆରେଅନି ବାଉଡ଼ଲାବେଲେ ସରଗର୍ ଦୁଡ଼ମନ୍ ଦର୍ସନ୍ ପାଇରଇଲା ଆରି ସେ ଦୁଡ଼ମନ୍ ଜାନାଇଲାଇଜେ, ସେ ଏବେ ଜିବନ୍ ଅଇଆତେ । <sup>୨୪</sup> ଆମର୍ ସଙ୍ଗାରିମନ୍ ବିତ୍ତରେଅନି ଜେ ଜେ ସେ ପାଆରେ

\* ୨୪:୬ ୨୪:୬ ମାଡ଼ିଜ ୧୬:୨୧;୧୭:୨୨,୨୩;୨୦:୧୮,୧୯; ମାର୍କ ୮:୩୧;୯:୩୧;୧୦:୩୩,୩୪; ଲୁକ୍ ୯:୨୨;୧୮:୩୧-୩୩

ଜାଇ ଦେକିଲା ଯିବା ମାଉଜିମାନ ଜେଣ୍ଡି କରଇଲାଇ, ସେ ସମାନ ଇସାବେ ଦେକିଲା । ମାତର୍ ସେମାନ ଜିସୁକେ ଦେକତ ନାଇ ।”

୨୫ ସେବେଲେ ଜିସୁ ସେମାନକେ କଇଲା, “ତମେ କେତେକ୍ ବକ୍ତୁଆ ଲକ୍ମାନ, ବବିସତ୍‌ବକ୍ତାମାନ କଇଲା କାତା ବିସ୍‌ବାସ୍ କରବାକେ କାଇକେ ଜାଗରତ୍ ଉଆସ୍ ନାଇ ? ୨୬ ଏ ସବୁ ଦୁକ୍‌କସ୍ ପାଇଲା ପଟେସେ ପର୍‌ମେସର୍ ବାଟିପାଟାଇଲା କିରିସ୍‌ଟକେ ମଇମା ପାଇବାକେ ଅଇସି । ୨୭ ଜିସୁ ମସାର୍ ବଇତେଇଅନି ଆରି ବିନ୍ ବିନ୍ ବବିସତ୍‌ବକ୍ତାମାନ ଲେକିରଇଲା କାତାଇ ଅନି ଆରାମ୍ କରି ସବୁ ଦରମ୍ ସାସ୍‌ତରେ ତାର୍ ଜେଡକି ବିସଇ ଲେକା ଅଇରଇଲା, ସେ ସବୁ ସେମାନକେ ବୁଜାଇଦେଲା ।”

୨୮ ଆରି ସେମାନ ଜନ୍ ଗାଉଁ ଜିବାର୍ ରଇଲା, ସେ ଗାଉଁ ଲଗାଇଗି ଅଇବାକେ ଜିସୁ ଆଗତ୍ ଗାଲାପାରା ଅଇ ଇଣ୍ଡିବାର୍ ଦାରଲା । ୨୯ ମାତର୍ ସେ ଲକ୍ମାନ ଜିସୁକେ ସୁତରାଇ କରି କଇଲା, “ଆମର୍ ସଙ୍ଗ୍ ର, କାଇକେ ବଇଲେ ବେଲ୍ ବସିଗାଲା ଆରି ରାତି ଅଇଗାଲାନି ।” ସେଟାର୍ ପାଇ ଜିସୁ ସେମାନର୍ ସଙ୍ଗ୍ ରଇବାକେ ଗର୍‌ବିତ୍‌ରେ ଗାଲା । ୩୦ ଆରି ସେମାନର୍ ସଙ୍ଗ୍ କାଇବାକେ ବସଲା । ରୁଟି ଦାରି ପର୍‌ମେସର୍‌କେ ଦନିଅବାଦ୍ ଦେଇକରି ସେଟା ବାଙ୍ଗାଇକରି ସେମାନକେ ଦେଲା । ୩୧ ସେ ବେଲାଇ ସେମାନର୍ ତାବିଅଇ ଜାଇରଇଲା ଆଁକି ପିଟିଗାଲାଜେ ତାକେ ଚିନି ପାରଲାଇ । ମାତର୍ ସେ ଦାପ୍‌ରେ ଜିସୁ ସେମାନର୍‌ତେଇଅନି ମାୟା ଅଇଗାଲା । ୩୨ ସେବେଲାଇ ସେମାନ୍ ସେମାନର୍ ବିତ୍‌ରେ କାତା ଅଇଲା, “ଜେଡେବଲ୍ ସେ ଆମର୍ ସଙ୍ଗ୍ ବାଟେ କାତା ଅଇତେ ରଇଲା, ଆରି ପର୍‌ମେସର୍‌ ସାସ୍‌ତରର୍ କାତା ବୁଜାଇ ଦେଇତେ ରଇଲା, ଆମର୍ ମନ୍ ବିତ୍‌ରେ ଉଡୁକ୍ ଦୁଡୁକ୍ ନ ଅଇତେ ରଇଲା କି ?”

୩୩ ସେଦାପ୍‌ରେ ସେମାନ ଦୁଇଲକ୍ ଉଟିକରି ଜିରୁସାଲାମେ ବାଉଡି ଉଟିଗାଲା । ତେଇ ଜିସୁର୍ ଏଗାରଟା ସିସ୍‌ମାନ ଆରି ବିନ୍‌ଲକ୍‌ମାନ କାତାବାର୍‌ତା ଅଇତେରଇଲାଟା ଦେକିଲା । ୩୪ ସେ ଲକ୍ମାନର୍‌ତେଇଅନି ସେମାନ ଜିସୁମାପୁରୁ ଆରି ତରେକ୍ ଜିବନ୍‌ଅଇ ଉଟ୍‌ଲା ଆଟେ ଆରି ସିମାନକେ ଦେକାଇଅଇଲା ଆଟେ ବଲି ଜାନଲାଇ ।

୩୫ ତାର୍ ପଟେ ଦୁଇଲକ୍ ଇମାୟୁ ଗାଉଁ ଆଇବା ବାଟେ କାଇକାଗଟା ଅଇରଇଲା ସେଟା ସବୁ କଇଲା । ଆରି ସେମାନ ଜିସୁ ରୁଟି ବାଙ୍ଗାଇ କରି ଦେଲାବେଲେ କେଣ୍ଡି ତାକେ ଚିନି ଦେଇରଇଲାଇ ସେଟା ମିସା ସେମାନକେ କଇଲା ।

ଜିସୁ ତାର୍ ସିସ୍‌ମାନକେ ଦେକା ଅଇଲା

(ମାତିଉ ୨୮:୧୬-୨୦; ମାର୍କ ୧୬:୧୪-୧୮; ଜଅନ୍ ୨୦:୧୯-୨୩; ପେରିତ୍ ୧:୬-୮)

୩୬ ସେ ଦୁଇଲକ୍ ଏଣ୍ଡି କଇବା ବେଲେ ଏଦେ ଦେକା ! ମାପୁରୁ ନିଜେ ସେମାନର୍ ମଜାଇ ଚିଆଅଇଦେଲା । ଆରି ସେମାନକେ କଇଲା, “ତମ୍‌କେ ସାଣ୍ଡି ଅ ।” ୩୭ ମାତର୍ ସେମାନ ସବୁ ଲକ୍ ଏଟା ଗଟେକ୍ ବୁଡ୍ ଦେକ୍‌ଲୁନି ବଲି ତରିଗାଲା । ୩୮ ଜିସୁ ସେମାନକେ କଇଲା, “ତମେ କାଇକେ ତର୍‌ଲାସ୍‌ନି ? ଆରି ଦେକି କରି ମିସା କାଇକେ ବିସ୍‌ବାସ୍ କରାସ୍ ନାଇ ? ୩୯ ମର୍ ଆତେ ଆରି ଗତେ ଦେକା, ଏଟା ମୁଇ ନିଜେ । ମକେ ଚିଇକରି ଦେକା । ଏଟା ମକେ ଜେଣ୍ଡାରି ଆଡ୍ ଆରି ମାଉସ୍ ଆଟେ ସେଣ୍ଡି ବୁଡ୍‌କେ ନ ରଏ ।” ୪୦ ଜିସୁ ଏଟା କଇକରି, ତାର୍ ଆଡ୍ ଆରି ଗଡ୍ ସେମାନକେ ଦେକାଇଲା । ୪୧ ସେଟା ଦେକି ସେମାନ ସାର୍‌ଦା ଅଇକରି କାବାଅଇ ଗାଲାଇ ମିସା ତାକେ ବିସ୍‌ବାସ୍ କରତ୍ ନାଇ । ସେଟାର୍ ପାଇ ଜିସୁ ସେମାନକେ ପାଟାରଲା, “ତମର୍ ଲଗେ କାଇଟା କାଇବାଟା ଆଟେ କି ?” ୪୨ ସେବେଲାଇ ସେମାନ ତାକେ କଣ୍ଡେକ୍ ବାଙ୍ଗିଲା ମାଡ୍ ଦେଲା । ୪୩ ସେଟା ଜିସୁ ଦାରିକରି ସେମାନର୍ ମୁଆଟେ କାଇଲା ।

୪୪ ଜିସୁ ସେମାନଙ୍କେ କଇଲା, “ମସୀହ ନିୟମ୍ ଆରି ବବିସତ୍‌ବକ୍‌ତାମନ୍ କଇଲା କାତା ଆରି ଗିଡ଼ସଙ୍ଗିତା ବଇଟାନ୍‌ନେ କାଇକାଇଟା ଲେକା ଅଇଲାଆଚେ ସେ ସବୁ, ସତ୍ ଅଇବାର୍ ରଇଲା । ମୁଇ ତମର୍ ସଙ୍ଗ୍ ରଇଲାବେଲେ ଏ ସବୁ କାତା ତମ୍‌କେ କଇରଇଲି ।”

୪୫ ତାର୍‌ପଚେ ଦରମ୍ ସାସ୍‌ତରର୍ ଅରତ୍ ବୁଦ୍‌ବାକେ ଜିସୁ ସେମାନର୍ ବୁଦ୍‌ବା ବପୁ ଉଗାଡ଼ି ଦେଲା । ୪୬ ଆରି ସେମନ୍‌କେ କଇଲା, “ପର୍‌ମେସର୍ ବାଟି ପାଟାଇଲା କିରିସ୍‌ଟ ରାଜା ମୁଇ, ଏନ୍ତି ଦୁକ୍ କସ୍‌ଟ ପାଇକରି ମର୍‌ବି । ପଚେ ତିନ୍‌ଦିନ୍ ଗାଲେ ଆରି ତରେକ୍ ଉଟ୍‌ବି ବଲି ଲେକା ଅଇଲା ଆଚେ । ୪୭ ଆରି ଜିରୁସାଲମେଅନି ଆରାମ୍ କରି ସବୁ ଦେସର୍, ସବୁ ଜାତିର୍ ଲକ୍‌ମନ୍‌କେ ମର୍ ନାଉଁଦାରି ପାପ୍ କେମା କରାଇ, ମନ୍ ବଦ୍‌ଲାଇବାକେ କଇବାର୍ ଆଚେ । ୪୮ ତମେ ଏ ସବୁ ବିସଇର୍ ସାକି ଆଟାସ୍ । ୪୯ ଆରି ମର୍ ବାବା ଜନ୍ ଜିଦ୍ କରିରଇଲା, ମୁଇ ନିଜେ ସେଟା ପାଟାଇବି । ମାତର୍ ତମେ ପର୍‌ମେସରର୍ ଟାନ୍‌ନେଅନି ବପୁ ନ ମିଲ୍‌ବା ଜାକ, ଏ ଜିରୁସାଲମେସେ ରୁଆ ।”

ଜିସୁ ସରଗେ ବାଉଡ଼ି ଗାଲା  
(ମାର୍‌କ ୧୬:୧୯-୨୦; ପେରିଡ୍ ୧:୯-୧୧)

୫୦ ତାର୍‌ପଚେ ଜିସୁ ସେମନ୍‌କେ ବେଡ଼ନିଆ ନାଉଁର୍ ଜାଗାଇ ଜିବା ବାଟ୍‌ଜାକ ଡାକିନେଲା । ଆରି ସେମନ୍‌କେ ଆଡ୍ ଟେକି ଆସିର୍‌ବାଦ୍ କଲା । ୫୧ ସେ ଏନ୍ତି ସେମନ୍‌କେ ଆସିର୍‌ବାଦ୍ କର୍‌ବାବେଲେ ପର୍‌ମେସର୍ ତାକେ ସରଗ୍‌ପୁରେ ଦାରିଗାଲା । ୫୨ ସେମନ୍ ତାକେ ଜୁଆର୍ କଲାଇ ଆରି ସାର୍‌ଦାଅଇ ଜିରୁସାଲମେ ବାଉଡ଼ି ଆଇଲାଇ । ୫୩ ସବୁବେଲା ମନ୍‌ଦିରେ ରଇକରି ପର୍‌ମେସରର୍ ଡାକ୍‌ପୁଟା କର୍‌ବାର୍ ଦାରିଲାଇ ।

**ଯୀଶୁ ଶ୍ରୀଷ୍ଟକ ବିଷୟରେ ଯୋହନ ଲେଖିଥିବା  
ସୁସମାଚାର  
ଜିସୁକିରିସ୍ତର୍ ବିସଇ ନେଇକରି ଜଅନ୍  
ଲେକିରଇବା ନିମାନ୍ କବର୍  
ଏ ବଇ ବିସଇରେ ଜାନ୍ବାଟା**

ଜଅନ୍ ବଇର୍ ସୁବ୍ କବରର୍ କାତା ମାପରୁ ପାଟାଇରଇବା ଜେବଦିର୍ ପ ଜଅନ୍ ଲେକିରଇଲା । ଏଟା କିରିସ୍ତାଦ ୭୦ ଅନି ୯୦ ବିଡ୍ରେ ଲେକାଅଇରଇଲା ବଲି କେତେକ୍ ବାଇବଲ୍ ପଣ୍ଡିତମନ୍ ବିସ୍ବାସ୍ କରବାଇ, ମାତର୍ ଏଟା କେବେ ଅଇଲାଆରେ, ନିକସଙ୍ଗେ କେ ମିସା ନାଜାନଡ୍ । ଜିସୁର୍ ସବୁ ସିସ୍ତମନ୍ ବିଡ୍ରେଅନି ଜଅନ୍ ଆକା ଗଟେକ୍ ମୁକିଅ ସିସ୍ ପାରା ବଲି ଲକ୍ମନ୍ ଜାନିରଇଲା । ବିନ୍ ସିସ୍ତମନ୍ ଟାନେଅନି ଜଅନ୍ ଜିସୁର୍ ମନ୍ ବିସଇ ନିକସଙ୍ଗେ ଜାନିରଇଲା । ସେଟାର୍ପାଇ ଏ ସୁବ୍ କବର୍ଟାନେ ଜିସୁ ମନ୍ ବିଡ୍ରେଅନି ଚିନ୍ତାକରିରଇବାଟା ଆରି ତାର୍ କେତେକ୍ କେତେକ୍ କାତାମନ୍ ଆମର୍ପାଇ ଲେକିଦେଇଆଟେ । ଜଅନ୍ କୁଲ୍କୁଲା ଡକ୍ଟରା ଅଇବାଜାକ ବଠିରଇଲା । ସେ ଏପିସିୟ ଡେଇ ବେସି ବରସ୍ ବାସା କରିରଇଲା । ତେଇ ବାସାକରି ରଇଲାବେଲେ ଆକା ଏ ସୁବ୍ କବର୍ ଲେକ୍ଲା ଆଟେବଲି କଇବାଇ । ନୁଆ ନିୟମେ ରଇବା ପର୍ତୁଗ୍, ଦୁଇପାଲି ଆରି ଚିନ୍ପାଲିର୍ ଚିଟିର୍ ବଇମନ୍ ମିସା ଜେବଦିର୍ ପ ଜଅନ୍ ଲେକିରଇଲା । ଜଅନ୍ ଜିବନ୍ ସାର୍ବା ବେଲାଇ, ବୁମ୍ପ ସାଗରେ ରଇବା ପାଡ୍ମ ନାଉର୍ ଗଟେକ୍ ଚାରିବେଟ୍ଟି ପାନି ରଇ ମଜାର୍ ସୁକ୍ଲା ଜାଗାର୍ ଦେସେ ତାକେ ପାଟାଇରଇଲା । ତେଇ ରଇଲାବେଲେ ସେ ଜିସୁର୍ ଗଟେକ୍ ଦର୍ସନ୍ ପାଇରଇଲା । ଏ ଦର୍ସନ୍ ବିସଇର୍ ଚିକିନିକି କାତା ଜଅନ୍ ନୁଆ ନିୟମର୍ ସାରାସାରି ବଇ, ପରକାସିଡ୍ ବାକିଅ ଟାନେ ଗଟେକ୍ ଗଟେକ୍ କରି ଲେକିଆଟେ । ଜଅନ୍ ସୁବ୍ କବର୍ ମାତିଉ, ମାର୍କ ଆରି ଲୁକ୍ ସୁସମାଚାର୍ ଟାନେଅନି ପୁରାପୁରୁନ୍ ବିନ୍ ଆଟେ । ଜଅନ୍ ସୁସମାଚାରେ ଆମେ ଜିସୁର୍ ମନ୍ ବିଡ୍ରେ ରଇବାଟା ଆରି ଆଡ୍ମାର୍ ବିସଇ ଅଦିକ୍ ଦେକିପାର୍ବାର୍ ଅଇସି । ଜଅନ୍ ଜିସୁ କେନ୍ଡିରଇଲା, ତାର୍ ଅବସ୍ତା କାଇଟା, କେନ୍ଡି ସବୁ ଚିକିନିକି ଲେକ୍ଲା ଆଟେ । ଜିସୁ ନିଜର୍ ବିସଇରେ ଦେଇରଇବା ସିକିଆ ସବୁ ଲେକିଆଟେ । ଜେନ୍ତାରିକି ମୁଇ ଜିବନ୍ ଦେବା କାଦି, ମୁଇ ଜଗତର୍ ଉଜଲ୍, ମୁଇ ନିମାନ୍ ମେଣ୍ଟା ଚାରାଉ ଗଉଡ୍, ମୁଇ ଆକା ଦୁଆର୍, ମୁଇ ସେ ସଡ୍ ଅଜୁର୍ମାଲ୍, ମୁଇ ବାଟ୍, ସଡ୍ ଆରି ଜିବନ୍ ।

**ଏ ବଇବିଡ୍ରେ ରଇବା ବିସଇ**

- ୧. ସୁସମାଚାରେ ଅନି ଆରାମ୍ ଅଇଲା ଜଅନ୍ । ୧:୧-୧୮
- ୨. ଜିସୁ କିରିରଇବା କେତେଟା କାବାଅଇଜିବା କାମ୍ ଜଅନ୍ । ୧:୧୯-୧୨:୫୦
- ୩. ଜିସୁ ମରିକି ଆରିତରେକ୍ ଉର୍ବାଟା ଜଅନ୍ । ୧୩:୧-୨୦:୩୧
- ୪. ଜିସୁ ଆରିତରେକ୍ ଜିବନ୍ ଅଇକରି ଲକ୍ମନ୍କେ ଦେକାଇ ଅଇବାଟା ଜଅନ୍ । ୨୧:୧-୨୫

ଜିବନ୍ ବାକିଅ

୧ କାଇଟା ତିଆର୍ ନ ଅଇରଇଲା ପୁର୍ବେ ବାକିଅ ରଇଲା । ସେ ବାକିଅ ପର୍ମେସରର୍ ସଙ୍ଗେ ରଇଲା । ସେ ଆରି ପର୍ମେସର୍ ଗଟେକ୍ ରଇଲା । ୨ କାଇଟା



ତିଆର୍ ନ ଅଇବା ଆଗତୁ ଏ ବାକିଅ ପରମେସର୍ ସଙ୍ଗ୍ ରଇଲା । ୩ ପରମେସର୍ ସେ ବାକିଅ ଦେଇ ସବୁ ବିସଇ ତିଆର୍ କଲାଆଚେ । ଏ ଦୁନିଆଇ ତିଆର୍ ଅଇଲା ଗଟେକ୍ ବିସଇ ମିସା ତାର୍ଟାନେଅନି ତିଆର୍ ନ ଅଇଲାଟା ନ ରଇଲା । ୪ ସେ ବାକିଅ ନ ସାର୍‌ବା ଜିବନର୍ ଦାନ୍ ଦେଲା ଆରି ସେ ଜିବନ୍ ଦୁନିଆର୍ ଲକ୍‌ମନ୍‌କେ ଉଜଲ୍ ଦେକାଇଦେଲା । ୫ ସେ ଉଜଲ୍ ଆନ୍ଦାର୍ ବିତ୍‌ରେ ସବୁବେଲେ ଉଜଲ୍ ଦେଇସି । ଆନ୍ଦାର୍ କେବେ ମିସା ସେ ଉଜଲ୍ ଲିବାଇ ନାପାଚେ ।

୬ \*ପରମେସର୍, ଜଅନ୍ ନାଉଁର୍ ଗଟେକ୍ ଲକ୍‌କେ ତାର୍ କବର୍‌ନେଉ କରି ପାଟାଇଲା । ୭ ସେ ଲକ୍‌ମନ୍‌କେ ଉଜଲ୍ ବିସଇ କଇବାର୍ ଆସିରଇଲା । ଜେନ୍ତାରିକି ଗୁଲାଇ ଜଗତର୍ ଲକ୍‌ମନ୍ ତାର୍‌ତେଇଅନି ସେ ଉଜଲ୍ ବିସଇ ସୁନ୍‌ବାଇ ଆରି ବିସ୍‌ବାସ୍ କର୍‌ବାଇ । ୮ ଜଅନ୍ ନିଜେ ସେ ଉଜଲ୍ ନ ରଇଲା, ମାତର୍ ଲକ୍‌ମନ୍‌କେ ସେ ଉଜଲ୍ ବିସଇର୍ ସାକି ଦେବାକେ ଆସିରଇଲା । ୯ ସେ ସତ୍ ଏବେ ଉଜଲ୍ ଅଇଲା, ଏ ଉଜଲ୍ ଦୁନିଆଇ ଆଇଲା ଆରି ସବୁ ଲକ୍‌ମନ୍‌ର୍ ମନ୍‌ବିତ୍‌ରେ ରଇବା ଆକି ଡିସାଇଲା ।

୧୦ ବାକିଅ ଏ ଦୁନିଆଇ ରଇଲା । ତାର୍‌ଟାନେଅନି ପରମେସର୍ ଏ ଦୁନିଆ ତିଆର୍ କରିରଇଲେ ମିସା ଏ ଦୁନିଆର୍ ଲକ୍‌ମନ୍ ତାକେ ଚିନତ୍ ନାଇ । ୧୧ ସେ ତାର୍ ନିଜର୍ ଲକ୍‌ମନ୍‌ର୍ ଟାନେ ଆଇଲା, ମାତର୍ ତାର୍ ନିଜର୍ ଲକ୍ ଇସ୍‌ରାଏଲ୍‌ର୍ ପିଲାଜିଲା ତାକେ ନାମତ୍‌ନାଇ । ୧୨ ମାତର୍ ଜେ ଜେ ତାକେ ନାମ୍‌ଲାଇ, ଆରି ତାକେ ବିସ୍‌ବାସ୍ କଲାଇ, ସେ ଲକ୍‌ମନ୍‌କେ ପରମେସର୍‌ର୍ ପିଲାଜିଲା ଅଇଜିବାକେ ସେ ଅଦିକାର୍ ଦେଲା । ୧୩ ସେମନ୍ ମୁନ୍‌ସ୍‌ମନ୍ ମନ୍‌କଲା ଇସାବେ ଜନମ୍ ଅଅତ୍‌ନାଇ, କି ଗାଗତର୍ ବନି ଇସାବେ ଅଅତ୍‌ନାଇ । ନିଜେ ପରମେସର୍ ସେମନ୍‌ର୍ ବାବା ।

୧୪ ଆରି ସେ ବାକିଅ ନର୍ ଲକ୍ ଅଇକରି ଆମ୍‌ର୍ ସଙ୍ଗ୍ ଜିଇଲା । ତାର୍ ସତ୍ ଆରି ଜିବନ୍ ଦୁକାଇବାଟା ପୁରାପୁରନ୍ ରଇଲା । ତାର୍ ବାବାର୍ ଗଟେକ୍‌ସେ ପିଲା ବଲି ସେ ମଇମା ପାଇରଇଲା । ତାର୍ ମଇମା ଆମେ ଦେକିଆରୁ ।

୧୫ ତୁବନ୍ ଦେଉ ଜଅନ୍ ଜିସୁର୍ ବିସଇ ଲକ୍‌ମନ୍‌କେ ଆକ୍‌ମାରି କରି ଏନ୍ତାରି କଇଲା, “ଏ ଲକ୍‌ର୍ ବିସଇ ମୁଇ ଏନ୍ତି କଇରଇଲି, ଜେ ମର୍‌ପଚେ ଆଇଲାନି, ସେ ମର୍‌ତେଇଅନି ବେସି ମୁକିଅ, କାଇକେବଇଲେ ମୁଇ ଜନମ୍ ଅଇବା ଆଗତୁଅନି ସେ ଆଚେ ।”

୧୬ “ତାର୍ ମନ୍ ବିତ୍‌ରେ ରଇଲା ପୁରାପୁରନ୍ ଜିବନ୍ ଦୁକାଇବା ତେଇଅନି ଆମେ ସବୁ ଆସିର୍‌ବାଦ୍ ପାଇଆରୁ । ଉଁ, ଆସିର୍‌ବାଦର୍ ପଚେ ଆସିର୍‌ବାଦ୍ ପାଇଆରୁ । ୧୭ କାଇକେ ବଇଲେ ପରମେସର୍ ଆମ୍‌କେ ମସାର୍‌ଟାନେଅନି ନିୟମ୍ ଦେଲା ଆଚେ । ମାତର୍ ଜିସୁ କିରିସ୍‌ଟ୍‌ଟାନେଅନି ଆମ୍‌କେ ଜିବନ୍ ଦୁକାଇ ସତ୍ ବାଟ୍ ଆଇଲା ଆଚେ । ୧୮ କେ ମିସା କେବେ ପରମେସର୍‌କେ ଦେକତ୍‌ନାଇ । ମାତର୍ ତାର୍ ଗଟେକ୍ ବଲି ପିଲା ଜେ କି ପରମେସର୍‌ର୍ ସମାନ୍ ଆଚେ ଆରି ତାର୍ କଲେ ଆଚେ, ସେ ଆକା ଆମ୍‌କେ ତାର୍ ବିସଇ ଜାନାଇ ଦେଲା ଆଚେ ।”

ତୁବନ୍ ଦେଉ ଜଅନ୍‌ର୍ ସାକି ଦେବାଟା  
(ମାତିଉ ୩:୧-୧୨; ମାର୍କ ୧:୧-୮; ଲୁକ୍ ୩:୧-୧୮)

୧୯ ଜିରୁସାଲମର୍ ଜିଉଦି ନେତାମନ୍, କେତେଟା ଦରମ୍ ଗୁରୁମନ୍‌କେ ଆରି ଲେବି ଦଲର୍ ଲକ୍‌ମନ୍‌କେ ତୁବନ୍ ଦେଉ ଜଅନ୍‌ର୍ ଲଗେ “ତମେ କେ ?” ବଲି ପାଟାର୍‌ବାକେ ପାଟାଇଲାଇ ।

୨୦ ସେ ସତ୍ ବିସଇ କଇବାକେ ନ ନିଚିକରି, ସବୁ ଲକ୍ ବୁଜିଲା ପାରା କଇଲା, “ମୁଇ କିରିସ୍‌ଟ୍ ନଇ ।”

\* ୧:୬ ୧:୭ ମାତିଉ ୩:୧; ମାର୍କ ୧:୪; ଲୁକ୍ ୩:୧,୨

୨୧ ତେଇ ସେମନ୍ ପାଚାରୁଲାଇ, “ସେନ୍ତ୍ରି ବଇଲେ ତମେ କେ ତେବେ ? ବବିସତ୍‌ବକ୍ତା ଏଲିୟ କି ?”

ଜଅନ୍ କଇଲା, “ନଇ, ମୁଇ ଏଲିଅ ନଇ ।”

ଆରି ସେମନ୍ ପାଚାରୁଲାଇ, “ତୁଇ ସେ ବବିସତ୍‌ବକ୍ତା କି ?”

ଜଅନ୍ କଇଲା, “ମୁଇ ସେ ନଇ ।”

୨୨ ତାର ପଚେ ସେମନ୍ ପାଚାରୁଲାଇ, “ସେନ୍ତ୍ରାରୁଆଲେ ତମେ କେ ? ଆମ୍ବକେ ପାଟାଇଲା ଲକ୍‌ମନ୍‌କେ ଆମେ ଜାଇ, କାଇଟା ବଲି କଇବୁ, ସେଟାରୁପାଇ ତମର ନିଜର ବିସଇ ଅଲପ୍ କଇଦିଆ ।”

୨୩ ଜିସାୟ ବବିସତ୍‌ବକ୍ତା ଜେନ୍ତ୍ରି କଇରଇଲା, ଜଅନ୍ ସେମନ୍‌କେ ସେନ୍ତ୍ରି କଇଲା ।

“ମୁଇ ମରୁବାଲି ବୁର୍ବୁ ଆକ୍‌ମାରି ବୁଲ୍‌ବା ଗଟେକ୍ ସବଦ୍

ମାପରୁ ଜିବାକେ ଗଟେକ୍ ସଲକ୍ ବାଟ୍ ତିଆର୍ କରା !”

୨୪ ତାର ପଚେ ପାରୁସିମନ୍ ପାଟାଇ ରଇଲା କବର୍ ନେଉମନ୍ ଜଅନ୍‌କେ ପାଚାରୁଲାଇ । ୨୫ “ତମେ ଜଦି କିରିସଟ୍ ନୁଆସ୍, ଏଲିୟ ନୁଆସ୍, ଆରି ବବିସତ୍‌ବକ୍ତା ନୁଆସ୍, କାଇକେ ଲକ୍‌ମନ୍‌କେ ତୁବନ୍ ଦେଲାସ୍ତନି ?” ୨୬ ଜଅନ୍ ସେମନ୍‌କେ କଇଲା, “ମୁଇ ଲକ୍‌ମନ୍‌କେ ପାନିତେଇ ତୁବନ୍ ଦେଲିନି, ଜନ୍ ଲକ୍‌କେ କି ତମେ ନାଜାନାସ୍, ମାତର୍ ସେ ତମର୍ ସଙ୍ଗ୍ ଆଚେ । ୨୭ ସେ ମର୍ ପଚେ ଆଇଲାନି । ଆରି ତାର୍ ଗତିଦାଙ୍ଗ୍‌ତା ଅଇ ତାର୍ ପାଣ୍ଡୁଇର୍ ପିତା ବେଟ୍‌ବାର୍ ମିସା ମର୍ ଅଦିକାର୍ ନାଇ ।”

୨୮ ଏ ଗଟ୍‌ନା ଜରଦନ୍ ଗାତର୍ ସେପାଟେ ବେଡ୍‌ନି ନାଉର୍ ଜାଗାଇ, ଜଅନ୍ ଲକ୍‌ମନ୍‌କେ ତୁବନ୍ ଦେଲା ବେଲା ଅଇରଇଲା ।

ପର୍ମେସରର୍ ମେଣ୍ଡା ପିଲା

୨୯ ତାର୍ ଆରକର୍ ଦିନେ ଜିସୁ ତାର୍ ଲଗେ ଆଇବାଟା ଦେକିକରି ଜଅନ୍ କଇଲା, “ଏଦେ ଦେକା ! ପର୍ମେସରର୍ ମେଣ୍ଡାପିଲା ଜେ କି, ଏ ଦୁନିଆର୍ ସବୁ ଲକ୍‌ମନ୍‌ର ପାପର୍ ତଣ୍ଟ ବଇକରି ନେଇସି । ୩୦ ଏ ଲକ୍‌ର୍ ବିସଇ ମୁଇ ଆଗତୁ ଏନ୍ତ୍ରି କଇରଇଲି, ମୁଇ ଆଇଲା ପଚେ ଜନ୍ ଲକ୍ ଆଇଲାନି ସେ ମର୍ତେଇଅନି ବେସି ବଡ୍‌ଲକ୍ ଆରି ମୁଇ ଜନମ୍ ଅଇଲା ବେସି ଆଗତୁଅନି ଆଚେ । ୩୧ ମୁଇ ନିଜେ ମିସା ସେ କେ ଅଇରଇସି ବଲି ନାଜାନିରଇଲି । ମାତର୍ ଇସରାଏଲ୍‌ର୍ ଲକ୍‌ମନ୍ ତାର୍ ବିସଇ ଜାନତ୍ ବଲି ମୁଇ ପାନିତେଇ ତୁବନ୍ ଦେବାକେ ଆସିଆତି ।”

୩୨ ତାର୍ ପଚେ ଜଅନ୍ ଆରି ଏ ସାକି ଦେଇ କଇଲା, “ସୁକଲ୍ ଆଡ୍‌ମା ପରୁଆପାରା ଅଇକରି ସର୍ଗେଅନି ଉଡ୍‌ରି ଆସି ତାର୍ ଉପ୍‌ରେ ବସ୍‌ବାଟା ମୁଇ ଦେକିଆତି । ୩୩ ଏଲେମିସା ସେଡ୍‌କିବେଲା ଜାକ ଏ ଲକ୍ ସେ ଆକା ବଲି ମୁଇ ଜାନି ନ ରଇଲି । ମାତର୍ ପାନିତେଇ ତୁବନ୍ ଦେବାକେ ପାଟାଇରଇଲା ପର୍ମେସର୍ ମକେ କଇରଇଲା, ଜେତେବେଲା ଗଟେକ୍ ଲକ୍‌ର୍ ଉପ୍‌ରେ ସୁକଲ୍ ଆଡ୍‌ମା ଉଡ୍‌ରି ଆଇବାଟା ତୁଇ ଦେକ୍‌ସୁ, ସେସେ ଅଇଲାନି ତୁଇ କଜ୍‌ବା ଲକ୍ । ସେ ଲକ୍ ସୁକଲ୍ ଆଡ୍‌ମାଇ ତୁବନ୍ ଦେଇସି । ୩୪ ଏନ୍ତ୍ରି ସୁକଲ୍ ଆଡ୍‌ମା ତାର୍ ଉପ୍‌ରେ ଉଡ୍‌ରି ଆଇବାଟା ମୁଇ ଦେକ୍‌ଲି ଆରି ସେ ପର୍ମେସରର୍ ପିଲା ବଲି ମୁଇ ତମ୍‌କେ ସାକିଦେଲିନି” ବଲି ଜଅନ୍ କଇଲା ।

ଜିସୁର୍ ପର୍‌ତୁମ୍ ସିସମନ୍

୩୫ ତାର୍ ଆରକର୍ ଦିନେମିସା ଜଅନ୍ ସେ ଜାଗାଇସେ ରଇଲା । ଆରି ତାର୍ ଦୁଇଟା ସିସମନ୍‌ର୍ ସଙ୍ଗ୍ ଚିଆ ଅଇରଇଲା । ୩୬ ଆରି ଜିସୁ ସେ ବାଟେ ଜିବାଟା ଜଅନ୍ ଦେକିକରି କଇଲା, “ଏଦେ ଦେକା ! ପର୍ମେସରର୍ ମେଣ୍ଡାପିଲା ଗାଲାନି ।”

୩୭ ଜଅନର ଦୁଇଟା ସିସ୍ତାମନ୍ ତାର କାତା ସୁନି, ଜିସୁର ପତେ ପତେ ଗାଲାଇ । ୩୮ ଜିସୁ ପାସଲକରି ଦେକ୍‌ବା ବେଲେ ସେ ଦୁଇଟା ସିସ୍ତାମନ୍ ତାର ପତେ ପତେ ଜିବାଟା ଦେକି ସେମନ୍‌କେ ପାଟାରଲା ତମେ କାଇଟା କଜ୍‌ଲାସିନି ? ସେମନ୍ ଜିସୁକେ କଇଲାଇ, “ରାବି ତମେ କନ୍ ଜାଗାଇ ରଇଲାସିନି ?” ରାବିର୍ ଅରଡ୍ ଅଇଲାନି ସିକାଇ ଦେବା ଗୁରୁ ।

୩୯ ଜିସୁ ସେମନ୍‌କେ କଇଲା, “ମର୍ ସଙ୍ଗ୍ ଆସା ମୁଇ ରଇବା ଜାଗା ଦେକ୍‌ସା ।” ସେଟାର ପାଇ ସେମନ୍ ତାର ସଙ୍ଗ୍ ଜାଇ ସେ ରଇବା ଜାଗା ଦେକ୍‌ଲାଇ । ଆରି ସେ ଦିନେ ତାର ସଙ୍ଗ୍ ରଇଲାଇ । ସେବେଲା ସଞ୍ଜୁଆ ଚାର୍‌ଟା ଅଇରଇଲା ।

୪୦ ତାକର୍ ବିତ୍‌ରେଅନି ଗଟେକ୍ ଲକ୍ ଅଇଲାନି ସିମନ୍ ପିତରର୍ ବାଇ, ଆନ୍‌ରିୟ । ୪୧ ସେ ଦାପ୍‌ରେ ସେ ତାର ବାଇ ସିମନ୍ ପିତର୍କେ କଜିକରି ବେଟ୍ ପାଇ କଇଲା, “ପର୍‌ମେସର୍ ବାଟି ପାଟାଇଲା ମସିଅକେ\* ଆମେ ବେଟ୍‌ପାଇଲୁ ।” ୪୨ ତାର ପତେ ଆନ୍‌ରିୟ ସିମନ୍‌ପିତର୍କେ ଜିସୁର୍ ଲଗେ ଡାକି ଆନଲା । ଜିସୁ ତାକେ ଦେକି କଇଲା, “ତମେ ସିମନ୍, ଜଅନର୍ ପିଲା ଏବେଅନି ତକେ କେପା ବଲି ଡାକ୍‌ବାଇ ।” କେପାର୍ ଅରଡ୍ ଅଇଲାନି ପିତର୍ ଆରି ପିତରର୍ ଅରଡ୍ ଅଇଲାନି ରାଜ୍‌ନି ପାକ୍‌ନା ।

ଜିସୁ ପିଲିପ୍ ଆରି ନିତନିଏଲ୍‌କେ ଡାକ୍‌ବାଟା

୪୩ ତାର୍ ଆରକର୍ ଦିନେ ଜିସୁ ଗାଲିଲି ଦେସେ ଜିବାକେ ମନ୍ କଲା । ଆରି ସେ ଜିବା ବେଲେ ପିଲିପ୍‌କେ ବେଟ୍‌ପାଇ ତାକେ କଇଲା, “ମର୍ ସଙ୍ଗ୍ ଆଉ ।” ୪୪ ଆନ୍‌ରିୟ ଆରି ପିତର୍ ପାରା ପିଲିପ୍ ମିସା ବେଟ୍‌ସାଇଦା ଗଡ୍‌ର୍ ଲକ୍ ରଇଲା । ୪୫ ପିଲିପ୍ ନିତନିଏଲ୍‌କେ ବେଟ୍ ପାଇ କଇଲା, “ଜନ୍ ଲକର୍ ବିସଇ ମସାର ନିୟମେ ଲେକିରଇଲା ଆରି ବବିସ୍‌ଡ୍‌ବକ୍‌ତାମନ୍ ଲେକି ଆଟ୍, ଆମେ ତାକେ ଦେକ୍‌ଲୁ ଆତୁ । ସେ ଜସେପର୍ ପିଲା ନାଜରିତ୍ ଗଡ୍‌ର୍ ଜିସୁ ।”

୪୬ ନିତନିଏଲ୍ ପିଲିପ୍‌କେ ପାଟାରଲା, “ନାଜରିତ୍ ଗଡେଅନି କାଇଆଲେ ନିକ ବିସଇ ଆଇସି କି ?”

ପିଲିପ୍ ତାକେ କଇଲା, “ତୁଇ ଆସିକରି ଦେକ୍ !”

୪୭ ଜିସୁ ନିତନିଏଲ୍‌କେ ତାର ଲଗେ ଆଇବାଟା ଦେକି ତାର ବିସଇ ନେଇ କଇଲା, “ଏଦେ ଦେକା ! ଏ ଗଟେକ୍ ଇସ୍ରାଏଲର୍ ସଡ୍ ଲକ୍, ଏ ଲକ୍‌ଡେଇ କାଇମିସା କୁଟ୍‌କପର୍ ନାଇ ।”

୪୮ ନିତନିଏଲ୍ ଜିସୁକେ ପାଟାରଲା “ମକେ କେନ୍ତ୍ର ଜାନୁସ୍ ?” ଜିସୁ କଇଲା, “ପିଲିପ୍ ତମ୍‌କେ ଡାକ୍‌ବା ଆଗତୁ ମୁଇ ତକେ ତୁମ୍‌ରି ଗର୍ ତଲେ ଦେକି ରଇଲି ।”

୪୯ ତାର ପତେ ନିତନିଏଲ୍ ଜିସୁକେ କଇଲା, “ଏ ଗୁରୁ, ତମେ ପର୍‌ମେସରର୍ ପିଲା ଆରି ଇସ୍ରାଏଲର୍ ରାଜା !”

୫୦ ଜିସୁ ତାକେ କଇଲା, “ମୁଇ ତକେ ତୁମ୍‌ରି ଗର୍ ତଲେ ଚିଆଅଇଲାଟା ଦେକ୍‌ଲି ବଲି କଇଲାକେ ବିସ୍‌ବାସ୍ କଲୁସିନି କି ? ଇତିଅନି ଆରି ଅଦିକ୍ ବଡ୍ ବଡ୍ କାବା ଅଇଜିବା ବିସଇମନ୍ ଦେକ୍‌ସୁ ।” ୫୧ ଜିସୁ ଆରି ତରେକ୍ କଇଲା, “ମୁଇ ତକେ ସଡ୍‌କାତା କଇଲିନି, ସରଗ୍ ଉଗାଡି ଅଇଜାଇ ନର୍‌ପିଲା ମର୍ ଉପରେ, ପର୍‌ମେସରର୍ ଦୁଟ୍‌ମନ୍ ଚଗି ଜିବାଟା ଆରି ଉଡ୍‌ରି ଆଇବାଟା ତମେ ଦେକ୍‌ସା ।”

## ୨

କାନା ଗଡେ ବିବା

୧ ତୁଇ ଦିନ୍ ପତେ ଗାଲିଲି ଦେସର୍ କାନା ନାଉର୍ ଗଡେ ଗଟେକ୍ ବିବା ଅଇତେ ରଇଲା । ସେ ବିବାଡେଇ ଜିସୁର୍ ମାଆ ମରିୟମ୍ ରଇଲା । ୨ ଜିସୁ ଆରି ତାର୍

\* ୧:୪୧ ୧:୪୧ ମସିଅକେ ମସିଅକ୍ ଅରଡ୍ ଅଇଲାନି କିରିସ୍‌ଟ

ସିସ୍ତମନକେ ମିସା ସେ ବିବାତେଇ ତାକି ରଇଲାଇ । ୩ ବଜି ନ ସାର୍ତେ ଅଙ୍ଗୁର୍ ରସ୍ ସାରିଗାଲାକେ ଜିସୁର୍ ମାଆ ଆସି ତାକେ କଇଲା, “ସେମନର୍ ଅଙ୍ଗୁର୍ ରସ୍ ସାରିଗାଲାବେ ।” ୪ ଜିସୁ ତାକେ କଇଲା, “ଏ ମାଆ, ମର୍ଟାନେ ତର୍ କାଇଟା ଆତେ ? ତୁଇ ମକେ କାଇଟା ମିସା କର୍ବାକେ କଅ ନାଇ । ମର୍ ବେଲା ଏବେ ଜାକ ଆସେ ନାଇତା ।”

୫ ଜିସୁର୍ ମା ବାଣ୍ଟାଗରିଆମନକେ କଇଲା, “ଜିସୁ ତମକେ ଜାଇଟା କଇସି ସେଟା କରା ।”

୬ ସେ ଜାଗାଇ ବଡ଼ ବଡ଼ ପାକନା ସଙ୍ଗ୍ ତିଆର୍ କଲା ଚଅଟା କୁଣ୍ଡ ରଇଲା । ଜିଉଦି ଲକ୍ମନ ସୁକଲ୍ ଅଇବାକେ ସେମନର୍ ରିତିନିତି ଇସାବେ ଏ କୁଣ୍ଡ ପାନି କାମେ ଲାଗାଇତେ ରଇଲାଇ । ଗଟେକ୍ ଗଟେକ୍ କୁଣ୍ଡେ ସଏ ଲିଟର୍ ଲାକା ପାନି ଦାର୍ତେ ରଇଲା । ୭ ଜିସୁ ବାଣ୍ଟାଗରିଆମନକେ “ସେ କୁଣ୍ଡମନକେ ପାନି ବର୍ତ୍ତି କରା” ବଲି କଇଲା ଆରି ସେମନ ସେ ସବୁ କୁଣ୍ଡେ ପାନି ବର୍ତ୍ତି କଲାଇ । ୮ ତାର ପତେ ଜିସୁ ସେମନକେ ତେଇର୍ ପାନି ତୁମିନେଇ ବଜି ଦାଇତେ ରଇଲା ଲକ୍ମକେ ଦିଆସ୍ ବଲି କଇଲା । ସେମନ ତେଇର୍ ପାନି ତୁମି ନେଇ ତାକେ ଦେଲାଇ । ୯ ମାତର୍ ସେ ସବୁ ପାନି ଅଙ୍ଗୁର୍ ରସ୍ ଅଇଜାଇରଇଲା । ବଜି ଦାଇତେ ରଇଲା ଲକ୍ ଅଙ୍ଗୁର୍ ରସ୍ କନ୍ତିଅନି ବଲି ଜାନି ନ ରଇଲା । ମାତର୍ ସେ ପାନି ତୁମି ନେଲା ଲକ୍ମନ ଜାନି ରଇଲାଇ, ପତେ ସେ ଲକ୍ ଚାକି କରି ଏ ରସ୍ କନ୍ତିଅନି ଆନଲାଇ ବଲି ବିବା ଅଇବା ଦାଙ୍ଗ୍ତାକେ ତାକି ପାଟାରୁଲା, ୧୦ “ଲକ୍ମନ ସବୁ ବେଲା ପର୍ତୁମ୍ ପର୍ତୁମ୍ କାଇବାକେ ନିମାନ ଅଙ୍ଗୁର୍ ରସ୍ ଦେବାଇ । ଆରି ଗତିଆ ଲକ୍ମନ କାଇ ପୁରୁନ୍ ଅଇଲା ପତେ ଚପରାଟା ଦେବାଇ । ମାତର୍ ତମେ ଏବେ ସାରାସାରି ଜାକ ନିମାନ ଅଙ୍ଗୁର୍ ରସ୍ କନ୍ତି ସଙ୍ଗ୍ ରଇଲାସ୍ ?”

୧୧ ଏଟା ଜିସୁ ପର୍ତୁମ୍ କଲା କାବାଅଇଜିବା କାମ୍ । ସେଟା ଗାଲିଲି ଦେସର୍ କାନା ନଅରେ କରିରଇଲା । ଏନ୍ତି କରି ତାର ମଇମା ଦେକାଇଲା ଆରି ତାର ସିସ୍ତମନ ତାକେ ବିସ୍ବାସ୍ କଲାଇ । ୧୨ ତାର ପତେ ଜିସୁ, ତାର ମାଆ ତାର ବାଇମନ ଆରି ତାର ସିସ୍ତମନର୍ ସଙ୍ଗ୍ କପର୍ନାଉମ୍ ଗତେ ଜାଇ ତେଇ କେତେ ଦିନ୍ ପାରା ରଇଲାଇ ।

ଜିସୁ ଜିରୁସାଲମ୍ ମନ୍ଦିରେ ଗାଲା  
(ମାତିଉ ୨୧:୧୨-୧୩; ମାର୍କ ୧୧:୧୫-୧୭; ଲୁକ୍ ୧୯:୪୫-୪୬)

୧୩ ସେ ବେଲା ଜିଉଦି ଲକ୍ମନର୍ ନିସ୍ତାର୍ ପରବ୍ କେଟି ଆଇତେ ରଇଲା । ସେଟାପାଇ ଜିସୁ ଜିରୁସାଲମେ ଗାଲା । ୧୪ ତେଇ ସେ ମନ୍ଦିର୍ ବିତ୍ତରେ, ଲକ୍ମନ ଗରୁଗାଇ ମେଣ୍ଟା, ଆରି ପାରୁଆମନ୍ ବେବାର୍ କର୍ବାଟା, ଆରି ବିନ୍ ଦେସର୍ ତାବୁ ବାଦ୍ଲାଉମନ୍ ସେମନର୍ ଟେବୁଲେ ବସିରଇଲାଟା ଦେକଲା । ୧୫ ତେଇ ଜିସୁ କସିରା ସଙ୍ଗ୍ କର୍ତ୍ତା ତିଆର୍ କରି ମେଣ୍ଟା ଆରି ଗରୁମନର୍ ସଙ୍ଗ୍ ସବୁ ଲକ୍ମନକେ ମନ୍ଦିରେଅନି ବାରକରାଇ ଦେଲା । ଆରି ଲକ୍ମନତେଇ ଅନି ବାଦ୍ଲାଇ ନେବା ତାବୁ ସବୁ ବିଚିଦେଇ ସେମନର୍ ଟେବୁଲ୍ ପାସ୍ଲାଇ ଦେଲା । ୧୬ ପରୁଆ ବିକ୍ବା ଲକ୍ମନକେ କଇଲା, “ଏ ସବୁ ଦିନ୍ସୁ ଇତିଅନି ଦାରିଜା । ମର୍ ବାବାର୍ ଗରେ ଗେନା ବିକା ଜାଗା ପାରା କରାନାଇ ।” ୧୭ ଏ ସବୁ ଗର୍ନା ଅଇବାବେଲେ ଜିସୁର୍ ସିସ୍ତମନ ପର୍ମେସରର୍ ସାସ୍ତରେ ଲେକାଅଇଲା ଗଟେକ୍ ବାକିଅ ଏତାଇଲାଇ । ତମର୍ ଗରର୍ ପାଇ ରଇବା ମର୍ ବକ୍ତି, ମର୍ ମନ୍ ବିତ୍ତରେ ଜଇ ଲାଗ୍ଲା ପାରା ଲାଗ୍ଲାନି ।

୧୮ ତେଇ ଜିଉଦି ନେତାମନ୍ ଜିସୁର୍ ଲଗେ ବାଉଡି ଆସି ଏନ୍ତାରି କଇଲାଇ । “ତୁଇ ଏନ୍ତାରି ସବୁ କାମ୍ କର୍ବାକେ ଅଦିକାର୍ ପାଇଆରୁସ୍ ବଲି ଆମେ କେନ୍ତି ଜାନୁ ଆରି

☆ ୨:୧୨ ୨:୧୨ ମାତିଉ ୪:୧୩

କାଈ ତିନରୁଲାଗି ଆମକେ ସେଟା ଦେକାଇଲୁସ୍‌ନି ?” ୧୯ ଈସୁ ସେମାନଙ୍କେ କଇଲା, “ତମେ ଏ ମନ୍ଦିର ବସ୍‌ଲାଇ ଦିଆସ୍ । ସେଟା ମୁଈ ତିନଦିନ୍ ବିତ୍‌ରେ ଆରିତରେକ୍ ତିଆର୍ କରିଦେବି ।”

୨୦ ଜିସୁର୍ ଏ କାତା ସୁନି ସେମନ୍ କଇଲା, “କାଈଟା ! ତିନଦିନ୍ ବିତ୍‌ରେ ତୁଈ ତିଆର୍ କରି ପାରୁସ୍ କି ? ଏ ମନ୍ଦିର ତିଆର୍ କରବାକେ ଚାଲିସ୍ ଚଅ ବରସ୍ ଲାଗିରଇଲା ।”

୨୧ ମାତର୍ ଜିସୁ ତାର୍ ନିଜର୍ ଗାଗଡର୍ ବିସଇ ମନ୍ଦିରକେ ଦେକାଇ କରି ଏ କାତା କଇରଇଲା । ୨୨ ସେ ମରିକରି ଆରିତରେକ୍ ଜିବନ୍ ଅଇ ଉଟ୍‌ଲା ପଟେ ସିସ୍‌ମନ୍‌ର୍ ମନେ ପଡ୍‌ଲା ଜେ, ସେ ଏନ୍ତାରି କଇରଇଲା । ତେବର୍‌ପାଇ ସେମନ୍ ଦରମ୍ ସାସ୍‌ତର୍ ଆରି ଜିସୁର୍ ବାକିଅ ବିସ୍‌ବାସ୍ କଲାଈ ।

ଜିସୁ ମୁନୁସମାନର୍ ଗୁନ୍ ଜାନେ

୨୩ ନିସ୍‌ତାର୍ ପରବ୍‌ବେଲେ ଜିସୁ ଜିରୁସାଲାମ୍ ରଇଲାବେଲେ କେତେକ୍ କେତେକ୍ ଲକ୍ ସେ କରିରଇବା କାବା ଅଇଜିବା କାମ୍‌ମନ୍ କଲାଟା ଦେକି ତାକେ ବିସ୍‌ବାସ୍ କଲାଈ । ୨୪ ମାତର୍ ଜିସୁ ସେ ଲକ୍‌ମନ୍ ବିସ୍‌ବାସ୍ କରିରଇବାଟା ସତ୍‌ବଲି ବାବେନାଇ । କାଈକେ ବଇଲେ ସେ ସବୁ ଲକ୍‌ର୍ ବିସଇ ସେ ନିକସଙ୍ଗ୍ ଜାନି ରଇଲା । ୨୫ ଲକ୍‌ମାନର୍ ବିସଇନେଇକରି ତାକେ, କେ ମିସା କାଈଟାବଲି କଇବାର୍ ଦରକାର୍ ନ ରଇଲା, କାଈକେବଇଲେ ସେ ତାକର୍ ମନ୍ ବିତ୍‌ରର୍ କାତା, ନିଜେ ଜାନି ରଇଲା ।

୩

ଜିସୁ ଆରି ନିକଦିମ

୧ ପାରୁସିମାନର୍ ବିତ୍‌ରେଅନି ନିକଦିମ ନାଉଁର୍ ଗଟେକ୍ ଲକ୍ ରଇଲା । ସେ ଜିଉଦି ମନର୍ ଗଟେକ୍ ନେତା । ୨ ସେ ଦିନେକ୍ ରାତିଆ ଜିସୁର୍ ଲଗେ ଆସି କଇଲା, “ଏ ଗୁରୁ ଆମେ ଜାନୁ, ତମେ ପର୍‌ମେସର୍‌ର୍ ପାଟାଈରଇବା ଗଟେକ୍ ଗୁରୁ । କାଈକେ ବଇଲେ ଜଦି ଗଟେକ୍ ଲକ୍‌ର୍ ସଙ୍ଗ୍ ପର୍‌ମେସର୍‌ ନ ରଇଲେ, ତମେ ଜନ୍ ସବୁ କାବାଅଇଜିବା କାମ୍‌ମନ୍ କଲାସ୍‌ନି, ସେଡ୍‌କି କାମ୍‌ମନ୍ କେ ମିସା କରିନାପାରତ୍ ।”

୩ ଜିସୁ ତାକେ କଇଲା, “ମୁଈ ତକେ ସତ୍ କାତା କଇଲିନି, ଆରିତରେକ୍ ଜନମ୍\* ନ ଅଇଲେ କେ ମିସା ପର୍‌ମେସର୍‌ର୍ ରାଇଜ୍ ଦେକି ନାପାରତ୍ ।”

୪ ନିକଦିମ ତାକେ ପାଚାରୁଲା, “ତକ୍‌ରା ଅଇଲା ଲକ୍ କେନ୍ତି ଆରି ତରେକ୍ ଜନମ୍ ଅଇସି ? ସେ ଆରି ତରେକ୍ ମାଆର୍ ପେଟ୍ ବିତ୍‌ରେ ଜାଈକରି ଜନମ୍ ଅଇସି କି ? ନାଈ ଅଇ ନର୍ସ ।”

୫ ଜିସୁ ତାକେ କଇଲା, “ମୁଈ ତକେ ସତ୍‌କାତା କଇଲିନି, ଗଟେକ୍ ଲକ୍ ପାନି ଆରି ଆଡ୍‌ମାଇଅନି ଜନମ୍ ନ ଅଇଲେ, ପର୍‌ମେସର୍‌ର୍ ରାଇଜେ ଜାଈ ନାପାରେ । ୬ ଗଟେକ୍ ନର୍ ଲକ୍ ତାର୍ ନର୍ ମାଆ ବାବାର୍‌ତେଇଅନି ଜନମ୍ ଅଇସି । ମାତର୍ ସୁକଲ୍ ଆଡ୍‌ମା ତାର୍ ଆଡ୍‌ମାଇ ନୁଆ ଜିବନ୍ ଦେଇସି । ୭ ସେଟାର୍‌ପାଇ ମୁଈ ତକେ ଆରିତରେକ୍ ଜନମ୍ ଅଇବାକେ ଅଇସି ବଲି କଇବା ବିସଇ ସୁନି କାବାଅଇଜାଆ ନାଈ । ୮ ପବନ୍ ଜନ୍ ବାଟେ ଜିବାକେ ମନ୍ କରସି ସେ ବାଟେସେ ଜାଈସି, ଆରି ତମେ ତାର୍ ସବଦ୍ ସୁନ୍‌ସା । ମାତର୍ ସେଟା କନ୍ତିଅନି ଆଈସି ଆରି କନ୍ ବାଟେ ଜାଈସି ସେଟା ନାଜାନାସ୍ । ଆଡ୍‌ମାଇ ଜନମ୍ ଅଇଲା ସବୁ ଲକ୍‌ମନ୍ ମିସା ସେନ୍ତାରିସେ ।” ୯ ନିକଦିମ ଜିସୁକେ ପାଚାରୁଲା, “ଏବେ ତୁଈ କଇବା କାତା କେନ୍ତି ଅଇପାରସି ?” ୧୦ ଜିସୁ ତାକେ କଇଲା, “ତୁଈ ଈସ୍‌ରାଏଲର୍ ଗଟେକ୍ ବଡ୍ ଗୁରୁ ଅଈକରି ମିସା କେନ୍ତି ଏ ସବୁ କାତା

\* ୨:୧୯ ୨:୧୯ ମାଡିଉ ୨୭:୨୧:୨୭:୪୦; ମାର୍କ ୧୪:୫୮; ୧୫:୨୯ \* ୩:୩ ୩:୩ ଆରିତରେକ୍ ଜନମ୍ ପର୍‌ମେସର୍‌ର୍ ଗାନେ ଜାଡ୍ ଅଇବାଟା

ବୁଢ଼ି ନାପାରୁଲୁସନି ? ୧୧ ମୁଞ୍ଚ ତକେ ସତ୍‌କାତା କଇଲିନି, ଆମେ ଜନଟା ଜାନୁ ସେଟା କଇଦେବୁ, ଜନଟା ଦେକିରଇବୁ ସେଟା ସାକି ଦେବୁ, ଅଇଲେ ମିସା ତୁଞ୍ଚ କଇକେ ବିସ୍‌ବାସ୍ କରୁସନାଇ ? ୧୨ ମୁଞ୍ଚ ତକେ ଏ ଦୁନିଆର୍ ବିସଇ କଇବାବେଲେ ବିସ୍‌ବାସ୍ କରୁସ ନାଇ । ଆରି ସରଗର୍ ବିସଇ କଇବି ବଇଲେ କେନ୍ତ୍ରି ମକେ ବିସ୍‌ବାସ୍ କରୁସୁ ? ୧୩ ସରଗେଅନି ଉତ୍‌ରି ଆଇଲା ନରପିଲା ମୁଞ୍ଚ, ମକେ ଚାଡ଼ିକରି ଆରି କେ ମିସା ସରଗେ ଜାଅଡ଼ ନାଇତା ।”

୧୪ “ଆରି ମସା କେନ୍ତ୍ରି ମରୁବାଲି ବୁର୍ଦ୍ଧ ପିତଲ୍ ସାପ୍‌କେ ଡେଲି ଉପରେ ଟେକି ରଇଲା, ସମାନ ସେନ୍ତାରିସେ ପରମେସର୍ ତେଇଅନି ଆଇଲା ନରପିଲା ମକେ ମିସା, ଗଟେକ୍ ଦିନେ ଉପରେ ଟେକ୍‌ବାଇ । ୧୫ ତେବେ, ତାକେ ବିସ୍‌ବାସ୍ କରବା ସବୁ ଲକ୍‌ମନ୍ ନ ସାରବା ଜିବନ୍ ପାଇବାଇ । ୧୬ ପରମେସର୍ ଏ ଦୁନିଆର୍ ଲକ୍‌ମନ୍‌କେ ଏତେକ୍ ଆଲାଦ୍ କଲାଜେ, ତାର୍ ଗଟେକ୍ ବଲି ପିଲାକେ ସର୍ପିଦେଲା । ଜେ ମିସା ତାକେ ବିସ୍‌ବାସ୍ କରବାଇ ବଇଲେ, ସେମନ୍ ନସର୍ ନ ଅଇକରି, ନ ସାରବା ଜିବନ୍ ମିଲାଇବାଇ । ୧୭ ପରମେସର୍ ତାର୍ ପିଲାକେ ଏ ଦୁନିଆଇ ବିଚାର୍ କରବାକେ ପାଟାଏନାଇ, ମାତର୍ ତାର୍ ଲାଗି ଦୁନିଆ ରକିଆ ପାଅ ବଲି ପାଟାଇ ଆଚେ । ୧୮ କେ ପରମେସରର୍ ପିଲାକେ ବିସ୍‌ବାସ୍ କଲାନି ତାର୍ ବିଚାରନା ନର୍ଦ୍ । ମାତର୍ ଜେ ପରମେସରର୍ ପିଲାକେ ବିସ୍‌ବାସ୍ କରେନାଇ ତାର୍ ବିଚାରନା ଅଇସାରୁଲାବେ । କାଇକେବଇଲେ ସେ ଗଟେକ୍ ବଲି ପିଲାକେ ବିସ୍‌ବାସ୍ କରେନାଇ । ୧୯ ଆରି ସେ ବିଚାରନା ଏନ୍ତ୍ର ଅଇସି, ସରଗେ ଅନି ଉଜଲ୍ ଏ ଦୁନିଆଇ ଆସିରଇଲା । ମାତର୍ ଏ ଦୁନିଆର୍ ଲକ୍‌ମନ୍ ସେ ଉଜଲେଅନି ଆନ୍ଦାର୍‌କେ ବେସି ମନ୍ କଲାଇ । କାଇକେବଇଲେ ସେମନ୍ କରବା କାମ୍ ସବୁ ବେସି କାରାପ୍ । ୨୦ ଜନ୍‌ଲକ୍‌ମନ୍ କାରାପ୍ କାମ୍ କଲାଇନି ସେମନ୍ ଉଜଲ୍‌କେ ଗିନ୍ କଲାଇନି । ଆରି ସେ ଉଜଲେ ନ ଆସଡ଼ । କାଇକେବଇଲେ ସେମନ୍‌ର୍ ସବୁ କାରାପ୍ କାମ୍ ସେ ଉଜଲେ ଡିସ୍‌ସି । ୨୧ ମାତର୍ ଜନ୍‌ଲକ୍ ସଡ଼ ଆରି ଟିକ୍ ଇସାବେ କାମ୍ କରି ତଲାତଲ୍‌ତି କଲାନି, ସେ ଉଜଲ୍ ଲଗେ ଆଇସି । ତେବେ, ସେ କରବା କାମ୍ ପରମେସରର୍ ମନ୍ କରବା ଇସାବେ ଅଇଲାନି ।”

**ଜିସୁ ଆରି ତୁବନ୍ ଦେଉ ଜଅନ୍**

୨୨ ତାର୍ ପଟେ ଜିସୁ ଆରି ତାର୍ ସିସ୍‌ମନ୍ ଜିଉଦା ଦେସେ ଗାଲାଇ ଆରି ସେ ଜାଗାଇ ରଇକରି ଲକ୍‌ମନ୍‌କେ ତୁବନ୍ ଦେଲାଇ । ୨୩ ସେ ବେଲାଇ ଜଅନ୍ ମିସା ସାଲମ୍ ଗଡ଼ଲଗେ ଏନନ୍ ନାଉର୍ ଗଟେକ୍ ଗାଏଁ ତୁବନ୍ ଦେଇତେ ରଇଲା । କାଇକେ ବଇଲେ ସେ ଜାଗାଇ ବେସି ପାନି ରଇଲା । ଆରି ଲକ୍‌ମନ୍ ଆସିକରି ତୁବନ୍ ନେଇତେ ରଇଲାଇ । ୨୪ \*ସେଡ଼କ୍ ଦିନ୍ ଜାକ ଜଅନ୍ ବନ୍ଦି ନ ଅଇରଇଲା ।

୨୫ ସେବେଲା ଗଟେକ୍ ଜିଉଦି ଲକ୍ ଆରି ଜଅନ୍‌ର୍ ସିସ୍‌ମନ୍ ଅସୁକଲ୍‌ଅନି ରିଡିନିଡି ଇସାବେ ସୁକଲ୍ ଅଇବା ବିସଇ ନେଇ ତାକର୍ ବିଡ଼ରେ ଦଦାପେଲା ଅଇତେ ରଇଲାଇ । ୨୬ ଆରି ଜଅନ୍‌ର୍ ସିସ୍‌ମନ୍ ତାର୍ ଲଗେ ଆସି କଇଲାଇ, “ଏ ଗୁରୁ, ତମେ ଜରଦନ୍ ଗାଡ଼ ସେପାଟେ କାର୍‌ସକ୍ ବେଟ୍ ଅଇରଇଲାସ୍ ଆରି ତାର୍ ବିସଇ ତମେ ସାକି ଦେଇତେରଇଲାସ୍, ସେ ଲକ୍ ଏବେ ଲକ୍‌ମନ୍‌କେ ତୁବନ୍ ଦେଲାନି ଆରି ସବୁ ଲକ୍‌ମନ୍ ତାର୍ ଲଗେ ଗାଲାଇନି ।” ୨୭ ଜଅନ୍ କଇଲା, “ପରମେସର୍ ନ ଦେଲେ, କେ ମିସା କାଇଟା ନ ପାଅଡ଼ । ୨୮ \*ମୁଞ୍ଚ କଇରଇଲି ପରମେସର୍ ପାଟାଇଲା ମସିଅ ମୁଞ୍ଚ ନଇ ବଲି । ମୁଞ୍ଚ ଅବକା ପାଟାଇରଇବା ଗଟେକ୍ ଦୁଡ଼ ପାରା ଅଇ ଆସିଆଚି । ୨୯ ଜେ ବିବା ଅଇସି, ସେ ବର୍ ଦାଙ୍‌ଡା । ମାତର୍ ବର୍ ଦାଙ୍‌ଡାର୍ ଲଗେ ବରର୍ ସଙ୍ଗାରି ଟିଆଅଇ ତାର୍ କାତା ସୁନ୍‌ସି । ସେ ବର୍ ଦାଙ୍‌ଡାର୍ କାତା ସୁନି, ବେସି ସାର୍‌ଦା

\* ୩:୨୪ ୩:୨୪ ମାଡିଉ ୧୪:୩; ମାର୍‌କ ୬:୧୭; ଲୁକ୍ ୩:୧୯, ୨୦      \* ୩:୨୮ ୩:୨୮ ଜଅନ୍ ୧:୨୦

ଅଇସି । ସେନ୍ତାରିସେ ମର ସାର୍ଦା ମିସା ପୁରାପୁରୁନ୍ ଅଇଲାଆତେ । ୩୦ ସେ ମଆନ୍ ଅଇତେ ଜାଅ ଆରି ମୁଇ ସାନ୍ ଅଇତେ ଜିବି ।”

ସର୍ଗେଅନି ଆଇବା ଗଟେକ୍ ଲକ୍

୩୧ “ଜେ ସର୍ଗେଅନି ଆଇଲା ଆତେ, ସେ ସବୁ ଲକ୍ମନର୍ତେଇଅନି ମଆନ୍ । ଜେ ଜଗତେ ଅନି ଜନମ୍ ଅଇଆତେ, ସେ ଜଗତର୍ କାତାସେ କଇସି । ମାତର୍ ଜେ ସର୍ଗେଅନି ଆସିଆତେ, ସେ ସବୁକଲର୍ତେଇ ଅନି ମଆନ୍ । ୩୨ ସେ ଜନ୍ତା ଦେକ୍ଲା ଆତେ ଆରି ସୁନ୍ଲା ଆତେ ସେ ବିସଇ ସେ ଜାନାଇଲାନି । ମାତର୍ ସେ କଇରଇବା କାତା କେ ମିସା ନାମତ୍ ନାଇ । ୩୩ ଜେ ତାର୍ କଇରଇବା କାତା ନାମସି, ସେ ପର୍ମେସର୍ ସତ୍ତା ବଲି ନାମସି । ୩୪ ଜାକେ ପର୍ମେସର୍ ପାଟାଇଲା ଆତେ, ସେ ପର୍ମେସରର୍ ବାକିଅ କଇସି । କାଇକେ ବଇଲେ ତାକେ ପର୍ମେସରର୍ ଆତ୍ମା ପୁରାପୁରୁନ୍ ଦିଆଅଇଲାଆତେ । ୩୫ \*ବାବା ପିଲାକେ ଆଲାଦ୍ କରି ସବୁ ବିସଇ ତାର୍ ଆତେ ସର୍ପି ଦେଲାଆତେ । ୩୬ ଆରି କେ ପର୍ମେସରର୍ ପିଲାକେ ବିସବାସ କର୍ସି, ସେ ନ ସାର୍ଦା ଜିବନ୍ ପାଇସି । ମାତର୍ ଜେ ପର୍ମେସରର୍ ପିଲାକେ ନାମେ ନାଇ, ସେ ନ ସାର୍ଦା ଜିବନ୍ ନ ପାଏ । ଆରି ପର୍ମେସରର୍ ତଣ୍ଡି ପାଇବାକେ ସେ ରଇସି ।”

### ୪

ଜିସୁ ଆରି ସମିରଣିୟ ମାଇଜି

୧ ଜଅନର୍ତେଇଅନି ଜିସୁକେ ଅଦିକ୍ ସିସ୍ ଅଇବାଟା ଆରି ତୁବନ୍ ଦେବା କାତା ପାରୁସିମନ୍ ସୁନ୍ଲାଇ । ୨ ଜିସୁ ସତଇସେ ନିଜେ କାକେ ମିସା ତୁବନ୍ ନ ଦେଇତେ ରଇଲା, ମାତର୍ ତାର୍ ସିସ୍ମନ୍ ତୁବନ୍ ଦେଇତେ ରଇଲାଇ । ୩ ତାର୍ ବିସଇ ନେଇ ଲକ୍ମନ୍ ଏନ୍ତାରି କାତା ଅଇବାଟା ସୁନି, ଜିସୁ ଜିଉଦା ରାଇଜ୍ ଚାଡିକରି ଆରି ତରେକ୍ ଗାଲିଲି ଦେସେ ଉଟିଗାଲା । ୪ ମାତର୍ ତାକେ ସମିରଣି ଗଡ୍ ବାଟେ ଜିବାକେ ପଡ୍ଲା ।

୫ ଆରି ଜାକୁବ୍ ତାର୍ ନିଜର୍ ପିଲା ଜସେପ୍ତକେ ଜନ୍ ଜାଗା ଦାନ୍ ଦେଇରଇଲା, ସେ ଲଗେ ସମିରଣି ଗଡର୍ ଗଟେକ୍ ସୁକାର୍ ନାଉର୍ ଜାଗାଇ ଜିସୁ ଆସି କେଟ୍ଲା । ୬ ସେ ଜାଗାଇ ଜାକୁବର୍ ଗଟେକ୍ କୁଇସାଲ୍ ରଇଲା । ଜିସୁ ଇଣ୍ଡି ଇଣ୍ଡି ତାକି ଜାଇକରି କୁଇସାଲ୍ ଲଗେ ବସି ରଇଲା । ସେବେଲା ଚିଆମୁଇଦାନ୍ ଅଇରଇଲା ।

୭ ଗଟେକ୍ ସମିରଣିୟ ମାଇଜି କୁଇସାଲେ ପାନି ନେବାକେ ଆଇଲା । ଆରି ଜିସୁ ସେ ମାଇଜିକେ କଇଲା, “ଏ ମା ମକେ ଗୁଡିକ୍ ପାନି କାଇବାକେ ଦେ ।” ୮ ସେଡକିବେଲେ ତାର୍ ସିସ୍ମନ୍ କାଦି ଗେନ୍ଦାକେ ଗଡ୍ ବିଡ୍ରେ ଜାଇରଇଲାଇ ଆରି ଜିସୁ ଗଟେକ୍ ଲକ୍ ସେ ରଇଲା ।

୯ ତେଇ ସମିରଣିୟ ମାଇଜି କାବାଅଇ ଜିସୁକେ କଇଲା, “ତୁଇ ଗଟେକ୍ ଜିଉଦି ଲକ୍ ଆରି ମୁଇ ଗଟେକ୍ ସମିରଣିୟ, ତୁଇ କେନ୍ତ୍ରି ମର୍ ଆତର୍ ପାନି କାଇବାକେ ମାଙ୍ଗ୍ଲୁସିନି ?” କାଇକେ ବଇଲେ, ଜିଉଦି ଲକ୍ମନ୍ ସମିରଣିୟ ଲକ୍ମନର୍ କାଇବାତେଇ ନ କାଇତେ ରଇଲାଇ । ୧୦ ଜିସୁ ତାକେ କଇଲା, “ପର୍ମେସର୍ ଦେବା ଦାନର୍ ବିସଇ, ତୁଇ ଅଲପ୍ ଆଲେ ଜାନି ରଇଲେ ଆରି ମୁଇ କେ ବଲି ଜାନ୍ତୁସ୍ ବଇଲେ ମକେ ମାଙ୍ଗ୍ତୁସ୍ । ଆରି ମୁଇ ତକେ ଜିବନ୍ ଦେବା ପାନି ଦେଇତି ।”

୧୧ ମାଇଜି କଇଲା, “ଆଗିଆଁ, ତମର୍ ଲଗେତା ପାନି ଜିକ୍ବାକେ ବାଲ୍ଟିନାଇ, ଆରି ଏ କୁଇସାଲ୍ ବେସି ତେଙ୍ଗ୍ ଆତେ । କନ୍ତ୍ରିଅନି ତମେ ଜିବନ୍ ଦେବା ପାନି ମିଲାଇସୁ ? ୧୨ ତୁଇ କାଇ ଆମର୍ ଆନିଦାଦି ଜାକୁବର୍ତେଇ ଅନି ବଡ୍ କି ?

\* ୩:୩୫ ୩:୩୫ ମାତିଉ ୧୧:୨୭; ଲୁକ୍ ୧୦:୨୨

ଜାକୁର୍ ଆମକେ ଏ କୁଇସାଲ୍ ଦେଇରଇଲା । ସେ ନିଜେ ମିସା ଏ କୁଇସାଲର୍ ପାନି କାଇତେରଇଲା । ତାର୍ ଗରର୍ ଲକ୍ମନ୍ ଆରି ସେ ପସିରଇଲା ଗରୁଗାଲମନ୍ ଇତିର୍ ପାନି କାଇଲା” ବଲି କଇଲା ।

୧୩ ଜିସୁ ତାକେ କଇଲା, “ଏ କୁଇସାଲର୍ ପାନି କାଇବା ସବୁ ଲକ୍ମନ୍‌କେ ଆରିସେ ସସ୍ ଲାଗିସି । ୧୪ ମାତର୍ ମୁଇ ଜନ୍ ପାନି ଦେବି, ସେ ପାନି ଜେ କାଇସି ବଇଲେ, ତାକେ କେବେ ମିସା ସସ୍ ନ ଲାଗେ । ମୁଇ ଜନ୍ ପାନି ଦେବି, ସେଟା ଜିବନ୍ ଦେବା ପାନି ପାରା ଉଡ଼ିଲି ଜାଇତେରଇସି । ତେଇ ଅନି ଜେ କାଇଲେ, ସେ ନ ସାର୍‌ବା ଜିବନ୍ ପାଇସି ।”

୧୫ ସେ ମାଇଜି ଜିସୁକେ କଇଲା, “ଏ ଆଗିଆଁ ମକେ ସେ ପାନି ଦେ, ଜେନ୍ତିକି କେବେ ମିସା ମକେ ସସ୍ ନ ଲାଗ ଆରି ମୁଇ ଏତେକ୍ ଦୁର୍ ପାନି ନେବାକେ ନ ଆସି ।”

୧୬ ଜିସୁ ସେ ତାକେ କଇଲା, “ତୁଇ ଜାଇକରି ତର୍ ମୁନୁସକେ ଇତି ତାକିଆନ୍ ।”

୧୭ ସେ ମାଇଜି “ମକେ ମୁନୁସ୍ ନାଇ” ବଲି କଇଲା । ଜିସୁ ତାକେ କଇଲା, “ମକେ ମୁନୁସ୍ ନାଇ ବଲି ସତ୍ କାତା କଇଆରୁସ୍ । ୧୮ କାଇକେ ବଇଲେ ତର୍ ପାଁଟା ମୁନୁସ୍ ରଇଲାଇ ଆରି ଏବେ ତୁଇ ଜନ୍ ଲକ୍ମନ୍ ସଙ୍ଗ୍ ଆରୁସ୍, ସେ ମିସା ତର୍ ମୁନୁସ୍ ନର୍ସ । ଏଟା ସତ୍ କଇଆରୁସ୍ ।”

୧୯ ସେ ମାଇଜି କଇଲା, “ଏ ଆଗିଆଁ ତୁଇ ଗଟେକ୍ ବବିସତର୍ କାତା କଇବା ଲକ୍ ବଲି, ଏବେ ମୁଇ ଜାନିପାରଲିନି । ୨୦ ଆମର୍ ସମିରଣିୟ୍ ଆନିଦାଦିମନ୍ ପର୍ମେସର୍‌କେ ଏ ଡଙ୍ଗ୍‌ରେ ଉପାସନା କର୍ତେ ରଇଲାଇ । ମାତର୍ ତମେ ଜିଉଦି ଲକ୍ମନ୍ କଇଲାଇନି ଜିରୁସାଲମ୍‌ସେ ପର୍ମେସର୍‌କେ ଉପାସନା କର୍ବା ଟିକ୍ ଜାଗା ।”

୨୧ ଜିସୁ ତାକେ କଇଲା, “ଏ ମାଆ ମରକାତା ବିସ୍‌ବାସ୍ କର୍ । ଏନ୍ତାରି ବେଲା ଆଇଲାନି ତମେ ପର୍ମେସର୍‌କେ ଏ ଡଙ୍ଗ୍‌ରେ କି ଜିରୁସାଲାମେ ମିସା ଉପାସନା ନ କରାସ୍ । ୨୨ ତମେ ସମିରଣି ଲକ୍ମନ୍ ଜାକେ ଉପାସନା କଲାସ୍‌ନି ତାକେ ସତଇସେ ନାଜାନାସ୍ । ମାତର୍ ଆମେ ଜିଉଦି ଲକ୍ମନ୍ ତାକେ ଜାନିକରି ଉପାସନା କଲୁନି । କାଇକେ ବଇଲେ ମୁକ୍ତି ଜିଉଦି ଲକ୍ମନ୍‌ର ତେଇଅନି ଆଇସି । ୨୩ ବେଲା ଆଇଲାନି ଆରି ସେ ବେଲା କେଟ୍‌ଲାବେ, ଜେତେବେଲା କି ସୁକଲ୍‌ଆଡ଼ମାର୍ ବପୁସଙ୍ ଲକ୍ମନ୍, ବାବା ପର୍ମେସର୍‌କେ ନିକସଙ୍ ଚିନ୍‌ବାଇ । ସେବେଲେ ସେମନ୍ ତାକର୍ ମନେ ସତ୍‌ସଙ୍ ଉପାସନା କର୍‌ବାଇ । ସେନ୍ତି ଉପାସନା କର୍‌ବା ଲକ୍ମନ୍‌କେ ବାବା ମନ୍ କଲାନି । ୨୪ ପର୍ମେସର୍ ଅଇଲାନି ଆଡ଼ମା । ଆରି ଜନ୍‌ଲକ୍ମନ୍ ତାକେ ଉପାସନା କଲାଇନି, ସେମନ୍ ସତ୍‌ସଙ୍ ଆଡ଼ମାଇ ଉପାସନା କର୍‌ବାର୍‌ଆତେ ।” ୨୫ ସେ ମାଇଜି କଇଲା, “ମୁଇ ଜାନି, ମସିଅ ଜାକେ କି କିରିସଟ୍ ବଲ୍‌ବାଇ । ସେବେଲାଇ ଆସି ଆମକେ ସବୁ ବିସଇ ବୁଜାଇ ଦେଇସି ।” ୨୬ ଜିସୁ ତାକେ କଇଲା, “ଏବେ ତର୍ ସଙ୍ ଜେ କାତା ଅଇଲାନି, ମୁଇ ସେ ।”

୨୭ ସେବେଲା ଜିସୁର୍ ସିସମନ୍ ଗତେଅନି ବାଉଡି ଆଇଲାଇ । ଜିସୁ ଗଟେକ୍ ମାଇଜିସଙ୍ କାତା ଅଇବାଟା ଦେକି କାବାଅଇଗାଲାଇ । ମାତର୍ ତାକେ କେ ମିସା ତୁଇ କାଇକେ ତାର୍ ସଙ୍ କାତା ଅଇଲୁସ୍‌ନି, କି କାଇ ବିସଇ ତମେ କାତା ଅଇତେ ରଇଲାସ୍ ? ବଲି ପାଟାର୍‌ବାକେ ସାଆସ୍ କରଡ଼ନାଇ । ୨୮ ତାର୍ ପଟେ ସେ ମାଇଜି ତାର୍ ଆଣ୍ଟିର୍ ପାନି, ତେଇ ଚାଡିକରି ସଅର୍ ବିଡ଼ରେ ଉଟିଗାଲା ଆରି ଜାଇକରି ସବୁ ଲକ୍ମନ୍‌କେ କଇଲା, ୨୯ “ଆସା ଗଟେକ୍ ଲକ୍‌କେ ଦେକ୍‌ସା । ଆଗେ ମୁଇ ଜାଇଜାଇଟା କରିରଇଲି, ସେ ସବୁ କାତା ସେ ମକେ କଇଦେଲା । ସେ ପର୍ମେସର୍ ବାଟି ପାଟାଇଲା ରାଜା ମସିଅ ଅଇଲେ ଅଇରଇସି କାଇକି ।” ୩୦ ସେଟାର୍‌ପାଇ ଲକ୍ମନ୍ ସଅରେ ଅନି ବାରଇକରି ଜିସୁକେ ଦେକ୍‌ବାକେ ଗାଲାଇ ।



୩୧ ଏତକ ବିତରେ ସିସ୍‌ମନ୍ ଜିସୁକେ “ଏ ଗୁରୁ କାଜଗା ଆଲେ ଅଲପ୍ କାଆ ।”  
ବଲି ବାବୁଜିଆ କଲାଇ ।

୩୨ ମାତର୍ ଜିସୁ ସେମନ୍‌କେ କଇଲା, “ମର୍ ଲଗେ ଜନ୍ କାଦି ଆଚେ, ସେ କାଦିର୍  
ବିସଇ ତମେ ନାଜାନାସ୍ ।”

୩୩ ସେଟାର୍ ପାଇ ସିସ୍‌ମନ୍ ନିଜର୍ ନିଜର୍ ବିତରେ କୁଆବଲା ଅଇଲାଇ,  
“ତାର୍‌ପାଇ କେ କାଦି ଆନିଦେଲାଇ ଆଚ୍‌ତ୍ କି ?”

୩୪ ଜିସୁ ସେମନ୍‌କେ କଇଲା, “ମକେ ପାଟାଇରଇବା ପର୍‌ମେସର୍ ମନ୍‌କଲାଟା  
ମାନିକରି ଆରି ସେ ଦେଇରଇବା କାମ୍ ପୁରାପୁରୁନ୍ କର୍‌ବାଟାସେ ମର୍ କାଦି ।

୩୫ ତାରି ମାସ୍ ଗାଲେ କାଟାବେଟା ଦିନ୍ ଆଇସି ବଲି ତମେ କଇତେରଇସା । ମାତର୍  
ମୁଇ ତମ୍‌କେ କଇଲିନି କେତ୍‌ମନ୍‌କେ ନିକ କରି ଦେକିଦେକା । ଏବେ ତେଇର୍ ତାସ୍  
ପାଟିଗାଲା ଆଚେ ଆରି କାଟ୍‌ବା ବେଲା ସମାନ୍ ଅଇଲା ଆଚେ । ୩୬ ଏବେ ମିସା ଜନ୍  
ଲକ୍ ତାସ୍ କାଟ୍‌ଲାନି ତାକେ ବୁଡି ଦିଆ ଅଇଲାନି, ସେ ନ ସାର୍‌ବା ଜିବନର୍ ପାଇ  
ତାସ୍ ଚୁଲିଆଇଲାନି । ସେଟାର୍ ପାଇ ବୁନ୍‌ଲା ଲକ୍ ଆରି କାଟ୍‌ବା ଦୁଇ ଲକ୍‌ଜାକ  
ମିସି ସାର୍‌ଦା କର୍‌ବାଇ । ୩୭ କାଇକେବଇଲେ ଗଟେକ୍ ଲକ୍ ବିଅନ୍ ବୁନ୍‌ଲେ ସେଟା  
ବିନ୍ ଲକ୍ କାଟ୍‌ସି । ଏ କାତା ପୁରାପୁରୁନ୍ ସତ୍ । ୩୮ ତମେ ଜିନ୍ତୁ ବୁନି ନ ରଇଲାସ୍  
ତେଇ କାଟ୍‌ବାକେ ପାଟାଇଆଚି । ବିନ୍ ଲକ୍‌ମନ୍ କାମ୍‌କଲାଇ ଆରି ତମେ ସେମନ୍  
କଲା କାମେଅନି ଲାବ୍ ପାଇଲାସ୍‌ନି ।”

୩୯ ସେ ସଅରର୍ କେତେକ୍ କେତେକ୍ ସମିରଣିୟମନ୍ ଜିସୁକେ ବିସ୍‌ବାସ୍ କଲାଇ ।  
କାଇକେବଇଲେ, ସେ ମାଇଜି ସେମନ୍‌କେ କଇରଇଲା । ଆଗେ ମୁଇ ଜାଇଜାଇଟା  
କରିରଇଲି, ସେ ସବୁ କାତା ସେ ମକେ କଇଦେଲା । ୪୦ ଆରି ସମିରଣିୟ  
ଲକ୍‌ମନ୍ ଜିସୁର୍ ଲଗେ ଆସି ତାର୍ ସଙ୍ଗ୍ କେତେ ଦିନ୍ ରଇବାକେ ଗୁଆରି କଲାଇ,  
ସେଟାର୍‌ପାଇ ସେ ତେଇ ଦୁଇ ଦିନ୍ ରଇଲା ।

୪୧ ଜିସୁର୍ କାତା ସୁନି ତାକେ ବେସି ଲକ୍‌ମନ୍ ବିସ୍‌ବାସ୍ କଲାଇ । ୪୨ ଲକ୍‌ମନ୍ ସେ  
ମାଇଜିକେ କଇଲାଇ, “ତୁଇ କଇଲାକେ ଆମେ ବିସ୍‌ବାସ୍ କରୁନାଇ, ଆମେ ନିଜେ  
ତାର୍ କାତା ସୁନି କରି ଏ ଆକା ଦୁନିଆର୍ ରକିଆକରୁ ବଲି ବିସ୍‌ବାସ୍ କଲୁ ।”

ଜିସୁ ଗଟେକ୍ ରାଜାର୍ ମୁକିଅ ଲକ୍‌ର୍ ପିଲାକେ ନିମାନ୍ କଲା

୪୩ ଜିସୁ ତେଇ ଦୁଇ ଦିନ୍ ରଇଲା ପଚେ ଗାଲିଲି ରାଇଜେ ଗାଲା । ୪୪ ଆରି  
ଗଟେକ୍ ବବିସ୍‌ତବକ୍‌ତା ନିଜର୍ ଦେସେ ସନ୍‌ମାନ୍ ନ ପାଏ ବଲି ଜିସୁ ଆଗ୍‌ତୁସେ ତାର୍  
ସିସ୍‌ମନ୍‌କେ କଇରଇଲା । ୪୫ ସେଟାର୍‌ପାଇ ସେ ଜେତେବେଲା ଗାଲିଲି ଦେସେ  
କେଟ୍‌ଲା, ସେବେଲା ଲକ୍‌ମନ୍ ଆଲାଦ୍ ସଙ୍ଗ୍ ତାକିନେଲାଇ । କାଇକେବଇଲେ  
ଆଗେ ଜିରୁସାଲାମେ ନିସ୍‌ତାର୍ ପରବ୍‌ଟାନେ ସେମନ୍ ସେ କରିରଇବା କାମ୍ ସବୁ  
ଦେକିରଇଲାଇ ।

୪୬ ଜିସୁ ଗାଲିଲିର୍ କାନା ନାଉର୍ ଗତେ ଆରି ତରେକ୍ ଗାଲା । ସେ ଗତେସେ ପାନି  
ଅଙ୍ଗୁର୍ ରସ୍ କରିରଇଲା । ତେଇ ରମିଅ ସାସନ୍‌କାରିଆର୍ ଗଟେକ୍ ମୁକିଅ ଲକ୍‌ର୍  
ପଅ କପର୍‌ନାଉମେ ଜର୍ ଅଇରଇଲା । ୪୭ ଜିସୁ ଜିଉଦାଇ ଅନି ଗାଲିଲି ଆଇଲା  
ଆଚେ ବଲି ସୁନିକରି ଜର୍ ଅଇଲା ପିଲାର୍ ବାବା ତାର୍ ଲଗେ ଗାଲା । ମର୍‌ବା ସମାନ୍  
ଅଇରଇବା ପିଲାକେ ନିମାନ୍ କର୍‌ବାକେ କପର୍‌ନାଉମେ ଜୁ ବଲି ଜିସୁକେ ଜୁଆର୍  
ବିଆର୍ କଲା । ୪୮ ଜିସୁ ତାକେ କଇଲା, “ତମେ କାବା ଅଇଜିବାଟା ଆରି କେବେ ନ  
ଅଇଲା ପାରା କାମର୍ ଚିନ୍‌ମନ୍ ନ ଦେକ୍‌ଲେ କେବେ ମିସା ମକେ ବିସ୍‌ବାସ୍ ନ କରାସ୍  
।”

☆ ୪:୪୪ ୪:୪୪ ମାଡିଉ ୧୩:୫୭; ମାର୍‌କ ୭:୪; ଲୁକ୍ ୪:୨୪ ☆ ୪:୪୫ ୪:୪୫ ଜଅନ୍ ୨:୨୩ ☆ ୪:୪୬ ୪:୪୬  
ଜଅନ୍ ୨:୧-୧୧

୪୯ ସେ ଲକ୍ ତାକେ କଇଲା, “ଏ ଗୁରୁ, ମର୍ ପିଲା ନ ମର୍ବା ଆଗ୍ତୁ ତମେ ମର୍ ସଙ୍ଗ୍ ଆସା ।”

୫୦ ଜିସୁ ତାକେ କଇଲା, “ଏବେ ତୁଇ ତର୍ ଗରେ ଜା, ତର୍ ପିଲା ଜିବନ୍ ଅଇଗାଲାବେ ।” ସେ ଲକ୍ ଜିସୁ କଇରଇବା କାତା ବିସ୍ବାସ୍ କରି ବାଉଡିଗାଲା । ୫୧ ସେ ଗରେ ଗାଲାବେଲେ ତାର୍ କେତେଟା ଗତି ଦାଙ୍ଗ୍ତାମନ୍ ତାକେ ବେଟ୍ପାଇକରି, “ତର୍ ପିଲା ନିମାନ୍ ଅଇଲାବେ” ବଲି କଇଲାଇ ।

୫୨ ସେ ଲକ୍ ତାର୍ ଗତିଦାଙ୍ଗ୍ତାମନ୍କେ ପାଚାର୍ଲା, “ପିଲା କେତେବେଲେ ନିମାନ୍ ଅଇଲା?” ଗତିଦାଙ୍ଗ୍ତାମନ୍, “କାଲି ଗଟେ ବେଲେ ନିମାନ୍ ଅଇଲା” ବଲି କଇଲାଇ । ୫୩ ଜିସୁ ଟିକ୍ ସେବେଲାସେ ତର୍ ପିଲା ନିମାନ୍ ଅଇଲାବେ ବଲି କଇରଇଲାଟା ସେ ମୁକ୍ତିଅ ଲକ୍ ମନେପାକାଇଲା । ସେଟାର୍ପାଇ ସେ ଲକ୍ ଆରି ତାର୍ ଗରର୍ ସବୁ ଲକ୍ ଜିସୁକେ ବିସ୍ବାସ୍ କଲାଇ ।

୫୪ ଜିସୁ ଜିଉଦାଇ ଅନି ଗାଲିଲି ଦେସେ ଆଇଲା ପଟେ ଏଟାସଙ୍ଗ୍ ଦୁଇପାଲି କାବାଅଇଜିବା କାମ୍ କରି ରଇଲାଟା ।



ଜିସୁ ବନ୍ଦ୍ଗାନେ ଗଟେକ୍ ରଗିକେ ନିକ କଲା

୧ ତାର୍ ପଟେ ଜିଉଦିମନର୍ ଗଟେକ୍ ମୁକ୍ତିଅ ପରର୍ ରଇଲା । ସେଟାର୍ ପାଇ ଜିସୁ ଜିରୁସାଲାମ୍ ଗାଲା । ୨ ଜିରୁସାଲାମର୍ ମେଣ୍ଟା ଦୁଆର୍ ଲଗେ ଗଟେକ୍ ବନ୍ଦ୍ ରଇଲା । ସେଟାକେ ଏବ୍ରି ବାସାଇ ବେତେସ୍ଦା ବଲି କଇବାଇ । ତେଇ ପାଟ୍ଟା ମଣ୍ଡପ୍ ରଇଲା । ୩ ସେ ମଣ୍ଡପ୍ ମନର୍ଟାନେ କେତେକ୍ କେତେକ୍ ଜର୍ଦୁକା ଅଇଲା ଲକ୍ମନ୍ ରଇତେ ରଇଲାଇ । ରଗିମନର୍ ବିତ୍ରେଅନି କାଣା, ଚଟା, ଆରି କେତେକ୍ ଅଦୁଆ ରଗିମନ୍ ରଇଲାଇ । ୪ କାଇକେବଇଲେ କେତେ କେତେବଲ୍ ପର୍ମେସରର୍ ଗଟେକ୍ ଦୁଡ୍ ଆସିକରି ସେ ବନ୍ଦ୍ ପାନି ଅଲ୍କା କରତେ ରଇଲା । ଆରି ସେ ଅଲ୍କା ଅଇଲାପଟେ, ଜନ୍ ଲକ୍ ପର୍ତୁମ୍ ଜାଇତେ ରଇଲା, ତାକେ କାଇ ରଗ୍ ଅଇରଇଲେ ମିସା ନିମାନ୍ ଅଇଜାଇତେରଇଲା । ୫ ତାକର୍ ବିତ୍ରେ ତିରିସ୍ ଆର୍ ବରସ୍ ଜାକ ଡୁଲିରଇବା ଗଟେକ୍ ରଗି ଲକ୍ ରଇଲା । ୬ ତେଇ ଜିସୁ ସେ ରଗି ଡୁଲିରଇବାଟା ଦେକି, ଏ ଲକ୍ ବେସି ବରସ୍ ରଗି ବଲି ଜାନି ତାକେ ପାଚାର୍ଲା “ତମେ କାଇ ନିମାନ୍ ଅଇବାକେ ମନ୍ କଲାସିନି କି ?”

୭ ସେ ରଗି ଲକ୍ ଜିସୁକେ କଇଲା, “ଏ ଆଗିଆଁ ପାନି ଅଲ୍କା କଲାବେଲେ, ସେ ବନ୍ଦ୍ ବିତ୍ରେ ମକେ ନେବାକେ କେ ନାଇ । ଆରି ବନ୍ଦ୍ ବିତ୍ରେ ଜିବାକେ ଚେସ୍ଟା କଲାବେଲେ ବିନ୍ ଲକ୍ ମର୍ ଆଗ୍ତୁ ଉଚିଜିବାଇ ।”

୮ ଜିସୁ ତାକେ କଇଲା, “ଉଚି ଚିଆଅ, ଆରି ତର୍ ଗାଟି ଦାରି ଇଣ୍ଡିଜା ।” ୯ ସେ ଦାପ୍ରେ ସେ ଲକ୍ ନିମାନ୍ ଅଇଗାଲା ଆରି ନିଜର୍ ଗାଟି ଦାରିକରି ଇଣ୍ଡିବାର୍ ଦାର୍ଲା । ସେ ଦିନ୍ ବିସ୍ରାମ୍ବାର୍ ରଇଲା । ୧୦ ସେଟାର୍ପାଇ ଜିଉଦି ନେତାମନ୍, ନିମାନ୍ ଅଇଲା ରଗିକେ କଇବାର୍ ଦାର୍ଲାଇ, “ଆଜି ବିସ୍ରାମ୍ ଦିନେ, ତୁଇ ଗାଟି ଦାରି ଜିବାଟା ଆମ୍ ନିୟ୍ମ୍ ନାଇ ।”

୧୧ ମାତର୍ ସେ ଲକ୍ ସେମନ୍କେ କଇଲା, “ଜେ ମକେ ନିମାନ୍ କଲା ସେ ମକେ ତମର୍ ଗାଟିଦାରିକରି ଜା ବଲି କଇଲାଆଟେ ।”

୧୨ ସେମନ୍ ତାକେ ପାଚାର୍ଲାଇ, “ଜେ ତକେ ଗାଟି ଦାରି ଜା ବଲି କଇଲା, ସେ ଲକ୍ କେ ?”

୧୩ ମାତର୍ ସେ ନିମାନ୍ ଅଇଲା ଲକ୍ ଜିସୁ କେ ବଲି ଚିନି ନରଇଲା, କାଇକେ ବଇଲେ ସେ ଜାଗାଇ ବେସି ଲକ୍ମନ୍ ରଇଲାଇଜେ, ଜିସୁ ତେଇଅନି ବିନେ ପିସ୍ଲି ଉଚିଜାଇରଇଲା ।

୧୪ ତାର ପରେ ଜିସୁ ସେ ନିକ ଅଇଲା ଲକ୍ଷକେ ମନ୍ଦିର ବିତ୍ତରେ ଦେକିକରି କଇଲା, “ଦେକ ଏବେ ତୁଇ ନିକ ଅଇଜାଇଆରୁସ୍ । ତୁଇ ଆରି ପାପ୍ କାମ୍ କରନାଇ । ନଇଲେ ତକେ ଆରି ଅଦିକ୍ ଦୁକ୍ କସଟ୍ ଆଇସି ମିସା ।”

୧୫ ତାର ପରେ ସେ ନିକ ଅଇଲା ଲକ୍ଷ ଜିଉଦି ନେତାମନର୍ ଲଗେ ଜାଇକରି, “ଜେ ତାକେ ନିକ କରିରଇଲା, ସେ ଜିସୁ” ବଲି କଇଲା । ୧୬ ଏ ନିମାନ୍ କାମ୍ କଲାଟା, ବିସ୍ତରାମ୍ ବାରେ ଅଇରଇଲା ଜେ, ଜିଉଦି ନେତାମନ୍ ଜିସୁକେ ଦୁକ୍‌କସଟ୍ ଦେବାର୍ ବସଲାଇ । ୧୭ ମାତର୍ ଜିସୁ ସେମନ୍‌କେ କଇଲା, “ମର୍‌ବାବା ପର୍‌ମେସର୍ ସବୁବେଲା କାମ୍‌କଲାନ୍, ମୁଇ ମିସା ସେନ୍ତି କାମ୍ କଲିନି ।”

୧୮ ଜିସୁ ଏନ୍ତି କଇରଇଲାଜେ ଜିଉଦି ନେତାମନ୍ ତାକେ ମରାଇବାକେ ଅଦିକ୍ ଚେସଟା କଲାଇ । କାଇକେ ବଇଲେ ଜିସୁ ବିସ୍ତରାମ୍ ବାରର୍ ନିୟମ୍ ମାନେ ନାଇ ବଲି ନାଇ, ମାତର୍ ସେ ପର୍‌ମେସର୍‌କେ ମର୍ ବାବା ବଲି କଇ, ନିଜ୍‌କେ ପର୍‌ମେସର୍ ସଙ୍ଗ୍ ସମାନ୍ କରି ରଇଲା ।

ପଅର୍ ଅଦିକାର୍

୧୯ ଜିସୁ ସେମନ୍‌କେ କଇଲା, “ମୁଇ ତମ୍‌କେ ସତ୍ କଇଲିନି, ପର୍‌ମେସରର୍ ପିଲା ମୁଇ ନିଜେ କାଇଟା ମିସା କରିନାପାରି । ମର୍ ବାବା ଜନ୍ ଜନ୍‌ଟା ସବୁ କର୍‌ବାଟା ମୁଇ ଦେକଲିନି ସେଟାସେ ମୁଇ କରିପାରି । କାଇକେ ବଇଲେ ବାବା ଜନ୍ ଜନ୍‌ଟା ସବୁ କଲାନ୍ ତାର୍‌ପିଲା ମୁଇ ମିସା ସେଟା ସବୁ ସେନ୍ତିସେ କଲିନି । ୨୦ ବାବା ମକେ ଆଲାଦ୍ କର୍‌ସି ଆରି ନିଜେ ଜନ୍‌ଟା କର୍‌ସି, ସେ ସବୁ ମକେ ଦେକାଇସି । ଆରି ଏବେ ଜାଇଟା ଗର୍‌ଲା ଆଟେ, ତାର୍‌ତେଇଅନି ଅଦିକ୍ ବଡ୍ ବଡ୍ କାବାଅଇଜିବା କାମ୍‌ମନ୍ ମକେ ଦେକାଇସି । ସେଟା ସବୁ ଦେକି ତମେ ସବୁଲକ୍ କାବାଅଇଜାଇସା । ୨୧ ବାବା ପର୍‌ମେସର୍ ଜେନ୍ତି ମଲାଲକ୍‌ମନ୍‌କେ ଜିବନ୍ କରି ଉଟାଇସି, ସମାନ୍ ସେନ୍ତି ମୁଇ ମିସା ତାର୍ ପିଲା ଜାକେ ଜାକେ ମନ୍ କର୍‌ବି, ସେମନ୍‌କେ ମଲାତେଇଅନି ଉଟାଇବି । ୨୨ ବାବା ପର୍‌ମେସର୍ କାକେ ମିସା ତାର୍ ପାପ୍ କାମ୍‌ଲାଗି ବିଚାର୍ ନ କରେ । ମାତର୍ ସବୁ ଲକ୍‌ମନ୍‌ ବିଚାର୍ କର୍‌ବା ପୁରାପୁରୁନ୍ ଅଦିକାର୍ ତାର୍ ପିଲା ମକେ, ଦେଲା ଆଟେ । ୨୩ ତେବେ ସବୁ ଲକ୍‌ମନ୍ ବାବାକେ ଜେନ୍ତି ସନ୍‌ମାନ୍ ଦେଲାଜିନି, ସେନ୍ତିସେ ତାର୍ ପିଲା ମକେ ମିସା ସନ୍‌ମାନ୍ ଦେବାଇ । ଜଦି ଜନ୍ ଲକ୍‌ମନ୍ ତାର୍ ପିଲା ମକେ ସନ୍‌ମାନ୍ ଦେଅଡ୍ ନାଇ, ସେମନ୍ ମକେ ପାଟାଇଲା ବାବାକେ ମିସା ସନ୍‌ମାନ୍ ଦେଅଡ୍ ନାଇ ।

୨୪ “ମୁଇ ତମ୍‌କେ ସତ୍ କଇଲିନି, ଜେ ମର୍ କାତା ସୁନି ମକେ ପାଟାଇଲା ପର୍‌ମେସର୍‌କେ ବିସ୍‌ବାସ୍ କର୍‌ସି, ସେ ନ ସାର୍‌ବା ଜିବନ୍ ପାଇସି । ଆରି ସେ ବିଚାର୍‌ନା କରାଇ ନ ଅଏ । କାଇକେବଇଲେ ସେ ମରନ୍‌କେ ଜିତି କରି ଜିବନ୍ ପାଇଆଟେ । ୨୫ ମୁଇ ତମ୍‌କେ ସତ୍ କଇଲିନି ଏନ୍ତି ଗଟେକ୍ ବେଲା ଆଇଲାନ୍, ସେ ବେଲା ଏବେ କେଟିଆଟେ । ଜେତେବେଲା ମଲା ଲକ୍‌ମନ୍ ପର୍‌ମେସରର୍ ପିଲା ମର୍ କଟ୍‌ର୍ ସର୍ ସୁନ୍‌ବାଇ, ସେମନ୍ ଜିବନ୍ ଅଇ ଉଟ୍‌ବାଇ । ୨୬ ବାବା ଜେନ୍ତିକି ଜିବନ୍‌ର୍ ମୁଲ୍, ସେନ୍ତାରିସେ ତାର୍ ପିଲା ମୁଇ ମିସା ଜିବନ୍‌ର୍ ମୁଲ୍ । ୨୭ ଆରି ମୁଇ ପର୍‌ମେସରର୍ ଟାନେଅନି ଆଇଲା ନର୍‌ପିଲା ଅଇଲାଟ୍‌ଲାଗି, ସବୁ ଲକ୍‌ମନ୍‌କେ ବିଚାର୍ କର୍‌ବା ଅଦିକାର୍ ସେ ମକେ ଦେଲାଆଟେ । ୨୮ ତମେ ଏଟାର୍‌ପାଇ କାବା ଉଆନାଇ, ଏନ୍ତି ବେଲା ଆଇଲାନ୍, ମରିକରି ତପିଅଇଲା ସବୁ ଲକ୍‌ମନ୍ ମର୍ କଟ୍‌ସର୍ ସୁନ୍‌ବାଇ । ୨୯ ଆରି ସେମନ୍ ସମାଦି ଅନି ଆରି ତରେକ୍ ଉଟ୍‌ବାଇ । କେ କେ ନିକ କାମ୍ କରିଆଟଡ୍, ସେମନ୍ ମଲାଟାନେଅନି ଜିବନ୍ ଅଇକରି ଉଟ୍‌ବାଇ । କାରାପ୍ କାମ୍ କରୁମନ୍ ମିସା ମଲାଟାନେଅନି ଉଟ୍‌ବାଇ ଆରି ଦସି ବଲାଇଅଇବାଇ ।”

ଜିସୁର ବିସଇର୍ କଇବା ସାକି

୩୦ ମୁଇ ମର୍ ନିଜର୍ ଅଦିକାରେ କାଇଟା ମିସା କରିନାଇ, ବାବା ମକେ କେନ୍ତ୍ରି କଇଲା ଆଟେ, ସେନ୍ତ୍ରିସେ ବିଚାର କର୍ବି । ଆରି ମୁଇ କର୍ବାଟା ଟିକ୍ସେ । କାଇକେବଇଲେ ମୁଇ ନିଜେ ମନ୍‌କଲାଟା ପୁରାପୁରୁନ୍ କର୍ବାକେ ନାଇ, ମାତର୍ ମକେ ପାଟାଇଲା ପର୍ମେସର୍ ମନ୍‌କଲାଟା ପୁରାପୁରୁନ୍ କଲିନି । ୩୧ ମର୍ ନିଜର୍ ପାଇ ଜଦି ମୁଇ ସାକି ଦେବି, ସେଟା ସତ୍ ବଲି ଦାରା ନ ଜାଏ । ୩୨ ମାତର୍ ମର୍ ପାଇ ଆରି ଗଟେକ୍ ଲକ୍ ସାକିଦେଲାନି, ଆରି ସେଟା ମୁଇ ଜାନି । ସେ ମର୍ ବିସଇ କାଇଟା ସବୁ କଇଲାନି ସେଟା ସବୁ ସତ୍‌ସେ । ୩୩ ତମେ ଜଅନ୍ ଲଗେ କବର୍ ନେଉମନ୍‌କେ ପାଟାଇ ରଇଲାସ୍, ଆରି ସେ ତମକେ ସତ୍ ବିସଇ ସାକି ଦେଲାଆଟେ । ୩୪ ମର୍ ବିସଇ କେ ମିସା ସାକି ଦେଅତ୍ ବଲି ମୁଇ ମନ୍ କରିନାଇ । ଜେନ୍ତ୍ରିକି ତମେ ପାପେଅନି ରକିଆ ପାଇସା ସେଟାର୍ ପାଇ ମୁଇ ଏ ସବୁ କଇଲିନି । ୩୫ ଜଅନ୍ ଗଟେକ୍ ବଡିପାରା ଲାଗିକରି ଅଲପର୍ ପାଇ ଉଜଲ୍ ଦେଇତେରଇଲା । ଆରି ତମେ ସେ ଉଜଲ୍, ଅଲପ୍ ଦିନର୍ ପାଇ ପାଇକରି ସାର୍ଦା ଅଇରଇଲାସ୍ । ୩୬ ମାତର୍ ମର୍ଲଗେ, ଜଅନ୍‌ତେ ତେଇଅନି ଅଦିକ୍ ବପୁର୍ ଗଟେକ୍ ସାକି ଆଟେ । ପର୍ମେସର୍ ଆଦେସ୍ ଇସାବେ ମୁଇ ଜନ୍ ସବୁ କାମ୍ କଲିନି, ସେଟା ସବୁ ମର୍ ପାଇ ନିକ ସାକି । ସେ ସବୁ କଇଲାନିଜେ, ମକେ ପର୍ମେସର୍ ପାଟାଇଲା ଆଟେ ବଲି ।

୩୭ ଆରି ମକେ ପାଟାଇଲା ବାବା ପର୍ମେସର୍ ମିସା ମର୍ ବିସଇ ସାକି ଦେଲାନି । ତମେ କେବେ ମିସା ତାର୍ କର୍ ସୁନାସ୍ ନାଇ, କି ସେ କେନ୍ତ୍ରାଟା ଦେକାସ୍ ନାଇ । ୩୮ ଆରି ତାର୍ କାତା ତମର୍ ମନ୍‌ବିତ୍‌ରେ ରଏନାଇ । କାଇକେବଇଲେ ସେ ଜାକେ ପାଟାଇଲା ଆଟେ ତାକେ ତମେ ବିସ୍‌ବାସ୍ କରାସ୍ ନାଇ । ୩୯ ତମେ ଜତନ୍‌ସଙ୍ଗ୍ ସାସ୍‌ତର୍ମନ୍ ପଡି କଇଲାସ୍‌ନି । ତେଇଅନି ନ ସାର୍‌ବା ଜିବନ୍ ପାଇଅଇସି ବଲି ସେ ସବୁ ପଡିଲାସ୍‌ନି । ସେ ସବୁ ସାସ୍‌ତର୍ ମର୍ ବିସଇସେ ସାକି ଦେଲାନି । ୪୦ ଏଲେମିସା ତମେ ନ ସାର୍‌ବା ଜିବନ୍ ପାଇବାକେ ମର୍ ଲଗେ ଆଇବାକେ ନିଚ୍‌ଲାସ୍‌ନି ।

୪୧ “ମୁଇ ମୁନ୍‌ସ୍ ଲକ୍‌ମନ୍‌ଟେ ଟାନେଅନି ଡାକ୍‌ପୁଟା କଜି ନାଇ । ୪୨ ମୁଇ ଜାନି, ତମେ କେନ୍ତ୍ରି ରକାମର୍ ଲକ୍, ତମର୍ ମନ୍ ବିତ୍‌ରେ ପର୍ମେସର୍‌କେ ଆଲାଦ୍ କର୍ବାଟା ନାଇ । ୪୩ ମୁଇ ମର୍ ବାବା ପର୍ମେସର୍‌ର ଅଦିକାର୍ ପାଇ ଆଇଲିଆଟି । ମାତର୍ ତମେ ମକେ ନାମାସ୍ ନାଇ । ମାତର୍ ଜେତେବେଲା କେ ମିସା ବିନ୍ ଲକ୍ ନିଜେ ମନ୍‌କରି ଆଇଲେ ତାକେ ଡାକିନେଲାସ୍‌ନି । ୪୪ ତମେ ନିଜର୍ ନିଜର୍ ବିତ୍‌ରେ ସନ୍‌ମାନ୍ ପାଇବାକେ ମନ୍‌କଲାସ୍‌ନି । ମାତର୍ ପର୍ମେସର୍‌ର ଆଲାଦ୍ ପାଇବାକେ ମନ୍ କରାସ୍ ନାଇ । ସେନ୍ତ୍ରି ବଇଲେ ତମେ କେନ୍ତ୍ରି ମକେ ବିସ୍‌ବାସ୍ କରିପାରାସ୍ ? ୪୫ ମୁଇ ତମର୍ ବିରଦେ ପର୍ମେସର୍‌ତେଇ ଦସି କର୍ବି ବଲି ତମେ ବାବାନାଇ । ତମେ ଜନ୍‌ଟା ମସାର୍ ତେଇ ଆସା କରିଆଟାସ୍ ସେ ସେ ତମର୍ ବିରଦେ ଦସି କଲାନି । ୪୬ ଜଦି ତମେ ମସାକେ ସତ୍‌ବଲି ବିସ୍‌ବାସ୍ କଲାସ୍‌ନି ବଇଲେ ମକେ ମିସା ବିସ୍‌ବାସ୍ କର୍ତେ ରଇସା । କାଇକେବଇଲେ ମସା ମର୍ ବିସଇସେ ଲେକିଆଟେ । ୪୭ ମାତର୍ ସେ ଜନ୍‌ଟା ଲେକିଆଟେ, ତେଇ ଜଦି ତମର୍ ବିସ୍‌ବାସ୍ ନାଇ ବଇଲେ, ମୁଇ ଜନ୍‌ଟା କଇଲିନି, ସେଟା କେନ୍ତ୍ରି ବିସ୍‌ବାସ୍ କର୍‌ସା ?”



ଜିସୁ ପାର୍ ଅଜାର୍ ଲକ୍‌ମନ୍‌କେ କୁଆଇଲା  
(ମାତିଉ ୧୪:୧୩-୨୧; ମାର୍କ ୬:୩୦-୪୪; ଲୁକ୍ ୯:୧୦-୧୭)

୧ ତାର୍ ପଟେ ଜିସୁ ଗାଲିଲି ଗାଡ୍ ସେପାଟେ ସେ ଗାଡ୍‌କେ ଡିବିରିଆ ଗାଡ୍ ବଲି ମିସା କଇବାଇ, ସେ ଜାଗାଇ ଗାଲା । ୨ ଆରି ବେସି ଲକ୍‌ମନ୍ ତାର୍ ପଟେ ପଟେ

☆ ୫:୩୩ ୫:୩୩ ଜଅନ୍ ୧:୧୯-୨୭; ୩:୨୭-୩୦ ☆ ୫:୩୭ ୫:୩୭ ମାତିଉ ୩:୧୭; ମାର୍କ ୧:୧୧; ଲୁକ୍ ୩:୨୨

ଗାଲାଈ । କାଇକେ ବଇଲେ ସେ ରଗି ଲକ୍ମନକେ ତାର୍ କାବାଅଇଜିବା ବପୁ ସଙ୍ଗ୍ ନିମାନ୍ କରବାଟା ସେମନ୍ ଦେକି ରଇଲାଈ । ୩ ଜିସୁ ତାର୍ ସିସ୍ମନର୍ ସଙ୍ଗ୍ ଗଟେକ୍ ଡଙ୍ଗର୍ ଉପ୍ରେ ଜାଇ ବସଲା । ୪ ସେବେଲେ ଜିଉଦି ମନର୍ ନିସ୍ତାର୍ ପରବ୍ କେଟି ଆଇତେରଇଲା । ୫ ତାର୍ ଲଗେ ବେସି ଲକ୍ମନ ଆଇବାଟା ଦେକିକରି ଜିସୁ ପିଲିପ୍ରେକେ ପାଚାରଲା, “ଏତେକ୍ମାଣ୍ଟ୍ ଲକ୍ମନର୍ ପାଇ କନ୍ତିଅନି ଜାଇ କାଦି ଗେନିଆନି ଅଇସି ?” ୬ ମାତର୍ ପିଲିପ୍ରେକେ ପରିକା କରବାକେ ଜିସୁ ଏଣ୍ଡାରି ପାଚାରି ରଇଲା । କାଇକେ ବଇଲେ ଜିସୁ କାଇଟା କରବାକେ ଗାଲାନି ବଲି ସେ ନିଜେ ଜାନିରଇଲା ।

୭ ପିଲିପ୍ ଜିସୁକେ କଇଲା, “ଇତି ରଇଲା ସବୁ ଲକ୍ମନକେ ଦୁଇସ ତେଇ ଅନି ଅଦିକ୍ ରୁପାଟାଙ୍ଗାନ୍ \* ରୁଟି ଗେନ୍ବାକେ ପଡ଼ସି ।” ୮ ତେଇ ଆନ୍ଦ୍ରିୟ ନାଉର୍ ଗଟେକ୍ ସିସ୍ ରଇଲା, ସେ ସିମନ୍ ପିତରର୍ ବାଇ । ସେ କଇଲା, “ଇତି ଗଟେକ୍ ପିଲାର୍ ଟାମେ ପାଁଟ୍ଟା ରୁଟି ଆରି ଦୁଇଟା ବାଜ୍ଲା ସାନ୍ ମାଟ୍ ଆଟେ । ୯ ମାତର୍ ଏଡ଼କି ଲକ୍ମନପାଇ ସେଟା ନ ଅଏ ।”

୧୦ ଜିସୁ ତାର୍ ସିସ୍ମନକେ କଇଲା, “ଲକ୍ମନକେ ଗାଁସ୍ ଉପ୍ରେ ବସାଆ ।” ସେ ପଡିଆଇ ବେସି ଗାଁସ୍ ରଇଲା । ଗାଁସ୍ ଉପ୍ରେ ସବୁଲକ୍ ବସଲାଈ । ଆରି ତେଇ ଅବକା ମୁନ୍ସ୍ ପିଲାସେ ପାଁଟ୍ ଅଜାର୍ ଲକ୍ ରଇଲାଈ । ୧୧ ଜିସୁ ରୁଟି ଦାରି ପରମେସରକେ ଦନିଅବାଦ୍ ଦେଲା ଆରି ତେଇ ବସିରଇବା ଲକ୍ମନକେ ବାଟାକରି ଦେଲା । ସେନ୍ତିସେ ମାଟ୍ ମିସା ବାଟାକରି ଦେଲା । ତେଇ ସେମନ୍କେ ପେଟ୍ ପୁରତେ କାଇବାକେ ମିଲ୍ଲା । ୧୨ ସବୁ ଲକ୍ମନ ପେଟ୍ ପୁରତେ କାଇଲା ପଟେ, ଜିସୁ ତାର୍ ସିସ୍ମନକେ କଇଲା, “ଅଗଲ୍ଲା ମାଟ୍ ଆରି ରୁଟି ଗଟେକ୍ଟାମେ ଟୁଲିଆଉ, ତେବେ କଣ୍ଡେକ୍ ମିସା ନସଟ୍ ନ ଅଏ ।” ୧୩ ଲକ୍ମନ କାଇସାରାଇଲା ପଟେ, ସେ ପାଁଟ୍ଟା ରୁଟିଅନି ଜେଡ଼କି ଅଗଲ୍ଲା, ସିସ୍ମନ୍ ସେଟା ଟୁଲିଆଇ କରି ବାରଟା ଡାଲାଈ ବରଡ଼ି କଲାଈ । ୧୪ ଜିସୁ କଲା ଏ କାବାଅଇଜିବା କାମ୍ ଦେକିକରି ତେଇ ରଇଲା ଲକ୍ମନ କଇଲାଈ “ଏ ଦୁନିଆଇ ପର୍ମେସରର୍ ଜନ୍ ବବିସତ୍ବକ୍ତା ଆଇବାର୍ ରଇଲା, ସତଇସେ ଏ ଆକା ।” ୧୫ ସେଦାପ୍ରେସେ ଲକ୍ମନ ଜିସୁକେ ରାଜା କରାଇବାକେ ଡିଆର୍ ଅଇବାଟା ଜାନି, ତେଇଅନି ସେ ଗଟେକ୍ ଲକ୍ ଡଙ୍ଗର୍ ଉପ୍ରେ ଉଟିଗାଲା ।

ଜିସୁ ପାନି ଉପ୍ରେ ଇଣ୍ଡିଲା  
(ମାତିଉ ୧୪:୨୨-୨୬; ମାର୍କ ୬:୪୫-୫୨)

୧୬ ସେ ଦିନେ ସଞ୍ଜ୍ ଅଇଗାଲାକେ ଜିସୁର୍ ସିସ୍ମନ୍ ତେଇଅନି ଉଡ଼ରିକରି ଗାଡେ ଗାଲାଈ । ୧୭ ସିସ୍ମନ୍ ଡଙ୍ଗାଇ ବସି ଗାଡ଼ ସେପାଟେ ରଇଲା କପର୍ନାଉମ୍ ଜାଗାଇ ବାଉଡ଼ବାର୍ ଦାରଲାଈ । ସେଡ଼କିବେଲେ ଆନ୍ଦାର୍ ଅଇ ଆଇତେ ରଇଲା । ମାତର୍ ସେ ବେଲା ଜାକ ଜିସୁ ତାକର୍ ଲଗେ ଆସି ନ ରଇଲା । ୧୮ ଆରି ତେଇ ବେସି ବାଉ ପବନ୍ ଅଇବାର୍ ଦାରଲାଜେ ଗାଡେ ବେସି ବଡ଼ ବଡ଼ ଲଅଡି ଅଇତେ ରଇଲା । ୧୯ ସେମନ୍ ଚଟୁ ଗାଟି ଗାଟି ପାଁଟ୍ କି ଚଅ କିଲମିଟର୍ ଗାଲା ପଟେ, ଜିସୁ ପାନି ଉପ୍ରେ ଇଣ୍ଡି ଇଣ୍ଡି ଡଙ୍ଗା ଲଗେ ଆଇବାଟା ଦେକିକରି ସେମନ୍ ବେସି ଡରିଗାଲାଈ । ୨୦ ମାତର୍ ଜିସୁ ସେମନ୍କେ କଇଲା, “ଡରାନାଇ, ଏଟା ମୁଇସେ ।” ୨୧ ଜିସୁ ଏ କାତା କଇଲା ପଟେ, ସିସ୍ମନ୍ ତାକେ ବେସି ସାରଦା ସଙ୍ଗ୍ ଡଙ୍ଗାଇ ଚଗାଇଲାଈ । ଆରି ସେମନ୍ ଜନ୍ ଜାଗାଇ ଜାଇତେରଇଲାଈ, ସେ ଜାଗାଇ ଦାପ୍ରେ ଜାଇ କେଟ୍ଲାଈ ।

ଲକ୍ମନ ଜିସୁକେ କଇଲାଈ

\* ୬:୨ ୬:୭ ରୁପାଟାଙ୍ଗାନ୍ ଗଟେକ୍ ରୁପାଟାଙ୍ଗାନ୍ ମୁଲିଅ ଗଟେକ୍ ଦିନର୍ ଆଜିରି

୨୨ ତାରୁ ଆରକର ଦିନରୁ ସାକାଲେ, ଗାଡ଼ ସେପାଟେ ରଇଲା ଲକ୍ମନ ଜାନିପାରଲାଜ ଜେ, ତେଇ ଗଟେକ୍‌ସେ ଡଙ୍ଗା ରଇଲା । ଆରି ସିସ୍‌ମନ୍ ଜିସୁକେ ମିସ୍‌ତେ ଡାକି ନ ନେଇ, ଡଙ୍ଗାଜ ବସି ମଜାଗାତେ ଉଟିଗାଲାଜ ଆତଡ଼ ବଲି । ସେମନ୍ ତାକେ ଚାଡ଼କରି ଜାଇରଇଲାଜ । ୨୩ ଜନ୍ ଜାଗାଇ ମାପରୁ ଜିସୁ ପାରତନା କରି ଲକ୍ମନକେ ରୁଟି କାଇବାକେ ଦେଇରଇଲା, ସେ ଜାଗା ଲଗେ ଡିବିରିଆ ଗାଡେଅନି ଆରି କେଡେଟା ଡଙ୍ଗା ଆସି କେଟଲା । ୨୪ ସେ ଜାଗାଇ ଲକ୍ମନ ଜିସୁକେ ଆରି ତାରୁ ସିସ୍‌ମନ୍କେ ବେଟ୍ ନ ଅଇଲାକେ, ଡଙ୍ଗାମନ୍କେ ଚଗି ତାକେ କଜି କଜି କପରନାଉମ୍ ଜାଗାବାଟେ ଜିବାକେ ବାରଇଲାଜ ।

ଜିସୁ ଅଇଲାନି ଜିବନରୁ କାଦି

୨୫ ଲକ୍ମନ ଜିସୁକେ ଗାଡ଼ ସେପାଟେ ବେଟ୍‌ଅଇକରି ପାଚାରଲାଜ, “ଏ ଗୁରୁ ତମେ ଇତି କେଡେବଲ୍ ଆସି କେଟଲାସ୍ ?” ୨୬ ଜିସୁ ସେମନ୍କେ କଇଲା, ମୁଇ ତମକେ ସଡ଼ କଇଲିନି, ମୁଇ କରିରଇବା କାବାଅଇଜିବା କାମ୍ ରୁଜିକରି ମକେ କଜାସ୍ ନାଇ । ମାତରୁ ତମେ ପେଟ୍ ପୁରତେ ରୁଟି କାଇରଇଲାସ୍ ବଲି ଆସିଆଟାସ୍ । ୨୭ ଜନ୍ କାଦି ନସିଜାଇସି, ସେ କାଦିରୁ ପାଇ ଏଡେକ୍ କସ୍‌ଟ କରାନାଇ, ମାତରୁ ଜନ୍‌ଟା ନ ନସେ, ସେଟା ନ ସାରବା ଜିବନ୍ ଦେଇସି, ସେଟାରୁ ପାଇ କସ୍‌ଟ କରା । ଏ କାଦି ନରୁପିଲା ମୁଇ ଦେବି । କାଇକେ ବଇଲେ, ସେଟାରୁପାଇ ବାବା ପର୍‌ମେସର୍ ମକେ ଅଦିକାର ଦେଲାଆଟେ ।

୨୮ ସେବେଲେ ଲକ୍ମନ ଜିସୁକେ ପାଚାରଲାଜ, “ଜନ୍‌ଟା ପର୍‌ମେସର୍ ମନ୍ କଲାନି, ସେଟା ଆମେ କରବାରୁ ଆଲେ କାଇଟା କରବାରୁ ଆଟେ ?”

୨୯ ଜିସୁ ସେମନ୍କେ କଇଲା, “ଜାକେ ପର୍‌ମେସର୍ ପାଟାଇଲା ଆଟେ, ତାକେ ତମେ ବିସ୍‌ବାସ୍ କଲେ ସେଟା କରପାରାସ୍ ।”

୩୦ ସେବେଲା ସେମନ୍ ଜିସୁକେ ପାଚାରଲାଜ, “ଏନ୍ତି ବଇଲେ ଆମେ ଜେନ୍ତି ବିସ୍‌ବାସ୍ କରୁ, ସେଟାରୁ ପାଇ ଆମକେ କାଇଆଲେ କାବାଅଇଜିବା କାମ୍ କରି ଦେକାଇପାରୁସ୍ କି ? କ କାଇଟା କରପାରୁସ୍ ?” ୩୧ ଆରି ସେମନ୍ କଇଲାଜ, “ଆମରୁ ଆନିଦାଦିମନ୍ ମରୁବାଲି ରୁଏଁ ମାନା କାଦି କାଇରଇଲାଜ, ସେଟା ଆମରୁ ଦରମ୍ ସାସ୍‌ତରୁ ଇସାବେ ପର୍‌ମେସର୍ ସେମନ୍କେ ସର୍‌ଗେ ଅନି ଦେଇରଇଲା ।”

୩୨ ଜିସୁ ସେମନ୍କେ କଇଲା, “ମୁଇ ତମକେ ସଡ଼ କଇଲିନି, ଜନ୍‌ଟା ମସା ତମକେ ଦେଇରଇଲା, ସେଟା ସର୍‌ଗେଅନି ଆସିରଇଲା କାଦି ନଏଁ । ମାତରୁ ମରୁ ବାବା ତମକେ ସର୍‌ଗେଅନି ସଡ଼ କାଦି ଦେଇସି । ୩୩ ପର୍‌ମେସରୁ କାଦି ଅଇଲାନି ଗଟେକ୍ ଲକ୍ ଜେ କି ନ ସାରବା ଜିବନ୍ ଦେବାକେ ସର୍‌ଗେଅନି ଦୁନିଆଇ ଆସିରଇଲା” ବଲି କଇଲା ।

୩୪ ଲକ୍ମନ ଜିସୁକେ କଇଲାଜ, “ଆଗିଆଁ ସବୁବେଲେ ଆମକେ ଏ କାଦି ଦିଆ ।”

୩୫ ତାରୁ ପଟେ ଜିସୁ ସେମନ୍କେ କଇଲା, “ମୁଇ ସେ ଜିବନରୁ କାଦି । ଜନ୍ ଲକ୍ ମରୁ ଲଗେ ଆଇସି, ସେ କେବେ ମିସା ବୁକେ ନ ରଏ । ଆରି କେ ମକେ ବିସ୍‌ବାସ୍ କରସି ତାକେ କେବେ ମିସା ସସ୍ ନ ଲାଗେ । ୩୬ ମୁଇ ତମକେ କଇଲିନି, ତମେ ମକେ ଦେକିକରି ମିସା ବିସ୍‌ବାସ୍ କରାସ୍‌ନାଇ । ୩୭ ମରୁ ବାବା ପର୍‌ମେସର୍ ଜନ୍ ଲକ୍‌ମନ୍କେ ମକେ ଦେଲା ଆଟେ, ସେ ଲକ୍‌ମନ୍ ମରୁ ଲଗେ ଆଇବାଇ । ଆରି ମରୁ ଲଗେ ଆଇବା ଲକ୍‌ମନ୍କେ କେବେ ମିସା ନ ବାଉଡାଇ । ୩୮ କାଇକେବଇଲେ ମୁଇ ନିଜେ ମନ୍ କଲାଟା ପୁରାପୁରୁନ୍ କରବାକେ ଆସି ନାଇ, ମାତରୁ ମକେ ପାଟାଇରଇବା ପର୍‌ମେସରୁ ମନ୍କଲାଟା ପୁରାପୁରୁନ୍ କରବାକେ ସର୍‌ଗେଅନି ଆସିଆରି । ୩୯ ଜନ୍ ଲକ୍‌ମନ୍କେ ସେ ମକେ ଦେଲାଆଟେ, ସେମନରୁ ବିଡ଼ରେଅନି ମୁଇ ଗଟେକ୍ ଲକ୍‌କେ ମିସା ନ ଆଜାଇ । ସାରାସାରି ଦିନେ ସେ ସବୁ ଲକ୍‌କେ ଆରିତରେକ୍ ଜିବନ୍ କରି

ଉଟାଇବି । ଏଟା ଆକା ସେ ମନ୍ କରବାଟା । ୪୦ ପରମେସରର୍ ପିଲା ମୁଇ କେ କେ ମକେ ଦେକ୍‌ବାଇ ଆରି ବିସ୍‌ବାସ୍ କରବାଇ, ସେମନ୍ ନ ସାର୍‌ବା ଜିବନ୍ ପାଇବାର୍ ଆଚେ ବଲି ପରମେସର୍ ମନ୍ କଲାନି । ଆରି ମୁଇ ସେମନ୍‌କେ ସାରାସାରି ଦିନେ ମଲାଟାନେଅନି ଜିବନ୍ ଅଇକରି ଉଟାଇ ଦେବାର୍ ଆଚେ ବଲି ମିସା ପରମେସର୍ ମନ୍ କଲାନି” ବଲି କଇଲା ।

୪୧ ଏଟା ସୁନିକରି ଜିଉଦି ନେତାମନ୍ ଜିସୁର୍ ବିରଦେ ସେମନ୍‌ର୍ ବିତ୍‌ରେ ଦଦାପେଲା ଅଇଲାଇ । କାଇକେ ବଇଲେ, ଜିସୁ ମୁଇ ସର୍‌ଗେ ଅନି ଆସିରଇବା କାଦି ବଲି କଇଲାର୍ ପାଇ ସେମନ୍ ଏନ୍ତି ଅଇଲାଇ । ୪୨ ସେମନ୍ କଇଲାଇ “ଏଟା ଜସେପର୍ ପିଲା ଜିସୁ ନର୍‌ଏ କି ? ଆମେ ତାର୍ ଆୟା ବାବାକେ ଜାନି ଆତୁ । ସେ କେନ୍ତି ‘ମୁଇ ସର୍‌ଗେଅନି ଆସିଆଚି’ ବଲି କଇଲାନି ?”

୪୩ ଜିସୁ ସେମନ୍‌କେ କଇଲା, ତମେ ଦଦାପେଲା ଉଆନାଇ, ଚିମ୍‌ରାଇଅଇ ରୁଆ । ୪୪ ମକେ ପାଟାଇରଇବା ପରମେସର୍ ମର୍ ଲଗେ ଡାକି ନ ଆନ୍‌ଲେ, କେ ମିସା ମର୍ ଲଗେ ଆସିନାପାରତ୍ । ଆରି ଜେ ଜେ ଆଇବାଇ, ସେମନ୍‌କେ ମୁଇ ସାରାସାରି ଦିନେ ମଲାଟାନେଅନି ଜିବନ୍ କରି ଉଟାଇବି । ୪୫ ବବିସତ୍‌ବକ୍‌ତାମନ୍ ଦରମ୍ ସାସ୍‌ତରେ ଲେକିଆଚତ୍, ପରମେସର୍‌ଟାନେଅନିସେ ସବୁଲକ୍ ସିକ୍‌ବାଇ । କେ ମିସା ବାବାର୍ କାତା ସୁନି ତାର୍ ସିକିଆ ପାଇସି, ସେ ମର୍‌ଲଗେ ଆଇସି । ୪୬ କେ ମିସା ବାବାକେ ଦେକଡ୍‌ନାଇ । ମୁଇ ପରମେସରର୍ ତେଇଅନି ଆସିଆଚେ, ମୁଇସେ ବାବାକେ ଦେକିଆଚି । ୪୭ ମୁଇ ତମ୍‌କେ ସତ୍ କଇଲିନି, ଜନ୍ ଲକ୍ ମକେ ବିସ୍‌ବାସ୍ କରସି, ସେ ନ ସାର୍‌ବା ଜିବନ୍ ପାଇସି । ୪୮ ଉ, ମୁଇସେ ଜିବନ୍ ଦେବା କାଦି । ୪୯ ତମର୍ ଆନିଦାଦିମନ୍ ମରୁବାଲିବୁର୍‌ଏ ମାନା କାଦି କାଇରଇଲାଇ, ଏଲେମିସା ସେମନ୍ ମଲାଇ । ୫୦ ମାତର୍ ଜନ୍ କାଦି ସର୍‌ଗେଅନି ଆଇସି, ସେଟା ଜେ କାଇଲେ ମିସା, ନ ମରତ୍ ।

୫୧ ମୁଇସେ ସର୍‌ଗେଅନି ଆଇଲା ଜିବନ୍ ଦେବା କାଦି । ଏ କାଦି କାଇଲା ଲକ୍‌ମନ୍ ସବୁ ଦିନର୍ ପାଇ ବର୍‌ଚି ରଇବାଇ । ଏ କାଦି ଅଇଲାନି ମର୍ ଗାଗତ୍ । ଏ ଦୁନିଆର୍ ଲକ୍‌ମନ୍ କାଲ୍‌କାଲ୍ ଜୁଗ୍‌ଜୁଗ୍ ବର୍‌ଚି ରଇବାକେ ମର୍‌ଗାଗତ୍ ଦେବି ବଲି କଇଲା ।

୫୨ ଜିସୁ କଇଲା କାତା ସୁନି ଜିଉଦି ନେତାମନ୍ ରିସାଅଇ ଆଉଲିଅଇକରି “ଏ ଲକ୍ କେନ୍ତି ନିଜର୍ ଗାଗତ୍ ଆମ୍‌କେ କାଇବାକେ ଦେଇ ପାରେ ?” ବଲି ଦଦାପେଲା ଅଇ କଇଲାଇ ।

୫୩ ଜିସୁ ସେମନ୍‌କେ କଇଲା, “ମୁଇ ସତ୍‌କାତା କଇଲିନି, ପରମେସର୍ ପାଟାଇ ରଇବା ନର୍‌ପିଲା ମୁଇ, ମର୍ ଗାଗତ୍ ଆରି ବନି ନ କାଇଲେ, ଜିବନ୍ ମିଲାଇ ନାପାରାସ୍ । ୫୪ ମାତର୍ ଜନ୍ ଲକ୍ ମର୍ ଗାଗତ୍ ଆରି ବନି କାଇସି ସେ ନ ସାର୍‌ବା ଜିବନ୍ ପାଇସି । ମୁଇ ସେ ଲକ୍‌କେ ସାରାସାରି ଦିନେ ମଲାଟାନେଅନି ଉଟାଇବି । ୫୫ କାଇକେବଇଲେ, ମର୍ ଗାଗତ୍ ଅଇଲାନି ସତ୍ କାଦି ଆରି ମର୍ ବନି ଅଇଲାନି ସତ୍ ପାନି । ୫୬ ଜନ୍ ଲକ୍ ମର୍ ଗାଗତ୍ ଆରି ବନି କାଇସି, ସେ ମର୍‌ଟାନେ ରଇସି ଆରି ମୁଇ ତାର୍‌ଟାନେ ରଇବି । ୫୭ ଜିବନ୍ ରଇବା ବାବା ମକେ ପାଟାଇଆଚେ, ଆରି ତାର୍‌ଲାଗି ମୁଇ ବର୍‌ଚିଆଚି । ସେନ୍ତାରିସେ ଜେ ମକେ କାଇସି, ମର୍‌ଲାଗି ବର୍‌ଚିରଇସି । ୫୮ ଏଟାସେ ସର୍‌ଗେଅନି ଆସିରଇବା କାଦି । ଜନ୍ କାଦି ତମର୍ ଆନିଦାଦିମନ୍ କାଇକରି ପଚେ ମଲାଇ, ଏଟା ସେନ୍ତାରି କାଦି ନର୍‌ଏ । ଏ କାଦି ଜେ କାଇସି ସେ କାଲ୍‌କାଲ୍ ଜୁଗ୍‌ଜୁଗ୍ ବର୍‌ଚିରଇସି ।”

୫୯ ଜିସୁ କପର୍‌ନାଉମେ ଜିଉଦିମନ୍‌ର୍ ପାର୍‌ତନା ଗରେ ସିକିଆ ଦେବାବେଲେ ଏ ସବୁ କାତା କଇରଇଲା ।

ନ ସର୍‌ବା ଜିବନ୍‌ର୍ ବାକିଅ

୨୦ ଜିସୁର୍ ସିସ୍ତାନର୍ ବିତ୍ତରେ ଅନି କେତେକ୍ ଲକ୍ ଏ କାତା ସୁନିକରି କଇଲା, “ଏ ସିକିଆ ମୁଲ୍‌କେ ବୁଜି ନଇଲାନି । ସେଟାର୍‌ପାଇ କେ ଏଟା ନାମସି ?”

୨୧ ଜିସୁକେ ଏ ବିସଇ ନେଇକରି କେ କାଇବଲି ନ କଇରଇଲେ ମିସା, ସିସ୍ତାନ୍ କୁଆବଲା ଅଇଲାଇନି ବଲି ଜାନିକରି, ସେ ସେମନ୍‌କେ କଇଲା, “ତମେ ଏ କାତା ସୁନି ମନ୍‌ଦୁକ୍ କଲାସିନି କି ?” ୨୨ ଏନ୍ତି ବଇଲେ, ନର୍‌ପିଲା ମୁଇ ଜନ୍ ଜାଗାଇଅନି ଆସିରଇଲି, ସେ ଜାଗାଇ ଆରି ତରେକ୍ ବାଉଡି ଜିବାଟା ଦେକ୍‌ଲେ ତମେ କାଇଟା ବଲି କଇସା ? ୨୩ ପର୍‌ମେସରର୍ ଆଡ଼ମାସେ ଜିବନ୍ ଦେଇପାରେ । ମୁନ୍‌ସର୍ ବସୁ କାଇଟା କରିନାପାରେ । ପର୍‌ମେସରର୍ ଜିବନ୍ ଦେବା ଆଡ଼ମା ତମେ ଜେନ୍ତାରିକି ଜାନି ପାରସା ? ସେଟାର୍‌ପାଇ ମୁଇ ଏ କାତା କଇଲିଆଟି । ୨୪ ମାତର୍ ତମର୍ ବିତ୍ତରେଅନି କେତେକ୍ ଲକ୍‌ମନ୍ ମକେ ବିସ୍‌ବାସ୍ କରାସ୍ ନାଇ ।” କାଇକେବଇଲେ ବିସ୍‌ବାସ୍ ନ କର୍‌ବା ଲକ୍‌ମନ୍‌କେ ଜିସୁ ଆଗେଅନି ଜାନିରଇଲା । ଆରି ପତେ ଜନ୍ ଲକ୍ ତାକେ ସତ୍‌ରୁକେ ସର୍‌ପି ଦେଇସି, ତାକେ ମିସା ଜାନି ରଇଲା । ୨୫ ଆରି ଜିସୁ କଇଲା, “ସେଟାର୍ ପାଇସେ ମୁଇ ତମ୍‌କେ କଇଲିନି, ଜଦି ବାବା ନ ପାଟାଇଲେ, କେ ମିସା ମର୍ ଲଗେ ଆସିନାପାରେ ।” ୨୬ ଜିସୁ ଏ କାତା କଇଲାକେ ତାର୍ ସଙ୍ଗ୍ ଜାଇତେତଇବା ଲକ୍‌ମନ୍‌ତେଇଅନି ବେସିଲକ୍ ତାର୍ ସଙ୍ଗ୍ ଜିବାକେ ମନ୍ ନ କରି ଚାଡି ଉଟିଗାଲା । ୨୭ ସେବେଲେ ଜିସୁ ତାର୍ ବାର୍‌ଟା ସିସ୍ତାନ୍‌କେ ପାଗାର୍‌ଲା, “ତମେ ମିସା ମକେ ଚାଡିକରି ଉଟିଜିବାକେ ମନ୍ କଲାସିନି କି ?” ୨୮ ସିସ୍ତାନ୍ ପିତର୍ ତାକେ କଇଲା, “ମାପୁର୍ ତମ୍‌କେ ଚାଡି ଆମେ କାର୍‌ଲଗେ ଜିବୁ ? ତମର୍‌ଟାନେତା ନ ସାର୍‌ବା ଜିବନ୍‌ର୍ ବାକିଅ ଆଟେ । ୨୯ ତମେତା ପର୍‌ମେସରର୍ ଟାନେଅନି ଆଇଲା ସୁକଲ୍ ଲକ୍ ବଲି, ଏବେ ଆମେ ବିସ୍‌ବାସ୍ କରି ଜାନ୍‌ଲୁ ।” ୩୦ ଜିସୁ ସେମନ୍‌କେ କଇଲା, “ମୁଇ କାଇ ତମ୍‌କେ ବାର ଲକ୍‌କେ ବାଟି ନାଇ କି ? ଏଲେମିସା ତମର୍ ବିତ୍ତରେଅନି ଗଟେକ୍ ଲକ୍ ସଇତାନର୍ ।” ୩୧ ଇସ୍କାରିୟତର୍ ପିଲା ଜିଉଦାକେ ଦେକାଇକରି ସେ ଏନ୍ତି କଇରଇଲା । କାଇକେ ବଇଲେ ବାର୍‌ଟା ସିସ୍ତାନର୍ ବିତ୍ତରେ ଅନି ଜିଉଦା ଗଟେକ୍ ଲକ୍ ଅଇମିସା, ଜିସୁକେ ବିସ୍‌ବାସେ ବିସ୍ ଦେଲାପାରା ସତ୍‌ରୁମନ୍‌କେ ସର୍‌ପି ଦେବାକେ ମନ୍ କର୍‌ତେ ରଇଲା ।

୭

ଜିସୁ ଆରି ତାର୍ ବାଇମନ୍

୧ ତାର୍ ପତେ ଜିସୁ ଗାଲିଲି ବାଟେ ବୁଲ୍‌ବାର୍ ଗାଲା । ସେ ଜିଉଦା ଦେସେ ଜିବାକେ ମନ୍ କରେନାଇ । କାଇକେ ବଇଲେ ଜିଉଦି ନେତାମନ୍ ତାକେ ମରାଇବାକେ ଚେସ୍‌ଟା କର୍‌ତେ ରଇଲାଟା, ସେ ଜାନି ରଇଲା । ୨ ସେ ବେଲେ ଜିଉଦିମନ୍‌ର୍ ଗଟେକ୍ କୁଡିଆ ପରବ୍ ଲଗେ କେଟି ରଇଲା । ୩ ସେଟାର୍‌ପାଇ ଜିସୁର୍ ବାଇମନ୍ ତାକେ କଇଲା, “ତୁଇ ଏ ଜାଗା ଚାଡିକରି ଜିଉଦା ଦେସେ ପରବ୍ କାଇବାର୍ ଜା, ତେବେ ତୁଇ କର୍‌ବା କାବାଅଇଜିବା କାମ୍‌ମନ୍ ତର୍ ସିସ୍ତାନ୍ ଦେକି ପାରତ୍ ।” ୪ ଜେ ଡାକ୍‌ପୁଟା ବଲି ଜାନାଇ ଅଇବାକେ ମନ୍‌କଲାନି, ସେ ନିଜର୍ କାମ୍ ଲୁଟାଇକରି ନ ସଙ୍ଗ୍‌ଇ ରଏ । ଜେତେବେଲା ତମେ ଏସବୁ କରିପାର୍‌ଲାସିନି ବଇଲେ, ଦୁନିଆର୍ ସବୁଲକ୍ ତମ୍‌କେ ଜାନ୍‌ବାଇ । ୫ କାଇକେ ବଇଲେ ଜିସୁର୍ ନିଜର୍ ବାଇମନ୍ ମିସା ତାକେ ବିସ୍‌ବାସ୍ ନ କର୍‌ତେ ରଇଲା ।

୬ ଜିସୁ ତାର୍ ବାଇମନ୍‌କେ କଇଲା, “ଏବେ ଜାକ ମର୍ ସମାନ୍ ବେଲା ଆସେ ନାଇତା । ମାତର୍ ତମର୍‌ପାଇ ସବୁ ବେଲା ସମାନ୍‌ସେ । ୭ ଏ ଦୁନିଆର୍ ଲକ୍‌ମନ୍ ତମ୍‌କେ ଗିନ୍ ନ କର୍‌ତ୍, ମାତର୍ ମକେ ଗିନ୍ କର୍‌ବାଇ । କାଇକେ ବଇଲେ ସେମନ୍

\* ୨:୨୮ ୨:୨୮ ମାଡିଉ ୧୭:୧୭; ମାର୍କ ୮:୨୯; ଲୁକ୍ ୯:୨୦



କରବା କାମ୍‌ମନ୍ କାରାପ ବଲି ମୁଇ ଜାନାଇଲିନି ।<sup>୮</sup> ତମେ ପରବ୍ କରବାକେ ଜାଆ, ମୁଇ ଜାଇ ନାପାରି । କାଇକେ ବଇଲେ ଏବେ ଜାକ ମର୍ ସମାନ୍ ବେଲା ଆସେ ନାଇତା ।”<sup>୯</sup> ଜିସୁ ସେମନ୍‌କେ ଏ ସବୁ କାତା କଇକରି ଗାଲିଲିତେଇସେ ରଇଗାଲା ।

**କୁଡିଆ ପରବ୍‌ଟାନେ ଜିସୁ**

<sup>୧୦</sup> ତାର୍ ବାଇମନ୍ ପରବ୍ ଟାନେ ଗାଲାପତେ, ଜିସୁ ମିସା ତେଇ ଗାଲା । ସେ ସବୁଲକ୍ ଦେକ୍‌ଲାପାରି ନ ଜାଇକରି ଲୁଚ୍‌ତେ ଗାଲା ।<sup>୧୧</sup> ତେବେ ପରବ୍‌ତେଇ ଜିଉଦି ନେତାମନ୍, “ଜିସୁ କନ୍ତୁ ଆଚେ ?” ବଲି ପାଟାରି ପାଟାରି କଇଲାଇ ।

<sup>୧୨</sup> ତେଇ ରଇଲା ବେସି ଲକ୍‌ମନ୍ ନିଜର୍ ନିଜର୍ ବିତ୍‌ରେ ଜିସୁର୍ ବିସଇ କାତା ଅଇତେ ରଇଲାଇ । କେତେ ଲକ୍ ଜିସୁ ବେସି ନିକ ଲକ୍, ବଲି କଇତେ ରଇଲାଇ ମାତର୍ ଆରି ଅଦେକ୍ ଲକ୍‌ମନ୍ ତାକେ ନାଇ, ସେ ଲକ୍‌ମନ୍‌କେ ବୁଲ୍ ସିକିଆ ଦେଲାନି, ବଲି କଇତେ ରଇଲାଇ ।<sup>୧୩</sup> ମାତର୍ ଜିଉଦି ନେତାମନ୍‌କେ ଡରିକରି କେ ମିସା ଜିସୁର୍ ବିସଇ ସବୁଲକ୍ ଜାନତେ ସବୁର୍ ମୁଆଁଟେ କଅଡ୍ ନାଇ ।

<sup>୧୪</sup> ଆରି ପରବ୍ ଅଦାଅଦି ସାରିଗାଲା ପତେ, ଜିସୁ ମାନ୍‌ବି ବିତ୍‌ରେ ଜାଇକରି ଲକ୍‌ମନ୍‌କେ ସିକିଆ ଦେବାର୍ ଦାର୍‌ଲା ।<sup>୧୫</sup> ତେଇ ଜିଉଦି ନେତାମନ୍ କାବାଅଇଜାଇ କରି କଇଲାଇ, “ଏ ଲକ୍ ପାଟ୍ ନ ପଡି ମିସା କେନ୍ତୁ ଏଡକି ବିସଇ ଜାନିଆଚେ ?”

<sup>୧୬</sup> ଜିସୁ ସେମନ୍‌କେ କଇଲା, “ମୁଇ ସିକାଇଦେବା ଏ ସିକିଆ ମର୍ ନିଜର୍‌ଟାନେ ଅନି ନର୍, ମାତର୍ ମକେ ପାଟାଇରଇବା ପର୍‌ମେସରର୍ ତେଇଅନି ଆସିଆଚେ ।<sup>୧୭</sup> ଜେ ଜଦି ପର୍‌ମେସର୍ ମନ୍‌କଲାଟା ପୁରୁନ୍ କରବାକେ ମନ୍ କରସି ବଇଲେ ସେ ଜାନିପାର୍‌ସି, ମୁଇ ଦେଇତେରଇବା ସିକିଆ ପର୍‌ମେସରର୍ ଟାନେ ଅନି ଆଇଲାନି କି ସେଟା ମର୍ ନିଜର୍ ବପୁର୍ ସଙ୍ଗ୍ କଲିନି ବଲି ।<sup>୧୮</sup> ଜନ୍ ଲକ୍ ନିଜର୍ ଅଦିକାରେଅନି କାତା କଇସି ସେ ନିଜେ ମଇମା ପାଇ ଅଇବାକେ କଇସି । ମାତର୍ ଜନ୍‌ଲକ୍ ମକେ ପାଟାଇଲା ଲକ୍ ସନ୍‌ମାନ୍ ପାଅ ବଲି ମନ୍ କରସି ବଇଲେ, ସେ ମିଟ୍ ନ କଇ ସଡ୍ କାତା କଇସି । ଆରି ତାର୍‌ଟାନେ କାଇ ବୁଲ୍ ବିସଇ ନ ରଏ ।<sup>୧୯</sup> ମସା ତମ୍‌କେ ନିୟ୍‌ମ୍ ଦେଲା ଆଚେ, ଏଟା ସଡ୍ । ମାତର୍ ତମ୍‌ ବିତ୍‌ରେ କେ ମିସା ଏ ନିୟ୍‌ମ୍ ମାନାସ୍ ନାଇ । ତମେ କାଇକେ ମକେ ମରାଇବାକେ ଚେସ୍‌ଟା କଲାସ୍‌ନି ?”

<sup>୨୦</sup> ଲକ୍‌ମନ୍ ତାକେ କଇଲାଇ, “ତକେ ଡୁମା ଦାର୍‌ଲା ଆଚେ । କେ ତକେ ମରାଇବାକେ ଚେସ୍‌ଟା କଲାନି ?”

<sup>୨୧</sup> ଜିସୁ ସେମନ୍‌କେ କଇଲା, “ମୁଇ ଗଟେକ୍ ଚକିଡ୍ ଅଇଜିବା କାମ୍ କଲି, ସେଟା ଦେକି ତମେ କାବା ଅଇଗାଲାସ୍ ।<sup>୨୨</sup> ‘ତମର୍ ପିଲାଜିଲାମନ୍‌କେ ସୁନଡ୍ କରାଆ’ ବଲି ମସା ଆଦେସ୍ ଦେଇରଇଲା । ଅଇଲେମିସା ମସା ଏ ନିୟ୍‌ମ୍ ଆରାମ୍ କରି ନ ରଇଲା । ତମର୍ ଆନିଦାଦିମନ୍‌ରେ ବେଲେଅନି ଏଟା ଚଲିଆଇତେରଇଲା ଆରି ତମର୍ ପିଲାମନ୍‌କେ ବିସ୍‌ରାମ୍‌ବାରେ ସୁନଡ୍ କରାଇଲାସ୍‌ନି ।<sup>୨୩</sup> ଧଜଦି ବିସ୍‌ରାମ୍‌ବାରେ ଗଟେକ୍ ପିଲାକେ ସୁନଡ୍ କରାଇବାକେ ମସାର୍ ନିୟ୍‌ମ୍ ମାନାସ୍ ନାଇ, ମୁଇ ଜଦି ବିସ୍‌ରାମ୍‌ବାରେ ଗଟେକ୍ ଲକ୍‌କେ ପୁରାପୁରୁନ୍ ନିକ କଲେ, କାଇକେ ରିସା ଅଇଗାଲାସ୍‌ନି ?<sup>୨୪</sup> ବାଇରର୍ ବିସଇ ଦେକିକରି କାଇ ବିଚାର୍ କରାନାଇ । ଜନ୍‌ଟା ଟିକ୍, ସେ ଇସାବେ ବିଚାର୍ କରା ।”

**ଜିସୁ କାଇ ମସିଅ କି ?**

<sup>୨୫</sup> ଜିରୁସାଲାମର୍ କେତେକ୍ ଲକ୍ କଇଲାଇ, “ସେ ଜିଉଦି ନେତାମନ୍ ଜନ୍ ଲକ୍‌କେ ମରାଇବାକେ ଚେସ୍‌ଟା କଲାଅନି, ଏ କାଇ ସେ ଲକ୍ ନର୍ କି ?<sup>୨୬</sup> ଦେକା, ସବୁଲକ୍‌ଟାନେ ଏଡକି ସବୁ କଇପାକାଇଲାନି, ମାତର୍ ତାକେ ର ବଲିକରି କେ

☆ ୭:୨୩ ୭:୨୩ ଜଅନ୍ ୫:୯

ମିସା ପଦେକ୍ କଅଡ଼ନାଇ । ସତଇସେ ଏ ପର୍ଯ୍ୟେସର୍ ପାଟାଇଲା ମସିଅ ବଲି ନେତାମନ୍ ଜାନିଆତଡ଼ କି ? ୨୭ ଜେଡେବେଲେ ପର୍ଯ୍ୟେସର୍ ପାଟାଇଲା ମସିଅ ଆଇସି, ସେଡ଼କିବେଲେ ସେ କନ୍ତି ଅନି ଆସିଆତେ ବଲି କେ ମିସା ନାଜାନଡ଼ । ମାତର୍ ଏ ଲକ୍ କନ୍ତିଅନି ଆସିଆତେ, ସେଟା ଆମେ ସବୁ ଜାନ୍ତୁ ।”

୨୮ ଜିସୁ ମନ୍ଦିରେ ସିକିଆ ଦେବାବେଲେ ବେସି ଆଉଲିଅଇ କଇଲା, “ଉଁ ତମେ ମକେ ନିକ ସଙ୍ଗ୍ ଜାନିଆଟାସ୍ । ସତଇସେ ମୁଇ କେ ଆରି କନ୍ତିଅନି ଆସିଆତି ଜାନିଆଟାସ୍ କି ? ମାତର୍ ମୁଇ ମର୍ ନିଜର୍ ଅଦିକାରେ ଆସିନାଇ, ମକେ ଜେ ପାଟାଇ ଆତେ ସେ ସଡ଼ । ତମେ ତାକେ ନାଜାନାସ୍ । ୨୯ ମାତର୍ ମୁଇ ତାକେ ଜାନି ଆତି । କାଇକେ ବଇଲେ ମୁଇ ତାତେଇଅନି ଆଇଲି ଆତି ଆରି ସେ ମକେ ପାଟାଇଲା ଆତେ ।”

୩୦ ଜିସୁ ଏ କାତା କଇବାବେଲେ, ସେମନ୍ ସୁନିକରି ତାକେ ଦାର୍ବାକେ ଚେସ୍ଟା କଲାଇ । ମାତର୍ କେ ମିସା ଚିଇ ନାପାରଲାଇ । କାଇକେ ବଇଲେ ସେଡ଼କି ବେଲା ଜାକ ତାର୍ ବେଲା କେଟି ନ ରଇଲା । ୩୧ ମାତର୍ ତେଇ ରଇଲା ଲକ୍ମନର୍ ବିଡ଼ରେଅନି କେତେକ୍ ଲକ୍ ଜିସୁକେ ବିସ୍ବାସ୍ କରି କଇଲାଇ, “ମସିଅ ଆଇଲେ ଆର୍ଟାନେଅନି ସେ କାଇ ଅଦିକ୍ କାବା ଅଇଜିବା କାମ୍ କର୍ସି କି ? ନାଇ ନ କରେ ।”

**ଜିସୁକେ ବନ୍ଦି କର୍ବାକେ ଚେସ୍ଟା କଲାଇ**

୩୨ ଲକ୍ମନ ଜିସୁର୍ ବିସଇ ତାକର୍ ବିଡ଼ରେ ଏନ୍ତାରି କାତା ଅଇତେ ରଇଲାଟା ପାରୁସି ଦଲ୍ଲର୍ କେତେକ୍ ଲକ୍ମନ ସୁନ୍ଲାଇ । ତେବେ ମୁକିଅ ପୁଜାରିମନ୍ ଆରି ପାରୁସି ଲକ୍ମନ ଜିସୁକେ ବନ୍ଦି କର୍ବାକେ କେତେଟା ମନ୍ଦିର୍ ଜାଗୁଆଲ୍ମନକେ ପାଟାଇଲାଇ । ୩୩ ପତେ ଜିସୁ କଇଲା, “ମୁଇ ଚନେକ୍ସେ ତମର୍ ସଙ୍ଗ୍ ରଇବି । ତାର୍ ପତେ ମକେ ଜେ ପାଟାଇଲା ଆତେ, ତାର୍ ଲଗେ ବାଉଡ଼ି ଜିବି । ୩୪ ତମେ ମକେ କଜ୍ସା, ମାତର୍ ବେଟ୍ ନ ଉଆସ୍ । ଆରି ମୁଇ ଜନ୍ ଜାଗାଇ ରଇବି, ସେ ଜାଗାଇ ତମେ ଆସି ନାପାରାସ୍ ।”

୩୫ ଜିଉଦି ନେତାମନ୍ ନିଜର୍ ନିଜର୍ ବିଡ଼ରେ କାତା ଅଇଲାଇ “ଏନ୍ତି ବଇଲେ ଏ ଲକ୍ କନ୍ତି ଜାଇସିଜେ ଆମେ ତାକେ କଜି ନାପାରୁ । ସେ କାଇ ଗିରିକ୍ ନଅରେ ଜାଇକରି ଏନେ ତେନେ ଅଇରଇବା ଆମର୍ ଲକ୍ମନକେ ସିକିଆ ଦେଇସି କି ? ୩୬ ସେ କଇଲାନି, ତମେ ମକେ କଜ୍ସା ମାତର୍ ବେଟ୍ ଅଇ ନାପାରସା ବଲି । ଆରି ଏନ୍ତି ମିସା କଇଲାନି, ‘ମୁଇ ଜନ୍ ଜାଗାଇ ଜିବି, ତେଇ ତମେ ଆସିନାପାରାସ୍’ ବଲି । ଏନ୍ତି ବଇଲେ ସେ କଇବା କାତାର୍ ଅରଡ଼ କାଟା ?”

**ଜିବନ୍ ଦେବା ପାନି**

୩୭ ପରବର୍ ସାରାସାରି ଦିନେ, ଜନ୍ଟାକି ମୁକିଅ ଦିନେ, ଜିସୁ ଚିଆଅଇ ଆକ୍ମାରି କଇଲା, “ଜଦି କାକେ ସସ୍ କଲାନି, ସେ ମର୍ ଲଗେ ଆସ । ୩୮ ଜେ ମକେ ବିସ୍ବାସ୍ କର୍ସି, ସେ ଆସି କାଅ । କାଇକେବଇଲେ ପର୍ଯ୍ୟେସର୍ ସାସତରେ ଏନ୍ତି ଲେକା ଆତେ, ଜେ ମର୍ଟାନେ ବିସ୍ବାସ୍ କର୍ସି ତାର୍ ମନ୍ ବିଡ଼ରେଅନି ନ ସାର୍ବା ଜିବନ୍ ଦେବା ପାନି ଉଡ଼ଲି କରି ବାରଇସି ।” ୩୯ ଜିସୁ ଜିବନ୍ ଦେବା ପାନି ବଲି ସୁକଲ୍ ଆଡ଼ମାର୍ ବିସଇ କଇତେ ରଇଲା । ତାକେ ବିସ୍ବାସ୍ କର୍ବା ଲକ୍ମନକେ ପତେ ପର୍ଯ୍ୟେସର୍ ଏ ସୁକଲ୍ ଆଡ଼ମା ଦେଇସି । ମାତର୍ ଏବେ ଜାକ, କାକେ ଦେଇ ନ ରଇଲାଇ । କାଇକେବଇଲେ ଜିସୁ ସେବେଲା ଜାକ ମଇମାଇ ପୁରାପୁରୁନ୍ ନ ଅଇରଇଲା ।

**ଲକ୍ମନର୍ ବିଡ଼ରେ ବାଟ୍ ବିଚାର୍**

୪୦ ଜିସୁର୍ ଏ କାତା ସୁନିକରି କେତେକ୍ ଲକ୍ କଇଲା, “ ସତ୍‌କାତା, ଏ ଲକ୍ ଗଟେକ୍ ପର୍‌ଫେସର୍ ଟା'ନେଅନି ଆସିରଇବା ବବିସତ୍‌ବକ୍ତା !” ୪୧ ଆରି ଅଦେକ୍ ଲକ୍ କଇଲା, “ସେ ପର୍‌ଫେସର୍ ବାଟି ପାଟାଇଲା ମସିଅ” ବଲି । ଆରି ଅଦେକ୍ ଲକ୍‌ମନ୍ ପାଟାଉଲା, “ପର୍‌ଫେସର୍ ବାଟି ପାଟାଇଲା ରାଜା ମସିଅ କାଇ ଗାଲିଲି ଦେସେଅନି ନ ଆସେ କି ?” ୪୨ ସାସତରେ ଏକ୍ତି ଲେକା ଅଇଲା ଆତେ, ପର୍‌ଫେସର୍ ବାଟି ପାଟାଇଲା ରାଜା ମସିଅ, ଦାଉଦ୍ ରାଜାର ଜାଗାଇ, ତାର୍ କୁଟୁମେ ବେଡ୍‌ଲିଇମ୍ ଗତେ ଜନମ୍ ଅଇ ଆଇସି ।” ବଲି କଇଲା । ୪୩ ଏକ୍ତି ସେମାନର୍ ବିଡ୍‌ରେ ଜିସୁର୍ ବିସଇନେଇ ବାଗ୍ ବାଗ୍ ଅଇଲା । ୪୪ ଆରି ଲକ୍‌ମାନର୍ ବିଡ୍‌ରେଅନି କେତେ ଲକ୍ ଜିସୁକେ ବାନ୍ଦାଇ ଅ ବଲି ମନ୍ କର୍‌ତେରଇଲା । ମାତର୍ କେ ମିସା ତାକେ ଦାରି ନାପାଉଲା ।

**ଜିଉଦି ନେତାମନ୍**

୪୫ ଜିସୁକେ ବନ୍ଦି କର୍‌ବାକେ ଜାଇରଇବା ଜାଗୁଆଲ୍‌ମନ୍, ବାଉଡିଆଇଲାକେ ମୁକ୍ତିଅ ପୁଜାରି ଆରି ପାରୁସିମନ୍ ସେମନ୍‌କେ ପାଟାଉଲା, “ତମେ କାଇକେ ଜିସୁକେ ବନ୍ଦି କରି ଆନାସ୍ ନାଇ ?” ୪୬ ଜାଗୁଆଲ୍‌ମନ୍ କଇଲା, “ଏ ଲକ୍ କଇଲା ପାରା କାତା ଆଜିକେଜାକ କେ ମିସା କଅଡ୍ ନାଇ ।”

୪୭ ପାରୁସିମନ୍ ସେମନ୍‌କେ କଇଲା, “ଏକ୍ତି ବଇଲେ ତମକେ ମିସା ସେ ବକ୍ତୁଆ କରିଦେଲା କି ?” ୪୮ ଆରି ପାଟାଉଲା, “ଗଟେକ୍ ନେତା ନଅଇଲେ ଗଟେକ୍ ପାରୁସି ତାକେ ବିସବାସ୍ କରିଆତଡ୍ ବଲି ତମେ ସୁନିଆଟାସ୍ କି ?” ୪୯ ମାତର୍ ଏ ଲକ୍‌ମନ୍, ମସାର୍ ନିୟମ୍ ନାଜାନଡ୍ । ତେବର୍ ପାଇ ଏମନ୍ ସବୁ ଅବିସାୟ ପାଇରଇବା ଲକ୍ ।” ୫୦ \*ତେଇ ସେ ଦଲେଅନି ନିକଦିମ୍ ନାଉର୍ ଗଟେକ୍ ନେତା ରଇଲା । ସେ ତରେକ୍ ଜିସୁକେ ଦେକ୍‌ବାର୍ ଜାଇରଇଲା । ସେ କଇଲା, ୫୧ “ଆମର୍ ନିୟମ୍ ଇସାବେ ଗଟେକ୍ ଲକ୍‌କେ ଦସି କର୍‌ବା ଆଗତୁ ତାର୍ କାତା ସୁନ୍‌ବାକେ ପଡ୍‌ସି ଆରି କାଇଟା କଲାଆତେ କଜ୍‌ବାକେ ପଡ୍‌ସି ।” ୫୨ ବିନ୍‌ଲକ୍‌ମନ୍ କଇଲା, “ଏକ୍ତି ବଇଲେ ତୁଇ ମିସା କାଇ ଗଟେକ୍ ଗାଲିଲିର୍ ଲକ୍ କି ? କେ ମିସା ପର୍‌ଫେସରର୍ ତେଇଅନି ବବିସତ୍‌କାତା କଇବା ଲକ୍ ଗାଲିଲିଅନି ଆସଡ୍ ନାଇ ।” ୫୩ ତାର୍ ପଟେ ତେଇ ରଇଲା ଲକ୍‌ମନ୍ ସେ ଜାଗା ଚାଡିକରି ନିଜର୍ ନିଜର୍ ଗରେ ବାଉଡି ଗାଲା ।

**୮**

**ଗଟେକ୍ ଦାରିଆନି ମାଇଜି**

୧ ଜିସୁ ଜିଡ୍ ନାଉର୍ ଗର୍‌ମନ୍ ରଇଲା ପର୍‌ବତେ ଉଟିଗାଲା । ୨ ତାର୍ ଆର୍‌କର୍ ଦିନର୍ ସାକାଲେ ସେ ମସିରେ ବାଉଡି ଆଇଲା ଆରି ତେଇ ସବୁଲକ୍ ତାର୍‌ଲଗେ ରୁଣ୍ଡୁଲାକେ, ସେ ବସିକରି ସେମନ୍‌କେ ସିକାଇବାର୍ ଦାଉଲା । ୩ ସେଡ୍‌କିବେଲେ କେତେଟା ସାସତର୍ ସିକାଉମନ୍ ଆରି ପାରୁସିମନ୍, ଗଟେକ୍ ବେସିଆନି ମାଇଜିକେ ବେସିଆ କାମ୍ କର୍‌ବାବେଲେ ଦାରିକରି ଜିସୁର୍ ଲଗେ ଆନ୍‌ଲା । ତାକେ ସବୁ ଲକ୍‌ମନ୍ ମୁଆଟେ ଟିଆ କରାଇ ଜିସୁକେ ପାଟାଉଲା, ୪ “ଏ ଗୁରୁ, ଏ ମାଇଜିକେ ବେସିଆ କାମ୍ କଲାବେଲେ ଦାରିଆତୁ । ୫ ଏନ୍ତାରି ମାଇଜିକେ ପାକ୍‌ନା ସଙ୍ଗ୍ ମାରି ମରାଆ ବଲି ମସାର୍ ନିୟମେ ଲେକା ଅଇଲା ଆତେ । ଏକ୍ତି ବଇଲେ ତୁଇ କାଇଟା ବଲି କଇଲୁସିନି ?” ୬ ସେମନ୍ ଜେକ୍ତିକି ଜିସୁ କଇବା ଉତ୍‌ରେତେଇଅନି ବୁଲ୍ ଦାରି ତାକେ ଦସି କର୍‌ବାକେ ଏ କାତା କଇଲା । ମାତର୍ ଜିସୁ ଲକ୍ କରି ଆଙ୍ଗଟି ସଙ୍ଗ୍ ବୁର୍‌ ଲେକ୍‌ବାର୍ ଦାଉଲା ।

\* ୭:୫୦ ୭:୫୦ ଜଅନ୍ ୩:୧,୨

୭ ମାତରୁ ସେମନ୍ ତାକେ ତରକେ ତର ପାଚାରିଲାଗି ରଇଲାଜ ଜେ ସେ ଚିଆଅଇ କଇଲା, “ ଇତି ମୁଲକେ ପାପ୍ ନ କଲା ଲକ୍ କେ ଆଚାସ୍ ବଇଲେ ସେ ଆଗୁତୁ ଆସିକରି ତାକେ ପାକନା ମାର ।” ୮ ତାରୁପଚେ ସେ ଆରି ତରେକ୍ ଲକ୍‌କରି ବୁର୍ସ୍ ଲେକ୍‌ବାର୍ ଦାରଲା । ୯ ଜିସୁର୍ ଏ କାତା ସୁନି ମାଇଜିକେ ଆନିରଇବା ସବୁଲକ୍ ସେ ଜାଗାଇଅନି ଗଟେକ୍ ଗଟେକ୍ ଲକ୍ ବାରଇ ଉଟିଗାଲାଇ । ପରୁତୁମ୍ ଡକ୍‌ରାମନ୍ ଗାଲାଇ । ତେଇ ସାରାସାରି ଜାକ ଜିସୁ ଆରି ସେ ମାଇଜିସେ ରଇଲାଇ । ୧୦ ଜିସୁ ଚିଆଅଇ ତାକେ ପାଚାରଲା, “ସେ ଲକ୍‌ମନ୍ କେନେ ଗାଲାଇ ? ଇତି କେ ମିସା ତକେ ଦସ୍ ଦାରବାକେ ନାଇ କି ?” ୧୧ ସେ କଇଲା, “ନାଇ ମାପୁରୁ କେ ମିସା ମକେ ଦସି ବଲି ବିଚାର୍ କରତ୍ ନାଇ ।” ଜିସୁ ତାକେ କଇଲା, “ମୁଇ ମିସା ତକେ ଦସି ବଲି ବିଚାର୍ ନ କରି । ମାତରୁ ଜା ଆରି ପାପ୍ କର୍ ନାଇ ।”

**ଜିସୁ ଦୁନିଆର ଉଜଲ୍**

୧୨ \*ଜିସୁ ଆରିତରେକ୍ ପାରୁସିମନ୍‌କେ କଇଲା, “ମୁଇସେ ଏ ଦୁନିଆର ଉଜଲ୍ । ଜନ୍ ଲକ୍ ମର୍ ପଚେ ପଚେ ଆଇସି, ସେ ଜିବନ୍‌ର ଉଜଲ୍ ପାଇସି । ଆରି କେବେ ମିସା ଆନ୍ଦାରେ ନ ରଏ ।”

୧୩ \* ପାରୁସିମନ୍ ତାକେ କଇଲାଇ, “ତୁଇ ନିଜେ ନିଜର୍ ବିସଇ ସାକି ଦେଲୁସନି, ସେଟାର୍‌ପାଇ, ତର୍ ସାକି ଦେଲାଟା ସତ୍ ନର୍ସ୍ ।”

୧୪ ଜିସୁ ସେମନ୍‌କେ କଇଲା, “ନାଇ, ମୁଇ ମର୍ ନିଜର୍ ପାଇ ସାକି ଦେଲେ ମିସା, ମୁଇ ଜନ୍‌ଟା କଇଲିନି ସେଟା ସତ୍‌ସେ । କାଇକେ ବଇଲେ ମୁଇ କନ୍ତିଅନି ଆଇଲି ଆଟି ଆରି କନ୍ତି ଗାଲିନି, ସେଟା ମୁଇସେ ଜାନି । ମାତରୁ ମୁଇ କନ୍ତିଅନି ଆଇଲିଆଟି ଆରି କନ୍ତି ଜିବି, ସେଟା ତମେ ନାଜାନାସ୍ । ୧୫ ଆରି ତମେ ମକେ ଲକ୍‌ମନର୍ ଇସାବେ ବିଚାର୍ କଲାସନି । ମାତରୁ ମୁଇ କାକେ ବିଚାର୍ ନ କରି । ୧୬ ଜଦି ମୁଇ ବିଚାର୍ କର୍ତ୍ତି ବଇଲେ ମର୍ ବିଚାର୍ ପୁରାପୁରୁନ୍ ଟିକ୍ ଅଇତା । କାଇକେ ବଇଲେ ମୁଇ ଗଟେକ୍ ଲକ୍ ନାଇ, ମାତରୁ ମକେ ପାଟାଇରଇବା ମର୍ ବାବା ମିସା ମର୍ ସଙ୍ ମିସତେ ଆଚେ । ୧୭ କାଇଆଲେ ଗଟ୍‌ନାର୍ ବିସଇ ରଇଲେ, ତୁଇ ଲକ୍‌ର୍ ସାକି ସମାନ୍ ଅଇଲାନି ବଇଲେ, ସେମନ୍ କଇଲା କାତା ସତ୍‌ସେ । ତମର୍ ଦରମ୍ ସାସତରେ ଏନ୍ତି ଲେକା ଅଇଲା ଆଚେ । ୧୮ ମୁଇ ନିଜେ ନିଜର୍ ବିସଇ ସାକି ଦେଲିନି, ଆରି ମକେ ପାଟାଇଲା ପର୍‌ମେସର୍ ମିସା ମର୍ ସାକି ଦେଲାନି ।”

୧୯ ଲକ୍‌ମନ୍ ଜିସୁକେ ପାଚାରଲାଇ “ତର୍ ବାବା କନ୍ତି ଆଚେ ?” ଜିସୁ ସେମନ୍‌କେ କଇଲା, “ତମେ ମକେ ନାଜାନାସ୍ ଆରି ମର୍ ବାବାକେ ମିସା ନାଜାନାସ୍ । ତମେ ଜଦି ମକେ ଜାନିରଇତାସ୍ ବଇଲେ ମର୍ ବାବାକେ ମିସା ଜାନ୍‌ତାସ୍ ।”

୨୦ ଜିସୁ ମନ୍ଦିରର୍ ଦାନ୍ ସଙ୍ଗଇବା ପେଡିମନ୍ ରଇବା ଆକରାଇ ଏ ସବୁ ବିସଇ ସିକିଆ ଦେଇତେରଇଲା । ଆରି କେ ମିସା ତାକେ ବନ୍ଦି କରି ନାପାରୁଲାଇ । କାଇକେବଇଲେ ତାର୍ ବେଲା କେଟି ନ ରଇଲା ।

**ଜିସୁ ତାର୍ ଜିବା ବିସଇ ବବିସତ୍‌କାତା କଇବାଟା**

୨୧ ଜିସୁ ଲକ୍‌ମନ୍‌କେ ଆରି ତରେକ୍ କଇଲା, “ମୁଇ ଗାଲିନି ଆରି ତମେ ମକେ କଜ୍‌ସା । ମାତରୁ ନିଜର୍ ନିଜର୍ ପାପ୍ କେମା ନ କରାଇଅଇ ମର୍‌ସା । ଆରି ମୁଇ ଜନ୍ ଜାଗାଇ ଜିବି ତମେ ତେଇ ଆସି ନାପାରାସ୍ ।”

୨୨ ଜିସୁ ଏନ୍ତି କଇଲାକେ ଜିଉଦି ନେତାମନ୍ ନିଜର୍ ନିଜର୍ ବିତ୍‌ରେ କୁଆବଲା ଅଇଲାଇ, “ସେ କାଇକେ ମୁଇ ଜନ୍ ଜାଗାଇ ଗାଲିନି, ତମେ ତେଇ ଜାଇନାପାରାସ୍ ବଲି କଇଲାନି ? ଜିସୁ କାଇ ନିଜେ ଉଦ୍‌କି ଅଇ ମର୍‌ବାକେ ମନ୍ କଲାନି କି ?”

\* ୮:୧୨ ୮:୧୨ ମାଡିଉ ୫:୧୪; ଜଅନ୍ ୯:୫      \* ୮:୧୩ ୮:୧୩ ଜଅନ୍ ୫:୩୧

୨୩ ଜିସୁ ସେମନ୍‌ଙ୍କେ କଇଲା, “ତମେ ଏ ଦୁନିଆଇଅନି ଆସିଆରାସ୍ । ମାତର୍ ମୁଇ ସର୍ଗେଅନି ଆସିଆତି । ତମେ ଏ ଦୁନିଆର୍ ଲକ୍, ମାତର୍ ମୁଇ ଏ ଦୁନିଆର୍ ଲକ୍ ନଇ । ୨୪ ତମେ ନିଜର୍ ନିଜର୍ ପାପ୍ କେମା ନ କରାଇଅଇତେ ମର୍ସା ବଲି ମୁଇ ତମ୍‌ଙ୍କେ କଇରଇଲି । ନିଜେ ମୁଇ ସେ । ଏଟାକେ ବିସ୍‌ବାସ୍ ନ କଲେ, ତମେ ନିଜର୍ ପାପେ ସେ ମର୍ସା ।”

୨୫ ଜିଉଦି ନେତାମନ୍ ପାଟାରଲାଇ, “ତୁଇ କେ ? ଆମ୍‌ଙ୍କେ କ ।” ଜିସୁ ସେମନ୍‌ଙ୍କେ କଇଲା, “ଆରାମେ ଅନି ମୁଇ କେ ବଲି କଇଆଇଲିନି । ୨୬ ତମେ ପାପ୍ କରିରଇବାଟା ଆରି ଦସ୍ କରିରଇବା ବିସଇ ମର୍ ଟାନେ ବେସି ଆଟେ । କାଇକେବଇଲେ, ଜେ ମକେ ପାଟାଇ ଆଟେ, ତାଟେଇ ଅନି ମୁଇ ଜାଇଟା ସୁନି ଆତି, ସେଟା ସେ ଜାନାଇଲିନି ।”

୨୭ ମାତର୍ ଜିସୁ ତାର୍ ବାବାର୍ ବିସଇ ଏନ୍ତାରି କଇଲାନି ବଲି ସେମନ୍ ମୁଲ୍‌ଙ୍କେ ବୁଜି ନାପାରଲାଇ । ୨୮ ସେଟାର୍‌ପାଇ ସେ ସେମନ୍‌ଙ୍କେ କଇଲା, “ତମେ ନର୍‌ପିଲା ମକେ କୁର୍‌ସେ କୁଟି ମାରି ଉଟାଇଲାବେଲେ ଜାନସା, ସେ ନିଜେ ମୁଇ ସେ । ମୁଇ ନିଜର୍ ଅଦିକାରେ କାଇଟା କରି ନାପାରି, ମର୍ ବାବାର୍ ଟାନେଅନି ଜାଇଟା ସିକ୍‌ଲି ଆତି, ସେଟାସେ କଇଲିନି, ସେଟା ତମେ ବୁଜୁସା । ୨୯ ଜେ ମକେ ପାଟାଇଆଟେ, ସେ ମର୍ ସଙ୍ଗ୍ ଆଟେ । ସେ ମକେ ଏକ୍‌ଲା ଚାଡି ଦେଏନାଇ, କାଇକେବଇଲେ ସେ ଜାଇଟା ମନ୍‌କଲାନି, ମୁଇ ସେଟାସେ କଲିନି ।”

୩୦ ଜିସୁର୍ ଏ ସବୁ କାତା ସୁନି, ବେସି ଲକ୍‌ମନ୍ ତାକେ ବିସ୍‌ବାସ୍ କଲାଇ ।

ସତ୍ ବିସଇ ତମ୍‌ଙ୍କେ ମୁକ୍‌ଲାଇସି

୩୧ ଜିସୁ ତାର୍‌ଟାନେ ବିସ୍‌ବାସ୍ କରିରଇବା ଜିଉଦି ଲକ୍‌ମନ୍‌ଙ୍କେ କଇଲା, “ଜଦି ତମେ ମର୍ ସିକିଆ ମାନିକରି ତବିର୍ ଅଇ ରଇସା, ବଇଲେ ସତଇସେ ମର୍ ସିସ୍ ଅଇସା । ୩୨ ଆରି ତମେ ସତ୍ ବିସଇ ଜାନସା, ସେ ସତ୍ ତମ୍‌ଙ୍କେ ମୁକ୍‌ଲାଇସି ।”

୩୩ ଜିଉଦି ଲକ୍‌ମନ୍ ତାକେ କଲାଇ, “ଆମେ ଅବ୍ରାଆମର୍ ନାତିତିମନ୍, ଆରି ଆମେ କେବେ ମିସା କାର୍ ଗତିଅଇ ରଉନାଇ, ଏନ୍ତ୍ର ବଇଲେ ତମେ କେନ୍ତ୍ର ମୁକ୍‌ଲୁସା ବଲି କଇଲୁସନି ? ଏ କାତାର୍ ଅରତ୍ କାଇଟା ?”

୩୪ ଜିସୁ କଇଲା, “ମୁଇ ତମ୍‌ଙ୍କେ ସତ୍ କାତା କଇଲିନି, ଜେ ପାପ୍ କର୍‌ସି, ସେ ପାପର୍ ଗତିଦାଙ୍ଗ୍‌ତା । ୩୫ ଗତିଦାଙ୍ଗ୍‌ତା ଗଟେକ୍ ଗରେ ସବୁ ଦିନର୍‌ପାଇ ନ ରଏ । ମାତର୍ ସେ ଗରର୍ ପିଲାସେ ସବୁଦିନର୍‌ପାଇ ରଇସି । ୩୬ ସେଟାର୍‌ପାଇ ମୁଇ ଜଦି ତମ୍‌ଙ୍କେ ମୁକ୍‌ଲାଇବି ବଇଲେ, ସତଇସେ ତମେ ମୁକ୍‌ଲୁସା । ୩୭ ତମେ ଅବ୍ରାଆମ୍ କୁଟୁମର୍ ଲକ୍‌ମନ୍ ବଲି ମୁଇ ଜାନିଆତି, ଅଇଲେ ମିସା ତମର୍ ବିତ୍‌ରେଅନି କେତେ ଲକ୍‌ମନ୍ ମକେ ମରାଇବାକେ ଚେସ୍‌ଟା କଲାସ୍‌ନି । କାଇକେ ବଇଲେ ମର୍ ସିକିଆ ତମେ ମାନାସ୍ ନାଇ । ୩୮ ମୁଇ ମର୍ ବାବା ସଙ୍ଗ୍ ରଇଲାବେଲେ ମକେ ସେ ଜାଇଟା ଦେକାଇଆଟେ, ସେଟା ତମ୍‌ଙ୍କେ କଇଲିନି । ମାତର୍ ତମର୍ ବାବା ତମ୍‌ଙ୍କେ ଜାଇଟା ସିକାଇଆଟେ, ସେଟା କଲାସ୍‌ନି ।”

୩୯ ଜିଉଦି ଲକ୍‌ମନ୍ ତାକେ କଇଲାଇ, “ଆମର୍ ବାବା ଅବ୍ରାଆମ୍ ।” ଜିସୁ କଇଲା, “ତମେ ଜଦି ସତଇସେ ଅବ୍ରାଆମର୍ ନାତିତିତି ଅଇରଇତାସ୍ ବଇଲେ, ଅବ୍ରାମ୍ କରିରଇଲା କାମ୍‌ମନ୍ କର୍‌ତାସ୍ । ୪୦ ପର୍‌ମେସର୍ ତେଇଅନି ସୁନ୍‌ଲା ସତ୍ କାତା ଚାଡି ମୁଇ ଆରି ତମ୍‌ଙ୍କେ କାଇଟା କଇନାଇ । ଅଇଲେ ମିସା ତମେ ମକେ ମରାଇବାକେ ଚେସ୍‌ଟା କଲାସ୍‌ନି । ମାତର୍ ଅବ୍ରାଆମ୍ ଏନ୍ତାରି କାଇ କାମ୍ କରି ନ ରଇଲା । ୪୧ ତମର୍ ବାବାମନ୍ ଜନ୍ କାମ୍‌ମନ୍ କରି ରଇଲାଇ, ତମେ ସେଟା କଲାସ୍‌ନି ।”

ମାତର ଜିଉଦିମନ୍ କଇଲା, “ଆମର ବାବା ପରମେସରସେ । ଆମେସେ ତାର ପିଲାଟକିମନ୍ ।”

୪୬ ଜିସୁ ସେମନ୍‌କେ କଇଲା, “ଜଦି ପରମେସର ତମର ବାବା ଅଇରଇଲେ, ତମେ ମକେ ଆଲାଦ୍ କରତାସ୍ । କାଇକେ ବଇଲେ ମୁଇ ପରମେସର ତେଇଅନି ଆସି ଏବେ ଇତି ଆତି । ମାତର ନିଜର ଅଦିକାରେ ଆସିନାଇ । ସେ ମକେ ଏ ଦୁନିଆଇ ପାଟାଇଲା ଆଚେ । ୪୭ ତମେ କାଇକେ ମର କାତା ବୁଜି ନାପାରଲାସ୍‌ନି ? କାଇକେ ବଇଲେ ତମେ ମର ସିକିଆ ସୁନି ତବିରଅଇ ରଇ ନାପାରଲାସ୍‌ନି । ୪୮ ସଇତାନ୍ ଅଇଲାନି ତମର ବାବା । ଆରି ତମେ ସେ କରବା କାରାପ୍ କାମମନ୍ କରବାକେ ମନ୍ କଲାସ୍‌ନି । ସେ ଆଗ୍‌ତୁଅନି ଲକ୍‌ମନ୍‌କେ ନସ୍‌ଟ କଲାନି, ଆରି ସେ ସତ୍ ବିସଇ ଚିନ୍ କଲାନି । ତାରତେଇ ସତ୍ ବିସଇ ନାଇ । ଜେଡେବେଲା ସେ ମିର୍ କଇଲାନି, ସେବେଲା ସେ ନିଜର ଗୁନ୍ ଚଲନ୍‌ଅନି ସେନ୍ତ୍ର କଇଲାନି । କାଇକେ ବଇଲେ ସେ ମିର୍ କଇବା ଲକ୍, ଆରି ମିର୍ କଇବା ଲକ୍‌ମନ୍‌ର ବାବା । ୪୯ ଏବେ ମୁଇ ସବୁବେଲା ସତ୍‌କାତା କଇଲିନି ମିସା ତମେ ମକେ ବିସ୍‌ବାସ୍ କରାସ୍‌ନାଇ । ୫୦ ତମର ବିତ୍‌ରେ ଅନି କେମିସା ଗଟେକ୍ ଲକ୍ ମୁଇ ପାପ୍ କଲିଆତି ବଲି ମକେ ଦସି କରାଇପାରେ କି ? ଆରି ମୁଇ ଜଦି ସତ୍‌କାତା କଇଲିନି ବଇଲେ, ତମେ କାଇଜେ ବିସ୍‌ବାସ୍ କରାସ୍ ନାଇ ? ୫୧ ଜେଡକି ଲକ୍ ପରମେସରର ଅଇଲାଇ ଆଚତ୍, ସେମନ୍ ପରମେସରର କାତା ସୁନ୍‌ବାଇ । ଆରି ତମେ ପରମେସରରତେଇଅନି ଆଇଲା ଲକ୍ ନୁଆସ୍ । ସେଟାରପାଇ ତମେ ମର ବାକିଅ ସୁନାସ୍ ନାଇ ।”

ଜିସୁ ଆରି ଅବରାଆମ୍

୫୮ ଜିଉଦିମନ୍ ଜିସୁକେ ପାଟାରଲା, “ତୁଇ ଗଟେକ୍ ସମିରଣିୟ ଲକ୍, ତକେ ଗଟେକ୍ ତୁମା ଦାରଲା ଆଚେ ବଲି ଆମେ କଇଲା କାତା ସତ୍ ନସ୍ କି ?”

୫୯ ଜିସୁ ସେମନ୍‌କେ କଇଲା, “ନାଇ ! ମକେ ତୁମା ଦାରେ ନାଇ । ମୁଇ ମର ବାବାକେ ସନ୍‌ମାନ୍ ଦେଲିନି । ମାତର ତମେ ମକେ ନିନ୍ଦାକାତା କଇ ଲାଜ୍ କରାଇଲାସ୍‌ନି । ୬୦ ମୁଇ ନିଜେ ଡାକ୍‌ପୁଟା ପାଇବାକେ ଚେସ୍‌ଟା କରିନାଇ । ମାତର ଆରି ଗଟେକ୍ ଲକ୍ ମକେ ଡାକ୍‌ପୁଟା କରାଇବାକେ ମନ୍ କଲାନି । ସେ ଟିକ୍ ବାବେ ବିଚାର୍ କରବା ମାପରୁ । ୬୧ ମୁଇ ତମକେ ସତ୍‌କାତା କଇଲିନି, ଜେ ମୁଇ ସିକାଇବା କାତା ମାନ୍‌ସି, ସେ କେବେ ମିସା ନ ମରେ ।”

୬୨ ସେମନ୍ ଜିସୁକେ କଇଲା, “ଏବେ ଆମେ ଜାନ୍‌ଲୁ ତକେ ଗଟେକ୍ ତୁମା ଦାରଲା ଆଚେ । ଅବରାଆମ୍ ଆରି ବବିସତ୍‌ବକ୍‌ତାମନ୍ ମରିଗାଲାଇ ଆଚତ୍, ମାତର ତୁଇ କଇଲୁସ୍‌ନି ଜଦି କେ ମିସା ମର କାତା ମାନ୍‌ସା ବଇଲେ ସେ କେବେ ମିସା ନ ମରେ ବଲି ।” ୬୩ ସେମନ୍ ପାଟାରଲା “ତୁଇକାଇ ଆମର ବାବା ଅବରାଆମ୍‌ମାନେଅନି ବଡ୍ ଲକ୍‌କି ? ସେମନ୍ ମିସା ମରିଗାଲାଇ ଆଚତ୍ ଆରି ବବିସତ୍‌ବକ୍‌ତାମନ୍ ମିସା ମରିଜାଇଆଚତ୍ । ତୁଇ ନିଜକେ କେ ବଲି ବାବ୍‌ଲୁସ୍‌ନି ?”

୬୪ ଜିସୁ ସେମନ୍‌କେ କଇଲା, “ମୁଇ ଜଦି ନିଜକେ ଡାକ୍‌ପୁଟା କରବି ବଲି ଚେସ୍‌ଟା କରତି ବଇଲେ, ସେ ଡାକ୍‌ପୁଟାର କାଇ ମୁଲିଅ ନାଇ । ମର ବାବା ଜାକେ କି ତମେ ତମର ପରମେସର ବଲି କଇଲାସ୍‌ନି, ସେ ସେ ମକେ ଡାକ୍‌ପୁଟା କରାଇଲାନି । ୬୫ ତମେ ତାକେ ନାଜାନାସ୍, ମାତର ମୁଇ ଜାନି । ଜଦି ମୁଇ ତାକେ ନାଜାନି ବଲି କଇବି, ସେନ୍ତ୍ରାଆଲେ ମୁଇ ମିସା ତମରପାରା ମିର୍ କଇବା ଲକ୍ ଅଇବି । ମାତର ମୁଇ ତାକେ ଜାନିଆତି ଆରି, ତାର କାତା ମାନ୍‌ଲିନି । ୬୬ ମୁଇ ଆଇବା ଦିନ୍ ଦେକ୍‌ବି ବଲି ତମର ବାବା ଅବରାଆମ୍, ବେସି ଆସା କରି ସାର୍‌ଦା ଅଇତେ ରଇଲା । ଆରି ସେ ଦିନ୍‌କେ ଦେକି କରି ସାର୍‌ଦା ଅଇଲା” ବଲି କଇଲା ।

୫୭ ତାର ପରେ ଜିଉଦିମନ୍ ଜିସୁକେ କଇଲା, “ତକେ ପଚାସ୍ ବରସ୍ ମିସା ଅଏ ନାଇତା, ତୁଇ କାଇ ଅବରାଆମ୍‌କେ ଦେକି ଆଚୁସ୍ କି ?”

୫୮ ଜିସୁ ସେମନ୍‌କେ କଇଲା, “ମୁଇ ତମ୍‌କେ ସତ୍‌କାତା କଇଲିନି, ଅବରାଆମ୍ ଜନମ୍ ଅଇବା ଆଗ୍‌ତୁଅନି ମୁଇ ଆଚି ।”

୫୯ ଜିସୁ ଏ କାତା କଇବାବେଲେ ସେମନ୍ ତାକେ ମାର୍‌ବାକେ ପାକନା ବେଟ୍‌ଲା, ମାତର୍ ଜିସୁ, ମନ୍ଦିରେ ଅନି ବାରଇ ଲକ୍‌ମନର୍ ବିତ୍‌ରେ ପୁରି ଉଟିଗାଲା ।

**୯**

ଜିସୁ ଗଟେକ୍ ଜନ୍‌ମେଅନି କାଣା ରଇଲା ଲକ୍‌କେ ନିମାନ୍ କଲା

୧ ଦିନେକ୍ ଜିସୁ ଜିବାବେଲେ ଗଟେକ୍ ଜନ୍‌ମେଅନି କାଣା ରଇଲା ଲକ୍‌କେ ଦେକ୍‌ଲା । ୨ ଆରି ତାର୍ ସିସ୍‌ମନ୍ ତାକେ ପାଚାରଲା, “ଏ ଗୁରୁ କେ ପାପ୍ କଲାଲଜେ ଏ ଲକ୍ କାଣାଅଇ ଜନମ୍ ଅଇଲା ? ସେ ନିଜେ କି ତାର୍ ବାବା ମାଆର୍ ପାପର୍ ଲାଗି ?”

୩ ଜିସୁ କଇଲା, “ତାର୍ କି ତାର୍ ବାବା ମାଆର୍ କାଇ ପାପ୍‌ସ୍ ନାଇ । ପର୍‌ମେସରର୍ ବପୁ ତାର୍‌ଟାଣେ ଜାନାପତ୍‌ସି ବଲି, ସେ କାଣା ଅଇ ଜନମ୍ ଅଇଲା ଆଚେ । ୪ ବେଲ୍ ରଇତେସେ ମକେ ପାଟାଇରଇବା ପର୍‌ମେସରର୍ କାମ୍ ଆମେ କର୍‌ବାର୍ ଆଚେ । ଏନ୍ତ୍ର ଆନ୍ଦାର୍ ଆଇଲାନି ସେ ବେଲାଲ କେ ମିସା କାଇ କାମ୍ କରି ନାପାରତ୍ । ୫ ମୁଇ ଜେତେ ଦିନ୍ ଜାକ ଏ ଦୁନିଆଇ ରଇବି ସେତ୍‌କି ଦିନ୍ ଜାକ ଏ ଦୁନିଆର୍ ଉଜଲ୍ ।”

୬ ଜିସୁ ଏ କାତା କଇଲା ପରେ, ମାଟିତେଇ ତୁକି ସେ ତୁକ୍ ସଙ୍ଗ୍ କାଦ ଚକଟ୍‌ଲା । ଆରି ସେ କାଦ ନେଇକରି କାଣାର୍ ଦୁଇଟା ଆଁକିତେଇ ଲିପିଦେଲା । ୭ ଆରି ତାକେ କଇଲା, “ତୁଇ ଜା ଆରି ସିଲଅ ନାଉର୍ ବନ୍ଦେ ଜାଇକରି ମୁ ଦଇ ଆଉ ।” ସିଲଅର୍ ଅରତ୍ ଅଇଲାନି ପାଟାଇଲାଟା । ତାର୍ ପରେ ସେ ଲକ୍ ବନ୍ଦେ ଜାଇକରି ମୁ ଦଇଲାଜେ, ଦେକିପାର୍‌ଲା ଆରି ଆଇଲା ।

୮ କେତେକ୍ ଲକ୍‌ମନ୍ ଏ ଲକ୍‌କେ ଆଗ୍‌ତୁ ବିକ୍ ମାଙ୍‌ବାଟା ଦେକି ରଇଲାଇ । ସେଟାର୍ ପାଇ ଏ ଲକ୍‌ମନ୍ ଆରି କାଣାର୍ ଗର୍ ଲଗର୍ ଲକ୍‌ମନ୍ ତାକେ ଦେକି କଇଲା, “ଜନ୍ ଲକ୍‌କି ସବୁବେଲା ବସିକରି ବିକ୍ ମାଙ୍‌ତେ ରଇଲା ସେ କାଇ ଏ ଲକ୍ ନଏଁ କି ?”

୯ କେତେ ଲକ୍‌ମନ୍ କଇଲା, “ଉଁ ଏତାଉ ସେ ଲକ୍‌ସେ ।” ମାତର୍ ଆରି ଅଦେକ୍ ଲକ୍ କଇଲା, “ନାଇ ଏ ସେ ଲକ୍ ନଏଁ ମାତର୍ ତାର୍ ପାରା ତିସ୍‌ଲାନି ।” ମାତର୍ କାଣା କଇଲା, “ମୁଇସେ ଆଗ୍‌ତୁ କାଣା ଅଇରଇଲି ।”

୧୦ ଲକ୍‌ମନ୍ ତାକେ ପାଚାରଲା, “ଏନ୍ତ୍ର ବଇଲେ ତୁଇ କେନ୍ତ୍ର ଦେକିପାର୍‌ଲୁସ୍‌ନି ?”

୧୧ କାଣା ସେମନ୍‌କେ କଇଲା, “ଲକ୍‌ମନ୍ ଜନ୍ ଲକ୍‌କେ ଜିସୁ ବଲି କଇଲାଇନି, ସେ କାଦ କରି ମର୍ ଆଁକିତେଇ ଲିପିଦେଲା । ତାର୍‌ପରେ ସେ ମକେ ‘ସିଲଅ ନାଉର୍ ବନ୍ଦେ ଜାଇକରି ଦ’ ବଲି କଇଲା । ପରେ ମୁଇ ଜାଇକରି ବନ୍ଦେ ମୁ ଦଇଲା ଦାପ୍‌ରେ ଦେକି ପାର୍‌ଲି ।”

୧୨ ଆରି ଲକ୍‌ମନ୍ ତାକେ କଇଲା, “ସେ କନ୍ତ୍ର ଆଚେ ?” ସେ “ମୁଇ ନାଜାନି” ବଲି କଇଲା ।

ପାରୁସିମନ୍ ନିକ ଅଇ ରଇବା ବିସଇ ଜାନ୍‌ବାକେ ଚେସ୍‌ଟା କଲା

୧୩ ତାର୍ ପରେ ଲକ୍‌ମନ୍ ଆଗେଅନି କାଣା ଅଇରଇଲା ଲକ୍‌କେ ପାରୁସିମନ୍‌ର୍ ଲଗେ ଡାକିନେଲା । ୧୪ ଜିସୁ ଜନ୍ ଦିନେ କାଦ ଲିପିକରି ତାର୍ ଆଁକି ନିକ

କରିରଇଲା, ସେ ଦିନ ବିସ୍ଵରାମ୍‌ବାର ରଇଲା । ୧୫ ପାରୁସି ଲକ୍‌ମନ୍ ତାକେ ଆରିତରେକ୍ ପାଚାରୁଲାଇ, “ତୁଇ କେନ୍ତାର ଦେକିପାରୁଲୁସିନି ?” ତେଇ ସେ ସେମନ୍‌କେ କଇଲା, “ଜିସୁ ମର୍ ଆଁକିଟାନେ କାଦ ଲାଗାଇଦେଲା । ପଚେ ମୁଇ ମୁ ଦଇ ଆଇଲି ଆରି ଏବେ ଦେକି ପାରୁଲିନି ।”

୧୬ କେତେଟା ପାରୁସିମନ୍ କଇଲାଇ, “ଏ ଲକ୍ ପର୍‌ମେସରର୍ ତେଇଅନି ଆସେ ନାଇ । ସେଟାର ପାଇଁ ସେ ବିସ୍ଵରାମ୍ ଦିନର୍ ନିୟମ୍ ମାନେନାଇ ।”

ଆରି ଅଦେକ୍ ଲକ୍‌ମନ୍ କଇଲାଇ, “ଗଟେକ୍ ପାପି ଲକ୍ କେବେ ମିସା ଏନ୍ତି କାବାଅଇଜିବା କାମ୍ କରିନାପାରେ ।” ଏନ୍ତି ଜିଉଦି ଲକ୍‌ମନ୍ ଦୁଇ ବାଗ୍ ଅଇଗାଲାଇ ।

୧୭ ସେଟାର ପାଇଁ ସେମନ୍ ସେ ଲକ୍‌କେ ଆରି ତରେକ୍ ପାଚାରୁଲାଇ, “ତକେ ଜିସୁ ନିମାନ୍ କଲାଜେ ଦେକି ପାରୁଲୁସିନି । ଏନ୍ତି ବଇଲେ ତୁଇ ତାକେ କେ ବଲି ବାବୁଲୁସିନି ?”

ସେ ଲକ୍ ସେମନ୍‌କେ କଇଲା, “ସେ ଗଟେକ୍ ବବିସତ୍‌ବକ୍‌ତା ।”

୧୮ ଜିଉଦି ନେତାମନ୍ ସେ ନିମାନ୍ ଅଇଲା ଲକ୍ ଆଗତୁ କାଣା ରଇଲା ଜେ ଏବେ ସେ ଦେକିପାରବା ବିସଇ ମୁଲ୍‌କେ ବିସ୍‌ବାସ୍ କରଡନାଇ । ପାରୁସିମନ୍ ସେ ଲକ୍‌ର୍ ମାଆ ବାବାକେ ନ ତାକ୍‌ବା ଜାକ ମୁଲ୍‌କେ ବିସ୍‌ବାସ୍ କରଡନାଇ । ୧୯ ସେମନ୍ ତାର୍ ମାଆ ବାବାକେ ପାଚାରୁଲାଇ, “ଏଟା ତମର୍ ପିଲା କି ? ସେ ଜନ୍‌ମେ ଅନି କାଣାଟା ବଲି ତମେ କଇଲାସିନି, ଏନ୍ତି ବଇଲେ ସେ କେନ୍ତି ଦେକିପାରୁଲାନି ?”

୨୦ ତାର୍ ମାଆ ବାବା କଇଲାଇ, “ଉଁ ଏଟା ଆମର୍ ପିଲା । ସେ ଜନ୍‌ମେଅନି କାଣା ରଇଲା ବଲି ଆମେ ଜାନି ଆରୁ । ୨୧ ମାତର୍ ଏବେ ସେ କେନ୍ତି ଦେକିପାରୁଲାନି ଆରି କେ ତାକେ ନିମାନ୍ କଲା ସେଟା ଆମେ ନାଜାନୁ । ସେ ଏବେ ବଡ୍ ଅଇଲା ଆଚେ ତାକେ ପାଚାରା ସେ ନିଜେ କଇସି ।” ୨୨ ତାର୍ ମାଆ ବାବା ଜିଉଦି ନେତାମନ୍‌କେ ଡରି ଏନ୍ତି ବଲି କଇଦେଲାଇ । କାଇକେ ବଇଲେ ଜିସୁକେ ଜଦି ମସିଅ ବଲି କଇସି ବଇଲେ ତାକେ ପର୍‌ମେସର୍କେ ଉପାସନା କର୍‌ବା ଗର୍ ବିତ୍‌ରେ ଜିବାକେ ନ ଦେଅଡ୍ ବଲି ଆଗତୁସେ କଇରଇଲାଇ । ୨୩ ସେଟାର୍‌ପାଇଁ ସେ ମାଆ ବାବା କଇଲାଇ, “ସେ ତ ବଡ୍ ଅଇଲା ଆଚେ, ତାକେ ପାଚାରା ।”

୨୪ ସେମନ୍ ସେ ଲକ୍‌କେ ଆରି ତରେକ୍ ବିତ୍‌ରେ ତାକି କରି ପାଚାରୁଲାଇ, “ପର୍‌ମେସର୍କେ ରାନ୍ ପାକାଇ କି । ଜିସୁ ଗଟେକ୍ ପାପି ଲକ୍ ବଲି ଆମେ ଜାନୁ ।”

୨୫ ତାର୍ ପଚେ ସେମନ୍‌କେ ସେ କଇଲା, “ସେ ପାପି ଲକ୍‌କି ନଏଁ ସେଟା ମୁଇ ଜାନି ନାଇ । ମାତର୍ ମୁଇ ଗଟେକ୍ ବିସଇ ଜାନି ଆଟି ସେଟା ଅଇଲାନି, ମୁଇ ଆଗତୁ କାଣା ରଇଲି, ଏବେ ଦେକି ପାରୁଲିନି ।”

୨୬ ଜିଉଦି ନେତାମନ୍ ତାକେ ପାଚାରୁଲାଇ, “ସେ ତକେ କାଇଟା କଲା ? କେନ୍ତି ତର୍ ଆଁକି ପିଟାଇଦେଲା ?”

୨୭ ସେ ସେମନ୍‌କେ କଇଲା, “ମୁଇ ଆଗତୁସେ କଇ ସାରାଇଆଟି, ମାତର୍ ତମେ ମାନ୍‌ବାକେ ମନ୍ କରାସ୍ ନାଇ । ଏବେ ଆରି ତରେକ୍ କାଇକେ ପାଚାରୁଲାସିନି ? ତମେ ମିସା କାଇ ତାର୍ ସିସ୍ ଅଇବାକେ ମନ୍‌କଲାସିନି କି ?”

୨୮ ସେମନ୍ ସାଇପ୍ ଦେଇ କଇଲାଇ, “ତୁଇ କାଇ ତାର୍ ସିସ୍ ଅଇସୁ, ଆମେ ନଉଁ, ଆମେ ମସାର୍ ସିସ୍‌ମନ୍ । ୨୯ ପର୍‌ମେସର୍ ମସାର୍‌ତେଇ କାତା ଅଇରଇଲାଟା ଆମେ ଜାନିଆରୁ, ମାତର୍ ଏ ଲକ୍ କନ୍ତିଅନି ଆଇଲାଆଚେ, ସେଟା ନାଜାନୁ ।”

୩୦ ତାର୍ ପଚେ ସେ ଲକ୍ ଜିଉଦି ନେତାମନ୍‌କେ କଇଲା, “ଏଟା ଗଟେକ୍ ବେସି ବଡ୍ କାବାଅଇଜିବା ବିସଇ । ସେ ଲକ୍ ମର୍ ଆଁକି ନିମାନ୍ କଲାଆଚେ, ମାତର୍ ସେ କନ୍ତିଅନି ଆଇଲା ଆଚେ, ସେଟା ତମେ ନାଜାନୁ ବଲି କଇଲାସିନି ।” ୩୧ ପାପି ଲକ୍‌ମନ୍‌ର୍ ପାର୍‌ତନା ପର୍‌ମେସର୍ ନ ସୁନେ ବଲି ସବୁ ଲକ୍‌ମନ୍ ଜାନିଆଚଡ୍ ।



ମାତର୍ ଜନ୍ ଲକ୍ ପର୍ଯ୍ୟେସର୍‌କେ ଜୁଆର୍ କରି ସେ ମନକଲା ଇସାବେ ଚଲାଚଲ୍‌ତି କଲାନି, ସେ ତାର କାତା ସୁନ୍‌ସି । ୩୨ ଦୁନିଆ ଆରାମେଅନି, ଜନ୍‌ମେ ଅନି କାଣା ରଇଲା ଗଟେକ୍ ଲକ୍‌କେ ଆକି ଡିସାଇବାଟା ଏବେ ଜାକ ମିସା ନ ସୁନିରଇଲାଇ । ୩୩ ଏ ଲକ୍ ଜଦି ପର୍ଯ୍ୟେସର୍‌ ଚାନେଅନି ଆସି ନ ରଇଲେ, କେବେ ମିସା ଏ କାମ୍ କରିନାପାରତା । ୩୪ ସେବେଲା ଜିଉଦି ନେତାମନ୍ କଇଲାଇ, “ତୁଇ ପାପେ ଜନମ୍ ଅଇକରି ପୁରାପୁରୁନ୍ ପାପେ ବୁଡି ଆରୁସ୍ । ତେଇଅନି ତୁଇ ବାଅଡ୍ । ଆମ୍‌କେ ସିକାଇଲୁସ୍‌ନି ?” ଏଡ୍ରି କଇକରି ସେମନ୍ ତାକେ ଜିଉଦିମନ୍‌ ପାରତନା ଗରେଅନି ବାରକରାଇଦେଲାଇ ।

ଆଡ୍‌ମା ଇସାବେ କାଣା ରଇବାଟା

୩୫ ଜିସୁ ସେ ଲକ୍‌କେ ପାରତନା ଗରେ ଅନି ବାର୍ କରାଇ ଦେଲାଟା ସୁନି ଆରିତରେକ୍ ତାକେ ଦେକାଇଅଇ, ପାଚାରଲା, “ତୁଇ ପର୍ଯ୍ୟେସର୍‌ ତେଇଅନି ଆଇଲା ନର୍‌ପିଲାକେ ବିସବାସ୍ କଲୁସ୍‌ନି କି ?”

୩୬ ସେ କାଣା ଲକ୍ କଇଲା, “ଏ ଆଗିଆଁ ସେ ଲକ୍ କେ ? ମୁଇ ତାକେ ବିସବାସ୍ କରୁବି ।”

୩୭ ଜିସୁ ତାକେ କଇଲା, “ତୁଇ ତାକେ ଦେକିଆରୁସ୍, ଆରି ଏବେ ଜନ୍ ଲକର୍ ସଙ୍ଗ୍ କାତା ଅଇଲୁସ୍‌ନି, ସେ ଆକା ସେ ଲକ୍ ।”

୩୮ ସେବେଲାଇ ସେ କଇଲା, “ମାପୁରୁ ମୁଇ ତକେ ବିସବାସ୍ କଲିନି ।” ଆରି ଜିସୁର୍ ମୁଆଟେ ମାଣ୍ଡିକୁଟା ଦେଇ ଜୁଆର୍ କଲା ।

୩୯ ଜିସୁ କଇଲା, “ମୁଇ ଏ ଦୁନିଆର୍ ଲକ୍‌ମନ୍‌କେ ବିଚାର୍ କରବାର୍ ଆସିଆତି । ସେଟାର୍ ପାଇ କାଣା ଲକ୍‌ମନ୍‌ ଦେକିପାରବାଇ, ଆରି ଦେକିପାରବା ଲକ୍‌ମନ୍ କାଣା ଅଇଜିବାଇ ।”

୪୦ ଜିସୁ ଏଡ୍ରି କଇବା କାତା, ଲଗେ ରଇଲା କେତେଟା ପାରୁସି ଲକ୍‌ମନ୍ ସୁନିକରି ତାକେ ପାଚାରଲାଇ, “ଏଡ୍ରି ବଇଲେ ଆମ୍‌କେ କାଇ କାଣା ଲକ୍‌ମନ୍ ବଲି ବାବ୍‌ଲୁସ୍‌ନି କି ?”

୪୧ ଜିସୁ ସେମନ୍‌କେ କଇଲା, “ତମେ କାଣା ଅଇରଇତାସ୍ ଆଲେ ଦସି ନ ଅଇତାସ୍ । ମାତର୍ ଦେକି ପାରଲୁନି ବଲି କଇଲାସ୍‌ନିଜେ ଅଦିକ୍ ଦସି ।”

## ୧୦

ମେଣ୍ଡା ଗଉଡର୍ କାତା

୧ ଜିସୁ କଇଲା, “ମୁଇ ତମ୍‌କେ ସଡ୍ କଇଲିନି, ଜେ ଦୁଆର୍ ବାଟେ ନ ଜାଇ ବିନ୍‌ବାଟେ ଜାଇ ମେଣ୍ଡାସାଲେ କେଟ୍‌ସି, ସେ ତର୍ ଆରି କାଙ୍ଗାର୍ । ୨ ମାତର୍ ଜେ ଦୁଆର୍ ବାଟେ ଜାଇ ମେଣ୍ଡାସାଲେ କେଟ୍‌ସି, ସେ ମେଣ୍ଡା ରାସିର୍ ଗଉଡ୍ । ୩ ଜାଗୁଆଲ୍ ଦୁଆର୍ ଉଗାଡି ଦେଇସି ଆରି ନାଉଁ ଦାରି ଡାକ୍‌ସି । ମେଣ୍ଡାମନ୍ ତାର୍ ଡାକଲାଟା ସୁନ୍‌ବାଇ, ଆରି ସେମନ୍‌କେ ବାରକରାଇ ଦାରିଜାଇସି । ୪ ନିଜର୍ ସବୁ ମେଣ୍ଡାମନ୍‌କେ ବାଇରେ ଆନ୍‌ବା ବେଲେ, ସେ ଆଗେ ଆଗେ ଇଣ୍ଡିସି ଆରି ମେଣ୍ଡାମନ୍ ତାର୍ ପଚେ ପଚେ ଜିବାଇ । କାଇକେବଇଲେ ମେଣ୍ଡାମନ୍ ତାର୍ ଡାକଲାଟା ଜାନଡ୍ । ୫ ମାତର୍ ମେଣ୍ଡାମନ୍ କେବେ ମିସା ନ ଚିନ୍‌ଲା ଲକର୍ ପର୍ ପର୍ ନ ଜାଅଡ୍, ତାରଲଗେଅନି ପାଲାଇବାଇ । କାଇକେବଇଲେ ସେମନ୍ ଅଚିନାର୍ ଲକ୍ ଡାକଲେ ନ ଜାଅଡ୍ ।”

୬ ଜିସୁ ସେମନ୍‌କେ ଏଡ୍ରି ଉଦାଅରଣ୍ ଦେଇ କଇଲା, ମାତର୍ ସେମନ୍ ତାର୍ ଅରଡ୍ କାଇଟା ବଲି ବୁଜି ନାପାରଲାଇ ।

ଜିସୁ ନିମାନ୍ ମେଣ୍ଡା ଗଉଡ୍

୭ ସେଟାର ପାଇ ଜିସୁ ଆରିତରେକ୍ କଇଲା, “ମୁଇ ତମକେ ସତ୍ କଇଲିନି ମୁଇ ମେଣ୍ଟାମନର୍ ତିଆଗତି । ୮ ମର୍ ଆଗତୁ ଜେତେଲକ୍ ଆସିଆତଡ୍, ସେମନ୍ ସବୁଲକ୍ ଜାକ ଚର୍ ଆରି କାଙ୍ଗାରମନ୍, ସେଟାରପାଇ ମେଣ୍ଟାମନ୍ ତାକର୍ କାତା ମୁଲକେ ସୁନଡ୍ନାଇ । ୯ ମୁଇ ଦୁଆର୍, ଜଦି କେ ମିସା ମର୍ ବାଟେ ଆସି କେଟ୍ସି ବଇଲେ, ସେ ରକିଆପାଇସି, ଆରି ସେ ବିଡ୍ରେ ଆରି ବାଇରେ ଜାଇ ଚାରି ପାର୍ସି । ୧୦ ଚର୍, ଚରାଇବାକେ, ମରାଇବାକେ, ଆରି ନାସ୍ କର୍ବାକେସେ ଆଇସି, ମାତର୍ ମୁଇ ଜେନ୍ତିକି ସେମନ୍କେ ପୁରାପୁରୁନ୍ ଜିବନ୍ ଦେବାକେ ଆଇଲି ଆତି ।”

୧୧ ମୁଇ ନିମାନ୍ ମେଣ୍ଟା ଚାରାଉ ଗଉଡ୍ । ନିମାନ୍ ଗଉଡ୍ ମେଣ୍ଟାମନର୍ ଲାଗି ନିଜର୍ ଜିବନ୍ ମିସା ଦେଇସି । ୧୨ ଜେ ମେଣ୍ଟା ଚାରାଉ ନସ୍, ମାତର୍ ବୁଡି ପାଉ, ମେଣ୍ଟାମନ୍ ତାର ନିଜର୍ଟା ନଅଡ୍, ସେଟାରପାଇ ଡୁରକା ଆଇବାଟା ଦେକି ମେଣ୍ଟାମନ୍କେ ଚାଡି ପାଲାଇସି । ଆରି ଡୁରକା ମେଣ୍ଟାମନ୍କେ ଦାରି ଚିନ୍ ଚତର୍ କରିଦେଇସି । ୧୩ ଜେ ବୁଡି ମିଲବଲି ମେଣ୍ଟା ଚାରାଇସି, ସେ ମେଣ୍ଟାମନ୍କେ ଚାଡି ଉଡିଜାଇସି । କାଇକେବଇଲେ ସେ ମେଣ୍ଟାମନ୍ ପାଇ ଚିନ୍ତା ନ କରେ । ୧୪ \*ମୁଇ ନିକ ମେଣ୍ଟା ଚାରାଉ । ବାବା ଜେନ୍ତାରି ମକେ ଜାନେ, ମୁଇ ମିସା ସେନ୍ତି ବାବାକେ ଜାନି, ୧୫ ସେନ୍ତାରିସେ ମୁଇ ମର୍ ନିଜର୍ ମେଣ୍ଟାମନ୍କେ ଜାନି । ଆରି ମେଣ୍ଟାମନ୍ ମିସା ମକେ ଜାନଡ୍ । ମୁଇ ସେମନ୍ର୍ ଲାଗି ମର୍ ଜିବନ୍ ଦେବାକେ ମିସା ରାଜି । ୧୬ ଏନ୍ତାରି ମର୍ ବିନ୍ ମେଣ୍ଟାମନ୍ ଆତଡ୍ । ସେମନ୍ ଏ ରାସି ଟାନେ ନାଇ, ମକେ ସେମନ୍କେ ମିସା ଆନ୍ବାକେ ପଡ୍ସି । ସେମନ୍ ମୁଇ ଡାକ୍ବାଟା ସୁନ୍ବାଇ ଆରି ତେଇର୍ ଗଟେକ୍ ରାସି ଅଇ ରଇବାଇ । “

୧୭ “ମର୍ ବାବା ମକେ ଆଲାଦ୍ କଲାନି, କାଇକେବଇଲେ ମୁଇ ମର୍ ଜିବନ୍ ଦେବାକେ ମନ୍ କଲିନି । ଆରି ମର୍ ଜିବନ୍ ଦାନ୍ କର୍ବି ବଇଲେ ଆରିତରେକ୍ ସେଟା ପାଇବି । ୧୮ ମର୍ ଜିବନ୍ ବିନ୍ ଲକ୍ ନେଇ ନାପାରଡ୍ । ସେଟା ମୁଇ ନିଜେ ମନ୍କରି ଦାନ୍ କର୍ବି କି ଆରିତରେକ୍ ଆନ୍ବାକେ ମିସା ମର୍ ଅଦିକାର୍ ଆତେ । ମର୍ ବାବା ମକେ ଏ ଅଦିକାର୍ ଦେଇଆତେ ।”

୧୯ ଜିସୁର୍ ଏ ସବୁ କାତାର ଲାଗି ଜିଉଦିମନ୍ ବାଗ୍ ବାଗ୍ ଅଇଗାଲାଇ । ୨୦ ସେମନ୍ର୍ ବିଡ୍ରେ କେତେକ୍ ଲକ୍ କଇବାର୍ ଦାରଲାଇ, “ତାକେ ଡୁମା ଦାରିଆତେ, ସେ ବାୟାଟା, କାଇକେ ତାର୍ କାତା ସୁନ୍ଲାସ୍ନି ?” ୨୧ ମାତର୍ ବିନ୍ଲକ୍ମନ୍ କଇଲାଇ, “ଏ ସବୁ କାତା ତା ଡୁମା ଦାରି ରଇବା ଲକ୍ କଇନାପାରେ । ଡୁମା କାଇ କାଣା ଲକ୍ ଅକି ନିମାନ୍ କରିଦେଇପାରେ କି ?”

**ଜିସୁକେ ନାମଡ୍ ନାଇ**

୨୨ ସେ ବେଲେ ସିଡ୍ ଦିନ୍ ଅଇରଇଲା ଆରି ଜିରୁସାଲାମ୍ ମନ୍ଦିର୍ ତିଆର୍ କଲା ପରବ୍ ଅଇତେରଇଲା । ୨୩ ତେଇ ଜିସୁ ମନ୍ଦିରେ ସଲ୍ମାନର୍ ମଣ୍ଡପେ ବୁଲ୍ତେରଇଲା । ୨୪ ତେଇ ଜିଉଦିମନ୍ ତାକେ ଚାରିବେଟ୍ଡିଅନି ଡାବିଅଇ ପାଗାର୍ବାର୍ ଦାରୁଲାଇ, “ଆରି କେତେ ଦିନ୍ ଜାକ ଆମ୍କେ ନାତାଇସୁ ? ତମେ ଜଦି ପର୍ମେସର୍ ବାଡି ପାଟାଇଲା ରାଜା ମସିଅ ଅଇରଇଲେ ଆମ୍କେ ସତ୍ କାତା କ ।”

୨୫ ଜିସୁ ସେମନ୍କେ କଇଲା, “ମୁଇ ତମ୍କେ ପର୍ଡୁମ୍ କଇଆତି, ମାତର୍ ମକେ ବିସ୍ବାସ୍ କରାସ୍ନାଇ । ମର୍ ବାବାର୍ ଅଦିକାରେ ମୁଇ ଜନ୍ ଜନ୍ କାମ୍ମାନ୍ କଲିଆତି, ସେ ସବୁଜାକ ମର୍ ବିସଇର୍ ସାକି ଦେଲାନି । ୨୬ ମାତର୍ ତମେ ମକେ ବିସ୍ବାସ୍ କରାସ୍ନାଇ, କାଇକେବଇଲେ ତମେ ମର୍ ମେଣ୍ଟାମନ୍ ନୁଆସ୍ । ୨୭ ମର୍ ସବୁ ମେଣ୍ଟାମନ୍ ମୁଇ ଡାକ୍ବାଟା ସୁନ୍ବାଇ, ମୁଇ ସେମନ୍କେ ଜାନି, ଆରି ସେମନ୍ ମର୍ ପଟେ ପଟେ ଆଇବାଇ । ୨୮ ଆରି ମୁଇ ସେମନ୍କେ ନ ସାର୍ବା ଜିବନ୍ ଦେବି ।

\* ୧୦:୧୪ ୧୦:୧୪ ମାଡିଉ ୧୧:୨୭; ଲୁକ୍ ୧୦:୨୨

ସେମନ୍ କେବେମିସା ନସଟ ନ ଅଅଡ଼ । ସେମନ୍‌କେ ମର୍ ଆଡେଅନି କେ ମିସା ଚାଡ଼ାଇ ନେଇ ନାପାରଡ଼ । <sup>୨୯</sup> ମର୍ ବାବା ମକେ ଜନ୍‌ଟା ଦେଲାଆଚେ, ସେଟା ସବୁରଟାନେଅନି ଅଦିକ୍ ମୁଲିଅ । ବାବାର୍ ଆଡେଅନି ସେଟା କେ ମିସା ଚାଡ଼ାଇ ନେଇ ନାପାରଡ଼ । <sup>୩୦</sup> ବାବା ଆରି ମୁଇ ଗଟେକ୍ ସେ ।”

<sup>୩୧</sup> ଏ କାତା ସୁନି ଲକ୍‌ମନ୍ ତାକେ ଆରିତରେକ୍ ମାର୍‌ବାକେ ପାକ୍‌ନା ବେଟ୍‌ଲାଇ । <sup>୩୨</sup> ଜିସୁ ସେମନ୍‌କେ କଇଲା, “ମୁଇ ବାବାର୍ ଆଦେସ୍ ଇସାବେ ତମ୍‌କେ କେତେକ୍ କେତେକ୍ ନିମାନ୍ କାମ୍ ଦେକାଇ ଆଚି, ସେ ସବୁ ନିମାନ୍ କାମ୍ ବିଡ଼ରେଅନି, କନ୍ କାମର୍‌ପାଇ ମକେ ମାର୍‌ବାକେ ପାକ୍‌ନା ବେଟିଆଚାସ୍ ?” <sup>୩୩</sup> ସେମନ୍ ତାକେ କଇଲା, “ନିମାନ୍ କାମର୍ ଲାଗି ତକେ ଆମେ ମାର୍‌ବାକେ ପାକ୍‌ନା ବେଟୁନାଇ, ମାତର୍ ପର୍‌ମେସର୍‌କେ ନିନ୍ଦା କଲୁସ୍‌ନି ବଲିକରି, ଆରି ତୁଇ ମନସ୍ ଅଇକରି ନିଜ୍‌କେ ପର୍‌ମେସର୍‌ ବଲାଇଅଇବାର୍ ଲାଗି ।”

<sup>୩୪</sup> ଜିସୁ ସେମନ୍‌କେ କଇଲା, “ତମର୍ ରିତିନିତି ଟାନେ କାଇ ଏଟା ଲେକାନାଇ କି ? ପର୍‌ମେସର୍ କଇଲା ତମେ ପର୍‌ମେସର୍ । <sup>୩୫</sup> ଆମେ ଜାନୁ ସାସ୍‌ତରର୍ ବାକିଅ ସବୁ ଦିନର୍ ପାଇ ସଡ଼ । ପର୍‌ମେସର୍‌ର ବାକିଅ ଜନ୍‌ଲକ୍‌ମନ୍ ଜାନିଆଚଡ଼, ସେମନ୍‌କେ ପର୍‌ମେସର୍ ବଲି କୁଆ ଅଇଲାଆଚେ । <sup>୩୬</sup> ବାବା ମକେ ବାଟିକରି ଏ ଦୁନିଆଇ ପାଟାଇଆଚେ, ସେନ୍ତାର୍ ଆଲେ ମୁଇ ନିଜ୍‌କେ ପର୍‌ମେସର୍‌ର ପ ବଲି କଇଲାକେ, ତମେ ମକେ କେନ୍ତ୍ର ପର୍‌ମେସର୍‌କେ ନିନ୍ଦା କଲୁସ୍‌ନି ବଲି କଇଲାସ୍‌ନି ? <sup>୩୭</sup> ମୁଇ ଜଦି ମର୍ ବାବାର୍ କାମ୍ ନ କରି, ସେନ୍ତାର୍‌ଆଲେ ମକେ ବିସ୍‌ବାସ୍ କରାନାଇ । <sup>୩୮</sup> ଜଦି ମୁଇ ସେ ମନ୍‌କଲାଟା ପୁରାପୁରୁନ୍ କର୍‌ବି ବଇଲେ, ମକେ ବିସ୍‌ବାସ୍ ନ କଲେମିସା ମୁଇ କର୍‌ବା କାମ୍ ବିସ୍‌ବାସ୍ କରା । ସେଟାର୍ ପାଇ ତମେ ଜାନିପାରାସ୍ ଜେ, ମର୍ ବାବା ପର୍‌ମେସର୍ ମର୍ ସଙ୍ଗ୍ ଆଚେ ଆରି ମୁଇ ତାର୍‌ଟାନେ ଆଚି ।”

<sup>୩୯</sup> ସେମନ୍ ଆରିତରେକ୍ ଜିସୁକେ ଦାର୍‌ବାକେ ଚେସ୍‌ଟା କଲା, ମାତର୍ ଜିସୁ ସେମନ୍‌କେ ଦାରାଇ ନ ଅଇକରି କସ୍‌ରି ଉଟିଗାଲା ।

<sup>୪୦</sup> ଧର୍‌ପତେ ସେ ଆରିତରେକ୍ ଜର୍‌ଦନ୍ ଗାତର୍ ସେପାଟେ ଉଟିଜାଇକରି ଆଗେ ଜଅନ୍ ଜନ୍ ଜାଗାଇ ତୁବନ୍ ଦେଇ ରଇଲା, ସେ ଜାଗାଇ ଜାଇକରି ରଇଲା । <sup>୪୧</sup> ଆରି ବେସିଲକ୍‌ମନ୍ ତାର୍‌ଲଗେ ଆସିକରି କଇଲା, “ଜଅନ୍ ସିନା କାଇ କାବାଅଇ ଜିବା କାମ୍ କରି ନ ରଇଲା, ମାତର୍ ଏ ଲକ୍‌ର୍ ବିସଇନେଇ ଜଅନ୍ ଜେଡ଼କି କାତା କଇରଇଲା, ସେ ସବୁ ସଡ଼ ଆକା ।” <sup>୪୨</sup> ଆରି ସେ ଜାଗାଇ ବେସି ଲକ୍‌ମନ୍ ଜିସୁକେ ବିସ୍‌ବାସ୍ କଲା ।

## ୧୧

### ଲାଜାର୍ ମରନ୍

<sup>୧</sup> ବେଡ଼ନିଆ ଗଡେ ଲାଜାର୍ ନାଉର୍ ଗଟେକ୍ ଲକ୍‌କେ ଜର୍ ଅଇରଇଲା । ମରିୟ୍‌ମ୍ ଆରି ତାର୍ ବଇନି ମାର୍‌ତା ସେ ଗାର୍‌ ରଇଲା । <sup>୨</sup> ଏ ମରିୟ୍‌ମ୍ ଅଇଲାନି, ଜନ୍ ମାଇଜି କି ବେସି ଦାମ୍‌ଦେବା ବାସ୍‌ନା ଚିକନ୍ ଜିସୁର୍ ପାଦେ ରକଇକରି ତାର୍ ଚେଣ୍ଟିସଙ୍ଗ୍ ପୁଟିଦେଇରଇଲା । ତାର୍ ବାଇ ଲାଜାର୍‌କେ ଆକା ଜର୍ ଅଇରଇଲା । <sup>୩</sup> ସେଟାର୍‌ପାଇ ତାର୍ ବଇନିମନ୍ ଜିସୁର୍ ଲଗେ କବର୍ ପାଟାଇଲା, “ମାପୁର୍ ତମେ ଜାକେ ଆଲାଦ୍ କଲାସ୍‌ନି, ସେ ବେସି ଜର୍ ଅଇଲାଆଚେ ।”

<sup>୪</sup> ମାତର୍ ଜିସୁ ଏ କାତା ସୁନିକରି କଇଲା, “ଏ ଜର୍ ମର୍‌ବାପାଇ ଅଏ ନାଇ, ମାତର୍ ପର୍‌ମେସର୍‌ର ମଇମାର୍ ପାଇ । ସେଟାର୍ ଲାଗି, ତାର୍ ପଅ, ମୁଇ ମିସା ମଇମା ପାଇବି ।”

୫ ଜିସୁ ମାର୍ତ୍ତା, ତାର ବଇନି ଆରି ଲାଜାରକେ ବେସି ଆଲାଦ୍ କରତେରଇଲା ।  
 ୬ ସେଟାର୍ପାଇ ଲାଜାର୍ ନିକ ନ ରଇବା କବର୍ ପାଇ ଜିସୁ ଜନ୍ ଜାଗାଇ ରଇଲା, ସେ  
 ଜାଗାଇ ଆରି ଦୁଇଦିନ୍ ରଇଲା । ୭ ତାର ପତେ ସେ ସିସ୍‌ମନ୍‌କେ କଇଲା, “ଆସା,  
 ଆମେ ଆରିତରେକ୍ ଜିଉଦା ଦେସେ ବାଉଡି କୁ ।”

୮ ସିସ୍‌ମନ୍ ତାକେ କଇଲା, “ଏ ଗୁରୁ, ତମ୍‌କେତା କେତେ ଦିନ୍ ଆଗେ, ଲକ୍‌ମନ୍  
 ପାକ୍‌ନା ସଙ୍ଗ୍ ମାର୍ତ୍ତାକେ ଚେସ୍‌ଟା କରତେରଇଲା, ତମେ ଆରିତରେକ୍ ତେଇ  
 ଜିବାକେ ମନ୍ କଲାସ୍‌ନି କି ?”

୯ ଜିସୁ କଇଲା “ଗଟେକ୍ ଦିନେ କାଇ ବାର ଗାଁଟା ଉଜଲ୍ ନ ରଏ କି ? ଜନ୍ ଲକ୍‌ମନ୍  
 ଦିନ୍‌ବେଲାର୍ ଉଜଲେ ରଇବାଇ, ସେମନ୍ ଜଟିଆଇ ନ ଅଅଡ୍, କାଇକେବଇଲେ  
 ସେମନ୍‌କେ ଏ ଜଗତର୍ ଉଜଲ୍ ଡିସ୍‌ସି । ୧୦ ମାତର୍ ରାତିଆ ଇଣ୍ଟଲେ ଜଟିଆଇ  
 ଅଇବାଇ । କାଇକେବଇଲେ ସେମନ୍‌ରଗାନେ ଉଜଲ୍ ନ ରଏ ।” ୧୧ ଜିସୁ ଏ ସବୁ  
 କାତା କଇଲା ପତେ, ସିସ୍‌ମନ୍‌କେ କଇଲା, “ଆମର୍ ସବୁଲକର୍ ମଇତର୍ ଲାଜାର୍  
 ଏବେ ସଇଆଚେ, ତାକେ ମୁଇ ଉଟାଇବାର୍ ଗାଲିନି ।”

୧୨ ତେଇ ସିସ୍‌ମନ୍ ଜିସୁକେ କଇଲା, “ମାପ୍‌ରୁ, ଜଦି ସେ ସଇଲାଆଚେ ବଇଲେ  
 ନିକ ଅଇସି ।” ୧୩ ଜିସୁ ଲାଜାର୍‌ର ମରନ୍ ବିସଇ ନେଇକରି କଇରଇଲା, ମାତର୍  
 ସିସ୍‌ମନ୍ ଲାଜାର୍‌କେ ଗୁନର୍‌ଲାଗି ସଇଲା ବିସଇ କଇଲାନି ବଲି ବାବ୍‌ଲାଇ ।  
 ୧୪ ସେଟାର୍ପାଇ ଜିସୁ ସେମନ୍‌କେ ନିକ ସଙ୍ଗ୍ ବୁଜ୍‌ଲା ପାରା କଇଲା, “ଲାଜାର୍  
 ମରିଗାଲାଆଚେ । ୧୫ ଆରି ମୁଇ ତେଇ ନ ରଇଲି, ସେଟାର୍ପାଇ ତମର୍ ସଙ୍ଗ୍ ସାର୍‌ଦା  
 କଲିନି, ଜେନ୍ତାରିକି ତମେ ବିସ୍‌ବାସ୍ କରସା । ମାତର୍ ଆସା, ଏବେ ଆମେ ତାକେ  
 ଜାଇ ଦେକୁ ।” ୧୬ ତେଇ ତମା ନାଉର୍ ଜାକେ କି ବିଦୁମ୍ ବଲି କଇବାଇ, ସେ ତାର୍  
 ସଙ୍ଗର୍ ସିସ୍‌ମନ୍‌କେ କଇଲା, “ଜୁ ଆମେ ମିସା ଗୁରୁର୍ ସଙ୍ଗ୍ ଜାଇ ତାର୍‌ସଙ୍ଗ୍ ମରୁ ।”

ଜିସୁ ଜିବନ୍ ଆରି ମରନେଅନି ଉର୍‌ବା ଲକ୍

୧୭ ଜିସୁ ବେଡ୍‌ନିଆଇ କେଟିକରି ସୁନ୍‌ଲା ଜେ ଲାଜାର୍‌କେ ସମାଦି ଦେଇ ଚାର୍‌ଦିନ୍  
 ଅଇରଇଲା । ୧୮ ଜିରୁସାଲାମ୍ ଅନି ବେଡ୍‌ନିଆ ତିନ୍ କିଲମିଟର୍ ତେଇଅନି ଉନାର୍  
 ବାଟ୍ । ୧୯ ଆରି ଜିଉଦିମନ୍‌ର୍ ତେଇଅନି କେତେକ୍ କେତେକ୍ ଲକ୍‌ମନ୍ ମାର୍ତ୍ତା ଆରି  
 ମରିୟ୍‌ମ୍ ଲଗେ ତାର୍ ମରିଜାଇରଇବା ବାଇର୍ ବିସଇ ସାଁତାଇବାକେ ଆସିରଇଲାଇ ।

୨୦ ଜିସୁ ଆଇଲାନି ବଲି ସୁନ୍‌ଲା ଦାପ୍‌ରେ ମାର୍ତ୍ତା ତାକେ ବେଟ୍‌ଅଇବାର୍ ଗାଲା  
 । ମାତର୍ ମରିୟ୍‌ମ୍ ଗରେସେ ବସିରଇଲା । ୨୧ ମାର୍ତ୍ତା ଜିସୁକେ କଇଲା, “ମାପ୍‌ରୁ  
 ତମେ ଜଦି ଇତି ରଇତାସ୍ ବଇଲେ, ମର୍ ବାଇ ନ ମର୍ତ୍ତା । ୨୨ ମାତର୍, ମୁଇ ଜାନି  
 ଆତି । ଏବେ ମିସା ତମେ ପର୍‌ମେସର୍‌କେ ଜାଇଟା ମାଙ୍ଗ୍‌ଲେ, ସେଟା ଦେଇସି ।”

୨୩ ଜିସୁ ତାକେ କଇଲା, “ତର୍ ବାଇ ଆରି ଜିବନ୍ ଅଇ ଉର୍‌ସି ।”

୨୪ ମାର୍ତ୍ତା ଜିସୁକେ କଇଲା, “ସେ ସାରାସାରି ଦିନେ ଆରିତରେକ୍ ଉର୍‌ବା  
 ବେଲାଇ ଉର୍‌ସି, ଏଟା ମୁଇ ଜାନି ।”

୨୫ ଜିସୁ ତାକେ କଇଲା, “ମୁଇ ଜିବନ୍ ଆରି ମରିକରି ଆରିତରେକ୍ ଉର୍‌ବା ଲକ୍  
 । ଜେ ମକେ ବିସ୍‌ବାସ୍ କରସି, ସେ ମଲେ ମିସା, ବର୍‌ସି । ୨୬ ଆରି ଜେ ଜଦି ବର୍‌ଟି  
 ରଇକରି ବିସ୍‌ବାସ୍ କରସି, ସେ କେବେ ମିସା ନ ମରେ । ଏ କାତା ବିସ୍‌ବାସ୍ କଲାସ୍‌ନି  
 କି ?”

୨୭ ମାର୍ତ୍ତା ଜିସୁକେ କଇଲା, “ଉଁ ମାପ୍‌ରୁ, ମୁଇ ବିସ୍‌ବାସ୍ କଲିନି । ତମେ ସେ  
 ପର୍‌ମେସର୍‌ ପ । ଜନ୍ ମସିଅ ଏ ଜଗତେ ଆଇବାର୍ ରଇଲା, ତମେ ସେ ଆକା ।”

ଜିସୁ କାନ୍‌ଲା

୨୮ ଏ ସବୁ କାତା କଇସାରଲାପତେ ମାର୍ତ୍ତା ଜାଇକରି ନିଜର୍ ବଇନିକେ କେ ନ ସୁନ୍‌ଲାପାରା ଡାକି କଇଲା, “ଆଉ ଗୁରୁ ଆସିଆତେ ଆରି ତକେ ଡାକ୍‌ଲାମି ।”  
 ୨୯ ମରିୟମ୍ ଏ କାତା ସୁନିକରି ଦାନ୍ଦା ପାନ୍ଦା ଅଇ ଜିସୁକେ ବେଟ୍ ଅଇବାର୍ ଗାଲା ।  
 ୩୦ ଜିସୁ ସେଡକିବେଲା ଗାଉଁ ବିଡରେ ଆସି ନ ରଇଲା, ମାତର୍ ମାର୍ତ୍ତା ତାକେ ଜନ୍ ଜାଗାଇ ବେଟ୍ ଅଇରଇଲା, ତେଇସେ ରଇଲା । ୩୧ ମରିୟମ୍ ଉଟିକରି ଦାନ୍ଦା ପାନ୍ଦା ଅଇ ବାଇରେ ସାଁତାଇବାକେ ଆସିରଇଲା ଲକ୍‌ମନ୍ ଦେକ୍‌ଲାଇ, ସେମନ୍ ମିସା ତାର୍ ପତେ ପତେ ଗାଲାଇ । ସେମନ୍ ବାବ୍‌ଲାଇ, ସେ କବର୍ ଲଗେ କାନ୍‌ବାର୍ ଗାଲାମି ।

୩୨ ତେଇ ଜିସୁ ଜନ୍ ଜାଗାଇରଇଲା, ମରିୟମ୍ ସେ ଜାଗାଇ କେଟ୍‌ଲା ଆରି ଜିସୁକେ ଦେକିକରି ତାର୍ ପାଦେ ଡାଣ୍ଟାସନ୍ ପଡି କଇଲା, “ମାପୁରୁ ତମେ ଜଦି ଇତି ରଇତାସ୍‌ଆଲେ ମର୍ ବାଇ ନ ମର୍ତ୍ତା ।”

୩୩ ମରିୟମ୍ ତାକେ ଆରି ତାର୍ ସକ୍ ରଇବା ଲକ୍‌ମନ୍ କାନ୍‌ତେରଇବାଟା ଦେକି ଜିସୁ ଆଡ଼ମାଇ ବେସି ମନ୍‌ଦୁକ୍ ଅଇଗାଲା । ୩୪ ସେ ପାଚାରଲା, “ତାକେ କନ୍ତ୍ର କବର୍ ଦେଇଆଗାସ୍ ?”

ସେମନ୍ ତାକେ କଇଲାଇ, “ମାପୁରୁ ଆସିଦେକା ।”

୩୫ ଜିସୁ କାନ୍‌ଲା । ୩୬ ତେଇ ଜିଉଦି ଲକ୍‌ମନ୍ କଇଲାଇ, “ଦେକା, ସେ ଲାଜାରକେ କେନ୍ତ୍ର ଆଲାଦ୍ କର୍ତେରଇଲା ।”

୩୭ ମାତର୍ ସେମନ୍‌ର୍ ବିଡରେଅନି କେତେକ୍ ଲକ୍ କଇଲାଇ, “ଏ ଲକ୍ ଜନ୍ କାଣାକେ ଆଁକି ଡିସାଇରଇଲା, ସେ ମନ୍‌କଲେ କାଇ ଏ ଲାଜାରର୍ ମରନ୍ ମିସା ତେବାଇ ନାପାର୍ତା କି ?”

ଜିସୁ ଲାଜାରକେ ମଲାତେଇ ଅନି ଉଟାଇଲା

୩୮ ତେଇ ଆରିତରେକ୍ ଜିସୁ ମନ୍ ବିଡରେ କିଲ୍‌ବିଲ୍ ଅଇ ସମାଦି ଲଗେ ଗାଲା । ସମାଦିଟାନେ ଗଟେକ୍ ପାଆର୍ ଆରି ପାଆର୍ ମୁଆଟେ ଗଟେକ୍ ବଡ୍ ପାକ୍‌ନା ତାବିଅଇରଇଲା । ୩୯ ଜିସୁ ଡିଆର୍‌ଲା, “ଏ ପାକ୍‌ନା ଗୁଟାଇଦିଆସ୍ ।” ମରିଜାଉ ଲାଜାରର୍ ବଇନି ମାର୍ତ୍ତା କଇଲା, “ମାପୁରୁ ସେଟା କୁଇକରି ଗନ୍ଦି ଗାଲାବେ, କାଇକେବଇଲେ, ତାକେ କବର୍‌ଦେଇ ଚାର୍‌ଦିନ୍ ଅଇଗାଲା ।”

୪୦ ଜିସୁ ମାର୍ତ୍ତାକେ କଇଲା, “ତୁଇ ଜଦି ବିସ୍‌ବାସ୍ କର୍‌ସୁ ବଇଲେ ପର୍‌ମେସରର୍ ମଇମା ଦେକ୍‌ସୁ ବଲି ମୁଇ ତକେ କଇ ନ ରଇଲି କି ?” ୪୧ ତେଇ ସେମନ୍ ପାକ୍‌ନା ଗୁଟାଇଲାଇ । ଜିସୁ ସରଗ୍‌ବାଟେ ମୁ କରି କଇଲା, “ବାବା ତମେ ମର୍ ପାର୍‌ତନା ସୁନ୍‌ଲାସ୍ ବଲି ମୁଇ ତମ୍‌କେ ଦନିଅବାଦ୍ ଦେଲିନି ।” ୪୨ ତମେ ଜେତେବେଲେ ମିସା ମର୍ ପାର୍‌ତନା ସୁନ୍‌ସା, ଏଟା ମୁଇ ଜାନି, ମାତର୍ ଜନ୍ ଲକ୍‌ମନ୍ ଏ ଚାରିବେଡ୍‌ତି ଚିଆଅଇ ଆଚଡ୍, ସେମନ୍ ଜେନ୍ତ୍ରକି ତମେଆକା ମକେ ପାଟାଇଆଗାସ୍ ବଲି ବିସ୍‌ବାସ୍ କର୍‌ବାଇ, ଏଟାର୍ ପାଇ ମୁଇ ଏନ୍ତ୍ରବଲି କଇଲି ।” ୪୩ ଏନ୍ତ୍ରକି କଇ ସାରାଇ ଜିସୁ ଆକ୍‌ମାରି ଡାକ୍‌ଲା, “ଲାଜାର୍ ତୁଇ ବାରଇ ଆଉ ।” ୪୪ ଡାକ୍‌ଲା ଦାପରେ ମଲା ଲାଜାର୍ ବାରଇ ଆଇଲା । ତାର୍ ଆତେ ଗତେ ମତା ଲୁଗା ବାନ୍ଦାଅଇରଇଲା । ମୁଏ ମିସା ଗର୍‌ଣ୍ଡା ଗୁଡିଆଇ ଅଇରଇଲା । ଜିସୁ ସେମନ୍‌କେ କଇଲା “ତାକେ ବାନ୍‌ଲାଟା କୁସ୍‌ଲାଇ କରି, ଜିବାକେ ଦିଆସ୍ ।”

ଜିସୁର୍ ବିରୁଦେ କୁର୍ ପାଁଟ୍‌ବାଟା

(ମାଡିଉ ୨୬:୧-୫; ମାର୍‌କ ୧୪:୧-୨; ଲୁକ୍ ୨୨:୧,୨)

୪୫ ଜିଉଦି ଲକ୍‌ମନ୍‌ର୍ ବିଡରେଅନି, ବେସି ଲକ୍ ମରିୟମ୍‌ର୍ ଲଗେ ଆସିରଇଲାଇ, ଆରି ଜିସୁର୍ ଏ କାମ୍ ଦେକି, ତାକେ ବିସ୍‌ବାସ୍ କଲାଇ । ୪୬ ଆରି ସେମନ୍‌ର୍ ବିଡରେଅନି କେତେଲକ୍ ପାରୁସିମନ୍‌ର୍ ଲଗେ ଜାଇକରି ଜିସୁ କରି ରଇବା କାମ୍

ଲକ୍ଷ୍ମୀଙ୍କୁ କେ ଜାନାଇଲା ।<sup>୪୭</sup> ପତେ ମୁକ୍ତି ପୁଜାରିମନ୍ ଆରି ପାରୁସିମନ୍ ଗଟେକ୍ ବଡ଼ ପଁଚାଦି ତାକାଇ କଇଲା, “ଆମେ କାଇଟା କରୁ ? ଦେକା ଏ ଲକ୍ଷ୍ମୀ ତା କେତେକ୍ କେତେକ୍ କାବାଅଇଜିବା କାମମନ୍ କଲାନି ।<sup>୪୮</sup> ଆମେ ଜଦି ଆକେ ଏନ୍ତାରି ଚାଡ଼ିଦେଉଁ ବଇଲେ ସବୁଲକ୍ ତାର୍ତ୍ତାନେ ବିସ୍ବାସ୍ କରବାଇ ଆରି ରମିୟ୍ ଅଦିକାରି ଆସିକରି ଆମର୍ ଏ ମନ୍ଦିର୍ ଆରି ଆମର୍ ବିସ୍ବାସ୍ କରବା ଦରମ୍ ସବୁ କୁରୁପ୍ନାସ୍ କରିପାକାଇସି ।”

୪୯ ମାତର୍ ସେମନ୍ ବିତ୍ତରେଅନି ଗଟେକ୍ କନ୍ୟାପା ନାଉଁର୍, ସେ ବରସର୍ ପାଇ ବାଟିରଇବା ବଡ଼ ପୁଜାରି, କଇଲା “ତମେ କେତେ ବକ୍ତୁଆ ଲକ୍ଷ୍ମୀ !<sup>୫୦</sup> ତମେ କାଇ ବୁଜି ନାପାରଲାସିନି ? ଗୁଲାଇ ଜାତି ନାସ୍ ଅଇବା ବାଦୁଲେ ଗଟେକ୍ ଲକ୍ଷ୍ମୀ ମରବାଟା ନିକ ।”<sup>୫୧</sup> କନ୍ୟାପା ସତଇସେ ତାର୍ ନିଜର୍ତ୍ତାନେ ଅନି ଏନ୍ତି କଇ ନ ରଇଲା, ମାତର୍ ସେ ବରସର୍ ବଡ଼ ପୁଜାରି ଅଇରଇଲାର୍ ଲାଗି ପତର୍ ଗର୍ନା ସବୁ ବବିସଡ଼କାତା ତାର୍ ମୁର୍ ଅନି ବାରଇରଇଲା । ସେ ଜାନିଦେଇ ରଇଲା ଜେ,<sup>୫୨</sup> ଚିନ୍ ରତର୍ ଅଇଜାଇରଇବା ପର୍ତ୍ତେସରର୍ ଲକ୍ଷ୍ମୀଙ୍କେ ଚୁଲିଆଇ, ଗଟେକ୍ କୁରୁମ୍ କରାଇବାକେ ଜିସୁ ମର୍ବାକେ ଗାଲାନି ।<sup>୫୩</sup> ତେବର୍ପାଇ ସେ ଦିନେଅନି ଜିଉଦିନେତାମନ୍ ଜିସୁକେ ମରାଇବାକେ ପାଁଚନା କଲା ।<sup>୫୪</sup> ତେବେ ଜିସୁ ଜିଉଦି ଲକ୍ଷ୍ମୀଙ୍କେ ବିତ୍ତରେ ସବୁଲକ୍ ଜାନଲା ପାରା ବୁଲାଚାଲା ନ କରତେ ରଇଲା । ସେ ଜାଗାଇଅନି ବାରଇଜାଇକରି, ମରୁବାଲି ବୁର୍ ରଇବା କିନରା ଜାଗାଇ ରଇଲା ଏପୁରଇମ୍ ନାଉଁର୍ ଗଟେକ୍ ଗତେ ଜାଇ ସିସ୍ମାନର୍ ସଙ୍ଗ୍ ତେଇ ରଇଲା ।<sup>୫୫</sup> ଜିଉଦିମନ୍ ନିସ୍ତାର୍ ପରବ୍ କେଟିଆଇଲା । ସେ ପରବ୍ ଅଇବା ଆଗ୍ତୁ ନିଜେ ନିଜେ ସୁକଲ୍ ଅଇବାକେ ଗୁଲାଇ ରାଇଜର୍ ଲକ୍ଷ୍ମୀଙ୍କ ନିସ୍ତାର୍ ପରବ୍ ଆଗ୍ତୁ ଜିରୁଆଲାମ୍ ଜିବାକେ ବାଟ୍ଦାରଲା ।<sup>୫୬</sup> ସେମନ୍ ଜିସୁକେ କଇଲା ଆରି ମନ୍ଦିର୍ ଚିଆଅଇଲାବେଲେ ତାକର୍ ତାକର୍ ବିତ୍ତରେ କୁଆବଲା ଅଇଲା, “ସେ ପରବ୍ତାନେ ନ ଆସେବଲି କାଇ ତମେ ବାବ୍ଲାସିନି କି ?”<sup>୫୭</sup> ମୁକ୍ତି ପୁଜାରି ଆରି ପାରୁସି ଲକ୍ଷ୍ମୀଙ୍କେ ଜିସୁକେ ଦାର୍ବାକେ ସେ କନ୍ତି ଆଚେ ଜାନିରଇବାଇ ବଲି, ସେଟା ଆଦେସ୍ ଦେଇରଇଲା ।

## ୧୨

ଜିସୁକେ ବେଡ଼ନିଆଇ ଚିକନ୍ ଲାଗାଇଲା  
(ମାତିଉ ୨୬:୬-୧୩; ମାର୍କ ୧୪:୩-୯)

୧ ଏଡ଼କି ବିତ୍ତରେ ଜିସୁ ନିସ୍ତାର୍ ପରବ୍ ଅଇବାକେ ଚ ଦିନର୍ ଆଗ୍ତୁ ବେଡ଼ନିଆ ଗାଲା । ତେଇ ଲାଜାରର୍ ଗର୍ । ଜିସୁ ଏ ଲାଜାର୍କେସେ ମଲାଟାନେଅନି ଉଟାଇରଇଲା ।<sup>୨</sup> ସେ ରାତି ତେଇ ଜିସୁର୍ପାଇ ଗଟେକ୍ ବଜି ଚିକ୍ କଲା । ଆରି ମାର୍ତ୍ତା ସେମନ୍କେ କୁଆପୁଟା କରାଇତେରଇଲା । ଲାଜାର୍ ଜିସୁର୍ ସଙ୍ଗ୍ ବଜିତେଇ ବସି ରଇଲା ।

୩ \*ସେଡ଼କିବେଲେ ମରିୟ୍ମ୍ ଜଟାମାଉଁସ୍ ନାଉଁର୍ ବେସି ଦାମେ ତିଆର୍ ଅଇଲା ଅଦ୍ ଲିଟର୍ ବାସନା ଚିକନ୍ ଆନି ଜିସୁର୍ ପାଦେ ରକଇ ନିଜର୍ ଚେଣ୍ଡିସଙ୍ଗ୍ ପୁଟିଦେଲା । ଆରି ସେ ଚିକନ୍ ସୁନ୍ଦର୍ ବାସନା ଗୁଲାଇ ଗର୍ ଗମ୍କିଗାଲା ।<sup>୪</sup> ଜିସୁର୍ ସିସ୍ମାନର୍ ବିତ୍ତରେ ଅନି ଇସ୍କାରିୟ୍ଡ଼ ଜିଉଦା ନାଉଁର୍ ସିସ୍, ଜେ କି ଜିସୁକେ ସଡ଼ୁମନ୍କେ ସର୍ପିଦେବାକେ ଜାଇତେ ରଇଲା, ସେ କଇଲା, \* “ଏ ବାସନା ଚିକନ୍ ତିନ୍ ସଅ ରୁପା ଗାଙ୍ଗାକେ ବିକିକରି ସେ ତାରୁ ଗରିବ୍ ଲକ୍ଷ୍ମୀଙ୍କେ ଦେଲେ ନଇତା କି ?”<sup>୬</sup> ଇସ୍କାରିୟ୍ଡ଼ ଜିଉଦା ଗରିବ୍ ଲକ୍ଷ୍ମୀଙ୍କପାଇ ଚିନ୍ତା କର୍ତେରଇଲାଜେ ଏନ୍ତି

☆ ୧୨:୩ ୧୨:୩ ଲୁକ୍ ୭:୩୭,୩୮

କଇଲା ବଲି ନାଇ, ମାତର ସେ ଗଟେକ୍ ଚର୍ । ତାର ଦାଇତେ ରଇଲା ଟାଙ୍ଗାମୁନା ଟାନେଅନି ସେ ନିଜର୍ ପାଇ କେତେକ୍ କେତେକ୍ ଲୁଟାଇ ନେଇତେରଇଲା ।

୭ ମାତର ଜିସୁ କଇଲା, “ତାକେ କାଇଟା ବଲି କୁଆ ନାଇ, ତାରଟାନେ ଜେଡୁକି ଆରେ, ସେଟା ଜେଡୁକି ମର୍ ସମାଦି ଦିନର୍ପାଇ ସଙ୍ଗଇଆରେ । ି ଗରିବ୍ ଲକ୍ମନ୍ ତା ସବୁବେଲେ ତମର୍ ସଙ୍ଗ୍ ରଇଲାଇନି, ମାତର ମୁଇ ସବୁବେଲେ ନ ରଇ ।”

ଲାଜାର ବିରୁଦେ କୁଟ୍ ପାଁଟ୍ବାଟା

୯ ଏଡୁକିବିଡୁରେ ଜିସୁ ବେଡୁନିଆଇ ଆରେ ବଲି ଜାନିକରି ବେସି ଜିଉଦି ଲକ୍ମନ୍ ଆଇଲାଇ । ଅବ୍ବା ଜିସୁକେ ସେ ଦେକ୍ବାକେ ନାଇ, ମାତର ଜନ୍ ଲାଜାରୁକେ ଜିସୁ ମଲାଟାନେଅନି ଉଟାଇରଇଲା ତାକେ ମିସା ଦେକ୍ବାର୍ ଆସିରଇଲାଇ । ୧୦ ମାତର ମୁକିଅ ପୁଜାରିମନ୍ ଲାଜାରୁକେ ମିସା ମରାଇବାକେ ଜଜନା କଲାଇ । ୧୧ କାଇକେବଇଲେ ତାରଲାଗି ବଲି କେତେକ୍ କେତେକ୍ ଜିଉଦି ଲକ୍ମନ୍ ନେତାମନ୍କେ ଚାଡି ଜିସୁକେ ବିସ୍ବାସ୍ କର୍ତେରଇଲାଇ ।

ଜିସୁ ଜିରୁସାଲାମ୍ ପୁର୍ବାଟା

(ମାତିଉ ୨୧:୧-୧୧; ମାର୍କ ୧୧:୧-୧୧; ଲୁକ୍ ୧୯:୨୮-୪୦)

୧୨ ତାର୍ ଆରକ୍ବର୍ ଦିନେ ରକିଆପାଇବା ପରବେ ଆସିରଇବା ବେସି ଲକ୍ମନ୍ ଜିସୁ ଜିରୁସାଲାମ୍ ଆଇଲାନି ବଲି ସୁନ୍ଲାଇ । ୧୩ ସେଟାର୍ ପାଇ ସେମନ୍ କଜ୍ରିତାଲ୍ ଦାରି ଜିସୁକେ ବେଟ୍ଅଇବାର୍ ଗାଲାଇ, ଆରି ଆଉଲିଅଇକରି କଇଲାଇ, “ଅସାନା, ଜେ ମାପୁରୁର୍ ନାଉଁଦାରି ଆଇଲାନି ତାର୍ ମଙ୍ଗଲ୍ ଅ, ପର୍ମେସର୍ ତାକେ ଆସିର୍ବାଦ୍ କର । ସେ ଇସ୍ବାଏଲର୍ ରାଜା ତାକ୍ପୁଟା ପାଅ ।”

୧୪ ଆରି ଜିସୁ ଗଟେକ୍ ଗଦ ପିଲାର୍ ଉପ୍ରେ ବସି ଆଇତେ ରଇଲା । ଜେଡୁକି ସାସ୍ତରେ ଲେକାଅଇଲା ଏ ବବିସଡ୍ କାତା ସିଦ୍ ଅଇଲା ।

୧୫ “ଏ ସିୟନ୍ ନଅରର୍ ଲକ୍ମନ୍, ତମେ ତରାନାଇ

ଦେକା ତମର୍ ରାଜା ଗଟେକ୍ ଗଦ ପିଲାର୍

ଉପ୍ରେ ବସି ଆଇଲାନି ।”

୧୬ ପରତୁମ୍ ପରତୁମ୍ ଜିସୁର୍ ସିସମନ୍ ଏ ବିସଇ ବୁଜି ନ ରଇଲାଇ । ମାତର ଜିସୁ ଜେତେବେଲା ମଲାଟାନେଅନି ଉଟ୍ଲା ପଟେ ଏ ସବୁଜାକ ଲେକା ଏତାଇଲାଇଜେ, ସାସ୍ତରେ ତାର୍ ବିସଇସେ ଲେକା ଅଇରଇଲା । ଆରି ସେମନ୍ ତାର୍ ପାଇ ସବୁ କାମ୍ କରିରଇଲାଇ । ୧୭ ଜିସୁ ଲାଜାରୁକେ ମଲାଟାନେଅନି ଉଟାଇକରି ସମାଦିଅନି ବାରଇବାକେ କଇଲାବେଲେ ଜନ୍ ଲକ୍ମନ୍ ଜିସୁର୍ ସଙ୍ଗ୍ ରଇଲାଇ, ସେମନ୍ ସେ ଗଟନା ବିସଇର୍ ସାକି ଦେବାର୍ ଦାରୁଲାଇ । ୧୮ ସେଟାର୍ପାଇ ଲକ୍ମନ୍ ତାକେ ବେଟ୍ଅଇବାକେ ଜାଇରଇଲାଇ । କାଇକେବଇଲେ ସେ ଆକା ଏ କାବା ଅଇବା କାମ୍ମନ୍ କଲାନି ବଲି ସେମନ୍ ସୁନିରଇଲାଇ । ୧୯ ତେଇ ପାରୁସିମନ୍ ତାକର୍ ତାକର୍ ବିଡୁରେ କୁଆବଲା ଅଇଲାଇ, “ଦେକ୍ଲାସ୍ନି କାଇକି, ଆମେ ଚେସ୍ଟା କଲାଟା ଗଟେକ୍ ମିସା ଅଏନାଇ, ଦେକାନି ଗୁଲାଇ ଦୁନିଆଜାକ ତାର୍ ପଟେ ଗାଲାନି ।”

କେତେଟା ଗିରିକ୍ ଲକ୍ମନ୍ ଜିସୁକେ କଜ୍ବାଟା

୨୦ ନିସ୍ତାର୍ ପରର୍ କର୍ବାକେ ଆସିରଇବା ଲକ୍ମନ୍ ବିଡୁରେ ଗିରିକ୍ ଲକ୍ମନ୍ ମିସା କେତେଲକ୍ ରଇଲାଇ । ୨୧ ସେମନ୍ ପିଲିପର୍ ଲଗେ ଆସି ତାକେ କଇଲାଇ, “ଏ ଆଗିଆଁ ଆମେ ଜିସୁକେ ଦେକ୍ବାକେ ମନ୍ କଲୁନି ।” ପିଲିପ୍ ବେଡୁସାଇଦାର୍ ଲକ୍ ରଇଲା ।

୨୨ ପିଲିପ୍ ଜାଇ ଆଦ୍ରିୟକେ ଏ କବର୍ ଜାନାଇଲାକେ ସେମନ୍ ଜାଇ ଜିସୁକେ କଇଲାଇ । ୨୩ ଜିସୁ ସେମନ୍କେ କଇଲା, “ପର୍ମେସର୍ତେଇଅନି ଆଇଲା ନର୍ପିଲା

ମୁଈ ଡାକ୍‌ପୁଟା ପାଇବା ବେଲା ଆସି କେଟି ଆଚେ । ୨୪ ମୁଈ ତମ୍‌କେ ସତ୍‌କାତା କଇଲିନି ଜଦି ଗଅମ୍ ମୁଈ ବୁର୍ଦ୍ଧ ଅଦ୍‌ରି ନ ମର୍‌ବା ଜାକ ସେନ୍ତିସେ ରଇସି । ସେଟା ମଲେ ସେ ବେସି ମୁଈ ଦାର୍‌ସି । ୨୫ ଋଜେ ନିଜର୍ ଜିବନ୍‌କେ ବେସି ଆଲାଦ୍ କର୍‌ସି, ସେ ସେଟା ଆରାଇସି । ଜେ ନିଜର୍ ଜିବନ୍ ଗିନ୍ କର୍‌ତେରଇସି, କାଲ୍ କାଲ୍ ଜୁଗ୍ ଜୁଗ୍ ଜାକ ତାର୍ ଜିବନ୍ ରକିଆ କର୍‌ସି । ୨୬ ଜନ୍ ଲକ୍ ମର୍ ସେବା କର୍‌ବାକେ ମନ୍ କଲାନ୍, ସେ ମର୍ ସଙ୍ଗ୍ ଆସ । ମୁଈ ଜନ୍ ଜାଗାଇ ରଇବି, ମର୍ ସେବା କାମ୍ କର୍‌ବା ଲକ୍‌ମନ୍‌ମିସା ସେ ଜାଗାଇ ରଇବାଇ । ଆରି ସେ ମର୍ ଆରି ମର୍ ବାବା ପର୍‌ମେସରର୍ ସନ୍‌ମାନ୍ ପାଇସି ।”

ଜିସୁ ତାର୍ ମରନ୍ ବିସଇ ନେଇ କଇବାଟା

୨୭ ଏବେ ମର୍ ଜିବନ୍ ବେସି ବାୟାବିକଲ୍ ଅଇଗାଲାନ୍ । କାଇଟା କଇବି ? ଏ ବାବା ମକେ ଏ ଦୁକର୍ ବେଲାଅନି ରକିଆ କର୍ ବଲି ଗୁଆରି କର୍‌ବି କି ? ନାଇ ସେନ୍ତି ନ କଇ । ଦୁକ୍ କସ୍ଟ ମୁରତ୍‌ବାକେ ସେ ମୁଈ ଆଇଲିଆଟି । ୨୮ ଏ ବାବା ତର୍ ନାଉଁ ଡାକ୍‌ପୁଟା କର । ସେ ବେଲା ସର୍‌ଗେଅନି ଏ କାତା କଇବା ସବ୍‌ ଆଇଲା, “ମର୍ ନାଉଁ ଡାକ୍‌ପୁଟା କଲିଆଟି, ଆରି ତରେକ୍ ଡାକ୍‌ପୁଟା କର୍‌ବି ।”

୨୯ ତେଇ ଟିଆଅଇ ରଇଲା ଲକ୍‌ମନ୍ ଏ ସବ୍‌ ସୁନି କରି “ଏଟା ବାଦଲ୍ ଗୁଡ୍‌ଗୁଡ୍‌ଲା” ବଲି କଇଲାଇ । ମାତର୍ ଅଦେକ୍ ଲକ୍‌ମନ୍, “ସର୍‌ଗେଅନି ଗଟେକ୍ ଦୁଡ୍ ତାର୍ ସଙ୍ଗ୍ କାତା ଅଇଲାନ୍” ବଲି କଇଲାଇ ।

୩୦ ଜିସୁ ସେ ଲକ୍‌ମନ୍‌କେ କଇଲା, “ଏ ସବ୍‌ ମର୍ ପାଇ ଅଏନାଇ, ମାତର୍ ତମ୍‌ର୍ ପାଇସେ ଅଇଲା । ୩୧ ଏବେ ଏ ଦୁନିଆର୍ ବିଚାର୍ କର୍‌ବା ଦିନ୍ କେଟଲା ଆଚେ, ଏ ଦୁନିଆର୍ ସାସନ୍ କରୁକେ ମୁଈ ବାଇରେ ପିଞ୍ଜିଦେବି । ୩୨ ଆରି ମକେ କୁରସେ ଟେକ୍‌ଲେ, ସବୁ ଲକ୍‌ମନ୍‌କେ ମର୍‌ବାଟେ ଜିକ୍‌ବି” ବଲି କଇଲା । ୩୩ ସେ କେନ୍ତିଅଇ ମର୍‌ବାକେ ଗାଲାନ୍, ସେଟା ଜାନାଇବାକେ ଏନ୍ତି କଇରଇଲା ।

୩୪ ସେବେଲା ସବୁ ଲକ୍‌ମନ୍ ତାକେ କଇଲାଇ, “ମସିଅ ସବୁ ଦିନର୍ ପାଇ ବଟି ରଇସି ବଲି ଆମର୍ ସାସ୍‌ତରେ ଲେକା ଆଚେ । ତୁଇ କେନ୍ତି ପର୍‌ମେସରର୍ ପିଲାକେ କୁରସେ ଟେକ୍‌ବାଇ ବଲି କଇଲୁସିନି ? ଏନ୍ତିବଇଲେ ପର୍‌ମେସରର୍ ଟାନେଅନି ଆଇଲା ନର୍‌ପିଲା କେ ତେବେ ?”

୩୫ ଜିସୁ ସେମନ୍‌କେ କଇଲା, “ଏବେ ତମ୍‌ର୍ ମୁଆଟେ ଜନ୍ ଉଜଲ୍, ଉଜଲ୍ ଦେଲାନ୍, ସେଟା ଚନେକର୍‌ପାଇସେ ରଇସି । ଜନ୍ ଜାଗାଇ ଜିବାର୍ ଆଚେ, ଉଜଲ୍ ରଇତେ ଆକା ଇଣ୍ଡା । ସେନ୍ତାରିଆଲେ ତମ୍‌କେ ଆନ୍ଦାର୍ ନ ତାବେ । ଆନ୍ଦାରେ ରଇବା ଲକ୍ କେନେ ଗାଲାନ୍ ସେଟା ନାଜାନେ । ୩୬ ସେଟାର୍ ପାଇ ତମ୍‌ର୍ ଲଗେ ଉଜଲ୍ ରଇତେସେ ଉଜଲ୍ ପାରା ରଇବା ମର୍‌କାତା ବିସ୍‌ବାସ୍ କରା । ତେବେ ତମେ ଉଜଲ୍‌ର୍ ଲକ୍ ଅଇସା” ବଲିକରି କଇଲା । ଜିସୁ ଏ କାତା କଇକରି ଉଟିଗାଲା ଆରି ସେମନ୍‌କେ ନ ଦେକାଇଅଇକରି ରଇଲା ।

ଲକ୍‌ମନ୍ ବିସ୍‌ବାସ୍ ନ କର୍‌ବାଟା

୩୭ ଜିସୁ ସେମନ୍‌ର୍ ଦେକ୍‌ତେ କେତେକ୍ କେତେକ୍ କାବା ଅଇଜିବା କାମ୍‌ମନ୍ କରିରଇଲେ ମିସା, ସେମନ୍ ତାକେ ବିସ୍‌ବାସ୍ କରତ୍‌ନାଇ । ୩୮ ଜେନ୍ତାରି ଜିସାୟ୍ ବବିସ୍‌ତ୍‌ବକ୍‌ତା କଇଲା କାତା ସତ୍ ଅଇଲା । ସେ ଏନ୍ତି କଇରଇଲା, “ଏ ମାପୁରୁ, ଆମେ କଇଲା କାତା ସୁନିକରି କେ ବିସ୍‌ବାସ୍ କଲାଆଚେ ? ଆରି ମାପୁରୁ କାର୍‌ଲଗେ ତାର୍ ରକିଆ କର୍‌ବା ବପୁ ଦେକାଇଲା ?”

୪ ୧୨:୨୫ ୧୨:୨୫ ମାଡିଉ ୧୦:୩୯; ୧୭:୨୫; ମାର୍କ ୮:୩୫; ଲୁକ୍ ୯:୨୪; ୧୭:୩୩



୩୯ ସେଟାର୍‌ପାଇ ସେମନ୍ ବିସ୍‌ବାସ୍ ନ କର୍‌ତେରଇଲା । ତେବେ ଜିସାୟ ଆରିତରେକ୍ କଇଲାଆଚେ,

୪୦ ପର୍‌ମେସର୍ ଜେନ୍‌ଟିକି ତାକର୍ ଦେକ୍‌ବା ଆଁକି କାଣା କରିଦେଇଆଚେ  
ଆରି ସେମନ୍‌ର୍ ବୁଜ୍‌ବା ବପୁ ନସାଇଦେଇଆଚେ

ସେଟାର୍‌ପାଇ ସେମନ୍ ଦେକି ନାପାରଲାଇନି  
କି ମୁଲ୍‌କେ ବୁଜି ନାପାରଲାଇନି ।

ସେମନ୍ ନିକ ଅଇବାକେ ମର୍‌ଟାନେ ବାଉଡି ଆସଡ୍‌ନାଇ ।

ଏଟା ପର୍‌ମେସର୍ କଇଲାନି । ଆମେ ସେମନ୍‌କେ ନିକ ନ କରୁ ।

୪୧ ଜିସାୟ ବବିସଡ୍‌ବକ୍‌ତା ପୁରବେ ଜିସୁ ମାପରୁର୍ ଏ ସବୁ ମଇମା  
ଜାନିରଇଲାଜେ ଏନ୍ତି ବଲି କଇରଇଲା ।

୪୨ ଏଲେ ମିସା ଜିଉଦି ନେତାମନ୍‌ର୍ ବିତ୍‌ରେଅନି କେତେ ଲକ୍ ତାକେ  
ବିସ୍‌ବାସ୍ କଲା । ମାତର୍ ସେମନ୍ ପାରୁସି ମନ୍‌ରୁଲାଗି ପାର୍‌ତନା ଗରେ  
ଅନି ବାର୍‌କରାଇଦେବାଇ ବଲି ଡରିକରି କାତାବାର୍‌ତା ନ ଅଇତେ ରଇଲା ।

୪୩ ସେମନ୍ ପର୍‌ମେସର୍‌କେ ମାନାଇବା ଟାନେଅନି ଲକ୍‌ମନ୍‌କେ ମାନାଇବାଟା ଅଦିକ୍  
ନିକ ବଲି ବାବ୍‌ତେରଇଲା ।

ଜିସୁର୍ ବାକିଅ ନେଇ ଲକ୍‌ମନ୍‌ର୍ ବିଚାର୍

୪୪ ଜିସୁ ଆଉଲିଅଇ କଇଲା, “ଜନ୍ ଲକ୍ ମକେ ବିସ୍‌ବାସ୍ କରସି, ସେ ମକେସେ  
ବିସ୍‌ବାସ୍ କରେନାଇ, ମକେ ଜେ ପାଟାଇଲା ଆଚେ, ତାକେ ମିସା ବିସ୍‌ବାସ୍ କଲାନି  
।” ୪୫ ଜେ ମକେ ଦେକି ଆଚେ, ସେ ମକେ ପାଟାଉକେ ମିସା ଦେକି ଆଚେ ।

୪୬ ମୁଇ ଜଗତର୍ ଉଜଲ୍ ଅଇ ଆଇଲିଆତି । ଜେ ମକେ ବିସ୍‌ବାସ୍ କରସି, ସେ ଆରି  
ଆନ୍ଦାରେ ନ ରଏ । ୪୭ ଜେ ମର୍ ବାକିଅ ସୁନି ନ ମାନେ, ମୁଇ ତାର୍ ବିଚାର୍ ନ

କରି । କାଇକେବଇଲେ ମୁଇ ଜଗତର୍ ଲକ୍‌ମନ୍‌କେ ବିଚାର୍ କର୍‌ବାର୍ ଆସିନାଇ,  
ମାତର୍ ସେମନ୍‌କେ ରକିଆ କର୍‌ବାର୍ ଆସିଆତି । ୪୮ ଜେ ମକେ ନିତି କରି ମର୍

ବାକିଅ ନ ମାନେ, ମର୍ ଟଣ୍ଡର୍ ବାକିଅ ତାର୍ ବିଚାର୍ କାରିଆ ଅଇସି । ସାରାସାରି  
ଦିନେ ସେ ବାକିଅସେ ତାକେ ବିଚାର୍ କରସି । ୪୯ ମୁଇ ନିଜର୍ ମନେ ଅନି କାଇଟା

ମିସା କଇନାଇ, ଏ କାତା ସଡ୍ । ମାତର୍ ମୁଇ କଇବାଟା ମକେ ପାଟାଇରଇବା ବାବା  
ଆଦେସ୍ ଦେଇଆଚେ । ୫୦ ଆରି ମୁଇ ଜାନିଆତି, ତାର୍ ଆଦେସ୍ ନ ସାର୍‌ବା ଜିବନ୍

ଦେଇସି । ମର୍ ବାବା ମକେ ଜନ୍ କାତା କଇବାକେ ଆଦେସ୍ ଦେଇଆଚେ, ସେଟାସେ  
ମୁଇ କଇଲିନି ।

## ୧୩

ଜିସୁ ତାର୍ ସିମନ୍‌ର୍ ପାଦ୍ ଦଇଦେଲା

୧ ନିସ୍‌ତାର୍ ପରବର୍ ଆଗ୍ରୁର୍ ଦିନ୍ ଅଇରଇଲା । ଜିସୁ, ଏ ଜଗଡ୍ ଚାଡି  
ବାବା ପର୍‌ମେସର୍‌ର୍ ଲଗେ ଜିବାକେ ତାର୍ ବେଲା କେଟ୍‌ଲାବେ ବଲି ଜାନିରଇଲା  
। ଦୁନିଆଇ ରଇବା ତାର୍ ସବୁ ଲକ୍‌ମନ୍‌କେ ସାରାସାରି ଜାକ ବେସି ଆଲାଦ୍  
କର୍‌ତେରଇଲା ।

୨ ସେଦିନର୍ ରାତି ଜିସୁ ଆରି ତାର୍ ସିମନ୍‌ କାଇବାକେ ବସିରଇଲା । ଜିସୁକେ  
ବିସ୍‌ବାସେ ବିସ୍ ଦେଲାପାରା କରାଇବା ଚିନ୍ତା, ସଇତାନ୍ ସିମନ୍ ଇସ୍‌କାରିୟ୍‌ତର୍ ପିଲା  
ଜିଉଦାର୍ ମନେ ପୁରିକରି ଦେଲା । ୩ ବାବା ପର୍‌ମେସର୍, ତାକେ ସବୁ ବିସଇର୍  
ଅଦିକାର୍ ଦେଇ ଆଚେ, ସେ ପର୍‌ମେସର୍‌ର୍ ଟାନେଅନି ଆସିଆଚେ ଆରି ତାର୍  
ଲଗେସେ ଜାଇସି, ବଲି ଜିସୁ ସବୁ ବିସଇ ଜାନିରଇଲା । ୪ ତେବର୍‌ପାଇ ସେ କାଇବା  
ଜାଗାଇଅନି ଉଟିକରି ଅତି ରଇବା ବସ୍‌ତର୍ ବେଟି ସଙ୍ଗଇ, ଆଁଟାଇ ଗଟେକ୍ ତୁଆଲ୍

ବାନ୍ଧିଅଇଲା ।<sup>୫</sup> ତାର ପରେ ସେ ଗଟେକ୍ ମୁତାଇ ପାନିନେଲା ଆରି ନିଜର୍ ସିସ୍‌ମନ୍‌ର୍ ପାଦ୍ ଦଇକରି ବାନ୍ଧିଅଇଲା ତୁଆଲ୍ ବେଟି ପୁଟି ଦେବାର୍ ଦାର୍‌ଲା ।<sup>୬</sup> ଜେତେବେଲେ ଜିସୁ ସିମନ୍ ପିତରର୍ ଲଗେ ଆଇଲା, ପିତର୍ ତାକେ କଇଲା, “ମାପୁରୁ ତମେ ମର୍ ପାଦ୍ ଦଇସା କି ?”<sup>୭</sup> ଜିସୁ ତାକେ କଇଲା, “ମୁଇ ଏବେ ଜାଇଟା କଲିନି, ସେଟା ତମେ ବୁଜି ନାପାରାସ୍, ମାତର୍ ପରେ ବୁଜସା ।”

୮ ପିତର୍ ତାକେ ମନାକରି କଇଲା, “ନିରୁ, ତମେ ମର୍ ପାଦ୍ ଦୁଆନାଇ ।” ଜିସୁ ତାକେ କଇଲା, “ମୁଇ ଜଦି ତର୍ ପାଦ୍ ନ ଦଇଲେ, କେବେ ମିସା ମର୍ ସିସ୍ ଅଇ ନାପାରୁସ୍ ।”

୯ ସିମନ୍ ପିତର୍ ତାକେ କଇଲା, “ମାପୁରୁ ସେନ୍ତାର୍‌ଆଲେ କାଇକେ ମର୍ ପାଦ୍‌ସେ ଦଇ ଦେଇସୁ ? ମର୍ ମୁଣ୍ଡ ଆରି ଆଡ୍ ମିସା ଦଇଦିଆସ୍ ।”

୧୦ ଜିସୁ ପିତର୍‌କେ କଇଲା, “ଜନ୍ ଲକ୍‌ମନ୍ ଗାଦଇ ସାରିଆତଡ୍, ସେମନ୍ ପୁରାପୁରୁନ୍ ସୁକଲ୍ । ପାଦ୍ ଦଇବାଟା ଚାଡି, କାଇଟା ଦଇବାର୍ ଲତାନାଇ । ଗଟେକ୍ ଲକ୍‌କେ ଚାଡି, ତମେ ସବୁଲକ୍ ସୁକଲ୍ ଆଗାସ୍ ।”<sup>୧୧</sup> କାଇକେ ବଇଲେ ଜନ୍ ସିସ୍ ଜିସୁକେ ସଡ୍‌ରୁମନ୍‌କେ ଦାରାଇଦେଇସି ତାକେ ଜିସୁ ଜାନି ରଇଲା । ସେଟାର୍ ପାଇ ସେ ଗଟେକ୍ ଲକ୍‌କେ ଚାଡି ସବୁଲକ୍ ସୁକଲ୍ ଆଗାସ୍ ବଲି କଇଲା ।

୧୨ \*ଜିସୁ ସିସ୍‌ମନ୍‌ର୍ ପାଦ୍ ଦଇଲା ପରେ ବେଟିରଇଲା ବସ୍‌ତର୍ ପିନ୍ଧିକରି ବସି ସେମନ୍‌କେ ପାଚାରଲା, “ଏବେ ମୁଇ ତମର୍ ପାଇ କଲା କାମ୍ ବୁଜ୍‌ଲାସିନି କି ?”<sup>୧୩</sup> ଆରି ସେ କଇଲା, “ତମେ ମକେ ଗୁରୁ ଆରି ମାପୁରୁ ବଲି ଡାକ୍‌ଲାସିନି, ସେଟା ଟିକ୍‌ସେ । କାଇକେ ବଇଲେ ଗୁରୁ ଆରି ମାପୁରୁ ମୁଇସେ ।”<sup>୧୪</sup> ମୁଇ ତମର୍ ଗୁରୁ ଆରି ମାପୁରୁ ଅଇକରି, ତମର୍ ପାଦ୍ ଦଇଦେଲି ଆଟି ବଇଲେ ତମେ ମିସା ତମର୍ ତମର୍ ବିଡ୍‌ରେ ପାଦ୍ ଦଇବାର୍ ଆରେ ।<sup>୧୫</sup> ମୁଇ ଏଟା ତମର୍ ପାଇ ଗଟେକ୍ ଉଦାଅରଣ୍ ପାରା କଲିଆଟି, ତମେ ମିସା ବିନ୍ ଲକ୍‌ମନ୍‌କେ ଏନ୍ତି କରା ।<sup>୧୬</sup> \*ମୁଇ ତମ୍‌କେ ସଡ୍ କାତା କଇଲିନି, ଗତିଦାଙ୍ଗ୍‌ତା ନିଜର୍ ସାଉକାରର୍ ତେଇଅନି ବଡ୍ ନର୍ସି । ଆରି କବର୍ ନେଉଁ କବର୍ ପାଟାଇଲା ଲକ୍‌ରତେଇଅନି ବଡ୍ ନର୍ସି ।<sup>୧୭</sup> ଜଦି ତମେ ଏ ସବୁ ବିସଇ ଜାନିଆଗାସ୍, ଆରି ସେ ଇସାବେ କର୍‌ସା ବଇଲେ ବେସି ସାର୍‌ଦା ଅଇସା ।

୧୮ ମୁଇ ତମର୍ ସବୁ ଲକ୍‌ର୍ ବିସଇ ନେଇକରି କଇନାଇ, ଜନ୍ ଲକ୍‌ମନ୍‌କେ ବାଟି ଆଟି, ସେମନ୍ କେନ୍ତି ବଲି ଜାନିଆଟି । ମାତର୍ ସାସ୍‌ତରେ ଲେକା ଅଇଲା କାତା ସିଦ୍ ଅଇବାକେ ଏନ୍ତି ଗଟ୍‌ନା ଅଇଲାନି । ସାସ୍‌ତରେ ଲେକା ଅଇଲା ଆରେ ଜେ ମର୍ ସଙ୍ଗ୍ କାଇଲାନି ସେ ମର୍ ବିରଦେ ଉଟ୍‌ସି ।<sup>୧୯</sup> ଏବେ ଏ ଗଟ୍‌ନା ଅଇବା ଆଗ୍‌ତୁସେ ମୁଇ ତମ୍‌କେ ଏ କାତା କଇଲିନି । ଜେତେବେଲା ଏ ଗଟ୍‌ନା ଗଟ୍‌ସି, ତମେ ମୁଇ ମସିଅ ବଲି ବିସବାସ୍ କର୍‌ସା ।<sup>୨୦</sup> \*ତମ୍‌କେ ସଡ୍ କାତା କଇଲିନି, ଜନ୍ ଲକ୍‌ମନ୍ ମର୍ କବର୍ ନେବା ଲକ୍‌ମନ୍‌କେ ନାମ୍‌ବାଇ, ସେମନ୍ ମକେ ମିସା ନାମ୍‌ବାଇ, ଆରି ମକେ ପାଟାଇଲା ପର୍‌ମେସର୍‌କେ ମିସା ନାମ୍‌ବାଇ ।”

ବିସ୍‌ବାସେ ବିସ୍ ଦେବା ବିସଇ ଜାନାଇବାଟା  
(ମାଡିଉ ୨୬:୨୦-୨୫; ମାର୍କ ୧୪:୧୭-୨୧; ଲୁକ୍ ୨୨:୨୧-୨୩)

୨୧ ଜିସୁ ଏ ସବୁ କାତା କଇସାରାଇଲା ପରେ, ଆଡ୍‌ମାଇ ବାୟାବିକଲ୍ ଅଇ ପୁଟ୍‌କାର୍ କରି କଇଲା, “ମୁଇ ତମ୍‌କେ ସଡ୍ କାତା କଇଲିନି, ତମର୍ ବିଡ୍‌ରେଅନି ଗଟେକ୍ ଲକ୍ ମକେ ବିସ୍‌ବାସେ ବିସ୍ ଦେଲାପାରା କର୍‌ସି ।”

୨୨ ସେ ଏ କାତା, କାର୍ ବିସଇ ନେଇକରି କଇଲାନି ବଲି ସିସ୍‌ମନ୍ ବୁଜିନାପାରି ନିଜର୍ ନିଜର୍ ବିଡ୍‌ରେ ଆର୍ ମୁଏ ସେ ତାର୍ ମୁଏ ଏ, ଦେକାଦେକି ଅଇବାର୍ ଦାର୍‌ଲାଇ

☆ ୧୩:୧୨ ୧୩:୧୨ ଲୁକ୍ ୨୨:୨୭      ☆ ୧୩:୧୭ ୧୩:୧୭ ମାଡିଉ ୧୦:୨୪; ଲୁକ୍ ୬:୪୦; ଜଅନ୍ ୧୫:୨୦  
☆ ୧୩:୨୦ ୧୩:୨୦ ମାଡିଉ ୧୦:୪୦; ମାର୍କ ୯:୩୭; ଲୁକ୍ ୯:୪୮; ୧୦:୧୭

। ୨୩ ଜିସୁର୍ ସିସ୍ତମନର୍ ବିତ୍ତରେଅନି ଜଅନ୍, ଜାକେକି ଜିସୁ ମୁକିଅ ଇସାବେ ଆଲାଦ୍ କରତେ ରଇଲା, ସେ ଜିସୁର୍ ଲଗେ ବସିକରି କାଇତେ ରଇଲା । ୨୪ ସିମନ୍ ପିତର୍ ଜଅନ୍କେ ସଗିଆ କରି କଇଲା, “ସେ କାର୍ ବିସଇ ନେଇକରି କଇଲାନି, ତାକେ ପାଟାର୍ ।”

୨୫ ସେଟାର୍ ପାଇ ଜଅନ୍ ଜିସୁର୍ ଉପରେ ଆଉଜି ଅଇକରି ପାଟାର୍ଲା, “ଏ ମାପୁରୁ, ସେ ଲକ୍ କେ ?”

୨୬ ଜିସୁ କଇଲା, “ମୁଇ ଏ ରୁଟି ଜଲେ ଚବାଲି ଜାକେ ଦେବି, ସେ ଲକ୍ ସେ ।” ସେବେଲେ ସେ ରୁଟି ଜଲେ ଚବାଲି କରି ସିମନ୍ ଇସ୍କାରିୟତର୍ ପିଲା ଜିଉଦାକେ ଦେଲା । ୨୭ ଇସ୍କାରିୟତ୍ ଜିଉଦା ରୁଟି ମାଙ୍ଗ୍ଲା ଦାପ୍ରେ ସଇତାନ୍ ତାର୍ ମନ୍ ବିତ୍ତରେ ଜାଇକରି ଚାଲାଇବାର୍ ଦାର୍ଲା । ଜିସୁ ସେ ବେଲାଇ ତାକେ କଇଲା, “ତୁଇ ଜାଇଟା କର୍ବାକେ ଗାଲୁସନି ବେଗି କର୍ ।” ୨୮ ଜିସୁ ଏ କାତା ଇସ୍କାରିୟତ୍ ଜିଉଦାକେ କାଇକେ କଇଲା, ତେଇ କାଇବାକେ ବସି ରଇଲା ଲକ୍ମନର୍ ବିତ୍ତରେଅନି କେମିସା, ବୁଜି ନାପାର୍ଲାଇ । ୨୯ ଇସ୍କାରିୟତ୍ ଜିଉଦାର୍ ଲଗେ ତାରୁ ପେଡି ରଇଲାଜେ କେତେଟା ସିସ୍ତମନ୍ ପାଟାର୍ଲାଇ, “ପରବ୍ ପାଇ କାଇକାଇଟା ଦର୍କାର୍ ଆତେ, ସେଟାର୍ପାଇ ନଇଲେ ଗରିବ୍ ଲକ୍ମନକେ ଦାନ୍ଦେବାକେ ଜିସୁ ତାକେ କଇଲାଆତେ ।”

୩୦ ତାର୍ ପତେ ଇସ୍କାରିୟତ୍ ଜିଉଦା ରୁଟି ମାଙ୍ଗି ଦାପ୍ରେ ବାରଇକରି ଉଟିଗାଲା । ସେ ବେଲେ ରାତି ଅଇରଇଲା ।

ନୁଆ ନିୟମ୍

୩୧ ଇସ୍କାରିୟତ୍ ଜିଉଦା ବାରଇକରି ଉଟିଗାଲା ପତେ ଜିସୁ କଇଲା, “ଏବେ ପର୍ମେସରର୍ ତେଇଅନି ଆଇଲା ନର୍ପିଲା ମୁଇ ତାର୍ଟାନେଅନି ତାକ୍ପୁଟା ପାଇବା ବେଲା ଆସିଆତେ । ଆରି ମର୍ ଲାଗି ପର୍ମେସର୍ ମିସା ତାକ୍ପୁଟା ପାଇସି । ୩୨ ଜଦି ପର୍ମେସର୍ ମର୍ତେଇଅନି ତାକ୍ପୁଟା ଅଇଲେ, ନିଜର୍ ମଇମାସକ୍ ନର୍ପିଲା ମକେ ମିସା ତାକ୍ପୁଟା କରାଇସି । ଦାପ୍ରେସେ ମକେ ସେନ୍ତି କରାଇସି । ୩୩ ଏ ମର୍ ପିଲାମନ୍ ମୁଇ ତମର୍ ସଙ୍ଗ୍ ଚନେକର୍ପାଇ ରଇବି । ତାର୍ ପତେ ତମେ ମକେ କଜ୍ସା, ଆରି ମୁଇ ଜନ୍ତି ଗାଲିନି ତମେ ତେଇ ଜାଇନାପାରାସ୍ । ଏ ବିସଇ ଜିଉଦି ନେତାମନ୍କେ ଜେନ୍ତି କଇରଇଲି, ସେନ୍ତି ଏବେ ତମକେ ଆରିତରେକ୍ କଇଲିନି । ୩୪ ଏମୁଇ ତମକେ ଗଟେକ୍ ନୁଆ ଆଦେସ୍ ଦେଲିନି, ତମେ ତମର୍ ନିଜର୍ ନିଜର୍ ବିତ୍ତରେ ଆଲାଦ୍ କରା । ମୁଇ ଜେନ୍ତି ତମକେ ଆଲାଦ୍ କଲିଆତି, ତମେ ମିସା ନିଜର୍ ନିଜର୍ ବିତ୍ତରେ ଆଲାଦ୍ କର୍ବାଟାଆତେ । ୩୫ ତମର୍ ନିଜର୍ ନିଜର୍ ବିତ୍ତରେ ଆଲାଦ୍ ରଇଲେ, ତମେ ମର୍ ସିସ୍ ବଲି ସବୁଲକ୍ ଜାନ୍ବାଇ ।”

ପିତରକେ ଜିସୁ ନାଜାନି ବଲି କଇବାଟା ଜାନାଇଲାନି

(ମାତିଉ ୨୭:୩୧-୩୫; ମାର୍କ ୧୪:୨୭-୩୧; ଲୁକ୍ ୨୨:୩୧-୩୪)

୩୬ ସିମନ୍ ପିତର୍ ଜିସୁକେ ପାଟାର୍ଲା, “ଏ ମାପୁରୁ ତମେ କନ୍ତି ଗାଲାସନି ?” ଜିସୁ କଇଲା, “ମୁଇ ଜନ୍ତି ଗାଲିନି ସେ ଜାଗାଇ ଏବେ ତୁଇ ଆସି ନାପାରୁସ୍ ମାତର୍ ପତେ ଆଇସୁ ।” ୩୭ ପିତର୍ ଜିସୁକେ କଇଲା, “ଏ ମାପୁରୁ ଏବେ କାଇକେ ତମର୍ ପତେ ପତେ ଆସିନାପାରି ? ମୁଇ ତମର୍ପାଇ ମର୍ବାକେ ମିସା ରାଜିଆତି ।” ୩୮ ଜିସୁ ତାକେ କଇଲା, “ତୁଇ କାଇକେ ମର୍ପାଇ ମର୍ସୁ ? ମୁଇ ତକେ ସତ୍ କାତା କଇଲିନି କୁକୁଡା ନ ତାକ୍ତେ ତୁଇ ମକେ ତିନ୍ ତର୍ ନାଜାନି ବଲି କଇସୁ ।”

☆ ୧୩:୩୩ ୧୩:୩୩ ଜଅନ୍ ୭:୩୪ ☆ ୧୩:୩୪ ୧୩:୩୪ ଜଅନ୍ ୧୫:୧୨, ୧୭; ୧ ମ ଜଅନ୍ ୩:୨୩; ୨ ଯ୍ ଜଅନ୍ ୧:୫

୧୪

ଜିସୁ ବାବାର ଲଗେ ଜିବା ବାଟ

୧ ଆରି ଜିସୁ କଇଲା, “ତମେ କିଲୁବିଲୁ ନ ଉଆ, ପରମେସରରଟାନେ ବିସ୍‌ବାସ୍ କରା । ଆରି ମରଟାନେ ମିସା ବିସ୍‌ବାସ୍ କରା । ୨ ମର୍ ବାବାର ଗରେ ରଇବାକେ ବେସି ବାକରା ଆଚେ । ଆରି ତେଇ ମୁଇ ତମର୍ ପାଇ ଜାଗା ଟିକ୍ କରବାର ଗାଲିନି । ଜଦି ଏଟା ସତ୍ ନଇତା ଆଲେ, ମୁଇ ତମକେ ଏନ୍ତି ବଲି ନ କଇତି । ୩ ଆରି ମୁଇ ଜାଇ ତମର୍ ପାଇ ଜାଗା ଟିକ୍ କଲା ପଚେ, ଆରି ତରେକ୍ ବାଉଡି ଆସି ତମକେ ମର୍ ସଙ୍ଗ୍ ଡାକିନେବି । ମୁଇ ଜନ୍ ଜାଗାଇ ରଇବି, ସେ ଜାଗାଇ ତମେ ମର୍ ସଙ୍ଗ୍ ରଇସା । ୪ ମୁଇ ଜନ୍ ଜାଗାଇ ଗାଲିନି, ତମେ ସେ ଜାଗାଇ ଜିବା ବାଟ୍ ଜାନିଆରାସ୍ ।”

୫ ତମା ଜିସୁକେ କଇଲା, “ଏ ମାପରୁ ତମେ କନ୍ ଜାଗାଇ ଗାଲୁସ୍‌ନି, ସେଟା ଆମେ ନାଜାନୁ, ଆରି ତେଇ ଜିବା ବାଟ୍ କେନ୍ତ୍ର ଜାନବୁ ?”

୬ ଜିସୁ ତାକେ କଇଲା, “ମୁଇ ସତ୍, ବାଟ୍ ଆରି ଜିବନ୍ । ମରବାଟେ ନ ଗାଲେ ବାବା ପରମେସର ଲଗେ କେ ମିସା ଜାଇନାପାରେ ।” ୭ ସେ କଇଲା, “ଜଦି ତମେ ମକେ ଜାନିରଇତାସ୍ ବଇଲେ, ମର୍ ବାବାକେ ମିସା ଜାନତାସ୍ । ଏବେ ମିସା ତମେ ତାକେ ଜାନଲାସ୍‌ନି ଆରି ଦେକ୍‌ଲାସ୍‌ନି ।”

୮ ପିଲିପ୍ ଜିସୁକେ କଇଲା, “ଏ ମାପରୁ ଆମକେ ବାବାକେ ଦେକାଇ ଦେ, ସେତ୍‌କିସେ ଆମର୍‌ପାଇ ବେସି ।” ୯ ଜିସୁ ତାକେ କଇଲା, “ପିଲିପ୍ ଏତ୍‌କି ଦିନ୍ ମୁଇ ତମର୍ ସଙ୍ଗ୍ ରଇଲି, ତୁଇ ମକେ ଚିନି ନାପାରଲୁସ୍ କି ?” ଜେ ମକେ ଦେକ୍‌ଲା ଆଚେ ସେ ମର୍ ବାବା ପରମେସରକେ ଦେକ୍‌ଲା ଆଚେ । କେନ୍ତ୍ର ଆମକେ ତର ବାବାକେ ଦେକାଇ ଦେ ବଲି କଇଲୁସ୍‌ନି ? ୧୦ ତୁଇ ବିସ୍‌ବାସ୍ କୁରୁସ୍ ନାଇ କି ପିଲିପ୍ ? ମୁଇ ବାବାର ତେଇ ଆଚି ଆରି ବାବା ମରଟାନେ ଆଚେ । ମୁଇ ତମକେ ଜନ୍ କାତା ସବୁ କଇଲିଆଚି, ସେ ସବୁ କାତା ମର୍ ନିଜରତେଇଅନି କଇନାଇ । ମାତର୍ ବାବା ମରତେଇ ରଇକରି ତାର କାମ, ମରଟାନେଅନି କଲାନି । ୧୧ ମୁଇ ବାବାରତେଇ ଆଚି ଆରି ବାବା ମରଟାନେ ଆଚେ ବଲି ମୁଇ କଇବା ଏ କାତା ବିସ୍‌ବାସ୍ କରା । ନଇଲେ ମୁଇ କରବା କାମ୍ ଦେକି ବିସ୍‌ବାସ୍ କରା । ୧୨ ମୁଇ ତମକେ ସତ୍ କଇଲିନି, ଜେ ମକେ ବିସ୍‌ବାସ୍ କରସି ସେ, ମୁଇ କରବା ଏନ୍ତି କାମ୍‌ମନ୍ କରସି ଆରି ମରତେଇଅନି ଅଦିକ୍ ବଡ୍ ବଡ୍ କାମ୍‌ମନ୍ ମିସା କରସି । କାଇକେ ବଇଲେ ମୁଇ ମର୍ ବାବାର ଲଗେ ଗାଲିନି । ୧୩ ତମେ ମର୍ ନାଉଁଦାରି ଜାଇଟା ମାଙ୍ଗ୍‌ସା ସେଟା ସବୁ ମୁଇ ତମକେ ଦେବି । ଇତିଅନି ବାବାର ଡାକ୍‌ପୁଟା ମରତେଇ ଜାନାପଡ୍‌ସି । ୧୪ ତମେ ଜଦି କାଇ ବିସଇ ମିସା ମର୍ ନାଉଁଦାରି ମାଙ୍ଗ୍‌ସା ବଇଲେ ମୁଇ ସେଟା ଦେବି ।

ସୁକଲ୍ ଆଡ଼ମାର୍ ଦାନର୍ ସପତ୍

୧୫ ତମେ ଜଦି ମକେ ଆଲାଦ୍ କରସା, ମର୍ ଆଦେସ୍ ମିସା ମାନସା । ୧୬ ମୁଇ ମର୍ ବାବାକେ ଗୁଆରି କରବି । ଆରି ତମର୍ ସଙ୍ଗ୍ ସବୁବେଲା ରଇବା ପାଇ, ସେ ଗଟେକ୍ ସାଇଜକାରିଆକେ ପାଗାଇସି । ୧୭ ସେ ଅଇଲାନି ସତ୍ ଆଡ଼ମା, ଜେକି ସତ୍‌ସଙ୍ଗ୍ ପରମେସରର୍ ବିସଇ ଦେକାଇସି । ଏ ଦୁନିଆର୍ ଲକ୍‌ମନ୍ ତାକେ ନ ନାମଡ୍, କାଇକେ ବଇଲେ ତାକେ ଦେକଡ୍ ନାଇ କି ଜାନଡ୍ ନାଇ । ମାତର୍ ତମେ ତାକେ ଜାନି ଆରାସ୍ । କାଇକେ ବଇଲେ ସେ ତମର୍ ସଙ୍ଗ୍ ଆଚେ ଆରି ତମର୍ ମନ୍ ବିତ୍‌ରେ ରଇସି ।

୧୮ ମୁଇ ଜେଡେବଲ୍ ଜିବି, ତମକେ ଚୁରା ପିଲାମନର୍ ପାରା କରି ଚାଡି ନ ଜାଇ । ଆରିତରେକ୍ ତମର୍ ଲଗେ ବାଉଡି ଆଇବି । ୧୯ ଚନେକ୍ ଗାଲେ ଦୁନିଆ ଆରି ମକେ ଦେକିନାପାରେ । ମାତର୍ ତମେ ଦେକ୍‌ସା, କାଇକେ ବଇଲେ ମୁଇ ସବୁବେଲେ ଜିବନ୍

ରଇବି, ଆରି ତମେ ମିସା ଜିବନ୍ ରଇସା ।<sup>୨୦</sup> ସେ ଦିନ୍ ଆଇଲେ ତମେ ଜାନ୍ସା, ମୁଇ ବାବାର୍ ଲଗେ, ତମେ ମର୍ ଲଗେ, ଆରି ମୁଇ ତମର୍ ଲଗେ ସବୁବେଲେ ରଇବି ।

<sup>୨୧</sup> “ଜେ ମର୍ ଆଦେସ୍ ମାନ୍ସି, ସେ ଆକା ମକେ ଆଲାଦ୍ କର୍ସି । ଜେ ମକେ ଆଲାଦ୍ କର୍ସି, ମର୍ ବାବା ତାକେ ଆଲାଦ୍ କର୍ସି । ମୁଇ ମିସା ତାକେ ଆଲାଦ୍ କରି ନିଜ୍ଜକେ ତାର୍ଗାନେ ଦେକାଇଅଇବି ।”

<sup>୨୨</sup> ତାର୍ ପଟେ ଜିଉଦା, ଇସ୍କାରିୟତ୍ ଜିଉଦା ନଏଁ, କଇଲା “ଏ ମାପ୍ତୁର ଏଟା କେନ୍ତି ଅଇସି ? ତମେ ନିଜ୍ଜକେ ଦୁନିଆଇ ଦେକାଇ ନ ଅଇ ଆମର୍ ଲଗେ କେନ୍ତି ଦେକାଇଅଇସା ?”

<sup>୨୩</sup> ଜିସୁ ତାକେ କଇଲା, “ଜନ୍ ଲକ୍ ମକେ ଆଲାଦ୍ କର୍ସି ସେ ମୁଇ ସିକାଇବା ବାକିଅ ମାନ୍ସି । ସେନ୍ତି କଲେ ମର୍ ବାବା ପର୍ମେସର୍ ତାକେ ଆଲାଦ୍ କର୍ସି । ବାବା ଆରି ମୁଇ ଆସି ସେ ଲକର୍ ଟାନେ ରଇବୁ ।<sup>୨୪</sup> ଜେ ମକେ ଆଲାଦ୍ ନ କରେ, ସେ ମର୍ ବାକିଅ ନ ମାନେ । ଆରି ମୁଇ କଇବା ଏ କାତା ସବୁ ମର୍ତେଜ ଅନି ନଏଁ, ମାତର୍ ମକେ ପାଟାଇଲା ମର୍ ବାବାର୍ ତେଜଅନି କଇଲିନି ।”

<sup>୨୫</sup> ମୁଇ ତମର୍ ଲଗେ ରଇକରିସେ ଏ ସବୁ କାତା କଇଲିନି ।<sup>୨୬</sup> ମାତର୍ ପର୍ମେସର୍ ଜନ୍ ସାଇଜକାରିଆ ସୁକଲ୍ ଆଡ଼ମାକେ ମର୍ ନାଉଁ ଦାରି ତମର୍ ଲଗେ ପାଟାଇସି, ସେ ତମକେ ସବୁ ବିସଇ ସିକାଇଦେଇସି ଆରି ମୁଇ ଜନ୍ ଜନ୍ କାତା କଇଲିଆଟି ସେଟା ସବୁ ତମକେ ଏତାଇ ଦେଇସି ।

<sup>୨୭</sup> “ମୁଇ ତମକେ ସାନ୍ତି ଦେଇକରି ଗାଲିନି । ମର୍ ନିଜର୍ ସାନ୍ତି ତମକେ ଦାନ୍ ଦେଇକରି ଗାଲିନି । ଏଟା ଦୁନିଆ ଦାନ୍ ଦେଲାପାରା ସାନ୍ତି ନଏଁ । ସେଟାର୍ ପାଇ ଚିନ୍ତା କରା ନାଇ କି କିଲ୍ବିଲ୍ ଅଇ ଡରା ନାଇ ।<sup>୨୮</sup> ମୁଇ ଜାଇଟା କଇରଇଲି, ସେଟା ସୁନିଆଟାସ୍ । ମୁଇ ଗାଲିନି ମାତର୍ ଆରି ତରେକ୍ ବାଉଡି ଆଇବି । ମକେ ଜଦି ଆଲାଦ୍ କର୍ତାସ୍ ବଇଲେ, ମୁଇ ବାବାର୍ ଲଗେ ଗାଲିନି ବଲି ସୁନି ସାର୍ଦା ଅଇତାସ୍, କାଇକେ ବଇଲେ ମର୍ ବାବା ମର୍ତେଜଅନି ବଡ଼ ।<sup>୨୯</sup> ଜାଇଟା ସବୁ ଗଟ୍‌ବାର୍ ଆତେ ସେଟା ସବୁ ମୁଇ ତମକେ ଆଗ୍ତୁ ଜାନାଇଦେଲି । ଜେନ୍ତିକି ସେଟା ସବୁ ଗଟ୍‌ଲେ, ତମେ ମକେ ବିସ୍‌ବାସ୍ କର୍ସା ।<sup>୩୦</sup> ମୁଇ ତମର୍ ସଙ୍ଗ୍ ଆରି ଅଦିକ୍ ପର୍ କାତାବାର୍ତା କରି ନାପାରି । କାଇକେ ବଇଲେ, ଏ ଦୁନିଆର୍ ସାସନ୍‌କାରିଆ ଆଇଲାନି । ଆରି ମର୍ଗାନେ ତାର୍ କାଇ ଅଦିକାର୍ ନାଇ ।<sup>୩୧</sup> ମୁଇ ମର୍ ବାବାକେ ଆଲାଦ୍ କଲିନି ଆରି ବାବାର୍ ଆଦେସ୍ ଇସାବେ କାମ୍ କଲିନି, ଏଟା ଦୁନିଆର୍ ଲକ୍‌ମନ୍ ଜାନଡ଼ ବଲି ଏନ୍ତି ଗଟ୍‌ନା ଅଇଲାନି । ଜୁ, ଆମେ ଏ ଜାଗାଇଅନି ବାରଇ ଉଟି ଜୁ ।”

## ୧୫

ଜିସୁ ସଡ଼ ଅଙ୍ଗୁର୍ ମାଲ୍

<sup>୧</sup> “ମୁଇ ଅଇଲିନି ସଡ଼ ଅଙ୍ଗୁର୍ ମାଲ୍ ଆରି ମର୍ ବାବା ଅଇଲାନି ଚାସି ।<sup>୨</sup> ମର୍ଗାନେ ରଇବା ପିଲ୍‌କା ମାଲେ ପଲ୍ ନ ଦାର୍ଲେ, ସେ କାଟି ପାକାଇସି । ଆରି ଜନ୍ ମାଲେ ପଲ୍ ଦାର୍ସି ସେ ମାଲ୍ ଅଦିକ୍ ପଲ୍ ଦାର୍‌ବାକେ ପରିଚଲ୍ କର୍ସି ।<sup>୩</sup> ମର୍ତେଜ ଅନି ପାଇରଇବା ସିକିଆଇ ଅନି ତମେ ପରିଚଲ୍ ଅଇସାରି ଆଟାସ୍ ।<sup>୪</sup> ତମେ ମର୍‌ସଙ୍ଗ୍ ମିସିକରି ରୁଆ । ସେନ୍ତି ବଇଲେ ମୁଇ ମିସା ତମର୍ ସଙ୍ଗ୍ ରଇବି । କେନ୍ଦା ଜଦି ବୁନ୍‌ସଙ୍ଗ୍ ମିସିକରି ନ ରଇଲେ ନିଜେ ପଲ୍ ନ ଦାରେ, ସେନ୍ତି ତମେ ମିସା ମର୍ତେଜ ମିସି ନ ରଇଲେ, ପଲ୍ ଦାରିନାପାରାସ୍ ।”

<sup>୫</sup> “ମୁଇ ଅଇଲିନି ମୁଲ୍ ଅଙ୍ଗୁର୍ ମାଲ୍, ତମେ ଅଇଲାସିନି ପିଲ୍‌କା ମାଲ୍ । ଜେ ମର୍ତେଜ ରଇସି ଆରି ମୁଇ ଜାର୍ତେଜ ରଇବି ସେ ବେସି ପଲ୍ ଦାର୍ସି, କାଇକେ ବଇଲେ ମକେ ଚାଡ଼କରି ତମେ କାଇଟା କରି ନାପାରାସ୍ ।<sup>୬</sup> ଜେ ମର୍ତେଜ ନ ରଏ,

ତାକେ ଗଟେକ୍ ଗରୁଣ୍ଡି କରି ପିଙ୍ଗାଲା ମାଲ୍‌ପାରା ବାଇରେ ପିଙ୍ଗି ଦେବାଇ ଆରି ସେଟା ସୁକି ଜାଇସି । ଏନ୍ତାରି ମାଲ୍‌ମନ୍‌କେ ଚୁଲିଆଇ ଜଇତେଇ ପିଙ୍ଗି ଦେବାଇ ଆରି ସେଟା ପଡି ଜାଇସି । ୭ ଜଦି ତମେ ମରସଙ୍ଗ ମିସିକରି ରଇସା ଆରି ମର ବାକିଅ ତମର ମନେ ରଇସି, ତମେ ମନକରି କାଇ ବିସଇ ମାଙ୍ଗୁଆ ବଇଲେ ସେଟା ମିଲାଇସା । ୮ ତମେ ବେସି ପଲ୍ ଦାରଲେ, ମର ବାବା ତାକ୍‌ପୁଟା ପାଇସି, ଆରି ଇତିଅନି ତମେ ମର ସତ୍ ସିସ୍‌ମନ୍ ବଲି ଜାନ୍‌ବାଇ । ୯ ମର ବାବା ଜେନ୍ତି ମକେ ଆଲାଦ୍ କଲା ଆରେ, ସେନ୍ତି ମୁଇ ମିସା ତମ୍‌କେ ଆଲାଦ୍ କଲିନି । ମର ଆଲାଦେ ତବିର୍ ଅଇରୁଆ । ୧୦ ମୁଇ ଜେନ୍ତି ମର ବାବାର ଆଦେସ୍ ମାନିକରି ତବିର୍ ଅଇଆତି । ସେନ୍ତି ତମେ ମର ଆଦେସ୍ ମାନ୍‌ସା ବଇଲେ ମର ଆଲାଦେ ତବିର୍ ଅଇକରି ରଇସା ।”

୧୧ “ଜେନ୍ତିକି ମର ସାରଦା ତମର ଟାମେ ରଇକରି, ସେ ସାରଦା ପୁରାପୁରୁନ୍ ଅଇବାକେ ତମ୍‌କେ ଏ ସବୁ କାତା କଇଲିଆତି । ୧୨ \*ମୁଇ ତମ୍‌କେ ଜେନ୍ତି ଆଲାଦ୍ କଲିଆତି, ସମାନ୍ ସେନ୍ତି ତମେ ମିସା ନିଜର ନିଜର ବିତ୍‌ରେ ଆଲାଦ୍ ଅଇକରି ରୁଆ । ଏଟାସେ ମର ଆଦେସ୍ । ୧୩ ନିଜର ମଇତରମନର ଲାଗି ଜିବନ୍ ଦେବାଟା ଅଇଲାନି ସବୁରଟାମେଅନି ବଡ୍ ଆଲାଦ୍ । ୧୪ ମୁଇ ତମ୍‌କେ ଜନ୍ ଆଦେସ୍ ଦେଇଆତି, ସେଟା ମାନ୍‌ସା ବଇଲେ ତମେ ମର ମଇତରମନ୍ । ୧୫ ଏବେ ମୁଇ ତମ୍‌କେ ଗତିଦାଙ୍ଗୁଡାମନ୍ ବଲି ନ ତାକି, କାଇକେ ବଇଲେ, ଗତିଦାଙ୍ଗୁଡା ତାର ସାଉକାର୍ କାଇଟା କରସି ସେଟା ନାଜାମେ । ମାତର ମୁଇ ତମ୍‌କେ ମଇତର ବଲି ତାକ୍‌ବି, କାଇକେ ବଇଲେ ମୁଇ ବାବାରତେଇ ଅନି ଜନ୍ ଜନ୍ ବିସଇ ସୁନି ଆତି, ସେଟା ତମ୍‌କେ କଇଦେଲିଆତି । ୧୬ ତମେ ମକେ ବାଟାସ୍ ନାଇ, ମାତର ମୁଇ ତମ୍‌କେ ବାଟ୍‌ଲି ଆତି । ଆରି ଜାଇକରି ଅଦିକ୍ ଅଦିକ୍ ପଲ୍ ଦାରବାକେ ତମ୍‌କେ ଦାଇଡ୍ ଦେଲି । ତମର ପଲ୍ ସବୁ ଦିନର ପାଇ ରଇସି । ତେବେ ତମେ ମର ନାଉଁ ଦାରି ବାବାକେ କାଇଟା ମାଙ୍ଗୁଲେ ମିସା ସେ ତମ୍‌କେ ଦେଇସି । ୧୭ ତମର ତମର ବିତ୍‌ରେ ଆଲାଦ୍ କରା । ଏଟା ଅଇଲାନି ମର ଆଦେସ୍ ।”

**ଜଗତର ଗିନ୍**

୧୮ “ଜାନିରୁଆ, ତମ୍‌କେ ଜଦି ଏ ଦୁନିଆ ଗିନ୍ କରସି, ତେବେ ତମ୍‌କେ ଗିନ୍ କରବା ଆଗରୁସେ ମକେ ଗିନ୍ କଲାଆଟେ । ୧୯ ତମେ ଜଦି ଏ ଦୁନିଆର୍ ଲକ୍‌ମନ୍ ଅଇରଇତାସ୍ ଆଲେ ଏ ଦୁନିଆ ତମ୍‌କେ ନିଜର ବାବି ଆଲାଦ୍ କରତା, ମାତର ମୁଇ ତମ୍‌କେ ବାଟି ଦୁନିଆଇଅନି ବେଗୁଲାଇ ଦେଇଆତି । ସେଟାର୍ ପାଇ ଏ ଦୁନିଆ ତମ୍‌କେ ଗିନ୍‌କରସି । ୨୦ \*ମୁଇ ଜନ୍‌ଟା କଇରଇଲି ଏତାଇଦେକା, ଗତିଦାଙ୍ଗୁଡା ତାର ସାଉକାର୍‌ତେଇଅନି ବଡ୍ ନଏଁ ବଲି ମୁଇ ତମ୍‌କେ କଇରଇଲି । ସେମନ୍ ମକେ ସାଦି ଆଟଡ୍ ଆରି ତମ୍‌କେ ମିସା ସାଦ୍‌ବାଇ । ଜଦି ସେମନ୍ ମର ସିକିଆ ମାନିଆଟଡ୍ ବଇଲେ ତମର କାତା ମିସା ମାନ୍‌ବାଇ । ୨୧ ମାତର ତମେ ମର ଲକ୍ ଅଇରଇବାର ଲାଗି ସେମନ୍ ତମ୍‌କେ ଏନ୍ତାରି କରବାଇ । କାଇକେ ବଇଲେ ମକେ ଜେ ପାଟାଇଲା ଆରେ, ସେଟା ସେମନ୍ ନାଜାନଡ୍ । ୨୨ ଜଦି ମୁଇ ଆସି ଏ ସବୁ ବିସଇ ସେମନ୍‌କେ ବୁଜାଇ ନ ରଇତି ବଇଲେ, ସେମନ୍ ଦସି ନ ଅଇତାଇ, ମାତର ଏ ପାପର ଚଲାଟଲୁତି ପାଇ କାଇ ଚାଲାକି ଦେକାଇ ନାପାରଡ୍ । ୨୩ ଜେ ମକେ ଗିନ୍ କରସି, ସେ ମର ବାବା ପରମେସରକେ ମିସା ଗିନ୍ କରସି । ୨୪ ଜଦି ମୁଇ ତାକର ବିତ୍‌ରେ କାବା ଅଇଜିବା କାମ ନ କରି ରଇଲେ, ସେମନ୍ ପାପି ବଲି ଦସି ନ ଅଇତାଇ । ମାତର ସେମନ୍ ମୁଇ କଲା କାବାଅଇଜିବା କାମମନ୍ ଦେକ୍‌ଲାଇ ଆଟଡ୍ । ଏନ୍ତି ବଇଲେ ମିସା ସେମନ୍ ମକେ ଆରି ମର ବାବା ପରମେସରକେ ଗିନ୍ କଲାଇ ଆଟଡ୍ । ୨୫ ମାତର ଏସବୁ

\* ୧୫:୧୨ ୧୫:୧୨ ଜଅନ୍ ୧୩:୩୪:୧୫:୧୭; ୧ ନ ଜଅନ୍ ୩:୨୩; ୨ ଯ ଜଅନ୍ ୧:୫      \* ୧୫:୨୦ ୧୫:୨୦ ମାଡିଉ ୧୦:୨୪; ଲୁକ୍ ୬:୪୦; ଜଅନ୍ ୧୩:୧୭

ଗଟ୍‌ବାର୍ ରଇଲା । କାଇକେବଇଲେ ସେଟାର୍ ଲାଗି ସେମାନର୍ ସାସ୍‌ତରେ ଜାଇଟା  
ଲେକାଅଇଲା ଆତେ, ସେଟା ସିଦ୍ ଅଇଲା । କାଇ ଦସ୍ ନ ରଇତେ ସେମନ୍ ମକେ  
ଗିନ୍ କଲାଇ । ୨୭ ସତଇସେ ସାଇଜକାରିଆ ଆଡ଼ମା ଆଇସି । ସେ ବାବାର୍‌ତେଇ  
ଅନି ଆସି, ପରମେସରର୍ ସବୁ ବିସଇର୍ ସତ୍ ଦେକାଇଦେଇସି । ମୁଇ ତାକେ  
ବାବାର୍‌ତେଇଅନି, ତମର୍ ଲଗେ ପାଟାଇବି । ଆରି ସେ ମର୍ ବିସଇ ତମ୍‌କେ କଇସି  
। ୨୭ ଆରି ତମେ ମିସା ମର୍ ବିସଇସେ କଇସା, କାଇକେବଇଲେ ଆରାମେଅନି ତମେ  
ମର୍ ସଙ୍ଗ୍ ଆଗାସ୍ ।”

**୧୭**

୧ “ତମେ ମକେ କରିରଇବା ବିସ୍‌ବାସ୍ ନ ଚାଡ଼ି, ତାଟ୍ ସଙ୍ଗ୍ ରଇବାକେ, ମୁଇ ଏ ସବୁ  
କାତା କଇଲିଆତି । ୨ ସେମନ୍ ତମ୍‌କେ ପାର୍‌ତନା ଗରେଅନି ବାର୍‌କରାଇ ଦେବାଇ ।  
ଉଁ ଏନ୍ତାରି ବେଲା ଆଇଲାନି, ଜେ ମିସା ତମ୍‌କେ ମରାଇବାଇ, ସେଟା ପରମେସର୍କେ  
ସେବା କଲାପାରା ରଇସି । ୩ ତମ୍‌କେ ସେମନ୍ ଏନ୍ତ୍ର ସବୁ କାମ୍‌ମନ୍ କରୁବାଇ ।  
କାଇକେ ବଇଲେ ସେମନ୍ ମକେ ଆରି ମର୍ ବାବାକେ ନାଜାନତ୍ । ୪ ଏବେ ମୁଇ ଏ  
ସବୁ କାତା କଇଲିନି । ସେଟାର୍ ପାଇ ଏ ସବୁ ଗଟ୍‌ନାମନ୍ ଗଟ୍‌ବା ବେଲା କେଟ୍‌ଲେ  
ମୁଇ କଇଲା କାତା ଏତାଇସା । ଆରାମେ ଅନି ମୁଇ ତମର୍ ସଙ୍ଗ୍ ରଇଲି ଜେ ଏ ସବୁ  
କାତା କଇ ନ ରଇଲି ।”

**ସୁକଲ୍ ଆଡ଼ମାର୍ କାମ୍**

୫ “ମାତର୍ ମୁଇ ଏବେ ମର୍ ପାଟାଉର୍ ଲଗେ ଗାଲିନି । ଏଲେମିସା ତମର୍ ବିତ୍‌ରେ  
ଅନି କେ ମିସା ମକେ କେନେ ଜାଇସୁ ବଲି ପାଟାରାସ୍ ନାଇ । ୬ ମାତର୍ ଏବେ ମର୍  
ଏ ସବୁ କାତା ସୁନିକରି ଦୁକ୍ ଅଇକରି ଆଗାସ୍ । ୭ ମୁଇ ତମ୍‌କେ ସତ୍‌କାତା କଇଲିନି,  
ମୁଇ ଉଚିଜିବା ବିସଇ ତମର୍ ପାଇ ଗଟେକ୍ ମଙ୍ଗ୍‌ଲର୍ ବିସଇ ଅଇସି । କାଇକେ  
ବଇଲେ ମୁଇ ନ ଗାଲେ ସାଇଜକାରିଆ ତମର୍‌ଟାନେ ନ ଆସେ, ମୁଇ ଗାଲେ ତାକେ  
ତମର୍‌ଟାନେ ପାଟାଇଦେବି । ୮ ସେ ଆସିକରି ଦୁନିଆର୍ ଲକ୍‌ମନ୍‌କେ ପାପ୍, ଦରମ୍  
ଆରି ନିଆଇ ବିସଇର୍ ସାକି ଦେଇସି । ୯ ଏ ଦୁନିଆର୍ ଲକ୍‌ମନ୍ ପାପ୍ ବିସଇ ବୁଲ୍  
ବୁଜ୍‌ଲାଇ ଆଚତ୍ । ସେ ଦେକାଇ ଦେଇସି ଜେ, ମକେ ବିସ୍‌ବାସ୍ ନ କରୁବାଟାସେ  
ପାପ୍ । ୧୦ ଚିକ୍ ଇସାବେ ଚଲାଟଲ୍‌ତି କରୁବା ବିସଇ, ଦୁନିଆର୍ ଲକ୍‌ମନ୍ ବୁଲ୍  
ବୁଜିଆଚତ୍ । ମୁଇ ମର୍ ବାବାର୍ ଲଗେ ବାଉଡ଼ି ଗାଲିନି, ଆରି ତମେ ମକେ  
ଦେକିନାପାରାସ୍ । ସେଟା ମୁଇ ମାନ୍‌ବା ଦରମ୍ ବିସଇ ସାକି ଦେଲାନି । ୧୧ ଦୁନିଆର୍  
ଲକ୍‌ମନ୍ ବିଚାର୍ କରୁବା ବିସଇ ବୁଲ୍ ବୁଜ୍‌ଲାଇ ଆଚତ୍ । କାଇକେବଇଲେ ଏ  
ଦୁନିଆର୍ ସାସନ୍‌କାରିଆ ଦସି ବଲି ବିଚାର୍ ଅଇ ସାରାଇ ଆତେ ।”

୧୨ “ମୁଇ ତମ୍‌କେ କେତେକ୍ କେତେକ୍ କାତା କଇବାର୍ ଆତେ । ମାତର୍ ଏବେ  
ତମେ ସେ ସବୁ କାତା ଦାରିନାପାରାସ୍ । ୧୩ ମାତର୍ ସତ୍ ଆଡ଼ମା ଆଇଲେ, ସେ  
ତମ୍‌କେ ସବୁ ସତ୍ ବିସଇର୍ ବାଟେ ଡାକିନେଇସି । କାଇକେ ବଇଲେ, ସେ ନିଜର୍  
ଅଦିକାରେ କାଇ କାତା ନ କଏ । ମାତର୍ ସେ ବାବାର୍‌ତେଇଅନି ଜନ୍ ଜନ୍ କାତା  
ସୁନ୍‌ସି, ସେ ସବୁ କଇସି । ଆରି ଆଇବା ଦିନ୍‌ମନ୍‌କେ କାଇଟା ଅଇସି ସେ ସବୁ ବିସଇ  
ମିସା କଇସି । ୧୪ ସେ ମୁଇ କଇବାଟାନେ ଅନି ନେଇକରି ଆକା ତମ୍‌କେ କଇସି ।  
ଆରି ମକେ ଡାକ୍‌ପୁଟା କରାଇ ଦେକାଇସି । ୧୫ ଜନ୍‌ଟା ବାବାର୍‌ଟା, ସେ ସବୁ ମର୍‌ଟା  
। ସେଟାର୍‌ପାଇ ମୁଇ ତମ୍‌କେ କଇଲିନି, ସୁକଲ୍ ଆଡ଼ମା ମର୍‌ଟାନେଅନି ନେଇକରି  
ସେ ତମ୍‌କେ କଇସି ।”

**ଦୁକର୍ ବିସଇ ଆରି ସାର୍‌ଦାର୍ ବିସଇ**

୧୬ “ଚନେକ୍ ଗାଲା ପଟେ ତମେ ଆରି ମକେ ଦେକି ନାପାରାସ୍ । ଆରି ଚନେକ୍  
ଗାଲେ ଦେକ୍‌ସା ।”

୧୭ ସେବେଲେ ତାର ସିସ୍ତମନର ବିତ୍ତରେଅନି କେତେ ଲକ୍ଷ ତାକର ବିତ୍ତରେ କୁଆବଲା ଅଇଲା । “ସେ ଆମ୍ଭଙ୍କେ କଇଲାନି, ଚନେକ୍ ଗାଲାପତେ ତମେ ଆରି ମକେ ଦେକି ନାପାରାସ୍, ଆରି ଚନେକ୍ ଗାଲେ ମକେ ଦେକ୍ସା । ମୁଇ ଏବେ ବାବାର ଲଗେ ଗାଲିନି ବଲି କଇବା ଅରତ୍ କାଇଟା ?” ୧୮ ତେବେ ସେମନ୍ କଇଲା, “ଏ ଚନେକ୍ ପତେ ବଲି କାଇକେ କଇଲାନି ? ସେ କାଇଟା ବଲି କଇଲାନି, ଆମେ ବୁଜି ନାପାରୁଲୁନି ।”

୧୯ ସେମନ୍ ମକେ ପାଚାର୍ବାକେ ମନ୍ କଲାଇନି ବଲି ଜିସୁ ଜାନିକରି ସେମନ୍କେ କଇଲା, “ଚନେକ୍ ଗାଲେ ତମେ ଆରି ମକେ ଦେକି ନାପାରାସ୍ ଆରି ଚନେକ୍ ଗାଲାପତେ ମକେ ଦେକ୍ସା ବଲି କଇଲା ଏ କାତା ନେଇକରି ତମର ତମର ବିତ୍ତରେ କାଇକେ କୁଆବଲା ଅଇଲାସ୍ନି ? ୨୦ ମୁଇ ତମ୍ଭଙ୍କେ ସତ୍ କାତା କଇଲିନି, ତମେ ସାତାରି ସାତାରି କାନ୍ଦ୍ସା, ମାତର ଦୁନିଆର୍ ଲକ୍ଷମନ୍ ସାର୍ଦା ଅଇବାଇ । ତମେ ପରତୁମ୍ ଦୁକ୍ ଅଇରଇସା ମାତର ତମର ଦୁକ୍ ସାର୍ଦାଇ ପୁରୁନ୍ ଅଇଜାଇସି । ୨୧ ଗଟେକ୍ ମାଇଜି ନିକ୍ ଅଇବା ବେଲା କେଟ୍ଲେ ବେସି ଦୁକ୍ ଅଇସି । କାଇକେବଇଲେ ତାର ଦୁକ୍ କସ୍ତର ବେଲା କେଟିଆତେ । ମାତର ନିମାନ୍ ଅଇସାରଲା ପତେ ତାର ଦୁକ୍ କସ୍ତ ପାସ୍ରିଜାଇସି । କାଇକେ ବଇଲେ ତାରତେଇଅନି ଗଟେକ୍ ପିଲା ଦୁନିଆଇ ଜନମ୍ ଅଇଲା ଆତେ । ୨୨ ସେନ୍ତାରିସେ ତମ୍ଭଙ୍କେ ମିସା ଅଇସି । ଏବେ ତମେ ଦୁକ୍ଅଇ ଆଚାସ୍, ମାତର ଆରି ତରେକ୍ ମୁଇ ତମ୍ଭଙ୍କେ ଦେକାଇଅଇବି, ତାର ପତେ ତମେ ବେସି ସାର୍ଦା ଅଇସା । ଆରି କେମିସା ତମର ସାର୍ଦା ତମରଟାନେଅନି ଚାଡାଇ ନେଇ ନାପାରତ୍ ।

୨୩ “ସେବେଲା ତମେ ମକେ ମୁଲ୍କେ ନ ପାଚାରାସ୍ । ମୁଇ ତମ୍ଭଙ୍କେ ସତ୍ କାତା କଇଲିନି, ତମେ ମର୍ ନାଉଁ ଦାରି ବାବାକେ କାଇଟା ମିସା ମାଙ୍ଗ୍ସା ବଇଲେ ସେଟା ଦେଇସି । ୨୪ ତମେ ଏବେ ଜାକ୍ ମର୍ ନାଉଁ ଦାରି କାଇଟା ମିସା ମାଙ୍ଗ୍ସା ନାଇତା । ଏବେ ମାଙ୍ଗ୍ସା, ତେବେ ତମ୍ଭଙ୍କେ ମିଲ୍ସି । ଆରି ତମର ସାର୍ଦା ପୁରାପୁରୁନ୍ ଅଇସି ।”

**ଦୁନିଆକେ ଜିତ୍ତବା ବିସଇ**

୨୫ “ମୁଇ ତମ୍ଭଙ୍କେ କାତା ମଲ୍କାଇ କରି ଏ ସବୁ କଇଲିନି, ଏନ୍ତି ବେଲା ଆଇସି, ତମ୍ଭଙ୍କେ ଆରି ମୁଇ କାତା ନ ମଲ୍କାଇ, ସଲ୍କେ ବାବାର ବିସଇ କଇଦେବି । ୨୬ ତମେ ସେ ଦିନମନ୍କେ ମର୍ ନାଉଁ ଦାରି ପର୍ମେସରକେ ବେସି ବିସଇମନ୍ ମାଙ୍ଗ୍ସା । ଆରି ମୁଇ ତମର ପାଇ ବାବା ପର୍ମେସରର ତେଇ ଗୁଆରି କର୍ବାର୍ ଦରକାର୍ ନ ରଏ । ୨୭ କାଇକେବଇଲେ ବାବା ତମ୍ଭଙ୍କେ ଆଲାଦ୍ କଲାନି, ସେ ତମ୍ଭଙ୍କେ ଆଲାଦ୍ କଲାନି କାଇକେବଇଲେ ତମେ ଜେନ୍ତିକି ମକେ ଆଲାଦ୍ କରି ଆଚାସ୍, ଆରି ମୁଇ ପର୍ମେସରର ତେଇଅନି ଆଇଲି ଆଟି ବଲି ବିସ୍ବାସ୍ କରିଆଚାସ୍ । ୨୮ ମୁଇ ବାବାରଟାନେଅନି ଏ ଦୁନିଆଇ ଆସିଆଟି, ଆରି ଏବେ ମୁଇ ଏ ଦୁନିଆ ଚାଡିକରି ବାବାର ଲଗେ ବାଉଡି ଗାଲିନି ।”

୨୯ ଜିସୁର ସିସ୍ତମନ୍ କଇଲା, “ଏବେ ତମେ ଆମ୍ଭଙ୍କେ କାତା ମଲ୍କାଇ ନ କଇକରି ସଲ୍କେସେ କଇଲାସ୍ନି । ୩୦ ତମେ ସବୁ ବିସଇ ଜାନିଆରୁସ୍, ଏଟା ଏବେ ଆମେ ଜାନ୍ଲୁ । ଆରି କେ ତମ୍ଭଙ୍କେ ଜାନେ କି ନାଇ ବଲି, ପାଚାର୍ବାର ଲଡା ନାଇ । ଏଟାରପାଇ ତମେ ପର୍ମେସରରଟାନେ ଅନି ଆସିଆରୁସ୍ ବଲି ଆମେ ବିସ୍ବାସ୍ କଲୁନି ।”

୩୧ ଜିସୁ ସେମନ୍କେ କଇଲା, “ଏବେ କାଇ ତମେ ବିସ୍ବାସ୍ କଲାସ୍ନି ? ୩୨ ଦେକା, ଏନ୍ତି ବେଲା ଆଇଲାନି, ଉଁ ସେ ବେଲା କେଟ୍ଲେ ଆତେ, ତମେ ମକେ ଗଟେକ୍ ଲକ୍ଷକେ ଚାଡି, ଏନେ ତେନେ ଅଇକରି ନିଜର୍ ନିଜର୍ ଗରେ ଉଟିପାଲାଇସା । ଏଲେମିସା ମୁଇ ଗଟେକ୍ ଲକ୍ଷ ନାଇ, ସବୁବେଲା ମର୍ ସଙ୍ଗ୍ ବାବା ଆତେ ।



୩୩ ଜେନ୍ତାରି କି ତମେ ମରତେଇ ରଇକରି ସାନ୍ତି ପାଇସା, ସେଟାରପାଇ ମୁଇ ତମକେ ଏ ସବୁ ବିସଇ କଇଥାତି । ଏ ଦୁନିଆଇ ତମରପାଇ ବେସି ଦୁକ୍ କସ୍ତ ଆତେ, ମାତର୍ ତାଟସଙ୍ଗ୍ ରୁଆ, ମୁଇ ଦୁନିଆର୍ କାରାପ୍ ବପୁ ନସାଇକରି ଜିତିଥାତି ।”

## ୧୭

ସିସମନର୍ ପାଇ ଜିସୁର୍ ପାର୍ତନା

୧ ଜିସୁ ଏ ସବୁ କାତା କଇସାରାଇଲା ପତେ, ସରଗ୍ ବାଟେ ଦେକି କଇଲା, “ଏ ସରଗର୍ ବାବା, ଏବେ ବେଲା କେଟ୍ଲା ଆତେ । ତମର୍ ପିଲା ମକେ ଡାକ୍ପୁଟା କରା । ଜେନ୍ତୁକି ତମର୍ ପିଲା ମୁଇ ତମକେ ଡାକ୍ପୁଟା କର୍ବି । ୨ ତମେ ମକେ ସବୁ ମୁନ୍ସୁ ଜାତି ଉପରେ ଅଦିକାର୍ ଦେଇଆଟାସ୍ । ଆରି ଜନ୍ଲକ୍ମନକେ ମକେ ସର୍ପି ଦେଇଆଟାସ୍, ସେମନ୍କେ ମୁଇ ନ ସାର୍ବା ଜିବନ୍ ଦେବି । ୩ ତମେସେ ଗଟେକ୍ ପର୍ମେସର୍, ତମକେ ଆରି ତମେ ପାଟାଇରଇବା ଜିସୁ କିରିସଟକେ ଜାନ୍ବାଟା ଅଇଲାନି ନ ସାର୍ବା ଜିବନ୍ । ୪ ତମେ ମକେ ଜନ୍ କାମ୍ମନ୍ କର୍ବାକେ ଦେଇଆଟାସ୍, ସେଟା ମୁଇ ସାରାଇ କରି, ଏ ଦୁନିଆଇ ତମକେ ଡାକ୍ପୁଟା କରିଥାତି । ୫ ଏ ବାବା, ଏ ଦୁନିଆ ତିଆର୍ ନ ଅଇତେ, ତମର୍ ସଙ୍ଗ୍ ରଇଲାବେଲେ, ମର୍ ଜନ୍ ଡାକ୍ପୁଟା ରଇଲା, ଏବେ ତମେ ରଇତେ ଆକା, ମକେ ଡାକ୍ପୁଟା କର୍ ।

୬ “ଏ ଜଗତର୍ ଜନ୍ ଲକ୍ମନକେ ତମେ ମକେ ସର୍ପି ଦେଇରଇଲାସ୍, ସେମନର୍ ଲଗେ ମୁଇ ତମକେ ଜାନାଇଥାତି । ସେମନ୍ ତମର୍ ଅଇରଇଲାଇ, ଆରି ମକେ ସେମନ୍କେ ସର୍ପିଦେଲୁସ୍ । ସେମନ୍ ତମର୍ ବାକିଅ ମାନ୍ଲାଇନି । ୭ ତମେ ମକେ ଜନ୍ ଜନ୍ଟା ସର୍ପି ଦେଇ ଆଟାସ୍, ସେଟାମନ୍ ସବୁ ତର୍ଟାନେଅନି ଆକା ଅଇଲାଆଟେ, ବଲି ଏବେ ସେମନ୍ ବୁଜିଆଟଡ୍ । ୮ ତମେ ମକେ ଦେଇରଇବା କବର୍ ମୁଇ ସେମନ୍କେ ସୁନାଇଥାତି, ସେମନ୍ ସେଟା ମାନି ଆଟଡ୍ । ମୁଇ ତମର୍ଟାନେଅନି ଆସିଥାତି ଆରି ତମେ ମକେ ପାଟାଇଆଟାସ୍, ସେମନ୍ ଏ କାତା ସଡ୍ ବଲି ଜାନିକରି ବିସ୍ବାସ୍ କଲାଇ ଆଟଡ୍ ।”

୯ ମୁଇ ସେମନର୍ଲାଗି ପାର୍ତନା କଲିନି, ଦୁନିଆର୍ ଲକ୍ମନର୍ ପାଇ ପାର୍ତନା କରିନାଇ । ମାତର୍ ତମେ ମକେ ଜନ୍ ଲକ୍ମନକେ ଦେଇଆଟାସ୍, ସେ ଲକ୍ମନର୍ ପାଇ ପାର୍ତନା କଲିନି । କାଇକେ ବଇଲେ ସେମନ୍ ତମର୍ ଲକ୍ମନ୍ । ୧୦ ଜେଡ୍କି ମର୍ଟା, ସେ ସବୁ ତମର୍ଟା । ଆରି ଜେଡ୍କି ତମର୍ଟା ସେ ସବୁ ମର୍ଟା । ଆକର୍ଲାଗି ଆକା ମର୍ ଡାକ୍ପୁଟା ଅଇଆତେ । ୧୧ ଏବେ ମୁଇ ତମର୍ ଲଗେ ଆଇଲିନି, ମୁଇ ଏ ଦୁନିଆଇ ରଇନାଇ । ମାତର୍ ଏମନ୍ ରଇଲାଇନି । ସୁକଲ୍ ରଇବା ବାବା ! ତମେ ଜନ୍ ଲକ୍ମନକେ ମକେ ସର୍ପି ଦେଇଆଟୁସ୍, ତମେ ଦେଇରଇବା ନାଉର୍ ବପୁର୍ ଲାଗି ସେମନ୍କେ ରକିଆ କରା । ଜେନ୍ତାରି ତମେ ଆରି ମୁଇ ଗଟେକ୍ । ସେନ୍ତାରିସେ ସେମନ୍ ଗଟେକ୍ ଅଇରଇବାକେ ସାଇଜ କରା । ୧୨ \*ମୁଇ ସେମନର୍ ସଙ୍ଗ୍ ରଇଲା ବେଲେ ତମର୍ ନାଉର୍ ବପୁସଙ୍ଗ୍ ସେମନ୍କେ ରକିଆ କରିରଇଲି । ଜେନ୍ତୁ କି ସେମନ୍ କାଲ୍କାଲ୍ ଜୁଗ୍ଜୁଗ୍ ପର୍ମେସର୍ଟାନେ ଅନି ବିନେ ଅଇ ନସଟ୍ ନ ଅଅଡ୍ । ଗଟେକ୍ ଲକ୍ମକେ ଚାଡି ସବୁଲକ୍ମକେ ରକିଆ କରିଥାତି । ସେ ଗଟେକ୍ ଲକ୍ମ ନସଟ୍ ଅଇସି ଆକା । ଜେନ୍ତୁକି ଦରମ୍ ସାସ୍ତରେ ଲେକା ଅଇଲାଟା ସିଦ୍ ଅଇବାର୍ ରଇଲା । ୧୩ ଏବେ ମୁଇ ତମର୍ ଲଗେ ଆଇଲିନି । ଏ ଦୁନିଆଇ ରଇଲା ବେଲେ ସେମନ୍କେ, ସେମନର୍ ମନେ ରଇବା ମର୍ ସାର୍ଦା ପୁରାପୁରନ୍ ଅଇବାକେ, ଏ ବିସଇ କଇରଇଲି । ୧୪ ମୁଇ ସେମନ୍କେ ତମର୍ ବାକିଅ ସୁନାଇଥାତି । ତେବର୍ପାଇ ଏ ଦୁନିଆ ସେମନ୍କେ ଗିନ୍ କଲାନି । କାଇକେ ବଇଲେ ମୁଇ ଜେନ୍ତୁ ଏ ଦୁନିଆ ଅନି ଜାଡ୍ ଅଇଲାଟା ନଇ, ସେନ୍ତୁ

\* ୧୭:୧୭ ୧୭:୧୭ ଜଅନ୍ ୧୩:୧୮

ସେମନ୍ ମିସା ଏ ଦୁନିଆର୍ ନଅଡ଼ । ୧୫ ତମେ ସେମନ୍‌କେ ଏ ଦୁନିଆଇଅନି ଦାରିଜା ବଲି ମୁଇ ପାର୍ତନା କରିନାଇ । ମାତର୍ ସଇତାନର୍ ପାନ୍ଦେ ଅନି ରକିଆ କରା ବଲି ଗୁଆରି କଲିନି । ୧୬ ମୁଇ ଜେନ୍ତ୍ରିକି ଏ ଦୁନିଆର୍ ନଇ, ସେନ୍ତ୍ରି ସେମନ୍ ମିସା ଏ ଦୁନିଆର୍ ନଅଡ଼ । ୧୭ ତମର୍ ସଡ଼ସଙ୍ଗ୍ ସେମନ୍‌କେ ସୁକଲ୍ କରା, ତମର୍ ବାକିଅ ତା ସଡ଼ । ୧୮ ତମେ ମକେ ଜେନ୍ତ୍ରି ଏ ଦୁନିଆଇ ପାଟାଇ ଆଟାସ୍, ସେନ୍ତ୍ରି ମୁଇ ମିସା ସେମନ୍‌କେ ଏ ଦୁନିଆଇ ପାଟାଇଲିନି । ୧୯ ଜେନ୍ତ୍ରିକି ସେମନ୍ ତମର୍‌ଟାନେ ସର୍ପି ଅଇବାଇ । ସେଟାପାଇ ମୁଇ ନିଜକେ ତମର୍‌ତେଇ ସୁକଲ୍ ଅଇଲିନି ।

୨୦ “ମୁଇ ଅବକା ଏ ସିସ୍‌ମନ୍‌ର ଲାଗିସେ ପାର୍ତନା କରିନାଇ, ମାତର୍ ଏ ଲକ୍‌ମନ୍ ଜାନାଇବା କାତାଇଅନି ଜନ୍ ଲକ୍‌ମନ୍ ମକେ ବିସ୍‌ବାସ୍ କର୍‌ବାଇ, ସେ ଲକ୍‌ମନ୍‌ର ପାଇ ମିସା ପାର୍ତନା କଲିନି । ୨୧ ଏ ବାବା ତମେ ଜେନ୍ତ୍ରି ମର୍‌ଟାନେ ମିସି ଗଟେକ୍ ଅଇଆଟାସ୍, ଆରି ମୁଇ ତମର୍‌ଟାନେ ମିସିକରି ଗଟେକ୍ ଅଇଆଟି । ସେନ୍ତ୍ରିସେ ସେମନ୍ ମିସା ସେମନ୍‌ର ବିଡ଼ରେ ମିସିକରି ଗଟେକ୍ ଅଇ ରଇବାକେ ମୁଇ ପାର୍ତନା କଲିନି । ଜେନ୍ତ୍ରିକି ତମେସେ ମକେ ପାଟାଇ ଆଟାସ୍ ବଲି ଏ ଦୁନିଆ ବିସ୍‌ବାସ୍ କର । ୨୨ ଜେନ୍ତ୍ରି ତମର୍ ଡାକ୍‌ପୁଟା ମକେ ଦେଇଆଟାସ୍, ସେନ୍ତ୍ରି ସେଟା ମୁଇ ସେମନ୍‌କେ ଦେଇଆଟି । ତେବେ ଆମେ ଗଟେକ୍ ଅଇରଇଲାପାରା, ସେମନ୍‌ମିସା ସେମନ୍‌ର ବିଡ଼ରେ ଗଟେକ୍ ଅଇରଇବାଇ । ୨୩ ତମେ ଜେନ୍ତ୍ରି ମର୍‌ଟାନେ ଆଟାସ୍, ସେନ୍ତ୍ରି ମୁଇ ମିସା ତାକର୍ ଟାନେ ରଇବି । ସେନ୍ତ୍ରି ରଇଲେ ଆକା ସେମନ୍ ପୁରାପୁରୁନ୍ ଗଟେକ୍ ଅଇ ରଇବାଇ । ଏନ୍ତ୍ରି ଅଇଲେ ଦୁନିଆ ଜାନ୍‌ସି ଜେ, ତମେ ମକେ ପାଟାଇ ଆଟାସ୍, ଆରି ମକେ ଜେନ୍ତ୍ରି ଆଲାଦ୍ କଲାସ୍‌ନି, ସେମନ୍‌କେ ମିସା ସେନ୍ତ୍ରିସେ ଆଲାଦ୍ କଲାସ୍‌ନି ।”

୨୪ ଏ ବାବା, ତମେ ମକେ ଜନ୍ ଲକ୍‌ମନ୍‌କେ ଦେଇଆଟାସ୍, ମୁଇ ଜନ୍ ଜାଗାଇ ରଇବି, ସେମନ୍ ମିସା ମର୍ ସଙ୍ଗ୍ ରଅଡ଼ ବଲି ମନ୍ କଲିନି । ତେବେ ମକେ ଦେଇରଇବା ଡାକ୍‌ପୁଟା ସେମନ୍ ଦେକ୍‌ବାଇ । କାଇକେ ବଇଲେ ତମେ ଏ ଦୁନିଆ ତିଆର୍ କର୍‌ବା ଆଗତ୍ରୁସେ ମକେ ଆଲାଦ୍ କରିଆଟାସ୍ । ୨୫ ଏ ଦରମର୍ ବାବା, ଏ ଦୁନିଆ ତମକେ ନାଜାନେ, ମାତର୍ ମୁଇ ତମକେ ଜାନିଆଟି । ଆରି ତମେସେ ମକେ ପାଟାଇଆଟାସ୍ ବଲି ସିସ୍‌ମନ୍ ଜାନିଆଟଡ଼ । ୨୬ ମୁଇ ସେମନ୍‌କେ ତମର୍ ବିସଇ ଜାନାଇ ଆଟି, ଆରି ସବୁ ବେଲେ ଜାନାଇତେରଇବି । ତେବେ ମର୍‌ଲାଗି ସେମନ୍ ତମର୍ ଆଲାଦ୍ ଏତାଇବାଇ ଆରି ମୁଇ ସେମନ୍‌ର ମନ୍ ବିଡ଼ରେ ରଇବି ।

## ୧୮

### ଜିସୁ ବନ୍ଦି ଅଇଲା

(ମାତିଉ ୨୬:୪୭-୫୬; ମାର୍କ ୧୪:୪୩-୫୦; ଲୁକ୍ ୨୨:୪୭-୫୩)

୧ ଜିସୁ ଏ ପାର୍ତନା ସାରାଇକରି ନିଜର୍ ସିସ୍‌ମନ୍‌ର ସଙ୍ଗ୍ କିଦ୍‌ରଣ୍ ନାଉଁର୍ ଜଲା ସେପାଟର୍ ଜାଗାଇ ଗାଲା । ତେଇ ଗଟେକ୍ ବାଡ଼ ରଇଲା, ଜିସୁ ଆରି ତାର ସିସ୍‌ମନ୍ ସେ ବାଡେ ପୁରଲାଇ । ୨ ଜନ୍ ଜିଉଦା କି ଜିସୁକେ ସଡ଼ରୁମନ୍‌କେ ସର୍ପିଦେଲା, ସେ ମିସା ସେ ଜାଗା ଜାନି ରଇଲା । କାଇକେବଇଲେ ଜିସୁ ତାର ସିସ୍‌ମନ୍‌ର ସଙ୍ଗ୍ ସେ ବାଡେ କେତେ ତର୍ ଜାଇରଇଲା । ୩ ସେଟାପର୍ ପାଇ ଜିଉଦା ରମିୟ୍ ସନିଅମନ୍‌ର ଗଟେକ୍ ଦଲ୍, ମୁକିଅ ପୁଜାରିମନ୍ ଆରି ପାରୁସିମନ୍ ପାଟାଇ ରଇବା ମନ୍‌ର୍ ଜାଗୁଆଲ୍‌ମନ୍‌କେ ଦାରି, ସେ ବାଡେ କେଟ୍‌ଲା । ସେମନ୍ ଆଡ଼ଆଡ଼ିଆର୍, ଲାତର୍ ଆରି ଜଇଉମ୍‌ଲା ଦାରିକରି ତେଇ ଆଇଲାଇ । ୪ ସେବେଲା କାଇ କାଇ ଗଟ୍‌ନାମନ୍ ଗଟ୍‌ସି, ସେଟା ସବୁ ଜିସୁ ଜାନିକରି ଆଗତ୍ରୁ ଗାଲା ଆରି ସେମନ୍‌କେ “ତମେ କାକେ କଜ୍‌ଲାସ୍‌ନି ?” ବଲି ପାଟାରିଲା ।

୫ “ନାଜରିତ୍ରିୟ ଜିସୁକେ କଜଲୁନି ।” ସେମନ୍ କଇଲାଇ ।

“ମୁଇସେ ଜିସୁ ।” ବଲି ସେମନ୍‌କେ କଇଲା ।

ବିସ୍‌ବାସେ ବିସ୍ ଦେଉ ଜିଉଦା ମିସା ସେ ଲକ୍‌ମନର୍ ସଙ୍ଗ୍ ଚିଆଅଇରଇଲା ।

୬ ଜିସୁ ଜେଡେବେଲା “ମୁଇ ଆକା ସେ ଲକ୍ ।” ବଲି ସେମନ୍‌କେ କଇଲା, ସେ ଲକ୍‌ମନ୍ ପଚେ ଗୁଚିଜାଇ ତଲେ ଅଦରଲାଇ । ୭ ଜିସୁ ସେମନ୍‌କେ ଆରିତରେକ୍ ପାଚାରଲା, “ତମେ କାକେ କଜଲାସ୍‌ନି ?” ସେମନ୍ କଇଲାଇ, “ଆମେ ନାଜରିତ୍ରିୟ ଜିସୁକେ କଜଲୁନି ।”

୮ ଜିସୁ କଇଲା, “ମୁଇ ଆକା ସେ ଲକ୍ ବଲି ତମକେ କଇଲି । ତମେ ଜଦି ମକେ କଜଲାସ୍‌ନି ବଇଲେ ଏ ଲକ୍‌ମନ୍‌କେ ଚାଡିଦିଆସ୍ ।” ୯ ଜେଡ୍‌କି ସେ ଆଗତୁ କଇରଇଲା ବାକିଅ ସିଦ୍ ଅଇସି, ବାବା ତମେ ମକେ ଜନ୍ ଲକ୍‌ମନ୍‌କେ ଦେଇଆଚାସ୍, ସେମନ୍‌ର୍ ବିତ୍‌ରେଅନି ଗଟେକ୍ ଲକ୍‌କେ ମିସା ଆଜାଇ ନାଇ ।

୧୦ ସିମନ୍ ପିତରର୍ ଆତେ ଗଟେକ୍ କାଣ୍ଡା ରଇଲା । ସେ କାଣ୍ଡା ବାଠକରାଇ ବଡୁ ପୁଜାରିର୍ ଗତିଦାଙ୍ଗ୍‌ଡାର ଉଜା କାନ୍ ଚିଡ୍‌ଡେ ମାରଲା । ସେ ଗତିଦାଙ୍ଗ୍‌ଡାର ନାଉ ମାଲକ୍ । ୧୧ \*ମାତର୍ ଜିସୁ ପିତରକେ କଇଲା, “ତର୍ କାଣ୍ଡା ଜାଗରଡ୍ କରି କଲ୍ ବିତ୍‌ରେ ପୁରାଇ ସଙ୍ଗ୍‌କ ଦେସ୍ । ମର୍ ବାବା ପର୍‌ମେସର୍ ମକେ ଜନ୍ ଦୁକ୍‌କସ୍‌ଚ ପାଇବାକେ ପାଚାଇ ଆଚେ, ସେଟା ମୁଇ ନ ପାଇ କି ?”

### ଆନାର୍ ମୁଆଟେ ଜିସୁ

୧୨ ତାର୍ ପଚେ ରମିୟ ସନିଅମନ୍, ସନିଅ ମନର୍ ମୁକିଅ ନେତାମନ୍ ଆରି ମନ୍ଦିର୍ ଜାଗୁଆଲ୍‌ମନ୍ ଜିସୁକେ ଦାରି ବାନ୍‌ଲାଇ । ୧୩ ଆରି ତାକେ ବାନ୍‌କରି ପର୍‌ତୁମ୍ କାୟାପାର୍ ସାଡ୍‌ରା ଆନାର୍ ଲଗେ ନେଲାଇ । କାଇକେ ବଇଲେ ଆନା ସେ ବରସ୍‌ର୍ ବଡୁ ପୁଜାରି ରଇଲା । ୧୪ \*ଏ କାୟାପାସେ ଆଗତୁ ଜିଉଦି ନେତାମନ୍‌କେ, ସତୁ ଲକ୍‌ର୍ ପାଇ ଗଟେକ୍ ଲକ୍ ମର୍‌ବାଟା ଗଟେକ୍ ମଙ୍ଗଲ୍‌ର୍ ବିସଇ ବଲି କଇରଇଲା ।

ପିତର ଜିସୁକେ ନାଜାନି ବଲି କଇବାଟା

(ମାଡିଉ ୨୬:୨୯-୩୦; ମାରକ୍ ୧୪:୨୪-୨୮; ଲୁକ୍ ୨୨:୫୫-୫୭)

୧୫ ସିମନ୍ ପିତର୍ ଆରି ଗଟେକ୍ ବିନ୍ ସିସ୍ ଜିସୁର୍ ପଚେ ପଚେ ଜାଇତେ ରଇଲାଇ । ବିନ୍ ସିସ୍ ବଡୁ ପୁଜାରିକେ ଜାନି ରଇଲା । ସେଟାର୍‌ପାଇ ଜିସୁର୍ ସଙ୍ଗ୍ ବଡୁ ପୁଜାରିର୍ ଡାଣ୍ଡେ ପୁରଲା । ୧୬ ମାତର୍ ପିତର୍ ବାଇରର୍ ଡିଆଗତିଲଗେ ଚିଆଅଇ ରଇଲା । ବଡୁ ପୁଜାରିକେ ଜାନିରଇଲା ସିସ୍ ଡାଣ୍ଡେ ବାଉଡି ଆସି ଡାଣ୍ଡୁର୍ ଡିଆଗତି ଲଗେ ଜାଗିରଇଲା । ଗତିଦାଙ୍ଗ୍‌ଡିକେ କଇକରି ପିତରକେ ବିତ୍‌ରେ ଡାକିନେଲା । ୧୭ ସେ ଡିଆଗତି ଜାଗି ରଇଲା ଗତିଦାଙ୍ଗ୍‌ଡି ସେବେଲା ପିତରକେ ପାଚାରଲା, “ତୁଇ ମିସା ଏ ଲକ୍‌ମନ୍‌ର୍ ବିତ୍‌ରେଅନି ଗଟେକ୍ ଲକ୍ ନଉସ୍ କି ?”

ପିତର୍ କଇଲା “ମୁଇ ତାର୍ ଲକ୍ ନଇ ।” ୧୮ ସିଦ୍ କଲାଜେ ଗତିଦାଙ୍ଗ୍‌ଡାମନ୍ ଆରି ଜାଗୁଆଲ୍‌ମନ୍ ଜଇଲାଗାଇକରି ଚାରିବେଡ୍‌ଡି ଚିଆଅଇ ଜଇ ଚେକ୍‌ଡେ ରଇଲାଇ । ପିତର୍ ମିସା ସେମନ୍‌ର୍ ସଙ୍ଗ୍ ଚିଆଅଇକରି ଜଇଚେକ୍‌ଡେ ରଇଲା ।

ଜିସୁକେ ବଡୁ ପୁଜାରିମନ୍‌ର୍ ପରସନ୍

(ମାଡିଉ ୨୬:୫୯-୬୨; ମାରକ୍ ୧୪:୫୫-୬୪; ଲୁକ୍ ୨୨:୬୪-୬୯)

୧୯ ଏଡ୍‌କି ବିତ୍‌ରେ ବଡୁ ପୁଜାରି ଜିସୁର୍ ସିସ୍‌ମନ୍‌ର୍ ବିସଇ ଆରି ଜିସୁ ସିକାଇଦେଲା ବିସଇ ସେମନ୍‌କେ ପାଚାର୍‌ବାଠ୍‌ଦାରଲା । ୨୦ ଜିସୁ ସେମନ୍‌କେ କଇଲା, “ମୁଇ ସବୁବେଲେ ଲକ୍‌ମନ୍‌ର୍ ଜାନ୍‌ଡେ ସିକାଇତେ ରଇଲି । ଆରି ଜିଉଦି ଲକ୍‌ମନ୍‌ର୍

ଉପାସନା ଗରେ ଆରି ମନ୍ଦିରତେଇ ସବୁ ଜିଉଦି ଲକ୍ମନ ରୁଣ୍ଡିରଇଲା ବେଲେ ସେମନ୍‌କେ ସିକାଇଲିଆଚି । କାଇଟାମିସା ଲୁଚ୍‌ତେ କଇନାଇ । ୨୧ ଏନ୍ତି ବଇଲେ କାଇକେ ମକେ ପାଚାରଲୁସିନି ? ଜନ୍ ଲକ୍ମନ ମୁଇ କଇଲା କାତା ସୁନିଆଚଡ଼, ସେ ଲକ୍ମନକେ ପାଚାର । ମୁଇ ଜାଇଜାଇଟା କଇଲିଆଚି, ସେଟା ସେମନ୍ ଜାନିଆଚଡ଼ ।”

୨୨ ଜିସୁ ଏ କାତା କଇବା ବେଲେ ଜିସୁର୍ ଲଗେ ଚିଆଅଇରଇଲା ଜାଗୁଆଲ୍‌ମନର୍ ବିଡ଼ରେଅନି ଗଟେକ୍ ଲକ୍ ଜିସୁକେ ଗଟେକ୍ ଚାପ୍‌ତା ମାରି କଇଲା, “ତୁଇ ବଡ଼ ପୁଜାରିକେ ଏନ୍ତାରି କାତା ଅଇଲୁସିନି ?”

୨୩ ଜିସୁ ତାକେ କଇଲା “ମୁଇ ଜଦି ବୁଲ୍ କାତା କଇରଇଲେ, ସବୁର୍ ମୁଆଟେ ମର୍ ବୁଲ୍ ଦେକାଆ, ମୁଇ ସଡ଼କାତା କଇଲିନି ବଇଲେ, ମକେ କାଇକେ ମାରଲୁସିନି ?” ୨୪ ତାର୍‌ପଟେ ଆନାନ୍ ଜିସୁକେ ବାନ୍‌ନେସେ ବଡ଼ ପୁଜାରି କାୟାପାର୍ ଲଗେ ପାଚାଇଦେଲା ।

ପିତର୍ ଜିସୁକେ ଆରି ତରକେ ନାଜାନି ବଲି କଇଲା

(ମାତିଉ ୨୬:୨୧-୨୫; ମାର୍କ ୧୪:୨୯-୩୨; ଲୁକ୍ ୨୨:୫୮-୬୨)

୨୫ ସିମନ୍ ପିତର୍ ଚିଆଅଇ ଜଇଚେକ୍‌ବା ବେଲେ ବିନ୍ ଲକ୍ମନ ତାକେ ପାଚାରଲାଇ, “ତୁଇ ମିସା ଏ ଲକ୍‌ର୍ ସିସ୍‌ମନର୍ ବିଡ଼ରେଅନି ଗଟେକ୍ ଲକ୍ ନଉଁସ୍ କି ?” ମାତର୍ ପିତର୍ କଇଲା,

“ନାଇ ମୁଇ ତାର୍ ସିସ୍ ନଇ ।”

୨୬ ବଡ଼ ପୁଜାରିର୍ ଗତିଦାଙ୍ଗ୍‌ତାମନର୍ ବିଡ଼ରେଅନି ଗଟେକ୍ ଲକ୍ ଜାକେ କି ପିତର୍ କାନ୍ କାଟିପାକାଇରଇଲା, ସେ ତାଟ୍ ସଙ୍ଗ୍ କଇଲା, “ସେ ବାଡେ ମୁଇ ତକେ ତାର୍ ସଙ୍ଗ୍ ରଇଲାଟା ଦେକି ରଇଲି ।”

୨୭ ପିତର୍ ଆରି ତରେକ୍ କଇଲା “ନାଇ ମୁଇ ତାକେ ମୁଲ୍‌କେ ନାଜାନି ।” ସମାନ୍ ସେଡ଼କି ଦାପ୍‌ରେ କୁକ୍‌ତା ଡାକ୍‌ଲା ।

ପିଲାତର୍ ଲଗେ ଜିସୁକେ ନେଲାଇ /

(ମାତିଉ ୨୭:୧-୨, ୧୧-୧୪; ମାର୍କ ୧୫:୧-୫; ଲୁକ୍ ୨୩:୧-୫)

୨୮ ତାର୍ ପଟେ ଜିସୁକେ କାୟାପାର୍ ଗରେଅନି ରମିୟ୍ ସର୍କାର୍ ପିଲାତର୍‌ତେଇ ଦାରିଗାଲାଇ । ସେଟା କୁକ୍‌ତା ତାକେ ଅଇରଇଲା । ଆରି ଜିସୁକେ ନିନ୍ଦା କର୍‌ବା ଲକ୍ମନ ନିଜ୍‌କେ ଅସୁକଲ୍ ଅଇବାର୍ ଅଇସି ବଲିକରି ବିଡ଼ରେ ଜାଅଡ଼ନାଇ । କାଇକେ ବଇଲେ ନିସ୍‌ତାର୍ ପରବର୍ ବଜିର୍ ପାଇ ବଲି ସେମନ୍ ଅସୁକଲ୍ ଅଇବାକେ ମନ୍ ନ କର୍‌ତେରଇଲାଇ । ୨୯ ତେବେ ରମିୟ୍ ସର୍କାର୍ ପିଲାଡ଼, ବାଇରେ ଆସିପାଚାରଲା, “ଏ ଲକ୍‌ର୍ ବିରୁଦେ ତମର୍ କାଇ ଦାବି ଆନିଆଚାସ୍ ?”

୩୦ ସେ ଲକ୍ମନ ପିଲାଡ଼କେ କଇଲା, “ଏ ଲକ୍ ଜଦି ବୁଲ୍ କାମ୍ କରି ନ ରଇଲେ, ଆମେ ତମର୍ ଲଗେ ନ ଆନ୍‌ତୁ ।” ୩୧ ସେଡ଼କି ବେଲା ପିଲାଡ଼ ସେମନ୍‌କେ କଇଲା, “ତମେ ତାକେ ଦାରିଜାଇକରି ତମର୍ ନିୟ୍‌ମ୍ ଇସାବେ ବିଚାର୍ କରା ।” ଜିଉଦି ନେତାମନ୍ କଇଲା, “ଗଟେକ୍ ଲକ୍‌କେ ମରନ୍ ତଣ୍ ଦେବାଟା ରମିୟ୍ ସର୍କାର୍‌କେ ସେ ଆଟେ । ଜିଉଦି ଲକ୍ମନ କାକେମିସା ମରନ୍ ତଣ୍ ଦେବାକେ ଆମର୍ ଅଦିକାର୍ ନାଇ ।” ୩୨ ଧିସୁ କେନ୍ତାରି ଅଇ ମର୍‌ବାକେ ଗାଲାନି ସେ ବିସଇ ନେଇକରି ଜନ୍ କାତା କଇରଇଲା ସେ କାତା ସିଦ୍‌ଅଇବାକେ ଏନ୍ତି ଅଇଲା ।

୩୩ ପିଲାଡ଼ ଆରି ତରେକ୍ ମେଡ଼ ବିଡ଼ରେ ବାଉଡ଼ି ଜାଇକରି, ଜିସୁକେ ଡାକି ପାଚାରଲା, “ତୁଇ କାଇ ଜିଉଦି ମନର୍ ରାଜା କି ?”

୩୪ ଜିସୁ ତାକେ କଇଲା, “ତୁଇ କାଇ ଏଟା ନିଜରଟାନେଅନିସେ କଇଲୁସ୍‌ନି, କି ବିନ୍ ଲକ୍‌ମନ୍ ତକେ କଇଲାଜେ କଇଲୁସ୍‌ନି ?”

୩୫ ପିଲାଡ଼ ପରସନ୍ କଲା, “ମୁଇ ଗଟେକ୍ ଜିଉଦି ଲକ୍ ବଲି ବାବ୍‌ଲୁସ୍‌ନି କି ? ତର ନିଜର ଲକ୍‌ମନ୍ ଆରି ମୁକିଅ ପୁଜାରିମନ୍ ତକେ ମରଟାନେ ସର୍ପି ଦେଇ ଆତଡ଼ । ତୁଇ କାଇ ବୁଲ୍ କରିଆରୁସ୍ ?” ୩୬ ଜିସୁ କଇଲା “ମର୍ ରାଇଜ୍ ଏ ଦୁନିଆର୍ ରାଇଜ୍‌ପାରା ନର୍ଏ । ଜଦି ମର୍ ରାଇଜ୍ ଏ ଦୁନିଆର୍ ରାଇଜ୍ ପାରା ଅଇତା, ସେନ୍ତାଆଲେ ମର୍ ସିସ୍‌ମନ୍ ମର୍‌ବାଟେ ଅଇ ଜୁଇଦ୍ କର୍ତାଇ । ଆରି ମକେ ଜିଉଦି ନେତାମନର୍ ଟାନେ ସର୍ପି ନ ଦେଇତାଇ । ମାତର୍ ମର୍ ରାଇଜ୍ ଏ ଦୁନିଆର୍ ରାଇଜ୍‌ପାରା ନର୍ଏ ।” ୩୭ ସେବେଲେ ପିଲାଡ଼ ତାକେ ପାଚାରଲା, “ଏନ୍ତି ବଇଲେ ତୁଇ କାଇ ଗଟେକ୍ ରାଜା ନଉଁସ୍ କି ?” ଜିସୁ କଇଲା, “ତୁଇସେ ମକେ ରାଜା ବଲି କଇଲୁସ୍‌ନି । ମୁଇ ସଡ଼ ବାଟେ ସାକି ଦେବାକେ ଆକା ଜନମ୍ କରି, ଏ ଦୁନିଆଇ ଆସିଆତି । ଜନଲକ୍‌ମନ୍ ସଡ଼ କଇଲାଜନି, ସେମନ୍‌ସେ ମର୍ କାତା ସୁନ୍‌ବାଇ ।”

୩୮ ପିଲାଡ଼ ଜିସୁକେ କଇଲା “ଏନ୍ତି ବଇଲେ ସଡ଼ ବିସଇ କାଇଟା ?” ପଟେ ସେ ତାଣ୍ଡେ ବାରଇ କରି ଜିଉଦି ନେତାମନ୍‌କେ କଇଲା, “ଏ ଲକ୍‌ରଟାନେ ଡଣ୍ଡ ଦେବା ଏଡ଼କି କାଇ ଦସ୍ ଦେକିନାଇ ।

ଜିସୁକେ ମରନ୍ ଡଣ୍ଡ ପାଇ ଆଦେସ୍ ଆଇଲା  
(ମାତିଉ ୨୭:୧୫-୩୧; ମାର୍କ ୧୫:୨-୨୦; ଲୁକ୍ ୨୩:୧୩-୨୫)

୩୯ “ତମର୍ ରିତିନିତି ଇସାବେ ନିସ୍‌ତାର୍ ପରବ୍ ବେଲେ ଗଟେକ୍ ବନ୍ଦି ଲକ୍‌କେ, ମୁଇ ମୁକ୍‌ଲାଇବାର୍ ଆଟେ । ତେବର୍ ପାଇ ତମର୍ ଜିଉଦିମନର୍ ରାଜା ଜିସୁକେ ମୁଇ ମୁକ୍‌ଲାଇ ଦେବି । ଏଟା ତମେ ମନକଲାସ୍‌ନି କି ?” ୪୦ ମାତର୍ ଲକ୍‌ମନ୍ ଆଉଲିଅଇକରି କଇଲା, “ନାଇ ଏ ଲକ୍‌କେ ନାଇ, ମାତର୍ ବାବ୍‌ବାକେ ମୁକ୍‌ଲାଇ ଦିଆସ୍ ।” ଏ ବାରବ୍‌ବା ଗଟେକ୍ ତାକୁ ଲକ୍ ରଇଲା ।

## ୧୯

୧ ତାର୍ ପଟେ ପିଲାଡ଼ ଜିସୁକେ ନେଇ କର୍ତା ସଙ୍ଗ୍ ମାରା ବଲି ଆଦେସ୍ ଦେଲା । ୨ ସନିଅମନ୍ କାଟାର୍ ମୁକୁଟ୍ ତିଆର୍ କରି ଜିସୁର୍ ମୁଣ୍ଡେ ପିନ୍ଧାଇଲା ଅରି ଜାମ୍‌କଲି ରଙ୍ଗର୍ ପଟିଆ ଗାଗ୍‌ଡେ ପିନ୍ଧାଇଦେଲା । ୩ ସେମନ୍ ଜିସୁର୍ ଲଗେ ଆସିକରି କଇଲା “ଏ ଜିଉଦିମନର୍ ରାଜା ଜୁଆର୍ ! ତୁଇ ବେସି ବରସ୍ ବର୍ଡ଼ !” ବଲି ତାକେ ଚାପଡ଼ ଚାପଡ଼ ମାରଲା ।

୪ ପିଲାଡ଼ ଆରି ତରେକ୍ ତାଣ୍ଡେ ବାରଇକରି ରୁଣ୍ଡିରଇଲା ଲକ୍‌ମନ୍‌କେ କଇଲା, “ଦେକା, ଏବେ ମୁଇ ତାକେ ଦସି କର୍‌ବାକେ କାଇ ବୁଲ୍‌କଲାଟା ମିଲେନାଇ । ଏଟାପାଇ ତମର୍ ଲଗେ ଆନ୍‌ବି । ଜେନ୍ତିକି ତମେ ଜାନ୍‌ବାର୍ ଆଟେ ।” ୫ ସେବେଲା ଜିସୁ କାଟାର୍ ମୁକୁଟ୍ ଆରି ଜାମ୍‌କଲି ରଙ୍ଗର୍ ପଟିଆ ପିନ୍ଧି ତାଣ୍ଡେ ଆଇଲା । ପିଲାଡ଼ ସେମନ୍‌କେ କଇଲା, “ଏଦେ ଦେକା ! ଏଦେ ସେ ଲକ୍ !”

୬ ତାକେ ଦେକଲା ଦାପ୍‌ରେ ମୁକିଅ ପୁଜାରିମନ୍ ଆରି ମନ୍ଦିର୍ ଜାଗୁଆଲ୍‌ମନ୍ ଆଉଲିଅଇକରି କଇଲା, “ତାକେ କୁରୁସେ ଚଗାଆ ! ତାକେ କୁରୁସେ ଚଗାଆ !” ବଲି । ପିଲାଡ଼ କଇଲା, “ତମେ ତାକେ ନେଇକରି କୁରୁସେ ଚଗାଆ, କାଇକେ ବଇଲେ, ମୁଇ ତାରଟାନେ କାଇ ବୁଲ୍ ମିସା ଦେକିନାଇ ।”

୭ ଜିଉଦି ନେତାମନ୍ ତାକେ କଇଲା, “ଆମର୍ ଗଟେକ୍ ନିୟମ୍ ଆଟେ । ସେ ନିୟମ୍ ଇସାବେ ଏ ମର୍‌ବାର୍ ଆଟେ ଆକା । କାଇକେ ବଇଲେ ସେ ନିଜେ ମୁଇ ପର୍‌ମେସରର୍ ପିଲା ବଲି ଦାବି କଲାଆଟେ ।”

୮ ତେଜ ପିଲାଟୁ ଏ କାତା ସୁନିକରି ଅଦିକ୍ ଡରିଗାଲା । ୯ ପିଲାଟୁ ଜିସୁକେ ଆରିତରେକ୍ ତାର୍ ମେତେ ବାଉଡାଇ ନେଇ ପାଟାରଲା, “ତୁଇ କନ୍ତିଅନି ଆସିଆରୁସ୍ ?”

ମାତର୍ ଜିସୁ ତାକେ ପଦେକ୍ ମିସା କଏନାଇ । ୧୦ ସେବେଲାଇ ପିଲାଟୁ ତାକେ କଇଲା, “ତୁଇ କାଇ ମର୍ ସଙ୍ଗ୍ କାତା ନ ଅଉସ୍ କି ? ତକେ ମୁକ୍ଲାଇବାର୍ ମର୍ ଅଦିକାର୍ ଆଚେ ଆରି କୁରସେ ଚଗାଇବାର୍ ମିସା ମର୍ ଅଦିକାର୍ ଆଚେ । ଏଟା ତୁଇ ନାଜାନୁସ୍ କି ?”

୧୧ ଜିସୁ ତାକେ କଇଲା, “ପର୍ମେସର୍ ତକେ ଦେଲାକେସେ ମର୍ ଉପ୍ରେ ତର୍ ଅଦିକାର୍ ଆଚେ, ମାତର୍ ତର୍ଗାନେ ମକେ ଜେ ସର୍ପି ଦେଲାଆଚେ, ତାର୍ ପାପ୍ ଅଦିକ୍ ଜବର୍ ।” ୧୨ ଏ କାତା ସୁନି ପିଲାଟୁ ଜିସୁକେ ମୁକ୍ଲାଇବାକେ ଚେସ୍ଟା କଲା । ମାତର୍ ଜିଉଦି ଲକ୍ମନ୍ ଆଉଲିଅଇ କଇଲାଇ, “ତୁଇ ଜଦି ଆକେ ମୁକ୍ଲାଇସୁ ବଇଲେ, ସମ୍ବାର୍ଟର୍ ମଇତର୍ ନଉସ୍ । ଜେ ନିଜ୍ଜକେ ରାଜା ବଲି ଦାବି କର୍ସି, ସେ ତାର୍ ବିରଦେ କଇଲାନି ।”

୧୩ ପିଲାଟୁ ଜିଉଦି ନେତାମନର୍ଗାନେଅନି ଏ କାତା ସୁନିକରି ଜିସୁକେ ବାର୍କରାଇ ଆନି ପାକ୍ନାଇ ତିଆର୍ ଅଇରଇଲା ବିଚାର୍ କର୍ବା ମଣ୍ଡପେ ବସ୍ଲା । ଜନ୍ଟାକି ଇବ୍ରୁ ବାସାଇ ଗବ୍‌ବତା ବଲି କଇବାଇ । ୧୪ ସେଦିନେ ନିସ୍ତାର୍ ପରବର୍ ପାଇ ତିଆର୍ ଅଇବା ଦିନ୍ ରଇଲା । ସେଟା ସେଦିନର୍ ଆଡ୍‌ବେଲାଇ ଅଇ ଆଇତେ ରଇଲା । ଆରି ପିଲାଟୁ ଜିଉଦିନେତାମନକେ କଇଲା, “ଏଦେ ଦେକା ! ତମର୍ ରାଜା !”

୧୫ ସେବେଲାଇ ଜିଉଦି ଲକ୍ମନ୍ ଆଉଲିଅଇ କଇଲାଇ “ତାକେ ମରାଆ !

“ତାକେ ମରାଆ ! କୁରସେ ଚଗାଆ !” ପିଲାଟୁ ସେମନକେ କଇଲା,

“ମୁଇ ତମର୍ ରାଜାକେ କୁରସେ ଚଗାଇବି କି ?” ଏଟା ସୁନି ମୁକ୍ତିଅ ପୁଜାରିମନ୍ କଇଲାଇ, “ସମ୍ବାର୍ଟକେ ଚାଡ଼ିକରି ଆମର୍ ଆରି କେ ରାଜା ନାଇ ।”

୧୬ ସାରାସାରି ପିଲାଟୁ ଜିସୁକେ ସେମନର୍ ମନ୍ କଲା ଇସାବେ କୁରସେ ଚଗାଇ ମରାଇବାକେ ସର୍ପିଦେଲା । ତାର୍‌ପଟେ ସନିଅମନ୍ ଜିସୁକେ ଦାରିଗାଲାଇ ।

ଜିସୁକେ କୁରସେ ଚଗାଇଲାଇ

(ମାତିଉ ୨୭:୩୨-୪୪; ମାର୍କ ୧୫:୨୧-୩୨; ଲୁକ୍ ୨୩:୨୬-୪୩)

୧୭ ଜିସୁ ତାର୍ ନିଜର୍ କୁରସ୍ ବଇକରି ନଅରର୍ ବାଇରେ ରଇବା କାପାଲ୍ ନାଉଁର୍ ଜାଗାଇ ଗାଲା । ଏଦ୍ରି ବାସାଇ ସେ ଜାଗାକେ ଗଲ୍‌ଗାତା ବଲି କଇବାଇ । ୧୮ ତେଜ ସେମନ୍ ଜିସୁକେ କୁରସେ ଚଗାଇଲାଇ । ତାର୍ ସଙ୍ଗ୍ ଦୁଇ ଲକ୍ମକେ ମିସା କୁରସେ ଚଗାଇଲାଇ । ଦୁଇ ଲକ୍ମକେ ଦୁଇବାଟେ ଚଗାଇ ଜିସୁକେ ମଜାଇ କଲାଇ । ୧୯ ଆରି ପିଲାଟୁ ନିଜେ ଗଟେକ୍ ବରଡ୍ ଲେକି କୁରସେ ଅଲାଇବାକେ ଆଦେସ୍ ଦେଲା । ସେ ବରଡ୍‌ତେଜ ନାଜରିତିୟ୍ ଜିସୁ, ଜିଉଦିମନର୍ ରାଜା ବଲି ଲେକିରଇଲା । ୨୦ ଜିସୁକେ ଜନ୍ ଜାଗାଇ କୁରସେ ଚଗାଇ ରଇଲାଇ, ସେଟା ଗତେ ଅନି ବେସି ଦୁର୍ ନ ରଇଲା । ସେ ବରଡେ ଏଦ୍ରି ବାସାଇ, ଲାଟିନ୍ ବାସାଇ ଆରି ଗିରିକ୍ ବାସାଇ ଲେକାଅଇରଇଲା । ବେସି ଲକ୍ମନ୍ ତେଜ ଲେକ୍‌ଲାଟା ପଡ଼ିଲାଇ । ୨୧ ସେବେଲା ଜିଉଦିମନର୍ ମୁକ୍ତିଅ ପୁଜାରିମନ୍ ପିଲାଟୁକେ କଇଲାଇ “ଜିଉଦିମନର୍ ରାଜା ବଲି ନ ଲେକି, ସେ ନିଜେ ମୁଇ ଜିଉଦିମନର୍ ରାଜା ବଲି କଇଲା ପାରା ଲେକ୍ ।”

୨୨ ପିଲାଟୁ କଇଲା “ନାଇ ମୁଇ ଜନ୍ଟା ଲେକ୍‌ଲି ଆଟି ସେଟା ଆରି ନ ବାଦ୍‌ଲାଇ ।”

୨୩ ଜିସୁକେ କୁରସେ ଚଗାଇଲା ପଟେ, ଚାର୍ଟା ସନିଅମନ୍ ତାର୍ ପଟିଆ ନେଇ ଚାରି ବାଗ୍ କଲାଇ । ସବୁ ସନିଅମନ୍‌କେ ଗଟେକ୍ ଗଟେକ୍ ବାଗ୍ ମିଲ୍‌ଲା । ସେମନ୍ ଜିସୁ ଉପ୍ରେ ପିନ୍‌ବା ବସ୍‌ତର୍ ମିସା ବେଟ୍‌ଲାଇ । ସେ ବସ୍‌ତର୍ ସିଲାଇ ନ

ଅଇ ଉପରେଅନି ତଲେ ଜାକ ଗଟେକ୍‌ସେ ରଇଲା । ୨୪ ସେଟାର୍‌ପାଇ ସେମନ୍ ନିଜର୍ ନିଜର୍ ବିତ୍‌ରେ କାତା ଅଇଲା । “ଆମେ ଏ ପଟିଆ ନ ଚିରିକରି ଏଟା କାକେଅଇସି ବଲି ଜାନ୍‌ବାକେ କେଡ଼ ପୁଟାଉଁ ।” ଜେଡ୍‌କି ସାସ୍‌ତରେ ଲେକାଅଇଲା କାତା ସିଦ୍ ଅଇବାକେ ଏନ୍ତି ଅଇଲା । “ମର୍ ପଟିଆ ସେମନ୍ ନିଜର୍ ନିଜର୍ ବିତ୍‌ରେ ବାଟା କଲା, ଆରି ମୁଇ ପିନ୍‌ବା ପଟିଆର୍ ପାଇ କେଡ଼ପୁଟାଇଲା ।” ସେଟାସେ ସନିଅମନ୍ କଲା । ୨୫ ଜିସୁର୍ କୁରସ ଲଗେ ତାର୍ ଆୟା ମରିୟମ୍, ତାର୍ ଆୟାର୍ ବଇନି, କଲ୍‌ପାର୍ ମାଇଜି ମରିୟମ୍ ଆରି ମଗ୍‌ଦଲିନି ମରିୟମ୍ ଚିଆଅଇ ରଇଲା । ୨୬ ଜିସୁ ବେସି ଆଲାଦ୍ କର୍‌ବା ଗଟେକ୍ ସିସ୍ ତାର୍ ମାଆର୍ ଲଗେ ଚିଆ ଅଇରଇଲାଟା ଦେକି ଜିସୁ ତାର୍ ମାକେ କଇଲା, “ଏଦେ ଦେକା ! ତର୍ ପଅ !”

୨୭ ତାର୍ ପଚେ ସେ ସିସ୍‌କେ କଇଲା “ଏଦେ ଦେକା ! ତର୍ ଆୟା !” ସେଦିନେ ଅନି ସେ ସିସ୍ ଜିସୁର୍ ମାକେ ନିଜର୍ ଗରେ ଡାକିନେଲା ।

**ଜିସୁର୍ ମରନ୍**

(ମାତିଉ ୨୭:୪୫-୫୬; ମାର୍କ ୧୫:୩୩-୪୧; ଲୁକ୍ ୨୩:୪୪-୪୯)

୨୮ ଏଡ଼କି ବିତ୍‌ରେ ଜିସୁ ସବୁ ବିସଇ ପୁରାପୁରୁନ୍ ଅଇଲାଟା ଜାନିପାରଲା, ମାତର୍ ସାସ୍‌ତରର୍ ବବିସଡ଼ କାତା ପୁରା କର୍‌ବାପାଇ ସେ କଇଲା “ମକେ ସସ୍ କଲାନି ।”

୨୯ ତେଇ ଗଟେକ୍ ନକିଟାନେ ଚପରା ଅଙ୍ଗୁର୍ ରସ୍ ରଇଲା । ସନିଅମନ୍ ଗଟେକ୍ ସୁତାର୍ ଗର୍‌ଣ୍ଡା ଚବାଲ୍‌ଲା ଅରି ତେଙ୍ଗ୍ ସୁଲ୍‌ଡାଙ୍ଗ୍ ଚିପେ ବାନ୍ତି ଜିସୁର୍ ଟଣ୍‌ଲଗେ ଲାମାଇଦେଲା । ୩୦ ଜିସୁ ସେଟା କାଇକରି “ସାରିଗାଲାବେ ! ” ବଲି କଇଲା । ଏଡ଼କି କଇକରି ତାର୍ ଆଡ଼ମା ସର୍‌ପିଦେଲା ।

**ଜିସୁକେ ପାଞ୍ଜିରା ତଲେ କାଁର୍‌ଲା**

୩୧ ସେଦିନ୍ ନିସ୍‌ତାର୍ ପରବର୍ ନିଉତା ଦିନ୍ ରଇଲାଜେ, ମଲା ଗାଗଡ଼ କୁରସ ଉପରେ ନ ରଏ, କାଇକେବଇଲେ ସେ ଦିନ୍ ବିସ୍‌ରାମ୍‌ବାର୍‌ର୍ ସୁକଲ୍ ଦିନ୍ ରଇଲା । ସେଟାର୍‌ପାଇ କୁରସେ ରଇବା ତିନ୍‌ଲକର୍ ଗଡ଼ ବାଙ୍ଗାକକରି ଦିନ୍ ଜାଗାଇ ନେଅଡ଼ ବଲି ଜିଉଦିଲକ୍‌ମନ୍ ପିଲାଡ଼କେ ଗୁଆରି କଲା । ୩୨ ସେଟାର୍‌ପାଇ ସନିଅମନ୍ ଜାଇ ଜିସୁର୍ ସଙ୍ଗ୍ ଚଗାଇଅଇରଇବା ଆରି ଦୁଇଲକର୍ ଗଡ଼ ବାଙ୍ଗାକଦେଲା । ୩୩ ମାତର୍ ଜେଡେବେଲା ସେମନ୍ ଜିସୁର୍ ଲଗେ ଆସି ଦେକ୍‌ଲାକେ, ସେ ମରିଜାଇରଇଲା । ସେଟାର୍‌ପାଇ ସେମନ୍ ତାର୍ ଗଡ଼ ବାଙ୍ଗାଅଡ଼ ନାଇ । ୩୪ ମାତର୍ ଗଟେକ୍ ସନିଅ ଚେଲ୍ ସଙ୍ଗ୍ ତାର୍ ପାଞ୍ଜିରା ତଲେ ବୁସ୍‌ଲା ଦାପରେ ବନି ଆରି ପାନି ବାରଇଲା । ୩୫ ଏଟା ଜେ ଦେକି ରଇଲା, ସେ ଏ ସାକି ଦେଲାଆଚେ । (ସେଟାର୍ ପାଇ ତମେ ମିସା ବିସ୍‌ବାସ୍ କରା । ତାର୍ ସାକିଦେଲାଟା ସଡ଼ସେ । ଆରି ସେ ସଡ଼କାତା କଇଲା ଆଚେ ବଲିକରି ନିଜେ ବିସ୍‌ବାସ୍ କର୍‌ସୁ ।) ୩୬ କାଇକେବଇଲେ ସାସ୍‌ତରର୍ ଏ ବାକିଅ ପୁରାପୁରୁନ୍ ଅଇବାପାଇ ବଲି ଏ ସବୁ ବିସଇ ଗର୍‌ଲା, “ତାର୍ ଗଟେକ୍ ଆଡ଼ ମିସା ନ ଚିଲ୍‌ପେ ।” ୩୭ ଧର୍‌ପରମେସରର୍ ସାସ୍‌ତରେ ଆରି ଗଟେକ୍ ବାକିଅ ଏଣ୍ଡାରି ଆଚେ ଜାକେ ସେମନ୍ ବୁସ୍‌ଲାକିଆତଡ଼, ତାକେ ଦେକ୍‌ବାଇ ଆରି ତାର୍ ବାଟେସେ ଦେକ୍‌ତେ ରଇବାଇ ।

**ଜିସୁର୍ ସମାଦି**

(ମାତିଉ ୨୭:୫୭-୬୧; ମାର୍କ ୧୫:୪୨-୪୬; ଲୁକ୍ ୨୩:୫୦-୫୬)

୩୮ ଏ ସବୁ ଗର୍‌ନା ଅଇଲା ପଚେ ଆରାମାତିଆ ଗଡ଼ର୍ ଜସେପ୍ ନାଉର୍ ଗଟେକ୍ ଲକ୍ ପିଲାଡ଼କେ ଜିସୁର୍ ଗାଗଡ଼ ମାଙ୍ଗ୍‌ଲା । ଜସେପ୍ ଜିସୁର୍ ସିସ୍ ରଇଲା । ମାତର୍ ସେ ଜିଉଦି ନେତାମନ୍‌କେ ଡରିକରି ଜାନାଇ ନ ଅଇ ରଇତେ ରଇଲା । ପିଲାଡ଼ ଜସେପ୍‌କେ ଜିସୁର୍ ଗାଗଡ଼ ନେ ବଇଲାକେ, ସେ ଜିସୁର୍ ମଲାଗାଗଡ଼ ଦାରି ଗାଲା

☆ ୧୯:୩୭ ୧୯:୩୭ ପଢ଼କାସିତ ୧:୭

। ୩୯ ନିକଦିମ ମିସା ଜସେପର୍ ସଙ୍ଗ ଗାଲା । ଏ ନିକଦିମ ଗଟେକ ରାତି ଜିସୁକେ ମିସ୍‌ବାର୍ ଜାଇରଇଲା । ସେ ଜିସୁର୍ ଗାଗଡ଼େ ଲାଗାଇବାକେ ଗନ୍‌ରସ୍ ଆରି ଅଙ୍ଗୁର୍ ମିସାଇଲା ବାସ୍ନା ଚିକନ୍ ତିରିସ୍ କେଜି ଆନିରଇଲା । ୪୦ ସେମନ୍ ଦୁଇ ଲକ୍ ମିସକରି ଜିଉଦିମନର୍ ରିତିନିତି ଇସାବେ ଜିସୁର୍ ଗାଗଡ଼ ନେଇ ବାସ୍ନା ଦିନ୍‌ସୁ ସଙ୍ଗ, ତେଙ୍ଗ ପଟିଆ ଗୁଡ଼ିଆଇ ଦେଲାଇ । ୪୧ ତାକେ ଜନ୍ ଜାଗାଇ କୁର୍ସେ ଚଗାଇ ରଇଲାଇ, ସେ ଜାଗାଇ ଗଟେକ୍ ବାଡ଼ ରଇଲା । ଆରି ସେ ବାଡ଼େ ମଲା ଲକ୍‌ମନ୍‌କେ ସଙ୍ଗଇବାକେ ଗଟେକ୍ ନୁଆ ପାଆର୍ ରଇଲା । ସେ ପାଆରେ କେବେ ମିସା କାକେ ନ ସଙ୍ଗଇ ରଇଲାଇ । ୪୨ ବିସ୍‌ରାମ୍ ବାରର୍ ନିଉଡା ଦିନ୍ ଅଇରଇଲା ଆରି ସେ ପାଆର୍ ଲଗେ ରଇଲା ଜେ, ସେମନ୍ ଜିସୁର୍ ଗାଗଡ଼ ନେଇକରି ସେ ପାଆରେ ସଙ୍ଗଇଦେଲାଇ ।

### ୨୦

#### ତୁଟା ପାଆର୍

୧ ଆଗର୍ ପର୍‌ତୁମ୍ ଦିନର୍ ସାକାଲେ ଜୁଲ୍‌ପୁଲ୍ ଉଜଲ୍ ବେଲାଇ ମଗ୍‌ଦଲିନି ମରିୟମ୍ ଜିସୁକେ ପାକନା ସଙ୍ଗ ତିଆର୍ କରି ସଙ୍ଗଇଲା ପାଆରେ ଆସିକରି ଡାବିରଇଲା ପାକନା ଗୁଡ଼ିରଇଲାଟା ଦେକ୍‌ଲା । ୨ ସେଟାପାଇ ସେ ପାଲାଇ କରି ସିମନ୍ ପିତର୍ ଆରି ଜିସୁ ଜନ୍ ସିସ୍‌କେ ବେସି ଆଲାଦ୍ କର୍ତ୍ତେ ରଇଲା, ସେମନ୍‌କେ ଆସି କଇଲା, “ସେମନ୍ ମାପୁରୁକେ, ସଙ୍ଗଇଲା ଜାଗାଇଅନି ଦାରିଗାଲାଇ ଆଚଡ଼ । ଆରି ତାକେ କନ୍ ଜାଗାଇ ସଙ୍ଗଇଲାଇ ଆଚଡ଼ ସେଟା ଆମେ ନାଜାନୁ ।”

୩ ସେଡ଼କି ବେଲେ ପିତର୍ ଆରି ସେ ସିସ୍, ଜିସୁକେ ସଙ୍ଗଇଲା ଜାଗାଇ ଜିବାକେ ବାରଇଲାଇ । ୪ ସେମନ୍ ଦୁଇ ଲକ୍ ମିସ୍‌ତେ ପାଲାଇତେ ରଇଲାଇ । ଆରି ସେ ବିନ୍ ସିସ୍ ପିତର୍‌କେ ପଚେ କରି ଆଗତୁ ସଙ୍ଗଇ ରଇଲା ଜାଗାଇ କେଟ୍‌ଲା । ୫ ସେ ପାଆର୍ ବିଡ଼ରେ ଲକ୍‌କରି ଏରି ଦେକ୍‌ଲାଜେ, ଏଦେ ଦେକା ! ତେଇ ଜିସୁର୍ ଗାଗଡ଼େ ଗୁଡ଼ିଆଇ ଅଇରଇଲା ଲୁଗା ଅଦ୍‌ରିରଇଲାଟା ଦେକ୍‌ଲା । ମାତର୍ ସେ ବିଡ଼ରେ ପୁରେନାଇ । ୬ ପଚେ ସିମନ୍ ପିତର୍ ମିସା ତାର୍ ପଚେ ପଚେ ଜାଇ କେଟ୍‌ଲା ଆରି ପାଆର୍ ବିଡ଼ରେ ଜାଇ ତେଇ ଅଦ୍‌ରି ରଇଲା ଲୁଗା ଦେକ୍‌ଲା । ୭ ଆରି ଜିସୁର୍ ମୁଣ୍ଡେ ଜନ୍ ଲୁଗା ଗୁଡ଼ିଆଇ କରି ବାନ୍ଦିରଇଲାଇ, ସେଟା ପାତଲ୍ ଲୁଗା ସଙ୍ଗ ନ ଅଇକରି ଗଟେକ୍ ବିନ୍‌ଗାନେ ଗୁଡ଼ିଆଇଅଇ ରଇଲା । ୮ ତାର୍ ପଚେ ସେ ବିନ୍ ସିସ୍ ଜେକି ଆଗତୁ କେଟି ରଇଲା ସେ ପାଆର୍ ବିଡ଼ରେ ଜାଇକରି ସେଟା ସବୁ ଦେକିକରି ବିସ୍‌ବାସ୍ କଲା । ୯ (ସେ ସିସ୍‌ମନ୍ ସେ ବେଲା ଜାକ ପର୍‌ମେସରର୍ ବଇତେଇ ଲେକା ଅଇଲା ଇସାବେ, ଜିସୁ ମଲାଟାନେଅନି ଆରି ତରେକ୍ ଜିବନ୍ ଅଇ ଉଟ୍‌ସି ବଲି ବୁଜି ନ ରଇଲାଇ ।) ୧୦ ତାର୍ ପଚେ ସିସ୍‌ମନ୍ ପାଆର୍ ଦେକି ସାରାଇ ଗରେ ବାଉଡ଼ି ଉଟି ଗାଲାଇ ।

ମଗ୍‌ଦଲିନି ମରିୟମ୍‌କେ ଜିସୁ ଦେକାଇଅଇଲାଇ

(ମାତିଉ ୨୮:୯-୧୦; ମାର୍କ ୧୬:୯-୧୧; ଲୁକ୍ ୨୪:୧-୧୨)

୧୧ ମାତର୍ ମରିୟମ୍ ଜିସୁର୍ ଗାଗଡ଼ ସଙ୍ଗଇରଇଲା ପାଆର୍ ଲଗେ ଚିଆଅଇ କାନ୍‌ତେ ରଇଲା । ସେ କାନ୍ଦି କାନ୍ଦି ଲକ୍‌କରି ପାଆର୍ ବିଡ଼ରେ ଦେକ୍‌ଲା, ୧୨ ଆରି ଏଦେ ଦେକା ! ତେଇ ଦବ୍‌ପଟିଆ ପିନ୍ଦିରଇବା ଦୁଇଟା ସରଗର୍ ଦୁଡ଼ମନ୍ ଜିସୁକେ ଜନ୍ ଜାଗାଇ ସଙ୍ଗଇରଇଲାଇ, ଗଟେକ୍ ଲକ୍ ମୁଣ୍ଡିବାଟେ ଆରିଗଟେକ୍ ଲକ୍ ଗଡ଼ବାଟେ ବସିରଇଲାଟା ଦେକ୍‌ଲା । ୧୩ ସେମନ୍ ମରିୟମ୍‌କେ ପାଚାରିଲାଇ, “ତୁଇ କାଇକେ ମା କାନ୍‌ଲୁସିନି ?” ମରିୟମ୍ କଇଲା, “ ସେମନ୍ ମର୍ ମାପୁରୁ ଗାଗଡ଼ କେନେକି ଦାରିଗାଲାଇ ଆଚଡ଼ । ଆରି ସେମନ୍ ତାକେ କନ୍ତି ସଙ୍ଗଇଲାଇ ଆଚଡ଼

☆ ୧୯:୩୯ ୧୯:୩୯ ଜଅନ୍ ୩:୧,୨



ସେଟା ମୁଇ ନାଜାନି ।” ୧୪ ସେ ଏନ୍ତ୍ର କଇକରି ପାସଲୁଲା ବେଲେ, ତେଇ ଜିସୁ ଚିଆଅଇ ରଇଲାଟା ଦେକ୍ଲା । ମାତର୍ ମରିୟମ୍ ତାକେ ଜିସୁ ବଲି ଚିନି ନାପାରଲା । ୧୫ ଜିସୁ ତାକେ ପାଚାରୁଲା “ଏ ମାଆ ତୁଇ କାଇକେ କାନ୍ଦୁଲୁସି ? ତୁଇ କାକେ କଜୁଲୁସି ?” ମରିୟମ୍ ଏ ଲକ୍ ବାତର୍ କାମ୍ କରୁ ମାଲି ବଲି ବାବିକରି ତାକେ କଇଲା, “ଏ ଆଗିଆଁ, ତୁଇ କାଇ ଜିସୁର୍ ଗାଗଡ଼ ନେଇ ଆତୁସ୍ କି ? ତାକେ ତୁଇ କନ୍ତି ସଙ୍ଗଇ ଆତୁସ୍ ? ମକେ କଇଦେ, ମୁଇ ଜାଇକରି ତାକେ ଦାରିଜିବି ।”

୧୬ ଜିସୁ ତାକେ “ମରିୟମ୍ !” ବଲି ଡାକ୍ଲା । ମରିୟମ୍ ତାର୍ ବାଟେ ପାସଲି କରି “ରାବ୍ରୁନି !” ବଲି ଏବ୍ରି ବାସାଇ କଇଲା । ଏଗାର୍ ଅରଡ଼ ଅଇଲାନି ଗୁରୁ ।

୧୭ ଜିସୁ ତାକେ କଇଲା, “ମକେ ଦାରି ର ନାଇ, ଏବେ ଜାକ ମୁଇ ବାବା ପର୍ମେସର୍ ଲଗେ ଜାଇନାଇ । ମାତର୍ ତୁଇ ଜାଇକରି ମର୍ ବାଇମନ୍‌କେ କଅ, ମୁଇ, ମର୍ ବାବା ଆରି ସେମନର୍ ବାବା, ମର୍ ପର୍ମେସର୍ ଆରି ସେମନର୍ ପର୍ମେସରର୍ ଲଗେ ବାଉଡ଼ି ଗାଲିନି ।” ୧୮ ମଗ୍ଦଲିନି ମରିୟମ୍ ସିସମନର୍ ଲଗେ ବାଉଡ଼ି ଗାଲା ଆରି କଇଲା “ମୁଇ ମାପୁରୁକେ ଦେକ୍ଲି ଆଟି ।” ଆରି ଜିସୁ କଇଲା ସବୁ କାତା ସିସମନ୍‌କେ କଇଦେଲା ।

ଜିସୁ ନିଜକେ ସିସମନ୍‌କେ ଦେକାଇଅଇଲାଇ

(ମାତିଉ ୨୮:୧୬-୨୦; ମାର୍କ ୧୬:୧୪-୧୮; ଲୁକ ୨୪:୩୬-୪୯)

୧୯ ସେ ଦିନ୍ ଆଟର୍ ପର୍ତୁମ୍ ଦିନ୍ ଅଇରଇଲା । ସଞ୍ଜ ବେଲା ସବୁ ସିସମନ୍ ଗଟେକ୍ ତେଇ ରୁଣ୍ଡୁଲାଇ । ସେମନ୍ ଜିଉଦି ନେତାମନ୍‌କେ ଡରିକରି ଗରର୍ କାପାଟ୍ ସବୁ ଡାବିଅଇଦେଇ ରଇଲାଇ । ସେ ବେଲା, ଏଦେ ଦେକା ! ଜିସୁ ଅଗାଡ଼ ସେମନ୍‌କେ ଦେକାଇଅଇକରି ସେମନ୍ ଚିଆଅଇଲା ଜାଗାଇ “ତମକେ ସାନ୍ତି ମିଲ !” ବଲି କଇଲା । ୨୦ ଜିସୁ ଏ କାତା କଇଲା ପଟେ ନିଜର୍ ଆଡ଼ ଆରି ପାଞ୍ଜରା ଦେକାଇଲା । ସିସମନ୍ ମାପୁରୁକେ ଦେକିକରି ବେସି ସାର୍ଦା ଅଇଗାଲାଇ । ୨୧ ଜିସୁ ଆରି ତରେକ୍ ସେମନ୍‌କେ କଇଲା “ତମକେ ସାନ୍ତି ମିଲ ! ବାବା ପର୍ମେସର୍ ମକେ ଜେନ୍ତି ପାଟାଇଆଟେ, ସେନ୍ତିସେ ମୁଇ ତମକେ ପାଟାଇଲିନି ।” ୨୨ ତାର୍ ପଟେ ଜିସୁ ସେମନର୍ ଉପରେ ପୁଣ୍ଡୁଲା ଆରି “ତମେ ସୁକଲ୍ ଆଡ଼ମାକେ ନାମା !” ୨୩ “ଜଦି ତମେ ଲକ୍‌ମନର୍ ପାପ୍ କେମା କର୍‌ସା ବଇଲେ, ପର୍ମେସର୍ ମିସା ସେମନର୍ ପାପ୍ କେମା ଦେଲା ଆଟେ । ଜଦି ତମେ ଲକ୍‌ମନର୍ ପାପ୍ କେମା ନ କରାସ୍ ବଇଲେ ପର୍ମେସର୍ ମିସା ସେମନର୍ ପାପ୍ କେମା ନ କରେ ।” ବଲି କଇଲା ।

ଜିସୁ ତମାକେ ଦେକାଇଅଇଲା ।

୨୪ ଜିସୁର୍ ବାଟା ସିସମନର୍ ବିଡ଼ରେଅନି ତମା ଜାକେକି ଜଅଁଲା ବଲି ଡାକ୍‌ବାଇ, ଜିସୁ ସିସମନ୍‌କେ ଦେକାଇଅଇଲା ବେଲେ ସେ ନ ରଇଲା । ୨୫ ସେଗାର୍ ପାଇ ତେଇ ରଇଲା ବିନ୍ ସିସମନ୍ ତମା ଆଇଲା ପଟେ କଇଲାଇ, ଆମେ ମାପୁରୁକେ ଦେକ୍ଲୁ ଆତୁ । ମାତର୍ ତମା କଇଲା, “ମୁଇ ତାର୍ ଆଡେ କୁଟିର୍ ଚିନ୍ ନ ଦେକ୍‌ତେ ଆରି ସେ ଚିନେ ମର୍ ଆଙ୍ଗଟି ନ ଚିଙ୍ଗାଲିବା ଜାକ ଆରି ତାର୍ ପାଞ୍ଜରାଇ ଆଡ଼ ନ ପୁରାଇବା ଜାକ ବିସବାସ୍ ନ କରି ।”

୨୬ ଗଟେକ୍ ଆଟ୍ ଗାଲା ପଟେ ସିସମନ୍ ଆରି ତରେକ୍ ଗର୍ ବିଡ଼ରେ ରଇଲାଇ, ତମା ମିସା ସେମନର୍ ସଙ୍ଗ୍ ତେଇ ରଇଲା । କାପାଟେ ଗାତା ଦେଇରଇଲାଇ । ମାତର୍ ଏଦେ ଦେକା ! ଆଗତୁର୍ ପାରା ଜିସୁ ଗର୍ ବିଡ଼ରେ ପୁରିକରି ସେମନର୍ ମଜାଇ ଚିଆଅଇକରି କଇଲା, “ତମକେ ସାନ୍ତି ମିଲ !” ୨୭ ତାର୍ ପଟେ ଜିସୁ ତମାକେ କଇଲା, “ତର୍ ଆଙ୍ଗଟି ଇଡି ସଙ୍ଗଇ ମର୍ ଆଡ଼ ଦେକ୍, ଆରି ମର୍ ପାଞ୍ଜରାଇ ଆଡ଼

ପୁରାଇ ଦେବ । ଆରି କେବେ ମିସା ବିସ୍‌ବାସ୍ କରିନାଇ ବଲି କଅ ନାଇ, ମାତର୍ ବିସ୍‌ବାସ୍ କର୍ ।” ୨୮ ତମା ଜିସୁକେ କଇଲା, “ଏ ମର୍ ମାପରୁ, ଏ ମର୍ ପର୍‌ମେସର୍ !”

୨୯ ଜିସୁ ତାକେ କଇଲା, “ତୁଇ ମକେ ଦେକିକରି ବିସ୍‌ବାସ୍ କଲୁସନି କି ? ମାତର୍ ଜନ୍ ଲକ୍‌ମନ୍ ମକେ ନ ଦେକିକରି ମିସା ବିସ୍‌ବାସ୍ କଲାଇନି, ସେମନ୍ କେତେ ସାର୍‌ଦା ପାଇବାଇ !”

ଏ ବଇର୍ ଉଦେସ୍

୩୦ ଜିସୁ ସିସ୍‌ମନ୍‌ର୍ ସଙ୍ଗ୍ ରଇଲାବେଲେ କେତେକ୍ କେତେକ୍ କାବାଅଇଜିବା କାମ୍‌ମନ୍ କରିରଇଲା । ସେଟା ସବୁ ଏ ବଇତେଇ ଲେକା ଅଏନାଇ । ୩୧ ମାତର୍ ଏଡ୍‌କିସେ ଲେକାଅଇଲା, “ତମେ ଜେନ୍ତୁକି ବିସ୍‌ବାସ୍ କର୍‌ସା ଜେ, ଜିସୁସେ ପର୍‌ମେସର୍‌ର୍ ପଅ, ଜେକି ମସିଅ, ଆରି ତାକେ ବିସ୍‌ବାସ୍ କଲେସେ ତମେ ଜିବନ୍ ପାଇସା ।”

## ୨୧

ଜିସୁ ସାତ୍‌ଟା ସିସ୍‌ମନ୍‌କେ ଦେକାଇ ଅଇଲା

୧ ତାର୍ ପତେ ଜିସୁ ନିଜେ ଆରି ତରେକ୍ ସିସ୍‌ମନ୍‌କେ ଡିବିରିଆର୍ ଗାଡ୍‌ପାଲି ଦେକାଇଅଇଲା । ସେଟା ଏନ୍ତି ଅଇଲା । ୨ ଜିସୁର୍ କେତେଟା ସିସ୍‌ମନ୍ ଗଟେକ୍ ତେଇ ରୁଣ୍ଡିରଇଲାଇ । ସେମନ୍ ଅଇଲାଇନି, ସିମନ୍ ପିତର୍, ବିଦୁମ୍ ବଲି ଡାକ୍‌ବା ତମା ନାଉର୍ ସିସ୍, ଗାଲିଲି ଦେସର୍ କାନା ଗଡେ ରଇଲା ନିତନିଏଲ୍, ଜେବଦିର୍ ଦୁଇଟା ପିଲା ଜାକୁର୍, ଜଅନ୍ ଆରି ବିନ୍ ଦୁଇଟା ସିସ୍‌ମନ୍ । ୩ \*ସିମନ୍ ପିତର୍ ସେମନ୍‌କେ “ମୁଇ ମାର୍ ଦାର୍‌ବାର୍ ଗାଲିନି ।” ବଲି କଇଲା । ସେମନ୍ ମିସା “ତର୍ ସଙ୍ଗ୍ ଆଇରୁ ।” ବଲି କଇଲାଇ । ଆରି ଡଙ୍ଗାଇ ଚଗି, ସେମନ୍ ଗୁଲାଇ ରାତି ଜାଲ୍ ମାର୍‌ଲାଇ, ମାତର୍ ମୁଲ୍‌କେ ଦାର୍‌ଡନାଇ । ୪ ଆର୍‌କର୍ ଦିନେ ଜୁଲ୍‌ପୁଲ୍ ଉଜଲେ ଜିସୁ ଗାଡ୍‌କଣ୍ଡି ଚିଆଅଇରଇଲା । ମାତର୍ ସିସ୍‌ମନ୍ ତାକେ ଜିସୁ ବଲି ଚିନି ନାପାର୍‌ଲାଇ । ୫ ଜିସୁ ସେମନ୍‌କେ ପାର୍‌ରଲା, “ଏ ମଇତର୍‌ମନ୍ ତମେ ଜଡେକ୍ ମିସା ମାର୍ ଦାରାସ୍ ନାଇ କି ?” ସେମନ୍ “ମୁଲ୍‌କେ ଦାରୁ ନାଇ ।” ବଲି କଇଲାଇ । ୬ \*ଜିସୁ ସେମନ୍‌କେ କଇଲା, “ଡଙ୍ଗାର୍ ଉଜାବାଟେ ଜାଲ୍ ମାରା, ତମେ ମାଡ୍‌ଦାର୍‌ସା ଆଲେ ।” ସେ କଇଲା ପାରା ଜାଲ୍ ପାକାଇଲାଇ ଜେ, ଏତର୍ ତାକର୍ ଜାଲେ ଏଡେକ୍ ମାଡ୍ ଲାଗ୍‌ଲାଇଜେ, ସେମନ୍ ଜାଲ୍ ଜିକି ନାପାର୍‌ଲାଇ । ୭ ଜିସୁ ଜନ୍ ସିସ୍‌କେ ଆଲାଦ୍ କର୍‌ତେ ରଇଲା, ସେ ସିସ୍ ପିତର୍‌କେ କଇଲା, “ଏଦେ ଦେକା ! ଏଟା ନିଜେ ଆମର୍ ମାପରୁ ସେ !” ପିତର୍ ଏଟା ମାପରୁ ଆକା ବଲି କଇଲାଟା ସୁନିକରି ବେଟି ସଙ୍ଗାଇଲା ବସ୍‌ତର୍ ପିନ୍ ଗାଡେ ଡେଗଇଦେଲା । କାଇକେ ବଇଲେ ସେ ମାଡ୍ ଦାର୍‌ବାବେଲେ, ଉପ୍‌ରେ ପିନ୍‌ଲା ବସ୍‌ତର୍ ବେଟି ସଙ୍ଗାଇ ରଇଲା । ୮ ଆରି ବାକି ସିସ୍‌ମନ୍ ମାଡ୍ ବର୍‌ଡି ରଇଲା ଜାଲ୍ ଜିକିଜିକି ଡଙ୍ଗା କଣ୍ଡିତେଇ ଆନି ଲାଗାଇଲାଇ । ସେମନ୍ କଣ୍ଡିଅନି ଦୁଇସ୍ ଆଡ୍ ଦୁରିକେସେ ରଇଲାଇ । ୯ ସିସ୍‌ମନ୍ ଡଙ୍ଗାଅନି ଉଡ୍‌ରିକରି ପଦାଇ କେଟ୍‌ଲାବେଲେ, ଜଇରଇଲା ଇଙ୍ଗରା ଉପ୍‌ରେ କେତେଟା ବାଜିଅଇଲା ମାଡ୍ ଆରି ରୁଟି ସଙ୍ଗାଇଅଇ ରଇଲାଟା ଦେକ୍‌ଲାଇ । ୧୦ ତାର୍ ପତେ ଜିସୁ “ତମେ ଏବେ ଦାର୍‌ଲା କେତେଟା ମାଡ୍ ଆନା ।” ବଲି କଇଲା ।

୧୧ ସେଟାର୍ ପାଇ ସିମନ୍ ପିତର୍ ଜାଇ ମାଡ୍ ବର୍‌ଡି ରଇଲା ଜାଲ୍ ପଦାପାଲିକେ ଜିକି ଆନଲା । ସେ ଜାଲେ ସଏ ପଟାସ୍ ତିନ୍‌ଟା ବଡ୍‌ବଡ୍ ମାଡ୍ ଲାଗି ରଇଲାଇ । ମାଡ୍‌ମନ୍ ଲାଗି ବେସି ବଜ୍ ରଇଲା ମିସା, ଜାଲ୍ ଚିଡେନାଇ । ୧୨ ଜିସୁ ସେମନ୍‌କେ “ଆସା କାଆ !” ବଲି କଇଲା । ସିସ୍‌ମନ୍‌ର୍ ବିଡ୍‌ରେଅନି କେ ମିସା ତୁଇ କେ

? ବଲି ପାଚାର୍‌ବାକେ ସାଆସ୍ କରତ୍ ନାଇ । କାଇକେ ବଇଲେ ସେମନ୍ ସେ ମାପରୁ ବଲି ଜାନି ରଇଲା । ୧୩ ଜିସୁ ତାକର୍ ଲଗେ ଜାଇ ରୁଟି ଆରି ମାଟ୍ ବାଟାକରିଦେଲା । ୧୪ ଜିସୁ ମରିକରି ଜିବନ୍‌ଅଇ, ସିସମନ୍‌କେ ଏଟା ସଙ୍ଗ୍ ମିସାଇ, ତିନ୍‌ତର୍ ଦେକାଇଅଇଲା ।

**ଜିସୁ ଆରି ପିତର୍**

୧୫ ସେମନ୍ କାଇଲା ପଚେ ଜିସୁ ସିମନ୍ ପିତର୍‌କେ କଇଲା, “ଜଅନର୍ ପଅ ସିମନ୍, ତୁଇକାଇ ଏମନର୍‌ତେଇଅନି ମକେ ଅଦିକ୍ ଆଲାଦ୍ କଲୁସ୍‌ନି କି ?” ପିତର୍ କଇଲା, “ଉଁ ମାପରୁ ମୁଇ ଆଲାଦ୍ କଲିନି ବଲି ତୁଇ ଜାନିଆରୁସ୍ ।”

ଜିସୁ ତାକେ “ତୁଇ ମର୍ ମେଣ୍ଟାମନ୍‌କେ ନିମାନ୍ କରି ଜତନ୍ କର୍ ।” ବଲି କଇଲା । ୧୬ ତାର୍ ପଚେ ଜିସୁ ଆରି ତରେକ୍ ତାକେ ପାଚାର୍‌ଲା, “ଜଅନର୍ ପଅ ସିମନ୍, ତୁଇ କାଇ ମକେ ସତଇସେ ଆଲାଦ୍ କଲୁସ୍‌ନି କି ?”

ପିତର୍ କଇଲା, “ଉଁ ମାପରୁ ମୁଇ ତକେ ଆଲାଦ୍ କଲିନି ବଲି ତୁଇ ଜାନିଆରୁସ୍ ।”

ତାର୍ ପଚେ ଜିସୁ କଇଲା, “ସେନ୍ତାର୍‌ଆଲେ ମର୍ ମେଣ୍ଟାମନ୍‌ର୍ ଜତନ୍ କର୍ ।” ୧୭ ଜିସୁ ଦୁଇତର୍ ପାଚାରି ସାରି ଆରିତରେକ୍ ପାଚାର୍‌ଲା, “ଏ ଜଅନର୍ ପଅ ସିମନ୍ ତୁଇ ମକେ ଆଲାଦ୍ କଲୁସ୍‌ନି କି ?”

ଜିସୁ ତାକେ ତିନ୍ ତର୍ ଜାକ ଗଟେକ୍ କାତାସେ ପାଚାର୍‌ଲାଜେ ପିତର୍ ଦୁକ୍ ଅଇଗାଲା, ଆରି କଇଲା, “ଏ ମାପରୁ ! ମୁଇ ଆଲାଦ୍ କଲିନି ବଲି ତୁଇ ସବୁ ଜାନିଆରୁସ୍ ।”

ଜିସୁ ପିତର୍‌କେ କଇଲା, “ତୁଇ ମର୍ ମେଣ୍ଟାମନ୍‌କେ ନିମାନ୍ କରି କୁଆଉ ।

୧୮ “ମୁଇ ତକେ ସତ୍ କାତା କଇଲିନି, ତୁଇ ଦାଙ୍ଗ୍‌ତା ରଇଲାବେଲେ, ତକା ପଟିଆ ପିନ୍ଦି କରି ଜେନେ ପାର୍‌ଲା ତେନେ ଜାଇତେ ରଇଲୁସ୍ । ମାତର୍ ଡକ୍‌ରା ଅଇଲେ ଆଡ୍ ଟେକ୍‌ସୁ, ଆରି ବିନ୍ ଲକ୍‌ମନ୍ ତକେ ବାନ୍ଦି ଜନ୍ତି ଜିବାକେ ମନ୍ ନ ରଏ, ସେ ବାଟେସେ ତକେ ନେବାଇ ।” ୧୯ ସେ କେନ୍ତାରି ଅଇ ମରିକରି ପର୍‌ମେସରର୍ ତାକ୍‌ପୁଟା କର୍‌ସି, ସେଟା ଜାନାଇବାକେ ଜିସୁ ଏନ୍ତାରି କଇଲା । ଏନ୍ତି କଇ ସାରାଇ ସେ ପିତର୍‌କେ କଇଲା “ମର୍ ସଙ୍ଗ୍ ଆଉ ।”

**ଜିସୁର୍ ଆଲାଦର୍ ସିସ୍**

୨୦ \*ପିତର୍ ପାସ୍‌ଲିକରି ଜିସୁର୍ ଆଲାଦର୍ ବିନ୍ ସିସ୍‌କେ ଦେକ୍‌ଲା । ଜାକେ କି ଜିସୁ ବେସି ଆଲାଦ୍ କର୍‌ତେରଇଲା । ଜନ୍ ସିସ୍ କି ରାତିଆ କାଇଲାବେଲେ ଜିସୁର୍ ବୁକେ ଆଉଜି ଅଇକରି ପାଚାରିରଇଲା । “ମାପରୁ କେ ତମ୍‌କେ ବିସ୍‌ବାସେ ବିସ୍ ଦେଲାପାରା ସତ୍‌ରୁମନ୍‌କେ ସର୍‌ପି ଦେଇସି ?” ୨୧ ପିତର୍ ସେ ସିସ୍‌କେ ଦେକି ଜିସୁକେ ପାଚାର୍‌ଲା, “ଏ ମାପରୁ ଆର୍ ବିସଇ କାଇଟା ଅଇସି ?”

୨୨ ଜିସୁ ତାକେ କଇଲା, “ଏ ଦୁନିଆଇ ଆରି ତରେକ୍ ଆଇବା ଜାକ ସେ ବଠି କରି ରଅ ବଲି ମୁଇ ମନ୍ କଲିନି ବଇଲେ, ଏଟାର୍‌ପାଇ ତୁଇ କାଇକେ ଚିନ୍ତା କଲୁସ୍‌ନି ? ତୁଇ ମର୍ ସଙ୍ଗ୍ ଆଉ ।”

୨୩ ତେବେ ଜିସୁ ଜନ୍ ସିସ୍‌କେ ଆଲାଦ୍ କର୍‌ତେ ରଇଲା, ସେ ନ ମରେ ବଲି କଇରଇଲା ବିସଇ ଗୁଲାଇ ବାଟର୍ ବିସ୍‌ବାସ୍ କର୍‌ବା ବାଇମନ୍‌ର୍‌ତେଇ କେଟ୍‌ଲା । ମାତର୍ ସେ ନ ମରେ ବଲି ଜିସୁ କଇ ନ ରଇଲା । ମୁଇ ଏ ଦୁନିଆଇ ଆରି ତରେକ୍ ଆଇବା ଜାକ ସେ ବଠିକରି ରଅ ବଲି ମୁଇ ଜଦି ମନ୍ କଲିନି ବଇଲେ, ଏଟାର୍‌ପାଇ ତୁଇ କାଇକେ ଚିନ୍ତା କଲୁସ୍‌ନି ? ବଲି କଇରଇଲା ।

☆ ୨୧:୨୦ ୨୧:୨୦ ଜଅନ୍ ୧୩:୨୫

୨୪ ସେ ସିସ୍ ଏ ସବୁ ବିସଇ କଇଲାଆଚେ, ଏ ସବୁଜାକ ସେ ଲେକି ମିସା ଆଚେ ଆରି ସେଟା ଆମେ ଜାନ୍ତୁ । ସେ ଜାଇଟା କଇଲା ଆଚେ ସେଟା ସବୁ ସତ୍‌ସେ ।

ସାରାସାରି ବିସଇ

୨୫ ଜିସୁ କରିରଇବା କାମ୍‌ମନ୍ ଆରି କେତେକ୍ କେତେକ୍ ଆଚେ, ମାତର୍ ମର୍ ବିଚାର୍ ଇସାବେ ସେ ସବୁଜାକ ଜଦି ଗଟେକ୍ ଲକ୍ ଲେକ୍‌ଲେ, ଜେଡ୍‌କି ବଇ ଲେକା ଅଇସି, ସେଟାମନ୍ ସଙ୍ଗଇବାକେ ଚାନ୍ ନ ଅଏ ।

## ପ୍ରେରିତ ମାନଙ୍କର କାର୍ଯ୍ୟ ପେରିଡ଼ ସିସ୍ତମନ୍ କାମ୍ବଳା ଇସାବ୍ ଏ ବଇ ବିସଇତେଇ ଜାନ୍ବାଟା

ପେରିଡ଼ ବଇ ଅଇଲାନି ମଣ୍ଡଲି ଆରାମ୍ ଅଇଲା ବଇ, ଆରି କେନ୍ତାରି ଜିରୁସାଲମେ ଅନି ଜିଉଦା ସମରିଆ, ଆରି ବିନବିନ୍ ଜାଗାମନକେ ଜାନାଇ ଅଇଲା ୧:୮ । ଏଟା ଜିସୁ ସରଗେ ଜିବା ଆଗତୁ ତାର ସିସ୍ତମନ୍କେ କଇ ରଇଲା, ପେରିଡ଼ ବଇ ଲୁକ୍ଲେକି ରଇଲା, ଜେକି ଲୁକ୍ ସୁବ୍‌କବର୍ ମିସା ଲେକି ରଇଲା । ସେ ଗଟେକ୍ ତାକ୍‌ଦର୍ ରଇଲା, ଆରି କାଇଟାମିସା ବୁଲ୍ ନ କର୍ତେ ଲେକ୍‌ବାକେ ମନ୍ଦିଆନ୍ ଦେଇତେ ରଇଲା । ସେ ସୁବ୍‌କବର୍ ବଇଟାନେ ଆରି ପେରିଡ଼ ବଇ ଏ ଦୁଇଟା ବଇଟାନେଜାକ ତିଅପିଲ୍‌କେ ଜାନାଇ ଆଟେ । ଜନ୍ ଲକ୍‌କି ସେ ଗଟେକ୍ ଗିରିକ୍ ଲକ୍ ରଇଲା ଏ ଦୁଇଟାଜାକ ବଇ ଗିରିକ୍ ଆରି ଜିଉଦି ଲକ୍‌ମନର୍ ପାଇ ଅଇରଇଲା ପେରିଡ଼ ୧:୧ ।

ଜାନ୍‌ବାକେ ଗାଲେ ପେରିଡ଼ ବଇ ଜିସୁକିରିସ୍‌ଟ ଜନମ୍ ଅଇକରି ୬୦-୬୪ ବିଡ଼ରେ ଲେକାଅଇ ରଇଲା । କାଇକେବଇଲେ ପାଉଲ୍ ବନ୍ଦିଗରେ ରଇକରି ମୁକଲ୍‌ବା ଆଗତୁ ଏ ବଇର୍ ଲେକାକାମ୍ ସାରିରଇଲା । ଲୁକ୍ ମିସା ପାଉଲ୍‌ର୍ ସଙ୍ଗ୍ ବୁଲି ରଇଲା, ଆରି ପେରିଡ଼ ବଇ ଆନ୍ତ୍ରିକିଆଇ ଅନି ଲେକାଅଇ ରଇଲା । ପେରିଡ଼ ବଇ ଲୁକ୍ ସୁବ୍‌କବର୍ତେଇ ଅନି ଆରାମ୍ ଅଇଲା ଆଟେ, ଆରି ଜିସୁ ସରଗେ ଜିବାଟା ଆରାମ୍ ଅଇଲାନି ଲୁକ୍ ସୁବ୍‌କବର୍‌ର୍ ଆଦେସ୍ ଆରି ପେରିଡ଼ର୍ ଲେକା ଆଦେସ୍ ସଙ୍ଗ୍ ସମାନ୍ ଆଟେ । ସେ ତିଅପିଲ୍‌କେ ଆରି ବିସ୍‌ବାସ୍ ବଡ଼ି ଆଇବା ଲକ୍‌ମନକେ ନିକସଙ୍ଗ୍ ରଇବାକେ ମନକଲାନି । ସେମନ୍‌କେ କାଇ ସିକିଆ ଦିଆ ଅଇରଇଲା ଜିସୁକିରିସ୍‌ଟର୍ ଜିବନ୍ ବିସଇ ଆରି ବଡ଼ିଆଇବା ବିସ୍‌ବାସିମନର୍ ବିସଇ କାଇବୁଲ୍ ନ କର୍ତେ ଇସାବ୍ ସଙ୍ଗ୍‌ଆଟେ । ପେରିଡ଼ ବଇଟାନେ ଆଗତୁର୍ ମଣ୍ଡଲି ଜିସୁକିରିସ୍‌ଟର୍ ଟାନେ ବିସ୍‌ବାସ୍ କରି ଜିଇବା କାଇବାକେ ଆମ୍‌କେ ଜାନାଇଲାନି । ଆମ୍‌କେ ପେରିଡ଼୍‌ମନର୍ ଟାନେଅନି ଜାନାଇଲାନି କି, ଆମେ କେନ୍ତାରି ସୁକଲ୍ ଆଡ଼ମାଟାନେ ରଇକରି ବିନଲକ୍‌ମନକେ ସୁବ୍‌କବର୍ ଜାନାଇ ଅଇସି ।

### ଏ ବଇ ବିଡ଼ରେ ରଇବା ମୁକିଆ ବିସଇ

- ୧. ସୁକଲ୍ ଆଡ଼ମା ଆଇବାଟା ଆରି ମଣ୍ଡଲି ବଡ଼ବାଟା । ୧:୧-୮:୧
- ୨. ମଣ୍ଡଲିର୍ ଦୁକ୍‌କସ୍‌ଟ ଆରି ସୁବ୍‌କବର୍ ଅଦିକ୍ ଅଦିକ୍ ବଡ଼ବାଟା । ୮:୨-୧୨:୨୩
- ୩. ପାଉଲ୍ ପର୍ତୁଗ୍ ତର୍ ସେବା କର୍‌ବାକେ ଜିବାଟା । ୧୨:୨୪-୧୪:୨୮
- ୪. ନୁଆ ବିସ୍‌ବାସିମନର୍ ଦର୍‌କାର୍ ବିସଇ ଆରି ଜିରୁସାଲମର୍ ସେବା । ୧୫:୧-୩୫
- ୫. ପାଉଲ୍ ଦୁଇପାଲି ସେବାକାମେ ଜିବାଟା । ୧୫:୩୬-୧୮:୨୨
- ୬. ପାଉଲ୍ ତିନ୍‌ପାଲି ସେବାକାମେ ଜିବାଟା । ୧୮:୨୩-୨୦:୩୮
- ୭. ପାଉଲ୍ ଜିରୁସାଲମେ ବନ୍ଦିଅଇରଇଲାଟା । ୨୧:୨୬
- ୮. ପାଉଲ୍ ରମ୍ ରାଇଜେ ଜିବାଟା । ୨୭:୧-୨୮:୧-୩୧

ସୁକଲ୍‌ଆଡ଼ମା ଦେଇରଇବା କାତା

୧ \*ସାର୍‌ଦାର୍ ତିଅପିଲ୍, ମର୍ ପର୍ତୁଗ୍ ଲେକିରଇବା ଲୁକ୍‌ବଇଟାନେ ଆରାମେଅନି, ପର୍‌ମେସର୍ ତାକେ ସରଗେ ନେବା ଦିନ୍ ଜାକ, ଜିସୁ କରିରଇବା ଆରି ସିକାଇରଇବା ସବୁ ବିସଇ ଲେକିରଇଲି । ୨ ତାର୍ ଆଗତୁ ସୁକଲ୍‌ଆଡ଼ମା

☆ ୧:୧ ୧:୧ ଲୁକ୍ ୧:୧-୪

ବପୁସଙ୍ଗ୍ ସେ ବାଟିରଇବା ପେରିଡ଼୍‌ମନ୍‌କେ କେତେଟା ଆଦେସ୍ ଦେଇରଇଲା ।  
 ୩ ସେ ଦୁକ୍ କସ୍‌ଟ ଅଇଲାପତେ, ସେମନ୍‌କେ ନିଜେ ବେସି ତର୍ ଦେକାଇଅଇଲା ।  
 ଚାଲିସ୍ ଦିନଜାକ ବିନ୍ ବିନ୍ ବେଲାଇ ଦେକାଇଅଇଲା । ମଲାତେଇଅନି ଉଟ୍‌ଲାଟା  
 ସତ୍‌ସଙ୍ଗ୍ ଜାନାଇଲା । ସେମନ୍ ତାକେ ଦେକ୍‌ଲାଇ, ଆରି ସେ ସେମନ୍‌ରସଙ୍ଗ୍  
 ପର୍‌ମେସରର୍ ରାଇଜ୍ ବିସଇନେଇ କାତା ଅଇଲା । ୪ \*ତରେକ୍ ସେମନ୍‌ରସଙ୍ଗ୍  
 ମିସିକରି କାଇବା ବେଲେ, ସେ ଏ ଆଦେସ୍ ଦେଲା, “ଜିରୁସାଲମ୍ ଚାଡାନାଇ । ମାତର୍  
 ଜନ୍‌ଟା ମର୍ ସରଗର୍ ବାବା, ଇନାମେ ଦେବିବଳି କଇଆଚେ, ସେଟା ନ ମିଲ୍‌ବା ଜାକ  
 ଜାଗିରୁଆ । ୫ \*କାଇକେବଇଲେ ଜଅନ୍ ପାନିତେଇ ତୁବନ୍ ଦେଇରଇଲା, ମାତର୍  
 କେତେ ଦିନ୍ ବିଡ଼ରେ ପର୍‌ମେସର୍ ତମ୍‌କେ ସୁକଲ୍ ଆତ୍‌ମାଇ ତୁବନ୍ ଦେଇସି ।”

**ଜିସୁ ସରଗେ ଜିବାଟା**

୬ ଦିନେକ୍ ପେରିଡ଼୍ ସିସମନ୍ ଗଟେକ୍‌ତେଇ ରୁଣ୍ଡିରଇଲା ବେଲେ ଜିସୁକେ  
 ପାଚାରୁଲାଇ, “ମାପ୍‌ରୁ, ତମେ କାଇ ଏବେ ଇସ୍ରାଏଲର୍ ଲକ୍‌ମନ୍‌କେ ତାକର୍  
 ରାଇଜ୍ ଆରିତରେକ୍ ବାଉତାଇ ଦେଇସୁ କି ?” ୭ ଜିସୁ ସେମନ୍‌କେ କଇଲା,  
 “ମର୍ ବାବା ତାର୍ ନିଜର୍ ଅଦିକାର୍‌ସଙ୍ଗ୍ ବେଲାଗତି ଚିକ୍‌କରି ସଙ୍ଗାଇ ଆଚେ ।  
 ଏ ସବୁ କେବେ ଗଟ୍‌ସି, ସେଟା ତମର୍ ଜାନ୍‌ବା ଦରକାର ନାଇ । ୮ \*ମାତର୍  
 ସୁକଲ୍ ଆତ୍‌ମା ତମର୍ ଉପରେ ଉତ୍‌ରଲେ, ତମେ ପୁରାପୁରୁନ୍ ବପୁ ଅଇସା ଆରି  
 ଜିରୁସାଲମ୍, ଜିଉଦାର୍ ସବୁଟାନେ, ସମିରଣ୍ ଆରି ଜଗତର୍ ସାରାସାରି ଜାକ ମର୍  
 ନାଉଁ ଦାରି ସାକି ଅଇସା ।” ୯ \*ଏଡ଼କି କାତା ସେମନ୍‌କେ କଇସାରାଇଲା ପତେ,  
 ସେମନ୍ ଜିସୁକେ ସରଗେ ନେବାଟା ଦେକ୍‌ଲାଇ । ଗଟେକ୍ ଚେଲ୍‌କା ବାଦଲ୍ ଆସି  
 ଡାବିଅଇଲାକେ ସେ ବାନା ଅଇଗାଲା । ଆରି ସେମନ୍ ତାକେ ଦେକି ନାପାରୁଲାଇ  
 । ୧୦ ସେ ସରଗେ ଗାଲାପତେ ମିସା ସେମନ୍ ଆଁକି ମରାଇକରି ଉପରେ ସେ  
 ଦେକ୍‌ତେ ରଇଲାଇ । ସେଡ଼କିବେଲେ ଏଦେ ଦେକା ! ଦବ୍ ପଟିଆ ପିନ୍‌ଲା  
 ଦୁଇ ଲକ୍, ସେମନ୍‌ର୍ ମୁଆଚେ ଆସି ଚିଆଅଇଲାଇ । ୧୧ ଆରି କଇଲାଇ “ଏ  
 ଗାଲିଲିର୍ ଲକ୍‌ମନ୍, ତମେ କାଇକେ ଇତି ଚିଆଅଇ ଆକାସେ ଦେକ୍‌ଲାସ୍‌ନି ? ଏ  
 ଜିସୁକେ ପର୍‌ମେସର୍ ତମର୍‌ଟାନେଅନି ସରଗେ ନେଲା ଆଚେ । ସେ ସରଗେ ଜେତି  
 ଜାଇରଇଲା, ସେନ୍ତାରିସେ ଦର୍‌ତନିତେଇ ଆଇବାଟା ଦେକ୍‌ସା ।”

**ଜିଉଦାର୍ ଜାଗାଇ ମତିଆସକେ ବାଟଲା**

୧୨ ତାର୍‌ପତେ ପେରିଡ଼୍ ସିସମନ୍ ଜିଡ଼୍ ପରବତେଅନି ଜିରୁସାଲମ୍ ବାଉତି ଗାଲାଇ  
 । ସେ ପରବତ୍, ଜିରୁସାଲମ୍ ନଅରେଅନି ଗଟେକ୍ କିଲମିଟର୍ ଦୁର୍ ରଇଲା ।  
 ୧୩ \*ଜିରୁସାଲମ୍ ନଅରେ ଜାଇକରି ସେମନ୍ ରଇବା ବାକ୍ରାଇ ପୁର୍‌ଲାଇ । ପିତର୍,  
 ଜଅନ୍, ଜାକୁବ୍ ଆରି ତାର୍ ବାଇ ଆନ୍‌ରିୟ୍, ପିଲିପ୍, ତମା, ବାର୍‌ତଲମି, ମାତିଉ,  
 ଆଲ୍‌ପିର୍ ପିଲା ଜାକୁବ୍, ଦେସ୍ ଆଲାଦ୍‌କରବା ସିମନ୍ ଆରି ଜାକୁବ୍‌ର୍ ପିଲା ଜିଉଦା,  
 ଏମନ୍ ରଇଲା ତେଇର୍ ପେରିଡ଼୍ ସିସମନ୍ । ୧୪ ସେମନ୍ ତର୍‌କେତର୍ ଗଟେକ୍ ଦଲ୍  
 ଇସାବେ ପାର୍‌ତନା କର୍‌ବାକେ ରୁଣ୍ଡିତେ ରଇଲାଇ । ଆରି ସେମନ୍‌ରସଙ୍ଗ୍ ଜିସୁର୍  
 ଆୟା ମରିୟ୍‌ମ୍, ବିନ୍ ମାଇଜିମନ୍ ଆରି ଜିସୁର୍ ବାଇମନ୍ ମିସା ମିସ୍‌ତେରଇଲାଇ  
 । ୧୫ କେତେ ଦିନ୍ ଗାଲାପତେ ପାକାପାକି ସଏ କତେ ଲକ୍ ବିସ୍‌ବାସି ବାଇମନ୍  
 ରଇଲା ଗଟେକ୍ ସବାଇ, ପିତର୍ ଲକ୍‌ମନ୍‌ର୍ ମୁଆଚେ ଉଟି ଚିଆଅଇ କଇଲା,  
 ୧୬ “ଏ ମର୍ ବାଇବଇନିମନ୍, ଜନ୍ ଇସ୍କାରିୟ୍‌ଡ଼ ଜିଉଦା ଜିସୁକେ ଦାରାଇଦେବାକେ  
 ସତ୍‌ରୁମନ୍‌କେ ବାଟ୍ ଦେକାଇ ଆନିରଇଲା, ତାର୍ ବିସଇ, ଦାଉଦ୍ ସୁକଲ୍‌ଆତ୍‌ମାଇ

\* ୧:୪ ୧:୪ ଲୁକ୍ ୨୪:୪୯    \* ୧:୫ ୧:୫ ମାତିଉ ୩:୧୧; ମାର୍‌କ ୧:୮; ଲୁକ୍ ୩:୧୭; ଜଅନ୍ ୧:୩୩    \* ୧:୮  
 ୧:୮ ମାତିଉ ୨୮:୧୯; ମାର୍‌କ ୧୭:୧୫; ଲୁକ୍ ୨୪:୪୭,୪୮    \* ୧:୯ ୧:୯ ମାର୍‌କ ୧୭:୧୯; ଲୁକ୍ ୨୪:୫୦,୫୧  
 \* ୧:୧୩ ୧:୧୩ ମାତିଉ ୧୦:୨-୪; ମାର୍‌କ ୩:୧୭-୧୯; ଲୁକ୍ ୬:୧୪-୧୭

ପୁରୁନ୍‌ଅଇ ବବିସଡ଼କାତା ସୁନାଇ ରଇଲା । ଦରମ୍ ସାସ୍ତରର୍ କାତା ସିଦ୍ ଅଇବାକେ ଏଟା ଗଟ୍‌ବାର୍ ରଇଲା । ୧୭ ଏଲେମିସା ସେ ଆମର୍ ଦଲର୍ ଲକ୍ ରଇଲା । ଆରି ଆମର୍ ସଙ୍ଗ୍ କାମ୍ କର୍ବାକେ ବାଟାଇଅଇ ରଇଲା ।” ୧୮ \*ଜିଉଦା କରଇରବା କରାପ୍ କାମେଅନି ମିଲାଇଲା ଡାରୁକେ ଗଟେକ୍ ଜମି ଗେନାଅଇରଇଲା । ଆରି ସେ ଜମିତେଇ, ଉମତାଡ଼ିଅଇ ଅଦରି ମଲା । ତାର୍ ପେଟ୍ ଚିରିଅଇ ଆଡ଼ି ବାରଇଗାଲା । ୧୯ ଜିରୁସାଲମ୍ ନଅରେ ବାସାଅଇରଇବା ସବୁ ଲକ୍‌ମନ୍ ଏ ସବୁ ବିସଇ ସୁନ୍‌ଲାଇ । ସେମନର୍ ବାସାଇ ସେ ଜମିର୍ ନାଉଁ ଆକେଲ୍‌ଦାମା ତାର୍ ଅରଡ଼ ଅଇଲାନି ବନିର୍ ପଦା ବଲି ନାଉଁ ଦେଲାଇ ଆଚଡ଼ ।

୨୦ ଗିଡ଼ସଙ୍ଗିତା ବଇଟାନେ ଏ ବିସଇ ଲେକା ଅଇଲା ଆଚେ,  
 “ତାର୍ ଗର୍ ରୁଟା ଅଇଜାଅ,

ତେଇ ବାସା ଅଇବାକେ କେ ମିସା ନ ରଅଡ଼ ।”

ଆରି ମିସା ଲେକା ଅଇଲା ଆଚେ,

“ତାର୍ ଜାଗାଇ ସେବା କର୍ବାକେ ଆରି ଗଟେକ୍ ଲକ୍ ମିସ ।”

୨୧ \* “ସେଟାର୍ ପାଇ, ଜିସୁମାପୁରୁ ଆମର୍ ସଙ୍ଗ୍ ଗାଲାବେଲେ ଜେ ଆମର୍ ଦଲେ ସବୁବେଲେ ରଇଲା, ସେନ୍ତାରି ଗଟେକ୍ ଲକ୍‌କେ ବାଟ୍‌ବାର୍ ଆଚେ । ୨୨ ଜନ୍ ଲକ୍‌କେ ଆମେ ବାଟ୍‌ରୁ, ପର୍‌ମେସର୍ ଜିସୁକେ ଜେନ୍ତି ଜିବନ୍ କରି ଉଟାଇଲା, ସେ ବିସଇ ଆମର୍‌ସଙ୍ଗ୍ ସେ ସାକି ଅଇବାର୍‌ଆଚେ । ଜଅନ୍ ଜିସୁକେ ଡୁବନ୍‌ଦେଲା ବେଲେଅନି, ପର୍‌ମେସର୍ ଆମର୍‌ଟାନେଅନି ତାକେ ସର୍‌ଗେ ନେବା ଜାକ, ସେ ଲକ୍ ଆମର୍ ଦଲେ ରଇବାର୍ ଆଚେ ।” ୨୩ ସେମନ୍ ଦୁଇ ଲକ୍‌ର ନାଉଁ ଦେଲାଇ । ଜସେପ୍ ଜେକି ବର୍‌ସବା ଆରି ଜୁସ୍‌ତକ୍ ବଲି ମିସା କଇବାଇ ଆରି ମଡ଼ିୟ । ୨୪ ଆରି ସେମନ୍ ପାର୍‌ତନା କଲାଇ, “ମାପୁରୁ ତମେତା ସବୁ ଲକ୍‌ର ମନର୍ କାତା ଜାନାସ୍ । ଜିଉଦା ଜନ୍ ଜାଗାଇ ରଇବାର୍‌ରଇଲା, ଟିକ୍ ତେଇ ଉଟିଗାଲା । ପଚେ ତାର୍ ଜାଗାଇ ତମେ ବାଟିରଇବା ଲକ୍, ଏ ଦୁଇ ଲକ୍‌ର ବିଡ଼ରେ ଅନି କେ ଅଇରଇସି ? ୨୫ ଜେ ପେରିଡ଼ ସିସ୍‌କାମ୍ କରପାର୍‌ସି, ତାକେ ଆମ୍‌କେ ଜାନାଆ ।” ୨୬ ତାର୍‌ପଚେ ଦୁଇ ଲକ୍‌ଟାନେଅନି ଗଟେକ୍ ଲକ୍‌କେ ବାଟ୍‌ବାକେ କେଡ଼ପୁଟାଇଲାଇ । କେଡ଼ପୁଟାଇଲାକେ ମଡ଼ିୟସର୍ ନାଉଁ ପୁଟ୍‌ଲା । ସେନ୍ତାରି, ଏଗାର୍‌ଟା ସିସ୍‌ମନର୍ ଦଲେ ସେ ମିସ୍‌ଲା ।

## ୨

### ସୁକଲ୍‌ଆଡ଼ମା ଆଇବାଟା

୧ ଜନ୍ ଦିନେ ସେମନ୍ ପେନ୍‌ଟିକସ୍‌ର୍ ପରର୍ ମାନ୍‌ତେରଇଲାଇ, ଜିସୁକେ ବିସ୍‌ବାସ୍ କର୍ବା ସବୁ ଲକ୍‌ମନ୍ ଗଟେକ୍ ଜାଗାଇ ରୁଣ୍ଡିରଇଲାଇ । ୨ ଅଟାଡ଼ ଆକାସେଅନି ବେସି ପବନ୍ ଆଇଲାପାରା ଗଟେକ୍ ସବ୍‌ ଅଇଲା । ଆରି ଜନ୍ ଗରେ ସେମନ୍ ବସି ରଇଲାଇ, ସେଟା ସେ ସବଦେ ପୁରୁନ୍ ଅଇଲା । ୩ ତାର୍‌ପଚେ ସେମନ୍ ଦେକ୍‌ଲାଇ, କେତେଟା ଜଇଜିବ୍ ଉଦ୍‌ଲିକରି ବିଚି ଅଇଲା । ଆରି ତେଇ ରଇଲା ସବୁ ବିସ୍‌ବାସିମନ୍‌କେ ଚିଲଲା । ୪ ସେମନ୍ ସବୁଲକ୍ ସୁକଲ୍‌ଆଡ଼ମାଇ ପୁରାପୁରୁନ୍ ଅଇଲାଇ ଆରି ଆଡ଼ମା ଦେଲା ବପୁ ଇସାବେ ନାଜାନ୍‌ଲା ବାସାମନର୍ ସଙ୍ଗ୍ କାତା ଅଇବାର୍ ଦାର୍‌ଲାଇ ।

୫ ଜଗତର୍ ବିନ୍ ବିନ୍ ଦେସେଅନି ଆସିରଇଲା ଜିଉଦି ଲକ୍‌ମନ୍ ସେଡ଼କିବେଲେ ଜିରୁସାଲମେ ରଇଲାଇ । ୬ ଏନ୍ତାରି ଅଇଲାଟା ଦେକି ସେମନ୍ ସାର୍‌ଦା ଅଇଗାଲାଇ । କାଇକେବଇଲେ ସେ ବିସ୍‌ବାସିମନ୍ ତାକର୍ ତାକର୍ ବାସାଇ କାତା ଅଇବାଟା ସେମନ୍

\* ୧:୧୮ ୧:୧୮ ମାଡ଼ିଉ ୨୭:୩-୮    \* ୧:୨୧ ୧:୨୧ ମାଡ଼ିଉ ୩:୧୭; ମାର୍‌କ ୧:୯; ଲୁକ୍ ୩:୨୧; ମାର୍‌କ ୧୭:୧୯; ଲୁକ୍ ୨୪:୫୧

ସୁନ୍ଦରୀ ।<sup>୭</sup> ସେମାନେ ବୁଦ୍ଧିଗୁପ୍ତଗାଲା ଆରି କାବା ଅଇଜାଇ ପାଚାରୁଲା, “ଏନ୍ତାରି ବାସାଇ କାତା ଅଇବା ଲକ୍ଷ୍ମୀନୀ ଗାଲିଲିଅନି ନଅଡ଼ କି ? ” ସେନ୍ତିଆଲେ ଆମେ କେନ୍ତି ସେମାନଙ୍କେ ଆମର ନିଜର ନିଜର ଜନମ୍ ଜାଗାର ବାସାଇ କାତା ଅଇବାଟା ସୁନ୍ଦରୀ ?<sup>୮</sup> ଆମେ ପାର୍ତିୟ, ମାଦିୟ, ଏଲୀୟ ଆରି ମେସପଟାମିୟ, ଜିଉଦା ଦେସ ଆରି କାପ୍ପାଦକିଆ, ପନ୍ଥୁ ଆରି ଆସିଆ,<sup>୯</sup> ପିରିଜିଆ ଆରି ପପୁଲିଆ, ମିସର୍ ଆରି କୁରିଣି ଲଗେ ରଇଲା ଲିବିଆ ଜାଗାର ଲକ୍ । ଆମର ବିତ୍ରେ ରମ୍ପରାଇଜେଅନି ଆସିରଇବା, ଜନମେ ଅନି ଜିଉଦି ଅଇଲା ଲକ୍ ଆରୁ ଆରି ପଚେ ଜିଉଦି ଦରମ୍ ନେଲା ଲକ୍ ମିସା ଆରୁ ।<sup>୧୦</sup> ଆମର ବିତ୍ରେଅନି କେତେଲକ୍ କିରତିୟଅନି ଆରି ଆରବିୟଅନି ଆଇଲୁ ଆରୁ । ଏନ୍ତି ଆମେ ସବୁ ବିନ୍ ବିନ୍ ଜାଗାଇଅନି ଆଇଲୁ ଆରୁ । ଏନ୍ତି ବଇଲେ ମିସା ପର୍ମେସର୍ କଲା ବଡ଼ ବଡ଼ କାବାଅଇଜିବା କାମ୍ ଏ ଲକ୍ଷ୍ମୀନୀ ଆମର ନିଜର ନିଜର ବାସାଇ କାତାଅଇବାଟା ସୁନ୍ଦରୀ ।”<sup>୧୧</sup> ଏନ୍ତି ବଲି ସେମନ୍ ବେସି କାବାଅଇଗାଲା । ଆରି ସେମାନେ ବୁଦ୍ଧି ଆଜି ଗାଲା । ଆରି ତାକର ତାକର ବିତ୍ରେ “ଏଟା କେନ୍ତାରୁ ଅଇଲା ତେବେ ?” ବଲି ସବୁ ବେଲେ ପାଚାରୁଉଟାରୁ ଅଇତେ ରଇଲା ।<sup>୧୨</sup> ମାତର୍ ବିନ୍ ଲକ୍ଷ୍ମୀନୀ ବିସ୍ବାସିମନ୍‌କେ କିଜାଇକରି କଇଲା, “ସେମନ୍ ମାଡିଆଡ଼ !”

ପିତର କବର ଜାନାଇବାଟା

<sup>୧୪</sup> ପିତର ତାର ସଙ୍ଗ ରଇଲା ଏଗାରଟା ପେରିଡ଼ ମନର ସଙ୍ଗ ଚିଆଅଇ ଆଉଲି ଅଇ କଇଲା, “ଏ ମର ପାରା ଜିଉଦି ଲକ୍ଷ୍ମୀନୀ ଆରି ଜିରୁସାଲମେ ରଇବା ସବୁ ବାଇମନ୍, ମର କାତା ମନ୍‌ଦେଇ ନିମାନ୍ ସୁନା । ଏଟା କାଇଟା ଅଇଲାନି ବଲି ମୁଇ ତମ୍‌କେ ବୁଜାଇ କଇବି ।<sup>୧୫</sup> ଏବେ ସାକ୍ଲିଆ ନଅଟା ବେଲା ଅଇଲା ଆଚେ । ତମେ ବାବ୍‌ଲାପାରା ଏ ଲକ୍ଷ୍ମୀନୀ ମାଡ଼ ନାଇ ।<sup>୧୬</sup> ଏଟା ଜଏଲ୍ ନାଉର୍ ବବିସ୍‌ବକ୍‌ତା କଇଲା କାତା ପାରା ଗଟ୍‌ନା ଗଟି ଆଚେ ।”

<sup>୧୭</sup> ସେଟା କାଇଟା ବଇଲେ ପର୍ମେସର୍ କଇଲାନି,

“ସାରାସାରି ଦିନେ ମୁଇ ଏ ସବୁ ବିସଇ କରବି ।

ମର ଆଡ଼ମା ଜବର ଅଇତେ ସବୁବାଟର ଲକ୍‌କେ ଦେବି ।

ତମର ପିଲାଜିଲା ମୁଇ କଇବା କାତା କଇବାଇ ।

ତମର ଦାଙ୍ଗଡାପିଲାମନ୍‌କେ ମୁଇ ଦରସନ୍ ଦେକାଇବି ।

ଆରି ତକରା ଲକ୍ଷ୍ମୀନୀ ମର ବିସଇନେଇ ସପନ୍ ଦେକ୍‌ବାଇ ।

<sup>୧୮</sup> ସେ ଦିନମନ୍‌କେ ମର ଆଡ଼ମା ଜବର ଅଇତେ ମର ଦାଙ୍ଗଡା ଅଇରଇବା

ମାଜିମୁନ୍‌ସମନ୍‌କେ ଆଜାଡି ଦେବି ।

ସେମନ୍ ମୁଇ କଇବା କାତା କଇବାଇ ।

<sup>୧୯</sup> ଆକାସେ କାବା ଅଇଜିବା କାମ୍ କରବି ।

ଦରତନି ତେଇ ମିସା କାବାଅଇଜିବା ଚିନ୍‌ମନ୍ କରବି ।

ଲକ୍ଷ୍ମୀନୀ ବନି, ଜଇ ଆରି କାଲିଆ ଦୁଆଁ ଦେକ୍‌ବାଇ ।

<sup>୨୦</sup> ବେଲ୍‌କେ ଆନ୍ଦାର ତିସଲା ପାରା କରାଇବି,

ଜନ୍, ବନି ପାରା ତିସବାକେ କରାଇବି ।

ମୁଇ ବାଉଡି ଆଇବା ସେ ବଡ଼ ଉଜଲର୍ ଦିନ୍ ଆଗ୍‌ତୁ, ଏଟାସବୁ ଅଇସି ।

<sup>୨୧</sup> ଜେଡ଼କି ଲକ୍ ମର ନାଉଁ ଦାରି ତାକ୍‌ବାଇ,

ସେମନ୍‌କେ ମୁଇ ରକିଆ କରବି ।”

<sup>୨୨</sup> ପିତର କଇଲା, “ଏ ଇସ୍ରାଏଲ୍ ଦେସର୍ ଲକ୍ଷ୍ମୀନୀ ତମେ ମୁଇ କଇବା କାତା ସୁନା । ପର୍ମେସର୍‌ସେ ବାଟି ପାଟାଇଲା ଲକ୍, ନାଜରିତ୍ ଗଡ଼ର୍ ଜିସୁ ବଲିକରି ସେ ତମର ଲଗେ ରଇଲା ବେଲେ, ଦେକାଇଦେଲା । ସେଟା କେନ୍ତାରୁ



ବଇଲେ, ପରମେସର୍ ତାର୍ତ୍ତେଇଅନି କାବା ଅଇଜିବା କାମ୍ କଲାଆଚେ । ଏଟା ସତ୍ ବଲି ତମେ ଜାନିଆଚାସ୍ । ୨୩ \*ତାର୍ ଆଗତୁର୍ ଜଜନା ଇସାବେ ସେ କାତା ଦେଇସାରାଇରଇଲା କି, ଜିସୁ ତମର୍ ଆତେ ସର୍ପାଇ ଅଇସି । ତାର୍ପଚେ ତାର୍ ନିୟମ୍ ନ ମାନ୍ବା ଲକ୍ମନ ତାକେ କୁର୍ସେ ଚଗାଇ ମରାଅତ୍ ବଲି ତମେ ତାକେ ଏଡ୍ଟି କଲାସ୍ । ୨୪ \*ମାତର୍ ପରମେସର୍ ଜିସୁକେ ମଲାଟାନେଅନି ଆରି ତରେକ୍ ଉଟାଇଲା । ମରନର୍ ବପୁତେଇଅନି ତାକେ ମୁକ୍ତାଇଲା । କାଇକେବଇଲେ କେ ମିସା ତାକେ ମରାଇକରି ସେ ଜାଗାଇ ସଙ୍ଗଇ ନାପାରୁଲା । ୨୫ ଏ ବିସଇ ଦାଉଦ୍ ରାଜା ଏଡ୍ଟି କଇ ଆଚେ । ସେଟା କାଇଟା ବଇଲେ,

“ପରମେସର୍ ସବୁ ବେଲା ମର୍ ମୁଆଟେ ରଇବାଟା ଦେକ୍ଲି ।  
ସେ ମର୍ ସଙ୍ଗ୍ ଆଚେ ।

ସେଟାର୍ପାଇ ମକେ କେ ମିସା କଟପଟ କରିନାପାରତ୍ ।

୨୬ ସେଟାର୍ ପାଇ ମୁଇ ସାର୍ଦାସଙ୍ଗ୍ ଆଚି ।

ଆରି ସାର୍ଦାର୍ କାତା କଇବି ।

ମର୍ ଏ ମର୍ବା ଗାଗଡ୍ ରଇଲେ ମିସା ମୁଇ ସବୁବେଲେ

ତମର୍ ତେଇ ଆସା କର୍ବି ।

୨୭ କାଇକେ ବଇଲେ ତୁଇ ମକେ ମଲାଲକ୍ମନର୍ ଜାଗାଇ ଚାଡି ନ ଦିଆସ୍ ।

ତମର୍ ସୁକଲ୍ ଦାଙ୍ଗ୍ତାକେ ସମାଦିଟାନେ କୁଇବାକେ ନ ଚାଡାସ୍ ।

୨୮ ତମେ ମକେ ଜିବନର୍ ବାଟ୍ ଦେକାଇ ଆଚାସ୍ ।

ତମେ ମର୍ ସଙ୍ଗ୍ ଆଚାସ୍, ସେଟାର୍ପାଇ ମୁଇ ସାର୍ଦା ସଙ୍ଗ୍ ରଇବି ।”

୨୯ ଆରି ପିତର୍ କଇଲା, “ଏ ଇସ୍ରାଏଲର୍ ବାଇବଇନିମନ୍, ଆମର୍ ଆନିଦାଦିବେଲର୍ ଦାଉଦ୍ ରାଜାର ବିସଇ ତାଟ୍ସଙ୍ଗ୍ କଇବାକେ ମର୍ ଅଦିକାର୍ ଆଚେ । ସେ ମଲାକେ ତାକେ ତପି ଦେଲାଇ । ସେ ତପ୍ଲା ଜାଗା ଏବେ ଜାକ ଇଡି ଆଚେ । ୩୦ ସେ ଗଟେକ୍ ବବିସତ୍ବକ୍ତା ରଇଲା ଆରି ପରମେସର୍ ସପତ୍କରି କଇଲା ବିସଇ ଜାନିରଇଲା । ପରମେସର୍ ତାକେ କାତା ଦେଇରଇଲା ଜେ, ତାର୍ ଗଟେକ୍ ନାଡିଡିଡି ଦିନେକ୍ ତାର୍ପାରା ସାସନ୍ କର୍ସି । ୩୧ ଏ ବିସଇ ଆଗେ ସେ ଜାନି ରଇଲାର୍ପାଇ ପରମେସର୍ ମସିଅକେ ମଲାତେଇଅନି ଆରିତରେକ୍ ଜିବନ୍ କରାଇସି ବଲି ସେ କଇପାରୁଲା ।”

“ପରମେସର୍ ତାକେ ମରିକରିସେ ତେଇ ରଇବାକେ ଚାଡିଦେଏ ନାଇ ।

ଆରି ତାର୍ ଗାଗଡ୍ ସମାଦି ତେଇ କୁଇ ଜିବାକେ ଚାଡେନାଇ ।”

୩୨ ଏବେ ଏ ଜିସୁକେ ପରମେସର୍ ଜିବନ୍ ଦେଇ ଉଟାଇଆଚେ । ଆମେ ସବୁ ସେ ଗଟ୍ନାର୍ ସାକି । ୩୩ ପରମେସର୍ ତାକେ ତାର୍ ଉଜାବାଟେ ବସ୍ବାକେ ଉଟାଇଆଚେ । ଆରି ସେ କାତା ଦେଲା ଇସାବେ ତାର୍ଟାନେଅନି ସୁକଲ୍ଆଡ୍ମା ପାଇଲାଆଚେ । ତମେ ଏବେ ଜନ୍ଟା ଦେକ୍ଲାସ୍ନି ଆରି ସୁନ୍ଲାସ୍ନି, ସେଟା ଅଇଲାନି ତାର୍ ଦାନକରି ରଇବାଟା । ଜନ୍ଟା କି ସେ ଆମ୍କେ ଜବର୍ ଅଇତେ ଆଜାଡି ଦେଲାଆଚେ । ୩୪ ସରଗେ ଗାଲା ଲକ୍ ଦାଉଦ୍ ନର୍ସ । ମାତର୍ ସେ କଇଲା,

“ପରମେସର୍ ମର୍ ମାପୁରୁକେ କଇଲା

ତମର୍ ସବୁ ସତ୍ତୁମନକେ ଆରାଇବା ଜାକ ମର୍ ଉଜାବାଟେ ବସ୍ ଆରି ସାସନ୍ କର୍ ।”

୩୫ ଆରି ତର୍ ସତ୍ତୁମନକେ ତର୍ ପାଦ୍ତଲେ ନ ଆନ୍ବା ଜାକ ମର୍ ଉଜାବାଟେ ବସି ର । ୩୬ ପିତର୍ ଆରି କଇଲା “ଏ ଇସ୍ରାଏଲର୍ ସବୁ ଲକ୍ମନ, ତମେ ଜନ୍ ଜିସୁକେ କୁର୍ସେ କୁଟିମାରି ମରାଇରଇଲାସ୍, ପରମେସର୍ ତାକେ ମାପୁରୁ ଆରି

\* ୨:୨୩ ୨:୨୩ ମାଡିଉ ୨୭:୩୫; ମାର୍କ ୧୫:୨୪; ଲୁକ୍ ୨୩:୩୩; ଜଅନ୍ ୧୯:୧୮ \* ୨:୨୪ ୨:୨୪ ମାଡିଉ ୨୮:୫,୬; ମାର୍କ ୧୬:୬; ଲୁକ୍ ୨୪:୫

ମସିଅ କଲୀଆରେ ବଲି ତାଟସଙ୍ଗ ଜାନ୍‌ବାରୁଆରେ ।” ୩୭ ଏ କାତା ପିତରୁଟାନେଅନି ସୁନ୍‌ଲୀ ସବୁ ଲକ୍‌ମନ୍ ତାକର୍ ନିଜର୍ ବୁଲ୍ ଏତାଇକରି ମନ୍ ବିଡ଼ରେ କିଲ୍‌ବିଲ୍ ଅଇଗାଲାଇ । ସେମନ୍ ପିତରୁକେ ଆରି ପେରିଡ଼ମନ୍‌କେ ପାଟାରୁଲାଇ, “ଏ ବାଇମନ୍ ଏନ୍ତାର ବଲି କଇଲେ ଆମେ କାଇଟା କରୁବାରୁ ଆରେ ?” ୩୮ ପିତରୁ ସେମନ୍‌କେ କଇଲା, “ତମେ ଗଟେକ୍ ଗଟେକ୍ ଲକ୍ ପାପେଅନି ବାଉଡ଼ିକରି ଜିସୁ କିରିସଟର୍ ନାଉଁ ଦାରି ତୁବନ୍ ନେବାରୁ ଆରେ, ଜେନ୍ତାରି କି ତମର୍ ପାପ୍ ସବୁ କେମା ଅଇସି ଆରି ପରମେସର୍ ତମ୍‌କେ ସୁକଲ୍ ଆଡ଼ମା ଦେଇସି । ୩୯ ଏ ସପତ୍ ତମର୍‌ପାଇ ଆରି ତମର୍ ପିଲାମନର୍‌ପାଇ । ଆରି ଇତିଅନି ଦୁରିକେ ରଇବା ସବୁର୍‌ପାଇ । ଜନ୍ ସବୁଲକ୍‌କେ ସେ, ତାରୁ ଲଗେ ତାକ୍‌ଲାମି ।” ୪୦ ଆରି ପିତରୁ ସେମନ୍‌କେ ଜାଗରତ୍ କରାଇବାକେ ବେସି ବିସଇ କଇଲା ଆରି ସେମନ୍‌କେ ବାବୁଜିଆ କଲା । ବିସ୍‌ବାସ୍ ନ କରୁବା ଜିତଦି ବାଇମନ୍‌କେ ଆଇତେରଇବା ବଡ଼ ଡଣ୍ଡେଅନି ନିଜ୍‌କେ ରକିଆ କରା । ବଲି କଇଲା । ୪୧ ତେଇ ପିତରୁ କାତା ସୁନି ବେସି ଲକ୍ ବିସ୍‌ବାସ୍ କଲା । ଆରି ସିସ୍‌ମନ୍ ସେମନ୍‌କେ ତୁବନ୍ ଦେଲାଇ । ସେ ଦିନେ ତିନ୍‌ଅଜାରୁ ଲକ୍‌ମନ୍ ତାକର୍ ଦଲେ ମିସ୍‌ଲାଇ । ୪୨ ସେମନ୍ ପେରିଡ଼ମନ୍ ସିକାଇଲା ବିସଇ ମାନ୍‌ଲାଇ । ମିସିବିତି ରଇବାକେ, ମିସିକରି କାଇବାକେ, ଆରି ପାର୍‌ତନା କରୁବାକେ ।

ବିସ୍‌ବାସିମନର୍ ଜିଉନା କାଉନା

୪୩ ଆରି ଲକ୍‌ମନ୍ ଡରିଜାଇତେରଇଲାଇ । ପର୍‌ମେସର୍ ପେରିଡ଼ମନ୍‌ରୁ ତେଇଅନି ବେସି କାବାଅଇଜିବା କାମ୍‌ମନ୍ କରତେ ରଇଲା । ସବୁ ଲକ୍‌ମନ୍ ପରମେସର୍‌କେ ନାମ୍‌ଲାଇ । ୪୪ ଜିସୁକେ ବିସ୍‌ବାସ୍ କଲା ଲକ୍‌ମନ୍ ଗଟେକ୍ ଗରୁର୍ ଲକ୍‌ପାରାଅଇ ରଇତେ ରଇଲାଇ । ଆରି ତାକର୍‌ତେଇ କାଇକାଟା ରଇଲା, ସେଟା ସେମନ୍ ବାଟା କରତେରଇଲାଇ । ୪୫ ତାକର୍ ବିଡ଼ରେ କେତେଲକ୍ ଜମି ଆରି ନିଜର୍‌ପାଇ ରଇବାଟା ବିକିକରି, ସେ ତାରୁ ଦର୍‌କାରୁ ଅଇଲା ଲକ୍‌ମନ୍‌କେ ଦେଇତେରଇଲାଇ । ୪୬ ସବୁଦିନ୍ ପାର୍‌ତନା କରୁବା ମନ୍‌ରେ ଗଟେକ୍ ଦଲ୍‌ଅଇ ମିସ୍‌ତେରଇଲାଇ । ଗରେ ଗରେ ମିସିବିତି କାଇତେରଇଲାଇ । ସାର୍‌ଦାସଙ୍ଗ୍ ରଇକରି, ମନେ କାଇଟା ନ ବାବି ଦିଆନିଆ ଅଇତେରଇଲାଇ । ୪୭ ସେମନ୍ ପର୍‌ମେସର୍‌କେ ଡାକ୍‌ପୁଟା କରତେରଇଲାଇ ଆରି ଜିରୁସାଲେମର୍ ସବୁଲକ୍ ସେମନ୍‌କେ ନିକ ବଲି ବାଡ଼େରଇଲାଇ । ମାପରୁ ଜନ୍ ଲକ୍‌ମନ୍‌କେ ମୁକ୍ତି କରତେରଇଲା, ଦିନ୍‌କେ ଦିନ୍ ସେମନ୍‌ରୁ ଦଲେ ମିସାଇତେରଇଲା ।

## ୩

ଗଟେକ୍ ଚଟା ନିକ ଅଇଲା

୧ ଗଟେକ୍ ଦିନେ ପିତରୁ ଆରି ଜଅନ୍ ପାର୍‌ତନା କରୁବାକେ ମନ୍‌ରେ ଗାଲାଇ, ଜେତେବେଲେ କି ପାର୍‌ତନା କରୁବା ବେଲା ମୁଇଦାନିଆ ତିନ୍ ଗଟା ଅଇରଇଲା । ୨ ତେଇ ଗଟେକ୍ ଲକ୍ ରଇଲା । ସେ ଜନମେଅନି ଚଟା । ତାକେ ସବୁଦିନ୍ ଲକ୍‌ମନ୍ ବଇକରି ସୁନ୍‌ର୍ ବଲି କଇବା ମନ୍‌ରର୍ ଡିଆଗଡ଼ି, ନିଆ ଆନା କରତେରଇଲାଇ । ସେ ଜେଡ଼ିକି ମନ୍‌ରେ ଆଇଲା ଲକ୍‌ମନ୍‌କେ ବିକ୍ ମାଙ୍ଗି ପାର୍‌ସି । ୩ ପିତରୁ ଆରି ଜଅନ୍ ମନ୍‌ରୁ ବିଡ଼ରେ ପୁର୍‌ବାଟା ଦେକି ସେ ସେମନ୍‌କେ କାଇଟା ମିସା ଦିଆ, ବଲି ବିକ୍‌ମାଗ୍‌ଲା । ୪ ପିତରୁ ଆରି ଜଅନ୍ ତାକେ ନିମାନ୍‌କରି ତିରିଆଇ ଦେକ୍‌ଲାଇ ଆରି ପିତରୁ କଇଲା, “ଆମର୍ ବାଟେ ଦେକ୍ !” ୫ ସେ କାଇଟାଆଲେ ପାଇବା ଆସାଇ ସେମନ୍‌ରୁ ବାଟେ ମୁ ବୁଲାଇ ଦେକ୍‌ଲା । ୬ ମାତର୍ ପିତରୁ ତାକେ କଇଲା, “ମର୍‌ଲଗେ ସୁନା କି ରୁପା ନାଇ, ମକେ ଜାଇଟା ଆରେ ସେଟା ତକେ ଦେଲିନି । ନାଜରିତର୍ ଜିସୁର୍

ନାଉଁଦାରି ମୁଇ ଆଦେସ୍ ଦେଲିନି, ଉର୍ ଆରି ଇଣ୍ଟୁ !”<sup>୭</sup> ଏନ୍ତି କଇକରି ପିତର୍ ତାକେ ଉଜା ଆଡ଼ ଦାରି ଉଟାଇଲା, ସେ ଦାପ୍ରେ ସେ ଲକର୍ ପାଦ୍ ଆରି ଗଡ଼ ସବୁ ତାଡ଼ ଅଇଲା ।<sup>୮</sup> ସେ ଚିକାଲୁନା ତେଗଇକରି ଉଟୁଲା ଆରି ଇଣ୍ଟୁବାର୍ ଦାଟୁଲା । ସେ ଇଣ୍ଟୁ ଇଣ୍ଟି ତେଗଇ ତେଗଇ ପର୍ମେସରର୍ ତାକ୍ପୁଟା କରିକରି ତାକର୍ ସଙ୍ଗ୍ ମନ୍ଦିରେ ଗାଲା ।<sup>୯</sup> ତେଇ ରଇବା ଲକ୍ମନ୍ ତାକେ ଇଣ୍ଟୁବାଟା ଆରି ପର୍ମେସରକେ ତାକ୍ପୁଟା କରୁବାଟା ଦେକ୍ଲାଇ ।<sup>୧୦</sup> ମନ୍ଦିରର୍ ସୁନ୍ଦର୍ ନାଉଁର୍ ତିଆଗତି ବସି ରଇଲା ମାଙ୍ଗ୍ତିଆ ବଲି ଚିନ୍ତଲାଇ । ଆରି ତାକେ ଜାଇଟା ଗଟି ରଇଲା ସବୁ ଜାନି କାବାଅଇଜାଇ କାନାବାନା ଅଇଲାଇ ।

ପାର୍ତନା ମନ୍ଦିରେ ପିତରର ଜାନାଇବାଟା

<sup>୧୧</sup> ସେ ଲକ୍ ପିତରକେ ଆରି ଜଅନ୍କେ ନ ଚାଡ଼ତେରଇଲା । ସଲ୍ମନର୍ ପିଣ୍ଡାଇ ତାକର୍ ସଙ୍ଗ୍ ରଇବାଟା ଦେକି, ଲକ୍ମନ୍ କାବାଅଇଗାଲାଇ । ପଟେ ପାଲାଇ ଆଇଲାଇ ।<sup>୧୨</sup> ପିତର୍ ସେମନ୍କେ ଦେକି କଇଲା, “ଏ ଇସ୍ରାଏଲର୍ ବାଇମନ୍, ତମେ କାଇକେ କାବାଅଇଜାଇ ଆମର୍ ବାଟେ ଏନ୍ତା ଦେକ୍ଲାସିନି ? କାଇଟା ବାବ୍ଲାସିନି ? ଆମର୍ ନିଜର୍ ବପୁସଙ୍ଗ୍ କି ଦରମ୍ପସଙ୍ଗ୍ ଏ ଲକ୍କେ ଇଣ୍ଟୁବା ବପୁ ଦେଲୁଆରୁ ?<sup>୧୩</sup> ଆମର୍ ଆନିଦାଦିମନ୍ ପର୍ମେସର୍ ଅବ୍ରାଆମର୍, ଇସାକର୍ ଆରି ଜାକୁବର୍ ପରମେସର୍ ତାର୍ ସେବାକାରିଆ ଜିସୁକେ ତାକ୍ପୁଟା କଲାଆଟେ । ମାତର୍ ତମେ ତାକେ ସାସନକାରିଆମନ୍ ଆତେ ସର୍ପିଦେଲାସ୍ । ଏନ୍ତି କି ପିଲାଡ଼ ତାକେ ଚାଡ଼ିଦେବାକେ ମନ୍କରି ରଇଲେ ମିସା ତାର୍ ମୁଆଟେ ଚାଡ଼ନାଇ ବଲି କଇଲାସ୍ ।<sup>୧୪</sup> \*ସେ ଆକା ଗଟେକ୍ସେ ସୁକଲ୍ ଆରି ଦରମ୍ ଲକ୍ ରଇଲା । ମାତର୍ ତମେ ତାକେ ନାମାସ୍ ନାଇ ଆରି ତାର୍ ବାଦୁଲେ ଗଟେକ୍ ନର୍ମାରୁକେ ମୁକ୍ଲାଇବାକେ ପିଲାଡ଼କେ ଗୁଆରି କଲାସ୍ ।<sup>୧୫</sup> ଜେ ଜିବନ୍ ବାଟ୍ ଦେକାଉ, ତାକେ ତମେ ମାର୍ଲାସ୍, ମାତର୍ ପର୍ମେସର୍ ତାକେ ମଲାଟାନେଅନି ଆରି ତରେକ୍ ଜିବନ୍ କରି ଉଟାଇଲା । ଆମେ ଅଇଲୁନି ତାର୍ ସାକି ।<sup>୧୬</sup> ତାର୍ ନାଉଁର୍ ବପୁ ସଙ୍ଗ୍ ଏ ଚଟା ନିମାନ୍ ଅଇଲାଆଟେ । ଜନ୍ ଗଟନା ଏବେ ତମେ ନିଜେ ଦେକି ସଡ଼ ବଲି ଜାନଲାସ୍, ସେଟା ଅବକା ତାର୍ ନାଉଁଦାରି ବିସ୍ବାସ୍ କଲାକେସେ ମିଲୁଲା ଆଟେ । ଜିସୁକେ ବିସ୍ବାସ୍ କଲାକେ ସେ ନିମାନ୍ ଅଇଲା ଆଟେ, ଏଟା ତମେ ଦେକ୍ଲାସ୍ ।”

<sup>୧୭</sup> “ସେଟାର୍ ପାଇ ଏ ଇସ୍ରାଏଲର୍ ବାଇମନ୍, ତମେ ଆରି ତମର୍ ନେତାମନ୍ ଜିସୁକେ ଜାଇଟା କଲାସ୍, ସେଟା ନାଜାନିକରି କଲାସ୍, ଏଟା ମୁଇ ଜାନି ।<sup>୧୮</sup> ବେସି ବରସ୍ ଆଗ୍ତୁ ତାର୍ ବବିସଡ଼ବକ୍ତା ମନ୍ରଟାନେ ଅନି ଜାନାଇରଇବା କାତା ଇସାବେ ଏବେ ସିଦ୍ ଅଇଲା ଜେ, ସେ ମସିଅ ଦୁକ୍ପାଇବାକେ ଅଇସି ।<sup>୧୯</sup> ସେନ୍ତିଆଲେ ତମେ ମନ୍ଦବାଦ୍ଲାଇ କରି ପର୍ମେସରର୍ ବାଟେ ବାଉଡ଼ି ଆସା । ତେବେ ସେ ତମର୍ ପାପ୍ କେମା କରସି ।”<sup>୨୦</sup> ଆରି ମାପରୁଟାନେଅନି ଆଡ଼ମାଇ ବପୁ ପାଇସା, ପର୍ମେସର୍ ତମର୍ପାଇ ସେ ଆଗେଅନି ବାଟୁଲା, ମସିଅ ଜିସୁକେ ପାଟାଇସି ।<sup>୨୧</sup> ପର୍ମେସର୍ ସବୁ ବିସଇ ନୁଆ କରବା ବେଲା ଜାକ ସେ ସର୍ଗେ ରଇସି । ଏଟା ପର୍ମେସର୍ ପୁର୍ବେ ରଇଲା ତାର୍ ସୁକଲ୍ ବବିସଡ଼ବକ୍ତାମନ୍କେ ସପଡ଼ କରିରଇଲା ।<sup>୨୨</sup> ସେ ବିସଇ ମସା କଇରଇଲା, ତମର୍ ମାପରୁ ପର୍ମେସର୍ ତମର୍ ଲଗେ ମର୍ପାରା ବବିସଡ଼ବକ୍ତାକେ ପାଟାଇସି । ତମର୍ ବାଇମନ୍ ବିଡ଼ରେ ଅନି ଗଟେକ୍ ଲକ୍କେ ପାଟାଇସି । ସେ ଜେଡ଼କି ବିସଇ କଇସି, ସେଟା ସବୁ ତମେ ମାନ୍ଦବାର୍ ଆଟେ ।<sup>୨୩</sup> କେ ଜଦି ସେ ବବିସଡ଼ବକ୍ତାତାର୍ କାତା ନ ନାମେ ତାକେ ପର୍ମେସରର୍ ଲକ୍ମନ୍ରଟାନେଅନି ଅଲ୍ଗା କରି କୁରୁପ୍ନାସ୍ କରିପାକାଇସି ।<sup>୨୪</sup> ଜେଡ଼କି କବର୍ ସୁନିରଇବା ବବିସଡ଼ବକ୍ତା ରଇଲାଇ, ସାମ୍ବୁଲ୍ ଆରି ଜେ ଜେ

ତାର ପରେ ଆଇଲାଲ ଆରି ଏବେ ଜାଇଟା ଗଟୁଲା, ସେ ବିସଇ କଇରଇଲାଲ ।  
 ୨୫ ପରମେସର୍ ବବିସଡ଼ବକ୍ତାମନର୍ ଟଣ୍ଡେଅନି ଜନ୍ସବୁ କାତା ଦେଲାଆତେ ସେଟା  
 ତମର୍ ପାଇସେ ଟିକ୍ । ତମର୍ ଆନିଦାଦିମନର୍ ସଙ୍ଗ୍ ଜନ୍ ରାଜିନାମା କଲାଆତେ,  
 ତମେ ମିସା ତେଇ ମିସିଆଗାସ୍ । ପରମେସର୍ ଅବରାଆମକେ କଇରଇଲା, “ମୁଇ  
 ତମର୍ ନାତିତିତି ମନରଟାନେଅନି ଜଗତର୍ ସବୁ ଲକ୍‌କେ ଆସିରବାଦ୍ କର୍ବି ।  
 ୨୬ ସେଟାରପାଇ ପରମେସର୍ ତାର ସେବାକାରିଆକେ ବାଟୁଲା ଆରି ତମ୍‌କେ ସବୁ  
 ଲକ୍‌କେ ବାନିଆ ବାଟେଅନି ବାଉଡାଇଆନ୍‌ବାକେ ଆରି ଆସିରବାଦ୍ କର୍ବାକେ  
 ପରତୁମ୍ ତାକେ ତମର୍ ଲଗେ ପାଟାଇଲା ।”

### ୪

ଜିଉଦି ବଡ଼ସବାଇ ପିତର୍ ଆରି ଜଅନ୍

୧ ପିତର୍ ଆରି ଜଅନ୍ ଲକ୍‌ମନକେ ଏନ୍ତି ସିକିଆ ଦେଇତେ ରଇଲା ବେଲେ  
 ମନ୍ଦିରର୍ କେତେଟା ପୁଜାରି ଆରି ଜାଗୁଆଲ୍‌ମନର୍ ସେନାପତି ଆରି କେତେଟା  
 ସାଦୁକିମନ୍ ଆସି କେଟୁଲାଲ । ୨ ସେମନ୍ ରିସା ଅଇଗାଲାଲ କାଇକେ  
 ବଇଲେ ପେରିଡ଼ ସିସ୍ ଦୁଇଲକ୍ ଜିସୁ ମଲାତେଇଅନି ଉଟୁଲା ଆତେ ବଲି  
 ସିକାଇତେରଇଲାଲ । ଏନ୍ତି ସିକାଇଲେସରି ଲକ୍‌ମନ୍ ମଲାଟାନେଅନି ଉଟୁବାଇବଲି  
 ପରମାନ୍ କର୍ତେ ରଇଲାଲ । ୩ ସେଟାରପାଇ ସେ ଦୁଇଟା ପେରିଡ଼ ସିସ୍‌ମନକେ  
 ଦାରି ବାନ୍‌ଲାଲ । ଆରି ସେ ଦିନେ ବେସି ଅଲ୍‌ସମ୍ ଅଇଜାଇରଇଲାକେ ଆରକର୍  
 ଦିନ୍ ଜାକ ବନ୍ଦିଗରେ ରକିରଇଲାଲ । ୪ ମାତର୍ ବେସି ଲକ୍ ସେମନର୍ ସିକିଆ  
 ସୁନିକରି ବିସବାସ୍ କଲାଲ, ଆରି ତାକର୍ ବିତ୍‌ରେଅନି ମୁନୁସ୍‌ପିଲା ସେ ଅଦିକ୍  
 ଅଇକରି ପାକାପାକି ପାଁଟୁଅଜାର୍ ଅଇଲାଲ ।

୫ ତାର ଆରକର୍ ଦିନେ ଜିଉଦି ନେତାମନ୍, ଆରି ପାର୍ଟିନ୍‌ମନ୍ ଆରି ନିୟମ୍  
 ସିକାଉମନ୍ ଜିରୁସାଲମେ ରୁଣ୍ଡିଲାଲ । ୬ ସେମନର୍ ବିତ୍‌ରେ ବଡ଼ପୁଜାରି ଆନାନ୍,  
 କାୟାପା, ଜଅନ୍, ଆଲେକଜାଣ୍ଡାର୍ ଆରି ବଡ଼ ପୁଜାରିର୍ କୁଟୁମେ ରଇବା ବିନ୍  
 ଲକ୍‌ମନ୍ ମିସ୍‌ଲାଲ । ୭ ପେରିଡ଼ମନକେ ସେମନର୍ ମୁଆଟେ ଡାକାଇ ପାଟାରୁଲାଲ,  
 “ତମେ ଏଟା ସବୁ କେନ୍ତାର କଲାସ୍‌ନି ? କାର୍ ବପୁସଙ୍ଗ୍ ନଇଲେ କାର୍ ନାଉଁଦାରି  
 ଏଟା କଲାସ୍‌ନି ?”

୮ ସେଟାରପାଇ ପିତର୍ ସୁକଲ୍‌ଆଡ଼ମାଇ ପୁରାପୁରୁନ୍ ଅଇ ସେମନକେ କଇଲା,  
 “ତମେ ଜେ କି ଆମର୍ ସାସନ୍‌କାରିଆମନ୍ ଆରି ପାର୍ଟିନ୍‌ମନ୍ ! ୯ ଜଦି ଆଜି ଏ  
 ଟଟାର ପାଇ କରରଇଲା ନିମାନ୍ କାମରୁଲାଗି ଆମ୍‌କେ ପରସନ୍ କଲାସ୍‌ନି ଆରି ସେ  
 କେନ୍ତାର ନିମାନ୍ ଅଇଲା ବଲି ଜାନ୍‌ବାକେ ମନ୍ କଲାସ୍‌ନି, ୧୦ ତେବେ ତମେ ଆରି  
 ଇସରାଏଲର୍ ସବୁ ଲକ୍ ଜାନ୍‌ବାର୍ ଦରକାର୍ ଜେ, ତମର୍ ମୁଆଟେ ଟିଆଅଇରଇଲା  
 ଏ ଲକ୍ ଅବକା ନାଜ୍‌ରିଡ଼ ଗତର୍ ଜିସୁକିରିସ୍‌ଟର୍ ବପୁସଙ୍ଗ୍ ପୁରାପୁରୁନ୍ ନିମାନ୍  
 ଅଇଲା ଆତେ । ସେ ଜିସୁକେ ତମେ କୁର୍ସେ ମରାଇଲାସ୍ । ମାତର୍ ପରମେସର୍  
 ତାକେ ମଲାତେଇଅନି ଆରି ତରେକ୍ ଉଟାଇଲା ଆତେ ।” ୧୧ ଜିସୁର୍ ବିସଇ ଦରମ୍  
 ସାସ୍‌ତରେ ଲେକା ଅଇଲାଆତେ,

ଗର୍ ଡିଆରକରୁମନ୍ ଜନ୍ ପାକ୍‌ନା ନଏଁ ବଲି ପିଜିଦେଇ ରଇଲାଲ,

ସେଟାସେ କନର୍ ମୁକିଅ ପାକ୍‌ନା ଅଇଲା ।

୧୨ ସେ ଆକା ଆମ୍‌କେ ମୁକ୍ତି ଦେଇସି । ଗୁଲାଲ ଜଗତର୍ପାଇ ପରମେସର୍  
 ତାକେସେ ଦେଲା ଆତେ । ଜେ କି ଆମ୍‌କେ ରକିଆ କର୍ସି । ୧୩ ବଡ଼ସବାର୍  
 ଲକ୍‌ମନ୍ ପିତର୍ ଆରି ଜଅନ୍‌ର୍ ସାଆସ୍ ଦେକି କାବା ଅଇଗାଲାଲ । ସେମନ୍  
 ପାଟ୍‌ସାଟ୍ ନ ପଡି ଅବକା ଲକ୍‌ମନ୍‌ସେ ବଲି ଜାନିରଇଲାଲ । ଆରି ସେମନ୍ ଦୁଇ  
 ଲକ୍ ଜିସୁର୍ ସଙ୍ଗ୍ ରଇଲାଲ ବଲି ଚିନିରଇଲାଲ । ୧୪ ମାତର୍ ତାକର୍ ବିରୁଦେ

କାଈବଲି କଇନାପାରୁଲାଈ, କାଈକେ ବଇଲେ ନିମାନ୍ ଅଇଲା ଲକ୍‌କେ ପିତର୍ ଆରି ଜଅନ୍‌ସଙ୍ଗ୍ ଠିଆଅଇରଇଲାଟା ଦେକ୍‌ଲାଈ । ୧୫ ସେଟାର ପାଇ ସେମନ୍ ସିସ୍‌ମନ୍‌କେ ସେ ସବାଇଅନି ବାଠକରାଇଦେଇକରି ତାକର୍ ତାକର୍ ବିତ୍‌ରେ କାତାବାଠତା ଅଇବାର୍ ଦାରୁଲାଈ । ୧୬ ସେମନ୍ କାତା ଅଇଲାଈ, “ଆମେ ଏମନ୍‌କେ କାଈଟା କରୁ ? ଏମନ୍ କରିରଇବା ଏ କାବା ଅଇଜିବା କାମ୍ ବିସଇ ଜିରୁସାଲମର୍ ସବୁ ଲକ୍ ଜାନିଗାଲାଈ ଆଚଡ୍ । ଏ ସଡ୍ ଗଟେନାଇ କି ନାଜାନ୍ ବଲି କଇ ନାପାରୁ । ୧୭ ମାତର୍ ଏ କାତା ଲକ୍‌ମନ୍‌ର ବିତ୍‌ରେ ଆରି ଅଦିକ୍ ଉଡ୍‌ରା ଅଇ ନ ଜାଅ, ଜିସୁର୍ ବିସଇ ଆରି କେବେ କାର୍ ମୁଆଟେ ନ କଇବାକେ ସେମନ୍‌କେ ଆମେ ତାଟ୍ ସଙ୍ଗ୍ ଜାଗ୍‌ରଡ୍ କରାଇଦେଉଁ ।” ୧୮ ସେଟାର ପାଇ ସେମନ୍ ପିତର୍ ଆରି ଜଅନ୍‌କେ ଆରି ତରେକ୍ ବିତ୍‌ରେ ତାକ୍‌ଲାଈ । ଆରି କେବେମିସା ଜିସୁର୍ ନାଉଁ ଦାରି କାଈମିସା କାତା ନ କଇବାକେ ଆରି ସିକିଆ ନ ଦେବାକେ ଜାଗ୍‌ରଡ୍ କରାଇଦେଲାଈ । ୧୯ ମାତର୍ ପିତର୍ ଆରି ଜଅନ୍ କଇଲାଈ, “ତମର୍ ବାଦିଅ ଅଇବୁ, କି ପରମେସରର୍ ବାଦିଅ ଅଇବୁ, କନ୍ ବିସଇ ପରମେସରର୍ ମୁଆଟେ ଠିକ୍ ସେଟା ତମେ ବିଚାର୍ କରା । ୨୦ କାଈକେ ବଇଲେ ଆମେ ଜାଈଟା ଦେକ୍‌ଲୁ ଆତୁ ଆରି ସୁନ୍‌ଲୁ ଆତୁ ସେଟା ନ କଇକରି ରଇନାପାରୁ ।” ୨୧ ମାତର୍ ବଡ୍‌ସବାର୍ ଲକ୍ ଆରି ତାଟ୍‌ସଙ୍ଗ୍ ସେମନ୍‌କେ ଦମ୍‌କାଈକରି ଚାଡି ଦେଲାଈ । ସେମନ୍‌କେ ତଣ୍ଡଦେବାଟା କସ୍‌ଟ ବଲି ସେମନ୍ ଜାନିପାରୁଲାଈ । କାଈକେ ବଇଲେ ସେ କାବାଅଇଜିବା କାମର୍ ଲାଗି ଲକ୍‌ମନ୍ ପର୍‌ମେସର୍କେ ଜୁଆର୍ କରଡେ ରଇଲାଈ । ୨୨ ଜନ୍ ଲକ୍ କାବା ଅଇଜିବା କାମର୍‌ଲାଗି ନିମାନ୍ ଅଇରଇଲା, ତାକେ ଚାଲିସ୍ ବରସେଅନି ଅଦିକ୍ ଅଇରଇଲା ।

ନ ଡର୍‌ବା ପାଇ ପାର୍‌ତନା

୨୩ ପିତର୍ ଆରି ଜଅନ୍ ମୁକ୍‌ଲୁଲା ଦାପ୍‌ରେ ନିଜର୍ ଦଲେ ବାଉଡିଗାଲାଈ ଆରି ମୁକିଅ ପୁଜାରିମନ୍ ଆରି ପାର୍‌ତିନ୍‌ମନ୍ ଜାଈଟା କଇରଇଲାଈ, ସେଟା ସେମନ୍‌କେ ଜାନାଇଲାଈ । ୨୪ ବିସ୍‌ବାସିମନ୍ ସବୁ କାତା ସୁନ୍‌ଲା ପତେ ଗଟେକ୍ ଅଇ ପର୍‌ମେସର୍କେ ଏ ପାର୍‌ତନା କଲାଈ, ଏ ମାପ୍‌ରୁ ! ସରଗ, ଦର୍‌ତନି, ସମ୍‌ଦୁର୍ ଆରି ତେଇ ରଇବା ସବୁ ବିସଇ ତମେସେ ତିଆର୍ କଲାସ୍ ! ୨୫ ତମେ ସୁକ୍‌ଲୁ ଆଡ୍‌ମାଇଅନି ଆମର୍ ଆନିଦାଦିମନ୍‌ର ଆରି ତମର୍ ଦାଈଡା ଦାଉଦର୍ ଟଣ୍ଡେଅନି ଏ କାତା ସୁନାଇ ରଇଲାସ୍ । ସେ କଇରଇଲା,

ଜିଉଦି ନଇଲା ଲକ୍‌ମନ୍ କାଈକେ ରିସା ଅଇଲାଈ ?

ଲକ୍‌ମନ୍ କାଈକେ ଚୁଟାଇ ସଡ୍‌ଜିତର୍ କଲାଈ ?

୨୬ ମାପ୍‌ରୁର୍ ବିରଦେ ଆରି

ତାକର ମସିଆର୍ ବିରଦେ

ଜଗତର୍ ରାଜାମନ୍ ଆରି ସାସନ୍‌କାରିଆମନ୍

ଜୁଜ୍‌ବାକେ ନିଜ୍‌କେ ତିଆର୍ ଅଇ ରୁଣ୍ଡିଲାଈ ।

୨୭ \*କାଈକେବଇଲେ ଏ ନଅରେ ଏରଦ୍ ଆରି ପନ୍ତିୟ ପିଲାଡ୍ ଇସ୍ରାଏଲିୟମନ୍‌ର ସଙ୍ଗ୍ ଆରି ଜିଉଦି ନ ଅଇରଇବା ଲକ୍‌ରସଙ୍ଗ୍ ମିସି ଜିସୁର୍ ବିରଦେ ଜଜ୍‌ନା କଲାଈ । ସେ ସେ ତମର୍ ସୁକ୍‌ଲୁ ଦାଈଡା ଆରି ତମେ ବାଟ୍‌ଲା ମସିଅ । ୨୮ ତମର୍ ବପୁ ଆରି ମନ୍ କଲାଟା ଈସାବେ ଜାଈଟା ସବୁ ଗଟାଈବାପାଇ ତମେ ଠିକ୍ କରି ରଇଲାସ୍, ସେମନ୍ ଗଟେକ୍ ଅଇ ସେ ସବୁ କର୍‌ବାକେ ଲାଗିପଡ୍‌ଲାଈ । ୨୯ “ଏ ମାପ୍‌ରୁ, ସେମନ୍ ଆମ୍‌କେ ଜନ୍ ଦମକ୍ ଦେଲାଈ ଆଚଡ୍ ସେ ବିସଇ ସୁନା ଆରି ନ ଡର୍‌ତେ ତମର୍ କାତା ଜାନାଇବାକେ ତମର୍ ଏ ଦାଈଡାମନ୍‌କେ ତାଟ୍ କରା

\* ୪:୨୨ ୪:୨୭ ଲୁକ୍ ୨୩:୭-୧୧; ମାତିଉ ୨୭:୧,୨; ମାର୍‌କ୍ ୧୫:୧; ଲୁକ୍ ୨୩:୧; ଜଅନ୍ ୧୮:୨୮, ୨୯

। ୩୦ ନିମାନ୍ କର୍ବାକେ ତମର୍ ଆଡ଼ ଲାମାଆ ଆରି ତମର୍ ସୁକଲ୍ ଦାଙ୍ଗଡା ଜିସୁର୍ ନାଏଁ ନ ଅଇବା କାମ୍ ଆରି କାବା ଅଇଜିବା କାମ୍ମାନ୍ ସାଦନ୍ କରାଆ ।”

୩୧ ସେମନ୍ ପାର୍ତତନା କରିସାରାଇଲା ପତେ ଜନ୍ ଜାଗାଇ ରୁଣ୍ଡିରଇଲାଇ, ସେଟା ତୁଲ୍‌ତୁଲିଗାଲା । ସେମନ୍ ସବୁ ସୁକଲ୍‌ଆଡ଼ମାଇ ପୁରାପୁରୁନ୍ ଅଇଲା । ଆରି ନ ଡର୍ତେ ପର୍ମେସରର୍ କାତା ଜାନାଇବାର୍ ଦାର୍‌ଲାଇ ।

ବିସ୍‌ବାସିମନ୍ ନିଜର୍ ନିଜର୍ ସଁମ୍‌ପତିକେ ବାଗ୍ ମିସ୍‌ବାଟା

୩୨ ☆ସବୁ ବିସ୍‌ବାସିମନ୍ ଗଟେକ୍ ବିସଇ ଚିନ୍ତା କରି ମନ୍ କଲାଇ । କେ ମିସା ନିଜର୍ ସଁମ୍‌ପତି ନିଜର୍ ବଲି ଦାବି ନ କର୍ତେ ରଇଲାଇ । ତାକର୍‌ଟାନେ ଜେଡ଼କି ରଇଲା ସେଟା ସବୁଲକ୍ ସମାନ୍ କରି ବାଟାସାଟା କର୍ତେ ରଇଲାଇ । ୩୩ ପେରିଡ଼ ସିସ୍‌ମନ୍ ବପୁସଙ୍ଗ୍ ସାକି ଦେବାର୍ ଦାର୍‌ଲାଇ । ପର୍ମେସର୍ ମାପୁରୁ ଜିସୁକେ କେନ୍ଦ୍ରିକରି ମଲାଟାନେଅନି ଉଟାଇଲା ବଲି । ଆରି ପର୍ମେସର୍ ସବୁ ବିସ୍‌ବାସିମନ୍‌କେ ଅଦିକ୍ ଅଦିକ୍ ଜିବନ୍ ଦୁକାଇଲା । ୩୪ ତାକର୍ ଦଲେ ଜିଇବା କାଇବାକେ କାକେ ମିସା ଅବାବ୍ ନ ରଇଲା । ଜନ୍ ଲକ୍‌ମନ୍‌କେ ଗର୍ ଆରି ଜମିରଇଲା, ସେମନ୍ ସେଟା ବିକକରି ତାବୁ ଆନି, ୩୫ ପେରିଡ଼ମନ୍‌କେ ସର୍ପିଦେଇରଇଲା । ସେ ତାବୁ, ପେରିଡ଼ ମନ୍ ଅବାବେ ରଇଲା ଲକ୍‌ମନ୍‌କେ ବାଟାକରି ଦେଇତେରଇଲାଇ ।

୩୬ ସାଇପରସ୍ ନାଉଁର୍ ଗଟେକ୍ ଜାଗାଇ ଜନମ୍ କରିରଇବା ଲେବି କୁଟୁମର୍ ଜସେପ୍, ଜାକେ ପେରିଡ଼ ସିସ୍‌ମନ୍ ବର୍ନବା ବଲି ନାଉଁ ଦେଇ ରଇଲାଇ । ବର୍ନବାର୍ ଅରଡ଼ ଦୁକ୍ ସାରାଇବା ପିଲା । ସେ ତାର୍ ଜମି ବିକଲା ଆରି ୩୭ ତାବୁ ପେରିଡ଼ ସିସ୍‌ମନ୍‌କେ ସର୍ପିଦେଲା ।

## ୫

ଅନନିୟ ଆରି ସପିରା

୯ ସେ ଦଲର୍ ଅନନିୟ ନାଉଁର୍ ଗଟେକ୍ ଲକ୍ ଆରି ତାର୍ ମାଇଜି ସପିରା ସେମନ୍‌ର୍ କେତେକ୍ ଜମି ବିକଲାଇ । ୧ ମାତର୍ ମାଇଜିମୁନ୍‌ସ୍ ରାଜିଅଇକରି ବିକକରି ପାଇଲା କେତେକ୍ ତାବୁ ଅନନିୟ ନିଜର୍ ପାଇ ସଙ୍ଗାଇଲା । ଅଗଲ୍‌ଲାଟା ସେ ପେରିଡ଼ ସିସ୍‌ମନ୍‌କେ ଦେଲା । ୩ ପିତର୍ ତାକେ କଇଲା, “ଅନନିୟ ତୁଇ କେନ୍ଦ୍ରି ସଇତାନର୍ ପାଦେପତି ଜମି ବିକି ଆନିରଇବା ତାବୁ କେତେକ୍ ନିଜର୍ ପାଇ ସଙ୍ଗାଇକରି ସୁକଲ୍ ଆଡ଼ମାର୍ ମୁଆଟେ ମିର୍ କଇଲୁସ୍ ? ୪ ବିକ୍‌ବା ଆଗତୁ ସେ ଜମି ତମର୍ ରଇଲା । ବିକଲା ପତେ ମିସା ସେ ତାବୁ ତମର୍‌ଟାସେ । ଏନ୍ତି କାମ୍ କର୍ବାକେ କାଇକେ ମନ୍ କଲୁସ୍ ? ତୁଇ ଲକ୍‌ମନ୍‌କେ ନାତାଉସ୍ ନାଇ ମାତର୍ ପର୍ମେସର୍‌କେ ନାତାଇଆଟୁସ୍ ।” ୫ ଅନନିୟ ଏ କାତା ସୁନ୍‌ଲା ଦାପ୍‌ରେ ତଲେ ଆପ୍‌ଟି ଅଇ ଅଦ୍‌ରି ମରିଗାଲା । ଜନ୍ ଲକ୍‌ମନ୍ ଏ କାତା ସୁନ୍‌ଲାଇ ସେମନ୍ ସବୁଲକ୍ ବେସି ଡରିଗାଲାଇ । ୬ ଦଲର୍ ଦାଙ୍ଗଡାମନ୍ ଅନନିୟର୍ ମଲା ଗାଗଡ଼ ଲୁଗାଇ ଗୁଡିଆଇକରି ବାଇରେ ବଇକରି ଦାରିଗାଲାଇ ଆରି ତପିଦେଲାଇ ।

୭ ପାକାପାକି ତିନ୍‌ଗଟା ପତେ ଅନନିୟର୍ ମାଇଜି ତେଇ ଆସି କେଟ୍‌ଲା । ସେ, ଏ ଗଟ୍‌ନା ନାଜାନି ରଇଲା । ୮ ପିତର୍ ତାକେ ପାଟାରୁଲା “ମକେ କ ପନି, ତୁଇ ଆରି ତର୍ ମୁନ୍‌ସ୍ ଜେଡ଼କି ଜମି ବିକଲାସ୍, ଏଟା କାଇ ତାର୍ ପୁରାଦାମ୍ କି ?” ସେ କଇଲା, “ଉଁ ଏଡ଼କିସେ ।”

୯ ପିତର୍ ତାକେ କଇଲା, “ମାପୁରୁର୍ ଆଡ଼ମାକେ ପରିକା କର୍ବାକେ ତୁଇ ଆରି ତର୍ ମୁନ୍‌ସ୍ କାଇକେ ରାଜିଅଇଲାସ୍ ? ଜନ୍ ଲକ୍‌ମନ୍ ତର୍ ମୁନ୍‌ସ୍‌କେ ସମାଦି ଦେଲାଇ ଆତଡ଼, ବାଟ୍ ଡିଆଗତି କେଟ୍‌ଲାଇବେ, ସେମନ୍ ତକେ ମିସା ବଇ

ଦାରିଜିବାଇବେ ।” ୧୦ ସେ ଦାପରେ ସେ ମିସା ପିତରର ପାଦତଳେ ଅଦରି ମରିଗାଲା । ଦାଙ୍ଗଡ଼ାମନ୍ ବିତ୍ତରେ ଆସି ତାର ମଲା ଗାଗଡ଼ ବଇନେଲାଇ ଆରି ତାର ମୁନୁସର ଲଗେ ତାକେ ମିସା ସମାଦି ଦେଲାଇ । ୧୧ ଜିରୁସାଲେମର୍ ଗୁଲାଇ ମଣ୍ଡଲିର ଲକ୍ମନ୍ ଆରି ଜେଡ଼କି ଲକ୍ ଏ କାତା ସୁନ୍ଲାଇ, ସବୁଲକ୍ ଡରିଗାଲାଇ ।

କାବାଅଇଜିବା କାମ୍ ଆରି ଚିନ୍

୧୨ ପେରିଡ଼ ସିସ୍ମନର୍ ଟାନେଅନି ଲକ୍ମନ୍ ବିତ୍ତରେ ବେସି କାବା ଅଇଜିବା କାମ୍ ଆରି ଚିନ୍ମନ୍ ସାଦନ୍ ଅଇତେ ରଇଲା । ସବୁ ବିସ୍ବାସିମନ୍ ସଲ୍ମନର୍ ମଣ୍ଡପେ ରୁଣ୍ଡେତେ ରଇଲାଇ । ୧୩ ସେମନ୍ ବିସଇ ବିନ୍ଲକ୍ମନ୍ ନିମାନ୍ କାତା କଇତେ ରଇଲାଇ । ମାତର୍ ଦଲ୍ ବାଇରେ ରଇଲା ଲକ୍ମନ୍ କେ ମିସା ଦଲେ ମିସ୍ବାକେ ସାଆସ୍ ନ କରତେ ରଇଲାଇ । ୧୪ ଏଲେ ମିସା ପର୍ମେସର୍କେ ବିସ୍ବାସ୍ କରି ଅଦିକ୍ ଅଦିକ୍ ମାଇଜିଚକି ଆରି ମୁନୁସ୍ ପିଲାମନ୍ ଏ ଦଲେ ମିସ୍ଲାଇ । ଆରି ସେ ଦଲ୍ ଦିନ୍କେ ଦିନ୍ ଅଦିକ୍ ଅଦିକ୍ ବଡ଼ତେ ଗାଲା । ୧୫ ପେରିଡ଼ ସିସ୍ମନର୍ କାମ୍ ଅଦିକ୍ ବଡ଼ି ବଡ଼ି ଗାଲା । ଏଡ଼ିକି ପିତର୍ ଇଣ୍ଡିଗାଲାବେଲେ ତାର ଚାଇଆଲେ ଅଲପ୍ ପତବଲି ଲକ୍ମନ୍ ରଗିମନ୍କେ ବଇଆନି ବାଟ୍ପାଲି କଟେ ଆରି ଟାରିମନ୍ ଅଚାଇକରି ସୁଆଇ ଦେଇତେ ରଇଲାଇ । ୧୬ ଜିରୁସାଲମର୍ ଚାରିବେଟ୍ଟି ରଇବା ଗଡ଼ର୍ ରଗି ଆରି ତୁମାଦାରଲା ଲକ୍ମନ୍କେ ପେରିଡ଼ମନ୍ ଲଗେ ଆନ୍ତେ ରଇଲାଇ । ଆରି ସେମନ୍ ସବୁ ଲକ୍ ନିମାନ୍ ଅଇତେ ରଇଲାଇ ।

ପେରିଡ଼ ସିସ୍ମନକେ ତାଡ଼ନା

୧୭ ତାର ପଟେ ବଡ଼ ପୁଜାରି, ତାରସଙ୍ଗ୍ ରଇବା ଲକ୍ମନ୍ ଆରି ସାଦୁକି ଦଲ୍ ଲକ୍ମନ୍, ସିସ୍ମନକେ ଛୁଆ ଅଇଗାଲାଇ । ଆରି ସେମନ୍ ବିରୁଦେ କାଇଟାଆଲେ କରୁ ବଲି ଜଜ୍ନା କଲାଇ । ୧୮ ସେମନ୍ ପେରିଡ଼ ସିସ୍ମନକେ ଦାରି ବାନ୍ଦିକରି ବନ୍ଦିଗରେ ସଙ୍ଗଇଲାଇ । ୧୯ ମାତର୍ ସେ ରାତି ମାପରୁର୍ ଗଟେକ୍ ଦୁଡ଼ ବନ୍ଦିଗରର୍ କାପାଟ୍ ଉଗାଡ଼ିଦେଲା ଆରି ସେମନ୍କେ ମୁକ୍ଲାଇ ଆନି କଇଲା, ୨୦ “ଜା ଆରି ମନ୍ଦିରେ ଚିଆଅଇକରି ଲକ୍ମନ୍କେ ଏ ନୁଆ ଜିବନ୍ ବିସଇ ସବୁ କାତା କୁଆ ।” ୨୧ ସିସ୍ମନ୍ ସେ ଦୁଡ଼ର୍ କାତା ମାନି ସାକାଲ୍ ସାକାଲ୍ ମନ୍ଦିରେ ପୁରି ସିକିଆ ଦେବାର୍ ଦାରଲାଇ ।

ବଡ଼ ପୁଜାରି, ତାକର୍ ସଙ୍ଗାରିମନ୍ ଆରି ଇସ୍ରାଏଲ୍ ପାର୍ଟିମନ୍ ଗଟେକ୍ ପୁରା ସବା ପାଇ ଡାକାଇ ପାଟାଇଲାଇ । ତାର ପଟେ ପେରିଡ଼ ସିସ୍ମନକେ ବନ୍ଦିଗରେ ଅନି ସବାଇ ଆନ୍ବାକେ ବନ୍ଦିଗରର୍ ଜାଗୁଆଲ୍ମନର୍ ମୁକିଆମନ୍କେ ଆଦେସ୍ ଦେଲାଇ । ୨୨ ମାତର୍ ସେ ମୁକିଆମନ୍ ବନ୍ଦିଗରେ କେଟ୍ଲାକେ ପେରିଡ଼ମନ୍କେ ତେଇ ଦେକଡ଼ନାଇ । ସେଟାପାଇ ସେମନ୍ ବଡ଼ସବାଇ ବାଉଡ଼ି ଆଇଲାଇ । ଆରି ଲକ୍ମନ୍କେ କଇଲାଇ, ୨୩ “ଆମେ ବନ୍ଦି ଗରେ କେଟି ଦେକ୍ଲୁ ଜେ ଦୁଆର୍ ନିକସଙ୍ଗ୍ ଡାବି ଅଇରଇଲା । ଆରି ଜାଗୁଆଲ୍ମନ୍ ମିସା ଜାଗିରଇଲାଇ । ମାତର୍ କାପାଟ୍ ଉଗାଡ଼ଲା ପଟେ ଆମେ ବିତ୍ତରେ କାକେ ମିସା ଦେକୁ ନାଇ ।” ୨୪ ଏ କାତା ସୁନି ମୁକିଅ ପୁଜାରିମନ୍ ଆରି ମନ୍ଦିର୍ ଜାଗୁଆଲ୍ମନର୍ ଦାଇତେ ରଇଲା ଲକ୍ମନ୍ କାବାଅଇଗାଲାଇ । ପେରିଡ଼ ସିସ୍ମନକେ କାଇଟା ଅଇଲାଆଟେ ବଲି ସେମନ୍ ବୁଜି ନାପାରଲାଇ । ୨୫ ସେଡ଼କିବେଲେ ଗଟେକ୍ ଲକ୍ ଆସି କଇଲା “ସୁନା ! ଜନ୍ ଲକ୍ମନ୍କେ ବନ୍ଦି ଗରେ ରକିରଇଲାସ୍, ସେମନ୍ ଏବେ ମନ୍ଦିରେ ଲକ୍ମନ୍କେ ସିକିଆ ଦେଲାଇନି ।” ୨୬ ମନ୍ଦିରର୍ କାମ୍କରୁମନ୍ ଜାଗୁଆଲ୍ମନର୍ ସଙ୍ଗ୍ ଜାଇ ପେରିଡ଼ ସିସ୍ମନକେ ସୁଡ଼ରାଇକରି ଆରିତରେକ୍ ଡାକିଆନ୍ଲାଇ । ସେମନ୍ ଡରାବିଡ଼ରା

କରତ୍ ନାଈ । କାଇକେବଇଲେ ସେମନ୍‌କେ ଲକ୍‌ମନ୍ ପାକ୍‌ନାପୁକ୍‌ନି ମାର୍‌ବାଇ ବଲି ଡରିଜାଇତେରଇଲାଇ ।

୨୭ ପେରିଡ଼ ସିସ୍‌ମନ୍‌କେ ବିତ୍‌ରେ ଡାକିଆନି ବଡ଼ସବାର୍ ମୁଆଟେ ଚିଆ କରାଇଲାଇ, ଆରି ବଡ଼ ପୁଜାରି ସେମନ୍‌କେ ପାଟାରୁଲା । ୨୮ \* “ଏ ଜିସୁର୍ ନାଉଁ ଦାରି କାଇମିସା ସିକିଆ ନ ଦେବାକେ ତମ୍‌କେ ଡାଟ୍ ସଙ୍ଗ୍ ଆଦେସ୍ ଦେଇରଇଲୁ, ମାତର୍ ଦେକା, ତମେ କାଇଟା କରିଆଟାସ୍ ! ତମେ ଦେଇରଇବା ଏ ସିକିଆ ଜିରୁସାଲମେ ରଇଲା ଲକ୍‌ମନ୍‌ରଟାନେ କେଟ୍‌ଲା ଆଟେ । ଆରି ତାର୍ ମରନ୍ ପାଇ ଆମ୍‌କେ ଦାଇ କର୍‌ବାକେ ଚେସ୍‌ଟା କଲାସ୍‌ନି !”

୨୯ ପିତର୍ ଆରି ବିନ୍ ସିସ୍‌ମନ୍ କଇଲାଇ, “ଆମେ ତମର୍ ଆଦେସ୍ ମାନ୍‌ବା ବାଦୁଲେ ପର୍‌ମେସରର୍ ଆଦେସ୍ ମାନ୍‌ବୁ । ୩୦ ତମେ ଜିସୁକେ କୁର୍‌ସେ ଚଗାଇ ମରାଇଲାପଟେ, ଆମର୍ ଆନିଦାଦିମନ୍‌ର୍ ପର୍‌ମେସର୍ ତାକେ ମଲାଟାନେଅନି ଉଟାଇଲାଆଟେ । ୩୧ ଇସ୍ରାଏଲର୍ ଲକ୍‌ମନ୍ ତାକର୍ ପାପେଅନି ବାଅଡ଼୍ ଆରି ପାପ୍ କେମା ଅଅଡ଼ ବଲି ପର୍‌ମେସର୍ ତାକେ ତାର୍ ଉଜା ବାଟେ ବସାଇଆଟେ । ଜେଜ୍‌କି ସେ ଆମର୍ ସାସନ୍‌କାରିଆ ଆରି ରକିଆକର୍‌ବା ଲକ୍ ଅଇସି । ୩୨ ଆମେ ଏ ସବୁ ବିସଇର୍ ସାକି ଆଚୁ । ଆରି ଜନ୍ ସୁକଲ୍ ଆଡ଼ମାକେ ପର୍‌ମେସର୍ ତାକର୍ ଆଗିଆଁକାରିମନ୍‌କେ ଦାନ୍‌କଲାଆଟେ, ସେ ମିସା ଏଟାର୍ ସାକି ।”

୩୩ ବଡ଼ସବାର୍ ଲକ୍‌ମନ୍ ଏ କାତା ସୁନି ଏତେକ୍ ରିସାଅଇଗାଲାଇ ଜେ, ପେରିଡ଼ମନ୍‌କେ ମରାଇବାକେ ମନ୍ କଲାଇ । ୩୪ ମାତର୍ ସେମନ୍‌ର୍ ବିତ୍‌ରେଅନି ଗମଲିଏଲ୍ ନାଉଁର୍ ଗଟେକ୍ ପାରୁସି ଲକ୍ ରଇଲା । ସେ ନିୟ୍‌ମ୍ ସିକାଇତେ ରଇଲା । ତାକେ ଲକ୍‌ମନ୍ ମାନିଅ କର୍‌ତେରଇଲାଇ । ସେ ବଡ଼ ସବାଇ ଚିଆଅଇ ପେରିଡ଼ମନ୍‌କେ ଚନେକର୍ ପାଇ ବାଇରେ ନେବାକେ ଆଦେସ୍ ଦେଲା । ୩୫ ଆରି ବଡ଼ ସବାର୍ ଲକ୍‌ମନ୍‌କେ କଇଲା, “ଏ ଇସ୍ରାଏଲିୟ୍ ବାଇମନ୍, ଏ ଲକ୍‌ମନ୍‌କେ ଜାଇଟା କର୍‌ବାକେ ଗାଲାସ୍‌ନି ଅଲପ୍ ବାବିତିକ୍ତି କରି କରା । ୩୬ ତମର୍ ମନେରଇସି, ଅଲପ୍ ଆଗ୍‌ତୁ ଡିଉଦା ନାଉଁର୍ ଗଟେକ୍ ଲକ୍ ରମିୟ୍‌ମନ୍‌ର୍ ବିରୁଦେ ଉର୍‌ଲା । ସେ ନିଜେ ବଡ଼ଲକ୍ ବଲି ଲକ୍‌ମନ୍‌କେ କଇଲାକେ ତାର୍ ସଙ୍ଗ୍ ଚାରିସଅ ଲକ୍ ମିସି ରଇଲାଇ । ମାତର୍ ତାକେ ମରାଇଲାଇ, ତାର୍‌ପଟେ ତାର୍‌ସଙ୍ଗ୍‌ର୍ ଲକ୍‌ମନ୍ ଚିନ୍‌ବିନ୍ ଅଇଗାଲାଇ ଆରି ତାର୍ ଦଲ୍ ବୁଡିଗାଲା । ୩୭ ତାର୍‌ପଟେ ଗାଲିଲି ଅନି ଜିଉଦା ନାଉଁର୍ ଆରି ଗଟେକ୍ ଲକ୍ ରମିୟ୍‌ମନ୍‌ର୍ ବିରୁଦେ ଉର୍‌ଲା । ରମିୟ୍ ସର୍‌କାର ଲକ୍‌ମନ୍‌ର୍ ନାଉଁ ଲେକାଇବା ବେଲେ ଏଟା ଅଇଲା । ବେସି ଲକ୍‌କେ ତାର୍ ଦଲେ ମିସାଇବାକେ ସୁଡ଼ରାଇଲା । ମାତର୍ ତାକେ ମିସା ମରାଇଲାଇ । ଆରି ତାର୍ ସବୁ ସିସ୍‌ମନ୍ ଚିନ୍‌ବିନ୍ ଅଇଗାଲାଇ । ୩୮ ସେଟାର୍ ପାଇ ଜିସୁର୍ ସିସ୍‌ମନ୍‌ର୍ ବିସଇ ମୁଇ ତମ୍‌କେ କଇଲିନି, ସେମନ୍ କର୍‌ବା କାମ୍ ତେବାଆ ନାଈ, ଗାଡିଦିଆସ୍ । ସେମନ୍ କର୍‌ବା କାମ୍ ଆରି ଜଜନା ଜଦି ଲକ୍‌ମନ୍‌ରଟାନେଅନି ଆସିରଇସି, ତେବେ ସେମନ୍ ମିସା ଆରିଜିବାଇ । ୩୯ ମାତର୍ ସେଟା ଜଦି ପର୍‌ମେସରର୍‌ଟାନେ ଆସିରଇସି ବଇଲେ, ତାକେ ତମେ ଦବାଇନାପାରାସ୍ । ସେଡ଼କିଅନି ଡିସ୍‌ସି ଜେ ତମେ ପର୍‌ମେସରର୍ ବିରଦେ ଜୁଜ୍‌ଲାସ୍‌ନି ।”

ବଡ଼ସବାର୍ ଲକ୍‌ମନ୍ ଗମଲିଏଲ୍ କଇଲା କାତା ମାନ୍‌ଲାଇ । ୪୦ ସେମନ୍ ପେରିଡ଼ ସିସ୍‌ମନ୍‌କେ ବଡ଼ସବାର୍ ବିତ୍‌ରେ ଆନ୍‌ବାକେ ଆଦେସ୍ ଦେଲାଇ । ଡାକିଆନିକରି ସେମନ୍‌କେ କର୍‌ଡା ସଙ୍ଗ୍ ମାରାଇଲାଇ । ଆରି ଜିସୁର୍ ନାଉଁଦାରି କାଇମିସା କାତା ନ କଇବାକେ ଆଦେସ୍ ଦେଇ ଗାଡିଦେଲାଇ । ୪୧ ପେରିଡ଼ ସିସ୍‌ମନ୍ ସାର୍‌ଦାସଙ୍ଗ୍ ବଡ଼ସବାଇଅନି ବାରଇଲାଇ, କାଇକେବଇଲେ ପର୍‌ମେସର୍ ଦେକ୍‌ବା ଇସାବେ



ଜିସୁର୍ ସିସ୍ ଅଇକରି ଅପମାନ ପାଇବାକେ ଅଦିକାର ପାଇରଇଲା । ୪୨ ଆରି ସେମନ୍ ସବୁ ଦିନ୍ ମନ୍ଦିରେ ଆରି ଲକ୍ମନର୍ ଗରେ ଗରେ ମସିଆ ଜିସୁର୍ ବିସଇର୍ ସୁବକବର୍ ଜାନାଇଲା ଆରି ସିକିଆ ଦେବାର୍ ଦାରଲା ।



### ସାତ୍ତା ସେବାକାରିଆମନ୍

୯ ସେ ବେଲା, ବେସି ଜିଉଦି ଲକ୍ମନ ଜିସୁର୍ ସିସ୍ ଅଇ ଆଇଲା । ଗିରିକ୍ ବାସା କଇତେରଇବା ଜିଉଦିମନ୍, ଏବ୍ରି ବାସା କଇତେରଇବା ଜିଉଦିମନ୍ ବିରୁଦେ କାତା ଉଟାଇଲା । କାଇକେବଲେ ଗିରିକ୍ ବାସାଇ କାତା ଅଇବା ଜିଉଦିମନ୍, ରାଣ୍ଡିମନ୍‌କେ ଦିନକର୍ କାଦି ବାଟା କଲାବେଲେ ତାକର୍ ରାଣ୍ଡିମନ୍‌କେ ଏଲା କର୍ତେରଇଲା ପନି । ୧୦ ସେଟାର୍ ପାଇ ବାର୍ଟା ପେରିଡ଼ ସିସମନ୍ ସବୁ ବିସ୍‌ବାସିମନ୍‌କେ ରୁଣ୍ଡାଇକରି କଇଲା, “କାଇବାଟା ବାଟାକର୍‌ବାର୍ ଆତେ ବଲିକରି ପର୍‌ମେସରର୍ ବାକିଅ ସିକାଇବାଟା ଜଦି ଆମେ ଏଲା କର୍ତୁ ବଲେ ସେଟା ନିକ ବିସଇ ନର୍ । ୧୧ ସେଟାର୍ ପାଇ ଏ ବାଇବଇନିମନ୍, ତମର୍ ବିତ୍‌ରେଅନି ସୁକଲ୍‌ଆତ୍‌ମାଇ ଆରି ଗିଆନେ ପୁରାପୁରୁନ୍ ଅଇରଇବା ଲକ୍ ବଲି ସବୁଲକ୍ ଜାନିରଇବା ସାତ୍ ଲକ୍‌କେ ବାଟା । ଆମେ ସେମନ୍‌କେ ଏ ସବୁ ବିସଇ କର୍‌ବାକେ ଦାଇଡ଼ ଦେବୁ । ୧୨ ସେଟାର୍ ଆଲେ ପାର୍‌ତନା ଆରି ପର୍‌ମେସରର୍ ବାକିଅ ସିକାଇବାକେ ଆମେ ସବୁ ଦିଆନ୍ ଦେଇପାରିଅଇସି ।”

୧୩ ଦଲର୍ ସବୁ ଲକ୍ ପେରିଡ଼ ସିସମନ୍ କଇଲା କାତାଇ ରାଜିଅଇଲା, ଆରି ଏ କାମ୍ କର୍‌ବାକେ ବିସ୍‌ବାସ୍ ଆରି ସୁକଲ୍ ଆତ୍‌ମାଇ ପୁରୁନ୍ ଅଇରଇବା ତିପାନ୍ ନାଉର୍ ଗଟେକ୍ ଲକ୍, ଆରି ପିଲିପ୍, ପକ୍‌ରସ୍, ନିକାନର୍, ତିମନ୍, ପର୍‌ମନା ଆରି ଆଗେ ଜିଉଦି ଦରମ୍ ବିସ୍‌ବାସ୍ କରିରଇବା, ଆନ୍‌ଟିକିୟଇ ଅନି ଆସିରଇବା ଗଟେକ୍ ଜିଉଦି ନ ଅଇଲା, ନିକଲାୟକେ ବାଟ୍‌ଲା । ୧୪ ବିସ୍‌ବାସିମନ୍ ଏ ସାତ୍‌ଲକ୍‌କେ ପେରିଡ଼ମନ୍ ଲଗେ ଆନଲା । ସେମନ୍‌କେ, ଆତ୍ ସଙ୍ଗଇ ପାର୍‌ତନା କଲା ।

୧୫ ଏଣ୍ଡାରି ପର୍‌ମେସରର୍ ବାକିଅ ଗୁଲାଇବାଟର୍ ଲକ୍ ସୁନ୍‌ଲା । ଜିରୁସାଲମେ ଅଦିକ୍ ଅଦିକ୍ ସିସମନ୍ ବଡ଼ବାର୍ ଦାରଲା, ବେସି ପୁଜାରିମନ୍ ମିସା ଜିସୁକେ ବିସ୍‌ବାସ୍ କଲା ।

### ତିପାନ୍‌କେ ଦାରିନେଲା

୧୬ ପର୍‌ମେସରଟାନେ ବେସି ଆସିର୍‌ବାଦ୍ ପାଇ ଆରି ବପୁ ସଙ୍ଗ୍ ପୁରୁନ୍ ଅଇରଇବା ତିପାନ୍, ଲକ୍ମନର୍ ବିତ୍‌ରେ ବେସି ନ ଅଇବା କାମ୍‌ମନ୍, କାବା ଅଇଜିବା କାମ୍‌ମନ୍ ସାଦନ୍ କଲା । ୧୭ ମାତର୍ କେତେଲକ୍ ତାକେ ବିରଦ୍ କଲା । ଏମନ୍ ଗତି କର୍‌ବାତେଅନି, ମୁକ୍‌ଲିରଇବା ଜିଉଦିମନ୍‌କେ ନେଇ, ଅଇରଇବା ପାର୍‌ତନା ଗରର୍ କେତେ ଲକ୍, ସେମନ୍ ବିତ୍‌ରେଅନି କେତେଲକ୍ ସାରିଆ ଅନି, କେତେକ୍ ଆଲେକ୍‌ଜାଣ୍ଡରିଆ ଅନି । ସେମନ୍ ସିଲିସିଆ ଅନି ଆରି ଆସିଆଅନି ଆସିରଇବା ବିନ୍ ଜିଉଦିମନ୍ ସଙ୍ଗ୍ ମିସିକରି ତିପାନ୍ ବିରଦେ ଦଦାପେଲା ଅଇଲା । ୧୮ ମାତର୍ ସୁକଲ୍ ଆତ୍‌ମା ତିପାନ୍‌କେ ଏଣ୍ଡି ଗିଆନ୍ ଦେଲାଜେ, କେମିସା ତାର୍ କାତା ଚାଡ଼ାଇକରି କଇ ନାପାର୍‌ତେ ରଇଲା । ୧୯ ଏଲେମିସା ସେ “ମସାର୍ ବିରଦେ ଆରି ପର୍‌ମେସରର୍ ବିରଦେ କାତା କଇବାଟା ଆମେ ସୁନ୍‌ଲୁ ।” ବଲି, ଏ ମିଡ଼୍ ସାକି ଦେବାକେ କେତେ ଲକ୍‌କେ ଲାଡ଼ ଦେଇ ଉସ୍‌କାଇଲା । ୨୦ ଏଣ୍ଡାରିକରି ସେମନ୍ ଲକ୍ମନ୍‌କେ, ପାର୍‌ତିମ୍‌ମନ୍ ଆରି ସାସ୍‌ତର୍ ସିକାଉମନ୍‌କେ ରିସା ଅଇବା କାତା କଇଲା । ଆରି ତିପାନ୍‌କେ ଦାରି ବଡ଼ସବାଇ ନେଲା । ୨୧ ତାର୍ ପଟେ ସେମନ୍ ତାର୍ ବିରୁଦେ ମିଡ଼୍ ସାକି ଦେବାକେ କେତେଟା ଲକ୍ମନ୍‌କେ ବିତ୍‌ରେ ଆନଲା ।

। ସେମନ୍ କଇଲା, “ଏ ଲକ୍ ସବୁବେଳେ ଆମର ସୁକଲ୍ ମନ୍ଦିର ଆରି ମସୀର୍ ରିତିନିତି ବିରୁଦେ ନିନ୍ଦା କାତା କଇବୁଲ୍ଲାଲିନି ।<sup>୧୪</sup> ନାଜରିତର ଜିସୁ ମନ୍ଦିର ବାଙ୍ଗାଲ ପାକାଇସି ଆରି ଆମେ ମସୀର୍ ଟାନେଅନି ପାଇ ରଇବା ସବୁ ବିଦିବିଦାନ୍ ବାଦ୍ଲାଲ ଦେଇସି ବଲି ଏ ଲକ୍ କଇବାଟା ଆମେ ସୁନି ଆରୁ ।”<sup>୧୫</sup> ସେଡ଼କି ବେଳେ ବଡ଼ସବାଇ ବସି ରଇବା ସବୁ ଲକ୍ ଆକିଗାଡ଼ି ତିପାନ୍ର ବାଟେ ଦେକ୍ଲାଲ ଜେ, ଏଦେ ଦେକା ! ତାର ମୁ ସରଗର ଦୁଡ଼ ପାରା ତିସ୍ତେ ରଇଲା ।



### ତିପାନ୍ କଇବାଟା

<sup>୧</sup> ବଡ଼ ପୁଜାରି ତିପାନ୍କେ ପାଚାରଲା, “ତର ବିରୁଦେ କଇବା ଏ ସବୁ କାତା ସଡ଼ କି ?”

<sup>୨</sup> ତିପାନ୍ କଇଲା, “ଇତି ରଇବା ମର ବାଇମନ୍ ଆରି ବାବାମନ୍ ଅଲପ୍ ସୁନା, ଆମର ଆନିଦାଦି ଅବରାଆମ୍ ଆରନେ ବାସା ଅଇବାକେ ଜିବା ଆଗ୍ରୁ ମଇମା କରବା ପରମେସର ମେସପଟାମିଆଇ ଦେକାଇଅଇଲା ।”<sup>୩</sup> ଆରି ତାକେ କଇଲା, ‘ତମର ଦେସ୍ ଆରି ତମର କୁଟୁମ୍ବକେ ଚାଡ଼ିକରି ମୁଇ ଜନ୍ ଦେସ୍ ଦେକାଇବି, ସେ ଦେସ୍ ଜା ।<sup>୪</sup> ତେବରପାଇ ସେ ତାର ଦେସ୍ ଚାଡ଼ିକରି ଆରାନ୍ ନାଉଁର ଗଟେକ୍ ଦେସେ ବାସା ଅଇବାକେ ଗାଲା । ଅବରାଆମ୍ ବାବା ମଲା ପଟେ, ପରମେସର ତାକେ, ତମେ ରଇବା ଏ ଦେସେ ଆନ୍ଲା ।<sup>୫</sup> ସେବେଳେ ପରମେସର ଅବରାଆମ୍କେ ଏ ଦେସେ କାଇ ଅଦିକାର୍ କି ପାଦେକ୍ ଜମି ମିସା ଦେଇ ନ ରଇଲା । ମାତର ତାକେ ଏ ଦେସ୍ ପଟେ ଦେବାକେ ପରମେସର କାତାଦେଇରଇଲା । ଆରି ସେଟା ତାର ନାତିତିତି ମନର ପାଇ ଅଇସି ବଲି ସପଡ଼ କଲା । ପରମେସର ଏ କାତା ଦେଇରଇଲା ବେଳେ ଅବରାଆମ୍କେ ପିଲାଟକି ନ ଅଇରଇଲା ।<sup>୬</sup> ସେବେଳେ ପରମେସର ଅବରାଆମ୍କେ ଏନ୍ତିବଲି କଇରଇଲା, “ତମର ନାତିତିତିମନ୍ ବିନ୍ ଦେସେ ଚାଲିସ୍ ବରସ୍ ଜାକ ଗତି ଅଇକରି ରଇବାଇ । ସେ ଦେସର ଲକ୍ ସେମନ୍କେ କରାପ୍ ଚଲାଚଲ୍ତି ଦେକାଇବାଇ ।<sup>୭</sup> ମାତର ସେମନ୍ ଜନ୍ ଲକ୍ମନର ସେବା କରବାଇ, ମୁଇ ସେ ଲକ୍ମନକେ ବିଚାର୍ କରବି । ପଟେ ତମର ନାତିତିତିମନ୍ ସେ ଦେସେଅନି ବାରଇ ଆଇବାଇ ଆରି ଏ ଜାଗାଇ ମର ଉପାସନା କରବାଇ ।”<sup>୮</sup> ତାରପଟେ ପରମେସର ଅବରାଆମ୍ ସଙ୍ଗ୍ କାତାଦେଇ ରଇବା ରାଜିନାମାର୍ ତିନ୍ ଇସାବେ ସୁନଡ଼ କରବା ବିଦି ତିଆର୍ କଲା । ଇସାକ୍ ଜନମ୍ ଅଇ ଆବ୍ଦିନ୍ ପଟେ ଅବରାଆମ୍ ତାକେ ସୁନଡ଼ କଲା । ପଟେ ଇସାକ୍ ତାର ପଅ ଜାକୁବ୍କେ ସେନ୍ତାରି କଲା । ସେନ୍ତାରିସେ ଜାକୁବ୍ ତାର ବାରଟା ପଅମନ୍କେ ସୁନଡ଼ କଲା, ଜନ୍ ଲକ୍ମନ କି ଆମର ତାକ୍ପୁଟା ସଙ୍ଗ୍ ରଇବା ଆନିଦାଦିମନ୍ ।

<sup>୯</sup> “ଜାକୁବର ପଅମନ୍ ତାକର ସାନ୍ ବାଇ ଜସେପ୍କେ ଇସା ଅଇକରି, ମିସର୍ ଦେସର ବେବାର୍ମିମନ୍କେ ବିକିଦେଲାଇ । ମାତର ପରମେସର ଜସେପର ସଙ୍ଗ୍ ରଇଲା ।<sup>୧୦</sup> ଆରି ସବୁ ଦୁକ୍ କସ୍ତେତେଅନି ତାକେ ରକିଆ କଲା । ଜେଡେବେଳେ ଜସେପ୍ ମିସର୍ ରାଜାର୍ ମୁଆଟେ ଚିଆଅଇଲା, ପରମେସର ତାକେ ଗିଆନ୍ ଦେଲା । ଆରି ସବୁଲକ୍ ମନ୍କଲାପାରା ଚଲାଚଲ୍ତି ଦେଲା । ପାର ରାଜା ଜସେପ୍କେ ସେ ଦେସର ସାସନ୍କାରିଆ ଆରି ତାର କୁଟୁମ୍ବର ସବୁ ଦେକାରକା କରବା ଦାଇଡ଼ ସରପି ଦେଲା ।<sup>୧୧</sup> ଜସେପ୍ ସାସନ୍କାରିଆ ରଇଲାବେଳେ ମିସର୍ ଆରି କିଶାନ୍ ଦେସେ ମରୁଡ଼ି ଅଇଲା ଜେ ଲକ୍ମନ୍ ବେସି ଅଇରାନ୍ ଅଇଗାଲାଇ । ସେବେଳେ ଆମର ଆନିଦାଦିମନ୍କେ କାଇଟା ମିସା କାଇବାଟା ମିଲେନାଇ ।<sup>୧୨</sup> ମିସର୍ ଦେସେ ଦାନ୍ ମିଲ୍ସି, ବଲି ସୁନି ଜାକୁବ୍ ପରଡୁମ୍ବତର ତାର ପିଲାମନ୍କେ କାଦି ଗେନ୍ବାକେ ପାଟାଇଲା । ଜେକି ଆମର ଆନିଦାଦିମନ୍ ଅଇବାଇ ।<sup>୧୩</sup> ତେଇ ସେମନ୍ ପଟର

ପାଲି ଗାଲାବେଳେ ଜସେପ୍ ତାର ନିଜର ବାଇମନ୍କେ ଚିନାଇ ଅଇଲା ଆରି ମିସରର ରାଜା ପାର ଜସେପ୍‌ର କୁଟୁମ୍‌କେ ଜାନଲା । ୧୪ ତାର ପତେ ଜସେପ୍ ତାର ବାବା ଜାକୁବ୍ ଆରି ତାର କୁଟୁମ୍‌ର ସବୁକେ ମିସାଇ ସତୁରି ପାଁର୍ ଲକ୍‌କେ ମିସରେ ଆଇବାକେ କବର୍ ପାଟାଇଲା । ୧୫ ଜାକୁବ୍ ମିସର୍ ଦେସେ ଗାଲା, ତେଇ ସେ, ତାର ପଅମନର୍ ମରନ୍ ଅଇଲା । ୧୬ ସେମନର୍ ମଲା ଗାଗଡ଼ ସେକିମେ ନେଲାଇ । ଆରି ଅବ୍ରାଆମ୍ କେତେକ୍ ଡାବୁଦେଇ ଆମ୍ ନାଉଁର୍ ଗଟେକ୍ କୁଟୁମେ ଅନି ଗେନ୍‌ଲା ମସ୍‌ନେ ନେଇ ସେମନ୍କେ ସଙ୍ଗାଇଲାଇ ।”

୧୭ ପର୍‌ମେସର୍ ଅବ୍ରାଆମ୍ ଜନ୍ ସପଡ଼ ଦେଇ ରଇଲା ସେଟା ସିଦ୍‌ଅଇଲା । ମିସର୍‌ଦେସେ ଆମର୍ ଜାତିର୍ ଲକ୍‌ମନ୍ ବେସି ବଡ଼ି ଗାଲାଇ । ୧୮ ସାରାସାରି, ଜସେପ୍‌ର ବିସଇ ଜାନି ନ ରଇବା ଗଟେକ୍ ରାଜା, ମିସର୍ ଦେସ୍ ସାସନ୍ କଲା । ୧୯ ସେ ଆମର୍ ଆନିଦାଦିମନ୍କେ ବେସି ନାଡ଼ାଇଲା । ଆରି ବେସି ଅଇରାନ୍ କଲା । ସେମନର୍ କଅଁଲା ପିଲାମନ୍କେ ନିପାଡ଼ କରି ବାଇରେ ପିଙ୍ଗି ଦେବାକେ ଆଦେସ୍ ଦେଲା । ୨୦ ସେ ବେଲାଇ ମସା ଜନମ୍ ଅଇଲା । ସେ ଗଟେକ୍ ବେସି ସୁନ୍‌ର୍ ପିଲା ରଇଲା । ତାକେ ତିନ୍ ମାସ୍ ଜାକ ଗରେସେ ପସ୍‌ଲାଇ । ୨୧ ଆରି ଜେଡେବେଲେ ବାଇରେ ଲୁଟାଇଦେଲାଇ, ପାର ରାଜାର୍ କନିଆ ତାକେ ମିଲାଇକରି ନିଜର୍ ପିଲାପାରା ପସ୍‌ପାଲ୍ କଲା । ୨୨ ମିସର୍ ଦେସେ ଜେଡ଼କି ଗିଆନ୍ ରଇଲା, ସେ ସବୁ ଗିଆନ୍ ମସାକେ ସିକାଇଲାଇ । ସେ ବଡ଼ିକରି ତାର କାତାବାର୍‌ତା ଆରି କାମର୍ ଲାଗି ଗଟେକ୍ ଡାକ୍‌ପୁଟା ଲକ୍ ବଲାଇଅଇଲା ।

୨୩ ଜେଡେବେଲେ ମସାକେ ଚାଲିସ୍ ବରସ୍ ଅଇଲା, ସେ ତାର ଇସ୍ରାଏଲର୍ ବାଇମନ୍ କାମ୍ କର୍‌ବା ଜାଗା ଦେକ୍‌ବାକେ ମନ୍କଲା । ୨୪ ଇସ୍ରାଏଲିଅ ମନର୍ ବିଡ଼ରେଅନି ଗଟେକ୍‌କେ ମିସରିୟର୍ ଗଟେକ୍ ଲକ୍ ସାଦ୍‌ବାନ୍ କର୍‌ବାଟା ଦେକି ମସା ତାକେ ରକିଆ କଲା । ଆରି ସେ କର୍‌ବାଟା ସୁଜାଇବି ବଲି ମିସରିଅକେ ସେ ମରାଇଲା । ୨୫ ମସା ବାବିରଇଲା, ସେମନ୍କେ ମୁକ୍‌ଲାଇବାକେ ପର୍‌ମେସର୍ ତାକେ ବାଟ୍‌ଲାଆଟେ ବଲି ତାର ନିଜର୍ ବାଇମନ୍ ଏତାଇବାଇ । ମାତର୍ ସେମନ୍ ସେଟା ବୁଜଡ଼ନାଇ । ୨୬ ତାର ଆରକର୍ ଦିନେ ଦୁଇଟା ଇସ୍ରାଏଲିଅ ମନ୍ ମାରାମାରି ଅଇଡେରଇବାଟା ଦେକ୍‌ଲା । ଆରି ସେମନ୍ ମିସଡ଼ ବଲି ବୁଜାଇବାକେ ଚେସ୍‌ଟା କଲା । ସେ କଇଲା, “ସୁନା ତମେ ଦୁଇ ଲକ୍‌ତା ଇସ୍ରାଏଲର୍ ବାଇବାଇ ଅଇସା । କାଇକେ ଏନ୍ତାରି ମାରାମାରି ଅଇଲାସନ୍ ?” ୨୭ ମାତର୍ ଜନ୍ ଲକ୍ ଆରିଗଟେକ୍ ଲକ୍‌କେ କାରାପ୍ କାତା କଇ ଲାଗିଡେରଇଲା, ସେ ମସାକେ ଏଡ଼ାଇଦେଇ କଇଲା, “ଆମ୍‌କେ ସାସନ୍ କର୍‌ବାକେ ଆରି ଆମ୍‌କେ ବିଚାର୍ କର୍‌ବା ଅଦିକାର୍, କେ ତକେ ଦେଇଆଟେ ?” ୨୮ କାଲି ଜେଡ଼ି ଗଟେକ୍ ମିସରିୟକେ ମରାଇଲୁସ୍, ସେଡ଼ି ମକେ ମିସା ମରାଇବାକେ ମନ୍ କଲୁସନ୍ କି ?” ୨୯ ଏଟା ସୁନିକରି ମସା ମିସର୍‌ଦେସେଅନି ଉଟିପାଲାଇଲା ଆରି ମିଦିଅନ୍ ଦେସେ ଜାଇ ବାସାକଲା । ତେଇ କେଡେ ବରସ୍ ରଇକରି ଆରି ତାର ଦୁଇଟା ପିଲା ଜନମ୍ ଅଇଲାଇ ।

୩୦ “ଚାଲିସ୍ ବରସ୍ ରଇଲା ପତେ, ମରୁବାଲି ରଇବା ଜାଗାର୍ ସିନୟ୍ ନାଉଁର୍ ପର୍‌ବତେ ଗଟେକ୍ ଜଇ ଲାଗ୍‌ବା ବୁଟାର୍ ମଜାଇ ପର୍‌ମେସରର୍ ଗଟେକ୍ ଦୁଡ଼, ମସାକେ ଦେକାଇ ଅଇଲା ।” ୩୧ ମସା ଏଟା ଦେକି ବେସି କାବା ଅଇଗାଲା, ଆରି କଣ୍ଡେକ୍ ନିକକରି ଦେକ୍‌ବି ବଲି ବୁଟା ଲଗେ ଗାଲା । ମାତର୍ ତେଇ ସେ ମାପ୍‌ରୁର୍ କାତା ସୁନ୍‌ଲା । ୩୨ “ମୁଇ ତମର୍ ଆନିଦାଦି ଅବ୍ରାଆମ୍, ଇସାକ୍ ଆରି ଜାକୁବ୍‌ର ପର୍‌ମେସର୍ ।” ମସା ଡରିକରି ତର୍‌ତର୍ ଗଜ୍‌ଗଜ୍ ଅଇ ଦେକ୍‌ବାର୍ ନାପାର୍‌ଲା । ୩୩ ମାପ୍‌ରୁ ତାକେ କଇଲା, “ତୁଇ ପିନ୍‌ରଇବା ପାଣ୍ଡୁଇ ବେଟ୍ । କାଇକେବଇଲେ ତୁଇ ଜନ୍ ଜାଗାଇ ଚିଆଅଇଆଟୁସ୍, ସେଟା ସୁକ୍‌ଲା ଜାଗା । ୩୪ ମିସର୍ ଦେସେ ମର୍ ଲକ୍‌ମନ୍ କସ୍‌ଟ ଅଇବାଟା ଦେକିଆଟି । ମୁଇ ସେମନର୍ କାନ୍‌ବୁବା ସୁନିଆଟି ଆରି

ସେମନ୍ତେ ମୁକୁଲାଇ ଆନୁବାକେ ଉଡ଼ରି ଆଇଲିଆତି । ଏବେ ଆଉ, ମୁଇ ତକେ ମିସର୍ ଦେସେ ପାଟାଇବି ।”

୩୫ ମସାକେ ଇସ୍ରାଏଲର ଲକ୍ମନ୍ ନିଚ୍ତେରଇଲାଇ । ସେମନ୍ ପାଟାରି ରଇଲାଇ, “ଆମ୍ବକେ ସାସନ୍ କରବାକେ ଆରି ଆମ୍ବକେ ବିଚାର କରବାକେ କେ ଅଦିକାର ଦେଇଆଚେ ?” ମାତର୍ ପର୍ମେସର୍ ଆକା ନିଜେ ମସାକେ ସେ ଲକ୍ମନ୍ ଉପ୍ରେ ସାସନ୍ କରବାକେ ଆରି ସେମନ୍ତେ ମୁକୁଲାଇ ଆନୁବାକେ ପାଟାଇରଇଲା । ଜଇଲାଗ୍‌ବା ବୁଟାଇ ଦରସନ୍ ଇସାବେ ଦେକାଇଅଇଲା । ୩୬ ମିସର୍ ଦେସେ, ଲଇଡ଼ ସାଗରେ ଆରି ଚାଲିସ୍ ବରସ୍ ମରୁବାଲି ବୁର୍ବୁଁ କେତେକ୍ କେତେକ୍ କାବା ଅଇଜିବା କାମମନ୍ ଆରି ଚିନ୍ମନ୍ କଲା । ୩୭ ମସା ନିଜେ ଇସ୍ରାଏଲର ଲକ୍ମନ୍ତେ କଇରଇଲା, “ମକେ ଜେନ୍ତି ପର୍ମେସର୍ ପାଟାଇଲା । ସେନ୍ତାରିସେ ତମର୍ ବାଇମନ୍ତେ ଲଗେ ଗଟେକ୍ ବବିସଡ଼ବକ୍ତାକେ ପାଟାଇସି, ସେ ତମର୍ ନିଜର୍ ଲକ୍ମନ୍ତେ ଚାନେଅନିସେ ଅଇସି ।” ୩୮ “ଇସ୍ରାଏଲିଅ ଲକ୍ମନ୍ ମରୁବାଲି ବୁର୍ବୁଁ ରଇଲାବେଲେ ସେ ସେମନ୍ତେ ସଙ୍ଗ୍ ରଇଲା । ସିନ୍ୟ ପର୍ବତେ ଆମ୍ବ ଆନିଦାଦିମନ୍ତେ ସଙ୍ଗ୍ ଦୁଡ଼ କାତା ଅଇଲାବେଲେ ସେ ରଇଲା । ଆରି ସେ ପର୍ମେସର୍ଚାନେଅନି ଜିବନ୍ ଦେବା ବାକିଅ ମିଲାଇକରି ଆମ୍ବକେ ଜାନାଇଲା ।”

୩୯ “ମାତର୍ ଆମ୍ବ ପୁରବର୍ ଆନିଦାଦିମନ୍ ମସାର କାତା ସୁନ୍ତ ନାଇ । ମିସର୍ ଦେସେ ବାଉଡ଼ି ଜୁ ବଲି ମନ୍‌କଲାଇ ।” ୪୦ ସେଟାପାଇ ସେମନ୍ ଆରଣ୍ଡାକେ କଇଲାଇ, “ଆମ୍ବକେ ମିସର୍ ଦେସେଅନି ବାରକରାଇ ଆନୁଲା ମସା କେନେ ଗାଲାଆଲେ, ଆମେ ନାଜାନ୍ । ଏବେ ଆମ୍ବକେ ବାଟ୍ ଦେକାଇ ନେବାକେ କେତେଟା ପୁଡ଼ଲା ବନାଇ ଦେ । ସେମନ୍ ଆମ୍ବ ଦେବ୍‌ତା ଅଇ ବାଟ୍‌ଦେକାଇବାଇ ।” ୪୧ ସେବେଲେ ସେମନ୍ ତେଇ ଗଟେକ୍ ବାଟାପିଲା ପାରା ଡିସ୍‌ବା ପୁଡ଼ଲା ତିଆରକଲାଇ । ଆରି ତାରଲାଗି ପୁଜାକରୁ ବଲି ଚଗାଇଲାଇ । ଆରି ନିଜେ ତିଆର୍ କରିରଇବା ସେ ମୁର୍ତ୍ତିକେ ସନ୍ମାନ୍ ଦେବାକେ ଗଟେକ୍ ବଜି କଲାଇ । ୪୨ ସେଟାପାଇ ପର୍ମେସର୍ ସେମନ୍ତେ ଦେକେନାଇ ଆରି ସେମନ୍ତେ, ଆକାସର୍ ତାରାମନ୍ ପୁଜା କରଡ଼ ବଲି ଚାଡ଼ିଦେଲା । ଏ ବିସଇ ବବିସଡ଼ବକ୍ତାର୍ ବଇଟାନେ ଲେକା ଆଚେ,

“ଏ ଇସ୍ରାଏଲ୍ ବୈସର୍ ଲକ୍ମନ୍, ମରୁବାଲି ବୁର୍ବୁଁ ଚାଲିସ୍‌ବରସ୍ ଜାକ ତମେ ପସୁମନ୍ତେ ମରାଇକରି ବଲି ଇସାବେ ଦେଲାସ୍ । ମାତର୍ ସେଟା ମର୍ପାଇ ଦେଇ ନ ରଇଲାସ୍ । ୪୩ ମଲେକ୍ ପୁଡ଼ଲାକେ ପର୍ମେସର୍ ବଲି ତାର୍ ତମ୍ ଗଟେକ୍ ଜାଗାଇଅନି ଆରିଗଟେକ୍ ଜାଗାଇ ବଇନେଲାସ୍ । ରେପାନ୍ ତାରାର୍ ପୁଡ଼ଲା ମିସା ଗଟେକ୍ ଜାଗାଇଅନି ଆରିଗଟେକ୍ ଜାଗାଇ ବଇନେଲାସ୍ । ଏ ସବୁଜାକ ପୁଡ଼ଲାମନ୍ତେ ତମେ ପୁଜାବିଦି କରବାକେ ବନାଇରଇଲାସ୍ । ସେଟାପାଇ ମୁଇ ତମ୍‌କେ ତମର୍ ନିଜର୍ ଦେସେଅନି ବାବିଲନ୍ ଦେସର୍ ତେନ୍‌କେ ନେବାକେ ଜଜ୍‌ନା କରବି ।”

୪୪ ତିପାନ୍ ଆରି କଇଲା, “ମରୁବାଲିବୁର୍ବୁଁ ଆମ୍ବ ଆନିଦାଦିମନ୍ ରଇଲାବେଲେ ପର୍ମେସର୍ ସେମନ୍ତେ ଲେକି ଦେଇରଇବା ନିୟମ୍ ମନ୍ ବିଡ଼ରେ ରଇଲା । ସେଟା ପର୍ମେସର୍ ମସାକେ ଜେନ୍ତି ତମ୍ ତିଆର୍ କରବାକେ କଇରଇଲା, ଆରି ତାକେ ଜନ୍ କାମ୍ ଦେକାଇ ରଇଲା, ଏଟା ସେନ୍ତାରିସେ ତିଆର୍ ଅଇରଇଲା ।”

୪୫ “ପତେ ଆମ୍ବ ଆନିଦାଦିମନ୍ ସେମନ୍ତେ ଆନିଦାଦିମନ୍ତେ ଚାନେଅନି ମିଲାଇକରି ସେ ତୁମ୍ ଜିଅସୁଅ ସଙ୍ଗ୍ ବଇ ଦାରିଗାଲାଇ । ଆରି ପର୍ମେସର୍ ବାରକରାଇ କେଦି ରଇବା ବିନ୍ ଜାତିମନ୍ତେ ଦେସ୍, ସେମନ୍ ଅଦିକାର କଲାଇ

। ଦାଉଦର ସାସନ ବେଳେ ଜାକ ସେ ତମ୍ଭୁ ତେଇସେ ରଇଲା । ୪୭ ଦାଉଦ ପରଫେସରର ମନକେ ଜାଇରଇଲାଜେ ଜାକୁବର ପରଫେସରର ପାଇ ଗଟେକ୍ ମନ୍ଦିର ତିଆର କରବି ବଲି ତାର ଆଦେସ୍ ପାଇବାକେ ମନ୍ କରତେ ରଇଲା । ୪୮ ପତେ ସେ ମନ୍ଦିର ଦାଉଦର ପଥ ସଲ୍ଲମନ୍ ତିଆର କର ବଲି ମନ୍କଲା ।”

୪୮ ଅଇଲେ ମିସା ସବୁର ଉପରର ପରଫେସର ଲକ୍ମମନ୍ ତିଆର କଲା ଗରେ ବାସା ନ କରେ । ଏ ବିସଇ ବବିସତ୍‌ବକ୍ତା ଲେକଲା ଆଟେ,

୪୯ ମାପରୁ କଇଲାନି, ସରଗ୍ ମର ବସ୍‌ବା ଜାଗା

ଦରତନି ଅଇଲାନି ମର ପାଦର ପିତା ।

ତମେ ମରପାଇ କେନ୍ତାରି ଗର ତିଆର କରସା ?

ମୁଇ ପୁଣ୍ଡବାକେ କନ୍ତି ଜାଗା ଆଟେ କି ?

୫୦ “ମୁଇ ନିଜେ କାଇ ଏ ସବୁ ବିସଇ ତିଆର କରି ନାଇ କି ?”

୫୧ ତିପାନ୍ ଆରି କଇଲା, “ତମେ ବିଲ୍‌କୁଲ୍ କାତା ନ ମାନବା ଲକ୍ମମନ୍ ।” ତମର ମନ୍ ତାଟ୍ ଅଇଗାଲା ଆଟେ । ମାପରୁର ବାକିଅରପାଇ ପୁରାପୁରୁନ୍ ବଇରା ଅଇଆଟାସ୍ । ତମେ ସମାନ୍ ତମର ଆନିଦାଦିମନ୍ ପାରା । ସବୁବେଲେ ସୁକଲ୍ ଆଡ଼ମାକେ ବିରୁଦ୍ କଲାସନି । ୫୨ ତମର ଆନିଦାଦିମନ୍ ବବିସତ୍‌ବକ୍ତାମନ୍‌କେ ନ ସାଦିକରି ଚାଡ଼ିରଇଲାଇ କି ? ମସିଅ ଆଇସି ବଲି କେତେ କେତେ ବରସ୍ ଆଗତୁ ଜାନାଇବା ପରଫେସରର କାତାଜାନାଉମନ୍‌କେ ମରାଇଲାଇ । ଏବେ ତମେ ତାକେ ବିସ୍‌ବାସେ ବିସ୍ ଦେଲାପାରା କରି ମରାଇଆଟାସ୍ । ୫୩ ତମେ ସରଗର ଦୁତ୍‌ମନ୍ ଜାନାଇରଇବା ରିତିନିତି ଦାରିଆଟାସ୍ । ମାତର ସେଟା ମାନାସ୍ ନାଇ ।

ତିପାନ୍‌ର ମରନ୍

୫୪ ବଡ଼ ସବାର ଲକ୍ମମନ୍ ତିପାନ୍ କାତା ଅଇବାଟା ସୁନିକରି ବେସି ରିସା ଅଇଗାଲାଇ ଆରି ରିସାର ମାତେ ଦାଡ଼ କାଡ଼ିର ଅଇଲାଇ । ୫୫ ମାତର ତିପାନ୍ ସୁକଲ୍ ଆଡ଼ମାଇ ପୁରାପୁରୁନ୍ ଅଇ ସରଗ୍ ବାଟେ ମୁ କଲା । ଆରି ପରଫେସରର ମଇମା ଆରି ଜିସୁ ତାର ଉଜାବାଟେ ଚିଆଅଇରଇବାଟା ଦେକଲା ।

୫୬ ତିପାନ୍ କଇଲା, “ଏଦେ ଦେକା ! ସରଗ୍ ଉଗାଡ଼ି ଅଇବାଟା ଆରି ନରପିଲା ପରଫେସରର ଉଜାବାଟେ ଚିଆ ଅଇରଇବାଟା ଦେକଲିନି ।”

୫୭ ବଡ଼ ସବାର ଲକ୍ମମନ୍ ସେ କାତା ସୁନିକରି ଆଡ଼ ସଙ୍ଗ୍ କାନେ ରୁଟିଅଇଦେଲାଇ, ଆରି ବେସି ଆଉଲିଅଇଲାଇ । ତାରପତେ ସବୁଲକ୍ ଗଟେକ୍ ଅଇକରି ତିପାନ୍‌ର ବାଟେ ଉଦଲି ଆଇଲାଇ । ୫୮ ତାକେ ନଅରର ବାଇରେ ଜିକିନେଇକରି ତାର ଉପରେ ପାକ୍‌ନା ସଙ୍ଗ୍ ମାର୍‌ବାର ଦାରଲାଇ । ସାକି ଦେଉମନ୍ ତିପାନ୍ ପିନ୍ଦିରଇଲା ବସ୍‌ତର ସାଉଲ୍ ନାଉର ଗଟେକ୍ ଦାଙ୍ଗ୍‌ତାକେ ଜିମାଦେଇ ଚାଡ଼ି ଜାଇରଇଲାଇ । ୫୯ ସେମନ୍ ତିପାନ୍‌ର ଉପରେ ପାକ୍‌ନା ମାର୍‌ବା ବେଲେ ସେ ମାପରୁକେ ପାର୍‌ତନା କରି କଇଲା, “ମାପରୁ ଜିସୁ, ମର ଆଡ଼ମାକେ ସଙ୍ଗୁଆ !” ୬୦ ତିପାନ୍ ମାଣ୍ଡିକୁଟା ଦେଇ ଆକ୍‌ମାରି କଇଲା, “ମାପରୁ, ଏମନ୍‌ର ବିରଦେ ଏ ପାପ୍ ଆରି ଏତାଆ ନାଇ କି ତଣ୍ଡ ଦିଆସନାଇ ।” ଏଡ଼କି କଇଲା ଦାପ୍‌ରେ ତାର ଜିବନ୍ ଚାଡ଼ିଗଲା ।

## ୮

ମଣ୍ଡଲିକେ ତାଡ଼ନା

୧ ସାଉଲ୍ ତିପାନ୍‌ର ମରନେ ରାଜିଅଇକରି ତେଇ ରଇଲା ।

ସେ ଦିନେଅନି ଜିରୁସାଲାମେ ରଇବା ମଣ୍ଡଲିମନ୍‌କେ ଲକ୍ମମନ୍ ଜବର ତାଡ଼ନା ଦେବାର ଆରାମ୍ କଲାଇ । ସେଟାରପାଇ ପେରିଡ଼ ସିସମନ୍ ତେଇରଇଲାଇ ଆରି ବିନ୍ ବିସ୍‌ବାସିମନ୍ ଜିବନ୍ ଆଡେଦାରି ଜିଉଦା ଆରି ସମିରଣ୍ ଜାଗାଇ ପାଲାଇଲାଇ

। ୨ ପର୍ଯ୍ୟନ୍ତକେ ନାମବା କେତେକ ଲକ୍ ଆକ୍‌ଫାରି କାହିକରି ତିପାନର୍ ମଲା ଗାଗଡ଼ ନେଇ ସମାଦି କଲା ।

୩ \*ମାତର୍ ସାଉଲ ମଣ୍ଡଲିକେ କୁରୁପ୍‌ନାସ୍ କର୍ବାକେ ଚେସ୍‌ଟା କଲା । ସେ ଗରେ ଗରେ ଜାଇ ଜିସୁକେ ବିସ୍‌ବାସ୍ କର୍ବା ମୁନୁସ୍ ପିଲା ଆରି ମାଇଜି ଟକିମନ୍ ସବୁକେ ଜିକି ଆନି ବନ୍ଦି ଗରେ ପୁରାଇ ଦେଲା ।

ସମିରଣ୍ ଜାଗାଇ ସୁବକବର୍ ଜାନାଇବାଟା

୪ ଜିରୁସାଲମେଅନି ପାଲାଉରଇବା ବିସ୍‌ବାସିମନ୍ ଗୁଲାଉବାଟେ ଜାଇ ସୁବକବର୍ ଜାନାଇବାର ଦାରଲା । ୫ ସେମନ୍‌ର ବିଡ଼ରେଅନି ପିଲିପ୍ ବଲି ଗଟେକ୍ ଲକ୍ ସମିରଣ୍ ମୁକିଅ ନଅରେ ଜାଇ, ତେଇ ରଇବା ଲକ୍‌ମନ୍‌କେ ମସିଅ କଇରଇବା କାତା ଜାନାଇଲା । ୬ ପିଲିପ୍ କଇବା କାତା ସୁନି ଆରି ସେ କରରଇବା କାବା ଅଇଜିବା କାମ୍‌ମନ୍ ସବୁ ଦେକି ଲକ୍‌ମନ୍ ତାକେ ଅଦିକ୍ ମନ୍‌ଦିଆନ୍ ଦେଇ ସୁନ୍‌ବାର୍ ଦାରଲା । ୭ କେତେ କେତେ ଲକ୍‌ମନ୍‌ର ଟାମେଅନି ତୁମାମନ୍ କିରକିରି କରି ବାରଇ ଗାଲା । କେତେ କେତେ ଚେରେଙ୍ଗ୍ ରଗି ଆରି ଆଡ଼ ଗଡ଼ ନ ଆଇବାଟାମନ୍ ନିକ ଅଇଗାଲା । ୮ ଏଟାର ପାଇ ସେ ନଅର୍ ସାଇସାର୍‌ଦା ଅଇରଇଲା ।

୯ ସମରିଆ ଜାଗାଇ ସିମନ୍ ନାଉର୍ ଗଟେକ୍ ଲକ୍ ତାର ଜନ୍ତର୍ ମନ୍ତର୍ ବିଦିଆ କରକିରି ତେଇର୍ ଲକ୍‌ମନ୍‌କେ କାବା କରାଇତେରଇଲା । ୧୦ ସେ, ମୁଇ ନିଜେ ଗଟେକ୍ ବଡ଼ ଲକ୍ ବଲାଅଇତେରଇଲା । ଆରି ସେ ନଅରେ ରଇବା ସାନ୍ ବଡ଼ ସବୁ ତାକେ ମାନିରଇଲା । ପର୍ଯ୍ୟନ୍ତକେ ଜନ୍ ବପୁ ମଆନ୍ ସେ ବପୁ ଏଟା ଆକା ବଲି ଲକ୍‌ମନ୍ କଇତେ ରଇଲା । ୧୧ ବେସି ବରସ୍ ଦାରି ତାର ଗୁନି ବିଦିଆର୍ ବପୁ ସଙ୍ଗ୍ ତେଇର୍ ଲକ୍‌ମନ୍‌କେ କାବା କରାଇତେରଇଲା । ସେଟାର୍‌ପାଇ ଗୁଲାଇ ସମିରଣ୍ ଲକ୍‌ମନ୍ ତାକେ ମାନିକରି ରଇଲା । ୧୨ ମାତର୍ ପିଲିପର୍ ଟାମେଅନି ପର୍ଯ୍ୟନ୍ତକେ ରାଇଜ ଆରି ଜିସୁର୍ ବିସଇ ସୁନ୍‌ଲା । ସୁନିକରି ତେଇର୍ ଲକ୍‌ମନ୍ ମାପୁରୁକେ ବିସ୍‌ବାସ୍ କଲା । ଆରି ସେ ଜାଗାର୍ ବିସ୍‌ବାସ୍ କଲା ମନସ୍ ପିଲା ଆରି ମାଇଜିଟକିକେ ପିଲିପ୍ ତୁବନ୍ ଦେଲା । ୧୩ ସିମନ୍ ନିଜେ ପିଲିପ୍ ଜାନାଇରଇବା ମାପୁରୁର୍ ବାକିଅ ସୁନି ବିସ୍‌ବାସ୍ କଲା । ଆରି ପିଲିପ୍ ତାକେ ତୁବନ୍ ଦେଲା । ସେ ପିଲିପର୍ ସଙ୍ଗ୍ ସବୁଜାଗାଇ ଜିବାର୍ ଦାରଲା । ପିଲିପ୍ କରରଇବା କାବା ଅଇଜିବା କାମ୍‌ମନ୍ ଆରି ଚିନ୍‌ମନ୍ ଦେକିକରି ସେ କାବା ଅଇଜାଇତେରଇଲା ।

୧୪ ସମରିଆର୍ ଲକ୍‌ମନ୍ ପର୍ଯ୍ୟନ୍ତକେ ବାକିଅ ବିସ୍‌ବାସ୍ କଲା ଆତଡ଼ ବଲି ଜିରୁସାଲମ୍ ରଇବା ପେରିଡ଼ ସିମନ୍ ସୁନ୍‌ଲା । ପିତର୍ ଆରି ଜଅନ୍‌କେ ସେମନ୍‌ର ଲଗେ ପାଟାଇଲା । ୧୫ ସେମନ୍ ତେଇ କେଟ୍‌ଲା ପଟେ ସମିରଣ୍ ବିସ୍‌ବାସିମନ୍ ସୁକଲ୍ ଆଡ଼ମା ପାଇବାକେ, ପାର୍‌ତନା କଲା । ୧୬ କାଇକେ ବଇଲେ ସେଡ଼କିବେଲ୍ ଜାକ କାର୍ ଉପ୍‌ରେ ସୁକଲ୍ ଆଡ଼ମା ଉଡ଼ି ନ ରଇଲା । ସେମନ୍‌କେ ଜିସୁକିରିସ୍‌ଟର୍ ନାଉଁଦାରି ଅବକାସେ ତୁବନ୍ ଦେଇରଇଲା । ୧୭ ପିତର୍ ଆରି ଜଅନ୍ ସେମନ୍‌ର ଉପ୍‌ରେ ଆଡ଼ ସଙ୍ଗାଇଲା ଦାପ୍‌ରେ ସେମନ୍ ସୁକଲ୍ ଆଡ଼ମା ପାଇଲା ।

୧୮ ପେରିଡ଼ ସିମନ୍ ବିସ୍‌ବାସିମନ୍‌ର ଉପ୍‌ରେ ଆଡ଼ ସଙ୍ଗାଇଲାକେ ସୁକଲ୍‌ଆଡ଼ମା ପାଇଲାଟା ଦେକି, ସିମନ୍, ପିତର୍ ଆରି ଜଅନ୍‌କେ ତାବୁ ଜାଡ଼ଲା ଆରି କଇଲା, ୧୯ “ମୁଇ ବିନ୍ ଲକ୍‌ର ଉପ୍‌ରେ ଆଡ଼ ସଙ୍ଗାଇଲେ, ସେମନ୍ ଜେନ୍ତି ସୁକଲ୍ ଆଡ଼ମା ପାଇପାର୍‌ବାଇ, ସେଟାର୍ ପାଇ ମକେ ସେ ବପୁ ଦିଆ ।” ୨୦ ମାତର୍ ପିତର୍ ତାକେ କଇଲା, “ତର୍ ତାବୁ ତର୍ ସଙ୍ଗ୍ ନସ୍‌ଟ ଅ । ତର୍ ସଙ୍ଗ୍ ତର୍ ତାବୁ ମିସା ନର୍‌କେ ଜାଅ । କାଇକେବଇଲେ ପର୍ଯ୍ୟନ୍ତକେ ଦାନ୍ ତାବୁସଙ୍ଗ୍ ଗେନ୍‌ବି ବଲି ବାବ୍‌ଲୁସିନି । ୨୧ ଆମର୍ କାମ୍‌ଟାମେ ତର୍ କାଇମିସା ବାଗ୍ ନାଇ, କାଇକେବଇଲେ ପର୍ଯ୍ୟନ୍ତକେ

\* ୮:୩ ୮:୩ ପେରିଡ଼ ୨୨:୪,୫:୨୭:୯-୧୧

ଦେକିବା ଇସାବେ ତରୁ ମନ୍ ନିକ ନାଇ । ୨୭ ସେଟାର ପାଇ ତମର ଏ କରାପ୍  
 ବାବନାର ପାଇ ମନ୍ ବାଦଲାଆ । ଏନ୍ତାରି ବିସଇ ଚିନ୍ତାକଲାର ପାଇ ମାପରୁ ଜେନ୍ତାରି  
 କେମା ଦେଇସି, ତାର ଲାଗି, ମାପରୁକେ ପାରତନା କର୍ । ୨୮ କାଇକେ ବଇଲେ  
 ମୁଇ ଦେକଲିନି ଜେ ତରୁ ମନ୍ ଆଁକାରେ ବର୍ତ୍ତି ଅଇଆଚେ । ତୁଇ ପାପର୍ ବନ୍ଦନେ  
 ବନ୍ଦିଅଇ ଆତୁସ୍ ।”

୨୫ ସିମନ୍ ସେମନ୍‌କେ କଇଲା, “ତମେ ଜାଇଟା ସବୁ କଇଲାସ୍ ସେଟା ଜେନ୍ତି ମର୍  
 ଉପରେ ନ ଗଟ । ମୁଇ ତମ୍‌କେ ବାବୁଜିଆ କଲିନି ମର୍‌ପାଇ ମାପରୁକେ ପାରତନା  
 କରା ।” ୨୫ ନିଜର୍ ଜିବନେ ଅଇରଇବା ବିସଇର୍ ସାକି ଆରି ମାପରୁର୍ ସୁବ୍ କବର୍  
 କଇସାରାଇଲା ପଚେ ପିତର୍ ଆରି ଜଅନ୍ ଜିରୁସାଲାମେ ବାଅଡ଼ଲାଇ । ବାଅଡ଼ବା  
 ବାଟେ ସେମନ୍ ସମିରଣର୍ ବେସି ଗାଉଁମନ୍‌କେ ସୁବ୍‌କବର୍ ଜାନାଇଲାଇ ।

ପିଲିପ୍ ଆରି ଇତିଅପିଆର୍ କାମ୍‌କରୁ

୨୬ ପର୍‌ମେସରର୍ ଗଟେକ୍ ଦୁଡ଼ ପିଲିପ୍‌କେ କଇଲା, “ତିଆର୍ ଅ, ଆରି ଦକିଣ୍  
 ଦିଗେ ଜିରୁସାଲମେଅନି ଗାଜା ବଲି ଗଟେକ୍ ଜାଗାଇ ଜିବାବାଟେ ଜା । ଆଜିକାଲି  
 ଏବାଟେ ଆରି ଲକ୍‌ମନ୍ ଆସ୍ ଜା କରଡ଼ ନାଇ ।” ୨୭ ପିଲିପ୍ ତିଆର୍ ଅଇ ସେବାଟେ  
 ଗାଲା । ଏଦେ ଦେକା ! ଇତିଅପିଆର୍ ଗଟେକ୍ ଲକ୍ ! ସେ ଗଟେକ୍ ବେନ୍ତୁ  
 ରଇଲା । ସେ ଜିରୁସାଲମେ ପାରତନା କରବାକେ ଆସିରଇଲା । ୨୮ ସେ ଗଟେକ୍  
 ମୁକିଅ ଆରି ଇତିଅପିଆ ରାନିର୍ ବାଣ୍ଟାଗରିଆ ରଇଲା । ସେ ପର୍‌ମେସର୍‌କେ  
 ଉପାସନା କରବାକେ ଜିରୁସାଲମ୍ ଜାଇରଇଲା । ତାର ରତେ ବସି ଗରେ ବାଡ଼ତି  
 ଆଇତେରଇଲା । ବସିକରି ଜିସାୟ୍ ବବିସଡ଼ବକ୍‌ତାର୍ ବଇଟାନେଅନି ଆଉଲି ଅଇ  
 ପଡ଼ତେରଇଲା । ୨୯ ସୁକଲ୍‌ଆଡ଼ମା ପିଲିପ୍‌କେ କଇଲା, “ସେ ରତେ ଜା ଆରି ସେ  
 ଲକ୍‌ର ଲଗେ ର ।” ୩୦ ପିଲିପ୍ ପାଲାଇ ପାଲାଇ ଗାଲା ଆରି ସେ ଲକ୍ ଜିସାୟ୍  
 ବବିସଡ଼ବକ୍‌ତାର୍ ବଇ ପଡ଼ବାଟା ସୁନ୍‌ଲା । ସେ ତାକେ ପାଚାରଲା “ତୁଇ ଜାଇଟା  
 ପଡ଼ଲୁସ୍‌ନି, ସେଟା ବୁଜିପାରଲୁସ୍‌ନିକି ?”

୩୧ ସେ ବାଣ୍ଟାଗ୍ ଗରିଆ କଇଲା, “କେ ମିସା ଗଟେକ୍ ଲକ୍ ବୁଜାଇ ନ ଦେଲେ ମୁଇ  
 କେନ୍ତି ବୁଜିପାରବି ?” ତାର ସଙ୍ଗ୍ ରତେ ବସବାକେ ସେ ପିଲିପ୍‌କେ ଡାକ୍‌ଲା । ପିଲିପ୍  
 ଜାଇ ବସଲା । ୩୨ ଦରମ୍ ସାସ୍‌ତରର୍ ଏ ପଦ୍ ପଡ଼ତେ ରଇଲା,

“ମରାଇବାକେ ନେବା ମେଣ୍ଟାପାରା, ଲକ୍‌ମନ୍ ତାକେ ଡାକିନେଲାଇ,  
 ଗଟେକ୍ ମେଣ୍ଟାର୍ ବାଲ୍ କାଟ୍‌ବା ବେଲେ ଜେନ୍ତି ସେ ଚିମ୍‌ରାଇଅଇରଇସି,  
 ସେନ୍ତାରି ସେ ପଦେକ୍ ମିସା କାତା କଏ ନାଇ ।

୩୩ ଲକ୍‌ମନ୍ ନିନ୍ଦା କଲାବେଲେ ତାକେ ନିଆଇ ମିଲେ ନାଇ  
 ତାର କୁଟୁମର୍ ଲକ୍‌ର ବିସଇ, କେ କଇ ନାପାରଡ଼,  
 କାଇକେବଇଲେ ମର୍‌ପୁରେ ତାର ଜିବନ୍ ସାରିଗାଲା ଆଚେ ।”

୩୪ ବାଣ୍ଟାଗ୍‌ଗରିଆ ପିଲିପ୍‌କେ ପାଚାରଲା, “ମୁଇ ତକେ ଗୁଆରି କଲିନି ।  
 ବବିସଡ଼ବକ୍‌ତା କାର୍ ବିସଇ କଇଲାନି, ମକେ କୁଆ । ତାର ନିଜର୍ ବିସଇ କି ଆରି  
 କାର୍ ବିସଇ ?” ୩୫ ପିଲିପ୍ ଦରମ୍ ସାସ୍‌ତରର୍ ଏ ପଦେଅନି ଆରାମ୍ କରି ଜିସୁର୍  
 ବିସଇର୍ ସୁବ୍ କବର୍ ତାକେ ଜାନାଇଲା । ୩୬ ସେମନ୍ ଜାଉ ଜାଉ ଗଟେକ୍ ବନ୍ଦ ଲଗେ  
 କେଟ୍‌ଲାଇ । ସେ ବାଣ୍ଟାଗ୍‌ଗରିଆ କଇଲା, ୩୭ “ଇତି ପାନି ଆଚେ, କାଇ ଅସୁବିଦା ନ  
 ରଇଲେ ମକେ ତୁବନ୍ ଦିଆ ।”

୩୮ ସେ ଲକ୍ ରଡ଼ ତେବାଇବାକେ ତିଆର୍‌ଲା । ପିଲିପ୍ ଆରି ସେ, ପାନି ବିତ୍‌ରେ  
 ଗାଲାଇ ଆରି ପିଲିପ୍ ତାକେ ପାନିତେଇ ତୁବନ୍ ଦେଲା । ୩୯ ସେମନ୍ ପାନିତେଇଅନି  
 ବାରଇ ଆଇଲା ପଚେ, ମାପରୁର୍ ଆଡ଼ମା ପିଲିପ୍‌କେ ଆରିଗଟେକ୍ ଜାଗାଇ ମାୟ୍  
 କରି ଦେଲା, ସେ ଲକ୍ ପିଲିପ୍‌କେ ଆରି କେବେ ଦେକି ନାପାରଲା, ମାତର୍ ସାର୍‌ଦାଇ

ପୁରୁନ୍ ଅଇ ତାର୍ ବାଟେ ଉଠିଗାଲା । ୪୦ ଚନେକ୍ ଗାଲା ପଚେ ପିଲିପ୍ ଦେକ୍ଲାଜେ ସେ ଅସଦର୍ ବଲି ଗଟେକ୍ ଜାଗାଇ କେଟିଆଚେ । ତେଇଅନି ସେ କାଇସେରିଆଇ ଗାଲା ଆରି ବାଟେ ରଇବା ସଅର୍ମନ୍କେ ସୁବ୍ କବର୍ ଜାନାଇଲା ।



ସାଉଲ୍ ମନ୍ ବାଦ୍ଲାଇଲା

୧ ସେ ସବୁ ଗର୍ବା ବେଲେ, ସାଉଲ୍ ମାପୁରୁର୍ ସିସ୍ମାନ୍‌କେ ମରାଇଦେବି ବଲି ଦମ୍‌କାଇତେ ରଇଲା । ସେ ବଡ଼ ପୁଜାରିର୍ ଲଗେ ଗାଲା । ୨ ଜାଇକରି ଦାମାସ୍କାସେ ଜିଉଦିମନର୍ ପାର୍ତନା ଗରେ ଦେବାକେ ଅଦିକାରର୍ ଚିଟି ମାଙ୍ଗ୍ଲା । ଦାମାସ୍କାସେ ଜନ୍ ମାଇଜି ଆରି ମୁନ୍‌ସମନ୍ ମାପୁରୁର୍ ବାଟେ ଆଇଲାଇ ଆଚଡ଼, ସେମନ୍‌କେ ବନ୍ଦିକରି ଡଣ୍ଡ ଦେବାକେ, ଜିରୁସାଲମର୍ ଜିଉଦି ନେତାମନର୍‌ଟାନେ ଆନିଅଇସି । ବାନ୍ଦିକରି ଜିରୁସାଲମେ ଆନ୍‌ବାକେ ସାଉଲ୍‌କେ ଏ ଚିଟି ଅଦିକାର୍ ଦେଲା ।

୩ ସାଉଲ୍ ଦାମାସ୍କାସ୍ ନଅର୍ ଲଗାଲଗି ଅଇବା ବେଲେ, ଅଟାଡ଼ ବାଦ୍‌ଲେଅନି ଗଟେକ୍ ଉଜଲ୍ ସାଉଲ୍‌ର୍ ଚାରିବେଡ଼ି ଜଗଜଗି ଗାଲା । ୪ ତେଇ ସେ ତଲେ ଅଦ୍‌ରି ଗାଲା ଆରି ଗଟେକ୍ କଇବା କାତା ସୁନ୍‌ଲା “ଏ ସାଉଲ୍ ତୁଇ ମକେ କାଇକେ ସାଦ୍‌ଲୁସ୍‌ନି ?”

୫ ସେ କଇଲା, “ତମେ କେ ମାପୁରୁ ?”

“ତୁଇ ଜାକେ ସାଦ୍‌ଲୁସ୍‌ନି, ସେ ଜିସୁ ମୁଇ । ୬ ଏବେ ଉର୍, ନଅରେ ଜା, କାଇଟା କର୍ବାକେ ଅଇସି, ତେଇ ତକେ ଜାନାଇବି ।”

୭ ସାଉଲ୍‌ର୍ ସଙ୍ଗ୍ ଜିବା ଲକ୍‌ମନ୍ କାବାଅଇଜାଇ ତେବିଦେଲାଇ, ତାକର୍ ଚଣ୍ଡେଅନି ପଦେକ୍ କାତା ବାରଏ ନାଇ । କଇବା ସବ୍‌ ସେମନ୍ ସୁନ୍‌ଲାଇ, ମାତର୍ କାକେ ଦେକି ନାପାରୁଲାଇ । ୮ ସାଉଲ୍ ଉଠି ଆଁକି ଦେକ୍ଲା ମାତର୍ ତାକେ କାଇଟା ଡିସେ ନାଇ । ତେବେ ତାର୍ ସଙ୍ଗ୍ ଲକ୍‌ମନ୍ ଆତେ ଦାରି ଦାମାସ୍କାସ୍ ତାକିନେଲାଇ । ୯ ତିନ୍‌ଦିନ୍ ଜାକ ସେ କାଇଟା ଦେକି ନାପାରୁଲା ଆରି ତିନ୍‌ଦିନ୍ ଜାକ କାଏ ନାଇ କି ପିଏ ନାଇ ।

୧୦ ଦାମାସ୍କାସେ ଅନନିୟ ନାଉର୍ ଗଟେକ୍ ବିସ୍‌ବାସି ଲକ୍ ରଇଲା, ସେ ମାପୁରୁର୍ ଦର୍ସନ୍ ପାଇଲା, ମାପୁରୁ ତାକେ କଇଲା, “ଅନନିୟ !”

ସେ କଇଲା, “ମୁଇ ଇତି ଆତି ମାପୁରୁ, କୁଆ ।”

୧୧ ମାପୁରୁ କଇଲା, “ତିଆର୍ ଅ । ସଲକ୍ ନାଉର୍ ବାଟ୍‌ଦାରି ଜିଉଦାର୍ ଗରେ ଜା । ତେଇ ତାର୍‌ସସେଅନି ଆସି ରଇବା ସାଉଲ୍ ନାଉର୍ ଗଟେକ୍ ଲକ୍‌କେ କଜ୍ । ସେ ପାର୍ତନା କଲାନି । ୧୨ ସେ ଦର୍ସନ୍ ଦେକ୍‌ଲାବେଲେ ଅନନିୟ ବଲି ଗଟେକ୍ ଲକ୍ ତାର୍ ଗରେ ପୁର୍ବାଟା ସେ ଦେକିଆଚେ, ତୁଇ ଜା ଆରି ସେ ଜେଡ଼ିକି ଆରିତରେକ୍ ଦେକିପାରସି ତାର୍ ଉପରେ ଆଡ଼ ସଙ୍ଗ୍ ।”

୧୩ ମାତର୍ ଅନନିୟ କଇଲା, “ମାପୁରୁ ଏ ଲକ୍ ଜିରୁସାଲମେ ତମର୍ ଲକ୍‌ମନ୍‌କେ ଜେଡ଼ିକି ପାପ୍ କାମ୍ କଲା ଆଚେ, ସେ ବିସଇ କେତେ କେତେ ଲକ୍ ମକେ ଜାନାଇ ଆଚଡ଼ । ୧୪ ଆରି ସେ ଲକ୍ ମୁକିଅ ପୁଜାରିମନର୍ ଟାନେଅନି ଅଦିକାର୍ କାଗଜ୍ ନେଇକରି ଦାମାସ୍କାସେ, ତମ୍‌କେ ପାର୍ତନା କର୍ବା ଲକ୍‌ମନ୍‌କେ ଦାରି ନେବାକେ ଆସିଆଚେ ।”

୧୫ ମାପୁରୁ ତାକେ କଇଲା, “ଜାଆ ଜିଉଦି ନ ଅଇଲା ଲକ୍‌ମନ୍, ତାକର୍ ରାଜାମନ୍ ଆରି ଇସ୍ରାଏଲର୍ ଲକ୍‌ମନ୍‌କେ, ମର୍ ନାଉଁ ଜାନାଇବାକେ ଆରି ମର୍ ସେବା କର୍ବାକେ ମୁଇ ତାକେ ବାଟ୍‌ଲି ଆତି । ୧୬ ସେ ମର୍ ପାଇ ଜେଡ଼ିକି ସବୁ କସ୍‌ର୍ ମୁରବ୍‌ବାର୍ ଆଚେ, ମୁଇ ନିଜେ ତାକେ ଜାନାଇବି ।”



୧୭ ଅନନିୟ ଗାଲା ଆରି ସାଉଲ୍ ରଇବା ଗରେ କେଟ୍‌ଲା । ସାଉଲ୍‌କେ ବେଟ୍‌ଅଇ ତାର ଉପରେ ଆଡ଼ ସଙ୍ଗଇ ତାକେ କଇଲା, “ଏ ବାଇ ସାଉଲ୍, ଇତି ତରଟାନେ ଆଇବାକେ ମାପୁରୁ ଜିସୁ ମକେ ପାଟାଇଆଟେ । ତୁଇ ଇତି ଆଇବା ବାଟେ ସେସେ ତକେ ଦେକାଇଅଇଲା । ତୁଇ ଜେନ୍ତ୍ରକି ଆରି ତରେକ୍ ଦେକି ପାରୁସ୍ ଆରି ସୁକଲ୍ ଆଡ଼ମାଇ ପୁରାପୁରୁନ୍ ଅଇପାରୁସ୍ । ସେଟାରପାଇ ପର୍ମେସର୍ ମକେ ପାଟାଇଆଟେ ।” ୧୮ ଅନନିୟ ଏ କାତା କଇଲା ଦାପରେ ଏଦେ ଦେକା ! ସାଉଲ୍‌ର ଆଁକିଅନି ମାଡ଼ କସ୍‌ଲି ପାରାଟା କୁସ୍‌ଲି ଅଦର୍ଲା । ସେ ଆରି ତରେକ୍ ଦେକି ପାରୁଲା । ସେ ଉଟ୍‌ଲା ଆରି ଅନନିୟ ତାକେ ତୁବନ୍ କଲା । ୧୯ ଆରି କାଆପିଆ ଅଇ ବପୁ ଅଇଲା । ସାଉଲ୍ ଜିସୁକେ ବିସ୍‌ବାସ୍ କର୍‌ବା ଲକ୍‌ମନର୍ ସଙ୍ଗ୍ ଦାମାସ୍କସେ କେତେ ଦିନ୍ ରଇଲା ।

ଦାମାସ୍କସେ ସାଉଲ୍‌ର ମାପୁରୁର୍ କାତା ଜାନାଇବାଟା

୨୦ ସେ ସିଦା ପାରତନା କର୍‌ବା ଗର୍‌ମନ୍କେ ଜାଇ ଜିସୁସେ ପର୍ମେସରର୍ ପଅ ବଲି ଜାନାଇବାର୍ ଦାରୁଲା ।

୨୧ ଜନ୍ ଲକ୍‌ମନ୍ ତାର କାତା ସୁନ୍‌ଲାଇ, କାବାଅଇଜାଇକରି ପାଟାରୁଲାଇ, “ଜିରୁସାଲାମେ ଜିସୁକେ ବିସ୍‌ବାସ୍ କରି ପାରତନା କର୍‌ବା ଲକ୍‌ମନ୍କେ ଜନ୍‌ଲକ୍ ମରାଇତେ ରଇଲା, ଏ କାଇ ସେ ଲକ୍ ନଏଁ କି ? ସେମନ୍କେ ମୁକିଅ ପୁଜାରିମନର୍ ଲଗେ ଦାରିନେବାକେ ସେ କାଇ ଇତି ଆସି ନ ରଇଲା କି ?”

୨୨ ମାତର୍ ସାଉଲ୍ ଦରମ୍ ସାସ୍‌ତରେ ଅନି, ଜିସୁ ଆକା ମସିଅ ବଲି ସଡ଼ ଦେକାଇଲା । ଏ ବିସଇଟାନେ ତାର କଇବା କାତା ଏତେ ବପୁ ରଇଲା ଜେ, ଦାମାସ୍କସେ ବାସାଅଇ ରଇବା ଜିଉଦିମନ୍ ତାର କଇବା କାତାର୍ ଗଟେକ୍ ମିସା ଉତର୍ ଦେଇନାପାରୁଲାଇ ।

୨୩ ✨କେତେଦିନ୍ ଗାଲା ପଟେ ଜିଉଦିମନ୍ ଗଟେକ୍ ଅଇକରି ସାଉଲ୍‌କେ ମରାଇବାକେ ପାର୍‌ନା କଲାଇ । ୨୪ ମାତର୍ ସାଉଲ୍ ସେମନର୍ କୁଟ୍ କାତା ଜାନ୍‌ଲା । ସାଉଲ୍‌କେ ମରାଇବାକେ ସେମନ୍ ଦିନ୍ ରାତି ନଅରର୍ ସବୁ ଦୁଆର୍‌ମନ୍କେ ଜାଗୁଲାଇ । ୨୫ ମାତର୍ ଦିନେକ୍, ରାତିବେଲେ ସାଉଲ୍‌ର ସିସ୍‌ମନ୍ ତାକେ ଡାଲାଇ ସାଜାତି ନଅରର୍ ଚାରିବେଟ୍‌ତି ରଇବା ପାରୁରିର୍ କାଣା ବାଟେ ତଲେ ଉଡ଼ରାଇଦେଲାଇ ।

ଜିରୁସାଲାମେ ସାଉଲ୍

୨୬ ସାଉଲ୍ ଜିରୁସାଲାମେ ଜାଇ ସିସ୍‌ମନର୍ ସଙ୍ଗ୍ ମିସ୍‌ବାକେ ଚେସ୍‌ଟା କଲା । ମାତର୍ ସେମନ୍ ସାଉଲ୍‌କେ ଗଟେକ୍ ସିସ୍ ବଲି ମୁଲ୍‌କେ ବିସ୍‌ବାସ୍ କରଡ଼ ନାଇ । ସବୁ ଲକ୍ ତାକେ ତରତେ ରଇଲାଇ । ୨୭ ମାତର୍ ପଟେ, ବର୍‌ନବା ତାକେ ପେରିଡ଼ ସିସ୍‌ମନର୍ ଲଗେ ନେଲା । ଦାମାସ୍କସର୍ ବାଟେ କେନ୍ତ୍ର ସାଉଲ୍ ମାପୁରୁର୍ ଦର୍‌ସନ୍ ପାଇରଇଲା, ଆରି ମାପୁରୁ ତାକେ କାତା କଇରଇଲା, ଏ ସବୁ ବିସଇ ସେମନ୍କେ ବୁଜାଇକରି କଇଲା । ଦାମାସ୍କସେ ସାଉଲ୍ ନ ତରତେ କେନ୍ତ୍ରାରି ଜିସୁର୍ ନାଉଁ ଦାରି ତାର ବାକିଅ ଜାନାଇରଇଲା, ସେମନ୍କେ ଟିକି ନିକି ବୁଜାଇ କରି କଇଲା । ୨୮ ଆରି ସାଉଲ୍, ପେରିଡ଼ ସିସ୍‌ମନର୍ ସଙ୍ଗ୍ ରଇଲା ଆରି ଜିରୁସାଲାମର୍ ଗୁଲାଇବାଟେ ଜାଇ, ନ ତରତେ ମାପୁରୁର୍ ବାକିଅ ଜାନାଇଲା । ୨୯ ସାଉଲ୍ ଏ ସବୁ ବିସଇ ଗିରିକ୍ ବାସା କଇବା ଜିଉଦିମନର୍ ସଙ୍ଗ୍ ଦଦାପେଲା ଅଇଲା । ମାତର୍ ସେମନ୍ ସାଉଲ୍‌କେ ମରାଇବାକେ ଚେସ୍‌ଟା କଲାଇ । ୩୦ ବିସ୍‌ବାସି ବାଇମନ୍ ଏ କାତା ଜାନିକରି ସାଉଲ୍‌କେ କାଇସରିଆ ନାଉଁର୍ ଗଟେକ୍ ଜାଗାଇ ଦାରିଗାଲାଇ । ଆରି ତେଇଅନି ତାକେ ତାରସିସ୍ ବଲି ବିନ୍ ଗଟେକ୍ ଜାଗାଇ ପାଟାଇ ଦେଲାଇ ।

୩୧ ଜିଉଦା, ଗାଲିଲି ଆରି ସମିରଣେ ରଇବା ମଣ୍ଡଲିମାନର୍ ପାଇ ସେବେଲା ଗଟେକ୍ ସାନ୍ତିର୍ ବେଲା ରଇଲା । ସୁକଲ୍ ଆତ୍ମା ସେମାନର୍ ସଙ୍ଗ୍ ରଇଲା ଜେ ଲକ୍ମନ୍ ଦିନକେଦିନ୍ ଅଦିକ୍ ଅଦିକ୍ ଅଇ ଡାକ୍ ଅଇଲା । ଜିସୁକେ ବିସ୍ବାସକର୍ବା ଲକ୍ମନ୍, ମାପୁରୁକେ ଡରିକରି ଆରି ମାନିକରି ଜିଇତେ ରଇଲା ।

ଲୁଦା ଆରି ଜପ୍ପା ଜାଗାଇ ପିତର୍

୩୨ ପିତର୍ ବିନ୍ ବିନ୍ ଜାଗାଇ ବୁଲି ବୁଲି ତରେକ୍ ଲୁଦାଇ ବାସାଅଇରଇବା, ମାପୁରୁର୍ ଲକ୍ମନ୍ ସଙ୍ଗ୍ ମିସ୍ବାକେ ଗାଲା । ୩୩ ତେଇ ଏନିୟ୍ ନାଉର୍ ଗଟେକ୍ ଲକ୍ମକେ ସେ ବେଟ୍ ଅଇଲା, ଏନିୟ୍କେ ଚେରେଙ୍ଗ୍ ବାଡ଼ ଦାରି ଆଟ୍ ବରସ୍ ଅଇଜାଇରଇଲା । ସଇଲାଟାନେଅନି ଉଟି ନାପାଟେତେ ରଇଲା । ୩୪ ପିତର୍ ତାକେ କଇଲା, “ଏନିୟ୍ ଜିସୁ ମାପୁରୁ ତକେ ନିକ କରିଆଚେ । ଉଟ୍ ଆରି ତର୍ ଅତ୍ମନା ସାଜାଡ଼ ।” ୩୫ କଇଲା ଦାପରେ ଏନିୟ୍ ଉଟି ଚିଆଅଇଲା । ଏଟା ଦେକି କରି ଲୁଦା ଆରି ସାରନେ ବାସା ଅଇରଇବା ସବୁ ଲକ୍ମନ୍ ମାପୁରୁର୍ ବାଟେ ଆଇବାକେ ମନ୍ କଲା ।

୩୬ ଜପାଇ, ଟାବିତା ନାଉର୍ ଗଟେକ୍ ବିସ୍ବାସି ମାଇଜି ବାସା ଅଇରଇଲା । ତାର୍ ଗିରିକ୍ ନାଉ, ଦାରକାସ୍ । ତାର୍ ଅରଡ଼ କଟ୍ଟରା । ସେ ସବୁବେଲା ସଡ଼ କାମ୍ କରି, ରଗି ଦୁକିମାନର୍ ସେବା କର୍ତେତେ ରଇଲା । ସେବେଲେ ସେ ରଗିବେମାର୍ ଅଇ ମରିଗାଲା । ୩୭ ତାର୍ ଲକ୍ମବାକ୍ମନ୍ ଟାବିତାର୍ ମଲାମଡ଼ ପାନିଦୁଆଇଲା ଆରି ଲୁଗା ସଙ୍ଗ୍ ଗୁଡ଼ିଆଇ ଉପର୍ ତାଲାର୍ ବାକ୍ରାଇ ସୁଆଇଦେଲା । ୩୮ ଜପା ଜାଗା ଲୁଦାଇଅନି ଦୁରିକେ ନ ରଇଲା । ପିତର୍ ଲୁଦାଇ ଆଚେ ବଲି ସୁନିକରି ଜପାଇ ରଇବା ବିସ୍ବାସିମନ୍ ଦୁଇ ଲକ୍ମକେ ପିତର୍ ଲଗେ କଇ ପାଟାଇଲା । “ଅଲସମ୍ ନ କର, ଦାପେ ଆମର୍ ଲଗେ ଚନେକ୍ ଆସା ।” ୩୯ ପିତର୍ ତିଆର୍ ଅଇକରି ସେମାନର୍ ସଙ୍ଗ୍ ଗାଲା । ତେଇ ସେ କେଟ୍ଲା ଦାପରେ ଲକ୍ମନ୍ ତାକେ ଉପର୍ ତାଲାର୍ ବାକ୍ରାଇ ଡାକି ନେଲା । ରାଣ୍ଡି ମାଇଜିମନ୍ ଚାରିବେଡ଼ତି ଅଇକରି କାନ୍ଦି କାନ୍ଦି ଦାରକାସ୍ ଜିବନ୍ ରଇଲାବେଲେ ସିଲାଇ ରଇବା ବସ୍ତର୍ ଆରି ଲୁଗାମନ୍ ସବୁ ପିତର୍କେ ଦେକାଇଲା । ୪୦ ପିତର୍ ବାକ୍ରାଇଅନି ସବୁକେ ବାକ୍ରାଇ ଦେଲା ଆରି ମାଣ୍ଡିକ୍ଟା ଦେଇ ପାର୍ତନା କଲା । ତାର୍ପଚେ ଦର୍କାସର୍ ମଲା ଗାଗଡ଼ବାଟେ ଦେକିକରି କଇଲା, “ଟାବିତା ଉଟ୍ !” ଏଦେ ଦେକା ! ଦର୍କାସ୍ ଆକି ଦେକ୍ଲା ଆରି ପିତର୍କେ ଦେକି ଉଟିକରି ବସ୍ଲା । ୪୧ ପିତର୍ ଆଡ଼ ଲାମାଇ ତାକେ ଉଟାଇଲା । ତାର୍ ପଚେ ତେଇ ରୁଣ୍ଡି ରଇଲା ସବୁ ବିସ୍ବାସି ଆରି ରାଣ୍ଡି ମାଇଜିମନ୍କେ ଡାକି ଦର୍କାସ୍କେ ସର୍ପିଦେଲା । ୪୨ ଏ କବର୍ ଜପାର୍ ଗୁଲାଇ ବାଟର୍ ଲକ୍ ସୁନ୍ଲାଇ ଆରି କେତେ କେତେ ଲକ୍ମନ୍ ମାପୁରୁକେ ବିସ୍ବାସ୍ କଲା । ୪୩ ପିତର୍ ବେସି ଦିନ୍ ଜପାଇ ସିମନ୍ ନାଉର୍ ଗଟେକ୍ ଲକ୍, ଜେକି ପସୁମାନର୍ ଚାମ୍ ସଙ୍ଗ୍ କାଇକାଇ ଜିନିସମନ୍ ତିଆର୍ କରି ବର୍ତେତେ ରଇଲା, ତାର୍ ଗରେ ରଇଲା ।

୧୦

ପିତର୍ ଆରି କର୍ନିଲିଅ

୧ କାଇସରିଆ ଅନି କର୍ନିଲିଅ ନାଉର୍ ଗଟେକ୍ ଲକ୍ ରଇଲା । ସେ, ଇଟାଲି ଅନି ଆଇବା ଗଟେକ୍ ବଡ଼ ଦଲର୍ ରମିୟ୍ ସନିଅମନ୍, ନେତା ରଇଲା । ୨ ସେ ଗଟେକ୍ ଦରମ୍ ଲକ୍ ରଇଲା । ସେ ଆରି ତାକର୍ ଗରର୍ ଲକ୍ମନ୍ ସବୁ ପର୍ମେସର୍କେ ଉପାସନା କର୍ତେତେ ରଇଲା । ସେ ରକିଦୁକି ଜିଉଦିମନ୍କେ ବେସି ଉପକାର୍ କର୍ତେତେ ରଇଲା । ଆରି ଜେଡେବେଲ୍ ମିସା ପର୍ମେସର୍କେ ପାର୍ତନା କର୍ତେତେ ରଇଲା । ୩ ଦିନେକ୍ ଆଡ଼ବେଲାର୍ ତିନ୍ଟା ବେଲେ କର୍ନିଲିଅ ପାର୍ତନା

କଲାବେଳେ, ଗଟେକ୍ ଦରସନ୍ ପାଇଲା । ତେଜ ପର୍ଯ୍ୟେସରର୍ ଦୁଡ଼ ଆସି ତାକେ “କର୍ନିଲିଅ !” ବଲି ଡାକ୍‌ବାଟା ନିକ ସଙ୍ଗ୍ ଦେକ୍‌ଲା ।

୪ ସେ ଡରିକରି ସରଗର୍ ଦୁଡ଼ବାଟେ ଦେକିକରି କଇଲା, “କାଇଟା ବଲି କଇଲୁସ୍‌ନି ମାପରୁ ?”

ସରଗର୍ ଦୁଡ଼ କଇଲା, “ପର୍ଯ୍ୟେସର୍ ତର୍ ପାର୍‌ତନା ଆରି ଦୁକିରକିମନ୍‌କେ ଦାନ କର୍‌ବାଟା ଦେକି ସାର୍‌ଦା ଅଇଲା । ଆର୍ ବାଦୁଲେ କାଇଟାଆଲେ ଦେବାକେ ସେ ମନ୍ କଲାନି । ୫ ଏବେ ସିମନ୍ ପିତର୍ ନାଉର୍ ଗଟେକ୍ ଲକ୍‌କେ ଇତି ଡାକି ଆନ୍‌ବାକେ, ଜପାଇ ଲକ୍ ପାଟାଆ । ୬ ସେ ସମ୍‌ଦୁର୍ କଣ୍ଡି ବାସାଅଇରଇବା ସିମନ୍ ନାଉର୍ ଗଟେକ୍, ପସୁମନ୍‌ର୍ ଚାମ୍ ସଙ୍ଗ୍ କାଇକାଇଟା ତିଆର୍ କର୍‌ବା ଲକ୍‌ର୍ ଗରେ ରଇଲାନି ।” ୭ ଏଡ଼କି କାତା କଇ ସରଗର୍ ଦୁଡ଼ ଉଟିଗାଲା । କର୍‌ନିଲିଅ ତାକର୍ ଗରର୍ ଦୁଇଟା ଗତିଦାଙ୍ଗ୍‌ତାକେ ଆରି ତାକେ ସେବା କର୍‌ତେରଇବା ଆରି ପର୍ଯ୍ୟେସର୍କେ ଉପାସନା କର୍‌ତେରଇବା ଗଟେକ୍ ସଇନକେ ଡାକାଇଲା । ୮ ସେ ସେମନ୍‌କେ ଦୁଡ଼ କଇରଇବା ସବୁ କାତା ଜାନାଇ କରି ଜପାଇ ପାଟାଇଲା ।

୯ ତାର୍ ଆର୍‌କର୍ ଦିନେ ଆଡ଼ବେଲାଇ ସେମନ୍ ଜପାର୍ ଲଗାଲଗି ଅଇଲାବେଳେ, ପିତର୍ ପାର୍‌ତନା କର୍‌ବାକେ ମେଡ଼ଗରର୍ ଚାଉନି ଉପ୍‌ରେ ଜାଇ ରଇଲା । ୧୦ ସେ ଉପାସ୍ ସାରାଇକରି, କାଇଟାଆଲେ କାଇବାକେ ମନ୍ କଲା ଆରି କାଦି ତିଆର୍ ଅଇବା ବେଲାଇ ସେ ଗଟେକ୍ ଦରସନ୍ ଦେକ୍‌ଲା । ୧୧ ଏଦେ ଦେକା ! ଆକାସ୍ ଉଗାଡିଅଇଲାଟା ଆରି ଗଟେକ୍ ବଡ଼ ଚାଦର୍ ଚାରିକନେ ବାନ୍ଧିଅଇକରି ଦର୍‌ତନି ଉପ୍‌ରେ ଉଡ଼ି ଆଇବାଟା ଦେକ୍‌ଲା । ୧୨ ତେଜ ଜଗତେ ରଇବା ରକାମ୍ ରକାମର୍ ଗଡ଼ ସଙ୍ଗ୍ ଇଣ୍ଡିବା ପସୁ, ରାଙ୍ଗ୍‌ବା ଜନ୍ତୁ ଆରି ଉଡ଼ବା ଚଡ଼ଇମନ୍ ! ୧୩ ଆରି ସେ ଗଟେକ୍ କାତା ଅଇବା ସବ୍ ସୁନ୍‌ଲା, “ପିତର୍ ! ଉଟ୍ ସେମନ୍‌କେ ମାରିକରି କାଆ !”

୧୪ ମାତର୍ ପିତର୍ କଇଲା, “ନାଇ ମାପରୁ, ଆମର୍ ଜିଉଦି ନିୟମ୍ ଇସାବେ ଅସୁକଲ୍ ବଲି କଇବା କାଇ ମାଉସ୍ ମିସା କାଇନାଇ ।”

୧୫ ସେ ସବ୍ ଆରି କଇଲା “ପର୍ଯ୍ୟେସର୍ ଜନ୍‌ଟା ସୁକଲ୍ କଲାଆଟେ ସେଟା ନିର୍‌ବାର୍ ନାଇ ।” ୧୬ ଏନ୍ତାରି ତିନ୍‌ତର୍ ଅଇଲା ପଟେ ଚାଦର୍ ସରଗ୍ ବାଟେ ଚଗାଇ ଦାରି ଗାଲାଇ ।

୧୭ ପିତର୍ ଜନ୍ ଦରସନ୍ ପାଇରଇଲା, ତାର୍ ଅରଡ଼ କାଇଟା, ସେଟା ବାବି କାନାବାନା ଅଇଗାଲା । ଟିକ୍ ସେନ୍ତ୍ର ଅଇଲାବେଳେ, ଏଦେ ଦେକା ! କର୍‌ନିଲିଅ ପାଟାଇଲା ଲକ୍‌ମନ୍ ସିମନ୍‌କେ କଜି କଜି ଆସି, ତାର୍ ଗରର୍ ବାଟ୍‌ତିଆଗତି ଲଗେ ଚିଆଅଇଲାଇ । ୧୮ ସେମନ୍ ଡାକିକରି ପାର୍‌ରଲାଇ, “ସିମନ୍ ପିତର୍, ନାଉର୍ ଗତିଆ ଲକ୍ ଇତି ଆଟେ କି ?” ୧୯ ପିତର୍ ସେ ଦରସନ୍ ବିସଇ ଚିନ୍ତା କର୍‌ତେ ରଇଲାବେଳେ ଆଡ଼ମା ତାକେ କଇଲା, “ସୁନ୍ ! ତକେ ତିନ୍ ଲକ୍ କଜ୍‌ଲାଇନି ।”

୨୦ “ଉଟ୍, ତଲେ ଜାଆ । ଏ ଲକ୍‌ମନ୍‌ର୍ ସଙ୍ଗ୍ ଜିବାକେ ନିର୍‌ନାଇ, କାଇକେବଇଲେ ମୁଇ ସେମନ୍‌କେ ପାଟାଇଆଟି ।”

୨୧ ତେଜଅନି ପିତର୍ ସେ ଲକ୍‌ମନ୍‌ର୍ ଲଗେଜାଇ କଇଲା, “ତମେ ଜାକେ କଜ୍‌ଲାସ୍‌ନି, ସେ ଲକ୍ ମୁଇ, ତମେ କାଇକେ ଆସି ଆଗାସ୍ ?”

୨୨ ସେମନ୍ କଇଲାଇ, “କର୍‌ନିଲିଅ ନାଉର୍ ରମିୟ୍ ସଇନମନ୍‌ର୍ ନେତା ଆମ୍‌କେ ପାଟାଇଆଟେ । ଜେ କି ଗଟେକ୍ ଦରମ୍ ଲକ୍ ଆରି ପର୍ଯ୍ୟେସର୍କେ ନାମସି । ଗୁଲାଇ ଜିଉଦି ଲକ୍‌ମନ୍ ତାକେ ନାମବାଇ । ତୁଇ କଇବାଟା ସୁନ୍‌ବାକେ, ସେ ତକେ ତାର୍ ଗରେ ଡାକାଇଆଟେ । ଏନ୍ତାରି କର୍‌ବାକେ ପର୍ଯ୍ୟେସର୍ ପାଟାଇଲା ଦୁଡ଼ ତାକେ ତିଆର୍‌ଲା ଆଟେ ।” ୨୩ ପିତର୍ ସେମନ୍‌କେ ବିଡ଼ରେ ଡାକିନେଇକରି ସେ ରାତି ତେଜ ରଇବାକେ ଗୁଆରି କଲା ।

ତାର୍ ଆରକର୍ ଦିନେ ସେ ଉଚି ସେମନର୍ ସଙ୍ଗ ଗାଲା । ଆରି ଜପା ନାଉର୍ ଜାଗାର୍ କେତେଟା ବିସ୍ବାସି ବାଇମନ୍ ମିସା ସେମନର୍ ସଙ୍ଗ ଗାଲା । ୨୪ ଆରି ଗଟେକ୍ ଦିନେ ସେମନ୍ ସିସେରିଆଇ କେଟ୍ଲାଇ । ତେଇ କର୍ନିଲିଅ ତାର୍ ମଇତରମନ୍କେ ଆରି କୁଟୁମର୍ ଲକ୍ମନକେ ରୁଣ୍ଡାଇକରି ପିତରକେ ଜାଗିରଇଲା । ୨୫ ପିତର ଗର୍ ବିତ୍ତରେ ଜିବାବେଲେ କର୍ନିଲିଅ ତାକେ ବେଟ୍ଅଇ, ତାର୍ ପାଦେ ଡାଣ୍ଡାସନ୍ ପଡି ଜୁଆର୍ କଲା । ୨୬ ପିତର ତାକେ ଉଟାଇକରି କଇଲା, “ଟିଆ ଅ, ମୁଇ ମିସା ତରପାରା ଗଟେକ୍ ମୁନ୍ସସେ ।” ୨୭ ପିତର କର୍ନିଲିଅର୍ ସଙ୍ଗ କାତା ଅଇ ଅଇ ଗର୍ ବିତ୍ତରେ କେଟ୍ଲା ଆରି ତେଇ ବେସିଲକ୍ ରୁଣ୍ଡିରଇବାଟା ଦେକ୍ଲା । ୨୮ ସେ ସେମନ୍କେ କଇଲା, “ଜିଉଦି ନ ଅଇଲା ଲକ୍ମନର୍ ସଙ୍ଗ ମିସ୍ବାଟା କି ତାକର୍ ଗରେ ଜିବାଟା ଆମର୍ ଜିଉଦି ଲକ୍ମନର୍ ବିଦି ନାଇ । ସେଟା ତମେ ନିକକରି ଜାନାସ୍ । ଏଲେମିସା କନ୍ଥାଲେ ଗଟେକ୍ ଲକ୍ମକେ ଅସୁକଲ୍ ଇସାବେ ଦେକ୍ବାର୍ ନାଇ ବଲି ପରମେସର୍ ମକେ କଇଲାଆଟେ । ୨୯ ତେବେ ମକେ ଡାକାଇଲା ଦାପ୍ରେ କାଇଟା ନ ବାବିକରି ଆଇଲି । ମକେ କାଇକେ ଡାକାଇଲୁସ୍ ତେବେ ? ସେଟା ମୁଇ ଜାନ୍ବାକେ ମନ୍ କଲିନି ।”

୩୦ କର୍ନିଲିଅ କଇଲା, ତିନ୍ଦିନ୍ ଆଗତୁ ଆଡ୍ବେଲାର୍ ତିନ୍ଦା ସମାନ୍ ଏଡ୍ବକି ବେଲାଇ, ମୁଇ ଗରେ ପାର୍ତନା କର୍ତେ ରଇଲି । ସେଡ୍ବକି ବେଲେ, ଏଦେ ଦେକା ! ଦବ୍ ପଟିଆ ପିନ୍ଦି ରଇବା ଗଟେକ୍ ଲକ୍ ମର୍ ମୁଆଟେ ଟିଆଅଇଲା, ଆରି କଇଲା, ୩୧ “କର୍ନିଲିଅ ! ପର୍ମେସର୍ ତର୍ ପାର୍ତନା ସୁନ୍ଲା ଆରି ତମେ ଦୁକିରକିକେ ସାଇଜ କର୍ବାଟା ଦେକି ସାର୍ଦା ଅଇଆଟେ । ୩୨ ସିମନ୍ ପିତର ନାଉର୍ ଗଟେକ୍ ଲକ୍ମକେ ଆନ୍ବାକେ ଜପା ନାଉର୍ ଜାଗାଇ, ଲକ୍ମନକେ ପାଟାଆ । ସେ ସମ୍ବୁର୍ କଣ୍ଡି ବାସାଅଇରଇବା ପସୁମନର୍ ଚାମ୍ ସଙ୍ଗ କାଇକାଟା ଡିଆରକରୁ ସିମନର୍ ଗରେ ଗତିଆ ଅଇଆଟେ । ୩୩ ତେବର୍ ପାଇ, ମୁଇ ତକେ ଦାପ୍ରେ ଡାକାଇଲି, ଆରି ତମେ ମର୍ କାତା ମାନିକରି ଆସି ଆଟାସ୍ । ଏବେ ଆମେ ସବୁ ଲକ୍ ପରମେସର୍ ରଇବା ଏ ଜାଗାଇ ରୁଣ୍ଡିଆରୁ । ମାପ୍ରେ ତକେ ଜନ୍ଦା କଇବାକେ ଆଦେସ୍ ଦେଲା ଆଟେ, ସେଟା ସୁନ୍ବାକେ ଜାଗିଆରୁ ।”

ପିତରର୍ ଉପଦେସ୍

୩୪ ସିତିଅନି ପିତର କଇଲା, “ଏବେ ମୁଇ ବୁଜିପାରଲିନି ଜେ ପର୍ମେସର୍ କେତେଟା ଦଲ୍ମମନ୍କେସେ ଡାକସି, ସେନ୍ତାରି ନଏଁ, ମାତର୍ ସବୁକେ ସମାନ୍ ଇସାବେ ଡାକସି । ୩୫ ଜନ୍ ଜାତିର୍ ଲକ୍ ମିସା ତାକେ ଡରିକରି, ତାର୍ ମୁଆଟେ ସଡ୍କାମ୍ କଲେ, ମାପ୍ରେ ତାକେ ଡାକସି । ୩୬ ଇସ୍ରାଏଲିଅ ମନର୍ ଲଗେ ପର୍ମେସର୍ ଜନ୍ କବର୍ ପାଟାଇରଇଲା, ସେଟା ତୁଇ ଜାନିଆରୁସ୍ । ଜିସୁ କିରିସ୍ଟ ଜେ କି ସବୁର୍ ମାପ୍ରେ, ସେ କିରିରଇବା କାମେଅନି ସବୁଲକ୍ମନ୍ ସାନ୍ତିସଙ୍ଗ ମିସ୍ବାଇ, ବଲି ପର୍ମେସର୍ ଆମ୍ବେ ଜାନାଇଲାଆଟେ । ୩୭ ତୁବନ୍ ଦେଉ ଜଅନ୍ ପାପ୍ କାମ୍ କର୍ବାଟାନେଅନି ବାଉଡ୍ବା ବିସଇ ଆରି ତୁବନ୍ ନେବା ବିସଇ କଇଲାପଟେ, ଗାଲିଲିଅନି ଆରାମ୍ କରି ଗୁଲାଇ ଜିଉଦାର୍ ସବୁବାଟେ ଜନ୍ ଗଟ୍ନାସବୁ ଗଟ୍ଲା ଆଟେ, ସେଟା ତୁଇ ଜାନୁସ୍ । ୩୮ ନାଜରିତର୍ ଜିସୁର୍ ବିସଇ ଆରି ପରମେସର୍ ତାକେ କେନ୍ତ୍ରି ସୁକଲ୍ ଆଡ୍ମା ଆରି ବପୁ ପୁରାପୁରନ୍ ଦେଇରଇଲା, ସେଟା ଜାନୁସ୍ । ଆରି ଜାନିଆରୁସ୍, ସେ ସବୁ ବାଟେ ଜାଇ ନିକନିକ କାମ୍ମନ୍ କରିରଇଲା । ସଇତାନର୍ ବାନ୍ଦନେ ରଇଲା ଲକ୍ମନକେ ମୁକ୍ତାଇଲା । କାଇକେବଇଲେ ପରମେସର୍ ତାର୍ ସଙ୍ଗ ରଇଲା । ୩୯ ଜିସୁ ଇସ୍ରାଏଲ ଦେସେ ଆରି ଜିରୁସାଲାମେ ଜେଡ୍ବକି ସବୁ କାମ୍ମନ୍ କଲା, ଆମେ ସବୁ ଲକ୍ ତାର୍ ସାକି ଆରୁ । ତାର୍ପଟେ ତାକେ କୁର୍ସେ କୁଟି ମାରି, ମରାଇଲାଇ । ୪୦ ମାତର୍ ପର୍ମେସର୍ ତାକେ ତିନ୍ଦିନ୍ ଅଇଲାକେ ମଲାତେଇଅନି ଉଟାଇ

ଜିବନ୍ କରାଇ, କେତେଲକ୍ଷକେ ଦେକାଇଦେଲା ।<sup>୪୧</sup> ସବୁଲକ୍ଷ ତାକେ ଦେକ୍‌ବାକେ ପରମେସର୍ ଦେଏନାଇ, ଅବ୍‌କା ସେ ବାଟ୍‌ଲା ସାକିମନ୍‌କେସେ । ତାକେ ଆରିତରେକ୍ ଜିବନ୍ କରାଇଲାପତେ, ତାର୍ ସଙ୍ଗ୍ କାଆ ପିଇ ଅଇରଇଲା ଲକ୍‌ମନ୍ ଆମେସେ ।<sup>୪୨</sup> ଲକ୍‌ମନ୍‌ର ଲଗେ ସୁବ୍‌କବର୍ ଜାନାଇବାକେ ସେ ଆମ୍‌କେ ଆଦେସ୍ ଦେଲା । ବଞ୍ଚିରଇବା ଲକ୍‌ର୍ ଆରି ମଲା ଲକ୍‌ର୍ ବିଚାର୍‌କାରିଆ ଇସାବେ ତାକେସେ ବାଟ୍‌ଲା ଆରେ, ଏ କାତାର୍ ସାକିଦେବାକେ ମିସା ସେ ଆମ୍‌କେ ଆଦେସ୍ ଦେଲାଆରେ ।<sup>୪୩</sup> ସବୁ ବବିସଡ଼ବକ୍‌ତାମନ୍ ତାର୍ ବିସଇନେଇ, ଏ କବର୍ କଇରଇଲା । ଜେ ମସିଅକେ ବିସ୍‌ବାସ୍ କରସି, ମସିଅ କରିରଇବା କାମର୍ ଲାଗି, ପରମେସର୍ ତାର୍ ପାପ୍‌କେମା କରସି ।”

ବିସ୍‌ବାସ୍ ନ କରିରଇବା ଲକ୍ ସୁକଲ୍ ଆଡ଼ମା ପାଇଲାଇ

<sup>୪୪</sup> ପିତର୍ ସିକିଆ ଦେବା ବେଲେ ଜେତେ ଲକ୍ ସୁନ୍‌ତେ ରଇଲାଇ, ସେ ସବୁ ଲକ୍‌ର୍ ଉପ୍‌ରେ ସୁକଲ୍ ଆଡ଼ମା ଉଡ଼ି ଡାବିଅଇଲା ।<sup>୪୫</sup> ଜିଉଦିନଇଲା ଲକ୍‌ମନ୍‌ର୍ ଉପ୍‌ରେ ମିସା ପରମେସର୍‌ର୍ ସୁକଲ୍ ଆଡ଼ମା ଡାବିଅଇବାଟା ଦେକି ଜପାଇଅନି ପିତର୍ ସଙ୍ଗ୍ ଆସିରଇବା ଜିଉଦି ବିସ୍‌ବାସିମନ୍ କାବାଅଇଗାଲାଇ ।<sup>୪୬</sup> କାଇକେବଇଲେ ସେମନ୍ ପରମେସର୍‌କେ ଡାକ୍‌ପୁଟା କରବାଟା, ଆରି ବିନ୍‌ବିନ୍ ବାସାଇ କାତାଅଇବାଟା, ଜିଉଦି ବିସ୍‌ବାସିମନ୍ ସୁନ୍‌ଲାଇ । ଜପାଇଅନି ଆସିରଇବା ଜିଉଦି ବିସ୍‌ବାସିମନ୍‌କେ ପିତର୍ କଇଲା,<sup>୪୭</sup> “ପରମେସର୍ ଆମ୍‌କେ ଜେନ୍ତ୍ର ସୁକଲ୍‌ଆଡ଼ମା ଦେଲାଆରେ, ସେନ୍ତ୍ରାରିସେ ଏ ଲକ୍‌ମନ୍‌କେ ମିସା ଦେଲାଆରେ । ସେମନ୍‌କେ ତୁବନ୍ ନ ନିଆ ବଲି କେ ମିସା ଅଟ୍‌କାଇପାର୍‌ସି କି?”<sup>୪୮</sup> ସେଟାର୍ ପାଇ ପିତର୍ ସେମନ୍‌କେ ଜିସୁକିରିସଟର୍ ନାଉଁ ଦାରି ତୁବନ୍ ଦେଲାପତେ କର୍‌ନିଲିଅ ଆରି ତାର୍ ସଙ୍ଗ୍ ରଇବାଲକ୍‌ମନ୍ ତାକେ ଆରି କେତେ ଦିନ୍ ସେମନ୍‌ର୍ ସଙ୍ଗ୍ ରଇବାକେ ବାବୁଜିଆ କଲାଇ ।

## ୧୧

ଜିରୁସାଲମ୍ ମଣ୍ଡଳିକେ ପିତର୍ ଜାନାଇବାଟା

<sup>୧</sup> ଜିଉଦି ନଇଲା ଲକ୍‌ମନ୍ ମିସା ପରମେସର୍‌ର୍ ବାକିଅ ନାମି ଆତଡ଼ ବଲି ପେରିଡ଼ ସିସ୍‌ମନ୍ ଆରି ଜିଉଦା ରାଇଜର୍ ବିନ୍ ବିସ୍‌ବାସି ବାଇମନ୍ ସୁନ୍‌ଲାଇ ।<sup>୨</sup> ପିତର୍ କାଇସେରିଆ ଅନି ଜିରୁସାଲମ୍ ଗାଲା । ଜିଉଦି ନଇଲା ଲକ୍‌ମନ୍‌କେ ସୁନ୍‌ତ କରୁ ବଲି କଇବା ଲକ୍‌ମନ୍ ତାକେ ବାକାନିକରି କଇଲାଇ,<sup>୩</sup> “ତୁଇ ଜିଉଦି ନଇଲା ଗରେ, ଅବ୍‌କା ଗତିଆଅଇ ଜାଉସ୍ ନାଇ, ତେଇ କାଇଲୁସ୍ ମିସା ।”<sup>୪</sup> ମାତର୍ ମୁଲେଅନି କର୍‌ନିଲିଅକେ କାଇକାଇଟା ଗଟିରଇଲା, ସେଟା ବୁଜାଇବାକେ ପିତର୍ କଇଲା ।<sup>୫</sup> “ମୁଇ ଜପା ନାଉଁର୍ ନଅରେ ପାର୍‌ତନା କରବା ବେଲେ ଗଟେକ୍ ଦର୍‌ସନ୍ ଦେକ୍‌ଲି । ଗଟେକ୍ ବଡେଟା ଚାଦର୍ ଚାରିକନେ ଡର୍‌ସଙ୍ଗ୍ ବାନ୍ଦି ଜୁଲାଅଇ ଆକାସେଅନି ଉଡ଼ରଲା ଆରି ସେଟା ମରଲଗେ ଅଟକ୍‌ଲା ।”<sup>୬</sup> ସେ ବିଡ଼ରେ, ଗରେପସ୍‌ବା ପସୁ, ଡଙ୍ଗ୍‌ରେ ରଇବା ପସୁ, ରାଜି ବୁଲ୍‌ବାଟାମନ୍ ଆରି ବିନ୍ ବିନ୍ ରକାମର୍ ଚଡ଼ଇମନ୍ ରଇଲାଟା ନିକକରି ଦେକ୍‌ଲି ।<sup>୭</sup> ତାର୍‌ପତେ ଗଟେକ୍ କର୍‌ ସୁନ୍‌ଲି, “ପିତର୍ ! ଉଟ୍, ମାରିକରି କାଆ ।”<sup>୮</sup> ମାତର୍ ମୁଇ କଇଲି, “ନାଇ ମାପ୍‌ରୁ ! ମୁଲ୍‌କେ ନିତି ! ଆମର୍ ଜିଉଦିମନ୍‌ ନିୟମ୍ ମନାକରିରଇବା ଇସାବେ, ଏବେ ଜାକ କାଇମିସା ମାଉଁସ୍ ଟଣ୍ଡେ ଚିଆଇ ନାଇତା ।”<sup>୯</sup> ସର୍‌ଗେଅନି ଆରିତରେକ୍ ଏ କର୍‌ ଆଇଲା, “ପରମେସର୍ କାଇଟା ଆଲେ କାଇ ଅଇସି ବଲି କଇଲେ ସେଟା ନିଟ୍‌ବାର୍ ନାଇ ।”<sup>୧୦</sup> ଏନ୍ତାରି ତିନ୍‌ତର୍ ଅଇଲା ପତେ, ସେ ଜୁଡ଼ମନ୍ ରଇଲାଟା ସଙ୍ଗ୍ ସେ ଚାଦର୍ ସରଗ୍ ଉପ୍‌ରେ ଜିକିନେଲାଇ ।<sup>୧୧</sup> ସମାନ୍ ବେଲାଇସେ, କର୍‌ନିଲିଅ ପାଟାଇଲା ତିନ୍

ଲକ୍ଷ୍ମୀ ସିଂହେରିଆଇ ଅନି ମୁଇ ରଇବା ଗରେ ଆସି କେଟ୍‌ଲାଇ । ୧୭ ଦୁଇମନିଆ ନ ଅଇ ସେମନର୍ ସଙ୍ଗ୍ ଜିବାକେ ମକେ ସୁକଲ୍‌ଆଡ଼ମା ଚାଲ୍‌ନା ଦେଲା । ଜପାଉର୍ ଏ ଚଅଟା ବିସ୍‌ବାସି ବାଇମନ୍ ମିସା ମର୍ ସଙ୍ଗ୍ ସିଂହେରିଆଇ ଗାଲାଇ ଆରି ଆମେ ସବୁ ଲକ୍ଷ୍ମୀ କର୍‌ନେଲିଅର୍ ଗରେ କେଟ୍‌ଲୁ । ୧୮ ତାର୍ ଗରେ ସେ କେନ୍ତ୍ରି ସରଗ୍ ଦୁତର୍ ଦରସନ୍ ପାଇରଇଲା, ସେ ବିସଇ ଆମକେ ଜାନାଇଲା । ସରଗ୍ ଦୁତ୍ ତାକେ ଏନ୍ତି କଇରଇଲା, ଜପାତେଇ ରଇବା ପିତରକେ, ତାର୍ ଆରି ଗଟେକ୍ ନାଉଁ ଅଇଲାନି ସିମନ୍, ତାକେ ଇତି ଡାକି ଆନ୍‌ବାକେ ଲକ୍ଷ୍ମୀ ପାଟା । ୧୯ ସେ ଆସି ତମକେ ସିକିଆ ଦେଇସି ଆରି ସିତିଅନି ତମକେ ଆରି ତମର୍ ଗରର୍ ଲକ୍ଷ୍ମୀକେ ପରମେସର୍ ରକିଆ କରସି । ୧୫ ଆରି ମୁଇ ଜେତେବଲ୍ ସିକିଆଦେବାର୍ ଆରାମ କଲି, ଆଗେ ସୁକଲ୍ ଆଡ଼ମା ଜେନ୍ତାରି ଆମର୍ ଉପରେ ତାବିଅଇରଇଲା, ସେନ୍ତାରି ସେମନର୍ ଉପରେ ତାବିଅଇଲା । ୧୬ \*ତାର୍‌ପତେ ମୁଇ ମାପ୍‌ରୁର୍ ଏ ବାକିଅ ଏତାଇଲି, ଜଅନ୍ ତମକେ ପାନି ସଙ୍ଗ୍ ହୁବନ୍ ଦେଲା, ମାତର୍ ପରମେସର୍ ତମକେ ସୁକଲ୍‌ଆଡ଼ମାଇ ହୁବନ୍ ଦେଇସି । ୧୭ “ଏଟା ପୁରାପୁରନ୍ ସଡ଼ ଜେ, ଆମେ ମାପରୁ ଜିସୁକିରିସଟକେ ବିସ୍‌ବାସ୍ କଲାକେ ପରମେସର୍ ଆମକେ ଜନ୍ ଦାନ ଦେଲାଆତେ, ଜିଉଦିନଇଲା ଲକ୍ଷ୍ମୀମକେ ମିସା ସେ ଦାନ ଦେଲା ଆତେ । ଜଦି ପରମେସର୍ ମନ୍ କରସି ବଇଲେ, ମୁଇ କେ ଜେ ପରମେସରର୍ ଏ କାମ୍ ଅଟ୍‌କାଇବି !”

୧୮ ଜିଉଦି ବିସ୍‌ବାସିମନ୍ ଏଟା ସୁନ୍‌ଲା ପତେ ଆରି ନ ବାକାନିକରି ପରମେସରକେ ଡାକ୍‌ପୁଟା କଲାଇ, “ସେନ୍ତାରି ଆଲେ ଜିଉଦିନଇଲା ଲକ୍ଷ୍ମୀମକେ ମିସା ପାପ୍ କଲାଟା ମାନିଅଇକରି ନ ସାର୍‌ବା ଜିବନ୍ ପାଇବାକେ ସେ ସୁଜଗ୍ ଦେଲାଆତେ ।”

**ଆନ୍‌ଟିୟକର୍ ମଣ୍ଡଳି**

୧୯ \*ଜିରୁସାଲେମର୍ ଲକ୍ଷ୍ମୀମନ୍ ତିପାନ୍‌କେ ମରାଇଲାପତେ ବିସ୍‌ବାସିମନ୍‌କେ ତାଡ଼ନା ଦେଲାଇ । ତେଇଅନି କେତେଲକ୍ଷ୍ମୀ ଚିନ୍‌ବିନ୍ ଅଇଗାଲାଇ । ସେମନ୍, ପିନିସିଆ, ସାଇପରସ୍ ଆରି ଆନ୍‌ଟିଅକ୍ ଟାନେ ଜାଇ ଅବକା ଜିଉଦିମନ୍‌କେସେ ସୁବ୍ କବର୍ ଜାନାଇଲାଇ । ୨୦ ମାତର୍ କେତେଟା ସାଇପରସ୍ ଆରି କୁରିନିୟର୍ ବିନ୍ ବିସ୍‌ବାସିମନ୍, ଆନ୍‌ଟିଅକେ ଜାଇ ଜିଉଦି ନଇଲା ଲକ୍ଷ୍ମୀମନ୍‌ତେଇ ଜିସୁ ମାପ୍‌ରୁର୍ ସୁବ୍ କବର୍ ଜାନାଇଲାଇ । ୨୧ ପରମେସରର୍ ବପୁ ସେମନର୍ ସଙ୍ଗ୍ ରଇଲା ଆରି ବେସି ଲକ୍ଷ୍ମୀ ବିସ୍‌ବାସ୍ କରି ମାପ୍‌ରୁର୍ ବାଟେ ମନ୍ ବାଉଡାଇଲାଇ ।

୨୨ ଆନ୍‌ଟିୟକିଆଇ ବେସି ଲକ୍ଷ୍ମୀ ଜିସୁଟାଗେ ବିସ୍‌ବାସ୍ କଲାଇନି ବଲି ଜିରୁସାଲେମର୍ ମଣ୍ଡଳିମନ୍ ସୁନ୍‌ଲାଇ । ଆରି ସେମନ୍ ବର୍‌ନବାକେ ଆନ୍‌ଟିୟକିଆଇ ପାଟାଇଲାଇ । ୨୩ ବର୍‌ନବା ତେଇ କେଟିକରି ପରମେସର୍ ସେ ଲକ୍ଷ୍ମୀମକେ କେନ୍‌ତି ଆସିରବାଦ୍ କଲାଆତେ, ସେଟା ଦେକି ସାର୍‌ଦା ଅଇଲା । ଆରି ମନ୍‌ପରାନ୍ ଦେଇକରି ମାପ୍‌ରୁକେ ବିସ୍‌ବାସ୍ କରି ଚଲାଟଲ୍‌ତି କର୍‌ବାକେ ସେମନ୍‌କେ ସିକିଆ ଦେଇ ସାର୍‌ଦା କଲା । ୨୪ ବର୍‌ନବା ସୁକଲ୍‌ଆଡ଼ମାଇ ଆରି ବିସ୍‌ବାସେ ପୁରୁନ୍ ଅଇ ରଇବା ଗଟେକ୍ ଦରମ୍ ଲକ୍ଷ୍ମୀ ରଇଲା । ସେ କବର୍ ଜାନାଇଲାକେ ବେସି ଲକ୍ଷ୍ମୀ ମାପ୍‌ରୁର୍ ଲଗେ ଆଇଲାଇ ।

୨୫ ତାର୍ ପତେ ବର୍‌ନବା ସାଉଲକେ କଜ୍‌ବାକେ ତାର୍‌ସସ୍ ଜାଗାଇ ଗାଲା । ୨୬ ତେଇ ତାକେ ବେଟ୍‌ପାଇ ବର୍‌ନବା ଆନ୍‌ଟିଅକେ ଡାକି ଦାରିଆଇଲା । ପୁରା ଗଟେକ୍ ବରସ୍ ଜାକ ବର୍‌ନବା ଆରି ସାଉଲ୍ ତେଇ ମଣ୍ଡଳିର୍ ବିସ୍‌ବାସିମନ୍‌ର୍ ସଙ୍ଗ୍ ମିସି, ଲକ୍ଷ୍ମୀମକେ ସିକିଆ ଦେଲାଇ । ଏ ଆନ୍‌ଟିଅକର୍ ବିସ୍‌ବାସିମନ୍‌କେସେ ଲକ୍ଷ୍ମୀମନ୍ ସିଗ୍ ପର୍‌ତୁମ୍ କିରିସ୍‌ଗାନ୍ ବଲି କଇରଇଲାଇ ।

\* ୧୧:୧୨ ୧୧:୧୭ ପେରିଡ଼ ୧:୫      \* ୧୧:୧୯ ୧୧:୧୯ ପେରିଡ଼ ୮:୧-୪

୨୭ ସେବେଲାଇ କେତେଟା ବବିସତ୍ତବକ୍ତାମନ୍ ଜିରୁସାଲମେଅନି ଆନ୍ତଟିଅକେ ଆଇଲାଇ । ୨୮ \*ସେମନର୍ ବିତ୍ତରେଅନି ଆଗାବ୍ ନାଉର୍ ଗଟେକ୍ ଲକ୍ ଆତ୍ତମାର୍ ବପୁ ସଙ୍ଗ୍ ପୁରୁନ୍ ଅଇ, ଗୁଲାଇ ଦେସେ ଗଟେକ୍ ବଡ଼ ମର୍ତ୍ତି ଅଇସି ବଲି ବବିସତ୍ତ କାତା ସୁନାଇ ରଇଲା । ଏଟା ବଡ଼ ସାସନ୍କାରିଆ କଲ୍ଡିୟ ରମଦେସେ ସାସନ୍ କଲାବେଲେ ଗଟି ରଇଲା । ୨୯ ଆନ୍ତଟିକିଅର୍ ସିସ୍ମନ୍ ଜିଉଦାଇ ରଇଲା ବିସ୍ବାସି ବାଇମନ୍କେ ତାକର୍ ପାରଲା ଏଡ଼କି ତାବୁ ପାଟାଇବାକେ ଟିକ୍ କଲାଇ । ୩୦ ସେମନ୍ ତାବୁ ଜମାଇକରି ବର୍ନବା ଆରି ସାଉଲର୍ ଆଡେ, ମଣ୍ଡଲିର୍ ପାର୍ଟିମନର୍ ଲଗେ ପାଟାଇ ଦେଲାଇ ।

## ୧୨

### ଅଦିକ୍ ତାତ୍ତନା

୧ ଏ ବେଲାଇ, ଏରଦ୍ ରାଜା ଜିରୁସାଲେମ୍ ମଣ୍ଡଲିର୍ କେତେକ୍ ବିସ୍ବାସିମନ୍କେ ତାତ୍ତନା ଦେବାର୍ ଦାରଲା । ୨ ଜଅନର୍ ବାଇ ଜାକୁବ୍କେ କାଣ୍ଡା ସଙ୍ଗ୍ ମାରି ମରାଇଲା, ଜାକୁବ୍ ଜଅନର୍ ବଡ଼ ବାଇ ରଇଲା । ୩ ଜାକୁବ୍କେ ମରାଇଲାଟା ଜିଉଦିମନ୍କେ ସାର୍ଦା କରାଇଲା । ଏଟା ଦେକି ଏରଦ୍ ପିତର୍କେ ମିସା ବନ୍ଦି କର୍ବାକେ ତିଆର୍ଲା । ଏଟା ଜିଉଦିମନ୍ କମିର୍ ନ ମିସାଇଡେ ରୁଟିକର୍ବା ପରବ୍ ବେଲେ ଅଇରଇଲା । ୪ ସଇନମନ୍ ପିତର୍କେ ବାନ୍ଦିକରି ବନ୍ଦିଗରେ ପୁରାଇଲାଇ । ରକିଆ ପାଇବା ପରବର୍ ପଟେ ସବୁ ଲକର୍ ମୁଆଟେ ବିଚାରନା କର୍ବି ବଲି ଏରଦ୍ ବାବି ରଇଲା । ସେଟାପାଇ ଗଟେକ୍ ଦଲେ ଚାରିଲକ୍ ଲାକା ଅଇ, ଚାରିଟା ଦଲ୍ଲକରି ସନିଅମନ୍ ତାକେ ଜାଗିରଇଲାଇ । ୫ ପିତର୍ ବନ୍ଦିଗରେ ରଇଲାବେଲେ ଜିରୁସାଲେମେ ରଇବା ମଣ୍ଡଲିର୍ ବିସ୍ବାସିମନ୍ ଗଟେକ୍ ଅଇକରି ତାର୍ପାଇ ପର୍ମେସର୍କେ ପାର୍ଡନା କର୍ଡେରଇଲାଇ ।

### ପିତର୍ ବନ୍ଦିଗରେ ଅନି ମୁକଲ୍ବାଟା

୬ ଜନ୍ ଦିନେ ଏରଦ୍ ପିତର୍କେ ଲକ୍ମନର୍ ମୁଆଟେ ଆନ୍ବାକେ କାତା ଦେଇରଇଲା, ତାର୍ ଆଗତୁର୍ ରାତି ପିତର୍ ବନ୍ଦିଗରେ ଦୁଇଟା ଜାଗୁଆଲ୍ମନର୍ ମଜାଇ ସଇରଇଲା । ତାକେ ସନିଅମନର୍ ମିସାତେ ଦୁଇଟା ଆଡେ ଦୁଇଟା ସିକ୍ଲି ସଙ୍ଗ୍ ବାନ୍ଦିରଇଲାଇ । ଆରି ଜାଗୁଆଲ୍ମନ ବନ୍ଦିଗରର୍ ଦୁଆରେ ଜାଗିରଇଲାଇ । ୭ ସେ ଦାପ୍ରେ, ଏଦେ ଦେକା ! ମାପୁରୁର୍ ଗଟେକ୍ ଦୁଡ଼ ଆସି ପିତରର୍ ମୁଆଟେ ଚିଆଅଇଲା ଆରି ଗୁଲାଇ ବାକ୍‌ରା ଉଜଲ୍ ଅଇଗାଲା । ସରଗର୍ ଦୁଡ଼ ପିତର୍କେ କନ୍ଦେ ଦାରି ଚୁଲ୍‌ଚୁଲାଇଲା ଆରି ସଇଲାଟାନେଅନି ଉଟାଇକରି କଇଲା “ଦାପ୍ରେ ଉଟ୍ !” ଉଟ୍ଲା ଦାପ୍ରେ ବାନ୍ଦି ଅଇରଇଲା ସିକ୍ଲି କୁସଲିଗାଲା । ୮ ତାର୍ପଟେ ଦୁଡ଼ କଇଲା, “ଆଁଟାଇ ତୁଆଲ୍ ବାନ୍ଦିଅ ଆରି ପାଣ୍ଡଇ ପିନ୍ ।” ପିତର୍ ସେନ୍ତି କଲା ପଟେ ଦୁଡ଼ କଇଲା, “ଚାଦର୍ ତାବିଅଇକରି ମର୍ ସଙ୍ଗ୍ ଆଉ ।” ୯ ପିତର୍ ଦୁଡ଼ ପଟେ ପଟେ ବନ୍ଦିଗରେ ଅନି ବାରଇ ଆଇଲା । ଦୁଡ଼ ଜନ୍‌ଟା କର୍ଡେରଇଲା, ସେଟା ସଡ଼ କି ନର୍ବି ବଲି ଜାନି ନାପାର୍ଡେରଇଲା । “ଏଟା ଗଟେକ୍ ଦର୍ସନ୍ ଦେକ୍ଲିନି ।” ବଲି ବାବ୍ଡେରଇଲା । ୧୦ ସେମନ୍ ଜାଗୁଆଲ୍ମନ ରଇବା ଦୁଇଟା ଜାଗା ଜିଡିକରି ପଟେ ନଅରେ ପୁର୍ବା ଲୁଆ କାପାଟ୍ ରଇବା ଲଗେ ଆଇଲାଇ । ତାକର୍ପାଇ ଲୁଆ କାପାଟ୍ ତାର୍ମନକେସେ ଉଗାଡିଅଇଗାଲା ଆରି ସେମନ୍ ବାରଇ ଉଟିଆଇଲାଇ । ସେମନ୍ ବାଟେ ଇଣ୍ଡ ଇଣ୍ଡ ଅୁଟାଡ଼ ସରଗର୍ ଦୁଡ଼ ପିତର୍କେ ଚାଡି ମାୟା ଅଇଗାଲା ।

୧୧ ତାର୍ପଟେ ଜାଇଟା ଗଟିରଇଲା, ସେଡ଼କିବେଲେ ତାକେ କାଇଟା ଅଇରଇଲା, ସେଟା ପିତର୍ ଜାନିପାରି କଇଲା, “ଏଟା ସଡ଼ ବଲି ମୁଇ ଜାନିଆଟି । ଏରଦର୍

\* ୧୧:୨୮ ୧୧:୨୮ ପେରିଡ଼ ୨୧:୧୦

ଟାନେଅନି ଆରି ଜିଉଦି ଲକ୍ଷ୍ମୀନ ଜାଇଟା ଗର୍ସି ବଲି ଆସା କରରଇଲା, ତେଜଅନି ମକେ ରକିଆ କରବାକେ ମାପୁରୁ ସରଗର୍ ଦୁଡ଼କେ ପାଟାଇରଇଲା ।”

୧୭ ନିଜର ବିସଇ ଜାନିକରି ସେ ଜଅନ୍ ମାରକର୍ ଆୟା ମରିୟମର୍ ଗରେ ଗାଲା । ତେଜ ବେସି ବିସବାସିମନ୍ ରୁଣ୍ଡିକରି ପିତରର୍ ପାଇ ପାର୍ତନା କର୍ତେ ରଇଲା । ୧୮ ପିତର ବାଇରର୍ କାପାଟେ ଟକଟକ୍ କରି ମାରଲାକେ, ରଦା ନାଉର୍ ଗଟେକ୍ ଗତିଦାଞ୍ଡି କାପାଟ୍ ଉଗାଡ଼ବାକେ ଆଇଲା । ୧୯ ପିତରର୍ କର୍ସର୍ ଜାନିପାରି ସେ ଏତେକ୍ ସାରଦା ଅଇଲା ଜେ କାପାଟ୍ ନ ଉଗାଡ଼ି ବିତ୍ରେ ପାଲାକକରି ତେଜର୍ ବିସବାସିମନ୍‌କେ କଇଲା, “ପିତର୍ ବାଇରେ ଟିଆଅଇଲା ଆଟେ ।” ୧୫ ସେମନ୍ ତାକେ କଇଲା, “ତୁଇ ବାୟାଅଇଲୁସନି ! ମାତର୍ ଏଟା ସଡ଼ ।” ବଲି ସେ ତାଟ୍ ସଙ୍ଗ୍ କଇଲାଗଲାକେ, ସେମନ୍ ଏଟା ତାର୍ ଦୁଡ଼ କାଇକି,” ବଲି ବାବଲା ।

୧୬ ପିତର୍ ତରକେ ତର କାପାଟେ ମାର୍ତେ ରଇଲା । ସାରାସାରି ସେମନ୍ କାପାଟ୍ ଉଗାଡ଼ି ତାକେ ଦେକି କାବାଅଇଗାଲା । ୧୭ ସେ ଆଡ଼ ସାରିଆକରି ସେମନ୍‌କେ ଚିମ୍‌ରା ଅଇବାକେ କଇଲା । ଆରି ମାପୁରୁ କେନ୍ତି ତାକେ ବନ୍ଦି ଗରେଅନି ବାରକରାଇ ଆନ୍‌ଲା, ସେ ବିସଇ ସେମନ୍‌କେ କଇଲା । ତାର୍ ପଟେ ଏ ସବୁ କାତା ଜାକୁର୍ ଆରି ବିନ୍ ସବୁ ବାଇମନ୍‌କେ ଜାନାଆ ବଲି କଇଲା । ପଟେ ସେ ତେଜଅନି ବିନ୍‌ବାଟେ ଉଟିଗାଲା ।

୧୮ ସାକାଲ୍ ପାଇଲାକେ “ପିତର୍ କେନେଗାଲା ?” ବଲି ଜାଗୁଆଲ୍‌ମନ୍ କିଲ୍‌ବିଲ୍ ଅଇଗାଲା । ୧୯ ଏରଦ୍ ଏଟା ସୁନିକରି ପିତରକେ କର୍ବାକେ ତାର୍ ସନିଅମନ୍‌କେ ଆଦେସ୍ ଦେଲା । ମାତର୍ ସେମନ୍ ତାକେ ମିଲାଇ ନାପାରୁଲା । ତେବେ ସାରାସାରି ଜାଗୁଆଲ୍‌ମନ୍‌କେ ପାଟାରୁଲା । କେନ୍ତି ଏଟା ଅଇଲାଟା କଇନାପାରୁଲାକେ ସେମନ୍‌କେ ମରିନର୍ ଡଣ୍ଡ ଦେବାକେ ଆଦେସ୍ ଦେଲା ।

ତାର୍ ପଟେ ଏରଦ୍ ଜିଉଦା ରାଇଜେଅନି ଜାଇ କେତେ ଦିନର୍‌ପାଇ କାଇସରିଆଇ ବାସା ଅଇରଇଲା ।

### ଏରଦର୍ ମରନ୍

୨୦ ସେ ବେଲାଇ ଏରଦ୍ ସର୍ ଆରି ସିଦନର୍ ଲକ୍ଷ୍ମୀନକେ ବେସି ରିସା ଅଇରଇଲା । ସେଟାର୍ ପାଇ ତେଜର୍ ଲକ୍ଷ୍ମୀନ ଗଟେକ୍ ଦଲ୍, ତାକେ ବେଟ୍ ଅଇବାକେ ଗାଲା । ପର୍ତୁମ୍ ସେମନ୍ ରାଜା ସଇବା ଗର୍ ଦାଇତେ ରଇଲା ବାଲସ୍‌ସକେ ବୁଜାଇ, ତାର୍ ସାଇଜ ପାଇଲା । ତାର୍ ପଟେ ସେମନ୍ ଏରଦର୍ ଲଗେ ଜାଇ ସାନ୍ତିସଙ୍ଗ୍ ରଉଁ ବଲି କାତା ଅଇଲା, କାଇକେ ବଇଲେ ଏରଦର୍ ରାଇଜେଅନି ସେମନ୍‌ର୍ ଦେସେ କାଇବା ଜିନିସ୍ ଜାଇତେରଇଲା ।

୨୧ ଜନ୍ ଦିନେ ଏରଦର୍ ସଙ୍ଗ୍ ସେମନ୍ ବେଟ୍ ଅଇବାକେ ଟିକ୍ କରରଇଲା, ସେ ରାଜାମନ୍ ପିନ୍‌ବା ବସ୍‌ତର୍ ପିନ୍‌ଲା ଆରି ତାର୍ ବସ୍‌ବା ଜାଗାଇ ବସି ଲକ୍ଷ୍ମୀନକେ ଗଟେକ୍ ବାସନ୍ ଦେଲା । ୨୨ ସୁନ୍‌ବା ଲକ୍ଷ୍ମୀନ ଆଉଲିଅଇଲା, “ଜେ କାତା ଅଇଲାନି, ସେ ଲକ୍ ନଏଁ, ମାତର୍ ପର୍ମେସର୍ !” ୨୩ “ମୁଇ ପର୍ମେସର୍ ନଇ,” ବଲି କଏ ନାଇକେ ଦାପ୍‌ରେ ମାପୁରୁର୍ ଦୁଡ଼ ଏରଦ୍‌କେ ରଗି କରାଇଲା । ସେଟାର୍‌ପାଇ ତାର୍ ଗୁଲାଜଗାଡ଼ କିତା କାଇଲା ଆରି ମରିଗାଲା ।

୨୪ ଏ ବେଲାଇ ବିସବାସିମନ୍ ପର୍ମେସରର୍ ବାକିଅ ସୁନ୍‌ଲା ଆରି ବିସବାସ୍ କର୍ବା ଲକ୍ଷ୍ମୀନ ବଡ଼ିଗାଲା । ୨୫ ଜିଉଦା ଦେସର୍ ବିସବାସିମନ୍‌କେ ତାରୁ ଦେଇ ସାରାଇକରି ବର୍ନବା ଆରି ସାଉଲ୍, ଆନ୍‌ଟିଅକିଆଇ ଆଇଲା । ଜଅନ୍ ଆରି ମାରକକେ ମିସା ସେମନ୍ ସଙ୍ଗ୍ ନେଇ ଜିରୁସାଲମେ ବାଅଡ଼ଲା ।

## ୧୩

ବର୍ନବା ଆରି ସାଉଲ୍‌କେ ପେରିଡ଼ ସିସ୍ ଇସାବେ ବାଟି ପାଟାଇଲା



୧ ଆନୁଷ୍ଠିକି ମଣ୍ଡଳିତେଇ କେତେଟା ବବିସତ୍ତବକତା ଆରି ସିକିଆ ଦେବା ଗୁରୁ ରଇଲାଇ । ସେମାନର୍ ବିତ୍ତରେ ରଇଲାଇ ବରନବା, ସିମନ୍ ଜାକେ କି ନିଗର୍ ଡାକ୍ତେରଇଲାଇ, ଲୁସିଅସ୍, ଜେ କି କୁରିନିୟ୍ ଅନି ଆସିରଇଲା, ମନ୍‌ଏମ୍ ଜେ କି ଏରଦର୍ ଗରେ ବଡ଼ି ରଇଲା ଆରି ସାଉଲ୍ । ୨ ସେମନ୍ ମାପ୍‌ରୁର୍ ସେବା ଆରି ଉପାସ୍ କଲାବେଲେ, ସୁକଲ୍ ଆଡ଼ମା ସେମନ୍‌କେ କଇଲା, “ମୁଇ ଜନ୍ କାମ୍‌ପାଇ ସାଉଲ୍ ଆରି ବରନବାକେ ଡାକଲି ଆରି, ସେଟାର୍ ପାଇ ସେମନ୍‌କେ ଅଲ୍‌ଗା କରା ।”

୩ ସେଟାର୍‌ପାଇ ସେମନ୍ ଉପାସ୍ କଲାଇ ଆରି ପାର୍ତନା କରି ଡାକର୍ ଉପ୍‌ରେ ଆଡ଼ ସଙ୍ଗଇ ସେମନ୍‌କେ କବର୍ କଇବା କାମେ ପାଟାଇଲାଇ ।

ସାଇପରସ୍ ତେଇ ସେବା କାମ୍

୪ ସୁକଲ୍ ଆଡ଼ମାଇଅନି ଆଦେସ୍ ପାଇକରି ଜାଇରଇବା ବରନବା ଆରି ସାଉଲ୍ ସେଲୁକିଆଇ ଗାଲାଇ । ଆରି ତେଇଅନି ପାନି ଜାଜେ ବସି ସାଇପରସ୍ ସମ୍ପୁର୍ ମଜାଇ ରଇବା ଜାଗାଇ ଗାଲାଇ । ୫ ସାଲାମି ଗଡେ କେଟି ଜିଉଦିମନ୍‌ର୍ ପାର୍ତନା ଗର୍ମନ୍‌କେ ପରମେସରର୍ ବାକିଅ ଜାନାଇଲାଇ । ଜଅନ୍ ମାର୍‌କ ମିସା ସେମନ୍‌ର୍ ସଙ୍ଗ୍ ରଇକରି ସେମନ୍‌କେ ସାଇଜ କର୍ତେ ରଇଲାଇ ।

୬ ସେମନ୍ ସାଇପରସ୍ ଜାଗା ଚାଡ଼ି ପାପ୍‌ତେ ନାଉର୍ ଜାଗାଇ ଗାଲାଇ । ତେଇ ବାର୍‌ଜିସୁ ନାଉର୍ ଗଟେକ୍ ମୱର୍ ସିକିରଇବା ଜିଉଦିକେ ବେଟ୍‌ଅଇଲାଇ । ସେ ନିଜ୍‌କେ ମିର୍‌ରେ ବବିସତ୍ତବକତା ବଲି କଇତେ ରଇଲା । ୭ ସେ ସମ୍ପୁର୍ ମଜାଇ ରଇଲା ଜାଗାର୍ ସାସନ୍ କାରିଆର୍ ସର୍‌ଗିଅ ପାଉଲ୍‌ର୍ ମଇତର୍ ରଇଲା । ସର୍‌ଗିଅସ୍ ଗଟେକ୍ ଗିଆନି ଲକ୍ ରଇଲା । ସେ ପରମେସରର୍ ବାକିଅ ସୁନ୍‌ବାକେ ମନ୍ କରି ବରନବା ଆରି ପାଉଲ୍‌କେ ଡାକାଇଲା । 「ମାତର୍ ଗୁନିଆଁ ଏଲିମାସ୍, (ଏଟା ତାର୍ ଗିରିକ୍ ନାଉଁ) ସେମନ୍‌କେ ନିରୁ ବଲି କଇଲା, କାଇକେ ବଇଲେ, ସେ ସାସନ୍ କାରିଆ କିରିସଟ୍‌କେ ବିସ୍‌ବାସ୍ ନ କର ବଲି ବାବ୍‌ତେ ରଇଲା । ୯ ମାତର୍ ସାଉଲ୍ ଜାର୍ ନାଉଁକି ପାଉଲ୍, ସୁକଲ୍ ଆଡ଼ମାଇ ପୁରୁନ୍ ଅଇ, ମୱର୍ ଜାନିରଇବା ଲକ୍ ବାଟେ ନିକ ଦେକ୍‌ଲା । ୧୦ ଆରି କଇଲା, “ଏ ସଇତାନର୍ ପିଲା ! ତୁଇ, ସବୁ ନିମାନ୍ ବିସଇ ବିରଦ୍ କଲାସ୍‌ନି । ତୁଇ ସବୁ ରକାମର୍ କରାପ୍ କାମେ ପୁରୁନ୍ ଅଇ ଆରୁସ୍ ଆରି ସବୁବେଲେ ପର୍‌ମେସରର୍ କାମ୍ ମିର୍ ବଲି ଦେକାଇବାକେ ଚେସଟା କଲୁସ୍‌ନି । ୧୧ ଏବେ ମାପ୍‌ରୁର୍ ଆଡେ ତଣ୍ଟ୍ ପାଇସୁ । ତୁଇ କାଣା ଅଇଜାଇକରି ଚନେକର୍‌ପାଇ ବେଲର୍ ଉଜଲ୍ ଦେକି ନାପାରୁସ୍ ।”

ସେଦାପରେ ଏଲିମାସର୍ ଆଁକି ଦୁଉଁରି ଆନ୍ଦାର୍ ଅଇଗାଲାପାରା ଲାଗଲା । ଆରି ତାକେ ଆଡେ ଦାରି ଡାକିନେବାକେ ଗଟେକ୍ ଲକ୍‌କେ ଏନେତେନେ ଆଣ୍ଟାଲି ଅଇ କଜି ବୁଲ୍‌ଲା । ୧୨ ଏଟା ଦେକି ସାସନ୍‌କାରିଆର୍ ବିସ୍‌ବାସ୍ ଅଇଲା, କାଇକେ ବଇଲେ ମାପ୍‌ରୁର୍ ସିକିଆ ସୁନି ସେ କାବା ଅଇଜାଇରଇଲା ।

ପିସିଦିଆର୍ ଆନୁଷ୍ଠିକ୍‌କ ତେଇ ସେବା କାମ୍

୧୩ ପାଉଲ୍ ଆରି ତାର୍ ସଙ୍ଗ୍ ଜିବା ଲକ୍‌ମନ୍ ପାପ୍‌ସ୍ ଜାଗାଇ ଅନି ପାନିଜାଜେ ଜାଇ ପପୁଲିଆର୍ ପରଗା ନାଉଁ ଜାଗାର୍ ଗଟେକ୍ ଗଡେ କେଟ୍‌ଲାଇ । ଜଅନ୍‌ମାର୍‌କ ତେଇ ସେମନ୍‌କେ ଚାଡ଼ିକରି ଜିରୁସାଲାମ୍ ବାଉଡିଗାଲା । ୧୪ ସେମନ୍ ପର୍‌ଗାଇଅନି ଜାଇ ପିସିଦିଆର୍ ଆନୁଷ୍ଠିକ୍‌କେ କେଟ୍‌ଲାଇ । ଆରି ବିସ୍‌ରାମ୍‌ବାର୍ ଦିନେ ପାର୍ତନା ଗରେ ଜାଇ ବସ୍‌ଲାଇ । ୧୫ ମସାର୍ ନିୟ୍‌ମ୍ ଆରି ବବିସତ୍ତବକତାମନ୍‌ର୍ ଲେକା ପଡ଼ଲା ପଡେ, ପାର୍ତନା ଚାଲାଉମନ୍ ସେମନ୍‌କେ ଏ କାତା କଇପାଟାଇଲାଇ, “ବାଇମନ୍ ଜଦି ଲକ୍‌ମନ୍‌ର୍ ସାର୍‌ଦା ବଡାଇବାପାରା ଉପ୍‌ଦେସ୍ ଦେବାର୍ ଆଡେ, ତେବେ କୁଆ ।” ୧୬ ପାଉଲ୍ ଚିଆଅଇ ଲକ୍‌ମନ୍‌କେ ଚିମ୍‌ରାଇ ଅଇବାକେ ଆଡ଼ ସାଗିଆ କରି କଇଲା ।

“ଇତି ରୁଣ୍ଡୁଅଇଲା ଇସ୍ରାଏଲ ବାଇମନ୍ ଆରି ପରମେସରକେ ପାର୍ତନା କରବା ଜିଉଦି ନଇଲା ଲକ୍ମନ୍, ମର କାତା ସୁନା ! <sup>୧୭</sup> ଇସ୍ରାଏଲ୍ ଜାତିର୍ ପରମେସର ଆମର୍ ଆନିଦାଦିମନ୍‌କେ ବାଟଲା । ଆରି ମିସର୍ ଦେସେ ସେମନ୍ ପରଦେସିଅଇ ରଇତେ ରଇଲା ବେଲେ, ଗଟେକ୍ ବଡ଼ ଜାତି କଲା । ପରମେସର୍ ତାର ବଡ଼ ବପୁ ସଙ୍ଗ୍ ସେମନ୍‌କେ ମିସରେଅନି ବାରକରାଇ ଆନଲା । <sup>୧୮</sup> ଆରି ଚାଲିସ୍ ବରସ୍ ଜାକ ମରୁବାଲିରୁଏଁ ସେମନ୍‌ର ସାଦବାନ୍ କଲାଟା ମୁରତଲା । <sup>୧୯</sup> ସେ କିଣାନେ ସାତଟା ଦଲ୍‌କେ ନସଟ୍ କରି ତାର ବାଟଲା ଲକ୍ମନ୍‌କେ ସେ ଦେସ୍ ଦେଲା । <sup>୨୦</sup> ପାକାପାକି ତାର ସଅ ପତାସ୍ ବରସ୍ ବିଡ଼ରେ ଏ ସବୁ ଗଟନା ଗଟିଗାଲା ।”

“ତାର ପତେ ସାମୁଏଲ୍ ବବିସଡ଼ବକ୍ତାର ବେଲା ଜାକ ପରମେସର୍ ସେମନ୍‌ର ଉପରେ ବିଚାରପତିମନ୍‌କେ ବାଟଲା । <sup>୨୧</sup> ଜେଡେବେଲେ ସେମନ୍ ଗଟେକ୍ ରାଜା ଦରକାର ବଲି କଇଲାଇ, ପରମେସର୍ ସେମନ୍‌କେ ଚାଲିସ୍ ବରସ୍ ଜାକ ସାସନ୍ କରବାକେ ବେନଜାମିନ୍ କୁଟୁମର୍ କିସଅର୍ ପଅ ସାଉଲ୍‌କେ ବାଟଲା । ସାଉଲ୍ ଇସ୍ରାଏଲିୟମନ୍‌କେ ଚାଲିସ୍‌ବରସ୍ ସାସନ୍ କଲା । <sup>୨୨</sup> ତାର ପତେ ପରମେସର୍ ତାକେ ରାଜା ପଦ୍ ଚାଡାଇକରି ଦାଉଦ୍‌କେ ସେମନ୍‌ର ରାଜା କଲା ।” ପରମେସର୍ ତାର ବିସଇ କଇରଇଲା, “ମୁଇ ଜନ୍ ରକାମେ ଲକ୍ମନ୍‌କେ ଆଲାଦ୍ କରବି, ଜେସିର୍ ପଅ ଦାଉଦ୍ ସେନ୍ତାରି ଗଟେକ୍ ଲକ୍ । ସେ ମୁଇ ମନକଲା ଇସାବେ ସବୁଜାକ କାମ୍ କରସି ।” <sup>୨୩</sup> ଏ ଦାଉଦ୍ କୁଟୁମର୍ ଲକ୍‌ରଟାନେଅନି ପରମେସର୍ ସେ କାତା ଦେଲା ଇସାବେ ଜିସୁକେ ଇସ୍ରାଏଲ୍ ଜାତିର୍ ମୁକ୍ତିକାରିଆ କଲାଆତେ । <sup>୨୪</sup> \*ଜିସୁ ତାର କାମ୍ ଆରାମ୍ କରବା ଆଗତୁ, ଜଅନ୍ ଇସ୍ରାଏଲ୍‌ର ସବୁ ଲକ୍‌ର ଲଗେ ଜାନାଇକରି, ସେମନ୍‌କେ ପାପେଅନି ମନ୍ ବାଉଡାଇ ହୁବନ୍ ନେବାକେ ଅଇସି ବଲି କଇରଇଲା । <sup>୨୫</sup> \*ଆରି ଜଅନ୍ ତାର ସେବା କାମ୍ ସାରାଇବା ଆଗତୁ ଲକ୍‌ମନ୍‌କେ ପାଚାରଲା, “ମର୍ ବିସଇ ତମେ କାଇଟା ବାବ୍‌ଲାସ୍‌ନି ? ତମେ ଜାକେ ଜାଗି ଆତାସ୍, ମୁଇ ସେ ନଇ । ମାତର୍ ସୁନା ! ସେ ଦାପ୍‌ରେ ଆଇଲାମି । ତାର ଗତିଦାଙ୍ଗ୍‌ତା ଅଇକରି ପାଣ୍ଡୁଇର୍ ପିତା ମିସା କୁସ୍‌ଲାଇବାକେ ମର୍ ଅଦିକାର୍ ନଇ ।”

<sup>୨୬</sup> ଏ ମର୍ ଇସ୍ରାଏଲ୍‌ର ବାଇମନ୍, ଅବ୍ରାଆମର୍ ନାତିତିତିମନ୍ ଆରି ପରମେସରକେ ପାର୍ତନା କରବାକେ ଇତି ରୁଣ୍ଡୁଲା ଜିଉଦି ନଇଲା ଲକ୍ମନ୍, ଆମ୍‌କେ ସେ ମୁକ୍ତିର୍ କବର୍ ମିଲ୍‌ଲା ଆତେ । <sup>୨୭</sup> ମାତର୍ ସେ ଆକା ଉଦାରକାରିଆ । ଜିରୁସାଲମର୍ ଲକ୍ ଆରି ସେମନ୍‌ର ନେତାମନ୍ ବିସ୍ରାମ୍‌ବାରେ ବବିସଡ଼ବକ୍ତାମନ୍‌ର ଲେକାଇଅନି ପଡ଼ଲାଟା ଲକ୍ମନ୍ ବୁଜଡ଼ନାଇ । ଏଲେମିସା ଜିସୁକେ ଦସି କରି ବବିସଡ଼ବକ୍ତାମନ୍‌ର କାତା ସିଦ୍ କଲାଇ । <sup>୨୮</sup> \*ଜିସୁକେ ବେସି ଲକ୍ ଦସ୍‌ଦେଲାଇ । ମାତର୍ କେ ମିସା ମରନର୍ ତଣ୍ଡ ପାଇବା ଏଡ଼କି ଦସ୍ କଜି ନାପାରଲାଇ । ଏଲେମିସା ତାକେ ମରନର୍ ତଣ୍ଡ ଦେବାକେ ପିଲାଡ଼କେ ବାଦିଅ କଲାଇ । <sup>୨୯</sup> \*ସାସ୍‌ତରେ ଜନ୍ ସବୁ ବିସଇ ଲେକା ଆତେ, ସେ ଇସାବେ ସବୁ କାମ୍ କଲାପତେ ସେମନ୍ ତାକେ କୁର୍ସେଅନି ଉଡ଼ରାଇ ଆନଲାଇ । ବିନଲକ୍‌ମନ୍ ଆସିକରି ତାର ଗାଗଡ଼ ନେଇ ସମାଦିଟାନେ ସଙ୍ଗାଇଲାଇ । <sup>୩୦</sup> ମାତର୍ ପରମେସର୍ ତାକେ ମଲାତେଇଅନି ଉଟାଇଲା । <sup>୩୧</sup> \*ବେସି ଦିନ୍ ଜାକ, ତାର ସଙ୍ଗ୍ ଗାଲିଲିଅନି ଜିରୁସାଲମ୍ ଆଇବାଜିବା ଲକ୍‌ମନ୍ ତାକେ ଦେକ୍‌ଲାଇ । ଏବେ ସେମନ୍ ଇସ୍ରାଏଲ୍ ଲକ୍‌ମନ୍‌ରତେଇ ତାର ସାକି ଆଟଡ଼ । <sup>୩୨</sup> ଆମର୍ ଆନିଦାଦିମନ୍‌କେ ପରମେସର୍ କାତା ଦେଇରଇଲା ଇସାବେ ଆମେ ତମ୍‌କେ ଏ ସୁବ୍ କବର୍ ଜାନାଇଲୁନି ।

☆ **୧୩:୨୪** ୧୩:୨୪ ମାର୍‌କ ୧:୪; ଲୁକ୍ ୩:୩      ☆ **୧୩:୨୫** ୧୩:୨୫ ଜଅନ୍ ୧:୨୦; ମାତିଉ ୩:୧୧; ମାର୍‌କ ୧:୭; ଲୁକ୍ ୩:୧୬; ଜଅନ୍ ୧:୨୭      ☆ **୧୩:୨୮** ୧୩:୨୮ ମାତିଉ ୨୭:୨୨-୨୩; ମାର୍‌କ ୧୫:୧୩,୧୪; ଲୁକ୍ ୨୩:୨୧-୨୩; ଜଅନ୍ ୧୯:୧୫      ☆ **୧୩:୨୯** ୧୩:୨୯ ମାତିଉ ୨୭:୫୭-୬୧; ମାର୍‌କ ୧୫:୪୨-୪୭; ଲୁକ୍ ୨୩:୫୦-୫୬; ଜଅନ୍ ୧୯:୩୮-୪୨      ☆ **୧୩:୩୧** ୧୩:୩୧ ପେରିଡ଼ ୧:୩

୩୩ ପରମେସ୍ୱର୍ ଜିସୁକେ ମଲାତେଇଅନି ଉଟାଇକରି ସେଟା ସିଦ୍ କଲାଆତେ । ସେମନର୍ ପିଲାମନ୍ ଆମ୍ବକେ, ଆମର୍ ବିତ୍ତରେ ସେ କାତା ଦେଲାଟା ସିଦ୍ ଅଇଲା ଆତେ । ଗିଡ଼ ସଙ୍ଗିତାର୍ ଦୁଇ ଲମର୍ ଗିତେ ଦାଉଦ୍ ଏନ୍ତାରି ଲେକିଆତେ, “ତମେ ମର୍ ପଅ,

ଆଜି ମୁଇ ସବୁକେ ଦେକାଇ ଆତି ଜେ ସତଇସେ ମୁଇ ତର୍ ବାବା ।”

୩୪ ଆରି ପରମେସ୍ୱର୍ ପୁରବେଅନି ସପତ୍ କରି କାତାଦେଇରଇଲା । ମୁଇ ତାକେ ମଲାତେଇଅନି ଉଟାଇବି । ତାର୍ ଗାଗଡ଼ ସମାଦିତେଇ କୁଇ ଜିବାକେ ନ ଦେଇ । ଦାଉଦ୍‌କେ ଦେଇ ରଇବା ସପତ୍ ଇସାବେ

ସତଇସେ ମୁଇ ତମ୍‌କେ ସୁକଲ୍ କରି ସବୁ ଆସିର୍‌ବାଦ୍ ଦେବି ।

୩୫ ଦାଉଦ୍ ଆରି ଗଟେକ୍ ଗିତସଙ୍ଗିତାଇ ଲେକିଲାଆତେ,

ମୁଇ ମରିଗାଲେ ମର୍‌ଗାଗଡ଼ ଦୁଇ ସମାଦିତେଇ କୁଇ ଜିବାକେ ଚାଡ଼ି ନ ଦେଉସ୍ ।

୩୬ ଦାଉଦ୍ ସାସନ୍ କଲାବେଲେ ପରମେସ୍ୱର୍ ମନ୍ କଲା ଇସାବେ କାମ୍ କରି ସାରାସାରି ମଲା । ଆରି ଆନିଦାଦିମନର୍ ସଙ୍ଗ୍ ତପିଅଇଲା । ତାର୍ ଗାଗଡ଼ ସମାଦିତେଇ କୁଇଲା । ୩୭ ମାତର୍ ପରମେସ୍ୱର୍ ଜାକେ ମଲାଟାନେଅନି ଉଟାଇଲା, ତାର୍ ଗାଗଡ଼ କୁଏ ନାଇ । ୩୮ ତେବର୍‌ପାଇ ମର୍ ଏ ଇସ୍ରାଏଲର୍ ବାଇମନ୍, ତମେ ଏଟା ଜାନିରୁଆ । ଜିସୁ କରିରଇବା କାମେଅନି ସେ, ତମର୍ ପାପ୍ କେମା ଅଇସି । ୩୯ ମସାର୍ ନିୟମ୍ ମାନିକରି ଆରୁ ବଇଲେ ପାପ୍ କେମା ନ ଅଇତା । ମାତର୍ ଜିସୁର୍ ଟାନେ ବିସ୍‌ବାସ୍ କଲାର୍‌ପାଇ ଆମେ ସବୁଲକ୍ ପାପେ ଅନି ମୁକଲି ଆରୁ, ସେଟା ତମେ ଜାନ୍‌ବାର୍ ଆତେ । ୪୦ ଜାଗ୍‌ରଡ଼, ବବିସ୍‌ଡ଼ବକ୍‌ତାମନ୍ ଜାଇଟା କଇଲାଇ ଆତଡ଼, ସେଟା ଜେକ୍ରିକି ତମ୍‌କେ ନ ଗଟ । ୪୧ ପରମେସ୍ୱର୍ କଇଲା,

ଏ ମକେ କିଜାଇବା ଲକ୍‌ମନ୍ ! ତମେମନ୍ କିଲ୍‌ବିଲ୍ ଅଇ ମରା !

କାଇକେ ବଇଲେ ତମର୍ ବେଲାଇ ମୁଇ ଜନ୍ କାମ୍ କର୍‌ବାକେ ଗାଲିନି,

ସେଟା ଜେ ମିସା ବୁଜାଇ କଇଲେ, ତମେ ବିସ୍‌ବାସ୍ ନ କରାସ୍ ।

୪୨ ପାଉଲ୍ ଆରି ବର୍‌ନବା ପାର୍‌ତନା ଗରେଅନି ବାରଇବା ବେଲେ, ଆରି ଗଟେକ୍ ବିସ୍‌ରାମ୍‌ବାରେ ବାଉଡ଼ି ଆସି ଏ ସବୁ ବିସଇ ଆରି ବୁଜାଇବାକେ, ଲକ୍‌ମନ୍ ବାବୁଜିଆ କଲାଇ । ୪୩ ଲକ୍‌ମନ୍ ପାର୍‌ତନା ଗରେଅନି ଉଟିଗାଲା ପରେ, ବେସି ଜିଉଦିମନ୍ ଆରି ଜିଉଦି ଦରମ୍ ନେଇରଇବା ଜିଉଦି ନ ଅଇଲା ଲକ୍‌ମନ୍, ସାଉଲ୍ ଆରି ବର୍‌ନବାର୍ ସଙ୍ଗ୍ ଜିବାର୍‌ଦାର୍‌ଲାଇ । ପେରିଡ଼ ସିସ୍‌ମନ୍ ତାକର୍ ସଙ୍ଗ୍ କାତା ଅଇ ପରମେସ୍ୱରର୍ ଜିବନ୍‌ଦୁକାଇଲାଟାକେ ମାନିକରି ଜିଇବାକେ ସେମନ୍‌କେ ସାର୍‌ଦା କରାଇଲାଇ ।

୪୪ ତାର୍ ଆରକର୍ ବିସ୍‌ରାମ୍‌ବାରେ ଆନ୍‌ଟିଅକିଅ ଗଡ଼ର୍ ସବୁ ଲକ୍ ମାପରୁର୍ ବାକିଅ ସୁନ୍‌ବାକେ ଜିଉଦିମନର୍ ପାର୍‌ତନା ଗରେ ରୁଣ୍ଡିଲାଇ । ୪୫ ବେସି ଲକ୍ ରୁଣ୍ଡିଲାଟା ଦେକି, ଜିଉଦି ନେତାମନ୍ ଇସା ଅଇଲାଇ । ଆରି ପାଉଲ୍ କଇବା କାତା, ବିରଦ୍ କରି ନିନ୍ଦା କଲାଇ । ୪୬ ମାତର୍ ପାଉଲ୍ ଆରି ବର୍‌ନବା ଅଦିକ୍ ତାଟ୍ ସଙ୍ଗ୍ କଇଲାଇ, “ପର୍‌ତମେ ପରମେସ୍ୱରର୍ ବାକିଅ ତମର୍ ଲଗେ ଜାନାଇବାର୍ ଦରକାର୍ ରଇଲା । ମାତର୍ ତମେ ସେଟା ନିଟ୍‌ଲାସ୍‌ନି । ଆରି ତାର୍ ସଙ୍ଗ୍ ନ ସାର୍‌ବା ଜିବନ୍ ପାଇବାକେ ଅଦିକାର୍ ନାଇ ବଲି ବିଚାର୍ କଲାସ୍‌ନି । ସେଟାର୍‌ପାଇ ଆମେ ତମ୍‌କେ ଚାଡ଼ି, ଏ କାତା ଜିଉଦି ନଇଲା ଲକ୍‌ମନ୍‌କେ କଇବାର୍ ଗାଲୁନି । ୪୭ କାଇକେ ବଇଲେ ମାପରୁ ଆମ୍‌କେ ଏ ଆଦେସ୍ ଦେଲା ଆତେ ।”

ଆନ୍ଦାରେ ଉଜଲ୍ ଅଇଲାପାରା

ଜିଉଦି ନ ଅଇଲା ଲକ୍‌ମନ୍‌କେ ମର୍ ବିସଇ ଜାନାଇବାକେ ମୁଇ ତମ୍‌କେ ବାଟିଆତି

ଜେନ୍ତାରି କି ମୁଇ ସେମନ୍‌କେ ରକିଆ କରି ପାର୍‌ବି ବଲି ଦୁନିଆର୍ ସବୁ ଲକ୍‌ମନ୍‌କେ ତମେ କଇପାରାସ୍ ।

୪୮ ଜିଉଦି ନଇଲା ଲକ୍ମନ୍ ଏଟା ସୁନି ବେସି ସାରଦା ଅଇଗାଲାଆ ଆରି ପରଫେସରର୍ କବର୍ ପାଇ ଜୁଆର୍ କଲାଇ । ଜନ୍ ଲକ୍ମନ୍ ନ ସାରଦା ଜିବନର୍ ପାଇ ବାଟାଇ ଅଇରଇଲାଇ, ସେମନ୍ ସେ କବର୍ ସୁନି ବିସ୍ବାସ୍ କଲାଇ ।

୪୯ ତେଇର୍ ବିସ୍ବାସିମନ୍ ସେ ଜାଗାଇ ବୁଲି ବୁଲି ମାପୁରୁର୍ ବାକିଅ ଜାନାଇଲାଇ । ୫୦ ମାତର୍ ସେ ଗଡ଼ର୍ ବଡ଼ ଲକ୍ମନ୍ ଆରି ପରଫେସର୍କେ ଉପାସନା କରବା ଉପର୍କେ ରଇବା ଜିଉଦି ନ ଅଇଲା ମାଇଜିମନ୍କେ ସୁଡ଼ରାଇକରି, ତେଇର୍ ଜିଉଦିମନ୍, ପାଉଲ୍ ଆରି ବରନବାକେ ବିରଦ୍ କଲାଇ । ସେମନ୍ ତାଉଁକେ ତାଡ଼ନା ଦେବାର୍ ଆରାମ୍ କଲାଇ । ଆରି ସେ ଜାଗାଇଅନି ବାର୍ କରଦେଲାଇ । ୫୧ \*ତେଇଅନି ଜିବାବେଲେ ପେରିଡ଼ ସିସମନ୍ ସେ ଲକ୍ମନ୍ ବିରଦେ ତାକର୍ ପାଦର୍ ଦୁଲି ପାପ୍ତିଦେଇ ଇକନିଅତେଇ ଗାଲାଇ । ୫୨ ଆନ୍ତିଅକର୍ ବିସ୍ବାସିମନ୍ ସୁକଲ୍ ଆଡ଼ମାଇ ଆରି ସାରଦାଇ ପୁରନ୍ ଅଇଲାଇ ।

# ୧୪

## ଇକନିଅତେଇ କାମ୍

୧ ଜନ୍ଟା ଆନ୍ତିଅକିତେଇ ଗଟିରଇଲା, ସେ ସମାନ୍ ବିସଇ ଆକିଅଟାନେ ମିସା ଅଇଲା । ପାଉଲ୍ଆରି ବରନବା ପାରତନା ଗରେ ଏକ୍ତି ତାଟ୍ ସଙ୍ଗ୍ ପରଟାର୍ କଲାଇ ଜେ ବେସି ଜିଉଦି ଆରି ଗିରିକ୍ ଲକ୍ମନ୍ ଜିସୁକେ ବିସ୍ବାସ୍ କଲାଇ । ୨ ମାତର୍ ଜନ୍ ଜିଉଦିମନ୍ ସେ ବାକିଅ ବିସ୍ବାସ୍ କରଡ଼ନାଇ, ସେମନ୍ ଜିଉଦି ନ ଅଇଲା ଲକ୍ମନ୍କେ ବେମ୍ଜା କରି, ବିସ୍ବାସି ବାଇମନ୍କେ ବିରଦ୍ କରାଇଲାଇ । ୩ ଏଲେମିସା ପାଉଲ୍ ଆରି ବରନବା ତେଇ ବେସିଦିନ୍ ରଇକରି ତାଟ୍ ସଙ୍ଗ୍ ମାପୁରୁର୍ ବିସଇ ଜାନାଇଲାଇ । ମାପୁରୁ ଏମନ୍କେ କାବା ଅଇଜିବା କାମମନ୍ କରି ଦେକାଇବାକେ ବପୁଦେଲା । ଏକ୍ତାରି ମାପୁରୁ ତାର୍ ଜିବନ୍ ଦୁକାଇଲା ବାକିଅ ସଡ଼ବଲି ଦେକାଇଲା । ୪ ଇକନିଆ ନଅରର୍ ଲକ୍ମନ୍ ଦୁଇଟା ଦଲେ ବାଗ୍ ଅଇଲାଇ । ସେମନ୍ ବିଡ଼ରେଅନି କେତେ ଲକ୍ ଜିଉଦିମନ୍ ବାଟେ ଆରି କେତେ ଲକ୍ ପେରିଡ଼ ସିସମନ୍ ବାଟେ ଅଇଲାଇ ।

୫ ତାର୍ପରେ କେତେଟା ଜିଉଦି ନଇଲା ଲକ୍ ଆରି ଜିଉଦିମନ୍ ସେମନ୍ ନେତାମନ୍ ସଙ୍ଗ୍ ଏକ୍ଜୁଟ୍ ଅଇ ପେରିଡ଼ ସିସମନ୍କେ ବେସି କାରାପ୍ ଚଲାଟଲ୍ଟି କରି ସେମନ୍ ଉପ୍ରେ ପାକ୍ନା ମାରି ମରାଇଦେବାକେ ପାଁଡ଼ଲାଇ । ୬ ମାତର୍ ପାଉଲ୍ ଆରି ବରନବା ସେଟା ଜାନିକରି ଲୁକାନିଆଇ ରଇବା ଲୁସ୍ତାରା ଆରି ଦର୍ବି ଗଡ଼ର୍ ଚାରିବେଡ଼ିର୍ ଜାଗାଇ ଦାପ୍ରେ ପାଲାଇଲାଇ । ୭ ଆରି ସିତି ସୁବ୍ କବର୍ ଜାନାଇଲାଇ ।

## ଲୁସ୍ତାରା ଆରି ଦର୍ବିତେଇ ସେବା କାମ୍

୮ ଲୁସ୍ତାରାତେଇ ଜନ୍ଫେଅନି ଗଡ଼ ବାଙ୍ଗଟି ରଇଲା ଗଟେକ୍ ଚଟା ଲକ୍ ରଇଲା । ସେ ବିଲ୍କୁଲ୍ ଇଣ୍ଡି ନାପାର୍ତେ ରଇଲା । ୯ ତେଇ ବସି, ସେ ପାଉଲ୍ ସିକିଆ ସୁନ୍ତେ ରଇଲା । ତାର୍ ମନେ ବିସ୍ବାସ୍ ଅଇଲାଆଟେ ଆରି ସେ ନିମାନ୍ ଅଇପାର୍ସି ବଲି ପାଉଲ୍ ଜାନି ପାର୍ଲା । ସେଟାର୍ ପାଇ ତାର୍ବାଟେ ଡିରିଆଇ ଦେକି, ୧୦ ଆଉଲିଅଇ କଇଲା, “ମଇତର୍ ପାଦ୍ ମାଣ୍ଡିକରି, ସିଦା ଚିଆ ଅ !” ସେ ଲକ୍ ଡେଗଇ କରି ଚାରିବେଡ଼ି ଇଣ୍ଡିବାର୍ ଦାର୍ଲା । ୧୧ ତେଇ ରୁଣ୍ଡିଲା ଲକ୍ମନ୍ ପାଉଲ୍ କାମ୍ ଦେକି ତାକର୍ ଲୁକାନିଆ ବାସାଇ ସାରଦା ଅଇ ଆଉଲିଅଇବାର୍ ଦାର୍ଲାଇ । “ଦେକା, ଏ ଲକ୍ମନ୍ ସତଇସେ ଦେବ୍ତା ଅଇରଇବାଇ । ନିଜେ ମନସ୍ ରୁପ୍ ଦାରି ଉଡ଼ରି ଆଇଲାଇ ଆତଡ଼ ।” ୧୨ ସେମନ୍ ବରନବାକେ ଜିଅସ୍ ବଲି ଜେ କି ତାକର୍

\* ୧୩:୫୧ ୧୩:୫୧ ମାତିଉ ୧୦:୧୪; ମାର୍କ ୬:୧୧; ଲୁକ୍ ୯:୫; ୧୦:୧୧

ମୁକ୍ତି ଦେବତା ରଇଲା, ଆରି ପାଉଲ୍‌କେ ଏରମିସ୍ ବଲି ନାମ୍‌ଲାଇ । ଏରମିସ୍ କାଇକେବଇଲେ ସେ ବେସି କାତା ଅଇତେରଇଲା । ୧୩ ଗଡ଼ ବାଇରର୍ ମୁଆଟେ ରଇଲା ଜିଅସ୍ ମନ୍ଦିରର୍ ପୁଜାରି, ଦୁଆର୍ ଲଗେ କେତେଟା ପୁଲ୍ ମାଲା ପିନ୍ଧାଇକରି, କେତେଟା ସଣ୍ଠମନ୍‌କେ ଆନ୍‌ଲା । କାଇକେବଇଲେ ସେ ଆରି ସିତି ରୁଣ୍ଡିଲା ଲକ୍‌ମନ୍ ପେରିଡ଼ ସିସ୍‌ମନ୍‌ ପାଇ ବଲ୍‌ଦ୍‌ମନ୍‌କେ ବିରୁ କର୍‌ବାକେ ମନ୍ କରିରଇଲାଇ ।

୧୪ ସେମନ୍ ଜନ୍ କାମ୍ କର୍‌ବାକେ ଜାଇରଇଲାଇ, ବର୍‌ନବା ଆରି ପାଉଲ୍ ସେଟା ସୁନ୍‌ଲା ଦାପରେ, ନିଜର୍ ବସ୍ତର୍ ଚିରିପାକାଇଲାଇ, ଲକ୍‌ମନ୍‌ ବିତ୍‌ରେ ପାଲାଇଜାଇ ଆଉଲିଅଇ କରି କଇଲାଇ, ୧୫ “ଏ ଲକ୍‌ମନ୍ ତମେ କାଇକେ ଏଟା କଲାସ୍‌ନି ? ଆମେ ତମର୍ ପାରା ଲକ୍ ସେ । ତମ୍‌କେ ସୁବ୍ କବର୍ ଜାନାଇବାକେ ଆଇଲୁଆଟୁ । ଆରି ଏ ରୁଟାଇ ରଇବା ପୁଡ଼ଲାମନ୍‌କେ ପୁଜା କର୍‌ବାଟା ଗତିକରି, ଜିବନ୍ ରଇବା ପର୍‌ମେସର୍‌କେ ଉପାସନା କରା ବଲି, କଇବାକେ ଆସିଆଟୁ । ଏ ପର୍‌ମେସର୍ ସରଗ, ଦର୍‌ତନି, ସମ୍‌ଦୁର୍ ଆରି ତାର୍ ବିତ୍‌ରେ ରଇବା ସବୁ ବିସଇ ତିଆର୍ କଲାଆଟେ । ୧୬ ପୁର୍‌ବେ ନିଜେ ମନ୍‌କରି ନିଜର୍ ବାଟେ ଜିବାକେ, ପର୍‌ମେସର୍ ଲକ୍‌ମନ୍‌କେ ଗତିଦେଇ ରଇଲା । ୧୭ ମାତର୍ ତାକର୍ ସବୁ ନିମାନ୍ କାମେଅନି ସେ ସବୁବେଲାଇ ଚିନ୍ ଦେକାଇଆଟେ; ସେ ଆକାସେଅନି ପାନି ଆରି ସମାନ୍ ବେଲାଇ କାଦି ପାଟାଇସି, ବେସି କାଦି ଜାଗାଇସି ଆରି ସାର୍‌ଦା ସଙ୍ଗ୍ ତମର୍ ମନ୍ ପୁରୁନ୍ ଅଇଜାଇସି ।” ୧୮ ଏଡ଼କି କଇଲେ ମିସା, ପାଉଲ୍ ଆରି ବର୍‌ନବାର୍‌ପାଇ ବଲି ଦେବାର୍ ଆଟେଆକା ବଲି କଇଲାଇ ।

୧୯ ପଟେ ପିସିଆର୍ ଆନ୍‌ଟିଅକ ଆରି ଇକନିୟ୍‌ଅନି କେତେଟା ଜିଉଦିମନ୍ ଆଇଲାଇ । ସେମନ୍ ଲକ୍‌ମନ୍‌କେ ସୁଡ଼ରାଇକରି ତାକର୍‌ବାଟେ ନେଲାଇ । ପାଉଲ୍‌କେ ପାକ୍‌ନାମାରାଇଲାଇ ଆରି ତାକେ ମଲାବଲି ବାବି ଗଡ଼ ବାଇରେ ଅର୍‌ଗତି ଜିକିନେଲାଇ । ୨୦ ମାତର୍ ବିସ୍‌ବାସିମନ୍ ଆସି ତାର୍ ଚାରିବେଟ୍‌ଟି ଚିଆଅଇଲାକେ, ସେ ଉଟିକରି ତାକର୍ ସଙ୍ଗ୍ ଗଡ଼ ବିତ୍‌ରେ ବାଅଡ଼ଲା । ତାର୍ ଆର୍‌କର୍ ଦିନେ ସେ ଆରି ବର୍‌ନବା ଲୁସ୍‌ରା ଗତି ଦର୍‌ବିଏ ଗାଲାଇ ।

ସିରିଆର୍ ଆନ୍‌ଟିୟକତେଇ ବାଅଡ଼ଲାଇ

୨୧ ପାଉଲ୍ ଆରି ବର୍‌ନବା ଦର୍‌ବିତେଇ ସୁବ୍ କବର୍ ଜାନାଇକରି ବେସି ଲକ୍‌ମନ୍‌କେ ସିସ୍‌କଲାଇ । ତାର୍ ପଟେ ସେମନ୍ ଲୁସ୍‌ତାରା, ଦର୍‌ବି, ଇକନିଅ ଆରି ପିସିଦିଆର୍ ଆନ୍‌ଟିଅକତେଇ ବାଉଡ଼ି ଗାଲାଇ । ୨୨ ସେମନ୍ ବିସ୍‌ବାସିମନ୍‌କେ ବିସ୍‌ବାସେ ତାଟ୍‌ଅଇ ରଇବାକେ ସାର୍‌ଦା କଲାଇ । ସେମନ୍ ସିକିଆ ଦେଇ କଇଲାଇ, “ପର୍‌ମେସରର୍ ରାଇଜେ କେଟ୍‌ବାକେ ଆଲେ ଆମ୍‌କେ ବେସି ଦୁକ୍‌କସ୍‌ଟ ଦେଇ ଜିବାକେ ଅଇସି ।” ୨୩ ସବୁ ମଣ୍ଡଲିର୍ ପାର୍‌ଟିମନ୍‌କେ ବାଟ୍‌ଲାଇ ଆରି ଜନ୍ ମାପ୍‌ରୁର୍‌ତେଇ ସେମନ୍ ବିସ୍‌ବାସ୍ କରି ରଇଲାଇ, ସେମନ୍‌କେ ପାର୍‌ତନା ଆରି ଉପାସ୍ ସଙ୍ଗ୍ ସର୍‌ପାଇଲାଇ ।

୨୪ ପିସିଦିଆ ବାଟ୍‌ଦେଇ ସେମନ୍ ପପୁଲିଆଇ ଆଇଲାଇ । ୨୫ ତାର୍‌ପଟେ ପର୍‌ଗାଇ କେଟ୍‌ଲାଇ । ଆରି ମାପ୍‌ରୁର୍ କାତା ଜାନାଇ ଆତାଲିଆତେଇ ଗାଲାଇ । ୨୬ ଆତାଲିଆଇ ସେମନ୍ ପାନିଜାଜେ ଚରି ଆନ୍‌ଟିଅକିଅତେଇ ବାଉଡ଼ି ଆଇଲାଇ । ଏ ଆନ୍‌ଟିଅକିଅ ବିସ୍‌ବାସିମନ୍ ପାଉଲ୍ ଆରି ବର୍‌ନବାକେ ପର୍‌ମେସର୍‌ଗାନେ ସର୍‌ପାଇଦେଇକରି ବିନ୍ ଜାଗାମନ୍‌କେ ମାପ୍‌ରୁର୍ ବାକିଅ ଜାନାଇବାକେ ପାଟାଇରଇଲାଇ ।

୨୭ ସେମନ୍ ଆନ୍‌ଟିଅକିଅ କେଟି ମଣ୍ଡଲିର୍ ଲକ୍‌ମନ୍‌କେ ରୁଣ୍ଡାଇଲାଇ । ପର୍‌ମେସର୍ ତାକର୍‌ଗାନେ କରିରଇବା ସବୁ କାମ୍ ସେମନ୍‌କେ ଜାନାଇଲାଇ । ଜିଉଦି ନ ଅଇଲା ଲକ୍‌ମନ୍ ଜିସୁଟାନେ ବିସ୍‌ବାସ୍ କର୍‌ବାକେ ପର୍‌ମେସର୍ କେନ୍ଦ୍ରି ବାଟ୍ ଉଗାଡ଼ଲା,

ସେଟା ସବୁଜାକ ସେମାନଙ୍କେ ଜାନାଇଲାଇ । ୨୮ ପାଉଲ୍ ଆରି ବରନବା ତେଇ ବିସ୍ବାସିମନର୍ ସଙ୍ଗ୍ ବେସି ଦିନ୍ ଜାକ ରଇଲାଇ ।

### ୧୫

ଜିରୁସାଲାମେ କିରିସ୍ତିଆନ୍ ସବା

୧ ଜିଉଦାଇଅନି କେତେକ୍ ଲକ୍ ଆନ୍ତଟିଅକ୍ ନଅରେ ଆଇଲାଇ । ସେମନ୍ ଆନ୍ତଟିଅକର୍ ବିସ୍ବାସି ବାଇମନଙ୍କେ ଏନ୍ତି କଇକରି ସିକାଇଲାଇ, “ମସାର୍ ନିୟମ୍ ଇସାବେ ଜଦି ତମେ ସୁନଡ଼ ନ ଉଆସ୍, ତମର୍ ପାପର୍ ତଣ୍ଡେଅନି ମୁକ୍ତି ନ ପାଆସ୍ ।” ୨ ଏ ବିସଇ, ସେମନର୍ ସଙ୍ଗ୍ ପାଉଲ୍ ଆରି ବରନବା ବେସି ଦଦାପେଲା ଅଇଲାଇ । ତେବର୍ପାଇ ଆନ୍ତଟିଅକର୍ ବିସ୍ବାସିମନ୍ ରାଜି ଅଇଲାଇଜେ, ପାଉଲ୍ ଆରି ବରନବା ଆରି ଆନ୍ତଟିଅକ୍ ମଣ୍ଡୁଲିଅନି କେତେ ଲକ୍ ଜିରୁସାଲାମେ ଜାଅଡ଼ ଆରି ତେଇର୍ ପାର୍ତିନି ଆରି ପେରିଡ଼ ସିସ୍ମନର୍ ସଙ୍ଗ୍ ଏ ବିସଇ କାତା ଅଅଡ଼ ।

୩ ଆନ୍ତଟିଅକର୍ ମଣ୍ଡୁଲି ସେମନ୍ ଜିବାଟା ସୁବିଦା କରିଦେଇ ପାଟାଇଲାଇ । ସେମନ୍ ପିନସିଆ ଆରି ସମିରଣ୍ ବାଟ୍ ଦେଇ ଜିବାବେଲେ, ଜିଉଦି ନଇଲା ଲକ୍ମନ୍ କେନ୍ତି ମନ୍ ବାଦ୍ଲାଇକରି ପରମେସର୍କେ ନାମ୍ଲାଇ, ସେ ବିସଇ ଜାନାଇଲାଇ । ଏ କାତା ସୁନି ବିସ୍ବାସି ବାଇମନ୍ ବେସି ସାର୍ଦା ଅଇଲାଇ । ୪ ସେମନ୍ ଜିରୁସାଲାମ୍ କେଟ୍ଲା ପଟେ ମଣ୍ଡୁଲିର୍ ଲକ୍, ପେରିଡ଼ ସିସ୍ମନ୍ ଆରି ମଣ୍ଡୁଲିର୍ ପାର୍ତିନିମନ୍ଙ୍କେ ବେଟ୍ଅଇଲାଇ । ଆରି ପରମେସର୍ ତାକର୍ଲଗେ କରିରଇବା କାମ୍ ବିସଇ ପାଉଲ୍ ଆରି ବରନବାକେ ଜାନାଇଲାଇ । ୫ ମାତର୍ ପାରୁସି ଦଲର୍ କେତେଟା ବିସ୍ବାସିମନ୍ ଟିଆଅଇ କଇଲାଇ, “ ଜିଉଦି ନଇଲା ଲକ୍ମନ୍ ସୁନଡ଼ ଅଇବାର୍ ଆଟେ ଆକା ଆରି ମସାର୍ ବିନ୍ ନିୟମ୍ମନ୍ ମାନବାକେ ମିସା ସେମନଙ୍କେ ସିକାଇବାର୍ ଆଟେ ।”

୬ ଏ ବିସଇ ଆଲ୍ତନା କର୍ବାକେ ପେରିଡ଼ ସିସ୍ମନ୍ ଆରି ମଣ୍ଡୁଲିର୍ ପାର୍ତିନି ରୁଣ୍ଡୁଲାଇ । ୭ \*ବେସି ପର୍ ଦଦାପେଲା ଅଇଲା ପଟେ ପିତର୍ ଟିଆଅଇ କଇଲା, “ମର୍ ବାଇବଇନିମନ୍ ଜିଉଦି ନଇଲା ଲକ୍ମନ୍, ସୁନିକରି ବିସ୍ବାସ୍ କର୍ବାକେ ସେମନର୍ଟାନେ ସୁବକବର ଜାନାଇବାକେ, ଆଗେଅନି ମକେସେ ବାଟ୍ଲାଆଟେ । ଏଟା ତମେ ଜାନାସ୍ । ୮ \*ସବୁ ଲକ୍ମନର୍ କାତା ଜାନ୍ବା ପରମେସର୍ ଆମ୍ଙ୍କେ ଜେନ୍ତି ସୁକଲ୍ ଆଡ଼ମା ଦାନ୍ କଲା ଆଟେ, ସମାନ୍ ସେନ୍ତି ବିସ୍ବାସ୍ କର୍ବା ଜିଉଦି ନଇଲା ଲକ୍ମନଙ୍କେ ମିସା ଦାନ୍ଦେଇ ସେମନଙ୍କେ ବାଟ୍ଲା ଆଟେ । ୯ ସେମନର୍ ଆରି ଆମର୍ ବିଡ଼ରେ, ସେ କାଇମିସା ବଡ଼ସାନ୍ ଦେକେ ନାଇ । ସେମନ୍ ଜିସୁକେ ବିସ୍ବାସ୍ କଲାର୍ପାଇ, ସେ ସେମନଙ୍କେ ସୁକଲ୍ କଲାଆଟେ । ୧୦ ସେନ୍ତି ଆଲେ ଗଟେକ୍ ବଡ଼ ବଜ୍ ପିଟିତେଇ ଲାଦିଦେଲାପାରା, ଆମର୍ ସବୁ ନିୟମ୍ ମାନବାର୍ ଆଟେ ବଲି କଇକରି ପରମେସର୍କେ କାଇକେ ପରିକା କଲାସ୍ନି ? ଆଜି ଜନ୍ ବଜ୍ ବଇବାକେ, ଆମର୍ ଆନିଦାଦିମନ୍ କି ଆମେ ମିସା ବଇ ନାପାର୍ତେ ରଇଲୁ । ୧୧ ନାଇ, ମନେ ଏତାଇଦେକା, ଆମେ ଜେନ୍ତି ବିସ୍ବାସ୍ କରି ମାପୁର୍ ଜିସୁ ଜିବନ୍ଦୁକାଇଲାକେ ମୁକ୍ତି ପାଇଆରୁ, ସେମନ୍ ମିସା ସେନ୍ତାରିସେ ।”

୧୨ ତାର୍ପଟେ ପାଉଲ୍ ଆରି ବରନବାଟାନେଅନି ଜିଉଦି ନଇଲା ଲକ୍ମନର୍ତେଇ ପରମେସର୍ ଜନ୍ ସବୁ କାବା ଅଇଜିବା କାମ୍ମନ୍ ଆରି ଚକିଡ଼ ବିସଇ କରି ରଇଲା, ସେ ସବୁ କାତା ସୁନି ଦଲର୍ ସବୁ ଲକ୍ ଟିମ୍ରାଅଇ ରଇଲାଇ । ୧୩ ସେମନ୍ କଇସାରାଇଲା ପଟେ ଜାକୁବ୍ କଇଲା, ଏ ମର୍ ବାଇବଇନିମନ୍ ମର୍ କାତା ସୁନା ! ୧୪ ପରମେସର୍ ପର୍ତମେ ଜିଉଦି ନଅଇଲା ଲକ୍ମନଙ୍କେ ଆଲାଦ୍ କରି, ତାର୍ ନିଜର୍ ଲକ୍ ଅଅଡ଼ ବଲି, ତାକର୍ ବିଡ଼ରେ ଅନି, ଲକ୍ମନଙ୍କେ ବାଟ୍ଲାଇ । ଏ କାତା ସିମନ୍

\* ୧୫:୭ ୧୫:୭ ପେରିଡ଼ ୧୦:୧-୪୩    \* ୧୫:୮ ୧୫:୮ ପେରିଡ଼ ୧୦:୪୪:୨:୪

ବୁଜାଇ ଦେଇଆଚେ । ୧୫ ପରମେସର୍ କରିରଇବା ଏ କାମ୍ ବବିସତ୍‌ବକ୍‌ତାମନ୍ କଇରଇବାଟା ସଙ୍ଗ୍ ସମାନ୍ ଆଚେ ।

୧୬ ମାପୁରୁ କଇଲା,

“ତାନ୍ ପଚେ ମୁଇ ନିଜେ ଦିନେକ୍ ବାଉଡି ଆଇବି,  
ଆରି ଦାଉଦର୍ ବାଜିଜାଇରଇବା ରାଇଜ୍ ଆରିତରେକ୍ ତିଆର୍ କର୍ବି ।  
ଜେନ୍ତିକି ସେଟା ପୁରାପୁରୁନ୍ ତାଟ୍ ରଇସି ।

୧୭ ତେଇଅନି ସବୁଜାକ ମନସ୍ ଜାତି ମର୍ ଲଗେ ଆଇବାଇ,

ଜନ୍ ଜିଉଦି ନଇଲା ଲକ୍‌ମନ୍‌କେ ମାପୁରୁ ନିଜର୍  
କର୍ବାକେ ତାକ୍‌ଲାଆଚେ  
ସେମନ୍ ସବୁ ଲକ୍ ମକେ ନାମ୍‌ବାଇ ।

୧୮ ମାପୁରୁ ଏ କାତା କଇଲାନି,

ଜେ କି ବେସି ଆଗ୍‌ତୁ ଏ କାତା କଇରଇଲା ।”

୧୯ ଏବେ ଜାକୁର୍ କଇବାକେ ଆରାମ୍‌କଲା । ସେ କଇଲା, “ମର୍ ବିଚାର୍ ଇସାବେ, ଜନ୍ ଜିଉଦି ନଇଲା ଲକ୍‌ମନ୍ ପରମେସରର୍ ବାଟେ ବାଅଡ଼ଲାଇ ଆଚଡ଼, ଆମେ ଆରି ସେମନ୍‌କେ ଅଇରାନ୍ ନ କରୁ । ୨୦ ଏଲେ ସେମନ୍ ଆରି ଜେନ୍ତିକି ପୁଡ଼ଲା ଦେବ୍‌ତାମନ୍‌କେ ସର୍ପିଦେଲା କାଇମିସା ଅସୁକଲ୍ କାଦି ନ କାଆ, ବିନ୍ ଲକର୍ ମାଇଜି କି ମୁନ୍‌ସର୍ ସଙ୍ଗ୍ ମିସ୍‌ବାଟାନେଅନି ଦୁରିକେ ରଅଡ଼, ଟର୍ଟରି ପିଚ୍‌କି ମରାଇରଇବା ପସୁର୍ ମାଉଁସ୍ କି ବନି, ନ କାଅଡ଼ ଏ ସବୁ ବିସଇଟାନେ ସେମନ୍‌କେ ଉପ୍‌ଦେସ୍ ଦେଇ, ସେମନ୍‌ର୍ ଲଗେ ଗଟେକ୍ ଚିଟି ଲେକୁ । ୨୧ କାଇକେବଇଲେ ବେସି ଦିନେଅନି ସବୁ ବିସ୍‌ରାମ୍‌ବାରେ ଆମର୍ ପାର୍‌ତନା ଗର୍‌ମନ୍‌କେ ମସାର୍ ନିୟ୍‌ମ୍ ପଡ଼ଲାଇନି, ଆରି ସବୁ ଗଡେ ସେ ନିୟ୍‌ମ୍‌ମନ୍ ଜାନାଇଲାଇନି ।”

ଜିଉଦିନଇଲା ବିସ୍‌ବାସିମନ୍ ଲଗେ ଚିଟି

୨୨ ପଚେ ପେରିଡ଼ ସିସ୍‌ମନ୍, ମଣ୍ଡଲିର୍ ପାର୍‌ଚିନ୍‌ମନ୍, ଆରି ସବୁ ମଣ୍ଡଲିର୍ ବାଇମନ୍ ରୁଣ୍ଡୁଲାଇ । ସେମନ୍ ରାଜିଅଇରଇବା କାତା ଆନ୍‌ଚିଅକର୍ ବିସ୍‌ବାସିମନ୍‌କେ ଜାନାଇବାକେ ପାଉଲ୍ ଆରି ବର୍‌ନବା ସଙ୍ଗ୍ ଜିବାକେ କେତେଲକ୍‌କେ ବାଟ୍‌ଲାଇ । ବର୍‌ସବା ନାଉଁର୍ ଜିଉଦା ଆରି ସିଲାକେ ବାଟ୍‌ଲାଇ । ଏ ଦୁଇଲକ୍‌କେ ସବୁ ବିସ୍‌ବାସିମନ୍ ସନ୍‌ମାନ୍ ଦେଇତେରଇଲାଇ । ୨୩ ବିସ୍‌ବାସିମନ୍ ଏ ତଲେ ଲେକାଅଇଲା ଚିଟି, ସେ ଦୁଇ ଲକ୍‌ର୍ ଆତେ ପାଟାଇଲାଇ ।

“ଆନ୍‌ଚିଅକ, ସିରିଆ ଆରି ସିଲିସିଆ ରଇବା ଜିଉଦିନଇଲା ଆମର୍ ବାଇମନ୍, ଜୁଆର୍ ! ଜିରୁସାଲମର୍ ପେରିଡ଼ମନ୍, ପାର୍‌ଚିନ୍‌ମନ୍ ଆରି ତମର୍ ବାଇମନ୍, ଏ ଚିଟି ପାଟାଇଲୁନି । ୨୪ ଆମେ ସୁନ୍‌ଲୁନି ଜେ, ଆମର୍ ଦଲେଅନି କେତେ ଲକ୍ ତମର୍‌ଟାନେ ଆସି, ଜାଇଜାଇଟା ସିକାଇଆଚଡ଼, ତେଇଅନି ସେମନ୍ ତମ୍‌କେ କଟପଟ ଆରି ତେରେପେତେ କଲାଇଆଚଡ଼ । ମାତର୍ ଆମେ ସେମନ୍‌କେ ସେନ୍ତାରି କର୍ବାକେ, କାଇମିସା ଆଦେସ୍ ଦେଉନାଇ । ୨୫ ସେଟାର୍ ପାଇ ଆମେ ସବୁ ଲକ୍ ଗଟେକ୍ ଅଇକରି କେତେଟା କବର୍ କଉମନ୍‌କେ ବାଟି, ତମର୍ ଲଗେ ପାଟାଇବାକେ ଚିକ୍ କଲୁ । ସେମନ୍ ଆମର୍ ଆଲାଦର୍ ମଇତର୍‌ମନ୍, ବର୍‌ନବା ଆରି ପାଉଲ୍‌ର୍ ସଙ୍ଗ୍ ଜିବାଇ । ୨୬ ଏ ମଇତର୍‌ମନ୍ ମାପୁରୁ ଜିସୁର୍ ସେବାତେଇ ନିଜର୍ ଜିବନ୍ ସର୍ପିଦେଇ ଆଚଡ଼ । ୨୭ ସେଟାର୍ ପାଇ ଜିଉଦା ଆରି ସିଲାକେ ତମର୍ ଲଗେ ପାଟାଇଲୁନି । ଆମେ ଜାଇଟା ଲେକିଆଡୁ, ସେଟା ତମ୍‌କେ ସେମନ୍ ନିଜେ ବାତାଇଦେବାଇ । ୨୮ କେତେଟା ଦର୍‌କାର୍ ରଇଲା ନିୟ୍‌ମ୍ ଚାଡ଼ି, ତମର୍ ଉପ୍‌ରେ ଆରି କାଇମିସା ବଜ୍ ନ ଲାଦ୍‌ବାକେ ଆମେ ସୁକ୍‌ଆଡ଼ମାଇ ଅନି ଚାଲ୍‌ନା ପାଇଲୁଆଡୁ । ୨୯ ସେ କେତେଟା ନିୟ୍‌ମ୍ ଅଇଲାନି ପୁଡ଼ଲା ଦେବ୍‌ତାମନ୍‌କେ ପୁଜା କରିରଇବା କାଇମିସା

କାଦି କାଇବାର ନାହିଁ । ଚର୍ଚ୍ଚା ପିଠକି ମରାଜଲ୍ଲା କନ୍ ମିସା ପସୁର ବନି କି ମାଉଁସ୍ କାଇବାର ନାହିଁ । ଆରି ବିନ୍ ମାଇଜି କି ମୁନୁସର୍ ମିଲ୍ଲାମିସା ଟାନେଅନି ଦୁରିକେ ରଇବାର । ଏ ସବୁ କାମ୍ ନ କରବାକେ ତମେ ଜାଗରତ୍ ରଇଲେ, ଅଇଜାଇସି । ଏଡ଼କିକେ ରଇଲୁନି ।”

୩୦ ଜନ୍ କବର୍ କଉମନ୍‌କେ ପାଟାଇ ରଇଲାଇ, ସେମନ୍ ଆନ୍‌ଟିଅକ୍‌ଡେଇ ଜାଇ ବିସ୍‌ବାସିମନ୍‌ର ସବୁ ଦଲ୍‌କେ ରୁଣ୍ଡାଇକରି ସେ ଚିଟି ଦେଲାଇ । ୩୧ ଡେଇର୍ ବିସ୍‌ବାସିମନ୍‌ ସେ ଚିଟି ପଡ଼ିକରି ବେସି ସାର୍‌ଦା ଅଇଗାଲାଇ । ୩୨ ଜିଉଦା ଆରି ସିଲ୍ଲା ନିଜେ ଦୁଇ ଲକ୍ ବିସ୍‌ତବ୍‌ବକ୍‌ତା ରଇଲାଇ । ସେମନ୍ ଆନ୍‌ଟିଅକ୍‌ର ବିସ୍‌ବାସି ବାଇମନ୍‌କେ ବେସିଦିନ୍ ରଇକରି, କବର୍ ଜାନାଇ, ସେମନ୍‌ର ବିସ୍‌ବାସ୍‌ ଡାଟ୍ କଲାଇ । ୩୩ ଡେଇ କେତେ ଦିନ୍ ରଇଲା ପଟେ, ଜନ୍‌ଲକ୍‌ମନ୍‌ ସେମନ୍‌କେ ପାଟାଇରଇଲାଇ, ସେମନ୍‌ର ଲଗେ ବାଉଡ଼ି ଜିବାକେ, ବିସ୍‌ବାସି ବାଇମନ୍‌ ସେମନ୍‌କେ ସାନ୍ତି ସଙ୍ଗ୍, ପାଟାଇ ଦେଲାଇ । ୩୪ ମାତର୍ ସିଲ୍ଲା ଡେଇସେ ରଇବାଟା ଟିକ୍ ବଲି ଡେଇ ରଇବାକେ ମନ୍ କଲା ।

୩୫ ପାଉଲ୍ ଆରି ବର୍ନବା ଆନ୍‌ଟିଅକ୍‌ଡେଇ କେତେ ଦିନ୍ ରଇକରି ବେସି ଲକ୍‌ମନ୍‌ର ସଙ୍ଗ୍, ମିସିବିଡ଼ି ମାପୁରୁର୍ ବାକିଅ ଜାନାଇଲାଇ ଆରି ସିକିଆ ଦେଲାଇ ।

ପାଉଲ୍ ଆରି ବର୍ନବା ବିନେ ଅଇଲାଇ

୩୬ କେତେ ଦିନ୍ ପଟେ ପାଉଲ୍ ବର୍ନବାକେ କଇଲା, “ଜୁ, ଆମେ ବାଉଡ଼ି ଜୁ, ସବୁ ଗଡ଼ମନ୍‌କେ, ଆମର୍ ଜନ୍ ବାଇମନ୍‌କେ ମାପୁରୁର୍ ବାକିଅ ଜାନାଇ ରଇଲୁ, ସେମନ୍‌କେ ବେଟ୍ ଅଉଁ ଆରି ସେମନ୍ ବିସ୍‌ବାସେ କେନ୍ତି ଆଡ଼ ବୁଜି ଦେକୁ ।” ୩୭ ଜଅନ୍ ମାର୍‌କକେ ମିସା ଡାକର୍ ସଙ୍ଗ୍ ନେବାକେ ବର୍ନବା ମନ୍ କଲା । ୩୮ ମାତର୍ ପାଉଲ୍ କଇଲା “ନିରୁ, କାଇକେ ବଇଲେ, ପପୁଲିଆଇ ଜନ୍ ଦିନେ ଆମର୍ କାମ୍ ସାରି ନ ରଇଲା, ସେ ଆମ୍‌କେ ଚାଡ଼ି ବାଉଡ଼ି ଉଟିଆଇଲା ।” ୩୯ ଏ ବିସଇ, ବେସି କୁଆବଲା ଅଇଲାଇ ଆରି ସେମନ୍ ବିନେ ଅଇଲାଇ । ବର୍ନବା ଜଅନ୍‌ମାରକକେ ନେଇ ସାଇପରସେ ଜିବା ପାନିଜାଜେ ଚଗ୍‌ଲାଇ । ୪୦ ମାତର୍ ପାଉଲ୍ ଡା଼ସଙ୍ଗ୍ ଜିବାକେ ସିଲ୍ଲାକେ ବାଟ୍‌ଲା । ଆରି ମାପୁରୁର୍ ଜିବନ୍‌ଦୁକାନି ଡେଇ ସେମନ୍‌କେ ସର୍ପିଦେଇ, ବିସ୍‌ବାସିମନ୍‌ ପାଟାଇ ଦେଲାଇ । ୪୧ ପାଉଲ୍ ଆରି ସିଲ୍ଲା, ସିରିଆ ଆରି ସିଲିସିଆଇ ବୁଲି ବୁଲି କରି ଡେଇର୍ ମଣ୍ଡଲିମନ୍‌କେ ଡାଟ୍ କରାଇଲାଇ ।

### ୧୭

ପାଉଲ୍ ଆରି ସିଲ୍ଲାର୍ ସଙ୍ଗ୍ ତିମତି ଜିବାଟା

୧ ଡେଇଅନି ପାଉଲ୍ ଦର୍ବି ଆରି ଲୁସ୍‌ଡାରାଇ ଆଇଲା । ସେ ନଅରେ ତିମତି ନାଉଁର୍ ଗଟେକ୍ ବିସ୍‌ବାସି ଲକ୍ ରଇଲା । ତାର୍ ମାଆ ଗଟେକ୍ ଜିଉଦି ବିସ୍‌ବାସି ରଇଲା । ମାତର୍ ତାର୍ ବାବା ଗଟେକ୍ ଗିରିକ୍ ଲକ୍ ରଇଲା । ୨ ଲୁସ୍‌ଡାରା ଆରି ଇକନିଅଡେଇ ରଇବା ସବୁ ବିସ୍‌ବାସି ବାଇମନ୍‌ ତିମତିକେ ସନ୍‌ମାନ୍ କର୍‌ଡେରଇଲାଇ । ୩ ପାଉଲ୍ ତାର୍ ସଙ୍ଗ୍ ତିମତିକେ ନେବାକେ ମନ୍ କଲା, ସେଟାର୍‌ପାଇ ଜିବା ଆଗ୍‌ତୁ ମସାର୍ ନିୟ୍‌ମ୍ ଇସାବେ ଡାକେ ସୁନତ୍ କଲା । ଜେନ୍ତିକି ସେ ଜାଗାର୍ ଜିଉଦିମନ୍‌ ଡାକେ ନିୟା ନ କରତ୍ । କାଇକେବଇଲେ ଡେଇର୍ ଲକ୍‌ମନ୍‌ ତିମତିର୍ ବାବା ଗିରିକ୍ ଲକ୍ ବଲି ଜାନିରଇଲାଇ । ୪ ସେମନ୍ କେଟ୍‌ଲା ସବୁ ଜାଗାଇ ଜିଉଦି ନ ଅଇଲା ବିସ୍‌ବାସିମନ୍‌ରପାଇ, ଜିରୁସାଲମର୍ ପାର୍‌ତିମନ୍‌ ଆରି ପେରିଡ଼ମନ୍ ରାଜି ଅଇରଇବା ନିତିନିୟ୍‌ମ୍ ବିସଇ କଇଲାଇ । ଏ ସବୁ ନିୟ୍‌ମ୍ ମାନ୍‌ବାକେ ବିସ୍‌ବାସିମନ୍‌କେ କଇଲାଇ । ୫ ସେଟାର୍‌ପାଇ ମଣ୍ଡଲିମନ୍‌ର ଲକ୍‌ମନ୍‌

☆ ୧୫:୩୮ ୧୫:୩୮ ପେରିଡ଼ ୧୩:୧୩



ବିସ୍ୱାସେ ତାଟ୍ ଅଇଲାଅ ଆରି ଦିନକେ ଦିନ ତାକର୍ ବିସ୍ୱାସ୍ ବଡ଼ବାର୍ ଦାରଲାଅ ।

ମାସିଦନିଆଇ ଜିବା ପାଇ ତରୟାତେଇ ପାଉଲକେ ଚାଲ୍ନା ମିଲ୍ବାଟା ।

୭ ସୁକଲ୍ଆଡ଼ମା ସେମନ୍ଦକେ ଆସିଆ ଦେସେ ମାପୁରୁର୍ କାତା କଇବାକେ ଚାଲ୍ନା ଦେଅଡ଼ନାଇକେ, ସେମନ୍ଦ ପିରିଜିଆ ଆରି ଗାଲାତିଅ ଜାଗାଇ ଗାଲାଅ । ୭ ମସିଆର୍ ସନ୍ଦିଲଗେ କେଟି ବିତିନିଆ ରାଇଜେ ଜିବାକେ ଚେସ୍ଟା କଲାଅ । ମାତର୍ ବାରଇଲାବେଲେ ଜିସୁର୍ଲାଗି ତାକର୍ ବିଡ଼ରେ ରଇବା ସୁକଲ୍ ଆଡ଼ମା, ସେମନ୍ଦକେ ଜିବାକେ ଚାଲ୍ନା ଦେଏନାଇ । ୮ ସେଟାର୍ ପାଇ ସେମନ୍ଦ ମସିଆବାଟ୍ ଦେଇ ତରଆତେଇ ଗାଲାଅ । ୯ ତରଆଇ ରଇଲାବେଲେ, ସେ ରାତିଆ ପାଉଲ୍ ଗଟେକ୍ ଦରସନ୍ଦ ଦେକ୍ଲା । ସେ ଦରସନେ ମାସିଦନିଆର୍ ଗଟେକ୍ ଲକ୍ ଟିଆଅଇ ବାରୁଜିଆ କରି କଇଲା “ମାସିଦନିଆଇ ଆସି ଆମ୍ବକେ ସାଇଜ କରା !” ୧୦ ପାଉଲ୍ ଏ ଦରସନ୍ଦ ଦେକ୍ଲା ଦାପରେ, ମାସିଦନିଆଇ ଜିବାକେ ଆମେ ତିଆର୍ ଅଇଲୁ, କାଇକେବଇଲେ ଆମେ ନିକ ସଙ୍ଗ୍ ଜାନ୍ଲୁ, ପର୍ମେସର୍ ତେଇର୍ ଲକ୍ମନର୍ ବିଡ଼ରେ, ସୁବ୍ କବର୍ ଜାନାଇବାକେ ଆମ୍ବକେ ଡାକ୍ଲା ଆଟେ ।

ପିଲିପିତେଇ ଲୁଦିଆର୍ ମନ୍ଦ ପେରାନି

୧୧ ଆମେ ତରଆଅନି ଜାଜେ ଚଗି ସିଦା ସାମ୍ବତରା ଗାଲୁ ଆରି ତାର୍ ଆର୍କର୍ ଦିନେ ନିଆପଲି କେଟ୍ଲୁ । ୧୨ ତେଇଆମେ ଉଡ଼ରିକରି ମାସିଦନିଆ ଜିଲାର୍ ମୁକିଅ ଗଡ଼ ପିଲିପେ ଗାଲୁ । ଏ ଗଡ଼ ଗଟେକ୍ ରମିୟ ଦଲ୍ ରଇବା ଗଡ଼ ରଇଲା । ତେଇ ଆମେ ବେସି ଦିନ୍ ଜାକ ରଇଲୁ । ୧୩ ବିସ୍ୱରାମ୍ବାରେ ଗଡ଼ ବାଇରର୍ ଗାଡ଼ କଣ୍ଡି ଗାଲୁ । ତେଇ ଜିଉଦିମନ୍ଦ ରୁଣ୍ଡିକରି ପାର୍ତନା କର୍ବାକେ ଗଟେକ୍ ଜାଗା ବଲି ବାବ୍ଲୁ । ଆମେ ତେଇ ବସ୍ଲୁ ଆରି ତେଇ ରୁଣ୍ଡି ରଇବା ମାଇଜି ମନର୍ ସଙ୍ଗ୍ କାତାବାର୍ତା ଅଇଲୁ । ୧୪ ସେମନ୍ଦର୍ ବିଡ଼ରେଅନି ତୁୟଟିରା ଗଡ଼ର୍ ଲୁଦିଆ ନାଉର୍ ଗଟେକ୍ ମାଇଜି, ଆମର୍ କାତା ସୁନ୍ଦେରଇଲା । ସେ ବେସି ଦାମ୍ ଅଇବା ଜାମକଲିଆ ରଙ୍ଗର୍ ଲୁଗା ବିକ୍ତେରଇଲା । ସେ ପର୍ମେସର୍କେ ପାର୍ତନା କର୍ବା, ଜିଉଦି ନ ଅଇଲା ଲକ୍ । ପାଉଲ୍ ମାପୁରୁର୍ କାତା କଇଲାବେଲେ ସେଟା ନାମ୍ବାକେ ମାପୁରୁ ତାର୍ ମନ୍ଦ ଉଗାଡ଼ିଦେଲା । ୧୫ ବିସ୍ୱାସ୍ କଲାପଟେ, ସେ ଆରି ତାର୍ କୁଟୁମର୍ ଲକ୍ ତୁବନ୍ଦ ନେଲାଅ । ତାର୍ ପଟେ ସେ ଆମ୍ବକେ ଡାକିକରି କଇଲା, “ଜିଦି ସତଇସେ ମୁଇ ମାପୁରୁକେ ବିସ୍ୱାସ୍ କଲିନି ବଲି ତମେ ବାବ୍ଲାସ୍ନି, ତେବେ ଆସି ମର୍ ଗରେ ରୁଆ ।” ସେ ଏନ୍ତି କଇ ଆମ୍ବକେ ତାର୍ ଗରେ ଜିବାକେ ସୁଡ଼ରାଇଲା ।

ପିଲିପିର୍ ବନ୍ଦି ଗରେ ପାଉଲ୍ ଆରି ସିଲା

୧୬ ଆରି ଗଟେକ୍ଦିନେ ଆମେ ପାର୍ତନା ଜାଗାଇ ଜାଇରଇଲୁ । ତେଇ ତୁମା ଡସିରଇବା ଗଟେକ୍ ଗତିଦାଙ୍ଗ୍ଡିକେ ବେଟ୍ଅଇଲୁ । ସେ ତାର୍ ବିଡ଼ରେ ରଇଲା କାରାପ୍ଆଡ଼ମାର୍ ବପୁ ସଙ୍ଗ୍ ବବିସଡ଼ କାତା କଇପାର୍ତେ ରଇଲା । ସେ ଲକ୍ମନର୍ ଆଡ଼ ଦେକି, ବବିସଡ଼ କାତା କଇଦେଇକରି, ସାଉକାର୍ମନ୍ଦକେ ବେସି ତାବୁ କାମାଇଦେଇତେରଇଲା । ୧୭ ଆମେ ତାର୍ଲଗେ ଗାଲାକେ, ସେ ପାଉଲ୍ ବଲି କିର୍କିରି ଆମର୍ ପର୍ ପର୍ ଆଇଲା । ଆରି କଇଲା, “ଏ ଲକ୍ମନ୍ ସବୁର୍ଟାନେଅନି ବଡ଼ ପର୍ମେସର୍ରେ ସେବାକରୁମନ୍ । ତମେ କେନ୍ତି ମୁକ୍ତି ପାଇସା, ଏ କାତା ସେମନ୍ଦ କଇଲାଅନି ।” ୧୮ ସେ ଦାଙ୍ଗ୍ଡି ବେସି ଦିନ୍ ଦାରି ଏନ୍ତି କଲା । ସାରାସାରିପଟେ ପାଉଲ୍ ବିଜାର୍ ଅଇଲା । ସେ ପର୍ବାଟେ ପାସ୍ଲି ଦେକି କାରାପ୍ଆଡ଼ମାକେ ଦମ୍କାଇକରି କଇଲା, “ଜିସୁ କିରିସ୍ଟର୍ ନାଉଁ ଦାରି ଆଦେସ୍ ଦେଲିନି, ତାର୍ତେଇଅନି ବାରଇ ଜା ।” ସେ କଇଲା ଦାପରେ, କରାପ୍ ଆଡ଼ମା ତାର୍ତେଇଅନି ବାରଇଗାଲା ।

୧୯ ଜେଡେବେଲ୍ ତାକର ସାଉକାର୍‌ମନ୍କେ ନିଜର ଦନ୍ ଅରଜ୍‌ବାଟା, ବୁଡିଗାଲା ବଲି ଜାନଲାଇ, ପାଉଲ୍ ଆରି ସିଲାକେ ଗଡର ମଜାଇ ରଇବା ରମିଅ ଅଦିକାରିର ଲଗେ ଜିକି ଆନଲାଇ । ୨୦ ସେମନ୍‌କେ ତାକର ମୁଆଟେ ଆନି ଦସ୍‌ଦେଇ କରି କଇଲାଇ “ଏମନ୍ ଜିଉଦି ଲକ୍, ଆମର୍ ଗଡେ ଆସି ଗଣ୍ଡଗଲ୍ କଲାଇନି ।” ୨୧ ଆମର୍ ନିୟମ୍ ବିରଦେ ରିତିନିତି ସିକାଇଲାଇନି । ଆମେ ରମିଅ ଲକ୍, ସେଟାର୍ ପାଇ ଏ ରିତିନିତି ମାନି ନାପାରୁ । ୨୨ ସାଉକାର୍ ମନର୍ କାତାମିସାଇ ଡେଇ ରଇଲା ଲକ୍‌ମନ୍, ପାଉଲ୍ ଆରି ସିଲାର୍ ବିରଦେ ଉଟ୍‌ଲାଇ ।

ସେ ଅଦିକାରିମନ୍ ପାଉଲ୍ ଆରି ସିଲାର୍ ବସତର୍ ଚିରିକରି କରତା ସଙ୍ଗ୍ ମାର୍‌ବାକେ ଆଦେସ୍ ଦେଲାଇ । ୨୩ ବେସି ମାଡକାଇଲା ପତେ ସେମନ୍‌କେ ବନ୍ଦି ଗରେ ପୁରାଇଲାଇ ଆରି କୁଟିଦେଇ ଜାଗ୍‌ବାକେ ବନ୍ଦି ଗର୍ ଜାଗୁଆଲ୍‌କେ ଆଦେସ୍ ଦେଲାଇ । ୨୪ ଏ ଆଦେସ୍ ପାଇ ବନ୍ଦି ଗର୍ ଜାଗୁଆଲ୍ ସେମନ୍‌କେ ଗଟେକ୍ ବିଡରର୍ ବାକ୍‌ରାଇ ପୁରାଇ ଦେଇ, ବଜରଇବା ଦାରୁମୁଟ୍‌ଲାଇ ତାକର ଗଡ୍ ବାନ୍ଦିଦେଲା ।

୨୫ ପାଉଲ୍ ଆରି ସିଲା ମଜା ରାତି ବେଲାଇ ପରମେସରକେ ପାର୍‌ତନା କରି ଗିଡ୍ ଗାଇଡେ ରଇଲାଇ । ବନ୍ଦି ଗରେ ରଇବା ବିନ୍‌ଲକ୍‌ମନ୍ ସେଟା ସବୁ ସୁନ୍‌ଡେ ରଇଲାଇ । ୨୬ ସେଡକିବେଲେ, ଅଟାଡ୍ ବେସି ଦରତନି ଚୁଲ୍‌ଚୁଲ୍‌ଲା ଆରି ବନ୍ଦି ଗରର୍ ପାକାଇଲା କୁନାଦି ପାକ୍‌ନା ଆଲିଗାଲା, ସେ ଦାପ୍‌ରେ କାପାଟ୍‌ମନ୍ ଉଗାଡି ଅଇଗାଲା ଆରି ସବୁ ବନ୍ଦିମନର୍ ସିକ୍‌ଲି କୁସ୍‌ଲି ଗାଲା । ୨୭ ବନ୍ଦି ଗରର୍ ଜାଗୁଆଲ୍ ଚେତାଅଇ ଉଟ୍‌ଲା ଆରି ବନ୍ଦି ଗରର୍ କାପାଟ୍ ଉଗ୍‌ଡା ଅଇରଇଲାଟା ଦେକ୍‌ଲା । ସେ ବନ୍ଦିମନ୍ ସବୁ ପାଲାଇ ଆଟ୍‌ଡ୍ ବଲି ବାବ୍‌ଲା । ସେଟାର୍ ପାଇ ସେ ତାର୍ କାଣ୍ଡା ବେଟି ବୁସି ଅଇ ମର୍‌ବାକେ ଜାଇଡେ ରଇଲା । ୨୮ ମାଡର୍ ପାଉଲ୍ ଆଉଲିଅଇ କଇଲା, “ନିଜେ ତର୍ ଗାଗଡ୍ କାଟିଅଇ ନସାନାଇ । ଆମେ ସବୁ ଲକ୍ ଇତି ଆରୁ ! କେ ପାଲାଉ ନାଇ ।”

୨୯ ବନ୍ଦି ଗର୍ ଜାଗୁଆଲ୍ ଗଟେକ୍ ବଡି ଆନ୍‌ବାକେ ଡିଆରୁଲା । ଆରି ସେ ବଡି ଦାରୁଲା ଆରି ତରତରି ତରତରି ଆସି ପାଉଲ୍ ଆରି ସିଲାର୍ ଗଡ୍ ତଲେ ଅଦରୁଲା । ୩୦ ତାର୍ ପତେ ସେମନ୍‌କେ ବାଇରେ ନେଇ ପାଟାରୁଲା, “ଆଗିଆଁମନ୍ ! ପରମେସରର୍ ତଣ୍ଡେଅନି ରକିଆ ପାଇବାକେ ମୁଇ କାଇଟା କରବାର୍ ଆଟେ ?”

୩୧ ସେମନ୍ କଇଲାଇ, “ମାପୁରୁ ଜିସୁକେ ବିସ୍‌ବାସ୍ କଲେ, ତୁଇ ଆରି ତମର୍ କୁଟୁମର୍ ସବୁ, ମୁକ୍ତି ପାଇସା ।” ୩୨ ତାର୍ ପତେ ସେମନ୍ ତାକେ ଆରି ତାକର ଗରର୍ ସବୁ ଲକ୍‌କେ ମାପୁରୁର୍ ବାକିଅ କଇଲାଇ । ୩୩ ସେ ଦାପ୍‌ରେ ମଜାରାତି ବେଲେ, ବନ୍ଦି ଗର୍ ଜାଗୁଆଲ୍ ସେମନ୍‌କେ ଡାକିନେଇ ସେମନ୍‌ର ଗାଉ ଅଇଲାଟା ସବୁ ଦଇଦେଲା । ତାର୍‌ପତେ ସେ ଆରି ତାର୍ କୁଟୁମର୍ ସବୁ ଲକ୍ ହୁବନ୍ ନେଲାଇ । ୩୪ ତାର୍‌ପତେ ସେ ପାଉଲ୍ ଆରି ସିଲାକେ ତାକର ଗରେ ଡାକିନେଇ କାଇବାକେ ଦେଲା । ଡେଇ ପରମେସରକେ ବିସ୍‌ବାସ୍ କଲାଟ୍ ପାଇ ସେ ଆରି ତାର୍ କୁଟୁମର୍ ସବୁ ଲକ୍‌ମନ୍ ସାର୍‌ଦା ଅଇଗାଲାଇ ।

୩୫ ଆରିଗଟେକ୍ ଦିନର୍ ସାକାଲେ ରମିଅ ସାସନ୍‌କାରିଆମନ୍ ସେ ଲକ୍‌ମନ୍‌କେ ଚାଡି ଦିଆସ୍ ବଲି ଜାଗୁଆଲ୍‌ମନ୍‌କେ କଇକରି ପାଟାଇଲାଇ ।

୩୬ ସେଟାର୍ ପାଇ ବନ୍ଦିଗର୍ ଜାଗୁଆଲ୍ ପାଉଲ୍‌କେ କଇଲା, “ରମିଅ ସାସନ୍‌କାରିଆ ତମ୍‌କେ ଆରି ସିଲାକେ ଚାଡି ଦେବାକେ ଆଦେସ୍ ଦେଲା ଆଟେ । ଏବେ ତମେ ଏ ଜାଗାଇଅନି ସାନ୍ତି ସଙ୍ଗ୍ ଉଟି ଜା ।” ୩୭ ମାଡର୍ ପାଉଲ୍ ସନିଅମନ୍‌କେ କଇଲା, “କାଇମିସା ଅପ୍‌ରାଦେ ଦସି ଅଇ ନ ରଇଲେ ମିସା, ସେମନ୍ ଆମ୍‌କେ ଲକ୍‌ମନ୍‌ର ମୁଆଟେ ମାରୁଲାଇ । ଆମେ ରମିଅ ଲକ୍, ମାଡର୍ ସେମନ୍ ଆମ୍‌କେ ବନ୍ଦି କଲାଇ । ଏବେ ଆମ୍‌କେ ଲୁଚ୍‌ଡେ ଚାଡିଦେବାକେ ମନ୍ କଲାଇନି । ଏଟା କର୍‌ବାକେ ଆମେ ନ ଦେଉଁ । ରମିୟ୍ ଅଦିକାରି ନିଜେ ଆସି ଇତି ଆମ୍‌କେ ମୁକ୍‌ଲାଅ ।”

୩୮ ସନିଅମନ୍ ରମିଅ ସାସନକାରିଆକେ ଏ କାତା ଜାନାଇଲା । ପାଉଲ୍ ଆରି ସିଲା ରମିଅ ଲକ୍ ବଲି ସୁନି ସେମନ୍ ଡରିଗାଲା । ୩୯ ସେଟାର୍‌ପାଇ ବନ୍ଦିଗରେ ଜାଇ ସେମନ୍‌କେ କେମା ମାଙ୍ଗ୍‌ଲାଲ୍ ଆରି ସେମନ୍‌କେ ବନ୍ଦି ଗରେଅନି ବାର୍‌କରାଇ ଗଡ୍ ଚାଡ଼ି ଉଡ଼ିବାକେ ବାରୁଜିଆ କଲା । ୪୦ ପାଉଲ୍ ଆରି ସିଲା ବନ୍ଦି ଗରେଅନି ବାରଇ ଲୁଦିଆର୍ ଗରେ ଗାଲା । ତେଇ ସେମନ୍ ବିସ୍‌ବାସି ବାଇମନ୍‌କେ ବେଟ୍ ଅଇ, ସେମନ୍‌କେ ସାର୍‌ଦା କରାଇ, ସେ ଜାଗା ଚାଡ଼ିଉଡ଼ିଗାଲା ।

**୧୭**

ତେସଲନିକିତେଇ ସେବା କାମ୍ କର୍‌ବାଟା

୧ ପାଉଲ୍ ଆରି ସିଲା ଅମ୍‌ପିପଲି ଆରି ଆପଲନିଆ ବାଟ୍‌ଦେଇ ତେସଲନି ଜାଗାଇ କେଟ୍‌ଲା । ତେଇ ଜିଉଦିମନ୍‌ର ଗଟେକ୍ ପାର୍‌ତନା ଗର୍ ରଇଲା । ୨ ପାଉଲ୍ ତାର୍ ରିଡିନିତି ଇସାବେ, ପାର୍‌ତନା ଗରେ ଗାଲା । ତେଇ ସେ ଲାଗି ଲାଗି ଡିନ୍‌ଟା ବିସ୍‌ରାମ୍‌ବାରେ ଲକ୍‌ମନ୍‌ର ସଙ୍ଗ୍ କାତାବାର୍‌ତା କଲା । ୩ ଦରମ୍ ସାସତର୍ ପଡ଼ିକରି ବୁଜାଇଲା ଜେ, ମସିଅ ଦୁକ୍ ପାଇବାର୍ ରଇଲା ଆରି ପରମେସର୍ ତାକେ ମଲାତେଇଅନି ଉଟାଇବାର୍ ରଇଲା । ପାଉଲ୍ କଇଲା, “ଜନ୍ ଜିସୁର୍ ବିସଇ ମୁଇ ଜାନାଇଲି, ସେ ଅଇଲାନି ମସିଅ ।” ୪ ସେମନ୍‌ର ବିଡ଼ରେଅନି କେତେ ଲକ୍ ଏଟା ବିସ୍‌ବାସ୍ କଲା । ପାଉଲ୍ ଆରି ସିଲାର୍ ସଙ୍ଗ୍ ମିସଲା । ସେନ୍ତି ଡାକ୍‌ପୁଟା ରଇବା ମାଇଜିମନ୍ ଆରି ପରମେସର୍‌କେ ପାର୍‌ତନା କର୍‌ବା ଗିରିକ୍ ମନ୍‌ର ଗଟେକ୍ ବଡ଼ ଦଲ୍ ମିସା ସେମନ୍‌ର ସଙ୍ଗ୍ ମିସଲା ।

୫ ମାତର୍ କେତେଟା ଜିଉଦିମନ୍ ପାଉଲ୍ ଆରି ସିଲାକେ କୁଟ୍ କରି, କାଇ କାମ୍ ନ କର୍‌ବା ଅଲ୍‌ସିଆ ଲକ୍‌ମନ୍‌କେ ଏକ୍‌ଜୁଟ୍ କଲା, ଆରି ଟୁଲିଆଇ, ଗୁଲାଇ ଗଡ୍ ଜାକର୍ ଲକ୍‌କେ ଉସ୍‌କାଇ ରିସା କରାଇଲା । ସେମନ୍ ପାଉଲ୍ ଆରି ସିଲାକେ କଜି ଆନ୍‌ବାକେ ଗଟେକ୍ ଜେସନ୍ ନାଉର୍ ଗରେ ଜାଇ, ତାର୍ ଗର୍ ଚପିପାଇଲା । ୬ ମାତର୍ ତେଇ ପାଉଲ୍ ଆରି ସିଲା ଡିସ୍‌ବ୍ ନାଇଜେ, ସେମନ୍ ଜେସନ୍ ଆରି ବିନ୍ କେତେଟା ବିସ୍‌ବାସି ବାଇମନ୍‌କେ, ଗଡ଼ର୍ ନେତାମନ୍‌ର ଲଗେ ଜିକିନେଇ ଆଉଲିଅଇ କଇଲା, “ଏ ଲକ୍‌ମନ୍ ଚାରିବେଟ୍‌ତି ଗଣ୍ଡଗଲ୍ କଲାଇନି ! ଏବେ ଆମର୍ ଗଡେ ମିସା ଆଇଲାଇ ଆଚଡ୍ ୭ ଆରି ଏସନ୍ ସେମନ୍‌କେ ତାର୍ ଗରେ ରକିରଇଲା । ଜିସୁ ନାଉଁ ଦାରି ଆରି ଗଟେକ୍ ରାଜା ଆଚେ ବଲି କଇକରି ସେମନ୍ ଆମର୍ ବଡ଼ ସାସନକାରିଆର୍ ନିୟମ୍ ବାଙ୍ଗ୍‌ଲାଇନି ।” ୮ ଏ କାତା କଇ ସେମନ୍, ଲକ୍‌ମନ୍‌କେ ଆରି ସାସନକାରିଆର୍ ବିରଦେ ଆଉଲି ଅଇକରି ବେସି ରିସା କରାଇଲା ଆରି ଗଣ୍ଡଗଲ୍ କରାଇଲା । ୯ ସାସନ୍ କରୁମନ୍ ଜେସନ୍ ଆରି ବିସ୍‌ବାସିମନ୍‌ରେଅନି ଚାଡ଼ବାକେ, ଜେଡ଼କି ତାରୁ ବାନ୍‌ବାକେ ରଇଲା, ଲାଁର୍ ନେଇକରି ସେମନ୍‌କେ ଜାମିଲେ ଚାଡ଼ିଦେଲା ।

ବେରିଆଇ ସେବାକାମ୍

୧୦ ରାତି ଅଇଲା ଦାପରେ, ବିସ୍‌ବାସି ବାଇମନ୍ ପାଉଲ୍ ଆରି ସିଲାକେ ବେରିଆ ନାଉର୍ ଜାଗାଇ ପାଟାଇଦେଲା । ସେମନ୍ ତେଇ କେଟି, ଜିଉଦି ଲକ୍‌ମନ୍‌ର ପାର୍‌ତନା ଗରେ ଗାଲା । ୧୧ ତେସଲନିର୍ ଜିଉଦିମନ୍‌ର ଟାନେଅନି ବେରିଆର୍ ଜିଉଦିମନ୍ କୁଲାକୁଲି ମନ୍ ରଇବା ଲକ୍ ରଇଲା । ସେମନ୍ ଅଦିକ୍ ମନ୍‌ଦିଆନ୍ ଦେଇ ସିସମନ୍‌ର ସିକିଆ ସୁନ୍‌ଲା । ଆରି ପାଉଲ୍ କଇଲା କାତା, ସଡ଼ କି ନାଇ ବଲି ଜାନ୍‌ବାକେ ସବୁ ଦିନ୍ ଦରମ୍ ସାସତର୍ ପଡ଼ିଚେରଇଲା । ୧୨ ସେମନ୍‌ର ବିଡ଼ରେଅନି ବେସି ଲକ୍ ବିସ୍‌ବାସ୍ କଲା । ବେସି ସାଉକାର୍ ଅଇ ସନ୍‌ମାନ୍ ପାଇବା ଗିରିକ୍ ମାଇଜି ଆରି ଗିରିକ୍ ଲକ୍‌ମନ୍ ମିସା ବିସ୍‌ବାସିମନ୍‌ର ସଙ୍ଗ୍ ମିସଲା ।

୧୩ ମାତର ଜେଡେବଲ୍ ତେସଲନିର୍ ଜିଉଦିମନ୍ ସୁନ୍ଲାଇ ଜେ ବେରିଆଡେଇ ମିସା ପାଉଲ୍ ପରମେସରର୍ ବାକିଅ ଜାନାଇଲାନି, ସେମନ୍ ତେଇ ଆସି ପାଉଲ୍‌ର ବିରଦେ ଗଣ୍ଡଗଲ୍ କର୍ବାକେ ଲକ୍‌ମନ୍‌କେ ଉସ୍କାଇଲାଇ । ୧୪ ସେ ଦାପ୍‌ରେ ବିସ୍‌ବାସି ବାଇମନ୍ ପାଉଲ୍‌କେ ସମ୍‌ଦୁର୍ ପାଲିବାଟେ ପାଟାଇଦେଲାଇ, ମାତର୍ ସିଲ୍ଲା ଆରି ତିମତି ଦୁଇ ଲକ୍ ବେରିଆଇ ରଇଲାଇ । ୧୫ ପାଉଲ୍‌କେ ଡାକିନେବା ଲକ୍‌ମନ୍, ତାର୍ ସଙ୍ଗ୍ ଆଡେନସ୍ ଜାକ ଗାଲାଇ । ତେଇଅନି ସେମନ୍ ବେରିଆଇ ବାଉଡି ଆସି, ସିଲ୍ଲା ଆରି ତିମତିକେ କଇଲାଇ, “ତମ୍‌କେ ପାଉଲ୍ ବେରି ମିସ୍‌ବାକେ କବର୍ ପାଟାଇ ଆଦେସ୍ ଦେଲାଆଟେ ।”

ଆଡେନେସ୍‌ଡେଇ ପାଉଲ୍‌ର ସେବାକାମ

୧୬ ସିଲ୍ଲା ଆରି ତିମତିକେ ଆଡେନେସ୍‌ଡେଇ ଜାଗି ରଇଲା ବେଲେ, ଗଡ଼ଜାକର୍ ଲକ୍ ପୁଜା କର୍ବା ଦେବ୍‌ତାମନର୍ ମୁରତିମନ୍ ଦେକି, ପାଉଲ୍‌ର ମନ୍ ବେସି ଉଡୁକ୍‌ପୁଡୁକ୍ ଅଇଗାଲା । ୧୭ ସେଟାର୍‌ପାଇ ସେ ଜିଉଦିମନର୍ ପାର୍‌ତନା ଗରେ ସେମନର୍ ସଙ୍ଗ୍, ଆରି ପରମେସର୍‌କେ ପାର୍‌ତନା କର୍ବା ଜିଉଦି ନଇଲା ଲକ୍‌ମନର୍ ସଙ୍ଗ୍, ଏ ବିସଇ ସବୁ ଦିନ୍ ଆଲ୍‌ତନା କର୍ବାର୍ ଦାର୍‌ଲା । ଆଟେବାଟେ ଜିବାଆଇବା କର୍ବା ଲକ୍‌ମନର୍ ସଙ୍ଗ୍ ସେ ବିସଇ ଆଲ୍‌ତନା କଲା । ୧୮ କେଡେଟା ଏପିକିଉରିଆନ୍ ଆରି ଟଇକ୍ ସିକିଆ ଦେବା ଗୁରୁମନର୍ ସଙ୍ଗ୍ ଦଦାପେଲା ଅଇଲାଇ । ସେମନର୍ ବିଡ଼ରେଅନି କେଡେ ଲକ୍ କଇଲାଇ, “ଏ ବକ୍ସୁଆ ବଡ଼ପନିଆ, କାଇଟା କଇବାକେ ଚେସ୍‌ଟା କଲାନ୍ତି ?”

ବିନ୍ ଲକ୍‌ମନ୍ କଇଲାଇ, “ବିନ୍ ଦେସେ ରଇବା ଦେବ୍‌ତାମନର୍ ବିସଇ, ସେ ଜାନାଇଲାନି ପାରା ଲାଗ୍‌ଲାନ୍ତି ।” ଜିସୁ ଆରି ତରେକ୍ ଜିବନ୍ ଅଇ ଉର୍‌ଲା ବିସଇ ପାଉଲ୍ ଜାନାଇବାଟା ସୁନି ସେମନ୍ ଏନ୍ତି କଇଲାଇ । ୧୯ ସେଟାର୍‌ପାଇ ସେମନ୍ ପାଉଲ୍‌କେ ଦାରି ସେ ନଅରର୍ ବିଟାର୍ କର୍ବା ଜାଗା, ଜନ୍‌ଟା କି ଏରିଅପାଗସ୍ ତେଇ ଆନ୍‌ଲାଇ । ଆରି ତେଇ କଇଲାଇ, “ତୁଇ ଜନ୍ ନୁଆ ସିକିଆ ବିସଇ କଇଲୁସିନ୍, ସେ ବିସଇ ଆମେ ଜାନ୍‌ବାକେ ମନ୍ କଲୁନ୍ତି ।” ୨୦ ତୁଇ କଇବା କେଡେଟା କାତା ଆମେ ଆଗ୍‌ତୁ କେବେ ସୁନି ନ ରଇଲୁ । ଆମେ ତାର୍ ଅରଡ଼ ଜାନ୍‌ବାକେ ମନ୍ କଲୁନ୍ତି । ୨୧ କାଇକେବଇଲେ ଆଡେନେସର୍ ଲକ୍ ଆରି ତେଇ ରଇବା ବିନ୍ ଦେସର୍ ଲକ୍‌ମନ୍ ନୁଆ ବିସଇ ସୁନ୍‌ବାକେ ଆରି କଇବାକେ ବଲ୍‌ପାଇଡେ ରଇଲାଇ । ତେଇ ସେମନ୍ ବେସି ବେଲା ଦେଇଡେ ରଇଲାଇ ।

୨୨ ପାଉଲ୍ ସେ ଗଡ଼ର୍ ସବା ମୁଆଟେ ଚିଆ ଅଇ କଇଲା, ଆଡେନିଅର୍ ଲକ୍‌ମନ୍, ତମେ ସବୁ ଦରମ୍ ଲକ୍ ବଲି ଜାନାପଡ଼ଲାନ୍ତି । ୨୩ କାଇକେବଇଲେ, ମୁଇ ତମର୍ ନଅରେ ବୁଲି ଦେକ୍‌ଲା ବେଲେ, ତମର୍ ପୁଜା କର୍ବା ଜାଗାମନ୍ ଦେକ୍‌ଲି । ତେଇ ଗଟେକ୍ ବେଦି ରଇଲା । ଗଟେକ୍ ନ ଜାନ୍‌ଲା ଦେବ୍‌ତାକେ, ଲେକାରଇଲାଟା ମିସା ଦେକ୍‌ଲି । ତମେ ଜାକେ ନାଜାନି ପୁଜାକଲାସିନ୍ । ଏବେ ତାର୍ ବିସଇ ତମ୍‌କେ ଜାନାଇଲିନ୍ତି । ୨୪ ପରମେସର୍ ଦୁନିଆ ଆରି ତେଇ ରଇଲା ସବୁ ବିସଇ ତିଆର୍ କଲା । ସେ ସରଗ୍ ଆରି ଜଗତର୍ ମାପୁରୁ । ଲକ୍‌ମନ୍ ତିଆର୍ କଲା ମନ୍‌ରେ ରଇବାକେ ମନ୍ ନ କରେ । ୨୫ ଆମେ ତାର୍ ପାଇ କାମ୍ କରି ତାକେ ଦେଇପାରୁ ପାରା କାଇଟା ମିସା ସେ ମନ୍ କରେ ନାଇ । କାଇକେବଇଲେ ସେ ସବୁକେ ଜିବନ୍, ପବନ୍ ଆରି ସବୁ ଦରକାର୍ ରଇଲାଟା ଦେଲାଆଟେ । ୨୬ ଗଟେକ୍ ଲକ୍‌ଅନି ସେ ସବୁ ମୁନୁସ୍ ଜାତିକେ ତିଆର୍ କଲା । ଆରି ତାର୍ ଆଦେସ୍ ଇସାବେ ସେମନ୍ ଦୁନିଆର୍ ବିନ୍ ବିନ୍ ଜାଗାଇ ବାସା ଅଇଲାଇ ଆଟଡ଼, ସେଟା ପୁର୍‌ବେଅନି ପରମେସର୍ ଚିକ୍ କଲାଆଟେ । ୨୭ ତାକର୍ ଆଦେସ୍ ରଇଲା ଜେ ସବୁ ଲକ୍ ତାକେ କଜି କରି ବେଟ୍ ଅଅଡ଼ । ମାତର୍

☆ ୧୭:୨୪ ୧୭:୨୪ ପେରିଡ଼ ୭:୪୮

ସତରଞ୍ଜେ ପରମେସ୍ୱର କାର୍ତ୍ତାନ୍ତେଅନି ମିସା ଦୁରିକେ ନାଇ । ୨୮ ଏ ବିସଇ କେକି ଗଟେକ୍ ଲକ୍ କଇଲା ଆଟେ,

“ତାର୍ ଲଗେ ଆକା ଆମର୍ ଜିବନର୍ କୁଟିକାଡ଼ି ଆଟେ ।”

ତମର୍ ବିତ୍ତରେଅନି କେତେଲକ୍ କଇଆଟଡ଼, ଆମେ ମିସା ତାର୍ ପିଲାଜିଲା ।

୨୯ ଆମେ ପରମେସ୍ୱରର୍ ପିଲାଜିଲା ଅଇଲାର୍ ପାଇ ମୁନ୍ତୁସ୍ ତିଆର୍ କଲା ସୁନା, ରୁପା ନଇଲେ ପାକନା ସଙ୍ଗ୍ ତିଆର୍ କଲା ପୁତ୍ତଲା, ପରମେସ୍ୱର ରୁପ୍ ବଲି ବାବି ନାପାରୁ । ୩୦ ଲକ୍ମନ୍ ପରମେସ୍ୱରକେ ଜାନି ନ ରଇଲା ବେଲେ, ସେ ଦସ୍ ଦାରି ନ ରଇଲା, ମାତର୍ ଏବେ ସବୁ ଜାଗାର୍ ସବୁ ଲକ୍ମନ୍କେ, ସେମନର୍ ପାପ୍ ବାଟେଅନି ବାଅଡ଼ବାକେ ଆଦେସ୍ ଦେଲାନି । ୩୧ ସେ ଗଟେକ୍ ଦିନ୍ ଚିକ୍ କଲା ଆଟେ । ସେ ଦିନେ, ସେ ବାଟିରଇବା ଲକ୍ମନ୍ ସଙ୍ଗ୍ ଗୁଲାଇ ଦୁନିଆର୍ ବିଚାର୍ କରସି । ସେ ଲକ୍ମନ୍ ମଲାଟାନ୍ତେଅନି ଉଟି ଏ କାତା ସଡ଼ ବଲି, ସବୁକେ ଜାନାଇଲା ଆଟେ ।

୩୨ ପାଉଲର୍ତାନ୍ତେ, ମଲାଟାନ୍ତେଅନି ଉଟ୍ତଲା ବିସଇ ସୁନି ସେମନର୍ ବିତ୍ତରେଅନି କେତେ ଲକ୍ ତାକେ କିଜାଇଲା, ମାତର୍ ବିନ୍ ଲକ୍ମନ୍ କଇଲା, “ତମର୍ତେଇଅନି ଆମେ ଆରିତରେକ୍ ଏ ବିସଇ ସୁନ୍ଦାକେ ମନ୍ କଲୁନି ।”

୩୩ ପାଉଲ୍ ସେ ଦିନର୍ ସବାଇ ଅନି ଉଟି ବାରିଗାଲା । ୩୪ ତାୟନିସିଅସ୍ ନାଉର୍ ସବାର୍ ଗଟେକ୍ ମେମର୍, ଦାମାରି ନାଉର୍ ଗଟେକ୍ ମାଇଜି ଆରି କେତେଟା ଲକ୍, ବିସ୍ବାସ୍ କରି ତାର୍ ସଙ୍ଗ୍ ମିସ୍ଲାଇ ।

# ୧୮

କରନ୍ତ୍ରିୟ ନଅରେ ପାଉଲର୍ ସେବାକାମ୍

୧ ତାର୍ପଟେ ପାଉଲ୍ ଆତେନ୍ସ୍ ଚାଡ଼ି କରନ୍ତ୍ରିଅ ଗାଲା । ୨ ତେଇ ପନ୍ତସ୍ତେଇ ଜନମ୍ କରିରଇବା ଆକିଲା ନାଉର୍ ଗଟେକ୍ ଜିଉଦିକେ ବେଟ୍ ଅଇଲା । ବଡ଼ ସାସନ୍କାରିଆ କଲଡ଼ିଅସ୍, ସବୁ ଜିଉଦିକେ ରମ୍ ଦେସ୍ ଚାଡ଼ବାକେ ଆଦେସ୍ ଦେଇରଇଲା । ସେଟାର୍ପାଇ, ସେ ଅଲପ୍ ଦିନ୍ ଆଗତ୍ତୁ ତାର୍ ମାଇଜି ପିରିସ୍କିଲାର୍ ସଙ୍ଗ୍ ଇଟାଲିଅନି ଆସିରଇଲା । ୩ ପାଉଲ୍ ସେମନ୍କେ ବେଟ୍ ଅଇବାକେ ଜାଇ ସେମନର୍ ସଙ୍ଗ୍ ରଇଲା । କାଇକେବଇଲେ ସେ ମିସା ସେମନର୍ ପାରା ତୁମ୍ ତିଆର୍ କରି ଜିଉନାକାଉନା କର୍ତେରଇଲା । ୪ ଜିଉଦି ଆରି ଗିରିକ୍ ମନ୍ ମାପୁରୁକେ ଅଦିକ୍ ବିସ୍ବାସ୍ କରାଇବାକେ, ସବୁ ବିସ୍ବାମ୍ବାରେ ପାର୍ତନା ଗରେ ଆଲ୍ଟନା କର୍ତେ ରଇଲା ।

୫ ସିଲା ଆରି ତିମତି ମାସିଦନିଆଇଅନି ବାଉଡ଼ି ଆଇଲା ପଟେ ପାଉଲ୍ ଜିଉଦିମନର୍ ଲଗେ ଜିସୁର୍ ସୁବ୍ କବର୍ ଜାନାଇବାକେ ପୁରାପୁରି ବେଲା ଦେଲା ଆରି ଜିସୁକେ ମସିଅ ବଲି ସାକି ଦେଲା । ୬ ମାତର୍ ସେମନ୍ ତାକେ ବିରଦ୍ କରି ତାର୍ କୁଟ୍ ପାଟ୍ବାର୍ ଦାର୍ଲାଇ, ସେଟା ବିରଦ୍ କରବା ଇସାବେ, ତାର୍ ବସ୍ତତର୍ ଦୁଲି ପାପ୍ତିଦେଇ ସେ ସେମନ୍କେ କଇଲା, “ଜଦି ତମେ କୁରୁପ୍ନାସ୍ ଅଇସା, ତେବେ ସେଟାର୍ପାଇ ତମେ ନିଜେ ଦାଇ ଅଇସା । ମୁଇ ଏଟାର୍ପାଇ ଦାଇ ନଇ, ଏବେ ମୁଇ ଜିଉଦି ନଇଲା ଲକ୍ମନ୍ ନ ଲଗେ ଜିବି ।” ୭ ସେଟାର୍ପାଇ ସେ ସେମନ୍କେ ଚାଡ଼ି ପରମେସ୍ୱରକେ ପାର୍ତନା କରବା ତିତସ୍ ଜୁସ୍ତ ନାଉର୍ ଗଟେକ୍ ଜିଉଦି ନଇଲା ଲକ୍ମନ୍ ଗରେ ରଇବାକେ ଗାଲା । ଜୁସ୍ତତ୍ ଗର୍ ପାର୍ତନା ଗର୍ ଲଗେ ରଇଲା । ୮ ପାର୍ତନା ଗରର୍ ମୁକିଅ କିରିସ୍ପସ୍ ଆରି ତାର୍ କୁଟ୍ମର୍ ସବୁ ଲକ୍ମନ୍ ମାପୁରୁତେଇ ବିସ୍ବାସ୍ କଲାଇ ଆରି କରନ୍ତ୍ରିଅର୍ ଅଦିକ୍ ଅଦିକ୍ ଲକ୍ ପାଉଲର୍ ସିକିଆ ସୁନି ବିସ୍ବାସ୍ କଲାଇ ଆରି ପାନିତେଇବୁଡ଼ି ତୁବନ୍ ନେଲାଇ ।

୯ ଗଟେକ୍ ରାତି, ପାଉଲ୍ ଦରସନ୍ ଦେକ୍ଲା । ଦରସନେ ମାପୁରୁ ତାକେ କଇଲା, “ଡର୍ ନାଇ, ଜାନାଇତେ ରଅ, ସେଟା ତେବାନାଇ । ୧୦ କାଇକେ ବଇଲେ ମୁଇ ତର୍

ସଙ୍ଗେ ଆସି । କେ ତମ୍ଭଙ୍କେ କାଜିଟା କରି ନାପାରନ୍ତୁ, କାଜିକେବଇଲେ ଏ ନଥରେ ମର୍ତ୍ତ୍ୟ ବେସି ଲକ୍ଷ ଆଚଡ଼ ।” ୧୧ ସେଟାରପାଇ ପାଉଲ୍ ପରମେସରର ବାକିଅ ସିକିଆ ଦେଇ, ତେଇ ବର୍ତ୍ତମାନ ଚ ମାସ୍ ଜାକ ରଇଗାଲା ।

୧୨ ଗାଲିୟନ୍ ଆକାୟର ରମିଅ ସାସନ୍‌କାରିଆ ରଇଲା ବେଲେ, ଜିଉଦିମନ୍ ଏକ୍‌ଡୁର୍‌ଅଇ ପାଉଲ୍‌କେ ଦାରି ବିଚାରନା ଜାଗାଇ ନେଲାଇ । ୧୩ ସେମନ୍ କଇଲାଇ, “ଏ ଲକ୍ଷ ଆମର୍ ନିୟମ୍ ବିରଦେ ପରମେସରକେ ପାର୍ତନା କରବାକେ ଲକ୍ଷମନ୍‌କେ ସୁତରାଇଲାନି ।”

୧୪ ପାଉଲ୍ କାତା ଅଇବାକେ ଗାଲାବେଲେ, ଗାଲିଅ ଜିଉଦିମନ୍‌କେ କଇଲା, “ଜିଦି ଇତି କାଜି ଦସ୍ ନଇଲେ ଅପ୍ରାଦର୍ ବିସଇ ରଇସି, ତେବେ ତମର୍ ବିସଇ ସମାଲି କରି, ତମର୍ କାତା ସୁନ୍‌ଦାଟା, ମର୍ ଇସାବେ ଟିକ୍ ଅଇସି । ୧୫ ମାତର୍ ଏ କାତା ତମର୍ ବିଦିବିଦାନ ଆରି ରିତିନିତିର୍ କାତା ଅଇଲାର୍ ପାଇ, ଏଟା ତମେ ଟିକ୍‌କରବାଟା ନିକ ଅଇସି । ମୁଇ ଏକ୍ତି ବିଚାର ନ କରି ।” ୧୬ ଏକ୍ତି କଇକରି ସେମନ୍‌କେ ବିଚାରନା ଜାଗାଇଅନି କେଦିଦେଲା । ୧୭ ସେମନ୍ ପାର୍ତନା ଗରର୍ ମୁକିଆ ସସ୍ତନସ୍‌କେ ଦାରି ବିଚାରନା ଜାଗାର୍ ମୁଆଟେ ମାଡ଼ମାରଲାଇ । ମାତର୍ ଗାଲିଅ ସେଟାକେ ମନ୍‌ଦେଏ ନାଇ ।

ସିରିଆର ଆନ୍‌ଟିୟକ୍‌ତେଇ ପାଉଲ୍ ବାଅଡ଼ଲା

୧୮ ପାଉଲ୍ କରନ୍ତିତେଇ ବିସ୍‌ବାସି ବାଇମନ୍ ସଙ୍ଗେ ବେସି ବେଲା ଜାକ ରଇଲା । ତାର୍‌ପଟେ ସେମନ୍‌କେ ଚାଡ଼ି ପିରିସ୍‌କିଲା ଆରି ଆକିଲାର୍ ସଙ୍ଗେ, ସିରିଆ ଜିବାକେ ପାନିଜାଜେ ବାଟ୍ ଦାରଲାଇ । ସେକେରିଆଅନି ଜିବାଟା ଆରାମ୍ କରବା ଆଗ୍‌ତୁ ତାକର୍ ଗଟେକ୍ ମାନଡ଼ ଇସାବେ ପାଉଲ୍ ମୁଣ୍ଡ କୁରାଇଅଇଲା । ୧୯ ସେମନ୍ ଏପିସ୍‌ସ୍‌ତେଇ କେଟ୍‌ଲା ପଟେ ପାଉଲ୍ ପିରିସ୍‌କିଲା ଆରି ଆକିଲାକେ ପାଟାଈଦେଲା । ତେଇ ସେ ପାର୍ତନା ଗରେ ଜାଇ ଜିଉଦିମନ୍‌ର୍ ସଙ୍ଗେ କାତାବାର୍ତା ଅଇଲା । ୨୦ ଲକ୍ଷମନ୍ ତାକେ ଆରି ବେସି ଦିନ୍ ରଇବାକେ କଇଲାଇ, ମାତର୍ ସେ ରାଜି ନଇଲା । ୨୧ ଜିବା ବେଲାଇ ସେ ସେମନ୍‌କେ କଇଲା, “ଜିଦି ପରମେସର୍ ମନ୍ କଲେ, ତମର୍ ଲଗେ ବାଉଡ଼ି ଆଇବି ।” ତାର୍ ପଟେ ସେ ଏପିସେ ଅନି ଜାଜେ ଚଗି ଗାଲା ।

୨୨ ସେ ସିରିଆ କେଟିକରି ତେଇଅନି ଜିରୁସାଲାମେ ଗାଲା ଆରି ମଣ୍ଡଲିକେ ଜୁଆର୍ ଜାନାଇ ତେଇଅନି ଆନ୍‌ଟିକିଅ ଗାଲା । ୨୩ ତେଇ କେତେ ଦିନ୍ ରଇଲା ପଟେ, ସେ ଆରି ତରେକ୍ ଜିବାଟା ଆରାମ୍ କରି ଗାଲାତିଅ ଆରି ପିରିଜିଆ ବାଟ୍‌ଦେଇ ଗାଲା । ବାଟେ ବିସ୍‌ବାସିମନ୍‌କେ ବିସ୍‌ବାସେ ତାଟ୍ ଅଇରଇବାକେ ସାଆସ୍ ଦେଲା ।

ଏପିସ୍ ଆରି କରନ୍ତିତେଇ ଆପଲ

୨୪ ସେ ବେଲାଇ ଆଲେକ୍‌ଜାଣ୍ଡ୍ରିଆଇ ଜନମ୍ ଅଇ ରଇଲା, ଆପଲ୍ ନାଉର୍ ଗଟେକ୍ ଜିଉଦି ଏପିସେ ଆଇଲା । ସେ ଗଟେକ୍ ନିମାନ୍ ସଙ୍ଗେ କାତାକଡ ଆରି ଦରମ୍ ସାସ୍‌ତରେ ତାର୍ ବେସି ଗିଆନ୍ ରଇଲା । ୨୫ ସେ ମାପ୍‌ରୁ ଜିସୁର୍ ବାଟ୍ ବିସଇ ସିକିଆ ପାଇରଇଲା ଆରି ଆଡ଼ମାଇ ପୁରାପୁରୁନ୍ ଅଇକରି ବେସି ସାର୍‌ଦା ସଙ୍ଗେ ସଡ଼ କାତା ବାରକରି, ସିକିଆ ଦେଇତେ ରଇଲା । ମାତର୍ କାଲି ଜଅନ ତୁବନ୍ ଦେବା ବିସଇ ଜାନି ରଇଲା ।

୨୬ ପାର୍ତନା ଗରେ ସେ ନ ଡର୍‌ତେ ସିକିଆ ଦେବାକେ ଲାଗ୍‌ଲା । ତାର୍ ସିକିଆ ସୁନି ପିରିସ୍‌କିଲା ଆରି ଆକିଲା ତାକର୍ ନିଜର୍ ଗରେ ଡାକିନେଲାଇ ଆରି ତେଇ ପରମେସରର୍ ବାଟ୍ ବିସଇ ଅଦିକ୍ ବୁଜାଇଦେଲାଇ । ୨୭ ତାର୍ ପଟେ ଆପଲ୍ ଆକାୟା ରାଇଜେ ଜିବାକେ ଟିକ୍ କଲାକେ, ଏପିସର୍ ବିସ୍‌ବାସି ବାଇମନ୍ ତାକେ ସାଇଜ୍ କଲାଇ ଆରି ତାକେ ସାର୍‌ଦା ସଙ୍ଗେ ଗତିଆ କରବାକେ କଇ ଆକାୟାର୍ ବିସ୍‌ବାସିମନ୍‌କେ ଚିଟି ଲେକ୍‌ଲାଇ । ସେ ତେଇ କେଟିକରି ପରମେସର ଜିବନ୍ ଦୁକାଇଲାକେ ବିସ୍‌ବାସି ଅଇରଇବା ଲକ୍ଷମନ୍‌କେ ବେସି ସାଇଜ୍ କଲା । ୨୮ ଜିସୁ

ଜେ ମସିଅ, ତାକର୍ ବେସି ଡାବ୍ ଜୁକ୍ତି, ଦରମ୍ ସାସ୍ତରେଅନି ଜାନାଇ କରି, ଜିଉଦିମନ୍‌କେ ଆରାଇଲା ।

## ୧୯

### ଏପିସିଏ ପାଉଲ୍

୧ ଆପଲ୍ କରନ୍ତିଏ ରଇଲାବେଲେ, ପାଉଲ୍ ସେ ରାଇଜର୍ ଉପର୍ ବାଗେ ବୁଲି ସାରାଇ, ଏପିସିଏ କେଟ୍‌ଲା । ତେଇ ସେ କେତେଟା ସିସ୍‌ମନ୍‌କେ ବେଟ୍ ଅଇଲା । ୨ ସେମନ୍‌କେ ପାଚାରୁଲା “ତମେ ବିସ୍‌ବାସି ଅଇବା ବେଲାଇ ସୁକଲ୍ ଆଡ଼ମା ପାଇରଇଲାସ୍ କି ?”

ସେମନ୍ କଇଲା, “ସୁକଲ୍ ଆଡ଼ମା ଆତେ ବଲି ଆମେ କେବେ ମିସା ସୁନ୍ ନାଇ ।” ୩ ପାଉଲ୍ ପାଚାରୁଲା, “ସେନ୍ତି ଆଲେ ତମେ କେନ୍ତାରି ତୁବନ୍ ନେଇ ଆଟାସ୍ ?”

ସେମନ୍ କଇଲା “ତୁବନ୍ ଦେଉ ଜଅନର୍ ତୁବନ୍ ।”

୪ \*ପାଉଲ୍ କଇଲା, “ଜନ୍ ଲକ୍‌ମନ୍ ପାପେଅନି ବାଉଡ଼ି ରଇଲା, ଜଅନର୍ ତୁବନ୍ ସେମନ୍‌ର ପାଇ ଟିକ୍ ରଇଲା । ମାତର୍ ତାପତେ ଜେ ଆଇବାର ରଇଲା, ଜନ୍‌ଟା କି, ଜିସୁ, ତାର ଲଗେ ବିସ୍‌ବାସ୍ କରବାକେ, ଜଅନ୍ ଇସ୍‌ରାଏଲ୍ ଲକ୍‌ମନ୍‌କେ କଇରଇଲା ।”

୫ ଏଟା ସୁନି ସେମନ୍ ମାପୁରୁ ଜିସୁର୍ ନାଉଁ ଦାରି ତୁବନ୍ ନେଲା । ୬ ପାଉଲ୍ ସେମନ୍‌ର ଉପରେ ଆଡ଼ ଚିଇଲା ଆରି ସୁକଲ୍ ଆଡ଼ମା ତାକର୍‌ଟାମେ ଉତରଲା । ସେମନ୍ ବିନ୍ ବିନ୍ ବାସାଇ କାତା କଇଲା ଆରି ପରମେସରର୍ ସୁବ୍ କବର୍ ଜାନାଇଲା । ୭ ସେମନ୍ ମୁନ୍‌ସ୍ ପିଲା ବାର ଲକ୍ ରଇଲା ।

୮ ତାର ପତେ ପାଉଲ୍ ତିନ୍ ମାସ୍ ଜାକ ନ ଡର୍‌ତେ ପାର୍‌ତନା ଗରେ କାତାବାର୍ କରି ପରମେସରର୍ ରାଇଜ୍ ବିସଇ ସେମନ୍‌ର ମନେ ବିସ୍‌ବାସ୍ ଜନ୍‌ମାଇବାକେ ଚେସ୍‌ଟା କଲା । ୯ ମାତର୍ ସେମନ୍‌ର ବିଡ଼ରେଅନି କେତେକ୍ ଲକ୍‌ର୍ ମନ୍ ଡାବ୍ ରଇଲା । ସେମନ୍ ବିସ୍‌ବାସ୍ କରନ୍‌ନାଇ । ଦଲ୍‌ର୍ ସବୁ ଲକ୍‌ର୍ ମୁଆଟେ ସେମନ୍ ମାପୁରୁର୍ ବାଟ୍ ବିସଇନେଇ, ତିପୁଲ୍ କାତା କଇଲା । ସେଟାପାଇ ପାଉଲ୍ ସେମନ୍‌କେ ଚାଡ଼ି, ବିସ୍‌ବାସିମନ୍‌କେ ନେଇ, ସବୁ ଦିନ୍ ଟିରାନସ୍ ନାଉଁର୍ ଗରେ ନିଆଇ କରବାର୍ ଦାରୁଲା । ୧୦ ଏଟା ଦୁଇ ବରସ୍ ଦାରି ଚାଲୁଲା । ରମ୍ ଦେସର୍ ଆସିଆ ଦେସେ ବାସା କରିରଇବା ବେସି ଜିଉଦି ଆରି ଗିରିକ୍ ଲକ୍ ମିସା ମାପୁରୁର୍ ବାକିଅ ସୁନ୍‌ଲା ।

### ଏସ୍‌କେବାର୍ ପଅମନ୍

୧୧ ପରମେସର୍ ପାଉଲ୍‌ଡେଇଅନି ବେସି ବଡ଼ ବଡ଼ କାବାଅଇଜିବା କାମମନ୍ କଲା । ୧୨ ଏକ୍ତି କି ପାଉଲ୍ ପୁଟିଅଇବା ଉର୍‌ମାଲ୍ ଆରି ବସ୍‌ତର୍ ରଗିମନ୍‌ର୍ ଲଗେ ନେଲେ, ସେମନ୍ ନିମାନ୍ ଅଇତେ ରଇଲା । ସେମନ୍‌ର ଗାଗଡେଅନି କାରାପ୍ ଆଡ଼ମାମନ୍ ସବୁ ବାରଇଜାଇତେ ରଇଲା । ୧୩ କେତେଟା ଏନେତେନେ ବୁଲ୍‌ବା ତୁମା ଚାଡ଼ାଇବା ଜିଉଦିମନ୍ ମିସା, ଜିସୁର୍ ନାଉଁ ଦାରି ତୁମା ଚାଡ଼ାଇବାକେ ଚେସ୍‌ଟା କଲା । ସେମନ୍ କାରାପ୍ ଆଡ଼ମାମନ୍‌କେ କଇତେ ରଇଲା, “ପାଉଲ୍ ଜାନାଇବା ଜିସୁର୍ ନାଉଁ ଦାରି ତକେ ଆଦେସ୍ ଦେଲିନି ।” ୧୪ ଏସ୍‌କେବା ନାଉଁର୍ ଗଟେକ୍ ଜିଉଦି, ବଡ଼ ପୁଜାରିର୍ ସାଡ଼ଟା ପିଲାମନ୍, ଏ ରକାମ୍ କରତେ ରଇଲା ।

୧୫ ମାତର୍ କାରାପ୍ ଆଡ଼ମା ସେମନ୍‌କେ କଇଲା, “ମୁଇ ଜିସୁକେ ଜାନି ଆରି ପାଉଲ୍‌କେ ଚିନ୍‌ଲି ଆଚି, ମାତର୍ ତମେ କେ ?”

୧୬ କାରାପ୍ ଆଡ଼ମା ଦାରିରଇଲା ଲକ୍, ସେମନ୍‌କେ ଦାରି ଚାବ୍‌କାତର୍ କରି ପାକାଇଲା । ସେମନ୍‌ର ଲୁଗାପଟିଆ ଚିରି ତୁମ୍‌ଣ୍ଟା କରିଦେଲା । ସେମନ୍ କଣ୍ଡିଆ

ବଣ୍ଟିଆ ଅଇ ତାର ଗରେଅନି ବାରଇ ପାଲାଇଲା । ୧୭ ଏପିସେ ବାସାଅଇରଇବା ଜିଉଦି ବିସ୍ବାସିମନ୍ ଆରି ଗିରିକ୍ ଲକ୍ମନ୍, ଏ ବିସଇ ସୁନି ତରିଗାଲା ଆରି ତେଇ ମାପୁରୁ ଜିସୁର୍ ନାଉଁ ଅଦିକ୍ ତାକ୍ପୁଟା ଅଇଲା । ୧୮ ବିସ୍ବାସିମନ୍ ବିତ୍ତରେଅନି ବେସି ଲକ୍ ସବୁର୍ ମୁଆଟେ ନିଜେ କଲା କାରାପ୍ କାମ୍ ମାନଲା । ୧୯ ପାଙ୍ଗନ୍ ବିଦିଆ ଅବିଆସ୍ କରେତେରଇବା ବେସି ଲକ୍ମନ୍ ତାକର୍ ବଇମନ୍ ଆନି ଚୁଲିଆଇକରି ସବୁ ଲକର୍ ମୁଆଟେ ପଡାଇ ଦେଲା । ସବୁ ମିସିକରି ସେମନ୍ ବଇର୍ ଦାମ୍ ପଟାସ୍ ଅଜାର ରୁପାଟାଙ୍ଗା ଏଡକି ରଇଲା । ୨୦ ଏନ୍ତ୍ରବାବ୍ରେ ପରମେସରର୍ ବାକିଅ ଅଦିକ୍ ଅଦିକ୍ ଗୁଲାଇବାଟେ ଉଡ଼ରା ଅଇଜାଇ ଅଦିକ୍ ବପୁ ଅଇବାର୍ ଦାରଲା ।

ଏପିସସ୍ତେଇ କିରମାର

୨୧ ଏ ସବୁ ଗଟ୍ଟନା ପଟେ ପାଉଲ୍ ମାସିଦନିଆ ଆରି ଆକାୟା ବାଟ୍ ଦେଇ ଜିରୁସାଲମେ ଜିବାକେ ଟିକ୍ କଲା । ସେ କଇଲା, “ତେଇ ଗାଲା ପଟେ, ମୁଇ ରମ୍ ଦେସେ ମିସା ଜିବାର୍ ଆଟେ ।” ୨୨ ସେଟାର୍ପାଇ ସେ ତାର୍ ଦୁଇଟା ସଙ୍ଗାରି, ତିମତି ଆରି ଏରାସ୍ତସ୍ତକେ ମାସିଦନିଆଇ ପାଟାଇଲା, ମାତର୍ ସେ ନିଜେ ଆସିଆ ଦେସେ ଆରି କେତେ ଦିନ ରଇଲା ।

୨୩ ଏଡକି ବିତ୍ତରେ ମାପୁରୁ ଦେକାଇରଇବା ବାଟ୍ ବିସଇ ନେଇ, ଗଟେକ୍ ବେସି ବଡ଼ ଗଣ୍ଡଗଲ୍ ଅଇବାଟା ଉବଜ୍ଜଲା । ୨୪ ଦିମିତିରିୟ ନାଉଁର୍ ଗଟେକ୍ ରୁପାର୍ ପୁଡ଼ଲା ତିଆର୍ କରୁ, ଆର୍ତେମି ଦେବିର୍ ମନ୍ଦିରେ ପୁଡ଼ଲା ତିଆର୍ କର୍ତେ ରଇଲା । ଏନ୍ତାରି ବେବାରକରି ପୁଡ଼ଲା ତିଆର୍ କରୁମନ୍, ବେସି ଲାବ୍ ପାଇତେ ରଇଲା ।

୨୫ ସେଟାର୍ପାଇ ସେ ତାର୍ ସଙ୍ଗର୍ ବେବାରମନ୍ଦକେ ରୁଣ୍ଡାଇକରି କଇଲା, “ଆଗିଆମନ୍, ଏ ବେବାର୍ ଆମ୍କେ ସାଉକାର୍ କଲାଆଟେ ବଲି ସବୁ ଲକ୍ ଜାନାସ୍ । ୨୬ ଏବେ, ଏ ଲକ୍ ପାଉଲ୍ କାଇଟା କଲାନି, ସେଟା ତମେ ନିଜେ ଦେକିପାରୁଲାସ୍ନି ଆରି ସୁନି ପାରୁଲାସ୍ନି । ସେ କଇଲାନି, ଲକର୍ ଆତେ ତିଆର୍ କଲା ଦେବ୍ତା ସବୁ ବିଲ୍କୁଲ୍ ଦେବ୍ତା ନଅଡ଼ । ସେ ଇତି ଏପିସେ ଆରି ସବୁ ଆସିଆ ଦେସେ ବେସି ଲକ୍ମନ୍ଦକେ ଏ ବିସଇ କଇ ଉସକାଇଲାନି । ୨୭ ସେଟାର୍ପାଇ ଆମର୍ ବେବାର୍ ବୁଡ଼ିଜିବାର୍ ଉପ୍ରେ ଆଟେ । କାଲି ସେଡକି ନଏଁ, ଜନ୍ ଦେବି ଆସିଆଇ ଆରି ଗୁଲାଇ ଜଗତେ ସବୁରଟାନେଅନି ପୁଜାପାଇସି, ସେ ତାକ୍ପୁଟା ଆର୍ତେମି ଦେବି, ମନ୍ଦିରର୍ ତାକ୍ପୁଟା ଆରି ନ ରଏ, ଆରି ଆର୍ତେମି ଦେବିର୍ ମର୍ଜିତା ନସ୍ତ ଅଇସି ।”

୨୮ ଲକ୍ମନ୍ ଏ କାତା ସୁନି ରିସା ଅଇଗାଲା ଆରି ଆଉଲିଅଇ କଇଲା, “ଏପିସିୟର୍ ଆର୍ତେମି ବଡ଼ଦେବିର୍ ତାକ୍ପୁଟା ଅ !” ୨୯ ଏ ଗଣ୍ଡଗଲ୍ ଅଇଲାଟା ଗୁଲାଇ ନଅରେ କେଟିଗାଲା । ଲକ୍ମନ୍ ପାଉଲ୍ ସଙ୍ଗ ରଇବା ମାକିଦନିଆର୍ ଗାୟ ଆରି ଆରିସ୍ତାକସ୍, ଦୁଇଲକ୍କେ ଦାରି, ଦାପ୍ରେ ଜୁଇଦ୍ ବାଟେ ପାଲାଇଲା । ୩୦ ତେଇ ପାଉଲ୍ ଏକ୍ଲାସେ ଲକ୍ମନ୍ ବିତ୍ତରେ ଜିବାକେ ମନ୍କଲା । ମାତର୍ ବିସ୍ବାସିମନ୍ ତାକେ ବିତ୍ତରେ ଜିବାକେ ଚାଡ଼ନାଇ । ୩୧ ଆସିଆ ରାଇଜର୍ କେତେଟା ମୁକିଅ ସାସନ୍ କାରିଆମନ୍ ମିସା ପାଉଲ୍ ମଇତର୍ ରଇଲାଇଜେ, ପାଉଲ୍କେ ଜୁଇଦ୍ ପଡ଼ିଆଇ ନ ଜାଅ ବଲି, କବର୍ ପାଟାଇଲା । ୩୨ ଏଡକି ବିତ୍ତରେ ରୁଣ୍ଡିରଇବା ସବୁ ଲକ୍ ରିସା ଅଇଜାଇରଇଲା । ଲକ୍ମନ୍ ଦଲ୍ଦଲ୍ ଅଇକରି ଏକାତା, ସେ କାତା କଇକଇ କରି ଆଉଲିଅଇ ଜାଇତେ ରଇଲା । ମାତର୍ ସେମନ୍ ବିତ୍ତରେଅନି କେତେକ୍ ଲକ୍, କାଇକେ ରୁଣ୍ଡିଆଟ୍ ବଲି ନାଜାନିରଇଲା । ୩୩ ସେମନ୍ ବିତ୍ତରେଅନି କେତେକ୍ ଲକ୍ ଏଟାର୍ପାଇ ଆଲେକ୍ଜାଣ୍ଡ୍ରାକେ ଦାଇ କଲା । କାଇକେବଇଲେ ଜିଉଦି ଲକ୍ମନ୍, ଆଗ୍ତୁ ତାକେ ଟିଆ କରାଇରଇଲା । ଆଲେକ୍ଜାଣ୍ଡ୍ରା ଲକ୍ମନ୍ଦକେ ଆଡ଼ଟେକି ଚିମ୍ବରାଅଇ ରଇବାକେ କଇଲା ଆରି



ତାରୁ ବାସନ୍ତୀନେ ବିସ୍ୱାସିମନରୁ ବାଟେ ଅଇକରି ବୁଜାଇବାକେ ଚେସଟା କଲା । ୩୪ ମାତରୁ ସେ ଗଟେକ୍ ଜିଉଦିଲକ୍ ବଲି ଜାନିକରି ଲକ୍ମନ ଏକାତରେକ୍ ଆଉଲିଅଇକରି “ଆରୁତେମି ଦେବିରୁ ଜୟ ଜୟ ଅ !” ବଲି ଦୁଇ ଗଟା ଜାକ ଆଉଲି ଅଇ ରଇଲା ।

୩୫ ପଟେ ନଅରୁ ଅଦିକାରେ ରଇବା ଗଟେକ୍ କାମ୍ବରୁ, ଲକ୍ମନକେ ବୁଜା ସୁଜା କରି ଚିମ୍ବରା କଲା ଆରି କଇଲା, “ଏ ଏପିସିୟର୍ ବାଇମନ୍, ଏପିସିୟ ନଅରେ ବଡ଼ଦେବି ଆରୁତେମିରୁ ମନ୍ଦିରୁ ଆରି ଆକାସେଅନି କସ୍ତି ଆଇଲା ସୁକଲ୍ ପାକ୍ନା ରକିଆ କରବା ଦାଇଡ଼, ଏପିସିୟ ନଅରେ ରଇବା ଲକ୍ମନରୁ । ୩୬ କେ ମିସା ଏଟା ନଏଁ ବଲି କଇନାପାରଡ଼ । ସେଟାରୁ ପାଇ ତମେ ସବୁ ଲକ୍ ଚିମ୍ବରାଇ ଉଆ । କାଇକାମ୍ ମିସା ବକ୍ସୁଆପାରା କରାନାଇ । ୩୭ ଏ ଲକ୍ମନ ମନ୍ଦିରେଅନି କାଇଟା ଚରି କରଡ଼ ନାଇ, କି ଆମରୁ ଦେବିରୁ ବିରଦେ, କାଇମିସା କାରାପ୍ କାତା କଅଡ଼ ନାଇ, ଏଲେମିସା ତମେ ଏମନ୍କେ ଦାରି ଆନିଆରାସ୍ । ୩୮ ଜଦି ଦିମିତିରିୟ ଆରି ତେଇରୁ ପୁଡ଼ଲା ତିଆରକରୁମନ୍କେ, କାରୁ ବିରଦେ ଦାବାକରୁବାଟା ଆତେ, ସେଟା ବିଚାରୁ କରୁବାକେ ଆମରୁ ଲକ୍ମନ ଆତଡ଼ । ଆରି ବିଚାରୁ ଅଇବା ଗଟେକ୍ ଦିନ୍ ଆତେ । ତେଇ ସେ ଦାବା ବିସଇ କଇପାରାସ୍ । ୩୯ ଜଦି ଆରୁତେଇଅନି ଆରି ଅଦିକ୍ କାଇଟା ଜାନୁବାକେ ମନ୍ କଲାସ୍ତି, ତେବେ ଲକ୍ମନ ଟିକ୍‌କଲା ନିୟମରୁ ସବାଇ, ସେଟା ଟିକ୍ କରାଅଇସି । ୪୦ ଆଜି ଜାଇଟା ଗର୍ଲା ଆତେ, ତେଇ ଗଣ୍ଡଗଲ୍ କରୁବା ଆରି ଦାବା କରୁବା ବିସଇ ଆମରୁ ବିରଦେ କାତା ଉଟିପାରେ । ଏ ଗଣ୍ଡଗଲରୁ କାଇମିସା କାରନ୍ ଦେକାଇ ନାପାରୁ ।” ୪୧ ଏ ସବୁ କାତା କଇ ସେ ଲକ୍ମନକେ ଚିମ୍ବରା କରାଇ ସବା ସେସ୍ କଲା ।

## ୨୦

ପାଉଲ୍ ମାସିଦନିଆ ଆରି ଆକାୟା ଜିବାଟା

୧ ଗଣ୍ଡଗଲ୍ ବନ୍ଦ ଅଇଲା ପଟେ, ପାଉଲ୍ ବିସ୍ୱାସିମନକେ ଗଟେକ୍‌ତେଇ ରୁଣ୍ଡାଇ ସାର୍‌ଦାରୁ କାତା ସୁନାଇଲା । ସେମନ୍କେ ଜିବିବେ ବଲି କଇ, ତେଇଅନି ବାରଇ ମାକେଦନିଆଇ ଗାଲା । ୨ ତେଇରୁ ସବୁ ଜାଗାଇ ଗାଲା, ଆରି ବେସି ଲକ୍ମନକେ ଉପ୍‌ଦେସ୍ ଦେଇ, ସାର୍‌ଦା କରାଇଲା, ତାରୁପଟେ ସେ ଗିରିସେ ଗାଲା । ୩ ତେଇ ସେ ତିନ୍ ମାସ୍ ରଇଲା, ଆରି ସିରିଆଇ ଜିବାକେ ତିଆରୁ ଅଇଲାବେଲେ, ଜିଉଦିମନ୍ ତାକରୁ ବିରଦେ କୁର୍‌ପାଁଟିଲାଇନି ବଲି କବରୁ ପାଇ ମାକିଦନିଆବାଟେ ବାଉଡ଼ି ଜିବାକେ ଟିକ୍ କଲା । ୪ ବେରିଆତେଇ ରଇବା ପୁରୁରୁ ପଅ ସପାତରୁ, ତେସ୍‌ଲିନିକିୟ ଆରିସତାକସ୍ ଆରି ସେକ୍ସୁଦ୍, ଦରୁବିରୁ ଗାୟ, ଏସିଆ ଦେସରୁ ତୁକିକ୍, ତରୁପିମ୍ ଆରି ତିମତି । ୫ ସେମନ୍ ଆଗରୁ ଜାଇ ତରିୟାଇ ଆମ୍‌କେ ଜାଗି ରଇଲାଇ । ୬ କମିରୁ ନ ପାକାଇ ରୁଟି କାଇବା ପରବରୁ ପଟେ, ଆମେ ପିଲିପେଅନି ପାନିଜାଜେ ଜାଇ ପାଁଟ୍ ଦିନ୍ ପଟେ ତରୟାଇ ସେମନରୁ ସଙ୍ଗ୍ ମିସ୍‌ଲୁ ଆରି ତେଇ ଗଟେକ୍ ଆର୍ ଜାକ ରଇଲୁ ।

ପାଉଲ୍ ତରୟାତେଇ ସାରାସାରି ଜାକ ରଇବାଟା

୭ ଆଟରୁ ପରୁଡ଼ୁମ୍ ଦିନରୁ ସଞ୍ଜବେଲାଇ ଆମେ ସବୁଲକ୍ ମିସି କାଇବାକେ ରୁଣ୍ଡଲୁ । ପାଉଲ୍ ଲକ୍ମନକେ ମଜାରାତି ଜାକ ଉପ୍‌ଦେସ୍ ଦେଲା । କାଇକେବଇଲେ ତାରୁ ଆରକରୁ ଦିନେ ସେ ଜାଗା ଚାଡ଼ି ଜିବାରୁ ରଇଲା । ୮ ଜନ୍ ଉପରୁ ତାଲାରୁ ବାକ୍‌ରାଇ ଆମେ ସବା କର୍ତେ ରଇଲୁ, ତେଇ ବେସି ବଡ଼ିମନ୍ ଲାଗିରଇଲା । ୯ ତେଇ ଇଉଟିକସ୍ ନାଉରୁ ଗଟେକ୍ ଦାଙ୍ଗ୍‌ଡା କିଡ଼କି ଲଗେ ବସି ରଇଲା । ପାଉଲ୍ କାତା କଇବା ବେଲାଇ, ତାକେ ଗୁନ୍ ଡାବି ଆଇଲା, ସେ ଗୁନ୍‌ରୁ ଲାଡେ, ତିନ୍‌ତାଲାରୁ ଗରୁ ଉପ୍‌ରେଅନି ତଲେ ଅଦ୍‌ରିଦେଲା । ସେମନ୍ ତାକେ ଉଟାଇବା ବେଲାଇ, ସେ

ମରିଜାଇରଇଲା । ୧୦ ମାତର ପାଉଲ୍ ତଲ୍ଲକେ ଉଡ଼ରି ଆସି ତାକେ ପାଗାଲି, ଦାରି କଇଲା, “ତରା ନାଇ । ତାକେ ଜିବନ୍ ଆଟେ ।” ୧୧ ତାରପଟେ ସେ ଉପରେ ବାଉଡ଼ିଜାଇ ରୁଟି ବାଙ୍ଗାଇ କାଇଲା, ଆରି ବେଲ୍ ଉଦ୍‌ବାଜାକ ସେମନର୍ ସଙ୍ଗ୍ ବେସି କାତାବାର୍ତା ଅଇ ତେଇଅନି ବାରଇଲା । ୧୨ ଲକ୍‌ମନ୍ ଦାଙ୍ଗ୍‌ତାକେ ଜିବନ୍ ରଇଲାଟା ଦେକି ତାର୍ ଗରେ ଦାରିଗାଲାଇ ଆରି ସାର୍‌ଦା ଅଇଲାଇ ।

ତରୟାଇ ଅନି ମିଲିଟସେ ଜିବାଟା

୧୩ ଆମେ ଆଗତୁ ଜାଜେ ଚଗି, ଆସସେ ଜିବାକେ ବାରଇଲୁ । ତେଇଅନି ଆମେ ପାଉଲ୍‌କେ ଜାଜେ ନେଇଜିବାକେ ଟିକ୍ କରଇରଇଲୁ । କାଇକେବଇଲେ ସେ ସମ୍‌ଦୁର୍‌ବାଟେ ଜାଇ, ସେ ଜାଗାଇ କେଟ୍‌ବି ବଲି କଇରଇଲା । ୧୪ ସେ ଜେଡେବେଲା ଆମ୍‌କେ ଆସସେ ବେଟ୍ ଅଇଲା, ଆମେ ତାକେ ଜାଜେ ଚଗାଇ ମିଡିଲିନି ଜାଗାଇ ଗାଲୁ । ୧୫ ତେଇଅନି ଆରି ଜିବାର୍‌ଦାରି ତାର୍ ଆର୍‌କର୍ ଦିନେ କିଅସ୍ ଲଗେ କେଟ୍‌ଲୁ । ତାର୍ ଆର୍‌କର୍ ଦିନେ ମିଲିଟସେ କେଟ୍‌ଲୁ । ଆରି ଗଟେକ୍ ଦିନ୍ ପଟେ ଆମସେ କେଟ୍‌ଲୁ । ତାର୍ ଆର୍‌କର୍ ଦିନେ ମିଲିଟସେ କେଟ୍‌ଲୁ । ୧୬ ଆସିଆ ରାଇଜେ ଆରି ବେସି ଦିନ୍ ନ ରଇକରି, ଏପିସସ୍ କଣ୍ଡିକଣ୍ଡି ଜାଜ୍ ଚାଲାଇବାକେ ପାଉଲ୍ ଟିକ୍ କଲା । ଜଦି ଅଇପାର୍‌ସି, ପେନ୍‌ଟିକସ୍‌ଟ୍ ଦିନେ ଜିରୁସାଲାମ୍ କେଟ୍‌ବାକେ ସେ ତେରେପେଡେ ଅଇଡେ ରଇଲା ।

ଏପିସି ମଣ୍ଡଲିର୍ ନେତାମନ୍‌କେ ପାଉଲ୍‌ର୍ ପାଟାଇବା କାତା

୧୭ ପାଉଲ୍ ମିଲିଟସେଅନି ଏପିସି ମଣ୍ଡଲିର୍ ପାର୍‌ଟିନ୍ ମନ୍‌କେ ତାର୍ ସଙ୍ଗ୍ ମିସ୍‌ବାକେ ଡାକାଇଲା । ୧୮ ସେମନ୍ ଆସି କେଟ୍‌ଲାକେ ପାଉଲ୍ କଇଲା, “ରମିୟ ରାଇଜର୍ ଆସିଆଇ କେଟ୍‌ଲା ପର୍‌ଡୁମ୍ ଦିନେଅନି, କେନ୍ତ୍ର ତମର୍ ସଙ୍ଗ୍ ବେସି ବେଲା କାଟାଇଲି ଆଟି, ସେଟା ତମେ ଜାନିଆଟାସ୍ । ୧୯ ଜିଉଦିମନର୍ କୁଟ୍ ପାଁର୍‌ନାର୍ ଲାଗି, ମକେ ଜନ୍ ଦୁକ୍ କସ୍‌ଟ ପାଇକରି ମୁରଟ୍‌ବାକେ ପଡ଼ଲା, ସେ ବିଡ଼ରେ ମୁଇ ପରମେସରର୍ ସେବାକାରିଆ ଇସାବେ ଆଁସୁପାନି ଜଡାଇ, ମୁଣ୍ଡ ତଲେକରି, କାମ୍ କଲିଆଟି । ୨୦ ତମେ ଜାନିଆଟାସ୍, ଲକ୍‌ମନର୍ ଲଗେ କବର୍ ଜାନାଇଲାବେଲେ ଆରି ତମର୍ ଗର୍‌ମନ୍‌କେ ଉପ୍‌ଦେସ୍ ଦେଲାବେଲେ, ତମର୍ ଉପ୍‌କାର୍ ଅଇଲାପାରା କାଇ ବିସଇ ମିସା ଜାନାଇବାକେ ମୁଇ ଦୁଇମନିଆ ଅଇନାଇ ।” ୨୧ ଜିଉଦି ଆରି ଗିରିକ୍ ଲକ୍‌ମନ୍‌କେ ସବୁକେ ମୁଇ ଡାଟ୍ ସଙ୍ଗ୍ ଜାଗର୍‌ଡ଼ ରଇବା କାତା ସୁନାଇ ରଇଲି, ଜେନ୍ତ୍ରାରିକି, ସେମନ୍ ପାପେଅନି ବାଉଡ଼ିକରି ପର୍‌ମେସରର୍ ବାଟେ ମନ୍ ଦେଅଡ଼ ଆରି ମାପ୍‌ରୁ ଜିସୁକେ ବିସ୍‌ବାସ୍ କରଡ଼ । ୨୨ ଏବେ ସୁକଲ୍‌ଆଡ଼ମାର୍ ଚାଲ୍‌ନାଦେଲା ଆଦେସ୍ ମାନିକରି, ମୁଇ ଜିରୁସାଲମେ ଗାଲିନି । ତେଇ ମକେ କାଇଟା ଅଇସି ନାଜାନି । ୨୩ ସୁକଲ୍‌ଆଡ଼ମା ମକେ ଜାଗର୍‌ଡ଼ କରିଦେଇ ଆଟେ ଜେ, ମୁଇ ସବୁ ନଅରେ ବନ୍ଦି ଗରେ ରଇକରି କସ୍‌ଟ ପାଇବି । ୨୪ \*ମର୍ ନିଜର୍ ଜିବନ୍, ମର୍ ପାଇ, ମୁଇ ଇନ୍ କଲିନି । ପର୍‌ମେସରର୍ ଜିବନ୍ ଦୁକାଇଲା ବିସଇ ଆରି ମାପ୍‌ରୁ ଜିସୁ ଜନ୍ କାତା ଜାନାଇବାକେ ମକେ ଦାଇଡ଼ ଦେଲାଆଟେ, ସେଟା ସାରାଇବି ଆରି ସୁବ୍ କବର୍ ଜାନାଇବାଟା ପୁରାପୁରନ୍ କରବି । ଏଡ଼କି ସେ ମୁଇ ମନ୍ କଲିନି ।

୨୫ “ପର୍‌ମେସରର୍ ରାଇଜ୍ ବିସଇ ଜାନାଇବାକେ ମୁଇ ତମର୍ ସବୁ ଲକ୍‌ର୍ ଲଗେ ଜାଇଆଟି । ଏବେ ମୁଇ ଜାନିଆଟି, ତମର୍ ବିଡ଼ରେଅନି କେମିସା ମର୍ ମୁଁ କେବେ ଦେକି ନାପାରାସ୍ । ୨୬ ତେବର୍‌ପାଇ ଆଜି ବେଲା ମିଲ୍‌ଲା ଆଟେ ବଲି ମୁଇ ଡାଟ୍ ସଙ୍ଗ୍ ତମ୍‌କେ ଜାନାଇଲିନି । ତମର୍ ବିଡ଼ରେଅନି କେ ଜଦି ବାଟ୍ ବାନା ଅଇଗାଲେ, ସେଟାର୍‌ପାଇ ମୁଇ ଦାଇ ନଇ । ୨୭ କାଇକେବଇଲେ ତମର୍‌ଟାମେ ପର୍‌ମେସରର୍ ସବୁଜାକ ଆଦେସ୍ ଜାନାଇବାକେ, ମୁଇ ଦୁଇମନିଆ ଅଇନାଇ ।

୨୮ ତେବେ ପାଇ ତମେ ନିଜର ବିଷୟ ଆରି ସୁକଲ୍‌ଆଡ଼ମା ତାର ସବୁ ଗିଆନେ ଜନ୍ ବିସ୍‌ବାସି ମାନ୍ୟାକେ ଦେକାରକାପାଇ ଚାଡ଼ିଦେଇ ଆଚେ, ସେ ସବୁ ବିଷୟଟାଣେ ଜାଗରତ୍ ଉଆ । ମେଣ୍ଟା ଚାରାଉ ଗଉଡ଼ପାରା ପରମେସରର୍ ମଣ୍ଡଲିର ଜତନ୍ ନିଆ । ସେ ମଣ୍ଡଲିକେ ପରମେସର୍ ତାର ନିଜର ବନିଦେଇ ଗେନିଆଚେ । ୨୯ ମୁଇ ଜାନିଆଟି, ମୁଇ ଗାଲାପଚେ ତମର୍ ବିତ୍‌ରେ ଅପରବଲ୍ ଗଦଭୁରକାମନ୍ ଆଇବାଇ ଆରି ମେଣ୍ଟାଋସିକେ ତିନ୍ ଚତର୍ କରିସେ ଚାଡ଼ିବାଇ । ୩୦ ବେଲା ଆଇସି, ତମର୍ ନିଜର ଦଲର କେତେ ଲକ୍ ବିସ୍‌ବାସିମନ୍‌କେ ମିଟ୍ କାତା କଇ ତାକର୍ ବାଟେ ଡାକି ନେବାଇ । ୩୧ ସେ ବେଲେ ତମେ ଜାଗରତ୍ ଅଇ ରୁଆ । ମୁଇ ତିନ୍ ବରସ୍ ଜାକ ଦିନ୍ ରାତି ଆଁସୁପାନି ଜରାଇ, ତମ୍‌କେ ଗଟେକ୍ ଗଟେକ୍ କରି, ସବୁ ଲକ୍‌କେ ସିକାଇ ଆଟି, ଏ କାତା ଏତାଇରୁଆ ।”

୩୨ “ଏବେ ମୁଇ ତମ୍‌କେ ପରମେସର୍‌କେ, ଆରି ତାର ଜିବନ୍ ଦୁକାଇବା ବାକିଅଟାଣେ ସର୍ପି ଦେଲିନି । ସେ ବାକିଅ ତମ୍‌କେ ଡାଟ୍ କରାଇସି ଆରି ପରମେସରର୍ ଲକ୍‌ମନ୍‌ର୍ ପାଇ ଅଇବା ସବୁ ଆସିରବାଦ୍ ତମ୍‌କେ ଦେଇପାରସି । ୩୩ ମୁଇ କାର୍ ସୁନା, ରୁପା କି ଲୁଗାପଟିଆ ମିଲାଇବି ବଲି ଆସା କରିନାଇ । ୩୪ ମର୍ ଏ ଦୁଇଟା ଆଡେ କସର୍ କରି, ମର୍ ପାଇ ଆରି ମର୍‌ସଙ୍ଗ୍ ରଇବାଲକର୍ ପାଇ, ଦରକାର ରଇଲାଟା ପୁରାପୁରୁନ୍ କଲିଆଟି ଏଟା ତମେ ଜାନିଆଚାସ୍ । ୩୫ ମିଲାଇବାଟାଣେଅନି ଦାନ୍‌ଦେବାଟା ଅଦିକ୍ ସାର୍‌ଦାର୍ ବିଷୟ ଅଇରଇସି । ନିଜେ ଜିସୁ ମାପୁର୍ ଏ ବାକିଅ ସୁମର୍‌ନା କରିରଇଲା । ଏନ୍ତାରି କସର୍ କାମେଅନି ନାପାରଲା ଲକ୍‌ମନ୍‌କେ ସାଇଜ କର୍‌ବାର୍ ଆଚେ । ଏ ବିଷୟ ମୁଇ ତମ୍‌କେ ସବୁବେଲେ କରିଦେକାଇଆଟି ।”

୩୬ ଏ ସବୁ କାତା କଇସାରାଇ ପାଉଲ୍ ସେମନ୍‌ର୍ ସଙ୍ଗ୍ ମାଣ୍ଡିକୁଟା ଦେଇ ପାର୍‌ତନା କଲା । ୩୭ ସବୁ ଲକ୍ କାନ୍ଦି କାନ୍ଦି କରି ପାଉଲ୍‌କେ ପାଟାଲିକରି ରୁମ୍‌ଟାଟ୍ କରି ପାଟାଇଦେଲାଇ । ୩୮ ପାଉଲ୍ ସେମନ୍‌କେ “ତମେ ଆରି ମକେ ଦେକିନାପାରାସ୍ ।” ବଲି କଇରଇଲାକେ, ସେମନ୍ ବେସି ମନ୍‌ଦୁକ୍ ଅଇଜାଇରଇଲାଇ । ଲକ୍‌ମନ୍ ପାଉଲ୍‌କେ ପାଟାଇ ଦେବାକେ, ଜାଜେ ନେଇ ଚାଡ଼ିଲାଇ ।

## ୨୧

### ପାଉଲ୍ ଜିରୁସାଲାମେ ଜିବାଟା

୧ ସେମନ୍‌କେ ପାଟାଇଦେଇକରି ଆମେ ତେଇଅନି ଜାଜେ ଚଗି ସିଦା କସ୍ ନାଉର୍ ଜାଗାଇ କେଟ୍‌ଲୁ । ତାର୍ ଆରକର୍ ଦିନେ ରଦେ କେଟ୍‌ଲୁ, ସମ୍‌ଦୁର୍ ପାଲି ପାଲି ଜାଇ ପାତାରା ନାଉର୍ ଜାଗାଇ ଗାଲୁ । ୨ ତେଇଅନି ପିନିସିଆଇ ଜାଇଡେ ରଇବା ଗଟେକ୍ ଜାଜେ ଚଗି ଜିବାର୍ ଦାରଲୁ । ୩ ତାର୍‌ପଚେ ତ୍ରିସ୍‌ତେରଇବା ସାଇପରସ୍ ନାଉର୍ ଗଟେକ୍ ଜାଗାଇ କେଟ୍‌ଲୁ । ତେଇଅନି ତାର୍ ଦକ୍‌ଶିଦିଗ୍ ବାଟେ ଜାଇ ସିରିଆଇ କେଟ୍‌ଲୁ । ଆମେ ଟାୟର୍ ନାଉର୍ ଗଟେକ୍ ଜାଗାଇ, ପାନିଜାଜେଅନି ଉତର୍‌ଲୁ, କାଇକେ ବଇଲେ, ଏ ଜାଜେଅନି ଦିନ୍‌ସୁମନ୍ ଉତ୍‌ରାଇବାର୍ ରଇଲା । ୪ ତେଇ ଆମେ କେତେଟା ବିସ୍‌ବାସିମନ୍‌ର୍ ସଙ୍ଗ୍ ବେଟ୍ ଅଇ ସେମନ୍‌ର୍ ସଙ୍ଗ୍ ଗଟେକ୍ ଆଟ୍ ରଇଲୁ, ସୁକଲ୍‌ଆଡ଼ମାର୍ ଚାଲ୍‌ନା ପାଇକରି ସେମନ୍, ଜିରୁସାଲାମେ ଜିବାକେ ପାଉଲ୍‌କେ ମନା କଲାଇ । ୫ ମାଡର୍ ସେମନ୍‌ର୍ ସଙ୍ଗ୍ ଗଟେକ୍ ଆଟ୍ ରଇଲା ପଚେ, ଆମେ ସେମନ୍‌କେ ଚାଡ଼ିକରି ଆମର୍ ବାଟେ ଉଟି ଆଇଲୁ । ଆମ୍‌କେ ପାଟାଇ ଦେବାକେ ସେମନ୍ ନିଜର୍ ନିଜର୍ ପିଲା ମାଇଜି ସଙ୍ଗ୍ ଗଡ଼ ବାଇରେ ରଇବା, ସମ୍‌ଦୁର୍ କଣ୍ଡିଜାକ ଆଇଲାଇ । ତେଇ ଆମେ ସବୁ ଲକ୍ ମାଣ୍ଡିକୁଟା ଦେଇ ପାର୍‌ତନା କଲୁ । ୬ ତାର୍‌ପଚେ ଆମେ ସେମନ୍‌ର୍ ସଙ୍ଗ୍, ଜୁଆର୍‌ବେଟ୍ ଅଇ ଜାଜେ ଚଗଲୁ, ସେମନ୍ ଗରେ ବାଉଡ଼ି ଗାଲାଇ ।

୭ ଆମେ ଚାୟରେଅନି ପାନିଜାଜେ ବାରଇ ପଡ଼ଲମା ନାଉଁର୍ ଜାଗାଇ କେଟ୍ଲୁ, ତେଇ ବିସ୍‌ବାସି ବାଇମନର୍ ସଙ୍ଗ୍ ଜୁଆର୍‌ବେଟ୍ ଅଇ ଗଟେକ୍ ଦିନ୍ ରଇଲୁ । ୮ \*ଆର୍‌କର୍ ଦିନେ ଆମେ ସେ ଜାଗା ଚାଡ଼ି, ସିସେରିଆ ନାଉଁର୍ ଜାଗାଇ କେଟ୍ଲୁ, ତେଇ ମାପୁରୁର୍ କାତା ଜାନାଇବା, ପିଲିପର୍ ଗରେ ରଇଲୁ, ଜିରୁସାଲମେ ସେବା କର୍‌ବାକେ ବାଚାଇଅଇରଇବା ସାଡ଼ ଲକ୍‌ର ବିଡ଼ରେଅନି, ପିଲିପ୍ ଗଟେକ୍ ଲକ୍ ରଇଲା । ୯ ପିଲିପର୍ ଚାର୍‌ଟା ଦାଙ୍ଗ୍‌ତି ଟକିମନ୍ ବିବା ନ ଅଇକରି ରଇଲାଇ, ସେମନ୍ ପରମେସର୍ କଇଲା କାତା ଜାନାଇତେ ରଇଲାଇ । ୧୦ \*ଆମେ ସେ ଜାଗାଇ ବେସି ଦିନ୍ ରଇଲା ପଟେ, ଜିଉଦା ରାଇଜେଅନି ଆଗାବ୍ ନାଉଁର୍ ଗଟେକ୍ ବବିସ୍‌ଡ଼ବକ୍‌ତା ତେଇ ଆଇଲା । ୧୧ ସେ ଆମର୍ ଲଗେ ଆସି ପାଉଲର୍ ଆଟାବେଡା ନେଲା, ତେଇ ସେ ନିଜର୍ ଆଡ଼ ଗଡ଼ ବାନ୍ଦି କରି କଇଲା, “ସୁକଲ୍‌ଆଡ଼ମା ମକେ ଜାନାଇଲା ଆଟେ ଜେ, ଏ ଆଟାବେଡାର୍ ସାଉକାରକେ ଜିରୁସାଲାମର୍ ଜିଉଦିମନ୍, ଏନ୍ତି ବାନ୍ଦି ଜିଉଦିନଇଲା ଲକ୍‌ମନ୍‌କେ ସର୍‌ପିଦେବାଇ ।”

୧୨ ଏଟା ସୁନି ଆମେ ଆରି ସେ ଜାଗାଇ ରଇଲା ବିନ୍‌ଲକ୍‌ମନ୍, ପାଉଲ୍‌କେ “ଜିରୁସାଲାମେ ନ ଜାଆ” ବଲି ବାରୁଜିଆ କଲୁ । ୧୩ ମାତର୍ ପାଉଲ୍ କଇଲା, “ତମେ ଏଟା କାଇଟା କଲାସ୍‌ନି, କାଇକେ ଏନ୍ତି କାନ୍ଦାରୁବା ଅଇ ମର୍ ମନ୍ କିଲ୍‌ବିଲ୍ କଲାସ୍‌ନି ? ଜିରୁସାଲାମ୍ ଅବକା ବାନ୍ଦାଇ ଅଇବାକେସେ ନାଇ, ମାତର୍ ମୁଇ ମାପୁରୁ ଜିସୁର୍ ପାଇ ମର୍‌ବାକେ ମିସା ରାଜି ଆତି ।”

୧୪ ଆମେ ତାକେ ବୁଜାଇ ନାପାରି, ତେଇଅନି ଚିମ୍‌ରାଇ ଅଇ କଇଲୁ “ମାପୁରୁ ମନ୍ କଲାଟା ପୁରାପୁରୁନ୍ ଅ ।”

୧୫ ତେଇ କେତେଦିନ୍ ରଇକରି, ଆମର୍ ଦିନ୍‌ସୁପତର୍ ସାଜାତି ଜିରୁସାଲମେ ଜିବାକେ ବାରଇଲୁ । ୧୬ ସିସେରିଆର୍ କେତେଟା ସିସ୍‌ମନ୍, ଆରି ସାଇପରସର୍ ମନାସନ୍ ନାଉଁର୍ ବିସ୍‌ବାସି ମିସା ଆମର୍ ସଙ୍ଗ୍ ଆଇଲା । ମନାସନ୍ ଗରେ ଆମେ ରଇବାକେ ଟିକ୍ ଅଇରଇଲା ।

ଜାକୁବର୍ ସଙ୍ଗ୍ ପାଉଲ୍ ବେଟ୍ ଅଇବାଟା

୧୭ ଜିରୁସାଲମର୍ ବିସ୍‌ବାସି ବାଇମନ୍ ଆମ୍‌କେ ସାର୍‌ଦାସଙ୍ଗ୍ ଗତିଆ କଲାଇ । ୧୮ ତାର୍ ଆର୍‌କର୍ ଦିନେ ପାଉଲ୍ ଆମର୍ ସଙ୍ଗ୍ ଜାକୁବ୍‌କେ ଦେକ୍‌ବାକେ ଗାଲା, ମଣ୍ଡଲିର୍ ସବୁ ପାର୍‌ଚିନମନ୍ ତେଇ ରୁଣ୍ଡି ରଇଲାଇ । ୧୯ ପାଉଲ୍ ସେମନ୍‌କେ ଜୁଆର୍‌ବେଟ୍ ଅଇ ତାକର୍ କାମେଅନି, ପରମେସର୍ ଜିଉଦିନଇଲା ଲକ୍‌ମନ୍‌ର ବିଡ଼ରେ ଜାଇଟା କରିରଇଲା ତାର୍ ଗଟେକ୍ ଟିକିନିକିର୍ ତାଲିକା ଦେଲା । ୨୦ ତାର୍ କାତା ସୁନ୍‌ଲାପଟେ ସେମନ୍ ସବୁ ଲକ୍ ପରମେସରର୍ ଡାକ୍‌ପୁଟା କଲାଇ । ତାର୍‌ପଟେ କଇଲାଇ, “ବାଇ ପାଉଲ୍, ତମେ ଦେକ୍‌ଲାସ୍‌ନି, କେନ୍ତି, ଏବେ ଅଜାର୍ ଅଜାର୍ ଜିଉଦିମନ୍ ମାପୁରୁ ଜିସୁକେ ମାନ୍‌ଲାଇନି ଆରି ସେମନ୍ ରିତିନିତି ମିସା ମାନ୍‌ଲାଇନି । ୨୧ ସେମନ୍ କବର୍ ପାଇଆତଡ଼ ଜେ, ତମେ ଜିଉଦିନଇଲା ଦେସେ ବାସା ଅଇରଇଲା, ଜିଉଦିମନ୍‌କେ ମସାର୍ ରିତିନିତି ଚାଡ଼ିଦେବାକେ, ସେମନ୍‌ର ପିଲାମନ୍‌କେ ସୁନଡ଼ ନ କର୍‌ବାକେ ଆରି ଜିଉଦି ରିତିନିତି ନ ମାନ୍‌ବାକେ ସିକିଆ ଦେଲାସ୍‌ନି । ୨୨ ତମେ ଇତି କେଟିଆଟାସ୍ ବଲି ସେମନ୍ ସଡ଼ସେ ସୁନ୍‌ବାଇ । ସେନ୍ତି ଆଲେ କାଇଟା କରିଅଇସି ? ୨୩ ଆମେ ମନ୍‌କଲୁନି ତମେ ଗଟେକ୍ କାମ୍ କରା ବଲି । ଇତି ରଇଲା ଚାରିଲକ୍ ଗଟେକ୍ ମାନ୍‌ଡ଼ କଲାଇଆତଡ଼ । ୨୪ ସେମନ୍‌ର ସଙ୍ଗ୍ ଜାଆ । ସୁକଲ୍ ଅଇବା ବିଦି ମାନ୍‌ବାତେଇ ସେମନ୍‌ର ସଙ୍ଗ୍ ମିସା ଆରି ସେମନ୍‌ର କର୍‌ଟା ଦେ । ତାର୍‌ପଟେ ସେମନ୍ ନିଜର୍ ନିଜର୍ ମୁଣ୍ଡ କୁରାଇ ଅଥଡ଼ । ଇତିଅନି ଜାନାପଡ଼ସି ଜେ, ତମର୍ ବିସଇ ବାରଇରଇବା କାଇମିସା କବର୍ ସଡ଼ ନଏଁ, ମାତର୍ ତମେ ମସାର୍

\* ୨୧:୮ ୨୧:୮ ପେରିଡ଼ ୬:୫;୮:୫      \* ୨୧:୧୦ ୨୧:୧୦ ପେରିଡ଼ ୧୧:୨୮

ରିତିନିତି ଇସାବେ ଜିବନ୍ ଜିଇଲାସନି । ୨୫ \*ମାତର୍ ଜିଉଦି ନ ଅଇଲା ଲକ୍ମନ୍ ବିସ୍ବାସି ଅଇଆତଡ଼ । ସେମନ୍‌କେ ଗଟେକ୍ ଚିଟି ଲେକି ଉପ୍‌ଦେସ୍ ଦେଲୁଆରୁ ଜେ, ଆମର୍ କଇଲା କାତା ଇସାବେ, ସେମନ୍ ପୁଡ଼ଲାମନ୍‌କେ ବିରୁକଲା କାଦି ନ କାଅଡ଼, ବନି ନ କାଅଡ଼, ଟର୍ଟି ପିଟ୍‌କି ମରାଇରଇବା ପସୁର୍ ମାଉସ୍ ନ କାଅଡ଼ ଆରି ବିନ୍ ମାଇଜିମନ୍‌ର୍ ସଙ୍ଗ୍ ପାପ୍ କାମ୍ କର୍ବାଟାନେଅନି ଦୁରିକେ ରଅଡ଼ ।”

୨୬ ତାର୍ ପର୍ଦିନେ ପାଉଲ୍ ସେ ତାର୍ ଲକ୍‌ର୍ ସଙ୍ଗ୍ ସୁକଲ୍ ଅଇବା ବିଦି ମାନଲା । ତାର୍ ପଟେ ସେ ମନ୍‌ରେ ଜାଇ ସୁକଲ୍ ଅଇବା କାମ୍ କେବେ ସାର୍‌ସି, ଆରି କେତେବଲ୍ ବିରୁ କର୍ବାଟା ଅଇସି, ସେଟା ଜାନାଇଦେଲା ।

ପାଉଲ୍ ମନ୍‌ର୍ ବିଡ଼ରେ ବନ୍ଦି ଅଇଲା

୨୭ ଏ ସୁକଲ୍ ଅଇବା କାମ୍‌ର୍ ସାଡ଼ ଦିନ୍ ଗାଲା ପଟେ, ଆସିଆ ରାଇଜର୍ କେତେଟା ଜିଉଦିମନ୍ ପାଉଲ୍‌କେ ମନ୍‌ରେ ଦେକ୍‌ଲା, ସେମନ୍ ତେଇ ରୁଣ୍ଡୁଲା ଲକ୍‌ମନ୍‌କେ ଉସ୍‌କାଇକରି ପାଉଲ୍‌କେ ଦାଉଲା । ୨୮ ସେମନ୍ ଆଉଲି ଅଇକରି କଇଲା, “ଏ ଇସ୍ରାଏଲ୍‌ର୍ ବାଇମନ୍ ଆମ୍‌କେ ସାଇଜ କରା ! ଏ ଲକ୍ ଚାରିବାଟେ ଜାଇକରି ଇସ୍ରାଏଲ୍ ମନର୍ ବିରଦେ, ମସାର୍ ନିୟ୍ମ୍ ଆରି ଏ ମନ୍‌ର୍ ବିରଦେ, ସିକିଆ ଦେଲାନି । ଏବେ କେତେଟା ଗିରିକ୍ ଲକ୍‌ମନ୍‌କେ ମନ୍‌ର୍ ବିଡ଼ରେ ଆନି, ଏ ସୁକଲ୍ ଜାଗା ଅସୁକଲ୍ କଲା ଆଟେ ।” ୨୯ \*ସେମନ୍ ଗଡ଼ ବିଡ଼ରେ ଏପିସସର୍ ତରପିମ୍‌କେ ପାଉଲ୍ ସଙ୍ଗ୍ ଦେକି ରଇଲାର୍ ପାଇ ବାବ୍‌ଲାଜ ଜେ, ପାଉଲ୍ ତାକେ ମନ୍‌ରେ ନେଲା ଆଟେ ବଲି ।

୩୦ ଗଡ଼ର୍ ଗୁଲାଇ ବାଟେ ରିସାର୍ କିଲ୍‌ବିଲ୍ ତାବିଅଇଗାଲା । ଲକ୍‌ମନ୍ ପାଉଲ୍‌କେ ମନ୍‌ର୍ ବାଇରେ ଅରଗତି ଆନଲା, ଆରି ମନ୍‌ର୍ କାପାଟ୍‌ମନ୍ ତାବିଦେଲା । ୩୧ ରିସାଅଇଲା ଲକ୍‌ମନ୍ ପାଉଲ୍‌କେ ମରାଇବାକେ ଚେସ୍‌ଟା କଲା, ମାତର୍ ସମାନ୍ ସେ ବେଲା “ଜିରୁସାଲାମେ ଗଣ୍ଡୁଗଲ୍ ଚାଲ୍‌ଲା ଆଟେ ।” ବଲି ରମିୟ୍ ସନିଅମନ୍‌ର୍ କବର୍ ସୁନ୍‌ଲା । ୩୨ ସେ କେତେଟା ସେନାପତି କେତେଟା ସନିଅମନ୍‌କେ ଦାରି ଦାପ୍‌ରେ, ଗଟ୍‌ନା ଗଟ୍‌ଲା ଜାଗାଇ ଆସି କେଟ୍‌ଲା । ଲକ୍‌ମନ୍ ସନିଅ ଆରି ସେନାପତିକେ ଦେକିକରି ପାଉଲ୍‌କେ ମାର୍‌ବାଟା ଚାଡ଼ିଦେଲା । ୩୩ ସେନାପତି ପାଉଲ୍‌କେ ବନ୍ଦିକରି, ତାକେ ଦୁଇଟା ସିକ୍‌ଲିତେଇ ବାନ୍ଦ୍‌ବାକେ ଆଦେସ୍ ଦେଲା, ତାର୍ ପଟେ ସେ ପାଚାଉଲା, “ଏ ଲକ୍ କେ ? ଆରି ସେ କାଇଟା କଲା ଆଟେ ?” ୩୪ ଲକ୍‌ମନ୍‌ର୍ ମାନ୍‌ଇଅନି କେ କେତେ ରକାମ୍ କାତା କଇ ଆଉଲିଅଇଲା । ଏଡ଼ି କିରମାର୍ ଅଇଲା ଜେ, ସନିଅମନ୍‌ର୍ ମୁକିଆ, ସଡ଼ସେ, ଏ ଗଟ୍‌ନା କାଇକେ ଅଇଲା ବଲି ବୁଜିନାପାଉଲା । ସେଟାପାଇ ସେ ପାଉଲ୍‌କେ ଗଡ଼ବିଡ଼ରେ ଦାରିଜିବାକେ ସନିଅମନ୍‌କେ ଆଦେସ୍ ଦେଲା । ୩୫ ସନିଅମନ୍ ପାଉଲ୍‌କେ ଦାରି ଚଗବା ପାଉଟେ କେଟ୍‌ଲା ଦାପ୍‌ରେ, ତାର୍ ଚାରିବେଡ଼ି ରଇଲା ଲକ୍‌ମନ୍ ବେସିଆଉଲି ଅଇଲାକେ ସନିଅମନ୍ ତାକେ ବଇ ଦାରିଗାଲା । ୩୬ ବଇନେବା ବେଲେ ଲକ୍‌ମନ୍ ପର୍‌ପର୍ ଆସି ତାକେ ମରାଆ ବଲି ଆଉଲି ଅଇତେରଇଲା ।

ପାଉଲ୍ ନିଜର୍ ବିସଇ ସାକି ଦେବାଟା

୩୭ ପାଉଲ୍‌କେ ସନିଅମନ୍ ଗଡ଼ବିଡ଼ରେ ନେବାବେଲେ ସେ ସନିଅମନ୍‌ର୍ ମୁକିଆକେ କଇଲା, “ମୁଇ ତମର୍ ସଙ୍ଗ୍ କାତା ଅଇପାର୍‌ବି କି ?”

ସନିଅମନ୍‌ର୍ ମୁକିଆ କଇଲା, “ତୁଇତା ଗିରିକ୍ କଇଲୁସନି । ୩୮ ସେନ୍ତି ଆଲେ କେତେ ଦିନ୍ ଆଗେ ମିସରର୍ ଜନ୍ ଲକ୍ ଚାରି ଅଜାର୍ କାଙ୍ଗାମନ୍‌ର୍ ସଙ୍ଗ୍ କେଟିରଇଲା, ତମେ ସେ ଲକ୍ ନୁଆସ୍ !”

୩୯ ପାଉଲ୍ କଇଲା, “ମୁଇ ସିଲିସିଆର୍ ତାର୍‌ସିସେ ଜନମ୍ କରିରଇବା ଗଟେକ୍ ଜିଉଦି, ଗଟେକ୍ ମୁକିଅ ଗଡ଼ର୍ ଲକ୍ । ଏ ଲକ୍‌ମନ୍‌କେ ବୁଜାଇ କଇବାକେ ଦୟାକରି ମକେ ଅଲପ୍ ଆଦେସ୍ ଦିଆ ।”

୪୦ ସେନାପତି ତାକେ ଆଦେସ୍ ଦେଲାକେ ପାଉଲ୍ ପାଉର୍ ଉପରେ ଚିଆଅଇ, ଲକ୍‌ମନ୍‌କେ ଚିମରା ଅଇବାକେ ଆଡ଼ ସାଗିଆ କଲା । ସେମନ୍ ଚିମରା ଅଇଲାକେ, ପାଉଲ୍ ଇବ୍‌ରୁ ବାସାଇ କଇଲା ।

### ୨୨

୧ “ମର୍ ସଜ୍ଜାରି ଜିଉଦି ବାଇ ଆରି ବାବାମନ୍, ମର୍ ନିଜର୍‌ବାଟେଅନି ମୁଇ ଜାଇଟା କଇଲିନି ସେଟା ସୁନା !” ୨ ସେମନର୍ ସଙ୍ଗ୍ ସେ ଇବ୍‌ରୁ ବାସାଇ କାତା କଇବାଟା ସୁନି, ଲକ୍ ମାନ୍‌ା ରୁପଚାପ୍ ଅଇଲାକ ଆରି ପାଉଲ୍ କଇବାକେ ଦାର୍‌ଲା,

୩ ☆ “ମୁଇ ଗଟେକ୍ ଜିଉଦି ଲକ୍, ସିଲିସିଆର୍ ତାର୍‌ସିସେ ମର୍ ଜନମ୍, ମାତର୍ ମୁଇ ଜିରୁସାଲାମେ କାଇପିଇ ବଡ଼ ଅଇରଇଲି ଆରି ଗମଲିଏଲର୍ ସିସ୍ ରଇଲି । ଆମର୍ ଆନିଦାଦିମନର୍ ରିତିନିତି, ମୁଇ ଟିକ୍ ଇସାବେ ସିକିରଇଲି ଆରି ତମର୍ ପାରା ପର୍‌ମେସର୍‌କେ ମାନିକରି ଜିଇତେରଇଲି । ୪ ☆ମାପୁରୁ ବାଟେ ଜିବା ଲକ୍‌ମନ୍‌କେ ମାର୍‌ଦାର୍ କରି ସେମନ୍‌କେ ମରାଇଦେଇତେ ରଇଲି । ମାଇଜିଟକି ମୁନୁସ୍‌ପିଲା ସବୁକେ ବାନ୍ଧିକରି ବନ୍ଧି ଗରେ ପୁରାଇ ଦେଇତେ ରଇଲି । ୫ ମର୍ ଏ କାତା ପୁରା ସଡ଼ । ବଡ଼ ପୁଜାରି ଆରି ବଡ଼ ସବାର୍ ସବୁ ପାର୍‌ଚିନ୍‌ମନ୍ ସାକି ଆବଡ଼ । ଲକ୍‌ମନ୍‌କେ ବନ୍ଧି କରି ସିକ୍‌ଲି ସଙ୍ଗ୍ ବାନ୍ଧି ଜିରୁସାଲାମ୍ ଦାରିଆଇବାକେ, ମୁଇ ବଡ଼ ପୁଜାରିର୍ ଟାନେଅନି ଆଦେସ୍ ପଡ଼ର୍ ପାଇ, ଦାମାସ୍କସେ ରଇବା ଜିଉଦି ବାଇମନର୍ ଲଗେ ଗାଲି ।”

ପାଉଲ୍ ତାର୍ ମନ୍ ବାଦ୍‌ଲାଇଲା ବିସଇନେଇ ଟିକିନିକି କଇଲା

୬ “ମୁଇ ଜେଡେବେଲା ବାରଇ ଜିରୁସାଲାମେ ଜିବାବେଲେ ଦାମାସ୍କସ୍ ଲଗାଲଗି ଅଇଲି, ପାକାପାକି ମୁଣ୍ଡବେଲାଇ, ଆକାସେଅନି ଗଟେକ୍ ଉଜଲ୍ ମର୍ ଚାରିବେଡ଼ତି ଉଜଲ୍ ଅଇଗାଲା ।” ୭ ମୁଇ ବୁଏଁ ଉମ୍‌ତାଡ଼ିଅଇ ଅଦ୍‌ରିଗାଲି ଆରି ମର୍‌ପାଇ ଏ କାତା ସୁନିଲି, ସାଉଲ୍, ସାଉଲ୍ ! ମକେ ତୁଇ କାଇକେ କସ୍‌ଟ ଦେଲୁସ୍‌ନି ? ୮ ମୁଇ ପାଚାରଲି, “ମାପୁରୁ, ତମେ କେ ? ସେ ମକେ କଇଲା, ‘ତମେ ଜାକେ କସ୍‌ଟ ଦେଲାସ୍‌ନି’ ମୁଇ ସେ ନାଜରିତର୍ ଜିସୁ ।” ୯ ମର୍‌ସଙ୍ଗ୍ ରଇଲା ଲକ୍ ସେ ଉଜଲ୍ ଦେକ୍‌ଲାଇ, ମାତର୍ ମର୍ ସଙ୍ଗ୍ କାତା ଅଇବା ଲକ୍‌ର୍ ସର୍ ସୁନି ନାପାର୍‌ଲାଇ । ୧୦ ମୁଇ ପାଚାରଲି, “ମାପୁରୁ, ମୁଇ କାଇଟା କର୍‌ବି ?” ମାପୁରୁ ମକେ କଇଲା, “ଉଟ୍, ଆରି ଦାମାସ୍କସେ ଜାଆ, ପରମେସର୍ ତର୍ ପାଇ ଜନ୍ କାମ୍ ଟିକ୍ କଲା ଆତେ, ସେଟା ତମ୍‌କେ ତେଇ ଜାନାଇ ଦିଆଅଇସି ।” ୧୧ ସେ ଉଜଲ୍ ଏତେକ୍ ଉଜଲ୍ ରଇଲା ଜେ, ସେ ଉଜଲ୍‌ର୍ ବପୁ ସଙ୍ଗ୍, ମୁଇ କାଣା ଅଇଜାଇରଇଲି । ସେଟାର୍‌ପାଇ ମର୍ ସଙ୍ଗ୍, ଜିବା ଲକ୍‌ମନ୍, ମର୍ ଆତେ ଦାରି, ମକେ ଦାମାସ୍କସେ ଡାକିନେଲାଇ ।

୧୨ ଦାମାସ୍କାସେ ଅନିଅ ନାଉର୍ ଗଟେକ୍ ଦରମ୍ ଲକ୍ ରଇଲା । ସେ ଆମର୍ ରିତିନିତି ନାମି କରି ରଇଲା, ତେଇ ରଇବା ଜିଉଦିମନ୍ ସବୁ ତାକେ ବେସି ନାମ୍‌ତେ ରଇଲାଇ । ୧୩ ସେ ମର୍‌ଲଗେ ଆସି ଚିଆଅଇ କଇଲା, “ବାଇ ସାଉଲ୍, ତୁଇ ଆଁକି ଆରି ତରେକ୍ ଦେକ୍ ।” ଟିକ୍ ସେ ଦାପରେ, ମୁଇ ଆରି ତରେକ୍ ଦେକ୍‌ବା ବପୁ ପାଇଲି । ୧୪ ସେ କଇଲା, “ଆମର୍ ଆନିଦାଦିର୍ ମାପୁରୁ ସେ ମନ୍‌କର୍‌ବାଟା ଜାନ୍‌ବାକେ, ତାର୍ ଦରମର୍ ଦାଙ୍ଗ୍‌ତାକେ ଦେକ୍‌ବାକେ ଆରି ତାର୍ କାତା ସୁନ୍‌ବାକେ, ତକେ ବାଟ୍‌ଲା ଆତେ । ୧୫ ତୁଇ କାଇଟା ଦେକିଆରୁସ୍ ଆରି ସୁନି ଆରୁସ୍, ସେଟା ସବୁ ଲକ୍‌ର୍ ଲଗେ ଦେକାଇବାକେ ଆରି ସୁନାଇବାକେ ଡାକର୍ ସାକି ଅଇସୁ । ୧୬ ଆରି କାଇକେ ଅଲ୍‌ସମ୍

କଲୁଥିଲି ? ଉଚ୍ଚ, ତୁବନ୍ ନେ, ଆରି ତାକେ ପାର୍ତନା କରି ତର୍ ସବୁ ପାପେଅନି ପରିଚଲ୍ ଅ ।”

ଜିଉଦି ନଇଲା ଲକ୍ମନରତେଇ ମାପୁରୁର୍ କାତା ଜାନାଇବାକେ ପାଉଲ୍‌କେ ଡାକ୍‌ରା ଆଇଲା

୧୭ “ମୁଇ ଜିରୁସାଲମେ ବାଉଡି ଜାଇ, ତେଇର୍ ମନ୍ଦିରେ ପାର୍ତନା କର୍‌ବାବେଲେ, ମକେ ମାପୁରୁର୍ ଦର୍‌ସନ୍ ମିଲ୍‌ଲା । ୧୮ ମାପୁରୁ ମକେ ନିଜେ ଦେକାଇଅଇ କଇଲା, ଦାପରେ ଜିରୁସାଲମ୍ ରାତି ଉଟି ଜା, କାଇକେ ବଇଲେ ଇତିର୍ ଲକ୍ମନ ମର୍ ବିସଇ, ତୁଇ ସାକିଦେବାଟା ନ ନାମଡ଼ ।” ୧୯ ମୁଇ କଇଲି “ମାପୁରୁ, ମୁଇ ପାର୍ତନା ଗର୍‌ମନ୍‌କେ ଜାଇ, ତମକେ ବିସବାସ୍ କର୍‌ବା ଲକ୍ମନକେ, କେନ୍ତାରି ବନ୍ଦି କରି ରଇଲି ଆରି ମାଡ଼ ମାରି ରଇଲି, ଏଟା ସେମନ୍ ନିକ ସଙ୍ଗ୍ ଜାନଡ଼ । ୨୦ ଆରି ଜେତେବେଲ୍ ତମର୍ ସାକି ଦେଇ ରଇବା ତିପାନ୍‌କେ ମରାଇଦେଲାଇ, ମୁଇ ନିଜେ ତେଇ ରଇଲି, ତାକେ ମାରି ମରାଇଦେବାକେ ରାଜିଅଇରଇଲି । ମାରୁମନର୍ ବେଟ୍‌ଲା ବସ୍‌ତର୍ ଜାଗି ରଇଲି ।” ୨୧ ମାପୁରୁ ମକେ କଇଲା, “ଜାଆ ମୁଇ ତକେ ବେସି ଦୁରିକେ ଜିଉଦି ନଇଲା ଲକ୍ମନର୍ ଲଗେ ପାଟାଇବି ।”

୨୨ ପାଉଲ୍ ଏ କାତା କଇବାଜାକ ଲକ୍ମନ ମନ୍‌ଦିଆନ୍ ଦେଇ ସୁନ୍‌ତେ ରଇଲାଇ, ମାତର୍ ତାର୍ ପଟେ ସେମନ୍ ଆଉଲିଅଇକରି କଇଲାଇ, “ତାକେ ଜଗତେଅନି ବାର୍‌କରାଇ ଦିଆସ୍ ! ମରାଇ ଦିଆସ୍, ସେନ୍ତା ଲକ୍ ଜିଇବାକେ ଲଡା ନାଇ !” ୨୩ ସେମନ୍ ଆଉଲି ଅଇକରି ବସ୍‌ତର୍ ଉପରେ ଉଡାଇତେରଇଲାଇ ଆରି ଦୁଲି ମିସା ଉପରେ ଉଡାଇତେ ରଇଲାଇ । ୨୪ ରମିୟ୍ ସନିଅମନର୍ ମୁକିଆ ପାଉଲ୍‌କେ ଗଡ଼ ବିଡ଼ରେ ଦାରିଜିବାକେ ସନିଅମନ୍‌କେ ତିଆର୍‌ଲା ଆରି ଜିଉଦିମନ୍ କାଇକେ ତାର୍ ବିରୁଦେ ଆଉଲି ଅଇଲାଇନି, ସେଟା ଜାନ୍‌ବାକେ ପାଉଲ୍‌କେ କର୍‌ଡା ସଙ୍ଗ୍ ମାର୍‌ବାକେ ଆଦେସ୍ ଦେଲା । ୨୫ ମାତର୍ ସେମନ୍ ତାକେ କର୍‌ଡା ମାର୍‌ବାକେ ବାନ୍ଦିରଇଲା ବେଲେ, ପାଉଲ୍ ତେଇ ରଇବା ଗଟେକ୍ ଅଦିକାରିକେ କଇଲା, “କାଇ ଦସ୍ ନ ରଇକରି ଏବେ ଜାକ ବିଚାରନା ନ ଅଇରଇବା ଗଟେକ୍ ରମିଅ ଲକ୍‌କେ କର୍‌ଡା ସଙ୍ଗ୍ ମାର୍‌ବାଟା, ଏଟା ତୁଇ ନିୟ୍‌ମ୍ ମାନ୍‌ଲୁଥିଲି କି ?”

୨୬ ଏ କାତା ସୁନିକରି ସନିଅ ଗାଲା ଆରି ସନିଅମନର୍ ମୁକିଅକେ କଇଲା, “ତୁଇ କାଇଟା କଲୁଥିଲି? ଏ ଗଟେକ୍ ରମିଅ ଲକ୍ !”

୨୭ ସନିଅମନର୍ ମୁକିଅ ପାଉଲ୍‌ର୍ ଲଗେ ଜାଇ ପାଟାର୍‌ଲା, “ସତଇସେ ତମେ କାଇ, ରମିଅ ଲକ୍ କି ?”

ପାଉଲ୍ ଉତର୍ ଦେଲା “ଉଁ ।”

୨୮ ସେନାପତି କଇଲା, “ମୁଇ ରମିଅ ସର୍‌କାର୍‌କେ ତାବୁ ଦେଇକରି ଗଟେକ୍ ରମିଅ ଲକ୍ ଅଇଲି ଆତି ।”

ପାଉଲ୍ କଇଲା “ମାତର୍ ମୁଇ ଜନମ୍ କଲାବେଲେଅନି ରମିଅ ଲକ୍ ।”

୨୯ ଏଟା ସୁନିକରି ଜନ୍‌ଲକ୍‌ମନ୍ ପାଉଲ୍‌କେ ପାଟାର୍‌ବାର୍ ଜାଇରଇଲାଇ, ସେମନ୍ ପର୍‌କେ ଗୁର୍‌ଲାଇ । ପାଉଲ୍ ଗଟେକ୍ ରମିୟ୍ ଲକ୍ ବଲି ଜାନ୍‌ଲାକେ, ସେମନ୍‌ର୍ ନେତା ମିସା ଡର୍‌ଲା । କାଇକେବଇଲେ ପାଉଲ୍‌କେ ସିକ୍‌ଲି ସଙ୍ଗ୍ ବାନ୍ଦିବାକେ ସେ ସେ ତିଆରିରଇଲା ।

ବଡ଼ ସବାର୍ ମୁଆଟେ ପାଉଲ୍

୩୦ ଜିଉଦିମନ୍ ପାଉଲ୍‌କେ କାଇବଲି ନିନ୍ଦା କର୍‌ତେରଇଲାଇ, ସେଟା ଜାନ୍‌ବାକେ ସନିଅମନର୍ ମୁକିଅ ମନ୍ କର୍‌ତେରଇଲା । ତେବର୍‌ପାଇ ତାର୍ ଆର୍‌କର୍ ଦିନେ ସବୁ ପୁଜାରିମନ୍‌କେ ଆରି ବଡ଼ ସବାର୍ ମେମର୍‌ମନ୍‌କେ ରୁଣ୍ଡାଇବାକେ ତିଆର୍‌ଲା ।

ତାର ପତେ ସେ ପାଉଲ୍‌କେ ବାନ୍ଦଲା ସିକ୍‌ଲି କୁସ୍‌ଲାଇ, ଦାରିକରି ଆନ୍‌ଲା ଆରି ବଡ଼ ସବାଇ ତାକର୍ ମୁଆଟେ ଚିଆ କରାଇଲା ।

## ୨୩

୧ ପାଉଲ୍‌ ବଡ଼ସବାର୍ ଲକ୍‌ମନକେ ସିଦା ଦେକି କଇଲା, “ଏ ଇସ୍ରାଏଲ୍‌ର୍ ବାଇମନ୍ ! ଆଜିକେ ଜାକ ମୁଇ ପରମେସରର୍ ମୁଆଟେ କେନ୍ଦ୍ରା ଜିବନ୍ ବିତାଇ ଆତି, ସେ ବିସଇଟାନେ ମନ୍ ପୁରାପୁରୁନ୍ ନିର୍ମାଲ୍‌ ଆତେ ।” ୨ ଏ କାତା ସୁନିକରି ଅନନିଅ ନାଉର୍ ବଡ଼ ପୁଜାରି ପାଉଲ୍‌ର୍ ଲଗେ ଚିଆଅଇରଇବା ଲକ୍‌ମନକେ, ତାର ଗାଲେ ଚାପଡ଼ ମାରା ବଲି ତିଆରଲା । ୩ \*ପାଉଲ୍‌ ତାକେ କଇଲା, “ଏ ରୁନ୍ ମାରିଅଇଲା ଦବ୍‌ଲା ଉଆଁରି କଡ଼ି, ପର୍ମେସର୍ ତକେ ଡଣ୍ଡ ଦେଇସି ଆକା । ନିୟମ୍ ଇସାବେ ମର୍ ବିଚାର କର୍ବାକେ, ତୁଇ ତେଇ ବସିଆରୁସ୍ । ଏଲେ ମିସା, ନିୟମ୍ ବାଜିକରି ମକେ ମାର୍‌ବାକେ ତିଆରଲୁସନ୍ !”

୪ ଲଗେ ରଇବା ଲକ୍‌ମନ୍ ପାଉଲ୍‌କେ କଇଲାଇ, “ପର୍ମେସର୍ ବାଟିରଇବା ବଡ଼ ପୁଜାରିକେ ତୁଇ ନିନ୍ଦା କଲୁସନ୍ !”

୫ ପାଉଲ୍‌ କଇଲା, “ଏ ଇସ୍ରାଏଲ୍‌ର୍ ବାଇମନ୍, ସେ ବଡ଼ ପୁଜାରି ବଲି ମୁଇ ନାଜାନିରଇଲି । ସାସତରେ ଲୋକାଆତେ, ତମେ ନିଜର୍ ଜାତିର୍ ସାସନ୍‌କାରିଆକେ କରାପ୍ କାତା କଇବାରନାଇ ।”

୬ \*ବଡ଼ ସବାର୍ ମେମରମନର୍ ବିତରେ କେତେଟା ପାରୁସି ଆରି କେତେଟା ସାଦୁକିମନ୍ ରଇଲାଟା ଦେକି ପାଉଲ୍‌ ବଡ଼ ସବାର୍ ଲକ୍‌ମନକେ ଦେକାଇ ଆଉଲି ଅଇକରି କଇଲା, “ଏ ଇସ୍ରାଏଲ୍‌ର୍ ବାଇମନ୍, ମୁଇ ଗଟେକ୍ ପାରୁସି ଲକ୍, ମର୍ ଆୟା ବାବା ମିସା ପାରୁସି । ମଲା ଲକ୍‌ମନ୍ ଆରିତରେକ୍ ଉର୍ବାଟା ମର୍ ଆସା ଆତେ ବଲି, ଇତି ମର୍ ବିଚାରନା ଅଇଲାନି ।”

୭ ପାଉଲ୍‌ ଏ କାତା କଇଲା ଦାପ୍‌ରେ, ପାରୁସି ଆରି ସାଦୁକିମନ୍ ବିତରେ ଲାଗାଜତା ଅଇଗାଲାଇ ଆରି ସେମନ୍ ବେଗଲି ଗାଲାଇ । ୮ \*କାଇକେବଇଲେ ସାଦୁକିମନର୍ ବିସ୍‌ବାସ୍ ଇସାବେ ମଲା ଲକ୍‌ମନ୍ ନ ଉଟ୍ । ସରଗର୍ ଦୁଡ଼ କି ଆଡ଼ମା ମିସା ନାଇ ବଲି, ବିସ୍‌ବାସ୍ କର୍ବାଇ, ମାତର୍ ପାରୁସିମନ୍ ଏ ତିନ୍‌ଟା ଜାକ ବିସ୍‌ବାସ୍ କର୍ତେରଇଲାଇ । ୯ ସେମନ୍‌ର୍ କିରଜାଟି ଅଇବାଟା ଅଦିକ୍ ଅଦିକ୍ ଅଇଆଇଲା । ପାରୁସି ଦଲ୍‌ର୍ କେତେଟା ଦରମ୍ ଗୁରୁ ଉଟିକରି ତାଟ୍ ସଙ୍ଗ୍ କଇଲାଇ, “ଆମେ ଏ ଲକ୍‌ର୍ ଟାନେଅନି କାଇ ଦସ୍ ମିସା ମିଲାଉ ନାଇ । କେଜାନେ ଆକେ ଗଟେକ୍ ସରଗର୍ ଦୁଡ଼ କି ଆଡ଼ମା କାତା କଇରଇସି ।” ୧୦ ତାକର୍ ଦଦାପେଲା ଅଦିକ୍ ଅଦିକ୍ ଅଇଗାଲାକେ ଲକ୍‌ମନ୍ ପାଉଲ୍‌କେ ଗନ୍ଦାଗନ୍ଦା କରି ଚିରି ପାକାଇବାଇ ବଲି ସନିଅମନ୍‌ର୍ ମୁକିଅ ଡରଲା । ତେବେ ସେ ଗଣ୍ଡଗଲ୍ ଅଇବା ଲକ୍‌ମନ୍‌ର୍ ବିତରେଅନି ପାଉଲ୍‌କେ ରକିଆ କରି ଗଡ଼ ବିତରେ ଦାରି ଜିବାକେ ସନିଅମନ୍‌କେ ତିଆରଲା ।

୧୧ ସେ ରାତି ମାପରୁ ପାଉଲ୍‌ର୍ ଲଗେ ଚିଆଅଇ କଇଲା, “ଡର୍ ନାଇ ! ମର୍ ପାଇ ଇତି ଜିରୁସାଲାମେ ତୁଇ ସାକି ଦେଇ ଆରୁସ୍ । ରମ୍ ଦେସେ ମିସା ତୁଇ ସେନ୍‌ତାରି କର୍ବାର୍ ଆତେ ।”

ପାଉଲ୍‌କେ ମରାଇବାକେ ଜଜ୍‌ନା କର୍ବାଟା

୧୨ ଆରକର୍ ଦିନର୍ ସାକାଲେ କେତେଟା ଜିଉଦିମନ୍ ଗଟେକ୍‌ଟାନେ ରୁଣ୍ଡି ଜଜ୍‌ନା କଲାଇ । ପାଉଲ୍‌କେ ନ ମରାଇବା ଜାକ ସେମନ୍ ଅରନ୍‌ପାନି ନ ଚିଉ ବଲି ସପଡ଼ କଲାଇ । ୧୩ ଚାଲିସ୍‌ତେଇଅନି ଅଦିକ୍ ଲକ୍ ଏ ଜଜ୍‌ନା କଲାଇ । ୧୪ ସେମନ୍ ଜାଇକରି ମୁକିଅ ପୁଜାରିମନ୍‌କେ ଆରି ପାର୍‌ତିମନ୍‌କେ କଇଲାଇ, “ପାଉଲ୍‌କେ ନ ମରାଇବା



ଜାକ ଅରନ୍ଧ୍ରପାନି ନ ଚିତ୍ତ ବଲି ଆମେ ସପତ୍ କରୁଥାଉ । ୧୫ ତମେ ଆରି ବଡ଼ସବାର୍ ଲକ୍ଷ୍ମୀନ୍ ରମିୟ ନେତା ପାଉଲ୍‌କେ ଇତି ଆରିତରେକ୍ ଆନା ବଲି କବର୍ ପାଟାଆ । ତାର୍ ବିସଇର୍ ଚିକିନିକି ଜାନ୍‌ବାର୍ ଆତେ ବଲି ମିଡ଼ କଇକରି ଆନାଆ । ସେ ବଡ଼ ସବାଇ ଆଇବା ବେଲେ ତାକେ ବାଟେ ଜାଗି ମାରି ମରାଇଦେବୁ ।”

୧୬ ପାଉଲ୍‌ର ବାନ୍‌ଜା ଏମନ୍‌ କୁଟ୍ କାତା ସୁନିକରି ଗଡ଼ ବିଡ଼ରେ ଗାଲା ଆରି ସବୁ କାତା ପାଉଲ୍‌କେ କଇଦେଲା । ୧୭ ପାଉଲ୍ ଗଟେକ୍ ରମିୟ ଅଦିକାରିକେ ତାକାଇ କରି କଇଲା, “ଏ ଦାଙ୍ଗ୍‌ତାକେ ସନିଅମନ୍‌ର ମୁକିଅ ଲଗେ ଦାରି ଜାଅଡ଼ । ସେ ତାକେ କାଇଟାକି କଇବାର୍ ଆତେ ।” ୧୮ ସନିଅ ତାକେ ମୁକିଆର୍ ଲଗେ ନେଇ କଇଲା, “ବନ୍ଦି ରଇବା ପାଉଲ୍ ମକେ ଡାକି ଏ ଦାଙ୍ଗ୍‌ତାକେ ତମର୍ ଲଗେ ଆନ୍‌ବାକେ କଇଲା । ତମ୍‌କେ ପନି ସେ କାଇଟା କଇବାର୍ ଆତେ ।”

୧୯ ସନିଅମନ୍‌ର ମୁକିଅ ତାର୍ ଆଡ଼ ଦାରିକରି ଗଟେକ୍ ପାଲିକେ ଡାକିନେଲା ଆରି ପାଟାଟାଲା, “କାଇଟା କଇବାର୍ ଆତେ କଅ !”

୨୦ ଦାଙ୍ଗ୍‌ତା କଇଲା, “ପାଉଲ୍‌ର ଚିକିନିକି ବିସଇ ଜାନ୍‌ବାର୍ ଆତେ ବଲି ନାଡ଼ାଇକରି ତାକେ ଜିଉଦିମନ୍ ବଡ଼ ସବାଇ ନେବାକେ, ତମ୍‌କେ ଗୁଆରି କରବାଇ । ୨୧ ମାତର୍ ତମେ ତାକର୍ କାତା ସୁନା ନାଇ । କାଇକେ ବଇଲେ ଚାଲିସ୍‌ତେଇଅନି ଅଦିକ୍ ଲକ୍ ଲୁଟିକରି ପାଉଲ୍‌କେ ମରାଇବାକେ ଜାଗିଆତଡ଼ । ତାକେ ନ ମରାଇବା ଜାକ ଅରନ୍ଧ୍ରପାନି ନ କାଉଁ ବଲି ସପତ୍ କଲାଇ ଆତଡ଼ । ଏବେ ସେମନ୍ ତମର୍ ଆଦେସ୍ ଦେବାଟାକେ ଜାଗିକରି ଆତଡ଼ ।”

୨୨ ସନିଅମନ୍‌ର ମୁକିଅ କଇଲା, “ତୁଇ ମକେ ଏ କାତା ଜାନାଇ ଆଟି ବଲି କାକେ କଅ ନାଇ ।” ଏନ୍‌ଡାରି କଇକରି ଦାଙ୍ଗ୍‌ତାକେ ପାଟାଇ ଦେଲା ।

ପାଉଲ୍‌କେ ସାସନ୍‌କାରିଆ ପେଲିକ୍‌ସ୍ ଲଗେ ପାଟାଇଦେଲାଇ

୨୩ ସନିଅମନ୍‌ର ମୁକିଅ ତାର୍ ତଲେ ରଇଲା ଦୁଇଟା ସନିଅକେ ତାକାଇ କଇଲା, “ଆଜି ରାତି ନଅଟା ବିଡ଼ରେ ସିସେରିଆ ଜିବାକେ ଦୁଇସ ସନିଅକେ ତିଆର୍, ଆରି ସତୁରିଟା ଗଡ଼ାଇ ଚଗୁମନ୍ ଆରି ଦୁଇ ସଅ ବର୍ତ୍ତି ଦାରୁମନ୍‌କେ ଟିକ୍ କର୍ । ୨୪ ପାଉଲ୍ ଜିବା ପାଇ କେତେଟା ଗଡ଼ା ଦିଆସ୍ ଆରି ନିକ ସଙ୍ଗେ ତାକେ ସାସନ୍‌କାରିଆ ପେଲିକ୍‌ସ୍ ଲଗେ ଦାରି ଜାଆ ।” ୨୫ ସନିଅମନ୍‌ର ମୁକିଅ ପେଲିକ୍‌ସ୍‌କେ ଏନ୍‌ତି ଗଟେକ୍ ଚିଟି ଲେକ୍‌ଲା,

୨୬ “ଏ ଚିଟି ମୁଇ କାଲାଡିଆକେ ଲିସିଆର୍ ସବୁରଟାନେଅନି ଡାକ୍‌ପୁଟା ରଇବା ସନ୍‌ମାନର୍ ସାସନ୍‌କାରିଆ ପେଲିକ୍‌ସ୍‌କେ ଲେକ୍‌ଲିନି, ଜୁଆର୍ ! ୨୭ ଆଗିଆ, ଜିଉଦିମନ୍ ଏ ଲକ୍‌କେ ଦାରି ତାକେ ମର୍ତ୍ତେ ମାରିଦେବାକେ ଚେସଟା କର୍ତ୍ତେ ରଇଲାଇ । ସେ ଗଟେକ୍ ରମିୟ ଲକ୍ ବଲି ଜାନ୍‌ଲା ପତେ, ମୁଇ ତାକେ ମର୍ ସନିଅମନ୍ ସଙ୍ଗେ ତାକେ ରକିଆ କଲି । ୨୮ ସେମନ୍‌ର ବିରଦେ ସେ କାଇ ଦସ୍ କଲା ଆତେ, ସେଟା ଜାନ୍‌ବାକେ ତାକେ ମୁଇ ସେମନ୍‌ର ବଡ଼ସବାଇ ଦାରିଗାଲି । ୨୯ ମାତର୍ ସେ ମରନ୍‌ର କି ବନ୍ଦି ଡଣ୍ଡ ପାଇବା ପାରା କାଇମିସା ବୁଲ୍ କାମ୍ କରେ ନାଇ ବଲି ମୁଇ ଜାନିପାରୁଲି । ତାର୍ ବିରଦେ ଅଇଲା ଦାବା ସବୁ, ତାକର୍ ନିଜର୍ ଦରମ୍ ବିସଇ । ୩୦ ଆରି ତାର୍ ବିରଦେ ଗଟେକ୍ କୁଟ୍ ଜଜ୍‌ନା ଅଇଲାନି ବଲି କବର୍ ସୁନି, ବେଗି ବେଗି ତମର୍ ଲଗେ ପାଟାଇ ଦେବାକେ ଟିକ୍ କଲି, ତାର୍ ବିରଦେ ରଇଲା ଦାବା, ତର୍ ମୁଆଟେ ଜାନାଇବାକେ ତାର୍ ଦାବାଦାରିମନ୍‌କେ ମୁଇ କଇଲିଆଟି ।”

୩୧ ସନିଅମନ୍ ସେ ଆଦେସ୍ ଇସାବେ ପାଉଲ୍‌କେ ସେ ରାତି ଆନ୍‌ଡିପର୍‌ରିସେ କେଟାଇଦେଲାଇ । ୩୨ ତାର୍ ଆର୍‌କର୍ ଦିନେ ଇଣ୍ଡିଜିବା ସନିଅମନ୍ ଗଟେ ବାଉଡିଗାଲାଇ ଆରି ଗଡ଼ାଇ ଜାଉ ସନିଅମନ୍‌କେ ଜିବାକେ କଇଲାଇ । ୩୩ ସନିଅମନ୍ ପାଉଲ୍‌କେ ଦାରି ସିସେରିଆଇ କେଟିଲାଇ । ତେଇ ସନିଅମନ୍‌ର

ମୁକ୍ତିଅର୍ ଚିତି ସଙ୍ଗେ ପାଉଲ୍‌କେ ସାସନକାରିଆର୍ ଆତେ ଜିମାଦେଇଦେଲା ।  
 ୩୪ ସାସନକାରିଆ ଚିତି ପଡ଼ି ପାଉଲ୍‌କେ କନ୍ ରାଇଜେଅନି ଆସିଆରୁସ୍ ? ବଲି  
 ପାଚାରଲା । ପାଉଲ୍ ସିଲିସିଆଇଅନି, ବଲି ଜାନ୍‌ଲା । ୩୫ ସେ କଇଲା, “ତମର୍  
 ଦାବାଦାରିମନ୍ ଆସି କେଟ୍‌ଲା ପଟେ, ମୁଇ ତର୍ କାତା ସୁନ୍‌ବି ।” ତାର୍ ପଟେ  
 ପାଉଲ୍‌କେ ଏରଦ୍ ରାଜାର୍ ନଅରେ ବନ୍ଦି କରି ସଙ୍ଗାଇବାକେ ଆଦେସ୍ ଦେଲା ।

### ୨୪

ଜିଉଦିମନ୍ ପାଉଲ୍‌କେ ଦସି କଲାଇ

୧ ପାଁର୍ଦିନ୍ ପଟେ ବଡ଼ ପୁଜାରି ଅନନିୟ୍ କେତେଟା ପାର୍ଟିନ୍ ଆରି ତର୍ତୁଲସ୍  
 ନାଉର୍ ଗଟେକ୍ ଅକିଲ୍ ସଙ୍ଗ୍ ସିସେରିଆଇ ଗାଲାଇ । ସେମନ୍ ପେଲିକ୍‌ସର୍  
 ମୁଆଟେ ଚିଆଅଇ ପାଉଲ୍‌ର୍ ବିରଦେ ସେମନ୍‌ର୍ ଦାବା ଜାନାଇଲାଇ । ୨ ତାର୍‌ପଟେ  
 ପାଉଲ୍‌କେ ତେଇଆନି ଚିଆ କରାଇଲାଇ ଆରି ତର୍ତୁଲସ୍ ଏକ୍ତି ତାକର୍ ଦାବାମନ୍  
 ସବୁ ଜାନାଇଲା ।

“ ଆଗିଆଁ, ତମେ ଗଟେକ୍ ତାକ୍‌ପୁଟା ଲକ୍, ତମର୍ ନିମାନ୍ ସାସନଅନି ଆମେ  
 ବେସି ଦିନ୍ ଦାରି ସାର୍‌ଦା ଅଇ ସାକ୍ତି ସଙ୍ଗ୍ ଜିଇଲୁନି, ଆମର୍ ଦେସର ମଙ୍ଗଲ୍  
 ପାଇ ବେସି ଦରକାର୍ ରଇଲା କାମ୍‌ମନ୍ କରାଇଆଟାସ୍ । ୩ ସବୁଜାଗାଇ ଆରି ସବୁ  
 ବେଲାଇ ଆମେ ଏଟାକେ ନାମ୍‌ଲୁନି, ଏଟାର୍‌ପାଇ ଆମେ ତମ୍‌କେ ମାନି ଆଇଲୁନି  
 । ୪ ସେଟା ଜାଇଟା ଅ, ମୁଇ ତମର୍ ଅଦିକ୍ ବେଲା ନେବାକେ ମନ୍ କରିନାଇ ।  
 ସେଟାର୍ ପାଇ ଆମର୍ ଗଟେକ୍ ଚଟ୍ ଅର୍‌ସାସଙ୍ଗର୍ କାତା ସୁନ୍‌ବାକେ ବାବୁଜିଆ  
 କଲିନି । ୫ ଏ ଲକ୍ ଗଟେକ୍ ବେସି ବଡ଼ ଗଣ୍ଡୁଗଲ୍ କରାଉ ବଲି ଆମେ ଜାନ୍,  
 ସେ ଦେସ୍‌ବିଦେସେ ସବୁ ବାଟେ ବୁଲିବୁଲି ଜିଉଦିମନ୍‌କେ କିରମାର କରାଇବାକେ  
 ଉସ୍‌କାଇଲାନି, ସେ ନାଜରିଡ଼ ଦଲ୍‌ର୍ ଗଟେକ୍ ନେତା । ୬ ସେ ଆମର୍ ମନ୍ଦିର୍ ଅସୁକଲ୍  
 କରବାକେ ଚେସ୍‌ଟା କଲାବେଲେ ଆମେ ତାକେ ବନ୍ଦି କଲୁ । ୭ ଆମର୍ ନିୟ୍‌ମ୍  
 ଇସାବେ ଏ ଲକ୍‌କେ ବିଚାର୍ କରବାକେ ଆମେ ମନ୍ କରତେରଇଲୁ । ୮ ଆର୍ ବିରଦେ  
 ଜନ୍ ସବୁ ଦାବା କଲୁଆରୁ, ସେଟା ତମେ ଏ ଲକ୍‌କେ ପାଚାରିକରି ଜାନିପାରାସ୍ ।”  
 ୯ ତେଇରଇଲା ଜିଉଦିମନ୍ ଏଟା ସଡ଼ବଲି ତାଟ୍ ସଙ୍ଗ୍ ସେ କାତାଇ ରାଜି ଅଇଲାଇ ।

ପାଉଲ୍ ପେଲିକ୍‌ସର୍ ମୁଆଟେ ମାନିଆଇବାଟା

୧୦ ତାର୍‌ପଟେ ସାସନକାରିଆ ପାଉଲ୍‌କେ କାତା ଅଇବାକେ ସାଗିଆ କଲାକେ  
 ପାଉଲ୍ କଇଲା ।

“ମୁଇ ଜାନି ଜେ ବେସି ବରସ୍ ଦାରି ତମେ ଏ ଜାତିର୍ ବିଚାର୍‌କରୁ ଅଇ ଆରୁସ୍,  
 ସେଟାର୍ ପାଇ ତମର୍ ମୁଆଟେ କଇବାଟା କେତେ କରମର୍ କାତା । ୧୧ ଆଗିଆ, ତମେ  
 ନିଜେ କଜିକରି ଜାନିପାର୍‌ସା ଜେ, ପାକାପାକି ବାରଦିନ୍ ତଲେ, ମୁଇ ଜିରୁସାଲାମେ  
 ପାର୍‌ତନା କରବାକେ ଜାଇରଇଲି । ୧୨ ମନ୍ଦିରେ କାର୍ ସଙ୍ଗ୍, ମୁଇ ଦଦାପେଲା  
 କରବାଟା ଜିଉଦିମନ୍ ଦେକି ନ ରଇଲାଇ କି ପାର୍‌ତନା ଗର୍‌ମନ୍‌କେ କି ଗତର୍  
 କନ୍ ବିନ୍ ଜାଗାଇ ଲକ୍‌ମନ୍‌କେ ଉସ୍‌କାଇବାଟା ଦେକି ନ ରଇଲାଇ । ୧୩ ସେଟାର୍  
 ପାଇ ମର୍ ବିରଦେ ଏବେ ଆନିରଇବା ଦାବାର୍ ପାଇ, ସେମନ୍ କାଇମିସା ସାକି  
 ଦେଇ ନାପାରଡ଼ । ୧୪ ଏଲେ ମିସା ମୁଇ ତମର୍ ଲଗେ ରାଜି ଅଇଲିନି ଜେ, ଜନ୍  
 ବାଟ୍ ସେମନ୍ ମିଟ୍ ବଲି କଇଲାଇନି, ସେ ବାଟେ ଜାଇ, ଆମର୍ ଆନିଦାଦିମନ୍‌ର୍  
 ପରମେସର୍‌କେ ପାର୍‌ତନା କଲିନି । ମାତର୍ ମୁଇ ମିସା ମସାର୍ ରିଡିନିତି ଆରି  
 ବବିସଡ଼ବକ୍‌ତାମନ୍‌ର୍ ସାସ୍‌ତରେ ଲେକାଅଇଲା ସବୁ ବିସଇ ବିସ୍‌ବାସ୍ କଲିନି ।  
 ୧୫ ଏମନ୍‌ର୍ ପାରା, ମାପ୍‌ରୁର୍ ଲଗେ ମର୍ ଗଟେକ୍ ଆସା ଆଟେ ଜେ, ନିକ ଲକ୍  
 ଅଅଡ଼ କି କାରାପ ଲକ୍ ଅଅଡ଼, ସବୁ ମଲାଟାନେଅନି ଉଟ୍‌ବାଇ । ୧୬ ସେଟାର୍ ପାଇ

ପରମେସରର ଆରି ମୁନୁସର ମୁଆଟେ ନିରୁମଲ୍ ବିବେକ୍ ଇସାବେ ଚଲାଚଲ୍ତି କରବାକେ ସବୁବେଲେ ଚେସ୍ଟା କଲିନି ।

୧୭ \*“ବେସି ବରସ୍ ଦାରି ଦୁରିକେ ରଇଲା ପତେ, ଜିରୁସାଲେମର ଲକ୍ମନର ପାଇ କିଚି ତାରୁ ନେବାକେ ଆରି ବଲିଦେବାକେ ମୁଇ ତେଇ ଜାଇରଇଲି । ୧୮ ମୁଇ ନିରୁମଲ୍ ଅଇବା ବିଦି ସାରାଇଲା ବେଲେ, ସେମନ୍ ମକେ ମନ୍ଦିରେ ଦେକ୍ଲାଇ । ସେଡ଼କିବେଲେ ମର୍ ଲଗେ ବେସି ଲକ୍ ନ ରଇଲାଇ କି କାଇମିସା ଗଣ୍ଟଗଲ୍ ଅଇ ନ ରଇଲା । ୧୯ ମାତର୍ ତେଇ ଆସିଆ ଦେସର୍ କେତେଟା ଜିଉଦି ରଇଲାଇ, ଜଦି ସେମନ୍କେ ମର୍ ବିରଦେ କାଇଟା କଇବାର୍ ରଇଲା, ଆଗ୍ରୁ ସେମନ୍ ନିଜେ ତମର୍ ମୁଆଟେ ଆସି ଦାବା କରବାର୍ ରଇଲା । ୨୦ ଆରି ତରେକ୍ ମୁଇ ଜେଡେବେଲା ବଡ଼ ସବାର୍ ମୁଆଟେ ଟିଆଅଇରଇଲି, କନ୍ ଅପରାଦେ ଦସି ଅଇଲି, ସେଟା ଇତି ରଇଲା ଲକ୍ମନ୍ କଅଡ଼ । ୨୧ \*ଏଲେମିସା ମୁଇ ଗଟେକ୍ କାତା କଇରଇଲି । ସେମନ୍ ମୁଆଟେ ଟିଆ ଅଇରଇଲା ବେଲେ ମଲାଲକ୍ମନ୍ ଆରିତରେକ୍ ଉଟ୍‌ବାଇ ବଲି ତାଟ୍ ସଙ୍ଗ୍ ବିସ୍‌ବାସ୍ କରତେ ରଇଲାର୍ ପାଇ ଆଜି ତମର୍‌ଟାନେ ବିଚାର୍‌ନା ପାଇଲିନି । ଏଟାକେ ଚାଡ଼ି ଆରି ସେମନ୍ ମୁଆଟେ କିଚି କଇନାଇ ।”

୨୨ ପେଲିକ୍‌ସ୍ ସେ ବାଟ୍ ବିସଇର୍ ଟିକିନିକି ଜାନି ରଇଲାର୍ ପାଇ ସୁନାଇବାଟା ବନ୍ଦ୍ କରି କଇଲା, “ ସନିଅମନ୍ ମୁକିଅ ଲିସିଅସ୍ କେଟ୍‌ଲା ପତେ, ମୁଇ ତମର୍ ବିଚାର୍‌ନା ସୁନାଇବି ।” ୨୩ ତାର୍‌ପତେ ସେ ଅଦିକାରେ ରଇବା ମୁକିଆକେ କଇଲା, “ପାଉଲ୍‌କେ ବନ୍ଦି ଇସାବେ ଜାଗିରଇବାର୍ ଆଟେ, ମାତର୍ ତାକେ ଦର୍‌କାର୍ ଅଇବା ଜିନିସ୍ ତାର୍ ଲକ୍ମନ୍ ଆନିଦେଲେ, ସେଟା ତେବାଇବାର୍ ନାଇ ।”

ପେଲିକ୍‌ସ୍ ଆରି ଦୁର୍‌ସିଲାର୍ ମୁଆଟେ ପାଉଲ୍

୨୪ କେତେଦିନ୍ ପତେ ପେଲିକ୍‌ସ୍ ତାର୍ ଜିଉଦି ମାଇଜି ଦୁର୍‌ସିଲା ସଙ୍ଗ୍ ତେଇ ଆଇଲା । ସେ ପାଉଲ୍‌କେ ଡାକାଇ ଜିସୁକିରିସ୍‌ଟକେ ବିସ୍‌ବାସ୍ କରବା ବିସଇ, ତାର୍ କାତା ନିକକରି ସୁନ୍‌ଲା । ୨୫ ମାତର୍ ଜେଡେବେଲେ ପାଉଲ୍ ଦରମ୍ ଚଲାଚଲ୍ତି ଆରି ଲକ୍ମନ୍ ନିଜର୍ ପାପର୍ ଗୁନ୍‌ଚଲନ୍ ଇସାବେ ନ ଜାଇକରି ନିଜେ ଦାରିଅଇରଇବା ବିସଇ, ଆରି ଆଇବା ଦିନର୍ ବିଚାର୍‌ନା ବିସଇ କଇବାକେ ଦାର୍‌ଲା, ପେଲିକ୍‌ସ୍ ଡରିଜାଇକରି “ତମେ ଏବେ ଜାଇପାରାସ୍ ।” ବଲି କଇଲା, “ବେଲା ପାଇଲେ ଆରି ତରେକ୍ ମୁଇ ତମ୍‌କେ ଡାକାଇବି ।” ୨୬ ସେ ବେଲା ପାଉଲ୍ ତାକେ କେତେକ୍ ତାରୁ ଲାଟ୍ ଦେଇସି ବଲି ସେ ଆସା କରି ରଇଲା, ସେଟାର୍ ପାଇ ସେ ତର୍‌କେ ତର୍ ତାକେ ଡାକାଇ ତାର୍ ସଙ୍ଗ୍ କାତାବାର୍‌ତା ଅଇବାର୍ ଦାର୍‌ଲା ।

୨୭ ଏଡ଼ି ଦୁଇ ବରସ୍ ଗାଲାପତେ ପର୍‌କିୟସ୍ ପେସ୍‌ଟସ୍ ପେଲିକ୍‌ର୍ ଜାଗାଇ ସାସନ୍‌କାରିଆ ଅଇ ଆଇଲା । ପେଲିକ୍‌ସ୍ ଜିଉଦିମନ୍‌କେ ବଲ୍‌ବଲାଇ ଅଇବାକେ ମନ୍ କରି ପାଉଲ୍‌କେ ନ ମୁକ୍‌ଲାଇ ବନ୍ଦି ଗରେ ଚାଡ଼ି ଉଟିଗାଲା ।

୨୫

ସମ୍‌ରାଟର୍ ଲଗେ ପାଉଲ୍‌ର୍ ଗୁଆରି

୧ ପେସ୍‌ଟସ୍ ସାସନ୍‌କାରିଆ ଅଇକରି ଆଇଲା ଜାଗାଇ, ତିନ୍ ଦିନ୍ ପତେ, ସେ ସିସିରିଆ ଅନି ଜିରୁସାଲମେ ଗାଲା । ୨ ସେ ଜିରୁସାଲମେ ରଇଲାବେଲେ, ତେଇ ମୁକିଅ ପୁଜାରି ଆରି ଜିଉଦିନେତାମନ୍ ଆରି ତରେକ୍ ପାଉଲ୍‌ର୍ ବିରଦେ ରଇବା ଦାବି ନେଇ, ସେମନ୍ ଲଗେ ଗାଲାଇ । ସେମନ୍ ପେସ୍‌ତେସ୍‌କେ ବାରୁଜିଆ କଲାଇ, ୩ ଜେଡ଼ିକି ପାଉଲ୍‌କେ ଜିରୁସାଲମେ ଆନ୍‌ବାକେ ଗୁଆରି କଲାଇ । କାଇକେବଇଲେ ବାଟେ ଜାଗିରଇ ସେମନ୍ ପାଉଲ୍‌କେ ମାରିମରାଇବାକେ ଜନ୍‌ନା

ତିଆର କରିରଇଲା । ୪ ପେସ୍ଟସ୍ କଇଲା, “ପାଉଲ୍‌କେ ଗଟେକ୍ ବନ୍ଦି ଇସାବେ ସିସେରିଆଇ ରକାଅଇଲା ଆଚେ ଆରି ବେଗି ମୁଇ ତେଇ ବାଉଡ଼ି ଜିବି । ୫ ଜଦି ସେ କାଇ ଦସ୍ କଲା ଆଚେ, ତେବେ ତମର୍ ନେତାମନ୍ ମର୍ ସଙ୍ଗ୍ ସିସେରିଆଇ ଆସଡ଼ ଆରି ତାର୍ ବିରଦେ ସେମନର୍ ଦାବା ଜାନାଅଡ଼ ।”

୬ ପେସ୍ଟସ୍ ସେମନର୍ ସଙ୍ଗ୍ ଆଟ୍ ଦସ୍ ଦିନ୍ ଜିରୁସାଲମେ ରଇକରି ସିସେରିଆଇ ବାଅଡ଼ଲା । ତାର୍ ଆରକର୍ ଦିନେ ବିଚାର୍ କର୍ବା ଗରେ ବସି ପାଉଲ୍‌କେ ଆନ୍‌ବାକେ ଆଦେସ୍ ଦେଲା । ୭ ପାଉଲ୍ ଆଇଲା ଦାପ୍‌ରେ ଜିରୁସାଲମେଅନି ଆସିରଇବା ଜିଉଦିମନ୍ ତାକର୍ ଚାରିବେଟ୍‌ତି ବେଡ଼ି ଚିଆ ଅଇଲାଇ ଆରି ତାର୍ ବିରଦେ କେତେକ୍ କେତେକ୍ ବଡ଼ ବଡ଼ ଦାବା କଲାଇ, ମାତର୍ ସେମନ୍ ଏ ସବୁ ସଡ଼ ବଲି ଦେକାଇ ନାପାରୁଲା । ୮ ମାତର୍ ପାଉଲ୍ ନିଜେ ନିଜର୍ ବାଟେ ଅନି କଇଲା, “ଜିଉଦିମନ୍‌ର ରିତିନିତି, ମନ୍ଦିରର୍ କି ରମିଅ ସାସନ୍‌କାରିଆ, କାର୍ ମିସା ବିରଦେ ମୁଇ ଦସ୍ କରିନାଇ ।”

୯ ମାତର୍ ପେସ୍ଟସ୍ ଜିଉଦିମନ୍‌କେ ବଲ୍ ବଲାଇ ଅଇବାକେ ମନ୍ କରି ପାଉଲ୍‌କେ ପାଚାରୁଲା, “ଜିରୁସାଲମେ ଜିବାକେ ଆରି ତେଇ ମର୍ ମୁଆଟେ, ଏ ସବୁ ଦାବାର୍ ବିଚାର୍ କର୍ବାକେ ତୁଇ କାଇ ରାଜି ଅଇସୁ କି ?”

୧୦ ପାଉଲ୍ କଇଲା, “ମୁଇ ବଡ଼ ସାସନ୍‌କାରିଆର୍ ନିଜର୍ ବିଚାର୍‌ନା ଜାଗାଇ ଚିଆ ଅଇଲିଆଚି, ଇତିସେ ମର୍ ବିଚାର୍ ଅଇବାର୍ ଦରକାର୍ । ତମେ ନିକକରି ଜାନାସ୍ ଜେ, ମୁଇ ଜିଉଦିମନ୍‌ର ବିରଦେ କାଇମିସା ଦସ୍ କରିନାଇ । ୧୧ ଜଦି ମୁଇ ରିତିନିତି ନ ମାନି ମରନ୍ ଡଣ୍ଟ ପାଇବାପାରା କାଇ ଦସ୍ କଲିଆଚି ବଇଲେ, ମର୍‌ବାକେ ନ ଡରି । ମାତର୍ ସେମନ୍ ମର୍ ବିରଦେ ଆନିରଇବା ଦାବା ବିତ୍‌ରେ କାଇମିସା ସଡ଼ ନ ରଏ, ତେବେ କେ ମିସା ମକେ ସେମନ୍‌କେ ସର୍‌ପିଦେଇ ନାପାରଡ଼ । ବଡ଼ ସାସନ୍‌କାରିଆ ଆକା ମକେ ବିଚାର୍‌ନା କର ବଲି ଗୁଆରି କଲିନି ।”

୧୨ ତାର୍‌ପଟେ ପେସ୍ଟସ୍ ତାର୍ ସବାଇ ରଇଲା ଲକ୍‌ମନର୍ ସଙ୍ଗ୍ କାତାବାର୍‌ତା ଅଇ କଇଲା, “ତମେ ବଡ଼ ସାସନ୍‌କାରିଆ ବିଚାର୍ କର ବଲି ଗୁଆରି କରିଆଟାସ୍, ସେଟାର୍ ପାଇ ତମକେ ବଡ଼ ସାସନ୍‌କାରିଆର୍ ଲଗେ ପାଟାଇବି ।”

ଆଗ୍ରିପା ଆରି ବର୍‌ନିକିର୍ ମୁଆଟେ ପାଉଲ୍

୧୩ କେତେଦିନ୍ ପଟେ ରାଜା ଆଗ୍ରିପା ଆରି ବର୍‌ନିସ୍ ପେସ୍ଟସ୍‌କେ ଜୁଆର୍ ଜାନାଇବାକେ କାଇସରିଆଇ ମିସ୍‌ବାର୍ ଆଇଲାଇ । ୧୪ ତେଇ ସେମନ୍ କେତେ ଦିନ୍ ରଇଲା ପଟେ ପେସ୍ଟସ୍ ପାଉଲ୍‌ର୍ ବିସଇ ରାଜାକେ ଜାନାଇଲା, “ପେଲିକସ୍ ବନ୍ଦିକରି ଜାଇରଇବା ଗଟେକ୍ ଲକ୍ ଇତି ଆଚେ ।” ୧୫ ମୁଇ ଜେତେବେଲା ଜିରୁସାଲାମ୍ ଜାଇରଇଲି, ଜିଉଦିମନ୍‌ର୍ ମୁକିଅ ପୁଜାରିମନ୍ ଆରି ସେ ଦରମର୍ ପାର୍‌ଚିନ୍‌ମନ୍ ତାର୍ ବିରଦେ କେତେଟା ଦାବା କଲାଇ ଆରି ତାକେ ଦସି କର୍ବାକେ ମକେ କଇଲାଇ । ୧୬ ମାତର୍ ମୁଇ ସେମନ୍‌କେ କଇଲି ଜେ, ଗଟେକ୍ ଦସିକେ ବିଚାର୍ କର୍ବା ଗରେ, ତାକେ ଦାବା କରୁମନର୍ ମୁଆଟେ ନିଜର୍ ବାଟେଅନି କଇବାକେ ବେଲା ଦେବା ଆଗ୍ଟୁ, ତାକେ ଦସି କର୍ବାଟା ଆମର୍ ରମିୟମନର୍ ନିୟମେ ନାଇ । ୧୭ ସେମନ୍ ଇତି ଆଇଲା ପଟେ ମୁଇ ଅଲ୍‌ସମ୍ ନ କରି, ତାର୍ ପର୍‌ଦିନେ ବିଚାର୍ କର୍ବା ଗରେ ବସଲି ଆରି ସେ ଲକ୍‌କେ ବିତ୍‌ରେ ଆନ୍‌ବାକେ ଆଦେସ୍ ଦେଲି । ୧୮ ମର୍ ବାବ୍‌ବାଟା ବୁଲ୍ ରଇଲା, ସେମନ୍ ତାର୍ ବିରୁଦେ ଆନିରଇବା ଦାବି, ସେ କରିରଇବା କରାପ୍ ବିସଇ ଅଇରଇସି ବଲି ବାବ୍‌ଲି, ମାତର୍ ସେନ୍ତାର୍ ନ ରଇଲା । ୧୯ ସେମନର୍ ଦାବି ତାକର୍ ନିଜର୍ ଦରମ୍ ବିସଇ ରଇଲା, ଆରି ଜିସୁ ବଲି ଗଟେକ୍ ମରିଜାଇରଇବା ଲକ୍‌ର୍ ବିସଇ ରଇଲା । ମାତର୍ ସେଲକ୍ ବଞ୍ଚିଲା ଆଚେ ବଲି ପାଉଲ୍ କଇଲା । ୨୦ ଏ ସବୁ ବିସଇର୍ ସଡ଼ କେନ୍ତ୍ର ବାର୍‌କରାଇବି ବଲି ମୁଇମିସା

ନାଜାନିରଇଲି, ତେବେ ଏ ସବୁ ବିଚାରନା କରବାକେ ପାଉଲୁକେ ଜିରୁସାଲମେ ଜାଇସୁ କି ନାଇ ବଲି ପାଟାରୁଲି । ୧୧ ମାତର ପାଉଲୁ, ନିଜେ ରମ୍ ରାଇଜର କାଇସର ରାଜା, ତାର ବିଚାର କର ବଲି କଇ ସନିଅମନ୍ ରକିଆ କରତୁ ବଲି ମନ୍ କଲା । ସେଟାରପାଇ ବଡ଼ ସାସନକାରିଆ ଲଗେ ପାଟାଇବା ଜାକ ବନ୍ଦି କରି ରକ୍ତବାକେ ଆଦେସ୍ ଦେଲିଆଟି ।

୨୨ ଆଗ୍ରିପା ପେସଟସ୍ କଇଲା, “ମୁଇ ନିଜେ ଏ ଲକର କାତା ସୁନ୍ବାକେ ମନ୍ କଲିନି ।” ପେସଟସ୍ କଇଲା, “କାଲିକେ ତମେ ତାର କାତା ସୁନ୍ସା ।”

୨୩ ତାର ଆରକର ଦିନେ ଆଗ୍ରିପା ଆରି ବରୁନିସ୍ ଆସି କେଟୁଲାଇ । ସେମନ୍ ରାଜାମନ୍ ପିନ୍ଦଲାପାରାଟା ପିନ୍ଦିର ଇଲା । ସନିଅମନ୍ ନେତାମନ୍ ଆରି ସେ ଗଡ଼ର ବଡ଼ ବଡ଼ ଲକ୍ମନର ସଙ୍ଗେ ବେସି ଡାକ୍ ପୁଟା ସଙ୍ଗେ ଆସି, ବିଚାରନା ଜାଗାଇ ପୁରୁଲାଇ । ପେସଟସ୍ ଆଦେସ୍ କଲାକେ, ପାଉଲୁକେ ବିତରେ ଆନ୍ଲାଇ । ୨୪ ପେସଟସ୍ କଇଲା, “ରାଜା ଆଗ୍ରିପା ଆରି ରୁଣ୍ଡି ରଇଲା ସବୁ ଲକ୍, ତମେ ଏ ଜନ୍ ଲକ୍ କେ ଦେକ୍ଲାସ୍ନି, ତାର ବିରଦେ ଇଡିର ଜିଉଦିମନ୍ ଆରି ଜିରୁସାଲମର ଜିଉଦିମନ୍ ମର ଲଗେ ଦାବା କଲାଇ ଆଚତ । ସେମନ୍ ତାକେ ମରାଉ ବଲିକରି କଇ ଆଉଲି ଅଇଲାଇନି । ୨୫ ମାତର ମୁଇ କଜି ବାରକରାଇଲି ଜେ, ଏ ଲକ୍ ମରନ୍ ଡଣ୍ଡ ପାଇବା ଏଡ଼କି, କାଇ ଦସ୍ କରେନାଇ । ସେ ନିଜେ ବଡ଼ସାସନକାରିଆକେ ଗୁଆରି କଲାର ପାଇ, ମୁଇ ତାକେ ତେଇ ପାଟାଇବାକେ ଟିକ୍ କଲି ଆଟି । ୨୬ ମାତର ତାର ଦାବି ବିସଇ ଟିକ୍ ସଙ୍ଗେ ବଡ଼ସାସନକାରିଆକେ ଲେକ୍ବାକେ ମର ଲଗେ କାଇଟା ନାଇ । ସେଟାରପାଇ ମୁଇ ସବୁର୍ ମୁଆଟେ ଆରି ଏ ଆଗ୍ରିପା ରାଜା, ତମର୍ ମୁଆଟେ ଆନ୍ଲି ଆଟି, ଜେକ୍ତି କି ତାର ବିସଇ ତମେ ନିକ୍ ସଙ୍ଗେ କଜୁଲା ପତେ ବଡ଼ସାସନକାରିଆକେ ଲେକିପାରବି । ୨୭ କାଇକେବଇଲେ ଗଟେକ୍ ବନ୍ଦି ବିରଦର ଦାବା ନିକସଙ୍ଗେ ନ ଦେକାଇ, ବଡ଼ସାସନକାରିଆର୍ ଲଗେ ପାଟାଇବାଟା ଟିକ୍ ନର୍ସ ବଲି ମୁଇ ବାବ୍ଲିନି ।”

### ୨୭

ଆଗ୍ରିପାର ମୁଆଟେ ପାଉଲୁ ନିଜର ବିସଇ ସାକି ଦେବାଟା

୧ ଆଗ୍ରିପା ପାଉଲୁକେ କଇଲା, “ତକେ ତର ନିଜର ବିସଇ ଜାଇଟା କଇବାରୁ ଆଟେ, ସେଟା କଇବାକେ ଅଦିକାର ଦିଆଅଇଲା ।” ପାଉଲୁ ଆଡ଼ ଉଟାଇକରି ନିଜର୍ବାଟେଅନି କଇଲା,

୨ “ରାଜା ଆଗ୍ରିପା ! ଜିଉଦିମନ୍ ମକେ ଜନ୍ ସବୁ ବିସଇ ନେଇ ଦସି କରିଆଚତ, ସେଟାର ବିରଦେ ତମର୍ ମୁଆଟେ, ନିଜର ବାଟେଅନି କଇବାକେ ବେଲା ପାଇଲାଟି ପାଇ ମୁଇ କେତେ କରମର୍ ଲକ୍ ବଲି ବାବ୍ଲିନି ।” ୩ କାଇକେବଇଲେ ଜିଉଦିମନ୍ ରିଡିନିଡି ବିସଇ ଆରି ସେମନ୍ ଲାଗାଜଡା ବିସଇ ତମେ ନିକସଙ୍ଗେ ଜାନାସ୍ । ମୁଇ ଗୁଆରି କଲିନି, ତମେ ବିଜାର ନ ଅଇକରି ମର୍ ସବୁକାତା ସୁନା ।

୪ “ପିଲାବେଲେଅନି କେକ୍ତି ମୁଇ ଜିଲି ଆଟି, ସେଟା ଜିଉଦିମନ୍ ଜାନଡ଼ । ପର୍ତୁମ୍ ମର୍ ନିଜର ଦେସେ ଆରି ପତେ ଜିରୁସାଲମେ ମୁଇ କେକ୍ତି ଜିବନ୍ କାଟୁଲି ଆଟି, ସେଟା ମିସା ସେମନ୍ ଜାନଡ଼ । ୫ ଆଗେଅନି ମୁଇ ଜିଉଦି ନିୟମ୍ ସବୁ ମାନିକରି ପାରୁସିମନ୍ ପାରା ଚଲାଚଲୁଟି କଲିଆଟି, ସେ ବିସଇ ସେମନ୍ ସାକି ଦେଇପାରତ ।” ୬ ପର୍ତେସର୍ ଆମର୍ ଆନିଦାଦିମନ୍ କେ ଜନ୍ କାତା ଦେଇ ରଇଲା, ତେଇ ମର୍ ଆସା ରଇଲାରପାଇ ଆଜି ମୁଇ ଇଡି ବିଚାରନା କରାଇଅଇବାକେ ଟିଆ ଅଇଲିଆଟି

☆ ୨୭:୫ ୨୭:୫ ପେରିଡ଼ ୨୩:୭; ପିଲିପିୟ ୩:୫

। ୭ ମାତର ଏ ରାଜା, ଏ ଆସା ଆମର ବାରଟା ଜିଉଦି ଜାତିର ଲକ୍ ଦିନ୍ ରାତି ମାପୁରୁକେ ପାରତନା କରି, ପାଇବାକେ ଆସାକଲାଇନି । ଆରି ଏ ଆସାର ଲାଗି ଆମର ଜିଉଦିମନ୍ ମକେ ଦସି କରିଆତଡ଼ ।<sup>୮</sup> ପରମେସର ମଲା ଲକ୍‌କେ ଉଟାଇସି, ବଲି କାଇକେ ବିସବାସ୍ କରିନାପାରୁଲାସି ?

୯ \*<sup>୯</sup>“ମୁଇ ମିସା ସେମନର୍ ପାରା ରଇଲି । ନାଜରିତିୟ ଜିସୁର୍ ବାଟେ ଜିବା ସବୁ ଲକ୍‌ମନର୍ ବିରୁଦେ ମର୍ ଜେଡକି ବପୁ ସଙ୍ଗ ମିସା କାମ୍ କରବାର୍ ଆଟେ ବଲି ଚିନ୍ତା କଲି ।<sup>୧୦</sup> ମୁଇ ଜିରୁସାଲାମେ ସେନ୍ତି କଲି । ମୁକିଅ ପୁଜାରିମନର୍‌ତେଇଅନି ଅଦିକାର୍ ଚିଟି ପାଇ, ପରମେସରର୍ ବେସି ଲକ୍‌ମନ୍କେ ବାନ୍ଦି କରି, ବନ୍ଦି ଗରେ ପୁରାଇଦେଲି । ଆରି ସେମନ୍କେ ମରନର୍ ଡଣ୍ଟ ଦେବାକେ ବିଚାରନା କଲାବେଲେ, ସେମନର୍ ବିରୁଦେ ଚିଆଅଇଲି ।<sup>୧୧</sup> କେତେ କେତେ ତର୍ ପାରତନା ଗର୍ମନ୍କେ ସେମନ୍ ବିସବାସ୍ ଚାତଡ଼ ବଲି ମାରବାକେ ତିଆରୁଲି, ସେମନର୍ ଉପରେ ଏତେ ରିସା ଅଇଜାଇରଇଲି ଜେ, ସେମନ୍କେ କସ୍ଟ ଦେବାକେ ବିଦେସେ, ରଇବା ଗର୍ମନ୍କେ ମିସା ଜାଇରଇଲି ।”

ନିଜେ ବାଦ୍‌ଲାଇଲା ବିସଇ ପାଉଲ୍ କଇବାଟା

୧୨ “ଏଟା କରବାକେ ମୁଇ ମୁକିଅ ପୁଜାରିମନର୍‌ତେଇଅନି ଅଦିକାର୍ ଚିଟି ଆରି ଆଦେସ୍ ନେଇ ଦାମାସ୍କସେ ଜାଇରଇଲି ।<sup>୧୩</sup> ଏ ରାଜା ଏଗ୍ରିପା, ଅଟାଡ଼ ଦିନେକ୍ ମୁଣ୍ଟବେଲା ଲଗେ, ଜିବାବାଟେ ବେଲ୍ ତାରାସେଅନି ଅଦିକ୍ ଉଜଲ୍ ଦେକ୍ଲି । ସରଗେଅନି ସେ ଉଜଲ୍ ଆସି ମକେ ଆରି ମର୍ ସଙ୍ଗ ଜିବା ଲକ୍‌ର୍ ଚାରିବେଟି ବିଟି ଅଇଲା ।”<sup>୧୪</sup> ଆମେ ସବୁ ଲକ୍ ତଲେ ଅଦ୍ରି ତୁଲିଦେଲୁ ଆରି ଇବ୍‌ରୁ ବାସାଇ ମକେ କଇତେରଇବା ଏ କାତା ସୁନ୍‌ଲି, “ସାଉଲ୍, ସାଉଲ୍ !” ତୁଇ ମକେ କାଇକେ କସ୍ଟ ଦେଲୁସି ? କସ୍‌ଲାବେଲେ କସ୍‌ବାଲକ୍ ବଲଦ୍‌କେ ତୁତାରିବୁସଲେ ବଲଦ୍ ଲାଡ଼ମାରବା ପାରା, ତୁଇ ନିଜେ କସ୍ଟ ପାଇଲୁସି ।<sup>୧୫</sup> “ମୁଇ ପାଟାରୁଲି, ‘ମାପୁରୁ ତମେ କେ?’ ସେ କଇଲା, ‘ମୁଇ ଜିସୁ, ମକେସେ ତୁଇ କସ୍ଟ ଦେଲୁସି ।’<sup>୧୬</sup> ମାତର ଉଟିକରି ଚିଆ ଅ । ତକେ ମର୍ ସେବାକାରିଆ କରବାକେ, ଦର୍‌ସନ୍ ଦେଲିଆତି । ଆଜି ତୁଇ ମର୍ ବିସଇ ଜାଇଟା ଦେକ୍‌ଲୁସ୍ ଆରି ପର୍‌କେ ମିସା ମୁଇ ଜାଇଟା ଦେକାଇବି, ସେ ବିସଇ ତୁଇ ବିନ୍ ଲକ୍‌ମନ୍କେ ସାକିଦେସ୍ ।<sup>୧୭</sup> ଜନ୍ ଜିଉଦି ଆରି ଜିଉଦିନଇଲା ଲକ୍‌ମନର୍‌ତେଇ ତକେ ପାଟାଇବି, ସେମନର୍‌ତେଇ ଅନି ତାଡ଼ନା ପାଇଲେ, ମୁଇ ତକେ ରକିଆ କରବି ।<sup>୧୮</sup> ତୁଇ ସେମନର୍ ଆକି ପିଟାଇଦେସ୍ ବଲି ମୁଇ ତକେ କଇଲିନି । ଜେନ୍ତିକି ସେମନ୍ ଆନ୍ଦାରେଅନି ଉଜଲେ ଆରି ସଇତାନର୍ ବାନ୍ଦନେଅନି ମାପୁରୁର୍ ବାଟେ ବାଅଡ଼ବାଇ । ଜେନ୍ତିକି ମକେ ବିସବାସ୍ କଲାର୍ ପାଇ, ସେମନର୍ ପାପ୍ କେମା ଅଇସି । ଆରି ମାପୁରୁ ବାଟୁଲା ଲକ୍‌ମନର୍ ସଙ୍ଗ ସେମନ୍କେ ମିସା ଡାକିନେବାଇ ।”

ନିଜର୍ କାମ୍ ବିସଇ ପାଉଲ୍ ସାକି ଦେବାଟା

୧୯ “ସେଟାର୍‌ପାଇ ଏ ରାଜା ଆଗ୍ରିପା ମୁଇ ସରଗେଅନି ଜନ୍ ଦର୍‌ସନ୍ ପାଇଲିଆତି, ସେଟା ପୁରାପୁରୁନ୍ ମାନଲି ।<sup>୨୦</sup> \*ସେନ୍ତାରି ମୁଇ ପର୍‌ତମେ ଦାମାସ୍କସେ ଆରାମକରି ତାର୍‌ପଟେ ଜିରୁସାଲାମେ, ପଟେ ଜିଉଦାର୍ ସବୁବାଟେ ଆରି ଜିଉଦିନଇଲା ଲକ୍‌ମନର୍ ବିତରେ ମାପୁରୁର୍ ବିସଇ ଜାନାଇଲି । ଜେନ୍ତି କି ସେମନ୍ କରିରଇବା ପାପ୍ ଏତାଇ, ଦୁକ୍‌କରି ମାପୁରୁର୍‌ବାଟେ ବାଅଡ଼ବାଇ । ଆରି ସେମନ୍ ଜନ୍‌ଟା ମାନିଆଇଲାଇ ଆଟଡ଼, ସେଟା ତାକର୍ ଚଲାଚଲ୍‌ତିଅନି ଜାନିଅଇସି ।<sup>୨୧</sup> ଏଟାର୍‌ପାଇ ମୁଇ ମନ୍ଦିରେ ରଇଲାବେଲେ ଜିଉଦିମନ୍ ମକେ ଦାରି ମରାଇବାକେ

\* ୨୭:୯ ୨୭:୯ ପେରିଡ଼ ୮:୩;୨୨:୪,୫    \* ୨୭:୨୦ ୨୭:୨୦ ପେରିଡ଼ ୯:୨୦;୨୮:୨୯

ତେସ୍ତା କଲା । ୨୨ ମାତର୍ ପର୍ଯ୍ୟନ୍ତ ମକେ ଆଜିକେଜାକ ରକିଆ କଲାଆତେ ଆରି ସେଟାପାଇ ଆଜି ସାନ୍ ବଡ଼ ସବୁ ଲକ୍ଷ୍ମୀ ଲଗେ ସମାନ୍ ଇସାବେ ମର୍ ସାକିଦେବାକେ ଚିଆକରାଇଆତେ । ବବିସତ୍ତବକ୍ତା ଆରି ମସା ଜାଇଟା ଗର୍ସି ବଲି କଇରଇଲା, ଟିକ୍ ସେ କାତା ମୁଇ କଇଲିନି । ୨୩ \*ମସିଆ ଦୁକ୍ ପାଇସି ଆରି ମଲାଲକ୍ମାନର୍ ବିତ୍ତରେଅନି ସିଗ୍ ପର୍ତ୍ତୁମେ ଉଟି, ଜିଉଦି ଆରି ଜିଉଦି ନଇଲା ଲକ୍ମାନର୍ ଲଗେ ମୁକ୍ତିର୍ ଉଜଲ୍ ଦେକାଇସି ।”

୨୪ ପାଉଲ୍ ନିଜର୍ ବାଟେଅଇ କଇଲା ବେଲେ, ପେସ୍ତସ୍ ତାକେ ଆଉଲିଅଇ କରି କଇଲା, “ପାଉଲ୍, ତୁଇ ବାୟା ଅଇଗାଲୁସ୍ ! ତୁଇ ପାଟ୍ପତି ବେସି ପାଇରଇବା ଗିଆନ୍ ତକେ ବାୟା କଲାଆତେ ।”

୨୫ ପାଉଲ୍ କଇଲା, “ଏ ମାପ୍ତୁ ପେସ୍ତସ୍, ମୁଇ ବାୟା ଅଇନାଇ, ମୁଇ ଜାଇଟା କଇଲିନି ସେଟା ପୁରାପୁରନ୍ ସତ୍ । ଆରି ତବିର୍ ବୁଦିର୍ କାତା କଇଲିଆଟି । ୨୬ ଏ ରାଜା ଅଗ୍ରିପା ! ତମେ ଏ ବିସଇ ଜାନିରଇଲାଟ୍ ପାଇ, ତମର୍ ମୁଆଟେ ଏ କାତା କଇବାକେ ସାଆସ୍ କଲିନି ! ମୁଇ ଜାନାଇରଇବା ସବୁ ବିସଇର୍ କାଇ କାତା ମିସା, ସେ ନାଜାନେ, ବଲି ମୁଇ ବିସବାସ୍ କରିନାଇ ! କାଇକେବଇଲେ ଏଟା ଲୁଟ୍ତେ କରାଅଏ ନାଇ । ୨୭ ରାଜା ଆଗ୍ରିପା, ତମେ ବବିସତ୍ତବକ୍ତାମନ୍କେ ବିସବାସ୍ କଲାସ୍ନି ତ ? ମୁଇ ଜାନି ତମେ ବିସବାସ୍ କଲାସ୍ନି !”

୨୮ ଆଗ୍ରିପା ପାଉଲ୍କେ କଇଲା, “ଏ ଅଲପ୍ ବେଲା ବିତ୍ତରେ ତୁଇ କାଇ ମକେ ବିସବାସି କରିଦେବି ବଲି ବାବ୍ଲୁସ୍ନି କି ?”

୨୯ ପାଉଲ୍ କଇଲା, “ତନେକ୍ ଅ କି ପରେକ୍ ଅ, ପର୍ଯ୍ୟନ୍ତ ଲଗେ ମର୍ ଏଡ଼କି ମାଙ୍ଗ୍ଲିନି । ଅବ୍କା ତମେସେ ନାଇ ରାଜା, ଆଜି ମର୍ କାତା ସୁନିରଇବା ସବୁ ଲକ୍ ମର୍ପାରା କିରିସ୍ତର୍ ସିସ୍ ଉଆ । ମାତର୍ ମର୍ପାରା ଏକ୍ତି ସିକ୍ଲିସଙ୍ ବାନ୍ଦାଇ ଉଆ ବଲି ମୁଇ କଇନାଇ ।”

୩୦ ତାର୍ ପଟେ ରାଜା, ସାସନ୍କାରିଆ, ଆରି ବର୍ନିସ୍ ଆରି ବିନ୍ ଲକ୍ମାନ୍ ଜିବାକେ ଉର୍ଲାଇ । ୩୧ ସେମନ୍ ବାରଇଲା ବେଲେ ତାକର୍ ତାକର୍ ବିତ୍ତରେ କଇଲା, “ଏ ଲକ୍ ଏକ୍ତି କାଇମିସା କାମ୍ କରେ ନାଇ, ଜନଟା କି ସେ ମରନ୍ ଡି ପାଇବାକେ କି ବନ୍ଦି ଅଇବାକେ ।” ୩୨ ଆଗ୍ରିପା ପେସ୍ତସ୍କେ କଇଲା, “ଜଦି ଏ ଲକ୍ ବଡ଼ସାସନ୍କାରିଆଟାନେ ବିଟାର୍ ପାଇବି ବଲି ଗୁଆରି କରି ନ ରଇଲେ, ତେବେ ଆମେ ତାକେ ଚାଡ଼ି ଦେଇତୁ ।”

## ୨୭

ପାଉଲ୍ ରମ୍ ଦେସେ ଗାଡ଼ ଗାଡ଼ ଜିବାଟା

୧ ଆମେ ଜେଡେବେଲେ ପାନି ଜାଜେ ବସି ଇଟାଲି ଜିବାକେ ଟିକ୍ କଲା, ସେଡ଼କିବେଲେ କେଡେଟା ବନ୍ଦି ଅଇଲା ଲକ୍କେ ଆରି ପାଉଲ୍କେ ରମିୟ୍ ସନିଅମନ୍ ସେନାପତି ଜୁଲିୟ୍ସକେ ସର୍ପି ଅଇଲା । ୨ ଆମେ ସବୁଲକ୍ ରମ୍ ରାଇଜର୍ ଆସିଆ ଜାଗାର୍ ଗାଡ଼କଣ୍ଡି ରଇଲା ବିନ୍ ବିନ୍ ଜାଗାଇ ଜୁ ବଲି ଆଦ୍ରାମୁଦିୟ୍ମର୍ ଗଟେକ୍ ପାନିଜାଜେ ବସି ଗାଲୁ । ଆରି ମାକିଦନିଆ ବଲି ଗଟେକ୍ ଜାଗାର୍ ଆରିସ୍ତାକସ୍ ନାଉର୍ ତେସ୍ଲନିକି ଲକ୍ ଆମର୍ ସଙ୍ଗ୍ ରଇଲା । ୩ ଆର୍କର୍ ଦିନେ ଆମେ ସିଦନେ କେଟ୍ଲୁ । ଜୁଲିୟ୍ସ ପାଉଲ୍କେ ବେସି ଦୟା ଦେକାଇଡେରଇଲା । ପାଉଲ୍ ସଙ୍ଗାରିମନ୍ ଟାନେଅନି ତାର୍ ଦର୍କାର୍ ଅଇବା ଜିନିସ୍ମନ୍ ତୁଲିଆଇବାକେ ତାକର୍ସଙ୍ଗ୍ ଜାଇ ମିସଡ଼ ବଲି ପାଉଲ୍କେ ଆଦେସ୍ ଦେଲା । ୪ ଆମେ ଡେଇଅନି କେଡେଦୁର୍ ଗାଲାପଟେ ପବନ୍ ଅଇଲାଜେ ସାଇପରସ୍

ଗାଡ଼ର୍ ପାଲି ପାଲି ଗାଲୁ ।<sup>୫</sup> ସିଲିସିଆ ଆରି ପପୁଲିଆ ନାଉଁର୍ ଦୁଇଟା ଜାଗା ଜିତିକରି ଲୁକିଆ ବଲି ମୁରା ନଅର୍ ଜାଗାଇ ଆଇଲୁ ।<sup>୬</sup> ତେଇ ସେନାପତି ଆଲେକ୍‌ଜାଣ୍ଡ୍ରିଆର୍ ଗଟେକ୍ ପାନି ଜାଜ୍ ଇଟାଲି ଜାଇତେରଇଲାଜେ ଆମ୍‌କେ ଦେକି, ସେ ଜାଜେ ବସାଇଲା ।

<sup>୭</sup> ପଟେ ଆମ୍‌କେ ବେସିଦିନ୍ ଲାଗିଗାଲା ଦିରେ ଦିରେ ଜାଇ କରି କେଡେକ୍ କସ୍‌ଟେ କିଦ୍ ନାଉଁର୍ ଗଟେକ୍ ଜାଗାଇ କେଟ୍‌ଲୁ । ତେଇ କେଟ୍‌ଲା ପଟେ ବେସି ପବନ୍ ଆଇଲାଜେ ଆମେ ଆରି ଆଗକେ ଜାଇ ନାପାର୍‌ଲୁ । ତେବେ ସାଲନି ବଲି ଗଟେକ୍ ଜାଗାର୍ ମୁଆଟ୍ ବାଟେ ଜାଇ କିରିତର୍ ପାଲି ପାଲି ଗାଲୁ ।<sup>୮</sup> ଆରି ପାଲି ପାଲି ଆସି ବଡେ କସ୍‌ଟେ ସୁନ୍ଦର୍ ବନ୍ଦ୍ ବଲି ଗଟେକ୍ ପାନିଜାଜ୍‌ମନ୍ ଲାଗ୍‌ବାଟାନେ ଆସି କେଟ୍‌ଲୁ । ସେଟା ଲାସିଆ ସଅର୍ ଲଗେ ରଇଲା ।

<sup>୯</sup> ସେ ଜାଗାଇ ଆମେ ବେସିଦିନ୍ ରଇଲୁ । ଜିଉଦିମନର୍ ଉପାସ୍ ମାନିଅଇବା ପରବ୍ ସାରି ଜାଇରଇଲା । ତେବେ ଗାଡ଼ ଗାଡ଼ ଜିବାଟା ବିପଦ୍ ରଇଲା । ସେଟାପାଇ ପାଉଲ୍ ସେମନ୍‌କେ ଜାଗରତ୍ କରାଇ କଇଲା, <sup>୧୦</sup> “ମଇତର୍‌ମନ୍ ଆମେ ଏ ଗାଡ଼ ଗାଡ଼ ଗାଲେ ସରି ଜାଆଜ୍ ଆରି ଜିନିସ୍‌ପତର୍ ଆକା କେତି ନ ଅଏ, କେଡେବେଲେ ଜାଜେ ଜିବା ଲକ୍‌ମନ୍‌ର୍ ମିସା ଦସା କେଟ୍‌ସି ।”<sup>୧୧</sup> ମାତର୍ ସେନାପତି ପାଉଲ୍‌ର୍ କାତା ବିସ୍‌ବାସ୍ ନ କରି, ଜାଜ୍ ଚାଲାଉ, ଜାଜ୍ ସାଉକାରର୍ କାତା ବିସ୍‌ବାସ୍ କଲା ।<sup>୧୨</sup> ସେ ଗାଡେ ସିଡ଼ମାସେ ରଇବାଟା ବେସି କସ୍‌ଟ୍ ରଇଲା । ତେବେ କେନ୍ତ୍ରି କରି ମିସା କସ୍‌ଟେ ମସ୍‌ଟେ ପେନିକସ୍ ବଲି ଗଟେକ୍ ଜାଗାଇ କେଟି, ଦରକାର୍ ପଡ଼ଲେ ତେଇ ରଇବାକେ ଜାଜେ ଜିବା କେଡେଲକ୍‌ମନ୍ କର୍‌ତେରଇଲାଇ । ପିନିକସ୍ ଅଇଲାନି କିରିତେ ଦକିଣ୍, ପଟିମ୍ ଆରି ଉତର୍ ପୁରୁବ୍ ଦିଗେ ରଇବା ଗଟେକ୍ ଜାଗାର୍ ନାଉଁ ।

ସମ୍‌ଦୁରେ ପାନିପବନ୍ ଆଇବାଟା

<sup>୧୩</sup> ଜେଡେବେଲେ ଦକିନ୍ ଦିଗ୍‌ବାଟେଅନି ଅଲପ୍ ଅଲପ୍ ପବନ୍ ଆଇଲା, ସେଡେବେଲେ ଜାଜେ ବସିରଇବା ଲକ୍‌ମନ୍ ଏଟା ଗଟେକ୍ ସୁବ୍‌କବର୍ ବଲି ବାବ୍‌ଲାଇ । ଜାଜ୍ ଅଟ୍‌କାଇବା ପାର୍‌ଦା ଟେକିଦେକ୍‌ଲାଇ ଆରି କିରିତ୍ ଗାଡ଼ ପାଲି ପାଲି ଜାଜ୍ ଚାଲାଇ ଚାଲାଇ ନେବାର୍ ଦାର୍‌ଲାଇ ।<sup>୧୪</sup> ମାତର୍ ଚନେକ୍ ଗାଲା ପଟେ କିରିତ୍‌ବାଟେଅନି ଉତର୍ ପୁରବ୍ ବଲି କଇବା ପବନ୍ ଆଇଲା ।<sup>୧୫</sup> ସେ ପବନ୍ ଅପର୍‌ବଲ୍ ଆସି ଜାଜେ ପିଟିଅଇଲା । ପବନ୍ ଆଇବା ମୁଆଟ୍‌ବାଟେ ଜାଜ୍ ନେବାକେ ଚେସ୍‌ଟା କରି କରି ନାପାରି ଡାକିଗାଲୁ । ତେବେ ପବନ୍ ଜାଜ୍‌କେ ପାନି ଟାନେ ଉପ୍‌କାଇକରି ନେଅ ବଲି ଚାଡିଦେଲୁ ।<sup>୧୬</sup> ଆରି କାଉଦ୍ ବଲି ଗୁଲାଇ ବାଟେ ପାନି ରଇକରି ମଜାଇ ସୁକ୍‌ଲା ବୁଇଁ ରଇବା ଜାଗାର୍ ଦକିଣ୍ ଦିଗ୍‌ବାଟେ ଗାଲାବେଲେ ଅଲପ୍ ପବନ୍‌ଟାନେ ଅନି ରକିଆ ପାଇଲୁ । ତେଇ ଆମେ କସ୍‌ଟେମସ୍‌ଟେ ଜାଆଜର୍ ସାନ୍‌ଡଙ୍ଗା କାଇ ବିପଦ୍ ନଇତେ ସଙ୍ଗାଇପାର୍‌ଲୁ ।<sup>୧୭</sup> ଜାଜ୍ ଚାଲାଉମନ୍ ସାନ୍‌ ଡଙ୍ଗା ଜାଜ୍‌ଉପ୍‌ରେ ଟେକି ନେଲାଇ ଆରି ତର୍ ସଙ୍ଗା ଡାଟ୍‌କରି ଜାଜର୍ ଚାରିବେଟ୍‌ଟି ନ ବାଙ୍ଗ ବଲି ବାନ୍ଦି ଦେଲାଇ । ଜାଜ୍ ଚାଲାଉମନ୍ ଜାଜ୍‌କେ ଲିବିଆର୍ ପାଲି ପାଲି ବାଲିବନ୍ଦ୍ ବାଟେ ଉଟିଜାଇସି ବଲି ଜାଜେ ବାନ୍ଦି ରଇବା ଡେରା ଉଡ଼ରାଇକରି ପବନେ ସେ ବଲି ବଲି ର ବଲି ଚାଡି ଦେଲାଇ ।<sup>୧୮</sup> ଚନେକ୍ ମିସା ନ ତେବି ଅପର୍‌ବଲ୍ ପବନ୍ ଆଇବାର୍ ଦାର୍‌ଲା ଜେ, ତାର୍ ଆର୍‌କର୍ ଦିନେ ସେମନ୍ ଜାଜେଅନି ଜିନିସ୍ ପତର୍ ପାନିତେଇ ପିଙ୍ଗ୍‌ବାର୍ ଦାର୍‌ଲାଇ ।<sup>୧୯</sup> ତାର୍ ଆର୍‌କର୍ ଦିନେ ସେମନ୍ ଜାଜର୍ ପାଇ ଦରକାର୍ ଅଇବା କେଡେଟା ଜିନିସ୍ ବେଟି ପିଙ୍ଗି ଦେଲାଇ ।<sup>୨୦</sup> ବେସି ଦିନ୍ ଅଇଗାଲା ଆମେ ବେଲର୍ ମୁକ୍ ନାଇ କି ତାରାର୍ ମୁକ୍ ଦେକୁନାଇ ସେନ୍ତ୍ରି ରଇଗାଲୁ ।



ପବନ ଚନେକ୍ ମିସା ତେବେ ନାହିଁ, ଅଦିକ୍ ଅଦିକ୍ ଆଇତେସେ ରଇଲା । ସାରାସାରି ଆମେ ବଢ଼ିବାର ଆସା ଚାଡ଼ି ଦେଇରଇଲୁ ।

୨୧ ଏତେକ୍ ଦିନ ଅଇଲା ସବୁ ଲକ୍‌ଜାକ ନ କାଇ ନ ପିଇ ରଇଲା ପତେ ପାଉଲ୍, ଜାଜେ ଜିବା ଲକ୍‌ମନର୍ ମଜାଇ ଚିଆଅଇ କଇଲା, ମଇତରମନ୍ ତମେ ମର୍ କାତା ଦାରି କିରତେଅନି ଜାଜ ନ ଆନି ରଇଲେ ଆମକେ ଏ ଦସା ନ ଆଇତା । ୨୨ ମାତର୍ ଏବେ ତମକେ ଗୁଆରି କରି କଇଲିନି, ନ ଡରି, ବରସ୍ ଅଇରୁଆ । ତମର୍ ବିଡ଼ରେଅନି କେ ମିସା ନ ମରାସ୍ । ଜାଜସେ ନସ୍ଟ ଅଇସି । ୨୩ କାଇକେବଇଲେ ମୁଇ ଜାର୍ ଲକ୍ ଅଇଲିଆଚି, ଆରି ଜନ୍ ପର୍ମେସର୍‌କେ ପାର୍ତନା କଲିନି, କାଲି ରାତି ତାର୍ ଗଟେକ୍ ସରଗର୍ ଦୁଡ଼ ମକେ ଆସି କଇଲା, ୨୪ ପାଉଲ୍ ତୁଇ ଡର୍ ନାଇ । ବାଇଦରେ ସମରାଗର୍ ମୁଆଟେ ତୁଇ ଚିଆ ଅଇସୁଆକା । ପର୍ମେସର୍ ତକେ ଜିବନ୍ ଦୁକାଇଲାଆଚେ । ଜେ କି, ତକେ ଆରି ଡର୍ ସଙ୍ଗ୍ ଜାଇତେ ରଇବା ସବୁ ଲକ୍‌ମନକେ ବଢ଼ାଇସି । ୨୫ ତେବେ ବାଇମନ୍ ତମେ ନ ଡରି ବରସ୍ ଅଇରୁଆ । କାଇକେ ବଇଲେ ମୁଇ ପର୍ମେସର୍‌କେ ବିସ୍‌ବାସ୍ କଲିନି, ମକେ ଜେନ୍ତ୍ର କଇଲାଆଚେ ଚିକ୍ ସେନ୍ତ୍ରାରିସେ ଅଇସି । ୨୬ ମାତର୍ ଆମେ ଆଗକେ ଗାଲେ ଗଟେକ୍ ଗୁଲାଇବାଟେ ପାନି ରଇକରି ମଜାଇ ରଇବା ସୁକ୍‌ଲା ଜାଗାଇ ପବନ୍ କେଟାଇସି ।

୨୭ ଏନ୍ତାରି ଆମେ ବାଉପବନ୍ ଆରାମଅଇକରି ଚଉଦ ଦିନ ଚଉଦ ରାତି ମିସା ଅଇଗାଲା । ପବନ୍ ଆମକେ ବୁମଦ୍ ସମଦୁରେ ଏନେ ତେନେ ନେଇତେରଇଲା । ମଜାରାତି ଅଇଲାକେ ଜାଜ ଚାଲାଉମନ୍ ଗଟେକ୍ କଣ୍ଟିପାଲି ଲଗାଲଗି ଆଇଲୁ ବଲି ଅନୁମାନ୍ କଲାଇ । ୨୮ ତେବେ ସେମନ୍ ଗଟେକ୍ ବଜ୍ ଜିନିସ୍ ଡର୍‌ସଙ୍ଗ୍ ବାନ୍ଦିକରି ନାପିକରି ଜାନୁଲାଇ ଜେ, ତେଇ ସଏ କତେ ପୁର୍ ପାନି ଡେଙ୍ଗ୍ ରଇଲା । ଆରି କଣ୍ଟେକ୍ ଦୁର୍ ଆଇଲାଇକେ ନବେ ପୁର୍ ପାନି ନାପୁଲାଇ । ୨୯ ପାନି ଜାଜ କନ୍‌ଆଲେ ଡଙ୍ଗ୍‌ରର୍ ପାକନାଇ ତୁକାଇ ଅଇଜାଇସି ବଲି ଡରିକରି ସେମନ୍ ପର୍‌ବାଟେ ଚାର୍‌ଟା ଜାଜ ଅଟ୍‌କାଇବାଟା ପାକାଇଲାଇ । ଆରି ଦାପ୍‌ରେ ସାକାଲ୍ ପାଅ ବଲି ପାର୍ତନା କଲାଇ । ୩୦ ତାର୍ ପତେ ଜାଜ ଚାଲାଉମନ୍ ଜାଜେଅନି ଲୁଚି ପାଲାଇବାକେ ଚେସ୍‌ଟା କଲାଇ । ସାନ୍ ଡଙ୍ଗା ବାନ୍ଦିରଇବା ଡର୍ ବେଟି ଡଙ୍ଗା ସମଦୁରେ ଉଡ଼ରାଇଲାଇ । ସେମନ୍ ଆରି କେତେଟା ଜାଜ ଅଟ୍‌କାଇବାଟା ମୁଆଟ୍‌ବାଟେ ପାକାଇବୁ ବଲି ନାଡ଼ାଇଲାଇ । ୩୧ ମାତର୍ ପାଉଲ୍, ସେନାପତି ଆରି ସନିଅମନ୍‌କେ କଇଲା, “ଜଦି ଜାଜ ଚାଲାଉମନ୍ ଜାଜେ ନ ରଇଲେ ତମେ ମରିଜାଇସା ।” ୩୨ ସେଟାର୍‌ପାଇ ସନିଅମନ୍ ଡଙ୍ଗାର୍ ଡର୍ କାଟି ଦେଲାଇ ଆରି ପାନି ଉପ୍‌ରେ ବଢ଼ି ଜାଅ ବଲି ଚାଡ଼ି ଦେଲାଇ ।

୩୩ ପାଉଲ୍ କୁକ୍‌ତାତାକେ ସବୁ ଲକ୍‌କେ କାଆ ବଲି ବାବୁଜିଆ କଲା । ସେ କଇଲା, ଆଜିକେ ଚଉଦ ଦିନ ଅଇଗାଲା କାଆସ୍ ନାଇ, ପିଆସ୍ ନାଇ, ବୁକେସେ ଆଚାସ୍ । ୩୪ ତେବେ ମୁଇ ତମକେ କାଇଟା ଆଲେ କାଆ ବଲି ବୁଜାଇଲିନି, କାଇକେ ବଇଲେ, ବଢ଼ି ରଇବାର୍ ଆଲେ କାଇବାର୍ ଆଚେଆକା । ଡରା ନାଇ ! ତମକେ କାଇଟା ନ ଅଏ । ୩୫ ପାଉଲ୍ ଏନ୍ତାରି କଇକରି ରୁଟି ଦାର୍‌ଲା ଆରି ସବୁ ଲକ୍‌ର୍ ମୁଆଟେ ପର୍ମେସର୍‌କେ ଦନିଅବାଦ୍ ଦେଇ ରୁଟି ଚିଡ଼ାଇ କାଇବାର୍ ଦାର୍‌ଲା । ୩୬ ତେଇ ସେମନ୍ ସବୁ ଲକ୍ ସାଆସ୍ ଅଇକରି ଆରି ନିଜେ ନିଜେ କାଇବାର୍ ଦାର୍‌ଲାଇ । ୩୭ ଆମେ ସେ ଜାଜେ ସବୁ ଲକ୍ ମିସି ଦୁଇସ ସତୁରି ଚଅ ଲକ୍ ରଇଲୁ । ୩୮ ସବୁ ଲକ୍ ପେଟ୍ ପୁରତେ କାଇ ସାର୍‌ଲା ପତେ ଜାଜ ଉସାସ୍ ଅ ବଲି ଜାଜେ ରଇଲା ସବୁ କାଦିକଣ୍ଟା ସମଦୁରେ ପିଙ୍ଗି ଦେଲାଇ ।

ଜାଜ୍ ତୁକାଇ ଅଇଲା

୩୯ ସାକାଲୁ ପାଇଲାକେ କଣ୍ଡିର କନ୍ ଜାଗାଇ ଆସି କେଟ୍‌ଲୁଆରୁ ବଲି ଜାଜୁ ଚାଲାଉମନ୍ ଜାନି ନାପାରଲାଇ । ମାତର ସେମନ୍ ଦେକ୍‌ଲାଇ, ଜେ ସେଟା ଗଟେକ୍ ସମ୍‌ଦୁର୍ ଆରି ଗାଡ଼ ମିସ୍‌ଲା ବାଲିପଟା ଜାଗା । ଜଦି ପାରଲେ ତେଇ ଜାଜୁ ଲାଗାଉ ବଲି ଚେସଟା କଲାଇ । ୪୦ ସେଟାରପାଇ ଜାଜୁ ଅଟକାଇବାକେ ବାନ୍ଦି ରଇବା ତର ସବୁ କାଟି ଦେଇ, ସେଟା ସବୁ ସମ୍‌ଦୁରେ ତପି ଅଇବାକେ ଚାଡ଼ି ଦେଲାଇ । ଆରି ଜାଜୁ ସଲ୍‌କାଇବାକେ ବାନ୍ଦି ରଇବା ତର କୁସ୍‌ଲାଇଦେଇ ମୁଆଟେ ବାନ୍ଦି ଅଇରଇବା ତେରାକେ ଟେକି ଦେଲାଇ । ସେନ୍ତା କଲାକେ ଜାଜୁ ପବ୍‌ନେ ଟେଲାଇ ଟେଲାଇ ଅଇକରି କଣ୍ଡିବାଟେ ଜିବାର ଦାରଲା । ୪୧ ଗାଡ଼ ଆରି ସମ୍‌ଦୁର୍ ମିସ୍‌ଲା ସାଙ୍ଗାମର୍ ବାଲିପାଟାଇ, ଜାଜୁ ଡୁକାଇ ଅଇ ମୁଆଟ୍ ବାଟରଟା ତଲେ ତପିଅଇ ଅଟକି ଦେଲା । ଅପର୍‌ବଲ୍ ଲଉତି ଆସି ଜାଜର୍ ପଟ୍‌ବାଟେ ଡୁକାଇ ଅଇଲାକେ ପଟ୍ ବାଟରଟା ମିସା ବାଙ୍ଗି କଣ୍ଡ କଣ୍ଡ ଅଇଗାଲା ।

୪୨ ସନିଅମନ୍ ବନ୍ଦି ଲକ୍‌ମନ୍‌କେ ପଅଁରି ପଅଁରି ଉଟିଜିବାଇ ବଲି ବାବି କରି ମାରିମରାଇବାକେ ବାବ୍‌ଲାଇ । ୪୩ ମାତର ସେନାପତି ପାଉଲର୍ ଜିବନ୍ ବଟାଇବି ବଲି ବାବ୍‌ତେ ରଇଲା । ତେବେ ସେ ସନିଅମନ୍‌କେ ସେନ୍ତାରି କରାନାଇ ବଲି ମନାକଲା । ଜେଡ଼କି ପଅଁରି ପାର୍‌ବା ସବୁ ଲକ୍‌ମନ୍‌କେ ପାନିଟାନ୍‌ନେ ଡେଗଇକରି ପଅଁରି ପଅଁରି କଣ୍ଡିତେଇ ଜିବାକେ ଆଦେସ୍ ଦେଲା । ୪୪ ଆରି ବାକି ଲକ୍‌ମନ୍‌କେ ଜାଜର୍ ବାଙ୍ଗିଲା ପାଟା ଆରି କାଇ କାଇଟାମନ୍ ଦାରି ପଅଁରି କରି ବାରୁଆ । ବଲି କଇଲା । ଏନ୍ତାରି ଅଇ ସବୁଲକ୍ କାଇଟା ନ ଅଇତେ କଣ୍ଡି ଆସି ବାରଇଲାଇ । ସାରାସାରି ଆମେ ସବୁଲକ୍ କଣ୍ଡି କେଟ୍‌ଲୁ ।

## ୨୮

### ମାଲ୍‌ଟା ଜାଗାଇ ପାଉଲ୍

୧ କାଇଟା ନ ଅଇ, କଣ୍ଡିପାଲି ଜାଇ ଦେକ୍‌ଲୁ ଜେ, ଆମେ ମେଲିତି ନାଉଁର୍ ଚାରିବେଟ୍‌ତି ପାନିର୍ ମଜାଇ ରଇବା ସୁକ୍‌ଲା ଜାଗାଇ କେଟିଆରୁ । ୨ ତେଇ ପୁରବେଅନି ରଇବା ଲକ୍‌ମନ୍ ଆମ୍‌କେ ଆଲାଦ୍ ଦେକାଇଲାଇ, ସେବେଲେ ବର୍‌ସା ମାରି ସିଡ଼ ଅଇତେ ରଇଲା । ସେଟାର ପାଇ ସେମନ୍ ଆମ୍‌କେ ଜଇ ଲାଗାଇ ଗତିଆ ମାନ୍‌ଲାଇ । ୩ ପାଉଲ୍ ଗଟେକ୍ ବିଡା ଦାରୁ ଜଇତେଇ ପାକାଇବା ବେଲେ ଜଇ ତାଡ଼ିର୍ ଲାଗି ବିଡାଇଅନି ଗଟେକ୍ ବିସ୍‌ରଇବା ସାଁପ୍ ବାରଇଲା ଆରି ପାଉଲର୍ ଆତେ ଚଗି ଚାବି ଡସିରଇଲା । ୪ ସେ ଜାଗାର ଲକ୍‌ମନ୍ ପାଉଲର୍ ଆତେ ଚାବିକରି ତସି ଜୁଲ୍‌ତେ ରଇବା ସାଁପ୍‌କେ ଦେକି ତାକର୍ ତାକର୍ ବିଡ଼ରେ କୁଆବଲା ଅଇଲାଇ, “ଏ ବାଇଦରେ ଗଟେକ୍ ନର୍‌ମାରୁ ଲକ୍, ସେ ଜାଇଟା ମିସା ଅ ବେ, ସେ ସମ୍‌ଦୁରେ ରକିଆ ପାଇରଇଲେ ମିସା ତାର କରମ୍ ତାକେ ବର୍‌ବାକେ ନ ଦେଏ ।” ୫ ମାତର ପାଉଲ୍ ତାର ଆଡ଼ ଜିଞ୍ଜାଡ଼ଲାକେ ସାଁପ୍ ଜଇତେଇ ଅଦର୍‌ଲା ଆରି ତାକେ କାଇଟା ଅଏନାଇ । ୬ ଲକ୍‌ମନ୍ ପାଉଲର୍ ଆଡ଼ ପୁଲିଜାଇସି ନଇଲେ ଅଟାଡ଼ ଅଦ୍‌ରି ମରିଜାଇସି ବଲି ଜାଗିରଇଲାଇ, ମାତର ବେସି ପର୍ ଜାଗିକରି ଦେକ୍‌ଲାଇ ମିସା ତାକେ କାଇଟା ଅଏ ନାଇ । ପଟେ ସେମନ୍ କାତା ପାସ୍‌ଲାଇକରି କଇଲାଇ “ଏ ଗଟେକ୍ ଦେବ୍‌ତା !”

୭ ତେଇଅନି ଅଲପ୍ ଦୁରିକେ ସେ ଜାଗାର ମୁକିଅ ନେତା, ତାର ନାଉଁ ପବ୍‌ଲିଅ । ତାର କେତେଟା ପଦା ରଇଲା, ସେ ଆମ୍‌କେ ଗତିଆ ମାନିକରି ଡାକିନେଲା । ଆରି ଆମେ ତିନ୍ ଦିନ୍ ଜାକ ତାକର୍ ଗରେ ଗତିଆ ଅଇ ରଇଲୁ । ୮ ସେବେଲେ ପବ୍‌ଲିଅସର୍ ବାବା ଜର୍ ଆରି ରକଡ଼ଜାତା ଦାରାଇଅଇ ଡୁଲିରଇଲା । ପାଉଲ୍ ତାକର୍ ବାକ୍‌ରାଇ ଜାଇ ତାରପାଇ ପାର୍‌ତନା କରି ତାର ଉପ୍‌ରେ ଆଡ଼ ଟିଇ ତାକେ ନିମାନ୍‌କଲା । ୯ ଏ ଗଟ୍‌ନା ପଟେ ସେ ଜାଗାର ଜେଡ଼କି ରଗିମନ୍ ସବୁ ପାଉଲର୍

ଲଗେ ଆସି ନିମାନ୍ ଅଇଲା । ୧୦ ସେମନ୍ ଆମ୍ଭକେ ବେସି ବିନ୍ ବିନ୍ ରକାମର୍ ଜିନିସ୍ ଇନାମେ ଦେଲା ଆରି ଆମେ ତେଇଅନି ଜାଜେ ବସି ଜିବାବେଲେ ସେମନ୍ ଆମର୍ପାଇ ଦରକାର ରଇଲା ସବୁ ଜିନିସ୍ ଜାଜେ ଆନି ଦେଲା ।

ମାଲ୍ଟା ଜାଗାଇଅନି ରମ୍ ଦେସେ

୧୧ ସେ ଜାଗାଇଅନି ବାରଇବାକେ ଆମ୍ଭକେ ତିନ୍ମାସ୍ ଲାଗ୍ଲା । ସିଡ଼ଦିନ୍ ଅଇରଇଲାକେ ତବିରଅଇଲା ଆଲେକ୍‌ଜାଣ୍ଡ୍ରିଆ ନଅରେଅନି ଆସିରଇବା ଗଟେକ୍ ଜାଜେ ଆମେ ବାରଇଲୁ । ସେ ଜାଜର୍ ନାଉଁ ରଇଲା ଜୁଲି ଦେବ୍‌ତା । ୧୨ ପର୍ତ୍ତୁମ୍ ସିର୍କୁସ୍ ନାଉଁର୍ ନଅରେ କେଟି ତେଇ ତିନ୍ଦିନ୍ ରଇଲୁ । ୧୩ ତେଇଅନି ଆରି ତରେକ୍ ଜିବାଟା ଆରାମ୍ କରି ଆମେ ରେଜିଅମ୍ ସଅରେ କେଟ୍ଲୁ । ତାର୍ ଆର୍କର୍ ଦିନେ ଦକିଣ୍ ଦିଗେଅନି ପବନ୍ ଆଇଲା ଆରି ଦୁଇଦିନ୍ ପତେ ପୁତେଅଲି ସଅରେ କେଟ୍ଲୁ । ୧୪ ତେଇ କେତେଟା ଜିସୁକେ ବିସ୍‌ବାସ୍ କରବା ବାଇମନ୍‌କେ ମିସ୍ଲୁ । ତାକର୍ ସଙ୍ଗ୍ ଗଟେକ୍ ଆର୍ ରଇବାକେ ସେମନ୍ ଆମ୍ଭକେ ବାରୁଜିଆ କଲା । ସାରାସାରିପତେ ଆମେ ରମ୍ ଦେସେ ଜାଇ କେଟ୍ଲୁ । ୧୫ ଆମେ ଗାଲା କବର୍ ସୁନିକରି ରମ୍ ଦେସର୍ ବିସ୍‌ବାସି ବାଇମନ୍ ତେଇଅନି ଆପିଅ ଜାଗାର୍ ଆଟେ ଆରି ତିନ୍‌ସରା ନାଉଁର୍ ନଅର୍ମନ୍ ଜାକ୍ ଆମ୍ଭକେ ବେଟ୍ ଅଇବାକେ ଇଣ୍ଟି ଇଣ୍ଟି ଆଇଲା । ସେମନ୍‌କେ ଦେକି ପାଉଲ୍ ପର୍ମେସର୍‌କେ ଦନିଅବାଦ୍ ଦେଲା ଆରି ବେସି ସାର୍‌ଦା ଅଇଲା ।

ରମିୟମନ୍‌ର ନଅରେ ପାଉଲ୍

୧୬ ଆମେ ରମ୍ ଦେସେ କେଟ୍ଲା ପତେ ପାଉଲ୍‌କେ ଗଟେକ୍ ସନିଅ ସଙ୍ଗ୍ ଗଟେକ୍ ଗରେ ରଇବାକେ ଆଦେସ୍ ମିଲ୍ଲା ।

୧୭ ତିନ୍ ଦିନ୍ ପତେ ପାଉଲ୍ ସେ ଜାଗାର୍ ଜିଉଦି ନେତାମନ୍‌କେ ଗଟେକ୍ ସବା କରବାକେ କବର୍ ପାଟାଇଲା । ସେମନ୍ ଆସି ରୁଣ୍ଡିଲାଇକେ ପାଉଲ୍ ସେମନ୍‌କେ କଇଲା, “ଏ ଇସ୍ରାଏଲ୍‌ର୍ ବାଇମନ୍, ମୁଇ ଆମର୍ ଲକ୍‌ମନ୍‌ ବିରୁଦେ କି ଆମର୍ ଆନିଦାଦିମନ୍‌ ଟାନେଅନି ସିକିରଇବା ରିତିନିତି ବିରୁଦେ କିଟି କରିନାଇ, ଏଲେ ମିସା ଜିରୁସାଲାମର୍ ଜିଉଦିମନ୍ ମକେ ଦାରି ବନ୍ଦିଗରେ ପୁରାଇ ରମିଅମନ୍‌କେ ସର୍ପିଦେଲା । ୧୮ ମକେ ପାଗାର୍ ଉଚାର୍ କଲା ପତେ ମରନ୍ ଡଣ୍ଡି ପାଇବା ଏଡ଼କି କାଇ ଅପୁରାଦ୍ କରେ ନାଇ ବଲି ଜାନ୍‌ଲା । ପତେ ରମିଅ ଲକ୍‌ମନ୍ ମକେ ମୁକ୍‌ଲାଇବାକେ ମନ୍ କର୍ତେ ରଇଲା । ୧୯ ମାତର୍ ଜିଉଦି ଲକ୍‌ମନ୍ ମକେ ଚାଡ଼ବାକେ ରାଜି ଅଅଡ଼ନାଇ । ତେବେ ମର୍ ନିଜର୍ ଲକ୍‌ମନ୍‌ ବିରୁଦେ ମର୍ କାଇ ଦାବି ନ ରଇଲା ମିସା, ମୁଇ ବଡ଼ସାସନ୍‌କାରିଆକେ ଗୁଆରି କର୍ବି ଆକା ବଲି ବାବ୍‌ଲି । ୨୦ ସେଟାର୍‌ପାଇ ଏ ବିସଇ କାତାବାର୍‌ତା ଅଉଁ ବଲି ମୁଇ ତମ୍‌କେ ତାକାଇ ଆଟି । ଇସ୍ରାଏଲ୍‌ର୍ ଲକ୍‌ମନ୍ ଏବେ ଜାକେ ଆସା କରି ଆଇଲାଇନି, ତାର୍‌ପାଇ ବଲିକରି ମୁଇ ଆଜି ସିକ୍‌ଲି ସଙ୍ଗ୍ ବାନ୍ଦାଇ ଅଇଆଟି ।”

୨୧ ସେମନ୍ କଇଲା, “ଆମ୍ଭକେ ଜିଉଦା ଦେସେଅନି ତମର୍ ବିସଇ କାଇ ଚିଟି ଗଟେକ୍ ମିସା ମିଲେ ନାଇ, କି ବାଇମନ୍‌ ବିତ୍‌ରେଅନି କେ ମିସା ଇତି ଆସି ତମର୍ ବିସଇର୍ ବୁଲ୍ କାତା ସୁନାଅଡ଼ ନାଇ କି କଅଡ଼ ମିସା ନାଇ । ୨୨ ମାତର୍ ତମେ କାଇଟା ବଲି ବିସ୍‌ବାସ୍ କଲାସିନି, ସେଟା ତମର୍‌ଟାନେଅନି ଆମେ ସୁନ୍‌ବାକେ ମନ୍ କଲୁନି । କାଇକେବଇଲେ, ଗୁଲାଇବାଟର୍ ଲକ୍ ତମର୍ ଦଲ୍ ବିରୁଦେ କାତା ଅଇଲାଇନି ।”

୨୩ ସେମନ୍ ଗଟେକ୍‌ଦିନ୍ ଟିକ୍ କଲା ଆରି ଟିକ୍ କଲା ଦିନେ ସେମନ୍‌ ବିତ୍‌ରେଅନି ବେସି ଲକ୍ ପାଉଲ୍ ରଇବା ଜାଗାଇ ଆଇଲା । ପାଉଲ୍ ସେମନ୍‌କେ ସାକାଲେଅନି ସଞ୍ଜ୍‌ଜାକ ପରମେସର୍ ରାଇଦ୍ ବିସଇ ବୁଜାଇଦେଲା ଆରି ମସାର୍

ରିତିନିତି ଆରି ବବିସତ୍ତବକ୍ତାମନ୍ ଲେକ୍‌ଲ୍ୟା ସାସ୍ତରର ବାକିଅ ଦେକାଇକରି ଜିସୁର ବିସଇ ବୁଜାଇଲା । ୨୪ ତେଇ କେତେ ଲକ୍ ପାଉଲ୍ କଇଲା କାତା ବିସ୍‌ବାସ୍ କଲାଇ, ମାତର୍ କେତେ ଲକ୍ ବିସ୍‌ବାସ୍ କରତ୍ ନାଇ । ୨୫ ତେବେ ତାକର୍ ତାକର୍ ବିତ୍ତରେ ଦଦାପେଲା ଅଇକରି ବାରଇ ଉଟିଗାଲାଇ । ପାଉଲ୍ ଗଟେକ୍ କାତା କଇଲା, ସୁକଲ୍ ଆତ୍‌ମା ତମର୍ ଆନିଦାଦିମନ୍‌କେ ଜିସାୟ୍ ବବିସତ୍ତବକ୍ତାର୍ ତଣ୍ଡେଅନି ସତ୍ କାତା କଇରଇଲା ! ୨୬ ସେ କଇରଇଲା,

“ଏ ଲକ୍‌ମନ୍‌କେ ଜାଇ କଅ, ତମେ ସୁନି ସୁନି ରଇସା, ମାତର୍ ନ ବୁଜାସ୍ ।

ଦେକି ଦେକି ରଇସା, ମାତର୍ ନ ଚିନାସ୍ ।”

୨୭ କାଇକେ ବଇଲେ ଏ ଲକ୍‌ମନ୍‌ର ମନ୍ ବେସି ଆର୍ଟ୍,

ସେମନ୍ ନିଜର୍ ନିଜର୍ ଆକି ଲିମିଦେଇ ଆରତ୍ ଆରି କାନ୍ ତୁଟି ଦେଇ ଆରତ୍,

ସେମନ୍ ଜଦି ଆକି ଦେକ୍‌ତାଇ, ଆରି ତୁଟି ଅଇଲା କାନ୍ ଉଗାତି ସୁନ୍‌ତାଇ ।

ସେନ୍ତାର୍ ଆଲେ ସେମନ୍ ମନେ ମନେ ବୁଜ୍‌ତାଇ ।

ଆରି ସେମନ୍ ମରଲଗେ ବାଅଡ୍‌ତାଇ ଆରି ମୁଇ ସେମନ୍‌କେ ନିକ କରତି ।

ଏଟା ପରମେସର୍ କଇଲାନ୍ତି ।

୨୮ ସାରାସାରିପତେ ପାଉଲ୍ କଇଲା “ତେବେ ପରମେସରର୍ ମୁକ୍ତି ଜିଉଦିନଇଲା ଲକ୍‌ମନ୍‌ର ପାଇ ଆଇଲା ଆତେ । ଏଟା ତମେ ଜାନିରୁଆ, ସେମନ୍ ମିସା ସେଟା ମାନ୍‌ବାଇ ।” ୨୯ ପାଉଲ୍ ଏ ସବୁ କାତା କଇଲାକେ, ଜିଉଦିମନ୍ ନିଜର୍ ନିଜର୍ ବିତ୍ତରେ ଦଦାପେଲା ଅଇଅଇକରି ଉଟିଗାଲାଇ । ୩୦ ପାଉଲ୍ ଗଟେକ୍ ଗର୍ ବାତାକରି ତେଇ ଦୁଇ ବରସ୍ ଜାକ ରଇଲା ଆରି ତାକେ ଦେକ୍‌ବାକେ ଆଇଲା ସବୁ ଲକ୍‌ମନ୍‌କେ ତେଇ ଗତିଆ ମାନ୍‌ତେରଇଲା । ଜେଡ୍‌କି ଲକ୍ ପାଉଲ୍‌ର୍ ଲଗେ ଆଇତେ ରଇଲାଇ ସେ ସବୁ ଲକ୍‌କେ ଡାକି, କାକେ ନ ତର୍ତେ କଲା । ୩୧ ଆରି ତାକେ କେ ମିସା ତେବାଅଡ୍ ନାଇ । ସେ ପରମେସରର୍ ରାଇଜ୍ ବିସଇ ଜାନାଇକରି ମାପ୍‌ରୁ ଜିସୁକିରିସ୍‌ଟର୍ ବିସଇ ସିକିଆ ଦେଇତେରଇଲା ।

# ରୋମିୟ ମଣ୍ଡଳୀର ବିଶ୍ୱାସୀ ମାନଙ୍କ ନିକଟକୁ ପାଉଲଙ୍କର ପତ୍ର

## ରମିଅ ମଣ୍ଡଳୀର ଲକ୍ଷ୍ମଣଙ୍କୁ ଚିଠି ଲେଖିଲାଟା ଏ ବଇଟାଣେ ଜାନ୍‌ବାଟା

ରମିଅ ବଇ ପେରିତ୍ ପାଉଲର୍ ଲାଗି ଲେକାଅଇରଇଲା । ଏ ବଇ ଜିସୁକିରିସ୍‌ଟ ଜନମ୍‌ଅଇକରି ୫୪ ଅନି ୫୮ ବଡ଼ରେ ଅଇରଇଲା ।

ପାଉଲ୍ ରମ୍ ରାଇଜେ ଜିବା ଆଗତୁ ଜିଉଦି ବିସ୍‌ବାସି ଆରି ଜିଉଦି ନ ଅଇରଇବା ବିସ୍‌ବାସିମନ୍‌କେ ତିଆରବାକେ ଏ ଚିଠି ଲେକିରଇଲା । ଜେଷ୍ଟାରିକି ସବୁ ଲକ୍ଷ୍ମଣ ବିସ୍‌ବାସ କରି ନାମ୍‌ବାଇ ୧୪:୧୭ । ଏଟାର୍‌ପାଇ ସେ କରନ୍‌ତି ନଅରେ ରଇବା ବେଲାଇ ରମିଅ ବିସ୍‌ବାସିମନ୍‌କେ ତିଆରବାକେ ଏ ଚିଠି ରଇଲା ।

ରମିଅ ବଇ ସବୁ ଜାଗାର୍ ଆରି ସବୁ ବେଲାର୍ ବିସ୍‌ବାସିମନ୍‌ରପାଇ, ଏଟା ଗଟେକ୍ ଗୁରୁତୁ ସଙ୍ଗର୍ ବଇ । କାଇକେବଇଲେ, ପାଉଲ୍ ଏ ବଇଟାଣେ ଜିସୁକେ ବିସ୍‌ବାସ କଲେ ଆମ୍‌କେ କେନ୍‌ତି ମୁକ୍ତି ମିଲ୍‌ସି, ସେଟା ନିକସଙ୍ଗ୍ ଗଟେକ୍ ଗଟେକ୍ କରି ବୁଜାଇଦେଲାଆଟେ । ପାଉଲ୍ ପୁରନା ନିଅମ୍‌କେ ମିସା ଜିସୁକିରିସ୍‌ଟର୍ ସୁବ୍ କବରଟାଣେ ମିସାଇଆଟେ । ଏ ବଇତେଇ ୧:୧୭ ଟାଣେ ରଇବା ବାକିଅକେ ନେଇକରି କେତେକ୍ କେତେକ୍ ପଣ୍ଡିତମନ୍ ଦାବିକରି ଏଟା ଏ ସବୁବଇର୍ ମୁଲ୍ ବଲି କଇଲାଇନି । ଜନ୍‌ଟା ଇତି ଜାନାଇଲାଇନି କି, ମୁଇ ବାକିଅ ଜାନାଇବାକେ ଲାଜ୍ ନ ଅଇ । କାଇକେବଇଲେ ଜେଡ଼କି ଲକ୍ ବିସ୍‌ବାସ କରବାଇ, ସେ ସବୁ ଲକ୍‌ରପାଇ ଏଟା ପର୍‌ମେସରର୍ ବପୁ । ପର୍‌ତୁମେ ଜିଉଦିମନ୍‌ରପାଇ ଆରି ଜିଉଦି ନ ଅଇଲା ଲକ୍‌ମନ୍‌ରପାଇ ମିସା ।

ପର୍‌ତୁମ୍ ବାଗେ ୧-୧୨ ଟିକିନିକିର୍ ବିସଇ ଆରି ଦୁଇରେ ଅଇଲାନି ବିସ୍‌ବାସି ଇସାବେ କେନ୍‌ତି ଚଲାଚଲ୍‌ତି କରବାର୍ ଆଟେ, ସେଟା ତିଆରଲାନି ।

### ଏ ବଇବିଡ଼ରେ ରଇବାଟା

୧. ପାଉଲ୍ ନିଜ୍‌କେ ଜାନାଇଅଇକରି କାର୍‌ଟାଣେ ଚିଠି ଲେକ୍‌ଲାନି, ସେଟା କଇକରି ଆରାମ୍ କଲାନି । ୧:୧-୧୫
୨. ମୁନ୍‌ସଜାତିର୍ ରାଇଜ୍ ଆରି ଜିସୁକିରିସ୍‌ଟର୍ ଲାଗି ମୁକ୍ତି ଅଇବାଟା । ୧:୧୬,୧୧:୩୬
୩. କିରିସ୍‌ଟର୍ ଟାଣେ ରଇକରି ଜିଉନାକାଉନା କରବା ବିସଇରେ ପାଉଲ୍ ତିଆରଲାଟା । ୧୨:୧-୧୫:୧୩
୪. ସେ ରମିୟ ମଣ୍ଡଳୀର ଲକ୍‌ମନ୍‌କେ ଦନିଅବାଦ୍ ଦେଇକରି ଲେକା ସାରାଇଲାଟା । ୧୬

ପାଉଲ୍ ଜୁଆର୍ ଜାନାଇବାଟା

<sup>୧</sup> ମୁଇ ପାଉଲ୍ ଏଟା ଲେକ୍‌ଲାନି, ମୁଇ କିରିସ୍‌ଟ ଜିସୁର୍ ଗଟେକ୍ ସେବାକାରିଆ । ପର୍‌ମେସର୍ ମକେ ବାଟ୍‌ଲା ଆରି ତାର୍ ନିମାନ୍ କବର୍ ଜାନାଇବାକେ ସର୍‌ପିଦେଲା । ରମ୍ ରାଇଜେ ରଇବା ତମର୍ ସବୁଲକ୍‌ରପାଇ ମୁଇ ଏ ଚିଠି ପାଟାଇଲାନି ।

<sup>୨</sup> ପର୍‌ମେସର୍ ଏ ବିସଇ ଆଗେଅନି କାତା ଦେଇରଇଲା, ଆରି ସୁକଲ୍ ସାସ୍‌ତରେ ସେ ସବୁ ଲେକ୍‌ବା ପାଇ ତାର୍ ବବିସଡ଼ବକ୍‌ତାମନ୍‌କେ ତିଆରଲା । <sup>୩</sup> ଏ ସୁବ୍‌କବରତେଇ ପର୍‌ମେସରର୍ ପଅ, ଆରି ଆମର୍ ମାପରୁ ଜିସୁକିରିସ୍‌ଟର୍ ବିସଇ

ଆଚେ । ସେ ଏ ମତ୍ସ୍ୟରେ ନର ରୁପଦାରି ଦାଉଦର ନାତିତିତି ଅଇ ଜାତ୍ ଅଇଲା ।  
 ୪ ମାତର୍ ସେ ପୁରାପୁରୁନ୍ ସୁକଲ୍ ରଇଲା, ଆରି ପରମେସରର୍ ବଡ଼ ବପୁସଙ୍ଗ ତାକେ  
 ମଲାଟାନେଅନି ଉଟାଇଲା । ମଲାଟାନେଅନି ଉଟ୍ଟଲାରପାଇ ସେ ପରମେସରର୍ ପଅ  
 ବଲି ଦେକାଇଲା । ୫ ପରମେସର୍ କିରିସ୍ତର୍ ତେଇଅନି ମକେ ଗଟେକ୍ ପେରିଡ଼  
 କଲାଆଚେ, ଜେନ୍ତାରି କି ସବୁ ଜଗତର୍ ଲକ୍ମନକେ ତାର୍ ବିସଇ ଜାନାଇବି ।  
 ସେମନ୍ ସେଟା ବିସ୍ବାସ୍ କରି ମାନବାଇ । ୬ ଏ ରମ୍ ଦେସର୍ ଲକ୍ ! ତମେମିସା  
 ଜିସୁକିରିସ୍ତର୍ ସିସ୍ ଅଇବାକେ ବାଟାଇ ଅଇଆଟାସ୍ ।

୭ ରମେ ରଇବା ସବୁ ଲକ୍ମକେ ଏ ଚିଟି ଲେକ୍ଲିନି । କାଇକେବଇଲେ ତମ୍‌କେ  
 ପରମେସର୍ ଆଲାଦ୍ କଲାନି । ଆରି ତାର୍ ନିଜର୍ ଲକ୍ ଅଇବାକେ ଡାକି ଆଚେ ।

ଆମର୍ ବାବା ପରମେସର୍ ଆରି ମାପୁରୁ ଜିସୁକିରିସ୍ତର୍ ତମ୍‌କେ ଜିବନ୍ ଦୁକାଇ ସାନ୍ତି  
 ଦେଅ ।

**ଦନିଅବାଦର୍ ପାର୍ତନା**

୮ ମୁଇ ତମ୍‌କେ ପର୍ତମେ ଏ ବିସଇ କଇବାକେ ମନ୍ କରି ରଇଲିଜେ, ତମ୍‌ର୍  
 ସବୁଲକ୍‌ରପାଇ ମୁଇ ମାପୁରୁ ଜିସୁର୍ ନାଉଁ ଦାରି ପରମେସର୍‌କେ ଦନିଅବାଦ୍  
 ଦେଲିନି । କାଇକେବଇଲେ ଗୁଲାଇ ଜଗତର୍ ଲକ୍, ତମେ ବିସ୍ବାସ୍ କରିରଇବା  
 ବିସଇ ସୁନ୍‌ଲାଇନି । ୯ ମୁଇ ମର୍ ସବୁ ମନ୍‌ପରାନ୍ ଦେଇ ଜନ୍ ପରମେସର୍‌କେ ସେବା  
 କଲିନି, ଆରି ଜନ୍ ପରମେସରର୍ ପଅର୍ ସୁବ୍ କବର୍ ଜାନାଇଲିନି, ସେ ପରମେସର୍  
 ମର୍ ସାକି । ୧୦ ମୁଇ ପାର୍ତନା କଲାବେଲେ ତମ୍‌କେ ସବୁବେଲେ ଏତାଇଲିନି  
 । ସେ ମନ୍ କଲେ, ମକେ ତମ୍‌ର୍ ଲଗେ ଜିବାକେ ବେଲା ଟିକ୍ କରି ଦେଅ ବଲି  
 ପରମେସର୍‌କେ ଗୁଆରି କଲିନି । ୧୧ ତମ୍‌ର୍ ଲଗେ ଆଇବାକେ ମୁଇ ବେସି ମନ୍  
 କଲିନି । ମର୍ ପାଇରଇଲା ଆଡ଼ମାର୍ ଦାନ୍ ବିସଇ ଜାନାଇବାଟାନେଅନି ତମ୍‌ର୍  
 ବିସ୍ବାସ୍ ଡାଟ୍ କରାଇବି । ୧୨ ଏଟାର୍ ଲାଗି ତମ୍‌ର୍ ବିସ୍ବାସେଅନି ମର୍ ବିସ୍ବାସ୍  
 ଡାଟ୍ ଅଇସି ଆରି ମର୍ ବିସ୍ବାସେଅନି ତମ୍‌ର୍ ବିସ୍ବାସ୍ ଡାଟ୍ ଅଇସି ।

୧୩ \*ବାଇବଇନିମନ୍, ତମ୍‌ର୍ ଟାନେ ଆଇବାକେ ମୁଇ ବେସି ତର୍ ମନ୍ କରିରଇଲି,  
 ମାତର୍ ଦାରାବାଦାଅଇ ଜାଇରଇଲି ଜେ ଆଜିକେ ଜାକ ଆସି ନାପାର୍‌ଲିନି । ବିନ୍  
 ବିନ୍ ଜାଗାର୍ ଜିଉଦି ନଇଲା ଲକ୍ମନର୍ ବିଡ଼ରେ ସୁବ୍‌କବର୍ ଜାନାଇକରି ମକେ  
 ଜେଡ଼କି ସାର୍‌ଦା ମିଲ୍‌ଲା ଆଚେ, ତମ୍‌ର୍ ଜାଗାଇ ମିସା ସେଟା କର୍‌ବାକେ ମୁଇ  
 ମନ୍ କଲିନି । ୧୪ କାଇକେବଇଲେ, ଗିରିକ୍ ଲକ୍ମନର୍ ପାରା ଗିଆନ୍ ରଇଲେ  
 ମିସା, ମୁରକ ଲକ୍ ଅଇରଇଲେ ମିସା, ସିକିରଇବା ଲକ୍ ଅଇରଇଲେ ମିସା, କି ନ  
 ସିକିରଇବା ଲକ୍ ଅଇରଇଲେ ମିସା, ଏ ସବୁ ଦଲ୍‌ର୍ ଲକ୍ମନର୍ ପାଇ ମର୍ ଦାଇଡ଼  
 ଆଚେ । ୧୫ ସେଟାର୍ ପାଇ ରମ୍ ଗଡ଼ର୍ ଲକ୍, ତମ୍‌ର୍ ଲଗେ ମିସା ନିମାନ୍ କବର୍  
 ଜାନାଇବାକେ ମୁଇ ମନ୍ କଲିନି ।

**ସୁବ୍‌କବରର୍ ବପୁ**

୧୬ \*ସେ ସୁବ୍ କବର୍‌ଟାନେ ମର୍ ପୁରାପୁରୁନ୍ ଆସାଆଚେ, ସେଟା ସିଗ୍ ପର୍ତମେ  
 ଜିଉଦି ଲକ୍ମନର୍ ପାଇ ଆରି ତାର୍ ପଚେ ବିସ୍ବାସ୍ କର୍‌ବା ଜିଉଦି ନଇଲା  
 ଲକ୍ମନର୍ ପାଇ ପରମେସରର୍ ବଡ଼ ବପୁ । ୧୭ ଲକ୍ମନ୍ ପରମେସରର୍ ଲଗେ  
 କେନ୍ତ୍ର ଦରମ୍ ଲକ୍ ବଲାଇ ଅଇ ପାର୍‌ବାଇ, ତାର୍ ଉପାଇ ତେଇ ଦେକାଇ  
 ଦିଆଅଇଲା ଆଚେ । ଆରାମେ ଅନି ସାରାସାରିଜାକ ମୁକ୍ତି ପାଇବା ଗଟେକ୍ ମାତର୍  
 ଉପାଇ ଅଇଲାନି, ବିସ୍ବାସ୍ । ସାସ୍‌ତରର୍ ବାକିଅ ଇସାବେ “ଜେ ବିସ୍ବାସ୍ କରି  
 ପରମେସରର୍ ମୁଆଟେ ଦରମ୍ ବଲାଇ ଅଇସି, ସେ ବର୍‌ସି ।”

\* ୧:୧୩ ୧:୧୩ ପେରିଡ଼ ୧୯:୨୧    \* ୧:୧୭ ୧:୧୭ ମାର୍‌କ୍ ୮:୩୮

ପାପକେ ପରମେସରର୍ ରିସା

୧୮ ଜନ୍ ପାପି ଲକ୍ମନ ନିଜର୍ କାରାପ୍ କାମେଅନି ସତ୍ ବିସଇ ଅଟ୍‌କାଇବାଇ, ସେମନର୍ ବିରଦେ ସର୍ଗେଅନି ପରମେସରର୍ ରିସା ଦେକାଇ ଅଇସି । ୧୯ କାଇକେବଇଲେ ପରମେସରର୍ ବିସଇନେଇ ଜାଇଟା ଜାନ୍‌ବାର୍ ରଇଲା ସେମନ୍ ସେଟା ଜାନ୍‌ଲାଇ ଆଚତ୍ । ପରମେସର୍ ନିଜେ ସେଟା ଦେକାଇ ଦେଲାଆଚେ । ୨୦ ପରମେସର୍ ଜଗତ୍ ତିଆର୍ କଲାତେଇଅନି, ତାର୍ ନ ଦେକାଇଅଇବା ଗୁନ୍ ଅଇଲାନି, ତାର୍ କାବାଅଇଜିବା କାମ୍ ଆରି ନ ସାର୍‌ବା ବପୁ । ସେ ତିଆର୍ କଲା ବିସଇତେଇ ସେଟା ଦେକିଅଇଲାନି । ସେଟାର୍ ପାଇ ସେମନ୍ ନାଜାନ୍‌ବଲି କଇନାପାରତ୍ । ୨୧ \*ସେମନ୍ ପରମେସର୍କେ ଜାନିକରି ମିସା ନିକ ନାମତ୍ ନାଇ କି ତାକେ କାଇ ବିସଇ ନେଇକରି ମିସା ଦନିଅବାଦ୍ ଦେଅତ୍ ନାଇ । ସେମନ୍ ଚିନ୍ତା କରବାଟା ସବୁ କାରାପ୍ ଆରି ତାକର୍ ତୁଟାଇ ରଇବା ମନ୍, ଆନ୍ଦାରେ ଆଚେ । ୨୨ ସେମନ୍ ନିଜ୍‌କେ ଗିଆନି ବଲି ବାବ୍‌ଲାଇନି, ମାତର୍ ସତଇସେ ସେମନ୍ ବକୁଆ । ୨୩ ସତ୍ ପରମେସର୍କେ ନ ନାମିକରି ନସିଜିବା ମୁନୁସ୍, ପସୁ, ଚଡ଼ଇ, ସାଁପ୍‌ପାଲା ପୁଡ଼ଲା ତିଆର୍ କରି ସେଟାମନ୍‌କେ ପୁଜା କଲାଇନି ।

୨୪ ସେଟାର୍ ପାଇ ପରମେସର୍ ସେମନ୍‌କେ ଚାଡ଼ିଦେଲାଆଚେ, ଆରି ସେମନ୍ ନିଜର୍ ନିଜର୍ ମନ୍ କଲା କାରାପ୍ କାମେ ବୁଡ଼ି ରଇଲାଇନି । ସେମନ୍ ତାକର୍ ତାକର୍ ବିତ୍‌ରେ ଲାଜ୍‌ଅଇଜିବା ମିସାବିତା କରବାଟା ସଙ୍ଗ୍‌ଆଚତ୍ । ୨୫ ସେମନ୍ ପରମେସରର୍ ବିସଇଟାନ୍‌ ରଇବା ସତ୍ ବାଦୁଲେ ମିର୍ ଦାରିକରି ଆଚତ୍ । ସବୁବେଲେ ତାକ୍‌ପୁଟା ପାଇବା ପରମେସର୍କେ ପାର୍‌ତନା ନ କରି, ତିଆର୍ କଲା ଦିନ୍‌ସୁମନ୍‌କେ ପାର୍‌ତନା କଲାଇନି । ସେ କାଲ୍ କାଲ୍ ଜୁଗ୍ ଜୁଗ୍ ତାକ୍‌ପୁଟା ପାଅ ! ଆମେନ୍ ।

୨୬ ସେମନ୍ ଲାଜ୍‌ଅଇଜିବା ପାପ୍‌କାମେ ବୁଡ଼ି ରଇଲାର୍ ପାଇ ପରମେସର୍ ସେମନ୍‌କେ ଚାଡ଼ି ଦେଲାଆଚେ । ତାକର୍ ମାଇଜିମନ୍ ନିଜର୍ ମୁନୁସ୍‌ମନର୍ ସଙ୍ଗ୍ ସୁଆବସା ନ ଅଇ, କାରାପ୍ ଇସାବେ ବିନ୍ ମୁନୁସ୍‌ମନର୍ ସଙ୍ଗ୍ ସୁଆବସା କଲାଇନି । ୨୭ ସେନ୍ତାରିସେ ମୁନୁସ୍‌ମନ୍ ମିସା ଆଲାଦେ ମାଇଜି ସଙ୍ଗ୍ ସୁଆବସା ନ କରି ନିଜର୍ ନିଜର୍ ବିତ୍‌ରେ କାରାପ୍ ଅଇ ମିସାବିତା ଅଇବା ଚିନ୍ତାଇ ଜଲି ଗାଲାଇନି । ମୁନୁସ୍‌ମନ୍ ତାକର୍ ତାକର୍ ବିତ୍‌ରେ ଲାଜ୍ ଅଇବା ଚଲାଚଲ୍‌ତି କଲାଇନି ଆରି ସେଟାର୍ ପାଇ ଡଣ୍ଡୁ ପାଇବାକେ ତିଆର୍ ଅଇଲାଇନି ।

୨୮ ଏ ଲକ୍ମନ ପରମେସରର୍ ବିସଇନେଇ ନିମାନ୍ ବାବ୍‌ବାକେ ମନ୍ ନ କଲାର୍ ପାଇ, ପରମେସର୍ ସେମନ୍‌କେ ଚାଡ଼ି ଦେଲାଆଚେ । ଆରି ମନ୍ ବିତ୍‌ରେ କାରାପ୍ ଚିନ୍ତା କରବାଟା କରତ୍ ବଲି ଚାଡ଼ିଦେଲାଆଚେ । ଏଟାର୍‌ପାଇ ସେମନ୍ ନ କରବା କାମ୍ କରବାଇ । ୨୯ ତାକର୍ ବିତ୍‌ରେ ସବୁରକାମର୍ କାରାପ୍ ବିସଇ, ଜନ୍‌ଟାମନ୍‌କି, କାରାପ୍ ଚିନ୍ତା କରବାଟା, ବାନିଆ ଚିନ୍ତା କରବାଟା, ଲବାଇବାଟା, ଲାଁର୍ ନେବାଟା, ତାକର୍ ତାକର୍ ବିତ୍‌ରେ ଛିଆତଲା ଅଇବାଟା, ନର୍ ମରାଇବାଟା, କିରମାର ଅଇବାଟା, ନାଡ଼ାଇବାଟା, ଆଁକାର୍ କରବାଟା ଆରି କୁଟ୍‌କାତା ଅଇବାଟା ବରୁଡ଼ି ଅଇଆଚେ । ୩୦ ସେମନ୍ କାନେ ପୁସୁର୍ ପାସାର୍ ଅଇବାଟା, ବିନ୍ ଲକ୍‌କେ ନିନ୍ଦା କରବାଟା, ପରମେସର୍କେ ଗିନ୍ କରବାଟା, ବଡ଼ପନ୍ ଅଇବାଟା, ବଡ଼ପନିଆ କାତା ଅଇବାଟା, ବିନ୍‌ଲକ୍‌କେ ପାନ୍ଦେ ଅଦରାଇବାଟା, ଆରି ଆୟା ବାବାର୍ କାତା ନ ମାନ୍‌ବାଟା, ୩୧ ଦରମ୍ ବିବେକ୍ ନ ଅଇବାଟା, କାତା ଦେଲା ପଚେ ସେଟା ବାଙ୍ଗାଇବାଟା, ତାକର୍ ବିତ୍‌ରେ ଆଲାଦ୍ ନ କରବାଟା ଆରି ଜିବନ୍ ନ ଦୁକାଇବାଟା । ୩୨ ଜନ୍ ଲକ୍ମନ ଏନ୍ତି ଚଲାଚଲ୍‌ତି କରବାଇ ସେମନ୍ ମରିଜିବାଟା ନିକ । ପରମେସରର୍ ଏ ନିୟ୍‌ମ୍

\* ୧:୨୧ ୧:୨୧ ଏପିସିୟ ୪:୧୭,୧୮

ସେମନ୍ ଜାନ୍ଲେ ମିସା ଏକ୍ତିସେ ଚଲ୍ଲାଚଲ୍ଲତି କରବାଇ, ଅବକା ସେଟା ନଏ, ମାତର୍ ଏକ୍ତି ଚଲ୍ଲାଚଲ୍ଲତି କରବା ଲକର୍ ବାଟେ ଅଇକରି, ସାରଦା ସଙ୍ଗ ଏଟା ଟିକ୍ ବଲି ସେମନ୍କେ କଇବାଇ ।

### ୨

ପରମେସରର୍ ସତ୍ ଦରମର୍ ବିଚାର୍

୧ \*ତେବେ ଏ ମର୍ ମଇତର୍ମନ୍, ତମେ କାଇ ବିନ୍ ଲକର୍ ବିଚାର୍ କଲାସ୍ନି କି ? ତମେ ଜେ ଅଇରଇଲେ ମିସା, ଏକ୍ତି କରବାଟା ଟିକ୍ ନଏ । ବିନ୍ ଲକର୍ ଦସ୍ଦାରି ତମେ ଜଦି ନିଜେ ସେ ଦସ୍ କର୍ତେ ରଇସା ବଇଲେ, ତମେ ନିଜେ, ନିଜକେ ଦସି ବଲାଇ ଅଇଲାସ୍ନି । ୨ ଆମେ ଜାନ୍, ପରମେସର୍ ଏକ୍ତି କର୍ତେ ରଇବା ଲକ୍ମନ୍କେ ଟିକ୍ ସଙ୍ଗ ବିଚାର୍ କରସି । ୩ ଜନ୍ କାରାପ୍ କାମର୍ ଲାଗି ତମେ ବିନ୍ ଲକ୍ମନ୍ ଦସ୍ ଦାର୍ଲାସ୍ନି, ସେଟା ତମେ ନିଜେ କର୍ତେ ରଇସା, ସେଟାର୍ ପାଇ ତମେ ପରମେସରର୍ ବିଚାର୍ ଜାଗାଇ ଟିଆ ନଉଁ ବଲି ବାବ୍ଲାସ୍ନି କି ? ୪ ସେକ୍ତି ବଇଲେ ତା, ତମେ ପରମେସରର୍ ବେସି ଜିବନ୍ ଦୁକାଇଲାଟା, ଉଦାର୍ କରବାଟା ଆରି ମୁରତ୍ବାଟାକେ ନାମାସ୍ ନାଇ । ତମେ ସତଇସେ ଜାନିଆଟାସ୍ ଜେ, ତମର୍ ମନେ କାରାପ୍ କାମ୍ ଅଇଲାଟା ମାନିଅଇବାକେ ପରମେସର୍ ଏଡେକ୍ ଦୟା କଲାଆଟେ । ୫ ମାତର୍ ତମେ ବଡ୍ପନିଆ ଆରି ମନ୍ ଜିଦିଆ । ସେଟାର୍ ପାଇ ସାରାସାରି ବିଚାର୍ନା ଦିନେ ପରମେସର୍ ଟିକ୍ ସଙ୍ଗ ତାର୍ ବିଚାର୍ନା ଦେକାଇସି । ସେ ରିସାର୍ ଦିନେ ନିଜର୍ ପାଇ ରିସା ଟୁଲିଆଇଲାସ୍ନି । ୬ କାଇକେବଇଲେ ପରମେସର୍ ସେ ଦିନେ ତାର୍ କରମ୍ ଇସାବେ ସବୁକେ ପୁରୁସ୍କାର୍ ଦେଇସି । ୭ ଜନ୍ ଲକ୍ମନ୍ ତାକ୍ପୁଟା, ସନ୍ମାନ୍ ଆରି ଅମର୍ ଅଇବା ଆସାଇ ମୁର୍ଚିକରି ସତ୍କାମ୍ କରିଜିବାଇ, ସେମନ୍କେ ପରମେସର୍ ନ ସାର୍ବା ଜିବନ୍ ଦେଇସି । ୮ ମାତର୍ ଜନ୍ ଲକ୍ମନ୍ ନିଜର୍ ଲାବ୍ ଆରି ସତ୍ ରଇବା ବିସଇ ନ ମାନି, ମିଚ୍କାତା ମାନ୍ବାଇ, ସେମନ୍ ଉପ୍ରେ ବଡ୍ ରିସା ଆଇସି । ୯ ଜନ୍ ଲକ୍ମନ୍ କାରାପ୍ କାମେ ବୁଡ୍ ଆଚଡ୍, ସେମନ୍ ପାଇ କସ୍ଟ ଆରି ଦୁକର୍ ଦିନ୍ ଆଇଲାନି । ସବୁକେ ଆଗ୍ତୁ ଜିଉଦିକେ ଆରି ତାର୍ ପଟେ ଜିଉଦି ନଇଲା ଲକ୍ମନ୍ ପାଇ । ୧୦ ମାତର୍ ଜନ୍ ଲକ୍ମନ୍ ସତ୍ ଇସାବେ କାମ୍ କଲାଇନି, ସେମନ୍ ଜିଉଦି ଅଅଡ୍ କି ଜିଉଦି ନଇଲା ଲକ୍ ଅଅଡ୍, ସେମନ୍କେ ପରମେସର୍ ତାକ୍ପୁଟାକରି ସନ୍ମାନ୍ ଆରି ସାକ୍ତି ଦେଇସି । ୧୧ କାଇକେ ବଇଲେ ପରମେସର୍ ଗଟେକ୍ ତୁଲାଇସେ ସବୁର୍ ବିଚାର୍ କରସି ।

୧୨ ଜିଉଦି ନଇଲା ଲକ୍ମନ୍, ମସା ଲେକ୍ଲା ନିୟ୍ମ୍ ପାଅଡ୍ ନାଇ । ନିୟ୍ମ୍ ନ ପାଇ ପାପ୍ କଲାଇ, ସେମନ୍ ନିୟ୍ମ୍ ନ ଅଇତେ କୁରୁପ୍ନାସ୍ ଅଇବାଇ । ଆରି ଗଟେକ୍ବାଟେ ଜିଉଦିମନ୍ ନିୟ୍ମ୍ ଜାନିକରି ମିସା, ପାପ୍ କଲାଇ, ସେମନ୍ ସେ ନିୟ୍ମ୍ ଇସାବେ ଡଣ୍ଡ୍ ପାଇବାଇ । ୧୩ କାଇକେବଇଲେ ଲକ୍ମନ୍ ଉଜେ ନିୟ୍ମ୍ ସୁନ୍ଲେସେ ପରମେସରର୍ ମୁଆଟେ ଦରମ୍ ଲକ୍ ବଲି ଏଜାଇଅଇ ନାପାରଡ୍, ମାତର୍ ନିୟ୍ମ୍ ନାମ୍ଲେସେ ଅଇପାରଡ୍ । ୧୪ ଜିଉଦିନଇଲା ଲକ୍ମନ୍ ନିୟ୍ମ୍ ନାଇ, ମାତର୍ ସେମନ୍ ଅବିଆସ୍ କରି ନିୟ୍ମ୍ ବିଦିମନ୍ ନାମବାଇ, ସେଟାସେ ସେମନ୍ ନିୟ୍ମ୍ ପାରା । ୧୫ ସେମନ୍ କାମ୍ଦାମ୍ଗାନେଅନି ଟିକ୍ ସଙ୍ଗ ଜାନାପଡ୍ଲାନି ଜେ, ନିୟ୍ମ୍ ବିଦିବିଦାନ୍ ସେମନ୍ ମନେ ଲେକାଅଇଲା ଆଟେ । ଏ କାତା ସତ୍, ସେମନ୍ ବିବେକ୍ ଟିକ୍ ବଲି କଇବା ଚଲ୍ଲାଚଲ୍ଲତିଅନି ଜାନାପଡ୍ଲାନା । ଜେନ୍ତାରିକ୍ ସତ୍ କାମ୍ କଲାବେଲେ ତାକର୍ ବିବେକ୍, ଉଁ ବଲି କଇସି, ଆରି କାରାପ୍ କାମ୍ କଲାବେଲେ ବିବେକ୍ ସେମନ୍କେ ଦସି କରାଇସି । ୧୬ ଜନ୍ ଦିନେ ପରମେସର୍ ଜିସୁକିରିସର୍

\* ୨:୧ ୨:୧ ମାଡିଉ ୭:୧; ଲୁକ୍ ୬:୩୭



ଚାନେଅନି ମୁନୁସର୍ ବିତ୍ତରେ ଲୁଚିଲା ବିସଇମନ୍ ବିଚାର କରସି, ସେ ଦିନେ ମୁଇ ଜାନାଇ ରଇଲା ସୁବ୍‌କବର୍ ଇସାବେ ଏ ସବୁ ଗଟସି ।

ଜିଉଦି ଲକ୍‌ମନ୍ ଆରି ନିୟମ୍

୧୭ ତମେମନ୍ ତେବେ ? ନିଜ୍‌କେ ଜିଉଦି ବଲାଇଅଇଲାସନ୍, ନିୟମ୍‌କେ ଆସାକରି ଆରି ପରମେସର୍ ସଙ୍ଗ୍ ମିସାବିତା କରବାଟା ନେଇ ବଡ଼ପନ୍ ଅଇଲାସନ୍, ୧୮ ପରମେସର୍ ତମରଚାନେଅନି କାଇଟା ମନ୍ କଲାନି ସେଟା ତମେ ଜାନିଆଟାସ୍ । ଆରି ନିୟମେଅନି ସଡ଼ ଆରି ସଡ଼ ନ ଅଇବା ଗିଆନ୍ ପାଇଆଟାସ୍, ୧୯ ସତଇସେ ଜାନିଆଟାସ୍ ଜେ, ତମେ କାଣାକେ ବାଟ୍‌ଦେକାଇବା ଲକ୍, ଆନ୍ଦାରେ ରଇବା ଲକ୍‌ମନର୍ ପାଇ ଉଜଲ୍ ପାରା । ୨୦ ବକ୍ସୁଆମନ୍‌କେ ନିମାନ୍ କାତା କଇବା ଲକ୍, ଗିଆନ୍ ନ ରଇବା ଲକ୍‌ମନର୍ ଗୁରୁ । ତମେ ବିସବାସ୍ କଲାସନ୍ ଜେ, ନିୟମ୍ ଜାନିକରି ପୁରାପୁରୁନ୍ ସଡ଼ ଆରି ଗିଆନ୍ ପାଇଆଟାସ୍ ବଲି । ୨୧ ତମେ ବିନ୍‌ଲକ୍‌ମନ୍‌କେ ସିକାଇଲାସନ୍, ମାତର୍ କାଇକେ ନିଜେ ସିକାସ୍ ନାଇ ? ଚରାଇବାର୍ ନାଇ ବଲି ସିକିଆ ଦେଇ ନିଜେ ଚରାଇଲାସନ୍ କି ? ୨୨ ପାଦରା କାମ୍ କରାନାଇ ବଲି କଇ, ନିଜେ ପାଦରା କାମ୍ କଲାସନ୍ କି ? ପୁଡ଼ଲା ପୁଜାକେ ଗିନ୍ କରି ଦେଉଲର୍ ଦିନ୍‌ସୁ ଚରଲାସନ୍ କି ? ୨୩ ପରମେସରର୍ ନିୟମ୍ ମିଲାଇଆଚୁ ବଲି ବଡ଼ପନ୍ ଦେକାଇଲାସନ୍, ମାତର୍ ସେଟାକେ ଏଡିଦେଇକରି ତାକେ ଲାଜ୍ କରାଇଲାସନ୍ କି ? ୨୪ ସାସ୍‌ତରେ ଲେକାଅଇଲା ଆଚେ, “ତମରଲାଗି ଜିଉଦି ନଇଲା ଲକ୍‌ମନର୍ ବିତ୍ତରେ ପରମେସର୍ ନିନ୍ଦା ପାଇଲାନି ।”

୨୫ ଜଦି ତମେ ନିୟମ୍ ମାନ୍‌ଲେ, ତମର୍ ସୁନଡ଼ ଅଇବାଟା ଟିକ୍ ଆଚେ । ଜଦି ନିୟମ୍ ନ ମାନ୍‌ଲେ ସୁନଡ଼ ନ ଅଇଲା ଲକ୍‌ମନର୍ ସଙ୍ଗ୍ ସମାନ୍ । ୨୬ ଜଦି ସୁନଡ଼ ନ ଅଇଲା ଗଟେକ୍ ଜିଉଦି ନଇଲା ଲକ୍ ନିୟମର୍ ବିଦିବିଦାନ୍ ସବୁ ନାମ୍‌ତେ ରଇସି, ପରମେସର୍ ତାକେ ସୁନଡ଼ ଲକ୍ ଇସାବେ ନ ତାକେ କି ? ୨୭ ସେଟାର୍ ପାଇ ଗାଗଡେ ସୁନଡ଼ ନ ଅଇରଇଲା ଜିଉଦି ନ ଅଇଲା ଲକ୍‌ମନ୍, ନିୟମ୍ ମାନିକରି ତମର୍ ବିଚାର କରବାଇ, କାଇକେ ବଇଲେ ତମେ ଗାଗଡେ ସୁନଡ଼ ଅଇ ନିୟମ୍ ପାଇରଇଲେ ମିସା, ସେଟା ନାମାସ୍ ନାଇ । ୨୮ ଉଜେ ଗାଗଡେ ସୁନଡ଼ ଅଇ ଉପରେ ଉପରେ ଜିଉଦି ବଲି ଚିନାଇଅଇବା ଲକ୍ ସତଇସେ ଜିଉଦି ନଅଡ଼ । ୨୯ ଜେ ମନ୍ ବିତ୍ତରେଅନି ଜିଉଦି, ସେ ଅଇଲାନି ସତଇସେ ଜିଉଦି । ସତଇସେ ସୁନଡ଼ ମନ୍ ବିତ୍ତରର୍ ବିସଇ । ସେଟା ସୁକଲ୍ ଆଡ଼ମାର୍ କାମ୍ । ଲେକ୍‌ଲା ନିୟମ୍ ସେଟା କରିନାପାରେ । ଏନ୍ତାରି ଲକ୍ ଲକ୍‌ମନର୍‌ଚାନେଅନି ତାକ୍‌ପୁଟା ନ ପାଏ, ମାତର୍ ପରମେସର୍‌ଅନି ପାଇସି ।

୩

୧ ତେବେ ଜିଉଦି ନଇଲା ଲକ୍‌ମନର୍‌ତେଇଅନି ଜିଉଦିମନର୍ ଅଦିକ୍ ସୁବିଦା କାଇଟା ? ସୁନଡ଼ କଲେ କାଇ ଲାବ୍ ? ୨ ସବୁ ରକାମର୍ ଲାବ୍ ଆଚେ । ତେବେ ପର୍‌ତୁମ୍, ପରମେସର୍ ତାର୍ କବର୍ ଜାନାଇବା ଦାଇଡ଼ ଜିଉଦିମନର୍ ଆତେ ଦେଲା ଆଚେ । ୩ ତେବେ କାଇଟା ଅଇସି ? ଜିଉଦିମନର୍ ବିତ୍ତରେଅନି କେତେ ଲକ୍ ବିସ୍‌ବାସ୍ ନ କଲେ ପରମେସର୍ କାତା ଦେଇରଇବାଟା ପୁରାପୁରୁନ୍ ନ ଅଏ କି ? ୪ କେବେ ନାଇ । ମୁନୁସମନ୍ ସବୁ ଲକ୍ ମିଚୁଆ ଅଇଲେ ମିସା, ପରମେସର୍ ସଡ଼ସେ । ସାସ୍‌ତରେ ଲେକା ଆଚେ,

“ତମର୍ ବାକିଅ ଅନି ତମେସେ ସଡ଼ ବଲି ଚିନାଇ ଉଆ,  
ତମେ ବିଚାର୍ କରାଇ ଅଇଲାବେଲେ ଜିତି କରି ରୁଆ ।”

୫ ଇତି ଗଟେକ୍ ପର୍‌ସନ୍ ଅଇପାରେ, “ଆମର୍ କାରାପ୍ ଚଲାଟଲ୍‌ଡି, ପରମେସରର୍ ଦରମ୍‌କେ ଚିନାଇ ଦେଇସି ବଇଲେ, ସେ ଆମ୍‌କେ ଡଣ୍ଡଦେଇ

ଅନିଆଇ କଲାନି ବଲି କଇପାରିଅଇସି କି ? ୬ କେବେ ନାଇ । ପରମେସର୍ ଜଦି ନିଆଇତେଇ ନାଇ, ତେବେ ସେ କେନ୍ତ୍ର ଜଗତର୍ ନିଆଇ ବିଚାର କର୍ସି ?”

୭ “ଜଦି ମୁଇ ମିର୍ କଇବାଟା ପରମେସର୍ ସତ୍ ଅଦିକ୍ ତିସି କରି ତାକ୍ପୁଟା କରାଇସି ବଇଲେ, ମୁଇ କାଇକେ ପାପି ବଲି ତଣ୍ଡ ପାଇବି ?” 「 ସେନ୍ତ୍ରାଆଲେ “ଆସା, ଆମେ କାରାପ୍ କାମ୍ କରୁ ଜେନ୍ତ୍ରାରି କି ତେଇଅନି ନିକ ବିସଇ ବାରଇସି” ବଲି କଇଅଇସି କି ? ନାଇ, କଇ ନଏ । ମୁଇ ସମାନ୍ ଏନ୍ତି କାତା କଇଲିନି ବଲି ଦାବା କରି କେତେ ଲକ୍ ମକେ ଇଜତ୍ ଜିକ୍ଲାଇନି । ସେମନ୍ ସେଟାର୍ ପାଇ ଜନ୍ ତଣ୍ଡ ପାଇବାର୍ ରଇଲାଇ, ସତଇସେ ପାଇବାଇ ।

ଗଟେକ୍ଲକ୍ ମିସା ଦରମ୍ ଲକ୍ ନାଇ

୯ ତେବେ କାଇ ଜିଉଦିମନର୍ ଜିଉନା କାଉନା, ଜିଉଦି ନଇଲା ଲକ୍ମନର୍ଟାନେଅନି ଅଦିକ୍ ନିକ କି ? ନାଇ, ମୁଲ୍କେ ନାଇ ! ମୁଇ ଆଗ୍ତୁଅନି କଇଲି ଆଟି ଜେ, ସେମନ୍ ଦୁଇ ଦଲ୍ ଜାକ ପାପର୍ ସାସନେ ଆତଡ୍ । ୧୦ ସାସ୍ତରେ ଲେକା ଆଟେ,

ଦରମ୍ ଲକ୍ କେ ନାଇ ଗଟେକ୍ ଲକ୍ ମିସା ନାଇ,

୧୧ କେ ମିସା ଗିଆନ୍ ରଇବା ଲକ୍ ନାଇ ।

ସତଇସେ ପରମେସର୍କେ ଉପାସନା କର୍ବା ଲକ୍ ନାଇ ।

୧୨ ସେମନ୍ ସବୁ ଲକ୍ ପରମେସର୍ଟାନେଅନି ଅନି ଦୁରିକେ ଜାଇ ଆତଡ୍ ।

ସେମନ୍ ବାଟ୍ ବାନା ଅଇଗାଲାଇ ଆତଡ୍ ।

କେ ଗଟେକ୍ ଲକ୍ ମିସା ସତ୍ କାମ୍ କରଡ୍ ନାଇ ।

୧୩ ସେମନର୍ କାତା କଇବାଟାନେ ଅଦିକ୍ ନାତାଇବାଟା ଆଟେ,

ଟଣ୍ଡେଅନି ଗାଡ୍ ଗାଲାପାରା ମିର୍ କାତା ବାରଇଲାନି ।

ଜିବ୍ତଲେ ନାଗ୍ ସାପର୍ ବିସ୍ ପାରା ଆଟେ ।

୧୪ ସେମନର୍ କାତା, ପିତା ଅଇ, ଅବିସାପେ ପୁରୁନ୍ ଅଇଆଟେ ।

୧୫ ସେମନ୍ ମାର୍ବାକେ ଆରି ମରାଇବାକେ ତେରେପେତେ ଅଇଲାଇନି ।

୧୬ ସେମନ୍ ଜନ୍ବାଟେ ଗାଲାଇନି, ତେଇ କୁରୁପ୍ନାସ୍ ଅଇବାଟା ଆରି କସ୍ତ

ଅଇବାଟା ଉବଜ୍ଲାନି ।

୧୭ ସେମନ୍ ସାନ୍ତ୍ର ବାଟ୍ ନାଜାନଡ୍,

୧୮ କି ପରମେସର୍କେ ତର୍ବାଟା ସିକଡ୍ ନାଇ ।

୧୯ ଆମେ ଜାନୁ, ଜନ୍ ଲକ୍ମନ୍ ନିୟ୍ମର୍ ସାସନ୍ ତଲେ ଆତଡ୍, ତେଇର୍ ସବୁ ବିଦିବିଦାନ୍ ମାନ୍ବାକେ ବାଦିଅ । ପରମେସର୍ ଜେତେବଲ୍ ଗୁଲାଇ ଜଗତର୍ ବିଚାର କର୍ସି, ନିୟ୍ମ୍ ନ ମାନ୍ଲା ଲକ୍ମନ୍ କାଇ କାମ୍ ମିସା ଦେକାଇକରି, ଦସ୍ କରନାଇ ବଲି କଇନାପାରଡ୍ । ୨୦ \*ମାତର୍ ନିୟ୍ମର୍ ରିଡିନିଡି ମାନିକରି କେ ମିସା ପରମେସର୍ ମୁଆଟେ ଦରମ୍ ଲକ୍ ଅଇନାପାରେ । ନିୟ୍ମେଅନି ସେ ଲକ୍ ଅବ୍କା ପାପର୍ ବଜ୍ସେ ପାଇସି ।

ବିସ୍ବାସ୍ କରି ଦରମ୍ ବଲାଇଅଇବାଟା

୨୧ ମାତର୍ ଏବେ ଲକ୍ମନ୍ ତାର୍ ମୁଆଟେ ଦରମ୍ ବଲି ଏଜାଇ ଅଇବାକେ, ପରମେସର୍ ଜନ୍ଟା ଜଜ୍ନା କରି ରଇଲା, ସେଟା ସେ ଆମ୍କେ ଜାନାଇଦେଲାଆଟେ । ମାତର୍ ଏଟା ନିୟ୍ମ୍ ମାନ୍ଲାକେ ଅଏନାଇ । ଏ ଜଜ୍ନା ମସାର୍ ନିୟ୍ମେ ଆରି ବିନ୍ ବବିସଡ୍ବକ୍ତାମନର୍ ଟାନେ ମିସା ରଇଲା । ୨୨ \*ଉଜେ ଜିସୁକିରିସ୍ଟକେ ବିସ୍ବାସ୍ କଲାକେ ଏବେ ଆମେ ପରମେସର୍ ଦେକ୍ବା ଇସାବେ ଦରମ୍ ଲକ୍ ବଲାଇ ଅଇଆତୁ । ପରମେସର୍ କେତେ ଲକ୍କେ ଆଲାଦ୍ କରି ଆରି କେତେକ୍

\* ୩:୨୦ ୩:୨୦ ଗାଲାତିୟ ୨:୧୭ ☆ ୩:୨୨ ୩:୨୨ ଗାଲାତିୟ ୨:୧୭

ଲକ୍ଷ୍ମୀଙ୍କେ ଗିନ କରେନାଇ । କିରିସ୍ତ୍ରଙ୍କେ ବିସ୍ତ୍ରାସକରୁବା ସବୁ ଲକ୍ଷ୍ମୀଙ୍କେ ଏ ଅଦିକାର ଦେଲାଆଟେ । ୨୩ ସବୁ ଲକ୍ଷ୍ମୀ ପାପ କଲାଆଟେ ଆତ୍ମ ଆରି ପରମେସର ପୁରାପୁରୁନ୍ ମଇମାଇଅନି ଉନା ଅଇଗାଲାଆଟେ । ୨୪ ମାତର୍ ପରମେସର କିରିସ୍ତ୍ର ଜିସୁର୍ତେଇଅନି ଇନାମେ ନ ସାରୁବା ଜିବନ୍ ଦୁକାନି ଦାନ କଲାଆଟେ । ଜନ୍ ଲକ୍ଷ୍ମୀଙ୍କେ ସେଟା ମିଲାଆଟେ, ସେମାନଙ୍କେ ମାପୁରୁ ଜିସୁ ମୁକ୍ତି ଦେଇସି । ସେମାନ ପରମେସର ମୁଆଟେ ଦରମ୍ ଲକ୍ଷ୍ମୀ ବଲାଆ ଅଇବାଇ । ୨୫ ପରମେସର ଜିସୁଙ୍କେ ଦାନକଲା, ଜେନ୍ତୁକି ତାର ମରନ୍, ତାଙ୍କେ ବିସ୍ତ୍ରାସ କରୁବା ଲକ୍ଷ୍ମୀଙ୍କେ ପାପ କେମାର ବାଟ ଦେକାଇସି । ସେ ନିଜର୍ ଦରମ୍ ଅଇଲାଟା ଦେକାଇବାଙ୍କେ ଏଟା କଲା । ସେ ସବୁ ମୁର୍ଚ୍ଚିକରି ଲକ୍ଷ୍ମୀଙ୍କେ ଆଗ୍ରୁ କରିରଇବା ପାପ ଦାରେ ନାଇ । ୨୬ ମାତର୍ ଏବେ ସେ ତାର ଦରମ୍ ଅଇଲାଟା ଦେକାଇବାଙ୍କେ ସେ ସବୁ ପାପ, ଜନ୍ ପାପ କି ଜିସୁ କୁରସକାଟେ ଦାରିରଇଲା, ତେଇ ମିସାଇ ଆଟେ । ଏଟାରଲାଗି ପରମେସର ପୁରାପୁରୁନ୍ ଦରମ୍ ଆଟେ । ଆରି ଜେଡକି ଲକ୍ଷ୍ମୀ ଜିସୁଙ୍କେ ବିସ୍ତ୍ରାସ କରୁବାଇ ସେ ସବୁ ଦରମ୍ ଲକ୍ଷ୍ମୀ ବଲି ଏଜାଇଅଇବାଇ ।

୨୭ ସେନ୍ତାରୁଆଲେ ଆମେ କାଇ ବିସଇନେଇ ବଡ଼ପନ୍ ଅଇବାରୁ ଆଟେ ? ନାଇ ସେନ୍ତୁ କାଇଟା ମିସା ନାଇ । ଆମେ ବଡ଼ପନ୍ ଦେକାଇବାଙ୍କେ କାଇ ବିସଇ ଆଟେ କି ? ଆମେ ପୁରାପୁରି ନିୟମ୍ ମାନୁନି ବଲିକରି କି ? ନାଇ, ଅବ୍ବା ବିସ୍ତ୍ରାସ କରୁବାଟାସେ ଆମର୍ ବଡ଼ପନ୍ ଦେକାଇବାଟା । ୨୮ ଆମେ ସତଇସେ ବୁଜି ପାରୁନୁ ଜେ, ଗଟେକ୍ ଲକ୍ଷ୍ମୀ ଅବ୍ବା ବିସ୍ତ୍ରାସ କରିସେ ଦରମ୍ ଲକ୍ଷ୍ମୀ ବଲାଆ ଅଇସି, ନିୟମ୍ ମାନିକରି ନାଇ । ୨୯ ପରମେସର କାଇ ଉଜେ ଜିଉଦିମନରସେ ପରମେସର କି ? ସେ କାଇ ଜିଉଦିନଇଲା ଲକ୍ଷ୍ମୀଙ୍କେ ପରମେସର ନଏଁ କି ? ସତଇସେ ସେ ସବୁ ଲକ୍ଷ୍ମୀଙ୍କେ ପରମେସର । ୩୦ \*ପରମେସର ଗଟେକ୍ସେ । ଜିଉଦି ଆରି ଜିଉଦିନଇଲା ଲକ୍ଷ୍ମୀଙ୍କେ ପାଇ ସମାନ । ସେମାନର୍ ବିସ୍ତ୍ରାସ ପାଇ ସେମାନଙ୍କେ ଦରମ୍ ଲକ୍ଷ୍ମୀ ଇସାବେ ବାଟସି । ୩୧ ଏଟାର ଅରଡ଼ କାଇଟା, ଏନ୍ତାରି ବିସ୍ତ୍ରାସ କରି ନିୟମ୍ ନସାଇଦେଉଁ କି ? ନାଇ, ଆମେ ଜଦି ଜିସୁକିରିସ୍ତ୍ରଙ୍କେ ବିସ୍ତ୍ରାସ କରୁବୁ ବଇଲେ, ନିୟମ୍ଙ୍କେ ମିସା ତାଟ୍ କରୁବୁ ।

### ୪

ବିସ୍ତ୍ରାସରଲାଗି ଅବ୍ରାଆମ୍ ଦରମ୍ ଅଇଲା

୧ ଆମର୍ ବାବା ଅବ୍ରାଆମର୍ ବିସଇନେଇ କାଇଟା ବଲି କଉଁ ? ସେ ଆମର୍ ଜିଉଦି ବସ୍ତର୍ ଆନିଦାଦି ରଇଲା । ସେ କେନ୍ତୁ ଦରମ୍ ବଲାଆ ଅଇଲା ? ୨ ଜଦି ଅବ୍ରାଆମ୍ ନିଜର୍ କରିରଇବା କାମେଅନି ସେ ପରମେସର ମୁଆଟେ ଦରମ୍ ଲକ୍ଷ୍ମୀ ବଲାଆ ଅଇତା, ସେ ବଡ଼ପନ୍ କାତା କଇପାରୁତା । ମାତର୍ ସେଟା ପରମେସର ମୁଆଟେ ଅଇ ନାପାରେ । ୩ \*ସାସ୍ତର୍ ଇସାବେ, “ଅବ୍ରାଆମ୍ ପରମେସରତେଇ ବିସ୍ତ୍ରାସ କଲା, ଆରି ଏ ବିସ୍ତ୍ରାସର ଲାଗି ପରମେସର ତାଙ୍କେ ଦରମ୍ ଲକ୍ଷ୍ମୀ ଇସାବେ ନିଜର୍ କଲା ।” ୪ ଜେ କାମ୍ କରୁସି ସେ ବୁଡି ପାଇସି ଆକା । କାର୍ଟାନେଅନି ଦାନ ଇସାବେ ନ ପାଏ । ୫ ମାତର୍ ଜେ ନିଜର୍ ଉପରେ ଆସା ନ କରି, ପରମେସରତେଇ ବିସ୍ତ୍ରାସ କରୁସି, ତାର ବିସ୍ତ୍ରାସର ଲାଗି, ଅପ୍ରାଦର୍ ଦସ୍ ନ ଦାରି ଚାଡିଦେବା ପରମେସର, ତାଙ୍କେ ଦରମ୍ ଲକ୍ଷ୍ମୀ ଇସାବେ ତାକ୍ସି । ୬ ଜନ୍ ଲକ୍ଷ୍ମୀ ରିଡିନିଡି ନ ଦେକି ପରମେସର ତାଙ୍କେ ଦରମ୍ ଲକ୍ଷ୍ମୀ ବଲି ତାକ୍ସି, ସେନ୍ତାରି ଲକ୍ଷ୍ମୀ ବିସଇନେଇ ଦାଉଦ୍ କଇଆଟେ,

୭ ଜାର୍ ଦସ୍ ଦଇଅଇଲା ଆଟେ ସେ କେଡେ କରମର୍ ଲକ୍ଷ୍ମୀ ।  
 ଜେ ପାପକେମା ପାଇଲାଆଟେ ସେ କେଡେ କରମର୍ ଲକ୍ଷ୍ମୀ ।

\* ୩:୩୦ ୩:୩୦ ଗାଲାତିୟ ୩:୨୦    \* ୪:୩ ୪:୩ ଗାଲାତିୟ ୩:୭

「ମାପୁରୁ ଜାନ୍ ପାପର ଇସାଏ ନ କରେ,  
ସେ କେତେ କରମର ଲକ୍ !

୯ ଇତି ଦାଉଦ୍ ଜନ୍ ଲକ୍ମାନଙ୍କେ କେତେ କରମର ଲକ୍ ବଲି କଇଲାଆତେ, ସେମନର୍ ବିତ୍ତରେ କାଇ ଅବକା ସୁନତ୍ ଅଇଲା ଲକ୍ସେ ରଇଲାଇ କି ? ନାଇ, ସୁନତ୍ ନ ଅଇଲା ଲକ୍ ମିସା କେତେ କରମର ଲକ୍ ଅଇପାରତ୍ । ଆମେ କଇଲୁନି ଅବରାଆମ୍ ବିସ୍ବାସ୍ କଲାକେସେ ଦରମ୍ ଲକ୍ ଇସାବେ ଏଜାଇଅଇଲା, ୧୦ ଏଟା କେତେବେଲେ ଗଟିରଇଲା ? ଅବରାଆମ୍ ସୁନତ୍ ଅଇଲା ପତେ କି, ତାର୍ ଆଗ୍ତୁ ? ଆଗ୍ତୁ, ପତେ ନାଇ । ୧୧ ସୁନତ୍ ଅଇବା ଆଗ୍ତୁ, ଅବରାଆମର ବିସ୍ବାସ୍ ଲାଗି ପରମେସର୍ ତାକେ ଦରମ୍ ଲକ୍ ଇସାବେ ତାକି ରଇଲା । ଏଟା ଜାନାଇବାକେ ଗଟେକ୍ ଚିନ୍ପାରା ଅବରାମ୍ ଏ ସୁନତ୍ବିଦି କରବାଟା ନାମି ରଇଲା । ଜେନ୍ତାରକି ଜନ୍ ଲକ୍ମାନ୍ ସୁନତ୍ ନ ଅଇକରି ମିସା, ବିସ୍ବାସ୍ କରବାଇ, ସେମନ୍ ଦରମ୍ଲକ୍ ବଲି ଏଜାଇ ଅଇବାଇ । ସେଟାର୍ପାଇ ଗାଗତ୍ ଇସାବେ ଅବରାଆମ୍ ସେମନର୍ ବାବା ବଲାଇଅଇସି, ୧୨ ଅବରାଆମ୍ ସୁନତ୍ ଅଇବା ଆଗ୍ତୁ ବିସ୍ବାସର୍ ଜନ୍ ଚିନ୍ ଦେଇରଇଲା, ଜଦି ସୁନତ୍ ନଇଲା ଲକ୍ମାନ୍ ନିଜର୍ ଜିବନେ ସେ ରକାମ୍ ବିସ୍ବାସ୍ ଦେକାଇ ପାରବାଇ ବଇଲେ, ଅବରାଆମ୍ ସେମନର୍ ମିସା ବାବା ।

ପରମେସର୍ ବିସ୍ବାସିମାନଙ୍କେ ଦେଇରଇବା କାତା

୧୩ \*ଅବରାଆମ୍ ନିୟମ୍ ମାନଲାର୍ ପାଇ ନାଇ, ଅବକା ବିସ୍ବାସ୍ କଲାର୍ପାଇ ସେ ଦରମ୍ ଲକ୍ ବଲି ଏଜାଇଅଇରଇଲା । ଆରି ସେଟାର୍ ପାଇ, ସେ ଆରି ତାର୍ କୁଟୁମର୍ ଲକ୍ମାନ୍ ଜଗତର୍ ଅଦିକାରି ଅଇବାଇ ବଲି ପରମେସର୍ କାତା ଦେଇରଇଲା । ୧୪ \*ଜନ୍ ଲକ୍ମାନ୍ ନିୟମ୍ ମାନବାଇ, ଅବକା ସେମନସେ ଜଦି ପରମେସରର୍ ଦାନ୍ ପାଇବାଇ, ତେବେ ଲକ୍ମାନର୍ ବିସ୍ବାସ୍ ରୁଟାଇ ଅଇସି । ପରମେସର୍ ଦେଇରଇବା କାତା ମିସା ରୁଟାଇସେ । ୧୫ ନିୟମ୍ ନ ମାନଲାର୍ପାଇ ଲକ୍ମାନ୍ ପରମେସରର୍ ବଡ଼ ରିସାଇ ପଡ଼ବାଇ । ମାତର୍ ଜନ୍ତ୍ର ନିୟମ୍ ନାଇ, ତେଇ ନିୟମ୍ ନ ମାନ୍ବା କାତା ଉଟେ ନାଇ ।

୧୬ \* “ସେଟାର୍ପାଇ ପରମେସର୍ କାତା ଦେଇରଇବାଟା ବିସ୍ବାସର୍ ଲାଗି ରଇସି । ଜନ୍ ଲକ୍ମାନ୍ ନିୟମ୍ ମାନବାଇ, ଅବକା ସେମନର୍ ପାଇସେ ପରମେସର୍ କାତା ଦେଏ ନାଇ । ଅବରାଆମର୍ ପାରା ବିସ୍ବାସ୍ କରତେ ରଇବା ସବୁର୍ ପାଇ ସେଟା ଲଡା । କାଇକେବଇଲେ ଅବରାମ୍ ସେମନର୍ ଆଡ଼ମା ଇସାବେ ରଇବା ବାବା ।” ୧୭ ଏ ବିସଇ ସାସ୍ତରେ ଲେକାଆତେ “ତକେ ଆମେ ସବୁ ବୈସର୍ ବାବା କରିଆତୁ ।” ପରମେସରର୍ ଇସାବେ ଏ କାତା ଦେଲାଟା ଟିକ୍ ରଇଲା, କାଇକେ ବଇଲେ ଜନ୍ ପରମେସର୍କେ ଅବରାଆମ୍ ବିସ୍ବାସ୍ କରତେ ରଇଲା, ସେ ପରମେସରର୍ ବାକିଅ ମଲା ଲକ୍ମାନଙ୍କେ ଜିବନ୍ କରସି ଆରି କାଇଟା ନଇଲାତେଇଅନି ସବୁ ବିସଇ ତିଆର୍ କରସି । ୧୮ ଆସା କରବାକେ କାଇଟା ନ ରଇଲେ ମିସା, ଅବରାଆମ୍ ବିସ୍ବାସ୍ କରି ଆସାଅଇ ରଇଲା । ସେଟାର୍ ପାଇ ସେ ସବୁ ବୈସର୍ ବାବା ଅଇଲା, କାଇକେ ବଇଲେ ସେ ସାସ୍ତରେଅନି କାତା ମିଲାଇରଇଲା, “ ତାର୍ କୁଟୁମର୍ ଲକ୍ମାନ୍ ଏଜି ନାପାର୍ବା ଆକାସର୍ ତାରାପାରା ଅଇବାଇ । ” ୧୯ ତାକେ ସେଡ଼କିବେଲେ ସଏ ବରସ୍ ଅଇରଇଲା । ମାତର୍ ତାକର୍ ମଲାପାରା ଗାଗତର୍ କାତା ବାବି, କି ସାରା ଜେକି ଆରି ପିଲା ପାଇ ନାପାରେ, ଏ କାତା ଜାନିକରି ମିସା, ତାକର୍ ବିସ୍ବାସ୍ ଉନା ଅଏନାଇ । ୨୦ ସେ ତାର୍ ବିସ୍ବାସେଅନି ବିନେ ବେଗ୍ଲେ ନାଇ, କି ପରମେସର୍ ଦେଇରଇବା କାତା ଅଇସି କି ନଏ ବଲି କଏନାଇ । ସେ ବିସ୍ବାସ୍ କରି ବପୁ ସଙ୍ଗ୍ ପୁରାପୁରନ୍ ଅଇଲା ଆରି ସେ ପରମେସର୍କେ ତାକ୍ପୁଟା କଲା । ୨୧ “ପରମେସର୍

\* ୪:୧୩ ୪:୧୩ ଗାଲାତିୟ ୩:୨୯    ✪ ୪:୧୪ ୪:୧୪ ଗାଲାତିୟ ୩:୧୮    ✪ ୪:୧୬ ୪:୧୬ ଗାଲାତିୟ ୩:୭

ଜନ୍ କାତା ଦେଇରଇଲା, ସେଟା ସେ କରସି ଆକା ବଲି ତାଟସଙ୍ଗ ବିସ୍‌ବାସ୍ କଲା ।” ୨୨ ସେ ବିସ୍‌ବାସର୍ ଲାଗି ଅବ୍ରାହାମ୍ ପରମେସର୍ ଦେକ୍‌ବା ଇସାବେ ଦରମ୍ ଲକ୍ ବଲି ଏଜାଇଅଇଲା । ୨୩ ଦରମ୍ ଲକ୍ ଇସାବେ ଏଜାଇଅଇବାଟା ସାସ୍‌ତରର୍ କାତା, ଉଜେ ଅବ୍ରାମ୍‌କେସେ ଅଇସି, ସେନ୍ତାରି ନାଇ । ୨୪ ସେଟା ଆମର୍‌ପାଇ ମିସା ଲେକାଅଇଆଟେ । ଆମେ ମିସା ପରମେସର୍‌କେ ବିସ୍‌ବାସ୍ କଲେ ଦରମ୍ ଲକ୍ ବଲି ଏଜାଇଅଇବୁ । ସେ ମାପରୁ ଜିସୁକେ ମଲାତେଇଅନି ଆରି ତରେକ୍ ଜିବନ୍ କରି ଉଟାଇଲା ଆଟେ ବଲି ବିସ୍‌ବାସ୍ କଲୁନି । ୨୫ ମାପରୁ ଜିସୁ ଆମର୍ ପାପର୍ ଲାଗି ମରିରଇଲା ଆରି ପରମେସର୍‌ତେଇ ଆମ୍‌କେ ଦରମ୍ ଲକ୍ କରାଇବାକେ ଆରି ତରେକ୍ ଜିବନ୍ ଅଇ ଉଟ୍‌ଲା ।



ପରମେସର୍ ସଙ୍ଗ ମିସିବିଡିରଇବାଟା

୧ ଏବେ ଆମେ ବିସ୍‌ବାସ୍ କଲାଟି ପାଇ ପରମେସର୍ ଦେକ୍‌ବା ଇସାବେ ଦରମ୍ ଲକ୍ ବଲାଇଅଇଲୁ ଆରୁ ଆରି ମାପରୁ ଜିସୁ କିରିସ୍‌ଟର୍ ଲାଗି ପରମେସର୍ ସଙ୍ଗ ସାନ୍ତି ସଙ୍ଗ ଆରୁ । ୨ କାଇକେବଇଲେ ଆମେ ବିସ୍‌ବାସ୍ କଲାଟି ପାଇସେ ତାର୍ ଜିବନ୍ ଦୁକାଇଲାଟାନେ ଆମ୍‌କେ ଆନି ଆଟେ । ଜନ୍‌ତେଇ କି ଏବେ ଆମେ ଆରୁ । ଆମେ ବେସି ସାର୍‌ଦା ସଙ୍ଗ ବଡ଼ପନର୍ କାତା କଇବୁ । କାଇକେବଇଲେ ପରମେସର୍‌ତ୍ ତାକ୍‌ପୁଟାଟେଇ ମିସ୍‌ବୁ ବଲି ଆମ୍‌କେ ଆସା ଆଟେ । ୩ ସବୁ ରକାମର୍ ଦୁକ୍ କସ୍‌ଟ ମୁରଟି କରି ସାର୍‌ଦା ଅଇଲୁନି, କାଇକେବଇଲେ ତେରେପେତେ ନ ଅଇ କସ୍‌ଟ ମୁରଟିଲେ, ମନେ ସାଆସ୍ ଆଇସି । ୪ ସାଆସ୍ ଦାରି ରଇଲେ ପରମେସର୍ ସାର୍‌ଦା ଅଇସି । ତାର୍ ସାର୍‌ଦାଅନି ଆସା ଆଇସି । ୫ ଏ ଆସା ଆମ୍‌କେ ମୁର୍‌ମୁରା ଅଇବାକେ ନ ଦେଏ, କାଇକେ ବଇଲେ ପରମେସର୍ ଆମ୍‌କେ ସୁକଲ୍‌ଆଡ଼ମା ଦେଇ କରି ଆମର୍ ମନେ ତାର୍ ଆଲାଦ୍ ବର୍‌ଡି କରିଦେଲାଆଟେ । ସୁକଲ୍‌ଆଡ଼ମା ଆମର୍ ପାଇ ରଇବା ପର୍‌ମେସର୍‌ତ୍ ଦାନ୍ ।

୬ ଆମ୍‌କେ କେ ମିସା ଆକାସାକା ନ ରଇଲା ବେଲେ, ପରମେସର୍ ଟିକ୍ କଲା ବେଲାଇ କିରିସ୍‌ଟ ପାପିମନର୍ ପାଇ ମଲା । ୭ ଦରମ୍ ଲକ୍‌ଟ୍ ପାଇ କେ ମିସା ଗଟେକ୍ ଲକ୍ ମର୍‌ବାଟା ଆମେ ନାଜାନୁ, ମାତର୍ ଏନ୍ତାରି ମିସା ଅଇସି ଜେ, ଗଟେକ୍ ନିମାନ୍ ଲକ୍‌ପାଇ ନିଜର୍ ଜିବନ୍ ଦେବାକେ କେ ଆଲେ ସାସ୍ କର୍‌ବାଇ । ୮ ମାତର୍ ଆମେ ପାପି ରଇଲାବେଲେ ଜିସୁ ଆମର୍ ପାଇ ନିଜର୍ ଜିବନ୍ ସର୍‌ପିଦେଲା । ଇତିଅନି ପରମେସର୍ ଆମ୍‌କେ କେତେକ୍ ଆଲାଦ୍ କଲାନ୍, ସେଟା ଜାନାପତିଆଟେ । ୯ କିରିସ୍‌ଟର୍ ବନିରୁଲାଗି ପରମେସର୍ ଆମ୍‌କେ ଦରମ୍ ଲକ୍ କଲାଆଟେ । ସେନ୍ତି ଆଲେ ପରମେସର୍‌ତ୍ ବଡ଼ ରିସାଇଅନି ଆମ୍‌କେ ରକିଆ କର୍‌ବାକେ କିରିସ୍‌ଟ କେତେକ୍ ମନ୍‌ଦିଆନ୍ ନ ଦେଏ ! ୧୦ ଆମେ ପରମେସର୍‌ତ୍ ସତ୍‌ରୁ ରଇଲାବେଲେ ତାର୍ ପିଲା ଆମର୍ ପାଇ ଜିବନ୍ ଦେଲା । ତେଇଅନି ପରମେସର୍ ସଙ୍ଗ ଆମେ ଆରିତରେକ୍ ଜଡିଅଇଲୁ । ତାର୍ ସଙ୍ଗ ଆରିତରେକ୍ ଜଡିଅଇଲା ପଟେ, ଏବେ କିରିସ୍‌ଟର୍ ଜିବନ୍‌ର୍ ଲାଗି ଆମେ ରକିଆ ପାଇବାକେ କେତେକ୍ ଅଦିକ୍ ନ ପାଉ ? ୧୧ ଅବକା ସେଡ଼କିସେ ନଏ, ମାପରୁ ଜିସୁକିରିସ୍‌ଟର୍ ତେଇଅନି ପରମେସର୍ ଜନ୍ ସବୁ କାମ୍ କଲାଆଟେ, ସେଟାଟ୍ ପାଇ ଆମର୍ ମନ୍ ଉଡୁକ୍‌ଦୁଡୁକ୍ ଆରି ସାର୍‌ଦାଇ ପୁରୁନ୍ ଅଇଆଟେ । ସେ ଜିସୁ ପରମେସର୍ ସଙ୍ଗ ଆମ୍‌କେ ଆରିତରେକ୍ ମିସାଇଲା ଆଟେ ।

ଆଦମ୍ ଆରି କିରିସ୍‌ଟ

୧୨ ପର୍‌ତମେ ଗଟେକ୍ ଲକ୍‌ସେ ପାପ୍ କରିରଇଲା । ଆରି ପାପର୍ ଲାଗି ମରନ୍ ଅଇଲା । ସବୁ ଲକ୍ ପାପ୍ କଲାଟ୍ ପାଇ ମରନ୍ ସବୁ ମୁନ୍‌ସ୍ ଜାତିକେ ଡାବିଅଇଲା

। ୧୩ ନିୟମ୍ ମିଲ୍‌ବା ଆଗତୁ ଲକ୍‌ମନ୍ ପାପ୍ କରତେରଇଲା । ମାତର୍ ନିୟମ୍ ନ ରଇବାଟାନେ ପାପର୍ ଇସାବ୍ ନ ଅଇତେରଇଲା । ୧୪ ଆଦମର୍ ବେଲାଅନି ମସାର୍ ବେଲା ଜାକ, କେ ଆଦମର୍ ପାରା କାତା ନ ମାନି, ସେ କରି ରଇବା ପାପ୍ ପାରା ନ କରିରଇଲେ ମିସା, ସବୁ ଲକ୍ ମଲା । ଜେ ଆଇବାର୍ ରଇଲା, ସେ ଆଦମର୍ ଗଟେକ୍ ରୁପ୍ । ୧୫ ମାତର୍ ପରମେସର୍ ଇସାବ୍ ନଇଲା ଦାନ୍ ଆରି ଆଦମର୍ ପାପ୍ ବିତ୍‌ରେ କେତେକ୍ କେତେକ୍ ଦୁର୍ ଆଟେ । ଗଟେକ୍ ଲକର୍ ପାପର୍ ପାଇ ବେସି ଲକର୍ ମରନ୍ ଅଇଲା । ମାତର୍ ପରମେସର୍ ତାର୍ ଜିବନ୍‌ଦୁକାଇଲାକେ, ଲକ୍‌ମନ୍‌ର୍ ପାଇ ଆରି ଗଟେକ୍ ଲକ୍‌କେ ଇନାମେ ଦେଲା । ସେ ବଡ଼ ଇନାମ୍ ଜିସୁ କିରିସ୍‌ଟର୍ ଜିବନ୍‌ ଦୁକାଇଲାକେ ପୁରାପୁରନ୍ ଅଇଲା । ୧୬ ସେ ଗଟେକ୍ ପାପ୍ କାମ୍ ଅଇଲା ପଟେ ସବୁ ମୁନୁସ୍ ଜାତି ବିତାର୍‌ନା ଜାଗାଇ ଟିଆଅଇ ଦସି ବଲାଅଇ ଅଇଲା । ମାତର୍ ଏବେ ଜବର୍ ଲକର୍ ପାପର୍ ଲାଗି ଲକ୍‌ମନ୍‌ର୍ ଆସା ନ ରଇଲେ ମିସା, ପରମେସର୍ ଦାନ୍ କଲାକେ ଦସି ନାଇ ବଲି ଏଜାଇଅଇଲା । ୧୭ ଏଲେମିସା ଗଟେକ୍ ମୁନୁସର୍ ପାପର୍ ପାଇ ସବୁ ଲକ୍‌କେ ମରନ୍‌ର୍ ଡଣ୍ଟୁ ଆଇଲା । ମାତର୍ ସେ ଗଟେକ୍ ମୁନୁସ୍ ଜନ୍‌ଟାକି କିରିସ୍‌ଟ, ଜାଇଟା କଲାଆଟେ ସେଟା କେତେକ୍ ବଡ଼ ବିସଇ ! ଜେତେକ୍ ଲକ୍ ପରମେସର୍ ବଡ଼ ଜିବନ୍‌ଦୁକାଇଲାଟା ଜବର୍ ଅଇତେ ଇନାମେ ମିଲାଇଆତଡ଼, ସେମନ୍ ଜିସୁକିରିସ୍‌ଟର୍ ବାଟେଅନି ସବୁ ଲକ୍ ତାର୍‌ଟାନେ ଦରମ୍ ବଲାଅ ଅଇବାଇ । ସେମନ୍ କିରିସ୍‌ଟର୍ ସଙ୍ଗ୍ ଜିତି କରି ଜିଉନା କାଉନା କରି ସାସନ୍ କର୍‌ବାଇ ।

୧୮ ଗଟେକ୍ ଲକର୍ ପାପ୍ ଜେନ୍ତି ଗୁଲାଅ ଲକ୍‌କେ ଡଣ୍ଟୁ ଆନାଇଲା, ସେନ୍ତିସେ ଗଟେକ୍ ଲକର୍ ଦରମ୍ ଗୁଲାଅ ଲକ୍‌ର୍‌ପାଇ ମୁକ୍ତି ଆରି ନ ସାର୍‌ବା ଜିବନ୍ ଆନିଦେଲାଆଟେ । ୧୯ ଗଟେକ୍ ଲକ୍ ଆଦେସ୍ ନ ମାନ୍‌ଲାର୍ ପାଇ ଜେନ୍ତିକି ସବୁ ଲକ୍ ପାପି ଅଇଲା, ସେନ୍ତି ଗଟେକ୍ ଲକ୍ ଆଦେସ୍ ମାନ୍‌ଲେ ପରମେସର୍ ମୁଆଟେ ଦରମ୍ ଲକ୍ ବଲାଅଅଇବାଇ ।

୨୦ ନିୟମ୍ ଚାଲ୍‌ଲାର୍ ପାଇ କାରାପ୍ କାମ୍ ବଡ଼ଲା । ମାତର୍ ପାପ୍ ବଡ଼ି ବଡ଼ି ଗାଲାକେ ପରମେସର୍ ଜିବନ୍‌ଦୁକାନି ମିସା ବେସି ବଡ଼ଲା । ୨୧ ପାପ୍ ଜେନ୍ତିକି ସବୁର୍‌ପାଇ ମରନ୍‌ର୍ ଡଣ୍ଟୁ ଆନିରଇଲା, ସେନ୍ତି ପରମେସର୍ ଜିବନ୍‌ଦୁକାନି ମାପୁର୍ ଜିସୁ କିରିସ୍‌ଟର୍ ସାଇଜେ ଅନି ଆମ୍‌କେ ଦରମ୍ ବାଟେ ଡାକିନେଇ ନ ସାର୍‌ବା ଜିବନ୍ ଦେଇସି ।



ପାପର୍‌ଲାଗି ମରନ୍, ମାତର୍ କିରିସ୍‌ଟ ସଙ୍ଗ୍ ମିସ୍‌ଲାର୍‌ପାଇ ନ ସାର୍‌ବା ଜିବନ୍ ୧ ସେନ୍ତିଆଲେ କାଇଟା କର୍‌ ? ପରମେସର୍ ଜିବନ୍‌ଦୁକାନି ଆରି ଅଦିକ୍ ମିଲ୍‌ସି ବଲି ଆମେ କାଇ ଆରି ସେ ପାପେ ରଇକରି ଚଲାଟଲ୍‌ତି କରୁ କି ? ୨ ନାଇ କେବେ ନାଇ । ପାପ୍ କର୍‌ବା ବିସଇତେଇ ଆମେ ମରିଗାଲୁଆରୁ । ଆରି କେନ୍ତି ପାପ୍ କରତେସେ ରଇବୁ ? ୩ ତମେ ଜାନାସ୍, ତୁବନ୍ ନେଲାକେ ଜିସୁକିରିସ୍‌ଟର୍ ସଙ୍ଗ୍ ମିସିକରି ଆମେ ତାର୍ ମରନେ ମିସା ମିସିଆରୁ । ୪ \*ସେଟାର୍‌ପାଇ ତୁବନ୍ ନେଲାପଟେ ଆମେ ତାର୍ ମରନେ ମିସି, ତାର୍ ସଙ୍ଗ୍ ତପି ଅଇଲୁଆରୁ । ସେ ଜେନ୍ତାରି ବାବାର୍ ଡାକ୍‌ପୁଟା ବପୁ ସଙ୍ଗ୍ ଆରିତରେକ୍ ଉଟ୍‌ଲା, ଆମେ ମିସା ସେନ୍ତାରି ନୁଆ ଜିବନ୍ ପାଇକରି ଚଲାଟଲ୍‌ତି କର୍‌ବାର୍ ଆଟେ ।

୫ କାଇକେବଇଲେ ଆମେ ମରନେ ମିସି ତାର୍ ସଙ୍ଗ୍ ଗଟେକ୍ ଅଇଲୁ ଆରୁ, ତାକେ ଆରିତରେକ୍ ଉଟ୍‌ବାଟେଇ ମିସା, ତାର୍ ସଙ୍ଗ୍ ଗଟେକ୍ ଅଇକରି ରଇବୁ । ୬ ଆମେ ଜାନିଆରୁ, କିରିସ୍‌ଟର୍ ସଙ୍ଗ୍ କୁର୍‌ସେ ଆମର୍ ପୁରନା ଜିବନ୍ ମରିଗାଲାଆଟେ । ତେଇଅନି ଆମର୍ ପାପର୍ ଚଲାଟଲ୍‌ତି କୁର୍‌ପୁନାସ୍ ଅଇଲା ଆଟେ ଆରି ଆମେ

\* ୨:୪ ୨:୪ ରମିୟ ୨:୧୨

ପାପର ଗତିଅନି ମୁକ୍ତିଆରୁ ।<sup>୭</sup> କାଇକେବଇଲେ ମୁନୁସ୍ ମରିଗାଲେସେ, ପାପର ବାନ୍ଦନେଅନି ରକ୍ତିଆ ପାଇସି ।<sup>୮</sup> ଆମେ ଜିସୁର ସଙ୍ଗ୍ ମରିରଇଲାର୍ ପାଇ, ତାର୍ ସଙ୍ଗ୍ ମିସା ଜିବନ୍ ଅଇବୁ ବଲି ବିସ୍ବାସ୍ କଲୁନି ।<sup>୯</sup> ଆମେ ଜାନୁ, କିରିସ୍ତ ମଲାତେଇଅନି ଉଟ୍ଲାର୍ପାଇ, ସେ ଆରି କେବେ ମିସା ନ ମରେ । ତାର୍ ଉପରେ ଆରି କେବେ ମରନ୍ ସାସନ୍ ନ ଚାଲେ ।<sup>୧୦</sup> ସେ ଜନ୍ ମରନ୍ ପାଇଲା, ତାର୍ଲାଗି ପାପର ବପୁତେଇଅନି ଏକାତରେକ୍ ଆମ୍ବକେ ମୁକ୍ତିଲାଲଲା । ସେ ଏବେ ଜନ୍ ଜିବନେ ଜିଇଲାନି, ସେଟା ପରମେସର୍ ସଙ୍ଗ୍ ମିସିକରି ରଇଲା ଜିବନ୍ ।<sup>୧୧</sup> ସେନ୍ତାରି ତମେ ମିସା ପାପେ ମରିଜାଇଆରୁ ବଲି ଏତାଆ । ତମେ ଏବେ କିରିସ୍ତ ଜିସୁର ଜିବନେଅନି ପରମେସର୍ ସଙ୍ଗ୍ ମିସିଲାସ୍ ।

<sup>୧୨</sup> ତମର ନସିଜିବା ଗାଗଡ୍ ଉପରେ ଆରି ପାପ୍ ଅଦିକାର୍ ନ କର, ସେଟାର୍ପାଇ ଆମର୍ ଏ ଗାଗଡ୍ ମନ୍କରବା କାରାପ୍ ବିସଇ ମାନିକରି ରୁଆନାଇ ।<sup>୧୩</sup> କାରାପ୍ କାମର୍ ଲାଗି ଆମର୍ ଗାଗଡ୍ କଣ୍ଟେକ୍ ବାଗ୍ ମିସା ପାପ୍ କରବାକେ ଦିଆସ୍ନାଇ । ମାତର୍ ଦରମ୍ କାମ୍ କରବାପାଇ ତମର୍ ଗୁଲାଇ ଗାଗଡ୍ ତାକେ ସର୍ପି ଦିଆସ୍ । ପରମେସର୍ ତମ୍ବକେ ମରନେଅନି ଜିବନ୍ କରି ଆନ୍ଲାଆତେ ।<sup>୧୪</sup> କାଇକେ ବଇଲେ ପାପ୍ ତମର୍ ଉପରେ ସାସନ୍ ନ କର । ତମେ ଆରି ନିୟମର୍ ତଲେ ନାଇ । ମାତର୍ ପରମେସର୍ ଜିବନ୍ଦୁକାନି ଅନି କାଇଟା ନ ଅଇତେ ଆଚାସ୍ ।

### ଦରମ୍ ଗତିଦାଙ୍ଗ୍ଡା

<sup>୧୫</sup> ସେନ୍ତିଆଲେ ଆମେ ନିୟମର୍ ତଲେ ନ ରଇ, ପରମେସର୍ ଜିବନ୍ଦୁକାନି ପାଇଲୁ ଆରୁ ବଲି ପାପ୍ କରତେ ରଉଁ କି ? ନାଇ, କେବେ ମିସା ନଏଁ ।<sup>୧୬</sup> ଏଲେ ମିସା ତମେ ଜାନିଆଚାସ୍, ଜଦି ତମେ କାକେ ତର୍ ତଲେ ଆକା ମୁଇ ବଲି କଇକରି ତାର୍ ପୁରାପୁରୁନ୍ କାତାମାନ୍ସା ବଇଲେ, ତମେ ତାର୍ ଗେନ୍ଲା ଗତିଦାଙ୍ଗ୍ଡା । ଜଦି ପାପର ଗତିଦାଙ୍ଗ୍ଡା ଅଇସା, ଏଟାର୍ ଦସା ଅଇସି ମରନ୍, ଜଦି ଦରମର୍ ବାଟେ ଇଣ୍ଡସା, ବଇଲେ ନ ସାର୍ବା ଜିବନ୍ ପାଇସା ।<sup>୧୭</sup> ମୁଇ ପରମେସର୍କେ ଦନିଅବାଦ୍ କଲିନି, ତମେ ଗଟେକ୍ ବେଲାଇ ପାପର ଗତିଦାଙ୍ଗ୍ଡା ଅଇରଇଲାସ୍ ମିସା, ଏବେ ଜନ୍ ସିକିଆ ଟାନେ ପାଇରଇବା ସଡ୍, ପୁରାପୁରୁନ୍ ମନ୍ଦେଇକରି ନାମ୍ଲାସ୍ନି ।<sup>୧୮</sup> ଏବେ ତମେ ପାପେଅନି ମୁକ୍ତିକରି ଦରମର୍ ଗତିଦାଙ୍ଗ୍ଡା ଅଇଆଚାସ୍ ।<sup>୧୯</sup> ଗଟେକ୍ ବେଲାଇ ତମେ ତମର୍ ଗୁଲାଇ ଗାଗଡ୍, ମନ୍, ପରାନ୍, ଅସୁକଲ୍ ଆରି କାରାପ୍ ଚଲାଚଲ୍ଡି କରବାକେ ଗତିଦାଙ୍ଗ୍ଡା ଅଇ ସର୍ପି ଦେଇରଇଲାସ୍ । ସେନ୍ତାରିସେ ସୁକଲ୍ ଆରି ଦରମ୍ ଚଲାଚଲ୍ଡିପାଇ ଦରମର୍ ଲଗେ ନିଜ୍ଜକେ ପୁରାପୁରୁନ୍ ସର୍ପିଦିଆସ୍ ।

<sup>୨୦</sup> ତମେ ପାପର ଗତିଦାଙ୍ଗ୍ଡା ରଇଲାବେଲେ, ଦରମ୍ ଜିବନ୍ ଜିଇବାକେ ମୁର୍ମୁରା ଅଇରଇଲାସ୍ ।<sup>୨୧</sup> ଏବେ ତମକେ ଜନ୍ କାମ୍ମନ୍ କରବାକେ ଲାଜ୍ଲାଗ୍ଲାନି, ସେଡ୍କିବେଲେ ସେ ସବୁ କରତେ ରଇଲାସ୍ । ତେଇଅନି ତମକେ କାଇ ଲାବ୍ ଅଇଲା ? ସେ ସବୁ କାମର୍ ଦସା ଅଇଲାନି ମରନ୍ ।<sup>୨୨</sup> ମାତର୍ ତମେ ଏବେ ପାପେଅନି ମୁକ୍ତିକରି ପରମେସର୍ ଗତିଦାଙ୍ଗ୍ଡା ଅଇଆଚାସ୍ । ଏଟାର୍ ଲାବ୍ ଅଇଲାନି, ପରମେସର୍ତେଇ ପୁରାପୁରୁନ୍ ସଲଦ୍ । ଆରି ଇତିଅନି ମିଲ୍ବାଟା ଅଇଲାନି ନ ସାର୍ବା ଜିବନ୍ ।<sup>୨୩</sup> ପାପ୍ କାମର୍ ବୁଡି ଅଇଲାନି ମରନ୍, ମାତର୍ ପରମେସର୍ ଜାଗାଇକରି ଦାନ୍ ଦେଇଆତେ । ସେଟା ଆମର୍ ମାପରୁ ଜିସୁ କିରିସ୍ତର୍ ସଙ୍ଗ୍ ମିସିକରି ମିଲାଇରଇବା ନ ସାର୍ବା ଜିବନ୍ ।



୧ ଏ ବାଇବଇନିମନ୍, ଏବେ ମୁଇ ଜାଇଟା କଇବାକେ ଗାଲିନି, ସେଟା ଅଇଲାନି ନିୟମ୍ । ନିୟମ୍ କାଇଟା ବଲି ତମେ ବୁଜିପାରାସ୍, ତାର୍ ଅରଡ୍ ମିସା ଜାନାସ୍ । ମୁନୁସ୍ ଅବ୍‌କା ତାର୍ ଜିଇବା କାଇବା ଦିନ୍ ଜାକ ନିୟମର୍ ତଲେ ରଇସି । ୨ ବିବା ଅଇବା ବିସଇ ଦେକ୍‌ଲେ, ମୁନୁସ୍ ବଠି ରଇବା ଜାକ, ତାର୍ ମାଇଜି ସଙ୍ଗ୍ ବିବା ବାନ୍ଦନେ ବାନ୍ଦିଅଇରଇସି । ମାତର୍ ମୁନୁସ୍ ମରିଗାଲା ପତେ ତାର୍ ମାଇଜି ଏ ନିୟମେଅନି ମୁକଲ୍‌ସି । ୩ ସେ ବଠି ରଇଲା ବେଲେ, ତାର୍ ମାଇଜି ଜଦି ବିନ୍ ମୁନୁସ୍‌କେ ବିବା ଅଇସି, ତେବେ ତାକେ ଚାଡ଼ରି ବଲି କଇବାଇ, ମାତର୍ ମୁନୁସର୍ ମରନ୍ ପତେ ବିନ୍ ମୁନୁସ୍‌କେ ବିବା ଅଇଲେ, ତାକେ ଆରି ଚାଡ଼ରି ବଲି ନ କଅଡ୍ । ନିୟମ୍ ଇସାବେ ସେ ଗଟେକ୍ ମୁକଲି ରଇବା ମାଇଜି । ୪ ଏ ମର୍ ବାଇବଇନିମନ୍, ତମେ ମିସା ସମାନ୍ ସେନ୍ତାରିସେ । ନିୟମ୍ ଇସାବେ କିରିସ୍‌ଟର୍ ଗାଗ୍‌ତେ ମିସଲାର୍‌ପାଇ ତମେମିସା ମରିଆଟାସ୍ । ଏବେ ତମେ ତାର୍‌ଟା । ପର୍‌ମେସର୍ ତାକେ ମରନେଅନି ଉଟାଇଆଟେ । ଜେନ୍ତାରିକି ତାର୍ ସେବାକାମେ ଆମେ ମିସା ମିସ୍‌ବୁ । ୫ ଜେତେଦିନ୍ ଜାକ ଆମେ ଗାଗଡ୍ ମନ୍ କଲା ଇସାବେ ବାନ୍ଦିଅଇରଇଲୁ, ନିୟମ୍ ଆମ୍‌କେ ନାଇ ବଲି କଇତେରଇଲା । ସେଟା ଆମର୍ ପାପ୍ ଅଦିକ୍ ଅଦିକ୍ କରାଇତେ ରଇଲା । ଆରି ଆମେ ମରନ୍ ବାଟେ ଜାଇତେରଇଲୁ । ୬ ଏବେ ଆମେ ନିୟମର୍ ସାସନେଅନି ମୁକଲ୍‌ଲୁ ଆତୁ, କାଇକେବଇଲେ ଜନ୍‌ଟା ଆମ୍‌କେ ଦିନେକ୍ ବନ୍ଦି କରି ସଙ୍ଗାଇରଇଲା, ସେଟା ଆମର୍ ବିଡ଼ରେ ମରିଗାଲାଆଟେ । ଆମେ ଆରି ଆଗତୁର୍ ପାରା ଲେକାଅଇଲା ନିୟମ୍ ଇସାବେ ପର୍‌ମେସର୍‌କେ ସେବାକରୁ ନାଇ । ଏବେ ସୁକଲ୍ ଆଡ଼ମା ଦେକାଇଲା ବାଟେ ଇଣ୍ଟୁନି ।

**ନିୟମ୍ ଆରି ପାପ୍**

୭ ତେବେ ଆମେ କାଇଟା ବଲି କଉଁ, ନିୟମେସେ ପାପ୍ ଆଟେ କି ? ସେଟା ସତଇସେ ନଏଁ । ମାତର୍ ପାପ୍ କାଇଟା ? ସେଟା, ମକେ ନିୟମ୍ ଜାନାଇଦେଲା ଆଟେ । “ବିନ୍ ଲକର୍ ଦିନ୍‌ସୁ ଲବାଇବାର୍ ନାଇ ।” ଏ ଆଦେସ୍ ଜଦି ନିୟମ୍‌ତେଇ ନ ରଇତା, ଲବାଇବାଟା କାଇଟା ବଲି ମୁଇ ନାଜାନ୍‌ତି । ୮ ମାତର୍ ଉପ୍‌ରର୍ ଆଦେସର୍ ସୁବିଦାନେଇ ପାପ୍ ମର୍ ବିଡ଼ରେ ବିନ୍‌ବିନ୍ ରକାମର୍ କାରାପ୍ ମନ୍ କର୍‌ବାଟା ଜନ୍‌ମାଇଲା । ନିୟମ୍‌କେ ଚାଡ଼ିଦେଲେ ପାପ୍ ମଲା ସମାନ୍ ଆଟେ । ୯ ଗଟେକ୍ ବେଲାଇ, ମୁଇ ନିୟମ୍ ନାଜାନି କରି ଜିଇତେ ରଇଲି, ନିୟମ୍ ଜାନ୍‌ଲା ପତେ ପାପ୍ ପୁରଲା, ୧୦ ଆରି ମୁଇ ମରିଗାଲି । ଜନ୍ ନିୟମ୍ ଜିବନ୍ ଦେବାକେ ଟିକ୍ କରିରଇଲା, ସେଟା ମର୍ ପାଇ ମରନ୍ ଆନ୍‌ଲା । ୧୧ କାଇକେବଇଲେ ନିୟମର୍ ସୁବିଦା ନେଇ ମକେ ପାପ୍ ନାତାଇଲା ଆରି ମରାଇଲା ।

୧୨ ନିୟମ୍ ପର୍‌ମେସର୍‌ଟାମେଅନି ଆଇଲାକେ ସୁକଲ୍ ଆଟେ । ତାର୍ ଆଦେସ୍ ସବୁ ସୁକଲ୍, ଟିକ୍ ଆରି ବେସି ନିକ । ୧୩ ସେନ୍ତିଆଲେ ଜନ୍‌ଟା ନିକ, ସେଟା କାଇକେ ମର୍ ମରନ୍ ଆନ୍‌ବାଟା ଅଇରଇଲା ? ସେନ୍ତାରି କେବେ ନ ଅ । ମାତର୍ ପାପ୍ ମରନ୍ ଅଇଲା । ତାର୍ ନିୟମ୍, ଜେନ୍ତିକି ଆମର୍ ପାପ୍ କେତେକ୍ କାରାପ୍ ଆଟେବଲି ଡିସାଇବାକେ ପର୍‌ମେସର୍‌ ଜଜ୍‌ନା ରଇଲା । ତେବର୍‌ପାଇ ତାର୍ ନିୟମ୍‌ରଲାଗି ଏଟା ସାଦନ୍ କଲା ।

**ମୁନୁସର୍ ମନେ ଦୁଇମନିଆ**

୧୪ ଆମେ ଜାନ୍ତୁ ଜେ, ନିୟମ୍ ଆଡ଼ମାଇ ଆଇସି, ମାତର୍ ମୁଇ ମର୍ ଗାଗଡ୍ ମନ୍ କଲାଟାକେ ମାନ୍‌ଲାର୍‌ପାଇ ପାପ୍ ଗଡ଼ିଦାଙ୍ଗ୍‌ଡା ଅଇଲିଆଟି । ୧୫ ମୁଇ ଜନ୍‌ଟା କଲିନି, ସେଟା ବୁଜି ନାଇ, ମାତର୍ ଜନ୍ ନିକ କାମ୍ କର୍‌ବାକେ ମନ୍ କଲିନି ସେଟାସେ

☆ ୭:୧୫ ୭:୧୫ ଗାଲାତିୟ ୫:୧୭



କରିନାପାରୁଲିନି । ଆରି ଜନ୍ କାରାପ୍ କାମ୍ କରବାକେ ମୁଇ ମୁଲକେ ମନ୍ କରି ନାଇ, ସେଟାସେ କଲିନି ।<sup>୧୭</sup> ମାତର୍ ମୁଇ ମନ୍ ନ କରି ରଇବା କାମ୍ କରବାର ଲାଗି, ନିୟମ୍ ଟିକ୍ ଆଟେ ବଲି ମାନଲିନି ।<sup>୧୮</sup> ସେଟାର ପାଇ ଏ ସବୁ ଜାକ କାମ୍ ମୁଇ କରି ନାଇ । ମର୍ ବିତ୍ରେ ରଇବା ପାପ୍ସେ ସେଟା କଲାନି ।<sup>୧୯</sup> ମର୍ ଗାଗଡର୍ କାରାପ୍ ମନ୍ କରବାଟାନେଅନି କାଇମିସା ନିମାନ୍ ବିସଇ ନ ଆସେ ବଲି ମୁଇ ଜାନଲିନି । କାଇକେବଇଲେ ନିକ କାମ୍ କରବାକେ ମନ୍ ରଇଲେ ମିସା ସେଟା କରି ନାପାରୁଲିନି ।<sup>୨୦</sup> ସେଟାର ପାଇ ଜନ୍ ନିକ କାମ୍ କରବାକେ ମୁଇ ମନ୍ କଲିନି, ସେ କାମ୍ ନ କରି, ଜନ୍ କାରାପ୍ କାମ୍ କରବାକେ ମୁଲକେ ମନ୍ ନାଇ, ସେଟାସେ କଲିନି ।<sup>୨୧</sup> ଜଦି ମୁଇ ମନ୍ ନ କରବାଟା କରିଲାଗି ଆଟି, ସେନ୍ତାରୁଆଲେ ଜାଇଟା କଲିନି, ସେଟା ମୁଇ ସତଇସେ କରିନାଇ, ମର୍ ବିତ୍ରେ ରଇଲା ପାପ୍ସେ ସେଟା କଲାନି ।

<sup>୨୨</sup> ଏଟା ମର୍ ବିତ୍ରେ ଗଟେକ୍ କାମ୍ କରବା ନିୟମ୍ ବଲି ମନେ ଅଇଲାନି । ଜନ୍ଟା ନିକ, ସେଟା ମୁଇ କରବାକେ ଗାଲାବେଲେ, ଅବକା କାରାପ୍ ବିସଇସେ କଲିନି ।<sup>୨୩</sup> ପରମେସରର୍ ନିୟମ୍ ନାମ୍ବାକେ ମୁଇ ବେସି ମନ୍ କଲିନି, <sup>୨୪</sup> ମାତର୍ ମର୍ ମନ୍ କଲା ବିରଦେ ମର୍ ଗାଗଡ୍ ତେବାଇବା ବିଦି ସବୁବେଲେ ଜୁଇଦ୍ କଲାନି । ମର୍ ଗାଗଡ୍ କାମ୍ କରତେ ରଇବା ସବୁ ପାପ୍ ମକେ ବନ୍ଦି କରି ସଙ୍ଗଇଲା ଆଟେ ।<sup>୨୫</sup> କେତେ କରମ୍ ନଇଲା ଲକ୍ ମୁଇ ! ମରନର୍ ମୁର୍ଦ୍ଦି ଜିକିନେବା ଏ ଗାଗଡର୍ ତଲାଚଲୁଡି ଅନି କେ ମକେ ମୁକଲାଇସି ? <sup>୨୬</sup> ପରମେସର୍ ଦନିଅବାଦ୍ ପାଅ ! ମାପୁରୁ ଜିସୁ କିରିସଟର୍ ଲାଗି ମୁଇ ଉଦାର୍ ପାଇଆଟି ।

ତେବେ, ଏଟା ଅଇଲାନି ମର୍ କରମ୍ । ପରମେସରର୍ ନିୟମ୍ କାଲି ମୁଇ ମର୍ ମନେ ନାମି ପାରୁବି । ମାତର୍ ମର୍ ମୁନ୍ଦୁସ୍ ଇସାବର୍ ତଲାଚଲୁଡି ମକେ ପାପର୍ ଗତି ଦାଙ୍ଗଡା ଅଇବାକେ ବାଦିଅ କଲାନି ।

## ୮

### ଆଡ଼ମାଇ ଜିବନ୍ ରଇବାଟା

<sup>୧</sup> ତେବେ ଆମେ ଜେଡକି ଲକ୍ ଜିସୁ କିରିସଟର୍ ସଙ୍ଗ ମିସିକରି ଆରୁ, ଆମର୍ପାଇ ଆରି ପର୍ମେସରର୍ ଡଣ୍ଟ ନାଇ । <sup>୨</sup> ଜିସୁ କିରିସଟର୍ ସଙ୍ଗ ମିସିଲାର୍ପାଇ ସୁକଲ୍ ଆଡ଼ମା ଆମ୍ବକେ ନୁଆ ଜିବନ୍ ଦେଲାଆଟେ । ତେଇଅନି, ପାପ୍ କଲେ ମର୍ବା ନିୟମେଅନି, ଆମ୍ବକେ ମୁକଲାଇ ଆଟେ । <sup>୩</sup> ସେ ଆମର୍ ଗୁନୁଚଲନ୍ ନିକ ନ ରଇଲାକେ, ମସା ଦେଇରଇବା ରିଡିନିଡି ମାନୁ ନାଇ । ତେଇ ନିୟମ୍ ସାଇଜ କରି ନାପାରୁଲା । ମାତର୍ ସେଟା ପର୍ମେସର୍ କରିଆଟେ । ସେ ଆମର୍ ପାରା ପାପିମନ୍ ଗଟେକ୍ ଗାଗଡ୍ ଦାରାଇ ତାର୍ ପଅକେ ପାଟାଇଲା । ଆରି ସେ ଏନ୍ତାରିକରି ଆମର୍ ଉପ୍ରେ ରଇବା ପାପର୍ ସାସନ୍ କୁରୁପ୍ନାସ୍ କଲା । <sup>୪</sup> ଆମେ ଜେନ୍ତାରି କି ନିୟମର୍ ସବୁ ଆଦେସ୍ ମାନିକରି ରଇରୁ, ସେଟାର ପାଇ ପର୍ମେସର୍ ଏନ୍ତି କଲାଆଟେ । ଆମେ ଏବେ ମୁନ୍ଦୁସର୍ ତଲାଚଲୁଡି ନ କରି ସୁକଲ୍ ଆଡ଼ମାର୍ ବାଟେ ଇଣ୍ଟଲେସେ ଏନ୍ତି କରିଅଇସି । <sup>୫</sup> ଜନ୍ ଲକ୍ମନ୍ ମୁନ୍ଦୁସର୍ ତଲାଚଲୁଡି ଇସାବେ ଜିଉନା କାଉନା କରତେରଇବାଇ, ସେମନ୍ ନିଜର୍ ଗାଗଡର୍ ମନ୍ କରବାଟା ଚିନ୍ତା କରତେରଇବାଇ । ମାତର୍ ଜନ୍ ଲକ୍ମନ୍ ସୁକଲ୍ ଆଡ଼ମାର୍ ତାଲ୍ନା ଇସାବେ କାମ୍ କରବାଇ, ସେମନ୍ ସୁକଲ୍ ଆଡ଼ମା ଜନ୍ ବିସଇ କରବାକେ ମନ୍ କରାଇସି, ସେଟା କରବାଇ । <sup>୬</sup> ମୁନ୍ଦୁସର୍ ତଲାଚଲୁଡି ଇସାବେ ଗାଲେ ମରନର୍ ଦସା ଅଇସି, ସୁକଲ୍ ଆଡ଼ମାର୍ ତାଲ୍ନା ଇସାବେ ଗାଲେ ଜିବନ୍ ଆରି ସାନ୍ତି ମିଲ୍ସି । <sup>୭</sup> ଜଦି ଗଟେକ୍ ଲକ୍ ତାର୍ ଗାଗଡର୍ ମନ୍ କଲା ଇସାବେ ତଲାଚଲୁଡି କରସି, ସେ ପରମେସରର୍ ବିରଦି ଅଇସି । କାଇକେ ବଇଲେ ସେ ପରମେସରର୍ ନିୟମ୍ ମାନେ ନାଇ, ସେ ସେଟା କରବାକେ

ନାପାରେ ।<sup>୮</sup> ଜନ୍ ଲକ୍ଷ୍ମୀନ୍ ମୁନ୍ନୁସର୍ ଚଲାଚଲ୍ତି ଇସାବେ କାମ୍ କଲାଇନି, ସେମନ୍ ପରମେସରକେ ସାରଦା କରିନାପାରତ୍ ।

<sup>୯</sup> ଜଦି ସତଇସେ ପରମେସରର୍ ସୁକଲ୍ ଆତ୍ମା ତମର୍ ବିତ୍ତରେ ଆଚେ, ତେବେ ତମେ ଆରି ମୁନ୍ନୁସର୍ ଚାଲିଚଲନ୍ ପାରା ଜିଉନାକାଉନା କରିନାପାରାସ୍, ମାତର୍ ଜିବନେ ସୁକଲ୍ ଆତ୍ମା ଆଦେସ୍ ମାନସା । ଜାର୍ତେଇ କିରିସର୍ ଆତ୍ମା ନାଇ, ସେ କେବେ ମିସା ତାକର୍ ଲକ୍ ଅଇନାପାରେ ।<sup>୧୦</sup> ମାତର୍ ତମର୍ ବିତ୍ତରେ କିରିସର୍ ବାସାଅଇ ରଇସି ବଇଲେ, ତମର୍ ଗାଗଡ୍ ପାପେ ନସ୍ଟ ଅଇବାକେ ଜାଇତେ ରଇଲେ ମିସା, ସୁକଲ୍ ଆତ୍ମା ତମକେ ଜିବନ୍ ଦାନ୍ ଦେଇସି । କାଇକେ ବଇଲେ ତମେ ପରମେସରର୍ ମୁଆଚେ ଦରମ୍ ଲକ୍ ବଲି ଏଜାଇଅଇ ଆଗାସ୍ ।<sup>୧୧</sup> ଜଦି ତମର୍ ବିତ୍ତରେ ଜିସୁକେ ମଲାତେଇଅନି ଉଟାଇଲା ପରମେସରର୍ ଆତ୍ମା ଆଚେ, ତେବେ ସେ ଆତ୍ମା ସାଇଜ ସଙ୍ଗ୍, ପରମେସର୍ ଜେ କି କିରିସର୍କେ ମଲାତେଇଅନି ଉଟାଇଲା, ସେନ୍ତ୍ରସେ ତମର୍ କୁଜିବା ଗାଗଡ୍ ମିସା ଜିବନ୍ କର୍ସି ।

<sup>୧୨</sup> ତେବେ ଏ ବାଇବଇନିମନ୍, ଆମର୍ କାମ୍ ଅଇଲାନି, ମୁନ୍ନୁସର୍ ଗୁନ୍ଚଲନ୍ ଇସାବେ ଜିଉନାକାଉନା ନ କରୁ ।<sup>୧୩</sup> କାଇକେବଇଲେ ସେନ୍ତ୍ର କଲେ, ତମେ ମର୍ସା ମାତର୍ ସୁକଲ୍ ଆତ୍ମା ସାଇଜ ସଙ୍ଗ୍ ନିଜର୍ ପାପଚଲନ୍ ନସ୍ଟ କରି ଆରି ପାପ୍ କାମ୍ ନ କରାସ୍, ତେବେସେ ତମେ ବର୍ସା ।<sup>୧୪</sup> ଜନ୍ ଲକ୍ଷ୍ମୀନ୍ ପରମେସରର୍ ଆତ୍ମା ଇସାବେ ଚାଲ୍ଲାଇନି, ସେମନ୍ସେ ପରମେସରର୍ ପିଲାଟକି ।<sup>୧୫</sup> କାଇକେବଇଲେ ପରମେସର୍ ଦେଲା ଆତ୍ମା, ତମକେ ଗତିଦାଙ୍ଗ୍ଡା ଅଇବା ତେଇଅନି ମୁକ୍ତାଇଲା ଆଚେ । ତମେ ଆରି ଡର୍ବାର୍ ଲତା ନାଇ । ମାତର୍ ସୁକଲ୍ ଆତ୍ମା ତମକେ ପରମେସରର୍ ପିଲାଟକି କରିଆଚେ । ତାର୍ ବପୁ ଏତାଇକରି ଏବେ ଆମେ ପରମେସରକେ “ବାବା, ମର୍ ବାବା !” ବଲି ଡାକ୍ଲୁନି ।<sup>୧୬</sup> ପରମେସରର୍ ଆତ୍ମା ଆମର୍ ବିତ୍ତରର୍ ଆତ୍ମା ସଙ୍ଗ୍ କର୍ଟ୍ ମିସାଇ ଆମକେ ତାର୍ ପିଲାଟକି ବଲି ଜାନାଇଲାନି ।<sup>୧୭</sup> କାଇକେବଇଲେ ଆମେ ପରମେସରର୍ ପିଲାଟକି । ତାର୍ ଲକ୍ଷ୍ମୀନକେ କାତା ଦେଇରଇବା ଆସିର୍ବାଦେ ଆମେ ମିସବୁ । ଆରି କିରିସର୍ ପାଇ ପରମେସର୍ ଜନ୍ଟା ଚୁଲାଇ ସଙ୍ଗ୍ ଇଲା ଆଚେ, ତେଇ ମିସା ଆମର୍ ପାଇ ବାଟା ଆଚେ । ଜଦି ଆମେ ଜିସୁର୍ ଦୁକ୍ ପାଇବାତେଇ ମିସଲୁ ଆରୁ, ତେବେ ତାର୍ ଡାକ୍ ପୁଟା ପାଇବାତେଇ ମିସା ମିସବୁ ।

**ଡାକ୍ ପୁଟାର୍ ଦିନ୍**

<sup>୧୮</sup> ଜନ୍ ଡାକ୍ ପୁଟାର୍ ଦିନେ ଆମେ ମିସବାକେ ଗାଲୁନି, ଦେକଲେସରି ଏ ଜିବନେ ଅଇବା ଆମର୍ ଦୁକ୍ କସର୍ କିଟି ନାଇ ।<sup>୧୯</sup> ପର୍ମେସର୍ ତିଆରକଲା ସବୁଜାକ ଜାଗର୍ତା ସଙ୍ଗ୍ ସେ ଦିନକେ ଜାଗି ଆଚତ୍ । ସେବେଲାଇ ପରମେସର୍ ତାର୍ ସତ୍ ପିଲାଟକିମନ୍ କେ, ବଲି ଦେକାଇସି ।<sup>୨୦</sup> କାଇକେବଇଲେ ପରମେସର୍ ତିଆର୍ କରିରଇବା ସବୁଜାକ, ଅବିସାପେ ପୁରୁନ୍ ଅଇଲାଆଚେ । ଜନ୍ବାଟେ ଜିବାର୍ ରଇଲା ସେ ବାଟେ ନ ଜାଇ, ବିନ୍ ବାଟେ ଗାଲାଆଚେ । ମାତର୍ ଏଟା ତାର୍ ନିଜର୍ ମନ୍ କଲା ଇସାବେ ଅଏନାଇ । ପର୍ମେସର୍ ମନ୍ କଲାକେସେ ଅଇଲା । ଏଲେମିସା ତାର୍ ଆସା ରଇଲା,<sup>୨୧</sup> ଜେନ୍ତ୍ରକି ଗଟେକ୍ ଦିନେ କୁଜିବାଟାନେ ଅନି ମୁକ୍ତକରି ପର୍ମେସରର୍ କୁଟୁମର୍ ଡାକ୍ ପୁଟାଇ ମିସବୁ ।<sup>୨୨</sup> ମାତର୍ ଏବେ ଜାକ ତିଆର୍ ଅଇଲାଟା ସବୁ, ଗାଗ୍ତେ ରଇଲା ମାଇଜି ନିକଅଇବା ଦୁକା ପାରା ଅଇକରି “ଆନା, ଆୟା !” ଅଇଲାନି ।<sup>୨୩</sup> ଆମେ, ପରମେସର୍ ଦେଲା ପର୍ତୁମର୍ ଦାନ୍ ପାରା ସୁକଲ୍ ଆତ୍ମା ପାଇଲୁଆରୁ, ଆମେ ମିସା ବିତ୍ତରେ ବିତ୍ତରେ “ଆନା, ଆୟା !” ଅଇଲୁନି । ଏଲେମିସା

୮ ଟ:୧୧ ଟ:୧୧ ୧ମ କରନ୍ତିୟ ୩:୧୭    ୯ ଟ:୧୫ ଟ:୧୫ ଗାଲାତିୟ ୪:୫-୭    ୧୦ ଟ:୧୫ ଟ:୧୫ ମାର୍କ ୧୪:୩୭; ଗାଲାତିୟ ୪:୬    ୧୧ ଟ:୨୩ ଟ:୨୩ ୨ୟ କରନ୍ତିୟ ୫:୨-୪

ପରମେସର୍ ଆମ୍ଭଙ୍କେ କୁଟୁମ୍ବର ଲକ୍ କରାଇକରି ପୁରାପୁରୁନ୍ ମୁକ୍ତଲାଇସି ବଲି ଜାଗିକରି ଆତୁ । ୨୪ କାଇକେବଇଲେ ଆସା କଲାକେସେ ଆମେ ମୁକ୍ତି ପାଇଆତୁ । ମାତର୍ ଜାଇଟା ଡିସ୍ଲାନି ସେଟାର ପାଇ ଆସାକର୍ବାଟା, ସେଟା ସତଇସେ ଆସା ରକ୍‌ବାଟା ନର୍ସ । କେ କାଇ ଡିସ୍‌ବାଟାକେ ଆସା କର୍ସି କି ? ନାଇ, ନ କରେ । ୨୫ ମାତର୍ ଆମେ ଜଦି ନ ଡିସ୍‌ବା ବିସଇ ଆସାକର୍ବୁ, ତେବେ ଆମ୍ଭଙ୍କେ ସାଆସ୍ ସଙ୍ଗ ଜାଗ୍‌ବାକେ ପଡ଼ସି ।

୨୬ ଆମ୍ଭଙ୍କେ ବପୁ ନାଇ, ମାତର୍ ସୁକଲ୍‌ଆଡ଼ମା ଆମ୍ଭଙ୍କେ ସାଇଜ କର୍ସି । କେନ୍ତାରି ପାର୍ତନା କର୍ବାକେ ଅଇସି, ସେଟା ଆମେ ନାଜାନୁ । ସେଟାର ପାଇ ଜନ୍‌ଟା ଆମେ କଇ ନାପାରଲୁନି, ସେଟା ସୁକଲ୍ ଆଡ଼ମା ନିଜେ ଆମର୍‌ପାଇ “ଆନା, ଆୟା !” ଅଇକରି ପରମେସର୍‌କେ ଗୁଆରି କର୍ସି । ୨୭ ପରମେସର୍ ଆମର୍ ମନର୍ କାତା ଜାନେ । ସୁକଲ୍‌ଆଡ଼ମାର ମନର୍ ଚିନ୍ତା ସେ ଜାନେ । କାଇକେବଇଲେ ସୁକଲ୍‌ଆଡ଼ମା ପରମେସର୍ ମନ୍ କଲା ଇସାବେ, ତାକର୍ ଲକ୍‌ମନର୍ ପାଇ ଗୁଆରି କର୍ତେ ରଇସି ।

୨୮ ଜନ୍ ଲକ୍‌ମନ୍‌କେ ପରମେସର୍ ତାର ମନ୍ କଲାଟା ପୁରାପୁରୁନ୍ କର୍ବାକେ ଡାକ୍‌ଲାଆଟେ, ଆରି ସେମନ୍ ତାକେ ଆଲାଦ୍ କଲାଇନି, ସେମନର୍ ପାଇ ସେ ସବୁ ମଙ୍ଗଲର୍ ବିସଇ କରାଇଦେଇସି । ୨୯ ଜନ୍ ଲକ୍‌ମନ୍‌କେ ପରମେସର୍ ବାଟ୍‌ଲା ଆଟେ, ସେମନ୍‌କେ ତାର ପଅ ପାରା ଅଇବାକେ ଆଗ୍‌ତୁସେ ଟିକ୍ କରିଆଟେ । ସେନ୍ତିଆଲେ, ଗଟେକ୍ ବଡ଼ କୁଟୁମ୍ବେ, ତାର ପଅ ସେମନର୍ ବଡ଼ ବାଇ ଅଇସି । ୩୦ ଜନ୍ ଲକ୍‌ମନ୍ ଏନ୍ତାରି ବାଟିଅଇଲାଅ ଆଟଡ଼, ସେମନ୍‌କେ ଡାକିଆଟେ । ସେ ଲକ୍‌ମନ୍‌କେ ପରମେସର୍‌ର୍ ମୁଆଟେ ଦରମଲକ୍ ବଲାଅ ଅଇ, ତାର ଡାକ୍‌ପୁଟାଇ ମିସାଇ ଆଟଡ଼ ।

**ପରମେସର୍‌ର ଆଲାଦ୍**

୩୧ ଏ ସବୁର୍‌ତେଇଅନି ଆରି କାଇଟା କଇବାର୍ ଅଇସି ? ଜଦି ପରମେସର୍ ଆମର୍ ବାଟେ ଆଟେ, ତେବେ କେ ଆମର୍ ବିରଦି ଅଇପାର୍‌ସି ? ୩୨ ପରମେସର୍ କେବେମିସା ଆମର୍ ବିରଦି ନର୍ସ, କାଇକେବଇଲେ ସେ ନିଜର୍ ପଅକେ ମିସା ରକିଆ ନ କରି ଆମର୍ ପାଇ ଦାନ୍ ଦେଇଆଟେ । ସେନ୍ତିଆଲେ ସେ ଆମର୍ ପାଇ କାଇ ସବୁ ବିସଇ ଦାନ୍ ନ ଦେଏ କି ? ୩୩ ପରମେସର୍ ବାଟ୍‌ଲା ଲକ୍‌ମନ୍‌କେ କେ ଦସିବଲି କଇପାର୍‌ସି ? ସେମନ୍‌କେ ସେ ନିଜେ କାଇ ଦସ୍ କରି ନ ରଇବା ଲକ୍ ବଲି ଉଡ଼ରା କଲାଆଟେ । ୩୪ ତେବେ ସେମନ୍‌କେ ଦସି ବଲି କେ କଇନାପାରଡ଼ । କିରିସ୍‌ଟ ଜିସୁ ତା କେବେ ନ କରେ, କାଇକେବଇଲେ ତାକେ ପରମେସର୍ ମଲାତେଇଅନି ଜିବନ୍ କରି ଉଟାଇଲାଆଟେ । ଏବେ ସେ ପରମେସର୍‌ର ଉଜାବାଟେ ରଇକରି ଆମର୍‌ପାଇ ଗୁଆରି କରି ପାର୍ତନା କଲାନି । ୩୫ ସେନ୍ତାର୍‌ଆଲେ ତେବେ କେ ମିସା ଆମ୍ଭଙ୍କେ କିରିସ୍‌ଟର୍ ଆଲାଦେଅନି ବେଗଲାଅ ନାପାରଡ଼ । ଦୁକେ ରଇଲେ ମିସା, କସ୍‌ଟ ପାଇକରି ରଇଲେ ମିସା, ନିନ୍‌ସା ପାଇକରି ରଇଲେ ମିସା, କାକୁର୍‌ତି ଅଇକରି ରଇଲେ ମିସା, ବୁକେ ରଇଲେ ମିସା, ବିପଦେ ରଇଲେ ମିସା କି ମରାଇଲେ ମିସା ଏ ସବୁ ବେଗଲାଅ ନାପାରେ । ୩୬ ସାସ୍‌ତରେ ଲେକାଆଟେ,

“ତମ୍‌ରଲାଗି ସବୁ ଦିନ୍ ଆମେ ମରନର୍ ମୁଆଟେ ଗାଲୁନି,

ପୁଜ୍‌ବାକେ ନେଲା ମେଣ୍ଡାପିଲା ପାରା ଆମେ ବାଟି ଅଇଲୁ ଆତୁ ।”

୩୭ ଜେ ଆମ୍ଭଙ୍କେ ଆଲାଦ୍ କଲାଇନି, ତାର୍ ସାଇଜ ସଙ୍ଗ ଆମେ ଏ ସବୁର୍ ଉପରେ ଜିତି ଆତୁ । ୩୮ ମୁଇ ସତଇସେ ଜାନ୍‌ଲିନି ଜେ, ପରମେସର୍ ଜନ୍ ବଡ଼ ଆଲାଦ୍ ଆମ୍ଭଙ୍କେ ଦେକାଇଲାଆଟେ, ସେ ଆଲାଦେଅନି କାଇଟା ମିସା ଆମ୍ଭଙ୍କେ ବେଗଲାଅ ନାପାରେ । ଆମେ ମରିଗାଲେ କି ଜିବନ୍ ରଇଲେ, ସରଗର୍ ଦୁଡ଼ ଅଅଡ଼ କି ସାସନ୍‌କାରିଆମନ୍, କି କାଇ ବିନ୍ ବପୁ, କି ଏବେ ଜନ୍‌ଟା ଅଇଲାନି, ପର୍‌କେ ଜନ୍‌ଟା

ଅଇସି, ୩୯ ଉପରର ଦୁନିଆ କି ତଳର ଦୁନିଆ, ଏ ଜଗତେ ତିଆର୍ ଅଇରଇବା କାଇ ବିସଇ ମିସା ପରମେସରର ବଡ଼ ଆଲାଦେ ଅନି ଆମ୍ବକେ ବେଗଲାଇ ନାପାରେ । ଆମର ମାପୁରୁ ଜିସୁକିରିସଟକେ ଦେଲା ପରମେସରର ସେ ବଡ଼ ଆଲାଦେ ଅନି, ଏ ସବୁ ବିସଇ ଆମ୍ବକେ ଦେକାଇଲା ଆଚେ । ଏଟା ମୁଇ ଜାନିଆତି ।



ପରମେସର ଆରି ତାକର ଲକ୍ଷମନ୍ଦ

୧ ମୁଇ ତମକେ ଗଟେକ୍ ସତ୍‌କାତା କଇବି । ମୁଇ କିରିସଟର ଲକ୍ଷ, ଆରି ସୁକଲ୍ ଆଡ଼ମା ମର ବିବେକ୍‌କେ ଡାକିନେଲାନି । ସେଟାରପାଇ ମିସା ମୁଇ ମିର୍ କଇନାଇ ବଲି ଜାନଲିନି । ୨ ଏଟା ମୁଇ କିରିସଟକେ ସାକିଦେଇ କଇଲିନି । ମୁଇ ଜେ କେତେକ୍ ତେରେପେତେ ଆରି ନ ସାର୍‌ବା ଦୁକେ, ମର ମନ୍ କେତେକ୍ ଉଡୁକ୍ ଦୁଡୁକ୍ ଅଇଲାନି । ୩ କାଇକେବଇଲେ ମର ରକଡ଼ ମାଉସ୍ ରଇବା ଜିଉଦି ବାଇବଇନିମନ୍ କିରିସଟକେ ବିସ୍‌ବାସ୍ କରଡ଼ ନାଇ । ଜଦି ଏଟା ଅଇପାରସି, ତେବେ ମୁଇ ମନ୍ କଲିନି, ନିଜେ ତାକର ପାଇ ପରମେସରଟାନେ ସାଇପ୍ ପାଇକରି, କିରିସଟରତେଇ ଅନି ବେଗଲୁବି ବଲି । ୪ କାଇକେବଇଲେ ସେମନ୍ ପରମେସରର ଲକ୍ଷ । ପରମେସର ସେମନ୍‌କେ ନିଜର୍ ପିଲା କରି ବାଟିଆଚେ । ସେ ସେମନ୍‌ର ଲଗେ ନିଜର୍ ଡାକ୍‌ପୁଟା ଦେକାଇରଇଲା । ସେମନ୍‌ର ସଙ୍ଗ୍ ରାଜିନାମା କରି ସେମନ୍‌କେ ନିୟମ୍ ଦେଇରଇଲା । ସେମନ୍ ସତଇସେ ପାରତନା କରବାଇ । ସେମନ୍‌କେ ପରମେସର କାତା ଦେଇରଇଲା । ୫ ସେମନ୍ ଆମର ଡାକ୍‌ପୁଟା ଜିଉଦି ଆନିଦାଦିମନ୍‌ର ନାତିତିମନ୍ । ଆରି ମୁନୁସ୍ ରୁପ୍ ଦାରି କିରିସଟ ତାକର କୁଟୁମେଅନି ଜନମ୍ ଅଇଲା । ସବୁଟାନେଅନି ବେସି ବପୁର ପରମେସର ଜୁଗେ ଜୁଗେ ଡାକ୍‌ପୁଟା ପାଅ, ଆମେନ୍ ।

୬ ପରମେସର ତାର କାତା ଦେଇରଇଲାଟା ପୁରାପୁରୁନ୍ କରେନାଇ ବଲି ମୁଇ କଇନାଇ । କାଇକେବଇଲେ ଇସ୍ରାଏଲିୟମନ୍‌ର କେତେଟା ନାତିତିମନ୍ ପରମେସରର ଲକ୍ଷ ନଅଡ଼, ୭ କି ଅବରାଆମ୍ବର କୁଟୁମର୍ ସବୁ ଲକ୍ଷ ପରମେସରର ପିଲାଟକି ନ ଅଅଡ଼ । ପରମେସର ଅବରାଆମ୍ବକେ କଇରଇଲା, “ମୁଇ ତର ଜନ୍ କୁଟୁମର୍ ବିସଇନେଇ କାତା ଦେଇରଇଲି, ସେମନ୍ ଇସାକର ଟାନେଅନି ଜାଡ଼ ଅଇବାଇ ।” ୮ ଏଟାର ଅରଡ଼ ଅଇଲାନି, ଗାଗଡ଼ ଦାରି ଜନମ୍ ଅଇବା ପିଲାଟକି ନାଇ । ଜେ କି ପରମେସରର ପିଲାଟକିମନ୍ ଅଇବାଇ, ମାତର୍ ତାର କାତା ଦେଇରଇବା ଇସାବେ ଜନମ୍ କରିରଇବା ପିଲାଟକିମନ୍ ତାର ମୁଆଟେ ସତଇସେ ତାର ପିଲାଟକି ବଲି ଏଜାଇ ଅଇବାଇ । ୯ ପରମେସର ଅବରାଆମ୍ବକେ ଏନ୍ତି କାତା ଦେଇରଇଲା, “ସମାନ୍ ଏ ଦିନେ ଆମେ ବାଉଡ଼ି ଆଇଲାବେଲେ, ସାରା ଗଟେକ୍ ପିଲା ଜନମ୍ ଦେଇରଇସି ।”

୧୦ ଏ ପିଲା ଆମର ପୁରବର ଆନିଦାଦି ଇସାକ୍ ରଇଲା । ରିବିକାର୍ ଜଅଁଲା ପିଲାମନ୍‌ବିତରେ ଅନି ଗଟେକ୍ ବାବା ଇସାକରଟାନେଅନି ଅଇରଇଲା । ୧୧ ପରମେସର ରିବିକାକେ କାତା ଦେଇରଇଲା । ବଡ଼ ପିଲା ସାନ୍ ପିଲାର୍ ଗତିଦାଙ୍ଗ୍‌ତା ଅଇସି । ଜଁଲା ପିଲାମନ୍ ଜନମ୍ ନ ଅଇତେ, ଆରି ନିକ କାମ୍ କି ବାନିଆ କାମ୍ କରବା ଆଗ୍‌ତୁ ଏଟା ପରମେସର କଇରଇଲା । ଜନ୍ ପିଲାକେ ସେ ବାଟୁଲା, ପିଲା କରିରଇବା କାମର୍ ଲାଗି ଅଏନାଇ । ମାତର୍ ପରମେସର କରିରଇବା ଜଜ୍‌ନାର୍ ପୁରାପୁରୁନ୍ ଅଇବାକେସେ ସେଟା ଅଇଲା । ୧୨ ଏଟାର ପାଇ ତାକେ ଏ କାତା କଇରଇଲା । “ବଡ଼ ପିଲା ସାନ୍ ପିଲାର୍ ଗତିଦାଙ୍ଗ୍‌ତା ଅଇସି ।” ୧୩ ସାସ୍‌ତରର୍ ବାକିଅ ଇସାବେ “ଜାକୁବ୍‌କେ ମୁଇ ଆଲାଦ୍ କଲି, ମାତର୍ ଏସକେ ନାଇ ।”

୧୪ ସେନ୍ତାଉ ଆଲେ କାଇଟା ବଲି କଉଁ, “ପରମେସର୍ ଅନିଆଇ କରସି କି ? ନାଇ କେବେ ନ କରେ ।” ୧୫ କାଇକେବଇଲେ ସେ ପୁରୁବେ ମସାକେ କଇରଇଲା, “ମୁଇ ଜାକେ ମନ୍ କରବି ତାକେ ଦୟା ଦେକାଇବି ଆରି ଜିବନ୍ ଦୁକାଇବି । ୧୬ ସେଟାର ପାଇ ପରମେସର୍ ତାର ଲକ୍ମାନକେ ଦେବା ସବୁ ମଙ୍ଗଲର୍ ଦାନ ଲକ୍ମାନ ମନ୍ କଲାକେ କି ତାକର୍ ନିକ କାମ୍ କଲାକେ ଅଏ ନାଇ । ମାତର୍ ପରମେସରର୍ ଜିବନ୍ ଦୁକାନିଟାନେଅନି ସେ ସେଟା ଅଇଲାଆତେ ।” ୧୭ ସାସତର୍ ଇସାବେ ପରମେସର୍ ମିସରର୍ ରାଜାକେ କଇରଇଲା, “ତକେ ଦେଇ ମର୍ ବପୁ ଦେକାଇବି ଆରି ଗୁଲାଇ ଜଗତ୍ତକେ ମର୍ ତାକ୍ପୁଟା ଦେକାଇବାକେ ମୁଇ ତକେ ରାଜା କରିଆଟି ।” ୧୮ ତେବର୍ପାଇ ପରମେସରର୍ ମନ୍କଲା ଇସାବେ, ସେ କାକେ କାକେ ଦୟା ଦେକାଇସି ଆରି କାକେ କାକେ ମନ୍ ଆର୍ ଅଇବାକେ ଚାଡିଦେଇସି ।

ପରମେସରର୍ ରିସା ଆରି ଜିବନ୍ଦୁକାନି

୧୯ ତମର୍ ବିତ୍ତରେଅନି କେ ଆଲେ ମକେ କଇବାଇ, “ସେନ୍ତାଉଆଲେ, ପରମେସର୍ କାଇକେ ଲକ୍ମାନକେ ଦସି କଲାନି ? ପରମେସର୍ ମନ୍ କଲାଟା ବାଦଲାଇବା ଲକ୍ କେ ମିସା ଆଚତ୍ କି ?” ୨୦ ମାତର୍ ମୁଇ ତମକେ କଇବି, “ଏ ମଇତର୍ ପରମେସରର୍ କାତା ନାଇ ବଲ୍ବାକେ ତମେ କେ ?” ଗଟେକ୍ ଆଣ୍ଟି ମକେ କାଇକେ ଏନ୍ତିକରି ଗଡ୍ଲୁସ୍ ବଲି କୁମାରକେ ପାଚାରି ନାପାରେ । ୨୧ ନିଜର୍ ମନ୍ କଲା ଇସାବେ ମାଟି ଚକଟିକରି ଆଣ୍ଟି ଗଟେକ୍ ତିଆର୍ କରବାକେ କୁମାରର୍ ସବୁ ଅଦିକାର୍ ଆତେ । ଗଟେକ୍ ଚକଟିଲା ମାଟି ବେଲାଅନି ଦୁଇ ରକାମର୍ ଆଣ୍ଟି ତିଆର୍ କରସି । ତେଇଅନି ଗଟେକ୍କେ ପରବ୍ ଦିନ୍ମନ୍କେ ବାଇବାଇ । ଆରି ଗଟେକ୍ ଉଜର୍ ଦିନ୍ମନ୍କେ ବାଇବାଇ । ତେଇ ତାର୍ ସବୁ ଅଦିକାର୍ ଆତେ ।

୨୨ ପରମେସର୍ ମିସା ଟିକ୍ ସେନ୍ତ୍ରସେ କଲାଆତେ । ଜେତେବେଲେ ତାର୍ ରିସା ଆରି ବପୁ ଦେକାଇବାକେ ମନ୍ କରତେ ରଇଲା, ଜେତକି ଲକ୍ ତାର୍ ରିସାର୍ ଆଣ୍ଟିତେଇ ଅଦି ନସଟ୍ ଅଇବାକେ ରଇଲା, ସେମନ୍ର୍ ପାଇ ପରମେସର୍ ବେସି ଜିବନ୍ଦୁକାଇଲା । ୨୩ ଆରି ସେ ତାର୍ ବେସି ବଡ୍ ତାକ୍ପୁଟା ଦେକାଇବାକେ ଆମ୍କେ ବେସି ଜିବନ୍ଦୁକାଇଲା ଆତେ । ଆରି ଆମ୍କେ ବେସି ଆଗତ୍ତୁ ସେ ବାଟି ରଇଲା । ୨୪ ଜନ୍ ଲକ୍ମାନକେ ସେ ତାକିଆତେ, ସେ ବିତ୍ତରେ ଆମେ ମିସା ଆତୁ । ସେଟା ଅବକା ଜିଉଦିମନ୍ର୍ ବିତ୍ତରେ ଅନି ନାଇ, ମାତର୍ ଜିଉଦି ନଅଇଲା ଲକ୍ମାନର୍ ବିତ୍ତରେଅନି ମିସା । ୨୫ ଏ ବିସଇନେଇ ଅସେୟ ବଇତେଇ ପରମେସର୍ କଇଆତେ,

“ଜନ୍ ଲକ୍ମାନ ଆମର୍ ଲକ୍ ନ ରଇଲାଇ, ସେମନ୍କେ ମୁଇ ଏବେ ନିଜର୍ ଲକ୍ ଇସାବେ ତାକ୍ବି ।

ଜନ୍ ଜାତିକେ ମୁଇ ଆଲାଦ୍ କରି ନ ରଇଲି, ତାକେ ‘ଆମର୍ ନିଜର୍’ ବଲି ତାକ୍ବି ।”

୨୬ “ଜନ୍ ଜାଗାଇ ସେମନ୍କେ କଇରଇଲୁ,

“ ତମେ ଆମର୍ ଲକ୍ ନୁଆଁସ୍ ”

“ତେଇ ସେମନ୍ ଜିବନ୍ ରଇବା ପରମେସରର୍ ପିଲାଟକି ବଲାଅଇବାଇ ।”

୨୭ ଆରି ଇସ୍ରାଏଲ୍ ବିସଇନେଇ ଜିସାୟ୍ କଇଲା ଆତେ, “ଇସ୍ରାଏଲିୟମନ୍ ସମ୍ବୁରର୍ ବାଲିପାରା ଅଇଲେ ମିସା, ସେମନ୍ର୍ ବିତ୍ତରେଅନି କେତେଲକ୍ସେ ମୁକ୍ତି ପାଇବାଇ । ୨୮ କାଇକେବଇଲେ ମାପୁରୁ ଦାପୁରେସେ ଗୁଲାଇ ଜଗତର୍ ନିଆଇ ବିଚାର୍ କରସି ।” ୨୯ ଜେନ୍ତିକି ଜିସାୟ୍ ମିସା କଇରଇଲା, “ସବୁଟାନେଅନି ବପୁ ରଇବା ମାପୁରୁ, ଆମର୍ କେତେଟା ଲକ୍ମାନକେ ରକିଆ କରି ନ ରଇଲେ, ଆମର୍ ଦସା ସଦମ୍ ଆରି ଗମ୍ବାର୍ ଲକ୍ମାନର୍ ପାରା ଅଇତା ।”

ଇସ୍ରାଏଲିୟମନ୍ ମୁକ୍ତି ପାଇ ପାଉଲର୍ ପାର୍ତନା

୩୦ ସେଗାର ପାଇ ଜିଉଦି ନଇଲାଇଲକ୍‌ମନର୍ ବିସଇନେଇ ଏଟା କଇପାରୁ, ସେମନ୍ ଦରମ୍ ଲକ୍ ବଲାଇ ଅଇବାକେ ମନ୍ କରି ନ ରଇଲାଇ ମିସା, ସେମନର୍ ବିସ୍‌ବାସ୍ ଲାଗି ସେମନ୍ ପରମେସରର୍ ମୁଆଟେ ଦରମ୍‌ଲକ୍ ବଲାଇ ଅଇଲାଇ ଆଟଡ୍ । ୩୧ ମାତର୍ ଇସ୍ରାଏଲର୍ ଲକ୍‌ମନ୍ ନିୟମ୍ ଆନିକରି ପରମେସରର୍ ମୁଆଟେ ଦରମ୍ ଲକ୍ ବଲାଇ ଅଇବାକେ ବେସି ଚେସ୍‌ଟା କଲାଇ, ମାତର୍ ନାପାରୁଲାଇ । ୩୨ କାଇକେ ନାପାରୁଲାଇ ? କାଇକେବଇଲେ ସେମନ୍ ପରମେସରକେ ବିସ୍‌ବାସ୍ ନ କରତେ ନିୟମ୍ ମାନବାକେ ଚେସ୍‌ଟା କଲାଇ ଆରି ତାର୍ ମୁଆଟେ ଦରମ୍ ବଲାଇ ଅଇବାକେ ବାବୁଲାଇ । ଏଟାରୁଲାଗି ବାଟେ ଗାଡ଼ିରଇବା ବଡ଼ ପାକ୍‌ନାଟାନ୍‌ନେ ଚେସାଇଅଇଲା ଲକ୍‌ମନର୍‌ପାରା ଅଇଗାଲା । ୩୩ ଜେନ୍ତ୍ରିକି ସାସତରେ ଲେକାଆଟେ,

ଦେକା ଆମେ ସିୟନେ ଗଟେକ୍ ବାଦାପାକାଇବା ପାକ୍‌ନା ଆରି  
ଅଟ୍‌କାଇବା ରାଙ୍ଗନିପାକ୍‌ନା ସଙ୍ଗଇଲୁ ଆରୁ,

ତେଇ ଲକ୍‌ମନ୍ ଜଟିଆଇ ଅଇ ଅଦର୍‌ବାଇ ।

ମାତର୍ ଜେ ତାକେ ବିସ୍‌ବାସ୍ କରସି, ସେ କେବେ ମୁରମୁରା ନ ଅଏ ।

## ୧୦

୧ ଏ ବାଇବଇନିମନ୍, ମର୍ ନିଜର୍ ଲକ୍ ମୁକ୍ତି ପାଅଡ଼ ବଲି ମୁଇ ବେସି ମନ୍ କଲିନି । ଆରି ଏଟାରୁପାଇ ମୁଇ ସବୁବେଲେ ପରମେସରକେ ପାର୍‌ତନା କଲିନି । ୨ ସେମନ୍ ପରମେସରକେ ପୁରାପୁରୁନ୍ ବିସ୍‌ବାସ୍ କଲାଇନି । ମାତର୍ ତାକେ କେନ୍ତ୍ରି ସାରଦା କରାଇବାର୍ ଆଟେ, ସେଟା ନାଜାନଡ଼ । ୩ ଲକ୍‌ମନ୍କେ ନିଜର୍ ମୁଆଟେ ଦରମ୍ ବଲାଇ ଅଇବାକେ, ପରମେସର ଜନ୍ ଜଜ୍‌ନା କଲା, ସେଟା ସେମନ୍ ନିଚୁଲାଇ । ମାତର୍ ନିଜେ ଜଜ୍‌ନା ତିଆର୍ କରି, ନିୟମର୍ ବାଟେ ଇଣ୍ଡୁଲାଇ । ୪ କିରିସ୍‌ଟ ଆଇଲାତେଇଅନି ନିୟମ୍ ମାନବାଟା କାଇ ମୁଲିଅ ନାଇ । ଜେନ୍ତ୍ରି କି ତାକେସେ ବିସ୍‌ବାସ୍ କଲେ, ମୁନ୍‌ସ୍ ପରମେସରର୍ ମୁଆଟେ ଦରମ୍ ଲକ୍ ବଲି ଏଜାଇ ଅଇସି ।

### ସବୁର୍ ପାଇ ମୁକ୍ତି

\* ନିୟମ୍ ମାନବାତେଇଅନି ଦରମ୍‌ଲକ୍ ଅଇବା ବିସଇ ମସା ଲେକ୍‌ଲା ଆଟେ । ଜଦି ଜନ୍ ଲକ୍‌ମନ୍ ନିୟମର୍ ସବୁଜାକ ଆଦେସ୍ ମାନବାଇ, ସେମନ୍ ବୁଟ୍‌ବାଇ । ୨ ମାତର୍ ଲକ୍‌ମନ୍ ବିସ୍‌ବାସକରି ପରମେସରର୍ ମୁଆଟେ ଦରମ୍ ବଲାଇଅଇବାଇ, ସେ ବିସଇ ସାସତରେ ଏନ୍ତ୍ରି ଲେକାଆଟେ, କେ ସର୍‌ଗେ ଜାଇକରି କିରିସ୍‌ଟକେ ଉଡ଼ରାଇ ଆନ୍‌ସି ? ବଲି ମନେ ମନେ କଇ ଉଆନାଇ । ୩ ଆରି କୁଆନାଇ, କେ ପାତାଲେ ଜାଇକରି କିରିସ୍‌ଟକେ ମଲାଟାନ୍‌ନେଅନି ଆରିତରେକ୍ ଉଟାଇ ଆନ୍‌ସି ? 「କାଇକେବଇଲେ ସାସତରେ ଏନ୍ତ୍ରି ମିସା ଲେକାଅଇଆଟେ, “ପରମେସରର୍ କବର୍ ତମର୍ ଲଗେ, ତମର୍ ଟଣ୍ଡେ ଆରି ମନେ ଆଟେ ।” ବିସ୍‌ବାସ୍ ବିସଇର୍ ଏ କବର୍‌ସେ ଆମେ ଜାନାଇଲୁନି । ୪ ଜଦି ଉଁ, କିରିସ୍‌ଟସେ ମାପୁରୁ ବଲି କଇଲାସ୍‌ନି ଆରି ଉଁ, ପରମେସର ତାକେ ମଲାତେଇଅନି ଉଟାଇଲା ଆଟେ ବଲି ମନେ ମନେ ବିସ୍‌ବାସ୍ କଲାସ୍‌ନି, ସେନ୍ତ୍ରି ଆଲେ ତମେ ମୁକ୍ତି ପାଇସା । ୫ ଆମର୍ ବିସ୍‌ବାସର୍ ଲାଗି ପରମେସର ଆମ୍‌କେ ଦରମ୍ ଲକ୍ ବଲି ଏଜଲାନି । ଆରି ଟଣ୍ଡେ ଉଁ ବଲି ମାନିଆଇଲୁନିଜେ ଆମେ ମୁକ୍ତି ପାଇଆରୁ । ୬ ସାସତର୍ ଇସାବେ, “କେ ମିସା ତାକେ ବିସ୍‌ବାସ୍ କରସି, ସେ ବିସ୍‌ବାସ୍ କରି କେବେ ଲାଜ୍ ନ ଅଏ ।” ୭ କାଇଟାବଇଲେ, ଜିଉଦି ଆରି ଜିଉଦି ନଇଲା ଲକ୍ ବିତ୍‌ରେ କାଇ ସାନ୍ ବଡ଼ ନାଇ । ସେଟାର୍ ପାଇ ସବୁ ଲକ୍‌ର୍ ତା ଗଟେକ୍ ମାପୁରୁ, ଆରି ଜେଡ୍‌କି ଲକ୍ ତାକେ ପାର୍‌ତନା କର୍‌ବାଇ ସେ ସବୁ ଲକ୍‌କେ ମଙ୍ଗଲ୍ କରସି । ୮ କାଇକେବଇଲେ “ଜେ ମିସା ମାପୁରୁର୍ ନାଉଁ ଦାରି ପାର୍‌ତନା କରସି, ସେ ମୁକ୍ତି ପାଇସି ।”

୧୪ ମାତର୍ ସେମନ୍ ତାକେ ବିସ୍‌ବାସ୍ ନ କଲେ, କେନ୍ତ୍ରି ତାର୍ ନାଉଁ ଦାରି ପାର୍‌ତନା କର୍‌ବାଇ ? ଆରି ତାର୍ ବିସ୍‌ଇର୍ ସୁବ୍‌କବର୍ ନ ସୁନିରଇଲେ କେନ୍ତ୍ରି ବିସ୍‌ବାସ୍ କର୍‌ବାଇ ? ଆରି ସେମନ୍‌କେ କବର୍ ନ ସୁନାଇଲେ, କେନ୍ତ୍ରି ସୁନ୍‌ବାଇ ? ୧୫ ଆରି କବର୍ ନେଉକେ ନ ପାଟାଇଲେ କେନ୍ତ୍ରି ଜାନାଇସି ? ଏ ବିସ୍‌ଇ ସାସ୍‌ତରେ ଲେକା ଆଟେ “ସୁବ୍‌କବର୍ ଜାନାଉମନ୍ ଆଇବାଟା, କେତେ ସାର୍‌ଦାର୍ କାତା !” ୧୬ ମାତର୍ ସୁବ୍‌କବର୍ ଜାନାଇବାଟା‌ନେ ସବୁ ଲକ୍ ମାନଡ୍ ନାଇ । ସେଟାର୍ ପାଇ ଜିସାଇୟ ଲେକ୍‌ଲା ଆଟେ, “ଏ ମାପ୍‌ରୁ, ଆମେ କଇଲା କାତା ସୁନିକରି କେ ବିସ୍‌ବାସ୍ କରଡ୍‌ନାଇ ।” ୧୭ ତେବର୍‌ପାଇ ସୁବ୍‌କବର୍ ସୁନ୍‌ବାଟା‌ନେଅନି ବିସ୍‌ବାସ୍ ଅଇସି । ଆରି କିରିସ୍‌ଟକେ ଜାନାଇବାଟା ସେ ସୁବ୍‌କବର୍ ।

୧୮ ମାତର୍ ମୁଇ ପାଟାର୍‌ଲିନି ଇସ୍ରାଏଲର୍ ଲକ୍‌ମନ୍ କାଇ, ସେ କବର୍ ସୁନଡ୍ ନାଇ କି ? ବାଇଦରେ ସୁନିଆଟଡ୍, କାଇକେବଇଲେ ଲେକାଆଟେ, “ଜାନାଉମନ୍‌ର ସବ୍‌ ଗୁଲାଇ ଜଗଡ୍ ଡାବିଅଇଗାଲା ଆଟେ, ସେମନ୍‌ର୍ କାତା ରାଇଜ୍ ଚିଡ୍‌ଲା ଜାକ କେଟ୍‌ଲା ଆଟେ ।”

୧୯ ଆରି ତରେକ୍ ମୁଇ ପାଟାର୍‌ଲିନି, ଇସ୍ରାଏଲର୍ ଲକ୍‌ମନ୍ ସେଟା ନିକସ୍‌ଜ୍ ବୁଜଡ୍ ନାଇ କି ? ଡ୍ ରୁଜିଆଟଡ୍ । କାଇକେବଇଲେ ବେସି ବରସ୍ ଆଗ୍‌ତୁ ମସା ଉତର୍‌ଦେଇ ଲେକ୍‌ଲା ଆଟେ,

ଗଟେକ୍ ନାଜାନୁଲା ଜାତିକେ ସାଇଜ୍ କରି  
ମର୍ ଲକ୍‌ମନ୍‌କେ ଛସା କରାଇବି ।

ସେନ୍ତ୍ରି ଗଟେକ୍ ବକୁଆ ଜାତିର୍ ଲକ୍‌କେ ଦୟାକରି  
ମୁଇ ସେମନ୍‌କେ ରିସା କରାଇବି ।

୨୦ ଜିସାଇଅ ଆରି ମିସା ଡାଟ୍‌ସଙ୍ଗ୍ କଇଲା ଆଟେ,  
“ଜନ୍ ଲକ୍‌ମନ୍ ମକେ ନ କଜ୍‌ଡେରଇଲାଇ,  
ସେମନ୍ ମକେ ବେଟ୍ ପାଇଲାଇ,  
ଜନ୍ ଲକ୍‌ମନ୍ ମର୍ ବିସଇ ନ ପାଟାର୍‌ଡେ ରଇଲାଇ,  
ମୁଇ ନିଜେ ସେମନ୍‌କେ ଦେକାଇଅଇଲି ।”

୨୧ ମାତର୍ ପର୍‌ମେସର୍ ଇସ୍ରାଏଲର୍ ବିସଇ କଇଲାନି, “ଗୁଲାଇଦିନ୍ ସେମନ୍‌କେ ଡାକି ନେବାକେ ଆଡ୍ ଲାମାଇଲି, ମାତର୍ ସେମନ୍ ମକେ ନ ମାନିକରି ବିରଡ୍ କଲାଇ ।”

## ୧୧

ଇସ୍ରାଏଲ୍‌ମନ୍‌ର ପାଇ ପରମେସର୍‌ର ଦୟା

୧ \*ମୁଇ ଆରିତରେକ୍ ପାଟାର୍‌ଲିନି, “ତେବେ ପରମେସର୍ ସବୁ ଜିଉଦି ଲକ୍‌ମନ୍‌କେ ଚାଡି ଦେଲା ଆଟେ କି ? ନାଇ, କେବେ ନାଇ । ମୁଇ ମିସା ନିଜେ ସେମନ୍‌ରପାରା ଗଟେକ୍ ଜିଉଦି, ଅବ୍ରାଆମ୍‌ତା ମର୍ ଆନିଦାଦି ଆରି ମୁଇ ବେନ୍‌ଜାମିନ୍ କୁଟ୍‌ମର୍ ଲକ୍ ଅଇଆତି ।” ୨ ପରମେସର୍ ମୁଲେଅନି ବାଚିରଇଲା ତାର୍ ଲକ୍‌ମନ୍‌କେ କେବେ ମିସା ଚାଡେନାଇ । ତମେ ସାସ୍‌ତରେ ପଡିଆଗାସ୍, ଏଲିଅ କେନ୍ତ୍ରି ଇସ୍ରାଏଲ୍ ମନ୍‌ର ପାପର୍ ଚଲାଟଲ୍‌ଡିର୍‌ପାଇ ପରମେସର୍‌କେ ପାର୍‌ତନା କରିରଇଲା, ୩ “ଏ ମାପ୍‌ରୁ, ସେମନ୍ ତମର୍ ବବିସ୍‌ଡ୍‌ବକ୍‌ତାମନ୍‌କେ ମରାଇଆଟଡ୍ ଆରି ତମର୍ ପୁଜା କର୍‌ବା ବେଦି ସବୁ ବାଙ୍ଗାଇ ପାକାଇଲାଇ ଆଟଡ୍ । ମୁଇ ଗଟେକ୍ ଲକ୍‌ସେ ତକେ ପୁଜା କର୍‌ବାକେ ଆତି । ମକେ ମିସା ସେମନ୍ ମାରିପାକାଇବାକେ ଚେସ୍‌ଟା କଲାଇନି ।” ୪ ପରମେସର୍ ଏଲିଅକେ କାଇବଲି କଇ ରଇଲା । “କାରାପ୍ ଦେବ୍‌ତା ବାଲ୍ ପୁଡ୍‌ଲାକେ ପୁଜା ନ କରିରଇବା ତମର୍ ବିଡ୍‌ରେଅନି ସାଡ୍ ଅଜାଡ୍

\* ୧୧:୧ ୧୧:୧ ପିଲିପିୟ ୩:୫

ଲକ୍ଷ୍ମୀଙ୍କେ ମର ପାଇ ସଙ୍ଗାଇ ଆତି ।” ୫ ଏବେ ସେ ସମାନ ବେଲା ଗର୍ଭିଣୀ ଆତେ । ପରମେସର ଜିବନ୍ ଦୁକାଇ ଜନ୍ ଲକ୍ଷ୍ମୀଙ୍କେ ବାଟି ରଇଲା, ସେମାନର ବିତ୍ତରେଅନି ଅଲପ୍ କେତେଟା ଜିଉଦିମନ୍ ଅଗ୍ଲି ଆତଡ଼ । ୬ ପରମେସର ସେମାନଙ୍କେ ତାର ନିଜର ଜିବନ୍ ଦୁକାଇକରି ବାଟିଲା ଆତେ । ସେମାନ କରି ରଇବା ନିକ କାମର ଲାଗି ନାଇ । ଜଦି ସେମାନର ନିକ କାମର ଲାଗି ସେମାନଙ୍କେ ବାଟିରଇତା, ତାର ଜିବନ୍ ଦୁକାନି ସଡ଼ ଜିବନ୍ ଦୁକାନି ନ ଅଇତା ।

୭ ତେବେ କାଇଟା ଅଇଲା ? ଇସ୍ରାଏଲର ଲକ୍ଷ୍ମୀଙ୍କ ନିଜେ ଦରମ ବଲାଅଇବାକେ ଗଟେକ୍ ବାଟ୍ କଇଲା । ମାତର ତେଇଅନି ଗଟେକ୍ ସାନ୍ ଦଲ୍ଲକେସେ ପରମେସର ବାଟିରଇଲା । ଆରି ବାକିଲକ୍ଷ୍ମୀଙ୍କ କେ ମିସା ସେ ଡାକ୍ଲାକେ ସୁନଡ଼ ନାଇ । « ସାସ୍ତର ବାକିଅ “ଜେଜ୍ଜିକି ପରମେସର ସେମାନର ଆଁକ ଆରି ମନ୍ ବାନ୍ଦି ଦେଲା ଆତେ । ଏବେ ଜାକ ସେମନ୍ ଦେକି ନାପାରଲାଜନି କି ସୁନି ନାପାରଲାଜନି ।” ୯ ସେମାନର ବିସଇନେଇ ଦାଉଦ୍ ଲେକଲା ଆତେ, ସେମନ୍ ଆମେ ପାପ୍ କରୁନାଇ ବଲି ବୁଲ୍ ଚିନ୍ତା କରଡ଼ । ସେମନ୍ ତେଇ ଅଦ୍ରି ଜାଅଡ଼

ଅଦ୍ରିଜାଇକରି ତଣ୍ଡ ପାଅଡ଼ ।

୧୦ ସେମନ୍ କାଣାକାଣି ଅଇକରି କାଇଟା ମିସା ଦେକି ନାପାରଡ଼ । ସବୁବେଲେ ଦୁକ୍ କସ୍ଟ ପାଇପାଇ

ସେମାନର ଆଁଟା ସବୁବେଲର ପାଇ ବାଁକ୍ ଅଇଜାଅ ।

୧୧ ମର ସଙ୍ଗର ଜିଉଦିମନ୍ ଜଟିଆଇ ଅଇକରି ଆଜିଜାଇ ନସ୍ଟ ଅଇଗାଲା । ମାତର ସେମାନଙ୍କେ ବାଉଡାଇ ଆନ୍ବାକେ ପରମେସର ନାପାରେ ବଲି ବାବ୍ଲାସ୍ନି କି ? ନାଇ ସେ ପାରସି । ସେମନ୍ ପରମେସରର ବାକିଅ ନିଟ୍ଲାକେ ଜିଉଦି ନ ଅଇଲା ଲକ୍ଷ୍ମୀଙ୍କ ମୁକ୍ତି ପାଇଲା ଆତଡ଼ । ଜେନ୍ତାରି କି ଜିଉଦିମନ୍ ଈସା ଅଇଜିବାଇ । ୧୨ ଜିଉଦିମନ୍ ନ ମାନବାଟା, ଜଗତର ବିନ୍ ଲକ୍ଷ୍ମୀଙ୍କେ ବେସି ଆସିରବାଦ୍ ମିଲଲା । ଜିଉଦିମନ୍ ପରମେସରଙ୍କେ ନ ମାନଲାକେ ଜିଉଦି ନ ଅଇଲା ଲକ୍ଷ୍ମୀଙ୍କ ତାରଟାନେ ଅନି ବଡ଼ ଆସିରବାଦ୍ ପାଇଲା । ସେନ୍ତାରି ଆଲେ ପଡ଼କେ ବାଟି ରଇବା ସବୁ ଜିଉଦିମନ୍ ବିସବାସ୍ କଲେ, ସେ ଆସିରବାଦ୍ କେତେକ୍ ଅଦିକ୍ ଅଇସି ।

ଜିଉଦିନଇଲା ଲକ୍ଷ୍ମୀଙ୍କ ମୁକ୍ତି

୧୩ ଜିଉଦି ନଇଲା ଲକ୍ଷ୍ମୀଙ୍କ, ତମ୍ବକେ ମୁଇ କଇଲିନି, ପେରିଡ଼ସିସ୍ ଇସାବେ ତମ୍ବ ବିତ୍ତରେ କାମ୍ କରବାକେ ପରମେସର ମକେ ବାଟିଲା ଆତେ । ସେ ମକେ ଜେଡ଼କି କାମ୍ ଦେଲାଆତେ, ସେଟା ମୁଇ ଜତନ୍ସଙ୍ଗ୍ କଲିନି । ୧୪ ମୁଇ ତମ୍ବକେ ସାଇଜ କଲାପାଇ, ମର ସଙ୍ଗର ଜିଉଦିମନ୍ ଈସା ଅଅଡ଼ ବଲି ମୁଇ ମନ୍ କଲିନି । କେ ଜାନେ ସେମାନର ବିତ୍ତରେଅନି କେତେଲକ୍ ବିସ୍ବାସ୍ କରି ପରମେସରର ତଣ୍ଡେଅନି ରକିଆ ପାଇବାଇ । ୧୫ ଜିଉଦିମନ୍ ପରମେସରର ଟାନେଅନି ବେଗଲ୍ଲାକେ, ଜିଉଦି ନ ଅଇଲା ଲକ୍ଷ୍ମୀଙ୍କ ତାର ନିଜର ଲକ୍ଷ୍ ଅଇପାରଲା । ସେନ୍ତାରିଆଲେ ଜିଉଦି ଲକ୍ଷ୍ମୀଙ୍କ ତାରଟାନେ ଆରିତରେକ୍ ବାଉଡିଆଇଲେ, ଜିଉଦି ନ ଅଇଲା ଲକ୍ଷ୍ମୀଙ୍କ କେତେକ୍ ଅଦିକ୍ ଆସିରବାଦ୍ ଅଇସି । ସେନ୍ତାରି ଅଇଲେ କେତେକ୍ ନିକ କରମ୍ ! ସବୁ ମଲାଲକ୍ଷ୍ମୀଙ୍କ ଜିବନ୍ଅଇ ଉର୍ଲାପାରା ଅଇସି ।

୧୬ ରୁଟିତେଇଅନି କଣ୍ଡେକ୍ ପରମେସରଙ୍କେ ଦିଆଅଇରଇଲେ, ସବୁଜାକ ରୁଟି ଦିଆଅଇଲା ଆତେ ବଲି ବାବ୍ବାର୍ । ଗଟେକ୍ ଗଟର୍ ଚେର୍ ସୁକଲ୍ ରଇଲେ, ତାର୍ କେନ୍ଦାକଡ଼ ମିସା ସୁକଲ୍ ଆତେ ବଲି ବାବ୍ବାକେ ଅଇସି । ୧୭ ଇସ୍ରାଏଲ୍ କୁଟୁମର ଲକ୍ଷ୍ମୀଙ୍କ ପରମେସର ଜତନ୍ କରଇବା ଗଟେକ୍ ଜିଡ଼ ଗଟର୍ ପାରା । ସେ ଗଟେଅନି କେତେଟା କେନ୍ଦି ବାଙ୍ଗାଇକରି ବନର୍ ଜିଡ଼ ଗଟର୍ କେନ୍ଦା ତେଇ, ଜଡିଆତେ ।



ତମେ ଜିଉଦି ନ ଅଇଲା ଲକ୍ମନ ସେ ବନରୁ ଜିତୁ ଗର୍ ପାରା । ଏବେ ତମେ ଜିଉଦିମନରୁ ତାଟ୍ ଆଡ଼ମାରୁ ଜିବନ୍ତେଇ ଜିତିଅଇଆଚାସ୍ । ୧୮ ସେଟାର ପାଇ ତମେ ଜିଉଦିମନରୁ ଟାନେଅନି ବଡ଼ ବଲି ବାବାନାଇ । କାଇକେବଇଲେ ତମେ ଅବକା କେନ୍ଦାସେ ଆରି କେନ୍ଦାମନରୁ କାଦି ଗଚରୁ ଚେରେଅନିସେ ଆଇସି । ଚେରରୁ କାଦି କେନ୍ଦାଇଅନି ନ ଆସେ ।

୧୯ “ଉଁ ତମେ କଇପାରାସ୍, ଜିଉଦି ନ ଅଇଲା ଲକ୍ମନ ଆମେସେ ବଡ଼ । କାଇକେବଇଲେ ଆମ୍ଭକେ ଜଡ଼ବାକେ କେନ୍ଦାମନ ବାଙ୍ଗାଇଲା ।”

୨୦ ତମକେ ଜଡ଼ିଆରେ, ସେଟା ସଡ଼ ସେ । ମାତରୁ ଜିଉଦିମନ ବିସବାସ୍ ନ କଲାପାଇ ପରମେସରୁ ସେମନକେ କାଟିଦେଲାଆଚେ । ତମେ ବିସବାସ୍ କଲାକେସେ ତମ୍ଭକେ ଜଡ଼ିଆଚେ । ସେଟାରପାଇ ବଡ଼ପନ୍ ନ ଅଇ ତରିକରି ରୁଆ । ୨୧ କାଇକେବଇଲେ ଜଦି ଗଚେଅନି ନିଜେ ବାରଇଲା କେନ୍ଦା ପାରା ଜିଉଦିମନକେ ପରମେସରୁ ବାଙ୍ଗାଇଦେଲା, ତେବେ ବନେଅନି ଆନି ଜଡ଼ିରଇବା କେନ୍ଦାମନକେ କେତେକ୍ ଅଦିକ୍ ସେ ନ ବାଙ୍ଗାଏ ? ସେ କେନ୍ଦାମନ ଅଇଲାନି, ତମେ ବିସବାସ୍ ନ କଲା ଜିଉଦି ନଇବା ଲକ୍ମନ । ୨୨ ଇଡ଼ିଅନି ଆମେ ଦେକ୍ଲୁନି ପରମେସରୁ କେନ୍ଦି ଆଲାଦକାରିଆ, ଆରି ସାସନକାରି ମିସା ! ଜନ୍ ଲକ୍ମନ ତାରୁ କାତା ମାନଡ଼ ନାଇ, ସେମନକେ ଡଣ୍ଡ ଦେଲା । ମାତରୁ ତାରୁ ଦୟା ତମେ ତାଟ୍ ସଙ୍ଗ୍ ଦାରିରଇଲେ, ସେ ତମ୍ଭକେ ଦୟା ଦେକାଇସି । ଜଦି ସେନ୍ତାରି ନ କଲେ, ତମ୍ଭକେ ମିସା କାଟିଦେଇସି । ୨୩ ଜଦି ଜିଉଦିମନ ବିସବାସ୍ କଲେ, ଗଚରୁ ବୁନ୍ଦେ ରଇବା ତାକର୍ ଆଗର୍ ଜାଗାଇ ପରମେସରୁ ସେମନକେ ବାଉଡ଼ାଇସି । କାଇକେବଇଲେ ସେଟା ପରମେସରୁସେ କରିପାରେ । ୨୪ ତମେ ଜିଉଦିନଇଲା ଲକ୍ମନ ବନରୁ ଜିତୁ ଗଚରୁ ବାଙ୍ଗାଇଲା କେନ୍ଦାପାରା । ସବୁବେଲେ ଜଡ଼ବାଟାନେ କଲାପାରା ନ କରି, ପରମେସରୁ ନିଜେ ଜତନ୍ କରବା ଗଚେ, ତମ୍ଭକେ ଜଡ଼ଲାଆଚେ । ଜିଉଦିମନ ସେ ନିଜେ ଜତନ୍ କରିରଇବା ଗଚରୁପାରା । ସେନ୍ତାରିଆଲେ ଗଚୁବୁନ୍ଦେ ରଇବା କେନ୍ଦାମନକେ ଆଗର୍ ଜାଗାଇ ନେଇ ଜଡ଼ବାକେ କେତେକ୍ ଅଦିକ୍ ସଅଜ୍ ଅଇସି ।

ସବୁ ଲକ୍ମନ ପାଇ ପରମେସରୁ ଆଲାଦ୍

୨୫ ଏ ବାଇବଇନିମନ, ଏ ବିସଇଟାନେ ଗଚେକ୍ ଲୁଟିରଇଲା ସଡ଼ ତମେ ବୁଜା ବଲି ମୁଇ ମନ୍ କଲିନି । ଆମେ ଜିଉଦିମନରୁ ଟାନେଅନି ବଡ଼ ଆରୁ ବଲି ତମେ ବଡ଼ପନ୍ ନ ଅଇବାକେ, ଏଟା ତମ୍ଭକେ ବୁଜାଇଲିନି । ଜିଉଦିମନରୁ କାତା ନ ମାନବାଟା, ବେସିଦିନ୍ ଜାକ ନ ରଏ । ମାତରୁ ଜେଡ଼କ୍ ଜିଉଦି ନ ଅଇଲା ଲକ୍ମନକେ ପରମେସରୁ ବାଟ୍ଲାଆଚେ, ସେମନ ବିସବାସ୍ କରବାଜାକ ସେଟା ରଇସି । ୨୬ ତାରୁ ପଚେ ଇସରାଏଲିଅମନ୍ ସବୁ ଲକ୍ ଏ ସାସ୍ତରରୁ ଇସାବେ ରକିଆ ପାଇବାଇ । ମୁକ୍ତିକାରିଆ ଜିଉଦିମନରୁ ବିଡ଼ରେ ଅନି ଆଇସି,

ଆରି ତାରୁ ଲାଗି ଜାକୁବରୁ କୁଟୁମେଅନି ସବୁ ତାକର୍ କାରାପ୍ ଚଲାଚଲ୍ଡି ଚାଡ଼ବାଇ ।

୨୭ ସେମନରୁ ପାପ୍ ରଇବା ଚଲାଚଲ୍ଡି ମୁଇ ଦାରିଜିବାବେଲେ, ସେମନରୁ ସଙ୍ଗ୍ ଏ ରାଜିନାମା କରୁବି । ୨୮ ସୁବ୍ କବର୍ ବିସବାସ୍ ନ କରି ଜିଉଦିମନ ପରମେସରୁ ସଡ଼ରୁ ଅଇଗାଲାଇ । ଏନ୍ତାରି ଅଇଲାକେ ତମେ ଜିଉଦି ନ ଅଇଲା ଲକ୍ମନ ମୁକ୍ତି ପାଇଲାସ୍ । ଏନ୍ତାରି ଅଇଲେମିସା ପରମେସରୁ ଜନ୍ କାତା ତାକର୍ ଆନିଦାଦିମନକେ ଦେଇରଇଲା, ଆରି ସେମନ୍ ତାରୁ ବାଟିରଇବା ଲକ୍ମନ ଅଇଲାକେ ମିସା, ସେମନ୍ ତାରୁ ଲକ୍ ଅଇଆଚଡ଼ । ୨୯ କାଇକେବଇଲେ ପରମେସରୁ ଜନ୍ ଲକ୍ମନକେ ବାଟିକରି ଆସିରବାଦ୍ କରୁସି, ସେ ଦାନ୍ ଦେବାକେ ଜାଗର୍ତା ରଇସି । ୩୦ ଜିଉଦିନଇଲା ଲକ୍ମନ ତମେ ପୁରୁବେ ପରମେସରୁ କାତା ନ ମାନତେ ରଇଲାସ୍, ମାତରୁ ଜିଉଦିମନ କାତା ନ ମାନଲାପ୍ ପାଇ, ଏବେ ତମେ ପରମେସରୁ

ଜିବନ୍ ଦୁକାନିର୍ ଆଲାଦ୍ ପାଇଆଚାସ୍ । <sup>୩୧</sup> ଏଟା ଜିଉଦି ଅଇରଇବା ଲକ୍ମନର୍ ପାଇ ମିସା ସେନ୍ତାରିସେ । ଏବେ ସେମନ୍ କାତା ନ ମାନ୍ଲେ ମିସା, ତମ୍ବକେ ଜେନ୍ତାରି ପର୍ମେସର୍ ଦୟା ଦେକାଇ ଆଲାଦ୍ କଲାଆଚେ, ସେ ପର୍ବକେ ସେମନ୍କେ ମିସା ଦୟା ଦେକାଇସି । <sup>୩୨</sup> ଗୁଲାଲ ମନସ୍ ଜାତି ତାର୍ କାତା ନ ମାନ୍ଲାକେ ତଣ୍ଟ୍ ପାଇବାର୍ ଆଚେ ବଲି ପର୍ମେସର୍ ଦେକାଇଲା ଆଚେ । ତାର୍ ଜିବନ୍ ଦୁକାଇଲାଟା ସବୁକେ ଡିସ୍ସି ବଲି ଏନ୍ତାରି କଲାଆଚେ ।

ପରମେସରର୍ ଡାକ୍ପୁଟା

<sup>୩୩</sup> ପରମେସରର୍ ଦୟା କେତେକ୍ ବଡ଼ ! ତାର୍ ଗିଆନ୍ ଆରି ବିଚାର୍ କର୍ବା ବପୁ କେ ବୁଜିନାପାରଡ଼ ! ସେ ଜନ୍ଟା ଡ଼ କର୍ସି, ସେଟା ଲକ୍ମନ ବୁଜିନାପାରଡ଼ । ସେ ଜନ୍ କାମ୍ କର୍ବାକେ ଗାଲାନ୍, ସେଟା କେ ବାତାଇ ନାପାରଡ଼ । <sup>୩୪</sup> କାଇକେବଇଲେ ସାସ୍ତରେ ଏନ୍ତାରି ଲେକା ଅଇଲାଆଚେ ।

“ପରମେସର୍ ମନେ ଚିନ୍ତା କର୍ବାଟା କେ ବୁଜି ପାରଡ଼ ?

ତାକେ କେ ମିସା ବୁଦିର୍ କାତା କଇବାକେ ଲତାନାଇ ।”

<sup>୩୫</sup> ତାକେ କାଇଟା ଉନା ନାଇ ।

ସେ ଆମର୍ ରୁଣି ଅଇବାକେ, ତାକେ କାଇଟା ଦେଇ ନାପାରୁ ।

<sup>୩୬</sup> ଧିଆର୍ ଅଇଲା ସବୁ ବିସଇ ସେ ସେ ଚାଲାଇଲାନ୍ତି । ଆରି ସବୁ ବିସଇ ତାର୍ପାଇସେ । ପର୍ମେସର୍, କାଲେ କାଲେ ଜୁଗେ ଜୁଗେ, ତାର୍ ଡାକ୍ପୁଟା ଅ । ଆମେନ୍ !

## ୧୨

ପରମେସର୍କେ ସେବା କର୍ବା ଜିବନ୍

<sup>୧</sup> ସେଟାର୍ ପାଇ ଏ ବାଇବଇନିମନ୍, ଆମର୍ ଉପରେ ପରମେସରର୍ ବଡ଼ ଜିବନ୍ଦୁକାନିର୍ ଲାଗି, ତମ୍ବକେ ମୁଇ ବାବୁଜିଆ କଲିନି, ପରମେସରର୍ ଲଗେ ଗଟେକ୍ ବଲି ଇସାବେ ନିଜର୍ ଜିବନ୍ ସର୍ପିଦିଆସ୍ । ଏନ୍ତାରି ବଲି ଅଇବାଟା ମର୍ବାକେ ନର୍ସ, ମାତର୍ ତାର୍ ସେବାକର୍ବାକେ ନିଜେ ସର୍ପି ଅଇବାଟା । ସେନ୍ତି ଅଇଲେ ପର୍ମେସର୍ ସାରଦା ଅଇସି । ପର୍ମେସର୍କେ ଏ ରକାମ୍ ଉପାସନା କର୍ବାର୍ ଆଚେ । <sup>୨</sup> ଏ ଜଗତେ ରଇବା ଲକ୍ମନର୍ ପାରା ଚଲାଚଲ୍ତି ଇସାବେ ଜିଉନା କାଉନା କରାନାଇ । ପରମେସର୍ ତମର୍ ମନ୍ ନୁଆକରି ବାଦ୍ଲାଅ । ସେନ୍ତି ଅଇଲେ ସେ ମନ୍ କର୍ବାଟା ବୁଜିପାର୍ସା । ଆରି ଜନ୍ ଚଲାଚଲ୍ତି ତାର୍ ମୁଆଚେ ନିକ, ସିଦ୍ ଆରି ତାକେ ସାରଦା କରାଇସି, ସେଟା ଜାନି ପାର୍ସା ।

<sup>୩</sup> ପରମେସର୍ ମକେ ଜିବନ୍ଦୁକାଇକରି ଅଦିକାର୍ ଦେଲାକେ ତମ୍ବକେ ସବୁ ଲକ୍ମକେ କଇଲିନି, । କେ ମିସା ମୁଇ ବିନ୍ ଲକ୍ମଟାମେଅନି ବଡ଼ ବଲି ବାବାନାଇ । ପରମେସର୍ ତମ୍ବକେ ଜେଡ଼କି ବିସବାସ୍ ଦେଲାଆଚେ, ସେଡ଼କି ନିଜକେ ବିଚାର୍ କରା । <sup>୪</sup> ଆମକେ ସବୁଲକ୍ମକେ ଗାଗଡ଼େ ବିନ୍ ବିନ୍ ବାଗ ଆଚେ । ସେ ଗାଗଡ଼ର୍ ବିନ୍ ବିନ୍ ବାଗର୍, ବିନ୍ ବିନ୍ କାମ୍ ଆଚେ । <sup>୫</sup> ସେନ୍ତାରିସେ ଆମେ ଜେଡ଼କି ଲକ୍ କିରିସ୍ତତେଇ ମିସଲୁଆରୁ, ଆମେ ତାର୍ ଗାଗଡ଼ ଅଇଲୁଆରୁ । ଗାଗଡ଼ର୍ ଆଡ଼ ଗଡ଼ ପାରା ଆମେ ସବୁ ଲକ୍ ମିସିଆରୁ । <sup>୬</sup> ସେଟାର୍ ପାଇ ପରମେସର୍ ଆମକେ ଜିବନ୍ ଦୁକାଇ ଜେଡ଼କି ବିନ୍ ବିନ୍ ବପୁର୍ ଦାନ୍ ଦେଲା ଆଚେ, ସେ ସବୁ ବପୁ ଆମର୍ କାମେ ଲାଗାଇବାର୍ ଆଚେ । ଜଦି ଆମକେ ପର୍ମେସରର୍ ବାକିଅ ଜାନାଇବା ବପୁ ଦେଲାଆଚେ, ସେନ୍ତାର୍ଆଲେ ଆମେ ପାଇରଇବା ବିସବାସ୍ ଇସାବେ ସେଟା କର୍ବାର୍ ଆଚେ । <sup>୭</sup> ଜଦି ଆମର୍ ସଙ୍ଗର୍ ଲକ୍ମକେ ସାଇଜ କର୍ବା ବପୁ ଦେଲାଆଚେ, ତେବେ ସେଟା କର୍ତ୍ତେ ରଇବାର୍

☆ ୧୧:୩୭ ୧୧:୩୭ ମେ କରକ୍ରିୟା ଟ:୭ କରକ୍ରିୟା ୧୨:୪-୧୧

☆ ୧୨:୪ ୧୨:୪ ମେ କରକ୍ରିୟା ୧୨:୧୨

☆ ୧୨:୭ ୧୨:୭ ମେ କରକ୍ରିୟା

ଆଚେ । ଜଦି ପରମେସରର ବାକିଅ ସିକାଇବାଟା ଦେଲାଆଚେ, ତେବେ ସେଟା ଜତନ୍ ସଙ୍ଗ୍ କରବାର ଆଚେ । ୮ ବିନ୍ ଲକ୍ମନକେ ସାରଦା କରାଇବାକେ ବପୁ ଦେଇରଇଲେ, ସେଟା କରତେ ରଉଁ । ଅରକିଡ଼ ଲକ୍ମନକେ ଦାନ୍ କରବା ବପୁ ଦେଇରଇଲେ, କାଇଟା ନ ବାବିକରି ଦାନ୍ କରୁ । ବିନ୍ ଲକ୍ମନ କାମ୍‌କେ ଦେକାରକା କରବା ଅଦିକାର ଦେଇରଇଲେ, ନିଜେ ବେସି କାମ୍ କରବାରୁଆଚେ । ଜଦି ବିନ୍ ଲକ୍ମନକେ ଦୟା ଦେକାଇବା ବପୁ ଦେଲାଆଚେ, ବିଜାର ନ ଅଇ ସାରଦା ସଙ୍ଗ୍ କରବାରୁ ଆଚେ ।

୯ ବିନ୍ ଲକ୍ମନକେ ଆଲାଦ୍ କରବାରୁ ଆଲେ କାଇ କପଟ୍ ରଇବାରୁ ନାଇ । କାରାପ୍ ଚଲାଚଲୁତି ଗିନ୍ କରି, ସଡ଼ ଚଲାଚଲୁତି ଚାଡ଼ବାରୁ ନାଇ ।

୧୦ ତମେ କିରିସ୍‌ଟରୁଟାନ୍‌ନେ ବାଇବଇନି ଅଇଲାଟ୍ ପାଇ, ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କରି ସନ୍‌ମାନ୍ କରା । ୧୧ ନିସଡ଼ ନଅଇକରି ଲାଗିରୁଆ । ଜିବନ୍ ପରାନ୍ ଦେଇକରି ପରମେସରକେ ସେବା କରା । ୧୨ ଆମ୍‌କେ ରଇବା ଆସାରୁ ଲାଗି ଆମେ ସାରଦା ଅଉଁ । ଦୁକ୍ କସ୍‌ଟ ଆଇଲେ ମୁରତିକରି ରଉଁ । ସରୁବେଲା ପରମେସରକେ ପାରତନା କରତେ ରଉଁ । ୧୩ ଆମ୍‌ରୁ ଟାନ୍‌ନେ ରଇବା ଅରକିଡ଼ ବାଇବଇନିମନ୍‌କେ ସାଇଜ କରୁ । ନ ଜାନ୍‌ବା ଲକ୍ମନ ଆମ୍‌ରୁ ଗରେ ଆଇଲେ ଗତିଆ କରି ଡାକିନେଉଁ ।

୧୪\*ଜନ୍‌ଲକ୍ମନ ତମ୍‌କେ ନିନ୍ଦା କରବାଇ, ସେମନ୍‌କେ ପରମେସର ଆସିରବାଦ୍ କରବଲି ପାରତନା କରା । ସେମନ୍‌କେ ଆସିରବାଦ୍ କରା, ସାଇପ୍ ଦିଆସ୍ ନାଇ । ୧୫ ଜଦି ଗଟେକ୍ ଲକ୍‌କେ ସାରଦାରୁ ଦିନ୍ ଆଇଲାଆଚେ, ତେବେ, ତାରୁ ସଙ୍ଗ୍ ମିସି ସାରଦା କରା, ଜଦି ଦୁକ୍‌ରୁ ଦିନ୍ ଆସିରଇଲେ, ସେ ଲକ୍‌ରୁ ସଙ୍ଗ୍ ମିସି ଦୁକ୍ କରା । ୧୬ ସରୁ ଲକ୍‌କେ ସମାନ୍ ଇସାବେ ଆଲାଦ୍ ଦେକାଆ । ଆଁକାରୁ ବୁଦି ଚାଡ଼ିକରି ସଲଦ୍ ଅଇ ସାନ୍ ସାନ୍ କାମ୍ କରବାକେ ମିସା ରାଜି ଉଆ । ନିଜ୍‌କେ ଗିଆନ୍ ରଇବାଲକ୍ ବଲି ଦେକାଇ ଉଆନାଇ ।

୧୭ କେ ତମ୍‌କେ ଅନିଆଇ କଲେ, ତାକେ ବେର୍ ଦାରବାରୁ ନାଇ, ଜନ୍ ଚଲାଚଲୁତି ସରୁ ମନ୍‌କେ ଜାଇସି, ସେଟା କରତେରଇବାରୁ । ୧୮ ସରୁ ଲକ୍‌ରୁ ସଙ୍ଗ୍ ସୁସାରେ ଜିଇବାକେ ଜେତେକ୍ ପାରାସ୍, ସେତେକ୍ ଚେସ୍‌ଟା କରା । ୧୯ ମର୍ ଆଲାଦ୍‌ରୁ ବାଇବଇନିମନ୍, ଜଦି କେ ତମ୍‌କେ ଅନିଆଇ କଲେ, ତମେ ବେର୍ ଦାରାନାଇ, କାଇକେବଇଲେ, ପରମେସରସେ ଡଣ୍ଟ ଦେଇସି । କାଇକେ ବଇଲେ ସାସ୍‌ତରେ ଲେକା ଆଚେ । ମାପ୍‌ରୁ କଇଲାମି, “ମୁଇ ବେର୍ ଦାରୁବି । ମୁଇ ଡଣ୍ଟ ଦେବି ।” ୨୦ ଏଲେ ସାସ୍‌ତରୁ ଲେକା ଇସାବେ “ତମ୍‌ରୁ ସଡ଼ରୁ ବୁକେ ରଇଲେ, ତାକେ କାଇବାକେ ଦିଆସ୍, ସସେ ରଇଲେ, ପାନି କୁଆ । ଏନ୍ତାରକଲେ ସେ ତମ୍‌କେ କିରିରଇବା ଅନିଆଇରୁ ଲାଗି ବେସି ଲାଜ୍ ଅଇଜାଇସି ।” ୨୧ ମିଟ୍ କାମ୍ କରି ଆରିଜାଆ ନାଇ, ସରୁ ବିସଇ ସଡ଼ ବାବେ କରି ଜିତିକରି ରୁଆ ।

## ୧୩

ସାସନ୍ କରୁମନ୍‌କେ ନାମ୍‌ବାଟା

୧ ସାସନ୍‌କାରିଆମନ୍‌ର କାତା ସରୁ ଲକ୍ ମାନ୍‌ବାକେ ବାଦିଅ, କାଇକେବଇଲେ ପରମେସର ଆଦେସ୍ ନ ଦେଲେ କେ ମିସା ସାସନ୍ କରବାକେ ଅଦିକାର ନ ପାଏ । ଗାଦିଟାନ୍‌ନେ ରଇଲା ସାସନ୍‌କାରିଆମନ୍‌କେ ପରମେସର ବସାଇଲା ଆଚେ । ୨ ସେଟାରୁ ପାଇ ଜେ ଗାଦିତେଇ ବସଲା ସାସନ୍‌କାରିଆମନ୍‌କେ ବିରଦ୍ କରୁସି, ସେ ପରମେସର ତିଆରକଲା ଗାଦିର ବିରଦ୍ କଲାମି । ଜେ ଏଟା କରୁସି ସେ ପରମେସର ବିଚାରନା ଜାଗାଇ ଚିଆଅଇସି । ୩ ଆମ୍‌ରୁ ଚଲାଚଲୁତି ସଡ଼ ରଇଲେ

\* ୧୨:୧୪ ୧୨:୧୪ ମାଡିଉ ୫:୪୪; ଲୁକ୍ ୬:୨୮

ସାସନକାରିଆକେ ଡରୁବାରୁ ଦରୁକାରୁ ନାଇ । କାରାପୁ ରଇଲେ ଡରୁବାରୁ ଆତେ । ସାସନକାରିଆମନକେ ତମେ ଡରୁବାକେ ମନ୍ କରାସ୍ ନାଇ, ସେନ୍ତାରୁଆଲେ ନିକ କାମ୍ କରା ଆରି ସେମନ୍ ତମ୍‌କେ ନାମ୍‌ବାଇ । ୪ ସେମନ୍ ପରୁମେସରରୁ ଗତିଦାଙ୍ଗତାମନ୍ ଆରି ତମରୁ ନିକପାଇସେ କାମ୍ କଲାଜନି । ତମେ ଜଦି କାରାପୁ କାମ୍ କରୁତେରଇସା, ତେବେ ସେମନ୍‌କେ ଡରୁବାରୁ ଆତେ । କାଇକେବଇଲେ ତମ୍‌କେ ତଣ୍ଟୁ ଦେବାକେ ତାକରୁ ଅଦିକାରୁ ଆତେ । ସେମନ୍ ପରୁମେସରରୁ ଗତିଦାଙ୍ଗତା ଆରି ଜେଡକି ଲକ୍ କାରାପୁ କାମ୍ କରୁତେରଇବାଇ, ସେମନ୍‌କେ ପରୁମେସରୁ ତଣ୍ଟୁ ଦେବାଇ । ୫ ସେଟାରୁପାଇ ତମେ ସାସନକାରିଆମନରୁ କାତା ମାନ୍‌ବାରୁ ଆତେ । ଉଜେ ପରମେସରରୁ ତଣ୍ଟୁ ଡରିକରି ନାଇ, ମାତରୁ ନିଜରୁ ବୁଦିସଙ୍ଗୁ ଏଟା ଟିକ୍ କାମ୍ ବଲି ଜାନିକରି ମିସା ଏଟା କରୁବାରୁ ଆତେ ।

୬ \*ଏଟାରୁପାଇ ତମେ ସିସୁତୁ ମିସା ଦେଲାସନି, କାଇକେବଇଲେ ସାସନକାରିଆମନ୍ ଟିକସଙ୍ଗୁ କାମ୍ କଲାବେଲେ ପରମେସରରୁ ସେବା କରୁତେ ରଇବାଇ । ୭ ସେଟାରୁ ପାଇ ସେମନ୍ ଜେଡକି ପାଇବାରୁ ଆତେ ସେଟା ସେମନ୍‌କେ ଦେଇଦିଆସ୍ । ତମେ ସିସୁତୁ କି ଅତି ଜାଇଟା ଦେବାରୁ ଆତେ, ସେଟା ବାନ୍ଦିଦିଆସ୍ ଆରି ସେମନ୍‌କେ ନାମିକରି ସନ୍‌ମାନ୍ କରା ।

**ନିଜରୁ ନିଜରୁ ବିତ୍‌ରେ ଆଲାଦ୍**

୮ ନିଜରୁ ନିଜରୁ ବିତ୍‌ରେ ଆଲାଦ୍ କରାକରି ଅଇବାଟା ଚାଡି ଆରି କାଇ ବିସଇ କାରୁ ଲଗେ ମିସା ଉଦାରୁ ଉଆ ନାଇ । ଜେ ଏଟା ବିନ୍ ଲକରୁପାଇ କରୁସି, ସେ ନିୟମ୍ ମାନ୍‌ସି । ୯ ନିୟମ୍‌ତେଇ ଲେକାଅଇଲା ଆତେ, “ବେସିଆ କାମ୍ କରୁବାରୁ ନାଇ, ନରୁ ମାରୁବାରୁ ନାଇ, ଚରାଇବାରୁ ନାଇ, ବିନ୍ ଲକରୁ ଦିନ୍‌ସୁ ଲବାଇବାରୁ ନାଇ ।” ନିଜକେ ଆଲାଦ୍ କଲାପାରା ବିନ୍ ଲକମନ୍‌କେ ଆଲାଦ୍ କରା । ଏ ଗଟେକ୍ ଆଦେସ୍ ଜଦି ତମେ ମାନ୍‌ସା, ନିୟମେ ରଇବା ସବୁ ଆଦେସ୍ ମାନ୍‌ଲାପାରା ଅଇସି । ୧୦ କାଇକେବଇଲେ ତମେ ଗଟେକ୍ ଲକକେ ଆଲାଦ୍ କରୁତେ ରଇଲେ, କେବେ ମିସା ତାକେ ଅନିଆଇ ନ କରାସ୍ । ଆରି ତମେ ଜଦି ସେମନ୍‌କେ ଆଲାଦ୍ କରୁସାବଇଲେ, ସବୁ ନିୟମ୍ ମାନିକରିଆତାସ୍ ।

୧୧ ଏବେ ତମେ ଏଟା କରୁବାରୁ ଆତେ । କାଇକେବଇଲେ ବେଲା କେଟୁଲାଆତେ । ଆମେ ସଇରଇବା ଲକରୁପାରା ନ ଅଇକରି ଚେତା ଅଇ ଜାଗରତୁ ଅଇରଇବାରୁ ଆତେ । ବିସବାସ୍ କରୁବା ବେଲା ଆଗୁତୁ ରଇଲେ ମିସା ଆମରୁ ମୁକ୍ତି ପାଇବା ଦିନ୍ ଲଗେ ଅଇଆତେ । ୧୨ ରାତି ଦାପୁରେ ସାରିଜାଇସିବେ, ସାକାଲୁ ଅଇବାକେ ଗାଲାନ୍ତି । ସେଟାରୁପାଇ ଆସା, ରାତିଆ କରିରଇବା କାରାପୁ କାମ୍ ସବୁ ଚାଡିକରି, ଉଜ୍‌ଲେ ଜୁଇଦ୍ କରୁବା ଆଡୁଆଡିଆରୁ ଦାରୁ । ୧୩ ବେସିଆମନରୁ ଦଲେ ମିସବାରୁ ନାଇ, ମାତୁଆଲ୍‌ମନରୁ ଦଲେ ଜିବାରୁ ନାଇ, ବିନ୍ ମାଇଜିମନରୁ ସଙ୍ଗୁ ମିସିରଇବାରୁ ନାଇ, ଲାଗାଜତା ଅଇବାରୁ ନାଇ ଆରି ଛୁଆ ଅଇବାରୁ ନାଇ । ଆମେ ଜେଡକି ଲକ୍ ଉଜ୍‌ଲେ ରଇଆରୁ, ଟିକ୍ ସଙ୍ଗୁ ଚଲାଟଲୁତି କରୁ । ୧୪ ମାପୁରୁ ଜିସୁକିରିସଟରୁ ଆଡୁଆଡିଆରୁ ଦାରି ରଉଁ । ଆରି ଆମରୁ ପାପରୁ ଗୁନ୍‌ଚଲନ୍ ନ ମାନିକରି ଆମେ ମନ୍ କରୁବାଟା ପୁରାପୁରୁନ୍ ନ କରୁ ।

**୧୪**

**ବିନ୍‌ଲକରୁ ଦସ୍ ଦାରାନାଇ**

୧ \*ଜଦି କେତେକ୍ ଲକ୍ କିରିସଟକେ ବିସବାସ୍ କଲାଜନି, ମାତରୁ ତାକରୁ ବିସବାସ୍ ଡାଟୁନାଇ, ସେମନ୍‌କେ ମିସା ଡାକି ମିସାଆ । ମାତରୁ ସେମନରୁ ଚିନ୍ତା କରୁବାଟା

\* ୧୩:୬ ୧୩:୬ ମାଡିଉ ୨୨:୨୧; ମାରୁକ ୧୨:୧୭; ଲୁକ୍ ୨୦:୨୫      \* ୧୪:୧ ୧୪:୧ ରମିୟ ୨:୧୭

ତମରୁପାରୀ ନ ରଇଲେ, ତାକର ସଙ୍ଗେ ଦଦାପେଲା ଉଆ ନାଇ । ୨ କେତେକ ଲକର ବିସ୍‌ବାସ, ଜେନ୍ତୁ ରକାମର କାଦିକେ ମିସା ଉଁ ବଲି କଇବାଇ । ମାତର ଜାର ବିସ୍‌ବାସ ଏବେଜାକ ଡାଞ୍ଚନାଇ ସେମନ୍ କାଇ ମାଉଁସ୍ ମିସା କାଇବାର ନଏଁ, ଅବକା ସାଗ୍‌ତାଲ୍‌ସେ କାଇବାଇ । ୩ ଜନ୍ ଲକ୍‌ମନ୍ ସବୁଜାକ କାଇବାଇ, ସେମନ୍ ଆମେ ଅବକା ସାଗ୍‌ତାଲ୍ କାଇବା ଲକ୍‌ରଟାନେଅନି ବଡ଼ ବଲି ବାବ୍‌ବାର ନାଇ । ସେନ୍ତାରିସେ ଜନ୍‌ଲକ୍‌ମନ୍ ଅବକା ସାଗ୍‌ତାଲ୍‌ସେ କାଇବାଇ, ସେମନ୍ ଆମେ ସବୁରକାମର କାଦିକାଇବା ଲକ୍‌ମନ୍‌ରଟାନେଅନି ବଡ଼ ବଲି ବାବ୍‌ବାର ନାଇ । କାଇକେବଇଲେ ପରମେସର୍ ଦୁଇ ଦଲ୍‌ର ଲକ୍‌ମନ୍‌କେ ମିସା ବାବ୍‌ଲା ଆତେ । ୪ ବିନ୍ ଲକ୍‌ ଦାଙ୍ଗ୍‌ତାମନ୍‌କେ ଆମେ ବିଚାର କର୍‌ବାର ନାଇ । କାଇକେବଇଲେ ସେମନ୍ କର୍‌ବା କାମ୍ କଲାଇ ଆତଡ଼ କି ନାଇ ବଲି ତାକର ସାଉକାର ଦେକ୍‌ସି । ଆରି ପରମେସର୍ ଜନ୍‌ଟା ମନ୍ କଲାନ୍ତି, ସେମନ୍ ସେଟା କର୍‌ବାଇ । କାଇକେବଇଲେ ପରମେସର୍ ସେମନ୍‌କେ ସାଇଜ କଲାନ୍ତି ।

\* ସେନ୍ତାରିସେ, ବିନ୍‌ଦିନ୍ ମନରଟାନେଅନି କନ୍‌ଆଲେ ଗଟେକ୍‌ଦିନ୍ ସୁବ୍‌ଦିନ୍ ବଲି କେତେ ଲକ୍ ବାବ୍‌ବାଇ । ବିନ୍ ଲକ୍‌ମନ୍ ସବୁଦିନ୍ ସମାନ୍ ବଲି ବାବ୍‌ବାଇ । କନ୍‌ଟା ଟିକ୍ ରଇସି ବଲି ଲକ୍‌ମନ୍ ନିଜେ ନିଜେ ବିଚାର କର୍‌ବାର ଆତେ । ୬ ଜନ୍ ଲକ୍‌ମନ୍ ବିନ୍‌ଦିନ୍ ମନରଟାନେଅନି ଗଟେକ୍ ଦିନ୍ ସୁବ୍ ବଲି ବାବ୍‌ବାଇ, ସେମନ୍ ପରମେସର୍‌କେ ସାର୍‌ଦା କରାଇବାକେ ସେନ୍ତାରି ବାବ୍‌ବାଇ । ସେନ୍ତାରିସେ, ଜନ୍‌ଲକ୍‌ମନ୍ ସବୁ ରକାମ୍ କାଦି କାଇବାଇ, ସେଟା ପରମେସର୍‌କେ ସାର୍‌ଦା କରାଇବାକେ କର୍‌ବାଇ ଆରି ସେଟାର୍‌ପାଇ ତାକେ ଦନିଅବାଦ୍ ଦେବାଇ । ଆରି ଜନ୍‌ଲକ୍‌ମନ୍ ଅବକା ସାଗ୍‌ତାଲ୍ କାଇବାଇ, ସେମନ୍ ସେଟା ପରମେସର୍ ସାର୍‌ଦା ଅଇସି ବଲି କାଇଲାଇନି ଆରି ସେମନ୍ ମିସା ତାକେ ଦନିଅବାଦ୍ ଦେଲାଇନି । ୭ ଆମର୍ ବିଡ଼ରେ ସବୁଲକ୍ ଦର୍‌ତନିତେଇ ବଞ୍ଚିରଇଲେ କି ମରିଗାଲେ ମିସା ପରମେସରର୍ । ୮ ଆମେ ବଞ୍ଚିରଇଲେ ପରମେସରର୍ ପାଇ, ମରିଗାଲେମିସା ସେନ୍ତାରିସେ । ତେବର୍‌ପାଇ ଆମେ ବଞ୍ଚିରଇଲେ କି ମରିଗାଲେ ପରମେସରର୍ ପାଇସେ । ୯ କାଇକେବଇଲେ କିରିସ୍‌ଟ ମରିଗାଲା ଆରି ମଲାତେଇଅନି ଆରିତରେକ୍ ଉଟ୍‌ଲା । ସେଟାର୍‌ପାଇ ସେ ମଲାଲକ୍‌ମନ୍‌କେ ଆରି ଜିବନ୍ ରଇଲା ଲକ୍‌ମନ୍‌କେ ସାସନ୍ କର୍‌ସି । ୧୦ \*ତେବେ ତମେ କାଇକେ ଅବକା ସାଗ୍‌ତାଲ୍ କାଇବା ବାଇମନ୍‌କେ ବିଚାର କଲାସ୍‌ନି ? ଆରି ଜନ୍‌ଲକ୍‌ମନ୍ ସବୁ ରକାମ୍ କାଦି କାଇଲାସ୍‌ନି, ଅବକା ସାଗ୍‌ତାଲ୍ କାଇବା ଲକ୍‌ମନ୍‌କେ କାଇକେ ଚିନ୍ କଲାସ୍‌ନି ? କାଇକେବଇଲେ ଆମେ ସବୁଲକ୍ ପରମେସରର୍ ମୁଆଟେ ଟିଆ ଅଇଲେ, ସେ ଆମ୍‌କେ ବିଚାର କର୍‌ସି । ୧୧ କାଇକେବଇଲେ ସାସ୍‌ତରେ ଲେକାଆତେ, “ମାପୁର କଇଲାନ୍ତି, ମୁଇ ଜିବନ୍ ରଇବା ପରମେସର୍, ତେବର୍‌ପାଇ ସବୁ ମୁନୁସ୍‌ଜାତି ମର୍ ମୁଆଟେ ମାଣ୍ଡିକୁଟା ଦେବାଇ ।

ମୁଇ ପରମେସର୍ ବଲି ସବୁ ଲକ୍ ନାମ୍‌ବାଇ ।”

୧୨ ସେବେଲେ ଆମେ ସବୁ ଲକ୍ ପରମେସରର୍ ଲଗେ ଟିଆଅଇ ଆମେ କରିରଇବା କାମର୍ ଇସାବ୍ ଦେବାକେ ପଡ଼ସି ।

ବାଇକେ ନସ୍‌ଟ ଅଇବାକେ ନ ଦିଆସ୍

୧୩ ସେଟାର୍ ପାଇ ତମର୍ ବିଡ଼ରେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ବିଚାର କରାନାଇ । ତାର୍ ବାଦୁଲେ ଆମର୍ ବାଇମନର୍ ଚଲାଟଲ୍‌ତିତେଇ ବିନ୍ ଲକ୍‌କେ ପାପ୍ କରାଇବା କାଇମିସା ବିସଇ ଆତେ କି ନାଇ, ସେଟା ଆମେ ନିଜେ ଦେକ୍‌ବାର୍ ଆତେ । ୧୪ ଜିସୁ ମାପୁରର୍ ସଙ୍ଗେ ମିସ୍‌ଲାର୍‌ପାଇ ପରମେସର୍ ଦେକ୍‌ବା ଇସାବେ

\* ୧୪:୧୦ ୧୪:୧୦ ୨ୟ କରନ୍ତିୟ ୫:୧୦

କାଈ କାଦି ମିସା ନିବୁବାଟା ନାଈ ବଲି ମୁଈ ଜାନି । ମାତରୁ କାଈମିସା ଗଟେକ୍ କାଦି ପରମେସରୁ ନିବୁଲ୍ଲା ଆଟେ ବଲି ଗଟେକ୍ ଲକ୍ ବିସ୍ବାସ୍ କଲେ, ସେଟା ସେ ନ କାଈଲେ ତାରୁପାଈ ନିକ । ୧୫ ତମେ କାଈ କାଦି ମିସା କାଈଲାରୁପାଈବଲି ଜଦି ତମରୁ ଗଟେକ୍ ବାଈକେ ଦୁକ୍ କରାଇସା, ସେନ୍ତାରୁଆଲେ ତାରୁପାଈ ତମରୁ କାଈ ଆଲାଦ୍ ନାଈ ପାରା ଆଟେ । ତମରୁ କାଈବା କାଦିରୁଲାଗି ଆରିଗଟେକ୍ ଲକ୍ ମନ୍ କଲାନ୍ତି । ସେଟା ନିକ ନଏଁ । କାଈକେବଇଲେ ସେ ମିସା ତମରୁ ସଙ୍ଘର୍ ବିସ୍ବାସି । ଆରି ତାରୁ ଜାଗାଇମିସା କିରିସ୍ଟ ମଲାଆଟେ । ୧୬ ଜଦି ଆରି କନ୍ ରକାମ୍ ତଲାଟଲ୍ଲତି ପରମେସରୁ ମନ୍କେ ଜାଏ ନାଈ ବଲି କେତେଟା ବିସ୍ବାସି ବାବୁବାଈ, ମାତରୁ ସେଟା ବଲ୍ ବଲି ତମେ ବାବୁସା ବଇଲେ ସେଟା କରା ନାଈ । ସେନ୍ତାରୁଆଲେ ସେଟା ନିକ ନଏଁ ବଲି କେ ବାଦିନାପାରତ୍ । ୧୭ ପରମେସରୁ ରାଇଜରୁ ସାସନ୍ ଅବକା ନ କାଈବା କାଦିପିଦିରୁ ନିଅମରୁପାଈ ନାଈ । ମାତରୁ ତାରୁ ମୁଆଟେ ଦରମ୍ ବଲାଈଅଇବାଟା, ବିନ୍ ଲକ୍ମନରୁ ସଙ୍ଘ ମିସି ସୁକ୍ସାନ୍ତିସଙ୍ଘ ରଇବାଟା, ଆରି ସୁକ୍ଲୁଆଡ଼ମା ଦେଇରଇବା ସାରୁଦା ବିସଇ ଆଟେ । ୧୮ ଆମେ କିରିସ୍ଟକେ ଏ ରକାମ୍ ନାମ୍ଲେ, ପରମେସରୁକେ ସାରୁଦା କରାଇବୁ ଆରି ବିନ୍ ଲକ୍ମନକେ ନାମାଈବୁ ।

୧୯ ସେଟାରୁ ପାଈ ଆସା, ଆମେ ଏନ୍ତାରି ତଲାଟଲ୍ଲତି କରୁ, ଜେନ୍ତାରିକି ଆମରୁ ଆମରୁ ବିତ୍ରେ ସୁକ୍ ସାନ୍ତିସଙ୍ଘ ରଇଅଇସି । ଆରି ଆମରୁ ବିସ୍ବାସ୍ ତାଟ୍ ରଇସି । ୨୦ ଜନ୍ କାଦି କାଈବାକେ ବିନ୍ ଲକ୍ମନ ମନ୍ନାଈ, ସେ କାଦି କାଈକରି, ପରମେସରୁ କାମ୍ ନସାଆ ନାଈ । ଜନ୍ ରକାମ୍ କାଦିମିସା କାଈଅଇସି । ମାତରୁ ତମେ କାଈଲାରୁପାଈ ବିନ୍ ଲକ୍ମନକେ ପାପୁବାଟେ ଡାକିନେଲେ, ସେଟା ବୁଲ୍ । ୨୧ ବିନ୍ ଲକ୍ମନ ନିବୁବା କାଦି ଆମେ କାଈବାରୁ ନାଈ । କି ମଦ୍ କାଈବାରୁ ନାଈ । ଆମରୁ ବିତ୍ରେ ରଇବା ଗଟେକ୍ ବାଈ କି ବଇନିକେ ପାପୁବାଟେ ଜିବା ବିସଇ ନ କରୁ । ୨୨ ଏ ବିସଇନେଇ ତମେ କାଈଟା ବିସ୍ବାସ୍ କଲାସ୍ତି ସେଟା ପରମେସରୁ ଆରି ତମରୁ ବିତ୍ରେ ରଅ । ଜନ୍ ଲକ୍ମନ ନିଜରୁ ତଲାଟଲ୍ଲତିରୁପାଈ ନିଜରୁ ବିବେକ୍ ସେମନ୍କେ ଦସ୍ ନ ଦାରେ, ସେ କେତେକ୍ କରମରୁ ଲକ୍ । ୨୩ ଜଦି ଗଟେକ୍ ଲକ୍ ତାରୁ କାଈବାଟା ଟିକ୍ କି ନାଈ ବଲି ବାବୁଲାନି, ଆରି ମନ୍କେ ନ ଲାଗୁବା କାଦି କାଈସି, ସେନ୍ତାରୁଆଲେ ସେ, ପରମେସରୁ ବିରୁଦେ ପାପୁକଲାନ୍ତି । କାଈକେବଇଲେ ସେ ନିଜରୁ ବିବେକ୍କେ ମାନେନାଈ । ଜନ୍ଟା ନିକ ନଏଁ ବଲି ଆମେ ବିସ୍ବାସ୍ କଲୁନି, ଆରି ସେଟାସେ କରିଆଇଲୁନି, ସେନ୍ତାରୁଆଲେ ଆମେ ପାପୁକଲୁନି ।

### ୧୫

ବିନ୍ଲକ୍ମକେ ସାରୁଦା କରାଆ

୧ ଏବେ ଆମେ, ଜାରୁ ବିସ୍ବାସ୍ ତାଟ୍ ଆଟେ, ଜନ୍ ଲକ୍ମନ ବିସ୍ବାସେ ଦୁର୍ବଲ୍ ଆଟତ୍ ଆରି ଅସୁବିଦାଈ ଆଟତ୍, ସେମନ୍କେ ଆମେ ସାଇଜ କରୁବାରୁ ଆଟେ । ଆରି ନିଜେ ସାରୁଦା ରଇବା ବିସଇ ଚିନ୍ତା କରୁବାରୁ ନାଈ । ୨ ମାତରୁ ଆମରୁ ବାଈବଇନିମନକେ ସାରୁଦା କରାଇବାକେ ଆରି ସେମନରୁ ବିସ୍ବାସ୍ ତାଟ୍ କରୁବାକେ ତାକରୁ ପାଈ ନିକ ବିସଇ କରୁବାରୁ ଆଟେ । ୩ କାଈକେବଇଲେ କିରିସ୍ଟ ନିଜ୍ଜକେ ସାରୁଦା କରାଏ ନାଈ । ମାତରୁ ସାସ୍ତରେ ଏନ୍ତାରି ଲେକାଅଇଲାଆଟେ, ଜନ୍ ଲକ୍ମନରୁ କାରାପ୍ କାତା ତମ୍କେ ନିନ୍ଦାକଲା, ସେଟା ମକେମିସା ନିନ୍ଦା କଲାଈ । ୪ କାଈକେବଇଲେ ସାସ୍ତରେ ଜେଡ୍କି ଲେକା ଅଇଲାଆଟେ, ସେ ସବୁ ଆମ୍କେ ସିକାଇବାକେ । ଜେନ୍ତାରିକି, ସାସ୍ତରେଅନି ଜନ୍ ମୁରୁଚି ରଇବାଟା ଆରି ସାରୁଦା କରାଇବାଟା ଆମେ ମିଲାଈଆରୁ, ତେଇଅନି ଆମରୁ ଆସା ବଡ୍ସି । ୫ ପରମେସରୁସେ ଆମ୍କେ ମୁରୁଚିରଇବାଟା ଆରି ସାରୁଦା କରାଇବାଟା ଦେଇସି

। ଆରି ଜିସୁକିରିସଟର ବାଟେ ଇଣ୍ଡି କରି ସବୁର୍ ମନ୍ ଗଟେକ୍ ଅଇବାକେ ସାଇଜ କର । ୬ ଜଦି ସେଟା ଅଇଲେ ଆମର୍ ମାପୁରୁ ଜିସୁକିରିସଟର ବାବା ଆରି ଆମର୍ ପରମେସରକେ ଡାକ୍ପୁଟା କରବାତେଇ ତମେ ସବୁ ଗଟେକ୍ ଅଇସା ।

ଜିଉଦି ଆରି ଜିଉଦିନଇଲା ଲକ୍ମନର୍ ପାଇ ସୁବ୍ କବର୍

୭ କିରିସଟ ଜେନ୍ତି ତମ୍‌କେ ଡାକ୍ଲା ଆଟେ, ତମେ ମିସା ସେନ୍ତି ତମର୍ ସଙ୍ଗର୍ ବିସ୍‌ବାସିମନ୍‌କେ ଡାକିନିଆ । ତମେ ଜଦି ଏନ୍ତି କଲେ ପରମେସର୍ ଡାକ୍ପୁଟା ପାଇସି । ୮ କିରିସଟ ଜିଉଦିମନ୍‌ରଲଗେ ଗଟେକ୍ ଗତିଦାଙ୍ଗ୍‌ତାପାରା ଅଇଲା । ପରମେସର୍ ତାକର୍ ଆନିଦାଦିମନ୍‌କେ ଜନ୍ କାତା ଦେଇରଇଲା, ସେଟା ସତ୍‌ସଙ୍ଗ୍ ସେ ପୁରାପୁରୁନ୍ କରସିଆକା ବଲି ଦେକାଇବାକେ ସେନ୍ତାରି କରିରଇଲା । ୯ ଜିଉଦି ନ ଅଇଲା ଲକ୍ମନକେ ପରମେସର୍ ତାର୍ ଦୟା ଦେକାଇସି, ଆରି ସେମନ୍ ତାକେ ଡାକ୍ପୁଟା କରବାଇ । ଜେନ୍ତାରି କି ସେମନ୍ ତାକେ ଡାକ୍ପୁଟା କରବାଇ । ଏ ବିସଇ ସାସ୍‌ତରେ ଲେକା ଆଟେ ।

ମୁଇ ଜିଉଦିନଇଲା ଲକ୍ମନର୍ ବିତ୍‌ରେ ତମ୍‌କେ ଡାକ୍ପୁଟା କରବି,

ସବୁବେଲା ତମର୍ ଡାକ୍ପୁଟାର୍ ଗିଡ୍ ଗାଇବି ।

୧୦ ଆରି ଏନ୍ତାରିମିସା ଲେକାଆଟେ,

“ତମେ ଜିଉଦିନଇଲା ଲକ୍ମନ ଏ ସାର୍‌ଦାଇ ମିସା

କାଇକେବଇଲେ ଏବେ ତମେ ଜିଉଦିମନ୍‌ରପାରା ।

ତମେ ପରମେସରର୍ ବାଟିରଇବା ଜିଉଦିମନ୍‌ରପାରା ।”

୧୧ ଆରିତରେକ୍ ସେ କଇଲାଆଟେ

“ଜେଡ୍‌କି ଜିଉଦି ନ ଅଇଲା ଲକ୍ମନ ପରମେସରକେ ତୁସ୍‌ତିକରା !”

ଆରି ଗୁଲାଇ ମୁନୁସ୍ ଜାତି ତାକେ ଡାକ୍ପୁଟା କରା ।

୧୨ ଆରି ଜିସାଇଅ କଇଆଟେ,

“ଜେସିର୍ କୁଟୁମେଅନି ଗଟେକ୍ ଲକ୍ ବାରଇସି,

ସେ ଜିଉଦି ନଇଲା ଲକ୍ମନକେ ସାସନ୍ କରସି

ଆରି ସେମନ୍ ତାକେ ବିସ୍‌ବାସ୍ କରବାଇ ।”

୧୩ ପରମେସର୍ ଜେକି ସବୁ ଆସାର୍ ମୁଲ୍‌ଡେଲି । ତମର୍ ବିସ୍‌ବାସର୍ ଲାଗି ସେ ତମ୍‌କେ ସବୁ ସାନ୍ତି ସାର୍‌ଦା ଦେଅ । ସୁକଲ୍ ଆଡ୍‌ମାର୍ ବପୁ ସଙ୍ଗ୍ ତମର୍ ଆସା ଅଦିକ୍ ଅଇଜାଅ ।

ଜିଉଦିନଇଲା ଲକ୍ମନର୍ ଟାନ୍‌ନେ ପାଉଲର୍ ସେବାକାମ୍

୧୪ ଏ ବାଇବଇନିମନ୍ ତମର୍ ବିସ୍‌ବାସ୍ ନିକଆଟେ, ବଲି ମୁଇ ଜାନିଆଟି । ଆରି ପରମେସରର୍ ବାକିଅ ତମେ ନିକସଙ୍ଗ୍ ବୁଜ୍‌ଲାସ୍‌ନି ଆରି ଏବେ ତମେ ବିନ୍ ଲକ୍ମନକେ ମିସା ସିକାଇପାର୍‌ସା । ୧୫ ମାତର୍ ଏ ଚିଟିଡେଇ ତମ୍‌କେ କେତେଟା ବିସଇନେଇ ଜାଗ୍‌ରଡ୍ କରାଇବାକେ ମୁଇ ବପୁ ଅଇଲି ଆଟି । କାଇକେବଇଲେ ପରମେସର୍ ମକେ ଅଦିକାର୍ ଦେଲାକେ ମୁଇ ତାଟ୍‌ସଙ୍ଗ୍ ଏଟା ତମ୍‌କେ କଇଲିନି । ୧୬ କିରିସଟ ଜିସୁର୍ ଦାଙ୍ଗ୍‌ତା ଇସାବେ ଜିଉଦି ନଇଲା ଲକ୍ମନର୍ ପାଇ କାମ୍ କରବାକେ ପରମେସର୍ ମକେ ବାଟ୍‌ଲାଆଟେ । ପରମେସରର୍ ସୁବ୍‌କବର୍ ଜାନାଇବା ପାଇ ମୁଇ ଗଟେକ୍ ଦରମ୍ ଗୁରୁ ଇସାବେ କାମ୍‌କଲିନି । ଜେନ୍ତାରିକି ଜିଉଦିନଇଲା ଲକ୍ମନ ଗଟେକ୍ ସୁକଲ୍ ବଲି ଇସାବେ ପରମେସରକେ ସର୍‌ପିଦେବାଇ । ଏ କାମ୍ ସୁକଲ୍‌ଆଡ୍‌ମା ପୁରାପୁରୁନ୍ କରସି । ୧୭ କିରିସଟ ଜିସୁର୍‌ଡେଇ ମକେ ମିସାଇଲାପାଇ, ତାର୍ ଏ ସେବା କାମ୍ କରବାକେ ମୁଇ ମୁଲ୍‌କେ ଲାଜ୍ ଅଇନାଇ । ୧୮ ଜିଉଦି ନ ଅଇଲା ଲକ୍ମନକେ ପରମେସରର୍ ଆଦେସ୍ ମାନବାକେ କିରିସଟ ମକେ ଦେଇକରି ଜନ୍‌ଟା ସାଦନ୍ କଲାଆଟେ, ଅଦ୍‌କା ସେଟାସେ ମୁଇ ତାଟ୍ ସଙ୍ଗ୍ କଇବି । କାଇଟା କଇବାର୍‌ଆଟେ, ଆରି

କାଈଟା କରୁବାରୁଆତେ, ସେମକେ ଜାନାଇଲାକେ ଏଟା ଅଇଲା । ୧୯ ଚିନର୍ ଲାଗି, କାବାଅଇଜିବା କାମରଲାଗି ଆରି ସୁକଲ୍‌ଆଡ଼ମାରୁ ବପୁରଲାଗି ଏଟା ସବୁ କଲାଆତେ । ସେଟାରୁ ପାଇ ମୁଇ ଜିରୁସାଲମେଅନି ଇଲିରିକମକେ ଗାଲାବେଲେ ବାଟେ କିରିସ୍‌ଟର ସୁବକବର ପୁରାପୁରୁନ୍ ଜାନାଇଲି ଆଟି । ୨୦ ଜନ୍ ଜାଗାମନ୍‌କେ ଲକ୍‌ମନ୍ କିରିସ୍‌ଟର ବିସଇ ସୁନତ୍‌ନାଇ, ସିତି ତାର କବର ଜାନାଇବାରୁ ମରୁ ଆଦେସ୍ ରଇଲା । କାଈକେବଇଲେ ଜନ୍‌ଲକ୍‌ମନ୍‌କେ ସୁବକବର ବିନ୍‌ଲକ୍‌ମନ୍ ଜାନାଇ ସାରାଇଆତଡ଼, ତେଇ ମୁଇ ଆରିତରେକ୍ କଇବାକେ ମନ୍ କରିନାଇ । ୨୧ ଜେକ୍ରିକି ସାସ୍‌ତରେ ଲେକା ଆତେ,

“ଜନ୍‌ଲକ୍‌ମନ୍ ତାର ନାଉଁ ଏବକେଜାକ ସୁନତ୍‌ନାଇ, ଏବେ ସେ କେ ବଲି ଜାନ୍‌ବାଇ  
 |  
 ଜନ୍‌ଲକ୍‌ମନ୍‌କେ ଏବେଜାକ ତାର ବିସଇ ଜାନାଅଡ଼ନାଇ, ସେମନ୍ ବୁଜ୍‌ବାଇ  
 |”

ରମ୍‌ଦେସେ ଜିବାକେ ପାଉଲର୍ ଜଜ୍‌ନା

୨୭ ✨ମୁଇ ବେସିତର୍ ତମକେ ଦେକିଆଇବାଟା ପିଟିଗାଲା ଆତେ । ୨୩ ମାତର୍ ଏ ଜାଗା ଲଗେ ମରୁ କାମ୍ ସାରିଗାଲା ଆତେ । ଆରି ତମକେ ଦେକ୍‌ବାକେ ମରୁ ବେସି ବରସର୍ ଆସା ଏବେ ପୁରାପୁରୁନ୍ ଅଇସି । ୨୪ ସାରାସାରି ଏବେ ମୁଇ ତମକେ ଦେକ୍‌ବାକେ ଆସିଅଇସି । ଏସ୍‌ପେନ୍ ଦେସେ ଜିବା ବାଟେ ତମକେ ଦେକିଆଇବି ବଲି ବାବ୍‌ଲିଆଟି । ତମରଟାନେ ସାରଦାସଙ୍ କେତେ ବେଲା ବିତାଇଲା ପତେ ତମର ସାଇଜେ ଏସ୍‌ପେନ୍ ଦେସେ ଉଟିଜିବି ।

୨୫ ✨ଏବେ ମୁଇ ପର୍‌ତୁମ୍ ଜିରୁସାଲମେ ଗାଲିନି । କାଈକେବଇଲେ ତେଇର୍ ବିସ୍‌ବାସିମନ୍‌କେ ସେବାକାମେ ସାଇଜ କରୁବା କେତେକ୍ ତାବୁ ନେଇଦେବାକେ ମକେ କଇଲା ଆତଡ଼ । ୨୬ ମାକିତନିଆ ଆରି ଗିରିସର୍ ଆକାୟାତେଇ ରଇବା ବିସ୍‌ବାସିମନ୍ ଜିରୁସାଲମେ ରଇବା ଅରକିଡ଼ ବିସ୍‌ବାସିମନ୍‌ରୁପାଇ ଏ ସାଇଜ ପାଟାଇବାଟା ନିକ ରଇସି ବଲି ବାବ୍‌ଲାଇ । ୨୭ ✨ସେମନ୍ ବେସି ସାରଦାଅଇ ଏ ସାଇଜ ଦେଲାଇନି । ଏଟା ଦେଇକରି ସେମନ୍ ଟିକ୍ ବିସଇ କଲାଇ । କାଈକେବଇଲେ, ଜିରୁସାଲମେ ରଇବା ବିସ୍‌ବାସିମନ୍‌ର ଟାନେ ସେମନ୍ ରୁନି ଅଇଆତଡ଼ । ସେଟା କେନ୍‌ତିବଇଲେ ଜିଉଦିମନ୍‌ରଟାନେଅନିସେ ପର୍‌ମେସରର୍ ବାକିଅ ଇଡିର୍ ଜିଉଦି ନ ଅଇଲା ଲକ୍‌ମନ୍‌କେ ଆନିରଇଲା । ସେଟାରୁପାଇ ତେଇର୍ ଅରକିଡ଼ ଜିଉଦିମନ୍‌କେ କେତେକ୍ ତାବୁ ସାଇଜ ପାଟାଇବାଟା ନିକ ବିସଇ । ୨୮ ଆରି ମରୁ ଏ କାମ୍ ସାରାଇକରି ସେମନ୍‌ର ସାଇଜର୍‌ପାଇ ଆନିରଇବା ତାବୁ ସର୍‌ପିଦେଲା ପତେ, ମୁଇ ଇସ୍‌ପେନ୍‌ଦେସେ ଜିବାକେ ବାରଇବି । ଆରି ବାଟେ ତେବିକରି ତମକେ ଦେକ୍‌ବି । ୨୯ ମୁଇ ଜାନିଆଟି, ତମରଟାନେ କେଟ୍‌ଲାବେଲେ କିରିସ୍‌ଟର୍ ପୁରାପୁରୁନ୍ ଆସିରୁବାଦ୍‌ନେଇ ମୁଇ ଆଇବି ।

୩୦ ଏ ମରୁ ଆଲାଦର୍ ବାଇବଇନିମନ୍ ! ଆମର ମାପୁରୁ ଜିସୁ କିରିସ୍‌ଟର୍ ନାଉଁ ଦାରି ଆରି ସୁକଲ୍‌ଆଡ଼ମା ଦେଲା ଆଲାଦର୍ ପାଇ ମୁଇ ତମକେ ଗୁଆରି କଲିନି, ମରୁ ପାଇ ମନ୍‌ଦେଇ ପାର୍‌ତନା କରତେରୁଆ । ୩୧ ଜିଉଦା ଦେସେ ରଇବା ବିସ୍‌ବାସି ନ କଲା ଲକ୍‌ମନ୍‌ର ଟାନେଅନି ମକେ କାଈଟା ନ ଅଅ ବଲି ପାର୍‌ତନା କରା । ଜିରୁସାଲମାରୁ ବିସ୍‌ବାସିମନ୍‌କେ ଜନ୍ ସାଇଜ ମୁଇ ନେଇଦେଲିନି, ସେଡ଼କିରେ ସେମନ୍ ସାରଦାସଙ୍ ରଅଡ଼, ବଲି ସେଟାରୁପାଇ ମିସା ପାର୍‌ତନା କରା । ୩୨ ସେଟା ସାରଲାପତେ ପରମେସର୍ ମନ୍ କଲେ ମୁଇ ତମର ଲଗେ ଆଇବି । ଆରି ତମର

✨ ୧୫:୨୨ ୧୫:୨୨ ରମିୟ ୧:୧୩ ✨ ୧୫:୨୫ ୧୫:୨୫ ୧ମ କରକ୍ରିୟ ୧୭:୧-୪ ✨ ୧୫:୨୭ ୧୫:୨୭ ୧ମ କରକ୍ରିୟ ୯:୧୧



ସଙ୍ଗ ସାରଦାସଙ୍ଗ କେତେଦିନ ରଇକରି ମର ମନେ ସାନ୍ତି ପାଇବି । ୩୩ ସାନ୍ତିଦେବା ପରମେସର ତମର ସବୁ ଲକର ସଙ୍ଗ ରଅ । ଆମେନ ।

## ୧୭

ଜୁଆର୍

୧୧ ଚିରିତେଇ ପିବି, ଜେ କି କିରିସଟର୍ ଲାଗି ଆମର ବଇନି ଅଇଲାଆଚେ, ତାର ବିସଇ ଜାନାଇଲିନି । ସେ କେକ୍ ଜାଗାଇ ରଇବା ମଣ୍ଡୁଲିଟାନେ ଏବେ ସେବାକାମ୍ କଲାମି । ତାକେ ମୁଇ ତମରଲଗେ ପାଟାଇଲିନି । ୧୨ ଆମର ମାପୁରୁ ନାଉଁ ଦାରି ତାକେ ଡାକିନିଆ । କାଇକେବଇଲେ ଏନ୍ତାରି ଚଲାଟଲୁଟି ବିସବାସିମନରପାଇ ନିକ । ତାକେ କାଇଆଲେ ଲତା ରଇଲେ ସାଇଜ କରା । କାଇକେବଇଲେ ସେ ମକେ ଆରି ବେସି ବିସବାସିମନକେ ସାଇଜ କଲାଆଚେ ।

୩ \* କିରିସଟର୍ ମର ସଙ୍ଗ କାମ୍‌କରୁମନ୍ ପିରିସକିଲା ଆରି ଆକିଲାକେ ମର ଜୁଆର୍ ଜାନାଆ । ୪ ସେମନ୍ ମକେ ସାଇଜ କଲାପାଇ ନିଜର୍ ଜିବନ୍ ବିପଦେ ପାକାଇ ଆଚଡ୍ । ଏଟାରପାଇ ମୁଇ ସେମନ୍‌କେ ବେସି ଜୁଆର୍ କଲିନି । ଅବକା ମୁଇସେ ନାଇ, ଇତି ରଇବା ସବୁ ଜିଉଦି ନଇଲା ମଣ୍ଡୁଲିମନ୍ ମିସା ସେମନ୍‌କେ ଜୁଆର୍ ଜାନାଇଲାଇନି । ୫ ସେମନ୍‌ର ଗରେ ପାରତନାକେ ରୁଣ୍ଡବା ମଣ୍ଡୁଲିକେ ମିସା ମର ଜୁଆର୍ ଜାନାଇଲିନି ।

ମର ଆଲାଦର୍ ମଇତର୍ ଏପାଇନେତନ୍‌କେ ମର ଜୁଆର୍ ଜାନାଇଲିନି । ଆସିଆ ରାଇଜେ ସେ ସିଗ୍ ପର୍ତୁମ୍ କିରିସଟ ବିସବାସି ଅଇରଇଲା । ୬ ତମର ନିକ ପାଇ ବେସି କସଟ ପତିରଇବା ମରିୟମକେ ମର ଜୁଆର୍ ଜାନାଇ ଦିଆସ୍ । ୭ ଆନ୍‌ରନିକ୍ ଆରି ୟୁନିୟାକେ ମର ଜୁଆର୍ ଜାନାଇଲିନି । ଏ ଦୁଇଟା ମର ସଙ୍ଗର୍ ଜିଉଦିଲକ୍ । ସେମନ୍ ମର ସଙ୍ଗ ବନ୍ଦିସାଲେ ରଇଲାଇ । ମର ଆଗତୁ ସେମନ୍ କିରିସଟକେ ବିସବାସ କଲାଇ । ଆରି ସବୁ ପେରିଡ୍ ସିସମନ୍ ସେମନ୍‌କେ ସନ୍‌ମାନ୍ ଦେବାଇ ।

୮ ମାପୁରୁଲଗେ ମର ଆଲାଦର୍ ମଇତର୍ ଆମପଲିଆକେ ଜୁଆର୍ ଜାନାଇଦିଆସ୍ । ୯ କିରିସଟର୍ ସେବାଇ ମର ସଙ୍ଗାରି ଉର୍ବାନ ଆରି ମର ଆଲାଦର୍ ମଇତର୍ ତାକିୟକେ ମିସା ମର ଜୁଆର୍ ଜାନାଇଦିଆସ୍ । ୧୦ କିରିସଟକେ ବିସବାସକରି ସେବାକର୍ବା ଆପଲ ଆରି ଆରିସତବଲର୍ କୁଟୁମର୍ ସବୁକେ ମର ଜୁଆର୍ ଜାନାଇଦିଆସ୍ । ୧୧ ମର ସଙ୍ଗର୍ ଜିଉଦି ଏରଦିୟନ୍ ଆରି ନାରସିସର୍ ଗରେ ରୁଣ୍ଡବା ବିସବାସି ବାଇବଇନିମନ୍‌କେ ମର ଜୁଆର୍ ଜାନାଇଦିଆସ୍ ।

୧୨ ମାପୁରୁ ସେବାଇ ଲାଗିରଇଲା ତିରିପନ୍ ଆରି ତିରିପସା ଆରି ମାପୁରୁ ପାଇ ବେସି କସଟ ପତିରଇବା ଆଲାଦର୍ ପର୍ସିସକେ ମର ଜୁଆର୍ ଜାନାଇଦିଆସ୍ । ୧୩ \* ମାପୁରୁ ମୁକିଅ ଦାଙ୍ଗ୍‌ତା ରୁପସ୍ ଜେ କି ସେବା କାମ୍‌ଟାନେ ଆବଡ୍ ଅଇ କଲାଆଚେ । ଆରି ମର ଆୟାପାରା ତାକର୍ ଆୟାକେ ମିସା ମର ଜୁଆର୍ । ସେ ମକେ ନିଜର୍ ପଅ ପାରା ଦେକଲା । ୧୪ ଆସୁକିରି, ପେଲେଗନ୍, ଅର୍ମିସ୍, ପାଡ୍‌ରବା, ଅର୍ମାସ୍ ଆରି ସେମନ୍‌ର ସଙ୍ଗ ରଇବା ସବୁ ବିସବାସି ବାଇବଇନିମନ୍‌କେ ଜୁଆର୍ ଜାନାଆ । ୧୫ ପିଲଲଗ୍ ଆରି ଜୁଲିଆ, ନିରୁସ୍ ଆରି ତାର ବଇନି ଆରି ଅଲୁମ୍‌ପା ଆରି ସେମନ୍‌ର ସଙ୍ଗ ରଇତେରଇବା ସବୁ ପର୍ମେସରର୍ ଲକ୍‌ମନ୍‌କେ ମର ଜୁଆର୍ ଜାନାଆ ।

୧୬ ତମର ବିଡ୍‌ରର୍ ଆଲାଦ୍ ଦେକାଇକରି ଗଟେକ୍ ଲକ୍ ଆରି ଗଟେକ୍ ଲକ୍‌କେ ଜୁଆର୍‌ବେଟ୍ ଉଆ । କିରିସଟର୍ ସବୁ ମଣ୍ଡୁଲି ତମକେ ଜୁଆର୍ ଜାନାଇଲାଇନି ।

ପାଉଲର୍ ସାରାସାରି ଆଦେସ୍

୧୭ ଏ ମର ବାଇବଇନିମନ୍, ମୁଇ ତମ୍ବକେ ବାବୁଜିଆ କଲିନି, ତମେ ଜାଗରତ୍ ଅଇକରି ରୁଆ । ତମର ବିସ୍ବାସ୍ ଆରି ଗଟେକ୍ ମନ୍ ଅଇରଇବାଟା ଜନ୍ ଲକ୍ମନ୍ ବେଗଲାଇବାକେ ଚେସ୍ଟା କଲାଜନି, ତାକ୍‌ଟାମେଅନି ଦୁରିକେ ରୁଆ । କାଇକେବଇଲେ, ତମେ ଜନ୍ ସିକିଆ ପାଇଆଟାସ୍, ତାର୍ ବିରଦ୍ କଲାଜନି । ୧୮ ଜନ୍ ଲକ୍ମନ୍ ଏନ୍ତାରି କାମେ ବୁଡି ଆଟଡ୍, ସେମନ୍ ଆମର୍ ମାପୁରୁ କିରିସ୍‌ଟର୍ ଆଦେସ୍ ମାନଡ୍ ନାଇ । ସେମନ୍ କାଲି ନିଜର୍ ମନ୍ କର୍ବାଟା ପୁରାପୁରୁନ୍ କର୍ବାକେ ତେରେପେତେ ଅଇଲାଜନି । ସୁଆଦ୍ କାତା ଆରି ତିପୁଲ୍ କାତା କଇ ଦରମ୍ ଲକ୍ମନ୍‌କେ ବୁଲ୍‌କାଇଦେଲାଜନି । ୧୯ ତମେ ପର୍ମେସରର୍ ଆଦେସ୍ ମାନଲାସ୍‌ନି ବଲି ତାର୍ ସୁବ୍‌କବର୍ ଗୁଲାଇବାଟର୍ ଲକ୍ ଜାନଲାଇ । ସେଟାର୍ ପାଇ ମୁଇ ବେସି ସାର୍‌ଦା । ମୁଇ ମନ୍ କଲିନି, ତମେ ସଡ୍ ବିସଇତେଇ ଗିଆନି ଉଆ ଆରି କାରାପ୍ ବିସଇତେଇ ବୁଡି ରୁଆନାଇ । ୨୦ ଆରି ସାନ୍ତିଦେଉ ପରମେସର୍ ତମର୍ ଲାଗି ସଇତାନକେ ପୁରାପୁରୁନ୍ କୁରୁପନାସ୍ କର୍ସି ।

ଆମର୍ ମାପୁରୁ ଜିସୁକିରିସ୍‌ଟର୍ ଜିବନ୍‌ଦୁକାଇଲାଟା ତମର୍ ସଙ୍ଗ୍ ସବୁବେଲେ ରଅ ।

୧୧ \*ମର୍ ସଙ୍ଗ୍ ମିସିକରି କାମ୍‌କର୍ବା ସଙ୍ଗାରି ତିମତି, ଆରି ଆମର୍ ଜିଉଦି ବାଇମନ୍ ଲୁକିଅ, ଜାସନ୍ ଆରି ସପିପାଡ୍‌ର ତମ୍ବକେ ଜୁଆର୍ ଜାନାଇଲାଜନି ।

୨୨ ମୁଇ ତରୁଡିଅ, ମର୍ ସଙ୍ଗାରି ପାଉଲ୍, କଇଦେଲାକେ ଏ ଚିଟି ଲେକ୍‌ଲିଆଟି । ମାପୁରୁର୍ ନାଉଁ ଦାରି ମୁଇ ତମ୍ବକେ ଜୁଆର୍ ଜାନାଇଲିନି ।

୨୩ \*ଗାୟ୍‌ସ୍ ତମ୍ବକେ ଜୁଆର୍ ଜାନାଇଲାମାନି । ମୁଇ ତାର୍ ଗରେ ରଇଲିନି ଆରି ତାର୍ ଗରେ ରୁଣ୍‌ବା ଇଡିର୍ ବିସ୍ବାସିମନ୍ ତମ୍ବକେ ଜୁଆର୍ ଜାନାଇଲାଜନି । ଏ ଗଡର୍ ଡାବୁ ଇସାବ୍‌କିତାବ୍ କରୁ ଏରାସ୍‌ଟ ଆରି ବାଇ କାର୍‌ତ ମିସା ତମ୍ବକେ ଜୁଆର୍ ଜାନାଇଲାମାନି । ୨୪ ମାପୁରୁ ଜିସୁକିରିସ୍‌ଟର୍ ଜିବନ୍‌ଦୁକାନି ତମର୍ ସବୁ ଲକ୍‌ର୍ ଲାଗେ ରଅ ।

ପାର୍‌ତନା ଆରି ସାର୍‌ଦାସଙ୍ଗ୍ ଏ ଚିଟି ସାର୍‌ଲାଟା

୨୫ ଆସା, ପରମେସର୍‌କେ ଡାକ୍‌ପୁଟା କରୁ । ମୁଇ ଜାନାଇତେରଇବା ଜିସୁ କିରିସ୍‌ଟର୍ ବିସଇର୍ ସୁବ୍ କବର୍ ଆରି ଜୁଗ୍ ଜୁଗ୍ ଦାରି ଲୁଟି ରଇବା ଚିକିନିକିର୍ ସଡ୍ ଇସାବେ ରଇବା ତମର୍ ବିସ୍ବାସ୍ ପରମେସର୍ ଡାଟ୍‌କରି ସଙ୍ଗାଇବାକେ ପାରେ । ୨୬ ସେ ଚିକିନିକିର୍ ସବୁ ସଡ୍ ବବିସଡ୍‌ବକ୍‌ଡାମନ୍‌ର୍ ସାସ୍‌ତରେ ସେ ଜାନାଇଲା ଆଟେ । ଆରି ଏବେ ମାପୁରୁ ପରମେସରର୍ ସଡ୍ ଜୁଗ୍ ଜୁଗ୍ ଅନି ସବୁ ଲକ୍ମନ୍‌ର୍ ବିଡ୍‌ରେ ଜାନାଇଆଟେ । ଇତିଅନି ସବୁ ବିସ୍ବାସ୍ କରି ପରମେସରର୍ କାତାମାନି ଚାଲି ପାର୍‌ବାଇ ।

୨୭ ମାପୁରୁ ଜିସୁ କିରିସ୍‌ଟର୍‌ତେଇଅନି ସବୁ ଜାନବା ଗଟେକ୍‌ସେ ପରମେସର୍ କାଲେ କାଲେ ଜୁଗେ ଜୁଗେ ଡାକ୍‌ପୁଟା ପାଅ । ଆମେନ୍ !

\* ୧୭:୨୧ ୧୭:୨୧ ପେରିଡ୍ ୧୭:୧      \* ୧୭:୨୩ ୧୭:୨୩ ପେରିଡ୍ ୧୯:୨୯; ୧ମ କରକ୍ତିୟ ୧:୧୪;୨ୟ ତିମତି ୪:୨୦

# କରନ୍ତଃୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କ ପ୍ରଥମ ପତ୍ର

## କରନ୍ତଃୟ ମଣ୍ଡଳୀର ଲକ୍ଷ୍ମଣନରୁଟାନେ ପାଉଲ୍ ପରତୁମ୍ଭତର୍ ତିଟି ଲେକ୍‌ଲାଟା ଏ ବଇ ବିସଇତେଇ ଜାନ୍‌ବାଟା

ପରତୁମ୍ଭ କରନ୍ତଃୟ ତିଟି ପେରିଡ୍ ପାଉଲ୍ ଲେକିରଇଲା । ଏଟା ଜିସୁ କିରିସ୍‌ଟ ଜନମ ଅଇକରି ୫୫ ବରସ ପତେ ଲେକିରଇଲା । ୧:୧ପାଉଲ୍ ଲେକିରଇଲା ଦୁଇଟା ତିଟି ବିଡ୍‌ରେଅନି ଏଟା ୧ ମ ତିଟି । ସେ ଏପିସିତେଇ ରଇଲା ବେଲାଇ ଏ ତିଟି ଲେକିରଇଲା । ମାକିଦନିଆଅନି କରନ୍ତି ବାସାଅଇଲା ଆଗେ ଲେକାଅଇରଇଲା । ୧୭:୫-୯ ।

ପାଉଲ୍ ଏ ତିଟିଟାନେ ମଣ୍ଡଳୀ ବିଡ୍‌ରେ ଅଇତେ ରଇବା କରାପ୍ କାମ୍, ଦଲ୍ ଦଲ୍ ବିଡ୍‌ରେ ବେଗ୍‌ଲା ବେଗ୍‌ଲି ଅଇବାଟା, ପାପ୍ କାମ୍ କର୍‌ବାଟା ଜାନିରଇଲା । ଏ ସବୁ ବିସଇ ମଣ୍ଡଳୀର ଲକ୍ଷ୍ମଣନରୁ ଟାନେ ସୁନିକରି ଏ ସବୁର୍ ଉତର୍ ଦେବାକେ ଦିଆନ୍ ଦେଇତେ ରଇଲା । କରନ୍ତଃୟ ନଅରେ ମୁନ୍‌ସ୍ ପିଲା ମାଇଜିଟକି ଅଇବା କରାପ୍ କାମ୍‌ର୍ ପାଇ ଡାକ୍‌ପୁଟା ରଇଲା । ତେବର୍ ପାଇ ମଣ୍ଡଳୀମନ୍‌କେ ଏନ୍ତାରି ଅସୁବିଦାମନ୍ ଆଇତେ ରଇଲା । ୧ ମ କରନ୍ତି ଆଲାଦ୍ ବିସଇ ଗଟେକ୍ ବାଗ୍ ଦାରିଆତେ ।

### ଏ ବଇଟାନେ ରଇବାଟା

୧. ପାଉଲ୍ କରନ୍ତିଏ ରଇବା ଲକ୍ଷ୍ମଣନକେ କ୍ରୁଆର୍ ଜାନାଇଲାନି ଆରି ସେମନର୍ ପାଇ ପରମେସର୍‌କେ ଦନିଅବାଦ୍ ଦେଲାନି । ୧:୧-୯
୨. ପାଉଲ୍ କରନ୍ତି ମଣ୍ଡଳୀଅନି ସୁନି ରଇବା ମଣ୍ଡଳୀ ମଣ୍ଡଳୀ ବେଗ୍‌ଲି ଜାଇରଇବା ବିସଇ ସିକିଆ ଦେଲାନି । ୧:୧୦;୪:୨୧
୩. ବିନ୍‌ଟା ଅଇଲାନି ମାଇଜିଟକି ମୁନ୍‌ସ୍ ପିଲା ଅଇବା କାରାପ୍ କାମ୍ କରି ଗଟେକ୍ ଲକ୍ ଆରି ଗଟେକ୍ ଲକ୍‌କେ କରର୍ ଦୁଆର୍ ଜାକ ନେବା ବିସଇ ଲେକିଆତେ । ୫-୬
୪. ପତେ ଜିବା ବିସଇ ମୁର୍ତ୍ତିମନ୍‌କେ ବଲିଦେବାଟା, ସବୁ ମିସିକରି ପାର୍‌ତନା କର୍‌ବାଟା, ଆଡ୍‌ମାଇ ଦାନ୍ ପାଇଲାଟା ଆରି ମରି କରି ଆରି ତରେକ୍ ଉର୍‌ବାଟା ବିସଇ ଲେକା ଆତେ । ୭-୧୫
୫. ସାରାସାରି ସେ ନିଜେ କର୍‌ତେରଇବା କେତେଟା ବିସଇ ଲେକିକରି ସାରାଇଲାନି । ୧୭

୧ ମୁଇ ପାଉଲ୍ ଆରି ଆମର୍ ସଙ୍ଗର୍ ବିସବାସି ସସ୍‌ତିନା କ୍ରୁଆର୍ ଜାନାଇଲୁନି । ପରମେସର୍‌ର୍ ମନ୍ କଲା ଇସାବେ କିରିସ୍‌ଟ ଜିସୁର୍ ପେରିଡ୍ ଅଇବାକେ ମକେ ବାଟିଆତେ ।

୨ \*କରନ୍ତଃୟ ନଅରେ ରଇବା ପରମେସର୍‌ର୍ ମଣ୍ଡଳୀର ଲକ୍ଷ୍ମଣନକେ ଲେକ୍‌ଲୁନି । ପରମେସର୍‌ ତମ୍‌କେ ଜିସୁକିରିସ୍‌ଟ ସଙ୍ଗ୍ ମିସାଇ, ତାର୍ ନିଜର୍ ଲକ୍ କଲାଆତେ । ଆରି ମାପୁରୁ ଜିସୁକିରିସ୍‌ଟକେ ଉପାସନା କର୍‌ବା, ସବୁ ଜାଗାଇ ରଇବା ଲକ୍‌ର୍ ସଙ୍ଗ୍ ତମ୍‌କେ ସୁକଲ୍ ଅଇବାକେ ବାଟିଆତେ । ସେ ଆମର୍ ମାପୁରୁ ଆରି ଡାକର୍ ମିସା ।

୩ ଆମର୍ ବାବା ପରମେସର୍‌ ଆରି ଜିସୁ କିରିସ୍‌ଟ ତମ୍‌କେ ଜିବନ୍ ଦୁକାଇ ସାନ୍ତି ଦେଅ ।

କିରିସ୍‌ଟର୍ ଟାନେ ଆସିର୍‌ବାଦ୍

☆ ୧:୨ ୧:୨ ପେରିଡ୍ ୧୮:୧

୪ କିରିସ୍ତ ଜିସୁର୍ଟାଣେ ପର୍ଯ୍ୟେସରର୍ ଜେକ୍ତି ଜିବନ୍ ଦୁକାଈରଇଲା, ସେ ଜିବନ୍ ଦୁକାନିର୍ ଲାଗି, ମୁଈ ସବୁବେଲେ ତମର୍ ବିସଇନେଇ ପର୍ଯ୍ୟେସରକେ ଦନିଅବାଦ୍ ଦେଲିନି । ୫ କାଈକେବଇଲେ ତମେ କିରିସ୍ତ ସଙ୍ଗ୍ ମିସିକରି ଆତାସ୍ ବଲି ପର୍ଯ୍ୟେସର୍ ତମକେ ଲତାକେ ଅଇବା ସବୁ ବିସଇ, ତମର୍ କାତା ଅଇବା ବପୁ ଆରି ସବୁ ରକାମର୍ ଗିଆନ୍ ଦେଇଆଚେ । ୬ କିରିସ୍ତର୍ ବିସଇନେଇ ତମକେ ଜନ୍ କବର୍ କଇରଇଲୁ, ସେଟା ଟିକ୍ ଆକା ବଲି ଜାନା ପଢ଼ଲାନି । ୭ ତେବେ ତମେ ଆମର୍ ମାପୁରୁ ଜିସୁ କିରିସ୍ତର୍ ଏ ଜଗତେ ବାଉଡି ଆଇବାଟା ଜାଗିରଇବାକେ ସବୁ ରକାମର୍ ଆଡ଼ମାର୍ ଦାନ୍ ମିଲାଇ ଆତାସ୍ । ୮ ଜେକ୍ତିକି ଆମର୍ ମାପୁରୁ ଜିସୁ ଆଇବା ଦିନେ ତମକେ କାଈ ମିସା ନିନ୍ଦା ନ ଅ । ଏଟାପାଇ ମାପୁରୁ ତମକେ ସାରାସାରି ଜାକ ମିସା ତବିର୍ କରି ସଙ୍ଗଇସି ।

୯ ଜନ୍ ପର୍ଯ୍ୟେସରର୍ ଲାଗି ତମେ ତାର୍ ପଅ ଜିସୁ କିରିସ୍ତ, ଆମର୍ ମାପୁରୁସଙ୍ଗ୍ ମିସିବିଡି ରଇବାକେ ବାଟିଅଇ ଆତାସ୍, ସେ ସେକ୍ତି କର୍ସି ଆକା ବଲି ତାଟ୍ ସଙ୍ଗ୍ ବିସବାସ୍ କଲାସ୍ନି ।

ବିସ୍ବାସିମନ୍ ବେଗ୍ଲା ବେଗ୍ଲି ଅଇବାଟା

୧୦ ଏ ମର୍ ବାଇବଇନିମନ୍, ଆମର୍ ମାପୁରୁ ଜିସୁ କିରିସ୍ତର୍ ନାଉଁ ଦାରି ମୁଈ ତମକେ ବାବୁଜିଆ କଲିନି, ଜେକ୍ତିକି ତମେ ସବୁଲକ୍ ଗଟେକ୍ କାତାଇ ରାଜି ଉଆ, ଆରି ତମର୍ ତମର୍ ବିତ୍ତରେ ବେଗ୍ଲା ବେଗ୍ଲି ଉଆନାଇ । ମାତର୍ ତମେ ଗଟେକ୍ ଦଲ୍, ଗଟେକ୍ ମନ୍ ଆରି ଗଟେକ୍ କାତାଇ ରାଜି ଉଆ । ୧୧ ତମର୍ ତମର୍ ବିତ୍ତରେ ଲାଗାଜତା ଆଚେ ବଲି ମୁଈ କଲିୟର୍ କୁଟୁମେ ଅନି ସୁନିଆଟି । ୧୨ \*ମୁଈ ବାବୁଲିନି, ତମର୍ ବିତ୍ତରେ କେତେଲକ୍ କଇବାଇ, ଆମେ ପାଉଲର୍ ବାଟେ ଜିବାଲକ୍, କେତେଲକ୍ ଆପଲର୍ ବାଟେ ଜିବାଲକ୍, କେତେଲକ୍ କେପାଟ୍ ବାଟେ ଜିବା ଲକ୍, ଆରି କେତେଲକ୍ ଆମେ କିରିସ୍ତର୍ ବାଟେ ଜିବା ଲକ୍ । ୧୩ କିରିସ୍ତକେ ମୁକା ମୁକା କରି ବାଗ୍ ବାଗ୍ କଲାପାରା ଦଲ୍ ଅଇଆତାସ୍ । ମୁଈ ପାଉଲ୍, ତମର୍ ପାଇ କୁର୍ସେ ମରିରଇଲି କି ? କି ତମେ ପାଉଲର୍ ନାଉଁ ଦାରି ହୁବନ୍ ନେଇରଇଲାସ୍ ?

୧୪ \*ସେଟାପାଇ କିରିସ୍ତ ଆରି ଗାଅକେ ଚାଡ଼ଲେ ତମର୍ ବିତ୍ତରେ ଆରି କାକେ ମିସା ହୁବନ୍ ଦେଇ ନାଇ ବଲି ମୁଈ ପର୍ଯ୍ୟେସରକେ ଦନିଅବାଦ୍ ଦେଲିନି । ୧୫ ତମେ ମର୍ ନାଉଁ ଦାରି ହୁବନ୍ ନେଇଆତାସ୍ ବଲି କେତେବେଲେ କେ ମିସା କଇଦେବାଇ । ୧୬ \*ଉଁ ତିପାନ୍କେ ଆରି ତାର୍ କୁଟୁମର୍ ଲକ୍କେ ମିସା ହୁବନ୍ ଦେଇରଇଲି । ଆରି କାକେ ହୁବନ୍ ଦେଲିଆଟି କି ନାଇ ବଲି ମକେ ଏଡ଼ ଆସେ ନାଇ । ୧୭ କାଈକେବଇଲେ କିରିସ୍ତ ମକେ ହୁବନ୍ ଦେବାକେ ପାଟାଏ ନାଇ, ନିମାନ୍ କବର୍ ଜାନାଇବାକେ ପାଟାଇଲା ଆଚେ । ଜଦି ଲକ୍ମନର୍ ଗିଆନ୍ ଈସାବେ ସେଟା ମୁଈ କର୍ତି, ସେନ୍ତା ଆଲେ କିରିସ୍ତର୍ କୁର୍ସର୍ କବରର୍ ବପୁ ଉନା ଅଇତା । ୧୮ କୁଟୁପନାସ୍ ଅଇଜାକେତେରଇବା ଲକ୍ମନର୍ପାଇ, କୁଟୁସେ ଅଇଲା କିରିସ୍ତର୍ ମରନର୍ କାତା, କାଈ ମୁଈଅ ନାଇ । ମାତର୍, ଆମର୍ପାଇ ସେଟା ପର୍ଯ୍ୟେସରର୍ ବପୁ । ଆମେ ମୁକ୍ତି ପାଇତେରଇବା ଲକ୍ମନ୍ । ୧୯ ତେବେ ଦରମ୍ ସାସ୍ତରେ ଏକ୍ତି ଲେକାଆଚେ,

ମୁଈ ଗିଆନ୍ ରଇବା ଲକ୍ମନର୍ ଗିଆନ୍ ନସାଇବି,  
ଆରି ବୁଦି ରଇବା ଲକ୍ମନର୍ ବୁଦି  
କାଈ ଲତାକେ ନ ଆଇଲା ପାରା କର୍ବି ।

\* ୧:୧୨ ୧:୧୨ ପେରିଡ଼ ୧୮:୨୪      \* ୧:୧୪ ୧:୧୪ ପେରିଡ଼ ୧୮:୮; ପେରିଡ଼ ୧୯:୨୯; ରମିୟ ୧୭:୨୩  
\* ୧:୧୬ ୧:୧୬ ୧ମ କରନ୍ତଃୟ ୧୭:୧୫

୨୦ ତେବେ ଗିଆନ୍ ରଇବା ଲକ୍ଷ୍ୟମନ୍ତ ବିସଇ କାଇଟା କଇଅଇସି ? ସାସତର୍ ସିକାଉମନ୍ତ ବିସଇ କାଇଟା କଇ ଅଇସି ? ଆରି ଏ ଜୁଗର୍ ଦଦାପେଲା ଅଇବା ଲକ୍ଷ୍ୟମନ୍ତ ବିସଇ କାଇଟା କଇଅଇସି ? ପର୍ମେସର୍ ଏ ଜଗତର୍ ଗିଆନ୍ ରଇବା ଲକ୍ଷ୍ୟମନ୍ତ କେ କାଇ ଲତାକେ ନ ଆଇବାଟା ବଲି କଏ ନାଇ କି ?

୨୧ ଏ ଜଗତର୍ ଲକ୍ଷ୍ୟମନ୍ତ ତାକର୍ ଚାଲାକିସଙ୍ଗ୍ ପର୍ମେସର୍‌କେ ନ ଜାନତ୍ ବଲି, ସେ ନିଜର୍ ଗିଆନ୍ ଇସାବେ ଟିକକଲା । ଆମେ ଜାନାଇବା ବିସଇ ଜନ୍‌ଟା କି କାଇ ମୁଲିଅ ନାଇ ବଲି ଲକ୍ଷ୍ୟମନ୍ତ କଇବାଇ, ସେଟା ବିସବାସ୍ କରବା ଲକ୍ଷ୍ୟମନ୍ତେ ମୁକ୍ତି ଦେବାକେ ପର୍ମେସର୍ ସାର୍‌ଦା ଅଇଲା । ୨୨ ଜିଉଦିମନ୍ତ କାବା ଅଇଜିବା ଚିନ୍ ପାଇ ଦାବି କଲାଇନି । ଗିରିକ୍‌ମନ୍ତ ଗିଆନ୍ କଜଲାଇନି । ୨୩ ମାତର୍ ଆମେ କୁରୁସ୍ ଉପରେ ଚଗାଇ ଅଇରଇବା କିରିସଟର୍ ବିସଇ ଜାନାଇଲୁନି । ଏ କାତା ସୁନ୍‌ଲେ ଜିଉଦିମନ୍ତ ରିସା ଅଇଗାଲାଇନି ଆରି ଜିଉଦି ନଇଲା ଲକ୍ଷ୍ୟମନ୍ତ ସେ କାତାଟ୍ କାଇ ମୁଲିଅ ନାଇ ବଲି ବାଟ୍‌ଲାଇନି । ୨୪ ମାତର୍ ଜିଉଦି ଅଅଡ୍, କି ଜିଉଦି ନଇଲା ଲକ୍ ଅଅଡ୍, ଜନ୍ ଲକ୍ଷ୍ୟମନ୍ତ ବାଟି ଅଇଆଚଡ୍, ସେମନ୍ତ ପାଇ କିରିସଟ୍ ପର୍ମେସର୍‌ର ବପୁ ଆରି ପର୍ମେସର୍‌ର ଗିଆନ୍ ପାରା ଆଚେ । ୨୫ ତେବେ ଜନ୍‌ଟା ପର୍ମେସର୍‌ର ବକୁଆ ବିସଇ ସେଟା ମୁନ୍ତସର୍ ଗିଆନେ ଅନି ଅଦିକ୍ ଆଚେ, ଆରି ଜନ୍‌ଟା ପର୍ମେସର୍‌ର ଦୁର୍‌ବଲ୍ ବିସଇ, ସେଟା ମୁନ୍ତସର୍ ବପୁଟାନେଅନି ଅଦିକ୍ ବପୁ ।

୨୬ ଏ ବାଇବଇନିମନ୍ତ, ପର୍ମେସର୍ ତମ୍‌କେ ବାଟ୍‌ଲା ବେଲେ ତମେ କେନ୍ତାଟ୍ ରଇଲାସ୍ ବାବିଦେକା । ଜଗତର୍ ବିଦି ଇସାବେ ବେସିଲକ୍ ଗିଆନି ନ ରଇଲାସ୍ । ବେସିଲକ୍ ନେତା ନ ରଇଲାସ୍ ଆରି ବଡ୍ ଗରେ ଜନମ୍ ନ ଅଇରଇଲାସ୍ । ୨୭ ପର୍ମେସର୍ ଗିଆନି ଲକ୍ଷ୍ୟମନ୍ତେ ଲାଜ୍ କରାଇବାକେ ଜଗତର୍ ଦୁର୍‌ବଲ୍ ଲକ୍ଷ୍ୟମନ୍ତେ ବାଟ୍‌ଲା, ଜେନ୍ତ୍ରକି ଜଗତେ ଗିଆନି ରଇବା ଲକ୍ଷ୍ୟମନ୍ତ ଆରି ବପୁ ରଇବା ଲକ୍ଷ୍ୟମନ୍ତ ଲାଜ୍ ଅଇଜିବାଇ । ୨୮ ତେବର୍ ପାଇ, ପର୍ମେସର୍ ଏ ଜଗତର୍ କାଇ ଲତାକେ ନ ଆସେ ବଲି କଇବା ଲକ୍ଷ୍ୟମନ୍ତେ, ଆରି ସବୁବେଲେ ତଲେ ରଇ ଲକ୍ଷ୍ୟମନ୍ତ ଗିନ୍ କର୍‌ତେରଇବା ଲକ୍‌କେ ବାଟ୍‌ଲାଆଚେ । ୨୯ ଜେନ୍ତ୍ରା କି ଜଗତ୍ ବିଡ୍‌ରେ ଜନ୍ ଲକ୍ଷ୍ୟମନ୍ତ ବଡ୍ ବଲି ନାମାଇ ଅଇବାଇ, ସେମନ୍ତ କାଇ ଲତାକେ ନ ଆସତ୍ ଆରି ପର୍ମେସର୍‌ର ମୁଆଟେ କେ ମିସା ବଡ୍‌ପନ୍ ଅଇ ନ କଅଡ୍ । ୩୦ ମାତର୍ ପର୍ମେସର୍ ତମ୍‌କେ କିରିସଟ୍ ଜିସୁର୍ ସଙ୍ଗ୍ ମିସାଇଆଚେ ଆରି ସେ କିରିସଟ୍‌କେସେ ଆମର୍‌ପାଇ ଗିଆନ୍ ପାରା କରିଆଚେ । ତାର୍‌ଲାଗି ଆମେ ପର୍ମେସର୍ ସଙ୍ଗ୍ ସଡ୍ ମିସାବିତା ଅଇଲାଟା ଆରିତରେକ୍ ଜଡିଅଇଲାଆଚେ । ଆମେ ଦରମ୍ ଆରି ସୁକଲ୍ ଲକ୍ ଅଇ ପାପେ ଅନି ମୁକ୍ତି ପାଇଆରୁ । ୩୧ ମାତର୍ ଜେନ୍ତ୍ର ଦରମ୍ ସାସତରେ ଲେକା ଅଇଆଚେ, ଜେ ଜଦି ବଡ୍‌ପନ୍ ଅଇସି, ତେବେ ସେ ମାପ୍‌ରୁ କଲା କାମ୍‌ ତେଇ ବଡ୍‌ପନ୍ ଅ ।

## ୨

କୁରୁସ୍‌କାଟେ ମଲା କିରିସଟ୍‌ର କାତା

୧ ଏ ବାଇବଇନିମନ୍ତ, ଜେଡ୍‌କିବେଲେ ମୁଇ ତମ୍‌ର୍ ଲଗେ ପର୍ମେସର୍‌ର ଟିକିନିକି କାତା ସୁନାଇବାକେ ଆସି ରଇଲି ପଣ୍ଡିତ୍‌ମନ୍ତ ପାରା କି ବାସଣ୍ ଦେବା ଲକ୍‌ପାରା ବଡ୍ ବଡ୍ କାତା କଇ ନ ରଇଲି । ୨ କାଇକେବଇଲେ କୁରୁସ୍ କାଟେ ମରିରଇବା ଜିସୁ କିରିସଟ୍‌କେ ଚାଡି ଆରି ବିନ୍ ବିସଇ ତମ୍‌କେ ନ କଇ ବଲି ମୁଇ ଟିକ୍ କଲି । ୩ \*ସେବେଲେ ମୁଇ ତମ୍‌ର୍ ଲଗେ ଦୁର୍‌ବଲ୍ ଅଇ ତରିକରି ରଇଲି ଆରି ତର୍‌ତରି ଗଜ୍‌ଗଜି ରଇଲି । ୪ ଜେନ୍ତ୍ରକି ତମ୍‌ର୍ ବିସବାସ୍ ମୁନ୍ତସର୍ ଗିଆନ୍ ଉପରେ ନ ରଇକରି

ପରମେସରର ବସ୍ତୁ ଉପରେ ବାନ୍ଧିଅଇ ରଥ । \* ତେବେପାଇ ମର ସିକିଆ ଆରି ମୁଇ  
ସୁନାଇବା ବାକିଅ, ମର ନିଜର ଗିଆନେ ଅନି ନ ରଇଲା । ଚାଲାକି କାତା କଇକରି  
ମୁଇ ସୁନାଇଲାଟା ତମ୍ଭେ ବିସ୍ବାସ୍ କରାଇନାଇ । ମାତର ପରମେସର ଆତ୍ମା  
ଆରି ତାର ବସ୍ତୁ ସମ୍ପଦ ମୁଇ କଇଲା ବିସଇ ସତ୍ ବଲି ଜାନାପଡ଼ଲା ।

### ପରମେସରର ଗିଆନ୍

୬ ଏଲେମିସା ଆମେ ଜେଡେବଲ୍ ଆତ୍ମାପାଇ ବଡ଼ିରଇବା ବିସ୍ବାସିମନର ସଙ୍ଗ  
ରଇଲାବେଲେ ଗିଆନର କାତା କଇଲୁନି । ମାତର ସେଟା ଏ ଜୁଗର ଗିଆନ୍ ନର୍ସ କି  
ଏ ଜୁଗର ନସ୍ତ ଅଇଜାଇରଇବା ନେତାମନର ଗିଆନ୍ ନର୍ସ । ୭ ନାଇ, ଜନ୍ ଗିଆନର  
ବିସଇ ଆମେ କଇଲୁନି, ସେଟା ପରମେସରର ଚିକିନିକି ଗିଆନର କାତା । ପୁରବେ  
ପରମେସର ତାର ଜଜନା କାକେ ମିସା ଜାନାଏ ନାଇ । ସେ ଜଜନା ଇସାବେ, ପଡ଼କେ  
ଆମର ମଇମାରପାଇ ସେ ବାଟିରଇଲା । ୮ ଏ ଜୁଗର ଅଧିକାରିମନ୍ଦକେ ମିସା ସେଟା  
ବୁଜଡ଼ନାଇ । କାଇକେବଇଲେ ସେମନ୍ ସେଟା ଜାନିରଇଲେ ତାକ୍ପୁଟା ମାପରୁକେ  
କୁରସେ ମାରି ନ ରଇତାଇ ।

୯ ଜେନ୍ତାରି କି ସାସ୍ତରେ ଲେକା ଆଟେ,  
ଜନ୍ତାକି କାର୍ ଆକି କେବେ ଦେକେନାଇ,

କାର୍ କାନ୍ କେବେ ସୁନେ ନାଇ ଆରି କେ ମିସା କେବେ ବାବି ନ ରଅଡ଼, ସେ  
ସବୁ ବିସଇ,

ପରମେସର ଜନ୍ ଲକ୍ମନକେ ଆଲାଦ୍ କଲାନି,  
ତାକରପାଇ ତିଆର କଲାଆଟେ ।

୧୦ ମାତର ଆମକେସେ ପରମେସର ତାର ଚିକିନିକି ବିସଇ ଜାନାଇଆଟେ । ସେ  
ସୁକଲ୍ ଆତ୍ମାସେ ସବୁ ବିସଇ ସିକାଇସି ଆରି ତାର ବିତ୍ତରେ ରଇବା ଚିକିନିକି  
ଚିନ୍ତା ମିସା କରସି । ୧୧ ମୁନ୍ସୁ କରବା ଚିନ୍ତା ସବୁ ତାର ବିତ୍ତରେ ରଇବା ଆତ୍ମାକେ  
ଚାଡ଼ଲେ ଆରି କେ ମିସା ନାଜାନଡ଼ । ସେନ୍ତସେ ପରମେସରର ସବୁ ଚିନ୍ତା କଲାଟା  
ତାର ଆତ୍ମାକେ ଚାଡ଼ିଦେଲେ ଆରି କେ ମିସା ନାଜାନଡ଼ । ୧୨ ଏ ଜଗତର ଲକ୍ମନ  
ପାଇରଇବା ଆତ୍ମା ପାରା ଆମେ ପାଉନାଇ । ମାତର ପରମେସର ଆତ୍ମା  
ପାଇଆରୁ । ଜେନ୍ତାରିକି ଜନ୍ ସବୁ ବିସଇ ଆମକେ ସେ ଦେଲାଆଟେ, ସେଟା ସବୁ  
ଆମେ ଜାନ୍ତୁ ।

୧୩ ତେବେ ସେ ସବୁ ବିସଇ ମିସା ଆମେ ଜଗତର ଗିଆନ୍ ଇସାବେ ସିକାଉନାଇ,  
ମାତର ଜନ୍ ବିସଇ ଆମକେ ପରମେସରର ସୁକଲ୍ ଆତ୍ମା ସିକାଇଲା ଆଟେ,  
ସେ ବିସଇ ଆକା ସିକାଇଲୁନି । ଜନ୍ ଲକ୍ମନ ସୁକଲ୍ ଆତ୍ମା ପାଇଆତଡ଼, ସେ  
ଲକ୍ମନକେ ଏ ଆତ୍ମାର ବିସଇ ସିକାଇଲୁନି । ୧୪ ମାତର ସୁକଲ୍ ଆତ୍ମା ନ ପାଇ  
ରଇବା ଲକ୍, ଆତ୍ମାର ବିସଇ ନ ମାନେ, ମାତର ସେଟାମନ୍ ତାରପାଇ ଗଟେକ୍  
କାଇଟା ନାଜାନବା ବକୁଆ ପାରା, ଆରି ସେ ସେଟା ବୁଜି ନାପାରେ, କାଇକେବଇଲେ  
ସେ ସବୁ ବିସଇ ସୁକଲ୍ ଆତ୍ମା ସିକାଇଲେ ସେ ବୁଜିଅଇସି । ୧୫ ମାତର ଜନ୍ଲକ୍ମନ  
ଆତ୍ମା ପାଇଆତଡ଼, ସେ ସବୁ ବିସଇର ମୁଲିଅ, ସତ୍ ବାବେ ବିଚାର କରସି । ଏଲେ  
ମିସା ତାକେ କେ ବିଚାର ନ କରଡ଼ । ୧୬ ସାସ୍ତରେ ଲେକା ଅଇଲାପାରା କେ ମିସା  
ମାପରୁର ମନର କାତା ଜାନି ନାପାରଡ଼, କି କେ ମିସା ତାକେ ସିକାଇ ନାପାରଡ଼ ।

ମାତର ଆମେ କିରିସ୍ତର ମନ୍ ପାଇଆରୁ ।



୧ ଏ ବାଜବଇନିମନ୍, ମୁଞ୍ଚ କରନ୍ତଃତେଇ ରଇଲାବେଲେ ସୁକଲୁଆଡ଼ମା ପାଇଲା ଲକ୍ମନର ଇସାବେ ତମ୍ଭେ କାତା ଅଇ ନାପାରୁଲି । ମାତର୍ ନିଜେ ମନ୍ କଲାଇ ଇସାବେ ରଇବା ଲକ୍ମନର ଇସାବେସେ କାତା ଅଇଲି । କାଇକେ ବଇଲେ ତମେ ସେବେଲେସେ, ବିସ୍ବାସ୍ କରବାକେ ମୁଲିଆଇ ରଇଲାସ୍ । କିରିସ୍ତର୍ ତେଇ କଅଁଲା ପିଲାମନର୍ ପାରା । ୨ \*ମୁଞ୍ଚ ତମ୍ଭେ ଆର୍ଟ୍ କାଦି ନ ଦେଇ କରି ଦୁଦ୍ କାଇବାକେ ଦେଇରଇଲି । କାଇକେବଇଲେ ତମେ ଆର୍ଟ୍ କାଦି କାଇବାର ନାପାରୁତେ ରଇଲାସ୍ । ଏବେ ମିସା ନାପାରାସ୍ । ୩ ତେବେ, ତମେ ନିଜର୍ ମନ୍ କଲାଇ ଇସାବେ ରଇବା ଲକ୍ମନପାରା ଆଚାସ୍ । ମୁଞ୍ଚ ଏଚାର୍ ପାଇ କଇଲିନି, କାଇକେବଇଲେ ତମର୍ ତମର୍ ବିତ୍ତରେ ଇସା ତଲା, ଲାଗାଜଡା ଆରି ଜାତିନିତି ଆତେ । ତମେ ନିଜର୍ ମନ୍ କଲାଇ ଇସାବେ ରଇବା ଲକ୍ ବଲି ଜାନାପଡ଼ଲାନି । ଜଗତର୍ ଲକ୍ମନର୍ ପାରା, ନିଜର୍ ମନ୍ କଲାଇ ଇସାବେ ଚଲାଚଲୁତି କଲାଇସ୍ନି । ୪ \*ଜେକ୍ତିକ୍ ତମର୍ ବିତ୍ତରେ କେତେଲକ୍ କଇବାଇ, ଆମେ ପାଉଲର୍ ବାଟେ ଗାଲୁନି । ତେଇଅନି ଆରି କେତେଲକ୍ କଇବାଇ, ଆମେ ଆପଲର୍ ବାଟେ ଗାଲୁନି । ସେଡ଼କିବେଲେ ତମେ କାଇ ନିଜର୍ ମନ୍ କଲାଇ ଇସାବେ ରଇବା ଲକ୍ ନୁଆସ୍ କି ?

\* ସେ ଇସାବେ ଦେକ୍ଲେ ଆପଲ୍ କେ ? ଆରି ମୁଞ୍ଚ ମିସା କେ ? ଆମେତା ଅବ୍ କା ସେବା କରୁମନ୍ । ଜେକ୍ତିକ୍ ତମ୍ଭେ ବିସ୍ବାସ୍ କରବାକେ ଆମେ ସାଇଜ କଲୁ । ପର୍ମେସର୍ ଆମ୍ଭେ ଜନ୍ କାମ୍ କରବାକେ ଦେଇରଇଲା, ଆମେ ସେ କାମ୍ କରିଆରୁ । ୫ \*ମୁଞ୍ଚ ମୁଞ୍ଚି ରପ୍ଲା ଲକ୍ ପାରା, ଆରି ଆପଲ୍ ଗଟେ ପାନିଦେଲା ଲକ୍ ପାରା । ମାତର୍ ପର୍ମେସର୍ ସେ ଗର୍ ବଡ଼ାଇଆତେ । ୬ ସେକ୍ତିସେ ଜେ ରପିରଇସି ଆରି ଜେ ପାନି ଦେଇସି, ତାକର୍ କାଇଟା ନାଇ, ଜେ ବଡ଼ାଇରଇସି, ସେ ପର୍ମେସର୍ ସେ ସବୁଟା । ୭ ଜେ ରପ୍ଲା ଆତେ ଆରି ଜେ ପାନି ଦେଲାଆତେ, ସେ ଦୁଇଲକ୍ ଗଟେକ୍ କାଇଆଲେ ଲଡ଼ାପାଇ କାମ୍ କଲାଇନି । କାଇକେବଇଲେ ସେମନ୍ କେ ପର୍ମେସର୍ ନିଜର୍ ନିଜର୍ କାମ୍ ଇସାବେ ପୁରୁସକାର୍ ଦେଇସି । ୮ ଆମେ ପର୍ମେସର୍ ସଙ୍ଗ୍ କାମ୍ କରବା କୁଲିଆର୍ ମନ୍ । ଆରି କରନ୍ତଃ ବିସ୍ବାସିମନ୍ ତମେ, ପର୍ମେସର୍ ଚାସ୍ କରବା ଜମି, ଆରି ତାର୍ ଗର୍ । ୯ ପର୍ମେସର୍ ମକେ ଦେଇରଇବା ତାର୍ ଜିବନ୍ ଦୁକାନି ଇସାବେ ମୁଞ୍ଚ ଗଟେକ୍ ସବୁ ଜାନିରଇବା ଗର୍ ତିଆର୍ କରୁ ପାରା କୁନାଦି ବସାଇଆତି । ସେବେଲେଅନି ବିନ୍ ଲକ୍ ତାର୍ ଉପ୍ରେ ତିଆର୍ କଲାନି । ମାତର୍ ତିଆର୍ କରବା ବେଲେ ତମେ, ଗଟେକ୍ ଗଟେକ୍ ଲକ୍ ଜାଗ୍ ରଡ଼ ରଇବାର୍ ଆତେ । ୧୦ କାଇକେବଇଲେ, ଜନ୍ କୁନାଦି ତିଆର୍ ଅଇସାରଲା ଆତେ, ତାକେ ଚାଡ଼ି ଅଲଗା କୁନାଦି କେ ମିସା ତିଆର୍ କରି ନାପାରଡ଼ । ସେ କୁନାଦିର୍ ମୁଲ୍ ପାକନା ଅଇଲାନି ଜିସୁକିରିସ୍ । ୧୧ ମାତର୍ କେତେକ୍ ଗର୍ ବାନ୍ଧୁମନ୍ କୁନାଦି ଉପ୍ରେ ସୁନା, ରୁପା ଆରି ବେସି ଦାମ୍ ଅଇବା ପାକନା ସଙ୍ଗ୍ ବାନ୍ଧଲାଜନି । ଆରି କେତେକ୍ ଲକ୍ ଦାରୁ, ଗାଁସ୍ ଆରି ପିରି ସଙ୍ଗ୍ କୁନାଦି ଉପ୍ରେ ବାନ୍ଧଲାଜନି । ୧୨ କିରିସ୍ତର୍ ଆରି ତରେକ୍ ଆଇବା ଦିନେ ଗଟେକ୍ ଗଟେକ୍ ଲକ୍ କିରିରଇବା ସବୁ କାମ୍ କେନ୍ତାଟା ବଲି ଜଇଟାନେ ଜାନାପଡ଼ିଜାଇସି । ସେଟା ଗଟେକ୍ ଏକ୍ତି ବେଲା ଆଇସି ଜେତେବେଲେ ସବୁ ଜିନିସ୍ ଜଇଟାନେ ପଡ଼ାଇ ପରିକା କରାଅଇସି । ୧୩ ଜନ୍ ଲକ୍ମନ କିରିରଇବା କୁନାଦି ଉପ୍ରେ ଜଇର୍ ପରିକାଟାନେ ନ ନସେ, ସେ ପୁରୁସକାର୍ ପାଇସି । ୧୪ ଜଦି ଜାର୍ କାମ୍ ପଡ଼ି ଜାଇସି, ସେ କାମ୍ କରୁକେ କାଇଟା ନ ମିଲେ । ମାତର୍ ସେ ଲକ୍ ଲାଗ୍ତେରଇବା ଜଇଟାନେଅନି ରକିଆ ପାଇଲା ପାରା ନିଜେ ରକିଆ ପାଇସି ।

\* ୩:୨ ୩:୨ ଏବ୍ରି ୫:୧୨, ୧୩      \* ୩:୪ ୩:୪ ୧୮ କରନ୍ତଃ ୧:୧୨      \* ୩:୬ ୩:୬ ପେରିଡ଼ ୧୮:୪-୧୧; ପେରିଡ଼ ୧୮:୨୪-୨୮

୧୭ \*ତମେ ନିକ ସଙ୍ଗ ଜାନିଆରାସ୍, ତମେ ଅଇଲାସନି ପର୍ଯ୍ୟନ୍ତ ମନ୍ଦିର । ଆରି ତାର ଆତ୍ମା ତମର ଗାଗଡ଼ ବିତ୍ରେ ବାସାଅଇଆତେ । ୧୭ ଜଦି କେ ମିସା ପର୍ଯ୍ୟନ୍ତ ମନ୍ଦିର ନସାଇସି, ତେବେ ପର୍ଯ୍ୟନ୍ତ ତାକେ ନସାଇସି । କାଇକେବଇଲେ ପର୍ଯ୍ୟନ୍ତ ମନ୍ଦିର ସୁକଲ୍ଟା । ତମେମନ୍ ଆକା ସେ ମନ୍ଦିର ।

୧୮ ନିଜକେ ମିସା ନାତାଇ ନ ଉଆ । ଜେ ଜଦି ମୁଇ ଜଗତର ଇସାବେ ଗିଆନ୍ ରଇବାଲକ୍ ବଲି ମନେ ମନେ ବାବ୍ସି, ତେବେ ସେ ସତ୍ ଗିଆନ୍ ପାଇବାକେ ଆଲେ, କାଇଟା ନାଜାନିଲା ବକୁଆ ଲକ୍ପାପା ଅଇବାର୍ ଆତେ । ୧୯ କାଇକେବଇଲେ ଏ ଜଗତର ଗିଆନ୍ ପର୍ଯ୍ୟନ୍ତ ମୁଆଟେ କାଇ ଲତାକେ ନ ଆସେ । ଜେନ୍ତିକି ସାସ୍ତରେ ଲେକା ଆତେ, ଗିଆନ୍ ରଇଲା ଲକ୍ପାମକେ ତାକର୍ ଚାଲାକିତେଇସେ ପର୍ଯ୍ୟନ୍ତ ଦାରସି । ୨୦ ଆରିତରେକ୍ ସାସ୍ତରେ ଲେକାଆତେ । ଗିଆନ୍ ରଇବା ଲକ୍ପାମ ବାବ୍ସାଟା ସବୁ ଚୁଚାଇସେ ବଲି ପର୍ଯ୍ୟନ୍ତ ଜାନିଆତେ । ୨୧ ଆରି କେ ମିସା ଲକ୍ପାମ କରିରଇବା କାମ୍ପାନେ ବଡ଼ପନ୍ ନ ଉଆ । ଏବେ ତମେ ସବୁ ବିସଇର୍ ଅଦିକାର୍ ପାଇଆରାସ୍ । ୨୨ ଜଦି ମୁଇ ଅଇଲେ କି, ଆପଲ୍ ଅଇଲେ କି, ପିତର୍ ଅଇଲେ କି, ଜଗତର କାଇଟା ମିସା ଅଇଲେ, ତମେ ମଲେ କି ବର୍ଲେ, ଏବେ ଜାଇଟା ଅଇଲେ କି ପର୍କେ ଜନ୍ଟା ଅଇଲେ ମିସା, ସବୁ ବିସଇ ତମର୍ ମଙ୍ଗଲ୍ ପାଇସେ । ୨୩ ମାତର ତମେ କିରିସ୍ତର୍ ଲକ୍, ଆରି କିରିସ୍ତ ପର୍ଯ୍ୟନ୍ତ ।

## ୪

### କିରିସ୍ତର୍ ପେରିଡ଼ମନ୍

୧ ତେବେ ତମେ ଆମ୍ବକେ କିରିସ୍ତର୍ ସେବା କରୁମନ୍ ବଲି ନାମ୍ବାର୍ ଆତେ । ଆରି ପର୍ଯ୍ୟନ୍ତ ଆମ୍ବକେ ଟିକିନିକି ସତ୍ ବିସଇର୍ ବାଣ୍ଟାଗରିଆର୍ ଦାଇଡ଼ ଦେଲାଆତେ । ୨ ଆରି ସେନ୍ତାରି ଦାଇଡ଼ ନେଇରଇବା ସେବାକରୁମନ୍ ସତ୍ ବାବେ କାମ୍ କରବାର୍ ଆତେ । ୩ ମାତର ତମର୍ ବିତ୍ରେ କେତେକ୍ ଲକ୍ କି, ବିନ୍ ଲକ୍ କେ ମିସା ମର୍ କାମ୍ ଦେକି ମକେ ବିଚାରନା କଲେ, ମକେ କାଇଟା ନର୍ । ମୁଇ ନିଜେ ମର୍ ବିଚାରନା ନ କରି । ୪ କାଇକେବଇଲେ ମୁଇ ନିଜର୍ ବିରୁଦେ କାଇ ଦସ୍ କଲାଟା ମର୍ ମନ୍ ନାଜାନେ । ଅଇଲେ ମିସା ମୁଇ ଇଡି କାଇ ଦସ୍ ନ କଲା ଲକ୍ ବଲି କଇନଏ । ମାତର ଜେ ମକେ ବିଚାର କରସି, ସେ ମାପରୁ । ୫ ସେଟାପାଇ ତମେ କାକେ ମିସା କାଇ ବିସଇ ନେଇ ବିଚାର କରାନାଇ । କାଇକେବଇଲେ ବିଚାରନା କରବାକେ ବେଲା ଅଏ ନାଇତା । ମାପରୁ ବିଚାରନା କରବାକେ ଆଇବାଜାକ ଜାଗା । ମାପରୁ ଆଇଲେ ଆକା ସାରାସାରି ବିଚାରନା ଅଇସି । ସେ ଆନ୍ଦାର୍ ବିତ୍ରେ ଲୁଟେ ରଇଲା ସବୁ ବିସଇ ଉଜଲେ ଦେକାଇ ଦେଇସି । ଆରି ଲକ୍ପାମର୍ ମନ୍ ବିତ୍ରେ କାତା ସବୁ ଦେକାଇ ଦେଇସି । ସେଡ଼କି ବେଲେ ସବୁଲକ୍ ପର୍ଯ୍ୟନ୍ତ ଟାନେଅନି ଲାଡ଼ ପାଇବାଇ ।

୬ ଏ ବାଇବଇନିମନ୍, ମୁଇ ଏ ସବୁ କାତା ତମେ ସିକା ବଲି, ମର୍ ବିସଇ ଆରି ଆପଲ୍ ବିସଇ ଉଦାଅରନ୍ ଦେଇ କଇଲି । ଜେନ୍ତିକି ସାସ୍ତରେ ଲେକାଅଇଲାଟାନର୍ ଅରଡ଼ ତମେ ସିକ୍ସା । ସାସ୍ତରେ ଜେଡ଼କି ସବୁ ଲେକା ଅଇଲାଆତେ, ତାର୍ଟାନେଅନି ଅଦିକ୍ କରାନାଇ । ସେନ୍ତାରି କଲେ କାକେ ମିସା ନେଇକରି ବଡ଼ପନ୍ ନ ଉଆସ୍, ଆରି କାକେ ମିସା ଇନ୍ ନ କରାସ୍ । ୭ କାଇକେବଇଲେ ବିନ୍ ଲକ୍ପାଟାନେଅନି କେ ତମକେ ବଡ଼ କରଡ଼ ନାଇ । ଆରି ଜନ୍ ଗୁଣ ତମେ ଦାନ୍ ଇସାବେ ମିଲାଅରାସ୍ ସେଟା ପର୍ଯ୍ୟନ୍ତ ଦେଲାଆତେ । ତେବେ ତମର୍ ନିଜର୍ଟା ବଲି ବଡ଼ପନ୍ ଅଇ କଇ ନାପାରାସ୍ ।

\* ୩:୧୭ ୩:୧୭ ୧୩ କରନ୍ତଃ ୭:୧୯; ୨ୟ କରନ୍ତଃ ୭:୧୭



« ତମ୍ଭେ ଦରକାର ରଇଲା ସବୁ ବିସଇ ମିଲାଇ ଆଗାସ୍ କି ? ତମ୍ଭେ କାଇ ସାଉକାର ଅଇସାରି ଆଗାସ୍ କି ? ଗଟେକ୍ ଗଟେକ୍ ରାଜା ଅଇଜାଇଆଗାସ୍ କି ? ଏଲେ ମିସା ଆମେ ଅଇ ନାପାରୁଲୁନି । ସତଇସେ ତମ୍ଭେ ରାଜାଅଇତାସ୍ କି ? ସେନ୍ତାଆଲେ, ଆମେ ମିସା ତମ୍ଭେ ସଙ୍ଗ୍ ରଇ କାମ୍ କରୁତୁ । ୯ ମାତର୍ ମୁଇ ବାବୁଲିନି ପରମେସର୍ ଆମର୍ ପାରା ପେରିତ୍ତମନ୍ତେ ଦାଡିର୍ ସାରାସାରି ଜାଗା ଦେଲାଆଚେ । ଜଗତର୍ ସବୁ ଲକ୍ ଆରି ସର୍ଗର୍ ଦୁତମନ୍ତ ଦେକ୍ତେ ରଇବାବେଲେ ଆମେ, ବନ୍ଦି ଅଇଲା ଲକ୍ମନ୍ତେ ମରାଇବାକେ ନେଲାପାରା ଆଚୁ । ୧୦ ଆମେ କିରିସ୍ତର୍ ଲାଗି ବକୁଆ ଲକ୍, ମାତର୍ ତମ୍ଭେ କିରିସ୍ତର୍ ସଙ୍ଗ୍ ମିସ୍ଲାର୍ ପାଇ ବୁଦିରଇବା ଲକ୍ । ଆମେ ଦୁରବଲ୍, ମାତର୍ ତମ୍ଭେ ବପୁରଇବା ଲକ୍, ତମ୍ଭେ ଲକ୍ମନ୍ତ ସନ୍ମାନ୍ ଦେଲାଇନି, ମାତର୍ ଆମ୍ଭେ ସନ୍ମାନ୍ ମିଲେନାଇ । ୧୧ ଏବେ ଜାକ ମିସା ଆମ୍ଭେ ପେଟ୍ପୁରତେ କାଇବାପିଇବାକେ ମିଲେନାଇ । ପିନ୍ଦବାକେ ବେସି ପୁରନା ବସତର୍ ଆଚେ । ଲକ୍ମନ୍ତ ଆମ୍ଭେ ମାରୁଲାଇନି ଆରି ରଇବାକେ ଜାଗା ନଇଲାର୍ ପାଇ ଏନେତେନେ ଅଇ ବୁଲୁନି । ୧୨ \*ଆବଡ୍ କାମ୍ କରି ଆମେ ଦିନକେ ଦିନ ଜୁଲିସୁକି ଗାଲୁନି । କେ ଆମ୍ଭେ ସାଇପ୍ ଦେଲେ ତାକେ ଆମେ ଆସିର୍ବାଦ୍ କଲୁନି, ଆରି ଉଡା ସୁନକରି ମିସା ମୁର୍ଚି କରି ରଇଲୁନି । ୧୩ ନିନ୍ଦା ପାଇଲେ, ଆଲାଦର୍ କାତା କଇଲୁନି । ଆମେ ଏବେ ଜାକ ମିସା ଜଗତର୍ କାଚ୍‌ରା ପାରା ଅଇଆଚୁ । ଲକ୍ମନ୍ତ ଆମ୍ଭେ ଆଣ୍ଟି ଦଇରଇବା ମୁର୍ଚି ପାନିପାରା ଦେକ୍ଲାଇନି ।

୧୪ ମୁଇ ତମ୍ଭେ ଲାଜ୍ କରାଇବାକେ ଏ ସବୁ ବିସଇ ଲେକିନାଇ, ମାତର୍ ତମ୍ଭେ ମର୍ ଆଲାଦର୍ ପିଲାଟକି ବଲି ଏତାଇ କରି ଚେଡନା ଦେବାକେ, ଏ ସବୁ ଲେକଲିନି । ୧୫ କାଇକେବଇଲେ ତମ୍ଭେଟାନେ କିରିସ୍ତର୍ ବିସଇ ସିକାଇବାକେ କେତେକ୍ କେତେକ୍ ଗୁରୁ ରଇଲେ ମିସା, ବାବା ଇସାବେ ତମ୍ଭେ ବେସି ଲକ୍ ନାଇ । କିରିସ୍ତ ଜିସୁର୍ତେଇ ମିସ୍ଲାର୍ ପାଇ ମୁଇ ତମ୍ଭେ ବାବା ଅଇଗାଲି । କାଇକେବଇଲେ ମୁଇ ତମ୍ଭେ ଜିସୁକିରିସ୍ତର୍ ସୁବ୍‌କବର୍ କଇରଇଲି । ୧୬ \*ତେବେ ମୁଇ ତମ୍ଭେ ବାବୁଜିଆ କରି କଇଲିନି, ମୁଇ ଜାଇଟା କଲିନି ତମ୍ଭେ ମିସା ସେନ୍ତାରି କରା । ୧୭ ସେଟାପାଇ ମୁଇ ତମ୍ଭେକେ ତମ୍ଭେ ଲଗେ ପାଟାଈ ଆଚି । ମୁଇ ତାକେ ଆଲାଦ୍ କଲିନି । ସେ ମର୍ ନିଜର୍ ପିଲା ପାରା ଆରି ମାପୁରୁର୍ ସେବାକାମେ ସବୁ ନିକସଙ୍ଗ୍ କରସି । ଜେଡ୍‌କିବେଲେ ସେ ତମ୍ଭେଟାନେ ଆଇସି, କିରିସ୍ତର୍ତେଇ ମିସ୍ଲାର୍ ପାଇ ବଲି ମୁଇ କେନ୍ତ୍ର ଚଲାଟଲ୍‌ତି କଲିନି, ସେ ବିସଇନେଇ ସେ ତମ୍ଭେକେ କଇସି । ସେ ସମାନ୍ ବିସଇ, ସବୁ ମଣ୍ଡଲର୍ ବିସବାସିମନ୍ତେ ମୁଇ ସିକାଇଲିନି ।

୧୮ ସେ କରନ୍ତିଅତେଇ ଆରି କେବେ ନ ଆସେ, ବଲିକରି ତମ୍ଭେ ବିତ୍ତରର୍ କେତେ ଲକ୍ ବଡ୍‌ପନ୍ ଅଇଆଗାସ୍ । ୧୯ ମାତର୍ ଜଦି ମାପୁରୁ ମନ୍ କଲେ ମୁଇ ଦାପ୍‌ରେ ତମ୍ଭେଟାନେ ଆଇବି । ଏ ବଡ୍‌ପନିଆ ଲକ୍ମନ୍ତ କାଇ କାତା ଅଇଲାଇନି ବଲି ମୁଇ ନିଜେ ଜାନ୍‌ବି ଆରି ତାକର୍ ବପୁ ପରମେସର୍‌ଟାନେଅନି କି ନାଇ, ସେଟା ଜାନ୍‌ବି । ୨୦ ପରମେସର୍‌ର ରାଇଜ୍, ଅବ୍‌କା କାତା ଅଇବା ବିସଇ ନର୍, ମାତର୍ ବପୁର୍ ସଙ୍ଗ୍ ରଇବା ବିସଇ । ୨୧ ମୁଇ ଆଇଲାବେଲେ ତମ୍ଭେକେ କେନ୍ତ୍ର ଚଲାଟଲ୍‌ତି ଦେକାଇବାର୍ ଆଚେ ? ମୁଇ ବେଡ୍‌ଡାଙ୍ଗ୍ ଦାରି ତମ୍ଭେ ଲଗେ ଆଇବାର୍ କି, ଆଲାଦ୍ ଆରି ସାନ୍ତ୍ରି ମନ୍ ଦାରି ଆଇବି ?



ମଣ୍ଡଲିତେଇ ବେବିଟାର୍

୧ ମୁଞ୍ଚ ସତ୍ତ୍ୱେ ସୁନ୍ଦଲି ଜେ, ତମର ବିତ୍ତରେ ବେସିଆ କାମ୍ ଆଚେ । ଆରି ଏନ୍ତାରି ବେସିଆ କାମ୍, ଜନ୍ତାକି ବିସ୍ବାସ୍ ନ କଲା ଲକର ବିତ୍ତରେ ମିସା ନାଇ । ଜେନ୍ତାରିକି ନିଜର ସାନ୍ ଆୟାର୍ ସଙ୍ଗ୍ ସୁଆବସା ଅଇଲାନି । ୨ ଆରି ତମର ବିତ୍ତରେଅନି ଗଟେକ୍ ଲକ୍ ଏନ୍ତାରି କାମ୍ କଲାଆଚେ, ତେବେ ତମେ କାଇକେ ବଡ଼ପନ୍ ଦେକାଇଲାସ୍ନି ? ସେ କରିରଇବା ପାପ୍ କାମ୍ ଲାଗି ଲାଜ୍ ଅଇକରି ସେନ୍ତାରି ଲକ୍ କେ ତମର ବିତ୍ତରେଅନି ବାରକରାଇ ଦେବାର୍ ରଇଲା । ୩ ମୁଞ୍ଚ ଗାଗଡ଼ ଇସାବେ ତମର ଟାନେ ନ ରଇଲେମିସା ସେନ୍ତି କରବାର୍ ରଇଲା, ଏଲେ ମିସା ଆଡ଼ମାଇ ତମର ସଙ୍ଗ୍ ଆତି । ଜେ କି ଏନ୍ତାର୍ କାମ୍ କରିଆଚେ, ମୁଞ୍ଚ ତେଇ ରଇଲା ପାରା, ବେସି ବଡ଼ ଦସ୍ କଲା ଲକ୍ କେ ଡଣ୍ଟ ଦେବାର୍ ଆଚେ ବଲି ମାପ୍ତରୁ ଜିସୁକରିସ୍ତର୍ ନାଉଁ ଦାରି, ମୁଞ୍ଚ ବିଚାର୍ କରି ସାରାଇ ଆତି । ୪ ତମେ ମାପ୍ତରୁ ଜିସୁର୍ ନାଉଁଦାରି ଗଟେକ୍ଲଗେ ରୁଣ୍ଟ୍ ଅଇଲା ବେଲେ ମର୍ ଆଡ଼ମା ଆରି ମାପ୍ତରୁ ଜିସୁର୍ ବସୁ ତେଇ ଆଚେ । ୫ ଏନ୍ତାରି ଲକ୍ କେ ତାର୍ ଗାଗଡ଼ କୁରୁପ୍ନାସ୍ ଅଇଜିବାକେ ସଇତାନର୍ ଆତେ ସର୍ପି ଦେବାର୍ ଆଚେ । ସେନ୍ତାର୍ କଲେ ମାପ୍ତରୁ ଆରି ତରେକ୍ ଆଇବା ବେଲେ ତାର୍ ଆଡ଼ମା ରକିଆ ପାଇପାର୍ସି ।

୬ ଏନ୍ତାରି ଲକ୍ କେ ତମର ମଣ୍ଡଲିତେଇ ସଙ୍ଗ୍ ଅଇକରି ଏନ୍ତି ବଡ଼ପନ୍ ଅଇବାଟା ବଲ୍ଲନାଇ । ମନେ ରକା କଣ୍ଡେକ୍ କମିରର୍ ଲାଗି, ଚକଟ୍ଲା ସବୁ ଗୁଣ୍ଟ୍ ଆମର୍ ଅଇଜାଇସି, ଏଟା କାଇ ତମେ ନାଜାନାସ୍ କି ? ୭ ତମର ବିତ୍ତରେ ରଇବା ପାପ୍ତରୁ ପୁରନା କମିର୍ ପିଙ୍ଗିଦେଇ ପୁରାପୁରନ୍ ସୁକଲ୍ ଉଆ । ସେନ୍ତାର୍ କଲେ ତମେ କମିର୍ ନଇତେ ଚକଟ୍ଲା ନୁଆ ଗୁଣ୍ଟ୍ ପାରା ଅଇସା । ମୁଞ୍ଚ ଜାନି, ଏବେମିସା ତମେ ସେନ୍ତାରି ଆଗାସ୍ । ଆମର୍ ନିସ୍ତାର୍ ପରବ୍ ଦିନ୍ ତିଆର୍ ଅଇ ସାରଲା ଆଚେ । ପରବର୍ ମେଣ୍ଡାପିଲା ନିଜେ କିରିସ୍ତର୍ ସର୍ପି ଅଇଆଚେ । ୮ ତେବେ ଆସା, ଆମର୍ ପାପ୍ ଆରି କାରାପ୍ ରଇବା ପୁରନା କମିର୍ ଚାଡ଼ିଦେଉଁ ଆରି କମିର୍ ନ ମିସଲା ରୁଟି ପାରା ଜେନ୍ତିକି ସତ୍ତ୍ୱ ଆରି ସୁଆଲ୍ ଅଇ ଏ ପରବର୍ ସାର୍ଦା କରୁ ।

୯ ମୁଞ୍ଚ ଆଗତୁ ବେସିଆମନର୍ ସଙ୍ଗ୍ ନ ମିସ୍ବାକେ ଚିଟି ଲେକିରଇଲି । ୧୦ ତାର୍ ଅରଡ଼ ନର୍ବ୍ ଜେ ଏ ଜଗତେ ରଇବା ବେସିଆ, ଲବ୍‌ରା, ଚର୍ନା ଆରି ମୁରତି ପୁଜା କରବା ଲକ୍ କେ ସଙ୍ଗ୍ ମୁଲ୍ କେ ମିସା ନାଇ ବଲି । ଜଦି ସେନ୍ତାର୍ କଲେ ତମେ ଜଗଡ଼ ଚାଡ଼ି ବାରଇଜିବାକେ ପଡ଼ସି । ୧୧ ମାତର୍ ମର୍ କଇବାଟା ଅଇଲାନି, ଜନ୍ ବାଇ ମୁଞ୍ଚ ବିସ୍ବାସି ବଲି କଇକରି ବେବିଚାର୍ କାମ୍ କରସି, କି କାଇଟା ଦେବାକେ ମିସା ଲବ୍ କରସି, କୁଟ୍ କାତା କଇସି, ପୁଡ଼ଲା ପୁଜା କରସି, ବିନ୍ ଲକ୍ କରଟା ଦନ୍ଦିପନ୍ଦିକରି ନେଇସି, ଆରି ମାତୁଆଲ୍ ଅଇସି ବଇଲେ, ତାର୍ ସଙ୍ଗ୍ ମିସାନାଇ । ଏନ୍ତିକି ତାର୍ ସଙ୍ଗ୍ ମିସିକରି କାଇବାର୍ ମିସା ନାଇ ।

୧୨ ବିସ୍ବାସ୍ ନ କରବା ଲକ୍ ମନକେ ବିଚାର୍ କରବାକେ ମୁଞ୍ଚ କେ ? ପର୍ମେସର୍ ସେମନକେ ବିଚାର୍ କରସି । ଜନ୍ ଲକ୍ ମନ ମଣ୍ଡଲିତେଇ ରଇବାଇ, ସେମନକେ ବିଚାର୍ କରବାଟା ଆମର୍ କାମ୍ । ୧୩ ସାସ୍ତରେ ଲେକା ଅଇଲାପାରା ତମର ବିତ୍ତରେ ଜନଲକ୍ ସେନ୍ତାରି କାରାପ୍ ଚଲାଚଲ୍ତି କଲାନି, ତାକେ ତମର ବିତ୍ତରେଅନି ବାରକରାଇ ଦିଆସ୍ ।



### ବିସ୍ବାସିମନର୍ ବିଚାର୍

୧ ଜଦି ତମର ବିତ୍ତରେ ଗଟେକ୍ ବିସ୍ବାସି ବାଇକେ ଆରି ଗଟେକ୍ ବିସ୍ବାସି ବାଇର୍ ବିରୁଦ୍ଧେ କାତା ରଇଲେ, ସେଟା ବିଚାର୍ କରବାକେ ବିସ୍ବାସ୍ ନ କଲା

ବିଚାରକାରିଆରୁ ଲଗେ ଜାଆ ନାହିଁ । ତାର ବାବୁଲେ ବିସ୍‌ବାସିମନ୍ ସେଟା ବିଚାର କରନ୍ତୁ । ୨ ମନେ ରଥ, ପରମେସରର ଲକ୍ଷ୍ମୀନ୍ ଜଗତର ଲକ୍ଷ୍ମୀମନ୍ ବିଚାର କରୁଛନ୍ତି । ସେନ୍ତ୍ରାନ୍ତୁଆଲେ, ଏ ଗଟେକ୍ ସାନ୍ ବିସକ୍ ବିଚାର କରିନାପାରାସ୍ କି ? ୩ ଏଦେ ସୁନା ! ଦିନେକ୍ ଆମେ ସରଗର ଦୁଡ଼ମନ୍‌କେ ବିଚାର କରୁ । ତେବେ ଏ ଜିବନେ ଆଇବା ସାନ୍ ସାନ୍ ବିସକ୍ ବିଚାର କରୁବାକେ ଅଦିକ୍ ସଅଜ୍ ନଏଁ କି ? ୪ ଜଦି ବିନ୍ ବିସ୍‌ବାସି ମନର୍ ସକ୍ ଲାଗାଜତା ଅଇଲେ ରାଜିନାମା କରୁବାକେ ତମର୍ ମଣ୍ଡଲି ବିତ୍‌ରେ ବିସ୍‌ବାସ୍ ଇସାବେ ସନ୍‌ମାନ୍ ନ ପାଇବା ଲକ୍ଷ୍ମୀଟାମେ କାଇକେ ଗାଲାସ୍‌ନି ? ୫ ମୁଇ ତମ୍‌କେ ଲାଜ୍‌କରାଇବାକେ ଏ କାତା ଲେକିଆତି । ବିସ୍‌ବାସି ବାଇ ବାଇ ବିତ୍‌ରେ କିରମାର ଅଇଲାଟା ରାଜିନାମା କରୁବାକେ ସତଇସେ ତମର୍ ବିତ୍‌ରେ ଗଟେକ୍ ମିସା ବୁଦି ରଇଲା ଲକ୍ଷ୍ମୀ ନାହିଁ କି ? ୬ ଏଦେ ଦେକା ! ଏଟା କେନ୍ତ୍ରା କଲାସ୍‌ନି ? ଗଟେକ୍ ବିସ୍‌ବାସି ବାଇ ଆରି ଗଟେକ୍ ବାଇରୁ ବିରୁଦେ ବିଚାରନା ଗରେ ଗାଲାନି, ଆରି ସେ ବିଚାରନା, ବିସ୍‌ବାସ୍ ନ କରୁମନ୍‌କେ ସର୍ପିଦେଲାସ୍‌ନି ।

୭ ତମେ ତମର୍ ତମର୍ ବିତ୍‌ରେ ଲାଗାଜତା ଅଇକରି କରନ୍ତୁ ଦୁଆର ଜାକ ଗାଲାସ୍‌ନି । ଇତିଅନି ଜାନା ପଡ଼ଲାନିଜେ ମିସାବିତାଟାମେ ପୁରାପୁରୁନ୍ ଆରି ଜାଇ ଆଗାସ୍ । ତମର୍ ପାଇ ଅନିଆଇ ମୁରତିକରି, କେତି ଅଇବାଟା ମୁରତିକରି ରଇଲେ ନିକ୍ ଅଇତା । ୮ ତାର ବାବୁଲେ ତମର୍ ତମର୍ ବିତ୍‌ରେ ଅନିଆଇ ଆରି କେତି କଲାସ୍‌ନି । ସେଟା ମିସା ନିଜର୍ ବିସ୍‌ବାସି ବାଇବଇନିମନ୍‌କେ ! ୯ ମନେରଥ ଜନ୍ ଲକ୍ଷ୍ମୀମନ୍ ପାପେରଇକରି ବଢ଼ିବାଇ ସେମନ୍ ପରମେସରର ରାଇଜେ ଜାଇ ନାପାରନ୍ତୁ । ନିଜେ ନାତାଇ ଉଆନାଇ । ଜନ୍ ଲକ୍ଷ୍ମୀମନ୍ ନିୟମ୍ ବିରୁଦେ ଚଲାଚଲ୍‌ତି କଲାଇନି କି ମୁରତି ପୁଜା କଲାଇନି କି ବେବିଚାର୍ କାମ୍ କଲାଇନି କି ମନସ୍ ମନସ୍ ବିତ୍‌ରେ ଆରି ମାଇଜି ମାଇଜି ବିତ୍‌ରେ ଅଇବା କାରାପ୍ କାମ୍ କଲାଇନି, ବେସିଆ କାମ୍ କଲାଇନି, ୧୦ ଚରନା ଅଇଲାନି, କି ଦନ୍ ଲବ୍‌ରା ଅଇଲାନି, ମାତୁଆଲ୍ କି ନିୟା କରୁବାଲକ୍ ଅଇଲାନି କି ଅଲ୍‌ଗା ଲକ୍ଷ୍ମୀ ଜିନିସ୍ ଚରାଇବା ଲକ୍ଷ୍ମୀ ଅଇଲାନି, ଏମନ୍ ପରମେସରର ରାଇଜେ ଜାଇ ନାପାରନ୍ତୁ । ୧୧ ମାପୁରୁକେ ବିସ୍‌ବାସ୍ କରୁବା ଆଗତୁ, ତମର୍ ବିତ୍‌ରେ କେ କେ ଏନ୍ତାରି ଅଇରଇଲାସ୍, ମାତର୍ ପରମେସର୍ ତମର୍ ପାପ୍ ସବୁ ଦଇ ଦେଲା । ଆରି ମାପୁରୁ ଜିସୁ କିରିସ୍‌ଟ ଆରି ସୁକଲ୍ ଆଡ଼ମାର ଲାଗି ଦରମ୍ ବଲାଇ ଅଇଆଗାସ୍ ।

ବେବିଚାରେ ଅନି ବାଉଡ଼ା

୧୨ \*ତମର୍ ବିତ୍‌ରେ କେତେଲକ୍ କଇବାଇ, “ମୁଇ ଜନ୍‌ଟା ମନ୍ କଲିନି, ସେଟା କରୁବି” । ମୁଇ କଇବି, “ଉଁ, ସେଟା ସତ୍, ମାତର୍ ସବୁ ବିସକ୍ ମର୍ ପାଇ ନିକ୍ ନଏଁ ।” କେତେଲକ୍ କଇବାଇ ସବୁ କରୁବାକେ ମର୍ ଅଦିକାର୍ ଆଟେ, । ମାତର୍ ମୁଇ କଇବି, ଜନ୍ ବିସକ୍ ମିସା ମକେ ଦାରି ରକିରଇବାକେ ମୁଇ ନ ଦେଇ, । ୧୩ କେତେଲକ୍ କଇବାଇ, ପେଟ୍ ଜଦି କାଦି କାଇବାକେ ମନ୍ କଲାନି ବଇଲେ କାଦି କାଇବାଟା ନିକ୍, । ମାତର୍ ମୁଇ କଇଲିନି, ପରମେସର୍ ଗଟେକ୍ ଦିନ୍ ଏ ଦୁଇଟାକେ ମିସା କୁରୁପନାସ୍ କରୁସି । ଗାଗଡ଼ ବେବିଚାର୍ କାମ୍ କରୁବାକେ ନାହିଁ, ମାତର୍ ମାପୁରୁର ସେବା କରୁବାକେ ଲାଗ । ଗାଗଡ଼କେ ଦରକାର୍ ଅଇବାଟା ମାପୁରୁ ଜାଗାଇସି । ୧୪ ପରମେସର୍, ମାପୁରୁ ଜିସୁକେ ତାର ନିଜର୍ ବପୁସକ୍ ମଲାତେଇଅନି ଉଟାଇଲା । ସେନ୍ତାରିସେ ଆମ୍‌କେ ମିସା ଉଟାଇସି, ।

୧୫ ତମର୍ ଗାଗଡ଼ କିରିସ୍‌ଟର୍ ଗାଗଡ଼େ ମିସିକରି ଆଟେ, ଏଟା କାଇ ତମେ ନାଜାନାସ୍ କି ? ତେବେ ମୁଇ କାଇ କିରିସ୍‌ଟର୍ ଗାଗଡ଼ର୍ ଗଟେକ୍ ବାଗ୍ ନେଇକରି ବେସିଆର୍ ଗାଗଡ଼େ ମିସାଇବି କି ? ନାହିଁ, ସେନ୍ତାରି କେବେ ମିସା ନ ଅ । ୧୬ ମାତର୍

☆ ୬:୧୨ ୬:୧୭ ୧୮ କରନ୍ତଃ ୧୦:୨୩

ଜେ ବେସିଆ ସଙ୍ଗ ମିସି, ସେ ତାର ସଙ୍ଗ ଗଟେକ୍ ଗାଗଡ଼ ଅଇସି । ଏଟା ତମେ ନାଜାନାସ୍ କି ? କାଇକେବଇଲେ ଲେକା ଅଇଆଟେ, ସେ ଦୁଇଲକ୍ ଜାକ ଗଟେକ୍ ଅଇବାଇ । <sup>୧୭</sup> ମାତର୍ ଜେ ମାପୁରୁର୍ ସଙ୍ଗ ମିସି, ତାର୍ ଆଡ଼ମା ଆରି ମାପୁରୁର୍ ଆଡ଼ମା ଗଟେକ୍ ଅଇଜାଇସି ।

<sup>୧୮</sup> ବେବିଟାର୍ କାମେଅନି ଦୁରିକେ ରୁଆ । ଲକ୍ମନ୍ କାଇ ବିନ୍ ପାପ୍ କଲେ ମିସା, ସେଟା ତାର୍ ଗାଗଡ଼ ବିରୁଦେ ନ<sup>୪୩</sup> । ମାତର୍ ଜେ ବେବିଟାର୍ କାମ୍ କରସି, ସେ ନିଜର୍ ଗାଗଡ଼ ବିରୁଦେ ପାପ୍ କରସି । <sup>୧୯</sup> \*ମନେ ରଅ, ତମର୍ ଗାଗଡ଼ ସୁକଲ୍ ଆଡ଼ମା ରଇବା ମନ୍ଦିର୍, ଜନ୍ ଆଡ଼ମା ତମର୍ ବିଡ଼ରେ ବାସା ଅଇଲାଆଟେ, ସେଟା ପର୍ମେସରର୍ ଟାନେଅନି ମିଲାଇ ଆତାସ୍ । ତମେ ନିଜେ, ନିଜର୍ ନୁଆସ୍ ମାତର୍ ପର୍ମେସରର୍ । <sup>୨୦</sup> କାଇକେବଇଲେ ପର୍ମେସର୍ ତମ୍‌କେ ଜବର୍ ଦାମ୍ ଦେଇକରି ଗେନିଆଟେ, ସେଟାର୍ ପାଇ ତମର୍ ଗାଗଡ଼ କାମ୍ ସଙ୍ଗ ପର୍ମେସରର୍ ମଇମା କରା ।



### ବିବା ବିସଇରେ ନିୟମ୍

<sup>୧</sup> ଏବେ ତମେ ଲେକ୍‌ଲାଟାନେ ଜନ୍ ସବୁ ବିସଇ ଆଟେ, ସେ ସବୁର୍ ଉତର୍ ମୁଇ ଦେବି । ତମେ ପାଚାରିରଇଲାସ୍ ବିସ୍‌ବାସିମନ୍ ବିବା ନ ଅଇବାଟା ନିକ୍ କି ? <sup>୨</sup> ଓଁ ସେଟା ସଡ଼, ମାତର୍ ବେସି ଲକ୍ ବେବିଟାର୍ କାମେ ଚଲାଚଲ୍‌ତି କଲାଜନି । ମୁଇ କଇଲିନି ଗଟେକ୍ ଗଟେକ୍ ମୁନୁସ୍‌କେ ତାର୍ ନିଜର୍ ମାଇଜି ଆରି ଗଟେକ୍ ଗଟେକ୍ ମାଇଜିକେ ତାର୍ ନିଜର୍ ମୁନୁସ୍ ରଇବାର୍ ଆଟେ । <sup>୩</sup> ଗଟେକ୍ ମନସ୍ ବିବା ଅଇଲାର୍ ଲାଗି, ତାର୍ ମାଇଜିକେ କିରିରଇବା ସବୁ ଦାଇଡ଼ କର୍‌ବାର୍ ଆଟେ । ସେନ୍ତାରିସେ ମାଇଜି ମିସା ତାର୍ ମୁନୁସ୍‌କେ କର୍‌ବାର୍ ଆଟେ । <sup>୪</sup> ମାଇଜିକେ ତାର୍ ନିଜର୍ ଗାଗଡ଼ ଅଦିକାର୍ ନାଇ, ମାତର୍ ମୁନୁସ୍ ଆଟେ । ସେନ୍ତାରିସେ ମୁନୁସ୍‌କେ ତାର୍ ନିଜର୍ ଗାଗଡ଼ ଅଦିକାର୍ ନାଇ, ମାତର୍ ମାଇଜିର୍ ଆଟେ । <sup>୫</sup> ଦୁଇ ମାଇଜି ମୁନୁସ୍ ବେଗ୍‌ଲିକରି ନ ରଅଡ଼ । ମାତର୍ ବେଗ୍‌ଲିକରି ରଇବାର୍ ଆଲେ, ଦୁଇ ଲକ୍ ରାଜି ଉଆ । ଜେନ୍ତାରି କି ସେ ବେଗ୍‌ଲି ରଇବା ବେଲାଇ, ପାର୍‌ତନା କରିଅଇସି । ମାତର୍ ତାର୍‌ପଟେ ଆରିତରେକ୍ ଆସି ମିସାଆ । ଏନ୍ତାରିକଲେ ସଇତାନର୍ ପରିକାତେଇ ଅନି ତମେ ରକିଆ ପାଇସା । କାଇକେବଇଲେ ତମ୍‌କେ ମୁର୍ଚିକରି ରଇବା ବସୁ ଉନା ଆଟେ ।

<sup>୬</sup> ଏ ବିସଇ ମୁଇ ତମ୍‌କେ ଜେଡ଼କି କଇଲି ଆଟି, ସେଟା ଆଦେସ୍ ଦେଲା ପାରା କଇନାଇ, ମାତର୍ ତମର୍ ଦୁର୍‌ବଲ୍ ଜାନିକରି ଉପଦେସ୍ ଦେଲା ପାରା କଇଲିନି । <sup>୭</sup> ତମେ ସବୁଲକ୍ ମର୍‌ପାରା ବିବା ନ ଉଆ ବଲି ମୁଇ ମନ୍ କଲିନି । ମାତର୍ ଗଟେକ୍ ଗଟେକ୍ ଲକ୍‌କେ ପର୍ମେସରର୍ ଟାନେଅନି ମୁଲିଅ ରଇବା ଦାନ୍ ମିଲିଆଟେ । ଗଟେକ୍ ଲକ୍‌କେ ଗଟେକ୍ ରକାମ୍‌ଟା ଆରି ବିନ୍ ଲକ୍‌କେ ବିନ୍ ରକାମ୍ ଦାନ୍ ଦେଲାଆଟେ ।

<sup>୮</sup> ଏବେ ମୁଇ ବିବା ନ ଅଇରଇବା, ଆରି ରାଣ୍ଡି ମାଇଜିମନ୍‌କେ କଇଲିନି, ତମେ ମର୍ ପାରା ଏକ୍‌ଲା ରଇଲେ ତମର୍‌ପାଇ ନିକ୍ ଅଇସି । <sup>୯</sup> ମାତର୍ ତମେ ଜଦି ମନର୍ ଲାଲ୍‌ସା ମୁର୍ଚିକରି ରଇ ନାପାର୍‌ଲାସିନି ବଇଲେ, ବିବା ଅଇବାଟା ନିକ୍ । କାଇକେବଇଲେ ଲାଲ୍‌ସାଇ ପଡ଼ିଜିବା ବାଦୁଲେ ବିବା ଅଇବାଟା ନିକ୍ ।

<sup>୧୦</sup> \*ମାତର୍ ବିବା ଅଇବା ବିସ୍‌ବାସିମନ୍‌କେ ମୁଇ ଆଦେସ୍ ଦେଲିନି, ମୁଇ ଦେଇ ନାଇ ମାତର୍ ମାପୁରୁ ଦେଲାନି । ଜଦି ତମେ ଗଟେକ୍ ବିବାଇ ମାଇଜି, ସେନ୍ତାରି ଆଲେ ମୁନୁସ୍‌କେ ଚାଡ଼ି ବିନେ ନ ରୁଆ । <sup>୧୧</sup> ଜଦି ତାକେ ଚାଡ଼ଲେ, ବିବା ନ ଅଇତେ ରୁଆ ।

\* ୬:୧୯ ୬:୧୯ ୧ମ କରନ୍ତଃ ୩:୧୬; ୨ୟ କରନ୍ତଃ ୬:୧୬    \* ୬:୧୦ ୬:୧୦ ମାଡିଉ ୫:୩୨; ୧୯:୯; ମାର୍କ ୧୦:୧୧, ୧୨; ଲୁକ୍ ୧୬:୧୮

ନଇଲେ ଆରି ଗଟେକ୍ ତର୍ ନିଜର୍ ମୁନ୍ନୁସ୍ ସଙ୍ଘ୍ ମିସା । ଜଦି ତମେ ବିବାଇ ମୁନ୍ନୁସ୍, ନିଜର୍ ମାଇଜିକେ ନ ଚାଡା ।

୧୨ ଏବେ ମୁଇ ବିସ୍ବାସିମନ୍ ଜେ କି ବିସ୍ବାସ୍ ନ କଲାଟାମନ୍କେ ବିବା ଅଇଆଚଡ୍, ସେମନ୍କେ କଇଲିନି, ମୁଇ କଇନାଇ ମାପୁରୁ କଇଲାନି, । ଜଦି ଗଟେକ୍ ବିସ୍ବାସି, ବିସ୍ବାସ୍ ନଇଲା ମାଇଜିକେ ବିବା ଅଇଲାଆଚେ, ଆରି ସେ ମାଇଜି ତାର୍ ସଙ୍ଘ୍ ମିସି ରଇବାକେ ମନ୍ କର୍ସି ବଇଲେ, ସେ ବାଇ ତାକେ ନ ଚାଡ । ୧୩ ଆରି ଜନ୍ ବିସ୍ବାସି ମାଇଜି ବିସ୍ବାସ୍ ନ କଲା ମୁନ୍ନୁସ୍କେ ବିବାଅଇରଇସି, ଆରି ସେ ତାର୍ସଙ୍ଘ୍ ମିସି ରଇବାକେ ମନ୍ କର୍ସି, ତେବେ ସେ ନିଜର୍ ମୁନ୍ନୁସ୍କେ ନ ଚାଡ । ୧୪ କାଇକେବଇଲେ ଜଦି ତମେ ଗଟେକ୍ ବିସ୍ବାସି ମାଇଜି, ବିସ୍ବାସ୍ ନ କର୍ବା ମୁନ୍ନୁସ୍କେ ବିବା ଅଇଆଚାସ୍, ତର୍ ମୁନ୍ନୁସ୍ ତର୍ ସଙ୍ଘ୍ ମିସ୍ଲାଚ୍ପାଇ ତାକେ ପର୍ମେସର୍ ତାର୍ ନିଜର୍ ସୁକଲ୍ ଲକ୍ କଲାଆଚେ । ସେନ୍ତାରିସେ ବିସ୍ବାସ୍ ନ କରିରଇବା ମାଇଜିକେ, ପର୍ମେସର୍ ତାକଲା ଆଚେ । କାଇକେବଇଲେ ସେ ବିସ୍ବାସ୍ କର୍ବା ମନସ୍ ସଙ୍ଘ୍ ମିସ୍ଲା ଆଚେ । ଏନ୍ତାରି ନ ରଇଲେ ତମର୍ ପିଲାମନ୍ ବିସ୍ବାସ୍ ନ କର୍ବା ଲକର୍ ପିଲାମନର୍ପାରା ଅଇତାଇ । ମାତର୍ ଏବେ ସେମନ୍କେ ମିସା ପର୍ମେସର୍ ତାର୍ ନିଜର୍ ଲକ୍ କଲାଆଚେ ।

୧୫ ସେ ଜାଇଟା ମିସା ଅ, ଜଦି ଗଟେକ୍ ବିସ୍ବାସ୍ ନ କଲା ଲକ୍ ତାର୍ ବିସ୍ବାସି ମାଇଜି କି ମୁନ୍ନୁସ୍ ଟାନେଅନି ବିନେ ଅଇବାକେ ମନ୍ କଲାନି ବଇଲେ, ସେ ବିନେ ଅ । ଏନ୍ତାରି ଅଇଲେ କିରିସ୍ଟକେ ବିସ୍ବାସ୍ କର୍ବା ମାଇଜି କି ମୁନ୍ନୁସ୍ ବିବା ବନ୍ଦନେ ଅନି ମୁକ୍ଲି ଆଚେ । ପର୍ମେସର୍ ତମ୍କେ ସାନ୍ତିସଙ୍ଘ୍ ମିସି ବିଡି ଜିଇବାକାଇବାକେ ତାକଲା ଆଚେ । ୧୬ ଅଇପାରେ, ତୁଇ ଗଟେକ୍ ବିସ୍ବାସି ବିବାଅଇଲା ମାଇଜି, ତର୍ ବିସ୍ବାସ୍ ନ କଲା ମୁନ୍ନୁସ୍କେ କିରିସ୍ଟର୍ ଟାନେ ବିସ୍ବାସ୍ କରାଇପାରୁସ୍ । ସେନ୍ତାରିସେ ତୁଇ ଗଟେକ୍ ବିସ୍ବାସି ବିବାଅଇଲା ମୁନ୍ନୁସ୍, ତର୍ ବିସ୍ବାସ୍ ନ କଲା ମାଇଜିକେ କିରିସ୍ଟର୍ ଟାନେ ବିସ୍ବାସ୍ କରାଇ ପାରୁସ୍ ।

ପର୍ମେସର୍ କଇଲା ଇସାବେ ଚଲାଚଲ୍ଡି କରା

୧୭ ମାପୁରୁ ଜାକେ ଜେନ୍ତ୍ର ଜିବନ୍ ଦୁକାଇ ଆଚେ, ପର୍ମେସର୍ ଜାକେ ଜନ୍ ଇସାବେ ତାକଲା ଆଚେ, ସେ ସେନ୍ତାର୍ ଜିଉନା କାଉନା କର । ମୁଇ ସବୁ ମଣ୍ଡଲିଟାନେ ଏ ରକାମ୍ ଆଦେସ୍ ଦେଲିନି । ୧୮ ଜଦି ତମେ ଗଟେକ୍ ସୁନଡ୍ ଅଇଲା ଜିଉଦି ଲକ୍ ଆରି ପର୍ମେସର୍ ତମ୍କେ ତାକଲାଆଚେ, ସେନ୍ତାର୍ ଆଲେ ତମେ ତମର୍ ଗାଗଡେଅନି ସୁନଡ୍ ଚିନ୍ ଲିବାଇବାକେ ଚେସଟା କରା ନାଇ । ସେନ୍ତାରିସେ ତମେ ଜଦି ଜିଉଦି ନ ଅଇଲା ଲକ୍ ଜାକେ କି ପର୍ମେସର୍ ତାକଲା ଆଚେ, ତମେ ସୁନଡ୍ ଅଇବାକେ ଚେସଟା କରାନାଇ । ୧୯ ଲକ୍ମନ୍ ସୁନଡ୍ ଅଇବାଟା କି ସୁନଡ୍ ନ ଅଇବାଟା କାଇଟା ନାଇ, ପର୍ମେସର୍ ଆଦେସ୍ ମାନ୍ବାଟାସେ ମୁକିଅ । ୨୦ ମାପୁରୁ ତମ୍କେ ଜନ୍ ଇସାବେ ତାକିଆଚେ, ତମେ ସେ ଇସାବେ ରୁଆ । ୨୧ ପର୍ମେସର୍ ତମ୍କେ ତାକଲାବେଲେ ତମେ କାଇ ଗତିଦାଙ୍ଘ୍ତା ରଇଲାସ୍ କି ? ସେ ବିସଇନେଇ ମନ୍ଦୁକ୍ କରାନାଇ । ଜଦି ତର୍ ସାଉକାର୍ ତକେ ମୁକ୍ଲାଇଲାନି, ତେବେ ଉଟିଜା । ୨୨ ମାପୁରୁ ତାକଲାବେଲେ ଜେ ଗତିଦାଙ୍ଘ୍ତା ରଇଲା ସେ ଏବେ ମୁକ୍ଲି ରଇଲା ଲକ୍ । କାଇକେବଇଲେ ମାପୁରୁ ତାକେ ମୁକ୍ଲାଇ ଆଚେ । ସେନ୍ତାରିସେ ଏବେ ଜେ ମୁକ୍ଲିକରି ଆଚେ, ସେ କିରିସ୍ଟର୍ ଗତିଦାଙ୍ଘ୍ତା । ୨୩ ତମ୍କେ ଅଦିକ୍ ଦାମ୍ ଦେଇ ଗେନାଅଇଆଚେ । ଲକ୍ମନର୍ ଗତିଦାଙ୍ଘ୍ତା ଉଆ ନାଇ । ୨୪ ଏ ବାଇବଇନିମନ୍, ତମ୍କେ ପର୍ମେସର୍ ତାକଲାବେଲେ ଜନ୍ ଇସାବେ ରଇଲାସ୍, ସେ ଇସାବେ ପର୍ମେସର୍ ସଙ୍ଘ୍ ମିସିକରି ରଇବାର୍ ଆଚେ ।

ବିବା ନ ଅଇରଇବା ଆରି ରାଣ୍ଡି ମାଇଜିମନର୍ ବିସଇରେ ପରସନ

୨୫ ଏବେ ମୁଇ ବିବା ନ ଅଇଲା ଦାଙ୍ଗଡାଦାଙ୍ଗଡି ବିସଇନେଇ ଲେକ୍‌ବି । ସେ ବିସଇନେଇ ମାପୁରୁର୍ ଲଗେଅନି କାଇ ଆଦେସ୍ ପାଇନାଇ । ମାତର୍ ପରମେସର୍ ମକେ ଦୟା କରି ଗଟେକ୍ ସତ୍‌ଦରମ୍ ଲକ୍ ଇସାବେ ନିଜର୍ ମନର୍ କାତା କଇଲିନି ।

୨୬ ଏବର୍ ଦୁକ୍ କସଟର୍ ବେଲା ଏତାଇଲେ, ମୁଇ ବାବ୍‌ଲିନି ଗଟେକ୍ ଲକ୍ ଜେନ୍ତାରି ଆରେ, ସେନ୍ତାରିସେ ରଇବା ଦରକାର୍ । ୨୭ ତମେ କାଇ ମାଇଜି ସଙ୍ଗ୍ ବାନ୍ଧିଅଇ ଆରାସ୍ କି ? ସେନ୍ତାରିଆଲେ ମୁକଲ୍‌ବାକେ ଚେସ୍‌ଟା କରାନାଇ । ତମେ କାଇ ବିବା ଉଆସ୍ ନାଇ କି ? ସେନ୍ତାରିଆଲେ ମାଇଜି କଜ୍‌ବାକେ ଚେସ୍‌ଟା କରାନାଇ । ୨୮ ଜଦି ତମେ ବିବାଅଇ ଆରାସ୍, ବଇଲେ ତମେ ପାପ୍ କରାସ୍ ନାଇ । ଜଦି ଗଟେକ୍ ଦାଙ୍ଗଡି ବିବାଅଇସି, ସେ ମିସା ପାପ୍ କରେନାଇ । ମାତର୍ ବିବାଅଇଲା ଲକ୍‌ମନ୍ ଦୁକ୍ କସଟ୍ ମୁରଟିକରି ରଇବାକେ ପଡ଼ସି । ଏନ୍ତାରି ଦୁକ୍ କସଟର୍ ବେଲାଇ ସିତିଅନି ରକିଆ ପାଆ, ବଲିକରି ମୁଇ ମନ୍ କଲିନି ।

୨୯ ମାତର୍ ଏ ବାଇମନ୍ ମୁଇ ତମକେ କଇଲିନି, ଏବେ ଆମ୍‌କେ ଅଲପ୍ ଦିନ୍ ଆତେ । ଏଟାର୍ ପାଇ ଏବେଅନି ଜେ ବିବା ଅଇଆତେ ସେ ବିବା ନ ଅଇଲା ଲକ୍‌ର୍ ପାରା ରଅ । ୩୦ ସେନ୍ତାରିସେ ଜନ୍ ଲକ୍‌ମନ୍ କାନ୍ଦାବୁବା ଅଇରଇଲାସ୍‌ନି, ସେମନ୍ କାନ୍ଦାବୁବା ନ ଅଇ ରଇଲା ଲକ୍‌ର୍ ପାରା ରୁଆ । ଆରି ଜନ୍ ଲକ୍‌ମନ୍ ସାର୍‌ଦା ଅଇରଇଲାଇନି, ସେମନ୍ ସାର୍‌ଦା ନ ଅଇଲା ଲକ୍‌ର୍ ପାରା ଅଇ ରଅଡ଼ । ଜନ୍ ଲକ୍‌ମନ୍ ଗେନ୍‌ବାଇ, ସେଟା ନିଜରଟା ନର୍ ବଇଲାପାରା ରଅଡ଼ । ୩୧ ଜନ୍ ଲକ୍‌ମନ୍ ଜଗତର୍ ଜିନିସ୍ ନେଇ ବେବାର୍‌ପାନି କଲାଇନି, ସେମନ୍ ସବୁବେଲେ ସେ ବିସଇ ଚିନ୍ତା ନ କଲା ଲକ୍‌ର୍ ପାରା ରଅଡ଼ । କାଇକେବଇଲେ ଜନ୍ ଜଗତେ ଆମେ ଆରୁ, ସେ ଜଗତର୍ ସବୁ ଜିନିସ୍ ବୁଡ଼ିଜାଇସି ।

୩୨ ମାତର୍ ତମେ ଏ ବିସଇନେଇ ତେରେପେତେ ଉଆନାଇ । ବିବା ନ ଅଇଲା ଲକ୍‌ମନ୍ ସବୁବେଲେ ମାପୁରୁର୍ ସେବା କାମ୍ କର୍‌ବାକେ ମନ୍ କର । କାଇକେବଇଲେ ମାପୁରୁକେ ସାର୍‌ଦା କରାଇବାଟା ତାର୍ ମୁକିଅ କାମ୍ । ୩୩ ମାତର୍ ଜେ ବିବାଅଇଆତେ, ସେ ଏ ଜଗତର୍ ସବୁ ବିସଇନେଇ ଚିନ୍ତା କରସି । କାଇକେବଇଲେ ସେ ତାର୍ ମାଇଜିକେ ସାର୍‌ଦାସଙ୍ଗ୍ ରକ୍‌ବାକେ ମନ୍ କରସି । ୩୪ ସେନ୍ତସେ ତାର୍ ମନ୍ ଦୁଇବାଟେ ଜିକ୍‌ଟାନ୍ ଅଇଲାନି । ବିବା ନ ଅଇଲା ମାଇଜି କି ଦାଙ୍ଗଡି ମାପୁରୁର୍ କାମ୍ ବିସଇ ଚିନ୍ତା କରସି । କାଇକେବଇଲେ ସେ ତାର୍ ଗାଗଡ଼ ଆରି ଆଡ଼ମା ପରମେସର୍‌କେ ସରପି ଦେବାକେ ମନ୍ କରସି । ମାତର୍ ବିବା ଅଇଲା ମାଇଜି ଏ ଜଗତର୍ ସବୁଦିନର୍ ବିସଇ ଚିନ୍ତା କରସି । କାଇକେ ବଇଲେ ତାର୍ ମୁନୁସ୍‌କେ ସାର୍‌ଦା କର୍‌ବାକେ ସେ ବାବ୍‌ତେ ରଇସି ।

୩୫ ଏ କାତା ମୁଇ ତମକେ ନିଜର୍ ମଙ୍ଗଲର୍ ପାଇ କଇଲିନି । ତମକେ ଆଦେସ୍ ମାନ୍‌ବାକେ ଦେଇ ନାଇ ମାତର୍ ତମେ ଜେନ୍ତକି ସତ୍ ବାବେ ଚଲାଚଲ୍‌ତି କରି ଏନେତେନେ ଚିନ୍ତା ନ ଅଇକରି ପୁରାପୁରୁନ୍ ବାବେ ମାପୁରୁକେ ସରପି ଅଇବାକେ କଇଲିନି ।

୩୬ କନିଆ ମାଙ୍ଗନି ଅଇଲାପତେ ଜଦି ଜନ୍ ମନସ୍ ତାର୍ ମାଙ୍ଗଲା ମାଇଜି ସଙ୍ଗ୍ ଟିକ୍‌ସଙ୍ଗ୍ ଚଲାଚଲ୍‌ତି କରି ନାପାରୁଲାନି ଆରି ତାର୍ ଲାଲ୍‌ସା ସେ କନିଆ ଉପ୍‌ରେ ବଡ଼ିଗାଲାନି, । ତାର୍ ଇସାବେ ବିବା ଅଇବାର୍ ଆତେ ଆକା ବଇଲେ, ସେ ବିବା ଅଇ ପାରେ । ଏଟାର୍‌ପାଇ କାଇ ପାପ୍ ନାଇ । ୩୭ ମାତର୍ ସେ ଜଦି କାର୍ ବାଦିଅ ନ ଅଇ ତାର୍ ମନ୍ ଡାଟ୍ କରି ଟିକ୍‌କଲେ, ଆରି ତାର୍ ମନ୍ କଲାଟା ପୁରାପୁରୁନ୍ ଦାରି ରକିପାରୁଲେ, ସେ ଡିଣ୍ଡା ଟକିକେ ବିବା ନ କଲେ ନିକ । ୩୮ ତେବେ ଜାକେ ଡିଣ୍ଡା

ଚକିର୍ ଫାଙ୍ଗନି ଅଇଲା ଆଚେ, ସେ ଚିକ୍ କାମ୍ କଲାନି, ମାତର ଜେ ବିବା ନ ଅଏ, ସେ ତାର୍ ତେଇଅନି ଅଦିକ୍ ନିମାନ୍ କାମ୍ କଲାନି ।

୩୯ ମୁନ୍ନୁସ୍ ଜିବନ୍ ରଇବା ଜାକ, ମାଇଜି ବାନ୍ଧି ଅଇରଇସି । ଜଦି ମୁନ୍ନୁସ୍ ମରିଜାଇସି, ତେବେ ମାଇଜି ମାପୁରୁକେ ବିସ୍ବାସ୍ କରବା ଲକ୍‌କେ, କାକେ ମିସା ବିବା ଅଇପାରସି । ୪୦ ମୁଇ ବାବ୍‌ଲିନି ସେ ବିବା ନ ଅଇ ସେନ୍ତସେ ରଇଲେ ଅଦିକ୍ ସୁକ୍ ମିଲ୍‌ସି । ଆରି ଏଟା ପରମେସରର୍ ସୁକଲ୍ ଆଡ଼ମାର୍ ମନ୍ କଲାଟା ବଲି ମୁଇ ବାବ୍‌ଲିନି ।

୮

ପୁଜା କଲା ପରସାଦ୍ ବିସଇ ପରସନ୍

୧ ଏବେ ମୁଇ ଦେବିଦେବତାମନ୍‌କେ ପୁଜଲା ମାଉଁସ୍ ବିସଇନେଇ ଲେକ୍‌ଲିନି । ଏଟା ସଡ୍ ଜେ ଆମ୍‌କେସେ ବୁଦି ଆଚେ ବଲି ତମେ ଜନ୍‌ଟା କଇଲାସ୍‌ନି, ସେଟା ଆମେ ଜାନିଆରୁ । ସେନ୍ତା ଗଟେକ୍ ଲକ୍‌କେ ଆଁକାର୍ ଜନମ୍ କରାଇସି । ମାତର ଆଲାଦ୍ ଆମର୍ ବିସ୍ବାସ୍‌କେ ଡାଟ୍ କରାଇସି । ୨ ଜନ୍ ଲକ୍, ଏ ବିସଇ ମୁଇ ଅଲପ୍ ଜାନିଆଟିବଲି ବାବ୍‌ସି, ସେ ସତଇସେ ଜାଇଟା ଜାନ୍‌ବା ଦରକାର୍, ସେଟା ଜାନେ ନାଇ । ୩ ମାତର ଜନ୍‌ଲକ୍ ଜଦି ପରମେସରକେ ଆଲାଦ୍ କଲାନି, ତାକେ ପରମେସର ଜାନେ ।

୪ ତେବେ ଦେବିଦେବତାମନ୍‌କେ ପୁଜଲା ମାଉଁସ୍ ବିସଇ ଜାନିଆରୁ ଜେ, ଏ ଜଗତେ ଦେବି ଦେବତା ବଲି କାଇଟା ନାଇ । ଆମର୍ ପରମେସରକେ ଚାଡ଼ିଦେଲେ ଆରି କେ ମିସା ପରମେସର ନାଇ । ୫ କାଇକେବଇଲେ ସରଗ୍ ପୁରେ ଅ କି ମଡ଼ପୁରେ ଅ ଜନ୍‌ଟାମନ୍‌କେ ଦେବିଦେବତା ବଲି କଇଲାଜନି, ଏଲେ ମିସା ସେମନ୍ ରଇପାରଡ୍ । ଏନ୍ତି କେତେକ୍ କେତେକ୍ ଦେବତା ଆରି ମାପୁରୁ ଆଚଡ୍ । ୬ ସେମନ୍ ରଇଲେ ମିସା ଆମର୍ ଗଟେକ୍ ଆକା ବାବା ପରମେସର, ଜନ୍ ବାବା କି ସବୁ ଡିଆର୍ କଲାଆଚେ, ଆରି ଆମେ ତାର୍ ଲାଗି ବ୍‌ବ୍‌ଲୁନି, ମାତର ଗଟେକ୍ ବଲି ମାପୁରୁ ଜିସୁ କିରିସ୍‌ଟ, ତାର୍ ଲାଗି ସବୁ ବିସଇ ଅଇଆଚେ, ଆରି ତାର୍ ଲାଗି ଆମେ ବ୍‌ବ୍‌ଲୁନି ।

୭ ଏଲେ ମିସା ଏ ସଡ୍ ଗିଆନ୍ ସବୁଲକ୍ ନାଜାନଡ୍ । ମାତର କେତେଲକ୍ ଆଗେଅନି ଦେବି ଦେବତା ଆଚଡ୍ ବଲି ବାବିକରି ସେମନ୍‌କେ ପୁଜା କରି ଆଇଲାଜନି । ସେମନ୍‌ର ବିସ୍ବାସ୍ ଡାଟ୍ ନାଇଜେ ଦେବିଦେବତାମନ୍‌କେ ପୁଜଲାଟା କାଇଲେସରି ସେମନ୍ ସୁକଲ୍ ଅଇବାର୍ ନଏ ବଲି ବାବ୍‌ଲାଜନି । ୮ ମାତର କାଦି କାଇବାଟା, ପରମେସରଟାଗେଅନି ଆମକେ ବିନେ ନ କରେ । ଆମେ କାଇଲେ କାଇ ଲାବ୍ ନଏ, କି ନ କାଇଲେ ମିସା କାଇଟା ନ ଜାଏ ।

୯ ମାତର କାଇଟା କାଇଲାସିନି ସେ ବିସଇନେଇ ଜାଗରଡ୍ ରୁଆ । ତମେ ଜନ୍‌ଟା କାଇଲାର୍ ଲାଗି ତମର୍ ଜନ୍ ବାଇର୍ ବିସ୍ବାସ୍ ଡାଟ୍ ନାଇ, ସେ ତମର୍‌ଲାଗି ପାପ୍ କରବାର୍ ନାଇ । ୧୦ କାଇକେ ବଇଲେ, ତମେ ଗଟେକ୍ ବୁଦି ରଇଲା ଲକ୍ । ପୁଜଲାଟା କାଇଲେ କାଇଟା ନଏ ବଲି ଜାନାସ୍ । ଜଦି ମନ୍ ବିଡ଼ରେ ବିସ୍ବାସେ ଡାଟ୍ ନଇଲା ତମର୍ ଗଟେକ୍ ବାଇ, ସେ ତମକେ ମନ୍‌ରେ କାଇବାଟା ଦେକ୍‌ଲେ, ତାକେ ମିସା ପୁଜଲାଟା କାଇବାକେ ମନ୍ ଲାଗସି । ୧୧ ତେବେ ସେ ବାଇ ନସ୍‌ଟ ଅଇଲାନି, କାଇକେବଇଲେ ପୁଜଲାଟା କାଇଲାକେ ପାପ୍ କଲିନି ବଲି ସେ ବାବ୍‌ସି । କିରିସ୍‌ଟ ସେ ବାଇର୍‌ପାଇ ମଲାଆଚେ ବଲି ମିସା ତମର୍ ମନେ ରଇବାର୍ ଆଚେ । ୧୨ ଏନ୍ତାରି ତମେ ସଙ୍ଗର୍ ବିସ୍ବାସି ବାଇମନ୍‌ର ବିରୁଦେ ପାପ୍ କଲାସିନି ଆରି ତାକର୍ ବୁଜବା ବପୁ ଉନାଟାକେ, ବାଦା ଦେଇ ମାପୁରୁ ଜିସୁର୍ ବିରୁଦେ ମିସା ପାପ୍ କଲାସିନି । ୧୩ ତେବେ ମୁଇ ପୁଜଲା ମାଉଁସ୍ କାଇଲାର୍ ଲାଗି ମର୍ ବାଇବଇନିମନ୍‌କେ ପାପ୍

କରାଇଲିନି ବଇଲେ, ମୁଇ କେବେ ମିସା ସେଟା ନ କାଇ । କାଇକେବଇଲେ ସେଟାରଲାଗି ମର ବାଇବଇନିମନ୍ ପାପେ ନ ପଡ଼ତ ।



ପେରିଡ଼ ସିସମନର୍ ଅଦିକାର୍

୧ ମର ଜାଇଟା ମନ୍ କଲାଟା, ସେଟା କାଇ କରିନାପାରି କି ? ମୁଇ କାଇ ଗଟେକ୍ ପେରିଡ଼ ନଇ କି ? ମୁଇ କାଇ ଆମର ମାପୁରୁ ଜିସୁର୍ ଦରସନ୍ ପାଇ ନାଇ କି ? ତମେ ସବୁ, ମୁଇ ମାପୁରୁର୍ ପାଇ କରିରଇବା କାମର୍ ଲାଗି ବିସ୍ବାସ୍ କଲାସ୍ ନାଇ କି ? ୨ ଜଦି ମକେ ବିନ୍ ଲକ୍ମନ ଗଟେକ୍ ପେରିଡ଼ ବଲି ନ ନାମ୍ଲେ ମିସା, ତମେ ମକେ ସଡ଼ ଇସାବେ ନାମି ଆଗସ୍ । କାଇକେବଇଲେ ମାପୁରୁର୍ ସଙ୍ଗ୍ ତମର୍ ଜିବନ୍ ମିସ୍ଲାର ଲାଗି, ମର ପେରିଡ଼ ପଦର୍ ସାକି ଆଗସ୍ ।

୩ ତମେ ଗଟେକ୍ ପେରିଡ଼ କି ? ବଲି ମକେ ପରସନ୍ କରବା ଲକ୍ମନକେ ମୁଇ ଏ କାତା କଇବି । ୪ ଆମେ ମାପୁରୁ ଜିସୁର୍ ପେରିଡ଼ ମନ୍ । ତାର୍ କାମର୍ ଲାଗି, କାଇବାଟା କି ପଇବାଟା ମିଲ୍ଲେ, ସେଟା ନେବାର୍ ମର୍ ଅଦିକାର୍ ନାଇ କି ? ୫ ଅଲ୍ଗା ପେରିଡ଼ମନର୍ ପାରା, ପିତର୍ ଆରି ଆମର୍ ମାପୁରୁ ଜିସୁର୍ ବାଇମନର୍ ପାରା, ବିସ୍ବାସ୍ କରିରଇବା ମାଇଜିକେ ବିବା ଅଇକରି ତାକେ ମର୍ ସଙ୍ଗ୍ ନେବାକେ କାଇ ମର୍ ଅଦିକାର୍ ନାଇ କି ? ୬ ଅବ୍‌କା ଜିଇବା କାଇବାକେ ମୁଇ ଆରି ବରନବା ଆବଡ଼ କାମ୍ କର୍ତେ ରଇବୁ କି ? ୭ ବାବିଦେକା, ଗଟେକ୍ ସଇନ ଜୁଇଦେ ରଇଲାବେଲେ ନିଜେ କର୍ତ କରି କେବେ କାମ କରିପାରେ କି ? ନାଇ, ନାପାରେ । କି ଗଟେକ୍ ଚାସି ତାର୍ କେତେ ଅନି ଅଇଲା ପସଲ୍, ତାର୍ କାଇବାର୍ ଅଦିକାର୍ ନାଇ କି ? ଆରି କେ ଗରୁଗାଇ ପସିରଇକରି ସେମନର୍ ଦୁଦ୍ ନ କାଅଡ଼ କି ?

୮ ମୁଇ କାଇ ଏଟା ମୁନୁସ୍ ଇସାବେ କଇଲିନି କି ? ନିୟମେ ଏଟା ଲେକା ଅଏ ନାଇ କି ? ୯ \*ସେ ନିୟମେ ଏନ୍ତାରି ଲେକା ଅଇଆଟେ । ଦାନ ଗାନାଇ ବୁଲ୍ଲଡେ ରଇବା ବଲ୍ଲଦର୍ ତମ୍ନାଇ ବାନ୍ନାଇ । ଜେଡ଼ି କି ସେ ଅଲ୍ପ ଅଲ୍ପ କାଇଡେରଇସି । ଏ ନିୟମ୍ ଲେକ୍ଲାବେଲେ ପର୍ମେସର୍ କାଇ ଏ ବଲ୍ଲଦମନର୍ ବିସଇସେ ଚିନ୍ତା କର୍ତେରଇଲା କି ? ୧୦ ଏଟା ଆମର୍ ପାଇ ଲେକା ଅଇଲାଆଟେ । ଜେଡ଼ିକି ଜନ୍ ଲକ୍ମନ କସ୍‌ବାଡେଇ ଆରି କାଟ୍‌ବାଡେଇ ମିସ୍ଲାଇ ଆଡ଼ତ, ସେମନ୍‌କେ ଡେଇର୍ ପସଲ୍‌ଟାନେ ବାଗ୍ ମିଲ୍ଲସି ବଲି ଆସା କରି କାମ୍ କର୍‌ବାଇ । ୧୧ \*ଆମେ ତମର୍ ବିଡ଼ରେ ଆଡ଼ମର୍ ମୁଞ୍ଜି ବୁନ୍‌ଲୁ ଆରୁ । ସେଟାର୍ ପାଇ ତମର୍‌ଟାନେ ଅନି କାଇ ଜଗଡ଼ର୍ ପସଲ୍ ପାଇବାକେ ମନ୍ କର୍‌ବାଟା, ଗଟେକ୍ କାରାପ୍ କାତା କି ? ୧୨ ତମର୍ ଟାନେଅନି ଏଟା ଆସା କର୍‌ବାକେ ଜଦି ବିନ୍ ଲକ୍ମନର୍ ଅଦିକାର୍ ଆଟେ, ସେଡ଼ି ବଇଲେ ତାକର୍‌ଟାନେଅନି ଆମର୍ ଅଦିକାର୍ ବେସି ନଏଁ କି ?

ଏଲେ ମିସା ସେ ଅଦିକାର୍ ଆମେ ବେବାର୍ କରୁନାଇ, ମାତର୍ କିରିସ୍‌ଟର୍ ସୁବ୍‌କବରକେ କାଇମିସା ଅସୁବିଦା ନ ଆସ ବଲି ଆମେ ସବୁ ରକାମର୍ କସ୍‌ଟ ମୁରୁଟି କରି ରଇଲୁନି । ୧୩ ଜନ୍ ଲକ୍ମନ ମିନ୍‌ରେ ସେବା କଲାଜିନି, ସେମନ୍ ମିନ୍‌ରେ ଅନି କାଦି ପାଇବାଇ । ଆରି ଜେ ସବୁଦିନେ ବେଦିଟାନେ ବଲି ଦେଲାଜିନି, ସେମନ୍ ବେଦିଟାନେ ବଲିକଲା ବାଟାଇ ମିସ୍‌ବାଇ, ଏଟା ତମେ ଜାନିଆଗସ୍ । ୧୪ \*ସୁସମାଚାର୍ ଜାନାଇବା ଲକ୍, ଡେଇଅନି ଜିଉନା କାଉନା କରା ବଲି ମାପୁରୁ ଆଦେସ୍ ଦେଲାଆଟେ ।

୧୫ ମାତର୍ ମୁଇ ଏନ୍ତାରି କାଇମିସା ଅଦିକାର୍ ମାଞ୍ଜିନାଇ, ଏ ବିସଇ ଦାବି କର୍‌ବାକେ ମୁଇ ଲେକିନାଇ । ତମର୍‌ଟାନେଅନି ମାଞ୍ଜିବା ବାଦୁଲେ ମୁଇ ମରିଜିବି ସିନା, ନ

\* ୯:୯ ୯:୯ ୧ମ ତିମତି ୫:୧୮ \* ୯:୧୧ ୯:୧୧ ରମିୟ ୧୫:୨୭ \* ୯:୧୪ ୯:୧୪ ମାତିଉ ୧୦:୧୦; ଲୁକ୍ ୧୦:୭



ମାଞ୍ଜି । କାଇକେବଇଲେ ମୁଞ୍ଚ ତମରଟାନେ କାଇଟା ନ ମାଞ୍ଜିତେ କାମ୍ କଲି, ବଲି ବଡ଼ପନ୍ ଅଇବି । ୧୭ ସୁବକବର ସୁନାଇଲିନି ବଲି ମର ବଡ଼ପନ୍ ଅଇବା ଅଦିକାର ନାଇ, କାଇକେବଇଲେ ଏଟା ମକେ ତିଆରିରଇବା କାମ୍ । ଜଦି ମୁଞ୍ଚ ସୁବକବର ନ ଜାନାଇଲେ ମକେ ବଡ଼ ଡଣ୍ଡ ମିଲୁସି । ୧୭ ଏଟା ଜଦି ମୁଞ୍ଚ ନିଜର୍ ମନ୍ କଲା ଇସାବେ କଲେ, କୁଲି ପାଇବାକେ ମର ଅଦିକାର ରଇତା । ମାତର୍ ପର୍ମେସର୍ ମକେ ଏ କାମ୍ ସର୍ପି ଦେଲାକେ, ମୁଞ୍ଚ ଏଟା କଲିନି । ୧୮ ସେନ୍ତାରିଆଲେ ମକେ କେତେକ୍ କୁଲି ମିଲୁଲାନି ? ମର କର୍ତା ପାଇ ମାଞ୍ଜିବାକେ ମର ଦାବି ରଇଲେ ମିସା, ମୁଞ୍ଚ କୁଲି ନ ପାଇତେ ସୁବକବର ଜାନାଇଲିନି । ସୁବକବର ଜାନାଇବାକେ ଜନ୍ ଅଦିକାର ମୁଞ୍ଚ ପାଇ ଆତି, ସେଟାସେ ମର କୁଲି ।

୧୯ ଏଟାପାଇ ମୁଞ୍ଚ କାର୍ ତଲିଆ ନାଇ କି କାର୍ ଗତିଦାଞ୍ଜିତା ନାଇ । ଅଇଲେ ମିସା କେତେକ୍ କେତେକ୍ ଲକ୍‌କେ କିରିସ୍‌ଟରତେଇ ଆନବାକେ ମୁଞ୍ଚ ସବୁଲକର୍ ଗତିଦାଞ୍ଜିତା ଅଇଆତି । ୨୦ ମୁଞ୍ଚ ଜିଉଦି ଲକ୍‌ମନକେ ପାଇବାକେ, ତାକର୍ ପାରା ଚଲାଚଲୁତି କଲିନି, ଜେନ୍ତୁକି ମୁଞ୍ଚ ସେମନକେ କିରିସ୍‌ଟର୍ ବାଟେ ଆନିପାର୍ବି । ମୁଞ୍ଚ ଜଦି ମସାର ନିୟମର୍ ତଲିଆର୍ ନ ଅଇରଇଲେ ମିସା, ସେମନକେ କିରିସ୍‌ଟର୍ ବାଟେ ଆନବାକେ, ନିୟମ୍ ମାନୁବା ଲକ୍‌କର୍ ପାରା ଚଲାଚଲୁତି କଲିନି । ୨୧ ସେନ୍ତାରିସେ ଜିଉଦି ନ ଅଇଲା ଲକ୍‌ମନର୍ ସଙ୍ଗ୍ ରଇଲାବେଲେ, ମୁଞ୍ଚ ଜିଉଦି ନିୟମ୍ ମାନି ନାଇ । ସେ ବେଲେ ମୁଞ୍ଚ ଜିଉଦି ନ ଅଇଲା ଲକ୍‌କର୍ ପାରା ଚଲାଚଲୁତି କର୍ବି । ଜେନ୍ତୁକି ସେମନକେ କିରିସ୍‌ଟର୍ ବାଟେ ଆନିପାର୍ବି । ଏଟା ଅରଡ଼ ନଏଁ ଜେ ମୁଞ୍ଚ ପର୍ମେସର୍ ନିୟମ୍ ମାନି ନାଇ । କାଇକେବଇଲେ ମୁଞ୍ଚ କିରିସ୍‌ଟର୍ ନିୟମର୍ ତଲେ ଆତି । ୨୨ ଜେତେବେଲେ ମୁଞ୍ଚ ବିସ୍‌ବାସେ ଦୁର୍ବଲ୍ ଲକ୍‌କର୍ ସଙ୍ଗ୍ ରଇବି, ତାକର୍ପାରା ଦୁର୍ବଲ୍ ଅଇବି । ଜେନ୍ତୁକି ସେନ୍ତୁଅଇକରି ସେମନକେ କିରିସ୍‌ଟର୍ ବାଟେ ଆନି ପାର୍ବି । ସେଟାପାଇ ମୁଞ୍ଚ ବିନ୍ ବିନ୍ ଲକ୍‌ଟାଟାନେ ବିନ୍ ବିନ୍ ରକାମ୍ ଅଇରଇଲି । କେନ୍ତୁକରି ମିସା ମୁଞ୍ଚ ସେମନକେ ରକିଆ କର୍ବି ।

୨୩ କିରିସ୍‌ଟର୍ ସୁବକବର ସବୁବାଟେ ଜାନାଇବାକେ ଆରି ତାର୍ ଆସିର୍ବାଦ୍ ପାଇବାକେ ମୁଞ୍ଚ ସବୁଟା କଲିନି । ୨୪ ଆରାଜିତା ଟାନେ ପାଲାଇବା ଲକ୍ ବେସି ଆତଡ଼, ଏଟା ସଡ଼ । ମାତର୍ ଗଟେକ୍ ଲକ୍‌କେସେ ପୁରୁସ୍‌କାର୍ ମିଲୁସି । ଏଟା ତମେ ଜାନିଆଟାସ୍ । ତମେ ମିସା ପୁରୁସ୍‌କାର୍ ପାଇଲା ପାରା ପାଲାଆ । ୨୫ ଜେ ପାଲାଇବାଟାନେ ବାଗ୍ ନେଇସି, ସେ ଅବିଆସ୍ କରି, ତାର୍ ଗାଗଡ଼ ତାଟ୍ କରିରଇସି । ଆରି ସେ ଦାପେ ନସିଜିବା ପୁରୁସ୍‌କାର୍ ମିଲାଇବାକେ ସେଟା କର୍ସି । ମାତର୍ ଆମେ, କେବେ ମିସା ନ ନସ୍‌ବା ପୁରୁସ୍‌କାର୍ ପାଇବାକେ, ସେଟା କଲୁନି । ୨୬ ମୁଞ୍ଚ ଏନେତେନେ ନ ଦେକି ସାରାସାରି କେଟ୍‌ବାଟାନେ ପାଲାଇବା ଲକ୍‌କର୍ ପାରା ଆତି । ମୁଞ୍ଚ ଗଟେକ୍ ବିଦା ସଙ୍ଗ୍ ଜୁଇଦ୍ କର୍ବା ଲକ୍‌କର୍ପାରା, ଜେକି ତାର୍ ବିଦା ମାର୍ଲେ ପାଇସି ଆକା । ୨୭ ମୁଞ୍ଚ କସ୍‌ଟ୍ ମୁର୍ଚିକରି ଗାଗଡ଼ ମେଲା ଚାଡ଼ିନାଇ । କାଇକେ ବଇଲେ ବିନ୍ ଲକ୍‌ମନର୍ ଲଗେ ସୁବକବର ଜାନାଇରଇଲେ ମିସା ମକେ ଜେନ୍ତୁକି ନାଇବଲିକରି ନ କଅଡ଼ ।

## ୧୦

ମୁର୍ଚିପୁଜା ବିରୁଦେ ଜାଗର୍ତା

୧ ଏ ମର ବାଇବଇନିମନ୍, ଆମର୍ ଆନିଦାଦିମନ୍, ଜନ୍ ଲକ୍‌ମନ ମସାର ବାଟେ ଜାଇତେରଇଲାଇ, ସେମନକେ କାଇଟା ଅଇଲା ଏଡାଇ ଦେକା । ସେମନ୍ ସବୁ ଲକ୍ ବାଦଲ୍ ତଲେ ରଇ ରକିଆ ପାଇତେରଇଲାଇ । ଆରି ରଙ୍ଗ୍ ସମ୍‌ଦୁରେ ନ ବୁଡ଼ତେ ଇଣ୍ଡି ଇଣ୍ଡି ଲଙ୍ଗ୍‌ଲାଇ । ୨ ସେମନ୍ ସବୁ ବାଦଲେ ଆରି ସମ୍‌ଦୁରେ ହୁବନ୍ ନେଲାଇ

। ମସାର ସିସ୍‌ମନ୍ ବଲି ସେମନକେ ଗଟେକ୍ ତିନ୍ ରଇଲା । ୩ ଆରି ସବୁଲକ୍ ପରମେସର୍ ଜାଗାଇ ରଇବା କାଦି କାଇଲାଇ, ୪ ଆରି ସେ ପାକ୍‌ନାଇ ଅନି ଆଇବା ପାନି କାଇଲାଇ । ସେ ପାକ୍‌ନା ଅଇଲାନି କିରିସ୍ଟ । ୫ ଏଲେମିସା ସେମନର୍ ବିତ୍‌ରେ ଅନି ବେସି ଲକ୍‌କେ ପରମେସର୍‌ର ସାର୍‌ଦା ନ ରଇଲା । ସେଟାର ପାଇ ସେମନ୍ ମରୁବାଲି ବୁର୍ବୁ ମଲାଇ ।

୬ ସେମନ୍ ଜନ୍ ରକାମ୍ ଆସାର ବିସଇର୍ ପାଇ ଲାଲ୍‌ସା ଅଇ ରଇଲାଇ, ଆମେ ମିସା ସେ ରକାମ୍ ଲାଲ୍‌ସା ନ ଅର୍ । ସେଟାରପାଇ ଏ ସବୁ ଗଟ୍‌ଲା ବିସଇ ଆମର୍‌ପାଇ ଲେକାଅଇଆଟେ । ୭ ଜେନ୍‌ଟ୍ରିକି ସେମନର୍ ବିତ୍‌ରେ ଅନି କେତେଲକ୍ ପୁଡ୍‌ଲା ପୁଜା କର୍‌ବାର ଦାର୍‌ଲାଇ, ତମେ ସେନ୍ତାରି ପୁଡ୍‌ଲା ପୁଜା କର୍‌ବାଟା, ଆରାମ୍ କରା ନାଇ । ସାସ୍‌ତରେ ଲେକା ଅଇଆଟେ, ଜେନ୍‌ଟ୍ରିକି ଲକ୍‌ମନ୍ ପୁଜାକଲାଟା କାଇବାକେ ବସିରଇଲାଇ ଆରି ମଦ୍ କାଇକରି ବେବିଟାର୍ କର୍‌ବାର ଦାର୍‌ଲାଇ । ୮ ଜେନ୍‌ଟ୍ରିକି ସେମନର୍ ବିତ୍‌ରେ କେତେଲକ୍ ବେସିଆ କାମ୍‌କରି ଗଟେକ୍ ଦିନେ କଡେ ତିନ୍ ଅଜାର୍ ଲକ୍ ପରମେସର୍‌ର ତଣ୍ଡ ପାଇକରି ମରିଗାଲାଇ । ସେନ୍ତାରି ଆମେ ବେସିଆ କାମ୍ ନ କରୁ । ୯ ସେନ୍ତ୍ରସେ ସେମନର୍ ବିତ୍‌ରେ କେତେଲକ୍ ମାପରୁକେ ପରିକା କଲାଇ ଆରି ବିସ୍ ରଇବା ସ୍‌ଆଁ ଟକାଇ ଅଇକରି ମଲାଇ । ସେନ୍ତାରି ଆମେ ମାପରୁକେ ପରିକା ନ କରୁ । ୧୦ ସେମନ୍ ଜେନ୍‌ଟ୍ରିକି ପରମେସର୍‌ର ବିରୁଦେ ତାକର୍ ତାକର୍ ବିତ୍‌ରେ ଦଦାପେଲା ଅଇକରି, କୁରୁପ୍ ନାସ୍ କର୍‌ବା ଦୁଡ୍‌ରଲାଗି ମରିଆଜିଗାଲାଇ । ତମେ ସେନ୍ତାରି ଦଦାପେଲା ଉଆନାଇ ।

୧୧ ସବୁ ଲକ୍‌ପାଇ ଏ ସବୁ ଗଟ୍‌ନା ଗଟ୍‌ଲା । ଆରି ଆମ୍‌କେ ଚେଡ୍‌ନା ପାଇବାକେ ସେଟା ସବୁ ଲେକାଅଇଆଟେ । କାଇକେବଇଲେ ଏ ଜଗତ୍‌ ସାରାସାରି ବେଲା ଆସି କେଟ୍‌ଲା ଆଟେ ।

୧୨ ସେଟାରପାଇ ଜେ ମୁଇ ନିଜେ ତାଟ୍ ଆତି ବଲି ମନେ ମନେ ଏତାଇସି, ସେ ବିସ୍‌ବାସେ ଅନି ବିନ୍‌ବାଟେ ନ ଜାଆ, ସେଟାରପାଇ ଜାଗର୍‌ତ୍ତୁ ରୁଆ । ୧୩ ଆମ୍‌କେ ପରିକା ଜାଇ ପରିକା ଆଇସି, ସେଟା ନୁଆ ବିସଇ ନର୍ । କାଇକେବଇଲେ ସବୁବେଲେ ଏନ୍ତାରି ଲକ୍‌ମନ୍‌କେ ପରିକା ଆଇତେରଇସି । ମାତର୍ ପରମେସର୍ ତାଟ୍ କାତାଇ ତାଟ୍ ଆଟେ । ଆମ୍‌କେ ମୁରଟି ନାପାର୍‌ଲା ପାରା ପରିକା ଅଇବାକେ ସେ ନ ଦେଏ । ପରିକା ଆଇବାବେଲେ ସେ ଆମ୍‌କେ ବପୁ ମିସା ଦେଇସି ଆରି ତେଇ ଅନି ରକିଆ ପାଇବା ବାଟ୍ ଦେକାଇସି ।

୧୪ ସେଟାର ପାଇ ଏ ମର୍ ଆଲାଦର୍ ବାଇବଇନିମନ୍, ପୁଡ୍‌ଲା ପୁଜା କର୍‌ବା ଟାନେଅନି ଦୁରିକେ ଉଟିଜା । ୧୫ ମୁଇ ବୁଦି ରଇଲା ଲକ୍‌ମନ୍‌କେ କଇଲା ପାରା କଇଲିନି । ମୁଇ କାଇଟା କଇଲିନି ସେଟା ତମେ ବିଟାର୍ କରା । ୧୬ \*ଜେଡେବେଲେ ଆମେ ମାପରୁର୍ କାଦିର୍‌ପାଇ ରୁଣ୍ଡୁ, ଜନ୍ ମୁତାଇଅନି ଆମେ କାଇବୁ, ସେ ମୁତାରପାଇ ଆମେ ପରମେସର୍‌କେ ଦନିଅବାଦ୍ ଦେଲୁନି । ସେ ମୁତାଇଅନି କାଇଲାବେଲେ ଆମେ କିରିସ୍ଟର୍ ବନିତେଇ ମିସ୍‌ଲୁନି । ଜନ୍ ରୁଟିଆମେ ବାଙ୍ଗାଇବୁ, ସେଟା କାଇଲାବେଲେ କିରିସ୍ଟର୍ ଗାଗଡେ ମିସ୍‌ଲୁନି । ୧୭ କାଇକେବଇଲେ ରୁଟି ଗଟେକ୍ ଅଇଲେ ମିସା ଆମେ ବୁଡେକ୍ ଲକ୍ ଆବୁ । ସେ ଗଟେକ୍ ରୁଟି ଆମେ ମିସିକରି କାଇବାବେଲେ ଗଟେକ୍ ଗାଗଡ୍ ଅଇଗାଲୁନି ।

୧୮ ଜିଉଦି ମନର୍ ବିସଇ ବାବିଦେକା । ଜନ୍ ଲକ୍‌ମନ୍ ପୁଜାକଲା ମାଉଁସ୍ କାଇଲାଇନି, ସେମନ୍ କାଇ ବେଦିଲଗେ ଉପାସନା କଲାବେଲେ ନ ମିସଡ୍ ? ୧୯ ଏଟାରପାଇ ମୁଇ କଇଲିନି ଜେ, ଦେବ୍‌ତାମନର୍ ବଲି କଲା ପର୍‌ସାଦ୍ କାଇଟା ନାଇ କି ପୁଡ୍‌ଲା ବଲି କାଇଟା ନାଇ । ୨୦ ପୁଡ୍‌ଲାକେ ପୁଜା କରୁମନ୍ ସେମନ୍ ଜନ୍

\* ୧୦:୧୭ ୧୦:୧୭ ମାଡିଉ ୨୭:୨୭-୨୮; ମାର୍‌କ ୧୪:୨୨-୨୪; ଲୁକ୍ ୨୨:୧୯,୨୦

ଜନ୍ମଟା ବଲି ଇସାବେ ସର୍ପି ଦେଲାଜନି, ସେସବୁ ପରମେସରକେ ନ ସର୍ପାଈ କରି ତୁମାମନ୍କେ ସରପ୍ଲାଜନି । ସେଟାପାଇ, ତମେ ତୁମାମନର ପୁଜାଟାନେ ମିସା ନାଇ । ୨୧ ତମେ ଜଦି ମାପରୁର କାଦିଟାନେ ମିସିଆଗସ୍, ସେନ୍ତାଟାଲେ ତୁମାମନ୍କେ ପୁଜିରଇବା କାଦି ତମେ କାଇବାର ନାଇ । ୨୨ ଜଦି ମାପରୁ ଆମର ଉପରେ ରିସା ଅଇଲେ, ତାର ତଣ୍ଡେଅନି ଆମେ ରକିଆ ପାଇ ନାପାରୁ । କାଇ ମାପରୁର ଟାନେଅନି ଆମେ ଅଦିକ୍ ବପୁ ଆରୁକି ?

୨୩ \*ସବୁ ବିସଇ କରବାକେ ଆମର ଅଦିକାର୍ ଆଟେ, ସେନ୍ତ୍ର ସେମନ୍ କଇବାଇ, ସେଟା ସଡ଼ । ମାତର ମୁଇ କଇଲିନି ସବୁ ବିସଇ ଆମକେ ସାଇଜ ନ କରେ । ୨୪ କେ ମିସା ଅବକା ନିଜର ପାଇ କାଇଟା ନିକ ଅଇସି ବଲି ଚିନ୍ତା ନ କରି, ନିଜର ବାଇମନର ମଙ୍ଗଲ୍ ବିସଇ ମିସା ଚିନ୍ତା କରା ।

୨୫ ଆଟେ ବିକ୍ରି ଅଇବା ଜନ୍ ମାଉଁସ୍ ମିସା କାଇବାର୍ ତମର ଅଦିକାର୍ ଆଟେ, ତମର ବିବେକର ପାଇ ଏଟା ପୁଜା କଲାଟା କି ନାଇ ? ବଲି ନ ପାଟାରି କାଇଦିଆସ୍ । ୨୬ ଜେନ୍ତ୍ରକି ସାସ୍ତରେ ଲେକା ଅଇଲାପାରା ଏ ଗୁଲାଇ ଜଗତେ ରଇବାଟା ମାପରୁରଟା ।

୨୭ ଜଦି ବିସବାସ୍ ନ କଲା ଗଟେକ୍ ଲକ୍ ତମକେ ତାର ଗରେ କାଇବାକେ ଡାକ୍ଲେ, ତମେ ଜିବାକେ ମନ୍ କରସା ବଇଲେ ତେଇ ତମକେ ଜାଇଟା ଦେଲେ ମିସା ସେଟା କାଇଦିଆସ୍ । ମାତର ତମର ବିବେକର ଲାଗି ଏଟା ପୁଜାକଲାଟା କି ନାଇ ? ବଲି ପାଟାରି ନାଇ । ୨୮ ମାତର କେମିସା ତମକେ ଏ କାଦି ପୁଜା କଲାଟା । ବଲି କଇଲେ, ସେଟା ନିଟା । ଜେନ୍ତ୍ରକି ସେ କଇଲାପାଇ ଆରି ତମର ବିବେକରପାଇ ସେଟା କାଆ ନାଇ । ୨୯ ସେଟା ତର ବିବେକର ପାଇ ନାଇ, ସେଟା କଇଲା ଲକ୍ ବିବେକର ପାଇ ।

ବାଦିଅରେ କେ ମିସା ପାଟାରି ପାରଡ଼, ଜଦି ଆମର ମନ୍ କଲା ଇସାବେ କାଇଟା ମିସା କରବାକେ ଅଦିକାର୍ ଆଟେ, ବିନ୍ ଲକ୍ ବିବେକର ଲାଗି ମୁଇ କାଇକେ ନ କାଇ ? ୩୦ ସେ କଇସି, “ଜଦି ମୁଇ ପରମେସରକେ ଦନିଅବାଦ୍ ଦେଇ କାଇବି, ତେବେ ମର ସଙ୍ଗର ବିସବାସିମନ୍ ମକେ କାଇକେ ନିନ୍ଦା ଦେବାର୍ ଆଟେ ?”

୩୧ ତେବରପାଇ ବାଡ଼ କା, କି ପାନି କା, କି ଜାଇଟା ମିସା କରା, ପରମେସର ଡାକ୍ପୁଟା ପାଇବାକେ ସବୁ କରା । ୩୨ ଜିଉଦି ଅ କି ଜିଉଦି ନ ଅଇଲା ଲକ୍ ଅ କି ତମର ସଙ୍ଗର ପରମେସରର ମଣ୍ଡଲିର ବିସବାସି ଅ, କାକେ ମିସା ତମର ଚଲାଟଲ୍ଡି ଦେକି ନିନ୍ଦା ପାଇବାକେ ଦିଆସ୍ନାଇ । ୩୩ ତମେ ମରପାରା ଚଲାଟଲ୍ଡି କରା, ମୁଇ ସବୁଲକ୍ ମଙ୍ଗଲ୍ ଅ ବଲି ଚେସଟା କଲିନି । ମୁଇ ମର ନିଜର ମଙ୍ଗଲ୍ ଅ, ବଲି ଚିନ୍ତା କରିନାଇ, ମାତର ସବୁଲକ୍ ମଙ୍ଗଲ୍ ଅ ବଲି ଚିନ୍ତା କଲିନି । ଜେନ୍ତ୍ରକି ସେମନ୍ ସବୁଲକ୍ ରକିଆ ପାଇବାଇ ।

## ୧୧

୧ \*ମୁଇ ଜେନ୍ତାରି ମାପରୁର ପଟେ ପଟେ ଗାଲିନି, ତମେମନ୍ ମିସା ସେନ୍ତାରି ମର ପଟେ ପଟେ ଆସା ।

ଉପାସନା କଲାବେଲେ ଅଡ଼ନା

୨ ତମେ ସବୁ ବିସଇଟାନେ ମକେ ଏତାଇଲାସ୍ନି ଆରି ମୁଇ ତମକେ ଜନ୍ ସବୁ ବିଦିବିଦାନ୍ ସିକାଇଆଟି, ସେ ସବୁ ମାନ୍ଲାସ୍ନି, ସେଟାର ପାଇ ମୁଇ ତମକେ ଦନିଅବାଦ୍ ଦେଲିନି । ୩ କିରିସଟ ସବୁ ମୁନ୍ସ ପିଲାମନର ନେଡା, ଆରି ମୁନ୍ସ ମାଇଜିର ନେଡା, ଆରି ପରମେସର କିରିସଟର ନେଡା । ଏଟା ତମେ ଜାନିରୁଆ ବଲି

ମୁଜ୍ଜମାନ କଲିନି । ୪ ଜେତେବେଳେ ତମେ ମଣ୍ଡଳିତେଇ ରୁଣ୍ଡିଆ, ତେଇ ଗଟେକ୍ ମୁନ୍ନୁସ୍ ପିଲା ପାର୍ତନା କଲାନି କି ପରମେସରର୍ କାତା ଜାନାଇଲାନି, ସେ ତାର୍ ମୁଣ୍ଡି ତାବ୍‌ବାର୍ ନାଇ । ସେନ୍ତାର୍ କଲେ ସେ କିରିସ୍‌ଟକେ ଲାଜ୍ କରାଇସି । ୫ ସେନ୍ତାରିସେ ଗଟେକ୍ ମାଲ୍‌ଜି ପାର୍ତନା କଲାନି, କି ପରମେସରର୍ କାତା ଜାନାଇଲାନି, ସେ ତାର୍ ମୁଣ୍ଡେ ଅଡ୍‌ନା ପାକାଇବାର୍ ଆତେ । ସେନ୍ତାର୍ ନ କଲେ ସେ ମୁନ୍ନୁସ୍‌କେ ଲାଜ୍ କରାଇସି । ସେ ଗଟେକ୍ ମୁଣ୍ଡିରି ମାଲ୍‌ଜିର୍ ପାରା ରଇସି । ୬ କାଇକେବଇଲେ ସେ ମାଲ୍‌ଜି ଜଦି ଅଡ୍‌ନା ନ ପାକାଏ, ତାର୍ ଚେଣ୍ଟି କାଟିଦେବାଟା ନିକ । ଗଟେକ୍ ମାଲ୍‌ଜି ଜଦି ତାର୍ ଚେଣ୍ଟି କାଟ୍‌ସି କି ମୁଣ୍ଡି କୁରାଇସି, ସେଟା ତାର୍ ପାଇ ଲାଜ୍‌ର୍ ବିସଇ, ସେଟାର୍‌ପାଇ ସେ ମୁଣ୍ଡେ ଅଡ୍‌ନା ପାକାଇବାର୍ ଆତେ । ୭ ମାତର୍ ଗଟେକ୍ ମୁନ୍ନୁସ୍ ପିଲା ପାର୍ତନା କଲାବେଳେ ତାର୍ ମୁଣ୍ଡେ ଅଡ୍‌ନା ପାକାଇବାର୍ ଦର୍‌କାର୍ ନାଇ । କାଇକେ ବଇଲେ ସେ ପରମେସରର୍ ଚାଇ ଆରି ତାର୍ ତାକ୍‌ପୁଟା ଦେକାଇସି । ଆରି ମାଲ୍‌ଜି ମୁନ୍ନୁସ୍‌ର୍ ତାକ୍‌ପୁଟା ଦେକାଇସି । ୮ କାଇକେବଇଲେ ମୁନ୍ନୁସ୍ ମାଲ୍‌ଜିର୍ ତେଇଅନି ତିଆର୍ ଅଏନାଇ, ମାତର୍ ମାଲ୍‌ଜି ମୁନ୍ନୁସ୍‌ର୍‌ତେଇ ଅନି ତିଆର୍ ଅଇଆତେ । ୯ ମନସ୍ ମାଲ୍‌ଜିର୍ ପାଇ ତିଆର୍ ଅଏନାଇ । ମାତର୍ ମାଲ୍‌ଜି ମୁନ୍ନୁସ୍‌ର୍ ପାଇ ତିଆର୍ ଅଇଲାଆତେ । ୧୦ ସେଟାର୍ ପାଇ ମାଲ୍‌ଜିମନ୍ ମୁଣ୍ଡେ ଅଡ୍‌ନା ପାକାଇବାଟା ନିକ, ଜେନ୍ଟିକି ସରଗର୍ ଦୁଡ୍‌ମନ୍ ମିସା ସେ ତାର୍ ମୁନ୍ନୁସ୍‌ର୍ ଅଦିକାରେ ଆତେ ବଲି ଜାନ୍‌ବାଇ । ୧୧ ମାତର୍ ଆମେ ବିସ୍‌ବାସିମନ୍‌ପାଇ ମାଲ୍‌ଜି ନଇତେ ମୁନ୍ନୁସ୍ ରଇ ନାପାରେ କି ମୁନ୍ନୁସ୍ ନଇତେ ମାଲ୍‌ଜି ରଇ ନାପାରେ । ୧୨ ମାଲ୍‌ଜି ମୁନ୍ନୁସ୍‌ର୍ ଗାଗତେ ଅନି ଜାଡ୍ ଅଇଲେମିସା, ମୁନ୍ନୁସ୍ ମିସା ମାଲ୍‌ଜି ଜନମ୍ ଦେଲାକେ ଜାଡ୍ ଅଇଆତେ । ମାତର୍ ସବୁ ବିସଇ ପରମେସର୍ ଟାନେଅନି ଜାଡ୍ ଅଇଆତେ ।

୧୩ କନ୍‌ଟା ନିକ ବଲି ତମେ ନିଜେ ନିଜେ ବିଚାର୍ କରା । ଜଦି ଗଟେକ୍ ମାଲ୍‌ଜି ମଣ୍ଡଳିତେଇ ସବୁର୍ ମୁଆଟେ ମୁଣ୍ଡେ ଅଡ୍‌ନା ନ ପାକାଇ ପାର୍ତନା କଲେ ସେଟା ସୁନ୍‌ର୍ କି ? ନାଇ ସୁନ୍‌ର୍ ନାଇ । ୧୪ ସେନ୍ତାରିସେ ଜଗତର୍ ଜାନ୍‌ବା ବିସଇ ନେଇକରି ମୁନ୍ନୁସ୍ ପିଲା ଜଦି ମାଲ୍‌ଜିମନ୍‌ର୍ ପାରା ଚେଣ୍ଟି ବଡାଇରଇଲେ ସେଟା ଲାଜ୍‌ର୍ କାତା । ୧୫ ମାତର୍ ମାଲ୍‌ଜିଟକି ଚେଣ୍ଟି ବଡାଇଲେ ତାର୍‌ପାଇ ସୁନ୍‌ର୍ ବିସଇ । କାଇକେବଇଲେ ପରମେସ୍‌ର୍ ତାର୍ ଡେଙ୍ଗ୍ ଚେଣ୍ଟି ତାର୍ ମୁଣ୍ଡେ ତାବି ଅଇବାକେ ଦେଲା ଆତେ । ୧୬ ଜଦି ଏ ବିସଇନେଇ କେ ମିସା ମର୍ ଆଦେସ୍ ମାନ୍‌ବାକେ ମନ୍ ନ କରେ, ଆମେ କି ପରମେସରର୍ ବିନ୍ ମଣ୍ଡଳିମନ୍‌କେ ମିସା ଏଟା ଚାଡି ଆରି କାଇ ଅବିଆସ୍ ନାଇ ।

**ମାପୁରୁର୍ ବଜି**

୧୭ ଆରି ଗଟେକ୍ ବିସଇ ମୁଜ୍ଜ କଇବାର୍ ଆତେ । ତମେ ଉପାସନା କର୍‌ବାକେ ରୁଣ୍ଡିଲାବେଳେ ଗଟେକ୍ କର୍‌ବା ବିସଇ ମର୍ ମନ୍‌କେ ଜାଏନାଇ । କାଇକେବଇଲେ ତମେ ରୁଣ୍ଡିଲାର୍ ଲାଗି ତମର୍ ବିସ୍‌ବାସ୍ ତାଟ୍ ଅଏନାଇ, ମାତର୍ ଦୁର୍‌ବଲ୍ ପାରା ଅଇଗାଲାନି । ୧୮ ମୁଜ୍ଜ ସୁନିଆଟି ଜେ, ତମେ ଉପାସନା କର୍‌ବାକେ ରୁଣ୍ଡିଲାବେଳେ ବାଗ୍ ବାଗ୍ ଅଇକରି ଗଟେକ୍ ବାଟର୍ ଲକ୍ ଆରି ଗଟେକ୍ ବାଟର୍ ଲକ୍‌କେ ବିରଦ୍ କଲାସ୍‌ନି ଆରି ଏଟା ସଡ୍ ବଲି ମୁଜ୍ଜ ଜାନି । ୧୯ ତମର୍ ବିଡ୍‌ରେ ଏନ୍ତାରି ଅଇବାଟା ନିକ । ଜେନ୍ତାରି କି ତେଇଅନି ପରିକାଟାନେ ସିଦ୍ ଅଇଲା ଲକ୍‌ମନ୍ ବାରଇବାଇ । ୨୦ ଜେତେବେଳେ ତମେ ମାପୁରୁର୍ କାଦି କାଇବାକେ ଗଟେକ୍ ଜାଗାଇ ଜମ୍‌ଲାସ୍‌ନି, ସେଟା ସତଇସେ ମାପୁରୁର୍ କାଦି ନଏ, ୨୧ କାଇକେ ବଇଲେ, ତମର୍ ବାଇମନ୍‌ପାଇ କାଇଟା ଚାଡାସ୍ ନାଇ । ଏଟାର୍‌ପାଇ କେତେଲକ୍ ବୁକେ ଉଟିଗାଲାଜନି । ଆରି କେତେଲକ୍ ମାଡ୍‌ଲାସ୍‌ନି । ୨୨ ତମେ କାଇବାକେ କାଇ ନିଜର୍ ଗର୍ ନାଇ କି ? ତମର୍ ଲାଗି ତମର୍ ଗରିବ୍ ବାଇମନ୍ ଲାଜ୍ ଅଇଗାଲାଜନି । ଆରି

ବାକି ବିସ୍ୱାସୀମାନଙ୍କେ ଇଜଡ଼ ଜିକାଈଲାସ୍ତାନି । ଏ ବିସଇ ଆରି ମୁଇ ତମ୍ବେକେ କାଈଟା ବଲି କଇବି ? ଏନ୍ତାରି ଅ ବଲି କଇବି କି ? ନାଈ, ନ କଇ ।

୨୩ କାଈକେବଇଲେ ମାପୁରୁର୍ ସିକିଆ ପାଈଲି ଆତି, ସେଟାସେ ମୁଇ ତମ୍ବେକେ ସିକାଈଆତି । ଜନ୍ ରାତି ଆମର୍ ମାପୁରୁ ଜିସୁ ବିସ୍ୱାସେ ବିସ୍ ଦେଲାପାରା ଅଇଲା, ସେ ରୁଟିନେଇ, ପର୍ମେସର୍‌କେ ଦନିଅବାଦ୍ ଦେଲା । ୨୪ ଏଟା ତମର୍ ପାଈ ବଲିଅଇରଇବା ମର୍ ଗାଗଡ଼, ମକେ ଏତାଇବାକେ ଏନ୍ତାର୍ କରା । ୨୫ ସେନ୍ତାରିସେ କାଈଲା ପତେ, ସେ ମୁତା ଦାରିକରି କଇଲା “ଏ ମୁତା ପର୍ମେସରର୍ ନୁଆ ରାଜିନାମା, ଜନ୍‌ଟା କି ମର୍ ନିଜର୍ ବନି ଦେଲାକେ, ଟିକ୍ ଅଇଲା ।”

୨୬ ଆମର୍ ମାପୁରୁ ଜିସୁ ବାଅଡ଼ବାଜାକ, ଜେଡ଼କିତର୍ ରୁଟି କାଈସା କି ଏ ମୁତାଇ ଅନି ତୁକ୍‌ସା, ତମେ ମାପୁରୁର୍ ମରନ୍ ବିସଇର୍ କବର୍ ଜାନାଇସା । ୨୭ ଏଟା ଅରଡ଼ ଅଇଲାନି, ଜେ ଜଦି ମାପୁରୁକେ ସନ୍‌ମାନ ନ ଦେଇ, ଏ ରୁଟି କାଈସି କି ମୁତାଇ ଅନି ତୁକ୍‌ସି, ସେ ମାପୁରୁର୍ ଗାଗଡ଼ ଆରି ବନିର୍ ବିରୁଦେ ପାପ୍ କଲାନି ।

୨୮ ସେଟାପାଈ ତମେ ନିଜକେ ପରିକା କରି ଦେକ୍‌ବାରୁଆଟେ, ଦେକି ସାରାଇ ଏ ରୁଟି କାଈଅଇସି ଆରି ମୁତାଇଅନି ତୁକି ଅଇସି । ୨୯ କାଈକେବଇଲେ ଜଦି ସେ ରୁଟି କାଈଲାବେଲେ ଜେ ମାପୁରୁର୍ ଗାଗଡ଼ ଆରି ମୁତାଇଅନି ତୁକ୍‌ଲାବେଲେ ସଡ଼ବିସଇ ନ ବୁଜଡ଼, ସେମନ୍ ନିଜେ ନିଜର୍ ଉପରେ ପର୍ମେସରର୍ ତଣ୍ଡ ତାକି ଆନୁଲାଈନି ।

୩୦ ସେଟାପାଈ ତମର୍ ବିତ୍‌ରେ ବେସି ଲକ୍ ଦୁର୍‌ବଲ୍ ଆଗାସ୍ ଆରି ବିନ୍ ବିନ୍ ଜର୍ ଦାରାଇ ଅଇଆଗାସ୍ ଆରି ମଲାସ୍‌ନି ମିସା । ୩୧ ମାତର୍ ଆମେ ଜଦି ନିଜକେ ପରିକା କର୍‌ତା ଆଲେ, ପର୍ମେସରର୍ ତଣ୍ଡ ଆମର୍ ଉପରେ ନ ଆଇତା । ୩୨ ମାତର୍ ଜଗତର୍ ଲକ୍‌ମନର୍ ପତର୍ ତଣ୍ଡଲଗେ ଅନି ଆମ୍‌କେ ରକିଆ କର୍‌ବାକେ ପର୍ମେସର୍ ଆମ୍‌କେ ବିଚାର୍ କରି ଦେଇସି ।

୩୩ ତେବେ ଏ ମର୍ ବାଇବଇନିମନ୍, ତମେ ଆମର୍ ମାପୁରୁର୍ କାଦି କାଈବାକେ ରୁଣ୍ଡିଲା ବେଲେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଜାଗା । ୩୪ ଜଦି କେ ବୁକେ ଆଟେ, ସେ ନିଜର୍ ଗରେ କାଈକରି ଆଇବାର୍ ଆଟେ । ଜେନ୍ତିକି ତମେ ରୁଣ୍ଡିଲାବେଲେ ପର୍ମେସରର୍ ତଣ୍ଡ ତମର୍ ଉପରେ ନ ଆସେ । ଆରି ରଇଲା ବିନ୍ ବିନ୍ ବିସଇମନ୍ ମୁଇ ଆଇଲେ, ପତେ ବୁଜାଇ ଦେବି ।

## ୧୨

### ସୁକଲ୍ ଆଡ଼ମାର୍ ଦାନ୍

୧ ମର୍ ବାଇମନ୍, ତମେ ସୁକଲ୍ ଆଡ଼ମା ଦେବା ଦାନ୍ ବିସଇର୍ ଜାଈଟା ଲେକିରଇଲାସ୍ ସେଟା ନିକସଙ୍ଗ୍ ବୁଜା ବଲି ମୁଇ କଲିନି । ୨ ତମେ ଜିସୁକେ ବିସ୍‌ବାସ୍ କର୍‌ବା ଆଗତୁ ଜିବନ୍ ନ ରଇବା ପୁଡ଼ଲାମନ୍‌କେ ପୁଜାକରି ବାଟ୍ ବାନା ଅଇଜାଇ ରଇଲାସ୍ । ୩ ସେଟାପାଈ ମୁଇ ଏବେ ତମ୍ବେକେ କଇଲିନି, ଜନ୍ ଲକ୍ ସୁକଲ୍ ଆଡ଼ମାର୍ ଚାଲ୍‌ନା ପାଈଲାଆଟେ, ସେ ଜିସୁକେ ଅବିସାପ୍ ଦେଇ ନାପାରେ । ଆରି ଜନ୍ ଲକ୍ ତାର୍ ଆଡ଼ମା ପାଏନାଇ, ସେ ଜିସୁ ପର୍ମେସର୍ ବଲି କଇନାପାରେ ।

୪ \*ସୁକଲ୍ ଆଡ଼ମାର୍ ଦାନ୍ ବିନ୍ ବିନ୍ ରକାମ୍, ମାତର୍ ଜନ୍ ଆଡ଼ମା ସେଟାମନ୍ ଦେଇସି ସେ ଗଟେକ୍ ସେ । ୫ ସେବା ବିନ୍ ବିନ୍ ରକାମର୍, ମାତର୍ ଜନ୍ ମାପୁରୁ ସେବା ପାଈଲାନି, ସେ ଗଟେକ୍ ସେ । ୬ କାମ୍ କର୍‌ବା ବପୁ ବିନ୍ ବିନ୍ ରକାମର୍, ମାତର୍ ପର୍ମେସର୍ ଗଟେକ୍ । ସେ ଆକା ସବୁକେ ବପୁ ଦେଲାନି । ୭ ମାତର୍ ସବୁ ଲକର୍ ମଙ୍ଗଲ୍ ପୁରାପୁରନ୍ ଅଇବାକେ ବିନ୍ ବିନ୍ ଲକର୍ ବିତ୍‌ରେ ସୁକଲ୍ ଆଡ଼ମାର୍ ବପୁ ବିନ୍ ବିନ୍ ଇସାବେ ଜାନାପଡ଼ସି । ୮ ସୁକଲ୍ ଆଡ଼ମା କାକେ କାକେ ବୁଦିର୍ ବାକିଆ

\* ୧୨:୪ ୧୨:୪ ରମିୟ ୧୨:୭-୮

କରବାକେ ଦେଇସି, ଆରି କାକେ କାକେ ଗିଆନରୁ ବାକିଅ ଦେଇସି । ୯ ସେ ଗଟେକ ସୁକଲ୍ ଆଡ଼ମାସେ କାକେ କାକେ ବିସ୍‌ବାସ୍ ଦେଇସି ଆରି କାକେ କାକେ ନିକ ଅଇବା ବପୁର ଦାନ ଦେଇସି । ୧୦ କାକେ କାକେ କାବାଅଇଜିବା କାମ୍ କରିପାରବା ବପୁ, କାକେ କାକେ ପରମେସର ଜାନାଇଲା କାତା କଇବା ବପୁ, କେତେ ଲକ୍‌କେ ଆଡ଼ମା ଦେଇରଇବା ଦାନ ଚିନ୍‌ବା ବପୁ, ଆରି କେତେକ ଲକ୍‌କେ ସେ ନାନାନି ରଇବା ବିନ୍ ବିନ୍ ବାସାଇ କାତା କଇବା ବପୁ, ଆରି କେତେକ ଲକ୍‌କେ ସେ ବାସାର୍ ଅରତ୍ ବୁଜାଇବା ବପୁ ଦେଇରଇସି । ୧୧ ମାତର୍ ଏ ସବୁଜାକ ବପୁ ଗଟେକ ଆଡ଼ମାସେ କରି ରଇସି । ସେ ନିଜର୍ ମନ୍ କଲା ଇସାବେ ବିନ୍ ବିନ୍ ଲକ୍‌ମନ୍‌କେ ବିନ୍ ବିନ୍ ବିସଇର୍ ଦାନ ଦେଇରଇସି ।

ଗଟେକ୍ ଗାଗଡ଼ ମାତର୍ ବେସି ଆଡ଼ଗଡ଼

୧୨ ☆ ଜେନ୍ତ୍ରକି ବିନ୍ ବିନ୍ ବାଗ୍ ମିସିକରି ରଇଲେ ମିସା ଗାଗଡ଼ ଗଟେକ୍‌ସେ, ସେନ୍ତ୍ରାରିସେ କିରିସର୍ ଗଟେକ୍ ଗାଗଡ଼ ପାରା । ଜନ୍‌ତେଇ କି ବିନ୍ ବାଗ୍ ମିସିଆଡ଼ତ୍ । ୧୩ କାଇକେବଇଲେ ଆମେ ସବୁ ଜିଉଦି ଅଇଲେ କି ଜିଉଦି ନ ଅଇଲେ ମିସା, ଗତିଦାଙ୍ଗଡା ଅଇଲେ କି ନିଜର୍ ଇସାବେ ଚଲାଚଲୁତି କଲେ ମିସା ପରମେସରର୍ ସେ ସମାନ୍ ଗଟେକ୍ ଆଡ଼ମାର୍ ଲାଗି, ଗଟେକ୍ ଗାଗଡ଼ ଅଇବାକେ ତୁବନ୍ ନେଇଆତୁ । ଆରି ଏ ସମାନ୍ ସୁକଲ୍ ଆଡ଼ମା ପାଇଆତୁ ।

୧୪ ଆମର୍ ଗାଗଡ଼ ବିସଇ ଆରି ଗଟେକ୍‌ତର୍ ଚିନ୍ତା କରିଦେକୁ । ସେଟାକେ ଗଟେକ୍ ବାଗ୍ ନାଇ ମାତର୍ ବେସି ବାଗ୍ ଆଚେ । ୧୫ ଜଦି ପାଦ୍, “ମୁଇ ଆଡ଼ ନଇ, ମୁଇ ଗାଗଡ଼ର୍ ନଇ ।” ବଲିକରି କଇଲେ ମିସା ପାଦ୍ ଗାଗଡ଼ର୍ ସେ । ୧୬ ସେନ୍ତ୍ରସେ କାନ୍ ଜଦି, ମୁଇ ଆଁକି ନଇ, ମୁଇ ଗାଗଡ଼େ ମିସ୍‌ବାଟା ନଇ ସେନ୍ତ୍ର କଇଲେ ମିସା ଆଁକି ଗାଗଡ଼ର୍‌ଟାସେ । ୧୭ ସବୁ ଗାଗଡ଼ ଜଦି ଗଟେକ୍ ଆଁକିସେ ରଇଲେ, ତେବେ ସୁନ୍‌ବାଟା କନ୍ତି ରଇତା ? ସବୁ ଗାଗଡ଼ ଜଦି ଗଟେକ୍ କାନ୍‌ସେ ଅଇତା, ତେବେ ସୁଙ୍‌ବାଟା କନ୍ତି ରଇତା ? ୧୮ ମାତର୍ ଗାଗଡ଼ ସେନ୍ତ୍ରାରି ନଏ । କାଇକେବଇଲେ ପରମେସର୍ ତାର୍ ନିଜର୍ ମନ୍ କଲା ଇସାବେ ଗାଗଡ଼ର୍ ସବୁ ବାଗ୍, ସମାନ୍ ଜାଗାଇ ସାଜାତି ସଙ୍ଗାଇଆଚେ । ୧୯ ଆରି ଗାଗଡ଼କେ ଜଦି ଗଟେକ୍‌ସେ ବାଗ୍ ରଇତା, ତେବେ ଗାଗଡ଼ ବଲି କେନ୍ତ୍ର ବଲାଇ ଅଇତା ? ୨୦ ମାତର୍ ସତ୍ ବିସଇ ଅଇଲାନି ବେସି ବାଗ୍ ରଇଲେ ମିସା ଗାଗଡ଼ ଗଟେକ୍‌ସେ ।

୨୧ ତର୍ ଟାନେ ମର୍ କାଇ ଲଡା ନାଇ, ବଲି ଆଁକି ଆଡ଼କେ କଇନାପାରେ କି, ମୁଣ୍ ପାଦ୍‌କେ କଇ ନାପାରେ । ୨୨ କାଇକେବଇଲେ ଜନ୍ ଗାଗଡ଼ର୍ ବାଗ୍ ବିନ୍‌ଟାମନର୍ ତେଇଅନି ଦୁର୍‌ବଲ୍ ଆଚେ ବଲି ଆମେ ବାବ୍‌ଲୁନି, ସେଟାମନ୍‌ସେ ଆମକେ ବେସି ଲଡାକେ ଆଇସି । ୨୩ ଆରି ଜନ୍ ଗାଗଡ଼ର୍ ବାଗ୍ ବେସି ମୁକିଅ ନାଇ, ଆରି ସୁନ୍‌ର୍ ନ ଡିସେ, ସେଟାମନ୍‌ସେ ଆମେ ନିକସଙ୍ଗ୍ ଜତନ୍ କରି ତାବ୍‌ଲୁନି । ୨୪ ଆରି ଜନ୍ ବାଗ୍ ବାଇରେ ଅନି ସୁନ୍‌ର୍ ଡିସି, ସେଟାମନ୍ ସେନ୍ତ୍ରାରି ଜତନ୍ କର୍‌ବା ଦରକାର ନାଇ । ପରମେସର୍ ଆମର୍ ଗାଗଡ଼ର୍ ବାଗ୍‌ମନ୍‌କେ କାଇକେ ଏନ୍ତ୍ର ସାଜାଇଲା ବଇଲେ, ଜନ୍‌ଟାକି ବେସି ମୁକିଅ ନାଇ ବଲି ଆମେ ବାବ୍‌ଲୁନି, ସେଟାମନ୍‌କେ ଆମେ ନିକସଙ୍ଗ୍ ଜତନ୍ କରି ସନ୍‌ମାନ୍ ଦେବୁ । ୨୫ ଜେନ୍ତ୍ରାରି କି ଗାଗଡ଼ର୍ ବାଗ୍ ସବୁ ଗଟେକ୍ ବାଗ୍ ଆରି ଗଟେକ୍ ବାଗ୍‌କେ ବିରଦ୍ ନ କରେ, ମାତର୍ ତାକର୍ ତାକର୍ ବିତରେ ସାଇଜ ଅଇବାଇ । ତେବେ ଗାଗଡ଼ର୍ ଗଟେକ୍ ବାଗ୍‌କେ ଦୁକା ଅଇଲେ, ସେଟା ସବୁର୍‌ପାଇ ଦୁକା । ୨୬ ଗଟେକ୍ ବାଗ୍ ଦୁକା ଅଇଲେ, ଆରି ଅଲ୍‌ଗା ବାଗ୍‌କେ ମିସା ଦୁକା ଅଇସି । ଗଟେକ୍ ବାଗ୍ ତାକ୍‌ପୁଟା ଅଇଲେ, ସେମନ୍ ସବୁ ମିସି ସାର୍‌ଦା ଅଇବାଇ ।

☆ ୧୨:୧୨ ୧୨:୧୨ ରମିୟ ୧୨:୪,୫

୨୭ ଆମେ ଜେଡ଼କି ଲକ୍ଷ ବିସ୍ଵାସୀ, କିରିସ୍ତର ଗାଗଡ଼ ସଙ୍ଗ ସମାନ୍ କରିଅଛସି । ଆରି ତେଇ ଆମେ ଗଟେକ୍ ଗଟେକ୍ ବାଗ୍ । ୨୮ \*କିରିସ୍ତର ଏ ଗାଗଡ଼େ ପର୍ଯ୍ୟେସର ବିନ୍ ବିନ୍ ଲକ୍ଷମନ୍ଦେ ବିନ୍ ବିନ୍ କାମ୍ ଦେଲାଆତେ । ପରତୁମ୍ ପେରିଡ଼ ଇସାବେ ବାଚ୍ଲା ଲକ୍ଷ, ତାର୍ ପଟେ ବବିସଡ଼ କାତା କଇବା ଲକ୍ଷମନ୍ଦେ, ସିକାଉମନ୍ଦେ, କାବାଅଇଜିବା କାମ୍ କରବା ଲକ୍ଷକେ, ନିକ କରବା ଲକ୍ଷମନ୍ଦେ, ସାଇଜ କରବା ଲକ୍ଷମନ୍ଦେ, ନେତା ଇସାବେ ଦାଇଡ଼ ନେବାକେ, ଆରି ନାଜାନ୍ଲା ବାସାଇ କାତା କଇବା ଲକ୍ଷମନ୍ଦେ ବାଚ୍ଲା ଆତେ । ୨୯ ସେମନ୍ ସବୁଲକ୍ଷ ପେରିଡ଼ ନଅଡ଼ କି ବବିସଡ଼ବକ୍ତା କି ସିକାଉମନ୍ ନଅଡ଼ । ସବୁଲକ୍ଷକେ କାବା ଅଇଜିବା କାମ୍ କରବା ବପୁ ନାଇ । ୩୦ କି ନିକ କରବା ବପୁ କି ନାଜାନ୍ବା କାତାଇ କଇବା ବପୁ, କି ଜନ୍ତା କଇଲାଟା ବୁଜାଇବା ବପୁ ନାଇ । ୩୧ ତେବେ ଅଦିକ୍ ମୁକିଅ ରଇବା ବପୁ ପାଇବାକେ ଆମେ ମନ୍ କରବାର୍ ଆତେ । ସବୁରଟାନେ ଅନି ମୁକିଅ ବପୁର୍ ବିସଇ ମୁଇ ତମ୍ଦକେ ଜାନାଇବି ।

### ୧୩

#### ଆଲାଦ୍

୧ ଜଦି ମୁଇ ଲକ୍ଷମନ୍ଦର ବାସାଇ କି ସରଗର ଦୁଡ଼ମନ୍ଦର ବାସାଇ କାତା ଅଇବି । ମର୍ ବାଇମନ୍ଦେ ମୁଇ ଆଲାଦ୍ ନ କରି ବଇଲେ, ମର୍ କାତା ରୁଟାଇସେ, ଜେନ୍ତିକି ଗଟେକ୍ ସବଦ୍ ଅଇକରି ବାଜ୍ବା ଗଟା ପାରା । ୨ \*ସେନ୍ତାରି ମକେ ମାପରୁର୍ ବାକିଅ ବୁଜାଇବା ବପୁ ରଇଲେ ମିସା, କି ମୁଇ ସବୁ ବିସଇ ଜାନିରଇଲେ ମିସା, ଚିକି ନିକି ବିସଇ ବୁଜିରଇଲେ ମିସା ଆରି ମର୍ ବିସ୍ଵାସ୍ ଏଡେକ୍ ତାଟ୍ ଆତେ ଜେ, ତଙ୍ଗର୍ ଉଟକାଇବା ପାରା ମର୍ ଡାଟର୍ ବିସ୍ଵାସ୍ ରଇଲେ ମିସା ବାଇମନ୍ଦ ପାଇ ଆଲାଦ୍ ନାଇ ବଇଲେ ମୁଇ ରୁଟାଇସେ । ୩ ଜଦି ମୁଇ ମର୍ ସବୁ ଦନ୍ ସପତି ଅର୍କିଡ଼ ଲକ୍ଷମନ୍ଦେ ଦେଇରଇଲେ ମିସା, ଆରି କିରିସ୍ତରପାଇ ମର୍ ଗାଗଡ଼ ପଡାଇବାକେ ସର୍ପି ଦେଲେ ମିସା ମର୍ ଆଲାଦ୍ ନାଇ ବଇଲେ, ମର୍ପାଇ କାଇ ଲାବ୍ ନାଇ ।

୪ ଆମେ ବାଇମନ୍ଦେ ଆଲାଦ୍ କଲେ ଦାପେ ରିସା ନ ଅଇ ଦୟା ଦେକାଇବୁ । ଆକାର୍ ନ ଅଇ, ବଡ଼ପନ୍ ନ ଅଇ ଲକ୍ଷମନ୍ଦେ ନିଜର୍ ତଲିଆ ନ ଦେକୁ । ୫ ଆମେ କାରାପ୍ ବେବାର୍ ନ କରୁ, ନିଜେ ପାଇବାକେ ମନ୍ ନ କରୁ । ଦାପେ ବିରୁବିରା ନ ଅଉ ଆରି ଆଗେ କଲା ବୁଲ୍ କାମ୍ମମନ୍ଦ ଇସାବ୍ ନ କରୁ । ୬ ଆମେ ଦରମ୍ ନଇଲାଟାକେ ଦେକି ସାର୍ଦା ନ ଅଉ, ମାତର୍ ସଡ଼ ଟାନେ ସାର୍ଦା ଅଇବୁ । ୭ ସବୁ ବିସ୍ଵାସ୍ କରବୁ, ସବୁଟା ଆସାକରବୁ, ସବୁବିସଇ ମୁରବଟା ନ ଚାଡ଼ୁ ।

୮ ଆଲାଦ୍ କରାକରି ଅଇବାଟାର୍ ସେସ୍ ନାଇ । ପର୍ଯ୍ୟେସରର୍ ବାକିଅ କଇବା ବପୁ, ଆରି ନାଜାନ୍ବା ବାସା କଇବା ବପୁ, ସବୁ ସାରିଜାଇସି । ସେନ୍ତାରିସେ ଆମ୍ଦେ ଗିଆନ୍ ରଇଲେ ମିସା ସେଟା ଆଜିଜାଇସି । ୯ ମାତର୍ ଆମର୍ ଗିଆନ୍ ଏବେ ଜାକ ପୁରାପୁରନ୍ ଅଏ ନାଇତା । ଆରି ପର୍ଯ୍ୟେସରର୍ ବାକିଅ କଇବାଟା ମିସା ଏବେ ଜାକ ପୁରାପୁରନ୍ ଅଏ ନାଇତା । ୧୦ ମାତର୍ ଜେଡେବେଲେ ଗଟେକ୍ ଦିନ୍ ଆଇସି, ଆମେ ସବୁ ନିକକରି ଜାନ୍ବୁ । ସେ ଦିମ୍ମନ୍ଦେ ଲକ୍ଷମନ୍ ସଙ୍ଗର୍ ବିସ୍ଵାସିମନ୍ଦେ ସିକାଇବାକେ ଦରକାର୍ ନ ପଡେ ।

୧୧ ମୁଇ ଜେଡେବେଲେ ପିଲା ରଇଲି, ପିଲାମନ୍ କଇଲାପାରା କାତା ଅଇଲି ଆରି ପିଲାମନ୍ ଚିନ୍ତା କଲାପାରା ଚିନ୍ତା କରତେରଇଲି ଆରି ସେମନ୍ ବାଚ୍ଲା ପାରା ବାବ୍ତେରଇଲି । ମାତର୍ ମୁଇ ଏବେ ବୟସେ ବଡ଼ ଅଇଗାଲିଜେ ପିଲାମନ୍ଦ ପାରା ଚଲାଚଲ୍ଡି କରବାଟା ଚାଡ଼ିଦେଲି । ୧୨ ମାତର୍ ଜନ୍ତା ଆମେ ଏବେ ଦେକ୍ଲୁନି,

\* ୧୨:୨୮ ୧୨:୨୮ ଏପିସିୟ ୪:୧୧    \* ୧୩:୨ ୧୩:୨ ମାତିଉ ୧୭:୨୦;୨୧:୨୧; ମାର୍କ ୧୧:୨୩

ସେଟା ଦରପନେ ଦେକଲାପାରା ସେତେକ ନିକ ଡିସେ ନାଇ । ମାତର ଗଟେକ ଦିନ ଆଇସି, ଜେବେ କିରିସଟକେ ଆମର ମୁଆଟେ ଦେକବୁ । ସେ ବେଲେ ଆମେ ନିକସଙ୍ଗ ଜାନବୁ । ଏବେ ଆମେ ଉନା ବିସଇ ଜାନଲୁନି, ମାତର ସେ ଦିନମନକେ ଆମେ ପୁରାପୁରୁନ୍ ବାବେ ଜାନବୁ । ଜେନ୍ତାବୁ କି ପରମେସର ଆମକେ ପୁରାପୁରୁନ୍ ବାବେ ଜାନେ ।

<sup>୧୩</sup> ସାରାସାରି ତିନଟା ବିସଇ ଆଟେ, ପରମେସର ଟାନେ ବିସବାସ କରବାଟା, ସେ କାତା କଇଲାଟା ଆସା କରବାଟା, ଆରି ବାଇମନର ପାଇ ରଇବା ଆମର ଆଲାଦ୍ । ଏ ତିନଟା ବିତ୍ରେଅନି ବାଇମନକେ ଆଲାଦ୍ କରବାଟା ସବୁଟାନେଅନି ମୁକିଅ ବିସଇ ।

## ୧୪

ସୁକଲ୍ ଆଡ଼ମାର ଦାନ ଦେବାଟା

<sup>୧</sup> ତେବେ ବାଇମନକେ ଆଲାଦ୍ କରବାକେ ତମର ସବୁ ବପୁ ସାରାଆ । ସୁକଲ୍ ଆଡ଼ମା ଜନ୍ ସବୁ ବପୁ ଦେଲାନି, ସେଟା ପାଇବାକେ ମିସା ମନ୍ କରା । ସେ ବିତ୍ରେ ଅନି ପରମେସରର ବାକିଅ ଜାନାଇବା ବପୁ ପାଇବାକେ ମନ୍ କରା । <sup>୨</sup> କାଇକେବଇଲେ ଜେ ନାଜାନଲା ବାସା ସଙ୍ଗ କାତା ଅଇସି, ସେ ଲକ୍ମନର ସଙ୍ଗ ନାଇ, ମାତର ପରମେସର ସଙ୍ଗ କାତା ଅଇଲାନି । କାଇକେବଇଲେ ତାର କାତା କେ ମିସା ବୁଜଡ଼ ନାଇ । ସେମନ୍ ଆଡ଼ମାର ବପୁର ସଙ୍ଗ ଲୁଚ୍ତେ ରଇବା ସତ୍ ବିସଇ କାତା ଅଇଲାଇନି । <sup>୩</sup> ମାତର ଜେ ପରମେସରର ବାକିଅ ଜାନାଇସି, ଲକ୍ମନର ସଙ୍ଗ କାତା ଅଇସି । ଜେନ୍ତାରିକି, ସେମନକେ ସାଇଜ, ସାର୍ଦା ଆରି ଦୁକ୍ ସାରାଇବାଟା ଦେଇରଇସି । <sup>୪</sup> ଜେ ନାଜାନଲା ବାସାଇ କାତାଅଇସି, ସେଟା ତାର ନିଜର ବିସବାସକେ ତାଟ କରାଇସି । ମାତର ଜେ କି ପରମେସରର ବାକିଅ ଜାନାଇସି, ସେ ଗୁଲାଇ ମଣ୍ଡଲିର ବିସବାସ ତାଟ କରାଇସି ।

<sup>୫</sup> ତମେ ସବୁଲକ୍ ନାଜାନଲା ବାସାଇ କାତା ଅଇଲେ ମୁଇ ସାର୍ଦା ଅଇବି । ମାତର ପରମେସରର ବାକିଅ ଜାନାଇବାକେ ବପୁ ଉଆ ବଲି ମୁଇ ଅଦିକ୍ ମନ୍ କଲିନି । କାଇକେବଇଲେ ପରମେସରର ବାକିଅ ପାଇକରି ଜାନାଇବା ଲକ୍, ନାଜାନବା ବାସାଇ କାତା ଅଇବା ଲକ୍ ଟାନେଅନି ମୁକିଅ । ଜଦି ମଣ୍ଡଲିର କେ ମିସା ସେ କଇଲା ବିସଇର ଅରଡ଼ ନ ବୁଜାଇବାଜାକ ଗୁଲାଇ ମଣ୍ଡଲି ସାଇଜ ନଏ । <sup>୬</sup> ତେବେ ଏ ବାଇବଇନିମନ୍ ମୁଇ ତମରଟାନେ ଆଇଲାବେଲେ, ଜଦି ନାଜାନଲା ବାସାଇ କାତା କଇଲେ, ତମକେ କେନ୍ତ୍ର ତାଟ କରାଇବି ? ମୁଲ୍କେ ନାଇ, ଜଦି ମୁଇ ପରମେସର ଟାନେଅନି ପାଇଲା ବାକିଅ, କି ଗିଆନ୍, କି ବବିସତ୍ କାତା ସିକ୍‌ବା ବିସଇ ନ ଜାନାଇଲେ, ତେବେ ତମକେ କେନ୍ତ୍ର ତାଟ କରାଇବି ?

<sup>୭</sup> ସେନ୍ତାରିସେ ବାଉଁସି ଆରି ତୁଡୁଙ୍ଗା ପାରା ଜିବନ୍ ନ ରଇବା ବାଇଦ୍ ବିସଇ ବାବିଦେକ୍, ସେଟା ଜଦି ବାଜନ୍‌ତେଇ ବିନ୍ ସର ନ ରଇଲେ, ସେଟା ବାଜଲାନି ବଲିକରି ଜାନି ନଏ ।

<sup>୮</sup> ସେନ୍ତାରିସେ ସନିଅମନ୍ ଜନ୍ ବାଁକା ବାଜାଇବାଇ, ଜଦି ତାର ସବଦ୍ ଟିକ୍ ନାଇ, ଜୁଇଦେ ଜିବାଜେ କେ ମିସା ଜାଗରଡ଼ ନ ଅଅଡ଼ । <sup>୯</sup> ସେନ୍ତାରିସେ ନ ବୁଜବା କାତା କଇଲେ, ତମେ କାଇଟା କାତା ଅଇଲାସିନି ବଲି କେ ବୁଜି ନାପାରଡ଼ । ତମର କାତା ପବନ୍ ଉଡ଼ାଇନେଲା ପାରା ଅଇସି । <sup>୧୦</sup> ଏ ଜଗତେ କେତେକ୍ କେତେକ୍ ବାସା ଆଟେ । ଆରି ସେଟାର ସବୁ ଅରଡ଼ ଆଟେ । <sup>୧୧</sup> ମାତର କାତାଅଇରଇବା ବାସା ଜଦି ମୁଇ ବୁଜି ନାପାରଲିନି, ସେ ବାସାଇ କାତା ଅଇବା ଲକ୍ମନ ମର ଅଚିନାର ଲକ୍ ପାରା, ମୁଇ ମିସା ସେମନରପାଇ ଅଚିନାର ପାରା । <sup>୧୨</sup> ତେବେ ତମେ ଜେନ୍ତାରିକି ସୁକଲ୍ ଆଡ଼ମାର ବିନ୍ ବିନ୍ ରକାମର ଦାନ ପାଇବାକେ ମନ୍ କଲାସିନି, ସେ ସବୁର



ଟାନେଅନି ଜନ୍ ସବୁ ଦାନ ତମର୍ ମଣ୍ଡଳିକେ ଡାଟ୍ କରାଇସି, ସେ ଦାନ ବାଇବାକେ ଚେସ୍ଟା କରା ।

୧୩ ତେବେ ଜେ ନାଜାନଲା ବାସାଇ କାତା ଅଇସି, ସେ କାତା ଅଇଲାଟା ବୁଜାଇବା ଦାନ ମିଲ ବଲି ପାର୍ତନା କର । ୧୪ କାଇକେବଇଲେ ମୁଇ ଜଦି ନାଜାନବା ବାସାଇ ପାର୍ତନା କରବି, ମର୍ ଆଡ଼ମା ପାର୍ତନା କଲାନି । ମାତର୍ ମର୍ ବୁଜୁବାର୍ ବପୁ ତେଇ ମିସେନାଇ । ୧୫ ତେବେ ମୁଇ କାଇଟା କରବି ? ମର୍ ଆଡ଼ମାଇ ପାର୍ତନା କରବି, ମାତର୍ ବୁଜୁଲା ପାରା ମିସା ପାର୍ତନା କରବି । ମର୍ ଆଡ଼ମାଇ ଗିଡ଼ କଇବି । ମାତର୍ ବୁଜୁଲାପାରା ମିସା ଗିଡ଼ କଇବି । ୧୬ କାଇକେବଇଲେ ପର୍ମେସର୍କେ ଆଡ଼ମାଇସେ ଦନିଅବାଦ୍ ଦେଇସା, ସବାଇ ରଇଲା ମାମୁଲି ଲକ୍ମନ୍ ତମର୍ ପାର୍ତନା ସୁନିକରି, କେ ଆମେନ୍ ବଲି କଇପାର୍ବାଇ ? ନାଇ ନା ପାରେ । କାଇକେବଇଲେ ତମେ କାଇଟା କଇଲାସୁନି, ସେଟା ସେ ନାଜାନେ । ୧୭ ତେବେ ପର୍ମେସର୍କେ ଟାନେ ତମର୍ ଦନିଅବାଦ୍ ଦେବାଟା ବେସି ନିକ ରଇଲେ ମିସା ତମର୍ ବିନ୍ ବାଇମନ୍କେ ଡାଟ୍ କରାଇ ନାପାରୁଲାସ୍ ।

୧୮ ମୁଇ ପର୍ମେସର୍କେ ଦନିଅବାଦ୍ ଦେଲିନି, ମୁଇ ତମର୍ ସବୁଟାନେଅନି ଅଦିକ୍, ନାଜାନଲା ବାସାଇ କାତା କଇପାରି । ୧୯ ମାତର୍ ମଣ୍ଡଳିର୍ ଉପାସନା ବେଲାଇ, ନାଜାନଲା ବାସାଇ ଅଜାର୍ ଅଜାର୍ ପଦ୍ ନ କଇକରି ସବୁଲକ୍ ବୁଜୁଲା ପାରା ପାଟ୍ଟା ପଦ୍ କଇବାଟା ନିକ ।

୨୦ ଏ ବାଇବଇନିମନ୍ ତମେ ପିଲାମନର୍ ପାରା ଚିନ୍ତା କରାନାଇ । କାରାପ୍ ବିସଇତେଇ ପିଲାପାରା ଉଆ । ମାତର୍ ବୁଦି ଆରି ବିଚାର୍ କରବାତେଇ ବଡ଼ ଲକର୍ ପାରା ଅଇବାର୍ ଦରକାର୍ । ୨୧ ସାସ୍ତରେ ଲେକାଆଟେ, ମାପୁରୁ କଇଲାନି, ବିନ୍ ବାସା କଇବା ଲକ୍ମନର୍ ବାଟେଅନି

ଏ ଲକର୍ ସଙ୍ଗ୍ ମୁଇ କାତା ଅଇବି ।

ନାଜାନବା ବାସା କଇବା ଲକର୍ ଟଣ୍ଡେଅନି

ମୁଇ ଏ ଜାତିସଙ୍ଗ୍ କାତା ଅଇବି,

ଏଲେ ମିସା ସେମନ୍ ମର୍ କାତା ନ ସୁନଡ଼ ।

୨୨ ନାଜାନବା ବାସା କାତା ଅଇବା ବପୁ, ବିସ୍ବାସ୍ ନ କଲା ଲକ୍ମନର୍ ପାଇ ଗଟେକ୍ ଚିନ୍ ପାରା । ମାତର୍ ବିସ୍ବାସିମନର୍ପାଇ ନାଇ । ଆରି ପର୍ମେସର୍କ୍ ବାକିଅ ଜାନାଇବା ବପୁ ବିସ୍ବାସି ମନର୍ପାଇ ଗଟେକ୍ ଚିନ୍, ଆରି ବିସ୍ବାସ୍ ନ କରବା ଲକ୍ମନର୍ ପାଇ ନାଇ ।

୨୩ ତେବେ ତମେ ମଣ୍ଡଳି ଇସାବେ ରୁଣ୍ଡୁଲା ବେଲେ ନାଜାନଲା କାତା କଇସା ବଇଲେ, ତେଇରଇବା ବିନ୍ ଲକ୍ମନ୍ ଆରି ବିସ୍ବାସ୍ ନ କରବା ଲକ୍ମନ୍ କାଇଟା ବଲି କଇବାଇ ? “ଏ ତା ବାୟା ଅଇଗାଲା ଆଟେ !” ୨୪ ଜଦି ସବୁଲକ୍ ପର୍ମେସର୍ ଜାନାଇଲା କାତା କଇଲାସୁନି, ଜଦି ତେଇ ଗଟେକ୍ ବିସ୍ବାସ୍ ନ କଲା ଲକ୍ କି ଗଟେକ୍ ମାମୁଲି ଲକ୍ ଆଇଲେ, ତେବେ ସେ ନିଜର୍ ପାପର୍ ବିସଇର୍ ଚେଡ଼ନା ପାଇସି । ଆରି ସେ ସୁନ୍ଲା ସବୁ ବିସଇର୍ କାତାଇଅନି ତାକେ ବିଚାର୍ ଅଇସି । ୨୫ ଆରି ତାର୍ ମନେ ଲୁଚି ରଇବା ବିସଇ ସବୁ ଜାନାପଡ଼ସି । ପତେ ସେ ପର୍ମେସର୍କେ ଡାଣ୍ଡାସନ୍ ପଡ଼ି, ତାର୍ କରଇବା ପାପ୍ ମାନିଅଇକରି “ତମର୍ ବିଡ଼ରେ ସତଇସେ ପର୍ମେସର୍ ଆଟେ !” ବଲି କଇସି ।

ମଣ୍ଡଳି ସାନ୍ତି ରକିଆ କରବାଟା

୨୬ ଏ ବାଇବଇନିମନ୍, ମର୍ କଇବା କାତା ଅଇଲାନି, ତମେ ଉପାସନା କରବାକେ ରୁଣ୍ଡୁଲା ବେଲାଇ ଏନ୍ତାରି କରା । ତମର୍ ବିଡ଼ରେଅନି କାକେ କାକେ ଗିଡ଼ ଆଟେ, କାକେ କାକେ, ସିକିଆ ଦେବାଟା ଆଟେ, ଆରି କାକେ କାକେ ପର୍ମେସର୍କ୍ ଟାନେ

ଅନି କାତା ପାଇ, ସେଟା ଜାନାଇବାଟା ଆଚେ, କି ନାଜାନୁଲା ବାସାଇ କାତା କଇବାଟା ଆଚେ, ଆରି କାକେ କାକେ ନାଜାନୁଲା ବାସାଇ କଇଲା କାତାର୍ ଅରତ୍ ବୁଜାଇବା ବପୁ ଆଚେ, ଏନ୍ତି କାଇଟା ନଇଲେ କାଇଟା ଆଚେ । ଏଟା ସବୁ ଅଇସି, ତେବେ ମଣ୍ଡଲିର ବିସ୍ବାସି ମନର୍ ବିସ୍ବାସ୍ ଡା଼ର୍ ଅଇସି ।<sup>୨୭</sup> ଜଦି କେ ନାଜାନୁଲା ବାସାଇ କାତା ଅଇଲେ, ଦୁଇ ତିନ୍ ଲକର୍ ତେଇଅନି ଅଦିକ୍ ଲକ୍ ନ କଅଡ୍ । ଆରି ଗଟେକ୍ ଲକର୍ ପଚେ ଗଟେକ୍ ଲକ୍ କଇବାର୍ ଆଚେ । ଆରି ସେ କାତା ବୁଜାଇ ଦେବା ଲକ୍ ମିସା ତେଇ ରଇବାର୍ ଆଚେ ।<sup>୨୮</sup> ଜଦି ସେଟା ବୁଜାଇବାକେ ତେଇ କେ ନାଇ, ସେ ଉପାସନାଇ ରୁପ୍ ଅଇ ରଅ । ସେ ଅବ୍‌କା ମନେ ମନେ ପର୍ମେସରର୍ ସଙ୍ଗ୍ କାତା ଅ ।<sup>୨୯</sup> ଜଦି ପର୍ମେସରର୍ ଟାନେଅନି କାତା ପାଇ, ଜାନାଇବା ଲକ୍ ଆଚଡ୍, ତେବେ ଦୁଇ ଲକ୍ କି ତିନ୍ ଲକ୍ ରଇବାର୍ । ସେ ବେଲାଇ ତେଇ ରଇଲା ଲକ୍‌ମନ୍ ସେ ବାକିଅ ବିଚାର୍ କରବାର୍ ଆଚେ ।<sup>୩୦</sup> ମାତର୍ ଉପାସନାତେଇ ରଇବା ଜଦି କାକେ ଅଟାଡ୍ ପର୍ମେସରର୍ ଟାନେ ଅନି କାତା ପାଇସି, ତେବେ ବାକିଅ କଇତେରଇବା ଲକ୍ ତେଇ ବନ୍ଦ୍ କରିରଇବାର୍ ଆଚେ ।<sup>୩୧</sup> କାଇକେବଇଲେ ତମେ ଏନ୍ତାରି କଲେ ପର୍ମେସରର୍ ବାକିଅ, ଗଟେକ୍ ଲକର୍ ପଚେ ଗଟେକ୍ ଲକ୍, କଇ ପାରାସ୍ । ଜେନ୍ତିକି ସବୁଲକ୍ ସିକିଆ ପାଇକରି ଚେଡ୍‌ନା ଅଇବାଇ ।<sup>୩୨</sup> ମାତର୍ ପର୍ମେସରର୍ ବାକିଅ ଜାନାଇବା ଦାନ୍, ଜାନାଇବା ଲକର୍ ତଲିଆ ରଇବା ଦରକାର୍ ।<sup>୩୩</sup> କାଇକେବଇଲେ ପର୍ମେସର୍ ଆଗାପଟା ନ ଅଇକରି ସବୁ ବିସଇ ଅର୍ସା ସଙ୍ଗ୍ ଅ, ବଲି ମନ୍ କଲାନି ।

ପର୍ମେସରର୍ ବିନ୍ ଉପାସନା ମଣ୍ଡଲିତେଇ ଜେନ୍ତାରି,<sup>୩୪</sup> ତମେ ମଣ୍ଡଲି ଇସାବେ ରୁଣ୍ଡିଲା ବେଲେ, ମାଇଜିମନ୍ ରୁପ୍‌ଟାପ୍ ଅଇରଇବାର୍ ଆଚେ । ତେଇ ସେମନ୍ କାତା କଇବାକେ ସେମନ୍‌କେ ଆଦେସ୍ ମିଲେନାଇ । ଜିଉଦି ନିୟ୍ ଇସାବେ ସେମନ୍ ମନସ୍ ପିଲାର୍ ତଲିଆ ରଇବାର୍ ଆଚେ ।<sup>୩୫</sup> ସେମନ୍ ଜଦି କାଇ ବିସଇ ବୁଜ୍‌ବାକେ ମନ୍ କଲାଇନି, ଗରେ ଜାଇ କରି ନିଜର୍ ମୁନୁସ୍‌କେ ପାଟାର । କାଇକେବଇଲେ ମଣ୍ଡଲିଟାନେ କାତା କଇବାଟା ମାଇଜିମନ୍ ପାଇ ଗଟେକ୍ ଲାଜର୍ କାତା ।

<sup>୩୬</sup> କାଇଟା ? ପର୍ମେସରର୍ ବାକିଅ ତମର୍ ଟାନେଅନି ଜାଡ୍ ଅଇଲା ଆଚେ କି ? ସେ ବାକିଅ କାଇ ତମର୍ ଟାନେସେ ଆସିରଇଲା କି ? ନାଇ ଆସି ନ ରଇଲା ।<sup>୩୭</sup> କେ ଜଦି ତମର୍ ବିଡ୍‌ରେ ପର୍ମେସରର୍ ବାକିଅ ଜାନାଇବା ଲକ୍ କି ସୁକଲ୍ ଆଡ୍‌ମା ଅନି ଦାନ୍ ପାଇଲିଆଟି ବଲି ବାସ୍‌ସି, ସେନ୍ତିଆଲେ ମୁଇ ତମ୍‌କେ ଜାଇ ଜାଇଟା ଲେକ୍‌ଲିନି, ସେ ସବୁ ଜେ ମାପ୍‌ରୁର୍ ଆଦେସ୍, ଏଟା ସେ ଜାନ୍‌ବାର୍ ଆଚେ ।<sup>୩୮</sup> ଜଦି ସେ ଏ ସବୁ କାତା ନ ସୁନେ କି ନ ମାନେ, ତମେ ମିସା ତାର୍ କାତା ସୁନା ନାଇ କି ମାନା ନାଇ ।

<sup>୩୯</sup> ସେଟାର୍‌ପାଇ ଏ ବାଇବଇନିମନ୍ ପର୍ମେସରର୍ କାତା ଜାନାଇବାକେ ମନ୍ କରା, ମାତର୍ ନ ବୁଜ୍‌ବା ବାସାଇ କାତା କଇବାକେ କାକେ ନିରୁ ବଲି କୁଆନାଇ ।<sup>୪୦</sup> ତମର୍ ସବୁ କାମ୍ ଟିକ୍ ବାବେ ଆରି ଅର୍ସା ସଙ୍ଗ୍ କରବାର୍ ଦରକାର୍ ।

## ୧୫

### କିରିସ୍ଟ ଆରିତରେକ୍ ଉଟ୍‌ଲାଟା

<sup>୧</sup> ଏ ବାଇବଇନିମନ୍, ମୁଇ ତମର୍ ଲଗେ ଜନ୍ ସୁବକବର୍ ଜାନାଇରଇଲି ସେଟା ତମ୍‌କେ ଏତାଇଦେବି ବଲି ମନ୍ କଲିନି । ସେଟା ତମେ ମାନି ରଇଲାସ୍ ଆରି ତେଇସେ ତମର୍ ବିସ୍ବାସ୍ ଡା଼ର୍ ଆଚେ ।<sup>୨</sup> ଜଦି ଏ ସୁସମାଚାର୍ ତମେ ତାଟ୍ ସଙ୍ଗ୍ ଦାରିରଇସା, ତେବେ ଉଦାର୍ ପାଇସା, ନଇଲେ ତମେ ବେକାର୍ ବିସ୍ବାସି ଅଇ ଆଗାସ୍ ।

<sup>୩</sup> କାଇକେବଇଲେ ଜନ୍ ସିକିଆ ମୁଇ ପାଇରଇଲି, ତେଇଅନି ଏ ବଡ୍ ସିକିଆ ତମ୍‌କେ ସିକାଇ ରଇଲି । ସାସ୍‌ତର୍ ଇସାବେ କିରିସ୍ଟ ଆମର୍ ପାପ୍ କେମା

ଅଇବାକେ ମରିଗାଲା । ୪ \*ତାକେ ତପିରଇଲାଇଜେ, ସାସ୍ତର ଇସାବେ ତିନ୍ଦିନ୍ ନ ଅଇତେ ତାକେ ପରମେସର୍ ଜିବନ୍ କରି ଉଟାଇଲା । ୫ \*ସେ ପିତର ଆରି ତାର ବାରଟା ପେରିଡ଼ ସିସ୍ତମନକେ ଦର୍ସନ୍ଦେଲା । ୬ ତାର ପତେ ତର ସଙ୍ଗ ଜାଇତେରଇବା ଏକାତର ପାଁଡ଼ଅଥ ଲଗେଅନି ଅଦିକ୍ ବାଇମନକେ ଦର୍ସନ୍ଦ ଦେଲା । ସେମନର୍ ବିଡ଼ରେ ଅନି କେତେଲକ୍ ମରିଗାଲାଆରି ବେସି ଲକ୍ ଆଜିକେ ଜାକ ଜିବନ୍ ଆତଡ଼ । ୭ ତାରପତେ ସେ ଜାକୁବକେ ଆରି ସବୁ ପେରିଡ଼ମନକେ ଦର୍ସନ୍ଦ ଦେଲା ।

୮ \*ସେ ଦର୍ସନ୍ଦ ଦେଲା ଲକ୍ମନର୍ ବିଡ଼ରେ ସାରାସାରି ମୁଇ ରଇଲି । ସବୁର ପତେ, ଦିନ୍ ନ କେଟ୍ତେ, ଜନମ୍ ଅଇଲା ପିଲା ପାରା ମକେ ମିସା ଦର୍ସନ୍ଦ ଦେଲା । ୯ \*ସବୁ ପେରିଡ଼ ସିସ୍ତମନର୍ ବିଡ଼ରେ ଅନି ମୁଇସେ ସାନ୍ । ପେରିଡ଼ ବଲି ଡାକାଇ ଅଇବାକେ ମର୍ ଅଦିକାର୍ ନାଇ । କାଇକେବଇଲେ ପରମେସରର୍ ମଣ୍ଡଲିର୍ ବିସ୍ତାସିମନକେ ମୁଇ କସ୍ତ ଦେଇତେ ରଇଲି । ୧୦ ଅଇଲେ ମିସା, ପରମେସରର୍ ଜିବନ୍ ଦୁକାଇଲାଟାନେଅନି ମୁଇ ଏବେ ଏନ୍ତାରି ଆଟି । ତାର ଜିବନ୍ ଦୁକାଇଲାଟା ମକେ ଦାରି ଆତେ ବଲି ଜାନା ପଡ଼ଲାନି । କାଇକେବଇଲେ ମର୍ ସଙ୍ଗର୍ ପେରିଡ଼ ମନର୍ଟାନେଅନି ମୁଇ ଅଦିକ୍ କାମ୍ କରିଆଟି । ମାତର୍ ସେଟା ମର୍ ନିଜର୍ ବପୁସଙ୍ଗ ନାଇ, ପରମେସର୍ ଜିବନ୍ ଦୁକାଇ ମକେ ସାଇଜ କଲା । ୧୧ ଅଇଲେ ମିସା ମୁଇ ସୁବକବର୍ ଜାନାଇଲେ କି ସେମନ୍ ଜାନାଇଲେ ମିସା କିଟି ବିନ୍ ନାଇ । କାଇକେବଇଲେ ଆମେ ସବୁ ଜାନାଇବାଟା ଗଟେକ୍ ବିସଇସେ । ସେଟା ତମେ ବିସ୍ତାସ୍ କରିଆଟାସ୍ ।

ଆମେ ଆରିତରେକ୍ ଉଟ୍ଟବା ବିସଇ

୧୨ ଜଦି କିରିସ୍ତକେ ପରମେସର୍ ମଲାତେଇଅନି ଜିବନ୍ କରି ଉଟାଇଆତେ ବଲି ଆମେ ସିକାଇଲୁନି, ତେବେ କାଇକେ ତମର୍ ବିଡ଼ରେ କେତେଲକ୍, ମଲା ଲକ୍ମନର୍, ଆରି ତରେକ୍ ଜିବନ୍ ଅଇବାଟା ନଏଁ, ବଲି କଇଲାସିନ୍ ? ୧୩ ମଲା ଲକ୍ମନ ଆରିତରେକ୍ ଜିବନ୍ ନ ଅଇବାଟା ଜଦି ସଡ଼, ତେବେ କିରିସ୍ତକେ ମିସା ଜିବନ୍ କରାଇ ଉଟାଏ ନାଇ । ୧୪ ଆରି, ଜଦି କିରିସ୍ତକେ ମଲାତେଇ ଅନି ଉଟାଏ ନାଇ, ତେବେ ଆମେ ଜାନାଇବାଟା ତୁଟାଇସେ, ତମେ ବିସ୍ତାସ୍ କରବାଟା ମିସା ତୁଟାଇସେ । ୧୫ ସେଡ଼କିସେ ନଏଁ, ଆମେ ପରମେସରର୍ ବିସଇର୍ ମିଟ୍ ସାକି ଦେଇତେରଇଲୁ ବଲି ଜାନାପଡ଼ସି । କାଇକେବଇଲେ ଆମେ କିରିସ୍ତକେ ଜିବନ୍ କରାଇ ଉଟାଇ ଆତେ ବଲି କଇରଇଲୁ । ମାତର୍ ମଲାଲକ୍ ଜିବନ୍ ଅଇ ନ ଉଟଡ଼, ସେଟା ଜଦି ସଡ଼, ସେନ୍ତାଆଲେ ପରମେସର୍ କିରିସ୍ତକେ ଜିବନ୍ କରାଇ ଉଟାଏ ନାଇ । ୧୬ ଜଦି ମଲା ଲକ୍ମନକେ ନ ଉଟାଏ, ତେବେ, କିରିସ୍ତକେ ମିସା ଉଟାଏ ନାଇ । ୧୭ ଜଦି କିରିସ୍ତକେ ଉଟାଏ ନାଇ, ତେବେ ତମର୍ ବିସ୍ତାସ୍ କରବାଟା ତୁଟାଇସେ । ଆରି ତମେ ଏବେ ଜାକ ନିଜର୍ ନିଜର୍ ପାପେ ଆଟାସ୍ । ୧୮ ସେନ୍ତାରିସେ ଜନ୍ ଲକ୍ କିରିସ୍ତକେ ବିସ୍ତାସ୍ କରି ମରିଗାଲାଆରି ଆତଡ଼, ସେମନ୍ ରକିଆ ଅଅଡ଼ ନାଇ, ମାତର୍ ନସ୍ତ ଅଇଆତଡ଼ । ୧୯ ଜଦି କିରିସ୍ତର୍ ଟାନେ ଆମର୍ ଆସା କିରିରଇବାଟା ଏ ଜଗତର୍ ଜିବନ୍ ସଙ୍ଗ୍ ସାର୍ସି, ତେବେ ସବୁଲକ୍ ତେଇଅନି ଆମର୍ କେତେକ୍ କାକୁର୍ଡ଼ିର୍ କରମ୍ ।

୨୦ ମାତର୍ କିରିସ୍ତକେ ମଲାତେଇଅନି ଉଟାଇଆତେ, ଏଟା ଅଇଲାନି ସଡ଼ ଆରି ଏନ୍ତାରିସେ ସବୁ ମଲା ଲକ୍ମନକେ ପରମେସର୍ ଜିବନ୍ କରି ଉଟାଇସି, ଏଟା ଆମେ ଜାନ୍ତୁ । ୨୧ କାଇକେବଇଲେ ଗଟେକ୍ ଲକ୍ମର୍ ଲାଗି ଗୁଲାଲ ଲକ୍ ମର୍ବାର୍ଆତେ

\* ୧୫:୪ ୧୫:୪ ମାଡ଼ିଉ ୧୨:୪୦; ପେରିଡ଼ ୨:୨୪-୩୨      \* ୧୫:୫ ୧୫:୫ ଲୁକ୍ ୨୪:୩୪; ମାଡ଼ିଉ ୨୮:୧୭,୧୭; ମାର୍ଚ୍ଚ ୧୭:୧୪; ଲୁକ୍ ୨୪:୩୭; ଜଅନ୍ ୨୦:୧୯      \* ୧୫:୮ ୧୫:୮ ପେରିଡ଼ ୯:୩-୭      \* ୧୫:୯ ୧୫:୯ ପେରିଡ଼ ୮:୩

। ସେନ୍ତାରିସେ ଗଟେକ୍ ଲକ୍ଷ୍ ଲାଗି ଗୁଲାଇ ଲକ୍ଷ୍ କେ ଫଲାତେଇଅନି ଉଟାଅଇସି । ୨୨ ଜେନ୍ତି ଆଦମର୍ ବସେଅନି ଆଇଲା ଲକ୍ଷ୍ ଫର୍ବାଇ, ସେନ୍ତାରିସେ କିରିସର୍ତ୍ତେଇ ରଇଲା ସବୁଲକ୍ଷ୍ ଜିବନ୍ ଅଇ ଉଟ୍ବାଇ । ୨୩ ଫାତର୍ ଗଟେକ୍ ଗଟେକ୍ ଲକ୍ଷ୍ ଆଗାପଟା ଇସାବେ ଉଟ୍ବାଇ । ପର୍ତ୍ତୁମ୍ କିରିସର୍ତ୍ତା ପଟେ ସେ ଆଇବା ଦିନେ ଜେଡକ୍ ଲକ୍ଷ୍ ସବୁ ତାରଲଗେ ରଇଲା । ୨୪ ତାର୍ପଟେ ଜୁଗର୍ ସାରାସାରି ଦିନ୍ କେଟ୍ସି । ସେଡକିବେଲେ ସବୁ ସାସନ୍କାରିଆମନ୍କେ, ଅଦିକାର୍ ଆରି ବପୁ ରଇଲା ଲକ୍ଷ୍ ଫର୍ବାଇ ସେ ଆରାଇସି ଆରି ବାବା ପର୍ତ୍ତେସର୍ତ୍ତେ ସେ ରାଇଜ୍ ସର୍ପି ଦେଇସି । ୨୫ କାଇକେବଇଲେ ପର୍ତ୍ତେସର୍ତ୍ତେ ତାର୍ ସବୁ ସର୍ତ୍ତୁମନ୍କେ ଆରାଇ, ତାର୍ ପାଦ୍ତଲେ ଆନ୍ବାଜାକ୍ କିରିସର୍ତ୍ତେ ସାସନ୍ କର୍ବାର୍ ଆଟେ । ୨୬ ସାରାସାରି ପଟେ ସର୍ତ୍ତୁମନ୍ ମିସା ଆରିଜିବାଇ । ୨୭ ଜେନ୍ତି କି ସାସ୍ତରେ ଲେକା ଅଇଲାଆଟେ, ପର୍ତ୍ତେସର୍ତ୍ତେ ସବୁ ବିସଇ ତାର୍ ପାଦ୍ତଲେ ସଙ୍ଗାଆଟେ । ସବୁ ବିସଇ ବଲି, କଇବା ବେଲେ ତାର୍ ଅରଡ୍ ଅଇଲାନି, ପର୍ତ୍ତେସର୍ତ୍ତେ ଚାଡି ସବୁ ବିସଇ । ସେ ଆକା ସବୁ ବିସଇ କିରିସର୍ତ୍ତେ ତଲିଆ କରି ସଙ୍ଗାଆଟେ । ୨୮ ସବୁ ବିସଇ କିରିସର୍ତ୍ତେ ତଲେ ସଙ୍ଗାଆ ପଟେ, ନିଜେ କିରିସର୍ତ୍ତେ ଜେ କି ପଅ, ସେ ପର୍ତ୍ତେସର୍ତ୍ତେ ତଲିଆ ଅଇ ରଇସି । ସବୁ ବିସଇ ପର୍ତ୍ତେସର୍ତ୍ତେ ତାର୍ ତଲିଆ କରି ସଙ୍ଗାଆଟେ ଆରି ପର୍ତ୍ତେସର୍ତ୍ତେ ପୁରାପୁରୁନ୍ ସବୁର୍ ଉପରେ ସାସନ୍ କର୍ସି ।

୨୯ ଫଲାଲକ୍ଷ୍ କେ ଆରିତରେକ୍ ନ ଉଟାଏ, ଜଦି ଏଟା କେନ୍ତାର୍ ଜେ ଫଲା ଲକ୍ଷ୍ ଫର୍ବାଇ ପାଇ ତାର୍ ଫଇତର୍ତ୍ତେମନ୍ ତୁବନ୍ ନେଲାଇନି ? ତେବେ ସେମନ୍କେ କାଇଟା ମିଲ୍ସି ? ଜଦି ଫଲାଲକ୍ଷ୍ ଫର୍ବାଇ ନ ଉଟାଅଡ୍, ସେନ୍ତାର୍ ଆଲେ କାଇକେ ଏମନ୍ ଫଲା ଲକ୍ଷ୍ ଫର୍ବାଇ ତୁବନ୍ ନେଲାଇନି ? ୩୦ ଆରି ଆମେ ମିସା କାଇକେ ସବୁ ବେଲେ ଆମର୍ ଜିବନ୍ ବିପଦେ ପାକାଇତେ ରଇବୁ ? ୩୧ ଏ ମର୍ ବାଇବଇନିମନ୍ ଦିନ୍କେ ଦିନ୍, ଲକ୍ଷ୍ ଫର୍ବାଇ ମକେ ମରାଇବାକେ ଚେସ୍ଟା କଲାଇନି । ମୁଇ ଏଟା କାଇକେ କଇଲିନି ବଇଲେ, ତମର୍ଟାମେ ମର୍ ଜନ୍ ବଡ୍ପଦ୍ ଆଟେ, ଆରି ଆମର୍ ମାପୁର୍ ଜିସୁକିରିସର୍ତ୍ତେ ଟାମେ ଆମର୍ ଜିବନ୍ ମିସିରଇଲାଜେ ମୁଇ କଇଲିନି । ୩୨ ଏପିସି ସଅରେ ମୁଇ ବେସି କସ୍ଟ ପାଇଲି । କାଇକେବଇଲେ ଜନ୍ ଲକ୍ଷ୍ ଫର୍ବାଇ ମକେ ବିରଦ୍ କଲାଇ, ସେମନ୍ ସଙ୍ଗା ତଙ୍ଗାରେ ରଇବା ପସୁମନ୍ ପାରା ଜୁଜିରଇଲି । ତେଇ ଆମେ ଜେନ୍ତି କସ୍ଟ ପାଇତେରଇଲୁ, ସେନ୍ତାରି ଅଇଲାକେ ଆମ୍ବେ କାଇ ଲାବ୍ ମିଲ୍ଲା ? ଜଦି ଫଲା ଲକ୍ଷ୍ ଫର୍ବାଇ ନ ଉଟାଏ, ତେବେ ଏନ୍ତାରି କଇବାଟା ନିକ ରଇସି । “ଆସା ଆମେ ବଜିକରି କାଉଁ, କାଇକେବଇଲେ ଆମେ କାଲିକେ ମର୍ବାର୍ ଅଇସିବେ ।”

୩୩ ନାଡାଇ ଉଆନାଇ, କାରାପ୍ ଲକ୍ଷ୍ ଫର୍ବାଇ ସଙ୍ଗା, ସାଙ୍ଗା ଅଇଲେ ସେମନ୍ ତମର୍ ନିକ ଚଲାଟଲ୍ଡି କର୍ବାଟା ନସାଇ ଦେବାଇ । ୩୪ ଟିକ୍ସଙ୍ଗା ଟିଙ୍ଗା କରା । ତମର୍ ପାପର୍ ଚଲାଟଲ୍ଡି କର୍ବାଟା ଚାଡିଦିଆସ୍ । କାଇକେବଇଲେ ପର୍ତ୍ତେସର୍ତ୍ତେ ନାଜାନ୍ଲା କେତେକ୍ ଲକ୍ଷ୍ ତମର୍ ବିଡ୍ରେ ଆଟଡ୍ । ଏଟା ମୁଇ ତମ୍ବେ ଲାଜ୍ କରାଇବାକେ କଇଲିନି ।

ଆରିତରେକ୍ ଜିବନ୍ ଅଇବା ଗାଗଡ୍

୩୫ କେତେଲକ୍ ପାଟାର୍ବାଇ, “ଫଲା ଲକ୍ଷ୍ ଫର୍ବାଇ କେ ଜିବନ୍ ଦେଇ ଉଟାଇସି ? ଆରି ସେମନ୍ ଗାଗଡ୍ କେନ୍ତାର୍ ରଇସି ?” ଜେ ଏନ୍ତାରି ପର୍ତ୍ତେସର୍ତ୍ତେ ପାଟାର୍ସି, ସେ ବକୁଆଟା । ୩୬ ତମେ ଜାନାସ୍ । ଜେତେବେଲେ ଗଟେକ୍ ମୁଞ୍ଜି ରପା ଅଇସି, ମୁଞ୍ଜିର୍ ଉପ୍ରେ ଚପା କୁଇଜାଇସି, ଫାତର୍ ବିଡ୍ରେଟା ଆଁକର୍ସି । ୩୭ ଜେତେବେଲେ ଗଟେକ୍ ମୁଞ୍ଜି ରପା ଅଇସି, ସେଟା ଦାନ୍ ଅ, କି ଆରି କାଇ ମୁଞ୍ଜି ଅ, ମୁଞ୍ଜିସେ ରପି ଅଇସି । ପଟେ ବଡିରଇବା ବୁଟା ନ ରପଡ୍ । ୩୮ ପର୍ତ୍ତେସର୍ତ୍ତେ ନିଜର୍ ମନ୍ କଲା

ଇସାବେ ମୁଞ୍ଚିତେଇଅନି ଆଁକ୍ରି ଗଡ଼ ଅ, ବଲି ଟିକ୍ କଲ। । ଆରି ସେ ବିନ୍ ବିନ୍ ରକାମର୍ ମୁଞ୍ଚି ବଡ଼ବାକେ ଦେଲା, ଜେନ୍ତୁକି ଗଟେକ୍ ଗଟେକ୍ କେ ତାର୍ ଗାଗଡ଼ ରୁପ୍ ବାଦଲାଇସି ।

୩୯ ଜିବନ୍ ରଇବା ସବୁ ଗାଗଡ଼ ସମାନ୍ ନଏଁ । ଲକ୍ମନ୍ କେ ଗଟେକ୍ ରକାମ୍ ଗାଗଡ଼, ପସୁ ଚଡ଼ଇ ଆରି ମାଟ୍ମନ୍ କେ ବିନ୍ ବିନ୍ ରକାମ୍ ଗାଗଡ଼ ଆଚେ ।

୪୦ ସେନ୍ତୁସେ ସର୍ଗେ ରଇବାଟାମନ୍ ଆରି ଦରତନି ରଇବାଟାମନ୍ ଆଚଡ଼ । ଜେନ୍ତୁକି ସର୍ଗେ ରଇବାଟାମନ୍ ର ସୁନ୍ଦର୍ ଗଟେକ୍ ରକାମ୍, ଦରତନି ରଇବାଟାମନ୍ ର ବିନ୍ ବିନ୍ ରକାମ୍ । ୪୧ ବେଲ୍ ତାର୍ ନିଜର୍ ଇସାବେ ସୁନ୍ଦର୍ ଆଚେ । ସେନ୍ତୁରିସେ ଜନ୍ ତାରାମନ୍ ମିସା ନିଜର୍ ନିଜର୍ ଇସାବେ ସୁନ୍ଦର୍ ଆଚଡ଼ ।

୪୨ ସେନ୍ତୁରିସେ ଆମର୍ ଗାଗଡ଼ ଆରି ଜନ୍ ଗାଗଡ଼ ପର୍ମେସର୍ ଉଟାଇସି, ଦୁଇଟାଜାକ ବିନ୍ ଆଚେ । କାକକେବଇଲେ ଆମର୍ ଗାଗଡ଼ ଏବେ ମରିକରି କୁଇଜାଇସି । ମାତର୍ ଜନ୍ ଗାଗଡ଼ ପର୍ମେସର୍ ଉଟାଇସି, ସେଟା କେବେ ନ ମରେ । ୪୩ ସେଟା ତପ୍ଲାଇବେଲେ ଦୁର୍ବଲ୍ ଅଇ ସୁନ୍ଦର୍ ନ ରଏ । ମାତର୍ ଉଟାଇଲାବେଲେ ସୁନ୍ଦର୍ ରଇକରି ଡାଁଟ୍ ରଇସି । ୪୪ ତପ୍ଲାଇ ବେଲେ ଅବକା ଗାଗଡ଼, ମାତର୍ ଉଟାଇଲାବେଲେ ଆଡ଼ମା ଗାଗଡ଼ ଅଇସି । ଅବକା ଗାଗଡ଼ ଆଚେ ବଇଲେ ଆଡ଼ମା ଗାଗଡ଼ ମିସା ରଇବାର୍ ଆଚେ । ୪୫ ଜେନ୍ତୁରିକି ଲେକା ଅଇଲାଆଚେ, ପର୍ତ୍ତୁମ୍ ମୁନ୍ସ ଜେ କି ଆଦମ୍, ତାକେ ତିଆର୍ କରି ଜିବନ୍ ଦେଇରଇଲା, ମାତର୍ ସାରାସାରିପଚର୍ ଆଦମ୍ ନ ସାର୍ବା ଜିବନ୍ ଦେବା ଆଡ଼ମା ଅଇଲା । ୪୬ ମାତର୍ ଆଡ଼ମା ଗାଗଡ଼ ପର୍ତ୍ତୁମ୍ ନ ଆସେ । ତୁଚାଇ ଗାଗଡ଼ ଆଇସି, ତାର୍ପଚେ ଆଡ଼ମା ଗାଗଡ଼ । ୪୭ ପର୍ତ୍ତୁମ୍ ଆଦମ୍ ମାଟିସଙ୍ଗ୍ ତିଆର୍ ଅଇ ଏ ଦରତନି ଆଇଲା । ମାତର୍ ପଚର୍ ଆଦମ୍ ସର୍ଗେ ଅନି ଆଇଲା । ୪୮ ଜନ୍ ଲକ୍ମନ୍ ଏ ଦରତନିର୍, ସେମନ୍ ଜେ କି ମାଟି ସଙ୍ଗ୍ ତିଆର୍ ଅଇରଇଲା, ତାର୍ପାଚା । ଆରି ଜନ୍ ଲକ୍ ସର୍ଗର୍, ଜେ କି ସର୍ଗେ ଅନି ଆଇଲା, ତାର୍ପାଚା । ୪୯ ଜେନ୍ତୁକି ଆମେ ଜନ୍ଲକ୍ ମାଟିସଙ୍ଗ୍ ତିଆର୍ ଅଇରଇଲା, ତାର୍ ବାନିମୁରତି ଆଟ୍, ସେନ୍ତୁରିସେ ଜେ ସର୍ଗେଅନି ଆଇଲା ତାର୍ ପାଚା ବାନିମୁରତି ଦାର୍ବୁ ।

୫୦ ଏ ବାଇବଇନିମନ୍, ମୁଇ କଇବା ଅଚଡ଼ ଅଇଲାନି ବନି ମାଉଁସ୍ ରଇବା ଗାଗଡ଼ ପର୍ମେସରର୍ ରାଇଜେ ମିସିନାପାରଡ଼ । ଆରି ଜନ୍ ଗାଗଡ଼ ମର୍ବାଇ, ସେମନ୍ କେ ନ ସାର୍ବା ଜିବନ୍ ଦେଇ ନଏଁ ।

୫୧ \*ସୁନା, ମୁଇ ତମ୍ କେ ଗଟେକ୍ ଆଗଡୁ ନ ଜାନାଇରଇବା ବିସଇ କଇବି । ଆମେ ସବୁଲକ୍ ନ ମରୁ, ମାତର୍ ଆମର୍ ଗାଗଡ଼ ସବୁ ବାଦଲି ଜାଇସି । ୫୨ ଗଟେକ୍ ଲକ୍ ଆଁକି ମିଟ୍ କା ମାରୁଲା ବିଡ଼ରେ ସେଟା ଗଟ୍ସି । ସାରାସାରିର୍ ମଇରି ବାଜୁଲା ବେଲେ ମଲା ଲକ୍ମନ୍ ଜିବନ୍ ଅଇ ଉଟ୍ ବାଇ । ସେମନ୍ ଆରି କେବେ ମିସା ନ ମରଡ଼ ଆରି ଆମେ ସବୁ ବଦଲି ଜିବୁ । ୫୩ କାକକେବଇଲେ ଆମର୍ ଏ ମର୍ବା ଗାଗଡ଼ ନ ମର୍ବା ଗାଗଡ଼ ଅଇ ବାଦଲିଜାଇସି । ୫୪ ସେଟା ଅଇଲାବେଲେ ଜନ୍ଟା କି ସାସତରେ ଲେକା ଅଇରଇଲା, ସେଟା ପୁରାପୁରନ୍ ଅଇସି ମରନ୍ ଆରିଜାଇକରି, ଜିଡ଼ବାଟା ପୁରାପୁରନ୍ ଅଇଲା ।

୫୫ ତେବେ ଆମେ କଇ ପାର୍ବୁ,

ଅଇରେ ମରନ୍ ! ତୁଇ କେନେ ଜିଡ଼ଲୁସ୍ ?

ଅଇରେ ମରନ୍ ! କେନେ ତର୍ ବପୁ ?

୫୬ ଆମର୍ ପାପେଅନି ଆମକେ ବାଦବା ବପୁ ମରନ୍ ପାଇଲା ଆଚେ । ଆରି ପର୍ମେସରର୍ ନିୟମ୍ ନ ମାନ୍ଲାତେଇଅନି ପାପ୍ ବପୁ ପାଇସି । ୫୭ ମାତର୍ ଆମେ

ପରମେସ୍ୱରକେ ଦନିଅବାଦ ଦେଲୁନି । କାଇକେବଇଲେ ଆମର ମାପରୁ ଜିସୁ କିରିସ୍ତ କଲ୍ୟା କାମେଅନି ପାପକେ ଆରି ମରନ୍ତକେ ଆରାଇବା ବପୁ ସେ ଆମ୍ଭକେ ଦେଲାଆଚେ ।

୫୮ ସେଟାରପାଇ ଏ ମର ଆଲାଦର ବାଇବଇନିମନ୍, ଡାଁଟ୍ ଅଇକରି ରୁଆ । ମାପରୁ ଜିସୁକିରିସ୍ତର ସେବା କାମ୍ ଆବଡ୍ ଅଇକରି କରା । କାଇକେବଇଲେ ତମେ ଜାନାସ୍, ତାରପାଇ ଜନ୍ କାମ୍ ସବୁ କରସା, ସେଟା ସବୁ ଲତାକେ ଆଇସି ।

## ୧୭

ସାବୁ ଲକର ପାଇ ଦାନ

୧ \*ଜିଉଦା ମଣ୍ଡଲିର ବିସ୍ୱାସିମନ୍ତକେ ତାବୁ ସାଇଜ କରବା ବିସଇ ମୁ ଲେକ୍ଲିନି । ମୁ ଗାଲାତିଅ ମଣ୍ଡଲିମନ୍ତକେ ଜାଇଟା କରବାକେ ଆଦେସ୍ ଦେଲିଆଚି, ସେ ଆଦେସ୍ ଡାଁଟ୍ ସଙ୍ଗ୍ କରବାରୁଆଚେ । ୨ ତମର କାମାଇବା ଇସାବେ, ସବୁ ବିସ୍ୱାସିମନ୍, ବିସ୍ୱାମ୍ ଦିନେ ମଣ୍ଡଲିତେଇ ରୁଣ୍ଡଲ୍ୟାବେଲେ ଅଲପ୍ ଅଲପ୍ ତାବୁ ଜମାଇବାରୁ ଆଚେ । ଜେନ୍ତୁକି ମୁଇ ଆଇଲ୍ୟାବେଲେ ଆରି ତାବୁ ତଲ୍ଲବାକେ ନ ଲାଗେ । ୩ ମୁଇ ଆଇଲ୍ୟାବେଲେ ତମେ ବାଟିରଇବା ଲକ୍ମନ୍ତକେ ଗଟେକ୍ ଚିଟି ଲେକିଦେବି ଆରି ସେମନ୍ ଜମାଇଲା ତାବୁ ଆରି ସେମନ୍ତକେ ଜାନାଇବା ଚିଟି ଦାରି, ଜିରୁସାଲାମ୍ ଜିବାଇ । ୪ ଜଦି ମର ଜିବାକେ ଦରକାର୍ ଅଇସି ବଇଲେ ସେମନ୍ ମରସଙ୍ଗ୍ ଜାଇପାରଡ୍ ।

ପାଉଲର ଉପାଳ

୫ \*ମାତର ମୁଇ ଏବେ ମାକିଦନିଆଇ ଗାଲିନି । ତେଇଅନି ଜାଇ ଆଇଲେ ତମର ଲଗେ ଆଇବି । ୬ ମୁଇ ତେଇ ତମର ସଙ୍ଗ୍ କେତେକ୍ ଦିନ୍ ରଇବି । ଅଇପାରେ ସିଡ୍‌ଦିନ୍ ସାର୍‌ବା ଜାକ । ତାରପତେ ଜନ୍ତି ଜିବାକେ ମନ୍ କଲିନି, ତେଇ ଜିବାକେ ତମେ ମକେ ସାଇଜ କରିପାରାସ୍ । ୭ କାଇକେବଇଲେ ଜିବାବେଲେ ବାଟେ ତମର ସଙ୍ଗ୍ ବେଟ୍ ଅଇକରି ଚନେକ୍‌ସେ ରଇବାକେ ମର ମନ୍ ନାଇ । ମୁଇ ଆସା କଲିନି ମାପରୁ ମନ୍ କଲେ ମୁଇ ତମର ସଙ୍ଗ୍ ଏତର୍ ବେସି ଦିନ୍ ରଇବି ।

୮ \*ମାତର ମୁଇ ପେନ୍‌ଟିକସ୍ ପରବ୍ ଜାକ ଏପିସିଏ ରଇବି, ୯ ଇତି ମର ବିରଦେ ବେସିଲକ୍ ରଇଲେ ମିସା, ସପଲ୍ ଅଇବା କାମ୍ କରବାକେ ମର ପାଇ ଦୁଆର୍ ଉଗାଡି ଅଇଆଚେ ।

୧୦ \*ଜଦି ତିମତି ତମରଟାନେ ଆଇଲେ, ତାକେ ଗତିଆ କରି ଡାକିନିଆ । କାଇକେବଇଲେ ସେ ମିସା ମରପାରା ମାପରୁର୍ କାମ୍ କଲାନି । ୧୧ ସେଟାର ପାଇ ତାକେ କେ ମିସା ସାନ୍ ପାରା ଦେକାନାଇ । ମାତର ତାକେ ସାଇଜ କରା, ଜେନ୍ତୁକି, ସେ ତମର ଜାଗାଇଅନି ଗାଲାବେଲେ, ସାନ୍ତିସଙ୍ଗ୍ ଜାଇପାରସି । ଆରି ସେ ମରଲଗେ ବାଅଡ୍‌ସି । ଇତିର୍ ବାଇବଇନିମନ୍ତର ସଙ୍ଗ୍ ମୁଇ ତାକେ ଜାଗଲିନି ।

୧୨ ବାଇ ଆପଲର ବିସଇ ମୁଇ କଇଲିନି । ବିନ୍ ବିସ୍ୱାସିମନ୍ତର ସଙ୍ଗ୍ ତମ୍‌କେ ବେଟ୍ ଅଇବାକେ ମୁଇ ତାକେ ବେସି ତର ସାରଦା କରାଇଲି, ମାତର ସେ ଏବେ ଜିବାକେ ମୁଲ୍‌କେ ରାଜି ଅଏନାଇ । ପଟେ ସୁଜର୍ ମିଲ୍‌ଲେ ସେ ତମରଟାନେ ଆଇସି ଆକା ।

ସାରାସାରିର କାତା

୧୩ ତମେ ଜାଗରଡ୍ ରଇକରି ବିସ୍ୱାସେ ଡାଁଟ୍ ରୁଆ । ବପୁ ଅଇକରି ସାଆସେ ରୁଆ । ୧୪ ତମେ କରବା ସବୁ କାମ୍ ଆଲାଦେ ସାରାଇବାରୁ ଆଚେ ।

\* ୧୭:୧ ୧୭:୧ ରମିୟ ୧୫:୨୫,୨୬ \* ୧୭:୫ ୧୭:୫ ପେରିଡ୍ ୧୯:୨୧ \* ୧୭:୮ ୧୭:୮ ପେରିଡ୍ ୧୯:୮-୧୦

\* ୧୭:୧୦ ୧୭:୧୦ ୧ମ କରନ୍ତଃ ୪:୧୭

୧୫ \*ଏ ବାଈମନ୍, ତମେ ତିପାନ୍ ଆରି ତାର୍ କୁଟୁମ୍ ବିସଇ ଜାନାସ୍ । ସେମନ୍ ଆକାୟାର୍ ପରତୁମ୍ ବିସ୍‌ବାସିମନ୍ ଆରି ପର୍ମେସରର୍ ଲକ୍ମନର୍ ସେବାଇ ନିଜେ ସର୍ପି ଅଇଲାଇ ଆଚଡ୍ । ଏ ବାଈବଇନିମନ୍ ମୁଇ ତମ୍‌କେ ବାବୁଜିଆ କଲିନି, ୧୬ ଏନ୍ତାରି ଦାଇଡ୍ ନେବା ଲକ୍ମନର୍ ତଲିଆ ରୁଆ । ଆରି ସେମନର୍ ସଙ୍ଗ୍ ସେବା କରବା ଲକ୍ମନର୍ ତଲିଆ ଉଆ ।

୧୭ ତିପାନା, ପରତୁନାଡ୍ ଆରି ଆକାଇ ଇତି ଆଇଲାକେ ମୁଇ ବେସି ସାର୍‌ଦା ଅଇଲିନି । କାଇକେବଇଲେ ତମେ ନ ରଇଲେ ମିସା ସେମନ୍ ତମର୍ ଜାଗାଇ ରଇଲା ପାରା । ୧୮ ତମ୍‌କେ ଜେନ୍ତି ସାର୍‌ଦା କରାଇଲାଇ, ମକେ ମିସା ସେନ୍ତି ସାର୍‌ଦା କରାଇଲାଇ । ଏନ୍ତାରି ଲକ୍ମନ୍‌କେ ନାମ୍‌ବାର୍ ଆଚେ ।

୧୯ \*ଆସିଆ ଦେସର୍ ମଣ୍ଡଲିମନ୍ ତମ୍‌କେ ଜୁଆର୍ ଜାନାଇଲାଇନି । ଆକିଲା, ପିରିସ୍‌କିଲା ଆରି ସେମନର୍ ଗରେ ଉପାସନା କର୍ତ୍ତେରଇବା ମଣ୍ଡଲି ମାପୁରୁର୍ ନାଉଁ ଦାରି ତମ୍‌କେ ତାକର୍ ମନ୍ ବିଡ୍‌ରେ ଅନି ଜୁଆର୍ ଜାନାଇଲାଇନି ।

୨୦ ଇତିର୍ ବାଈବଇନିମନ୍ ସବୁ ତମ୍‌କେ ଜୁଆର୍ ଜାନାଇଲାଇନି । ତମର୍ ତମର୍ ବିଡ୍‌ରେ ଆତେ ଦାରାଦାରି ଅଇ କିରିସ୍‌ଟର୍ ଆଲାଦେ ସାଲାମ୍ କରି ଜୁଆର୍‌ବେଟ୍ ଉଆ ।

୨୧ ମୁଇ ପାଉଲ୍, ଏଡ୍‌କିସେ ଲେକି ଜୁଆର୍ ଜାନାଇଲିନି ।

୨୨ ଜଦି କେ ମାପୁରୁକେ ଲାଡ୍ ନ କରେ, ସେ ଅବିସାପ୍ ପାଅ । ମାରାନାତା, ଆମର୍ ମାପୁରୁ ଆସ ।

୨୩ ମାପୁରୁ ଜିସୁର୍ ଜିବନ୍ ଦୁକାନି ତମର୍‌ଟାନେ ରଅ ।

୨୪ କିରିସ୍‌ଟ ଜିସୁକିରିସ୍‌ଟର୍ ସଙ୍ଗ୍ ମିସିରଇବା ସବୁକେ ମର୍ ଆଲାଦ୍ ରଅ ।

# କରକ୍ରିୟା ମଣ୍ଡଳୀର ବିଶ୍ୱାସୀମାନଙ୍କୁ ପାଠକଙ୍କ ଦ୍ୱିତୀୟ ପତ୍ର

## କରକ୍ରିୟା ମଣ୍ଡଳୀର ଲକ୍ଷ୍ୟମାନଙ୍କୁ ଗଠନେ ପାଠକ ଦୁଇପାଲି ଚିଠି ଲେଖିଲାଟା

### ଏ ବଇ ବିସଇନେଇକରି ଜାନ୍‌ବାଟା

୨ ଯ କରକ୍ରିୟା ଜିସୁ କ୍ରିଷ୍ଟ ଜନମୂଳର ଲଗାଲଗି ୫୫-୫୬ ପରେ ପେରିଡ଼ ପାଠକ ଲେଖିରଇଲା । ୧:୧ ଆମରୁଟାଣେ ରଇଲା କରକ୍ରିୟା ମଣ୍ଡଳୀକେ ଲେଖାଅଇରଇବା ଚିଠି ବିତ୍‌ରେଅନି ଏଟା ଅଇଲାନି ପାଠକର ଦୁଇ ଲମ୍ଫ ଚିଠି । ଆର୍ ଆଗତୁ ପାଠକ କରକ୍ରିୟା ମଣ୍ଡଳୀକେ ରିସାଅଇ ଲାଗିକରି ଚିଠି ଲେଖିରଇଲା ବଲିକରି ପଣ୍ଡିତମନ୍ ବିସ୍‌ବାସ କରୁବାଇ । ୨:୩-୪ପଦେ ଏଟା ଜାନାଇଲାନି । ସେ ସମାନ୍ ଚିଠି କାଇଟାମିସା ଆମରୁଟାଣେ ନାଇ ।

ପାଠକ ମାକିଦନିଆଇ ରଇଲା ବେଲେସେ ୨ ଯ କରକ୍ରିୟା ଲେଖିରଇଲା ୨:୧୩ ୨ ଯ କରକ୍ରିୟା ପାରା ଚିଠି ଆରି ନାଇ । ସେଟା ନିଜର୍ ପାଇସେ ଆରି ସାରଦାର୍ ପାଇସେ ଆଟେ । ତିତସର୍ ଟାଣେଅନି କରକ୍ରିୟା ମଣ୍ଡଳୀର୍ ସବୁ ନିକ ବିସଇ ସୁନି କରି ପାଠକ ସାରଦା ଜାନାଇଲାନି । ଏ ଚିଠିଟାଣେ ନୁଆ ନିୟମର୍ ଦାନ୍ ଦେବା ବିସଇ ସିକିଆ ପାଇବାର୍ ଅଇସି । ଏ ପାକୁଡାଇ ପାଠକ ଜିରୁସାଲମର୍ ବିସ୍‌ବାସିମନ୍‌କେ ସାଇଜର୍ ପାଇ ବଲି ତାରୁ ଉଟାଇବାକେ ଆଦେସ୍ ଦେଲାନି ୮:୯ । ଆରି ମିସା ଏଟା ଜାନାଇଲାନିଜେ, ମଣ୍ଡଳୀ ବାଇରେ ରଇକରି କେତେଟା ମିରୁଆ ପେରିଡ଼ମନ୍ ସେମନ୍ ନିଜେ ଉପରେ ଉଟ୍‌ରୁ ବଲି ପାଠକର୍ ବିରୁଦେ ଉଟ୍‌ଲାଇନି । ସେମନ୍ କେତେଟା ମଣ୍ଡଳୀର୍ ନିକ ନିକ ଲକ୍ଷ୍ୟମନ୍‌କେ ତାକର୍ ତାକର୍ ବିତ୍‌ରେ ଜୁଜାଇଲାଇନି । ସେମନ୍ ପାଠକର୍ ଅଦିକାରକେ ସତ୍ କି ମିର୍ ବଲି ବାବ୍‌ତେରଇଲାଇ । ଜନ୍‌ଟାର୍ ପାଇ କି ୨ ଯ କରକ୍ରିୟା ସାରାସାରିବାଟେ ମୁଇ ନିଜେ ଗଟେକ୍ ଜିସୁକ୍ରିଷ୍ଟର୍ ଅଦିକାରକ ପେରିଡ଼ ଅଇଆତି ବଲି ତାର୍ ସଙ୍ଗ୍ ଦେକାଇଲା ।

#### ଇତି ରଇବାଟା

- ୧. ପାଠକ ଚିଠି ଲେଖିବାକେ ଆରାମ୍ କରୁବା ଆଗତୁ ଜୁଆର୍ ଜାନାଇଲାନି । ୧:୧-୭
- ୨. ପାଠକ୍ ସେ ଜିବାକେ ତିଆର୍‌ଅଇଲାଟା ବାଦ୍‌ଲାଇଲା ଆରି ସେମନ୍‌ର୍ ସୁନିରଇବା କାତା ବିସଇ ସେମନ୍‌କେ ଜବାବ୍ ଦେବାଟା ୧:୮-୭:୧୭
- ୩. ପାଠକ୍ ଜିରୁସାଲମେ ରଇବା ବିସ୍‌ବାସିମନ୍‌ର୍ ପାଇ ଦାନ୍ ଉଟାଇବାକେ ଆଦେସ୍ ଦେବାଟା । ୧:୮-୯:୧୫
- ୫. ସାରାସାରିବେଲେ ପାଠକ୍ ପେରିଡ଼ ପଦକେ ରକିଆ କରୁବାଟା ଆରି ଆରିତରେକ୍ ଜିବାକେ ଜାଗ୍‌ରଡ଼ ଅଇବାଟା । ୧୦:୧-୧୩:୧୦

୧ \*ମୁଇ ପାଠକ୍, ପର୍‌ମେସରର୍ ମନ୍ କଲା ଇସାବେ କ୍ରିଷ୍ଟ ଜିସୁର୍ ଗଟେକ୍ ପେରିଡ଼ ସିସ୍ ବାଗାଇଅଇଲିଆତି ।

ମୁଇ ଆରି ଆମର୍ ବାଇ ତିମତି ଆରି କରକ୍ରିୟାଟାଣେ ରଇବା ପର୍‌ମେସରର୍ ଗୁଲାଇ ମଣ୍ଡଳୀମନ୍‌କେ ଆରି ଆକାଇଆଟାଣେ ରଇବା ସବୁ ପର୍‌ମେସରର୍ ଲକ୍ଷ୍ୟମନ୍‌କେ, ଏ ଚିଠି ଲେଖିଲୁନି । ୨ ଆମର୍ ବାବା ପର୍‌ମେସର୍ ଆରି ମାପୁରୁ ଜିସୁର୍ ଟାଣେଅନି ଜିବନ୍ ଦୁକାଇଲାଟା ଆରି ସାନ୍ତି ତମ୍‌କେ ଅ ।

\* ୧:୧ ୧:୧ ପେରିଡ଼ ୧୮:୧



ପରମେସରକେ ପାଉଲର ଦନିଅବାଦ

୩ ଆମର ମାପୁରୁ ଜିସୁ କିରିସ୍ଟର ବାବା ପରମେସରକେ ଦନିଅବାଦ ଦେଉଁ । ସେ ଆମର ଦୟାକାରିଆ ବାବା ଆରି ଜାର ଟାନେଅନି କି ଆମକେ ସବୁ ବିସଇରୁ ସାଇଜ ଆଇସି । ୪ ସେ ଆମକେ ସବୁ ଦୁକ୍ କସ୍ଟ ଆଇଲେ ସାଇଜ କରସି । ସେନ୍ତାରିସେ ବିନ୍ ବିନ୍ ରକାମର କସ୍ଟ ପାଇଡେରଇବା ଲକ୍ମନକେ ଆମେ ଜେନ୍ତି ଦୁକ୍ ସାରାଇବୁ । ପରମେସର ଟାନେଅନି ଜନ୍ ସାଇଜ ଆମେ ପାଇଲୁଆରୁ, ସେ ସାଇଜର ଲାଗି, ଆମେ ମିସା ବିନ୍ ଲକ୍ମକେ ସାଇଜ କରୁ । ୫ କାଇକେବଇଲେ ଜେନ୍ତିକି କିରିସ୍ଟରଡେଇ ମିସଲାରପାଇ ଆମର ଦୁକ୍, କସ୍ଟ ଅଦିକ୍ ଅଦିକ୍ ଅଇଆଚେ, ସେନ୍ତାରିସେ କିରିସ୍ଟର ଲାଗି ଆମର ଦୁକ୍ ସାରାଇବାଟା ମିସା ଅଦିକ୍ ଅଦିକ୍ ଅଇଲାନି । ୬ ମାତର ଆମକେ ଦୁକ୍ କସ୍ଟ ଅଇଲେ, ସେଟା ତମର ଦୁକ୍ ସାରାଇବାକେ ଆରି ନ ସାରବା ଜିବନ୍ ପାଇବାକେ । ସେନ୍ତାରିସେ ଜେଡେବେଲେ ଆମେ ପରମେସରର ଟାନେଅନି ସାଇଜ ମିଲାଇବୁ, ସେଟା ତମରପାଇ ମିସା ସାଇଜ ମିଲିଲା ପାରା । ଏନ୍ତାରି ସେ ତମର ବିସ୍ବାସ କରବାଟା ଡାଟ୍ କରାଇସି, ଜେନ୍ତିକି ଆମେ ଦୁକ୍ କସ୍ଟ ଆଇଲେ ମିସା ମୁରତି କରି ଆରୁ, ସେନ୍ତାରି ଦୁକ୍ କସ୍ଟ ଆଇଲେ ତମେ ମିସା ମୁରତି କରି ରଇପାରାସ୍ । ୭ ଏଟାରଲାଗି ତମରଟାନେ ଆସା କରବାଟା ଡାଟ୍ ଅଇଲାଆଚେ । କାଇକେବଇଲେ, ଆମେ ଜାନିଆରୁ, ଆମକେ ଦୁକ୍ କସ୍ଟ ଆଇଲେ ମିସା ମୁରତିକରି ଆରୁ, ତମେ ମିସା ସେନ୍ତାରି ମୁରତିକରି ଆଟାସ୍ । ଜେନ୍ତାରି କି ପରମେସର ଟାନେଅନି ଆମେ ସାଇଜ ମିଲାଇଆରୁ । ସେନ୍ତାରିସେ ତମେ ମିସା ସାଇଜ ମିଲାଇଆଟାସ୍ ।

୮ \*କାଇକେ ବଇଲେ, ଏ ବାଇବଇନିମନ୍, ଆସିଆ ରାଇଜେ ଆମକେ ଅଇରଇବା ବଡ଼ ଦୁକ୍ କସ୍ଟ ବିସଇ ତମେ ଜାନିରୁଆ ବଲି ଆମେ ମନ୍ କଲୁନି । ମୁରତି ନାପାରଲା ବଡ଼ ପରିକା ଆଇଲା । ଏନ୍ତାରି କି ଆମେ ଆରି ନ ରଇକରି ମରିଜିବାର୍ ଅଇସିବେ ବଲି ବାବଡେରଇଲୁ । ୯ ଉଁ, ଆମକେ ମରନ୍ ଆସି ଡାବିଅଇରଇଲା । ମାତର ନିଜର୍ ନିଜର୍ ଉପରେ ଆସା ନ କରି, ଜନ୍ ପରମେସର ମଲା ଲକ୍ମନକେ ଉଟାଇସି, ତାର ଉପରେ ଆସା କରବାକେ ଏ ସବୁ ଅଇଲା । ୧୦ ସେ ଆମକେ ମରନ୍ଟାନେ ଅନି ବଂଚାଇଲା । ସେଟାରପାଇ ଆମେ ରକିଆ ପାଇଲୁ । ମରନ୍ ରଇଲା ଆକା, ମାତର ମରୁନାଇ । ଆରି ସେ ଆମକେ ସାଇଜ କରଡେରଇସି ଆକା ବଲି ଜାନିଆରୁ । ଆମକେ ବଡ଼ ଆସା ଆଚେ ଜେ, ସେ ଆମକେ ସାଇଜ କରବାଟା କେବେ ନ ଡେବାଏ । ୧୧ ତମେ ଆମର ପାଇ ପାରତନା କରି ଆମକେ ସାଇଜ କରବାର୍ ଆଚେ । ସେନ୍ତାର୍ କଲେ ପରମେସର ସବୁ ପାରତନାଇ ମାଙ୍ଗଲାଟା ପାଟାଇସି । ଆରି ବେସି ଲକ୍ ପରମେସରକେ ଦନିଅବାଦ ଦେବାଇ । କାଇକେବଇଲେ ସେ ଆମକେ ଆସିରବାଦ କଲାଆଚେ ।

ପାଉଲ୍ ଜଜ୍ନା କଲାଟା ବାଦଲାଇଲା

୧୨ ବାଇମନ୍ ଆମେ ବଡ଼ପନ୍ ଅଇକରି କଇବା ଗଟେକ୍ କାତା ଆଚେ । ସେଟା ଆମେ ସଡ଼ ବଲି ଜାନ୍ଲୁନି ଆରି ସେଟା ଅଇଲାନି, । ସବୁଲକରଟାନେ ଆରି, ତମରଟାନେ ମିସା ଆମର ଚଲାଟଲୁଡି ସୁକଲ୍ ଆରି ଦରମ୍ ଆଚେ । ଏଟା ଆମର ବିବେକ୍ ସାକି ଦେଲାନି । ଲକ୍ମନର ଗିଆନ୍ ଇସାବେ ଆମେ କରୁନାଇ, ମାତର ପରମେସରର ଜିବନ୍ ଦୁକାଇଲା ବପୁର ସଙ୍ ଏ ସବୁଜାକ କଲୁନି । ୧୩ କାଇକେ ବଇଲେ, ଆମେ ଚିଟି ପାଟାଇଲା ବେଲେ ତମେ ଜାଇଜାଇଟା ପଡିକରି ବୁଜିପାରାସ୍, ସେଟାସେ ଲେକି ପାଟାଇଲୁନି । ୧୪ ଏବେ ଆମେ ଜାଇଟା କଲୁନି, ସେ ବିସଇ ତମେ ଅଲପ୍ ଅଲପ୍ ବୁଜିଲାସିନି । ମାତର ମୁଇ ଆସା କଲିନି, ସେଟା ତମେ ପୁରାପୁରୁନ୍

\* e:୮ ୧:୮ ୧ମ କରକ୍ରିୟା ୧୫:୩୨

ବୁଢ଼ି ପାର୍ଯ୍ୟା । ଜେନ୍ତାରି କି, ଆମର ମାପରୁ ଜିସୁ ବାଉଡ଼ଲା ଦିନେ, ତମେ ଆମର ଲାଗି ସାର୍ଦ୍ଦା କରସା, ସେନ୍ତାରିସେ ଆମେ ମିସା ତମରଲାଗି ସାର୍ଦ୍ଦା କରବୁ ।

୧୫ ଏଟା ସବୁ ତମେ ବୁଢ଼ି ପାରସା, ସେଟା ଜାନକରି ମୁଝ ତମରଟାମେ ବୁଲିଆଇବି ବଲି ମନ୍‌କଲି । ଜେନ୍ତାରି କି ମୁଝ ତମକେ ଦୁଇତର ସାଇଜ କରିପାରବି । ୧୬ \*କାଇକେବଇଲେ ମୁଝ ମାକିଦନିଆଇ ଜିବାବାଟେ ତମରଟାମେ ଆସି ରଇବି ବଲି ମନ୍‌କଲି । ଆରି ମୁଝ ଗରେ ବାଅଡ଼ବାବେଲେ ଆରିତରେକ୍ ତମରଟାମେ ତେବି ବଲି ମନ୍‌କଲି । କାଇକେବଇଲେ ମୁଝ ଜେବେ ଜିଉଦା ଦେସେ ଜିବାକେ ବାରଇବି, ସେ ବେଲେ ତମେ ମକେ ସାଇଜ କରି ପାରାସ । ୧୭ ତେବେ ମୁଝ ଏନ୍ତାରି ମନ୍‌କଲାକେ ମକେ ତମେ ଦୁଇ ମନିଆ ଲକ୍‌ବଲି ବାବଲାସନି କାଇକି । ନିଜର୍ ମନ୍‌କଲା ଇସାବେ ଚିନ୍ତା କରବା ଗଟେକ୍ ଲକ୍‌କରପାରା ତମେ ମକେ ବାବଲାସ୍ କାଇକି । ମୁଝ ଆଇବି ବଲି କଇଲେ ମିସା ତମର୍ ମନେ ସେ ନ ଆସେ, ବଲି ବାବଲାସ୍ କାଇକି । ୧୮ ଜଦି ପର୍ମେସର୍ କଇବାଟା ସଡ଼, ସେନ୍ତାରି ଆଲେ ମୁଝ କଇବାଟା ମିସା ସଡ଼ ସେ । ଏକାବେଲେ ଉଁ ଆରି ନାଇ ବଲି, ନ କଇ । ୧୯ \*ମୁଝ, ସିଲାନ ଆରି ତିମତି, ପର୍ମେସରର୍ ପଅ ଜେ କି କିରିସ୍‌ଟ ଜିସୁ, ତାର ବିସଇନେଇ ତମକେ ଜାନାଇରଇଲୁ । ସେ ଉଁ ଆରି ନାଇ, ବଲି କଇବା ଦୁଇ ମନିଆ ଲକ୍‌ନର୍ । ୨୦ ତାରଲାଗି ପର୍ମେସର୍ ଉଁ ବଲି, କଇରଇବାଟା, ସବୁଜାକ ପୁରାପୁରୁନ୍ କରସି । ସେଟାପାଇ ଜିସୁକିରିସ୍‌ଟକେ ଆମେ ଆମେନ୍ ବଲି, କଇବାଟା ପର୍ମେସରର୍ ମଇମା ପାଇ ଅଇସି । ୨୧ ତମକେ ଆରି ଆମକେ ଜିସୁକିରିସ୍‌ଟତେଇ ମିସିରଇବାକେ ଆଇବା ତାଟ୍ ବିସ୍‌ବାସ୍ ଆନବାଟା, ପର୍ମେସର୍ ସେ । ଆରି ସେ ଆମକେ ବାଡ଼ଲା ଆଟେ । ୨୨ ଆମେ ତାରଟା ବଲି ଜାନବାକେ ସେ ଆମକେ ତାର ଚିନ୍ ମାରଲା ଆଟେ ଆରି ସୁକଲଆଡ଼ମା ଆମର୍ ବିଡ଼ରେ ଦାନ୍ କଲା ଆଟେ । ପର୍ମେସର୍ ଆମର୍ପାଇ ଜେଡ଼କି ବିସଇ ସଙ୍ଗଇଆଟେ, ସେ ଆଡ଼ମାର ଲାଗି ଆମେ ସେଟା ସବୁ ପାଇବୁ ବଲି ଜାନଲୁନି ।

୨୩ ଜଦି ମୁଝ କଇବାଟା ସଡ଼ ନାଇ, ସେନ୍ତାରିଆଲେ ପର୍ମେସର୍ ମକେ ତଣ୍ଡ ଦେଅ । ମୁଝ କରକ୍ତିଅତେଇ ବୁଲି ଆଇବାକେ କାଇକେ ଅଏ ନାଇ ବଲି ସେ ଜାନେ । ମୁଝ ତେଇ ଆଇଲେ, ତମର୍ ଚଲାଚଲ୍‌ତିର୍ ବୁଲ୍‌ଟିକ୍ ଦେକଲେ, ତମେ ଦୁକ୍ କରତାସ୍ । ୨୪ ତମେ କନ୍‌ଟା ମାନ୍‌ବାର୍ ଆଟେ, କନ୍‌ଟା ନାଇ, ସେଟା ଆଦେସ୍ ଦେବାକେ ଆମେ ମନ୍‌କରୁନାଇ । କାଇକେବଇଲେ, ତମର୍ ବିସ୍‌ବାସ୍ ତାଟ୍ ଅଇଗାଲା ଆଟେ । ତମର୍ ସଙ୍ଗ୍ ମିସିକରି କାମ୍ କରବାକେ ଆମେ ମନ୍‌କଲୁନି । ଜେନ୍ତାରିକି ତମେ ସାର୍ଦ୍ଦା ଅଇସା ।

## ୨

୧ ମାତର୍ ମୁଝ ଆଗଟୁ ଆଇଲା ବେଲେ ଜେକ୍ତିକି ତମକେ ଦୁକ୍ ଦେଲି, ସେକ୍ତି ଆରିତରେକ୍ ଦୁକ୍ ଦେବାର୍ ଆଲେ ନ ଆସି ବଲି ବାବତେ ରଇଲି । ୨ ଜଦି ମୁଝ ତମକେ ଦୁକ୍‌ଦେବି, ତେବେ କେ ମକେ ସାର୍ଦ୍ଦା କରାଇବାଇ ? ଜନ୍‌ଲକ୍‌କେ ମୁଝ ଦୁକ୍ ଦେଇରଇଲି, ସେ ସମାନ୍ ଲକ୍‌ତମେ ଆକା । ୩ ସେଟାପାଇ ମୁଝ ତମକେ ଚିଟି ଲେକିରଇଲି । ଜନ୍‌ଲକ୍‌ମନ୍ ମକେ ସାର୍ଦ୍ଦା କରାଇବାର୍ ଆଟେ, ମୁଝ ଆଇଲେ ସେମନ୍‌ସେ ମକେ ଦୁକ୍ ଦେଅଡ଼ ବଲି ମନ୍‌କରିନାଇ । ମୁଝ ଜାନି, ମୁଝ ସାର୍ଦ୍ଦା ଅଇକରି ରଇଲେ, ତମେ ମିସା ସବୁଲକ୍ ସାର୍ଦ୍ଦା ଅଇରଇସା । ୪ ମୁଝ ମନେ ମନେ ବେସି ଦୁକ୍ କସ୍‌ଟ ଅଇକରି ଆରି ମନେ ମନେ କାନ୍ଦି ଆସୁଜରାଇ କରି ଲେକି ରଇଲି,

ଜେନ୍ତୁକି ତମେ ଦୁକ୍ ଅଇରୁଆ ବଲିକରି ମୁଇ ବାବିନାଇ । କାଇକେବଇଲେ ମୁଇ ତମ୍‌କେ ବେସି ଆଲାଦ୍ କଲିନି । ଏଟା ଜେନ୍ତୁକି ତମେ ଜାନିରୁଆ ।

ଦସିକେ କେମା ଦେବାଟା

୫ ଏବେ ତମ୍‌ର ବିତ୍‌ରେ ଜେ ପାପ୍ କରି ତମ୍‌କେ ଦୁକ୍ ଦେଲା ଆତେ, ସେ ଅବକା ମକେ ଦୁକ୍ ଦେଏନାଇ, ମାତର୍ ତମ୍‌କେ ସବୁକେ ଦୁକ୍ ଦେଲାଆତେ । ସବୁକେ ନଇଲେ ମିସା, କେତେଲକ୍‌କେ ଦେଇଆତେ । ତାର୍ ପାପ୍ କଲାଟା ଅଦିକ୍ ବଡ଼ ଅଇକରି ତିସ ବଲି ମୁଇ ମନ୍ କରିନାଇ । ୬ ତମ୍‌ର ବିତ୍‌ରେ ଜବର୍ ଲକ୍ ତାକେ ତଣ୍ଟ ଦେଲାଇ ଆତଡ଼ । ଆରି ସେମନ୍ ତାକେ ଦେଇରଇବା ତଣ୍ଟ ତାର୍‌ପାଇ ଅଇଜାଇସି । ୭ ଏବେ ତମେ ତାକେ କେମା ଦେଇକରି ସାଆସ୍ ଦେବାର୍ ଆତେ । ସେନ୍ତାରି ନ କଲେ, ସେ ବେସି ଦୁକ୍ ଅଇକରି ତାର୍ ମନ୍ ବାଙ୍ଗିଜାଇସି । ୮ ସେଟାର୍‌ପାଇ ତାକେ ଆରିତରେକ୍ ଆଲାଦ୍ କରା ବଲି ମୁଇ ତମ୍‌କେ ବାବୁଜିଆ କଲିନି । ୯ କାଇକେବଇଲେ ତମେ ବିସ୍‌ବାସର୍ ପରିକାତେଇ ତାଟ୍‌ଅଇ ରଇଲାସ୍ କି ନାଇ, ଆରି ତମେ ମର୍ ଆଦେସ୍ ମାନ୍‌ଲାସ୍‌ନି କି ନାଇ ବଲି ଜାନ୍‌ବାକେ ମୁଇ ତମ୍‌କେ ଆଗ୍‌ତୁର୍ ସେ ଚିଟି ଲେକିରଇଲି ।

୧୦ ଜେଡେବେଲେ ମିସା ତମେ ସେ କରିରଇବା କାମର୍ ପାଇ ତାକେ କେମା କରସା, ତେବେ ମୁଇମିସା ତାକେ କେମା କରବି, ଜଦି କାଇଟା ମିସା ମୁଇ କରବାର୍ ରଇଲା, ତମ୍‌ରପାଇ ମୁଇ କିରିସ୍‌ଟର୍ ମୁଆଟେ ସେମନ୍‌କେ କେମା ଦେଇସାରାଇ ଆଟି । ୧୧ ଜେନ୍ତୁକି ସଇତାନ୍, ଆମର୍ ଉପରେ ଜିତି ନାପାରେ, କାଇକେବଇଲେ, ସେ କରିରଇବା ସବୁ ଜଜ୍‌ନା ଆମେ ଜାନ୍‌ଲୁନି ।

୧୨ \*କିସ୍‌ଟର୍ ସୁବକବର୍ ଜାନାଇବାକେ ମୁଇ ଜେଡେବେଲେ ଆଇଲି, ତର୍‌ଆୟାଇ ସେବା କାମର୍‌ପାଇ ମାପୁରୁର୍ ବାଟ୍ ମେଲାଅଇଆତେ ବଲି ମୁ ଜାନି ପାରୁଲି । ୧୩ ମାତର୍ ଆମର୍ ବାଇ ତିତସ୍‌କେ ବେଟ୍ ନ ଅଇଲି ଜେ ମର୍ ମନେ ମନେ ବେସି ଚିନ୍ତା ରଇଗାଲା । ତେବର୍ ପାଇ ମୁଇ ତେଇର୍ ଲକ୍‌ମନ୍‌କେ ଗାଲିନିବେ ବଲି ତେଇଅନି ମାକିଦନିଆଇ ଉଟିଗାଲି ।

ଜିସୁର୍ ଲାଗି ଜିଡ଼ବାଟା

୧୪ ମାତର୍ ପର୍‌ମେସର୍ ଦନିଅବାଦ୍ ପାଅ । କିରିସ୍‌ଟେଇ ମିସିରଇଲାଟ୍‌ପାଇ ତାର୍ ଜିଡ଼ଲା ଦଲର୍ ଦାଡିତେଇ ବଦି ଲକ୍‌ର ଇସାବେ ପର୍‌ମେସର୍ ଆମ୍‌କେ ସବୁବେଲେ ଡାକିନେଲାନି । ସବୁଲକ୍‌କେ କିରିସ୍‌ଟର୍ ବିସଇ ଜାନାଇବାକେ ସେ ଆମର୍ ଦେଇକରି କାମ୍ କଲାନି । ଜନ୍‌ଟା କି ଦୁପ୍ ପାରା ସବୁ ଜାଗାଇ ବାସ୍‌ନା ମାର୍‌ସି । ୧୫ କାଇକେବଇଲେ ଆମେ କିରିସ୍‌ଟ ପର୍‌ମେସର୍‌କେ ପଡ଼ାଇ ଦେଇତେରଇବା ଦୁପ୍ ପାରା ଆତୁ । ଆମେ ଜାନାଇତେରଇବା ସୁବକବର୍ ଗଟେକ୍ ସୁନ୍‌ର୍ ବାସ୍‌ନା ପାରା ସବୁଲକ୍‌କେ ଗାଲାନି । ଗଟେକ୍ ବାଟର୍ ଲକ୍‌ମନ୍ ଆଜିଗାଲାଇନି, ଆରି ଗଟେକ୍ ବାଟର୍ ଲକ୍‌ମନ୍ ରକିଆ ପାଇଲାଇନି । ୧୬ ଜନ୍ ବାଟର୍ ଲକ୍‌ମନ୍ ଆଜିଗାଲାଇନି, ସେମନ୍‌ରପାଇ ସେଟା ଗନ୍ । ଆରି ସେଟା ମର୍‌ବା ବାଟେ ଡାକିନେଇସି । ମାତର୍ ଜନ୍ ବାଟର୍ ଲକ୍ ରକିଆ ପାଇଲାଇନି, ସେଟା ସେମନ୍‌କେ ସୁନ୍‌ର୍ ବାସ୍‌ନା । ଆରି ସେଟା ନ ସାର୍‌ବା ଜିବନ୍‌ତେଇ ଡାକିନେଇସି । ଏ ଆବଡ଼ କାମ୍ କେ ମିସା କରି ନାପାରଡ଼ । ୧୭ କେତେକ୍ ଲକ୍‌ମନ୍ ପର୍‌ମେସର୍‌ର ବାକିଅ ବେବାର୍ କର୍‌ତେରଇବା ଜିନିସ୍ ପାରା ବାଇବାଇ, ମାତର୍ ଆମେ ସେନ୍ତାର୍ ନାଇ । କାଇକେବଇଲେ ପର୍‌ମେସର୍ ଆମ୍‌କେ ପାଟାଇଆତେ । କିରିସ୍‌ଟର୍ ଗତିଦାଙ୍ଗ୍‌ଡା ଇସାବେ, ଆମେ ତାର୍ ମୁଆଟେ ସଡ଼ ବାକିଅ ଜାନାଇବୁ ।

# ୩

## ନୁଆ ନିୟମର ଗତି

୧ ଆମେ ଆରିତରେକ୍ ନିଜକେ ଉପରକେ ଉଠାଇବା କାତା କଇଲୁନି ବଲି ତମେ କୁଆ ନାଇ । ଆମେ ତେଇ ରଇବା କେତେଟା ଦରମ୍ ଗୁରୁମନର୍ ପାରା ନାଇ । ବିନ୍ ଲକର୍ ତେଇଅନି ଏ ଲକ୍ ନିକଟା ବଲି ଚିଟି ଆନଲେ, ତମେ ସେମନ୍କେ ଡାକି ନେଇସା, ଆରି ତମର୍ ଜାଗା ଚାଡ଼ିକରି ଗାଲେ, ଏ ଲକ୍ ନିକଟା ବଲିକରି ତମର୍ଗାନେଅନି ଏମନ୍ ଚିଟି ମାଙ୍ଗବାଇ । ଆମ୍କେ ସେନ୍ତାରି ଚିଟି ଦରକାର ନାଇ । ୨ ତମେସେ ଆମର୍ ମନ୍ ବିଡ଼ରେ ଲେକିଅଇ ରଇବା ଚିଟି । ସବୁ ଲକ୍ ତମ୍କେ ଦେକବାଇ ଆରି ତମର୍ ଚଲାଚଲୁଡ଼ି ଜାନବାଇ । ୩ କିରିସ୍ତ ଆମ୍କେ ଏ ଚିଟି ଲେକଲା ଆଚେ । ଏଟା ସିରା ସଙ୍ଗ୍ ଲେକା ଅଏନାଇ, ମାତର୍ ଜିବନ୍ ରଇବା ପର୍ମେସରର୍ ଆଡ଼ମା ସଙ୍ଗ୍ ଲେକାଅଇଆଚେ । ଏଟା ପାକ୍ନାଇ ଲେକା ନ ଅଇକରି ଲକ୍ମନର୍ ମନ୍ବିଡ଼ରେ ଲେକାଅଇଆଚେ ।

୪ ଆରି କିସ୍ତର୍ ଲାଗି ପର୍ମେସର୍କେ ଆସା କରି ଆମେ ସାଆସ୍ ସଙ୍ଗ୍ କଇପାରୁଲୁନି । ୫ ଏ କାମ୍ ଆମେ ନିଜର୍ ବପୁ ସଙ୍ଗ୍ କରି ପାରୁବୁ ବଲି କଉନାଇ । ପର୍ମେସର୍ ଆକା ଆମ୍କେ ବପୁ ଦେଇସି । ୬ ସେ ତା ଆମ୍କେ ବପୁ ଦେଲାଆଚେ, ଜେନ୍ତିକି ଆମେ ତାର୍ ନୁଆ ରାଜିନାମା କଲାଟା ସବୁକେ ଜାନାଇ ପାରୁବୁ । ସେଟା ଲେକଲା ନିୟମ୍ ନଏ, ମାତର୍ ତାର୍ ଆଡ଼ମାଇ ଅନି ଅଇଲାଟା । ଲେକଲା ନିୟମ୍ ମରନ୍ ଆନସି, ମାତର୍ ପର୍ମେସରର୍ ଆଡ଼ମା ନ ସାର୍ବା ଜିବନ୍ ଦେଇସି ।

୭ ମସାର୍ ନିୟମ୍ ପର୍ତମେ ଚେପ୍ଟା ପାକ୍ନାଇ ଲେକା ଅଇରଇଲା ଆରି ସେ ନିୟମ୍ ଦେଲାବେଲେ ପର୍ମେସରର୍ ମଇମା ଡିସ୍ତେରଇଲା । ମସାର୍ ମୁଏ ରଇଲା ସେ ମଇମା ଉନା ଉନା ଅଇଜାଇତେରଇଲା । ଅଇଲେ ମିସା ତାର୍ ଉଜଲର୍ପାଇ ଇସରାଏଲର୍ ଲକ୍ମନ୍ ତାର୍ ମୁଏ ଆଁକି ସଙ୍ଗ୍ ନାପାର୍ତେରଇଲାଇ । ଜଦି ପର୍ମେସର୍ ମରନ୍ ଆନବା ସେ ନିୟମ୍ ମଇମା ସଙ୍ଗ୍ ପାଟାଇରଇଲା, « ତେବେ ପର୍ମେସରର୍ ଆଡ଼ମାଇ ଅନି ଆଇବା ନୁଆ ରାଜିନାମା ଆରି କେତେକ୍ ଅଦିକ୍ ମଇମାସଙ୍ଗ୍ ରଇସି । ୮ ଲକ୍ମନ୍ ଡଣ୍ଡ ପାଇବାଇ ବଲି ଜାନାଇ ଅଇବା କାମ୍, ଜଦି ମଇମା ସଙ୍ଗ୍ ଆଇଲା, ତେବେ ଆମର୍ ସବୁ ପାପ୍ କେମା ଅଇଲାଆଚେ ବଲି ଜାନାଇବା ବାକିଅ କେତେକ୍ ଅଦିକ୍ ମଇମା ଅଇରଇସି ? ୯ ପର୍ତୁମ୍ ନିୟମ୍ ମଇମା ବେସି ଉଜଲ୍ ରଇଲା, ମାତର୍ ଏବେ ନୁଆ ନିୟମ୍ ରାଜିନାମାର୍ ଲାଗି ପୁରନା ନିୟମ୍ ମଇମା ଉନାଅଇଗାଲା ଆଚେ । ୧୦ ଜଦି ଆଗର୍ ପର୍ମାନ୍ ନିୟମ୍ ପାକାଇ କାତା ଦେଇରଇବାଟା ଚନେକ୍ପାଇ ଅଇଲେ ମିସା ମଇମାସଙ୍ଗ୍ ରଇଲା, ତେବେ ନୁଆ ପର୍ମାନ୍ ନିୟମ୍ ପାକାଇ ଦେଇରଇବାଟା, ଜନ୍ଟା କି କେବେ ନ ସାରେ, ସେଟା କେତେକ୍ ଅଦିକ୍ ମଇମା ସଙ୍ଗ୍ ରଇସି !

୧୧ ଆମ୍କେ ଏ ଆସା ରଇଲାକେ, ଆମେ ବେସି ସାଆସ୍ ସଙ୍ଗ୍ ଆଚୁ । ୧୨ ଆମେ ମସାର୍ ପାରା ନାଇ, ସେ ମୁ ଡାବିଅଇ ରଇଲା । ଜେନ୍ତିକି, ଲିବି ଆଇତେରଇବା ଆରି ଇସରାଏଲର୍ ଲକ୍ମନ୍ ତେଇର୍ ମଇମା ଉନା ଅଇକରି ପୁରାପୁରୁନ୍ ଜିବାଟା ନ ଦେକଡ଼ । ୧୩ ସେବେଲେ ଇସରାଏଲର୍ ଲକ୍ମନ୍ ନ ବୁଜଡ଼େରଇଲାଇ, ତାକର୍ ମନ୍ ଡାବଲା ପାରା ଅଇରଇଲା । ଆରି ସେମନ୍ ପୁରନା ରାଜିନାମାର୍ ବଇମନ୍ ପଡ଼ଲାଇନି ଜେ ଏବ୍କେ ଜାକ ବୁଜଡ଼ ନାଇ । ଜେତେବେଲେ ଜାକ ସେମନ୍ କିରିସ୍ତର୍ତେଇ ନ ମିସି ରଅଡ଼, ସେ ବେଲା ଜାକ ତାକର୍ ମନର୍ ଡାବନା ନ ବେଟି ଅଏ । ୧୪ ଏବେ ଜାକ ମିସା ସେମନ୍ ମସାର୍ ନିୟମ୍ ପଡ଼ବାବେଲେ, ତାକର୍ ମନ୍ ସେନ୍ତି ଡାବିସେ ଅଇରଇସି । ୧୫ ମାତର୍ ସାସ୍ତର୍ କଇଲାନ୍, “ଜଦି ଜେ ମାପୁରୁର୍ ବାଟେ ମନ୍ ବାଉଡାଇଲେ, ତାର୍ ମନେ ଡାବିଅଇ ରଇବାଟା ଉଗାଡ଼ି ଅଇସି ।” ୧୬ ଏ

ଚିଚିତେଇ ମାପରୁ ବଳି କଇବାଟା ଅଇଲାନି ଆଡ଼ମା ଆରି ମାପରୁର୍ ଆଡ଼ମା ଜନ୍ତି ମିସା ରଇଲେ, ତେଇ ଆମେ ମୁକ୍ତି କରିଆରୁ ।<sup>୧୮</sup> ତେବେ ଆମେ ଜେଡ଼କି ଲକ୍ ସବୁ ମାପରୁକେ ବିସ୍ତବାସ୍ କରିଆରୁ, ଆମର୍ ମୁଁ ତାବି ଅଏନାଇ । ପର୍ମେସରର୍ ବପୁ ଆରି ମଇମା ଦେକାଇଅଇବା ଗଟେକ୍ ଦର୍ପନ୍ ପାରା ଆମେ ଆରୁ । ଆମେ ତାର୍ପାରା ଅଇବା ଜାକ ଦିରେ ଦିରେ ବାଦ୍‌ଲାଇ ଅଇ ଆଇଲୁନି । ପର୍ମେସରର୍ ଆଡ଼ମାସେ ଆମ୍‌କେ ବାଦ୍‌ଲାଇଲାନି ।

## ୪

ମାଟି ଆଣ୍ଡିତେଇ ସରଗର୍ ଦନ୍

<sup>୧</sup> ପର୍ମେସର୍ ତାର୍ ଜିବନ୍ ଦୁକାଇକରି ଆମ୍‌କେ ଏ ସେବାକାମ୍ ଦେଲାଆତେ । ସେଟାର୍‌ପାଇ, ଆମେ ବପୁ ନଇଲା ଲକର୍ ପାରା କାମ୍ କରୁନାଇ । <sup>୨</sup> ଆମେ ଲୁଚ୍‌ତେ ରଇବା କାମ୍ କି ଲାଜ୍ କରାଇବା କାମ୍ କରୁନାଇ । ଆମେ ଲକ୍‌ମନ୍‌କେ ନାତାଉ ନାଇ । ଆମେ ଜାନାଇତେରଇବା ମାପରୁର୍ ବାକିଅ ତେଇ ମିଚ୍ ସିକିଆ ମିସାଉ ନାଇ । ମାତର୍ ସବୁଲକ୍ ବୁଜ୍‌ଲାପାରା ସଡ଼ ସିକିଆ ଦେଲୁନି । ଜେନ୍ତାର୍ କି, ମୁଇ କଇଲା ବାକିଅ ଲକ୍‌ମନ୍ ତାକର୍ ବିବେକ୍‌ଟାନେ ସଡ଼ ବଲି ଜାନ୍‌ବାଇ । ଆମେ କର୍‌ବା ସବୁ କାମ୍ ପର୍ମେସରର୍ ମୁଆଟେ ଆତେ । <sup>୩</sup> ଜଦି ଆମେ ଜାନାଇବା ସୁବ୍‌କବର୍ ନ ବୁଜ୍‌ବା ଲକ୍ ଆତଡ଼, ସେନ୍ତାର୍ ଆଲେ ସେମନ୍‌ସେ ଆଜିଜାଇରଇବା ଲକ୍ । <sup>୪</sup> ଏ ଜଗତର୍ କାରାପ୍ ସାସନ୍‌କାରିଆ ତାକର୍ ମନ୍ ଆନ୍ଦାର୍ କରି ଦେଇଆତେ ଜେ, ସେମନ୍ ବିସ୍ତବାସ୍ କରଡ଼ ନାଇ । ଜନ୍ ଉଜଲ୍ ତାକର୍ ଉପ୍‌ରେ ଉଜଲ୍ ଦେଲାନି, ସେଟା ନ ଦେକ୍‌ବାକେ ସେ ଆଗ୍‌ଟିଦେଲାନି । କିରିସ୍‌ଟର୍ ମଇମାର୍ ଉଜଲ୍ ତାର୍ ସୁବ୍‌କବରେଅନି ଆଇସି । କିରିସ୍‌ଟ ସମାନ୍ ପର୍ମେସରର୍ ପାରାସେ ଆତେ । <sup>୫</sup> କାଇକେବଇଲେ ଆମେ ନିଜର୍ ବିସଇ ଜାନାଇ ଅଉନାଇ । ମାତର୍ ଜିସୁ କିରିସ୍‌ଟ ଜେ କି ମାପରୁ, ତାର୍ ବିସଇ ଜାନାଇଲୁନି । ଜିସୁର୍ ଲାଗି ତମର୍ ଗତିଦାଙ୍ଗ୍‌ତା ଇସାବେ ଆମେ ନିଜେ ଜାନାଇଅଇଲୁନି । <sup>୬</sup> ପର୍ମେସର୍ ଜେ କି କଇଲା “ଉଜଲ୍ ଆନ୍ଦାରେ ଅନି ଉଜଲ୍ ଦେଇସି ।” ସେ ସମାନ୍ ପର୍ମେସର୍ କିରିସ୍‌ଟର୍ ମୁଏ ଅନି ତାର୍ ଉଜଲ୍ ଆମର୍ ବିଡ଼ରେ ଉଜଲ୍ କରାଇଲା । ଜେନ୍ତାରି କି କିରିସ୍‌ଟ ତେଇ ରଇବା ପର୍ମେସରର୍ ମଇମା, ଆମେ ବୁଜି ପାରୁ ।

<sup>୭</sup> ଆମେ ଗଟେକ୍ ମାଟି ଆଣ୍ଡି ପାରା । କାଇକେବଇଲେ ଆମ୍‌କେ ବପୁ ନ ରଇଲେ ମିସା ପର୍ମେସର୍ ତାର୍ ବେସି ମୁଲିଅ ରଇବା ବାକିଅ ଆମ୍‌କେ ସର୍ପି ଦେଲାଆତେ । ଜେନ୍ତାରି କି ଆମ୍‌କେ ବପୁ ନ ରଇକରି ପର୍ମେସର୍‌କେସେ ବେସି ବପୁ ଆତେ ବଲି ଲକ୍‌ମନ୍ ଜାନ୍‌ବାଇ । <sup>୮</sup> ଆମେ ସବୁ ରକାମର୍ ଦୁକ୍‌କସ୍‌ଟ ଅଇକରି ଗାଲୁନି, ଏଲେ ମିସା କସ୍‌ଟ ପାଉ ନାଇ । କେବେ କେବେ କାଇଟା କର୍‌ରୁ ବଲି ଗିଆନ୍ ନ ରଇଲା ଲକ୍‌ପାରା ଅଇଲୁନି, ଅଇଲେମିସା ମନ୍‌ଦୁକ୍ କରୁ ନାଇ । <sup>୯</sup> ସଡ଼ରୁମନ୍‌ର୍ ଚାନେଅନି ଉଡା ସୁନି ସୁନି ରଇଲୁ, ଏଲେମିସା ମାପରୁ ଆମ୍‌କେ ଚାଡେ ନାଇ । ଆମର୍ ଗାଗ୍‌ତେ କେଡେକ୍ କେଡେକ୍ ମାଡ଼ ଅଇଲା । ଅଇଲେ ମିସା ମାପରୁ ଆମ୍‌କେ ବିନାସ୍ ଅଇବାକେ ଦେଏନାଇ । <sup>୧୦</sup> ଆମେ ସବୁବେଲେ ଜିସୁର୍ ମରନ୍ ଆମର୍ ଗାଗ୍‌ତେ ଏତାଇଲୁନି । ଜେନ୍ତିକି ଜିସୁର୍ ଜିବନ୍‌ମିସା ଆମର୍ ଗାଗ୍‌ତେ ତିସି ।

<sup>୧୧</sup> ଆମେ ଜିସୁର୍ ସଙ୍ଗ୍ ରଇଲାର୍ ପାଇ ବର୍‌ବାଜାକ ମର୍‌ବା ବିପଦେ ଆରୁ । ଜେନ୍ତିକି ଲକ୍‌ମନ୍ ଏ ମର୍‌ବା ଗାଗ୍‌ତେ ଜିସୁ ବର୍‌ଟିରଇବାଟା ଦେକ୍‌ବାଇ । <sup>୧୨</sup> ଏନ୍ତାରିସେ ଆମେ ମରନ୍ ଦାରିଆରୁ । ମାତର୍ ତମର୍‌ଟାନେ ଜିବନ୍ ଅଇ ଆଇଲାନି । କାଇକେବଇଲେ ତମେ ନ ସାର୍‌ବା ଜିବନ୍ ପାଇସା ।

୧୩ ସାସ୍ତରେ ଲେକା ଅଇଲାପାରା “ ମୁଇ ବିସ୍ବାସ୍ କଲି, ତେବର୍ପାଇ ମୁଇ କାତା ଅଇଲି ” । ସେ ସମାନ୍ ବିସ୍ବାସର୍ ଆଡ଼ମାଇ, ଜନ୍ ବାକିଅ ମୁଇ ବିସ୍ବାସ୍ କଲିଆଟି, ସେଟାସେ ମୁଇ ଏବେ ଲକ୍ମନକେ ଜାନାଇଲିନି । ୧୪ କାଇକେ ବଇଲେ ଆମେ ଜାନିଆରୁ ପର୍ମେସର୍ ଜେ କି ମାପୁରୁ ଜିସୁକେ ଜିବନ୍ କରି ଉଟାଇଲା, ସେ ଆମ୍ଭକେ ମିସା ମାପୁରୁ ଜିସୁର୍ ସଙ୍ଗ୍ ଉଟାଇସି । ଆରି ତମର୍ ସଙ୍ଗ୍ ଆମ୍ଭକେ ମିସା ପର୍ମେସରର୍ ମୁଆଟେ ନେଇସି । ୧୫ ତେବର୍ପାଇ ଜେଡ଼କି ସବୁ ସାଦନା ବାଦନା ଆଇଲାନି, ସେ ସବୁ ବିସଇ ତମର୍ ମଙ୍ଗଲର୍ପାଇ ସେ ଅଇଲାନି । ପର୍ମେସରର୍ ଜିବନ୍ ଦୁକାଇଲାଟା ଅଦିକ୍ ଅଦିକ୍ ଅଇକରି ଲକ୍ମନର୍ଗାନେ କେଟସି, ଆରି ସେମନ୍ ସବୁଲକ୍ ତାକେ ଦନିଅବାଦ୍ ଦେବାଇ ।

### ବିସ୍ବାସ୍ କରି ଜିଇବାଟା

୧୬ ତେବର୍ପାଇ ଆମେ ସାଆସ୍ ନ ଅଇରଇବା ଲକର୍ ପାରା ନ ଅଉଁ । କାଇକେବଇଲେ ଆମର୍ ବାଇରର୍ ଗାଗଡ଼ ମରିମରି ଆଇଲେ, ମିସା ବିଡ଼ରେ ରଇବା ଲକ୍ ଦିନକେ ଦିନ ନୁଆ ଅଇ ଆଇଲାନି । ୧୭ କାଇକେ ବଇଲେ ଆମର୍ ଦୁକ୍ କସ୍ଟ ସବୁ ଉନା ଅଇକରି ଚନେକର୍ପାଇ । ମାତର୍ ସେଟା ଆମ୍ଭକେ ନ ସର୍ବା ସବୁଦିନର୍ ମଇମା ଆନ୍ସି । ସେଟା ଆମର୍ ଦୁକ୍ କସ୍ଟ ଟାନେଅନି ବଡ଼ ରଇସି । ୧୮ ତେବର୍ ପାଇ ଆମେ ଏ ଜଗତେ ଡିସ୍ବା ବିସଇ ଆସା ନ କରି ନ ଡିସ୍ବା ବିସଇ ଆସା କଲୁନି । କାଇକେବଇଲେ ଦେକ୍ବା ବିସଇ ସବୁଦିନ ନ ରଏ, ମାତର୍ ନ ଦେକ୍ବା ବିସଇ ସବୁ ଦିନର୍ପାଇ ରଇସି ।

## ୫

୧ ଆମର୍ ଗାଗଡ଼ ତୁମ୍ ଟାନିକରି ବାଦିରଇବା ଗର୍ପାରା । ଆରି ଆମେ ଜାନୁ ଜେ ଜେଡେବେଲେ ମିସା ଏଟା ବାଙ୍ଗି ଜାଇସି, ତେବେ ସର୍ଗେ ରଇବାପାଇ ଆମ୍ଭକେ ଗଟେକ୍ ଗର୍ ଆଟେ । ଏଟା ନିଜେ ପର୍ମେସର୍ ଡିଆର୍ କଲାଟା । ସେଟା କେବେ ବିନାସ୍ ନ ଅଏ । ସବୁ ଦିନର୍ପାଇ ରଇସି । ୨ ମାତର୍ ଆମେ ଏ ଜଗତେ ରଉ ରଉ ଏଡ଼କି କସ୍ଟ ପାଇଲୁନି । ସର୍ଗେ ରଇବା ଆମର୍ ନୁଆ ଗାଗଡ଼ ଏବେଆକା ଆମ୍ଭକେ ମିଲ ବଲି ଆମେ ମନ୍ କଲୁନି । ୩ କାଇକେବଇଲେ ମଲାଡେଇଅନି ଆମ୍ଭକେ ଉଟାଇଲାବେଲେ ଆମର୍ପାଇ ଗଟେକ୍ ଗାଗଡ଼ ଦରକାର୍ ଆଟେ । ୪ ଏ ଜଗତେ ଆମେ ବଠି ରଇଲାବେଲେ, ଇଡିର୍ ଗାଗଡ଼ ନେଇକରି ଜେଡ଼କି ଦୁକ୍ କସ୍ଟ ପାଇବାର୍ ଆଟେ, ସେଟା ସବୁ ବଇକରି ଆଉଜି ଗାଲୁନି । ମାତର୍ ଏ ଗାଗଡ଼ ଚାଡ଼ବାକେ ଆମେ ମନ୍ କରୁ ନାଇ । ସର୍ଗେ ଅନି ଆଇବା ନୁଆ ଗାଗଡ଼ ଆମ୍ଭକେ ମିଲ ବଲି ମନ୍ କଲୁନି । ସେନ୍ତାର୍ଆଲେ ମରନ୍କେ ସର୍ପି ଦେଇରଇବା ଏ ଗାଗଡ଼ର୍ ବାଦୁଲେ ସବୁଦିନର୍ ପାଇ ଜିବନ୍ ରଇବା ଗଟେକ୍ ଗାଗଡ଼ ମିଲାଇରୁ । ୫ ମାତର୍ ପର୍ମେସର୍ ଆମର୍ପାଇ ଏ ସବୁ ବିସଇ ଜାଗାଇଦେଇ ସାରାଇଆଟେ । ଜେକ୍ରିକି ଆଇବା ଦିନମନ୍କେ ଏଟାସବୁ ଅଇସି । ଏଟା ସବୁ ସେ ପୁରାପୁରନ୍ କର୍ସି ବଲି ଆମ୍ଭକେ ଚିନ୍ ଇସାବେ ସୁକଲ୍ ଆଡ଼ମା ଦେଲାଆଟେ ।

୬ ସେଟାର୍ ପାଇ ଆମେ ସବୁବେଲେ ସାଆସ୍ ଅଇକରି ଆରୁ । ଏ ସାର୍ବା ଗାଗଡେ ଆମେ ରଉ ରଉ, ମାପୁରୁ ରଇବା ଗରେ ଅନି ଦୁରିକେ ବାସା ଅଇଆରୁ ବଲି ଜାନିଆରୁ । ୭ ଏ ଜଗତେ ରଇବା ଆମର୍ ଜିବନ୍, ପର୍ମେସର୍ଗାନେ ବିସ୍ବାସ୍ କରି ରଇଲୁନି । କାଇକେବଇଲେ ଜନ୍ ଜାଗାଇ ଆମେ ବାସା ଅଇବାକେ ଗାଲୁନି, ସେ ଜାଗା ଏବେଜାକ ଆମେ ଦେକୁ ନାଇତା । ୮ ଉଁ ଆମର୍ ବିସ୍ବାସ୍ ସବୁବେଲେ ଡା଼ର୍ ଆଟେ । ଏ ସାରିଜିବା ଗାଗଡ଼ ଚାଡ଼ିକରି ମାପୁରୁ ଗରେ ଜିବାକେ ବଲି ଆମେ ଜାନିଆରୁ । ୯ ମାତର୍ ଏବେ ଆମେ ଜକ୍ତି ରଇଲେ ମିସା, ଏ ଜଗତେ ରଇଲେ କି, ପର୍ମେସର୍

ରଇବାଟାନେ ରଇଲେ ମିସା, ସେ ଜନ୍ମଟା ଆମରୁଟାନେଅନି ଆସା କଲାନି, ସେଟା ପୁରାପୁରୁନ୍ ଅ ବଲି ଆମେ ମନ୍ କଲୁନି ।

୧୦ \*ଆମେ ସବୁଲକ୍ କିରିସ୍ତର୍ ମୁଆଟେ ଆଇବାକେ ପଢ଼ସି । କାଇକେବଇଲେ ସେ ଆମର୍ କାମ୍ ବିଚାର୍ କରସି । ଏ ଜଗତେ ରଇକରି ଆମେ ଜନ୍ମଟା କଲୁଆରୁ, ସେଟା ନିକ ଅ କି ନ ଅ, ସେ ଇସାବେ ଆମ୍‌କେ ଗଟେକ୍ ଗଟେକ୍ ଲକ୍‌କେ ବୁଡ଼ି ମିଲସି ।

### କିରିସ୍ତର୍ ଦେଇ ପର୍ମେସର୍ ସଙ୍ଗ୍ ମଇତର୍

୧୧ ଆମେ ଜାନିଆରୁ ମାପରୁ ଆମ୍‌କେ ବିଚାର୍ କରବାବେଲେ ଗଟେକ୍ ଡର୍ବା ବେଲା ଅଇସି । ସେଟାର୍‌ପାଇ ଆମେ ଲକ୍‌ମନ୍‌କେ ମାନାଇଲୁନି । ପର୍ମେସର୍ ଆମ୍‌କେ ପୁରାପୁରୁନ୍ ଜାନଲାନି । ଆରି ମୁଇ ଆସା କଲିନି ତମେ ମିସା ତମର୍ ମନେ ମନେ ମକେ ଜାନିରୁଆ । ୧୨ ଏଟା ସବୁ ଲେକିକରି ତମେ ଆମ୍‌କେ ଆରିତରେକ୍ ଏ ଲକ୍ ନିକ ବଲିକରି କୁଆଇଅଇବାକେ ଆମେ ମନ୍ କରୁନାଇ । ମାତର୍ ଆମେ ଆସା କରବାଟା ଟିକ୍ ଆଟେ, ସେଟା ତମେ ଜାନା ବଲି ଆମେ ମନ୍ କଲୁନି । ଆରି ଜନ୍ ଲକ୍‌ମନ୍ ନିକ ଗୁନ୍ ନ ମାନିକରି, ବାଇରେ ଡିସ୍‌ବା ବିସଇଟାନେ ବଡ଼ପନ୍ ଅଇବାଇ, ସେମନ୍‌କେ ବୁଜାଇପାରାସ୍ । ୧୩ କେତେଲକ୍ ଆମେ ବାୟା ଅଇଗାଲୁଆରୁ ବଲି ବାବ୍‌ବାଇ । ସେନ୍ତାର୍‌ଆଲେ ସେନ୍ତି ଅଇବାଟା ପର୍ମେସର୍ ମନ୍ କଲାଇସାବେ । ଜଦି ଆମେ ନିକ ଆରୁ ବଲି ବାବ୍‌ଲେ ସେଟା ତମର୍ ବଲ୍ ପାଇ । ୧୪ କିରିସ୍ତର୍ ଆଲାଦ୍ ଆମ୍‌କେ ବାଟ୍ ଦେକାଇଲାନି । ସେଟା ଆମେ ଜାନିଆରୁ । ସେଟାର୍ ଲାଗି ଆମେ ସବୁଲକ୍ ତାର୍ ମରନେ ମିସିଆରୁ । ୧୫ ସେ ସବୁ ଲକ୍‌ପାଇ ମଲାଆଟେ । ଜେନ୍ତି କି ଜନ୍‌ଲକ୍‌ମନ୍ ବଠି ଆତଡ଼, ସେମନ୍ ନିଜର୍ ପାଇ ନ ବଠଡ଼ । ଜେ ତାକର୍ ପାଇ ମରିକରି ଜିବନ୍ ଅଇ ଉଟ୍‌ଲା, ଅବ୍‌କା ତାର୍ ପାଇସେ ବଠ୍‌ବାର୍ ଆଟେ ।

୧୬ ଏ ଜଗତର୍ ଲକ୍‌ମନ୍ ବିଚାର୍ କଲାପାରା ଆମେ ଲକ୍‌ମନ୍‌କେ ବିଚାର୍‌ନା କରୁନାଇ । ପୁର୍ବେ ଆମେ କିରିସ୍ତକେ ମିସା ଏ ଜଗତର୍ ଲକ୍ ବିଚାର୍ କଲାପାରା କରତେରଇଲୁ । ମାତର୍ ଏବେ ଆମେ ସେନ୍ତି କରୁନାଇ । ୧୭ ଜେ ଜଦି କିରିସ୍ତ ସଙ୍ଗ୍ ମିସ୍‌ଲେ ସେ ଗଟେକ୍ ନୁଆ ଲକ୍ ଅଇସି । ପୁର୍ନା ଚଲାଚଲ୍‌ତି ଆରି ନାଇନି, ସବୁଜାକ ନୁଆ ଅଇଗାଲା ଆଟେ । ୧୮ ଏଟା ସବୁ ପର୍ମେସର୍ କଲାଆଟେ । ସେ କିରିସ୍ତକେ ଦେଇ ଆମ୍‌କେ ସଡ଼ୁରୁ ରଇବା ତେଇଅନି ମଇତର୍ କରିଆଟେ । ବିନ୍ ଲକ୍‌ମନ୍‌କେ ମିସା ତାର୍ ମଇତର୍ କରାଇବା କାମ୍ ଆମ୍‌କେ ସର୍ପି ଦେଲାଆଟେ । ୧୯ ତେବେ ଆମେ ଏ ବିସଇ ଜାନାଇଦେଲୁନି, ଜେ କିରିସ୍ତର୍ ଲାଗି ପର୍ମେସର୍ ସବୁ ମୁନୁସ୍ ଜାଡ଼ିକେ ତାର୍ ନିଜର୍ ମଇତର୍ କରିପାରସି । ଆରି ସେ ତାକର୍ ସବୁ ପାପ୍ କେମା କରିଦେଇସି । ବିନ୍ ଲକ୍‌ମନ୍‌କେ ମିସା ତାର୍ ମଇତର୍ କରାଇବା କାମ୍ ଆମ୍‌କେ ସର୍ପି ଦେଲାଆଟେ ।

୨୦ ପର୍ମେସର୍ ଆମ୍‌କେ ଦେଇ ତମ୍‌କେ ବାବୁଜିଆ କଲାନି । ଏଟାର୍‌ପାଇ କିରିସ୍ତ ଆମ୍‌କେ ପାଟାଇଲା ଆଟେ । ଆରି କିରିସ୍ତର୍ ଲାଗି ଆମେ ମିସା ତମ୍‌କେ ବାବୁଜିଆ କଲୁନି । ପର୍ମେସର୍ ତମ୍‌କେ ସଡ଼ୁଟାନେଅନି ମଇତର୍ କର । ୨୧ କିରିସ୍ତକେ କାଇ ପାପ୍ ନ ରଇଲା । ମାତର୍ ଆମର୍ ପାପର୍ ପାଇ ଆକା ସେ ଡ଼ଣ୍ ପାଅ ବଲି ପର୍ମେସର୍ ଟିକ୍ କଲା । କିରିସ୍ତ ସଙ୍ଗ୍ ମିସ୍‌ଲାର୍‌ପାଇ ଏବେ ପର୍ମେସର୍ ଆମ୍‌କେ ଦରମ୍ ଲକ୍ ଇସାବେ ଦେକ୍‌ଲାନି ।



୧ ତେବେ ପରମେସରର୍ ଏ କାମେ, ଆମେ କାମ୍ କରୁମନ୍ ଅଇଲୁଆରୁ ଜେ, ତମ୍ କେ ଆମେ ବାବୁଜିଆ କଲୁନି । ତମେ ତାର ଜିବନ୍ ଦୁକାଇଲାଟା ମିଲାଇ ଆଚାସ୍ । ସେଟା ରୁଚାଇ ନ ଅ । ୨ ପରମେସର କଇବାଟା ସୁନା ।

“ ତମ୍ କେ ଦୟା ଦେକାଇବା ବେଲା ସମାନ୍ ଅଇଲାକେ,

ମୁଇ ତମେ ଗୁଆରି କଲାଟା ସୁନ୍ଲି ।

ଜନ୍ ଦିନେ ମୁଇ ମୁକ୍ତଲାଇବା ଦିନ୍ ବଲି ଟିକ୍ କଲି,

ସେ ଦିନେ ମୁଇ ତମ୍ କେ ସାଇଜ କଲି ।”

ସୁନା ! ପରମେସର ତମ୍ କେ ତାର ଆଲାଦ୍ ଦେକାଇବି ବଲି, ଟିକ୍ କଲା ଦିନ୍ ଆଜିସେ । ତମ୍ ପାପର୍ ତଣ୍ଟେ ଅନି ସେ ତମ୍ କେ ରକିଆ କରବା ଦିନ୍ ଆଜି ସେ ।

୩ ଜେନ୍ତ୍ରକି ଆମର୍ ସେବା କାମେ ଲକ୍ମନ୍ ଆମ୍ କେ ଦସ୍ ନ ଦାରଡ୍ ବଲି ଆମେ ମନ୍ କରୁନାଇ । ସେଟାପାଇ କିରିସଟର୍ ପତେ ଜିବା ଲକ୍ମନ୍ କେ ଆମ୍ କେ ଆଗ୍ରୁ ନାଇ । ୪ ତାର ବାଦୁଲେ ଆମେ ଜାଇଟା କଲେ ମିସା ପରମେସରର୍ ସେବାକାରିଆ

ଇସାବେ କଲୁନି । ଜେନ୍ତ୍ରକି, କିରିସଟର୍ ଲାଗି ଉତାସୁନ୍ ବା ଟାନ୍, ଦୁକ୍ କସଟ ଟାନ୍, ଆମେ ସାଆସ୍ ଅଇ ମୁରଟିକରି ଆରୁ । ୫ ଆମେ କର୍ତ୍ତା ମାଡ୍ କାଇ ବନ୍ଦି ଗରେ ରଇଆରୁ, ମାନ୍ ଲକ୍ମନ୍ ଟାନ୍ ଅନି କେଦାଇଅଇଆରୁ, ବେସି ଆବଡ୍ କାମ୍ କରି ଆରୁ, ନ ସଇକରି ରଇଲୁଆରୁ, ଦିନ୍ ଦିନ୍ ଦାରି ନ କାଇ ନ ପିଇ କରି ରଇଆରୁ । ୬ ଆମର୍ ସୁକଲ୍ କାମେ, ଆମର୍ ଗିଆନେ, ଆମର୍ ମୁରଟି ରଇବାଟାନ୍, ଆମର୍ ଦୟା ଦେକାଇବାଟାନ୍, ସୁକଲ୍ ଆଡ୍ ମାଟାନ୍, ଆମର୍ ସଡ୍ ଆଲାଦ୍ ଟାନ୍, ଆମେ ପରମେସରର୍ ସେବା କାରିଆ ବଲିକରି ଜାନାଇ ଅଇଲୁନି । ୭ ଆମେ ସିକାଇବା ବାକିଅ ସଡ୍ ବାକିଅ । ଆରି ଆମର୍ ସଙ୍ ପରମେସରର୍ ବପୁ ଆଟେ । ପରମେସର ଦେକ୍ ବା ଇସାବେ, ଆମର୍ ଦରମ୍ ବଲାଇ ଅଇବାଟା ଗଟେକ୍ ଆଡ୍ ଆଡିଆର୍ ପାରା । ଆମର୍ ସଡ୍ ରୁମନ୍ ବିରୁଦେ ଜୁଜ୍ ବାକେ ଆରି ନିଜ୍ କେ ରକିଆ ପାଇବାକେ, ସେଟା ବାଇଲୁନି । ୮ କେବେ କେବେ ଆମ୍ କେ ସନ୍ ମାନ୍ ମିଲୁଲାନି । ମାତର୍ କେବେ କେବେ ତଲେ ପାକାଇଲାଇନି । କେବେ କେବେ ନିକ୍ ଲକ୍ ବଲାଇଅଇଲୁନି । ମାତର୍ କେବେ କେବେ ଆମେ ନିନ୍ଦା ପାଇଲୁନି । ୯ ଆମେ ମିରୁଆ ବଲାଇଅଇଲୁନି । ମାତର୍ ସଡ୍ କାତା କଇଲୁନି । ନାଜାନ୍ ତେ ରଇଲେ ମିସା ସବୁଲକ୍ ଜାନି ଆତଡ୍ । ମଲା ସମାନ୍ ରଇଲୁ, ମାତର୍ ଆଜିକେ ଜାକ ବୈଆରୁ । ଡଣ୍ ପାଇଲୁ ମିସା ମରୁନାଇ । ୧୦ ବେସି ଦୁକେ ରଇଲେ ମିସା ସାର୍ ଦା ସଙ୍ ଆରୁ । ଆମେ ଅରକିଡ୍ ପାରା ଅଇରଇଲେ ମିସା, ବିନ୍ ଲକ୍ମନ୍ କେ ସାଉକାର୍ କରାଇଆରୁ । ଆମେ କାଇଟା ନ ରଇବା ଲକ୍ମର୍ ପାରା ଆରୁ, ମାତର୍ ସବୁଜାକ ଆମର୍ ଟା ।

୧୧ ଏ କରନ୍ତ୍ରୀ ରଇବା ଆମର୍ ମଇତର୍ ମନ୍, କାଇ କପର୍ ନ କରି, ଆମର୍ ମନେ ଜାଇଟା ରଇଲା, ସେଟା ସବୁ ତମର୍ ମୁଆଟେ କଇଲୁଆରୁ । ଆମେ ତମ୍ କେ ବେସି ଆଲାଦ୍ କଲୁନି । ୧୨ ତମର୍ ପାଇ ବଲିକରି ଆମର୍ ଆଲାଦ୍ ଉନା ଅଏ ନାଇ । ମାତର୍ ଆମର୍ ପାଇ ରଇବା ତମର୍ ଆଲାଦ୍ ଉନା ଅଇଆଟେ । ୧୩ ନିଜର୍ ପିଲାମନ୍ କେ କଇଲା ପାରା ତମ୍ କେ କଇଲିନି, ଆମେ ଜେନ୍ତ୍ରାରି କି ତମ୍ କେ ଆଲାଦ୍ କଲୁନି, ସେନ୍ତ୍ରାରିସେ ତମେ ଆମ୍ କେ ଆଲାଦ୍ କରା ।

ବିସ୍ ବାସ୍ ନ କଲା ଲକ୍ମନ୍ ଟାନ୍ ଜାଟାଇ ଉଆନାଇ

୧୪ ତମେ ବିସ୍ ବାସ୍ ନ କରବା ଲକ୍ମନ୍ ସଙ୍ ମିସିକରି କାମ୍ କରାନାଇ । ସେ କାମ୍ କେବେମିସା ନ ଅଏ । କାଇକେବଇଲେ ସଡ୍ ଆରି ମିଡ୍ ମିସାଇ ନ ଅଏ । ଉଜଲ୍ ଆରି ଆନ୍ଦାନ୍ ନ ମିସଡ୍ । ୧୫ କିରିସଟ୍ ଆରି ସଇତାନ୍ କାଇ ବିସଇଟାନ୍ ମିସା



ରାଜି ନ ଅଥଡ଼ । ଗଟେକ୍ ବିସ୍‌ବାସ୍ କରବା ଲକ୍ ଆରି ଗଟେକ୍ ବିସ୍‌ବାସ୍ ନ କରବା ଲକ୍, ଗଟେକ୍ ଟାନେ ମିସିକରି ନ ରଅଡ଼ ।<sup>୧୭</sup> \*ପରଫେସରର୍ ମନ୍ଦିରେ ପୁଡ଼ଲା ପୁଜା କରବାର୍ ନ ଅଏ । ଆମେ ପରଫେସରର୍ ମନ୍ଦିର୍ ପାରା । କାଇକେବଇଲେ ଜିବନ୍ ରଇବା ପରଫେସର୍ ଆମର୍ ବିଡ଼ରେ ବାସା ଅଇଆଟେ । ସେ ନିଜେ କଇଲାଆଟେ  
“ ଜନ୍ ଲକ୍‌ମନ୍ ମର୍ ଲକ୍,

ମୁଇ ସେମନର୍ ସଙ୍ଗ୍ ରଇବି ।

ଡାକର୍ ବିଡ଼ରେ ଚାଲାବୁଲା କରବି । ମୁଇ ସେମନର୍ ପରଫେସର୍ ଅଇବି ।

ଆରି ସେମନ୍ ମର୍ ଲକ୍ ଅଇବାଇ ।”

<sup>୧୭</sup> ତେବେ ମାପୁରୁ କଇଲାନି,

“ ଜନ୍ ଲକ୍‌ମନ୍ ମର୍ ସଙ୍ଗ୍ ଆସଡ଼ ନାଇ,

ସେ ମାନ୍‌ଆଇ ଅନି ଚାଡ଼ି କରି ବେଗଲି ଉଟିଆସା ।

ସୁକଲ୍ ନ ରଇବା କାଇଟା ମିସା ଚିଆନାଇ ।

ସେନ୍ତାର୍‌ଆଲେ ମୁଇ ତମ୍‌କେ ଡାକିନେବି ।”

<sup>୧୮</sup> ମୁଇ ତମର୍ ବାବା ଅଇବି ଆରି,

ତମେ ମର୍ ପିଲାଜିଲା ଅଇସା ।

ଏଟା ସବୁଟାନ୍‌ନେ ଅନି ବପୁ ରଇବା

ମାପୁରୁ କଇଲାନି ।

## ୭

<sup>୧</sup> ତେବର୍‌ପାଇ ଏ ମର୍ ଆଲାଦର୍ ମଇତର୍‌ମନ୍, ପରଫେସର୍ କାତା ଦେଇରଇବାଟା ସବୁ ଆମ୍‌କେ ସର୍‌ପିଆଟେ । ତେବର୍‌ପାଇ ଜନ୍‌ଟା ସବୁ ଆମର୍ ଗାଗଡ଼କେ ଆରି ଆଡ଼ମାକେ ସୁକଲ୍ ନ କରାଏ, ସେଟା ସବୁ ଚାଡ଼ିଦେଉଁ । ପରଫେସର୍‌କେ ଡରିରଇକରି ପୁରାପୁରୁନ୍ ସୁକଲ୍ ଅଇରଉଁ ।

ପାଉଲ୍ ସାର୍‌ଦା ଅଇଲାଟା

<sup>୨</sup> ତମେ ଆମ୍‌କେ ଅଦିକ୍ ଆଲାଦ୍ କରବା ଦରକାର୍ । ଆମେ ତମର୍ ବିରୁଦେ କାଇ ଦସ୍ କରୁନାଇ । ଆମେ କାକେ ନସ୍‌ଟ କରୁନାଇ, କି କାକେ ନାଡ଼ାଉ ନାଇ ।<sup>୩</sup> ମୁଇ ତମ୍‌କେ ଦସ୍‌ଦେବାକେ ଏ କାତା କଇନାଇ । ଆଗ୍‌ତୁ କଇଲାପାରା, ଆମେ ତମ୍‌କେ ସଡ଼ସେ ଆଲାଦ୍ କଲିନି, ବର୍‌ଟି ରଇଲେ କି ମଲେ ମିସା, ତମେ ଆମର୍ ମନ୍ ବିଡ଼ରେ ଆଗାସ୍ ।<sup>୪</sup> ତମର୍ ଲଗେ ମର୍ ବିସ୍‌ବାସ୍ ଆଟେ । ଆରି ମୁଇ ତମର୍ ବିସ୍‌ଇନେଇ ବଡ଼ପନ୍ ଅଇଲିନି । ଆମେ ବେସି ଦୁକ୍ କସ୍‌ଟ ଆଇଲେ ମିସା ସାଆସ୍ ଦାରି ଆରୁ । ମର୍ ମନ୍‌ବିଡ଼ରେ ସାର୍‌ଦା ଅଦିକ୍ ଅଦିକ୍ ଅଇକରି ଉଡ଼ଲି ଗାଲାନି ।

<sup>୫</sup> \*ଆମେ ମାକିଦନିଆଇ ଆଇଲାପଟେ ମିସା ଚନେକ୍ ପୁଣ୍ଡୁଆଇ । କାଇକେବଇଲେ ତେଇ ଦୁକ୍ କସ୍‌ଟ ରଇଲା, କେତେଲକ୍ ଆମର୍ ବିରଦେ କଇ ଲାଗାଜଡ଼ା କଲାଇ । ଆମେ ମନ୍ ବିଡ଼ରେ ବେସି ଡରିଜାଇତେ ରଇଲୁ ।<sup>୬</sup> ମାତର୍ ଜେ କି ଆକା ସାକା ନ ରଇବା ଲକ୍‌ମନ୍‌କେ ଦୁକ୍ ସାରାଇବା ପରଫେସର୍ ଡିତସ୍‌କେ ଆନାଇ କରି ଆମ୍‌କେ ସାର୍‌ଦା କରାଇଲା ।<sup>୭</sup> ଅବ୍‌କା ସେ ଆଇଲାକେସେ ଆମେ ସାର୍‌ଦା ଅଉନାଇ, ମାତର୍ ତମର୍ ଲାଗି ଡିତସ୍ ବେସି ସାର୍‌ଦା ଅଇଗାଲା ବଲି ଆମ୍‌କେ କଇଲାପାଉଇ ମିସା ସାର୍‌ଦା ଅଇଲୁ । ତମେ ମକେ ଦେକ୍‌ବାକେ ମନ୍ କଲାସ୍‌ନି ବଲି ମିସା ସେ କଇଲା । ଆରି ତେଇ ମକେ ଜେଡ଼କି ଗଟ୍‌ଲା, ସେଟାପାଇ ଦୁକ୍ ଅଇକରି ଆଗାସ୍ । ଆରି ତମେ ମର୍‌ବାଟେ ଅଇକରି କଇବାକେ ମିସା ରାଜିଆଗାସ୍ । ଏଟାମନ୍ ସବୁ ସୁନିକରି ମୁଇ ବେସି ସାର୍‌ଦା ଅଇଗାଲି ।

୮ ମରୁ ଚିଟିରଲୀଗି ତମେ ଦୁକ୍ ଅଇରଇଲେ ମିସା, ସେ ଚିଟି ତମକେ ପାଟାଇଲି ବଲି, ମୁଇ ଦୁକ୍ କରିନାଇ । ସେ ଚିଟିର ଲାଗି ତମେ ଚନେକର୍ ପାଇ ଦୁକ୍ କରିରଇଲାସ୍ ଜେ ଜାନିକରି, ମୁଇ ମିସା ଦୁକ୍ ଅଇରଇଲି, ଏଟା ସତ୍ । ୯ ମାତର୍ ମୁଇ ଏବେ ସାରଦାସଙ୍ଗେ ଆତି । ତମକେ ଦୁକ୍ଦେଇ ଆତି ବଲିକରି ନାଇ, ମାତର୍ ସେ ଦୁକ୍ ଲାଗି ତମେ ତମର୍ ଚଲାଚଲ୍ଡି ବଦ୍‌ଲାଇଲାସ୍ । ସେ ଆସିରଇବା ଦୁକ୍ ପର୍ମେସରର୍ ମନ୍ କଲା ଇସାବେ ଅଇବାଟା । ଜେନ୍ତୁକି ମାନିଆଇସା । ସେନ୍ତାଆଲେ ଆମେ ତମର୍ ପାଇ କାଇ ବାଦା ଆନୁନାଇ । ୧୦ କାଇକେବଇଲେ ଜଦି ଗଟେକ୍ ଲକର୍ ଦୁକ୍ ପର୍ମେସରର୍ ମନ୍ କଲା ଇସାବେ ଆଇସି, ସେଟା ନିଜର୍ ପାପ୍ କଲାଟା ମାନିଅଇକରି, ମନ୍ ବାଉଡାଇବାକେ ଲଡାକେ ଆଇସି । ତେଇ କାଇ ମିସା ଦୁକ୍ ନାଇ । ମାତର୍ ମୁନୁସ୍‌ମନର୍ ଟାନେଅନି ଅଇବା ଦୁକ୍ ମରନ୍‌ବାଟେ ଡାକିନେଇସି । ୧୧ ତମକେ ଦୁକ୍ ଦେଇକରି ପର୍ମେସର୍ କାଇଟା କଲାଆଟେ ଦେକିଦେକା । ଜେନ୍ତୁକି ଏବେ ତମେ ଟିକ୍ ଚଲାଚଲ୍ଡି କର୍ବାକେ ମନ୍ କଲାସ୍‌ନି, ବୁଲ୍ କାମ୍ କରୁନାଇ ବଲି ବୁଜାଇବାକେ ଚେସଟା କଲାସ୍‌ନି, ଲାଜ୍ ପାଇବା କାମ୍ କର୍ବାକେ ବାକାନ୍‌ଲାସ୍‌ନି, ଡରିକରି ଆଟାସ୍, ଆମେ ଆରିତରେକ୍ ବେଟ୍ ଅଇବୁ ବଲି ମନ୍ କଲାସ୍‌ନି, ମକେ ସାରଦା କରାଇବାକେ ମନ୍ କଲାସ୍‌ନି, ପାପ୍ କଲା ଲକ୍‌କେ ଦାପ୍‌ରେ ତଣ୍ଟି ଦେଲାସ୍, ଏଟା ସବୁ କଲାକେ ସେ କରିରଇବା ପାପେ ତମର୍ କାଇ ବୁଲ୍ ନାଇ ।

୧୨ ଜନ୍ ଲକ୍ ପାପ୍ କରିଆଟେ, ତାର୍ ବଲ୍ ପାଇ କି ଜନ୍ ଲକର୍ ବିରୁଦେ ପାପ୍ କରାଇଅଇଲା, ତାର୍ ବଲ୍ ପାଇ ମୁଇ ସେ ଚିଟି ଲେକିନାଇ । ମାତର୍ ଆମ୍‌କେ ତମେ ଏତେକ୍ ଆଲାଦ୍ କଲାସ୍‌ନି, ସେଟା ତମେ ନିକସଙ୍ଗ୍ ଜାନ୍‌ବାକେ ମୁଇ ଲେକିରଇଲି । ପର୍ମେସର୍ ଏଟା ଜାନିଆଟେ । ୧୩ ସେଟାପାଇ ତମେ ଆମ୍‌କେ ବେସି ସାରଦା କରାଇଲାସ୍ ।

ଅବ୍‌କା ଆମେସେ ସାରଦା ଅଇଲୁ ସେଡ୍‌କି ନର୍‌ସ୍, ମାତର୍ ତିତସ୍ ସାରଦା ଅଇଲାଟା ଦେକିକରି ମିସା ଆମେ ସାରଦା ଅଇଲୁ । ତମେ ସବୁ ତାକେ ସାରଦା କରାଇଲାକେ ସେ ମିସା ସାରଦା ଅଇରଇଲା । ୧୪ ତିତସ୍ ତମର୍‌ଟାନେ ନ ଆଇବା ଆଗ୍‌ତୁ, ମୁଇ ତମର୍ ବିସଇ ବଡ୍‌ପନ୍ ଅଇକରି ତାକେ କଇରଇଲି । ସେ ତମର୍‌ଟାନେ ଆଇଲାକେ ମୁଇ ବଡ୍‌ପନ୍ ଅଇକରି ସବୁ କଇଲାଟା ସତ୍ ବଲି ଜାନ୍‌ଲା । ତମେ ମକେ ଲାଜ୍ କରାସ୍ ନାଇ । ମୁଇ ତମକେ ଜାଇଟା ସବୁ କଇଲି ଆତି, ସେଟା ସତ୍ । ଆରି ତିତସ୍‌କେ ଜାଇଟା କଇରଇଲି ସେଟା ମିସା ସତ୍ ବଲି ଜାନାପଡ୍‌ଲାନି । ୧୫ ତେବେ ତମେ ତାର୍ ସବୁ ଆଦେସ୍ ମାନ୍‌ଲାସ୍ ଆରି ତମେ ତାକେ ସାରଦାଇ ରଇସି କି ନ ରଏ ବଲି ଡରିକରି ରଇଲାଟା ସେ ଏଡ୍ କଲା । ତମର୍ ପାଇ ରଇବା ତାର୍ ଆଲାଦ୍, ଅଦିକ୍ ଅଦିକ୍ ଅଇ ଆଇଲାନି । ୧୬ ତମର୍‌ଟାନେ ମର୍ ପୁରାପୁରୁନ୍ ଆସା ଆଟେ ବଲିକରି ମୁଇ ବେସି ସାରଦା ଅଇଲିନି ।

୮

ବିସ୍‌ବାସିମନ୍ ଦାନ୍ ଦେବାଟା

୧ ☆ଏ ମର୍ ବାଇବଇନିମନ୍, ମାସିଦନିଆର୍ ବିସ୍‌ବାସିମନ୍‌କେ ପର୍ମେସର୍ ଜିବନ୍‌ଦୁକାଇ ରଇଲାର୍‌ପାଇ ତେଇ କାଇଟା ଗର୍‌ଲା, ସେଟା ତମେ ଜାନିରୁଆ ବଲି ମୁଇ ମନ୍ କଲୁନି । ୨ ବେସି ବଡ୍ ଦୁକ୍ କସ୍‌ଟ ପାଇ, ମୁରଟି ରଇକରି, ତେଇ ସେମନ୍ ବେସି ସାରଦା କଲାଇ । ତାକର୍ ସାରଦା ଏତେକ୍ ବଡ୍‌ଜାଇରଇଲା ଜେ ସେମନ୍ ଅରକିଡ୍ ଅଇରଇଲେ ମିସା ତାକର୍ ବିସ୍‌ବାସି ବାଇମନର୍ ପାଇ ବେସି ବେସି ଦାନ୍ କଲାଇ । ୩ ସେମନ୍ ଜେଡ୍‌କି ଦେବାର୍ ରଇଲା, ତାର୍‌ତେଇଅନି ଅଦିକ୍ ଦେଲାଇ ବଲି

☆ ୮:୧ ୮:୧ ରମିୟ ୧୫:୨୭

ମୁଈ ସାକି ଦେଲିନି । ଦେବାର୍ ମନ୍ ରଇଲାକେ ନିଜର୍ ମନ୍ କଲା ଇସାବେ ଦେଲାଈ ।<sup>୪୪</sup> ଜିଉଦା ଦେସେ ରଇବା ପର୍ମେସରର୍ ଲକ୍ମନକେ ସାଇଜ କର୍ବାକେ ସେମନ୍ ମିସା ମିସତ୍ ବଲି ଆମ୍ବେ ବାବୁଜିଆ କଲାଈ ।<sup>୪୫</sup> ତାକର୍ଗାନେଅନି ଆମେ ଜେଡକି ଆସା କରିରଇଲୁ, ତାର୍ତେଇଅନି ଅଦିକ୍ ଦେଲାଈ । କାଇକେବଇଲେ ପର୍ତମେ ସେମନ୍ ନିଜେ ନିଜେ ମାପରୁକେ ସର୍ପି ଅଇଲାଈ । ତାର୍ପତେ ପର୍ମେସରର୍ ମନ୍ କଲା ଇସାବେ ସେମନ୍ ଆମ୍ବେ ମିସା ସର୍ପି ଅଇଲାଈ ।<sup>୪୬</sup> ତେବର୍ପାଇ ତିତସ୍ ଜେ କି ତମର୍ ବିଡରେ ଏ କାମ୍ ଜେନ୍ତି ଆରାମ୍ କରିରଇଲା, ସେନ୍ତାରି ଆକା ତମର୍ ଆଲାଦର୍ ଦାନ୍ ସାରାଅ ବଲି ଆମେ ତାକେ ବାବୁଜିଆ କଲୁ ।<sup>୪୭</sup> ତମେ ବେସି ବିସଇଗାନେ ପୁରାପୁରୁନ୍ ଆଗାସ୍ । ସବୁ ବିସଇଗାନେ ସାଉକାର୍ ଅଇଆଗାସ୍ । ବିସବାସେ ଡାଁଟ୍ ଆଗାସ୍, ବାକିଅ ସିକାଇବାକେ ଜାନିଆଗାସ୍, ବାକିଅତେଇ ତମର୍ ଗିଆନ୍ ଜବର୍ ଆତେ, ସଙ୍ଗର୍ ବିସବାସିମନ୍କେ ସାଇଜ କର୍ବାଟା ଆରି ଆମର୍ପାଇ ରଇବା ତମର୍ ଆଲାଦ୍ ବେସି ବଡ୍ ଆତେ । ସେନ୍ତାରିସେ ଦାନ୍ ଦେବାଟାନେ ମିସା ଅଦିକ୍ ଅଦିକ୍ ଦିଆସ୍ ବଲି ଆମେ ମନ୍ କଲୁନି ।

୮ ଏଟା ତମ୍ବେକେ ମୁଈ ତିଆରଲା ପାରା କଇନାଇ, ମାତର୍ ବିନ୍ ବିସବାସିମନ୍ ତାର୍ ବାଇମନ୍କେ କେନ୍ତି ଅଦିକ୍ ମନ୍ କରି ସାଇଜ କଲାଈନି, ସେଟା ଜାନିରଇବାକେ କଇଲିନି । ସେମନ୍ କଲାପାରା ତମେ କରିପାରାସ୍ ଆରି ସେଟା ଦେକି ତମର୍ ଆଲାଦ୍ ସତ୍ କି ମିତ୍ ବଲି ମୁଈ ଜାନିପାର୍ବି ।<sup>୪୮</sup> ଆମର୍ ମାପରୁ ଜିସୁକିରିସ୍ଟ ଜିବନ୍ ଦୁକାଇ ଅଇଲା ବିସଇ ତମେ ଜାନିଆଗାସ୍ । ସର୍ଗେ ସେ ବେସି ସାଉକାର୍ ଅଇରଇଲେ ମିସା ସେ ନିଜେ ଅର୍କିଡ୍ ଅଇଆଇଲା । ଜେନ୍ତି କି ତାର୍ଲାଗି ତମେ ସାଉକାର୍ ଅଇସା ।

<sup>୫୦</sup> ସାଇଜ କର୍ବାକେ ତମେସେ ଆଗଡୁ ଅଇଲାସ୍ ଆରି ପରୁ ଅନି ଆରାମ୍ କରିଆଗାସ୍ । ଏବେ ମୁଈ ବାବୁଲିନି, ସେଟା ତମେ ସାରାଇଦେବାଟା ନିକ । ଉଜେ କାମ୍କର୍ବାଟାସେ ନାଇ, ମାତର୍ କାମ୍କର୍ବାକେ ମନ୍ କରି କର୍ବାକେ ତମେ ପର୍ତୁମ୍ ଆଗାସ୍ ।<sup>୫୧</sup> ତେବେ ତମେ ସେଟା କରା, ଆରି ଦେବାଟା ସାରାଇଦିଆସ୍ । ତମେ ବେସି ସାର୍ଦା ଅଇ ମୁଈଆଇଲାସ୍ । ସେନ୍ତାରିସେ ସାର୍ଦା ଅଇ ସାରାଇବାର୍ ଆତେ । ଗଟେକ୍ ଗଟେକ୍ ଲକ୍ ଜେଡକି ଦେଇପାରାସ୍, ସେଡକି ଦେଇ ସାରାଇଦିଆସ୍ ।<sup>୫୨</sup> କାଇକେ ବଇଲେ ଜଦି ତମ୍ବେକେ ଦାନ୍ ଦେବାକେ ମନ୍ଆତେ, ତମର୍ ପାର୍ବା ଏତେକ୍ ଦେଲାସ୍ନି । ତମେ ଦେବାଟା ପର୍ମେସର୍ ସଙ୍ଗଇସି । କାଇକେବଇଲେ, ତମେ ନାପାର୍ବା ଏଡକି ଦିଆ ବଲି ମାଙ୍ଗେ ନାଇ ।

<sup>୫୩</sup> ତମର୍ ବାଇମନ୍କେ ସାଇଜ କରିକରି ତମର୍ଟା ଉନା ଅଇଜାଅ ବଲି ମୁଈ ମନ୍ କରିନାଇ । ମାତର୍ ଏବେ ତମର୍ ଟାନେ ଜବର୍ ଆତେଜେ, ଜାକେ ଲଡାଆତେ, ତାକେ ସାଇଜ କର୍ବାଟା ଟିକ୍ ରଇସି ।<sup>୫୪</sup> ଏନ୍ତାରିକଲେ, ତମ୍ବେକେ ଜେଡେବେଲେ ଲଡା ପଡ୍ସି, ଆରି ସେମନ୍କେ ଜବର୍ ରଇଲେ, ସେମନ୍ ତମ୍ବେକେ ସାଇଜ କର୍ବାକେ । ଏନ୍ତାରି ଦୁଇ ବାଟର୍ ଲକ୍ ସମାନ୍ ଇସାବେ ପାଇବାଇ ।<sup>୫୫</sup> ଜେନ୍ତିକି ସାସ୍ତରେ ଲେକା ଅଇଆତେ, ଜେ ଅଦିକ୍ କାମାଈଲା, ତାର୍ଟା ଉର୍ରେ ନାଇ, ଆରି ଜେ ଉନା କାମାଈଲା, ତାକେ ଉନା ଅଏନାଇ ।

**ତିତସର୍ ମଇତର୍ମନ୍**

<sup>୫୬</sup> ଆମେ ପର୍ମେସର୍କେ ଦନିଅବାଦ୍ ଦେଲୁନି, ଜେନ୍ତି ତମ୍ବେକେ ସାଇଜ କର୍ବାକେ ମନ୍ କଲୁ, ସେନ୍ତାରିସେ ତିତସ୍କେ ମିସା ସାଇଜ କର୍ବାକେ ମନ୍ ଦେଲା ।<sup>୫୭</sup> ଆମେ ଜେଡେବେଲେ ତିତସ୍କେ ତମର୍ଟାନେ ଜିବାକେ କଇଲୁ, ସେ ଦାପ୍ରେ ଜିବାକେ ରାଜି ଅଇଲା । ସେ ନିଜେ ମନ୍ କରି ତମର୍ଟାନେ ଜାଇ ତମ୍ବେକେ ସାଇଜ କର୍ବି ବଇଲା ।<sup>୫୮</sup> ତାର୍ ସଙ୍ଗ୍ ଆରି ଗଟେକ୍ ବାଇକେ ମିସା ପାଟାଇଲୁନି । ଏ ଲକ୍ ଜିସୁକିରିସ୍ଟର୍ ସୁବ୍ବବର୍ ଜାନାଇଲାନିଜେ ସବୁ ବିସବାସିମନ୍ ତାକେ ସନ୍ମାନ୍

ଦେଲାଈନି । ୧୯ କାଲି ସେତୁକିରେ ନଏଁ, ତମେ ଦେଇରଇବା ଆଲାଦର୍ ଦାନ୍ ଆମେ ଲଡା ରଇବା ବାଇମନର୍ ଲଗେ ନେବାବେଲେ, ଆମର୍ ସଙ୍ଗ ଜିବାକେ ସବୁ ବିସ୍ବାସିମନ୍ ତାକେ ବାଟିକରି ପାଟାଇଆତଡ଼ । ଏଟା ପର୍ମେସର୍ ତାକ୍ପୁଟା ପାଇବାକେ ଆରି ତମ୍‌କେ ସାଇଜ କର୍ବାକେ ଆମେ ସାର୍‌ଦା ଅଇକରି ଏନ୍ତାରି କଲୁନି ।

୨୦ ଆମର୍ ଲାଗି ସେବା କାମର୍ ପାଇ ତମେ ଆଲାଦ୍ ସଙ୍ଗ ଦେଇ ଜମାଇରଇଲା ଏ ତାବୁ ଜନ୍‌ଟାକି ଆମେ ଦାରିଗାଲୁନି, । ଏ ତାବୁ ବିସଇନେଇ ଆମ୍‌କେ କେ ମିସା ନିନ୍ଦା ନ କରଡ଼ । ସେଟାପାଇ ଆମେ ଜାଗ୍‌ରଡ଼ ଅଇଆରୁ । ୨୧ କାଇକେ ବଇଲେ ଆମେ କର୍ବା କାମ୍ ସବୁ ଟିକ୍ ରଇବାର୍ ଆତେ । ଅବ୍‌କା ପର୍ମେସର୍ ଦେକ୍‌ବା ଇସାବେସେ ନାଇ ମାତର୍ ଲକ୍‌ମନ୍ ଦେକ୍‌ବା ଇସାବେ ମିସା ଅ ।

୨୨ ଆମେ ଆରି ଗଟେକ୍ ବାଇକେ ମିସା ତିତସର୍ ଦଲ୍ ସଙ୍ଗ ପାଟାଇଲୁନି । ଏ ବାଇକେ ଆମେ ବେସି ତର୍ ପରିକା କଲୁଆରୁ । ଆରି ତାକେ ସାଇଜ କର୍ବାକେ ବେସି ମନ୍ ଆତେ । ଏବେ ସେ ଅଦିକ୍ ମନ୍ କଲାନି । କାଇକେବଇଲେ ସେ ତମ୍‌କେ ଅଦିକ୍ ଆସା କଲାନି । ୨୩ ଏବେ ତିତସର୍ ବିସଇ ଜାନ୍‌ବାର୍ ଆଲେ ସେ ତମ୍‌କେ ସାଇଜ କର୍ବାକେ ମର୍ ସଙ୍ଗ କାମ୍ କଲାନି । ଆରି ସେ ଦୁଇଟା ବିନ୍ ବାଇମନ୍ ଇତିର୍ ବିସ୍ବାସିମନ୍ କଇଲାକେସେ ତାର୍‌ସଙ୍ଗ ଗାଲାନି । ସେମନ୍ କର୍ବା କାମର୍ ଲାଗି କିରିସଟ ତାକ୍ପୁଟା ଅଇସି । ୨୪ ସେମନ୍ ତେଇ କେଟ୍‌ଲେ ସରି ତମେ ଆଲାଦ୍ କରି ସେମନ୍‌କେ ତାକିନିଆ । ଜେନ୍ତାରି କି ତମର୍ ଆଲାଦ୍ ସଡ଼ ବଲି ସବୁ ବିସ୍ବାସିମନ୍ ଜାନ୍‌ବାଇ ଆରି ତମର୍ ବିସଇନେଇ ଆମେ ବଡ଼ପନ୍ ଅଇ ସବୁ କଇବାଟା, ସଡ଼ ବଲି ଜାନ୍‌ବାଇ ।

୯

ବିନ୍ ବିସ୍ବାସି ମନ୍‌କେ ସାଇଜ

୧ ଜିଉଦାଦେସେ ରଇବା ପର୍ମେସରର୍ ଲକ୍‌ମନ୍‌କେ ଦାନ୍ ଦେଇ ପାଟାଇତେରଇବା ତାବୁ ବିସଇ ତମ୍‌କେ ଆରି ମୁଇ ନ ଲେକି । ୨ କାଇକେବଇଲେ ମୁଇ ଜାନି ଆଟି, ତମେ ସବୁବେଲେ ସାଇଜ କର୍ବାକେ ସାର୍‌ଦା ଅଇଲାସ୍‌ନି । ଆରି ମୁଇ ବଡ଼ପନ୍ ଅଇ ତମର୍ ବିସଇନେଇ ମାକିଦନିଆର୍ ଲକ୍‌ମନ୍‌କେ କଇ ଆଟି । ମୁଇ କଇଲି “ଆକାୟାର୍ ବାଇବଇନିମନ୍ ପରୁଅନି ସାଇଜ କର୍ବାକେ ଜାଗିଆତଡ଼ ।” ସେମନ୍ ଏଟା ସୁନ୍‌ଲାବେଲେ ତାକର୍ ବିତ୍‌ରେ ଅନି ବେସି ଲକ୍ ଦେବାକେ ମନ୍ କଲାଇ । ୩ ଏବେ ମୁଇ ଏ ବାଇବଇନିମନ୍‌କେ ପାଟାଇଲିନି । ଜେନ୍ତାରି ତମର୍ ବିସଇନେଇ ମୁଇ ବଡ଼ପନ୍ ଅଇ କଇଲାଟା ଅବ୍‌କା କାତାଇ ନ ରଅ । ମାତର୍ ମୁଇ କଇଲାପାରା ତମେ ଦାନ୍ ଦେବା ତାବୁସଙ୍ଗ ଜାଗ୍‌ରଡ଼ ଅଇ ରୁଆ । ୪ ମାତର୍ ମାକିଦନିଆର୍ ଲକ୍‌ମନ୍ ଜଦି ମର୍ ସଙ୍ଗ ଆସି ତମେ ଜାଗ୍‌ରଡ଼ ନ ଅଇଲାଟା ଦେକ୍‌ଲେ, ତାକର୍ ମୁଆଟେ ଆମେ ଲାଜ୍ ଅଇଜିବାର୍ ଅଇସି । ଆରି ତମେ ମିସା ଲାଜ୍ ଅଇଜାଇସା । କାଇକେବଇଲେ ଆମେ ତମ୍‌କେ ବେସି ଆସାକରି ରଇଲୁ । ୫ ତେବେ ମୁଇ ବାବ୍‌ଲି, ଏ ବାଇବଇନିମନ୍, ମୁଇ ଜିବା ଆଗ୍‌ତୁ ସେମନ୍ ଜାଇକରି ଜନ୍ ଦାନ୍ ତମେ ଦେବୁ ବଲି କଇତେରଇଲାସ୍, ସେଟା ଜମାଇକରି ସଙ୍ଗକବାକେ ସେମନ୍‌କେ ବାବୁଜିଆ କର୍ବି । ଜଦି ଆମେ ସେନ୍ତାରି କର୍ବୁ ବଇଲେ, ଦାନ୍ ଦେବା ତାବୁ ମୁଇ ଆଇଲା ବେଲେ, ଜାଗ୍‌ରଡ଼ ଅଇରଇସି । ଆରି ସେଟା ତମେ ନିଜେ ମନ୍ କରି ଦେଲାସ୍ । ବାଦିଅ କଲାକେ ଦିଆସ୍ ନାଇ ବଲି ଜାନାପଡ଼ସି ।

୬ ତମର୍ ମନେ ର । ଜଦି ଗଟେକ୍ ଚାସି ଉନା ବିଅନ୍ ବୁନ୍‌ସି, ସେ ଉନା ପସଲ୍ ପାଇସି । ଆରି ଜନ୍ ଚାସି ବୁଡେକ୍ ବିଅନ୍ ବୁନ୍‌ସି, ସେ ବୁଡେକ୍ ପସଲ୍ ପାଇସି । ୭ ଦାନ୍ ଦେବାକେ ତମେ ଜେନ୍ତା କାତାବାର୍‌ତା ଅଇଆଟାସ୍, ସେନ୍ତାରି ଦେବାର୍‌ଆତେ । ଦୁକ୍

ଅଇକରି ନାଇ କି କେ ବାଇଦ କଲାପାଇ ନାଇ । କାଇକେବଇଲେ ତମେ ସାର୍ଦଦା ସଙ୍ଗ୍ ଦେଲେ ପର୍ଯ୍ୟେସର୍ ସେଟା ମନ୍ କର୍ସି ।<sup>୮</sup> ଆରି ତମ୍ଭକେ ଜେଡ଼କି ଲତା ଆରେ, ତାର୍ଡେଇଅନି ଅଦିକ୍ ପର୍ଯ୍ୟେସର୍ ଦେଇ ପାର୍ସି । ଜେନ୍ତାରିକି ନିଜର୍ପାଇ ଜେଡ଼କି ଦର୍କାର୍, ସେଡ଼କି ତମ୍ଭର୍ଟାନେ ସବୁ ବେଲେ ରଇସି ଆରି ବିନ୍ ଲକ୍ମନ୍ଦକେ ସାଇଜ କର୍ବାକେ ମିସା ଜବର୍ ରଇସି ।<sup>୯</sup> ସାସ୍ତର୍ କଇଲାପାରି

ଲତାକେ ଆଇବା ଲକ୍ମନ୍ଦକେ ସେ ଜବର୍ ଦେଇସି ଆରି

ତାର୍ ଜିବନ୍ ଦୁକାଇଲାଟା କେବେ ମିସା ନ ସାରେ ।

<sup>୧୦</sup> ଆରି ପର୍ଯ୍ୟେସର୍ ଜେ କି ବୁନ୍ଦାକେ ବିଅନ୍ ଆରି କାଇବାକେ କାଦି ଦେଇସି, । ସେ ତମ୍ଭକେ ଜେଡ଼କି ବିଅନ୍ ଦର୍କାର୍ ସେଡ଼କି ଦେଇସି । ଆରି ସେଟା ବଡ଼କରି ବେସି ପସଲ୍ ଅଇସି । କାଇକେବଇଲେ ତମେ ଜବର୍ ଦେଲାସିନି ।<sup>୧୧</sup> ସେ ତମ୍ଭକେ ସାଉକାର୍ କରାଇସି । ଜେନ୍ତାରି କି ତମେ ସବୁବେଲେ ଜବର୍ ଦେଇପାରାସ୍ । କାଇକେବଇଲେ ଆମର୍ଟାନେଅନି ପାଇରଇବା, ତମେ ଦେଲା ଦାନର୍ପାଇ ବେସି ଲକ୍ ପର୍ଯ୍ୟେସର୍କେ ଦନିଅବାଦ୍ ଦେବାଇ ।<sup>୧୨</sup> ତମେ କର୍ବା ଏ ନିକ କାମର୍ ଲାଗି ପର୍ଯ୍ୟେସର୍ର ଲକ୍ମନ୍ଦକେ ଲତାକେ ଆଇବା ବିସଇ ପୁରାପୁରନ୍ ଅଇଲାନି । ଆରି ପର୍ଯ୍ୟେସର୍ଟାନେ ଦନିଅବାଦ୍ ଆଜାତି ଅଇଲାପାରି ମିସା ଅଇଲାନି ।<sup>୧୩</sup> ତମେ କର୍ବା ଏ ନିକ କାମ୍ ଦେକିକରି ଲକ୍ମନ୍ଦ ପର୍ଯ୍ୟେସର୍କେ ମଇମା କର୍ବାଇ । କାଇକେବଇଲେ ବିସ୍ବାସ୍ କରିରଇବା କିରିସଟର୍ ସୁବ୍‌କବର୍ ତମେ ମାନ୍‌ଲାସିନି । ଆରି ସେମନ୍ଦକେ ଆରି ବିନ୍‌ଲକ୍ମନ୍ଦକେ ମିସା ଜବର୍ ଦେଲାସିନି ।<sup>୧୪</sup> ପର୍ଯ୍ୟେସର୍ ଜିବନ୍ ଦୁକାଇ ତମ୍ଭକେ ଦୟା ଦେକାଇଲାପାଇ ସେମନ୍ଦ ବେସି ଆଲାଦ୍ ଅଇକରି ତମ୍ଭର୍ପାଇ ପାର୍ଡନା କର୍ବାଇ ।<sup>୧୫</sup> ପର୍ଯ୍ୟେସର୍ର ବେସି ମୁଲିଅ ରଇବା ଦାନର୍ପାଇ ଆମେ ତାକେ ଦନିଅବାଦ୍ ଦେଉଁ ।

## ୧୦

ପନି କାତା ବିରୁଦେ ପାଉଲ୍ ଉତର୍ ଦେବାଟା

<sup>୧</sup> ମୁଇ ପାଉଲ୍ ତମ୍ଭକେ ବାବୁଜିଆ କଲିନି, ମୁଇ ତମ୍ଭର୍ ସଙ୍ଗ୍ ରଇଲାବେଲେ, ତମ୍ଭକେ ଲାଗ୍‌ବାକେ ଡର୍ସି ବଲି କେଡେଲକ୍ କଇଲାଇନି । ମାତର୍ ଲେକ୍‌ବାକେ ସାଆସ୍ ଅଇକରି ବାଦ୍‌ଲାପାରି ଲେକ୍‌ଲାନି ବଲି କଇଲାଇନି । ଆମେ କିରିସଟର୍ ସଙ୍ଗ୍ ଗାଲୁନି, ଜେ କି ବେସି ସୁଆଲ୍ ଆରି ଦରମ୍ । ସେଟା ନେଇକରି ବାବୁଜିଆ କଲିନି ।<sup>୨</sup> ମୁଇ ତେନେ ଆଇଲାବେଲେ ତମ୍ଭର୍ ଚଲାଟଲ୍‌ତି ନିକ ଅଇରଅ । ଜେନ୍ତାରି କି ମୁଇ ତମ୍ଭକେ ଲାଗ୍‌ବାକେ ନ ପଡେ । ମାତର୍ ଜନ୍ ଲକ୍ମନ୍ଦ ଏ ଜଗତର୍ ଲକ୍ ପାରି ନିଜର୍ ମନ୍ କଲା ଇସାବେ ଗାଲାଇନି ବଲି ଆମର୍ ବିସଇନେଇ କଇଲାଇନି, ସେମନ୍ଦକେ ଲାଗ୍‌ବାକେ ମୁଇ ନ ଡରି ।<sup>୩</sup> ଆମେ ଏ ଜଗତେ ବୁର୍ଲୁନି ଏଟା ସଡ଼, ମାତର୍ ଲକ୍ମନ୍ଦର୍ ଗିଆନ୍ ସଙ୍ଗ୍ ଜୁଜିକରି ରଉନାଇ ।<sup>୪</sup> ଜନ୍ ଆଡ୍ ଆତିଆର୍ ସଙ୍ଗ୍ ଆମେ ଜୁଜୁଲୁନି, ସେଟା ଲକ୍ମନ୍ଦର୍ଟାନେଅନି ଆସେନାଇ, ମାତର୍ ସେଟା ବେସି ବପୁର୍ ସଙ୍ଗ୍ ରଇବା ପର୍ଯ୍ୟେସର୍ ଟାନେଅନି ଆଇସି । ଏ ବପୁ ସଙ୍ଗ୍ ପର୍ଯ୍ୟେସର୍ର ବିରୁଦେ ତାର୍ ସଡ଼ୁମନ୍ ଉଟାଇରଇବା ଡାଟର୍ କତି ଜାକ ଆରି ଲକ୍ମନ୍ଦର୍ ମନ୍ ବିଡ଼ରେ ଦଦାପେଲା ଅଇବା ଚିନ୍ତା ସବୁ ଆମେ ଆରାଇପାରୁ ।<sup>୫</sup> ବଡ଼ପନ୍ ଅଇବା ଲକ୍ମନ୍ଦ ପର୍ଯ୍ୟେସର୍ର ବିରୁଦେ ନିଜ୍‌କେ ଉଟାଇବାଟା ଆରି ଜେଡ଼କି ସବୁ ଚିନ୍ତା ପର୍ଯ୍ୟେସର୍ର ଗିଆନ୍ ଉପରେ ଉଡ଼ସି, ସେଟା ସବୁ ଜାକ ଆମେ ବାଦିକରି କିରିସଟକେ ମାନଡ୍ ବଲି ସର୍ପାଇବୁ ।<sup>୬</sup> ତମେ କିରିସଟର୍ ଆଦେସ୍ ସବୁ ମାନ୍‌ଲାଟା ଦେକାଇଲା ପଡେ, ତେଇ ରଇବା ଜେଡ଼କି ସବୁ ବିସ୍ବାସିମନ୍,

ଜନ୍ମଲକ୍ଷ୍ମୀମନ୍ କି ତାରୁ ଆଦେସ୍ ମାନୁବାକେ ମନ୍ କରତ୍ ନାଇ, ସେମନ୍‌କେ ଡଣ୍ଡ ଦେବାକେ ଆମେ ଜାଗରତ୍ ଅଇକରି ରଇବୁ ।

୭ ତମେ ଲକ୍ଷ୍ମୀମନ୍ ବାଇରତ୍ ବିସଇ ଦେକ୍‌ଲାସିନି । କାଇକେବଇଲେ ତମର୍ ବିତ୍‌ରେ କେତେଲକ୍ ବୁଲ୍ ଚିନ୍ତାକରି ଆମେସେ କିରିସ୍‌ଟର୍ ସତ୍ ସେବାକରୁମନ୍ ବଲି ବାବ୍‌ଲାଇନି । ସେମନ୍ ଆରିତରେକ୍ ନିଜର୍ ବିସଇ ଚିନ୍ତାକରି ଦେକ୍‌ବାରୁ ଆତେ । କାଇକେବଇଲେ ସେମନ୍ ଜେନ୍ତାରି ଆତତ୍ ଆମେ ମିସା ସେନ୍ତାରି କିରିସ୍‌ଟର୍ ସତ୍ ଦାସ୍ ।<sup>୬</sup> ତମର୍ ଉପ୍‌ରେ ଆମର୍ ଅଦିକାରୁ ଆତେ । ସେଟା ପର୍‌ମେସର୍ ଆମ୍‌କେ ଦେଇରଇଲା । ମାତର୍ ସେ ଅଦିକାରତ୍ ବିସଇନେଇ ଜଦି ମୁଇ ବେସି ବଡ୍‌ପନ୍ ଅଇଲିଆଚି, ସେଟାପାଇ ମକେ ଲାଜ୍ ନ ଲାଗେ । ତମ୍‌କେ ନସ୍‌ଟ କର୍‌ବା ଅଦିକାର ସେ ମକେ ଦେଏନାଇ, ମାତର୍ ଜେନ୍ତୁ କି ତମର୍ ବିସ୍‌ବାସ୍ ଡାଟ୍ କରାଇବି ।<sup>୭</sup> ଏ ଚିଟି ଲେକିକରି ମୁଇ ତମ୍‌କେ ଡରାଇବାକେ ମନ୍ କରିନାଇ ।<sup>୮</sup> ମାତର୍ ତମ୍‌କେ ଲେକ୍‌ଲାବେଲେ ଦମକାଇ କରି ଲେକ୍‌ଲିନି ବଲି କେତେଲକ୍ କଇଲାଇନି । ମାତର୍ ତମର୍ ସଙ୍ଗ୍ ରଇଲାବେଲେ ମୁଇ ଦୁର୍‌ବଲ୍ ଅଇକରି ମର୍ କଇଲା ପଦ୍ କାଇ ମୁଲିଅ ନାଇ ପାରା ରଇଲା ।<sup>୯</sup> ଜନ୍ ଲକ୍ଷ୍ମୀମନ୍ ଏନ୍ତାରି କାତା ଅଇବାଇ, ଚିଟିଟାମେ ଆମେ ଜନ୍ ବିସଇ ଲେକିଆରୁ, ତେଇ ଆଇଲେ, ସମାନ୍ ବିସଇସେ କର୍‌ବୁ ବଲି ସେମନ୍ ଜାନ୍‌ବାରୁ ଆତେ ।

୧୦ ଜନ୍‌ଲକ୍ଷ୍ମୀମନ୍ ଆମେ ନିଜେ ବଡ୍‌ଲକ୍ ବଲି ବାବିଅଇଲାଇନି, ସେମନ୍‌ର୍ ସଙ୍ଗ୍ ସମାନ୍ ଅଇବାକେ ଆମେ ମନ୍ କରୁନାଇ । ସେମନ୍ ସବୁର୍‌ଟାମେ ଅନି ଆମେ ଆକା ଜାନିଆରୁ ବଲି ବୁଲ୍ ଚିନ୍ତା କଲାଇନି । ସେମନ୍ ସତଇସେ ବକୁଆ । ନିଜ୍‌କେ ନାପ୍‌ବାକେ, ନାପି ଅଇବାଟା ନିଜେ ତିଆର୍ କଲାଇନି । ନିଜ୍‌କେ ବିଚାରୁ କର୍‌ବାକେ ପରିକା ନିଜେ ତିଆର୍ କଲାଇନି ।<sup>୧୧</sup> ମାତର୍ ଆମେ, ଆମର୍ କାମ୍ ବିସଇନେଇ ଅଦିକ୍ ବଡ୍‌ପନ୍ ଅଉନାଇ । ଆମେ ଜେଡ୍‌କି ବଡ୍‌ପନ୍ ଅଇବାରୁ ଆତେ ସେଡ୍‌କି ବଡ୍‌ପନ୍ ଅଇବୁ । ପର୍‌ମେସର୍ ଆମ୍‌କେ ଜେଡ୍‌କି କାମ୍ ଦେଲାଆତେ, ସେଡ୍‌କି କାମେ, ଆମେ ବଡ୍‌ପନ୍ ଅଇବୁ । ଆରି ତମର୍ ବିତ୍‌ରେ ଆମେ କର୍‌ବା କାମ୍ ମିସା ତେଇ ମିସ୍‌ଲା ଆତେ ।<sup>୧୨</sup> ପର୍‌ମେସର୍ ଆମ୍‌କେ ଦେଇରଇବା କାମେ ତମେ ମିସ୍‌ଲାପାଇ କିରିସ୍‌ଟର୍ ସୁବ୍‌କବର୍ ନେଇକରି ଆଇଲାବେଲେ, ପର୍‌ମେସର୍ ଆମ୍‌କେ ଦେଲା କାମେଅନି ବାଇରେ ଜାଏ ନାଇ ।<sup>୧୩</sup> ତେବର୍‌ପାଇ ବିନ୍ ଲକର୍ କାମ୍ କଲାଟା ନେଇକରି ଆମେ ନିଜେ ଡାକ୍‌ପୁଟା ଅଉନାଇ । ସେ କାମ୍ କର୍‌ବାକେ ପର୍‌ମେସର୍ ଆମ୍‌କେ ଦେଏ ନାଇ । ମାତର୍ ତମର୍ ବିସ୍‌ବାସ୍ ଡାଟ୍ ଅ ବଲି ଆମେ ମନ୍ କଲୁନି । ଜେନ୍ତୁକି ତମର୍ ଜାଗାଇ ଆମେ କର୍‌ବା କାମ୍ ଅଦିକ୍ ଅଦିକ୍ ଅଇସି । କାଇକେବଇଲେ ପର୍‌ମେସର୍ ଆମ୍‌କେ ଦେଇରଇବା କାମେଅନି ଅଦିକ୍ କର୍‌ବାକେ ଆମେ ମନ୍ କରୁନାଇ ।<sup>୧୪</sup> ସେନ୍ତାରିଆଲେ ଆମେ ଜାଇକରି କିରିସ୍‌ଟର୍ ସୁବ୍‌କବର୍ ତମର୍ ଜାଗାଇ ଅନି ତେନ୍‌କର୍ ଜାଗା ମନ୍‌କେ ଜାନାଇବୁ । କାଇକେବଇଲେ ଆମ୍‌କେ ଦେଇରଇବା କାମେସେ ଆମେ ବଡ୍‌ପନ୍ ଅଇବୁ ବଲି ମନ୍ କଲୁନି । ବିନ୍ ଲକ୍ କିରିରଇବା କାମ୍‌ଟାମେ ବଡ୍‌ପନ୍ ନ ଅଉ ।

୧୧ ସାସ୍‌ତର୍ କଇଲାପାରା “ଜେ ବଡ୍‌ପନ୍ ଅଇବାକେ ମନ୍ କଲାନି, ସେ ମାପୁରୁ କଲା କାମେସେ ବଡ୍‌ପନ୍ ଅଇବାରୁ ଆତେ ।”<sup>୧୫</sup> କାଇକେ ବଇଲେ ଗଟେକ୍ ଲକ୍ ନିଜେ ବଲ୍ ବଲାଅଇଲେ, ମାପୁରୁ ତାକେ ଅଦିକାର ନ ଦେଏ । ମାତର୍ ମାପୁରୁ ଦେକ୍‌ବା ଇସାବେ ଜେ ନିକ, ସେ ତାର ନିଜର୍ ଲକ୍ ଅଇସି ।



<sup>୧</sup> ଜଦି ମୁଞ୍ଚ ବକୁଆ ଲକ୍ଷ୍ମୀପାଠା କାତା କଲଲେ ମିସା ତମେ ସେଟା ସୁନି ତିମରା ଅଇରୁଆ । <sup>୨</sup> ମାପରୁ ତମର ବିସଇନେଇ ମର ଲକ୍ଷ୍ମୀମନ୍ ମକେସେ ନାମିକରି ରଅତ୍ ବଲି ଦାରିଆତେ । ସେନ୍ତସେ ମୁଞ୍ଚ ମିସା ତମକେ ପରମେସରକେସେ ମନ୍ କରା ବଲି ଆସା କଲିନି । ସୁକଲ୍ ଅଇରଇବା ଗଟେକ୍ ଦାଙ୍ଗଡ଼ିପାଠା ମୁଞ୍ଚ ତମକେ ଗଟେକ୍ ଦାଙ୍ଗଡ଼ାର ପାଇ ମାଙ୍ଗନି କଲିଆତି । ସେ ଅଇଲାନି ନିଜେ କିରିସଟ । <sup>୩</sup> ମୁଞ୍ଚ ତମର ବିସଇନେଇ ବାବି ବାବି ଆତି । କେତେବେଲେ ତମର ମନର ତିନ୍ତା କିରିସଟତେଇ ଅନି ବିନ୍ ବାଟେ ଜାଇସି ଆରି ତାରପାଇ ରଇବା ତମର ଆଲାଦ୍ ପୁରାପୁରୁନ୍ ମନ୍ ସଙ୍ଗ୍ ନ ରଏ । ଅବା ପାରା ତମେ ନାତାଇଅଇସା ମିସା । ଜେନ୍ତକି ସେ ଗଟେକ୍ ଚତୁର ସାପର କାତା ଦାରି ନାତାଇଅଇଲା । <sup>୪</sup> କାଇକେବଇଲେ, ଜଦି କେ ମିସା ତମର ଲଗେ ଆସି କରି ଆମେ ତମକେ ଜାନାଇରଇବା ଜିସୁର୍ ବିସଇକେ ଚାଡ଼ି, ବିନ୍ ସିକିଆ ଦେଲେ ତମେ ସାରଦା ଅଇସା । ସୁକଲ୍ ଆଡ଼ମାକେ ନ ପାଇକରି ବିନ୍ ଆଡ଼ମାକେ ପାଇଲାସୁନି । ଆରି ସେମନ୍ ଜନ୍ ସୁବକବର୍ ଜାନାଇଲାଇନି, ସେଟା ଆମେ ଜାନାଇବା ସୁବକବର୍ ନଏ ।

<sup>୫</sup> ତମର ଟାନେ ଜେଡ଼କି ସିକାଉମନ୍ ଆଚଡ଼ । ଜଦି ସେମନ୍ ଆମେ ସବୁଟାମେଅନି ମୁକିଅ ପେରିଡ଼ମନ୍ ବଲି ନିଜେ କଇଅଇଲେ ମିସା, ସେମନ୍ ମରଟାନେଅନି ବଡ଼ ବଲି ମୁଞ୍ଚ ବାବି ନାଇ । <sup>୬</sup> ମୁଞ୍ଚ ଅଦିକ୍ କାତା କଇ ନାପାରଲେ ମିସା, ସଡ଼ ସିକିଆ ଜାନିଆତି । ଆରି ମୁଞ୍ଚ ତମକେ ଜେତେବେଲେ ଜାକ ଏ ସିକିଆ ଦେଇତେରଇଲି, ଏଟା ତମକେ ଜାନାଇଆତି ।

<sup>୭</sup> ତମକେ ମୁଞ୍ଚ ଜେତେବେଲେ ସୁବକବର୍ ଜାନାଇରଇଲି, କେବେ ମିସା ମର ବୁଡ଼ି ମାଙ୍ଗି ନାଇ । ତମକେ ମୁକିଅ ଲକ୍ଷ୍ମୀ କରାଇବାକେ ମୁଞ୍ଚ ନିଜେ ତଲକେ ଅଇଲି । ମୁଞ୍ଚ କିରଇଲାଟା ବୁଲ୍ ରଇଲା କି ? 「 ମୁଞ୍ଚ ତମର ବିଡ଼ରେ ସେବା କାମ୍ କଲାବେଲେ, ବିନ୍ ମଣ୍ଡଲିର ଲକ୍ଷ୍ମୀମନ୍ ମରପାଇ କରତ ଅଇଲାଟା ଦେଲାଇ । ତମକେ ସାଇଜ କରବାକେ ତାରଟାନେଅନି ମୁଞ୍ଚ ଚରାଇକରି କଲାପାରା ଅଇଲା । <sup>୯</sup> ମୁଞ୍ଚ ତମରଟାନେ ରଇଲାବେଲେ ମକେ ଲଡ଼ା ରଇଲାବେଲେ, ତମରଟାନେଅନି ମାଙ୍ଗିନାଇ । କାଇକେବଇଲେ ମାକିଦନିଆର୍ ବାଇବଇନିମନ୍ ମକେ ଜାଇଟା ଲଡ଼ା ରଇଲା, ସେଟା ସବୁ ଆନିଦେଲାଇ । ପୁରବେ ଜେନ୍ତ ରଇଲା, ପଡ଼କେ ମିସା ମୁଞ୍ଚ ତମରଟାନେଅନି କାଇଟା ନ ମାଙ୍ଗି । <sup>୧୦</sup> ମୁଞ୍ଚ ବଡ଼ପନ୍ ଅଇକରି ଏନ୍ତାରି କଇବାଟା ଆକାୟାର୍ କେ ମିସା ମର ବିରୁଦେ କଇନାପାରତ୍ । ମୁଞ୍ଚ କଇବାଟା ସଡ଼ । କାଇକେବଇଲେ କିରିସଟ ମରସଙ୍ଗ୍ ଆତେ । <sup>୧୧</sup> ମକେ ଆଲାଦ୍ ନାଇକେ ମାଙ୍ଗେ ନାଇ ବଲି ବାବଲାସୁନି କି ? ମାତର ମୁଞ୍ଚ ତମକେ ସତଇସେ ଆଲାଦ୍ କରବାଟା ପରମେସର ଜାନେ ।

<sup>୧୨</sup> ମୁଞ୍ଚ ତମରଟାନେ ଅନି କାଇକେ ବୁଡ଼ି ନେଇନାଇ ବଇଲେ, ଜେନ୍ତାରିକି ତମର ଟାନେ ରଇବା ବିନ୍ ପେରିଡ଼ମନ୍ ବଡ଼ପନ୍ ଅଇକରି, ଆମେ ପରମେସର ପାଇ କରବା କାମ୍ ସମାନ୍ ଆତେ ବଲି କଇନାପାରତ୍ । <sup>୧୩</sup> ସେମନ୍ ସଡ଼ ପେରିଡ଼ମନ୍ ନଅତ୍ । ସେମନ୍ ମିରୁଆଟାମନ୍ । ଜେ କି ନିଜର ନିଜର କାମ୍ ବିସଇନେଇ ମିଡ଼ କଇବାଇ । ଆରି ସେମନ୍ ମିଡ଼ ବେସ୍ ଦାରିକରି ଆମେ ସଡ଼ ପେରିଡ଼ ବଲି ଦେକାଇଅଇବାଇ । <sup>୧୪</sup> ଏଟା ଦେକି କାବାଅଇ ଜାଆ ନାଇ । କାଇକେବଇଲେ, ସଇତାନ୍ ମିସା ନିଜେ ବାଦ୍ଲାଅଇ ଉଜଲ୍ ଦୁଡ଼ ପାରା ଦେକାଇ ଅଇସି । <sup>୧୫</sup> ସେନ୍ତା ଆଲେ ତାର ସେବାକାମ୍ କରୁମନ୍ ମିସା ବାଦ୍ଲାଅଇ ଦରମ୍ କାମ୍ କରୁମନ୍ ପାରା ଦେକାଇଅଇଲେ, ସେଟା କାବା ଅଇଜିବା ବିସଇ ନଏ । ସାରାସାରି ସେମନ୍କେ ତାକର କିରଇବା କାରାପ୍ କାମ୍ ଇସାବେ ଡ଼ଣ୍ଡୁ ମିଲ୍ସି ।

\* ୧୧:୯ ୧୧:୯ ପିଲିପିୟ ୪:୧୫-୧୮

ପେରିଡ଼ ସିସ୍ ଇସାବେ ପାଉଲର ଦୁକ୍

୧୭ ମୁଇ ଏ କାତା ଆରିତରେକ୍ କଇଲିନି ଜେ, ଏଟା ଗଟେକ୍ ବକୁଆଟା, ବଲି ବାବାନାଇ । ଜଦି ତମେ ମକେ ବକୁଆ ବଲି ମାନିଲାସ୍ତନି, ମୁଇ କଇବା ଏ ବଡ଼ପନର୍ କାତା ଆରି ଅଲପ୍ ସୁନାତା । ସେନ୍ତାର୍ କଲେ ମୁଇ ବଡ଼ପନ୍ ଅଇ କାତା ଅଇବି । ୧୭ ମୁଇ ଏ କଇବା କାତାମନ୍ ମାପରୁ ମକେ କଅ ବଲି ମନ୍ କରେନାଇ । ମାତର୍ ଏ କାତା ଗଟେକ୍ ବକୁଆ ଲକର୍ପାରା ବଡ଼ପନ୍ ଅଇକରି କଇଲିନି । ୧୮ କାଇକେବଇଲେ, ଏ ଜଗତେ ତାକର୍ ନିଜର୍ କାମ୍ ବିସଇନେଇ ବଡ଼ପନ୍ ଅଇ କଇବାଲକ୍ ବେସି ଆଚଡ଼ । ମୁଇ ମିସା ମର୍ ବିସଇନେଇ ବଡ଼ପନ୍ ଅଇକରି କଇବି । ୧୯ ତମେ ସବୁ ବୁଦି ରଇବା ଲକ୍ ବଲି ବଲାଇ ଅଇଲାସ୍ତନି । ମାତର୍ ବକୁଆ ମନର୍ କାମ୍ ଦେକ୍ଲେ ରୁପ୍ ଅଇଆଟାସ୍ । ୨୦ ତେବର୍ପାଇ ସେମନ୍ ଜଦି ତମ୍‌କେ ଗତିଦାଙ୍ଗ୍‌ତା କରି ସଙ୍ଗାଇଲେ, କି ତମର୍ ଦନ୍ ସପତି ନେଲେ, କି ତମ୍‌କେ କାଇଆଲେ ପାନ୍ଦେ ପାକାଇଲେ, କି ଆମର୍ ତଲେ ରୁଆ ବଲି କରି କଇଲେ କି ଏନ୍ତାରି କି କେ ତମର୍ ଗାଲେ ଚାପଡ଼ ମାର୍‌ଲେ ମିସା ତମେ ମୁରୁଟି କରି ରଇସା । ୨୧ ସେ ସବୁ କାରାପ୍ ବିସଇ କରବାକେ ଆମ୍‌କେ ସାଆସ୍ ନ ରଇଲା । ଏଟା ସଡ଼ ବଲି କଇବାକେ ମୁଇ ଲାଜ୍ ଅଇନାଇ ।

ମାତର୍ ସେମନ୍ କାଇ ବିସଇନେଇ ବଡ଼ପନ୍ ଅଇ କାତା ଅଇବାକେ ସାଆସ୍ କରବାଇ, ସେକ୍ତି ମୁଇ ମିସା ସାଆସ୍ କରବି । ଦେକା ! ମୁଇ ଏଟା ଗଟେକ୍ ବକୁଆ ଲକର୍ପାରା କାତା ଅଇଲିନି । ୨୨ ସେମନ୍ ଜଦି ଆମେ ଏବ୍‌ରି ବସ୍‌ର୍ ଲକ୍ ବଇଲେ, ମୁଇ ମିସା ତେଇର୍‌ଟାସେ, ଜଦି ଆମେ ଇସ୍‌ରାଏଲର୍ ନାତିତିତି ବଇଲେ, ମୁଇ ମିସା ତେଇର୍ ଗଟେକ୍ । ଅବ୍‌ରାଆମ୍ ଆମର୍ ଆନିଦାଦି ବଇଲେ, ସେ ମର୍ ମିସା ଆନିଦାଦି । ୨୩ ☆ସେମନ୍ ଜଦି ଆମେ କିରିସ୍‌ଟର୍ ଦାଙ୍ଗ୍‌ତା ବଇଲେ, ମୁଇ ମିସା ଗଟେକ୍ ଦାଙ୍ଗ୍‌ତା । ମାତର୍ ସେମନର୍ ଟାନେ ଅନି ମୁଇ ଅଦିକ୍ ନିକ ଦାଙ୍ଗ୍‌ତା । ନିଜ୍‌କେ ବଡ଼ କରାଇ ମୁଇ ଗଟେକ୍ ବାୟାଲକର୍ ପାରା କାତା ଅଇଲିନି ବଲି ଜାନିଆତି । ମୁଇ ତାକର୍‌ଟାନେ ଅନି ଅଦିକ୍ ଆବଡ଼ କାମ୍ କରିଆତି, ଅଦିକ୍ ତର୍ ବଦିଗରେ ରଇଆତି, ଅଦିକ୍ ତର୍ ମାଡ଼ କାଇଆତି, ଅଦିକ୍ ତର୍ ମଲାସମାନ୍ ଅଇଜାଇରଇଲି । ୨୪ ମୁଇ ଜିଉଦି ଲକ୍‌ମନର୍‌ଟାନେଅନି ପାଁଟ୍‌ପାଲି ତିରିସ୍ ନ ତାଙ୍ଗ୍ ମାଡ଼କାଇ ଆତି । ୨୫ ☆ରମିଅମନର୍‌ଟାନେ ତିନ୍‌ତର୍ କର୍‌ତା ସଙ୍ଗ୍ ମାଡ଼କାଇ ଆତି । ଗଟେକ୍‌ତର୍ ସେମନ୍ ମକେ ପାକନା ମାର୍‌ଲାଇ । ମୁଇ ଜନ୍ ଜାଜେ ଜାଇତେରଇଲି, ସେ ଜାଜ୍ ତିନ୍‌ତର୍ ବୁଡି ଜାଇରଇଲା । ତରେକ୍ ମର୍ ଜାଜ୍ ନସିଗାଲାକେ ମୁଇ ଗଟେକ୍ ଦିନ୍ ଆରି ଗଟେକ୍ ରାତି, ସମ୍‌ଦୁରେ ଉପକି ଅଇ ରଇଲି । ୨୬ ☆ମୁଇ ଜିବାବେଲେ ବାଟେ, ମର୍ ମୁଆଟେ କେତେକ୍ କେତେକ୍ ବିପଦ୍ ଆଇଲା । ଜେକ୍‌କି, ବନିଆର୍ ବିପଦେ, ଚର୍‌ମନର୍ ବିପଦେ, ମର୍ ଜିଉଦି ବାଇମନର୍ ବିପଦେ, ଜିଉଦି ନ ଅଇଲା ଲକ୍‌ମନର୍ ବିପଦେ, ସଅରେ ଅଇରଇବା ବିପଦେ, କିନରା ଜାଗା ମନର୍ ବିପଦେ, ଡଙ୍ଗ୍‌ରର୍ ଜୁଡ଼ ଜିଆଦ୍ ମନର୍ ବିପଦେ, ସମ୍‌ଦୁରେ ବନିଆ ଆଇଲାବେଲର୍ ବିପଦେ ଆରି କିରିସ୍‌ଟର୍ ବିସ୍‌ବାସିମନ୍ ବଲି ନାତାଇ ଅଇରଇବା ଲକ୍‌ମନର୍ ବିପଦେ । ୨୭ ମର୍ କାମ୍ ଆବଡ଼ କାମ୍ ଆରି ମୁଇ ସବୁବେଲେ ଆବଡ଼ କାମ୍ କଲିଆତି । ବେସି ତର୍ ରାତିଆ ସଇ ନାପାର୍‌ଲି, ବୁକେ ସସେ ରଇଆତି, ବେସି ତର୍ ମକେ କାଦି କେଟେ ନାଇ, ପିନ୍‌ବାକେ ବସ୍‌ତର୍ ନାଇ, କି ରଇବାକେ ଗର୍ ନ ରଇଲା । ୨୮ ସେ ସବୁ ବିସଇ ମର୍‌ପାଇ ଅଇରଇଲା । ମାତର୍ ଆରି ମର୍ ବିନ୍ ବିନ୍ ଦୁକ୍ କସ୍‌ଟ ଆଟେ । ସବୁ ମାଣ୍‌ଲିର୍ ପାଇ ଚିନ୍ତା କରି ମୁଇ ଦୁକ୍ କସ୍‌ଟ ପାଇଲିନି । ୨୯ ଜଦି କିରିସ୍‌ଟର୍ ଲଗେ ରଇବା କାର୍

☆ ୧୧:୨୩ ୧୧:୨୩ ପେରିଡ଼ ୧୭:୨୩ ☆ ୧୧:୨୫ ୧୧:୨୫ ପେରିଡ଼ ୧୭:୨୨; ପେରିଡ଼ ୧୪:୧୯ ☆ ୧୧:୨୭ ୧୧:୨୭ ପେରିଡ଼ ୯:୨୩; ପେରିଡ଼ ୧୪:୫



ବିସ୍‌ବାସ୍‌ ଉନା ଅଇସି ବଇଲେ ମକେ ମିସା ଦୁର୍‌ବଲ୍‌ ଲାଗ୍‌ସି । କେ ଜଦି ପାପ୍‌ କଲେ, ତାର୍‌ ଲାଗି ମୁଇ ବେସି ଦୁକ୍‌ କସ୍‌ଟ୍‌ ପାଇଲିନି ।

୩୦ ମୁଇ ବଡ଼ପନ୍‌ ଅଇ କାତା ଅଇବାକେ ମନ୍‌ କରନାଇ । ଜଦି ସେନ୍ତ୍ରି କରବାର୍‌ ଆଲେ, ମକେ ଗଟିରଇବା, ଦୁକ୍‌ କସ୍‌ଟ୍‌ ବିସଇନେଇ ମୁଇ ବଡ଼ପନ୍‌ ଅଇବି । ସେନ୍ତ୍ରାର୍‌ଆଲେ ମୁଇ କେତେ ଦୁର୍‌ବଲ୍‌ ଆଟି ବଲି ତମେ ଜାନ୍‌ସା । ୩୧ ମୁଇ ତମ୍‌କେ ଜେଡ଼କି ବିସଇ କଇଲି, ସେଟା ସବୁ ସତ୍‌ । ଗଟେକ୍‌ ମିସା ମିଡ଼ ନଏଁ । ଆମର୍‌ ମାପରୁ ଜିସୁର୍‌ ବାବା ପର୍‌ମେସର୍‌ ଏଟା ଜାନେ । ସେ ଜୁଗ୍‌ ଜୁଗ୍‌ ଡାକ୍‌ପୁଟା ପାଅ । ୩୨ ଧୁରବେ ମୁଇ ଦାମାସକାସେ ରଇଲା ବେଲେ ରାଜା ଆରେଡାସରର୍‌ ତଲେ ଗଟେକ୍‌ ସାସନ୍‌ କାରିଆ ରଇଲା । ସେ ସଅର୍‌ ସଦି ଜାଗବାକେ ତାର୍‌ ସନିଅମନ୍‌କେ କଇଲା । ଜେନ୍ତ୍ରାରି କି ଜେତେବେଲେ ମୁଇ ସେ ସଅରେ ବାରଇତି, ସେମନ୍‌ ମକେ ଦାର୍‌ଡାଇ । ୩୩ କେନ୍ତ୍ରି ବଇଲେ ତେଇର୍‌ ପାକ୍‌ନା ପାରୁରିର୍‌ କାଣାବାଟେ ମକେ ଚାଟ୍‌ନାଇ ପୁରାଇ ଉଡ଼ରାଇ ଦେଲାଇ । ଆରି ତାର୍‌ ଟାନେ ଅନି ବଠିଗାଲି ।

### ୧୨

#### ପାଉଲ୍‌ ଦରସନ୍‌ ଦେକ୍‌ଲାଟା

୧ ସେନ୍ତ୍ରାର୍‌ଆଲେ ମୁଇ ବଡ଼ପନ୍‌ ଅଇ କଇଲା ଟାନେ କାଇ ଲାବ୍‌ ନଇଲେ ମିସା ମୁଇ ବଡ଼ପନ୍‌ ଅଇ କାତା ଅଇବି । ଏବେ ମୁଇ ଦରସନ୍‌ ବିସଇ ଆରି ମାପରୁ ମକେ ଜାନାଇଲା ବିସଇ ତମ୍‌କେ କଇବି । ୨ ମୁଇ ଜାନିରଇବା ଗଟେକ୍‌ ବିସବାସି ଆଟେ । ଜାକେ କି ଚଉଦ ବରସର୍‌ ଆଗେ ସର୍‌ଗେ ନେଲାଇ । ସେ ସତ୍‌ରେ ସର୍‌ଗେ ଗାଲା କି ତାକେ ଦରସନେ ସେ ସରଗ୍‌ ଦେକାଇଅଇଲା କି ନାଇ ବଲି ମୁଇ ନାଜାନି । ସେଟା ପର୍‌ମେସର୍‌ ସେ ଜାନେ । ୩ ମାତର୍‌ ମୁଇ ଜାନିଆଟି, ତାକେ ସର୍‌ଗେ ନେଲାଇ ବଲି । ମୁଇ ଆରି ତରେକ୍‌ କଇଲିନି ସେ ସତଇସେ ତେଇ ଗାଲା କି ଦରସନେସେ ସରଗ୍‌ ଦେକାଇ ଅଇରଇଲା, ସେଟା ମୁଇ ନାଜାନି । ସେଟା ପର୍‌ମେସର୍‌ସେ ଜାନେ । ୪ ଆରି ସେ ତେଇ ରଇଲାବେଲେ ଲକର୍‌ ବାସାଇ କାତା ନ ଅଇବା ବିସଇ ସୁନ୍‌ଲା । ଜନ୍‌ଟା ମୁନ୍‌ସ୍‌ ମନର୍‌ କଇବାର୍‌ ଅଦିକାର୍‌ ନାଇ, ସେଟା ମିସା ସେ ସୁନ୍‌ଲା । ୫ ଏ ଲକର୍‌ ବିସଇନେଇ ମୁଇ ବଡ଼ପନ୍‌ ଅଇ କାତା ଅଇବି, ମାତର୍‌ ମର୍‌ ନିଜର୍‌ ବିସଇନେଇ ବଡ଼ପନ୍‌ ଅଇ କାତା ନ ଅଇ । ମର୍‌ ଦୁର୍‌ବଲ୍‌ ରଇବା ବିସଇଟାନେସେ ମୁଇ ବଡ଼ପନ୍‌ ଅଇବି । ୬ ମୁଇ ଜଦି ବଡ଼ପନ୍‌ ଅଇ କାତା ଅଇବାକେ ମନ୍‌ କଲେ, ସେଟା ବୁଦି ନ ରଇଲା ଲକ୍‌ ବଡ଼ପନ୍‌ ଅଇଲାପାରା ନ ଅଏ । ମୁଇ କଇବାଟା ସବୁ ସତ୍‌ । ମାତର୍‌ ମୁଇ ବଡ଼ପନ୍‌ ଅଇକରି କାତା ନ ଅଇ । କାଇକେବଇଲେ ଲକ୍‌ମନ୍‌ କେତେବେଲେ ମିସା ମକେ ମୁଇ ଜେଡ଼କି ଆଟି, ତାର୍‌ତେଇଅନି ଅଦିକ୍‌ ଗଟେକ୍‌ ବଡ଼ ଲକ୍‌ ଇସାବେ ଦେକ୍‌ବାଇ । ମୁଇ କରବା କାମ୍‌ ଦେକିକରି ଆରି ମୁଇ କଇବା କାତା ସୁନିକରିସେ ସେମନ୍‌ ମାନବାଇ ।

୭ ମୁଇ ପର୍‌ମେସର୍‌ ଟାନେଅନି ବେସି ବଡ଼ିଆ ଦରସନ୍‌ ପାଇଲିଆଟି ବଲିକରି ବଡ଼ପନ୍‌ ନ ଅଇବାକେ ପର୍‌ମେସର୍‌ ମକେ ଦୁକାଇବା ଗଟେକ୍‌ ରଗ୍‌ ଦେଲା । ଏ ରଗ୍‌ ସଇତାନର୍‌ ଦୁଡ଼ପାରା ମାର୍‌ବାକେ ମର୍‌ ଗାଗଡେ ଆଟେ । ଜେନ୍ତ୍ରି କି ମୁଇ ଆରି ବଡ଼ପନ୍‌ ନ ଅଇ । ୮ ଏ ରଗ୍‌ ମର୍‌ଟାନେଅନି ଦାରିଜାଅ ବଲି ମୁଇ ତିନ୍‌ଡର୍‌ ମାପରୁକେ ଗୁଆରି କଲି । ୯ ମାତର୍‌ ସେ ଏନ୍ତ୍ରାରି କଇଲା, “ତମ୍‌କେ ଜେଡ଼କି ସବୁ ଲଡା ଆଟେ, ମର୍‌ ଜିବନ୍‌ ଦୁକାଇଲାଟା, ସେଟା ପୁରାପୁରୁନ୍‌ କରବାକେ ଅଇସି । କାଇକେବଇଲେ ଜେତେବେଲେ ତୁଇ ଦୁର୍‌ବଲ୍‌ ରଇସୁ, ସେବେଲେ ମର୍‌ ବପୁ ନିକକରି ତିସସି ।” ତେବେ ମର୍‌ ଦୁର୍‌ବଲ୍‌ ବିସଇନେଇ ବଡ଼ପନ୍‌ ଅଇକରି କଇବାକେ ମକେ ବେସି ସାର୍‌ଦା ଲାଗ୍‌ସି । କାଇକେବଇଲେ ମୁଇ ଦୁର୍‌ବଲ୍‌ ରଇଲାବେଲେ କିରିସର୍‌ ବପୁ

\* ୧୧:୩୨ ୧୧:୩୨ ପେରିଡ଼୍ ୯:୨୩-୨୫

ମନେ ସାଇଜ କରୁବାଟା ଜାନ୍‌ଲିନି । ୧୦ ସେଟାର ପାଇ ମନେ କିରିସଟର ଲାଗି ଜେଡକି ସବୁ ଗଟ୍‌ସି, ମୁଇ ସାରଦା ଅଇ ରଇବି । ଜେଡକି ମରଗାଗଡ ଦୁରବଲ୍ ରଇଲେ ମିସା, ନିନ୍ଦା ପାଇଲେ ମିସା, ଦୁକ୍ କସଟ ଅଇରଇଲେ ମିସା, ଆରି ସାଦ୍‌ବାନ୍ଦ ଅଇ ଦୁକ୍ କସଟ ପାଇଲେ ମିସା । କାଇକେବଇଲେ ଜେଡେବେଲେ ମୁଇ ଦୁରବଲ୍ ଅଇଆରି, ସେଡକି ବେଲେ ମୁଇ ବପୁ ଅଇଆଟି ।

କରକ୍ରିଅର୍ ଲକ୍‌ମନର୍ ପାଇ ପାଉଲର୍ ବାବ୍‌ନା

୧୧ ନିଜେ ବଡ଼ ଅଇବାକେ ମୁଇ ବକ୍ତୁଆ ଲକ୍‌ର ପାରା ଅଇଲିନି । ମାତର୍ ମୁଇ ତମ୍‌କେ ଦସ୍ ଦେଲିନି । କାଇକେବଇଲେ ତମେ ଜଦି ମନେ ସନ୍‌ମାନ୍ ଦେଇତାସ୍, ମୁଇ ଏନ୍ତାରି ନ କରତି । ମୁଇ କାଇ କାମେ ନାଇ, ବଲି କେଡେଲକ୍ କଇଲେ ମିସା ତମର୍ ସେ ପେରିଡ଼ମନର୍ ଟାନେ ଅନି ଉନା ନଇ । ୧୨ ଜେଡେବେଲେ ମୁଇ ତମର୍‌ଟାନେ ରଇଲି, ସେ ବେଲେ ମୁଇ ମୁରତିକରି ରଇବା କାବା ଅଇଜିବା କାମ୍‌ମନ୍ ଆରି ଚିନ୍‌ମନ୍ ତମେ ଦେକିରଇଲାସ୍ । ସେଟା ଦେକି ମୁଇ ଗଟେକ୍ ପେରିଡ଼ ବଲି ତମେ ଜାନ୍‌ଲାସ୍ । ୧୩ ବିନ୍ ମଣ୍ଡଲିମନ୍‌କେ ମୁଇ ଜାଇଟା କିରିରଇଲି, ସେ ସମାନ୍ ବିସଇସେ ତମର୍‌ପାଇ ମିସା କଲି । ଏଡକି ସେ ଜେ ତମ୍‌କେ ବୁଡି ମାଜି ତମର୍ ଉପ୍‌ରେ ବଜ୍ ଚାପାଇନାଇ । ଜଦି ସେଟା ମର୍ ବୁଲ୍ ଅଇଲା ଆଟେ ବଇଲେ ମନେ କେମା କିରିଦିଆସ୍ ।

୧୪ ଦେକା, ଏଟା ସଙ୍ଗ୍ ଡିନ୍ ତର୍ ଅଇଲାବେ ମୁଇ ତମର୍‌ଲଗେ ବୁଲି ଆଇବି ବଲି ଜାଗିଆଟି । ଆଗର୍ ପାରା ଏବେ ମିସା ତମର୍‌ଟାନେ ଅନି କାଇଟା ନ ମାଜି । ତମେ ଦେବାଟା ମୁଇ ମନ୍ କିରିନାଇ, ତମର୍ ଆଲାଦ୍ ମନ୍ କଲିନି । ଏନ୍ତାରି ନର୍‌ସି ଜେ ପିଲାମନ୍ ଆୟା ବାବାର୍‌ପାଇ ସଙ୍ଗ୍‌ଇବାଇ, ମାତର୍ ଆୟାବାବା ପିଲାମନର୍ ପାଇ ସଙ୍ଗ୍‌ଇବାର୍ ଆଟେ । ୧୫ ସତଇସେ ମର୍ ଜେଡକି ସବୁ ଆଟେ, ସେଟା ସବୁଜାକ ତମ୍‌କେ ଦେବାକେ ମୁଇ ସାରଦା ଅଇବି । ଜେନ୍ତାରି କି ତମ୍‌କେ ସାଇଜ କରୁବାକେ ମର୍ ଗାଗଡ଼ ମିସା ସରପି ଅଇଦେବି । ତମର୍ ପାଇ ରଇବା ମର୍ ଆଲାଦ୍ ଅଦିକ୍ ଅଦିକ୍ ଅଇ ଆଇଲାନ୍, ମାତର୍ ମର୍ ପାଇ ରଇବା ତମର୍ ଆଲାଦ୍ ଉନା ଅଇ ଆଇଲାନ୍ ।

୧୬ ମୁଇ ତମର୍‌ଟାନେଅନି ବୁଡି ମାଜିନାଇ, ସେଟା ସଡ଼ ବଲି ତମେ କଇଲାସ୍‌ନି, ମାତର୍ ତମର୍ ବିଡ଼ରେ କେଡେ ଲକ୍ କଇଲାଇନି, ଜେ ମୁଇ ଚାଲାକି ଆରି ମର୍ ଲାଗି ତମେ ନାତାଇଅଇଲାସ୍ । ୧୭ ମୁଇ ତମ୍‌କେ କେନ୍ତ୍ର ନାତାଇଲି ? ମୁଇ ତମର୍ ଲଗେ ଜନ୍ ଲକ୍‌ମନକେ ପାଟାଇ ରଇଲି, ସେମନର୍ ଦେଇ ନାତାଇଲି କି ? ୧୮ ମୁଇ ତିତସ୍‌କେ ତମର୍ ଲଗେ ଜିବାକେ ବାବୁଜିଆ କଲି । ଆରି ତାର୍‌ସଙ୍ଗ୍ ଜିବାକେ ଗଟେକ୍ ବିସ୍‌ବାସି ବାଇକେ ମିସା ପାଟାଇରଇଲି । ତିତସ୍‌କାଜ ତମର୍ ଲଗେ ଅନି କାଇଟା ଲାଦ୍ କଲା ଆଟେ କି ? ତିତସ୍ ତମ୍‌କେ ନାତାଇଲା ବଲି ତମେ କଇନାପାରାସ୍ । କାଇକେବଇଲେ, ସେ ଆରି ମୁଇ, ଆମେ ସୁକଲ୍ କାମର୍ ପାଇସେ ଏଟା କଲୁନି ।

୧୯ ଆମେ ତମର୍ ବିରୁଦେ କାଇ ଦସ୍ କରୁନାଇ ବଲି ତମ୍‌କେ ଦେକାଇ ଅଇବାକେ ଚେସ୍‌ଟା କଲୁନି ବଲି ତମେ ବାଦ୍‌ସା ମିସା । ମାତର୍ ସେନ୍ତାରି ନାଇ । ଆମେ କିରିସଟର ଲକ୍ ଇସାବେ ପର୍‌ମେସରର୍ ମୁଆଟେ କାତା ଅଇଲୁନି । ଆଲାଦ୍‌ର୍ ମଇତର୍‌ମନ୍ ! ତମର୍ ଟାନେ ଆମେ ଜେଡକି ବିସଇ କଲୁଆରୁ, ସେଟା ତମର୍ ବଲ୍ ପାଇ । ୨୦ ମୁଇ ବେସି ଚିନ୍ତାଇ ଆଟି, ମୁଇ ତମର୍ ଟାନେ ଆଇଲାବେଲେ, ମନ୍ ନ କରୁବା ଚଲାଚଲ୍‌ତି ତମର୍ ବିଡ଼ରେ ଦେକ୍‌ବି ମିସା । ସେନ୍ତାରି ଅଇଲେ, ମୁଇ ତମ୍‌କେ ଦମ୍‌କାଇବାକେ ପଡ଼ସି ଆରି ସେଟା ତମେ ମନ୍ ନ କରାସ୍ । ତେଇ କେଡେଟା ଜୁଜିଆଲ୍‌ମନ୍, ଇସ୍‌ଲିଆମନ୍, ଦାପ୍‌ରେ ରିସା ଅଉମନ୍, ନିଜର୍ ବିସଇ ଦେକାଇ ଅଉମନ୍, ତାର୍ ବାଇମନକେ ନିନ୍ଦା କରୁମନ୍, ଡିପ୍‌ଲିଆମନ୍, ବଡ଼ପନିଆମନ୍, ଆରି

ବିସ୍ୱାସୀମାନ ଗଟେକ୍ ମନ ନ ଅଇଲାଟା ଦେକ୍‌ବି । ୨୧ ମୁଇ ଚିନ୍ତାଈ ଆଚି ଜେ, ମୁଇ ଆରିତରେକ୍ ଆଇଲାବେଲେ, ତମର୍ ମୁଆଟେ ମକେ ପର୍ମେସର୍‌ର ଲାଜ୍ କରାଇସି । ଆରି ମୁଇ ବେସି ଦୁକ୍ ଅଇବି । କାଇକେବଇଲେ, ଆଗେ ଜେଡ୍‌କି ଲକ୍ ପାପ୍ କରି ଆଚଡ୍ ବଲି ମୁଇ ଜାନିଆଚି । ସେମନ୍ ଏବ୍‌କେ ଜାକ ତାକର୍ କାରାପ୍ ଚଲାଚଲ୍‌ତିର୍ ଲାଗି ମାନି ଅଅଡ୍ ନାଇ । ଜନ୍‌ଟାକି ନିଜର୍ କାରାପ୍ ମନ୍ କଲା ଇସାବେ ବର୍‌ବାଟା ଆରି ବେସିଆ କାମ୍ କର୍‌ବାଟା ।

## ୧୩

ସାରାସାରି ଜୁଆର୍ କରି ମନା କର୍‌ବାଟା

୧ ଏଟାସଙ୍ଗ୍ ତିନ୍‌ତର୍ ଅଇଲାବେ ତମର୍ ଲଗେ ମୁଇ ଆଇଲିନି । ସାସ୍‌ତର୍ କଇଲାପାରା "ମଣ୍ଡଲିର୍ ବାଇମନର୍ ବିରୁଦେ ନିନ୍‌ଆ କାତା ଉଟ୍‌ଲେ, ସେଟା ତିନ୍ ଲକ୍ ନଇଲେ ଦୁଇଲକ୍‌କର୍ ସାକିର୍ ମୁଆଟେ ସବୁଜାକ ରାଜିନାମା କରାଇବାର୍ ଆଟେ । ୨ ଆଗେ ପାପ୍‌କରି ରଇବା ଲକ୍‌ମନ୍‌କେ, ଆରି ଏବେ ପାପ୍ କଲା ଲକ୍‌ମନ୍‌କେ ମୁଇ ତମର୍ ଲଗେ ଦୁଇପାଲି ଆଇଲା ବେଲେ କଇରଇଲି । ମୁଇ ତେଇ ନ ଆଇବା ଆଗ୍‌ତୁ କଇଲିନି, ମୁଇ ଆରିତରେକ୍ ଆଇଲାବେଲେ କେ ଜଦି ତାକର୍ ପାପେ ଅନି ନ ବାଉଡଡ୍, । ସେମନ୍‌କେ ଦୟା ନ ଦେକାଇ । ୩ ମୁଇ କଇବାଟା ଏ ସବୁ କିରିସ୍‌ଟର୍ ଆଦେସେ ଅନି ଆଟେବଲି ଜାନ୍‌ବାକେ ତିନ୍ ମାଙ୍ଗ୍‌ଲାସିନି । ମୁଇ ତମ୍‌କେ ଡଣ୍ଡ ଦେଲାବେଲେ ସେ ତିନ୍ ବିସଇ ଜାନ୍‌ସା । କିରିସ୍‌ଟ ତମର୍ ବିଡ୍‌ରେ କାଇ କାମ୍ କଲେ ମିସା ବପୁର୍ ସଙ୍ଗ୍ କର୍‌ସି, ଦୁର୍‌ବଲ୍ ଅଇକରି ନାଇ । ୪ କାଇକେବଇଲେ କୁର୍‌ସେ ଚଗାଇଲାବେଲେ ସେ ଦୁର୍‌ବଲ୍ ପାରା ଡିସ୍‌ଲେ ମିସା ପର୍ମେସର୍‌ର ବପୁସଙ୍ଗ୍ ସେ ବର୍‌ଆଟେ । ସେନ୍ତାରିସେ କିରିସ୍‌ଟ୍‌ରେକ୍ ମିସି ରଇଲାର୍‌ପାଇ ଆମେ ମିସା ଦୁର୍‌ବଲ୍ ପାରା ଡିସ୍‌ଲୁନି । ମାତର୍ ପର୍ମେସର୍‌ର ବପୁ ସଙ୍ଗ୍ ଜିଇ ରଇବୁ ଆରି ତମର୍ ବିଡ୍‌ରେ କର୍‌ବା ଜନ୍ କାମେ ମିସା ତାର୍ ବପୁ ରଇସି ।

୫ ତମେ ନିଜେ ନିଜେ ବିସ୍‌ବାସେ ଆଟାସ୍ କି ନାଇ, ବିଚାର୍ କରି ଦେକା । ଜିସୁକିରିସ୍‌ଟ ତମର୍ ବିଡ୍‌ରେ ବାସା ଅଇଆଟେ ବଲି ନାଜାନାସ୍ କି ? ତମେ ବିସ୍‌ବାସ୍ କରାସ୍ ନାଇକେ, କିରିସ୍‌ଟ ତମର୍‌ଟାନେ ବାସା ଅଏନାଇ । ୬ ମାତର୍ ମୁଇ ଆସା କଲିନିଜେ, ଆମେ ସବୁଲକ୍ କିରିସ୍‌ଟର୍ ପେରିଡ୍ ଅଇଆଟୁ । ୭ ତମେ କାଇ କରାପ୍ କାମ୍ ନ କରା ବଲି, ଆମେ ପର୍ମେସର୍‌କେ ଗୁଆରି କଲୁନି । ଇତି ପୁରାପୁରୁନ୍ ଟିକ୍ କରିଆଟୁ ବଲି ଆମେ ଦେକାଇବାକେ ଜାଉନାଇ, ମାତର୍ ସେଟା ନାପାରି ରଇଲେ ମିସା, ତମେ ଜେକ୍ରିକି ସଡ୍‌କାମ୍ କର୍‌ସା, ଏଟାର୍‌ପାଇ ଆମେ ପାର୍‌ତନା କଲୁନି । ୮ ସଡ୍ ବିସଇର୍ ବିରୁଦେ ଆମେ କାଇଟା ନ କରୁ, ମାତର୍ ତାର୍ ପାଇ ଟିଆ ଅଇବୁ । ୯ ଜଦି ଲକ୍‌ମନ୍ ଆମ୍‌କେ ଦୁର୍‌ବଲ୍ ଆଚଡ୍ ବଲି କଇଲେ ମିସା, ଆମେ ସାର୍‌ଦାସଙ୍ଗ୍ ଆଟୁ । ତମେ ଆକା ବିସ୍‌ବାସେ ଡାଟ୍ ରଇବାର୍‌ଆଟେ । ଆରି ତମର୍ ଚଲାଚଲ୍‌ତି ସିଦ୍ ଅଇଜାଅ ବଲି ଆମେ ଗୁଆରି କଲୁନି । ୧୦ ମୁଇ ନ ଆଇତେ ଏ ସବୁଜାକ ତମ୍‌କେ କାଇକେ ଲେକ୍‌ଲିନି ବଇଲେ, ଜେକ୍ରିକି ମୁଇ ଆଇଲାବେଲେ ମାପୁର୍ ମକେ ଦେଇରଇବା ଅଦିକାର୍ ସଙ୍ଗ୍ ତମ୍‌କେ ଡଣ୍ଡ ଦେବାକେ ନ ପଡେ । ଜନ୍ ଅଦିକାର୍ ତମର୍ ବିସ୍‌ବାସ୍ ବଡାଇବାକେ ଦେଲାଆଟେ, ମାତର୍ ସେଟା ଉନା କର୍‌ବାକେ ନାଇ ।

୧୧ ଏବେ ଏ ମର୍ ବାଇବଇନିମନ୍ ମୁଇ ରଇଲିନି । ତମର୍ ଚଲାଚଲ୍‌ତି ସିଦ୍ କର୍‌ବାକେ ଜବର୍ ଚେସ୍‌ଟା କରା । ମର୍ ଆଦେସ୍ ସବୁ ମାନିକରି ରୁଆ । ସବୁଲକ୍ ଗଟେକ୍ ମନ୍ ଅଇକରି ସାକ୍ରିଅଇ ରୁଆ । ତେବେ ଆଲାଦ୍ ଆରି ସାକ୍ରିର୍ ପର୍ମେସର୍ ତମର୍ ସଙ୍ଗ୍ ରଇସି ।

୧୨ ତମେ ରୁଣ୍ଡିଲା ବେଳେ ନିଜର ନିଜର ବିତ୍ତରେ କିରିସ୍‌ଟର ଆଲାଦେ ଜୁଆର୍‌ବେଟ୍ ଉଆ । ଇତି ରଇବା ପର୍ଯ୍ୟନ୍ତ ଲକ୍‌ମନ୍ ତମ୍‌କେ ଜୁଆର୍ ଜାନାଇଲାଇନି ।

୧୩ ଆମର ମାପରୁ ଜିସୁକିରିସ୍‌ଟର ଜିବନ୍ ଦୁକାଇଲାଟା, ପର୍ଯ୍ୟନ୍ତ ଆଲାଦ୍ ଆରି ସୁକଲ୍ ଆତ୍‌ମାର ମିସିକରି ରଇବାଟା, ତମର ସବୁ ଲକର ସଙ୍ଗ୍ ରଥ । ଜୁଆର୍ ।

# ଗାଲାତିୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କ ପତ୍ର ଗାଲାତିୟ ମଣ୍ଡଳୀର ଲକ୍ଷ୍ୟମାନଙ୍କେ ପାଉଲ୍ ଚିଠି ଲେଖିଲାଟା

## ଏ ବଇ ବିସଇ ପଦେକ୍ ଜାନ୍‌ବାଟା

ଗାଲାତିୟ ବଇ ପେରିଡ଼ ପାଉଲ୍ ଲେଖିଆରେ । ୧:୧ ଏ ଚିଠି ଗାଲାତିୟ ମଣ୍ଡଳୀର ବିସ୍ୱାସୀମାନଙ୍କେ ଲେଖାଅଇରଇଲା । ଏଟା ଜିସୁକିରିସ୍ଟ ଜନମ୍ ଅଇକରି ୪୮-୫୭ ବିଡ଼ରେ ଲେଖିରଇଲା । ଗାଲାତିୟର ଲକ୍ଷ୍ୟମାନ ରମ୍ ରାଇଜର୍ ଗାତିଆ ନାଉଁର୍ ଜାଗାଇ ବାସା ଅଇରଇଲା । ପାଉଲ୍ ଏ ଚିଠି ଲେଖିଲା ବେଲେ କନ୍ତି ରଇଲା, ସେ ବିସଇ ପଣ୍ଡିତମାନ ନିକସଙ୍ଗ ନାଜାନଡ଼ । ମାତର୍ ଏପିସେ ନଇଲେ କରନ୍ତି ଏ ଦୁଇଟା ଜାଗାଇ ରଇସି କାଜକି ବଲି କଇବାଇ । ପାଉଲ୍ ଗାଲାତିୟ ମଣ୍ଡଳୀତେଇ ରଇବା ଜିଉଦି ଆରି ଜିଉଦି ନ ଅଇଲା ବିସ୍ୱାସୀମାନର୍ କୁଟୁମ୍, ଜାଗା ସବୁ ମିସାଇକରି ଚିଠି ଲେଖିଆରେ । ସେ ମିଡ଼ ସିକିଆ ବିରଦ୍ କରବାପାଇ ଅଦିକ ଦିଆନ୍ ସଙ୍ଗ ଲେଖିଆରେ । ସେଟା ଜିଉଦିମାନଙ୍କେ ପୁରନା ନିୟମର୍ ତାକର୍ ରିତିନିତି ମାନି ଚଲ୍‌ବାକେ ଲେଖାଅଇଆରେ । ଦେକ୍‌ବାକେଗାଲେ ସୁନଡ଼ ଅଇବା ବିଦି ବିସଇ ଅଦିକ୍ ଦିଆନ୍ ଦିଆଅଇଆରେ । ବିସ୍ୱାସୀମାନର୍ ବିଡ଼ରେଅନି କେତେକ୍ ଲକ୍ଷ୍ୟ, ଜନ୍ ଲକ୍ଷ୍ୟମାନଙ୍କେ କି ଜୁଡାଇମ୍ ବଲି କଇତେରଇଲା । ସେମାନ ଜିଉଦି ନଇଲା ବିସ୍ୱାସୀମାନଙ୍କେ ସୁନଡ଼ ଅଇବା ରିତିନିତି ମାନବାକେ କଇତେରଇଲା ।

ସେମାନ ପାଉଲ୍ କେନ୍ତି ପେରିଡ଼ ଅଇବା ଅଦିକାର୍ ପାଇଲା, ସେ ବିସଇ ପାଚାରତେରଇଲା । ପାଉଲ୍ ସେମାନଙ୍କେ କେତେଟା କାତାନି ସଙ୍ଗ ମିସାଇକରି ସେ ପେରିଡ଼ ଅଇଲା ଅଦିକାର୍ ବିସଇ ଜୁକ୍ତି କର୍ତେରଇଲା । ୧:୧-୨:୧୪ ଜିସୁକିରିସ୍ଟକେ ବିସ୍ୱାସ କଲେ ମୁକ୍ତି ପାଇବାର୍ ଅଇସି ବଲି ବୁଜାଇକରି ସୁବକବରକେ ରକିଆକରିଆରେ ୨:୧୭ । ଜନ୍‌ଗାକି ପର୍ମେସରର୍ ଦୟାକଲେ ଅଇସି, ମୁନୁସ୍ କଲାଟା ନଏ ।

### ଏ ବିଡ଼ରେ ରଇବାଟା

- ୧. ପାଉଲ୍ ଜୁଆର୍ ଜାନାଇବାଟା । ୧:୧-୫
- ୨. ଆଗତୁ ପାଉଲ୍ ଜିବନ୍ କେନ୍ତ୍ରାର ରଇଲା, ତାର୍ ସିକିଆଦେବା ଅଦିକାର୍ ଆରି ରିତିନିତି ମାନବା ବିସଇ । ୧:୬-୨:୨୧
- ୩. ରିତିନିତି ମାନବାଟା ଆରି ପର୍ମେସରର୍ ଦୟାଟାଣେ ଅନି ମୁକ୍ତି ପାଇବାଟା । ୩-୪
- ୪. ନିକ ବିସ୍ୱାସି ଅଇକରି ଜିଉନା କାଉନା ବିସଇର୍ ସିକିଆ । ୫:୧-୬:୧୦
- ୫. ପାଉଲ୍ ଜୁଆର୍ ଜାନାଇବାଟା ଆରି ପର୍ମେସରର୍ ଟାଣେ ରଇକରି ଜିବନ୍ ବାଦ୍‌ଲାଇବା ବିସଇ ଜାଗ୍‌ରଡ଼ କରାଇଲାନି । ୬:୧୧-୧୮

୧ ମୁଇ ପେରିଡ଼ ସିସ୍ ପାଉଲ୍ । ପେରିଡ଼ ସିସ୍ ଅଇବାକେ ମୁଇ ଲକ୍ଷ୍ୟମାନର୍ଟାଣେଅନି କି ଲକ୍ଷ୍ୟମାନର୍ ମାଲାକାରିଆ ଇସାବେ ତାକ୍‌ରା ପାଇନାଇ । ଏ ତାକ୍‌ରା ମୁଇ ବାବା ପର୍ମେସରର୍ ଆରି ଜିସୁ କିରିସ୍ଟର୍ ତେଇଅନି ପାଇଲିଆଟି । ପର୍ମେସରର୍ ତାକେ ମଲାଟାଣେଅନି ଉଟାଇଆରେ । ୨ ଆରି ଏଟା ଗାଲାତିୟ ମଣ୍ଡଳୀତେଇ ରଇବା ତମର୍ପାଇ ମର୍ ଚିଠି । ଜନ୍ ବିସ୍ୱାସି ବାଇବଇନିମନ୍ ମର୍ ସଙ୍ଗ୍ ଆଚଡ଼, ସେମାନ ମିସା ମର୍ ସଙ୍ଗ୍ ଜୁଆର୍ ଜାନାଇଲାଜନି ।

୩ ଆମର ବାବା ପରମେସର ଆରି ମାପରୁ ଜିସୁ କିରିସ୍ତ ତମକେ ଜିବନ୍ ଦୁକାଇ ସାନ୍ତି ଦେଅ ।

୪ ଏବେ ଏ ପାପ ବରତି ଅଇରଇବା ଜଗତେଅନି ଆମକେ ଉଦାର କରବାକେ ଆମର ବାବା ପରମେସର ମନ୍ କଲାଟା, ମାନିକରି କିରିସ୍ତ ଆମର ପାପର ପାଇ ନିଜକେ ସରପିଦେଲା । ୫ ପରମେସର କାଲ୍ କାଲ୍ ଜୁଗ୍ ଜୁଗ୍ ଡାକ୍ପୁଟା ପାଅ । ଆମେନ୍ !

**ଗଟେକ୍ ସେ ସୁବକବର**

୬ କିରିସ୍ତ ଜିବନ୍ ଦୁକାଇକରିସେ ତମକେ ଡାକିରଇଲା । ମାତର ତମେ ତାକେ ଏତେକ ଦାପରେ ଚାଡିଦେଇକରି ଆରି ଗଟେକ୍ ବିନ୍ ସୁବକବରବାଟେ ମନ୍ ଦେଲାସିନି । ତମର ଏ ମନ୍ ବାଦଲାଇବାଟା ଦେକିକରି ଇତି ମୁଇ କାବା ଅଇଗାଲିନି । ୭ ଏ ସୁବକବର ଚାଡି ଆରି ଗଟେକ୍ ବିନ୍ ସୁବକବର ନାଇ । ମାତର ମୁଇ ଏନ୍ତି କଇଲିନି, କାଇକେ ବଇଲେ କେତେଲକ୍ କିରିସ୍ତର ସୁବକବର ବିନ୍ ବିନ୍ ରକାମ୍ କରି, ତମକେ କଟପଟ କରବାକେ ଚେସ୍ଟା କଲାଇନି ବଲି ମୁଇ ସୁନ୍ଲିନି । 「ମାତର ଆମେ ତମର ଲଗେ ଜନ୍ ସୁବକବର ଜାନାଇ ରଇଲୁ, ଜଦି ସେଟାକେ ଚାଡି ବିନ୍ ଗଟେକ୍ ସୁବକବର ଆମେ ନିଜେ, ନଇଲେ ସରଗ୍ ଦୁଡ୍ ମିସା ଜାନାଇସି ବଇଲେ, ସେ ଅବିସାପ୍ ପାଅ । ୯ ଏଟା ଆମେ ଆଗ୍ତୁ କଇରଇଲୁ ଆରି ମୁଇ ଏବେ ଆରି ତରେକ୍ କଇଲିନି, ତମେ ତମର ଜିବନେ ଜନ୍ ସୁବକବର ମାନିରଇଲାସ୍, ସେଟା ଚାଡି ଆରି ଜଦି କେ, କାଇମିସା ବିନ୍ ସୁବକବର ଜାନାଇସି ବଇଲେ ସେ ଅବିସାପ୍ ପାଅ ।

୧୦ ଏଟା ସୁନି ତମେ ମନେ ମନେ କାଇଟା ବାବଲାସିନି ? ମୁଇ ଲକ୍ମନର ମାନବାଟା ପାଇବାକେ ଚେସ୍ଟା କଲିନି କି ? ନାଇ, କେବେ ନାଇ । ମୁଇ ପରମେସରର ମାନବାଟାସେ ମନ୍ କଲିନି । ମୁଇ କାଇ ଡାକ୍ପୁଟା ଅଇବି ବଲି ମନ୍ କଲିନି କି ? ମୁଇ ଜଦି ଏବେ ଜାକ୍ ଡାକ୍ପୁଟା ଅଇବାକେ ମନ୍ କରତି ବଇଲେ, ଆଜି କିରିସ୍ତର ସେବାକାରିଆ ନ ଅଇତି ।

**ପାଉଲ୍ କେନ୍ତାରି ପେରିଡ୍ ସିସ୍ ଅଇଲା**

୧୧ କାଇକେବଇଲେ, ଏ ବାଇବଇନିମନ୍ ମୁଇ ତମକେ ଜନ୍ ସୁବକବର ଜାନାଇଲିନି, ସେଟା ମୁନ୍ସର୍ଟାଗେଅନି ବାରଏ ନାଇ । ୧୨ ତେବେ ମୁଇ ସେଟା ମୁନ୍ସ୍ ମନର ଟାଗେଅନି ପାଇନାଇ, କି କେ ମକେ ସିକାଅଡ୍ ନାଇ । ନିଜେ ଜିସୁ କିରିସ୍ତ ସେଟା ମକେ ଜାନାଇଲା ଆଟେ ।

୧୩ \*ଆଗ୍ତୁ ମୁଇ ଜିଉଦି ଦରମ୍ ନାମ୍ବା ବେଲାଇ ଜେନ୍ତିକି ଜିଇତେ କାଇତେ ରଇଲି । ପାର୍ତନା କରବାକେ ରୁଣ୍ଡୁବା ଲକ୍ମନକେ କେନ୍ତି କସ୍ତ ଦେଇତେ ରଇଲି ଆରି ସେଟାମନ୍ ନସ୍ତ କରବାକେ କେନ୍ତି ଚେସ୍ଟା କିରିରଇଲି, ଏଟା ସବୁ ବିସଇ ତମକେ ଜାନାଇଦିଆଅଇଆଟେ । ୧୪ \*ଜିଉଦି ଦରମ୍ ମାନବା ବେଲେ, ମୁଇ ଦାଙ୍ଗ୍ତା ବଇସେ ଆମର ଜିଉଦିମନର ବିଡ୍ରେ ସବୁକେ ଅନି ଆଗ୍ତୁ ରଇଲି ଆରି ଆମର ଆନିଦାଦିମନ୍ ବିସ୍ବାସ୍ କରି ଆଇତେରଇବା ରିତିନିତି ବେସି ତାଟ୍ ସଙ୍ଗ୍ ମାନତେରଇଲି ।

୧୫ \*ମାତର ପରମେସର ତାର୍ ଜିବନ୍ ଦୁକାଇ ମର ମାଆର୍ ଗର୍ବେ ରଇଲା ବେଲେ, ମକେ ବାଟିରଇଲା ଆରି ତାର୍ ସେବା କରବାକେ ଡାକ୍ଲା । ୧୬ ଆରି ଜେତେବେଲେ ଜିଉଦି ନଇଲା ଲକ୍ମନର ଟାଗେ ସୁବକବର ଜାନାଇବାକେ ପରମେସର ମକେ ତାର୍ ପଅକେ ଦେକାଇଲା, । ଏ ବିସଇନେଇ ମୁଇ କାରୁଲଗେ ଜିବି ଆରି ସେମନ୍ ମକେ ସିକାଇଦେଅଡ୍ ବଲି ଚିନ୍ତାକରି ନାଇ । ୧୭ ଜେନ୍ତିକି ମର

\* ୧:୧୩ ୧:୧୩ ପେରିଡ୍ ୮:୩:୨୨:୪,୫:୨୬:୯-୧୧      \* ୧:୧୪ ୧:୧୪ ପେରିଡ୍ ୨୨:୩      \* ୧:୧୫ ୧:୧୫ ପେରିଡ୍ ୯:୩-୬:୨୨-୭-୧୦:୨୬:୧୩-୧୮

ଆଗରୁ ଜେଡ଼କି ଲକ୍ ପେରିଡ଼ ସିସ୍ ଅଇରଇଲାଇ, ସେମାନର୍ ସଙ୍ଗ୍ ମିସ୍‌ବାକେ ଜିରୁସାଲାମେ ଜାଇନାଇ । ସେବେଲେ ମୁଇ ଦାପ୍‌ରେ ବାରଇ ଆରବ୍ ଦେସେ ଉଟିଗାଲି । ଜାଇକରି ଆରିତରେକ୍ ଦାମାସ୍କସେ ବାଉଡ଼ି ଆଇଲି । ୧୮ \*ଆରି ତିନ୍ ବରସ୍ ପଟେ ମୁଇ ପିତର୍କେ ବେଟ୍ ଅଇବାକେ ଜିରୁସାଲାମେ ଗାଲି । ତେଇ ତାରସଙ୍ଗ୍ ଦୁଇ ଆଟ୍ ରଇଲି । ୧୯ ମାତର୍ ମାପୁରୁର୍ ବାଇ ଜାକୁବ୍‌କେ ଚାଡ଼ଲେ ଆରି ମୁଇ କନ୍ ପେରିଡ଼ ସିସ୍‌କେ ମିସା ବେଟ୍ ଅଇନାଇ ।

୨୦ ମୁଇ ଜେଡ଼କି ବିସଇ ଲେକ୍‌ଲିନି, ସେଟା ସଡ଼, ପରମେସର୍ ଜାନିଆଟେ ମୁଇ କାଇଟା ମିସା ମିର୍ କଇନାଇ !

୨୧ ତାରପଟେ ମୁଇ ସିରିଆ ଆରି ସିଲିସିଆର୍ ବେସି ଜାଗାଇ ଜାଇରଇଲି । ୨୨ ସେବେଲା ଜିଉଦା ରାଇଜେ ରଇଲା କିରସ୍‌ଟକେ ବିସ୍‌ବାସ୍ କର୍‌ବା ମଣ୍ଡଲିର୍ ଲକ୍‌ମନ୍ ମକେ ନିକସଙ୍ଗ୍ ନାଜାନି ରଇଲାଇ । ୨୩ ବିନ୍ ଲକ୍‌ମନ୍ ମର୍ ବିସଇ ଜାଇଟା କଇରଇଲାଇ, ସେମନ୍ ସେଡ଼କିସେ ଜାନିରଇଲାଇ । ବିନ୍ ଲକ୍‌ମନ୍‌ରଟାନେଅନି ସେମନ୍ ସୁନିରଇଲାଇ କି, ଜନ୍ ଲକ୍ ଗଟେକ୍ ବେଲାଇ ଆମ୍‌କେ କସ୍‌ଟ ଦେଇତେ ରଇଲା, ଆମର୍ ଦରମ୍ କୁରୁପ୍‌ନାସ୍ କରିଦେବାକେ ଚେସ୍‌ଟା କର୍‌ତେ ରଇଲା, ଏବେ ସେ ଆକା ମାପୁରୁର୍ ସୁବ୍‌କବର୍ ଜାନାଇଲାନି ! ୨୪ ସେଟାର୍ ପାଇ ସେମନ୍ ମର୍‌ପାଇ ପରମେସରର୍ ଡାକ୍‌ପୁଟା କର୍‌ତେରଇଲାଇ ।

## ୨

### ପାଉଲ୍ ଆରି ବିନ୍ ପେରିଡ଼ ସିସ୍‌ମନ୍

୧ \*ତଉଦ ବରସ୍ ପଟେ ବର୍‌ନବାର୍ ସଙ୍ଗ୍ ମୁଇ ଜିରୁସାଲାମେ ବାଉଡ଼ିଆଇଲି । ଆମର୍ ସଙ୍ଗ୍ ତିତସ୍‌କେ ମିସା ଡାକି ନେଇରଇଲୁ । ୨ ମୁଇ ତେଇ ଜିବାର୍ ଆଟେଆକା ବଲି ପରମେସରର୍‌ଟାନେଅନି ଆଦେସ୍ ପାଇ ଜାଇରଇଲି । ଜିଉଦି ନ ଅଇଲା ଲକ୍‌ମନ୍‌ର ଲଗେ ମୁଇ ଜନ୍ କବର୍ ଜାନାଇଲିନି, ସେଟା ଜିରୁସାଲାମର୍ ନେତା ବଲି ମାନିଅ ପାଇରଇବା ଲକ୍‌ମନ୍, ଗଟେକ୍ ଗରେ ବସ୍‌ଲା ବେଲେ, ତେଇ ବୁଜାଇ ଦେଲି । ଜେନ୍ତ୍ରକି ମର୍ ଆଗର୍ ପଟର୍ ଜାନାଇବା ସୁବ୍‌କବର୍ ବେକାର ନ ଅ, ସେଟାର୍ ପାଇ ମୁଇ ଦିଆନ୍ ଦେଇରଇଲି । ୩ ମୁଇ କଇଲା ବିସଇ ସେମନ୍ ରାଜି ଅଇଲାଇ । କାଇକେବଇଲେ ମର୍ ସାଙ୍ଗ୍ ତିତସ୍, ଗଟେକ୍ ଗିରିକ୍ ଲକ୍ ଅଇରଇଲେ ମିସା, ତାକେ ସୁନଡ଼ ଅ ଆକା ବଲି ବାଦିଅ କରଡ଼ ନାଇ । ୪ ଏଲେମିସା କେତେକ୍ ଲକ୍ ତାକେ ସୁନଡ଼ କର୍‌ବାକେ ମନ୍ କର୍‌ତେ ରଇଲାଇ । ସେମନ୍ ବିସ୍‌ବାସି ବାଇ ବଲି ନାଡ଼ାଇକରି କୁଟିଆଲ୍ ଇସାବେ ଦଲେ ମିସିରଇଲାଇ । କିରିସ୍‌ଟ ଜିସୁର୍ ସଙ୍ଗ୍ ମିସିରଇଲାର୍ ଲାଗି ଆମେ ଜନ୍ ମୁକ୍‌ଲିରଇବା ଦିନ୍ ପାଇଲୁଆରୁ, ସେ ବିସଇ କଜି ମିଲାଇବାକେ ସେମନ୍ ମନ୍ କର୍‌ତେ ରଇଲା । ଆମ୍‌କେ ଆରିତରେକ୍ ମସାର୍ ନିୟ୍‌ମର୍ ଦାଙ୍ଗ୍‌ତା କର୍‌ବାକେ ମିସା ମନ୍ କର୍‌ତେରଇଲାଇ । ୫ ମାତର୍ ତମର୍ ଲାଗି, ସୁବ୍‌କବର୍ ସଡ଼ସଙ୍ଗ୍ ଦାରି ରକ୍‌ବାକେ, ଆମେ ସେ ନାଡ଼ାଉମନ୍‌କେ ଚନେକ୍ ମିସା ବେଲା ଦେଇ ନ ରଇଲୁ ।

୬ ମାତର୍ ଜନ୍ ଲକ୍‌ମନ୍ ନେତା ବଲାଇ ଅଇତେ ରଇଲାଇ, ସେମନ୍ ଜେ ମିସା ଅଅଡ଼, ସେଟାର୍ ପାଇ ମକେ କାଇଟା ନ ଅଏ । କାଇକେବଇଲେ ପରମେସର୍ କାକେ ମିସା ବାଇରର୍ ତଲାଟଲୁଡି ଦେକି ବିଚାର୍‌ନା ନ କରେ । ସେ ନେତାମନ୍ ମକେ କାଇମିସା ନୁଆ ଜଜ୍‌ନା ନ ଦେଇରଇଲାଇ । ୭ ଆରି ଗଟେକ୍ ବାଟେ ସେମନ୍ ଦେକ୍‌ଲାଇ ଜେ, ପରମେସର୍ ଜେନ୍ତ୍ରକି ପିତର୍କେ ଜିଉଦିମନ୍‌ର ଲଗେ ସୁବ୍‌କବର୍ ଜାନାଇବାକେ ଦାଇଡ଼ ଦେଇ ରଇଲା, ସେନ୍ତ୍ର ଜିଉଦି ନଇଲା ଲକ୍‌ମନ୍‌ର ଟାନେ

ସୁବକବର ଜାନାଇବାକେ ମକେ ଦାଇଡ଼ ଦେଲାଆତେ ।<sup>୮</sup> କାଇକେବଇଲେ ପିତର ଜେନ୍ତି ପରମେସରର ବସୁ ପାଇକରି ଜିଉଦିମନର ପାଇ ପେରିଡ଼ ସିସ୍ ଇସାବେ ଦାଇଡ଼ ପାଇରଇଲା, ସମାନ୍ ସେନ୍ତି, ମୁଇ ମିସା ପରମେସରର ବସୁ ପାଇକରି ଜିଉଦି ନଇଲା ଲକ୍ମନର ପାଇ ପେରିଡ଼ ସିସ୍ ଇସାବେ ଦାଇଡ଼ ପାଇଲିଆଟି ।<sup>୯</sup> ନେଡା ଇସାବେ ଏଜାଇଅଇରଇବା ଜାକୁବ୍, ପିତର ଆରି ଜଅନ୍, ଉଁ ବଲି ମାନି ଅଇରଇଲାଜ ଜେ, ପରମେସର ମକେ ଏ ମୁକିଅ କାମର୍ ଦାଇଡ଼ ଦେଲାଆତେ । ସେଟାର୍ ପାଇ ସେମନ୍ ମକେ ଆରି ବରନବାକେ, ଆମେ ମିସିକରି କାମ୍ କରୁବଲି ଗଟେକ୍ ଚିନ୍ ଇସାବେ ଆଡ଼ ମିଲାଇଲାଜ । ବରନବା ଆରି ମୁଇ ଜିଉଦି ନଇଲା ଲକ୍ମନର ବିଡ଼ରେ ଆରି ସେମନ୍ ଜିଉଦିମନର ବିଡ଼ରେ କାମ୍ କରୁବୁ ବଲି ରାଜି ଅଇରଇଲୁ ।<sup>୧୦</sup> ସେମନ୍ ଆମ୍‌କେ ସେମନର୍ ଦଲେ ଅବାବେ ରଇଲା ଲକ୍ମନକେ ଏଡାଇତେରୁଆ ବଲି ଅବକା ଏଡ଼କି ଗୁଆରି କରିରଇଲାଜ । ସେ ବିସଇ କରବାକେସେ ମର୍ ମନ୍ ରଇଲା ।

ଆନଟିଅକ୍‌ତେଇ ପାଉଲ୍ ପିତରକେ ମନାକରବାଟା

<sup>୧୧</sup> ପିତର ଆନ୍ତିଅକିଅତେଇ ଆସି ରଇଲା ବେଲେ ମୁଇ ସବୁ ଲକ୍ମର ମୁଆଟେ ତାକେ ମନାକରିରଇଲି, କାଇକେ ବଇଲେ ସତଇସେ ସେ ବୁଲ୍ କାମ୍ କରତେରଇଲା ।<sup>୧୨</sup> ଆଗୁଡୁ ସେ ଜିଉଦି ନଇଲା ଲକ୍ମନର ସଙ୍ଗ୍ କାଇତେରଇଲା, ମାତର୍ ଜେଡେବଲ୍ ଜାକୁବ୍ ପାଟାଇରଇବା ଲକ୍ମନ୍ ତେଇ ଆଇଲାଜ, ତେଇ ମିସିକରି କାଇବାଟା ଚାଡ଼ି ବିନେ ରଇଲା । ଜନ୍ ଜିଉଦି ବିସ୍‌ବାସିମନ୍ ଜିଉଦି ନଇଲାଟାମନ୍‌କେ ସୁନଡ଼ ଉଆ ବଲି ବାଦିଅ କରତେରଇଲାଜ, ସେମନ୍‌କେ ଡରି ପିତର ଏନ୍ତି କଲା ।<sup>୧୩</sup> ବିନ୍ ଜିଉଦି ବାଇମନ୍ ମିସା ପିତର ସଙ୍ଗ୍ ମିସି କୁଟିଆଲ୍‌ମନର୍ ପାରା ଚଲାଚଲ୍‌ତି କରତେ ରଇଲାଜ । ଏନ୍ତିକି ବରନବା ମିସା ସେନ୍ତାରି ଅଇଗାଲା ।<sup>୧୪</sup> ସବୁର୍ ମୁଆଟେ ମୁଇ ପିତରକେ କଇଲି, “ଡୁଇ ଜିଉଦି ଅଇକରି ମିସା, ଜିଉଦି ନଇଲା ଲକ୍ମର୍ ପାରା କେତେଟା ଜିଉଦି ରିଡିନିତି ଚାଡ଼ିଦେଇ ଆରୁସ୍ । ସେନ୍ତାରିଆଲେ ଜିଉଦି ନ ଅର୍ଡମନ୍‌କେ ଆମର୍ ଦରମର୍ ସବୁ ରିଡିନିତି ମାନ୍‌ବାକେ କେନ୍ତି ବାଦିଅ କଲୁସିନି ?”

ବିସ୍‌ବାସର ଲାଗି ମୁକ୍ତି

<sup>୧୫</sup> ଏବେ ଆମ୍‌କେ ଜନ୍‌ମେଅନି ଜିଉଦି ଲକ୍ ବଲି ଜାନଡ଼ । ପରମେସରର ନିୟମ୍ ନାଜାନ୍‌ଲା ଜିଉଦି ନଇଲା ଲକ୍ମନର୍‌ପାରା ନର୍ଡ଼ ।<sup>୧୬</sup> \*ଅଇଲେ ମିସା ଆମେ ଜାନ୍, ମସାର ନିୟମ୍‌ର୍ ଦାବି ପୁରାପୁରୁନ୍ କଲେ ନର୍ସ, ମାତର୍ ଉଜେ ଜିସୁ କିରିସ୍‌ଟର୍‌ତେଇ ବିସ୍‌ବାସ୍ କଲେ, ଗଟେକ୍ ଲକ୍ ପରମେସରର ମୁଆଟେ ଦସ୍ ନ ରଇବା ଲକ୍ ବଲାଇଅଇସି । ତାର୍ ମୁଆଟେ ଦରମ୍ ଲକ୍ ବଲାଇଅଇବାକେ, ଆମେ ଜିଉଦିମନ୍ ମିସା ଜିସୁକିରିସ୍‌ଟକେ ବିସ୍‌ବାସ୍ କଲୁନି । କାଇକେବଇଲେ ପରମେସରର ମୁଆଟେ କେମିସା ନିୟମ୍ ମାନ୍‌ବା ଲକ୍ ଦରମ୍ ବଲି ଏଜାଇ ନ ଅଅଡ଼ ।<sup>୧୭</sup> ମାତର୍ କିରିସ୍‌ଟର୍ ସଙ୍ଗ୍ ମିସିରଇଲାକେ ତାର୍ ମୁଆଟେ ଆମେ ଦରମ୍‌ଲକ୍ ବଲି ଏଜାଇ ଅଇବୁ । ମାତର୍ ମସାର ନିୟମ୍ ଇସାବେ, ଜିଉଦି ନଇଲା ଲକ୍ମନର୍ ପାରା ଆମେ ପାପିଲକ୍ ବଲି ଏଜାଇ ଅଇଲୁନି । କିରିସ୍‌ଟ ଲକ୍ମନକେ ପାପ୍ କରାଇବାକେ ବାଦିଅ କଲାମି ବଲି ତାର୍ ଅରଡ଼ ଆଟେ କି ? ନାଇ, ଏନ୍ତାରି କେବେ ନ ଅଏ ।<sup>୧୮</sup> କାଇକେବଇଲେ ମୁଇ ମସାର ନିୟମ୍ ପିଟି ପାସ୍‌ଲିଦେଲି । ମାତର୍ ଜନ୍ ନିୟମ୍ ମୁଇ ଚାଡ଼ିଦେଇରଇଲି, ସେଟା ଆରିତରେକ୍ ମାନ୍‌ବାକେ ଚେସ୍‌ଟା କଲେ ସତଇସେ ପାପି ଅଇଜିବି ।<sup>୧୯</sup> ନିୟମ୍‌ର୍ ପାଇ ମୁଇ ମଲାସମାନ୍ ଅଇଆଟି । ନିୟମ୍‌ର୍ ଲାଗି ସେ, ପରମେସରର

\* ୨:୧୭ ୨:୧୭ ରମିୟ ୩:୨୦; ରମିୟ ୩:୨୨



ମୁଆଟେ ଦସି ଅଇକରି ମରନର୍ ତଣ୍ଡ ପାଇଲି ।<sup>୨୦</sup> ପର୍ମେସରର୍ ପାଇ ବର୍ବବାକେ ମକେ କିରିସଟର୍ ସଙ୍ଗ୍ କୁର୍ସେ ମରାଇଆଟେ । ଏବେ ମୁଇ ଜିଇକରି ରଇନାଇ । ମାତର୍ କିରିସଟ୍ ମର୍ଟାନେ ଜିଇକରି ଆଟେ । ଏବେ ମର୍ ଗାଗଡ୍ ବିସ୍‌ବାସର୍ ଲାଗି ଜିବନ୍ ଆଟେ । ଜନ୍‌ଟା କି ପର୍ମେସରର୍ ପଅ ଜିସୁ କିରିସଟ୍ ମକେ ଆଲାଦ୍ କରି ମର୍ପାଇ ସେ ନିଜେ ସର୍ପି ଅଇଲା । ତାକେ ବିସ୍‌ବାସ୍ କରି ମୁଇ ଜିଇଲି ଆଟି ।<sup>୨୧</sup> ଏଟାର୍‌ପାଇ ପରମେସରର୍ ଜିବନ୍ ଦୁକାଇଲାଟାକେ ମୁଇ କେବେ ମିସା ନାଇ ବଲି କଇନାପାରି । କାଇକେ ବଇଲେ ନିୟମ୍ ମାନଲେ ଜଦି ଗଟେକ୍ ଲକ୍ ତାର୍ ମୁଆଟେ ଦରମ୍ ଲକ୍ ଅଇପାରେ, ତେବେ କିରିସଟ୍ ମଲାର୍ କିଟି ମୁଲିଅ ନାଇ । ଏ ସବୁ ବିସଇ ମୁଇ ଆନ୍‌ଟିଅକେ କଇଲି ।

## ୩

### ନିୟମ୍ କି ବିସ୍‌ବାସ୍

<sup>୧</sup> ଏ ବକୁଆ ଗାଳାତିଅମନ୍ ! କେ ତମକେ ଏନ୍ତାରି ବୁଲ୍ ସିକିଆ ଦେଇ ତଟ୍‌ପଟ୍ କରାଇଲାନି ? ତମର୍ ମୁଆଟେ ତା କୁର୍ସେ ମରିରଇବା ଜିସୁ କିରିସଟ୍ ବିସଇ ଅର୍ସା ସଙ୍ଗ୍ ବାତାଇ ଦେଇଆରୁ ।<sup>୨</sup> ଗଟେକ୍ କାତା ମକେ କଇଦେକାପନି, ମସାର୍ ନିୟମ୍ ମାନଲାଇକେ ତମେ ସୁକଲ୍‌ଆଡ୍‌ମା ପାଇଆଟାସ୍ କି, ସୁବ୍‌କବର୍ ସୁନି ସେଟା ବିସ୍‌ବାସ୍ କଲାକେ ?<sup>୩</sup> ତମେ କେନ୍ତାର୍ ଏତେକ୍ ବୁଦି ନଇଲା ଲକ୍ ପାରା ଅଇଗାଲାସ୍‌ନି ? ଆଡ୍‌ମାର୍ ବପୁ ପାଇକରି ତମେ ଜନ୍ ବିସ୍‌ବାସର୍ ଜିବନ୍ ଆରାମ୍ କଲାସ୍, ସେଟା କାଇ ନିଜର୍ ବପୁସଙ୍ଗ୍ ସାରାଇବାକେ ମନ୍‌କଲାସ୍‌ନି କି ?<sup>୪</sup> ସେଟାର୍‌ପାଇ ତମେ ଆଗତୁ ସିକ୍‌ଲାଟା ସବୁ ବେକାର୍ କି ? ତେଇଅନି କାଇଟା ମିସା ସିକାସ୍ ନାଇ କି ?<sup>୫</sup> ପର୍ମେସର୍ କାଇକେ ତାର୍ ଆଡ୍‌ମା ଦେଇ ତମର୍ ବିତ୍‌ରେ କାବାଅଇଜିବା କାମ୍‌ମନ୍ କଲା ? ତମେ ମସାର୍ ନିୟମ୍ ମାନଲାର୍ ପାଇ କି ଜନ୍ ସୁବ୍‌କବର୍ ତମକେ ଜାନାଇରଇଲାଇ ସେଟା ବିସ୍‌ବାସ୍ କଲାକେ ?

<sup>୬</sup> ଅବ୍ରାଆମର୍ କାତା ଏତାଇ ଦେକା । ସାସ୍‌ତରେ ଲେକାଆଟେ, “ସେ ପର୍ମେସର୍ କଇଲା ବିସଇ ବିସ୍‌ବାସ୍ କଲା । ଆରି ତାର୍ ବିସ୍‌ବାସର୍ ଲାଗି ପରମେସର୍ ତାକେ ଦରମ୍ ଲକ୍ ଇସାବେ ଲେକା କଲା ।”<sup>୭</sup> ଜନ୍ ଲକ୍‌ମନ୍ ବିସ୍‌ବାସ୍ କର୍‌ବାଇ, ସେମନ୍‌ସେ ଅବ୍ରାଆମର୍ କୁଟ୍‌ମର୍ ଲକ୍ । ଏଟା ତମେ ଜାନ୍‌ବାର୍ ଆଟେ ।<sup>୮</sup> ପୁର୍‌ବେଅନି ଦରମ୍ ସାସ୍‌ତରେ ଲେକାଅଇଲା ଆଟେ ଜେ, ବିସ୍‌ବାସ୍ କଲେସେ ପରମେସର୍ ଜିଉଦିନଇଲା ଲକ୍‌ମନ୍‌କେ ମିସା ଦରମ୍ ଲକ୍ ଇସାବେ ଲେକା କର୍‌ସି । ପରମେସର୍ ତମର୍‌ଟାନେଅନି ଜଗତର୍ ସବୁ ଲକ୍‌କେ ଆସିର୍‌ବାଦ୍ କର୍‌ସି । ଏ କବର୍ ପର୍‌ତୁମ୍ ଅବ୍ରାଆମକେ ଜାନାଇ ଦିଆଅଇରଇଲା ।<sup>୯</sup> ଅବ୍ରାଆମ୍ ବିସ୍‌ବାସ୍ କରି ଆସିର୍‌ବାଦ୍ ପାଇରଇଲା । ସେଟାର୍ ପାଇ ଜେଡ୍‌କି ଲକ୍ ବିସ୍‌ବାସ୍ କର୍‌ବାଇ, ସେମନ୍ ସବୁ ଲକ୍ ତାର୍ ପାରା ଆସିର୍‌ବାଦ୍ ପାଇବାଇ ।

<sup>୧୦</sup> ଜନ୍ ଲକ୍‌ମନ୍ ରିତିନିତିର୍ ନିୟମ୍ ମାନଲୁନି ବଲି ବଡ୍‌ପନ୍ ଅଇବାଇ, ସେମନ୍ ସାଇପ୍ ପାଇବାଇ । କାଇକେ ବଇଲେ ଦରମ୍‌ସାସ୍‌ତରେ ଲେକାଆଟେ, “ମସାର୍ ନିୟମ୍ ବଇଟାନେ ଜାଇଟା ସବୁ ଲେକାଅଇଲା ଆଟେ, ଜଦି କେ ସେଟା ପୁରାପୁରୁନ୍ ନ ମାନେ, ସେ ପରମେସରର୍ ସାଇପ୍ ପାଇସି ।”<sup>୧୧</sup> ଏଟା ନିକସଙ୍ଗ୍ ଜାନାପଡ୍‌ଲାନି । ରିତିନିତିର୍ ନିୟମ୍ ମାନିକରି କେ ମିସା ପର୍ମେସରର୍ ମୁଆଟେ ଦରମ୍ ବଲାଅଇ ନ ଅଅଡ୍ । କାଇକେବଇଲେ ଦରମ୍ ଲକ୍ ବିସ୍‌ବାସର୍ ଲାଗି ବର୍‌ବାଇ ।<sup>୧୨</sup> ନିୟମ୍ ମାନବାଟା ଆରି ବିସ୍‌ବାସ୍ କର୍‌ବାଟା ଦୁଇଟା ମୁଲ୍‌କେ ନ ମିସେ । ଦରମ୍ ସାସ୍‌ତରେ ଲେକାଆଟେ, ଜନ୍ ଲକ୍ ନିୟମ୍‌ର୍ ଦାବି ଇସାବେ କାମ୍ କର୍‌ସି ସେ ଜିବନ୍ ପାଇସି ।

୧୩ ଆମେ କେ ମିସା ନିୟମର ସବୁ ଆଦେସ୍ ମାନି ନାପାରୁ । ସେଟାର୍‌ପାଇଁ ଆମେ ସବୁ ଡକ୍ଟ ପାଇବାର ରଇଲା । ମାତର କିରିସ୍ଟ ଆମର ସାଇପ୍ ନିଜେ ନେଲା ଆରି ନିୟମର ସାଇପେଅନି ଆମ୍ଭେ ମୁକ୍ତଲାଇଲା । ଦରମ୍ ସାସ୍ତରେ ଲେକାଆଟେ, ଜେ ଗଟେ ଉତ୍ତକିଅଇ ମରସି, ସେ ପରମେସରର୍‌ତେଇ ଅନି ସାଇପ୍ ପାଇଲା ଲକ୍ ! ୧୪ ଅବରାଆମ୍ ଜନ୍ ଆସିରବାଦ୍ କରବାକେ ସପତ୍ କରିରଇଲା ଜିଉଦି ନଇଲା ଲକ୍‌ମନ୍ ମିସା ସେଟା ପାଇବାଇ, ସେଟାର୍ ପାଇ କିରିସ୍ଟ ଏ କାମ୍ କଲାଆଟେ । ସେଟାର୍ ପାଇ ବିସ୍‌ବାସ୍ କରି ଆମେ ମିସା ପରମେସରର୍ କାତା ଦେଲା ଇସାବେ ସୁକଲ୍‌ଆଡ଼ମା ପାଇପାରୁ ।

### ନିୟମ୍ ଆରି ସପତ୍

୧୫ ଏ ବାଇବଇନିମନ୍ ! ପରମେସର୍ ଅବରାଆମ୍‌କେ ଜନ୍ ସପତ୍ ଦେଇ ରଇଲା, ସେଟା ବାତାଇବାକେ ମୁଇ ଗଟେକ୍ ଉଦାଅରନ୍ କଇବି । ଜେତେବଲ୍ ଦୁଇ ଲକ୍ ଗଟେକ୍ ବିସଇତେଇ ରାଜିନାମା ଲେକ୍‌ବାଇ, ସେ ରାଜିନାମା କେ ମିସା ବାଙ୍ଗାଇ ନାପାରତ୍ । କି ତେଇ କାଇଟା ମିସାଇ ନାପାରତ୍ । ୧୬ ସେନ୍ତାର୍‌ସେ ପରମେସର୍ ଅବରାଆମ୍ ଆରି ତାର୍ ନାତିତିତିକେସେ ସପତ୍ ଦେଇରଇଲା । ଏ ବିସଇନେଇ ନାତିତିତିମନ୍ ବଲି ସାସ୍ତରେ ଲେକାରଇବାଟା, ଅବରାଆମ୍ ସବୁ ନାତିତିତିମନ୍‌କେ କଏନାଇ । ମାତର ଗଟେକ୍ ଲକ୍‌କେସେ କଇଲାଆଟେ । ଜେ କି କିରିସ୍ଟ । ୧୭ ମର୍ କଇବାର୍ ଅରତ୍ ଅଇଲାନି, ପରମେସର୍ ଅବରାଆମ୍ ସଙ୍ଗ୍ ଗଟେକ୍ ରାଜିନାମା ତିଆର୍ କରିରଇଲା, ଆରି ସେଟା ମାନ୍‌ବାକେ ସପତ୍ କରିରଇଲା ।

ଜନ୍ ନିୟମ୍ ଚାରି ସଅ ତିରିସ୍ ବରସ୍ ପଟେ ଦିଆଅଇଲା, ସେ ନିୟମ୍ ରାଜିନାମା କେ ମିସା ବାଙ୍ଗାଇ ଦେଇ, ପରମେସରର୍ ଦେଇରଇବା ସପତ୍ ନସ୍ଟ କରିନାପାରେ । ୧୮ \*ପରମେସରର୍ ଆସିରବାଦ୍ ପାଇବାଟା ଜଦି ନିୟମ୍ ମାନ୍‌ବା ଉପ୍ରେ ଅଇସି ବଇଲେ, ତେବେ ସେଟା ଆରି ତାକର୍ ସପତର୍ ଲାଗି ଅଇଲାଟା ବଲି କଇ ନଏ । ସେଟାର୍ ପାଇ ପରମେସର୍ ଅବରାଆମ୍‌କେ ଅବ୍‌କା ତାର୍ ସପତ୍ ଇସାବେ ସେ ଆସିରବାଦ୍ ଦେଇରଇଲା ।

୧୯ ତେବେ ନିୟମ୍ କାଇକେ ଦିଆଅଇଲା ? ମୁନ୍‌ସର୍ ସତ୍ ନ ଅଇବା ସବୁ କାମ୍ ଦେକାଇ ଦେବାକେ ଦିଆଅଇଲା । ଆରି ଅବରାଆମ୍ ଜନ୍ କୁଟୁମ୍ ଦେକି ପରମେସର୍ ସେ ସପତ୍ କରିରଇଲା, ସେ ଲକ୍ ଆଇବା ଜାକ ନିୟମ୍ ଦରକାର୍ ରଇଲା । ପରମେସର୍ ଗଟେକ୍ ଲକ୍‌କେ ମାଲାକାରିଆ କରାଇ ସରଗର୍ ଦୁଡ଼ମନ୍‌ର୍ ଆଟେ ନିୟମ୍ ପାଟାଇରଇଲା । ୨୦ ମାତର ଅବରାଆମ୍‌କେ ସପତ୍ ଦେଲା ବେଲେ ମାଲାକାରିଆମନ୍ ନ ରଇଲାଇ । ପରମେସର୍ ନିଜେସେ ସପତ୍ କରିରଇଲାଇ ।

### ନିୟମ୍ ଆଦେସ୍

୨୧ ନିୟମ୍ କାଇ ପରମେସରର୍ ସପତ୍ ବିରଦ୍ କଲାନି କି ? ନାଇ କେବେ ନାଇ ! କାଇକେବଇଲେ ଲକ୍‌କେ ଜିବନ୍ ଦେଲାପାରା ଗଟେକ୍ ନିୟମ୍ କରା ଅଇତା, ତେବେ ସେଟା ମାନ୍‌ଲେସରି ସେ ପରମେସରର୍ ମୁଆଟେ ଦସ୍ ନ କଲାଲକ୍ ବଲାଇ ଅଇତା । ୨୨ ମାତର ଦରମ୍ ସାସ୍ତରେ ଲେକା ଆଟେ, ସବୁ ମୁନ୍‌ସ୍ ଜାତି ପାପର୍ ତଲେ ଆଟତ୍, ସେଟାର୍ ପାଇ କିରିସ୍ଟ ବିସ୍‌ବାସିମନ୍, ଜିସୁ କିରିସ୍ଟର୍‌ତେଇ ବିସ୍‌ବାସ୍ କଲାର୍ ପାଇ ସପତର୍, ଆସିରବାଦ୍ ପାଇବାଇ ।

୨୩ ବିସ୍‌ବାସର୍ ଜୁଗ୍ ଆଇବା ଆଗ୍‌ତୁ ଆରି ଦେକାଇଅଇବା ଜାକ, ନିୟମ୍ ଆମ୍‌କେ ବନ୍ଦି କରି ରକିରଇଲା । ୨୪ କିରିସ୍ଟର୍ ଆଇବା ଜାକ ଆମେ ନିୟମ୍ ତଲେ ରଇଲୁ । ମାତର ତାର୍ ପଟେ, କାଲି ବିସ୍‌ବାସେଅନି ଆମେ ପରମେସରର୍ ମୁଆଟେ ଦସି

ନଇଲା ଲକ୍ ବଲାଇ ଅଇବୁ । ୨୫ ଏବେ ବିସ୍‌ବାସର୍ ଜୁଗ୍ କେଟିଆଚେ, ଆମେ ଆରି ନିୟମର୍ ତଲେ ନାଇ ।

୨୬ ବିସ୍‌ବାସ୍ କଲାକେ କିରିସ୍‌ଟ ଜିସୁର୍ ସଙ୍ଗ୍ ମିସିକରି, ଆମେ ସବୁ ପରମେସରର୍ ପିଲାଟକି ଅଇଆବୁ । ୨୭ ଆମେ ତୁବନ୍ ନେଇକରି କିରିସ୍‌ଟର୍ ସଙ୍ଗ୍ ଗଟେକ୍ ଅଇଆବୁ ଆରି ଏବେ ଜିସୁ କିରିସ୍‌ଟର୍ ଜିବନ୍ ରୁପର୍ ବସ୍‌ତର୍ ପିନ୍ଦି ଆବୁ । ୨୮ ସେଟାଟ୍ ପାଇ ଜିଉଦି ଆରି ଜିଉଦିନଇଲା ଲକ୍, ଗେନାଅଇଲା ଗତିଦାଙ୍ଗ୍‌ତାଦାଙ୍ଗ୍‌ତି କି ମୁକ୍‌ଲାଇଲା ଲକ୍, ମୁନୁସ୍ କି ମାଇଜି ବିତ୍‌ରେ, କାଇଟା ମିସା ବିନ୍ ନାଇ । ଆମେ ସବୁ ଲକ୍ ଜିସୁର୍ ସଙ୍ଗ୍ ମିସିକରି ଗଟେକ୍ ଅଇଆବୁ । ୨୯ \*ଜଦି ତମେ କିରିସ୍‌ଟର୍ ଲକ୍, ତେବେ ତମେ ମିସା ଅବ୍ରାଆମର୍ କୁଟୁମର୍ ଆରି ପରମେସର୍ ଜାଇଟା ସପତ୍ କଲାଆଚେ, ସେଟା ମିଲାଇସା ।

**୪**

୧ କାତା ଇସାବେ କଇଅଇସି । ପିଲା ବାବାର୍ ସବୁ ଦନ୍‌ସଁମ୍‌ପତି ପାଇବାର୍ ଅଦିକାର୍ ଆଚେ, ମାତର୍ ସବୁ ଜାକ ତାର୍ ଅଇରଇଲା ପଚେ ମିସା, ବୟସ୍ ନ ଅଇବା ଜାକ ସେ ଗତିଦାଙ୍ଗ୍‌ତା ଇସାବେ ଲେକା ଅଇସି । ୨ ବୟସ୍ ନ ଅଇବା ଜାକ, ତାର୍ ବାବା ଟିକ୍ କର୍‌ବା ବେଲା ନ ଅଇବା ଜାକ, ବିନ୍ ଲକ୍‌ମନ୍ ତାକେ ଜତନ୍ କର୍‌ବାଇ ଆରି ତାର୍ ସବୁ ବିସଇ ଦେକାରକା କର୍‌ବାଇ । ୩ ସେଣ୍ଟାରିସେ ଆମେ ମିସା ଆତ୍‌ମାର୍ ଇସାବେ ବୟସ୍ ନ ଅଇବା ଆଗ୍‌ତୁ, ଜଗତ୍‌କେ ସାସନ୍ କର୍‌ବା ନିଅମ୍, ଆରି ରିତିନିତିର୍ ଗତିଦାଙ୍ଗ୍‌ତା ଅଇ ରଇଲୁ । ୪ ସାରାସାରି ଜେତେବଲ୍ ସମାନ୍ ବେଲା କେଟ୍‌ଲା, ପରମେସର୍ ତାର୍ ନିଜର୍ ପଅକେ ପାଟାଇଲା । ଗଟେକ୍ ମାମୁଲି ଟକିର୍ ଗର୍‌ବେଅନି ଜାତ୍ ଅଇକରି ସେ ଜିଉଦି ନିଅମ୍ ମାନିକରି ଜିଇଲାଇ କାଇଲାଇ । ୫ \*ଜେକ୍ରିକି ଦର୍‌କାର୍ ରଇଲା ମୁଲିଅ ଦେଇ, ନିଅମ୍‌ର୍ ବନ୍‌ନେଅନି ଲକ୍‌ମନ୍‌କେ ମୁକ୍‌ଲାଇବାକେ ଆରି ସେମନ୍‌କେ ପରମେସରର୍ ପିଲାଜିଲା ଅଇବାକେ ବେଲା ଟିକ୍ କର୍‌ବାକେ, ତାର୍ ଜିବନ୍‌ର୍ ଆଦେସ୍ ରଇଲା ।

୬ ତମେମନ୍ ଜେ ପରମେସରର୍ ପିଲାଜିଲା, ଏଟା ଦେକାଇ ଦେବାକେ, ପରମେସର୍ ତାର୍ ପଅର୍ ଆତ୍‌ମା ଆମର୍ ମନ୍ ବିତ୍‌ରେ ପାଟାଇଲା ଆଚେ । ସେ ଆତ୍‌ମା ଆଉଲିଅଇ କଇଲାନି, “ବାବା ! ଏ ମର୍ ବାବା !” ୭ ସେଟାଟ୍‌ପାଇ ତମେ ଆରି ବିକିଅଇରଇବା ଗତିଦାଙ୍ଗ୍‌ତା ନୁଆସ୍, ମାତର୍ ପିଲାମନ୍ । ତମେ ତାର୍ ପିଲାଜିଲା ଅଇଲାର୍ ଲାଗି, ପରମେସର୍ ତାର୍ ପିଲାଟକିମନ୍‌ର୍‌ପାଇ ଜାଇଟା ସଙ୍ଗ୍‌ଇଲା ଆଚେ, ସେଟା ସବୁ ତମ୍‌କେ ଦାନ୍ କରିଦେଇସି ।

ଗାଳାତିଅମନ୍‌ର୍ ପାଇ ପାଉଲର୍ ଚିନ୍ତା

୮ ଆଗ୍‌ତୁ ତମେମନ୍ ପରମେସର୍‌କେ ଜାନି ନ ରଇଲାସ୍, ସେଟାଟ୍ ପାଇ ତମେ ମିର୍ ଦେବିଦେବ୍‌ତାମନ୍‌ର୍ ଗତି ଅଇରଇଲାସ୍ । ୯ ମାତର୍ ଏବେ ତମେ ପରମେସର୍‌କେ ଜାନିଆଟାସ୍, ନଇଲେ ମୁଇ କଇବି ପରମେସର୍ ତମ୍‌କେ ଜାନିଆଚେ । ତେବେ ଏଟା କେକ୍ରି ଅଇପାରେ ଜେ, ତମ୍‌କେ ରକିଆ କରିନାପାରି, ବପୁ ନ ରଇ ନସିଜିବା ଦେବ୍‌ତାମନ୍‌ର୍ ଲଗେ ଆରି ତରେକ୍ ବାଉଡି ଜିବାକେ ମନ୍ କଲାସ୍‌ନି ? ତମେ କାଇକେ ଆରି ତରେକ୍ ସେମନ୍‌ର୍ ଗତିଦାଙ୍ଗ୍‌ତା ଅଇବାକେ ମନ୍ କଲାସ୍‌ନି ? ୧୦ ଦୁକର୍ କାତା, ତମେ କେତେଟା ଦିନ୍, ମାସ୍, ପାଗ୍ ଆରି ବରସ୍‌କେ ବେସି ମନ୍‌ଦିଆନ୍ ଦେଲାସ୍‌ନି । ୧୧ ମୁଇ ତମର୍ ପାଇ ବେସି ଚିନ୍ତା କଲିନି । ତମର୍‌ପାଇ ମର୍ ସବୁ କାମ୍ ବେକାର୍ ଅଇଲା କି ?

\* ୩:୨୯ ୩:୨୯ ରମିୟ ୪:୧୩    \* ୪:୫ ୪:୫ ରମିୟ ୮:୧୫-୧୭

୧୨ ବାଇମନ୍, ମୁଇ ତମକେ ଜୁଆର୍ କରି କଇଲିନି, ମୁଇ ଜେନ୍ତାର୍ କଇଲିନି, ସେନ୍ତାରି ଜିଆ । ମୁଇ ଜିଉଦି ଅଇଲେ ମିସା ତମରପାରା ଜିଉଦି ନଇଲା ଲକ୍ ପାରା ଅଇକରି, ମସାର୍ ନିୟମେଅନି ମୁକ୍ଲିଆତି । ଆରି ତମେ ମକେ କାଇମିସା ଅନିଆଇ କରାସ୍ ନାଇ । ୧୩ ମୁଇ ପର୍ତ୍ତୁମ୍ ତର୍ କାଇକେ ତମର୍ ସଙ୍ଗ୍ ରଇଲି, ସେଟା ଏତାଆ । ସେଡ଼କି ବେଲେ ମକେ ଜର୍ଅଇରଲାକେ ତମକେ ସୁବ୍‌କବର୍ ଜାନାଇରଇଲି । ୧୪ ମାତର୍ ମର୍ ଗାଗଡ଼ ନିକ ନ ରଇଲାର୍‌ପାଇ ତମକେ ବେସି ଅସୁବିଦା ଅଇଲା । ଅଇଲେମିସା ତମେ ମକେ ଏଲା କରାସ୍ ନାଇ କି ଚାଡ଼ି ଦିଆସ୍ ନାଇ, ମାତର୍ ମକେ ଗଟେକ୍ ସରଗର୍ ଦୁଡ଼ପାରା ତାକି ରଇଲାସ୍ । କିରିସ୍‌ଟ ଜିସୁକେ ଜେନ୍ତ୍ର ତମେ ତାକ୍‌ତାସ୍, ସେନ୍ତ୍ର ମକେ ମିସା ତାକ୍‌ଲାସ୍ । ୧୫ ସେବେଲା ତମେ କେତେକ୍ ସାର୍‌ଦା ରଇଲାସ୍ ! ମାତର୍ ଏବେ ଆମର୍ ବିତ୍‌ରେ ରଇବା ସେ ସାର୍‌ଦା କେନେ ଗାଲା ? ତମର୍ ବିସଇ ମୁଇ ତାଟ୍‌ସଙ୍ଗ୍ କଇଲିନି ଜେ, ଜଦି ଅଇପାର୍‌ତା ଆଲେ, ତମର୍ ନିଜର୍ ନିଜର୍ ଆଁକି ବେଟି ଆନି ମକେ ଦେଇତାସ୍ ! ୧୬ ମାତର୍ ମୁଇ ଏବେ ସଡ଼୍ କଇଲାର୍ ପାଇ, କାଇ ତମର୍ ସଡ଼୍‌ରୁ ଅଇଗାଲି ଆଟି କି ?

୧୭ ସେ ବିନ୍ ଲକ୍‌ମନ୍ ତମର୍ ବାଟେ ବେସି ଦିଆନ୍ ଦେଲାଜିନି । ମାତର୍ ସେମନ୍‌ର୍ ଦିଆନ୍ ଦେବାଟା ସଡ଼୍ ଇସାବେ ନାଇ । ସେମନ୍ ଏଟା ମନ୍ କଲାଜିନି, ଜେନ୍ତ୍ରକି ମର୍‌ବାଟେଅନି ତମକେ ବିନେ କଲେ, ତମେ ତାକ୍‌ର୍‌ବାଟେ ମନ୍ କର୍‌ସା । ୧୮ ବିନ୍ ଲକ୍‌ମନ୍ ତମର୍ ବାଟେ ବେସି ଦିଆନ୍ କର୍‌ବାଟା ନିକ ବିସଇ । ମୁଇ ରଇଲା ବେଲେ କି ନ ରଇଲା ବେଲେ ସେମନ୍ ତମର୍‌ଟାନେ ଦିଆନ୍ ଦେବାଟା ନିକ ବିସଇ, ମାତର୍ ତାକ୍‌ର୍ ଦିଆନ୍ ଦେବାଟା ଟିକ୍ ରଇବାର୍ ଆଟେ । ୧୯ ଏ ମର୍ ଆଲାଦର୍ ପିଲାମନ୍, ତମର୍ ବିତ୍‌ରେ କିରିସ୍‌ଟର୍ ପାରା ଚଲାଚଲ୍‌ତି ଅଇ ଆଇବାକେ, ମୁଇ ଆରିତରେକ୍ ଆଡ଼ଗଡ଼ ସୁକ୍ ଅଇବା ପାରା ଦୁକ୍‌କସ୍‌ଟ ପାଇଲିନି । ୨୦ ଜେନ୍ତ୍ରାରିକି ମୁଇ ଏବେ ତମର୍ ଲଗେ ରଇକରି ଦାକାପୁକା ନ କରି, ବିନ୍ ଇସାବେ କାତା ଅଇବାକେ ମନ୍ କଲିନି । କାଇକେବଇଲେ ମୁଇ ତମର୍ ବିସଇନେଇ ବେସି ଚିନ୍ତା କଲିନି ।

ଆଗାର୍ ଆରି ସାରାର୍ ବିସଇନେଇ କଇବାଟା

୨୧ ମସାର୍ ରିଡିନିଡିର୍ ତଲେସେ ରଇବାକେ ତମେ ମନ୍ କଲାସ୍‌ନି କି ? ମକେ କଇଦେକାପନି, ତମେ କାଇ ରିଡିନିଡିଟାନର୍ ବାକିଅ ସୁନାସ୍ ନାଇ କି ? ୨୨ ଅବ୍‌ରାଆମ୍‌କେ ଦୁଇଟା ପଅ ରଇଲାଇ । ଗଟେକ୍ ତାର୍ ଗରେ ପାଇଟି କର୍‌ବା କୁଲିଆର୍‌ନିର୍‌ଟା, ଆରି ଗଟେକ୍ ତାର୍ ନିଜର୍ ବିବାଇ ମାଇଜିର୍‌ଟା । କାଇକେବଇଲେ ଲେକା ଆଟେ, ୨୩ ଜନ୍‌ଟା କୁଲିଆର୍‌ନିର୍ ପଅ, ସେ ମୁନ୍‌ସର୍ ମନ୍ କଲା ଇସାବେ ଜନମ୍ ଅଇଲା । ଜନ୍‌ଟା ବିବାଇ ମାଇଜିର୍‌ଟା, ପର୍‌ମେସର୍ କରିରଇବା ସପଡ଼ ଇସାବେ ଜାଡ଼୍ ଅଇଲାଟା । ୨୪ ଏ କାତା ଗଟେକ୍ ଜଟ୍‌କା ଇସାବେ ଆଟେ । କାଇକେବଇଲେ ଦୁଇଟା ମାଇଜି ଦୁଇଟା ରାଜିନାମା ପାରା । ଗଟେକ୍ ରାଜିନାମା ଆରାବ୍ ଦେସେ ରଇବା ସିନଅ ପର୍‌ବଡ଼ ଉପରେ ପର୍‌ମେସର୍ ମସାକେ ଦେଇରଇବା ନିୟମ୍ । ଏ ରାଜିନାମା ଆଗାର୍‌କେ ସମାନ୍ କରି ଅଇସି । କାଇକେବଇଲେ ଆଗାର୍ ଆରି ତାର୍ ପିଲାମନ୍ ଗତି ଅଇରଇଲାଇ । ସମାନ୍ ସେନ୍ତାରିସେ ଏ ରାଜିନାମାର୍ ପିଲାମନ୍ ସବୁଲକ୍ ଗତିଦାଙ୍ଗ୍‌ତା । ୨୫ ଆଗାର୍‌କେ ଆରବର୍ ସିନଅ ପର୍‌ବଡ଼ ସଙ୍ଗ୍ ସମାନ୍ କରିଅଇସି, କନ୍ତ୍ରୁଅନି ନିୟମ୍ ଆଇଲାଆଟେ । ତାକେ ଏବର୍ ଜିରୁସାଲାମ୍ ସଅର୍‌କେ ମିସା ସମାନ୍ କରିଅଇସି । କାଇକେବଇଲେ, ଜିରୁସାଲାମ୍ ରଇବା ଜିଉଦିମନ୍ ମସାର୍ ନିୟମ୍ ବିସ୍‌ବାସ୍ କଲାଜିନି । ସେ ନିୟମ୍ ବିସ୍‌ବାସ୍ କରି ନିୟମ୍‌ର୍ ଗତିଦାଙ୍ଗ୍‌ତା ଅଇଆଟଡ଼ ।

୨୭ ମାତର ଅବରାଆମର ବିବାଇ ମାଇଜି ଜେ କି ଗତିଦାଙ୍ଗତା ନଏଁ, ତାକେ ସରଗର ଜିରୁସାଲାମକେ ସମାନ କରିଅଇସି । ସେ ଆମେ ବିସ୍‌ବାସ କରବା ସବୁ ଲକର ମାଆ । ୨୭ ଜେନ୍ତାରିକି ସାସ୍‌ତରେ ଲେକାଅଇଆଟେ,

“ ଅଇରେ ବାଞ୍ଜି ମାଇଜି, ତୁଇ ସାରଦା ଅ,  
କେବେମିସା ପିଲାଜିଲା ପାଇବା ଦୁକାସୁକା

ଦାରାଇ ଅଇବାଟା ନାଜାନିରଇଲେ ମିସା  
ଆଉଲି ଅଇ ତର୍ ସାରଦା ସବୁକେ ଜାନାଇଦେସ୍ । କାଇକେବଇଲେ ମୁନୁସ୍  
ସଙ୍ଗ୍

ବାସା ଅଇରଇବା ମାଇଜିର ଟାନେଅନି ଗଟେକ୍ ରାଡ୍‌ର  
ମାଇଜିର ପିଲାଜିଲା ଅଦିକ୍ ଅଇସି । ”

୨୮ ଏ ବାଇବଇନିମନ୍ ତମେ ଇସାକର୍ ପାରା ପର୍ମେସର୍ ସପଡ୍ କରି ପାଟାଇରଇବା ପିଲାଜିଲା ଅଇଗାଲାସ୍ । ୨୯ ସେବେଲେ ଅବରାଆମର ପିଲା ଜେ କି ଗାଗତର୍ ଇସାବେ ଜନମ୍ ଅଇରଇଲା, ତାର୍ ସାନ୍ ବାଇକେ ସାଦ୍‌ବାନ୍ କଲା । ଜେ କି ପର୍ମେସରର୍ ଆଡ୍‌ମା ଇସାବେ ଜନମ୍ ଅଇଲା । ସେଟା ଏବେ ମିସା ଅଇଲାନି । ୩୦ ମାତର ଏ ବିସଇନେଇ ସାସ୍‌ତର୍ କାଇଟା କଇଲାନି ? ତେଇ ଲେକାଅଇଆଟେ, କୁଲିଆର୍ନି ଆରି ତାର୍ ପଅକେ ବାର୍‌କରାଇ ଦିଆସ୍ । କାଇକେବଇଲେ କୁଲିଆର୍ନିର ପଅ ବିବାଇ ମାଇଜିର ପଅର୍ ସଙ୍ଗ୍ ବାବାର୍ ଦନ୍ ସପଡି ପାଇନାପାରେ । ୩୧ ତେବେ ଏ ମର୍ ବାଇବଇନିମନ୍ ଆମେ କୁଲିଆର୍ନିର ପିଲାଜିଲା ନଉଁ, ବିବାଇ ମାଇଜିର ପିଲାଜିଲା ।

### ୫

ତମର୍ ମୁକଲ୍‌ଲାଟା ଜତନ୍ କରା

୯ ଏବେ ଆମେ ବାନ୍‌ନେଅନି ମୁକଲିଆରୁ । ଆମ୍‌କେ କିରିସ୍‌ଟ ବାନ୍‌ନେଅନି ମୁକଲାଇଆଟେ । ସେଟାର୍ ପାଇ ଆମେ ବାନ୍‌ନ୍ କୁସ୍‌ଲାଇ ଡାଟ୍ ସଙ୍ଗ୍ ରଉଁ । ଆରି ତରେକ୍ ଗତିଦାଙ୍ଗତାର୍ ବାନ୍‌ନେ ବାନ୍‌ଅଇବାକେ ନ ଦେଉ ।

୧୦ ମୁଇ ପାଉଲ୍ ଏବେ କଇଲିନି ସୁନା, ତମେ ଜଦି ପର୍ମେସରର୍ ମୁଆଟେ ଦରମ୍ ଅଇବାକେ ସୁନଡ୍ ଅଇବା ରିଡିନିଡି ମାନ୍‌ଲାସ୍‌ନି, ତମ୍‌କେ କିରିସ୍‌ଟ ଆରି ଲଡାନାଇ ବଲି ତେଇଅନି ଜାନା ପଡ୍‌ଲାନି । ୧୧ ଜନ୍ ଲକ୍ ସୁନଡ୍ ଅଇବାକେ ଗାଲାନି, ମୁଇ ଆରିତରେକ୍ ତାକେ ଜାଗ୍‌ରଡ୍ କରାଇଦେଲିନି ଜେ, ମସାର୍ ନିୟମ୍ ପୁରାପୁରୁନ୍ ମାନ୍‌ବାର୍ ଆଟେ । ୧୨ ତମର୍ ବିଡ୍‌ରେ ଜେଡ୍‌କି ଲକ୍ ନିୟମ୍ ମାନ୍‌ଲାର୍‌ପାଇ ପର୍ମେସରର୍ ମୁଆଟେ ଦରମ୍ ଅଇବାକେ ଚେସ୍‌ଟା କଲାସ୍‌ନି, । ତମେ କିରିସ୍‌ଟେଇ ଅନି ବିନେ ଅଇଆଟାସ୍, ଆରି ପର୍ମେସରର୍ ଜିବନ୍ ଦୁକାଇଲାତେଇଅନି ବାଇରେ ଆଟାସ୍ । ୧୩ ମାତର ଆମେ ଆସାକଲୁନି ଜେ, ପରମେସର୍ ଆମ୍‌କେ ତାର୍ ବିଟାର୍ ଇସାବେ ଦସ୍ ନଇଲା ଲକ୍ ବଲି କଇସି, ଜନ୍ ସୁକଲ୍ ଆଡ୍‌ମାର୍ ବପୁ ବିସ୍‌ବାସର୍ ଲାଗି ଆମ୍‌ର ବିଡ୍‌ରେ କାମ୍ କଲାନି, ସେ ବପୁର ଲାଗି ସେଟା ଅଇସିବଲି ଆମେ ଜାଗ୍‌ଲୁନି । ୧୪ କାଇକେବଇଲେ ଜିସୁ କିରିସ୍‌ଟର୍ ସଙ୍ଗ୍ ମିସିକରି ଜିଇଲେ କାଇଲେ, ସୁନଡ୍ ଅଇବାଟା କି ସୁନଡ୍ ନ ଅଇବାଟା କାଇଟା ମିସା ନାଇ । ଏକାଇ ଗଟେକ୍‌ସେ ଦରକାର୍ ରଇଲା ବିସଇ । ସେଟା ଅଇଲାନି, ବିସ୍‌ବାସେ ଡାଟ୍ ରଇ ଆଲାଦ୍ ସଙ୍ଗ୍ ଦାଇତେ ରଇବା କାମ୍ କରବାର୍ ।

୧୫ ତମେ ନିମାନ୍ ସଙ୍ଗ୍ ଆଗ୍‌କେ ଜାଇତେ ରଇଲାସ୍ ! ସଡ୍ ବାଟେ ଇଣ୍ଡୁଲା ବେଲେ, କେ ତମ୍‌କେ ଅଟ୍‌କାଇଲା ? କାରାପ୍ ବାଟେ ଜିବାକେ କେ ଉସ୍‌କାଇଲା ? ୧୬ ତମ୍‌କେ ଡାକି ରଇଲା ପରମେସର୍‌ଟାନେଅନି ଏଟା ଅଏନାଇ । ୧୭ କାତାଇ ଆଟେ, ଚକ୍‌ଟି

☆ ୫:୯ ୫:୯ ୧ମ କରକ୍ରିୟ ୫:୨

ରଇବା ସବୁ ଅଗାଗୁଣ୍ଡ ପୁଲାଇବାକେ କଣ୍ଠେକ୍‌ସେ କମିର୍ ଲଡା । ୧୦ ସେଟା ଜାଇଟା ଅଇଲେ ମିସା ଅଅବେ, ଏବେ ଜାକ ମର୍ ତମର୍ ଉପରେ ଆସାବରସା ଆଚେ । କାଇକେ ବଇଲେ ଆମେ ସବୁ ଲକ୍ ମାପୁରୁର୍ ସଙ୍ଗ୍ ମିସି ଆଚୁ । ମୁଇ ବିସ୍‌ବାସ୍ କଲିନି, ତମେ ମର୍ ସିକିଆ ବିରଦ୍ ନ କରାସ୍ । ଆରି ଜନ୍ ଲକ୍ ତମ୍‌କେ କଟପଟ କଲାଇନି, ସେ ଜେ ଅଇରଇଲେ ମିସା, ତାକେ ପର୍‌ମେସର୍ ଡଣ୍ଡ ଦେଇସି ।

୧୧ ମାତର୍ ଏ ବାଇବଇନିମନ୍, ମୁଇ ଆଜିକେଜାକ ଜିଉଦି ନ ଅଇଲା ଲକ୍‌ମନ୍ ବିସ୍‌ବାସ୍ କଲେ ମିସା, ସୁନଡ୍ କର୍‌ବାର୍ ଆଚେ ଆକା ବଲି ସିକାଇଲିନି ପନି । ମୁଇ ଏନ୍ତାରି ସିକାଇଲିନି ବଲି, କେତେକ୍ ଲକ୍‌ମନ୍ କଇବୁଲ୍‌ଲାଇନି । ସେନ୍ତାରିଆଲେ ମୁଇ ଏବେ ମିସା କାଇକେ ନିୟା ପାଇଲିନି ? ତେବେ ମୁଇ କିରିସର୍‌ର କୁରୁସ୍ ବିସଇ ଜାନାଇବାଟା ସୁନିକରି ଜିଉଦିଲକ୍‌ମନ୍ ରିସା ନ ଅଇତାଇ । ୧୨ ମୁଇ ମନ୍ କଲିନି, ଏ ବିସଇନେଇ ଜେ ଜେ ତମ୍‌କେ କଟପଟ କଲାଇନି, ସେମନ୍ ଆରି ଅଲପ୍ ଆଗ୍‌କେ ଜାଅଡ୍ । ଉଜେ ସୁନଡ୍ ନ ଅଇ ସେମନ୍‌ର୍ ଲିଙ୍ଗ୍ ପୁରାପୁରନ୍ କାଟି ଦେଅଡ୍ !

୧୩ ଏ ବାଇବଇନିମନ୍, ନିୟମର୍ ଡଣ୍ଠେଅନି ମୁକ୍‌ଲାଇ ଅଇବାକେ ପର୍‌ମେସର୍ ତମ୍‌କେ ଡାକ୍‌ଲାଆଚେ । ମାତର୍ ଜାଗ୍‌ରଡ୍, ଏବେ ଆରି ଗାଗଡର୍ ମନ୍ କର୍‌ବାଟା ସବୁ ପୁରାପୁରନ୍ କରିଅଇସି ବଲି କୁଆନାଇ । ମାତର୍ ଆଲାଦେଅନି ଚଲାଚଲ୍‌ତି ଅଇ ତମର୍ ବିଡ୍‌ରେ ଗଟେକ୍ ଲକ୍ ଆରି ଗଟେକ୍ ଲକ୍‌ର୍ ସେବା କରା । ୧୪ କାଇକେ ବଇଲେ ସବୁ ନିୟମ୍ ଏ ଗଟେକ୍ ବାକିଅତେଇ ସିଦ୍ ଅଇସି, ତମେ ନିଜ୍‌କେ ଆଲାଦ୍ କଲାପାରା ବିନ୍ ଲକ୍‌କେ ଆଲାଦ୍ କରା । ୧୫ ମାତର୍ ତମେ ଜଦି କିରମାର ଅଇ ତମର୍ ବିଡ୍‌ରେ ଚାବାକାଡ୍‌ରା ଅଇସା, ତେବେ ଜାଗ୍‌ରଡ୍, ଜେନ୍ତିକି ତମର୍ ଗଟେକ୍ ଲକ୍ ଆରି ଗଟେକ୍ ଲକ୍‌କେ ମାରି ନସ୍‌ଟ ନ ଉଆ ।

**ସୁକଲ୍‌ଆଡ୍‌ମା ଆରି ଲକ୍‌ମନ୍‌ର୍ ଚଲନ୍**

୧୬ ମର୍ କଇବା କାତା ଅଇଲାନି, କେନ୍ତି ଚଲାଚଲ୍‌ତି କର୍‌ବାର୍ ସେଟା ସୁକଲ୍‌ଆଡ୍‌ମା ତମ୍‌କେ ସିକାଅ । ସେନ୍ତି ବଇଲେ, ତମେ ଆରି ଲକ୍‌ର୍ ଚଲନ୍ ଆରି ଲାଲ୍‌ସା ବାଟେ ନ ଜାଆସ୍ । ୧୭ \*ଲକ୍‌ର୍ ଚଲନ୍ ସୁକଲ୍‌ଆଡ୍‌ମାର୍ ବିରଦି । ସେନ୍ତି ସେ ସୁକଲ୍‌ଆଡ୍‌ମା ମନ୍ କର୍‌ବାଟା, ଲକ୍‌ର୍ ଚଲନ୍‌ର୍ ବିରଦି । ଏମନ୍ ଗଟେକ୍ ଲକ୍ ଆରି ଗଟେକ୍ ଲକ୍‌ର୍ ସଡ୍‌ରୁ । ସେଟାର୍ ପାଇ ତମେ କାଇଟା କର୍‌ବାକେ ମନ୍ କଲାସ୍‌ନି ସେଟା କରି ନାପାରାସ୍ । ୧୮ ଜଦି ସୁକଲ୍‌ଆଡ୍‌ମା ତମ୍‌କେ ଚାଲ୍‌ନା ଦେଇସି, ତେବେ ତମେ ଆରି ମସାର୍ ନିୟମର୍ ତଲେ ନାଇ ।

୧୯ ଗାଗଡର୍ କାମ୍‌ମନ୍ ତା ନିକ ସଙ୍ଗ୍ ଜାନା ପଡ୍‌ଲାନି, ବେସିଆ କାମ୍ କର୍‌ବାଟା, ସୁକଲ୍ ନଇଲାଟା, ୨୦ କାରାପ୍ ଇସାବେ ଦେକ୍‌ବାଟା, ପୁଡ୍‌ଲାପୁଜା କର୍‌ବାଟା, ଜାତୁବିଦିଆ କର୍‌ବାଟା, ଲାଗାଜତା କରି ସଡ୍‌ରୁ ଅଇବାଟା, ଆଁକାର୍ ଅଇବାଟା, ରିସା ଅଇବାଟା, କାମ୍ ଅଇଲାପଚେ ପାଚାରି ନ ଦେକ୍‌ବାଟା, ଦଲ୍‌ବିରଦି ଅଇବାଟା, କିରମାର୍ ଅଇବାଟା, ୨୧ ଇସାତଲା ଅଇବାଟା, ମାତୁଆଲ୍ ଅଇବାଟା, ମଜାମଜ୍‌ଲିସ୍ ଅଇବାଟା, ଏ ସବୁ କାମ୍‌ମନ୍ ମୁଇ ଆଗ୍‌ତୁ ଜେନ୍ତି ତମ୍‌କେ କଇରଇଲି, ସେଟାର୍ ପାଇ ଆରିତରେକ୍ କଇଦେଲିନି ଜେ, ଜନ୍ ଲକ୍‌ମନ୍ ଏନ୍ତାରି କାମ୍ କର୍‌ବାଇ, ସେମନ୍ ପରମେସର୍‌ର୍ ରାଇଜେ ପୁରବା ଅଦିକାର ପାଇ ନାପାରଡ୍ ।

୨୨ ମାତର୍ ଆଡ୍‌ମାର୍ ପଲ୍ ଅଇଲାନି, ଆଲାଦ୍ କରାକରି ଅଇବାଟା, ସାର୍‌ଦାସଙ୍ଗ୍ ରଇବାଟା, ସାନ୍ତିସଙ୍ଗ୍ ରଇବାଟା, ମୁରଟିକରି ରଇବାଟା, ବିନ୍‌ଲକ୍‌କେ ଉପ୍‌କାର୍ କର୍‌ବାଟା, ନିମାନ୍ ଚଲାଚଲ୍‌ତି କର୍‌ବାଟା, ବିସ୍‌ବାସେ କାମ୍‌କର୍‌ବାଟା, ସଲଦ୍ ଅଇବାଟା, ଆଡ୍‌ମାଇ ସାଆସ୍ ଦାରି ଚଲାଚଲ୍‌ତି କର୍‌ବାଟା, ୨୩ ଏ ସବୁର୍ ଚଲନ୍ ମାନ୍‌ବା ଲକ୍ ନିୟମର୍ ବିରୁଦେ କାଇଟା ନ କରେ । ୨୪ ଜନ୍ ଲକ୍‌ମନ୍ କିରିସର୍

\* ୫:୧୭ ୫:୧୭ ରମିୟ ୭:୧୫-୨୩

ଜିସୁର୍, ସେମନ୍ ତାକର୍ ଗାଗଡ଼କେ ତାର୍ ମନ୍ କରବାଟା ଆରି ଆସା କରବାଟା ସଙ୍ଗ୍ କୁରସତେଇ ମରାଇ ଆଚଡ଼ ।<sup>୨୫</sup> ଜଦି ଆମେ ସୁକଲ୍ ଆଡ଼ମାଇଅନି ଜିବନ୍ ପାଇଆରୁ, ତେବେ ଆଡ଼ମାର୍ ଇସାବେ ଚଲାଚଲ୍ତି କରୁ ।<sup>୨୬</sup> ଆମେ ତୁଚାଇ ବଡ଼ପନ୍ ଅଇ ଗଟେକ୍ ଲକ୍ ଆରି ଗଟେକ୍ ଲକ୍‌କେ ରିସା ନ କରୁ ଆରି ଇସା ନ କରୁ ।



ମିସିବିଡ଼ିକରି ବଜ୍ ବୁଆ

<sup>୧</sup> ଏ ବାଇବଇନିମନ୍ ଜଦି ତମର୍ ବିଡ଼ରେ କେ କାରାପ୍ କାମ୍ କଲା ବେଲେ ଦାରାପଡ଼ଲେ, ତମର୍‌ଟାନେ ଜେ ସୁକଲ୍ ଆଡ଼ମାଇଅନି ଚାଲ୍‌ନା ପାଇଲାନି, ସେ ତାକେ ଟିକ୍ ବାଟେ ଆନ୍‌ବାର୍ ଆଚେ । ମାତର୍ ସେ ଏ କାମ୍ ସାର୍‌ଦା ଆରି ସଲଦସଙ୍ଗ୍ କରବାର୍ ଆଚେ । ଆରି ଜାଗରଡ଼, ଜେନ୍ତିକି ସେ ନିଜେ ସେନ୍ତା କାମ୍ କରବାକେ ମନ୍ କରବାର୍ ନାଇ ।<sup>୨</sup> ତମର୍ ତମର୍ ବିଡ଼ରେ, ଜିବନେ ଆଇବା ବଜ୍ ବିସଇ ବଇବାକେ ସାଇଜ କରାକରି ଉଆ । ଏନ୍ତାରି କଲେ ତମେ କିରିସଟର୍ ଆଦେସ୍ ମାନ୍‌ସା ।<sup>୩</sup> ଜେ ନିଜର୍ ବିସଇନେଇ ବଡ଼ ବଲି ବାସ୍‌ସି, ସତଇସେ ଦେକ୍‌ଲେ ସେ ବଡ଼ ନଏ । ସେ ନିଜେ ନାଡ଼ାଇ ଅଇଲାନି ।<sup>୪</sup> ସବୁ ଲକ୍ ନିଜର୍ ନିଜର୍ ଚଲାଚଲ୍ତି ବିଚାର୍ କରି ଦେକ୍‌ବାର୍ ଆଚେ । ଜଦି ସେଟା ନିକ ଅଇରଇସି, ତେବେ ସେ ନିଜେ ସାର୍‌ଦା ଅ । ଆରି ବିନ୍ ଲକ୍‌କର୍ କାମ୍‌ସଙ୍ଗ୍ ନିଜେ କଲାଟା ସମାନ୍ ନ କର ।<sup>୫</sup> କାଇକେ ବଇଲେ ସବୁ ଲକ୍ ନିଜର୍ ନିଜର୍ ଜିବନେ ଆଇବା ବଜ୍ ବଇବାକେ ପଡ଼ସି ।

<sup>୬</sup> ଜନ୍ ଲକ୍‌ମନ୍ ବାକିଅଟାନେ ସିକିଆ ପାଇଲାଇନି, ସେମନ୍‌ଟାନେ ଜନ୍‌ଟା ଆଚେ, ସେଟା ତାକର୍ ସିକାଉମନ୍‌ର୍ ସଙ୍ଗ୍ ବାଟା କରବାର୍ ଆଚେ ।

<sup>୭</sup> ପରମେସର୍ ନାଡ଼ାଇ ନ ଅଏ, ନିଜେ ନାଡ଼ାଇ ଉଆ ନାଇ । ଜେ ଜନ୍‌ଟା ବୁନିରଇସି, ସେ ସମାନ୍‌ଟା ଆକା କାଟ୍‌ସି । « ଜେ ନିଜର୍ ଗାଗଡ଼ର୍ ଗୁନ୍‌ଚଲନ୍ ଇସାବେ ବୁନ୍‌ସି, ସେ ଗାଗଡେଅନି ବାରଇବା ମରନର୍ କେଡ଼ କାଟ୍‌ସି । ମାତର୍ ଜେ ଆଡ଼ମାର୍ ଇସାବେ ବୁନ୍‌ସି, ସେ ଆଡ଼ମାଇଅନି ବାରଇଲା ନ ସାର୍‌ବା ଜିବନ୍‌ପାରା କେଡ଼ କାଟ୍‌ସି ।<sup>୯</sup> ସେଟାର୍ ପାଇ ଆମେ ନିକ କାମ୍ କରି ଲାଗି ରଇବୁ । କାଇକେ ବଇଲେ ନ ତାକ୍‌ଲେ ସେ ସମାନ୍ ବେଲାଇ ପସଲ୍ ପାଇବାର୍ ଅଇସି ।<sup>୧୦</sup> ସେନ୍ତି ବଇଲେ ଜେତେକ୍ ତର୍ ବେଲା ପାଇଲୁନି, ସବୁବେଲା ସବୁର୍‌ସଙ୍ଗ୍, ଜନ୍‌ଲକ୍‌ମନ୍ ଆମର୍ ବିସବାସି କୁଟୁମେ ମିସ୍‌ଲାଇ ଆଚଡ଼, ସେମନ୍‌ର୍ ପାଇ ନିମାନ୍ କରବାର୍ ଆମର୍ ଦାଇଡ଼ ।

ସାରାସାରି ବେଲର୍ ଜାଗରଡ଼ କରାଇବା କାତା

<sup>୧୧</sup> ଦେକା, କେତେ ବଡ଼ ବଡ଼ ଅଇକର୍‌ସଙ୍ଗ୍ ମୁଇ ତମ୍‌କେ ଏ ଚିଟିର୍ ସାରାସାରି କାତା ମର୍ ନିଜର୍ ଆତେ ଲେକ୍‌ଲିନି ।<sup>୧୨</sup> ଜନ୍ ଲକ୍‌ମନ୍ ବାଇରର୍ ରିତିନିତି ମାନିକରି ଡାକ୍‌ପୁଟା ପାଇବାକେ ମନ୍ କରବାଇ, ସେମନ୍ ତମ୍‌କେ ସୁନଡ଼ ଅଇବାକେ ବାଦିଅ କଲାଇନି । କିରିସଟର୍ କୁରସର୍ ଲାଗି ସେମନ୍ ଜେନ୍ତି ସଙ୍ଗ୍‌ର୍ ଜିଉଦିମନ୍‌ର୍ କସ୍‌ଟ ନ ପାଇବାର୍ ଲାଗି ଏଟା କଲାଇନି ।<sup>୧୩</sup> କାଇକେ ବଇଲେ ଜନ୍ ଲକ୍‌ମନ୍ ସୁନଡ଼ ବିଦିକେ ଟିକ୍ ବଲି କଇଲାଇନି, ସେମନ୍ ନିଜେ, ମସାର୍ ସବୁ ନିୟମ୍ ମାନଡ଼ ନାଇ । ଜେନ୍ତି କି ତମେ ସୁନଡ଼ ଅଇ ସେମନ୍‌ର୍‌ବାଟେ ମିସ୍‌ଲାସ୍ । ଏଟା ନେଇକରି ବଡ଼ପନ୍ ଅଇବାଇ ।<sup>୧୪</sup> ମାତର୍ ମାପ୍‌ରୁ ଜିସୁ କିରିସଟର୍ କୁରୁସ୍ ଚାଡ଼ିକରି ଆରି କାଇତେଇ ବଡ଼ପନ୍ ଅଇବାଟା ମର୍‌ଟାନେଅନି ଦୁରିକେ ରଅ । କାଇକେବଇଲେ ଜଗଡ଼ ଜନ୍ ବିସଇର୍ ପାଇ ବେସି ଦାନ୍‌ଦା ଅଇଲାନି, ସେଟା ମୁକିଅ ବିସଇ ବଲି ମୁଇ ନ ବାବି । ଆରି ଜଗଡ଼ ମିସା ମକେ କାଇ ମୁଲିଅ ନ ଅଇଲା ଲକ୍ ପାରା ଦେକ୍‌ଲାନି ।<sup>୧୫</sup> କେ ସୁନଡ଼ ଅଇଲା, କେ ସୁନଡ଼ ଅଏନାଇ, ସେଟା କିଟି ନାଇ । ମାତର୍ ପରମେସର୍ ଆମ୍‌କେ ନୁଆ

ଜନମ୍ ଦେଲାଆଚେ, ସବୁରଟାନେଅନି ସେଟାସେ ମୁକିଅ ବିସଇ ।<sup>୧୭</sup> ଜନ୍ ଲକ୍ମନ ନିଜର୍ ଜିବନେ ଏ କାତା ଦାରବାଇ, ସେମନ୍ ସବୁ ଲକ୍ ଆରି ପରମେସରର୍ ସବୁ ଲକ୍ମନ ଜିବନେ ସାନ୍ତି ଆରି ଜିବନ୍ ଦୁକାନି ପାଇବାଇ ।

<sup>୧୭</sup> ସାରାସାରି ଏଡ଼କି କଇଲିନି, ଆଜିଅନି ବୁଲ୍ ସିକିଆ ଦେଇକରି ମକେ ଆରି କେ ମିସା କସ୍ଟ ନ ଦେଅ, କାଇକେ ବଇଲେ ମୁଇ ଜିସୁର୍ ଗତିଦାଙ୍ଗ୍ଡା ବଲି ଦେକାଇବାକେ ମର୍ ଗାଗ୍ଡେ ତାର୍ କଣ୍ଡିଆ ଚିନ୍ ଆଚେ ।

<sup>୧୮</sup> ଏ ବାଇବଇନିମନ୍ ! ଆମର୍ ମାପୁରୁ ଜିସୁକିରିସଟର୍ ଜିବନ୍ ଦୁକାନି ତମର୍ ସବୁ ଲକର୍ ଲଗେ ରଅ । ଆମେନ୍ !



# ଏପିସିୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କର ପତ୍ର ଏପିସିୟ ମଣ୍ଡଳୀର ବିସ୍ତ୍ରାସିମାନଙ୍କେ ପାଉଲ୍ ଚିଠି ଲେକ୍‌ଲାଟା

## ଏ ବଇର ବିସଇ ଜାନବାଟା

ଏପିସିୟ ମଣ୍ଡଳୀର ଲକ୍‌ମନଙ୍କେ ପାଉଲ୍ ଲେକିରଇଲା ଚିଠି ପାକାପାକି ୬୦ କିରିସଟାଦ ବିଡ଼ରେ ଲେକାଅଇରଇଲା । ଏଟା କଲସିଅ ମଣ୍ଡଳୀର ଲକ୍‌ମନଙ୍କେ ଲେକିରଇଲା ବେଲେ ଲେକା ଅଇରଇଲା । ଜେ ଏ ଚିଠି ଲେକ୍‌ଲା ଆତେ, ସେ ନିଜେ ପେରିଡ଼ ପାଉଲ୍ ବଲି ଜାନାଇଅଇଲା ଆତେ ୧:୧ । କଲସିଅ ବଇଟାମେ ନିଜେ ଜାନାଇ ନ ଅଇରଇଲେ ମିସା କେତେଟା ପଣ୍ଡିଡ଼ମନ୍ ଏପିସିୟ ବଇ ପାଉଲ୍ ଲେକ୍‌ଲାଆତେ ବଲି କଇବାଇ । ଏଟାର୍‌ପାଇ ସବୁ ମଣ୍ଡଳୀକେ ଚିଠି ବାଟ୍‌ବା ଆଦେସ୍ ନେଇକରି ଲେକାଅଇରଇସି କାଇକି ବଲି କଇବାଇ । ପାଉଲ୍ ଏଟା ମିସା ଜାନାଇଦେଇ ଆତେ, କି ଏ ଚିଠି ଲେକ୍‌ବା ବେଲେ ସେ ବନ୍ଦି ରଇଲା । ୩:୧;୪:୧, ୬:୨୦ । ପାଉଲ୍ ତୁକିକକେ ଏ ଚିଠି ଦେଇକରି ଏପିସିୟ ମଣ୍ଡଳୀତେଇ ପାଟାଇରଇଲା ୬:୨୧-୨୨ ।

ଏପିସିୟ ଅଇଲାନି ଏସିଆ ଦେସର୍ ଗଟେକ୍ ବଡ଼ ସଅର୍ ଆରି ରାଜ୍‌ଦାନି ରଇଲା । ଏପିସି ଗିରିକ୍ ଦେବ୍‌ତା ଆର୍ତେମିର୍ ଉପାସନା କର୍ବାକେ ଆରି ମନ୍ଦିରର୍ ପାଇ ଡାକ୍‌ପୁଟା ରଇଲା । ପେରିଡ଼ ୯:୨୩-୩୧ । ଏପିସିୟ ମଣ୍ଡଳି ପର୍ତୁଗୁ ଡାଟ୍ ରଇଲା, ମାତର୍ ପତେ ପତେ ଉନା ଉନା ଅଇଆଇଲା । ପର୍କାସିତ ୨:୧-୭ । ପାଉଲ୍ ତାର ଚିଠି ଲେକ୍‌ଲା ଅଦା ବାଗେ ପର୍ମେସର୍ ତାର ଲକ୍‌ମନଙ୍କେ କେନ୍ଦ୍ରି ବାଟ୍‌ଲାଆତେ ଆରି ଜିସୁକିରିସଟର୍ ଲାଗି କେନ୍ଦ୍ରି ପାପେଅନି ରକିଆ କଲାଆତେ, ସେଟା ବୁଜାଇଦେଇଆତେ ।

ପାଉଲ୍ ମଣ୍ଡଳୀକେ ଗାଗଡ଼ ସମାନ୍ କରି କିରିସଟ ଇଡିର୍ ମୁଣ୍ଡ ଆରି କନର୍ ମୁଲ୍‌ଡେଲି ବଲି କଇଆତେ, ଜନ୍‌ଟାକି ସଙ୍ଗ୍ ମିସିକରି ବଡ଼ ଅଦିକ୍ ଅଦିକ୍ ଅଇଲାନି । ପାଉଲ୍‌ର ଚିଠିଟାମେ ଅଦାବାଗ୍ ବିସ୍ତ୍ରାସିମାନର୍ ଜିବନ୍ କେନ୍ଦ୍ରି ରଇବାର୍, ସେ ବିସଇ ଆଦେସ୍ ଦେଲାଆତେ ।

### ଏ ବଇ ବିଡ଼ରେ ରଇବାଟା

- ୧. ପାଉଲ୍ ଜୁଆର୍ କରି ନିଜେ ଜାନାଇଅଇଆତେ । ୧:୧-୨
- ୨. କିରିସଟର୍ ସଙ୍ଗ୍ ମଣ୍ଡଳୀର ମିସାବିଡା ଅଇବାଟା । ୧:୩-୩:୨୧
- ୩. ବିସ୍ତ୍ରାସିର୍ ଜିବନ୍ କେନ୍ଦ୍ରି ବିତାଇବାର୍ । ୪:୧-୬:୨୦
- ୪. ପାଉଲ୍ ସାରାସାରି ଜୁଆର୍ ଜାନାଇବାଟା । ୬:୨୧-୨୪

୧ \*ମୁଇ ପାଉଲ୍ ପର୍ମେସରର୍ ମନ୍ କଲା ଇସାବେ କିରିସଟ ଜିସୁର୍ ଗଟେକ୍ ପେରିଡ଼ ସିସ୍ ଅଇ ବାତି ଅଇଆତି ।

ଜିସୁ କିରିସଟର୍ ସଙ୍ଗ୍ ମିସିକରି ବିସ୍ତ୍ରାସିସଙ୍ଗ୍ ଜିଉନା କାଉନା କର୍ତେ ରଇବା ଏପିସିୟର୍ ବିସ୍ତ୍ରାସିମାନର୍ ଲଗେ ଏ ଚିଠି ଲେକ୍‌ଲିନି ।

୨ ଆମର୍ ବାବା ପର୍ମେସର୍ ଆରି ମାପୁରୁ ଜିସୁକିରିସଟ ତମ୍‌କେ ସବୁଲକ୍‌କେ ଜିବନ୍ ଦୁକାଇକରି ସାନ୍ତି ଦେଅ ।

ଆଡ଼ମାର୍ ଆସିର୍ବାଦ୍

☆ ୧:୧ ୧:୧ ପେରିଡ଼ ୧୮:୧୯-୨୧:୧୯:୧

୩ ଆମର ମାପରୁ ଜିସୁ କିରିସ୍ତର ବାବା ପରମେସର ଦନିଅବାଦ୍ ପାଅ । କାଇକେ ବଇଲେ ସେ ଆମ୍ଭେ କିରିସ୍ତର ସଙ୍ଘ ମିସାଇକରି ସରଗେ ରଇବା ସବୁଜାକ ଆଡ଼ମାଇଅନି ମିଲାଇବା ଆସିରବାଦ୍ ଦେଇଆଚେ । ୪ କିରିସ୍ତର ସଙ୍ଘ ମିସିରଇକରି ଆମେ ଜେନ୍ତ୍ର ପରମେସରର ଅଇବୁ, ସେଟାରପାଇ ସେ ଆମ୍ଭେ ଜଗତ୍ ତିଆର୍ ନ ଅଇବା ଆଗତୁ ବାଟି ରଇଲା ।

ଜେନ୍ତ୍ରାରିକି ସୁକଲ୍ ଆରି କାଇ ଦସ୍ ନ ଅଇତେ ତାର୍ ମୁଆଟେ ଚିଆଅଇବୁ । ୫ ତାର୍ ଆଲାଦର୍ ଲାଗି, ଜିସୁ କିରିସ୍ତର ସଙ୍ଘ ସେ ଆମ୍ଭେ ତାର୍ ନିଜର୍ ପଅଜି ପାରା କରବାକେ ବାଟିଆଚେ । ଏଟାସେ ତାର୍ ଆଦେସ୍ ଆରି ସାର୍ଦା । ୬ ଜେନ୍ତ୍ରାରିକି ତାର୍ ବଡ଼ ଜିବନ୍ ଦୁକାନିର୍ ଲାଗି ଆମେ ତାକେ ତାକ୍ପୁଟା କରୁ । ତାର୍ ଆଲାଦର୍ ପଅ କରି ରଇଲା କାମର୍ ଲାଗି, ଇନାମେ ତାର୍ ଜିବନ୍ ଦୁକାଇଲାଟା ସେ ଆମ୍ଭେ ଦେଲା ଆଚେ । ୭ କିରିସ୍ତ ବନି ଜରାଇ ମଲାର୍ପାଇ ଆମେ ମୁକ୍ତି ପାଇଆତୁ ଆରି ଆମର୍ ସବୁଜାକ ପାପ୍ କେମା ଅଇଲା ଆଚେ । ପରମେସର ଜିବନ୍ ଦୁକାଇଲାଟା କେତେ ବଡ଼ ବିସଇ !

୮ ସେଟା ସେ ଆମ୍ଭେ ନ ସାରାଇତେ ଦେଇଆଚେ । ସବୁ ଗିଆନ୍ ଆରି ବୁଜ୍ବା ବପୁ ସଙ୍ଘ ମିସା ଦେଲା ଆଚେ । ୯ ଆଗତୁ ଆମେ ଜାନି ନ ରଇଲା ତାର୍ ଜଜ୍ନାର୍ ଟିକିନିକି ବିସଇ, ସେ ଆମ୍ଭେ ଜାନାଇ ଆଚେ । ସେଟା ଜିସୁ କିରିସ୍ତର ଦେଇ ସେ ପୁରାପୁରୁନ୍ କଲାଆଚେ, କାଇକେ ବଇଲେ ଏଟା ତାକେ ସାର୍ଦା କଲା ।

୧୦ ସରଗେ ଆରି ଜଗତେ ତିଆର୍ ଅଇରଇବା ସବୁ ବିସଇ ଗଟେକ୍ଟାନେ ଆନ୍ବାକେ ପରମେସରର୍ ଜଜ୍ନା ରଇଲା । କିରିସ୍ତ ସେସବୁ ବିସଇର୍ ମୁଣ୍ଡ ପାରା ଅଇକରି ରଇସି । ଏଟା ସମାନ୍ ବେଲାଇ ସେ ପୁରାପୁରୁନ୍ କରସି ।

୧୧ କିରିସ୍ତର ସଙ୍ଘ ମିସାଇ କରି, ପରମେସର, ଆମେ ଜିଉଦିମନ୍ଦକେ ବାଟି ଆଚେ । କାଇକେ ବଇଲେ ଆଗେ ଅନି ଏନ୍ତାରି କରବାକେ ସେ ଜଜ୍ନା କରି ରଇଲା । ସେ ଜେନ୍ତ୍ରାରି ମନ୍ କରସି, ସେ ଇସାବେ ସବୁ ବିସଇ ପୁରାପୁରୁନ୍ କରସି । ୧୨ ଜେନ୍ତ୍ରାରିକି ଆମେ ଜେଡ଼କି ଜିଉଦି ଲକ୍ ପରତୁମ୍ କିରିସ୍ତକେ ଆସାକରି ରଇଲୁ, ସବୁଲକ୍ ପରମେସରକେ ମଇମା କରୁ !

୧୩ ତମେ ମିସା ଜେତେବେଲେ ମୁକ୍ତି ପାଇବା, ଏ ସୁବ୍ କବରର୍ ସଡ଼ କାତା ସୁନ୍ଲାସ୍, ସେ ବେଲେଅନି ପରମେସରର୍ ଲକ୍ ଅଇଆଟାସ୍ । ତମେ କିରିସ୍ତକେ ବିସ୍ବାସ୍ କଲାକେ, ପରମେସର ସେ ଦେଇରଇବା କାତା ଇସାବେ ସୁକଲ୍ ଆଡ଼ମା ଦାନ୍ କରିଆଚେ । ଆରି ସେ ତମକେ ଚିନ୍ କଲାଆଚେ । ୧୪ ପରମେସର ତାର୍ ଲକ୍ମନ୍ଦକେ ଜେଡ଼କି ବିସଇ ଦାନ୍ କରବାକେ କାତା ଦେଲାଆଚେ, ସେ ସବୁଜାକ ଆମେ ମିଲାଇପାରୁ । ସୁକଲ୍ଆଡ଼ମା ଆମର୍ବାଟେ ଚିଆଅଇସି । ପରମେସର ତାର୍ ଲକ୍ମନ୍ଦକେ ପୁରାପୁରୁନ୍ ନିଜେ ମନ୍ଦକରି ମୁକ୍ତି ଦେଇସି । ଏଟା ସଡ଼ ବଲିକରି, ଆସା ପରମେସରକେ ମଇମା କରୁ !

ପାଉଲର୍ ପାର୍ତନା

୧୫ ସେଟାର୍ ପାଇ ମାପରୁ ଜିସୁର୍ ଲଗେ ତମେ ବିସ୍ବାସ୍ କରବାଟା ଆରି ପରମେସରର୍ ଲକ୍ମନ୍ଦର୍ ପାଇ ରଇବା ତମର୍ ଆଲାଦର୍ ବିସଇ ସୁନ୍ଲା ଦିନେଅନି, ୧୬ ମୁଇ ପରମେସରକେ ତମର୍ପାଇ ଦନିଅବାଦ୍ ଦେଇ ଆଇଲିନି । ମୁଇମିସା ପାର୍ତନା କଲାବେଲେ ତମର୍ପାଇ ପରମେସରକେ ଦନିଅବାଦ୍ ଦେବାକେ ପାସ୍ରି ଜାଇ ନାଇ । ମୁଇ ପାର୍ତନା କଲାବେଲେ ତମକେ ଏତାଇଲିନି । ୧୭ ଆରି ତାକ୍ପୁଟାର୍ ବାବା, ଆମର୍ ମାପରୁ ଜିସୁକିରିସ୍ତର ପରମେସରକେ ପାର୍ତନା କଲିନି । ଜେନ୍ତ୍ରାରିକି ସେ ତମକେ ସୁକଲ୍ ଆଡ଼ମା ଦେଇସି । ସେ ଆଡ଼ମା ତମକେ ଗିଆନ୍

କରାଇସି ଆରି ପର୍ଯ୍ୟେସର୍ଯକେ ତମର୍ ମୁଆଟେ ଦେକାଇସି । ୧୮ ମୁଇ ପାର୍ତନା କଲିନି, ଜେନ୍ତ୍ରିକି ତାର୍ ଉଜଲ୍ ଦେକ୍ବାକେ ତମର୍ ଆଡ଼ମାର୍ ଆଁକି ତିସି । ଜେନ୍ତ୍ରିକି ଜନ୍ ଆସା ନେଇକରି ତମେ ତାର୍ ଲଗେ ଆସି ଆଟାସ୍, ସେଟା ଜାନିପାରାସ୍ । ୧୯ ତାର୍ ଲକ୍ମନର୍ ପାଇ ସେ ଦେଇରଇବା କାତାର୍ ସବୁ ବଡ଼ ଆସିର୍ବାଦ୍ କେତେକ୍ ଅଦିକ୍ ଆଟେ । ଆରି ଆମର୍ ପାରା ବିସ୍ବାସିମନର୍ ପାଇ ରଇବା ତାର୍ ବପୁ କେତେ ବଡ଼, ସେଟା ତମେ ଜାନି ପାରାସ୍ । ୨୦ ଏବେ ଆମର୍ ବିତ୍ରେ କାମ୍ କର୍ତ୍ତେରଇବା ସେ ବପୁର୍ ସଙ୍ଗେ, ପର୍ଯ୍ୟେସର୍ କିରିସ୍ଟକେ ମଲାତେଇଅନି ଉଟାଇକରି ତାର୍ ଉଜାବାଟେ ବସାଇଆଟେ । ୨୧ କିରିସ୍ଟ ସର୍ଗେ, ସାସନ୍ କର୍ବା ଲକ୍ମନକେ, ସନ୍ମାନ ପାଇବା ଲକ୍ମନକେ, ବପୁରଇବା ଲକ୍ମନକେ ଆରି ସାସନ୍କାରିଆମନର୍ ଉପରେ ସାସନ୍ କର୍ସି । ତାର୍ ଅଦିକାର୍ ଏବର୍ ସାସନ୍କାରିଆମନର୍ କି ଆଇବା ଦିନର୍ ସାସନ୍କାରିଆମନର୍ ତେଇଅନି ଅଦିକ୍ ବପୁ ସଙ୍ଗର୍ ଆଟେ । ୨୨\*ପର୍ଯ୍ୟେସର୍ ସବୁବିସଇ କିରିସ୍ଟର୍ ପାଦତଲେ ସଙ୍ଗାଇଆଟେ । ଆରି ସବୁ ବିସଇର୍ ଉପରେ, ସବୁତେଇଅନି ଉପରର୍ ମାପୁରୁ କରି ମଣ୍ଡଲିକେ ଦାନକଲା ଆଟେ । ୨୩ ମଣ୍ଡଲି ଅଇଲାନି କିରିସ୍ଟର୍ ଗାଗଡ଼ । କିରିସ୍ଟର୍ ଜିବନ୍ ସଙ୍ଗ ମଣ୍ଡଲି ପୁରାପୁରୁନ୍ ଅଇସି । ଆରି କିରିସ୍ଟ ସବୁବିସଇ ପୁରାପୁରୁନ୍ କର୍ସି ।

### ୨

ମରନ୍ତାନେ ଅନି ଜିବନ୍

୧\* ଆଗତୁ ତମର୍ ପାପର୍ ଲାଗି, ତମେ ଆଡ଼ମାଇ ମରି ରଇଲାସ୍ । ୨ ସେବେଲେ ଜଗତର୍ ସଡ଼ ନଇଲା ବାଟେ ଇଣ୍ଡୁତେରଇଲାସ୍ ଆରି ଆକାସର୍, ଗାଗଡ଼ ଦାରି ନ ରଇବା, ସାସନ୍କାରିଆର୍ ତଲେ ରଇଲାସ୍ । ସେ ସାସନ୍କାରିଆ ଏବେ ପର୍ଯ୍ୟେସର୍ ଆଦେସ ନ ମାନବା ଲକ୍ମନକେ ସାସନ୍ କଲାନି । ୩ ସତଇସେ ଆମେ ସବୁଜାକ, ସେ ରକାମ୍ ରଇଲୁ ଆରି ଗାଗଡ଼ ଆରି ମନର୍ ଲାଲ୍ସା ଇସାବେ ଜିଉନା କାଉନା କର୍ତେ ରଇଲୁ । ଆରି ଅଲ୍ଗା ଲକ୍ମନର୍ ପାରା ଆମେମିସା ପର୍ଯ୍ୟେସର୍ ରିସାର୍ ଡଣ୍ଡ ପାଇବାକେ ଜାଇତେ ରଇଲୁ ।

୪ ମାତର୍ ଏ ରକାମ୍ ରଇଲେମିସା ଦୟାଦେକାଇବା ପର୍ଯ୍ୟେସର୍, ଆମ୍ବକେ ଜନ୍ ବଡ଼ ଆଲାଦ୍ ସଙ୍ଗ ଆଲାଦ୍ କଲା, ୫ ସେଟାପାଇ ଆମ୍ବକେ କିରିସ୍ଟର୍ ସଙ୍ଗ ଜିବନ୍ କଲାଆଟେ, ସେ ଜିବନ୍ ଦୁକାଇଲାକେ ତମେ ମୁକ୍ତି ପାଇ ଆଟାସ୍ । ୬ ପର୍ଯ୍ୟେସର୍ କିରିସ୍ଟର୍ ସଙ୍ଗ ଆମ୍ବକେ ଉଟାଇଲା ଆଟେ, ଆରି ତାର୍ ସଙ୍ଗ ଗଟେକ୍ ଅଇବାର୍ ଲାଗି, ସରଗ୍ ଉପରେ ସାସନ୍ କର୍ବାପାଇ ବଲିକରି, ତାର୍ ସଙ୍ଗ ବସାଇଲା ଆଟେ । ୭ ଜେନ୍ତ୍ରିକି ଆଇବା ଦିନମନକେ ଜିସୁ କିରିସ୍ଟର୍ ଲାଗି ରଇବା ତାର୍ ବଡ଼ ଜିବନ୍ଦୁକାଇଲାଟା, ସବୁକେ ଦେକାଇ ଅଇସି । ୮ କାଇକେବଇଲେ ପର୍ଯ୍ୟେସର୍ ଜିବନ୍ ଦୁକାଇଲାର୍ପାଇ, ତମେ ମୁକ୍ତି ପାଇ ଆଟୁସ୍, ସେଟା ତମେ ବିସ୍ବାସ୍ କଲାର୍ ଲାଗି, । ତମେ କିରିରଇବା କାଇ ନିକ କାମର୍ ଲାଗି ନାଇ, ସେଟା ପର୍ଯ୍ୟେସର୍ ଦାନ । ୯ ଜେନ୍ତ୍ରିକି ଏ ବିସଇନେଇ କେ ମିସା ନିଜେ ବଡ଼ପନ୍ ଅଇ ନାପାରେ । ୧୦ ପର୍ଯ୍ୟେସର୍ସେ ଆମ୍ବକେ ତିଆର୍ କଲା ଆଟେ । ତମେ କିରିସ୍ଟର୍ ସଙ୍ଗ ମିସଲାର୍ପାଇ, ନିକ କାମ୍ କର୍ବାକେ ସେ ଆମ୍ବକେ ନୁଆ କଲା ଆଟେ । ଏଟା ଆଗତୁଆନି ସେ ଆମର୍ ପାଇ ମନ୍ କରି ରଇଲା ।

କିରିସ୍ଟର୍ଗାନେ ଗଟେକ୍

୧୧ ତମେ, ଜିଉଦି ନ ଅଇଲା ଲକ୍ମନ୍, ଆଗେ କେନ୍ତ୍ରାର୍ ରଇଲାସ୍ ଏତାଇ ଦେକା । ନିଜେ ସୁନଡ଼ ବଲାଇଅଇତେ ରଇବା ଜିଉଦିମନ୍ ତମ୍ବକେ ସୁନଡ଼ ନ ଅଇଲା

ଲକ୍ଷ୍ମୀ ବଲି କଇତେ ରଇଲା । ମାତର ସୁନତୁ ଅଇବାଟା ଗାଗତେ କରବା କାମ ।<sup>୧୨</sup> ଆଗେ ତମେ କିରିସ୍ତର ଲଗେ ଅନି ଦୁରକେ ରଇଲାସ୍ । ଆରି ପରମେସର ବାଟିରଇବା ଲକ୍ଷ୍ମୀନରଟାନେ ମିସି ନ ରଇଲାସ୍ । ତାର ଲକ୍ଷ୍ମୀନକେ କାତା ଦେଇ, ତିଆର କରିରଇବା ନିୟମଟାନେ, ତମର କାଇ ମିସା ଅଦିକାର ନ ରଇଲା । ତମେ ଜଗତେ ବାସାକରି, କାଇ ଆସା ନ ରଇକରି ପରମେସରର ଲକ୍ଷ୍ମୀ ନ ଅଇ ରଇଲାସ୍ ।<sup>୧୩</sup> ଗଟେକ୍ ବେଲାଇ ଦୁରିକେ ରଇଲାସ୍ । ଏବେ ଜିସୁର ସଙ୍ଗ୍ ମିସିକରି କିରିସ୍ତ ବନି ଦେଇ ମଲାପାଇ ତାର ଲଗେ ଅଇଆଟାସ୍ ।<sup>୧୪</sup> କାଇକେ ବଇଲେ ଜିଉଦି ଆରି ଜିଉଦି ନଇଲା ଲକ୍ଷ୍ମୀକେ ଗଟେକ୍ କରି, କିରିସ୍ତ ନିଜେ ଆମର ବିତ୍ତରେ ସାନ୍ତି ଆନିଦେଇ ଆଟେ । ସେମାନକେ ବେଗ୍ଲାଇକରି ନିଜର ନିଜର ସତ୍ତ୍ୱ ପାରା କରି ସଙ୍ଗାଇଅଇରଇବା ପାରୁରି, ସେ ତାର ଗାଗତୁସଙ୍ଗ ବାଙ୍ଗାଇଲା ଆଟେ ।<sup>୧୫</sup> ଯେ ଜିଉଦିମନ୍ ମାନିଆଇତେରଇବା ସବୁ ରିତିନିତି ନିୟମ ବାଙ୍ଗାଇକରି, ଜିଉଦି ଆରି ଜିଉଦି ନଇଲା ଲକ୍ଷ୍ମୀନରଟାନେଅନି ତାର ସାଇଜ ପାଇତେରଇବା ଗଟେକ୍ ନୁଆ ମୁନୁସଙ୍ଗାତି ତିଆର କଲାଆଟେ । ଏନ୍ତାରି କରି ଦୁଇ ଦଲ୍ ବିତ୍ତରେ ସେ ସାନ୍ତି ଆନିଦେଇ ଆଟେ ।<sup>୧୬</sup> ଯେ କୁରସେ ମଲାପାଇ ବଲି ତାକର ତାକର ବିତ୍ତରେ ସତ୍ତ୍ୱ ଅଇ ରଇବାଟା, ଲିବାଇଦେଇଆଟେ । କୁରୁସର ଲାଗି ସେ ଦୁଇଟାଜାକ ମିସାଇକରି ଗଟେକ୍ ଗାଗତୁ ପାରା କଲାଆଟେ । ଆରି ସେମାନକେ ପରମେସରର ଲଗେ ବାଉତାଇ ଆନୁଲାଆଟେ ।<sup>୧୭</sup> ସେଟାର ପାଇ କିରିସ୍ତ ଆଇଲା ଆରି ପରମେସରତେଇଅନି ଦୁରିକେ ଜାଇ ରଇବା ଜିଉଦି ନଇଲା ଲକ୍ଷ୍ମୀନକେ ଆରି ତାର ଲଗର ଜିଉଦିମନକେ ସୁବକବର ସୁନାଇଲା ।<sup>୧୮</sup> କିରିସ୍ତର ଲାଗିସେ ଜିଉଦି ଆରି ଜିଉଦି ନଇଲା ସବୁଲକ୍ଷ୍ମୀ ଗଟେକ୍ ଆଡ଼ମାଇ, ବାବାର ମୁଆଟେ ଆସି ପାରୁଲୁ ।<sup>୧୯</sup> ତେବର ପାଇ ଏ ଜିଉଦି ନଇଲା ଲକ୍ଷ୍ମୀନ, ତମେ ଆରି ବିନ୍ ଦେସେ ବାସା ଅଇରଇବାଲକ୍ଷ୍ମୀ ନୁଆସ୍ । ଏବେ ପରମେସରର ଲକ୍ଷ୍ମୀନସଙ୍ଗ୍ ତମେମିସା ତାର ରାଇଜେ ମିସିବା ଲକ୍ଷ୍ମୀ ଆରି ତାର ଜାତିର କୁଟୁମର ଲକ୍ଷ୍ମୀ ।<sup>୨୦</sup> ତମେ ମିସା ପେରିତ୍ତ ସିସ୍ତମନ୍ ଆରି ବବିସତ୍ତ୍ୱବକ୍ତାମନ୍ କରିରଇବା କୁନାଦି ଉପରେ, ତିଆର ଅଇଲା ଗର ପାରା । ସେ ଗର କନର ମୁଲ୍ ପାକନା ଅଇଲାନି କିରିସ୍ତ ଜିସୁ ।<sup>୨୧</sup> ସେ ଆକା ଗରକେ ସମାନକରି ସଙ୍ଗାଇଲା ଆଟେ ଆରି ମାପୁରୁପାଇ ଗଟେକ୍ ସରପିଦେଲା ସୁକଲ୍ ମନ୍ଦିରପାରା କଲାଆଟେ ।<sup>୨୨</sup> କିରିସ୍ତର ସଙ୍ଗ୍ ମିସ୍ତାର ପାଇ, ଗଟେକ୍ ଗର ପାରା ତମେ ସବୁକେ ମିସିକରି ତିଆର କଲାନି । ଜେନ୍ତାରିକି ତମେ ପରମେସର ତାର ଆଡ଼ମାଇ ରଇବା ଗଟେକ୍ ବାସା ଅଇବା ଗର ପାରା ଅଇସା ।

### ୩

ଜିଉଦି ନଇଲା ଲକ୍ଷ୍ମୀ ପାଇ ପାଉଲର କାମ

<sup>୧</sup> ଏଟାରଲାଗି ତମର ପାରା ଜିଉଦି ନଇଲା ଲକ୍ଷ୍ମୀ ପାଇ, କିରିସ୍ତ ଜିସୁର ଲାଗି ବନ୍ଦି ଅଇରଇବା ପାଉଲ୍ ମୁଇ, ପରମେସରକେ ପାରତନା କଲିନି ।<sup>୨</sup> ତମର ନିକପାଇ ପରମେସର ତାର ଜିବନ୍ ଦୁକାଇଲାଟେ ତେଇଅନି ମକେ ଏ କାମ ଦେଇଆଟେ । ଏଟା ନିଜେ ସୁନିଆଟାସ୍ ।<sup>୩</sup> ପରମେସର ସେ ଜାନାଇ ନରଇଲା ବିସଇ ମକେ ଜାନାଇ ଆଟେ । ଏ ବିସଇ ମୁଇ ଆଗତୁ ତମକେ ଅଲପ୍ ଲେକି ରଇଲି ।<sup>୪</sup> ଯେଟା ପଡ଼ଲେ, କିରିସ୍ତର ପାଇ ରଇବା ପରମେସରର ଟିକିନିକି ବିସଇ ମୁଇ ବୁଜ୍ଜିଆଟି ବଲି, ତମେ ଜାନି ପାରସା ।<sup>୫</sup> ଆଗର ଲକ୍ଷ୍ମୀନକେ ଏ ଟିକିନିକି ବିସଇ ନ କୁଆଅଇ ରଇଲା । ମାତର ଏବେ ତାର ଆଡ଼ମା ଦେଇ, ସେ ବାଟି ରଇବା ତାର ସୁକଲ୍ ପେରିତ୍ତମନକେ ଆରି ବବିସତ୍ତ୍ୱବକ୍ତାମନକେ ସେ ଜାନାଇଲା ଆଟେ

। ୬ ଏ ଲୁଚି ରଇବା ବିସଇ ଅଇଲାନ୍ତି, ସୁବକବରର ଲାଗି, ଜିଉଦି ବିସ୍‌ବାସିମନର୍ ସଙ୍ଗ, ଜିଉଦି ନଇଲା ବିସ୍‌ବାସିମନ ମିସା ପରମେସରର୍ ଆସିରବାଦେ ମିସ୍‌ବାଇ । ସେମନ୍ ମିସିକରି, ଗଟେକ୍ ଗାଗଡ଼ ପାରା ଅଇଜିବାଇ । ମାପରୁ ଜିସୁ କିରିସ୍‌ଟର୍ ଲାଗି ପରମେସର ଦେଇ ରଇବା ସବୁ କାତାଇ ବାଗ୍ ଅଇସା ।

୭ ପରମେସର ତାର ଜିବନ୍ ଦୁକାଇଲାର୍ ତେଇଅନ୍ତି ମକେ ଜନ୍ ଦାନ୍ ଦେଇ ଆତେ, ସେଟାର ଲାଗି ମୁଇ ନିମାନ୍ କବର୍ ଜାନାଇବା ଲକ୍ ଅଇଲିଆଟି । ତାର ବପୁ ମର୍ ବିତ୍‌ରେ କାମ୍ କଲାର୍ ଲାଗି ଏଟା ଅଇଲା । « ମୁଇ ପରମେସରର୍ ଲକ୍‌ମନର୍ ସବୁରଟାନେଅନ୍ତି ସାନ୍ ଅଇଲେ ମିସା ଜିଉଦିନଇଲା ଲକ୍‌ମନ୍କେ କିରିସ୍‌ଟର୍‌ଟାନେ ରଇବା ନିକ ନିକ ବିସଇ ଜାନାଇବାକେ ମକେ ସେ ବାଟ୍‌ଲା ଆତେ । ଏ ବିସଇ ଲକ୍‌ମନ୍ ବୁଜ୍‌ବାକେ ଆବଡ଼ ରଇବାଟା । ୯ ପରମେସର ତାର ଲୁଚ୍‌ତେରଇବା ଜଜ୍‌ନା କେନ୍ତାର୍ ପୁରାପୁରନ୍ କରସି, ସେଟା ସବୁ ଜାନାଇବାକେ ମିସା ମକେ ବାଟ୍‌ଲା ଆତେ । ସବୁ ବିସଇ ତିଆର୍ କଲା ବେଲେଅନ୍ତି, ଏବେ ଜାକ ସେ ତାର ଟିକିନିକି ବିସଇ ଲୁଚାଇକରି ସଙ୍ଗଇରଇଲା, । ୧୦ ଜେନ୍ତାରିକି ମଣ୍ଡଲିର୍ ଟାନେଅନ୍ତି ତାର ବିନ୍ ବିନ୍ ରକାମର୍ ଗିଆନ୍ ସରଗର୍ ସାସନ୍‌କାରିଆମନ୍‌କେ ଆରି ବପୁ ରଇବାଟାମନ୍‌କେ, ସେ ଜାନାଇସି । ୧୧ ଜଗଡ଼ ତିଆର୍ କରବା ଆଗ୍‌ତୁ, ଏଟା ସେ ଜଜ୍‌ନା କରିରଇଲା । ଏଟା ଆମର୍ ମାପରୁ ଜିସୁ କିରିସ୍‌ଟର୍ ଲାଗି ସେ ପୁରାପୁରନ୍ କଲା ଆତେ । ୧୨ କିରିସ୍‌ଟର୍ ତେଇ ବିସ୍‌ବାସ୍ କଲାର୍ ପାଇ ଆରି ତାର ସଙ୍ଗ ମିସି ରଇଲାର୍ ପାଇ, ନ ତର୍‌ତେ, ସାଆସ୍ ଅଇକରି, ପରମେସରର୍ ମୁଆଟେ ଚିଆ ଅଇବୁ । ୧୩ ସେଟାର ପାଇ ମୁଇ ତମ୍‌କେ ବାବୁଜିଆ କରି କଇଲିନ୍ତି, “ତମର୍ ପାଇ ବଲି ଅଇବା ମର୍ ଦୁକ୍ କସ୍‌ଟର୍ ପାଇ ମନ୍‌ଦୁକ୍ କରାନାଇ, ଏ ସବୁ ତମର୍ ବଲ୍ ପାଇ ଅଇଆତେ ।”

**କିରିସ୍‌ଟର୍ ଆଲାଦ୍**

୧୪ ସେଟାରପାଇ ବଲିକରି ମୁଇ ପରମେସରର୍ ମୁଆଟେ ମାଣ୍ଡିକୁଟା ଦେଇ ପାର୍‌ତନା କଲିନ୍ତି, ୧୫ ତାର ଲାଗିସେ ସରଗର୍ ଆରି ପୁର୍‌ତିବିର୍ ସବୁ କୁଟୁମ୍ ଅଇଲା ଆତେ, ୧୬ ମୁଇ ପାର୍‌ତନା କଲିନ୍ତି ଜେନ୍ତ୍ରକି ସେ ତାର ନ ସାର୍‌ବା ମଇମାଇଅନ୍ତି, ତାର ଆତ୍‌ମା ତମ୍‌କେ ବପୁ ଦେଇସି, ଜେନ୍ତ୍ରକି ତମର୍ ମନ୍ ତାଟ୍ ଅଇସି । ୧୭ ମୁଇ ପାର୍‌ତନା କଲିନ୍ତି, ଜେନ୍ତ୍ରକି ତମର୍ ବିସ୍‌ବାସର୍ ଲାଗି, କିରିସ୍‌ଟ ତମର୍ ବିତ୍‌ରେ ବାସା ଅଇସି । ଆରି, ତମେ ପରମେସର୍କେ ଆରି ବିନ୍ ଲକ୍‌କେ ଆଲାଦ୍ କଲାଟାନେଅନ୍ତି, ବୁର୍‌ଜ୍ ଜାଇତେରଇବା ଗଟର୍ ଚେର୍‌ପାରା ଆରି କୁନାଦି ଉପରେ ତିଆର୍ ଅଇଲା ଗର୍ ପାରା ତାଟ୍ ଅଇସା । ୧୮ ମୁଇ ପାର୍‌ତନା କଲିନ୍ତି ତମେ ପରମେସରର୍ ଲକ୍‌ମନର୍ ସଙ୍ଗ ମିସିକରି କିରିସ୍‌ଟର୍ ଆଲାଦ୍ ବୁଜ୍‌ବାକେ ବପୁ ପାଇସା । ତାର ବଡ଼ ଆଲାଦ୍ ସଙ୍ଗ ସେ ଆମ୍‌କେ ଆଲାଦ୍ କଲା ଆତେ । ୧୯ ଉଁ, ନର୍‌ଲକ୍ ବୁଜ୍‌ବା ତେଇଅନ୍ତି ଅଦିକ୍ କିରିସ୍‌ଟ ଆମ୍‌କେ ଆଲାଦ୍ କଲା ଆତେ, ସେ ଆଲାଦ୍ ତମେ ଜାନ୍ ବଲି ମୁଇ ପାର୍‌ତନା କଲିନ୍ତି । ଜେନ୍ତାରିକି ତମର୍ ଚାଲାଚାଲ୍‌ତି ପରମେସରର୍ ପାରା ଅଇ ଆଇସି ।

୨୦ ପରମେସର ଜେକି ଆମେ ତାକେ ମାଙ୍ଗବା ତେଇଅନ୍ତି କି ଚିନ୍ତା କରବା ତେଇଅନ୍ତି ଅଦିକ୍ କରିପାରସି, କାଇକେ ବଇଲେ ତାର ବଡ଼ ବପୁ ସଙ୍ଗ ସେ ଆମର୍ ବିତ୍‌ରେ କାମ୍ କରି ଆଇଲାନ୍ତି । ୨୧ ମଣ୍ଡଲିଟାନେ ଆରି କିରିସ୍‌ଟ ଜିସୁର୍‌ଟାନେଅନ୍ତି ପରମେସରର୍ ବଡ଼ ବପୁ ବିନ୍ ଲକ୍‌କେ ତିସ୍‌ଲାନ୍ତି, ତାର ବଡ଼ ବପୁର୍ ଲାଗି ପରମେସର୍କେ ତାକ୍‌ପୁଟା କରୁ, କାଲ୍‌କାଲ୍ ଜୁଗ୍‌ଜୁଗ୍ ସେ ତାକ୍‌ପୁଟା ପାଇତେରଅ । ଆମେନ୍ !



୧୧ ଏ ସବୁରୁଲାଗି ମାପୁରୁର ସେବାକାରିଆ ମୁଇ ବନ୍ଦିଗରେ ଆତି । ମାପୁରୁ ତମକେ କେନ୍ତାରି ତଲାତଲୁତି କରବାକେ ତାକଲାଆତେ, ସେନ୍ତାରିସେ କରାବଲି ମୁଇ ତମକେ ବାବୁଜିଆ କଲିନି । ୧୦ \*ତମେ ଲକ୍ମନନର ସଙ୍ଗ ମିସାବିତା ଅଇଲାବେଲେ, ପୁରାପୁରୁନ୍ ଦରମ ଅଇ ସୁଆଲେ ରୁଆ । ତମେ ଗଟେକ୍ ଲକ୍ ଆରି ଗଟେକ୍ ଲକ୍କେ ଆଲାଦ୍ କଲାବପାଇ ସାଆସ୍ ଅଇ, ମୁରଟିକରି ରୁଆ । ୧୧ ଜନଟା କି ଗଟେକ୍ ମନ୍ ଅଇକରି ରଇବାକେ ସୁକଲ୍ ଆତମା ଆମ୍ବେ ବାନ୍ଦିଆତେ, ସେନ୍ତାରି ସାନ୍ତି ଅଇକରି ରୁଆ । ୧୨ ଆମେ ସବୁ ବିସ୍ବାସି ବାଇବଇନିମନ୍ ଗଟେକ୍ ଗାଗଡ୍ ପାରା ଆରି ସବୁଲକ୍ ସମାନ୍ ଆତମା ମିଲାଇଆତୁ । ସେନ୍ତାରିସେ ସମାନ୍ ଆସିବବାଦ୍ ମିଲାଇବାକେ ସେ ଆମ୍ବେ ତାକଲାଆତେ । ୧୩ ଆମ୍ବେ ଗଟେକ୍ ମାପୁରୁ ଆତେ, ସମାନ୍ ସିକିଆଇ ବିସ୍ବାସ୍ କଲୁନି ଆରି ସମାନ୍ ତୁବନ୍ ନେଲୁ ଆତୁ । ୧୪ ଗଟେକ୍ ପରମେସରକେ ଆମେ ଉପାସନା କଲୁନି । ଜେ କି ସବୁର ବାବା ଅଇଆତେ । ସେ ଆମର୍ ବିତ୍ରେ ରଇକରି ଆରି ଆମ୍ବେ ଦେଇକରି ସବୁର ଉପରେ ସାସନ୍ କଲାନ୍ତି ।

୧୫ ମାତର୍ କିରିସ୍ଟ ଆମେ ବିନ୍ ବିନ୍ ଲକ୍କେ ବିନ୍ ବିନ୍ ଦାନ୍ ଦେଲାଆତେ । ସେଟା କାକେ କେନ୍ତାରି ବାଟା କରବାର୍ ଆତେ, ସେ ସେ ଟିକ୍ କଲାଆତେ । ୧୬ ତେବର୍ ପାଇ ସାସ୍ତରେ ଲେକାଅଇଲା ଆତେ,

“ସେ ତାର୍ ସତ୍ତୁମନ୍କେ ଆରାଇକରି ଜେତେବେଲେ ଉର୍ ରଇବା ଜାଗାଇ ଗାଲା, ତାର୍ ଆରାଇ ରଇବା ସତ୍ତୁମନ୍କେ ବାନ୍ଦିକରି ନେଲା

ଆରି ତାର୍ ଦାନ୍ ବିନ୍ ବିନ୍ ଲକ୍କେ ଦେଲା ।

୧୭ “ସେ ଗଟେକ୍ ଉର୍ ଜାଗାଇ ଗାଲା ।” ଏନ୍ତାରି ଲେକ୍ବା ଅରଡ୍ କାଇଟା ? ଏଟାର୍ ଆରଡ୍ ଅଇଲାନି, କିରିସ୍ଟ ଉଡ୍ରି କରି ଏ ଜଗତେ ଆସି ସାରି ଆତେ । ୧୮ ଜେ କି ଏ ଜଗତେ ଉଡ୍ରି ଆଇଲା, ସେ ସମାନ୍ ଲକ୍ସେ, ସରଗେ ଅନି ଉପରେ ରଇବା ଜାଗାଇ ଚଗି ଗଲା । ଜେନ୍ତାରି କି ସେ ଗୁଲାଇ ଜଗତକେ ପୁରାପୁରୁନ୍ କରସି ।

୧୯ ସେ ଆକା କେତେ ଲକ୍ମନକେ ପେରିଡ୍ ଅଇବାକେ, କେତେଲକ୍କେ ବସିସଡ୍ କାତା କଇବାକେ, କେତେଲକ୍କେ ସୁଦ୍‌କବର୍ ଜାନାଇବାଟା ଅଇବାକେ, କେତେଲକ୍କେ ମଣ୍ଡୁଲି ଚାଲାଇବାକେ ଆରି କେତେଲକ୍କେ ସିକାଇବାକେ ବପୁ ଦେଇ ବାଟୁଲାଆତେ । ୨୦ ପରମେସରର୍ ଲକ୍ମନ ଜେନ୍ତାରି କି ତାକେ ସେବା କରିପାରଡ୍, ତାରୁଲାଗି ଏ ସବୁ ଦାନ୍ ତାର୍ ଲକ୍ମନକେ ଦେଲା । ଏନ୍ତାରି ଅଇ କିରିସ୍ଟର୍ ଗାଗଡ୍ ପାରା ଅଇବା ବିସ୍ବାସିମନ୍ ବପୁ ଅଇ ସିଦ୍ ଅଅଡ୍ । ୨୧ ଏନ୍ତାରି ଅଇ ଆମେ ସବୁ ବିସ୍ବାସେ ବଡିକରି ଆରି ପରମେସରର୍ ପଅକେ ଜାନିକରି, ସିଦ୍ ଅଇବୁ । ଆମେ ଜେନ୍ତାରିକି ପୁରାପୁରୁନ୍ କିରିସ୍ଟର୍ ପାରା ଅଇବୁ । ସେ ପୁରାପୁରୁନ୍ ସିଦ୍ ଆତେ । ୨୨ ତେବେ ଆମେ ସାନ୍ ପିଲାମନର୍ ପାରା ନ ଅଇ କରି, ଜଗତର୍ ମନସମନର୍ ସିକିଆଇ ଆରି ତାକର୍ ଦଦାପେଲା ଅଇବା ପାରା ବିଚାରନା ଇସାବର୍ ବିନ୍ ବିନ୍ ସିକିଆଇ, ଗାତର୍ ଲଅତି ଆରି ମାର୍ବା ପବନ୍ ଜେନ୍ତାରି ତଙ୍ଗାକେ ଏନେତେନେ କରସି, ସେନ୍ତାରି ତାକର୍ ସିକିଆ ସୁନିକରି ଏନେତେନେ ନ ଅଉଁ । ୨୩ ତାର୍ ବାଦୁଲେ ଆମେ ପରମେସରର୍ ସଡ୍ ବିସଇର୍ ଆଲାଦ୍ ଜାନାଉଁ । ସେନ୍ତାରି ମୁଣ୍ଡ ଇସାବେ ରଇବା କିରିସ୍ଟର୍ ପାରା ଆମେ ସବୁ ବିସଇତେଇ ସିଦ୍ ଅଇ, ତାର୍ ପାରା ଅଇବୁ ।

୨୪ \* କାଇକେବଇଲେ କିରିସ୍ଟ ତାର୍ ସବୁ ଲକ୍ମନକେ ମିସାଇକରି ସଙ୍ଗ ଅତେ । ଗଟେକ୍ ଗାଗଡ୍ ସନ୍ଦି ଜେନ୍ତିକି ସେ ଗାଗଡ୍ ସବୁ ବାଗ୍‌କେ ମିସାଇକରି ସଙ୍ଗଇସି, ସେନ୍ତାରିସେ ଗାଗଡ୍ ଗଟେକ୍ ଗଟେକ୍ ବାଗ୍ ନିଜର୍ ନିଜର୍ କାମ୍ କଲେ, ଗୁଲାଇ ଗାଗଡ୍ ବଡିକରି ବପୁ ଅଇସି ।

କିରିସ୍ତର ଲଗେ ନୁଆଜିବନ୍

୧୭ ତେବର୍ ପାଇ ମାପୁରୁର୍ ନାଉଁଦାରି ମୁଇ ତମ୍ବକେ ଜାଗର୍ତା କରିଦେଲିନି । ତମେ ଆରି ପର୍ମେସର୍ବକେ ନାଜାନୁଲା ଲକରପାରା ଚଲାଚଲ୍ତି କରା ନାଇ । ୧୮ ସେମନ୍ ଚିନ୍ତାକରବାଟା ବୁଚାଇସେ । ସେମନ୍ ପର୍ମେସର୍ବ ବିସଇ ବୁଜି ନାପାରତ୍ । ଆରି ସେ ଦେଇରଇବା ଜିବନେ ଅନି ଦୁରିକେ ଆଚତ୍ । ସେମନ୍ ତାକର୍ ମନ୍ ତାଟ୍ କଲାରପାଇ ତାକେ ନାଜାନତ୍ । ୧୯ ସେମନ୍ ପାପ୍ କାମ୍ କଲେ ମିସା, ବୁଲ୍ କଲି ବଲି ଲାଜ୍ କି ଦୁକ୍ ନ ଅଅତ୍ । ତେବର୍ପାଇ ସବୁରକାମର୍ ବେସିଆ କାମ୍ କରବାଟାନେ ସର୍ପିଅଇ ଆଚତ୍ । ଏନ୍ତାରି କାମ୍ କରି କରି ଆରି କରବାକେସେ ଲାଲ୍ସା ଅଇ ଆଚତ୍ ।

୨୦ ମାତର୍ ତମେ କିରିସ୍ତର୍ ଟାନେଅନି ସେନ୍ତାରି ସିକିଆ ସିକାସ୍ ନାଇ । ୨୧ ତମେ ଜେଡେବେଲେ ତାର୍ ବିସଇ ସୁନିକରି ସିକଲାସ୍, ସେଟା ତାର୍ ସତ୍ ସିକିଆଇଅନି ସିକଲାସ୍ । ୨୨ \*ଆଗତୁ ଜନ୍ ପୁରନା ଚଲାଚଲ୍ତି କରି ତମେ ଜିଉନା କାଉନା କର୍ତେ ରଇଲାସ୍, ସେଟା ଚାଡ଼ବାକେ ତମ୍ବକେ ସିକାଇ ରଇଲାଇ । ତମର୍ ମନେ କାରାପ୍ ଚିନ୍ତା ଆଇବାଟା, ତମ୍ବକେ ନାତାଇକରି ତମର୍ ଜିବନ୍ ନସାଇ ଦେଲାଇ । ୨୩ ତମେ ଚିନ୍ତା କରବାଟା ପର୍ମେସର୍ ନୁଆକରି ବାଦ୍ଲାଇବାକେ ତାକେ ସର୍ପି ଦିଆସ୍ ବଲି ସିକାଇଲାଇ ଆଚତ୍ । ୨୪ \* ପର୍ମେସର୍ ତମ୍ବକେ ତାକର୍ ଗୁନ୍ତଲନ୍ ପାରା ରଇବା ନୁଆ ଗୁନ୍ତଲନ୍ ଦେଲାଆଚେ । ତେବର୍ପାଇ ସେ ରକାମ୍ ଚଲାଚଲ୍ତି କରା । ପୁରାପୁରୁନ୍ ଦରମ୍ ଅଇକରି ସୁକଲ୍ ଅଇରୁଆ ।

୨୫ ତମର୍ ବିତ୍ରେ ମିର୍ କଇବାଟା ଚାଡ଼ିଦିଆସ୍, ନିଜର୍ ନିଜର୍ ବିତ୍ରେ ସତ୍ କୁଆକୁଇ ଉଆ । କାଇକେବଇଲେ ଆମେ ସବୁଲକ୍ ଗଟେକ୍ ଗାଗଡ଼ର୍ ବିନ୍ ବିନ୍ ବାଗ୍ ଅଇଲୁଆବୁ । ୨୬ ଜେଡେବେଲେ ରିସା ଆଇଲେ, ସେଡେବେଲେ ପାପ୍କରା ନାଇ । ବେଲ୍ ନ ବୁଡ଼ତେ ତମର୍ ରିସା ଚାଡ଼ି ଦିଆସ୍ । ୨୭ ତମ୍ବକେ ପାପ୍ କରାଇବା ସଇତାନକେ ଜାଗା ଦିଆସ୍ନାଇ । ୨୮ ଜେ ଚରାଇତେ ରଇଲା, ସେ ଆରି ନ ଚର୍ ଅଅ । ମାତର୍ ନିଜେ ତାର୍ ଜିଉନା କାଉନାର୍ ପାଇ କାଇଆଲେ ନିକ କାମ୍ କର । ସେନ୍ତାଆଲେ ଅର୍କିତ୍ ଲକ୍ମନକେ ଦେବାକେ ତାର୍ଟାନେ କାଇଟା ମିସା ରଇସି । ୨୯ ଜନ୍ କାତା ବିନ୍ଲକ୍ମନକେ ଲଡାକେ ନ ଆସେ, ସେନ୍ତାରି କାତା ତମର୍ ଟଣ୍ଡେ ଅନି ନ ବାରଅ । ତାର୍ବାଦୁଲେ ସେମନ୍କେ ସାର୍ଦା କରାଇ ବପୁ ଆଇବା କାତା କୁଆ । ଜେନ୍ତାରିକି ସୁନ୍ଦା ଲକ୍ମନ୍ ତାକର୍ ଲଡାକେ ଆଇବା ବେଲାଇ ସେଟା ସୁନିକରି ସାର୍ଦା ଅଇବାଇ । ୩୦ ପର୍ମେସର୍ବର୍ ସୁକଲ୍ ଆଡ଼ମାକେ ଦୁକ୍ ଦିଆସ୍ ନାଇ । ତାକେ ମୁକଲ୍ବା ଦିନ ଜାକ ଗଟେକ୍ ଚିନ୍ ଇସାବେ ସେ ତମ୍ବକେ ଦେଲାଆଚେ । ୩୧ ସବୁ ରକାମର୍ କୁଟ୍ କାତା ଚିନ୍ତା କରବାଟା, ରିସା ଅଇବାଟା, କିରଜାଟି କରବାଟା, ନିନ୍ଦା କାତା କଇବାଟା, ଇସା ତଲା ଅଇବାଟା, ଏ ସବୁଜାକ ତମର୍ଟାନେ ଅନି ଦୁରିକେ ସଙ୍ଗୁଆ । ୩୨ \*ତାର୍ ବାଦୁଲେ ତମର୍ ତମର୍ ବିତ୍ରେ ମାନାମାନି ଅଇକରି ଆଲାଦ୍ ସଙ୍ଗ୍ ଦରମ୍ ଅଇ ରୁଆ । ଜେନ୍ତିକି କିରିସ୍ତର୍ ଲାଗି ପର୍ମେସର୍ବ ତମ୍ବକେ କେମା କରିଦେଲା ଆଚେ । ତମେମନ୍ ମିସା ସେ ରକାମ୍ ନିଜର୍ ନିଜର୍ ବିତ୍ରେ କେମା କରାକରି ଉଆ ।



ଉଜଲର୍ ଜିବନ୍

୧ ପର୍ମେସର୍ବକେ ବେସି ଆଲାଦ୍ କରବା ତାର୍ ପିଲାମନ୍ ଅଇବାକେ, ତାର୍ପାରା ଅଇ ଗଟେକ୍ ଆଲାଦର୍ ଚଲାଚଲ୍ତି କରା । ୨ ଜେନ୍ତାରି କି କିରିସ୍ତ ଆମ୍ବକେ ଆଲାଦ୍

\* ୪:୨୨ ୪:୨୨ କଲସିଅ ୩:୯    \* ୪:୨୪ ୪:୨୪ କଲସିଅ ୩:୧୦    \* ୪:୩୨ ୪:୩୨ କଲସିଅ ୩:୧୩

କରି ଆମର ପାଇ ମରି ରଇଲା । ଗଟେକ୍ ସୁନ୍ଦର ବାସନା ଅଇବା ବଲି ପାରା ସେ ତାର ଜିବନ୍ ପର୍ଯ୍ୟେସରକେ ସର୍ପିଦେଲା ।

<sup>୩</sup> ମାତର ତମର ବିତ୍ତରେ ବେସିଆ ଇସାବେ ରଇବା ଚଲାଚଲ୍ତି, କି କାଇ ରକାମର ସୁକଲ୍ ନ ଅଇବାଟା କି ଲବ୍ ଅଇବାଟା ଆଚେ, ବଲି ବିନ୍ ଲକ୍ମନ୍ ନ କଅଡ଼ । କାଇକେବଇଲେ ଏଟା ସବୁ ପର୍ଯ୍ୟେସରର ସୁକଲ୍ ଲକ୍ମନ୍ କରବା ଟିକ୍ ବିସଇ ନଏ । <sup>୪</sup> ସେନ୍ତାରିସେ ଜନ୍ମଟାକି ଲତାକେ ନ ଆଇବା ଗୁନ୍‌ଚଲ୍ମନ୍, କି କାରାପ୍ କାତା, ଲାଜ୍ କରବା କାତା କି ଟାପୁରା କାତା ତମରଟାନେ ନ ଡିସ । ଏଟାମନ୍ ତମରଟାନେ ରଇବାଟା ଟିକ୍ ନଏ । ତାରବାଦୁଲେ ତମେ ପର୍ଯ୍ୟେସରକେ ଦନିଅବାଦ୍ ଦେବା କାତା କୁଆ । <sup>୫</sup> ତମେ ଜାନବାର୍ ଆଚେ ଜେ, କେନ୍ତାରି ମିସା ବେସିଆ କାମ୍ କରବା ଲକ୍, କି ସୁକଲ୍ ନ ଅଇଲା ଲକ୍, କି ଲବ୍‌ରା ଲକ୍ ପର୍ଯ୍ୟେସର ଆରି କିରିସ୍‌ଟର ରାଇଜେ ରଇବା କାଇ ବିସଇ ମିଲାଇବାକେ ଅଦିକାର୍ ପାଇ ନାପାରଡ଼ । ଗଟେକ୍ ଲବ୍‌ରା, ପୁଡ଼ଲା ପୁଜା କରବା ଲକ୍‌ର ସଙ୍ଗ୍ ସମାନ୍ ।

<sup>୬</sup> ବିନ୍ ଲକ୍‌ର ଟାନେଅନି କାଇ ଲତାକେ ନ ଆଇବା ରୁଟା କାତା ସୁନି ନାଡ଼ାଇ ଉଆ ନାଇ । କାଇକେବଇଲେ, ଏନ୍ତାରି କରି ତାକେ ନ ନାମବା ଲକ୍ମନ୍‌କେ ପର୍ଯ୍ୟେସର ଡଣ୍ଟ ଦେଇସି । <sup>୭</sup> ତେବର୍‌ପାଇ ସେନ୍ତାରି ଲକ୍ମନ୍‌ର ସଙ୍ଗ୍ ମିସା ନାଇ । <sup>୮</sup> କାଇକେବଇଲେ ଆଗତୁ ତମେ ଆନ୍ଦାରେ ରଇଲାସ୍ । ମାତର ଏବେ ମାପୁରୁର ସଙ୍ଗ୍ ମିସ୍‌ଲାର୍‌ପାଇ ଉଜଲେ ପୁରି ଆଟାସ୍ । ତେବର୍‌ପାଇ ଉଜଲେ ରଇବା ଲକ୍ମନ୍‌ପାରା ଚଲାଚଲ୍ତି କରା । <sup>୯</sup> କାଇକେବଇଲେ, ଉଜଲେ ରଇଲେ ତେଇଅନି ସବୁ ରକାମର ନିକ, ଦରମ୍, ଆରି ସଡ଼ ବିସଇ ବାରଇସି । <sup>୧୦</sup> ପର୍ଯ୍ୟେସରକେ ସାର୍‌ଦା କରାଇବା ବିସଇ କଜିକରି ମିଲାଆ । <sup>୧୧</sup> ଆନ୍ଦାରେ ରଇବା ଲକ୍ମନ୍ କରବା କାଇ ମୁଲିଅ ନ ରଇବା କାମେ ମିସାନାଇ । ସେଟାମନ୍‌କେ କାଇ ମୁଲିଅ ନାଇ । ତାର ବାଦୁଲେ ସେନ୍ତାରି କାରାପ୍ ଅଇବା କାମ୍ ନ ଲୁଟାଇ ଦେକାଇଦିଆସ୍ । <sup>୧୨</sup> ସେନ୍ତାରି ଲୁଡ଼ତେ କରବା କାମ୍ ବିସଇ କାତା ଅଇବାକେ ମିସା ଲାଜ୍ ଲାଗ୍‌ସି । <sup>୧୩</sup> ଏନ୍ତାରି କାମ୍ ନ ଲୁଟାଇ ବାରକରାଇଲେ, ତେଇର୍ ସଡ଼ ବିସଇ ଲକ୍ମନ୍ ଦେକ୍‌ବାଇ । <sup>୧୪</sup> କାଇକେବଇଲେ ଉଜଲର୍ ସବୁ ବିସଇ ଉଜଲ୍‌ସେ । ସେଟାର୍ ପାଇ ଏନ୍ତାରି ଲେକାଅଇଲାଆଚେ, “ଏ ଗୁନେରାମନ୍ ଉଟା,

ମଲାପାରା ନ ରଇକରି ଜିବନ୍ ରୁଆ,  
କିରିସ୍‌ଟ ତମ୍‌କେ ଉଜଲ୍ ଦେଇସି ।”

<sup>୧୫</sup> ତେବେ ତମର ଚଲାଚଲ୍ତି କରବାଟାନେ ଜାଗ୍‌ରଡ଼ ରୁଆ । ବକୁଆ ଲକ୍ମନ୍‌ପାରା ନ ଅଇ ବୁଦିରଇବା ଲକ୍‌ପାରା ରୁଆ । <sup>୧୬</sup> \* ସବୁବେଲେ ନିକ କାମ୍ କରବାକେ କଜ୍‌ତେ ରୁଆ । କାଇକେବଇଲେ ଏ ଲୁଗର୍ ଲକ୍ମନ୍ ବେସି କାରାପ୍ ଆଚଡ଼ । <sup>୧୭</sup> ତେବର୍‌ପାଇ ବୁଦିନଇଲା ଲକ୍ ପାରା ନଅଇ ମାପୁରୁର ମନ୍‌କଲାଟା କଜିକରି ମିଲାଆ ।

<sup>୧୮</sup> ମଦ୍ ପେଣ୍ଡମ୍ କାଇ ମାତା ନାଇ । କାଇକେବଇଲେ ସେଟା ତମ୍‌କେ ଡିଲା ଚାଡ଼ବା ଗରୁଟାଇର୍ ପାରା ଚଲାଚଲ୍ତି କରବାକେ ଡାକିନେଇସି । ତାରବାଦୁଲେ ସୁକଲ୍‌ଆଡ଼ମା ବାନ୍ଦିନେବାକେ ସର୍ପିଉଆ । <sup>୧୯</sup> \* ଗିଡ଼ ସଙ୍ଗିତାର୍ ଗିଡ଼, ଆଡ଼ମାଇ ଅନି ଆଇବା ବିନ୍ ଗିଡ଼ମନ୍, ତମର ବିତ୍ତରେ କୁଆକୁଇ ଉଆ । ଗିଡ଼ କଇକରି ନିଜେ ନିଜେ ମନ୍‌ବିତ୍ତରେ ମାପୁରୁକେ ଡାକ୍‌ପୁଟା କରା । <sup>୨୦</sup> ଆମର ମାପୁରୁ ଜିସୁକିରିସ୍‌ଟର ନାଉଁଦାରି ସବୁବେଲେ ସବୁ ବିସଇର୍‌ପାଇ ବାବା ପର୍ଯ୍ୟେସରକେ ଦନିଅବାଦ୍ ଦିଆସ୍ ।

ମାଇଜି ମୁନୁସ୍



୨୧ କିରିସ୍ତର୍ପାଇ ରଇବା ତମର୍ ସନ୍ମାନର୍ ଲାଗି, ତମର୍ ତମର୍ ବିତ୍ତରେ ସର୍ପାସର୍ପି ଉଥା ।

୨୨ \*ଏ ମାଇଜିମନ୍ ତମେ ଜେନ୍ତାର ମାପୁରୁକେ ସର୍ପିଅଇ ଆତାସ୍, ସେନ୍ତାରି ତମର୍ ନିଜର୍ ନିଜର୍ ମୁନୁସକେ ମିସା ସର୍ପି ଉଥା । ୨୩ କାଇକେବଇଲେ କିରିସ୍ତ ଜେ କି ତାର୍ ଗାଗଡ଼ପାରା ରଇବା ମଣ୍ଡଲିର୍ ନେତା ଆତେ, ସେନ୍ତାରିସେ ମୁନୁସ୍ ମିସା ତାର୍ ମାଇଜିର୍ ନେତା ଆତେ । କିରିସ୍ତସେ ତାର୍ ମଣ୍ଡଲିକେ ରକିଆ କଲାଆତେ । ୨୪ ତେବର୍ପାଇ ମଣ୍ଡଲି ଜେନ୍ତାର କିରିସ୍ତକେ ସର୍ପି ଅଇସି, ସେନ୍ତାରି ଏ ମାଇଜିମନ୍, ତମେ ମିସା ସବୁ ବିସଇତେଇ ତମର୍ ମନସ୍ମାନର୍ ଚାନେ ସର୍ପି ଅଇବାର୍ଆତେ ।

୨୫ \* ଏ ମୁନୁସମନ୍, କିରିସ୍ତ ଜେନ୍ତାର ମଣ୍ଡଲିକେ ଆଲାଦ୍ କରି, ତାକେ ସୁକଲ୍ କର୍ବାକେ ନିଜେ ସର୍ପିଅଇଲା, ସେନ୍ତାରିସେ ତମେ ମିସା ନିଜର୍ ମାଇଜିମନ୍କେ ଆଲାଦକରା । ୨୬ କିରିସ୍ତ ପର୍ମେସରର୍ ବାକିଅ ସଙ୍ଗ୍ ଆରି ପାନିସଙ୍ଗ୍ ଦଇକରି ମଣ୍ଡଲିକେ ସୁକଲ୍ କଲା । ୨୭ ମଣ୍ଡଲିକେ ତାର୍ ମୁଆଟେ ଆନଲାବେଲେ, ମଣ୍ଡଲି ଜେନ୍ତାରି କି, କାଇ ମୁରକି ନ ଅଇତେ, ଅସୁକଲ୍ ନଇତେ, କାଇ ଦସ୍ ନ ଅଇତେ ରଇ, ତାର୍ ବାଦୁଲେ ସୁକଲ୍ ଆରି ସିଦ୍ କାରାଇ ତାକେ ଚିଆ କରାଇସି । ୨୮ ସେନ୍ତାରିସେ ମୁନୁସମନ୍ ନିଜର୍ ଗାଗଡ଼କେ ଜତନ୍ କରି ଆଲାଦ୍ କଲାପାରା ନିଜର୍ ମାଇଜିମନ୍କେ ସେନ୍ତାରି କରା । ଜେ ନିଜର୍ ମାଇଜିକେ ଆଲାଦ୍ କର୍ସି, ସେ ନିଜକେ ମିସା ଆଲାଦ୍ କର୍ସି । ୨୯ କେ ମିସା କେବେ ନିଜର୍ ଗାଗଡ଼କେ ଗିନ୍ ନ କରେ । ମାତର୍ ତାର୍ପାଇ ଦୁଆପୁଟା କରି କାଦି କୁଆଇସି । ଜେନ୍ତାରି କି କିରିସ୍ତ ତାର୍ ମଣ୍ଡଲିର୍ ପାଇ ଜତନ୍ କଲାନି । ୩୦ କାଇକେବଇଲେ ଆମେ ସବୁ ତାର୍ ଗାଗଡ଼ର୍ ବାଗ୍ ଅଇଆୁ ।

୩୧ ଏଟାର୍ପାଇ ଦରମ୍ ସାସ୍ତରେ ଲେକାଅଇଆତେ ମୁନୁସ୍ ତାର୍ ନିଜର୍ ଆୟା ବାବାକେ ଚାଡ଼ି ନିଜର୍ ମାଇଜିର୍ ସଙ୍ଗ୍ ମିସି ଜାଇସି । ଆରି ସେ ଦୁଇଲକ୍ ମିସି ଗଟେକ୍ ଅଇବାଇ । ୩୨ ଏଟା ଗଟେକ୍ ବଡ଼ ଲୁଚି ରଇବା ବିସଇ । ମାତର୍ ମୁଇ କିରିସ୍ତ ଆରି ମଣ୍ଡଲି ବିତ୍ତରେ ମିସିବିଡ଼ି ରଇବା ବିସଇ କାତା ଅଇଲିନି । ୩୩ ସାରାସାରି ତମେ ଗଟେକ୍ ଗଟେକ୍ ଲକ୍ ନିଜେ ନିଜେ ଆଲାଦ୍ ଅଇଲାପାରା ନିଜର୍ ନିଜର୍ ମାଇଜିକେ ସେନ୍ତାରି କର୍ବାର୍ ଆତେ । ଆରି ମାଇଜିମନ୍ ତାକର୍ ମୁନୁସମନ୍କେ ସନ୍ମାନ ଦେବାର୍ ଆତେ ।



ବାବା ମାଆ ଆରି ପିଲାଟକି

୧ \*ଏ ମର୍ ପିଲାଟକିମନ୍, ତମେ ମାପୁରୁର୍ ସଙ୍ଗ୍ ମିସ୍ଲାର୍ପାଇ ଆୟା ବାବାର୍ କାତା ମାନିକରି ରୁଆ । ତମେ ଏନ୍ତାରି କର୍ବାର୍ ଆତେଆକା । ୨ ଏନ୍ତାରି ଲେକା ଅଇଲାଆତେ, ନିଜର୍ ଆୟା ବାବାକେ ସନ୍ମାନ ଦିଆସ୍ । ଜେନ୍ତାରି କି ତମର୍ପାଇ ସବୁ ବିସଇ ମଙ୍ଗଲ୍ ରଇସି । ଆରି ତମେ ସାର୍ଦା ଅଇ ବେସି ଦିନ୍ ଜାକ ଏ ଜଗତେ ବଢ଼ିରଇସା । ୩ ଏଟା ଅଇଲାନି ପର୍ମେସରର୍ ପର୍ତୁମ୍ ଆଦେସ୍ ଜନ୍ଟା କି ସେ ଗଟେକ୍ ଦେଇରଇବା କାତା ମିସା ତେଇ ମିସାଇଆତେ ।

୪ \*ଏ ବାବାମନ୍, ପିଲାମନ୍କେ ରିସା କରାଆ ନାଇ । ତାର୍ ବାଦୁଲେ ସେମନ୍କେ ମାପୁରୁର୍ ବାକିଅ ଇସାବେ ସିକାଇକରି ବତାଆ ।

ଗତିଦାଙ୍ଗ୍ଡା ଆରି ସାଉକାର୍

\* ୫:୨୨ ୫:୨୨ କଲସିଅ ୩:୧୮; ୧ ମ ପିତର୍ ୩:୧      \* ୫:୨୫ ୫:୨୫ କଲସିଅ ୩:୧୯; ୧ ମ ପିତର୍ ୩:୭  
\* ୬:୧ ୬:୧ କଲସିଅ ୩:୨୦      \* ୬:୪ ୬:୪ କଲସିଅ ୩:୨୧

୫ ☆ଏ ଗତିଦାଙ୍ଗତାମନ୍, ଏ ଜଗତେ ରଇବା ସାଉକାର୍ତମନ୍ କାତା ମାନିକରି ରୁଆ । ସେମନ୍‌କେ ସନ୍‌ମାନ୍ ଦେଇ, ପୁରାପୁରୁନ୍ ମନ୍ ସଙ୍ଗ ନାମିକରି ରୁଆ । ଜେନ୍ତାରି କି ତମେ କିରିସ୍‌ଟକେ ନାମିକରି ରଇସା ।<sup>୬</sup> ଅବ୍‌କା ସେମନ୍‌ର ମୁଆଟେ ବଲ୍ ବଲାଇ ଅଇବାକେ ନାଇ, କି ସେମନ୍ ଦେକ୍‌ଲାବେଲେସେ ନାଇ । ମାତର୍ କିରିସ୍‌ଟର୍ ଗତିଦାଙ୍ଗତା ପାରା, ପର୍‌ମେସର୍ ମନ୍‌କଲ୍‌ଗା ପୁରାପୁରୁନ୍ ମନ୍ ଦିଆନ୍ ଦେଇ କରା ।<sup>୭</sup> ତମକେ ଦାଇଡ୍ ଦେଇରଇବା ସବୁ କାମ୍ ସାର୍‌ଦା ସଙ୍ଗ କରା । ଜେନ୍ତାରିକି ତମେ ଅବ୍‌କା ଲକ୍‌ମନ୍‌ର୍ ପାଇ କାମ୍ ନ କରି ମାପ୍‌ରୁର୍ ସେବା କଲା ପାରା କରା ।<sup>୮</sup> କାଇକେବଇଲେ ତମେ ନିକ କାମ୍ କଲେ, ମାପ୍‌ରୁ ତମକେ ପୁରୁସ୍‌କାର୍ ଦେଇସି । ତମେ ଗତିଦାଙ୍ଗତା ଅଇରୁଆ କି ମୁକଲ୍‌ଲା ଲକ୍ ଅଇରୁଆ ।

୯ ☆ଏ ସାଉକାର୍ତମନ୍, ସେନ୍ତାରିସେ ତମର୍ ଦାଙ୍ଗତାମନ୍‌କେ ନିକସଙ୍ଗ ଦେକାରକା କରା । ସେମନ୍‌କେ ଦାକାପୁକା ଦିଆସ୍ ନାଇ । ତମର୍ ମନେ ରଅ, ତାକର୍ ଆରି ତମର୍ ସାଉକାର୍ ସର୍‌ଗେ ଆଟେ । ଆରି ସେ ସାନ୍ ବଡ୍ ନ ବାବି ଦେକାରକା କରସି ।

ଆଡ୍‌ମାର୍ ଆଡ୍‌ଆତିଆର୍

୧୦ ସାରାସାରି ପଟେ, ମାପ୍‌ରୁର୍ ଟାନେ ମିସିକରି ତାର୍ ବପୁପାଇକରି ତାଟ୍‌ଅଇରୁଆ ।

୧୧ ପର୍‌ମେସର୍ ତମକେ ଦେଇରଇବା ଜୁଇଦର୍ ସବୁ ରକାମ୍ ଆଡ୍ ଆତିଆର୍ ସାଜାତିକରି ରୁଆ । ଜେନ୍ତାରିକି ତମକେ ସଇତାନ୍ ନାତାଇବା ବେଲେ ତାକେ ବିରଦ୍ କରିପାରାସ୍ ।<sup>୧୨</sup> କାଇକେବଇଲେ ଆମେ ଜଗତର୍ ଲକ୍‌ମନ୍‌ର୍ ବିରୁଦେ ଜୁଇଦ୍ କରୁନାଇ । ମାତର୍ କାରାପ୍ ଆଡ୍‌ମାମନ୍‌କେ, ଆନ୍‌ରେ ରଇବା ଜଗତର୍ ସାସନ୍‌କାରିଆମନ୍‌କେ, ଆରି ସର୍‌ଗେ କାରାପ୍ ବପୁ ପାଇରଇବା ଆଡ୍‌ମାମନ୍‌ର୍ ବିରୁଦେ ଜୁଇଦ୍ କଲୁନି ।<sup>୧୩</sup> ତେବର୍‌ପାଇ ପର୍‌ମେସର୍ ଦେଇରଇବା ସବୁରକାମ୍ ଜୁଜ୍‌ବା ଆଡ୍ ଆତିଆର୍ ଗଟେକ୍ ସନିଅ ପିନ୍‌ଲାପାରା ପନ୍‌କରି ସାଜାତା । ସେନ୍ତାରି ରଇଲେ ସଇତାନ୍ ଆରି ତାର୍ କାରାପ୍ ଆଡ୍‌ମାମନ୍ ତମକେ ଜୁଜ୍‌ଲାବେଲେ ସେମନ୍‌କେ ତମେ ବିରଦ୍ କରି ପାରାସ୍ । ଜୁଇଦର୍‌ପାଇ ସବୁ ରକାମ୍‌ଟା ସାଜାତି ରଇଲେ ତମେ ପଟେ ନ ଗୁଟିକରି ଟିଆଅଇ ପାରସା ।

୧୪ ତେବେ ଜୁଇଦର୍‌ପାଇ ତମେ ଏନ୍ତାରି ଜାଗ୍‌ରଡ୍ ଉଆ । ଜେନ୍ତାରି କି, ପର୍‌ମେସର୍‌ର୍ ସଡ୍ ଆଁଟାବେତା, ଆଁଟାଇ ବାନ୍‌ଅଇ, ତାର୍ ଦରମର୍ ସାଞ୍ଜୁ ଜଗାତି ଅଇ, <sup>୧୫</sup> ସୁବ୍‌କବରେଅନି ଆଇବା ସାନ୍ତିର୍ ପାଣ୍ଡଇ ପିନ୍‌ ସାଜାତି ଉଆ । <sup>୧୬</sup> ଏ ସବୁର୍ ଉପ୍‌ରେ ବିସ୍‌ବାସର୍ ତେବାଇବା ତାଲ୍ ଦାରିରୁଆ । ଏ ତାଲ୍‌ସଙ୍ଗ୍ ସଇତାନ୍ ତମର୍ ମୁଆଟେ ବିନ୍‌ବା ଜଇର୍ କାଣ୍ ଅଟ୍‌କାଇ ପାରସା ।

୧୭ ଆରି ମାପ୍‌ରୁ ଦେଇରଇବା ମୁକ୍ତି, ଗଟେକ୍ ଟପିପାରା ମୁଣ୍ଡ ରକିଆ କର୍‌ବାକେ ପିନ୍‌ରୁଆ । ସୁକଲ୍‌ଆଡ୍‌ମା ଦେଇରଇବା କାଣ୍ଟା ଦାରିରୁଆ । ସେ କାଣ୍ଟା ଅଇଲାନି ପର୍‌ମେସର୍‌ର୍ ବାକିଅ । <sup>୧୮</sup> ସୁକଲ୍‌ଆଡ୍‌ମା ଚେଡ୍‌ନା ଦେଲା ଇସାବେ ପାର୍‌ତନା କରା । ସବୁ ରକାମ୍‌ର୍ ପାର୍‌ତନା ଆରି ଗୁଆରିସଙ୍ଗ୍ ପାର୍‌ତନା କରା । ଏଟାରିଲାଗି ଜାଗ୍‌ରଡ୍ ଅଇରୁଆ । ପର୍‌ମେସର୍‌ର୍ ଲକ୍‌ମନ୍‌ର୍‌ପାଇ ପାର୍‌ତନା କରିଲାଗିରୁଆ । <sup>୧୯</sup> ମର୍‌ପାଇ ମିସା ପାର୍‌ତନା କରା । ଜେନ୍ତାରିକି ମୁଇ କାତା ଅଇବାବେଲେ ପର୍‌ମେସର୍ ମକେ ଟିକ୍ ବାକିଅ ଦେଅ । ସେନ୍ତାରି କଲେ, ସୁବ୍ କବରର୍ ଲୁଟିରଇବା ବିସଇ ମୁଇ କାକେ ନ ଡରିକରି ଲକ୍‌ମନ୍‌କେ ଜାନାଇ ପାର୍‌ବି ।<sup>୨୦</sup> ଏବେ ମୁଇ ବନ୍‌ଅଇ ରଇଲେ ମିସା କିରିସ୍‌ଟର୍ ସୁବ୍‌କବର୍ ଜାନାଇବାପାଇ ଗଟେକ୍ ରାଜାର୍ ଦୁଡ୍ ପାରା ଅଇଲିଆତି । ସୁବ୍‌କବର୍ ଟିକ୍ ସଙ୍ଗ୍, ନ ଡରିକରି ଜାନାଇବାକେ ପର୍‌ମେସର୍ ମକେ ବପୁ ଦେଅ ବଲି ପାର୍‌ତନା କରା ।

ସାରାସାରି ଜୁଆରବେଟ୍ ଅଇବାଟା

୨୧ \*\* ତକିକସ୍ ଜେ କି ଆମର୍ ଆଲାଦର୍ ବାଇ, । ସେ ମାପୁରୁକେ ବିସ୍ବାସ୍ ସଙ୍ଗ୍ ସେବା କଲାନି । ମୁଇ କେନ୍ତି ଆତି ଆରି କାଇଟା କଲିନି, ସେ ସବୁ ବିସଇ ତମ୍ବେ କଇଦେଇସି । ୨୨ ଆମ୍ବେ ଗଟ୍ବା ବିସଇ ସବୁ ତମେ ଜାନିରୁଆ ବଲିକରି ମୁଇ ତାକେ ତମର୍ଟାନେ ପାଟାଇଲିନି । ଆରି ସେ ତମ୍ବେ ସାର୍ଦା କରାଇସି ।

୨୩ ଆମର୍ ବାବା ପର୍ମେସର୍ ଆରି ମାପୁରୁ ଜିସୁକିରିସ୍ଟ ସବୁ ବିସ୍ବାସି ବାଇମନ୍ବେ ସାନ୍ତି ଦେଅ । କିରିସ୍ଟକେ ବିସ୍ବାସ୍ କରି ତମର୍ ବିତ୍ରେ ଆଲାଦ୍ କରାକରି ଅଇବାକେ ସେମନ୍ ତମ୍ବେ ସାଇଜ କରଡ୍ ।

୨୪ ଆମର୍ ମାପୁରୁ ଜିସୁ କିରିସ୍ଟକେ ଜେଡ୍କି ଲକ୍ ଆଲାଦ୍ କଲାଇନି, ସେମନ୍ବେ ପର୍ମେସର୍ ତାର୍ ଜିବନ୍ ଦୁକାଇଲାଟା ଆରି ନ ସାର୍ବା ଆଲାଦ୍ ଦେଅ ।

# ପିଲିପିଅ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କ ପତ୍ର ପିଲିପିୟ ମଣ୍ଡଳୀର ବିସ୍ତାରିତମନ୍ତ୍ରଣା ପାଉଲ୍ ଚିଠି ଲେଖିଲାଟା

## ଏ ବଇର ବିସଇ ପଦେକ୍ ଜାନ୍‌ବାଟା

ଜିସୁକ୍ରିଷ୍ଟ ଜନମ୍ ଅଇକରି ୬୧ ବରସ୍ ପରେ ପାଉଲ୍ ପିଲିପିଅ ମଣ୍ଡଳୀର ବିସ୍ତାରିତମନ୍ତ୍ରଣା ଲଗେ ଏ ଚିଠି ଲେଖିରଇଲା । ଏ ଚିଠି ପାଉଲ୍ ରମ୍ ରାଇଜେ ବନ୍ଦି ରଇଲାବେଲେ ଲେଖିରଇଲା ୧:୧୩ ।

ପିଲିପି ସଥରେ ରଇବା ମଣ୍ଡଳୀମନ୍ତ୍ରଣାଏ ଏ ଚିଠି ଲେଖାଅଇରଇଲା । ଆମେ ପେରିଡ଼ ବଇଟାମେ ମିସା କେତେଟା ବିସଇ ପିଲିପିୟ ବଇର ବିସଇ ଜାନ୍‌ପାରିଅଇସି । ପିଲିପି ମାକିଦନିଆର୍ ରାଜ୍‌ଦାନି ରଇଲା । ଏଟା ମାକିଦନିଆଇ ତିଆର୍ ଅଇରଇବା ପର୍ତୁଗାଲ୍ ମଣ୍ଡଳୀ ରଇଲା । ଏ ମଣ୍ଡଳୀ ପାଉଲ୍ ଆରି ସିଲା ମିସିକରି ଆରାମ୍ କରିରଇଲା । ଆରି ତେଇ ରଇଲାବେଲେ ଗଟେକ୍ ରାତିର୍‌ପାଇ ସେମନ୍‌କେ ବନ୍ଦିକରି ସଙ୍ଗଇରଇଲା ପେରିଡ଼ ୧୭ ।

ପାଉଲ୍ ଏ ଚିଠି ଲେଖିବାକେ କେତେଟା ଆଦେସ୍ ରଇସି ମିସା । ସେ ବନ୍ଦି ରଇବା ବିସଇ ସୁନି ମଣ୍ଡଳୀର ଲକ୍‌ମନ୍ ଚାନ୍ଦା ଉଟାଇକରି ପାଟାଇରଇଲାଜେ ସେମନ୍‌କେ ଦନିଅବାଦ୍ ଦେବା ଉଦେସେ ଚିଠି ଲେଖିଲାଆରେ ୪:୧୦-୧୯ । ସେ ମିସା ତାର୍ ବନ୍ଦିରଇଲା ବେଲର୍ ଚିକିନିକି ବିସଇ ମଣ୍ଡଳୀତେଇ ତିମତିକେ ଆରି ଏପ୍ରାପଦିଡ଼କେ ଜାନାଇଦେଲାନି । ବିସ୍ତାରିତମନ୍ତ୍ରଣା ଜେଜୁକି ସେମନ୍‌କେ ମାନିକରି ଜୁଆର୍ ଜାନାଇବାଇ ଆରି ତାକର୍ ଦାଇତେ ନାମିକରିରଇବାଇ ୨:୧୯-୩୦ ।

### ଏ ବଇ ବିତ୍‌ରେ ରଇଲାଟା

- ୧. ପିଲିପିୟ ମଣ୍ଡଳୀକେ ପାଉଲ୍ ଜୁଆର୍ ଜାନାଇବାଟା । ୧:୧-୨
- ୨. ପାଉଲ୍‌କ କସ୍ ପଡ଼ିରଇଲାଟା ଆରି ବାଦ୍‌ବାଟା । ୧:୩-୨:୩୦
- ୩. ବିସ୍ତାରିତମନ୍ତ୍ରଣା କିରିସ୍‌ଟକେ ବିସ୍ତାରିକରି ଜିଉନାକାଉନା କର୍‌ବାକେ ପାଉଲ୍ ତିଆରି ଆରେ । ୩:୧-୪:୯
- ୪. ପାଉଲ୍ ଚାନ୍ଦାକରି ଦାନ୍ ଦେବାକେ ପିଲିପି ରଇବା ମଣ୍ଡଳୀର ବିସ୍ତାରିତମନ୍ତ୍ରଣାକେ ଜୁଆର୍ ଆରି ଦନିଅବାଦ୍ ଜାନାଇଆରେ । ୪:୧୦-୨୩

ପାଉଲ୍‌କ ପାର୍‌ତନା

୧ \*ଏ ଚିଠି ପାଉଲ୍ ଆରି ତିମତି, କିରିସ୍‌ଟ ଜିସୁର୍ ଦୁଇଟା ଗତିଦାଙ୍‌ଡାମନ୍ ଲେଖିଲୁନି ।

ଜିସୁକ୍ରିଷ୍ଟର୍ ଅଇକରି ପିଲିପି ନଅରେ ରଇବା ସବୁ ପର୍‌ମେସର୍‌କ ଲକ୍‌ମନ୍‌ପାଇ ଏଟା ଲେଖାଅଇଲା ଆରେ । ତମର୍ ବିତ୍‌ରେ ନେତା ଅଇକରି ତମ୍‌କେ ସାଇଜ କର୍‌ବା ଲକ୍‌ମନ୍‌ପାଇ ମିସା ।

୨ ଆମର୍ ବାବା ପର୍‌ମେସର୍ ଆରି ମାପରୁ ଜିସୁକ୍ରିଷ୍ଟ ତମ୍‌କେ ଜିବନ୍ ଦୁକାଇକରି ସାନ୍ତି ଦେଅ ।

ପାଉଲ୍‌କ ପାର୍‌ତନା

୩ ମୁଇ ତମ୍‌କେ ଜେଡ଼କିତର୍ ଏତାଇଲିନି, ସେଡ଼କିତର୍ ମର୍ ପର୍‌ମେସର୍‌କେ ଦନିଅବାଦ୍ ଦେଇତେରଇବି । ୪ ପାର୍‌ତନା କଲାବେଲେ ସବୁତର୍ ତମର୍‌ପାଇ

\* ୧:୧ ୧:୧ ପେରିଡ଼ ୧୭:୧୨

ସାର୍ଦ୍ଦାସଙ୍ଗ ପାର୍ତନା କଲିନି ।<sup>୫</sup> କାଇକେବଇଲେ ସୁବକବର୍ ଜାନାଇବା କାମେ ତମେ ମର୍ ସଙ୍ଗ ମିସିକରି ରଇଲାସ୍ । ବିସ୍ବାସ୍ କରବା ପର୍ତ୍ତୁମ୍ ଦିନେଅନି ଆଜିକେ ଜାକ ତମେ ମକେ ଏଟା କଲାସ୍ନି । ଆରି ଏବେ ମିସା କରି ଆଇଲାସ୍ନି ।<sup>୬</sup> ପର୍ତ୍ତମେସର୍ ଜେକି ତମର୍ ମନ୍ ବିତ୍ତରେ କାମ୍ କରବାକେ ଆରାମ୍‌କରିଆଚେ, ଜିସୁକିରିସ୍ତ ବାଉଡିଆଇବା ଜାକ, ସେଟା କରି ସାରାଇସି ।<sup>୭</sup> ତମେ ସବୁବେଲେ ମର୍ ମନ୍ ବିତ୍ତରେ ଆଟାସ୍ । ତେବର୍‌ପାଇ ତମର୍ ବିସଇନେଇ କରି ଏନ୍ତାରି ବାବ୍‌ବାଟା ଟିକ୍ ସେ । ମୁଇ ବନ୍ଦି ନ ଅଇକରି ରଇଲାବେଲେ କି ଏବେ ବନ୍ଦି ରଇକରି ସୁବକବର୍ ବିରୁଦେ ଦଦାପେଲା ଉଟ୍‌ଲାବେଲେ, ଏଟା ସତ୍ ଆକା ବଲି ତାଟ୍‌ସଙ୍ଗ ଦେକାଇବାଟାନେ ମିସା, ତମେ ସବୁ ମିସବାକେ ପର୍ତ୍ତମେସର୍ ବେଲା ଟିକ୍ କରି ଦେଲାଆଚେ ।<sup>୮</sup> ମୁଇ ତମ୍‌କେ ସବୁ ଲକ୍‌କେ ଆରିତରେକ୍ ଦେକ୍‌ବି ବଲି ମନ୍ କଲିନି । ଏ ବିସଇତେଇ ନିଜେ ପର୍ତ୍ତମେସର୍ ସାକିଆଚେ । କାଇକେବଇଲେ ଜିସୁକିରିସ୍ତ ଆଲାଦ୍ କଲାପାରା ମୁଇ ତମକେ ଆଲାଦ୍ କଲିନି ।

<sup>୯</sup> ମୁଇ ତମର୍‌ପାଇ ଏନ୍ତାରି ପାର୍ତନା କଲିନି, ଜେନ୍ତାରିକି ତମେ ଆଲାଦ୍ କରବାଟାନେ ଅଦିକ୍ ଅଦିକ୍ ବଡ଼ସା । ପର୍ତ୍ତମେସର୍ ଜେନ୍ତାରି ଆଚେ, ସେ ବିସଇ ତମେ ଅଦିକ୍ ଅଦିକ୍ ଜାନ୍‌ସା ବଲି ମୁଇ ପାର୍ତନା କଲିନି । ଆରି ଜେତେବଲ୍ ମିସା କନ୍‌ଟା ସତ୍ କନ୍‌ଟା ବୁଲ୍ ସେଟା ଜାନିପାର୍‌ସା ।<sup>୧୦</sup> ସେନ୍ତାଆଲେ ଟିକ୍ ବିସଇ କନ୍‌ଟା ବଲି ବାଟିକରି କରିପାର୍‌ସା । ଆରି ଏବେଅନି କିରିସ୍ତ ବାଉଡି ଆଇବାଜାକ ସବୁ ପାପେଅନି ମୁକ୍‌ଲିକରି କାଇ ଦସ୍ ନ ଅଇକରି ରଇପାର୍‌ସା ।<sup>୧୧</sup> ଜେନ୍ତାରିକି ଗଟେକ୍ ପଲ୍ ଦେବା ଗର୍ ପଲ୍ ଦେଇସି, ସେନ୍ତାରିସେ ତମେ ମିସା ଜିସୁକିରିସ୍ତର୍ ବପୁ ସଙ୍ଗ ଦରମ୍ କାମର୍ ପଲ୍ ଦେଇସା । ଏଟା ପର୍ତ୍ତମେସର୍‌କେ ତାକ୍‌ପୁଟା ଆରି ମଇମା କର୍‌ସି ।

**କିରିସ୍ତ ଅଇଲାନି ଆମର୍ ଜିବନ୍**

<sup>୧୨</sup> ଏ ବାଇବଇନିମନ୍, ତମେ ଜାନ୍‌ବାର୍ ଆଚେ କି କିରିସ୍ତର୍‌ପାଇ ମର୍ ଜିବନେ ଜେଡ଼କି ଗଟିଆଚେ, ତାର୍‌ଲାଗି ଅଦିକ୍ ଲକ୍ ସୁବକବର୍ ବିସ୍ବାସ୍ କରବାକେ ଗଟେକ୍ ବାଟ୍ ଆଇଲା ।<sup>୧୩</sup> ଧ୍ରେକ୍‌କି, ସମ୍‌ରାଟର୍ ମେତେ ଜେଡ଼କି ସଇନ ଜାଗିଆଚଡ଼, ସେମନ୍ ସବୁ ମୁଇ କିରିସ୍ତକେ ସେବା କଲାର୍ ପାଇ ବନ୍ଦିଗରେ ଆଟିବଲି ଜାନ୍‌ଲାଇ ।<sup>୧୪</sup> ମୁଇ ବନ୍ଦିଗରେ ରଇଲାର୍‌ପାଇ, ଇଡି ରଇବା କେତେକ୍ କେତେକ୍ ବିସ୍ବାସି ବାଇବଇନିମନ୍‌କେ ମାପୁର୍ ବପୁ ଦେଲାଆଚେ । ପର୍ତ୍ତମେସର୍‌ ବାକିଅ ନ ଡର୍‌ତେ ଜାନାଇବାକେ ସେମନ୍‌କେ ଏବେ ସାଆସ୍ ଆଚେ ।

<sup>୧୫</sup> ଅଇଲେ ମିସା ସେମନ୍‌ର୍ ବିତ୍ତରେ ଅନି କେତେଲକ୍ ମକେ ଆଁକାର୍ କଲାର୍‌ପାଇ କିରିସ୍ତର୍ ବିସଇ ଜାନାଇବାକେ ମନ୍ କଲାଇନି । ସେମନ୍ ମର୍‌ଟାନେଅନି ବଡ଼ ବଲି ଦେକାଇଅଇବାକେ ଏନ୍ତି କଲାଇନି । ମାତର୍ ଆରି କେତେକ୍ ଲକ୍ ଏଟା ସତ୍ ବଲି ମନେବାବିକରି କଲାଇନି ।<sup>୧୬</sup> ଏ ଲକ୍‌ମନ୍ ମକେ ଆଲାଦ୍ କଲାର୍ ପାଇ ସୁବକବର୍ ଜାନାଇଲାଇନି । କିରିସ୍ତର୍ ସୁବକବର୍ ଦେକାରକା କରବାକେ ପର୍ତ୍ତମେସର୍‌ସେ ମକେ ଏ ବନ୍ଦିଗରେ ସଙ୍ଗିଆଚେ ବଲି ଜାନିକରି ମିସା ।<sup>୧୭</sup> ମାତର୍ ଜନ୍ ଲକ୍‌ମନ୍ ମକେ ଆଁକାର୍ କଲାଇନି, ମର୍‌ଟାନେଅନି ବଡ଼ ଅଇବୁ ବଲିକରି, କିରିସ୍ତର୍ ସୁବକବର୍ ଜାନାଇଲାଇନି । ତାକର୍ ମନେ ଏଟା ସତ୍‌ବଲି ବାବିକରି କରଡ଼ନାଇ । ମୁଇ ବନ୍ଦି ଗରେ ରଇକରି ଜେଡ଼କି କସ୍ତ ମୁରଟ୍‌ଲିନି, ତାର୍‌ତେଇଅନି ଅଦିକ୍ କସ୍ତ ମିସାଇବାକେ କୁଟ୍ ପାଁଟ୍‌ଲାଇନି ।

<sup>୧୮</sup> ମାତର୍ ଏଟା ମର୍‌ପାଇ କାଇଟା ନାଇ । ସେମନ୍ ସତଇସେ କଲେ କି ବୁଲ୍ କାମର୍ ପାଇ କଲେ ମିସା, କିରିସ୍ତର୍ ବିସଇର୍ କବର୍ ଜାନାଇ ଅଇଲେ, ସେଟା

☆ ୧:୧୩ ୧:୧୩ ପେରିଡ଼ ୨୮:୩୦

ମୁକ୍ତି ବିସଇ । ଆରି ସେଟାରପାଇ ମୁଇ ସାରଦା ସଙ୍ଗ ରଇବି । ୧୯ ଆରି ମୁଇ ସାରଦା ଅଇତେରଇବି । କାଇକେବଇଲେ ତମେ ମରପାଇ ପାରତନା କଲାସ୍ତି ବଲି ମୁଇ ଜାନି । ଆରି ଜିସୁକିରିସ୍ତର୍ ସୁକଲ୍ ଆଡ଼ମାର୍ ସାଇଜରଲାଗି ପରମେସର୍ ମକେ ମୁକ୍ତଲାଇସି । ୨୦ ମୁଇ ଦିଆନ୍ ଦେଇ ଆରି ଆସା କରି ଜାଗଲିନି । ମୁଇ ଜିବନ୍ ରଇଲେ କି ମରବାକେ ଅଇଲେ ମିସା ମର୍ କାମଟାନେ ଏଲା ନ କରି । ମାତର୍ ଅଦିକାର୍ ସଙ୍ଗ ରଇବା ଲକ୍ମନର୍ ମୁଆଟେ କାତା ଅଇବାକେ ମକେ ଅଦିକ୍ ସାଆସ୍ ଆଇସି । ଏନ୍ତାରିକରି ମୁଇ ଜେଡ଼କି କାମ୍ କଲିନି, କିରିସ୍ତକେ ଡାକ୍ପୁଟା କରାଇବି । ୨୧ କାଇକେବଇଲେ ମରପାଇ ଜିଇବା କାଇବାଟା ସବୁ କିରିସ୍ତସେ । ଆରି ମର୍ ଇସାବେ, କିରିସ୍ତର୍ଟାନେ ରଇକରି ମରବାଟା ବେସି ନିକ । ୨୨ ମୁଇ ଜିଇରଇଲେ, କିରିସ୍ତର୍ପାଇ ନିକ ସଙ୍ଗ କାମ୍ କରିଅଇସି । ମାତର୍ ମଲେ ନିକ କି ଜିଇରଇଲେ ନିକ ବଲି ଜାନି ନାପାରଲିନି । ୨୩ ଏ ଦୁଇଟା ବିତ୍ତରେ କାଇଟା କରବି ବଲି ଜିକାଟାନା ଅଇଲିନି । ଏ ଜିବନ୍ ଚାଡ଼ି ସର୍ଗେ କିରିସ୍ତର୍ ସଙ୍ଗ ରଇବାକେ ମୁଇ ମନ୍ କଲିନି । କାଇକେବଇଲେ ସେଟା ଅଦିକ୍ ନିକ । ୨୪ ମାତର୍ ତମରପାଇ ମୁଇ ଜିଇକରି ରଇବାଟା ବେସି ମୁକ୍ତି ବିସଇ । ୨୫ ଏ ବିସଇ ମୁଇ ଡାଁର୍ ସଙ୍ଗ ଜାନିଲିନି । ତେବରପାଇ ମୁଇ ଜିଇକରି ରଇବି ଜେନ୍ତାରିକି, ତମେ ବିସବାସେ ଡାଁର୍ ଅଇସା ଆରି ବିସବାସ କଲାମରପାଇ ସାରଦା ଅଇସା । ୨୬ ସେନ୍ତାଆଲେ, ମୁଇ ତମର୍ ସଙ୍ଗ ଆରିତରେକ୍ ମିସବାବେଲେ, ଜିସୁକିରିସ୍ତର୍ ସଙ୍ଗ ମିସଲାମରପାଇ ତମେ ମର୍ ବିସଇନେଇ ବଡ଼ପନ୍ ଅଇସା ।

୨୭ ସବୁଟାନେଅନି ମୁକ୍ତି ବିସଇ ଅଇଲାନି ଏଟା । କିରିସ୍ତର୍ ସୁର୍ କବର୍ ବିସବାସ୍ କରବା ଲକ୍ମନ କେନ୍ତାରି ଚଲାଚଲ୍ତି କରବାରୁଆଟେ, ତମେ ସେନ୍ତାରି କରା । ମୁଇ ତମ୍‌କେ ଦେକ୍‌ବାର୍ ଆଇଲେମିସା, କି ତମରଟାନେଅନି ଦୁରିକେ ରଇ ଅବକା ସୁନିପାରଲେ ମିସା ଏନ୍ତାରି ଜିଇତେରୁଆ । ଏଟାରଲାଗି ତମେ ସବୁ ଗଟେକ୍ ମନ୍ ଅଇ ମିସିଆଗାସ୍ ବଲି ମୁଇ ଜାନିପାରବି । ଜନ୍ ଲକ୍ମନ ସୁର୍ କବରର୍ ବିରୁଦେ ଦଦାପେଲା କଲାଇନି, ତାକର୍ ମୁଆଟେ କିରିସ୍ତର୍ ସୁର୍ କବରର୍ ଦେକାରକା କରବାକେ ତମେ ସବୁ ଗଟେକ୍ ଅଇ ଚିଆଅଇଲାସ୍ତି ବଲି ମୁଇ ଜାନ୍‌ବି । ୨୮ ଜନ୍ ଲକ୍ମନ ତମର୍ ବିରଦେ ଆଇଲାଇନି, ସେମନ୍‌କେ ତରା ନାଇ । ତମେ ସାଆସ୍ ଦାରିରଇଲେ, ପରମେସର୍ ସେମନ୍‌କେ କୁରୁପନାସ୍ କରି ତମ୍‌କେ ରକିଆ କରସି ବଲି ଜାନ୍‌ବାଇ । ଏ ସବୁ ବିସଇ ପରମେସରସେ କରସି । ୨୯ କାଇକେବଇଲେ ପରମେସର୍ ତମ୍‌କେ କିରିସ୍ତକେ ଅବକା ବିସବାସ୍ କରବା ଦାନ୍ ଦେଏନାଇ, ମାତର୍ ତାରପାଇ ଦୁକ୍ କସ୍ତ ପାଇକରି ରଇବା ଦାନ୍ ମିସା ଦେଲାଆଟେ । ୩୦ \*ତମର୍ ବିରୁଦେ ଆଇବା ଲକ୍ମନର୍ ସଙ୍ଗ ଜନ୍ ଜୁଇଦେ ତମେ ରଇଲାସ୍, ସେନ୍ତାରିସେ ଗଟେକ୍ ଜୁଇଦେ ମୁଇ ମିସା ପିଲିପ୍‌ତେଇ ରଇଲାବେଲେ ଅଇଲାଟା ତମେ ଦେକିଆଗାସ୍ । ଆରି ଏବେ ମିସା ସେ ଜୁଇଦେ ମୁଇ ଆଟି ବଲି ତମେ ସୁନି ଆଇଲାସ୍ତି ।

## ୨

କିରିସ୍ତର୍ ଦରମ୍ ଆରି ଡାକ୍ପୁଟା

୧ ଜଦି କିରିସ୍ତର୍ ସଙ୍ଗ ମିସଲାମ୍ ପାଇ ତମର୍ ମନ୍ ସାରଦା ଅଇଲାଆଟେ, ଆରି ତାର୍ ଆଲାଦର୍ ଲାଗି ସାନ୍ତି ପାଇଆଗାସ୍, ଜଦି ସୁକଲ୍ ଆଡ଼ମାର୍ ସଙ୍ଗ ମିସିବିଡକରି ଆଗାସ୍, ଆରି ଜଦି କିରିସ୍ତର୍ ତମ୍‌କେ ଜିବନ୍ ଦୁକାଇ ଦୟା ଦେକାଇଆଟେ, ୨ ସେନ୍ତାଆଲେ, ମୁଇ ତମ୍‌କେ ଜୁଆର୍ କରି କଇଲିନି, ତମର୍ ତମର୍ ବିତ୍ତରେ

ଗଟେକ୍ ମନ୍ ଉଆ । ଗଟେକ୍ ଲକ୍ ଆରି ଗଟେକ୍ ଲକ୍‌କେ ସମାନ୍ ଇସାବେ ଆଲାଦ୍ କରା । ଗଟେକ୍ ଚିନ୍ତା କରା ଆରି ତମର୍ ଆତ୍‌ମା ଗଟେକ୍ ଅଇକରି ତମର୍ ବାବ୍‌ବାଟା ଗଟେକ୍ ଅ । ଏନ୍ତାରି କରି ମକେ ପୁରାପୁରୁନ୍ ସାର୍‌ଦା କରାଆ । ୩ ବିନ୍ ଲକ୍‌ମନ୍ ଟାନ୍‌ନେଅନି ନିଜେ ବଡ଼ ଅଇବାକେ ଚେସ୍‌ଟା କରାନାଇ । ଅବ୍‌କା ବଡ଼ପନ୍ କାତା କଇବାକେ କାଇ ବିସଇ ମିସା କରାନାଇ । ତାର୍ ବାଦୁଲେ ନିଜ୍‌କେ ସାନ୍ କରା । ବିନ୍ ଲକ୍‌ର୍ ଟାନ୍‌ନେଅନି, ନିଜେ ମୁଇ ବଡ଼ ବଲି ବାବାନାଇ । ୪ ମର୍ ନିଜ୍‌ପାଇ କାଇଟାକଲେ ଅଦିକ୍ ନିକ ରଇସି ବଲି ଅବ୍‌କା ସେଟାସେ ବାବି ବାବି ରୁଆନାଇ । ବିନ୍ ଲକ୍‌ପାଇ ଜନ୍ ବିସଇ ନିକ ରଇସି, ସେଟାମିସା ଏତାଇରୁଆ । ୫ କିରିସ୍‌ଟ ଜିସୁର୍ ମନ୍ ଜେନ୍ତି ରଇଲା, ତମର୍ ମନ୍‌ମିସା ସେ ରକାମ୍ ଅ ।

୬ ସେ ପର୍‌ମେସରର୍ ପାରା ସବୁ ରକାମ୍ ରଇଲେ ମିସା, ତାର୍ ସଙ୍ଗ୍ ସମାନ୍‌ଅଇ ରଇବା ଅଦିକାର୍ ନିଜ୍‌ପାଇ ଦାରିକରି ରଇବି ବଲି ମନ୍ କରେ ନାଇ ।

୭ ତାର୍ ବାଦୁଲେ ସେ ନିଜେ ମନ୍‌କରି, ତାକେ ରଇଲା ସବୁଟା ଚାଡ଼ିଦେଇ ଗଟେକ୍ ଗତିଦାଙ୍ଗ୍‌ତାର୍ ରୁପ୍ ଦାରିଆଇଲା । ନର୍ ଲକ୍ ପାରା ଅଇକରି ନର୍ ଲକ୍‌ର୍ ବାନିମୁର୍ତି ଦାରି ଜାଡ଼ିଆଇଲା ।

୮ ନର୍‌ଲକ୍ ପାରା ଅଇ ଆଇଲାପଟେ, ସେ ପର୍‌ମେସରର୍ ଆଦେସ୍ ମାନିକରି, ନିଜ୍‌କେ ଆରି ଅଦିକ୍ ସାନ୍‌କଲା । ଲକ୍‌ମନ୍ ମରାଅଡ଼ବଲି ସର୍‌ପାଇଆଇଲା । ଅବ୍‌କା ମର୍‌ବାକେ ନାଇ, ମାତର୍ କୁରୁସ୍ କାଟେ କୁଟିମାରାଇଅଇ ଚଗାଇଅଇବାକେ ମିସା ।

୯ ତେବର୍‌ପାଇ ପର୍‌ମେସର୍ ତାକେ ସବୁର୍‌ତେଇଅନି ଉପ୍ରେ ଉଟାଇଲା । ଆରି ସବୁର୍ ନାଉଁଟାନ୍‌ନେଅନି ଅଦିକ୍ ଡାକ୍‌ପୁଟା ଆରି ଅଦିକାର୍ ରଇବା ନାଉଁ ତାକେ ଦେଲା ।

୧୦ ଜେନ୍ତିକି ସରଗ୍‌ପୁରେ, ମର୍‌ପୁରେ ଆରି ପାତାଲେ ରଇବା ସବୁ, ଜିସୁକେ ମାଣ୍ଡିକୁଟା ଦେଇ ଜୁଆର୍ କର୍‌ବାଇ । ସେଟାର୍‌ପାଇ ପର୍‌ମେସର୍ ଏ ସବୁ କଲାଆଟେ ।

୧୧ ଆରି ସବୁ ଲକ୍ ଜିସୁକିରିସ୍‌ଟସେ ମାପୁରୁ ବଲି ମାନିଅଇବାଇ । ଏନ୍ତାରି ଅଇଲେ ବାବା ପର୍‌ମେସର୍ ଡାକ୍‌ପୁଟା ପାଇସି ।

ପୁର୍‌ତିବିତେଇ ଉଜଲ୍‌ଅଇ ରୁଆ

୧୨ ତେବର୍ ପାଇ, ଏ ମର୍ ଆଲାଦର୍ ମଇତର୍‌ମନ୍, ତମେ ଜେନ୍ତାରିକି, ମାପୁରୁର୍ ଆଦେସ୍ ମାନିକରି ରଇଆଟାସ୍, ଜାଗିରଇ ଡରିକରି ତମର୍ ମୁକ୍‌ତିର୍ କାମ୍ ପୁରାପୁରୁନ୍ କରା । ମୁଇ ରଇଲାବେଲେସେ ନାଇ, ମାତର୍ ମୁଇ ଦୁରିକେ ରଇଲେ ମିସା ଏଟା କରା । ୧୩ ପର୍‌ମେସର୍ ନିଜେ ତମର୍ ବିଡ଼ରେ ଏ କାମ୍ କଲାପାଇ ତମେ ଏଟା କରିପାର୍‌ସା । ତମ୍‌କେ ଜାଇଟା କରଡ଼ ବଲି ସେ ମନ୍ କଲାନି, ସେ ସମାନ୍ ମନ୍ କର୍‌ବାଟା, ତମ୍‌କେ ମିସା ଦେଇସି । ଆରି ସେଟା କର୍‌ବାକେ ବପୁ ମିସା ଦେଇସି ।

୧୪ ମୁର୍‌ମୁରା ଆରି କିରଜାଟି ନ ଅଇକରି ସବୁ ଲକ୍‌ଜାକ କାମ୍ କରା । ୧୫ ଏନ୍ତାରିକଲେ, ତମେ କାରାପ୍ କାମ୍ କଲାସ୍‌ନି ବଲି ବିନ୍‌ଲକ୍ କାଇ ଦସ୍ ନ ଦାରଡ଼ ଆରି ତମେ ସୁକଲ୍ ଅଇସା । ପାପ୍‌କରି କାରାପ୍ କାମ୍ କର୍‌ବା ଲକ୍‌ମନ୍ ମଜାଇ ପର୍‌ମେସରର୍ ସିଦ୍ ପିଲାଟକି ଇସାବେ ତମେ ରଇସା । ତାକର୍ ବିଡ଼ରେ ଆନ୍ଦାର୍ ଜଗତେ ଉଜଲ୍ ଜଟକ୍‌ଲା ପାରା ତମର୍ ଚଲାଟଲତି ଡିସ୍‌ସି । ୧୬ ନ ସାର୍‌ବା ଜିବନର୍ କବର୍ ସବୁ ଲକ୍‌କେ ଜାନାଆ । ଏନ୍ତାରିକଲେ, କିରିସ୍‌ଟ ବାଅଡ଼ବା ଦିନେ ମୁଇ ତମର୍ ବିସଇର୍ ଲାଗି ବଡ଼ପନ୍ ଅଇବି । ତମର୍ ବିଡ଼ରେ ଆବଡ଼ ଅଇକରି କରିରଇବା କାମ୍ ହୁଟାଇ ଅଏ ନାଇ ବଲି ସେ ଦିନେ ଡିସ୍‌ସି ।

୧୭ ସୁବ୍‌କବର୍ ବିସ୍‌ବାସ୍ କଲାପାଇ, ତମେ ଜେନ୍ତାରି ଦୁକ୍ କସ୍‌ଟ ପାଇକରି ମୁର୍‌ଚ୍‌ଲାସ୍‌ନି, ସେନ୍ତାରିସେ ମୁଇ ମିସା ସୁବ୍‌କବର୍ ଜାନାଇଲାଟ୍ ପାଇ ଦୁକ୍ କସ୍‌ଟ ପାଇକରି ମରିମିସା ଜିବି । ସେନ୍ତାରିଅଇଲେ ମିସା ମୁଇ ନିଜେ ସାର୍‌ଦା ଅଇ

ତମରସଙ୍ଗ ସାରଦା କରବି ।<sup>୧୮</sup> ସେନ୍ତାରିସେ ତମେମିସା ସାରଦା ଅଇକରି ମରସଙ୍ଗ ସାରଦା କରବାର୍ ଆଟେ ।

ତିମତି ଆରି ଏପାପରଦିତ୍

<sup>୧୯</sup> ଜଦି ମାପୁରୁ ମନକଲେ, ତିମତିକେ ତମରଟାନେ ଦାପୁରେ ପାଟାଇବାକେ ମନ କଲିନି । ତାରଟାନେଅନି ତମେ ନିକ ଆଟାସ୍ ବଲି ସୁନଲେ, ମୁଇ ମିସା ସାରଦା ଅଇବି ।<sup>୨୦</sup> ତିମତିକେ ଚାଡ଼ିଦେଲେ ଆରି ତମର ବିସଇ କେ ମିସା, ଅଦିକ୍ ଚିନ୍ତା କରବା ଲକ୍ ମର ଲଗେ ନାଇ । ସେ ତମର ଦୁକ୍ ସୁକ୍ ବିସଇନେଇ ସତଇସେ ଚିନ୍ତା କରସି ।<sup>୨୧</sup> ମୁଇ କାଇକେ ଏନ୍ତାରି କଇଲିନି ବଇଲେ, ସବୁ ଲକ୍ ନିଜର୍ ନିଜର୍ ମନ କଲାଟା ପୁରାପୁରୁନ୍ କରବାକେ ମନ କରବାଇ । ଜିସୁକିରିସଟ୍ ମନ କଲାଟା ପୁରାପୁରୁନ୍ କରବାକେ ମନ କରଡ଼ ନାଇ ।<sup>୨୨</sup> ତମେତା ଜାନିଆଟାସ୍, ତିମତି ନିଜକେ ସତ୍ତବାବେ କାମ୍ କରବା ଲକ୍ ପାରା ଦେକାଇଅଇଆଟେ । ସେ ଜେନ୍ତକି ଗଟେକ୍ ପଅ, ତାର ବାବା ସଙ୍ଗ୍ ସେବା କରସି, ସେନ୍ତାରିସେ ସେ ମରସଙ୍ଗ୍ ସୁବ୍‌କବର୍ ଜାନାଇବା କାମେ ମିସିଆଟେ ।<sup>୨୩</sup> ତେବର୍ ପାଇ, ମକେ କାଇଟା ଗଟ୍‌ସି, ସେଟା ଜାନଲା ଦାପୁରେ, ତାକେ ତମର ଲଗେ ପିଲିପିଡେଇ ପାଟାଇବି ବଲିକରି ଆସା କଲିନି ।<sup>୨୪</sup> ମୁଇ ମାପୁରୁର୍ ଲଗେ ବିସବାସ୍ କଲିନିଜେ, ମୁଇ ନିଜେ ମିସା ଦାପୁରେ ତମକେ ଦେକ୍‌ବାକେ ଆଇବି ।

<sup>୨୫</sup> ମାତର୍ ଆମର୍ ବାଇ ଏପାପରଦିତକେ ତମରଟାନେ ପାଟାଇବି ବଲି ମୁ ମନେ ମନେ ବାବ୍‌ଲିନି । ସେ ମର ସଙ୍ଗ୍ କାମ୍ କରି ସୁବ୍‌କବରର୍ ଦେକାରକା ପାଇ ଆବଡ଼ କଲା । ତମର ବାଦୁଲେ ମର ସବୁ ବିସଇ ପୁରାପୁରୁନ୍ କରବାକେ ତାକେ ତମେ ପାଟାଇରଇଲାସ୍ ।<sup>୨୬</sup> କାଇକେ ବଇଲେ ସେ ତମକେ ଦେକ୍‌ବାକେ ବେସି ମନ କଲାନି । ଆରି ତାକେ ବେମାର୍ ଦାରାଇ ଅଇଆଟେ ବଲିକରି ତମେ ସୁନିକରି ଦାନ୍ଦାପାନ୍ଦା ଅଇରଇଲାସ୍ ବଲି ସେ ଜାନିରଇଲା ।<sup>୨୭</sup> ଓଁ, ସେ ମରବା ଉପୁରେ ରଇଲା । ଆରି ପର୍ମେସର୍ ତାକେ ଦୟାକଲା । ଅବ୍‌କା ତାକେସେ ନାଇ, ମାତର୍ ଜେନ୍ତକି ମର୍ପାଇ ଦୁକ୍‌ଉପୁରେ ଦୁକ୍ ନ ଆସ ବଲି ମକେ ମିସା ଦୟାକଲା ।<sup>୨୮</sup> ତେବର୍ପାଇ ମୁଇ ତାକେ ଆରିତରେକ୍ ବେସି ସାରଦା ସଙ୍ଗ୍ ପାଟାଇଲିନି । ଜେନ୍ତକି ତମେ ତାକେ ଆରିତରେକ୍ ଦେକି ସାରଦା ଅଇସା ଆରି ମୁଇ ମିସା ଦୁକ୍ ନ କରି ।<sup>୨୯</sup> ତେବର୍ପାଇ ତାକେ ଗଟେକ୍ ବିସବାସି ବାଇ ଇସାବେ ସାରଦା ସଙ୍ଗ୍ ଡାକିନିଆ । ତାରପାରା ଲକ୍‌ମନକେ ସନ୍‌ମାନ ଦିଆସ୍ ।<sup>୩୦</sup> କାଇକେବଇଲେ କିରିସଟ୍‌ର୍ ଲାଗି ବଲିକରି ସେ ତାର ଜିବନ୍ ବିପଦେ ପାକାଇଲା । ଆରି ତମେ ମରଲାଗି ବଲିକରି ସେବାକାମେ ଜାଇଟାସବୁ ଉନା ଅଇଲାଆଟେ, ସେଟା ସବୁଜାକ ସେ ପୁରାପୁରୁନ୍ କଲା ।

## ୩

ସତ୍ତବାବ୍‌ରେ ଦରମ୍‌କରୁ

<sup>୧</sup> ସାରାସାରି ପଟେ ଏ ମର ବାଇବଇନିମନ୍, ମୁଇ ତମକେ ଆଗତୁ କଇଲାଟା ଆରିତରେକ୍ କଇବାକେ ମକେ ବିଜାର୍ ଲାଗେନାଇ । କାଇକେବଇଲେ ସେନ୍ତାରି କଲେ ବୁଲ୍ ବିସଇ ସିକାଉମନରଟାନେଅନି ତମେ ଜାଗରଡ଼ ଅଇରଇସା ।<sup>୨</sup> କୁକୁର୍ମନର୍ ପାରା ରଇବା ସେନ୍ତାରି ଲକ୍‌ମନର୍ ଟାନେଅନି ଜାଗରଡ଼ା ରୁଆ । କାଇକେବଇଲେ ସେମନ୍ କାରାପ୍ ବିସଇ କଲାଜନି । ବିସବାସି ଅଇବା ମନସ୍ ପିଲାମନ୍ ସବୁ ସୁନଡ଼ ଅଇବାର୍ ଆଟେ ବଲି କଇଲାଜନି ।<sup>୩</sup> କାଇକେ ବଇଲେ ଆମେସେ ସତଇସେ ପର୍ମେସରର୍ ଲକ୍ । ଆମେସେ ସୁକଲ୍‌ଆଡ଼ମାର୍ ସାଇଜ ସଙ୍ଗ୍ ପର୍ମେସରକେ ଜୁଆର୍ କଲୁନି । ଆମେ ଜିସୁ କିରିସଟ୍‌କେ ଡାକ୍‌ପୁଟା କଲୁନି



। ଆମର ନିଜର ରିତିନିତି ସେ ମୁକିଅ ବଲି ଚଲୁନାଇ । ୪ ମୁଇତା ଆମର ରିତିନିତି ଇସାବେ ଚାଲୁବାକେ ଅଦିକ୍ ମନ୍ କରତି । ଜଦି କେଆଲେ ବିନ୍ ଲକ୍ ରିତିନିତିକେ ଆସା କରବାଇ, ସେନ୍ତାଆଲେ ସେମନରତେଇଅନି ମୁଇ ଅଦିକ୍ କରତି । ୫ \*ପର୍ମେସର୍ ଆମର ଆନିଦାଦିମନ୍‌କେ ତିଆରୁଲାପାରା ଗଟେକ୍ ଆର୍ ଅଇଲାକେ ମକେ ସୁନ୍‌ଡ଼ କରିରଇଲାଇ । ମୁଇ ଗଟେକ୍ ଇସ୍‌ରାଏଲ୍‌ର ଲକ୍ । ଦେକ୍‌ବାକେ ଗାଲେ ମୁଇ ବେନ୍‌ଜାମିନ୍ କୁଟୁମର ଲକ୍ । ମୁଇ ଗଟେକ୍ ଏବ୍‌ରିଆ ଆରି ଆମର ଆନିଦାଦିମନ୍ ମିସା ଏବ୍‌ରିଆ ରଇଲାଇ । ମସାର ରିତିନିତି ମାନବାକେ ଗଟେକ୍ ପାରୁସି ପାରା ରଇଲି । ୬ \*ପର୍ମେସର୍ ମନ୍‌କଲାଟା ପୁରାପୁରୁନ୍ କରବାକେ ମୁଇ ବେସି ମନ୍ କଲି ଆରି ସେନ୍ତାରି କରୁ କରୁ ଜିସ୍‌ର ସିସମନ୍‌କେ କସ୍‌ଟ ଦେଲି । ଆମର ଜିଉଦି ନିୟମ୍ ସବୁ ପୁରାପୁରୁନ୍ ମାନଲାଟା ପାଇ ଜଦି ଗଟେକ୍ ଲକ୍ ଦରମ୍ ଅଇପାରତା ବଇଲେ, ମୁଇ ସେନ୍ତାରି ଅଇତି । କାଲକେବଇଲେ ମୁଇ ସେ ସବୁ ନିୟମ୍ ମାନତେରଇଲି । ୭ ମାତର୍ ଆଗେ ମୁଇ ଜେଡ୍‌କି ସବୁ ବିସଇ ବେସି ମୁଲିଆ ଆଟେବଲି ବାବ୍‌ତେରଇଲି, ଏବେ କିରିସ୍‌ଟର୍ ସଙ୍ଗ୍ ମିସ୍‌ଲାର ପାଇ ସେଟାମନ୍ ସବୁ ରୁଚାଇସେ ବଲି ଜାନଲିନି । ୮ ସେଡ୍‌କିସେ ନର୍‌ଏ ଆଗତୁ ଜେଡ୍‌କି ସବୁ ବିସଇ ପର୍ମେସର୍‌କେ ସାର୍‌ଦା କରାଇବାକେ କର୍‌ତେରଇଲି, ଜିସ୍‌ କିରିସ୍‌ଟକେ ମର୍ ମାପରୁ ବଲି ମାନଲାତେଇଅନି, ସେଟା ରୁଚାଇସେ ବଲି ଜାନଲିନି । ତାରପାଇ ମୁଇ ସବୁ ବିସଇ ଚାଡିଦେଲିଆତି । କିରିସ୍‌ଟର୍ ସିସ୍ ଅଇବି ବଲିକିରି ସେଟାମନ୍ ରୁଚାଇସେ ବଲି ଏଡ୍‌କଲିନି । ୯ ଜେନ୍ତାରି କି ମୁଇ ତାର୍ ସଙ୍ଗ୍ ପୁରାପୁରୁନ୍ ମିସିରଇବି । ରିତିନିତି ମାନିକରି ପର୍ମେସର୍‌ର ମୁଆଟେ ଦରମ୍ ଲକ୍ ଅଇବି ବଲି ଚେସ୍‌ଟା କର୍‌ତେରଇଲି, ଏବେ ସେଟା ସବୁ ଚାଡିଦେଲି । ତାର୍ ବାଦୁଲେ କିରିସ୍‌ଟକେ ବିସ୍‌ବାସ୍ କଲାଟପାଇ ପର୍ମେସର୍ ମକେ ଦରମ୍ ଲକ୍ ଇସାବେ ଦେକ୍‌ଲାନି । ୧୦ ମୁଇ କିରିସ୍‌ଟକେ ଜାନବି ବଲି ମନ୍ କଲିନି । ଆରି ପର୍ମେସର୍ ତାକେ ଜନ୍ ବପୁସଙ୍ଗ୍ ମଲାତେଇଅନି ଉଟାଇଲା, ସେ ବପୁ ମୁଇ ମର୍ ଜିବନେ ମିଲାଇବି ବଲି ଆସା କଲିନି । ସେ ଜେନ୍ତାରି ମର୍ପାଇ ଦୁକ୍ କସ୍‌ଟ ପାଇଲା, ସେନ୍ତାରିସେ ମୁଇମିସା ତାର୍ପାଇ ଦୁକ୍ କସ୍‌ଟ ପାଇବି ଆରି ତାର୍ ମରନେ ମିସ୍‌ବି । ୧୧ ସେନ୍ତାରି ପର୍ମେସର୍ ଜେଡ୍‌କି ଲକ୍‌କେ ମଲାତେଇଅନି ଜିବନ୍ କରି ଉଟାଇସି, ସେମନର୍ ବିଡ୍‌ରେଅନି ମୁଇ ଗଟେକ୍ ଲକ୍ ଅଇବି ।

**ପୁରୁସ୍‌କାର ପାଇବାକେ ପାଲାଇଲିନି**

୧୨ ଏ ସବୁ ବିସଇ ମୁଇ କରିସାରାଇ ଆତି ବଲି କଇନାଇ । ପର୍ମେସର୍ ମକେ ସିଦ୍ କରି ସାରାଇଆଟେ ବଲି ମିସା ମୁଇ କଇନାଇ । ମାତର୍, କିରିସ୍‌ଟର୍ ପାରା ଅଇବାକେ ମୁଇ ବେସି ଚେସ୍‌ଟା କଲିନି । ସେଟାର୍ପାଇ କିରିସ୍‌ଟ ମକେ ବାଟ୍‌ଲା ଆଟେ । ୧୩ ନାଇ, ମର୍ ବାଇବଇନିମନ୍, ଏ ସବୁଜାକ କରିସାରାଇଆତି ବଲି ମୁଇ କଇନାଇ । ମାତର୍ ଅଦିକ୍ ଗଟେକ୍ ମୁକିଅ ରଇବା ବିସଇ ମୁଇ କଲିନି, । ଜେଡ୍‌କି ସବୁ ବିସଇ ଅଇସାରୁଲା ଆଟେ, ସେଟା ସବୁ ପାସ୍‌ରି ଚାଡିଦେଇକରି କିରିସ୍‌ଟ ଜନ୍ ରକାମ୍ ମକେ ଅଇବାଟ୍‌ଆଟେ ବଲି ମନ୍ କଲାନି, ସେନ୍ତାରି ଅଇବାକେ ମୁଇ ଚେସ୍‌ଟା କଲିନି । ୧୪ ମର୍ ସାରାସାରି ଜାଗାଇ କେଟ୍‌ବା ଜାକ ଆଗତୁ ଆଗତୁ ଗାଲିନି । ଜେନ୍ତାରି ମୁଇ ସର୍‌ଗେ ପୁରୁସ୍‌କାର ପାଇବି । ଜିସ୍‌କିରିସ୍‌ଟ ମର୍ପାଇ ଜେଡ୍‌କି ବିସଇ କଲାଆଟେ, ସେଟାର୍ପାଇ ସେ ପୁରୁସ୍‌କାର ମୁଇ ସର୍‌ଗେ ପାଇବି ।

୧୫ ସେନ୍ତାଆଲେ ଆସା, ଆମେ ଜେଡ୍‌କି ଲକ୍ ସୁକଲ୍ ଅଇଆରୁ, ଏ ରକାମ୍ ବିସଇ ସମାନ୍ ଇସାବେ ଚିନ୍ତା କର୍‌ତେଉଁ । ଆରି ଜଦି ଏ ସବୁ ବିସଇଟପାଇ ତମେ

\* ୩:୫ ୩:୫ ରମିୟ ୧୧:୧; ପେରିଡ୍ ୨୩:୬;୨୭:୫      \* ୩:୬ ୩:୬ ପେରିଡ୍ ୮:୩;୨୨:୪;୨୭:୯-୧୧

ମର ସଙ୍ଗେ ରାଜି ଉଆସନାଇ, ଟିକ୍ ସଙ୍ଗେ ଚିନ୍ତା କରବାକେ ପରମେସର୍ ତମ୍ଭକେ ସାଇଜ କରସି ।<sup>୧୭</sup> କେନ୍ଦ୍ରି ମିସା ପରମେସର୍ ଜେଡ଼କି ବିସଇ ସବୁ ଆମ୍ଭକେ ଦେକାଇ ସାରାଇଆଚେ, ସେ ସବୁଜାକ ଆମେ ମାନବାର୍ ଆଚେ ।

<sup>୧୭</sup> \*ଏ ମର ବାଇବଇନିମନ୍, ମୁଇ ଜେନ୍ତାରି କଲିନି, ତମେ ମିସା ସେନ୍ତାରିସେ କରା । ଆମେ ତମର୍ ସଙ୍ଗେ ରଇଲାବେଲେ ଜେନ୍ଦ୍ରି ଚଲାଚଲ୍ଡି କର୍ତ୍ତେରଇଲୁ, ସେଟା ଜାଗରଡ଼ ସଙ୍ଗେ ଦେକା ଆରି ସେନ୍ତାରି ଚଲାଚଲ୍ଡି କରା ।<sup>୧୮</sup> କାଇକେ ବଇଲେ ମୁଇ ତମ୍ଭକେ ଆଗତୁ କେତେତର୍ କଇ ସାରାଇଆଚି, ଆରି ଏବେ ବେସି ଦୁକର୍ ସଙ୍ଗେ କାନ୍ଦିକରି କଇଲିନି, ବେସି ଲକ୍ କିରିସ୍ତର୍ ବିରଦି ଇସାବେ ଚଲାଚଲ୍ଡି କରବାଇ ।<sup>୧୯</sup> ସାରାସାରି ପରମେସର୍ ସେମନ୍ଦକେ ବିନାସ୍ କରସି । ସେମନ୍ ଅବକା ଗାଗଡ଼ ମନ୍ କରବାଟା ପୁରାପୁରୁନ୍ କରବାକେ ମନ୍ କଲାଇନି । ଲାଜର୍ ବିସଇ କରି ସାର୍ଦା କଲାଇନି । ଅବକା ଏ ଜଗତର୍ ବିସଇସେ ଚିନ୍ତା କଲାଇନି ।<sup>୨୦</sup> ମାତର୍ ଆମେତା ସରଗର୍ ଲକ୍ମନ୍, ସେ ଜାଗାଇଅନି ଆମର୍ ଉଦାରକାରିଆ ମାପୁରୁ ଜିସୁକିରିସ୍ତ ବାଉଡି ଆଇବା ବେଲାକେ ଆମେ ଜାଗଲୁନି ।<sup>୨୧</sup> ଜେନ୍ଦ୍ରିକି ତାକେ ଜଗତର୍ ସବୁ ବିସଇ ସର୍ପିଅଇବାଇ, ସେନ୍ତାରି ତାର୍ଗାନେ ବପୁ ଆଚେ । ସେ ବପୁସଙ୍ଗେ ଆମର୍ ମରବା ଗାଗଡ଼ମନ୍ଦକେ ନୁଆ କରି ବାଦ୍ଲାଇସି । ପରମେସର୍ ତାକେ ଜିବନ୍ କରି ଉଟାଇଲାବେଲେ, ସେ ଜନ୍ ମଇମାର୍ ଗାଗଡ଼ ପାଇରଇଲା, ସେନ୍ତାରି ରଇବା ମଇମାର୍ ଗାଗଡ଼ ଆମ୍ଭକେ ମିସା ଦେଇସି ।

### ୪

#### ସିକିଆ ଆରି ଆଦେସ୍

<sup>୧</sup> ତେବର୍ ପାଇ ଏ ମର ବିସ୍ବାସି ବାଇବଇନିମନ୍, ମୁଇ ତମ୍ଭକେ ଆଲାଦ୍ କରି ଦେକବାକେ ମନ୍ କଲିନି, ତମେ ମକେ ବେସି ସାର୍ଦା କରାଇଲାସି ଆରି ତମେ ଆକା ମର୍ ପୁରୁସକାର୍ । ମର୍ ମଇତର୍ମନ୍, ମୁଇ ତମ୍ଭକେ ଜେଡ଼କି ବିସଇ କଇଆଚି, ସେନ୍ତାରିସେ ମାପୁରୁଗାନେ ବିସ୍ବାସେ ତାଟ୍ ରୁଆ ।

<sup>୨</sup> ଇୟଦିଆକେ ଆରି ସନ୍ତୁକେ ମୁଇ ବାବୁଜିଆକରି କଇଲିନି, ତମେ ଦୁଇଲକ୍ ଜାକ ମାପୁରୁ ଲକ୍ ଅଇଆଟାସ୍ । ତେବର୍ ପାଇ ତମର୍ ବିତ୍ତରେ ଗଟେକ୍ ମନ୍ ଅଇ ରାଜିଉଆ ।<sup>୩</sup> ଆରି ବାଇ ଜେ କି ସବୁବେଲେ ମକେ ସାଇଜ କରସ୍, ଏ ଦୁଇଟା ମାଇଜିମନ୍ ସାନ୍ତି ସଙ୍ଗେ ରଇବାକେ ତୁଇ ସାଇଜ କର୍ । କାଇକେବଇଲେ ସୁବକବର୍ ଜାନାଇବା କାମେ ସେମନ୍ ମରସଙ୍ଗେ ରଇକରି ବେସି ଆବଡ଼ ଅଇଲାଇ ଆଚଡ଼ । ସେନ୍ତାରିସେ କେଲେମେନ୍ଟ ଆରି ବିନ୍ ଲକ୍ମନ୍ ମିସା ମର୍ ସଙ୍ଗେ କାମ୍ କର୍ତ୍ତେରଇଲାଇ । ପରମେସର୍ ତାର୍ ବଇଗାନେ ସେମନ୍ ସବୁ ଲକର୍ ନାଉଁ ଲେକ୍ଲା ଆଚେ । ସେ ସବୁ ଲକ୍ ନ ସାର୍ଦା ଜିବନ୍ ପାଇଲାଇ ଆଚଡ଼ ।

<sup>୪</sup> ମାପୁରୁ ସଙ୍ଗେ ମିସିରଇଲାର୍ପାଇ ସବୁବେଲେ ସାର୍ଦା ଅଇକରି ରୁଆ । ମୁଇ ଆରିତରେକ୍ କଇଲିନି ସାର୍ଦା ଅଇକରି ରୁଆ ।

<sup>୫</sup> ଦରମ୍ ଅଇକରି ସବୁ ଲକର୍ ସଙ୍ଗେ ଚଲାଚଲ୍ଡି କରା । ମାପୁରୁ ଆଇବା ଦିନ୍ କେଟି ଆଇଲାନି ବଲି ପାସରାନାଇ ।<sup>୬</sup> କାଇ ବିସଇ ନେଇକରି ମିସା ଚିନ୍ତା କରି ଦାନ୍ଦା ଉଆନାଇ । ତାର୍ ବାଦୁଲେ ସବୁ ଗଟ୍ନା ଅଇଲା ବେଲେ, ତମ୍ଭକେ ଜାଇଟା ଲଡା ଆଚେ, ସେ ବିସଇ ପରମେସର୍କେ ଗୁଆରି କରା । ଆରି ପାର୍ତନା କଲାବେଲେ, ତାକେ ଦନିଅବାଦ୍ ମିସା ଦିଆସ୍ ।<sup>୭</sup> ଏନ୍ତାରି କଲେ, ପରମେସର୍ ତମ୍ଭକେ ସାନ୍ତି ଦେଇସି । ଏ ସାନ୍ତି ଲକ୍ମନ୍ ବୁଜ୍ବା ସାନ୍ତିରପାରା ନାଇ । କିରିସ୍ତ ଜିସୁର୍ ସଙ୍ଗେ ମିସ୍ଲାର୍ପାଇ ଜଦି ଏ ସାନ୍ତି ତମେ ପାଇଲେ, ତମର୍ ଜିବନେ କସ୍ତ ଆଇଲେ ମିସା ନ ଡରିକରି, ଚିନ୍ତାକରି ଦାନ୍ଦା ନ ଅଇବାକେ ସାଇଜ କରସି ।

\* ୩:୧୭ ୩:୧୭ ୧ମ କରନ୍ତିୟ ୪:୧୭;୧୧:୧

ଠି ସାରାସାରି ପତେ ଏ ମରୁ ବାଇବଇନିମନ୍, ଜେଡ଼କି ସବୁ ବିସଇ ନିକ ରଇସି, ଜେଡ଼କି ସବୁ ବିସଇ ସନ୍ମାନ ପାଇସି, ଜନ୍ ସବୁ ବିସଇ ସତ୍ ରଇସି, ଜନ୍ ସବୁ ବିସଇ ପାପ ନଇତେ ରଇସି, ଜନ୍ ସବୁ ବିସଇ ଦରମ୍ ରଇସି, ଆରି ଡାକ୍ପୁଟା ରଇସି, ଏ ସବୁ ବିସଇନେଇ ଚିନ୍ତା କରା । ୯ ତମକେ ମୁଇ ଜେଡ଼କି ସବୁ ବିସଇ ସିକାଇରଇଲି, ଆରି ତମେ ମାନିରଇଲାସ୍ ସେଟା ସବୁ କରତେରୁଆ । ମୁଇ ଜେଡ଼କି ବିସଇ କଇତେରଇଲି, ସେଟା ସୁନ୍ତେରଇଲାସ୍ ଆରି ଜେଡ଼କି ବିସଇ କରତେରଇଲି, ସେଟା ଦେକିରଇଲାସ୍, ସେଟା ସବୁ କରତେରୁଆ । ପରମେସର୍ ତମ୍ବସଙ୍ଗ୍ ରଇ ତମକେ ସାନ୍ତି ଦେଇସି ।

ଦାନ ଦେବାରଲାଗି ଦନିଅବାଦ୍

୧୦ ମାପୁରୁର୍ ସଙ୍ଗ୍ ମିସ୍ଲାର୍ ପାଇ ମୁଇ ବେସି ସାର୍ଦା ଅଇଲିନି । କାଇକେବଇଲେ, ମକେ ଲତାକେ ଲାଗବାଟା ପାଟାଇଦେଲାକେ ତମେ ମର୍ ବିସଇ ଚିନ୍ତା କଲାସିନି ବଲି ମୁଇ ଜାନଲିନି । ତମର୍ ଆଲାଦ୍ ଦେକାଇବାକେ ଏବେସେ ତମକେ ବେଲା ଚିକ୍ ଅଇଲା । ୧୧ ମକେ ଲତାକେ ଲାଗବା ବିସଇ ମରୁଲଗେ ନ ରଇଲାକେ ବଲି ଏନ୍ତାରି କଇନାଇ । କାଇକେବଇଲେ ମର୍ ଜିବନର୍ କାଇ ରକାମର୍ ଗଟ୍ନା ଆଇଲେ ମିସା, ସାର୍ଦା ସଙ୍ଗ୍ ରଇବାକେ ସିକ୍ଲିଆଟି । ୧୨ ଅଲପ୍ତକେ ମିସା ସାର୍ଦାସଙ୍ଗ୍ ରଇବାକେ, କି ବୁଡେକ୍ ରଇଲେ ମିସା ସାର୍ଦା ସଙ୍ଗ୍ ରଇବାକେ ସିକ୍ଲିଆଟି । ପେଟ୍ ପୁରତେ କାଇଲେମିସା, କି ବୁକେ ରଇଲେ ମିସା, ଲତାକେ ଆଇବା ସବୁ ବିସଇ ରଇଲେ ମିସା, ନ ରଇଲେ ମିସା, ସାର୍ଦାସଙ୍ଗ୍ ରଇବାକେ ମୁଇ ଜାନି । ୧୩ ଏ ସବୁ ଗଟ୍ନା ଆଇଲେ ମିସା ମୁଇ ମୁର୍ଚିକରି ରଇବାକେ ସିକ୍ଲିଆଟି । କାଇକେବଇଲେ, କିରିସଟ୍ ମକେ ବପୁ ଦେଲାନି ।

୧୪ ଏନ୍ତାରି ଅଇଲେ ମିସା ଅବାଦ୍ ରଇଲା ବେଲାଇ, ତମେ ମକେ ଦୟାଦେକାଇ ମର୍ପାଇ ସାଇଜ ପାଟାଇଲାସ୍ । ୧୫ ପିଲିପିଅତେଇ ରଇବା ବାଇବଇନିମନ୍, ତମେ ସତଇସେ ଜାନିଆରାସ୍, ସିଗ୍ ପର୍ତୁମ୍ ସୁବ୍ବବରର୍ ବିସଇ ସିକାଇବା ବେଲେ, ମୁଇ ମାକେଦନିଆଇଅନି ଜେଡେବଲ୍ ବାରଇ ଜାଇରଇଲି, । ବିସ୍ବାସି ମନର୍ ଦଲ୍ ବିଡ଼ରେ, ତମର୍ ମଣ୍ଡଲିର୍ ବିସ୍ବାସିମନ୍ସେ ମକେ ତାବୁ ଦାନ୍ କରିରଇଲାସ୍ । ୧୬ \*\*ଡେସଲନିକିଆ ନଅରେ ରଇବାବେଲେ ମିସା ମକେ ଲତା ରଇଲାବେଲେ, ତମେ ବୁଇତର୍ ଦାନ୍ ପାଟାଇଲାସ୍ । ୧୭ ତମକେ ମୁଇ ଦାନ୍ ପାଟାଇତେଅଡ଼ ବଲି ଏନ୍ତାରି କଇନାଇ । ମାତର୍ ମକେ ସାଇଜ କଲାର୍ ପାଇ, ପରମେସର୍ ତମକେ ପୁରୁସ୍କାର ଦେଅ ବଲି ମୁଇ ମନ୍ କଲିନି । ୧୮ ତେବେ ତମେ ମର୍ପାଇ ପାଟାଇଲାଟା ସବୁଜାକ ମର୍ଗାନେ କେଟ୍ଲା ଆତେ । ଆରି ସେଟା ମର୍ପାଇ ଅଦିକ୍ । ତମେ ପାଟାଇଲା ସବୁ ବିସଇ ଏପାପର୍ଦିସ୍ ମର୍ଲଗେ ଆନୁଲାକେ, ମକେ ଲତାକେ ଆଇବା ସବୁ ମୁଇ ମିଲାଇଆଟି । ଏନ୍ତାରି କଲାକେ ତମେ ପରମେସର୍କେ ସର୍ପି ଦେଲା ନିକ ବାସନା ଅଇବା ଦାନ୍ ପାରା ଅଇଲା ଆତେ । ସେ ସେଟା ସଙ୍ଗାଇକରି ସାର୍ଦା ଅଇଲାଆତେ । ୧୯ ଜିସୁକିରିସଟ୍ କରି ରଇବା କାମର୍ ଲାଗି, ବେସି ରଇବା ତାର୍ ଦନ୍ସପତି ଟାନେଅନି ସେ ତକେ ଲତାକେ ଆଇବା ସବୁ ବିସଇ ଦେଇସି । ୨୦ ଆମର୍ ସରଗର୍ ବାବା ପରମେସର୍ କାଲ୍ କାଲ୍ ଜୁଗ୍‌ଜୁଗ୍ ଡାକ୍ପୁଟା ପାଅ । ଆମେନ୍ !

ସାରାସାରିର୍ ଜୁଆର୍

୨୧ କିରିସଟ୍ ଜିସୁକେ ବିସ୍ବାସ୍ କରବା ପରମେସର୍ ସବୁ ଲକ୍‌ମନ୍‌କେ ଜୁଆର୍ କରା । ମର୍ସଙ୍ଗ୍ ରଇବା ଆମର୍ ବିସ୍ବାସି ବାଇବଇନିମନ୍ ଡାକର୍ ଜୁଆର୍

ଜାନାଇଲାଇନି । <sup>୨୨</sup> ଏ ନଥରେ ରଇବା ବାକି ସବୁ ପରମେସରର୍ ଲକ୍ମନ୍ ତମ୍ଭେ  
 ଜୁଆର୍ ଜାନାଇଲାଇନି । ଜନ୍ ବିସ୍‌ବାସିମନ୍, ଜନ୍‌ଲକ୍ କି ରମିଅ ସାସନ୍‌କାରିଆର୍  
 ଗତିଦାଙ୍ଗ୍‌ତା ଅଇଲାଇଆଚଡ୍, ସେମନ୍ ତାକର୍ ଜୁଆର୍ ଜାନାଇଲାଇନି ।

<sup>୨୩</sup> ମାପ୍‌ରୁ ଜିସୁକ୍‌ରିସ୍‌ଟ ତମ୍ଭେ ଜିବନ୍ ଦୁକାଇ ଦୟା କଲାଟା ତମର୍ ବିତ୍‌ରେ  
 ରଥ ।

# କଲସିଅ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲକ ପତ୍ର କଲସିଅ ମଣ୍ଡଳିର ବିସ୍ତ୍ରାସିମାନଙ୍କେ ପାଉଲ ଚିଠି ଲେଖିଲାଟା

## ଏ ବଇର ବିସଇ ପଦେକ୍ ଜାନ୍‌ବାଟା

କଲସିଅତେଇ ଲେକିରଇବା ଚିଠି ଅଇଲାନ୍ ପାଉଲ୍ ଲେକିରଇବାଟା୧:୧ । ଦେକ୍‌ବାକେ ଗାଲେ ଜିସୁକିରିସ୍‌ଟ ଜନମ୍‌ଅଇକରି ୬୦ କିରିସ୍‌ଟାଦ ପାକାପାକି ଲେକାଅଇଆଟେ । ରମ୍ ରାଇଜେ ବନ୍ଦି ରଇଲା ବେଲେ ସେ ଏ ଚିଠି ଲେକିରଇଲା । କଲସିଅ ବଇ ସଙ୍ଗ୍ ଏପିସ୍‌ୟ ଆରି ପିଲିପିୟ ବଇମାନଙ୍କେ ମିସା ବନ୍ଦି ଗରର୍ ବଇ ବଲି କଇବାଇ । କାଇକେବଇଲେ ପାଉଲ୍ ବନ୍ଦିଗରେ ରଇବା ବେଲେ ଏ ବଇ ଲେକିରଇଲା । ସେ କଲସିଅ ସଅରେ ରଇବା ମଣ୍ଡଳିମାନଙ୍କେ ଏ ବଇ ଲେକିରଇଲା । ପାଉଲ୍ ଏ ମଣ୍ଡଳି ଆରାମ୍ ନ କରିରଇଲା, ଜନ୍‌ଟା ସେ ୨:୧ ତେଇ ଜାନାଇଆଟେ, ମାତର୍ ବେସି ଲକ୍ ତେଇ ତାର୍ ଦାଇତେ ରଇବା କାତା ମନେପାକାଇଲାଜନ୍ । ଏପାପରସ୍ ଏ ମଣ୍ଡଳି ତିଆରକରିରଇଲା । ସେଟାପାଇ ସେ କଲସିଅର୍ ଗଟେକ୍ ଲକ୍ ରଇଲା ।

ପାଉଲ୍ କଲସିଅ ମଣ୍ଡଳିଟାନେ ଅଇତେରଇବା କେତେଟା ମିର୍ ସିକିଆର୍‌ପାଇ ବାବ୍‌ତେରଇଲା । ସେ ଚିଠିଟାନେ ଏ ବିସଇ ଲେକ୍‌ବାକେ ବେସି ଦିନ୍ ବିତାଇରଇଲା । ଅଇଲେ ଅଇରଇପାରେ କେତେଟା ଜିଉଦି ବିସ୍ତ୍ରାସିମନ୍ ଜନ୍‌ଲକ୍‌ମନ୍ କି ବିନ୍ କେତେଟା ବିସ୍ତ୍ରାସିମାନଙ୍କେ ପୁରନା ନିୟମର୍ ଜିଉଦି ରିଡିନିତି ନିକସଙ୍ଗ୍ ମାନ୍‌ବାକେ ବାଦିଅ କର୍‌ତେରଇଲାଇ । ସେମନ୍ ସୁନର୍ ବିଦିର୍ ନିୟମ୍ ମାନ୍‌ବାକେ ବାଦିଅ କର୍‌ବାକେ ଚେସ୍‌ଟା କର୍‌ତେରଇଲାଇ । ପାଉଲ୍ ଲଡାକେ ନ ଆଇବା ବିସ୍ତ୍ରାସିମାନର୍ ବିସଇ ନିକ ସଙ୍ଗ୍ ଲେକିଆଟେ । କେ ଅଇଲେ ମିସା ଗଟେକ୍ ଲକ୍ କିରିସ୍‌ଟଙ୍କେ ଚାଡି ପର୍‌ମେସରର୍ ମୁଆଟେ ତାର୍ ଅଇ ନାପାରେ ୧:୧୫-୨୦ । ମାତର୍ ଏ ନର୍ ଲକ୍‌ମନର୍ ଦଦାପେଲାର୍‌ଲାଗି ତିଆର୍‌ଅଇରଇବା ସିକିଆ କାଇ କାମ୍‌କେ ନ ଦେଏ ୨:୮ ।

### ଏ ବଇ ବିତ୍‌ରେ ରଇବାଟା

- ୧. କଲସିଅ ମଣ୍ଡଳିକେ ପାଉଲ୍ ଜୁଆର୍ ଜାନାଇବାଟା । ୧:୧-୨
- ୨. କିରିସ୍‌ଟର୍ କେବେ କେ କରି ନ ରଇବା କାମ୍ ଆରି ମିର୍ ସିକିଆ ବିସଇ ନେଇକରି ପାଉଲ୍ ଉତର୍ ଦେବାଟା । ୧:୩-୩:୪
- ୩. ପାଉଲ୍ ଗଟେକ୍ ନିମାନ୍ ବିସ୍ତ୍ରାସି ଅଇ ଜିଉନା କାଉନା କର୍‌ବାକେ କଇଲାଆଟେ । ୩:୫-୪:୨
- ୪. ପାଉଲ୍ ଏ ଚିଠି ବିନ୍ ବିନ୍ ମଣ୍ଡଳିତେଇ ମିସା ପଡ୍‌ବାକେ କଇକରି, ଆରି ଜୁଆର୍‌ବେଟ୍ ଜାନାଇ ସରାଇଲାନ୍ । ୪:୭-୧୮

୧ ଏ ଚିଠି ମୁଇ ପାଉଲ୍ ଆରି ବିସ୍ତ୍ରାସର୍ ଲାଗି ଆମର୍ ବାଇଅଇରଇବା ତିମତି ମିସି ଲେକ୍‌ଲୁନ୍ । ପର୍‌ମେସର୍ ମକେ ବାଟ୍‌ଲାର୍‌ପାଇ ମୁଇ ଜିସୁକିରିସ୍‌ଟର୍ ଗଟେକ୍ ପେରିଡ୍ ଅଇଆଟି ।

୨ କଲସି ନଅରେ ରଇବା ପର୍‌ମେସରର୍ ଲକ୍‌ମନ୍ ତମ୍‌କେ, ମୁଇ ଏ ଚିଠି ଲେକି ପାଟାଇଲିନ୍ । ତମେ ଆମର୍ ବିସ୍ତ୍ରାସ୍ ରଇବା ବାଇବଇନିମନ୍ ଆରି କିରିସ୍‌ଟର୍ ସଙ୍ଗ୍ ମିସିଆରାସ୍ ।

ଆମର୍ ବାବା ପର୍‌ମେସର୍ ତମ୍‌କେ ଜିବନ୍ ଦୁକାଇ ସାନ୍ତି ଦେଅ ।

ଦନିଅବାଦ୍ ଦେବା ପାର୍ତନା

୩ ଆମେ ତମରପାଇ ପାର୍ତନା କଲାବେଳେ ଆମର ମାପରୁ ଜିସୁକିରିସ୍ତର ବାବା ପରମେସରକେ ଦନିଅବାଦ୍ ଦେଲୁନି । ୪ କାଇକେବଇଲେ ମାପରୁ ଜିସୁକିରିସ୍ତର ତେଇ ରଇବା ତମର ବିସବାସ୍ ଆରି ପରମେସରର ଲକ୍ମନର ପାଇ ରଇବା ତମର ଆଲାଦର ବିସଇ ଆମେ ସୁନିଆରୁ । ୫ ତମେ ପରତୁମ୍ ସୁବ୍ କବରର ବିସଇ ସୁନଲାବେଲେ, ସୁବ୍ କବରେ ରଇବା ଆସାକରବା ବିସଇ ଜାନିରଇଲାସ୍ । ତେବରପାଇ ତମେ ବିସବାସ୍ କରି ପରମେସରର ଲକ୍ମନକେ ଆଲାଦ୍ କରତେ ରଇଲାସ୍ । ତମରପାଇ ସରଗେ ତିଆର୍ ଅଇରଇବା ପୁରୁସକାର୍ ଆସାକରି ଏନ୍ତାରି କଲାସ୍ । ୬ ଗୁଲାଇ ଜଗତର୍ କେତେକ୍ କେତେକ୍ ଲକ୍ମନ ଏ ସୁବ୍ କବର ବିସବାସକରି ତାକର ମନ୍ ବାଦଲାଇଲାଇନି । ତମେ ସୁବ୍ କବର ସୁନଲା ପରତୁମ୍ ଦିନେଅନି ତମର ବିତ୍ରେ ମିସା ଏନ୍ତାରିସେ ଅଇରଇଲା ଆରି ପରମେସର ଜିବନ୍ ଦୁକାଇଲା ସତ୍ ବିସଇ ତମେ ପୁରାପୁରୁନ୍ ଜାନିରଇଲାସ୍ । ୭ \*ପରମେସର ତାର୍ ଜିବନ୍ ଦୁକାଇ ଦୟା ଦେକାଇଲା ବିସଇ ଆମର ଆଲାଦର ଗତିଦାଙ୍ଗଡା ଏପାପରାସ୍ ତମକେ ସିକାଇରଇଲା । ଆମର ବାଦୁଲେ ସେ ବିସବାସ୍ ରଇକରି କିରିସ୍ତକେ ସେବାକଲାନି । ୮ ପରମେସର ଲକ୍ମନକେ ଆଲାଦ୍ କରବାକେ ତମକେ ସୁକଲୁଆଡ଼ମା କେନ୍ତାରି ସାଇଜ କଲାଆଚେ ବଲି ଏପାପରାସ୍ ଆମକେ ଜାନାଇଆଚେ ।

୯ ଆମେ ତମର ବିସଇର୍ ଏ ନିକ କବର ସୁନିକରି, ତମରପାଇ ପାର୍ତନା କରିଲାଗିଆରୁ । ତାର୍ ସୁକଲୁଆଡ଼ମାଇଅନି ପାଇରଇବା ଗିଆନ୍ ଆରି ବୁଜ୍ ବା ବପୁସଙ୍ ସେ ମନ୍ କଲାଟା ତମେ ପୁରାପୁରୁନ୍ ଜାନିପାର୍ସା ବଲି ଆମେ ମାପରୁକେ ଗୁଆରି କଲୁନି । ୧୦ ତେବରପାଇ ତମେ ତାକେ ସାରଦା କରାଇଲାପାରା ତଲାଟଲ୍ଡିକରି ସେ ମନ୍ କଲାପାରା ଜିଉନାକାଉନା କରସା । ବିନ୍ ଲକ୍ମନକେ ସାଇଜ କରିଲାଗିରଇସା ଆରି ପରମେସର ବିସଇ ଜାନିବାକେ ଅଦିକ୍ ଅଦିକ୍ ବଡିଆଇସା । ୧୧ ତାର୍ ବଡ୍ ବପୁସଙ୍ ନିଜେ ବପୁଅଇ ତମେ ସାରଦାସଙ୍ ମୁରଟିକରି ରଇପାରସା । ୧୨ ବାବା ପରମେସର ଉଜଲର୍ ରାଇଜେ ତାର୍ ଲକ୍ମନର ପାଇ ଜାଇଟା ଟୁଲିଆଇ ଆଚେ, ତେଇ ମିସ୍ବାକେ ସେ ତମକେ ବାଦ୍ଲା ଆଚେ । ସେଟାର୍ପାଇ ସାରଦା ସଙ୍ଗ ତାକେ ଦନିଅବାଦ୍ ଦେଇସା । ୧୩ ସେ ଆମକେ ଆନ୍ଦାର୍ ବପୁତେଇଅନି ମୁକ୍ଲାଇକରି ତାର୍ ଆଲାଦର ପଅର୍ ରାଇଜେ ତାକିଆନିଆଚେ । ୧୪ \*ତାର୍ ପଅର୍ଲାଗି ସେ ଆମକେ ମୁକ୍ଲାଇକରି ଆମର ସବୁ ପାପ କେମା କରିଦେଲାଆଚେ ।

କିରିସ୍ତ ଆରି ତାର୍ କାମ

୧୫ କିରିସ୍ତ ନ ତିସବା ପରମେସରର ସମାନ୍ ବାନିମୁର୍ତି ଆଚେ । ତିଆର୍ କରିରଇବା ସବୁର୍ ଉପ୍ରେ, ପରତୁମ୍ ଜନମ୍ ଅଇଲା ପଅ ଇସାବେ, ତାର୍ ଅଦିକାର୍ ଆଚେ । ୧୬ କାଇକେବଇଲେ ପରମେସର ତାର୍ଟାନେଅନି ସବୁ ବିସଇ ତିଆର୍କଲା ଆଚେ । ଜଗତେ ରଇବାଟା ସବୁଜାକ, ସରଗେ ରଇବାଟା ସବୁଜାକ, ତିସବାଟା ଆରି ନ ତିସବାଟା, ବପୁରଇ ସାସନ୍ କରବା ଦୁଡ଼ମନ୍ ଆରି ଆଡ଼ମା ରଇବାଟାମନ୍ । କିରିସ୍ତଟେଇଅନି ସବୁ ବିସଇ ତିଆର୍ କରିରଇଲା ଆରି ତାର୍ଲାଗିସେ ସବୁ ବଠିଆଚଡ୍ । ୧୭ କାଇଟା ତିଆର୍ ନ ଅଇତେ ସେ ରଇଲା, ଆରି ତାର୍ଟାନେ ସବୁ ବିସଇ ମିସିକରି ଚାଲ୍ଡେରଇସି । ୧୮ \*ମଣ୍ଡଲି ଅଇଲାନି ତାର୍ ଗାଗଡ୍ ଆରି ସେ ମଣ୍ଡଲିର ମୁଣ୍ଡ । ମୁଣ୍ଡ ଗାଗଡ଼କେ ସାସନ୍ କଲାପାରା, ସେ ମଣ୍ଡଲିକେ ସାସନ୍ କଲାନି । ତାକେସେ ପରମେସର ମରନେଅନି ପରତୁମ୍ ଉଟାଇରଇଲା । ଜେନ୍ତିକି

\* ୧:୭ ୧:୭ କଲସିଅ ୪:୧୨; ପିଲିମନ୍ ୧:୨୩ \* ୧:୧୪ ୧:୧୪ ଏପିସିୟ ୧:୭ \* ୧:୧୮ ୧:୧୮ ଏପିସିୟ ୧:୨୨,୨୩

କିରିସ୍ତର୍ ସବୁର୍ ଉପରେ ସାସନ୍ କରସି । ୧୯ କାଇକେବଇଲେ ପର୍ଯ୍ୟେସର୍ ତାର୍ ପଅକେ ତାର୍ ପୁରାପୁରୁନ୍ ଗୁନ୍ତଲନ୍ଦସଙ୍ଗ ରଅ ବଲି ଟିକ୍ କିରିରଇଲା । ୨୦ \*ଆରି କିରିସ୍ତର୍ ଚାଟାନେଅନି ସେ ତିଆର୍ କିରିରଇବା ସବୁଜାକ, ତାର୍ଚାନେ ବାଉଡାକ ଆନ୍ଦି ବଲି ଟିକ୍ କିରିରଇଲା । ଦର୍ତ୍ତନିଟାନେ ରଇବାଟା ଅ କି ସର୍ଗେ ରଇବାଟା ଅ । ତାର୍ ପଅ କୁରୁସ୍କାଟେ ମରି ବନି ଜରାଇଲାର୍ପାଇ ସବୁ ବିସଇ ତାର୍ଚାନେ ସାନ୍ତିଅଇ ରଇସି ।

୨୧ ଗଟେକ୍ ବେଲାଇ ତମେ ପର୍ଯ୍ୟେସରର୍ ଚାନେଅନି ବେଗ୍ଲି ରଇଲାସ୍ । ତମେ କିରିରଇବା ଆରି ମନେ ବାବିରଇବା କାରାପ୍ ବିସଇର୍ ଲାଗି ତାର୍ ସତ୍ତୁର୍ ଅଇରଇଲାସ୍ । ୨୨ ମାତର୍ ଏବେ କିରିସ୍ତର୍ ନର୍ ରୁପ୍ ନେଇ ମଲାର୍ ପାଇ ସେ ତମ୍ବେ ତାର୍ ମୁଆଟେ ସାନ୍ତି ସଙ୍ଗ ଆଇବାକେ ଟିକ୍ କଲାଆଟେ । ତମେ ତାର୍ ମୁଆଟେ ଟିଆଅଇଲାବେଲେ ତମ୍ବେ ପୁରାପୁରୁନ୍ ସୁକଲ୍ ଇସାବେ କାଇ ପାପ୍ ନ କିରି, କାଇ ନିନ୍ଦା ନ ରଇଲା ଲକ୍ପପାରା ସେ ଦେକ୍ସି । ୨୩ ତମେ ବିସ୍ବାସ୍ କିରିଲାଗିରଇଲେ, ତମର୍ ବିସ୍ବାସ୍ ତାଟ୍ ରଇସି । ସୁବ୍ କବର୍ଚାନେ ମାପୁରୁ ଜନ୍ ଆସା ଦେବି ବଲି କାତା ଦେଇଆଟେ, ସେ ଆସା ପାଇବାଟାନେଅନି ତମ୍ବେ କେ ମିସା ନ ତେବାଅଡ୍ । ଏ କବର୍ ତମେ ଆଗତୁ ସୁନିସାରାଇଆଟାସ୍ । ଆରି ଜଗତର୍ ଗୁଲାଇଲକ୍ବେ ଜାନାଇଅଇଆଟେ । ଏ ସୁବ୍ କବର୍ ଜାନାଇବାକେ ମୁଇ ପାଉଲ୍ ଗଟେକ୍ ଗତିଦାଙ୍ଗ୍ଡା ଅଇଲିଆଟି ।

ମଣ୍ଡଲିତେଇ ପାଉଲ୍ କାମ୍

୨୪ ଏବେ ମୁଇ ସାର୍ଦାଅଇଆଟି । କାଇକେବଇଲେ ଜେଡ୍ବି ଦୁକ୍ବସଟ୍ ମୁଇ ମୁରଟିକିଆଟି, ସେଟା ତମର୍ ନିକପାଇ । ତାର୍ ବାଦୁଲେ ରଇକରି ଜେଡ୍ବି ଦୁକ୍ବସଟ୍ ମକେ ମୁରଟ୍ବାକେ କିରିସ୍ତର୍ ମନ୍ କଲାନ୍ତି, ସେଟା ସବୁ ସାର୍ଦାସଙ୍ଗ୍ କଲିନି । ତାର୍ ଗାଗଡ୍ ପାରା ରଇବା ତାର୍ ମଣ୍ଡଲିର୍ ନିକପାଇ ମୁଇ ସେଟା କଲିନି । ୨୫ ପର୍ଯ୍ୟେସର୍ ମକେ ମଣ୍ଡଲିର୍ ଗତିଦାଙ୍ଗ୍ଡା କିରିଆଟେ । ତମ୍ବେ ସାଇଜ କର୍ବାକେ ସେ ମକେ ବାଟିଆଟେ । ତାର୍ କବର୍ ତମ୍ବେ ପୁରାପୁରୁନ୍ ଜାନାଇବାଟା ଅଇଲାନି ମର୍ କାମ୍ । ୨୬ ପୁର୍ବେ ବଟିରଇବା ସବୁଲକ୍ବର୍ ଚାନେଅନି ଏ ବିସଇ ଲୁଗାଇକରି ସଙ୍ଗରଇଲଲା । ମାତର୍ ଏବେ ସେଟା ତାର୍ ଲକ୍ପମ୍ବେକେ ସେ ଜାନାଇଆଟେ । ୨୭ ଜିଉଦି ନ ଅଇଲା ଲକ୍ପମ୍ବେକେ ପାଇ ସେ ଟିକ୍ କିରିରଇବା ମଇମାସଙ୍ଗର୍ ଜଜ୍ନା ତାର୍ ଲକ୍ପମ୍ବେକେ ଜାନାଇବାକେ ପର୍ଯ୍ୟେସର୍ ଟିକ୍କଲା । ସେ ଲୁଟିରଇବା ବିସଇ ଅଇଲାନି, ଜିଉଦି ନଇଲା ଲକ୍ପମ୍ବେକେ ଚାନେମିସା କିରିସ୍ତର୍ ରଇସି । ଆରି ସେ କାତା ଦେଇରଇବା ସବୁ ରକାମର୍ ମଇମା ତମେମିସା ପାଇସା ବଲି ଜାନିରୁଆ । ୨୮ କିରିସ୍ତର୍ ବିସଇ ରଇବା ଏ କବର୍ ଆମେ ସବୁକେ ଜାନାଇଲୁନି । ଆମେ ସବୁକେ ଜାଗ୍ବେ କରାଇ, ସେ ଆମ୍ବେକେ ଦେଇରଇବା ଗିଆନ୍ ସଙ୍ଗ୍ ସିକାଇଲୁନି । ଜେନ୍ତାରିକି ସେମନ୍ ତାର୍ ମୁଆଟେ ଟିଆଅଇଲାବେଲେ କିରିସ୍ତର୍ ସଙ୍ଗ୍ ମିସିରଇଲା ସବୁଲକ୍ବ୍ ପୁରାପୁରୁନ୍ ସିଦ୍ ଅଇରଇବାଇ । ୨୯ ଏ କାମ୍ ମୁଇ ପୁରାପୁରୁନ୍ କର୍ବାକେ ମକେ କିରିସ୍ତର୍ ଦେଇରଇବା ବଡ୍ ବପୁସଙ୍ଗ୍ ଆବଡ୍ ଅଇ କଲିନି ।

୨

୧ କାଇକେବଇଲେ ତମର୍ପାଇ, ଲାଉଦିକିଆର୍ ଲକ୍ପମ୍ବେକେ ଆରି ଏବେ ଜେଡ୍ବି ଲକ୍ପ ମକେ ନ ଦେକିରଇଲାଇ, ସେ ସବୁଲକ୍ବ୍ ପାଇ, ମୁଇ କେତେକ୍ କସ୍ଟ କଲିନି, ସେଟା ତମେ ଜାନା ବଲିକରି ମନ୍ଦକଲିନି । ୨ ଏ ସବୁ ବିସଇ ତମ୍ବେ ଆଡ୍ମା ଇସାବେ ସାର୍ଦା କରାଇବାପାଇ ମୁଇ କଲିନି । ଜେନ୍ତାରିକି ତମେ ଗଟେକ୍ ମନ୍ ଅଇକରି

\* ୧:୨୦ ୧:୨୦ ଏପିସ୍ତଲ୍ ୨:୧୭

ଆଲୀନ୍ କରାକରି ଅଇସା । ତମେ ପୁରାପୁରୁନ୍ ବୁଢ଼ବାବେଲେ ବେସି ଆସା ଆରି ସାର୍ଦା ଅଇରଇସା । ଜଦି ତମ୍ଭକେ ଏ ଆସା ରଇଲେ, ପର୍ମେସର୍ ଜନ୍ନା କଲାଟା ଜାନିପାରାସ୍ । ସେ ଆସା ପୁରବେ ରଇଲା ଲକ୍ମନକେ ଜାନାଇ ନ ରଇଲା । ସେଟା ନିଜେ କିରିସ୍ତର୍ ବିସଇସେ ।

୩ ସେ ନିଜେ ଏ କବରର୍ ଅରଡ଼ ବୁଢାଇପାରସି । ସେଟା ଗଟେକ୍ ବେସି ମୁଲିଅ ରଇବା ବିସଇ ।

୪ କେ ମିସା କାତାର ଚାଲାକିସଙ୍ଗ୍ ତମ୍ଭକେ ନ ନାତାଅଡ଼ ବଲି ଆସାକରି ଏଟା ମୁଇ ତମ୍ଭକେ ଲେକ୍ଲିନି । ସେମନ୍ କଇବା କାତା ସଡ଼ପାରା ଲାଗ୍ଲେମିସା ନାତାଇ ଉଆନାଇ । ୫ କାଇକେବଇଲେ ଗାଗଡ଼ ଇସାବେ ମୁଇ ତମ୍ଭର୍ ସଙ୍ଗ୍ ନ ରଇଲେ ମିସା ଆଡ଼ମା ଇସାବେ ଆଟି । ତମେ କିରିସ୍ତକେ ଡାଟ୍‌ସଙ୍ଗ୍ ବିସବାସ୍ କଲାଟା ଆରି ଗଟେକ୍ ମନ୍ ଅଇରଇବାଟା ଦେକି ମୁଇ ବେସି ସାର୍ଦା ଅଇଲିନି ।

କିରିସ୍ତର୍ତେଇ ପୁରାପୁରୁନ୍ ଜିବନ୍

୬ ତେବେ ଜିସୁକିରିସ୍ତକେ ତମ୍ଭର୍ ମାପରୁ ଇସାବେ ଜେନ୍ତ୍ର ବିସବାସ୍ କରିଆଗାସ୍, ସେନ୍ତାରି ତାର୍‌ସଙ୍ଗ୍ ମିସିକରି ରୁଆ । ୭ କିରିସ୍ତର୍ ବିସଇ ବିସବାସ୍ କରିରଇବା କବର୍ ଡାଟ୍‌ସଙ୍ଗ୍ ଦାରିରୁଆ । ତାର୍ ବିସଇ ଅଦିକ୍ ଅଦିକ୍ ସିକା ଆରି ବିସବାସେ ଡାଟ୍ ଉଆ । ଜେନ୍ତ୍ରକି ତମ୍ଭକେ ସିକାଇଲାପାରା, ପର୍ମେସର୍ତକେ ଦନିଅବାଦ୍ ଦେଇଡେରୁଆ ।

୮ କେ ମିସା ନିଜର୍ ଚାଲାକିକରି ପର୍ମେସରର୍ ବିସଇ ତିଆରକରି ରଇବାଟା ସଙ୍ଗ୍ ତମ୍ଭକେ ପାନ୍ଦେ ନ ଲାଗାଅଡ଼, ସେଟାର୍‌ପାଇ ଜାଗରଡ଼ ଅଇରୁଆ । ସେମନ୍ ସିକାଇବାଟା କାଇ ଲତାକେ ନ ଆସେ ଆରି ସେଟା ସଡ଼ ବିସଇ ନର୍ସ । ସେଟା ବିନ୍ ଲକ୍‌ଟାନ୍‌ନେଅନି ସୁନି ସୁନି ଆଇବାଟା ଆରି ସେଟା ଏ ଜଗଡ଼ ବିଡ଼ରେ ରଇବା ନିୟମ୍ । ମାତର୍ କିରିସ୍ତର୍ ବିସଇଟାନ୍‌ନେ ରଇବା, ସଡ଼ ସିକିଆ ନର୍ସ । ୯ କାଇକେବଇଲେ ନର୍‌ରୁପ୍ ଦାରିରଇବାବେଲେ ମିସା କିରିସ୍ତର୍ ପୁରାପୁରୁନ୍ ପର୍ମେସର୍ ରଇଲା । ୧୦ ଆରି ତମେ ତାର୍ ସଙ୍ଗ୍ ମିସିରଇଲାର୍‌ପାଇ ଆଡ଼ମା ଇସାବେ ପୁରାପୁରୁନ୍ ଅଇଆଗାସ୍ । ବିନ୍ ବିନ୍ ବପୁ ଆରି ଅଦିକାର୍ ଉପରେ ରଇ, କିରିସ୍ତର୍ ସାସନ୍ ବଡ଼ ।

୧୧ ତମେ କିରିସ୍ତର୍ ସଙ୍ଗ୍ ମିସଲାର୍‌ପାଇ ସୁନଡ଼ ଅଇଲାପାରା ଅଇଆଗାସ୍ । ଜେନ୍ତ୍ରକି ତମ୍ଭର୍ ପାପର୍ ଗୁନ୍‌ଚଲନେ ଅନି ମୁକ୍ଲିଆଗାସ୍ । ଗାଗଡ଼ ଇସାବେ ସୁନଡ଼ ଅଇଆଗାସ୍ ବଲି ମୁଇ କଇନାଇ, ମାତର୍ କିରିସ୍ତସେ ତମ୍ଭର୍ ପାପର୍ ଗୁନ୍‌ଚଲନେଅନି ମୁକ୍ଲାଇଆଟେ । ୧୨ ତମେ ଜେଡେବେଲେ ହୁବନ୍ ନେବାକେ ପାନିଟାନ୍‌ନେ ବୁଡ଼ଲାସ୍, ସେଟା ତମ୍ଭର୍ ପାପର୍ ଗୁନ୍‌ଚଲନ୍ କିରିସ୍ତର୍ ସଙ୍ଗ୍ ମରିକରି ତପିଅଇଲାପାରା ଅଇରଇଲାସ୍ । ପାନିବିଡ଼ରେଅନି ବାରଇଲାଟା ନୁଆ ଗୁନ୍‌ଚଲନ୍ ଦାରି କିରିସ୍ତର୍ ସଙ୍ଗ୍ ଆରି ତରେକ୍ ଉଟ୍‌ଲାପାରା ଅଇଲା । ପର୍ମେସର୍ ତାର୍ ବପୁସଙ୍ଗ୍ ମଲାଡେଇଅନି ଜିବନ୍‌କରି କିରିସ୍ତକେ ଉଟାଇଲା ବଲି ତମେ ବିସବାସ୍ କଲାର୍‌ପାଇ ଏଟା ତମ୍ଭକେ ଗଟ୍‌ଲା । ୧୩ ତମେ ଜିଉଦି ନ ଅଇଲା ଲକ୍ମନ ପର୍ମେସରର୍ ନିୟମ୍ ନ ମାନ୍‌ଲାର୍‌ପାଇ ତାର୍‌ଟାନ୍‌ନେଅନି ବେଗ୍ଲି ରଇଲାସ୍ । ଆରି ତମ୍ଭର୍ ପାପର୍ ଗୁନ୍‌ଚଲନର୍ ବପୁଅନି ମୁକ୍ଲି ନ ରଇଲାସ୍ । ମାତର୍ ପର୍ମେସର୍ କିରିସ୍ତର୍ ସଙ୍ଗ୍ ଗଟେକ୍ ନୁଆ ଜିବନ୍ କରି ତମ୍ଭକେ ଉଟାଇଆଟେ । ସେ ଆମର୍ ସବୁ ପାପ୍ କେମାକରି ଦେଲାଆଟେ । ୧୪ ଆମେ କରିରଇବା ସବୁ ପାପ୍ ଲେକାଅଇରଇବା ଚିଟିପତର୍ ଜନ୍‌ଟା କି ଆମ୍ଭକେ ଦସିକରିରଇଲା, ସେ ସବୁ ପର୍ମେସର୍ ଲିବାଇଦେଲା । ଲେକ୍‌ଲାଟାମନ୍ କୁରୁସକାଟେ କୁଟି ମାରି କୁରୁପନାସ୍ କଲା । ୧୫ ସାସନ୍ କରି ଅଦିକାରେ ରଇବା ସବୁ କାରାପ୍ ଆଡ଼ମାମନ୍‌କେ ସେ



ଆରାଉଲା । କିରିସ୍ତ କୁରୁସକାଟେ ମଲାକେ, ସେ ସବୁ ସାସନକାରିଆମନକେ ଆରାଉଲା ବଲି ଦେକାଇଲା ।

<sup>୧୭</sup> \*ତେବର୍ପାଇ ତମର୍ କାଇବା, ପିଇବା, ବିସଇ ଅ କି ତାକର୍ କେତେଟା ପରବ୍ବନ୍ଦଟାନେ କି ଉଆଁସରାତି ବେଲେ କି ବିସରାମ୍ବାରେ ତମେ ମିସାସନାଇ, ବଲି କାକେ ବିଚାର କର୍ବାକେ ଦିଆସନାଇ । <sup>୧୮</sup> ଏ ସବୁ ନିୟମ୍ ପର୍ମେସର୍ ଆମ୍ବକେ ଦେବିବଲି କାତାଦେଇରଇବା ବିସଇର୍ ଚିନ୍ । ଏ ସବୁ ନିୟମ୍ ଚିନ୍ କିରିସ୍ତଟାନେ ପୁରାପୁରୁନ୍ ସିଦ୍ ଅଇସି । <sup>୧୯</sup> ନିଜକେ ନିଚ୍କରି ସେମନ୍ ଉପାସନା କଲାପାରା ଦୁଡ଼ମନକେ ଉପାସନା କର୍ବାକେ, କାକେମିସା ବାଦିଅ କର୍ବାକେ ଦିଆସନାଇ । ସେନ୍ତାରିକଲେ ପର୍ମେସର୍ କାତାଦେଇରଇବା ପୁରୁସକାର୍ ତମ୍ବକେ ନ ମିଲେ । ସେନ୍ତାରି ସିକାଇବା ଗଟେକ୍ଲକ୍, ପର୍ମେସର୍ଟାନେ ଅନି ଦର୍ସନ୍ ଦେକିଆତି ବଲିକରି ଅଦିକାର୍ ସଙ୍ଘ୍ ସିକାଇଲାନି । ସେ ତାର୍ ଚାଲକିସଙ୍ଘ୍ ନିଜେ ତିଆରକରିରଇବା ବିସଇର୍ ଲାଗି ବଡ଼ପନ୍ ଅଇସି, ମାତର୍ ସତଇସେ ସେନ୍ତାରି ବଡ଼ପନ୍ ଅଇବାକେ କାଇଟାମିସା ନାଇ । <sup>୨୦</sup> \*କିରିସ୍ତର୍ ବିସଇଟାନେ ରଇବା ସଡ଼୍ ସିକିଆ ରାଡିଦେଲାଇ ଆଟଡ଼୍ । କିରିସ୍ତ ଜେ କି ଗାଗଡ଼ର୍ ମୁଣ୍ଡ୍ ଅଇଆଟେ । ମୁଣ୍ଡ୍ ଜେନ୍ତାରିକି ଗାଗଡ଼କେ ବାଟ୍ ଦେକାଇସି, ସେନ୍ତାରିସେ ତାର୍ ଲକ୍ମନ୍ ଗଟେକ୍ ଅଇରଇବାକେ କିରିସ୍ତ ବାଟ୍ ଦେକାଇସି । ଗାଗଡ଼ର୍ ସନ୍ଦି ଆରି ଚିର୍ ଗାଗଡ଼କେ ଗଟେକ୍ କରି ସଙ୍ଘାଇଲାପାରା । ଆରି ପର୍ମେସର୍ ମନ୍କଲାପାରା ସେଟା ବଡ଼ସି ।

କିରିସ୍ତ ସଙ୍ଘ୍ ମରୁ ନଇଲେ ଜିଉଁ

<sup>୨୦</sup> ତମେ କିରିସ୍ତର୍ ସଙ୍ଘ୍ ମଲାବ୍ପାଇ ଏ ଜଗତର୍ ସାସନକାରିଆମନର୍ ଟାନେଅନି ମୁକ୍ଲିଆଟାସ୍ । ତେବେ ଏ ଜଗତେ ରଇବା ନିୟମ୍ମନ୍ ଏବେ ଜାକ କାଇକେ ମାନିଆଟାସ୍ ? <sup>୨୧</sup> ଏନ୍ତାରିଟାମନ୍ ଦାରାନାଇ କି କାଆନାଇ କି, ଏନ୍ତାରିଟାମନ୍ ତିଆନାଇ ମିସା । ଏ ନିୟମ୍ମନ୍ କାଇକେ ମାନିକରି ଆଟାସ୍ ? <sup>୨୨</sup> ଏ ସବୁଜାକ ନିୟମ୍ ମାନିକରି ଚାଲିଲେ ତମ୍ବକେ କାଇ ଲଡାକେ ନ ଆସେ । କାଇକେବଇଲେ ସେଟା ଲକ୍ମନ୍ ତିଆରକଲାଟା । <sup>୨୩</sup> ଏ ରକାମର୍ ନିୟମ୍ ବେସି ଗିଆନ୍ ରଇଲାପାରା ତିସ୍ସି । ବାଦିଅକରି ଦୁଡ଼ମନକେ ଉପାସନା କର୍ବାଟାନେ ଆରି ଲକ୍ମନ୍କେ ଦେକାଇଅଇଲା ପାରା ନିଜକେ ନିଚ୍କରି ଆରି ଗାଗଡ଼କେ କସ୍ତ ଦେବା ବିସଇ ସିକାଇବାଇ । ମାତର୍ ଏ ସବୁ ନିୟମ୍ ଲକ୍ମନ୍ର୍ ପାପର୍ ଗୁନ୍ତଲନ୍ ଜାଗ୍‌ରଡ଼୍ କରି ସଙ୍ଘାଇବାକେ କାଇ ମୁଲିଅ ନ ରଏ ।

୩

<sup>୧</sup> କିରିସ୍ତର୍ ସଙ୍ଘ୍ ମରିରଇଲାର୍ ପାଇ ଆରି ତାର୍ ସଙ୍ଘ୍ ନୁଆଜିବନ୍ ପାଇ ପର୍ମେସର୍ ତମ୍ବକେ ଉଟାଇଲାର୍ପାଇ ସର୍ଗେ ରଇବା ବିସଇ ଦେକ୍‌ତେରୁଆ । ତେଇ କିରିସ୍ତ ପର୍ମେସରର୍ ଉଜାବାଟେ ବସିଆଟେ । <sup>୨</sup> ଏ ଜଗତର୍ ବିସଇ ନ ବାବିକରି ସରଗର୍ ବିସଇ ଚିନ୍ତାକରା । <sup>୩</sup> କାଇକେବଇଲେ ତମେ ମରିକରି ପର୍ମେସରର୍ ମୁଆଟେ କିରିସ୍ତର୍ ସଙ୍ଘ୍ ମିସିରଇବା ଜିବନ୍ ବିତାଇଲାସିନି । ସେ ଜିବନ୍ ଲୁଚିକରିଆଟେ । <sup>୪</sup> କିରିସ୍ତ ଅଇଲାନି ତମର୍ ଜିବନ୍ । ସେ ବାଅଡ଼ଲାବେଲେ ତମେ ମିସା ସବୁର୍ ଦେକ୍‌ତେ ତାର୍ ମଇମାତେଇ ମିସା ।

ପୁରନା ଆରି ନୁଆ ଜିବନ୍

<sup>୫</sup> ତମର୍ ପାପର୍ ଗୁନ୍ତଲନ୍ ଇସାବେ ଜେଡ଼କି ସବୁ ପାପ୍ କାମ୍ କର୍ତେରଇଲାସ୍, ସେଟାମନ୍ ଆରି କରାନାଇ । ଜେନ୍ତାରି କି ବେସିଆ କାମ୍, ସୁକଲ୍ ନ ରଇବା ଚଲାଚଲ୍‌ତି, ଗାଗଡ଼ର୍ ଲାଲ୍‌ସାଅଇବାଟା, କାରାପ୍ ବିସଇ ମନ୍ କର୍ବାଟା, ଆରି ଲବ୍

\* ୨:୧୭ ୨:୧୭ ରମିୟ ୧୪:୧-୬ \* ୨:୧୯ ୨:୧୯ ଏପିସିୟ ୪:୧୭

ଅଇବାଟା, ଏ ସବୁ ବିସଇ ପୁତୁଲାନୁକେ ଜୁଆର୍ କରବାଟା ସଙ୍ଗ୍ ସମାନ । ୬ ଏ ସବୁ କାମେ ବୁଡ଼ିକରି ଜନ୍ମଲକ୍ଷ୍ମୀନ୍ ପର୍ଯ୍ୟେସରର୍ କାତା ନ ମାନଡ଼, ସେମାନୁକେ ତାର ବଡ଼ ରିସା ଆଇସି । ୭ ପୁରବେ ତମେ ମିସା ଏ ସବୁ କାମେ ମିସି ରଇକରି ସେନ୍ତାରି ଚଲାଚଲ୍ତି କରତେରଇଲାସ୍ ।

୮ ମାତର୍ ଏବେ ସେନ୍ତାରି ବିସଇ କରା ନାଇ । ଜେନ୍ତିକି ରିସା ଅଇବାଟା, ଇସାତଲା କରବାଟା, ବିନ୍ଲକ୍ଷ୍ମୀକେ ଗିନ୍ କରବାଟା, ନିନ୍ଦାକାତା କଇବାଟା, ଆରି ପିଟ୍ତେ କାତାକଇବାଟା ଚାଡ଼ିଦିଆସ୍ । ୯ ନିଜର୍ ନିଜର୍ ବିତ୍ତରେ ମିଟ୍ କାତା କୁଆବଲା ଉଆନାଇ । କାଇକେ ବଇଲେ ତମେ ପୁରନା ଗୁନଚଲନର୍ ସବୁ ଅବିଆସ୍ ଚାଡ଼ିଦେଇକରି, ୧୦ ନୁଆ ଚଲାଚଲ୍ତି ଆରାମକରି ଆଟାସ୍ । ପର୍ଯ୍ୟେସର୍ ତମକେ ଦେଇରଇବା ଏ ନୁଆ ଚଲାଚଲ୍ତିତେଇ ତମେ ତାର ବିସଇ ଅଦିକ୍ ଅଦିକ୍ ଜାନ୍ସା ଆରି ତାରପାରା ଅଦିକ୍ ଅଦିକ୍ ଅଇଆଇସା । ୧୧ ତମେ ଜିଉଦି ଲକ୍ ଉଆ କି ଜିଉଦି ନ ଅଇଲା ଲକ୍ ଉଆ, ସୁନଡ଼ ଅଇଲାଲକ୍ କି ସୁନଡ଼ ନ ଅଇଲା ଲକ୍, ଦାପରେ ରିସା ଅଇ ମାରିମରାଇବା ଲକ୍ କି ବିନ୍ ଦେସର୍ ଗତିଦାଙ୍ଗ୍ଡା କି ମୁକ୍ଲାଇଲା ଲକ୍, ସେଟା କାଇଟା ନଏ । ମାତର୍ କିରିସଟ୍ ସବୁରଟାନେ ଆଟେ ଆରି ସେ ଆକା ସବୁର୍ ଉପରେ ସାସନ୍ କଲାନି ।

୧୨ ଧେବେ ପର୍ଯ୍ୟେସର୍ ତମକେ ତାର ଲକ୍ ଅଇବାକେ ବାଟିରଇଲାର୍ ପାଇ ଆରି ତମକେ ଆଲାଦ୍ କରି ସୁକଲ୍ ଲକ୍ ଅଇବାକେ ବେଗ୍ଲାଇଲାର୍ ପାଇ, ଦୟା ଦେକାଇବାକେ, ଦରମ୍ ଅଇବାକେ, ନିଟ୍ ଅଇବାକେ, ସୁଆଲ୍ ଅଇବାକେ, ମୁରଟିକରି ରଇବାକେ ଜାଗରଡ଼ ଉଆ । ୧୩ ତମର୍ ତମର୍ ବିତ୍ତରେ ଦସ୍ ଦାରାଦାରି ଅଇ ବୁଲ୍ଲକଲେ କେମା ଦିଆଦିଇ ଉଆ । ବିନ୍ ଲକ୍ ବିରଦ୍ କାତା ରଇଲେ ମୁରଟିକରି କେମା ଦିଆଦିଇ ଉଆ । ମାପୁରୁ ତମକେ କେମା ଦେଲାପାରା ତମର୍ ବିତ୍ତରେ କେମା କରାକରି ଉଆ । ୧୪ ଏ ସବୁ ବିସଇ କରି ତମର୍ ବିତ୍ତରେ ଆଲାଦ୍ କରାକରି ଉଆ । ସେନ୍ତାଆଲେ ତମେ ଗଟେକ୍ ମନ୍ ଅଇକରି ରଇବାଟା ସିଦ୍ ଅଇସି । ୧୫ ତମେ ସବୁଲକ୍ ଗଟେକ୍ ଗାଗ୍ଡେ ରଇବା ବିନ୍ ବିନ୍ଟା ଅଇଲାର୍ ପାଇ, କରବା ସବୁ କାମେ କିରିସଟ୍ ତମକେ ବାଟ୍ ଦେକାଅ । ସେ ତମକେ ସାନ୍ତି ଦେଲା ଆଟେ । ତମେ ସାନ୍ତି ସଙ୍ଗ୍ ରଇବାକେ ସେ ତମକେ ବାଟ୍ଲାଆଟେ । ଆରି ପର୍ଯ୍ୟେସର୍କେ ଦନିଅବାଦ୍ ଦେଇତେରୁଆ ।

୧୬ କିରିସଟ୍ ବାକିଅ ଦିଆନ୍କରି ଲାଗିରୁଆ । ତମର୍ ତମର୍ ବିତ୍ତରେ ସିକିକରି ଜାଗରଡ଼ ଅଇରୁଆ । ଏଟା ଗିଆନ୍ ସଙ୍ଗ୍ କରା । ଗିଡ଼ ସଙ୍ଗିତା ବଇର୍ ଗିଡ଼ମନ୍, ବିନ୍ ଗିଡ଼ମନ୍ ଆରି ସୁକଲ୍ ଗିଡ଼ମନ୍ କଇତେରୁଆ । ମନ୍ବିତ୍ତରେ ଦନିଅବାଦ୍ କଇକରି ପର୍ଯ୍ୟେସର୍କେ ଗିଡ଼ କଇତେରୁଆ । ୧୭ ତମେ କାଇଟା ମିସା କଇଲେ କି କଲେ, ସେ ସବୁ ମାପୁରୁ ଜିସୁର୍ ନାଉଦାରି ବାବା ପର୍ଯ୍ୟେସର୍କେ ଦନିଅବାଦ୍ ଦିଆସ୍ ।

ନୁଆ ଜିବନର୍

୧୮ ଏ ମାଇଜିମନ୍, ତମେ ନିଜର୍ ନିଜର୍ ମୁନୁସ୍ମନର୍ କାତା ମାନିକରି ରୁଆ । ଜିସୁ କିରିସଟ୍ ସଙ୍ଗ୍ ମିସିରଇଲାର୍ ପାଇ ଏନ୍ତାରି କରବାଟା ନିକ ।

୧୯ ଏ ମୁନୁସ୍ମନ୍, ତମେ ନିଜର୍ ନିଜର୍ ମାଇଜିମନ୍କେ ଆଲାଦ୍ କରି ଦରମ୍ ଉଆ ।

୨୦ ଏ ପିଲାଟକିମନ୍, ତମର୍ ଆୟାବାବାର୍ କାତା ମାନିକରି ରୁଆ । ସେଟା ପର୍ଯ୍ୟେସର୍କେ ସାର୍ଦା କରାଇସି ।

☆ ୩:୯ ୩:୯ ଏପିସିୟ ୪:୨୨ ☆ ୩:୧୦ ୩:୧୦ ଏପିସିୟ ୪:୨୪ ☆ ୩:୧୨ ୩:୧୨ ଏପିସିୟ ୪:୨ ☆ ୩:୧୩ ୩:୧୩ ଏପିସିୟ ୪:୩୨ ☆ ୩:୧୬ ୩:୧୬ ଏପିସିୟ ୫:୧୯,୨୦ ☆ ୩:୧୮ ୩:୧୮ ଏପିସିୟ ୫:୨୨; ୧ ମ ପିତର୍ ୩:୧ ☆ ୩:୧୯ ୩:୧୯ ଏପିସିୟ ୫:୨୫; ୧ ମ ପିତର୍ ୩:୭ ☆ ୩:୨୦ ୩:୨୦ ଏପିସିୟ ୭:୧

୨୧ ☆ଏ ଆୟା ବାବାମନ୍, ତମର୍ ପିଲାଟକିମନ୍‌କେ ସବୁବେଳେ ଲାଗିକରି ମନ୍ ବାଙ୍ଗାଆ ନାଇ ।

୨୨ ☆ଏ ଗତିଦାଙ୍ଗତାମନ୍, ତମେ କରିରଇବା ସବୁକାମ୍‌ଗାନେ ତମର୍ ଜଗତେରଇବା ସାଉକାର୍‌ମନ୍ କାତା ମାନିକରି ରୁଆ । ସେମନ୍ ତମର୍ କାମ୍ ଦେକି ବଲ୍ ବଲ୍‌ବାକେ ନାଇ ମାତର୍ ମାପୁରୁକେ ଡରିକରି ସତ୍ ମନେ ରଇ ସବୁ କାମ୍ କରା । ୨୩ ତମେ ଜାଜଗା କଲେମିସା ପୁରାପୁରୁନ୍ ମନ୍, ଦିଆନ୍, ଜିବନ୍, ପରାନ୍ ଦେଇ ମାପୁରୁପାଇ କଲା ଇସାବେ କରା । ଲକ୍‌ମନ୍ ପାଇ କାମ୍ କଲାପାରା କରାନାଇ । ୨୪ କାଇକେବଇଲେ ମାପୁରୁ ତମକେ ପୁରୁସକାର୍ ଦେଇସି ଆରି ତାର୍ ଲକ୍‌ମନ୍‌କେ ସେ ଦେବି ବଲି କାତା ଦେଇରଇବା ସବୁ ଆସିର୍‌ବାଦ୍ ତମେ ପାଇସା ବଲି ଜାନିଆଟାସ୍ । ତମେ ସେବା କର୍‌ବା ସାଉକାର୍ କିରିସଟ୍, ବଲି ଏତାଇରୁଆ ।

୨୫ ☆ଜଦି କେ ମିସା ବୁଲ୍ କାମ୍ କରି ଲାଗିରଇଲେ, ପର୍‌ମେସର୍ ସେମନ୍‌କେ ଡଣ୍ ଦେଇସି ଆରି ସେ ସବୁଲକ୍‌କେ ସମାନ୍ ନାପ୍‌ବା ତାଙ୍‌ସଙ୍ଗ୍ ବିଚାର୍ କର୍‌ସି ।

### ୪

୧ ☆ଏ ସାଉକାର୍‌ମନ୍, ତମର୍ ଦାଙ୍ଗତାମନ୍‌କେ ଜତନ୍ କରା ଆରି ସେମନ୍‌କେ ସବୁକେ କାଇ ଅନିଆଇ ନ କରି ତଲାଟଲ୍‌ତି କରା । କାଇକେବଇଲେ ସର୍‌ଗେ ମିସା ତମର୍ ପାଇ ଗଟେକ୍ ସାଉକାର୍ ଆଟେ ବଲି ଏତାଆ ।

#### ବିନ୍ ବିନ୍ ବିସଇର୍ ଆଦେସ୍ ଦେବାଟା

୨ ପାର୍‌ତନା କରିଲାଗିରୁଆ । ଆରି ଜାଗ୍‌ରଡ୍ ଅଇରୁଆ । ପର୍‌ମେସର୍‌କେ ସବୁବେଳେ ଦନିଅବାଦ୍ ଦେଇତେରୁଆ । ୩ ଆମର୍ ପାଇ ମିସା ପାର୍‌ତନା କରା । ଜେନ୍‌ଡିକି କିରିସଟ୍‌ର ବିସଇଟାମେ ରଇବା ଏ ସୁବ୍‌କବର୍ ଆମେ ସବୁଲକ୍‌କେ ଜାନାଇପାରୁ । ଏ ସୁବ୍‌ କବର୍ ସେମନ୍ ଆଗତୁ ନାଜାନିରଇଲାଇ । ଏ ସୁବ୍‌କବର୍ ଜାନାଇଲାପାଇ ମୁଇ ଏବେ ବନ୍‌ଗରେ ଆଟି । ୪ ଜେନ୍‌ଡିକି ମୁଇ ଜେଡ୍‌କି ଲକ୍‌କେ ଏ ସୁବ୍‌କବର୍ ନିକସଙ୍ଗ୍ ଜାନାଇବି, ସେଟାପାଇ ପାର୍‌ତନା କରା ।

୫ ☆ମାପୁରୁ ଜିସୁକିରିସଟ୍‌କେ ବିସ୍‌ବାସ୍ ନ କଲା ଲକ୍‌ମନ୍‌ରତେଇ ଜାଗ୍‌ରଡ୍ ସଙ୍ଗ୍ ତଲାଟଲ୍‌ତି କରା । ତମେ ମିଲାଇରଇବା ସବୁ ବେଲା ବୁଦିର୍ ସଙ୍ଗ୍ କରା । ୬ ସେମନ୍‌କେ ସନ୍‌ମାନ୍ ଦେଇ କାତା ଉଆ । ଜେନ୍‌ଡିକି ତମେ କଇବା ବିସଇ ସେମନ୍ ମନ୍‌କର୍‌ବାଇ । ତେବେ ତମେ ବିସ୍‌ବାସ୍ କର୍‌ବା ବିସଇଟାମେ କାଇଆଲେ କାତା ଉଟ୍‌ଲେ, ତମେ ଉତର୍ ଦେଇପାର୍‌ସା ।

#### ସାରାସାରିର୍ କାତା

୭ ☆ଡୁକିକି କଲସିଅ ଆଇଲାବେଲେ ମକେ କାଇକାଜଗା ଗଟ୍‌ଲାନ୍ ବଲି ତମ୍‌କେ କଇଦେଇସି । ସେ, ମୁଇ ବେସି ଆଲାଦ୍ କର୍‌ବା ଗଟେକ୍ ବିସ୍‌ବାସି ବାଇ । ସେ ବିସ୍‌ବାସ୍ ସଙ୍ଗ୍ କାମ୍ କର୍‌ସି ଆରି ମର୍ ସଙ୍ଗ୍ ମାପୁରୁକେ ସେବା କର୍‌ସି । ୮ ଆମ୍‌କେ କାଇଟା ଗଟ୍‌ଲାନ୍ ବଲି ତାଟ୍‌ଗାନେଅନି ଜାନ୍‌ସା । ଆରି ସେ ତମ୍‌କେ ବିସ୍‌ବାସ୍ କରାଇବାଟା ତାଟ୍ କରାଇସି । ଏଟାପାଇ ତାକେ ତମର୍‌ଟାମେ ପାଟାଇଲିନି । ୯ ☆ଅନିସିମ୍‌କେ ତାଟ୍‌ସଙ୍ଗ୍ ପାଟାଇଲିନି । ସେ ଆମର୍ ଆଲାଦର୍ ବେସି ବିସ୍‌ବାସ୍ ରଇବା ବାଇ । ସେ ତମର୍ ନଅରର୍ ଲକ୍ । ଇତି ଗଟ୍‌ବା ସବୁ ବିସଇ ସେମନ୍ ତମ୍‌କେ ଜାନାଇବାଇ ।

☆ ୩:୨୧ ୩:୨୧ ଏପିସିୟ ୬:୪ ☆ ୩:୨୨ ୩:୨୨ ଏପିସିୟ ୬:୫-୮ ☆ ୩:୨୫ ୩:୨୫ ଏପିସିୟ ୬:୯ ☆ ୪:୧ ୪:୧ ଏପିସିୟ ୬:୯ ☆ ୪:୫ ୪:୫ ଏପିସିୟ ୫:୧୭ ☆ ୪:୭ ୪:୭ ପେରିଡ୍ ୨୦:୪; ୨ୟ ଡିମ୍‌ଡି ୪:୧୨ ☆ ୪:୭ ୪:୭ ଏପିସିୟ ୬:୨୧,୨୨ ☆ ୪:୯ ୪:୯ ପିଲିମନ୍ ୧:୧୦-୧୨

୧୦ ✨ଆରିସତାକସ୍ ତାର୍ ଜୁଆର୍ ଜାନାଇଲାନି । ସେ ମର୍ ସଙ୍ଗ୍ ବନ୍ଦିଗରେ ଆଚେ । ବର୍ନବାର୍ ମେଏନାବାଇ ମାର୍କ ମିସା ଜୁଆର୍ ଜାନାଇଲାନି । ମାର୍କର୍ ବିସଇ ତମେ ସୁନିସାରାଇ ଆଚାସ୍ । ସେ ତମର୍ ଲଗେ ଆଇଲେ ତାକେ ତାକି ନିଆ ।  
 ୧୧ ଜୁସ୍ତ ନାଉଁଦାରି ତାକ୍ପୁଟା ଅଇଲା ଜିୟସୁୟ ମିସା ତମ୍‌କେ ଜୁଆର୍ ଜାନାଇଲାନି । ଏ ତିନ୍ ଲକ୍‌ସେ ଇଡି ରଇବା ଜିଉଦି ବିସ୍‌ବାସିମନ୍ । ପର୍‌ମେସର୍‌ର ରାଇଜ୍ ବିସଇତେଇ ରଇବା ସୁବ୍‌କବର୍ ଜାନାଇବାକେ ସେମନ୍ ମର୍ ସଙ୍ଗ୍ କାମ୍ କଲାଇନି । ସେମନ୍ ମକେ ବେସି ସାର୍‌ଦା କରାଇଆଚଡ୍ ।

୧୨ ✨ଏପାପୁରା ତାର୍ ଜୁଆର୍ ଜାନାଇଲାନି । ସେ ମିସା ତମର୍ ନଅର୍‌ର୍ ଲକ୍ । ସେ ମିସା ଗଟେକ୍ ଜିସୁକିରିସ୍‌ଟର୍ ଗଡିଦାଙ୍ଗ୍‌ଡା । ସେ ତମର୍‌ପାଇ ସବୁବେଲେ ମନ୍‌ଦିଆନ୍ ଦେଇ ପାର୍‌ତନା କରିଲାଗିରଇସି । ଜେନ୍‌ଟିକି ତମେ ତାର୍ ଅଇ ସିଦ୍ ଅଇସା ଆରି ପର୍‌ମେସର୍ ତମ୍‌କେ କରା ବଲି ମନ୍‌କଲାଟା ଜାନିରଇସା ।  
 ୧୩ ଏରାପଲି ଆରି ଲାଉଦିକିଆଇ ରଇବା ବିସ୍‌ବାସିମନ୍‌ପାଇ ଆରି ତମର୍‌ପାଇ ମିସା ସେ ଆବଡ୍ ଅଇଲାନି ବଲି ମୁଇ ସାକି ଦେଲିନି ।  
 ୧୪ ✨ଆମର୍ ଆଲାଦର୍ ନିଜେ ଅସଦେଉ ଲୁକ ଆରି ଦିମା ତମ୍‌କେ ଜୁଆର୍ ଜାନାଇଲାଇନି ।

୧୫ ଲାଉଦିକିଆତେଇ ରଇବା ବାଇବଇନିମନ୍‌କେ, ମର୍ ଜୁଆର୍ ଜାନାଇଦିଆସ୍ । ବଇନି ନୁମ୍‌ପାକେ ଆରି ତାର୍ ଗରେ ରୁଣ୍‌ବା ସବୁ ବିସ୍‌ବାସିମନ୍‌କେ ମିସା ମର୍ ଜୁଆର୍ ଜାନାଆ ।  
 ୧୬ ତମେ ଏ ଚିଟିତେଇ ଲେକ୍‌ଲାଟା ସୁନିସାରାଇଲାପଚେ ଲାଉଦିକିଆଇ ରଇବା ବାଇବଇନିମନ୍‌କେ ମିସା ସୁନାଇଦେବାର୍‌ଆଚେ ଆକା ।  
 ୧୭ ✨“ମାପୁର ତକେ ସର୍‌ପିଦେଲା କାମ୍ ତୁଇ କରିସାରାଇବାର୍ ଆଚେ ଆକା” ବଲି ଆର୍‌କିପସ୍‌କେ କୁଆ ।

୧୮ ମୁଇ ପାଉଲ୍ ଏଟା ନିଜେ ଲେକ୍‌ଲିନି, “ଜୁଆର୍ ! ମୁଇ ବନ୍ଦିଗରେ ଆଚିବଲି ଏତାଆ ।” ପର୍‌ମେସର୍‌ର ଜିବନ୍ ଦୁକାଇ ଦୟା ଦେକାଇଲାଟା ତମର୍ ସଙ୍ଗ୍ ରଅ ।

---

☆ ୪:୧୦ ୪:୧୦ ପେରିଡ୍ ୧୯:୨୯:୨୭:୨; ପିଲିମନ୍ ୧:୨୪; ପେରିଡ୍ ୧୨:୧୨,୨୫:୧୩:୧୩:୧୫:୩୭-୩୯ ☆ ୪:୧୨ ୪:୧୨ କଲସିଅ ୧:୭; ପିଲିମନ୍ ୧:୨୩ ☆ ୪:୧୪ ୪:୧୪ ୨ୟ ଡିମତି ୪:୧୧; ପିଲିମନ୍ ୧:୨୪; ୨ୟ ଡିମତି ୪:୧୦; ପିଲିମନ୍ ୧:୨୪ ☆ ୪:୧୭ ୪:୧୭ ପିଲିମନ୍ ୧:୨

# ଡେସଲନିକିୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କର ପ୍ରଥମ ପତ୍ର ଡେସଲନିକିୟ ମଣ୍ଡଳୀର ବିସ୍ତୃତ ବିସ୍ତୃତମନ୍ତ୍ରଣା ପାଉଲ ପର୍ଯ୍ୟନ୍ତ ଚିଠିଲେଖନୀ ଏ ବଇର ବିସଇ ଜାନ୍‌ବାଟୀ

୧ ମ ଡେସଲନିକିୟ ଚିଠି ପେରିଡ଼ ପାଉଲ୍ ଲେକାଅଇରଇଲା୧:୧ । ଏଟା ପାଉଲ୍ ପର୍ଯ୍ୟନ୍ତ ତର ଲେକାଅଇରଇଲା ଆରି ଏଟା ବାଇବଲେ ଗଟେକ୍ ବାଗ୍ ଅଇଆଟେ । ଏଟା ଜିସୁକିରିସ୍ଟ ଜନମ୍ ଅଇକରି ଲଗାଲଗି ୫୧ ବରସ୍ ପଟେ ଲେକା ଅଇଲାଆଟେ । ଜେଡେବେଲେ ପାଉଲ୍ ଡେସଲନିକିୟ ମଣ୍ଡଳୀକେ ଚିଠି ଲେକ୍ଲା, ସେବେଲେ ସେ କରନ୍ତୁଥ ମଣ୍ଡଳୀତେଇ ରଇଲା । ଜନ୍ ମଣ୍ଡଳୀକେ କି ସେ ମିସ୍ତାନି ଇସାବେ ଦୁଇପାଲି ଗାଲାବେଲେ ତାପନା କରିରଇଲା । ପେରିଡ଼ ୧୭:୧-୧୦ ।

ଏଟା କେଡେଟା ଜିଉଦି ଆରି କେଡେଟା ଗିରିକ୍ ବାସା କଇବା ଲକ୍‌ମନ୍ ଆକା କରିରଇଲାଇ ବଲି ପେରିଡ଼ ବଇଟାନ୍‌ କୁଆଅଇଆଟେ । ପାଉଲ୍ ମଣ୍ଡଳୀ ତାପନା କଲା ପଟେ, ବେସି ଦିନ୍ ଡେସଲନିକିଏ ରଇନାପାରୁଲା । ଡେବରପାଇ ତେଇ ରଇବା ବିସ୍ତୃତମନ୍ତ୍ରଣା ନ ଡରିକରି ରଇବାକେ ସେ ଏ ଚିଠି ପାଟାଇଲା । ଗଟେକ୍ ବିସ୍ତୃତ କେନ୍ତାରି ଜିଉନା କାଉନା କର୍ବାକେ ପଡ଼ସି, ଏ ଚିଠି ଟାନ୍‌ କେଡେକ୍ କେଡେକ୍ ବିସଇ, ଆରି ବିନ୍ ବିନ୍ ଜାନ୍‌ବା କାତା ଆଟେ । ପାଉଲ୍ କେଡେଟାଟାନ୍‌ ଆରିତରେକ୍ ଆଇବା ବିସଇ ମନ୍‌ଦିଆନ୍ ଦେଲାଆଟେ । ଜେନ୍ତୁକି ଡେସଲନିକିୟ ମଣ୍ଡଳୀର ବିସ୍ତୃତମନ୍ତ୍ରଣା ଏ ବିସଇତେଇ କାଇ ଅସୁବିଦା ନ ଅଇକରି ଆଗ୍ତୁ ଅଇତେରଇଲାଇ । ପାଉଲ୍ ଜିସୁ ଆରିତରେକ୍ ଆଇବାଟା ନେଇ କେନ୍ତାରି ଜିଉନା କାଉନା କର୍ବାର୍ ଆରି ପର୍ଯ୍ୟନ୍ତକେ ସାର୍‌ଦା କରାଇବାକେ ଜାନାଇଲାନି । ୫:୨-୮ ।

### ଏ ବଇଟାନ୍‌ ରଇଲାଟା

- ୧. ପାଉଲ୍ ମଣ୍ଡଳୀକେ ଜୁଆର୍ ଜାନାଇ କରି ଆରି ପର୍ଯ୍ୟନ୍ତକେ ଦନିଅବାଦ୍ ଦେଇକରି ଚିଠି ଆରାମ୍ କଲାଆଟେ । ୧
- ୨. ପଟେ ସେ ତିମତି ଆନିରଇବା କବର୍ ଆରି ତାର୍ କାମ୍ ବିସଇନେଇ ବୁଜାଇଲା । ୨-୩
- ୩. ଜିସୁକେ ବିସ୍ତୃତ କଲା ଲକ୍ ସେ ଆରିତରେକ୍ ଆଇବା ଜାକ ଜାଗିରଇକରି କେନ୍ତାରି ଜିଉନା କାଉନା କର୍ବାର୍ ସେଟା ଚେତାଇ କରି ଆଦେସ୍ କଲାନି । ୪:୧-୫:୧୫
- ୪. ପାଉଲ୍ ଆରିତରେକ୍ ମଣ୍ଡଳୀକେ ଜୁଆର୍ ଜାନାଇକରି ସେମନ୍‌କେ ଚିଠି ପଡ଼ବାକେ ବାଦିଅ କରାଇ ସେସ୍ କଲାନି । ୫:୧୬-୨୮

୧ \*ମୁଇ ପାଉଲ ଆରି ମର୍ ବାଇମନ୍ ସିଲାନ, ଆରି ତିମତି ଡେସଲନିକିୟ ମଣ୍ଡଳୀତେଇ ରଇବା ଲକ୍‌ମନ୍‌କେ ଏ ଚିଠି ଲେକ୍‌ଲୁନି । ବାବା ପର୍ଯ୍ୟନ୍ତ ଆରି ମାପରୁ ଜିସୁକିରିସ୍ଟ ଜିବନ୍ ଦୁକାଇଲା ସାନ୍ତି ତମ୍‌କେ ମିଲ ।

ଡେସଲନିକିୟ ମନ୍‌ ବିସ୍ତୃତମନ୍ତ୍ରଣା

୨ ଆମେ ସବୁବେଲେ ତମର୍ ସବୁ ଲକ୍‌ପାଇ ପର୍ଯ୍ୟନ୍ତକେ ଦନିଅବାଦ୍ ଦେଇତେରଇବୁ ଆରି ପାର୍‌ତନା କଲାବେଲେ ତମର୍ ବିସଇ ସବୁବେଲେ

\* ୧:୧ ୧:୧ ପେରିଡ଼ ୧୭:୧

ଜାନାଇତେରଇବୁ । <sup>୩</sup> ତମେ ବିସବାସ କରି କେନ୍ତ୍ର ଚଲାଚଲ୍‌ତି କଲାସ୍‌ନି ଆରି ତମର ତମର ବିତ୍ରେ ରଇବା ଆଲାଦର୍ ଲାଗି, ମିସିବିଡି କେନ୍ତ୍ର ସାଇଜ କରାକରି ଅଇଲାସ୍‌ନି ଆରି ମାପୁରୁ ଜିସୁ କିରିସ୍‌ଟ ଟାନେ ତମର ବିସବାସ କେନ୍ତ୍ର ତାଟ୍ ଅଇଆଗାସ୍ । <sup>୪</sup> ବାଇବଇନିମନ୍ ! ଆମେ ଜାନିଆରୁ ଜେ, ପର୍ମେସର୍ ତମ୍‌କେ ଆଲାଦ୍ କଲାନ୍ତି । ଆରି ସେ ତମ୍‌କେ ନିଜର୍ ଲକ୍ କରବି ବଲି ବାଟ୍‌ଲାଆଟେ । <sup>୫</sup> ଜେଡେବେଲେ ଆମେ ତମ୍‌କେ ଏ ସୁବ୍ କବର୍ ଜାନାଇରଇଲୁ, ସେଟା ଅବକା କାତାଇ ନ ରଇଲା, ମାତର୍ ସୁକଲ୍‌ଆଡ଼ମାର୍ ବପୁ ସଙ୍ଗ୍ ଆରି ସେଟା ସତ୍ ବଲି ପୁରାପୁରୁନ୍ ବିସବାସର୍ ସଙ୍ଗ୍ ରଇଲା । ତମେ ଜାନାସ୍, ତମର ସଙ୍ଗ୍ ରଇଲାବେଲେ ଆମେ କେନ୍ତ୍ର ରକାମେ ଜିଉନାକାଉନା କର୍ତେରଇଲୁ, ଜେନ୍ତ୍ରକି ତମର୍ ମଙ୍ଗଲ୍ ଅ ବଲି ଆମର୍ ବାବନା ରଇଲା । <sup>୬</sup> ତମେ ଚଲାଚଲ୍‌ତିତେଇ ଆମର୍ ପାରା ଆରି ମାପୁରୁର୍ ପାରା ରଇଲାସ୍ । ତମ୍‌କେ ଦୁକ୍‌କସ୍‌ଟ ଅଦିକ୍ ରଇଲେ ମିସା ସୁକଲ୍ ଆଡ଼ମାର୍ ଟାନେଅନି ମିଲାଇରଇବା ସାରଦା ସଙ୍ଗ୍ ସୁବ୍ କବର୍ ମାନଲାସ୍ । <sup>୭</sup> ତେବେ ତମେ ମାକିଦନିଆ ଆରି ଆକାୟାତେଇ ରଇବା ସବୁ ବିସବାସିମନ୍‌କେ ଗଟେକ୍ ବାଟ୍‌ଦେକାଉ ପାରା ରଇଲାସ୍ । <sup>୮</sup> ତମର୍‌ଲଗେଅନି ମାସିଦନିଆ ଆରି ଆକାୟାର୍ ଜାଗାମନ୍‌କେ ଅବକା ମାପୁରୁର୍ ସୁବ୍‌କବର୍‌ସେ ବିଚି ନ ଅଇରଇଲା । ମାତର୍ ତମେ ମାପୁରୁକେ ବିସବାସ୍ କରିରଇବା କାତା ସବୁ ବାଟେ ଜାନାପଡ଼ଲା ଆଟେ । ଏ ବିସଇ ଆରି ଆମେ ଅଦିକ୍ କଇବା ଦରକାର୍ ନାଇ । <sup>୯</sup> ଆମେ ତମର୍‌ଲଗେ ଆଇଲାବେଲେ ତମେ ଜେନ୍ତ୍ର ଆଲାଦର୍‌ସଙ୍ଗ୍ ଡାକିରଇଲାସ୍ ଆରି ତୁଟା ପାକ୍‌ନାମନ୍ ପୁଜା କର୍‌ବାଟା ଚାଡିକରି ଜିବନ୍ ରଇବା ପର୍ମେସର୍‌କେ ଉପାସନା କର୍‌ବାକେ ଆଗ୍ରୁ ଆସିରଇଲାସ୍ । ଏ ସବୁ ବିସଇ ତେଇର୍ ଲକ୍‌ମନ୍ କାତା ଅଇଲାଇନି । <sup>୧୦</sup> ଆରି ପର୍ମେସର୍ ତାର୍ ନିଜର୍ ଜନ୍ ପଅକେ, ମଲା ଲକ୍‌ମନ୍‌ର ବିତ୍ରେ ଅନି ଉଟାଇଲା । ଆରି ଜେ କି ଆଇତେରଇବା ପର୍ମେସର୍‌ର ବଡ଼ ଡଣ୍ଡିତେଇଅନି ଆମ୍‌କେ ରକିଆ କରସି । ତାର୍‌ପିଲା ଜିସୁ ସର୍‌ଗେଅନି ଆରିତରେକ୍ ଆଇବାଟାକେ ଆମେ ଜାଗିକରି ରଉଁ । ଏ ସବୁ ବିସଇ ମିସା ତେଇର୍ ଲକ୍‌ମନ୍ କାତାବାଟ୍‌ତା ଅଇଲାଇନି ।

୨

ତେସଲନିକିତେଇ ପାଉଲର୍ କାମ

<sup>୧</sup> ଏ ବାଇବଇନିମନ୍ ତମେ ନିଜେ ଜାନି ଆଗାସ୍, ତମର୍‌ଲଗେ ଆମେ ଆଇଲାଟା ତୁଟାଇ ନ ରଇଲା । <sup>୨</sup> ତମର୍‌ଗାନେ ଆଇବା ଆଗ୍ରୁ ପିଲିପେ ଆମ୍‌କେ କେନ୍ତ୍ର ଦୁକ୍ ନିନ୍ଦା ଅଇରଇଲା, ସେଟା ତମେ ଜାନାସ୍ । ବେସି ଲକ୍ ଆମ୍‌କେ ବିରଦ୍ କଲେ ମିସା ସୁବ୍‌କବର୍ ତମ୍‌କେ ଜାନାଇବାକେ ପର୍ମେସର୍ ସାଆସ୍ ଦେଇରଇଲା । <sup>୩</sup> ଆମେ ବାବୁଜିଆ କଲାଟା, ଲକ୍‌ମନ୍‌ର ବୁଲ୍ ଆଦେସ୍ ଅନି ନ ରଇଲା ଆରି ନାଡାଇବାଟା କି ବୁଲ୍‌ବାଟେ ନେବା ବିସଇ ନ ରଇଲା । <sup>୪</sup> ମାତର୍ ସବୁବେଲେ ଆମେ ପର୍ମେସର୍‌ର ମନ୍ କଲା ଇସାବେ ସେ କାତା କଇତେରଇବୁ । କାଇକେବଇଲେ ସେ ଆମ୍‌କେ ବାଟିକରି ସୁବ୍‌କବର୍ ଜାନାଇବା ଦାଇଡ଼ ସର୍‌ପି ଦେଲାଆଟେ । ଲକ୍‌ମନ୍‌କେ ସାରଦା କରାଇବାକେ ଆମର୍ ଆଦେସ୍ ନାଇ । ଜନ୍ ପର୍ମେସର୍ ଆମର୍ ମନ୍ ବିତ୍ରେରଟା ପରିକା କରି ଦେକିପାରସି, ତାକେ ଆକା ସାରଦା କରବାକେ ଆମେ ଚେସ୍‌ଟା କଲୁନି । <sup>୫</sup> ତମେତା ନିକ କରି ଜାନାସ୍ । ଆମେ କେବେ ମିସା ତମ୍‌କେ ସାରଦା କରାଇବା କାତା କଇ ନ ରଇଲୁ । ଆମର୍ ଲବ୍‌ଅଇବାଟାକେ ଲୁଟାଇକରି ସଙ୍ଗ୍‌ଉନାଇ । ତମର୍‌ଲଗେ କାରାପ୍ ବେବାର୍ କରି ନ ରଇଲୁ । ଏ ବିସଇଟାନେ ପର୍ମେସର୍

\* ୧:୭ ୧:୭ ପେରିଡ଼ ୧୭:୫-୯      \* ୨:୨ ୨:୨ ପେରିଡ଼ ୧୭:୧୯-୨୪; ପେରିଡ଼ ୧୭:୧-୯

ଆମର ସାକ୍ଷି । ୭ ଆମେ କାରୁଲଗେ ଅନି ସନ୍ମାନ ପାଇବୁ ବଲି ଚେସ୍ଟା କରି ନ ରଇଲୁ । ତମରଟାନେ ଅନି କି ବିନ୍ ଲକର ଟାନେଅନି ମିସା ନାଇ । ୭ ଜଦି କିରିସ୍ତ ପାଟାଇରଇବା ପେରିଡ଼ ଇସାବେ ଆମ୍ଭକେ ତମେ ମାନିକରି ରୁଆ ବଲି ଦାବି କରୁତୁ । ମାଆ ଜେନ୍ତ୍ର ନିଜର ପିଲାମନ୍କେ ଜତନ୍ କରତେରଇସି, ଆମେ ତମରୁଲଗେ ରଇବା ବେଲାଇ ସେରକାମ୍ କରତେରଇଲୁ । 「 ଆମେ ତମ୍ଭକେ ବେସି ଆଲାଦ୍ କଲୁ ଜେ, ତମ୍ଭକେ ଅବ୍‌କା ପରମେସରର୍ ସୁବ୍ କବର ଜାନାଇରୁ ବଲି ନାଇ, ମାତର ତମରୁଲାଗି ନିଜକେ ସରପି ଅଇବାକେ ମିସା ତିଆର ଅଇରଇଲୁ । ତମେ ଆମର କେତେକ୍ ନିଜର ନ ରଇଲାସ୍ ! ୯ ଏ ବାଇବଇନିମନ୍ ଆମେ ଆବଡ଼ ଅଇ ଗାଗ୍‌ତେ ବାଦିଜାଇରଇଲେ ମିସା ମାନିଅଇ କାମ୍ କଲାଟା ତମ୍ଭକେ ମନେରଇସି । ଆମେ ଜେନ୍ତ୍ର କି ତମର ଉପରେ ବଜ ନ ଅଇକରି, ଏଟାରପାଇ ଦିନ୍ ରାତି କସ୍ତ ପାଇ ପରମେସରର୍ ସୁବ୍‌କବର ତମ୍ଭକେ ଜାନାଇରଇଲୁ ।

୧୦ ଜେତେବେଲେ ଆମେ ତମରଟାନେ ରଇଲୁ, ଆମେ କେନ୍ତ୍ର ସୁକଲ୍‌ଅଇ, ସତଇସେ କାଇ ଦସ୍ ନ ଅଇକରି ଚଲାଚଲ୍‌ତି କରତେରଇଲୁ । ନିଜେ ପରମେସର ଆରି ତମେ ଆକା ଆମର ସାକ୍ଷି ଆଟାସ୍ । ୧୧ ତମେତା ଜାନାସ୍ । ବାବା ଜେନ୍ତ୍ର ନିଜର ପିଲାମନ୍କେ ଚଲାଚଲ୍‌ତି କରତା, ଆମେ ମିସା ସମାନ୍ ସେନ୍ତାରିସେ ଚଲାଚଲ୍‌ତି କରିରଇଲୁ । ୧୨ ଆମେ ତମ୍ଭକେ ସାଆସ୍ ଦେଇରଇଲୁ, ଦୁକ୍ ସାରାଇରଇଲୁ, ଆରି ପରମେସରଟାନେ ଟିକ୍‌ସଙ୍ଗ ଚଲାଚଲ୍‌ତି ଅଇ ବର୍ତ୍ତବାକେ ବାରୁଜିଆ କରତେରଇଲୁ । ପରମେସର ଜେ କି ତାର ରାଇଜେ ଆରି ତାର ମଇମା ଟାନେ ମିସିରଇବାକେ ତମ୍ଭକେ ଡାକ୍‌ଲାନ୍ତି ।

୧୩ ଆମେ ପରମେସରକେ ଏଟାରପାଇ ମିସା ଦନିଅବାଦ୍ ଦେଲୁନି, କାଇକେବଇଲେ ଜେତେବେଲେ ଆମେ ତାର ସୁବ୍‌କବର ତମ୍ଭକେ ଜାନାଇରଇଲୁ ସେଟା ପରମେସର ଟାନେ ଅନି ଆଇଲା ବାକିଅ ବଲି ତମେ ମାନିଲାସ୍ । ଏଟା ଲକ୍‌ମନର୍ ଟାନେଅନି ଆସି ଆଟେ ବଲି ନାଇ । ସତଇସେ ସେଟା ପରମେସରର୍ ବାକିଅ । ଆରି ତମରପାରି ବିସ୍‌ବାସିମନର୍ ମନ୍ ବିଡ଼ରେ, ସେଟା ଡାଟ୍ ଅଇରଇସି । ୧୪ \*ଏ ବାଇବଇନିମନ୍ ଜିଉଦା ଦେସେ ରଇବା ପରମେସରର୍ ମଣ୍ଡୁଲିମନ୍କେ ଆରି ତେଇ ରଇବା କିରିସ୍ତ ବିସ୍‌ବାସିମନର୍‌ଲାଗି ଜନ୍ ଗଟ୍‌ନା ଗଟିରଇଲା, ତମରପାଇ ମିସା ସେ ଗଟ୍‌ନା ଗଟ୍‌ଲା ଆଟେ । ସେମନ୍ ଜିଉଦିମନର୍ ଲଗେଅନି ଜନ୍ ରକାମ୍ ତାଡ଼ନା ପାଇରଇଲାଇ, ତମେ ମିସା ନିଜର ଦେସର ଲକ୍‌ମନର୍ ଲଗେଅନି ସେ ସମାନ୍ ତାଡ଼ନା ପାଇଆଟାସ୍ । ୧୫ \* ଜିଉଦିମନ୍ ମାପରୁ ଜିସୁକେ ଆରି ବବିସଡ଼ବକ୍‌ତାମନ୍କେ ମରାଇରଇଲାଇ ଆରି ଆମ୍ଭକେ ମିସା ଦୁକ୍ କସ୍ତ ଦେଇରଇଲାଇ । ସେମନର୍‌ଟାନେ ପରମେସର ସାନ୍ତି ନାଇ । ସେମନ୍ ସବୁ ମୁନୁସ୍‌ଜାତିର୍ ସଡ଼ରୁ ।

୧୬ ଜେନ୍ତାରି କି ଜନ୍ ସୁବ୍‌କବର ଜାନାଇଲେ ଜିଉଦି ନଇଲା ଲକ୍‌ମନ୍କେ ମୁକ୍ତି ମିଲି ପାରସି, ସେଟା ଚାଡ଼ି ଦେଅଡ଼ ବଲି ଆମ୍ଭକେ ସେମନ୍ ଚେସ୍ଟା କଲାଜନି । ଏନ୍ତାରି ସେମନ୍ କରତେରଇବା ପାପ୍ ଅଦିକ୍ ଅଦିକ୍ ବଡ଼ିଜାଇକରି ସାରାସାରି ଆସି କେଟିଆଟେ । ଏବେ ସାରାସାରି ବେଲାଇ ସେମନର୍ ବିରୁଦେ ପରମେସରର୍ ରିସା ଅଇଆଟେ ।

ପାଉଲ୍ ଆରିତରେକ୍ ଜିବାକେ ମନ୍‌କଲା

୧୭ ଏ ବାଇବଇନିମନ୍ ଜେତେବେଲେ ଆମେ ଚନେକ୍‌ପାଇ ତମରଟାନେଅନି ବିନେ ଅଇଜାଇରଇଲୁ, ସେଟା ଗାଗଡ଼ ଇସାବେ । ମାତର ଆମର ମନ୍ ବିଡ଼ରେ ତମେ ସବୁବେଲେ ବାସାଅଇରଇଲାସ୍ । ତମ୍ଭକେ ଏତାଇ ଏତାଇ କରି ବେସି ଚିନ୍ତା

କରୁତେରଇଲୁ । ପତେ ଆରିତରେକ୍ ତମକେ ଦେକ୍‌ବାକେ ଚେସ୍‌ଟା କରୁତେରଇଲୁ । ୧୮ ମାତର୍ ତମରଲଗେ ବାଉଡିଆଇବାକେ ଆମ୍‌କେ ବେସି ମନ୍‌ରଇଲା । ମୁଇ ନିଜେ ତମରଲଗେ ବାଉଡିଆଇବାକେ ଗଟେକ୍‌ତର୍ ଚେସ୍‌ଟାକରିରଇଲି, ମାତର୍ ଏଟାର୍‌ପାଇ ଆମ୍‌କେ ସଇତାନ୍ ବାଦା ଦେଲା । ୧୯ ସେ ଗାଲା କାତା ଗାଲାବେ । ମର୍ ଆସା ଆଚେ, ମାପୁରୁ ଜିସୁ ଆଇବା ବେଲେ ତମେ ଆମର୍ ଆସା, ସାର୍‌ଦା ବଡ଼ପନ୍ ଆରି ଜିଡ଼ବାଟା । ୨୦ ତମେ ସବୁବେଲେ ଆମର୍‌ପାଇ ଡାକ୍‌ପୁଟା ଆରି ସାର୍‌ଦା ।

### ୩

୧ \*ସାରାସାରିପତେ ଆମେ ଦୁକ୍ କସ୍‌ଟ ମୁର୍ତି ନାପାରିକରି ଆଡିନେସ୍‌ତେଇ କାର୍ ସଙ୍ଗ୍ ନ ମିସିକରି ଜିଉନାକାଉନା କରୁବଲି, କାତା ଅଇଲୁ । ୨ ତମକେ ବପୁ କରାଇବାକେ ଆରି ତମର୍ ବିସ୍‌ବାସ୍ ଡାଟ୍ କରାଇବାକେ ତମର୍ ଲଗେ ଆମର୍ ବାଇ ତିମତିକେ ପାଟାଇରଇଲୁ । ସେ ଆମର୍‌ସଙ୍ଗ୍ କିରିସ୍‌ଟର୍ ସୁବ୍‌କବର୍ ଜାନାଇକରି ପର୍‌ମେସରର୍ ସେବା କଲାନ୍ତି । ୩ ତମର୍ ଉପ୍‌ରେ ଅଇତେରଇବା ବିପଦର୍ ଲାଗି ଜେକ୍ରିକି କେ ମିସା ବିନ୍ ବାଟେ ନ ଜାଅଡ଼ । ସେଟାର୍‌ପାଇ ସେ ତମକେ ସାଇଜ କର୍‌ସି । ଏଲେମିସା ତମେତା ଜାନାସ୍, ଆମ୍‌କେ ମିସା ଏନ୍ତାରି କସ୍‌ଟ ମିଲୁଲାନି, ଏଟା ଆମର୍ ପାଇ ପର୍‌ମେସର ମନ୍ କର୍‌ବାଟା । ୪ ଆମେ ତମର୍‌ସଙ୍ଗ୍ ରଇଲା ବେଲେ, ବେସି ଆଗେଅନି ଆମ୍‌କେ ଦୁକ୍‌କସ୍‌ଟ ଆଇସି ବଲି ପୁର୍‌ବେଅନି ଜାନାଇ ଦେଇରଇଲୁ । ଏବେ ତମେ ଜାନ୍‌ଲାସିନ୍, ଟିକ୍ ସେଟାସେ ଗଟ୍‌ଲା । ୫ ଏଟାର୍‌ପାଇ ତମର୍ ବିସଇ ନାଜାନିକରି ମୁଇ ରଇ ନାପାର୍‌ଲି । ତମେ ବିସ୍‌ବାସେ ଆଟାସ୍ କି ନାଇ ଚିନ୍ତାକରି ମୁଇ ତିମତିକେ ପାଟାଇଲି । ଏଟାର୍‌ପାଇ ବଲି କେଡେବେଲେ ସଇତାନ୍ ତମକେ ପରିକା କରି ଆମେ ଆବଡ଼ ଅଇ କଲାଟା ରୁଟାଇ ଜାଇସି ବଲି ଡର୍‌ତେ ରଇଲି ।

୬ \*ମାତର୍ ତିମତି ତମରଲଗେଅନି ବାଉଡି ଆସି ତମର୍ ବିସ୍‌ବାସ୍ ଆରି ଆଲାଦର୍ ବିସଇର୍ ସୁବ୍‌କବର୍ ଆନ୍‌ଲା । ସେ ଆମ୍‌କେ ଜାନାଇଦେଲାଆଚେଜେ, ତମେ ସବୁବେଲେ ଆମ୍‌କେ ଆଲାଦ୍ ସଙ୍ଗ୍ ଏଡ଼ କଲାସିନ୍ ଆରି ଆମେ ଜେକ୍ରିକି ତମକେ ଦେକ୍‌ବାକେ ମନ୍ କଲୁନି, ତମେ ମିସା ସେରକାମ୍ ଆମ୍‌କେ ଦେକ୍‌ବାକେ ମନ୍ କଲାସିନ୍ । ୭ ତେବେ ଏ ବାଇବଇନିମନ୍, ଆମେ କାକୁର୍ଡି ଅଇ ଦୁକ୍ କସ୍‌ଟ ପାଇଲା ବେଲେ ତମର୍ ବିସ୍‌ବାସ୍‌ରଲାଗି ସାର୍‌ଦା ଅଇଲୁନି । ତମର୍ ବିସ୍‌ବାସ୍ ଆକା ଆମ୍‌କେ ସାଆସ୍ ଦେଇକରି ସଙ୍ଗ୍‌ଆଚେ । ୮ କାଇକେବଇଲେ ଏବେ ତମେ ଡାଟ୍‌ଅଇ ମାପୁରୁ ସଙ୍ଗ୍ ମିସିକରି ଆଟାସ୍ । ଏଟା ଆମେ ଜାନିକରି ଆରିତରେକ୍ ସାର୍‌ଦା ସଙ୍ଗ୍ ଜିଇଲୁନି । ୯ ଡୁ, ଆମର୍ ପର୍‌ମେସରର୍ ମୁଆଟେ ତମର୍ ଲାଗି ଆମେ ସବୁଲକ୍ ସାର୍‌ଦା ଅଇଲୁନି । ସେଟାର୍‌ପାଇ ତମର୍‌ଲାଗି ପର୍‌ମେସର୍କେ ଦନିଅବାଦ୍ ଦେଲୁନି । ୧୦ ତମେ ବିସ୍‌ବାସ୍ କଲାଟାନେ କେଡେଟା ଉନା ଆଚେ । ସେଟା ପୁରାପୁରୁନ୍ କର୍‌ବାକେ, ଆମେ ତମର୍‌ସଙ୍ଗ୍ କେକ୍ରି ମିସିପାର୍‌ରୁ, ଏଟାର୍‌ପାଇ ଦିନ୍ ରାତି ପାର୍‌ତନା କରିଲାଗିଆରୁ ।

୧୧ ତମରଲଗେ ଆଇବାକେ ଆମ୍‌କେ ଆମର୍ ବାବା ପର୍‌ମେସର୍ ଆରି ଆମର୍ ମାପୁରୁ ଜିସୁ ବାଟ୍ ତିଆର୍‌କରି ଦେଅଡ଼ । ୧୨ ଜେକ୍ରିକି ଆମର୍ ଆଲାଦ୍ ତମର୍‌ପାଇ ବଡିଆଇଲାନି, ସେନ୍ତାରିସେ ନିଜର୍ ନିଜର୍ ବିଡ଼ରେ, ଆରି ସବୁ ଲକ୍‌ମନ୍‌କେ ମାପୁରୁ ଆଲାଦ୍ ବଡାଇକରି ଅଦିକ୍ କର । ୧୩ ମାପୁରୁ ଏନ୍ତାରି ତମକେ ତବିର୍ କରାଅ । ଜେଡେବେଲେ ଆମର୍ ମାପୁରୁ ଜିସୁ ତାର୍ ନିଜର୍ ସୁକଲ୍ ଲକ୍‌ମନ୍‌ର୍ ସଙ୍ଗ୍ ଆଇବା ବେଲେ, ତମେ କାଇ ଦସ୍ ନ ଅଇଡେ ଆରି ସୁକଲ୍ ଅଇ, ବାବା ପର୍‌ମେସରର୍ ମୁଆଟେ ଚିଆଅଇସା ।

☆ ୩:୧ ୩:୧ ପେରିଡ଼ ୧୭:୧୫ ☆ ୩:୬ ୩:୬ ପେରିଡ଼ ୧୮:୫



## ୪

ପରମେସର୍ ଦେକ୍‌ବା ଇସାବେ ସାନ୍ତିରେ ରଇବା ଜିବନ୍

<sup>୧</sup> ତେବେ ଏ ବାଇମନ୍ ସାରାସାରି ବେଲାଇ କେନ୍ତାରି ଚଲାଟଲୁଡି କଲେ ପରମେସର୍ ସାରଦା ଅଇସି, ସେ ବିସଇ ତମେ ଆମରଟାନେଅନି ସିକିଆଟାସ୍ । ଆରି ସେନ୍ତାରିସେ ଚଲାଟଲୁଡି କଲାସ୍‌ନି । ତମେ ଜେନ୍ତାରି କଲାସ୍‌ନି, ସେ ଇସାବେ ଆରି ଆଗ୍ରୁ ଆଗ୍ରୁ ଜିବାକେ ଆମେ ତମକେ ମାପୁରୁ ଜିସୁର୍ ନାଉଁଦାରି ବାବୁଜିଆ କରି ସାରଦା କରାଇଲୁନି । <sup>୨</sup> କାଇକେବଇଲେ ମାପୁରୁ ଜିସୁର୍ଟାନେଅନି ଆଦେସ୍ ପାଇକରି ଜାଇ ଜାଇଟା କର୍ବାକେ କଇରଇଲୁ, ସେଟା ତମେ ଜାନାସ୍ । <sup>୩</sup> ଜେନ୍ତାରି କି ତମେ ବେସିଆ କାମଟାନେଅନି ବିନେ ରଇକରି, ସୁକଲ୍ ସଙ୍ଗ୍ ରଇବାଟା ପରମେସର୍ ମନ୍ କଲାନି । <sup>୪</sup> ସବୁଲକ୍ ସୁକଲ୍ ଆରି ଆଲାଦସଙ୍ଗ୍ ନିଜର୍ ନିଜର୍ ମାଇଜିମନର୍ ସଙ୍ଗ୍ ରଇବାକେ ସିକା । <sup>୫</sup> ଆରି, ଜେନ୍ତାରି ବିସ୍‌ବାସ୍ ନ କଲା ଲକ୍‌ମନର୍‌ପାରା ପରମେସର୍‌ର ବାକିଅ ନ ମାନିକରି ଆସାର୍ କାମ୍ କରାନାଇ । <sup>୬</sup> ଜେ ଜଦି ଏ ବିସଇ ନ ମାନିକରି କନ୍ ବିସ୍‌ବାସି ବାଇକେ ମିସା ଅନିଆଇ କର୍ସି ବଇଲେ, ମାପୁରୁ ଏ ସବୁ ବିସଇ ନେଇ ତଣ୍ଡ ଦେଇସି । ଏ କାତା ଆମେ ପୁର୍ବେ ଜାନାଇଦେଇ ଆରୁ । <sup>୭</sup> କାଇକେବଇଲେ ପରମେସର୍ ଆମ୍‌କେ ସୁକଲ୍ ନ ଅଇକରି ଜିଉନା କାଉନା କର୍ବାକେ ଡାକେନାଇ ମାତର୍ ସୁକଲ୍ ଅଇ ରଇବାକେ ଡାକିଆଟେ । <sup>୮</sup> ତେବେ ଜେ ଆମର୍ ଏ ସିକିଆ ନ ନାମେ, ସେ ଅବ୍‌କା ମୁନ୍‌ସକେ ନ ନାମେ । ମାତର୍ ଜନ୍ ପରମେସର୍ ତମର୍ ବିତ୍‌ରେ ସୁକଲ୍‌ଆଡ଼ମା ଦେଇସି, ତାକେ ନ ନାମେ ।

<sup>୯</sup> ଏ କିରିସ୍‌ଟ ବିସ୍‌ବାସି ବାଇବଇନିମନ୍, ତମର୍ ଆଲାଦ୍ କର୍ବା ବିସଇ ଆମେ ଆରି ଅଦିକ୍ ଲେକ୍‌ବାର୍ ଦର୍‌କାର୍ ନାଇ । କାଇକେବଇଲେ ତମେ ପରମେସର୍‌ଟାନେଅନି ନିଜର୍ ନିଜର୍ ବିତ୍‌ରେ ଆଲାଦ୍ କର୍ବାଟା ସିକିଆଟାସ୍ । <sup>୧୦</sup> ଆରି ଗୁଲାଇ ମାକିଦନିଆଇ ରଇବା ସବୁ ବିସ୍‌ବାସି ବାଇମନ୍‌କେ ସେନ୍ତାରି କଲାସ୍‌ନି । ଏଲେମିସା, ତମେ ଆରି ଅଦିକ୍ ଅଦିକ୍ ସେନ୍ତାରି କରା । <sup>୧୧</sup> ଆରି ତମ୍‌କେ ପୁର୍ବେ ଦିଆଅଇରଇବା ଆଦେସ୍ ଇସାବେ ତମେ ସାନ୍ତିସଙ୍ଗ୍ ରଇକରି ନିଜର୍ ନିଜର୍ କାମେ ଲାଗିରୁଆ, ପାଇଟି କାବାଡ୍ କରି ରୁଆ । ଏଟାର୍‌ପାଇ ଆମେ ତମ୍‌କେ ବାବୁଜିଆ କଲୁନି । <sup>୧୨</sup> ଏନ୍ତାରି କଲେ ବିସ୍‌ବାସ୍ ନ କର୍ବା ଲକ୍‌ମନ୍ ମିସା ତମ୍‌କେ ନାମ୍‌ବାଇ । ଆରି କାଇଟା ମିସା ଅବାବ୍ ନ ଅଏ । ତମ୍‌କେ ଦର୍‌କାର୍ ରଇବା ବିସଇପାଇ ବିନ୍‌ଲକ୍‌କେ ଆସା କର୍ବାକେ ନ ପଡେ ।

ମାପୁରୁ ଆରିତରେକ୍ ଆଇବାଟା

<sup>୧୩</sup> ଏ ବାଇବଇନିମନ୍, ଆସା ନ କର୍ବା ବିନ୍ ଲକ୍‌ମନର୍ ପାରା ଦୁକ୍ ଚିନ୍ତା ଅଇ ରୁଆନାଇ । ଏଟାର୍‌ପାଇ ତମେ ମରିଜାଇରଇବା ଲକ୍‌ମନର୍ ବିସଇ ଜାନିରୁଆ । <sup>୧୪</sup> କାଇକେବଇଲେ ଜିସୁ ମରିକରି ଆରିତରେକ୍ ଉଟିଆଟେ ବଲିକରି ଆମେ ବିସ୍‌ବାସ୍ କଲୁନି । ତେବେ ଆମେ ତାଟ୍ ସଙ୍ଗ୍ ଜାନି ଆରୁ କି, ଜନ୍ ଲକ୍‌ମନ୍ ଜିସୁକେ ବିସ୍‌ବାସ୍ କରି ମରିଆଟଡ୍, ସେ ଆରିତରେକ୍ ଆଇଲେ ପରମେସର୍ ତାର୍ ସଙ୍ଗ୍ ସେମନ୍‌କେ ଦାରିଜାଇସି ।

<sup>୧୫</sup> ଏବେ ଆମେ ତମକେ ଜନ୍ ସିକିଆ ଦେଲୁନି, ସେଟା ମାପୁରୁର୍ ସିକିଆ । ମାପୁରୁ ଆଇବା ବେଲେ ଜେଡ୍‌କି ଲକ୍ ଆମେ ନ ମରିକରି ଜିଇ ଆରୁ, ଆମେ ଦେକ୍‌ବା ଆଗ୍ରୁ ମରିଜାଇରଇବା ବିସ୍‌ବାସିମନ୍ ମାପୁରୁକେ ଦେକ୍‌ବାଇ । <sup>୧୬</sup> କାଇକେବଇଲେ ମାପୁରୁ ନିଜେ ଆଦେସ୍ ଦେଇ, ମୁକିଆ ଦୁତର୍ ସର୍ ଆରି ପରମେସର୍‌ର ବାଜାମଇରି ସଙ୍ଗ୍ ସର୍‌ଗେ ଅନି ଉଡର୍‌ସି । ଜିସୁକିରିସ୍‌ଟକେ ବିସ୍‌ବାସ୍‌କରି ଜନ୍‌ଲକ୍‌ମନ୍

ମରିଆତତ୍ତ୍ୱ ସେମନ୍ ତେଜ ପର୍ତ୍ତମେ ଉତ୍ତବାଇ । ୧୭ ତାର୍ପତେ ଆମେ ଜେତ୍ତକି ଲକ୍ ଜିବନ୍ ରଇରୁ, ସେବେଲେ ମେଗ୍‌ମାଲାଇଅନି ସେମନ୍‌ରସଙ୍ଗ୍ ଉତ୍ତରିକରି ସବୁବେଲେ ମାପ୍‌ରୁର୍ ସଙ୍ଗ୍ ସରଗ୍‌ପୁରେ ରଇରୁ । ୧୮ ଏସବୁ କାତାମନ୍ ସୁନାଇକରି ତମେ ନିଜର୍ ନିଜର୍ ଲକ୍‌ମନ୍‌କେ ସାଆସ୍ କରାଆ ।

**୫**

ମାପ୍‌ରୁ ଆରିତରେକ୍ ଆଇଲାନି ତିଆର୍ ଅଇରୁଆ

୧ ଏ ବାଇମନ୍, ମାପ୍‌ରୁ ଜିସୁର୍ ଦିନ୍ କେବେ ଆରି କେତେବେଲେ ଗଟ୍‌ସି, ସେ ବିସଇ ତମ୍‌କେ ଆରି ଅଦିକ୍ ଲେକ୍‌ବାକେ ଲତା ନାଇ, ୨ \*କାଇକେବଇଲେ ମାପ୍‌ରୁର୍ ଦିନ୍ ଗଟେକ୍ ଚର୍ ରାତିଆ ଗରେ ଆସି ପୁରଲାପାରା କେଟ୍‌ସି । ୩ ଜେତେବେଲେ ଲକ୍‌ମନ୍ ସାନ୍ତିସଙ୍ଗ୍ ରଇକରି ଆମ୍‌କେ ଆରି କାଇ ବିପଦ୍ ନ ଆସେ ବଲି ବାବ୍‌ତେରଇବାଇ, ସେତ୍‌କିବେଲେ ଅଟାତ୍ ଗାଗ୍‌ତେଅଇ ରଇଲା ମାଜ୍‌ଜିକେ ପିଲା ଜନମ୍ ଅଇବାବେଲର୍ ଦୁକାସୁକାପାରା ବିନାସର୍ ବେଲା ଆସି କେଟ୍‌ସି । ଆରି ସେମନ୍ କାଇଟା କଲେମିସା ତେଇଅନି ବୈ ନାପାରତ୍ । ୪ ମାତର୍ ଏ ବାଇବଇନିମନ୍, ଏବେ ତମେ ଆନ୍ଦାରେ ବାସାଅଇ ରୁଆସ୍ ନାଇ । ତେବେ ସେ ଦିନ୍ ତମର୍ ନାଜାନ୍‌ତେ ଆରି ଜାଗ୍‌ରତ୍ ନ ରଇଲା ବେଲାଇ ଚର୍‌ପାରା ଅଇ ନ ଆସେ । ୫ ତମେ ସବୁଲକ୍ ଉଜଲ୍ ଆରି ଦିନ୍ ବେଲର୍ ପିଲାମନ୍ । ଆମେ ରାତିଆଇ କି ଆନ୍ଦାରେ ରଉନାଇ । ୬ ତେବେ ଆସା, ଆମେ ବିନ୍ ଲକ୍‌ମନ୍‌ର୍ ପାରା ଗୁନି ଗୁନି କରି ନ ରଉଁ । ଚେତା ଅଇକରି ଜାଗ୍‌ରତ୍‌ସଙ୍ଗ୍ ରଉଁ । ୭ ତେବେ ଜନ୍ ଲକ୍‌ମନ୍ ସଇବାଇ, ସେମନ୍ ରାତିବେଲେ ସଇବାଇ । ଆରି ଜନ୍ ଲକ୍‌ମନ୍ ମାତ୍‌ବାଇ, ସେମନ୍ ରାତିଆ ମାତ୍‌ବାଇ । ୮ \*ଆମର୍ ବିସ୍‌ବାସ୍ ଆରି ଆମର୍ ଆଲାଦ୍ ଗଟେକ୍ ରକିଆ ପାଇବା ଲୁଆର୍ ବସ୍‌ତର୍ ପାରା ରକିଆ କର୍‌ସି । ଆମର୍ ଆସା ଗଟେକ୍ ଲୁଆର୍ ଚପି ପାରା ଆମ୍‌କେ ରକିଆ କର୍‌ସି । ୯ କାଇକେବଇଲେ ପର୍‌ମେସର୍ ଆମ୍‌କେ ରିସାର୍ ମୁତାର୍ ଡଣ୍ଟ୍ ପାଇବାକେ ନ ବାଟିକରି ଆମର୍ ମାପ୍‌ରୁ ଜିସୁକିରିସ୍‌ଟର୍ ଲାଗି, ମୁକ୍ତି ପାଇବାକେ ତିଆର୍ କଲାଆତେ । ୧୦ ସେ ଆମର୍ ଲାଗି ତାର୍ ଜିବନ୍ ଦେଲା । ଜେନ୍ତିକି ଆମେ ଜାଗ୍‌ରତ୍ ଅଇକରି ରଇଲେ କି ସଇକରି ରଇଲେ ମିସା ତାର୍ ସଙ୍ଗ୍ ଜିଇକରି ରଇବାର୍ ଅଇସି । ୧୧ ତେବେ ତମେ ଜେନ୍ତାରି କଲାସ୍‌ନି, ସେନ୍ତାରି ନିଜର୍ ଲକ୍‌ମନ୍‌କେ ଦୁକ୍ ସାରାଆ । ଆରି ସାଇଜ କର୍‌ତେରୁଆ ।

ସାରାସାରି କାତା

୧୨ ଏ ବାଇବଇନିମନ୍, ଆମେ ତମ୍‌କେ ଗୁଆରି କଲୁନି । ତମର୍ ବିତ୍‌ରେ ଜନ୍ ଲକ୍‌ମନ୍ କସ୍‌ଟ୍ କର୍‌ବାଇ, ଆରି ମାପ୍‌ରୁର୍ ସେବା କାମେ ମିସିକରି, ନେତା ପାରା ରଇକରି ତମ୍‌କେ ସିକାଇବାଇ, ସେମନ୍‌କେ ମାନିଅ କରା । ୧୩ ତାକର୍ କାମର୍ ଲାଗି ସେମନ୍‌କେ ଜିବନ୍ ପରାନ୍ ଦେଇକରି ଆଲାଦ୍ କରା । ନିଜର୍ ନିଜର୍ ଲକ୍‌ମନ୍‌ର୍ ସଙ୍ଗ୍ ସାନ୍ତିସଙ୍ଗ୍ ରୁଆ ।

୧୪ ଏ ବାଇବଇନିମନ୍, ଆମେ ତମ୍‌କେ ଗୁଆରି କଲୁନି । ପାଇଟି କାବାଡ୍ ନ କରି ବାଡୁ ଅଇ ରଇବା ଲକ୍‌ମନ୍‌କେ ଜାଗ୍‌ରତ୍ କରା । ତାକଲା ପୁଣ୍ଡିଲା ଲକ୍‌ମନ୍‌କେ ଜତନ୍ କରା । ତର୍‌ବା ଲକ୍‌ମନ୍‌କେ ସାଆସ୍ ଦିଆସ୍ । ଲକ୍‌ମନ୍‌ର୍ କୁଆ କାତା ମୁର୍ଚି କରି ରୁଆ । ୧୫ ଜାଗ୍‌ରତା, କେ ମିସା କାର୍‌ଆଲେ ଅନିଆଇର୍ ବାଦୁଲେ ଅନିଆଇ ନ କରା । ତାର୍ ବାଦୁଲେ ନିଜର୍ ନିଜର୍ ବିତ୍‌ରେ ଆରି ସବୁଲକ୍‌ର୍ ପାଇ ସବୁବେଲେ ମଙ୍ଗଲ୍ କର୍‌ବାକେ ଚେସ୍‌ଟା କରା ।

\* ୫:୨ ୫:୨ ମାଡିର ୨୪:୪୩; ଲୁକ୍ ୧୨:୩୯; ୨ ଯ ପିତର୍ ୩:୧୦      \* ୫:୮ ୫:୮ ଏପିସିୟ ୬:୧୩-୧୭

୧୬ ସବୁବେଳେ ସାର୍ଦାଅଇ ରୁଆ । ୧୭ ସବୁବେଳେ ପାର୍ତନା କରା । ୧୮ ସବୁ ସୁକ୍ ଦୁକ୍ ବେଳେ ମାପରୁକେ ଦନିଅବାଦ୍ ଦିଆସ୍ । କାଇକେବଇଲେ କିରିସ୍ଟ ଜିସୁର୍ ସଙ୍ଗ୍ ମିସିକରି ଜିଉନା କାଉନା କଲାସ୍ନି ବଲି ପର୍ମେସର୍ ତମର୍ଟାନେ ଅନି ମାଙ୍ଗ୍ଲାନି ।

୧୯ ସୁକଲ୍‌ଆଡ଼ମାକେ ଏଲା କରାନାଇ । ୨୦ ସୁକଲ୍‌ଆଡ଼ମା କଇଲା କାତା ଏଲା କରାନାଇ । ୨୧ ସବୁ ବିସଇ ପରିକା କରି ଦେକା, ଜନ୍‌ଟା ସଡ଼, ସେଟା ଚାଡ଼ାନାଇ । ୨୨ ସବୁ ରକାମର୍ କାରାପ୍ କାମେଅନି ଦୁରିକେ ରୁଆ ।

୨୩ ନିଜେ ସାନ୍ତି ଦେବା ପର୍ମେସର୍ ତମ୍‌କେ ପୁରାପୁରୁନ୍ କରି ସୁକଲ୍ କର । ଆରି ଆମର୍ ମାପରୁ ଜିସୁ ଆରିତରେକ୍ ଆଇବା ବେଳେ, ତମର୍ ଆଡ଼ମା, ଜିବନ୍, ଗାଗଡ଼ କାଇ ଦସ୍ ପାପ୍ ନ ଅଇକରି ସଙ୍ଗଇ ରଅ । ୨୪ ଜେ ତମ୍‌କେ ବାଡ଼ଲା ଆଟେ, ସେ ସେଟା କର୍ସି । କାଇକେବଇଲେ ସେ ବିସ୍‌ବାସ୍ ରକ୍‌ବା ଲକ୍ ।

୨୫ ଏ ବାଇବଇନିମନ୍, ଆମର୍‌ପାଇ ମିସା ପାର୍ତନା କରା ।

୨୬ ସବୁ ବାଇମନ୍‌କେ ସୁକଲ୍ ରଇ, ଆତେ ଦାରି ଜୁଆର୍ କରା ।

୨୭ ସବୁ ବାଇବଇନିମନ୍‌ର୍ ଲଗେ ଏ ଚିଟି ପଡ଼ାଆ ବଲି ମୁଇ ମାପରୁର୍ ନାଉଁ ଦାରି ତମ୍‌କେ ମୁଇ ତିଆରଲିନି ।

୨୮ ମାପରୁ ଜିସୁ ଜିବନ୍ ଦୁକାଇ ଦୟା କଲାଟା ତମର୍ ସଙ୍ଗ୍ ର ।

**ତେସଲନୀକିୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କର  
ଦ୍ୱିତୀୟ ପତ୍ର  
୨ ଯ ତେସଲନିକିୟ ମଣ୍ଡଳିର ବିସ୍ତାରିତମନ୍ତ୍ରଣା  
ପାଉଲ ଦୁଇପାଲି ଚିଠି ଲେଖିଲାଟା  
ଏ ବଇର ବିସଇ ଜାନ୍‌ବାଟା**

୨ ଯ ତେସଲନିକିୟ ବଇ ତେସଲନିକିୟ ମଣ୍ଡଳିତେଇ ଲେଖିଲା ଦୁଇ ପାଲି ଜାଇରଇଲା ଚିଠି । ଏ ଚିଠି ପେରିଡ଼ ପାଉଲ୍ ଲେକାଇରଇଲା ୧:୧ । ୧ ମ ତେସଲନିକିୟର ଦାପେ ଦାପେସେ କିରିସ୍ତ ଜନମ୍ କରି ୫୧ ବରସ୍ ଗାଲା ପତେ ଏ ଚିଠି ଲେକି ରଇଲା । ତେସଲନିକି ମଣ୍ଡଳିକେ ଚିଠି ଲେଖିଲା ବେଲେ ପାଉଲ୍ କରନ୍ତ୍ରୟ ମଣ୍ଡଳିତେଇ ରଇଲା । ଜନ୍ ମଣ୍ଡଳିକେ କି ସେ ମିସ୍ନାରି ଇସାବେ ଦୁଇ ପାଲି ଗାଲାବେଲେ ଗଢ଼ି ରଇଲା ପେରିଡ଼ ୧୭:୧-୧୦ ।

କେତେଟା ଜିଉଦିମନ୍ ଆରି କେତେଟା ଗିରିକ୍ ଲକ୍‌ମନ୍ ଲାଗି ଏ ମଣ୍ଡଳି ତାପନା ଅଇଲା ଆତେ ବଲି ପେରିଡ଼ ବଇଟାନ୍ କଇଲାଆତଡ଼ । ତେସଲନିକି ମଣ୍ଡଳି ଲେକାଅଇରଇବା ଚିଠିଟାନ୍ କିରିସ୍ତ ଆରିତରେକ୍ ଆଇବାଟା ଆରି ସାରାସାରିବେଲାର୍ ବିସଇ ଲେକାଅଇଲାଆତେ । କାଇକେବଇଲେ ପାଉଲ୍ ତାର୍ ଚିଠିଟାନ୍ ଏ ଦୁଇଟା ଜାକ ତେସଲନିକି ମଣ୍ଡଳିକେ ଲେକିଆତେ । ୨ ଯ ତେସଲନିକିୟଟାନ୍ ଲେକାରଇବା ବିସଇ ପାକାପାକି ଅଦା ବିସଇ ସାରାସାରିବେଲା ବିସଇରେସେ ଆତେ । ପାଉଲ୍ ଅଲ୍‌ସିଆ ବିସଇନେଇ ମିସା ତରିକନା କରାଇଲାନି । ସବୁ ମୁନୁସ୍ ଜାତି ସେମନ୍ କାଦିର୍ ପାଇ ପାଇଟିକାବାଡ଼ କର୍‌ବାର୍ ଆତେ ୩:୬-୧୦ ।

**ଏ ବଇ ବିଡ଼ରେ ରଇବାଟା**

- ୧. ପାଉଲ୍ ତାର୍ ଚିଠିଟାନ୍ ତାର୍ ନିଜର୍ ମଇତର୍‌ମନ୍‌କେ ଚିନାର୍ ଜାନାର୍ କରାଇ ଆରାମ୍ କଲାନି । ୧:୧-୨
- ୨. ତେସଲନିକି ମଣ୍ଡଳିର ପାଇ ପରମେସର୍‌କେ ଦନିଅବାଦ୍ ଦେଲାନି ଆରି ପାର୍‌ତନା କଲାନି । ୧:୩-୧୨
- ୩. ୨ ଯ ଅଦିଆଇ ଜଗତର୍ ସାରାସାରି ବେଲାର୍ ବିସଇ କଇଲାନି । ୨:୧-୧୭
- ୪. ସେ ଅଲ୍‌ସକେ ବିରଦ୍ କଲାନି ଆରି ପାଇଟିକାବାଡ଼ କର୍‌ବା ବିସଇ କଇଲାନି । ୩:୧-୧୫
- ୫. ପାଉଲ୍ ଆରିତରେକ୍ ମଣ୍ଡଳିର ଲକ୍‌ମନ୍‌କେ ଜୁଆର୍ ଜାନାଇକରି ସାରାଇଲାନି । ୩:୧୬-୧୮

୧ \*ମୁଇ ପାଉଲ୍, ବାବା ପର୍‌ମେସର୍ ଲଗେ ଆରି ମାପୁରୁ ଜିସୁକିରିସ୍ତ ତେଇ ରଇବା ତେସଲନିକିୟ ମଣ୍ଡଳିର ଲକ୍‌ମନ୍‌କେ ଏ ଚିଠି ଲେକି ପାଟାଇଲିନି । ମର୍ ସଙ୍ଗ୍ ରଇକରି ସିଲା ଆରି ତିମତି ମିସା ଜୁଆର୍ ଜାନାଇଲାଇନି ।

୨ ଆମର୍ ବାବା ପର୍‌ମେସର୍ ଆରି ମାପୁରୁ ଜିସୁକିରିସ୍ତ ତମ୍‌କେ ଜିବନ୍ ଦୁକାଇ ସାନ୍ତି ଦେଅ ।

ଜିସୁ ଆରିତରେକ୍ ଆସି ବିଚାର୍ କର୍‌ବାଟା

\* ୧:୧ ୧:୧ ପେରିଡ଼ ୧୭:୧

୩ ଏ ବାଇବଲନିମନ୍ ତମରପାଇ ଆମେ ପରମେସରକେ ସବୁବେଳେ ଦନିଅବାଦ ଦେବା କାତା । ଏଟା ଟିକ୍ ବିସଇ । କାଇକେବଇଲେ ତମର ବିସବାସ୍ ଅଦିକ୍ ଅଦିକ୍ ଅଇଲାନି । ଆରି ତମର ନିଜର୍ ନିଜର୍ ବିତ୍ତରେ ସବୁଲକ୍‌କେ ଆଲାଦ୍ ବଡିଗାଲାନି । ୪ ତମେ ଜେଡକି ସବୁ ଉତାସୁନିକରି ମିସା ବିସବାସ୍ କରି ବପୁସଙ୍ଘ୍, ତାଟ୍ ଅଇକରି ଆଗାସ୍ । ଏ କାତା ଆମେ ପରମେସରର୍ ମଣ୍ଡୁଲିମନ୍‌କେ ବଡପନ୍ ଅଇକରି କଇଲୁନି ।

୫ ପରମେସରର୍ ଜନ୍ ରାଇଜରପାଇ ତମେ ଦୁକ୍ କସଟ୍ ପାଇଲାସ୍‌ନି, ସେ ରାଇଜ୍ ପାଇସା । ପରମେସରର୍ ବିଚାର୍ କର୍ବାଟା ଟିକ୍ ଆକା, ଇଡିଅନି ସେଟା ଜାନିଅଇଲାନି । ୬ ଜନ୍‌ଟା ଟିକ୍, ସେଟା ପରମେସର୍ ପୁରାପୁରୁନ୍ କର୍ସି । ଜନ୍‌ଲକ୍‌ମନ୍ ଏବେ ତମ୍‌କେ କସଟ୍ ଦେଲାଇନି, ସେମନ୍ କସଟ୍ ପାଇବାଇ । ୭ ପରମେସର୍ ତମର୍ ଦୁକ୍ କସଟ୍ ଅଇବାଟା ସାରାଇକରି ଆମ୍‌କେ ମିସା ସାନ୍ତି ଦେଇସି । ଜେଡେବେଲେ ମାପରୁ ଜିସୁ ସର୍ଗେଅନି ତାର୍ ବପୁର୍ ଦୁଡମନ୍‌ର୍ ମଜାଇ ବପୁଅଇ ଆଇସି, ପରମେସର୍ ଏ କାମ୍ ପୁରାପୁରୁନ୍ କର୍ସି । ୮ ଜନ୍‌ଲକ୍‌ମନ୍ ପରମେସରକେ ନାଜାନଡ୍, ଆରି ଆମର୍ ମାପରୁ ଜିସୁର୍ ବାକିଅ ନ ମାନଡ୍, ସେନ୍ତାରି ଲକ୍‌ମନ୍‌କେ ସେ ତଣ୍ଟ ଦେବାକେ ଲାଗ୍‌ତେରଇବା ଜଇସଙ୍ଘ୍ ଆଇସି । ୯ ସେ ଲକ୍‌ମନ୍ ମାପରୁର୍ ମୁଆଟେ ତାଟ୍‌ସଙ୍ଘ୍ ତାକ୍‌ପୁଟା ପାଇବା ତେଇଅନି, କାଲ୍ କାଲ୍ ଜୁଗ୍ ଜୁଗ୍ ପାଇ କୁରୁପ୍‌ନାସ୍ ଅଇଜିବାଇ । ୧୦ ସେଦିନେ ମାପରୁ ତାର୍ ଲକ୍‌ମନ୍‌ର୍ ଟାନେଅନି ଆରି ସବୁ ଲକ୍‌ମନ୍‌ର୍ ଟାନେଅନି ତାକ୍‌ପୁଟା ଅଇ ସନ୍‌ମାନ୍ ପାଇସି । ଏମନ୍‌ର୍ ବିତ୍ତରେ ତମେ ମିସା ମିସାସା । କାଇକେବଇଲେ ଆମେ ଜନ୍ କବର୍ ଦେଇରଇଲୁ, ସେଟା ତମେ ବିସବାସ୍ କଲାସ୍ ଆରି ମାନ୍‌ଲାସ୍ ।

୧୧ ତମ୍‌କେ ଜେନ୍ତି ଜିଉନା କାଉନା କର୍ବାପାଇ ପରମେସର୍ ବାଟ୍‌ଲା ଆଟେ, ସେନ୍ତାରି ଚଲାଚଲ୍‌ତି କରାଇବାକେ ଆମେ ପରମେସରକେ ଗୁଆରି କଲୁନି । ସେ ତାର୍ ବପୁସଙ୍ଘ୍ ସବୁ ଆସା କର୍ବା ସଡ୍ ପୁରାପୁରୁନ୍ କରି ତମର୍ ବିସବାସ୍ ଡାଟ୍ କର । ସେଟାପାଇ ଆମେ ସବୁବେଳେ ତମର୍‌ଲାଗି ପାର୍‌ତନା କଲୁନି । ୧୨ ଏନ୍ତାରି କଲେ ଆମର୍ ସବୁଲକ୍‌ର୍ ପରମେସର୍ ଆରି ମାପରୁ ଜିସୁକିରିସ୍‌ଟ ଜିବନ୍ ଦୁକାଇ ତମ୍‌କେ ମିସା ତାକ୍‌ପୁଟା କରାଇସି । ଆରି ତମେ ମିସା ତାର୍‌ଟାନେ ତାକ୍‌ପୁଟା ଅଇସା ।

## ୨

### କାରାପ୍ କର୍ବା ଲକ୍

୧ ☆ ଏ ବାଇବଲନିମନ୍, ମାପରୁ ଜିସୁକିରିସ୍‌ଟ ଆରିତରେକ୍ ଆଇବା ବିସଇ ଆରି ତାର୍‌ଲଗେ ଆମେ ସବୁଲକ୍ ରୁଣ୍ଡିଅଇବା ବିସଇ, ତମ୍‌କେ ଆମେ ବାବୁଜିଆ କଲୁନି । ୨ କାର୍‌ଲଗେଅନି ମିସା ମାପରୁର୍ ଦିନ୍ କେଟ୍‌ଲାବେ, ବଲିକରି ସୁନିଦେଇ କିଲ୍‌ବିଲ୍ ଉଆନାଇ । ଜଦି ସେ କବର୍ ଆମେ ବବିସଡକାତା କଇଲୁ କି ଜାନାଇଲୁ ନଇଲେ ଚିଟିଟାନେ ଲେକିଆଟଡ୍ ବଲି ସୁନ୍‌ଲେ ମିସା ସେନ୍ତାର୍ ଉଆନାଇ । ୩ କେ ମିସା ସେନ୍ତାରିକରି ତମ୍‌କେ ବୁଲ୍ ବାଟେ ନ ନେଅ । କାଇକେବଇଲେ ପର୍‌ଡୁମ୍ ଦରମର୍ ପାଇ ବିରଦ୍ ଅଇସି । ତାର୍‌ପଟେ ବିନାସ୍ କରୁ ଜେ କି ପାପି ମୁନ୍‌ସ୍ ଆଇବା ଦରକାର୍ । ସେ ପାପି ମୁନ୍‌ସ୍ ନ ସାରବା ମରନେ ଜାଇସି । ୪ ସେ ଦୁରାଟାର୍ ମୁନ୍‌ସ୍ ଜନ୍ ସବୁ ବିସଇ ପରମେସରର୍ ବଲି ଲକ୍‌ମନ୍ ପୁଜା କଲାଇନି, ସବୁର୍‌ଟାନେଅନି ସେ ନିଜେ ମୁକିଅ ବଲି କଇସି । ଜେନ୍ତି କି ପରମେସରର୍ ମନ୍‌ରେ ବସିକରି ମୁଇ ଆକା ପରମେସର୍, ବଲି ଦେକାଇ ଅଇସି ।

୫ ମୁଞ୍ଚ ତମର ସଙ୍ଗେ ରଇଲାବେଳେ ତରକେ ତର ଏ ସବୁ ବିସଇ ଏତାଇ ଦେଇତେ ରଇଲି । ସେଟା କାଇ ତମର ମନେ ନାଇ କି ? ୬ ଅଇଲେମିସା ସେ ବିପଦ ଏବେ ନ ଗଟେତା । କାଇକେବଇଲେ ତାରସଙ୍ଗେ ଦୁଇବାକେ ଏବେ ଗଟେକ୍ ବପୁ ଆଟେ । ସେଟା କାଇ ତମେ ଜାନାସ୍ କି ? ସମାନ୍ ବେଲାଇ ସେ କାରାପ୍ ଲକ୍ ବାରଇସି । ୭ କାଇକେବଇଲେ ଏବେ ମିସା ଲୁଚ୍ତେ ଅନିଆଇର୍ ପାପ୍ କାମ୍ ଚାଲିଆଟେ । ଜନ୍ କାରାପ୍ ଲକ୍ ମାପୁରୁର୍ ବାଟେ ଜିବା ଲକ୍ମାନକେ ବିରଦ୍ କଲାନ୍, ସେ ଲକ୍ ବିନାସ୍ ନ ଅଇବା ଜାକ, ଏଟା ଏକ୍ତିସେ ଅଇତେରଇସି । ୮ ସେଡ୍‌କିବେଲେ ସେ କାରାପ୍ ଲକ୍ ଦେକାଇ ଅଇସି । ତାକେ ମାପୁରୁ ଜିସୁ ତାର ନିଜର୍ ଟଣ୍ଡେଅନି ବାରଇବା ପୁଣ୍ଡା ସଙ୍ଗେ ନାସ୍ କରସି । ଆରି ତରେକ୍ ସେ ଡାକ୍‌ପୁଟା ସଙ୍ଗେ ଆଇବାବେଳେ ସେ କାରାପ୍ ଲକ୍ ବିନାସ୍ ଅଇଜାଇସି । ୯ \*ସେ କାରାପ୍ ଲକ୍, ସଇତାନର୍ ବପୁ ପାଇକରି ଆଇସି । ଆରି କାବା ଅଇବା କାମମନ୍ କରି ଦେକାଇସି । ୧୦ କେତେ କେତେ ଲକ୍ମାନ ସେ କରବା କାମେ ଜାଇ କିଲ୍‌ବିଲ୍ ଅଇବାଇ ଆରି ନସ୍ଟ ଅଇଜିବାଇ । ଜନ୍ ସଡ୍ ମାନିକରି ସେବାଟେ ଗାଲେ, ସେମନ୍ ନ ସରବା ଜିବନ୍ ପାଇତାଇ, ସେଟା ଚାଡିଦେଇରଇବା ଲାଗି ସେମନ୍‌କେ ଏ ଦସା ଅଇସି । ୧୧ ସେମନ୍ ଜେକ୍ଟିକି ମିର୍ କାତା ବିସବାସ୍ କରବାଇ, ସେଟାର୍‌ପାଇ ପର୍‌ମେସର୍ ସେମନ୍‌ଟାଣେ ସଡ୍ ନଇବା ବପୁ ପାଟାଇସି । ୧୨ ଜେକ୍ଟିକି ଜନ୍ ଲକ୍ମାନ ସଡ୍ ବିସଇ ବିସବାସ୍ ନ କରି ମିର୍ ବିସଇ ବିସବାସ୍ କରି ସାର୍‌ଦା ଅଇବାଇ, ସେମନ୍ ସବୁଲକ୍ ଏ ରକାମ୍ ଡଣ୍ଡ ପାଇବାଇ ।

**ବିସ୍‌ବାସେ ତବିର୍ ଅଇରଇବାର୍**

୧୩ ତେବର୍‌ପାଇ ଏ ବାଇବଇନିମନ୍, ତମର୍‌ପାଇ ସବୁବେଳେ ପର୍‌ମେସର୍‌କେ ଦନିଅବାଦ୍ ଦେବାର୍ ଆଟେ । କାଇକେ ବଇଲେ ପର୍‌ମେସର୍ ତମ୍‌କେ ଆଲାଦ୍ କଲାନ୍ ଆରି ଆଗେଅନି ସେ ତମ୍‌କେ ବାଟ୍‌ଲା ଆଟେ । ଜେକ୍ଟିକି ସେ ତମ୍‌କେ ରକିଆ କରି ପାରସି । ସୁକଲ୍ ଆଡ୍‌ମାର୍ କାମର୍ ଲାଗି ତମେ ସୁକଲ୍ ଅଇ ସଡ୍ ବିସଇ ବିସବାସ୍ କରି ପାରସା । ୧୪ ଆମେ ତମର୍‌ଟାଣେ ଜନ୍ ନିମାନ୍ କବର୍ ଜାନାଇଆଟୁ, ସେଟାର୍‌ଲାଗି ପର୍‌ମେସର୍ ତମ୍‌କେ ବାଟ୍‌ଲା ଆଟେ । ଆମର୍ ମାପୁରୁ ଜିସୁ କିରିସ୍‌ଟର୍ ନାଉଁ ଡାକ୍‌ପୁଟା ଅଇବା ଟାଣେ ମିସାଇବାକେ ବାଟିଆଟେ । ୧୫ ତେବେ ଏ ବାଇବଇନିମନ୍, ତମେ ତବିର୍ ଅଇକରି ରୁଆ । ଆମେ ବାକିଅ ଦେଲାଟାଣେ ଅନି, କି ଚିଟିତେଇ ଅନି ତମେ ଜନ୍‌ଟା ସିକିଆଟାସ୍, ସେ ସବୁ ଚାଡାନାଇ ।

୧୬ ନିଜେ ଆମର୍ ମାପୁରୁ ଜିସୁ କିରିସ୍‌ଟ, ଆରି ଜନ୍ ଆମର୍ ବାବା ପର୍‌ମେସର୍ ଆମ୍‌କେ ଆଲାଦ୍ କଲା, ସେ ଆକା ଆମ୍‌କେ ଜିବନ୍ ଦୁକାଇକରି କେବେ ନ ସାର୍‌ବା ବପୁ ଆରି ଆସା ଦେଇଆଟେ । ୧୭ ସେ ସବୁବେଳେ ସଡ୍ କାମ୍ କରବାକେ ଆରି ବାକିଅତେଇ ତବିର୍ ଅଇ ରଇବାକେ ସାଇଜ କର ।

**୩**

**ପାର୍‌ତନାର୍ ଲାଗି ଗୁଆରି**

୧ ଏ ବାଇବଇନିମନ୍, ସାରାସାରି ଆମର୍‌ପାଇ ପାର୍‌ତନା କରା । ମାପୁରୁର୍ ବାକିଅ ତମର୍ ବିଡ୍‌ରେ ଜେକ୍ଟିକି ଦାପ୍‌ରେ ଡାବିଅଇ ଜାଇରଇଲା, ସେନ୍ତାରିସେ ଦାପ୍‌ରେ ଗୁଲାଇବାଟେ ବିଟିଅଇକରି ଡାକ୍‌ପୁଟା ଅ । ୨ ଜେନ୍ତାରି କି ପର୍‌ମେସର୍ ଆମ୍‌କେ ପର୍‌କାର୍ ଆରି କୁଟିଆଲ୍ ଲକ୍ମାନର୍ ଟାଣେଅନି ରକିଆ କର । କାଇକେବଇଲେ, ସବୁଲକ୍ ମାପୁରୁର୍ ବାକିଅ ବିସବାସ୍ କରଡ୍ ନାଇ । ଏଟାର୍‌ପାଇ ଆରିତରେକ୍ ପାର୍‌ତନା କରା ।

\* ୨:୯ ୨:୯ ମାଡିଭ ୨୪:୨୪

୩ ଫାତରୁ ଫାପରୁ, କାତା ରକିଆକାରି । ସେ ତମକେ କାରାପଟାନ୍ଦେଅନି ରକିଆ କରି ତବିର କରାଇସି । ୪ ଆମେ ଜେଡ଼କି ସବୁ ଆଦେସ୍ ଦେଲେ ମିସା ତମେ ସେଟା କଲାସ୍‌ନି, ଆରି କରସା ମିସା । ଏଟା ଫାପରୁଟୁ ଟାନ୍ଦେ ତମର ବିସଇ ନେଇ ଆମେ ତାଟୁସଙ୍ଗର ବିସବାସ୍ ।

୫ ଆରି ଫାପରୁ ତମର ମନ୍ଦକେ ପର୍ଦ୍ଦେସରର ଆଲାଦ୍ ଆରି କିରିସ୍‌ଟର ସାଆସ୍ ବାଟେ ଜିବାକେ ସାଇଜ କର ।

ଅଲସର୍ ବିରୁଦେ ଚେତାଇବାଟା

୬ ଏ ବାଇବଇନିମନ୍, ଆମେ ତମକେ ଆମର ଫାପରୁ ଜିସୁ କିରିସ୍‌ଟର ନାଉଁ ଦାରି ଆଦେସ୍ ଦେଲୁନି । କନ୍ ବାଇ ମିସା ଆମରଟାନ୍ଦେଅନି ପାଇରଇବା ସିକିଆ ଇସାବେ ମାନିକରି ବାଡୁଅଇକରି ଚଲାଟଲୁଡି କରସି ବଇଲେ, ତାରଟାନ୍ଦେଅନି ବେଗ୍‌ଲି ଦିଆସ୍ । ୭ କାଇକେବଇଲେ, ତମେ, ଆମେ କଲାପାରା କରବା ଦରକାର୍ । ଆରି ସେଟା କେନ୍ତାରି କରବାର ନିଜେ ଜାନିଆଟାସ୍ । ସେଟାରପାଇ ଆମେ ତମର ଟାନ୍ଦେ ବାଡୁଅଇକରି ଚଲାଟଲୁଡି କରୁନାଇ । ୮ କାର୍ ଗରେ ମିସା ଉଜେ ଉଜେ ମାଜି ନ କାଇତେରଇଲୁ । ତମର ବିତ୍‌ରେ କାର୍‌ମିସା ବଜ୍ ପାରା ନ ଅଇ ରଇକରି କସ୍‌ଟ ପାଇ, ଆବଡ୍ ପାଇଟି କରି ଦିନ୍‌ରାତି କାମ୍ କରତେରଇଲୁ । ୯ ତମକେ କାଇବାଟା ମାଜିବାକେ ଆମର ଅଦିକାର୍ ରଇଲା, ମାତର ସେନ୍ତାରି କରୁନାଇ । କାଇକେବଇଲେ ତମରପାଇ ଗଟେକ୍ ଉଦାଅରନ୍ ଦେକାଇବାକେ ସେନ୍ତାରି କଲୁ । ୧୦ ତମର ସଙ୍ଗ୍ ରଇଲାବେଲେ ଆମେ ତମକେ କଇରଇଲୁ, ଜନ୍ ଲକ୍ ପାଇଟି କାବାଡ୍ ନ କରେ, ସେ ବାଡ୍‌ପେଜ୍ ନ କାଅ ।

୧୧ ଏବେ ଏ କାତା ଆରିତରେକ୍ କଇଲୁନି, କାଇକେବଇଲେ ଆମେ କବର୍ ପାଇଲୁ ଆତୁଜେ, ତମର ବିତ୍‌ରେ କେତେକ୍ ଲକ୍‌ମନ୍ ବାଡୁ ଅଇକରି ଜିଉନାକାଉନା କଲାଇନି । କାଇ ପାଇଟି ନକରି ବିନ୍ ଲକ୍‌ର କାମେ ମଜାଇ ଅଇସି ଆରି କାଇଟାମିସା ନ କରଡ୍ । ୧୨ ଫାପରୁ ଜିସୁକିରିସ୍‌ଟର ନାଉଁ ଦାରି ଆମେ ସେ ଲକ୍‌ମନ୍‌କେ ଜାଗରଡ଼କରି ଆଦେସ୍‌ଦେଲୁନି, ସେମନ୍ ସେନ୍ତାରି କରବାଟା ଚାଡିଦେସ୍ । ଜେନ୍ତାରିକି ନିଜର୍ ପେଟରପାଇ କାଦି ପାଇବାକେ ପାଇଟି କରଡ୍ ।

୧୩ ଫାତରୁ ଏ ବାଇବଇନିମନ୍ ତମେ ସଡ଼କାମ୍ କରବାକେ ତାକିଜାଆ ନାଇ । ୧୪ ଏ ଚିଟିଲଗେ ତମକେ ଜନ୍ କବର୍‌ପାଟାଇଲୁ ଆତୁ, କେନ୍ତ୍ର ଆଲେ ତମର ବିତ୍‌ରେଅନି କେ ମିସା ସେଟା ମାନ୍‌ବାକେ ମନ୍ ନ କରେ, ସେନ୍ତାରି ଲକ୍‌କେ ଚିନିରୁଆ ଆରି ତାରସଙ୍ଗ୍ ମିସିବିଡି ରଇବାଟା ଚାଡି ଦିଆସ୍ । ୧୫ ସେନ୍ତାର କଲେ ସେ ଲାଜ୍ ଅଇଜାଇସି । ମାତର ତାରସଙ୍ଗ୍ ସଡ଼ରୁର ପାରା କାତାବାର୍‌ତା ନ ଅଇକରି, ନିଜର୍ ବିସବାସି ବାଇପାରା ତାକେ ଜାଗରଡ଼ କରା ।

ସାରାସାରି କାତା

୧୬ ଜନ୍‌ଫାପରୁ ଆମକେ ସାନ୍ତି ଦେଲାନ୍, ସେ ତମକେ ସବୁବେଲେ ଆରି ସବୁରକାମ୍ ସାନ୍ତିଦେଅ । ଫାପରୁ ତମର ସବୁରଲଗେ ରଅ ।

୧୭ ମୁଇ ମର ନିଜର୍ ଆଡେ ଏଟା ଲେକ୍‌ଲିନି । ପାଉଲର୍ ଜୁଆର୍ ଜାନାଇଲୁନି । ମୁଇ ଲେକିରଇବା ସବୁ ଚିଟିପତର ଲଗେ ମୁଇ ଏନ୍ତାରି ଦସ୍‌ତକଡ଼ କରି ଲେକିରଇବି ।

୧୮ ଆମର ଫାପରୁ ଜିସୁକିରିସ୍‌ଟର ଜିବନ୍ ଦୁକାନି ତମକେ ସବୁକେ ମିଲ ।

# ତୀମଥୁକ ନିକଟକୁ ପାଉଲଙ୍କର ପ୍ରଥମ ପତ୍ର ପାଉଲ ତିମତିଙ୍କେ ଲେକିରଇବା ପତ୍ରତୁମ୍ ଚିଟି ଏ ବଇର ବିସଇ ଜାନବାଟା

ପତ୍ରତୁମ୍ ତିମତି ବଇ ଗଟେକ୍ ଚିଟିପାରା । ପେରିଡ୍ ପାଉଲ୍‌ଟାନେଅନି ତର୍ସିସ୍ ତିମତିର୍ପାଇ ଏ ଚିଟି ଲେକାଜାଇ ଆଟେ ।

ପତ୍ରତୁମ୍ ତିମତି ଜିସୁକିରିସଟ୍ ଜନମ୍ ଅଇକରି ୬୨-୬୪ ବିଡ୍ରେ ଲେକାଅଇଆଟେ । ଏଟା ପାଉଲ୍‌ର ଜିବନର୍ ସାରାସାରିର୍ ବେଲା ଅଇରଇସି କାଇକି । ପାଉଲ୍ ଆରି ତିମତି ଦୁଇଲକ୍ ମିସିବିଡିକରି ରଇଲା । ସେ କେବେକେବେ ତିମତିଙ୍କେ ପ ବଲିକରି ଡାକ୍ତେ ରଇଲା । ପିଲିପିୟ ୨:୨୨; ପତ୍ରତୁମ୍ ତିମତି ୧:୨; ୧:୧୮ । ଏଟା ପାଉଲ୍‌ଟାନେ ଅନି ଲେକି ରଇବା ଚାର୍ଟା ଚିଟି ବିଡ୍ରେ ଅନି ଏଟା ଅଇଲାନି ଗଟେକ୍ । ଜନ୍‌ଟାନେକି ମଣ୍ଡୁଲିକେ ଚାଡିକରି ଗଟେକ୍ ଲକ୍‌ର ବିସଇରେ ଜାନାଇଲାନି । ଅଲ୍‌ଗା ତିନ୍‌ଟା ବଇ, ଦୁତିଅ ତିମତି, ତିତସ୍ ଆରି ପିଲିମନ୍ । ପତ୍ରତୁମ୍ ତିମତିଟାନେ ମଣ୍ଡୁଲିକେତେଇ ଏନ୍ତାରି ଉପାସନା କର୍ବା ବିସଇ ଆଟେ । ୨:୧-୫ ।

ଇତି ମଣ୍ଡୁଲିର୍ ନେତାମନ୍ କେନ୍ତାରି ରଇବାର୍‌ଆଟେ ସେ ବିସଇରେ ଲେକାଅଇଆଟେ । ୩:୧-୧୩ ମିର୍ ସିକିଆ ଦେଉମନର୍‌ଟାନେ ଅନି କେନ୍ତ୍ର ଜାଗର୍‌ତା ରଇବାର୍ ସେ ବିସଇରେ ଆଟେ । ୧:୧-୧୧, ୪:୧-୫, ୬:୨-୫ । ତିମତିଙ୍କେ ମଣ୍ଡୁଲି ବିଡ୍ରେ କେନ୍ତାରି ଗଟେକ୍ ନେତାଅଇବା ଦର୍‌କାର୍ ସେଟା ପାଉଲ୍ ସିକିଆଦେବା ବିସଇ ଜାନାଇଲାନି ପତ୍ରତୁମ୍ ତିମତି ଏବର୍ ଗାଉଁମନ୍‌କେ ରଇବା ମଣ୍ଡୁଲି ଚାଲାଇବାକେ କେନ୍ତାରି କାମ୍ କର୍ବାର୍ ଆଟେ ସେଟା ଜାନାଇଲାନି । ଆରି ଆମର୍ ଜୁଗର୍ ମଣ୍ଡୁଲିର୍ ନେତାମନର୍ ପାଇ କେତେଟା ମୁଲିକା ଉପାଇରେ ସିକାଇଲାନି ।

### ଏ ବଇ ବିଡ୍ରେ ରଇବାଟା

- ୧. ପାଉଲ୍ ତିମତିଙ୍କେ ଜୁଆର୍ ଜାନାଇକରି ଲେକ୍‌ଲାଟା ମୁଲିଆଇ ଆଟେ । ୧:୧-୨
- ୨. ପାଉଲ୍ ତିମତିଙ୍କେ ମିର୍ ସିକିଆ ଦେବା ଗୁରୁମନର୍ ବାଟେ ନ ଜିବାକେ ଜାଗର୍‌ତ୍ କରାଇଆଟେ । ୧:୩-୧୧
- ୩. ପାଉଲ୍ କିରିସଟ୍‌କେ କେତେକ୍ ବିସ୍‌ବାସ୍ କଲାନି ସେଟା ଜିସୁର୍‌ଟାନେ ରୁଜାଇଲାନି । ୧:୧୨-୧୯
- ୪. ପାଉଲ୍ ମଣ୍ଡୁଲିଟାନେ ସେବାକର୍‌ବାଟା ଆରି ନେତାମନର୍ ବିସଇରେ ଆଦେସ୍ ଦେଇ ଆଟେ । ୨-୩
- ୫. ସାରାସାରି ପାଉଲ୍ ତିମତିଙ୍କେ କେତେଟା କର୍ବା ବିସଇ ଜାନାଇକରି ଲେକା ସାରାଇଲାନି । ୪-୬

ତିମତିର୍ ଲଗେ ପେରିଡ୍ ପାଉଲ୍‌ର ପତ୍ରତୁମ୍ ଚିଟି

୧ ମୁଇ ପାଉଲ୍ ଜିସୁକିରିସଟ୍‌ର ଗଟେକ୍ ପେରିଡ୍, ଏ ଚିଟି ଲେକ୍‌ଲିନି । ଆମର୍ ମୁକ୍‌ତିକାରିଆ ପର୍‌ମେସର୍ ଆରି ଆମେ ଆସା କରିରଇବା କିରିସଟ୍ ଜିସୁର୍ ଆଦେସ୍ ଇସାହେ ବାଟିଅଇଆଟି ।

୨ \*କିରିସଟ୍‌କେ ବିସ୍‌ବାସ୍ କଲାର୍‌ପାଇ, ତୁଇ ତିମତି ମର୍ ନିଜର୍ ପଅ ଅଇ ଆରୁସ୍ । ଆମର୍ ବାବା ପର୍‌ମେସର୍ ଆରି ମାପ୍‌ରୁ ଜିସୁ କିରିସଟ୍ ତମ୍‌କେ ଜିବନ୍ ଦୁକାଇ ଦୟା ଦେକାଅ ଆରି ସାନ୍ତି ଦେଅ ।

ସଡ୍ ନଇଲା ଉପ୍‌ଦେସ୍ ପାଇ ଜାଗର୍‌ତା

☆ ୧:୨ ୧:୨ ପେରିଡ୍ ୧୭:୧



୩ ମୁଞ୍ଚ ମାକିଦନିଆଇ ଜିବା ଆଗତୁ ତମକେ ଏପିସିଅତେଇ ରୁଆ ବଲି କଇରଇଲି । ତେଇ ଜନ୍ ଲକ୍ମନ ବୁଲ୍ ସିକିଆ ସବୁ ଦେଲାଇନି, ସେମନ୍‌କେ ବୁଲ୍ ସିକିଆ ଦେବାଟା ବନ୍ଦ କରବାକେ ଆଦେସ୍ ଦିଆସ୍ ବଲି ମୁଞ୍ଚ ତମକେ କଇରଇଲି । ୪ ସେମନ୍ ଗଣ୍ଡେ ପାନ୍ଦି କାତା କଇବାଇ ଆରି ଆଗତୁର୍ ଆନିଦାଦିମନର୍ କୁଟୁମର୍ କାତା ତିଆର୍ କରବାଟା ଚାଡାବଲି ତିଆରା । ଲକ୍ମନକେ ଏନ୍ତାରି ସିକିଆ ଦେଇତେରଇଲେ ଲକ୍ମନ ତେଇ ଦଦାପେଲା ଅଇବାଇ । ବିସ୍‌ବାସ୍ ମାନିକରି ଜନକାମ୍ ପରମେସର୍ ସେମନ୍‌କେ କରତ୍ ବଲି ମନ୍ କଲାନି, ସେଟା ସେମନ୍ କରତ୍ ନାଇ । ୫ ତମେ ଏନ୍ତାରିଟା ତିଆରା ଜେନ୍ତାରିକି, ସେମନ୍ ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କରବାଇ । ଜନ୍ ଲକ୍ମନକେ ସତ୍ ବିସ୍‌ବାସ୍ ଆରି ସୁକଲ୍ ଜିବନ୍, କାଇ କପଟ୍ ନ ରଇବା ମନ୍ ଆତେ, ସେମନ୍‌ସେ ଏଟା କରପାର୍‌ବାଇ । ୬ ମାତର୍ ଜନ୍ ଲକ୍ମନ ବୁଲ୍ ସିକିଆ ଦେଲାଇନି, ଏ ସବୁ ବିସଇ ଚାଡିଦେଇକରି ରୁଟା ବିସଇ କାତା ଅଇଲାନି । ୭ ନିୟମ୍ ଗୁରୁ ଇସାବେ ସବୁଲକ୍ ସେମନ୍‌କେ ନାମତ୍ ବଲି ସେମନ୍ ମନ୍ କଲାଇନି । ମାତର୍ ସେମନ୍ ସିକାଇବା ବିସଇ ନିଜେ ବୁଜତ୍‌ନାଇ ଆରି ସାଆସ୍ ସଙ୍ଗ୍ ଜନ୍‌ଟା ସତ୍ ବଲି କଇଲାଇନି, ସେଟା ସତ୍ କି ନଏଁ ବଲି ନାଜାନତ୍ ।

୮ ପରମେସରର୍ ନିୟମ୍‌ଗାନେ କାଇ ଅନିଆଇ ନାଇ । ମାତର୍ ଲକ୍ମନ ସେଟା ଟିକ୍ ସଙ୍ଗ୍ ସିକାଇବାର୍ ଆତେ । ୯ ଦରମ୍ କାମ୍ କରବା ଲକ୍ମନର୍‌ପାଇ ନିୟମ୍ ତିଆର୍ ନ ଅଇରଇଲା । ତାର୍ ବାଦୁଲେ ଜନ୍ ଲକ୍ମନ ତାର୍ ବିରଦି ଅଇରଇଲାଇ, ଆରି ତାର୍ କାତା ମାନି ନ ରଇଲାଇ, ସେନ୍ତାରି ଲକ୍ମନର୍ ପାଇ ପରମେସର୍ ନିୟମ୍ ତିଆର୍ କରିରଇଲା । ଜନ୍ ଲକ୍ମନ ପରମେସର୍ ରଏ ନାଇ ବଲି ଚଲାଟଲ୍‌ତି କଲାଇନି, ଜନ୍ ଲକ୍ମନ ପାପ୍ କରବାଇ, କରାପ୍ କାମ୍ କରତେରଇବାଇ, ଆରି ପରମେସର୍‌କେ ସନ୍‌ମାନ୍ ନ ଦେଇତେରଅତ୍, ଜନ୍‌ଲକ୍ମନ କି ତାକର୍ ଆୟା ବାବାମନ୍‌କେ ମରାଇବାଇ କି ବିନ୍ ଲକ୍ମନକେ ମିସା ମରାଇବାଇ, ୧୦ ବେବିଟାର୍ କାମ୍ କରି ପାପ୍ କରବାଇ, ମୁନ୍‌ସ୍‌ମୁନ୍‌ସ୍ ବିତ୍‌ରେ ଆରି ମାଇଜିମାଇଜି ବିତ୍‌ରେ ବେବିଟାର୍ କାମ୍ କରବା ଲକ୍ମନର୍‌ପାଇ, ଗତିଦାଙ୍ଗ୍‌ଡା ଇସାବେ ଲକ୍ମନକେ ବିକ୍‌ବା ସାଉକାର୍ ମନର୍‌ପାଇ, ଜନ୍ ଲକ୍ ସତ୍ କଅଡ୍‌ନାଇ, ସତ୍‌ସେ କଇବି ବଲି କାତା ଦେଇରଇକରି ମିତ୍ କଇବା ଲକ୍ମନର୍‌ପାଇ ଆରି ପରମେସରର୍ ବିସଇଟାନେ ରଇବା ସତ୍ ସିକିଆ ବିରୁଦେ ଜେଡକି ସବୁ କାତା ଉଟ୍‌ସି, ସେ ସବୁର୍‌ପାଇ । ୧୧ ଏ ସତ୍ ସିକିଆ ସୁବକବରର୍ ସିକିଆ ସଙ୍ଗ୍ ମିସ୍‌ସି । ଆମର୍ ତାକ୍‌ପୁଟା ପରମେସରର୍ ମଇମା ଆରି ଜନ୍ ସୁବକବର୍ ଜାନାଅ ବଲି ସେ ମକେ ଦାଇତ୍ ଦେଲାଆତେ, ସେଟାମିସା ମିସ୍‌ସି ।

ମାପୁରୁର୍ ଦୟାର୍ ପାଇ ଦନିଅବାଦ୍

୧୨ ଆମର୍ ମାପୁରୁ ଜିସୁ କିରିସ୍‌ଟକେ ମୁଞ୍ଚ ଦନିଅବାଦ୍ ଦେଲିନି । ସେ ମକେ ବପୁ ଦେଲାଆତେ । ତାର୍ ମୁଆଟେ ଗଟେକ୍ ବିସ୍‌ବାସ୍ ସଙ୍ଗ୍ ରଇବା ଗତି ଦାଙ୍ଗ୍‌ଡା ଇସାବେ ଏଜ୍‌ଲା ଆରି ତାକେ ସେବା କରବାକେ ମକେ ବାଟ୍‌ଲା । ୧୩ ଗଟେକ୍ ବେଲାଇ କିରିସ୍‌ଟର୍ ବିସଇର୍ କାରାପ୍ କାତା କଇତେରଇଲେ ମିସା ଆରି ବିନ୍ ବିସ୍‌ବାସିମନ୍‌କେ କାରାପ୍ ଇସାବେ ଦେକି ନିୟା କରତେରଇଲି ମିସା, ପରମେସର୍ ମକେ ଦୟା ଦେକାଇଲା । କାଇକେବଇଲେ ମୁଞ୍ଚ କାଇଟା କରତେରଇଲି, ସେଟା ନିଜେ ନାଜାନତେରଇଲି । ଆରି ମୁଞ୍ଚ କିରିସ୍‌ଟକେ ବିସ୍‌ବାସ୍ ନ କରିରଇଲି । ୧୪ ଆମର୍ ମାପୁରୁ ମକେ ବେସି ଦୟା ଦେକାଇଲା । ଜେନ୍ତାରି କି, କିରିସ୍‌ଟ ଜିସୁର୍ ସଙ୍ଗ୍ ମିସ୍‌ଲାର୍‌ପାଇ ମୁଞ୍ଚ ତାକେ ବିସ୍‌ବାସ୍ କରି ବିନ୍ ଲକ୍ମନକେ ଆଲାଦ୍ କରିପାର୍‌ଲି । ୧୫ ଏଟା କଇବାଟା ପୁରାପୁରୁନ୍ ସତ୍ ଆତେ । ଆରି ସେଟା ଅଇସି

☆ ୧:୧୩ ୧:୧୩ ପେରିଡ୍ ୮:୩:୯:୪,୫

କି ନିର୍ଦ୍ଦେଶ ବାବଦରେ ନାମ୍ବାରୁ ଆତେ । ପାପିମାନଙ୍କେ ଉଦାର କରବାକେ  
 କିରିସ୍ତ ଜିସୁ ଏ ଜଗତେ ଆଇଲା ଆରି ପାପିମାନର ବିତ୍ତରେଅନି ମୁଇ ବଡ଼ ପାପି  
 ।<sup>୧୭</sup> ଏଲେମିସା ଏଟାରପାଇ ମକେ କିରିସ୍ତ ଦୟା ଦେକାଇଲା । ସେ ମକେ କେମା  
 କଲାକେ କେତେକ ମୁରଚିକରି ଆତେ ବଲି ଦେକାଇବାକେ ସେ ମନ୍ କଲା । ବିନ୍  
 ଲକରଟାନେଅନି ମୁଇ ଅଦିକ୍ ପାପ୍ କଲିଆତି । ଏଟା ଏନ୍ତାରି ଅଇଲା । ଜେନ୍ତୁକି  
 ଦିନେକ୍ ଜେଡ଼କି ଲକ୍ଷ୍ମରୁ ତାକେ ବିସ୍ବାସ୍ କରି ସବୁଦିନରପାଇ ମୁକ୍ତି ପାଇବାଇ  
 ସେମନରପାଇ ମୁଇ ଗଟେକ୍ ସାକି ଇସାବେ ରଇବି ।<sup>୧୮</sup> ଜନ୍ ରାଜା କାଲ୍ କାଲ୍  
 ଜୁଗ୍ ଜୁଗ୍ ସାସନ୍ କରସି, ଆରି ଜାକେ କି କେ ଦେକି ନାପାରଡ଼, ସେ ଆକା ଗଟେକ୍  
 ପରମେସର । ସେ କାଲ୍ କାଲ୍ ଜୁଗ୍ ଜୁଗ୍ ମଇମା ଆରି ସନ୍ମାନ ପାଅ । ଆମେନ୍ !

<sup>୧୯</sup> ମର ପଅ ତିମତି, ମୁଇ ତକେ ଏଟା ତିଆରଲିନି, ତମେ କାଇଟା କରସା  
 ବଲି ସୁକଲ୍ ଆଡ଼ମା କେତେଟା ବବିସଡ଼ବକ୍ତାମନକେ ଜାନାଇରଇଲା ଇସାବେ  
 ମୁଇ ଏଟା କଇଲିନି । ସେ ବବିସଡ଼ବକ୍ତାମନ କଇଲା ବିସଇ ସୁବ୍ କବରର  
 ଦେକାରକା କରବା ଜୁଇଦର କାମେ ତମେ ଜେନ୍ତୁକି ସାରଦା ସଙ୍ଗ୍ ମିସା, ସେ  
 ବିସଇ କଇଲିନି ।<sup>୧୯</sup> ତାରସଙ୍ଗ୍ ସବୁବେଲେ ବିସ୍ବାସ୍ କରବାଟା ଚାତାନାଇ ।  
 ଆରି ଏଟା ସଡ଼ ବଲି ନିଜେ ଜାନିରଇବା ବିସଇ କରତେରୁଆ । କେତେକ୍ ଲକ୍  
 ନିଜର ବିବେକ୍ କଇବାଟାକେ ଦିଆନ୍ ନ ଦେଇକରି କିରିସ୍ତକେ ବିସ୍ବାସ୍ କରବାଟା  
 ଚାଡ଼ିଦେଇଆତଡ଼ ।<sup>୨୦</sup> ସେମନର ବିତ୍ତରେ ଉମନାୟକେ ଆରି ଆଲେକ୍ଜାଣ୍ଡ୍ରାକେ  
 ବିନ୍ ବିସ୍ବାସି ମନରଟାନେଅନି ବେଗଲାଇକରି ସଇତାନ୍କେ ସର୍ପିଦେଲିଆତି  
 । ଏନ୍ତାରି କଲେ ପରମେସରର ବିରଦେ କାରାପ୍ କାତା କଇବାଟା ସେମନ୍  
 ଚାଡ଼ିଦେବାଇ ବଲି ଆସା କଲିନି ।

## ୨

### ପାର୍ତନାର ନିୟମ୍

<sup>୧</sup> ପରତୁମ୍ ବିସଇ ତମକେ ତାଟସଙ୍ଗ୍ କଇଲିନି, ସେଟା ଅଇଲାନି ସବୁରଟାନେଅନି  
 ମୁକ୍ତି ବିସଇ । ସବୁ ଲକ୍ମନରପାଇ ପରମେସରକେ ଗୁଆରି କରା ।  
 ସେମନରପାଇ ପାର୍ତନା କରି ମଜାଇ ଉଆ ଆରି ସେମନର ପାଇ ତାକେ  
 ଦନିଅବାଦ୍ ଦିଆସ୍ ।<sup>୨</sup> ରାଜା ମନ୍କେ ଆରି ଅଦିକାରେ ରଇକରି ସାସନ୍ କରବା  
 ଲକ୍ମନରପାଇ ପାର୍ତନା କରା । ସେନ୍ତାରି କଲେ କାଇଟା ନ ଅଇତେ ସାନ୍ତିସଙ୍ଗ୍  
 ରଇପାରସା । ଆରି ଆମେ କାକେ ନ ତରତେ ପରମେସରକେ ପାର୍ତନା କରି  
 ତାର ମନ୍ କଲା ଇସାବେ ଚଲାଚଲ୍ତି କରିପାରୁ ।<sup>୩</sup> ଲକ୍ମନର ପାଇ ଏନ୍ତାରି  
 ପାର୍ତନା କରବାର୍ ଦରକାର୍ ଆକା । କାଇକେବଇଲେ ଏ ରକାମର ପାର୍ତନା  
 ଆମର ଉଦାରକାରିଆ ପରମେସରକେ ସାରଦା କରାଇସି ।<sup>୪</sup> ସବୁଲକ୍ ଜେନ୍ତୁକି  
 କି ରକିଆ ପାଅଡ଼ ଆରି ସଡ଼ ବିସଇ ଜାନଡ଼ ବଲି ପରମେସର ମନ୍ କଲାନ୍ତି ।  
<sup>୫</sup> କାଇକେବଇଲେ ଗଟେକ୍ ସେ ପରମେସର ଆତେ । ଆରି ଗଟେକ୍ସେ ଲକ୍  
 ଆତେ, ଜେ କି ପରମେସର ଆରି ଲକ୍ମନର ବିତ୍ତରେ ସାନ୍ତି ଆନିପାରସି । ସେ ଲକ୍  
 ଅଇଲାନି ଜିସୁ କିରିସ୍ତ ।<sup>୬</sup> ସବୁଲକ୍କେ ମୁକ୍ଲାଇବାକେ ସେ ନିଜେ ସର୍ପି ଅଇଲା  
 । ସମାନ୍ ବେଲାଇ ପରମେସର ତାକେସେ ବାଟଲା । ସେ ସବୁକେ ରକିଆ କରବି  
 ବଲି ମନ୍ କଲାଟା ଏନ୍ତାରି ଜାନାଇଲା ।<sup>୭</sup> ଶବ୍ଦବରପାଇ ପରମେସର ତାର ସୁବ୍  
 କବର ଜାନାଇବାକେ ଆରି ତାର ପେରିଡ଼ ଅଇବାକେ ମକେ ବାଟଲା । ମୁଇ ମିଡ଼  
 କଇନାଇ, ସଡ଼ସେ କଇଲିନି । ଉଦିଦି ନ ଅଇଲା ଲକ୍ମନକେ ମିସା ସୁବ୍ କବରର  
 ସଡ଼ ବିସଇ ଜାନାଇବାକେ ମକେ ବାଟିରଇଲା ।

☆ ୨:୭ ୨:୭ ୨ୟ ତିମତି ୧:୧୧

୮ ମୁଇ ମୁନୁସ୍ ପିଲାମନ୍‌କେ କଇଲିନି, ସେମନ୍ ଜେତେବେଲେ ପାର୍‌ତନା କରବାକେ ରୁଣ୍ଡିବାଇ, ସୁକଲ୍ ଚଲାଚଲ୍‌ତି ଅଇକରି ତାକର୍ ଆଡ଼ ଟେକି ପାର୍‌ତନା କରଡ଼ । ଜଦି ଏବେ ମିସା ସେମନ୍ ଦଦାପେଲା ଅଇରଇଲେ କି ଲାଗାଲାଗି ଅଇରଇଲେ, ସେଟା ରାଜିନାମା କରବାର୍ ଆଟେ । ୯ \*ସେନ୍ତାରିସେ ମାଇଜିମନ୍ ମିସା ଜାଗରଡ଼ ରଇକରି ସୁଆଲ୍‌ସୁତର୍ ଉଆ । ମୁଣ୍ଡର୍ ଚେଣ୍ଡିତେଇ ଚିକଟାକ୍ ନ କରି, ସୁନା କି ମୁକ୍‌ତା କି ଅଦିକ୍ ଦାମ୍ ଦେଇରଇବା ଲୁଗା ନ ପିନ୍ଧିକରି, ନିକ ବୁଦିସଙ୍ଗ୍ ମରଜିତା ସଙ୍ଗ୍ ନିଜ୍‌କେ ମାନ୍‌ଲାପାରା ତିଆର୍ ଉଆ । ୧୦ ତାର୍ ବାଦୁଲେ ବିନ୍‌ଲକ୍‌ମନ୍‌କେ ଦୟା ଦେକାଅଡ଼ । ପର୍‌ମେସର୍‌କେ ଛୁଆର୍ କଲୁନି ବଲି କଇବା ମାଇଜିମନ୍‌ପାଇ ସେଟା ନିକ ଚଲାଚଲ୍‌ତି ଅଇସି । ୧୧ ମାଇଜିମନ୍ ଚିମ୍‌ରାଇଅଇ ରଇ ସୁଆଲ୍‌ସୁତର୍ ଅଇକରି ବସଡ଼ । ୧୨ ମୁଇ ମାଇଜିମନ୍‌କେ ସିକାଇବା ଅଦିକାର୍ କି ମୁନୁସର୍ ଉପରେ ସାସନ୍ କରବା ଅଦିକାର୍ ଦେଇନାଇ । ତାର୍ ବାଦୁଲେ ସେମନ୍ ଚିମ୍‌ରାଇଅଇ ରଅଡ଼ । ୧୩ କାଇକେ ବଇଲେ ପର୍‌ମେସର୍ ପର୍‌ତମେ ଆଦମ୍‌କେ ତିଆର୍ କଲା । ତାର୍ ପଟେ ଅବାକେ । ୧୪ ପର୍‌ତମେ ଆଦମ୍ ସଇତାନର୍‌ଟାନେ ନାଡ଼ାଇ ଅଏନାଇ, ମାତର୍ ମାଇଜି ନାଡ଼ାଇ ଅଇ ପର୍‌ମେସର୍‌ର ଆଦେସ୍ ନ ମାନିକରି ପାପି ଅଇଲା । ୧୫ ମାତର୍ ମାଇଜିମନ୍ ପିଲାଟକିମନ୍‌କେ ଜନମ୍ ଦେଇକରି ଉଦାର୍ ପାଇବାଇ । ସେମନ୍ କିରିସ୍‌ଟକେ ବିସ୍‌ବାସ୍ କରି ବିନ୍‌ ଲକ୍‌ମନ୍‌କେ ଆଲାଦ୍ କରି ସୁଆଲ୍ ସୁକଲ୍ ସଙ୍ଗ୍ ଚଲାଚଲ୍‌ତି କରଡ଼ ।

### ୩

#### ମଣ୍ଡଲିର୍ ନେତାମନ୍

୧ ଏ କାତା ସଡ଼ ଜେ, କେ ଜଦି ମଣ୍ଡଲିଟାନେ ମୁକିଅ ପଦ୍ ପାଇବାକେ ମନ୍ କଲାନ୍ତି, ତେବେ ସେ ନିମାନ୍ କାମ୍ କରବାକେ ମନ୍ କଲାନ୍ତି । ୨ \*ତେବର୍‌ପାଇ ଜେନ୍ତିକି ତାର୍ ଜିବନେ ବିନ୍‌ ଲକ୍‌ମନ୍‌ର୍ କାଇ ନିନ୍ଦା ନ ରଇବାର୍ । ସେ ଗଟେକ୍ ମାଇଜି ସଙ୍ଗ୍‌ଇରଇବାର୍ ଆଟେ । ନିଜେ ଜାଗରଡ଼ ରଇକରି, ନିଜର୍ ଜିବନେ ସୁସ୍‌ତା ରଇକରି, ସବୁଲକ୍‌ର୍ ସନ୍‌ମାନ୍ ପାଇକରି, ଆଇଲା ଲକ୍‌ମନ୍‌କେ ଡାକିନେବା ପାରା ଲକ୍ ଅଇକରି, ଲକ୍‌ମନ୍‌କେ ବୁଦିର୍ କାତା ସିକାଇବା ଲକ୍ ଅଇ, ୩ ନ ମାତି କରି, କିରମାର୍ ନ ଅଇକରି ସାନ୍ତିସଙ୍ଗ୍ ରଇ, ଦଦାପେଲା ନ ଅଇକରି, ଦନ୍ ମିଲାଇବାକେ ଆସା ନ ଅଇକରି ରଇବାର୍ ଆଟେ । ୪ ନିଜର୍ କୁଟୁମ୍‌କେ ନିକକରି ଚାଲାଇତେରଇବାର୍ ଆଟେ । ଆରି ତାର୍ ପିଲାଟକିମନ୍‌କେ ସେ ତିଆର୍‌ଲାଟା ମାନ୍‌ବାକେ ବାଦିଅ କରାଇବା ସିକିଆ ଦେଇରଇବାର୍ ଆଟେ । ୫ ଜଦି କେ ମିସା ନିଜର୍ କୁଟୁମ୍‌କେ ଚାଲାଇବାର୍ ନାଜାନେ, ସେ କେନ୍ତି ପର୍‌ମେସର୍‌ର୍ ମଣ୍ଡଲିର୍ ଦାଇଡ଼ ନେଇପାର୍‌ସି ? ୬ ସେ ନୁଆ ନୁଆ ବିସ୍‌ବାସ୍ କରବା ଲକ୍ ନ ରଇବାର୍ ଆଟେ । ନଇଲେ ସେ ବଡ଼ପନିଆ ଅଇକରି ସଇତାନ୍ ଜେନ୍ତାରି ଡଣ୍ଡ ପାଇଲା, ସେ ମିସା ସେନ୍ତାର୍ ଡଣ୍ଡ ପାଇସି । ୭ ତାର୍ ଚଲାଚଲ୍‌ତି ଦେକି ବିସ୍‌ବାସ୍ ନ କରବା ଲକ୍‌ମନ୍ ମିସା ତାକେ ଗଟେକ୍ ସନ୍‌ମାନ୍ ଲକ୍ ପାରା ନାମ୍‌ବାର୍ ଆଟେ । ଜେନ୍ତିକି ଲକ୍‌ମନ୍ ତାକେ ନିନ୍ଦା ନ କରି ସଇତାନର୍ ପାନ୍ଦେ ନ ଲାଗେ ।

#### ମଣ୍ଡଲିର୍ ସେବା କରୁମନ୍

୮ ସେନ୍ତାରିସେ ମଣ୍ଡଲିର୍ ସେବା କରୁମନ୍ ମୁକିଅର୍ ପାରା ସବୁ ଲକ୍‌ଟାନେଅନି ସନ୍‌ମାନ୍ ପାଇବା ଲକ୍ ରଇବାର୍ ଆଟେ । ସେମନ୍ ସଡ଼ ବାବେ ଚଲାଚଲ୍‌ତି କରବାର୍ ଆଟେ । ମଦୁଆ ଲକ୍ ଅଇ ରଇବାର୍ ନାଇ । ତାବୁକାସୁର୍ ପାଇ ଆସା ନ ରଇବାର୍ ଆଟେ । ୯ ପର୍‌ମେସର୍ ଜନ୍ ସଡ଼ କବର୍ ସେମନ୍‌କେ ଜାନାଇଆଟେ, ସେଟା ସେମନ୍

\* ୨:୯ ୨:୯ ୧ ମ ପିତର୍ ୩:୩      \* ୩:୨ ୩:୨ ତିତସ୍ ୧:୭-୯

ତାଟ୍ ସଙ୍ଗେ ବିସ୍ବାସ କରୁବାରୁ ଆତେ । ଆରି ସେମନ୍ ପାପେ ରଉନାଇ ବଲି  
 ତାକର ବିବେକ ସାକ୍ଷିଦେବାରୁ ଆତେ । ୧୦ ମଣ୍ଡଲିର ସେବାକରୁ ଅଇବା ଆଗତୁ ବିନ୍  
 ଲକ୍ମନ୍ ସେମନ୍‌କେ ପରିକା କରି ଦେକତ । କାଇ ଦସ୍ ନ ରଇଲେ ସେମନ୍ ସେବା  
 କରୁବାକେ ଦାଇତ ନେଅତ । ୧୧ ସେନ୍ତାରିସେ ତାକର ମାଇଜିମନ୍ ମିସା ବିନ୍‌ଲକର  
 ସନ୍‌ମାନ୍ ପାଇଲା ପାରା ଚଲାଚଲ୍‌ତି କରତ । ସେମନ୍ ତିପୁଲ୍ କାତା କଇବାରୁ  
 ନାଇ । ତାର ବାଦୁଲେ ନିଜେ ଜାଗରତ ରଇବାରୁ ଆତେ । ସେମନ୍ ସତ୍ ଲକ୍  
 ବଲି ବିନ୍ ଲକ୍ ଆସା କରୁବାରୁ ଆତେ । ୧୨ ସେବାକରୁ ଗଟେକ୍ ମାଇଜି ସଙ୍ଗେ,  
 ତାର ପିଲାଟକିମନ୍‌କେ, ତାର କୁଟୁମ୍‌ରୁ ବିନ୍ ଲକ୍ମନ୍‌କେ, ଆରି ଗତିଦାଙ୍ଗ୍‌ତାମନ୍‌କେ  
 ନିକସଙ୍ଗ୍ ଜତନ୍ କରୁବାରୁ ଆତେ । ୧୩ ସେବାକାରିଆମନ୍ ଆବତ୍ ଅଇ ନିକ କାମ୍  
 କଲେ, ଲକ୍ମନ୍‌ର ଟାନେଅନି ଅଦିକ୍ ସନ୍‌ମାନ୍ ମିଲ୍‌ସି । ସେନ୍ତାରି ଲକ୍ କିରିସ୍‌ଟ  
 ଜିସୁର ବିସଇ ବିନ୍ ଲକ୍ମନ୍‌କେ ତାଟ୍ ସଙ୍ଗେ କଇପାରୁବାଇ ।

ବିସ୍ବାସର ସତ୍

୧୪ ମୁଇ ଏପିସେ ଆସି ଦାପ୍‌ରେ ତମ୍‌କେ ଦେକ୍‌ବି ବଲି ମନ୍ କଲିନି । ଅଇଲେ ମିସା  
 ଏ ଚିଟିଟାନେ ତମ୍‌କେ ମୁଇ ତିଆରଲିନି । ୧୫ କାଇକେବଇଲେ ଜଦି ମରୁ ଆଇବାଟା  
 ଅଲ୍‌ସମ୍ ଅଇଲେ ମିସା, ପର୍‌ମେସରର୍ କୁଟୁମ୍ ଇସାବେ ମଣ୍ଡଲିଟାନେ ତମେ ଗଟେକ୍  
 ଲକ୍ ଆରିଗଟେକ୍ ଲକ୍‌କେ କେନ୍ତାରି ମସିକରି ରଇବାରୁଆତେ, ସେ ବିସଇ ତମେ  
 ଜାନ୍‌ସା । ଏ ମଣ୍ଡଲି ପର୍‌ମେସରର୍, ଜେକି ସତଇସେ ବଠିଆତେ । ସେ କୁନାଦି ଆରି  
 ମୁଲ୍ ତେଲି ପାରା ଅଇ ସତ୍ ବିସଇକେ ତାଟ୍ କରାଇଲାନି ।

୧୬ ଆମରୁ ବିସ୍ବାସଟାନେ କେ ନାଜାନ୍‌ଲା ପାରା ବିସଇ ଲୁଟିକରି ଆତେ ।  
 ସେନ୍ତାରି ନର୍ବ ବଲି କେ କଇନାପାରତ୍ ।

“ ଜିସୁକିରିସ୍‌ଟ ନର୍ ରୁପ୍ ଦାରି ଆଇଲା ।

ସେ ନିଜେ ପର୍‌ମେସରର୍ ପଅ ବଲି ସୁକଲ୍ ଆଡ୍‌ମା କାତାଦେଲା ଆତେ ।  
 ଦୁଡ୍‌ମନ୍ ତାକେ ଦେକ୍‌ଲାଇ ।

ତାର ବିସଇର ସତ୍ କବର୍ ଗୁଲାଇ ରାଇଜେ ଜାନାଇଲାଇ ।

ସବୁ ଜାଗାରୁ କେତେକ୍ କେତକ୍ ଲକ୍ମନ୍ ତାକେ ବିସ୍ବାସ୍ କଲାଇ ।  
 ପର୍‌ମେସର୍ ତାକେ ସର୍‌ଗେ ନେଲା ।”

୪

ବୁଲ୍ ସିକିଆ ଦେଉମନ୍‌କେ ଜାଗରତା କରାଇବାଟା

୧ ସୁକଲ୍ ଆଡ୍‌ମା ନିକସଙ୍ଗ୍ କଇଲାନି, ସାରାସାରି ଦିନେ, ଲକ୍ମନ୍ ସତ୍ ବିସଇ  
 ବିସ୍ବାସ୍ କରୁବାଟା ଚାଡିଦେବାଇ । କାରାପ୍ ଆଡ୍‌ମାମନ୍‌ର ସିକିଆ ମାନ୍‌ବାଇ । ଆରି  
 ସେମନ୍ ସିକାଇବା ବୁଲ୍ ସିକିଆ ବିସ୍ବାସ୍ କରୁବାଇ । ୨ ଏନ୍ତାରି ସିକିଆ ଦେବାବେଲେ  
 ଏଟା ସତ୍ ସିକିଆବଲି ଲକ୍ମନ୍ ମାନ୍‌ବାଇ । ମାତର୍ ସେଟା ମିଟ୍ ସିକିଆ ରଇସି ।  
 ସେମନ୍ ଟିକ୍ କଲାଇନି କି ବୁଲ୍ କଲାଇନି, ସେଟା ନିଜେ ଜାନି ନ ରଅତ୍ । ଜେନ୍ତାରି  
 କି ତପ୍‌ଲା ଲୁଆସଙ୍ଗ୍ ମାଉଁସ୍‌ଟାନେ ଚାପଲେ ମରିଜାଇସି, ସେନ୍ତାରିସେ । ୩ ସେମନ୍,  
 ମାଇଜି ମନ୍‌ସ୍ ବିବା ଅଇବାରୁ ନାଇ ଆରି କାଇ କାଇ କାଦି କାଇବାରୁ ନାଇ ବଲି ବୁଲ୍  
 ସିକିଆ ଦେବାଇ । ସବୁ ରକାମର୍ କାଦି ପର୍‌ମେସର୍ ତିଆର୍ କଲାଆତେ । ଜେନ୍ତାରି କି  
 ଜେଡ୍‌କି ସବୁ ଲକ୍ ତାର ସତ୍ କବର୍ ବିସ୍ବାସ୍ କରୁବାଇ, ସେମନ୍ ସେ କାଦିର୍ ଲାଗି  
 ତାକେ ଦନିଅବାଦ୍ ଦେବାଇ । ୪ ସେନ୍ତାରି ସିକିଆ ଦେଉମନ୍ ବୁଲ୍ ସିକିଆ ଦେଲାଇନି  
 । କାଇକେବଇଲେ କାଦି ଆରି ପର୍‌ମେସର୍ ତିଆର୍‌କଲା ସବୁ ବିସଇ ନିକଆତେ ।  
 ଆରି କାଇ ରକାମର୍ କାଦି ମିସା ନିର୍‌ବାରୁ ନାଇ । ତାର ବାଦୁଲେ ସବୁ କାଦି ନିକ

ବଲି ମାନିକରି ତାକେ ଦନିଅବାଦ୍ ଦେବାର୍ ଆଚେ ।<sup>୫</sup> କାଈକେବଇଲେ ପରମେସର୍ କଇରଇବା ବାକିଅ ଆରି ଆମର୍ ପାର୍ତନା ବିସଇ ସବୁ ସୁକଲ୍ ଅଇଆଚେ ।

କିରିସ୍ତ ଜିସୁର୍ ନିକ ସେବାକାରିଆ

<sup>୬</sup> ଏ ସବୁ ବିସଇ ତମେ ବିସ୍ବାସିମନ୍ଦକେ ସିକାଇବାର୍ ଲାଗି, ତମେ ଜିସୁ କିରିସ୍ତକେ ସେବା କଲାସ୍ତି । ତମର୍ ବିସ୍ବାସର୍ ଲାଗି ଆରି ସତ୍ ସିକିଆ ମାନିଲାର୍ ଲାଗି ପରମେସର୍ ତମ୍‌କେ ବତାଇସି ।<sup>୭</sup> ଜନ୍ ସବୁ ସିକିଆ ମିର୍, ଆରି ଜନ୍‌ଟା ସବୁ ଟଣ୍ଡେପାଠି କଇବାଟାନେ ଅନି ଦୁରିକେ ରୁଆ । ତାର୍ ବାଦୁଲେ ନିଜେ ଜାଗରତ୍ ରଇକରି ପରମେସର୍ ଜନ୍‌ଟା ମନ୍ କଲାନ୍ତି, ସେନ୍ତାରି ଚଲାଟଲୁତି କରା ।  
« କାଈକେବଇଲେ ଗାଗଡ଼କେ ବୁଲାଟାଲା କରି ନିକ ସଙ୍ଗ୍ ସଙ୍ଗାଇବାଟା କେତେଟା କାମର୍ ପାଇ ନିକ ବିସଇ । କାଈକେବଇଲେ ଏଟା ଜଗତେ ବଠିରଇଲେ କି ମରିଗାଲେ ମିସା ତାକେ ଲତାକେ ଆଇସି । ମାତର୍ ଆଡ଼ମାଇ ଚଲାଟଲୁତି କରବାଟା ସବୁ କାମେ ନିକ ରଇସି ।<sup>୮</sup> ଏଟା ବାଇଦରେ ସତ୍ ଆକା । ଏଟା ସବୁଲକ୍ ଅଇସି କି ନ ଅଏ ବଲିକରି ପୁରାପୁରୁନ୍ ବିସ୍ବାସ୍ କରିଅଇସି ।<sup>୯</sup> ଆମେ ପରମେସର୍‌କେ ବିସ୍ବାସ୍ କଲାପାଇ କସ୍ତ ଅଇ କାମ୍ କରି ଏଟା ଆସା କଲୁନ୍ତି । ସେ ସତଇସେ ବଠିଆଚେ । ସେ ଗୁଲାଇ ମନସ୍ ଜାତିର୍ ଉଦାରକାରିଆ, ଜେଡ଼କି ସବୁ ତାକେ ବିସ୍ବାସ୍ କଲାଇନ୍ତି, ତାକର୍ପାଇ ଅଦିକ୍ ।

<sup>୧୦</sup> ମୁଇ ତମ୍‌କେ ଜେଡ଼କି ବିସଇ ଲେକ୍‌ଲିଆଟି ସେଟାସବୁ ବିନ୍ ଲକ୍‌ମନ୍‌କେ ସିକାଆ ଆରି ତିଆରା ।<sup>୧୧</sup> ତକେ ଦାଙ୍ଗ୍‌ତା ଆଚେ ବଲି କେ ମିସା ଇନ୍ ନ କର । ମାତର୍ ସବୁ ବିସ୍ବାସି ମନର୍ପାଇ ଗଟେକ୍ ସାକିପାରା ନିକ ଚଲାଟଲୁତି କର୍ । ସବୁ ବେଲେ ସତ୍ କାତା କଇତେର, ନିକସଙ୍ଗ୍ ଚଲାଟଲୁତି କରତେରଇବା, ଲକ୍‌ମନ୍‌କେ ଆଲାଦ୍ କରତେରଇବା, କିରିସ୍ତକେ ବିସ୍ବାସ୍ କରତେରଇବା, ପାପେ ରଅନାଇ ।  
<sup>୧୨</sup> ମୁଇ ତରଟାନେ ଆଇବା ଜାକ ବିସ୍ବାସିମନ୍ ରୁଣ୍ଡିଲା ବେଲାଇ, ଜେନ୍ତାରି କି ସବୁଲକ୍ ନିକକରି ସୁନ୍‌ଲାପାରା ସାସତର୍ ପଡିଦେସ୍ । ତେଇର୍ ଅରତ୍ ସେମନ୍‌କେ ବୁଜାଇଦେସ୍ ।<sup>୧୩</sup> ପରମେସର୍ ତର୍ପାଇସେ ବଲିକରି ଜନ୍ ଦାନ୍ ଦେଲାଆଚେ, ସେ କାମେ ଲାଗିର । ଏଟା ବବିସତ୍‌ବକ୍‌ତାମନ୍ ଆରି ପାର୍ତିନିମନ୍ ତର୍ ମୁଣ୍ଡେ ଆଡ଼ ସଙ୍ଗାଇ ପାର୍ତନା କଲାବେଲେ, ତୁଇ ପରମେସର୍‌ଟା ଟାନେଅନି ପାଇରଇଲୁସ୍ ।  
<sup>୧୪</sup> ଏ ସବୁ ବିସଇ ପୁରାପୁରୁନ୍ ମନ୍ ଦିଆନ୍ ଦେଇ କର୍ । ଜେନ୍ତାରିକି, ସୁବକବର୍ ଜାନାଇବାଟାନେ ଆରି ସିକାଇବାଟାନେ ତୁଇ ଆଗତୁ ଆଗତୁ ଗାଲୁସି ବଲି ଲକ୍‌ମନ୍ ଦେକ୍‌ବାଇ ।<sup>୧୫</sup> ତୁଇ ଜାଗରତ୍ ସଙ୍ଗ୍ ଚଲାଟଲୁତି କର୍ । ଆରି ପରମେସର୍‌ର୍ ବିସଇ ଜନ୍‌ଟା ସିକାଇଲୁସିନ୍ତି, ସେ ବିସଇଟାନେ ଜାଗରତ୍ ର । ଏଟା କିରିଲାଗିର । କାଈକେବଇଲେ ସେନ୍ତାରି କଲେ, ତୁଇ ନିଜ୍‌କେ ଆରି ତର୍ କାତା ସୁନ୍‌ବା ଲକ୍‌କେ ରକିଆ କର୍ସୁ ।

**୫**

ବିସ୍ବାସିମନ୍‌ରୁତି କରବା କାମ୍

<sup>୧</sup> ତରଟାନେଅନି ବୟସେ ବଡ଼ ରଇବା ଲକ୍‌କେ ତାଟ୍‌ସଙ୍ଗ୍ ଦାକାପୁକା ଦେସ୍‌ନାଇ । ତାର୍ ବାଦୁଲେ ନିଜର୍ ବାବାକେ ବାବୁଜିଆ କଲାପାରା ସନ୍‌ମାନ୍ ସଙ୍ଗ୍ କର୍ । ବଇସେ ସାନ୍ ରଇଲା ଲକ୍‌ମନ୍‌କେ ନିଜର୍ ବାଇ ଇସାବେ କାତା ଅ ।<sup>୨</sup> ବଇସେ ବଡ଼ ରଇବା ମାଇଜିମନ୍‌କେ ନିଜର୍ ମାଆ ପାରା ଆରି ଦାଙ୍ଗ୍‌ତିମନ୍‌କେ ନିଜର୍ ବଇନି ପାରା ମାନିକରି ର । ସେମନ୍‌କେ ମନେ ମନେ ମିସା ପାପ୍ ଇସାବେ ଦେକ୍‌ନାଇ ।  
<sup>୩</sup> ରାଣ୍ଡିଜୁଣ୍ଡିମନ୍‌କେ ସନ୍‌ମାନ୍ ଦେକାଇ ଜତନ୍ କର୍ ।<sup>୪</sup> ଜଦି କନ୍ ରାଣ୍ଡିମାଇଜିକେ ପିଲାଟକି କି ନାତିତିତି ରଇଲେ, ସେମନ୍ ନିଜର୍ କୁଟୁମର୍ ଲକ୍ ଇସାବେ ତାକେ

ଜତନ୍ କରତ୍ । ସେନ୍ତାରି ସେମନ୍ ଆୟା ବାବାମନ୍‌କେ ଆରି ଆନିଦାଦିମନ୍‌କେ ତାକର୍ ଆଲାଦ୍ ବାଉଡାଲ ଦେଅତ୍ । ଏଟା ପର୍‌ମେସର୍‌କେ ସାର୍‌ଦା କରାଇସି । ୫ ଜନ୍ ରାଣ୍ଡିମାଲଜି ଜାକେ କି ଆକାସାକା ନାଲ, ସେ ପର୍‌ମେସର୍‌କେ ଆସାକରିଆଚେ, ସେ ଦିନ୍‌ରାତି ତାକେ ଗୁଆରିକଲାନି, ତାକେସେ ମଣ୍ଡଲିର୍ ବିସ୍‌ବାସିମନ୍ ଜତନ୍ କର୍‌ବାର୍ ଆଚେ । ୬ ମାତର୍ ଗଟେକ୍ ରାଣ୍ଡି ମାଲଜି ଅବ୍‌କା ନିଜେ କର୍‌ବା ବିସଲ ମନ୍‌କରି, ପର୍‌ମେସର୍ ତାକେ ଜନ୍‌ଟା କର ବଲି ମନ୍ କଲାନି, ସେଟା ନ କରିରଇଲେ, ସେ ବର୍‌ତିରଇକରି ମିସା ମଲା ସମାନ୍ ଆଚେ । ୭ ରାଣ୍ଡି ମାଲଜିମନ୍‌ର ଜତନ୍ ପାଇ ମୁଇ ଜେଡ୍‌କି ଆଦେସ୍ ଦେଲିଆତି, ସେଟା ସବୁ ମାନା ବଲି ବିସ୍‌ବାସିମନ୍‌କେ ତିଆର୍ । ଜେନ୍ତାରିକି ସେମନ୍‌କେ କେ ମିସା ନିନ୍‌ଦା କରି ନାପାରତ୍ ।

୮ କେ ଜଦି, ତାର୍ ନିଜର୍ ଲକ୍‌ମନ୍‌କେ କି କୁଟୁମ୍‌ର୍ ଲକ୍‌ମନ୍‌କେ ଲଡାକେ ରଇବା ବିସଲ ନ ଦେଲେ, ସେ ଜନ୍‌ଟା ବିସ୍‌ବାସ୍ କଲିନି ବଲି କଇସି, ସେ ସତଇସେ ସେଟା ବିସ୍‌ବାସ୍ କରେନାଇ । ସେ ବିସ୍‌ବାସ୍ ନ କରିରଇବା ଲକ୍‌ଟାଟାମେଅନି ଅଦିକ୍ ଇନ୍ । ୯ ଗଟେକ୍ ରାଣ୍ଡି ମାଲଜି କଡେଟାରି ବରସ୍ ନ ଅଇଡେ, ତାକେ ରାଣ୍ଡି ବଲି ଲେକା କର୍‌ବାର୍ ନାଇ । ସେ ଗଟେକ୍ ମୁନ୍‌ସର୍ ସଙ୍‌ସେ ମିସିରଇବାର୍‌ଆଚେ । ୧୦ ବିନ୍ ଲକ୍ ଦେକ୍‌ବା ଇସାବେ, ସେ ବେସି ଦରମ୍ ଅଇ, ବିନ୍ ଲକ୍‌କେ ସାଇଜ କର୍‌ବାର୍ ଆଚେ । ଜେନ୍ତାରି କି ନିଜର୍ ପିଲାମନ୍‌କେ ନିକ ସଙ୍‌ ବଡାଉରଇସି, ଆଇଲା ଲକ୍‌ମନ୍‌କେ ଗତିଆ ଇସାବେ ତାକ୍‌ସି, ପର୍‌ମେସର୍‌ର ସୁକଲ୍ ଲକ୍‌ମନ୍‌ର ଗଡ୍ ଦଇଦେଇସି, ଦୁକ୍ କସ୍‌ଟେ ରଇବା ଲକ୍‌ମନ୍‌କେ ସାଇଜ କର୍‌ସି, ଲକ୍‌ମନ୍‌କେ ସାଇଜ କର୍‌ବାକେ ବିନ୍ ବିନ୍ କାମ୍ କର୍‌ଡେରଇସି ।

୧୧ ତକ୍‌ରି ନ ରଇବା ରାଣ୍ଡିମନ୍‌କେ ରାଣ୍ଡି ଇସାବେ ଲେକା କର୍ ନାଇ । କାଇକେବଇଲେ ସେମନ୍ ରାଣ୍ଡି ଇସାବେ କିରିସ୍‌ଟକେ ସେବା କର୍‌ବି ବଲି କାତା ଦେଇରଇଲେ ମିସା, ମୁନ୍‌ସର୍ ସଙ୍‌ ରଇବି ବଲି ମନ୍ ଆଇଲେ, ଆଗ୍‌ତୁ ଦେଇରଇବା କାତା ପାସ୍‌ରିଜାଇ ଆରିତରେକ୍ ବିବା ଅଇବାକେ ମନ୍ କର୍‌ବାଇ । ୧୨ ଆରିତରେକ୍ ବିବା ଅଇଲାର୍ ପାଇ ସେମନ୍ ଦସି ଅଇବାଇ । କାଇକେବଇଲେ, ସେମନ୍ ଆଗ୍‌ତୁ ଦେଇରଇବା କାତା ପୁରାପୁରୁନ୍ କରତ୍ ନାଇ । ୧୩ ଏଟାର୍ ମିସ୍‌ଡେ ସେମନ୍ ଅଲସ୍ ଅଇବାଟା ସିକ୍‌ବାଇ । ଆର୍ ଗରେ ତାର୍ ଗରେ ଜାଇ ବେଲା ବିତାଇବାଇ । ତିପୁଲ୍ କାତା କଇ ବିନ୍ ଲକ୍‌କର୍ ବିସଲ କାତାବାର୍‌ତା ଅଇବାଇ । ୧୪ ଡେବର୍‌ପାଇ ତକ୍‌ରି ନ ରଇବା ରାଣ୍ଡିମନ୍‌କେ ମୁଇ ତିଆରଲିନି, ଆରିତରେକ୍ ଗର୍ ବସାଇ ପିଲାଟକିର୍ ଜତନ୍ କରା । ସେନ୍ତାରି କଲେ ଆମର୍ ବିରଦିମନ୍ ଆମ୍‌କେ ନିନ୍‌ଦା ନ କରତ୍ । ୧୫ କାଇକେବଇଲେ ସେମନ୍ ପର୍‌ମେସର୍‌ର ଟାମେଅନି ଦୁରିକେ ଜାଇ ସଇତାନର୍ ସଙ୍‌ ଜିଇବାକେ ଆରାମ୍ କଲାଇ ଆଚତ୍ । ୧୬ ଜଦି କନ୍‌ଆଲେ ମାଲଜି କିରିସ୍‌ଟକେ ବିସ୍‌ବାସ୍ କର୍‌ସି, ଆରି ତାର୍ କୁଟୁମ୍‌େ ରାଣ୍ଡିମାଲଜିମନ୍ ରଇବାଇ, ସେ ଆକା ସେମନ୍‌କେ ସାଇଜ କର୍‌ବାର୍ ଆଚେ । ବିନ୍ ବିସ୍‌ବାସିମନ୍ ସେ ଦାଇଡ୍ ନେଇ କରତ୍ ବଲି ସେ ଆସା କର୍‌ବାର୍ ନାଇ । ଏଟା ଜେନ୍ତାରିକି ଜାକେ ଆକାସାକା ନ ରଅତ୍ ସେମନ୍‌କେ ବିସ୍‌ବାସିମନ୍ ଜତନ୍ କରିପାରତ୍ ।

୧୭ ଜନ୍ ପାର୍‌ତିନ୍‌ମନ୍ ମଣ୍ଡଲିର୍ ନେତା ଅଇ ତାକିନେଲାଇନି, ସେମନ୍ ଦୁଇଗୁନ୍ ବୁଡି ପାଇବା ଦର୍‌କାର୍ । କାଇକେବଇଲେ ସୁବ୍‌କବର୍ ଜାନାଇବାଟା ଆରି ସିକାଇବାଟା ସେମନ୍‌କେ ଦାଇଡ୍ ଇସାବେ ଦେଲାଇ ଆଚତ୍ । ୧୮ ସ୍‌ସାସ୍‌ତରେ ଜେଡ୍ ଲେକାଅଇଲା ଆଚେ, ଗାନାଇ ଦାନ୍ ମାଣ୍ଡାଇବାବେଲେ ବଲଦର୍ ଟଣ୍ଡେ କଡରା ବାନ୍ଦା ନାଇ ଆରି କାମ୍ କରୁ ସାଉକାର୍‌ଟାମେଅନି ତାର୍ କୁଲି ପାଇସି ଆକା । ୧୯ ଗଟେକ୍ ପାର୍‌ତିନ୍ ବିରୁଦେ ନିନ୍‌ଦା କାତା ଉଟ୍‌ଲେ, ଦୁଇ କି ତିନିଲକ୍‌କର୍ ସାକି ନଇଲେ, ସେଟାକେ ମାନ୍ ନାଇ । ୨୦ ପାପେ ରଇବା ଗଟେକ୍ ପାର୍‌ତିନ୍‌କେ ସବୁର୍

✱ ୫:୧୮ ୫:୧୮ ମାଡିଉ ୧୦:୧୦; ଲୁକ୍ ୧୦:୭

ମୁଆଟେ ଲାଗ । ଜେନ୍ତାରିକି ବିନ୍ ପାର୍ବତୀନମନ୍ ସେନ୍ତାରି ପାପ୍ କର୍ବାକେ ଡର୍ବାଇ

୧୧ ଆମର୍ ବାବା ପର୍ମେସର୍ ଜିସୁକିରିସ୍ଟ ଆରି ସେ ବାଟିରଇବା ଦୁର୍ମନକେ ସାକିକରି ମୁଇ ତକେ ତିଆରଲିନି, ମୁଇ ତିଆରଲା ଏ ସବୁ ବିସଇ କାଇ ବଡ଼ସାନ୍ ନ ଦେକିକରି କର୍ । ୧୨ ଗଟେକ୍ ଲକ୍‌କେ ପରିକା ନ କର୍ବା ଜାକ ତାକେ ମୁକିଅ ଇସାବେ, ତର୍ ଆଡ଼ ତାର୍ ମୁଣ୍ଡେ ସଙ୍ଗଇ, ସେବା କାମର୍ ପାଇ ସରପ୍ ନାଇ । ନଇଲେ ତାର୍ ପାପର୍ ପାଇ, ତୁଇ ଦାଇ ଅଇସୁ । ତୁଇ ନିଜେ ପାପ୍ ନ କର୍ବାକେ ଜାଗର୍ଡ଼ ର ।

୧୩ ଆରି ରୁଟା ପାନି ନ କାଇକରି ତର୍ ପେଟର୍ ଲାଗି ଅଲପ୍ ଅଙ୍ଗୁର୍ ମଦ୍ ମିସା କାଆ । କାଇକେବଇଲେ ତୁଇତା ସବୁବେଲେ ନିକ ରଉସ୍ ନାଇ ।

୧୪ କେତେ ଲକ୍ ସବୁର୍ ଦେକ୍‌ତେ ପାପ୍ କଲାଇନି । ଜେନ୍ତାରି ତୁଇ ସେଟା ଜାନିପାରଲୁସ୍‌ନି । ସେମନ୍‌ର୍ ଚଳାଚଲୁତି ପରିକା କର୍ବା ଆଗତୁ, ତୁଇ ସେଟା ଜାନ୍‌ସୁ । ମାତର୍ ଆରି କେତେଲକର୍ ପାପ୍ ବେସି ଦିନ୍ ଅଇଲେ ମିସା ଜାନି ନଏ । ୧୫ ସେନ୍ତାରିସେ କେତେ ଲକ୍ କର୍ବା ନିକ ବିସଇ ସବୁକେ ତିସ୍‌ସି । ସେମନ୍ କର୍ବା ନିକ ବିସଇ ଦାପ୍‌ରେ ନ ତିସ୍‌ଲେ ମିସା କେତେଦିନ୍ ପଟେ, ସେଟା ଲକ୍‌ମନ୍ ଜାନ୍‌ବାଇ ।



୧ ଜନ୍ ବିସ୍‌ବାସିମନ୍ ଗତିଦାଙ୍ଗ୍‌ତା ଇସାବେ ଗଟେକ୍ ସାଉକାର୍ ତଲେ କାମ୍ କଲାଇନି, ସେମନ୍ ତାକର୍ ସାଉକାର୍‌ମନ୍‌କେ ଅଦିକ୍ ସନ୍‌ମାନ୍ ଦେବାର୍ ଆଟେ । ଜେନ୍ତାରି କି, ପର୍ମେସର୍‌ର୍ ନାଉଁ ଆରି ଆମେ ସିକାଇବାଟା କେ ନିନ୍‌ନା ନ କରଡ଼ । ୨ ଜଦି ତାକର୍ ସାଉକାର୍‌ମନ୍ କିରିସ୍‌ଟକେ ବିସ୍‌ବାସ୍ କଲାଇନି, ସେନ୍ତାରିଆଲେ ବିସ୍‌ବାସି ସାଉକାର୍‌ମନ୍‌କେ, ବିସ୍‌ବାସ୍ ନ କର୍ବା ସାଉକାର୍‌ମନ୍‌ର୍ ତେଇଅନି, କିରିସ୍‌ଟର୍‌ଟାନେ ବାଇ ଇସାବେ ସନ୍‌ମାନ୍ ଉନା ଦେକାଇଲେ ଅଇସି ବଲିକରି ବାବ୍‌ବାର୍ ନାଇ । ତାର୍ ବାଦୁଲେ ସେମନ୍‌ର୍‌ପାଇ ଅଦିକ୍ ଆବଡ଼ କାମ୍ କର୍ବାର୍ ଆଟେ । କାଇକେବଇଲେ ସେମନ୍ ଜନ୍ ସାଉକାର୍‌ର୍‌ପାଇ କାମ୍ କଲାଇନି, ସେମନ୍ ମିସା ବିସ୍‌ବାସି ଲକ୍ । ଆରି କିରିସ୍‌ଟର୍‌ଟାନେ ବାଇ ଇସାବେ ଆଲାଦ୍ କଲାଇନି । ବିସ୍‌ବାସି ମନ୍‌କେ ଏ ସର୍‌ତେ ବିସଇ ସିକାଆ । ଆରି ସେଟା କର୍ବାକେ ସେମନ୍‌କେ ସାର୍‌ଦା କର୍ ।

ବୁଲ୍ ସିକିଆ ଆରି ସଡ଼ ଦନ୍

୩ ଜଦି କେ ବୁଲ୍ ବିସଇ ସିକାଇଲାଇନି, ଆରି ଆମର୍ ମାପ୍‌ରୁ ଜିସୁକିରିସ୍‌ଟର୍ ସଡ଼ ସିକିଆଟାନେ ରାଜି ନ ଅଅଡ଼, ୪ ସେନ୍ତାରି ଲକ୍ ବେସି ବଡ଼ପନିଆ ଆରି ସେ କାଇଟା ନାଜାନେ । ସେ ସବୁବେଲେ ଦଦାପେଲା କରି କାଇ ମୁଲିଅ ନ ରଇବା ବିସଇନେଇ ଜଗ୍‌ତାଜାଟି କର୍‌ତେରଇବାକେ ମନ୍ କର୍‌ସି । ଏନ୍ତାରି କରି କରି ଲକ୍‌କେ ଛୁଆ କର୍‌ବାଟା, କିରଜାଟି କର୍‌ବାଟା, ନିନ୍‌ନା କର୍‌ବାଟା ଆରି କାରାପ୍ ଚିନ୍ତା, ୫ ଗଟେକ୍ ଲକ୍ ଆରି ଗଟେକ୍ ଲକ୍‌ର୍ ସଙ୍ଗ୍ କିରଜାଟି ଅଇ ଲାଗି ରଇସି । ସେନ୍ତାରି ଲକ୍‌ର୍ ମନ୍ କାରାପ୍ ଅଇଲା ଆଟେ ଆରି ସଡ଼ ବିସଇ ତାକର୍ ମନ୍‌କେ ନ ଜାଏ । ସେମନ୍ ପର୍ମେସର୍‌ର୍ ବିସଇ ସିକାକେତେରଇଲେ ତାରୁ ମିଲ୍‌ତେରଇସି ବଲି ବାବ୍‌ଲାଇନି ।

୬ ତାର୍ ବାଦୁଲେ ଆମେ ଜେଡେବେଲେ ପର୍ମେସର୍‌କେ ସାର୍‌ଦା କରାଉଁ, ଆରି ଆମ୍‌କେ ଜେଡ଼କି ଆଟେ ସେଡ଼କି ସଙ୍ଗ୍ ସୁସ୍‌ତା ସଙ୍ଗ୍ ରଉଁ, ତେବେ ଆମେ ଜବର୍ ଅଇତେ ମିଲାଅଥାବୁ । ୭ କାଇକେବଇଲେ ଆମେ ଜନମ୍ ଅଇଲାବେଲେ ରୁଟାଆତେ ଆଇଲୁ, ଆରି ଜେଡେବେଲେ ମର୍‌ବୁ, ରୁଟା ଆଡେସେ ଉଟିଜିବୁ । ୮ ତେବେ ଆମ୍‌କେ ଲଡାକେ ଆଇବା କାଦି ଆରି ପିନ୍‌ବାକେ ବସ୍‌ତର୍ ରଇଲେ ସେଡ଼କିସଙ୍ଗ୍ ସୁସାରେ ରଇବାର୍ ଅଇସି । ୯ କେତେ କେତେ ଲକ୍ ସାଉକାର୍ ଅଇବାକେ ଏନ୍ତ୍ର ମନ୍

କରୁବାଇଲେ, ସେମାନର ଜିବନେ କାଲ ପରିକା ଆଇଲେ ମିସା ତେଇ ଅଦରୁବାଇ । ଗଟେକ୍ ପସୁ ପାରା ପାନ୍ଦେ ଲାଗୁବାଇ । ଜେଡକି ବିସଇ ତାକରପାଇ ଆରି ବିନ୍ ଲକର ପାଇ କାରାପ୍ ଆରି ବିପଦ୍ ଆନ୍ସି, ସେ ସବୁ ବିସଇ କରୁବାକେ ମନ୍ କରୁବାଇ । ଏନ୍ତାରି ମନ୍ କରୁବାଟା ଅଦିକ୍ ଅଦିକ୍ ବାବି, ସେମନ୍ କୁରୁପ୍ନାସ୍ ଅଇଜିବାଇ । ୧୦ କାଇକେବଇଲେ ଜନ୍ ଲକ୍ମନ୍ ତାବୁ ଆସାକରି ଆଚଡ୍, ସେ ତାବୁ ମିଲାଇବାକେ ବିନ୍ ବିନ୍ ରକାମର୍ କାରାପ୍ ବିସଇ କରୁବାକେ ମନ୍ କରୁବାଇ । କେତେଲକ୍ କିରିସର୍ ର ବିସଇଟାନେ ରଇବା ସିକିଆ ବିସ୍ବାସ୍ କରୁବାଟା ଦିରେ ଦିରେ ଚାଡିଦେଇଆଚଡ୍ । କାଇକେବଇଲେ ସେମନ୍ ତାବୁ ମନ୍କଲାଇ ଆରି ନିଜେ ବୁସିଅଇଲା ଲକ୍ପାରା ବେସି ରକାମ୍ ଦୁକ୍ କସ୍ଟେ ପଡ଼ଲାଇଆଚଡ୍ ।

ପାଉଲର ସାରାସାରି କାତା

୧୧ ମାତର୍ ଏ ଡିମତି, ତୁଇ ଗଟେକ୍ ପରମେସରର୍ ଲକ୍ । ତୁଇ ଏଟାମନ୍ ଚାଡିଦେସ୍ । ସଡ୍ ବିସଇଆକା କରୁବାକେ ବେସି ଆବଡ୍ ଅ । ପରମେସର ଜେକ୍ଟି ମନ୍ କଲାନ୍, ସେନ୍ତାରି ଚଲାଚଲତି କର୍ । କିରିସର୍କେ ବିସ୍ବାସ୍ କର୍ । ବିନ୍ ଲକ୍ମନ୍କେ ଆଲାଦ୍ କର୍ । ପରମେସର୍ ତିଆରଲାଟା ମାନ୍ବାକେ କେ ଚାଡ଼ନାଇ । ଲକ୍ମନ୍ର ସଙ୍ଗ୍ ରିସା ଅ ନାଇ । ୧୨ ଗଟେକ୍ ନିକ ସଇନ ଜେନ୍ତାରି ଜୁଇଦେ ଜୁଇବାକେ କେବେ ନ ଚାଡେ, ସେନ୍ତାରିସେ ତୁଇ ମିସା ପରମେସରକେ ବିସ୍ବାସ୍ କରି ତାର୍ ତିଆରଲାଟା ମାନ୍ବାକେ ଚାଡ଼ନାଇ । ଜନ୍ ନ ସାର୍ବା ଜିବନ୍ ପରମେସରର୍ଟାନେ ଆଚେ, ସେଟା ତୁଇ ନିଜରପାଇ ଆନ୍ । ସେ ବିସଇ ମିଲାଇବାକେ ବେସି ଲକ୍ମନ୍ ମୁଆଟେ କାତା ଦେଇରଇଲୁସ୍ । ୧୩ \*ପରମେସର୍ ମର୍ ସାକି, ଜେ କି ସବୁକେ ବର୍ଡବାକେ ଦେଇସି । ଆରି ଜିସୁକିରିସର୍ ଜେ କି, ପନ୍ଥିଅ ପିଲାଡ୍ ପାଚାରଲା ବେଲେ ସଡ୍ କଇଲା, ଏ ତୁଇ ଲକ୍ମନ୍ ସାକି ନେଇକରି ମୁଇ ତକେ ତିଆରଲିନି, ୧୪ ଆମର୍ ମାପୁରୁ ଜିସୁକିରିସର୍ ବାଉଡି ଆଇବା ଜାକ ମୁଇ ତକେ ତିଆରିରଇବା ଜେଡକି ସବୁ ବିସଇ ମାନିକରି, କାଇ ନିନ୍ଦା ନ ଅଇତେ ର । ୧୫ ସେ ବାଉଡି ଆଇବାଟା ପରମେସର୍ ଟିକ୍ କଲା ବେଲାଇ ଗର୍ସି, ସେ ଗଟେକ୍ ଲକ୍ସେ ସାସନ୍କାରିଆ । ସେ ସେ ରାଜାମନ୍ ଉପରେ ରଇବା ରାଜା ଆରି ମାପୁରୁମନ୍ ଉପରେ ରଇବା ମାପୁରୁ । ୧୬ ସେ କାଲ୍ କାଲ୍ ଜୁଗ୍ ଜୁଗ୍ ବର୍ସି ଆରି ତାର୍ ଚାରିବେଟି ରଇବା ଉଜ୍ଲେ କେ ଆସିନାପାରଡ୍ । ବର୍ତି ରଇବା କେ ମିସା ତାକେ ଦେକଡ୍ ନାଇ ଆରି କେବେ ମିସା ଦେକିନାପାରଡ୍ । ଲକ୍ମନ୍ ତାକେ ଡାକ୍ପୁଟା କରୁବାଇ ଆରି ତାର୍ଟାନେ ସବୁବେଲେ ବେସି ବପୁ ରଇସି । ଆମେନ୍ ।

୧୭ ଏ ଜିବନର୍ ବିସଇନେଇ ଜେଡକି ଲକ୍ମନ୍ ସାଉକାର ଅଇ ଆଚଡ୍, ବିନ୍ ଲକ୍ମନ୍ରଟାନେଅନି ସେମନ୍ ନିକ ବଲି ନ ବାବୁବାକେ ତିଆର୍ । ଦନ୍ ସପତି ଉପରେ ବେସି ଆସା କରୁବାର୍ ନାଇ ବଲି ସେମନ୍କେ ସିକା । କାଇକେବଇଲେ ତାବୁ ଦାପ୍ରେ ମାୟାଅଇଜାଇସି । ତାର୍ ବାଦୁଲେ ସେମନ୍କେ ଲତାକେ ଲାଗୁବା ବିସଇ ସବୁ ଦେବାକେ ପରମେସରର୍ଟାନେ ଆସା ରକ୍ବାକେ ସିକାଇଦେସ୍ । ସେ ଆକା ଆମ୍ବରପାଇ କାଇଟା ନ ଦେକି, ସବୁ ବିସଇ ସାର୍ଦା କରୁବାକେ ଦେଇସି । ୧୮ ଦରମ୍ ମନେ ଲକ୍ମନ୍କେ ସାଇଜ କରୁବାକେ ସେମନ୍କେ କଇଦେସ୍ । ଅରକିଡ୍ ଲକ୍ମନ୍କେ କାଇଟା ନ ବାବି ଦେବାକେ, ତାକର୍ ଟାନେ ରଇଲାଟା ସାର୍ଦା ସଙ୍ଗ୍ ବାଟାକରୁବାକେ କଇଦେସ୍ । ୧୯ ଏନ୍ତାରି ତାକର୍ ନିକ କାମସବୁ ଗଟେକ୍ ବଡ୍ ଦନ୍ ଇସାବେ ସେମନ୍ ସର୍ଗେ ସଙ୍ଗାଇଆଚଡ୍ । ସେନ୍ତାର୍ ଆଲେ ସେମନ୍ ତାକର୍ ନିଜରପାଇ ଜିବନ୍ ମିଲାଇବାଇ ।

୨୦ ଏ ଡିମତି, ପରମେସର୍ ତକେ ଜନ୍ଟା କରୁବାକେ ଦାଇଡ୍ ଦେଲାଆଚେ, ସେ ଦାଇଡ୍ ନିକ ସଙ୍ଗ୍ କର୍ । ଆସା ନ ରଇବା ଚୁଟା କାତା, କାଇ ଲତାକେ ନ ଆଇବା



କାତାବାରତା ଆରି ପରମେସରର ବିସଇଟାନେ ରଇବା ସତ୍ ସିକିଆ ଜନ୍ ଲକ୍ ବିରଦ୍ କଲାଇନି, ସେମାନର୍ ଟାନେଅନି ଦୁରିକେ ର । ସେଟା ସେମନ୍ ସିକ୍‌ବା ଗିଆନ୍ ବଲି ବୁଲ୍ ବୁଞ୍ଜଲାଇନି । ୨୧ ଏ ବୁଲ୍ ସିକିଆ କେତେଲକ୍ ମାନିକରି କିରିସଟର୍ ବିସଇଟାନେ ରଇବା ସତ୍ ସିକିଆ ଚାଡିଦେଇଆଚଡ୍ । ପରମେସର୍ ଜିବନ୍ ଦୁକାଇ ଦୟା ଦେକାଇଲାଟା ତର୍ ସଙ୍ଗ୍ ସବୁବେଲେ ରଅ । ଆମେନ୍ !

# ତିମଥୁଙ୍କ ନିକଟକୁ ପାଉଲଙ୍କର ଦ୍ଵିତୀୟ ପତ୍ର ପାଉଲ୍ ତିମତିଙ୍କେ ଦୁଇପାଲି ଲେକିରଇବା ଚିଠି ଏ ବଇ ବିସଇରେ ଜାନ୍‌ବାଟା

ତିମତି ବଇ ପାଉଲ୍‌ରଟାନେଅନି ତରସିସେ ତିମତିର୍ ଲଗେ ଲେକାଅଇରଇବା ଚିଠି । ଦୁତିଅ ତିମତି ପାଉଲ୍‌ର୍ ଜିବନର୍ ସାରାସାରିର୍ ବେଲେ ଲେକାଅଇ ରଇବା ଚିଠି ।

ଏ ଚିଠି ଲେକାଅଇଲା ବେଲେ ସେ ରମିୟରାଇଜେ ବନ୍ଦିଅଇ ରଇଲା ୧:୧୭ ପାଉଲ୍ ଆରି ତିମତି ଦୁଇଲକ୍ ସବୁବେଲେ ମିସିବିତି ରଇଲାଆରି ପାଉଲ୍ ତିମତିଙ୍କେ ପ ପାରା ଜାନାଇଜେ ରଇଲା ପିଲିପିୟ ୨:୨୨୧ମ ତିମତି ୧:୨:୧:୧୮ ।

ଏଟା ପାଉଲ୍‌ର୍ ଚାର୍ଟା ଚିଟିଟାନେ ଅନି ଗଟେକ୍‌ଚିଟି । ଜନ୍‌ଟାନେକି ମଣ୍ଡୁଲିକେ ଗଟେକ୍ ଲକ୍‌କସାବେ ଜାନାଇ ଆଟେ । ଆରି ବିନ୍ ତିନ୍‌ଟା ଚିଟି ଅଇଲାନି ପର୍‌ତୁମ୍ ତିମତି, ତିତସ୍ ଆରି ପିଲିମନ୍ । ଦୁଇପାଲି ଚିଠିଲେକା ଅଇଲାବେଲେ ରମିୟରାଇଜେ କସ୍‌ଟ ଦେଇଜେ ରଇଲା । ଏନ୍ତାରି ଅଇଜେରଇଲାକେ ପାଉଲ୍ ବନ୍ଦିରଇଲା କାଇକି ଆରି ତିମତିଙ୍କେ କସ୍‌ଟ ଆଇଲେ ମିସା ମୁର୍ଚିକରି ରଇବାକେ ଆଦେସ୍ ଦେଇଜେ ରଇଲା । ପର୍‌ତୁମ୍ ତିମତିପାରା ପାଉଲ୍ ତିମତିଙ୍କେ ମିର୍ ସିକିଆ ଦେଉ ଗୁରୁମାନର୍ ବିସଇ ନେଇକରି କେତେଟା ଜାଗର୍‌ତା ରଇବା ବିସଇ ଜାନାଇଲା ଆଟେ । ପର୍‌ତୁମ୍ ତିମତି ୧:୧୭-୧୮ ପାଉଲ୍ ତିମତିଙ୍କେ ଆଇବା ଦିନ୍‌ମନ୍‌କେ କେତେକ୍ କସ୍‌ଟ ପାଇବା ବେଲା ଆଟେ ବଲି କଇଲାନି । ୩:୧

### ଏ ବଇ ବିସରେ ରଇବାଟା

- ୧. ପାଉଲ୍ ତିମତିଙ୍କେ ଆଲାଦ୍ ଜାନାଇକରି ସାସ୍ ଦେଇଆଟେ । ୧:୧-୧୮
- ୨. ପାଉଲ୍ ତିମତିଙ୍କେ କେନ୍ଦ୍ରି ମୁର୍ଚିରଇ ଦେକାଇବାଇ ସେଟା ବପୁଦେଲାନି । ୨:୧-୧୩
- ୩. ସାରାସାରିପଟେ ପାଉଲ୍ କେତେଟା ଜାନାଇବା ବିସଇ କଇଆଟେ । ୨:୧୪-୧୭
- ୪. ଆଇବା ଦିନ୍‌ମନ୍‌କେ କେନ୍ଦ୍ରିଅଇ ଜାଗର୍‌ତା ଅଇବାର୍ ଆଟେ ଆରି ସଡ୍‌ବାଟ୍ ବାଟ୍‌ବାକେ ଜାଗର୍‌ତା କଲାଆଟେ । ୩:୧-୪:୮
- ୫. ପତ୍ରୁଲ୍ ତିମତିଙ୍କେ କେତେଟା ନିଜର୍ ବିସଇ ଜାନାଇ କରି ଲବ୍ ବିସଇ ଜାନାଇଆଟେ । ୪:୯-୨୨

ପେରିଡ୍ ପାଉଲ୍ ତିମତିଙ୍କେ ଦୁଇପାଲି ଚିଠି ଦେବାଟା

୧ ମୁଇ ପାଉଲ୍ ଏ ଚିଠି ଲେକ୍‌ଲିନି । ଜିସୁକିରିସ୍‌ଟର୍ ଗଟେକ୍ ପେରିଡ୍ ଅଇବାକେ ପର୍‌ମେସର୍ ମକେ ବାଟ୍‌ଲା ଆଟେ । ନ ସାର୍‌ବା ଜିବନ୍ ପାଇବା ଜନ୍ ସୁବ୍ କବର୍ ପର୍‌ମେସର୍ କାତା ଦେଇରଇଲା, ସେଟା ଜାନାଇବାକେ ମକେ ପାଟାଇଲାଆଟେ । ସେ ଜିବନ୍ କିରିସ୍‌ଟର୍ ସଙ୍ଗ୍ ମିସିରଇବା ଜିବନ୍ ।

୨ \*ଏ ଚିଠି ତିମତି ମୁଇ ତକେ ଲେକ୍‌ଲିନି । ତୁଇ ମର୍ ଆଲାଦର୍ ପଅ ପାରା ଅଇ ଆରୁସ୍ । ଆମର୍ ବାବା ପର୍‌ମେସର୍ ଆରି ଆମର୍ ମାପୁରୁ ଜିସୁକିରିସ୍‌ଟ, ତକେ ଜିବନ୍ ଦୁକାଇ ଦୟା ଦେକାଅ ଆରି ସାନ୍ତି ଦେଅ ।

ଦନିଅବାଦ୍ ଆରି ସାର୍‌ଦା କରାଇବାଟା

୩ ମୁଇ ପର୍‌ମେସର୍‌କେ ଦନିଅବାଦ୍ ଦେଲିନି । ମର୍ ଆନିଦାଦିମନ୍ ଜେନ୍ତାର୍ ତାକେ ସେବା କଲାଇ, ସେନ୍ତାରି ମୁଇ ମିସା ତାକେ ସେବା କଲିନି । ମର୍ ବିବେକ୍ ମକେ

\* ୧:୨ ୧:୨ ପେରିଡ୍ ୧୭:୧

ଦସ୍ ଦେଏ ନାଇ । ମୁଇ ତରପାଇ ଦିନ୍‌ରାତି ପାର୍‌ତନା କଲିନି । ୪ ଆମେ ଦୁଇ ଲକ୍ ବେଗଲ୍‌ଲାବେଲେ ତୁଇ ଦୁକ୍ ଅଇ ଆଁସୁ ଜରାଇଲୁସ୍, ସେଟା ମର୍ ମନେଆତେ । ତେବର୍‌ପାଇ ତକେ ଦେକ୍‌ବି ବଲି ମୁଇ ବେସି ମନ୍ କଲିନି । ଜେନ୍ତାରି କି ମୁଇ ପୁରାପୁରୁନ୍ ସାର୍‌ଦା ଅଇବି । ୫ ତୁଇ ସତଇସେ ଜିସୁକିରିସ୍‌ଟକେ ବିସ୍‌ବାସ୍ କରିଆରୁସ୍ ବଲି ମର୍ ମନେଆତେ । ତୁଇ ବିସ୍‌ବାସ୍ କର୍‌ବା ଆଗ୍‌ତୁ ତର୍ ଆମା ଲଇ ଆରି ତର୍ ଆୟା ଉନିସ୍ ତାକେ ବିସ୍‌ବାସ୍ କର୍‌ତେରଇଲାଇ । ସେନ୍ତାରିସେ ତୁଇ ବିସ୍‌ବାସ୍ କର୍‌ବାଟା ଡାଞ୍ଚ ଆତେବଲି ମୁଇ ଜାନ୍‌ଲିନି । ୬ ତେବର୍‌ପାଇ ମୁଇ ମର୍ ଆଡ୍, ତର୍ ମୁଣ୍ଡେ ସଙ୍ଗଇ ପାର୍‌ତନା କଲାବେଲେ, ଜନ୍ ଆଡ୍‌ମାର୍ ଦାନ୍ ପର୍‌ମେସର୍ ତକେ ଦେଇରଇଲା, ସେଟା ବଞ୍ଚାଇକରି ସଙ୍ଗ ବଲି ଏତାଇଦେଲିନି । ୭ କାଇକେବଇଲେ ଜନ୍ ଆଡ୍‌ମା ପର୍‌ମେସର୍ ଆମ୍‌କେ ଦେଲାଆତେ, ସେଟା ଆମ୍‌କେ ତର୍‌ବାକେ ନ ଦେଏ । ତାର୍ ବାଦୁଲେ ଆଡ୍‌ମାଇ ବପୁ ଦେଇସି, ବିନ୍ ଲକ୍‌ମନ୍‌କେ ଆଲାଦ୍ କର୍‌ବାକେ ସିକାଇସି ଆରି ନିଜ୍‌କେ ଜାଗରଡ୍ ରଇବାକେ ସିକାଇସି ।

୮ ତେବର୍‌ପାଇ ଆମର୍ ମାପରୁ ଜିସୁକିରିସ୍‌ଟର୍ ବିସଇ, ବିନ୍ ଲକ୍‌କେ ଜାନାଇବାକେ ଲାଜ୍ ଅ ନାଇ । ତାର୍ ପାଇ ମୁଇ ଏବେ ବନ୍ଦିଗରେ ଆଟି, ମର୍‌ପାଇ ମିସା ଲାଜ୍ ଅ ନାଇ । ମାତର୍ ସୁବ୍ କବରର୍ ଲାଗି ଦୁକ୍ କସ୍‌ଟ ପାଇବାକେ ମର୍‌ସଙ୍ଗ୍ ମିସ୍ । ସେନ୍ତି କର୍‌ବାକେ ପର୍‌ମେସର୍ ତକେ ବପୁ ଦେଇସି । ପର୍‌ମେସର୍ ଆମ୍‌କେ ନ ସାର୍‌ବା ମରନେଅନି ବଞ୍ଚାଇକରି ଗଟେକ୍ ସୁକଲ୍ ଚଲାଚଲ୍‌ତି କର୍‌ବାକେ ଡାକିନେଲା ଆତେ । ୯ ନିକ କାମ୍ କଲାର୍ ପାଇ ସେ ଆମ୍‌କେ ବାଚେନାଇ । ମାତର୍ ତାର୍ ନିଜର୍ ଜଜ୍‌ନା ଇସାବେ ସେ ଆମ୍‌କେ ବାଟିକରି ତାର୍ ଦୟା ଦେକାଇଲା ଆତେ । ଏ ଜଗଡ୍ ତିଆର୍ ନ ଅଇତେ ପର୍‌ମେସର୍ ଜିବନ୍ ଦୁକାଇ, ଜିସୁକିରିସ୍‌ଟକେ ଆମର୍‌ଲାଗି ଏ ଜଗତେ ପାଗାଇଲା । ୧୦ ଆରି ଏବେ ସେ ଜିବନ୍ ଦୁକାଇ ଦୟା ଦେକାଇଲାଟା, ପର୍‌ମେସର୍ ଆମ୍‌କେ ଜାନାଇଆତେ । ଏଟା ଆମର୍ ରକିଆକାରି ଜିସୁକିରିସ୍‌ଟ ଜେ କି ଆମର୍‌ଟାନେ ଆଇଲା । ମରନର୍ ବପୁକେ ସେ କୁରୁପ୍‌ନାସ୍ କଲା । ଆରି ସୁବ୍ କବର୍ ଜାନ୍‌ଲାର୍‌ପାଇ ନ ସାର୍‌ବା ଜିବନ୍ ପାଇବାକେ ସେ ଆମ୍‌କେ ବାଟ୍ ଦେକାଇଲା ।

୧୧ ଜିସୁକିରିସ୍‌ଟର୍ ବିସଇ ରଇବା ଏ ସୁବ୍ କବର୍ ପର୍‌ମେସର୍ ମକେ ଜାନାଇବାକେ କଇଆତେ । ଗଟେକ୍ ସିକାଇବା ଲକ୍ ଆରି ପେରିଡ୍ ଇସାବେ, ସେ ମକେ ବାଟିଆତେ । ୧୨ ଏଟାର୍ ଲାଗି ମୁଇ ଏ ବନ୍ଦିଗରେ ଦୁକ୍ କସ୍‌ଟ ପାଇଲିନି । ପାଇଲେ ମିସା ଲାଜ୍ ଅଇନାଇ । କାଇକେବଇଲେ ମୁଇ ଜାକେ ବିସ୍‌ବାସ୍ କରିଆଟି, ତାକେ ଜାନି, ଆରି ମୁଇ ତାକେ ଜନ୍‌ଟା ସର୍‌ପି ଆତେ, ସେଟା ସେ ବାଉଡି ଆଇବା ଦିନ୍ ଜାକ, ଜତନ୍ କରି ସଙ୍ଗଇବାକେ ତାର୍ ବପୁ ଆତେ । ଏଟା ମୁଇ ତାଟ୍ ସଙ୍ଗ୍ ବିସ୍‌ବାସ୍ କଲିନି । ୧୩ ତୁଇ ମର୍‌ଟାନେଅନି ସଡ୍ ସିକିଆ ସୁନିଆରୁସ୍ । ସେନ୍ତାରିସେ ଚଲାଚଲ୍‌ତି କର୍ । ଜିସୁକିରିସ୍‌ଟର୍ ସଙ୍ଗ୍ ମିସଲାର୍ ପାଇ ଏଟା ବିସ୍‌ବାସ୍ ଆରି ଆଲାଦ୍ ସଙ୍ଗ୍ କର୍ । ୧୪ ଜନ୍ ସୁବ୍‌କବର୍ ପର୍‌ମେସର୍ ତକେ ଦେଇଆତେ, ସେଟାକେ ଦେକାରକା କର୍ । ଆମର୍ ବିଡ୍‌ରେ ରଇବା ସୁକଲ୍ ଆଡ୍‌ମାର୍ ବପୁସଙ୍ଗ୍ ସେଟା ଦେକାରକା କର୍ ।

୧୫ ଆସିଆ ଦେସେ ରଇବା ବେସି ବିସ୍‌ବାସିମନ୍ ମକେ ଚାଡିକରି ଗାଲାଇ ଆତଡ୍ ବଲି ତୁଇ ଜାନିଆରୁସ୍ । ତେଇ ପୁଗେଲ୍ ଆରି ଅର୍‌ମଗେନା ମିସା ମକେ ଚାଡି ଉଟିଗାଲାଇ । ୧୬ ଅନିସିପର୍ ଆରି ତାର୍ କୁଟ୍‌ମକେ ମାପରୁ ଦୟାକର । କାଇକେବଇଲେ ମୁଇ ବନ୍ଦିଗରେ ରଇଲାବେଲେ ସେ ମକେ ଦେକ୍‌ବାକେ ଲାଜ୍ ଅଏନାଇ । ତାର୍ ବାଦୁଲେ ସେ ତର୍‌କେ ତର୍ ଆସି ମକେ ସାର୍‌ଦା କରାଇଲା । ୧୭ ସେ ରମ୍ ଦେସେ ଆଇଲା ଦାପ୍‌ରେ ମକେ ବେଟ୍ ଅଇବାଜାକ ସବୁ ଜାଗାଇ କଜ୍‌ଲା ।

☆ ୧:୫ ୧:୫ ପେରିଡ୍ ୧୭:୧ ☆ ୧:୧୧ ୧:୧୧ ୧ମ ଡିମ୍ବି ୨:୭

୧୮ ବଡ଼ ବିଚାରନା ଦିନେ ତାକେ ଜେନ୍ତ୍ରୀ ମାପରୁ ଦୟା କର । ତୁଇ ନିଜେ ଜାନିଆରୁସ୍ ଏପିସିଡେଇ ସେ ମକେ କେତେକ୍ ଯାଇଜ କଲା ।

୨

କିରିସ୍ଟ ଜିସୁକେ ବିସ୍ବାସ୍ କରିରଇବା ସନିଅ

୧ ଏ ମର୍ ଆଲାଦର୍ ପ । ଜିସୁକିରିସ୍ଟ ଆମକେ ଜିବନ୍ ଦୁକାଇ ଦୟା ଦେକାଇଲାର ପାଇ ଡାଟ୍ ଅଇ ର । ୨ ଜେଡ୍ କି ଲକ୍ମନ୍ ବିନ୍ ଲକ୍ମନ୍ କେ ସିକାଇବାକେ ଅଦିକାର୍ ପାଇଆଡ୍, ଏନ୍ତାରି ଲକ୍ମନ୍ କେ ସବୁ ବିସଇ ସର୍ପିଦେସ୍ । କେତେକ୍ କେତେକ୍ ସାକିମନ୍ ମୁଆଟେ ତୁଇ ମର୍ଟାଣେଅନି ଜନ୍ ସାକି ସୁନିଆରୁସ୍, ସେନ୍ତାରି ଲକ୍ମନ୍ କେ ସେ ସବୁଜାକ ସର୍ପିଦେସ୍ ।

୩ କିରିସ୍ଟ ଜିସୁର୍ ଗଟେକ୍ ନିକ ସନିଅ ଅଇ, ମର୍ପାରା ଦୁକ୍ କସ୍ଟ ମୁର୍ଚିକରି ରଅ । ୪ ଗଟେକ୍ ସନିଅର୍ ବିସଇ ବାବିଦେକା । ସଇନ ଜୁଇଦ୍ କେ ଜିବାକେ ଜାଗରଡ୍ ଅଇବାବେଲେ, ଏ ଜଗତର୍ ବିସଇ କର୍ବାକେ ମନ୍ ନ ଦେଏ । କାଇକେବଇଲେ, ସେ ତାର୍ ଉପରର୍ ଅଦିକାରିକେ ସାର୍ଦା କରାଇବାକେ ମନ୍ କର୍ସି । ୫ ସେନ୍ତାରିସେ, ଗଟେକ୍ ପାଲାଇବା ଲକ୍ମନ୍ ବିସଇ ବାବିଦେକ୍ । ଜେ ଆରାଜିତାଟାଣେ ପାଲାଇବାକେ ମନ୍ କର୍ସି, ସେ ଜଦି ଆରାଜିତାର୍ ନିୟମ୍ ମାନିକରି ନ ପାଲାଇଲେ, ତାକେ ସେ ଇନାମ୍ ନ ମିଲେ । ୬ ଗଟେକ୍ ଚାସିର୍ ବିସଇ ବାବିଦେକ୍, ଜନ୍ ଚାସି କସ୍ଟ କରିରଇସି, ସେ ପର୍ଡୁମ୍ ପଲ୍ ପାଇବା ଦର୍କାର୍ । ୭ ମୁଇ ଜାଇଟା କଇଲିନି, ସେଟା ବାବିଦେକ୍, ମାପରୁ ସବୁ ବିସଇଟାଣେ ତକେ ଗିଆନ୍ ଦେଇସି ।

୮ ମୁଇ ଜନ୍ ସୁବକବର୍ ତକେ ଜାନାଇରଇଲି, ତେଇ ଜିସୁକିରିସ୍ଟକେ ଏତାଉଁ । ସେ ଦାଉଦର୍ କ୍ରୁମେ ଜନମ୍ ଅଇଲା ଆରି ପର୍ମେସର୍ ତାକେ ମରନେଅନି ଉଟାଇଲା । ୯ ସେ ସୁବକବର୍ ଲାଗି ମୁଇ ଦୁକ୍ କସ୍ଟ ଅଇ ଆଇଲିନି ଆରି ଗଟେକ୍ ଦସ୍ କଲା ଲକ୍ମନ୍ ପାରା ବନ୍ଦିଗରେ ଆଟି । ମାତର୍ ପର୍ମେସରର୍ ବାକିଅ ବାନ୍ଦାଇଅଇ ରଏନାଇ । ୧୦ ସେନ୍ତାରିସେ ବାଟିଅଇଲା ଲକ୍ମନ୍ ମିସା କେବେ ନ ସାର୍ବା ମଇମା ସଙ୍ଗ୍ ଜିସୁକିରିସ୍ଟ ଦେବା ମୁକ୍ତି, ପାଇବାଇ । ସେମନ୍ ଲାଗି ଏ ସବୁ ବିସଇ ମୁଇ ମୁର୍ଚିକରି ରଇଲିନି । ୧୧ ଏ ବାକିଅ ସର୍,

ଜଦି ଆମେ ତାର୍ ସଙ୍ଗ୍ ମରିଜାଇଆରୁ,

ସେନ୍ତାର୍ ଆଲେ ଆମେ ତାର୍ ସଙ୍ଗ୍ ବର୍ବୁ ମିସା,

୧୨ \*ଜଦି ଆମେ ମୁର୍ଚିକରି ରଇବୁ

ତେବେ ତାର୍ ସଙ୍ଗ୍ ସାସନ୍ ମିସା କର୍ବୁ ।

ଆମେ ଜଦି ତାକେ ନ ନାମ୍,

ସେ ଆମକେ ମିସା ନ ନାମେ ।

୧୩ ମାତର୍ ଆମେ ବିସ୍ବାସ୍ କର୍ବାଟା ଏଲା କଲେ ମିସା

ସେ କାତା ଦେଇରଇବାଟା ସବୁ କରିସାରାଇସି ।

କାଇକେବଇଲେ ସେ ତାର୍ କାତା ନ ବାଦ୍ଲାଏ ।

ନିମାନ୍ ସେବା କରୁ

୧୪ ପଦେକ୍ କାତା ନେଇ ଦଦାପେଲା ଅଇତେରଇଲେ, ସେଟା ତୁଟାଇସେ । ସୁନ୍ଦା ଲକ୍ମନ୍ କେ ନସ୍ଟକରି ଦେଇସି । ଏନ୍ତାରି କଇ ପର୍ମେସରର୍ ମୁଆଟେ ଲକ୍ମନ୍ କେ ଡାଟ୍ ସଙ୍ଗ୍ ଆଦେସ୍ ଦେସ୍ । ୧୫ ସର୍ ବାକିଅ ନିମାନ୍ ସଙ୍ଗ୍ ଜାନା । ଲାଜ୍ ନଇଲା କାମ୍ କର୍ବା ଲକ୍ମନ୍ ପାରା ମାପରୁର୍ ଲଗେ ନିଜ୍ କେ ଅଦିକାର୍ ପାଇଲା ଲକ୍ ବଲି ଦେକାଇଅଇବାକେ ଜତନ୍ ଅ । ୧୬ ମାତର୍ ଜନ୍ ଲକ୍ମନ୍ ଆସାର୍ କାତାଇ

ଆରି ବକୁଆ କାତାଇ ଦିଆନ୍ ଦେଇତେ ରଇବାଇ, ସେନ୍ତାରି ଲକ୍ମନର ଟାନେଅନି ଦୁରିକେ ର । ଜନ୍ ଲକ୍ମନ ସେନ୍ତାରିଟାନେ ମିସବାଇ, ସେ ଲକ୍ମନ ପରମେସରର ଟାନେଅନି ଦୁରିକେ ଜିବାଇ ।<sup>୧୭</sup> ତାକର୍ କାତା ଗାଗତେ ଅଦିକ୍ ଅଦିକ୍ ଅଇବା ଗଟେକ୍ ଗାଉପାରା ଅଇ ଲକ୍ମନକେ ନସାଇସି । ସେନ୍ତାରିସେ ଉମନାଅ ଆରି ପିଲିଡ୍ ଲକ୍ମନକେ ଏନ୍ତି ସିକିଆ ଦେଇ ବୁଲ୍ଲାଇନି ।<sup>୧୮</sup> ସେମନ୍ ମଲାଲକ୍ ଉଟି ସାରିଆତେ ବଲି କଇକରି ସଡ୍‌କେ ଚାଡିଦେଇଆଚଡ୍ । ଏନ୍ତାରି କଇକରି କେତେ କେତେ ଲକ୍ମର ବିସବାସ୍ ନସାଇଦେଇ ଆଚଡ୍ ।<sup>୧୯</sup> ଅଇଲେମିସା ପରମେସର୍ ଜନ୍ କୁନାଦି ବସାଇଆଚେ, ସେଟା ତାଟ୍‌ସେ ରଇସି । ସେ କୁନାଦି ଉପ୍‌ରେ ଏନ୍ତାରି ଲେକା ଅଇଲାଆଚେ, “ମାପୁରୁ ତାର୍ ନିଜର୍ ଲକ୍‌କେ ଜାନେ, ଆରି ଜେଡ୍‌କିଲକ୍ ସବୁ ଆମେ ମାପୁରୁର୍ ଲକ୍ ବଲାଇଅଇଲାଇନି, ସେମନ୍ ବୁଲ୍ କାମେ ଅନି ଦୁରିକେ ରଅଡ୍ ।”

<sup>୨୦</sup> ଗଟେକ୍ ରାଜାର୍ ଗରେ କେତେ ରକାମର୍ ଗିନାକୁଡ୍‌କା ରଇସି, କେତେଟା ସୁନା ରୁପା ସଙ୍ଗ୍ ତିଆର୍ ଅଇଲାଟା, କେତେଟା ଗର୍ ଆରି ଟିକଟ୍ ମାଟିସଙ୍ଗ୍ ତିଆର୍ ଅଇଲା, କେତେଟା ବିବା ବଜି ବେଲର୍‌ପାଇ ଆରି କେତେଟା ଦିନକେ ବାଇବାକେ ରଇସି ।<sup>୨୧</sup> ଜେ ନିଜ୍‌କେ ସବୁ ରକାମର୍ ପାପେଅନି ଜାଗର୍‌ଡ୍ କରିରଇସି, ମାପୁରୁ ସେମନ୍‌କେ ନିକ କାମର୍‌ପାଇ ବାଇସି । କାଇକେବଇଲେ, ସେ ଦେକ୍‌ବା ଇସାବେ, ସେମନ୍ ନିକ ଲକ୍ ଆରି ସବୁ ରକାମର୍ ଦରମ୍ କାମର୍‌ପାଇ ନିଜେ ସର୍‌ପି ଅଇଲାଇ ଆଚଡ୍ ।<sup>୨୨</sup> ମାତର୍ ଦାଙ୍ଗ୍‌ତା ବଇସେ ରଇବା ଗାଗଡ୍‌ର୍ ମନ୍‌କର୍‌ବାଟାନେଅନି ତୁଇ ଦୁରିକେ ର । ଟିକ୍ ବିସଇ କର୍‌ବାକେ ଚେସ୍‌ଟା କର୍ । ବିସବାସେ ଡାଁଟ୍ ରଅ । ବିନ୍ ଲକ୍ମନକେ ଆଲାଦ୍ କର୍ । ଆରି ତାକର୍ ସଙ୍ଗ୍ ସାନ୍ତିସଙ୍ଗ୍ ର । ମନ୍‌କେ ସୁକଲ୍ କରି ଜେଡ୍‌କି ସବୁଲକ୍ ମାପୁରୁକେ ପୁଜା କଲାଇନି, ସେମନ୍‌ର୍ ସଙ୍ଗ୍ ଏ ସବୁଜାକ କର୍ ।<sup>୨୩</sup> ଆସାର୍ କାତାଇଅନି, ଚୁଟାଇ ଦଦାପେଲା ଅଇବା କାତାଇଅନି ଦୁରିକେ ର । କାଇକେବଇଲେ, ସେନ୍ତାରି ଟାନେ ମିସବା ଲକ୍ମନ୍ ସବୁ କିରଜାଟି ଅଇକରି ସାରିଜିବାଇ । ଏଟା ତୁଇ ଜାନିଆଚୁସ୍ ।<sup>୨୪</sup> ମାପୁରୁକେ ସେବା କର୍‌ବା ଏନ୍ତାରି ଗଟେକ୍ ଲକ୍ କିରଜାଟି କର୍‌ବାର୍‌ନାଇ । ତାର୍ ବାଦୁଲେ, ସେ ସବୁକେ ସୁଆଲେ ଚଲାଟଲ୍‌ତି କର୍‌ବାର୍ । ସେ ନିକସଙ୍ଗ୍ ସିକାଇବାକେ ଜାନ୍‌ବାର୍‌ଆଚେ । ଦାପ୍‌ରେ ରିସା ନ ଅଇକରି ମୁର୍‌ତି ରଇବାର୍ ଆଚେ ।<sup>୨୫</sup> ପରମେସର୍ ତାର୍ ମନ୍ ବାଉଡାଇବାକେ ଦେଇସି, ସେଟା ଆସାଅଇ ତାର୍ ବିରଦେ କାତା ଅଇବା ଲକ୍ମନକେ ସେ ଦରମ୍ ସଙ୍ଗ୍ ସୁଆଲ୍ କର୍‌ବାର୍ ଆଚେ । ସଡ୍ ବିସଇ ଜାନ୍‌ବାକେ ସେମନ୍‌କେ ସାଇଜ କର ।<sup>୨୬</sup> ତାର୍ ଚିନ୍ତା କର୍‌ବାଟାନେ ସେମନ୍ ସଡ୍ ବିସଇ ଅଇସି କି ନାଇ ବଲି ନ ବାବିକରି ରଇବାର୍ । ତାର୍ ମନ୍ କଲାଟା ପୁରାପୁରୁନ୍ କର୍‌ବାକେ ସଇତାନ୍ ସେମନ୍‌କେ ବନ୍ଦିକରି ନେଲାଆଚେ । ତାର୍ ପାନ୍‌ଦେଅନି ସେମନ୍ ରକିଆ ପାଅଡ୍ ।

## ୩

### ସେସ୍ କାଲେ ଗଟଲା ଗଟ୍‌ନା

<sup>୧</sup> ମାତର୍ ଜାନିର । ଜଗତର୍ ସାରାସାରି ଦିନମନ୍‌କେ ବେସି ଦୁକ୍ କସ୍‌ଟ ବେଲା ଆଇସି ।<sup>୨</sup> କାଇକେବଇଲେ ଲକ୍ମନ୍ ନିଜେ ଆଲାଦ୍ ଅଇକରି ବିନ୍ ଲକ୍‌କେ ଆଲାଦ୍ ନ କରଡ୍ । ସେମନ୍ ଡାବୁକାସୁ ଆସାକର୍‌ବା ଲକ୍, ନିଜର୍ ବିସଇଟାନେ ବଡ୍‌ପନ୍ ଅଇବା ଲକ୍, ବିନ୍ ଲକ୍‌କେ ନିନ୍ଦା କର୍‌ବା ଲକ୍, ତାକର୍ ଆୟା ବାବାର୍ କାତା ନ ମାନ୍‌ବା ଲକ୍, ଦନିଅବାଦ୍ ଦେବାଟା ପାସର୍‌ବା ଲକ୍, ପରମେସରର୍ ବିସଇକେ ସନ୍‌ମାନ୍ ନ ଦେବା ଲକ୍,<sup>୩</sup> ବିନ୍ ଲକ୍ମନକେ କେମା ନ ଦେବା ଲକ୍, ବିନ୍ ଲକ୍‌ର୍ ବିସଇ ମିଟ୍ କଇବା ଲକ୍, ନିଜେ ଜାଗର୍‌ଡ୍ ନ ରଇବା ଲକ୍, କିରଜାଟି ଅଇବା ଲକ୍, ନିକ ବିସଇ ଗିନ୍ କର୍‌ବା ଲକ୍,<sup>୪</sup> ବିସବାସେ ବିସ୍ ଦେବା ଲକ୍, ବକୁଆ ବିସଇ କର୍‌ବା

ଲକ୍ଷ୍ମୀ, ବିନ୍ଦୁ ଲକ୍ଷ୍ମୀଗଣେଶ୍ଵରୀ ବଡ଼ ବଲ୍ଲଭାଭିକ୍ଷା ଲକ୍ଷ୍ମୀ, ପରମେଶ୍ଵରଙ୍କେ ଆଲ୍ଲାଦ୍ କରବା ବାପୁଲେ ନିଜ୍ଞଙ୍କେ ସାର୍ଵଦା କରାଇବା ଲକ୍ଷ୍ମୀ । \* ପରମେଶ୍ଵରଙ୍କେ ସେବା କଲିନି ବଲି ଦେକାଇବାଇ, ମାତର ତାର ବପୁ ତାକର୍ ଜିବନ୍ ବାଦ୍ଲାଇବାକେ ନ ଦେଅଡ଼ । ସେନ୍ତାରି ଲକ୍ଷ୍ମୀମନର୍ଗଣେଶ୍ଵରୀ ଦୁରିକେ ର । ୬ କାଇକେବଇଲେ ଏନ୍ତାରି ଲକ୍ଷ୍ମୀ ବିନ୍ଦୁ ଗରମନ୍ଦକେ ପୁରିଦେଇ ତେଇ ରଇବା ମାଇଜିମନ୍ଦକେ ନାଡ଼ାଇଲାଇନି । ଏ ମାଇଜିମନ୍ଦ ତାକର୍ ପାପର ଲାଗି ନିଜ୍ଞଙ୍କେ ଦସ୍ ଦେଇ ବିନ୍ଦୁ ବିନ୍ଦୁ ରକାମର୍ କରାପ୍ ମନ୍ଦକର୍ବାଟାସଙ୍ଗ୍ ପୁରାପୁରୁନ୍ ଅଇଲାଆତର୍ । ୭ ସେମନ୍ ସବୁବେଲେ ବିନ୍ଦୁ ବିନ୍ଦୁ ରକାମର୍ ସିକିଆ ସିକିବାକେ ମନ୍ଦ କଲାଇନି । ମାତର ତେଇର୍ ସଡ଼ ବିସଇ ନାଜାନଲାଇନି । « ଆଗର୍ କାଲେ ଜେନ୍ତାରିକି, ଜୁନସ୍ ଆରି ଜମ୍ବିରିସ୍ ମସାର୍ ବିରୁଦେ ଉଟ୍ଲାଇ, ସେନ୍ତାରିସେ ଏ ସିକାଉମନ୍ ମିସା ସଡ଼କେ ବିରଦ୍ କଲାଇନି । ସେମନ୍ ମନ୍ଦ କରାପ୍ ଅଇଆତେ । ଆରି ବିସ୍ବାସର୍ କାତା ଉଟ୍ଲେ ତାକର୍ଗା ହୁଟାଇସେ । ୯ ମାତର ସେମନ୍ ନିଜେ ପାଁଟିରଇବାଟା ସବୁବେଲର୍ପାଇ ନ ରଏ । କାଇକେବଇଲେ ଜାନାସ୍ ଆରି ଜିମିରସ୍ ବକୁଆଟାମନ୍ଦ ବଲି ଆଗତୁର୍ ଲକ୍ଷ୍ମୀ ଜାନଲାଇ, ସେନ୍ତାରିସେ ଏବର୍ ଲକ୍ଷ୍ମୀମନ୍ଦ ମିସା ସେମନ୍ ବକୁଆ ବଲି ଜାନବାଇ ।

**ତିମତିକେ ପାଉଲର୍ ସେସ୍ କାତା**

୧୦ ମାତର ତିମତି ତୁଇ ମର୍ ସବୁ ବିସଇ ଜାନିଆରୁସ୍ । ମୁଇ ଲକ୍ଷ୍ମୀମନ୍ଦକେ କେନ୍ତାରି ସିକାଇଲିନି, କେନ୍ତାରି ଚଲାଟଲ୍ଡି କଲିନି, ମର୍ ଆଦେସ୍ କାଇଟା, ମର୍ ବିସ୍ବାସ୍ କେନ୍ତାଟା, ମୁଇ କେନ୍ତା ମୁରଟିକରି ରଇଲିଆଟି, ବିନ୍ଦୁ ବିନ୍ଦୁ ଲକ୍ଷ୍ମୀମନ୍ଦକେ କେନ୍ତା ଆଲ୍ଲାଦ୍ କରିଆଟି ଆରି ମକେ ଆଇଲା ଦୁକ୍ କସ୍ଟ ମିସା ଜାନୁସ୍ । ୧୧ \*ଲକ୍ଷ୍ମୀମନ୍ଦ ମକେ ଦୁକ୍ କସ୍ଟ ଦେଲାଟା ଆନ୍ଟିକିୟ, ଇକନିୟ ଆରି ଲୁସ୍ତା ନଅର୍ମନ୍ଦକେ କାଇ କାଇଟା ଅଇରଇଲା ଆରି କେତେକ୍ ଅଦିକ୍ କସ୍ଟ ପାଇରଇଲି, ସେ ସବୁ ବିସଇ ତୁଇ ଜାନୁସ୍ । ମାତର ମାପରୁ ଜିସୁ ମକେ ସବୁ ଦୁକ୍ କସ୍ଟ ଟାନ୍ଦେଅନି ରକିଆ କଲା । ୧୨ ଦେକ୍ବାକେଗାଲେ ଜେଡ଼କି ଲକ୍ଷ୍ମୀ ଜିସୁକିରିସ୍ଟକେ ବିସ୍ବାସ୍ କରି ପରମେଶ୍ଵର ଦେକ୍ବା ଇସାବେ ଦରମ୍ ଚଲାଟଲ୍ଡି କର୍ବାକେ ମନ୍ଦ କଲାଇନି, ସେମନ୍ ସବୁ ବିସ୍ବାସ୍ ନ କଲା ଲକ୍ଷ୍ମୀମନର୍ଗଣେଶ୍ଵରୀ ଦୁକ୍ କସ୍ଟ ପାଇବାଇ । ୧୩ ମାତର କରାପ୍ ଲକ୍ଷ୍ମୀମନ୍ଦ ଆରି ନାଡ଼ାଉମନ୍ ଅଦିକ୍ ଅଦିକ୍ କରାପ୍ ଅଇଜିବାଇ । ସେମନ୍ ଲକ୍ଷ୍ମୀମନ୍ଦକେ ନାଡ଼ାଇକରି ନିଜେ ନାଡ଼ାଇଅଇବାଇ । ୧୪ ମାତର ତୁଇ ଜେଡ଼କି ବିସଇ ସିକିଆରୁସ୍, ଆରି ସେଟା ସବୁ ସଡ଼ ବଲି ବିସ୍ବାସ୍ କରିଆରୁସ୍, ସେଟା ସବୁ ଡାଟ୍ ସଙ୍ଗ୍ ଦାରି ର । କାଇକେବଇଲେ, ନିକ ସିକାଇବା ଲକ୍ଷ୍ମୀମନ୍ଦ ଟାନ୍ଦେଅନି ଏ ସବୁ ସିକିଆରୁସ୍ । ୧୫ ଆରି ତୁଇ ପିଲାବେଲେ ଅନି ସୁକଲ୍ ସାସ୍ତର୍ ଜାନିଆରୁସ୍ । କିରିସ୍ଟ ଜିସୁକେ ବିସ୍ବାସ୍ କଲାଟ୍ ପାଇ ପରମେଶ୍ଵର ତକେ ରକିଆ କର୍ସି ବଲି ତୁଇ ଜାନୁସ୍ନି । ୧୬ ସବୁ ସାସ୍ତର୍ ପରମେଶ୍ଵର ଟାନ୍ଦେଅନି ଆଇଲା ଆତେ, ଆରି ସେଟା ଲକ୍ଷ୍ମୀମନ୍ଦକେ ସିକାଇବାକେ, ବୁଲ୍ ଅଇଲାଟା ଟିକ୍ କର୍ବାକେ, ଟିକ୍ ବିସଇ କର୍ବାକେ, ଆରି ଲକ୍ଷ୍ମୀମନ୍ଦକେ ସିକାଇବାକେ ଆମ୍ବକେ ସାଇଜ କର୍ସି । ୧୭ ଜେନ୍ତାରି କି, ପରମେଶ୍ଵରଙ୍କେ ସେବା କର୍ବା ଗଟେକ୍ ଲକ୍ଷ୍ମୀ ପୁରାପୁରୁନ୍ ତିଆର୍ ଅଇ, ସବୁ ଦରମ୍ କାମ୍ କର୍ବାକେ ବପୁ ପାଇସି ।

**୪**

୧ ପରମେଶ୍ଵର ଆରି ଜିସୁକିରିସ୍ଟ ମର୍ ସାକି । ଜେକି ମଲା ଲକ୍ଷ୍ମୀମନ୍ଦ ଆରି ଜିବନ୍ ରଇଲା ଲକ୍ଷ୍ମୀମନ୍ଦ ବିଟାର୍ କର୍ସି । ତାର ରାଇଜର୍ ଲାଗି, ସେ ଜଗତେ ସାସନ୍ଦ କର୍ବାକେ ଆଇସି । ସେଟାପାଇ ମୁଇ ତମ୍ବକେ ତିଆର୍ଲିନି । ୨ ସୁବ୍ କବର୍ ସବୁକେ

\* ୩:୧୧ ୩:୧୧ ପେରିଡ଼ ୧୩:୧୪-୫୨; ପେରିଡ଼ ୧୪:୧-୭; ପେରିଡ଼ ୧୪:୮-୨୦

ଜାନାଆ । ଲକ୍ମନ ସେଟା ସୁନ୍ଦବାକେ ମନ୍ କଲାବେଲେ କି ନ ସୁନ୍ଦବା ବେଲେ ସେଟା ଜାନାଇବାକେ ଜାଗିର । ତୁଲକରି କାରାପ୍ କାମ୍ କରବା ଲକ୍ମନକେ ସେଟା ଚାଡ଼ବାକେ ଡାଟ୍ ସଙ୍ଗ୍ କ । ଆସା ନ ଚାଡ଼ି ପରମେସରର୍ ବାକିଅ ସିକାଇତେର । ସେମନ୍‌କେ ନିକ କାମ୍ କରବାକେ ସାରଦା କରାଆ । ୩ ଗଟେକ୍ ବେଲା ଆଇସି, ଜେତେବେଲେ ସଡ଼ ସିକିଆ ସୁନ୍ଦବାକେ ଲକ୍ମନ ମନ୍ ନ କରଡ଼ । ତାର୍ ବାଦୁଲେ ସେମନ୍ ଜନ୍ କାରାପ୍ ବିସଇ କରବାକେ ମନ୍ କରବାଇ, ସେଟା କରଡେରଇବାଇ । ବିନ୍ ବିନ୍‌ଟା ସିକାଉମନ୍‌କେ ଡାକିକରି, ତାକର୍ ଟାନେ ଜନ୍ ସାରଦାର୍ ବିସଇ ସୁନ୍ଦବାକେ ମନ୍ କରବାଇ, ସେନ୍ତାରି ଲକ୍ମନକେ ଡାକିଆନ୍‌ବାଇ । ୪ ସଡ଼ ବିସଇ ଦିଆନ୍ ନ ଦେଇକରି କାତାନିମନ୍ ସୁନ୍ଦବାକେ ମନ୍ କରବାଇ । ୫ ମାତର୍ ତିମତି, ତୁଇ ନିଜେ ସବୁବେଲେ ଜାଗରଡ଼ ଅଇ ର । ଦୁକ୍ କସଟ ଆଇଲେ ମୁରଟିକରି ର । ସୁବକବର୍ ଜାନାଇତେର । ତର୍ ଦାଇତେ ରଇବା ସବୁ କାମ୍ କରଡେରଇବାର୍ ।

୬ ଗଟେକ୍ ପୁଜାରି ଜେନ୍ତିକି ବେଦିଟାନେ ବଲି ଚଗାଇସି, ସେନ୍ତାରିସେ, ଏବେ ମର୍ ଜିବନ୍ ସର୍ପାଇ ଅଇବା ବେଲା କେଟିଆଟେ । ତାର୍‌ଲାଗି ଏ ସବୁ ଆଦେସ୍ ମୁଇ ତକେ ଦେଲିନି । ୭ ଆରାଜିତାଟାନେ ମୁଇ ନିକସଙ୍ଗ୍ ଜୁଇଦ୍ କଲିଆଟି । ଜେଡ଼କି ପାଲାଇବାର୍ ରଇଲା ମୁଇ ନିକସଙ୍ଗ୍ ସାରାଇଲି । ଆରି ମୁଇ ମର୍ ବିସବାସ୍ ଆରାଇନାଇ । ୮ ଏବେ ସର୍ଗେ ମର୍ପାଇ ଜିଡ଼ଲା ମୁକୁଟ୍ ସଙ୍ଗ୍‌ଆଟେ । ଏ ମୁକୁଟ୍ ପରମେସରର୍ ମୁଆଟେ ମୁଇ ଦରମ୍ ସଙ୍ଗ୍ ଚଲାଚଲ୍‌ତି କଲାଟ୍‌ପାଇ ଆଟେ । ମାପୁରୁ ଜେ କି କାକେ ଅନିଆଇ ନ କରି ବିଚାର୍ କରସି, ତାର୍ ବିଚାର୍‌ନା ଦିନେ ସେ ମୁକୁଟ୍ ମକେ ପୁରୁସ୍କାର୍ ଇସାବେ ଦେଇସି । ସେଟା ଅବକା ମର୍ପାଇ ନାଇ, ମାତର୍ ଜେଡ଼କି ଲକ୍ ସେ ବାଉଡ଼ି ଆଇବାଟା ଜାଗିଆଟଡ଼, ସେମନ୍‌କେ ସବୁକେ ଦେଇସି ।

**ନିଜର୍ ଆଦେସ୍**

୯ ତିମତି, ଜେତେକ୍ ଦାପରେ ତୁଇ ମର୍ଲଗେ ଆଇବାକେ ଚେସ୍‌ଟା କର୍ । ୧୦ \*କାଇକେବଇଲେ ଦିମା ଏବେ ମକେ ଚାଡ଼ିକରି ତେସଲନିକି ଗାଲାଆଟେ । ସେ ଏ ଜଗତର୍ ବିସଇ ଅଦିକ୍ ମନ୍ କଲାନି । କରସିନ୍ ଗାଲାତିଆଇ ଗାଲା, ଆରି ତିତସ୍ ଦୁଲମତି ଗାଲା । ୧୧ \*ଲୁକ୍ ଗଟେକ୍ ଲକ୍‌ସେ ମର୍ସଙ୍ଗ୍ ଆଟେ । ତୁଇ ଆଇଲାବେଲେ ମାରକକେ ତର୍ ସଙ୍ଗ୍ ଡାକିଆନ୍ । କାଇକେବଇଲେ ଇତି ରଇଲାବେଲେ ମର୍ କାମେ ସେ ସାଇଜ କରସି । ୧୨ \*ତିକିକସକେ ମୁଇ ଏପିସିଅ ପାଟାଇଆଟି । ୧୩ \*ତୟସ୍ ନଅର୍ ଚାଡ଼ଲାବେଲେ କର୍ପର୍ ଗରେ ମୁଇ ମର୍ ଅଡ଼ବାଟା ଚାଡ଼ିଆଟି । ତୁଇ ଆଇବାବେଲେ ସେଟା ଦାରିଆଉ । ଆରି ମର୍ ବଇପତର୍‌ମନ୍ ଆରି ଲଡାକେ ଆଇବା କାଗଜ୍‌ପତର୍ ମିସା ଦାରିଆଉ । ମେଣ୍ଡାର୍ ଚାମ୍ ସଙ୍ଗ୍ ତିଆର୍ ଅଇଲାଟା ଚାଡ଼ବାର୍ ନାଇ ।

୧୪ \*କ୍‌ସ୍ କାମ୍ କରୁ ଆଲେକ୍‌ଜାଣ୍ଡେର୍ ମକେ ବେସି ଅନିଆଇ କରି ଆଟେ । ସେ କଲା କାମର୍‌ପାଇ ମାପୁରୁ ତାକେ ବେସି ଡଣ୍ଟ ଦେଇସି । ୧୫ ତୁଇ ମିସା ତାର୍‌ଟାନେଅନି ଜାଗରଡ଼ ରଅ । ସେ ଆମର୍ ସିକିଆ ଡାଟ୍ ସଙ୍ଗ୍ ବିରଦ୍ କରଇରଇଲା ।

୧୬ ମୁଇ ପର୍‌ଡୁମ୍‌ତର୍ ନିଜ୍‌କେ ରକିଆ କରବାକେ ବିଚାର୍‌ନା ଜାଗାଇ ଗାଲାବେଲେ, ମର୍‌ବାଟେ ଅଇକରି ସାକି ଦେବାକେ କେ ନ ରଇଲାଇ । ତାର୍ ବାଦୁଲେ ସବୁଲକ୍ ମକେ ଚାଡ଼ିଦେଲାଇ । ଏ କାମର୍‌ପାଇ ସେମନ୍‌କେ ପରମେସର୍ ଡଣ୍ଟ ନ ଦେଅ । ୧୭ ସେ ବିଚାର୍‌ନା ଜାଗାଇ ଜେଡ଼କି ଜିଉଦି ନ ଅଇଲା ଲକ୍ମନ ରୁଣ୍ଡିରଇଲାଇ, ସେମନ୍‌କେ ସବୁକେ ଜିସୁକିରିସର୍‌ର୍ ସୁବକବର୍ ଜେନ୍ତାରିକି ମୁଇ

\* ୪:୧୦ ୪:୧୦ କଲସିଅ ୪:୧୪; ପିଲିମନ୍ ୧:୨୪; ୨ୟ କରନ୍ତିୟ ୮:୨୩; ଗାଲାତିୟ ୨:୩; ତିତସ୍ ୧:୪ \* ୪:୧୧ ୪:୧୧ କଲସିଅ ୪:୧୪; ପିଲିମନ୍ ୧:୨୪; ପେରିଡ଼ ୧୨:୧୨,୨୫;୧୩:୧୩;୧୫:୩୭-୩୯; କଲସିଅ ୪:୧୦; ପିଲିମନ୍ ୧:୨୪ \* ୪:୧୨ ୪:୧୨ ପେରିଡ଼ ୨୦:୪; ଏପିସିୟ ୬:୨,୨୨; କଲସିଅ ୪:୬,୮ \* ୪:୧୩ ୪:୧୩ ପେରିଡ଼ ୨୦:୬ \* ୪:୧୪ ୪:୧୪ ୧ମ ତିମତି ୧:୨୦; ରମିୟ ୨:୬

ପୁରାପୁରୁନ୍ ବାବେ ଜାନାଇପାର୍ବି, ସେଟାର୍ପାଇ ମାପୁରୁ ମର୍ସଙ୍ଗ ରଇକରି ମକେ ବପୁଦେଲାଆତେ । ସେ ବିଟାର୍ନାର୍ ସାରାସାରି ମକେ କାଇବାକେ ଆସିରଇବା ଗଟେକ୍ ସିଅର୍ ଟାନେଅନି ରକିଆ କଲାପାରା ମାପୁରୁ ରକିଆ କଲା । ୧୮ ବିପଦେ ପାକାଇବା ସବୁ ଗଟ୍ନାଇଅନି ମାପୁରୁ ଜିସୁ ମକେ ରକିଆ କରି, ସର୍ଗେ ରଇବା ତାର ରାଇଜେ କାଇଟା ନ ଅଇତେ ଡାକିନେଇସି । କାଲ୍ କାଲ୍ ଜୁଗ୍ ଜୁଗ୍ ସେ ଆକା ଡାକ୍ପୁଟା ପାଅ । ଆମେନ୍ !

ପାଉଲର୍ ଜୁଆର୍

୧୯ ☆ପିରସିଲାକେ ଆରି ଆକିଲାକେ ଜୁଆର୍ ଜାନାଆ । ଆରି ଅନିସିପରର୍ କୁଟୁମ୍‌କେ ମିସା ମର୍ ଜୁଆର୍ ଜାନାଆ । ୨୦ ☆ଏରାସ୍ତ କରନ୍ତିଅ ନଅରେ ଆତେ । ଆରି ତରପିମସ୍‌କେ ଜର୍ ଅଇଲାକେ ମୁଇ ତାକେ ମିଲିତି ଚାଡିଦେଇ ଆସିଆତି । ୨୧ ତୁଇ ସିଡ୍‌ଦିନ୍ ଅଇବା ଆଗ୍‌ତୁ ଆଇବାକେ ଚେସ୍‌ଟା କର୍ । ଇଉବୁଲ୍ ପୁଦେନ୍‌ସ୍, ଲିନ୍, କଲ୍‌ଦିଆ ଆରି ଇତିରଇବା ସବୁ ବିସ୍‌ବାସି ବାଇବଇନି ତକେ ଜୁଆର୍ ଜାନାଇଲାଇନି ।

୨୨ ପର୍‌ମେସର୍ ଜିବନ୍ ଦୁକାଇ ଦୟା କଲାଟା ତମର୍ ସଙ୍ଗ୍ ରଅ ।

☆ ୪:୧୯ ୪:୧୯ ପେରିଡ୍ ୧୮:୨;୨ୟ ତିମତି ୧:୧୭,୧୭ ପେରିଡ୍ ୨୦:୪;୨୧:୨୯

☆ ୪:୨୦ ୪:୨୦ ପେରିଡ୍ ୧୯:୨୨; ରମିୟ ୧୭:୨୩;



# ତିତସଙ୍କ ନିକଟକୁ ପାଉଲଙ୍କର ପତ୍ର ପାଉଲ୍ ତିତସ୍‌ଙ୍କେ ଚିଠିଲେଖଲାଟା ଏ ବଇରୁ ବିସଇ ଜାନ୍‌ବାଟା

ପାଉଲ୍‌ର ଚାର୍‌ଟା ଚିଠି ବିତ୍‌ରେଅନି ତିତସ୍ ବଇ ଗଟେକ୍ । ଜନ୍‌ଟାକି ମଣ୍ଡଲିକେ ନ ଜାନାଇକରି ଲକ୍‌ମନ୍‌କେ ଜାନାଇଲାନି । ବିନ୍ ତିନ୍‌ଟା ଚିଠି ଅଇଲାନି ୧ ମ ତିମତି, ୨ ଯ ତିମତି ଆରି ପଲିମନ୍ । ପାଉଲ୍ ତିତସ୍‌ଙ୍କେ ଜେନ୍ତ୍ରକି ସେ ସବୁ ଲକ୍‌ର ମୁଆଟେ ଆଉଲିଅଇକରି ଏ ଚିଠି ପତ ବଲି ଲେଖଲାନି । ପେରିତ୍ ଇସାବେ ତାର୍ କାଇକାଇଟା ରଇବାର ଦରକାର୍ ସେ ବିସଇରେ ବୁଜାଇଲାନି । ଏଟା କେତେଟା ବିସଇ ତିତସ୍ ଆଗେଅନି ଜାନିରଇଲା । ଏ ଚିଠି କିରିସ୍‌ଟ ଜନମ୍ ଅଇକରି ୬୩-୬୪ ବରସ୍ ବିତ୍‌ରେ ପାଉଲ୍ ଲେକି ରଇସି ।

ପାଉଲ୍ କିରିତରୁ ଦିପେ ରଇଲା ମଣ୍ଡଲିମନ୍‌କେ ଚାଲାଇବାକେ ତିତସ୍‌ଙ୍କେ ଆଦେସ୍ ଦେଲାନି । ସେ ସମାନ୍ ସିକିଆ ତିମତିକେ ମିସା ଦେଲାଆଟେ । ପାଉଲ୍ ଏ ଚିଠିଟାନ୍ ତିତସ୍‌ଙ୍କେ ମଣ୍ଡଲିର୍ ମୁକିଅ ଲକ୍‌ମନ୍‌କେ ବାଟ୍‌ଲା ଆରି ସେମନ୍‌କେ ସିକାଇବା ବିସଇରେ ଲେଖଲାନି । ଆଜିର୍ ମଣ୍ଡଲି ଆରି ମଣ୍ଡଲିର୍ ନେତାମନ୍ ସାସନ୍ କରବାକେ କେନ୍ତ୍ର ଗୁନ୍‌ଚଲନ୍ ରଇବାର୍ ଆଟେ ତାର୍ ଚିକିନିକି ସଙ୍ଗ୍ ଦିଆନ୍ ଦେବାର୍ ଦରକାର୍, ସେଟା ଚିଠିତେଇ ଲେଖଲା ଆଟେ ।

### ଏ ବଇ ବିତ୍‌ରେ ରଇଲାଟା

- ୧. ପାଉଲ୍ ତିତସ୍‌ଙ୍କେ ସୁଆଲ୍ ଲକ୍‌ମନ୍‌କେ ବାଟ୍‌ବାକେ ଆଦେସ୍ ଦେଲାନି । ୧:୧-୧୬ ।
- ୨. ତାର୍‌ପଟେ ସେ ଲକ୍‌ମନ୍‌କେ ମିସା ଦରମ୍ ଜିବନେ ଜିଇବା କାଇବାକେ ସିକିଆ ଦେବାକେ ଆଦେସ୍ ଦେଲାନି, ଜନ୍‌ଟାକି ପରମେସ୍‌ରକେ ସାର୍‌ଦା କରାଇସି । ୨:୧-୩:୧୧
- ୩. ସାରାସାରି ପାଉଲ୍ ତାକର୍ ସାରାସାରି କାତା ଲେକି ଲେଖ୍‌ବାଟା ସାରାଇଲାଇନି । ୩:୧୨-୧୫

### ତିତସ୍‌ଙ୍କେ ପାଉଲ୍‌ର ଚିଠି

୧ ମୁଇ ପାଉଲ୍, ଏ ଚିଠି ଲେଖଲିନି । ମୁଇ ପରମେସ୍‌ରକେ ସେବାକରି ଜିସୁକିରିସ୍‌ଟର୍ ଗଟେକ୍ ପେରିତ୍ ଅଇଆଟି ।

ଜନ୍ ଲକ୍‌ମନ୍‌କେ ତାର୍‌ଟାନ୍ ତାର୍ ସଙ୍ଗ୍ ବିସବାସ୍ କରବାକେ ପରମେସ୍‌ର ବାଟ୍‌ଲା ଆଟେ, ଆରି ସେମନ୍ ଜେନ୍ତ୍ରକି ଜିସୁକିରିସ୍‌ଟର୍ ନିକ ସିକିଆ ବୁଜ୍‌ବାଇ, ସେନ୍ତାରି ଲକ୍‌ମନ୍‌କେ ସାଇଜ କରବାକେ ମୁଇ ବାଟିଅଇଆଟି । ଏ ସିକିଆ ନିକସଙ୍ଗ୍ ଜାନ୍‌ଲେ, ପରମେସ୍‌ରକେ ସାର୍‌ଦା କରାଇବା ପାରା ଚଲାଟଲ୍‌ତି କରବାକେ ସେମନ୍ ସିକ୍‌ବାଇ । ୨ ଏନ୍ତାରିଅଇ ସେମନ୍ କାଲ୍‌କାଲ୍ ଜୁଗ୍‌ଜୁଗ୍ ପରମେସ୍‌ରର୍ ସଙ୍ଗ୍ ବୁଟ୍‌ବାକେ ଆସା କରବାଇ । କାଇକେବଇଲେ କାଇଟା ତିଆର୍ ନ ଅଇତେ କାଲ୍‌କାଲ୍ ଜୁଗ୍‌ଜୁଗ୍ ତାର୍ ଲକ୍ ତାର୍ ସଙ୍ଗ୍ ବୁଟ୍‌ବାଇ ବଲି ପରମେସ୍‌ର କାତା ଦେଇରଇଲା । ଏଟା ପୁରାପୁରୁନ୍ ସତ୍ ବଲି ଆମେ ଜାନ୍‌ଲୁନି । କାଇକେବଇଲେ ସେ କେବେ ମିଟ୍ ନ କଏ । ୩ ପରମେସ୍‌ର ଚିକ୍ କଲା ବେଲାଇ ମୁଇ ସୁଦ୍‌କବର୍ ଜାନାଇଲିକେ, ଲକ୍‌ମନ୍ ସେଟା ବୁଜ୍‌ବାକେ ସେ ବପୁଦେଲା । ଏଟା ପରମେସ୍‌ରର୍ କାମ୍ । ସେ ଆକା ଆମ୍‌କେ ରକିଆ କରସି । ସେ ଏ ଦାଇତ୍ ଦେଇକରି ମକେ ତିଆର୍‌ଲା ଆଟେ ।

୪ \*ଏ ତିତସ୍ୱ, ତରଫାଇ ମୁଇ ଏ ଚିଟି ଲେକଲିନି । ଆମେ ଜିସୁକିରିସ୍ତକେ ବିସ୍ୱବାସ୍ କଲାରଫାଇ ତୁଇ ମର୍ ନିଜର୍ ପଅପାରା ଅଇ ଆତୁସ୍ ।

ବାବା ପର୍ମେସ୍ତକେ ଆରି ଆମର୍ ଉଦାରକାରିଆ ଜିସୁକିରିସ୍ତକେ ମୁଇ ବାବୁଜିଆ କଲିନି, ସେମନ୍ ତକେ ଦୟା ଦେକଅଡ୍ ଆରି ସାନ୍ତି ଦେଅଡ୍ ।

କିରତତେଇ ତିତସ୍ତର କାମ୍

\* କିରତେ ତକେ ରଇଜା ବଲି ମୁଇ କଇରଇଲି । ଜେଡ୍‌କି ସବୁ କାମ୍ କରିସାରାଇବାକେ ମକେ ବେଲା ନ ରଇଲା, ସେଟା କରିସାରାଇବାକେ ମୁଇ ସେନ୍ତାରି କଲି । ଏଟା ଅଇଲାନି ପର୍ତୁତୁମ୍ ବିସଇ । କିରତେ ରଇବା ସବୁ ଜାଗାର୍ ମଣ୍ଡଲିମନ୍‌କେ ପାର୍ତିନ୍ ଇସାବେ ଲକ୍‌ମନ୍‌କେ ବାଡ୍ । ମୁଇ ତର୍ ସଙ୍ଗ୍ ରଇଲାବେଲେ ଏ ବିସଇନେଇ ତକେ ତିଆରି ରଇଲି । ୧\* ଜନ୍ ଲକ୍‌କେ ତୁଇ ପାର୍ତିନ୍ ଇସାବେ ବାଡ୍‌ସୁ, ସେ ଏନ୍ତାରି ଲକ୍ ଅଇବାର୍ ଆତେ, କେ ମିସା ତାକେ ବୁଲ୍ କଲାନି ବଲି ଦସ୍ ଦେଇନାପାରଡ୍ । ତାକେ ଗଟେକ୍ ସେ ମାଜି ରଇବାର୍ ଆତେ । ତାର୍ ପିଲାଟକିମନ୍ କିରିସ୍ତକେ ବିସ୍ୱବାସ୍ କର୍ବାର୍ ଆତେ । ସେମନ୍ ନିକ ଚଲାଟଲ୍‌ତି କର୍ତେରଇବାର୍ ଆତେ । ଜେନ୍ତାରି କି ତାକର୍ ଆୟାବାବାମନ୍‌କେ ମାନଡ୍ ନାଇ କି ନିଜର୍ ମନ୍ କଲା ଇସାବେ ଚଲାଟଲ୍‌ତି କଲାଇନି ବଲି ସେମନ୍‌କେ କେ ଦସ୍ ଦାରି ନାପାରଡ୍ । ୨ ବିନ୍ ବିସ୍ୱାସିମନ୍‌କେ ଜତନ୍ କର୍ବାକେ ଦାଇଡ୍ ଇସାବେ ପର୍ମେସ୍ତ ଗଟେକ୍ ପାର୍ତିନ୍‌କେ ଦେଲାଆତେ । ତେବର୍ ପାଇ ଜନ୍ ମଣ୍ଡଲିର୍ ପାର୍ତିନ୍‌କେ ତୁଇ ବାଡ୍‌ସୁ, ତାକେ କାଇ ଦସ୍ ନ ରଅ । ସେ ବଡ୍‌ପନିଆ ନ ରଇବାର୍, ଦାପରେ ରିସା ନ ଅଇବାର୍, ମଦୁଆ ନ ରଇବାର୍, ବିନ୍ ଲକର୍ ସଙ୍ଗ୍ କିରଜାଟି ନ ଅଇବାର୍, ତାବୁକେ ଆସା ନ କର୍ବାର୍ । † ସେନ୍ତାରି ନ ଅଇକରି ଲକ୍‌ମନ୍‌କେ ଡାକିନେବା ଲକ୍, ଦରମ୍ ବିସଇ କର୍ବାକେ ମନ୍ କର୍ବା ଲକ୍, ନିଜେ ଜାଗ୍‌ରଡ୍ ରଇବା ଲକ୍, ବଡ୍ ସାନ୍ ଇସାବେ ନ ଦେକ୍‌ବା ଲକ୍, ସୁକଲ୍ ଇସାବେ ଚଲାଟଲ୍‌ତି କର୍ବା ଲକ୍, ନିଜେ ମନ୍‌କର୍ବା ବିସଇଟାନେ ଜାଗ୍‌ରଡ୍ ଅଇବା ଲକ୍, ରଇବାର୍ ଆତେ । ୯ ସେ ଲକ୍ ଆମେ ସିକାଇତେରଇବା ସୁର୍ କବର୍ ତାଟ୍‌ସଙ୍ଗ୍ ବିସ୍ୱବାସ୍ କରିରଇବାର୍ ଆତେ । ଏ କବର୍ ସଡ୍ ଆରି ନ ବାଦ୍‌ଲେ ବଲି ସେ ଜାନ୍‌ବାର୍ ଆତେ । ଏନ୍ତାର୍ ଆଲେ ସେ ଲକ୍‌ମନ୍‌କେ ସଡ୍ ବିସଇ ସିକାଇପାରୁସି । ଆରି ଜନ୍ ଲକ୍ ତାର୍ ବିରୁଦେ କାତା ଅଇଲାଇନି, ତାକର୍ ବୁଲ୍ ଦେକାଇପାରୁସି ।

୧୦ ମଣ୍ଡଲିର୍ ପାର୍ତିନ୍‌ମନ୍‌ର ଅଦିକାର୍ ନ ନାମ୍‌ବା ଲକ୍ ବେସି ରଇଲାରଫାଇ ମୁଇ ତକେ କଇଲିନି । କାଇ ମୁଲିଅ ନ ରଇବା କାତା ସବୁ ସେମନ୍‌କେ ସିକାଇକରି, ସେମନ୍‌କେ ବିସ୍ୱବାସ୍ କରାଇଲାଇନି । ଜିଉଦି ନିୟମ୍ ଇସାବେ ସବୁ ବିସ୍ୱାସିମନ୍ ସୁନଡ୍ ଅଇବାର୍ ଆତେ ବଲି ସିକାଇଲାଇନି । ୧୧ ଏନ୍ତାରି ଲକ୍‌ମନ୍‌କେ ସିକାଇବାକେ ଦେସ୍ ନାଇ । କାଇକେବଇଲେ ନ ସିକାଇବା ବିସଇ ସିକାଇକରି ସେମନ୍ ଗୁଲାଇ କୁଟୁମ୍‌ମନ୍‌କେ ବିସ୍ୱବାସ୍ କରାଇ, ସଡ୍ ବିସଇତେଇ ଅନି ବାଉତାଇଲାଇନି । ଲକ୍‌ମନ୍‌ରଟାନେଅନି ତାରୁ ମିଲାଇବାକେ ମିସା ଏନ୍ତାରି କଲାଇନି । ୧୨ କିରତେଅନି ଆଗେ ଗଟେକ୍ ଗିଆନ୍ ରଇବା ଲକ୍ ରଇଲା । ସେ ଏନ୍ତାରି କଇରଇଲା, “ କିରତେରଇବା ଲକ୍‌ମନ୍ ବେସି ମିର୍ କଇବାଇ । ସେମନ୍ ବନର୍ ପସୁପାରା ଚଲାଟଲ୍‌ତି କର୍ବାଇ ଆରି ସେମନ୍ ବେସି ଅଲ୍‌ସିଆ ଆରି କାଉରାମନ୍ ।” ୧୩ କିରତେ ରଇବା ଲକ୍ ବିସଇ ସେ ବବିସଡ୍‌ବକ୍‌ତା କଇଲାଟା ଏବେ ମିସା ସଡ୍‌ସେ । ତେବର୍ ପାଇ ସେମନ୍‌କେ ତାଟ୍ ସଙ୍ଗ୍ ଦମ୍‌କାଇକରି କଇବାର୍ ଆତେ । ଜେନ୍ତାରିକି ସେମନ୍ ସଡ୍ ସିକିଆ ବିସ୍ୱବାସ୍ କର୍ବାଇ । ୧୪ ଜିଉଦି ଲକ୍‌ମନ୍

\* ୧:୪ ୧:୪ ୨ୟ କରନ୍ତିୟ ୮:୨୩; ଗାଲାତିୟ ୨:୩; ୨ୟ ଡିମତି ୪:୧୦ \* ୧:୭ ୧:୭ ୧ମ ଡିମତି ୩:୨-୭

ତିଆରକଲ୍ଲା କାତାନିମନ୍ ନ ମାନିକରି ଆରି ସତ୍ତ୍ୱ ସିକିଆ ନ ମାନିକରି ରଇବା ଲକ୍ମନର ତିଆରକଲ୍ଲା ରିତିନିତି ଦିଆନ୍ ନ କରତ୍ । ୧୫ ଜନ୍ ଲକ୍ମନ ପରମେସ୍ୱର ଦେକ୍‌ବା ଇସାବେ ସୁକଲ୍ ରଇବାଇ, ସେନ୍ତାରିସେ ତାକର୍ପାଇ ସବୁ ବିସଇ ସୁକଲ୍ ରଇସି । ମାତର୍ ଜନ୍ ଲକ୍ମନର ବିବେକ୍ ସେମନ୍‌କେ ଦସି କରସି, ସେମନ୍ କାରାପ୍ ଅଇ ଜିସୁକିରିସଟ୍‌କେ ବିସ୍‌ବାସ୍ ନ କଲେ, ତାକର୍ପାଇ କାଇ ବିସଇ ମିସା ସୁକଲ୍ ନାଇ । ୧୬ ଏ ଲକ୍ମନ ପରମେସ୍ୱରକେ ଜାନିଆତୁ ବଲି କଇ ବୁଲ୍‌ବାଇ, ମାତର୍ ତାକର୍ ଚଲାଚଲ୍‌ତିଟାଣେ ସେଟା ନ ତିସେ । ସେମନ୍ ଗିନ୍ କର୍ବାଲକ୍, କାତା ନ ମାନ୍‌ବା ଲକ୍ ଆରି କାଇ ଦରମ୍ ବିସଇ କଇବାକେ ନାପାରତ୍ ।

## ୨

### ସତ୍ତ୍ୱ ଦରମର୍ କାତା

୧ ମାତର୍ ତିତସ୍ତ ତୁଇ ବିସ୍‌ବାସିମନ୍‌କେ ଜନ୍ ବିସଇ ସିକାଇଲୁସିନି ସେଟା ଜିସୁକିରିସଟ୍‌ର ସତ୍ତ୍ୱ ସିକିଆ ଇସାବେସେ ସିକା । ୨ ପର୍ତ୍ତୁମ୍ ତକ୍‌ରାମନ୍‌କେ ତାକର୍ ଜିବନେ ନିକ ଚଲାଚଲ୍‌ତି କର୍ବାକେ ସିକା, ଜେନ୍ତୁକି ନିଜେ ବୁଦିରସଙ୍ଗ୍ ରଇ, ଲକ୍ମନରଟାଣେଅନି ସନ୍‌ମାନ୍ ପାଇବାଲକ୍ ପାରା ଅଇ ଜାଗରତ୍ ରଇବାର୍ । ସେମନ୍ ପରମେସ୍ୱରକେ ଡାଟ୍‌ସଙ୍ଗ୍ ବିସ୍‌ବାସ୍ କରି ବିନ୍ ଲକ୍ମନକେ ସତ୍ତ୍ୱସଙ୍ଗ୍ ଆଲାଦ୍ କରି ମୁରତି ରଇବାର୍ ଆଟେ । ୩ ସେନ୍ତାରିସେ ତକ୍‌ରିମନ୍‌କେ ମିସା ସିକାଆ । ଜେନ୍ତୁକି, ସେମନ୍ ସୁକଲ୍ ଚଲାଚଲ୍‌ତି କର୍ବାଇ । ତିପୁଲ୍ କାତା ନ କଇକରି, ମାତୁଆଲ୍‌ନିମନ୍ ନ ଅଇକରି, ତାର୍ ବାଦୁଲେ ବିନ୍ ଲକ୍ମନକେ ନିକ ବିସଇ ସିକାଅତ୍ । ୪ ଏନ୍ତାରି କଲେ ସେମନ୍‌ର ଟାଣେଅନି ଦାଙ୍ଗ୍‌ତିମନ୍ ନିକ ଚଲାଚଲ୍‌ତି କର୍ବାଟା ସିକ୍‌ବାଇ । ସେମନ୍ ପର୍ତ୍ତୁମ୍ ନିଜର୍ ମୁନ୍‌ସକେ ଆରି ପିଲାଟକିମନ୍‌କେ ଆଲାଦ୍ କରବାଟା ସିକତ୍ । ୫ ନିଜେ ଜାଗରତ୍ ଅଇକରି ମୁନ୍‌ସକେ ସୁକଲ୍ ଚଲାଚଲ୍‌ତି କରି, ନିଜର୍ ଗର୍ଦୁଆର୍ ଚାଲାଇକରି, ବିନ୍ ଲକ୍ମନକେ ଦୟା ଦେକାଇକରି ଆରି ନିଜର୍ ମୁନ୍‌ସର୍ କାତା ମାନିକରି ରଇବାକେ ସିକା । ସେନ୍ତାର୍ କଲେ ପରମେସ୍ୱର ଆମ୍‌କେ ସର୍ପି ଦେଲା କବର୍ କେ ମିସା ନିନ୍ଦା ନ କରତ୍ ।

୬ ସେନ୍ତାର୍ ସେ ଦାଙ୍ଗ୍‌ତାମନ୍‌କେ ମିସା ନିଜେ ଜାଗରତ୍ ରଇବାକେ ସିକା । ୭ ତୁଇ ନିଜେ ସବୁ ବିସଇଟାଣେ ନିକ ଚଲାଚଲ୍‌ତି କର୍ । ଜେନ୍ତାରି କି ତକେ ଦେକିଦେକି ଦାଙ୍ଗ୍‌ତାମନ୍ ସେନ୍ତାରି ଅଇବାଇ । ସିକାଇଲାବେଲେ, ମନ୍ ସତ୍ତ୍ୱ ରଇକରି ଲକ୍ମନର୍ ମୁଆଟେ ସନ୍‌ମାନ୍ ପାଇଲାପାରା ପରମେସ୍ୱରର୍ ବିସଇ ସିକା । 「ଜେଡ୍‌କି ବିସଇ ସିକାଇଲୁସିନି, ସେ ସବୁ ବିସଇ ସତ୍ତ୍ୱ ରଅ ଜେନ୍ତାରିକି ଲକ୍ମନ ନିନ୍ଦା କରିନାପାରତ୍ । ଜେଡ୍‌କି ଲକ୍ ଜିସୁକିରିସଟ୍‌ପାଇ ତୁଇ କର୍ବା କାମ୍ ବିରଦ୍ କଲାଇନି, ସେମନ୍ ସବୁ ଲାଜ୍ ଅଇଜିବାଇ । କାଇକେବଇଲେ ଆମ୍‌କେ ନିନ୍ଦା କର୍ବାକେ ତାକର୍ଟାଣେ କାଇଟା ନ ରଏ ।

୮ ତର୍ ମଣ୍ଡଲିମନ୍‌କେ ରଇବା ଗତିଦାଙ୍ଗ୍‌ତାମନ୍‌କେ ତାକର୍ ସାଉକାର୍‌ମନ୍‌କେ ମାନିକରି ରଇବାକେ ସିକା । ତାକର୍ କର୍ବା କାମ୍ ଦେକି ସାଉକାର୍‌ମନ୍ ସାର୍‌ଦା ଅଅତ୍ ଆରି ସାଉକାର୍‌ମନ୍‌କେ ସେମନ୍ ଟଣ୍ଡ୍ ନ ଲାଗାଅତ୍ । ୧୦ ସାଉକାର୍‌ର କାଇ ଜିନିସ୍ ନ ଚରାଇକରି ସବୁବେଲେ ଦରମ୍ ଚଲାଚଲ୍‌ତି କର । ସେମନ୍‌କେ ସାଉକାର୍ ବିସ୍‌ବାସ୍ କର୍ବାର୍ ଆଟେ । ତାକର୍ ନିକ ଚଲାଚଲ୍‌ତି କର୍ବାଟା ଦେକି ଆମ୍‌କେ ମୁକ୍ତି ଦେବା ପରମେସ୍ୱରର୍ କବର୍ ସୁନ୍‌ବାକେ ଲକ୍ମନ ମନ୍ କର୍ବାଇ ।

୧୧ କାଇକେ ବଇଲେ ପରମେସ୍ୱର ଗୁଲାଇ ମୁନ୍‌ସକାଡିକେ ପାପେଅନି ମୁକ୍ତି କର୍ବାକେ ତାର୍ ଦୟା ଦେକାଇଲା ଆଟେ । ୧୨ ସେ ଦୟା କଲାକେ, କାରାପ୍ ଚଲାଚଲ୍‌ତି କର୍ବାଟା ଚାଡିକରି, ବିସ୍‌ବାସ୍ ନ କର୍ବା ଲକ୍ମନ କର୍ବା ଚଲାଚଲ୍‌ତି ନ କରି, ସେମନ୍ ଲାଲ୍‌ସା ଅଇବା ବିସଇ ମନ୍ ନ କର୍ବାକେ ପରମେସ୍ୱର ଆମ୍‌କେ

ସିକାଇଲାନି । ତାର ବାପୁଲେ ଜେଡ଼କି ଦିନ୍ ଆମେ ଏ ଜଗତେ ବଞ୍ଚିଆରୁ, ସେଡ଼କି ଦିନ୍ ନିଜେ ଜାଗରତ୍ ରଇ, ଦରମ୍ ଚଲାଚଲ୍ତି କରି ତାକେ ସାର୍ଦା କରାଇବାକେ ସେ ଆମ୍‌କେ ବସୁ ଦେଲାନି । ୧୩ ଜନ୍ ବଡ଼ ଦିନ୍ ଆଇବାକେ ଆମେ ଜାଗିଆରୁ, ସେଡ଼କି ଦିନ୍ ଜାକ ଏନ୍ତାରିସେ ଚଲାଚଲ୍ତି କରୁ । ସେ ଦିନେ ଜିସୁକିରିସ୍ତ ଡେକି ଆମ୍‌ର ପର୍‌ମେସର୍ ଆରି ମୁକ୍ତିକାରିଆ, ତାର ସବୁ ଡାକ୍‌ପୁଟା ସଙ୍ଗ୍ ଏ ଜଗତେ ବାଉଡ଼ିଆଇସି । ୧୪ ଏ ଜିସୁ କିରିସ୍ତ ଆମ୍‌ର ଲାଗି ମର୍‌ବାକେ ନିଜେ ସର୍‌ପିଅଇଲା । ପାପର୍ ବାନ୍‌ନେଅନି ମୁକ୍ତଲାଇବାକେ ଆରି ତାର୍‌ପାଇ ସୁକଲ୍ ଲକ୍ କରାଇବାକେ ସେ ଏନ୍ତି କଲା । ସେ ଦେକ୍‌ବା ଇସାବେ, ଦରମ୍ କାମ୍ କର୍‌ବାକେ ବେସି ମନ୍ କର୍‌ବା ଲକ୍ ଅଇବାକେ ମିସା ।

୧୫ ତେବର୍‌ପାଇ ତିତସ୍ତ, ତୁଇ କିରତେ ରଇବା ବିସ୍‌ବାସିମନ୍‌କେ, ମୁଇ ତକେ କଇରଇବା ସବୁ ବିସଇ ସିକାଇଦେସ୍ । ଏ ସବୁ ବିସଇ କର୍‌ବାକେ ସାର୍ଦା କରା ଆରି ନ କଲେ ସେମନ୍‌କେ ଜାଗରତ୍ କରା । ସେନ୍ତାରି କର୍‌ବାକେ ତର୍ ଅଦିକାର୍ ଆତେ । ତୁଇ ସିକାଇଲା ବିସଇମନ୍ କେ ମିସା ନିର୍ ଇସାବେ ନ ନାମତ୍ ।

## ୩

ବିସ୍‌ବାସି ମନର୍ କାତାବାର୍‌ତା

୧ ସାସନ୍‌କାରିଆ ଆରି ଅଦିକାରିମନର୍ ତଲେ ରଇକରି ସେମନ୍ ତିଆର୍‌ଲାଟା ମାନିକରି ରଇବାକେ ମାଣ୍ଡଲିର୍ ବାଇବଇନିମନ୍‌କେ ଏତାଇଦେସ୍ । ବିନ୍ ଲକ୍‌କେ କାଇ ସାଇଜ ମିସା କର୍‌ବାକେ ଜାଗରତ୍ ଅଇରଅଡ଼ । ୨ ବିନ୍ ଲକ୍‌ର୍ ବିସଇ ମିର୍ ନ କଇ ସବୁର୍ ସଙ୍ଗ୍ ସାନ୍ତିସଙ୍ଗ୍, ଆଲାଦେ, ମନ୍‌ବିତ୍‌ରେ ଦରମ୍‌ରଇ ମିସିବିତି ରଅଡ଼ । ୩ କାଇକେବଇଲେ ଗଟେକ୍ ବେଲାଇ ଆମେମିସା ବକୁଆ ଲକ୍‌ପାଠା ରଇ ପର୍‌ମେସର୍‌ର୍ କାତା ନ ମାନିକରି, ବୁଲ୍ ବିସଇ କର୍‌ତେରଇଲୁ । ଆମ୍‌ର୍ ପାପର୍ ଗୁନ୍‌ଚଲନ୍ ଇସାବେ ଜେଡ଼କି ସବୁ ବିସଇ ରଇଲା, ସେଟା ସବୁ ସାର୍‌ଦାସଙ୍ଗ୍ କର୍‌ତେରଇଲୁ । ବିନ୍ ଲକ୍‌ର୍ ତିପୁଲ୍ କାତା ଗୁଲାଇବାଟେ ବିଚିକରି ସେମନ୍‌କେ ଇସା କର୍‌ତେରଇଲୁ । ସେମନ୍ ଆମ୍‌କେ ଗିନ୍ କର୍‌ତେରଇଲାଇ, ଆମେମିସା ସେମନ୍‌କେ ଗିନ୍ କର୍‌ତେରଇଲୁ । ୪ ମାତର୍ ଆମେ ସେନ୍ତାରି ଚଲାଚଲ୍ତି କର୍‌ତେରଇଲେ ମିସା ଆମ୍‌ର୍ ମୁକ୍ତିକାରିଆ ପର୍‌ମେସର୍ ନିଜର୍ ଦୟା ଆରି ଆଲାଦ୍ ଆମ୍‌କେ ଦେକାଇଆତେ । ୫ ପାପର୍ ତଣ୍ଡେଅନି ସେ ଆମ୍‌କେ ମୁକ୍ତଲାଇଲା । ଆମେ ଦରମ୍ କାମ୍ କଲାର୍‌ପାଇ ସେ ଆମ୍‌କେ ଏନ୍ତି କରେନାଇ । ମାତର୍ ସେ ଆମ୍‌କେ ଜିବନ୍ ଦୁକାଇ ଦୟା ଦେକାଇଲାକେସେ । ସୁକଲ୍ ଆଡ଼୍‌ମା ଦେଇକରି ସେ ଆମ୍‌କେ ରକିଆ କଲା । ଜେକି ଆମ୍‌ର୍ ସବୁ ପାପ୍ ଦଇକରି ନୁଆ ଜିବନ୍ ଦେଲା । ୬ ଆମ୍‌ର୍ ରକିଆକାରି ଜିସୁକିରିସ୍ତ କଲା କାମ୍‌ରଲାଗି ପର୍‌ମେସର୍ ଏଟା କଲା । କାଇ ମୁଲିଅ ନ ଦେଇ ଜେଡ଼କି ବଇଲେ ସେଡ଼କି ଆମ୍‌କେ ସୁକଲ୍‌ଆଡ଼୍‌ମା ଦେଲା ଆତେ । ୭ ପର୍‌ମେସର୍ ଆମ୍‌କେ ତାର୍ ପିଲାଟକି କର୍‌ବାକେ ଏନ୍ତାରି କଲା ଆତେ । ତାର୍‌ସଙ୍ଗ୍ କାଲ୍‌କାଲ୍ ଜୁଗ୍‌ଜୁଗ୍ ବଞ୍ଚିବାକେ ଆମେ ଆସା କର୍‌ବାର୍ ଅଇସି । ଆମ୍‌ର୍‌ପାଇ ରଇବା ତାର୍ ବଡ଼ ଦୟାରଲାଗି, ତାର୍ ମୁଆଟେ ଦସି ଇସାବେ ନ ଦେକେ । ପର୍‌ମେସର୍ ଆମ୍‌କେ କାଇ ଦସ୍ ନ କଲା ଲକ୍‌ବଲି ଜାନାଇଆତେ । ୮ ମୁଇ ତକେ ଲେକିରଇବା ଏ ସବୁ ବିସଇ ସଡ଼ ବଲି ମାନିଅଇସି ।

ତେବର୍‌ପାଇ ମୁଇ ତକେ ବାବୁଜିଆକରି କଇଲିନି, ତୁଇ ସିକାଇବାବେଲେ ଏ ସବୁ ବିସଇ ନ ପାସରି ଏତାଇତେ ର । ଜେନ୍ତାରିକି ପର୍‌ମେସର୍‌କେ ଜେଡ଼କି ଲକ୍ ବିସ୍‌ବାସ୍ କର୍‌ବାଇ, ସେମନ୍ ସବୁ ଦରମ୍ କାମ୍ କର୍‌ବାକେ ମନ୍‌ଦିଆନ୍ ଦେବାଇ । ଏନ୍ତାରି

ସିକିଆ ଦେଲେ ସବୁ ଲକ୍ଷ୍ମୀପାଇ ସେଟା ନିକ ଆରି କାମ୍‌କେ ଆଇସି । ୯ ମାତର୍ ଜନ୍ ଲକ୍ଷ୍ମୀନ କାଇ ଲତାକେ ନ ଆଇବା ବିସଇର୍‌ପାଇ ଦଦାପେଲା ଅଇବାଇ, ଆରି ତାକର୍ କୁଟୁମର୍ ଆନିଦାଦିମନର୍ ବିସଇ କଇ ଲାଗିରଇବାଇ, ତୁଟାଇ ତୁଟାଇ ଦଦାପେଲା ଅଇବାଇ ଆରି ମସା ମିଲାଇରଇବା ରିଡିନିଡି ବିସଇନେଇ ଲାଗାଲାଗି ଅଇବାଇ, ସେନ୍ତାରିଟାନେ ପୁର୍ନାଇ । କାଇକେବଇଲେ ଏଟା କାକେ ଲତାକେ ନ ଦେଏ, ଆରି ତୁଟାଇସେ । ୧୦ ବିସ୍‌ବାସିମନର୍ ବିଡ଼ରେ ଜଦି କେ ମସା ଗଟେକ୍ ବେଗ୍‌ଲାଇବା ଲକ୍ ରଇଲେ, ତାକେ ତାଟ୍ ସଙ୍ଗ୍ କଇକରି ଚାଡାଇଦେସ୍ । ସେ ନ ଚାଡ଼ଲେ ଆରିତରେକ୍ ଜାଗରତା କରା । ତାର୍‌ପଟେ ମସା ସେ କରିଲାଗିରଇଲେ ତାକେ ଚାଡ଼ିଦେସ୍ । ୧୧ ଏନ୍ତାରି ଲକ୍ ସଡ଼ ବିସଇତେଇଅନି ମନ୍ ବାଉଡାଇଲା ଆଟେ ବଲି ତୁଇ ଜାନିପାରୁସ୍ । ତାର୍ ପାପର୍‌ଲାଗି ସେ ପର୍‌ମେସରର୍ ମୁଆଟେ ଦସ୍ କରିଆଟେ ବଲି ଲକ୍‌ମନ୍ ନିକସଙ୍ଗ୍ ଜାନ୍‌ବାଇ ।

ସାରାସାରି ବେଲର୍ କାତା

୧୨ ☆ତକେ ସାଇଜ୍ କର୍‌ବାକେ ମୁଇ ଆର୍‌ତେମସ୍‌କେ ନଇଲେ ତେକିକସ୍‌କେ ପାଟାଇବି । ଆକର୍ ବିଡ଼ରେ କେ ଆଲେ ଆଇଲେ, ତୁଇ ତେଇଅନି ବାରଇ ନିକପଲି ନଅରେ ମକେ ବେଟ୍ ଅଇବାକେ ଆଉ । କାଇକେବଇଲେ ସିଡ଼ମାସ୍ ସାର୍‌ବାଜାକ ତେଇ ରଇବାକେ ମୁଇ ମନ୍ କଲିନି । ୧୩ ☆ଜିନି ନାଉର୍ ଗଟେକ୍ ଅକିଲ୍ ଆରି ଆପଲ୍ ନାଉର୍ ଆରିଗଟେକ୍ ଲକ୍ ଜିବାକେ ବାରଇବାବେଲେ, ସେମନ୍‌କେ ଜେଡ଼କି ସାଇଜ୍ ଲତା ଆଟେ, ସେଟା ସବୁ କରିଦେସ୍ । ସେମନ୍‌କେ ଲତାକେ ଆଇବାଟା ଜାଗାଇଦେସ୍ । ୧୪ ସେଟାକେ ଚାଡ଼ି କିରତେରଇବା ଆମର୍ ସବୁ ବିସ୍‌ବାସି ବାଇବଇନିମନ୍, ଦରମ୍ କାମ୍ କର୍‌ବାଟା ନ ଚାଡ଼ିକରି, ପାଇଟିକାବାଡ଼୍ କର୍‌ତେରଅଡ଼ । ସେନ୍ତାରି କଲେ, ଅବାବେ ରଇଲା ଲକ୍‌ମନ୍‌କେ ଦେଇପାର୍‌ବାଇ । ଆରି ବିସ୍‌ବାସିମନ୍ ବେକାର୍ ଜିବନ୍ ନ ବିତାଅଡ଼ ।

୧୫ ମର୍ ସଙ୍ଗ୍ ରଇବା ସବୁ ବିସ୍‌ବାସିମନ୍ ତକେ ଜୁଆର୍ ଜାନାଇଲାଇନି । କିରତେରଇବା ଆମର୍ ବିସ୍‌ବାସି ବାଇବଇନିମନ୍ ଜେଡ଼କିଲକ୍ ଆମ୍‌କେ ଆଲାଦ୍ କଲାଇନି, ସେମନ୍‌କେ ସବୁକେ ଆମର୍ ଜୁଆର୍ ଜାନାଇଦେସ୍ ।

ପର୍‌ମେସର୍ ତାର୍ ଜିବନ୍ ଦୁକାଇ ତମ୍‌କେ ଦୟା ଦେକଅ ।

☆ ୩:୧୨ ୩:୧୨ ପେରିଡ଼ ୨୦:୪; ଏପିସିୟ ୬:୨୧,୨୨; କଲସିଅ ୪:୭,୮; ୨ୟ ଡିମତି ୪:୧୨  
 ଷ୍ଟ ୩:୧୩ ୩:୧୩ ପେରିଡ଼ ୧୮:୨୪; ୧ମ କରନ୍ଥିୟ ୧୬:୧୨

## ଫିଲିମନଙ୍କ ନିକଟକୁ ପାଉଲଙ୍କ ପତ୍ର ପାଉଲ୍ ପିଲିମନ୍‌ଙ୍କେ ଚିଠି ଲେଖିଲାଟା ଏ ବଇ ବିସଇରେ ଜାନ୍‌ବାଟା

ସବୁରୁଅନି ସାନ୍ ବଇ ପିଲିମନ୍ ପେରିଡ଼ ପାଉଲ୍ ଲେଖିଲା ଆତେ ୧:୧ । ଜେଡେବଲ୍ ସେ ଏ ବଇ ଲେଖିଲା ସେଡ଼କିବେଲେ ସେ ବନ୍ଦି ଗରେ ବନ୍ଦି ଅଇରଇଲା । ଜାର୍ ଅରଡ଼ ଏଟା ଅଇପାରେ ସେ ରମ୍‌ଦେସେଅନି ଲେଖିଆତେ । ଜଦି ସେ ରମ୍‌ଦେସେ ରଇଲା କିରିସ୍‌ଟ ଜନମର୍ ପାକାପାକି ୬୧ ବରସ୍ ପତେ ଏ ଚିଠି ଲେଖି ରଇପାରେ । ଜନ୍‌ଟା କି ସେ ସମାନ୍ ବେଲାଇସେ କଲସିଅ ମଣ୍ଡଲିକେ ମିସା ଲେଖି ରଇସି । ସେ ଏ ଚିଠି ପିଲିମନ୍ ନାଉର୍ ଗଟେକ୍ ଲକ୍‌କେ ଲେଖିଆତେ । ପିଲିମନ୍ ଗଟେକ୍ ମଣ୍ଡଲିର୍ ଲକ୍ ଆରି ଗତିଦାଙ୍ଗ୍‌ଡାମନର୍ ସାଉକାର୍ ରଇଲା । ପାଉଲ୍ ଲେଖିଲାଜନି ଜେ, ସେ ଅନିସିମସ୍‌କେ ଡଣ୍ଟ ନ ଦେଅ ଜେ କି ଚରିକରି ପିଲିମନ୍‌ର୍ ଟାନେଅନି ଦୁରିକେ ପାଲାଇରଇଲା । ରମିୟ ନିୟମ୍ ଇସାବେ ପିଲିମନ୍ ଅନିସିମସ୍‌କେ ମରନର୍ ଡଣ୍ଟ ଦେବାର୍ ଅଦିକାର୍ ରଇଲା । ଅନିସିମସ୍‌କେ କିରିସେ ବାଇ ଇସାବ୍‌ରେ ଡାକ୍‌ବାକେ ପିଲିମନ୍‌କେ ପାଉଲ୍ ବାଦିଅ କରି ବାବୁଜିଆ କରି ସାର୍‌ଦା ଦେଲାନି । ପାଉଲ୍ ଅନିସିମସ୍‌କେ ପିଲିମନ୍‌ର୍ ଜାଗାଇ ସେବା କାମ୍ କରବାକେ ରାଜିଅଇବାକେ କଇଦେଲା । ୧:୧୩-୧୪

### ଏ ବଇ ବିଡ଼ରେ ରଇଲାଟା

- ୧. ପାଉଲ୍ ପିଲିମନ୍‌କେ ଜୁଆର୍ ଜାନାଇବାଟା । ୧:୧-୩
- ୨. ପାଉଲ୍ ଅନିସିମସ୍‌ର୍ ବାଟେଅଇ ଅନିସିମସ୍‌କେ ଗଟେକ୍ କିରିସ୍‌ଟ୍‌ରେଡେଇ ଗଟେକ୍ ବାଇ ଇସାବେ ନାମବାକେ ପିଲିମନ୍‌କେ କଇଲାନି । ୧:୪-୨୧
- ୩. ପାଉଲ୍ ଗଟେକ୍ ଜାଗାଇଅନି ଆରି ଗଟେକ୍ ଜାଗାଇ ଜିବାକେ ରଇଲା ମନ୍‌ବିଡ଼ରର୍ କାତାକେ ଜାନାଇଲାନି ଆରି ଜୁଆର୍ ପାଟାଇଲାନି । ୧:୨୨-୨୫

୧ ମୁଇ ପାଉଲ୍ ଜେକି ଜିସୁକିରିସ୍‌ଟ୍‌ର୍ ଲାଗି ବନ୍ଦି ଆତି । ଆରି ଆମର୍ ବାଇ ତିମତି । ଆମେ ମିସିକରି ଆମର୍ ମଇତର୍ ଆରି ସଙ୍ଗର୍ କାମ୍‌କରୁ ପିଲିମନ୍‌କେ ଏ ଚିଠି ଲେଖିଲୁନି । ୨ \*ଡର୍ ଗରେ ରୁଣ୍ଡିକରି ପାର୍‌ଡନା କରବା ମଣ୍ଡଲିକେ, ଆରି ଆମର୍ ବଇନି ଆପିୟାକେ, ଗଟେକ୍ ସନିଅ ପାରା ଆମର୍ ବିସ୍‌ବାସ୍ ଦେକାରକା କରବା ଆରକିପସ୍‌କେ ମିସା ଏ ଚିଠି ଲେଖିଲୁନି ।

୩ ଆମର୍ ବାବା ପରମେସର୍ ଆରି ମାପ୍‌ରୁ ଜିସୁ କିରିସ୍‌ଟ୍ ଡାର୍ ଜିବନ୍ ଦୁକାଇ ଦୟା ଦେକାଅ ଆରି ସାନ୍ତି ଦେଅ ।

### ପିଲିମନ୍‌ର୍ ଆଲାଦ୍ ଆରି ବିସ୍‌ବାସ୍

୪ ବାଇ ପିଲିମନ୍, ମୁଇ ଜେଡେବେଲେ ମିସା ପାର୍‌ଡନା କରବା ବେଲେ, ଡକେ ଏଡାଇକରି ପର୍‌ମେସର୍‌କେ ଦନିଅବାଦ୍ ଦେଲିନି । ୫ କାଇକେବଇଲେ ପର୍‌ମେସର୍‌ର୍ ଲକ୍‌ରପାଇ ରଇବା ତମର୍ ଆଲାଦ୍ ଆରି ମାପ୍‌ରୁ ଜିସୁଟ୍‌ଗାନେ ରଇବା ତମର୍ ବିସ୍‌ବାସ୍ ମୁଇ ସୁନିଆତି । ୬ କିରିସ୍‌ଟ୍‌ର୍ ସଙ୍ଗ୍ ଆମେ ମିସଲାର୍‌ପାଇ ଆମର୍ ଜିବନେ ଜେଡ଼କି ସବୁ ଆସିର୍‌ବାଦ୍ ପାଇଆରୁ, ସେଟା ସବୁ ନିକ ସଙ୍ଗ୍ ବୁଜ୍‌ବାକେ ଆମେ ତମର୍ ସଙ୍ଗ୍ ରଇଲାବେଲେ, ବୁଜିପାର୍‌ବୁ ବଲି ମୁଇ ଆସା କଲିନି

\* ୧:୨ ୧:୨ କଲସିଅ ୪:୧୭

।<sup>୭</sup> ଏ ମର ଆଲାଦର ବାଇ, ତର ଆଲାଦ୍ ମକେ ବେସି ସାରଦା କରାଇଲା ଆଚେ । ପରମେସରର ସବୁଲକର ମନ୍ ମିସା ତୁଇ ସାରଦା କରାଇ ଆଚୁସ୍ ।

### ଅନିସିମସ୍ ପାଇ ଗୁଆରି

୮ ତେବେ ଏଟାରଲାଗି କିରିସ୍ତର ପାଇ ଗଟେକ୍ ବାଇ ଇସାବେ ତକେ ଡିଆରବାକେ ମର ପୁରାପୁରନ୍ ଅଦିକାର୍ ଆଚେ ।<sup>୯</sup> ମାତର ମୁଇ ତକେ ଆଲାଦ୍ କଲିନି, ସେଟାରଲାଗି ଅଦିକା ବାବୁଜିଆ କରବି । ମୁଇ ପାଉଲ୍ କିରିସ୍ତ ଜିସୁର ମୁକିଅ କବରନେଉ ଅଇରଇଲେମିସା, ତାରଲାଗି ଏବେ ମୁଇ ବନ୍ଦିଅଇଆଚି ।<sup>୧୦</sup> ଅନିସିମସ୍ ଜେକି କିରିସ୍ତର ଲାଗି ମର ନିଜର ପଅ ପାରା ଅଇଗାଲା ଆଚେ । ତାର ବାଦୁଲେ ମୁଇ ତକେ ବାବୁଜିଆ କଲିନି । ଆମେ ବନ୍ଦିଗରେ ରଇଲା ବେଲେ, ମୁଇ ତାର ଆଡ଼ମା ଇସାବେ ରଇବା ବାବା ପାରା ଅଇଆଚି ।<sup>୧୧</sup> ଗଟେକ୍ ବେଲାଇ ସେ ତରପାଇ ଅଦିକା ରଇଲା । ମାତର ଏବେ ଆମର ଦୁଇଲକର ଲତାକେ ଲାଗିବା ଲକ୍ ଅଇଲା ।

<sup>୧୨</sup> ମୁଇ ଏବେ ତାକେ ତର ଲଗେ ପାଟାଇଲିନି । ମର ଜିବନେ କାନ୍ଦି କାନ୍ଦି ଆଚି ।<sup>୧୩</sup> ତାକେ ବନ୍ଦିଗରେ ମର ସଙ୍ଗ୍ ରଅ ବଲି ମନ୍ କରତେରଇଲି । ସୁବ୍ କବରର ଲାଗି ତର ବାଦୁଲେ ସେ ମକେ ଇତି ସାଇଜ କରତା ।<sup>୧୪</sup> ମାତର ତୁଇ ମକେ ସାଇଜ କର ଆକା ବଲି ବାଦିଅ କରିନାଇ । ତୁଇ ନିଜେ ମନ୍ କରି କଲେ, ମୁଇ ମନ୍ କରତି । ତେବେ ତୁଇ ରାଜି ନ ଅଇତେ ମୁଇ କାଇଟା ନ କରି ।

<sup>୧୫</sup> ଜେନ୍ତାରିକି ଅନିସିମସ୍ ଆରି ତୁଇ, ସାଉକାର୍ ଆରି ଗତିଦାଙ୍ଗ୍ତା ପାରା ନ ଅଇ, ମରବା ଜାକ ନିଜର ବାଇ ଇସାବେ ରଇବାକେ, ଚନେକରପାଇ ତରଟାନେଅନି ଦୁରିକେ ରଇଲା ।<sup>୧୬</sup> ଆରି ଏବେ ସେ ଅଦିକା ଗତିଦାଙ୍ଗ୍ତା ନଏଁ, ମାତର କିରିସ୍ତର ଲାଗି ଗଟେକ୍ ଆଲାଦର ବାଇ ଅଇଆଚେ । ମୁଇ ତାକେ ବେସି ଆଲାଦ୍ କଲିନି । କିରିସ୍ତର ଲାଗି ଗଟେକ୍ ବାଇ ଇସାବେ ଆରି ଗତିଦାଙ୍ଗ୍ତା ଇସାବେ ସେ ତରପାଇ କେତେକ୍ ଅଦିକ୍ ଆଲାଦର ଲକ୍ ଅଇସି ।

<sup>୧୭</sup> ତେବରପାଇ ତୁଇ ମକେ ଜଦି ସଙ୍ଗ୍ କାମ୍ କରୁ ଇସାବେ ଦେକ୍ଲୁସ୍ନି, ଜେନ୍ତି ତୁଇ ମକେ ତାକିନେଇତୁସ୍, ସେନ୍ତାରିସେ ତାକେ ମିସା ତାକିନେ ।<sup>୧୮</sup> ସେ ଜଦି ତର କାଇ ପାପ୍ ଦସ୍ କରି ରଇଲେ, କି କାଇଟା ଦେବାର୍ ରଇଲେ ସେଟା ମର ରୁନ୍ ବଲି ବାବ୍ ।<sup>୧୯</sup> ଏବେ ମୁଇ ନିଜେ ଲେକ୍ଲିନି ମୁଇ ପାଉଲ୍ ତକେ ସୁଜ୍ବି । ତୁଇତା ମର ରୁନି ଅଇ ଆଚୁସ୍, ଏଟା ମୁଇ ତକେ ଏତାଇଦେବାକେ ଲତା ନାଇ ।<sup>୨୦</sup> ତେବେ ତୁଇ ଜେକି କିରିସ୍ତର ଲାଗି ମର ବାଇଅଇଆଚୁସ୍ । ମରପାଇ ଏ ଗଟେକ୍ କାମ୍ କରି ମକେ ସାରଦା କରାଆ ।

<sup>୨୧</sup> ଏଟା ଲେକ୍ଲାବେଲେ, ମୁଇ ତାର୍ ସଙ୍ଗ୍ ଜାନିଆଚି, ମୁଇ ମାଙ୍ଗ୍ ବା ବିସଇ ତୁଇ କରସୁ ଆକା । ଦେକ୍ଲେ, ମାଙ୍ଗ୍ଲାତେଇଅନି ଅଦିକ୍ କରସୁ ।<sup>୨୨</sup> ଏଟାଗାତି ମରପାଇ ଗଟେକ୍ ବାକ୍ତା ସାଜାତି ର । କାଇକେବଇଲେ, ତୁଇ ପାର୍ତନା କଲା ଇସାବେ ମୁଇ ତରଲଗେ ଦାପ୍ରେ କେଟିପାର୍ବି ।

### ଜୁଆରବେଟ୍

<sup>୨୩</sup> ଏପାପୁରା ଜେକି କିରିସ୍ତର ଲାଗି ମରସଙ୍ଗ୍ ବନ୍ଦିଅଇଆଚେ, ସେ ତାର୍ ଜୁଆର ଜାନାଇଲାନି ।<sup>୨୪</sup> ସେନ୍ତାରିସେ, ମର ସଙ୍ଗ୍ କାମ୍ କରୁମନ୍ ମାରକ, ଆରିସ୍ତାକସ୍, ଦିମା ଆରି ଲୁକ୍ ମିସା ।

☆ ୧:୧୦ ୧:୧୦ କଲସିଅ ୪:୯ ☆ ୧:୨୩ ୧:୨୩ କଲସିଅ ୧:୭:୪:୧୨ ☆ ୧:୨୪ ୧:୨୪ ପେରିଡ୍ ୧୨:୧୨, ୨୫:୧୩:୧୫:୩୭-୩୯; କଲସିଅ ୪:୧୦; ପେରିଡ୍ ୧୯:୨୯:୨୭:୨; କଲସିଅ ୪:୧୦; କଲସିଅ ୪:୧୪; ୨ୟ ଡିମତି ୪:୧୦; କଲସିଅ ୪:୧୪; ୨ୟ ଡିମତି ୪:୧୧

୨୫ ଆମର ମାପରୁ ଜିଣୁ କିରିସ୍ତ ଜିବନ୍ ଦୁକାଇ ଦୟା ଦେକାଇଲାଟା ତମର ସବୁର ସଙ୍ଗ ର ।



# ଏବ଼ି ମାନଙ୍କ ନିକଟକୁ ପହ଼ ଏବ଼ି ଲକ୍ମନର ଲଗେ ଚିଟି ଲେକ୍ଲଗାଟା ଏ ବଇ ବିସଇରେ ଜାନବାଟା

ଏବ଼ି ବଇ ଗଟେକ୍ ଲକ୍ମନକେ ସାରଦା କରାଇବା ଚିଟି । ପୁରନା ନିୟମର ବିନ୍ ବିନ୍ ବବିସଡ଼ କାତା, ପୁରାପୁରୁନ୍ ଅଇରଇବା ବିସଇ ଏ ବଇଟାନେ ମିଲାଇବାର୍ ଅଇସି । ଏଟା ଗଟେକ୍ ଉପଦେସ୍ ଦେବା ବଇପାରା । ଇଡି ପାକାପାକି ୭୦ ଅନି ଅଦିକ୍ ପୁରନା ନିୟମର ବିସଇ ଆଚେ । ଜନଟାକି ଜିସୁ କିରିସଟ କେନ୍ଦ୍ରିବାବେ ବବିସଡ଼ କାତା ଆରି ଜିଉଦି ପୁଜାରିମନର୍ କରମ୍ ପୁରାପୁରୁନ୍ କଲା, ସେଟାମନ୍ ଏ ବଇଟାନେ ଆମେ ମିଲାଇବାର୍ ଅଇସି । ସେଟାର୍ପାଇ ଏଟା ଜିଉଦି ବିସ୍ବାସିମନକେ ଗଟେକ୍ ବପୁଦେବା ବଇ । ଜିସୁ ଜେନ୍ତାରି ରିଡିନିଡି ମନ୍ ସାରାଇଲା, ଜନଟାକି ପୁଜାରିମନ୍ ଆରିତରେକ୍ କେବେ ବଲି ନ ଦେଅଡ଼, ସେଟା ଏବ଼ି ଚିଟିଟାନେ ଦେକାଇଆଚେ ।

ଜିସୁ କିରିସଟ ଅଇଲାନି ସବୁରକାମର୍ ପାପର୍ ବଲି । ଏଟା ଗଟେକ୍ ଡ଼ରକେସେ ସବୁବେଲର୍ପାଇ ଅଇସି । ଏବ଼ି ଜୁଗର୍ ବିସ୍ବାସିମନର୍ପାଇ ଏବ଼ି ଲେକ୍ଲା ଚିଟିଟାନେ ବପୁ ରଇବାଟା ଡିସ୍ଲାନି । କିରିସଟ ଆକା ଆମ୍ବକେ ପର୍ମେସରର୍ ସଙ୍ଗେ ରଇକରି ଜିଇବା କାଇବାଟା କରିପାର୍ସି ଆରି ତାକେ ଆସାକରି ତାର୍ ସଙ୍ଗେ ରଇବାର୍ ଆରି ଇଣ୍ଡୁବାର୍ ଅଇସି । ୧୨:୨ । ଏବ଼ି ବଇ କେ ଲେକ୍ଲାଆଚଡ଼ ସେଟା ଏବେଜାକ ଜାନାପଡେନାଇ । ମାତର୍ ପଣ୍ଡିଡ଼ମନ୍ ପେରିଡ଼ ପାଉଲ୍ ଲୁକ୍ ନଇଲେ ବରନବା ଲେକିରଇବାଇ ବଲି କଇଆଚଡ଼ । ଏଟା କେବେ ଲେକା ଅଇଲାଆଚେ, ସେଟାମିସା କେ ନାଜାନଡ଼ । ମାତର୍ କେଡେକ୍ଲକ୍ ଏଟା ଜିସୁକିରିସଟ ଜନମ୍ ଅଇକରି ୭୦ କିରିସଟାବ୍ଦରେ ଲେକିଆଚଡ଼ ବଲି ବିସ୍ବାସ୍ କଲାଜନି ।

ଜିରୁସାଲମ୍ ମନ୍ଦିର୍ ୭୦ କିରିସଟାବ୍ଦରେ ନସଟ ଅଇଗାଲା, ମାତର୍ ଏ ଚିଟିଲଗେ ଲେକ୍ଲା ଲକ୍, ଏଟା ନ ନସ୍ଲପାରା କଇଲା ଆଚେ । ଏବ଼ି ଚିଟି କଇବାକେ ଗାଲେ ରମିୟ ନଅରେ ଲେକା ଅଇରଇଲା । ୧୩:୨୪ ଆରି ବିନ୍ ବିନ୍ ମଣ୍ଡଲିମନ୍କେ ବାଟାକରି ଦେଇରଇଲାଇ ।

**ଏ ବଇ ବିଡ଼ରେ ରଇବାଟା**

୧. ଜେ ଲେକ୍ଲାଆଚେ ସେ ଜିସୁକିରିସଟ ଅଇଲାନି ପର୍ମେସରର୍ ବବିସଡ଼ବକ୍ତା ଦୁଡ଼ମନର୍ ଟାନେମିସା ମୁକିଅ ବଲି ଜାନାଇଦେଲାନି । ୧:୧-୪:୧୩
୨. ଲେକ୍ଲା ଲକ୍ ମିସା ଜାନାଇଦେଲାନି କି, ଜିରୁସାଲମେ ପୁଜାରି ଇସାବେ ସେବା କର୍ତେରଇବା ଲକ୍ମନର୍ଟାନେ ମିସା ଜିସୁ ମୁକିଅ । ୪:୧୪-୭:୨୮
୩. ପର୍ମେସର୍ ମସାକେ ନିୟମ୍ ଦେଇକରି ତାର୍ ଲକ୍ମନର୍ ସଙ୍ଗେ କିରିରଇବା ରାଜିନାମା ଟାନେଅନି ଜିସୁର୍ ସେବା କର୍ବାଟା ମୁକିଅ । ୮:୧-୧୦:୩୧
୪. ଲେକିରଇବା ଲକ୍ ଜିସୁକେ ସବୁକାମେ ମୁକିଅ ବଲି ବୁଜାଇଦେଲାଆଚେ । ଆରି ସବୁର୍ପାଇ ଏ ଆଦେସ୍ ଦେଇଆଚେ । ୧୦:୩୨-୧୩:୧୭
୫. ଲେକ୍ଲା ଲକ୍ ଏ ଚିଟିଟାନେ କେଡେଟା ବିସଇ ମୁରଟିକରି ରଇବାକେ ଆଦେସ୍ ଦେଲାଆଚେ । ଆରି ଜୁଆର୍ବିଆର୍ ଜାନାଇକରି ଏ ଲେକା ସାରାଇଆଚେ । ୧୩:୧୮-୨୫

ପଅର୍ ଲାଗି ମାପୁରୁର୍ ବାକିଅ

୧ ପରମେସର ପୁରୁବେ ବିନ୍ ବିନ୍ ବେଲାଇ ଆରି ବିନ୍ ବିନ୍ ବାଟେ ବବିସତ୍ତବକ୍ତା  
ମନକେ ପାଟାଇକରି, ଆମର ଆନିଦାଦିମନର ସଙ୍ଗ କାତା ଅଇଲା । ୨ ମାତର ଏ  
ସେସ୍ କାଲେ ତାର ପଅକେ ପାଟାଇକରି ତାର କାତା ଜାନାଇ ଆଟେ । ତାରଲାଗି ଏ  
ଜଗତ୍ ତିଆର୍ କଲାଆଟେ ଆରି ଜଗତର ସବୁ ବିସଇର ଉପରେ ତାକେ ଅଦିକାର  
ଦେଲାଆଟେ । ୩ ପରମେସରର ମଇମାର୍ ଉଜଲ୍ ମାପରୁ ଜିସୁରଟାନେ ତିସସି ।  
ପରମେସର ଜେନ୍ତାରିଆଟେ, ତାର ପଅ ସେନ୍ତାରିସେ । ଜନ୍ ବପୁର ବାକିଅ ପଅ କାତା  
ଅଇସି, ସେ ବାକିଅ ସଙ୍ଗ ତିଆରକଲାଟା ସେ ସାସନ୍ କରସି । ଆମର ପାପର ଲାଗି  
କେମା କରିସାରାଇଲା ପଟେ, ସେ ସର୍ଗେ ବାଅଡୁଲା । ଆରି ସବୁରତେଇଅନି ବପୁ  
ରଇବା ପରମେସରର ଉଜାବାଟେ ସାସନ୍ କରବାକେ ବସୁଲା ।

ପରମେସରର ପ ମୁକିଆ

୪ ପରମେସର ତାର ପଅକେ ସରଗର ଦୁଡ଼ମନର ଟାନେଅନି ମୁକିଅ କଲା ଆରି  
ସେମନଟାନେଅନି ତାକେ ବଡ଼ ନାଉଁ ଦେଲା । ୫ କାଇକେବଇଲେ, ପରମେସର  
ତାର କନ୍ ଦୁଡ଼କେ ମିସା ଏନ୍ତାରି କଏ ନାଇ,  
ତୁଇ ମର ପଅ,

ଆଜିଅନି ମୁଇ ତର ବାବା ଅଇଲି ଆରି,

ତାର କନ୍ ଦୁଡ଼ର ବିସଇ ଏନ୍ତାରି କଏନାଇ,

ମୁଇ ତର ବାବା ଅଇବି ଆରି

ସେ ମର ପଅ ଅଇସି ।

୬ ମାତର ପରମେସର ଜେତେବେଲେ ତାର ପଶୁଆ ପଅକେ ଏ ଜଗତେ  
ପାଟାଇଲା, ସେ ଏନ୍ତାରି କଇରଇଲା,  
ପରମେସରର ଦୁଡ଼ମନ ତାକେ ସେବା କରବାଇ ।

୭ ମାତର ସରଗର ଦୁଡ଼ମନର ବିସଇନେଇ ପରମେସର ଏନ୍ତାରି କଇରଇଲା,  
ପରମେସର ତାର ଦୁଡ଼ମନକେ ପବନ୍ ପାରା କଲାଆଟେ ।

ଆରି ତାର ଦାଙ୍ଗତାମନକେ ଲାଗ୍‌ବା ଜଇପାରା କଲାଆଟେ ।

୮ ତାର ପଅର ବିସଇ ସେ ଏନ୍ତାରି କଇରଇଲା,

“ଏ ପରମେସର ତର ରାଇଜ୍ କାଲ୍‌କାଲ୍ ଜୁଗ୍‌ଜୁଗ୍ ରଇସି, ଆରି କେବେ ନ ସାରେ ।

କାଇ ଅନିଆଇ ନ କରି ତର ଲକ୍‌ମନକେ ସାସନ୍ କଲୁସିନି ।

୯ ସତ୍ ବିସଇ ମନକରି ବିନ୍ ବିସଇ ଗିନ୍ କଲୁସିନି ।

ତେବରପାଇ ତର ପରମେସର ତକେ ବାଡ଼ିଲାଆଟେ ।

ସେ ତକେ ଆଲାଦ୍ କରି

ତର ସଙ୍ଗାରିମନର ତେଇଅନି ଅଦିକ୍ ସନ୍‌ମାନ ଦେଇ ସାର୍‌ଦା କରାଇଆଟେ ।”

୧୦ ସେ ଏନ୍ତାରି ମିସା କଇଲାଆଟେ,

“ଏ ମାପରୁ ଆରାମେ ଅନି ତୁଇ ଜଗତ୍ ତିଆର୍ କରିଆରୁସ୍ ।

ଆରି ତର ନିଜର୍ ଆତେ ଆକାସ୍ ଆରି ତେଇ ରଇବା ସବୁଜାକ ତିଆର୍ କଲୁସ୍ ।

୧୧ ସେଟା ସବୁ ମାୟା ଅଇଜାଇସି, ମାତର ତୁଇ ସବୁଦିନରପାଇ ରଇସୁ ।

ସେଟା ସବୁ ପୁରନା ଲୁଗା ପାରା ଚିରି ଅଇଜାଇସି ।

୧୨ ଲୁଗା ଦୁନାଇକରି ସଙ୍ଗଇଲା ପାରା ତୁଇ ସେଟାମନକେ ସଙ୍ଗଇସୁ ।

ଆରି ଲୁଗା ପାଲଟନା କଲାପାରା ବାଦ୍‌ଲାଇସୁ ।

ମାତର ନିଜେ ତୁଇ ନ ବାଦ୍‌ଲି କରି

କାଲ୍ କାଲ୍ ଜୁଗ୍ ଜୁଗ୍ ରଇସୁ ।”

୧୩ ପରମେସର ତାର କନ୍ ଦୁଡ଼ମନକେ ମିସା କଏନାଇ,

“ମୁଇ ତମର ଦୁଡ଼ମନକେ ତମର ପାଦ୍‌ତଲେ

ନ ସଙ୍ଗଇବା ଜାକ

ମର ଉଦ୍ଧାରଣେ ବସି ରୁଆ ।”

<sup>୧୪</sup> ତେବେ ପାଇ ପିଲାମାନ ସବୁ ରକତ ମାଉଁସ ମିସି ରକ୍ତବାକେ ସେ ମିସା ନିଜର ସେ ରକାମ ସିତି ମିସିଗାଲା, ଆରି ତାର ମରନ୍ ସଙ୍ଗେ ମରନର ଅଦିକାରି ସମ୍ଭାଷଣକେ ବିନାସ କଲା ।

## ୨

### ବଡ଼ ମୁକ୍ତି

<sup>୧</sup> ଆମେ ଜେନ୍ତୁକି ସତ୍ତାଗେନେ ଅନି ବିନେ ନ ବେଗଲୁ, ସେଟାର ପାଇ ଆମେ ସୁନିରକ୍ତବା ସତ୍ତ ବାକିଅଟାଗେନେ ଡାଞ୍ଚିଅଇ ରକ୍ତବା ଦରକାର । <sup>୨</sup> କାଇକେ ବଇଲେ ପୁରବେ ପରମେସର ସରଗ ଦୁଡ଼ମନର ଅନି ଜାନାଇ ଆଟେ, ସେଟା ସତ୍ତ ବଲି ପରମାନ ଅଇଆଟେ, ଜନ୍ ଲକ୍ଷମନ୍ ସେଟା ମାନତ୍ ନାଇ, ସେମନ୍ ତଣ୍ଡ ପାଇଆଟତ୍ । <sup>୩</sup> ତେବେ ଏନ୍ତାରି ରକ୍ତବା ବଡ଼ ମୁକ୍ତି ଆମେ ଏଲା କରିଦେଲେ କେନ୍ତୁ ରକିଆ ପାଇବାର ଅଇସି ? ଏ ମୁକ୍ତିର ବିସଇ ପରତମେ ମାପୁରୁ ନିଜେ ଜାନାଇ ଆଟେ ଆରି ତାରଟାଗେନେ ଅନି ସୁନିରକ୍ତବା ଲକ୍ଷମନ୍ ତେଇର ସତ୍ତ ଆମରଟାଗେନେ ପରମାନ କରି ଜାନାଇ ଆଟତ୍ । <sup>୪</sup> ସେମନ୍ ପରମାନ କଲାଟା ସତ୍ତ ବଲି ପରମେସର ମିସା ସାକିଦେଲା । କାଇକେବଇଲେ ସେ ସେମନ୍କେ, କେତେ ରକାମର ଚିନ୍ ଆରି କାବାଅଇଜିବା କାମମନ୍, ନ ଗଟ୍‌ବା ଗଟ୍‌ନାମନ୍ କରବାକେ ବପୁଦେଲା । ତାର ମନ୍ କଲା ଇସାବେ ସୁକଲ୍‌ଆଡ଼ମାର ଦାନ ମିସା ସେମନ୍କେ ବାଟାକରି ଦେଇ ରଇଲା ।

ଜିସୁ ପୁରାପୁରୁନ୍ ବାବରେ ନରରୁପ୍ ଦାରଲା

<sup>୫</sup> ପରମେସର ନୁଆ ଜଗତ୍ ତିଆର କରସି । ଆରି ଆମେ ଜନ୍ ଜଗତର କାତା କଇଲୁନି, ତେଇର ସାସନ୍ କରବାକେ, ସେ ସରଗର ଦୁଡ଼ମନକେ ବାଟିକରି ମିସାଏ ନାଇ । <sup>୬</sup> କାଇକେ ବଇଲେ ଦରମ୍‌ସାସ୍ତରେ ଏନ୍ତୁ ଲେକାଅଇଆଟେ, “ଏ ପରମେସର, ମୁନୁସ୍ କେ ଜେ

ତମେ ତାରପାଇ ଚିନ୍ତା କଲାସନି ?

ଆରି ମୁନୁସ୍ ଏତେକ୍ ଇନ୍ ଅଇଲେ ମିସା

ତାକେ ଜତନ୍ କଲାସନି ।

<sup>୭</sup> ତମେ ତାକେ ସରଗର ଦୁଡ଼ମନର ଟାଗେନେ ଅନି ଅଲପ୍ ଉନା କରି ଆଟାସ୍ ।

ସେମନ୍କେ ମଇମା ଆରି ଡାକ୍‌ପୁଟା କରିଆଟାସ୍ ।

“ସବୁ ବିସଇର ଉପରେ ସାସନ୍ କରବାକେ ଅଦିକାର ଦେଇଆଟାସ୍ ।”

ଇତି ଲେକାଅଇଆଟେ, କାଇ ବିସଇ ନ ଚାଡ଼ି ମୁନୁସ୍‌କେ ସବୁ ବିସଇ ଉପରେ ସାସନ୍ କରବାକେ ଦେଇଆଟେ । ଇତିଅନି ଜାନାପତି ଗାଲାନିଜେ ସବୁ ବିସଇ ତାର ଅଦିକାରେ ଆଟେ । ମୁନୁସ୍ ଏବେ ସବୁ ବିସଇର ଉପରେ ଅଦିକାର କରେ ନାଇତା । ଏଟା ଏବେ ଆମେ ଜାନ୍‌ଲୁନି । <sup>୯</sup> ଆମେ ଦେକ୍‌ଲୁନି, ଜିସୁ କେନ୍ତୁ ଚନେକରପାଇ ସରଗର ଦୁଡ଼ମନର ଟାଗେନେ ଅନି ତଲେ ଅଇରଇଲା । ଆରି ଜେନ୍ତୁକି ସେ ପରମେସରର ଦୟା ପାଇକରି ସବୁଲକର୍ ପାଇ ଜନ୍ ଦୁକ୍ କସ୍‌ଟ ପାଇକରି ମଲା, ସେ ମରନର ଲାଗି ଏବେ ଆମେ ତାକେ ମଇମା ଆରି ଡାକ୍‌ପୁଟା ଅଇଲାଟା ଦେକ୍‌ଲୁନି । <sup>୧୦</sup> ପରମେସର ସବୁ ବିସଇ ତିଆରକରି ସଙ୍ଗଇଲା ଆଟେ । ସେଟାର ପାଇ ଜିସୁକେ ଦୁକ୍ କସ୍‌ଟ ପାଇବାକେ ସେ ଦେଲା । ଏନ୍ତାରି ଅଇ ସେ ସିଦ୍ ଅଇଲା ଆରି ଆମର ବିତ୍‌ରେଅନି ବେସି ଲକ୍, ତାର ପଅ ଅଇଗାଲୁ । ଜେନ୍ତୁକି କି ଆମେ ମିସା ତାର ମଇମା କଲାଟାଗେନେ ମିସୁ, କାଇକେବଇଲେ ଜିସୁ ପାପର ତଣ୍ଡେଅନି ଆମକେ ମୁକ୍‌ଲାଇଲା ।

୧୧ ସେ ଆମ୍ଭଙ୍କେ ପାପେ ଅନି ସୁକଲ୍ କଲାଆତେ । ଆରି ଆମେ ଜେ କି ସୁକଲ୍ ଅଇଆତୁ, ଆରି ଜେ କି ଆମ୍ଭଙ୍କେ ସୁକଲ୍ କରିଆତେ, ନରଲକ୍ଷ୍ମୀନର୍ ଗଟେକ୍ ସେ ବାବା । ଏଟାରୁଲାଗି ଜିସୁ ସେମନ୍‌କେ ବାଇବଇନି ବଲିକରି କଇବାକେ ଲାଜ୍ ଅଏ ନାଇ । ମାତର୍ ତାର୍ କୁଟୁମ୍ ବଲି ତାକ୍‌ସି । ୧୨ ଜିସୁ ପର୍‌ମେସର୍‌କେ କଇଲା ଆତେ, “ମୁଇ ତମର୍ ସବୁଜାକ କାମ୍ ମର୍ ବାଇମନ୍‌କେ ଜାନାଇବି ।

ସେମନ୍ ରୁଣ୍ଡୁଲାଟାନେ ତମ୍‌କେ ସୁମରନା କର୍‌ବି ।”

୧୩ ସେ ଏନ୍ତାରି ମିସା କଇଲାଆତେ,  
 “ପର୍‌ମେସର୍‌ଟାନେ ମୁଇ ଆସା କର୍‌ବି ।”

ଆରି ସେ କଇଲା, “ପର୍‌ମେସର୍ ମକେ ଦେଲା ପିଲାଟକିମନ୍, ମର୍‌ସଙ୍ଗ୍ ଆତଡ୍ ।”

୧୪ ଇତି ଜନ୍ ଲକ୍ଷ୍ମୀନର୍‌କେ ପିଲାମନ୍ ବଲି ତାକ୍‌ଲାଇନି, ସେମନ୍ ବନି ମାଉଁସ୍ ରଇବା ଗାଗଡ୍ ସଙ୍ଗର୍ ଲକ୍ଷ୍ମୀନର୍ । ଜିସୁ ମିସା ସେମନ୍‌ର୍ ପାରା ଗଟେକ୍ ଗାଗଡ୍ ନେଲା ଆରି ତାକର୍ ଗୁନ୍‌ତଲନ୍‌ତେଇ ମିସ୍‌ଲା । ତାର୍ ମରନର୍ ଲାଗି ସେ ମରନର୍ ଉପ୍‌ରେ ବପୁ ରଇବା ସଇତାନ୍‌କେ ପୁରାପୁରୁନ୍ ବାବେ ଆରାଇଲା । ୧୫ ଜନ୍ ଲକ୍ଷ୍ମୀନର୍ ମରନ୍‌କେ ଡରିକରି ରଇଲାଇ, ସେଟାର୍ ପାଇ ସେମନ୍ ଜନମେ ଅନି ଗତିଦାଙ୍ଗ୍‌ତା ପାରା ଅଇରଇଲାଇ । ସେମନ୍‌କେ ସେ ମରନର୍ ଡଣ୍ଡେଅନି ମୁକ୍‌ଲାଇଲା । ୧୬ ଇତିଅନି ନିକ କରି ଜାନିଅଇଲାନି ଜେ, ସେ ସରଗର୍ ଦୁର୍‌ମନ୍‌କେ ସାଇଜ କରେନାଇ । ତାର୍ ବାଦୁଲେ ଆମେ ଜନ୍‌ଲକ୍ଷ୍ମୀନର୍ କି ଅବ୍ରାଆମର୍ ବର୍‌ସର୍ ନାତିତିତି ବଲି ଏଜାଇଅଇଲୁନି, ସେ ଆମ୍ଭଙ୍କେ ସାଇଜ କଲାନି । ୧୭ ତେବର୍ ପାଇ ସେଟା ଦରକାର୍ ରଇଲା ଜେ ଆମେ ଜନ୍‌ଲକ୍ଷ୍ମୀନର୍‌କି ତାର୍ ବାଇବଇନି ଅଇଲୁଆତୁ, ସେ ସମାନ୍ ଆମର୍ ପାରା ଅଇରଇବାକେ । ସେନ୍ତାର୍ ଆଲେ ସେ ଆମର୍ ପର୍‌ମେସର୍ ଟାନେ ରଇବା ସଡ୍‌ସଙ୍ଗ୍ ଆରି ଦୟାସଙ୍ଗ୍ ରଇବା ବଡ୍ ପୁଜାରି । ସେ ଆମର୍ ବଡ୍ ପୁଜାରି ଅଇଲାକେ ଆମର୍ ପାପର୍ କେମା ଅଇଲା । ୧୮ ସେ ଦୁକ୍‌କ୍‌ସ୍‌ଟ ପାଇଲା ଆରି ପରିକା କରାଇ ଅଇଲା, ଏବେ ଆମେ ଜେଡ୍‌କି ଲକ୍ ପରିକା କରାଇଅଇଲୁନି, ଆମ୍ଭଙ୍କେ ସବୁକେ ସାଇଜ କରିପାର୍‌ସି ।

### ୩

ଜିସୁ କିରିସ୍‌ଟ ମସାର୍ ଟାନୁ ବଡ୍

୧ ଏ ମର୍ ବିସ୍‌ବାସି ବାଇବଇନିମନ୍, ଜନ୍‌ଲକ୍ଷ୍ମୀନର୍‌କେ କି ପର୍‌ମେସର୍ ତାର୍ ଲକ୍ ବଲି ବାଟ୍‌ଲା ଆତେ, । ଆମେ ଜିସୁର୍ ବିସଇ ଅଲପ୍ ବାବିଦେକୁ । କାଇକେବଇଲେ ଜେଡ୍‌କି ସବୁ ବିସଇ ଆମର୍ ବିସ୍‌ବାସର୍ ଲାଗି ଆତେ, ତାକେ ସେ ପର୍‌ମେସର୍ ବଡ୍ ପୁଜାରି ଇସାବେ ପାଟାଇଲା । ୨ ମସା ଜେନ୍ତାରି ପର୍‌ମେସର୍‌ର୍ କୁଟୁମେ ସଡ୍ ବାବେ କାମ୍ କଲା, ସମାନ୍ ସେନ୍ତାରିସେ, ସେ ମିସା ସଡ୍ ବାବେ ପର୍‌ମେସର୍‌ର୍ ଆଦେସ୍ ମାନ୍‌ବାକେ ସଡ୍ ସଙ୍ଗ୍ କଲା ଆରି ପର୍‌ମେସର୍‌ସେ ତାକେ ବାଟି ପାଟାଇରଇଲା । ୩ ଗର୍‌ତେଇଅନି ଗର୍ ତିଆର୍‌କଲା ମେସ୍‌ତୁରି ଅଦିକ୍ ସନ୍‌ମାନ୍ ପାଇସି । ସେନ୍ତାରିସେ ଜିସୁ ମସାର୍‌ଟାନେଅନି ଅଦିକ୍ ବଡ୍ ବଲି ସନ୍‌ମାନ୍ ମିଲ୍‌ସି । ୪ କାଇକେବଇଲେ ସବୁ ଗର୍ ମେସ୍‌ତୁରିସେ ତିଆର୍ କର୍‌ସି । ମାତର୍ ପର୍‌ମେସର୍ ସବୁ ବିସଇ ତିଆର୍ କଲାଆତେ । ୫ ମସା ଗତିଦାଙ୍ଗ୍‌ତା ଇସାବେ ପର୍‌ମେସର୍‌ର୍ ଗରେ କାମ୍ କର୍‌ତେରଇଲା, ଆରି ପର୍‌ମେସର୍ ଜନ୍‌ଟା ଆଇବା ଦିନ୍‌ମନ୍‌କେ ଜାନାଇସି, ସେଟାଆକା ସେ କଇରଇଲା । ୬ ମାତର୍ କିରିସ୍‌ଟ ଅବ୍‌କା ଗତିଦାଙ୍ଗ୍‌ତାସେ ନ ରଇ ଗଟେକ୍ ପଅ ରଇଲା । ତାର୍ ବାବାର୍ ଗରେ ରଇବା ସବୁ ଦାଇଡ୍ ସେ ସଡ୍ ବାବେ କଲା । ଆମେ ଜଦି ମୁର୍‌ଚିରଇକରି ଆସା କଲାଟା ମିଲାଇବୁ ବଲି ଜାଗିରଇଲେ, ତାର୍ କୁଟୁମେ ମିସ୍‌ବୁ ।

ଇସ୍ରାଏଲର ଲକ୍ଷ୍ମୀମାନଙ୍କୁ ପୁଣିବାଟା

୧୭ ସୁକଲ୍ ଆତ୍ମା ଜେନ୍ତାରି କଲଲାନି,

“ଆଜି ଜଦି ତମେ ପରମେସରର କାତା ସୁନ୍‌ସା,

୮ ଜେନ୍ତାରି, ମରୁବାଲି ବୁର୍ଷ୍ଟି ତମର ଆନିଦାଦିମନ୍ ମାପରୁକେ ପରିକା କଲାଇ  
ଆରି ତାର ବିରଦେ ଟିଆ ଅଇଲାଇ,

ସେ ରକାମ୍ ତମେ ନିଜର ମନ୍ ଆଁଟ୍ କରାନାଇ ।”

୯ କାଇକେବଇଲେ ସେ ଜେଡ଼କି କରିରଇବା କାବାଅଇଜିବା କାମ୍‌ମନ୍ ଚାଲିସ  
ବରସ୍‌ଜାକ ଦେକଲେ ମିସା, ସେମନ୍ ତାର ବପୁକେ ପରିକା କରିଲାଗିରଇଲା ।

୧୦ ସେଟାରପାଇ ପରମେସର ସେ ଲକ୍ଷ୍ମୀମାନଙ୍କେ ରିସାଅଇଲା, ଆରି କଲଲା,  
ସେମନ୍ ବେଗ୍‌ଲିକରି ଦିନ୍ ବିସଇମନ୍ କରିଲାଗିଆତଡ଼ । ମୁଇ ତିଆରଲାଟା  
କରବାକେ ନିଡ଼ଲାଇନି ।

୧୧ ସେଟାର ପାଇ ମୁଇ ରିସାଅଇ ସପଡ଼କରି କଲଲି, ମୁଇ ଜନ୍‌ଦେସେ ପୁଣିବାକେ  
ଦେଇତି, ସେ ଦେସେ କେବେ ମିସା ତମ୍‌କେ ପୁରବାକେ ନ ଦେଇ ।

୧୨ ତେବର୍ ପାଇ ଏ ମର ବିସ୍‌ବାସି ବାଇବଇନିମନ୍, ଜାଗରତାଅଇ ରୁଆ,  
ଜେନ୍ତାରିକି ତମର ବିଡ଼ରେଅନି କେ ମିସା କାରାପ୍ ମନ୍ ରଇକରି ପରମେସରକେ  
ବିସ୍‌ବାସ୍ ନ କରା, ଆରି କେ ମିସା ଜିବନ୍ ରଇବା ପରମେସର ଟାନେଅନି ବେଗ୍‌ଲି  
ନ ଜା । ୧୩ ତମର ବିଡ଼ରେ କେ ମିସା ପାପରଲାଗି ନାଡ଼ାଇ ଅଇବାର ନାଇ  
। ସେଟାରଲାଗି ତମର ମନ୍ ଆଁଟ୍ ଅଇଜାଇସି । ଆମର ଜିଇବାକାଇବା ଦିନ୍  
ସାର୍‌ବାଜାକ ଆମେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଏ ବିସଇ ଜାଗରଡ଼  
କରାଇବାରୁ ଆତେ । ୧୪ କାଇକେବଇଲେ ଆମେ ଜଦି ସାରାସାରି ଦିନ୍ ଜାକ ଆମର  
ବିସ୍‌ବାସ୍ ଡାଁଟ୍ ସଙ୍ଗ୍ ଦାରିରଇରୁ, ସେନ୍ତାରିଆଲେ ଆମେ ସବୁଲକ୍ କିରିସ୍‌ଟର୍ ସଙ୍ଗ୍  
ବାଗ୍ ନେଇ ମିସିକରି ରଇରୁ ।

୧୫ ଦରମ୍‌ସାସ୍‌ତରେ ଏନ୍ତାରି ଲେକା ଅଇଲାଆତେ

“ଜଦି ତମେ ଆଜି ପରମେସରର ବାକିଅ ସୁନ୍‌ସା,

ତମର ଆନିଦାଦିମନ୍ ଜେନ୍ତାରି ତାକର ମନ୍ ଆଁଟ୍‌କରି ତାକେ ବିରଦ୍ କଲାଇ,  
ସେନ୍ତାରି ତମର ମନ୍ ଆଁଟ୍ କରାନାଇ ।”

୧୬ ପରମେସରର ବାକିଅ ସୁନିକରି ମିସା ଜେଡ଼କି ଲକ୍ ତାକେ ବିରଦ୍ କଲାଇ,  
ସେ ଲକ୍‌ମନ୍ କେ ? ଜନ୍ ଲକ୍‌ମନ୍‌କେ ମସା ମିସର୍‌ଦେସେଅନି ବାର୍‌କରାଇ  
ଆନିରଇଲା ସେମନ୍ ନ ଅଅଡ଼ କି ? ୧୭ ଚାଲିସ୍ ବରସ୍ ଜାକ ପରମେସର କନ୍  
ଲକ୍‌ମନ୍‌କେ ରିସା ଅଇରଇଲା, ସେମନ୍ କେ ? ଜନ୍ ଲକ୍‌ମନ୍ କି ପାପ୍ କରିରଇଲା  
ଆରି ମରୁବାଲି ବୁର୍ଷ୍ଟି ମରିଜାଇରଇଲା, ସେମନ୍ ନଅଡ଼ କି ? ୧୮ ପରମେସର  
ଜେବେ ସପଡ଼କରି କଇରଇଲା ଜେ, ସେମନ୍ ତାର ପୁଣିବାଦେସେ କେବେମିସା ପୁରି  
ନାପାରଡ଼, ସେବେଲେ ସେ କନ୍ ଲକ୍‌ମନ୍‌କେ କଇରଇଲା ? ଜନ୍‌ଲକ୍‌ମନ୍ ତାର  
କାତା ନିଡ଼ତେ ରଇଲା ସେମନ୍‌କେସେ । ୧୯ ଆମେ ଏନ୍ତାରି ଜାନ୍ତୁ ଜେ, ସେମନ୍  
ବିସ୍‌ବାସ୍ କରଡ଼ ନାଇଜେ ପରମେସର ତିଆର୍ କରିରଇବା ପୁଣିବା ଜାଗାଇ ସେମନ୍  
ପୁରି ନାପାରଲା ।

### ୪

୧ ପରମେସର ଆମ୍‌କେ କାତା ଦେଇରଇଲାଜେ, ସେ ଆମରପାଇ ଗଟେକ୍ ପୁଣିବା  
ଜାଗା ତିଆର୍ କଲାଆତେ । ତେବର୍ ପାଇ ଆମେ ଜାଗରଡ଼ ରଇବାକେ ପଡ଼ସି ।  
ଜେନ୍ତାରି ଆମର ବିଡ଼ରେ ସେନ୍ତାରି କେ ନ ରଅଡ଼, ଜେ କି ସେ ଜାଗାଇ ପୁରିନାପାରଡ଼  
। ୨ କାଇକେବଇଲେ ଆମର ଆନିଦାଦିମନ୍‌ପାରା ଆମେ ମିସା ସୁବ୍‌କବର୍ ସୁନିଆଡ଼ୁ  
। ମାତର୍ ସେମନ୍ ସେଟା ସୁନିକରି ମିସା ମାନଡ଼ ନାଇ, କାଇକେବଇଲେ ସେଟା

ସେମାନ ବିସ୍‌ବାସ କରନ୍ତୁ ନାହିଁ ।<sup>୩</sup> ଆମେ ଜେଡ଼କି ଲକ୍ଷ୍ୟ ବିସ୍‌ବାସ କରୁଛୁ, ଆମେସେ ସେ ପୁଣ୍ୟ ଜାଗା ପୁରୁଛୁ । କାହିଁକିବୋଲେ ତାଙ୍କର ବିସ୍‌ଭାବେ ପରମେସ୍‌ବର କଲିଆଣେ,

“ମର ରିସାଲ ମୁକ୍ତ ସପତ୍ କରୁଥାନ୍ତି ।

ମୁକ୍ତ ତିଆର କରିରକ୍ତ ପୁଣ୍ୟ ଜାଗା ସେମାନଙ୍କେ ନ ପୁରାଇ ।”

ଜଗତ୍ ତିଆର ଅଇଲା ବେଳେଅନ୍ତି ସେ ପୁଣ୍ୟ ଗର୍ ତିଆର ଅଇରଇଲା । ଏଲେ ମିସା ପରମେସ୍‌ବର ସେନ୍ତାରି କଲରଇଲା ।<sup>୪</sup> କାହିଁକିବୋଲେ ଆଟର ସାରାସାରି ଦିନର ବିସ୍‌ଭା ସାସ୍‌ତରେ ଏନ୍ତାରି ଲେକାଅଇଲାଆଟେ, “ପରମେସ୍‌ବର ସବୁଜାକ କାମସାରାଇ କରି ଆଟର ସାରାସାରି ଦିନେ, ଅଲପ୍ ପୁଣ୍ୟ ।”<sup>୫</sup> ଆରି ଏ ବିସ୍‌ଭା ବିନ୍‌ଟାନେ ଲେକାଅଇଆଟେ । “ସେମାନ ମର ପୁଣ୍ୟ ଜାଗା କେବେ ମିସା ପୁରିନାପାରନ୍ତୁ ।”<sup>୬</sup> ପରତମେ ଜେଡ଼କିଲକ୍ଷ୍ୟ ସୁବକବର ସୁନିରଇଲା, ନିଜେ ବିସ୍‌ବାସ କରନ୍ତୁ ନାହିଁ ଆରି ସେମାନ ସେ ପୁଣ୍ୟ ଜାଗା ପାଅନ୍ତୁ ନାହିଁ । ତାରପତେ ପରମେସ୍‌ବର ବିନ୍‌ ଲକ୍ଷ୍ୟମ୍ ପୁରବାକେ ଆଦେସ୍ ଦେଲା ।<sup>୭</sup> ଲକ୍ଷ୍ୟମ୍ ତେଲ ପୁରବାକେ ପରମେସ୍‌ବର ଆରି ଗଟେକ୍ ବେଲା ବାଟଲା । ସେ ବେଲା ଅଇଲାନ୍ତି ଆଜି । ବେସି ବରସ୍ ପତେ ପରମେସ୍‌ବର ମୁକ୍ତ କଲଲା ବିସ୍‌ଭା ଦାଉଦର ସାସ୍‌ତରେ ଲେକାଅଇରଇଲା,

“ଆଜି ଜଦି ପରମେସ୍‌ବର ସବଦ୍ ସୁନିଲେ

ତମର ମନ୍ ଆର୍ କରା ନାହିଁ ।”

୮ ଆମେ ଏ ବିସ୍‌ଭା ମିସା ଜାନିଆରୁ ଜେ, ପରମେସ୍‌ବର ଜନ୍ ବିସ୍‌ରାମ୍ ଜାଗାର ପାଇ ସପତ୍ କରିରଇଲା, ସେ ଜାଗା ଜିଅସୁଆ ଆମର ଆନିଦାଦିମନ୍‌କେ ଡାକି ନେଇ ରଇବା ଜାଗା ନାହିଁ । ଜଦି ସେ ଜାଗା ସେଟା ଅଇରଇତା, ତେବେ ପରମେସ୍‌ବର ଆରି ଗଟେକ୍ ପୁଣ୍ୟ ଦିନର କାତା ନ କଇତା ।<sup>୯</sup> ସେଟାରପାଇ ଏଟା ସତ୍ ଆକା । ଆଟର ସାରାସାରି ଦିନେ ପରମେସ୍‌ବର ପୁଣ୍ୟପାରା ତାଙ୍କର ଲକ୍ଷ୍ୟମ୍ ପାଇ ଗଟେକ୍ ପୁଣ୍ୟ ବେଲା ସଙ୍ଗାଆଟେ ।<sup>୧୦</sup> କାହିଁକିବୋଲେ ପରମେସ୍‌ବର ସପତ୍ କରିରଇବା ବିସ୍‌ରାମେ ଜେଡ଼କିଲକ୍ଷ୍ୟ ପୁରବାଇ, ସେ ବିସ୍‌ରାମ୍ କଲାପାରା, ତାଙ୍କର କାମେଅନ୍ତି ବିସ୍‌ରାମ୍ କରବାଇ ।<sup>୧୧</sup> ସେଟାରପାଇ ଆମେ ସବୁଲକ୍ଷ୍ୟ ମନ୍ ଦିଆନ୍ ଦେଇକରି, ସେ ବିସ୍‌ରାମ୍ ଜାଗା ପୁରବାକେ ଚେସ୍‌ଟା କରୁ । ଆମର ଆନିଦାଦିମନ୍‌ପାରା ନ ଅଇବାକେ ଆମେ ଜାଗରନ୍ତୁ ରହୁ । ପରମେସ୍‌ବର କଲଲାଟା ବିସ୍‌ବାସ୍ ନ କଲାରପାଇ, ସେମାନ ସେଜାଗା ପୁରି ନାପାରୁଲା ।

<sup>୧୨</sup> ପରମେସ୍‌ବର ବାକିଅ ଜିବନ୍‌ରଇବାଟା ଆରି ବେସି ବପୁରଇ ଦୁଇବାଟେ ଦାରରଇବା ଗଟେକ୍ ଲାଗନ୍ କାଣ୍ଡା ପାରା । ସେଟା ଆଡ଼ର ଗିଟି ଆରି ଆଡ଼ ବିତ୍‌ରେ ରଇବାଟା କାଟ୍‌ସି । ଗଟେକ୍ ଲକ୍ଷ୍ୟ ମନ୍ ବିତ୍‌ରେ ରଇବା ସବୁ ବିସ୍‌ଭା ବିଚାର କରିପାରୁସି । ମନ୍ ବିତ୍‌ରେ ଲୁଚିରଇବା ସବୁ ବିସ୍‌ଭା ମିସା ।<sup>୧୩</sup> ପରମେସ୍‌ବରାନେ କାହିଁକି ବିସ୍‌ଭା ମିସା ଲୁଚିକରି ନ ରଏ । ତାର୍ ଆକିଟାନେ ସବୁ ବିସ୍‌ଭା ଉଗାଡ଼ି ଅଇରଇଲାପାରା ଆଟେ । କାହିଁକିବୋଲେ ସେ ସବୁ ବିସ୍‌ଭା, ଗଟେକ୍ ନ ଚାଡ଼ିକରି, ସବୁ ଜାନେ । ଆରି ତାର୍ ଲଗେ ଆମେ ଆମର ନିଜର ବିସ୍‌ଭା ଇସାବ୍ ଦେବାର୍ ଆଟେ ।

ଜିସୁଆକା ବଡ଼ ମୁକ୍ତି ପୁଜାରି

<sup>୧୪</sup> ଜିସୁ ପରମେସ୍‌ବର ପଅ ଅଇଲାକେ, ସେ ଆମର ମନେ ଜନ୍ ବଡ଼ ପୁଜାରି ବଲି ବିସ୍‌ବାସ୍ କରି ଦାରିକରି ଆରୁ, ସେଟା ଡାକ୍ କରୁ ।<sup>୧୫</sup> ସେ ଆମର ବାଦୁଲେ ବଡ଼ ପୁଜାରିଅଇ ପରମେସ୍‌ବର ମୁଆଟେ ଗାଲାଆଟେ । ଆରି ଜେଡ଼କି ରକାମ୍ ପରିକା, ଜେଡେକ୍ କସ୍‌ଟ ଆମେ ପାଇଲୁନି, ସେଟା ଆମର ବଡ଼ ପୁଜାରି ସବୁବେଳେ ଆମର

ସଙ୍ଗେ ମିଶିକରି କଲାନି । କାଇକେବଇଲେ ଜେଡ଼କି ସବୁ ଆମେ କଲୁନି, ସେଟା ସବୁଜାକ ସେ ମିସା କଲା । ମାତର ସେ କେତେବେଳେ ମିସା ପାପ୍ କରେ ନାଇ । ୧୭ ତେବରପାଇ ତମେ ସାଆସ୍ ସଙ୍ଗେ ପରମେସରର୍ ଟାନେ ଜାଇଅଇସି, ଜଦି ଆମେ ମାଙ୍ଗଲେ ସେ ଜିବନ୍ ଦୁକାଇ ଆମକେ ଦୟା କରସି ଆରି ସାଇଜ ଦରକାର ରଇବାବେଳେ, ଆମକେ ସାଇଜ କରସି ।

**୫**

୧ ଜିଉଦିମନର୍ ଜେଡ଼କି ବଡ଼ ପୁଜାରିମନ୍ ତାକର୍ ନିଜର୍ ଲକ୍ମନର୍ତେଇଅନି ବାଚାଇଅଇବାଇ । ତାକରବାଟେଅନି ପାପ୍ କେମା କରବା ବଲି ଆରି ସର୍ପିଦେବା ବଲି, ଦେଇକରି ପରମେସର୍କେ ସେବା କରବାଇ । ୨ ଜେତେବେଳେ ତାର ସଙ୍ଗାରିମନ୍ ନାଜାନିକରି ରଇବାଇ, ଆରି ବୁଲ୍ କାମ୍ କରିରଇବାଇ, ସେ ସେମନର୍ ସଙ୍ଗେ ଦୟାଦରମ୍ ଦେକାଇକରି ରଇପାରସି । କାଇକେବଇଲେ ତାର ଜିବନେ ମିସା ବେସି ବୁଲ୍ ରଇସି । ୩ ଆରି ତାକେ ମିସା ବେସି ବୁଲ୍ ରଇଲାକେ ସେ ଅଦକା ବିନ୍ ଲକର୍ ପାପର୍ ପାଇ ବଲି ଦେଲେ ନଏଁ, ମାତର ନିଜର୍ ପାପରଲାଗି ମିସା ବଲି ସର୍ପିଦେବାକେ ପଡ଼ସି । ୪ କେ ମିସା ନିଜେ ବାଟିଅଇକରି ବଡ଼ପୁଜାରିର୍ ବେସି ସନ୍ମାନ ପାଇବା ପଦ୍ ପାଇ ନାପାରେ । ମାତର ଗଟେକ୍ ଲକ୍ ପରମେସର୍ ତାକ୍ଲା ଇସାବେସେ ବଡ଼ ପୁଜାରିର୍ ପଦ୍ ପାଇଅଇସି । ଜେନ୍ତାରି କି କେତେ କେତେ ବରସ୍ ପୁରବେ ଆରଣ୍ଣକେ ବାଟିରଇଲା ।

୫ ସେନ୍ତାରିସେ କିରିସଟ ବଡ଼ ପୁଜାରିର୍ ସନ୍ମାନ ପାଇବାକେ ନିଜ୍ଜକେ ବଡ଼ କରେ ନାଇ । ମାତର ପରମେସରସେ ତାକେ ବାଟଲା । ତାର ବାଦୁଲେ ସେ ତାକେ କଇଲା, “ତୁଇ ମର୍ ପଅ,

ଆଜି ମୁଇ ତର୍ ବାବା ଅଇଲିଆଟି ।”

୬ ଆରି ଗଟେକ୍ ଜାଗାଇ ମିସା ସେ କଇଲା,

“ତୁଇ ପୁଜାରି ପଦ୍ ପାଇକରି

ମଲ୍‌କିସେଦକର୍ କୁଟୁମ୍ ପାରା

କାଲ୍ କାଲ୍ ଜୁଗ୍ ଜୁଗ୍ ପୁଜାରି ଅଇ ରଇସୁ ।”

୭ \*ଜିସୁ ଏ ଜଗତେ ରଇଲାବେଳେ, ସେ ଆକମାରି କାନ୍ଦିକରି ଆରି ଆଁସୁ ଜରାଇକରି କାନ୍ଦି ପରମେସର୍କେ ପାରତନା କରିଲାଗିରଇଲା । ମରନେଅନି ତାକେ ରକିଆ କରବାକେ ପରମେସର୍କେ ବପୁଆତେ ବଲି ସେ ଜାନିକରି ଏନ୍ତାରି କଲା । ସେ ନିଜେ ଦୟାଦରମ୍ ଦେକାଇଲାକେ ଆରି ପରମେସରର୍ କାତା ମାନଲାକେ, ପରମେସର୍ ତାର ପାରତନା ସୁନ୍‌ଲା । ୮ ଜିସୁ ପରମେସରର୍ ପଅ ଅଇରଇଲେ ମିସା, ସେ ଦୁକ୍ କସ୍ଟ ପାଇରଇଲାଟି ଲାଗି, ତାର କାତା ମାନବାକେ ସିକ୍‌ଲା । ୯ ସେ ପରମେସରର୍ କାତା ମାନଲାକେ ପୁରାପୁରୁନ୍ ସିଦ୍ ଅଇଲା । ତାକେ ବିସ୍‌ବାସ୍ କରବା ଲକ୍ମନକେ କେବେ ନ ସାରବା ମୁକ୍ତି ଦେବା ଲକ୍ ଅଇଲା । ୧୦ ସେଟାର୍ ପାଇ ତାକେ ପରମେସର୍ ମଲ୍‌କିସେଦକ୍ ପୁଜାରିର୍ ପାରା ବଡ଼ ପୁଜାରି କରି ବାଟଲା ।

ବିସ୍‌ବାସ୍ ନ ଆଜାଇବାକେ ଜାଗରତ୍

୧୧ ଏ ବିସଇ ଆରି ଅଦିକ୍ ତମକେ ଜାନାଇବି ବଲି ମୁଇ ମନ୍ କଲିନି । ମାତର ତମେ ଦାପ୍‌ରେ ବୁଜି ନାପାରାସ୍‌କେ ବୁଜାଇବାକେ କସ୍ଟ ଆତେ । ୧୨ \*ତମେ ବିସ୍‌ବାସ୍ କରି ବେସିଦିନ୍ ଅଇଗାଲା ଆତେ ।

ଆରି ଏବେ ତମେ ତମର୍ ସଙ୍ଗାରିମନ୍‌କେ ସିକାଇବାର୍ ରଇଲା । ମାତର ପରମେସରର୍ ପରତୁମ୍ ସିକିଆ ତମକେ ଏବେ ସିକାଇବାକେ ଲକ୍ ଲତାଆତେ

\* ୫:୭ ୫:୭ ମାଡିଉ ୨୭:୩୭-୪୭; ମାର୍କ ୧୪:୩୨-୪୨; ଲୁକ୍ ୨୨:୩୯-୪୭      \* ୫:୧୭ ୫:୧୭ ୧ମ କରନ୍ତିୟ ୩:୨

। ତମେ ଗଟେକ ଦୁଃ କାଲବା ପିଲାଟପାରା ଆଗାସ୍ । କାଲକେବଲଲେ ଆଁଟଟା  
ମନ୍ କାଡ଼ି ନାପାରାସ୍ । ୧୩ ଜେ ଦୁଃ କାଲବାର ଆତେ, ସେ ଏବେ ମିସା ପିଲାସେ  
। ସେନ୍ତାରି ଲକ୍ମନ୍ ଟିକ୍ ଆରି ବୁଲ୍ ଚଲାଚଲ୍ତି କରବାଟା ଚିନି ନାପାରାଲାଇନି ।  
୧୪ ଚାବି ଚାବି କାଲବା କାଦି ବଡ଼ ଲକ୍ମନ୍‌ରପାଇ । ସେମନ୍ ନିକ ଆରି କାରାପ୍  
ଚିନ୍‌ବାକେ, ନିଜକେ ଅବିଆସ୍ କରାଇ ଆଚଡ଼ ।



୧ ଡେବରପାଇ କିରିସଟର ମୁଲେଅନି ସିକିରଇବା ବିସଇ ତରକେ ତର ନ  
ସିକିକରି ତାର ଟିକିନିକି ବିସଇ ସିକୁ । ଜେନ୍ତିକି ଆମର୍ ବିସବାସ୍ ମିସା ଡାଢ଼ ଅଇସି  
। ତୁଚାଇ କାମମନ୍ ଚାଡ଼ିକରି ପର୍ମେସରଟାନେ ବାଉଡ଼ବା ଜନ୍‌ଟା କି ଆମର୍  
ବିସବାସର୍ ମୁଲ୍ ପାକନା ରଇଲା, ତେଇ ଆରିତରେକ୍ ସେଟାସେ କରବାର ନାଇ  
। ୨ ତୁବନ୍ ବିସଇର ସିକିଆ ଦେବାଟା, ଆଡ଼ ସଙ୍ଗଇକରି ପାର୍ତନା କରବାଟା,  
ମଲା ଲକ୍ମନ୍ ଆରିତରେକ୍ ବଡ଼ବାଟା ଆରି ଲକ୍ମନ୍‌କେ ସବୁଦିନରପାଇ ରଇବା  
ପର୍ମେସରର୍ ନ ସାରବା ବିଚାରନା । ୩ ଏବେ ଆମେ ଆଗକେ ଜିବାକେ ପଡ଼ସି ।  
ମାପୁରୁକେ ଆସାକରି ଆଗର୍ ବିସଇ ସିକୁ ।

୪ କାଲକେବଲଲେ ଜେଡ଼କି ଲକ୍ ତାକର୍ ବିସବାସ୍ ଚାଡ଼ିଆଚଡ଼, ସେମନ୍‌ର  
ମନ୍ ପର୍ମେସରର୍ ଉଜଲ୍‌ସଙ୍ଗ ଉଗାଡ଼ି ଅଇ ଆତେ । ସେ ଦେଇ ରଇବା ସୁଆଦ୍  
ସେମନ୍ ଚାକିଆଚଡ଼ । ଆରି ସୁକଲ୍‌ଆଡ଼ମା ପାଇଆଚଡ଼ । ୫ ପର୍ମେସରର୍ ବାକିଅ  
କେତେକ୍ ନିକ ବଲି ସେମନ୍ ଜାନିଆଚଡ଼ । ଆଇବା ଜୁଗେ ତାର ଜନ୍ ବପୁ ସବୁକେ  
ଦେକାଇ ଅଇସି, ସେଟା ସେମନ୍ ଜାନିଆଚଡ଼ । ୬ ଏଟା ସବୁ ଅଇଲା ପତେ ସେମନ୍  
ତାକର୍ ବିସବାସ୍ ଆରାଇ ଆଚଡ଼ । ସେଟାରପାଇ ସେମନ୍‌କେ ଆରିତରେକ୍ ମନ୍  
ବାଉଡ଼ାଇବାକେ ସଅଜ୍ ନାଇ । କାଲକେବଲଲେ ସେମନ୍ ପର୍ମେସରର୍ ପଅକେ  
ଆରିତରେକ୍ କୁରସେ ମରାଇକରି ଗୁଲାଇ ଲକର୍ ମୁଆଟେ ଇଜଡ଼ ଜିକ୍‌ଲାଇନି ।

୭ ବରସା ପାନି ଜମିଟାନେ ମାରଲେ ସେ ପାନି ଜମି ଜିକିନେଇସି । ସେନ୍ତାରି  
ଜମିକେ ପର୍ମେସର୍ ଆସିରବାଦ୍ କରସି । ସେନ୍ତାରି ଜମିଟାନେ ଲକ୍ମନ୍‌କେ  
ଦରକାର୍ ଅଇବା ଚାସ୍ କରିଅଇସି । ୮ ମାତର୍ ସେ ଜମିଟାନେ ଜଦି କାଟା ଗର୍  
ଅଇସି, ଆରି ଲାଟାବୁଟା ଗାଜା ଅଇସି, ତେବେ ସେଟା କାଇ ଲତାକେ ନ ଲାଗେ  
। ଆରି ସେଟାକେ ପର୍ମେସର୍ ତଣ୍ଟ ଦେଇସି ଆରି ସେଟାମନ୍‌କେ ଜଇଟାନେ  
ପଡ଼ାଇଦେଇସି ।

୯ ଏ ଆଲାଦର୍ ମଇତରମନ୍, ମୁଇ ଏନ୍ତାରି କଇତେରଇଲେ ମିସା ତମେ ସେନ୍ତାରି  
ନୁଆସ୍ ବଲି ମୁଇ ଜାନି । ତମେ ଆଗତୁଅନି ବିସବାସ୍ କଲାସ୍‌ନି ଆରି ତମର୍  
ଚଲାଚଲ୍ତି ନିକ ଆତେ । ଏ ସବୁ ତମେ ମୁକ୍ତି ପାଇରଇବା ଗଟେକ୍ ଚିନ୍ ।  
୧୦ କାଲକେବଲଲେ, ପର୍ମେସର୍ ଅନିଆଇ ନ କରେ । ତମେ କିରିରଇବା ନିକ କାମ୍  
ସେ ନ ପାସରେ । ତାରପାଇ ରଇବା ତମର୍ ଆଲାଦ୍ ମିସା । ସେ ଆଲାଦ୍ ତମର୍  
ବିସବାସି ବାଇବଇନିକେ ସାଇଜ କଲାର୍ ପାଇ ତମେ ଦେକାଇ ଆଗାସ୍ । ୧୧ ମୁଇ  
ଜନ୍‌ଟା ମନ୍ କଲିନି, ସେଟା ଅଇଲାନି ସାରାସାରି ଜାକ ପର୍ମେସର୍ ଜନ୍ କାତା  
ଦେଇଆତେ, ସେଟା ପୁରାପୁରୁନ୍ ଅଇବାଜାକ ତମର୍ ଆସା ନ ଚାଡ଼ା । ୧୨ ସେନ୍ତାରି  
କଲେ ଅଲସ୍ ନଅଇ ବିସବାସ୍ ଆରି ମୁର୍ଚି ରଇବା ଲକ୍ ଅଇସା । ସେନ୍ତାରି ଲକ୍  
ପର୍ମେସର୍ ଜନ୍‌ଟା ଦେବାକେ କାତା ଦେଇଆତେ, ସେମନ୍ ସେଟା ପାଇବାଇ ।

ପର୍ମେସରର୍ ସପଡ଼ ସଡ଼ ଅଇସି

୧୩ ପର୍ମେସର୍ ଅବରାଆମକେ କାତା ଦେଇରଇଲା ବେଲେ, ସେ ପୁରାପୁରୁନ୍  
କରବି ବଲି ସପଡ଼ କରିରଇଲା । ତାରଟାନେ ଅନି ଆରି କେ ମିସା ବଡ଼ ନ ରଇଲାକେ  
ନିଜର୍ ନାଉଁ ଦାରି ସପଡ଼ କଲା । ୧୪ ସେ ଅବରାଆମକେ କଇଲା, “ମୁଇ ତମକେ



ବାଇଦରେ ଆସିବାରୁ କରବି । ଆରି ତର କୁଟୁମ୍ ଜବର୍ କରବି ।” ୧୫ ଅବରାଆମ୍ ତାର କାତା ଦାରି ଜାଗିରଇଲାକେ, ପର୍ମେସର ସପତ୍ କଲାଟା ସେ ମିଲାଇଲା । ୧୬ ଜେଡେବେଲେ ଲକ୍ମନ୍ ପର୍ମାନ୍ ସଇତ୍ କରବାଇ, ସେମନ୍ ବଡ଼ଲକ୍ମନ୍ନର ନାଉଁ ଦାରି ପର୍ମାନ୍ ସଇତ୍ କରବାଇ । ସେନ୍ତାରି କଲେ ସେ ସପତ୍ ଲାଗିରଇବା ସବୁ ଦଦାପେଲାକେ ଚିତାଇସି । ୧୭ ଜନ୍ଲକ୍ମନ୍ ସେ କାତା ଦେଇରଇବାଟା ମିଲାଇବାଇ, ସେମନ୍ ଏ ସବୁ ବିସଇ ଜାନତ୍ ବଲି ସେ ମନ୍ କରିରଇଲା । ତାର ମନ୍ କେବେ ନ ବାଦ୍ଲେ ବଲି ସବୁ ଲକ୍ ଜାନିରଅତ୍ । ସେଟାରପାଇ ସେ ତାର କାତାଦେଇ ରଇବାଟାନ୍ ତାର ସପତ୍ ମିସା ମିସାଇଲା । ପର୍ମେସର ଦେଇରଇବା କାତା ଆରି ତାର ସପତ୍ ସଡ଼ସେ । ୧୮ ଏ ଦୁଇଟା ବିସଇ କେବେ ନ ବାଦ୍ଲେ । କାଇକେବଇଲେ ପର୍ମେସର ମିତ୍ ନ କଏ । ତେବର୍ପାଇ ଆମେ ମୁକ୍ତି ପାଇରଇବା ଲକ୍ମନ୍, ଆମର୍ ମନେ ବେସି ସାଆସ୍ ଦାରିଆତୁ । ଆରି ତାରଟାନ୍ ରଇବା ଆମର୍ ଆସା ଡାଟ୍ ଆଟେ ।

୧୯ ଏ ଆସା ଆମର୍ ବିସ୍ବାସ୍ ଡାଟ୍ କରାଇସି । କାଇକେବଇଲେ ସେଟା ପୁରାପୁରନ୍ ଅଇସିଆକା । ଅମର୍ ଆସାର୍ ଲାଗି ଆମେ ପର୍ମେସରର୍ ଜାଗାଇ ପୁରିଆତୁ । ଏଟା ଜେନ୍ତାରି ବଡ଼ ପୁଜାରି ମନ୍ଦିରର୍ ଅଦିକ୍ ସୁକଲ୍ ଜାଗାଇ ପୁରିସି । ଜନ୍ ଜାଗା କି ପାର୍ଦା ବିତ୍ରେ ଲୁଚିରଇସି । ୨୦ ସେ ଜାଗାଇସେ ଆମର୍ ଜିସୁ ଆଗତୁ ଜାଇଆଟେ । ଆରି ସବୁଦିନର୍ପାଇ ମଲ୍କିସେଦକର୍ ପୁଜାରି ପଦ୍ ପାରା ସେ ବଡ଼ ପୁଜାରି ଅଇଲାଆଟେ ।



### ମଲ୍କିସେଦକ୍ ପୁଜାରି ଅଇବାଟା

୧ ଏ ମଲ୍କିସେଦକ୍ ସାଲେମ୍ ରାଇଜର୍ ରାଜା ରଇଲା । ସେ ସବୁଟାନ୍ନେଅନି ଉପ୍ରେ ରଇବା ପର୍ମେସରର୍ ପୁଜାରି ରଇଲା । ଚାର୍ଟା ରାଜାମନ୍କେ ଜୁଇଦେ ଆରାଇକରି ବାଡ଼ତୁଲାବେଲେ ମଲ୍କିସେଦକ୍ ଅବରାଆମ୍କେ ବେଟ୍ ଅଇବାର୍ ଗାଲା ଆରି ତାକେ ଆସିବାରୁ କଲା । ସେଡ଼କିବେଲେ ଜୁଇଦେ ଜିତିକରି ତେଇର୍ ଜେଡ଼କି କାଇକାଇଟା ନେଇକରି, ନିଜର୍ଟା କରିରଇଲା, ତେଇଅନି ଦସ୍ବାଗେ ଅନି ଗଟେକ୍ବାଗ୍ ଅବରାଆମ୍ ତାକେ ଦେଲା । ୨ ମଲ୍କିସେଦକ୍ ନାଉଁର୍ ଅରଡ୍ ଅଇଲାନ୍, ଦରମସକ୍ ରଇବା ରାଜା । ଆରି ସାନ୍ତ୍ରି ରାଜା ମିସା । କାଇକେବଇଲେ ସାଲେମ୍ ନାଉଁର୍ ଅରଡ୍ ଅଇଲାନ୍ ସାନ୍ତ୍ରି । ୩ ମଲ୍କିସେଦକ୍ ଆୟା ବାବା, ଆନିଦାଦିମନ୍ ବିସଇନେଇ କାଇଟା ଲେକା ଅଏନାଇ । ସେନ୍ତାରିସେ ତାର ଜନମ୍ ମରନ୍ ବିସଇ ମିସା କାଇଟା ନାଇ । ସେଟାର୍ ପାଇ ସେ ପର୍ମେସରର୍ ପଅ ପାରା । ସେ ସବୁଦିନର୍ପାଇ ପୁଜାରି ଅଇରଇସି ।

୪ ମଲ୍କିସେଦକ୍ କେଡେବଡ଼ ଲକ୍ ରଇଲାବଲି ଆମେ ଏତାଇଦେକୁ । ପର୍ତ୍ତମେ ଆମେ ଜିଉଦିମନ୍ ତାକ୍ପୁଟା ପାଇରଇବା ଆନିଦାଦି ଅବରାଆମ୍ ମିସା ଜୁଇଦକରି ତେଇଅନି ମିଲାଇ ଆନିରଇବା କାଇକାଇଟା ଦସ୍ ବାଗେଅନି ଗଟେକ୍ବାଗ୍ ତାକେ ଦେଇରଇଲା । ୫ ମସାର୍ ନିୟମ୍ ଇସାବେ ଜିଉଦିମନ୍କେ ଏନ୍ତାରି ଗଟେକ୍ ନିୟମ୍ ଆଟେ । ଲେବି ବସ୍ତର୍ ଜେଡ଼କି ନାତି ତିତିମନ୍ ପୁଜାରିଅଇବାଇ । ତାକର୍ ସଙ୍ଗେ ରଇବା ଜିଉଦିମନ୍ କାମାଇ ଆନ୍ବା ଚାସେଅନି ଦସ୍ବାଗେଅନି ଗଟେକ୍ ବାଗ୍ ନେବାଇ । ସେମନ୍ ସବୁ ଅବରାଆମର୍ ନାତିତି ଅଇରଇଲେ ମିସା ଏନ୍ତାରି କର୍ତ୍ତେରଇଲା । ୬ ମାତର୍ ମଲ୍କିସେଦକ୍ ଲେବିର୍ ନାତିତି ନ ଅଇରଇଲେ ମିସା, ସେ ଅବରାମର୍ଟାନ୍ନେଅନି ଦସ୍ବାଗେଅନି ବାଗେକ୍ ନେଇଡେରଇଲା । ସେବେଲେ ମଲ୍କିସେଦକ୍ ଅବରାଆମ୍କେ ଆସିବାରୁ କରି

ରଇଲା । ଅବ୍ରାହାମକେସେ ପରମେସରର ସବୁକାତା ଦେଇରଇଲା ।<sup>୭</sup> ଆମେସବୁ ଜାନିଆରୁ, ଜନ୍ ଲକ୍‌କେ ଆସିରବାଦ୍ କରବାକେ ଅଦିକାର୍ ଆଚେ, ସେ ଆସିରବାଦ୍ ପାଇବା ଲକରଟାନେଅନି ବଡ଼ ।<sup>୮</sup> ଲେବିର ଜେଡ଼କି ନାତିତିତିମନ୍, ଦସ୍‌ବାଗେ ଅନି ଗଟେକ୍ ବାଗ୍ ନେଇରଇଲା, ସେମନ୍ ସବୁଲକ୍ ଜାକ ଗଟେକ୍ ଦିନ୍ ମରବାଇ । ମାତର୍ ମଲ୍‌କିସେଦକର୍ ମରନ୍ ବିସଇ ସାସ୍‌ତରେ କନ୍ତି ମିସା ଲେକା ଅଏନାଇ । ତାର୍ ବାଦୁଲେ ତେଇ ଲେକାଅଇଲା ଆଚେ, ତାର୍ ପୁଜାରି ପଦ୍ ନ ବାଦଲିକରି ସବୁ ଦିନର୍ପାଇ ରଇସି ।<sup>୯</sup> ଲେବିର ଜେଡ଼କି ସବୁ ନାତିତିତିମନ୍ ଦସ୍‌ବାଗେ ଅନି ଗଟେକ୍ ବାଗ୍ ନେଇତେ ରଇଲା, ସେମନ୍ ଅବ୍ରାହାମର୍ ସଙ୍ଗ୍ ମିସିକରି ମଲ୍‌କିସେଦକ୍‌କେ ଦସ୍‌ବାଗେଅନି ଗଟେକ୍ ବାଗ୍ ଦେଲାବଲି ଆମେ କଇଅଇସି ।<sup>୧୦</sup> କାଇକେବଇଲେ ଜେଡେବଲ୍ ମଲ୍‌କିସେଦକ୍ ଅବ୍ରାହାମକେ ବେଟ୍ ଅଇଲା, ସେ ଲେବି ଜନମ୍ ନ ଅଇରଇଲା, ମାତର୍ ସେ ଅବ୍ରାହାମର୍ ଗାଗ୍‌ତେ ରଇଲା । କାଇକେବଇଲେ ଅବ୍ରାହାମ୍ ତାର୍ ଆନିଦାଦି ରଇଲା ।

<sup>୧୧</sup> ଲେବିର ନାତିତିତି ପୁଜାରି ଇସାବେ ବାଟ୍‌ଲାରୁପାଇ ପରମେସର ତାର୍ ନିୟମ୍ ଜିଉଦିମନ୍‌କେ ଦେଇରଇଲା । ମାତର୍ ଲେବି ବସ୍‌ର୍ ପୁଜାରିମନ୍ ଜଦି ସିଦ୍‌ଲକ୍ ଅଇରଇତାଇ ଆଲେ, ଆରି ଗଟେକ୍ ପୁଜାରି ଆଇବାକେ ଦରକାର୍ ନ ରଇଲା । ସେନ୍ତାର୍ ଏ ପୁଜାରି ଆରଣ୍ ଜେ କି ଲେବିର ନାତିତିତି ରଇଲା, ତାର୍ ପୁଜାରିପଦ୍ ନ ଦାରି ମଲ୍‌କିସେଦକର ପୁଜାରି ପଦ୍ ଦାରି ଆଇସି ।<sup>୧୨</sup> ଜନ୍ ପୁଜାରି ଲକ୍‌ମନ୍‌ର୍ ବାଦୁଲେ ପରମେସରର୍ ମୁଆଟେ ଟିଆ ଅଇସି, ତାର୍ ପୁଜାରି ପଦ୍ ବାଦଲାଲେ ଜନ୍ ନିୟମ୍ ମାନିଆଇଲାଜିନି, ସେଟାମିସା ବାଦଲ୍‌ବାର୍ ଆଚେ ।<sup>୧୩</sup> ଏ ସବୁ ବିସଇ ବାଦଲିଗାଲା ଆଟେବଲି ଆମେ ଜାନ୍ତୁ । କାଇକେବଇଲେ ଆମର୍ ମାପୁରୁ ଜିସୁ ଜାର୍ ବିସଇନେଇ ଏ ସବୁ କାତା କଇଲୁନି, ସେ ଲେବି ବସ୍‌ର୍ ନାତିତିତି ନ ରଇଲା । ଜିଉଦା ବସ୍‌ସେଅନି ଏବେଜାକ କେ ପୁଜାରି ବାବେ ସେବା କରଡ଼ ନାଇ ।<sup>୧୪</sup> ଜିଉଦା ତାର୍ ଆନିଦାଦି ରଇଲା । ମସା ଦେଇରଇବା କାତାଇ ମିସା ଜିଉଦାର୍ ନାତିତିତିମନ୍ ପୁଜାରି ଅଇବା ବିସଇ କାଇଟା କଏ ନାଇ ।

ମଲ୍‌କିସେଦକର୍ ପାରା ଆରିଗଟେକ୍ ପୁଜାରି

<sup>୧୫</sup> ଇତିଅନି ନିମାନ୍ ଜାନାପଡ଼ଲାନି ଜେ, ଆଗର୍ ରକାମ୍ ପୁଜାରି ଆରି ସେମନ୍ ମାନିଆଇତେରଇବା ନିୟମ୍ ଏବେ ବାଦଲାଲକରି ଗଟେକ୍ ନୁଆ ରକାମ୍ ପୁଜାରି ବାରଇଆଚେ । ସେ ମଲ୍‌କିସେଦକର୍ ପୁଜାରି ପଦ୍ ଦାରି ଆଇବାଟା ।<sup>୧୬</sup> ଆରି ସେ ମୁନୁସ୍‌ମନ୍‌ର୍ ନିୟମ୍ ଆରି ରିତିନିତି ଇସାବେ ପୁଜାରି କରେନାଇ, ମାତର୍ କେବେ ନ ସାର୍‌ବା ଗଟେକ୍ ବପୁର୍ ଜିବନ୍ ଲାଗି କଲାଆଚେ । ମଲ୍‌କିସେଦକର୍ ପାରା ଗଟେକ୍ ବିନ୍ ପୁଜାରି ବାରଇଲା ।<sup>୧୭</sup> କାଇକେବଇଲେ ତାର୍ ବିସଇରେ ସାସ୍‌ତର୍ କଇଲାନି, “ମଲ୍‌କିସେଦକର୍ ପୁଜାରି ପଦ୍‌ପାରା ତୁଇ ପୁଜାରି ଅଇ ଆରୁସ୍ ।”<sup>୧୮</sup> ପୁର୍ନା ନିୟମ୍ ବାଦଲାଲଲା । କାଇକେବଇଲେ, ସେଟା ଲକ୍‌ମନ୍‌କେ ପରମେସରର୍ ଲଗେ ଆନ୍‌ବାକେ ବପୁ ନ ରଇଲା ଆରି ବେକାର୍ ରଇଲା ।<sup>୧୯</sup> କାଇକେବଇଲେ ମସାର୍ ନିୟମ୍ କାଇଟା ମିସା ପୁରାପୁରୁନ୍ ସିଦ୍‌କରି ନାପାରୁଲା । ମାତର୍ ଏବେ ଆମ୍‌କେ ଗଟେକ୍ ବପୁର୍ ଆସା ମିଲ୍‌ଲା ଆଚେ । ଜାର୍‌ଲାଗି ଆମେ ପରମେସରର୍ ଲଗେ ଅଇବାକେ ଆସିପାରୁଲୁନି ।

<sup>୨୦</sup> ଆରି ଆମର୍ ପାଇ ପରମେସରର୍ କାତାଦେଇ ରଇବାଟା ମିସା ଆଚେ । ବିନ୍ ଲକର୍ ନାତିତିତିମନ୍ ପୁଜାରି ପଦେ ରଇଲାବେଲେ ସେ ଏନ୍ତି କାଇମିସା ସପଡ଼ କରି ନ ରଇଲା ।<sup>୨୧</sup> ମାତର୍ କିରିସ୍‌ଟ୍ ପୁଜାରି ଅଇବାବେଲେ ପରମେସର୍ ତାକେ ସପଡ଼ କରି କଇରଇଲା,  
 “ମାପୁରୁ ଗଟେକ୍ ସପଡ଼ କଲା ଆଚେ

ତୁଇ ସବୁଦିନରପାଇ ପୁଜାରି ଅଇରଇସୁ ।  
କଇଲା ଏ କାତା କେବେ ନ ବାଦଲାଏ ।

ତମେ କାଲକାଲ୍ ଜୁଗ୍ ଜୁଗର୍ ପାଇ ପୁଜାରି ଅଇସା ।”

୨୭ କାଇକେବଇଲେ ପରମେସର୍ ଜନ୍ ସପତ୍ ତାକେ ଦେଇରଇଲା, ତାର୍ ନୁଆ ରାଜିନାମା ପୁରାପୁରୁନ୍ ଅଇସିଆକା ବଲି ଜିସୁ ଡାଁର୍ ସଙ୍ଗ୍ କଇଲାନି ।

୨୮ ଜିସୁର୍ ପୁଜାରି ପଦ୍ ଆରି ଲେବି ବଝର୍ କେତେକ୍ କେତେକ୍ ପୁଜାରି ପଦ୍ ଦାରିରଇବା ବେସି ପୁଜାରିମନର୍ ବିତ୍ତରେ ଏନ୍ତାରି ବିନ୍ ରଇଲା । ସେମନ୍ ସବୁ ତାକର୍ ପୁଜାରିପଦ୍ କରିଲାଗି ରଅତ୍ ନାଇ । କାଇକେବଇଲେ ସେମନ୍ ସବୁଲକ୍ ମରିଗାଲାଇ ।

୨୯ ମାତର୍ ଜିସୁ କେବେ ନ ମରେ । ଆରି ପୁଜାରି ଇସାବେ ରଇବା ତାର୍ କାମ୍ ଆରି କାକେ ମିସା ଦିଆ ନ ଅଏ । ୩୦ ସେଟାର୍ ପାଇ ଜନ୍ ଲକ୍ମନ୍ ତାକେ ବିସ୍ବାସ୍ କରି ଲଗେ ଆଇବାଇ, ସେମନ୍କେ ସବୁବେଲ୍ପାଇ ରକିଆ କରିପାର୍ସି । କାଇକେ ବଇଲେ ସେମନ୍ ପାଇ ପରମେସର୍ ମୁଆଟେ ଗୁଆରି କର୍ବାକେ ସେ ଜୁଗ୍ ଜୁଗର୍ ପାଇ ଜିବନ୍ ଅଇକରି ଆଟେ ।

୩୧ ତେବର୍ପାଇ ଜିସୁ ଅଇଲାନି ଆମର୍ ବଡ୍ ପୁଜାରି । ସେ ଆମର୍ପାଇ ସମାନ୍ ଆଟେ । କାଇକେବଇଲେ ସେ ସୁକଲ୍, ତାର୍ଟାନେ କାଇ ବୁଲ୍, କି ପାପ୍ ନାଇ । ଆମର୍ ପାପିମନର୍ଟାନେଅନି ସେ ପୁରାପୁରୁନ୍ ବିନ୍ଆଟେ । ଆରି ପରମେସର୍ ତାକେ ସରଗ୍ ଜେଡ୍କି ଜାଇ ଉଟାଇଆଟେ । ୩୨ ବିନ୍ ବଡ୍ ପୁଜାରି ମନ୍ ସବୁଦିନ୍ ପରମେସର୍ଟାନେ ଦିନ୍କେ ବଲି ଦେବାର୍ ଆଟେ । ତାର୍ପଟେ ସେମନ୍ ଲକ୍ମନର୍ ପାପର୍ପାଇ ମିସା ବଲି ଦେବାର୍ ଆଟେ । ମାତର୍ ଜିସୁ ଏନ୍ତାରି ନାଇ । ସେ ସବୁଲକ୍ ପାଇ ମିସତେ ଗଟେକ୍ତର୍ସେ ବଲି ଅଇଲା ଆଟେ । ତାର୍ ସେ ମରନ୍ ସବୁଦିନର୍ପାଇ ଅଇସି । ୩୩ କାଇକେବଇଲେ ମସାର୍ ନିୟମ୍ ଇସାବେ, ଜନ୍ଲକ୍ ବଡ୍ ପୁଜାରି ପଦ୍ପାଇରଇସି, ସେମନ୍କେ ମିସା ପାପ୍ ରଇସି । ମାତର୍ ଜନ୍ଟା ପରମେସର୍ ଗଟେକ୍ ସପତ୍ କରି କାତା ଦେଇରଇଲା, ସେଟା ନିୟମ୍ ପଟେ ଆଇଲା । ଜନ୍ ଲକ୍ ବାଚାଇଅଇରଇଲା, ତାର୍ ପଅ ରଇଲା । ସେ ସବୁଦିନର୍ପାଇ କାଇ ପାପ୍ ନ ରଇବା ପୁଜାରି ଅଇଆଟେ ।

## ୮

ଜିସୁ ଆମର୍ ବଡ୍ପୁଜାରି

୧ ଏ ସବୁ କାତାଇଅନି ତମ୍କେ ବୁଜତ୍ ବଲି ମୁଇ ମନ୍ କଲିନି ଜେ, ଏ ଆମର୍ ବଡ୍ ପୁଜାରି ସରଗର୍ ସବୁର୍ ଉପରେ ପରମେସର୍ ଉଜାବାଟେ ବସ୍ଲା ଆଟେ । ୨ ଆରି ପରମେସର୍ ଅଦିକ୍ ସୁକଲ୍ ଜାଗାଇ ସେ ବଡ୍ ପୁଜାରି ଇସାବେ ସେବା କଲାନି । ସେ ତୁମ୍କୁଡିଆ ଲକ୍ମନ୍ ତିଆରକଲାଟା ନଏଁ, ମାତର୍ ସେଟା ମାପୁର୍ ତିଆର୍ କଲାଆଟେ ।

୩ ସବୁ ବଡ୍ପୁଜାରିମନ୍ ଲକ୍ମନ୍ ଦେଇରଇବା ପସୁମନ୍ ଆରି ବିନ୍ ରକାମର୍ ବଲି ପରମେସର୍କେ ସର୍ପି ଦେବାକେ ବାବ୍ଲାଇ ଆଟତ୍ । ତେବର୍ପାଇ ଆମର୍ ବଡ୍ ପୁଜାରି ମିସା କାଇଟା ମିସା ପରମେସର୍କେ ସର୍ପାଇବାର୍ ଆଟେ । ୪ ମାତର୍ ଏ ଜଗତେ ସେବା କରେନାଇ । ସେ ଜଦି ଏ ଜଗତେ ରଇତା, ତେବେ ସେ ଗଟେକ୍ ପୁଜାରି ନ ଅଇତା । କାଇକେ ବଇଲେ ଜିଉଦିମନର୍ ନିୟମ୍ ଇସାବେ ଦାନ୍ ସର୍ପିଦେବାକେ ପୁଜାରିମନ୍ ରଇଲାଇ । ୫ ମାତର୍ ତାକର୍ ସେବା କର୍ବା ଜାଗା ସର୍ଗେ ରଇବା ସତ୍ ବିସଇ ଅବ୍କା ଗଟେକ୍ ଚାଇପାରା । ସମାନ୍ ସେନ୍ତାରିସେ ମସାର୍ ବେଲେ ଅଇଲା । ସେ ଜେତେବଲ୍ ଗଟେକ୍ ତୁମ୍କୁଡିଆ ତିଆର୍ କର୍ବାକେ ଜାଇତେରଇଲା, ପରମେସର୍ ତାକେ ତିଆର୍ଲା, “ଜାଗ୍‌ରଡ୍ ! ତୁଇ ସୁକଲ୍

ତୁମ୍ଭକୁ ଡିଆଁଇ ଜେଡ଼କି କରୁଥିବଲେ, ମୁଁ ତକେ ସେଟା ପରଫେତେ ଦେକାଇଲା  
 ରକାମ୍ କରବାର ଆତେ ।”<sup>୭</sup> ଏ ଜଗତର ପୁଜାରିମନର କାମ୍‌ତେଇଅନି ଜନ୍ କାମ୍  
 ପରଫେସର ଜିସୁକେ ସରପିଦେଲା, ସେ କାମ୍ ଅଦିକ୍ ଗୁରୁତୁ ରଇବାଟା । ସେନ୍ତାରିସେ  
 ଜନ୍ ନୁଆ ରାଜିନାମାସଙ୍ଗ୍ ସେ ପରଫେସର ଆରି ମନୁସଜାତିକେ ଆରିତରେକ୍  
 ମିସାଇଲା, ସେଟା ପୁରନା ରାଜିନାମାତେଇ ଅନି ନିକ । କାଇକେବଇଲେ, ନୁଆ  
 ରାଜିନାମାତେଇ ରଇବା ପରଫେସରର ସପତ୍ ସବୁ ବେସି ନିକ ଆତେ ।

<sup>୮</sup> ପରତୁମର ରାଜିନାମାତେଇ ଜଦି କାଇ ବୁଲ୍ ନ ରଇତା, ତେବେ ପରଫେସର  
 ସେଟା ନ ବାଦ୍‌ଲାଇତା । ଫାତର ସେ ରାଜିନାମା ମାନିକରି ରଇଲା ଲକ୍‌ମନର  
 ଚଲାଚଲ୍‌ତି ସଙ୍ଗ୍ ପରଫେସର ସାରଦା ନ ରଇଲା । କାଇକେବଇଲେ ସାସ୍‌ତରର  
 ମାପୁରୁ ବାକିଅଟାନେ ଲେକା ଅଇଲାଆତେ,

“ଆଗ୍‌କେ ଗଟେକ୍ ବେଲା ଆଇଲାନି

ଜେତେବେଲ୍ କି ଇସ୍ରାଏଲର ଲକ୍‌ମନକେ ଆରି ଜିଉଦାର ଲକ୍‌ମନକେ ମର୍  
 ନିଜର କରବାକେ ମୁଇ ଗଟେକ୍ ନୁଆ ରାଜିନାମା ଟିକ୍ କରବି ।”

<sup>୯</sup> ଏ ନୁଆ ରାଜିନାମା ଆଗର ରାଜିନାମା ପାରା ନ ରଏ । ସେ ରାଜିନାମା  
 ତାକର ଆନିଦାଦିମନକେ ମିସରଦେସେଅନି ତାକି ଆନୁଲାବେଲେ ମୁଇ କରଇଲି  
 । ଆଗର ରାଜିନାମାର ମର୍ ଆଦେସ୍ ସବୁ ସେମନ୍ ମାନଡନାଇ । ତେବର୍‌ପାଇ ମୁଇ  
 ଆରି ସେମନ୍‌ରବାଟେ ନ ଦେକି ।

<sup>୧୦</sup> ମାପୁରୁ ଆରିତରେକ୍ କଇଲା, ଇସ୍ରାଏଲର ଲକ୍‌ମନକେ ମର୍ ନିଜର  
 କରବାକେ ମୁଇ ଜନ୍ ନୁଆ ରାଜିନାମା ତିଆରକରବି ସେଟା ଏନ୍ତାରି ରଇସି । ମୁଇ  
 ମର୍ ଆଦେସ୍ ତାକର ଚିନ୍ତା କଲାଟାନେ ଦେବି ଆରି ତାକର ମନ୍ ବିତ୍‌ରେ ଲେକ୍‌ବି ।  
 ଆରି ମୁଇ ତାକର ପରଫେସର ଅଇରଇବି ଆରି ସେମନ୍ ମର୍ ନିଜର ଅଇରଇବାଇ  
 ।

<sup>୧୧</sup> ଏଟାରୁଲାଗି କେ ମିସା ମର୍ ବିସଇରେ ତାର୍ ସଙ୍ଗର୍ ଲକ୍‌ମନକେ ସିକାଇବାକେ  
 ନ ପଡେ । ଆରି ମୁଇ କେ ବଲି କେ ମିସା ତାକର ବାଇମନକେ ବାତାଇବାକେ ନ  
 ପଡେ । କାଇକେବଇଲେ, ସେବେଲେ ଗୁଲାଇ ଲକ୍ ବଡ୍ ଅଅଡ୍ କି ସାନ୍ ଅଅଡ୍ ମୁଇ  
 କେ ବଲି ଜାନ୍‌ବାଇ ।

<sup>୧୨</sup> ମୁଇ ସେମନ୍‌ର ସବୁ ପାପ୍ କେମା କରବି ଆରି  
 ସେମନ୍ କାଇ ଅନିଆଇ କଲାଟା ମିସା ମନେ ନ ଏତାଇ ।

<sup>୧୩</sup> ଏବେ ଗଟେକ୍ ନୁଆ ରାଜିନାମା ଆତେ ବଲି ପରଫେସର କଇଲାକେ ପୁରନା  
 ରାଜିନାମାକେ କାଇ ମୁଲିଅ ନାଇ ବଲି ଆମେ ଜାନୁ । ଜନ୍‌ଟା ପୁରନା ଅଇଗାଲା ଆରି  
 କାଇଟା ପାଇ ମିସା ଲଡାକେ ନ ଆଇଲେ, ସେଟା ବାଇରେ ପିଙ୍ଗିଦେବାଇ ।



ସରଗ୍ ଆରି ମର୍‌ପୁରର ପାର୍‌ତନା

<sup>୧</sup> ପରଫେସରର ପର୍‌ତୁମ୍ ରାଜିନାମାତେଇ, ତାକେ କେନ୍ତାରି ଉପାସନା କରବାର୍  
 ଆତେ ବଲି ନିୟମ୍ ରଇଲା । ତାକେ ଏ ଜଗତେ ଉପାସନା କରବାକେ ଗଟେକ୍ ତୁମ୍  
 ଉଟାଇରଇଲା ।<sup>୨</sup> ଏ ତୁମ୍‌ଟାନେ ଦୁଇଟା ଜାଗା ରଇଲା । ପର୍‌ତୁମ୍ ଜାଗାକେ ସୁକଲ୍  
 ଜାଗା ବଲି ନାଉଁ ରଇଲା । ସେ ବିତ୍‌ରେ ବଡିସଙ୍ଗଇବା କୁଦରା ଆରି ପରଫେସରକେ  
 ସରପିଦେବାକେ ରୁଟି ସଙ୍ଗଇବା ଗଟେକ୍ ଟେବୁଲ୍ ରଇଲା ।<sup>୩</sup> ସେ ଜାଗାଇ ପୁରବା  
 ବାଟେ ଗଟେକ୍ ପାର୍‌ଦା ରଇଲା । ପାର୍‌ଦାର୍ ପିଡବାଟେ ଜନ୍ ଜାଗା ରଇଲା, ତାକେ  
 ବଡ୍ ସୁକଲ୍ ଜାଗା ବଲି କଇତେ ରଇଲାଇ ।<sup>୪</sup> ସେ ବଡ୍ ସୁକଲ୍ ଜାଗାଇ ଗଟେକ୍  
 ଦୁପ୍ ପଡାଇବା ସୁନାର ବେଦି ଆରି ସୁନାର ନିୟମ୍ ପେଡି ରଇଲା । ଏ ନିୟମ୍  
 ପେଡି ବିତ୍‌ରେ, ମାନା ରଇବା ଗଟେକ୍ ସୁନାର ଆଣ୍ଡି ରଇଲା । ତେଇ ପତର୍

କର୍ମ ରକ୍ଷା ଆରଣ୍ୟ ଦାରି ଇଣ୍ଡ୍ରା ତାଙ୍ଗ ରକ୍ଷା । ଆରି ପରମେସର ଆଦେସ୍  
ଲେକାଅଇରକ୍ଷା ଦୁଇ କଣ୍ଠ ଚାତଡା ପାକ୍ନା ମିସା ରକ୍ଷା । \* ପେଡିର୍ ତାବ୍ନା  
ଉପରେ ପରମେସର ଆଚେ ବଲି ଚିନ୍ ଇସାବେ କେରୁବିନ୍ ବଲି ତାକ୍‌ବା ଦୁଇଟା  
ତେନା ରକ୍ଷା ଜିହ୍‌ର ମୁରୁତି ରକ୍ଷା । ତାକ୍‌ର ଉଗାଡିଅଇରକ୍ଷା ତେନା ପେଡିର୍  
ତାବ୍ନା ଉପରେ ତାବିଅଇଜାଉରକ୍ଷା । ତାର ଉପରେ ବନି ଚିଡିଅଇରକ୍ଷା ।  
ଜେନ୍ତାରିକି ଲକ୍‌ମନର୍ ପାପ୍‌କେମା ଅଇଜିବାକେ । ମାତର୍ ଏ ଚିକିନିକି ବିସଇ  
ବୁଜାଇବାକେ ଲିଡାନାଇ ।

୨ ତୁମ୍ ବିତ୍‌ରେ ଏ ସବୁ ବିସଇ ସାଜାଡିଅଇରକ୍ଷା । ପୁଜାରିମନ୍ ସବୁଦିନ୍  
ତାମ୍ ଗରର୍ ବାଇରର୍ ଜାଗାଇ ପୁରି, ସେମନର୍ କାମ୍ କର୍‌ବାଇ । ୩ ମାତର୍  
ବିତ୍‌ରର୍ ଜାଗାଇ ବଡ୍ ପୁଜାରିସେ ଜିବାକେ ଅଦିକାର ରକ୍ଷା । ସେ ସିତି  
ବର୍‌ସେକ୍‌କେ ତରେକ୍ ସେ ଜାଇତେରକ୍ଷା । ସେ ନିଜର୍ ପାଇ ଆରି ଲକ୍‌ମନ୍  
ନ ଜାନିକରି କରିରକ୍ଷା ପାପ୍ ପାଇ ବନି ନେଇକରି ଜଦି ନ ପୁରଲେ ସେ  
ଜାଇନାପାରତେ ରକ୍ଷା । ୪ ଏ ସବୁ ବିସଇରଲାଗି ସୁକଲ୍ ଆଡ଼ମା ଜାନାଇଲାନି  
ଜେ, ପରମେସର ଅଦିକ୍ ସୁକଲ୍ ଜାଗାଇ ପୁରବାକେ ଲକ୍‌ମନ୍‌କେ ଅଦିକାର ନ  
ରକ୍ଷା । କାଇକେବଇଲେ ସୁକଲ୍ ଜାଗା ଆରି ଅଦିକ୍ ସୁକଲ୍ ଜାଗା ବିସଇନେଇ  
ରକ୍ଷା ଆଗତୁର୍ ଆଦେସ୍ ସବୁ ଲକ୍‌ମନ୍ ମାନିଆଇତେ ରକ୍ଷା । ୫ ସେ ସବୁ  
ବିସଇ ଗଟେକ୍ ବାନା ପାରା । ଜନ୍‌ଟା ସବୁ ଏବର୍ ଦିନେ ସିଦ୍ ଅଇଲା ଆଚେ ।  
କାଇକେବଇଲେ ଜନ୍ ପସୁମନ୍‌କେ ଉପାସନା ଇସାବେ ଲକ୍‌ମନ୍ ପରମେସରକେ  
ସର୍ପି ଦେଇତେ ରକ୍ଷା, ସେଟା ସବୁ ଲକ୍‌ମନର୍ ବିବେକ୍ ଦଇ ନାପାରଲା ।  
୬ କାଇକେବଇଲେ ସେଟା ସବୁ ଗାଗଡର୍ ଲାଗି ରକ୍ଷା ନିୟମ୍ ରକ୍ଷା । ଜେନ୍ତାରି  
କି, କାଇଟା କାଇଅଇସି, କାଇଟା ପିଇ ଅଇସି ଆରି ସେ ସବୁ ନିକ ସଙ୍ଗ୍ ଦଇବା  
ବିସଇ, ବାଇରେ ଦେକାଅଇବା ରିଡିନିତି ସେ । ପରମେସରର୍ ନୁଆ ନିୟମ୍ ଚିକ୍  
ଅଇବାଜାକ, ଏ ସବୁ କର୍‌ବାଟା ରକ୍ଷା ।

୭ ମାତର୍ ଆମେ ଜେଡକିଲକ୍ ସବୁରତେଇଅନି ବଡିଆ ବିସଇ ପାଇଆରୁ,  
କିରିସଟ୍ ଆମର୍ ବଡ୍ ପୁଜାରି ଅଇ ଆଇଲା ଆଚେ । ସେ ସେବା କର୍‌ବା ଜାଗାର୍  
ତୁମ୍ ଲଗେ ରକ୍ଷା ଅଦିକ୍ ସୁକଲ୍ ଜାଗାଇଅନି ଅଦିକ୍ ମୁଲିଅ ରକ୍ଷାଟା ଆରି  
ଅଦିକ୍ ସିଦ୍ ଆଚେ । କାଇକେବଇଲେ ସେଟା ଲକ୍‌ମନ୍ ତିଆର୍ କଲାଟା ନଏଁ, କି ଏ  
ନସିଜିବା ଜଗତର୍‌ଟା ମିସା ନଏଁ । ୮ କିରିସଟ୍ ସେ ତାମ୍ ବାଟେଜାଇ ଏକାତରେକ୍  
ସେ ବଡ୍ ସୁକଲ୍ ଜାଗାଇ ପୁରଲା । ସେ ତେଇ ପୁରବା ବେଲେ ବଲି କର୍‌ବାକେ  
ଚେଲି କି ପସୁ ବନି ନେଇ ନ ଜାଇରକ୍ଷା । ମାତର୍ ସେ ନିଜର୍ ବନି ନେଇକରି  
ଜନ୍ ଜନ୍‌ଟା କର୍‌ବାର୍ ରକ୍ଷା, ସେଟା ପୁରାପୁରନ୍ କଲା । ଜେନ୍ତାରି କି ଆମ୍‌କେ  
ମୁକ୍‌ଲାକକରି କାଲ୍ କାଲ୍ ଜୁଗଜୁଗର୍ ପାଇ ମୁକ୍ତି ଦେଲା । ୯ ଆଗର୍ କାଲେ  
ଚେଲି ଆରି ବଲଦ୍‌ମନର୍ ବନି ଆରି ପଡାଇଲା ବାଟିପିଲାର୍ ଚାର୍ ଚିବ୍‌ବାଟା, ଏସବୁ  
ଅସୁକଲ୍ ଅଇରକ୍ଷା ଲକ୍‌ମନର୍ ଗାଗଡ୍ ଦଇବା କାମ୍‌କେସେ ଆଇଲା । ୧୦ ଏଟା  
ଜଦି ଲକ୍‌ମନର୍ ଗାଗଡ୍ ଦଇପାରଲା, ସେନ୍ତାଆଲେ କିରିସଟ୍ ବନିସଙ୍ଗ୍ ଆରି  
କେତେକ୍ ଅଦିକ୍ କରିଅଇସି ? ନ ସାର୍‌ବା ଆଡ଼ମାର୍‌ପାଇ ସେ ନିଜେ ପରମେସରର୍  
ସାଇଜ ନେଇ, କାଇ ପାପ୍‌ଦସ୍ ନ ଅଇତେ ବିରୁ ଇସାବେ ନିଜକେ ପୁରାପୁରନ୍ ସର୍ପି  
ଦେଲାଆଚେ । ତାର ବନିରଲାଗି ବାନିଆ ରିଡିନିତି କାମେଅନି ଜିତି କରି ଆମର୍  
ବିବେକ୍ ସୁକଲ୍ ଅଇସି । ଆରି ଆମେ ସତଇସେ ଜିବନ୍ ରକ୍ଷା ପରମେସରର୍ ସେବା  
କର୍‌ବା ଅଦିକାର୍ ପାଇଆରୁ ।

୧୧ ଏଟାପାଇ କିରିସଟ୍‌ସେ ନୁଆ ନିୟମ୍ ସାଦନ୍ କଲାଆଚେ । ଜେନ୍ତାରି କି,  
ଜେଡକି ଲକ୍‌ମନ୍‌କେ ପରମେସର୍ ଡାକିଆଚେ, ସେମନ୍ ପରମେସର୍ ସପଡ୍ କରି

କରଇବା ନ ସାର୍ବ ଆସିବାଦ ପାଇବା । କିରିସ୍ତ ମଲାଦ୍‌ପାଇ ଆଗର ରାଜିନାମାତେଇ କରିରଇବା ସବୁ ପାପେଅନି ସେମନ୍ ମୁକଲ୍‌ଲା ।

୧୭ ଗଟେକ୍ ଲକ୍ ଜଦି ତାର ଦନ୍ ସପତି ବାଗ୍ ବାଟା କରବା ବିସଇର୍ ଚିତି କରିରଇସି । ସେଟା ଜାନାଇବାକେ ସେ ଲକ୍ ନାଉଁଦାରି ରାଜିନାମା ପାଆଟା ପତର୍ ରଇବାର୍ ଆଟେ । ସେ ମରିଗାଲାପତେ ତାରୁଟା ଜାନାପତ୍‌ବାର୍ ଆଟେ । ୧୭ କାଇକେ ବଇଲେ ବାଗ୍‌ବାଟା ଲେକିରଇଲା ଲକ୍ ବଟି ରଇଲା ଜାକ, ବାଗ୍‌ବାଟାର୍ କାଗଜ୍ ପତରର୍ କିଚି ମୁଲିଅ ନାଇ । ସେଟା ତାର୍ ମରିଗାଲା ପତେ ସେ କାମ୍ ଦେଇସି । ୧୮ ସେନ୍ତାରିସେ, ପର୍ତୁମ୍ ରାଜିନାମା ମିସା ବନି ଜରାଇଲାକେସେ ସେଟାର୍ ମୁଲିଅ ରଇଲା । ୧୯ ମସା ପର୍ତୁମ୍ ନିୟମର୍ ଆଦେସ୍ ଲକ୍‌ମନର୍ ଲଗେ କଇଲା । ତାର୍‌ପତେ ସେ ବଲଦ୍ ଆରି ତେଲିମନର୍ ବନି ନେଇ ପାନି ସଙ୍ଗ୍ ମିସାଇଲା । ତାର୍‌ପତେ ଅଲପ୍ ମେଣ୍ଡାର୍ ବାଲେ ଏସୁର୍ ନାଉଁର୍ ଗଟର୍ କେନ୍ଦେଇ ଗୁଡାଇଲା । ପତେ ସେଟା ବନିଟାନେ ବୁଡାଇ ନିୟମର୍ ବଇତେଇ ଆରି ଲକ୍‌ମନର୍ ଉପ୍ରେ ଚିର୍ଲା । ୨୦ ସେ କଇଲା, ଜନ୍ ନିୟମ୍ ମାନବାକେ ପରମେସର୍ ତମ୍‌କେ ଆଦେସ୍ ଦେଲାଆଟେ, ଏ ବନି ସେ ନିୟମ୍‌କେ ଚିନ୍ ମାରିଆଟେ । ୨୧ ତାର୍‌ପତେ ମସା ସେ ବନିନେଇ ତମ୍, ମନ୍ଦିର୍ ଆରି ପର୍ମେସର୍‌କେ ପାର୍ତନା କରବାବେଲେ କାମେ ଆଇବା ସବୁ ଜିନିସ୍ ପତର୍ ଉପ୍ରେ ଚିର୍ଲା । ୨୨ କାଇକେବଇଲେ ମସାର୍ ନିୟମ୍ ଇସାବେ ସବୁ ବିସଇ ସୁକଲ୍ କରବାକେ, ବନି ଦରକାର୍ । ବନି ନ ଜରାଇଲେ ପାପ୍ କେମା ନ ଅଏ ।

କିରିସ୍ତ ବଲିଦାନ୍ ଅଇଲାଟା ପାପ୍ ଦୁର୍ କରସି

୨୩ ତେବର୍‌ପାଇ ଏ ସବୁ ବିସଇ ଜନଟା ସରଗେ ରଇବା ବିସଇ ଚୁଚାଇସେ ଆଟେ । ଏଟା ସବୁ ପସୁମନର୍ ବନିସଙ୍ଗ୍ ସୁକଲ୍ କରାଇବାକେ ଦରକାର୍ ରଇଲା । ମାତର୍ ସରଗର୍ ବିସଇମନ୍କେ ସୁକଲ୍ କରବାକେ ସର୍ପି ଅଇବାଟା ଅଦିକ୍ ନିକ୍ ଅଇରଇବାର୍ ରଇଲା । ୨୪ କାଇକେବଇଲେ ଲକ୍‌ମନର୍ ଆତେ ତିଆର୍ ଅଇଲା ସୁକଲ୍ ଜାଗାଇ କିରିସ୍ତ ଜାଏନାଇ । ସେଟା ସଡ୍ ଜାଗାର୍ ଚାୟାସେ ରଇଲା । ମାତର୍ ସେ ସଡ୍‌ରେ ସରଗେ ଗାଲା । ଆରି ସେ ଏବେ ତେଇ ଆଟେ । ପର୍ମେସର୍‌ର୍ ମୁଆଟେ ଆମର୍ ପାଇ ଗୁଆରି କଲାନି । ୨୫ ଜିଉଦିମନର୍ ବଡ୍ ପୁଜାରି ଜେନ୍ତିକି ବରସକେ ତରେକ୍ ପସୁର୍ ବନି ନେଇ ବଡ୍ ସୁକଲ୍ ଜାଗାଇ ଜାଇସି, ସେନ୍ତାରି କିରିସ୍ତ ନିଜ୍‌କେ ତରକେ ତର୍ ସର୍ପିଅଇକରି ତେଇ ଜାଏନାଇ । ୨୬ କାଇକେବଇଲେ, ସେ ଜଦି ସେନ୍ତାରି କରତା ଏ ଜଗଡ୍ ତିଆର୍ ଅଇଲା ଦିନେଅନି ସେ ବେସି ତର୍ ଦୁକ୍‌ପାଇବାକେ ଅଇତା । ମାତର୍ ସେ ଏ ସାରାସାରି ଦିନ୍ ମନ୍କେ ତରେକ୍‌ସେ ଏ ଜଗତେ ଆଇଲା ଆରି ନିଜ୍‌କେ ସର୍ପିଦେଇକରି ସବୁ ପାପ୍ ଦାରିଗାଲା । ୨୭ ଆମେ ସବୁ ଲକ୍ ତରେକ୍ ମର୍ବୁ ଆରି ତାର୍‌ପତେ ପରମେସର୍‌ର୍ ମୁଆଟେ ବିଚାର୍ ଦିନେ ତିଆଅଇବୁ । ୨୮ ସେନ୍ତାରିସେ କିରିସ୍ତ ମିସା ସବୁ ଲକ୍‌ର୍ ପାପ୍ ନିଜେ ନେବାକେ ବଲି ଇସାବେ ତରେକ୍ ସେ ସର୍ପାଇ ଅଇଲା । ସେ ଆରି ତରେକ୍ ଆଇଲାବେଲେ, ଆମର୍ ପାପର୍‌ପାଇ ସେ ନ ଆସେ । ମାତର୍ ତାକେ ଜାଗି ରଇଲା ଲକ୍‌ମନ୍କେ ଉଦାର୍ କରବାକେ ଆଇସି ।

୧୦

୧ ମସାର୍ ନିୟମ୍ ଅବକା ଗଟେକ୍ ବାନା ପାରା ରଇଲା । ଜନ୍ ନିକ୍ ଆସିବାଦ୍ କିରିସ୍ତ ଆମକେ ଦେଇସି, ସେ ଆସିବାଦର୍ ଗୁନ୍‌ଚଲନ୍ ତେଇ ତିସ୍‌ତେରଇଲା । ମାତର୍ ସେଟା ଆସିବାଦର୍ ସମାନ୍ ନଏ । ତେବର୍‌ପାଇ ନିୟମ୍ ମାଙ୍ଗ୍‌ଲା ଇସାବେ, ସେମନ୍ ସବୁ ବର୍‌ସେ ବଲି ସର୍ପାଇ ଅଇତେରଇଲା । ମାତର୍ ସେ ସବୁ ବଲି ସରପାଟା ପର୍ମେସର୍‌ଟାନେ ଆଇବା ଲକ୍‌ମନ୍କେ ସିଦ୍ କରିନାପାର୍‌ଲା

। ୨ ସେନ୍ତାରି ଜନ୍ ଲକ୍ଷ୍ମୀନ୍ ପରମେସ୍ୱରକେ ଉପାସନା କରତେରଇଲାଇ, ଜଦି ସେମନ୍ ତାକର୍ ପାପେ ଅନି ସୁକଲ୍ ଅଇତାଇ, ତେବେ ସେମନ୍‌କେ ତାକର୍ ପାପ୍ ଦସି ନ କରାଇତା । ଆରି ସବୁ ବଲିଦେବାଟା ସାରିଜାଇତା । ୩ ମାତର୍ ସବୁ ବରସେ ସେ ସମାନ୍ ବେଲାଇ ବଲି ସର୍ପିଦେବାଟା କର୍ବାକେ ପଢ଼ଲା । ସେମନ୍‌ର୍ ପାପ୍ ରଇଗାଲା ଆତେ ବଲି ସେମନ୍ ତେଇଅନି ଜାନ୍‌ଲାଇ । ୪ କାଇକେବଇଲେ ବଲଦ୍‌ମନ୍‌ର୍ ଆରି ତେଲିମନ୍‌ର୍ ବନି କେବେ ମିସା ଆମର୍ ପାପ୍ ଦାରି ନ ନେଏ ।

\* ଆମେ ଜାନିଆରୁ ଜେ, କିରିସ୍‌ଟ ଏ ଜଗତେ ରଇଲାବେଲେ ସେ ତାର୍ ବାବା ପରମେସ୍ୱରକେ କଇ ରଇଲା,

ବଲି ଆରି ସର୍ପିଦେବାଟା ତୁଇ ମନ୍ କରୁସ୍ ନାଇ ।

ସେଟାପାଇ ତୁଇ ମର୍ପାଇ ଗଟେକ୍ ଗାଗଡ଼ ତିଆର୍ କଲୁସ୍ ।

୨ ବେଦିଟାନେ ପଡ଼ାଇବା ପସୁମନ୍‌କେ

ତୁଇ ମନ୍ କରୁସ୍ ନାଇ ।

କି ପାପ୍ ଦଇନେବା ବଲି ମିସା ନାଇ ।

୩ ତାର୍‌ପଟେ ମୁଇ କଇଲି, ଏ ପରମେସ୍ୱର,

ମର୍ ବିସଇ ନିୟମ୍ ବଇଟାନେ

ଜେନ୍ତି ଲେକାଅଇଆତେ,

ସେ ଇସାବେ ତୁଇ ମନ୍ କଲାଟା

ପୁରାପୁରୁନ୍ କର୍ବାକେ ରାଜିଆଟି ।

୮ ସେ ପର୍ତୁମ୍ କଇଲା, ତମେ ସର୍ପି ଦେବାଟା, କି ବେଦିଟାନେ ପଡ଼ାଇବାଟା, କି ପାପ୍ ଦାରିନେବା ପସୁମନ୍‌ର୍ ବନି ମନ୍ କରୁସ୍ ନାଇ । ଏ ସବୁ ବଲି ନିୟମ୍ ଇସାବେ ସର୍ପିଦେବାଟା ଅଇରଇଲେ ମିସା, ସେ ଏନ୍ତାରି କଇଲା । ୯ ତାର୍ ପଟେ ସେ ଆରିତରେକ୍ କଇଲା, ତୁଇ ଜାଇଟା ମନ୍ କଲୁସ୍‌ନି ସେଟା ସିଦ୍ କର୍ବାକେ ଏ ପରମେସ୍ୱର, ମୁଇ ଇତି ଆଟି । ସେନ୍ତାରି ଆଗର୍‌ପାରା ବଲିଦେବାଟା ପରମେସ୍ୱର ମନାକରି, ତାର୍ ବାତୁଲେ କିରିସ୍‌ଟର୍ ବଲି ଟିକ୍ କଲା । ୧୦ କିରିସ୍‌ଟ ପରମେସ୍ୱରର୍ ମନ୍ କର୍ବାଟା ସାଦନ୍ କଲା । ସେ ତାର୍ ଗାଗଡ଼ ସର୍ପିଦେଇକରି ଏକାତର୍ ସବୁବେଲର୍‌ପାଇ ଆମର୍ ପାପ୍ ଦଇଦେଲା ।

୧୧ ସବୁ ଜିଉଦି ପୁଜାରିମନ୍ ସେ ସମାନ୍ ବଲି ସର୍ପିଦେଇକରି ଦିନ୍‌କେଦିନ୍ ଟିଆ ଅଇତେରଇଲାଇ । ମାତର୍ ଏ ବଲି ଲକ୍ଷ୍ମୀମନ୍ ପାପ୍ ନେଇ ନାପାରୁଲା । ୧୨ ମାତର୍ କିରିସ୍‌ଟ ତରେକ୍ ସେ ନିଜ୍‌କେ ବଲିଅଇଲା, ସେଟା ଆମର୍ ପାପ୍‌କେ ଦାରିଗାଲା ଆରି ସେ ସର୍ପିଦେବାଟା ଅଇଲାଟା ସବୁଦିନର୍ ପାଇ ନିକ । ସେ କିରିରଇବା କାମ୍ ସାରାଇଲା ଇସାବେ ଗଟେକ୍ ଚିନ୍ ପାରା, ପରମେସ୍ୱରର୍ ଉଜାବାଟେ ବସୁଲା । ୧୩ ସେ ଏବେ ମିସା ତେଇସେ ଜାଗିଆତେ । ଜନ୍ ବେଲାଇ ପରମେସ୍ୱର ତାର୍ ସବୁ ସର୍ତ୍ତୁମନ୍‌କେ ତାର୍ ପାଦେ ଆନ୍‌ସି । ୧୪ ଗଟେକ୍ ବଲିରୁଲାଗି ଆମେ ଜେଡ଼କିଲକ୍ ପାପେଅନି ଦଇଅଇ ଆରୁ, ସେ ଆମ୍‌କେ ସବୁଦିନର୍ ପାଇ ସିଦ୍ କରି ଆତେ ।

୧୫ ସୁକଲ୍‌ଆଡ଼ମା ମିସା ଆମ୍‌କେ ତାର୍ ସାକି ଦେଇ କଇଲାନ୍‌,

୧୬ “ମାପୁରୁ କଇଲାନ୍‌, ଆଇବା ଦିନ୍‌ମନ୍‌କେ,

ମୁଇ ଏ ନୁଆଁ ରାଜିନାମା,

ସେ ଲକ୍ଷ୍ମୀମନ୍‌ପାଇ କର୍ବି ।

ମୁଇ ମର୍ ନିୟମ୍ ସେମନ୍‌ର୍ ମନେ ସଙ୍ଗଇବି ଆରି

ଚିନ୍ତା କର୍ବାଟାନେ ଲେକ୍‌ବି ।”

୧୭ ସେ ଆରି ତରେକ୍ କଇଲା, ତାକର୍ ପାପ୍ ଆରି କାରାପ୍ ଗୁନ୍ ଚଲନ୍ ମୁଇ ପାସ୍‌ରି ଜିବି । ୧୮ ସେନ୍ତାରି ଏ ସବୁ ବିସଇ କେମା ଅଇଲାଟା ପାଇ, ତାକର୍ ପାପ୍ ଦାରି ନେବାକେ ବଲି ଆରି ଦେବାକେ ନ ପଡ଼େ ।

ପରମେସରର ଲଗେ ଆଇବାଟା

୧୯ ଏ ମର ବାଇବଇନିମନ୍, ଜିସୁର ମରନର ଲାଗି ଆମେ ଅଦିକ୍ ସୁକଲ୍ ଜାଗାଇ ପୁରବାକେ ଆମ୍ଭକେ ଅଦିକାର୍ ଆଟେ । ୨୦ କାଇକେବଇଲେ, ତାର୍ ଗାଗଡ଼ ସରପି ଅଇଲାକେ ପାରଦାବାଟେ ଆମ୍ଭକେ ନୁଆ ଆରି ଜିବନ୍ ରଇବା ବାଟ୍ ଉଗାଡ଼ିଦେଲା ଆଟେ । ୨୧ ଆରି ସେଡ଼କିସେ ନଏଁ, ଆମ୍ଭକେ ଏବେ ଗଟେକ୍ ବଡ଼ ପୁଜାରିଆଟେ । ଜେ କି ପରମେସର ଗରର ଅଦିକାରେ ରଇବା ଲକ୍ । ୨୨ ସେଟାର୍ପାଇ ତେବେ ଆସା, ଆମେ ସତଇସେ ମନକରି ଆରି ତାଟ୍‌ସଙ୍ଗ୍ ବିସବାସ କରି ପରମେସରର ଲଗେ ଜୁ । ଆମର୍ ବିବେକ୍ ଆମ୍ଭକେ ଦସ୍ ନ ଦେଲାପାରା କିରିସଟ୍‌ର ବନିସଙ୍ଗ୍ ଚିଟିଅଇକରି ଦଇଅଇ ରଇବାର୍ ଆଟେ । ଆରି ଆମର୍ ଗାଗଡ଼ ସୁକଲ୍ ପାନିସଙ୍ଗ୍ ଦଇଅଇଲାପାରା ରଇବାର୍ ଆଟେ । ୨୩ ଆମର୍ ଜନ୍ ଆସା ଉଁ, ବଲି ମାନିଆଇଲୁନି, ତାକେ ଡାଟ୍ କରୁ । ଆମେ ଅଇସି କି ନଏଁ ଆଲେ, ବଲି ନ ବାବୁ । କାଇକେବଇଲେ ପରମେସର ଜନ୍ ସପଡ଼ କଲାଆଟେ, ସେଟା ସେ କରସି ଆକା । ୨୪ ଆସା, ଆମେ ବିନ୍ ଲକ୍‌ମନ୍‌କେ ମନ୍‌ଦେଇ ସେମନ୍‌କେ ସାଇଜ କରୁ । ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କରି ନିକ କାମ୍ କରୁ । ୨୫ ଜେଜ୍‌ଜି ଆରି କେତେଲକ୍ କଲାଇନି, ଆମେ ମିସିବିଡ଼ି ରଇବା ବିସବାସି ବାଇବଇନି ମନରୁ ସଙ୍ଗ୍ ରୁଣ୍ଡବାକେ ଏଲା ନ କରୁ । ତାର୍ ବାଦୁଲେ ଆମର୍ ସଙ୍ଗାରିମନର୍ ବିସବାସ ଡାଟ୍ କରାଉ । ଆମର୍ ମାପୁରୁ ଜିସୁ ଆରିତରେକ୍ ଆଇବା ଦିନ୍ ଲଗେ କେଟି ଆଇଲାନି ।

୨୬ କିରିସଟ୍‌ର ବିସଇତେଇ ରଇବା ସଡ଼, ଆମେ ଜାନିକରି ପାପକରି ଲାଗିରଇଲେ, ଆମର୍ ପାପ୍ ଦାରିନେବାକେ ଆରି କାଇ ବଲି ନାଇ । ୨୭ ସେନ୍ତାରିଆଲେ ପରମେସରର ଜନ୍ ବଡ଼ବିଚାର୍ ଦିନ୍ ଆଇଲାନି, ତେଇ ତାର୍ ବେସି ତର ଲାଗ୍‌ବା ବିଚାରନାର୍‌ପାଇ ଜାଗ୍‌ବାକେ ପଡ଼ସି । ପରମେସରର ସବୁ ବିରଦିମନ୍‌କେ କ୍ଷୁରୁପ୍‌ନାସ୍ କରବା ସେ ବେସି ଲାଗ୍‌ତେରଇବା ଜଇର୍ ପାଇ ମିସା ଜାଗ୍‌ବାକେ ପଡ଼ସି । ୨୮ ମସାର୍ ନିୟମ୍ ନ ମାନବା ଗଟେକ୍ ଲକ୍‌କେ କାଇଟା ଅଇତେରଇଲା ବଲି ବାବିଦେକା । ଦୁଇ କି ତିନ୍ ଲକ୍ ତାର୍ ପାପୁର ଲାଗି ସାକିଦେଲେ, ସେ କାଇମିସା ଦୟା ନ ପାଇକରି ମରବାକେ ଆଦେସ୍ ଦେଇତେରଇଲାଇ ।

୨୯ ମସାର୍ ନିୟମ୍ ନ ମାନବା ଗଟେକ୍ ଲକ୍‌ର ଦସା ସେନ୍ତାରି ରଇଲେ, ପରମେସରର ପଅକେ ଇନ୍ କରବା ଗଟେକ୍ ଲକ୍‌ର ଦସା କେତେକ୍ ଅଦିକ୍ ନ ରଏ । ଜଦି ତାର୍ ରାଜିନାମାର୍ ବନିକେ କାଇ ମୁଲିଅ ନାଇ ବଲି ଏଲାକରିଦେଲେ, ଏ ବନିର୍ ଲାଗି ସେ ପାପେଅନି ସେ ସୁକଲ୍ ଅଇରଇଲା । ସେନ୍ତାରି କରବା ଲକ୍ ପରମେସରର ଆଡ଼ମା ଜେ କି ଜିବନ୍ ଦୁକାଇ ଦୟା ଦେକାଇସି, ତାକେ ମିସା ମନ୍‌ଦୁକ୍ କରାଇଲାନି । ତାର୍ ଡଣ୍ଡ କେତେକ୍ ଅଦିକ୍ ନ ଅଏ । ୩୦ କାଇକେବଇଲେ ଆମେ ଜାନିଆରୁ, ପରମେସର କଇଲା, “ବେର୍ ସୁଜାଇବାକେ ମର୍ ଅଦିକାର୍ ଆଟେ । ମୁଇସେ ବାଉଡାଇବି ।” ସେ ଏନ୍ତାରି ମିସା କଇରଇଲା, “ମୁଇସେ ମାପୁରୁ ଆରି ମର୍ ଲକ୍‌ମନ୍‌କେ ମୁଇ ଆକା ବିଚାର୍ କରବି ।” ୩୧ ଜିବନ୍ ରଇବା ଆରି ସବୁଟାନ୍‌ନେଅନି ବପୁ ରଇବା ପରମେସର ଡଣ୍ଡ ପାଇବାକେ କେତେକ୍ ତର ଲାଗସି ।

୩୨ ଗାଲା ଦିନ୍‌ମନ୍‌କେ ତମେ କେନ୍ତାରି ରଇଲାସ୍, ତମେ ଏତାଇଦେକା । ପରମେସରର ସଡ଼ ବିସଇର୍ ପାଇ ତମର୍ ମନ୍ ଉଗାଡ଼ି ଅଇଲାକେ, ତମ୍‌କେ ବେସି ଦୁକ୍ କସଟ୍ ଅଇଲେମିସା, ସେଟା ସବୁ ମୁର୍ଚ୍ଚି କରି ରଇଲାସ୍ । ଆରିତେଇ ଆରିଜାଆସ୍ ନାଇ । ୩୩ କେତେ କେତେ ତର ତମ୍‌କେ ସବୁର୍ ମୁଆଟେ ଇଜଡ଼ ଜିକ୍‌ଲାଇ ଆରି କାରାପ୍ ଇସାବେ ଦେକ୍‌ଲାଇ । କେବେ କେବେ ଜନ୍ ଲକ୍‌ମନ୍‌କେ ଦୁକ୍ ଆଇସି, ତାକର୍ ସମାନ୍ ଅଇତେରଇଲାସ୍ । ୩୪ ଆରି ବନ୍‌ ଗରେ ରଇବା



ତମର ସମ୍ପାଦନାକୁ ଦୟା ଦେବାକୁ ଇଚ୍ଛା । ତମର ଗାଥାରେ ଜେଡ଼କି ରକ୍ତକାଣ୍ଡା  
 ସେମାନେ ମାରଦାର କରି ନେଲାବେଳେ, ତମେ ସାର୍ଦ୍ଦାସଙ୍କ ମୁରୁଚି ରକ୍ତକାଣ୍ଡା ।  
 କାଳକେବଳେ, ତମ୍ଭେ ତାରତେଜସିନି ନିକଟା ଆରି ନ ସାର୍ଦ୍ଦା ଦିନ ଜାକ  
 ରକ୍ତକାଣ୍ଡା ଦନ୍ତପତି ଆରେ ବଳି ଜାନିରକ୍ତକାଣ୍ଡା । ୩୫ ସେଟାରୁପାଇଁ ତମର ସାଆନ୍ତ  
 ଚାଡ଼ାନାହିଁ । ମାତର ସେଟା କରତେରୁଆ । କାଳକେ ବଳେ ତମର ଇନାମ୍ ବଡ଼  
 ରକ୍ତକାଣ୍ଡା । ୩୬ ପରମେସରର ମନ୍ କଳାଟା ସାଦନ୍ କରବାକେ ତମେ ମୁରୁଚିକରି  
 ରକ୍ତକାଣ୍ଡା ଆରେ ଆରି ସେ କାତା ଦେଇରକ୍ତକାଣ୍ଡା ତମେ ମିଳାଇସା ।

୩୬ ଜେନ୍ତାରିକି ସାସ୍ତରେ ଲେକା ଅଇଲାଆରେ,

ତନେକ୍ ଜାଗିରୁଆ,

ଜେ ଆଇବାର ଆରେ, ସେ ଆଇସି ଆକା,  
 ସେ ଅଲ୍ଲସମ୍ ନ ଅଏ ।

୩୭ ମର ଜେଡ଼କି ଦରମ୍ ଲକ୍ ଆତଡ଼,

ସେମନ୍ ବିସବାସ କରି ବୁଦ୍ଧବାଇ

ମାତର ଜେ ଜଦି ପରକେ ବାଅଡ଼ଲେ  
 ମୁଇ ତାରୁଟାନେ ସାର୍ଦ୍ଦା ନ ଅଇ ।

୩୮ ମାତର ଆମେ ପରମେସରକେ ନ ମାନିକରି ତାର ତେଜସିନି ବେଗୁଲି ଜିବା  
 ଲକ୍ ନଉଁ । ମାତର ଆମେ ବିସବାସ କରି ରକିଆ ପାଇଲା ଲକ୍ମନର ସଙ୍ଗ ଆରୁ ।

## ୧୧

ବିସବାସ

୧ ତେବେ ବିସବାସ ଆଲେ କାଲଟା ? ଜନ୍ ବିସଇର ପାଇ ଆମେ ଆସା କଲୁନି,  
 ସେଟା ସିଦ୍ ଅଇସି ଆକା ବଳି ଆମର ମନେ ଜାନ୍‌ବାଟା ଅଇଲାନି ବିସବାସ ।  
 ଆରି ଜନ୍‌ଟା ଆମେ ଦେକି ନାପାରୁ, ସତଇସେ ଆରେ ବଳି ଜାନ୍‌ବାଟା, ମିସା  
 ବିସବାସ । ୧ ପୁରବେ ରକ୍ତକାଣ୍ଡା ଆମର ଆନିଦାଦିମନର ବିସବାସର ଲାଗି ପରମେସର  
 ସେମନ୍‌କେ ମନ୍‌କଲା ।

୨ ଆମର ବିସବାସରଲାଗି, ଏ ଜଗଡ଼ ଆରି ତେଜ ରକ୍ତକାଣ୍ଡା ସବୁଜାକ  
 ପରମେସରର ଆଦେସ୍ ଇସାବେ ତିଆର ଅଇଲାଆରେ ବଳି ଆମେ ଜାନ୍‌ଲୁନି ।  
 ତେବେ ଜନ୍‌ଟା ଦେକି ଅଇଲାନି, ସେଟା ଦେକି ନ ରକ୍ତକାଣ୍ଡା ଟାନେଅନି ତିଆର  
 ଅଇଆରେ ।

୩ ଏବଲର ବିସଇ ବାବି ଦେକୁ । ତାର ବିସବାସର ଲାଗି ସେ ଜନ୍‌ଟା  
 ପରମେସରକେ ସରପି ଦେଇରକ୍ତକାଣ୍ଡା, ତାର ବାଇ କଇନ୍ ଦେଲାଟାନେଅନି  
 ନିକରକ୍ତକାଣ୍ଡା । ତାର ବିସବାସର ଲାଗି ପରମେସର ତାକେ ଦରମ୍ ବଳି ଏଜାଇଲା ।  
 ସେ ସରପିଦେଲାଟା ପରମେସର ମାନ୍‌ଲାକେ ଆମେ ଏଟା ଜାନ୍‌ଲୁନି । ତେବରପାଇ  
 ଏବଲ୍ ମରିଗାଲେମିସା ତାର ବିସବାସର ଲାଗି, ସେ ଆମ୍ଭେ କାଳକାଳଟା କଇଲାନି  
 ।

୪ ଆରି ଗଟେକ୍ ଲକ୍ ରକ୍ତକାଣ୍ଡା ଇନକ୍, ତାର ବିସବାସର ଲାଗି ସେ ମରେନାଇ,  
 ମାତର ଜିବନ୍ ରକ୍ତକାଣ୍ଡା ତାକେ ପରମେସର ଦାରିଗାଲା । ତେବେ ସେମନ୍ ତାକେ  
 କଜ୍‌ଲାଇ ମିସା ମିଲାଇ ନାପାରୁଲାଇ । କାଳକେବଳେ ପରମେସର ତାକେ  
 ନେଇରକ୍ତକାଣ୍ଡା । ସାସ୍ତରେ ଏନ୍ତାରି ଲେକା ଅଇଲାଆରେ, ତାକେ ଦାରି ନେବା  
 ଆଗ୍ଡୁ ପରମେସର ତାକେ ମନ୍ କରିରକ୍ତକାଣ୍ଡା । ୫ ତେବରପାଇ ଜନ୍ ଲକ୍ମନ  
 ପରମେସରର ଲଗେ ଆଇବାକେ ମନ୍ କଲାଜନି, ପରମେସର ଆରେ ବଳି ବିସବାସ  
 କରବାରୁ ଆରେ । ଜେଡ଼କି ଲକ୍ମନ ତାକେ କଜ୍‌ବାଇ, ସେ ସେମନ୍‌ରୁ ଆସା କଳାଟା  
 ପୁରାପୁରନ୍ କରସି ।

<sup>୭</sup> ନଅର ବିସଇ ବାବିଦେକା । ତାର ବିସବାସର ଲାଗି ପରକେ ଅଇବା ବିସଇ ପରମେସର ତାକେ ଜାଗରତ୍ କରାଇଲାକେ, ସେ କାତା, ସେ ଏଲାକରେ ନାଇ । ତାର ଆଗତ୍ ସେ ସେନ୍ତାରିଟା କାଇଟା ନ ଦେକିରଇଲେ ମିସା, ସେ ବିସବାସ କଲା । ତାରପଟେ ସେ ଆରି ତାର କୁଟୁମ୍ ରକିଆ ପାଇବାକେ ଗଟେକ୍ ବଡ଼ ତଙ୍ଗା ତିଆର କଲା । ତାର ବିସବାସର ଲାଗି ପରମେସର ତାକେ ଦରମ୍ ଲକ୍ ବଲି ଏଜ୍ଲା, ମାତର ବିନ୍ଲକ୍ମନକେ ଦସି କଲା ।

୮ ଅବ୍ରାଆମ୍ ମିସା ତାର ବିସବାସର ଲାଗି ପରମେସରର କାତା ମାନଲା । ପରମେସର ତାରପାଇ ସଙ୍ଗାଇରଇବା ଗଟେକ୍ ଦେସେ ଜା ବଲି କଇଲାକେ, ସେ ଦାପୁରେ ମାନଲା ଆରି ବାରଇଲା । ସେ କନ୍ତୁ ଗାଲିନି ବଲି ନାଜାନି ରଇଲେ ମିସା ସେ ସେନ୍ତାର୍ କଲା । <sup>୯</sup> ତାର ବିସବାସର ଲାଗି ପରମେସର ତାକେ ଦେବି ବଲି କାତା ଦେଇରଇଲା ଦେସେ, ସେ ବିନ୍ଦେସର ଲକ୍ ପାରା ତୁମ୍ ଟାନି ରଇଲା । ସେନ୍ତାରିସେ ତାର ପଅ ଇସାକ୍ ଆରି ଜାକୁବ୍ ତାର ନାତି ମିସା ପରମେସର କାତା ଦେଇରଇଲାଟା ମିଲାଇବାଟାନେ ମିସୁଲା । <sup>୧୦</sup> ଅବ୍ରାଆମ୍ ସେନ୍ତାରି ଜାଗାଇ ମୁର୍ତ୍ତିକରି ରଇଲା । କାଇକେବଇଲେ ପରମେସର ତିଆର କଲା ସବୁଦିନ୍ ରଇବା ସରଗର୍ ନଅରେ ରଇବି ବଲି ସେ ଆସାକଲା ।

<sup>୧୧</sup> ତାର ବିସବାସର ଲାଗି ଅବ୍ରାଆମ୍ ବେସି ତକ୍ତରା ରଇଲା ମିସା ଆରି ତାର ମାଇଜି ସାଆରା ବାଞ୍ଜି ରଇଲେ ମିସା, ବାବା ଅଇଲା । ପରମେସର କାତା ଦେଇରଇଲାଟା ସିଦ୍ କର୍ସିଆକା ବଲି ସେ ଜାନିରଇଲା । <sup>୧୨</sup> ଅବ୍ରାଆମ୍ କୁଲ୍କୁଲା ତକ୍ତରା ଅଇଲାକେ ସେ ପିଲାଜିଲା କରି ନାପାରଲା । ଅଇଲେମିସା ତାର ନାତିତିମିମନ୍ ବାଦଲର୍ ତାରା ପାରା ଆରି ସମ୍ପଦୁରେ ରଇବା ବାଲି ପାରା ଜବର୍ ଅଇଗାଲା ।

<sup>୧୩</sup> ଏ ସବୁ ଲକ୍ମନ ସେମନ୍ ମଲାବେଲେ ମିସା ପରମେସରକେ ବିସବାସ କରତେ ରଇଲା । ପରମେସର ସେମନ୍କେ କାତା ଦେଇରଇଲାଟା, ସେମନ୍ ଜିବନ୍ ରଇଲାବେଲେ ନ ମିଲାଇରଇଲେ ମିସା, ଜନ୍ଟା ପାଇବାଇ, ସେଟା ଦୁରିକେଅନି ଦେକ୍ଲାପାରା ଦେକି ସାର୍ଦା ଅଇଲା । ଏ ଜଗତେ ସେମନ୍ ବିନ୍ ଦେସର୍ ପାରା ଆରି ନିଜର୍ ଦେସେ ନ ରଇଲା ଲକ୍ପାରା ମାନିଅଇକରି ରଇଲା । <sup>୧୪</sup> ସେମନ୍ ମାନିଅଇ ରଇଲାଟାନେ ଅନି ଆମେ ଜାନୁବୁ ଜେ, ସେମନ୍ ନିଜର୍ଟା ବଲି ଜାନାଇବା ଗଟେକ୍ ଦେସ୍ କଜ୍ତେ ରଇଲା । <sup>୧୫</sup> ସେମନ୍ ଚାଡ଼ିକରି ଆସିରଇବା ଦେସ୍ ବିସଇନେଇ ଚିନ୍ତା କରତନାଇ । ସେନ୍ତାରି କର୍ତାଇଆଲେ, ସେମନ୍ ବାଉଡ଼ବାକେ ଅଇତା । <sup>୧୬</sup> ସେମନ୍ ଚାଡ଼ିଆଇଲା ନଅର୍ତେଇଅନି ଅଦିକ୍ ନିକ ଗଟେକ୍ ନଅରର୍ ପାଇ ତାକର୍ ଆଁକି ରଇଲା । କାଇକେବଇଲେ, ସେମନ୍ ସରଗ୍ ଦେସ୍ ପାରାଟା କଜ୍ତେରଇଲା । ସେମନ୍ ତାକେ ପରମେସର ବଲି ତାକ୍ଲାର୍ ପାଇ, ସେ ଲାଜ୍ ଅଏନାଇ । କାଇକେବଇଲେ ସେ ତାକ୍ପାଇ ଗଟେକ୍ ନଅର୍ ତିଆରକଲା ଆଟେ ।

<sup>୧୭</sup> ତାର ବିସବାସର ଲାଗି ଅବ୍ରାଆମ୍ ଜେଡେବେଲେ ପରମେସର ତାକେ ପରିକା କଲା, ସେ ତାର ପଅକେ ବଲି ଇସାବେ ସର୍ପି ଦେଲା । ମାତର ପରମେସର କାତା ଦେଇରଇଲାଟାନେ ଅବ୍ରାଆମ୍ ବିସବାସ ଡାଁଟ୍ ରଇଲା । ଆରି ସେ ତାର ଗଟେକ୍ ବଲି ପଅ ଇସାକ୍କେ ବଲି ଇସାବେ ଦେବାକେ ରାଜି ରଇଲା । <sup>୧୮</sup> ତାର ପଅ ଇସାକ୍ ଲାଗି, ତାର ନାତିତିମିମନ୍ ଜବର୍ ଅଇଜିବାଇ ବଲି ପରମେସର ତାକେ କାତା ଦେଇରଇଲା । <sup>୧୯</sup> ଜଦି ଇସାକ୍ ମରିଗାଲେ, ପରମେସର ତାକେ ଜିବନ୍ କରି ଉଟାଇପାରସି ବଲି ଅବ୍ରାଆମ୍ ବାବିରଇଲା । ଆରି ସେବେଲେ ସେନ୍ତାରିସେ ତାକେ ମଲାତେଇଅନି ଜିବନ୍ ଅଇକରି ପାଇଲା ପାରା ସେ ରଇଲା ।

<sup>୨୦</sup> ଇସାକ୍ ତାର ବିସବାସର ଲାଗି, ତାର ପଅମନ୍ ଜାକୁବ୍ ଆରି ଏସ୍ଅକେ ଆଇବା ଦିନମନ୍ ପାଇ ଆସିର୍ବାଦ୍ ଦେଲା ।

୨୧ ଜାକୁବ୍ ତାର ବିସ୍‌ବାସର ଲାଗି, ସେ ମରବା ବେଳେ ତାର ନାତିତିତିମନ୍ଦ ଜେ କି ଜସେପର୍ ପଅମନ୍‌କେ ଆସିରବାଦ୍ କଲା । ସେ ଦାରିକରି ଇଶ୍‌ବା ତାଙ୍ ଉପରେ ଆଉଜି କରି ପର୍ମେସର୍‌କେ ଉପାସନା କଲା ।

୨୨ ଜସେପ୍ ତାର ବିସ୍‌ବାସର ଲାଗି ସେ ମରବାବେଳେ ଆଇବା ଦନ୍‌ମନ୍‌କେ ଇସ୍ରାଏଲର୍ ଲକ୍‌ମନ୍ ସବୁ ମିସର୍ ଦେସ୍ ଚାଡ଼ି ଜିବାଇ ବଲି କଇରଇଲା । ଆରି ତାର ମଲା ଗାଗଡ଼ସଙ୍ କାଇଟା କରବାର୍ ଆତେ ବଲି ସେମନ୍‌କେ ତିଆରି ରଇଲା ।

୨୩ ମସାର୍ ଆୟାବାବାମନ୍ ତାକର୍ ବିସ୍‌ବାସର ଲାଗି ଏବ୍‌ରିଅମନ୍‌ର୍ ପିଲାଟକିକେ ମରାଇବାର୍ ଆତେ ବଲି ରାଜା ଆଦେସ୍ ଦେଇରଇଲା ମିସା, ସେମନ୍ ମସା ଜନମ୍ ଅଇଲାକେ ତାକେ ତିନ୍‌ମାସ୍ ଲୁଚାଇକରି ସଙ୍ଗଇଲା । ସେ ଗଟେକ୍ ସୁନ୍‌ର୍ ପିଲା ବଲି ସେମନ୍ ଦେକ୍‌ଲା । ରାଜା ଆଦେସ୍ କଲାଟାକେ ସେମନ୍ ଡରଡ଼ ନା ।

୨୪ ମସା ତାର ବିସ୍‌ବାସର ଲାଗି, ସେ ବଡ଼ ଅଇଲାକେ ରାଜାର ଜିଇର୍ ପିଲା ବଲାଅଇବାକେ ମନ୍ କରି ନ ରଇଲା । ୨୫ ଚନେକର୍‌ପାଇ ସାର୍‌ଦା ଦେବା ପାପ୍ କରବାତେଅନି, ପର୍ମେସର୍‌ର୍ ଲକ୍‌ମନ୍‌ର୍ ସଙ୍ଗ୍ କସ୍‌ଟ୍ ଅଇରଇବାଟା ଅଦିକ୍ ନିକ ବଲି ସେ ବାବ୍‌ଲା । ୨୬ ମସିଅର୍ ଲାଗି ଲାଜ୍‌ପାଇ ମୁରଟିକରି ରଇବାଟା ମିସର୍ ଦେସେଅନି ମିଲାଇରଇବା ବଡ଼ ଦନ୍ ସପ୍‌ତିତେଅନି ଅଦିକ୍ ନିକଟା ବଲି ସେ ବାବ୍‌ଲା । ଆଇବା ଦିନ୍‌ମନ୍‌କେ ମିଲାଇବା ପୁରୁସ୍‌କାର୍‌ଟାନେ ସେ ଆକିପାକାଇ ରଇଲା ।

୨୭ ତାର ବିସ୍‌ବାସର ଲାଗି, ସେବେଳେ ସେ ମିସର୍‌ଦେସ୍ ଚାଡ଼ିଆଇଲା । କାଇକେବଇଲେ, ସେ ରାଜାର୍ ରିସା ଡରେନାଇ । ଆକିସଙ୍ଗ୍ ଦେକି ନାପାର୍‌ବା ପର୍ମେସର୍‌କେ ଦେକ୍‌ଲା ପାରା ସେ ଆରି ସେ ଦେସେ ବାଡ଼ଡେନାଇ । ୨୮ ତାର ବିସ୍‌ବାସର ଲାଗି ସେ ନିସ୍‌ତାର୍ ପରବ୍ ମାନ୍‌ଲା ଆରି ଇସ୍ରାଏଲ୍ ଲକ୍‌ମନ୍‌ର୍ ରଇବା ଗରର୍ କାପାଟେ, ଗଟେକ୍ ମେଣ୍ଡାପିଲାର୍ ବନି ଚିବ୍‌ବାକେ ଆଦେସ୍ ଦେଲା । ସେ ଏନ୍ତାରି କଲାକେ ପର୍ମେସର୍‌ର୍ ଦୁଡ଼ ଇସ୍ରାଏଲ୍ ଲକ୍‌ମନ୍‌ର୍ ପଣ୍ଡୁଆ ପିଲାମନ୍‌କେ ମରାଏ ନାଇ ।

୨୯ ଇସ୍ରାଏଲ୍‌ର୍ ଲକ୍‌ମନ୍ ତାକର୍ ବିସ୍‌ବାସର ଲାଗି ଲଇଡ଼ ନାଉଁର୍ ସମ୍‌ଦୁର୍ ବିଡ଼ରେ ସୁକ୍‌ଲା ବୁଇଁପାରା ଇଣ୍ଡି ଇଣ୍ଡି ଲଙ୍‌ଲା । ସେମନ୍‌କେ କେଦି ଆନ୍‌ଡେରଇବା ମିସର୍ ଦେସର୍ ଲକ୍‌ମନ୍, ସେନ୍ତାରି ଲଙ୍‌ବାକେ ଚେସ୍‌ଟା କଲାଇଜେ ସେମନ୍ ସବୁଲକ୍ ବୁଡ଼ିଗାଲା । କାଇକେବଇଲେ ଜନ୍ ସମ୍‌ଦୁରେ ସେମନ୍ ଇଶ୍‌ବା ବେଳେ ପାନି ଦୁଇବାଗ୍ ଅଇରଇଲା, ପର୍ମେସର୍ ସେ ପାନି ମିସାଇଦେଲା ।

୩୦ ଇସ୍ରାଏଲ୍‌ର୍ ଲକ୍‌ମନ୍ ତାକର୍ ବିସ୍‌ବାସର ଲାଗି ଜିରିକର୍ ପାଚୁରିତେଇ ଆସି ସାଡ଼ ଦିନ୍ ଜାକ ତେଇ ବୁଲ୍‌ଲାକେ ତାର୍ ପାଚୁରି ବସ୍‌ଲିଗାଲା । ୩୧ ଜେରିକର୍ ନଅରେ ରଇବା ରାଆର୍ ନାଉଁର୍ ଗଟେକ୍ ବେସିଆ ମାଇଜି, ତାର ବିସ୍‌ବାସର ଲାଗି ପର୍ମେସର୍‌କେ ନ ମାନିକରି ରଇବା ଲକ୍‌ର୍ ସଙ୍ଗ୍ ମରେନାଇ । ଇସ୍ରାଏଲ୍‌ର୍ କବର୍ ନେବା ଲକ୍‌ମନ୍ ଲୁଚ୍‌ତେ ନଅରେ ଆଇଲାବେଳେ ରାଆର୍ ସେମନ୍‌କେ ସାଇଜି କଲା ।

୩୨ ମୁଇ ଇତି ତେବ୍‌ବି । କାଇକେବଇଲେ ମୁଇ ଆରି କଇବାଟା ଆରାମ୍ କଲେ, ଗିଦିୟନ୍, ବାରାକ୍, ସାମ୍‌ସନ୍, ଜେପ୍‌ତା, ସାମୁଏଲ୍, ଆରି ବବିସ୍‌ଡ଼ବକ୍‌ତାମନ୍‌ର୍ ବିସ୍‌ବାସ୍ ବିସଇ କାତା ଅଇବାକେ ବେଲା ନ କେଟେ । ୩୩ ତାକର୍ ବିସ୍‌ବାସର ଲାଗି କେତେକ୍ ଲକ୍ ରାଇଜେ ଜୁଇଦ୍ କରି ଜିଡ଼ଲା । ବିନ୍‌ଲକ୍‌ମନ୍ ଦରମ୍ ଚଲାଟଲ୍‌ଡିକରି ପର୍ମେସର୍ କାତା ଦେଇରଇବାଟା ମିଲାଇଲା । ସେମନ୍ ବାଦ୍‌ରା ସିଅଁମନ୍‌କେ ଆରାଇଲା । ୩୪ ବିନ୍ ଲକ୍‌ମନ୍ ତାକର୍ ବିସ୍‌ବାସର ଲାଗି ଜବର୍ ଜଇଲାଟଲା ମିସା ପଡ଼ଡ଼ନାଇ, । କାଣ୍ଡୁତେଅନି ରକିଆ ପାଇଲା । ସେମନ୍ ଦୁର୍‌ବଲ୍ ରଇଲା । ମାଡର୍ ତାକର୍ ବିସ୍‌ବାସର ଲାଗି ତାଟ୍ ଅଇଲା ।

। ଜୁଇଦକରବାକେ ବସ୍ତୁ ଅଇଲା । ସତ୍‌ରୁମନର୍ ସଇନମନକେ ଆରାଇଲା ।  
 । ୩୫ କେତେଟା ମାଇଜିମନ୍ ମିସା ତାକର୍ ବିସ୍‌ବାସର୍ ଲାଗି ସେମନର୍ କୁଚୁମର୍  
 ଲକ୍‌ମନକେ ମଲାତେଇଅନି ଜିବନ୍ ଅଇତେ ମିଲାଇଲା । ବିସ୍‌ବାସିମନକେ  
 ବନ୍ଦିକରି ନେଲା ।

ସେମନ୍ ମର୍ବାଜାକ ଦୁକ୍ କସ୍‌ଟ ପାଇଲେ ମିସା ତାକର୍ ବିସ୍‌ବାସ୍ ଚାଡ଼ନ୍ ନାଇ ।  
 ଆଇବା ଦିନମନକେ ଅଦିକ୍ ନିକ ଜିବନ୍ ପାଇରୁ ବଲି ସେନ୍ତାରି ଅଇକରି ମଲା ।  
 ୩୬ କେତେ ଲକ୍‌କେ କିଜାଇଲା, କରତା ମାରାଇଲା, ବିନ୍ ଲକ୍‌ମନକେ ବନ୍ଦିକରି  
 ଜଇଲେ ପୁରାଇଲା, ୩୭ ବିନ୍ ଲକ୍‌ମନକେ ପାକ୍‌ନା ମାରାଇ ମାରାଇଲା, ।  
 ଦୁଇପତାକରି କାଟାଇଲା, କାଣ୍ଡା ସଙ୍ଗ୍ ମାରାଇଲା । କେତେକ୍ ଲକ୍‌ ତାକର୍  
 ବିସ୍‌ବାସ୍ ଚାଡ଼ନ୍‌ନାଇକେ ଅଦକା ଚେଲିମେଣ୍ଡା ଚାମସେ ଲୁଗାର୍‌ପାଇ ରଇଲା ।  
 ସେମନ୍ ବେସି ଅର୍‌କିଡ଼ ରଇଲା । ସେମନକେ ସାଦବାନ୍ଦ କରି ତାଡ଼ନା କଲା ।  
 ୩୮ ଏ ଜଗତର୍ କାରାପ୍ ଲକ୍‌ମନ୍, ସେ ଦରମ୍ ଲକ୍‌ମନର୍ ସଙ୍ଗ୍ ମିସ୍‌ବାକେ ସମାନ୍ ନ  
 ରଇଲା, ବିନ୍ ବିସ୍‌ବାସିମନ୍ ନିଜର୍ ଗର୍‌ଦୁଆର୍ ଚାଡ଼ି ଆଜିଜାଇରଇବା ଲକ୍‌ମନର୍  
 ପାରା ମରୁବାଲି ବୁର୍‌ଏ, ଆରି କୁପ୍‌ଲିତେଇ ରଇବା ପାଆରେ, ଆରି କଲେ ରଇଲା ।

୩୯ ତାକର୍ ବିସ୍‌ବାସର୍ ଲାଗି ସେମନ୍ ତାକ୍‌ପୁଟା ଅଇଲା । ଏଲେମିସା  
 ପର୍‌ମେସର୍ କାତା ଦେଇରଇବାଟା ସେମନ୍ ମିଲାଅଡ଼ ନାଇ । ୪୦ କାଇକେବଇଲେ  
 ପର୍‌ମେସର୍ ଗଟେକ୍ ବେସି ନିକ ଜଜ୍‌ନା ଆମର୍‌ପାଇ ଟିକ୍ କଲାଆଟେ । ଆମେ ସେ  
 ଲକ୍‌ମନର୍ ସଙ୍ଗ୍ ନ ମିସ୍‌ବାଜାକ, ସେ ସେମନକେ କାତା ଦେଇରଇଲାଟା ସିଦ୍ ନ  
 କରେ ।

## ୧୨

### ପର୍‌ମେସର୍ ଆମର୍‌ ବାବା

୧ ଏବେ ଆମେ ସବୁ ଆରାଜିତାଗାନେ ପାଲାଇବା ଲକ୍‌ମନର୍‌ପାରା ଆରୁ ।  
 ଆମର୍ ଚାରିବେଟ୍‌ଟି ଗଟେକ୍ ବଡ଼ ଦଲ୍‌ର ସାକିମନ୍ ଦେକ୍‌ଲାଇନି । ତେବର୍‌ପାଇ  
 ଜନ୍‌ଟାମନ୍ ଆମକେ ବାଦା ଦେଲାନ୍ତି, ଆରି ଜନ୍ ପାପମନ୍ ଆମକେ ପଡ଼କେ  
 ଜିକ୍‌ଲାନ୍ତି, ସେଟା ସବୁ ବେଟି ପିଙ୍ଗିଦେବାର୍ । ଜନ୍ ଆରାଜିତା ଅଇ ପାଲାଇବାଟା  
 ପର୍‌ମେସର୍ ଆମର୍ ମୁଆଟେ ସଙ୍ଗିଆଟେ, ତେଇ ଆମେ ମୁର୍‌ଟିକରି ପାଲାଇ  
 ସାରାଇଦେଉଁ । ୨ ଆମର୍ ଆଁକି ଜିସୁରଟାନେ ସଙ୍ଗି । ତାକେ ଆମେ ଆରାମେ ଅନି  
 ସାରାସାରି ଜାକ ବିସ୍‌ବାସ୍ କରିଆରୁ । ଜନ୍ ସାର୍‌ଦା ତାର୍ ମୁଆଟେ ସଙ୍ଗିରଇଲା,  
 ସେ ସାର୍‌ଦାର୍‌ଲାଗି ରଇବା ଦୁକ୍‌କସ୍‌ଟ ମୁର୍‌ଟି କରି ରଇଲା । ଆରି ତେଇ ମର୍‌ବା  
 ଲାଜର୍ ବିସଇ ମନେ ଦାରେନାଇ । ପର୍‌ମେସର୍ ଆଜି ଜନ୍ ଜାଗାଇ ବସ୍‌ଲାଆଟେ,  
 ତାର୍ ଉଜାବାଟେ ସେ ମିସା ବସ୍‌ଲାଆଟେ ।

୩ ବାବିଦେକା, ସେ କେତେକ୍ ଦୁକ୍ କସ୍‌ଟ ପାଇଆଟେ । ସେ ପାପିମନର୍  
 ଗାନେଅନି କେତେକ୍ ଉତ୍ତା ସୁନିଆଟେ । ଜେନ୍ତାରିକି ଆସା ନ କରି ଚାଡ଼ି ଦିଆସ୍  
 ନାଇ । ୪ କାଇକେବଇଲେ ପାପର୍ ବିରୁଦେ ଆଇବା ଜୁଇଦେ ବନି ଜରବା ଏଡ଼କି  
 ତମେ କରାସ୍ ନାଇତା । ୫ ପର୍‌ମେସରର୍ ସାସ୍‌ତରେ ଲେକା ଅଇଲାଟା ତମେ  
 ପାସ୍‌ରିଗାଲାସ୍ କି ? ସେ ତାର୍ ପିଲାଜିଲାମନକେ ମନ୍ ସାର୍‌ଦା କରାଇ ଏନ୍ତାରି  
 କଇରଇଲା । ସେ କଇଲା,  
 ମର୍ ପଅ ମାପୁରୁର୍ ସାସନ୍ କର୍‌ବାଟା ଏଲା କର୍‌ବାର୍ ନାଇ ।

ସେ ତମକେ ତଣ୍ଡ ଦେବାବେଲେ ଆସା ଚାଡ଼ବାର୍ ନାଇ ।

୬ କାଇକେବଇଲେ ମାପୁରୁ ଜେଡ଼କି ଲକ୍‌କେ ଆଲାଦ୍ କର୍‌ସି, ସେଡ଼କି ଲକ୍‌କେ ସେ  
 ସାସନ୍ କର୍‌ସି ।

ଆରି ଜେଡ଼କି ଲକ୍‌କେ ତାର୍ ପିଲାଜିଲା ବଲି ଏଜିଆଟେ

ସେ ସବୁ ଲକ୍‌କେ ତଣ୍ଡ ଦେଇସି ।

୭ ତେବର୍ପାଇ ତମର୍ ଦୁକ୍‌କସ୍ତ ସବୁ ତମର୍ ବାବାର୍ତେଇଅନି ମିଲିରଇବା ତଣ୍ଡ ପାରା ବଲି ବାବ୍‌ବାର୍ ଆତେ । ପର୍ମେସର୍ ତମ୍‌କେ ତାର୍ ପିଲା ଜିଲା ବଲି ଏଜ୍‌ଲାନି । ଏଟା ତମର୍ ଦୁକ୍‌କସ୍ତ ପାଇବାତେଇଅନି ଜାନାପଡ଼ସି । କାଇକେବଇଲେ, ତାର୍ ପିଲାକେ ତଣ୍ଡ ନ ଦେଲା ବାବା କେ ଆତେ ? 「 ତେବର୍ପାଇ ତାର୍ ସବୁ ପିଲାଜିଲାପାରା ପର୍ମେସର୍ ଜଦି ତମ୍‌କେ ତଣ୍ଡ ନ ଦେଏ, ତାର୍ ଅରଡ଼ ଅଇଲାନି ସତଇସେ ତମେ ତାର୍ ପିଲାଜିଲା ନୁଆସ୍, ମାତର୍ ଉପ୍‌କା ପିଲାଜିଲା । ୯ ଆମ୍‌କେ ଜନମ୍ ଦେଲା ବାବାମନ୍ ତଣ୍ଡ ଦେଇରଇଲାଇ ଆରି ସେଟାର୍ପାଇ ଆମେ ସେମନ୍‌କେ ମାନିଅ କର୍ତେରଇଲୁ । ସେନ୍ତାର୍‌ଆଲେ ସର୍ଗେ ରଇବା ଆମର୍ ବାବାକେ ଆମେ କେତେକ୍ ଅଦିକ୍ ନିଜ୍‌କେ ସର୍ପିଅଇ ବର୍ତୁ ? ୧୦ ଆମର୍ ବାବାମନ୍ ସେମନ୍ ଟକ୍ ବଲି ବାବ୍‌ବା ଇସାବେ, ଚନେକର୍ପାଇ ରଇବା ଏ ଜିବନେ ଆମ୍‌କେ ତଣ୍ଡ ଦେଇରଇଲାଇ । ମାତର୍ ଜେଡେବେଲେ ପର୍ମେସର୍ ଆମ୍‌କେ ତଣ୍ଡ ଦେଇସି, ଆମର୍ ନିକପାଇ ଦେଇସି । ଜେନ୍ତାରିକି ଆମେମିସା ତାର୍ପାରା ସୁକଲ୍ ଅଇବୁ । ୧୧ ଜେଡେବେଲେ ତଣ୍ଡ ପାଇବୁ, ଆମେ ସାର୍‌ଦା ନ ଅଉଁ, ମାତର୍ ଦୁକ୍ ଅଇବୁ । ସେଟା ସଡ଼, ମାତର୍ ସେ ତଣ୍ଡ ପାଇଲାତେଇଅନି କାଇକାକଟା ସିକ୍‌ଲା ପଟେ, ସେଟା ନିକ ବଲି ବାବ୍‌ବୁ । କାଇକେବଇଲେ ସେଟା ଆମ୍‌କେ ସାନ୍ତିସଙ୍ଗ୍ ରଇବା ମନ୍ ଆରି ଗଟେକ୍ ଦରମ୍ ଚଲାଚଲ୍‌ତି କର୍ବାକେ ସାଇଜ କର୍ସି ।

ସିକିଆ ଆରି ଚେଡ଼ନା

୧୨ ତେବର୍ପାଇ ଅଦୁଆ ଅଇରଇବା ଆଡ଼ ଉଟାଆ ଆରି ଲୁଡ଼ଗୁଡ଼ି ଜାଇତେରଇବା ମାଣ୍ଡିମନ୍ ଡାଁଟକରା । ୧୩ ସଲକ୍ ବାଟେ ଇଣ୍ଡିଜା । ସେନ୍ତାରିକଲେ ତମର୍ ନ ଆଇବା ପାଦ୍ ନିକଅଇ ଡାଁଟ ଅଇସି ।

୧୪ ସବୁ ଲକର୍ ସଙ୍ଗ୍ ସୁସାରେ ଆରି ସୁକଲ୍ ସଙ୍ଗ୍ ରଇବାକେ ଚେସ୍‌ଟା କରା, ଆରିକେ ସୁକଲ୍ ନ ଅଇକରି ମାପୁରୁକେ ଦେକି ନାପାରଡ଼ । ୧୫ ଗଟେକ୍ ଲକ୍ ଆରିଗଟେକ୍ ଲକ୍‌କେ ଜାଗରଡ଼ କରାଆ । ଜେନ୍ତାରି କି ପର୍ମେସର୍ ଜିବନ୍ ଦୁକାଇକରି ଦୟା ଦେକାଇଲାଟାନେଅନି କେ ପର୍‌କେ ନ ଜାଅଡ଼ । କାଇକେବଇଲେ ସେନ୍ତାରି ଲକ୍ ପିତା ପଲ୍ ଦାର୍‌ବା ଗଟେକ୍ ଗର୍ ପାରା ରଇସି ଆରି ବେସି ଲକ୍‌କେ ତାର୍ ବିସ୍ ସଙ୍ଗ୍ ଅଇରାନ୍ କର୍ସି । ୧୬ ଜାଗର୍‌ତା ରୁଆ, ତମର୍ ବିଡ଼ରେ କେ ମିସା ବେସିଆ କାମ୍ କରାନାଇ । ପର୍ମେସର୍‌କେ ବିସ୍‌ବାସ୍ ନ କରି ରଇବା ଏସ୍‌ଅ ପାରା ନ ଉଆ । ସେ ଗଟେକ୍ କାଦିର୍ପାଇ ପର୍ମେସର୍ ସେ ପାଇସି ବଲି କାତା ଦେଇରଇବା ବଡ଼ ପିଲାର୍ ଅଦିକାର୍ ପାଲ୍‌ଟାଇଲା । ୧୭ ଆମେ ଜାନିଆରୁ ଜେ ସେ ସେନ୍ତାରି କଲାପଟେ, କରିରଇବା କାମର୍ ପାଇ ଦୁକ୍ କଲା । କାଇକେବଇଲେ ବାବାର୍ ବଡ଼ ପଅ ଇସାବେ ତାର୍ ବାବାର୍ ଆସିର୍‌ବାଦ୍ ପାଇବାକେ ବେସି ମନ୍ କଲା । ମାତର୍ ତାର୍ ସଙ୍ଗ୍ କାଦିକରି ବାବୁଜିଆ କଲାମିସା, ସେ ମିଲାଇ ନାପାରଲା କି କରିରଇବା କାମ୍ ମିସା ବାଦ୍‌ଲେ ନାଇ ।

୧୮ ଇସ୍‌ରାଏଲର୍ ଲକ୍‌ମନ୍ ପର୍ମେସର୍‌ର ଲଗେ ଆଇଲାପାରା ତମେ ଆସାସ୍ ନାଇ । ସେମନ୍ ଜନ୍‌ଟା ଦେକ୍‌ଲାଇ, ସେଟା ଜାନିପାର୍‌ଲାଇ । ସିନ୍‌ୟ ପର୍‌ବତେ ରଇବା ଜଇ ଦେକ୍‌ଲାଇ । ବେସି ଆନ୍ଦାର୍ ଅଇଲାଟା ଆରି ଜବର୍ ପବନ୍ ଆଇଲାଟା ତେଇ ରଇକରି ଜାନିପାର୍‌ଲାଇ । ୧୯ ମଇରି ପୁକ୍‌ବାଟା ଆରି ସବଦ୍ ଅଇବାଟା ସୁନ୍‌ଲାଇ । ସେ ସବଦ୍ ସୁନ୍‌ଲାକେ ଲକ୍‌ମନ୍ ଆରି ନ ସୁନ୍ ବଲି ବାବୁଜିଆ କଲାଇ । ୨୦ କାଇକେବଇଲେ ତେଇ ଦେଇରଇବା ଆଦେସ୍‌କେ ସେମନ୍ ବେସି ଡର୍‌ଲାଇ । “ଗଟେକ୍ ପସୁ ମିସା ସେ ପର୍‌ବତେ ପାଦ୍ ମାଣ୍ଡିଲେ ତାକେ ପାକ୍‌ନା ସଙ୍ଗ୍ ମାରି ମରାଇବାର୍ ଆତେ ।” ବଲି ଆଦେସ୍ ରଇଲା । ୨୧ ଜନ୍‌ଟା ଦେକିଅଇଲା ଆରି ସୁନି

ଅଇଲା, ସେଟା ବେସି ଡର ଲାଗିବାଟା ରଇଲା । ଜେନ୍ତାରି କି ମସା ମିସା କଇଲା,  
“ସତଇସେ ମୁଇମିସା ଡରଡରି କରି ଡରଲିନି ।”

<sup>୨୨</sup> ମାତର ଏବେ ଆମେ ସିଅନ୍ ପରବତେ ଆସିଆତୁ । ସେଟା ଅଇଲାନି ସରଗେ  
ରଇବା ଜିରୁସାଲେମ୍ । ଜିବନ୍ ରଇବା ପରମେସରର ନଅରେ ଆଇଲୁ ଆତୁ  
। ଜନ୍ମଟାନେ କି ଅଜାର ଅଜାର ଦୁଡମନ୍ ଆରଡ । <sup>୨୩</sup> ପରମେସରର ପଶୁଆ  
ପିଲାମନ୍ ସାରଦାସଙ୍ଗ ରୁଣ୍ଡିରଇବା ଜାଗାଇ ଆମେ ଆଇଲୁଆତୁ । ତାକର ନାଉଁମନ୍  
ସରଗେ ଲେକାଅଇଲା ଆଟେ । ଆମେ ପରମେସରର ଲିଗେ ଆଇଲୁ ଆତୁ । ସେ  
ସବୁକେ ବିଚାର କରସି । ସେ ସିଦ୍ କରିରଇବା ଦରମଲକର ଆଡ଼ମାମନରଟାନେ  
ଆଇଲୁ ଆତୁ । <sup>୨୪</sup> ଆରି ନୁଆ ରାଜିନାମା ତିଆର୍ କରିରଇବା ଜିସୁକରିସଟର୍ ଲଗେ  
ଆଇଲୁଆତୁ । ସେ ତାର ବନି ଜରାଇରଇଲା । ସେଟା ଏବଲର୍ ବନିତେଇଅନି ନିକ  
ଆଟେ ।

<sup>୨୫</sup> ଜନ୍ମଟା ତମ୍ବକେ ପରମେସର କଇଲାନି, ନ ସୁନ୍ଲା ଲକରପାରା ଉଆ ନାଇ  
। କାଇକେବଇଲେ ପରମେସରର କାତା ନ ମାନଲାକେ ଆମର୍ ଆନିଦାଦିମନ୍  
ସିନୟ ପରବତେ ତଣ୍ଡ ପାଇରଇଲାଇ । ଜନ୍ ଲକ୍ ଆମ୍ବକେ ସରଗେଅନି କଇଲାନି,  
ସେ କାତା ଆମେ ନ ସୁନିକରି ଏଲାକଲେ, କେତେକ୍ ଅଦିକ୍ ତଣ୍ଡ ପାଇବୁ  
? <sup>୨୬</sup> କାଇକେବଇଲେ, ସିନୟ ପରବତେ ପରମେସର କାତା ଅଇଲାବେଲେ,  
ଦରଡନି ତୁଲ୍‌ବୁଲିଗାଲା । ମାତର ସେ ଏବେ କାତା ଦେଇ କଇଲା ଆଟେ, “ମୁଇ  
ଆରିତରେକ୍ ଦରଡନିକେ ତୁଲ୍‌ବୁଲାଇବି । ଅବ୍‌କା ଦରଡନିସେ ନଏଁ, ଆକାସେ  
ରଇବା ସବୁଜାକକେ ମିସା କରବି ।” <sup>୨୭</sup> ଜେଡେବେଲେ ସେ ଆରିତରେକ୍ ବଲି  
କଇରଇଲା, ତାର ଅରଡ୍ ଅଇଲାନି ତିଆର୍ କରିରଇବା ସବୁଜାକ ତୁଲ୍‌ବୁଲାଇ କରି  
ସବୁଜାକ ଦାରିଜାଇସି । ଜେନ୍ତାରି କି ନ ତୁଲ୍‌ବୁଲ୍‌ବାଟାସେ ରଇସି ।

<sup>୨୮</sup> ସେଟାରପାଇ ଆମେ ପରମେସରକେ ଦନିଅବାଦ୍ ଦେଉଁ । କାଇକେବଇଲେ  
ସେ ଆମ୍ବକେ ସାସନ୍ କଲାନି । ଆରି ତାର ରାଇଜ୍ ନ ତୁଲ୍‌ବୁଲେ । ତାକେ ସାରଦା  
କରାଇବାକେ ଡରିକରି ସନ୍‌ମାନ୍ ସଙ୍ଗ ଉପାସନା କରୁ । <sup>୨୯</sup> କାଇକେବଇଲେ ଆମର୍  
ପରମେସର ସବୁକେ ପଡାଇକରି କୁରୁପ୍‌ନାସ୍ କରବା ଜଇପାରା ଆଟେ ।

## ୧୩

ପରମେସରକେ ସନ୍ତୁସକରୁ

<sup>୧</sup> କିରିସଟଟାନେ ମିସିବତି ରଇବା ବିସ୍‌ବାସି ବାଇବଇନି ପାରା ଆଲାଦ୍ କରାକରି  
ଅଇ ରୁଆ । <sup>୨</sup> ନ ଚିନ୍‌ଲା ଲକ୍‌ମନ୍‌କେ ମିସା ତମର୍ ଗର୍‌ମନ୍‌କେ ଡାକିନିଆ ।  
କାଇକେବଇଲେ କେତେଲକ୍ ନାଜାନିକରି ସେନ୍ତାରି ଦୁଡମନ୍‌କେ ଡାକିନେଲାଇ ।  
<sup>୩</sup> ବନ୍ଦି ଗରେ ରଇବା ଲକ୍‌ମନ୍‌କେ ତମେ ତାକର୍ ସଙ୍ଗ ରଇଲାପାରା ଦୟା ଦେକାଆ  
। ଦୁକ୍‌କସଟ୍ ଅଇରଇବା ଲକ୍‌ମନ୍‌କେ ନିଜେ ତାକରପାରା ଦୁକ୍‌କସଟ୍ ପାଇଲୁନି  
ବଲି ଏଡାଆ ।

<sup>୪</sup> ବିବା ଅଇବାଟା ସବୁଲକ୍ ନିକ ବଲି ମାନଡ୍ । ସବୁ ମାଇଜିମନ୍‌ସ୍ ମନ୍ ଗଟେକ୍  
ମାଇଜି ଆରି ଗଟେକ୍ ମନ୍‌ସ୍ ଅଇକରି ସଡ଼ସଙ୍ଗ୍ ରଇବାରୁଆଟେ । ଜନ୍ ଲକ୍‌ମନ୍  
ବେସିଆ କାମ୍ କରି ରଇବାଇ, ସେମନ୍‌କେ ପରମେସର ତଣ୍ଡ ଦେଇସି ।

<sup>୫</sup> ତାବୁ ଆସା ଅଇକରି ତାରପଟେ ପାଲାଆ ନାଇ । କାଇକେବଇଲେ ପରମେସର  
କଇଲାଆଟେ, “ମୁଇ ତମ୍ବକେ କେବେ ନ ପାସ୍‌ରି କି ନ ଚାଡି ।” <sup>୬</sup> ତେବର୍‌ପାଇ ଆମେ  
ସାସ୍ ଦାରି କଇପାରବୁ

ପରମେସର ଆକା ମକେ ସାଇଜ କରସି,

ମୁଇ କେବେ ନ ଡରି

ଲକ୍‌ମନ୍ ମକେ କାଇଟା କରି ନାପାରଡ୍ ।

୭ ଜନ୍ ଲକ୍ଷ୍ମୀନ ଡମ୍ବକେ ମୁକ୍ତିଅ ଇସାବେ ତାକିନେଇ ପରମେସରର ବାକିଅ ସିକାଇତେରଇଲା, ସେମାନର ବିସଇ ବାବିଦେକା । ସେମାନ କେନ୍ତ୍ର ଜିଲଲା ଆରି ମଲାଇ ? ତମେ ତାର ପାରା ବିସବାସ କରା । 「କାଇକେବଇଲେ, ଜିସୁକିରିସଟ କେବେ ନ ବାଦଲେ । ସେ ଆଜିରପାଇ, କାଲିକରପାଇ, ଆରି ସବୁଦିନର ପାଇ ସମାନ ସେ ରଇସି । ୯ ତେବରପାଇ ଲକ୍ଷ୍ମୀନ ଡମ୍ବକେ ବିନ୍ ବିନ୍ ସିକିଆ ସୁନାଇକରି ସତ୍‌ବାଟେଅନି ବିନେ ନେବାକେ ରାଜି ଉଆନାଇ । କାଇକେବଇଲେ ପରମେସର ଜିବନ୍ ଦୁକାଇକରି ଦୟା ଦେକାଇଲାଟା ଆମର ମନକେ ଡାଟ୍ କରସି । କାଦିର ଲାଗି ରଇବା ନିୟମ୍ ମାନବାଟା ନଏ । ସେନ୍ତାରି ନିୟମ୍ ମାନବା ଲକ୍, ତେଇ ଅନି କାଇଟା ମିସା ପାଅଡ୍ ନାଇ ।

୧୦ ଜିଉଦିମନର ବେଦିଟାନେ ସେବା କରବା ପୁଜାରିମନ୍ ତେଇ ସରପି ଦେଇରଇବା କାଇଟା ମିସା କାଇବାରୁ ନଏ । ୧୧ ବଡ୍ ପୁଜାରି ପସୁମନର ବନି ନେଇକରି, ପାପର ବଲି ସରପିଦେବାକେ ଅଦିକ୍ ସୁକଲ୍ ଜାଗାଇ ନେଇସି । ମାତର ପଡିଜାଇରଇବା ପସୁମନର ଗାଗଡ୍ ତୁମ୍ ଗର ବାଇରେ ରଇସି । ୧୨ ସେଟାସେ ଜିସୁକେ ଅଇରଇଲା । କାଇକେବଇଲେ, ତାକେ ନଅରର ବାଇରେ ଲକ୍ଷ୍ମୀନ ମରାଇରଇଲା । ଆରି ତାର ବନି ଗୁଲାଇ ମୁନୁସ୍ ଜାତିର ପାପ ଦଇଦେଲା । ୧୩ ତେବରପାଇ ନଅରର ବାଇରେ ଜୁ । ଆରି ତାକେ ଆମେ ବିସବାସ କଲାଟପାଇ, ଲକ୍ଷ୍ମୀନ ଜେଡକି ନିୟା କଲାଟା ଆମେ ମୁରଟିକରି ରଉ ।

୧୪ କାଇକେ ବଇଲେ ଆମେ ସବୁଦିନ୍ ଏ ଜଗତେ ନ ରଉ । ମାତର ଆଇବା ଦିନମନ୍ଦକେ କେବେ ନ ସାରବା ଦିନଜାକ ରଇବା ନଅରେ ରଇବୁ ବଲି ଆମେ ଜାଗିଆରୁ । ୧୫ ତେବେ ଆସା । ଜିସୁକିରିସଟକେ ଦେଇକରି ଆମେ ସବୁବେଲେ ପରମେସରକେ ବଲି ସରପି ଦେଇତେ ରଉ । ସେଟା ଆମର ଗଣ୍ଡେଅନି ଆଇବା ଉପାସନା । ସେ ଆକା ମାପୁରୁ ବଲି ଆମେ କଉଁ । ୧୬ ନିକ କାମ୍ କରବାକେ ପାସରା ନାଇ । ଗଟେକ୍ ଲକ୍ ଆରି ଗଟେକ୍ ଲକ୍‌କେ ସାଇଜ କରା । କାଇକେବଇଲେ, ଏନ୍ତାରି ରଇବା ଚଲାଟଲୁଡି ପରମେସରକେ ସାରଦା କରାଇବା ଗଟେକ୍ ବଲି ।

୧୭ ତମର ମୁକ୍ତିଅ ଲକ୍ଷ୍ମୀନର କାତା ମାନିକରି ଆଦେସ୍ ଦେଲାଟା କରା । ସେମନ୍ ଜାଗୁଆଲ୍‌ମନର ପାରା ନ ତାକିକରି ତମର ଆଡ଼ମାମନ୍ଦକେ ଜତନ୍ କଲାନ୍ତି । କାଇକେବଇଲେ ସେମନ୍ଦକେ ତାକର କରରଇବା କାମ୍ ପରମେସର କେ ଇସାବ୍ ଦେବାକେ ପଡସି । ତମେ ଜଦି ତାକର କାତା ମାନସା, ସେମନ୍ ସାରଦା ସଙ୍ଗ୍ ସେବା କାମ୍ କରବାଇ । ତମେ ତାକର କାତା ନ ମାନଲେ, ସେମନ୍ ଦୁକ୍ ଅଇବାଇ । ତେବେ ତମକେ କାଇ ସାଇଜ ନଏ ।

୧୮ ଆମର ପାଇ ପାର୍ତନା କରତେରୁଆ । ଆମର ବିବେକ୍ ଆମେ କରରଇବା କାମ୍ ସତ୍ ବଲି ସାକିଦେଲାନ୍ତି । ୧୯ ମରପାଇ ମିସା ପାର୍ତନା କରା । ଜେନ୍ତାରି କି ପରମେସର ଦାପରେ ମକେ ତମରଲଗେ ପାଟାଇସି ।

### ସାରାସାରିର ପାର୍ତନା

୨୦ ଆମର ମାପୁରୁ ଜିସୁକେ ପରମେସର ମଲାତେଇଅନି ଉଟାଇଲା । ସେ ଗଟେକ୍ ଗଉଡ଼ପାରା ଆମକେ ଜାଗିରଇସି । ଆମେ ପରମେସର ସଙ୍ଗ୍ ସବୁଦିନପାଇ ଗଟେକ୍ ଅଇବାଟାକେ ତାର ବନି ଜରାଇଲା । ୨୧ ଜିସୁକିରିସଟର ଲାଗି ସାନ୍ତି ଦେବା ପରମେସର ତମକେ ସବୁ ରକାମର ସାଇଜ ଦେଅ । ଜେନ୍ତାରି କି ସେ ମନ୍ କଲାଟା ତମେ ପୁରାପୁରୁନ୍ କରସା । ଆମେ କରବା କାମ୍ ତାକେ ସାରଦା ଦେଅ । ଜିସୁକିରିସଟକେ ଆମେ ନ ସାରବା ଦିନଜାକ ତାକ୍‌ପୁଟା ଦେଉଁ ।

### ସେସ୍ କାତା

୨୨ ଏ ମର ବାଇବଇନିମନ୍, ମୁଇଁ ତମ୍ଭେ ବାରୁଜିଆ କଲିନି, ମୁଇଁ ତମ୍ଭେ କଇଲି ।  
ଏ ସବୁ କାତା ମୁରୁଚିକରି ସୁନା । କାଇକେବଇଲେ, ଏ ଚିଟି ବେସି ତେଙ୍ଗ ନାଇ ।  
୨୩ ଆମର ବାଇ ତମତି ବନ୍ଦିଗରେ ଅନି ମୁକ୍ତି ଆଚେବଲି ଜାନସା । ସେ ଜଦି ସେ  
ଦାପରେ ଆଇସି, ତେବେ ମରସଙ୍ଗ ତାକେ ଡାକିଆନ୍ବି ।

୨୪ ତେଇ ରଇବା ତମର ମୁକ୍ତି ଲକ୍ଷମନ୍ଦେ ଆରି ପରମେସରର୍ ସବୁ  
ଲକ୍ଷମନ୍ଦେ ମର ଜୁଆର ଜାନାଇ ଦିଆସ୍ । ଇଚାଲିତେଇ ମର ସଙ୍ଗ ରଇବା ଆମର  
ବାଇବନିମନ୍ ମିସା ଜୁଆର ଜାନାଇଲାଇନି ।

୨୫ ପରମେସର ତମ୍ଭେ ସବୁଲକ୍ଷେ ତାର ଜିବନ୍ ଦୁକାଇ ଦୟା ଦେକାଅ ।



## ଜାକୁବଙ୍କ ପତ୍ର ଜାକୁବ ଲେକିରଇବା ଚିଠି ଏ ବଇରୁ ବିସଇ ଜାନବାଟା

ଜାକୁବ୍ ବଇ ଜାକୁବ୍ ନାଉଁ ଡାକ୍ତେରଇବା ଗଟେକ୍ ଲକ୍ ଲେକିଆଟେ । ଦେକବାକେ ଗାଲେ ଏ ଜାକୁବ୍ ଜିସୁକିରିସ୍ତର୍ ବାଇ ରଇଲା । ଜେ କି ଆଦିଅ ମଣ୍ଡଲିର୍ ଗଟେକ୍ ନେତା ରଇଲା ଆରି ଜିରୁସାଲମ୍ ସବାର୍ ଗଟେକ୍ ମେମର୍ ରଇଲା ପେରିଡ୍ ୧୫:୧୩ । ପେରିଡ୍ ପାଉଲ୍ ମିସା ଜାକୁବ୍‌କେ ମଣ୍ଡଲିର୍ ମୁଲ୍ ଡେଲି ବଲି ଡାକ୍ତେରଇଲା ଗାଲାଡିୟ ୨:୯ ।

ଜାକୁବ୍ ବଇ ଜିସୁକିରିସ୍ତର୍ ଜନମ୍ ଅଇକରି ୫୦ ବରସ୍ ପଟେ ଲେକାଅଇଆଟେ ବଲି ପଣ୍ଡିତମନ୍ ବିସ୍‌ବାସ୍ କରବାଇ । ଜାକୁବ୍ ଜିରୁସାଲମ୍ ମଣ୍ଡଲିର୍ ନେତା ରଇଲା । ତେବର୍‌ପାଇ ସେ ଡେଇ ବାସାଅଇକରି ରଇଲାବେଲେ ସେ ଏ ବଇ ଲେକିରଇଲା । ଜାକୁବ୍ ବିନ୍ ବିନ୍ ଦେସେ ଚିନ୍‌ବିନ୍ ଅଇଜାଇରଇବା ବାର୍‌ଟା କୁଟୁମ୍‌କେ ଡାକ୍ ବଇଟାନେ ନିଜେ ଜାନାଇଅଇଆଟେ ୧:୧ ।

ଜାକୁବର ଏ ବଇ ସବୁ ବିସ୍‌ବାସିମନ୍ ନିଜେ ବାଇବାର୍ ବିସଇ ଆଟେ । ମାତର୍ ଜାକୁବ୍ ବାର୍‌ଟା କୁଟୁମ୍ ବିସଇ ନେଇକରି ସିଦା ସିଦା ଜିଉଦି ବିସ୍‌ବାସିମନ୍‌କେ ଲେକିଲାଆଟେ । କାଇକେବଇଲେ ଏ ବଇ ଚିନ୍‌ବିନ୍ ଅଇଜାଇରଇବା ପଡ୍‌ବା ଲକ୍‌ମନ୍‌କେ କେଟାଇବା ବିସଇରେ ଜାନାଇଲାଜିନି ।

ଜାକୁବ୍ ବିସ୍‌ବାସ୍ ଆରି କରମର୍ ନିକ ମିସିରଇବା ବିସଇ ଜାନାଇଲାଜିନି ଜେ, ସଡ୍ ବିସ୍‌ବାସ୍ କରବା କରମ୍‌ଡେଇ ଜାନାପଡ୍‌ସି ୩:୧-୧୨ ।

ଦେକିଟାଇଁ କରି କାତା କଇବାକେ ମିସା ଜାଗ୍‌ରଡ୍ କରାଇଲାଜିନି ।

### ଏ ବଇ ବିଡ୍‌ରେ ରଇବାଟା

୧. ଜାକୁବ୍ ଡାକ୍ ଚିଠି ପଡ୍‌ବା ଲକ୍‌ମନ୍‌କେ ଜୁଆର୍ ଜାନାଇଆଟେ । ୧:୧
୨. ସେ ବିସ୍‌ବାସିମନ୍‌କେ ଦୁକ୍ ଅଇଲାବେଲେ ଡାକ୍‌ସଙ୍ଗେ ରଇବାକେ ସାଆସ୍ ଦେଇଆଟେ । ୧:୨-୨୭
୩. କରମ୍ କରି କେନ୍ତାରି ବିସ୍‌ବାସ୍ ଦେକାଇ ଅଇସି, ସେ ବିସଇରେ କଇଆଟେ । ୨:୧-୨୬
୪. ବାକିଅ କେନ୍ତାରି ଅଦିକ୍ ବପୁ ଅଇସି, ସେଟା ସେ ଜାନାଇଆଟେ । ୩:୧-୧୨
୫. ଜାକୁବ୍ ପର୍‌ମେସରର୍ ଗିଆନ୍ ଜଗତର୍ ଗିଆନ୍ ଟାନେ ଅନି ବିନ୍ ଆଟେ ବଲି ଚିକି ନିକି ଜାନାଇଆଟେ । ୩:୧୩-୪:୧୦
୬. ପଟେ ସେ ପଡ୍‌ବା ଲକ୍‌ମନ୍‌କେ ବଡ୍‌ପନ୍ ନ ଅଇବାକେ ଜାଗ୍‌ରଡ୍ କରାଇଲାଜିନି । ୪:୧୧-୫:୬
୭. ସାରାସାରି ଜାକୁବ୍, କେଡେଟା ସାନ୍ ସାନ୍ ମାନ୍‌ବା ଆଦେସ୍ ଦେଇକରି ଡାକ୍ ଲେକା ସାରାଇଆଟେ । ୫:୭-୨୦

୧ \*ମୁଇ ଜାକୁବ ମାପରୁ ଜିସୁକିରିସ୍ତ ଆରି ବାବା ପର୍‌ମେସରର୍ ଗଟେକ୍ ଗତିଦାଙ୍ଗଡା ।

ଗୁଲାଇ ଜଗତେ ଚିନ୍‌ଚଡ୍‌ର୍ ଅଇଜାଇରଇବା ପର୍‌ମେସରର୍ ବାର୍‌ଟା କୁଟୁମର୍ ଲକ୍‌ମନ୍‌କେ ମୁଇ ଜୁଆର୍ ଜାନାଇକରି ଏ ଚିଠି ଲେକିଲିନି ।

ବିସ୍‌ବାସ୍ ଆରି ଗିଆନ୍

\* ୧:୧ ୧:୧ ମାଡିଉ ୧୩:୫୫; ମାର୍କ ୬:୩; ପେରିଡ୍ ୧୫:୧୩; ଗାଲାଡିୟ ୧:୧୯

୨ ଏ ମର ବାଇବଇନିମନ୍ ଜିବନ୍ ବିତାଇଲାବେଳେ ତମର ବିସ୍‌ବାସ ଡାଁଟ୍ ଆଚେ କି ନାଇ ବଲି, ଜେଡ଼କି ଦୁକ୍ କସ୍‌ଟର ପରିକା ଆଇଲେ, ଏଟା ଗଟେକ୍ ନିକ କରମର ବିସଇ ବଲି ଏତାଆ । ୩ କାଇକେବଇଲେ, ଏନ୍ତାରି ଦୁକ୍ କସ୍‌ଟ ଆଇଲେ ତମର ବିସ୍‌ବାସ ପରିକାକରି ଡାଁଟ୍ ଆଚେବଲି ଦେକାଇସି । ଆରି ମୁରଟ୍‌ବାଟା ଅଦିକ୍ ଅଦିକ୍ ଅଇସି ବଲି ତମେ ଜାନିଆଟାସ୍ । ୪ ତମେ ସାରାସାରିଜାକ ମୁରଟିକରି ରଇଲେ, କାଇ ବିସଇଟାମେ ମିସା ଉନା ନ ଅଇକରି ପୁରାପୁରୁନ୍ ସିଦ୍ ଅଇସା । ୫ ମାତର୍ ତମର ବିତ୍‌ରେ ଜଦି କାକେ ଗିଆନ୍ ଉନା ରଇ, ଗିଆନ୍ ପାଇବାର୍‌ଆଲେ ପର୍‌ମେସର୍‌କେ ମାଜା । ସେ ତାର୍ ଆଡ୍ ମେଲାଇକରି, ଦସ୍ ନ ଦାରି ସବୁକେ ଦାନ୍ କର୍‌ସି । ୬ ମାତର୍ ସେ ଅଇସି କି ନ ଅଏ ବଲିକରି ନ ବାବି, ବିସ୍‌ବାସର୍ ସଙ୍ଗ୍ ପାର୍‌ତନା କର୍‌ବାର୍‌ଆଚେ । କାଇକେ ବଇଲେ ଜେ ଅଇସି କି ନ ଅଏ ବଲିକରି ବାବ୍‌ସି, ସେ ପବନ୍‌ସଙ୍ଗ୍ ଇଣ୍ଡ୍‌ତେ ରଇବା ସମ୍‌ଦୁରର୍ ଉଲ୍‌କା ପାନି ପାରା ଗଟେକ୍ ଲକ୍ । ୭ ସେ ରକାମ୍ ଲକ୍ ମାପ୍‌ରୁର୍ ଟାନେଅନି କାଇଟା ଆଲେ ପାଇବି ବଲିକରି ଆସା ନ କର । ୮ ସେ ତା, ଦୁଇମନିଆ ଲକ୍, ସେ କର୍‌ବା ସବୁ କାମ୍‌ଟାମେ ତବିର୍ ନ ରଏ ।

**ସାଉକାର୍ ଆରି ଅରକିଡ଼**

୯ ଗଟେକ୍ କାକୁର୍‌ତି ଅଇ ରଇବା ବିସ୍‌ବାସି ବାଇକେ ପର୍‌ମେସର୍ ସାଉକାର୍ କଲେ ସେ ସାର୍‌ଦାଅ । ୧୦ ସେନ୍ତାରିସେ ଗଟେକ୍ ସାଉକାର୍ ବିସ୍‌ବାସିକେ ସେ ଅରକିଡ଼ କଲେ, ସେ ମିସା ସାର୍‌ଦାଅ । କାଇକେବଇଲେ ସାଉକାର୍ ଲକ୍ ପଦାର୍ ଗାଁସର୍ ପୁଲ୍ ପାରା ଜାଉଲି ଜାଇସି । ୧୧ ଜେନ୍ତି କି ବେଲ୍ ଉଦିକରି ବେସି ତାତିକଲେ ଗାଁସ୍ ସୁକିଜାଇସି, ତାର୍ ପୁଲ୍ ଜଡିଜାଇସି ଆରି ତାର୍ ବାନିମୁର୍‌ତି ନସି ଜାଇସି । ସେନ୍ତାରିସେ, ସାଉକାର୍ ଲକ୍‌ମନ୍ କାମ୍ କରି କରି ମରିଜିବାଇ ।

**ପରିକା ଆରି ଦୁକ୍‌କସ୍‌ଟ**

୧୨ ଜନ୍ ଲକ୍‌ମନ୍ ପରିକା ଆଇଲେ ମିସା ମୁର୍‌ଟି କରି ରଇବାଇ, ସେମନ୍ କେତେକ୍ ନିକ କରମର ଲକ୍ । କାଇକେବଇଲେ ସେ ସବୁ ପରିକାଇ ସେମନ୍ ଡାଁଟ୍ ସଙ୍ଗ୍ ଟିଆଅଇଲାପଚେ, ପୁରୁସ୍‌କାର୍ ପାଇବାଇ । ପର୍‌ମେସର୍ ତାର୍ ନିଜର୍ ଲକ୍‌ମନ୍‌କେ ଜନ୍ ଜିବନ୍‌ର୍ ମୁକୁର୍ ଦେବାକେ ସପଡ଼ କଲାଆଚେ, ସେମନ୍ ସେଟା ପୁରୁସ୍‌କାର୍ ଇସାବେ ମିଲାଇବାଇ । ୧୩ କାକେ ମିସା ଦୁକ୍‌କସ୍‌ଟ ପାଇବା ପରିକା ଆଇଲେ, ଏ ପରିକା ପର୍‌ମେସର୍ ପାଟାଇଆଚେ ବଲିକରି କଇବାର୍ ନାଇ । କାଇକେବଇଲେ ପର୍‌ମେସର୍‌କେ କେ ମିସା ପରିକାକରି ନାପାଚେ । ଆରି ସେ ନିଜେ କାକେ ପରିକା ନ କରେ । ୧୪ ମାତର୍ ଗଟେକ୍ ଲକ୍‌ର୍ କରାପ୍ ଗୁନ୍‌ଚଲନ୍ ତାକେ ପରିକା କରାଇ ଅଇବାକେ ଡାକିନେଇସି । ୧୫ ତାର୍‌ପଚେ ତାର୍ କାରାପ୍ ଗୁନ୍‌ଚଲନେଅନି ପାପ୍ ବାରଇସି । ଆରି ପାପ୍ ଅଦିକ୍ ଅଦିକ୍ ବଡ଼ିଜାଇକରି ମରନ୍ ଆଇସି ।

୧୬ ଏ ମର ଆଲାଦର୍ ବାଇବଇନିମନ୍, ତମେ ନାଡ଼ାଇଉଆ ନାଇ । ୧୭ ସବୁ ନିକ ଆରି ସିଦ୍ ରଇବା ଦାନ୍ ପର୍‌ମେସର୍ ଦେଲା ଆଚେ । ବାଦ୍‌ଲେ ଉଜଲ୍ ଅଇବା ସବୁଜାକ ସେ ଡିଆର୍‌କଲା ଆଚେ । ସେଟାମନ୍ ବାଦ୍‌ଲେ ବୁଲ୍‌ବାବେଲେ ବାଦ୍‌ଲ୍‌ସି ଆରି ଟାଇଁ ଏନେତେନେ ଅଇସି । ମାତର୍ ପର୍‌ମେସର୍ ଅଲପ୍ ମିସା ସେନ୍ତାରି ନ କରେ । ୧୮ ତାର୍ ସଡ଼ ବାକିଅ ଆମ୍‌କେ ଜାନାଇକରି ତାର୍‌ତେଇଅନି ଆମ୍‌କେ ଜିବନ୍ ଦେବାକେ ସେ ମନ୍ କଲା । ଜେଡ଼କି ସବୁ ବିସଇ ସେ ଡିଆର୍‌କଲା ମିସା ଆମେ ଅବ୍‌କା ତାର୍‌ପାଇସେ ଅଇବାକେ ସେ ମନ୍ କଲା ।

**ସୁନ୍‌ବାଟା ଆରି କାମ୍ କର୍‌ବାଟା**

୧୯ ଏ ମର ଆଲାଦର୍ ବାଇବଇନିମନ୍, ମନେ ରକିରୁଆ । ତମେ ଆଗ୍‌ତୁ ନିକକରି ସୁନା । ମାତର୍ ବାବିଟିକ୍‌କରି କାତା କୁଆ । ଦାପ୍‌ରେ ରିସା ଉଆନାଇ ।

୨୦ କାଇକେବଇଲେ ମୁନୁସର ରିସାର ଲାଗି ପରମେସର ସୁକଲସଙ୍ଗ ଜଜ୍ଜନା କଲାଟା ନସିଜାଇସି । ୨୧ ସେଟାର ପାଇ ତମର ଚଲାଚଲ୍ଲତି ଟାନେଅନି ବାରଇବା ସବୁ ରକାମର କାରାପ୍ ଅବିଆସ୍ ଚାଡ଼ିଦିଆସ୍ । ପରମେସରକେ ନିଜରୁ ମନ୍ ସରପି ଦିଆସ୍ । ତମର ମନ୍ ବିତ୍ରେ ସେ ଜନ୍ ବାକିଅ ରପିଆଟେ ସେଟାକେ ଦିଆନ୍ ଦିଆ । ସେ ବାକିଅ ତମକେ ରକିଆ କରସି ।

୨୨ ବାକିଅ ଜନ୍ଟା କରା ବଲି କଇଲାନି, ସେଟା କରା । ଅବକା ସୁନିକରି ରଇବା ଲକ୍ମନରପାରା ଉଆ ନାଇ । ଏନ୍ତାରିକଲେ ତମେ ନିଜେ ନାତାଇ ଅଇଲାସିନି । ୨୩ ଜନ୍ଲକ୍ ପରମେସରର ବାକିଅ ଅବକା ସୁନ୍ସି, ମାତର ତେଇର୍ କାତା ନ ନାମେ, ସେ ତାର ମୁସ୍ ରଇବା ଆରଲା, ଦରପନେ ଦେକ୍ବା ଲକ୍ ପାରା । ୨୪ ସେ ନିକ କରି ନିଜର ଟାଇ ଦେକି ଅଇତେରଇସି । ମାତର ତେଇଅନି ଉଟିଗାଲା ପଟେ ତାର ବାନିମୁରତି ପାସରି ଜାଇସି । ୨୫ ମାତର ମୁନୁସର ମୁକ୍ତି ପାଇ ଗଟେକ୍ ପୁରାପୁରୁନ୍ ନିୟମ୍ ଆଟେ । ଜେ ସେ କାତା ସୁନିକରି ନ ପାସରେ, ଆରି ତାରଲାଗି ସବୁ ମନ୍ପରାନ୍ ଦେଇକରି ନିଜର ଜିବନ୍ତେଇ ମାନିକରି ରଇସି ବଇଲେ ପରମେସର ତାର କରିରଇବା ସବୁ କାମ୍ ମଙ୍ଗଲ୍ କରସି ।

୨୬ କେ ଜଦି ମୁଇ ନିଜେ ଗଟେକ୍ ଦରମ୍ ଲକ୍ ବଲି ବାବ୍ଲାନି, ସେ ଜଦି ତାର ନିଜର ଜିବ୍ ଜାଗରତା କରେ ନାଇ, ସେ ନିଜେ ଆକା ନାତାଇ ଅଇଲାନି । ତାର ରିତିନିତି କରବାଟା ଚୁଟାଆଇସେ । ୨୭ ପରମେସର ଦେକ୍ବା ଇସାବେ ଜନ୍ ରିତିନିତି ସଡ଼ ଆରି ନିକ, ସେଟା ଅଇଲାନି ଦୁକେ ରଇବା ଚୁରାଚୁରି ପିଲାମନ୍ ଆରି ରାଣ୍ଡିଜୁଣ୍ଡିମନ୍ ଜତନ୍ କରବାଟା । ପଟେ ଜଗତର୍ ଜଞ୍ଜାଲେଅନି ମୁକଲ୍ବାଟା, ଜେନ୍ତାରିକି ସେ ସବୁ ତାକେ ନ ନସାଏ ।

## ୨

ଲକ୍ ଦେକି କରବା କାମେ ଜାଗରତ

୧ ଏ ବାଇବଇନିମନ୍ ଆମର ତାକ୍ପୁଟା ମାପୁରୁ ଜିସୁ କିରିସ୍ଟକେ ବିସ୍ବାସ୍ କଲାଋଲାଗି, ଲକ୍ମନର ଅଲ୍ଗା ପିନ୍ଦାଅତା ଦେକିକରି, ନିଜର ଚଲାଚଲ୍ଲତି ବାଦ୍ଲାଇବାଟା ଟିକ୍ ନାଇ । ୨ ଜଦି ସବାଇ ଗଟେକ୍ ଲକ୍ ସୁନାର ମୁନ୍ଦି ଆରି ଜକ୍ମକି ଜାଇତେରଇବା ବସ୍ତର ପିନ୍ଦିକରି ତମରଲଗେ ଆଇସି, ଆରି ଗଟେକ୍ ଲକ୍ ମୁରକି ରଇ ଚିରୁରୁଅଇରଇବା ବସ୍ତର ପିନ୍ଦିକରି ଆଇସି । ୩ ଆରି ତମେ ସୁନ୍ଦର ବସ୍ତର ପିନ୍ଦିଆସି ରଇବା ଲକ୍କେ ଅଦିକ୍ ସନ୍ମାନ୍ ଦେଇକରି କଇସା, “ଆସା ଏ ନିକ କୁରତି ଉପରେ ବସା ।” ମାତର ଅରକିଡ଼ ଲକ୍କେ କଇସା “ତେଇ ଜାଇ ଟିଆ ଅ ।” ନଇଲେ “ତଲେ ବସ୍ ।” ବଲିକରି କଇସୁ । ୪ ସେନ୍ତାର ଆଲେତା ତମେ ନିଜର ନିଜର ବିତ୍ରେ ବଡ଼ସାନ୍ ବଲିକରି ଅଲ୍ଗା ଇସାବେ ଦେକ୍ଲାସିନି । ଆରି କାରାପ୍ ଇସାବେ ମୁ ଦେକି, ବିଚାର କଲାସିନି ।

୫ ଏ ମର ଆଲାଦର ମଇତରମନ୍ ସୁନା, ପରମେସର ଏ ଜଗତର ଅରକିଡ଼ ଲକ୍ମନକେ ବାଟି ଆଟେ । ସେମନ୍ ତାକେ ବିସ୍ବାସ୍ କରବାଇ ଆରି ତାର ରାଇଜେ କେଟ୍ବାଇ । ତାକେ ଆଲାଦକରବା ସବୁ ଲକ୍କେ ସେ ରାଇଜ୍ ଦେବିବଲି କାତା ଦେଏ ନାଇ କି ? ୬ ମାତର ତମେ ଅରକିଡ଼ ଲକ୍ମନକେ ସନ୍ମାନ୍ ଦିଆସ୍ ନାଇ । ସାଉକାର ଲକ୍ମନସେ ତମକେ କସ୍ଟ ଦେଲାଇନି । ସେମନ୍ସେ ତମକେ ବିଚାରନା ଜାଗାଇ ଜିକି ନେଲାଇନି । ୭ ତମକେ ଜନ୍ ନାଉଁ ଜିସୁ କିରିସ୍ଟ ଦିଆଅଇଆଟେ, ସେ ନାଉଁ ନେଇକରି ନିନ୍ଦା କଲାଇନି ।

୮ ନିଜ୍ଜେ ଆଲାଦ୍ କଲାପାରା ବିନ୍ ଲକ୍ମନକେ ଆଲାଦ୍ କରା । ସାସ୍ତରେ ଲେକା ଅଇରଇଲାପାରା ପରମେସରର ରାଇଜର୍ ଏ ନିୟମ୍ ଜଦି ତମେ ମାନ୍ସା,

ସେନ୍ତାର୍ ଆଲେ ଟିକ୍ କଲାସ୍‌ନି । ୯ ମାତର୍ ତମେ ଜଦି ବଡ଼ ସାନ୍ ଦେକ୍‌ଲାସ୍‌ନି, ପାପ୍ କଲାସ୍‌ନି । ଆରି ସେ ରିଡିନିଡିର୍ ଲାଗି ଦସି ବଲାଇ ଅଇଲାସ୍‌ନି । ୧୦ କାଇକେବଇଲେ ଜେ ମିସା ସବୁ ନିଅମ୍ ମାନିକରି ଗଟେକ୍ ନିୟମ୍ ଚାଡ଼ିଦେଲେ, କାଇ ନିୟମ୍ ନ ମାନିଲା ଲକର୍ ପାରା ଦସିଅଇ ଡଣ୍ଡ ପାଇସା । ୧୧ କାଇକେବଇଲେ ପର୍ମେସର୍ କଇଲାଆତେ “ତମେ ବେସିଆ କାମ୍ କରବାରନାଇ, ଆରି ନର୍ ମାରବାର ନାଇ” ବଲିକରି । ତେବେ ତମେ ଜଦି ବେସିଆ କାମ୍ ନ କରି, ଲକ୍‌ମନ୍‌କେ ମାରସା, ତେବେ ତାର୍ ନିଅମ୍ ମାନାସ୍ ନାଇ । ୧୨ ପର୍ମେସର୍ ବିଚାରନା କରସି ବଲି ଜାନିକରି ସେନ୍ତାରି କାତା କଇ କାମ୍ କରି ଦେକାଆ । ଜନ୍ ନିୟମ୍ ଆମ୍‌କେ ମୁକ୍‌ଲାକ୍‌ସି, ସେ ନିୟମ୍ ଇସାବେ ଆମ୍‌କେ ବିଚାରନା କରସି । ୧୩ କାଇକେବଇଲେ ଜନ୍‌ଲକ୍ ବିନ୍ ଲକ୍‌କେ ଦୟା ନ ଦେକାଏ, ପର୍ମେସର୍ ବିଚାରନା କରବାବେଲେ ତାକେ ମିସା ଦୟା ନ ଦେକାଏ । ଜନ୍ ଲକ୍‌ମନ୍ ବିନ୍ ଲକ୍‌ମନ୍‌କେ ଦୟା କରିଆତେ, ସେମନ୍ ବିଚାରନାଟାନେ ଡରବାର ନାଇ ।

**ବିସ୍‌ବାସ୍ ଆରି କାମ୍**

୧୪ ଏ ମର୍ ବାଇବଇନିମନ୍, ଜଦି ଗଟେକ୍ ଲକ୍ ମୁଇ ବିସ୍‌ବାସ୍ କଲିନି ବଲି କଇସି । ମାତର୍ ତାର୍ କାମ୍ କଲାଟାନେ ସେଟା ନ ଡିସେ ବଇଲେ, ତାର୍ ପାଇ କାଇ ମୁଲିଅ ନାଇ । ଏନ୍ତାରି ବିସ୍‌ବାସ୍ ତାକେ କାଇ ମୁକ୍ତି ଦେଇ ନାପାରେ । ୧୫ ଜଦି ଗଟେକ୍ ବିସ୍‌ବାସି ବାଇ କି ବଇନିକେ, ସେ ଦିନର୍ ପାଇ କାଇବାକେ କି ପିନ୍‌ବାକେ ନ ରଇଲେ, ୧୬ ତମର୍ ବିତ୍‌ରେ କେଆଲେ ଗଟେକ୍ ଲକ୍ ତାର୍ ଲଗେ ଜାଇ, ତକେ ପେଟ୍‌କେ କାଦି ଆରି ଗାଗଡ଼କେ ଲୁଗା ମିଲ ବଲି କଇସା । ତମେ ତାକେ ଲତାକେ ଲାଗ୍‌ବାଟା ନ ଦେଇ ଏନ୍ତାରି କଇଲେ କାଇ ଲାବ୍ ? ୧୭ ସେନ୍ତାରିସେ ଗଟେକ୍ ବିସ୍‌ବାସ୍ କରବା ଲକ୍ ତାର୍ ବିସ୍‌ବାସ୍ ସଙ୍ଗ୍ ନିକ କାମ୍ ମିସା ନ ଡିସ୍‌ଲେ ତାର୍ ବିସ୍‌ବାସ୍ ମରିଗାଲା ଆତେ ।

୧୮ ମାତର୍ କେ ଆଲେ ମକେ କଇସି, ଗଟେକ୍ ଲକ୍‌ର ବିସ୍‌ବାସ୍ ଆତେ ଆରି ଗଟେକ୍ ଲକ୍‌ର ନିକ କାମ୍ ଆତେ, ମୁଇ ତାକେ କଇବି ନିକ କାମ୍ ଚାଡ଼ି, ଗଟେକ୍ ଲକ୍‌କେ କେନ୍ତ୍ର ବିସ୍‌ବାସ୍ ଅଇସି ? ଅବ୍‌କା ବିସ୍‌ବାସ୍ କର୍‌ତେରଇବା ଲକ୍ ରଇଲେ ମକେ ଦେକାଆ । ମର୍ କରବା ନିକ କାମ୍ ସଙ୍ଗ୍ ମର୍ ବିସ୍‌ବାସ୍ ମୁଇ ଦେକାଇବି । ୧୯ ପର୍ମେସର୍ ଗଟେକ୍‌ସେ ଆତେବଲି ତମେ ବିସ୍‌ବାସ୍ କଲାସ୍‌ନି, ସେଟା ନିକ । ତୁମାମନ୍ ମିସା ସେନ୍ତାରି ବିସ୍‌ବାସ୍ କଲାକିନି ଆରି ଡରିକରି ଗଜ୍‌ଗଜି ଜିବାଇ । ୨୦ ମାତର୍ ଏ ନିଲ୍‌ଜାଇ ଲକ୍‌ମନ୍ ତମେ ବୁଜିନାପାରାସ୍, ଜଦି ଗଟେକ୍ ଲକ୍ ମୁଇ ବିସ୍‌ବାସ୍ କଲିନି, ବଲି କଇସି ଆରି ନିକ କାମ୍ ନ କରେ, ସେନ୍ତାର୍‌ଆଲେ ତାର୍ ବିସ୍‌ବାସ୍ କରବାଟା ତୁଟାଇସେ । ୨୧ ଆମର୍ ପୁର୍‌ବର୍ ଆନିଦାଦି ଅବ୍‌ରାଆମ୍ କେ ଦେକା, ପର୍ମେସର୍ ତାକେ ଦରମ୍ ଲକ୍ ବଲି ଡାକ୍‌ଲା । ସେଟା ତାର୍ ନିକ କାମ୍ ପାଇ । ଜେତେବେଲେ ନିଜର୍ ପିଲା ଇସାକ୍‌କେ ବେଦିଟାନେ ବଲି ଦେବାବେଲେ ନେଇରଇଲା । ୨୨ ତମେ ଦେକ୍‌ଲାସ୍‌ନିଜେ, ତାର୍ ବିସ୍‌ବାସ୍ ଆରି କରମ୍ ମିସିକରି ରଇଲା । ସେ କରିରଇବା କରମର୍ ଲାଗି ବିସ୍‌ବାସ୍ ସିଦ୍ ଅଇଲା । ୨୩ ଏଟାର୍ ଲାଗି ଦରମ୍ ସାସ୍‌ତରର୍ ଏ ବାକିଅ ପୁରାପୁରୁନ୍ ଅଇଲା । ଅବ୍‌ରାଆମ୍ ପର୍ମେସର୍‌କେ ବିସ୍‌ବାସ୍ କଲା । ତାର୍ ବିସ୍‌ବାସର୍ ଲାଗି ପର୍ମେସର୍ ଦେକ୍‌ବା ଇସାବେ ଦରମ୍ ଲକ୍ ବଲି ଏଜାଇଅଇଲା । ଆରି ଲକ୍‌ମନ୍ ତାକେ ପର୍ମେସର୍‌ର୍ ମଇତର୍ ବଲି ଡାକିରଇଲା । ୨୪ ଅବ୍‌କା ବିସ୍‌ବାସ୍ କଲେସେ ଗଟେକ୍ ଲକ୍ ଦରମ୍ ବଲି ନାମାଇଅଇ ନଏଁ, ମାତର୍ ତାର୍ କରବା ନିକ କାମର୍ ଲାଗି ଅଇସି । ଏଟା ତମେ ଦେକ୍‌ଲାସ୍‌ନି ।

୨୫ ସେନ୍ତାରିସେ ବେସିଆ ମାଇଜି ରାଆବକେ ମିସା ଅଇଲା । ସେ ଇସ୍ରାଏଲର୍ ଦେକାଦେକି କରବା ଲକ୍ମନକେ ଡାକିନେଲା ଆରି ବିନ୍ ବାଟେ ବାରଇଜିବାକେ ସାଇଜ କଲା । ସେ ଏନ୍ତାରି କଲାକେ ପର୍ମେସର୍ ଦେକ୍ବା ଇସାବେ ଗଟେକ୍ ଦରମ୍ ଲକ୍ ବଲି ଜାନାଇଅଇଲା ।

୨୬ ତେବେ, ଆଡ଼ମା ଚାଡ଼ିଗାଲେ ଲକ୍ମନର୍ ଗାଗଡ଼ ଜେନ୍ତ୍ରକି ମଲା ସମାନ୍, ସେନ୍ତାରିସେ ନିକ କାମ୍ ନ କଲେ, ବିସ୍ବାସ୍ ମିସା ମଲା ସମାନ୍ ଆଟେ ।

### ୩

ଜିବକେ ବାନ୍ଧି ସଙ୍ଗାଇବାଟା

୧ ଏ ମର୍ ବାଇବଇନିମନ୍, ତମର୍ ବିତ୍ରେ ବାକିଅ ସିକିଆ ଦେବା ଗୁରୁ ଅଦିକ୍ ଉଆ ନାଇ । ଜନ୍ଲକ୍ ବିନ୍ ଲକ୍ମନକେ ସିକାଇବାଇ ସେମନ୍ ଅଦିକ୍ ତଣ୍ଡ ପାଇବାଇ, ଏଟା ଜାନିରୁଆ । ୨ ଆମେ ସବୁ ତରକେତର୍ ବୁଲ୍ କଲୁନି । ମାତର୍ ଜେ ମିସା ତାର୍ କାତାବାର୍ତା କଇଲାବେଲେ ବୁଲ୍ ନ କରେ, ତେବେ ସେ ସିଦ୍ ଲକ୍ । ଆରି ସେ ତାର୍ ସବୁଜାକ ମିସା ଜାଗ୍ରଡ଼କରି ସଙ୍ଗାଇ ଆଟେ । ୩ ଗଟେକ୍ ଗଡ଼ାର୍ ବିସଇ ବାବିଦେକ୍ । ଜଦି ଗଡ଼ା ଆମର୍ କାତା ମାନ୍ବାର୍ ଆଟେ ବଇଲେ, ତାର୍ ଟଣ୍ଡେ ଲାଗନ୍ ଚାବାଇଲୁନି । ଜେନ୍ତାରିକି ଗଡ଼ାର୍ ଗୁଲାଇ ଗାଗଡ଼ ମିସା ବୁଲାଇକରି, ଆମେ ଜନ୍ବାଟେ ମନ୍ କରବୁ, ସେବାଟେ ନେଲୁନି । ୪ ସେନ୍ତାରିସେ ଗଟେକ୍ ବଡ଼ ପାନିଜାଜର୍ ବିସଇ ଚିନ୍ତା କରିଦେକା । ସେଟା ବେସି ବଡ଼ ରଇଲେ ମିସା ଜବର୍ ପବନ୍ ଆଇତେରଇଲେସେ ସେଟା ଚାଲାଇଅଇସି । ମାତର୍ ଗଟେକ୍ ଜାଜଗଲାଉ ସାନ୍ଟା ବୁଲାଇବା ଚକା ମାରିକରି ସେ ଜନ୍ତ୍ର ମନ୍ କରସି, ଜାଜ୍ ସେ ବାଟେ ଚାଲାଇ ନେଇସି । ୫ ସେ ରକାମ୍ ଆକା ଆମର୍ ଟଣ୍ଡେ ରଇବା ଜିବ୍ ମିସା ଆମର୍ ଗାଗଡ଼ର୍ ଗଟେକ୍ ସାନ୍ ଜିନିସ୍, ମାତର୍ ଏଟା ବେସି ବଡ଼ବଡ଼ କାତା କଇସି ।

ଗଟେକ୍ ତଙ୍ଗରର୍ ବିସଇ ବାବିଦେକା, ସେଟା ବଡେଟା ରଇଲେ ମିସା କଣ୍ଡେକ୍ ଜଇ ଇଙ୍ଗରା ଲାଗିକରି ସବୁ ପଡ଼ାଇଦେଇସି ।

୬ ସେନ୍ତାରି ଜିବ୍ ମିସା ଜଇପାରା, ଜିବ୍ ବିତ୍ରେ ମିଟ୍ଟାମନ୍ ବରଡ଼ିଅଇ ଆଟେ । ସେଟା ଆମର୍ ଗାଗଡ଼ ବିତ୍ରେ ବାସାଅଇ ଆଟେ । ଆମର୍ ଗୁଲାଇ ଗାଗଡ଼କେ କାରାପ୍ ଡାବିଦେଇସି । ଆମର୍ ଜିବନ୍ ଜଇଟାନ୍ ପଡ଼ାଇଲାପାରା ପଡ଼ାଇ ଦେଇସି । ଆରି ସେ ଜଇ ନରକେଅନି ଆଇସି ।

୭ କାଇକେବଇଲେ ସବୁ ରକାମର୍ ତଙ୍ଗରର୍ ଜିବ୍, ଉଡ଼ିବୁଲ୍ବାଟାମନ୍, ରାଜିବୁଲ୍ବାଟାମନ୍ ଆରି ପାନିତେଇ ରଇବାଟାମନ୍, ପୁର୍ବେଅନି ଲକ୍ମନ ସେଟାମନ୍କେ ମାନାଇକରି ଆଟଡ଼ । ୮ ମାତର୍ ଏବେଜାକ ଜିବକେ କେ ମିସା ମାନାଅଡ଼ ନାଇ । ତେଇ କାରାପ୍ ବିସଇ ପୁରୁନ୍ ଅଇଆଟେ । ସେ ତାର୍ ନିଜର୍ ମନ୍ କରବା ଇସାବେ ଜାଇସି । ଆରି ମରନ୍ ଡାକିଆନ୍ବା ବିସ୍ ବରଡ଼ି ଅଇଆଟେ । ୯ ଆମେ ଜିବ୍ ସଙ୍ଗ୍ ମାପୁରୁକେ ଆରି ବାବା ପରମେସର୍କେ ଦନିଅବାଦ୍ ଦେଲୁନି ଆରି ଏ ଜିବ୍ସଙ୍ଗ୍ ପର୍ମେସର୍ ତାର୍ପାରା ତିଆର୍ କରିରଇବା ମୁନୁସକେ ସାଇପ୍ ଦେଲୁନି । ୧୦ ଗଟେକ୍ ଟଣ୍ଡେଅନିସେ ଦନିଅବାଦ୍ ଦେବାଟା ଆରି ସାଇପ୍ ଦେବାଟା ବାରଇସି । ମର୍ ବାଇବଇନିମନ୍, ଏନ୍ତାରି ଅଇବାଟା ଟିକ୍ ନଏ । ୧୧ ଗଟେକ୍ ରୁଆବିଲେଅନି, ଗଲାପାନି ଆରି ନିର୍ମଲ୍ପାନି ବାରଇସି କି ? ନାଇ, ନ ବାରଏ । ୧୨ ଏ ମର୍ ବାଇବଇନିମନ୍, ତୁମ୍ରିଗଟେ ଜିବ୍ପଲ୍ ନ ପଲେ କି କାଇ ଅଙ୍ଗୁର୍ ମାଲେ ତୁମ୍ରି ନ ପଲେ । ସେନ୍ତାରିସେ ଗଟେକ୍ ଗଲାପାନି ବାରଇବା ରୁଆଇ ଅନି ନିର୍ମଲ୍ପାନି ନ ବାରଏ ।

ସରଗର୍ ଗିଆନ୍

୧୩ ତମର ବିତ୍ତରେ ଗିଆନି ଆରି ବୁଲୁଟିକ୍ ବଲି କଇବା ଲକ୍ ଆଚଡ୍ କି ? ତାର୍ ନିକକରି ଜିଇବାକାଇବାଟାନେଅନି ସେଟା ଦେକାଅ । ତାର୍ ଜିବନେ, ଗଟେକ୍ ଗିଆନି ରଇବା ଲକର୍ ଇସାବେ, ସବୁବିସଇ ସୁଆଲେ କଲାଆଚେ ବଲି ଦେକାଅ । ୧୪ ଜଦି ତମର ମନବିତ୍ତରେ ଛିଂସାତଲା, କପଦାର୍‌ବାଟା ଆରି ସବୁବେଲେ ନିଜର୍ ବିସଇ ଚିନ୍ତା କରବାଟା ରଇସି, ସେନ୍ତାଆଲେ ସେ ବିସଇଟାନେ ବଡ଼ପନ୍ ଉଆନାଇ । ଆରି ସଡ଼ ବିସଇ ବୁଲୁ ଆଚେବଲି କୁଆ ନାଇ । ୧୫ ଏନ୍ତାରି ଗିଆନି ପର୍‌ମେସରର୍ ଟାନେଅନି ନ ଆସେ । ସେଟା ଜଗତେଅନି ଆଇସି । ପର୍‌ମେସରର୍ ଆଡ଼ମା ନ ରଇବାଟାନେ ଅନି ଆଇସି । ଆରି ସେଟା ସଇତାନର୍ ଗିଆନେ ଅନି ଆଇସି । ୧୬ ଜନ୍ ଜାଗାଇ ଲକ୍‌ମନର୍ ବିତ୍ତରେ ଛିଂସା, ଆରି ନିଜର୍ ବିସଇସେ ଚିନ୍ତା କରବାଟା ରଇଲେ, ସେ ଜାଗାଇ ଲାଗାଲାଗି ଆରି ସବୁ ରକାମର୍ କାରାପ୍ କାମ୍ ରଇସି । ୧୭ ମାତର୍ ପର୍‌ମେସର୍ ସିକାଇବା ଗିଆନି ଜନ୍‌ଲକ୍‌ମନ୍କେ ଆଚେ, ତାକର୍ ଗୁନ୍‌ତଲନେ ସେମନ୍ ସୁକଲୁ ଅଇରଇବାଇ, ସାନ୍ତ୍ରସଙ୍ଗ୍ ରଇବାଇ, ସୁଆଲେ ରଇବାଇ, ଦୟା ଦେକାଇବାଇ, ଜିବନ୍‌ଦୁକାଇବାଇ ଆରି ତାକର୍ ସବୁ କାମ୍ ନିକ ରଇସି । ସେମନ୍ ଲକ୍‌ମନ୍କେ ବଡ଼ ସାନ୍ ଇସାବେ ନ ଦେକଡ଼ ଆରି ଚଲାନିକାତା ନ କଅଡ଼ । ୧୮ ଜନ୍ ଲକ୍‌ମନ୍ ସାନ୍ତ୍ରପାଇ କାମ୍ କରବାଇ, ସାନ୍ତ୍ର ସଙ୍ଗ୍ ରଇକରି ଦରମର୍ ବିଅନ୍ ବୁନ୍‌ବାଇ, ସେନ୍ତାରି ଲକ୍‌ମନ୍ ପର୍‌ମେସର୍ ଦେକବା ଇସାବେ, ନିକ କାମର୍ ଦାନ୍ କାର୍‌ବାଇ ।

୪

ଜଗତର୍ ସଙ୍ଗ୍ ମଇତର୍

୧ ତମର ବିତ୍ତରେ ମାରାମାରି ଆରି ଲାଗାଜଡ଼ା କାଇକେ ଆଇଲାନି ? ତମର ମନବିତ୍ତରେ ତସିରଇବା କାରାପ୍ ମନ୍କଲାଟା ଉଟିକରି ତମର ବିତ୍ତରେ ଜୁଜ୍‌ଲାନି, ଏଟାର୍ ଲାଗି ଏନ୍ତାରି ଅଇଲାନି । ସେଟାର୍‌ପାଇ ଗଟେକ୍ ଲକ୍ ଆରିଗଟେକ୍ ଲକର୍ ସଙ୍ଗ୍ ଲାଗିଲାସିନି । ୨ କାଇକେବଇଲେ ତମେ ଜନ୍‌ଟା ମିଲାଇବାକେ ମନ୍ କଲାସିନି, ସେଟା ମିଲାଇ ନାପାର୍‌ଲେ, ମରାଇବାକେ ମନ୍‌କଲାସିନି । ଜନ୍‌ଟା ମିଲାଇବାକେ ବେସି ମନ୍ ଅଇଲାନି, ସେଟା ମିଲାଇବାକେ ତମ୍‌କେ ବପୁନାଇ । ସେଟାର୍‌ପାଇ ତମରତମର ବିତ୍ତରେ ଲାଗାଜଡ଼ା ଅଇ ମାରାମାରି ଅଇଲାସିନି । ତମେ ପର୍‌ମେସର୍‌କେ ମାଙ୍ଗାସ୍ ନାଇଜେ ମନ୍‌କଲାଟା ମିଲାଇ ନା ପାର୍‌ଲାସିନି । ୩ ତମେ ମାଙ୍ଗ୍‌ତେରଇସା, ମାତର୍ ସେ ତମ୍‌କେ ଦେଏ ନାଇ । କାଇକେବଇଲେ ସେଟା କାରାପ୍ କରବାକେ ମାଙ୍ଗ୍‌ଲାସିନି । ସୁକେ ରଇକରି ସାଇସାର୍‌ଦା ସଙ୍ଗ୍ ରଇବୁ ବଲି ମାଙ୍ଗ୍‌ଲାସିନି । ୪ ଏ ବିସ୍‌ବାସେ ବିସ୍‌ଦେବା ଲକ୍‌ମନ୍, ତମେ କାଇ ନାଜାନାସ୍ କି ଜଗତ୍‌କେ ଆଲାଦ୍ କରୁମନ୍ ପର୍‌ମେସରର୍ ସଡ଼ରୁ ବଲିକରି ? ଜନ୍‌ଲକ୍ ଏ ଜଗତର୍ ଚଲାଚଲୁଡ଼ି ଆଲାଦ୍ କରବାଇ ସେମନ୍ ପର୍‌ମେସରର୍ ବିରଦି । ୫ ତମେ ଦରମ୍ ସାସ୍‌ତରେ ଲେକାଅଇରଇବା ଏ ବାକିଅ ରୁଟାଇ ବଲିକରି ବାବ୍‌ଲାସିନି କି ? ପର୍‌ମେସର୍ ଜନ୍ ଆଡ଼ମାକେ ଆମର୍ ବିତ୍ତରେ ବାସାଅଇରଇବାକେ ଦେଲାଆଚେ, ସେ ଆମ୍‌କେ ପୁରାପୁରୁନ୍ ଅଦିକାର୍ କରବାକେ ମନ୍ କଲାନି । ୬ ମାତର୍ ପର୍‌ମେସର୍ ଜିବନ୍ ଦୁକାଇଲାଟା, ତାର୍‌ତେଇଅନି ଅଦିକ୍ ବପୁଆଚେ । ସେଟାର୍‌ପାଇ ସାସ୍‌ତର୍ କଇଲାନି, ଆଁକିରିଆମନ୍‌କେ ପର୍‌ମେସର୍ ବିରଦ୍ କରସି, ମାତର୍ ସୁଆଲେ ରଇବା ଲକ୍‌କେ ତାର୍ ଜିବନ୍ ଦୁକାଇ, ଦୟା କରସି ।

୭ ତେବର୍ ପାଇ, ତମେ ପର୍‌ମେସର୍‌କେ ସର୍‌ପାଇଡ଼ଆ । ସଇତାନ୍‌କେ ଜାକି ଦିଆସ୍ । ସେନ୍ତାରି କଲେ ସଇତାନ୍ ତମର୍‌ଲଗେ ଅନି ପାଲାଇସି । ୮ ପର୍‌ମେସରର୍ ଲଗେ ଆସା, ତେବେ ସେ ମିସା ତମର୍ ଲଗେ ଲଗେ ରଇସି । ଏ ପାପିମନ୍, କାରାପ୍ କାମ୍‌କରବାଟା ଚାଡ଼ିଦିଆସ୍ । ଆରି ଏ ଦୁଇବାଟେ ମନ୍‌କରୁମନ୍ ତମର୍ ମନ୍ ନିର୍‌ମଲ୍

କରା । ୯ ତମର ପାପରଲାଗି ମାରିବି ଅଇକରି କାନ୍ଦୁଛୁ । ନ ଆସିକରି କାନ୍ଦୁଛୁ, ସାରଦା ନ ଅଇକରି ଦୁକେ ରୁଆ । ୧୦ ମାପୁରୁ ମୁଆଟେ ନିଜେ ନିଜେ ସରପିଆ, ସେ ତମ୍ଭେ ଉଟାଇସି ।

ବିନ୍‌ଲକର ବିଚାର କରନାଇ

୧୧ ଏ ମର ବାଇବଇନିମନ୍, ନିଜର ନିଜର ବିତରେ କୁଟ କାତା କୁଆ ନାଇ । ଜଦି ବିସ୍‌ବାସି ବାଇମନର ବିରୁଦେ କୁଟ କାତା କଇ ତାକେ ଦସ୍ ଦେଇସା, ତମେ ପରମେସରର ନିୟମ୍ ବିରୁଦେ କାତା ଅଇଲାସିନି । ଆରି ତାର ନିୟମ୍‌କେ ବିଚାର କଲାସିନି । ପରମେସରର ନିୟମ୍ ବିଚାର କଲେ, ତମେ ତାର ଆଦେସ୍ ମାନାସ୍ ନାଇ । ମାତର ବିଚାରକାରିଆ ଇସାବେ ରଇଲାସିନି । ୧୨ ପରମେସରସେ ନିୟମ୍ ଦେଇପାରସି । ସେ ସେ ଆମ୍‌କେ ବିଚାର କରିପାରସି । ସେ ସେ ଲକ୍‌ମନ୍‌କେ ରକିଆ କରିପାରସି ଆରି ସେ ସେ କୁରୁପ୍‌ନାସ୍ କରିପାରସି । ମାତର ତମେ କେ ଜେ, ବିନ୍‌ଲକର ବିଚାର କରିପାରାସ୍ ?

ବଡ଼ପନ୍ ବିସଇର ଚେତନା

୧୩ ତେବେ ମର କାତା ସୁନା । ତମର ବିତରେ ଜନ୍ ଲକ୍‌ମନ୍ ଏନ୍ତାରି କାତା ଅଇତେରଇସା, ଆଜି ନଇଲେ କାଲିକେ ଆମେ ଏ ନଅରେ କି ସେ ନଅରେ ଜିବୁ, ତେଇ ବରସେକ୍ ରଇବୁ ଆରି ବେବାର୍ କରି ତାବୁ ଅରଜବୁ । ୧୪ ମାତର କାଲିକେ କାଇଟା ଗର୍ସି, ସେଟା ତମେତା ନାଜାନାସ୍ ! ତମର ଜିବନ୍ ଦୁର୍‌ଉଁସି ସମାନ୍, ଜନ୍‌ଟାକି ଚନେକର ପାଇ ଡିସ୍‌ସି ଆରି ମାୟା ଅଇଜାଇସି । ୧୫ ତାର ବାଦୁଲେ ତମେ ମାପୁରୁ ମନ୍ କଲେ ଆମେ ଜିଇକରି ଏନ୍ତାରି ନଇଲେ ସେନ୍ତାରି କରୁ ବଲି କଇବାର୍ ଆତେ । ୧୬ ମାତର ତମେ ସେନ୍ତାରି କରାସ୍ ନାଇ । ଆଁକରିଆମନ୍ ଆରି ବଡ଼ପନ୍ କାତା କଉଁମନ୍ । ଏନ୍ତାରି ବଡ଼ପନ୍ କାତା କଇବାଟା ବୁଲୁଆତେ ।

୧୭ ଏତାଇ ରୁଆ । ଜେ ଜଦି ଏଟା ନିକ କାମ୍ ବଲି ଜାନେ, ମାତର ସେଟା ନ କରେ ବଇଲେ, ପରମେସର ଦେକ୍‌ବା ଇସାବେ ସେ ଦସ୍ କଲାଆତେ ।



ସାଉକାର ମନ୍‌କେ ଜାଗରତ୍ କରାଇବାଟା

୧୮ ଏ ସାଉକାର ଲକ୍‌ମନ୍, ମରକାତା ସୁନା । ତମ୍ଭେ ଜନ୍ ଦୁକ୍‌କସ୍‌ଟ ଆଇଲାନି, ସେଟାର ପାଇ ମାରିବିଅଇ କାନ୍ଦା । ୧୯ ତମର ଦନ୍‌ସ୍‌ପତି କୁଇଗାଲାନି ଆରି ନିକନିକ ବସ୍‌ତରମନ୍ ଅଲମା କାଇଲାନି । ୨୦ ତମର ସୁନାରୁପା ଚିଲମ୍ ଦାରଲାନି ଆରି ଏ ଚିଲମ୍ ଦାରଲାଟାକେ ନେଇକରି ପରମେସର ତମ୍ଭେ ଦସି କରସି । ଆରି ଜଇଟାନେ ପଡ଼ଲେ ଜେନ୍ତି ଗାଗଡ଼ ନସି, ସେନ୍ତି ତମର ଗାଗଡ଼ ସେ କୁରୁପ୍‌ନାସ୍ କରସି । ଏ ଜୁଗ୍ ସାରବାକେ ଜାଇତେରଇଲେ ମିସା ତମେ ସବୁଲକ୍ ଦନ୍‌ସ୍‌ପତି ଚୁଲିଆଇଲାସିନି । ୨୧ ତମର ଜମିବାଡ଼ିଲଗେ କାମ୍‌କରବା ବୁଡିଆର୍‌ମନ୍‌କେ ବୁଡି ଦିଆସ୍ ନାଇ । ତାର ବାଦୁଲେ ସେମନ୍‌କେ ନାଡାଇ ଆଟାସ୍ । ସୁନା, ସେମନର ବୁଡି ତମର ବିରୁଦେ କାନ୍ଦୁଲାପାରା ସୁନିଅଇଲାନି । ସେମନର କାନ୍ଦବାଟା ସବୁରଟାନେଅନି ବପୁ ରଇବା ମାପୁରୁ, ସୁନ୍‌ଲା ଆତେ । ୨୨ ଏ ଜଗତେ ତମେ ସାଇସାରଦା ସଙ୍ଗ୍ ଜିଇଲାସିନି । ଜାଇଟା ମନ୍ କଲେ, ସେଟା କଲାସିନି । ମାତର ପରମେସରର ଡଣ୍ଡର ଦିନ୍ ଦାପ୍‌ରେ ଆଇଲାନି । ୨୩ ତମେ ଦସ୍ ନ କଲା ଲକ୍‌ମନ୍‌କେ ଦସି ବଲିକରି ମାରି ମରାଇଆଟାସ୍ । ଏଲେମିସା ସେମନ୍ ତମ୍ଭେ ଅଟ୍‌କାଅଡ଼ ନାଇ ।

ସାଆସ୍ ଦାରିକରି ପାରତନା କରା

୭ ଏ ମର ବାଇବଇନିମନ୍, ମାପରୁ ଆରିତରେକ ଆଇବାଜାକ ମୁରୁଚିକରି ରୁଆ । ଚାସିମନର ବିସଇ ଚିନ୍ତାକରିଦେକା, ତାକର ଜମିଅନି ନିକ ପସଲ୍ ମିଲ୍‌ବା ଜାକ ସେମନ୍ ଜାଗିକରି ରଇବାଇ । ଜେନ୍ତିକି ମାଟିବିଜାଇବାକେ ପରୁଡ଼ମର ବରିସା ଆରି ନିଙ୍ଗୁବାପାବୁବା ବେଲରୁ ସାରାସାରି ବରୁସାକେ ମୁରୁଚିକରି ଜାଗି ରଇବାଇ ।  
 「 ସେ ରକାମ୍ ତମେମନ୍ ମିସା ମୁରୁଚି ଜାଗିରୁଆ । ତମର ମନ୍ ଡାଂଟକରି ରୁଆ, କାଇକେବଇଲେ ମାପରୁ ଆଇବା ଦିନ୍ ଲଗେ କେଟିଆଇଲାନି ।

୯ ଏ ମର ବାଇବଇନିମନ୍, ନିଜର ନିଜର ବିତ୍ତରେ ଦସ୍ ଦାରାଦାରି ଉଆ ନାଇ । ସେନ୍ତିଆଲେ ମାପରୁ ତମକେ ବିଚାର ନ କରେ । ଦେକା ବଡ଼ ବିଚାରକାରିଆ ଲଗେ ଆଚେ । ୧୦ ମର ବାଇବଇନିମନ୍, ଜନ୍ ବବିସତ୍‌ବକ୍‌ତାମନ୍ ମାପରୁର ନାଉଁ ଦାରି କାତାଦେଇ ରଇଲାଇ, ସେମନ୍‌କେ ଏତାଆ । ଦୁକ୍‌କସ୍‌ଟ ଆଇଲାବେଲେ । ସେମନ୍ ମୁରୁଚିକରି ରଇଲାଇ । ତମେମିସା ସେନ୍ତାରି ଅଇକରି ମନେ ଏତାଆ । ୧୧ ସେମନ୍ ମୁରୁଚିକରି ରଇଲାପାଇ ବଲି କେତେକରମର ଲକ୍ ବଲି କଇଲୁନି । ସେନ୍ତାରିସେ ଆୟୁର୍ ବେସି ଦିନ୍‌ଜାକ ମୁରୁଚିକରି ରଇଲାଟା ତମେ ସୁନି ଆଚାସ୍ । ସାରାସାରି ପଚେ ମାପରୁ ଜନ୍‌ରକାମ୍ ତାକେ ବାଉଡାଇଦେଲାଟା ଜାନିଆଚାସ୍ । କାଇକେ ବଇଲେ ଆମରୁ ମାପରୁ ଦୟାକରସି ଆରି ପୁରାପୁରୁନ୍ କଲିକରମ୍ ଦେକ୍‌ବା ମାପରୁ ।

୧୨ ଏ ମର ବାଇବଇନିମନ୍, ତମେ କାତା ଦେଲା ବେଲେ ରାନ୍ ନିୟମ୍ ପାକାଆ ନାଇ । ସରଗର କି ଏ ଜଗତର ନାଉଁ ଦାରିକରି କାଇ ବିସଇ ରାନ୍ ପାକାଆ ନାଇ । ତମର ଅଇବା କାତାଆଲେ “ ଉଁ ” ଆରି, ନ ଅଇବା କାତା ଆଲେ “ ନାଇ ” ବଲିକୁଆ । ସେନ୍ତାରୁ ରଇଲେ, ତମେ ପରମେସରର ବିଚାରନାଟାମେ ଡଣ୍ଡୁ ନ ପାଆସ୍ ।

୧୩ ତମର ବିତ୍ତରେ କେ ଜଦି ଦୁକ୍ ଜଞ୍ଜାଲେ ରଇଲେ, ସେ ପାର୍‌ତନା କର । କେ ଜଦି ସାର୍‌ଦାସଙ୍ଗ୍ ଆଚେ ବଇଲେ, ସେ ପରମେସରର ଡାକ୍‌ପୁଟାରୁ ଗିଡ଼ ଗାଅ । ୧୪ ଏକେ ଜଦି ଜରୁଦୁକା ଅଇ ରଇଲେ ସେ ମଣ୍ଡୁଲିର ପାର୍‌ଚିନ୍‌ମନ୍‌କେ ଡାକାଆ, ସେମନ୍ ମାପରୁର ନାଉଁଦାରି ଚିକନ୍ ରକଇ କରି ତାକେ ଲାଗାଇ, ପାର୍‌ତନା କରବାଇ । ୧୫ ବିସବାସ୍ ସଙ୍ଗ୍ ସରପଲା ପାର୍‌ତନା ଜରୁ ଲକ୍‌କେ ନିମାନ୍ କରି ଉଟାଇସି । ଜଦିସେ ପାପ୍‌କରି ରଇସି ବଇଲେ ମାପରୁ ତାକେ କେମା କରସି । ନିଜର ନିଜର ଲଗେ ପାପ୍ କଲାଟା ଜାନାଆ ଆରି ନିଜର ନିଜର ପାଇ ପାର୍‌ତନା କରା । ସେନ୍ତାରୁ କଲେ, ତମେ ନିକ ଅଇସା । ୧୬ ଗଟେକ୍ ଦରମ୍ ଲକ୍ ପାର୍‌ତନା କଲାଟା ବେସି ବପୁ ରଇସି ଆରି ସେ ପାର୍‌ତନାରୁ ଉତର୍ ଦେକିଅଇସି । ୧୭ ଏଲିଅର୍ ବିସଇ ବାବିଦେକା, ସେ ମିସା ଆମର ପାରାସେ ରଇଲା । ପୁରବେ ଇସ୍ରାଏଲ୍ ଦେସେ ପାନି ନ ମାର ବଲି ସେ ମନ୍‌ଦିଆନ୍ ଦେଇ ପାର୍‌ତନା କର୍ତ୍ତେରଇଲା । ସେଟାରୁପାଇ ସେ ଦେସେ ତିନ୍ ବରସ୍ ଚ ମାସ୍ ଜାକ ପାନି ମାରେ ନାଇ । ୧୮ ଆରି ତରେକ୍ ପାନି ମାର ବଲି ପାର୍‌ତନା କଲାକେ ବାଦ୍‌ଲେଅନି ପାନି ମାରଲା । ତେବର୍‌ପାଇ ଜମିଟାମେ ତାସ୍ ଅଇଲା ।

୧୯ ଏ ମର ବାଇବଇନିମନ୍ ତମର ବିତ୍ତରେ ଜଦି କେ ସତ୍ ବାଟ୍ ଚାଡ଼ିକରି ବିନ୍ ବିନ୍ ବାଟେ ଗାଲେ, ତାକେ କେ ଆଲେ ଜାଇ ବାଉଡାଇ ଆନ୍‌ଲେ, ୨୦ ଏତାଇରୁଆଜେ, କେ ଜଦି, ଗଟେକ୍ ପାପିକେ ବୁଲ୍‌ବାଟେଅନି ବାଉଡାଇ ଆନ୍‌ସି, ସେ ତାକେ ମରନେଅନି ରକିଆ କରସି । ଆରି ସେ ଲକ୍‌ର ଜବର୍ ପାପ୍ ରଇଲେ ମିସା ତାକେ କେମା ଅଇସି ।



# ପିତର ଲେଖିତ୍ୱା ପ୍ରଥମ ପତ୍ର ପିତର ଲେଖିତ୍ୱା ପରତ୍ରୁମ୍ ଚିତି ଏ ବଇର ବିସଇ ଜାନବାଟା

ପିତର ପରତ୍ରୁମ୍ ଚିତି ପେରିଡ଼ ତିତସର୍ ଲାଗି ଲେକାଅଇ ରଇଲା । ପିତର କେ ଆରି ସେ କାକେ ଏ ଚିତି ଲେକଲାନି, ସେ ଏଚିତିତେଇ ସବୁ ବିନ୍ ଦେସର୍ ବିସ୍ବାସି ବାଇବଇନି ମନର୍ ପାଇ ବଲିକରି ଏ ଚିତି ଲେକଲାନି ୧:୧;୧:୧୭ ଆରି ୨:୧୧ ସେ ତାକର୍ ପତ୍ରବା ଲକ୍ମନକେ ଏ ରକାମ୍ ବାବିକରି ଲେକଲାନି । କାଇକେବଇଲେ ସେମନ୍ ବିନ୍ବିନ୍ ଦେସେ ଚିନ୍ବିନ୍ ଅଇରଇଲାଇ । ଏ ଚିତି କେତେଟା ଏପିସିଅ ମଣ୍ଡଲିଲଗେ ପାଉଲର୍ ଚିତି ରକାମ୍ । ବେସିଲକ୍ ବିସ୍ବାସ୍ କଲାଇନିଜେ, ପରତ୍ରୁମ୍ ପିତର ଜିସୁକିରିସ୍ତର୍ ଜନମ୍ଅଇ ୬୫ ବରସ୍ ପଟେ ଲେକାଅଇ ରଇଲା । ପିତର ଏ ଚିତି ରମେଅନି ଜାକେକି ବାବିଲନ୍ ବଲିକରି କଇବାଇ ସିତିଅନି ସେ ଲେକି ରଇଲା । ୫:୧୩ ।

ପିତର ଏ ଚିତିତେଇ ଲକ୍ମନ କଇଲାଇ ନିଜେ, ଏ ବଇର ଆଦେସ୍ ତମ୍କେ ସାଆସ୍ ଦେଇସି ଆରି ପର୍ମେସରର୍ ସତ୍ ଆରି ଦୟାକେ ପରିକା କର୍ବାଟା ଆକା ୫:୧୨ ଏଟା କେତେଟା ସମାନ୍ସେ ଆଟେ ଆରି ୧ ମ ପିତୃ ୨:୧୧-୩:୭ଏପିସିୟ ୫:୧୮-୬:୯କଲସିଅ ୩:୧୮-୪:୬ ଏ ତିନଟା ଚିତିର୍ ସବୁବଇ ନିଜର୍ ନିଜର୍ ଲକ୍ ମନର୍ ବିସଇ ଆରି ଅଦିକାର ବିସୟରେ କଇଲା ଆଟେ । ସାରାସାରି ବେଲାଇ କେଟ୍ଲାନିକେ କସ୍ଟ ବେଲାଇମିସା ତବିର୍ଅଇକରି ରଇବାକେ ବିସ୍ବାସିମନ୍କେ ବପୁଦେଲାନି ୪:୧

### ଏ ବିତ୍ରେ ରଇବାଟା

୧. ପିତର ତାର ଚିତି ପତ୍ରବା ଲକ୍ମନକେ ତାର ନିଜର୍ ବିସଇ ଆରି ସେ ରଇବା ଜାଗାର ବିସଇ ଜାନାଇଆଟେ । ୧:୧-୨
  ୨. ପିତର ପର୍ମେସରକେ ଦନିଅବାଦ୍ ଦେଇଆଟେ । ଜେକ୍ଟିକି ସବୁଲକ୍ ପର୍ମେସରର୍ ମୁକ୍ତିଟିନେ ମିସ୍ବାଇ । ଜନ୍ଗାକି ତାକର୍ ଜିବନ୍ ଉଦାର ଅଇସି । ୧:୩-୨:୧୦
  ୩. ପଟେ ଜଗତେ କେନ୍ତାରି ଜିଉନା କାଉନା କରିଅଇସି ଆରି ମାଇଜି ମୁନୁସ୍ ସାଉକାର ଆରି ଦାଙ୍ଗ୍ତାମନର୍ ବିତ୍ରେ କେନ୍ତାରି ମିସିବିତି ରଇବାକେ ଅଇସି, ସେଟା ଜାନାଇଦେଲାନି । ୨:୧୧-୪:୧୧
  ୪. ତାରପଟେ ଦୁକ୍ କସ୍ଟ ଆଇଲାବେଲେ ତବିର୍ ଅଇରଇବାକେ ପିତର ସେମନ୍କେ ସାଆସ୍ ଦେଲାନି । ୪:୧୨-୫:୧୧
- ସେ ତାର ଚିତି ଲେକବାଟା ସାରାଇଆଟେ । ୫:୧୨-୧୪

### ପିତର ଲେଖିତ୍ୱା ପରତ୍ରୁମ୍ ଚିତି

୧ ମୁଇ ପିତର, ଜିସୁକିରିସ୍ତର୍ ଗଟେକ୍ ପେରିଡ଼ ସିସ୍ ।

ପତ୍ର, ଗାଲାତିଅ, କାପାଦକିଆ, ଆସିଆ ଆରି ବିତୁନିଆ ରାଇଜମନ୍କେ, ବିନ୍ଦେସର୍ ଲକ୍ମନପାରା ଚିନ୍ବିନ୍ ଅଇଜାଇରଇବା ପର୍ମେସରର୍ ଲକ୍ମନକେ ମୁଇ ଏ ଚିତି ଲେକଲିନି । ୨ ତାର ଜଜନା ଇସାବେ ବାବା ପର୍ମେସର ତମ୍କେ ତାକଲା ଆଟେ । ତାର ସୁକଲ୍ ଆଡ଼ମାଇ ସେ ତମ୍କେ ତାର ସୁକଲ୍ ଲକ୍ କରାଇସି । ତମେ ଜିସୁ କିରିସ୍ତକେ ମାନିକରି, ତାର ବନିତେଇ ଦଇଅଇକରି ରଇବାକେ ସେ ଏନ୍ତାରି ଜଜନା କଲା ।

ତାର ଜିବନ୍‌ଦୁକାଈଲାଟା ଆରି ସାନ୍ତି ପୁରାପୁରୁନ୍ ତମ୍‌କେ ମିଲ ।

ଜିବନ୍ ରଇବା ଆସା

୩ ଆମର ମାପୁରୁ ଜିସୁକିରିସ୍‌ଟର ବାବା ପରମେସ୍‌ବରକେ ଦନିଅବାଦ୍ ଦେଉଁ । କାଇକେବଇଲେ ସେ ଜବର ଅଇତେ ଦୟା କଲାପାଇ ଆମ୍‌କେ ନୁଆ ଜିବନ୍ ଦେଲା ଆତେ । ଜିସୁକିରିସ୍‌ଟକେ ମଲାଟାନେଅନି ଉଟାଇକରି ଏନ୍ତାରି କରିଆତେ । ଆମେ ମଲେ ମିସା ଆମ୍‌କେ ଉଟାଇସି ବଲିକରି ପୁରାପୁରୁନ୍ ଆସାଆତେ । ୪ ସେଟାରପାଇ ପରମେସ୍‌ବର ତାର ଲକ୍‌ମନପାଇ ଜେଡକି ସବୁ ଆସିରବାଦ୍ ସରଗେ ଜତନ୍ କରି ସଙ୍ଗଇଆତେ, ସେଟା ସବୁ ଆମର ଅଇସି ବଲି ଆସାକଲୁନି । ତେଇ ସେଟା ନ ନସେ କି ଚିଲମ୍ ନ ଦାରେ କି ଉନା ମିସା ନ ଅଏ । ୫ ଏ ସବୁ ଆସିରବାଦ୍ ଆମରପାଇ । ତମେ ପରମେସ୍‌ବରକେ ବିସ୍‌ବାସ୍ କଲାପାଇ, ତାର ବପୁ ତମ୍‌କେ କାଇଟା ନ ଅଇତେ ସଙ୍ଗଇଲା ଆତେ । ସାରାସାରିଦିନେ ତାର ମୁକ୍ତି ସବୁଲକ୍ ଜାନବା ଜାକ, ତମର ଉପରେ ଜାଗ୍‌ତେରଇସି ।

୬ ଚନେକରପାଇ ତମର ଜିବନେ ବିନ୍ ବିନ୍ ଦୁକ୍‌କସ୍‌ଟ ଆଇଲାକେ ମୁରଟିକରି ରଇବାକେ ପଡଲେ ମିସା, ସେଟାରପାଇ ତମେ ସାରଦା ଅଇକରି ରୁଆ । ୭ ତମର ଜିବନେ ଆଇଲା ଦୁକ୍‌କସ୍‌ଟ ସବୁ ତମର ବିସ୍‌ବାସ୍ ସତ୍‌ଆତେ କି ନାଇ ବଲି ପରିକା କରବାକେସେ । ସୁନାର ବିସଇ ବାବିଦେକା, ଏ ଜଗତର ସବୁ ବିସଇରପାରା ସୁନା ମିସା ନସିଜାଇସି । ସୁନା ନିକଟା କି କାରାପୁଟା ବଲି ଜାନବାକେ ଜଇଟାନେ ସିଲାଇବାଇ । ତମର ବିସ୍‌ବାସ୍ ସୁନାଟାନେଅନି ଅଦିକ୍ ମୁଲିଅ । ସେନ୍ତାରୁଆଲେ ତମର ବିସ୍‌ବାସ୍ ନିକଟା କି ନାଇ ବଲି ପରିକା କରବାର୍ ଆତେ । ତମର ବିସ୍‌ବାସ୍ ଜଦି ନିକଟା, ଜିସୁ କିରସ୍‌ଟ ଦେକା ଅଇବା ସେ ଦିନେ ତମେ ଡାକ୍‌ପୁଟା ଆରି ମଇମା ପାଇସା । ୮ ଏବେ ତମେ ତାକେ ନ ଦେକିରଇଲେ ମିସା ଆଲାଦ୍ କଲାସ୍‌ନି ଆରି ବିସ୍‌ବାସ୍ କଲାସ୍‌ନି । ସେଟାରପାଇ ତମର ସାରଦା ବେସି ବଡ । ୯ ତମେ ବିସ୍‌ବାସ୍ କଲାପାଇ ତମ୍‌କେ ସରଗେ ନ ସାରବା ଜିବନ୍ ଆତେ ।

୧୦ ପରମେସ୍‌ବର ମୁନୁସ୍‌ମନକେ ତାକର ପାପେଅନି କେନ୍ତ୍ର ମୁକ୍‌ଲାଇସି ବଲି ପୁରବର ବବିସ୍‌ଡବକ୍‌ତାମନ୍ ମନ୍‌ଦିଆନ୍ କରି ପଡଲାଇ । ପରମେସ୍‌ବର ତମ୍‌କେ ଦେବା ଏ ଦାନ୍ ବିସଇ, ସେମନ୍ ଆଗ୍‌କେ ଗଟ୍‌ବା କାତା କଇଲାଇ । ୧୧ କିରିସ୍‌ଟ କେନ୍ତ୍ର ଦୁକ୍‌କସ୍‌ଟ ମୁରଟିଲା, ଆରି ସବୁ ନିନ୍ଦା ସାରଲା ପତେ ସେ କେନ୍ତ୍ର ଡାକ୍‌ପୁଟା ପାଇଲା, ସେ ବିସଇ ପରମେସ୍‌ବର ଆଡ୍‌ମା ସେମନ୍‌କେ ଜାନାଇଲା । ଏଟା ସବୁ କେବେ ଅଇସି ଆରି କେନ୍ତ୍ରାରି ଅଇସି, ସେଟା ଜାନବାକେ ସେମନ୍ ବେସି ମନ୍ କଲାଇ । ସେଟାରପାଇ ସେମନ୍ ସେ ବିସଇ ମନ୍‌ଦିଆନ୍ କରି ପଡଲାଇ । ୧୨ ମାତର ଜନ୍ ଆଗ୍‌କେ ଗଟ୍‌ବା କାତା ସେମନ୍ କଇରଇଲାଇ, ସେଟା ସେମନ୍‌ର ବଲ୍‌ପାଇ ନାଇ ମାତର ତମର ବଲ୍‌ପାଇ ବଲି ପରମେସ୍‌ବର ସେମନ୍‌କେ ଜାନାଇଲା । ଆରି ଏବେ ସେଟା ପୁରାପୁରୁନ୍ ଅଇଲା । କାଇକେବଇଲେ ଜନ୍ ଲକ୍‌ମନ୍ ତମ୍‌କେ ସୁବ୍ କବର ଜାନାଇଲାଇ ଆତଡ୍, ତମେ ସେ କାତା ସୁନିଆଟାସ୍ । ସରଗେଅନି ପାଟାଇରଇବା ସୁକଲ୍‌ଆଡ୍‌ମା ସେମନ୍‌କେ ବପୁଦେଲା । ଦୁତ୍‌ମନ୍ ମିସା ଏ ବିସଇ ଜାନବାକେ ମନ୍ କଲାଇ ।

ସୁକଲ୍ ଅଇକରି ଜିଉନା କାଉନା କରବାଟା

୧୩ ସେଟାରପାଇ ତମେ ନିଜର ନିଜର ମନେ ପରମେସ୍‌ବର ମନ୍‌କଲାଟା ପୁରାପୁରୁନ୍ କରବାକେ ଜାଗିରୁଆ । ଆରି ଜିସୁ କିରିସ୍‌ଟ ବାଉଡି ଆଇବା ବେଲାଇ ସେ ଜନ୍ ଆସିରବାଦ୍ ତମ୍‌କେ ଦେଇସି, ସେଟା ମିଲ୍‌ସି ବଲି ପୁରାପୁରୁନ୍ ଆସା ଉଆ । ୧୪ ପରମେସ୍‌ବର ଆଦେସ୍ ମାନିକରି ରୁଆ । ତାର ସଡ୍ ସିକିଆ ଜାନବା ଆଗ୍‌ତୁ ତମେ କେନ୍ତ୍ରାରି ନିଜେ ମନ୍ କଲାଟା ପୁରାପୁରୁନ୍ କରତେରଇଲାସ୍, ସେନ୍ତାରି ଆରି

କରାନାଇ । ୧୫ ମାତର ତମ୍ଭେ ତାକଲ୍ଲା ମାପୁରୁ ଜେନ୍ତାର ସୁକଲ୍ ଆଚେ, ସେନ୍ତାରିସେ ତମେମନ୍ ମିସା ତମ୍ଭେ ସବୁ ବିସଇଚାନେ ସୁକଲ୍ ଉଥା । ୧୬ ତେବେ ସାସ୍ତରେ ଲେକା ଆଚେ, ପରମେସର୍ କଇଲାଆଚେ, ମୁଇ ଜେନ୍ତାରି ସୁକଲ୍, ତମେ ମିସା ସେନ୍ତାରି ସୁକଲ୍ ଉଥା ।

୧୭ ପରମେସର୍ ଜେଡେବେଲେ ମୁନୁସ୍ମାନକେ ବିଚାର କର୍ସି, ସେ କାର୍ବିଡ୍ରେ ସାନ୍ ବଡ୍ ନ ଦେକେ । ଗଟେକ୍ ଗଟେକ୍ ଲକ୍‌କେ ତାକର୍ କଲ୍ଲା କାମ୍ ଇସାବେ ସେ ବିଚାର କର୍ସି । ତେବେ ତମେ ପାରତନା କର୍ବାବେଲେ ପରମେସର୍‌କେ ବାବା ବଲି ତାକଲ୍ଲାସ୍ନି । ତମେ ଜେଡ୍‌କି ଦିନ୍ ଏ ଜଗତେ ବଞ୍ଚିଆଚାସ୍, ତାକେ ମାନିକରି ରଇବାରଆଚେ । ୧୮ ତମ୍ଭେ ଆନିଦାଦିମନର୍ ଟାନେଅନି ଲତାକେ ନ ଆଇବା ରିତିନିତିଅନି ସେ କାଇ ମୁଲିଅ ଦେଇକରି ତମ୍ଭେ ମୁକଲ୍ଲାଆଚେ, ସେଟା ତମେ ଜାନିଆଚାସ୍ । ତମ୍ଭେ ମୁକଲ୍ଲାଆଚେକେ ସେ ନସି ଜିବା ସୁନା କି ରୁପାର୍ ମୁଲିଅ ଦେଏ ନାଇ । ୧୯ ମାତର ବେସି ମୁଲିଅ ରଇବା ଜିସୁକ୍ରିସ୍ଟର୍ ବନି, ଜନ୍‌ଟା ସେ ତାର୍ ମରନେ ରକଇଦେଲା । କାଇ ଦସ୍ କି କାଇ ଅବାବ୍ ନ ରଇବା ମେଣ୍ଡାପିଲା ପାରା ବଲିଅଇଲା । ୨୦ ଏ ଜଗତ୍ ତିଆର୍ ନ ଅଇବା ଆଗ୍ତୁ ପରମେସର୍ କିରିସ୍ଟକେ ବାଟିରଇଲା । ମାତର ଏବେ ଏ ସାରାସାରି ଦିନେ ସେ ତାକେ ଦେକାଇଲା ଆଚେ । ଜେନ୍ତାରି କି ସେ ଆମ୍ଭେକେ ସାଇଜକରିପାର୍ସି । ୨୧ ଜିସୁକ୍ରିସ୍ଟର୍ ଲାଗି ତମେ ଏବେ ପରମେସର୍‌କେ ବିସବାସ୍ କଲ୍ଲାସ୍ନି । ସେ ଆକା କିରିସ୍ଟକେ ମରନେଅନି ଉଟାଇକରି ତାକ୍‌ପୁଟା କଲ୍ଲା ଆଚେ । ତେବର୍‌ପାଇ ତମ୍ଭେ ବିସବାସ୍ ଆରି ଆସା ଏବେ ପରମେସର୍‌ଟାନେ ଆଚେ ।

୨୨ ତମେ ସତ୍ ମାନଲାର୍ ପାଇ, କାରାପ୍ ଚଲାଚଲ୍‌ତି ଚାଡିକରି ତମ୍ଭେ ସଙ୍ଗର୍ ବିସବାସିମନକେ ସତ୍‌ସଙ୍ଗ୍ ଆଲାଦ୍ କଲ୍ଲାସ୍ନି । ମନ୍ ପରାନ୍ ଦେଇକରି ଗଟେକ୍‌ଲକ୍ ଆରି ଗଟେକ୍ ଲକ୍‌କେ ଆଲାଦ୍ କଲ୍ଲାସ୍ନି । ୨୩ ତମେ ଆରିତରେକ୍ ଜନମ୍ ଅଇଲାସ୍‌କେ ଏନ୍ତାରି କଲ୍ଲାସ୍ନି । କେବେ ନ ମର୍ବା ବାବାମାଆର୍ ପିଲାମନର୍ ଇସାବେ । ତାର୍ ବାକିଅ ତମ୍ଭେ ନୁଆ ଜିବନ୍ ଦେଲାଆଚେ । ତାର୍ ବାକିଅ ସବୁଦିନର୍‌ପାଇ ରଇସି । ୨୪ ସାସ୍ତରେ ଲେକାଅଇଲାପାରା,

ଗୁଲାଇ ମୁନୁସ୍ ଜାତି ଗାଁସ୍ ପାରା ।

ତାକର୍ ବାନିମୁର୍ତି ଗାଁସ୍ ପୁଲ୍‌ପାରା ।

ଗାଁସ୍ ସୁକିଜାଇସି ଆରି ପୁଲ୍ ଜଡିଜାଇସି ।

୨୫ ମାତର ପରମେସର୍‌ର୍ ବାକିଅ ସବୁଦିନ୍ ପାଇ ରଇସି ।

ଏ ବାକିଅ ଅଇଲାନି ତମ୍ଭେ ଜାନାଇରଇବା ସୁବକବର୍ ।

## ୨

ଜିବନ୍ ପାକନା ଆରି ସୁକଲ୍ କୁଟୁମ୍

୧ ତମେ ନୁଆ ଜିବନ୍ ପାଇଲାପାଇ ସବୁ କାରାପ୍ ବିସଇଚାନେଅନି ଦୁରିକେ ରୁଥା । ସବୁ ରକାମ୍ ମିବ୍ କଇବାଟା, ନାତାଇବାଟା, ଇସା ଅଇବାଟା ଆରି ନିନ୍‌ କାତା କଇବାଟା ଚାଡିଦିଆସ୍ । ୨ ଏବେ ଜନମ୍ ଅଇଲା କଅଁଲା ପିଲାମନ୍ ଦୁଦ୍ କାଇବାକେ ଜେନ୍ତାରି ମନ୍ କର୍ବାଇ, ସେନ୍ତାରିସେ ତମେ ଆଡ୍‌ମାର୍ ଦୁଦ୍ କାଇବାକେ ମନ୍ କରା । ସେଟା ଅଇଲାନି ପରମେସର୍‌ର୍ ସତ୍ ବାକିଅ । ସେଟା କାଇବାକେ ମନ୍ କଲେ, ତମ୍ଭେ ମୁକ୍ତି ସିଦ୍ ଅଇବାଜାକ ତମେ ବିସ୍‌ବାସେ ଅଦିକ୍ ଅଦିକ୍ ବଡି ଆଇସା । ୩ ସାସ୍ତରେ ଲେକା ଅଇଲାପାରା “କାଇକେ ବଇଲେ, ମାପୁରୁ ଜିବନ୍ ଦୁକାଇ ଦୟା କଲାଟା ତମେ ଜାନିସାରାଇ ଆଚାସ୍ ।”

୪ ତେବର୍ପାଇ କିରିସ୍ତର ଲଗେ ଆସା । ସେ, ଗର୍ ତାଟ୍ କର୍ବା ଜିବନ୍ ପାକ୍ନା ପାରା ଆତେ । ଏ ପାକ୍ନା, କାଇ ମୁଲିଅ ନାଇ ବଲି, ଲକ୍ମନ୍ ଚାଡ଼ିଦେଇରଇଲାଇ । ମାତର୍ ପର୍ମେସର୍ ସେଟାକେସେ, ବେସି ମୁଲିଅ ରଇବାଟା ବଲି ବାଟିଆତେ । ୫ ତାର୍ ଲଗେ ଆଇଲାର୍ପାଇ ତମେ ଜିବନ୍ ରଇବା ପାକ୍ନାପାରା ଅଇଆଟାସ୍ । କାଇକେବଇଲେ, ତମକେ ଜଡ଼ିକରି ଗଟେକ୍ ଆତ୍ମା ରଇବା ମଣ୍ଡୁଲି ତିଆର୍ ଅଇଲାନ୍ତି । ଆରି ପର୍ମେସରର୍ ସୁକଲ୍ ରଇବା ପୁଜାରି ଇସାବେ ତମେ ତାକେ ସେବା କଲାସ୍ତି । ଜିସୁକିରିସ୍ତର ଲାଗି ଏ ଆତ୍ମାର୍ ସେବା ପର୍ମେସର୍କେ ସାର୍ବା କରାଇସି । ୬ ସାସ୍ତରେ କଇଲାପାରା

“ଦେକା, ମୁଇ ସବୁରତେଇଅନି ଅଦିକ୍ ମୁଲିଅ ରଇବା ପାକ୍ନା ବାଟୁଲିଆତି,  
 ସେଟା ଗର୍ କନର୍ ମୁଲ୍ପାକ୍ନା ଇସାବେ ସିୟନେ ସଙ୍ଗୁଆତି  
 କେ ଜିଦି ତାକେ ବିସ୍ବାସ୍ କରବାଇ, ସେ କେବେ ଲାଜ୍ ନଏ ।”

୭ ତମେ ବିସ୍ବାସି ଲକ୍ମନ୍ପାକ୍ନା, ଏ ପାକ୍ନା ବେସି ମୁଲିଅ ରଇବାଟା । ମାତର୍ ଜେଡ଼ିକି ଲକ୍ ବିସ୍ବାସ୍ କରଡ଼ ନାଇ, ସାସ୍ତରେ ଲେକା ଅଇଲା ବିସଇ ସେମନ୍ ମନେ ରକ୍ବାର୍ ଆତେ ।

“ଗର୍ ତିଆର୍ କରୁମନ୍ ଜନ୍ ପାକ୍ନା ଚାଡ଼ିଦେଇରଇଲାଇ,  
 ସେ ପାକ୍ନାକେସେ ପର୍ମେସର୍ ସବୁଟାଟାନ୍ ଅନି ମୁଲିଅ ରଇବା ପାକ୍ନା  
 କଲାଆତେ ।”

୮ ସାସ୍ତରେ ଲେକା ଅଇଲା ଆରି ଗଟେକ୍ ବିସଇ ମିସା ସେମନ୍ ଏତାଇବାର୍ ଆତେ ।

“ଏ ପାକ୍ନା କେତେ ଲକ୍ପାକ୍ନା ବାଦା ଆନ୍ସି ।  
 ତେଇ ବେସି ଲକ୍ ଜଟିଆଇ ଅଇ ଅଦର୍ବାଇ ।”

“ସେମନ୍ ପର୍ମେସରର୍ ବାକିଅ ବିସ୍ବାସ୍ ନ କଲାର୍ପାଇ ଜଟିଆଇ ଅଇ ଅଦର୍ବାଇ । ଏଟା ତାକ୍ପାକ୍ନା ପର୍ମେସରର୍ ଜଜ୍ନା ରଇଲା ।”

୯ ମାତର୍ ତମେ, ବାଟି ଅଇରଇବା ପର୍ମେସରର୍ କୁଟୁମ୍ । ଆରି ଆମର୍ ରାଜାର୍ ପୁଜାରି ଦଲ୍ । ପର୍ମେସରର୍ ଚକିଡ଼ ଅଇଜିବା କାମ୍ ଜାନାଇବାକେ ସେ ବାଟିରଇବା ତାର୍ ନିଜର୍ ଲକ୍ ଅଇଆଟାସ୍ । ଆନ୍ଦାର୍ ବିତ୍ତରେ ଅନି ତାର୍ କାବା ଅଇଜିବା ଉଜଲେ ଜିବାକେ ସେ ତମକେ ତାକି ଆତେ । ୧୦ ଆଗେ ତମେ ତାର୍ ନିଜର୍ ଲକ୍ ନ ରଇଲାସ୍ । ମାତର୍ ଏବେ ତାର୍ ନିଜର୍ ଲକ୍ ଅଇଆଟାସ୍ । ଆଗେ ତାର୍ ଦୟା ପାଇ ନ ରଇଲାସ୍, ମାତର୍ ଏବେ ପାଇଆଟାସ୍ ।

**ପର୍ମେସରର୍ ଗତି ଦାଙ୍ଗଡ଼ା**

୧୧ ଏ ମର୍ ମଇତର୍ମନ୍, ତମେ ଏ ଜଗତେ ବିଦେସି ପାରା ଆଟାସ୍ ଆରି ଚନେକର୍ ପାଇସେ ଇତି ରଇଲାସ୍ତି । ତମର୍ ଗାଗ୍ଡେ ରଇବା ପାପର୍ ଗୁନ୍ତଲନେ ଅନି ଆଇବା ସବୁ ରକାମ୍ କାରାପ୍ ମନ୍କରବା ଟାନ୍ନେଅନି ଦୁରିକେ ରୁଆ । ୧୨ ତମର୍ ନଅରେ ରଇବା ବିସ୍ବାସ୍ ନ କର୍ବା ଲକ୍ମନ୍ ଦେକ୍ବା ଇସାବେ ତମର୍ ଚଲାଚଲ୍ତି ନିକ ରଇବାର୍ଆତେ । ସେନ୍ତାରି ରଇଲେ ସେମନ୍ ତମର୍ ବିରୁଦେ ନିନ୍ଦା କାତା କଇଲେ ମିସା, ତମେ କିରିରଇବା ନିକ କାମ୍ ଦେକିକରି ପର୍ମେସର୍ ବାଡ଼ିଆଇବା ଦିନେ ତାକେ ତାକ୍ପୁଟା କର୍ବାଇ ।

୧୩ ତମର୍ ଉପ୍ରେ ଅଦିକାର୍ କର୍ବା ଲକ୍ମନ୍କେ ଆମର୍ ମାପ୍ପୁର୍ ଲାଗି ମାନିକରି ରୁଆ । ସବୁଟାଟାନ୍ ଅନି ଅଦିକାର୍ ରଇବା ସାସନ୍କାରିଆକେ ମିସା ମାନିକରି ରୁଆ । ୧୪ ସବୁଟାଟାନ୍ ଅନି ବଡ଼ ସାସନ୍କାରିଆ, ଜେ କି କାରାପ୍ କାମ୍ କର୍ବା ଲକ୍ମନ୍କେ ତଣ୍ଡ ଦେବାକେ ଆରି ନିକ କାମ୍ କର୍ବା ଲକ୍ମନ୍କେ ତାକ୍ପୁଟା କର୍ବାକେ ପାଟାଇଆତେ, ତାକେ ମିସା ମାନିକରି ରୁଆ । ୧୫ କାଇକେବଇଲେ,

☆ ୨:୯ ୨:୯ ଡିଡସ୍ ୨:୧୪

ତମେ କରିରଇବା ନିକ କାମରଲାଗି କାଜ ଲତାକେ ନ ଥାଇବା କାତା କଇବୁଲୁବା ଲକ୍ଷ୍ମୀନକେ ତୁମ୍ଭ କରାଇବାକେ ପରମେସର୍ ମନ୍ କଲାନି । <sup>୧୭</sup> ତମେ ମୁକଲୁଲୁ ଲକ୍ଷ୍ମୀନ ବଲି ତମର୍ ଜିବନର୍ ଚଲାଚଲୁଡିତେଇ ଦେକାଆ । ମାତର୍ ଆମ୍ଭକେ ମୁକ୍ତି ମିଲୁଲାଆଚେ ବଲି କାଇଟା ମିସା କରୁ ବଲି ନ ବାବିକରି ପରମେସର୍କେ ସେବା କରା । <sup>୧୮</sup> ସବୁ ଲକ୍ଷ୍ମୀନକେ ସନ୍ମାନ ଦିଆସ୍ । ବିସ୍ବାସି ବାଇବଇନିମନ୍କେ ଆଲାଦ୍ କରା । ପରମେସର୍କେ ମାନିକରି ରୁଆ । ଆରି ସବୁର୍ ଉପ୍ପରର୍ ସାସନ୍କାରିଆକେ ସନ୍ମାନ ଦିଆସ୍ ।

**କିରିସ୍ତର୍ ଦୁକ୍ଷ୍ଟଗର୍ ସିକିଆ**

<sup>୧୯</sup> ତମର୍ ବିତ୍ତରେ ଜେଡୁକି ଲକ୍ଷ୍ମୀ ଗତିଦାଙ୍ଗତା ଅଇଆରାସ୍, ତମର୍ ସାଉକାର୍ମନର୍ କାତା ମାନିକରି ରୁଆ ଆରି ସେମନ୍କେ ପୁରାପୁରୁନ୍ ସନ୍ମାନ ଦିଆସ୍ । ଦରମ୍ ରଇବା ସାଉକାର୍ମନ୍ ରଇଲେ, କି ଚେରା ରଇବା ସାଉକାର୍ମନ୍କେ ମିସା ଏନ୍ତାରି କରୁତେରୁଆ । <sup>୨୦</sup> ତମର୍ କାଜ ବୁଲୁ ନ ରଇଲେ ମିସା ମୁରୁତିକରି ରଇଲେ, ତେଇ ପରମେସର୍ ସାର୍ଦା ଅଇସି । କାଜକେବଇଲେ ତମେ ତାର୍ ମନ୍ କଲାଟା ସିଦ୍ କଲାସ୍ନି । <sup>୨୧</sup> ଜଦି ବୁଲୁ କଲାର୍ପାଇ ଦୁକ୍ଷ୍ଟସ୍ତ ମୁରୁତି କରି ତଣ୍ଡ ପାଇଲେ, ତେଇ ତମେ କଲା କରମ୍ଭେ ପାଇଆରାସ୍ । ମାତର୍ ସତ୍ତ୍ୱାମ୍ କରି ଦୁକ୍ଷ୍ଟ କସ୍ତ ମୁରୁତଲେ, ସେଟା ପରମେସର୍କେ ସାର୍ଦା କରାଇସି । <sup>୨୨</sup> ସେନ୍ତାରି ଚଲାଚଲୁଡି କରବାକେ ପରମେସର୍ ତମ୍ଭକେ ଡାକ୍ଲାଆଚେ । କିରିସ୍ତ ତମର୍ପାଇ ଦୁକ୍ଷ୍ଟକସ୍ତ ମୁରୁତି କରି, ତମେ ଚଲାଚଲୁଡି କରବାଟା ଦେକାଇଆଚେ । <sup>୨୩</sup> ସେ କେବେ ପାପକରି ନ ରଇଲା ଆରି ତାର୍ ଟଣ୍ଡେଅନି ଗଟେକ୍ ମିସା ମିଟ୍‌କାତା ନ ବାରଇ ରଇଲା । <sup>୨୪</sup> ଲକ୍ଷ୍ମୀନ ତାକେ କିଜାଇଲାବେଲେ ସେ ନିନ୍ଦା କାତାକଇ ତଣ୍ଡ ଲାଗାଏ ନାଇ । ତାକେ ଦୁକ୍ଷ୍ଟ କସ୍ତ ଦେଲାକେ ସେ ଦମ୍‌କାଏ ନାଇ । ମାତର୍ କାଜ ଅନିଆଇ ନ କରବା ପରମେସର୍କେ ସବୁ ବିସଇ ଚାଡିଦେଲା । <sup>୨୫</sup> ଆମେ ପାପ୍ କଲାର୍ପାଇ ପାଇବା ତଣ୍ଡ କୁରୁସ୍‌କାଟେ ମରିକରି କିରିସ୍ତ ନିଜେ ବଇନେଲା । ପାପ୍ କରବାଟା ଚାଡିକରି ଦରମ୍ ଚଲାଚଲୁଡି କରବାକେ ସେ ଏନ୍ତାରି କଲା । ତାର୍ ଗାଗ୍‌ତେ ମାରି ରଇବା ଗାଉର୍ ଲାଗି ଆମେ ନିକ ଅଇଆରୁ । <sup>୨୬</sup> ଆଗ୍‌ତୁ ତମେ ବାଟ୍ ବାନା ଅଇଲା ମେଣ୍ଡାପାରା ରଇଲାସ୍, ମାତର୍ ଏବେ ସେ ତମ୍ଭକେ ଡାକି ଆନିଆଚେ । ସେ ଆକା ତମ୍ଭକେ ଜତନ୍‌କରି ତମର୍ ଆଡ଼ମାମନ୍‌କେ ଜାଗ୍‌ଲାନି ।

**୩**

**ମାଇଜି ମୁନ୍‌ସର୍ ପାଇ ସିକିଆ**

<sup>୧</sup> \*ସେନ୍ତାରିସେ ତମେ ବିବାଅଇ ରଇବା ଏ ମାଇଜିମନ୍, ନିଜର୍ ନିଜର୍ ମୁନ୍‌ସ୍‌ମନ୍ କାତାମାନିକରି ରୁଆ । କାଜକେବଇଲେ ତାକର୍ ବିତ୍ତରେ କେ ଜଦି ପରମେସର୍ ବାକିଅ ବିସ୍ବାସ୍ ନ କରିଅତ୍, ତମର୍ ନିକ ଚଲାଚଲୁଡି ଦେକିକରି ସେମନ୍ ମିସା ମନ୍ ବାଦ୍‌ଲାଇବାଇ । ତମ୍ଭକେ ପଦେକ୍ କଇବାକେ ନ ପଡେ । <sup>୨</sup> କାଜକେବଇଲେ ତମର୍ ସୁଆଲୁ ଚଲାଚଲୁଡି ଆରି ପରମେସର୍କେ ମାନିକରି ରଇବାଟା ସେମନ୍ ଦେକ୍‌ବାଇ । <sup>୩</sup> \*ବିନ୍ ମାଇଜିମନ୍ ଜେନ୍ତାରିକି, ପିନ୍ଦାଅତା ଅଇକରି, ସୁନାବାନା ପିନ୍ଦିକରି, ଚେଣ୍ଡି ସାଜାଡିକରି, ନିଜେ ସୁନ୍‌ର୍ ଅଇବାଇ, ତମେ ସେନ୍ତାରି ଉଆନାଇ । <sup>୪</sup> ମାତର୍ ମନ୍‌ବିତ୍ତରେ ସୁଆଲେ ରଇକରି ଆଡ଼ମାଇ ସୁସାରେ ରଇବା ଗଟେକ୍ ମାଇଜି ପରମେସର୍ ଦେକ୍‌ବା ଇସାବେ ସୁନ୍‌ର୍ । ସେନ୍ତାରି ସୁନ୍‌ର୍ ରଇବାଟା ବେସି ମୁଲିଅ ଆରି ସବୁଦିନର୍ପାଇ ରଇସି । <sup>୫</sup> ପୁର୍ବେ ରଇବା ସୁକଲୁ ମାଇଜିମନ୍ ଏନ୍ତାରିସେ ସେମନ୍ ଆସା କରବାଟା ପରମେସର୍କେ ସର୍ପିଦେଇ ନିଜର୍

\* ୩:୧ ୩:୧ ଏପିସ୍ତଲ ୫:୨୨; କଲସିଅ ୩:୧୮      \* ୩:୩ ୩:୩ ୧ମ ତିମତି ୨:୯

ମୁନୁସ୍ତମନର୍ କାତା ମାନିକରି ସୁନ୍ଦର୍ ଅଇତେରଇଲା । ୬ ପୁରବେ ସାରା ସେନ୍ତାରି କରତେରଇଲା । ସେ ତାର୍ ମନସ୍ ଅବ୍ରାଆମକେ ନିଜର୍ ସାଉକାର୍ ଇସାବେ କାତା ମାନିକରି ରଇଲା । ତମେ ଜଦି ସତ୍‌କାମ୍ କରି କାଇଟାର୍ ପାଇ ତରି ନ ରଇଲେ, ତମ୍‌କେ ମିସା ତାର୍ ଟକିମନ୍ ଇସାବେ ଲେକା କରସି ।

୭ \*ସେନ୍ତାରିସେ ତମେ ବିବାଅଇରଇବା ଏ ମୁନୁସ୍ତମନ୍, ନିଜର୍ ମାଇଜିମନର୍ ସଙ୍ଗ୍ ବୁଜାମାନା ଅଇରୁଆ । କାଇକେବଇଲେ ସେମନ୍‌କେ ତମର୍‌ଟାନେଅନି ଉନା ବପୁଆତେ । ସେମନ୍‌କେ ସନ୍‌ମାନ୍ ଦିଆସ୍, କାଇକେବଇଲେ ପର୍‌ମେସର୍ ଦେବା ନ ସାର୍‌ବା ଜିବନ୍ ତମର୍ ସଙ୍ଗ୍ ସେମନ୍‌କେ ମିସା ମିଲ୍‌ସି । ତମର୍ ପାର୍‌ତନା କର୍‌ବାଟା ବାଦା ନ ଆଇବାକେ ଏ ସବୁ ଆଦେସ୍ ମାନିକରି ରୁଆ ।

ନିମାନ୍ କାମ୍‌ପାଇ ଦୁକ୍‌କସ୍‌ଟ

୮ ସାରାସାରି ତମର୍ ସବୁଲକର୍ ମନ୍ ଗଟେକ୍ ଅ । ଦୁକ୍‌ସୁକ୍ ବେଲେ ତମର୍ ତମର୍ ବିତ୍‌ରେ ମିସିବିତି ରୁଆ । ନିଜର୍ ନିଜର୍ ବିତ୍‌ରେ ଆଲାଦ୍ ଅଇକରି ସୁଆଲେ ରୁଆ । ୯ ତମର୍ ବିରୁଦେ କେ କାରାପ୍ କାମ୍ କଲେ ତାକେ ବେର୍‌ଦାରି ରୁଆନାଇ । ନିନ୍ଦାକାତା କଇଲେ ଟିଣ୍ଡ ଲାଗାଆ ନାଇ । ତାର୍ ବାଦୁଲେ ପର୍‌ମେସର୍ ସେମନ୍‌କେ ଦୟା ଦେକାଇବାକେ ପାର୍‌ତନା କରା । କାଇକେବଇଲେ ସେ ତମ୍‌କେ ଡାକ୍‌ଲାବେଲେ ମୁଇ ତମ୍‌କେ ଆସିର୍‌ବାଦ୍ କରବି । ବଲି କାତା ଦେଇରଇଲା । ୧୦ ସାସ୍‌ତରେ ଲେକା ଅଇଲାପାରା,

“ଗଟେକ୍ ଲକ୍ ଜଦି ତାର୍ ଜିବନେ ସାର୍‌ଦାର୍ ଦିନ୍  
ଆରି ମଙ୍ଗଲ୍‌ର ଦିନ୍ ଦେକ୍‌ବିବଲି ମନ୍‌କଲେ,  
ସେ କାରାପ୍ କାତା ନ କଅ  
ଆରି ମିର୍ କାତା ନ କଅ ।

୧୧ “ସେ କରାପ୍ କାମ୍ ଚାଡ଼ିକରି, ନିକ ବିସଇ କରବାର୍ ଆତେ ।  
ତାର୍ ସଙ୍ଗ୍‌ର ଲକ୍‌ର ସଙ୍ଗ୍ ସୁସାରେ ରଇବାର୍‌ଆତେ ।”

୧୨ କାଇକେବଇଲେ ଦରମ୍‌ଲକ୍‌କେ ମାପ୍‌ରୁ ଜାଗିଲାଗିରଇସି ।

ସେମନ୍ ପାର୍‌ତନା କଲାଟା ସୁନ୍‌ସି  
ଜେଡ୍‌କି ଲକ୍ କାରାପ୍ ବିସଇ କର୍‌ବାଇ  
ସେମନ୍‌କେ ବିରଦ୍ କରସି ।

୧୩ ତମେ ଜଦି ନିକ କାମ୍ କର୍‌ବାକେ ମନ୍ କଲେ, ତମର୍ ବିରଦେ କେ ମିସା କାରାପ୍ କାମ୍ ନ କରଡ୍ । ୧୪ \*ସତ୍ କାମ୍ କରି ମୁର୍ଚି ରଇଲେ ତମେ କେଡେକ୍ କରମର୍ ଲକ୍ । ଜନ୍ ଲକ୍‌ମନ୍ ତମ୍‌କେ କସ୍‌ଟ ଦେଲାଜିନି, ସେମନ୍‌କେ ଡରିକରି ଚିନ୍ତା କରାନାଇ । ୧୫ ମାତର୍ କିରିସ୍‌ଟକେ ମାପ୍‌ରୁବଲି ଡାକ୍‌ପୁଟା କରା ଆରି ସନ୍‌ମାନ୍ ଦିଆସ୍ । ବିସ୍‌ବାସି ଇସାବେ, ତମେ ଆସା କର୍‌ବା ବିସଇ କେ ମିସା ପାତାର୍‌ଲେ, ସେମନ୍‌କେ ବାତାଇବାକେ ଜାଗରଡ୍ ଅଇରୁଆ । ୧୬ ମାତର୍ ମନ୍‌ବିତ୍‌ରେ ସୁଆଲ୍ ରଇକରି, ସନ୍‌ମାନ୍ ଦେଇକରି କାତାଉଆ । ତମର୍ ବିବେକ୍ ତମ୍‌କେ ଦସି ନ କର । ଜେନ୍ତାରିକି ତମର୍ ନିକ ଚଲାଟଲ୍‌ତି ବିରୁଦେ ଜେଡ୍‌କି ଲକ୍ ନିନ୍ଦା କର୍‌ବାଇ, ତାକର୍ କାତାଇସେ ସେମନ୍ ଲାଜ୍ ଅଇବାଇ । ୧୭ କାଇକେବଇଲେ ତମେ ନିକ କାମ୍ କଲାର୍ ଲାଗି ଦୁକ୍ କସ୍‌ଟ ମୁର୍ଚ୍‌ବାକେ ପର୍‌ମେସର୍ ଜଦି ମନ୍ କଲେ, ସେନ୍ତାରି ଅଇବାଟା ନିକ । କାରାପ୍ କରି ଦୁକ୍ କସ୍‌ଟ ମୁର୍ଚ୍‌ବା ବାଦୁଲେ, ସେଟା ନିକ । ୧୮ କିରିସ୍‌ଟ ମିସା ଆମର୍ ପାପର୍‌ଲାଗି ଏକାତରେକ୍ ସବୁଲକର୍‌ପାଇ ଦୁକ୍‌କସ୍‌ଟ ଅଇ ମୁର୍ଚିକରି ମଲା । ସେ ଦରମ୍ ରଇ ପାପ୍‌କରିରଇବା ଲକ୍‌ମନ୍‌କେ ପର୍‌ମେସର୍‌ର ଲଗେ ଆନ୍‌ବାକେ ମରିଜାଇରଇଲା । ଲକ୍‌ମନ୍ ତାର୍ ଗାଗଡ୍ ମରାଇଲାଇ, ମାତର୍

\* ୩:୭ ୩:୭ ଏପିସିୟ ୫:୨୫; କଲସିଆ ୩:୧୯      \* ୩:୧୪ ୩:୧୪ ମାଡିଉ ୫:୧୦

ତାର ଆତ୍ମା ଜିବନ୍ ଅଇଆଚେ । ୧୯ ମଲା ଲକ୍ମନର୍ ଆତ୍ମା ବନ୍ଦିଅଇରଇବା ଜାଗାଇ, ଆତ୍ମାର ଇସାବେ ସେ ସୁବ୍ କବର୍ ଜାନାଇଲା । ୨୦ ଏ ବନ୍ଦି ଆତ୍ମାମନ୍ ପୁରବେ ନଅର୍ ବେଲେ ପର୍ମେସରର୍ କାତା ନ ମାନ୍ଲାଟାମନ୍ । ସେତ୍‌କିବେଲେ ନଅ ବଡ଼ ତ୍ତା ତିଆର୍ କର୍ତେରଇଲା । ତାର କାତା ଲକ୍ମନ୍ ବିସ୍‌ବାସ୍ କରବାଇ ବଲି ପର୍ମେସର୍ ମୁର୍ଚିକରି ରଇଲା । କାଇକେବଇଲେ, ଏକାଇ ଆର୍ ଲକ୍ମେ ସେ ପାନିତେଇ ବୁଡ଼ନାଇ । ସେମନ୍ ତ୍ତାଇ ଚରିରଇଲା ଆରି ରକିଆ ପାଇଲା । ୨୧ ସେ ପାନି ଆମର୍ ତୁବନ୍ ବିସଇ ଜାନାଇଲାନି । ତମେ ତୁବନ୍ ନେଲାକେ ତମର୍ ଗାଗତର୍ ମୁର୍ଚି ଦଇଅଇଲାର୍ ପାଇ ନଏଁ, ମାତର୍ ଗଟେକ୍ ନିକ ବିବେକ୍ ସଙ୍ଗ୍ ପର୍ମେସର୍‌କେ ଦେଇରଇଲା କାତାର୍ ଲାଗି ତମ୍‌କେ ମୁକ୍ତି କର୍ସି । ଜିସୁ କିରିସ୍ଟ ମଲାତେଇଅନି ଜିବନ୍ ଅଇକରି ଉଟ୍‌ଲାକେ ଏଟା ଅଇସି । ୨୨ ସେ ସର୍ଗେ ବାଉଡି ଜାଇ ପର୍ମେସରର୍ ଉଜାବାଟେ ଆଚେ । ସର୍ଗେ ରଇବା ସବୁ ଦୁଡ଼, ଅଦିକାର୍ ଆରି ବପୁ ଉପରେ ସେ ସାସନ୍ କଲାନି ।

### ୪

ମନ୍ ବାଦ୍‌ଲାଇଲା ଜିବନ୍

୧ କିରିସ୍ଟ ନିଜର୍ ଗାଗତେ ଦୁକ୍‌କସ୍ଟ୍ ମୁର୍ଚିକରି ଜେନ୍ତାରି ଚିନ୍ତା କର୍ତେ ରଇଲା, ତମେମିସା ସେନ୍ତାରି ଚିନ୍ତାକରି ତାଟ୍ ଉଆ । କାଇକେବଇଲେ ଜେ ଗାଗତେ ଦୁକ୍‌କସ୍ଟ୍ ମୁରସି, ସେ ଆରି ପାପ୍ କରବାକେ ମନ୍ ନ କରେ । ୨ ତେବର୍‌ପାଇ ତମର୍ ମନ୍‌କେ ଜାଗରଡ଼ କରା । ଜେନ୍ତାରିକି, ଏବେ ଅନି ତମର୍ ମରନ୍ ଜାକ, ପର୍ମେସର୍ ମନ୍ କଲା ଇସାବେ ଚଲାଚଲ୍‌ତି କର୍ସା । ତମର୍ ପାପର୍ ଗୁନ୍ ଚଲନ୍ ଇସାବେ କରାନାଇ । ୩ କାଇକେବଇଲେ ପର୍ମେସର୍‌କେ ନାଜାନ୍‌ଲା ଲକ୍ ଜନ୍‌ଟା କରବାକେ ମନ୍ କରବାଇ, ସେନ୍ତାରି ତମେମିସା କର୍ତେ ରଇଲାସ୍ । ଆରି ସେନ୍ତାରି କରି କରି ବୁଗାଇ ବୁଗାଇ ଦିନ୍ ଗାଲା । ତମର୍ ଗାଗତର୍ ପାପେରଇବା ଗୁନ୍‌ଚଲନ୍ ଇସାବେ ଲାଜର୍ ବିସଇ, ପାଦ୍‌ରା କାମ୍ କରବାକେ ମନ୍ କରବା ବିସଇ, ମାତିରଇବା ବିସଇ, କରାପ୍ ବିସଇଟାନେ ମଜାମଜ୍‌ଲିସ୍ କରବା ବିସଇ ଆରି ପର୍ମେସର୍ ଗିନ୍‌କରବା ପୁଡ଼ଲା ପୁଜା କରବାଟାମନ୍ କର୍ତେରଇଲାସ୍ । ୪ ମାତର୍ ଏବେ, ବିସ୍‌ବାସ୍ ନ କଲା ଲକ୍ମନ୍ କାବାଅଇଗାଲାଇନି ଆରି ତମ୍‌କେ ନିନ୍ଦାର୍ କାତା କଇଲାଇନି । କାଇକେବଇଲେ ସେମନ୍ କିରିରଇବା କାରାପ୍ ମଜାମଜ୍‌ଲିସ୍ ବିସଇତେଇ ତମେ ମିସାସ୍ ନାଇ । ୫ ମାତର୍ ସେମନ୍ ନିଜେ ପର୍ମେସର୍‌କେ ଇସାବ୍ ଦେବାକେ ପଡ଼ସି । ସେ ବଞ୍ଚିରଇବା ଆରି ମରିରଇବା ସବୁକେ ବିଚାର୍ କରବାକେ ଜାଗିଆଚେ । ୬ ସେଟାପାଇ ସୁବ୍‌କବର୍ ମରିରଇବା ଲକ୍ମନ୍‌କେ ମିସା ଜାନାଇରଇଲା । କାଇକେବଇଲେ ସବୁଲକ୍ମନ୍ ପାଇବା ତଣ୍ଟ୍ ସେମନ୍ ପାଇରଇକରି ମରିରଇଲେ ମିସା ତାକର୍ ଆତ୍ମା ପର୍ମେସରର୍ ପାରା ବଞ୍ଚିବାକେ ସୁବ୍ କବର୍ ଜାନାଇରଇଲା ।

ଇସ୍‌ପର୍ ଦେବା ଦାନର୍ ନିମାନ୍ ଗୁମସ୍‌ତା

୭ ମାତର୍ ସବୁ ବିସଇ ସାର୍‌ବା ବେଲା ଲଗେ କେଟ୍‌ଲାବେ । ତେବର୍‌ପାଇ ନିଜେ ଜାଗରଡ଼ ରୁଆ ଏନ୍ତାରି କଲେ ତମେ ନିକସଙ୍ଗ୍ ପାର୍‌ତନା କରିପାରାସ୍ । ୮ ସବୁର୍‌ଟାନେଅନି ମୁକ୍ତିସ ବିସଇ ଅଇଲାନି ତମର୍ ତମର୍ ବିଡ଼ରେ ଆଲାଦ୍ କରାକରି ଅଇବାଟା । କାଇକେବଇଲେ, ସେନ୍ତାରି ଆଲାଦ୍ କଲେ, ତମର୍ ତମର୍ ପାପ୍ ବିସଇ ଚିନ୍ତା ନ କରି ମୁର୍ଚିକରି କେମା ଦିଆଦିଇ ଅଇସା । ୯ ତମର୍ ବିଡ଼ରେ ମୁର୍‌ମୁରା ନଅଇ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଗତିଆ କରି ତାକାତାକି ଉଆ । ୧୦ ତାକେ ବିସ୍‌ବାସ୍ କରବା ସବୁଲକ୍‌କେ ପର୍ମେସର୍ ବିନ୍ ବିନ୍ ଦାନ୍ ସର୍‌ପିଦେଲା

ଆଚେ । ଗଟେକ୍ ବିସ୍‌ବାସ୍ ରଇବା ଗତିଦାଙ୍ଗତା ପାରା ସେ ଦେଇରଇବା ଦାନ୍ ବିନ୍ ଲକ୍‌ମ୍‌ ଫାଇଲ୍ ଅଇବାକେ ଦିଆସ୍ ।<sup>୧୧</sup> ଜନ୍ ଲକ୍‌ମ୍‌ କବର୍ ଜାନାଇଲାଇନ୍, ଆମେ ପର୍‌ମେସର୍‌ କବର୍ ଜାନାଇଲୁନ୍, ବଲି ଜାଗର୍‌ତ୍ ରଇବାର୍ ଆଚେ । ଜନ୍ ଲକ୍‌ମ୍‌ ତାକର୍‌ ବାଇବଇନ୍‌ମନ୍‌କେ ସେବା କଲାଇନ୍, ଆମେ ପର୍‌ମେସର୍‌ ବପୁ ଦେଲାକେସେ, ସେବାକଲୁନ୍ ବଲି ଏତାଅଡ୍ । ତମେ କରରଇବା ସବୁ କାମେ ଜିସୁକିରିସ୍‌ଟର୍‌ଟାନେଅନ୍ ପର୍‌ମେସର୍‌ ତାକ୍‌ପୁଟା ପାଅ । ସେ ଆକା କାଲ୍ କାଲ୍ ଜୁଗ୍ ଜୁଗ୍ ମଇମା ଆରି ବପୁ ପାଇସି । ଆମେନ୍ !

**କିରିସ୍‌ଟ ବିସ୍‌ବାସିର ଦୁକ୍**

<sup>୧୨</sup> ଏ ମର୍‌ ମଇତର୍‌ମନ୍, ତମେ ବେସି ଦୁକ୍ କସ୍‌ଟ ମୁର୍‌ଟିକରି ରଇବାବେଲେ କାବାଅଇଜିବାର୍ ନାଇ । ନ ଅଇବା ବିସଇ ମକେ କେନ୍ତାରି ଗଟ୍‌ଲାନ୍ ବଲି ବାବ୍‌ବାର୍ ନାଇ ।<sup>୧୩</sup> ତାର୍ ବାଦୁଲେ, କିରିସ୍‌ଟ ଦୁକ୍ କସ୍‌ଟ ମୁର୍‌ଟିକରି ରଇଲାର୍ ପାରା ତମ୍‌କେ ମୁର୍‌ଟିବାକେ ଆଇଲେ, ସାର୍‌ଦା ଉଆ । ଜନ୍ ଦିନେ ସେ ତାର୍ ତାକ୍‌ପୁଟା ଦେକାଇସି, ସେ ଦିନେ ତମେ ଅଦିକ୍ ସାର୍‌ଦା ଅଇସା ।<sup>୧୪</sup> କିରିସ୍‌ଟର୍‌ ସିସ୍ ଅଇଲାର୍ ପାଇ ଲକ୍‌ମ୍‌ ତମ୍‌କେ ନିନ୍ଦା କଲେ, ତମେ କେତେକ୍ କରମର୍ ଲକ୍ ! କାଇକେବଇଲେ ବେସି ମଇମା ରଇବା ପର୍‌ମେସର୍‌ର ଆଡ୍‌ମା ତମର୍‌ଟାନେ ଆଚେ ବଲି ଜାନିପାର୍‌ସା ।<sup>୧୫</sup> ତମର୍ ବିତ୍‌ରେ ଜଦି କେ ମିସା ନର୍ ମାର୍‌ଲାର୍ ପାଇ ନଇଲେ ଚର୍ ଅଇଲାର୍ ପାଇ କି ନିୟମ୍ ନ ମାନ୍‌ଲାର୍‌ପାଇ କି ବିନ୍ ଲକ୍‌ ବିସଇତେଇ ମୁଣ୍ଡ ପୁରାଇଲାର୍‌ପାଇ ଦୁକ୍ କସ୍‌ଟ ପାଆନାଇ ।<sup>୧୬</sup> ମାତର୍ କିରିସ୍‌ଟକେ ବିସ୍‌ବାସକରି ଜଦି ଦୁକ୍ କସ୍‌ଟ ପାଇଲେ ଲାଜ୍ ନ ଅଇ ପର୍‌ମେସର୍‌କେ ତାକ୍‌ପୁଟା କରା । କାଇକେବଇଲେ ତମ୍‌କେ କିରିସ୍‌ଟର୍ ଲକ୍ ଇସାବେ ଲେକାଅଇଲା ଆଚେ ।

<sup>୧୭</sup> କାଇକେବଇଲେ ପର୍‌ମେସର୍ ସବୁ ଲକ୍‌କେ ବିଚାର୍ କର୍‌ବାଦିନ୍ ଲଗେ କେଟ୍‌ଲା ଆଚେ । ଆରି ସେ ତାର୍ ନିଜର୍ ଲକ୍‌କେ ପର୍‌ତୁମ୍ ବିଚାର୍ କର୍‌ସି । ଜଦି ସେଟା ଆମର୍ ସଙ୍ଗ୍ ଆରାମ୍ ଅଇଲେ, ତାର୍ ସୁର୍ କବର୍ ଚାଡିଦେଲା ଲକ୍‌ମନ୍‌ ଦସା କେନ୍ତା ଅଇସି ?<sup>୧୮</sup> ଦରମ୍ ସାସ୍‌ତରେ ଲେକାଅଇଲାପାରା,

“ଜଦି ଦରମ୍ ଲକ୍ ମୁକ୍ତି ପାଇବାଟା ଆବଡ୍

ପର୍‌ମେସର୍‌ର ବିସଇ କାଇ ଚିନ୍ତା ନ କର୍‌ବା ପାପିମନ୍‌ ବିସଇ କେନ୍ତା ରଇସି ?”

<sup>୧୯</sup> ତେବର୍‌ପାଇ ପର୍‌ମେସର୍ ମନ୍ କଲାକେ ତମେ ଜଦି ଦୁକ୍ କସ୍‌ଟ ମୁର୍‌ଟିକରି ଆଚାସ୍, ସେନ୍ତା ଆଲେ ନିକ କାମ୍ କର୍‌ବାକେ ଲାଗିରୁଆ ଆରି ନିଜେ ତାକେ ସର୍‌ପିଉଆ । ସେ କାତା ଦେଇରଇଲାଟା ସିଦ୍ କର୍‌ସିଆକା ।



**ପର୍‌ମେସର୍‌ ମେଣ୍ଡାରିସି**

<sup>୧</sup> ତମର୍ ମଣ୍ଡଲିର୍ ପାର୍‌ଟିନ୍‌ମନ୍‌କେ ଗଟେକ୍ ବିସଇ କଇବାକେ ମୁଇ ମନ୍ କଲିନ୍ । କାଇକେବଇଲେ ମୁଇ ମିସା ଗଟେକ୍ ପାର୍‌ଟିନ୍ । କିରିସ୍‌ଟ ଦୁକ୍‌କସ୍‌ଟ ମୁର୍‌ଟିଲାଟା ମୁଇ ଦେକିଆଟି । ଆରି ତାର୍ ତାକ୍‌ପୁଟା ଜାନାଇବା ଦିନେ ମୁଇ ମିସା ତେଇ ମିସ୍‌ବି । ମୁଇ ତମ୍‌କେ ବାବୁଜିଆ କଲିନ୍, <sup>୨</sup> ତମେ ଦେକାରକା କର୍‌ବା ବିସ୍‌ବାସିମନ୍‌କେ ଜତନ୍ କରା । କାଇକେବଇଲେ ସେମନ୍ ପର୍‌ମେସର୍‌ ମେଣ୍ଡାରିସି ପାରା । ପର୍‌ମେସର୍ ସେ ଲକ୍‌ମନ୍‌କେ ତମ୍‌କେ ସର୍‌ପିଦେଇଆଚେ । ତମେ ସାର୍‌ଦାସଙ୍ଗ୍ ତାକର୍ ଜତନ୍ ନେବାର୍‌ଆଚେ । କାଇକେବଇଲେ ସେଟା ସେ ମନ୍ କଲାନ୍ । ତାବୁ ଆସା ଅଇକରି ଏ କାମ୍ କର୍‌ବାର୍ ନାଇ । ତାର୍‌ବାଦୁଲେ, ପର୍‌ମେସର୍‌କେ ଆରି ତାର୍

\* ୫:୨ ୫:୨ ଜଅନ୍ ୨୧:୧୫-୧୭



ଲକ୍ଷ୍ମୀଙ୍କୁ ଯେବାକରବାକେ ମନ୍ କର ସେଟା କରା ।<sup>୩</sup> ତମେ ଦେକାରକା କରବା ଲକ୍ଷ୍ମୀଙ୍କୁ ବାଦିଅ କରାନାଇ । ତାର ବାଦୁଲେ ତମର ନିକ ଚଲାଚଲ୍ତି ଦେକି ସେମନ୍ ସିକଡ଼ ।<sup>୪</sup> ଆରି ଜେତେବେଲେ ଜିସୁକରିସଟ ଜେ କି ସବୁ ବିସ୍ବାସିମନର ବଡ଼ ନେତା ଦେକାଇ ଅଇସି, ଉଜଲ୍ ଉନା ନ ଅଇବା ତାକ୍ପୁଟାର ପୁରୁସ୍କାର ତମ୍ଭକେ ଦେଇସି ।

<sup>୫</sup> ସେନ୍ତାରିସେ ଏ ଦାଙ୍ଗତାମନ୍, ତମେ ବଡ଼ଲକ୍ଷ୍ମୀମନ୍ କାତା ମାନିକରିରୁଆ । ମନ୍ ବିତ୍ତରେ ସୁଆଲ୍ ରଇ ଗଟେଲକ୍ ଆରି ଗଟେଲକ୍‌କେ ସେବା କରାକରି ଅଇରୁଆ । କାଇକେବଇଲେ ସାସ୍ତରେ ଲେକା ଅଇଲାଆତେ ବଡ଼ପନ୍ ଅଇବା ଲକ୍ଷ୍ମୀଙ୍କୁ ପରମେସର୍ ବିରଦ୍ କରସି, ମାତର୍ ମନେ ମନେ ସୁଆଲ୍ ରଇବା ଲକ୍ଷ୍ମୀଙ୍କୁ ଦୟା ଦେକାଇସି ।<sup>୬</sup> ସବୁରଟାନେ ଅନି ବପୁ ରଇବା ପରମେସର୍‌କେ ନିଜେ ସର୍ପିତଆ । ତାର୍ ସମାନ୍ ବେଲାଇ ସେ ତମ୍ଭକେ ଉଟାଇସି ।<sup>୭</sup> ତମ୍ଭର ସବୁଜାକ ଚିନ୍ତା କରବାଟା ପରମେସର୍‌କେ ସର୍ପି ଦିଆସ୍, କାଇକେବଇଲେ, ସେ ତମ୍ଭକେ ଜତନ୍ କଲାନ୍ତି ।

୮ ଜାଗରତା ଅଇକରି ଜାଗିରୁଆ, କାଇକେବଇଲେ ଆମର୍ ସତ୍ତ୍ୱ ସଇତାନ୍ କାକେ ମିସା ଗିଲ୍‌ବି ବଲି ଅଡ଼ରି ବୁଲ୍‌ଲାନ୍ତି ।<sup>୯</sup> ବିସ୍ବାସେ ତାଟ୍ ରଇକରି ତାକେ ବିରଦ୍ କରା । ଗୁଲାଇ ଦୁନିଆଇ ରଇବା ତମ୍ଭର ବିସ୍ବାସି ବାଇବଇନିମନ୍, ଏନ୍ତାରି ଦୁକ୍ କସଟ୍ ପାଇ ମୁରଚ୍‌ଲାଇନି ବଲି ତମେ ଜାନିଆଟାସ୍ ।<sup>୧୦</sup> ଚନେକର୍ ଆଇବା ଦୁକ୍‌କସଟ୍ ମୁଚ୍‌ଟି ସାରାଇଲେ, ତମ୍ଭକେ ପରମେସର୍ କାଇ ଦସ୍ ନ ରଇବା, ତାର୍ ସିଦ୍ ଲକ୍ କରାଇସି । ତମ୍ଭର ବିସ୍ବାସ୍ ତାଟ୍ ଅଇବାକେ ସେ ତମ୍ଭକେ ବପୁ ଦେଇସି । ଆରି ତମ୍ଭକେ ନିକ କୁନାଦି ପାରା ତିଆର୍ କରସି । କିରିସଟ୍‌ର ସଙ୍ଗ୍ ମିସ୍‌ଲାର୍‌ପାଇ, ତାର୍ ନ ସାର୍‌ବା ମଇମାତେଇ ମିସ୍‌ବାକେ ତମ୍ଭକେ ତାକ୍‌ଲାଆତେ । ସେ ତମ୍ଭକେ ଜିବନ୍ ଦୁକାଇ ଦୟା କରି ଏ ସବୁ ବିସଇ କଲାଆତେ ।<sup>୧୧</sup> ତାକେ ସବୁରଟାନେଅନି ବପୁଆତେ, ସେ ସେ କାଲ୍ କାଲ୍ ଜୁଗ୍ ଜୁଗ୍ ସାସନ୍ କରସି । ଆମେନ୍ ।

**ସାରାସାରିର୍ ଜୁଆର୍**

<sup>୧୨</sup> ଏ ଅଲପ୍ ବିସଇର୍ ଚିଟି ଲେକ୍‌ବାକେ ସିଲା ମକେ ସାଇଜ କରଇଲଲା । ସେ ଗଟେକ୍ ଆମର୍ ବିସ୍ବାସି ବାଇ । ତମ୍ଭର ବିସ୍ବାସ୍ ତାଟ୍ କରାଇବାକେ ଆରି ପରମେସର୍ ତାର୍ ଜିବନ୍ ଦୁକାଇ ଦୟା ଦେକାଇଲାଟା ତମେ ସତଇସେ ଜାନିଲାସ୍‌ନି ବଲି ଟିକ୍ କରବାକେ ମୁଇ ଏ ଚିଟି ଲେକ୍‌ଲିନି । ତାର୍ ଜିବନ୍ ଦୁକାଇଲାଟାନେ ତମେ ତାଟ୍ ସଙ୍ଗ୍ ରୁଆ ।

<sup>୧୩</sup> ଏବାବିଲନେ ରଇବା ତମ୍ଭର ବିସ୍ବାସି ବାଇବଇନିମନ୍ ତାକର୍ ଜୁଆର୍ ଜାନାଇଲାଇନି । ପରମେସର୍ ସେମନ୍‌କେ ବାଟ୍‌ଲାଆତେ । ମାର୍‌କ ଜାକେ କି ମର୍ ପଅ ଇସାବେ ଦେକ୍‌ଲିନି, ସେମିସା ତାର୍ ଜୁଆର୍ ଜାନାଇଲାନ୍ତି ।<sup>୧୪</sup> ତମ୍ଭର ବିତ୍ତରେ ଆଲାଦ୍ ଆତେ ବଲି ଦେକାଇବାକେ ଆତେ ଦାରି ଜୁଆର୍ କରାକରିତଆ ।

କିରିସଟ୍‌ତେଇ ଜେଡକି ଲକ୍ ମିସ୍‌ଲାଇଆଟଡ଼ ସେମନ୍ ସବୁ ଲକ୍‌କେ ସାନ୍ତି ମିଲ୍ ।

୫:୨ ୫:୨ ମାଡିଉ ୨୩:୧୨; ଲୁକ୍ ୧୪:୧୧:୧୮:୧୪    ୫:୧୨ ୫:୧୨ ପେରିଡ଼ ୧୫:୨୨,୪୦    ୫:୧୩ ୫:୧୩ ପେରିଡ଼ ୧୨:୧୨,୨୫:୧୩:୧୩;୧୫:୩୭-୩୯; କଲସିଅ ୪:୧୦; ପିଲିମନ୍ ୧:୨୪

# ପିତର ଦ୍ୱିତୀୟଥର ଲେଖୁଥିବା ପତ୍ର ପିତର ଦୁଇପାଲି ଲେକିରଇବା ଚିଠି ଏ ବଇର ବିସଇ ଜାନ୍‌ବାଟା

ପିତର ଦୁଇପାଲି ଲେକିଲା ଚିଠି ଜାଣାଇଲାନି କି, ଏ ଚିଠି ପେରିଡ଼ ପିତର ଲେକିଲାଆତେ । ମାତର ଏବେ କେତେକ୍ କେତେକ୍ ପଣ୍ଡିତମନ୍ଦ ଏଟା ସତ୍ ନାଇ ବଲି କଇଲାଇନି । କଇବାକେଗାଲେ ଏଟା ଗଟେକ୍ ବିନ୍ ପିତର ଲେକିଆତେ । ସେ ଜିସୁକିରିସ୍‌ଟର୍ ଗଟେକ୍ ସତ୍ ସାକି ରଇଲା ବଲି ଲେକିଲା ଲକ୍ କଇଲାନି । ଦେକିବା ଇସାବେ ଜିସୁକିରିସ୍‌ଟ ବାଦଲ୍‌ବା ବିସଇ କଇଲାନି ୧:୧୭-୧୮ । ପିତର ଏ ଚିଠି କିରିସ୍‌ଟ ଜନମ ଅଇଲାପତେ ୫୬-୬୯ ବିତ୍‌ରେ ତାର୍ ମରନ୍ ଅଇବା ଆଗତୁ ଏଟା ଲେକିଲାଆତେ । ପିତର ଏଟା ତାର୍ ଦୁଇପାଲି ଲେକିବା ଚିଠିବଲି ମିସା କଇଆତେ ୩:୧ ।

ପିତରର ପରତୁମ୍ ଚିଠି ଲେକାଅଇଲା ପତେ, ସେ ଲେକାର୍ ବେଲାକେ ଇତି ଜାଗାଦେଇ ଏଟାକେ ଦୁଇପାଲି ଲେକିଲା ଚିଠି ବଲି କଇଆତେ । ଏ ଚିଠିଟାଣେ ସବୁ ବିସ୍‌ବାସିମନ୍‌କେ ତାର୍ ସବୁ ବିସଇ ଦେଇଆତେ । ପିତର ବିସ୍‌ବାସିମନ୍‌କେ ସାଆସ୍ ଆରି ନିକସଙ୍ଗେ ଜିଉନା କାଉନା କରବାକେ ଆରି ମିଡ଼ ସିକିଆ ଦେଉ ମନର୍ କାତା ନ ମାନି ଜାଗରତ୍ ରଇବାକେ ଏ ଚିଠିଟାଣେ ଲେକିଆତେ ୨ । ଜିସୁ ଆଇବାଟା ବେସି ଦିନ୍ ଆତେ ବଲି ମିଡ଼ କଇବା ଲକ୍‌ମନ୍‌କେ ସାଆସ୍ ଦେଲାନି । ପର୍‌ମେସର୍ ଦିରେ ରଇବା ପର୍‌ମେସର୍ ନଏ, ମାତର ସବୁଲକ୍ ତାର୍‌ଲାଗି ଉଦାର୍ ପାଅଡ଼ ବଲି ସେ ମନ୍‌କଲାନି ୨ ଯ ପିତୃ ୩:୮-୯ ଏଟାସେ ଗଟେକ୍ ନିକସଙ୍ଗେ ଜିଉନା କାଉନା କରବାଟା ୩:୧୪

### ଏ ବଇ ବିତ୍‌ରେ ରଇବାଟା

- ୧. ପିତର ତାର୍ ନିଜର୍ ବିସଇ ଆରି ତାର୍ ଚିଠି ପଡ଼ିବା ଲକ୍‌ମନ୍‌କେ ରଇବା ଜାଗା ବିସଇରେ ଜାଣାଇଲାନି । ୧:୧-୨
- ୨. ତାର୍‌ପତେ ବିସ୍‌ବାସି ବାଇବଇନିମନ୍‌କେ ନିକସଙ୍ଗେ ଜିଉନା କାଉନା କରବାକେ ଏଟାକ୍‌ଦେଲାଆତେ । କାଇକେବଇଲେ ପର୍‌ମେସର୍ ଆମ୍‌କେ ସାଆସ୍ ଦେଲାଆତେ । ୧:୩-୨୧
- ୩. ସେ ମିଡ଼ ସିକାଇବା ଗୁରୁମନ୍‌କେ ଜାଗରତା କରାଇ ସାରାସାରି ପତେ ସେମନରୁଲାଗି କାଇଟା ଗଡ଼ି, ସେଟା କଇଲାଆତେ । ୨:୧-୨୨
- ୪. ପିତର ଜିସୁକିରିସ୍‌ଟ ଆରିତରେକ୍ ଆଇବା ବିସଇ ଜାଗିରଇ ଜିଉନା କାଉନା କରବାକେ ସାସ୍ ଦେଇଆତେ । ୩:୧-୧୮

### ପିତର ଦୁଇପାଲି ଚିଠି ଲେକିବାଟା

୧ ମୁଇ ସିମନ୍ ପିତର, ଜିସୁକିରିସ୍‌ଟର୍ ଗଟେକ୍ ଗତିବାଙ୍ଗ୍‌ଡା ଆରି ପେରିଡ଼ ଅଇଆଟି ।

ଆମେ ଜେକ୍ତି ଜିସୁକିରିସ୍‌ଟକେ ବିସ୍‌ବାସ୍ କରିଆତୁ, ସେନ୍ତାରି ବିସ୍‌ବାସ୍ କରବା ଲକ୍‌ମନ୍‌କେ ଏ ଚିଠି ଲେକିଲିନି । ସେ ଆମର୍ ପର୍‌ମେସର୍ ଆରି ମୁକ୍‌ତିକାରିଆ । ତାକେ ବିସ୍‌ବାସ୍ କରବାକେ ସେ ଆକା ଆମ୍‌କେ ବପୁଦେଲାଆତେ । ସେ କରବା ସବୁ କାମ୍ ଟିକ୍ ଆରି କାଇ ଅନିଆଇ ନାଇ ।

।<sup>୨</sup> ପର୍‌ମେସର୍‌କେ ଆରି ଆମର୍ ମାପୁରୁ ଜିସୁକିରିସ୍‌ଟକେ ତମେ ଜାନ୍‌ଲାର୍ ପାଇ ତାର୍ ସାନ୍ତି ଆରି ସେ ଜିବନ୍ ଦୁକାଇ ଦୟା କଲାଟା ତମ୍‌କେ ମିଲି ।

ପର୍‌ମେସର୍ ତାକ୍‌ଲାଟା ଆରି ବାଟ୍‌ଲାଟା

୩ ତାକେ ସାର୍ଦ୍ଦା କରାଇଲାପାରା ଚଲାଚଳୁତି କରବାକେ ସେ ଆମ୍ଭକେ ଲତାକେ ଆଇବା ସବୁ ବିସଇ ଦେଲାଆତେ । ତାର ବପୁରଲାଗି ସେ ଆମ୍ଭକେ ଏଟା ଦେଲାଆତେ ଆରି ଆମେ ତାକେ ଜାନ୍‌ଲାବୁପାଇ ମିସା । ତାର ମଇମାଇ ଆରି ଦରମେ ମିସବାକେ ସେ ସେ ଆମ୍ଭକେ ଡାକିଆତେ । ୪ ତାର ମଇମା ଆରି ଦରମର ଲାଗି ସେ ଆମ୍ଭକେ ବେସି ବଡ଼ ଆରି ବେସି ମୁଲିଅ ରଇବା ଦାନ୍ ଦେଲାଆତେ । କିରିସ୍‌ଟକେ ବିସ୍‌ବାସ୍ ନ କଲା ଲକ୍‌ମନ୍ ଜେଣ୍ଟିକି କାରାପ୍ ବିସଇ କରବାକେ ମନ୍ କରବାଇ, ସେନ୍ତାରି ମନ୍‌କରବା ଚାନେଅନି ମୁକ୍‌ଲାଇବାକେ ସେ ଆମ୍ଭକେ ଏନ୍ତାରି କଲାଆତେ । ଏ ସବୁ ବିସଇ ତାକର୍ ମନ୍‌କେ ନସାଇସି । ମାତର୍ ତମେ ପର୍‌ମେସର୍‌ର୍ ପାରା ଦରମ୍ ଅଇପାର୍‌ସା । ୫ ତେବେ କିରିସ୍‌ଟକେ ବିସ୍‌ବାସ୍ କଲାର୍ ପାଇ ନିକ ଚଲାଚଳୁତି କରବାକେ ଚେସ୍‌ଟା କରା । ଏଟାର୍ ସଙ୍ଗ୍, ଗିଆନ୍ ସଙ୍ଗ୍ ଜିଉନାକାଉନା କରବାକେ, ୬ ଜିଉନାକାଉନା ସଙ୍ଗ୍ ନିଜେ ଜାଗ୍‌ରଡ଼ ଅଇରଇବାକେ, ଜାଗ୍‌ରଡ଼ ରଇକରି ମୁରତି ରଇବାକେ, ମୁରତିକରି ରଇ ପର୍‌ମେସର୍‌କେ ସାର୍ଦ୍ଦା କରବା ଗୁନ୍‌ଚଲନ୍ କରବାକେ, ୭ ଗୁନ୍‌ଚଲନ୍‌ସଙ୍ଗ୍ ବାଇବଇନିକେ ଆଲାଦ୍ କରବାକେ, ବାଇବଇନିକେ ଆଲାଦ୍ କରି ସବୁଲକ୍‌କେ ଆଲାଦ୍ କରବାକେ ଚେସ୍‌ଟା କରା । ୮ ତମର୍ ଚଲାଚଳୁତି ଜଦି ଏନ୍ତାରି ଅଦିକ୍ ଅଦିକ୍ ଅଇ ଆଇଲେ, ଆମର୍ ମାପୁରୁ ଜିସୁକିରିସ୍‌ଟକେ ଜାନ୍‌ବା ବିସଇତେଇ ତମେ ଅଦିକ୍ ଅଦିକ୍ ବଡ଼ିଆଇସା । ୯ ଜଦି ଗଟେକ୍ ଲକ୍ ଏନ୍ତାରି ଜିଉନାକାଉନା ନ କଲେ, ସେ ଗଟେକ୍ ନିକ ନ ଡିସବା ଲକ୍‌ପାରା ଅଇଆତେ । ସେ ପୁର୍‌ବେ କିରିରଇଲା ପାପର୍ ଲାଗି ପର୍‌ମେସର୍‌ କେମା ଦେଲାଆତେ ବଲି ପାସ୍‌ରିଦେଇ ଆତେ ।

୧୦ ତେବର୍‌ପାଇ ଏ ମର୍ ବାଇବଇନିମନ୍, ନିକ ଚଲାଚଳୁତି କରବାକେ ଚେସ୍‌ଟା କରା । ସେନ୍ତାରିକଲେ ପର୍‌ମେସର୍‌ ତମ୍‌କେ ବାଟିକରି ତାର ଲକ୍ ଅଇବାକେ ଡାକ୍‌ଲାଆତେବଲି ସବୁଲକ୍‌କେ ଡିସି । ଏ ସବୁ ବିସଇ କଲେ ତମେ କେବେ ମିସା ତାର୍‌ତେଇଅନି ବିନ୍‌ବାଟେ ନ ଜାଆସ୍ । ୧୧ ଆମର୍ ମାପୁରୁ ଜିସୁକିରିସ୍‌ଟର୍ କେବେ ନ ସାର୍‌ବା ରାଇଜେ ପର୍‌ମେସର୍‌ ତମ୍‌କେ ସାର୍‌ଦା ସଙ୍ଗ୍ ଡାକିନେଇସି ।

୧୨ ଏ ସବୁ ବିସଇ ତମେ ଜାନିରଇଲେ ମିସା, ଆରି ପାଇଲା ସବୁ ବିସଇଟାନେ ତାର୍ ଆଗାସ୍ ମିସା, ଏ ସବୁ ବିସଇ ତମ୍‌କେ ଏତାଇଦେଇତେ ରଇବି । ୧୩ ମୁଇ ବଞ୍ଚିରଇବା ଜାକ ଏ ସବୁ ବିସଇ କାତା ଅଇବାଟା ନିକ । ଜେଣ୍ଟିକି ତମେ ସେଟା ଆରି ନ ପାସ୍‌ରାସ୍ । ୧୪ ମର୍ ଜିବନ୍ ଦାପ୍‌ରେ ସାରିଜାଇସି ବଲି ମୁଇ ଜାନି । କାଇକେବଇଲେ ଆମର୍ ମାପୁରୁ ଜିସୁକିରିସ୍‌ଟ ମକେ ନିକସଙ୍ଗ୍ ଜାନାଇଆତେ । ୧୫ ଏ ସବୁ ବିସଇ ତମ୍‌କେ ଏତାଇଦେବାକେ ମୁଇ ବେସି ଆବଡ଼ ଅଇଲିନି । ଜେନ୍ତାରିକି ମୁଇ ମଲାପତେ ମିସା ଏ ସବୁ ବିସଇ ଏତାଇସା ।

କିରିସ୍‌ଟର୍ ମଇମା ସବୁଲକ୍ ଦେକ୍‌ବାଇ

୧୬ ଆମର୍ ମାପୁରୁ ଜିସୁକିରିସ୍‌ଟ ତାର୍ ସବୁ ବପୁରସଙ୍ଗ୍ ବାଉଡ଼ି ଆଇସି ବଲି ତମ୍‌କେ କଇରଇଲୁ । ସେଟା ବିନ୍ ଲକ୍ ତାକର୍ ଚାଲାକିକରି ତିଆରକଲା ଗଟେକ୍ କାତାନି ନର୍ । ୧୭ \*ଆମେ ନିଜେ ଆଁକିସଙ୍ଗ୍ ତାର୍ ମଇମା ଦେକ୍‌ଲୁ । ବାବା ପର୍‌ମେସର୍‌ ତାକେ ଡାକ୍‌ପୁଟା କରି ମଇମା ଦେଲାବେଲେ ଆମେ ତେଇ ରଇଲୁ । ସେ ନିଜେ ସବୁଟାନେଅନି ମଇମାର୍ ପର୍‌ମେସର୍‌ କଇରଇଲା “ଏଟା ମର୍ ଆଲାଦର୍ ପ, ତାର୍‌ଟାନେ ମୁଇ ବେସି ସାର୍‌ଦା ।” ୧୮ ସେ ସବଦ୍ ସୁନ୍‌ଲାବେଲେ ପର୍‌ମେସର୍‌ର୍ ସୁକଲ୍ ପର୍‌ବତେ ଆମେ ମିସା କିରିସ୍‌ଟର୍ ସଙ୍ଗ୍ ରଇଲୁ ।

୧୯ ବବିସ୍ତବକ୍ତାମନର କାତା ସତ୍ ଆଚେ ବଲି ଆମେ ଜାନିଆରୁ । ଏ ସବୁ କାତା ତମେ ମନୁଦିଆନ୍ ଦେଇ ସୁନା । କାଇକେବଇଲେ ସେଟା ଆନ୍ଦାରେ ଲାଗିରଇବା ଗଟେକ୍ ବତିର୍ ଉଜଲ୍ ପାରା ଆଚେ । ସାକ୍ଲିଆ ଉଜଲ୍ ତିସ୍ବା ତାରାର୍ପାରା ତମର୍ ମନୁବିତ୍ତରେ ଉଜଲ୍ ଦେଇସି । ୨୦ ବବିସ୍ତବକ୍ତାମନ କେ ମିସା ନିଜେ ବାବିକରି ସାସ୍ତରଟାମେ ଲେକଡୁନାଇ । ଏଟା ତମେ ବାଇଦରେ ଜାନବାର୍ ଆଚେ । ୨୧ କାଇକେବଇଲେ, ସେମନ୍ କେବେମିସା ନିଜରତେଇଅନି କାଇ ବବିସ୍ତ କାତା କଅଡ୍ ନାଇ । ମାତର୍ ପର୍ମେସର୍ଟାନେଅନି ଆଇଲା କାତା ସୁକଲ୍ଆଡ଼ମାର୍ ସାଇଜ ସଙ୍ଗ୍ କଇରଇଲାଇ ।

## ୨

### ମିର୍ ସିକିଆ ଦେଉମନ୍

୧ ପୁରବେ ପର୍ମେସରର୍ ଲକ୍ମନର୍ ବିତ୍ତରେ ମିର୍ କାତା କଇବା ବବିସ୍ତବକ୍ତାମନ ମିସା ରଇଲାଇ । ସେନ୍ତାରିସେ ତମର୍ ବିତ୍ତରେ ମିସା ମିର୍ ସିକାଉମନ୍ ରଇବାଇ । ପର୍ମେସରର୍ ବିସଇ ସେମନ୍ ମିଟଟା ସିକାଇବାଇ । ଜନ୍ ଲକ୍ମନ ସେ କାତା ବିସ୍ବାସ୍ କର୍ବାଇ, ସେମନ୍ ବିନାସ୍ ଅଇଜିବାଇ । ସେମନ୍କେ ମୁକ୍ଲାଇଲା ନିଜର୍ ମୁକ୍ତିକାରିଆକେ ସେମନ୍ ଚାଡ଼ିଦେବାଇ । ସେନ୍ତାରି କଲାର୍ ପାଇ ପର୍ମେସର୍ ସେମନ୍କେ ଦାପ୍ତରେ କୁରୁପନାସ୍ କର୍ସି । ୨ ବିସ୍ବାସି ବଲାଇଅଇବା ବେସି ଲକ୍ମନ୍ ତାକର୍ କାରାପ୍ ଚଲାଟଲ୍ତି ଦାର୍ବାଇ ଆରି ସତ୍ ବାଟର୍ ବିସଇନେଇ କାରାପ୍ କାତା କଇ ବୁଲ୍ବାଇ । ୩ ଏନ୍ତାଟା ସିକାଉମନ୍ ଲବ୍ ଅଇକରି ନିଜେ ତିଆର୍ କରିରଇବା କାତା କଇକରି ତମକେ ନାତାଇବାଇ । ସେନ୍ତାରି ଲକ୍ମନକେ ଡଣ୍ଟ ଦେବି ବଲି ପର୍ମେସର୍ କାତା ଦେଇରଇଲା । ଆରି ସେଟା କର୍ବାକେ ସେ ଏବେ ଜାଗିଆଚେ । ସେ ସେମନ୍କେ କୁରୁପନାସ୍ କର୍ସି ଆକା ।

୪ ପୁରବେ କେତେଟା ଦୁଡ଼ମନ୍ ଜେତେବେଲେ ପାପ୍ କରିରଇଲାଇ, ପର୍ମେସର୍ ସେମନ୍କେ ଡଣ୍ଟ ନ ଦେଇକରି ଚାଡ଼ିଦେଏ ନାଇ । ମାତର୍ ସେମନ୍କେ ନରକେ ପିଙ୍ଗିଦେଲା । ସେମନ୍କେ ବିଚାର୍ କରି ଡଣ୍ଟଦେବା ଦିନ୍ ଜାକ ସେ ସେମନ୍କେ ବନ୍ଦିକରି ଆନ୍ଦାରେ ସଙ୍ଗଇସି । ୫ ଆଗର୍କାଲେ ବଠିରଇବା ଲକ୍ମନ ପର୍ମେସର୍କେ ମାନିକରି ରଅଡ଼ନାଇକେ, ସେ ସେମନ୍କେ ଡଣ୍ଟ ନ ଦେଇକରି ଚାଡ଼େନାଇ । ତାର୍ବାଦୁଲେ ସେମନର୍ପାଇ ବନିଆ ଆନାଇଲା । ତେଇ ସବୁଲକ୍ ବୁଡ଼ିଗାଲାଇ । ମାତର୍ ସେ ନଅ ଆରି ତାର୍ କୁଟୁମର୍ ସାଡ଼ଲକ୍କେ ସେ ରକିଆ କଲା । ସେବେଲେ ନଅ ପର୍ମେସର୍ ଦେକ୍ବା ଇସାବେ ଟିକ୍ ବିସଇ କର୍ବାର୍ ଆଚେ ବଲି ଲକ୍ମନକେ କଇଡେରଇଲା । ୬ ସଦମ୍ ଗମରା ନଅର୍ମନକେ ରଇବା ଲକ୍ମନକେ ପର୍ମେସର୍ ଦସିକରି ତାକର୍ ନଅର୍ମନକେ ପଡ଼ାଇକରି କୁରୁପନାସ୍ କରିଦେଲା । ସେମନ୍ ବେସି କାରାପ୍ କାମ୍ କଲାଇଜେ ଏନ୍ତାରି କଲା । ତାକେ ନ ମାନିକରି ରଇବା ଲକ୍ମନକେ ଏନ୍ତାରି ଦସା ଅଇସି ବଲି ଲକ୍ମନକେ ଦେକାଇଲା । ୭ ସେ ନଅର୍ମନ ପଡ଼ାଇବା ଆଗ୍ତୁ ସେ ଲଡ଼କେ ରକିଆ କଲା । ଲଡ଼ ଗଟେକ୍ ନିକଲକ୍ ରଇଲା । ତାର୍ ନଅରର୍ ଲକ୍ମନ୍ କରିରଇବା ପାଦ୍‌ରାପାଦ୍‌ରି କାମ୍ ଆରି ନିୟମ୍ ନ ମାନ୍‌ବାଟା ଦେକି ବେସି ଦୁକ୍ କର୍ତେରଇଲା । ୮ ସେନ୍ତାରି କାରାପ୍ ଲକ୍ମନର୍ ବିତ୍ତରେ ଲଡ଼ ନିକ ସଙ୍ଗ୍ ବଠିକରି ରଇଲା । ସେମନ୍ କରିରଇବା କାରାପ୍ କାମ୍ ସେ ଦେକ୍ତେରଇଲା ଆରି କଇଡେରଇବା ସତ୍ ନ ରଇବା ବିସଇ, ସୁନ୍ତେରଇଲା । ସେ ଗଟେକ୍ ନିକ ଲକ୍ ରଇଲାଜେ ଏଟାମନ୍ ସୁନି ଦୁକ୍ କର୍ତେରଇଲା । ୯ ସେନ୍ତାର୍ ଆଲେ ଦରମ୍ ଲକ୍ମନକେ ପର୍ମେସର୍ ତାକର୍ ଦୁକ୍ କସ୍ଟ ତେଇଅନି ଆରି ଆଇବା ପରିକାଇ ଅନି ରକିଆ କର୍ସି । ଆରି କାରାପ୍ ଲକ୍ମନକେ ସେ ସବୁ ଲକ୍କେ ବିଚାର୍

କରବା ଦିନ୍ ଜାକ ଡଣ୍ଡଦେଇ ସଙ୍ଗଇସି । ୧୦ ତାକର ପାପର ଗୁନଟଲନ୍ ଇସାବେ  
 ଚଲାଚଲୁତିକରି ଲାଜର ବିସଇ କରବା ଲକ୍ମନକେ ସେ ବେସି ବଡ଼ ଡଣ୍ଡ ଦେଇସି  
 । ତାକର ଉପରେ ସାସନ୍ କରବାକେ ପରମେସରର୍ ଜନ୍ ଅଦିକାର୍ ଆଟେ, ସେଟା  
 ସେମନ୍ ନିଚ୍‌ଲାଇନି ।

ଏନ୍ତାରି ମିଚ୍ ସିକାଉ ଆଁକରିଆମନ୍, ନିଜର୍ ମନକେ ଆଇଲାଟା କରବାକେ  
 ଡରଡ଼ ନାଇ । ସରଗେ ମଇମାସଙ୍ଗ ରଇବାଟାମନ୍‌କେ ମିସା ନିନ୍ଦା କରବାଇ ।  
 ୧୧ ତାକରଟାନେଅନି ଅଦିକ୍ ବଡ଼ରଇ ବପୁ ରଇବା ଦୁଡ଼ମନ୍, ମାପରୁର୍ ମୁଆଟେ  
 ଆକର୍ ବିସଇନେଇ ନିନ୍ଦାକାତା କଅଡ଼ ନାଇ । ୧୨ ମାତର୍ ଏମନ୍ ଡଙ୍ଗ୍‌ରେ  
 ରଇବା ପସୁମନରପାରା । ତାକର୍ ଗାଗଡ଼ ଜନ୍‌ଟା କରବାକେ ମନ୍ କର୍ସି,  
 ସେଟାସେ କଲାଇନି । ସେନ୍ତାରି ପସୁମନ୍‌କେ ଲକ୍ମନ୍ ଦାରିକରି ମରାଇବାଇ ।  
 ସେମନ୍ ନାଜାନ୍‌ଲା ବିସଇ ନେଇକରି ନିନ୍ଦାକାତା କଇବାଇ । ସେମନ୍‌କେ ଲକ୍ମନ୍  
 ମରାଇଲା ପାରା ପରମେସର୍ କୁରୁପ୍‌ନାସ୍ କର୍ସି । ୧୩ ବିନ୍ ଲକ୍ମନ୍‌କେ ସେମନ୍  
 ବେସି ଦୁକ୍ କସ୍‌ଟ ଦେଲାଇଆଟଡ଼କେ ପରମେସର୍ ମିସା ସେମନ୍‌କେ ଦୁକ୍ କସ୍‌ଟ  
 ଦେଇସି । ନିଜର୍ ଗାଗଡ଼ ମନ୍ କଲାଟା ପୁରାପୁରୁନ୍ କରବାକେ ସେମନ୍ କାଇଟା  
 ମିସା କରବାଇ । ସେଟା ଦିନ୍‌ବେଲେ ମିସା କରବାଇ । ମାତର୍ ସେମନ୍ ତମର୍ ସଙ୍ଗ୍  
 କାଇବାକେ ବସଲାବେଲେ ମିସା ସେନ୍ତାରି ଅଇତେରଇବାଇ, ଜନ୍‌ଟାକି ତମ୍‌କେ  
 ଇଜଡ଼ ଜିକି ଲାଜ୍ କରାଇସି । ୧୪ ବେସିଆ କାମ୍ କରବାକେ ସବୁବେଲେ ମନ୍  
 କର୍ତେରଇବାଇ । ସେନ୍ତାରି କରବାଟାନେଅନି ସେମନ୍ କେବେ ନ ତେବଡ଼ ।  
 ମନ୍ ବିଡ଼ରେ ଦୁରବଲ୍ ରଇବା ଲକ୍ମନ୍‌କେ ନାଡ଼ାଇକରି ପାପକାମ୍ କରବାଟାନେ  
 ଡାକିନେବାଇ । ସେମନ୍ ବେସି ଲବି ଅଇଆଟଡ଼ । ପରମେସର୍ ସେମନ୍‌କେ ସାଇପ୍  
 ଦେଲା ଆଟେ । ୧୫ ସଲକ୍ ବାଟ୍ ଚାଡ଼ିକରି ବାଟ୍‌ବାନା ଅଇଲାଇ ଆଟଡ଼ । ବେଅର୍  
 ପଅ ବାଲାମ୍, ଜେ କି ଗଟେକ୍ ବବିସଡ଼ବକ୍‌ତା ରଇଲା, ସେ ଜନ୍ ରକାମ୍ କାମ୍‌ମନ୍  
 କରିରଇଲା, ଏମନ୍ ମିସା ସେନ୍ତାରି କଲାଇଆଟଡ଼ । ତାବୁ ଆସାଅଇ ବାଲାମ୍ ଏନ୍ତି  
 ରଇଲାଜେ ସେଟା ମିଲାଇବାକେ ବୁଲ୍ କାମ୍ କରବାକେ ମିସା ଡିଆର୍ ଅଇରଇଲା ।  
 ୧୬ ମାତର୍ ସେ କରିରଇବା କାରାପ୍ କାମର୍ ଲାଗି, ପରମେସର୍ ତାକେ ଦମ୍‌କାଇଲା  
 । ତାର୍ ଗଦ ନରଲକ୍ ପାରା କାତା ଅଇଲା ଆରି ଜନ୍ ବାୟା କାମ୍ କରବାକେ ସେ  
 ଜାଇତେରଇଲା, ସେ କାମେଅନି ତାକେ ତେବାଇଲା ।

୧୭ ଏ ଲକ୍ମନ୍ ପାନି ଆଁଟିଜାଇରଇବା ପାଜ୍‌ରା ପାରା । ଜବର ପବନ୍ ଆସି  
 ଉଡ଼ାଇନେବା ବାଦଲ୍ ପାରା । ପରମେସର୍ ସେମନରପାଇ ପୁରାପୁରୁନ୍ ଆନ୍ଦାର୍  
 ରଇବା ଗଟେକ୍ ଜାଗା ସଙ୍ଗାଇଆଟେ । ୧୮ ସେମନ୍ ଲକ୍ମନ୍‌କେ ସିକାଇବା ବେଲେ  
 ମୁକ୍ତି ବିସଇପାରା ରଇସି, ମାତର୍ ତେଇ କାଇଟା ନ ରଏ । ଗାଗଡ଼ ମନ୍ କଲା ସବୁ  
 ଗୁନଟଲନ୍ କରିଅଇସି ବଲି ସେମନ୍ ସିକାଇବାଇ । ନୁଆ ନୁଆ ନିକ ଚଲାଚଲୁତି କରି  
 ଆଇତେରଇବା ଲକ୍ମନ୍‌କେ ସୁଡ଼ରାଇକରି ନେବାଇ । ୧୯ ତାକର୍ ସିକିଆ ମାନିକରି  
 ରଇଲେ ମୁକ୍ତି ମିଲ୍‌ସି ବଲି ସେମନ୍ କାତାଦେବାଇ । ମାତର୍ ସେମନ୍ ନିଜେ କାରାପ୍  
 ଚଲାଚଲୁତିର୍ ଗତିଦାଙ୍ଗ୍‌ତା ଅଇଆଟଡ଼ । ସେ କାରାପ୍ ଚଲାଚଲୁତି ସେମନ୍‌କେ  
 କୁରୁପ୍‌ନାସ୍ କର୍ସି । ଜଦି ଗଟେକ୍ ଲକ୍ମକେ କାରାପ୍ ଅବିଆସ୍ ଦାରିଆଟେ, ସେ  
 ତାର୍ ଗତିଦାଙ୍ଗ୍‌ତା । ୨୦ ସେନ୍ତାରି ମିଚ୍ ସିକାଉମନ୍ ଲକ୍ମନ୍‌କେ କୁରୁପ୍‌ନାସ୍  
 କରବା କାରାପ୍ ବିସଇତେଇଅନି ରକିଆ ପାଇକରି ଆମର୍ ମୁକ୍ତିକାରିଆ ମାପରୁ  
 ଜିସୁକିରିସ୍‌ଟକେ ଜାନିରଇଲାଇ । ମାତର୍ ଆରିତରେକ୍ ସେ କାରାପ୍ ବିସଇମନ୍  
 କରବାକେ ନିଜେ ସର୍ପିଅଇଲାଇ ଆଟଡ଼ । ତାକର୍ ଏବର୍ ଇନସ୍‌ତା ଆଗ୍‌ତୁର୍  
 ଇନସ୍‌ତାଇ କେତେକ୍ ଅଦିକ୍ ଆଟେ । ୨୧ ଦରମ୍ ଚଲାଚଲୁତି କରବା ବାଟ୍ ସେମନ୍  
 କେବେ ଜାନିନରଇଲେ ତାକର୍ ପାଇ ନିକ ଅଇତା । ମାତର୍ ସେମନ୍ ଏବେ

ଲକ୍ଷ୍ମୀ ସିଦ୍ଧି ଆପାଇବାର ପରମେଶ୍ଵର ନିୟମ ଚାଡ଼ିଦେଇଆନ୍ତୁ ।<sup>୨୨</sup> ସେମାନ କଲ୍ୟାଣ ବିଷୟ ଉପଦେଶ ଦେବାପାଇଁ ଲୋକ ଅଲୋଚନାରେ । କୁକୁର ଜନ୍ମଟା ବାଟିକରୁ, ସେତାସେ ଜାଇ କାଢ଼ି, ଗୁରୁକେ ପାନି ଦୁଆଇଦେଇ ରଇଲେ ମିଆ ସେ କାଦଲଗେସେ ଜାଇ ଚକ୍ତି ଅଇସି ।

## ୩

### ମାପୁରୁ ଆଇବା ଦିନ

<sup>୧</sup> ଏ ମରୁ ଆଲାଦର ବାଇବଇନିମନ୍, ଏଟା ମୁଇ ତମର ଲଗେ ଦୁଇପାଲି ଅଇଲା ଚିଟି ଲେକଲିନି । ଏ ଦୁଇଟାଜାକ ଚିଟିତେଇ ଏ ସବୁ ବିଷୟ ମନେ ଏତାଇ ତମର ମନେ ସୁକଲ୍ କରବାପାଇ ଚିନ୍ତା କଲିନି ।<sup>୨</sup> ବେସି ଆଗେ ସୁକଲ୍ ବବିସତ୍ତବକ୍ତାମନ୍ ଜନ୍ମସବୁ କାତା ଜାନାଇ ରଇଲା ଆରି ଉଦାର କରବା ମାପୁରୁ ଦେଇରଇବା ଆଦେସ୍ ତମ୍ଭେ ପେରିତ୍ ସିସ୍ମାନ୍ ଦେଇଆନ୍ତୁ, ସେଟା ତମର ମନେ ଏତାଇ ଦେବାକେ ମନକଲିନି ।<sup>୩</sup> \*ପରତମେ ଏଟା ଜାନା ଜେ, ସାରଲା ଦିନମନ୍ କେ ଲକ୍ଷ୍ମୀ ନିଜର ନିଜର କାରାପ୍ ମନକଲା ଇସାବେ ଚଲାଚଲ୍ତି କରବାଇ । ସାରାସାରି ଦିନେ ସେମନ୍ ସତ୍ତକେ ନିସାର୍ କରା ପାଚାରବାଇ ।<sup>୪</sup> ଆରି କିଜାଇକରି କଇବାଇ, “ଜିସୁ ଆଇବି ବଲି କାତା ଦେଇରଇଲାଟା, କେନେ ତେବେ ?” କାଇକେବଇଲେ ପୁରୁବେଅନି ଆମର ଆନିଦାଦିମନ୍ ମଲାତେଇଅନି ଏବକେ ଜାକ ସବୁ ବିଷୟ ଜେନ୍ତି ରଇଲା, ଏବେ ମିଆ ସେନ୍ତାରସେ ଆଚେ ।<sup>୫</sup> ସେମନ୍ ଜାନି ଜାନି ପାସରିଗାଲାଇନି ଜେ ଆଗର୍ ବେଲ୍ ଆରି ବାଦଲ୍ ସବୁ ମାପୁରୁର ବାକିଅର୍ ଲାଗି ଗଟ୍ଲା ଆଚେ, ଦରତନି ପାନି ବିତ୍ତରେଅନି ବାରଇଲା ଆଚେ ଆରି ଦରତନି ଚାରିବେଟ୍ତି ପାନି ରଇଲା ବଲି ।<sup>୬</sup> ତାରଲାଗି ସେ ସେବେଲେ ପୁରୁନା ଜଗତ୍ ପାନି ସଙ୍ଗ୍ ବୁଡ଼ି ନସିଗାଲା ।<sup>୭</sup> ମାତର୍ ଏବେ ରଇବା ବାଦଲ୍ ଆରି ଦରତନି ସେ ବାକିଅର୍ ଲାଗି, ଦରମ୍ ନଇଲା ଲକ୍ଷ୍ମୀକେ ବିଚାର୍ ଆରି ବିନାସର୍ ଦିନ ଜାକ, ଜଇ ସଙ୍ଗ୍ ନସ୍ଟ ଅଇବାକେ ଜମାଇକରି ସଙ୍ଗ୍ଇଲା ଆଚେ ।

୮ ମାତର୍ ଏ ଆଲାଦର ବାଇମନ୍, ମାପୁରୁ ଦେକ୍ବା ଇସାବେ, ଗଟେକ୍ ଦିନେ ଅଜାର ବରସ୍ ପାରା, ଆରି ଅଜାର ବରସ୍, ଗଟେକ୍ ଦିନ ପାରା, ଏ ମୁଲିକା ରଇଲା ବିଷୟ ତମେ ପାସରା ନାଇ ।<sup>୯</sup> ଅଲସମ୍ ଅଇସି ବଲି କେତେଲକ୍ ଏତାଇଲାଇନି, ମାତର୍ ମାପୁରୁ ନିଜେ କାତା ଦେଲା ବିଷୟ ସେନ୍ତାର୍ ଅଲ୍ସମ୍ କରେନାଇ । ମାତର୍ କେମିଆ ଜେନ୍ତିକି ବିନାସ୍ ନଅତ୍, ସେମନ୍ ସବୁ ମନ୍ ବାଦଲାଇବାଇ, ଏଟା ସେ ମନକରି ତମର୍ ପାଇ ବଲି ଅଲ୍ସମ୍ ଅଇଲାନି ।

<sup>୧୦</sup> \*ମାପୁରୁର ଦିନ ଚର୍ ଆଇଲା ରକାମ୍ କେଟିଜାଇସି । ସେ ଦିନେ ବାଦଲ୍ ସବୁ ବେସି ସବଦ୍ ସଙ୍ଗ୍ ନସ୍ଟ ଅଇଜାଇସି, ବାଦଲେ ଉଜଲ୍ ରଇବାଟାମନ୍ ସବୁ ସିଲିଜାଇସି, ପୁରୁତିବି ଆରି ସିତି ରଇଲା ଲକ୍ଷ୍ମୀ ତିଆର୍ କଲା ଜେତେକ୍ ସବୁ ଜିନିସ୍ ପଡ଼ିଜିବାଇ ।

<sup>୧୧</sup> ଏ ସବୁ ବିଷୟ ଏ ରକାମ୍ ଆଜିଜାଇସି, ତେବର୍ ପାଇ ତମେମନ୍ ବେସି ସୁକଲ୍ ଆରି ଜାଗରତ୍ତସଙ୍ଗ୍ ରଇବାର୍ ଆଚେ ।<sup>୧୨</sup> ମାପୁରୁ ଆଇବା ଦିନକେ ଜାଗି କରି, ସେଟାଜେନ୍ତି ଦାପ୍ରେ ଆଇସି, ସବୁ ବେଲେ ଦରମ୍ ଚଲାଚଲ୍ତି କରବାର୍ ଆଚେ ।

<sup>୧୩</sup> \*ଆମେ ସେ କାତା ଦେଲା ଇସାବେ ନୁଆଁ ବାଦଲ୍ ଆରି ନୁଆଁ ପୁରୁତିବିକେ ଜାଗଲୁନି । ସେଟା ଦରମ୍ଲକର୍ ବାସା ଅଇବା ଜାଗା ଅଇସି ।

\* ୩:୩ ୩:୩ ଜିଉଦା ୧:୧୮    \* ୩:୧୦ ୩:୧୦ ମାଡିଉ ୨୪:୪୩; ଲୁକ୍ ୧୨:୩୯; ୧ମ ତେସଲନିକିୟ ୫:୨; ପରକାସିତ ୧୭:୧୫    \* ୩:୧୩ ୩:୧୩ ପରକାସିତ ୨୧:୧

୧୪ ସେଟାର ପାଇ ଏ ଆଲାଦର ବାଇମନ୍, ତମେ ସେ ଦିନକେ ଜାଗତେରୁଆ । ପରମେସର ଦେକବା ଇସାବେ, କାଇ ଦସ୍ ନ ଅଇତେ, ସୁକଲ୍ ଲକ୍ମନର୍ ପାରା, ତାର ସଙ୍ଗ ସାନ୍ତିଅଇ ରଇବାକେ ଜାଗରତ୍ ଉଆ । ୧୫ ଆରି, ଆମର୍ ମାପରୁ ବେସି ଦିନ୍ ଜାଗବାଟା ଆରି ରକିଆ କରବାଟା ବଲି ଏତାଆ । ଆମର୍ ଆଲାଦର ବାଇ ପାଉଲ୍‌କେ ମିସା ମାପରୁ ତାକେ ଦେଲା ବୁଦି ଇସାବେ ତମର୍ ଲଗେ ଏନ୍ତାର୍ ଲେକ୍‌ଲା ଆତେ । ୧୬ ସେ ତାର୍ ସବୁ ଚିଟି ଲଗେ ମିସା ଏ ସମାନ୍ ବିସଇ ଲେକ୍‌ଲାଆତେ । ମାତର୍ ତେଇଅନି କେତେଟା ବିସଇ ଲକ୍ମନକେ ବୁଦ୍‌ବାକେ କସ୍‌ଟ ଆତେ । ଜନ୍ ଲକ୍ମନ ନିକ ସିକତ୍‌ନାଇ ଆରି ତାକର୍ ବିସ୍‌ବାସ୍‌ଟାନେ ତାଟ୍‌ନାଇ, ଏ ସବୁ ବିସଇର୍ ଅରତ୍ ବୁଲ୍‌ଇସାବେ ବାତାଇଲାଇନି । ପରମେସରର୍ ବାକିଅତେଇରଇବା କେତେଟା ବିନ୍ ବିସଇମନ୍ ମିସା ଏନ୍ତାରି ବୁଲ୍‌କରି ବାତାଇଲାଇନି । ଏନ୍ତାରି କଲାର୍‌ପାଇ ପରମେସର୍ ସେମନ୍‌କେ କୁରୁପ୍‌ନାସ୍ କରସି ।

୧୭ ଏ ଆଲାଦର ବାଇମନ୍, ତମେ ଆଗେ ଅନି ଏ ସବୁ ବିସଇ ଜାନି ଜାଗରତା ଅଇରୁଆ । କେତେବଲ୍ ନିୟ୍‌ମ୍ ନ ମାନ୍‌ଲା ଲକର୍ ଆସାର୍ କାମର୍ ପାନ୍‌ଲଗେ ଅଦ୍‌ରି, ତାଟ୍‌ସଙ୍ଗ ରଇବା ବିସ୍‌ବାସେ ଅନି ଉନା ଉଆନାଇ । ୧୮ ମାତର୍ ଆମର୍ ମାପରୁ ଆରି ଉଦାର୍ କରବା ଜିସୁକିରିସ୍‌ଟର୍ ଜିବନ୍ ଦୁକାଇଲାଟା ଆରି ଗିଆନ୍ ସଙ୍ଗ୍ ଅଦିକ୍ ଅଦିକ୍ ବତା । ଏବେ ଆରି କାଲ୍ କାଲ୍ ଜୁଗ୍ ଜୁଗ୍ ଜାକ ସେ ତାକ୍‌ପୁଟା ପାଅ । ଆମେନ୍ ।

## ଯୋହନ ଲେଖିଥିବା ପ୍ରଥମ ପତ୍ର ଜଅନ୍ ଲେକିରଇବା ୧ ମ ଚିଟି ଏ ବଇର ବିସଇ ଜାନ୍‌ବାଟା

ଜଅନ୍‌ର ପରତୁମ୍ ଚିଟି ଜିସୁକିରିସ୍‌ଟ ଜନମ୍ ଅଇକରି ୫୦-୧୦୦ କିରିସ୍‌ଟାବ୍‌ଦ ବିତ୍‌ରେ ପେରିଡ୍ ଜଅନ୍ ଲେକି ରଇଲା ।

ଜଅନ୍ ନିଜ୍‌କେ ଗଟେକ୍ ଲେକ୍‌ବା ଲକ୍‌ର ଇସାବେ ଜାନାଇ ଅଏନାଇ । ମାତ୍‌ର ପରତୁମ୍ ପାଟେ ସେ ଜିସୁକିରିସ୍‌ଟର ଜିବନର୍ ଆରି ମରିକରି ଉଟ୍‌ବା ବିସଇ ନେଇକରି ସେ ମୁଇନିଜେ ସାକିବଲିକରି କଇଲାନି୧:୧-୩ଜଅନ୍ ପରତୁମ୍ ଲେକି ରଇଲାଟା ଜଅନ୍ ସୁସମାଚାର୍ ଲଗେ ଲେକା ଅଇଲାପାରା ଅଲପ୍ ମିସ୍‌ସି । ସେ ଜେତେବେଲେ ଏପିସିତେଇ ରଇଲା । ସେ ଜଅନ୍ ସୁବ୍‌କବର୍ ଆରି ଜଅନ୍‌ର ତିନ୍‌ଟା ଚିଟି ଲେକିଆଟେ ବଲିକରି ବିସ୍‌ବାସ୍ କର୍‌ବାଇ । ଜନ୍ ବଇକି ପରତୁମ୍ ଜଅନ୍ ଦୁତିଅ ଜଅନ୍ ତୁର୍‌ତିଅ ଜଅନ୍ ।

ଗିଆନି ବଲିକରି କଇତେରଇବା ଲକ୍‌ମନର୍ ଗଟେକ୍ ଦଲ୍ ଜନ୍‌ଲକ୍‌ମନର୍ ଲାଗି ମଣ୍ଡଲିତେଇ କାଇଆଲେ ଗଟେକ୍ ଗଟ୍‌ନା ଆଇଲେ ଚିଆ ଅଇତେ ରଇବା ଲକ୍‌ମନ୍ । ସେ ବେଲେ ଜଅନ୍ ସବୁ ବିସ୍‌ବାସି ମନ୍‌କେ ଏ ଚିଟିଲେକି ରଇଲା । ସେମନ୍ ବିସ୍‌ବାସ୍ କର୍‌ବାଇକି ଜିସୁ ସତ୍‌ରେ ଆଇବା ପୁରାପୁରନ୍ ପର୍‌ମେସର୍, ମାତ୍‌ର ଜଗତେ ରଇବାବେଲେ ସେ ବନିମାଉଁସ୍ ଦାରିରଇବା ଗଟେକ୍ ନର୍‌ଲକ୍ ନଏଁ । ଜଅନ୍ ଜିସୁକିରିସ୍‌ଟର୍ ସଙ୍ଗ୍ ରଇବା ଗଟେକ୍ ସାକି ଆରି ତାର୍ ନିଜର୍ ଆଡ୍‌ସଙ୍ଗ୍ ଜିସୁକେ ଚିଇ ରଇଲାକେ ସେ ଏନ୍ତାରି ଲେକ୍‌ଲା ଆଟେ ୧:୧-୩ । ଜଅନ୍ ଏ ଚିଟି ଲେକ୍‌ବାର୍ ମୁକିଅ କାରନ୍ ଅଇଲାନି ତାର୍ ସାର୍‌ଦା ପୁରାପୁରନ୍ ଅଇବାଟା । ପରତୁମ୍ ଜଅନ୍ ୧:୪ ଆରି ବିସ୍‌ବାସି ମନ୍‌କେ ପାପେଅନି ଦୁର୍‌କେ ରଇବାକେ ପରତୁମ୍ ଜଅନ୍ ୨:୧ଆରି ବିସ୍‌ବାସି ମନ୍‌କେ ମିର୍ ସିକିଆଇଅନି ରକିଆକର୍‌ବାକେ, ପରତୁମ୍ ଜଅନ୍ ୨:୨୭ ଆରି ବିସ୍‌ବାସି ମନ୍‌କେ ରକିଆ କର୍‌ବାକେ, ୫:୧୩

### ଏ ବଇବିତ୍‌ରେ ରଇବା ବିସଇ

- ୧. ଜଅନ୍ ତାର୍ ଚିଟିଟାନେ ନିଜର୍ ବିସଇ ଜାନାଇକରି ଆରି କାଇକେ ଲେକ୍‌ଲାନି ସେଟାସବୁ ଆଟେ । ୧:୧-୪
- ୨. ପର୍‌ମେସର୍ କେନ୍ତାରି ଉଜଲ୍ ବଲିକରି ବୁଜାଇଦେଇ ଜିସୁର୍‌ପାରା ଚଲାଚଲ୍‌ତି କର୍‌ବାକେ କଇଆଟେ । ୧:୫-୩:୧୦
- ୩. ଗଟେକ୍‌ଲକ୍ ଆରି ଗଟେକ୍ ଲକ୍‌କେ କେନ୍ତାରି ଆଲାଦ୍ କର୍‌ବାର୍ ଅଇସି ସେ ବିସଇ ମନେ ଏତାଇଦେଲା ଆଟେ । ୩:୧୧-୫:୧୨
- ୪. ସେ ତାର୍ ଲେକ୍‌ବାଟା ସାରାଇ ଆଟେ । ୫:୧୩-୨୧

### ଜିବନର୍ ବାକିଅ

୧ \*ଜାକେ ଜିବନର୍ ବାକିଅ ବଲି କଇଲାଇନି, ତାର୍ ବିସଇ ତମ୍‌କେ ଲେକ୍‌ଲୁନି । କାଇଟା ତିଆର୍ ନ ଅଇତେ ପୁର୍‌ବେଅନି ସେ ରଇଲା । ତାର୍ ବାକିଅ ଆମେ ସୁନିଆରୁ । ସେ କରିରଇବା କାମମନ୍ ଆମେ ଆଁକି ସଙ୍ଗ୍ ନିକ ଦେକି ଆରୁ । ଆରି ଆମେ ତାକେ ଆଡ୍ ସଙ୍ଗ୍ ଚିଇଲୁ ଆରୁ । ୨ \*ଏ ଲକ୍ ସତ୍ ଜିବନ୍ ଦେଇସି । ପର୍‌ମେସର୍ ଏ ଲକ୍‌କେ ସବୁକେ ଦେକାଇଲା । ଆରି ଆମେ ଦେକ୍‌ଲୁ ଆରି ତାର୍ ସତ୍ ବିସଇ ତମ୍‌କେ କଇଲୁନି । ସେ ଦେଇରଇବା ନ ସାର୍‌ବା ଜିବନର୍ ବିସଇ ତମ୍‌କେ ଜାନାଇଲୁନି ।

\* ୧:୧ ୧:୧ ଜଅନ୍ ୧:୧    \* ୧:୨ ୧:୨ ଜଅନ୍ ୧:୧୪



ପୁରବେଅନି ସେ ଆମର ବାବା ପରମେସରର ସଙ୍ଗ ରଇଲା । ମାତର ପରମେସର ତାର ବିସଇ ଆମ୍ଭେ ଜାନାଇଲାଆତେ । <sup>୩</sup> ତେବର୍ପାଇ ଏ ଲକ୍, ଜାର ବିସଇ ଆମେ ଦେକିଆରୁ ଆରି ସୁନିଆରୁ, ତାର ବିସଇ ଆକା ଆମେ ତମ୍ଭେ କଇଲୁନି । ଜେନ୍ତାରିକି ତମେ ମିସା ଆମର ସଙ୍ଗ ମିସିବିତି ରଇସା । କାଇକେବଇଲେ ଆମେ ବାବା ପରମେସରର ସଙ୍ଗ ଆରି ତାର ପଅ ଜିସୁ କିରିସଟର୍ ସଙ୍ଗ ମିସିବିତି ଆରୁ । <sup>୪</sup> ଆମର ସାରଦା ଜେନ୍ତାର ପୁରାପୁରୁନ୍ ଅଇସି, ତେବର୍ ପାଇ ଏ ସବୁ ବିସଇ ତମ୍ଭେ ଲେକ୍ଲୁନି ।

ପରମେସର ଆକା ଉଜଲ୍

<sup>୫</sup> ମାତର ଜନ୍ ବିସଇ ଜିସୁକିରିସଟ ଆମ୍ଭେ କଇଲା, ଆରି ଜାଇଟା ତମ୍ଭେ ଆମେ ଜାନାଇ ଆରୁ, ସେଟା ଅଇଲାନି ପରମେସରର ଉଜଲ୍ । ଆରି ତାରଟାନେ ମୁଲ୍‌କେ ଆନ୍ଦାର ନାଇ । <sup>୬</sup> ତେବର୍ପାଇ ଆମେ ପରମେସରର ସଙ୍ଗ ମିସିବିତି ଆରୁ ବଲି କଇକରି କାରାପ୍ କାମ୍ କରି ଆନ୍ଦାରେସେ ରଇବୁ ବଇଲେ, ଆମେ କଇବାଟା ମିର୍ । ଆରି ସଡ୍ ବିସଇ ଆମେ ଚାଡିଦେଇଆରୁ ବଲି ଆମର ଚଲାଚଲ୍‌ତିଟାନେ ଜାନାପଡ୍‌ଲାନି । <sup>୭</sup> ମାତର ଆମେ ସଡ୍ କାମ୍ କରି ଉଜଲେ ରଇବୁ ଜେନ୍ତାରି କି ପରମେସର ସବୁବେଲେ ଉଜଲେଆତେ । ସେନ୍ତାର ଆଲେ ଆମେ ଗଟେକ୍ ଲକ୍ ଆରି ଗଟେକ୍ ଲକ୍‌ର ସଙ୍ଗ ମିସିବିତି ଆରୁ । ଆରି ପରମେସରର ପଅ ଜିସୁର ବନି ଆମର ସବୁ ପାପକେ ଦଇଦେଇସି ।

<sup>୮</sup> ଆମେ କେବେମିସା ପାପ୍ କରୁନାଇ ବଲି କଇଲେ, ଆମେ ନିଜେସେ ନାଡାଇଅଇଲୁନି । ଆରି ସଡ୍ ବିସଇ ଆମେ ନାଜାନୁଲୁନି । <sup>୯</sup> ଜଦି ଆମେ ବୁଲ୍ କରିଆରୁ ବଲି ପରମେସରକେ ନ ଲୁଟାଇତେ କଇଲେ, ସେ ଆମର ସବୁ ପାପ୍ କେମା କରସି । ଆରି ସବୁ କାରାପ୍ କାମେଅନି ଆମ୍ଭେ ସୁକଲ୍ କରସି । <sup>୧୦</sup> ଜଦି ଆମେ କେବେ ମିସା ପାପ୍ କରୁନାଇ ବଲି କଇଲେ, ପରମେସର ସଡ୍‌ଟା ନଏଁ ବଲି କଇଲୁନି । ଆରି ତାର ବାକିଅ ମାନିକରି ରଉନାଇ ।

## ୨

ରକିଆ କାରି ଜିସୁ

<sup>୧</sup> ଏ ମର ପିଲାଟକି ପାରା ଅଇରଇବା ଲକ୍‌ମନ୍, ତମ୍ଭେ ମୁଇ ଏଟା ଲେକ୍‌ଲିନି । ଜେନ୍ତାରିକି ତମେ ପାପ୍ ନ କରାସ୍ । ମାତର କେ ଜଦି ପାପ୍ କଲେ ଆମର ବାବା ପରମେସରର ମୁଆଟେ ଚିଆଅଇରଇବା ଗଟେକ୍ ଲକ୍ ଆମର ପାଇ ଗୁଆରି କଲାନି । ସେ ଅଇଲାନି ଜିସୁକିରିସଟ । ପରମେସର ଦେକ୍‌ବା ଇସାବେ ସେ ପୁରାପୁରୁନ୍ ସଡ୍‌ଆତେ । <sup>୨</sup> ଆମର ବୁଲ୍ କାମରପାଇ ଆମର ବାବୁଲେ ପରମେସର ଜିସୁକେ ଡଣ୍ ଦେଲା । ତାରଲାଗି ଅବ୍‌କା ଆମର ପାପ୍‌ସେ ନଏଁ ମାତର ଗୁଲାଇଟାନେ ରଇବା ସବୁଲକ୍‌ର ପାପ୍ ସେ କେମା କରସି ।

<sup>୩</sup> ଆମେ ତାକେ ଜାନବା ଲକ୍ ଅଇଲୁଆରୁ । ଜଦି ଆମେ ତାର ଡିଆରଲାଟା ମାନୁଲୁନି, ଏଟା ଡାଟ୍‌ସଙ୍ଗ୍ ଜାନୁଲୁନି । <sup>୪</sup> କେ ଜଦି ମୁଇ ପରମେସରକେ ଜାନିଆଟିବଲି କଇକରି, ତାର ଡିଆରଲାଟା ନ ମାନେ, ସେ ମିର୍ କଇଲାନି ଆରି ସେ ସଡ୍ ବିସଇମନ୍ ନାଜାନେ । <sup>୫</sup> ମାତର ଜେ ଜଦି ତାର ବାକିଅ ମାନସି, ସେନ୍ତାର ଆଲେ ପରମେସରପାଇ ରଇବା ତାର ଆଲାଦ୍ ସତଇସେ ପୁରାପୁରୁନ୍ ସିଦ୍ ଅଇଆତେ । ଆମେ ପରମେସରର ସଙ୍ଗ ମିସୁଆରୁ ବଲି ଦେକାଇବା ବିସଇ । <sup>୬</sup> କେ ଜଦି ପରମେସରର ସଙ୍ଗ ମିସିଆଟି ବଲି କଇଲେ, ଜିସୁର ଚଲାଚଲ୍‌ତି ପାରା ଚଲ୍‌ବାରୁଆତେ ।

## ନୁଆଁ ଆଗିଆ

୨୬\* ଏ ମର୍ ଆଲାଦର୍ ମଇତର୍ମନ୍, ମୁଇଁ ତମର୍ ଲଗେ କାଇମିସା ନୁଆ ଆଦେସ୍ ଲେକିନାଇ । ତମେ ଜିସୁର୍ ସଙ୍ଗ୍ ଜିବାକେ ଆରାମ୍ କଲାବେଲେଅନି, ଏ ସମାନ୍ ଆଦେସ୍ ତମେ ଜାନିଆରାସ୍ । ସେ ପୁରନା ଆଦେସ୍ ସୁନି ସାରାଇଆରାସ୍ ।

୮ ମାତର୍ ଏଟା ଗଟେକ୍ ନୁଆ ଆଦେସ୍ ପାରା ମିସା ଆତେ । କାଇକେବଇଲେ ତେଇର୍ ସତ୍ ବିସଇ କିରିସ୍ଟ ଲଗେ ଆରି ତମର୍ ଲଗେ ତିସ୍ଲାନି । ଆନ୍ଦାର୍ ଉଟିଗାଲାନି, ଆରି ସତ୍ ଉଜଲ୍ ତିସ୍ଲାନି ।

୯ ଜଦି କେ ମିସା ପର୍ମେସରର୍ ଉଜଲ୍ ଆରି ସୁକଲ୍ ଇସାବେ ତଲ୍ଲାଚଲ୍ତି କଲିନି ବଲି କଇକରି ତାର୍ ସଙ୍ଗ୍ ମିସିବିତି ରଇବା ବିସ୍ବାସି ବାଇବଇନିମନ୍‌କେ ଗିନ୍ କରସି, ସେ ଏବେଜାକ ଆନ୍ଦାରେସେ ରଇଲାନି । ୧୦ ଜନ୍ ଲକ୍‌ମନ୍ ତାକର୍ ମିସିବିତି ରଇବା ବିସ୍ବାସି ବାଇବଇନିମନ୍‌କେ ଆଲାଦ୍ କରବାଇ, ସେମନ୍ ପର୍ମେସରର୍ ସୁକଲ୍ ଇସାବେ ତଲ୍ଲାଚଲ୍ତି କଲଲାନି । ସେମନ୍ ଜିବନେ ବିନ୍ ଲକ୍‌ମନ୍‌କେ ପାପ୍ କରାଇବା କାଇ ବିସଇ ନାଇ । ୧୧ ମାତର୍ ଜେ ମିସା ମିସିବିତି ରଇବା ବିସ୍ବାସି ବାଇବଇନିମନ୍‌କେ ଗିନ୍ କଲେ, ସେ ଆନ୍ଦାରେ ଆତେ । ସେ ବୁଲ୍ ଟିକ୍ ନାଜାନିକରି ତଲ୍ଲାଚଲ୍ତି କଲାନି । ସେ କନ୍ତ୍ରି ଗାଲାନି ସେଟା ନାଜାନେ । କାଇକେବଇଲେ ସେ ଆନ୍ଦାର୍ ତାର୍ ଆକିକେ କାଣା କରିଆତେ ।

୧୨ ଏ ଆଲାଦର୍ ପିଲାମନ୍, ମୁଇଁ ତମ୍‌କେ ଲେକ୍‌ଲିନି । କାଇକେବଇଲେ କିରିସ୍ଟର୍ ଲାଗି ତମର୍ ପାପ୍ କେମା ଅଇଲାଆତେ । ୧୩ ଏ ବଡ୍‌ଲକ୍‌ମନ୍, ମୁଇଁ ତମ୍‌କେ ଲେକ୍‌ଲିନି, କାଇକେବଇଲେ ତମେ କିରିସ୍ଟକେ ଜାନିଆରାସ୍ । କାଇଟା ତିଆର୍ ନ ଅଇବା ଆଗ୍‌ତୁ ସେ ରଇଲା । ଏ ଦାଙ୍ଗ୍‌ଡାଦାଙ୍ଗ୍‌ଡିମନ୍ ମୁଇଁ ତମ୍‌କେ ଲେକ୍‌ଲିନି । କାଇକେବଇଲେ ସବୁ କାରାପ୍ କାମ୍ କରାଇବା ସଇତାନ୍‌କେ ତମେ ଆରାଇଆରାସ୍ ।

୧୪ ଏ ଆଲାଦର୍ ପିଲାଟକିମନ୍, ମୁଇଁ ତମ୍‌କେ ଲେକ୍‌ଲିନି । କାଇକେବଇଲେ ତମେ ବାବା ପର୍ମେସର୍‌କେ ଜାନିଆରାସ୍ । ଏ ବଡ୍ ଲକ୍‌ମନ୍ ମୁଇଁ ତମ୍‌କେ ଲେକ୍‌ଲିନି । କାଇକେବଇଲେ ତମେ କିରିସ୍ଟକେ ଜାନିବା ଲକ୍ ଅଇଆରାସ୍ । କାଇଟା ତିଆର୍ ନ ଅଇବା ଆଗ୍‌ତୁ ସେ ରଇଲା । ଏ ଦାଙ୍ଗ୍‌ଡାମନ୍ ମୁଇଁ ତମ୍‌କେ ଲେକ୍‌ଲିନି, କାଇକେବଇଲେ ତମେ ବିସ୍ବାସେ ଡାଟ୍ ଅଇଆରାସ୍ । ପର୍ମେସରର୍ ବାକିଅ ସବୁବେଲେ ତମର୍ ମନେ ଆତେ । ଆରି ସବୁ ରକାମ୍ ପାପ୍ କାମ୍ କରାଇବା ସଇତାନ୍‌କେ ଆରାଇଆରାସ୍ ।

## ଜଗତ୍‌କେ ଆଲାଦ୍ କରାନାଇ

୧୫ ମୁଇଁ ତମ୍‌କେ କଇଲିନି ଏ ଜଗତର୍ ତଲ୍ଲାଚଲ୍ତି ଆରି ତେଇରଇବା ସବୁ କାରାପ୍ ବିସଇ ଆଲାଦ୍ କରାନାଇ । କାଇକେବଇଲେ ଏ ଜଗତର୍ କାରାପ୍ ବିସଇର୍ ଆଲାଦ୍ କରି, ବାବା ପର୍ମେସର୍‌କେ ମିସା ଆଲାଦ୍ କରିନାପାରେ । ୧୬ ସେ କାରାପ୍ ତଲ୍ଲାଚଲ୍ତି ତେଇ ଲକ୍‌ମନ୍ ଜାଇଟା ମନ୍ କରବାଇ, ଲକ୍‌ମନ୍ ଦେକିକରି ଲାଲ୍‌ସା ଅଇବାଟା, ସବୁ ବିସଇ ରଇଲାର୍‌ପାଇ ବଡ୍‌ପନ୍ ଅଇବାଟା ଏ ସବୁ ରଇସି । ଏ ରକାମ୍ ତଲ୍ଲାଚଲ୍ତି ଏ କାରାପ୍ ଜଗତର୍ ଲାଗି ଅଇଲାଆତେ । ଆମର୍ ବାବା ପର୍ମେସର୍ ଏନ୍ତାରି କରବାକେ ଆମ୍‌କେ ତିଆରେନାଇ । ୧୭ ଏ କାରାପ୍ ଜଗତ୍ ଆରି ତେଇର୍ ସବୁ ରକାମ୍ ତଲ୍ଲାଚଲ୍ତି ଦାପ୍‌ରେ ଉଟିଜାଇସି । ମାତର୍ ଜେ ପର୍ମେସର୍‌କେ ମାନ୍‌ସି, ସେ ନ ସାର୍‌ବା ଜିବନ୍ ପାଇସି ।

## କିରିସ୍ଟର୍ ସତ୍‌ତୁ

୧୮ ଏ ପିଲାଟକିମନ୍, ଏ ଦିନମନ୍ ଏ ଜଗତର ସାରାସାରି ଦିନ୍ । କିରିସ୍ତକେ ବିରଦ୍ କରବା ଗଟେକ୍ ଡାକ୍‌ପୁଟା ଲକ୍ ବାରଇସି ବଲି ଆମେ ତମ୍‌କେ କଇରଇଲୁ, ସେଟା ମନେ ପାକାଆ । ଏବେମିସା କିରିସ୍ତକେ ବିରଦ୍ କରବାଟାମନ୍ ଜବର୍ ଉଟ୍‌ଲାଇ ଆଚଡ୍ । ସେଟାରଲାଗି ଏ ଜଗତର ସାରାସାରି ଦିନ୍ ଲଗେ ଅଇଲା ବଲି ଆମେ ଜାନ୍‌ଲୁନି । ୧୯ ଏ ବିରଦ୍ କରବାଟାମନ୍ ଆମର୍ ସଙ୍ଗ୍ ମିସିବିଡି ରଇଲାଇ । ଆରି ଏବେ ସେମନ୍ ଚାଡିଦେଲାଇ । ସେମନ୍ କେବେ ମିସା ଆମର୍ ମିସାବିଡାଟାମନେ ମିସଡନାଇ । ଜଦି ସେମନ୍ ସତଇସେ ଆମର୍ ସଙ୍ଗର୍ ବିସ୍‌ବାସି ଅଇରଇଲେ, ଆମର୍ ସଙ୍ଗ୍ ରଇତାଇ । ମାତର୍ ସେମନ୍ ଚାଡିଲାଟପାଇ ଆମର୍ ଦଲର୍ ଲକ୍ ନଅଡ୍ ବଲି ଜାନାପଡିଲା ।

୨୦ ମାତର୍ କିରିସ୍ତ ତମ୍‌କେ ସୁକଲ୍ ଆଡମା ଦେଲାଆଟେ । ୨୧ ତମେ ସଡ୍ ନାଜାନାସ୍ ବଲିକରି ମୁଇ ତମ୍‌କେ ଲେକ୍‌ଲିନି, ସେନ୍ତାରି ନର୍ସି । ମାତର୍ ସେଟା ତମେ ନିକ ସଙ୍ଗ୍ ଜାନାସ୍ । ଆରି ସଡ୍ ସିକିଆ ସଙ୍ଗ୍ ବୁଲ୍ ସିକିଆ କେବେ ନ ମିସେ ।

୨୨ ତେବେ କେ ମିଟ୍ କଇଲାଇନି ? ଜିସୁକେ ମସିଅ ନର୍ସି ବଲି ଜେ କଇଲାମି, ସେ ଆକା ସବୁଟାମନେଅନି ବଡ୍ ମିଟୁଆ । ସେନ୍ତାରି ଲକ୍‌ମନ୍ କିରିସ୍ତର୍ ବିରଦି ଲକ୍‌ମନ୍ । ସେମନ୍ ଉଜେ ବାବା ପର୍‌ମେସର୍‌କେ ଆରି ତାର୍ ପଅ ଜିସୁ କିରିସ୍ତକେ ନାମଡନାଇ । ୨୩ ଜେ ଜଦି ପର୍‌ମେସର୍‌ ପଅକେ ନାମେ ନାଇ, ସେ ବାବା ପର୍‌ମେସର୍‌କେ ମିସା ନାମେ ନାଇ, ଜେ ପର୍‌ମେସର୍‌ ପଅକେ ନାମସି, ସେ ବାବା ପର୍‌ମେସର୍‌କେ ମିସା ନାମସି ।

୨୪ ତମେ କିରିସ୍ତର୍ ସଙ୍ଗ୍ ଜିବାକେ ଆରାମ୍ ଅଇଲାତେଇଅନି ଜନ୍ କବର୍ ସୁନିଆଚାସ, ସେଟା ସବୁବେଲେ ମନେ ପାକାଆ । ଜଦି ସେ କବର୍ ତମର୍ ମନେ ରଇସି, ସେନ୍ତାରିଆଲେ ତମେ ବାବା ପର୍‌ମେସର୍‌ ସଙ୍ଗ୍ ଆରି ତାର୍ ପଅର୍ ସଙ୍ଗ୍ ମିସିକରି ରଇସା । ୨୫ କିରିସ୍ତ ନିଜେ ଆମ୍‌କେ ନ ସାର୍‌ବା ଜିବନ୍ ଦେବି ବଲି କାଡାଦେଇଆଟେ ।

୨୬ ଜନ୍ ଲକ୍‌ମନ୍ ତମ୍‌କେ ସୁବ୍‌କବର୍ ଜାନାଇଲୁନି ବଲି ବୁଲ୍ ସିକିଆ ଦେଇ ତମ୍‌କେ ନାଡାଇବାକେ ଚେସ୍‌ଟା କଲାଇନି, ସେମନର୍ ବିସଇ ଜାନାଇବାକେ ଏ ସବୁ ବିସଇ ମୁଇ ତମ୍‌କେ ଲେକ୍‌ଲିନି । ୨୭ ମାତର୍ ତମେ ନାଡାଇ ନ ଉଆସ୍ । କାଇକେବଇଲେ କିରିସ୍ତ ତାର୍ ସୁକଲ୍‌ଆଡମା ତମ୍‌କେ ଦେଇଆଟେ । ସେ ସୁକଲ୍‌ଆଡମା ଏବେ ମିସା ତମର୍ ବିଡରେ ଆଟେ । ତେବର୍‌ପାଇ କେ ମିସା ବିନ୍ ଲକ୍ ତମ୍‌କେ ସିକାଇବାକେ ଲଡାନାଇ । ସୁକଲ୍‌ଆଡମା ତମ୍‌କେ ସବୁ ବିସଇର୍ ସଡ୍ ସିକାଇସି । ତେଇ ସେ ଜନ୍‌ଟା ସିକାଇସି, ସେଟା ପୁରାପୁରୁନ୍ ସଡ୍ । ତେଇ କାଇ ବୁଲ୍ ବିସଇ ନ ରଏ । ତେବର୍‌ପାଇ ମୁଇ ତମ୍‌କେ କଇଲିନି, କିରିସ୍ତର୍ ସଙ୍ଗ୍ ମିସିରୁଆ ।

୨୮ ଏ ଆଲାଦର୍ ପିଲାଟକିମନ୍, ମୁଇ ତମ୍‌କେ ଆରିତରେକ୍ କଇଲିନି କିରିସ୍ତର୍ ସଙ୍ଗ୍ ମିସିକରି ରୁଆ । ଜେନ୍ତାରି କି ସେ ଆରିତରେକ୍ ଏ ଜଗତେ ବାଉଡିଆଇଲାବେଲେ ତାକେ ବେଟ୍ ଅଇବାକେ ତାକେ ନ ଡରୁ କି ଲାଜ୍ ମିସା ନ ଉଆସ୍ । ୨୯ ଆମେ ଜାନିଆରୁ, କିରିସ୍ତ ଅନିଆଇ କାମ୍ ନ କରେ । ଏଟାମିସା ଜାନିଆରୁ, ଜନ୍‌ଲକ୍‌ମନ୍ ସଡ୍ କାମ୍ କର୍‌ବାଇ, ସେମନ୍ ପର୍‌ମେସର୍‌ ପିଲାଟକି ।

## ୩

ପର୍‌ମେସର୍‌ ପିଲାଟକିମନ୍

୧ \*ଅଲପ୍ ବାବିଦେକାପନି, ବାବା ପର୍‌ମେସର୍‌ ଆମ୍‌କେ କେତେକ୍ ଆଲାଦ୍ କଲାମି । ତାର୍ ଏତେକ୍ ଆଲାଦର୍ ଲାଗି ଆମେ ତାର୍ ପିଲାଜିଲା ବଲାଇ ଅଇଲୁନି । ଆରି ସତଇସେ ଆମେ ତାର୍ ଅଇଆରୁ ବଲି ଏ ଜଗତର୍ ଲକ୍ ବୁଜଡନାଇ ।

କାଈକେବଇଲେ ଆମର ବାବା ପରମେସରକେ ସେମନ୍ ନାଜାନତ୍ । ୨ ଏ ମର୍ ଆଲାଦର୍ ମଇତରମନ୍, ଏବେ ଆମେ ପରମେସରର୍ ପିଲାଜିଲା ଅଇଆତୁ । ପବ୍‌କେ ଆମେ କେନ୍ତାର୍ ଅଇରଇବୁ ବଲି ଏବେଜାକ ନାଜାନୁ । ମାତର୍ ଜେଡେବେଲେ କିରିସ୍‌ଟ ଏଜଗତେ ବାଡ଼ିଆଇସି, ସେବେଲେ ସେ ଜେନ୍ତାରି ଆଚେ, ସେନ୍ତାରି ତାକେ ଆମେ ଦେକ୍‌ବୁ । ଆମେ ମିସା ତାର୍‌ପାରା ଅଇଜିବୁ । ଏଟା ସତ୍ । ୩ ଜେଡ଼କି ଲକ୍ କିରିସ୍‌ଟର୍ ପାରା ଅଇବୁ ବଲି ଆସା କଲାସ୍‌ନି, ନିଜେ ପାପ୍ କାମ୍ ଚାଡ଼ି ସୁକଲ୍ ରଇବାର୍ ଆଚେ । ଜେନ୍ତାରିକି କିରିସ୍‌ଟ କେବେ ପାପ୍ ନ କରେ ।

୪ ଜେ ପାପ୍ କର୍‌ସି, ସେ ପରମେସରର୍ ନିୟମ୍ ବିରୁଦେ ଗାଲାନି । କାଈକେବଇଲେ ନିୟମ୍ ନ ମାନ୍‌ବାଟା ଆକା ପାପ୍ । ୫ ଆମର୍ ପାପର୍ ଡଣ୍ଟ ନେବାର୍‌ପାଇ କିରିସ୍‌ଟ ଏ ଜଗତେ ଆଇଲା, ସେଟା ତମେ ଜାନାସ୍ । ଆରି ସେ କାଈ ପାପ୍‌କାମ୍ ନ କରେ । ୬ ତେବେ ଜଦି ଗଟେକ୍ ଲକ୍ କିରିସ୍‌ଟର୍ ସଙ୍ଗ୍ ମିସିରଇଲେ, ସେ ଆରି ପାପ୍ କର୍‌ବାର୍ ନାଇ । ମାତର୍ ଗଟେକ୍ ଲକ୍ ଜଦି ପାପ୍ କରିଲାଗିରଇସି, ସେ କିରିସ୍‌ଟକେ ଦେକେନାଇ କି ନାଜାନେ ମିସା ।

୭ ଏ ପିଲାଟକିମନ୍, ତମେ କାର୍‌ଟାମେଅନି ମିସା ନାଡ଼ାଇ ନ ଅଇବାକେ ଜାଗରତ୍ ଅଇରୁଆ । ପରମେସର୍ ଦେକ୍‌ବା ଇସାବେ ଜନ୍ ଲକ୍ ଦରମ୍ କାମ୍ କର୍‌ବାଇ, ସେମନ୍‌କେସେ ଦରମ୍ ଲକ୍ ବଲି ଡାକ୍‌ସି । ସେନ୍ତାରି ଲକ୍‌ମନ୍ ପରମେସର୍ ଦେକ୍‌ବା ଇସାବେ ଦରମ୍ । ଜେନ୍ତାରିକି କିରିସ୍‌ଟ ଦରମ୍ ରଇଲା । ୮ ମାତର୍ ପାପ୍‌କରି ଲାଗିରଇବା ଲକ୍‌ମନ୍ ସଇତାନର୍ । କାଈକେବଇଲେ କାଈଟା ତିଆର୍ ନଅଇବା ଆଗତୁ ସଇତାନ୍ ପାପ୍ କରିଆଇଲାନି । ସଇତାନ୍ କିରିରଇବା କାମ୍ କୁରୁପ୍‌ନାସ୍ କର୍‌ବାକେ ପରମେସରର୍ ପଅ ଏ ଜଗତେ ଆଇଲା ।

୯ ପରମେସରର୍ ପିଲା ଅଇରଇବା କେ ମିସା ପାପ୍‌କରିଲାଗି ରଇବାର୍ ନାଇ । କାଈକେବଇଲେ ପରମେସରର୍ ଗୁନ୍‌ଚଲନ୍ ତାକର୍ ବିଡ଼ରେ ଆଚେ । ସେମନ୍ ପରମେସରର୍ ପିଲାଜିଲା ଅଇଲାଇକେ, ପାପ୍‌କରିଲାଗି ନ ରଅତ୍ । ୧୦ କେ କେ ସଇତାନର୍ ପିଲାମନ୍ ଆରି କେ କେ ପରମେସରର୍ ପିଲାମନ୍ ବଲି ଆମେ ଜାନୁ । ଜନ୍ ଲକ୍‌ମନ୍ ପରମେସର୍ ଦେକ୍‌ବା ଇସାବେ ସତ୍ କାମ୍ ନ କରତ୍ । ଜନ୍ ଲକ୍‌ମନ୍ ମିସିବିଡ଼ିକରି ରଇବା ବିସ୍‌ବାସି ବାଇବଇନିମନ୍‌କେ ଆଲାଦ୍ ନ କରତ୍, ସେମନ୍ ତାର୍ ପିଲାଜିଲା ନ ଅଅତ୍ ।

ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କରା

୧୧ ☆ ଏ କବର୍ ତମେ ଆଗତୁଅନି ସୁନିଆସିଆଚାସ୍ । ସେଟା ଅଇଲାନି, ଆମେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କର୍‌ବାର୍ ଆଚେ । ୧୨ ଆମେ କୟିନର୍‌ପାରା ଅଇବାର୍ ନାଇ । ସେ ଗଟେକ୍ ସଇତାନର୍ ଲକ୍ ରଇଲା । ଜେକି ଜେଡ଼କି କାରାପ୍ କାମ୍ କରାଇସି । ସେ ତାର୍ ସାନ୍‌ବାଇକେ ମିସା ମରାଇଲା । ସେ କାଈକେ ସେନ୍ତାରି କଲା ? କାଈକେବଇଲେ, ତାର୍ ନିଜର୍ ଜେଡ଼କି କାମ୍ କାରାପ୍ ରଇଲା, ତାର୍ ବାଇ ଏବଲର୍ କାମ୍‌ମନ୍ ସେଡ଼କି ଦରମ୍ ରଇଲା ।

୧୩ ତେବର୍‌ପାଇ ଏ ମର୍ ବାଇବଇନିମନ୍, ଏଜଗତର୍ ଲକ୍‌ମନ୍ ତମ୍‌କେ ଗିନ୍ କଲେ, କାବା ଅଇବାର୍‌ନାଇ । ୧୪ ☆ ଆମେ କିରିସ୍‌ଟ ବିସ୍‌ବାସି ବାଇବଇନିମନ୍‌କେ ଆଲାଦ୍ କର୍‌ବାର୍ ଲାଗି ଏଟା ଜାନ୍‌ଲୁନି । ଜେ ଆଲାଦ୍ ନ କରେ, ସେ ଏବେ ମିସା ମରନର୍ ସାସନର୍ ତଲେଆଚେ । ୧୫ କେ ଜଦି ବିନ୍ ବିସ୍‌ବାସି ବାଇବଇନିମନ୍‌କେ ଗିନ୍ କର୍‌ସି, ନର୍‌ମାର୍‌ବା ଲକ୍‌ର୍ ସମାନ୍ । ଗଟେକ୍ ନର୍‌ମାରୁ ଲଗେ ପରମେସରର୍ ନ ସାର୍‌ବା ଜିବନ୍ ନ ରଏ । ଏଟା ତମେ ଜାନିଆଚାସ୍ । ୧୬ ଏଗାର୍‌ଲାଗି ଆଲାଦ୍ କାଈଟା ଆମେ ଜାନ୍‌ଲୁନି । କିରିସ୍‌ଟ ଆମର୍‌ପାଇ ତାର୍ ନିଜର୍ ଜିବନ୍ ଦେଲା । ସେନ୍ତାରିସେ

☆ ୩:୫ ୩:୫ ଜଅନ୍ ୧:୨୯ ☆ ୩:୧୧ ୩:୧୧ ଜଅନ୍ ୧୩:୩୪ ☆ ୩:୧୪ ୩:୧୪ ଜଅନ୍ ୫:୨୪

ଆମେମିସା ଆମର ମିସିବିଡ଼ିରଇବା ବିସ୍‌ବାସି ବାଇବଇନି ମନରୁଲାଗି ମରବାକେ ତିଆର ଅଇବାରୁଆତେ ।<sup>୧୭</sup> ଜଦି କାକେମିସା ବୁଡ଼ବାକେ ତାର ଲତାକେ ଲାଗ୍‌ବାଟା ସବୁ ବିସଇଆତେ, ଆରି ତାର ବିସ୍‌ବାସି ବାଇକେ ଲତାଆତେ ବଲି ସେ ଜାନେ, ମାତର ତାରପାଇ ଜିବନ୍ ଦୁକାଏ ନାଇ, ସେ ମୁଇ ପରମେସରକେ ଆଲାଦ୍ କଲିନି ବଲି କଇନାପାରେ ।<sup>୧୮</sup> ଆଲାଦର ପିଲାମନ୍, ଆମର ଆଲାଦ୍ ଅବକା କୁଆବଲାଇ ରଇବାର ନାଇ । ଆମେ ସତ୍‌ସଙ୍ଗ୍ ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କରବାରୁ ଆତେ । ଜେନ୍ତାରିକି ପରମେସର ସତ୍‌ସଙ୍ଗ୍ ଆମ୍‌କେ ଆଲାଦ୍ କରସି ।

<sup>୧୯</sup> ଆମେ ସବୁ ସେନ୍ତାରି ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କଲେ, ପରମେସରର ଲକ୍‌ବଲି ଜାନୁ ଆକା । ଜନ୍‌ଟା ସତ୍ ଆରି ଜନ୍‌ଟା ଟିକ୍, ସେ ତାର ଲକ୍‌ମନ୍‌କେ ଦେକାଇସି । ଆରି ଆମେ ପରମେସରକେ ପାର୍‌ତନା କଲାବେଲେ ନ ଡରୁ ।<sup>୨୦</sup> ଆମର ବିବେକ୍ ଜଦି ଆମ୍‌କେ ପାପିବଲି ଦସ୍ ଦେଲେ, ଆମେ ସାନ୍ତିସଙ୍ଗ୍ ରଇବୁ । କାଇକେବଇଲେ ଆମର ବିବେକ୍ ଟାନେଅନି ଆମେ ଜାନୁବାଡେଇଅନି ପରମେସର ଅଦିକ୍ ଜାନେ । ଆରି ଆମେ କରବା ସବୁ କାମ୍ ସେ ଜାନେ ।<sup>୨୧</sup> ଏ ଆଲାଦର ମଇତରମନ୍, ଆମର ବିବେକ୍ ଜଦି ଆମ୍‌କେ ଦସି ବଲି ନ ଜାନାଇଲେ, ଆମେ ପରମେସରକେ ପାର୍‌ତନା କଲାବେଲେ ନ ଡରୁ ।<sup>୨୨</sup> ଆମେ ତାକେ ଜେଡ଼କି ମାଙ୍ଗ୍‌ଲୁନି, ସେଟା ସବୁ ପରମେସର ଆମ୍‌କେ ଦେଇସି । କାଇକେବଇଲେ ସେ ତିଆରଲାଟା ସବୁ ଆମେ କଲୁନି ।<sup>୨୩</sup> ଆରି ଏଟା ଅଇଲାନି ତାର ଆଦେସ୍ । ତାର ପଅ ଜିସୁକିରିସ୍‌ଟକେ ବିସ୍‌ବାସ୍ କରବାରୁ ଆରି ଜିସୁ ତିଆରଲାପାରା ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କରବାରୁ ।<sup>୨୪</sup> ଜେଡ଼କି ଲକ୍ ତାର ଆଦେସ୍ ମାନୁବାଇ, ସେମନ୍ ସବୁ ପରମେସରର ସଙ୍ଗ୍ ମିସ୍‌ଲାଇ ଆଟଡ଼ । ଆରି ସେ ମିସା ସେନ୍ତାରିସେ । ସେ ଆମର ବଡ଼ିରେ ଆତେ ବଲି ଏନ୍ତାରି ଆମେ ଜାନୁଲୁନି । ଜନ୍ ସୁକଲୁଆଡ଼ମା ପରମେସର ଆମର ବିଡ଼ରେ ରଇବାକେ ଦେଲାପାଇ ।

## ୪

ଆଡ଼ମା ମନ୍‌କେ ଚିନା

<sup>୧</sup> ଏ ଆଲାଦର ବାଇବଇନିମନ୍, ଜଦି କେ ମିସା ପରମେସରରୁ ଆଡ଼ମା ମରଟାନେ ଆତେ, ବଲି କଇବା ଲକ୍‌ମନ୍‌ର କାତା ବିସ୍‌ବାସ୍ କରବାରୁ ନାଇ । ମାତର ସେନ୍ତାରି ଲକ୍‌ଟାଟାନେ ସତଇସେ ପରମେସରରୁ ଆଡ଼ମା ଆତେ କି ନାଇ ଜାନୁବାକେ ମନ୍‌ଦିଆନ୍ ଦେଇ ସେ କଇବା କାତା ପରିକା କରବାରୁ ଆତେ । କାଇକେବଇଲେ ମିଡ଼ କାତା ସିକାଉମନ୍ ବେସି ଲକ୍ ବାରଇଆଟଡ଼ । ପରମେସରର ଟାନେଅନି ମିଲାଇଲା କବରୁ ବଲି ସବୁବାଟେ ଗାଲାଇ ଆଟଡ଼ ।<sup>୨</sup> ଗଟେକ୍ ଲକ୍‌ଟାଟାନେ ପରମେସରରୁ ଆଡ଼ମା ଆତେ କି ନାଇ ବଲି ଏନ୍ତାରି ତମେ ଜାନୁସା । ଜେ ଜିସୁକିରିସ୍‌ଟ ନରୁୟ୍ ଦାରି ଏ ଜଗତେ ଆଇଲା ବଲି କଇଲେ, ତାରଟାନେ ପରମେସରରୁ ଆଡ଼ମା ଆତେ ।<sup>୩</sup> ମାତରୁ ଜେ କି ଏ କାତା ନ ମାନେ, ତାରଟାନେ ପରମେସରରୁ ଆଡ଼ମା ନାଇ । ସେନ୍ତାରି ଲକ୍‌ମନ୍‌ଟାଟାନେ କିରିସ୍‌ଟର୍ ବିରଦିରୁ ଆଡ଼ମା ଆତେ । ଏ ଆଡ଼ମା ଜଗତେ ଆଇସି ବଲି ତମେ ସୁନିଆଟାସ୍ । ସେନ୍ତାରି ସେ ଆଡ଼ମା ଆଇଲାଆତେ । ଆରି ଏବେ ମିସା ସେଟା ଜଗତେ ଆତେ ।

<sup>୪</sup> ମାତରୁ ତମେ ପରମେସରରୁ ଲକ୍ । ଏ ଆଲାଦର ପିଲାମନ୍, ସେନ୍ତାରି ବୁଲ୍ ସିକିଆ ଦେଉମନ୍‌ର କାତା ମାନା ନାଇ । କାଇକେବଇଲେ ତମରଟାନେ ରଇବା ଆଡ଼ମା ଏ ଜଗତରୁ ଲକ୍‌ମନ୍‌ରୁ ଆଡ଼ମାଡେଇଅନି ଅଦିକ୍ ବପୁଟା ।<sup>୫</sup> ସେମନ୍ ଏ ଜଗତରୁ ଲକ୍ । ଆରି ଏ ଜଗତରୁ ଲକ୍‌ମନ୍ ତାକର୍ କାତା ସୁନୁବାଇ

। କାଇକେବଇଲେ ସେମନର ସିକିଆ ଆରି ଏ ଜଗତର ଲକ୍ମନର ସିକିଆ ସମାନଆଚେ । <sup>୭</sup> ମାତର ଆମେ ପରମେସରର ଲକ୍ । ଆରି ଜେଡକି ଲକ୍ ପରମେସରକେ ଜାନିଆତଡ, ସେମନ୍ ସବୁ ଆମର ସିକିଆ ମାନବାଇ । ମାତର ଜେଡକି ପରମେସରର ଲକ୍ ନଅଡ, ଆମର ସିକିଆ ନ ମାନଡ । ଏଟାରଲାଗି ଗଟେକ୍ ଲକ୍‌କେ ସଡ ଆଡ଼ମା ଆଚେ କି ସଇତାନର ଆଡ଼ମା ଆଚେ ବଲି ଜାନିଅଇସି ।

ପରମେସର ଆଲାଦକାରିଆ

<sup>୭</sup> ଏ ମର ଆଲାଦର ମଇତରମନ୍, ଆମେ ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କରାକରି ଅଉଁ । କାଇକେବଇଲେ ଆଲାଦ୍ କରବାକେ ପରମେସର ଆମ୍‌କେ ସାଇଜ କରସି । ଜେ ଜଦି ବିନ୍ ଲକ୍‌ମନକେ ଆଲାଦ୍ କରସି, ସେ ପରମେସରର ପିଲା ଆରି ପରମେସରକେ ଜାନେ । <sup>୮</sup> ଜେ ବିନ୍ ଲକ୍‌ମନକେ ଆଲାଦ୍ ନ କରେ, ସେ ପରମେସରକେ ନାଜାନେ । କାଇକେବଇଲେ ପରମେସର ସବୁବେଲେ ଆଲାଦକାରିଆ । <sup>୯</sup> ପରମେସର ଏନ୍ତାରି ଆମରପାଇ ତାର ଆଲାଦ୍ ଦେକାଇଲା । ସେ ଗଟେକ୍ ବଲି ତାର ପିଲାକେ ଏ ଜଗତେ ପାଟାଇଲା । ଜେନ୍ତାରିକି ତାରଲାଗି ଆମେ ନ ସାରବା ଜିବନ୍ ପାଇରୁ । <sup>୧୦</sup> ଏନ୍ତାରି ନଏଁଜେ, ଆମେ ପରମେସରକେ ଆଲାଦ୍ କଲୁ, ମାତର ସେ ଆମ୍‌କେ ଆଲାଦ୍ କଲା । ଆରି କ୍ଲୁସକାଟେ ମଲାପାଇ ଆମର ଡଣ୍ଡ ପାଇବାକେ ତାର ପଅକେ ପାଟାଇଲା । ଏଟା ଅଇଲାନି ସଡ଼ସଙ୍ଗ ଆଲାଦ୍ କରବାଟା ।

<sup>୧୧</sup> ଏ ମର ଆଲାଦର ମଇତରମନ୍, ଜେନ୍ତାରିକି ପରମେସର ଆମ୍‌କେ ଏଡେକ୍ ଆଲାଦ୍ କଲାପାଇ, ଆମେମିସା ଗଟେକ୍ ଲକ୍ ଆରିଗଟେକ୍ ଲକ୍‌କେ ସେନ୍ତାରି ଆଲାଦ୍ କରବାର ଆଚେ । <sup>୧୨</sup> \*କେ ମିସା ପରମେସରକେ ଦେକଡ ନାଇତା । ମାତର ଆମେ ଜଦି ଗଟେକ୍ ଲକ୍ ଆରିଗଟେକ୍ ଲକ୍‌କେ ଆଲାଦ୍ କଲେ, ପରମେସର ଆମର ସଙ୍ଗ ମିସିଆଚେ । ସେ ଆମରଟାନେ ତାର ଆଲାଦ୍ ସିଦ୍ କରସି ।

<sup>୧୩</sup> ପରମେସରର ସଙ୍ଗ ମିସିଆରୁ ବଲି ଆମେ ଜାନୁ । ଆରି ସେ ମିସା ଆମର ସଙ୍ଗ ମିସିଆଚେ । କାଇକେବଇଲେ ସେ ତାର ଆଡ଼ମା ଆମ୍‌କେ ଦେଲାଆଚେ । <sup>୧୪</sup> ଆରି ଆମେ ଦେକିଆରୁ ପାପର ଡଣ୍ଡେଅନି ଲକ୍‌ମନକେ ରକିଆ କରବାକେ ବାବା ପରମେସର ତାର ପଅକେ ଏ ଜଗତେ ପାଟାଇଲା । ଏଟା ସଡ଼ କାତା ବଲି ବିନ୍ ଲକ୍‌ମନକେ କଇଲୁନି । <sup>୧୫</sup> ଜେ ମିସା ଜିସୁକେ ପରମେସରର ପଅ ବଲି ନାମ୍‌ଲେ, ପରମେସର ସେ ଲକ୍‌ର ସଙ୍ଗ ମିସିରଇସି । ଆରି ସେ ମିସା ପରମେସରର ସଙ୍ଗ ରଇସି । <sup>୧୬</sup> ପରମେସର ଜନ୍ ଆଲାଦ୍ ଆମରପାଇ ଦେକାଇଆଚେ, ସେଟା ଆମେ ଜାନୁଲୁନି ଆରି ବିସ୍‌ବାସ୍ କଲୁନି ।

ସେ ସବୁବେଲେ ଲକ୍‌ମନକେ ଆଲାଦ୍ କରସି । ଜେଡକି ଲକ୍ ପରମେସରକେ ଆରି ବିନ୍ ଲକ୍‌ମନକେ ଆଲାଦ୍ କରବାଇ, ସେମନ୍ ପରମେସରର ସଙ୍ଗ ମିସିଆଚଡ । ଆରି ସେ ମିସା ତାକର ସଙ୍ଗ ଆଚେ । <sup>୧୭</sup> ପରମେସର ଆମ୍‌କେ ଦେଇ ବିନ୍ ଲକ୍‌ମନକେ ଆଲାଦ୍ କରବା କାମ୍ କଲାଆଚେ । ଜେନ୍ତାରିକି ସେ ସବୁକେ ବିଚାରନା କରବା ଦିନେ ଆମେ ଡରିକରି ନ ରଉଁ । କିରିସଟ ଏ ଜଗତେ ରଇଲାବେଲେ, ଜେନ୍ତାରିକି ଚଲାଚଲୁଡି କରଡେରଇଲା, ସେନ୍ତାରିସେ ଆମେମିସା ଚଲାଚଲୁଡି କରୁ । ଆରି ଆମେ ଡରିକରି ନ ରଉଁ । <sup>୧୮</sup> ଜେ ପରମେସରକେ ଆଲାଦ୍ କରସି, ସେ ତାକେ ନ ଡରେ । ତାର ଆଲାଦ୍ ଆମର ବିଡରେ କାମ୍ କରସି, ଆମେ ତାକେ ଡରିନଏଁ । ସେ ସେମନକେ ଡଣ୍ଡ ଦେଇସି ବଲି ଲକ୍‌ମନ୍ ତାକେ ଡରଲାଇନି । ଜଦି କେ ମିସା ପରମେସରକେ ଡରସି, ତାର ଆଲାଦ୍ ସେ ଲକ୍‌ରଟାନେ କାମ୍ କରେନାଇ ବଲି ଜାନାପଡସି ।

\* ୪:୧୨ ୪:୧୨ ଜଅନ୍ ୧:୧୮

୧୯ ଆମେ ତାକେ ଆଲାଦ୍ କରୁବା ଆଗତୁ ପରମେସର୍ ଆମକେ ଆଲାଦ୍ କଲା । ସେଟାରପାଇ ଆମେ ତାକେ ଆଲାଦ୍ କଲୁନି । ୨୦ ଜଦି କେ ମିସା ମୁଇ ପରମେସରକେ ଆଲାଦ୍ କଲିନି ବଲି କଇସି, ମାତର୍ ନିଜର୍ ବିସ୍ବାସି ବାଇବଇନିକେ ଚିନ୍ କରସି, ସେନ୍ତ୍ରାରୁଆଲେ ସେ ମିର୍ କଇଲାନି । କାଇକେବଇଲେ ଦୁଇଟା ଆଁକିଡେଇ ଡିସ୍ବା ବାଇବଇନିମନ୍ଦକେ ଆଲାଦ୍ ନ କରୁବା ଗଟେକ୍ ଲକ୍, ନ ଡିସ୍ବା ପରମେସରକେ ଆଲାଦ୍ କରିନାପାରେ । ୨୧ ଆରି ସେ ଆମକେ ଏ ଆଦେସ୍ ଦେଇ ତିଆରଲାଆଟେ, ଜେ ପରମେସରକେ ଆଲାଦ୍ କରସି, ତାର୍ ମିସିବିଡି ରଇବା ବିସ୍ବାସି ବାଇବଇନିମନ୍ଦକେ ମିସା ଆଲାଦ୍ କରୁବାର୍ ଆଟେ ।

## ୫

### ଏ ଜଗତେ ଜିଡ୍ବାଟା

୧ ଜେ କି ଜିସୁକେ ମସିଅ ବଲି ବିସ୍ବାସ୍ କରସି, ସେ ପରମେସରର୍ ପିଲା । ଆରି ଜେ କି ବାବାକେ ଆଲାଦ୍ କରସି, ସେ ତାର୍ ପିଲାକେ ମିସା ଆଲାଦ୍ କରସି । ୨ ପରମେସରର୍ ପିଲାମନ୍ଦକେ ଆମେ ଆଲାଦ୍ କଲୁନି ବଲି ଏନ୍ତାରି ଜାନିଅଇସି । ପରମେସରକେ ଆଲାଦ୍ କରି ଆରି ତାର୍ ଆଦେସ୍ ମିସା ମାନିକରି । ୩ \*ଆମେ ଜଦି ସତଇସେ ପରମେସରକେ ଆଲାଦ୍ କଲେ, ତାର୍ ଆଦେସ୍ ସବୁ ମାନୁ । ସେ ଆମକେ ତିଆରଲା ବିସଇ ମାନୁବାକେ ଆମକେ ଆବଡ୍ ନ ଲାଗେ । ୪ କାଇକେବଇଲେ ପରମେସରର୍ ସବୁ ପିଲା ଏ ଜଗତର୍ କାରାପ୍ ଚଲାଚଲୁଡି ନିଟିକରି ଜିଡିପାରସି । ଆମର୍ ବିସ୍ବାସର୍ ଲାଗି ଆମେ ଜଗତକେ ଜିଡିଅଇସି । ୫ ଏ ଜଗତକେ କେ ଆରାଇପାରସି ? ଜିସୁକେ ପରମେସରର୍ ପଅ ବଲି ଜେ ବିସ୍ବାସ୍ କରସି, ସେ ଏ ଜଗତକେ ଆରାଇସି ।

### ଜିସୁ କିରିସ୍ଟର୍ ଲାଗି ସାକି

୬ ଜିସୁକିରିସ୍ଟ ପରମେସରର୍ ପ ବଲିକରି, ତୁବନ୍ ଦେଉ ଜଅନ୍ ତାକେ ପାନିଡେଇ ତୁବନ୍ ଦେଲା । ଆରି ସେ ମଲାବେଲେ ତାର୍ ବନି ରକଇଅଇଲା । ଏନ୍ତାରି ନଏଁ ଜେ ସେ ଅବ୍କା ପାନିସଙ୍ଗ୍ ତୁବନ୍ ଅଇଲା, ମାତର୍ ତାର୍ ମରନେ ତାର୍ ବନି ରକଇଅଇଲା । ଏ ସବୁ ବିସଇ ସଡ୍ ବଲି ସୁକଲୁଆଡ଼ମା ଆମକେ ସାକିଦେଲାନି । କାଇକେବଇଲେ ସେ ସଡ୍ ଆଡ଼ମା । ୭ ଡେବର୍ପାଇ ତିନ୍ଟା ସାକିଡେଇଅନି ଆମେ ସଡ୍ ଜାନୁଲୁନି । ୮ ସୁକଲୁଆଡ଼ମା, ତୁବନ୍ ଅଇରଇବା ପାନି, ଆରି ରକଇଅଇରଇବା ବନି, ତିନ୍ଟାଜାକ ସାକିଡେଇ ରାଜି ଅଇଆତଡ୍ । ୯ ଜେଡେବେଲେ ଲକ୍ମନ୍ଦ ତାକର୍ ଜାନିରଇବା ବିସଇନେଇ ସାକିଦେବାଇ, ଆମେ ସେମନ୍ଦକେ ବିସ୍ବାସ୍ କରୁ । ମାତର୍ ପରମେସର୍ ଆମକେ ସାକିଦେବାଟା ତାର୍ଡେଇଅନି ଅଦିକ୍ ମୁକିଅ । କାଇକେବଇଲେ ସେଟା ପରମେସରର୍ ସାକି । ସେ ତାର୍ ନିଜର୍ ପଅର୍ ବିସଇନେଇ ଆମକେ ସାକିଦେଲାନି । ୧୦ କେ ମିସା ଜିସୁକେ ପରମେସରର୍ ପଅ ବଲି ବିସ୍ବାସ୍ କଲେ, ପରମେସରର୍ ସାକି ତାକର୍ ମନ୍ ବିଡ୍ରେ ଆଟେ । ପରମେସର୍ କଇଲା କାତା ଜେ ଜଦି ବିସ୍ବାସ୍ ନ କରେ, ସେ ମିର୍ ବଲିକରି କଇଲାନି । କାଇକେବଇଲେ ତାର୍ ନିଜର୍ ପଅର୍ ବିସଇ କଇଲାଟା ସେମନ୍ଦ ବିସ୍ବାସ୍ କରଡ୍ ନାଇ । ୧୧ \*ସେ ସାକିଅ ଏଟା ସେ । ପରମେସର୍ ଆମକେ ନ ସାରୁବା ଜିବନ୍ ଦେଲାଆଟେ । ଏ ଜିବନ୍ ଆମେ ତାର୍ ପଅର୍ଲାଗି ମିଲାଇଆରୁ । ୧୨ ତାର୍ ପଅସଙ୍ଗ୍ ଜେ ମିସା ମିସିରଇବାଇ, ସେମନ୍ଦ ଏ ନ ସାରୁବା ଜିବନ୍ ପାଇବାଇ । ଆରି ଜେ ତାର୍ ପଅସଙ୍ଗ୍ ମିସେନାଇ ସେ ଏ ଜିବନ୍ ମିସା ପାଏନାଇ ।

ନ ସାର୍ବବା ଜିବନ୍

<sup>୧୩</sup> ତମେ ଜେଡକି ଲକ୍ ପର୍ମେସରର୍ ପଅକେ ବିସ୍ବାସ୍ କଲାସ୍ନି, ତମ୍ଭକେ ଏ ଚିଟି ଲେକ୍ଲିନି । ଜେନ୍ତାରିକି ଆମ୍ଭକେ ନ ସାର୍ବବା ଜିବନ୍ ଆଟେ ବଲି ତମେ ଜାନାସ୍ । <sup>୧୪</sup> ପର୍ମେସର୍କେ ପାର୍ତନା କର୍ବାବେଲେ ଆମେ ଡରିକରି ରତନାଇ । କାଇକେବଇଲେ ତାର୍ ମନ୍ କଲା ଇସାବେ ଆମେ କାଇଟା ମାଙ୍ଗ୍ଲେ ମିସା ସେ ଆମ୍ଭକେ ଦେଇସି । <sup>୧୫</sup> ଜେଡେବେଲେ ଆମେ ତାକେ ମାଙ୍ଗ୍ଲେ, ସେ ଆମ୍ଭ କାତା ସୁନ୍ସି । ଆମେ ତାକେ ପାର୍ତନାଇ ଜାଇଟା ମାଙ୍ଗ୍ଲେ ସେଟା ଆମ୍ଭକେ ଦେଇସି ।

<sup>୧୬</sup> ଜଦି ତମର୍ ସଙ୍ଗର୍ ବିସ୍ବାସି ବାଇ ପାପ୍‌କଲାନି ବଲି ଜାନ୍‌ଲେ, ଆରି ସେ ପାପ୍, ଲକ୍‌କେ ପର୍ମେସରର୍ ଟାନେଅନି ସବୁଦିନର୍‌ପାଇ ବେଗଲ୍‌ବା ପାରା ପାପ୍ ନଇଲେ, ସେ ଲକ୍‌କେ ରକିଆ କର ବଲି ତାକେ ଗୁଆରି କର୍ବାର୍ ଆଟେ । ଆରି ପର୍ମେସର୍ ସେ ଲକ୍‌କେ କେମାକରି ରକିଆ କର୍ସି । ଏଟା ଜେନ୍ତାରି ପାପ୍ ଜନ୍‌ଟା ମରନର୍ ବାଟେ ଲକ୍‌ମନ୍‌କେ ନ ତାକିନେଏ, ସେନ୍ତାରି ପାପର୍ ପାଇ । ମାତର୍ ପର୍ମେସରର୍ ଟାନେଅନି ସବୁଦିନର୍‌ପାଇ ବେଗଲ୍‌ବା ପାରା ପାପର୍ ପାଇ, ତମେ ତାକେ ଗୁଆରି କରା ବଲି ମୁଇ କଇ ନାଇ । <sup>୧୭</sup> ସବୁ ରକାମର୍ ବୁଲ୍ କାମ୍ ପାପ୍‌ସେ । ମାତର୍ ସବୁ ରକାମର୍ ପାପ୍ ମରନର୍ ବାଟେ ନ ତାକିନେଏ ।

<sup>୧୮</sup> ଆମେ ଜାନିଆରୁ, ଜେ ପର୍ମେସରର୍ ପିଲା ଅଇଗାଲା ଆଟେ, ସେ ପାପ୍‌କାମ୍ କରିଲାଗି ନ ରଏ । କାଇକେବଇଲେ ପର୍ମେସରର୍ ପଅ ତାକେ ଦେକାରକା କର୍ସି । ଆରି ସଇତାନ୍ ଜେ କି ସବୁ ରକାମ୍ କାରାପ୍ କାମ୍ କରାଇସି, ତାକେ କାଇଟା କରିନଏ ।

<sup>୧୯</sup> ଆମେ ଜାନିଆରୁ, ଆମେ ପର୍ମେସରର୍ ପିଲାଜିଲା ଆରି ଜେ କି ତାକେ ନାଜାନେ, ସଇତାନ୍ ସେମନ୍‌କେ ସାସନ୍ କଲାନି ।

<sup>୨୦</sup> ଆମେ ଏଟା ମିସା ଜାନିଆରୁ ଜେ, ତାର୍ ପଅ ଏ ଜଗତେ ଆଇଲା ଆରି ଆମ୍ଭକେ ସଡ୍ ପର୍ମେସର୍କେ ଜାନାଇଲା । ଏ ସଡ୍ ପର୍ମେସରର୍ ସଙ୍ଗ୍ ଆମେ ମିସିକରିଆରୁ । କାଇକେବଇଲେ ତାର୍ ପଅ ଜିସୁକିରିସ୍‌ଟର୍ ସଙ୍ଗ୍ ଆମେ ମିସିଆରୁ । ସେ ସେ ସଡ୍ ପର୍ମେସର୍ ଆରି ସେ ସେ ଲକ୍‌ମନ୍‌କେ ନ ସାର୍ବବା ଜିବନ୍ ଦେଇସି ।

<sup>୨୧</sup> ଏ ମର୍ ଆଲାଦର୍ ପିଲାଟକିମନ୍, ମିର୍ ପୁଡ୍‌ଲାମନର୍ ଟାନେଅନି ଦୁରିକେ ରୁଆ ।



# ଯୋହନ ଲେଖିଥିବା ଦ୍ୱିତୀୟ ପତ୍ର ଜଅନ୍ ଦୁଇପାଲି ଚିଠି ଲେଖିଲାଟା ଏ ବଇର ବିସଇ ଜାନ୍‌ବାଟା

ଜଅନ୍ ଲେଖିଲା ଦୁଇଟା ଚିଠି ଜିସୁକିରିସ୍‌ଟ ଜନମେଅନି ୧୦୦ କିରିସ୍‌ଟାବ୍‌ଦରେ ପେରିଡ୍ ଜଅନ୍‌ର ଲାଗି ଲେକା ଅଇରଇଲା । ଜଅନ୍ ନିଜ୍‌କେ ଲେକିଆଟିବଲି ଜାନାଏନାଇ । ତାର ବାଦୁଲେ ସେ ନିଜ୍‌କେ ପାର୍‌ତିନ୍ ବଲିକରି ଜାନାଇ ଅଇଲାନି । ଜଅନ୍‌ର ଦୁତିଅ ଚିଠିର ବିସଇ ସଙ୍ଗ୍ ଜଅନ୍ ଲେଖିଲା ସୁସମାଚାର ରଇବା ବିସଇ ସଙ୍ଗେ ସମାନ୍ । ଏଟା ସତ୍‌ସଙ୍ଗ୍ ଜିସୁକେ ଜଅନ୍ ଇସାବେ ସେ ଗଟେଲକ୍ ଆରି ଗଟେକ୍ ଲକ୍‌କେ ଆଲାଦ୍ କରବା ସମାନ୍ । ଜିସୁର ଆଦେସ୍‌କେ ମନ୍‌ଦେବାଇ, ସେ ରକାମ୍ ଜିସୁର ଆଦେସ୍‌କେ ମାନ୍‌ବାଟା ଅଇଲାନି, ତାକେ ଆଲାଦ୍ କରବାର୍ ଜଅନ ୧:୫-୬;୧:୬;୧୦ ।

ଏଟା ବିସ୍‌ବାସ୍ କରିଅଇସିଜେ, ଜଅନ୍ ଜେଡେବେଲେ, ଏପିସିଏ ବାସାଅଇ ରଇଲା, ସେ ସୁବକବର୍ ସଙ୍ଗ୍ ତାର୍ ତିନ୍‌ଟା ଚିଠି ମିସା ଲେକି ରଇଲା । ସେଟା ଅଇଲାନି ୧ ଜଅନ, ୨ ଜଅନ, ଆରି ୩ ଜଅନ୍

### ଏ ବଇବିଡ୍‌ରେ ରଇବା ବିସଇ

- ୧. ଜଅନ୍ ଏ ଚିଠି କାର୍‌ପାଇ ଲେଖିଲାନି ଏଟା କଇ ତାର୍ ବିସ୍‌ବାସ୍ କରବା ଲକ୍‌ମନ୍‌କେ ଜୁଆର୍ ଜାନାଇଲାନି । ୧:୧-୩
- ୨. ଜଅନ୍ ତାର୍ ମଣ୍ଡଲିମନ୍‌କେ ସାଆସ୍‌ଦେଇକରି ବଡ୍ ଆଦେସ୍‌ର ବିସଇ ମନେ ଏଡାଇଦେଲାନି । ୧:୪-୬
- ୩. ସେ ମିଡ୍‌ସିକିଆ ଦେଉ ମନର୍ ବିସଇ ଜାଗରୁତା କଲାନି । ୧:୭-୧୧
- ୪. ସେ ଜନ୍‌ଲଗେ ବାସାଅଇ ଆଟେ ଡେଇର୍ ବିସ୍‌ବାସିମନ୍‌କେ ଜୁଆର୍ ଜାନାଇକରି ଏ ଲେକା ସାରାଇଆଟେ । ୧:୧୨-୧୩

୧ ପାର୍‌ତିନ୍ ଜଅନ୍‌ଜେ ମୁଇ ଏ ଚିଠି ଲେଖିଲିନି । ଏ ଚିଠି ଆମର୍ ଆଲାଦର୍ ବଇନି ଆରି ତାର୍ ପିଲାମନର୍‌ପାଇ । ମୁଇ ସତଇସେ ତମକେ ସବୁଲକ୍‌ମନ୍‌କେ ଆଲାଦ୍ କଲିନି । ଆରି ମୁଇସେ ନାଇ, ସତ୍ ବିସଇ ଜାନିରଇବା ସବୁଲକ୍ ମିସା । ୨ ଆମେ ସତ୍ ବିସଇ ଜାନିରଇଲାର୍‌ପାଇ ତମ୍‌କେ ଆଲାଦ୍ କଲିନି । ଆରି କାଲ୍‌କାଲ୍ ଜୁଗ୍‌ଜୁଗ୍ ପାଇ, ସେ ସତ୍ ବିସଇ ଜାନିରଇବୁ ।

୩ ଆମର୍ ବାବା ପର୍‌ମେସର୍ ଆରି ତାର୍ ପଅ ଜିସୁକିରିସ୍‌ଟ ଆମ୍‌କେ ଆସିର୍‌ବାଦ୍ କରି ଦୟା ଦେକାଅ ଆରି ସାନ୍ତି ଆରି ସତ୍‌ସଙ୍ଗ୍ ବର୍‌ଦବାକେ ଦେଅ । ତମେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କରା ।

ସତ୍ ଆରି ଆଲାଦ୍

୪ ଆମର୍ ବାବା ପର୍‌ମେସର୍ ଆମ୍‌କେ ତିଆର୍‌ଲାପାରା ତମର୍ କେଡେଟା ପିଲାଟକିମନ୍ ତାର୍ ସତ୍‌ବାଟେ ଇଣ୍ଡିଲାଇନି ବଲି ସୁନିକରି ମୁଇ ବେସି ସାର୍‌ଦା ଅଇଲି । \*ଏବେ ଆରି ମର୍ ଆଲାଦର୍ ବଇନି, ମୁଇ ତକେ ଗଟେକ୍ ବିସଇ କରବାକେ କଇବି । ଗଟେକ୍ ନୁଆ ଆଦେସ୍ କର୍ ବଲି କଇନାଇ । ମାତର୍ କିରିସ୍‌ଟ ସଙ୍ଗ୍ ଜିବାକେ ଆରାମ୍ କରବା ବେଲେଅନି ଏଟା ଆମେ ସୁନି ଆଇଲୁନି । ମୁଇ ମାଙ୍ଗ୍‌ଲିନି ତମେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କରା । ୨ ଏ ଆଲାଦର୍ ଅରଡ୍ ଅଇଲାନି ଆମେ ପର୍‌ମେସର୍‌ର ଆଦେସ୍ ସବୁ ମାନ୍‌ବାର୍ ଆଟେ । କିରିସ୍‌ଟ ସଙ୍ଗ୍

\* ୧:୫ ୧:୫ ଜଅନ୍ ୧୩:୩୪;୧୫:୧୨,୧୭

ଜିବାକେ ଆରାମ୍ କରବା ବେଲେଅନି ଏଟା ଆମେ ସୁନି ଆଇଲୁନି । ତମେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଆଲାଦ୍ କରା ।

<sup>୭</sup> କାଇକେ ବଇଲେ ମୁଇ ଏକ୍ତିବଲି କଇଲିନିଜେ ସତ୍ ନ ରଇବା ବିସଇ ସିକାଇକରି ଲକ୍‌ମନ୍‌କେ ନାଡାଇବା ବେସି ଲକ୍ ଗୁଲାଇବାଟେ ଆତତ୍ । ଜିସୁକିରିସ୍‌ଟ ନରୁପ୍ ଦାରି ଏ ଜଗତେ ଆସେନାଇ ବଲି ସେମନ୍ କଇବାଇ । ଜଦି କେ ମିସା ସେନ୍ତାରି କଇଲେ, ସେ ଲକ୍‌ମନ୍‌କେ ନାଡାଇବା କିରିସ୍‌ଟର୍ ବିରଦି ।<sup>୮</sup> ଲକ୍‌ମନ୍ ତମ୍‌କେ ନାଡାଇ ନାପାରତ୍, ତମେ ଜାଗରତ୍‌ସଙ୍ଗ୍ ରଇବାର୍ ଆଟେ । ଜେନ୍ତାରିକି ପର୍‌ମେସର୍‌କେ କରବା ତମ୍‌ର ସେବା କାମ୍ ବେକାର୍ ନ ଅ । ମାତର୍ ତମ୍‌ର ସେବାକାମ୍‌ର୍ ପାଇ ପର୍‌ମେସର୍ ତମ୍‌କେ ପୁରାପୁରୁନ୍ ଅଇତେ ଜନାମ୍ ଦେଇସି ।

<sup>୯</sup> ଜଦି କେ କିରିସ୍‌ଟ ସିକାଇଲା ବିସଇ ବିସବାସ୍ ନ କରେ, ଆରି ତାର୍ ସିକିଆର୍ ସଙ୍ଗ୍ ତାର୍ ନିଜର୍‌ଟା ମିସାଇଲେ, ସେ କିରିସ୍‌ଟର୍ ସଙ୍ଗ୍ ମିସେନାଇ । ମାତର୍ କେ ଜଦି କିରିସ୍‌ଟ ସିକାଇଲା ବିସଇ ବିସବାସ୍ କର୍‌ତେରଇସି, ସେ ବାବା ପର୍‌ମେସର୍ ସଙ୍ଗ୍ ଆରି ତାର୍ ପଅ ଜିସୁକିରିସ୍‌ଟ ସଙ୍ଗ୍ ମିସଲାଆଟେ ।<sup>୧୦</sup> ତେବର୍‌ପାଇ କେ ଜଦି ତମ୍‌ର୍‌ଟାନେ ଆସି, କିରିସ୍‌ଟ ସିକାଇରଇବା ବିସଇତେଇଅନି ବିନ୍ ବିସଇ କଇଲେ, ତାକେ ତମ୍‌ର୍ ଗରେ ମୁଲ୍‌କେ ଡାକିନିଆ ନାଇ, କି ସଙ୍ଗର୍ ବିସବାସି ଇସାବେ ଜୁଆର୍‌ବିଆର୍ କରାନାଇ ।<sup>୧୧</sup> ଜଦି କେ ମିସା ସେନ୍ତାରି ଲକ୍‌କେ ଜୁଆର୍‌ବିଆର୍ କର୍‌ସି, ସେ ବୁଲ୍ ସିକାଉର୍ ସଙ୍ଗ୍ ମିସିକରି ତାର୍ କାରାପ୍ କାମେ ମିସଲାନି ।

ସାରା ସାରି ବେଲର୍ କାତା

<sup>୧୨</sup> ମୁଇ ତମ୍‌କେ ବେସି ବିସଇ ଲେକ୍‌ବାକେ ମନ୍ କଲିନି, ମାତର୍ ଚିଟିଟାନେ ଲେକ୍‌ବାକେ ମନ୍ କରନାଇ । ତାର୍‌ବାଦୁଲେ ଆସିକରି ତମ୍‌ର୍ ମୁଆଟେ କାତା ଅଇବି । ତେବେ ଆମେ ପୁରାପୁରୁନ୍ ସାର୍‌ଦା ଅଇବୁ ।

<sup>୧୩</sup> ପର୍‌ମେସର୍ ବାଚିରଇବା ବଇନିର୍ ପିଲାମନ୍, ତମ୍‌କେ ଜୁଆର୍ ଜାନାଇଲାଇନି

।

## ଯୋହନ ଲେଖିଥିବା ତୃତୀୟ ପତ୍ର ଜଅନ୍ଦ ତିନିପାଲି ଚିଠି ଲେଖିଲାଟା ଏ ବଇର ବିସଇ ଜାନ୍‌ବାଟା

ଜଅନ୍ଦର ତିନିପାଲି ଚିଠି ଜଅନ୍ଦର ଲାଗି ୫୦-୧୦୦ କିରିସ୍‌ଟାବ୍‌ଦରେ ଜିସୁ କିରିସ୍‌ଟର ଜନମ୍ ପତେ ଲେକାଅଇ ରଇଲା । ଜଅନ୍ଦ ନିଜ୍‌କେ ଲେକିଆଟି ବଲିକରି ଜାନାଇଅଇ ନିଜ୍‌କେ ପାର୍‌ତିନ୍ ଇସାବେ କଇଲାନି ୧:୧ ସେ ଜଅନ୍ଦର ଦୁଇଟା ଚିଠିତେଇ ଜେନ୍ତାର ଲେକି ରଇଲା ୧:୧ । ଏଟା ବିସ୍‌ବାସ୍ କରି ଅଇସିଜେ, ସେ ଏପିସିତେଇ ରଇବାବେଲେ ଜଅନ୍ଦ ଲେଖିଲା ନିମାନ୍ କବରସଜ୍ ୩ ଟା ଚିଠିମିସା ଲେକି ରଇଲା । ୧ ଜଅନ୍ଦ ୨ ଜଅନ୍ଦ ୩ ଜଅନ୍ଦ,

ଜଅନ୍ଦ ଗାଥ ନାଉଁର୍ ଗଟେକ୍ ବିସ୍‌ବାସିକେ ଏ ଚିଠି ଲଗେ ଲେଖିଲା ଆଟେ ।

### ଏ ବଇ ବିତ୍‌ରେ ରଇବାଟା

- ୧. ଜଅନ୍ଦ ତାର୍ ଚିଠିର୍ ବିସଇ ଜାନାଇଲାନି । ୧:୧
- ୨. ସେ ଗାୟକେ ସାଆସ୍ ଦେଇକରି ନଅର୍ ମନ୍‌କେ ବୁଲ୍‌ତେ ରଇବା ବିସ୍‌ବାସି ବାଇମନ୍‌କେ, ଗତିଆ କୁଟୁମ୍‌କେ ଡାକି ଦେକାରକା କର୍‌ବାକେ ସିକାଇଲାନି । ୧:୨-୮
- ୩. ସେ ଦୁଇଲକ୍‌କେ ଡାୟଟର୍‌ପିସ୍ ଆରି ତିମିଟିଅସ୍ ବିସଇ କଇସି । ୧:୯-୧୨
- ୪. ସାରାସାରି ପତେ ଲେକା ସାରାଇଆଟେ । ୧:୧୩-୧୪

୧ \*ଏ ମଣ୍ଡଲିର୍ ପାର୍‌ତିନ୍ ଇସାବେ ମୁଇ ଜଅନ୍ଦ,

ଏ ଚିଠି ଆଲାଦର୍ ଗାଇସ୍, ତକେ ଲେଖିଲିନି । ମୁଇ ତକେ ସତଇସେ ଆଲାଦ୍ କଲିନି ।

୨ ଏ ମର୍ ଆଲାଦର୍ ମଇତର୍, ତମେ ଗାଗଡ୍ ଇସାବେ ବସୁ ଉଆ ଆରି ତମର୍ ସବୁ କାମ୍ ନିକ ଅ ବଲି ମୁଇ ପାର୍‌ତନା କଲିନି । ଜେନ୍ତାରିକି ମୁଇ ଜାନି, ତମେ ଆଡ୍‌ମାଇ ମିସା ନିକସେ ଆଟାସ୍ । ୩ ପର୍‌ମେସରର୍ ସଡ୍ ବାଟ୍ ଇସାବେ ତମେ ଚଲାଚଲ୍‌ତି କଲାସ୍‌ନି ବଲି କେତେଟା ସଙ୍ଗର୍ ବିସ୍‌ବାସି ବାଇମନ୍ ଇତି ଆସିକରି ଆମ୍‌କେ କଇଲାଇ । ଆରି ତମେ ସେନ୍ତାରିସେ ଚଲାଚଲ୍‌ତି କଲାସ୍‌ନି ବଲି ମୁଇ ଜାନି । ୪ ମର୍ ପିଲାମନ୍ ସଡ୍ ଇସାବେ ଚଲାଚଲ୍‌ତି କଲାଇନି ବଲି ସୁନ୍‌ଲାତେଇଅନି ଆରି କାଇ ବିସଇ ମକେ ସାର୍‌ଦା ନ କରାଏ ।

ଗାୟସର୍ ସଡ୍ କରମର୍ ମଇମା

୫ ମର୍ ଆଲାଦର୍ ମଇତର୍, ତମର୍ ସଙ୍ଗ୍ ରଇବା ବିନ୍ ଦେସର୍ ବିସ୍‌ବାସି ବାଇମନ୍‌ପାଇ ତମେ କର୍‌ବା କାମ୍ କେବେ କେବେ ନାଜାନିରଇଲେ ମିସା ସଡ୍‌ସଙ୍ଗ୍ କଲାସ୍‌ନି । ୬ ତାକର୍ ବିତ୍‌ରେଅନି କେତେକ୍ ଲକ୍ ଇତିର୍ ମଣ୍ଡଲିର୍ ଲକ୍‌ମନ୍‌କେ ତମର୍ ଆଲାଦର୍ ବିସଇ କାତା ଅଇଲାଇଆଟଡ୍ । ସେନ୍ତାରି ଲକ୍‌ମନ୍‌କେ, ଜେତେବେଲେ ତମ୍‌କେ ଚାଡି ଅଲ୍‌ଗା ଜାଗାମନ୍‌କେ ଜିବାବେଲେ, ଆଗ୍‌କେ ପର୍‌କେ କାଇଟା ନ ବାବିକରି ସାଇଜ କରିଲାଗିରୁଆ । ୭ ଏ ଲକ୍‌ମନ୍ ଜିସୁକିରିସ୍‌ଟର୍ ସେବା କାମ୍‌ରଲାଗି ଗୁଲାଇବାଟେ ବୁଲ୍‌ଲାଇନି । ଆରି କିରିସ୍‌ଟକେ ବିସ୍‌ବାସ୍ ନ କର୍‌ବା ଲକ୍‌ମନ୍‌ତେଇଅନି ସେମନ୍ କାଇ ସାଇଜ ନ ମାଙ୍ଗଡ୍ । ୮ ତେବର୍‌ପାଇ ଆମେ ତାକର୍ ସଙ୍ଗର୍ ବିସ୍‌ବାସିମନ୍, ସେମନ୍‌କେ ଜାଇଟା ଲତାଆଟେ ସେଟା ଦେଇତେରଡ୍ । ଏନ୍ତାରି ଲକ୍‌ମନ୍‌କେ ସଡ୍ ଜାନାଇବା କାମ୍‌ଟାନେ ଆମେ ମିସିକରି କରୁ ।

\* ୧:୧ ୧:୧ ପେରିଡ୍ ୧୯:୨୯; ରମିୟ ୧୭:୨୩; ୧ମ କରନ୍ତୁୟ ୧:୧୪

ତାୟଗେପିସ୍ ଆରି ତିମିଟିରିଅସ୍

୯ ତମର୍ ନଅରେ ରଇବା ମଣ୍ଡଲିର୍ ଲକ୍ମନକେ ମୁଇ ଆଗ୍ତୁ ଗଟେକ୍ ଚିଟି ଲେକିରଇଲି । ମାତର୍ ତାୟଗେପିସ୍ ମର୍ କାତା ଦାରେନାଇ । କାଇକେବଇଲେ ସେ ନିଜେ ମଣ୍ଡଲିର୍ ନେତା ଅଇବି ବଲି ମନ୍ କଲାନି । ୧୦ ତେବର୍ପାଇ ମୁଇ ଜେତେବେଲେ ତମର୍ ନଅରେ ଆଇବାବେଲେ ତାୟଗେପିସ୍ ଜାଇଟା କଲାନି, ସେଟାସବୁ ମଣ୍ଡଲିର୍ ଲକ୍ମନକେ, କଇଦେବି ବଲି ମନ୍ କଲି । ସେ ମର୍ ବିରୁଦେ, ନ କରଲୀଟାମନ୍ କଇବୁଲଲାନି । ଆରି ତାର୍ତେଇଅନି ଅଦିକ୍ କାରାପଟା ମିସା ସେ କଲାନି । ଆମର୍ ସଙ୍ଗର୍ ବିସବାସିମନ୍, ଜେକି ସୁବକବର୍ ଜାନାଇଲାଇନି, ସେ ସେମନ୍କେ ତାକିନେବାକେ ନିବୁଲାନି । ଜନ୍ ଲକ୍ମନ ସେମନ୍କେ ତାକିନେବାକେ ମନ୍ କଲାଇନି, ସେମନ୍କେ ତେବାଇଲାନି । ସେନ୍ତାରି ଲକ୍ମନକେ ମଣ୍ଡଲିର୍ ସବାତେଇ ଆଇବାକେ ମନାକଲାନି ।

୧୧ ଆଲାଦର୍ ମଇତର୍, କାରାପ୍ କାମ୍ କରି ଚଲାଚଲ୍ତି କରବା ଲକ୍ମନର୍ ପାରା ଉଆନାଇ । ତାର୍ ବାଦୁଲେ ନିକ୍ କାମ୍ କରବା ଲକ୍ମନର୍ପାରା ଉଆ । ଜଦି କେ କାରାପ୍ କାମ୍ କଲେ, ତାର୍ କାମେଅନି ସେ ପର୍ମେସର୍କେ ନାଜାନେ ବଲି ତିସ୍ଲାନି ।

୧୨ ତିମିଟିର୍ ଗଟେକ୍ ନିକ୍ ଲକ୍ ବଲି ମଣ୍ଡଲିର୍ ସବୁଲକ୍ କଇଲାଇନି । ସେ ସଦ୍ ବିସଇ ଇସାବେ ଚଲାଚଲ୍ତି କଲାନି । ତେବର୍ପାଇ ସେ ଗଟେକ୍ ନିକ୍ ଲକ୍ ବଲି ଆମେ ଜାନିଆରୁ । ସେ ଗଟେକ୍ ନିକ୍ ଲକ୍ ବଲି ମୁଇ ମିସା ସାକିଦେଲିନି । ଆରି ତମେ ଜାନାସ୍ ଆମେ ଗଟେକ୍ ଲକ୍ କାଇଆଲେ ବିସଇ କଇଲେ, ସେଟା ସଦ୍ ।

ସାରା ସାରି କାତା

୧୩ ତମ୍କେ ମୁଇ ଦେସି ବିସଇ କଇବାକେ ମନ୍ କଲିନି, ମାତର୍ ଚିଟିଟାନେ ଲେକ୍ବାକେ ମନ୍ କରିନାଇ । ୧୪ ମୁଇ ଦାପ୍ରେ ତମର୍ଟାନେ ଆସିକରି ତମର୍ ମୁଆଟେ ସବୁ କାତା କଇବି ।

୧୫ ପର୍ମେସର୍ ତମ୍କେ ସାନ୍ତି ଦେଅ ।

ମଣ୍ଡଲିତେଇ ରଇବା ତମର୍ ସବୁ ମଇତର୍ମନ୍ ଜୁଆର୍ ଜାନାଇଲାଇନି । ତମର୍ ନଅରର୍ ମଣ୍ଡଲିତେଇ ରଇବା ମର୍ ସବୁ ମଇତର୍ମନ୍କେ ଗଟେକ୍ ଗଟେକ୍ ଲକ୍କେ, ଜୁଆର୍ ଜାନାଆ ।

# ଜିଉଦାଙ୍କ ପତ୍ର ଜିଉଦା ଲେକ୍‌ଲା ଚିଠି ଏ ବଇର ବିସଇ ଜାନବାଟା

ଏ ଚିଠି ଲେକ୍‌ଲା ଲକର ନାଉଁ ଇସାବେ ଏ ବଇର ନାଉଁ ଦିଆଅଇଆଚେ । ଜିଉଦା ନିଜେ ଜାକୁବ୍ ଜିସୁର୍ ବାଇ ବଲି ଜାନାଇଅଇଲାନି । ତେବର୍‌ପାଇ ତାକେ ଜିସୁର୍ ବାଇମନର୍ ବିଡ୍‌ରେଅନି ଗଟେକ୍ ଲକ୍ ବଲି କଇବାଇ ୧ ପୁର୍ନା ନିୟମର୍ ବିସଇ ଉଦାର୍ କରିରଇଲାକେ ଏଟା ଗଟେକ୍ ନିକ ମଣ୍ଡଲିକେ ଲେକା ଅଇରଇଲା ପାରା ମନେ ଆଇସି । ଜିଉଦାର୍ ଚିଠି ସଡ୍‌ରେ ପଡ୍‌ବା ଲକ୍‌ମନ୍ ଜିଉଦି ବଲି ଜାନାଇଅଇଲାଇନି । ଜନ୍ ଲକ୍‌ମନ୍ କି ବାବା ପର୍‌ମେସର୍‌ର ଆଲାଦେ କିରିସ୍‌ଟର୍ ପାଇ ସଙ୍ଗାଅଇଆଚଡ୍ । ଜାଇଟା ଅବେ, ଜିଉଦା ବାଟାଇଅଇରଇବା ସବୁ ଲକ୍‌ମନ୍‌କେ ନିଜର୍ ବିସଇରେ ଜାନାଇଲାନି । ଏ ଚିଠି ଜିସୁକିରିସ୍‌ଟ ଜନମ୍ ଅଇକରି ପାକାପାକି ୬୦ ବିଡ୍‌ରେ ଲେକାଅଇରଇଲା ।

ଜନ୍ ଲକ୍‌ମନ୍ ଟକାବଣ୍ଡା କର୍‌ବା ବିସ୍‌ବାସି ମନର୍ ବାଟେ ଜାଇତେରଇଲାଇ, ସେ ସବୁ ବିସ୍‌ବାସିମନ୍‌କେ ଜାଗ୍ରତ୍ କରାଇବାକେ ଲେକାଅଇଆଚେ । ସେ ଦଦାପେଲା ଅଇକରି ପୁର୍ନା ନିୟମର୍ ବିସଇ ଆରି ଗଟିରଇବା ବିସଇ କଇଲାନି । ଏ ଚିଠିତେଇ ମିର୍ ସିକାଉମନର୍ ବିରୁଦେ ପିତରର୍ ୨ ୟ ଚିଠିତେଇ ବାବିକରି ଲେକା ଅଇଲାଟା ସଙ୍ଗା ମିସିଆଚେ । ଇତି ଦୁଡ୍ ଆରି ସଦମ୍ ଗମ୍‌ରା ବିସଇ ମିସା ଲେକାଅଇଆଚେ ଜିଉଦା ୧:୪; ୨ ୟ ପିତର୍ ୨:୧

## ଏ ବଇ ବିଡ୍‌ରେ ରଇଲାଟା

୧. ଜିଉଦା ପର୍‌ତୁମ୍ ତାର୍ ଚିଠି ପଡ୍‌ବା ଲକ୍‌ମନ୍‌କେ ନିଜର୍ ବିସଇ ଜାନାଇଆଚେ । ୧:୧-୨
୨. ମିର୍ ସିକାଉମନର୍ ବିରୁଦେ ଜାଗ୍ରତ୍ କରାଇଆଚେ । ୧:୩-୪
୩. ସେ ପୁର୍ନା ନିୟମର୍ ଲକ୍‌ମନ୍‌କେ ଆରି ଅଇରଇବା ଗର୍‌ନାକେ ଦେକାଇ କଇବା ବିସଇ । ୧:୫-୧୭
୪. ଜାକୁବ୍ ଜାଗ୍ରତ୍ କରାଇଲାଟା, ସେ ବିସଇ ସେମନର୍ ଦାଇଡ୍ କେନ୍ତ୍ରାର ରଇବାର୍ ଆଚେ ସେ ବିସଇ କଇଲାଆଚେ ୧:୧୭-୨୩
୫. ସାରାସାରି ସେ ପର୍‌ମେସର୍‌କେ ଡାକ୍‌ପୁଟା କରି ସେ ଲେକ୍‌ବାଟା ସାରାଇଆଚେ । ୧:୨୪-୨୫

୧ \*ମୁଇ ଜିଉଦା । ଜିସୁ କିରିସ୍‌ଟର୍ ଗଟେକ୍ ଗତିଦାଙ୍ଗ୍‌ଡା ଆରି ଜାକୁବର୍ ବାଇ । ଜନ୍ ଲକ୍‌ମନ୍‌କେ ପର୍‌ମେସର୍ ବାଟ୍‌ଲାଆଚେ, ସେମନର୍‌ପାଇ ମୁଇ ଏ ଚିଠି ଲେକ୍‌ଲାନି । ବାବା ପର୍‌ମେସର୍ ତମ୍‌କେ ଆଲାଦ୍ କଲାନି । ଆରି ତମ୍‌କେ ଜିସୁକିରିସ୍‌ଟ ଦେକାରକା କର୍‌ବାକେ ସଙ୍ଗାଅଇଆଚେ ।

୨ ପର୍‌ମେସର୍ ତମ୍‌କେ ଦୟା ଦେକାଅ, ତାର୍ ସାନ୍ତି ଆରି ଆଲାଦ୍ ତମ୍‌କେ ଜବର୍ ଅଇତେ ମିଲ ।

ବୁଲ୍ ସିକିଆ ଦେଉମନ୍

୩ ଏ ମର୍ ଆଲାଦର୍ ମଇତର୍‌ମନ୍, ଆମେ ପାଇରଇବା ମୁକ୍ତିର୍ ବିସଇ ତମ୍‌କେ ଲେକ୍‌ବି ବଲି ମନ୍ କଲିନି ମିସା, ସଡ୍ ବିସଇର୍‌ପାଇ ଚିଆ ଅଇବାକେ ତମ୍‌କେ ସାର୍‌ଦା କରାଇବି ବଲି ମନ୍‌କଲି । ତାର୍ ସୁକଲ୍ ଲକ୍‌ମନର୍‌ପାଇ ପର୍‌ମେସର୍ ଏ

☆ ୧:୧ ୧:୧ ମାଡିଉ ୧୩:୫୫; ମାର୍‌କ ୬:୩

ସତ୍ତ୍ୱ ସିଦ୍ଧିଆ ଗଟେକ୍ ବେଲେ ସବୁଲକର୍ପାଇ ଦେଲାଆଚେ । ୪ କାଇକେବଇଲେ ବିସ୍ୱାସି ବଲି କେତେକ୍ ନାତାଇବା ଲକ୍ କେ ନାଜାନୁତେ ପୁରିଆଚତ୍ । ଏ ଲକ୍ମନ୍ ପାଇବା ଡଣ୍ଡ ଆଗର୍ କାଲେଅନି ସାସ୍ତରେ ଲେକାଅଇଆଚେ । ଏ ଲକ୍ମନ୍ ପର୍ମେସରର୍ ଅଦିକାର୍ ନାମଡ୍ନାଇ । ଆମର୍ ପର୍ମେସର୍ ଦରମ୍ଟା ବଲି ଲକ୍ମନ୍ ଜେନ୍ତାର୍ ସେନ୍ତାର୍ ବେସିଆ କାମ୍ କଲେମିସା କାଇଟା ନଏଁ ବଲି କଇଲାଇନି । ମାପୁରୁ ଜିସୁକ୍ରିସ୍ତସେ ଆମର୍ ମାଲିକ୍ ବଲି ସେମନ୍ ନାମଡ୍ନାଇ ।

୫ ଏ ସବୁ ବିସଇ ତମେ ଜାନିରଇଲେ ମିସା ମାପୁରୁ ଇସ୍ରାଏଲର୍ ଲକ୍ମନ୍କେ ମିସର୍ ଦେସେଅନି ମୁକ୍ତଲାଇକରି ଆନୁଲା ବିସଇ ତମକେ ଏତାଇଦେବାକେ ମୁକ୍ତ ମନ୍ କଲିନି । ମାତର୍ ପଚେ ଜେଡ୍କି ଲକ୍ ବିସ୍ୱାସ୍ କରଡ୍ନାଇ, ସେମନ୍କେ ସବୁକେ କୁରୁପ୍ନାସ୍ କଲା । ୬ ସେଡ୍କିସେ ନଏଁ ସେ ଦୁଡ୍ମନ୍କେ ମିସା ଡଣ୍ଡ ଦେଇରଇଲା । ପର୍ମେସର୍ ସେମନ୍କେ ଜେଡ୍କି ଅଦିକାର୍ ସର୍ପି ଦେଇରଇଲା, ସେମନ୍ ତାର୍ତେଇଅନି ଅଦିକ୍ ନେଲାଇ । ଆରି ତାକର୍ ଦେଇରଇବା ଜାଗା ଚାଡ୍ଲାଇ । ସେ ସେମନ୍କେ ବିଚାର୍ କରବା ଦିନ୍ ଜାକ, ଗଟେକ୍ ଆନ୍ଦାର୍ ଜାଗାଇ, କେ ବାଙ୍ଗାଇ ନାପାରୁଲା ପାରା, ସିକ୍ଲି ସଙ୍ଗ୍ ବାନ୍ଧିଆଚେ । ୭ ସଦମ୍ ଗମ୍ଭାରା ଆରି ତାର୍ ଚାରିବେଟ୍ତି ରଇବା ନଅର୍ମନର୍ ବିସଇ ଏତାଇଦେକା । ନ ଲିବ୍ବା ଜଇଟାନେ ଡଣ୍ଡ ଇସାବେ ସେମନ୍ ଜେଡ୍କି ଦୁକ୍ କସଟ୍ ପାଇଲାଇ, ସେଟା ସବୁଲକର୍ପାଇ ଗଟେକ୍ ଜାଗର୍ତ୍ ଅଇରଇବା ବିସଇ । ସେମନ୍ ଅବ୍କା ପାଦ୍ରା ପାଦ୍ରି କାମ୍ସେ କରଡ୍ନାଇ ମାତର୍ ମନସ୍ ମନସ୍ ବିଡ୍ରେ ମାଇଜି ମାଇଜି ବିଡ୍ରେ ବେସିଆ କାମ୍ କର୍ତେ ରଇଲାଇ ।

୮ ସେନ୍ତାରିସେ ଏ ଲକ୍ମନ୍ ନିଜେ ଦରସନ୍ ପାଇକରି ମିସା ପାଦ୍ରା ପାଦ୍ରି କାମ୍ କରି ନିଜର୍ ଗାଗଡ୍ ଅସୁକଲ୍ କଲାଇନି । ମାପୁରୁ ଅଦିକାର୍ ସେମନ୍ ଗିନ୍ କରି ସର୍ଗେ ରଇବାଟାମନ୍କେ ନିନ୍ଦା କଲାଇନି ।

୯ \*ମୁକ୍ତିଅ ଦୁଡ୍ ମିକାଏଲ୍ ମିସା ମସାର୍ ମଲା ଗାଗଡ୍ ନେଇକରି ତପ୍ବାକେ କାର୍ ଅଦିକାର୍ ଆଚେ ବଲିକରି ସଇତାନର୍ ସଙ୍ଗ୍ ଦଦାପେଲା କର୍ତେରଇଲା । ସେଡ୍କିବେଲେ ପର୍ମେସରର୍ ଜାଗାଇ ରଇ, ସଇତାନକେ ବିଚାର୍ କରବା ଅଦିକାର୍ ନେବାକେ ସେ ସାଆସ୍ କରେନାଇ । ତାର୍ ବାଦୁଲେ ମାପୁରୁ ତକେ ଡଣ୍ଡ ଦେଇସି ବଲି କଇଲା । ୧୦ ଏଲେମିସା ଏ ଲକ୍ମନ୍ ନ ବୁଜ୍ବା ବିସଇ ନେଇ ନିନ୍ଦା କାତା କଲାଇନି । ସେମନ୍ ଜେଡ୍କି ବିସଇ ବୁଜ୍ଲାଇନି, ସେଟା ସେମନ୍କେ ଅଦିକ୍ ବାବ୍ବାକେ ନ ପଡେ । ଜେନ୍ତାରି, କି ପସୁମନ୍ କାଇ ବିସଇ ନ ବାବଡ୍ । ଏ ସମାନ୍ ବିସଇ ଆକା ସେମନ୍କେ କୁରୁପ୍ନାସ୍ କର୍ସି । ୧୧ ସେମନ୍ କେତେକ୍ ଡଣ୍ଡ ପାଇବା ଲକ୍ ସେମନ୍ କଇନର୍ ବାଟ୍ ଦାରୁଲାଇ ଆଚତ୍ । ବିଲିଆମ୍ ପାପ୍ କଲାପାରା ସାର୍ଦା ସଙ୍ଗ୍ ପାପ୍ କଲାଆଚତ୍ । କରା ବିରଦ୍ କଲାପାରା ସେମନ୍ ବିରଦ୍ କରି କୁରୁପ୍ନାସ୍ ଅଇବାଇ । ୧୨ ତମେ ଗଟେକ୍ତେଇ ରୁଣ୍ଡିକରି ମିସି କାଇଲାବେଲେ, ତମର୍ ସଙ୍ଗ୍ ସେମନ୍ ଲାଜ୍ ଲାଗ୍ବା କାମ୍ କଲେ ମିସା ସେମନ୍ ତମର୍ ମୁଆଚେ ଲାଜ୍ ନ ଅଇକରି ସାଆସ୍ ସଙ୍ଗ୍ କାଇଲାଇନି । ମେଣ୍ଡାମନ୍କେ ନ ଚାରାଇ ନିଜେ ଚାରାଇଅଇଲା ଗଉଡ୍ ପାରା ଅଇଲାଇନି । ପବନ୍ ଆଇଲେ ଉତାଇନେବା ପାନି ନ ମାର୍ବା ବାଦଲ୍ପାରା ଏମନ୍ ଆଚତ୍ । ପଲ୍ ଦେବା ବେଲାଇ କାଇପଲ୍ ନ ରଇବା ଗଟ୍ ଜେନ୍ତାରି ଉପାଡ୍କିରି ସୁକ୍ବାକେ ଚାଡ୍ଲାପାରା, ସେନ୍ତାରି ଅଇ ସେମନ୍ ଆଚତ୍ । ୧୩ ସେମନ୍ ସମ୍ପୁରର୍ ଲଅଡି ଜେନ୍ତି ପେପୁଲ୍ ବାର୍କର୍ସି, ସେ ପେପୁଲ୍ପାରା ତାକର୍ ଲାଜର୍ ଚଲାଟଲ୍ଡି ଡିସ୍ସି । ଆକାସର୍ କେତେକ୍ କେତେକ୍ ତାରାମନ୍ ଜେନ୍ତି ତାକର୍ ପାଇ ରଇବା ଜାଗାଇ ନ କିନ୍ଦିକରି ବିନ୍ଦାଚେ ବୁଲ୍ତେରଇବାଇ, ସେମନ୍ ସମାନ୍ ସେନ୍ତାରିସେ

\* ୧:୯ ୧:୯ ପରକାସିତ ୧୨:୭

। ପରମେସର୍ ସେମନର୍ପାଇ ଗଟେକ୍ ବଡ଼ ଗଇରି ରଇବା ଆନ୍ଦାରର୍ ଜାଗା ସଙ୍ଗାଆତେ । ଜିନ୍ତିକି ସେମନ୍ ସବୁଦିନର୍ପାଇ ରଇବାଇ ।

୧୪ ଅନକର୍ ବିସଇ ବାବିଦେକା । ସେ ଆଦମର୍ଟାନେ ଅନି ଆଇବା ସାଡ଼ ଲମର୍ ନାତିତିତି । ଏନ୍ତାରିଲକ୍ମନର୍ ବିସଇନେଇ ସେ ବବିସଡ଼ବକ୍ତା ଏନ୍ତାରି କଇଲା, ଦେକା ମାପୁରୁ ତାର୍ ଅଜାର୍ ଅଜାର୍ ସୁକଲ୍ ଦୁଡ଼ମନର୍ ସଙ୍ଗ୍ ଆଇସି । ୧୫ ସେ ସବୁଲକ୍ମକେ ବିଚାର୍ କର୍ସି । ଆରି ଜେଡ଼କି ଲକ୍ ତାକେ ନାମଡ଼ନାଇ, ସେମନ୍ ସବୁଲକ୍ମକେ ଦସି କର୍ସି । ସେମନ୍ କରିରଇବା ସବୁ କାରାପ୍ କାମର୍ ଲାଗି ମିସା ଦସିଅଇବାଇ ।

୧୬ ଏ ଲକ୍ମନ ମୁରମୁରା ଅଇକରି ବିନ୍ ଲକ୍ମନକେ ନିନ୍ଦା କର୍ବାଇ । ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କର୍ବାକେ ମନ୍ କର୍ବାଇ, ନିଜର୍ ବିସଇନେଇ ବଡ଼ପନ୍ ଅଇବାଇ ଆରି ନିଜର୍ ଲାବ୍ ପାଇବାକେ ବିନ୍ଲକ୍ମକେ ନିକ କାତା କଇ ସୁଡ଼ରାଇବାଇ ।

ଜାଗ୍‌ରଡ଼ ରଇବାକେ ଆଦେସ୍

୧୭ ମାତର୍ ଏ ମର୍ ଆଲାଦର୍ ମଇତର୍ମନ୍, ଆମର୍ ମାପୁରୁ ଜିସୁ କିରିସଟର୍ ପେରିଡ଼ ସିସମନ୍ କାଇଟା ଅଇସି ବଲି କଇଲାଟା ତମର୍ ମନେ ରଅ । ୧୮ \*“ସାରାସାରି ଦିନ୍ ମନ୍‌କେ ମାପୁରୁକେ କିଜାଇକରି ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କର୍ବାକେ ମନ୍ କର୍ବା ଲକ୍ମନ ରଇବାଇ ।” ସେମନ୍ ତମକେ ଏନ୍ତି କଇରଇଲାଇ । ୧୯ ଏନ୍ତାରି ସେମନ୍ ଲକ୍ମନକେ ବେଗ୍‌ଲାଇବାଇ, ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କର୍ବାକେ ମନ୍ କର୍ବାଇ । ସେମନ୍ ସୁକଲ୍‌ଆଡ଼ମା ପାଅଡ଼ନାଇ । ୨୦ ମାତର୍ ତମେ ମର୍ ଆଲାଦର୍ ମଇତର୍ମନ୍, ଆମର୍ ବେସି ସୁକଲ୍ ରଇବା ବିସବାସେ ନିଜେ ତାଟ୍ ଅଇତେରୁଆ । ସୁକଲ୍‌ଆଡ଼ମାର୍ ସାଇଜ ନେଇ ପାରତନା କର୍ତେରୁଆ । ୨୧ ମାପୁରୁ ଜିସୁକିରିସଟ୍ ବାଉଡ଼ି ଆଇବା ଦିନକେ ଜାଗ୍‌ତେରୁଆ ଆରି ପରମେସରର୍ ଆଲାଦେ ବଡ଼ିଆସା । ସେନ୍ତାର୍‌ଆଲେ ତମେ ତାର୍‌ସଙ୍ଗ୍ କାଲ୍‌କାଲ୍ ଜୁଗ୍‌ଜୁଗ୍ ରଇସା । କାଇକେବଇଲେ ସେ ଆମକେ ଦୟା ଦେକାଇଲା ଆତେ ।

୨୨ ଦୁଇମନିଆ ଅଇବା ଲକ୍ମନକେ ଦୟା ଦେକାଆ । ୨୩ କେବେ ନ ଲିବ୍‌ବା ଜଇଟାନେଅନି ଚାଡ଼ାଇକରି ସେମନ୍‌କେ ରକିଆ କରା । ଡରିକରି ପାପକର୍‌ବା ଲକ୍ମନକେ ଦୟା ଦେକାଆ । ମାତର୍ ତାକର୍ ପାପକାମେ ମୁରକି ରଇବା ବସ୍‌ତର୍ ମିସା ଗିନ୍ କରା ।

୨୪ ତମେ ଜେନ୍ତାରିକି ନ ଅଦର୍ତେ, ପରମେସର୍ ତମକେ ଦେକାରକା କର୍ସି । ସେ ଅଇଲାନି ମଇମା ପାଇବା ପରମେସର୍ । କାଇ ଦସ୍ ନ ଦାରି ସାର୍‌ଦାସଙ୍ଗ୍ ତମକେ ତାର୍ ମୁଆଟେ ଚିଆକରାଇବାକେ ତାର୍ ବପୁଆଟେ । ୨୫ ଆମର୍ ମାପୁରୁ ଜିସୁକିରିସଟର୍ ଲାଗି ସେ ଗଟେକ୍ ସେ ପରମେସର୍, ଜେ କି ଆମକେ ରକିଆ କଲାଆଟେ । ସବୁ ଡାକ୍‌ପୁଟା, ମଇମା, ବପୁ ଆରି ସାସନ୍ କାଇଟା ନ ଅଇତେ ତାର୍‌ଟାସେ ରଇଲା, ଏବେ ତାର୍‌ଟାସେ ଆତେ ଆରି କାଲ୍ କାଲ୍ ଜୁଗ୍ ଜୁଗ୍ ତାର୍‌ଟାସେ ରଇସି । ଆମେନ୍ !

\* e:ef e:ef ୨ ଯ ପିତର୍ ୩:୩

## ଯୋହନ ଦର୍ଶନ ପାଇଥିବା ପୁସ୍ତକ ଜଅନ୍ ଦରସନ୍ ପାଇରଇବା ବଇ ଏ ବଇ ବିସଇରେ ଜାନବାଟା

ପରକାସିତ ବଇ ନୁଆ ନିୟମର ସାରାସାରି ବଇ । ଏ ବଇ ମିସା ଜଅନ୍ ଲେକିରଇଲା । ଏଟା ଜିସୁକିରିସଟ ଜନମ୍ ଅଇକରି ପାକାପାକି ୯୫ ବେଲେ ଲେକାଅଇରଇଲା ୧:୧ । ସେ ଜଅନ୍ ସୁବକବର ସଙ୍ଘ ତିନଟା ଚିଟି ମିସା ଲେକିରଇଲା । ଜନ୍ଟାମନ୍ କି, ୧ ମ ଜଅନ୍, ୨ ଯ ଜଅନ୍ ଆରି ୩ ଯ ଜଅନ୍ । ଜଅନ୍ ଜାକେ କି ଜିସୁ ବେସି ନିକଲକୁ ବଲି ଦେକ୍ତେରଇଲା ବଲି ଜାନିଅଇସି । ଜଅନ୍ ଆଇସଲାଣ୍ଡର ପାଡ଼ରସ ନାଉଁର ଜାଗାଇ ରଇଲାବେଲେ ଏ ପରକାସିତ ବଇ ଲେକିରଇଲା । ଜଅନ୍ ୧୩:୨୩ କାଇକେବଇଲେ ଜିସୁକିରିସଟର ସୁବକବର ଜାନାଇବାକେ ତେଇ ଜାଇ ବାସାଅଇରଇଲା ୧:୯ ।

ଜିସୁ ଆରିତରେକ୍ ଆଇବା ବେଲା ଲଗେ ଅଇରଇଲାଜେ, ଜିସୁକିରିସଟକେ ବିସବାସ୍ କରି ରଇବାକେ ପଡ଼ବା ଲକ୍ମନକେ ଆସା ଆରି ସାଆସ୍ ଦେବାକେ ଏ ପରକାସିତ ବଇ ଜଅନ୍ ଲେକିରଇଲା ୧:୩;୨୨:୭ । ସେ ସାଡ଼ଟା ମଣ୍ଡଲିକେ ସବୁ ବିସବାସିମନର୍ପାଇ ନିକସଙ୍ଘ ଲେକିଆଟେ ୨:୩ । ଜଅନ୍ ତାର ଲେକାଟାମେ ଆଗକେ ଗଟବା ବବିସଡ଼ କାତା ୧:୩ ଆରି ସେ ଦରସନ୍ ଦେକିରଇବା କେତେକ୍ କେତେକ୍ ଚିନ୍ତନର୍ ବିସଇ ଲେକିଆଟେ । ଏ ବଇଟାମେ କେତେଟା ବାଗଟାମେ ପୁରନା ନିୟମର ବାଗସଙ୍ଘ ସମାନ୍ ଆଟେ । ଜନ୍ଟାକି ଜିକରିୟ ୬:୧-୮ ଦେକିଅଇସି ।

ଜନ୍ଟା କି ସାଡ଼ଟା ମଇରି, ସାଡ଼ଟା ମୁଡା । ଜନ୍ଟା ପର୍ମେସର୍ ମିସରର୍ ଲକ୍ମନକେ ଡଣ୍ଡ ଦେବାକେ ମର୍ଡ଼ି ପାଟାଇରଇଲା । ଜାଡ଼ରା ୭:୯ ।

ପରକାସିତ ବଇ ସାରାସାରି ଜୁଗ୍ ବିସଇ ଜାନାଇଲାନି । ସାରାସାରି ବେଲେ ଜିସୁ ଜିଡ଼ସି ଆରି ଜେଡ଼କି ଲକ୍ମନ ତାକେ ଆସାକରି ରଇବାଇ, ସେମନ୍ ସବୁବେଲର୍ପାଇ ତାର ସଙ୍ଘ ରଇବାଇ । ଏ ବଇ ଆମ୍ବକେ ଜାଗର୍ତା ଆରି ଆସା ଦେଲାନି ଜେ, ଜିସୁ ଦାପ୍ରେ ବାଉଡ଼ି ଆଇଲାନି ।

### ଏ ବଇ ବିଡ଼ରେ ରଇଲାଟା

୧. ଜଅନ୍ ନିଜର୍ ବିସଇ ଜାନାଇ ଅଇଲାଟା ଆରି ସେ ଆଗକେ କାଇଟା ଅଇସି ସେ ବିସଇ ଦରସନ୍ ଦେକ୍ଲାଟା । ୧:୧-୨୦
୨. ଜଅନ୍ ଜିସୁକିରିସଟର୍ ତେଇଅନି ସାଡ଼ଟା ମଣ୍ଡଲିକେ ଜାନାଇବାଟା । ୧:୧-୩:୨୨
୩. ସାଡ଼ଟା ଚିନ୍ ୪:୧;୮:୫ ସାଡ଼ଟା ମଇରି । ୮:୬;୧୧:୯
୪. ମାପ୍ପୁରର୍ ପିଲାଜିଲା ଆରି ସାଡ଼ଟା ମୁଣ୍ଡ ଦାରିକରି ରଇବା ପୁରନା ସାଁପ୍ ସଙ୍ଘ ଜୁଇଦ୍ କର୍ବାଟା । ୧୨:୧;୧୪:୨୦
୫. ସାଡ଼ଟା ରିସାର୍ ମୁଡା ବିସଇରେ ଚିକିନିକି ଜାନାଇବାଟା । ୧୭:୧;୧୭:୧୮
୬. ସରଗ୍ପୁରେ ପର୍ମେସର୍ ତାର ସଡ଼ୁ ସଙ୍ଘ ଜୁଇଦ୍ କରି ଜିଡ଼ବାଟା । ୧୭:୧;୨୦:୧୫
୭. ନୁଆ ସରଗ୍ ଆରି ନୁଆ ଜଗଡ଼ । ୨୧:୧;୨୨:୨୧

୧ ଜାଇ ଜାଇଟା ଦାପ୍ରେ ଗଟବାକେ ଗାଲାନି, ପର୍ମେସର୍ ଜିସୁ କିରିସଟକେ ଜାନାଇ ରଇବା ବିସଇ ଏ ବଇଟାମେ ଲେକାଅଇ ଆଟେ । ସେ ସବୁ ବିସଇ ତାର ଦାଙ୍ଗଡାମନ୍କେ ଜାନାଇବାକେ ପର୍ମେସର୍ ତାକେ ଜାନାଇଲା । ତେବର୍ପାଇ ମୁଇ



ଜଅନ୍ ଜେ କି ତାର୍ ସିସ୍ ଅଇଲିଆଟି, ମକେ ଜାନାଇବାକେ କିରିସ୍ଟ ତାର୍ ଦୁଡ଼କେ ପାଟାଇଲାଆତେ ।<sup>୨</sup> ଆରି ମକେ ଜେଡ଼କି ବିସଇ ଦେକାଇରଇଲା, ମୁଇ ସେଟାମନ୍ ସବୁ ଲେକିଆଟି । ଆରି ଏ ସବୁ ଜିସୁ କିରିସ୍ଟ ଜାନାଇରଇବା ପର୍ମେସରର୍ ସଡ଼ ବାକିଅ ବଲି ମୁଇ ତାଟ୍ ସଙ୍ଗ୍ କଇଲିନି ।<sup>୩</sup> ଏ ବଇ ପଡ଼ିକରି ତେଇ ଲେକାଅଇରଇବା ଆଗ୍‌କେ ଗଟ୍‌ବା କାତାମନ୍ ବୁଜିକରି ମାନ୍‌ବା ଲକ୍‌ମନ୍ କେଡେକ୍ କରମର୍ ଲକ୍‌ମନ୍ ! କାଇକେବଇଲେ ଏ ସବୁ ବିସଇ ଗଟ୍‌ବା ବେଲା କେଟ୍‌ଲା ।

**ସାଡ଼ଟା ମଣ୍ଡଲିକେ ଜୁଆର୍**

୪ \*ମୁଇ ଜଅନ୍ ଆସିଆ ରାଇଜେ ରଇବା ସାଡ଼ଟା ମଣ୍ଡଲିକେ ଲେକଲିନି । ପର୍ମେସର୍ ଟାନେଅନି ଆସିରଇବା ଜିବନ୍ ଦୁକାଇଲାଟା ଆରି ସାନ୍ତି ତମକେ ମିଲ । ସେ ଏବେ ଆତେ । ଆଗ୍‌ତୁ ମିସା ରଇଲା ଆରି କାଲ୍ କାଲ୍ ଜୁଗ୍ ଜୁଗ୍ ରଇସି । ସେ ବସିରଇବା ଜାଗାର୍ ମୁଆଟର୍ ସାଡ଼ଟା ଆଡ଼ମାମନ୍ ଟାନେଅନି \* ଆରି ଜିସୁକିରିସ୍ଟ ଟାନେଅନି । ସେ ଆକା ପର୍ମେସରର୍ ବିସଇର୍ ସଡ଼ ସାକି ଦେଇପାର୍‌ସି । ମଲା ଲକ୍‌ମନ୍‌ରଟାନେଅନି ତାକେସେ ପର୍ଡୁମ୍ ଉଟାଇରଇଲା । ଏ ଜଗତର୍ ସାସନ୍‌କାରିଆମନ୍ ଉପରେ ରଇବା ସାସନ୍‌କାରିଆ । ସେ ଆମ୍‌କେ ଆଲାଦ୍ କଲାନି । ଆମ୍‌ପାଇ ଗଟେକ୍ ବଲି ଇସାବେ ମଲାକେ ଆମ୍‌ ପାପେଅନି ସେ ଆମ୍‌କେ ମୁକ୍‌ଲାଇଆତେ ।<sup>୬</sup> \*ତାର୍ ବାବା ପର୍ମେସର୍କେ ସେବା କର୍‌ବାପାଇ ସେ ଆମ୍‌କେ ଗଟେକ୍ ରାଜାର୍ କୁଟୁମେ ପୁଜାରି କଲାଆତେ । ସେ କାଲ୍ କାଲ୍ ଜୁଗ୍ ଜୁଗ୍ ବପୁ ଆରି ମଇମା ପାଅ । ଆମେନ୍ ।<sup>୭</sup> \*ଏଦେ ଦେକା ! ସେ ମେଗ୍‌ମାଲାଇ ବସି ଆଇଲାନି । ଗୁଲାଇ ଲକ୍‌ମନ୍ ତାକେ ଦେକ୍‌ବାଇ । ତାକେ କୁରୁସ୍‌କାଟେ କୁଟି ମାରିରଇବା ଲକ୍‌ମନ୍ ମିସା ଦେକ୍‌ବାଇ । ଏ ଜଗତେ ରଇବା ସବୁ ଲକ୍‌ମନ୍ ତାର୍‌ଲାଗି ଦୁକ୍ କର୍‌ବାଇ । ସେଟା ସେନ୍ତାରିସେ ଅଇସି । ଆମେନ୍ !

୮ \*ମାପରୁ ପର୍ମେସର୍ ସବୁଟାନେଅନି ଅଦିକ୍ ବପୁରଟା । ସେ ଏବେ ମିସା ଆତେ । ସେ ଆଗ୍‌ତୁ ରଇଲା । ଆରି କାଲ୍ କାଲ୍ ଜୁଗ୍ ଜୁଗ୍ ରଇସି । ସେ କଇଲାଆତେ “ଆରାମେଅନି ସବୁ ବିସଇ କର୍‌ବା ଲକ୍ ମୁଇ, ଆରି ସାରାଇବା ଲକ୍ ମିସା ମୁଇସେ ।”

**କିରିସ୍ଟ ଦର୍‌ସନ୍ ଦେଲା**

୯ “ମୁଇ ଜଅନ୍, ତମର୍ ବିସ୍‌ବାସର୍ ଲାଗି ବାଇ ଅଇଲିଆଟି । ଜିସୁର୍ ସଙ୍ଗ୍ ଆମେ ମିସିଆଡୁକେ, ତାର୍ ରାଇଜେ ରଇବା ଲକ୍‌ମନ୍‌ପାଇ ଆସିରଇବା ସବୁ ଦୁକ୍ କସ୍‌ଟାନେ ମୁଇ ତମର୍ ସଙ୍ଗ୍ ମୁରଟିକରି ଆଟି । ଚାରିବେଟ୍‌ତି ସମ୍‌ଦୁର୍ ରଇକରି ମଜାଇ ରଇବା ପାଡ଼ମସ୍ ବଲି ଗଟେକ୍ ରାଇଜେ ମକେ ନେଇରଇଲା । ମୁଇ ପର୍ମେସରର୍ କାତା ଆରି ଜିସୁ ଦେଇରଇବା ସିକିଆ ଜାନାଇରଇଲିଜେ, ମକେ ସେନ୍‌ତାରି କଲା ।<sup>୧୦</sup> ଆମେ ମିସିକରି ତାକେ ଆରାଦନା କର୍‌ବା ମାପରୁର୍ ଦିନେ, ତାର୍ ଆଡ଼ମା ମକେ ଦାରିରଇଲା । ଆରି ଜବର୍ ଅଇତେ ମଇରି ବାଜ୍‌ଲା ପାରା ମର୍ ପର୍‌ବାଟେ ସୁନ୍‌ଲି ।<sup>୧୧</sup> ତୁଇ ଦେକ୍‌ଲାଟା ବଇଟାନେ ଲେକ୍ ଆରି ଏପିସିୟ, ସୁରନା, ପର୍‌ଗାମା, ତିଆଟିରା, ସାର୍‌ଦି, ପିଲାଦେଲ୍‌ପିଆ ଆରି ଲାଉଦିକିଆଇ ମଣ୍ଡଲିକେତଇ ପାଟାଆ ବଲି ସେ ସବଦ୍ ସୁନ୍‌ଲି ।”

<sup>୧୨</sup> ସେ ସବଦ୍ ସୁନ୍‌ଲାକେ, କେ କାତାଅଇଲାନି, ଦେକ୍‌ବି ବଲି ପାସଲ୍‌ଲି ଆରି ସାଡ଼ଟା ସୁନାର୍ ବଡ଼ି ଡାଣ୍ଡି ଦେକ୍‌ଲି ।<sup>୧୩</sup> ତାର୍ ମଜାଇ ନର୍ ପାରା ତିସ୍‌ତେରଇବା ଗଟେକ୍ ଲକ୍‌କେ ଦେକ୍‌ଲି । ତାର୍ ପାଦ୍‌ଜାକ ଅଇବା ଗଟେକ୍ ଡେଙ୍ଗ୍ ଲୁଗା

\* ୧:୪ ୧:୪ ପରକାସିତ ୪:୫    \* ୧:୬ ୧:୬ ପରକାସିତ ୫:୧୦    \* ୧:୭ ୧:୭ ମାଡିଉ ୨୪:୩୦; ମାର୍କ ୧୩:୨୬; ଲୁକ୍ ୨୧:୨୭; ୧ମ ତେସଲନିକିୟ ୪:୧୭; ଜଅନ୍ ୧୯:୩୪,୩୬; ମାଡିଉ ୨୪:୩୦    \* ୧:୮ ୧:୮ ପରକାସିତ ୨୨:୧୩

ପିନ୍ଧିରଇଲା । ତାର ବୁଦ୍ଧତଲେ ଗଟେକ ସୁନାର ବେଲ୍‌ଟୁ ବାନ୍ଧି ରଇଲା । ୧୪ ତାର ମୁଣ୍ଡର ଚେଣ୍ଡି ଦଇଲା ଚାଉଲ୍ ଆରି ଦୁଦ୍‌ପାରା ଦବ୍ ରଇଲା । ଆରି ତାର ଆଁକି ଲାଗତେ ରଇବା ଜଇ ପାରା ଗଢ଼ଗଢ଼ି ଜାଇତେ ରଇଲା । ୧୫ ତାର ପାଦର ରେଡ଼ି ପିତଲ୍ ପାରା ଜଗଜଗି ଜାଇତେରଇଲା, ଜନ୍‌ଟାକି ଜଇଟାଣେ ପରିଚଲ୍ ଅଇ ସୁନ୍ଦର୍ କରି ରେଡ଼ଲାପାରା । ଆରି ତାର ସବଦ୍ ଅଦରତେରଇବା ଜର୍‌ନା ପାନିର୍ ସବଦ୍‌ପାରା ଜବର୍ ସବଦ୍ ଅଇତେରଇଲା । ୧୬ ସେ ତାର ଉଜା ବାଟର୍ ଆତେ ସାଡ଼ଟା ତାରା ଦାରି ରଇଲା, ଆରି ତାର ଚଣ୍ଡେ ଅନି ଦୁଇବାଟେ ଦାର୍ ରଇବା ଡିପ୍‌ଡିପା କାଣ୍ଡା ବାରଇତେ ରଇଲା । ଆରି ତାର ମୁଁ ମୁଇଦାନିଆର୍ ବେଲ୍‌ପାରା ଜଲ୍‌କି ଜାଇତେ ରଇଲା । ୧୭ \*ତାକେ ଦେକିକରି ମୁଇ ମଲାପାରା ଅଇକରି ତାର ପାଦ୍‌ତଲେ ଅଦ୍‌ରି ଗାଲି । ତାର ପଟେ ସେ ମର୍ ଉପ୍‌ରେ ତାର ଉଜା ଆଡ଼ ସଙ୍ଗଇ କରି କଇଲା, ଡର୍‌ନାଇ, ମୁଇସେ ଆରାମ୍ ମୁଇସେ ସେସ୍ । ୧୮ ମୁଇସେ ଜିବନ୍ ରଇବା ଲକ୍ । କାଇକେବଇଲେ ମୁଇ ମରିରଇଲି ମିସା ଦେକା କାଲ୍ କାଲ୍ ଜୁଗ୍ ଜୁଗ୍ ବଠିକରି ଆଟି । ମର୍ ଆତେ ମରନର୍ ଆରି ପାତାଲର୍ କୁଟିକାଡ଼ି ଆଟେ । ମରିରଇବା ସବୁ ଲକ୍‌ମନର୍ ଉପ୍‌ରେ ଆରି ମଲାଲକ୍‌ମନ୍‌କେ କନ୍ତି ପାଟାଇବାର୍, ସେଟା ମର୍ ଅଦିକାର୍‌ଆଟେ । ୧୯ ଡେବର୍ ପାଇ ତମେ ଏବେ ଜାଇଜାଇଟା ଦେକି ଆଟାସ୍ ଆରି ଜାଇଜାଇଟା ଏବେ ଗଟ୍‌ଲାନି ଆରି ପର୍‌କେ ଗଟ୍‌ସି, ସେଟା ସବୁ ଲେକିକରି ସଙ୍ଗୁଆ । ୨୦ ମର୍ ଉଜାବାଟେ ରଇବା ସାଡ଼ଟା ତାରା ଆରି, ସାଡ଼ଟା ସୁନାର ବଡ଼ି ଡାଣ୍ଡିର୍ ଅରଡ଼ ମୁଇ ତମ୍‌କେ କଇଦେବି । ସେ ସାଡ଼ଟା ବଡ଼ିଡାଣ୍ଡି ଅଇଲାନି ସାଡ଼ଟା ମଣ୍ଡଲି । ସାଡ଼ଟା ତାରମନ୍ ଅଇଲାଇନି, ସାଡ଼ଟା ମଣ୍ଡଲିର୍ ଦାଇଡ଼ ନେବା ଦୁଡ଼ମନ୍ ।

### ୨

#### ଏପିସି ମଣ୍ଡଲିର୍ କାତା

୧ ସେ କଇଲା, ଏପିସସ୍ ମଣ୍ଡଲିକେ ଦେକାରକା କର୍‌ବା ଦୁଡ଼କେ ଲେକା । ଏ କବର୍ ମର୍‌ଟାଣେଅନି ପାଟାଇଲିନି । ସାଡ଼ଟା ତାରାକେ ମୁଇ ମର୍ ଉଜାବାଟେ ଦାରିରଇବି । ସାଡ଼ଟା ସୁନାର ବଡ଼ିଡାଣ୍ଡି ମଜାଇ ଇଣ୍ଡ୍‌ତେରଇବି । ୨ ମୁଇ ତମର୍ ଚଲାଟଲ୍‌ଡି ଜାନି । ତମେ ଆବଡ଼ ଅଇ ପାଇଟି କର୍‌ବାଟା ଆରି ଦୁକ୍ କସ୍‌ଟ ଆଇଲେ ମିସା ମୁର୍‌ଟି କରି ରଇବାଟା ମୁଇ ଜାନି । କରାପ୍ ଲକ୍‌ର୍ କାମ୍ ତମକେ ସାର୍‌ଦା ନ କରାଏ ବଲି ମୁଇ ଜାନି । ଜନ୍ ଲକ୍‌ମନ୍ ଆମେ ପେରିଡ଼ସିସ୍ ବଲି ନାଡାଲଲାଇନି, ସେମନ୍ ସଡ଼ କି ମିଡ଼ ବଲି ତମେ ପରିକା କରିଆଟାସ୍ । ସେମନ୍ ମିଡ଼ କଇଲାଇନି ବଲି ତମେ ଜାନିଆଟାସ୍ । ୩ ଦୁକ୍ କସ୍‌ଟ ଆଇଲେ ମିସା ମର୍ ଲାଗି ମୁର୍‌ଟିକରି ରଇଲାସିନି । ଆରି ବିସ୍‌ବାସ୍ ଚାତାସନାଇ । ୪ ମାତର୍ ତମର୍ ଚଲାଟଲ୍‌ଡିତେଇ ମକେ ଗଟେକ୍ ବିସଇ ବଲ୍ ନ ଲାଗେ । ସେଟା ଅଇଲାନି ଆଗେ ତମେ ମକେ ଜେନ୍ତି ଆଲାଦ୍ କର୍‌ତେରଇଲାସ୍, ଏବେ ସେନ୍ତାରି କରାସ୍ ନାଇ । ୫ ମର୍‌ପାଇ ରଇବା ଡାଟ୍ ଆଲାଦ୍ ମନେ ଏତାଆ । ପାପେଅନି ବାଉଡା । ଆରି ଆଗୁଡ଼ କର୍‌ତେରଇବା ନିକ କାମ୍‌ମନ୍ କରା । କାଇକେବଇଲେ ତମେ ପାପେଅନି ନ ବାଅଡ଼ଲେ, ମୁଇ ତମର୍‌ଟାଣେ ଆଇବି ଆରି ତମର୍ ବଡ଼ିଡାଣ୍ଡି ଗଟେକ୍ ଜାଗାଇଅନି ଆରି ଗଟେକ୍ ଜାଗାଇ ଗୁଟାଇଦେବି । ୬ ମାତର୍ ତମର୍ ଗଟେକ୍ ବିସଇ ମକେ ନିକ ଲାଗ୍‌ସି । ତମେ ନିକଲାଡିଅର୍ ଲକ୍‌ମନ୍ କର୍‌ବା କାମ୍ ଗିନ୍ କର୍‌ସା । ଜନ୍‌ଟାକି ମୁଇମିସା ବେସି ଗିନ୍ କର୍‌ବି । ୭ \*ଆଡ଼ମା ମଣ୍ଡଲିମନ୍‌କେ କଇବାଟା ମନ୍‌ଦିଆନ୍ ଦେଇକରି ସୁନା । ଜେ ଜିଡ଼ସି, ତାକେ ମୁଇ ପର୍‌ମେସରର୍ ବାଡେ ପଲିରଇବା ଜିବନ୍ ଗଟର୍ ପଲ୍ କାଇବାକେ ଦେବି ।

\* ୧:୧୭ ୧:୧୭ ପରକାସିତ ୨:୮;୨୨:୧୩      \* ୨:୭ ୨:୭ ପରକାସିତ ୨୨:୨

ସୁମରନା ମଣ୍ଡଳିର କାତା

୮ \*ସୁମରନା ମଣ୍ଡଳିକେ ଦେକାରକା କରତେରଇବା ଦୁଡ଼କେ ଲେକା । ଏ କବର ମରଟାନେଅନି ପାଟାଇଲିନି । ଆରାମେଅନି ସବୁ ବିସଇ କରବା ଲକ୍ ମୁଇ ଆରି ସାରାଇବା ଲକ୍ ମିସା ମୁଇସେ । ମୁଇ ମରିରଇଲି ଆରି ଜିବନ୍ ଅଇକରି ଉଟ୍ଲି । ୯ ତମର ଦୁକ୍‌କସଟ ମୁଇ ଜାନି । ତମେ ଅରକିଡ଼ ବଲି ମୁଇ ଜାନି । ମାତର ସତଇସେ ତମେ ସାଉକାର ଲକ୍ । ଜିଉଦିମନ୍ ତମର କାରାପ୍ ବିସଇ କଇଲାଜନି ବଲି ମୁଇ ଜାନି । ମାତର ସେମନ୍ ଆମେ ଜିଉଦି ବଲି କଇଲେମିସା ସତସେ ସେମନ୍ ପରମେସରର ଲକ୍ ନଅଡ଼ । ମାତର ସଇତାନ୍ ଦଲର ଲକ୍ । ୧୦ ତମେ ଜେଡ଼କି ଦୁକ୍ କସଟ ମୁରଟିକରି ରଇବାକେ ଗାଲାସନି, ସେ ବିସଇ ଚିନ୍ତା କରି ଡରାନାଇ । ସୁନା ତମକେ ସଇତାନ୍ ବନ୍ଦିଗରେ ପାକାଇକରି ପରିକା କରସି, ଦସ୍‌ଦିନ୍ ଜାକ ତମେ କସଟେ ରଇସା । ମାତର ମରବାକେ ପଡ଼ଲେ ମିସା ମକେ ବିସବାସ୍ କରି ରୁଆ । ଆରି ଇନାମ୍ ଇସାବେ ତମକେ ନ ସାରବା ଜିବନ୍ ଦେବି ।

୧୧ \*ଆଡ଼ମା ମଣ୍ଡଳିମନ୍‌କେ କଇବାଟା ମନ୍ ଦିଆନ୍ ଦେଇ ସୁନା । ଜନ୍ ଲକ୍ କାରାପ୍‌କେ ଆରାଇକରି ଜିଡ଼ସି, ପତର ମରନେ ସେମନ୍ ତଣ୍ଡ ନ ପାଅଡ଼ ।

ପରଗାମ ମଣ୍ଡଳିର କାତା

୧୨ ପରଗାମ ମଣ୍ଡଳିକେ ଦେକାରକା କରବା ଦୁଡ଼କେ ଲେକା । ଏ କବର ମରଟାନେଅନି ପାଟାଇଲିନି । ଦୁଇବାଟେ ଦାର ରଇବା ଲାଗନ୍ କାଣ୍ଡା ମରଟାନେ ଆତେ । ୧୩ ତମେ ଜନ୍ ନଅରେ ରଇଲାସନି, ସେଟା ସଇତାନର୍ ସାସନର୍ ଜାଗା ବଲି ମୁଇ ଜାନି । ମାତର ସେନ୍ତାର୍ ଅଇଲେମିସା, ତମେ ମକେ ବିସବାସ୍ କଲାସନି । ବିସବାସେ ମର୍କାମ୍ କରବା ଦାଙ୍ଗଡା ଆନ୍ତିପା ମର ବିସଇ ସାକି ଦେଲାକେ ମରାଇରଇଲାଇ । ତମେ ରଇବା ସଇତାନର୍ ନଅରେ ତାକେ ମରାଇରଇଲେ ମିସା ତମେ ବିସବାସ୍ ଚାତାସନାଇ । ୧୪ ମାତର ତମର ଚଲାଟଲ୍‌ତିଟାନେ କେତଟା ବିସଇ ମର ମନ୍‌କେ ଜାଏନାଇ । କାଇକେବଇଲେ ତମର ବିଡ଼ରେ କେତେକ୍ ଲକ୍ ବାଲାମର୍ ସିକିଆ ମାନ୍‌ଲାସନି । ଇସରାଏଲର ଲକ୍‌ମନ୍‌କେ ପାପ୍‌ବାଟେ ଡାକିନେବାକେ, ସେ ବାଲାକ୍‌କେ ସିକାଇରଇଲା । ସେମନ୍‌କେ ମୁରତିମନ୍‌କେ ସରପି ଦେଇରଇବା କାଦି କାଇବାକେ ଆରି ବେସିଆ କାମ୍ କରବାକେ ସେ ସିକାଇତେରଇଲା । ୧୫ ସେନ୍ତାରିସେ ତମର ବିଡ଼ରେ କେତେଲକ୍ ନିକଲାତିୟମନ୍‌ ସିକିଆ ମିସା ମାନ୍‌ଲାସନି । ୧୬ ଏବେ ତମର ପାପେଅନି ବାଉଡା । ନଇଲେ ମୁଇ ତମରଟାନେ ଦାପ୍‌ରେ ଆଇବି । ଆରି ମର ଟଣ୍ଡେଅନି ବାରଇବା କାଣ୍ଡା ସଙ୍ଗ୍ ମୁଇ ସେ ଲକ୍‌ମନ୍‌ର ବିରୁଦେ ଜୁଇଦ୍ କରବି ।

୧୭ \*ଆଡ଼ମା ମଣ୍ଡଳିମନ୍‌କେ କଇବାଟା ମନ୍‌ଦିଆନ୍ ଦେଇ ସୁନା । ଜେ ଜିଡ଼ସି, ସେମନ୍‌କେ ଲୁଟାଇକରି ସଙ୍ଗାଇରଇବା ମାନା ଦେବି । ନୁଆ ନାଉଁ ଲେକିରଇବା ଗଟେକ୍ ଦବ୍ ପାକ୍‌ନା ମିସା ସେମନ୍‌କେ ଦେବି ।

ତିଆଟିରା ମଣ୍ଡଳିକେ କବର

୧୮ ତିଆଟିରା ମଣ୍ଡଳିକେ ଦେକାରକା କରବା ଦୁଡ଼କେ ଲେକା । ପରମେସରର୍ ପଅ ମୁଇ ଏ କବର ମରଟାନେଅନି ପାଟାଇଲିନି । ମର ଆଁକି ଜଇପାରା ଜଗ୍‌ଜଗି ଗାଲାନି ଆରି ପାଦ୍ ରେଡିରଇବା ପିତଲ୍‌ପାରା ଆତେ । ୧୯ ତମର ଚଲାଟଲ୍‌ତି ମୁଇ ଜାନି । ତମର ଆଲାଦ୍, ସଡ଼ ସଙ୍ଗ୍ କାମ୍ କରବାଟା, ସେବା କରବାଟା ଆରି ମୁରଟିକରି ରଇବାଟା ମୁଇ ଜାନି । ଆଗଡୁର୍ ଟାନେଅନି ଏବେ ଅଦିକ୍ ନିକ କଲାସନି ବଲି ମୁଇ ଜାନି । ୨୦ ମାତର ତମର ଚଲାଟଲ୍‌ତିତେଇ ଗଟେକ୍ ବିସଇ ମର ମନ୍‌କେ ଜାଏନାଇ

\* ୨:୮ ୨:୮ ପର୍କାସିତ ୧:୧୭;୨୨:୧୩    \* ୨:୧୧ ୨:୧୧ ପର୍କାସିତ ୨୦:୧୪;୨୧:୮    \* ୨:୧୭ ୨:୧୭ କଅନ୍ ୬:୪୮-୫୦

। ସେ ଜେଜେବଲ୍ ନାଉଁର ମାଇଜିକେ ତମର ଦଲେ ମିସାଇଲାସ୍ । ମୁଇ ନିଜେ ପରଫେସରର୍ ଦୁଡ଼ ବଲାଇଅଇଲାନି । ମର୍ ଗତିଦାଙ୍ଗତାମନ୍‌କେ ସେ ବେସିଆ କାମ୍ କରବାକେ ସିକାଇଲାନି । ମୁର୍ତିମନ୍‌କେ ସର୍ପିଦେଇରଇବା କାଦି ମିସା କାଇବାକେ କଇଲାନି । ୨୧ ପରଫେସର୍ ଟାନେ ବାଉଡ଼ ବଲି ମୁଇ ତାକେ ଜାଗ୍‌ଲି, ମାତର୍ ତାର ବେସିଆ କାମ୍ କରବାକେ ସେ ମନ୍ କଲା । ୨୨ ଡେବର୍‌ପାଇ ମୁଇ ତାକେ ବଡ଼ ବେମାର୍ ଦାରାଇବି । ଜେନ୍ତାରି କି ସେ ସଇଲାଡେଇଅନି ଉଟିନାପାରେ । ତାର ସଙ୍ଗ୍ ଜେଡ଼କି ଲକ୍‌ମନ୍ ପାପ୍ କରିରଇଲାଇ, ମୁଇ ସେମନ୍‌କେ ବେସି ଦୁକ୍ କସ୍‌ଟ ଦେବି । ତାର କରାପ୍ ଚଲାଚଲ୍‌ତିଟାନେ ମିସିରଇବା ଜେଡ଼କି ଲକ୍‌ମନ୍ ନ ବାଉଡ଼ଲେ, ଏ ସବୁଜାକ ମୁଇ ଏବେସେ କରବି । ୨୩ ତାରବାଟେ ଜାଇଡେରଇବା ସବୁ ଲକ୍‌ମନ୍‌କେ ମୁଇ ମରାଇବି । ସେନ୍ତାରି ସବୁ ଲକ୍‌ର ତିନ୍ତା ଆରି ମନ୍ ଜାନ୍‌ବା ଲକ୍ ମୁଇସେ ବଲି ସବୁ ମଣ୍ଡଲି ଜାନ୍‌ବାଇ । ତମେ କରିରଇବା କାମ୍ ଇସାବେ ମୁଇ ତମ୍‌କେ ବାଉଡ଼ାଇବି ।

୨୪ ମାତର୍ ତିଆଟିଆଇ ରଇବା, ତମେ ବାକି ଲକ୍‌ମନ୍ ଏ କରାପ୍ ସିକିଆ ମାନାସ୍‌ନାଇ । ସଇତାନର୍ ଟିକିନିକି ସିକିଆ ବଲି ଲକ୍‌ମନ୍ ମାନ୍‌ବା ସିକିଆ ତମେ ମାନାସ୍‌ନାଇ । ଡେବର୍‌ପାଇ ତମେ ମାନ୍‌ବାକେ ବେସି ଆଦେସ୍ ମୁଇ ନ ଦେଇ । ୨୫ ମାତର୍ ମୁଇ ଆଇବା ଜାକ ତମେ ବିସ୍‌ବାସ୍ କଲାଟା ତାଟ୍ ସଙ୍ଗ୍ ଦାରିରୁଆ । ୨୬ ଜେଡ଼କି ଲକ୍ ଜିତିକରି ସାରାସାରି ଜାକ ରଇବାଇ, ମୁଇ ମର୍ ବାବାଟାନେଅନି ପାଇରଇବା ସମାନ୍ ଅଦିକାର୍ ସେମନ୍‌କେ ଦେବି । ୨୭ ରାଇଜ୍‌ମନ୍‌କେ ଲୁଆର୍ ଡାଙ୍ଗ୍‌ସଙ୍ଗ୍ ସାସନ୍ କରି ମାଟିର୍ ଆଣ୍ଡିପାରା ବାଙ୍ଗାଇବାକେ ମୁଇ ଅଦିକାର୍ ଦେବି । ୨୮ ଆରି ମୁଇ ସେମନ୍‌କେ ସାକ୍‌ଲିଆ ବେଲର୍ ତାରା ଦେବି । ୨୯ ଆଡ଼ମା ମଣ୍ଡଲିମନ୍‌କେ କଇବାଟା ମନ୍ ଦିଆନ୍ ଦେଇ ସୁନା ।

## ୩

### ସାର୍‌ଦି ମଣ୍ଡଲିକେ କବର୍

୧ ସାର୍‌ଦି ମଣ୍ଡଲିକେ ଦେକାରକା କରବା ଦୁଡ଼କେ ଲେକା । ଏ କବର୍ ମୁଇ ପାଟାଇଲିନି । ପରଫେସରର୍ ସାଡ଼ଟା ଆଡ଼ମା ଆରି ସାଡ଼ଟା ତାରା ମର୍‌ଲଗେ ଆଟେ । ତମର୍ ଚଲାଚଲ୍‌ତି ମୁଇ ଜାନି । ଲକ୍‌ମନ୍ ଦେକ୍‌ବା ଇସାବେ, ତମେ ଆଡ଼ମାଇ ଜିବନ୍ ଆଟାସ୍ । ମାତର୍ ପରଫେସର୍ ଦେକ୍‌ବା ଇସାବେ ମରିଆଟାସ୍ । ୨ ଡେବର୍‌ପାଇ ସଇଲାଡେଇଅନି ଉଟା । ତମର୍ ଦୁର୍‌ବଲ୍ ବିସ୍‌ବାସ୍ ତାଟ୍ କରା । ନଇଲେ ସେଟା ପୁରାପୁରୁନ୍ ମରିଜାଇସି । କାଇକେବଇଲେ ମୁଇ ଜାନି ଜେ ପରଫେସର୍ ତମର୍ ଟାନେ ସାର୍‌ଦା ଅଇଲାପାରା ତମର୍ କାମ୍ ସିଦ୍ ଅଏନାଇ । ୩ \*ତମେ ଜନ୍ ସିକିଆ ସିକିଆଟାସ୍, ଆରି ଜନ୍‌ଟା ସୁନି ଆଟାସ୍, ସେଟା ଏଡାଆ । ସେଟା ମାନିକରି ତମର୍ ପାପେଅନି ବାଉଡ଼ା । ସଇଲାଡେଇଅନି ନ ଉଟ୍‌ଲେ ମୁଇ ଚର୍ ପାରା ଆସି ତମ୍‌କେ ଡଣ୍ଡ ଦେବି । ମୁଇ କେଡେବେଲେ ଆଇବି, ସେଟା ତମେ ଜାନିନାପାରାସ୍ । ୪ ମାତର୍ ସାର୍‌ଦିସେ ରଇବା ତମର୍ ବିଡ଼ରେ କେଡେଲକ୍ ବସ୍‌ତର୍ ପରିଚଲ୍ କରି ଆଟାସ୍ । ମୁଇ ଆଇବା ଦିନ୍‌ମନ୍‌କେ ସୁକଲ୍ ବସ୍‌ତର୍ ପିନ୍‌କିରି ମର୍ ସଙ୍ଗ୍ ଇଣ୍ଡିସା । କାଇକେ ବଇଲେ ତମେ ସେଟା କରବାକେ ଅଦିକାର୍ ପାଇ ଆଟୁସ୍ । ୫ \*ଜେ ଜିଡ଼ସି ସେ ଏ ରକାମ୍ ସୁକଲ୍ ବସ୍‌ତର୍ ପିନ୍‌ସି । ଆରି ମୁଇ ଜିବନ୍ ବଇଲଗେଅନି ଜେନ୍ତୁଆଲେ ମିସା ତମର୍ ନାଉଁ ନ ଲିବାଇ । ମର୍ ବାବା ଆରି ତାର

\* ୩:୩ ୩:୩ ମାଡିଉ ୨୪:୪୩,୪୪; ଲୁକ୍ ୧୨:୩,୪୦; ପରକାସିତ ୧୬:୧୫      \* ୩:୫ ୩:୫ ପରକାସିତ ୨୦:୧୨; ମାଡିଉ ୧୦:୩୨; ଲୁକ୍ ୧୨:୮

ଦୁଃସମୟର ମୁଆଁରେ ତମର ନାଉଁ ମର ଲକ୍ଷ୍ମୀ ବଳି ସର୍ପି ଦେବି । ୬ ଆତ୍ମା ମାଣ୍ଡଳିନୀକେ କରାବାଟା ମନ୍ ଦିଆନ୍ ଦେଇ ସୁନା ।

ପିଲାଦେଲୁପିଆ ମାଣ୍ଡଳିକେ କବର

୭ ପିଲାଦେଲୁପିଆ ମାଣ୍ଡଳିକେ ଦେକାରକା କରବା ଦୁଃସମୟ ଲଗେ ଲେକା । ଏ କବର ମୁଇ ପାଟାଇଲିନି । ମୁଇ ସୁକଲୁ ଆରି ସତ୍ । ଦାଉଦ ରାଜାର କୁଟିକାଡ଼ି ମରଗାନେ ଆଟେ । ମୁଇ ଉଗାଡ଼ଲେ, କେ ମିସା ଡାବି ନାପାରତ୍ । ଆରି ମୁଇ ଡାବଲେ କେ ମିସା ଉଗାଡ଼ି ନାପାରତ୍ । ୮ ମୁଇ ତମର ଚଲାଚଲୁତି ଜାନି । ତମ୍ଭେ ଅଲପ୍ ସେ ବପୁ ଆଟେବଲି ମିସା ଜାନି । ମାତର ମର ସିକିଆ ତମେ ମାନିଆଟାସ୍ ଆରି ସତ୍ସେ ମର ସିକିଆ ମାନଲାସ୍ । ତେବରପାଇ ମୁଇ ତମର ମୁଆଁରେ ଗଟେକ୍ କାପାଟ୍ ଉଗାଡ଼ିଆଟି । ସେଟା କେ ମିସା ଡାବିନାପାରତ୍ । ୯ ସୁନା ତମର ବିତ୍ତରେ କେତେଟା ଜିଉଦିମନ୍ ସଇତାନର ଦଲେ ମିସିଆଟତ୍ । ମାତର ସେମନ୍ ଜିଉଦିଲକ୍ ନଅତ୍ । ଆଇବା ଗଟେକ୍ ଦିନେ ମୁଇ ସେମନ୍‌କେ ତମରଗାନେଅନି ମାଣ୍ଡିକୁଟା ଦିଆଇବି । ମୁଇ ତମ୍ଭେ ଆଲାଦ୍ କଲିନି ବଲି ସେମନ୍ ଜାନବାଇ । ୧୦ ଦୁକ୍ କସଟ୍ ଆଇଲାବେଲେ ମୁରଟିକରି ରୁଆ ବଲି ମୁଇ ତିଆରଲାଟା ତମେ ମାନଲାସ୍ । ସେଟାପାଇ ଜଗତର ସବୁ ଲକ୍ଷ୍ମୀକେ ପରିକା କରବାକେ ଦୁକ୍ କସଟ୍ ଆଇବା ବେଲାଅନି ମୁଇ ମିସା ତମ୍ଭେ କାଇଟା ନ ଆଇବାକେ ରକିଆ କରି ସଙ୍ଗାଇବି । ୧୧ ମୁଇ ଦାପରେ ଆଇଲିନି । ଜନ୍ ସତ୍ ସିକିଆ ତମେ ପାଇଆଟାସ୍, ସେଟା ମାନିକରି ରୁଆ । ଜେନ୍ତାରି କି ତମର ଜନାମ୍ କେ ମିସା ଚରାଇନେଇ ନାପାରତ୍ । ୧୨ \*ଜେ ଜିତ୍ସି, ମୁଇ ତାକେ ଆମର ପରମେସରର ମନ୍ଦିରର ମୁଲ୍‌ଡେଲି କରବି । ଆରି ସେମନ୍ ତେଇଅନି କେବେ ମିସା ଗାଡ଼ି ନ ଜାଅତ୍ । ତାକର ଉପରେ ମୁଇ, ମର ପରମେସରର ନଅରର ନାଉଁ ଆରି ନୁଆ ଜିରୁସାଲମର ନାଉଁ ଲେକ୍ବି । ସେଟା ମର ପରମେସରର ଟାନେଅନି ସରଗେଅନି ଉଡ଼ରି ଆଇସି । ତାକର ଉପରେ ମିସା ମର ନୁଆ ନାଉଁ ଲେକ୍ବି ।

୧୩ ଆତ୍ମା ମାଣ୍ଡଳିନୀକେ କରାବାଟା ମନ୍ ଦିଆନ୍ ଦେଇ ସୁନା ।

ଲାଉଦିକିଆ ମାଣ୍ଡଳିକେ କବର

୧୪ ଲାଉଦିକିଆ ମାଣ୍ଡଳିକେ ଦେକାରକା କରବା ଦୁଃସମୟ ଲେକା । ଏ କବର ମୁଇ ପାଟାଇଲିନି । ମୁଇ ଅଇଲିନି, ଆମେନ୍ । ମୁଇ ଅଇଲିନି ସତ୍ ବିସ୍ବାସର ସାକି । ମରଗାନେ ଅନି ପରମେସର ସବୁ ବିସଇ ତିଆରକଲା । ୧୫ ମୁଇ ତମର ଚଲାଚଲୁତି ଜାନି । ତମେ ବେସି କାକର ନାଇ କି ବେସି ତପ୍‌ଲାଟା ପାରା ନାଇ, ମାତର ଉସୁମ୍ ପାନିପାରା ଆଟାସ୍ । ତମେ ତପତ୍ ଉଆ, ନଇଲେ କାକର ଉଆ ବଲି ମୁଇ ମନ୍ କଲିନି । ୧୬ ମାତର ତମେ ଉସୁମ୍ ଅଇଲାଟ୍ ପାଇ ମୁଇ ତମ୍ଭେ ତୁକିଦେବି । ୧୭ ତମେ କଇଲାସିନି ମୁଇ ସାଉକାର୍, ମକେ ଜାଇ ଜାଇଟା ଦରକାର୍, ସେଟା ମରଲଗେ ଆଟେ । ମାତର ତମେ କେତେକ୍ କାକୁରତି ଅଇଆଟାସ୍, ତମେ ଅରକିତ୍, ତୁମ୍‌ଗ୍ସା ଆରି କାଣା, ସେଟା ତମେ ନାଜାନାସ୍ । ୧୮ ମୁଇ ତମ୍ଭେ ବୁଦି ସିକାଇବି । ମରଗାନେଅନି ସୁନା ଗେନା । ସୁନା ବଇଲେ ଅସଲି ସୁନା । ଜେନ୍ତାରିକି ତମେ ସତଇସେ ସାଉକାର୍ ଅଇସା । ମରଗାନେଅନି ସୁକଲୁ ଲୁଗା ଗେନା । ଜେନ୍ତାରି କି ତମେ ତୁମ୍‌ଗ୍ସା ଅଇଲାଟ୍ ପାଇ ଲାଜ୍ ନ ଉଆସ୍ । ଲାଗାଇଅଇବା ଅସ ମିସା ମରଗାନେଅନି ନିଆ । ସେଟା ତମର ଆକିଟାନେ ଲାଗାଆ । ଜେନ୍ତାରିକି ତମେ ଦେକିପାରସା । ୧୯ \*ମୁଇ ଜେଡ଼କି ଲକ୍ଷ୍ମୀକେ ଆଲାଦ୍ କଲିନି, ସେ ଲକ୍ଷ୍ମୀକେ ଦମ୍‌କାଇ କରି ଡ଼ଣ୍ଡ ଦେଲିନି । ତେବରପାଇ ତମର ପାପେଅନି ବାଉଡା । ଜେନ୍ତାରି କି ସତ୍ ବାବେ ମରବାଟେ ଆଇସା । ୨୦ ଦେକା, ମୁଇ କାପାଟେ ଚିଆଅଇ ମାରଲିନି

। ଜେ ଜଦି ମର୍ ମାର୍‌ବା ସବଦ୍ ସୁନି କାପାଟ୍ ଉଗାଡ଼ଲେ ମୁଇ ବିତ୍‌ରେ ପୁରବି ଆରି ସେମାନର୍ ସଙ୍ଗ୍ କାଇବି ।<sup>୨୧</sup> ଜେ ଜିଡ଼ସି ମର୍ ଲଗେ ତାକେ ବସାଇ ସାସନ୍ କରବାକେ ଅଦିକାର୍ ଦେବି । ମୁଇ ଜିଡ଼ଲି ଆରି ଏବେ ମର୍ ବାବାର୍ ଲଗେ ବସି ସାସନ୍ କଲିନି ।<sup>୨୨</sup> ଆଡ଼ମା ମଣ୍ଡଲିମନ୍‌କେ କଇବାଟା ମନ୍ ଦିଆନ୍ ଦେଇ ସୁନା ।

## ୪

ସରଗେ ପାରତନା

<sup>୧</sup> ସେବେଲେ ମୁଇ ଆରିଗଟେକ୍ ଦରସନ୍ ଦେକଲି । ସରଗେ ଗଟେକ୍ ଉଗାଡ଼ିରଇବା କାପାଟ୍ ରଇଲା । ଆଗେ ସୁନିରଇବା ମଇରି ପାରା ସବଦ୍ ଆରିତରେକ୍ ସୁନଲି । ଉପରେ ଚଗି ଆଉ, ଏଟାର୍‌ପତେ କାଇଟା ଅଇସି ମୁଇ ତକେ ଜାନାଇବି ।<sup>୨</sup> ସେ ଦାପ୍‌ରେ ଆଡ଼ମା ମକେ ଗଟେକ୍ ସପନ୍ ଦେକାଇଲା । ସରଗର୍ ବସବାଟାନେ ଗଟେକ୍ ଲକ୍ ବସିରଇବାଟା ମୁଇ ଦେକଲି ।<sup>୩</sup> ତାର୍ ମୁଇରା ଆରି ମୁକ୍‌ତା ପାରା ଜଗ୍‌ଜଗି ଜାଇତେରଇଲା । କାଟାପଡ଼ିଆ ଡିସ୍‌ବାପାରା ଇରା ମୁକ୍‌ତାର୍ ଇନ୍‌ରଦୁନ୍ ବସବା ଜାଗାର୍ ଚାର୍‌ବେଟ୍‌ତି ଗୁଡ଼ିଆଇ ଅଇଲାପାରା ଅଇରଇଲା ।<sup>୪</sup> ସେ ବସବା ଜାଗାର୍ ଗୁଲ୍‌ଟି ବିତ୍‌ରେ କଡେ ଚାର୍‌ଟା ବସବା ଜାଗା ରଇଲା । ତେଇ ଦବ୍‌ଲୁଗା ପିନ୍‌କରି ଆରି ସୁନାର୍ ମୁକ୍‌ଟ୍ ପିନ୍‌ କଡେଚାରିଟା ପାର୍‌ଚିନ୍‌ମନ୍ ବସିରଇଲା ।<sup>୫</sup> ବସବା ଜାଗାଇଅନି ବିଜ୍‌ଲି ମାର୍‌ଲା ଆରି ଗୁଡ଼ଗାଡ଼ କରି ଗଡ଼ଗଡ଼ି ମାର୍‌ଲା । ବସବା ଜାଗାର୍ ମୁଆଟେ ସାଡ଼ଟା ଜଇଉମ୍‌ଲା ଲାଗତେରଇଲା । ସେଟା ଅଇଲାନି ପର୍‌ମେସରର୍ ସାଡ଼ଟା ଆଡ଼ମା ।<sup>୬</sup> ଆରି ବସବା ଜାଗାର୍ ମୁଆଟେ ନିର୍‌ମଲ୍ ଅଇକରି ଡିସ୍‌ବା କାଟର୍ ସମ୍‌ତୁର୍ ପାରା ରଇଲା । ବସବା ଜାଗାର୍ ଚାରିବେଟ୍‌ତି ଚାରିଟା ଜିବନ୍ ରଇବା ପସୁ ରଇଲା । ତାର୍ ମୁଆଟ୍ ବାଟେ ଆରି ପର୍‌ବାଟେ ଆଁକିମନ୍ ରଇଲା ।<sup>୭</sup> ପର୍‌ତୁମର୍ ପସୁ ସିଅବାଗ୍‌ପାରା ଡିସ୍‌ତେ ରଇଲା । ଦୁଇ ଲମର୍‌ଟା ସଣ୍ଡପାରା ରଇଲା । ତିନ୍ ଲମର୍‌ଟା ଲକ୍‌ର୍ ପାରା ବାନିମ୍‌ରଡ଼ି ରଇଲା । ଆରି ସାରାସାରିରଟା ଉଡ଼ିବୁଲ୍‌ବା ଗିଦ୍ ପାରା ଡିସ୍‌ତେ ରଇଲା ।<sup>୮</sup> ସେ ଚାରିଟା ଜାକ ଜିବନ୍ ରଇବା ପସୁମନ୍‌କେ ଗଟେକ୍‌କେ ଚଅଟା ଲାକା ତେନା ରଇଲା । ଆରି ତାକର୍‌ବାଇରେ ବିତ୍‌ରେ ମିସା ଆଁକି ରଇଲା । ଦିନ୍ ରାତି ଗିଡ଼ କଇବାଟା ସେମନ୍ ତେବଡ଼ନାଇ । ସବୁରଟାନେ ଅନି ବପୁରଇବା ମାପୁରୁ ପର୍‌ମେସର୍, ସୁକଲ୍‌ଟା ! ସୁକଲ୍‌ଟା ! ସୁକଲ୍ ସେ ! ସେ ଆଗତୁ ରଇଲା, ଏବେ ଆଟେ ଆରି ସେ କାଲ୍ କାଲ୍ ଜୁଗ୍ ଜୁଗ୍ ରଇସି !<sup>୯</sup> ଚାରିଟା ଜିବନ୍ ରଇବା ପସୁମନ୍ ଜେ ବସବା ଜାଗାଇ ବସିରଇଲା ତାର୍ ମଇମାର୍, ଡାକ୍‌ପୁଟା ଆରି ଦନିଅବାଦର୍ ଗିଡ଼ ସୁନାଇତେରଇଲା । ସେ କାଲ୍ କାଲ୍ ଜୁଗ୍ ଜୁଗ୍ ବୁଦ୍‌ସି । ସେମନ୍ ସେନ୍ତାରି କଲାକେ<sup>୧୦</sup> କଡେ ଚାରିଟା ପାର୍‌ଚିନ୍‌ମନ୍ ଜେ ବସବା ଜାଗାଇ ବସିରଇଲା ତାର୍ ମୁଆଟେ ଡାଣ୍ଡାସନ୍ ପଡ଼ି ତାକେ ଜୁଆର୍ କଲା । ସେ କାଲ୍ କାଲ୍ ଜୁଗ୍ ଜୁଗ୍ ବୁଦ୍‌ଟିରଇସି । ସେମନ୍ ପିନ୍ ରଇବା ମୁକ୍‌ଟ୍ ବସବା ଜାଗାର୍ ମୁଆଟେ ପିଙ୍‌ଦେଇକରି କଇଲା, <sup>୧୧</sup> ଏ ଆମର୍ ମାପୁରୁ ଆରି ଆମର୍ ପର୍‌ମେସର୍ ! ସବୁ ମଇମା, ଡାକ୍‌ପୁଟା ଆରି ବପୁ ତୁଇ ଆକା ପାଇସୁ । ତୁଇ ସବୁଜାକ ଡିଆର୍ କଲାସ୍ ଆରି ତମର୍ ମନ୍ କଲା ଇସାବେ ସେମନ୍ ଡିଆରିଅଇ ବୁଲାଇନି ।

## ୫

ବଇ ଆରି ମେଣ୍ଡାପିଲା

୧ ଜେ ବସ୍ତା ଜାଗାଇ ବସିରଇଲା ତାର ଉଜା ଆତେ ଗୁଡ଼ିଆଇଅଇରଇବା ଗଟେକ୍ ପୁରନା କାଗଜ୍ ଦେକ୍ଲି । ସେଟା ଦୁଇବାଟେ ଲେକା ଅଇରଇଲା । ଆରି ସାଡ଼ଟା ସିଲ୍ଲ୍ ମାରି ତାବିରଇଲା । ୨ ଆରି ଗଟେକ୍ ବେସି ବପୁରଇବା ଦୁଡ଼କେ ଦେକ୍ଲି । ସେ ଆଉଲିଅଇ କଇଲା “ଏ ସାଡ଼ଟା ସିଲ୍ଲ୍ ପିଟାଇକରି କେ, ଏ କାଗଜ୍ ମେଲାକରି ପାରସି ?” ୩ ମାତର୍ ସରଗେ କି ମତ୍ପୁରେ କି ପାତାଲେ କେ ମିସା ସେ କାଗଜ୍ ମେଲାକରି ଦେକି ନାପାରୁଲା । ୪ ସେ କାଗଜ୍ ମେଲାକରି ବିଡ଼ରଟା ଦେକ୍ବାକେ କେ ନାପାରୁଲାଜେ ମୁଇ ବେସି ମନ୍ଦୁକ୍ କରି କାନ୍ଲି । ୫ ତାରପତେ ଗଟେକ୍ ପାର୍ଟିନ୍ ମକେ କଇଲା, “କାନ୍ନାଇ, ଏଦେ ଦେକା ! ଜିଉଦା ବଂସେଅନି ଆଇବା ସିଅଁ, ଜେ କି ଦାଉଦର୍ ଗଟେକ୍ ଡାକ୍ପୁଟା ନାତିତିତି, ସେ ଜିତ୍ଲାଆତେ । ସେ ସାଡ଼ଟା ସିଲ୍ଲ୍ ବାଙ୍ଗାଇସି ଆରି କାଗଜ୍ ମେଲାକରି ପାରସି ।”

୬ ତାରପତେ ବସ୍ତା ଜାଗାର୍ ମଜାଇ ଗଟେକ୍ ମେଣ୍ଡାପିଲା ଟିଆଅଇରଇବାଟା ଦେକ୍ଲି । ତାର ଚାରିବେଟ୍ଟି ଚାରିଟା ଜିବନ୍ ରଇବା ପସୁ ଆରି ପାର୍ଟିନ୍ମନ୍ ରଇଲା । ମେଣ୍ଡାପିଲା ମରାଇରଇଲାଟା ପାରା ଡିସ୍ତେରଇଲା । ତାକେ ସାଡ଼ଟା ସିଲ୍ଲ୍ ଆରି ସାଡ଼ଟା ଆଁକି ରଇଲା । ସେଟା ପର୍ମେସରର୍ ସାଡ଼ଟା ଆଡ଼ମା ରଇଲା । ପର୍ମେସର୍ ସେ ସାଡ଼ଟା ଆଡ଼ମାକେ ଗୁଲାଇ ଜଗତେ ପାଟାଇରଇଲା । ୭ ଜେ ବସ୍ତା ଜାଗାଇ ବସିରଇଲା, ତାର ଉଜାଆତେଅନି ସେ ମେଣ୍ଡା କାଗଜ୍ ନେଲା । ୮ ସେ ସେନ୍ତାରି କଲାକେ ସେ ଚାରିଟା ଜିବନ୍ ରଇବା ପସୁ ଆରି କଟେଚାରିଟା ପାର୍ଟିନ୍ମନ୍ ମେଣ୍ଡାର୍ ମୁଆଟେ ଡାଣ୍ଡାସନ୍ ପତି ଜୁଆର୍ କଲା । ସେମନ୍କେ ସବୁ ଲକର୍ ଆତେ ଗଟେକ୍ ଗଟେକ୍ ହୁଡୁଙ୍ଗା ଆରି ସୁନାର୍ ଗିନାମନ୍କେ ଗନ୍ଦରସ୍ ରଇଲା । ସେଟା ଅଇଲାନି ପର୍ମେସରର୍ ଲକ୍ମନ୍ ଗୁଆରି କର୍ବାଟା । ୯ ସେମନ୍ ଗଟେକ୍ ନୁଆ ଗିଡ଼ କଇତେରଇଲା । “ଗୁଡ଼ିଆଇଅଇରଇବା କାଗଜ୍ ସିଲ୍ଲ୍ ବାଙ୍ଗାଇକରି ନେବାକେ ତୁଇସେ ପାରୁସ୍ । କାଇକେବଇଲେ ତୁଇ ମରାଇଅଇଲୁସ୍ ଆରି ତର୍ ବଲି ଇସାବ୍ ମରନର୍ ଲାଗି, ସବୁ ବଂସେଅନି, ସବୁବାସାଇଅନି, ସବୁ ରାଇଜେଅନି ଆରି ଲକ୍ମନ୍ ଦଲେଅନି ପର୍ମେସରର୍ ପାଇ ତୁଇ ଲକ୍ମନ୍କେ ଆନ୍ଲୁସ୍ । ୧୦ \*ତୁଇ ସେମନ୍କେ ଗଟେକ୍ ପୁଜାରିମନ୍ ରାଇଜ୍ କରି ଆରୁସ୍ । ସେମନ୍ ଆମର୍ ପର୍ମେସର୍କେ ସେବା କର୍ବାଇ । ଆରି ଏ ଜଗତେ ସାସନ୍ କର୍ବାଇ ।”

୧୧ ମୁଇ ଆରିତରେକ୍ ଦେକ୍ଲି । ତେଇ ଅଜାର୍ ଅଜାର୍ ଦୁଡ଼ମନ୍ ସବଦ୍ ସୁନ୍ଲି । ସେ ଦୁଡ଼ମନ୍ ଚାରିଟା ପସୁମନ୍ ଆରି ପାର୍ଟିନ୍ମନ୍ ଚାରିବେଟ୍ଟି ଟିଆ ଅଇଲା । ୧୨ ସେମନ୍ ଆଉଲି ଅଇକରି ଗିଡ଼ କଇତେ ରଇଲା, “ମରାଇଅଇରଇବା ମେଣ୍ଡାପିଲା, ସବୁ ବପୁ, ସବୁ ଦନ୍ସପତି, ସବୁ ଗିଆନ୍, ସବୁ ସକ୍ତି, ଡାକ୍ପୁଟା, ମଇମା, ଆରାଦନା ପାଇବା ଅଦିକାର୍ ତର୍ ଲଗେ ଆତେ ।”

୧୩ ଜଗତେ ରଇବା ସବୁ ଜିବନ୍ ରଇବାଟାମନ୍ ଜେନ୍ତାରି କି ସର୍ଗେ ରଇବା ସବୁଜାକ, ଜଗତେରଇବା ସବୁଜାକ, ପାତାଲେ ରଇବା ସବୁଜାକ ଆରି ସମତୁରେ ରଇବାଟାମନ୍ ଗିଡ଼ ଗାଇତେରଇଲା । ଜେ ବସ୍ତା ଜାଗାଇ ବସିଆତେ ଆରି ମେଣ୍ଡାପିଲାକେ ଆରାଦନା, ଡାକ୍ପୁଟା, ମଇମା, ଆରି ବପୁ କାଲ୍ କାଲ୍ ଜୁଗ୍ ଜୁଗ୍ ଅ । ୧୪ ଚାରିଟା ଜିବନ୍ ରଇବା ପସୁମନ୍ କଇଲା, ଆମେନ୍ ! ଆରି ପାର୍ଟିନ୍ମନ୍ ଡାଣ୍ଡାସନ୍ ପତି ଜୁଆର୍କଲା ।



ସାଡ଼ଟା ସିଲ୍ଲ୍ ଅରଡ଼

୧ ତାରପତେ ସେ ମେଣ୍ଡାପିଲା ସାତୁଟା ସିଲ୍ ବିତ୍ତରେ ପରତୁମ୍ ସିଲ୍ ବାଙ୍ଗାଲବାଟା ମୁଇ ଦେକ୍ଲି । ଚାରଟା ଜିବନ୍ ରଇବା ପସୁମାନର୍ ବିତ୍ତରେଅନି ଗଟେକ୍ ପସୁ ଗଡ଼ଗତି ସବଦ୍ପାରା କରି ମକେ କଇଲା “ ଆଉ !” ୨ ତେଇ ମୁଇ ଦେକ୍ଲି, ଆରି ଏଦେ ଦେକା ! ଗଟେକ୍ ଦବ୍ଲା ଗଡା ଡିସ୍ଲା । ତାକେ ଚାଲାଇବା ଲକର୍ ଆତେ ଦୁନ୍ନୁ ରଇଲା । ତାକେ ଗଟେକ୍ ମୁକୁଟ୍ ଦିଆ ଅଇଲା । ସେ ତାର ସତ୍ତରୁମନ୍ଦକେ ଆରାଇବାକେ ଦାପ୍ରେ ଗାଲା । ୩ ସେ ମେଣ୍ଡାପିଲା ଦୁଇ ଲମର୍ ସିଲ୍ ବାଙ୍ଗାଲଲା । ଆରି ସେ ଦୁଇ ଲମର୍ ଜିବନ୍ ରଇବା ପସୁ ମକେ କଇଲା “ଆଉ !” ୪ ଆରି ଏଦେ ଦେକା ! ଆରିଗଟେକ୍ ରଙ୍ଗ୍ ରଇବା ଗଡା ବାରଇଲା । ଜଗତେ ଜୁଇଦ୍ କରାଇବାକେ ସେ ଗଡା ଚାଲାଉକେ ଦିଆଅଇରଇଲା । ଜେନ୍ତାରିକି, ଲକ୍ମନ୍ ତାକର୍ ତାକର୍ ବିତ୍ତରେ ମାରାମାରିଅଇ ମରବାଇ । ତାକେ ଗଟେକ୍ ବଡେଟା କାଣ୍ଡା ଦିଆଅଇଲା ।

୫ ତାରପତେ ସେ ମେଣ୍ଡାପିଲା ତିନ୍ ଲମର୍ ସିଲ୍ ବାଙ୍ଗାଲଲା । ତିନ୍ ଲମର୍ ଜିବନ୍ ରଇବା ପସୁ ମକେ କଇଲା “ଆଉ !” ମୁଇ ଦେକ୍ଲି ଆରି ଏଦେ ଦେକା ! ଆରି ଗଟେକ୍ କାଲିଆ ଗଡା ଡିସ୍ଲା । ସେ ଗଡା ଚାଲାଉର୍ ଆତେ ଗଟେକ୍ ତୁଲ୍ବା କେଜି ରଇଲା । ୬ ଚାରିଟା ଜିବନ୍ ରଇବା ପସୁମନ୍ କଇତେରଇଲାଇ “ଦିନେକର୍ ବୁଡିକେ ମାନେକ୍ ମୁଣ୍ଡିଆ ଆରି ଦିନେକର୍ ବୁଡିକେ ତିନ୍ ମାନ୍ ଦାନ୍ । ମାତର୍ ଅଙ୍ଗୁର୍ ବାଡ଼ ଆରି ଜିଡ଼ ଗର୍ ନସାଇବାରନାଇ ।”

୭ ତାରପତେ ସେ ମେଣ୍ଡାପିଲା ଚାରି ଲମର୍ ସିଲ୍ ବାଙ୍ଗାଲଲା । ଆରି ଚାରି ଲମର୍ ଜିବନ୍ ରଇବା ପସୁ ମକେ “ ଆଉ !” ବଲି କଇଲା । ୮ ତେଇ ମୁଇ ଦେକ୍ଲି, ଏଦେ ଦେକା ! ଗଟେକ୍ ଚାରୁଆ ଗଡା ଡିସ୍ଲା । ଗଡା ଚାଲାଉ ଅଇଲାନି ମରନ୍ ଆରି ତୁମାମାନର୍ ରାଇଜ୍ । ସେ ପତେ ପତେ ଆଇତେରଇଲା । ସେମନ୍ଦକେ ଏ ଜଗତର୍ ଚାରିବାଗେ ଅନି ଗଟେକ୍ ବାଗ୍ ଉପ୍ରେ ଅଦିକାର୍ ଦେଇତେରଇଲା । ତେଇ ଜୁଇଦର୍ ଲାଗି, ମର୍ଡିର୍ ଲାଗି, ରଗର୍ ଲାଗି ଆରି ତଙ୍ଗର୍ ପସୁର୍ ଲାଗି ମରାଇବାକେ ଅଦିକାର୍ ଦେଲା ।

୯ ତାରପତେ ମେଣ୍ଡାପିଲା ପାଁର୍ ଲମର୍ ସିଲ୍ ବାଙ୍ଗାଲଲା । ଆରି ଏଦେ ଦେକା ! ବେଦିର୍ ତଲ୍ବାଟେ ସତ୍ତବାବେ ସାକି ଦେଲାରପାଇ ଆରି ପର୍ମେସରର୍ ବାକିଅ ଜାନାଇଲାରପାଇ ଜନ୍ ଲକ୍ମନ୍ ମରାଇ ଅଇରଇଲାଇ ତାକର୍ ଆତ୍ମାମନ୍ଦକେ ଦେକ୍ଲି । ୧୦ ସେମନ୍ ଆଉଲି ଅଇକରି କଇଲାଇ “ଏ ମାପ୍ତୁ ପର୍ମେସର୍ ଜେ କି ସବୁଟାମେଅନି ବପୁଟା । ତୁଇ ସୁକଲ୍ ଆରି ସତ୍ । ଆମକେ ମରାଇଲା ଲକ୍ମକେ ବିଚାରକରି ତଣ୍ଟ ଦେବାକେ ଆମେ ଆରି କେତେକ୍ ଦିନ୍ ଜାଗୁ ?” ୧୧ ସେମନ୍ଦକେ ସବୁକେ ଗଟେକ୍ ଗଟେକ୍ ଦବ୍ ବସ୍ତର୍ ଦିଆଅଇରଇଲା । ତାକର୍ ସଙ୍ଗେ ରଇବା ଦାଙ୍ଗାମନ୍ଦକେ ଆରି ବାଇମନ୍ଦକେ ତାକର୍ ପାରାସେ ମରାଇଅଇସି । ଜେଡକି ଲକ୍ ଅଇବା କାଡା, ସେଡକି ଲକ୍ ପୁରାପୁରୁନ୍ ନ ଅଇବାଜାକ ସେମନ୍ଦକେ ଆରି କେତେଦିନ୍ ପୁଣ୍ଡିରଇବାକେ କୁଆ ଅଇଲା ।

୧୨ ଆରି ଏଦେ ଦେକା ! ମେଣ୍ଡା ପିଲା ଚଅ ଲମର୍ ସିଲ୍ ବାଙ୍ଗାଲବାଟା ମୁଇ ଦେକ୍ଲି । ତେଇ ଦର୍ତନି ଜବର୍ଅଇତେ ତୁଲ୍ତୁଲ୍ଲା । ବେଲ୍ କାଲିଆ ଅଇ କରକର୍ସା ରଇବା ଲୁଗାପାରା ଅଇଗାଲା ଆରି ଜନ୍ ବନି ପାରା ପୁରାପୁରୁନ୍ ରଙ୍ଗ୍ ଅଇଗାଲା । ୧୩ ଜବର୍ ପବନ୍ ଆସି ଗଟେକ୍ ତୁମ୍ବି ଗର୍ ଦୁନିଅଇଲେ ଜେନ୍ତାରି ନ ପାଟଲା ତୁମ୍ବି ତଲେ ଅଦର୍ସି, ସେନ୍ତାରିସେ ବାଦଲର୍ ତାରାମନ୍ ଦର୍ତନି ଉପ୍ରେ ଅଦର୍ଲାଇ । ୧୪ ବାଦଲ୍ ଦୁଇପତା ଅଇଗାଲା ଆରି କାଗଜପାରା ଗୁଡିଆଇଅଇଲା । ଗଟେକ୍ ଗଟେକ୍ ତଙ୍ଗର୍ ଆରି ଚାରିବେଟ୍ଟି ପାନିରଇ ମଜାଇ ରଇବା ସୁକଲା

☆ ୭:୧୨ ୭:୧୨ ପରକାସିତ ୧୧:୧୩:୧୭:୧୮; ମାଡିଉ ୨୪:୨୯; ମାର୍ଚ୍ଚ ୧୩:୨୪,୨୫; ଲୁକ୍ ୨୧:୨୫ ☆ ୭:୧୪ ୭:୧୪ ପରକାସିତ ୧୭:୨୦



ଜାଗା ତାର ଜାଗାଇ ଅନି ଅସକଲାଇ । ୧୫ ତାରପଟେ ଏ ଜଗତର ରାଜାମନ୍, ସାସନକାରିଆମନ୍, ସନିଅର୍ ନେତାମନ୍, ସାଉକାର ଆରି ବେସି ବପୁରଇବା ଲକ୍ଷମନ୍, ବନ୍ଦିରଇବା ଆରି ମୁକ୍ତଲିରଇବା ଲକ୍ଷମନ୍ ସେନ୍ତାରି ସବୁଲକ୍ଷମନ୍ ପାଆରେ ଆରି ତଙ୍ଗରେ ରଇବା ବଡ଼ ପାକନା ତଲେ ଜାଇ ଲୁଚଲାଇ । ୧୬ \*ସେମନ୍ ଆମ୍ଭକେ ଦୟା କର ବଲି ବାବୁଜିଆ କଲାଇ । ଆରି ତଙ୍ଗରମନ୍‌କେ ଆରି ପାକନାମନ୍‌କେ ଆଉଲିଅଇକରି କଇଲାଇ, “ଆମର୍ ଉପରେ ଅଦରା ଆରି ଆମ୍ଭକେ ଆତୁକା ଉଆ । ଜେନ୍ତାରି କି ଜେ ବସ୍‌ବା ଜାଗାଇ ବସିଆଟେ, ସେ ଆମ୍ଭକେ ନ ଦେକେ । ଆରି ମେଣ୍ଟାର ବଡ଼ ରିସାଇଅନି ଆମେ ରକିଆ ପାଇବୁ । ୧୭ କାଇକେବଇଲେ ତାର ରିସା ବେସି ରିସାର ଦିନ୍ ଆଇଲାଆଟେ । ଆରି ଆମେ ସେଟା ମୁରଚିରଇ ନାପାରୁ ।”



୧୪,୪୦୦୦ ଇସ୍ରାଏଲର ଲକ୍ଷ

୧ ତାରପଟେ ଦରତନିର ଚାରିଟା କନେ ଚାରିଟା ଦୁଡ଼ ଚିଆଅଇରଇବାଟା ମୁଇ ଦେକଲି । ଜେନ୍ତାରିକି କାଇ ପବନ୍ ଦରତନି କି ସମ୍ପଦୁରେ କି କାଇ ଗଡ଼ ଉପରେ ନ ଆଇବାକେ ପବନ୍‌କେ ଦାରି ଅଟକାଇ ରଇଲା । ୨ ପୁରୁବ ଦିଗେଅନି ଆରି ଗଟେକ୍ ଜିବନ୍ ରଇବା ପର୍ମେସରର ସିଲ୍ ସଙ୍ଗ୍ ଆଇବାଟା ମୁଇ ଦେକଲି । ସେ ଦୁଡ଼ ସେ ଚାରିଟା ଦୁଡ଼ମନ୍‌କେ ଆଉଲି ଅଇ ତାକି କଇଲା । ପର୍ମେସର ସେମନ୍‌କେ ଦରତନି ଆରି ସମ୍ପଦୁର ବିନାସ୍ କରବାକେ ବପୁ ଦେଇରଇଲା । ୩ ସେ ଦୁଡ଼ କଇଲା ଆମର୍ ପର୍ମେସରକେ ସେବା କରବା ଲକ୍ଷମନ୍‌ର କାପାଲେ ଚିନ୍ ନ ଦେବା ଜାକ ଦରତନିକେ କି ସମ୍ପଦୁରକେ କି ଗଡ଼କେ ବିନାସ୍ ନ କରା । ୪ ସେମନ୍ ସେ ଲକ୍ଷମନ୍‌କେ ଚିନ୍ କରି ସାରାଇଲା ପଟେ, ସଏ ଚାଲିସ୍ ଚାରି ଅଜାର ଲକ୍ଷମନ୍‌କେ ଚିନ୍ ଦେଲୁ ବଲି ମକେ କଇଲା । ସେମନ୍ ଇସ୍ରାଏଲର ବାରଟା ବୈସେଅନି ରଇଲାଇ । ୫ ଜିଉଦା ବୈସେଅନି ବାରଅଜାର । ସେନ୍ତାରିସେ ରୁବେନ୍‌ଅନି, ଗାଦ୍ ନାଉର୍ ଜାଗାଇଅନି ବାର ଅଜାର । ୬ ଆସରେଅନି, ନାପ୍ତାଲିଅନି, ମାନାସେଅନି, ବାରଅଜାର । ୭ ସିମିୟନ୍‌ଅନି, ଲବିଅନି, ଇସାକର ତେଇଅନି ବାରଅଜାର । ୮ ସବ୍‌ଲୁନେଅନି, ଜସେପେଅନି, ବନିୟମେଅନି, ବାରଅଜାର ଲାକା ଚିନ୍ କଲାଇ ।

ବଡ଼ ଦଲ୍

୯ ତାରପଟେ ମୁଇଦେକଲି ଏଦେ ଦେକା ! ତେଇ ଏତେକ୍ ମାୟା ଲକ୍ଷକେ ଦେକଲି ଜେ ସେ ଲକ୍ଷମନ୍‌କେ କେ ମିସା ଏଜି ନାପାରଡ଼ । ସେମନ୍ ସବୁ ଜାତିଅନି, ବୈସେଅନି, ରାଇଜେଅନି, ଆରି ବାସାଇଅନି ଆସିରଇଲାଇ । ସେମନ୍ ବସ୍‌ବା ଜାଗାର ମୁଆଟେ ଆରି ମେଣ୍ଟାପିଲାର୍ ମୁଆଟେ ଚିଆଅଇଲାଇ । ସେମନ୍ ଦବ୍ ଲୁଗାପିନ୍ଦିକରି ଆରି ଆତେ କଜ୍‌ରି ତାଲ୍ ଦାରିରଇଲାଇ । ୧୦ ସେମନ୍ ଆଉଲି ଅଇକରି କଇତେ ରଇଲାଇ, “ଆମର୍ ପର୍ମେସର ଜେ କି ବସ୍‌ବା ଜାଗାଇ ବସିଆଟେ, ତାରଟାନେଅନି ଆରି ମେଣ୍ଟା ପିଲାର୍ ଟାନେଅନି ମୁକ୍ତି ମିଲୁସି ।” ୧୧ ସବୁ ଦୁଡ଼ମନ୍ ବସ୍‌ବା ଜାଗାର ଆରି ପାର୍‌ଚିନ୍ ମନର୍ ଆରି ଚାରିଟା ଜିବନ୍ ରଇବା ପସୁମନର୍ ଚାରିବେଟ୍‌ଟି ଚିଆଅଇଲାଇ । ତାରପଟେ ସେମନ୍ ବସ୍‌ବା ଜାଗାର ମୁଆଟେ ଡାଣ୍ଡାସନ୍ ପତି ପର୍ମେସରକେ କୁଆର୍ କରି, ୧୨ କଇଲାଇ, ଆମେନ୍, ଦନିଅବାଦ୍, ମଇମା, ଗିଆନ୍, ଡାକ୍‌ପୁଟା, ବପୁ ଆରି ସକ୍ତି କାଲ୍ କାଲ୍ ଜୁର୍ ଜୁର୍ ଆମର୍ ପର୍ମେସରକେ ଅ । ଆମେନ୍, ବଲି କଇତେରଇଲାଇ ।

୧୩ ପାର୍‌ଚିନ୍ ମନର୍ ବିଡ଼ରେ ଅନି ଗଟେକ୍ ଲକ୍ଷ ଆସିକରି ମକେ ପାଚାରଲା, “ଏ ଲକ୍ଷମନ୍ କାଇକେ ଦବ୍ ଲୁଗା ପିନ୍ଦି ଆଚଡ଼ ଆରି ସେମନ୍ କନ୍ତିଅନି ଆଇଲାଇ ?”

୧୪ \*ମୁଁ ତାକେ କଲି “ଆଗିଆ ମୁଁ ନାଜାନି, ତୁଇତା ଜାନୁସ୍ ।” ସେ ମକେ କଲି “ବେସି ବଡ଼ ତାଡ଼ନା ପତେ ରକିଆ ପାଇ ଆଇଲାଆତଡ଼ । ମେଣ୍ଡାପିଲାର ବନି ସଙ୍ଗ ସେମନ୍ ତାକର୍ ବସତର୍ ଦଇକରି ଦବ୍ କଲାଆତଡ଼ ।” ୧୫ ସେଟାର ପାଇ ସେ ଲକ୍ମନ୍ ପର୍ମେସରର୍ ବସବା ଜାଗାର ମୁଆଟେ ରଇ ତାର ମନ୍ଦିରେ ଦିନ୍ ରାତି ତାକେ ସେବା କଲାଇନି । ଜେ ବସବା ଜାଗାଇ ବସଲାଆଟେ, ସେ ସେମନ୍କେ ରକିଆ କରସି । ୧୬ ସେମନ୍କେ କେବେ ବୁକ୍ ନ ଲାଗେ କି ସସ୍ ନ କରେ । ବେଲ୍ କି ଅଦିକ୍ ତପି ରଇବା ତାତି ସେମନ୍କେ ପଡ଼ାଇନାପାରେ । ୧୭ କାଇକେବଇଲେ ବସବା ଜାଗାର ମଜାଇ ରଇବା ମେଣ୍ଡାପିଲା, ସେ ଲକ୍ମନ୍ ବସବାକାରିଆ ଅଇସି, ଆରି ଜିବନ୍ ରଇବା ଗାଡ଼ବାଟେ ସେ ଲକ୍ମନ୍କେ ବାଟକାତାଇ ନେଇସି । ଆରି ପର୍ମେସର ସେ ଲକ୍ମନ୍ ଆକିର୍ ଆସୁ ପୁଟି ଦେଇସି ।

୮

ସାଡ଼ଟା ସିଲ୍

୧ ମେଣ୍ଡାପିଲା ଜେତେବେଲେ ସାଡ଼ ତମର୍ ସିଲ୍ ବାଙ୍ଗାଇଲା, ସେଡ଼କିବେଲେ ସରଗେ ସମାନ୍ ଅଦଗଟା ଜାକ ଚିମ୍ପରା ଅଇଗାଲା । ୨ ତାରପତେ ପର୍ମେସରର୍ ମୁଆଟେ ସାଡ଼ଟା ଦୁଡ଼ମନ୍କେ ଚିଆଅଇ ରଇଲାଟା ମୁଁ ଦେକଲି । ସେ ମନ୍କେ ସାଡ଼ଟା ମଇରି ଦିଆଅଇ ରଇଲା । ୩ ତେଇ ଆରି ଗଟେକ୍ ଦୁଡ଼ ଆସିକରି ବେଦିଲଗେ ଚିଆ ଆଇଲା । ତାର ଆତେ ଗନ୍ଦରସ୍ ପଡ଼ାଇବା ଗଟେକ୍ ସୁନାର ଗିନା ରଇଲା । ପର୍ମେସରର୍ ଲକ୍ମନ୍ ପାର୍ତନା ସଙ୍ଗ ମିସାଇବାକେ ତାକେ ବେସି ଗନ୍ଦରସ୍ ଦିଆଅଇରଇଲା । ତାରପତେ ସେ ସେଟା ବସବା ଜାଗାର ମୁଆଟେ ରଇବା ସୁନାର ବେଦି ଉପରେ ସରପସି । ୪ ପଡ଼ତେରଇବା ଦୁପର୍ ଦୁଆଁ ପର୍ମେସରର୍ ଲକ୍ମନ୍ ପାର୍ତନା ସଙ୍ଗ ଉପରେ ଗାଲା । ପର୍ମେସରର୍ ମୁଆଟେ ଚିଆଅଇରଇବା ଦୁଡ଼ ସେଟା ଦାରିରଇଲା । ୫ ତାରପତେ ସେ ଦୁଡ଼ ଦୁପ୍ ପଡ଼ାଇବା ଅରକି ନେଇକରି ବେଦିଗାନର୍ ଜଇସଙ୍ଗ ବର୍ଡ଼ି କଲା । ସେଟା ସେ ଦରତନି ଉପରେ ପିଙ୍ଗିଦେଲା । ତେଇ ଗୁଡ଼ଗାଡ଼ କରି ଗଡ଼ଗତି ମାରଲା ଆରି ବିଜ୍ଜି ମାରି ଦରତନି ଚୁଲ୍‌ଚୁଲ୍‌ଲା ।

ମଇରି ବାଜା

୬ ତାରପତେ ସାଡ଼ଟା ମଇରି ଦାରିରଇବା ସାଡ଼ଟା ଦୁଡ଼ ସେଟା ପୁକ୍‌ବାକେ ଚିଆଅଇଲାଇ । ୭ ପର୍ତୁମର୍ ଦୁଡ଼ ତାର ମଇରି ପୁକ୍‌ଲା ଆରି ଏଦେ ଦେକା ! କାରାପାକ୍‌ନା ଆରି ଜଇ ଜନ୍‌ଟା କି ବନି ସଙ୍ଗ ମିସିରଇଲା, ସେଟା ଦରତନି ଉପରେ ଡାଲିଅଇଲା । ଦରତନି ତିନ୍‌ବାଗ୍ ଅନି ଗଟେକ୍ ବାଗ୍ ପଡ଼ିଗାଲା । ତାର ସଙ୍ଗ ତିନ୍‌ବାଗେ ଅନି ଗଟେକ୍ ବାଗର୍ ଗର୍ମନ୍ ଆରି ସବୁ ଗାଁସମ୍ ମିସା ପଡ଼ିଗାଲା ।

୮ ତାରପତେ ଦୁଇଲମର୍ ଦୁଡ଼ ମଇରି ପୁକ୍‌ଲା । ଆରି ଏଦେ ଦେକା ! ଗଟେକ୍ ବଡ଼ କୁପ୍‌ଲି, ଜନ୍‌ଟା ଜଇ ଲାଗତେରଇଲା, ସେଟା ସମ୍‌ଦୁର୍ ବିଡ଼ରେ ପିଙ୍ଗା ଅଇଲା । ଆରି ସମ୍‌ଦୁର୍ ପାନି ତିନ୍‌ବାଗେ ଅନି ଗଟେକ୍ ବାଗ୍ ବନି ଅଇଗାଲା । ୯ ଆରି ସମ୍‌ଦୁର୍ ବିଡ଼ରେ ରଇବା ତିନ୍‌ବାଗେଅନି ଗଟେକ୍ ବାଗ୍ ଜୁଡ଼ିଆଦ୍ ମରିଗାଲାଇ । ଆରି ତିନ୍‌ବାଗେଅନି ଗଟେକ୍ ବାଗ୍ ପାନି ଜାଜ୍ ମିସା କୁରୁପ୍‌ନାସ୍ ଅଇଗାଲା ।

୧୦ ତାରପତେ ତିନ୍ ଲମରର୍ ଦୁଡ଼ ତାର ମଇରି ପୁକ୍‌ଲା । ଆରି ଏଦେ ଦେକା ! ସେ ଦାପ୍‌ରେସେ ଆକାସେ ଅନି ଜଇଅଲା ପାରା ଲାଗତେରଇବା ଗଟେକ୍ ବଡ଼ ତାରା ବାଦ୍‌ଲେଅନି ଅଦର୍ଲା । ସେଟା ତିନ୍‌ବାଗେଅନି ଗଟେକ୍ ବାଗର୍ ଗାଡ଼ମନ୍କେ ଆରି ଜଲାମନ୍ ଉପରେ ଅଦର୍ଲା । ୧୧ ସେ ତାରାର ନାଉଁ ଅଇଲାନି ଲାଗ୍‌ଦଣାଡ଼ିକ୍‌ତତା

। ତାରା ଅଦରଲାକେ ତିନ୍ବାଗେ ଅନି ଗଟେକ୍ ବାଗ୍ ପାନି ପିତା ଅଇଗାଲା । ସେ ପିତା ପାନି କାଇକରି ବେସିଲକ୍ମାନ୍ ମରିଗାଲା ।

୧୨ ତାର୍ପତେ ତାର୍ ଲମରର୍ ଦୁଡ୍ ତାର୍ ମଇରି ପୁକ୍ଲା । ଆରି ଏଦେ ଦେକା ! ବେଲର୍ ତିନ୍ବାଗେଅନି ଗଟେକ୍ ବାଗ୍ କେ ମାଡ୍ ଅଇଲା । ସେନ୍ତାରିସେ ଜନର୍ ତିନ୍ବାଗେଅନି ଗଟେକ୍ ବାଗ୍, ଆରି ତାରା ମନର୍ ତିନ୍ବାଗେ ଅନି ଗଟେକ୍ ବାଗ୍ ନସ୍ଟ ଅଇଗାଲା । ତେବର୍ ପାଇ ଜନ୍ ଆରି ତାରାମନର୍ ଉଜଲ୍ ଦେବାଟା ତିନ୍ବାଗେଅନି ଗଟେକ୍ ବାଗ୍ ଉନା ଅଇଗାଲା । ତାର୍ପତେ ଦିନ୍ମିସା ତିନ୍ବାଗେଅନି ଗଟେକ୍ ବାଗ୍ ଆରି ରାତି ମିସା ତିନ୍ବାଗେ ଅନି ଗଟେକ୍ ବାଗ୍ ଉଜଲ୍ ନ ରଇଲା ।

୧୩ ତାର୍ପତେ ମୁଇ ଆରି ଦେକ୍ଲି ଆରି ଏଦେ ଦେକା ! ଗଟେକ୍ ଗିଦ୍ ବେସି ଉପ୍ରେ ଉଡ୍ତେରଇଲା । ଆରି ଆଉଲି କଇତେରଇଲା, “କାଇ ଇନସ୍ତା, କାଇ ଇନସ୍ତା । ଜେତେବେଲେ ବାକି ତିନ୍ଟା ଦୁଡ୍ମନର୍ ମଇରି ଟାନେଅନି ସବଦ୍ ଆଇଲାବେଲେ, ଦର୍ତନି ଟାନେ ରଇବା ସବୁ ଲକ୍ମାନର୍ ପାଇ କେତେକ୍ ଇନସ୍ତା ଅଇସି ।”



୧୪ ତାର୍ପତେ ପାର୍ ଲମରର୍ ଦୁଡ୍ ତାର୍ ମଇରି ପୁକ୍ଲା । ଆରି ଏଦେ ଦେକା ! ବାଦଲେଅନି ଦର୍ତନି ଉପ୍ରେ ଅଦ୍ରି ରଇବା ଗଟେକ୍ ତାରା ଦେକ୍ଲି । ତାକେ ପାତାଲର୍ କୁଟିକାଡି ଦିଆଅଇରଇଲା । ୧ ସେ ତାରା ପାତାଲ୍ ଉଗାଡ୍ଲା ଆରି ତେଇଅନି ଗଟେକ୍ ଜଇଲାଗ୍ବା ବାଟି ଅନି ଦୁଆଁ ବାରଇଲା ପାରା ବାରଇଲା । ପାତାଲେଅନି ଆଇବା ଦୁଆଁର୍ ଲାଗି ବେଲର୍ ଉଜଲ୍ ଆରି ପବନ୍ ଆନ୍ଦାର୍ ଅଇଗାଲା । ୨ ଦର୍ତନିଟାନେ ରଇବା ଦୁଆଁର୍ ଲାଗି, ତେଇଅନି ଚିଟ୍କାମନ୍ ବାରଇଲା । ସେଟାମନ୍ କେ ବିସ୍କାକ୍ତାର୍ ପାରା ବପୁ ଦିଆଅଇରଇଲା । ୪ ସେମନ୍ କେ ଦର୍ତନିର୍ ଗାଁସ୍ କି ଗର୍ କି ବିନ୍ ବାଡ୍ ଗର୍କୁଟ୍ କେ ମାରାନାଇ ବଲି କୁଆଅଇରଇଲା । ପର୍ମେସରର୍ ସିଲର୍ ଚିନ୍, ଜନ୍ ଲକ୍ମାନର୍ କାପାଲେ ନ ରଇଲା, ସେମନ୍ କେ ଆକା ମାର୍ବାକେ ଆଦେସ୍ ରଇଲା । ୫ ଏ ଲକ୍ମାନ୍ କେ ମରାଇବାକେ ଚିଟ୍କାମନ୍ କେ ଆଦେସ୍ ନ ଦେଇରଇଲା । ମାତର୍ ପାର୍ମାସ୍ ଜାକ ସେମନ୍ କେ କସ୍ଟ ଦେବାକେ ସେମନ୍ ଜନ୍ କସ୍ଟ ପାଇବାଇ, ସେଟା ଗଟେକ୍ ବିସ୍କାକ୍ତା ଚାବ୍ଲାବେଲର୍ ଦୁକାପାରା ରଇସି । ୬ ସେ ପାର୍ମାସ୍ ଜାକ କେନ୍ତ୍ର କିରି ମର୍ବୁ ବଲି ବାଟ୍ କଜ୍ବାଇ । ମାତର୍ ସେଟା ମିଲାଇନାପାରଡ୍ । ସେମନ୍ ମର୍ବବାକେ ବେସି ମନ୍ କର୍ବାଇ, ମାତର୍ ସେଟା ନ ଅଏ ।

୭ ଜୁଇଦ୍ ପାଇ ତିଆର୍ ଅଇରଇବା ଗତାମନର୍ପାରା ସେ ଚିଟ୍କାମନ୍ ତିସ୍ତେରଇଲା । ସେମନର୍ ମୁଣ୍ଡ୍ ସୁନାର୍ ମୁକୁଟ୍ ପିନ୍ଦି ରଇଲା । ସେମନର୍ ମୁ ଲକ୍ମାନର୍ ମୁ ପାରା ରଇଲା । ୮ ସେମନର୍ ଚେଣ୍ଟି ମାଜିଟକିମନର୍ପାରା ଆରି ଦାଡ୍ ସିଅଁମନର୍ପାରା ରଇଲା । ତାକର୍ ବୁକେ ଲୁଆର୍ ସାଞ୍ଜୁ ତାବିଅଇରଇଲା । ୯ ତାକର୍ ତେନାମନ୍ ଜାଡ୍ଲେ ଜୁଇଦ୍ କେ ଜିବା ଗତାର୍ ରତର୍ ସବଦ୍ ପାରା ସୁନିଅଇତେରଇଲା । ୧୦ ବିସ୍କାକ୍ତା ମନର୍ ପାରା ସେମନର୍ ଲେଞ୍ଜ୍ ଗଜିଆ ରଇଲା । ଆରି ବିସ୍କାକ୍ତା ପାରା ଚାବ୍ତେରଇଲା । ପାର୍ମାସ୍ ଜାକ ଲକ୍ମାନ୍ କେ ନସାଇବାକେ ତାକର୍ ଲେଞ୍ଜ୍ ବପୁ ରଇଲା । ୧୧ ତାକର୍ ଉପ୍ରେ ଗଟେକ୍ ରାଜା ସାସନ୍ କର୍ତ୍ତେରଇଲା । ସେ ପାତାଲେ ଦେକା ରକା କର୍ବା ଦୁଡ୍ । ଏବ୍ରି ବାସାଇ ତାର୍ ନାଉଁ ଅଇଲାନି ଅବଦନ୍ । ଆରି ଗିରିକ୍ ବାସାଇ ଅପଲିୟନ୍ । ତାର୍ ଅରଡ୍ ଅଇଲାନି କୁରୁପ୍ନାସ୍ କର୍ବା ଲକ୍ ।

୧୨ ପର୍ତୁମର୍ ତର୍ ଲାଗ୍ବା ଦୁକ୍ କସ୍ଟ ସାରଲା । ତାର୍ପତେ ଆରି ଦୁଇଟା ଅଦିକ୍ ଦୁକ୍ କସ୍ଟ ଅଇବାଟା ଆଇଲାନି ।

୧୩ ତାର୍ପଚେ ଚଅ ଲମରର ଦୁଡ଼ ତାର୍ ମଇରି ପୁକ୍ଲ । ଆରି ଏଦେ ଦେକା ! ପର୍ମେସର୍ ମୁଆଁଚେ ରଇବା ସୁନା ବେଦିର୍ ଚାରିଟା କନେଅନି ମୁଇ ଗଟେକ୍ ସବଦ୍ ସୁନୁଲି । ୧୪ ସେ ସବଦ୍ ଚଅ ଲମର ଦୁଡ଼କେ କଇଲା, ବଡ଼ ଗାଡ଼ ଇଉପର୍ଟିସ୍ ଗାଡେ, ବାନ୍ଦି ସଙ୍ଗଇବା ଚାରିଟା ଦୁଡ଼ମନ୍କେ ମୁକ୍ଲାଇଦେସ୍ । ୧୫ ଚାର୍ଟା ଦୁଡ଼ମନ୍କେ ମୁକ୍ଲାଇଲା । ଗୁଲାଇ ମୁନୁସ୍ ଜାତିର୍ ତିନ୍ ବାଗେଅନି ଗଟେକ୍ ବାଗ୍କେ ମରାଇବାକେ ସେମନ୍କେ ତିଆର୍ କରି ସଙ୍ଗଇରଇଲା । ଏ ସମାନ୍ ବରସର୍, ସମାନ୍ ମାସର୍, ସମାନ୍ ଦିନର୍, ସମାନ୍ ଗଁଟାର୍ପାଇ ସେମନ୍କେ ସଙ୍ଗଇରଇଲା । ୧୬ ତାର୍ପଚେ ଗଟେକ୍ ବଡ଼ଦଲ୍ ଅଇକରି ଗଡ଼ାଲଗେ ଆଇତେ ରଇବା ସନିଅମନ୍ ଜନଲକ୍ମନ କି ଦୁଇସ ଲକିଅ ଲକ୍ମନ ଆତଡ଼ ବଲି ସେମନ୍ କଇଲାଇ, ସେଟା ଦେକ୍ଲି । ୧୭ ମୁଇ ମର୍ ଦରସନେ ଗଡ଼ାମନ୍କେ ଆରି ତାର୍ ଚାଲାଉମନ୍କେ ଦେକ୍ଲି । ତାକର୍ ସାଞ୍ଜୁମନ୍ ଜଇପାରା ରଙ୍ଗ୍ ଆରି ନିଲି ପାରା ନିଲିଆ, ଅଲ୍ଲଦି ପାରା ରଇଲା । ସେ ଗଡ଼ା ମନର୍ ମୁଣ୍ଡ୍ ସିଅଁମନର୍ ମୁଣ୍ଡ୍ ପାରା ରଇଲା । ଆରି ତାକର୍ ଟଣ୍ଡେଅନି ଜଇ ଦୁଆଁ ଆରି ରକଡ଼ ପାରାଟା ବାରଇତେରଇଲା । ୧୮ ଗୁଲାଇ ମୁନୁସ୍ ଜାତିର୍ ତିନ୍ବାଗେ ଅନି ଗଟେକ୍ ବାଗ୍ ସେ ତିନ୍ଟା ମର୍ଡିରୁଲାଗି ମରିଗାଲାଇ । ଗଡ଼ାମନର୍ ଟଣ୍ଡେଅନି ଆଇବା ଜଇ ଦୁଆଁ ଆରି ଗନ୍ଧପାରା ତିନ୍ଟା ମର୍ଡି ଅଇଲା । ୧୯ ଗଡ଼ାମନର୍ ବପୁ ତାକର୍ ଟଣ୍ଡେ ଆରି ତାକର୍ ଲେଞ୍ଜେ ମିସିକରି ରଇଲା । ତାକର୍ ଲେଞ୍ଜ୍ ମୁଣ୍ଡ୍ ରଇବା ସାଁପମନର୍ ପାରା ରଇଲା । ସେଟାସଙ୍ଗ୍ ସେମନ୍ ଲକ୍ମନ୍କେ ମାର୍ଡେତେରଇଲାଇ । ୨୦ ଏ ମର୍ଡି ଅଇଲାର୍ ପାଇ ଜେଡ଼କି ରଇଲା ମନସ୍ ଜାତି, ଆତେ ତିଆର୍କରି ରଇବାଟାକେ ଚାଡ଼ଡ଼ନାଇ । ଗର୍ସଙ୍ଗ୍, ପାକ୍ନାସଙ୍ଗ୍, ପିତଲସଙ୍ଗ୍, ରୁପାସଙ୍ଗ୍ ଆରି ସୁନାସଙ୍ଗ୍ ତିଆର୍ କରିରଇବା ମୁର୍ଡିମନ୍କେ ଆରି ତୁମାମନ୍କେ ସେବା କର୍ବାଟା ସେମନ୍ ଚାଡ଼ଡ଼ନାଇ । ୨୧ ସେମନ୍ ଚରାଇବାଟା, ବେସିଆ କାମ୍ କର୍ବାଟା, ଜାଦୁ ମାତର୍ କର୍ବାଟା ଆରି ନର୍ ମରାଇବାଟା ମିସା ଚାଡ଼ଡ଼ନାଇ ।

## ୧୦

ସରଗର୍ ଦୁଡ଼ ଆରି ସାନ୍ଟା ବଇ

୧ ତାର୍ପଚେ ଏଦେ ଦେକା ! ସର୍ଗେଅନି ଆରି ଗଟେକ୍ ବଡ଼ ଦୁଡ଼ ଉଡ଼ରି ଆଇବାଟା ମୁଇ ଦେକ୍ଲି । ତାକେ ଗଟେକ୍ ବାଦଲ୍ ଗୁଡ଼ାଇରଇଲା ଆରି ମୁଣ୍ଡେ ଗଟେକ୍ ଇନ୍ଦ୍ରଦୁନୁ ଗୁଡ଼ିଆଇ ଅଇରଇଲା । ତାର୍ ମୁ ବେଲ୍ ପାରା ରଇଲା । ତାର୍ ଗଡ଼ମନ୍ ଜଇର୍ କୁନାଦି ପାରା ରଇଲା । ୨ ତାର୍ ଆତେ ଉଗାଡ଼ି ଅଇରଇବା ଗଟେକ୍ ସାନ୍ ବଇ ରଇଲା । ସେ ତାର୍ ଉଜାଗଡ଼ ସମ୍ପୁର୍ ବିଡ଼ରେ ସଙ୍ଗଇଲା ଆରି ଡେବ୍ରି ଗଡ଼ ସୁକ୍ଲା ବୁର୍ସ୍ ସଙ୍ଗଇଲା । ୩ ସେ ଆଉଲି ଅଇଲାକେ ସିଅଁମନ୍ ଅଡ଼ରୁଲା ପାରା ସୁନିଅଇଲା । ସେ ଡାକ୍ଲା ପଚେ, ସାଡ଼ଟା ଗଡ଼ଗଡ଼ିମନ୍ ଅଡ଼ରିକରି କଇଲାଇ । ୪ ସେମନ୍ କାତା ଅଇଲା ଦାପ୍ରେ ମୁଇ ଲେକ୍ବାକେ ଆରାମ୍ ଅଇରଇଲି । ମାତର୍ ସର୍ଗେଅନି ଗଟେକ୍ ସବଦ୍ ସୁନୁଲି, ସାଡ଼ଟା ଗଡ଼ଗଡ଼ିମନ୍ କଇଲାଟା କେ ନାଜାନୁଲାପାରା ସଙ୍ଗ । ସେଟା ଲେକ୍ନାଇ । ୫ ତାର୍ପଚେ ମୁଇ ଆଗ୍ଟୁ ଦେକିରଇବା ଦୁଡ଼ ଜେ କି ସମ୍ପୁରେ ଆରି ସୁକ୍ଲା ପଦାଇ ଚିଆ ଅଇରଇଲା, ସେ ତାର୍ ଉଜା ଆଡ଼ ସରଗ୍ବାଟେ ଲାମାଲଲା । ୬ ପର୍ମେସରର୍ ନାଉଁ ଦାରି ସେ ଗଟେକ୍ ସପଡ଼ କଲା । ପର୍ମେସର୍ କାଲ୍ କାଲ୍ ଜୁଗ୍ ଜୁଗ୍ ବର୍ସି । ସେ ସର୍ଗେ ରଇବାଟା, ଦର୍ଡନିଡେଇ ରଇବାଟା ଆରି ସମ୍ପୁରେ ରଇବା ସବୁଜାକ ତିଆର୍ କଲା । ସେ ଦୁଡ଼ କଇଲା, “ଆରି ଅଲ୍‌ସମ୍ ନ ଅଏ ।” ୭ ମାତର୍ ଜେଡେବେଲେ ସାଡ଼ ଲମର୍ ଦୁଡ଼ ତାର୍ ମଇରି ପୁକ୍ସି, ସେଡ଼କିବେଲେ, ପର୍ମେସର୍ କାକେ ନ ଜାନାଇରଇବା ତାର୍ ମନ୍ କଲାଟା ପୁରାପୁରୁନ୍ ସିଦ୍ କର୍ସି । ଏଟା ସେ ତାର୍ ଦାଙ୍ଗ୍ଡାମନ୍କେ ଆରି

ବବିସଦ୍‌ବକ୍ତାମାନଙ୍କେ ସେ ଆଗତୁ ଜାନାଇରଇଲା । ଠ ତାର୍‌ପତେ ସର୍‌ଗେଅନି ଜନ୍ ସବଦ୍‌ ମର୍‌ସଙ୍ଗ୍ କାତା ଅଇତେରଇଲା, ସେଟା ଆରିତରେକ୍ ମକେ କଇଲା “ଜାଆ, ସମ୍‌ଦୁରେ ଆରି ସୁକ୍‌ଲା ଜାଗାଇ ଚିଆଅଇରଇବା ଦୁତର୍‌ ଆତେଅନି ଉଗାତି ଅଇରଇବା କାଗଜ୍‌ ବେଟ୍ ।” ୯ ମୁଇ ଦୁତର୍‌ ଲଗେ ଗାଲି ଆରି ସାନ୍‌ଟା କାଗଜ୍‌ ମକେ ଦେ ବଲି କଇଲି । ସେ ମକେ କଇଲା “ଏଟା ନେଇକରି କାଆ । ତର୍‌ ପେଟେ ଏଟା ପିତା ଅଇସି । ମାତର୍‌ ତର୍‌ ଟଣ୍ଡେ ସେଟା ମୁ ପାରା ମୁନ୍‌ହୁର ରଇସି ।” ୧୦ ତେଇ ମୁଇ ଦୁତର୍‌ ଟାନେଅନି ସାନ୍‌ଟା କାଗଜ୍‌ ନେଲି ଆରି କାଇଲି । ସେଟା ମର୍‌ ଟଣ୍ଡେ ପାକାଇଲାକେ ମୁ ପାରା ସୁଆଦ୍‌ ରଇଲା । ମାତର୍‌ ଗିଲ୍‌ଲା ପତେ ପେଟ୍ ବିଡ଼ରେ ପିତା ଅଇଗାଲା । ୧୧ ତାର୍‌ପତେ ମକେ କଇଲା, “ସବୁ ରାଜାମନର୍‌ ବିସଇ, ବାସାମନର୍‌ ବିସଇ, ବସ୍‌ର୍‌ ବିସଇ, ଆରି ରାଇଜର୍‌ ବିସଇ, ଏ ସବୁଜାକର୍‌ ଉପ୍‌ରେ ପର୍‌ମେସରର୍‌ କବର୍‌ ତୁଇ ଆରିତରେକ୍ ଜାଇ ଜାନାଇବାର୍‌ ଆତେ ।”

## ୧୧

### ଦୁଇଟା ସାକି

୧ ତାର୍‌ପତେ ମକେ ନାପ୍‌ବା ଡାଙ୍ଗ୍ ପାରା ତ୍ରିସବା ଡାଙ୍ଗ୍ ଗଟେକ୍ ଦିଆଅଇଲା । “ଜାଆ ଆରି ପର୍‌ମେସରର୍‌ ମନ୍ଦିର୍‌ ଆରି ବେଦି ନାପ୍ । ମନ୍ଦିରେ ପାର୍‌ତନା କର୍‌ବା ଲକ୍‌ମନ୍‌କେ ଏଜିକରି ଆଉ ।” ୨ \*ମାତର୍‌ ମନ୍ଦିର୍‌ ବାଇରେ ରଇବା ଡାଣ୍ଡୁ ନାପ୍‌ନାଇ । କାଇକେବଇଲେ ସେ ଜାଗା ଜିଉଦି ନ ଅଇଲା ଲକ୍‌ମନ୍‌କେ ଦିଆଅଇଲା ଆତେ । ସେମନ୍‌ ସୁକ୍‌ଲ୍‌ ନଅରେ ରଇ ୪୨ ମାସ୍‌ ଜାକ ସେ ନଅର୍‌କେ ଅସୁକଲ୍‌ କରିଦେବାଇ । ୩ ବାସତା ପିନ୍ଦିରଇବା ଦୁଇଟା ସାକିମନ୍‌କେ ମୁଇ ପାଟାଇବି । ସେ ବାରସ ସାଟେଦିନ୍‌ ମୁଇ ସେମନ୍‌କେ କଇଲାଟା ଜାନାଇବାଇ ।

୪ ସେ ଦୁଇଟା ସାକିମନ୍‌ ଜଗତର୍‌ ମାପ୍‌ରୁର୍‌ ମୁଆଟେ ଚିଆଅଇବା ଜିଡ଼ ଗର୍‌ ଆରି ଦୁଇଟା ବଡ଼ି ଅଇଆଟଡ଼ । ୫ କେ ଜଦି ସେମନର୍‌ ଅନିଆଇ ଦେକି ମାର୍‌ବାକେ ଚେସ୍‌ଟା କର୍‌ବାଇ, ତାକର୍‌ ଟଣ୍ଡେଅନି ଜଇ ବାର୍‌କରାଇ ତାକର୍‌ ବିରଦିମନ୍‌କେ ବିନାସ୍‌ କର୍‌ବାଇ । ଏନ୍ତାରି ଜେ ସେମନକେ ମାର୍‌ବାକେ ଚେସ୍‌ଟା କର୍‌ବାଇ, ସେମନ୍‌ ମରିଜିବାଇ । ୬ ସେମନ୍‌ ପର୍‌ମେସରର୍‌ କବର୍‌ ଜାନାଇବାବେଲେ ଜେନ୍ତାରି କି ବର୍‌ସା ନଅ ବଲି ବାଦଲ୍‌କେ ଡାବିକରି ସଙ୍ଗାଇବାକେ ତାକର୍‌ ଅଦିକାର୍‌ଆତେ । ପାଜ୍‌ରା ପାନିମନ୍‌କେ ବନି କର୍‌ବାକେ ମିସା ତାକର୍‌ ଅଦିକାର୍‌ ରଇସି । ଜେତେବେଲେ ମନ୍‌କଲେ, ସେତେବେଲେ ଜନ୍ ରକାମ୍‌ ମର୍‌ଡ଼ି ଦର୍‌ତନି ଉପ୍‌ରେ କେତେତର୍‌ ମିସା କରି ବାଦାଦେବାକେ, ସେମନର୍‌ ଅଦିକାର୍‌ ଆତେ । ୭ \*ସେମନ୍‌ ତାକର୍‌ କବର୍‌ ଜାନାଇଲା ପତେ, ଗଟେକ୍ ବେସି ତର୍‌ ଲାଗ୍‌ବା ପସୁ ପାତାଲେଅନି ବାରଇଆସି ତାକର୍‌ ବିରୁଦେ ଜୁଇଦ୍‌ କର୍‌ସି । ସେ ପସୁ ସେମନକେ ଆରାଇକରି ମରାଇଦେଇସି । ଠ ବଡ଼ ନଅର୍‌ ସାଇର୍‌ ମଜାଇ ତାକର୍‌ ମଲା ଗାଗଡ଼ ରଇସି । ସେ ବଡ଼ ନଅରେ ତାକର୍‌ ମାପରୁ କୁରୁସ୍‌କାଟେ ସର୍‌ପି ଅଇରଇଲା । ସେ ନଅର୍‌ ସଦମ୍‌ କି ମିସର୍‌ ରାଇଜ୍‌ ପାରା ଆତେ । ୯ ତିନ୍ ଦିନ୍ ଆରି ଅଦା ଦିନର୍‌ପାଇ ସବୁ ରାଇଜର୍‌, ସବୁ ଦେସର୍‌, ସବୁ ବସ୍‌ର୍‌, ସବୁ ଜାତିର୍‌ ଆରି ସବୁ ବାସାର୍‌ ଲକ୍‌ ଦେକ୍‌ବାଇ । ସେ ମଲା ମତାମନ୍‌କେ ତପ୍‌ବାକେ ସେମନ୍‌ ରାଜି ନଅଡ଼ । ୧୦ ଏ ଦୁଇ ଲକ୍‌ ମଲାପାଇ, ଜଗତର୍‌ ଲକ୍‌ ସାର୍‌ଦା ଅଇବାଇ । ଏ ଦୁଇଟା ବବିସଦ୍‌ବକ୍ତାମନ୍‌ ଜଗତେ ବେସି ଦୁକ୍‌କସ୍‌ଟ ଆନାଇଲାଜେ ଲକ୍‌ମନ୍‌ ସାର୍‌ଦା ଅଇବାଇ ଆରି ସାଇସାର୍‌ଦା ଅଇକରି ସାର୍‌ଦା ଅଇବା ଜିନିସମନ୍‌ ଦିଆନିଆ ଅଇବାଇ । ୧୧ ତିନ୍‌ଦିନ୍‌ ଆରି ଅଦା ଦିନ୍ ପତେ ଜିବନ୍‌ ଦେବା ଗଟେକ୍ ପୁଣ୍ଡା ପର୍‌ମେସର୍‌ ଟାନେଅନି ଆସି

\* ୧୧:୨ ୧୧:୨ ଲୁକ୍ ୨୧:୨୪      \* ୧୧:୭ ୧୧:୭ ପର୍କାସିତ ୧୩:୫-୭:୧୭:୮

ତାକର ବିତ୍ତରେ ପୁରଲା । ଆରି ଏଦେ ଦେକା ! ସେମନ୍ ଉତ୍ତଲା । ସେମନ୍‌କେ ଦେକଲା ଲକ୍ମନ ବେସି ତରିଗାଲା । ୧୨ ତାରପତେ ସରଗେ ଅନି ଗଟେକ୍ ଜବର ସବଦ୍ ବବିସତ୍‌ବକ୍‌ତାମନ୍‌କେ କଇଲା, “ଉପରେ ଆସା ।” ଆରି ତାକର ବିରଦିମନ୍ ଦେକ୍‌ବାବେଲେ ସେମନ୍ ଗଟେକ୍ ବାଦଲ୍ ଉପରେ ବସି ସରଗେ ଗାଲା । ୧୩ \*ସେତ୍‌କିବେଲେ, ଏଦେ ଦେକା ! ବେସି ଦର୍ତ୍ତନି ତୁଲ୍‌ବୁଲି ଗାଲା । ନଅରଦ୍ ଦସ୍‌ବାଗେଅନି ଗଟେକ୍ ବାଗ୍ କୁରୁପ୍‌ନାସ୍ ଅଇଗାଲା । ଆରି ତେଇ ୭,୦୦୦ ଲକ୍ମନ ମରିଗାଲା । ବାକି ରଇଲା ଲକ୍ମନ ତ୍ରିକରି ସରଗେ ରଇବା ପର୍ମେସରର୍ ବପୁକେ ତାକ୍‌ପୁଟା କଲା । ୧୪ ବେସି ତର୍ ଅଇବା ଦୁଇ ଲମର୍ ଦୁକ୍‌କସ୍‌ଟ ସାରିଗାଲା । ମାତର୍ ଏବେ ଦେକା ପଚର୍‌ଟା ଦାପ୍‌ରେ ଆଇସି ।

**ସାତ୍‌ଟା ମଇରି**

୧୫ ତାରପତେ ସାତ୍ ଲମର୍ ଦୁତ୍ ତାର୍ ମଇରି ପୁକ୍‌ଲା । ଆରି ଏଦେ ଦେକା ! ସରଗେ ଜବର୍ ଆଉଲି ଅଇବାଟା ସୁନିଅଇଲା । ଜଗତ୍‌କେ ସାସନ୍ କର୍‌ବା ବପୁ ଆମର୍ ମାପୁରୁ ଆରି ତାର୍ ମସିଅକେ । ସେ କାଲ୍ କାଲ୍ ଜୁଗ୍ ଜୁଗ୍ ସାସନ୍ କର୍‌ସି । ୧୬ ତାରପତେ ପର୍ମେସରର୍ ମୁଆଟେ ବସ୍‌ବା ଜାଗାଇ ବସିରଇବା ୨୪ ଟା ପାର୍‌ତିନ୍‌ମନ୍ ଡାଣ୍ଡାସନ୍ ପଡି ତାକେ ଜୁଆର୍ କଲା । ୧୭ ସେମନ୍ ଏନ୍ତାରି କଇଲା “ମାପୁରୁ ପର୍ମେସର୍ ସବୁଟାମେଅନି ଉପରେ ଆଟେ । ସେ ସବୁବେଲେ ରଇଲା ଆରି ରଇସି ମିସା । ତର୍ ବଡ୍ ବପୁ ସଙ୍ଗ୍ ତୁଇ ସାସନ୍ କର୍‌ବାକେ ଆରାମ୍ କଲୁସ୍ । ଆରାମ୍ କଲାପାଇ ଆମେ ତକେ ଜୁଆର୍ କଲୁନି । ୧୮ ଜିଉଦି ନ ଅଇଲା ଲକ୍ମନ ବେସି ରିସା ଅଇଜାଉରଇଲା ।” କାଇକେବଇଲେ ଏବେ ରିସା ଅଇବା ପାଲି ତମର୍‌ଟା । ଏବେ ମଲା ଲକ୍ମନର୍ ବିଚାର୍ ଅଇସିବେ । ବବିସତ୍‌ବକ୍‌ତାମନ୍ ଜେ କି ତମର୍ ଦାଙ୍ଗ୍‌ଡା ଅଇରଇଲା, ସେମନ୍‌କେ ପୁରୁସ୍‌କାର୍ ଦେବା ବେଲା କେଟ୍‌ଲା । ତକେ ଜେତ୍‌କି ନାମ୍‌ବା ଲକ୍, ବଡ୍‌ସାନ୍ ସମାନ୍ ଅଇକରି ଦର୍ତ୍ତନିକେ ବିନାସ୍ କରିରଇବା ଲକ୍ମନ୍ ଏବେ ନିଜେ ବିନାସ୍ ଅଇବାଇ । ୧୯ \*ସରଗେ ରଇବା ପର୍ମେସରର୍ ମନ୍ଦିର୍ ଉଗାଡି ଅଇଲା ଆରି ତେଇ ରାଜିନାମାର୍ ପେଡି ଡିସ୍‌ଲା । ତାରପତେ ବିଜ୍‌ଲି ଜଟ୍‌କଲା, ଗଡ୍‌ଗଡି ମାର୍‌ଲା ଦର୍ତ୍ତନି ତୁଲ୍‌ବୁଲ୍‌ଲା ଆରି ବେସି କାରାପାକ୍‌ନା ମିସା ମାର୍‌ଲା ।

**୧୨**

**ମାଇଜି ଆରି ସାଁପ୍**

୧ ତାରପତେ ବାଦ୍‌ଲେ ଗଟେକ୍ କାବାଅଇଜିବା ଚିନ୍ ଡିସ୍‌ଲା । ଆରି ଏଦେ ଦେକା ! ଜନ୍ ବିତ୍ତରେ ଗଟେକ୍ ମାଇଜି ଚିଆଅଇରଇବାଟା ଡିସ୍‌ଲା । ତାର୍ ଲୁଗା ବେଲ୍‌ପାରା ଜକ୍‌ଜକି ଜାଇତେରଇଲା । ୨ ସେ ମାଇଜି ବାର୍‌ଟା ତାରା ରଇବା ମୁକୁଟ୍ ପିନ୍‌ରଇଲା । ସେ ନିକ ଅଇବା ବେଲା ଲଗେ କେଟିରଇଲା । ଆରି ଦୁକାସୁକାର୍‌ଲାଗି କାନ୍ଦିତେରଇଲା ।

୩ ଆରି ବାଦ୍‌ଲେ କେବେ ଦେକି ନ ରଇବା ବିନ୍ ରକାମ୍ ଚିନ୍ ଡିସ୍‌ଲା । ଆରି ଏଦେ ଦେକା ! ସାତ୍‌ଟା ମୁଣ୍ଡ୍ ଆରି ଦସ୍‌ଟା ସିଙ୍ଗ୍ ରଇବା ଗଟେକ୍ ବଡେଟା ଅଇ ରଙ୍ଗ୍ ରଇଲା ଅସୁର୍ ସାଁପ୍ ଡିସ୍‌ଲା । ତାର୍ ସାତ୍‌ଟା ମୁଣ୍ଡେ ସାତ୍‌ଟା ମୁକୁଟ୍ ରଇଲା । ୪ ବାଦ୍‌ଲେ ରଇବା ତିନ୍ ବାଗେଅନି ଗଟେକ୍ ବାଗର୍ ତାରାମନ୍‌କେ ତାର୍ ଲେଞ୍ଜ୍ ଜିକିନେଇକରି ଦର୍ତ୍ତନିଟାମେ ପିଙ୍ଗିଦେଲା । ସେ ମାଇଜି ନିକ ଅଇଲାଦାପ୍‌ରେ ତାର୍ ପିଲାକେ କାଇବି ବଲି ମାଇଜିର୍ ମୁଆଟେ ଚିଆଅଇଲା । ୫ ତାରପତେ ସେ

\* ୧୧:୧୩ ୧୧:୧୩ ପରକାସିତ ୬:୧୨:୧୬:୧୮ \* ୧୧:୧୯ ୧୧:୧୯ ପରକାସିତ ୮:୫:୧୭:୧୮; ପରକାସିତ ୧୭:୨୧

ମାଈଜି ଗଟେକ୍ ପିଲାକେ ଜନମ୍ ଦେଲା । ସେ ପିଲା ଜଗତର୍ ସବୁ ରାଇଜ୍ ଗଟେକ୍ ଲୁଆର୍ ତାଙ୍ଗ୍‌ସଙ୍ଗ୍ ସାସନ୍ କରସି । ମାତର୍ ଚାତାଈକରି ପର୍ମେସର୍ ବସ୍‌ବା ଜାଗାଇ ନିଆଅଇଲା ।<sup>୬</sup> ପର୍ମେସର୍ ତାର୍‌ପାଇ ତିଆର୍ କରି ସଙ୍ଗିରଇବା ମରୁବୁଇଁ ବାଟେ ସେ ମାଈଜି ପାଲାଇଲା । ତେଇ ୧,୨୬୦ ଦିନ୍ ଜାକ ତାକେ ଜତନ୍ ନିଆଅଇସି ।

<sup>୭</sup> ଧର୍ତ୍ତପତେ ସରଗ୍‌ପୁରେ ଗଟେକ୍ ଜୁଇଦ୍ ଆରାମ୍ ଅଇଲା । ମିକାଏଲ୍ ଆରି ତାର୍‌ଦୁତ୍‌ମନ୍ ସେ ଅସୁର୍ ଆରି ତାର୍‌ ଦୁତ୍‌ମନ୍‌ର୍ ସଙ୍ଗ୍ ଜୁଇଦ୍ କଲାଇ । « ସେମନ୍ ସେ ଅସୁର୍‌କେ ଆରାଇଲାଇ । ତାକେ ଆରି ତାର୍‌ ଦୁତ୍‌ମନ୍‌କେ ସର୍ଗେ ରଇବାକେ ଆଦେସ୍ ନ ରଇଲା ।<sup>୮</sup> ସେ ଅସୁର୍ ସାଁପ୍‌କେ ବାଇରେ ବେଟି ପିଙ୍ଗିଦେଲାଇ । ସେ ଅସୁର୍‌ସାଁପ୍ ଦିଆବଲ୍ ବଲି ତାକ୍‌ବା ସାଁପ୍ ରଇଲା । ଜେ କି ଗୁଲାଇ ଜଗତ୍ ନାଡାଇରଇଲା । ତାର୍‌ ଦୁତ୍‌ମନ୍‌କେ ଆରି ତାକେ ମିସ୍‌ତେ ଦରତନି ଉପ୍‌ରେ ପିଙ୍ଗିଦେଲାଇ ।

<sup>୧୦</sup> ତାର୍‌ପତେ ସର୍ଗେ ଗଟେକ୍ ଜବର୍ ସବଦ୍ ଅଇବାଟା ମୁଇ ସୁନ୍‌ଲି । ସେ ସବଦ୍ କଲା “ଏବେ ଲକ୍‌ମନ୍‌ପାଈ ଅଇରଇବା ପର୍ମେସର୍‌ର୍ ମୁକ୍ତି ସିଦ୍ ଅଇଲାଆଟେ । ରାଜା ଇସାବେ ତାର୍‌ ବପୁ ସେ ଦେକାଇଆଟେ । ତାର୍‌ ମସିଅ, ତାର୍‌ ଅଦିକାର୍ ଦେକାଇଲା ଆଟେ ।” କାଇକେବଇଲେ, ଜେ କି ପର୍ମେସର୍‌ର୍ ମୁଆଟେ ଚିଆଅଇ ଆମର୍ ବାଇବଇନିମନ୍‌କେ ଦସ୍ ଦେଇତେରଇଲା, ତାକେ ସର୍ଗେଅନି ବାର୍‌କରାଇ ଦେଲାଆଟେ ।<sup>୧୧</sup> ମେଣ୍ଡାପିଲାର୍ ବନିର୍‌ଲାଗି ଆରି ସେମନ୍ ଜାନାଇରଇବା ସତର୍ ଲାଗି ଆମର୍ ବାଇବଇନିମନ୍ ତାର୍‌ସଙ୍ଗ୍ ଜୁଇଦ୍ କରି ଜିତ୍‌ଲାଇ । ସେମନ୍ ମରିଜିବାଜାକ ଜାନିରଇଲେ ମିସା ବିସ୍‌ବାସ୍ କର୍ତେରଇଲାଇ ।<sup>୧୨</sup> ତେବର୍‌ପାଇ, ତମେ ସର୍ଗେ ରଇବା ଜେତ୍‌କି ଲକ୍ ସାର୍‌ଦା ଉଆ । ମାତର୍ ଦରତନିତେଇ ଆରି ସମ୍‌ଦୁରେ ରଇବା ଲକ୍‌ମନ୍ ତମର୍‌ପାଇ କେତେ ଇନସ୍‌ତାର୍ ଦିନ୍ ଆଇସି । କାଇକେବଇଲେ ତମର୍ ବିତ୍‌ରେ ସଇତାନ୍ ଉତ୍‌ରି ଆଇଲାଆଟେ । ସେ ବେସି ରିସାଅଇଆଟେ । କାଇକେବଇଲେ ସେ ଏବେ ବେଲା ଚନେକ୍‌ସେ ଆଟେବଲି ଜାନିଆଟେ ।

<sup>୧୩</sup> ଅସୁର୍‌ସାଁପ୍ ମକେ ଦରତନିଲଗେ ପିଙ୍ଗିଦେଲାଇ ବଲି ଜାନିକରି ପିଲାକେ ଜନମକରିରଇବା ମାଈଜିର୍ ପର୍ ପର୍ ଜିବାର୍‌ଦାର୍‌ଲା ।<sup>୧୪</sup> ମରୁବାଲି ବୁର୍‌ ତାର୍‌ ଜାଗାଇ କେଟ୍‌ବାକେ ଗଟେକ୍ ବଡ୍ ଗିଦର୍ ଦୁଇଟା ତେନା ତାକେ ଦିଆଅଇଲା । ତେଇ ଅସୁର୍ ସାଁପ୍ ତାକେ ନ ମିଲାଇକରି କାଇଟା ନ କଲାପାରା ତିନ୍ ବରସ୍ ଅଦା ଦିନ୍ ତାର୍‌ ଜତନ୍ ନିଆଅଇସି ।<sup>୧୫</sup> ତାର୍‌ପତେ ସେ ଅସୁର୍‌ସାଁପ୍ ତାର୍‌ ଚଣ୍ଡେଅନି ବନିଆ ଅଇଜିବା ଏଡ୍‌କି ପାନି ବାର୍‌କରାଇଲା । ଜେନ୍ତାରି କି ସେ ପାନି ସେ ମାଈଜିକେ ବୁଝିଲାଇ ନେଇସି ।<sup>୧୬</sup> ମାତର୍ ଦରତନି ସେ ମାଈଜିକେ ସାଇଜ୍ କଲା । ଅସୁର୍‌ସାଁପ୍‌ର୍ ଚଣ୍ଡେଅନି ଆଇଲାପାନି ତାର୍‌ ନିଜର୍ ଚଣ୍ଡପାଡିକରି ଗିଲିଦେଲା ।<sup>୧୭</sup> ସେଟାର୍‌ପାଇ ସେ ଅସୁର୍‌ସାଁପ୍ ବେସି ରିସାଅଇଗାଲା । ଆରି ସେ ମାଈଜିର୍ ବାକିରଇବା ନାଡିଡିତି ମନର୍ ସଙ୍ଗ୍ ଜୁଇଦ୍ କର୍‌ବାର୍ ଆଇଲା । ସେମନ୍ ପର୍ମେସର୍‌ର୍ ଆଦେସ୍ ମାନିକରି ଜିସୁ ଜାନାଇରଇବା ସତ୍ ଦାରିରଇବାଇ ।<sup>୧୮</sup> ଆରି ସେ ଅସୁର୍‌ସାଁପ୍ ସମ୍‌ଦୁର୍‌ର୍ ବାଲିଉପ୍‌ରେ ଜାଇ ଚିଆ ଅଇଲା ।

### ୧୩

#### ଦୁଇଟା ପସୁ

<sup>୧</sup> ଧର୍ତ୍ତପତେ ମୁଇ ସମ୍‌ଦୁର୍ ବିତ୍‌ରେ ଅନି ଗଟେକ୍ ପସୁକେ ବାରଇଆଇବାଟା ଦେକଲି । ତାକେ ଦସ୍‌ଟା ସିଙ୍ଗ୍ ଆରି ସାଡ୍‌ଟା ମୁଣ୍ଟ୍ ରଇଲା । ତାର୍‌ ସବୁ ସିଙ୍ଗେ

\* ୧୨:୭ ୧୨:୭ ଜିଉଦା ୧:୯    \* ୧୨:୯ ୧୨:୯ ଲୁକ୍ ୧୦:୧୮    \* ୧୩:୧ ୧୩:୧ ପରକାସିତ ୧୭:୩,୭-୧୨

ଗଟେକ୍ ଗଟେକ୍ ମୁକୁଟ୍ ରଇଲା । ଆରି ମୁଣ୍ଡ ଉପରେ ପରମେସରକେ ନିନ୍ଦା କଲା ପାରା ବିନ୍ ବିନ୍ ରକାମର୍ ସାତ୍ଟା ନାଉଁ ରଇଲା । <sup>୨</sup> ସେ ପସୁ ଚିତାବାଗ୍ ପାରା ରଇଲା । ତାରପାଦ୍ ବାଲୁଟ୍ ପାଦ୍ପାରା, ତାର ଟଣ୍ଡ୍ ସିଅର୍ ଟଣ୍ଡ୍ ପାରା ରଇଲା । ଆରି ସେ ଅସୁରସାପ୍, ସେ ପସୁକେ ନିଜର୍ ବପୁ, ସିଆସନ୍ ଆରି ତାର ବଡ୍ ଅଦିକାର୍ ଦେଲା । <sup>୩</sup> ସେ ପସୁର ଦସଟା ମୁଣ୍ଡେଅନି ଗଟେକ୍ ମୁଣ୍ଡ୍ ବେସି ମାଡ୍ ଅଇରଇଲାପାରା ତ୍ରିସ୍ତେତରଇଲା । ମାତର୍ ସେଟା ନିକ ଅଇଲା । ଗୁଲାଇ ଜଗତର୍ ଲକ୍ମନ୍ କାବାଅଇଜାଇକରି ତାର୍ ପଟେ ପଟେ ଗାଲାଇ । <sup>୪</sup> ଆରି ନିଜର୍ ଅଦିକାର୍ ସେ ପସୁକେ ଦେଲାକେ ସବୁ ଲକ୍ ଅସୁର ସାପ୍କେ ଜୁଆର୍ କଲାଇ । ଏନ୍ତାରି କଇକରି ମିସା ସେ ପସୁକେ ସେମନ୍ ଜୁଆରକଲାଇ । ଏ ପସୁର ପାରା ଆରି କେ ନାଇ । ତାର୍ ବିରଦେ ଜୁଇଦ୍ କରି କେ ମିସା ଜିତି ନାପାରଡ୍ ।

<sup>୫</sup> ସେ ପସୁକେ ୪୨ ମାସଜାକ ଅଦିକାର୍ ସଙ୍ଗାଇବାକେ ଆରି ପରମେସରର୍ ବିରୁଦେ ବଡ୍ପନ୍ କାତା କଇବାକେ ପରମେସର୍ ଆଦେସ୍ ଦେଲା । <sup>୬</sup> ସେ ପସୁ ପରମେସରର୍ ନାଉଁକେ, ସେ ରଇବା ଜାଗାକେ ଆରି ସର୍ଗେ ରଇବା ସବୁକେ ସାଇପ୍ ଦେବାର୍ଦାରଲା । <sup>୭</sup> ପରମେସର୍ ଲକ୍ମନ୍ର ସଙ୍ଗ୍ ଜୁଇଦ୍ କରି ସେମନ୍କେ ଆରାଇବାକେ ତାକେ ଅଦିକାର୍ ଦିଆଅଇଲା । ସବୁ ବସ୍ତର୍ ଉପରେ, ରାଇଜର୍ ଉପରେ, ବାସା ଉପରେ ଆରି ଜାତିର୍ ପାଇ ତାକେ ଅଦିକାର୍ ଦିଆଅଇଲା । 「 ଦର୍ତ୍ତନିଟାନେ ରଇବା ସବୁଲକ୍ ତାକେ ଜୁଆରକରାଇ । ଜିବନ୍ ରଇବା ଲକ୍ମନ୍ର ବଇଟାନେ ନାଉଁ ଲେକାଅଇରଇବା ଲକ୍ମନ୍ସେ ତାକେ ଜୁଆର୍ ନ କରଡ୍ । କାଇଟା ତିଆର୍ ନ ଅଇରଇବା ଆଗ୍ତୁ ଲେକା ଅଇଜାଇରଇଲା । ସେ ବଇ ମରାଇଜାଇରଇବା ମେଣ୍ଡାପିଲାଟା । <sup>୯</sup> କାନ ରଇଲା ଲକ୍ ମନ୍ଦିଆନ୍ କରି ସୁନା । <sup>୧୦</sup> ପରମେସରର୍ ଜଜ୍ନା ଇସାବେ ଜାର୍ କର୍ମେ ବନ୍ଦିଗରେ ରଇବାର୍ ଆଟେ, ସେ ବନ୍ଦିଗରେ ଜାଇସି । ପରମେସରର୍ ଜଜ୍ନା ଇସାବେ ଜାର୍ କର୍ମେ କାଣ୍ଡାସଙ୍ଗ୍ ମରବାର୍ଆଟେ, ସେ କାଣ୍ଡାସଙ୍ଗ୍ ମାରାଇଅଇସି । ମାତର୍ ପରମେସରର୍ ଲକ୍ ବିସ୍ତବାସ୍ ଦାରି ମୁରଟିକରି ରଇବାର୍ଆଟେ ।

<sup>୧୧</sup> ଏଦେ ଦେକା ! ତାର୍ପଟେ ଦର୍ତ୍ତନି ଅନି ଆରିଗଟେକ୍ ପସୁ ବାରଇ ଆଇବାଟା ମୁଇ ଦେକ୍ଲି । ତାକେ ମେଣ୍ଡାପିଲାର୍ ସିଙ୍ଗ୍ପାରା ଦୁଇଟା ସିଙ୍ଗ୍ ରଇଲା ଆରି ଅସୁରସାପ୍ ପାରା କାତା କଇତେରଇଲା । <sup>୧୨</sup> ଆଗ୍ତୁର୍ ପସୁପାରା ତାକେ ମିସା ଅଦିକାର୍ ରଇଲା । ସେ ଅଦିକାର୍ ସଙ୍ଗ୍ ସେ ସେବା କର୍ତ୍ତେରଇଲା । ଜଗତେ ଆରି ଜଗତେରଇବା ସବୁ ଲକ୍ମନ୍କେ, ଆଗ୍ତୁର୍ ପସୁକେ ଜୁଆର୍ କରା ବଲି ତରାଇତେରଇଲା । ଏଡ୍କି ବିତ୍ରେ ପର୍ତୁମ୍ ପସୁର୍ ଗାଉ ସୁକିଜାଇତେରଇଲା ।

<sup>୧୩</sup> ପଟର୍ ପସୁ ବଡ୍ ବଡ୍ କାବା ଅଇଜିବା କାମ୍ମନ୍ କଲା । ଦର୍ତ୍ତନିଟାନେ ରଇବା ସବୁଲକ୍ ଦେକ୍ଲାପାରା ସର୍ଗେଅନି ଜଇ ବାରକରାଇତେରଇଲା । <sup>୧୪</sup> ପର୍ତୁମ୍ ପସୁର୍ ମୁଆଟେ କେତେକ୍ କେତେକ୍ କାବାଅଇଜିବା କାମ୍ମନ୍ କରବାକେ ତାକେ ଅଦିକାର୍ ରଇଲା । ସେ କାବା ଅଇଜିବା କାମ୍ମନ୍ ଲାଗି ଦର୍ତ୍ତନିତେଇ ରଇବା ସବୁ ଲକ୍ମନ୍କେ ନାଡାଇଲା । ପର୍ତୁମ୍ ପସୁ ଜେ କି କାଣ୍ଡାସଙ୍ଗ୍ ମାରି ରଇଲେ ମିସା ଜିଇ ରଇଲା, ତାକେ ଡାକ୍ପୁଟାର୍ପାଇ ଗଟେକ୍ ମୁରତି ତିଆରକରୁ ବଲି ସେ ଲକ୍ମନ୍କେ କଇଲା । <sup>୧୫</sup> ପଟର୍ ପସୁ ଆଗ୍ତୁ ତିଆର୍ କରିରଇବା ପସୁର୍ ମୁରତିତେଇ ପୁଣ୍ଡବାକେ ଅଦିକାର୍ ପାଇଲା । ଜେନ୍ତାରି କି ସେନ୍ତି କଲେ, ସେ ମୁରତି କାତା ଅଇକରି ତାକେ ଜୁଆର୍ ନ କରବା ସବୁଲକ୍କେ ମରାଇସି । <sup>୧୬</sup> ସେ ପସୁ ସାନ୍ ବଡ୍ ଲକ୍ମନ୍କେ, ସାଉକାର୍ ଆରି ଅରକିଡ୍ ଲକ୍ମନ୍କେ, ବନ୍ଦି ଆରି ମୁକ୍ତିରଇବା ଲକ୍ମନ୍କେ ଆରି ସବୁକେ ତାକର୍ ଉଜାଆତେ ନଇଲେ ତାକର୍ କାପାଲେ ଗଟେକ୍ ଚିନ୍ ଗଦ୍ବାକେ ତରାଇଲା । <sup>୧୭</sup> ଏ ଚିନ୍ ନ ଅଇତେ କେ ମିସା ଗେନା ବିକା କରି



ନାପାରୁଲାଇ । ଏ ଚିନ୍ ଅଇଲାନି, ସେ ପସୁର ନାଉଁ ନଇଲେ ସେ ନାଉଁ ବାଦଲିରଇବା ଲମର୍ ।

୧୮ ସେ ପସୁର ନମରର୍ ଅରଡ଼ ଗଟେକ୍ ଗିଆନ୍ ରଇବା ଲକ୍‌ସେ ଜାନିଅଇସି । କାଇକେବଇଲେ ସେ ନମର୍ ଗଟେକ୍ ଲକର୍ ନାଉଁର୍ ବାଦୁଲେ ଆଟେ । ସେ ନମର୍ ଅଇଲାନି ୨୭୭ ।

### ୧୪

ମେଣ୍ଡାପିଲାର୍ ସଙ୍ଗେ ଜିବାଲକ୍

୧ \*ତାରପଟେ ମୁଇ ସିୟନ୍ ପରବତେ ମେଣ୍ଡାପିଲା ଚିଆଅଇରଇବାଟା ଦେକ୍‌ଲି । ତାର୍ ସଙ୍ଗ୍ ୧୪,୪୦୦୦ ଲକ୍‌ମନ୍ ରଇଲାଇ । ତାକର୍ କାପାଲେ ମେଣ୍ଡାପିଲାର୍ ନାଉଁ ଆରି ତାର୍ ବାବାର୍ ନାଉଁ ଲେକିରଇଲାଇ । ୨ ଆରି ସର୍ଗେ ଅନି ମୁଇ ଗଟେକ୍ ସବଦ୍ ସୁନ୍‌ଲି । ସେଟା ଗଟେକ୍ ଜବର୍ ଗଡ଼ଗତି ଅଇ ବଡ଼ ସବଦର୍ ପାରା ଆରି ଜବର୍ ପାନି ଅଦରଲାପାରା ରଇଲା । ବିଣା ବାଜ୍‌ଲେ ସବଦ୍ ଅଇବା ଗିଡ଼ପାରା ସୁନି ଅଇଲା । ୩ ସେ ୧୪୪,୦୦୦ ଲକ୍‌ମନ୍ ବସ୍‌ବା ଜାଗାର୍ ଚାର୍ଟା ବୈରଇବା ପସୁମନର୍, ପାରଚିନ୍‌ମନର୍ ମୁଆଟେ ଚିଆଅଇଲାଇ । ସେମନ୍ ଗଟେକ୍ ନୁଆ ଗିଡ଼ କଇତେରଇଲାଇ । ସେମନ୍ ଆକା ସେ ଗିଡ଼ ଜାନିରଇଲାଇ । ସେମନ୍‌ସେ ମୁକ୍ତି ପାଇରଇବା ଲକ୍‌ମନ୍ । ୪ ସେମନ୍ ନିଜେ ସୁକଲ୍ ରଇଲାଇ । ମାଇଜି ମନର୍ ସଙ୍ଗ୍ ମିସାବିତା ଅଇକରି ନିଜକେ ଅସୁକଲ୍ ଅଇ ନ ରଇଲାଇ । ସେମନ୍ ପିଲାବେଣ୍ଡିଆ ପାରା ରଇଲାଇ । ସେମନ୍ ସବୁବେଲେ ମେଣ୍ଡାପିଲାର୍ ସଙ୍ଗ୍ ଜାଇତେରଇଲାଇ । ସେମନ୍ ମୁନୁସଜାତିର୍ ବିଡ଼ରେ ପର୍ତୁମ୍ ତର୍ ମୁକ୍ତି ପାଇକରି ପର୍ମେସରପାଇ ଆରି ମେଣ୍ଡାପିଲାର୍‌ପାଇ ନିଜକେ ସର୍ପି ଅଇଆଟଡ଼ । ୫ ସେମନ୍ କେବେ ମିସା ମିଡ଼ ନ କଅଡ଼ । କେ ମିସା ସେମନ୍‌କେ ଦସ୍ ଦେଇନାପାରେ ।

ତିନ୍‌ଟା ଦୁଡ଼ମନ୍

୨ ତାରପଟେ ମୁଇ ଆରିଗଟେକ୍ ଦୁଡ଼କେ ଆକାସେ ଉଡ଼ି ଜିବାଟା ଦେକ୍‌ଲି । ଏ ଜଗତର୍ ସବୁ ରାଇଜେଅନି, ବାସାଇଅନି, ବୈସେଅନି, ଜାତିଅନି ଆଇବା ସବୁ ଲକ୍‌ମନ୍‌କେ ଜାନାଇବା ପର୍ମେସରର୍ କେବେ ନ ସାର୍‌ବା ସୁବକବର୍ ଜାନାଇତେରଇଲା । ୩ ସେ ଆଉଲିଅଇକରି କଇଲା “ପର୍ମେସରକେ ଡାକ୍‌ପୁଟା କରା । ତାର୍ ବଡ଼ ବଡ଼ କାମର୍ ପାଇ ତାକେ ଆରାଦନା କରା । ଲକ୍‌ମନ୍‌କେ ବିଚାର୍ କର୍ବାକେ ତାର୍ ବେଲା କେଟ୍‌ଲାଆଟେ । ସରଗ, ଦର୍ତନି, ସମ୍‌ଦୁର୍, ଆରି ପାଜ୍‌ରା ପାନି ସବୁଜାକ ସେ ତିଆରକଲାଆଟେ, ତାକେ ଜୁଆର୍ କରା ।” ୮ \*ଆରି ଗଟେକ୍ ଦୁଡ଼ ପର୍ତୁମ୍‌ର୍ ଦୁଡ଼ ପଟେ ଗାଲା । ସେ କଇଲା “କୁରୁପନାସ୍ ଅଇଲା । ବେସି ଡାକ୍‌ପୁଟାରଇବା ବାବିଲନ୍ କୁରୁପନାସ୍ ଅଇଲା ।” ତେଇର୍ ଲକ୍‌ମନ୍ ବିନ୍ ଦେସର୍ ଲକ୍‌ମନ୍‌କେ ତାକର୍ ମଦ୍ କୁଆଇଲାଇ । ତାର୍ ଅରଡ଼ ଅଇଲାନି, ତାକର୍ ପାରା କାରାପ୍ ଚଲାଟଲ୍‌ତି କରାଇଲା । ୯ ସେ ଦୁଇଟା ଦୁଡ଼ମନର୍ ପଟେପଟେ ଆରି ଗଟେକ୍ ଦୁଡ଼ ଆସିକରି ଆଉଲି ଅଇକରି କଇବାର୍ ଦାର୍‌ଲା, ଜେ ଜଦି ପସୁକେ କି ତାର୍ ମୁର୍ତ୍ତିକେ ପୁଜା କରସି ଆରି ନିଜର୍ କାପାଲେ କି ତାର୍ ଆତେ ତାର୍ ଚିନ୍ ଗଦାଇଅଇସି, ୧୦ ସେମନ୍ ପର୍ମେସରର୍ ମଦ୍ କାଇବାଇ । ଜନ୍‌ଟାକି ପାନି ଗାବିକରି ଚପରା ନ କଲାଟା । ତାର୍ ତର୍ ଲାଗ୍‌ବା ଡଣ୍ଡୁ ଆରି ବଡ଼ ରିସା ସେମନ୍ ମୁରଡ଼ବାଇ । ସେମନ୍‌କେ କାଇ ଦୟା ନ ଦେକାଅଡ଼ । ସୁକଲ୍ ଦୁଡ଼ମନର୍ ମୁଆଟେ ଆରି ମେଣ୍ଡାପିଲାର୍ ମୁଆଟେ ଗନ୍‌ଟାନ୍‌ନେ ପଡ଼ିକରି ବେସି ଦୁକ୍ କସଟ୍ ପାଇବାଇ । ୧୧ ଜଇଟାନେଅନି ଆଇବା ଦୁଆଁ, ଜନ୍‌ଟାକି ସେମନ୍‌କେ ଦୁକ୍ କସଟ୍ ଦେଲାନି, ସେଟା

\* ୧୪:୧ ୧୪:୧ ପରକାସିତ ୭:୩      \* ୧୪:୮ ୧୪:୮ ପରକାସିତ ୧୮:୨

କାଲ୍ କାଲ୍ ଜୁଗ୍ ଜୁଗ୍ ଉପରେ ଜାଇତେ ରଇସି । ପସୁକେ କି ତାର୍ ମୁର୍ତିକେ ପୁଜାକରବା ଲକ୍ ଦିନରାତି ପୁଣ୍ଡି ନାପାରତ୍ । ଜେନ୍ତିକି ତାର୍ ନାଉଁର୍ ନେଇରଇବା ଲକ୍ମନରପାଇ ମିସା ।<sup>୧୨</sup> ପର୍ମେସରର୍ ଲକ୍ମନ ଜନ୍ ଲକ୍ମନ କି ତାର୍ ଆଦେସ୍ ନାମ୍ବାଇ, ଆରି ଜିସୁକେ ବିସ୍ବାସ୍ କରି ଆତତ୍, ସେମନ୍ ମୁର୍ତିକରି ରଇବାର୍ ଆଚେ ।<sup>୧୩</sup> ତାର୍ପଚେ ସରଗେଅନି ମୁଇ ଏନ୍ତାରି ସୁନ୍ଲି । “ଏଟା ଲେକି ସଙ୍ଗଇର । ଏବେଅନି ମାପୁରୁଟାନେ ମିସ୍ଲାପଚେ ମରିଜିବାଇ ସେ ଲକ୍ମନ କେତେକ୍ କରମର୍ ଲକ୍ । ଉଁ ବଲି ଆଡ଼ମା କଇଲାନି । ଏଟା ସତଇସେ ଗଟ୍ସି, ତାକର୍ ଆବଡ଼ କାମେଅନି ଚନେକ୍ ପୁଣ୍ଡିବାକେ ସେଟା ତାକର୍ ବେଲା ରଇସି । କାଇକେବଇଲେ ସେମନ୍ କରିରଇବା ନିକ କାମର୍ ଲାଗି ସେମନ୍ ପୁରୁସ୍କାର୍ ପାଇବାଇ ।”

**ପସଲ୍ ପାଟଲା**

<sup>୧୪</sup> ତାର୍ପଚେ ମୁଇ ଦେକ୍ଲି, ଏଦେ ଦେକା ! ଗଟେକ୍ ଦବ୍ ବାଦଲ୍ ଡିସ୍ଲା । ଆରି ଗଟେକ୍ ନରପାରା ଡିସ୍ବା ବାଦଲ୍ ଉପରେ ବସିରଇଲା । ତାର୍ ମୁଣ୍ଡେ ସୁନାର୍ ମୁକୁଟ୍ ଆରି ଆତେ ଗଟେକ୍ ଗଜିଆ ଇଲା ଦାରିରଇଲା ।<sup>୧୫</sup> ତାର୍ ପଚେ ମନ୍ଦିରେଅନି ଆରି ଗଟେକ୍ ଦୁଡ଼ ବାରଇ ଆଇଲା । ଆରି ବାଦଲ୍ ଉପରେ ବସିରଇଲା ଲକ୍କେ ଆଉଲିଅଇକରି କଇଲା “ବେଲା କେଟ୍ଲାବେ ।” ତମର୍ ପସଲ୍ ପାଟଲାଆଚେ । ତର୍ ଇଲାସଙ୍ଗ୍ ସେଟା କାଟ୍ ।<sup>୧୬</sup> ତାର୍ପଚେ ବାଦ୍ଲେ ବସ୍ଲା ଲକ୍ ତାର୍ ଇଲା ଦର୍ତନି ଉପରେ ବୁଲାଇଲା । ଦର୍ତନିର୍ ଚାସ୍ ସବୁ କାଟାଅଇଲା ।<sup>୧୭</sup> ସରଗର୍ ମନ୍ଦିରେଅନି ଆରିଗଟେକ୍ ଦୁଡ଼ ବାରଇ ଆଇବାଟା ମୁଇ ଦେକ୍ଲି । ତାର୍ ଆତେ ମିସା ଗଟେକ୍ ଲାଗନ୍ ଇଲା ରଇଲା ।<sup>୧୮</sup> ତାର୍ପଚେ ବେଦିଟାନେଅନି ଜଇ ଦେକାରକା କରବା ଆରିଗଟେକ୍ ଦୁଡ଼ ଆଇଲା । ସେ ଆଉଲିଅଇକରି ଲାଗନ୍ ଇଲା ଦାରିରଇବା ଦୁଡ଼କେ କଇଲା “ଦର୍ତନିଟାନେ ରଇବା ଅଙ୍ଗୁରବାଡର୍ ଅଙ୍ଗୁର ପାଟଲାଆଚେ । ତର୍ ଇଲାଦାରି କାଟିନେ ।”<sup>୧୯</sup> ତେବର୍ପାଇ ସେ ଦୁଡ଼ ଦର୍ତନି ଉପରେ ତାର୍ ଇଲା ବୁଲାଇଲା । ମାଲେଅନି ଅଙ୍ଗୁର କାଟଲା । ଆରି ଅଙ୍ଗୁର ଆଜାଡ଼ବା କୁଣ୍ଡେ ଡାଲିଦେଲା । ସେ ଜାଗା ଅଇଲାନି ପର୍ମେସରର୍ ବଡ଼ ରିସାର୍ ଜାଗା ।<sup>୨୦</sup> ନଗରର୍ ବାଇରେ ରଇବା କୁଣ୍ଡେ ଚକ୍ଟାଗାଲା ଜାଗାଇ, ଅଙ୍ଗୁରମନ୍ ପିଟକ୍ଲାଇ ଆରି ତେଇଅନି ବନି ବାରଇଲା । ସେ ବନି ତିନ୍ସ କିଲମିଟର୍ ଲମ୍, ଆରି ଦୁଇମିଟର୍ କାଲ୍ସେଡ଼କି ବଇଗାଲା ।

**୧୫**

**ସାରାସାରିର୍ ମରଡ଼ି**

<sup>୧</sup> ଏଦେ ଦେକା ! ତାର୍ପଚେ ଆକାସେ ଆରିଗଟେକ୍ କାବା ଅଇଜିବା ତିନ୍ ମୁଇ ଦେକ୍ଲି । ତେଇ ସାଡ଼ଟା ଦୁଡ଼ମନକେ ସାଡ଼ଟା ମରଡ଼ି ସର୍ପାଇ ଅଇରଇଲା । ଏ ସର୍ତେ ମରଡ଼ି ସାରାସାରି ବେଲଟା । କାଇକେବଇଲେ ଏଟା ଅଇଲାନି ଦର୍ତନି ଉପରେ ପର୍ମେସର୍ ଆନ୍ଦବା ସାରାସାରିର୍ ତଣ୍ଡ ।<sup>୨</sup> ତାର୍ପଚେ କାଟ୍ ପାରା ଡିସ୍ବା ସମ୍ବୁର୍ ସଙ୍ଗ୍ ଜଇ ମିସାଇଲା ପାରାଟା ଗଟେକ୍ ଦେକ୍ଲି । ପସୁ ଆରି ତାର୍ ମୁର୍ତି ଉପରେ ଜୁଇଦ୍ କରି ଜିତିରଇବା ଲକ୍ମନକେ ମିସା ମୁଇ ଦେକ୍ଲି । ସେ ପସୁର୍ ନାଉଁ ଗଟେକ୍ ଲମ୍ବରର୍ ବାଦୁଲେ ରଇଲା । ସେମନ୍ କାଟର୍ ସମ୍ବୁର୍ ପାଲିବାଟେ ଚିଆ ଅଇରଇଲାଇ । ପର୍ମେସର୍ ସେମନକେ ଦେଇରଇବା ବିଣା ତାକର୍ ଆତେ ରଇଲା ।<sup>୩</sup> ସେ ଲକ୍ମନ ମସା ଜେ କି ପର୍ମେସରର୍ ଗତିଦାଙ୍ଗ୍ଡା, ତାର୍ ଗିଡ଼ ଆରି ମେଣ୍ଡାପିଲାଟ୍ ଗିଡ଼ ଗାଇତେରଇଲାଇ । ମାପୁରୁ ପର୍ମେସର୍ ଜେ କି ସବୁର୍ ଉପରେ ଆଚେ, ତମେ କରବା କାମ୍ ବେସି ବଡ଼ ଆରି କାବାଅଇଜିବାଟା । ତୁଇ

☆ ୧୪:୨୦ ୧୪:୨୦ ପର୍କାସିତ ୧୯:୧୫

ରାଇଜ୍‌ମାନର ରାଜା । ତର ବାଟ ସତ୍ତ ଆରି ସମାନ । ୪ ତମକେ ପରମେସର ବଲି ନ ନାମିବା ଲକ୍ କେ ନ ରଅତ୍ । ତମକେ ଡାକ୍‌ପୁଟା ନ କରବା ଲକ୍ କେ ନ ରଅତ୍ । କାଇକେବଇଲେ ତମେସେ ସୁକଲ୍ । ସବୁ ରାଇଜର୍ ଲକ୍‌ମନ୍ ତମକେ ଜୁଆର୍ କରବାକେ, ତମର ମୁଆଟେ ରୁଣ୍ଡିବାଇ । କାଇକେବଇଲେ ତମର ଦରମ୍ କାମିମନ୍ ସବୁ ସେମନ୍ ଦେକଲାଇ ଆତତ୍ ।

୫ ତାରପତେ ସୁକଲ୍ ତମୁ ରଇବା ସରଗର୍ ମନ୍ଦିର୍ ଉଗାଡି ଅଇରଇବାଟା ମୁଇ ଦେକଲି । ୬ ସାତଟା ମରଡି ସରପାଇ ଅଇରଇବା ସାତଟା ଦୁତମନ୍ ମନ୍ଦିରେ ଅନି ବାରଇଲାଇ । ସେମନ୍ ଦବ୍ ରଇକରି ଜକ୍‌ଜକି ଜାଇତେରଇବା ବସତର୍ ପିନ୍ଦି ରଇଲାଇ । ଆରି ସୁନାର ବେଲ୍‌ଟୁ ବୁକେ ବାନ୍ଦିଅଇରଇଲାଇ । ୭ ଚାରଟା ଜିବନ୍ ରଇବା ପସୁମନ୍‌ର ବିତ୍ତରେ ଗଟେକ୍ ସବୁବେଲ୍‌ର ପରମେସରର ରିସାସଙ୍ଗ୍ ବରଡି ଅଇରଇବା ସାତଟା ସୁନାର ଗିନା, ସେ ସାତଟା ଦୁତମନ୍‌କେ ଦେଲା । ଠ ପରମେସର ବପୁ ଆରି ତାର ମଇମାର ଲାଗି ମନ୍ଦିର୍ ଦୁଆଁ ସଙ୍ଗ୍ ବରଡି ଅଇଲା । ସେ ସାତଟା ଦୁତମନ୍ ସାତଟା ମରଡି ନ ସାରାଇବା ଜାକ, ମନ୍ଦିର୍ ବିତ୍ତରେ କେ ପୁରିନାପାରଲାଇ ।

## ୧୭

### ପରମେସରର ଗିନାର ରିସା

୧ ତାରପତେ ଗଟେକ୍ ମନ୍ଦିରେଅନି ଗଟେକ୍ ଜବର୍ ସବଦ୍ ସେ ସାତଟା ଦୁତମନ୍‌କେ କାତା ଅଇବାଟା ମୁଇ ସୁନ୍‌ଲି । “ଜାଆ ଆରି ପରମେସରର ରିସା ବରଡି ଅଇରଇବା ସାତଟା ଗିନା ଦରତନି ଉପ୍‌ରେ ଆଜାଡିଦେସ୍ ।” ୨ ପରତୁମ୍ ଦୁଡ୍ ଗାଲା ଆରି ତାର ରିସାର ଗିନା ଦରତନି ଉପ୍‌ରେ ଆଜାଡିଦେଲା । ଆରି ଏଦେ ଦେକା ! ଜନ୍ ଲକ୍‌ମନ୍ ଜେ କି ପସୁର ତିନ୍ ଗଦିଅଇରଇଲାଇ ଆରି ତାର ମୁରଡିକେ ଜୁଆର୍ କରତେରଇଲାଇ, ତାକର୍ ଗାଗ୍‌ତେ ମୁରଡି ନାପାରଲା ପାରା ଉଟାନ୍ ବାରଇଲା । ୩ ତାରପତେ ଦୁଇ ଲମର୍ ଦୁଡ୍ ତାର ରିସାର ଗିନା ସମଦୁରେ ଆଜାଡି ଦେଲା । ଆରି ଏଦେ ଦେକା ! ତେଇର୍ ପାନି ମଲାଲକର୍ ବନିପାରା ଅଇଗାଲା । ଆରି ସମଦୁରେ ରଇବା ଜୁଡ୍‌ଜିଆଦ୍ ମରିଗାଲାଇ । ୪ ତାରପତେ ତିନ୍ ଲମର୍ ଦୁଡ୍ ତାର ରିସାର ଗିନା ଗାଡ୍‌ମନ୍‌କେ ଆରି ପାଜ୍‌ରାମନ୍‌କେ ଆଜାଡିଦେଲା । ସେଟାମନ୍‌ର ପାନି ସବୁ ବନି ଅଇଗାଲା । ୫ ତାରପତେ ପାନି ଦେକାରକା କରବା ଦୁଡ୍ ଏନ୍ତାରି କଇବାଟା ମୁଇ ସୁନ୍‌ଲି “ଏ ସୁକଲ୍ ରଇବା ପରମେସର ତମେ ଆଗେଅନି ଆରି ଏବେ ମିସା ଆଟାସ୍ । ତମର୍ ବିଚାରନା ଟିକ୍ ଆଟେ । ୬ ପରମେସର ଲକ୍‌ମନ୍‌ର ଆରି ବବିସତ୍‌ବକ୍‌ତାମନ୍‌ର ବନି ଡାଲିଦେଲାଇ । ତେବର୍‌ପାଇ ତମେ ସେମନ୍‌କେ କାଇବାକେ ବନି ଦେଇଆଟାସ୍ । ସେମନ୍ କରରଇବା କାମର୍ ପଲ୍ ସେମନ୍ ଆକା ପାଇଲାଇ ଆତତ୍ ।” ୭ ତାରପତେ ବେଦିଟାନେଅନି ଗଟେକ୍ ସବଦ୍ ମୁଇ ସୁନ୍‌ଲି । “ମାପୁର ପରମେସର ଜେ କି ସବୁର ଉପ୍‌ରେ ଆଟେ, ତମର୍ ବିଚାରନା ସମାନ ଆରି ସତ୍ ।”

ଠ ତାରପତେ ଚାରି ଲମର୍ ଦୁଡ୍ ତାର ରିସାର ଗିନା ବେଲ୍ ଉପ୍‌ରେ ଆଜାଡ୍‌ଲା । ଆରି ଏଦେ ଦେକା ! ତାର ଅପର୍‌ବଲ୍ ତାଡି ସଙ୍ଗ୍ ଲକ୍‌ମନ୍‌କେ ପତାଇଦେବାକେ ବେଲ୍ ଆଦେସ୍ ପାଇଲା । ୯ ସେ ଅପର୍‌ବଲ୍ ତାଡିର୍ ଲାଗି ସେମନ୍ ପଡିଗାଲାଇ । ଆରି ପରମେସରର ନାଉଁ ଦାରି ସାଇପ୍ ଦେଲାଇ । କାଇକେବଇଲେ ଏ ସବୁର୍ ମରଡି ଉପ୍‌ରେ ତାରୁଆକା ଅଦିକାର୍ ରଇଲା । ମାତର୍ ସେମନ୍ ଏନ୍ତା ଅଇଲାଇ ମସିଆ ତାକର୍ ପାପେଅନି ବାଉଡ୍‌ତନାଇ । ଆରି ପରମେସରର ବଡ୍ କାମ୍‌କେ ମାନଡ୍‌ନାଇ । ୧୦ ତାରପତେ ପାଁର୍ ଲମର୍ ଦୁଡ୍ ତାର ରିସାର ଗିନା ପସୁର ବସବା ଜାଗା ଉପ୍‌ରେ ଆଜାଡିଦେଲା । ଆରି ଏଦେ ଦେକା ! ପସୁର ରାଇଜେ ଆନ୍ଦାର୍

ତାବିଅଇଦେଲା । ଆରି ଦୁକାର ଲାଗି ଲକ୍ମନ ନିଜର ନିଜର ଜିବ୍ ଚାବିଅଇଦେଲା ।  
 ୧୧ ତାକର ଦୁକା ଆରି ଉତ୍ତାନର ଲାଗି ସରଗର ପରମେସରକେ ସେମନ୍ ସାଇପ୍  
 ଦେଲା । ମାତର ତାକର କାରାପ୍ ଚଲାଚଲ୍‌ତିର ଲାଗି ସେମନ୍ ବାଉଡ଼ତନା ।  
 ୧୨ ତାରପରେ ଚଅ ଲମର୍ ଦୁଡ଼ ତାର ରିସାର୍ ଗିନା ଇଉପର୍‌ଟିସ୍ ନାଉଁର୍ ଗଟେକ୍  
 ବଡ଼ଗାଡେ ଆଜାଡିଦେଲା । ଆରି ଏଦେ ଦେକା ! ସେ ଗାଡ଼ର୍ ପାନି ଆଁଟିଗାଲା ।  
 ସେନ୍ତାରି ପୁରବେଅନି ଜନ୍ ରାଜାମନ୍ ଆରି ତାକର ସନିଅମନ୍ ଆଇବାର୍ ରଇଲା,  
 ସେମନର୍‌ପାଇ ବାଟ୍ ତିଆରୁଅଇଲା । ୧୩ ତାରପରେ ତିନଟା ବେଙ୍ଗପାରା ତିସବା  
 ଅସୁକଲ୍ ଆଡ଼ମାମନ୍‌କେ ମୁଇ ଦେକଲି । ସେମନ୍ ଅସୁର୍‌ସାପର୍ ଟଣ୍ଡେଅନି, ପସୁର୍  
 ଟଣ୍ଡେଅନି ଆରି ମିଟ୍ କଇବା ବବିସଡ଼ବକ୍‌ତାର୍ ଟଣ୍ଡେଅନି ବାରଇ ଆଇଡେରଇଲା ।  
 ୧୪ ସେମନ୍ କାବାଅଇଜିବା କାମ୍ କରବା ତୁମାମନର୍ ଆଡ଼ମାମନ୍ । ଏ ତିନଟା  
 ଆଡ଼ମା ଜଗଡେ ରଇବା ସବୁ ରାଜାମନର୍‌ଟାନେ ଗାଲା । ବେସି ବପୁ ରଇବା  
 ପରମେସରର୍ ବଡ଼ ଦିନର୍ ଜୁଇଦେ ସେ ଆଡ଼ମାମନ୍ ସବୁ ରାଜାମନ୍‌କେ ଚୁଲିଆଇ  
 ଆନ୍‌ବାଇ ।

୧୫ \*ସୁନା, ମୁଇ ଚର୍ ପାରା ଆଇଲିନି । ଜନ୍ ଲକ୍ମନ ଜାଗରଡ଼ ରଇକରି ତାକର  
 ବସ୍‌ତର୍ ଜାଗରଡ଼ା କରି ସଙ୍ଗଇବାଇ, ସେମନ୍ କେଡେକ୍ କରମର୍ ଲକ୍ମନ । ମୁଇ  
 ଆଇବା ଦିନେ ସେମନ୍ ଗଟେକ୍ ତୁମଣ୍ଡା ଅଇକରି ଏନେଡେନେ ବୁଲ୍‌ବା ଲକ୍ ପାରା ନ  
 ରଏ । ଆରି ସେମନ୍ ଲକ୍ମନକେ ଦେକି ଲାଜ୍ ନ ଅଅଡ଼ । ୧୬ ତାରପରେ ଆଡ଼ମାମନ୍  
 ସବୁ ରାଜାମନ୍‌କେ ଗଟେକ୍ ଜାଗାଇ ଚୁଲିଆଇ ଆନ୍‌ଲାଇ । ଏବ୍‌ରି ବାସାଇ ସେ  
 ଜାଗାର୍ ନାଉଁ ଅଇଲାନି ଅମିଗର୍‌ଦନ୍ । ୧୭ ତାରପରେ ସାଡ଼ ଲମର୍ ଦୁଡ଼, ତାର୍  
 ରିସାର୍ ଗିନା ପବନେ ଆଜାଡିଦେଲା । ଆରି ଏଦେ ଦେକା !! ମନ୍‌ରେ ରଇବା ବସ୍‌ବା  
 ଜାଗାଇ ଅନି ଗଟେକ୍ ବଡ଼ ସବ୍‌ଦ୍ ଆଇଲା । “ସେଟା ସବୁ ସାରିଗାଲା !” ୧୮ \*ଦାପ୍‌ରେ  
 ବିଜ୍‌ଲି ମାର୍‌ଲା, ଗଡ଼ଗତି ମାର୍‌ଲା ଆରି ବେସି ଦର୍‌ତନି ଚୁଲ୍‌ଚୁଲ୍‌ଲା । ମୁନୁସ୍ ଜାତି  
 ତିଆର୍ କଲାଡେଇଅନି ଏନ୍ତାରି ଦର୍‌ତନି ଚୁଲ୍‌ଚୁଲ୍‌ବାଟା କେବେ ନ ଅଇରଇଲା ।  
 ଏଟା ସବୁର୍‌ଟାନେ ଅନି କାରାପ୍ ରଇଲା । ୧୯ ସେ ବଡ଼ ନଅର୍ ତିନବାଟ୍ ଅଇଗାଲା ।  
 ସବୁ ଦେସର୍, ସବୁ ରାଇଜର୍ ନଅର୍‌ମନ୍, ବିନାସ୍ ଅଇଗାଲା । ପରମେସର୍ ତାକ୍‌ପୁଟା  
 ରଇବା ବାବିଲନ୍‌କେ ଏଡାଇଲା । ଆରି ତାର୍ ଗିନାଇଅନି ତାକେ ମଦ୍ କୁଆଇଲା ।  
 ଏଟାର୍ ଅରଡ଼ ଅଇଲାନି, ତାର୍ ରିସାଇଅନି ଆଇବା ବଡ଼ ଡଣ୍ଡ୍ ସେମନ୍ ପାଇବାଇ  
 । ୨୦ \*ସମ୍‌ଦୁର୍ ମଜାଇ ରଇବା ସୁକ୍‌ଲା ଜାଗାମନ୍ ସବୁ କୁପ୍‌ଲି, କି ଡଙ୍ଗର୍‌ମନ୍  
 ନ ରଇଲା । ୨୧ \*ଆକାସେଅନି ପଟାସ୍ କେଜି ଲାକା ରଇବା କାରାପାକ୍‌ନାମନ୍  
 ଲକ୍ମନର୍ ଉପ୍‌ରେ ଅଦର୍‌ଲା । କାରାପାକ୍‌ନା ଅଦର୍‌ଲା ବିପଦର୍‌ଲାଗି ଲକ୍ମନ  
 ପରମେସରକେ ସାଇପ୍ ଦେଲା । କାଇକେବଇଲେ ସେଟାଗଟେକ୍ ବଡ଼ ବିପଦ୍  
 ରଇଲା ।

## ୧୭

### ତାକ୍‌ପୁଟା ବେସିଆ

୧ ତାରପରେ ସାଡ଼ଟା ଗିନାଦାରିରଇବା ସାଡ଼ଟା ଦୁଡ଼ମନର୍ ବିଡ଼ରେ ଅନି ଗଟେକ୍  
 ଦୁଡ଼ ମକେ ଆସିକରି କଇଲା, “ଇତି ଆଉ ।” ସେ ତାକ୍‌ପୁଟାର୍ ବେସିଆ କେନ୍ତାରି  
 ଡଣ୍ଡ୍ ପାଇସି, ସେଟା ମୁଇ ତକେ ଦେକାଇବି । ବେସି ଗାଡ଼ମନ୍ ମିସିରଇବା ଜାଗାଇ  
 ସେ ନଅର୍ ତିଆର୍ ଅଇଲାଆଟେ । ୨ ଜଗଡର୍ ରାଜାମନ୍ ତାର୍ ସଙ୍ଗ୍ ବେସିଆ

କାମ୍ କଲାଈ । ଜଗତର ଲକ୍ଷ୍ମୀମନ୍ ତାର ମଦ୍ କାଈକରି ମାଡ଼ିଲାଈ । ତାର ଅରତ୍ ଅଇଲାନି, ତାକର କାରାପ୍ ଚଲାଚଲ୍ତିକେ ସେମନ୍ ମାନ୍‌ଲାଈ ।

୩ \*ମକେ ଆଡ଼ମା ଦାରିଦେଲା ଆରି ଦୁଡ଼ ମକେ ମରୁବାଲି ବୁର୍ବ୍ ତାକିନେଲା । ଆରି ଏଦେ ଦେକା ! ତେଇ ରଙ୍ଗ୍ ପସୁର ଉପ୍ରେ ଗଟେକ୍ ମାଈଜି ବସିରଇବାଟା ମୁଈ ଦେକ୍ଲି । ତାକେ ସାଡ଼ଟା ମୁଣ୍ଡ ଆରି ଦସ୍‌ଟା ସିଙ୍ଗ୍ ରଇଲା । ପର୍ମେସର୍‌କେ ନିନ୍ଦାକରବା ନାଉଁ ସେ ପସୁର ଉପ୍ରେ ଲେକାଅଇରଇଲା । ୪ ସେ ମାଈଜି ରଙ୍ଗ୍ ଆରି ଜାମକଲି ରଙ୍ଗ୍‌ର ବସ୍‌ତର ପିନ୍‌ରଇଲା । ସେ ବେସି ସୁନାବାନା, ଆରି ବେସି ଦାମ୍ ଦେଇରଇବା ଈରାନିଲା ପିନ୍‌ରଇଲା । ତାର୍ ଆତେ ସୁନାର୍ ଗିନା ଦାରିରଇଲା । ସେ କରିରଇବା ବେସିଆ କାମ୍‌ମନ୍ ଆରି କାରାପ୍ କାମ୍‌ମନ୍ ସେ ଗିନାଇ ବର୍ତ୍ତିଅଇରଇଲା । ୫ ତାର୍ କାପାଲେ ଲେକିରଇବା ନାଉଁ କେ ନାଜାନ୍‌ବା ଗଟେକ୍ ଅରତ୍ ରଇଲା । “ଏ ତାକ୍‌ପୁଟାର୍ ବାବିଲନ୍ !” ଜଗତେ କରିରଇବା ସବୁ ବେସିଆ କାମ୍‌ର ଆରି କରାପ୍ କାମ୍‌ର ଆୟା ତୁଈସେ । ୬ ଆରି ସେ ମାଈଜି ପର୍ମେସର୍‌ର ଲକ୍ଷ୍ମୀମନ୍ ବନି କାଈ ମାଡ଼ିରଇବାଟା ମୁଈ ଦେକ୍ଲି । ଜିସୁକେ ବିସ୍‌ବାସ୍ କରି ସାଦ୍‌ବାସ୍ ଅଇ ମରିଜାଈରଇବା ଲକ୍ଷ୍ମୀମନ୍ ବନି କାଈକରି ମିସା ସେ ମାଡ଼ିରଇଲା । ମୁଈ ତାକେ ଦେକିକରି କାବା ଅଇଗାଲି । ୭ ଦୁଡ଼ ମକେ ପାଟାର୍‌ଲା, “କାଈକେ ତୁଈ କାବା ଅଇଗାଲୁସ୍ ? ଏ ମାଈଜିର୍ ଆରି ତାକେ ଦାରିରଇବା ପସୁର କେ ନାଜାନ୍‌ ରଇବା ଅରତ୍ ମୁଈ ତକେ କଇଦେବି ।” ସେ ପସୁକେ ସାଡ଼ଟା ମୁଣ୍ଡ ଆରି ଦସ୍‌ଟା ସିଙ୍ଗ୍ ରଇଲା । ୮ \*ଆଗ୍‌ତୁ ତରେକ୍ ସେ ପସୁ ବର୍ତ୍ତିରଇଲା । ମାତର୍ ଏବେ ଆରି ସେ ନ ବର୍ତ୍ତି । ପାତାଲେଅନି ସେଟା ବାରଇ ଆଇସି । ତାକେ ଆରି ତରେକ୍ ସେ ଡଣ୍ଡ ପାଇବା ଜାଗାଈ ନିଆଅଇସି । ଜଗତେରଇବା ଲକ୍ଷ୍ମୀମନ୍, ସବୁ ତିଆର୍ ନ ଅଇବା ଆଗ୍‌ତୁ, ଜାର୍ ନାଉଁ ଜିବନ୍‌ରଇବା ବଇଟାନେ ଲେକାଅଡ଼ନାଇ, ସେମନ୍ ସେ ପସୁକେ ଦେକି କାବାଅଇଜିବାଇ । କାଈକେବଇଲେ ସେ ଆଗ୍‌ତୁ ବର୍ତ୍ତିରଇଲା, ଏବେ ଆରି ସେଟା ବର୍ତ୍ତିରଏନାଇ । ମାତର୍ ସେଟା ଆରିତରେକ୍ ଆଇସି ।

୯ “ଗଟେକ୍ ଗିଆନ୍ ରଇବା ଆରି ଚିନ୍ତା କରବା ଲକ୍ଷ୍ମୀମନ୍ ଏଟା ବୁଝିପାରସି । ସେ ସାଡ଼ଟା ମୁଣ୍ଡର ଅରତ୍ ଅଇଲାନି, ସେ ମାଈଜି ବସ୍‌ବା ସାଡ଼ଟା କୁପ୍‌ଲି । ସେଟା ଅଇଲାନି ସାଡ଼ଟା ରାଜାମନ୍ ମିସା । ୧୦ ସେ ସାଡ଼ଟା ରାଜାମନ୍‌ର ବିତ୍‌ରେଅନି ପାଁଟା ରାଜା ବୁଝିଗାଲାଈ । ଗଟେକ୍ ଏବେ ମିସା ସାସନ୍ କଲାନ୍ତି । ସାରାସାରିଟା ଏବେଜାକ ଆସେନାଇତା । ସେ ଆଇଲେ ଚନେକର୍‌ପାଇ ସାସନ୍ କର୍‌ବାର୍‌ଆତେ । ୧୧ ଆରି ଜନ୍ ପସୁ ଜେ କି ଆଗ୍‌ତୁ ବର୍ତ୍ତିରଇଲା, ଆରି ଏବେ ସେ ବର୍ତ୍ତିନାଇ, ସେ ଅଇଲାନି ଆଟ୍ ଲମ୍‌ର ରାଜା । ସାଡ଼ଟା ରାଜାମନ୍‌ର ବିତ୍‌ରେଅନି ସେ ଗଟେକ୍ । ଆରି ସେ ମିସା ବୁଝିଜାଈସି ।”

୧୨ ଜନ୍ ଦସ୍‌ଟା ସିଙ୍ଗ୍ ତୁଈ ଦେକିରଇଲୁସ୍, ସେଟା ଅଇଲାନି ଦସ୍‌ଟା ରାଜା । ସେମନ୍ ଏବେଜାକ ରାଈଜେ ସାସନ୍ କରତ୍ ନାଈତା । ମାତର୍ ପସୁସଙ୍ଗ୍ ରାଜା ଈସାବେ ଗଟେକ୍ ଗାଁଟା ସାସନ୍ କର୍‌ବାକେ ଅଦିକାର୍ ଦିଆଅଇସି । ୧୩ ଏ ସବୁ ଦସ୍‌ଟା ରାଜାମନ୍‌କେ ଗଟେକ୍ ଆକା ଆଦେସ୍ ଆତେ । ତାକର୍ ସବୁ ବପୁ ଆରି ଅଦିକାର୍ ପସୁକେ ଦେବାଇ । ୧୪ ସେମନ୍ ମେଣ୍ଡାପିଲାର୍ ବିରୁଦେ ଜୁଈଦ୍ କର୍‌ବାଇ । ମାତର୍ ମେଣ୍ଡାପିଲା ସେମନ୍‌କେ ଆରାଇସି । କାଈକେବଇଲେ ସେ ସବୁ ମାପରୁମନ୍‌ର ଟାନେଅନି ଉତେ ରଇବା ମାପରୁ । ଆରି ରାଜା ମନ୍‌ରଟାନେ ଅନି ଉପ୍ରେ ରଇବା ରାଜା । ତାର୍ ଜେଡ଼କି ସିସ୍‌ମନ୍‌କେ ସେ ତାକିକରି ବାଟ୍‌ଲାଆତେ, ଆରି ତାକେ ସଡ଼ ସଙ୍ଗ୍ ନାମ୍‌ବାଇ, ସେମନ୍‌ର ସଙ୍ଗ୍ ସେ ଜୁଈଦ୍ କର୍‌ସି ।

୧୫ ଦୁହ୍ ଏନ୍ତାରି ମିସା ମକେ କଇଲା, ତୁଇ ଜନ୍ ପାନି ଉପରେ ବେସିଆ ବସିରଇବାଟା ଦେକ୍ଲୁସ୍, ସେଟା ଅଇଲାନ୍ତି ଏ ଜଗତର୍ ରାଇଜ୍‌ମନ୍, ଲକ୍‌ମନ୍, ଜାତିମନ୍ ଆରି ବାସାମନ୍ । ୧୬ ତୁଇ ଦେକିରଇବା ଦସ୍‌ଟା ସିଙ୍ଗ୍ ଆରି ସେ ପସ୍ତୁ, ବେସିଆକେ ଗିନ୍ କର୍‌ବାଇ । ତାର୍‌ଟାନ୍‌ରେ ରଇବାଟା ସବୁ ଚାଡ଼ାଇନେଇ ତୁମ୍‌ଗ୍‌ଟା କର୍‌ବାଇ । ତାର୍ ମାଉଁସ୍ କାଇକରି ତାକେ ଜଇଟାନ୍‌ରେ ପଡ଼ାଇଦେବାଇ । ୧୭ କାଇକେବଇଲେ ପର୍‌ମେସର୍ ତାର୍ ଜଜ୍‌ନା ପୁରାପୁରନ୍ କର୍‌ବାକେ ସେମନ୍‌ର୍ ମନ୍‌କେ ଏ କାତାଦେଇ ପାଟାଇଆଟେ । ସେମନ୍ ଗଟେକ୍ ଅଇ କାମ୍ କର୍‌ବାଇ । ପର୍‌ମେସର୍‌ର୍ ବାକିଅ ସିଦ୍ ଅଇବାଜାକ ତାର୍ ରାଇଜର୍ ସାସନ୍ କର୍‌ବା ବପ୍, ପସ୍ତୁକେ ଦେଲାଆଟେ ।

୧୮ ଆରି ଜନ୍ ମାଇଜିକେ ତୁଇ ଦେକ୍ଲୁସ୍, ସେ ଅଇଲାନ୍ତି, ଜଗତର୍ ରାଜାମନ୍‌କେ ସାସନ୍ କର୍‌ବା ସେ ବଡ଼ ନଅର୍ ।

## ୧୮

ବାବିଲନ୍ ବୁଡ଼ିଗାଲାଟା

୧ ତାର୍‌ପଟେ ଏଦେ ଦେକା ! ସର୍‌ଗେଅନି ଆରି ଗଟେକ୍ ଦୁହ୍ ଉଡ଼ରିଆଇବାଟା ମୁଇ ଦେକ୍ଲି । ତାକେ ବେସି ଅଦିକାର୍ ରଇଲା । ଆରି ତାର୍ ଉଜଲ୍ ଗୁଲାଇ ଜଗତେ ବରୁତି ଅଇଗାଲା । ୨ \*ସେ ବେସି ଆକ୍‌ମାରି କଇଲା, “ତାର୍ ଦସା ଅଇଲା ଆଟେ ! ସେ ବଡ଼ ବାବିଲନ୍ ମାଟିଲଗେ ମିସି ରୁନ୍‌ରୁନା ଅଇଗାଲାବେ ! ସେଟା ଏବେ ମାଟିବିଡ଼ରେ ତପିଅଇ ଗାଲାବେ ! ତାକେ ଏବେ ତୁମ୍‌ମନ୍ ଆରି ଅସୁକଲ୍ ଆଡ଼ମାମନ୍ ବାଦାଦେଲାଇନ୍ତି । ସବୁ ରକାମର୍ ଅସୁକଲ୍ ଆରି ଗିନ୍‌କର୍‌ବା ଚତଇମନ୍ ତାର୍ ବିଡ଼ରେ ବାସା ଅଇଆଟଡ଼ । ୩ କାଇକେବଇଲେ ଜଗତର୍ ସବୁ ରାଇଜ୍‌ମନ୍, ତାର୍ ମଦ୍ କାଇ ମାଡ଼ିଜାଇଆଟଡ଼ । ଏଟାର୍ ଅରଡ଼ ଅଇଲାନ୍ତି ତାର୍ କାରାପ୍ ଚଲାଟଲୁଡ଼ି ମାନ୍‌ବାକେ ସେମନ୍‌କେ ସୁଡ଼ରାଇଲା । ଜଗତର୍ ରାଜାମନ୍ ତାର୍ ସଙ୍ଗ୍ ବେସିଆ କାମ୍ କର୍‌ବାର୍ ଅବିଆସ୍ କଲାଇ । ଜନ୍ ସଁପତି ପାଇବା ଆସାଇଅନି ଏ ଜଗତର୍ ବେବାରିମନ୍ ସାଉକାର୍ ଅଇଗାଲାଇ ।”

୪ ତାର୍‌ପଟେ ସର୍‌ଗେ ଅନି ଆରି ଗଟେକ୍ ସବଦ୍ ଏନ୍ତାରି କଇବାଟା ମୁଇ ସୁନ୍‌ଲି । “ମର୍ ଲକ୍‌ମନ୍ ତାର୍‌ଟାନ୍‌ରେଅନି ବାରଇ ଆସା । ତମେ ଜଦି ତାର୍ ପାପେ ମିସ୍‌ଲେ, ସେ ପାଇବା ତଣ୍ଡେ ମିସ୍‌ସା । ୫ କାଇକେବଇଲେ ତାର୍ ସବୁଜାକ ପାପ୍ କୁପା କୁଡ଼ାଇଲା ପାରା ସର୍‌ଗେ ଜାକ କେଟ୍‌ଲା ଆଟେ । ଆରି ପର୍‌ମେସର୍ ତାକର୍ କାରାପ୍ ଚଲାଟଲୁଡ଼ି ଏତାଇଲାନ୍ତି । ୬ ତାର୍ କିରିରଇବା କାମର୍ ଲାଗି ତାକେ ବାଉଡ଼ାଇ ଦିଆଅଇସି । ଆରି ସେ ସମାନ୍ ତଣ୍ଡ ପାଇସି । ଲକ୍‌ମନ୍‌କେ ଦୁକ୍‌କସ୍‌ଟ ଦେବାକେ ସେ ଜାଇଜାଇଟା କଲାଆଟେ, ସେଟା ତାକେ ଦୁଇ ଗୁନ୍ ଇସାବେ ବାଉଡ଼ାଇ ଦିଆଅଇସି । ସେ ଜେଡ଼କି କାଟୁର୍ ମଦ୍ ବିନ୍ ଲକ୍‌ମନ୍‌କେ କାଇବାକେ ଦେଇତେରଇଲା, ତାର୍ ଦୁଇଗୁନ୍ ଅଦିକାର୍‌ଟା ତାକେ କାଇବାକେ ଦିଆଅଇସି । ୭ ତାର୍ ଜେଡ଼କି ଦନ୍ ସଁପତି ଆରି ବଡ଼ପନ୍ ଆଟେ, ସେ ଇସାବେ ତାର୍ ଦୁକ୍ କସ୍‌ଟ ଆରି କାକୁର୍‌ତି ରଇସି । ସେ ନିଜ୍‌କେ କଇସି ‘ମୁଇ ଇତି ସାସନ୍ କର୍‌ବା ଗଟେକ୍ ରାନି ।’ ରାଣ୍ଡି ଅଇଲିଆଟି ଜେ ମୁଇ କାନ୍‌ବି ? » ସେଟାର୍‌ପାଇବଲି ଦିନେକ୍ ବିଡ଼ରେ ତାକେ ମର୍‌ଡ଼ି, ରଗ୍‌ଦୁକା, କାକୁର୍‌ତି ଆରି ଇନସ୍‌ତା ଆଇସି । ଆରି ସେ ଜଇଟାନ୍‌ରେ ପଡ଼ିଜାଇସି । କାଇକେବଇଲେ ବେସି ବପୁର୍ ମାପୁର୍ ପର୍‌ମେସର୍ ତାକେ ବିଚାର୍‌ନା କର୍‌ସି ।”

୯ ତାର୍ ବେସିଆ କାମେ ଆରି ଲାଲ୍‌ସା ଅଇ ମିସ୍‌ଲା ଜେଡ଼କି ରାଜାମନ୍ ସେ ଜଇଲଗେ ପଡ଼ଲାତେଇଅନି ବାରଇବା ଦୁଆଁ ଦେକିକରି ଆକ୍‌ମାରି କାନ୍‌ବାଇ । ୧୦ ସେମନ୍ ଆମେମିସା ତଣ୍ଡ ପାଇବୁ ବଲି ଡରିକରି ଦୁରିକେ ଟିଆଅଇ କଇବାଇ,

“ଏଟା କାଲ ଇନସତା, କାଲ କାକୁରତି, ଏ ବଡ଼ ଅଇକରି ସୁନ୍ଦର ବାବିଲନ୍ । ତୁଇ ପାଇବା ତଣ୍ଡ ଅଟାଡ଼ ଅଇଗାଲା । କାଲକେବଇଲେ ଗଟେକ୍ ଗଟା ବିଡ଼ରେ ତୁଇ କୁରୁପ୍‌ନାସ୍ ଅଇଗାଲୁସ୍ ।”

୧୧ “ଏ ଜଗତର ବେବାରିମନ୍ ତାରପାରା ଦୁକ୍ ଅଇକରି କାନ୍ଦୁଲାଇନି । କାଲକେବଇଲେ ତାକର୍ ଜିନିସ୍ ଆରି କେ ନ ଗେନଡ଼ ।” ୧୨ ତାକର୍ ସୁନାବାନା, ତାକର୍ ରୁପା, ଜବର୍ ଦାମ୍ ଦେଇରଇବା ଇରା ମଡ଼ିମନ୍, ସିଲ୍‌କୁ ଲୁଗା, ଜାମ୍‌କଲି ରଙ୍ଗର୍ ବସ୍‌ତର୍, ରଙ୍ଗୁଆ ବସ୍‌ତର୍, ବିନ୍ ବିନ୍ ରକାମର୍ ବେସି ଦାମ୍ ଦେବା ବାସନା ଗର୍, ଆଁତିର୍ ଦାତାଇଅନି ଜବର୍ ଦାମ୍‌ଦେବାଟାମନ୍, ଗଟେଅନି, ପିତଲେଅନି, ଲୁଆଇଅନି, ମାର୍‌ବଲ୍ ପାକ୍‌ନାଇ ଅନି, ତିଆର୍ କରିରଇବାଟା, ବିନ୍ ବିନ୍ ଜିନିସ୍ କେ ମିସା ନ ଗେନଡ଼ । ୧୩ ତାଲ୍‌ଚିନି, ବିନ୍ ବିନ୍ ରକାମର୍ ମସଲା, ଦୁପ୍, ବାସନାଦେବା ଦିନ୍‌ସୁ, ଟୁଣ୍ଡି, ଅଙ୍ଗୁର୍ ମଦ୍, ଚିକନ୍, ଅଟା, ଗାଁମ୍, ଗରୁ, ମେଣ୍ଡା, ଗଡା, ରଡ଼, ଏନ୍ତାରିକି ଗତିକଟ୍‌ବା ଦାଙ୍ଗଡା ଆରି ଲକ୍‌ମନ୍‌କେ ମିସା ଜାକେ କି ସେମନ୍ ଗତିଦାଙ୍ଗଡା କରି ବିକ୍‌ବାଇ, ସେମନ୍‌କେ ମିସା ଗେନି ନେବାକେ କେ ନ ବାରଅଡ଼ । ୧୪ ବେବାରିମନ୍ ତାକେ କଇଲାଇ, “ଜନ୍ ସବୁ ଜିନିସ୍ ତମେ ନିଜର୍ କର୍‌ବାକେ ମନ୍ କର୍‌ତେରଇଲାସ୍, ସେଟା ସବୁ ପୁରାପୁରୁନ୍ ନସ୍‌ଟ ଅଇଗାଲା । ତମର୍ ଦନ୍ ସଁପତି ନସିଗାଲା ଆରି ଜେଡ଼କି ଜିନିସ୍ ତମ୍‌କେ ସାର୍‌ଦା କରାଇତେରଇଲା, ସେଟାମନ୍ ଆରି ନ ତିସେ ।” ୧୫ ସେ ନଅରେ ବେବାର୍ କରି ବେବାରିମନ୍ ଜେଡ଼କି ସାଉକାର୍ ଅଇଗାଲାଇ, ସେ ନଅରର୍ ତଣ୍ଡେ, ସେମନ୍‌କେ ମିସାଇବାଇ ବଲି ଡରିକରି ସେମନ୍ ଦୁରିକେ ରଇବାଇ । ସେମନ୍ ଆକ୍‌ମାରି କାନ୍‌ବାଇ । ୧୬ ଆରି ଏନ୍ତାରି କଇବାଇ “ଏଟା କାଲ ଇନସତା ! ଏ ବଡ଼ ନଅରର୍ ପାଇ କାଲ କାକୁରତି ? ତେଇର୍ ଲକ୍‌ମନ୍ ଜାମ୍‌କଲିଆ ରଙ୍ଗର୍ ଆରି ଦବ୍ ସିଲ୍‌କୁ ଲୁଗା ପିନ୍‌ତେରଇଲାଇ । ସେମନ୍ ସୁନା ଆରି ବେସି ଦାମ୍ ଦେବା ଇରା ମୁକ୍‌ତାମନ୍ ପିନ୍‌ରଇଲାଇ । ୧୭ ମାତର୍ ଗଟେକ୍ ଗଟା ବିଡ଼ରେ ତାକର୍ ସବୁ ଦନ୍ ସଁପତି କୁରୁପ୍‌ନାସ୍ ଅଇଗାଲା । ପାନିଜାଜ୍ ଚାଲାଉମନ୍ ଆରି ଜାଜେ ଜିବାଲକ୍‌ମନ୍ ଜାଜେ କାମ୍ କର୍‌ବା ଲକ୍‌ମନ୍ ଆରି ସମ୍‌ଦୁରେ କାମ୍ କରି ଜିଉନାକାଉନା କରି ସାଉକାର୍ ଅଇରଇଲାଇ, ସେମନ୍ ସବୁ ଦୁରିକେ ରଇକରି ଦେକ୍‌ତେରଇଲାଇ ।” ୧୮ ସେ ନଅର୍ ପଡ଼ଲାକେ ତେଇଅନି ଉଟ୍‌ଲା ଦୁଆଁ ଦେକି ସେମନ୍ ଆଉଲି ଅଇକରି କଇଲାଇ, “ଏ ନଅର ପାରା ଆରି କନ୍ ନଅର୍ ମିସା ନ ରଇଲା ।” ୧୯ ସେମନ୍ ତାକର ମୁଣ୍ଡେ ଦୁଲି ବିଚିଅଇଲାଇ ଆରି ଆକ୍‌ମାରି କାନ୍‌ କାନ୍‌ କଇଲାଇ, “ଏଟା କାଲ ଇନସତା । ଏ ବଡ଼ ନଅରର୍ ପାଇ କାଲ କାକୁରତି ?” ସମ୍‌ଦୁରେ ଆସ୍‌ଜା ଅଇତେରଇବା ଜାଆଜ୍ ମନ୍ ତାକର୍ ଦନର୍ ଲାଗି ସାଉକାର୍ ଅଇରଇଲାଇ । ଆରି ଏବେ ଗଟେକ୍ ଗଟା ବିଡ଼ରେ ସେଟାସବୁ ନସିଗାଲା । ୨୦ ସେ ବଡ଼ ନଅରର୍ ଦସାର୍‌ଲାଗି ସର୍‌ଗେ ରଇବା ଲକ୍‌ମନ୍ ସାର୍‌ଦା ଉଆ । ପର୍‌ମେସର୍ ସେ ନଅର୍‌କେ ତଣ୍ଡେ ଦେଲାକେ ତମେ ବବିସ୍‌ଡ଼ବକ୍‌ତାମନ୍, ପାର୍‌ଚିନ୍‌ମନ୍ ଆରି ପର୍‌ମେସର୍‌କେ ବିସ୍‌ବାସ୍ କର୍‌ବା ଲକ୍‌ମନ୍ ସାର୍‌ଦା ଉଆ । ସେ ନଅରର୍ ଲକ୍‌ମନ୍ ତମ୍‌କେ ତାଡ଼ନା କର୍‌ତେରଇଲାଇ ।

୨୧ ତାର୍‌ପଟେ ଏଦେ ଦେକା ! ଗଟେକ୍ ବେସି ବପୁର୍ ଦୁଡ଼ ଗଟେକ୍ ବଡ଼ ଜଡା ଏଡ଼କି ପାକ୍‌ନା ବେଟି ସମ୍‌ଦୁରେ ପିଙ୍ଗାଲା । ଆରି କଇଲା “ଏନ୍ତାରିସେ ବଡ଼ ନଅର୍ ବାବିଲନ୍‌କେ ଜବର୍ ଅଇତେ ପିଙ୍ଗାବାଇ । ଆରି ତାର୍ ନାଉଁଗନ୍ ନ ମିଲେନି ।” ୨୨ ବିଣା ବାଜାଉମନ୍, ଗିଡ଼ଗାଉମନ୍, ବାଉଁସି ପୁକ୍‌ମନ୍ ଆରି ମଇରିର୍ ସବଦ୍ କେବେ ନ ସୁନଡ଼ । ସୁନ୍‌ଜି ଜିନିସ୍ ତିଆର୍‌କରୁମନ୍ ତେଇଆରି ନ ତିସଡ଼ । ଲକ୍‌ମନ୍ ଜଡାସଙ୍ଗ୍ ଗର୍‌ବା ସବଦ୍ ମିସା ଆରି ନ ସୁନିଅଏ । ୨୩ ଏ ନଅର୍ କାଇବତିସଙ୍ଗ୍ ମିସା ଉଜଲ୍ ନ ତିସେ । ଏବେ ବିବା ଅଇବା ଦାଙ୍ଗଡା ଦାଙ୍ଗଡ଼ିର୍ କାତା ମିସା ନ ସୁନିଅଏ । ତମର୍ ବେବାରିମନ୍

ଗୁଲାଇ ଜଗତେ ଡାକ୍‌ପୁଟା ଅଇଆଚଡ଼ । ଆରି ତର ମାୟାଜାଲେ ପଡ଼ିକରି ଜଗତର ଲକ୍‌ମନ୍ ସବୁ ନାତାଇଅଇଲା ।”

୨୪ ବଡ଼ ନଅର ବାବିଲନ୍ ଡଣ୍ଡ ପାଇଆଚେ । କାଇକେବଇଲେ ବବିସଡ଼ବକ୍‌ତାମନର ଆରି ପରମେସରର ଲକ୍‌ମନର ବନି ସେ ନଅରେ ବଇଗାଲାଆଚେ । ଆରି ଗୁଲାଇ ଜଗତେ ମରାଇଅଇରଇବା ଜେଡ଼କି ଲକ୍ ଏ ନଅରର ଲାଗି ମରିଜାଇରଇଲା । ବାବବାଦିମନର ସାଦୁଲକ୍‌ମନର ଆରି ପୁରତିବିତେଇ ମାରା ଜାଇରଇବା ସବୁଲକ୍‌ମନର ବନି ସେ ଡିସି ରଇଲା ।

### ୧୯

#### ସରଗର ସାରଦା

୧ ତାରପଚେ ସରଗେ ଗଟେକ୍ ଜାଗାଇ ମାୟା ଲକ୍ ଆଉଲିଅଇକରି ଏନ୍ତାରି କଇବାଟା ମୁଇ ସୁନ୍‌ଲି । “ପରମେସରକେ ଜୁଆର କରା । ସେ ଆମ୍‌କେ ମୁକ୍ତି ଦେଲାଆଚେ । ଆମ୍‌ର ପରମେସରକେ ଡାକ୍‌ପୁଟା ଆରି ବପୁଅ ।” ୨ ତାର ବିଚାରନା ଜାକ ସଡ଼ ଆରି ଅନିଆଇ ନ ଅଇତେ ଜନ୍ ବେସିଆ ମାଇଜି ଗୁଲାଇ ଜଗତକେ ତାର କାରାପ୍ ଚଲାଚଲୁତି ସଙ୍ଗ ନସାଇତେରଇଲା, ସେ ତାକେ ଦସ୍ ଦେଲାଆଚେ । ତାର ଦାଙ୍ଗତାମନକେ ସେ ମରାଇଲାକେ ତାକେ ସେ ଡଣ୍ଡ ଦେଲାଆଚେ । ୩ ସେମନ୍ ଆରିତରେକ୍ ଆଉଲିଅଇଲା । “ପରମେସରକେ ଜୁଆର କରା । ସେ ବଡ଼ ନଅର ଜଇଲଗେ ପଡ଼ଲାପାଇ ଉଟ୍‌ଲା ଦୁଆଁ କେବେ ନ ସାରେ ।” ୪ ୨୪ ପାର୍‌ଚିନ୍‌ମନ୍ ଆରି ଚାରଟା ଜିବନ୍ ରଇବା ପସୁମନ୍ ଡାଣ୍ଡାସନ୍ ପଡ଼ି ବସବା ଜାଗାଇ ବସିରଇବା ପରମେସରକେ ଜୁଆର କଲା । ଆମେନ୍ ପରମେସର ଡାକ୍‌ପୁଟା ପାଅ । ବଇଲାଇ ।

#### ମେଣ୍ଡାପିଲାର୍ ବିବା ବଜି

୫ ତାରପଚେ ବସବା ଜାଗାଇଅନି ଗଟେକ୍ ସବଦ୍ ଆଇଲା । ସେଟା ଏନ୍ତାରି କଇଲା, “ଆମ୍‌ର ପରମେସରକେ ଜୁଆର କରା । ତାର ଦାଙ୍ଗତାମନ୍, ଆକେ ନାମବା ଜେଡ଼କି ସବୁ ବଡ଼ସାନ୍ ଲକ୍‌ମନ୍ ତାକେ ଜୁଆରକରା ।” ୬ ତାରପଚେ ଗଟେକ୍ ଜବର ମାୟା ଲକ୍‌ପାରା ଆରି ବେସି ସବଦ୍ କରି ଉପରେ ଅନି ଅଦରତେରଇବା ଗଟେକ୍ ଜଲାପାରା ଆରି ଗୁଡ଼ଗୁଡ଼ ଅଇ ଆଇବା ଗଡ଼ଗତି ପାରା ଗଟେକ୍ ସବଦ୍ ସୁନ୍‌ଲି । ସେମନ୍ ଏନ୍ତାରି କଇତେରଇଲା “ପରମେସରକେ ଜୁଆର କରା । ଆମ୍‌ର ମାପୁରୁ ସବୁରଟାନେଅନି ବପୁରଟା । ଆମ୍‌ର ପରମେସର ଅଇଲାନ୍ ମାପୁରୁ ।” ୭ ଆସା ଆମେ ସାରଦା ସଙ୍ଗ ଗିଡ଼ନାଟ୍ କରୁ ଆରି ତାର କାବାଅଇଜିବା କାମରପାଇ ତାକେ ଡାକ୍‌ପୁଟା କରୁ, କାଇକେବଇଲେ ମେଣ୍ଡାପିଲାର୍ ବିବା ଅଇବା ବେଲା ଲଗେ କେଟ୍‌ଲାବେ । ଆରି ତାର କନିଆଦାଙ୍ଗଡ଼ିକେ ବିବା ଅଇବାକେ ନିଜେ ଡିଆର କଲାଆଚେ । ୮ ତାକେ ସୁକଲ୍ ପିରପିରା ଅଇ ଜକ୍‌ମକିଜିବା ବସଡ଼ ପିନ୍‌ବାକେ ଦିଆଅଇଆଚେ । ପିରପିରା ଲୁଗା ଅଇଲାନ୍, ପରମେସରର ଲକ୍‌ମନର ଦରମ୍ କାମ୍ ।

୯ ତାରପଚେ ଦୁଡ଼ ମକେ କଇଲା, “ଏଟା ଲେକି ସଙ୍ଗଇର । ମେଣ୍ଡାପିଲାର୍ ବିବା ବଜିକେ ଜେଡ଼କି ଲକ୍‌କେ ଡାକ୍‌ରା ଅଇଲାଆଚେ । ସେମନ୍ କେଡେକ୍ ନିକ କରମର ଲକ୍ ।” ଆରି ଦୁଡ଼ କଇଲା, “ଏଟା ପରମେସରର ସଡ଼ ବାକିଅ ।”

୧୦ ମୁଇ ତାକେ ଜୁଆର କରବି ବଲି ତାର ଗତେ ଡାଣ୍ଡାସନ୍ ପଡ଼ଲି, ମାତର ସେ ମକେ କଇଲା, “ନିରୁ, ମୁଇ ଆରି ତର ସଙ୍ଗର୍ ବିସବାସି ବାଇମନ୍ ଜେଡ଼କି ଲକ୍ ଆମେ ସବୁ ଜିସୁ ଜାନାଇରଇବା ସଡ଼ ଦାରିଆରୁ, ଆମେ ସବୁ ଅବ୍‌କା ଦାଙ୍ଗତାମନ୍, ପରମେସରକେ ଜୁଆର କରା । କାଇକେବଇଲେ ଜିସୁ ଜନ୍ ସଡ଼ ଜାନାଇଆଚେ, ସେଟାସେ ବବିସଡ଼ ବକ୍‌ତାମନକେ କାତାଅଇବାକେ ବପୁଦେଲାଆଚେ ।”

☆ ୧୯:୯ ୧୯:୯ ମାଡିଲ ୨୨:୨,୩



ଦବ୍‌ଲୀ ଗତାଇ ବସି ଜାଇତେ ରଇବା ଲକ୍

୧୧ ତାର୍‌ପଟେ ସରଗ୍ ଉଗାଡ଼ି ଅଇଲାଟା ମୁଇ ଦେକ୍‌ଲି । ଆରି ଏଦେ ଦେକା ! ଗଟେକ୍ ଦବ୍ ଗତା ଆଇବାଟା ତିସ୍‌ଲା । ଗତା ଚାଲାଉର୍ ନାଉଁ ଅଇଲାନି ବିସ୍‌ବାସ୍ କରବାଟା ଆରି ସଡ଼ଟା । ସେ ଅନିଆଇ ନ କରି ତାର୍ ଜୁଇଦ୍ କରସି ଆରି ଜିଡ଼ସି । ୧୨ ତାର୍ ଆଁକି ଲାଗ୍‌ତେ ରଇବା ଜଇପାରା ରଇଲା । ଆରି ତାର୍ ମୁଣ୍ଡେ ବେସି ମୁକୁଟ୍ ପିନ୍ଦି ରଇଲା । ଜନ୍ ନାଉଁ ତାର୍ ଉପ୍‌ରେ ଲେକା ଅଇରଇଲା, ସେଟାକେ ଚାଡ଼ିଦେଲେ ଆରି କେ ନାଜାନିରଇଲାଇ । ୧୩ ତାର୍ ବସ୍‌ତର୍ ବନିତେଇ ବୁଡ଼ାଇଲାପାରା ରଇଲା । ତାର୍ ନାଉଁ ରଇଲା ପର୍‌ମେସରର୍ ବାକିଅ । ୧୪ ସର୍‌ଗର୍ ସନିଅମନ୍ ଦବ୍ ବସ୍‌ତର୍ ପିନ୍ଦିକରି ଆରି ଦବ୍‌ଗତାଇ ବସି ତାର୍ ପଟେ ପଟେ ଜାଇତେରଇଲାଇ । ୧୫ \*ତାର୍ ଟଣ୍ଡେଅନି ଗଟେକ୍ ଗଜିଆ କାଣ୍ଡା ବାରଇଲା । ସେଟାସଙ୍ଗ୍ ସେ ଏ ଜଗତର୍ ରାଇଜ୍‌ମନ୍‌କେ ଆରାଇସି । ସେ ତାଟ୍ ସଙ୍ଗ୍ ତାକର୍ ଉପ୍‌ରେ ସାସନ୍ କରସି । ବେସି ବପୁ ରଇବା ପର୍‌ମେସରର୍ ରିସା ସେମନ୍‌କେ ଦେକାଇସି । ସେ ତାର୍ ସଡ଼ରୁମନ୍‌କେ ମାଣ୍ଡିକରି ରମ୍‌ଦିଦେଇସି । ଜେନ୍ତାରିକି ଅଙ୍ଗୁର୍ ପିଚ୍‌କିକରି ରସ୍ ବାର୍‌କରାଇସି । ୧୬ ତାର୍ ବସ୍‌ତରେ, ଜଙ୍ଗେ, ଏ ନାଉଁ ଲେକାଅଇରଇଲା । “ସବୁରାଜାମନ୍‌ର୍ ଉପ୍‌ରେ ରଇବା ରାଜା, ସବୁ ମାପ୍‌ରୁମନ୍‌ର୍ ଉପ୍‌ରେ ରଇବା ମାପ୍‌ରୁ ।”

୧୭ ତାର୍‌ପଟେ ଏଦେ ଦେକା ବେଲ୍ ଉପ୍‌ରେ ଗଟେକ୍ ଦୁଡ଼ ଟିଆଅଇରଇବାଟା ମୁଇ ଦେକ୍‌ଲି । ଆକାସର୍ ମଜାଇ ଉଡ଼ତେରଇବା ଜେଡ଼କି ସବୁ ଚତଇମନ୍‌କେ ସେ ଆକ୍‌ମାରି କଇଲା “ଆସା ପର୍‌ମେସରର୍ ବଡ଼ ବଜିତେଇ ଜିବାକେ ସବୁଲକ୍ ଟୁଲ୍‌ଉଆ । ୧୮ ଆସା ଆରି ରାଜାମନ୍‌ର୍, ମୁକିଆମନ୍‌ର୍ ଆରି ସଇନମନ୍‌ର୍ ମାଉଁସ୍ କାଇବାକେ ଆସା । ଗତାମନ୍‌ର୍ ଆରି ତାକେ ଚାଲାଉମନ୍‌ର୍, ବଡ଼ ସାନ୍ ଲକ୍‌ମନ୍‌ର୍, ବନ୍ଦି ଆରି ମୁକ୍‌ଲି ରଇବା ଲକ୍‌ମନ୍‌ର୍ ସବୁ ଲକ୍‌ର୍ ମାଉଁସ୍ କାଇବାକେ ଆସା ।”

୧୯ ତାର୍‌ପଟେ ସେ ପସୁ, ଜଗତର୍ ରାଜାମନ୍‌ ଆରି ତାକର୍ ସନିଅମନ୍ ଜେ ଗତା ଚାଲାଇତେରଇଲା ଆରି ତାର୍‌ସନିଅମନ୍‌ର୍ ସଙ୍ଗ୍ ଜୁଇଦ୍ କରବାକେ ରୁଣ୍ଡିଲାଟା, ମୁଇ ଦେକ୍‌ଲି । ୨୦ \*ତେଇ ପସୁକେ ବନ୍ଦିକରି ନେଲାଇ । ତାର୍ ସଙ୍ଗ୍ ଜନ୍ ମିଚ୍ କଇବା ବବିସଡ଼ବକ୍‌ତା, ଜେ କି ତାର୍ ମୁଆଟେ କାବାଅଇଜିବା କାମ୍‌ମନ୍ କର୍‌ତେରଇଲା, ତାକେ ମିସା ବନ୍ଦିଗରେ ନେଲାଇ । ଏ କାବାଅଇଜିବା କାମ୍‌ମନ୍‌ର୍ ଲାଗି ସେ ଲକ୍‌ମନ୍‌କେ ନାଡ଼ାଇରଇଲା । ଜନ୍ ଲକ୍‌ମନ୍ କି ପସୁର୍ ଚିନ୍ ଗଦିଅଇକରି ତାର୍ ମୁରତିକେ ଜୁଆର୍ କର୍‌ତେରଇଲାଇ ସେ ପସୁ ଆରି ମିଚ୍ କଇବା ବବିସଡ଼ବକ୍‌ତା ଦୁଇଲକ୍‌ଜାକ ଜିବନ୍ ରଇତେ ଗନ୍ ଅଇତେରଇବା ଜଇର୍ ଗାତେ ପିଙ୍ଗାଅଇଲା । ୨୧ ଗତା ଚାଲାଉର୍ ଟଣ୍ଡେଅନି ବାରଇ ଆଇବା କାଣ୍ଡା ସଙ୍ଗ୍ ତାକର୍ ସନିଅମନ୍ ମରିଗାଲାଇ । ସବୁ ଚତଇମନ୍ ତାକର୍ ମାଉଁସ୍ ପେଟ୍‌ପୁର୍‌ତେ କାଇଲାଇ ।

### ୨୦

ଅଜାର୍ ବରସର୍ ସାସନ୍

୧ ତାର୍‌ପଟେ ଏଦେ ଦେକା ! ସର୍‌ଗେଅନି ଗଟେକ୍ ଦୁଡ଼ ଉଡ଼ରି ଆଇବାଟା ମୁଇ ଦେକ୍‌ଲି । ତାର୍‌ଲଗେ ପାତାଲର୍ କୁଟିକାଡ଼ି ଆରି ଗଟେକ୍ ବନ୍ଦି ରଇବା ସିକ୍‌ଲି ରଇଲା । ୨ ସେ ଅସୁର୍ ସାଁପ୍‌କେ ଦାରଲା । ଜନ୍ ଆଗର୍ କାଲେ ରଇଲା ସାଁପ୍, ସେଟା ଅଇଲାନି ସଇତାନ୍ । ତାକେ ଅଜାର୍ ବରସର୍‌ପାଇ ସିକ୍‌ଲିସଙ୍ଗ୍ ବାନ୍ଦିଦେଲା । ୩ ଦୁଡ଼ ତାକେ ପାତାଲେ ପିଙ୍ଗିଦେଲା ଆରି କୁଟି ପାକାଇକରି ସିଲ୍ ମାରଲା । ଏନ୍ତାରି କଲାକେ ଅଜାର୍ ବରସ୍ ନ ସାର୍‌ତେ ସେ ବିନ୍ ବିନ୍ ରାଇଜର୍ ଲକ୍‌ମନ୍‌କେ ଆରି ନାଡ଼ାଇ ନାପାରେ । ତାର୍‌ପଟେ ଚନେକର୍‌ପାଇ ତାକେ ଚାଡ଼ିଦେବାଇ ।

\* ୧୯:୧୫ ୧୯:୧୫ ପର୍କାସିତ ୧୪:୨୦      \* ୧୯:୨୦ ୧୯:୨୦ ପର୍କାସିତ ୧୩:୧-୧୮

୪ ତାର୍ପତେ ମୁଞ୍ଚ କେତେଟା ବସ୍ତ୍ରା ଜାଗାମନ୍ ଦେକଲି । ଜେଡ଼କି ଲକ୍ ବସ୍ତ୍ରା ଜାଗାଇ ବସିରଇଲାଇ, ସେମନ୍‌କେ ନିଆଇ କର୍‌ବାକେ ବସ୍ତୁ ଦିଆଅଇରଇଲା । ଆରି ତାଡ଼ନା ପାଇ ମରାଇଅଇରଇବା ଆଡ଼ମାମନ୍‌କେ ଦେକଲି । ଜିସୁ ଜାନାଇରଇଲା ସତ୍ ଆରି ପର୍‌ମେସରର୍ ବାକିଅ ସେମନ୍ ଜାନାଇରଇଲା । ପସୁକେ କି ତାର୍ ମୁରତିକେ ସେମନ୍ ଜୁଆର୍ କରଡ଼ନାଇ । ପସୁର ଚିନ୍ ତାକର୍ କାପାଲେ କି ତାକର୍ ଆତେ ଗଦିଅଅଡ଼ ନାଇ । ସେମନ୍ ଜିବନ୍ ପାଇଲାଇ ଆରି ଅଜାର୍ ବରସ୍‌ଜାକ କିରିସ୍‌ସଙ୍ଗ ରାଜା ଇସାବେ ସାସନ୍ କଲା । ୫ ଅଜାର୍ ବରସ୍ ନ ସାର୍‌ବାଜାକ ମରିଜାଇରଇବା ଜେଡ଼କି ବାକି ଲକ୍ ଜିବନ୍ ପାଅଡ଼ନାଇ । ଏଟାଆକା ପର୍‌ତୁମ୍ ଜିବନ୍ ପାଇବାଟା । ୬ ମଲାତେଇଅନି ପର୍‌ତମେ ଜେଡ଼କି ଲକ୍‌କେ ଉଟାଇରଇଲାଇ, ସେମନ୍ କେତେକ୍ କରମର୍ ଲକ୍ । ପର୍‌ର୍ ମରନ୍ ତାକର୍ ଉପ୍‌ରେ ସାସନ୍ ନ କରେ । ସେମନ୍ ପର୍‌ମେସରର୍ ଆରି କିରିସ୍‌ଗର୍ ପୁଜାରି ଅଇବାଇ । ସେମନ୍ ତାକର୍ ସଙ୍ଗ ଅଜାର୍‌ବରସ୍ ଜାକ ସାସନ୍ କର୍‌ବାଇ ।

ସଇତାନର୍ ଆର୍‌ବାଟା

୭ ଅଜାର୍ ବରସ୍ ସାର୍‌ଲାପତେ ବନ୍ଦିଗରେଅନି ସଇତାନ୍‌କେ ମୁକ୍‌ଲାଇବାଇ । ୮ ତେଇଅନି ଜଗତର୍ ରାଇଜ୍‌ମନ୍‌କେ ନାଡ଼ାଇବାକେ, ଗୁଲାଇ ଜଗତେ ବିଚିଅଇରଇବା ରାଇଜ୍‌ମନ୍‌କେ ନାଡ଼ାଇବାକେ ସେ ବାରଇସି । ସେଟା ଅଇଲାନି ଗର୍ ଆରି ମାଗର୍ । ସଇତାନ୍ ସେମନ୍‌କେ ଜୁଇଦ୍ କର୍‌ବାକେ ରୁଣ୍ଡାଇସି । ସମ୍‌ପୁରେ ରଇବା ବାଲି ଜେଡ଼କି ଆତେ, ସେଡ଼କି ଲକ୍ ସେମନ୍ ରଇବାଇ । ୯ ସେମନ୍ ଗୁଲାଇ ଜଗତେ ବିଚି ଅଇବାଇ । ଆରି ପର୍‌ମେସରର୍ ଲକ୍ ବାସାଅଇରଇବା ଜାଗାଇ ଆରି ସେ ମନ୍‌କର୍‌ବା ନଅରର୍ ଚାରିବେଟ୍‌ତି ଆଇବାଇ । ମାତର୍ ଏଦେ ଦେକା ! ସର୍‌ଗେଅନି ଜଇ ଅଦ୍‌ରି ସେମନ୍‌କେ କୁରୁପନାସ୍ କଲା । ୧୦ ତାର୍‌ପତେ ସଇତାନ୍ ଜେ କି ସେମନ୍‌କେ ନାଡ଼ାଇଲା, ଜଇ ଆରି ଗନ୍‌ରସ୍ ରଇବା ଗାଡେ ପିଙ୍ଗାଅଇଲା । ସେ ପସୁ ଆରି ମିଚ୍ କଇବା ବବିସ୍‌ତ୍‌ବକ୍‌ତା ଆଗେଅନି ତେଇ ପିଙ୍ଗାଅଇରଇଲାଇ । ସେମନ୍ ତେଇରଇକରି ଦିନ୍ ରାତି କାଲ୍ କାଲ୍ ଜୁଗ୍ ଜୁଗ୍ ସେ ଲକ୍‌ମନ୍‌କେ କାବା କିରିରଇଲା, ତାକେ ଜଇ ଆରି ଗନ୍‌ତେ ରଇବା ଗାଡେ ନସ୍‌ଟ କରାଇଲା, ସେ ତେଇ ସେ ପସୁ ଆରି ମିଚ୍‌ସିକିଆ ଦେଉଁ ବାବବାଦିମନ୍ ମିସା ଆତଡ଼, ଆରି ସେ ଲକ୍‌ମନ୍ ଦିନ୍‌ରାତିଜାକ କସ୍‌ଟ ବର୍‌ବାଇ ।

ସାରାସାରି ବିଚାର୍

୧୧ ତାର୍‌ପତେ ମୁଞ୍ଚ ଗଟେକ୍ ବଡ଼ଟା ଦବ୍ ବସ୍ତ୍ରା ଜାଗା ଆରି ଜେ ତାର୍ ଉପ୍‌ରେ ବସିରଇଲା, ତାକେ ଦେକଲି । ସରଗ୍ ଆରି ଦର୍‌ତନି ତାର୍ ମୁଆଟେଅନି ପାଲାଇଲାଇ ଆରି କେବେ ତ୍ରିସଡ଼ନାଇ । ୧୨ ତାର୍‌ପତେ ମୁଞ୍ଚ ଜେଡ଼କି ମଲା ବଡ଼ ସାନ୍ ଲକ୍‌କେ ଦେକଲି । ସେମନ୍ ବସ୍ତ୍ରା ଜାଗାର୍ ମୁଆଟେ ଟିଆଅଇରଇବାଟା ମୁଞ୍ଚ ଦେକଲି । ବଇମନ୍ ଉଗାଡ଼ି ଅଇଲା, ଜିବନ୍ ରଇବା ଲକ୍‌ମନ୍‌ର୍ ବଇ ମିସା ଉଗାଡ଼ି ଅଇଲା । ସେମନ୍ କଲା କାମ୍ ଇସାବେ ମଲା ଲକ୍‌ମନ୍‌କେ ବିଚାର୍ କଲା । ସେମନ୍ କିରିରଇବା କାମ୍‌ମନ୍ ବଇଟାନ୍‌ନେ ଆଗ୍‌ତୁଅନି ଲେକା ଅଇରଇଲା । ୧୩ ତାର୍ ପତେ ସମ୍‌ପୁରେ ଜେଡ଼କିଲକ୍ ମିରିରଇଲାଇ, ସେମନ୍ ବାରଇଆଇଲାଇ । ମରନ୍ ଆରି ପାତାଲ୍ ମିସା ସେମନ୍ ଦାରିରଇବା ମଲାଲକ୍‌ମନ୍‌କେ ଚାଡ଼ିଦେଲାଇ । ସେମନ୍‌କେ ସବୁକେ କିରିରଇବା କାମ୍ ଇସାବେ ବିଚାର୍‌ନା କଲା । ୧୪ ତାର୍‌ପତେ ମଲା ଲକ୍‌ର୍ ଜାଗାଇଅନି ଆଇଲା ସବୁଲକ୍‌ର୍ ଗାଗଡ଼ ଆରି ଆଡ଼ମା, ଜଇର୍ ଗାଡେ ପିଙ୍ଗାଲାଇ । ସେ ଗାଡ଼ ଅଇଲାନି ଦୁଇ ଲମ୍‌ରର୍ ମରନ୍ ୧୫ ସେ ବେଲେ ଜେଡ଼କି ଲକ୍‌ର୍ ନାଉଁ ଜିବନ୍ ରଇବା ବଇଟାନ୍‌ନେ ଲେକା ନ ଅଇରଇଲା, ସେ ସବୁଲକ୍‌କେ ଜଇଲାଗ୍‌ବା ଗାଡେ ପିଙ୍ଗା ଅଇଲା ।

## ୨୧

ନୁଆଁ ସରଗ୍ ଆରି ଜଗଡ଼

<sup>୧</sup> \*ତାର୍ପତେ ଏଦେ ଦେକା ! ନୁଆ ସରଗ୍ ଆରି ନୁଆ ଜଗଡ଼ ଦେକଲି । ପରତୁମ୍ ସରଗ୍ ଆରି ପରତୁମ୍ ଜଗଡ଼ ଆରି ତିସେନାଇ । ସମ୍ପଦୁର୍ ମିସା ଆରି ତିସେନାଇ । <sup>୨</sup> \*ଆରି ସେ ସୁକଲ୍ ନଅର୍ ଦେକଲି । ସେଟା ରଇଲା ନୁଆ ଜିରୁସାଲେମ୍ । ସର୍ଗେଅନି, ପର୍ମେସର୍ଟାନେଅନି, ସେଟା ଉଡ଼ରି ଆଇତେରଇଲା । ଗଟେକ୍ ଦାଙ୍ଗ୍ଡି ଦାଙ୍ଗ୍ଡାକେ ବେଟ୍ ଅଇବାକେ ଗାଲେ କେନ୍ତାଟା ପିନ୍ଦିରଇସି, ସେନ୍ତାରି ତିଆର୍ ପିଆର୍ ଅଇରଇଲା । <sup>୩</sup> ବସ୍ବା ଜାଗାଇଅନି ଗଟେକ୍ ବଡ଼ ସବଦ୍ କାତାଅଇବାଟା ମୁଇ ସୁନ୍ଲି “ସାରାସାରି ବେଲେ ପର୍ମେସର୍ ମୁନୁସ୍ଜାତି ସଙ୍ଗ୍ ବାସା ଅଇବାକେ ଆଇଲାଆତେ । ସେ ତାକର୍ ସଙ୍ଗ୍ ବାସା ଅଇସି । ଆରି ସେମନ୍ ତାର୍ ଲକ୍ ଅଇବାଇ । ପର୍ମେସର୍ ନିଜେ ତାକର୍ ସଙ୍ଗ୍ ରଇସି । ଆରି ସେ ତାକର୍ ପର୍ମେସର୍ ଅଇସି ।” <sup>୪</sup> ସେ ତାକର୍ ଆଁସୁ ପୁଟିଦେଇସି । କେ ଆରି ନ ମରଡ଼ । କାନ୍ଦାବୁବା, ଦୁକାସୁକା ନ ରଏ । ପୁରନା ବିସଇ ଆରି ନ ତିସେ ।

<sup>୫</sup> ତାର୍ପତେ ଜେ ବସ୍ବା ଜାଗାଇ ବସିରଇଲା, ସେ କଇଲା “ମୁଇ ଏବେ ସବୁ ବିସଇ ନୁଆ କଲିନି ।” ସେ ମକେ ଆରି କଇଲା “ଏଟା ଲେକିକରି ସଙ୍ଗ୍ । କାଇକେବଇଲେ ଏ ବାକିଅ ସବୁ ସଡ଼ । ଆରି ବିସ୍ବାସ୍ କରିଅଇସି ।” <sup>୬</sup> ସେ ଆରି କଇଲା ସେଟା ସାରିଗାଲା, ମୁଇ ଅଇଲିନି ଆରାମର୍ ଲକ୍ ଆରି ସାରାସାରିର୍ ଲକ୍ । ମୁଇ ସେ ଆରାମ୍ ମୁଇ ସେ ସାରାସାରି । ଜାକେ ଜଦି ସସ୍ କର୍ସି, ପାଜ୍ରାପାନି କାଇବାକେ ମୁଇ ତାକେ ତାକିନେବି । ଏ ପାଜ୍ରାଇ ଅନି ଜନ୍ ପାନି ବାରଇସି, ସେଟା ନ ସାର୍ବା ଜିବନ୍ ଦେଇସି । ସେମନ୍କେ ସେଟା ଇନାମେ ମିଲ୍ସି । <sup>୭</sup> ଜନ୍ ଲକ୍ମନ୍ କୁଇଦ୍ କରି ଜିଡ଼ବାଇ ସେମନ୍କେ ଇନାମ୍ ଦେବି, ଆରି ତାକର୍ ପର୍ମେସର୍ ଅଇବି ଆରି ସେମନ୍ ମର୍ ପିଲାଟକି ଅଇବାଇ । <sup>୮</sup> ମାତର୍ ଜେ ମର୍ସଙ୍ଗ୍ ଆଇବାକେ ଡର୍ବାଇ, ଆରି ବିସ୍ବାସ୍ ନ କରଡ଼, ଜାର୍ ତଲ୍ଲାଟଲ୍ଡି କାରାପ୍, ଜେ କି ନର୍ମାରୁମନ୍ ଆଟଡ଼, ଜନ୍ ଲକ୍ମନ୍ କାରାପ୍ ରିତିନିତି ଅବିଆସ୍ କର୍ବାଇ, ଜନ୍ଲକ୍ମନ୍ ମିତର୍ ଜିତର୍ କର୍ବାଇ ଆରି ଜନ୍ ଲକ୍ମନ୍ ମିର୍ ଦେବ୍ତାମନ୍କେ କୁଆର୍ କର୍ବାଇ, ଆରି ଜେଡ଼କି ସବୁ ମିରୁଆମନ୍ ରଇବାଇ, ତାକର୍ ସେସର୍ ବେଲା ଏନ୍ତାରି ଅଇସି । ସେମନ୍କେ ଲାଗ୍ତେରଇବା ଗନ୍ଦ୍ଟାନେ ପିଙ୍ଗା ଅଇସି । ସେଟା ଅଇଲାନି ପଟର୍ ମରନ୍ ।

<sup>୯</sup> ସାଡ଼ା ଦୁଡ଼ମନ୍ ବିଡ଼ରେ ଗଟେକ୍ ଦୁଡ଼, ଜାର୍ ଆତେ ସାଡ଼ା ମର୍ଡ଼ି ରଇବା ଗିନା ରଇଲା, ସେ ମକେ ଆସି କଇଲା ଆଉ ମୁଇ ତକେ କନିଆ ଦାଙ୍ଗ୍ଡିକେ ଦେକାଇବି । ସେ ଅଇଲାନି ମେଣ୍ଡାପିଲାର୍ ମାଇଜି । <sup>୧୦</sup> ସୁକଲ୍ ଆଡ଼ମା ମକେ ଦାରଲା, ଦୁଡ଼ ମକେ ଗଟେକ୍ ଉର୍ ଡଙ୍ଗର୍ ଟିପେ ଦାରିଗାଲା । ସେ ମକେ ସୁକଲ୍ ନଅର୍ ଜିରୁସାଲେମ୍ ପର୍ମେସର୍ ଟାନେଅନି, ସର୍ଗେଅନି ଉଡ଼ରି ଆଇବାଟା ଦେକାଇଲା । <sup>୧୧</sup> ସେ ନଅର୍ ପର୍ମେସର୍ ମଇମାସଙ୍ଗ୍ ଜକ୍ମକି ଜାଇତେରଇଲା । ଗଟେକ୍ ବେସି ଦାମ୍ ରଇବା ଜାସ୍ପର୍ ନାଉର୍ ଇରାପାକନା ପାରା ଜକ୍ମକି ଜାଇତେରଇଲା । ସେ ପାକନାଇ ଦେକ୍ଲେ ଏବାଟେ ଅନି ସେବାଟର୍ଟା ସବୁ ତିସ୍ତେରଇଲା । <sup>୧୨</sup> ସେ ନଅରେ ଗଟେକ୍ ବେସି ଉର୍ କଡ଼ି ରଇଲା । ତେଇ ବାର୍ଟା ଗେଟ୍ ରଇଲା ଆରି ବାର୍ଟା ଦୁଡ଼ମନ୍ ସେ ଗେଟ୍ମନ୍ ଦେକାରକା କର୍ତେରଇଲା । ଇସ୍ରାଏଲ୍ ଲକ୍ମନ୍ ବାର୍ଟା ବସ୍ବର୍ ନାଉର୍ମନ୍ ସେ ଗେଟେ ଲେକାଅଇରଇଲା । <sup>୧୩</sup> ସବୁ ଦିଗେ ତିନ୍ଟାଲାକା କାପାଟ୍ ରଇଲା, ଉଡ଼ର୍ ଦିଗେ ତିନ୍ଟା କାପାଟ୍ ଦକିନ୍ଦିଗେ ତିନ୍ଟା କାପାଟ୍ ଆରି ପଟିମଦିଗେ ତିନ୍ଟା କାପାଟ୍

ରଇଲା । ୧୪ ବାର୍ତ୍ତା ମୁଲ୍ ପାକ୍ନାଇ ସେ ନଗରରୁ କତି ଉଟାଇରଇଲା । ଆରି ସେ ପାକ୍ନା ଉପରେ ମେଣ୍ଟାପିଲାର ବାର୍ତ୍ତା ପେରିତ୍ ମନର୍ ନାଉଁ ଲେକା ଅଇରଇଲା । ୧୫ ଜନ୍ ଦୁତ୍ ମରସଙ୍ଗ୍ କାତା ଅଇତେ ରଇଲା, ତାର୍ ଆତେ ନଗରକେ, ତାର୍ କାପାଟ୍ ମନକେ ଆରି କତିମନକେ ନାପ୍ବା, ସୁନାର୍ ନାପ୍ବା ତାଙ୍ଗ୍ ରଇଲା । ୧୬ ସେ ନଅର୍ ପୁରାପୁରନ୍ ଚାରିକନିଆ ରଇଲା । ତାର୍ ଲମ୍ ଆରି ଅସାର୍ ସମାନ୍ ରଇଲା । ଦୁତ୍ ତାର୍ ନାପ୍ବା ତାଙ୍ଗ୍ ସଙ୍ଗ୍ ନଅର୍ ନାପ୍ଲା । ସେ ନାପ୍ବା ଇସାବେ ସେଟା ଦୁଇଅଜାର୍ ଚାରସ କିଲମିଟର୍ ଲମ୍ ରଇଲା । ତାର୍ ଲମ୍ ଅସାର୍ ଆରି ଉର୍ ସମାନ୍ ରଇଲା । ୧୭ ଦୁତ୍ କତି ମିସା ନାପ୍ଲା । ସେଟା ୬୦ ମିଟର୍ ଉର୍ ରଇଲା । ୧୮ ଜାସ୍ପର୍ ନାଉଁର୍ ଗଟେକ୍ ବେସି ଦାମର୍ ଇରା ପାକ୍ନା ସଙ୍ଗ୍ କତି ତିଆର୍ ଅଇରଇଲା । ଅସ୍ଲି ସୁନା ସଙ୍ଗ୍ ନଅର୍ ତିଆର୍ ଅଇରଇଲା । ଆରି କାଁପାରା ସବୁ ତିସ୍ତେରଇଲା । ୧୯ ସେ ନଅରର୍ କତିର୍ ମୁଲ୍ ପାକ୍ନାମନ୍ ବିନ୍ ବିନ୍ ରକାମର୍ ଇରାପାକ୍ନାମନର୍ ସଙ୍ଗ୍ ସୁନ୍ଦର୍ କରିରଇଲା । ପର୍ତ୍ତୁମ୍ ମୁଲ୍ ପାକ୍ନା ରଇଲା, ଇସ୍ପର୍ । ତାର୍ପଟର୍ ସପାୟର୍, ତାର୍ ପଟର୍ ଆଗାଟେ । ତାର୍ ପଟର୍ ଏମରଲ୍ । ୨୦ ତାର୍ ପଟର୍ ଅନିକ୍ । ତାର୍ ପଟର୍ କରନିଲିଅନ୍ । ତାର୍ ପଟର୍ ଅଲ୍ଦି ରଙ୍ଗର୍ କାଟ୍, ତାର୍ ପଟର୍ ବେରିଲ୍, ତାର୍ପଟର୍ ତପାଜ୍, ତାର୍ ପଟର୍ ଚାଲକେଦନି, ତାର୍ ପଟର୍ ତରକଇ, ଆରି ସାରାସାରି ଆମେତି । ୨୧ ବାର୍ତ୍ତା ମୁକ୍ତାଇ ବାର୍ତ୍ତା କାପାଟ୍ ତିଆର୍ ଅଇରଇଲା । ଗଟେକ୍ ଗଟେକ୍ କାପାଟ୍ ଗଟେକ୍ ଗଟେକ୍ ମୁକ୍ତାଇଅନି ତିଆର୍ ଅଇରଇଲା । ନଅରର୍ ବାଟ୍ ଅସ୍ଲି ସୁନାସଙ୍ଗ୍ ତିଆର୍ ଅଇରଇଲା । କାଁପାରା, ଏନେ ଅନି ଦେକ୍ଲେ ତେନରଟାମନ୍ ତିସ୍ତେରଇଲା ।

୨୨ ସେ ନଅରେ ମୁଇ ଗଟେକ୍ ମିସା ମନ୍ଦିର୍ ଦେକିନାଇ । କାଇକେବଇଲେ, ତାର୍ ମନ୍ଦିର୍ ରଇଲା ମାପୁରୁ ପର୍ମେସର୍ । ଜେ କି ସବୁର୍ ଉପରେ ଆଟେ, ଆରି ମେଣ୍ଟାପିଲା । ୨୩ ସେ ନଅର ଉପରେ ଉଜଲ୍ ଦେବାକେ ବେଲ୍ କି ଜନ୍ ଦରକାର ନ ରଇଲା । କାଇକେବଇଲେ, ପର୍ମେସରର୍ ମଇମା ତେଇ ଉଜଲ୍ ଦେଇତେରଇଲା ଆରି ମେଣ୍ଟାପିଲା ତେଇର୍ ବତି ରଇଲା । ୨୪ ସେ ଉଜଲେ ଜଗତର୍ ଲକ୍ମନ୍ ଇଣ୍ଡିବାଇ ଆରି ରାଜାମନ୍ ତାକର୍ ଦନ୍ ସଁପତି ତେଇ ଆନି ସର୍ପି ଦେବାଇ । ୨୫ ସେ ନଅରର୍ କାପାଟ୍ମନ୍ ସବୁବେଲେ ଉଗଡା ରଇସି । ସେଟା କେବେ ମିସା ଡାବିଅଇ ନ ରଏ । କାଇକେବଇଲେ ତେଇ କେବେ ରାତି ନ ଅଏ । ୨୬ ରାଇଜ୍ ମନର୍ ତାକ୍ପୁଟା ଆରି ଦନ୍ ସଁପତି ସେ ନଅରେ ଆନ୍ବାଇ । ୨୭ ମାତର୍ ଅସୁକଲ୍ ରଇବା କାଇ ବିସଇ ମିସା ସେ ନଅରେ ନ ପୁରେ । ଲାଜ୍ ଅଇବା କାମ୍ମନ୍ କରବା ଲକ୍ କି ମିଟ୍ କଇବା ଲକ୍ କେ ମିସା ତେଇ ପୁରି ନାପାରତ୍ । ମେଣ୍ଟାପିଲାର୍ ବଇଲଗେ ଜାର୍ ନାଉଁ ଲେକାଅଇଆଟେ, ସେମନ୍ସେ, ସେ ନଅରେ ଜାଇପାରତ୍ ।

## ୨୨

୧ ତାର୍ପଟେ ଦୁତ୍ ମକେ ଜିବନର୍ ପାନି ରଇବା ଗାଡ୍ ଦେକାଇଲା, ଜନ୍ଟା କି କାଁପାରା ତିସ୍ତେରଇଲା । ପର୍ମେସରର୍ ବସ୍ବା ଜାଗାଇଅନି ଆରି ମେଣ୍ଟାପିଲାର୍ଟାନେଅନି ସେ ଗାଡ୍ ପାନି ଆଇତେରଇଲା । ୨ ନଅରର୍ ବାଟର୍ ମଜାଇ ସେଟା ବଇ ଆଇତେରଇଲା । ଗାଡ୍ ଦୁଇବାଟେ ଜିବନର୍ ଗଟ୍ ରଇଲା । ସେ ଗଟ୍ ମାସ୍କେ ଗଟେକ୍ ତର୍ ଅଇ ବରସ୍କେ ବାରତର୍ ପଲ୍ ଦାର୍ସି । ରାଇଜ୍ମନ୍ ନିକ ଅଇବାକେ ତାର୍ ପଟର୍ମନ୍ ରଇଲା । ୩ ପର୍ମେସରର୍ ଅବିସାପ୍ ରଇବା କାଇଟାମିସା ସେ ନଅରେ ନ ତିସେ । ପର୍ମେସରର୍ ଆରି ମେଣ୍ଟାପିଲାର୍ ବସ୍ବାଜାଗା ସେ ନଅରେ ରଇସି । ଆରି ତାର୍ ଦାଙ୍ଗ୍ଡାମନ୍ ତାକେ ଜୁଆର୍ କରବାଇ । ୪ ସେମନ୍ ତାକେ ଦେକ୍ବାଇ ଆରି ତାର୍ ନାଉଁ ସେମନ୍ କାପାଲେ ଲେକାଅଇ ରଇସି । ୫ ତେଇ ଆରି ରାତି ନ ରଏ । ବତିର୍ ଉଜଲ୍ କି ବେଲର୍ ଉଜଲ୍ ଦରକାର ନ ପଟେ

। କାଇକେବଇଲେ ମାପୁରୁ ପରମେସର ତାକର୍ ଉଜଲ୍ ରଇସି । ସେମନ୍ ରାଜା ଇସାବେ କାଲ୍ କାଲ୍ ଜୁର୍ ଜୁର୍ ସାସନ୍ କର୍ବାଇ ।

ଜିସୁ ଆରିତରେକ୍ ଆଇବାଟା

<sup>୭</sup> ତାରପତେ ଦୁଡ଼ ମକେ କଇଲା “ଏ ବାକିଅ ସବୁ ସଡ଼ ଆରି ବିସ୍ବାସ୍ କରିଅଇସି । ମାପୁରୁ ପରମେସର ଜେ କି ତାର୍ ଆଡ଼ମା ବବିସଡ଼ବକ୍ତାମନ୍‌କେ ଦେଇରଇଲା, ସେ ତାର୍ ଦୁଡ଼କେ ପାଟାଇଆଟେ । ଆଇବା ଦିନ୍‌ମନ୍‌କେ କାଇଟା ଅଇସି, ସେଟା ତାର୍ ଦାଙ୍ଗତାମନ୍‌କେ ଦେକାଇସି ।” <sup>୮</sup> ଜିସୁ କଇଲାନି, “ସୁନା ମୁଇ ଦାପ୍‌ରେ ଆଇଲିନି । ଏ ବଇର୍, ଆଇବା ଦିନ୍‌ମନ୍‌କେ ଗଟ୍‌ବା କାତା, ଜେଡ଼କି ଲକ୍ ନାମ୍‌ବାଇ, ସେମନ୍ କେଡେକ୍ କରମର୍ ଲକ୍ ।” <sup>୯</sup> ମୁଇ ଜଅନ୍ ଏ ସବୁ ସୁନିଆଟି ଆରି ଦେକିଆଟି । ଏ ସବୁଜାକ ଦେକଲା ପତେ ଆରି ସୁନ୍‌ଲାପତେ ଜନ୍ ଦୁଡ଼ ମକେ ଏ ସବୁ ବିସଇ ଦେକାଇରଇଲା, ତାର୍ ପାଦେ ଡାଣ୍ଡାସନ୍ ପଡ଼ଲି । ମୁଇ ତାକେ ଜୁଆରକର୍‌ବାକେ ଜାଇରଇଲି । <sup>୧୦</sup> ମାତର୍ ସେ ମକେ କଇଲା, “ନିରୁ । କାଇକେବଇଲେ ମୁଇ ମିସା ତମର୍‌ପାରା ଗଟେକ୍ ଲକ୍‌ସେ । ତମର୍ ଜେଡ଼କି ବବିସଡ଼ବକ୍ତା ବାଇମନ୍ ଆରି ଜେଡ଼କି ବଇଟାନେ ରଇବା ବାକିଅମନ୍ ଆଟେ, ସେଟାମନ୍ ମାନିକରି ରଇଲାଇନି । ତାକର୍ ପାରା ମୁଇ ମିସା ଗଟେକ୍ ସେବାକାରିଆ । ପରମେସରକେ ଜୁଆର୍ କରା ।” <sup>୧୧</sup> ଆରି ସେ ମକେ କଇଲା, ଏ ବଇର୍ ଜେଡ଼କି ବିସଇ ତକେ ଜାନାଇଅଇଲାଆଟେ, ସେଟା କେ ନାଜାନିଲା ପାରା ଲୁଟାଇ ସଙ୍ଗନାଇ । କାଇକେବଇଲେ ଏ ସବୁ ଗଟ୍‌ବା ବେଲା ଲଗେଆଟେ । <sup>୧୨</sup> ଜେ କରାପ୍ ଚଲାଚଲ୍‌ତି କରି ଜିଉନା କାଉନା କଲାଇନି, ସେ ସେନ୍ତାରିସେ କାରାପ୍ କର୍ତେ ରଅ । ଜେ କି ନିକ ଚଲାଚଲ୍‌ତିକରି ଜିଉନା କାଉନା କଲାନି, ସେ ସେନ୍ତାରିସେ ନିକ କର୍ତେରଅ । ଜେ କି ସୁକଲ୍ ଆଟେ, ସେ ସେନ୍ତାରିସେ ସୁକଲ୍ ରଅ । <sup>୧୩</sup> ଜିସୁ କଇଲାନି “ସୁନା ମୁଇ ଦାପ୍‌ରେ ଆଇଲିନି । ଲକ୍‌ମନ୍ କରିରଇବା କାମ୍ ଇସାବେ ମୁଇ ସେମନ୍‌କେ ପୁରୁସ୍‌କାର୍ ଦେବି । <sup>୧୪</sup> ମୁଇ ପର୍ତୁମର୍ ଲକ୍ ଆରି ସାରାସାରିର୍ ଲକ୍ । ମୁଇ ଆରାମ୍ କର୍ବି ଆରି ମୁଇସେ ସାରାଇବି ।”

<sup>୧୫</sup> ଜେଡ଼କି ସବୁଲକ୍ ତାକର୍ ବସ୍ତର୍ ଦଇକରି ସୁକଲ୍ କର୍ବାଇ, ସେମନ୍ କେଡେକ୍ କରମର୍ ଲକ୍ ! ଜିବନର୍ ଗଟେଅନି ପଲ୍ କାଇକରି କାବାଟ୍‌ବାଟେ ଜାଇ କରି ନଅରେ ପୁର୍‌ବାକେ ସେମନ୍ ଅଦିକାର୍ ପାଇବାଇ । <sup>୧୬</sup> ମାତର୍ ଜନ୍ ଲକ୍‌ମନ୍ ଲାଜ୍ ଅଇବା କାମ୍‌ମନ୍ କର୍ବାଇ, ଜେଡ଼କି, ଜନ୍ତର୍ ମନ୍ତର୍ ଅବିଆସ୍ କର୍ବାଇ, ବେସିଆ କାମ୍‌ମନ୍ କର୍ବାଇ, ନର୍ ମରାଇବାଇ, ମୁରତି ପୁଜା କର୍ବାଇ, ଆରି କାତାଇ ଆରି କାମେ ମିର୍ କଇବାଇ, ସେମନ୍ ନଅରର୍ ବାଇରେ ରଇବାଇ । <sup>୧୭</sup> “ମୁଇ ଜିସୁ, ମଣ୍ଡାଲିଟାନେ ରଇବା ତମ୍‌କେ ସବୁ ଲକ୍‌କେ ଏ ବିସଇ ଜାନାଇବାକେ ମର୍ ଦୁଡ଼କେ ପାଟାଇଆଟି । ମୁଇ ଦାଉଦର୍ କୁଟୁମେ ଆଟି । ମୁଇ କୁକ୍ତା ତାକ୍‌ବାବେଲେ ଉଜଲ୍‌ଦେବା ତାରା ।” <sup>୧୮</sup> ଆଡ଼ମା ଆରି କନିଆ ଦାଙ୍ଗତି କଇଲାନି ଆଉ, । ଜେଡ଼କି ଲକ୍ ଏଟା ସୁନ୍‌ଲାଇନି, ସେମନ୍ ମିସା ଆଉ, ବଲି କଇବାଆଟେ । ଆସା ଜେଡ଼କି ଲକ୍‌କେ ସସ୍ କଲାନି, ଜିବନର୍ ପାନି ଇନାମେ ନିଆ ।

ସାରାସାରିର୍ କାତା

<sup>୧୯</sup> ମୁଇ ଜଅନ୍ ସବୁକେ ଜାଗରଡ଼ କରାଇଲିନି, ଆଇବା ଦିନ୍‌ମନ୍‌କେ ଗଟ୍‌ବା ଏ ବଇର୍ ଜେଡ଼କି ବାକିଅ ଆଟେ, କେ ଜଦି ଇତି ଆରି କାଇ କାଇଟା ମିସାଇଲେ, ପରମେସର ଏ ବଇଟାନେ ଜନ୍ ମର୍ତ୍ତି ବିସଇ ଲେକ୍‌ଲାଆଟେ, ସେ ତାର୍ ପାଇବା ଡଣ୍ଡ ସଙ୍ଗ୍, ଏ ମର୍ତ୍ତି ମିସା ମିସାଇସି । <sup>୨୦</sup> ଏ ବବିସଡ଼ କାତାର୍ ବଇଟାନେଅନି କେ ଜଦି କାଇ ବିସଇ ମିସା ଲୁଟାଇଦେଲେ, ଏ ବଇଟାନେ ଲେକାଅଇରଇବା ଜିବନର୍

\* ୨୨:୧୩ ୨୨:୧୩ ପରକାସିତ ୧:୮; ପରକାସିତ ୧:୧୭:୨୮

ଗଚର୍ ପଲ୍ ଆରି ସୁକଲ୍ ନଅରେଅନି ସେମନ୍ ପାଇରଇବାଟା ତାକର୍ଟାନେଅନି  
 ଦାରିଜାଇସି । ୨୦ ଜେ କି ଏ ସବୁ ବିସଇର୍ ପାଇ ସାକି ଦେଇସି, ସେ କଇଲାନି ଓ  
 ମୁଇ ଦାପ୍ରେସେ ଆଇଲିନି ! ସେନ୍ତାରିସେ ଅ ବେ ! ମାପ୍ତୁ ଜିସୁ ଆଉ ! ୨୧ ମାପ୍ତୁ  
 ଜିସୁ ଜିବନ୍ ଦୁକାଇଲାଟା ସବୁର୍ ଲଗେ ରଅ । ଆମେନ୍ !